



Digitized by the Internet Archive
in 2011 with funding from
University of Toronto

PATROLOGIÆ

CURSUS COMPLETUS

SEU BIBLIOTHECA UNIVERSALIS, INTEGRÆ, UNIFORMIS, COMMODA, OECONOMICA,
OMNIUM SS. PATRUM, DOCTORUM SCRIPTORUMQUE ECCLESIASTICORUM,

SIVE LATINORUM, SIVE GRÆCORUM,

QUI AB *ÆVO APOSTOLICO AD TEMPORA INNOCENTII III (ANNO 1216) PRO LATINIS*
ET CONCILII FLORENTINI (ANN. 1439) PRO GRÆCIS FLORUERUNT :

RECUSIO CHRONOLOGICA

OMNIUM QUÆ EXSTITERE MONUMENTORUM CATHOLICÆ TRADITIONIS PER QUINDECIM PRIMA
ECCLESIE SÆCULA,

JUXTA EDITIONES ACCURATISSIMAS, INTER SE CUMQUE NONNULLIS CODICIBUS MANUSCRIPTIS COLLATAS, PERQUAM DILIGENTER CASTIGATA; DISSERTATIONIBUS, COMMENTARIIS, VARIISQUE LECTIONIBUS CONTINENTER ILLUSTRATA; OMNIBUS OPERIBUS POST AMPLISSIMAS EDITIONES QUÆ TRIBUS NOVISSIMIS SÆCULIS DEBENTUR ABSOLUTAS DETECTIS, AUCTA; INDICIBUS PARTICULARIBUS ANALYTICIS, SINGULOS SIVE TOMOS SIVE AUCTORES ALICUJUS MOMENTI SUBSEQUENTIBUS, DONATA; CAPITULIS INTRA IPSUM TEXTUM RITE DISPOSITIS, NECNON ET TITULIS SINGULARUM PAGINARUM MARGINEM SUPERIOREM DISTINGUENTIBUS SUBJECTAMQUE MATERIAM SIGNIFICANTIBUS, ADORNATA; OPERIBUS CUM DUBIIS, TUM APOCRYPHIS, ALIQUA VERO AUCTORITATE IN ORDINE AD TRADITIONEM ECCLESIASTICAM POLLENTIBUS, AMPLIFICATA;

DUCENTIS ET AMPLIUS LOCUPLETATA INDICIBUS AUCTORUM SICUT ET OPERUM, ALPHABETICIS, CHRONOLOGICIS, STATISTICIS, SYNTHETICIS, ANALYTICIS, ANALOGICIS, IN QUODQUE RELIGIONIS PUNCTUM, DOGMATICUM, MORALE, LITURGICUM, CANONICUM, DISCIPLINARE, HISTORICUM, ET CUNCTA ALIA SINE ULLA EXCEPTIONE; SED PRÆSERTIM DUOBUS INDICIBUS IMMENSIS ET GENERALIBUS, ALTERO SCILICET RERUM, QUO CONSULTO, QUIDQUID NON SOLUM TALIS TALISVE PATER, VERUM ETIAM UNUSQUISQUE PATRUM, NE UNO QUIDEM OMISSO, IN QUODLIBET THEMA SCRIPSERIT, UNO INTUITU CONSPICIATUR; ALTERO SCRIPTURÆ SACRÆ, EX QUO LECTORI COMPERIRE SIT OBVIUM QUINAM PATRES ET IN QUIBUS OPERUM SUORUM LOCIS SINGULOS SINGULORUM LIBRORUM S. SCRIPTURÆ VERSUS, A PRIMO GENESEOS USQUE AD NOVISSIMUM APOCALYPSIS, COMMENTATI SINT:

EDITIO ACCURATISSIMA, CÆTERISQUE OMNIBUS FACILE ANTEPONENDA, SI PERPENDANTUR CHARACTERUM NITIDITAS, CHARTÆ QUALITAS, INTEGRITAS TEXTUS, PERFECTIO CORRECTIONIS, OPERUM RECUSORUM TUM VARIETAS, TUM NUMERUS, FORMA VOLUMINUM PERQUAM COMMODA SIBIQUE IN TOTO PATROLOGIÆ DECURSU CONSTANTER SIMILIS, PRETHI EXIGUITAS, PRÆSERTIMQUE ISTA COLLECTIO, UNA, METHODICA ET CHRONOLOGICA, SEXCENTORUM FRAGMENTORUM OPUSCULORUMQUE HACTENUS HIC ILLIC SPARSORUM, PRIMUM AUTEM IN NOSTRA BIBLIOTHECA, EX OPERIBUS ET MSS. AD OMNES ÆTATES, LOCOS, LINGUAS FORMASQUE PERTINENTIBUS, COADUNATORUM.

SERIES LATINA,

IN QUÆ PRODEUNT PATRES, DOCTORES SCRIPTORESQUE ECCLESIE LATINÆ
A TERTULLIANO AD INNOCENTIUM III.

ACCURANTE J.-P. MIGNE,

Bibliothecæ Cleri universæ,

SIVE CURSuum COMPLETORUM IN SINGULOS SCIENTIÆ ECCLESIASTICÆ RAMOS EDITORE.

PATROLOGIÆ TOMUS CXXVI

HINC MARI RHEMENSIS ARCHIEPISCOPI, JOANNIS VIII, MARINI I, ADRIANI III,
PONTIFICUM ROMANORUM, BERTARII ABBATIS CASSINENSIS, ETC., ETC.

HINC MARI TOMUS POSTERIOR. — CÆTERORUM TOMUS UNICUS.

PARISIIS

APUD GARNIER FRATRES, EDITORES ET J.-P. MIGNE, SUCCESSORES,

IN VIA DICTA: AVENUE DU MAINE, 189, OLIM CHAUSSÉE DU MAINE, 127.

PATROLOGIA

CURSUS COMPLETUS

SEPTIMUM VOLUMEN. — DE VITAE SANCORUM HISTORIA. — AUCTOR: DOMINICUS MONSIEUR.

PARISIIS, APUD P. LETHBRUN, 1878.

ALBERTUS MONSIEUR

IN HOC LIBRO TRACTATUR DE VITAE SANCORUM HISTORIA. — AUCTOR: DOMINICUS MONSIEUR.

DE VITAE SANCORUM HISTORIA. — AUCTOR: DOMINICUS MONSIEUR. — HIC LIBER TRACTATUR DE VITAE SANCORUM HISTORIA. — AUCTOR: DOMINICUS MONSIEUR.

CLICHY. — EX TIPYS PAULI DUPONT, VIA DICTA BAC-D'ASNIÈRES. 852.7.79

THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA.

DEC - 5 1931

2126

ACQUANTIA J. M. MIGNÉ

PHYSIOLOGIA SANCORUM

PHYSIOLOGIA SANCORUM. — AUCTOR: DOMINICUS MONSIEUR. — HIC LIBER TRACTATUR DE PHYSIOLOGIA SANCORUM. — AUCTOR: DOMINICUS MONSIEUR.

PARISIIS

PARISIIS, APUD P. LETHBRUN, 1878.

SÆCULUM IX.

HINC MARI

RHEMENSIS ARCHIEPISCOPI

OPERA OMNIA,

JUXTA EDITIONEM SIRMONDIANAM AD PRELUM REVOCATA.

VARIA ACCESSERE MONUMENTA

QUÆ SUPPEDITARUNT

SURII, PERTZII, ETC., COLLECTIONES MEMORATISSIMÆ

SEQUUNTUR

JOANNIS VIII, MARINI I, ADRIANI III,

PONTIFICUM ROMANORUM

EPISTOLÆ ET DECRETA.

TOMUM CLAUDUNT

S. BERTARII ABBATIS CASSINENSIS, HARMOTI SANGALLENSIS ABBATIS, S. REMBERTI HAMBURGENSIS
EPISCOPI, AIMOINI MONACHI SANGERMANENSIS, RATPERTI SANGALLENSIS,

Scripta vel scriptorum fragmenta quæ supersunt.

ACCURANTE J.-P. MIGNE,

Bibliothecæ Cleri universæ,

SIVE

CURSUM COMPLETORUM IN SINGULOS SCIENTIÆ ECCLESIASTICÆ RAMOS EDITORE.

HINC MARI TOMUS POSTERIOR. — CÆTERORUM TOMUS UNICUS.

PARISIIS

APUD GARNIER FRATRES, EDITORES ET J.-P. MIGNE, SUCCESSORES
IN VIA DICTA : AVENUE-DU-MAINE, 189; OLIM CHAUSSÉE-DU-MAINE, 127

—
1879

ELENCHUS

AUCTORUM ET OPERUM QUI IN HOC TOMO CXXVI CONTINENTUR.

HINCMARUS RHEMENSIS ARCHIEPISCOPUS. (Operum continuatio.)

	Col.
Epistolæ	9
Opuscula et epistolæ quæ spectant ad causam Hincmari Laudunensis	279

JOANNES VIII PONTIFEX ROMANUS

Epistolæ et decreta	651
-------------------------------	-----

MARINUS I PONTIFEX ROMANUS.

Privilegia	967
Epistola ad monachos S. Ægidii	969

ADRIANUS III PONTIFEX ROMANUS.

Privilegium pro monasterio placentino	971
Epistola ad Sigibodum Narbonensem episcopum	973

S. BERTARIUS ABBAS CASSINENSIS.

Carmen de S. Benedicto	975
Appendix ad scripta S. Bertarii. — Vita sanctæ Scholasticæ virginis	979
Quomodo per annum jejunandum sit	987

HARMOTUS SANGALLENSIS ABBAS.

Inscriptiones in templo S. Oihmari	989
Epitaphium Grimaldi	991

S. REMBERTUS HAMBURGENSIS EPISCOPUS.

Vita S. Bemberti, auctore anonymo, ejus æquali	<i>Ibid.</i>
Vita S. Ansharii archiepiscopi Hamburgensis, auctore S. Remberto	1009

AIMOINUS MONACHUS SANGERMANENSIS.

Historia translationis S. Vencentii martyris ex Hispania in Galliam	1011
De translatione SS. MM. Georgii, Aurelii et Nathaliæ ex urbe Corduba Parisios	1027
De Miraculis S. Germani	<i>Ibid.</i>
Acta translationis S. Savini martyris	1039

RATPERTUS SANGALLENSIS MONACHUS.

De casibus monasterii S. Galli	1047
Poemata varia	1079

OPERUM HINC MARI CONTINUATIO.

Epistolæ.

EPISTOLA PRIMA.

EPISCOPORUM DIOECESON RHEMENSIS ATQUE ROTHOMAGENSIS ^a AD LUDOVICUM GERMANIE REGEM ^b.

(Ex Actis prov. oeccl. Rhem. tom. I, pag. 247).

DOMNO LUDOVICO, regi, glorioso, episcopi Rhemorum diœceseos atque Rothomagensis, qui adesse potuimus.

Excusant cur ad conventum Rhemensem venire non potuerunt.

Litteras dominationis vestræ quique nostrum habuimus, quibus iussistis ut vobis VII Kalendas Decembris Rhemis occurreremus, quatenus ibi nobiscum et cum cæteris fidelibus vestris de restauratione sanctæ Ecclesiæ, et de statu ac salute populi Christiani, tractaretis. Sed nos ad placitum illud occurrere non potuimus, et propter incommoditatem et brevitatem temporis, et propter inconvenientiam loci; et, quod est lugubrius, propter confusionem tumultus exorti. Sed et divinis legibus, quas et vos observaturos cum vestris fratribus nobis denuntiastis, tantum esse dignoscitur, quia sicut nec archiepiscopi sine coepiscopi, ita nec coepiscopi sine archiepiscoporum consensu vel jussu, nisi quæ ad proprias pertinent parochias, debent præsumere, et in tam angusto tempore archiepiscoporum litteras non valuit de conventu habere. Quapropter noverit vestra sublimitas quia mandatum vestrum nostra non contempsit humilitas; sed, sicut longe est ante nos dictum, qui jubet impossibile, facit se contemptibilem.

II. *Queruntur quod eorum monitis et consiliis hæcenus non paruerit.*

Sed et tractatum de restauratione sanctæ Ecclesiæ, et statu ac salute populi christiani, quod nunc vos nobiscum habere velle dicitis, justius et rationabilius illud haberi potuisset, si nostris, quin potius divinis consiliis et observationibus atque obtestationibus superno respectu obtemperare voluissetis, quia non nostra scripsimus, mandavimus, diximus sed quæ, dictante charitate, quæ Deus est, in litteris sacris invenimus, et quæ naturæ insita recognoscimus. Cæterum quæ contra illa quæ scripsimus, mandavimus, diximus, acta sunt vel aguntur, naturalis legis morbus et vitium etiam a minus sapientibus esse dignoscitur. Qua de re prudens quisque resi-

Apiscat, et sapiat quam granditer Deus offenditur quando in sic grandibus et apertis non ignoranter peccatur. Unde scriptum est : *Descendant in infernum viventes (Psal. LIV)*. Id est, labantur in peccatum scientes. Quæ divina permissione merito mundi patientis, propter communia peccata nostra, pastorum scilicet et gregum, propter delicta regis et regni, eveniunt sicut scriptum est : *Immissiones per angelos malos, viam fecit Dominus semitæ iræ suæ (Psal. LXXVII)*. Tamen, sicut Veritas protestatur, non erit sine ultione vindictæ nec ipsi virga furoris Domini. Sic legimus, sic audivimus, sic vidimus, et pro certo sic cito videbimus : quoniam licet peccatores simus, sed pœnitentes, et in divina clementia fortiter confidentes, ministerium sacrum operante Spiritu sancto suscepimus, sine quo sacra non ministramus, et nobis dictum a Veritate veraciter scimus : *Non vos estis qui loquimini, sed Spiritus Patris vestri qui loquitur in vobis (Matth. x)*.

III. *Quod sæpius illum ad ineundam cum fratre concordiam hortati sunt.*

Et licet dominatio vestra melius noverit de quibus scriptis, mandatis et dictis dicamus, tamen non ab re est si etiam et nos illa ad memoriam vestram reducamus. Primo quidem per Hildegarium ^c, venerabilem episcopum, scriptis at dictis; secundo per Æneam ^d, honorabilem episcopum, litteris et verbis; item per Æneam verbis, deinde per Hincmarum Rhemensem et Wenilonem Rothomagensem episcopos; iterum per eosdem, cum aliis quos ipsi vocastis, ea quæ saluti fuerunt congrua sufficienter audistis, quando sicut et ante petivimus, ut frater vester et omnes fideles illius ante vestram fideliumque vestrorum præsentiam in rationes loco et tempore congruo venissemus, et quæ male gesta forent, vestro consilio et auxilio cum Dei adjutorio fuerint emendata. Pro quibus omnibus dictis non obaudientibus valde timemus quod dicitur : *Si sermonem meum servaverunt, et vestrum servabunt (Joan. xv)*, et reliqua quæ Dominus comminatur. Et si illa non sunt exaudita, putari potest et nec ista, quæ vos dicitis apud nos velle quærere et audire, exaudientur. Videturque quibusdam, ut sicut Dominus, quando quæsivit ficus in ficulnea cui maledixit, cum non esset, teste Evangelio, tempus ficorum, aliud voluerit significare; ita et in hoc citato et incongruo conventu, remota do-

^a Hincmar, archevêque de Reims; Immon, évêque de Noyon; Ermenfrois, évêque de Beauvais; Hincmar, évêque de Laon.

^b On attribue cette lettre à Hincmar de Reims.

^c Hildegare, évêque de Meaux.

^d Enée, évêque de Paris.

mnationis vestræ sinceritate, de qua nihil contra puritatem volumus autumare, alia quædam possint intelligi. Et quia beatus Petrus omnem monet episcopum ut paratus sit ad satisfactionem omni poscenti se rationem, quæ nunc videmus, pro tempore damus fideliter dominationi vestræ consilia.

VI. *Ut consideret cur in fratris regnum venerit, et utrum talia sustinere velit, qualia fecit.*

Primo quidem in ipsa radice cordis adventum vestrum in hoc regnum inspiciat, et coram oculis Domini, cui secundum Psalmistam cogitatio hominis confitetur, statera æquitatis ponderate; et quidquid hortatores et consiliarii ac laudatores vestri vobis dicant, ad cor redite; et quidquid ad accusationem et commendationem adventus vestri invenire et dicere potueritis, vestram conscientiam interrogate; et si talia sustinere vultis qualia factis, iudicate. Et illam horam quam certi estis quia nullo modo poteritis effugere, quando anima vestra de corpore exiet, ante mentis oculos ponite, quando totum mundum et omnem potestatem, et omnes divitias, et ipsum corpus derelinquet, et sine adiutorio uxoris ac filiorum, et sine solatio et comitatu drudorum atque vassorum nuda et desolata exhibit, et quidquid cogitavit et ordinare disposuit, infectum dimittet, sicut dicit Scriptura: *In illa die peribunt omnes cogitationes eorum (Psal. CXLV)*; et videbit omnia peccata sua et sentiet, videns diabolos se constringentes et coartantes, et quidquid contra charitatem et fidem debitam cogitavit, parabolavit, et fecit in isto sæculo et per dignos penitentiae fructus non emendavit, ante oculos semper habebit, et effugere volet, et non valebit. Nam certum est quia ad omnes homines, quando egrediuntur de corpore, veniunt diaboli, et ad justos et ad peccatores: sed et ad ipsum Christum venit, in quo suum nihil invenit, sicut scriptum est: *Venit princeps hujus mundi, et in me non habet quidquam (Joan. XIV)*.

Et crede nobis veraciter, rex utinam semper bone et christiane, nec longe est, sed satis et plusquam speretur, prope tibi est illa hora. Propterea non te seducant ista quæ vides. In tempore quippe patris vestri vidimus per aliquos incepta et facta quæ in tempore isto, per istos qui ista faciunt videmus fieri, et per alios videbuntur compleri. Et quando tibi adveniet hora exitus tui, sicut rident nunc, quando per te obtinent quæ volunt, in hora voluntatis suæ; sic ridebunt et in hora exitus tui, et quærent quomodo per alium teneant quæ per te obtinuerunt. Quod et fieri potest ut quidam etiam quærant in tempore tuo. Sed et illi, nisi dignam penitentiam egerint, miserabiliter ad illam horam venient exitus sui, sicut venerunt et illi qui defecerunt a patre tuo cum fratre tuo. Nam ut illi ordinantes seditiones in paternam reverentiam sic et isti vos excitantes in fraternam dilectionem, nomen pacis et statum Ecclesiae, et salutem ac unitatem populi obtendere stu-

duerunt; et latebat sub melle venenum. Et completum est in illis, complenturque in istis Psalmistæ dictum: *Qui loquantur pacem cum proximo suo, mala autem in cordibus eorum (Psal. XXVII)*; et reliqua quæ sequuntur. Et receperunt illi in sæculo isto quæ nota sunt et receperunt in sæculo altero quæ in iudicio plenius cognoscentur. Quorum isti intuentes exitum, timere debuerant actionem: et facient si illos respexerit Dominus qui respicit humiles et custodit parvulos, Et sic pestilente flagellato, ut scriptum est, sapientior erit parvulus; et sapient, quia non repellet Dominus plebem suam, nec obliviscetur in finem: *Quoniam Propter miseriam inopum et gemitum pauperum nunc exurgam (Psal. XI)*, dicit Dominus. Alioqui sicut tunc dixit illis, ita ex nunc dicit Dominus istis: *Tucui, nunquid semper tacebo? quam si parturiens clamabo (Isa. XLII)*. Nondum venit hora mea, sed nunc est hora vestra, et potestas tenebrarum. Et quidem in hac die tua quæ ad pacem tibi! nunc autem abscondita sunt ab oculis tuis, quia venient dies in te. Roga tibi, quæsumus, in tali loco ubi bene possis intendere homiliam sancti Gregorii legere in lectione Evangelii: Videns Jesus civitatem, flevit super illam. Precamur vos, Domine ut et diem ante mentis oculos habeatis, quando cum omnibus hominibus anima vestra proprium corpus recipiet, et venietis ante faciem æternis iudicis in conspectu omnium angelorum et hominum: in qua die, sicut dicit sanctus Paulus, iudicabit Dominus unumquemque, non per alienum testimonium, sed occulta uniuscujusque per cogitationes accusantes, aut etiam defendentes, quando recipiet uniuscujusque propria corporis prout gessit, sive bonum, sive malum. Et non despiciantur tunc nostra verba quæ scripsimus, ab eis qui nunc illa contemnunt; quando sine dubio replicata erunt in testimonium in ipso tremendo iudicio, et nullus illorum te tunc adjuvabit, qui nec seipsum adjuvare sufficiet, quando ibunt qui talia agunt qualia audimus et sentimus atque dolemus, si in talibus perseveraverint, in ignem æternum, et justî, qui injusta patiuntur, in vitam æternam.

V. *De eis quæ crudeliter et impie, qua transibat, fiebant, ut ea prohibeat et compescat.*

Quia tanta et talia crudelia et abominanda fieri, per parochias quas pertransitis, audivimus, et quædam sentimus, quædam sentire timemus, et illis qui senserunt et sentiunt condolemus, quæ calamitatem et miseriam quam a paganis patimur, superant, quoniam a christianis in christianos a parentibus in parentes, a rege christiano in regem christianum, a fratre in fratrem, contra omnes leges divinas et humanas aguntur: contra quos clamat Ecclesia a paganis afflicta: *Et super dolorem vulnerum meorum addiderunt (Psal. LXXVIII)*: Et nos omnes cunctique patientes, *Sustinuimus pacem, et non venit; quæ sive minus bona, et ecce turbatio (Jer. XIV)*; propterea talia

* Paganis, par les Normands, qui n'étaient pas encore convertis au christianisme.

prohibete, compescite et sedate; quoniam palatium vestrum debet esse sacrum, et non sacrilegum. Palatium enim regis dicitur propter rationabiles homines habitantes, et non propter parietes insensibiles, sive macerias. Et rex a regendo dicitur, ut se sub Deo et bonis cum Deo puritate cordis, veritate oris, firmitate stabilitatis regat, et pravos a pravitate corrigat et in rectitudinem dirigat. Et si quæ male facta sunt emendare venistis, pejora quam viderimus a christianis in christianos fieri, ingerere non debetis. Et si pacem facere advenistis, pacem pacifice ab auctore pacis obtinere debetis. Et si discordiam effugare et charitatem redintegrare venistis, illam quam Christus per Paulum docuit, monstrare debetis. Ait enim: *Charitas non est ambitiosa, non agit perperam, non quærit quæ sua sunt; non gaudet super iniquitate, congaudet autem veritati* (I Cor. XIII); quæ est de corde puro et conscientia bona, et fide non ficta; quæ operatur per dilectionem, et non per potestatem, vel indebitam cupiditatem: sine qua charitate, sicut scriptum est, etiamsi qui tradiderit corpus suum ut ardeat, nihil illi prodest. Quam omnibus Dominus in signum dedit, ut sciant si quisque est christianus, aut si intrabit in regnum Dei, an non, dicens: *In hoc cognoscent omnes quia discipuli mei estis, si dilectionem habueritis ad invicem* (Joan. x.) Nam qui in primordio fidei discipuli appellabantur, nunc christiani dicuntur. Et ipsa est vestis nuptialis, quam qui non habuerit, de nuptiis cælestis convivii in futuro judicio ejicietur in tenebras exteriores, et in ignem æternum, ubi erit fletus et stridor dentium.

VI. *Ut contra paganos potius arma convertat; et illos qui ab illis fugiunt, vexari a suis non sinat.*

Ipsa charitas vos contra paganos accendat; ut qui tunc moti non sunt ad pietatem ut nobiscum irent contra eos, qui de isto regno amplos habebant et habent honores (quod si facerent, et zelo recto accensi unanimiter vellent, expelli aut disperdi pagani, adjuvante Domino, poterant), vel nunc quancunque intentione a dominatu illorum per vestram ordinationem sancta liberetur Ecclesia, et regnum, quod contra eos redimitur, a tributo indebito eripiat. Sed et qui fugiunt a facie paganorum, cum in illas partes venerint in quibus degitis, refugium tranquillum inveniant, et non talem deprædationem ut nec incolæ vivere nec fugientibus solatium possint præbere. Quia nunc peccatis nostris exigentibus completur quod olim dictum est per prophetam: *Qui fugerit a facie leonis, irruet in ursum; et cum intraverit domum, et innisus fuerit super parietem, mordebit eum coluber. Et cum effugerint arma ferrea, irruent in arcum æreum* (Amos v.) In omni enim parte miseri, proh dolor! afflictionem inveniunt.

VII. *Ut privilegia et immunitates ecclesiarum conservet, rectoresque illarum non inquietet, nec possessiones diripi permittat.*

Et si Ecclesiam Dei, sicut nobis scripsistis, quæ-

A ritis restaurare, debita episcopis et sibi commissis ecclesiis privilegia intemerata, sicut divinitus constituta sunt, custodite. Præcepta et immunitates et honorem earum, sicut avus et pater vester conservaverunt, conservare curate. Et quæ frater vester dominus noster, qui et paterna donatione, et vobiscum, cum vestris vestrorumque fidelium mutuis firmitatibus, regni partem accepit, pro cultu et honore ecclesiarum egit, similiter conservate; et rectores ac pastores ecclesiarum ut patres et Christi vicarios colite, sicut sancta Scriptura præcipit, dicens: *Sacerdotes Dei sanctifica, et magnatis humilia caput tuum* (Eccli. VII). Eorumque spiritualia consilia obaudite, iterum dicente Scriptura: *Interroga patres tuos, et annuntiabunt tibi; majores tuos, et dicent tibi* (Deut. XXXI); Et item: *Interroga sacerdotes meos legem meam* (Agg. II); et Dominus per Malachiam prophetam: *Labia sacerdotis custodient scientiam, et legem requirent ex ore ejus, quia angelus Domini exercituum est* (Malach. II). Eosque tempore incongruo et inopportuno nolite inquietare; sed liceat eis ministerium sacrum, ad quod ordinati sunt, in populi salutem peragere: sibi que domestica cura subjectos nolite concutere, et non sinatis dehonestare, sive opprimere. Ut presbyteris honor congruus et jura debita, quæ canones et capitula avi et patris vestri statuerunt, conserventur, satagite. Ut episcopi quietam libertatem suas parochias circumveundi, et prædicandi ac confirmandi, atque corrigendi habeant, ordinate. Ut missus reipublicæ, id est minister comitis, cum ipsis, si jusserint, eat, qui liberos homines incestuosos, si per admonitionem presbyterorum venire ad episcopum noluerint, eos ad episcopi placitum venire faciat, commendate. Ut si episcopus pro quacunque necessitate ecclesiastica ad vos direxerit, ad quem suus missus veniat per quem quæ rationabiliter petierit, obtinent, in palatio vestro, sicut comes palatii est in causis reipublicæ, ministerio congruus constitutum habete. Ut temporibus a sacris regulis constitutis provinciales synodos cum episcopis, et speciales cum presbyteris, habere quiete possint, annuite^a. Res et facultates ecclesiasticas, quæ sunt vota fidelium, pretia peccatorum, stipendia ancillarum et servorum Dei, deprædari et ab ecclesiis discindi nolite sustinere; sed fortiter, ut rex christianus et Ecclesiæ alumnus resistite atque defendite. De quibus consecratis Deo rebus quod habent liberi homines ecclesiis servientes per dispositionem rectorum ipsarum ecclesiarum, ideo constituerunt apostolorum successores hoc ordinari, ut quia creverunt fidelium vota, et increverunt fidelium mala, augeretur per dispensationem ecclesiasticam regni militia ad resistendam malorum nequitiam, quatenus ipsæ ecclesiæ defensionem haberent et pacem, et christianitas obtineret tranquillitatem. Quapropter sicut et illæ res ac facultates de quibus vivunt clerici, ita et illæ sub consecratione immuni-

^a Il parait que Louis de Germanie avait défendu aux évêques de tenir des conciles.

tatis sunt, de quibus debent militare vassalli; et pari tuitione a regia potestate in ecclesiarum usibus debent muniri. Quia vero Carolus ^a princeps, Pippini regis pater, qui primus inter omnes Francorum reges ac princeps, res ecclesiarum ab eis separavit atque divisit, pro hoc solo maxime est æternaliter perditus. Nam sanctus Eucherius Aurelianensium episcopus, qui in monasterio sancti Trudonis requiescit, in oratione positus ad alterum est sæculum raptus, et inter cætera quæ, Domino sibi ostendente, conspexit, vidit illum in inferno inferiori torqueri. Cui interroganti, ab angelo ejus ductore responsum est, quia sanctorum judicatione, qui in futuro judicio cum Domino judicabunt, quorumque res abstulit et divisit, ante illud iudicium anima et corpore sempiternis pœnis est deputatus, et recipit simul cum suis peccatis pœnas propter peccata omnium qui res suas et facultates in honore et amore Domini ad sanctorum loca, in luminaribus divini cultus et alimoniis servorum Christi ac pauperum, pro animarum suarum redemptione tradiderunt. Qui in se reversus sanctum Bonifacium et Fulradum, abbatem monasterii sancti Dyonisii, et summum capellanum regis Pippini ad se vocavit, eisque talia dicens in signum dedit ut ad sepulcrum illius irent, et si corpus ejus ibidem non reperissent, ea quæ dicebat, vera esse concrederent. Ipsi autem pergentes ad prædictum monasterium, ubi corpus ipsius Caroli humatum fuerat, sepulcrumque illius aperientes, visus est subito exisse draco, et totum illud sepulcrum interius inventum est denigratum, ac si fuisset exustum. Nos autem illos vidimus qui usque ad nostram ætatem duraverunt, qui huic rei interfuerunt, et nobis viva voce veraciter sunt testati quæ audierunt atque viderunt. Quod cognoscens filius ejus Pippinus synodum apud Liptinas congregari fecit, cui præfuit cum sancto Bonifacio legatus apostolicæ sedis Georgius nomine ^c; nam et synodum ipsam habemus, et quantumcunque de rebus ecclesiasticis, quas pater suus abstulerat, potuit, ecclesiis reddere procuravit. Et quoniam omnes res ecclesiis a quibus ablatae erant, restituere, propter concertationem quam cum Waifario Aquitanorum principe habebat, non prævaluit, precarius fieri ab episcopis exinde petiit, et nonas ac decimas ad restaurationes tectorum, et de unaquaque casata duodecim denarios ad ecclesiam unde res erant beneficiatae, sicut in libro capitulorum regum habetur, dari constituit, usque dum ipsæ res ad Ecclesiam revenirent. Unde et dominus Carolus imperator, adhuc in regio nomine constitutus, edictum fecit ut neque ipse, nec filii ejus neque successores, hujusmodi rem agere attemptarent: quod manu propria firmavit, cujus plenitudinem habemus, et de quo capitulum excerptum

^a *Carlus* ou *Carolus*, Charles-Martel.

^b Malgré le témoignage des évêques du concile de Quierzy, on doit regarder cette prétendue vision de saint Eucher comme une fable.

^c Le concile de Lestines a été tenu par l'ordre de Car-

in libro Capitulorum ejus, quicumque librum illum habet, et legere voluerit, invenire valebit. Hanc etiam relationem et in scripturis habemus, et quidam nostrum etiam viva voce domnum Ludovicum imperatorem patrem vestrum referre audivimus. Sed et sacri canones Spiritu sancto dictati, eos qui facultates ecclesiasticas diripiunt, et res ecclesiasticas indebite sibi usurpant, Judæ traditori Christi similes computant. Et sancti qui cum Deo in celo regnant, et in terris miraculis coruscant, divino iudicio tanquam neceiores pauperum ab Ecclesiæ liminibus et a cœlesti regno secludunt. De quibus sacrilegis in prophetia psalmi prædictum est: *Qui dixerunt: Hereditate possideamus sanctuarium Dei. Deus meus, pone illos ut rotam, et sicut stipulam ante faciem venti. Et sicut ignis qui comburit sylvam, et sicut flamma comburens montes, ita persequeris illos in tempestate tua, et in ira tua turbabis eos. Imple facies eorum ignominia* (Psal. LXXXII.)

VIII. Ut monasteria laicis a Carolo concessa religiosis personis restituant.

Monasteria etiam religiosa atque præcipua canonicorum et monachorum atque sanctimonialium habitacula, quæ ab antiquo tempore parentes vestri sub religioso habitu constituerunt, et in eis rectores et retrices fecerunt, et quando parentes vestri primatum regni tenuerunt, et etiam quando sanctus Remigius Francos ad fidem, cooperante Domino, convertit, et cum rege ipsorum baptizavit, et frater vester dominus noster partim juventute, partim fragilitate, partim aliorum callida suggestione, etiam et minarum necessitate, quia dicebant petitores, nisi eis illa loca sacra donaret, ab eo deficerent, et ipse aliquando per vos, sicut nunc patet, aliquando per fratrem vestrum regnum destitutus ab eis perderet, talibus, sicut scitis, personis commisit, debito privilegio restituite. Nam idem frater vester et divina inspiratione, et sacerdotali redargutione, et etiam ab apostolica sede commonitus, ex aliqua parte quæ perpere egit, correxerat: quæ autem adhuc incorrecta erant, quomodo emendare posset, sæpe gemebundus quærebat. Absit autem ut vos, qui pro restauratione sanctæ Ecclesiæ huc venistis, aut illa quæ ipse emendavit deterioretis, et sicut ille offendit, et vos offendatis, aut quæ ipse necdum emendare potuit, inemendata sinatis: qui sæpe, sicut, et nos testes sumus, fratres vestros de talibus, monuistis, et in omni annuntiatione quam communiter faciebatis, promptissime inde disputabatis; sicut et secus Teudonis villam, in loco qui *Judicium* dicitur, capitula quæ habemus cum vestris fratribus accepistis, et in chirographo apud Marsnam manu propria confirmastis. Contra quod si forte aliquis

loman, maire du palais, en 745. Hinemar prétend que Georges, légat du saint-siège, y assista avec saint Boniface, c'est une erreur: Georges ne fut envoyé en France qu'après la mort de cet évêque.

egit, non propterea vos immunes eritis, si illud quod, teste Domino, pepigistis et confirmastis, observare, quod absit, non studueritis. Neminem quippe adjuvat quod aliena mala reprehendit, nisi et ipse illa caveat: quod demonstrat Paulus, dicens: *Putas, o homo, quod tu evades iudicium Dei, qui eadem agis quæ judicas?* (Rom. II.)

IX. *Ut rectores monasteriorum sollicitè provideant ut servi et ancillæ Dei secundum ordinem vivant.*

Rectores etiam monasteriorum, quibus monasteria committitis, firmiter et obnixè præcipite ut secundum ordinem et habitum ac sexum, quo inhabitantes constituti sunt sollicitè et solerter prævideant ut secundum debitum ordinem servi vel ancillæ Domini vivant, et necessaria stipendia in victu et vestitu, et cæteris quibusque habeant, et domos ac servitores, prout competit, sicut religiosi et habitus et conversationis rectores, eis provideant, susceptionem etiam hospitem et pauperum nullomodo negligent. Quin et inconvenientes personæ, et res tales quæ religioni non congruunt, in monasteria non introducantur, non dicimus: quoniam religiosos rectores providentiam et curam debitam inde sumere debere non ignoramus.

X. *Ut hospitalia peregrinorum ad hoc ad quod deputata sunt, episcoporum concilio a rectoribus suis administrantur.*

Hospitalia peregrinorum, sicut sunt Scottorum, et quæ tempore antecessorum vestrorum regum constructa et constituta fuerunt, ut ad hoc ad quod deputata sunt teneantur, et a rectoribus Deum timentibus ordinentur, custodiantur, ne dissipentur, obtinete. Sed et rectoribus monasteriorum et xenodochiorum, id est hospitalium, præcipite ut sicut canonica docet auctoritas, et capitula avi et patris vestri præcipiunt, episcopis propriis sint subjecti, et monasteria atque hospitalia sibi commissa ipsorum regant consilio; quoniam episcopi paternam sollicitudinem eis, secundum ministerium illorum, studebunt impendere. Et quia sæpe unicuique in omni ordine competentem legem et justitiam, una cum fratribus vestris, frequenti annuntiatione perdonastis, ecclesiastici et religiosi habitus viri ac feminae, atque peregrini et pauperes, in quibus specialiter Christus suscipitur, perdonationem vestram sibi sentiant semper adesse.

XI. *Quod regem ita vitam instituere conveniat, ut omnibus sit exemplo.*

Et quia de statu et salute populi christiani, sicut nobis scripsistis, vultis quærere, primo a vobis ipsis incipite, qui alios debetis corrigere, sicut scriptum est: *Medice, cura te ipsum* (Luc. IV); et munda debet manus a sordibus esse, quæ alienas sordes curat detergere. Et quæ in aliis debetis corrigere, nemo in vobis juste valeat reprehendere. Super quantos enim estis in regni culmine, tantorum moribus debetis servire, et sicut lucerna super candelabrum in domo posita, bonitatis exempla monstrare;

quia omnium oculi in vos debent intendere: quos si malo exemplo destruxeritis, qui per vos et a vobis in bonum debuerant ædificari, sub tantis sine dubio in futuro sæculo pœnis vos necesse est torqueri. Propterea oportet ut qui rex estis, et dominus appellamini, in illum semper suspensus corde suspiciatis quo videlicet, Rege regum et Domino dominorum, nomen regis et domini mutuatis. Et sicut ille disponit orbem terræ in æquitate, et ad hoc, sicut in libro Sapientiæ dicitur, constituit hominem ut ipse similiter faciat, imitamini illum, si vultis regnare cum illo. Quia qui dicit se in Christo manere, debet, sicut ille ambulavit, et ipse ambulare, qui dicit: *Estote et vos perfecti, sicut et Pater vester cælestis perfectus est* (Matth. v). Et si dixeritis quomodo possum esse perfectus, cum alia scriptura dicat: *Si quis in verbo non offendit, ille perfectus est vir*, non cadit a perfectione qui non peccat malitiæ cupiditate: *Septies, enim cadit justus et resurgit: impij autem corrumpunt in malo* (Prov. xvi). Et: *Justus, cum ceciderit, non collidetur, quia Dominus supponit manum suam* (Psal. xxxvi). Qualitercunque vero quis peccet, cupiditatis voluntate aut fragilitatis necessitate, nemo illi prævalet melius indicare quam conscientia sua, quæ non potest latere oculos inspectoris sui. Propterea ita oportet vos vivere, judicare et agere etiam in occulto, quasi sitis semper in publico; quia sæpe talis vos verbo laudabit, qui corde acriter reprehendet, sæpe etiam illa quæ vobis et in vobis laudaverit, apud alios de vobis reprehensibilia iudicabit. Si autem, ut dicimus, adjuvante Domino, vivere, judicare et agere prævalebitis; si vos non stimula verit amor privatus; si vos non inflammaverit cupiditas gloriæ, divitiarum, possessionum, et potentatus; si non plus credideritis alienæ linguæ, quam propriæ conscientiæ; si vos non roserit tinea adulationis; si non vos userit livor alienæ felicitatis; si vos non vexaverit neglectus animæ et amor carnis; si credideritis regem Christum non pro se, id est non pro sua necessitate mortuum, sed pro nobis, ut viveremus qui mortui eramus; et vos plus studeatis aliis vivere in salutis suæ utilitatibus, quam vobis ipsis in propriis voluntatibus; si scieritis vos esse mortuos, et vos credideritis de factis propriis rationem Domino reddituros; et quæ digne receperitis, sine fine vel immutatione aliqua habituros.

XXII. *Quomodo domesticos regere, quid Deo, quid subditis reddere, et quales palatii ac reipublicæ ministros constituere debeat.*

Domum vestram domesticam sic nutrite, regite et disponite, ut quando regni populus ad vos convenierit, in vobis et in domesticis vestris videant qualiter se atque domum, cum tanta humilitate atque castitate, quam sobrie, quam juste, quam pie nutrire, disponere debeant, et gubernare: quia sicut quidam sapiens dixit, secundum mores domini erit familia custodita. Et ideo domus regis schola dicitur, id est disciplina; quia non tantum scholastici, id est disciplinati et bene correcti sunt, sicut alii; sed potius

ipsa schola, quæ interpretatur disciplina, id est correctio, dicitur, quæ alios habitu incessu, verbo, et actu, atque totius vanitatis continentia corrigat. Et vos, sicut paxillus non bene infixus, nisi in Domino virtutum innixi fortiter fueritis, et vos cadetis, et qui in vobis pendent, labentur. Quapropter, sicut Dominus sub potestate constitutos ex tentatorum occasione docuit reddere quæ sunt Cæsaris Cæsari, et quæ sunt Dei Deo; ita et vos qui sub Deo estis et super homines estis, reddite quæ sunt Dei Deo; et sicut Cæsar æquus, quæ subditorum sunt subditis reddite. Reddite Deo puram et immaculatam fidem et sincerissimum cultum in sacerdotibus, in ecclesiarum privilegiis, in sacris locis, in ecclesiasticis et religiosis viris ac feminis, in defensione Ecclesiæ et christianitatis, in æquitate et justitia populi christiani, in sublevatione et tranquillitate et consolatione omnium indigentium, sicut præmisimus. Reddite illi quotidianum pensum in quotidiana oratione, in justis et assiduis eleemosynis. Offerte illi devotionem vestram in sacris oblationibus et lacrymis secundum magnitudinem ac multitudinem quotidianorum peccatorum profusis. Reddite subditis iudicium cum misericordia, justitiam cum æquitate. Studete exaltare humiles et Deum timentes, et debellare atque humiliare superbos. Studete a bonis plus diligi, quam timeri. Curate ut mali, si non propter Deum, vel propter timorem vestrum malum agere metuant. Non plus apud vos lingua dolosa, manus plena, obsequium indebitum valeat, quam veritas, æquitas et sinceritas, scientes scriptum: *Qui excutit manus suas ab omni munere, iste in excelsis habitabit (Isa. xxxiii.)* Unde consequenter intelligi debet, et non aliud. Munus enim est a lingua, favor; munus a manu, donatio; munus ab obsequio indebita subjectio. Constituite ministros palatii qui Deum cognoscant, ament, et metuant, qui maximam curam gerant quatenus quicunque necestuosi palatium adierint, et per quos perrexeritis, patrem et consolatorem mirantes, gaudentes vos videre accurrant, non, qualiter dicere nolumus, gemendo et maledicendo refugiant. Constituite comites et ministros reipublicæ qui non diligant munera, qui odiant avaritiam, qui detestentur superbiam, qui non opprimant neque dehonorent pagenses^a, qui messes et vineas et prata ac sylvas eorum nequaquam devastent; qui eorum pecora vel friskingas^b, vel quæcunque illorum sunt, non prædentur, neque diripiant, et per violentiam ac mala ingenia quæ illorum sunt nullo modo auferant, qui episcoporum suorum consilio quæ Dei sunt, et Christianitati conveniunt, faciant; qui placita non pro acquisitione lucri teneant, sed ut casæ Dei, et viduæ, ac pupilli, et populus justitiam habeant, et plus litigantes ad concordiam, salva justitia, revocare student, quam committere ut ipsi inde aliquod lucrum possint habere: quos si pacificare non potuerint, tunc sicut rectum est, justum iudicium decerni cum

^a Pagenses, paysans.

A magna sollicitudine faciant, scientes scriptum esse: *Indicabo tibi, homo, quid sit bonum, id est, facere iudicium et justitiam et sollicitum ambulare cum Deo tuo (Mich. vi.)* Id est, ut quod illi placet, tibi placeat et facias; quod illi displicet, tibi displiceat et non facias. Quod si per fragilitatem feceris, non contumaciter vel pertinaciter in tuo malo facto perseveres; sed statim pedem sicut a ferro calido revoca, et in viam voluntatis Domini Dei tui dirige. Et sicut scriptum est: *Quia sunt viæ quæ videntur hominibus bonæ, et ducunt ad interitum (Prov. xvi)* fac sicut Scriptura tibi præcipit, quicunque es homo. *Interroga de viâ bona, et ambula per eam (Jer. vi.)*, quia sicut dicitur in Evangelio: *Ampla viâ est quæ ducit ad perditionem, et multi vadunt per eam: arcta et angusta viâ est quæ ducit ad vitam, et pauci inveniunt eam (Matth. vii.)* Propterea quicunque es homo, audi prophetam, et ora cum propheta: *Legem pone mihi, Domine, viam justificationum tuarum, et exquiram eam semper (Psal. cxviii.)* Et: *Deduc me in semitam mandatorum tuorum, et viam iniquitatis amove a me, et de lege tua miserere mei (ibid.)*. Quia sicut Jeremias propheta dicit: *Non est hominis viâ ejus, nec viri est ut ambulet et dirigat gressus suos (Jer. x)* sed a Domino dirigentur gressus viri, et viam ejus volet (Psal. xxxvi). Ipsi comites similiter quantum potuerint, similes sibi timentes Deum, et justitiam diligentes per se ministros constituant, qui sicut seniores suos benignos et affabiles pagensibus suis viderint, et ipsi pro modulo suo illos imitari in omni bonitate et justitia certent.

C XIII. *Ut eos qui propter has seditiones excommunicati sunt, ad Ecclesiæ pacem revocare studeat.*

Homines etiam potentes sæculi, qui inter istas seditiones legis jugum et justitiam æquitatis refugerunt, et talia ac tanta fecerunt pro quibus ecclesiasticam et episcopalem excommunicationem meruerunt, ad leges et justitiæ tramitem revocate; et ut ad suos episcopos humiliter, sicut eis necesse est, veniant, jubete vel cogite; et ut Ecclesiæ, in quam peccaverunt, aut cum debita necessaria humilitate satisfaciunt, aut humiliter et veraciter se excusent, qualiter absolvi a Domino per ministerium episcopale valeant, suadete, atque regia potestate præcipite. Et si forte vos, vel quicunque alii de eorum societatis et conjunctionis communicatione infecti et condemnati sunt, pœnitentiam quiscunque se recognoscendo faciat; quia, teste sacra auctoritate, non poterit absolvi a suis, qui peccatis damnabiliter gravatur externis. Sicut orans Deum sanctus propheta David demonstrat, dicens: *Ab occultis meis munda me, Domine, et ab alienis parce servo tuo (Psal. xviii.)*

D XIV. *Judices villarum regiarum qualiter constituendi sint.*

Judices denique villarum regiarum constituite qui non sint cupidi, qui non diligant avaritiam, et

^b Friskingas, jeunes pores.

usuras nec ipsi faciant, nec pecunias regias vel suas ad usuras donent, neque a suis subditis usuras fieri sinant : quæ omnia vos super omnes ministros vestros odire debetis et fugere. Et servos regios iudices non opprimant, nec ultra quod soliti fuerunt reddere tempore patris vestri ab eis exigant ; neque per angarias in tempore incongruo illos affligant ; neque per dolos, aut per mala ingenia, sive inconvenientes precationes, colonos condemnent : quia si per tales vel alias hujusmodi factiones pondus argenti vel auri habueritis in arca, majus et gravius pondus erit peccati quod habebitis in conscientia vestra et anima. Edificent villas vestras moderatis castitiis, ut et honestas necessaria sit, et familia non gravetur. Laborent et excolant terras et vineas in tempore cum debita sollicitudine, salvent et dispensent laborata cum fidei discretione, faciant nutrimenta congrua et necessaria ; custodiant silvas, unde habeant pastiones ; defendant et excolant prata, unde habeant pabula ; quatenus non sit vobis necesse per quascunque occasiones quorumcunque hortatibus circuire loca episcoporum, abbatum, abbatissarum vel comitum, et majores quam ratio postulat paratas ^a exquirere, et pauperes ecclesiasticos et fidelium vestrorum mansuarios in carricaturis et paraveredis ^b contra debitum exigendis, gravare, et peccatum de facultatibus indebite consumptis in animam vestram congerere. Neque et comitibus vel fidelibus vestris plus studeatis quam lex et consuetudo fuit tempore patris vestri, de hoc quod de francis accipiunt, exquirere. Quin potius habeatis unde sufficienter et honeste cum domestica corte vestra possitis vivere, et legationes palatium vestrum adeuntes recipere, et, sicut scriptum est, unde possitis de justis laboribus necessitatem patientibus tribuere : quia rex et largus debet esse, et non quod largiatur de injustitia vel iniquitate debet conquirere. Iudices vero villarum colonos distringant ut non ecclesiasticos homines vel francos pauperiores, aut alienos servos, propter privilegium regium opprimant, aut silvas vel quæcunque aliorum sunt in sua vicinitate devastent. Quia rex justus, qui justitiam debet diligere, ministros et colonos impios et iniquos non debet habere ; sed omnibus in se et in suis debet imitationem debitam demonstrare : quia si ipse Deum dilexerit, omnes boni diligent illum ; et si ipse Deum timuerit, omnes mali timebunt illum. Et rex atque sui ministri per amorem Dei bonum faciant, et omnes bona facere doceant, et per timorem Dei mala fugiant, et omnes in illis mala fugere discant. Missos etiam tales per regnum constituite, qui sciant qualiter comites et cæteri ministri reipublicæ justitiam et iudicium populo faciant, qui sicut comitibus præponuntur, ita scientia, justitia ac veritate eis præmineant.

XV. *Ut synodus episcoporum regni expectetur, in qua quid facto ipsis opus sit deliberent. Quanta*

^a *Paratas.* Frais de réception.

reverentia regibus debeat, et quod episcopi ad sacramenta adigendi non sint.

Hæc, quia litteris vestris significastis, quod nobiscum de restauratione sanctæ Ecclesiæ, et statu ac salute populi christiani, tractare velletis, dominationi vestræ scripto respondere curavimus : quia et pro inclementia aeris, et pro inconvenientia temporis, et propter imminem diem Domini nostri Natalis, venire ad præsentiam vestram nequivimus. Operamini vos interim ista quæ cum fidelibus vestris sine nostra corporali præsentia operari valetis. Et cum tempus congruum et sacris canonibus designatum advenerit, quando et pro paganorum infestatione, et pro exorti tumultus ac deprædationum atque rapinarum miserrima nimis confusione, nobis licuerit cum dominis et confratribus ac comprovincialibus archiepiscopis et coepiscopis synodum, favente Domino, celebrare, quæ his sunt residua, cum eis sicut cum magistris et patribus tractare, et vestræ dominationi debitum consilium dare studebimus. Et si Deus soliditatem et salutem Ecclesiæ atque regni in manu vestra adunare et prosperari decreverit, quæ cum archiepiscopis et coepiscopis nostris plus congruere divinis dispositionibus viderimus, agere sub famulatu recti regiminis vestri studebimus. Potens est enim Deus minus bonum initium in perfecte bonum commutare processum, cui noscitur esse possibile quod impossibile solent homines judicare. Si enim sapientia vestra dignum iudicari loqui et tractare cum vicino rege ejusque fidelibus, secedente de ista parte regni domino nostro, fratre videlicet vestro, multo magis nos oportet expectare tempus canonicum, ut cum fratribus et comprovincialibus archiepiscopis et episcopis loquamur, quia generalis causa imminet totius Cisalpinæ ecclesiæ. Maxime autem nobis necesse est loqui cum illis archiepiscopis et episcopis, qui consensu et voluntate populi regni istius dominum nostrum fratrem vestrum unxerunt in regem sacro chrismate divina traditione, quemque sancta sedes apostolica mater nostra litteris apostolicis ut regem honorare studuit et confirmare. Legite libros Regnum, et invenietis quanta reverentia reprobaturum et abjectum a Domino Saul ducere dignum duxit sanctus Samuel, cujus locum in Ecclesia nos licet indigni tenemus. Et attendite quam magni pendit sanctus David, in loco illius electus, et unctus a Domino, mittere manum in Christum Domini ; cum Saul non solum ex alia progenie, verum ex alia tribu erat ; et illum rejectum, et se electum a Domino cognoscebat ; et nihil firmitatis Sauli David fecerat, sed plurimum adiutorium et devotam servitatem ei impenderat. Et neque bello auferre, neque ingenii dolo, illi regnum subripere attentavit. Et cum multos ad hoc suasores et auxiliares habuisset, nulli autem ut hoc moliretur accommodavit,

^b *Carricaturis et paraveredis.* carrorum et equorum ad subvectionem operis.

quamvis multas persecutiones et morti proximas ab eo sepiissime sustinuerit. Insuper et bene scitis quid de illo jusserit, qui, licet mendaciter, pro illius tamen gratia acquirenda se manum misisse in Christum, id est unctum Domini, nuntiavit : nam si est aliquis qui hæc ignoret, nos ei dicimus quia gladio eum interficere jussit. Sic et qui infideliter et contumaciter in unctum qualemunque Domini manum mittit, Dominum Christorum Christum contemnit, et in anima procul dubio spiritualis gladii animadversione perit. Hæc dicimus, non ut exaggerationes contra dominationem vestram incongruas exquiramus, sed ut evidentius pro qualitate nostri ministerii, quid, excepta debita fide et beneficentia, nobis in fratre vestro reverendum sit, demonstramus. Talem nempe vos debemus et volumus credere, ut nec vos regi augmentum cum animæ vestræ detrimentum velitis habere, neque nos cum tali dedecore ad adjutorium ecclesiastici regiminis et gubernationis recipere, ut sine sacerdotio simus ; quo privati erimus, si contra Deum et rationis auctoritatem, nos, ecclesiasque nostras vobis studuerimus committere. Ecclesiæ siquidem nobis a Deo commissæ non talia sunt beneficia, et hujusmodi regis proprietates, ut pro libitu suo inconsulte illas possit dare, vel tollere : quoniam omnia quæ Ecclesiæ sunt, Deo consecrata sunt. Unde qui Ecclesiæ aliquid fraudatur aut tollit, sacrilegium secundum sanctam Scripturam facere noscitur. Et nos episcopi Domino consecrati, non sumus hujusmodi homines ut sicut homines sæculares in vassallitico debeamus nos cuilibet commendare, sed ad defensionem et ad adjutorium gubernationis in ecclesiastico regimine nos, ecclesiasque nostras committere, aut jurationis sacramentum, quod nos evangelica et apostolica auctoritas vetat, debeamus quoquomodo facere. Manus enim chrismate sancto peruncta, quæ de pane et vino aqua misto per orationem et crucis signum conficit corpus et Christi sanguinis sacramentum, abominabile est, quidquid ante ordinationem fecerit, ut post ordinationem episcopatus sæculare tangat ullo modo sacramentum. Et lingua episcopi, quæ facta est per Dei gratiam clavis cœli, nefarium est ut sicut sæcularis quilibet super sacra juret in nomine Domini et sanctorum invocatione ; nisi forte, quod absit, contra eum scandalum acciderit Ecclesiæ suæ ; et inde sic temperanter agat, sicut, Domino docente, constituerunt rectores Ecclesiæ synodali concilio. Et si aliquando sacramenta ab episcopo exacta aut facta fuerint, contra Deum et ecclesiasticas regulas, quæ Spiritu sancto dictatæ et Christi sunt sanguine confirmatæ, irrita sanctæ Scripturæ paginis declarantur ; et exigentes atque facientes medicamento exinde salutaris poenitentiae indigent ^a. Propterea exspectate, domine, patienter sicut princeps christianus Ecclesiæ filius, et honorate sanctæ Ecclesiæ rectores ; ut vos honoraret qui nobis dixit : *Qui vos audit, me audit : et qui vos spernit, me spernit* (Luc. x). Et : *Honorantes me*

A honorabo, et hi qui tenuerunt me, erunt ignobiles (I Reg. ii). Et : *Qui vos tangit, tangit pupillam oculi mei* (Zach. ii). Et in psalmo : *Nolite tangere christos meos, et in prophetis meis nolite malignari* (Psal. civ) ; quoniam : *Qui malignantur, id est maligna agunt, exterminabuntur : sustinentes autem Dominum ipsi hæreditabunt terram* (Psal. xxxvi), hoc est regnum Dei. Et cum venerit tempus et locus, sicut superius diximus, loquemur cum nostris confratribus ; et sicut Domini justis dispositionibus viderimus convenire, sine dubio faciemus. Et non est rationabilis causa quæ contra hoc quod petimus vos debeat stimulare : quia non sumus hujusmodi homines ut cum cognoverimus voluntatem Domini, velimus aut debeamus quomodo resultare, vel rixas et dissensiones seu ^B seditiones, quas vulgus *verras* nominat debeamus commovere, conserere, vel tenere, quos Dominus pacis prædicatores et sectatores voluit ordinare, et peccata nostra atque nobis commissorum, et etiam totius populi, constituit plangere et curare, et bellum cum vitis, et pacem cum fratribus jussit habere. Nos equidem pacem et quietem, non rixas et bella, optamus et quærimus : Quia sicut dicit Apostolus : *Non sunt nobis carnalia arma, sed spiritualia, et potentia* (II Cor. x), quibus sumus calceati pedes in præparatione evangelii pacis, induti lorica justitiæ et galea salutis, accincti lumbos in veritate, habentes scutum fidei et gladium Spiritus sancti : quia non est nobis collectatio adversus carnem et sanguinem, sed adversus principes et potestates, adversus rectores tenebrarum harum, contra spiritalia nequitiae in cælestibus. Et non militamus terreno regi, ^C sed cælesti, pro salute et nostra et terreni regis, et totius populi nobis commissi : quorum officium est nulli nocere, contra neminem infideliter agere, omnibus autem velle prodesse. Tandem, domine nobis rex, contra Deum et contra animam vestram non audiat illos qui dixerint, si forte vobis dixerint : non tibi sit curæ, rex, quæ tibi referunt illi fellones atque ignobiles ; hoc fac quod tibi dicimus, quoniam cum nostris, et non cum istorum parentibus, tenuerunt parentes tui regnum. Nos autem obsecramus dominationem vestram, attendite potius, si christianus rex estis, sicut et Deo gratias egistis, et in illum creditis, et per illum regnare vultis, ^D *Per quem*, sicut scriptum est, *reges regnant* (Prov. viii), et cujus est regnum, imo orbis terre et plenitudo ejus, quia idem Deus in carne veniens, qui solus rex fieri potuit et sacerdos, et in cælum ascendens suum regnum, id est suam Ecclesiam, inter pontificalem auctoritatem et regiam potestatem gubernandum disposuit, et non elegit ad hoc divites et nobiles, sed pauperes et pisces, et sicut scriptum est : *Ignobiles et contemptibilia mundi elejil, ut conjunctat fortia* (I Cor. i). Et fieri potest ut tales vobis ista dicant (si forte minus necessario Deum timentes vobis dixerint) cum quorum parentibus diabolus, qui secundum Scripturam : *Est rex super omnes filios super-*

^a Voyez le concile de Pontyon, de Fan 876. où Hinemar prêta le serment de fidélité au roi

bis (Job xli), regnum Christi, quod est Ecclesia, conturbaverit, et nunc eos in regno suo, id est in inferno, retineat, et secum in sæcula retinebit. Pro certo autem sciatis quia cum nostris parentibus, id est cum apostolis, Christus, Rex regum, regnum suum, id est Ecclesiam, conquistavit, ampliavit, et rexit, et per nos et nobiscum, utinam non ad iudicium nostrum dicamus ! eandem Ecclesiam, id est regnum suum, quotidie acquirit, auget, atque gubernat idem Dominus Jesus Christus, sicut dictum est a Domino Ecclesiæ per prophetam : *Pro patribus tuis nati sunt tibi filii* (Ps. xlvii ; id est pro apostolis, creavit tibi episcopos, qui te regant et doceant. Cum qua Ecclesia nobis a Deo commissa, rex christiane et domine, sicut litteris vestris iussistis, jejuniis et orationibus, ac litanis, Dominum summum gubernatorem in navi sanctæ Ecclesiæ fluctuante in hoc mare, id est sæculo naufragoso, peccatis nostris communibus dormientem pulsare et excitare, et pro vobis deprecari studebimus : ut quantocius pro sua ineffabili pietate evigilet et imperet ventis et mari, id est tentationibus diabolicis et inquietudinibus sæcularium hominum, ut redeat quantulacunque tranquillitas, gratia et misericordia ejusdem Domini nostri Jesu Christi, cui est et sit potestas et honor, et gloria et imperium, in sæcula sæculorum. Amen.

EPISTOLA II.

AD NICOLAUM PAPAM.

De vacatione sedis Cameracensis, et de Balduini et Judith conjunctione : deque Rothadi depositione, ac hæresi Gothesculci.

(Ex Sirmondo.)

Domino unice singulariterque suscipiendo Patrum Patri, et summa veneratione honorando, reverentissimo papæ NICOLAO, HINC MARUS, nomine non merito Rhemorum episcopus, ac plebis Dei famulus.

In epistola vestræ sanctitatis, per Odonem episcopum episcopis in regno Lotharii pro præjudicio Cameracensis Ecclesiæ directa, relegi vestram auctoritatem sciscitaturum, cujus neglectu eadem Ecclesia ultra decimum mensem pastore vacaret. Unde ne ut negligens a vestro apostolatu succensear, indico auctoritati vestræ, post directas Lothario et episcopis regni ejus, atque Hilduino, qui eandem Ecclesiam irregulariter occupat, ita ut antequam ipsam mitteretis epistolas, hæcenus præjudicium permanere : meque Lotharium regem et legatis et litteris, prout potui, sæpe et eo usque commonuisse, donec regiis suis litteris mihi respondit, Hilduinum ad vestram auctoritatem suum legatum misisse, et nihil aliter de præfata Ecclesia nisi ut egerat disponere debuisset, donec a vobis inde responsum acciperet.

Balduinus quoque in proximo nunc decurso mense Octobrio, quinto Kalendas Novembris, per duos homines suos mihi litteras auctoritatis vestræ direxit, in quibus continetur, ut easdem litteras coepiscopis provinciæ nostræ legerem, et Judith paternis ac maternis obtutibus præsentandam suscipere, si tamen intelligeremus, quod confestim præfatus ex-

cellentissimus rex noster, quæ de illa vobis scriptis et verbis per legatos vestros apostolatu vestro renuntianda sponndit, adimplere vellet. Quod si eorum animos ad in protelandum esse intentos investigare possemus, nequaquam eam reciperemus. Alioquin, id est si aliter egissemus, gratia et communione vestra frui nequaquam valeremus. Quam vestræ auctoritatis epistolam ut oportuit reverenter suscepi, et coepiscopis nostris eam relegi, et pro præfata Judith apud patrem et matrem illius quantum potuimus, ut mandastis communiter intervenimus et paternis ac maternis obtutibus eam præsentare studuimus. Post quæ voluimus, quia sic nobis secundum sacras regulas, sicut eas intelligimus, visum fuerat (non enim sine dignis pœnitentiæ fructibus absolvi posse putamus, quod anathematis vinculo a sacris regulis innodatum videmus) ut juxta ecclesiasticam traditionem prius Ecclesiæ quam læserant satisfacerent, et sic demum quod præcipiunt jura legum mundialium exsequi procurarent. Sed quoniam litteras vestras, quæ inde nihil præceperunt, imo etiam nullam protelationem in eorum conjunctione fiendam significaverunt, sibi sufficere voluerunt, et sine vestra auctoritate, ad quam clamaverant, cogi nisi alio se modo submitterent non debuerunt : ex altera epistola vestræ sanctitatis eis retuli, quod non leges ecclesiasticas dissolvistis, sed preces pro eo misistis, qui puniri secundum leges mundanas poterat, quatenus locum pœnitendi haberet quod contra leges divinas admiserat. Sic et Salvator noster, qui vult omnes homines salvos fieri, et neminem vult perire, in cruce apud Patrem jure sacerdotis pro suis persecutoribus interessit ; quod in eis qui post passionem ejus crediderunt, et compuncti pœnitentiam egerunt, qui cum Patre omnia donat efficaciter impetravit. Ad cujus instar apostolorum vicarius, ad quorum limina contugerunt, et catholicæ atque apostolicæ Ecclesiæ summus pontifex, quod in hominem regem et in leges mundi peccatum est perdonari petistis : ut quod in regem cœli et terræ, et in leges cœlestis regni offensum erat, haberent inducias per pœnitentiam abolendi. Econtra carnales, et etiam quidam eorum qui antea conjunctioni hujusmodi contradicebant, hæc defensione ut eis visum fuerat se protegentes, sed sicut se habet veritas salute nudantes, ab istius novissimæ vestræ epistolæ verbis recedere noluerunt, quam sine protelatione eorum conjunctionem debere fieri demonstrare dicebant. Dicenti vero mihi, quia pro nulla potestate terrena quod de ecclesiasticis regulis intelligeretur dimittere debere : maxime cum etiam necum, imo cum Deo, domnus rex noster filius vester Carolus faceret : quasi consulendo mihi quidam hoc dederunt consilium, in quo non meis, sed verbis eorum utar, quæ mansuetudo vestra, velut exemplum et doctrix disciplinæ Dei, mitis et humilis corde ac patiens æquanimitèr sustinebit, dicentium, ut quia non sæcularis, sed ecclesiastica pietas de hoc mihi negotio

imperaret, conspirationem resistentium aliquantum A
 lum declinarem, ne quisquam æmulus noster vestræ
 sanctitati suggereret, quasi in contemptum sancti
 Apostolatus vestri et sedis apostolicæ hoc egissent,
 et vestræ mansuetudinis erga me animum commo-
 veret, et quæcumque excommunicationem, sicut
 pro Rothado actum fuerat (quod tamen ad me non
 parvenit, nisi quantum Odo episcopus, et postea
 Luido detulit), antequam ad auctoritatem vestram
 gestorum seriem inde mittere valuissimus, vel quo-
 modo res gesta fuerit per legatos vestros resciretis,
 obtineret. Præsertim cum in hac epistola vestræ
 auctoritatis legatur, quod si aliter egissemus quam
 in ea scriptum est, gratia et communione vestra
 frui nequaquam valeremus. Quo contra mihi di-
 centi hoc in epistola vestra ob id posuisse, ne fe-
 mina illa a nobis deciperetur, et non ob hoc, ne
 Ecclesiæ satisfaceret, responderunt, cur aliter vellem
 vestram epistolam intelligere, quam vobis placuit
 eam componere, cum de in præterito mihi trans-
 missis ejus sensum possem manifeste cognoscere.
 Quapropter memor præteritarum epistolarum mihi
 et episcopis regni filii vestri domni Caroli a vobis
 missarum, attendens etiam quæ in epistola nuper
 per Luidonem mihi benignitas vestra mandaverat
 (hæc enim in Antisiodoro post adventum Luidonis
 ventilabantur) inter metum præteritarum et spem
 posterioris epistolæ mihi mitiora monstrantis, con-
 tentionem in hac causa dissimulando vitavi, et con-
 descensionem quasi in tempus aliud differendo
 dissimulavi: exspectans ut in causæ hujus quæ
 instat dispositione vestra, ex Rothado discere valeam
 qualiter de reliquo in hujusmodi agere debeam.
 Sicque nihil nobis de ecclesiastico ministerio eis
 interdicentibus, sed tamen quod valuimus nostram
 præsentiam ab hoc negotio subducentibus, Balduinus
 et Judith jura legum sæcularium quæ elegerunt
 exsequi studuerunt. Dominus etiam noster rex filius
 vester huic desponsationi et conjunctioni interesse
 non voluit: sed missis publicæ rei ministris, sicut
 vobis promisit, secundum leges sæculi eos uxoria
 conjunctione adinvicem copulari permisit, et hono-
 res Balduino pro vestra solummodo petitione do-
 navit.

Denique ad epistolam vestræ auctoritatis, ad quam
 me misistis, obedienter audiendam, generaliter om-
 nibus episcopis regni domni nostri Caroli regis
 gloriosi pro Rothadi causa per Odonem episcopum
 transmissam, sicut litteris exiguitati meæ directis
 sanctitas vestra præcepit, conveni, et simul cum
 eisdem venerabilibus episcopis, quantum ex me
 fuit, mox antequam synodus solveretur, vestram jus-
 sionem de eodem Rothado, ne aliqua mora vestræ
 præceptionis implendæ, aut de superventione paga-
 norum, aut de alia qualibet causa interveniret, ad-
 implere curavi, sicut et legati domni regis ac nostri
 et litteræ pleniter vestræ notum facient sanctitati.
 Sed quoniam causa interveniente, quam vobis ipsi
 legati referent, statim in præcepimus datis litteris,

et designatis nostris vicariis, ad vestram præsentiam
 cum eodem Rothado ire non potuerunt, et ob id
 diutius quam voluerimus immorati fuerunt: interea
 Luido legatus domni nostri regis a vestra rediens
 sanctitate pridie Kalend. Decembris vestras aposto-
 licas litteras domno nostro regi filio vestro in
 civitate Antisiodoro detulit; et quia filius ejus atque
 æquivocus Carolus, qui patris animum in quibusdam
 offenderat, et ob id ad ejus præsentiam
 quorundam suggestionem aliquantulum venire distu-
 lerat, patrem legatis suis petiit, ut meam parvita-
 tem cum aliis quibusdam suis fidelibus pro eo ad
 ipsius vestigia deducendo transmitteret: quatenus
 nostro interventu patrem placabiliorum invenire val-
 leret, exiguitatem humilitatis meæ dominus rex illuc
 in suum venire servitium jusserat. Quo mox ut veni,
 mihi litteras vestras legendas donavit. In quibus
 licet pro sua dignatione sublimitas vestra humilita-
 tem meam sine ulla meriti prærogativa benigne
 traciaverit, et a mea insipientia scripta, sapientia
 vestra, supra id quod scio atque intelligo, non tam-
 en absque inducto cauterio, laudare dignata
 fuerit: tamen in eis videor mihi videre vobis multo-
 loquium meum increescere. Unde dignetur sanctitas
 vestra dignanter suscipere, quod beatus Augustinus
 de suo multiloquio Domino dominorum audacter
 non dubitavit dicere (*lib. xv de Trinit. in fine*), cum
 se inde apud eum voluit excusabilem reddere, inter
 alia scribens: « Loqui multum non est nimium, si
 tamen est necessarium. »

Qua de re, sanctissime domine et Pater reve-
 rentissime, æquanimiter sustinete modicum quid
 insipientiæ meæ, sed et supportate me, si adhuc
 quiddam de Rothadi causa vobis jam sufficienter
 notissima quasi repetens scribo. Cum quo, quia
 vobis placet cui euncta bona placent, mittimus vi-
 carios nostros, non ut accusatores ad confligendum,
 sed ut a Rothado, atque a vicinis nostris, qui causam
 pleniter ac veraciter aut nesciunt aut scire non
 volunt, accusati. Quod non in contemptum sedis
 apostolicæ, appellantem Rothadum secundum Sar-
 dicenses canones sedem apostolicam, sed eum qui
 ad electorum judicium de certis capitulis provoca-
 vit, juxta Carthaginenses et Africanos canones, ac
 decreta beati Gregorii, regulariter judicavimus
 vestræ summæ auctoritati humiliter intimandum.
 Absit enim a nobis, ut privilegium primæ et summæ
 sedis sanctæ Romanæ Ecclesiæ pontificis pro sic
 parvo pendamus, ut controversias et jurgia tam su-
 perioris quam etiam inferioris ordinis, quæ Nicæni
 et cæteri sacrorum conciliorum canones, et Inno-
 centii atque aliorum sanctæ Romanæ sedis pontifi-
 cum decreta, in synodis provincialibus a metro-
 politanis præcipiunt terminari, ad vestram sum-
 mam auctoritatem fatigandam duamus. At si forte
 de episcopis causa nata fuerit, unde certa et ex-
 pressa in sacris regulis non habeamus judicia, et
 ob id in provinciali vel in comprovinciali nequeat
 examine diffiniri, ad divinum oraculum, id est

apostolicam sedem nobis inde est recurrendum. Si etiam de majoribus causis a provinciali episcopo ad electorum iudicium non fuerit provocatum, et in aliqua causa idem episcopus fuerit iudicatus, id est a gradu suo in comprovinciali synodo dejectus, et putat se bonam causam habere, et appellaverit qui dejectus est, et confugerit ad episcopum Romanæ Ecclesiæ, et voluerit se audiri : si justum putaverit ut renovetur examen, scribendum est ab his, qui causam examinarunt post iudicium episcopale, eidem summo pontifici, et ad illius dispositionem secundum septimum Sardicensis concilii capitulum renovabitur examen. Nam de metropolitano per sacras regulas constituto, qui ex antiqua consuetudine ab apostolica sede pallium accipit, sicut Leo ad Anastasium, quod et Nicænum concilium innuit, et cæteri Romanæ sedis pontifices in decretis suis ex sacris canonibus monstrant, sedis ipsius pontificis etiam ante iudicium est sententia præstolanda. Is enim est qui secundum Ezechielem prophetam moratur in gazophylacio quod respicit viam meridiana[m] et excubat in custodiis templi (*Ezech. xi., 45*). Et nos metropolitani ad comparationem illius sumus qui in ministerio altaris, quod est ante faciem templi, in quo carnes incenduntur, servimus, et controversias carnalium in synodis provincialibus laborantes dirimimus, et de majoribus ac majorum causis ad examina summæ sedis pontificis post iudicium referre curamus. Homines enim sub illius potestate sub nobis commilitones habemus, et dicimus huic vade et vadit, et alio veni et venit : quoniam ut Leo dicit (*epist. 82, ad Anastasium*) : « Et inter beatissimos apostolos in similitudine honoris fuit quædam discretio potestatis, et cum omnium par esset electio, uni tamen datum est ut cæteris præemineret. De qua forma episcoporum quoque orta est distinctio, et magna ordinatione provisum, ne omnes sibi omnia vindicarent, sed essent in singulis provinciis singuli, quorum inter fratres haberetur prima sententia, et per quos ad unam beati Petri sedem universalis Ecclesiæ cura conflueret, et nihil usquam a suo capite dissideret. Qui ergo scit se quibusdam præpositum, non moleste ferre debet aliquem sibi esse prælatum : sed obedientiam quam exigit, etiam ipse dependat. » Quam Rothadus a suis exigere magis, quam sacris regulis sategit dependere, cum etiam sancti angeli in cælo legantur suis potioribus obedire. Et ideo ad hoc pervenit ut deici promeruerit, quem per plures annos et beneficiis impensis, et monitis atque obsecrationibus, per me et per coepiscopos, ac per quoscunque familiares potui, ad obediendum sacris regulis commovere curavi. Multoties etiam et per litteras metropolitanas, et ex apostolicæ sedis auctoritate, minas ei inculcare curavi, et ex lectione catholicorum quam graviter offendeat ei ostendere studui ; ad quæ respondebat, quia nihil aliud facere sciebam, nisi ei meos libellos tota die ostendere. Unde a multis et frequen-

tissime redargutus fui, cur incorrigibilem et ministerio sacro inutilem tandiu scienter contra Dei voluntatem et sacram auctoritatem portarem. Ego vero, quamvis sæpissime et regem, et coepiscopos ac vicinos suos, et etiam me multo sæpius, quasi ex studio ad iracundiam provocare satageret, licet non posset, sciens periculosissimum esse in sacerdote perturbatam et præcipitem iram, præcipitemque proferre sententiam, et persecutionum supplere sævitiam, dissimilitudines morum, contumacias inobedientium, et malignarum tela linguarum, diu illum non sine timore de periculo animarum sibi commissarum portavi, et cum amplius portare non debui, ad plurimorum episcoporum concilium, ut vel eos audiret, deduxi : quorum non audire consilium, sed adversum me postulare iudicium maluit. Ad cujus petitionem ut ei satisfacere[m], ut vel sic erubesceret, et a cœpta se stultitia revocaret, iudicio me devinxi, velut jam vestræ sanctitati plenius aliis litteris intimavi, et replicare me pro vestræ auctoritatis satisfactione cogit necessitas, ut cognoscatis quoniam nihil in eum egi animo inimico, sed zelo divino, quantum in conscientia mea perspicere valeo. Sed et domno regi, ac episcopis regni ejus, et quamplurimis tam ecclesiasticis quam sæcularibus viris, hæc sunt nota quæ dico. Post depositionem autem illius, obtinui ut unam abbatiam valde bonam ei domnus rex et episcopi consentirent, et omnes nos illi sicut patri de nostris impendiis serviremus : quatenus qui in deliciis vitam semper perduxerat, non frangeretur. Tantum ut seditiosus et molestus Ecclesiæ cui præferat esse non decertaret. Quod primum quidem acquievit. Sed, ut dicunt qui hoc se scire testantur, quidam episcoporum regni Lotharii, zelo amaro contra nos ducti, quia illorum consiliis de Waldrada non acquievimus, et etiam aliqui de Germania, ut quidam dicunt, ad Ludovici sui regis suasionem, quoniam cum eo non feci sicut Rothadus in fratris sui de regno expulsionem, persuaserunt eidem Rothado, ut non se a seditione movenda concederet, et ipsi apud vos obtinerent ut restitueretur. Nunc autem, sicut jussistis, ad vestram præsentiam et dispositionem illum perducere apud domnum nostrum regem filium vestrum obtinimus, credentes quia quod Domino inde placabilis erit, cordi vestro inspirare dignabitur. De quo quia benignissima dignatio vestra mihi servo per Luidonem dignata est scribere, ut juncto mihi integro collegio fratrum, secundum modum ibi descriptum, vestra apostolica censura fretus, studerem illum pristino reintegrare decenter officio : sciat reverentissima et amantissime colenda dulcissima vestra paternitas, hoc me agere nequissime, pro his quæ continentur in subditis. Videlicet quia cum litteris ad vestram auctoritatem deferendis idem Rothadus jam commissus erat eis, qui ad vestram præsentiam illum deducerent, et mihi non erat possibile integrum fratrum collegium convocare : quoniam, ut supra scripsi, a diocesi nostra

longius eram remotus, in filii vestri regis nostri servitio : et quoniam sine illorum iudicio, qui in ejus depositione fuerant, et quibus inde scripsistis, restitui regulariter non valebat : et episcopi aliarum provinciarum per meam convocationem in multis occupati congregari non poterant. Sed et coepiscopi Rhemorum provinciæ ab ipsa synodo, in qua epistolam sanctitatis vestræ audivimus, causa resistendi Normannis ad suas sedes festinare maturaverunt. Pauci etiam numero episcopi, qui mecum in filii vestri regis nostri erant obsequio, cum eis benignitatis vestræ commendationem de Rothado relegi, responderunt non se scire talem vitam atque intelligentiam, taleque studium sacri ministerii in eo fuisse, ut in hoc se miscere auderent ; præsertim cum is, qui antea aliquam reverentiam de dejectione sua habebat, et semper inobediens et sacris regulis, et regiæ dignitati, et metropolitano privilegio fuerat, nunc effrenatus ad multorum malum exemplum, et plurimorum benevolentium scandalum, desævire et negligentius atque perniciosius vivere voluntatibus suis serviens cum libertate deberet. De eo autem quod benignitas animi vestri pensans non belluinum, sed humanum hominis animum, scripsit dicens : « Fortasse cognoscet dilectum suum, et sua sponte in iudicio quo iudicatus est perseverare deliget. Quod si fecerit, apud regem Carolum, dilectissimum videlicet filium vestrum, agendum est, ut liberalitate sua eidem congrua beneficia, quibus sufficienter cum suis sustentari ac honorifice degere possit, benigno mentis largiatur affectu : » sciat dignatio vestra, non illum esse huiusmodi temperantiæ. Nam ab eo quod cœpit nunquam potuit revocari.

Quæ etiam ego famulus vestræ dominationis meditatus sum cum corde meo, et conferens cum fidelissimo filio vestro domno meo rege glorioso, in hac causa providi, vestræ sapientissimæ auctoritati scribere dignum duxi. Id est, quia licet fretus vestræ auctoritatis litteris, per Luidonem meæ exiguitati directis, quarum mentionem fecistis in epistola, quam filio vestro domno nostro regi misistis, quasque illi relegi, apud eum obtinere possem, ut missis suis, qui Rothadam ad vestram deducendum præsentiam susceperunt, mandaret, quatenus ab arripiendo Romam itinere expectarent, donec oportunitatem tempus episcopos regionum nostrarum convocandi adveniret : quia non erat ratio, ut aliis notificaretur, cur Rothadi transmissio tardaretur antequam episcopis vestræ auctoritatis epistola legeretur, poterat fieri, ut qui me divina clementia et sua benignitate et amoris devotione colunt, et aliquid æstimant esse cum nihil sim, cognoscentes meo obtentu id accidisse, in me scandalum paterentur, quasi contemni aut negligi facerem vestram commendationem, qui intra constitutos a vobis dies in epistola per Odonem episcopum missa, ad obediendum vestram accelerari fecerim quantum potui jussionem. Et si quando in unum convenirent, epi-

scopos, qui sciunt et me una cum eis scire norunt Rothadi negligentiam et diutinam in sacro ministerio inutilitatem, de ejus restitutione alloquerer, omnes me insuflarent, et amentem penitus iudicarent. Si etiam Rothado, ut se concrederet, quod non suæ salutis intuitu faceret, beneficia nos impetraturos promitteremus, quoniam pene omnes in istis provinciis sciunt, quia secundum Carthaginenses et Africanos canones, et decreta beati Gregorii, electorum se commisit iudicio, et amplius quam quingenti interfuerunt diversi ordinis viri, videntes quando calix aureus cum gemmis a caupone et tabernaria per missum regis de illius pignore sumptus et delatus fuit in synodum, et scientes coronas argenteas a Judæo, cui illas dederat, resumptas, et facultates ecclesiasticas ab eo suppressas, et latenter commendatas, indeque receptas et Ecclesiæ redditas, et vascula argentea, quæ non pauci ponderis a longo tempore in Ecclesia pependerunt. Sed et alia, quæ sui decessores ac prædecessores, cæterique fideles pro remedio animæ suæ eidem Ecclesiæ obtulerunt, ab eo sine consensu metropolitani ac coepiscoporum, et sine œconomi ac presbyterorum et diaconorum suæ Ecclesiæ consensu pro libitu suo donata. Cum etiam beatus Gregorius multoties in epistolis suis ex sacris canonibus scribat, quæcumque episcopus post ordinationem episcopatus acquisierit, omnia esse Ecclesiæ in qua exstitit ordinatus. Unde constat quia nec ipse sine œconomo et conscientia clericorum illa debeat dispensare.

Sed et omnes urbis incolæ ac populi, qui cum rege et episcopis ad synodum convenerunt, et ut revera ad spectaculum currentes, eum viderunt usque ad ostium synodi venientem, et inde ut maniacum redeuntem : quique sciunt quantum benignitatem regis et fratrum spernens, qualiter de certis capitulis, unde sacri canones expressa decreverunt iudicia, iudicatus lacrymantibus rege et episcopis durior saxo recesserit, putarent nos, qui eum secundum sacros canones (sicut eos intelleximus, iudicavimus, et postea ut ipsi præcipiant canones per coepiscopum nostrum qui eidem iudicio interfuit, prius iudicium nostrum de eo referre, et nunc illud ipsum cum nostris litteris atque vicariis, sicut iussistis, ad apostolicam sedem, quæ paternos canones servandos confirmat, et confirmatos ac observandos sua observatione demonstrat, dirigere procuravimus,) de vestræ auctoritatis iustitia et æquitatis libramine dubitare, et ideo ut se concrederet locarium ei promittere, sicque nos ut insanos merito denotarent. Cum etiam si fieri posset, quod ab illa prima et sancta sede ac summo apostolatu vestro fiendum non creditur, ut talis a vobis cognitus restitutus in ordine nominetur, nulla nobis de cætero conscientia de sibi a vobis commissis animabus esset periculum. Et cum omnes in istis regionibus sciant quam negligens et contemptor sacrorum canonum, et quandiu quamque patienter atque benigne fuerit toleratus, et a quam invitis, quia se

corrige noluisset, secundum sacras regulas, sicut eas intelleximus, fuerit iudicatus, nullam habere possemus verecundiam de restitutione illius, si foret facta a vestri summi pontificatus pietate, quia omnes senes cum junioribus scimus nostras Ecclesias subditas esse Romanæ Ecclesiæ, et nos episcopos in primatu beati Petri subjectos esse Romano pontifici, et ob id salva fide, quæ in Ecclesia semper viguit, et, Domino cooperante, florebit, nobis est vestræ apostolicæ auctoritati obediendum. Nobis quippe cum aliis quibusque scriptum est, quia Jesus erat subditus parentibus suis (*Luc. II, 51*), nobisque item scriptum est: *Obedite præpositis vestris, et subjacetis eis* (*Heb. XII, 17*); et: *Nihil per contentionem, neque per inanem gloriam* (*Philip. II, 3*); et: *Et si quis vult contentiosus esse, nos talem consuetudinem non habemus, neque Ecclesia Dei* (*I Cor. XI, 16.*) Propterea locutus cum fidelissimo filio vestro, domno meo rege glorioso, illi replicavi, quod sæpe inculcavi, quodque libentissime accepit et adimplere cupit, quia sicut Domini est terra et plenitudo ejus, orbis terrarum et universi qui habitant in eo, et ipsius est regnum et cui voluerit dabit illud, ita ipse supra fundamentum apostolicæ petræ suam fundavit Ecclesiam, quam et ante passionem et post resurrectionem suam, speciali cura et singulari privilegio beato Petro, et in illo suis commisit vicariis. Cujus sedem suæque sedis pontificem qui honorat, illum honorat qui dixit: *Qui accipit si quem misero, me accipit* (*Matth. X, 40*); et ab ipso honorabitur dicente: *Honorantes me honorificabo, et qui contemnunt me erunt ignobiles* (*I Reg. II, 30*).

Idecirco quia multi sciunt qualiter se Rothadi reclamatio habeat, et quidam inde aliter dicunt, et omnes generaliter sciunt, quoniam vestra auctoritas illum cum nostris vicariis ad suum præcepit destinari iudicium, dignum et justum est, ut quemcumque episcopum Romanus pontifex ad se Romam venire mandaverit, si infirmitas vel gravior quæcumque necessitas vel impossibilitas, sicut sacri præfigunt canones, eum non detinuerit, ad illum venire studeat, multo magis etiam is, quem pro tali querela ad se quocumque modo clamantem præsentiam suæ indicat exhibendum. Et quicumque viderit vel audierit, quod rex et episcopi apostolicæ sedis summum pontificem prompte obaudiunt, et honorant, et promptius et humiliter eis subjecti sui obediunt. Nam, ut beatus Gregorius dicit, sicut languente capite subjecta membra in cassum vigent: ita gloria et honore coronato, id est honorificato ac decorato capite, subjecta membra ejus honore ac decore fulgebunt. Et Rothado in nullo poterat melius satisfieri, quam si ad vestram pergeret præsentiam, et ei tantorum subscriptionibus episcoporum, qui Deo et vobis mentiri nolunt, et allegationibus tot vicariorum eorundem episcoporum, fuerit illum bonam causam nequaquam habere ostensum. Quamobrem sibi ipsi, et non vobis reputare debuit, quia sine bona causa se et multos alios fatigavit.

A Unde illum vestra discretissima pietas, quæ compassionem proximo, et rectitudinem dictare vitiiis novit, suis apostolicis litteris sufficienter præmonuit: quique inter alias seordias tantæ duritiæ esse dignoscitur, ut cum multoties sine ullo respectu timoris vel amoris divini, et absque ulla humana verecundia, per tot annos et in tantis causis, toties sacris canonibus, et decretis sanctæ sedis Romanæ pontificum, et suæ metropolis privilegio, ac synodalibus judiciis resultaverit, et per tantos annos tantisperque toleratus a sua stultitia se revocare contempserit, a rege et episcopis multipliciter obsecratus in hoc adduci potuit, ut sacris canonibus et decretis sanctæ sedis Romanæ pontificum, et secundum ea suæ metropolis privilegio de cætero se obediturum subscriberet, quoniam sine horum observatione nemo nostrum potest esse episcopus, et sic pace fraterna in omnibus potiretur. Postea autem sua sponte in libello suæ professionis, per quem ad electorum iudicium provocavit, hæc se observasse impudenter, quia scientibus cunctis mendaciter, synodo misit, et sic ad iudicium provocavit, quæ se servaturum ne iudicaretur subscribere detrectavit. Quod ideo, sicut postea nobis dixerunt qui ab ipso audierunt, subscribere noluit, quod et nos episcopimus, ne vinceretur: sed si in nostra rex et episcopi permaneremus sententia, Romam iret antequam vinceretur, et quando illuc veniret, his per vestram jussionem, cum a vobis foret nobis nolentibus absolutus, subscriberet: non intelligens, imo intelligere non valens (excæcavit enim eum malitia sua) vestram auctoritatem sapientissime intelligere, quare Dominus de cælo alloquens Paulum et dicenti: Quid me jubes, Domine, facere? non omnia quæ agenda illi erant exposuit, sed ad Ananiam, a quo agenda auditorus et accepturus erat, illum direxit (*Act. IX, 6*). Sic et angelus Cornelium, postquam illum exauditum esse denuntiavit, ad Petri doctrinam atque obedientiam misit (*Act. X, 5*). Quem licet ante baptismum sancto, ut ita dicamus, Spiritu baptizatum, beatus Petrus illius baptismate, qui baptizat in Spiritu sancto, et in quo credentium corda fide purificantur, baptizari præcepit. Unde facta questione contra eum etiam a minoribus suis, tamen fidelibus, cur ad gentes intraverit, isdem apostolorum princeps summorum gratia donorum repletus, et innumerabilium miraculorum potestate suffultus, querelæ non ex potestate, sed ex ratione respondit, causamque per ordinem ea mansuetudine exposuit, qua humilitate præfatus Cornelio se adorare volenti dixit: *Vide ne feceris: nam et ego ipse homo sum sicut et tu* (*ibid., v, 26*). Si enim in querela fidelium, ut Gregorius dicit, aliquid de sua potestate diceret, profecto doctor mansuetudinis non fuisset. Humili ergo eos ratione placavit, atque in causa reprehensionis suæ humiliter rationem reddidit, et etiam testes adhibuit, dicens: *Venerunt autem mecum et sex fratres isti* (*Act. XI, 12*). Cujus humilem auctoritatem, et

mansuetissimam potestatem. et rectissimam prædicationem dicentis : *Non dominantes in clero, - sed forma facti gregis (I Petr. v, 3)*, secutus beatus Gelasius in decretis suis ad omnes episcopos de institutis Ecclesiasticis dicit (*epist. 6 ad universos episcopos*): « Cumque nobis contra salutarium reverentiam regularum cupiamus temere nihil licere, et cum sedes apostolica super his omnibus, favente Domino, quæ paternis canonibus sunt præfixa, pio, devotoque studeat tenere proposito, satis indignum est, quemquam vel Pontificum, vel ordinum subsequentium, hanc observantiam refutare, quam beati Petri sedem et sequi videat et docere : satisque conveniens sit, ut corpus Ecclesiæ in hac sibimet observatione concordet, quam illic vigere conspiciat, ubi Dominus Ecclesiæ totius posuit principatum. » De Barnaba quoque et Saulo dicente veraciter, Paulus apostolus non ab hominibus, neque per hominem, sed per Jesum Christum et Dominum Patrem. Qui postquam diutius frui sunt apostolorum consortio, non ipsis apostolis, sed juxta fidem sacræ historiæ, ministrantibus Domino prophetis et doctoribus, qui erant Antiochiæ, dixit Spiritus sanctus : *Separate mihi Barnabam et Saulum in opus ministerii, ad quod assumpsi eos. Tunc jejunantes et orantes, imponentesque eis manus, dimiserunt illos (Act. xiii, 2)*. Et ipsi quidem missi a Spiritu sancto abierunt vocati apostoli, et in sequenti anno, id est quarto decimo post passionem Domini, licet qui operatus est Petro in apostolatam circumcissionis, operatus sit et Paulo inter gentes, tamen juxta conductum Jacobi, Cephæ et Joannis, gentium magisterium una cum Barnaba Paulus accepit. Idem quoque Paulus apud Corinthios negligentibus rectoribus de incestuoso scripsit : *Congregatis vobis et meo spiritu, tradidi hujusmodi in interitum carnis Satanæ, ut spiritus salvus sit in die Domini (I Cor. v, 4)*. Ipsi enim Corinthiorum rectores illum tradiderunt in interitum carnis Satanæ : et Paulus cognito ejus opere, sua auctoritate cum illis, et comperta ejus pœnitentia, ipsi eum restituerunt, et Paulus sua auctoritate cum illis : *Cui inquit, aliquid donastis, et ego, nam et ego si quid donavi, propter vos in persona Christi (I Cor. ii, 10)*. Hinc beatus Gregorius (*Moral. lib. xxxiii, cap. 8*) : « A bono, inquit, vestro non dissentio, meum sit quod ipsi fecistis. Cui velut si dicere præsumamus, quare ita caute discipulis te copulas ? quare vel te illorum, vel illos tuis actionibus tam sollicita mente discipulorum confirmas ? *ut non circumveniamur, inquit, a Satana (ibid. v, 11)*. Non enim ignoramus cogitationes ejus, id est ne hoc quod bene mens inchoat ipse in malitiæ finem vertat. Et Innocentius : Hæc ad Corinthios apostolica est declarata benignitas, ut in uno spiritu ductam ac reductam sententiam boni semper indifferenter sequantur. » Et Leo ex Apostolo (*Leo, epist. 88, ad Anastasium*) : « *Nemo quod suum est querat, sed quod alterius (I Cor. x, 24)*, et : *Unusquisque proximo suo placeat in bono ad adificationem (Rom. xv, 2)*. » Non enim poterit

A unitatis nostræ firma esse compago, nisi nos ad inseparabilem soliditatem vinculum charitatis astrinxerit : quoniam sicut in uno corpore multa membra habemus, omnia autem membra non eundem actum habent : ita multi unum corpus sumus in Christo, singuli autem alterius membra. Connexio totius corporis unam sanitatem, unam pulchritudinem facit. Et hæc quidem connexio totius corporis unanimi- tatem requirit, sed præcipue exigit concordiam sacerdotum. Quibus et si ordo est generalis, non tamen communis est dignitas omnibus.

Hæc autem servata altiori intelligentia circa supradictos sunt acta, et a prædictis docta, ut cognoscatur, qualiter minores potioribus debeant obedire, et potiores minoribus providere, et ordo a Deo dispositus ab omnibus et in omnibus valeat conservari. B Unde summus Ecclesiæ pastor docet : *Si quis ministrat, tanquam ex virtute quam administrat Deus, ut in omnibus honorificetur Deus (I Petr. iv, 11)*, qui servis suis commisit negotia sua, et unicuique secundum propriam virtutem. Sicut et de Spiritu sancto scriptum est, qui dona dividit singulis prout vult. Et hinc juxta Sardicense concilium (*can. 7*), summus primæ et sanctæ sedis Romanæ Pontifex, pro examinis renovatione ad se reclamantis et confugientis cum sua clamazione dejecti provincialis episcopi, non statim singularitate privilegii et auctoritatis suæ restituit : sed remittens eum ad provinciam, ubi causa patrata fuerat, et in qua juxta Carthaginienses canones, et jura legis Romanæ, causa potest diligenter inquiri, et quod non sit difficile testes producere, veritas inveniri, aut finitimis episcopis dignatur scribere, aut e latere suo mittit, qui habentes ejus auctoritatem præsentem cum episcopis judicent, et diligenter causam inquisitam diffiniant, aut dignatur credere episcopos sufficere, ut negotio terminum possint imponere. Et Innocentius (*epist. 1, ad Victrivium*) si, quæ causæ vel contentiones inter clericos tam superioris ordinis, quam etiam inferioris, fuerint exortæ, congregatis secundum synodum Nicænam ejusdem provinciæ episcopis jurgium præcipit terminari. Et Bonifacius de Maximo scribit (*epist. 2, ad episcopos Galliæ*), ut ad provinciam venire cogatur, et illic se constituto præsentare judicio, et quidquid de illo duxerint provinciæ episcopi decernendum, cum ad eum relatum foret, sua firmaretur auctoritate : quatenus, ut idem ad Hilarium scribit (*epist. 3*), metropolitani sui unaquæque provincia in omnibus rebus ordinationem semper expectet, sicut scriptum est in Nicæno concilio, ut sicut apud Alexandriam, quia et urbis Romæ episcopo parilis mos est, similiter et apud Antiochiam cæterasque provincias, suis privilegia serventur Ecclesiis. Unde bene placuit annis singulis per unamquamque provinciam bis in anno concilia celebrari, ut communiter omnibus simul episcopis congregatis provinciæ, discutiantur hujusmodi quæstiones. Et hæc dico, non, quod absit, præjudicans summæ sedis apostolicæ, et sancti apostolatus vestri in ali-

quo potestatem, cui in omnibus sum, sicut rectum est, obedire paratus : sed quia summum auctoritatis vestræ obsequium præstare me puto, cum ea quæ sentio, aut ad probationem, aut ad correctionem humiliter sapientiæ vestri magisterii pando, et Rothadi mores vobis intimare procuro, ne mea negligentia, qui eos novi, vos lateant, quatenus certius quod vobis placuerit de illo vestra auctoritas decernere valeat. Quem si nunc in depositione iudicium vestrum manere decreverit, scimus de benignitate et modestia ac pietate filii vestri domni regis Caroli, quoniam quidquid de illo præfato filio vestro præceperitis, et rationabiliter poterit adimplere, sine ulla retractatione obediet. Sed et coepiscopi nostri de Ecclesiarum suarum stipendiis abundantissime illi impendent. Mea etiam exiguitas, sicut nunquam ad retributionem mali propter contemptus et contumelias ab illo mihi illatas pervenire volui : ita quidquid benignitatis poterit, libentissime abundantius etiam quam unquam fecerim, impendere procurabo. Si vero sine ulla satisfactione tam diutini contemptus sacrorum canonum, et sedis apostolicæ decretorum, ac suæ metropolis privilegii, atque synodali iudiciorum, quibus nec obedire, nec se obediturum de cætero profiteri vel subscribere voluit, et absque professione, vel subscriptione suæ correctionis et obedientiæ, coram fratribus suis, quorum multoties regularia spreverat monita, cum inde pluraliter in Leonis et Gregorii epistolis relegatur. Si etiam, ut illa prætereamus, quæ ob sacerdotii verecundiam et opprobrium secularium, sequentes Africanum concilium, nec ad notionem in synodum deduci permisimus, parvi pensis et sine aliqua correctione dimissis eis capitulis auctoritatis vestræ sub fidei stipulatione directis, pro quibus fuerat iudicatus ab episcopis, ad quorum iudicium provocaverat, secundum expressa sacrorum canonum et apostolicæ sedis decreta, Cœlestino dicente (*epist. 2, episcopis per Apul. et Calab.*) : « Quæ enim a nobis res digna servabitur, si decretalium norma constitutorum pro aliquorum libitu licentia populis permessa frangatur ? » Me vestræ pietati placuerit illum restituere, ut primæ sedis et matris ac magistræ omnium Ecclesiarum pontificis, cunctorumque episcoporum patris atque magistri, regulare iudicium ferre convenit, æquo animo feram. Credo tamen diligentissimam discretionem vestram provisuram contemptum ac contumaciam subjectorum erga prælatos suos, et libertatem impune delinquendi contra canones sacros, quæ hinc in nostris regionibus poterunt, ut quibusdam videtur, noxias vires accipere : præsertim cum sapientissimæ auctoritatis vestræ constet esse notissimum, demonstrare Sardicense concilium in septimo suo capitulo, qualiter dejecti et ad se clamantis episcopi restitutionis vel in depositione permansionis executio, cum indemnitate simpliciter iudicantium, ab apostolica sede debeat celebrari. Quod et Innocentius, et Bonifacius, verum et Leo in decretis, et Gregorius evidentius in epistolis suis

demonstrant. Carthaginensis concilii, imo apostolicæ sedis, quæ in suis idem præsedet vicariis, decreta sequentes : videlicet ut a quibuscumque iudicibus ecclesiasticis ad alios iudices ecclesiasticos, ubi est major auctoritas, fuerit provocatum, non eis obsit, quorum fuerit soluta sententia, si convinci non poterint, vel inimico animo iudicasse, vel aliqua cupiditate aut gratia depravati, unde nobis et conscientia perhibet testimonium, et omnibus qui interfuerunt notum factum fuisse dignoscitur, quoniam illum servare quam iudicare maluimus, si pro sacrorum canonum neglectu eorum iudicio, per quos, Spiritu sancto inspirante, promulgati sunt, cum eo quem corrigere nequibamus damnari pariter non timeremus. Et ideo nullo inimico animo, nulla cupiditate aut gratia depravati, flentes illius incorrigibilem secordiam et irrevocabilem pertinaciam, regularia in eum iudicia executi sumus, quæ ab eo suspendere diutius non præsumpsimus. Vestra etiam sapiens et summa auctoritas in decernendo attendet Apostolum docentem, quia *quorundam peccata præcedentia sunt ad iudicium, quorundam etiam et subsequuntur* (I Tim. v, 24). Quæ sicut beatus exponit Ambrosius (*in Apolog. David, c. 6*), ac si posita in bilance, in iudicio sunt examinanda, utrum bona opera amplius pensando remuneranda præcedant, et mala facta minima misericorditer dimittenda demonstrent, an male facta amplius pensando præcedant, ut mereantur damnationis iudicium, et bona paucula suffocent. Quia et nos pro modulo nostro, non solum utilitatem, verum et noxietatem in Rothado cum factis suis pensavimus, et velut ficulneam infructuosam, terram rationalem diutius inutiliter occupantem, et etiam post plura tempora, pluresque admonitiones, quasi cophinos pinguedinis sibi appositos non recipientem, sed sterilem permanentem, non sine dolore cordis succidendum providimus.

Et cum hæc ita se habeant, absque dubitatione confido, quia illud, quod in præfato Carthaginensis concilii capitulo sine ulla interpellatione subsequitur, decretum vestri moderaminis nequaquam præteriret : Sane, inquit (*concil. African., can. 89*), si ex consensu partium electi fuerint iudices, etiam a pauciore numero quam constitutum est, non liceat provocari. Qui numerus constitutus in duodecimo superiori capitulo demonstratus, et consensus partium expetitus, in dijudicatione Rothadi constat fuisse completus. Quorum et si iudicium pro quacunque causa forte rationabiliore, et adhuc nobis incognita, vestræ summæ auctoritati, quam multa nobis occulta non transeunt, placuerit, refragari, quia meum est mea vobis obediendo committere, et non iudicia vestra discutere sustinebo, et contra vestram restitutionem regularem, si forte in eo agenda visa fuerit (in qua vestra disponet auctoritas, qualiter isdem victor, ut solet, et voti compos quæ sunt episcopi de reliquo faciat), non recalci-trabo : ducens pro magno, si a diutinis et multis

molestiis, quas ab illo et pre illo passus sum, jam tandem aliquando valeam respirare, et nunquam mihi contingat ulterius contra illius inquietudines inutiliter laborare. Et quod non solum ab ecclesiasticis personis, verum et multo magis etiam a sæcularibus nostra iudicia contemnunt, et pro nihilo ducuntur, dicentibus eis, et ad medium devocantibus illa, quæ mihi vestræ auctoritati non sunt ascribenda, ut non animum dulcedinis vestræ in aliquo moveam, quod summopere cavere desidero. Si qui in provincia nostra, quorum querela illo restituto ad vos valeat pervenire, de majoribus causis de cætero quædam commiserint, sicut de quibusdam rebus frequentius quam in istis retroactis temporibus committuntur, ne a Deo damno silentio, eos commonere studebo, et si corrigere se voluerint congaudebo, sin autem, ad vestrum eos iudicium provocabo. Qui si ire voluerint, vestra sancta sapientia quid inde melius viderit decernere procurabit. Si autem ire noluerint, facient quod sibi utile iudicaverint. Me utinam hinc a divina damnatione sententia sancti Ambrosii liberet, qua dicit: Si, iniquiens, quis potestatem non habet quem scit reum abjicere, aut probare non valet, immunis est. Sicque, ut puto, quia in multis occupatus, et itineris longitudine atque insoliditate obstrictus, de omnibus, antequam insolentium querela ad vos perveniat, ad apostolicam sedem referre non valeo, infirmitate gravatus, et gratias Deo termino jam vicinus, potero præcavere ne a quocunque sanctitatis vestræ animus erga me moveatur, ut aliqua mihi excommunicatio intentetur. Et licet noverim secundum Apostoli Evangelium, redditurum Dominum unicuique secundum opera ejus (*Rom. II, 6*), testimonium reddente illis conscientia, et inter se invicem cogitationum accusantium aut etiam defendentium, in die qua iudicabit occulta hominum: et ut Leo dicit: Si quid per servitatem nostram, videlicet sacerdotalem, bono ordine et gratulando impletur affectu, non ambigamus per Spiritum sanctum nobis fuisse donatum, et quod secus fuerit, ratum esse non poterit: modis omnibus, quantum ipse donaverit, a quo est omne datum optimum et omne donum perfectum, providere studebo, ne a communione sedis apostolicæ, quod absit, quolibet modo extorrem me ultimus dies, qui mihi incertus est, et subito venire potest, inveniat. Erit enim, quamvis tardius quam necesse sit, quoniam ego gravis peccator, gravi carcere corporis diu inclusus teneor, merito in multis afflictus, providentissimo Domino providente, et tempus et persona in Rhemorum Ecclesia, quando et in qua ab apostolica auctoritate privilegium integratum sibi ex antiqua consuetudine collatum et conservatum habebitur: quæ nunquam excepto Romano pontifice primatem habuit, nisi quando ejecto sine ullo crimine ab ea suo pontifice Rigoberto violentia tyranni Milonis tempore Caroli principis pastore vacans, Bonifacio apostolicæ sedis legato aliquandiu sicut et Ecclesia

A Treverensis, commissa fuit. Inter quas, Rhemensem scilicet et Treverensem Ecclesiam (has enim duas tantum provincias Belgica regio habet), hæc semper distinctio fuit, sicut in ecclesiasticis monumentis invenimus, et vetustissimam consuetudinem semper obtinuisse comperimus, ut isdem episcopus non loci, sed dignitate ordinis prior secundum sacras regulas haberetur, qui foret in qualibet istarum Ecclesiarum metropoli antea ordinatus. Mihi vero necesse erit me taliter gerere, ne toties auctoritatis vestræ epistolas excommunicationes intentantes et objuraciones, quas raro et magna necessitate fiendas in apostolicorum virorum litteris legimus, ferentes de reliquo accipiam, sicut istis temporibus, peccatis meis merentibus, frequenter accepi. Quod si sanctitati vestræ placuerit, non vobis opus agere in postmodum erit, donec apostolica vestra jussio me inobedientem in aliquo contra regulas sacras per contemptum, quod absit, invenerit. Qui enim quare Dominus in Evangelio centurionis fidem laudet dicentis: *Dic verbo et sanabitur puer meus* (*Matth. VIII, 8*) intelligit, quam operatorium sit episcopi, imo sicut in Paulo in se loquentis Christi, quanto magis pontificis apostolicæ sedis verbum, et quam obedienda sit ipsius præceptio, etiam sine ulla admirationis adjectione cognoscit. Quod et scientibus inculcare, et nescientibus intimare sapientibus et insipientibus debitores debemus episcopi: quibus si de reliquo verba iniquorum prævaluerint adversum nos, sicut jactitant proferentes, non erit necesse de provincialibus synodis, in quibus hactenus laboravimus, magnopere laborare: quippe quoniam erit et lex et spes sibi quisque. Quod quidem vestra humilitati meæ scripsit sublimitas, primo vos commotos esse ad Rothadi causam inquirendam cura, qua pro universis fratibus vestris constringimini, cum debita reverentia grater accepi, intelligens quia in numero fratrum nos qualescunque metropolitani computari debemus. Ea propter, sicut vestræ discretioni providendum est, ne subjecti episcopi a metropolitanis irregulariter condemnentur, ita nihilominus providendum est, ut metropolitani a subditis suis episcopis non irregulariter contemnantur. Deinde quod perfectissime scripsistis secundo, quoniam sedem apostolicam Rothadus noscitur appellasse, et ne videamini Ecclesiæ vestræ privilegiorum detrimenta diebus vestris æquanimiter tolerare, et hoc nihilominus a nobis et ab omnibus est rectissime suscipiendum, et solertissime conservandum. Quod et ego pro modulo meo, servandum esse volui et volo, et, favente Domino, in hac devotione manebō, sciens privilegium metropolitanæ sedis Rhemorum, cui me divina dignatio servire disposuit, in summo privilegio sanctæ sedis Romanæ, manere, et privilegium esse sedis Romanæ, si sua auctoritate privilegium sibi subjectæ sedis fecerit vigere, et studuerit confirmare.

De eo vero quod tertio loco ad medium devoca-

stis, scribere aliud nihil præsumpsi, nisi quia causa Rothadi a causis illorum, de quibus scripsistis, est pene in cunctis dissimilis. De eo quod tandem apostolica vestra benignitas indignitati meæ scribere est dignata, ut hæc vobiscum cogitem, et quod de Rothado decernitis approbem, et non ad mei injuriam id vos egisse aliquantulum autemem : quantum valeo totis medullis cordis, cum omni supplicatione et debita ac submissa humilitate, immensas gratiarum actiones sancto apostolatui vestro rependo, cum omni sinceritate animi rescribens, quia sicut mihi scribere dignati estis, ita per omnia credo. Et quia privilegium vestri summi pontificatus, ut concedet et omnes desideramus, evindicatum habetis, quod nemo nostrum contradixerat, in deductione Rothadi sicuti præcepistis ad vestram presentiam, ut perdonare dignati estis, videre desidero, et visurum me esse confido, quia non aliud nisi ut supra monstravi, quod regulæ sacræ præcipiunt, et mihi petendum, et vobis concedendum est. Postulo videlicet, ut sic Rothado ab auctoritate vestra compassio exhibeatur, ut vigor ecclesiasticus non dissolvatur : et sic vigor ecclesiasticus conservetur, ut debita misericordia et necessaria sufficientia ei non denegetur. Quatenus nec ipsius exemplo ad excedendum alii provocentur, nec quibus in istis regionibus, longius ab apostolica sede remotis, censuræ ecclesiasticæ moderatio est commissa, hinc, quod absit, conspiciant, unde aut negligentia, aut dissolutione tepescant, vel terminos quos statuerunt patres transgrediendi materiam se sumere posse dicant, quos, sicut intelleximus, nos hactenus servasse putamus. Vos videbitis quid inde facto melius erit, et nobis in iudicio vestro videndum est quid Deus velit : quoniam injusta esse non poterunt divina iudicia, quæ a soliditate confessionis apostolicæ petræ, adversus quam inferi portæ, id est suggestiones vel operationes prævæ, non prævalebunt, dicantē justitia proferentur.

Epistolam, quam mihi auctoritas vestra cum obtestatione præcepit Rothado dirigere, dominus noster rex, filius vester, mox ut ad eum venit, per abbatem suum Rothado direxit. Rodulfus quoque ejusdem filii vestri domni nostri regis avunculus, tertio Idus nunc elapsi mensis Decembris a Ludovic Germaniæ rege revertens, cum valde vesperi a corte regis nostri ad mansiones nostras super fluvium Ligerim, secus confinium regni Aquitaniæ festinarem, misit ad me hominem suum nomine Rodulfum, mandans quia præfatus rex Ludovicus quemdam hominem Rothadi, cum epistolis vestræ sanctitatis, manui et fidei suæ commisit, quatenus ita præsentiam domni nostri regis Caroli cum eisdem episcopis cum perduceret, ut nullum malum ei inferret. Est enim apud dominum nostrum regem idem homo accusatus, quod fraudatus sit res et thesaurum Ecclesiæ, et post perjurium inde commissum, fuga lapsus ad Ludovicum regem perrexerit. Unde idem Rodulfus petiit ut ego illum

inde apud dominum nostrum regem adjuvarem, ut quoniam prædictum hominem in sua fide acceperat, nullum malum haberet. Cui respondi, ut teneret ipsum hominem secum, ne interim ullum malum pateretur, donec ad cortem redirem, et quantum possem inde illum adjuvare curarem. Ipsum autem hominem nec tunc nec postea vidi, nec quo abscesserit cum episcopis audivi.

Quæ idcirco sanctitati vestræ scribere studui, ut si aliquis malivolorum nostrorum more suo vobis quiddam sinistri ex hoc, suggerere voluerit, quid inde verum sit cognoscatis, et erga me vestrum animum non moveatis. Rationem denique, quam reddidi coram electis iudicibus, de quibus per libellum provocationis ad electorum iudicium fueram a Rothado impetitus, ipsi venerabiles episcopis vestræ auctoritati transmittunt. De gestis vero a Rothado post excommunicationem suam in provinciali synodo compilatis, quæ per vicinos nostros ad vos in derogationem nostram pervenisse audivimus, episcopi Rhemorum provinciæ per communes legatos nostros vestræ sanctitati quæ sciunt intimare curant.

Item post aliquanta de promotione ipsius domni Hincmarii ad episcopatum, quæ jam superius partim prænotata non curavimus hic iteranda. Denique præfato Ebone defuncto, Ecclesia sed et parochia nostra, secundum consuetudinem quam ex antiquo habuit etiam de his episcopis qui in episcopatu usque ad obitum in eadem Ecclesia non permanserunt, ipsius nomen inter sacrosancta mysteria in episcoporum catalogo recitare pietatis gratia cœpit, et hactenus facit. Quod ego, ne scandalizarem devotos, quasi invidens saluti fraternæ, maxime autem quiescentis in Domino animæ, qui non pro exorbitatione a catholicæ fidei sanitate anathematatus, sed sua conscientia stimulante primum a seipso et postea a synodo, sed et apostolica sede damnatus exstitit, hoc prohibere sine apostolicæ sedis auctoritate nequaquam præsumpsi, dicente beato Cœlestino papa, quia nefas est hæc pati religiosas animas, quarum afflictione, qui membra nostra sunt, nos quoque convenit macerari. Nunc autem in epistolis sanctitatis vestræ, quas Engeluvinus diaconus nobis attulit, invenimus ut Teotgaudum et Guntharium in catalogo episcoporum non recipiamus. Et Antiochenum concilium, ut præmisimus, et melius ipsi scitis, de eo qui post damnationem juxta præcedentem consuetudinem episcopale præsumit ministerium, quod Ebonem fecisse non dubium est, rescribere mihi dignetur apostolica vestra auctoritas, utrum eumdem Ebonem inter episcopos in sacris dypticis in Ecclesia nostra nominare permittam, an ne de cætero in episcoporum catalogo nominetur prohibere debeam : quatenus vestra auctoritate fultus, quid in nostra Ecclesia inde sit observandum, sine ambiguitate decernentibus vobis demonstrarem.

Cæterum Luido mihi dixit quod cum eo rationem.

de damnatione et reclusionem Gothescalci habuisse. Unde quoniam per alios jam audieram ad sanctitatem vestram verba venisse, nisi auctoritati vestræ quædam ex verbis et catholicorum sensibus in rotula, qualiter contra ipsius pestiferi hominis sensum sentiam, per Odonem episcopum, et nihil inde responsionis accipere merui. De quo nihilominus ut redderem rationem, quidam episcopi, quorum nihil de illo intererat, quoniam nec eos, ut ipsi manifestis iudiciis prodiderunt, ad hoc charitas commovebat, nec auctoritas deducebat, me ad conciliabulum nuper Metis habitum, quod vocari synodum vetuistis, sicut intelligo, irregulariter quarto die antequam congregaretur, cum ego longius quam octoginta, et idem Gothescalcus plusquam centum millibus ab ipsa civitate disparati essemus, nihil ante præmonitum per quemdam laicum hominem litteris vocaverunt. Et nunc ideo breviter de eo sanctitati vestræ suggero, quoniam antequam ad episcopatus ordinem pervenirem, sicut abbas suus et monachi, inter quos fuerat conversatus, ei testimonium perhibent, in metropolis Ecclesiæ Rhemorum monasterio in Suessionica parochia, quod Orbacus dicitur, habitu monachus, mente ferinus, quietis impatiens, et vocum novitate delectans, ac inter suos mobilitate noxia singularis, de omnibus quæ in his regionibus perverse tunc temporis sensa cognoverat, quædam sibi elegit capitula, ut novitate vocum innotesci valeret, utque simplicium et deceptorum sensus pervertere, et magistri nomen usurpando post se discipulos trahere, illisque qui ad sua vota prurientes auribus magistros sibi concervare decertant, querere indebite, quoniam legitime non poterat, simulatione vitæ religiosæ et doctrina præesse. Quique a Rhemorum chorepiscopo, qui tunc erat, contra regulas presbyter ordinatus, a monasterio irregulariter exiens, peragratis regionibus plurimis, et exitiosa semina sator pessimus seminans, tandem in Moguntina civitate habitæ synodo et Rabano archiepiscopo libellum sui erroris porrigens, damnatus ab omnibus Germaniæ episcopis, cum litteris synodalibus ad metropolim Rhemorum, cui jam auctore Domino præeram, est remissus. Postea autem a Belgicæ, Rhemorum ac Galliarum provinciarum episcopis auditus, et inventus hæreticus, quia respisci a sua pravitate non voluit, ne aliis noceret qui sibi prodesse volebat. Iudicio præfatarum provinciarum episcoporum, in nostra parochia, quoniam Rothadus, de cuius parochia erat, illi nesciebat resistere, et novitates amans timebatur a nobis ne disceret prava sentire, qui noluit discere recta docere, neve idem Gothescalcus, cum aliis communem vitam ducens, errori suo faceret esse communes, monasteriali custodiæ mancipatus est, docente Apostolo: Hæreticum hominem post primam et secundam correptionem devota, sciens subversum esse huiusmodi et proprio iudicio condemnatum (Tit. III, 10). Qui ut Leo papa de Eutyche dicit, cum videret insipientiæ suæ sen-

sum catholicis auribus displicere, revocare se a sua opinione debuerat, nec ita Ecclesiæ præsules commovere, ut damnationis sententiam mereretur excipere. Quam utique, si in suo sensu voluerit permanere, nullus poterit relaxare. A qua damnatione si voluisset ad sensum catholicum respicere, paratus semper fui et sum, quoniam sic venerabiles iudicaverunt episcopi, eum in catholicæ Ecclesiæ communionem recipere, sicut ei iubeo quæ sunt corpori necessaria ministrare.

Si autem vestra catholica sapientia vult scire quæ contra catholicam fidem ex veteri hæresi Prædestiniana, quæ primum in Africa, postea in Galliis per idem tempus, quando et Nestoriana hæresis est exorta, et tempore Cælestini papæ, ipsius auctoritate, et instantia sancti Prosperi est revicta, dicere videatur, de multis pauca vobis numero, sed non pondere, capitulatim significamus. Dicit, quod et veteres Prædestinatiani dixerunt, quoniam sicut Deus quosdam ad vitam æternam, ita quosdam prædestinavit ad mortem æternam. Dicit, quod et veteres Prædestinatiani dixerunt, quoniam non vult Deus omnes homines salvos fieri, sed tantum eos qui salvantur; omnes autem salvari quoscunque ipse salvare voluerit, ac per hoc quicumque non salvantur, penitus non esse voluntatis illis ut salventur. Quoniam si non omnes salvantur quos vult Deus salvos fieri, non omnia quæcunque voluit fecit; et si vult quod non potest, non omnipotens, sed infirmus est. Est autem omnipotens qui fecit quodcunque voluit, dicente Scriptura: *Omnia quæcunque voluit Dominus fecit in celo et in terra, in mari et in omnibus abyssis (Psal. cxxxiv, 6)*; et item: *In voluntate tua, Domine, cuncta sunt posita, et non est qui possit resistere tux voluntati: si decreveris salvare nos, continuo liberabimur (Esther xiii, 9)*. Dicit, quod et veteres Prædestinatiani dixerunt, quod non pro totius mundi redemptione, id est non pro omnium hominum salute et redemptione Dominus et Salvator noster Jesus Christus sit crucifixus et mortuus, sed tantum pro his qui salvantur. Dicit quoque modo, dispari traditione, sed pari errore, quod et veteres Prædestinatiani dixerunt, exponens sententiam apostoli Petri, *eum qui emit eos negantes (II Petr. II, 1)*. Baptismi, inquit, sacramento eos emit, non tamen pro eis crucem subiit, neque mortem pertulit, neque sanguinem fudit. Quod autem baptismi perceptio redemptio nuncupatur, doctor gentium manifeste fatetur: *Nolite contristare, inquit, Spiritum sanctum Dei, in quo signati estis in die redemptionis (Ephes. iv, 30)*. At illa quæ propria et specialis est solorum omnium electorum, quam eis tantummodo crucifixus impertivit pius Redemptor ipsorum, sicut a præteritis, ita nimirum a præsentibus, natos et nascituros, vivos et mortuos, videlicet omnes pariter electos redemit, eruit, abluitque peccatis. Ipsi prorsus, ipsi sunt mundus pro quo passus est Dominus, ut ipse dixit: *Panis quem ego dedero, caro mea est pro mundi vita (Joan. vi, 52)*. Et item alibi idem

Gothescalcus scribit : « Absit procul a me, ut vel illud solummodo velim somnare, nedum semel susurrare, ut illum eorum perpetualiter secum peritutum antiquus rapere valeat anguis, pro quibus redimendis tam pretiosus Deo Patri Domini nostri Filii sui fusus est sanguis, Amen. » Et item loquens ad Deum : « Claret itaque satis aperte, quod nullus tibi perit, quisquis redemptus est per sanguinem crucis tuæ. » Quod Prædestinatiani veteres non dixerunt, iste ut audacius ita perniciosus dicit, Deitatem sanctæ Trinitatis trinam esse. Sunt et alia quæ ipse et alii plures in istis partibus dicunt, quæ nobis sanæ fidei adversari videntur. Quæ dum per alium quam per vililitatem personæ meæ auctoritas vestra cognoverit, forte attendet solertius, et quæ inde timenda sunt docere studebit quantocius. Erit enim in proximo inde necessitas : quia et si eorum corda in insania perversi sensus ebulliunt, orthodoxi tamen regis nostri tempore prava quæ sentiunt eloqui non præsumunt. Ita ut aperte videamus impleri quod scriptum est : *Conjregans sicut in utre aquas maris (Psal. xxxii, 7)*. Aqua enim maris sicut in utre congregata est, quia amara hæreticorum scientia quidquid hodie in isto regno filii vestri domni Caroli pravum sentit, in pectore comprimit, et aperte dicere non præsumit. Meam quoque exiguitatem et occulte canino dente corrodunt. Facile autem, adjuvante Domino, portare valebo. Quia et mihi paucum superest temporis spatium, et si inter filios Ecclesiæ, permittente Deo, id me acceperint potestatem corporaliter affligendi, divina gratia adjuvante, exercebunt patientiam. Sed etsi tantummodo male sentiendo adversabuntur, exercebunt quantulamcunque scientiam, et ut etiam inimici secundum præceptum Domini diligantur, exercebunt benevolentiam. Præfatum autem Gothescalcum, si vestra auctoritas mihi scripserit ut eum a custodia solvam, et aut ut ad vos cundi, ut per vos ejus doctrinam experiamini, aut ad quemcunque ex nomine designatum pergendi licentiam donem, quia ut melius ipsi scitis, sicut absolute quisque ordinari non valet, ita nisi ex ipsius consensu, cujus esse dignoscitur, certæ personæ commendandus, et ad certum locum monachus, vel quisque sub regula constitutus, a loco suo absolvi juxta regulas sacras non valet, vestris jussionibus nullomodo resultabo. Tantum ut auctoritatem vestram habeam, ne tantorum episcoporum judicium mea presumptione parvipendere videat. Non enim illius delector, quam juste sustinet pertinaciter contumax, quantulamcunque reclusionis molestia : sed doleo a qua revocari non potest perfidiam. Quem si cuicumque commendandum vestra auctoritas viderit, hoc in commendatione etiam providebit, ut cui commendabitur catholicus sit, et gravitatem ecclesiasticam, et vigorem a Scripturarum scientiam habeat, quia non solum Scripturas ad suum sensum violenter inflexas, sed et catholicorum dicta detruncata per totum diem sine respiratione aliqua prævalet memoriter decan-

tare. Unde non solum idiotas in admirationem sui abducere, verum et sciolos et incautos, atque zelum Dei sed non secundum scientiam habentes, in sententiam suam solitus erat traducere. Et non solum doctorum suorum doctor videri appetit, sed et hoc solerter satis intendit, ut secum loquentes vel in sermone capere valeat : et si de veritate non poterit, invincibiliter sacramentis affirmare curabit, ea secum loquentes dixisse, quæ forte non dixerunt, ut ipse verax, et illi qui ei contradicunt probentur esse mendaces, et adversus suam doctrinam docentes.

EPISTOLA III.

AD EPISCOPOS SYNODI SUESSIONENSIS.

De Vulfado et collegis, quorum judicium Nicolaus papa jusserat in hac synodo renovari.

(Apuđ Sirmond.)

HINCMARUS, Rhemorum episcopus, REMIGIO, WENILONI, et cæteris archiepiscopis et episcopis, domni papæ Nicolai auctoritate ad synodum, quo et exiguitatem meam cum coepiscopis nostris venire præcepit ; in hac Suessorum civitatem pro causa Vulfadi et collegarum ejus convocatis.

Si vobis visum fuerit per quoscunque ad rei notitiam, secundum seriem litterarum domni apostolici, canonice per ordinem cuncta quæ in suprascriptis fratribus gesta sunt, examinare et subtiliter investigare, ut quod justum et pium sensum fuerit de causa eorum sine contradictione, sicut idem dominus apostolicus et fraternitati vestræ et humilitati meæ scripsit, possitis perficere, devote ac libenter accipiam. Et si hanc quæ sequitur brevem responsionem, quantum ex me est, ad apostolica scripta videritis vobis sufficere, non ingratum forte habebit, quod ad rem pertinentia succinctissime refero. Videlicet quia Rhemensis Ecclesiæ filii de collegio Vulfadi, ab Ebone post depositionem suam ordinati, non meo iudicio, nec ab episcopis solummodo Rhemorum provinciæ, primum suspensi et postea dejecti, ut meo vel communi cum eis tantum placito, juxta Nicænos et Antiochenos canones (*Nicæn. can. 5, Antioch. c. 4*), humaniorem aut alteram suscipere sententiam valeant ; sed prius suspensi, et processu temporis a synodo episcoporum quinque provinciarum, ad quam provocaverant, secundum decreta Innocentii ad Rufum et Eusebium, inspectis quæ scripsit ad Martianum, et juxta Zosimi successoris Innocentii decreta ad Patroclum Arelatensem episcopum et ad Massiliensem Ecclesiam (*Innocent., ep. 21 et 22 ; Zozimus, ep. 6, 11 et 12*), sed et alias plures Ecclesias, de his quos Proculus vitæ suæ conscius, datis litteris in abdicationem sui, per professionis atque subscriptionis suæ libellum sacerdotio submotus ordinavit, juxtaque sacros canones, et Leonis ac cæterorum Romanæ sedis pontificum decreta, quæ hic ponere prætermisi, et studio brevitatis, et ut vobis notissima, sunt judicati, et ab ecclesiasticis ordinibus dejecti, præjudicante Leone papa, atque dicente (*epist. 1, ad episcopos Campaniæ*) : « Om-

nia decretalia constituta, tam beatæ recordationis Innocentii quam omnium decessorum nostrorum, quæ de ecclesiasticis ordinibus et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » In qua, ut regulæ sacræ dicunt, perfecta et canonica episcoporum quinque provinciarum synodo, quoniam Ecclesiæ mihi commissæ filii finitimos episcopos pro causa sua interpellarunt, et hujusmodi Africæ provincie canones (*conc. Afr.*, can. 92) vicinos episcopos audire, et inter eos ac proprium adhibitos ab eis episcopos jubent querimoniam diffinire: ego Vulfadum et collegas ejus non judicavi, neque ab ordinibus ecclesiasticis populi vel dejeci, nec etiam cum iudicibus eorum subscripsi, sicut norunt qui interfuerunt, et ipsa etiam episcopalia gesta, eorum inconvulsis subscriptionibus subnixâ a quibus fuere patrata, præsentialiter monstrant. Unde, jubentibus eisdem episcopis, tantum bajulus fui, causam videlicet Ecclesiæ mihi commissæ ab illis diffinitam ad sedem apostolicam deferendi. Quæ domni apostolici Benedicti privilegio sub anathematis interpositione, ut inde quæstio nullis aliquando temporibus oriatur, sunt confirmata; et demum domni Nicolai papæ confirmatione, sicut sanctæ recordationis Benedictus pontifex illam confirmavit, salvo Romanæ sedis in omnibus jussu atque iudicio, sub terribili anathemate, ut quæcunque persona, magna vel parva, temerario ausu contra hoc suum apostolicum decretum agere præsumperit, anathematis vinculo sit innodatus, sunt roborata: velut hic potestis retexere, et sigilla eorum salva, ac incorruptas scripturas atque subscriptiones valetis inspicere. Et quia sedes apostolica, ut in decretis suorum pontificum legimus, in hoc prorsus sua ibi magnopere jura conservat, et aliena custodit, imo sua propria facit, ut omnis quæstio ad eam relata iudicio et suæ confirmationis decisione finem accipiat, omnem ex hac causa suspicionem querulitatis hæ duorum præclarissimorum luminarium confirmationes atque subscriptiones a nostris regionibus et mentibus abstulerunt. Nunc vero, quia isdem dominus et pater noster Nicolaus papa suis epistolis ex hoc negotio a vobis sanxit refricari iudicium, monente Apostolo: *Obedite præpositis vestris, et subjacete eis* (*Heb. xiii, 17*), quod privilegio apostolicæ sedis de ipsis fratribus decernit vel decreverit, ut competet meæ subditi, obedio et obediunt, sicut hactenus conservavi ea quæ domni Benedicti et sua fuerunt auctoritate firmata. Et item dicente Apostolo: *Id ipsum dicatis omnes, et non sint in vobis schismata* (*I Cor. i, 11*), sicut servavi usque in præsens quæ prædecessores quorundam vestrorum cum quibusdam ex vobis regulariter ex iisdem fratribus diffinierunt: ita et quæ de ipsis canonicè juxta tenorem epistolarum domni apostolici diffinieritis, priscis, ut dicit Gelasius (*Deer. cap. 2*), pro sui reverentia manentibus constitutis, et reservato per omnia sententiæ ac juris privilegio apostolicæ

A sedis, regularibus vestris diffinitionibus, sollicitus servare unitatem spiritus in vinculo pacis, consentiam. Qui istorum fratrum, de quibus agitur, vel quorumcunque aliorum felicitati non invideo, nec quamcunque malitiam eos nocere festino: quorum salubrem ac regularem statum et cupivi et cupio, et quæsi et quæro, et de quorum dejectione dolui satis ac doleo, quia nemo majus dispendium de illorum dejectione habet quam ego. Quos, sicut mihi dominus apostolicus dignatus est scribere, justum quid vel pium sentiens, sine retractione in suis ordinibus consensu ac iudicio coepiscoporum Rhemensis provincie restituere maturarem, si illos ab eisdem gradibus cum eorum tantum iudicio dejecissem. Ad quod me, juxta ejus verba discretissima, quia eos non dejeci, flecti munda conscientia non permisit. Et hoc meo ausu facere vereor, quoniam a vobis, aut a decessoribus vestris, quinque videlicet provinciarum episcopis, quorum meo consensu expecterunt iudicium secundum sacros canones electorum ex consensu partium diffinitione fuere dejecti. Et ideo aliorum opus in illorum restitutione nullatenus usurpare præsumpsi: quia, sicut scitis, regulæ sacræ usque ad similem excusationis vindictam decernunt, ut ab aliis dejecti ab aliis non recipiantur, minime autem restituantur: sed aut eorumdem, aut majoris concilii episcoporum discussiones ac iudicia præstolentur. Et quia Leo dicit (*epist. 95 ad Rusticum Narbon.*) ut in his quæ vel dubia fuerint, aut obscura, in noverimus sequendum, quod nec præceptis evangelicis contrarium, nec decretis sanctorum inveniat adversum, et dominus ac Pater noster Nicolaus papa vobis ut mihi videtur scripsit, quoniam quæ statuta sunt de præfatis viris, violanda non ducant, nisi forsan sacris legibus inveniant adversa, simplici ac sincera cordis intentione ex regulis sacris perspicue tarditati sensus mei monstrari expecto, utrum quæ diffinierunt fratres et coepiscopi nostri, sicut hactenus observata sunt, de cætero ut regulis concordantia debeant observari, an illorum diffinitio ut inventa legibus sacris adversa debeat refutari. Sed et mihi ostendi expecto apertius, quam in suis sacris litteris intelligere valeam, si domni Benedicti, ac ejusdem domni Nicolai, super eandem diffinitionem sub anathemate confirmationis privilegia; nisi forte illa ipse sua singulari auctoritate dissolvenda et immutanda viderit, quorum summam firmitatemque nobis omnibus scripsit in apostolicæ sedis reservatam arbitrio potestatis, nos sine regularum et sedis apostolicæ præiudicio, sineque nostro communi periculo, dissolvere et immutare possimus. Cælestino dicente (*epist. 3*): Quæ a nobis res digna servabitur, si decretalium norma constitutorum pro aliquorum libitu licentia populis permissa frangatur? Sed et a nobis non est parvipendenda granditer Leonis papæ ad Leonem Augustum de se scripta sententia (*epist. 84*), Si quæ, inquit, destruxi hæc ædificio, prævaricatorem me constituo, et eis me ultionum conditionibus subdo, quas non solum auctoritas

beatæ memoriæ Martiani, sed etiam ego mea confessione firmavi. De quibus ultionum conditionibus quid a sancto Spiritu per concilia provinciæ Africæ, quidve Dei sapientia, qua, ut scriptum est, conditores legum justa decernunt, legibus sit decretum, melius ipsi scitis. Quod si etiam hoc de se intelligens, et his legum conditionibus subdi tantus papa et primæ sedis pontifex præcavendo refugit, qualiter eisdem ultionum conditionibus subdi præcavendo timere nos debeamus subjecti, patenter ostendit. Sed et de contempto anathemate necessitate (quanto magis deliberatione?) rite prolato, quod in præfatis privilegiis continetur, quid sanctus Gregorius ad Theoctistam patriciam dicat (*lib. ix, epist. 79*), sapientiam vestram a Deo doctam non latet. Et Symmachus dicit (*epist. 1 ad Æonium*) ad ipsam sacrosanctam catholicam religionem pertinere, cujus omnis potestas infringitur, nisi universa, quæ a Domini sacerdotibus semel regulariter statuuntur, perpetua sint; quod alias contingere poterit, si successor decessoris actibus non tribuerit firmitatem, et roborando quæ gesta sunt, faciat rata esse quæ gesserit. Et Gelasius (*epist. 11 ad Germanos*): « Patres, inquit, nostri catholici videlicet doctique pontifices, quidquid pro fide, pro veritate, pro communione catholica atque apostolica, secundum Scripturarum tramitem, traditionemque majorum, facta semel congregatione sanxerunt, inconvulsum voluerunt deinceps firmumque constare; nec in hac eadem causa denuo quæ præfixa fuerant retractari qualibet recenti præsumptione permiserunt. Sapientissime pervidentes, quoniam si decreta salubriter cuiquam liceret iterare, nullum contra singulos quosque prorsus errores stabile persisteret Ecclesiæ constitutum, ac semper iisdem furoribus redivivis omnis integra diffinitio turbaretur. »

Hæc itaque de litteris divinitus inspiratis accepta, vel pro rei notitia manifestata, non ad resultandum, quod absit, in aliquo domni papæ decretis apostolicis, vel ad resistendum vestris regularibus diffinitionibus profero; sed ut quomodo his quæ in dejectione illorum diffinita sunt hætenus obedivi, sic in eorum restitutione, cujus estis a domno apostolico arbitri constituti, si a vobis fienda canonice inventa et patrata fuerit, quantum ex me est, præfatis regulis sacris, et episcopalibus atque apostolicæ sedis exinde confirmationibus, periculose non obviem, et a præceptionibus, quæ in apostolicis epistolis continentur, a quibus Domino annuente vel transverso, ut dicitur, ungue scienter et per contumaciam non exorbitabo, in nullo per ignorantiam deviem, et qualiter absque descrimine sequi debeam regularem vestram, quorum ex delegatione sedis apostolicæ interest, diffinitionem, per ipsarum regularum tramitem liquido cognoscere valeam. Ad hoc enim vel maxime ad synodum venit episcopus, ut aut discat, aut doceat, aut corrigatur, aut corrigat. Et Cælestino dicente (*Decret. 20, episcopis per Apuliam, etc.*), ut nulli sacerdoti suos liceat canones ignorare, nec

Aquidquam facere quod Patrum possit regulis obviare, necesse est ut ea hinc decernatis, ne aut in quæstionem reveniant, aut occasio exinde alicujus præsumptionis exsurgat, aut illa dissolvere temporibus nostris vel successorum nostrorum oporteat. Quanta, inquit Symmachus (*epist. 1, ad Æonium*), vicariis beatissimi Petri apostoli judicabitur esse reverentia, si quæ in sacerdotio præcipiunt eisdem transeuntibus dissolvantur? quia, ut idem dicit, non potest ex parte firmum esse quod generalitatis tangit injuriam.

EPISTOLA IV.

AD EAMDEM SYNODUM SUESSIONENSEM

De Ebone Rhemensi, quod ab episcopatu jure dejectus, nec legitime postea restitutus, clericos ordinare non potuerit, et quod hi quos ordinarat, ni synodo Meldensi suspensi, in SueSSIONENSI gradu spoliati sint.

(Apud Sirmond.)

HINC MARUS Rhemorum episcopus sanctæ synodo domni papæ Nicolai auctoritate convocatæ.

CAP. I. De Ebone, unde quidam loquuntur, qui causam ejus nesciunt, vel scire aut audire non volunt, cum quocunque per contentionem nullam conferam quæstionem, quia nec domnus apostolicus mihi agendum hoc scripsit, nec cum eodem Ebone in vita sua exstiti alterator, nec post mortem ejus illius sum derogator, nec ejus sedis invasor exstiti, quam ab eo secundum regulas sacerdotio defuncto quartus, post eos qui eam tenuerunt, canonice in ea electus et ordinatus regendam suscepi. Ratione autem dictante, quam omni poscenti negare non debeo, veritatem proferre licite valeo. Idem namque a se, juxta sacras regulas et traditionem ecclesiasticam, ac decreta sedis Romanæ pontificum, Zosimi, Joannis atque Gregorii, sicut ab eis constitutum multoties legitur, per professionis suæ libellum, ea moderatione, quam Leo magnus papa decrevit ad universos episcopos per Sannium, Picenum et Tusciam (*ep. 86*), dictatum et propria manu subscriptum, in synodo se deposuit, et episcopali ministerio spoliavit, atque secundum suam professionem et subscriptionem a quadraginta tribus episcopis judicium depositionis suscepit: sicut ille ipse libellus, quem synodo porrexit, et notitia synodalis, quæ habemus, evidenter ostendunt. Ut enim dicit Gelasius, ideo vocatur ad judicium certa quæcunque persona, ut aut fateatur objecta, aut ut convincatur objectis. Sed hunc et actio pene omni mundo nota convicit, et ipse propria se voce et subscripta professione damnavit. Postea vero sine ulla regulari restitutione idem ministerium episcopale, quo se privaverat, contra sacros canones usurpavit. Et demum sub papa Sergio Romam veniens, ab eo, ut damnatus in laica tantum communione maneret, districta sententia, sicut et gesta ipsius papæ demonstrant, condemnatus fuit. Qui cum metropolis Rhemorum, in qua fuerat ordinatus, per decennium post depositionem ejus pastore vacaret, sed et usque ad terminum vitæ suæ, cum fere decem et septem annis post damnationem suam

vixerit, eandem sedem qua regulariter se privavit, canonice non repetiit, nec obtinuit, neque ullum canonicæ suæ restitutionis documentum synodo cui-libet, vel principibus terræ, ac populis, qui eum damnatum fuisse noverant, secundum regulas sacras ostendit. Et si quis vult dicere eum fuisse regulariter, consensu episcoporum, vel sedis apostolicæ restitutum, sicut sanctus Gelasius in decretali sua epistola de Acacio dicit (in *tomo de anath. vinculo*), quem sui complices ac fautores restitutum fuisse fingebant, doceat a quibus et ubi ille consensus restitutionis sit gestus, si secundum Ecclesiæ regulas celebratus, si paterna traditione profectus, si majorum more prolatus, si competenti examinatione de promptus, si ad primam sedem, ejus intererat, de sententia qua tenebatur obstrictus, secundum Ecclesiæ regulas est relatum, si eadem quæ ligavit absolvit. Si hæc ita gesta non sunt, cum nec a pontificibus legitime et ecclesiasticis legibus fuerit expeditus, nulla sæculari potestate potuit præter Ecclesiæ tramitem prorsus absolvi. Nec quisquam ei post depositionem quasi restituito communicare debuerat, in ea duntaxat causa, unde a seipso et ab episcoporum concilio, insuper et ab apostolica sede excommunicatus exstiterat, sine restitutionis suæ canonicis litteris, ab eis a quibus fuerat restitutus secundum morem confectis, sicut sacri canones et decreta Felicis papæ demonstrant (Felix, *in synodo Rom., epist.* 59). Quapropter, ut Leo ad Theodorum scribit, quod manens in corpore non recepit, consequi exutus carne non poterit. Unde taliter visum est de illo tenendum, sicut Gelasius de Acacio dicit (*de tomo Anthem.*), Talis est, inquit, dictus, qualis ligatus est, talis usque in finem permansit, talis esse non destitit. Ita talis est hodie, qualis est et dictus, non talis esse jam non potest. Nunquam igitur, talis permanendo solvendus est. Et constat quia comedens fructus viæ suæ, suisque consiliis saturatus, docente Innocentio, qui particeps factus est damnato, quomodo debeat honorem accipere invenire non possum, dimisit reliquias suas parvulis suis. Sed et de eo omnem quæstionem, secundum leges ecclesiasticas et mundanas, quas probat Ecclesia, qui damnatus fuit anno Incarnationis Dominicæ 835, indictione XIII, sub die Kalendarum IV Nonas Martii, jam tricennale et amplius eo tempus excludit.

CAP. II. Sed dicitur usque ad vitæ suæ terminum episcopale ministerium in omnibus ecclesiasticis muniis peregrisse. Quæ præsumptio a sanum sapientibus non sumitur in exemplum: quia et in veteri et in novo sacerdotio vetus hoc artificium est diaboli, et quia plures hoc præsumperunt, sicut Bonosus, contra cujus morbum Innocentius, et Proculus, adversus quem laboravit non modice Zosimus, et Acacius, quem dejecit Felix, et sequens sacros canones, ac decreta prædecessorum suorum, cum præsumptione et usurpatione sua peremit et exstinxit Gelasius. Et plures alii fuerunt, qui in hanc præsumptionis sententiam transierunt, et transeuntibus

A consenserunt, de quibus in nostro sæculo quosdam audivimus, quosdam etiam qui hoc egerunt vidimus. Sed, monente Scriptura, non debemus turbam sequi ad male agendum, et ut Innocentius loquens de Bonoso dicit (*decret.* 56), « Quoties a populis, aut a turba peccatur, quia in omnes propter multitudinem non potest vindicari, inultum soleat transire. Priora ergo dimittenda dico Dei judicio, et de reliquo maxima sollicitudine præcavendum. » Et de incongruo sacris Scripturis ac sanctorum decretis multorum consensu, item in decretis apostolicæ sedis legitur, quia et si omnes sacerdotes, et mundus assentiat, damnatio consentientes involvit, non prævaricationem consensus absolvit. Non enim crimen minuitur, sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit; et sacrum dicit Nicænum concilium (*can.* 9), quia quod irreprehensibile est catholica defendit Ecclesia. Nam si hoc impune fuerit licitum, ut hi auctoritatem in sacris ordinibus ministrandi, vel eosdem ordines tribuendi usurpent, qui aut penitus non acceperint, aut contra regulas ordines sacros acceperint, aut quibus regulariter ministerium sacrorum ordinum fuerit interdictum, omnis ordo et vigor ecclesiasticus non tantum nutabit vel confundetur, quam penitus destruetur.

CAP. III. Quia denique in Moguntina provincia ministravit, contra omnem auctoritatem esse cognoscitur. Nam Antiocheni canones de vacante episcopo et vacante Ecclesia regulam præfixerunt (*can.* 16, 17, 18); sed et de illo qui manus impositionem episcopatus accipit et ministrare detrectat, ne non et de illo qui ordinatus nullo suo vitio ad parochiam, in qua ordinatus fuerat, non accedit. De quibus regulis nulla Eboni convenit. Et canones Sardicenses (*can.* 21) de vim injuste patientibus, et pro disciplina et catholica confessione, vel pro defensione veritatis expulsis, vel pericula evadere quærentibus, quid teneri debeat manifeste demonstrant. Sed nec ista regula Ebonem absolvit; cum et sacerdotes, et omnis pene mundus, et ipsa etiam sedes apostolica ejus falsis criminibus appetitum, et quadam traditione pro honoribus cum juramento exinde acceptis venditum, et ab imperio, atque ab ipso Ecclesiæ aditu, pium Augustum Ludovicum satagente ipso abjectum gravissime ingemuerit, et innoxium a criminibus inventum, et justissime restitutum, totus in orbe terrarum mundus gaudio exultaverit, et Ebonem dejiciendum, qui irreverentius manum in christum Domini miserat, ut reum majestatis, una cum ipso clamaverit. Sed neque necessitate cogente, propria amissa provincia, secundum Chalcedonenses canones (*can.* 20), civitate in qua ordinatus fuerat captivata, pulsus ab hostibus exstitit, ut alibi in cardinali valeret, sicut in decretis beati Gregorii, et aliorum sedis Romanæ pontificum invenimus; nec injuste et contra regulas sacras dejectus, et regulariter sedi suæ secundum Sardicenses canones (*can.*

3) jussu sedis apostolicæ refricato judicio restitutus, Aullo documento canonico invenitur. Quapropter ab ipsa, ubi immorabatur, parochia contra concilium Africanam appetitus, ut ibi decretum est, potestate judiciaria per rectorem provinciæ protinus excludi, et neque ab Ecclesiis quibus præfuit, neque a quolibet homine defensari debuerat. Constat ergo juste dejectum ea quæ sua non fuerant præsumpsisse : cuius non necesse est nos merita actusque discutere, cum habeat conscientiæ et operis sui testem quem habet et iudicem. Nam, ut Leo dicit (*epist 84 ad Leonem Augustum*), quæ patefacta sunt quærere, et quæ perfecta sunt retractare, et quæ sunt diffinita convellere, quid aliud est, quam de adeptis gratiam non referre, et ad interdictæ arboris cibum improbos appetitus mortiferæ cupiditatis extendere ?

CAP. IV. De mea etiam ordinatione, cui forte si aliqui occulte, quod aperte non audio, derogant, in nullam alterationem contra quemcumque intrabo, quia, sicut dicit Apostolus, in mortuis testamentum est confirmatum (*Heb. ix, 17*). Nam cum Rhemensis Ecclesiam Folco fere per novem annos sine ulla regulari Ebonis reclamatione tenuisset, et post eum Noto pene per annum et dimidium eandem sedem similiter sine ulla Ebonis repetitione tenuisset, sub Sergio papa in synodo plurimorum archiepiscoporum et episcoporum apud Bellovacum dioceseos Rhemorum habita, a clero et plebe ipsius metropolis, sed et ab episcopis ejusdem provinciæ petitis, et ab archiepiscopo tunc meo, et proprio episcopo, ne non et a coepiscopis ipsius provinciæ, secundum Laodicense concilium (*can. 12*), cum consensu abbatis mei et fratrum monasterii in quo degebam, episcopis Rhemensis provinciæ, et clero ac plebi ipsius metropolis per canonicas litteras traditus, et cum decreto canonico, præsentia vel consensu omnium suffraganeorum ipsius metropolis, et a metropolitano meo, qui me illis tradiderat, sum in eadem Ecclesia, omnibus acclamantibus, absque ullius contradictione vel repetitione, canonicè et secundum decreta sedis Romanæ pontificum ordinatus : ipsaque ordinatio mea non solum Rhemorum provinciæ episcoporum, ordinatorum videlicet meorum, secundum Africanum concilium subscriptionibus est roborata, verum et omnium pene Galliarum; atque Neustriæ, ne non et Aquitanicæ episcoporum manibus subscripta epistola ad præfatum Sergium, papam, unanimiter dirigenda; sed et edicto domni regis Caroli manu propria confirmato, et sigillo ipsius corroborato, est comprobata. Quæ omnia Sergio, antequam mittere ad illum concurrerem, in brevi defuncto, Leoni papæ sunt missa. Indeque a domno imperatore Lothario, suam epistolam eidem Leoni papæ dirigente, in qua scripsit quantum pro restitutione Ebonis apud Sergium papam sategerit, et nihil obtinere potuerit, favoribus prosecuta, et ab eodem Leone papa et usu pallii et privilegio sedis apostolicæ, ac pluribus apostolicis suis epistolis, ut videlicet in loco pastoris sacerdotio defuncti, est multoties approbata.

Quamque ordinationem meam, sanctæ memoriæ gratia et nomine Benedictus, sed et dominus ac Pater noster papa Nicolaus, suis privilegiis eam corroborarunt. Quæ in episcopali concilio, et ante ordinationem electio, et postea ordinatio canonice patrata fuisse, non contra cujuscumque quæstionem, sed adversus susurrantium atque occulte mussitantium derogationes, ut omnis iniquitas oppilaret os suum, ex sacris regulis est demonstrata. Sed et illud in causa est, cur inde in nullam alterationem contra quemcumque modo intrare non deliberem, quoniam dominus papa suis apostolicis litteris mihi non scripsit, ut cuiuscumque inde per quæstionem debeam reddere rationem. Quod non de diffidentia dico, quasi documentorum probantis ad ista deficiam, in quo jure si quis audet, audeo et ego; sed et Leonis ad Leonem Augustum verba pro modulo meo sequens, dicentis (*epist 84*), quia de rebus et apud et Nicæam, et apud Chalcedonem, sicut Deo placuit definitis, nullum audeam inire tractatum, tanquam dubia vel infirma sint, quæ tanta per sanctum Spiritum fixit auctoritas. Cum tantus ac tantæ sedis papa se ad hæc dixerit non audere, ego tantillus homuncio super ea quæ tot conciliorum et tantorum pontificum sedis apostolicæ de ordinatione mea, qualiscumque plebis Dei famuli, sicut certissima monumenta declarant, approbavit et fixit auctoritas, tanquam de re dubia vel infirma, nullum audeo inire certamen.

CAP. V. De his autem fratribus nostris, de quibus nuper nobis communiter dominus apostolicus scripsit, si vobis ad apostolica scripta non sufficit brevis et data responsio, ecce habetis gesta episcopalia, et privilegia domni Benedicti et domni Nicolai, quæ vobis demonstrant qua ratione et quo ordine, quave auctoritate, et a quibus, et ubi, et quando patrata sint, quæ in eos acta fuerunt. Quibus omnibus perscrutatis, secundum domni et Patris nostri apostolici papæ discretissimum ac regulare mandatum, quod justum et pium inveniritis, secundum canones sacros decernite, absque ulla, quantum ex me est, contradictione perficite : quia sicut in præcedenti schedula vobis scripsi, nec illius apostolicis præceptis, nec vestris regularibus definitionibus contradicam.

CAP. VI. Cæterum si vestræ beneplacitæ voluntati necessarium visum fuerit non ad ullam contentionem, nec adversum alicujus quæstionem, sed ob pleniorum rei notitiam, ut de Ebonis adhuc latius regulari depositione, et nulla canonica restitutione, sed et de mea qualiter celebrata sit ordinatione, vel qua ratione fratres et coepiscopi nostri in synodo Meldensi filios Rhemensis Ecclesiæ, de quibus agitur suspenderunt, vel unde accepit Suessonica synodus non debere in gradibus ecclesiasticis eos manere, rationem et ordinem, atque auctoritatem, quæ ibi ostensa, et a sollicitudine exiguitatis meæ suscepta sunt, ne offendam reticens dicendam in tempore veritatem, vestræ fraternitati pondere non negabo. Tantum ut non vos morosa, et forte vobis si nota est

non necessaria ratio tedeat, et sic veritas a me post-
sit ostendi, quatenus vestrae unanimitalis charitas erga
me debeat conservari. Qui absque nostro detrimento
non solum fratribus, sed et inimicis prodesse deside-
ro, et apostolicis mandatis quacunque contumacia
non resulto, nec fraternis vestris monitis et regula-
ribus diffinitionibus intentionem vel manus obvias
tendere paro, ea tamen conditione, quod et vos velle
et studere cognosco, ut regularum status et sedis
apostolicæ privilegium maneat, et commune pericu-
lum nostrum vitari prævaleat.

Post hanc schedulam, synodo ostensa sunt gesta
episcopalia Suessionicæ synodi per manus Hincmari
Laudunensis episcopi, et gesta synodi Bituricensis
provinciæ per manus Raginelmi Tornacensis epi-
scopi, et privilegium domni Benedicti per manus
Erchanravi Catalaunensis episcopi, et privile-
gium domni Nicolai per manus Hodonis Belves-
censis episcopi. Et post hæc omnia, data est
quæ sequitur schedula, qualiter priscis, ut dicit Ge-
lasius, pro sui reverentia manentibus constitutis,
et salvis apostolicæ sedis privilegiis, cum eorum
etiam salvamento qui synodo subscripserunt, in qua
fratres de quibus agitur fuere dejecti, per indulgen-
tiam et auctoritatem domni papæ in suis ordinibus
recipi et provehi possint absque contradictione,
migratis jam omnibus, qui in Ebonis depositione
fuerunt, episcopis, excepto solo Rothado; sed et eis
qui illi excommunicato dicebantur communicasse,
et aliis in eorum locis substitutis, ac per eos, ut ita
dicamus, innumeris ordinatis. Tantum ut de cætero
scandala, quæ hinc valent emergi, domni apostolici
auctoritate et providentia devitentur.

EPISTOLA V.

AD EPISCOPOS SYNODI SUESSIONENSIS,

*Quod absque necessitate mutari non debeant quæ
semel in conciliis statuta vel iudicata sunt.*

(Apuđ Sirmond.)

HINCMARUS Rhemorum episcopus REMIGIO, WEN-
LONI, et cæteris archiepiscopis, et episcopis, domni
papæ Nicolai auctoritate ad synodum, quo et exigui-
tatem meam cum coepiscopis nostris venire præcep-
pit, in hanc Suessorum civitatem pro causa Vul-
fadi et collegarum ejus convocatis.

Legimus, scribente beato Innocentio (*epist. 2, ad
Exuperium*), quod de quibusdam observatio prior du-
rior, posterior interveniente misericordia inclinatio
est. Et sanctus Leo dicit (*epist. 95, ad Rusticum*),
quia sicut quædam sunt, quæ nulla possunt ratione
convelli, ita multa sunt quæ aut pro consideratione
ætatum, aut pro necessitate rerum, oporteat tempe-
rari. Velut et de quodam indulgentiæ jure dicit, in
quo, inquiens, non regulam constituimus, sed quid
sit tolerabilius æstimamus. Et facundissimus Ge-
lasius (*epist. 6*): Priscis, inquit, pro suo reverentia ma-
nentibus constitutis, quæ ubi nulla vel rerum vel
temporum perurget angustia regulariter convenit
custodiri. Hic procul dubio, qui in ecclesiasticorum

A narratur altitudine dignitatum, et in cujus virtute
bonis operibus corda ponenda sunt, gradibus utique
distributis, cunctis Deus noster et rector populis
prædicandus est Christianis: ubi nemo sibimet ali-
quid jam æstimet imminutum, cum et de uniuscujus-
que gradus perfectione nil deperit, et convenienter
retinendo quod cœlesti dispensatione collatum est, pa-
riter nobis et cognoscibilem Deum fleri, et tribuit
esse rectorem. Nam etsi quid indulgetur de tempo-
rum quantitate, moribus aggregata strenuitate pen-
satur, si vitæ jam proposito continetur, quod prote-
lata fuerat ætate curandum: dummodo illa nullate-
nus dissimulata subripiant, quorum quodlibet si inesse
claruerit, merito clericalibus infulis reprobabilem
convincat esse personam. Et si illa nonnunquam si-
nenda sunt, quæ si cæterorum constet integritas,
B sola nocere non valeant: illa tamen sunt magnopere
præcavenda quæ recipi sine manifesta decoloratione
non possint. Et Africanum concilium, de virginum
velatione retractans (*can. 93*), ita manere constitu-
tionem prioris concilii, ubi nulla perurget necessi-
tas, decrevit, ut non obsit posteriori concilio certis
pro causis ea quæ constituta fuerant immutanti, nec
posterius concilium priori obviet (*can. 35*), ubi nulla
illud perurget necessitas immutare. Sed et de Dona-
tistis decrevit, ut consentientibus fratribus et co-
episcopis, maxime autem apostolica sede, a quibus
inde fuerat diffinitum, quatenus secundum unius-
cujusque episcopi catholici voluntatem atque consi-
lium, qui in eodem loco gubernat Ecclesiam, si hoc
paci Christianæ prodesse visum fuerit, in suis hon-
oribus suscipiantur, sicut prioribus ejusdem divi-
sionis temporibus factum esse manifestum est:
quod multorum et pene omnium Africanarum Eccle-
siarum, quibus talis error exortus est, exempla tes-
tantur. Non ut concilium, quod in transmarinis
partibus de hac re factum est, dissolvatur, sed ut il-
lud maneat circa eos qui sic transire ad Catholicam
volunt, ut nulla per eos unitatis compensatio pro-
curetur. Per quos autem vel omnimodo pericli, vel
adjuvari manifestis fraternalium animarum lucris,
catholica unitas in locis quibus degunt visa fuerit,
non eis obsit quod contra honores eorum, quamvis
salus nulli interelusa sit, in transmarino concilio
statutum est.

Unde manentibus statutis, absque regularum et
D apostolicæ sedis præjudicio, et iudicantium ullo dis-
crimine, quos non solum auctoritas Carthaginensis
concilii ab omni nævo defendit, si eorum fuerit so-
luta sententia, qui convinci non possunt vel inimico
animo iudicasse, aut aliqua cupiditate aut gratia de-
pravati; verum et idem concilium, sed et Antioche-
num, atque decreta sedis Romanæ pontificum, Inno-
centii, Zosimi atque Leonis, eos commendant, per
que sua confirmare iudicia, quæ fratres et coepi-
scopi nostri in Suessionica synodo Rhemensis Eccle-
siæ filiis, ab Ebone post depositionem suam ordina-
tis, censura ecclesiasticæ severitatis iudicaverunt,
ubi eos non iudicavi, nec cum iudicibus eorum sub-

scripsi : manente etiam, ut oportet et necesse est, auctoritate privilegiorum domni Benedicti, et domni ac Patris nostri Nicolai papæ; si illi placet cui cuncta bona placent, ut decessoris sui Benedicti et sua privilegii a se confirmati sententia de his fratribus propter misericordiam per indulgentiam immutetur, ubi exinde scriptum habetur, salvo Romanæ sedis in omnibus jussu atque iudicio : et aliter decretum confirmetur, nobisque tenendum mandetur, juxta moderationem Innocentii, qui observationem priorem duriolem, posteriorem autem interveniente misericordia inclinationem dicit (*epist. 2, ad Exuperium*); et vestra fraternitas, qui eosdem fratres iudicastis, vel quorum decessores illos iudicaverunt, unanimi benignitate, justitia, pietate condita consenserit atque decreverit, sicut sacra et mystica Nicæna synodus de Novatianis (*can. 8*), et per indulgentiam, in epistola ad universos episcopos per Ægyptum, Libyam et Pentapolim constitutos, de Meletio damnato clementi consilio, dum subtili veraque ratione nullam veniam mereretur, et ab eo post damnationem illius ordinatis, quos Meletienos appellat, decrevit.

Nam idem Meletius, ut in veraci et recipienda historia legimus, unius civitatis Ægyptiorum episcopus, sub Petro Alexandria civitatis archiepiscopo, qui suscepit Diocletiano imperante martyrium, depositus est, et propter alias multas causas, et maxime quia in persecutione fide negata sacrificaverat. Ergo damnatus habuit multos sequaces, et hæresiarches factus est eorum qui hæcenus ab eo in Ægypto Meletiani vocantur, nullam justitiæ satisfactionem habens cur remanserit ab Ecclesia separatus. Dicebat quidem injustitiam se passum, et obloquebatur sibi derogabatque Petro. Sed Petrus in persecutione percepta martyrii palma defunctus est; iste vero retulit detractiones in Achillam, qui post Petrum suscepit episcopatum, et rursus in Alexandrum, qui post Achillam noscitur ordinatus. Inter hæc igitur supervenit quæstio Ariana, et Meletius una cum suis defendebat Arium, conspuratione facta cum eo adversus episcopum. De quo Meletio et ejus complicitibus præfata sacra synodus in præscripta epistola, pacis redintegrandæ et unitatis gratia, hæc decrevit ad locum. Placuit, inquit (*epistola conc. Nicæni ad Ægyptios*), Meletium quidem clementi consilio, dum subtili veraque ratione nullam veniam mereretur, manere quidem in propria civitate, nullam vero omnimodis habere potestatem neque eligendi, neque ordinandi, nec in provincia, nec in qualibet civitate, purumque nomen tantummodo possidere. Eos autem qui ab eo sunt constituti, mystica ordinatione firmatos habere honorem et ministerium, ut tamen sequentes sint modis omnibus universorum in singulis parochiis et ecclesiis a charissimo et comministro nostro Alexandro consecratorum, ut in his nulla potestas sit placitos sibi eligere, aut nomina eorum præferre aut omnino aliquid gere præter voluntatem Ecclesiæ catholicæ

præsulis Alexandri. Gratia namque Dei, et orationibus vestris, in nullo schismate repertos, sed sine macula in catholica et apostolica Ecclesia permanentes, dignum est potestatem habere et eligendi quemlibet, et nomina eorum dandi qui clero sunt digni, et absolute facere omnia secundum legem et sanctiones Ecclesiæ. Si quem vero contigerit requiescere in Ecclesia, tunc provehi in honorem defuncti eos qui nuper assumpti sunt, solummodo si videantur digni, et populus eos elegerit, concedente simul et consignante maximæ Alexandria civitatis episcopo. Hoc itaque aliis quidem concessum est omnibus : in persona vero Meletii nequam eadem placuerit propter priorem indisciplineationem ejus, et propter procacitates ejus ac petulantiam voluntatem, ne ulla daretur auctoritas vel potestas homini, qui posset rursus easdem indisciplineationes instruere. Et Anastasius junior papa, ad Anastasium imperatorem scribens de ordinatis a damnato Acacio (*epistola unica*), recipiendos in suis ordinibus dicit. Quamquam eadem epistola sacris canonibus et decretis Innocentii, Zosimi, et Leonis, atque Gelasii, a quibusdam non convenire dicatur; quia ut ambigua sententia in eadem epistola idem Anastasius scribit, et baptizavit catholice, non canonice : nec secundum sacras regulas, neque secundum Ecclesiæ catholicæ consuetudinem sacerdotes vel levitas damnatus ordinavit Acacius, quia possunt etiam interdum laici catholici baptizati, ut dicit Gelasius, catholice baptizare, et etiam criminosi adhuc sedentes super cathedram, sicut Scribæ et Pharisæi, et sicut Judas, pro ministerii dignitate inter apostolos sibi commissa, et nondum iudicio aperto amissa, pro suo officio quæ in eodem ministerio operanda sunt operari. Sunt et alia, quæ hic poni poterant, nisi obviari eis ab aliis constitutis sanctorumque decretis manifeste cognosceretur; quoniam, ut Daniel dicit : *Pertransibunt plurimi, et multiplex erit scientia (Dan. xii, 4)*, aliter de hujusmodi decreta fuisse inveniuntur. Et idcirco ista possuisse sufficere, quæ indulgentiæ potius misericordiam sequi, quam censuram justitiæ intentare videntur.

His ergo ita se habentibus, quantum ex me est, sedis apostolicæ benignitati, et vestræ fraternitatis bene placitæ consensioni, sollicitus servare unitatem spiritus in vinculo pacis, in fratrum istorum regulari statu non obvio. Quorum, sicut in præcedenti scheda vobis porrecta præmissi, salubrem ac regularem statum et cupivi et cupio, et quæsi et quæro, et de quorum dejectione dolui satis et doleo, quia nemo majus dispendium habet de illorum dejectione quam ego. Et hæc quidem scripsi pro mediocritate ingenio mei, devotionem mentis meæ circa fratres ostendens, priscis, ut dicit Gelasius, pro sui reverentia manentibus constitutis, et reservato per omnia sententiæ ac juris privilegio apostolicæ sedis, et non præjudicans vestræ vel cujuscunque rationabiliori, seu plus tenendæ, ac majoris auctoritatis sententiæ,

quam si mihi ostensa fuerit paratus sum sine contradictione aliqua sequi. Illa tamen modis omnibus in istorum statu, si tamen a vobis unanimiter inde consensum, et a domno papa fuerit confirmatum, conditione servata, quam et apostolica sedes pro ecclesiastico vigore ab omnibus petimus faciat conservari, et a vestra fraternitate necesse est provideri, ne hæc, quod absit, occasione auctoritatem in sacris ordinibus ministrandi usurpent, qui aut penitus non acceperint, aut contra regulas acceperint, vel quibus regulariter ministerium fuerit interdictum. Quoniam si hoc impune fuerit licitum, omnis ordo et vigor ecclesiasticus non tantum nutabit, quantum penitus confundetur. Sunt cum istis et alia, de quibus provide domni apostolici summa auctoritas, et sub ejus magisterio hinc vestra solers considerabit sagacitas, quæ in alio diplomate mea vobis ostendet humilitas, ne sub hujus rei occasione in Ecclesia possint emergi. Vestra autem prudentia et hæc clarius, et alia, quæ sensus mei paucitas non potest attingere, contemplabitur, et domni apostolici supereminens sapientia multo sollicitius et videbit quæ providenda sunt, et præsentibus medelam et futuris imponet custodiam.

EPISTOLA VI.

AD EPISCOPOS SYNODI SUESSIONENSIS.

De Vulfado, quod Lingonensem Ecclesiam pastore viduatam usurpare præsumpserit, ac per satisfactionis libellum nunquam se ulterius ad gradum ecclesiasticorum administrationem aspiraturum proficiscitur.

(Apud eundem.)

HINCMMARUS Rhemorum episcopus, REMIGIO, WENIGLONI, et cæteris archiepiscopis et episcopis, domni papæ Nicolai auctoritate ad synodum, quo et exiguitatem meam cum coepiscopis nostris venire præcepit, in hanc Suessorum civitatem pro causa Vulfadi et collegarum ejus convocatis.

Quod invitum dico, et suppressimere in totum non audeo, ne forte mihi ab his qui hoc sciunt imputetur quod calliditate aliqua occultaverim veritatem, et si hæc causa, juxta veterum constitutionem judicio synodali decreta, sine diffinitione synodalis sententiæ modo quolibet fuerit refragata, dilecto fratri nostro Vulfado ad noxam cujuscumque redivo furore valeat deputari. Isdem namque dilectus frater noster, post omnia quæ de sua et collegarum suorum adjudicatione a synodo episcoporum quinque provinciarum diffinita, et a sedis apostolicæ auctoritate sub anathematis interpositione sunt confirmata, sine audientia et consilio episcopalis concilii sacerdotum qui eum judicaverunt, sineque auctoritate Romani pontificis qui ipsa judicia confirmavit, inconsulta etiam Rhemensi Ecclesia, extra provinciam ejus, in qua baptizatus, et in clericum tonsus, atque per plures annos in Ecclesia publice sacras Scripturas legit, ubi sicut Africanum decrevit concilium cap. 58 postquam semel legit, ab alia Ecclesia inconsulte recipi non debuerat, sicut idem concilium cap. 21

manifeste demonstrat, Lingonensem Ecclesiam pastore viduatam, ut ibi ordinaretur episcopus, sub nomine vocati episcopi usurpare præsumpsit, ejusque facultates, quæ secundum Chalcedonense concilium (*can. 25*) penes œconomum futuro duberant reservari episcopo, suis suorumque usibus arrogavit; decernente ipso concilio ut eos qui ausi fuerint post diffinitionem magnæ et universalis hujus synodi quidquam ex his quæ sunt prohibita perpetrare, decrevit sancta synodus (*can. 12*) a proprio hujusmodi gradu recedere: et Antiocheno concilio, de damnatis aliquid præsumptibus de ministerio, ut nullo modo liceat eis nec in alia synodo spem restitutionis habere. Et ab hac præsumptione synodali auctoritate, cujus habemus constitutionem, revocatus, jubente Domino, si peccaverit frater tuus, increpa illum, et si pœnitentiam egerit, dimitte illi, per satisfactionis libellum propria manu firmatum recipere communionem, qua regulariter secundum Nicænos et Chalcedonenses canones ac decreta Gelasii fuerat privatus, promeruit, sicut idem ipse libellus, qui præ manibus habetur ostendit. In quo sub jurejurando per sanctam Trinitatem unius deitatis professus est se nunquam et nusquam ad sibi interdictam præsumptionem, et ad graduum ecclesiasticorum administrationem ulterius aspiraturum, neque aliam hujusmodi temeritatem, qua pax Ecclesiæ valeat perturbari, et quies sacerdotalis possit inquietari, scienter vel libenter ulterius moliturum. Quem libellum coram episcopis Pardulo Laudunensi, Gunberto Ebroicensi, Ænea Parisii, coramque rege et quamplurimis aliis, nobis iudicibus suis a synodo constitutis porrexit; decernente beato Gregorio, ut revertentes a schismate jurejurando profiteantur et subscribant, se nunquam ad schisma quo redierant reversuros. Et secundum traditionem Leonis papæ scribentis ad Januarium episcopum (*epist. 3*): « Saluberrimum est, inquit, et spiritualis medicinæ utilitate plenissimum, ut sive presbyteri, sive diaconi, vel ejuslibet ordinis clerici, qui se correctos videri volunt, prius errorem suum damnari a se sine ambiguitate fateantur: ut sensibus pravis et dudum peremptis nulla aspirandi supersit occasio, nec ulum membrum Ecclesiæ talium possit societate violari, cum per omnia illis professio propria cœperit obviare. » Et ad Flavianum Constantinopolitanum episcopum de erroneo ab ecclesiastica disciplina (*epist. 12*): Si, inquit, fideliter aut utiliter dolet, et quam recte mota sit episcopalis auctoritas vel sero cognoscit, vel si ad satisfactionis plenitudinem, omnia quæ ab eo male sunt sensa, viva voce et præsentis subscriptione damnaverit, non erit reprehensibilis erga correctum quantalacumque miserratio, quia Dominus noster verus et bonus Pastor, qui animam suam posuit pro ovibus suis, et qui venit animas salvare non perdere, imitatores nos suæ vult esse pietatis, ut peccantes justitia coerceat, conversos autem misericordia non repellat. Et item ad Anatolium Constantinopolitanum episcopum de At-

tico presbytero scripsit (*epist.* 82), ut remota omni dubitatione Chalcedonensis synodi diffinitionem de fide, quam et apostolicæ sedis firmavit auctoritas, profiteatur se per omnia servaturum, adjecta subscriptione manus propriæ, quæ in Ecclesia populo præsentè recitetur. Quibus constat eos qui ab ecclesiastica traditione deviant per contemptum, taliter recipi debere : quoniam, ut Hilarus dicit (*epist.* 2), non minus in sanctarum traditionum pelinquitur sanctiones, quam in injuria ipsius Domini prosilitur. De quibus, si a sua professione vel subscriptione exorbitaverint, Carthaginense dicit concilium (*concilium Carth.* II, *can.* 13). Si quis, inquit, contra suam professionem vel subscriptionem venerit in aliquo, ipse se honore privabit. Et sanctus Gregorius ad Maximum episcopum Salonitanum de Andrea diacono dicit (*epist.* 125, *lib.* VII), quia flagitari judicium non debet de causa quam ipse judicavit. Sed quia contempta fuerat indebita præsumptione, non solum diffinitio synodalis episcoporum, sed et apostolicæ sedis domni Benedicti papæ auctoritas, opportunitate inventa, per venerabilem fratrem et coepiscopum nostrum Hodonem exemplar privilegii domni Benedicti sub fidei astipulatione dirigens domni Nicolai papæ auctoritati, ab eo quod suus decessor firmaverat corroborari poposci : non ad injuriam, quod absit, sedis apostolicæ, quasi ejus adhuc in ambiguum sententia duceretur, et ob id non sufficerent quæ ab ea semel domni Benedicti papæ auctoritate, ut inde quæstio nulli aliquid temporibus oriatur, et aspirantes indebite anhelitus compressi funditus perpetuo maneant, fuerant confirmata : sed quoniam incauta præsumptio ut constitutio geminaretur exegit, quatenus si obstinatio permanere deligeret, se post tot prohibitiones diffinita impune non posse tentare cognosceret. Hæc non per malitiam dicta, sed ne ut putarentur per vafritiem tacita, ad vestram notitiam necessarium duxi perducere, qui canonice cuncta per ordinem, quæ in præfato fratre nostro Vulfado et collegis ejus gesta sunt, secundum præceptionem domni nostri papæ, examinare et subtilius investigare, et si quid justum piumque sensum fuerit, de illorum reformatione debetis perficere, ne quid forte prætermisissimum videatur, quod vobis scire, et unde a vobis conveniat diffiniri.

EPISTOLA VII.

AD NICOLAUM PAPAM.

Per Egilonem missa cum actis synodi Suessionensis anno 866.

(Apud eundem.)

Domino sanctissimo et reverentissimo Patrum Patri NICOLAÛ, primæ ac summæ sedis apostolicæ et universalis Ecclesiæ papæ, HINC MARUS, Rhemorum episcopus, et vestræ sanctissimæ paternitatis devotissimus famulus.

Decimo quinto Kalend. Septembris, indictionis XIV, secundum vestram apostolicam jussionem, ad Suessorum civitatem, cum fratribus ac coepiscopis

A Rhemorum provinciæ, archiepiscopis et episcopis illuc ex mandato vestro convenientibus occurrere festinavi, quo etiam dilectum fratrem nostrum Vulfadam venire commonui. Eos etiam fratres nostros de ipsius collegio, qui sub nostra cura degunt, mecum adduxi. Quos sicut mihi scribere dignati estis, justum quid vel pium sentiens, sine retractatione in suis ordinibus consensu ac judicio coepiscoporum Rhemensis provinciæ restituere maturarem, si illos ab eisdem gradibus cum eorum tantum judicio dejecissem. Sed quoniam synodi episcoporum quinque provinciarum, quorum meo consensu expetierunt judicium, diffinitione fuere dejecti : et sicut melius sapientia vestra novit, sacri canones usque ad similem excommunicationis vindictam decernunt, B ut ab aliis dejecti ab aliis non recipiantur, minime autem restituantur, sed aut eorundem aut majoris concilii episcoporum diffinitiones ac judicia præstolentur, aliorum opus in illorum restitutione nullatenus usurpare præsumpsi quos meo arbitrio ab officio non suspendi, et in præfata synodo episcoporum quinque provinciarum, non tantum non judicavi vel dejeci, verum nec cum judicibus eorum subscripsi, quia mihi commissæ Ecclesiæ filii finitimos episcopos juxta canones Sardicenses pro causa sua interpellarunt, et Africæ provinciæ canones hujusmodi vicinos episcopos audire, et inter eos ac proprium episcopum adhibitos ab eis episcopos jubent querimoniam diffinire. Unde humiliter obsecro, ne pro inobedientia mihi reputetis, quoniam eos non statim restitui, qui ad synodum, sicut præcepistis, hoc solo C meo ausu agere viritus, obedienter occurri, et his quæ fratres et coepiscopi nostri, vestræ sanctissimæ paternitatis devotissimi filii, vestra fulti auctoritate, de illorum restitutione decreverunt, secundum quod mystica Micæna synodus, scribens ad diocæsim Ecclesiæ Alexandrinæ, de ordinatis a Meletio damnato episcopo clementi consilio statuit, videlicet ut mystica ordinatione firmati haberent honorem et ministerium, et proveheretur quilibet eorum in honorem episcopi in Ecclesia defuncti, si visus foret dignus, et eum populus elegisset, cum consensu Alexandrini episcopi, sub cujus cura diocæsis illa debebat, condecernente quodammodo similia Africano concilio de Donatistis, quæ non vobis ut incognita ingeruntur, sed ut notissima inculcantur, sacrorum canonum et sedis apostolicæ manentibus constitutis paratissime annuere, et sollicitus servare unitatem spiritus in vinculo pacis, obtemperare curavi : reservato per omnia sententiæ ac juris privilegio ejusdem apostolicæ sedis, et salva diffinitione ac confirmatione expectatæ vestræ discretionis, atque auctoritatis. Et quia Synodo, per hunc venerabilem archiepiscopum Egilonem, qui interfuit actionibus, dirigente epistolam omnium nostrum, qui adesse potuimus, cum ipso voce loquentem, quoniam si eis manum porrigitis, vobiscum pariter porrigemus, Vulfado et ejus collegis pro disceptatione diversa judicantium, in eadem synodo omnibus consonan-

ter idipsum sentientibus. sedem apostolicam non fuit necessarium appellare. Idecirco hujusmodi legatum, qui meam vobis repræsentans personam, cujuscunque diversa sententis allegationibus, quæ modo nullæ sunt, responderet, et vestram exinde diffinitionem referret, omisi dirigere, quia quæ verbis et scriptis mihi per istum religiosum archiepiscopum exinde sequenda atque tenenda mandaveritis, pro scire et posse obedire et conservare curabo, sicut hactenus ea, quæ inde fuerant statuta et confirmata, servavi. Nec causa inobedientiæ missum meæ subditiōnis cum hoc venerando archiepiscopo dimisi transmittere : sed quia sic intellexi in litteris vestræ auctoritatis contineri, tunc solum, ut verbis earum utar, si disceptantibus, vel fortassis alia atque alia decernentibus nobis, præfati dejecti sedem appellaverint apostolicam, et ejus speciali se judicio damnari vel absolvi petierint, si ego, vel si Vulfadus, aut socii ejus, ad vos venire per nos non possemus, vicarios nostros ad hoc negotium ventilandum et finiendum, mox post consummatum concilium xv Kalend. Septembris præsentis xiv indictionis auctoritate vestra collectum, nostras præsentaturos vobis personas, nullam penitus excusationem prætententes, utrique ad sedem beati Petri mitteremus. Unde supplico, ut merear scripto hinc vestram diffinitionem recipere, quam paratus sum, ut oportet, obnixius observare. Gestorum autem seriem de omnibus quæ in concilio relata, examinata, atque reperta sunt, quæ sicut veneranda decreta statuunt, discretioni vestræ dirigi præcepistis, ut quæ salubria videbuntur corroborentur : si forte aliqua supersunt epistolæ syn odali, quæ debeant explanari, hic venerandus ac religiosus sanctitatis vestræ devotissimus filius, et unanimis frater ac consacerdos noster Egilo archiepiscopus, plena fidelique relatione apostolicæ auctoritati vestræ poterit patefacere, et sicut ea visu et auditu comperit ac episcopaliter contulit intimare. Sed et de præfatis fratribus nostris, Rhemorum Ecclesiæ filii, ab Ebone post depositionem suam ordinatis, qui inter canonicos et monachos, urbanos et parochianos, una cum Vulfado apud nos non sunt amplius quam novem, de quibus sanctissima vestra paternitas mihi scripsit, ut cum dejectionis suæ causam venire ad examen optaverint, nullum ex his quilibet indignationem meam sustineat, nullum ad cepta peragenda per suggestionem meam patiatur incommodum, qualiter me antea et postea erga eos egisse in synodo fratres et coepiscopi nostri una cum eo repererint, sufficienter dignationi vestræ prævalet enarrare. Quorum salubrem ac singularem statum et cupivi et cupio, et quesivi et quero, et quorum dejectioni condolui, et statui eorum congaudeo. De Tetberga etiam regina, unde sublimitati vestræ ab humilitate mea mandari rogastis, quia Lotharium vel ipsam Tetbergam, postquam Arsenius venerandus episcopus et sanctæ Ecclesiæ Romanæ apocrisiarius, ab Attiniaco palatio domni Caroli regis gloriosi perrexit, non vidi, certe

A salubritatis rationem vobis mandare non valeo. *Et alia manu.* Deus omnipotens sanctitatem vestram, ad doctrinam et correctionem sanctæ suæ Ecclesiæ, in suo apto servitio per annorum multa curricula conservare dignetur, domine sanctissime et reverentissime Patrum Pater in Domino. Data Kalendis Septemb., indict. xiv.

EPISTOLA VIII.

AD EGILONEM ARCHIEPISCOPIUM SENONENSEM.

Romam euntem instruit de iis quæ in synodo gesta sunt in causa Vulfadi, et quemadmodum in Urbe gerere se debeat.

(Apud eundem.)

B HINCMARUS, nomine non merito Rhemorum episcopus, ac plebis Dei famulus, sanctissimo et reverentissimo EGILONI archiepiscopo, et charissimo ac unanimi atque fidissimo mihi, plurimam in Salvatore salutem.

Quanta fiducia vestra utar dilectione ex vestra mente pensare potestis. Non enim aliter in mente mea vos teneo, quam me alterum exceptis peccatis meis. Quapropter sicut in vobis et de vobis confido, et sicut vobis et pro vobis in omnibus esse cupio, ita erga me in omnibus sitis. Cæterum exemplar epistolæ domni apostolici ad dominum Carolum, quod non mandastis, sed et exemplar epistolæ mihi directæ, sicut mihi mandastis, dilectioni vestræ transmittito. Exemplar autem epistolæ, quæ uniformiter per archiepiscopos istius regni directæ est, vos habetis, sine qua ire non debetis. Mitto etiam vobis capitula in quibus summa continetur de omnibus epistolis, quas pro ista causa nobis omnibus dominus apostolicus misit. Et necesse vobis erit ut ipsa capitula bene cognita habeatis, et memoria teneatis quæ sparsim in ipsis epistolis continentur, ut si illi quos scitis more suo sua dicta involvere voluerint, habeatis veritatem quam illis respondere possitis. De scriptis denique quæ porrexi in synodo, de quibus mandastis ut discernere si vobis ad portandum necessaria forent, non mihi visum est vos ullam habere necessitatem : sed videtur mihi, quia si ostensa fuerint apostolico aut Romanis, ut aliquam dubitationem possint afferre domno apostolico, quasi contentiones inter nos fuerint in restitutione Vulfadi, et una cum vestro missatico suspecta synodi et mea epistola fiat, inde aliquid impedimentum et dilatio ad ea quæ senior noster cito obtinere vult de ipso Vulfado. Et puto non displicebit quibusdam, si aliqua occasio interciderit, unde ad illos sit ei necesse recurrere, et sicut mihi jam mandatum est, increseit apostolico et Romanis tanta legere. In scripto quippe quod primum dedi, nihil aliud habetur nisi quia ego non suspendi eosdem fratres ab officio, neque judicavi, neque a gradibus ecclesiasticis eos dejeci, neque cum judicibus eorum subscripsi, sed synodus episcoporum quinque provinciarum, et quod vos regulariter inde inveniretis, ego sine cunctatione sequerer secundum tenorem epistolarum domini apostolici : unde et synodus et ego rationem

reddimus in epistolis nostris domno apostolico, A quare eos ego non restitui. Alterum autem scriptum ideo dedi, quia sicut scitis non putabat me Vulfadus ad illum condescendere velle; et licet non in mea præsentia, tamen audiebam per alios illum dicere interdum, Ebonem non fuisse regulariter depositum, interdum autem regulariter restitutum. Et ideo demonstravi eundem Ebonem regulariter depositum, et non regulariter restitutum: qui damnatus anno Incarnationis Dominicæ 833, iv Nonas Martias, et per decem et septem annos postea in carne vivens, suam sedem regulariter in synodo non repetiit, neque obtinuit, nec etiam suam canonicam restitutionem, aut a sede apostolicat, aut a synodo regulariter factam, secundum canones et decreta sedis Romanæ ulli synodo in vita sua ostendit, et omnem quæstionem de illo secundum leges ecclesiasticas et humanas jam tricennale et eo amplius tempus excludit. Quoniam ut Leo ad Theodorum scribit (*epist.* 59, sub medium), quod manens in corpore non recepit, consequi exultus carne non poterit. De cujus depositione admodum plura habeo quam in synodo modo ostenderim, sicut et in ipso scripto in synodo est relectum, ubi me canonicè electum et canonicè ordinatum monstravi. In quibus sicut scitis et rex et omnes concordaverunt, scientes me non in durezza velle contra Vulfadum persistere, qui interdum etiam dicebat quod meus non esset clericus, angustians sicut scitis ut qualicumque modo gradus posset habere. Quæ etiam scripta vobis non ad ostendendum sed ad habendum mitterem, si notarius noster infirmus illa transcribere concurrisset.

Postea autem ostensa est synodus, cui ego non suscripsi; in qua ab ipsis, qui Ebonis damnationi interfuerunt, et verbis et scriptis atque auctoritatibus, coram rege comprobatum fuit, qualiter Ebo a se, juxta decreta Zosimi, Leonis, Joannis et Grægorii, per libellum professionis manu sua subscriptum, et a quadraginta tribus episcopis, secundum suam professionem et subscriptionem, regulariter depositus fuit, et regulariter restitutus non fuit: et ob id, secundum decreta Innocentii, qui scribens ad Martianum Naxitanum episcopum (*epist.* 28), jussit eos recipi suis ordinibus quos Bonosus ante damnationem suam ordinavit. Postea scribens ad Rufum et Eusebium ac cæteros Macedoniæ episcopos (*epist.* 27), eos quos post damnationem suam idem Bonosus ordinavit, nequaquam recipi in ordinibus ecclesiasticis permisit. Et secundum decreta Zosimi ad Aurelium et ad universos episcopos per Africam et cæteras provincias constitutos (*epist.* 6), et ad Massiliensem Ecclesiam, et ad Patroclum Arelatensem episcopum, de his quos post damnationem suam Proculus ordinavit, qui se libello professionis suæ suscripto in synodo deposuit; et secundum decreta Leonis et sacrorum canonum, qui excommunicato communicarunt in dejectione permanere istis fratres judicati fuerunt. Ostensa est etiam synodus episcoporum provinciæ Bituricensis, cui præ-

sedit Rodulfus, manibus eorum subscripta; in qua ab ipsis qui interfuerunt, et ab Aiulfo qui unus fuit de iudicibus Ebonis audierunt, comprobatum fuit eundem Ebonem regulariter fuisse depositum. Deinde ostensa sunt privilegia domni Benedicti et domo Nicolai, qui suis subscriptionibus et Ebonis depositionem et istorum dejectionem confirmaverunt. Quæ si omnia vobis longum fuerit enarrare, breviter poteritis dicere, quæ bene firma tenere debetis quia scitis quales sunt quidam; et peto ut non displiceat vobis quod talia vobis mando firma tenere debere, quasi me putem vobis sapienterem, quia ex charitate hoc dico, et talia mihi a vobis mandari vellem, si tale missaticum haberem sicut vos habetis. Verba autem quæ vos firma habere debetis, et etiam vestri, si aliquis inde fuerit tentatus, ista sunt: B Quia secundum tenorem epistolarum domni apostolici, sicut in eis scriptum habetur, cuncta per ordinem quæ in istis fratribus gesta sunt canonicè examinantes, invenistis Ebonem juste et regulariter depositum et non regulariter restitutum, et istos fratres non a me sed a synodo episcoporum quinque provinciarum iudicatos secundum sacros canones, et decreta Innocentii, Zosimi, et Leonis, sicut in synodali epistola continetur. Et quia in domni apostolici epistolis continetur ut quæ statuta sunt non ducat dissolvenda, nisi sacris legibus inveniantur adversa; et in eisdem epistolis intelligens synodus ipsius benignitatem erga hos fratres, inventa est ista auctoritas Nicæni concilii de ordinatis a Meletio quondam damnato episcopo, quam episcopi in synodali epistola illi unanimiter mandant, ut priscis, sicut dicit Gelasius, pro sui reverentia manentibus constitutis, et salvis apostolicæ sedis privilegiis, cum eorum etiam salvamento qui synodo subscripserunt, in qua fratres de quibus agitur fuere dejecti, per indulgentiam et auctoritatem ipsius in suis ordinibus recipi et provehi possint absque contradictione migratis jam omnibus qui in Ebonis depositione fuerunt episcopis, excepto solo Rothado. Verum et illi episcopi, qui eidem Eboni post depositionem suam dicebantur communicasse, jam ad divinum, judicium migraverunt, et aliis in eorum locis substitutis, ac per eos, ut ita dicamus, innumeris ordinatis, a nullo istorum fratrum restituito contra dicitur. Tamen si vos non gravaret, multum vellem ut omnem plenitudinem suprascriptam de Ebonis depositione, et de istorum adjudicatione domno apostolico referretis: quod sapientiæ vestræ committo arbitrio, cui melius credo, quam si ipsa scripta transmitterem. Est etiam, quoniam si aliqua scripta per vos mitterem, et vos illa portassetis, nisi tantum epistolam synodalem, et meam epistolam concordantem eidem epistolæ, scitis quales sumus: posset fieri ut aliquorum mentes inde contra nos scandalum sumerent; quod et modo in synodo quantum potui devitavi, ubi sicut comprobatur est istos fratres non judicavi, nec eidem synodo suscripsi. Et erant auctoritates canonicæ, et decretorum sedis

Romane pontificum, quibus ipsi episcopi hos fratres A
 judicaverunt, et qui eidem synodo suscripserunt, me tacente necesse habebant hoc statuere quod judicaverunt et subscripserunt, aut contra professionem et subscriptionem suam euntes, secundum Carthaginense concilium se honore privarent: et privilegia sedis. Apostolicæ duorum pontificum qualia sunt et quæ confirmaverunt quod ipsi episcopi judicaverunt, ipsi vidistis et audistis. Tamen ne scandalum fieret, secutus exemplum Domini qui dixit ad Petrum: Nos census non debemus, sed ne scandalizemus eos, videlicet qui census exigebant, *da staterem de ore piscis pro me et pro te* (Matth. xvii, 26), vitato scandalo et præjudicio sedis apostolicæ, ut non nos, sed ipsius auctoritas si voluerit, solvat et immutet suam sententiam quam ligavit et confirmavit, servandam vidi unitatem spiritus in vinculo pacis, similiter et in hoc sicut et ibi, ut nullum ego scriptum mittam, nec vos aliud portetis, nisi quod cum rege et cum episcopis nobis convenit. Eamus simpliciter quia sicut Scriptura dicit: *Qui ambulat simpliciter, ambulat confidenter* (Prov. x, 9). Sed si locum videritis, domo apostolico aperire debetis, quoniam multi jam dicunt, si illa firma non fuerunt quæ tunc inde confirmata sunt, nec ista quæ modo fiunt firma erunt. Et nihil est jam firmum quod episcopi et apostolica sedes decernunt; neque de nostris judiciis, nec etiam de excommunicatione curant; nec presbyteri a nobis degradati pro nostro judicio suum ministerium dimittent, quia nihil est firmum quod agimus sed sicut vult rex, et sicut nos aut odium movet, aut gratia, aut cupiditas, aut timiditas, ita et nostra et apostolicæ sedis vadunt judicia. Et recordari debetis apostolico, qualiter de sua excommunicatione et propriæ manus confirmatione fecit Guntharius. Qua de re providendum est in talibus, quia jam homines plus proclives et voluntarii sunt ad impune peccandum, quam ad regularem disciplinam suscipiendam et observandam. Et si dominus apostolicus a vobis quæsierit ipsas auctoritates, qualiter isti dejiciendi judicati fuerunt, potestis si vobis videtur illi respondere, quia unanimiter episcopi suum studium ad hoc converterunt, ut isti fratres restituerentur: unde illi miserunt auctoritatem quam invenerunt. Et quia non fuit eorum studium ut in dejectione permanerent, illas auctoritates sacrorum canonum, et decretorum Innocentii, Zosimi, Leonis, quæ supra dictæ sunt, et illi sunt cognitæ, ei transmittere omiserunt. De quorum restitutione, si Vulfadus in causa non foret, satis Ecclesia indurare potuisset, qui inter canonicos et monachos, urbanos et parochianos, una cum Vulfado non sunt amplius quam novem. Ego dico quod mihi videtur charitatis affectu; vestra autem prudentia, et ad hæc et ad plura alia, Deo gratias satis sufficiet. Peto etiam ut ad hoc quod dominus apostolicus mihi scripsit de duritia Pharaonis, sicut in epistola mihi missa legitis, ei ex ordine Condi-catis quam benigne eosdem fratres et antea et

postea tractavi, sicut coram ipsis in synodo compro-
 bavi, ne talem me aestimet, sicut me æmuli mei illi depingunt. Et habete exemplaria de epistola syno-
 dali, et de mea epistola: ut si aliqui inde quiddam voluerint dicere, postquam illas apostolico dederitis, habeatis earum exemplaria, et habeatis eas bene cognitas. Similiter satagite, ut illas epistolas, quas dominus apostolicus de ista causa facere jubebit, legatis antequam huc mittantur, ne aliquem dolum in eis scriptores, sicut dicuntur facere, possint imponere. Et non obliviscamini ut faciatis certum apostolicum, quia illa epistola quarti Leonis papæ de istorum fratrum reclamatione, quam memorat in suis epistolis, istis Cisalpinis regionibus non innouit, nisi per suas nuper missas epistolas; et rogare aliquem de vestris memorosum hominem, qui vos sæpe admoneat, quoniam occupati eritis, ut non obliviscamini impetrare gesta pontificum, ab initio gestorum Sergii papæ, in quibus invenitur Ebo fuisse damnatus, usque ad præsentem annum istius præsulatus, quia nos in istis regionibus satis hoc indigemus. Nam aliorum pontificum gesta, si vos non habetis, per me aut per Fulricum habere poteritis. De omnibus istis quæ dilectioni vestræ mando, qualiter vobis placeant, aut qualiter displiceant, quantum vobis placuerit et licuerit, et quæ mitto qualiter ad vos salva pervenerint, per istum missum nostrum mihi litteris remandate. In conclusione autem vobis scribo, quod sanctus Petrus apostolus Apollinari dixit, quando eum Ravennam prædicare transmisit, Dominus meus Jesus Christus mittat angelum suum coram te, qui custodiat vias tuas ante te, et annuat quæ postulaveris.

EPISTOLA IX.

AD EGILONEM EUMDEM ARCHIEPISCOMUM.

Do Gothescalco ejusque assertionibus, et de Prudentio episcopo, ut suggerat pontifici.

(Apud eumdem.)

Charissimo et fidissimo mihi plurimam in Christo salutem.

In aliis litteris ideo tantu vobis scripsi, ut habere-
 tis rei ordinem et plenitudinem, ac veritatem de his quæ fuerunt gesta in synodo, quia dominus apostolicus, sicut in vobis directa legetis epistola, cuncta quæ ibi gesta fuerunt plena fidelique narratione ad
 Dse referri præcepit, et animus vester, ad iter subita-
 neum et difficile occupatus, intendere forte ad cuncta non potuit, licet inde in epistola synodi sufficienter sit positum, et etiam de aliis quæ scribo, mihi verbis vobiscum conferre non licuit, quæ peto, sed et ista quæ sequuntur, ut in talium manus non veniant, unde scandalum possit oriri. Post illas autem scriptas literas, nuntiatum est mihi, de cella nostra, quæ vocatur Altumuillare, monachum nostrum nomine Guntbertum aufugisse cum libris, et vestimentis, et caballis, et aliis etiam quæ furari potuit. Qui sæpe pro suis negligentis regulariter correptus fuit: et quia sæpe Gothescalco furtim se conjunxerat, et lit-

teras ei dederat, et ab eo acceperat, secundum regulam in gravioribus culpis missus fuit, et dicitur illus perversa doctrina depravatus. Et sicut mihi dictum est, quasi ipsius Gothescalci reclamationem vult perferre ad domnum apostolicum, videns qualiter illa adversum me, quæ de istis partibus ad illum veniunt, suum cursum accipiunt. Et audiens, quod domnus apostolicus domno regi Carolo de me scripsit, quia semper me tegere non debet a talibus, nec valet : ut providerem ne pro eis tandem aliquando incurram quæ non opto, et ipse frater et alii licenter quæ volunt aut moliantur, aut faciunt. Nam ego nescio in quibus domnus apostolicus tam sæpe se texisse me dicat. Si enim de Rothado dicit, non singulariter mea auctoritas, sed episcoporum regni domni nostri Caroli, ad quos contra me provocavit, eum dejecit, sicut subscriptiones eorum demonstrant. Si de istis ordinatis dicit, sicut modo comprobatum vidistis et audistis, ego eos non judicavi, neque dejeci, neque cum iudicibus eorum subscripsi. Si de Gothescalco dicit, de quo, sed et de præfatis ordinatis, ab Arsenio scripto interrogatus scriptis rationem reddidi, eumdem Gothescalco a duabus synodis damnatum, jubentibus episcopis postquam iudicatus fuit custodiendum accepi, ne alios sua perversa doctrina noceret qui sibi prodesse nolebat. De quo etiam litteris domno apostolico suggesti, qualis ejus sit doctrina, et utrum vellet ut ei licentiam ab eum eundi darem, an alteri eum per suam jussionem commendarem, ne sine auctoritate duarum synodorum diffinitionem dissolverem. Si illi placet per seipsum audire, mandet, et ego illum dimittam ut ad eum vadat : quia si rex illum non miserit, ego non habeo tantos custodes qui eum deducant. Si etiam illi placet ut alius eum recipiat, et suam doctrinam sive synodus, sive quilibet episcopus audiat, et si bona est sequatur, si prava est, ab eis qui eum audierint refellatur. Et illi quibus hoc commendaverit, facient de illo quod sacris regulis viderint convenire, sicut illi de eo fecerunt qui se sacras regulas intellexisse putarunt, nihil mea interest. Tamen si aliquis vos interrogaverit de sua doctrina, hanc esse illi respondere potestis, sicut et verba et scripta illus demonstrant.

1. Dicit enim deitatem sanctæ Trinitatis trinam esse, sicut sunt tres sanctæ Trinitatis personæ. 2. Dicit ita geminam esse Dei prædestinationem, ut sicut Deus quosdam ad vitam æternam, ita quosdam prædestinaverit ad mortem æternam. 3. Dicit quod non vult Deus omnes homines salvos fieri, sed tantum eos qui salvantur : omnes autem salvari quoscunque ipse salvare voluerit, ac per hoc quicumque non salvantur, penitus non esse voluntatis illius ut salventur. 4. Dicit quod non pro totius mundi redemptione, Dominus et salvator noster Jesus Christus sit crucifixus et mortuus, sed tantum pro his qui salvantur. 5. Dicit exponens sententiam apostoli Petri, eum qui emit eos Dominum negantes,

A Baptismi, inquit, sacramento eos emit, non tamen pro eis crucem subit, neque mortem pertulit, neque sanguinem fudit. Unde latius diela in suis scriptis inveniuntur, quæ in altera schedula vobis mitto, ut si fuerit vobis visum, domno apostolico eam monstretis a me vobis directam, non ad illi ex mea parte ostendendam, sed ad vobis habendam. Sunt et alia quæ dicit, quæ mihi videntur esse pernicioosa et fidei catholicæ contraria, quæ si ad hoc venerit probantur sapientes atque catholici. Mihi de tantis ac talibus taliter impetito sufficit sedere in angulo domatis, et non conserere contentionum manus cum muliere litigiosa in domo communi : et sufficit ut sit mihi anima mea pro spolio. Nam idem Gothescalco, vel quia jam tempus est ut veniat quod Paulus prædixit apostolus de ultimis temporibus, vel invidia mei, quasi me tangat quod jussu episcoporum illum custodio, dicitur multos habere fautores, sicut habuit domnum Prudentium, sicut scripta ipsius testantur, quæ a pluribus qui illa habent possunt proferri. Qui etiam, videlicet domnus Prudentius, in Annali gestorum nostrorum regum, quæ composuit, ad confirmandum suam sententiam, gestis anni Dominicæ Incarnationis 859 indidit dicens, Nicolaus pontifex Romanus de gratia Dei et libero arbitrio, de veritate geminæ prædestinationis, et de sanguine Christi, ut pro credentibus omnibus fusus sit, fideliter confirmat et catholicæ decernit. Quod per alium non audivimus, nec alibi legimus. Unde quoniam ipsa gesta, quibus nec conscripta sunt, jam in plurimorum manus devenerunt, necesse est ut taliter de hoc domno apostolico suggeratis, ne scandalum inde in Ecclesia veniat, quasi ipse quod absit talia sicut Gothescalco sentiat. Et precor ut de mea parte nihil ei dicatur, qui commotum dicitur habere suum animum erga me, multis ad eum contra me scribentibus, et mihi derogantibus, ne scandalum in me inde retorqueat unde culpam non habeo. Ipsum autem Annale quod dico rex habet, et ipse est ille liber, quem coram vobis in Ecclesia, ubi vos nobis commendavit, coram vobis ab illo mihi præstitum ei reddidi. Plura denique vobis de ipso Gothescalco scribere poteram, quam perniciosus sit, et multo magis noxius erit multis, si ab ipsa custodia fuerit absolutus : quia pro certo talia dicit et talia facit, in quibus evidenter cognoscitur aut dæmoniacus esse, aut maniacus : et scitis quoniam mania esse non solet absque dæmone. Et si aliquis vos interrogaverit de ipsius custodia, talem esse veraciter illi respondere potestis : Quidquid fratres in cibo et potu habent, hoc ei quotidie sine ulla negligentia ministratur; vestimenta illi ad sufficientiam offeruntur, si vult ille accipere : ligna ad focum faciendum illi sufficienter dantur. In mansionem in qua degit caminatum habet, et necessarium. Lavacra illi non deneantur : sed postquam in eandem mansionem intravit, non solum corpus lavare noluit, verum nec manus, nec faciem. Antea enim, sicut illi testantur inter quos conversatus erat, turpissimus et adhuc

quantum potest in sua turpitudine manet. Et sciatis quia maxima nausea in ista Ecclesia commovebitur, si ad synodum venire jussus fuerit, aut de ipsa custodia absolutus exstiterit. Quæ non pro me dico, quia nulla mihi inde est cura nisi pro aliis, sed vos probabit mihi verum dicere. Tales enim surgent qui adhuc latent.

EPISTOLA X.

AD EGLONEM EUMDEM ARCHIEPISCOPUM.

Gothescalci ejusdem doctrinæ uberius expositio, quam præcedenti epistola promittebat.

(Apud eundem.)

HINC MARUS, nomine non merito Rhemorum episcopus, ac plebis Dei famulus, sanctissimo et reverentissimo EGLONI archiepiscopo.

Si aliquis vos interrogaverit de Gothescalci doctrina, unde vobis jam quædam scripsi, hanc esse interroganti respondere potestis, sicut et verba et scripta illius demonstrant. 1. Dicit enim deitatem sanctæ Trinitatis trinam esse, sicut sunt tres sanctæ Trinitatis personæ. 2. Dicit ita geminam esse Dei prædestinationem, ut sicut Deus quosdam ad vitam æternam, ita quosdam prædestinaverit ad mortem æternam. 3. Dicit quod non vult Deus omnes homines salvos fieri, sed tantum eos qui salvantur : omnes autem salvari, quoscumque ipse salvare voluerit. Ac per hoc quicumque non salvantur, penitus non esse voluntatis illius ut salventur. *Omnia*, inquit Scriptura, *quæcunque voluit Dominus fecit in cælo et in terra, in mari et in omnibus abyssis* (Psal. CXXXIV, 6), etc.; *In voluntate tua, Domine, cuncta sunt posita, et non est qui possit tuæ resistere voluntati* (Esther XIII, 9). Ergo non vult omnes salvos fieri, sed tantum eos qui salvantur, quia si vult quod non potest, omnipotens non est. 4. Dicit quod non pro totius mundi redemptione, id est non pro omnium hominum salute et redemptione, Dominus et Salvator noster Jesus Christus sit crucifixus, sed tantum pro his qui salvantur. 5. Dicit exponens sententiam apostoli Petri, *eum qui emit eos Dominum negantes* (II Petr. II, 1), Baptismi, inquit, sacramento eos emit, non tamen pro eis crucem subiit, neque sanguinem pertulit, neque sanguinem fudit. Unde latius dicta in suis scriptis inveniuntur. Ex quibus mortiferis capitulis quanta exitiosa prodeant, catholicis et litteratis quisque conspiciere potest.

1. Hinc enim ad inventionem diaboli dicentis ad Adam : *Eritis sicut dii* (Gen. III, 5), pluralitas deorum inducitur, quoniam si trina est Deitas, tres dii erunt. Unitatem quippe in Trinitate, non eadem persona, sed eadem implet essentia, id est deitas, quæ Trinitatis est unitas. Et in lege Domino dicente : *Audi, Israel, Dominus Deus tuus Deus unus est* (Deut. VI, 4). Et in Evangelio : *Ite, docete omnes gentes, baptizantes eos in nomine Patris, et Filii, et Spiritus sancti*, (Math. XXIII, 19), et cantantibus

A seraphim : *Sanctus, sanctus, sanctus Dominus Deus Sabaoth* (Isa. VI, 3). Et concinente David : *Benedicat vos Deus, Deus noster; benedicat nos Deus, et metuant cum omnes fines terræ* (Psal. LXXVI, 8). Et confitente Paulo : *Ex ipso, et per ipsum, et in ipso sunt omnia. Ipsi gloria* (Rom. XI, 36). Cum sese Deus unus dicitur, et in nomine, non in nominibus, credens quique baptizari præcipitur, et a seraphim ter *Sanctus* cantatur, et unus Dominus Deus Sabaoth confitetur, et a David ter Deus nominatur, et metui per omnes fines terræ unus oratur, et a Paulo post Trinitatis confessionem unus Deus glorificatur, trium personarum sanctæ Trinitatis una deitas, quæ Trinitatis est unitas, demonstratur. Ac per hoc, quantum ex se est, ista perniciosissima hæresi, idolatriæ videlicet matre, a mystica Nicæna synodo gladio verbi Dei perempta, et ab isto nuper resuscitata, fides in qua baptizati sumus, et qua corde creditur ad justitiam, et ore confitetur ad salutem evertitur.

2. Liberi arbitrii opera, sive bona sive mala, nihil valere ad meritum, sed sive ad vitam sive ad mortem, cuncta Dei prædestinationem agere, ab ista prava doctrina enucleatur. A qua et reprobis tollitur meritum damnationis, et justis meritum aufertur salutis. Ac per hoc nec illi juste damnantur, qui justus esse non possunt : nec isti juste remunerantur, quia aliud quam justus esse non possunt. Nec injustis ergo quidquam acquirit meritum, nec in electis aliquid gratia operatur : sed in utraque parte et perditio et salus non est ex judicio propriæ actionis, sed ex præjudicio Domini voluntatis, totumque Dei opificio reputabitur. Non enim potest dicere figmentum ei qui se finxit. Quare me fecisti sic? Non igitur aliquis libero arbitrio condemnabitur, nec quisquam pro gratia misericordias Domini in æternum cantabit. Si enim, quod cæcus iste in meridie palpans non videt, liberum non esset arbitrium, unde totus in massa perditionis Adam perditus, cum suis etiam additis juste judicaretur mundus? Et rursus, nisi Dei gratia esset, quomodo ex eadem massa perditionis electus, id est, gratia lectus salvaretur mundus? *Misericordia*, inquit psalmus, *et veritas obviaverunt sibi, justitia et pax osculatæ sunt* (Psal. LXXXIV, 11). Misericordia quidem est, qua salvantur electi : veritas autem est, qua in massa perditionis deseruntur relictus. Justitia quidem est, quia non assumuntur reprobi : pax vero his est, qua de una eademque massa perditionis gratia fiunt probi. Unde Paulus dicit : *Stipendia enim peccati mors, gratia autem Dei vita æterna* (Rom. VI, 23).

3. Sed et male interpretando Scripturam : *Omnia quæcunque voluit Dominus fecit in cælo et in terra, in mari et in omnibus abyssis* (Psal. CXXXIV, 6) : *In voluntate tua, Domine, cuncta sunt posita, et non est qui possit tuæ resistere voluntati* (Esther. XIII, 9), iniquus Deus, qui infert iram his qui contra prædestinationem et voluntatem

ejus salvari non possunt, et his qui alieno, id est A primi parentis peccato venditi sunt, et pro quibus non est data redemptio, ab illo asseveratur. Et vel non intelligens, vel scienter mendaciter interpretans ex Scripturis quod bene et vere dictum est, dum Deum infirmum dicere vitat, iniquum facit, dedignans, usus pessimo præceptore seipso, ab alio discere qualiter debeat intelligere, quia sunt quædam quæ dicitur non posse omnipotens, docente Paulo, *Deus fidelis permanet, seipsum negare non potest* (II Tim. II, 13). Qui etiam mutari, mentiri, falli, peccare, miser fieri, vinci ac mori non potest. Quæ et his similia si posset, vel si hæc velle posset, omnipotens non esset. Unde nunc longum est scribere, et si hic nebulo in his sanum sensum haberet, in hæc sententia non erraret, qui dum dedignatur fieri discipulus veritatis, si ei liceret, magister fieri vellet erroris.

4. Necnon et loquente de seipso in magno Petro : *Non tardat Dominus promissis suis, sed patienter agit propter vos, nolens aliquos perire, sed omnes ad penitentiam reverti* (II Petr. III, 9); et in divino Paulo : *Omnes homines vult salvos fieri, qui dedit redemptionem semetipsum pro omnibus* (I Tim. II, 4, et 6); et : *Gratia Dei pro omnibus gustavit mortem* (Hebr. II, 9); et : *Si unus pro omnibus mortuus est, ergo omnes mortui sunt, et pro omnibus mortuus est Christus* (II Cor. V, 14); et in propheta cum juramento propter incredulos : *Vivo ego, dicit Dominus, nolo mortem peccatoris, sed ut convertatur et vivat*. Et in omni catholica Ecclesia, quæ pro omnibus hominibus ex traditione apostolica illi supplicans, legem hinc credendi lege nobis statuit supplicandi, veritatem mendacem dogmatizat. Et cum Christus de diabolo dicat : *Mendax est ab initio, et pater ejus* (Joan. VIII, 44), si idem Christus juxta istius doctrinam mendax est, suis ipsis verbis, quod nefas est dicere, similis ei, id est diabolo, mendax esse convincitur. Est autem Deus verax, et Gothescalcus mendax : quia unus idemque. Sol justitiæ Christus, ut repararet omnium vitam, recepit omnium causam, inde in omnes manante justitia, ubi est omnis humana suscepta natura, non culpa, qui omnibus ortus est, omnibus venit, et pro omnibus passus est, et omnes vult salvos fieri qui pro omnibus passus est; sed non ab omnibus videtur, et non omnes salvantur. *Lux enim lucet in tenebris, et tenebræ eam non comprehenderunt* : quod non pertinet ad culpam lucis, sed ad tenebrarum. Lux quippe venit in mundum dicens : *Ego sum lux mundi : qui sequitur me non ambulat in tenebris, sed habebit lumen vite* (Joan. VIII, 12). Sed dilexerunt homines tenebras magis quam lucem. Erant enim eorum mala opera. Et item comprehendentibus lucem tenebris, ipsa lux per Apostolum dicit : *Fuistis aliquando tenebræ, nunc autem lux in Domino* (Ephes. V, 3). Quod autem quidam sequentes lucem salvantur salvantis est donum; et quod quidam in tene-

bris remanentes pereunt, pereuntium est meritum. *Universæ enim viæ Domini misericordia et veritas*. Ut enim reus damnatur, inculpabilis Dei justitia est; ut autem reus justificetur, ineffabilis Dei gratia est. Et redemptio humani generis omnibus proposita est, sed fidelibus dat salutem. *Sic enim dilexit Deus mundum, ut Filium suum unigenitum daret; ut omnis qui credit in eum non pereat, sed habeat vitam æternam; qui autem non credit, jam judicatus est* (Joan. III). Quod et Dominus ostendit quando sacramenta passionis suæ discipulis et apostolis suis tradidit dicens : *Hoc est corpus meum, quod pro vobis tradetur* (Luc. XXII, 19); et : *Hic est sanguis meus, qui pro vobis et pro multis effundetur* (ibid.). Utrumque enim in Evangelio invenitur. Inter quos, quibus hæc tradidit, erat et Judas. reproborum tenens partem, sicut et cæteri discipuli electorum partem ferebant. Idem quippe non pro omnibus sed *pro multis* dixit, quia non omnes credituri erant. Effusio enim sanguinis Christi, justis pro injustis, tam fuit dives ad pretium, ut si universitas captivorum in redemptorem suum crederet, nullum diaboli vincula retinerent. Qui autem non credunt, ipsi sibi damnationem acquirunt. Nam sicut incarnatio, prædicatio, miracula, ita et mors Christi, salus et honor est credentibus, non credentibus autem lapis offensio- nis et petra scandali, veluti in Scripturis multoties et passim qui legunt inveniunt, et in natura creaturarum conspiciunt, per quas invisibilia Dei cognosci a Paulo dicuntur (Rom. I, 20). Unus namque ac idem sol lutum stringit, et ceram liquat, et conditor ac redemptor, atque salvator noster, non alia cogitatione justus adjuvat, atque alia injustos damnat : sed una eademque vi naturæ singularis, sibi semper indissimilis, dissimilia disponit una prædestinatione sua, quæ semper in bono est, et sic est gemina, sicut unus sanctus Spiritus et duo ejusdem data, una charitas et duo ipsius præcepta. Una Dei prædestinatio, aut ad donum pertinens gratiæ, aut ad retributionem justitiæ. Non ut Deus reprobos prædestinasse credatur, quod absit, ad pœnam, sicut creditur electos prædestinasse ad gloriam, et eis gloriam præparasse perennem; sed ejus prædestinatione, veluti ei canitur a propheta : *Misericordia et veritas præcedent faciem tuam* (Psal. LXXXVIII, 15), per misericordiam conferantur quæ ad donum pertinent gratiæ, et ad veritatem justis iudicii referantur quæ redduntur retributione justitiæ. Bonus est enim et justus in omnibus Dominus, quoniam bonum est cum debitum redditur, et justum est, cum indebitum sine cujusquam fraude donatur, sicut scriptum est : *Cui vult miseretur, et quem vult indurat* (Rom. IX, 18). Miseretur nimirum Deus, gratis impartiendo misericordiam, et auferendo nequitiam : obdurat autem, non impartiendo malitiam, sed juste non impartiendo misericordiam; sicut dicitur obdurasse cor Pharaonis, id est per gratiam non emollisse, et tradidisse quosdam in reprobum sensum, id est, ex retributione justitiæ per gratiam non

liberasse a reprobo sensu. Et multa alia hoc genere A
locutionis dicta, in Scripturis inveniuntur.

5. Et qui locutus est per prophetas, dicente Dei Spiritu per apostolos et evangelistas : *Unus et Deus, una fides, unum est et baptisma* (Ephes. IV, 5); in quo sanctificatio spiritus per aspersionem fit sanguinis Christi, quo redempti sumus de vana nostra conversatione paternæ traditionis (I Petr. II). *Sanguis enim ejusdem Jesu Christi Filii Dei emundat nos ab omni peccato* (I Joan. I, 7), *qui venit per aquam et sanguinem Jesus Christus, non in aqua solum, sed in aqua et sanguine. Et Spiritus est qui testificatur, quoniam Christus est veritas : quia tres sunt qui testimonium dant, spiritus, aqua et sanguis, et tres unum sunt* (I Joan. V, 6). Spiritus utique sanctificationis, et sanguis redemptionis, et aqua baptismatis, quæ tria unum sunt, et individua manent, nihilque eorum a sui connexione sejungitur. Et hæc fide vivit et proficit catholica Ecclesia, mundata lavacro aquæ in verbo, quoniam non est unum, et salutare baptismum, quod in eadem catholica celebratur Ecclesia, vel aqua sine verbo, vel verbum sine aqua ; sed cum accedit verbum ad elementum, efficitur sacramentum, spiritu qui in principio ferebatur super aquas sanctificatum, quod uno militum lancea aperiente latus Christi in cruce, continuo exivit de secreto divinæ humanitatis et humanæ divinitatis, scilicet sanguis et aqua, unde lavacro rigatur et populo Ecclesia credentium, quorum corda fide quæ datur per spiritum purificantur, quique spe salvi fiunt, *quoniam charitas Dei diffusa est in cordibus nostris per Spiritum sanctum qui datus est nobis* (Rom. V, 5), in quo credentes signati sumus spiritu promissionis sanctæ. Et item, eodem dicente Apostolo : *In quo signati sumus in die redemptionis* (Ephes. IV, 30), id est in eodem sacramento baptismatis, in quo nulla est discretio renatorum, dicente Apostolo : *Quicumque baptizati sumus in Christo, in morte ipsius baptizati sumus* (Rom. VI, 3); et : *Quicumque in Christo baptizati estis, Christum induistis. Non est Judeus neque Græcus, non est servus neque liber, non est masculus neque femina, omnes enim unum estis in Christo Jesu* (Gal. III, 27). Quoniam quos aut sexus in corpore, aut ætas discernit in tempore, ab immaculato divini fontis utero omnes in unam parit gratia mater infantiam, et renatus ex aqua et Spiritu, non solum spiritualis, sed etiam invisibiliter D
fit spiritus, et per adoptionis gratiam Dei Filius, cum visibiliter videntibus appareat caro et hominis filius. Contra quæ omnia ipsius unius ejusdemque baptismatis veritas isto pestilentissimo dogmate evacuatur, quod nullam credentibus spem salutis relinquit, nec a quo credentes salutem sperare possumus, faciens Deum iniquum atque mendacem, et personarum acceptorem, dimittit. Quæ, sed et aliæ ipsius blasphemix, Scripturarum auctoritate, et catholicorum traditione, qui se in loquente Domino, a cujus facie est sapientia et intellectus, et qui docet hominem scientiam, hæc prava in directa et

aspera in vias planas fecerunt, facile posse revinci cognoscitis. Non igitur est perfunctorie transeundum quod Cœlestinus scripsit pro talibus atque de talibus (epist. 8, ad episcop. Gallix). « Merito, inquiens, causa nos respicit, si silentio faveamus errori. Ergo corripiantur hujusmodi ; non sit his liberum habere pro voluntate sermonem. Desinat, si ita res sunt, incessere novitas vetustatem ; desinat Ecclesiarum quietem inquietudo turbare. » Alioquin, ut Leo dicit, inferiorum ordinum culpæ ad nullos magis sunt referendæ, quam ad desides negligentisque rectores, qui inultam sæpe nutriunt pestilentiam, dum necessariam dissimulant adhibere medicinam. Multa vobis scribere poteram de his, sed et de aliis exitiosissimis dictis hujus procacissimi hominis, si licuisset, et antea hinc vobis scribere meditatus fuisset. Sed quia in articulo jam perfectionis missi nostri, quem ad vos dirigebam, nuntiatum est mihi, habitu tantummodo monachum nostrum, ejusdem Gothescalci complicem, in partes Italiæ quo pergitis, cum his quæ furari de monasterio potuit aufugisse, necessarium duxi, accito notario, vel hæc parva et tumultuario sermone quæ mens ori suggestit emissa, vestræ sapientiæ intimare ; ut si forte isdem pestifer in illis partibus de zizania magistri sui aliqua seminaverit, et a quibusdam inde interrogati fueritis, habeatis quæ illis de doctrina ejus certa respondere possitis, et ne pro multis detentus missus noster tam diu morari cogeretur, ut ei necesse foret vos longius sequi.

EPISTOLA XI.

AD NICOLAUM PAPAM.

Respondet increpatoriis ejus litteris, purgans se de timore ac dolo, et de objectis in causa Ebonis et Vulfadi, tum de Benedicti papæ privilegio, et Actis synodi Suessionensis, deque immoderato usu pallii.

(Apud eundem.)

Domino sanctissimo et reverentissimo Patrum Patri NICOLAÛ, primæ ac summæ sedis apostolicæ et universalis Ecclesiæ papæ, HINCMMARUS, Rhemorum episcopus, et vestræ sanctissimæ paternitatis devotissimus famulus,

Decimo tertio Kalend. Junii præsentis XV indictionis, mandatus a domno nostro, devotissimo filio vestro, Carolo rege glorioso, abviam illi eunti ad colloquium fratris sui Ludovici regis gloriosi ad Metis civitatem, quo secum me duxit, ad palatium ejus quod Salmontiacus dicitur in Laudunensi parochia veniens, et secundum jussionem illius fratres nostros de Vulfadi collegio mecum ducons quo et fratres ac consacerdotes nostri, Rothadus Suessorum episcopus, et Hincmarus Laudunensis episcopus convenerunt, conveniente etiam præfato dilecto fratre nostro Vulfado, litteras sanctissimæ paternitatis et præcellentissimæ auctoritatis vestræ coram eodem domno rege et prædictis fratribus nostris, ab Egilone venerabili archiepiscopo Sennensi accepi. In quibus, sed et in litteris generaliter ad episcopos qui

in synodo vestra auctoritate congregata apud Sues- A siones fuerunt ibidem relectis, tantas et tales increpationes indignitati meæ a dignitate vestra illatas inveni, sicut peccata mea merentur. Unde si præsens corpore vobis, adessem, quod sanctus Spiritus per os beati Benedicti in Regula ab ipso dictata præcipit, sine cunctatione vel aliqua mora exsequi procurarem. « Si quis, inquit, frater pro quavis minima causa a quocunque priore suo corripitur, quolibet modo vel si leviter senserit animos prioris cujuscun- que contra se iratos vel commotos quamvis modice, mox sine mora tandiu prostratus in terra ante pedes ejus jaceat satisfaciens usque dum benedictione sanetur illa commotio. » Quod quia corporaliter ante vestræ sanctitatis vestigia implere non valeo, mente et spiritu ubicumque sum cum debita mentis devotione adimpleo, suadente beato Gregorio, sanctitatis vestræ prædecessore, atque dicente in expositione evangelicæ sententiæ : *Si offers munus tuum ad altare (Matth. v, 23)*, ac reliqua. « Debemus, inquit, ad proximum quamvis longe positum longeque disjunctum mente ire, eique animum subdere, humilitate illum ac benevolentia placare ; et silicet conditor noster, dum tale placitum nostræ mentis aspererit, a peccato nos solvet, quia munus pro culpa sumet. » Et quia tempus annuum, quod in litteris humilitatis meæ directis de causa fratris Vulfadi collegarumque ejus inveni, ex benignitatis vestræ commotione mihi concessum intellexi, diutius sustinere passus non fui, quin post reversionem de præfato itinere, nunc consequenter isto qui instat mense Julio præsentis xv indictionis, cum domino nostro rege in hoste ex omni regno suo collecta contra Brittones et Nortmannos illis conjunctos, sicut et cæteri confratres ac consacerdotes nostri, secundum nostrarum regionum gravem consuetudinem, cum suis vadunt, quam longe infirmitate attritus potero, cum hominibus commissæ mihi Ecclesiæ perrecturus, quantocius potui vestræ sublimitati satisfactorus has humilitatis meæ litteras ad vestræ sanctitatis vestigia, quoniam propter insidias principum mihi infestorum, quibus ad sua vota placere non audeo, aperte non valui. modo quo potui transmittere maturavi. Denique post præfatas vestræ auctoritatis epistolas, relectum est in supradicto loco decretum vestræ præceptionis de restitutione prædictorum fratrum nostrorum, et quod decrevistis libenter D amplexi sumus. Et quod præfatus venerandus archiepiscopus Egilo mihi ex vestro mandato inde injunxit, sine retractatione exsequi procuravi. Qua de re nil aliter, nisi veluti a vestra auctoritate est diffinitum, in postmodum repetere cupio, sicut in processu horum doloris mei apicum pro commotione erga me vestra explanans plenius inculcabo ; in quibus, ut legitur, a doloroso dictum : *Si locutus fuero non quiescet dolor meus, et si tacuero non recedet a me (Job xvi, 7)*. Scio enim quia nisi multam rubiginem in me conspiceret fictor meus, non toties me isto igne purgationis, ex apostolicæ sedis auctoritate quorum-

dam factione adversus ~~exiguitatem~~ meam commota, tam duriter constaret, et utinam expurgaret. Sic enim bonæ memoriæ dominus Lotharius in initio ordinationis meæ, apud Sergium, et postea apud successorem ipsius Leonem, pro contentione regni quam erga fratrem suum habebat domnum Carolum, cujus obsequiis fideliter adhærebam, satagit. Unde postea, Deo inspirante, pœnitentiam egit, et litteris ad sedem apostolicam missis quod excesserat corripseret studuit. Per quos etiam serenissima sanctitatis vestræ tranquillitas erga indignitatem meam toties et adeo sit commota, non debet a me conquiri, nec indebitis suspicionibus debeo agitari.

Duo tamen sunt, quæ tenere ne veraciter puto, et tertium quod in mente mea cognosco. Scilicet quia commotio animi vestri erga humilitatem meam, non ex vestris propriis motibus, sed alienis procedat suggestionibus. Et si vera essent quæ vobis de me a quibusdam audio dicta, non solum merito erga me taliter moveremini, verum et incomparabiliter severius quam moveamini zelo rectitudinis accendere- mini. Sed gratias illi, cujus gratia sum id quod sum, quia perhibente mihi testimonium conscientia mea, licet in aliis sim peccator, tamen in his de quibus me apud auctoritatem vestram audio denotari, non talis sum in oculis divinis, qualis depingor in auribus humanis. De tumore namque erga sedem apostolicam, omnium Ecclesiarum matrem atque magistram, jam apud sanctæ recordationis Sergium atque Leonem fueram denotatus ; sed debitis obsequiis, co- C operante Domino, quocunque se locus mihi præbuit, monstravi quod fidelis et devotus, humilis quoque atque subjectus semper in omnibus et ubique erga sedem apostolicam et ejus rectores existiterim ; et modo cum tumore, quem quantum potui ab ineunte ætate vitavi, dolositate atque crudelitate, apud sanctam et prudentissimam simplicitatem vestram videor denotari. Qui postquam sensualiter percepi dictum a sancto Spiritu et imprecari a sancta Dei Ecclesia, de his qui in corde et corde loquuntur : *Disperdat Dominus universa labia dolosa (Psal. xi, 4)* ; ac, *muta fiant labia dolosa (Psal. xxx, 19)* ; et ut *virum sanguinum*, ita nihilominus et dolosum abominari a Domino (*Psal. v, 7*), dolositatem et crudelitatem quasi a facie colubri fugiens execrari curavi (*Eccli. xxi, 2*) sciens beatos esse misericordes, et judicium illi futurum sine misericordia, qui non facit misericordiam. De quibus vitis in istis partibus Ecclesia mihi commissa, sed nec vicinæ Ecclesiæ adversum me hactenus fuere conquestæ, sed nec modo conqueruntur. Unde datur intelligi quoniam illi qui de me ista falso disseminant, si vel similitudines aliorum criminum in me percepissent (quod non ad excusandum excusationes in peccatis fateor), utique vobis non tacuissent. Sed benedictus Dominus, qui hactenus non dedit me in captionem dentibus eorum, qui sæpe expugnaverunt me a juventute mea, et non potuerunt mihi, protegente Domino

qui de multis tribulationibus eripuit me, in quem A
spero quia et adhuc eripiet.

Hæc, domine et Pater sanctissime, cum omni
animi contritione, et qua possum humilitate de-
poco, ut pensantes quanto cordis mœrore sint dic-
ta, non aspernanter accipiatis, et non subdole au-
toritati vestræ subjectionem meam scripsisse vobis
a quoquam persuaderi sinatis. Nec ea quæ modo
dignationi vestræ scribere fisus de clementia vestræ
benignitatis præsumo, ad hoc scripta intelligatis,
quasi increpationibus vestris duriter susceptis, con-
tumaci corde resistere, et quæ scripsistis irreve-
renti fronte vel erecta cordis cervice dissolvere,
aut vestris apostolicis jussionibus vel diffinitionibus
resultare modo quolibet vel in modico velim, qui
sicut domino famulus et patri filius, in omnibus
satisfacere et parere apostolicæ vestræ auctoritati
desidero.

Cæterum de Ebone, de quo humilitati meæ san-
ctiatis vestræ sublimitas scripsit, multa et in regnum
et in gestis episcoporum, qui jam nos ad Dominum
præcesserunt, et adhuc nobiscum in suis monu-
mentis atque subscriptionibus vivunt, habentur,
quæ apud nos et apud alios in nostris regionibus
conservantur, multa etiam in scrinio sanctæ et
summæ sedis Romanæ haberi non dubito. Unde ne
videar quasi mei causa mortuo derogare, et sepulti
reprehensibilia gesta velle resuscitare, de actis quæ
apud nos exinde conservantur, cur et qualiter de-
positio ejus acciderit, rationabilius videtur a nobis
sileri, quam pleniter et ex ordine dici. Sed et contra
multiplicem sapientiam vestram, quæ excedit no-
strum sensum atque intelligentiam, et contra vest-
ram summam auctoritatem, quæ supereminet no-
stram subjectionem, de illius qualicumque deposi-
tione quamcunque contentionem, quod absit, con-
serere, vel quamcunque resultationem inire non
volo, non præsumo, non debeo. Præsertim cum et
ipse, et illi qui eum non clamantem vel resistantem,
sed potius, quantum ab eis qui interfuerunt videri
potuit, sponte coniventem, ante triginta et tres
annos jam evolutos judicaverunt, illic procul dubio
sint, ubi unusquisque sub tanto iudice, cujus oculis
nuda et aperta sunt omnia, non possunt perdere sui
meriti qualitatem. Verumtamen ut pauca ex eorum
gestis ob rei notitiam vobis suggerendam com-
memoremus, Hildemanno Ecclesiæ Belgivacorum epi-
scopo calumniis, quibus fuerat denotatus, regulari
satisfactione exuto, Ebo, qui pridem cum aliis archie-
piscopis et episcopis libellum, quem habemus,
de restitutione imperatoris Ludovici manu sua cum
additamento archiepiscopi edidit, in eadem synodo
secundum traditionem apostolicæ sedis, velut Zo-
simus de Proculo, Joannes de Contumelioso. Gre-
gorius de Paulo decernentes ostendunt, et sicut
Gregorius multoties de episcopo non valente pro
infirmate corporis ad ministerium episcopale as-
urgere, quod si voluerit hoc modo, videlicet dato
libello, ad episcopatu se remove valeat scripsit,

dati literis in abdicationem sui sacerdotio se
sponte amovit. Quem, ut Alexander papa in decretis
suis ostendit, metus aut vis vel fraus, quæ a nemine
pertulit, innoxium vel excusabilem reddere nequi-
verunt; neque, ut Gregorius de Pompeio monstrat,
violentia aut afflictio, quæ a nullo sustinuit; nec
etiam reclamatio ad apostolicam sedem, quam præ-
sens in iudicio non emisit, ei consulere debuerunt,
qui nullo cogente, nec etiam postulante, sed propria
sponte, conscius criminum, de quibus partim in
synodo fuerat accusatus, partim autem, nisi locum
peteret quærendi consilium cum quibusdam epi-
scopis, foret nihilominus accusandus, et de quibus
se purgare non poterat, secundum eorundem epi-
scoporum consilium, sequentium Africanum conci-
lium propter Ecclesiæ opprobrium, et insolentem
insultationem sæcularium, ne dignitas sacerdotalis
pollueretur, libellum temperantia, quam beatus Leo
ad universos episcopos per Campaniam et Samnium
cæterasque provincias decrevit, manu sua subscri-
ptum, propriaque confessione attestatum, synodo
sine ulla resultatione porexit. Et Africani canones
testimonio episcopi, etiam de se mentientis, adeo
credi debere dicant, ut episcopatum amittat, sicut
et Dominus in Evangelio monstrat dicens: *Ex ore
tuo te iudicio* (Luc. xix, 22); *Ex verbis tuis justi-
ficaberis, et ex verbis tuis condemnaberis* (Matth.
xii, 37); et David propheta mentiendi quod occiderit
Saul: *Sanguis tuus super caput tuum: os enim tuum
locutum est adversum te* (II Reg. i, 16). Et sanctus
Gregorius de Andrea: Quia flagitari iudicium non
debet de causa quam ipse iudicavit, quia si verum
de se confessus fuit (sicut in libello suæ professionis
quem habemus scriptum est, cujus exemplar cum
exemplari notitiæ synodalis sanctæ memoriæ Leoni
papæ directum est, in quo pro reatibus suis a pon-
tificali ministerio alienum se reddidit, et alium in
loco suo absque repetitione canonica consecrari
decrevit), tanquam criminosus suo testimonio a mi-
nisterio pontificali cessare, et juxta Leonis et Gre-
gorii decreta, ad promerendam misericordiam Dei,
privatam secessionem expetere debuit. Et si falsum
de se protulit, tanquam falsus contra semetipsum
testis abjiciendus fuit, prohibente Domino: *Non
loqueris contra proximum tuum falsum testimo-
nium* (Exod. xx, 16). Quod si non licuit contra proxi-
mum, multo minus contra semetipsum. Et ideoque,
ut iudices sui dixerunt, juxte et rationabiliter a pon-
tificali ministerio alienum una cum ipso eum red-
diderunt. De quibus, quantum rescire possumus,
qui in nomine episcopi tunc fuerunt, in istis Cisal-
pinis regionibus nemo in corpore vivit, nisi solus
Rothadus; licet adhuc plures supersint qui Eccle-
siam et provinciam suam eum prius nullo impetente
deseruisse contra regulas sacras noverunt, et post
ejus depositionis ordinem cognoverunt. Et Aposto-
lus *testamentum dicit in mortuis confirmatum* (Hebr.
vii, 9). Verum et de his qui me in illius loco ordi-
naverunt, non habentur superstites, nisi præfatus

Rothadus et Erpoinus; quamvis in istis provinciis, A Rhemorum scilicet, Trevirorum, Agrippinensium, Moguntinæ, Lugdunensium, Arelatensium, Narbonensium, Rothomagensium, Turonensium, Senonum, Bituricensium, Burdegalensium, non facile plures inveniri possint episcopi, vel presbyteri, aut diacones, qui aut ab illis non sint ordinati, qui in Ebonis depositione fuerunt, et me quidam eorum et ab eis ordinati ordinauerunt, aut qui in ordinatione mea consentientes non subscripserunt, seu qui a me aut ab illis non sint ordinati, quos ego Dei gratia ordinavi. Qui post decennium quam idem Ebo, sicut Cisalpini episcopi dixerunt, depositus fuerat, et sine regulari repetitione vel reclamazione permanserat, atque post annum quam a Sergio papa sententiam notam susceperat, quam rectissime auctoritas vestras, ut videlicet divinæ legis oraculum in epistola synodali per Egilonem directa nobis exposuit, in synodo apud Belgivacum civitatem Rhemensis provinciæ, a clero et plebe Rhemorum metropolis, sed et ab episcopis ejusdem provinciæ petitus et electus, et cum decreto canonico præsentia et unanimitatis consensu omnium suffraganeorum ipsius metropolis, cunctis acclamantibus, nullo autem reclamante vel contradicente, regulariter in eadem Ecclesia sum ordinatus, sicut epistolæ de ordinatione mea sanctæ memoriæ Leoni papæ directæ, et scripta ecclesiasticæ traditionis, quæ in Rhemensi Ecclesia conservantur, ostendunt. In quibus inter cætera secutos se fore dixerunt episcopi, ordinatores videlicet mei, auctoritatem Africanæ concilii, quod missis episcopis, Ecclesiæ diutino tempore pro fuga Equitii destitutæ jussit ordinari episcopum. Et Damasi papæ decreta, ad Paulinum episcopum (*epist.* 3) a congregata in urbe Roma synoda directæ, de episcopis adhuc etiam in statu suo manentibus, et contra regulas transmigrantibus. « Eos, inquit, qui de Ecclesiis ad Ecclesias migraverunt, tandiu a communione nostra habemus alienos, quandiu ad eas redierint civitates in quibus primum sunt constituti. Quod si alius, alio transmigrante, in loco viventis est ordinatus, tandiu vacet sacerdotii dignitate qui suam deseruit civitatem, quandiu successor ejus quiescat in Domino.

Ego autem decernentibus sacris canonibus Carthaginensis concilii, ut quicumque clerici vel diaconi pro necessitatibus Ecclesiarum non obtemperaverint episcopis suis, volentibus eos ad honorem ampliorem in sua Ecclesia promovere, nec illic in gradu suo ministrent, unde recedere noluerunt. Quod et sanctus Gregorius in epistola ad Galliarum episcopos approbat dicens (*lib. vii, epist. 110, ind. 11*): « Sicut is qui invitatus renuit, quæsitus refugit, sacris est altaribus admovendus, sic qui ultro ambit, vel importunum se ingerit, est procul dubio repellendus. » Mentis et corporis ad obediendum episcopis et ordinatoribus meis colla supposui, quoniam aliter ductus devotione, sicut tunc mihi videre videbar, agere non

præsumpsi. Qui in monasterio, ubi ab ipsis rudimentis infantie sub canonico habitu educatus, indeque eductus, in palatio domni Ludovici imperatoris non modico tempore mansi. Conversis autem ad regularem vitam et habitum fratribus in monasterio sancti Dionysii, ubi nutritus fueram, in illud, sæculum fugiens, sine spe vel appetitu episcopatus aut alicujus prælationis, diutius degui, et exinde assumptus, familiaribus obsequiis præfati imperatoris, ac episcoporum conventibus, pro sola obedientia mihi injuncta inserviens, post aliquot annos monasterii quietem repetii. A quo, peccatis meis exigentibus, rupto anchoræ fune, quo me in portu negligenter devinxeram, sub obtentu salutis plurimorum, persuasus hortamentis eorum quibus facilius quam mihi necesse foret credidi, ad tempestates maris magni et spatiosi periculosissime sum rejectatus. Emenso autem anno post ordinationem meam, Lotharius imperator, ut prædixi, causa fratris sui erga me commotus, epistolas a Sergio papa exegit, sicut postea mihi innotuit, pro refricando concilio de Ebonis depositione, quasi discordia esset in Rhemensi Ecclesia pro mea ordinatione, quod nullatenus constitit. Unde isdem dominus apostolicus litteras domno Carolo misit, præcipiens ut Guntboldum Rothomagensem archiepiscopum, cum cæteris episcopis regni sui quos prædictus Guntboldus ad hoc sibi eligeret, obviam missis ejus Treveris ad hanc causam discutiendum dirigeret, et me ad ipsam synodum venire faceret. Ipsi quoque Guntboldo inde litteras misit, ut cum post diem sanctæ Resurrectionis missos suos idem dominus papa in servitium imperatoris mitteret, ad prædictum locum cum episcopis hanc causam diffiniturus adiret. Sed et mihi inde litteras misit, ut ad idem venire concilium. Nos autem expectavimus eosdem missos usque ad dictum terminum, et non venerunt. Quapropter auctoritate litterarum domni papæ Sergii, annuente domno nostro rege Carolo, cum consensu archiepiscoporum et cæterorum episcoporum regni ipsius, Guntboldus synodum condixit, quo Ebonem litteris, quarum exemplar habemus, per Erpoinum provinciæ Rhemensis episcopum directis, ex auctoritate prædicti papæ convocavit, ut secundum ejus commendationem hanc causam regulariter diffiniret, et diffinitionem ipsius rei ad sedem apostolicam secundum D sacras regulas referre curaret. Quo isdem Ebo sibi conscius venire non voluit, nec ut apud sedem apostolicam, a qua notam sententiam suscepit, absolveretur sategit, cum eundi illic facultatem habuerit, quoniam diu in Italia immoratus, et proprietatem de facultatibus Rhemensis Ecclesiæ comparatam possederit, et abbatiam sancti Columbanii apud Lotharium obtinuerit, sed et in istis regionibus alteram abbatiam adeptus fuerit, quas et habuit usque dum legationem in Græciam a Lothario susceptam exsequi detrectavit, et ob id honores quos a præfato imperatore acceperat perdidit, et per clementiam Ludovici regis Germaniæ in provincia Maguntina condu-

etum promeruit. Et nullum documentum canonicum a de sua restitutione vel a sede apostolica absolute, sicut præcipiunt regulæ, in vita sua synodo ulli ostendit. Qui sine documenti testimonio, vel litteris de sua restitutione, ut Felix papa decrevit, ministrare vel recipi in ministerio sacro non debuit, a se et a plurimarum provinciarum metropolitanis cum suis coepiscopis in iudicio præsens, et ad sedem apostolicam non reclamans, consonanter exclusus. Maxime quia per tot annos, etiam post acceptam sententiam a sede apostolica, innocentiam suam non asseruit, quam demonstrare non potuit; sed et quia ante regularem audientiam, vel ante prolatam et confirmatam atque ostensam a sede apostolica suam restitutionem, per edictum imperiale Lothariⁱ imperatoris, quod habemus, ministerium episcopale præsumpsit, quod, ut Gelasius in epistolis suis de Acacii damnatione ostendit, manifestissime sacris est canonibus inimicum, qualia et quanta iudicia incurreret melius ipsi scitis. Nam et si, ut prædiximus, exigente imperatore Lothario, a sede apostolica litteræ missæ fuerunt pro synodo ex hac causa congreganda, cum legatus ipsius sedis in has partes veniret, tamen sicut ad nullam synodum, sed nec ad eam quam Guntboldus auctoritate litterarum domni Sergii papæ congregavit, isdem Ebo convenit: ita nec missus a sede apostolica pro synodo ex hoc congreganda in istas partes advenit, veluti et epistola ipsius imperatoris, necnon et episcoporum Belgicæ, Gallicæ, Neustriæ et Aquitanicæ provinciarum epistola, cum litteris domni regis Caroli, sanctæ memoriæ Leoni papæ directæ, quas in scrinio Romano credimus servari, demonstrant. Sicque sæpèdictus Ebo, absque ulla repetitione vel reclamatione suæ sedis apud quancunque synodum, vel apud sedem apostolicam, a qua fuerat decretum ut nec communionem inter clericos susceperet, post datas litteras papæ Sergii pro synodo ex hac causa congreganda, cum missos suos in istas partes dirigeret, et post synodum auctoritate litterarum ipsius congregatam, quo vocatus, ut prædiximus, non convenit, usque ad obitum suum permansit. Videlicet, sicut superius memoratæ litteræ auctoritatis vestræ demonstrant, talis a sede apostolica et papa Sergio habitus, qualis ab aliis non ignorabatur haberi, id est, ut codex episcopalis ostendit, pro criminibus suis honore privatus, et ab Ecclesia pulsus, et ideo, ante synodalis examinis discussionem, ad quam Dei iudicio non pervenit, secundum sacros Nicænos canones non receptus.

Quod ergo, ut Leo scribit, manens in corpore non recepit, consequi exutus carne non poterit; sicut sanctus Gelasius de Acacio dicit, qui a sede apostolica damnatus et non restitutus, licet Anastasius papa, sicut in libro episcopali legimus, eum recipere voluerit, vitam finivit. Talis est, inquit, dictus qualis signatus est nunquam esse solvendus, talis usque in finem permansit, talis esse non destitit. Ita talis est hodie qualis est et dictus, non talis

esse jam non potest: nunquam igitur talis permanendo salvendus est.

De dilecto autem fratre nostro Vulfado et ejus collegis, de quibus mihi summa dignitatis vestræ auctoritas quæ sibi placuit scripsit, nihil aliud sanctitati vestræ scribere præsumpsi, nisi quod increpationes vestras non negligenter sed diligenter suscipio, et præceptiones obedienter obaudio; et quia illis sufficere debet præstabilis auctoritatis vestræ benignitas, et mihi abundanter sufficet, si satisfactionem humilitatis meæ suscipientes, credere dignati fueritis me vobis simpliciter scripsisse. Nam secundum ordinatorum meorum præceptionem, qui mihi necdum duobus exactis mensibus post ordinationem meam, in synodo apud Meldis civitatem habitata præceperunt, eatenus ignoranti, quod Ebo post depositionem suam aliquos in Rhemensi Ecclesia ordinaverit, ut eis mecum usque ad diligentem tractatum ministrare non permetterem, egi. Et hoc ipsum eisdem fratribus, decernente Carthaginensi concilio ut ordinatis episcopis vel clericis prius ab ordinatoribus suis placita conciliorum auribus eorum inculcentur, ne se aliquid contra statuta concilii fecisse pœniteant, per Pardulum tunc diaconum Ecclesiæ Rhemensis qui interfuit synodo mandaverunt. Quoniam canones posteriores anterioribus jubent deferre, post synodum apud Sussions habitam, cum eorum litteris, quarum exemplar habemus, et quas in Romano scrinio inveniri posse existimo, cum meis pro eorum petitione litteris, et cum aliis petitionibus meis, ad sedem apostolicam domno papæ Leoni pro confirmandis eorum gestis ex eisdem fratribus ad synodum non coactis, quæ non scripsi, nec eis subscripsi, sicut et in synodo vestra auctoritate collecta ostendi, me direxisse non denego. In quibus gestis veram præfatorum fratrum prosecutionem adversum me silentio non firmavi. Unde ex communi consensu, secundum canones sicut eos intelleximus, iudices postulavi; quorum sententiam sequendam vidi usquequo majoris auctoritatis aliter exinde diffinitionem acciperem. Recepta autem domni papæ Leonis excusatoria epistola eam eadem gesta non confirmaverit, dicens inter cætera, « causas pro quibus hoc usque ad tempus suspendimus charitati vestræ dicemus. Prima igitur hæc est, quia sicut ab episcopis prænominata synodus utiliter ventilata sive sopita est, ita per aliquos ex eis, ut dubitatio foret radicibus evulsa, statuta vestræ synodi destinare debuistis; » nesciens quia nos metropolitani in istis regionibus non habemus potestatem ut sine consensu vel jussione regis aut nos ipsi ire aut coepiscopos nostros quoquam longius possimus dirigere. Subjunxit autem idem pontifex in suis apostolicis litteris dicens: « Alia autem juxta votum vestri desiderii id nos perficere minime permisit, eo quod legati sedis apostolicæ præsentibus ibidem non fuerunt, neque imperialis epistola nobis talis est præsentata, quæ hoc quod expetendum misistis specialiter indicare potuisset. Quarta sci-

licet causa hæc est, quia hi quos depositos charitas vestra auctoritate synodi fore affirmat, per proprias litteras sedem apostolicam appellati sunt, et volunt iterum nostra se Apostolica audiri præsentia, et tunc si culpabiles inventi fuerint, non se abnuunt canonicam subire censuram. »

Et postquam has litteras domni papæ Leonis accepi, sicut mihi innotuit, domnus Lotharius, petente quodam episcopo regni sui qui adhuc vivit, per Petrum Aretinum episcopum præfato domno papæ mandavit ut gesta episcoporum de eisdem clericis non firmaret. Quæ cum ad fratres et coepiscopos nostros retuli, rogantibus eis apud Lotharium imperatorem, epistolam exinde, ipso ex animo largiente, per missos meos obtinui, ubi inter cætera ita scriptum habetur : « Sed ad nostras petitiones exsequendas et obtinendas Petrum venerabilem et dilectissimum nobis Spoletinum episcopum viva voce nostra vice executorem instruximus; et alium Petrum, venerabilem æque et amantissimum episcopum Aretinum, litteris commonuimus, et alios fideles vestros atque nostros similiter inde monuimus, » et reliqua. Sicque cum ista epistola, et cum legatione imperatoris, per præfatum venerabilem episcopum missos meos cum litteris Romam direxi, quibus in via nuntius venit de obitu papæ Leonis. Pervenientes autem Roman cum præfatis litteris, et intervenientibus prædictis episcopis, domnus nomine et gratia Benedictus mihi quod nostris privilegium inde direxit. Synodum autem pro sæpe dictis clericis, aut a Petro Spoletino, aut ab alio aliquo in istis regionibus, nec fama nec veritate ex apostolica auctoritate congregatam, vel congregari jussam, sicut et per alios in istis partibus rescire potestis, unquam audivi. Nisi illam quæ anno præterito vestræ auctoritatis jussione exiit congregata, in qua eorum restitutioni secundum traditionem majorum paratissimi anni. Quam posteaquam litteras vestræ auctoritatis inde suscepi, salubrem ac regularem cupivi, et idcirco ab ipsis qui eos destituerunt, vel non a minori numero, una cum meo consensu eos restitui peroptavi. Et propterea inde usque ad synodum expectavi, et plenius a sede apostolica vestra auctoritate firmandam cupivi, ejus arbitrio potestatis reservata erat summa ac firmitas privilegiorum apostolicæ sedis, sicut et vestræ epistolæ nobis directe continet, et in epistola synodali, ejus exemplar habemus, sanctæ auctoritati vestræ directa communi consensu scripsimus. In qua nullam mentionem de quacunque Ebonis depositione habuimus. Sed et litteris meæ exiguitatis simplici mente inserui inter cætera dicens : « Quia synodo per hunc venerabilem archiepiscopum Egilonem, qui interfuit actionibus, dirigente epistolam omnium nostrum qui adesse potuimus, cum ipso voce loquentem. Quoniam si eis manus porrigitis, vobiscum pariter porrigemus; et item post aliquanta. Quæ verbis et scriptis mihi per istum religiosum archiepiscopum exinde sequenda atque tenenda mandaveritis, pro

scire et posse obedire et conservare curabo. » Quam epistolam idcirco ut veraciter vobis confitear sigillatam non misi, quia synodus epistolam a se directam non sigillavit, ducens incongruum, ut quoniam archiepiscopus de ipsa synodo, qui eidem vestris ad eam vocatus apostolicis litteris interfuit, ad vos mittebatur, quasi incredulo epistola sigillata committeretur, et quod synodus non egit ego agere, ne scandalum cuiquam generarem, non præsumpsi.

Sanctitas igitur vestra, charitate quæ omnia credit repleta, veraciter mihi credat, quia simpliciter et absque ullo dolo in restitutione prædictorum fratrum, postquam vestram dispositionem inde rescivi, ex benivola mente consensi; et simpliciter ac sine ullo dolo scripsi quæ vestræ sanctitati transmisi. A quo consensu modo quolibet postea non diverti, nisi veluti in præfatis litteris vobis scripsi, dicens, reservato per omnia sententiæ ac juris privilegio apostolicæ sedis, et salva diffinitione ac confirmatione expectatæ vestræ discretionis atque auctoritatis. Nunc autem, suscepta diffinitione de illorum restitutione, quam vestra sicut decuit et ordo poposcit summa auctoritas præcessit, et subsequente synodali consensu vestræ perfectio firmationis corroboravit, nunquam vel nusquam exinde quancunque querimoniam contra quemcunque molior vel dipono, intendo vel cupio habere, remove, excitare sive conserere. Nec meditatus sum, litteris pro hoc vestræ benignitatis acceptis, a consensu in synodo, contra ipsius diffinitionem et vestram confirmationem, aliquid remove ex tunc in postmodum usque in sempiternum. Quia enim nullo crimine proprio denotati, nescientes Ebonem damnatum, non importune ad ordinationem, sicut ipsi dicunt, et non est qui contradicat, se ingesserunt, sed electi et vocati obedierunt, sicut secundum excellentiam sapientiæ vestræ domno regi Carolo scripsistis, si nollet obedire volenti eos ad majorem gradum provehere, omnes illi velut procaciter renitentes reprehenderentur, et tanquam contumaces circa sacros canones damnarentur, veluti in epistola episcopis, qui per gratiam Dei et decretum vestrum apud Suessionis urbem convenerunt, directa intimastis : qualiscunque fuerit vel quæcunque pertulerit Ebo, a se ordinatis, qui nihil præter humilitatem et obedientiam exhibuerunt, nullum prorsus intulit officulum quoniam et beatissimus Leo ad Mauros scribens, ita de quodam Maximo præcipit dicens (*epist.* 91, *sub finem*) : « Maximum quoque, licet reprehensibiliter ordinatum, tamen si Donatista jam non est, et a spiritu schismaticæ pravitatis alienus est, ab episcopali, quam quoquomodo adeptus est, non repellimus dignitate. » Et Anastasius ejusdem apostolicæ sedis præsul, quod mali bona ministrando sibi tantummodo noceant, nec Ecclesiæ sacramenta commaculent, ad Anastasium principem scribens (*epistola unica*), evidentissima ratione demonstrat. Cui sane pio sensui, sicut in eorum decretis cum additamento conditionum legimus, juxta quemdam

modum non inconvenienter coaptari posse videtur quod beatus Augustinus scripsit, de cuius sensu ac verbis Anastasius papa in præfata epistola hinc quædam assumpsit. « Si quem forte, inquit, coegerit extrema necessitas, ubi catholicum per quem accipiat non invenerit, et in animo pacem catholicam custodiat, per aliquem extra unitatem catholicam positum acceperit quod erat in ipsa catholica unitate accepturus, si statim etiam de hac vita emigraverit, non eum nisi catholicum deputamus. Si autem fuerit a corporali morte liberatus, cum catholicæ congregationi etiam præsentia corporali redierit, unde nunquam corde discesserat, non solum non improbamus quod fecit, sed etiam securissime verissimeque laudamus, quia præsentem Deum credidit cordi suo, ubi unitatem servabat. » Exemplar denique privilegii sanctæ memoriæ Benedicti, sine ulla mutilatione vel adiectione seu immutatione, per venerabilem fratrem et coepiscopum nostrum Odonem sanctissimæ paternitati vestræ transmisi. De quo et in epistola a me per illum vobis directa, inter alia si placet potestis relegere, ubi scriptum habetur : « Mitterem, inquam, ipsam authenticam privilegii chartam, quam beatæ recordationis præcessor vester dominus Benedictus mihi sua auctoritate direxit ; sed timui ne mihi inde aliquid sinistri in via contingeret, et solatio, quod inde adversus insurgentium impetus habeo, fierem destitutus. Vestra vero dignatio in scrinio sanctæ Romanæ Ecclesiæ ex more exemplar illius potest requirere, et utrum ita se habeat evidenter agnoscere. In quo si vestræ sanctitati placet, necesse est nobis ut quadam superaddatis, quæ hic frater ac filius noster, juxta quod necessitates nostras cognoscit, vestræ suggeret sanctitati. Quia sicut sanctus Augustinus dicit, necesse est ut ad nova morborum genera nova quærantur medicamentorum experimenta. Sed et de synodo apud Suessionis habita, de qua, factione cujusdam clerici nostri, qui a nobis negligentis suis territus aufugerat, quiddam ibi sub quadam dubitatione est positum, hic frater ac filius noster vobis rei veritatem potest narrare, qui eidem synodo interfuit, et adhuc in nomine abbatis subscripsit. »

Hæc sunt verba mea in epistola sanctæ paternitati vestræ directa. Nam, si inde quod ibi est positum *si ita est* erasissem, superflue quod quiddam ibi sub quadam dubitatione esset positum scriberem. Et si aliquid ibi adderem, mutarem, vel demerem, ut in scrinio sanctæ Romanæ Ecclesiæ exemplar illius requireretur, et utrum ita se haberet agnosceretur, scribere non auderem. Cæterum si quocunque modo, quacunque occasione, a quocunque aliter ad vos delatum fuit, tamen ego per præfatum venerabilem coepiscopum nostrum, sicut se habet, exemplar ipsius privilegii vobis direxi. Quod si vobis non fuerit tædium reservato in Romano scrinio illud quod per eum mihi conferre, verum invenietis. Sed et illum ipsum privilegii tonum, et non exemplar, sy-

A nodo vestra auctoritate congregatæ cum privilegio vestræ sanctitatis ostendi, et incorruptas scripturas atque sigilla monstravi, et ex integro, coram filio vestro domno rege Carolo, audientibus omnibus episcopis et qui synodo interfuerunt, relegi feci. Unde in epistola synodi vestræ auctoritati directa scriptum inter cætera habetur ad locum : « In suis ordinibus restituere maturaremus, quin prædictos fratres, nisi privilegii sanctæ Romanæ sedis, per reverendum confratrem nostrum Hincmarum, archiepiscopum nostræ unanimi prolatis, quæ de ipsis viris quædam statuerunt, debita reverentia exhiberetur ; quorum summa perfecta et infegra firmitas, ut claret et justum est, in apostolicæ sedis reservata est arbitrio potestatis. » Quod synodus vobis non scriberet, si integra privilegia eis non ostendissem.

De eo quod benignissima et sanctissima paternitas vestra mihi est dignita scribere, ut non arbitraret ad discrimen quodlibet quæ mihi mandata sunt exaggerasse, cum meliora esse vulnera diligentis, quam fraudulenta odientis oscula esse non nesciam, sed ne adeo in privilegiorum meorum defensionem vel elationem immoderatus erigar, ut apostolicæ sedis jura quoquomodo temere tetigisse videar, veraciter fateor, hoc nunquam in cor meum ascendit, qui semper et apostolicæ sedi, et ejus rectoribus, postquam me nosse potui, pro meo scire et posse fidelis et devotus, et humilis ac subjectus exstiti, sum, et adjuvante Domino, permanebo. Privilegia autem sedis apostolicæ non ideo petii ut mihi non sufficeret quod sacri canones et decreta sedis Romanæ pontificum cuique metropoli sedi concedunt, et nec alia, vel amplius quam Ecclesiæ Rhemorum collatum est ex antiquo, mihi largiri specialiter petii, neque appeto. Sed quia non solum diocesis, verum et parochia mea, inter duo regna sub duobus regibus habetur divisa, et res mihi commissæ Ecclesiæ sub multorum principum potestate conjacere videntur, de quibus aut parum aut nihil utilitatis Ecclesiæ nostra potest habere : quia veteres constitutiones jam quasi pro vili apud quosdam habentur, his novis decretis carnales et animales homines territi, quiddam reverentius contra Ecclesiam indignitati meæ commissam agerent. De quibus privilegiis, quorum defensionem mihi non arrogo, sed nec de aliis quibuscunque est unde inflari valeam vel efflari, qui et si justus fuero, non lavabo caput saturatus afflictione et miseria Postremo de pallio, a mea præsumptione non certis temporibus et juxta morem aliis metropolitanis definitis uso, unde vestræ sanctitatis auribus intantum esse indignitati meæ scripsistis, auctoritati vestræ veraciter fateor, quod et in istis regionibus per alios si vobis placuerit rescire valebitis, quia nisi in die Natalis Dominici, et indie sanctæ Resurrectionis ejus, vix in toto anno eodem pallio utor. Quoniam de illorum numero, peccatis meis exigentibus, factus, de quibus scriptum est : Impedimenta mihi fecerunt eos miseros, raro in decretis festivi-

tatibus, quo pallio uti metropolitanis conceditur, in A sede mea, propter multas occupationes et necessitates Ecclesiæ et regni, esse mihi permittitur; et nisi quando in eadem sede sum in decretis festivitibus, non solum non toties sicut mihi concessum est, verum vix aut nunquam eodem pallio utor. Pro cuius usu apud sedem apostolicam nihil petii, nisi sicut decessores ac prædecessores mei eo uti et in episcopi ordinatione solebant. Non enim usum pallii esse meæ dignitatis puto, sed genii sedis metropolis esse cognosco. Et cum multi sint sancti episcopi qui eodem pallio non utuntur, non nescio quia si sine virtutibus, quas exponente beato Gregorio pallium signat, pallio utor, et si excellentiorem cæteris Rhemorum provinciæ sedibus metropolim sedem pallii usus demonstrat in oculis hominum, non tamen majorem me facit in oculis Domini. Et veraciter confiteor sanctæ vestræ paternitati, quia si episcopus ordinatus non essem, non solum pallii usum non quaererem, quoniam scio, sine ordinatione episcopali, fide recta et operibus bonis per Dei gratiam vitam æternam me potuisse acquirere. In isto sæculo cognoscens illud, sicut modo cognosco, episcopale non ordinem non subirem, si vitare valerem. Sed et nunc jam sufficit mihi anima mea pro spolio. Ego enim multis afflictus infirmitatibus, et ætate gravatus, ac injuriis fatigatus, jam delibor, et tempus meæ resolutionis instat. Quapropter licet alius ab amicis meis Cisalpinis in partibus Romanis, ut a multis jactatur, confingar, ad aliud me oportet tendere, et de aliis cogitare quam alicui pompæ ac ostentationi, minime autem ecclesiastico ministerio applaudere, aut modo quolibet inservire.

Hæc autem, de quibus clarissimæ sanctitati et famosissimæ sapientiæ vestræ scripsi, non ad ullam controversiam, vel contumacem resultationem, quod absit, protuli; sed animatus veridica sententia vestræ, imo divinæ auctoritatis, quam mihi scribere dignati fuistis, dicentes quia veritas liberet, mendacium vero perdat, humiliter veritatis narrationem suggessi. Tandem meæ servituti a vestra dignatione remandari depono de fratribus nostris. Rhemensis Ecclesiæ filius, vestra auctoritate in suis ordinibus restitutus, quoniam venerandus archiepiscopus Egilo ex vestra auctoritate eis præcepit ut in suis gradibus ministrarent, et ad altiores ascendere non præsumerent, utrum debeam eos ad altiores gradus provehere, si confratres ac comministri nostri illos elegerint: quoniam eorum animos mea incuria ledere nolo, et ne contra vestram jussionem ac dispositionem agam modis omnibus devitare cupio, qui apostolicæ sedis decretis omnibus parere desidero. Deus omnipotens sinceritatem vestram, ad doctrinam et correctionem sanctæ suæ Ecclesiæ, in suo apto servitio per annorum multa curricula conservare dignetur, domne sanctissime et reverentissime Patrum Pater in Domino.

EPISTOLA XII.

AD NICOLAUM PAPAM.

Ejusdem argumenti cum superiore, maximaque ex parte iisdem verbis contexta.

(Apud eundem.)

Domino sanctissimo et reverentissimo Patrum Patri NICOLAO, primæ ac summæ sedis apostolicæ et universalis Ecclesiæ papæ, HINCMARUS, Rhemorum episcopus, et vestræ sanctissimæ paternitatis devotissimus famulus.

Litteras sanctissimæ paternitatis et præcellentissimæ auctoritatis vestræ, XIII Kalendas Junii, indictionis XV ab Egilone venerabili archiepiscopo Sennensi accepi, in quibus, sed et litteris generaliter ad episcopo, qui in synodo vestra auctoritate congregata apud Suesiones præterito anno fuerunt, tantas et tales increpationes indignitatis meæ a dignitate vestra illatas inveni, sicut peccata mea merentur. Quibus ad omnia respondere et humilitati meæ præsumptiosam, et sublimitati vestræ constat incongruum; præsertim cum post multa, pusillitatem meam refoventes, mihi scribere dignati fueritis dicentes: « Hæc ne nos arbitreris ad discrimen quodlibet tuæ sanctitatis vel dignitatis exaggerasse, cum meliora esse vulnera diligentis quam fraudulenta odientis oscula non nescias. » Cæterum, quoniam propter multas et maximas ac pene continuas infestationes paganorum atque falsorum Christianorum, quas patimur, continue laborantibus antea episcopis regionum nostrarum, in unum convenire non licuit, ut nobis communiter vestræ sanctitatis epistola communiter missa relegeretur, et sicut jussistis, quæcunque super hac re de qua agitur scripta tam a vobis prius et nunc quam a nobis edita reperiuntur, et quid inde humilitas mea et illi dejecti clerici sedi apostolicæ suggererimus vel retulerimus, in volumine unum ordine quo missa sunt redigerentur, et apostolicæ sedi, ut competens est, eorum nobis exemplaribus reservatis, summo studio dirigerentur. Nunc in aliqua regni parte aliquantulum de paganorum infestatione respirantes, sed aliarum anxietatum gemitibus laborantes, et adhuc graviora quæ imminent metuentes, et fratres ac coepiscopi nostri devotissimi filii vestri, quæ jussistis, videlicet de Ebonis dejectione, et de ipsius restitutione, ac fratribus Vulfadi et collegarum ejus promotione, et de præfati Ebonis iterata repulsione, atque ad aliam Ecclesiam migratione, sed et quæ de ordinatione mea compererunt, exequi studio fideliter procurant: et humilis mea servitus, de his quæ indignitati meæ vestra scripsit dignatio, omni humilitate ac puritate conscripta, his quæ auctoritati vestræ collectis dirigunt, subjungenda et suggerenda atque perferenda secundum vestram præceptionem eis porrexi. De dilecto scilicet fratre nostro Vulfado et ejus collegis de quibus mihi summa dignitatis vestræ auctoritas quæ sibi placuit scripsit, nihil aliud sanctitati vestræ scribere præsumo, nisi quod increpationes ve-

stras non negligentem, sed diligentem suscipio, et A præceptiones obedienter obaudio. Et quia illis sufficere debet præstabilis auctoritatis vestrae benignitas et mihi abundanter sufficere, si satisfactionem humilitatis meae suscipientes credere dignati eritis, me vobis simpliciter ac veraciter inde scripsisse. Nam secundum ordinatorum meorum præceptionem, qui in Ebonis dejectione fuerunt, et mihi necdum duobus exactis mensibus post ordinationem meam, in synodo apud Meldis civitatem habita præceperunt, eatenus ignorantem quod Ebo post dejectionem suam aliquos in Rhemensi Ecclesia ordinaverit, ut eis mecum usque ad diligentem tractatum ministrare non permetterem, egi; et hoc ipsum eisdem fratribus, decernente Carthaginensi concilio, ut ordinatis episcopis vel clericis prius ab ordinatoribus suis placita conciliorum auribus eorum inculcentur, ne se aliquid contra statuta concilii fecisse poeniteant, per Pardulum, tunc diaconum Rhemensis Ecclesiae, qui interfuit synodo, mandaverunt. Ab ea autem synodo Pardulus mecum Rhemis reversus, eisdem fratribus, qui nobiscum erant et de quibus agebatur, hoc quod mihi præceperunt episcopi retulit, et ut non in gradibus, quos ab Ebone post dejectionem suam acceperant ministrarent, usque ad diligentem tractatum observarent præcepit. Frater quippe Vulfadus adhuc mecum non erat; sed post plures evolutos menses, si rite remetiatur, antequam fere anni spatium completeretur, de alia provincia ad me veniens, cum benignitate est et cum liberalitate susceptus, et honorabiliter habitus, usque quo domno nostro regi Carolo, ipso petente, illum commendavi. Defuncto autem Ebone anno Incarnationis Dominicae 851, Indictione XVI, XIII Kalend. Aprilis, quia præfati fratres nostri ab eo ordinati qui mecum erant, post annos circiter octo suæ ab officio suspensionis, anno scilicet Incarnationis Dominicae 853 me petierunt, eisdem fratribus ad synodum ire permisi et his qui indignuerunt, subsidium necessarium, ut ad ipsum concilium sine difficultate ire possent, ministrari præcepi. Ubi eos non iudicavi, neque deieci, nec etiam cum iudiciis eorum subscripsi, sicut norunt qui interfuerunt, et ipsa episcopalia gesta, quæ authentica cum subscriptionibus episcoporum qui eis subscripserunt, sine mea subscriptione, præterito anno in synodo vestra auctoritate apud Suessiones habita ostendi, demonstrant. Et quoniam canones posteriores anterioribus jubent deferre, præcipientibus eisdem episcopis, cum eorum litteris, quarum exemplar habemus, et quas in Romano scrinio inveniri posse existimo, cum meis pro eorum petitione litteris, et cum aliis petitionibus meis ad sedem apostolicam domno papæ Leoni pro confirmandis eorum gestis, quæ non scripsi, me direxisse non denego. In quibus gestis veram præfatorum fratrum prosecutionem adversum me silentio non firmavi. Unde ex communi consensu secundum canones, sicut eos intelleximus, iudices postulavi, quorum sententiam se-

quendam vidi, usquequo majoris auctoritatis aliter exinde diffinitionem acciperem. Recepta autem domni papæ Leonis excusatoria epistola, et cætera, ut supra, usque ad finem epistolæ.

EPISTOLA XIII.

AD MONACHOS ALTOVILLARENSIS MONASTERII.

Ut Gothescalco, si ante mortem resipuerit, spiritalem et corporalem humanitatem exhibeant.

(Apud eundem.)

Pro tempore, sicut mihi licuit, dixi vobis qua conditione, si se Gothescalco, antequam anima illius egrediatur de corpore, recognoverit, et spiritalem et corporalem humanitatem illi exhibeatis. Sed ne quid vobis desit in ulla gratia, auctoritatem inde ecclesiasticam ex verbis orthodoxorum vobis transmitto. Ait enim de hujusmodi Leo (*epist. 12, ad Flavianum*), ut si fideliter et utiliter dolet, et quam recte mota sit erga eum episcopalis auctoritas vel sero cognoscit, vel si ad satisfactionis plenitudinem, omnia quæ ab eo male sunt sensa, vel viva voce vel signo competenti damnaverit, reconciliatio et communio illi non denegetur, sicut Cælestinus, et Leo, et sacri canones decreverunt. Et si in hac confessione ac communione obierit, sicut cæteris fratribus, ita et illi communem sepulturam, ac sepeliendi officium et orationem post obitum exhibete. Quia Dominus noster, verus et bonus pastor, qui animam suam posuit pro ovibus suis, et qui venit animas hominum salvare, non perdere, imitatores nos suæ vult esse pietatis, ut peccantes quidem C justitia coerceat, conversos autem misericordia non repellat. Si autem in obstinatione sua usque ad mortem permanserit, tenendum nobis de illo est quod sanctus Leo de communione privatis et ita defunctis dicit (*epist. 95, ad Rusticum*): « Horum, inquit, causa Dei iudicio reservanda est, in cuius manu fuit, ut talium obitus usque ad communionis remedium non differretur. Nos autem quibus viventibus non communicavimus, mortuis communicare non possumus. » Et item (*epist. 59 ad Theodorum*): « Si, inquit, aliquis eorum pro quibus Domino supplicamus, quocumque interceptus obstaculo, munere indulgentiæ præsentis exciderit, et priusquam ad constituta remedia pervenerit, temporalem vitam humana conditione finierit, quod manens in corpore non recepit, consequi exutus corpore non poterit. Nec necesse est nos eorum qui sic obierint merita actusque discutere, cum Dominus Deus noster, cuius iudicia nequeunt comprehendere, quod sacerdotale ministerium implere non potuit, suæ justitiæ reservavit. » Et sanctus Joannes apostolus dicit: *Est peccatum ad mortem: non pro illo dico ut quis roget (I Joan. v, 16).* « Peccatum, inquit Gregorius (*Moral. xvi, cap. 28*), est usque ad mortem, quia scilicet peccatum quod in hac vita non corrigitur, ejus venia frustra post mortem postulatur. » Peccatum quippe usque ad inferos dicitur, quod ante finem vitæ præsentis per correctionem ac poenitentiam non

emendatur. Et talium memoriam, scilicet in peccato perseverantium usque ad mortem, minimelicet inter sacra altaris mysteria celebrari, in quibus pro eis oratur, qui nos præcesserunt cum signo fidei, et dormiunt in somno pacis, in Christo videlicet quiescentes. Dormiunt ergo, ut catholici doctores dicunt, in somno pacis, qui ab unitate et societate Christi Ecclesiæ nec per hæreses, nec per schismata, nec per mortalia crimina separati sunt. In quibus etsi aliquando fuerunt, tamen per pœnitentiam sanati, et per orationem Ecclesiæ, cui in Petro dictum est: *Quodcunque solveris super terram, erit solutum et in cœlis* (Matth. xvi, 19), reconciliati et redemptionis mysterio sociati, utique in pace obierunt, miserante illo non vult mortem peccatoris, sed ut convertatur et vivat. Neque enim piorum animæ mortuorum separantur ab Ecclesia, quæ regnat nunc cum Christo in vivis et mortuis. Propterea enim, sicut dicit Apostolus, *mortuus est Christus, ut et vivorum et mortuorum dominetur* (Rom. xiv, 9.). Unde et alibi ait: *Quoniam non posuit nos ad iram, sed in acquisitionem salutis per Dominum nostrum Jesum Christum, qui mortuus est pro nobis, ut sive vigilemus sive dormiamus, simul cum illo vivamus* (I Thess. v, 9). Quiescentes autem in Christo sunt, de quibus dicit Apostolus: *Et mortui qui in Christo sunt resurgent primi* (I Thess. iv, 16); et de quibus item scriptum est: *Beatus qui habuerit partem in resurrectione prima; non lædetur a morte secunda* (Apoc. xx 6). Unde et Juda pontifex, sicut in libro Machabæorum legitur (II Machab. xii, 46), pro his qui cum pietate dormitionem acceperunt, misit Hierosolymis offerenda. Et si, ut præmissi, in obstinatione sua permanens mortuus fuerit, sicut ex auctoritate beati Gregorii et sacrorum canonum accepimus, cum psalmis et hymnis ad sepulturam deportari, vel in communi fratrum sepultura sepeliri non debet; privatæ autem sepulturæ humanitas, sicut vobis dixi, ei non est deneganda.

EPISTOLA XIV.

AD ODOMEM EPISCOPUM BELVOACENSEM.

De objectionibus Græcorum a Nicolao papa in Galliam missis, ut ad eas respondeatur.

(Apud eundem.)

HINC MARUS Rhemorum episcopus, dilecto fratri et venerabili episcopo ODOMI salutem.

Domnus apostolicus communiter nobis et aliis episcopis regni domni nostri Caroli epistolam misit, in qua continetur quod Græci tam Ecclesiam Romanam specialiter quam omnem generaliter lingua Latina utitur, conantur reprehendere, quia jejunamus in Sabbatis, quod Spiritum sanctum ex Patre Filioque procedere dicamus, cum ipsi hunc tantum ex Patre procedere fateantur. Dicunt præterea nos abominari nuptias, quia presbyteros sortiri conjuges prohibemus; et insimulare tentant quod eosdem presbyteros chrismate linire baptizatorum frontes inhibemus, quod tamen chrisma nos ex aqua flu-

minis conficere fallaciter arbitrantur. Reprehendere nihilominus moliuntur eo quod octo hebdomadibus ante Pascha a carnium et septem hebdomadibus a casei et ovorum esu more suo non cessamus. Mentiuntur quoque nos, sicuti per alia ipsorum conscripta indicatur, agnum in Pascha more Judæorum super altare pariter cum Dominico corpore benedicere et offerre. Quin et reprehendere satagunt quia penes nos clerici barbas radere suas non abnuunt; et quia diaconus non suscepto presbyteratus officio apud nos episcopus ordinatur, cum ipsi etiam illum quem patriarcham suum nominant ex laico subito tonsuratum ac monachum factum saltu ad episcopatus apicem imperiali favore ac brachio provehere, ut ipsi putant, minime formidaverunt. Et adhuc, quod gravius est et insanius, a missis nostris contra omnem regulam, et præter omnem consuetudinem, libellum fidei, si se ab illis recipi vellent, exigere moliebantur, in quo tam ista capitula, quam ea tenentes anathematizarent, necnon epistolas canonicas ab his ei quem suum œcumenicum patriarcham appellant dandas improbe requirebant. Et ipse invasor Constantinopolitanæ Ecclesiæ Photius in scriptis suis, se archiepiscopum atque universalem patriarcham appellat. Et imperatores Græcorum legatos apostolicæ sedis cum epistolis veneratione qua debuerunt recipere noluerunt. Inde unusquisque vestrum qui metropolitani jura sortitus est, junctis sibi fratribus et coepiscopis suis qui sub se sunt, de his diligentem curam suscipiat, et quid invidis eorum detractionibus opponi necesse sit rimari studeat, et invenire summopere gestiat, atque inventum nobis oculis transmittere minime parvipendat, et præsulatui nostro scripta divinitus inspirata sapientia vestra reprehendendo et forti prorsus invectione fariendo tantam eorumdem imperatorum vesaniam mittat. Quæ nos suscipientes, rursus ea cum aliis assuetionibus nostris ad ipsorum quoque dementiae confutandam mittere valeamus. Quapropter, frater charissime, secundum domni apostolici commendationem, de his per tramitem Scripturarum et traditionem majorum, quæ illi convenienter rescribere possimus, quærere et in unum colligere stude, ut cum simul adjuvante Domino venerimus, quæ quisque nostrum invenit singillatim communi studio relegamus, et quæ eidem domno papæ a nobis inde scribenda sunt ordinemus. Data quarto Kalendas Januarii, indictione prima.

EPISTOLA XV.

AD CAROLUM REGEM.

De Hincmaro Laudunensi.

(Act. prov. eccl. Rhem.)

Domino CAROLO regi glorioso, HINC MARUS, nomine non merito Rhemorum episcopus, ac plebis Dei famulus.

Ecce, domine, sicut hic dilectus frater, venerabilis coepiscopus noster Odo, ac missi vestri verbis plenius possunt dicere, et *exiguitas mea his litterulis*

dominationi vestræ dixit ratum significare. Hincmaro episcopo rebus et facultatibus ecclesiasticis quibus spoliatus fuerat, revestio, in provincia, et competenti loco, ab electis ex utriusque partis consensu iudicibus secundum leges ecclesiasticas, sine potestatis vestræ aliquo detrimento, et cum honoris vestri augmento, dicente Dei spiritu per Psalmistam : *Honor regis iudicium diligit* (Psal. xcviij), quæstio contra eundem Hincmarum commota, regulariter audita et ventilata est ac definita, quantum ad ministerium episcopale pertinuit, licet isdem episcopus ex integro non fuerit revestitus. Contumaciam autem causa, alterum finem expectat. Non igitur, quod in adolescentia vestra, quando animus hominis lubricus, et ad indebita usurpanda solet esse proclivus, Domino vos custodiente, non accidit, in perfecta ætate vobis subripi, minime autem persuaderi leges ecclesiasticas, vel in modico infringi, sive convelli a quocunque sustineatis. « Scientes (sicut Constantinus et Constans imperatores in edicto suæ legis quo immunitatem Ecclesiæ, ac suis ministris conferunt) debere magis religionibus, quam officiis, et labore corporis et sudore rempublicam contineri. » Et sicut sæpe soletis recolere, beatum Gregorium Brunichildi reginæ Francorum scripsisse : « Facite quod Dei est, et Deus faciet quod vestrum est ; » huic præmittens sententiæ : « Confidimus, inquit, quod tanto propitius causas vestras sua pietate disponet, quanto ipse de sua vos esse videt causa sollicitos. » Olim enim, sicut Honorius et Theodosius in lege data Ecclesiæ scribunt, ut eorum utamur verbis : « Clericos indiscretim ad sæculares iudices debere deduci infaustus præsumptor edixerat, quos abdicata tyranni præsumptione, episcopali audientiæ reservamus. Fas enim non est, uti divini muneris ministri temporalium potestatum subdantur arbitrio. » Quæ lex postea a decessoribus et prædecessoribus vestris regibus, Ecclesiæ et ministris suis conservata fuit ; nisi forte aut per excessum principum, aut per negligentiam episcoporum ad tempus aliquomodo exstitit violata : quæ aut correctione, aut innovata constitutione indigens per eos ad statum solidatum est reducta, vel in statu solido confirmata. Sicut in avi, et patris vestri capitulis in libro primo Capitulorum habetis quæ in quaterniunculis ^a vobis super apud Pistas oblati et postea causa compendii, in rotula ^b dominationi vestræ a me collecta, et vobis data sine difficultate potestis relegere. Potest enim fieri ut alicui principi ante vos, hinc subreptum ad modicum fuerit, et iterum æterna lege correctum. Sicut Julianus, et postea imperator Mauricius decreverunt, ut ei qui semel in terrena militia signatus fuerit, nisi aut expleta militia, aut pro debilitate corporis repulsus, in monasterio recipi, et Christo eum militare non liceat. Quod religiosi imperatores, et sanctus Gregorius

Auctoritate apostolica et generali episcoporum consensu, ecclesiastico vigore, ac reipublicæ christianæ cohibente religione destruxerunt, velut in ejus epistolis ad ipsum Mauricium imperatorem, et ad plurimos archiepiscopos directis ostenditur. Quod et divæ memoriæ avo vestro Carolo subripuit, sicut majorum traditione, et verbis et scriptis didicimus. Et in libro primo Capitulorum cap. 112 demonstratur, de liberis hominibus ad servitium Dei sine sua licentia non convertendis. Quod Ecclesia et respublica non consensit, quodque postea correxit ; sicut in eodem libro cap. 134 monstratur. De rebus nihilominus ecclesiasticis dividendis eidem avo vestro incongruentia quædam subripuit, quæ oris præfatione, et edicti subscriptione correxit, sicut in præfato primo libro Capitulorum, cap. 74 evidenter ostenditur. Unde præiudicium ad tempus extortum vel usurpatum, pro legis iudicio nemo sanum sapiens tenuit, retinet, vel tenebit.

Cæterum in secundo libro Capitulorum cap. 13 continetur, ut « Si talis causa in qualibet provincia, aut in aliquo comitatu orta fuerit, quæ aut ad inhonorationem regni, aut ad commune damnum pertineat, quæ etiam sine nostra potestate corrigi non possit, nos diu latere non permittatis, qui omnia, Deo auxiliante, corrigere debemus. Quidquid hæcenus in his quæ ad pacem et justitiam totius populi pertinent, et ad honorem regni, ac communem utilitatem, aut a nobis, aut a vobis, neglectum est, debemus, Deo auxiliante, certare qualiter abhinc nostro et vestro studio emendatum fiat ^c. » In quarto etiam libro cap. 24 scriptum est : « Si quis aliqua necessitate cogente homicidium commisit, comes in cuius ministerio perpetratum est, et compositionem solvere, et faidam per sacramentum pacificare faciat. Quod si una pars ei ad hoc consentire voluerit, id est aut ille qui homicidium commisit, aut is qui compositionem suscipere debet, faciat illum qui ei contumax fuerit ad præsentiam nostram venire, ut eum ad tempus quod nobis placuerit in exilium mittamus, donec ibi castigetur, ut comiti suo in obediens esse ulterius non audeat, et majus damnum inde non accrescat ^d. »

Cur autem ista vobis bene scientibus scribo, quia vobis tacere non audeo, patenter ostendo. Jam plusquam quatuor annis ex quo Luido in parochia nostra invitatus homicidium perpetravit, unde Lotharius nepos vester in regno suo, sine respectu alicujus personæ, regium ministerium adimplevit. Nunc autem ad Pistas, et inde ad Basivum eundem Luidonem ut cum hominibus dominationis vestræ pacificatus esse posset, sicut vobis et nepoti vestro convenisse audivi, ducere studui ; et secundum commendationem vestram per legale iudicium causa perrexit, usque ad id loci, ut ne faidam homines vestri jurarent. Vias inde ad vestram commendationem

^a Il s'agit du premier memoire présenté à Charles le Chauve. Voy. ci-dessus dans les opuscules.

^b Second memoire au roi. Voy. *ibid.*

^c Capitulaire de l'an 813, cap. 13.

^d Capitulaire de l'an 819, cap. 15.

petierunt, cum iudicatum fuerit, ut eisdem leudem A rewadiaret et homines vestri fadim jurarent. Et si alia eidem Luidoni quærere vellent, in mallo illius de quibuscunque vellent eum interpellarent et ipse iustitiam redderet. Quod et ipse Luido humiliter obtulit. Postea autem qualiter inde actum fuerit, vos non latet; scio tamen quia sicut Capitula dicunt, inde actum non fuit. Nec tantum inde in palatio vestro fuit executum, quantum capitulum jubet, ut quilibet comes in suo comitatu inde facere per auctoritatem debet. Unde vos inquietare tunc propter Aquitanorum præsentiam nolui.

Nunc autem, quia ipsi vestri homines et proprietatem, et beneficium, in vestro regno, et in mea parochia habent; sed et Boso in nostra diocesi beneficium vestrum habet, consideret inde sapientia vestra qualiter secundum ministerium vobis a Deo commissum, et secundum honorem vestrum inde fiat, ne hæc causa diutius ex vestra parte, imperfecta remaneat et si majus damnum inde fuerit, periculum anima vestra, quod avertat Dominus, contrahat. Utrum autem vobis placeat, ut ipsi homines vestri cum misso vestro, in nostram parochiam, ubi proprietatem et beneficium habent et ipsa causa corrigi debet, veniant; aut nisi renierint, quod in regno vestro habent in bannum mittatur, aut aliter inde fiat, vestræ sapientiæ intererit. Ego autem quoniam amplius hanc causam differre non audeo, si interim aliud quod rationi et auctoritati conveniat, a vobis aut ab illis inde non accepero, in die missa sancti Remigii, vita comite, Domino adjuvante, ubi locus sermonis mei inter sacra misarum solemniam venerit, ante corpus illius sacratissimum qui vere est episcopus, auctoritate Dei, et sanctorum apostolorum, et ipsius Francorum apostoli, in quibus et nobis licet indignis, pro patribus natis filiis, Dominus dicit: *Quæcunque ligaveritis super terram erunt ligata et in cælis* (Joan. xx), eos qui ad pacem redire nolunt, sicut canones sacri præcipiunt, et quolibet modo consentientes eis, ab omni societate totius in Christianitatis excommunicare curabo, donec ad pacem quam Christus ostendit et docuit, redire, cum debita satisfactione procurent; eosque, sicut præcipiunt canones, regibus et episcopis et quibuscunque potuero, litteris excommunicatos esse denuntiabo, ut non communicantes excommunicatis, excommunicati et ipsi pariter habeantur. Non enim vobis vel nobis parvipendenda est sententia beati Gregorii, qua concordans Apostolo, præsertim de potestatem habentibus dicit: « Qui non corrigit resecanda, committit. »

Audivi denique quosdam reprehendere nos episcopos et dicere, quod volumus tota die per Scripturas parabolare. Quod devotio religionis vestræ non sinat suis auribus susurrari. Apostolus namque pleus dicit: *Quæcunque scripta sunt ad nostram doctrinam scripta sunt: scripta sunt autem propter nos* (Rom. xv). Et Dominus ad prophetam: *Audiens nuntiabis eis ex me* (Jerem. iii.) *Ex me*, inquit, id est

quæ ego in Scripturis loquor, et non ex te, id est ex tuo animali et carnali sensu. Et sanctus Leo sacros canones Spiritu Dei conditos et totius mundi reverentia consecratos dicit. Et de legibus quibus Ecclesia moderatur et Christianitas regitur, Christi Domini sapientia dicit: *Ego sapientia habito in consilio: per me reges regnant, et legum conditores justa decernunt* (Prov. viii). Conditores quippe legum non nudo verbo, sed scripto leges condiderunt et condunt, et subscriptione confirmaverunt atque confirmant. Quas non illi reges custodiunt de quibus Deus, qui ut scriptum est: *Facit hypocritam regnare propter peccata populi* (Job xxxiv) dicit: *Ipsi regnaverunt, et non ex me: principes exstiterunt, et non cognovi* (Ose. viii). Sed illi reges eas condunt atque conservant; de quibus item Dominus, ut præmissus, dicit: *Per me reges regnant, quales, præmittens, Dominum timete*, jubet honorificare apostolus, dicens: *Regem honorificate et obedite regi quasi præcellenti* (I Petr. ii): videlicet qui Regis regum obedit mandatis, et ejus custodit judicia. Alioquin ut sanctus Petrus dicit: *Obedire oportet Deo magis quam hominibus* (Act. v). Hinc enim ejus caepostolus dicit: *Non est potestas nisi a Deo*. Et: *Qui potestati resistit, Dei ordinationi resistit* (Rom. xiii). Quia nihil fit in mundo, nisi quod aut Deus misericorditer facit, aut fieri juste permittit. Cum itaque reges ex illo regnant, misericordia illius est, ut salventur populi eis commissi: cum vero non ex illo, sed permittente justo ipsius iudicio reges regnare videntur, vindicta est peccatoris populi et regnantis cumulus pœnæ. Sed fideles quique potestati aut a Deo collatæ aut a Deo permissæ non resistunt, cum juxta Petri vocem: *Sub manu Dei humiliantur* (I Petr. v) et de bonis principibus gratias referunt; et de his qui ad purgationem suam a Deo regnare permissi sunt, gementes exultant; sicut scriptum est: *Exultaverunt filie Judæ in omnibus judiciis tuis, Domine* (Psal. xcvi). Sicque non resistunt ordinationi Dei, qui novit, non mala facere, sed ordinare. Resistunt autem iniquis iniquorum operibus et mandatis. Unde scriptum est: *Verba sapientium quasi stimuli, et quasi clavi in altum defixi* (Eccli. xi), quia nesciunt culpas palpate, sed pungere, et tolerant patienter propter Dominum illata mala sibi a principibus malis. Quapropter, qui nobis derogant dicentes, quod volumus tota die loqui per Scripturam, si *de omni verbo otioso reddent rationem in diem iudicii* (Matth. xii), sicut Veritas non mentiente ore dicit, videant, quid sustinebunt, de hoc criminoso detractionis et contra nos murmurationis verbo. Non enim cum sancto Moysè illis dicimus: *Nec contra nos est murmur vestrum, sed contra Dominum. Nos enim quid sumus?* (Exod. xvi.) Illisque cum Apostolo inculcamus: *Neque murmuraveritis sicut quidam murmuraverunt, et a serpentibus perierunt* (I Cor. x). Quibus enim increscit legere, vel scribere quæ scripta sunt, vel scribuntur, sciunt, quia non de ignorantia iudicabuntur;

sed de contemptu quo nolunt scire, quo nolunt legere, vel audire condemnabuntur. De qualium choro Dominus dicit: *Noluit intelligere ut bene ageret; iniquitatem meditatus est in cubili suo* (Psal. xxxv). Cum enim non dicit, non potuit intelligere, sed *noluit intelligere*, aperte reatum contemptus denuntiat, pro quolibet contemptor merito debitas pœnas luet...

EPISTOLA XVI.

AU CLERICOS PALATII.

Ut hominem suorum rapinas reprimant.

(Apud Sirmond.)

HINC MARIUS Rhemorum episcopus fratribus nostris, presbyteris, diaconibus, subdiaconibus, et cæteris clericis in palatio domno nostro regi et domnæ reginæ, ac illorum fidelibus ecclesiastico ministerio consententibus.

Audio de hominibus vestris quia multa mala, rapinas scilicet et deprædationes, et fornicationes, et adulteria in parochia mea faciunt et etiam de vobis audio quia illis rapinis consentitis, ut videlicet qui de illis vivitis, et vestros homines atque caballos exinde pascitis. Unde timendum est ne de vobis dicat Dominus per prophetam: *Et erit sicut populus, sic sacerdos* (Isa. xxiv, 2). Sed mihi non est necesse multum laborare admonendo in vobis, qui et ministerio et doctrina tales estis, ut non solum vos abstinere a malo, sed etiam alios a malo divertere et bonum facere debere admonere sciatis et debeatis. Tamen pro ministerio imposito admeone vos cum Paulo apostolo, et obtestor in Christo et per Christum, qui per Paulum locutus est, *ut exhibeatis vos sicut Dei ministros, ne vituperetur ministerium nostrum* (II Cor. vi, 3 et 4). Et quia jejunia paschalia inchoastis, ante oculos habete quid in Pascha, id est in transitu suo ex hoc mundo ad Patrem, Dominus Jesus tradendo corpus et sanguinem suum discipulis suis de reprobo discipulo dixit: *Ecce manus tradentis me necum est in mensa; vae autem homini illi per quem filius hominis tradetur* (Luc. xxii, 21). Hoc pascha quotidie sacerdotes immolando, diaconi ministrando, subdiaconi obsequendo, et cæteri clerici Amen respondendo, celebratis pleno ore de rapina, pleno corde de iniquitate. An oblitii estis quod scriptum est in Evangelio: *Post buccellam introivit in Judam Satanas?* (Joan. xiii, 27.) id est in quem introierat prius ut Dominum traderet suadendo, tunc in eum introiit plenissime possidendo; sicut scriptum est: *Intravit autem Satanas in Judam qui dicitur Scarioth* (Luc. xxii, 3); et item: *Jam enim miserat diabolus in cor Judæ, ut traderet Dominum* (Joan. xiii, 2); ac deinde dictum est: *Post buccellam introivit in eum Satanas*. Quia cum intravit sanctus panis in plenum de iniquitate ventrem, intravit hostis antiquus, qui dicitur diabolus et Satanas, in crudelem et impiam mentem; et ad quem finem illa communicatio ei pervenit, quam ideo accepit, ut malam conscientiam mentiretur atque celaret, ipsi melius

scitis. Et ille enim, sicut ipsi legitis in Scripturis, in exemplum Judæ filium hominis tradit, non quidem Judæis peccatoribus, sed tamen peccatoribus, membris videlicet suis, qui illud inestimabile Domini corpus violare præsumit. Et vae illi homini qui ad mensam Domini malignus accedit, qui insidiis mente conditis, qui, præcordiis rapina aut aliquod scelere pollutis, mysteriorum Christi secretis participare non metuit. Vae, inquam, illi presbytero, vae illi diacono, vae illi subdiacono, vae illi clerico, vae illi homini, de quo Jesus, qui altaribus sacrosanctis inter immolandum, utpote proposita consecraturus munera, adesse non dubitatur, astantibus sibi ministris cœlestibus, queri cogitur quod in cœna discipulis de Juda dixit: *Ecce, inquit, manus tradentis me necum est in mensa* (Luc. xxii, 21); et vae illi de quo dicit Paulus apostolus, quod quasi speciali privilegio in cœna Domini quando hæc sunt tradita legimus: *Quicumque manducat panem hunc aut calicem Domini bibit indigne, judicium sibi manducat et bibit non dijudicans corpus Domini* (I Cor. xi, 29). Sed sic ad mensam Domini accedat sine reverentia et timore de peccatis suis, sicut lætus accedit, quando socius suus illum plena mensa pascit de rapinis suis. Et quod idem dicit Apostolus: *Ideo inter vos multi infirmi et imbecilles, et dormiunt* (ibid., 30), id est moriuntur, multi, hoc monstratur in exemplo de infirmitatibus et mortibus corporalibus aliquorum, quod fit in anima in spiritalibus infirmitatibus atque mortibus omnium irreverendorum. Et qua fronte accedit sacerdos immolare, et diaconus ministrare, ad sanetum altarium, ut pro aliorum peccatis Dominum placatum faciant, qui non solum de præteritis suis peccatis illi non satisfaciunt, sed insuper quotidianis ac recentibus illum ad iracundiam provocant? et cum quali fiducia aliquis homo talem intercessorem pro se ad Deum in altario ministrando transmittit, qui Deum quotidie non mediocriter offendit, quando si ad suum parem illum transmitteret qui ipsi intercessori iratus existeret, plus illum ad iracundiam quam ad placationem excitaret? Hoc enim Pascha, quod tunc Dominus in novo mysterio egit, quotidie celebratis, quotiescunque missam agitis, sicut ipse tunc omnibus episcopis et presbyteris et cæteris fidelibus celebrantibus atque astantibus ad hoc terribile sacramentum in apostolis suis dixit: *Hæc quotiescunque, inquit, feceritis, in meam memoriam facietis* (II Cor. xi, 25). Videte quales cum Domino ad Domini passionem celebrandam acceditis, qui de talibus miscrisi coinquinati estis, si tamen, ita ut adivi, vestris hominibus consentitis. Unde nisi vos correxeritis, quicumque de mea diœcesi sunt, sine dubio usque ad synodum ab officio et communione privabo; et qui de mea diœcesi non sunt, de mea parochia et diœcesi eos excommunicabo, et ad suos episcopos, qui eos corrigant atque dijudicent, divina auctoritate redire mandabo. Quod ut necesse non sit fieri, fratres et filii, et vos ac vestros corri-

gite, et alios admonete, quia sicut majus peccatum A vos peccantes habetis quam populus, sic majorem gloriam apud Deum habebitis, si vos ac vestros custodieritis, et alios admonueritis, scientes quia qui converti facit unum peccatorem ab errore viæ suæ, quid inde sequitur, quanto magis si vobis et vestris, de quibus rationem reddetis, ad salutem consulere studueritis? Domino etiam nostro regi et amabiliore et venerabiliore eritis, et securius vos ille Ecclesiis præficere, quando locus evenerit, et nos vos audacius et amabilius, nutu Dei et ipsius domini nostri favore, ordinare valebimus.

EPISTOLA XVII.

AD PRESBYTEROS DIOECESIS RHEMENSIS.

Ut excommunicationem denuntient iis qui ac de B præcationibus admoniti non abstinerint.

(Apud eumdem.)

HINC MARUS Rhemorum episcopus omnibus presby- teris in parochia nostra consistentibus.

Sicut vobis sæpe dixi, sacerdotes medici sunt spiri- ritales, et infirmi homines sunt peccatores. Et licet nos peccatores simus, tamen dignatione Dei officium sanandi peccatores suscepimus; sicut sæpe medici corpore infirmi per magisterium medicinæ infirmos solent sanare. Et quando usitata infirmitas venit in liquo, usitatem faciunt medicinam; quando autem inusitata infirmitas nascitur infirmo, de medicinæ experimento inusitatum medici faciunt medicinam. Propterea, fratres, unusquisque vestrum quoties- cunque cantat missam, usque dum ista quam patimur C miseria in parochia nostra cessaverit, quoniam tales homines sunt qui non propter salutem, sed propter consuetudinem, ad ecclesiam veniunt, et usque ad Evangelium, juxta quod ista prædicare debueratis, in missa stare solent et recedunt, statim post Apostolum, id est post Epistolam, hanc admonitionem nostram ab initio usque ad finem, cum verbis prophetæ vel Apostoli legite, quia utinam non ad iudicium nostrum dicamus, et nos Dei apostoli, id est Dei missi sumus. Ut quoniam ipse per corporalem præsentiam eis qui in parochia nostra tanta mala faciunt annuntiare non possum, verbum Dei per nos ad illos transmissum, quod alligari quacun- que infirmitate non potest, illis eorum salutem annuntiet. Et orate pro illis et pro nobis omni- bus, ut ipsi resipescant a laqueis diaboli, a quo capti tenentur ad Dei voluntatem, et Deus nobis patientiam sufferendi donet, et liberet nos a malis quæ patimur propter peccata nostra, et det pacem in diebus nostris. Et admonitio nostra ad illos talis est.

Precor vos omnes in amore Dei, legationem ejus portans, per Christum, qui pro vobis crucifixus est, et per Spiritum sanctum, per quem in baptisate sanctificati estis, tam qui de parochia mea estis quam et vos qui de aliis parochiis in parochiam istam venistis et venitis, ut abstineatis vos ab istis

deprædationibus et fornicationibus, et aliis crimini- bus quæ mergunt eos qui illa faciunt in infernum, et de illis quæ in mea parochia facta habetis, confessionem puram et dignam poenitentiam faciatis. Quæ mala vobis et omnibus Christianis Paulus apostolus enumerat dicens: *Nolite errare, neque idolis servientes, neque adulteri, neque molles, neque masculorum concubitores, neque fures, neque avari, neque ebriosi, neque maledici, neque rapaces regnum Dei possidebunt* (I Cor. vi, 9), si vel in uno de istis peccatis quicunque homines vitam istam finierint. Et iterum idem Paulus apostolus dicit: *Si quis frater, id est si quis Christianus, nominatur, et est fornicator, aut avarus, aut idolis serviens, aut ebriosus aut maledicus, aut rapax, cum tali homine nec cibum debet verus Christianus accipere* (I Cor. v, 11). Et iterum dicit: *Non solum qui faciunt, sed et qui consentiunt facientibus, digni sunt morte* (Rom. i, 32). Quoniam sicut demonstrat sanctus Joannes apostolus, qui alicui consentit talia mala facere, id est si in eum emendare potest, aut illi potest vetare ut non faciat, aut si talem non potest corrigere, et ab illis se potest communionem separare, et non facit, *communicat* et particeps est operibus illius malignis (II Joan. xi). Et ideo, fratres et filii, videte quantæ miseriæ et de paganis et de aliis malis Christianis super nos veniunt, et quotidie qui ista mala faciunt, de isto sæculo ex majori parte ad tormenta, quæ sine fine, pro malefactis quæ in parvo tempore fecerunt mortui vadunt; et timentes Dei iudicium, retrahite vos ab ista rapina et a cæteris malefactis. Maxime in isto tempore, quando alia peccata, quæ per totum annum sicut fragiles homines committitis, pænitere et satisfacere Deo inde debetis, ut communionem corporis et sanguinis Domini in sanctissimo die redemptionis nostræ non ad iudicium, sed ad salutem accipere possitis. Quia si quis de istis peccatis plenus ad illam sanctam communionem accesserit, sine dubio suam perditionem accipiet, sicut et Judas fecit, qui Dominum tradidit, et laqueo strangulatus quo se suspendit medius crepuit, et diffusis visceribus in infernum perrexit. Quoniam sicut ille Dominum Judæis tradidit, ita iste corpus et sanguinem Christi accipiens peccatoribus suis membris in condemnationem tradit. Et de hoc quod ille passus est in anima simul et corpore, multos D exspectat Dominus ad poenitentiam, ut non patiantur in corpore. Omnes autem male hanc communionem accipientes patiuntur in anima et peribunt in æternum, nisi Dei gratia fuerint liberati per poenitentiam. De istis quæ dico potest fieri ut diabolus humanæ salutis inimicus immittat in corda vestra cum auditis quod tale periculum sit hanc sanctam communionem accipere, si ab iniquitatibus vestris vos non vultis retrahere, et dicatis: Si tale periculum est nobis, sicut iste episcopus dicit, communicare, abstinebimus nos ab illa communionem, quia non retrahimus nos a mala operatione. Unde iterum audite quibuscunque diabolus ista susurrat. Quoniam

sicut Dominus dixit de baptismo quod nullus potest fieri salvus, nisi quis renatus fuerit ex aqua et Spiritu sancto (Joan. III, 5), ita de hac sancta communione dixit : *Nisi manducaveritis carnem filii hominis, et biberitis ejus sanguinem, non habebitis vitam in vobis* (Joan. VI, 54). Et sicut dixit : *Qui crediderit et baptizatus fuerit salvus erit* (Marc XVI, 16); id est si quod promisit in baptisate, diabolo et ejus operibus abrenuntiando, et in Deum fide quæ per dilectionem est credendo, quod est ut in fide et bonis operibus permaneat, et si post baptismum peccaverit, per confessionem et dignam pœnitentiam illis qui in eum peccaverunt dimittendo, et bonis operibus insistendo, hoc quod male fecit emendet. Ita etiam de hac sancta communione dixit : *Qui manducat carnem meam et bibit meum sanguinem, in me manet et ego in eo* (Joan. VI, 57); et : *Si quis manducaverit ex hoc pane, vivet in æternum, et ego resuscitabo eum in novissimo die* (ibid., 52, 55). Propterea attendite, omnes Christiani, quia sine ista communione nec remissionem peccatorum potestis accipere, nec de inferno liberari, nec ad regnum Dei potestis pervenire. Et qui istam communionem cum odio et corde pleno de iniquitate, sicut dixi, et cum voluntate peccandi acceperint, judicium et condemnationem sibi accipiunt. Et ideo nullum consilium aliud restat ei quicumque vult salvus fieri, nisi ut ab iniquitatibus cesset, et inde poeniteat et offerat Deo confessionem de præteritis peccatis et professionem, ut in reliquum cesset a peccatis, quantum ei Deus adjutorium dederit, et bonis insistat operibus, et confusus de misericordia Dei, mundo corpore et pura conscientia et contrito corde accipiat communionem corporis et sanguinis Domini. Et tunc non erit ei in condemnationem, sed in remissionem omnium peccatorum, et in fortitudinem, ut possit resistere diabolo, et ad regnum Dei pervenire. Quoniam sicut *qui adhæret meretrici unum corpus efficitur*, ita qui digne communicat de ista communione unus spiritus est cum Domino (I Cor. VI, 16), et in quo Deus habitat et ipse in Deo, et in tali homine in quo Deus habitat, et qui in Deo habitat, non habebit peccatum et peccati auctor atque hortator diabolus, damnabiliter locum; et si ita perseveraverit, post mortem in refrigerio erit, et post resurrectionem in sanctorum angelorum consortio cum Christo sine fine regnabit. Et nolite sperare quia tantum ad terrorem vestrum, et non ex veritate hoc dicam. Testis est Deus quia sicut ex ore Dei per Scripturas accepi, ita et hic ad salutem et correctionem vestram scripsi. Et sciatis quia nisi vos correxeritis ut ista mala dimittatis, omnes qui in ista parochia ista mala facitis excommunicabo, et presbyteris mandabo ut nulli communionem scienter donent, qui ista mala post istam admonitionem relectam in mea parochia fecerit, neque illi qui facienti voluntarie communicavit, aut facienti mala consensit. Et omnibus ad communionem accedentibus presbyter quicumque denuntiet, ut qui post istam admonitio-

nem ab his malis non cessavit ad communionem non accedat, sciens qui condemnationem accipiet. Et ex verbo Dei mandabo, ut nullus presbyter in mea parochia de alia parochia veniens illis missam cantet qui se ab istis malis non correxerint, sicut in Christi amore vos deprecor. Et nemo despiciat dicens : Quid si iste episcopus talia commendaverit? Sciatis pro certo quia qualiscunque ego sim, Deus verax et omnipotens est qui dixit nobis : *Quæcunque ligaveritis super terram, erunt ligata et in cælo* (Matth. XVIII, 18). Et si aliquis dixerit : Ad illos dies in alteram ibo parochiam, sciatis quicumque ille non hominis sed Dei illusor et suus ipse deceptor, quia si in alteram parochiam communicare sic excommunicatus perrexerit, quoniam majus etiam judicium coram Deo sustinebit, quia putat se illum effugere posse qui ubique est, et cujus verbo, non mea potestate secundum hominem, sed secundum divinum ministerium, illum excommunicabo. Et non irascimini, dilecti fratres et filii, quia paterna dilectione vos moneo. Sed corrigite vos, attendentes communionem Dei et ad me et ad vos factam. Ait enim Dominus unicuique qui officium sacerdotale suscepit : *Si annuntiaveritis iniquo iniquitatem suam, et conversus fuerit ille iniquus ab impietate sua, ille vita vivet, et tu animam tuam liberasti. Et si non annuntiaveris iniquo iniquitatem suam, et non fuerit conversus ille impius ab impietate sua, ipse iniquus in iniquitate sua morietur, sanguinem autem ejus de manu tua requiram* (Ezech. III, 39). Quapropter, fratres et filii, attendite, quia Deus omnipotens est qui ista dixit, et ipse nos fecit, et ipse nos redemit, et ante illius judicium omnes astabimus, et ibi iudicati erimus nos sacerdotes, et principes ac seniores, qui vos admonere et castigare debemus, et pro nostris ac vestris peccatis; et vos etiam iudicati eritis, non solum de peccatis quæ fecistis, et non poenitistis, sed etiam de admonitionibus et castigationibus quas contempsistis. Deus omnipotens, qui per me ista loquitur in auribus vestris, per se hæc loquatur in cordibus vestris.

EPISTOLA XVIII.

AD PRESBYTEROS RHEMENSIS PAROCHIE.

De baptismo.

(Act. prov. eccl. Rhem.)

HINC MARIUS episcopus ac plebis Dei famulus dilectis fratribus hujus Rhemensis parochiæ compresbyteris nostris.

Cupiens vos in omni sensu et doctrina atque operis perfectione gratia Dei esse ditatos, pro imposito exiguitati meæ ministerio singulis et in commune vobis quædam de actione sacri baptismatis breviter ex plenitudinis latitudine sanctarum Scripturarum, et doctrina catholicorum patrum curavi excerpere et notitiæ vestræ ingerere, ut secundum sacram Scripturam intelligatis in sancto ministerio cuncta quæ agitis, et ut in aperto sermone non sit in vobis

difficultas intelligendi, neque in prolixo tedium legendi et memoriæ commendandi.

Dominus Jesus Christus, creator et redemptor noster, dicit in Evangelio : *Nisi quis renatus fuerit ex aqua et Spiritu, non intrabit in regnum cælorum* (Joan. III) ; unde discipulis suis mandavit dicens : *Ite, docete omnes gentes, baptizantes eos in nomine Patris, et Filii, et Spiritus sancti, docentes eos servare omnia quæcunque mandavi vobis* (Matth. XXVIII) In istis paucissimis verbis totius sanctæ prædicationis ordinem exposuit, his docere dixit, et semel baptizare. Primo omnium fidem catholicam docere præcepit, et post fidem acceptam, in nomine sanctæ Trinitatis baptizare jussit. Deinde fide imbutum et sacro baptismate ablutum evangelicis instruere præceptis mandavit. Primo fides docenda est, et sic baptismi percipienda sunt sacramenta, deinde evangelica præcepta tradenda sunt. At si aliquid horum trium defuerit, salutem animæ suæ auditor habere non poterit. Hic namque ordo catechizandi, id est instruendi in adultæ ætatis viris ubique firmiter retinendus est. Fragiliori vero ætati pia mater Ecclesia concessit, ut qui alieno in paternæ prævaricationis ligatus est peccato, alterius in baptismi mysterio abrenuntiatione et fidei professione solutus sit. Et si hoc non esset, quanti perirent infantes, ex quorum numero cælestis quæ otidie ædificatur Jerusalem ? Absque fide quippe baptisma non proficit, dicente Apostolo : *Sine fide impossibile est placere Deo* (Heb. II). Inter impossibile siquidem et difficile hoc interesse legimus. Difficile est quod licet vix, tamen fieri potest : impossibile vero, quod omnino ab humana fragilitate fieri non potest. Ideo ipse Dominus in Evangelio stupentibus apostolis, quis ex divitibus salvus fieri posset, respondit : *Apud homines, hoc impossibile est ; apud Deum autem omnia possible sunt* (Matth. XIX). Docendus est itaque homo rationalem habens intelligentiam, et multimoda prædicatione atrahendus, ut sacræ fidei veritatem agnoscat ; et maxime Dei omnipotentis pro eo deprecanda est clementia : quia otiosa est lingua docentis, si gratia divina cor non imbuat auditoris, dicente ipsa Veritate : *Nemo potest venire ad me, nisi Pater meus attraxerit eum* (Joan. VI) ; et ut æqualiter sanctam Trinitatem salutem hominis operari intelligatis, dicit et ipse Dominus in Evangelio : *Nemo potest venire ad Patrem, nisi per me* (Joan. XIV) ; item et de Spiritu sancto ait : *Nisi quis renatus fuerit ex aqua et Spiritu, non potest introire in regnum Dei* (Joan. III). Quod enim visibiliter sacerdos per baptismum operatur in corpore per aquam, hoc Spiritus sanctus invisibiliter operatur in anima per fidem. Tria sunt in baptismatis sacramento visibilia, et tria invisibilia. Visibilia sunt, sacerdos, corpus et aqua ; invisibilia vero, spiritus, et anima, et fides. Illa tria visibilia nihil proficiunt foris, si hæc tria invisibilia non operantur. Sacerdos corpus aqua abluit, Spiritus sanctus animam fide justificat, et hoc est quod Apostolus ait : *Cooperatores enim Dei sumus* (I Cor. III).

A Cooperatur homo sancto Spiritui in salute hominis ; sed et ipse homo qui baptizandus est, cooperari ambobus debet in salute sua ; id est Spiritui sancto et sacerdoti humiliter corpus præstare ad sacri mysterium lavaeri, et animam voluntarie ad catholicæ fidei susceptionem.

Ut vim cognoscatis hujus sacratissimi juxta sanctorum Patrum intelligentiam et statuta ecclesiastica, vestræ charitati eadem sacramenta catholica interpretatione ostendam. Nam magna sanctitate et venerabili significatione quidquid in eis geritur statutum esse, neminem dubitare fas esse credimus.

Primo, paganus catechumenus, id est instructus, fit accedens per ordinem traditum ad baptismum, id est sanctam tinctionem ; et renuntiat maligno spiritui et omnibus damnosis ejus pompis.

B II. Accipit manus impositionem et crucem in fronte, in nomine Patris et Filii et Spiritus sancti : et exsufflatur in facie, ut fugato diabolo, Christo Deo nostro paretur introitus.

III. Exorcizatur, id est, conjuratur malignus spiritus, ut exeat et recedat, dans locum Deo.

IV. Accipit catechumenus salem, ut putrida et fluxa ejus peccata sapientiæ sale divino munere mudentur.

V. Deinde vero symboli apostolici traditur ei fides, et oratio Dominica ; ut vacua domus et a prisco habitatore derelicta, fide ornatur, et præparetur habitatio Deo. Quorum expositionem, id est symboli et orationis Dominicæ, habetis in scrutinio quod fit in apertione aurium, sicut vobis credimus esse notum.

C Quod enim symbolum Græce dicitur, latine indicium, vel signum, sive collatio interpretatur. Indicium, quia per id indicatur fidei integritas. Signum, quod eo bene retento et intellecto fideles ab infidelibus discernuntur. Collatio, quia in eo sancti apostoli omnem fidei integritatem contulerunt : quod autem omnes Apostoli pari fidei sinceritate corde retinebant, ore confessi sunt ; et singuli proprias sententias conferentes, symbolum, id est totius fidei collationem ediderunt. Discessuri enim ab invicem per totius orbis provincias normam futuræ prædicationis in commune statuerunt, ne localiter ab invicem discedentes, diversum aliquid vel dissonum prædicarent. Oratio autem Dominica, quam omnes Christiani sincero corde frequentare necessario debent, ideo sic appellatur, quia petentibus apostolis ut eis insinaret qualiter orare deberent, Dominus noster Jesus Christus, sicut sacra Evangelia docent, hanc orationem illis composuit, etsic eos orare præcepit.

VI. Tunc fiunt scrutinia, id est explorationes, vel investigationes secundum morem vobis cognitum, ut exploretur sæpius, quam firmiter post renuntiationem Satanæ sacra verba datæ fidei radicibus corde defixerint ; et sicut vobis notum est per decretos dies in sancta Quadragesima fiunt septem scrutinia, secundum formam septiformis Spiritus.

VII. Deinde tangit consecrando sacerdos nares et aures de sputo, et dicit : *Effeta quod est adaperire*

(*Matth. vii.*), et reliqua. Inter cætera quippe consecrationis exordia, de saliva oris sui sacerdos nares tangit, et aures consecrandi, et dicit: *Effeta, quod est adaperire*. Obsurduit enim homo ab audiendo vitæ verbo, postquam mortifera serpentis verba contra Deum timidus audivit; et surditatem quam primus homo peccando promeruit, omnis per traducem virilis seminis generatus ab illo contraxit. Per salivam quidem oris sacerdotis, gustus quo initiandus est supernæ sapientiæ designatur: quia ex capite in quo omnes sensus hominis sunt, saliva descendit: et Apostolus: *Caput*, inquit, *Christi Deus* (*I Cor. xi.*), et divinitas hominem assumens, quoddam ex connectione duarum substantiarum in una Dei Filii persona collyrium fecit, unde genus humanum, quod cœcum a primis parentibus natum erat, illuminaret. Non ab re sputo aures tanguntur et nares: ut qui expuens linguam muti tetigerat, et sputo lutum fecerat, et oculos cæci nati aperuerat, nunc per ministerium sacerdotum, et auditum spiritalem his qui baptizandi sunt, tribuat; et recte loquendi, id est veræ fidei confitendi facultatem præbeat; et nares, quibus bonum Christi odorem capiant, aperiat. Per tactum vero narium, ut abjectis delectationibus noxiis, solum Christi semper amplectatur odorem, de quo dicit Apostolus: *Christi bonus odor sumus Deo in omni loco* (*II Cor. ii.*). Et ut meminerit se juxta exemplum beati Job, donec superest halitus in eo et spiritus Dei in naribus ejus, non loqui iniquitatem labiis, nec lingua mendacium meditari debere. Porro per tactum aurium, ut relicto auditu linguæ nequam, audiat verba Christi, et faciat ea: similis vero prudenti, qui ædificavit domum suam supra petram: qui incorporatus Ecclesiæ, quæ corpus est Christi, dicit cum Psalmista: *Sacrificium et oblationem, veterum scilicet cæremoniarum, noluisti: aures autem perfecisti mihi, ut annuntiem omnes laudationes tuas in portis filiæ Sion* (*Psal. xxxix.*), et: *In me sunt, Deus, vota tua, quæ reddam laudationes tibi* (*Psal. lv.*). Legimus quoque in quibusdam regionibus esse consuetudinem, ut etiam labia consecrandi de saliva sacerdotis tangerentur, auctoritate sacri Evangelii: quia postquam Dominus in aures surdi et muti misit digitos suos, sputo tetigit linguam illius, et subintulit: *Effeta, quod est adaperire*. Et statim apertæ sunt aures ejus, et solum est vinculum lingue ejus, et loquebatur recte. Et in quibusdam regionibus alii oleo sancto tangunt catechumenorum aures et nares: quia nemo potest per gratiam sancti Spiritus, quæ oleo designatur, fidei sacramenta cognoscere, nisi audiat prædicantem, dicente Apostolo: *Fides ex auditu, auditus autem per verbum Christi* (*Rom. x.*). Nares quoque simili tactu sanctificantur: ut hi qui ad baptismum veniunt admoneantur tanti mysterii sacramentum per gratiam sancti Spiritus usque ad mortem inviolatum atque integrum custodire. Ut quandiu spiritum vitæ hujus naribus suis attrahunt, a Christi Domini nostri cultura et servitio non re-

cedant. Sed sicut nostrarum regionum consuetudo ab eis non est reprehendenda, ita nec a nobis illarum consuetudo, quia non abhorre a fide videtur, penitus est abdicanda: cum in unius fidei soliditate in quibusdam rebus obesse non solet diversa consuetudo. Sicut et sacramenta Veteris ac Novi Testamenti, licet pro temporum ratione discrepent, fides tamen una, eademque concordat: quia quam nos per apostolos factam, eandem patres Testamenti Veteris dispensationem Christi per prophetas didicerant esse venturam.

VIII. Posthæ vocato ex nomine consecrando, interrogat eum sacerdos, si abrenuntiet Satanæ et omnibus operibus ejus, et reliqua. Post cujus responsionem ungit eum oleo exorcizato, in pectore et inter scapulas, dicens: « Et ego linio te oleo salutis in Christo Jesu Domino nostro in vitam æternam. » Pectus quippe perungitur oleo, ut signo sanctæ crucis diabolo claudatur ingressus. Signatur et inter scapulas, ut undique muniatur. Item in pectoris et inter scapulas unctione signatur fidei firmitas, et operum honorum perseverantia. Signatur etiam baptizandus pectore et inter scapulas de oleo sancto: ut illius olei sancti, videlicet Spiritus unctione liniatur, de qua Apostolus ait: *Sicut unctio ejus docet vos de omnibus* (*I Joan. ii.*); ante et retro munitus contra omnia, prospera sive adversa, sit circumspectus. Abrenuntiat autem baptizandus diabolo, id est, resistit, sicut jubet Petrus apostolus, dicens: *Resistite diabolo, et fugiet a vobis* (*I Petr. v.*). Abrenuntiat quidem, id est, repudiat, spernit, rejicit, contradicit, abnegat, relinquit, sive aliud quid quod hoc verbo in hoc sensu exprimi potest. Quamvis enim illius verbi quod est *nuntio*, sensus in promptu sit cum sine præpositione profertur: accepta præpositione interdum a sua significatione non longe recedit: ut est illiud, *nuntio* et *renuntio*; interdum vero in alium sensum vertitur, et est illiud: *Sic ergo omnis ex vobis qui non renuntiat omnibus quæ possidet, non potest meus esse discipulus* (*Luc. xiv.*). Quam sententiam beatus Gregorius exponens in homilia Evangelii, renuntiare abnegare, intelligi debere, ostendit. Denique baptizandus post abrenuntiationem Satanæ, interrogatur si abrenuntiet omnibus operibus ejus. Quæ sunt autem opera Satanæ, divinus apostolus Paulus, in quo loquitur Christus, demonstrat scribens ad Corinthios: *Si quis frater est fornicator, aut avarus, aut idolis serviens, aut maledicus, aut ebriosus, aut rapax, cum hujusmodi nec cibum sumere* (*I Cor. v.*). Et item: *An nescitis quia iniqui regnum Dei non possidebunt? Nolite errare: neque fornicarii, neque idolis servientes, neque adulteri, neque molles, neque masculorum concubitores, neque fures, neque avari, neque ebriosi, neque maledici, neque rapaces, regnum Dei possidebunt* (*I Cor. iv.*). Et ad Galatas: *Manifesta sunt opera carnis, quæ sunt fornicatio, immunditia, luxuria, idolorum servitus, veneficia, inimicitia, contentiones, emulationes, iræ, rixæ, dissensiones, sectæ, invidia,*

homicidia, ebrietates, comessationes et his similia, A ctum. Quas necesse est inconvulsæ mentis intentione servare fidelibus, et ut intemperate custodiri possint, illius semper adiutorium requirere, cujus gratia in baptismo sunt renati.

quæ prædico vobis, sicut prædixi, quoniam qui talia agunt, regnum Dei non consequentur (Galat. III) : nisi per debitos pœnitentiæ fructus, antequam exeant de corpore, ea cooperiant, et devotis precibus, elemosynis, jejuniis, fletibusque et hostiæ salutaris oblationibus, abluere illa curaverint. Abrenuntiat enim baptizandus omnibus diaboli pompis, id est spiritualibus vitiis, ut sunt ambitio, arrogantia, vana gloria, ostentatio et cætera hujusmodi, quæ de superbæ fonte procedunt. Pompa quippe propriè dicitur publica ostentatio cum multa ambitione. Ambitio quippe phantasia dicitur Græcè : quo nomine designatur multiplex apparatus et pompa regalis officii. Et hac conditione post abrenuntiationem, ut præmisimus, oleo sancto linitur.

IX. Et sic fonte verbis solemnibus consecrato, adstante baptizando juxta fontem, obsequente patrono interrogat eum sacerdos, si credit in Deum Patrem omnipotentem, et reliqua secundum morem. Et respondente illo secundum ecclesiasticam consuetudinem; post supradictam trinam diaboli et pomparum, ac operum abrenuntiationem, postque trinam veræ fidei confessionem, quia non potest quisque nisi trina abrenuntiatione et trina confessione purgari; trina mersione baptizatur in nomine Patris, et Filii, et Spiritus sancti : ut sicut interior homo, qui ad imaginem sanctæ Trinitatis conditus est, per invocationem sanctæ Trinitatis ad eandem revocatur imaginem; et qui tertio gradu peccati, id est, cogitatione, locutione et operatione cecidit in mortem, tertio elevatus de fonte per gratiam resurgat ad vitam. Et sicut interior homo in fide sanctæ Trinitatis ad imaginem sui conditoris reformandus est, ita et exterior trina mersione abluendus est : ut quod invisibiliter Spiritus operatur in anima, hoc visibiliter sacerdos imitetur in aqua. Nam originale peccatum tribus modis actum est, delectatione, consensu et opere; ita et omne peccatum, aut cogitatione, aut locutione, aut operatione efficitur; ideo triplici generi peccatorum trina videtur ablutio convenire; vel propter originale peccatum, quod in infantibus valet ad perditionem, vel propter illa quæ in provectoris ætatis hominibus, voluntate, verbo vel facto adduntur. Et quia secundum sanctam Scripturam unus Deus, una fides, unum baptisma, ter baptizandus mergitur in nomine Patris, et Filii, et Spiritus sancti, ut Trinitas unum appareat sacramentum; et non baptizetur in nominibus Patris et Filii et Spiritus sancti, sed in uno nomine, quod intelligitur Deus, juxta Apostolum. Igitur unus est Deus, una fides, unum baptisma : sed duæ sunt pactiones quæ in baptismo paciscuntur, quas patroni suis susceptis, cum ad intelligibilem ætatem pervenerint, insinuare sollicitè et inculcare debent. Quarum pactionum una est qua diabolo abrenuntiat, et omnibus operibus ejus, et omnibus pompis ejus : et altera qua quisque baptizatus professus fuit se credere in Patrem, et Filium, et Spiritum san-

ctum. Quas necesse est inconvulsæ mentis intentione servare fidelibus, et ut intemperate custodiri possint, illius semper adiutorium requirere, cujus gratia in baptismo sunt renati.

EPISTOLA XIX.

AD LUDOVICUM III REGEM, BALBI FILIUM.

Ut liberam episcopi electionem in Bellovacensi Ecclesia fieri permittat.

(Apud Sirmond.)

Domino LUDOVICO regi glorioso HINCMARUS episcopus ac plebis Dei famulus.

CAP. I. Episcopi qui apud martyrium sanctæ Marcræ in nomine Christi convenimus, non pro ulla indebita voluntate, sed pro sanctæ Ecclesiæ ac vestro et regni vobis commissi honore ac salvamento, sicut scripta demonstrant, quæ vobis per consacerdotes nostros transmisimus, relecta præsumptione cleri et plebis Ecclesiæ Belvacensis, qui personam regulis sacris incongruam, cum decreto singulorum manibus roborato, nobis præsentaverunt in synodo, veluti jam fuit actum, quando Fromoldum quemdam elegerunt, et rejecto illo propter insipientiam et improbitatem, Odo ex vicina parochia ibidem cum decreto canonico fuit electus, relectis coram omnibus qui adfuerunt sacris canonibus, secundum easdem sacras leges constituimus designatos ex nomine dilectos fratres et venerabiles coepiscopos nostros, per quos vestræ dominationi litteras direximus, in quibus inter cætera hæc continentur : « Ut sicut sacræ leges et regulæ præcipiunt, archiepiscopis et episcopis collimitaneorum dioceseon electionem concedere dignemini, ut undecunque, secundum formam regularem electionis, episcopi talem eligant, qui et sanctæ Ecclesiæ utilis, et regno proficiuus, et vobis fidelis ac devotus cooperator existat : et consentientibus clero et plebe eum vobis adducant, ut secundum ministerium vestrum res et facultates Ecclesiæ, quas ad defendendum et tuendum vobis Dominus commendavit, suæ dispositioni committatis, et cum consensu ac litteris vestris eum ad metropolitanum episcopum ac coepiscopos ipsius dioceseos, qui eum ordinare debent, transmittatis, et sic sine scandali macula ad sanctum sacerdotium provehatur. » Et reliqua quæ inde ibi sequuntur.

CAP. II. In quibus verbis nulla indebita cujuscunque voluntas, nihil contra Domini voluntatem, nihil contra vestrum honorem, nihil contra regni vobis commissi resonat salvamentum : sed ordinis plenitudo, qualiter electus vitæ merito et sapientiæ doctrina a metropolitanano et provinciæ coepiscopis debeat juxta Nicænum sanctum et magnum concilium regulariter ordinari, ubi inter alia scriptum est (*can. 6*) ; « Illud, inquit, generaliter clarum est quod si quis præter sententiam metropolitani fuerit factus episcopus, hunc magna synodus diffinivit episcopum esse non posse : firmitas autem eorum quæ geruntur per unamquamque provinciam metropolitanano tribuatur episcopo. » Et de hac mystica Nicæna synodo sedes apostolica contestatur (Leo,

ep. 56, ad Anatol.) : « Quia tanto divinitus privilegio est consecrata, ut sive per pauciores, sive per plures episcopos, ecclesiastica judicia celebrentur, omnino penitus auctoritate sit vacuum quidquid ab illius fuerit constitutione diversum. » Debetis igitur incunctanter advertere, sicut sanctus papa Leo ad Leonem Augustum scripsit (epist. 81), regiam potestatem vobis non ad solum mundi regimen, sed maxime ad Ecclesiae praesidium esse collatam, ut ausus nefarios comprimendo, et quae bene sunt statuta defendatis, et veram pacem hanc quae sunt turbata restitatis. Quod et optare et quaerere atque servare debetis, sicut antecessores vestri imperatores et reges fecerunt. Et non debetis inflexibilem Dei voluntatem, qui si mutat sententiam, non mutat consilium, ad humanam et fragilem voluntatem vestram velle inflectere, quod fieri non potest, sed vestram voluntatem Dei voluntati subdere, sicut Christus nobis et omnibus Christianis, ex humanitate sua loquens, sequendum dedit exemplum, dicens : *Non veni voluntatem meam facere, sed voluntatem ejus qui misit me Patris* (Joan. v, 30, et vi, 38); Et : *Fiat non sicut ego volo, sed sicut tu vis, Pater* (Matth. xxvi, 39). Si enim a divina voluntate humana voluntas vestra perseveranter, quod non permittat Dominus, discordaverit, respondenda sunt ministerio episcopali apostolorum verba : *Obedire oportet Deo magis quam hominibus* (Act. v, 29); et : *Si justum est in conspectu Dei vos potius audire quam Deum, judicate. Non enim possumus quae vidimus et audivimus non loqui* (Act. iv, 19).

CAP. III. Nam si quod a quibusdam dicitur, ut audiavi, quando petitam apud vos electionem conceditis, illum debeant episcopi et clerus ac plebs eligere, quem vos vultis, et quem jubetis (quae non est divinae legis electio, sed humanae potestatis extorsio), si ita est, ut dici a quibusdam audiavi, ille malignus spiritus, qui per serpentem primos parentes nostros in paradiso decepit et inde illos ejecit, per tales adulatorem in aures vestras haec sibilat; quia hoc in Scripturis tam Veteris quam Novi Testamenti non continetur, neque in catholicorum dictis, vel sacris canonibus, nec etiam in legibus a Christianis imperatoribus et regibus promulgatis hoc scriptum vel decretum invenitur, sed talia dicta infernus evomit. Christus enim per Apostolum loquens, talem jubet eligere : *Qui potens sit exhortari in doctrina sana, et eos qui contradicunt revincere* (Tit. i, 9). Et si quis contra hoc loquitur, iniquitatem contra Dominum loquitur, et inter blasphemos a sancto Spiritu computatur. Sic enim avus vester Carolus et abavus Ludovicus imperatores intellexerunt, et ideo in primo libro Capitulum suorum promulgaverunt scribentes (cap. 84, de episcopis eligendis) : « Sacrorum, inquit, canonum non ignari, ut in Dei nomine sancta Ecclesia suo liberius potiatur honore, assensum ordini ecclesiastico praebemus, ut scilicet episcopi per electionem cleri et populi, secundum statuta canonum, de propria diocesi, remota personarum

A et munerum acceptione, ob vitae meritum et sapientiae donum eligantur, ut exemplo et verbo sibi subiectis usquequaque prodesse valeant. » Notandum est sane quod dicitur : « Secundum statuta canonum eligantur, » ut exemplo et verbo sibi subiectis usquequaque prodesse valeant. Et sacri canones dicunt (Caelestinus, *Decret.* 18) : « Primum enim illi (quin clerici uniuscujusque Ecclesiae) reprobandi sunt, ut aliqui de alienis Ecclesiis merito praeferrantur. » Et item : « Ut episcopi judicio metropolitanorum et eorum episcoporum qui circumcirca sunt, provehantur ad ecclesiasticam potestatem : hi videlicet qui plurimo tempore probantur tam verbo fidei quam rectae conversationis exemplo. » Attendendum est igitur qualiter hoc imperiale capitulum sacris regulis et antiquorum imperatorum legibus congruat, ostendens quoniam, sicut et leges et regulae dicunt, in electione episcopi assensio regis sit, non electio, in episcoporum vero executione sit electio, sicut et ordinatio.

CAP. IV. Sunt qui dicunt, ut audiavi, quia res ecclesiasticae episcoporum in vestra sint potestate, ut cuiusque volueritis eas donetis. Quod si ita est, ille malignus spiritus, qui, ut superius praemisum est, primos parentes nostros perdidit, perditionem vestram in aures vestras susurrat. Sanctus namque Spiritus per eos qui cum Christo in caelo regnant, et in terris miraculis condescendunt dixit, et usque ad nos scriptis pervenire fecit dicens : « Res et facultates ecclesiasticae oblationes appellantur, quia Domino offeruntur, et vota sunt fidelium, ac pretia peccatorum, atque patrimonia pauperum : si quis illa rapuerit, reus est damnationis Ananiae et Saphirae, et oportet huiusmodi tradere Satanae, ut spiritus salvus sit in die Domini. » Quod praefati gloriosi imperatores Carolus et Ludovicus in primo libro Capitulum suorum ita inseruerunt dicentes (cap. 83) : « Quia juxta sanctorum Patrum traditionem, novimus res Ecclesiae vota esse fidelium, pretia peccatorum, et patrimonia pauperum, cuique non solum habita conservare, verum etiam multa, Deo opitulante, conferre optamus. Tamen ut ab ecclesiasticis de non dividendis rebus Ecclesiae suspicionem dudum conceptam penitus amoveremus, statuimus ut neque nostris, neque filiorum, et, Deo dispensante, successorum nostrorum temporibus, qui nostram vel progenitorum nostrorum voluntatem vel exemplum imitari voluerint, ullam penitus divisionem aut jaecturam patiantur. » Quod et vos servare oportet, si feliciter vultis regnare, qui minoris potestatis et aetatis atque sapientiae adhuc estis, quam et illi fuerunt, qui haec et servaverunt et servanda promulgaverunt.

CAP. V. Recordamini, quaeso, professionis vestrae, quam in die consecrationis vestrae promisistis, sicut ab illis qui interfuerunt accepimus, quamque manu propria subscripsistis, et super altare coram episcopis omnibus qui adfuerunt Domino obtulistis : et diligenter relegi eam facite coram vobis et fide-

libus vestris, quorum consilio et auxilio sanctam A
Ecclesiam et regnum vobis commissum gubernare debetis, et si aliquid per ignorantiam, vel aliorum suggestionem, ab ea exorbitastis, nolite negligere inde Domino satisfacere. Et quod in epistola mihi directa et in synodo relecta scripsistis, sicut vobis expedit attendite. Sic enim ibi est scriptum : « Jungamur si mul, ut ego rex, et vos sacerdos Dei, ministerium condigne tam in divinis quam in humanis adimplere valeamus officiiis. » Quatenus devotione et operatione ostendatis, quia Christus, a quo legitimus omnis episcopatus cepit exordium, et omnis principatus accepit provecum, auctor sit vestri regiminis, et protector fiat vestræ sublimitatis. Per quem vos obsecro episcopali ministerio, talia vestro tempore in sanctam Ecclesiam introducere non tentetis, qualia magni imperatores et antecessores vestri suis temporibus introducere non præsumpserunt. Et quoniam sine sancto Spiritu ministerium episcopale non agitur, non sit vobis leve in episcopis contristare Spiritum sanctum, cum Dominus terribiliter comminans dicat : *Qui scandalizaverit unum de pusillis istis, expedit ei ut suspendatur mola asinaria in collo ejus, et demergatur in profundum maris* (Matth. xviii, 6). Et Apostolus : *Nolite contristare Spiritum sanctum Dei* (Ephes. iv, 30). Et item idem Apostolus dicit : *Per fidem habitare Christum in cordibus nostris* (Ephes. iii, 17), qui jam sedens ad dexteram Patris de cælo Saulo intonuit dicens : *Saule, Saule, quid me persequeris?* (Act. ix, 4.) Demonstrans quoniam in membris suis Christus persequitur et scandalizatur, et in membris suis suscipitur, velut se dicturum electis in judicio pollicetur : *Quandiu uni de minoribus meis fecistis, mihi fecistis* (Matth. xxv, 40). Et sanctus Spiritus in eis in quibus habitat contristatur, sicut ex Apostoli verbis supra ostendimus. Et quia jam tempus transiit, ultra quod sacri canones Spiritu Dei conditi et totius mundi reverentia consecrati decernunt ut ordinationes episcoporum non differantur, sicut synodus apud martyrium sanctæ Macræ secundum leges et regulas diffinivit, electionem episcoporum, qui designati ad hoc negotium exsequendum una cum consensu vestro fuerunt in synodo, sicut in epistola vobis directa ab eadem synodo scriptum habetur, dominatio vestra consentiat, et non differatis accelerare, ut vobis suggestimus, quatenus ipsa ecclesia D
diu contra sancti Spiritus promulgationem non vacet pastore, et vos, quod absit, non mediocre incurrat periculum. Quia enim sacri canones (*conc. Anth.*, can. 16) perfectum dicunt esse concilium, ubi cum suis suffraganeis interfuerit metropolitanus antistes, multo magis ratum teneri debet quod metropolitani cum episcopis diversarum provinciarum secundum sacras leges et regulas decreverunt. Sexcenti namque triginta et eo amplius episcopi, quorum nomina scripta sunt in cælo, quorumque nomina habemus scripta in libris nostris, in Chalcedona civitate apud Martyrium sanctæ Euphemie in Christi nomine con-

gregati, constituerunt (*can. 25*) ut ultra tres menses ordinationes episcoporum non differantur, cum decreto judicio, ut qui ausi fuerint, post diffinitionem magnæ et universalis hujus synodi, quidquam ex his quæ sunt prohibita perpetrare, decrevit sancta synodus a proprio hujusmodi gradu recedere. Et Dominus in Evangelio dicit : *Ubi fuerint congregati duo aut tres in nomine meo, ibi sum in medio eorum*. Et : *Si duo ex vobis de omni re consenserint super terram, fiet*. Et : *Quæcunque alligaveritis super terram, erunt ligata et in cælis* (Matth. xviii, 18, 19, 20). Si ergo adesse dignabitur ubi duo vel tres fuerint, quanto magis ubi tanti ex sanctis Patribus congregati hæc irrefragabiliter decrevere servanda ?

CAP. VI. De eo quod in litteris vestris, quas pridie B
Nonas transacti mensis Maii, deferente clerico nomine Teutberto relegi, voluntarie vos subicere velle exiguitatis meæ consiliis, et secundum quod hortatus fuero, agere et disponere in ecclesiasticis et sæcularibus negotiis, et meæ fiduciæ vosmetipsos subicere velle, et secundum datum a me consilium regni vestri jura componere : vestræ dominationi rescribo, ut Domini voluntatem vestræ voluntati præponere in omnibus studeatis; cujus voluntatem per sanctas Scripturas, et per eos qui jam in cælo cum illo regnant, et in terris miraculis coruscant, et per sacras leges a Christianis imperatoribus et regibus promulgatas, sicut ipse dicit : *Per me reges regnant, et conditores legum juxta decernunt* (Prov. viii, 15), potestis cognoscere : sed et per scripta a nobis ex synodo apud martyrium sanctæ Macræ habita, et per consacerdotes nostros vobis directa, potestis agnoscere. Sed satis doleo, et multum timeo, quia, ut cum venia vestra dicam, quantum in hac causa de qua agitur paret, plus intenditis sequi propriam voluntatem quam divinam auctoritatem, et eorum qui se importune ingerunt cupiditatem quam sanctæ Ecclesiæ utilitatem; et eorum de quibus dicit Apostolus, *quoniam nesciunt quæ loquuntur, neque de quibus affirmant* (I Tim. i, 7), adulationis favorem quam vestram ipsam salutem. Quod scripsistis, vota omnium qui commorantur in Belvacensi Ecclesia, in Odaerum concordare, non est mirum si stulti et improbi ac cupiditate cæcati toties taliter agunt, non correcti de rejectione pravæ suæ electionis in Fromoldum, et reprobo Rodulfo, et a se electo Honorato sacro episcopali ordini adhuc fidei doctrina incongruo, perdidit electionem, sicut ostensum est illis in synodo, et per sacras regulas non ulterius illorum, sed episcoporum esse electionem, quam non præire sed subsequi, et non se ab ea debere excidere, et nunc contra regulas et leges sine visitatore præsumpserunt electionem. Unde referendum est eidem plebi illud propheticum : *Frons mulieris meretricis facta est tibi, nescis erubescere*. (Jer. iii, 3). Et Jacobus apostolus tam tales clericos quam plebeios redarguit dicens : *Adulteri, nescitis quia amicitia hujus mundi inimica est Deo?* (Jac. iv, 4). Adulteros enim recte nuncupat, quos

derelicto amore sapientiæ cœlestis, quæ dicit : *Leges A meas custodite (Levit. xviii et xx)*, ad amplexum potius amicitia mundialis esse deflexos increpat. Quapropter potius merentur excommunicatione corrigi, quam corrupti in voluntatibus suis audiri. Sed forte non est ita ut vobis est dictum. Dominationi autem vestræ ostendo quod scriptum est, Spiritu sancto dictante, in Decretis apostolicæ sedis : Quod si et omnes sacerdotes, et mundus erroris assentiat, damnatio consentientes involvit, non prævaricationis damnationem consensus absolvit. Non enim crimen minuitur, sed accrescit, cum generale fit ex privato. Hoc enim Deus indicavit, qui mundum peccantem generali diluvio interemit.

CAP. VII. Quod scripsistis, ut sicut semper regibus prædecessoribus vestris in omni utilitate regni proficuum B et devotus fui, ita vobis fidelis et devotus existam. Quod et hactenus observavi et observare cupio. Vos autem sanctæ Ecclesiæ, et ejus rectoribus, atque mihi servate quod illi conservaverunt ; et pro devotionis fidelitate, quam vobis cum cæteris fidelibus vestris in electione vestra, non sine magno labore, ad provectionem regiminis, quo jam nomine, det Dominus etiam virtute potiti estis, nolite retribuere mihi mala pro bonis, suadentes, non tamen auxiliante Domino, persuadentes, ut in senecta mea declinem a sacris regulis, quod nec pro cupiditate, nec pro amore vel timore hactenus feci, ut a gradu episcopali, quo per triginta et sex annos gratia Dei usque modo functus fui, merito decidam. Non enim excidit mihi a mente sententia Salvatoris, qua dicitur : *Quid enim proficit homo, si lucretur universum C mundum, se autem ipsum perdat, et animæ suæ detrimentum faciat ? aut quam dabit homo commutationem pro anima sua ? (Luc. ix, 15 ; Matth. xvi, 25.)* Et sacri canones Spiritu sancto decreti (*concil. Carth. II, can. 13*) : « Si quis, inquit, contra suam professionem vel subscriptionem venerit in aliquo, ipse se honore privabit. » Et si vobis consensero, ut contra divinas et humanas leges, et contra vestram et meam, coram pluribus in synodo episcopis cohibentibus, professionem faciatis, me perdam, et vos non salvabo, dicente Apostolo : *Non solum qui faciunt, sed qui consentiunt facientibus, digni sunt morte (Rom. i, 32)*. Et sicut in ecclesiasticis et in mundanis legibus scriptum habetur : Prava facientes atque consentientes par judiciorum pœna constringit : nec expers facinoris æstimatur, qui licet ipse non fecerit, facientes tamen in familiaritatem fœdusque receperit.

CAP. VIII. Quod scripsistis, ut per meam voluntatem et ministerium Belvacensis Ecclesiæ episcopatum dilecto filio meo et fideli vestro Odaero tribuere valeatis, si vestræ dominationi de illo est cura, hoc nullatenus faciatis, ne forte si feceritis, et ipse episcopium illud, et pastore vacantem Ecclesiam, contra sacras Ecclesiæ regulas invadere præsumperit, sacris legibus et regulis exigentibus, quod non opto, contingat ut ulterius, nec in vita mea, nec post

mortem corporis mei, in diœcesi Rhemensi in gradu ecclesiastico valeat ministrare.

CAP. IX. De eo quod scripsistis, quia si vestræ voluntati, ecclesiasticis videlicet regulis contrariæ, obsecutus fuero, eos quos mihi chariores et familiariores cognoveritis, honorare in omnibus curabitis, tantummodo ut in hac petitione vestra vobis consentiam, non meis, sed sacrorum canonum verbis respondeo, quia secundum eosdem sacros canones, pro indigentibus, et mihi conjunctis, et pro aliis, sicut præcipiunt, ad salutis vestræ augmentum et potestatis honorem, regiam potestatem vestram petitionibus adire curabo, quandiu Dominus me in corpore morari præceperit. Verum, sicut sanctus Innocentius papa dicit : Sollicitus vos pro salute libenter audio ; contra caput autem non libenter admitto. Et sanctus Gregorius exponens (*hom. 37, in Evang.*) sententiam Evangelii : *Si quis venit ad me, et non odit patrem suum, et matrem, et uxorem, et filios, et fratres, et sorores, adhuc autem et animam suam, non potest meus esse discipulus (Luc. xiv, 26)*, dicit : « Quoniam quisquis jam æterna concupiscit, in ea quam aggreditur causa Dei, extra patrem, extra matrem, extra uxorem, extra filios, extra cognatos, extra semetipsum fieri debet, ut eo verius cognoscat Deum, quo in ejus causa neminem recognoscit. » Unde in hoc episcopali ministerio carnalem propinquum, nec amicum videlicet animi familiarem, carnali affectu recognosco, sed sententiam Domini attendo, qui dicit : *Qui non intrat per ostium in ovile ovium, sed ascendit aliunde, hic fur est et latro (Joan. x, 1)*. Et ideo neminem eligo, neminem recognosco, neminem recipio, nisi qui vita et moribus, et scientiæ catholicæ doctrina, per claves Ecclesiæ ad hoc episcopale ministerium accedit, et sciat et faciat quod sacrum ministerium postulat. Et quoniam *non est Deus personarum acceptor, sed in omni gente, qui timet eum et operatur justitiam, acceptus est illi (Act. x, 34)*, in hac causa nullius personam accipio, sicut sanctus propheta virum justum describens dicit : *Qui excutit manus suas ab omni munere (Isa. xxxiii, 15)*. Neque enim dixit tantum a munere, sed addidit *ab omni*, id est a munere manus, a munere linguæ, a munere obsequii, sicut jam vobis scripsi, si mente voluissetis recondere.

D CAP. X. Vestram denique charam mihi dominationem solerter atque attente ante mentis oculos oportet habere, quod, sicut jam vobis scripsi, qui contra sacros canones ordinantur, et ordinatores et ordinati hæretici sunt, sicut sanctus Gregorius et cæteri catholici Ecclesiæ sanctæ doctores atque rectores multoties in libris suis ostendunt. Quam hæresim sanctus Petrus primum in Simonem Magum æterno anathemate condemnavit (*Act. viii*). Sed et hujusmodi non ordinationis, sed exordinationis mediatores, prefatum magnum et sanctum Chalcedonense concilium (*can. 2*), si clerici sunt, proprio gradu privari, si vero laici aut monachi fuerint, sine ulla exceptione

aut respectu alicujus personæ, anathematizari præcipit. Propterea hortor dominationem vestram ut a tali mediatione vel interventione vos caveatis. Ne vero pro alicujus temporali placiditate æternum periculum incurratis, sed et dilectus filius meus, fidelis vester, pro quo satagitis, non obliviscatur quod jam in epistola vobis directa, capellani vestris me inter alia scripsisse recorder, canonicam decretam sententiam, qua dicitur: Sicut is qui invitatus renuit, quæsitus refugit, sacris est altaribus admovendus, sic qui ultro ambit, vel qui importune se ingerit, est procul dubio repellendus. Quæ itaque præmissa sunt, non mea, neque a me excogitata sunt verba, sed a Christo, et per apostolos, ac ejus sanctos, Spiritu sancto prolata. Propterea illi qui audire ea non sufferunt, vel obaudire contemnunt, timeant Dominum dicentem, quæ nuper quinto decimo die ante sanctum Pascha legi omnes in ecclesia audivimus: *Qui est ex Deo verba Dei audit: propterea vos non auditis, quia ex Deo non estis* (Joan. VIII, 47). Unde sanctus Gregorius (*hom. 18, in Evang.*: Si enim ipse verba Dei audit qui ex Deo est, et audire verba ejus non potest quisquis ex illo non est, interroget se unusquisque si verba Dei in aure cordis percipit, et intelligit unde sit. Et sanctus Paulus apostolus, per quem ipse locutus est Christus: *Nolite communicare operibus infructuosis tenebrarum: magis autem et redarguite* (Ephes. v, 14). Et item idem Apostolus. *Si quis non obaudit verbo nostro per epistolam, hunc notate, et non commisceamini cum illo, ut confundatur* (11 Thess. III, 14.) Unde sacri canones excommunicatis communicantes excommunicatos esse decreverunt. Hæc de cælo Christus, et sancti ejus apostoli, atque sancti ipsius cum eo jam in cælo regnantes intonant: et nos, licet peccatores in terra episcopi, et Christi vicarii, atque apostolorum successores in terra, ejus virtute et ministerio divino prosequimur, imitari desiderantes quod de sancto viro cantamus, quia pro lege Dei sui certavit usque ad mortem: fundatus enim erat supra firmam petram. *Petra, inquit Apostolus, erat Christus* (1 Cor. x, 4). Conveniant ergo in pace Christi, sicut statutum secundum sacros canones fuit, in synodo episcopi et clerus ac plebs Belvacensis Ecclesiæ cum libero consensu vestro, sicut regium ministerium decet, et juxta legalem ac regularem formam electio exsequatur et ordinatio prosequatur.

EPISTOLA XX.

AD EUMDEM LUDOVICUM III REGEM.

De Odacro invasore Ecclesiæ Belvacensis.

(Apud eundem.)

Domino LUDOVICO regi glorioso HINC MARUS episcopus ac plebis Dei famulus.

Ex litteris sigillo vestro subter signatis, quas mihi Warinus clericus Idbus præsentis Junii mensis ex vestrâ parte donavit, non statui ad singula vobis rescribere, quoniam de præcedentibus mandatis et litteris vestris jam sufficienter vobis rescripsi. Ve-

rumtamen quia et ex his a me vobis rescribi rogastis, quæ ita inter se dissentiunt, ut a principiis media, et a mediis ultima dissonent, sicut de quodam monstro antiquus poeta dicit:

Prima leo, postrema draco, media ipsa chimæra,

fatigatus missis et litteris vestris, pro Belvacensi Ecclesia rescribere vobis ad quædam loca, Domino adjuvante, curabo, secundum proverbium, quod in antiquorum libris juvenis legeram: *Bos lassus fortius figit pedem.*

1. De eo quod in prioribus mihi datis litteris ad locum scriptum habetur: « Petitionem filii dilecti justam nullo modo oportet respuere patrem, » hoc exiguitas mea, sed et Dominus approbat dicens discipulis suis: *Si quid petieritis Patrem in nomine meo, dabit vobis* (Joan. xvi, 23), Nomen enim Domini Jesus, id est *salvator* interpretatur, et illa petitio justa est, quæ ad veram salutem pertinet. Quam petitionem quoniam Dominus non respuit, nec quilibet Christianus debet respuere. Si autem contra veram salutem quilibet petierint, audient a Jacobo apostolo: *Petitistis et non accipitis, eo quod male petistis* (Jac. iv, 3).

II. De eo quod ibidem subsequitur: « Nostræ petitioni ac voluntati clementer faveatis, et desiderium nostrum ad præsens adimpleatis, » rescribo ut velitis et desideretis quod Dominus vult, cui Psalmista dicit: *Domine, ante te omne desiderium meum* (Psal. xxxvii, 10); securus voluntati vestræ favebo, et quantum potero vestrum desiderium adimplere curabo. Vos autem attendite quod omni homini qui Domino placere vult, dicit Scriptura: *Post concupiscentias tuas, scilicet improbables, non eas, et a tua voluntate carnali videlicet, avertere* (Eccli. xviii, 30); et: *Sunt viæ quæ videntur hominibus rectæ, quarum finis usque ad profundum inferni demergit* (Prov. xvi, 25).

III. De eo quod ibidem subsequitur ex Odacro, in præcedentibus litteris satis vobis respondi.

IV. De eo quod mox subsequitur, « Quia meus missus Altramnus monachus vobis retulit ex mea parte, nihil aliud me velle ex hoc agere, nisi illud quod vos et Hugo abbas et Theodoricus comes cæterique vestri fideles decernerent, » scio istud mandatum ex me non processisse, nec ipse frater mihi talia se dixisse professus est. Remitto autem illum ad vos, ut coram fidelibus vestris, aut prefeatur se ita dixisse, aut veraciter denegat talia vobis ex mea parte non ambasciasse. Unde puto ut sicut in nomine interpretum est, ita sit et in ambasciato. Nam iste frater noster a vobis ad me rediens ambasciavit mihi ex vestra parte, ut pedem meum basiaret et peteret ut ad opus Odacri honorarem vos de episcopio Belvacensis Ecclesiæ. Cui respondi, quoniam sicut melius et honorabilius atque salubrius scivi, vos inde honorare curavi, hortans ut sicut professi estis in die consecrationis vestræ in regimine regni

more prædecessorum vestrorum honoretis Deum, A contra illorum consuetudinem), nihil amplius facie-
 consentiendo ei, conservando sanctæ Ecclesiæ ac ip-
 sius rectoribus leges ejus qui dixit : *Honorificantes*
me honorificabo (I Reg. II, 30), velut in litteris
 scriptum habetur quas per eum vobis direxi. Dixit
 etiam mihi quid de voluntate Hugonis abbatis ex
 hoc dixeritis, et quam moderate ad interrogatio-
 nem exinde vestram Theodoricus Comes respon-
 derit.

V. In eo quod in primordiis litterarum, quas
 post præmissas prædictus clericus mihi dedit, scri-
 ptum habetur : « Si vobis in ordinatione Odacri non
 consenserō, pro certo scietis non me velle vestrum
 benigne tractare honorem, nec decus debitum et
 privilegia prædecessorum vestrorum vobis consen-
 tire velle, sed in omnibus vestræ reniti voluntati, » B
 scriptor vester et sensu et litteratura mentitus est.

VII. De honore prædecessorum vestrorum impe-
 ratorum et regum, et qualiter privilegia sanctæ Ec-
 clesiæ ac rectorum et ministrorum ipsius decreve-
 runt et conservaverunt, in aliis litteris sufficienter
 vobis scribere studui : quæ si vobis non profuerint,
 nec plura proderunt.

VII. De eo quod ibidem subsequitur, « Qualiter
 contra similem vestrum honorem vestrum evindica-
 retis pro viribus, quanto magis oportet eum contem-
 nere, me videlicet, qui vestræ ditioni commissus ve-
 strum abjicere satago ne pollens prævaleat hono-
 rem, » qui vobis hoc scribere mihi qualicumque
 ministro Christi persuasit, non bene Dominum, ne-
 que Scripturas ejus cognovit. Sicut enim jam vobis
 ex Scripturis divinitus inspiratis innotuit, quo sunt
 quibus principaliter mundus hic regitur, auctoritas
 sacra pontificum, et regalis potestas : in quibus
 tanto gravius pondus est sacerdotum, quanto etiam
 pro ipsis regibus hominum in divino reddituri sunt
 examine rationem ; et pontifices reges consecrare non
 possunt ; et pontificibus dixit Deus : *Qui vos audit,*
me audit, et qui vos spernit, id est contemnit et desp-
picit, me contemnit (Luc. x, 16) ; et : *Qui contemnunt*
me, erunt ignobiles (I Reg. II, 30). Non ergo debue-
 ratis ita inverecunde qualicumque pontifici scribere,
 vestræ ditioni commissum, quia sicut dixit Dominus
 apostolis suis, quorum minimus sum merito, suc-
 cessor autem officio : *Non vos me elegistis, sed ego*
elegi vos (Joan. xv, 19), ita et ego juxta modulum
 meum humili corde ac voce dicere possum : Non vos
 me elegistis in prælatione Ecclesiæ, sed ego cum
 collegis meis et cæteris Dei ac progenitorum vestro-
 rum fidelibus, vos elegi ad regimem regni, sub con-
 ditione debitas leges servandi.

VIII. De eo quod ibidem subsequitur, « Ex hoc
 facto, id est quia Odacro Ecclesiam Belvacensem
 pastore vacantem commisistis (facientes contra re-
 gulas ecclesiasticas, contraque antiquorum et Chri-
 stianorum regum leges, contraque prædecessorum
 ac progenitorum vestrorum promulgationes, sed et
 IX. Quod mandastis, quia nihil aliud ex illo illi-
 cito facto facietis nisi quod factum habetis, si vos
 non facietis, faciet Dominus quando illi placuerit.
 Non vixit tot annos Ludovicus imperator quot pater
 suus Carolus ; non vixit tot annos Carolus avus
 vester quot annos pater suus vixit ; non vixit pater
 vester tot annos quot pater suus : et quando statis
 in illo statu ubi avus vester et pater vester steterunt
 apud Compendium, inclinate oculos ubi jacet pater
 vester, et si nescitis, interrogate ubi mortuus fuit
 et ubi jacet avus vester, et non exaltetur cor vestrum
 ante eum qui mortuus fuit pro vobis et pro nobis
 omnibus, et resurrexit a mortuis et jam non mori-
 tur : et certi estote quia moriemini nescitis qua die
 vel qua hora ; et ideo necesse est et vobis et nobis
 omniibus secundum advocationem Domini paratos
 esse, quia nescimus qua hora veniet nobis finis : et
 ideo non exaltetur cor vestrum contra eum, in cujus
 manu vita diesque nostri consistunt. Vos cito defi-
 cietis, et sancta Ecclesia cum suis rectoribus sub
 Christo rectore secundum promissionem ejus per-
 manebit sicut luna perfecta in æternum (Psal.
 LXXXVIII, 38).

X. De eo quod ibidem subsequitur : Insuper aliud
 exinde si necessitas fuerit quod rectum est facie-
 mus, » ut intelligo, ad timorem mihi incutiendum,
 quatenus jussioni vestræ licet invitus obediam, scri-
 bere voluistis. Unde respondeo : *Dominus mihi, ad-*
jutor, non timebo quid faciat mihi homo (Psal. cxvii
6). Et : *Dominus illuminatio mea, et salus mea, quem*
timebo? Dominus protector vitæ meæ, a quo trepidabo?
(Psal. xxvi, 1). Et alia Scriptura dicit : *Sortes mit-*
tuntur in sinum, sed a Domino temperantur (Prov.
xvi, 33) ; et ipse Dominus ad præsidem ante quem
 stetit : *Non haberes, inquit, in me potestatem nisi*
tibi datum fuisset desuper (Joan. xix, 11) ; et summus
 quondam archangelus nec unam oviulam Job servi
 Dei rapere potuit, nisi Domino permitte. Sed
 utinam aut per vos, aut per quemcumque sibi placue-
 rit, educat me Dominus de isto carcere, videlicet
 infirmo et senili corpore, ad eum quem sua gratia

largiente ex toto corde desidero videndum, non meis meritis, quæ nulla nisi mala sunt, sed sua indebita misericordia et gratuita gratia. Sed et de eo quod dixistie, « Quia insuper et aliud si necesse fuerit quod rectum est facietis, » amplector quod promittitis, quod rectum est erga me facietis. Igitur rectum est, ut Scriptura ostendit, ut *per quæ quis peccat, per hæc et torqueatur* (Sap. xi, 17). Nam quia contra plurimorum voluntates, et minas, atque suggestiones, in electione vestra consensi, opto et gaudeo, ut si inde peccavi, Domino permittente, hic per vos et non in futuro per Dominum talionem recipiam, sicut legimus de sancto Paschasio, qui per ignorantiam errans in cujusdam electione consensit.

XI. Et quoniam tantopere satagitis de ordinatione Odacri, mandate mihi tempus constitutum, quando episcopi Rhemorum dioceseos, sed et venerabiles episcopi ac dilecti fratres nostri, qui a synodo apud martyrium sanctæ Macræ habita ad vos cum litteris directi fuerunt, valeant convenire ad eundem locum, et faciam me, vita et possibilitate comite, illuc obvium eis portari, et veniat vester Odacrus cum electoribus suis sive palatinis, sive Ecclesiæ Belvacensis, et si vobis placet, etiam illuc venite, aut missi vestri, et Domino dicente: *Qui non intrat per ostium in ovile ovium, sed ascendit aliunde, hic fur est et latro* (Joan. x, 1); et: *Qui intrat per ostium in ovile ovium, huic ostiarius aperit* (ibid., 3). *Ego, inquit, sum ostium; per me si quis introierit, salvabitur* (ibid., 9). Et videte, aut per missos vestros audite, si vestro Odacro ostiarius aperiet ostium ovis sui, et intret securus, ut audiant oves vocem ejus, et non sit mercenarius, sed pastor, et Ecclesiæ Belvacensis sub mercenario non gemat. Et notum sit nobis, sed et ipse Odacrus pro certo sciat, quia si ad nos non venerit, et in obstinatione suæ prævaricationis manere delegerit, dicente Apostolo, *Quia verbum Domini non est alligatum* (II Tim. ii, 9) in sermone Domini, qui est *vivus et efficax, et penetrabilior omni gladio ancipiti* (Hebr. iv, 12), nos ad eum ibimus, ubicunque fuerit in Rhemensi provincia, et quod sacri canones de contemptore suo et Ecclesiæ contra leges et regulas invasore judicant, in illum quod ad nos pertinet exsequi procurabimus, ut nunquam vel nusquam in Rhemensi provincia in ecclesiastico gradu ministret, et omnes de cætero in hoc illi communicantes, secundum sacros canones Spiritu Domini conditos, et Christi sanguine confirmatos, excommunicati usque ad Ecclesiæ satisfactionem erunt. Sed et qui contra auctoritatem ac rationem, contraque ipsam suam salutem, in hac causa vos stimulat, sicut dicit Apostolus, *portabit judicium quicumque est ille* (Gal. v, 10). Paulus apostolus necessitate compulsus, scripsit Corinthiis: *Factus sum insipiens, vos me coegistis* (II Cor. xii, 11); et ex quanto dolore vobis compellentibus hæc scripsi, ille videt cui gemitus meus non est absconditus. Et scitote certissime quia, Domino adjuvante,

* Hanc epistolam scripsit Hincmarus Roster.

A nec quibuscunque vel quorumcunque terroribus vel blanditiis, ex hac causa unde agitur, a sacris legibus et regulis deviato.

EPISTOLA XXI

CONCILII TUSIACENSIS AD RERUM ECCLESIASTICARUM PERVERSORES ET AD PAUPERUM PRÆDADORES ^a.

Unde et quando ac qualiter acciderit ut res ecclesiasticæ Domino sint consecratæ et quantum sit periculum pauperes deprædori.

(Apud Labb., Conc. tom. VIII.)

Anno Incarnationis Dominicæ 860, indictione ix, xi Kalendas Novembres, sancta synodus congregata in villa Tasiaco Tullensis præciæ, episcoporum xiv provinciarum, Lugdunensium videlicet, Rothomagensium, Turonensium, Senonum, Viennensium, Arelatensium, Vesontionum, Mogontinensium, Agrippinensium, Trevirorum, Rhemorum, Biturigensium, Burdigalensium, Narbonensium, omnibus Dei fidelibus et sanctæ Ecclesiæ filiis, ad quos hæc divinæ constitutionis notitia potuerit pervenire, pacem et salutem optat in Domino.

Deus omnipotens, summus et verus, unus ac solus, Pater scilicet, et Filius, qui est consubstantialia Verbum ejus, et utriusque Spiritus sanctus, utriusque coæternus ac coequalis, Trinitas inconfusa atque inseparabilis, qui solus habet immortalitatem, et lucem habitat inaccessibilem, quem nemo hominum vidit, nec videre potest, nec locorum vel finito vel infinito spatio continetur, nec temporum vel finito vel infinito volumine variatur: neque enim est in ejus substantia, qua Deus est quod brevius sit in parte quam toto; qui sine initio est et permanet sine fine, incommutabili æternitate vivens; creavit omnia simul, ex quibus currerent tempora, et implerentur loca, temporalibusque et localibus rerum motibus sæcula volverentur. In quibus rebus quædam spiritalia, quædam corporalia, visibilia siquidem et invisibilia condidit: formans materiem, quam nec alius, nec nullus, sed omnino ipse informem ac formabilem instituit, ut formationem suam non tempore, sed origine præveniret; testante Scriptura: *Qui vivit in æternum, creavit omnia simul* (Eccli. xviii). *Et: In principio, fecit Deus cælum et terram* (Gen. i); et omnia opera sua bona valde, quæ in cælo sunt et quæ in terra. Duas quoque harum creaturarum suarum rationales creaturas, scilicet angelicam et humanam, imaginis et similitudinis suæ dote ditatas cum libero arbitrio condidit; ut sicut ipse non necessitate, sed natura est bonus et voluntarie, et ita ipsæ rationales creaturæ non constrictæ necessitate, sed bonæ essent, ut natura, ita et voluntarie. Quia si tales essent ut liberæ voluntatis arbitrio malum vitare et bonum non possent agere, lapidibus et cæteris rebus insensibilibus atque irrationalibus potius quam Deo similes essent, et merito illius retributione carerent, nec esset unde pro

qualitate voluntatis et actionis remunerarentur a Deo. Qui ideo bonus est quia vult, non quia cogitur; quique bonum velle non ex accidenti, sed ut et bonus et omnipotens esset essentialiter habet. Cui, secundum quorundam opinionem, sententiæ non repugnat quod dicit Apostolus: *Seipsum negare non potest (I Tim. II)*. Porro nec peccare, nec mori potest. Et tamen non falso angelus et homo, qui potuere peccare, imaginis et similitudinis ejus dignitate donati leguntur. Quia aliud est similitudo et aliud signaculum similitudinis, et aliud imaginem esse et aliud ad imaginem factum esse. Solus quippe consubstantialis Filius essentialiter imago invisibilis et splendor et figura est substantiæ Dei Patris. Sic ad Omnipotentis hæc vel magis omnipotentiam pertinet, quia aliud non potest quam bonum velle, et aliud quam bonus et omnipotens esse, et seipsum negare, peccare quoque, vel mori, mutari, falli, miser fieri, seu vinci non potest. Hæc atque hujusmodi absit ut possit Omnipotens. Sed quia non vult, non potest, quia et velle non potest. Non enim potest justitia velle facere quod injustum est, aut sapientia velle quod stultum est, aut veritas velle quod falsum est. Ac per hoc non solum ostendit veritas Omnipotentem non esse quod ista non possit, sed etiam cogit veritas omnipotentem non esse qui hæc possit. Volens enim est Deus quicquid est: æternus ergo, et incommutabilis, et verax, et beatus, et insuperabilis volens est. Si ergo potest esse quod non vult, omnipotens non est: est autem omnipotens, ergo quicquid vult potest: et ideo quod non vult esse non potest, qui propterea dicitur Omnipotens, quoniam quicquid vult potest. De quo et psalmus dicit: *In cælo et in terra omnia quæcunque voluit fecit (Psal cxxxiv)*. Nihil enim in cælo vel in terra fit, nisi quod ipse aut propitius facit, aut fieri juste permittit. Qui vult omnes homines salvos fieri, et neminem vult perire. Sed justus Dominus justitiam diligens, et iniquitatem non volens, eis quos ad imaginem et similitudinem suam fecit, nec post primi hominis casum vult tollere violenter suæ voluntatis arbitrium liberum; quibus reddere paratus est meritum, ut Scriptura demonstrat: *Quis est, inquit, homo qui vult vitam? (Psal xxxii.)* Et ac si respondenti: Ego, Dominus dicit: *Direrte a malo, et fac bonum. (ibid.)* Et e regione volens salvari dicit: *Voluntarie sacrificabo tibi (Psal liii)*. Et: *Ex voluntate mea confitebor illi (Psal xxvii)*. De quo scriptum est: *Quia non privabit bonis eos qui ambulant in innocentia (Psal lxxxiii)*. Ut autem ambulantes ambulent et perseverent in innocentia, sanat et adjuvat eorum arbitrium gratia, attestante Apostolo: *Gratia Dei in me vacua non fuit, sed abundantius illis omnibus laboravi: non autem ego, sed gratia Dei mecum (I Cor. xv)*.

Quibus et aliis Scripturæ sententiis, quoniam post casum primi hominis inest homini ad bene volendum, et ad bonum incipiendum, et perficiendum atque in

A bono perseverandum, liberum arbitrium, gratia liberatum, et gratia de corrupto sanatum, gratia præventum, adjutum et coronandum. A bono autem deficiens, et in malo proficiens homo, post casum primi hominis habet arbitrium liberum, scilicet justitiæ liberum, peccati servum: quo qui se elongant a Deo volente congregare filios volentis Jerusalem, peribunt. Unde quia gratia Dei est, salvatur mundus; et quia inest liberum arbitrium homini, judicabitur mundus. Ex his namque rationalibus creaturis, angelica videlicet et humana, angelos ad se cognoscendum atque perpetuo collaudandum in cælesti gloria collocavit. Unde pars quædam angelorum ex superbia debriata per liberum arbitrium cecidit, qui appellantur diaboli; et tales suo vitio sunt effecti, ut jam non velint nec possint meriti esse boni. Sicut et illi qui per liberum arbitrium in voluntate Conditoris permanserunt, ipsius gratia et retributione justitiæ acceperunt in munere quod Creator, cujus signaculum similitudinis sunt, habet essentia ut non velint nec valeant esse mali. Hominem vero opifex Deus corpore de limo terræ formavit, cui animam de incomprehensibili nobis suæ virtutis opere, in moribus et integritate ad imaginem et similitudinem suam conditam, in qua, interiore videlicet homine, per fidem in nobis habitat, insufflavit. In quo et si exterior homo noster corrumpitur, renovamur induentes novum hominem, qui secundum Deum creatus est in justitia, et sanctitate, et veritate. Et factum eundem primum hominem in animam viventem, id est factam animam rationalem, factam carnem vivificantem, atque in duabus et ex duabus, scilicet spiritu ac luti, substantiis in unitate personæ subsistentem, in paradiso deliciarum, quem plantaverat ab initio, posuit, ut operaretur eum, vel in eo, sicut et quæ ei præcepit, et custodiret ne illa admitteret quæ et sicut illi prohibuit. Cui ex latere fabricavit mulierem, dum in somno corporis obdormivit, unde et dixit: *Erunt duo in carne una (Gen. ii)*; itaque jam non sunt duo, sed una caro, secundum præscientiam suam, qua novit omnia etiam antequam fiant, vero demonstrans indicio quoniam sine transfusione seminis viri ex femina ipse venturus esse in carnem, ad redimendum hominem, qui in carne condidit hominem. Et qui eum fabricavit ex pulvere, quo sine seminis transfusione hominem fecit ex homine, homines quoque fabricetur ex semine. Quique corporis morte in cruce pro omnibus mortis debitoribus, solus inter mortuos liber a mortis debito dormiens, prædestinatus Filius Dei in virtute secundum Spiritum sanctificationis, et prædestinatorum omnium caput, ac lumen, atque exemplum factus ex muliere, legisque lator qui legi nihil deberet, factus sub obedientia legis, ut eos qui sub lege peccati et mortis futuri erant, redimeret, ut adoptionem filiorum, quam in Adam perdituri eramus, reciperemus: de his qui in eum credere voluerint, sive adventum ejus in carne præcesserint, sive etiam forent sicuti (nam per gra-

tiam, inquit, Domini Jesu salvari credimus, quem admodum et illi (Act. xv), ædificaturus erat Ecclesiam aperto lancea latere, de quo produxit aquam et sanguinem, quibus nunc lavacro rigatur et poculo. id est mundatur aqua baptismatis, et per fidem illi incorporatur potato sanguine redemptionis, justificata spiritu sanctificationis. Hoc sacramentum magnum est in Christo et in Ecclesia (Ephes. v) : quæ eodem Spiritu sancto ab immaculato divini fontis utero suos regenerat natos, quo et de illibata virgine Christus est natus. Idem namque primus homo, quia et Eva ipsa est Adam, conditus ut dominaretur creaturæ a Creatore factæ, et diserneret orbem terrarum in justitia et æquitate, et in directione cordis judicium judicaret, si in accepta lege vitæ et disciplinæ libero arbitrio permansisset; videlicet si in Conditoris voluntate perseverasset ut non peccaret; nec ipse moreretur, nec mortales, neque mortis ac gehennæ filios generaret. Sed merito hujus permansionis, et retributione justitiæ, sicut et sancti angeli acceperunt, accepisset in munere quod Creator, ad cujus imaginem et similitudinem conditus est, habet essentia, ut nec peccare velle nec jam cadere posset. Ipsi autem diabolo invidenti quia illuc erat homo terrenus per debitam obedientiam ascensurus, unde ipse cecidit per superbiam angelicus spiritus, et mendacia suadenti plus credens quam voluntati conditoris sui obediens, abusus arbitrio libero deseruit Deum, et desertus juste a Deo, peccavit ac cecidit; et per malum velle perdidit bonum posse, qui per posse bonum vincere potuit velle malum. Qua de re facta est massa perditionis totius humani generis. De qua si nullus adsalutem eriperetur, irreprehensibilis esset Dei justitia; quia vero multi salvantur, ineffabilis est Dei gratia, quia ab ipso mundi primordio, incipiens ab Abel justo, salutis humanæ præcones mundo in sua infirmitate languenti, et in peccatorum suorum tenebris tabescenti, donec ipse lux mundi adveniret, per patriarchas et legis doctores, atque prophetas ac justos, verbis et prodigiis prædicans, consolando præmisit. Tandem ipse, qui semper unum et ubique est cum Patre et Spiritu sancto essentia majestatis propter nos homines et propter nostram salutem, opere conceptus ejusdem Spiritus sancti, natus ex Maria virgine, id est ex virginea maternæ carnis substantia, in duabus et ex duabus naturis atque substantiis, divinitatis scilicet et humanitatis, verus per omnia Deus, et verus homo anima rationali et humana carne in unitate personæ subsistens, ad nos per præsentiam assumptæ veniens carnis, factis et dictis et aliud in se credentes sæculum invitavit, id est ad gloriam sempiternam, quam angeli sancti habent in cælo, et ad quam obtinendam conditus fuerat primus homo. Et quoniam ad illam pervenire non possumus, nisi sicut nos docuit de quo scriptum est: *Quia sic oportuit pati Christum, et intrare in gloriam suam (Luc. xxiv)*, dux et doctor hujus itineris, scilicet per labores ac dolores, quos in primo

A parente meruimus, promerentes regnum Dei, quia non sunt condignæ passionēs hujus temporis ad futuram gloriam quæ revelabitur in nobis (Rom. viii); et in istius agonis scammate certantes, sine viatico non valemus subsistere.

B Primitiva Ecclesia, id est fideles in exordio nascentis Ecclesiæ vendebant omnia quæ possidebant, et deferrebant possessionum suarum pretium ad pedes apostolorum, docentes non debere a rationali homine serviri, sed dominari divitiis, et uti eis in transitum, non eas amare pro æterna perventione. De quo pretio dividebatur singulis, prout cuique opus erat. Cum autem gratia Dei cœpit multiplicari credentium numerus, ad quorum sustentationem non sufficiebat pretii reditus, quoniam omnes ad hoc non dabant, neque valebant compelli, ut a conjugio et in totum a mundanis vacarent actibus, ne sæculum deperiret, donec omnes qui salvandi sunt, id est omnes prædestinati, veluti scriptum est filii Dei, qui erant dispersi, id est in massæ generaliter perditæ ex debito relicione conspersi, et ex ea, antequam mundus fieret, prædestinatione Dei, cui nihil præteritum transiit acciditque futurum, electi, scilicet gratia Dei congregentur in unum, in plenitudinem videlicet cœlestis ac sempiternæ Ecclesiæ, ad quam tanti ex hominibus salvatis et eidem sociandis sunt ascensuri unde diabolus cum suis sequaciis cecidit, quanti illic electi angeli remanserunt: ut unum ovile unius pastoris scilicet, et individua Trinitatis perpetua visione et perfecta cognitione, quæ est non solum hominum, sed et angelorum vita sine fine gaudeat, societate gloriosa repletum: constituit idem Dominus et magister salutis per sanctos suos, in quibus et cum quibus loquebatur, et per quos suam gubernabat, et usque hodie meritis et precibus gubernat Ecclesiam, ut credentes non jam ex asse possessiones et prædia venundarent, sed de ipsis possessionibus Domino consecrarent. Unde qui quasi specialiter eidem dominorum Domino adhærent, et ministri sermonis, et donorum æternæ salutis, atque mediatores inter Deum et homines ope fiunt assiduæ intercessionis, vivant; et in omnibus necessariis, sine quibus humana fragilitas non potest subsistere, eis in eleemosynas eorum, qui easdem possessiones Domino consecraverunt, ministretur: ut dum Christi pauperes atque ministri Ecclesiæ ex his in præsentia subsistunt sæculo, largitores possessionum de sua fideli eleemosyna, sicut et in baptisate, a malo funditus conversi et cum fide recta perseverantes in bonis operibus, mundentur a peccato et effician-
 tur Christo, cui eas devoverant, consortes in cælo, sicut ipse dicit in Evangelio: *Date eleemosynam, et ecce omnia munda sunt vobis (Luc. xi)*; et item: *Quod uni ex minimis meis fecistis, mihi fecistis. Venite, benedicti Patris mei, percipite regnum quod vobis paratum est ab origine mundi (Matth. xxv)*. Quapropter sicut illi qui seipsos ac divitias et possessiones suas Domino fideli mente consecraverunt, hæredes Dei et cohæredes Christi per prophetas et

apostolos, et ab ipso Domino appellantur et fiunt ita et tales possessiones atque facultates, Domino in suis ecclesiis et in specialibus servorum ipsius usibus consecratae, propter fideles Christi, quibus et exinde aluntur, Dei hæreditas, cum orbis terrarum et plenitudo ejus ipsius sit, quasi specialiter appellantur. Sicut enim, quando omnis domus Israel Domini hæreditas vocabatur, tribus tamen Levi, quasi decimatio adhuc etiam in lumbis Abrahæ a Deo electa, cum decimis et primitiis, urbibus et suburbiis, villabus atque possessionibus et facultatibus cunctis, specialis Domini hæreditas, pars, vel assumptio dicebatur : ita et isti, qui clerici, id est sors vel pars Domini appellantur, cum omnibus ecclesiis, id est divinis ovilibus ad se pertinentibus, specialis Christi hæreditas dicitur et existit, cum omnes credentes ac credituri, tam ex circumcissione quam qui ex præputio, Christi hæreditas appellentur, dicente Propheta : *Deus, venerunt gentes in hæreditatem tuam (Psal. LXXVIII)*; et : *Postula a me, et dabo tibi gentes hæreditatem tuam, ei possessionem tuam terminos terræ (Psal. II)*. De quibus quicumque indebite quodam abutitur, sine ulla dubitatione illa maledictione multatur, et ipsa tenetur obnoxius, quam et cælestis et omnis terrena continue Domino decantat Ecclesia : *Qui dixerunt, iniquis, hæreditate possideamus sanctuarium Dei. Deus meus, pone illos ut rotam, et sicut stipulam ante faciem venti. Sicut ignis qui comburit silvam, et sicut flamma comburens montes, ita persequeris illos in tempestate tua, et in ira tua turbabis eos. Imple facies eorum ignominia, ut quærant nomen tuum, Domine. Erubescant et conturbentur in sæculum sæculi, et confundantur et pereant et cognoscant quia nomen tibi Dominus, tu solus altissimus in omni terra (Psal. LXXXII)*. Sanctus quoque Anacletus papa, ab ipso beato Petro apostolo presbyter ordinatus, postea in sede Romana successor illius factus episcopus, cum totius mundi sacerdotibus judicavit : « Qui abstulerit, inquit, aliquid patri vel matri, homicidæ particeps est. Pater noster sine dubio Deus est, qui nos creavit ; mater vero nostra Ecclesia, quæ in baptismo spiritaliter regeneravit. Ergo qui Christi pecunias et Ecclesiæ rapit, aufert vel fraudatur, homicida est, atque ut homicida ante conspectum justis iudicis deputabitur. Qui rapit pecuniam proximi sui iniquitatem operatur ; qui autem res Ecclesiæ abstulerit, sacrilegium facit et ut sacrilegus judicandus est. » Item, sanctus Urbanus papa et martyr : « Res et facultates ecclesiasticæ oblationes appellantur, quia Domino offeruntur, et vota sunt fidelium et pretia peccatorum atque patrimonia pauperum. Si quis a rapuerit, reus est damnationis Ananiæ et Saphiræ, et oportet hujusmodi tradere Satanæ, ut spiritus salvus sit in die Domini (I Cor. v). » Item, sanctus Lucius papa : « Rerum ecclesiasticarum et facultatum raptores, a liminibus sanctæ Ecclesiæ anathematizatos apostolica auctoritate pellimus et damnamus, atque sacrilegos esse judicamus, et

non solum eos, sed et omnes consentientes eis, quia non solum qui faciunt rei judicantur, sed etiam qui facientibus consentiunt. Par enim pœna et agentes et consentientes comprehendit. A qua pœna consensus liberi esse non possunt illi quorum ministerium est, ei qui talia possunt prohibere, comprimere et emendare, et ea non student corrigere. » Et sanctus Gregorius in epistola ad Sabinum subdiaconum : « Sacrilegium, inquit, et contra leges est, si quis quod venerabilibus locis relinquatur, pravæ voluntatis studiis suis tentaverit compendiis retinere. » Et sanctus Augustinus in sermone Evangelii sancti Joannis dicit : Fur sacrilegus loculorum sacrorum et Dominicorum est Judas ; et qui aliquid de Ecclesia furatur et rapit, Judæ perditio comparatur. » Et item in sacris canonibus a sancto Spiritu dictatis, et Christi sanctione confirmatis, scriptum est (*concil. Tolet. I, can. 11*) : « Si quis de potentibus clericum aut quemlibet pauperum aut religiosum exspoliaverit, et mandaverit ad ipsum episcopum ut eum audiat ; si contempserit, invicem mox scripta percurrant per omnes provinciæ episcopos, et quoscunque adire poterit, ut excommunicatus habeatur, donec audiat et reddat aliena. » Et item scriptum est (*concil. Agath. can. 4*) : « Clerici etiam, vel sæculares, qui oblationes parentum, aut donatas, aut testamento relictas, retinere præsumperint, aut id quod ipsi donaverunt ecclesiis vel monasteriis crediderint auferendum, sicut synodus sancta constituit, velut necatores pauperum, quousque reddant, ab ecclesiis excludantur. »

Unde summopere caveant potentiores quique, unusquisque in ordine et dignitate sua, ne præsumant in damnationem suam res sibi ecclesiasticas, neque fatigent, vel affligant inconsumptis consuetudinibus Dei ecclesias, et loca sanctorum : scientes quia ut præmissimus, res ecclesiasticæ vota sunt fidelium, patrimonia pauperum, pretia peccatorum ; et in tuitione atque defensione Christi consistunt, qui eas terræ principibus atque primoribus ad defendendum et conservandum, non ad affligendum vel usurpandum, sive præsumendum, commisit. Nam, quæcumque prætendatur a quocunque utilitatis, sive necessitatis occasio, ille corda omnium conspicit, qui novit cogitationes hominum, et remunerat actiones et etiam cogitationes irremuneratas nullatenus derelinquet. Quocirca omnis qui vult salvus fieri, et ab æterna morte liberari, et ad æternam vitam pervenire, attentissima cordis aure exaudiat quid Spiritus sanctus per eos locutus est, quibus dixit Dominus : *Ecce ego vobiscum sum omnibus diebus usque ad consummationem sæculi (Matth. XXVIII)* ; et : *Non vos estis qui loquimini, sed Spiritus Patris vestri qui loquitur in vobis (Matth. X)* ; et : *Quæcumque alligaveritis super terram, erunt ligata et in cælo ; et quæcumque solveritis super terram, erunt soluta et in cælo (Matth. XVIII)* ; et : *Accipite Spiritum sanctum : quorum*

remiseritis peccata, remittuntur eis, et quorum retinueritis, retenta sunt (Joan. xx); et: Qui vos audit, me audit; et qui vos spernit, me spernit (Luc. x).

Dicunt enim illi qui in cœlo et in terra miraculis coruscant, qui et usque hodie nobiscum vivunt et cum successoribus nostris usque in perpetuum vivent, quoniam apud Dominum est merces eorum:

« Si quis oblationes Ecclesiæ extra Ecclesiam accipere vel dare voluerit, præter conscientiam episcopi, vel ejus cui hujusmodi officia commissa sunt, nec cum ejus voluerit agere consilio, anathema sit (*concil. Gangr.*, can. 7). » Anathema autem interpretatur in Romana lingua *alienatio*; quia omnis talia faciens, quandiu in illis peccatis manet, licet nos episcopi, qui in apostolis et cum apostolis, non nostro merito, sed gratia divina, ligandi et solvendi potestatem accepimus, interdum tardi, interdum divini sensus ignari, interdum quæ committantur nescientes, aliquando etiam commissa, ut expedit, corrigere non valentes, quæ statuta sunt exsequi dissimulemus vel etiam negligamus, ut talem hominem ab Ecclesia et fidelium societate excommunicantes non segregemus: jam tamen a sacris canonibus excommunicatus et prædamnatus est, donec peccatum illud deserat, et per satisfactionem ecclesiasticam et sacerdotalem reconciliationem Domini gratiam et fidelium societatem recipiat. Et quicumque in peccatis suis et talibus sceleribus implicatus, ante satisfactionem necessariam vitam istam finierit, communionem et societatem cum electis in regno Dei habere nullatenus poterit; nec de inferni pœnis et dæmonum societate unquam liberari valebit. Sed sunt forte tales qui privilegia de locis et rebus Deo dicatis, sanctorum manibus confirmata, parvipendentes sibi, quia volunt, non quia possunt, excommunicationes usurpatoribus rerum et facultatum ecclesiasticarum a sanctis Domini intentatas alleviant dicentes se pro hoc illata damnatione, id est anathematis vinculo, non teneri. De quibus sanctus Gregorius in epistola ad Theoctistam patriciam dicit: « Ipsi, inquit, sibi testes sunt, quia Christiani non sunt, qui ligamenta sanctæ Ecclesiæ vanis se æstimant conatibus solvere; ac per hoc nec absolutionem sanctæ Ecclesiæ, quam præstat fidelibus, veram putant, si ligaturas ejus valere non æstimant. Contra quos diutius disputandum non est, quia per omnia despiciendi et anathematizandi sunt; et unde se fallere veritatem credunt, inde in peccatis suis veraciter ligantur. » Si qui sunt igitur qui sub nomine Christiano hæc aut prædicare audent, aut taciti apud semetipsos tenere, eos et ego, et omnes catholici episcopi, atque universa Ecclesia, anathematizamus, quia veritati contraria sentiunt et contraria loquuntur.

Rapinæ quoque et deprædationes quæ in istis rebus jam ex consuetudine sic ab omnibus pene tenentur, quasi peccata non sint, aut quasi levia peccata sint, sanctus Paulus apostolus, per quem locutus est Christus, et qui antequam mortis debitum solveret, ad tertium cœlum et paradysum fuit raptus, ubi

studuit secreta Domini verba, inter mortalia crimina ea posuit dicens: *An nescitis quia iniqui regnum Dei non possidebunt? Nolite errare: Neque fornicarii, neque idolis servientes, neque adulteri, neque molles, neque masculorum concubitores, neque fures, neque avari, neque ebriosi, neque maledici, neque rapaces, regnum Dei possidebunt (I Cor. vi); et iterum dicit: Si quis fornicator est, aut avarus, aut idolis serviens, aut maledicus, aut ebriosus, aut rapax, cum hujusmodi nec cibum sumere (I Cor. v); id est cum tali non homine, sed cum tali diabolo, non licet Christi discipulo, id est Christiano homini, ante satisfactionem, id est correctionem atque emendationem, et dignam pœnitentiam, cibum sumere. Sanctus quoque Joannes apostolus electus et dilectus Christi, qui in cœna supra pectus ejus recubuit, talem hominem etiam salutare vetat: *Nec ave ei, inquit, dixeris, neque in domum eum receptoris. Qui enim dicit ei, Ave, communicat operibus ejus malignis (II Joan. x).* Et item sanctus Paulus dicit unicuique Christiano: *Nec communicaveris peccatis alienis (I Tim. v).* Et dominus, quando venturus est judicare vivos et mortuos, et in adventum ejus omnes homines resurgent cum corporibus suis, et reddent de factis propriis rationem, se in judicio dicturum promittit in Evangelio his qui peccata sua eleemosynis redimere cum possent noluerunt: *Ite, maledicti, in ignem æternum, qui paratus est diabolo et angelis ejus (Matth. xxv).* Unde cogitandum est raptoribus, quo ibunt illi qui aliena rapiunt, si in infernum ibunt qui eleemosynas non fecerunt. Et item Dominus per Isaiam prophetam dicit raptoribus: *Rapina pauperis in domo vestra (Isa. iii); et: Lacrymæ viduæ ad maxillam descendunt; et exclamatio ejus superdeducentem eas; maxilla in cœlum coram Deo ascendunt, et Dominus non delectabitur in illis (Eccli. xxxv),* scilicet viduæ lacrymis, qui pater orphanorum et defensor viduarum queritur contra judices dicens: *Causa viduæ non ingreditur ad eos (Isa. i)* Quapropter sciant raptores, in cujus domo sive corporis, sive mansionis, rapina est pauperis, quia non habitat in illa domo Spiritus sanctus, sed spiritus malignus. Et si accedit ad communionem corporis et sanguinis Christi ante dignam satisfactionem, non mundatur per illam communionem a peccato, sed plenius possidetur a diabolo: sicut Judas, quando in cœnam Dominicam plenus rapina, et iniquitate, et avaritia atque cupiditate, communicare præsumpsit de manu Domini Salvatoris. Et forte tales erunt, cum hæc audierint, qui dicant: Non communicabimus. Sed sciant, quia sicut Dominus dixit: *Nisi quis renatus fuerit ex aqua, et Spiritu sancto, non intrabit in regnum cœlorum (Joan. iii),* ita dixit: *Nisi manducaveritis carnem meam, et biberitis meum sanguinem, non habebitis vitam in vobis (Joan. vi);* et sic dicit: *Qui crediderit et baptizatus fuerit, salvus erit (Marc. xvi);* ita etiam dixit: *Qui manducat carnem meam, et bibit sanguinem meum, in me manet, et ego in eo; et ego resuscitabo**

eum in novissimo die, et non morietur in æternum A (Joan. vi). Propterea nullum aliud restat salutis refugium, nisi ut declinet quisque vult salvus fieri ab istis malis et ab aliis mortalibus criminibus, et per pœnitentiam reconcilietur Deo, et communicet vivificis mysteriis, ut vivere valeat in æternum. Nihil enim prodest ulli homini si Christianus vocatur, si opera Christi, quæ præcepit ipse Christus, non fecerit: imo etiam magis ad suum iudicium Christianus vocatur, qui sub nomine Christi idola colit diaboli. Ipsa enim Veritas, quæ Deus est, protestatur, quia qui servit mammonæ (sic enim dæmon divitiarum præpositus appellatur) diabolo servit, vel idola colit diaboli: qui servit luxuriæ, voluntati carnis pro Deo servit; unde scriptum est: *Gloria eorum in confusione est* (Philip. iii), id est in genitalibus membris, quæ vulgo verecunda appellantur. Deum quippe Scriptura gloriam appellavit, quæ dicit de Judæis: *Mutaverunt gloriam suam in similitudinem vituli comedentis fenum* (Psal. cv.) Sed et de eis qui gloriantur quando sua libidine castitate expugnant, et aliorum toros maculant, hæc quæ supra idem dicit Apostolus: *Gloria in pudendis eorum qui terrena sapiunt* (Philip. iii); et alibi Scriptura: *Lætantur cum male fecerint, et exultant in rebus pessimis* (Prov. ii). Contra quod præcipit ut *qui gloriatur, in Domino gloriatur* (I Cor. i). Qui servit avaritiæ, idola colit, sicut Paulus dicit: *Et avaritiam quæ est idolorum servitus* (Coloss. iii). Qui servit gulæ et ebrietati, ventrem pro Deo colit; unde item dicit: *Quorum Deus venter est* (Philip. iii). Quæ ita non utique ad dignitatem dominantium, sed ab infelicitate famulantium, sic appellat Apostolus. Qui fratrem, id est Christianum hominem, injuste per potentiam opprimit; aut pro acceptione munerum justitiam facit, diabolum imitatur, et justitiam vendit, quæ Christus est, sique similis Judæ est. Qui veritatem pervertit pro invidia, aut veritatem retinet, aut dicit pro muneribus, diabolum imitatur, et Judæ similis est. Et sic de cæteris vitiis intelligendum est. Et cui vitio quisque servit, illi diabolo subjectus est qui eidem vitio præpositus est, et cum eo sine fine torquetur, nisi digne antea pœniterit. Et ne principes terræ, vel quilibet Christiani, dicant: **Episcopis, presbyteris et monachis strictiora præcepta dedit Deus; nos qui homines laici et sæculares sumus, hæc omnia attendere non valemus,** D *audiant quid Dominus in Evangelio dicat: Qui est ex Deo, verba Dei audit; propterea vos non auditis, quia ex Deo non estis* (Joan. viii). Et qui non est ex Deo, certum est quia ex diaboli parte est. Et quid lucrabitur, si etiam totum mundum habuerit, et animæ suæ detrimentum patiat? Aut quam dabit homo commutationem pro anima sua? Idcirco quicumque est homo, audiat dicentem sibi Dominum per prophetam: *Indicabo tibi, homo quid sit bonum: Facere iudicium et justitiam, et sollicitum ambulare cum Deo tuo.* (Mich. vi).

Hæc, fratres et filii, in quocunque ordine et digni-

tate sit quisque Christianus, ad vos ex Domino mandata dirigimus, qui de omnibus hominibus dicit omni episcopo: *Tu autem audiens nuntiabis eis ex me* (Ezech. xxxiii). *Ex me, inquit, et non, Ex te.* Propterea hæc sicut Domini mandata suscipite: cujus potentiæ non potestis, et cujus voluntati atque mandato non debetis resistere, si non vultis ut vestri proprii inimici salutem vestram obsistere. Nos autem talia nobis tacere nec possumus nec audeamus, quibus Dominus per prophetam dicit quod si non annuntiaverimus vobis, sanguinem vestrum de manu nostra requiret. Et ab illis Patribus et prædecessoribus nostris, quorum vices tenemus in terris, coram Domino degradamur in cœlis, si non exsequimur quæ illi statuerunt regulis divinitus inspiratis. Quapropter si vos ab his unde commone-mini tantocius non correxeritis, sicut illi in cœlo et nos in terra, una cum apostolicæ sedis præsule, et omni sacerdotum unanimitate, vos a Christi et fidelium ejus consortio segregabimus. Quod ne nos agere compellatis, vos pro Christo et vestra salute obnixius deprecamur. Vos autem si mandatis Dominicis obedire studueritis, et vestram salutem, præsentem scilicet et futuram ageritis; et gloria atque corona nostra coram Deo eritis, qui de vobis reddemus illi in die iudicii rationem, sicut et vos de vobis ipsis et de omnibus vobis commissis rationem estis sine dubio reddituri. Et ideo multo studio satagite ut in illa tremenda die ab iniquorum consortio segregati sitis; quod tunc erit si modo a diabolicis et malis operibus atque a perversis hominibus vos separaveritis: vindicantes contra diabolum, et vitia atque peccata, et honorem vestrum, qui homines ad Dei imaginem facti estis. Ad hoc enim, sicut scriptum est, ut Deum timeat et mandata ejus custodiat factus est omnis homo, propter quem factus est Deus homo, qui cum Deo Patre in unitate Spiritus sancti vivit et regnat in sæcula sæculorum.

EPISTOLA XXII.

AD ROFULDUM BITURICENSEM ET FROTARIUM BURDIGALENSEM, METROPOLITANOS AQUITANIÆ.

De nuptiis Stephani, et filix Regimundi comitis.

HINC MARUS, nomine non merito, Rhemorum archiepiscopus, ac plebis Dei famulus, reverentissimo Bituricensium archiepiscopo et charissimo fratri RODULFO et FROTARIO fratri et honorabili Burdigalensium archiepiscopo, cum omnibus provinciarum vestrarum episcopis venerabilibus, plurimam optat in Salvatore salutem.

Nuper synodo episcoporum quatuordecim provinciarum, Lugdunensium videlicet, Rothomagensium, Turonensium, Senonum, Viennensium, Arelatensium, Vesontionensium, Moguntinensium, Agrippinensium, Trevirorum, Rhemorum, Bituricensium, Burdigalensium, Narbonensium, apud Tusiacum villam Tullensis parochiæ, anno Incarnationis Dominicæ 860, indictione ix, mense Novembrio habita, delatæ sunt litteræ querelam Regi-

mundi comitis adversus Stephanum depromentes, quia videlicet idem Regimundus filiam suam præfato Stephano legaliter ad conjugii copulam dederit : sed ipse non illa utatur ut conjuge, eo quod, ut fateatur, cum aliqua ejusdem puellæ propinqua quondam carnali commercio se miscuerit : sed cum qua vel quam proxima affinitate conjuncta, indicare non velit. Hic litterarum sensus, si rite remetior, quarum verba non teneo, constitit in synodo recitatus. Unde licet talis accusatio non mereretur synodaliter obtinere responsum, quia nemo quemquam per scripturam absens potest regulariter accusare : et si legaliter filiam suam alteri nuptum tradidit, eam a sua potestate dimisit ; pro qua ex hoc negotio, quod forte utrum ita an non sit latere poterat, aut aliter quam sit dictum interpretari, illum cui eam tradidit canonicè accusare non poterat. Qua de re accusationem sive interpellationem adversus maritum suum, si necessitas postularet, uxor debet conserere, consilium autem pater debet pro illa exinde quærere, vel correctionem viri ejus, suadendo, vel suggerendo modis quibus potuerit, et ipse agere satis. Sed quoniam hæc ratio per tres circiter annos a plurimis ventilatur, et ambo viri nobiles et illustres, et juxta sæculi dignitatem potentes, si inter se hinc diutius dissident, maximum scandalum in Ecclesia et detrimentum in regno ob hoc accidere poterit, et quia isdem Stephanus ibidem in domni regis erat obsequio, visum est synodo ut eum accerseret, et quid de his diceret per ipsum rescire curaret. Vocato autem ut hæc relata fuere, post quædam suæ responsionis obloquia, petiit ut tantummodo cum episcopis sibi loqui liceret. Et recedentibus aliis, quæ sibi visa fuerunt episcopis intimavit. Cum inter cætera dixerunt episcopi, quia de talibus, ex quibus Regimundi locutæ sunt litteræ, et quæ per omnium pene ora in regnis plurimis ventilentur, ei non secretum dare consilium, neque privatum decernere possent judicium. Quapropter et ipse, quod hinc apud se erat, in omnium dixit velle venire notitiam, et necessarium obtinere consilium, et salubre sibi decerni judicium : velle tamen prius, ut synodus patienter ejus audiret sententiam, et tunc demum sibi donaret consilium, et promulgaret judicium.

Et ut personam illius inducamus loquentem : Ut assolet, inquit Stephanus, in fragili juventutis ætate cum quadam femina juvene mihi convenit. Sed et quando tempus mihi advenit, ut more prædecessorum meorum legitimum conjugium peterem, una cum consensu parentum et amicorum meorum, ipsius Regimundi ut nobilis viri, filiam meis natalibus competentem apud eum in conjugem legaliter petii, et obtentam legaliter desponsavi. In me autem reversus, et sciens quid fecerim, ad confessorem meum perrexi, et consilium ejus quæsi : ut quoniam juvenis femina, cum qua carnali commercio mistus fueram, propinqua istius puellæ exstitit, et audieram quod et quarto genu, et in reliquum pertinentes sibi copulari non valerent, utrum cum hæc

desponsata mihi puella sub pœnitentia occulte manens, sine mea et ipsius æterna damnatione, in conubio illam mihi potuissem conjungere. Qui ostendit mihi librum quem, ut spero, canones appellavit, et legit coram me, quoniam quandiu potest affinitatis propinquitas computari, mihi, nec cuiquam Christiano, cum cognata sua, vel quam cognatus habuit, vel cum duabus cognatis salubriter liceret conjugii ; et quandiu in tali incestu maneremus, nec ego, nec illa, fructuosam pœnitentiam agere possemus : neque talis incestus, nisi separatione nostra ab invicem sanari valeret. Interea accidit discordia inter domnum regem seniores meum, et meam juventutem, intantum ut in illo regno solide non possem subsistere. Propterea ex utraque parte constrictus, nec frangere desponsalia potui, nec eandem sponsam meam in conjugem ducere ausus fui : ne cum discordia senioris mei, etiam ipsius Regimundi, et nobilium parentum ejus, accumularetur discordia ; et sic aut de regno funditus pelleret, aut si in regno manere vellem, occumberem. Et idcirco per duo placita subterfugi, ne sponsam meam in conjugem ducerem. Tandem autem necessitate compulsus, quia causa mihi de vita instabat, dotavi eam, et publicis nuptiis honoratam accepi. Sed ne illam, quæ adhuc sana erat, mecum perderem, et mihi cumulatus perditionem acquirerem, intactam hactenus conservare disposui. Et quoniam ita se rationis veritas per omnia habeat, et non dolo, neque odio, sive despectu alicujus, aut amore feminæ alterius, nisi sicut vobis modo Deo teste narraui, hoc egerim : quicumque modo vobis placet, per meipsum, et per parentes atque amicos, seu fideles meos, hoc vobis verum esse sacramento, vel alio quolibet conveniente modo demonstrabo : et si vultis ac quæritis, quantoscunque servos meos decernitis inde in judicium mitto, et quale consilium mihi inde secundum Deum ad meam salutem, et secundum sæculum ad competentem honorem et ad pacificationem Regimundi, et ad salvamentum, et honorem ipsius puellæ dederitis, paratus sum in omnibus, quibus valero, obedire.

Auditum autem eum synodus jussit secedere, et dicentibus singulis, prout cuique visum fuit, decretum est, ut vos comprovinciales archiepiscopi, cum coepiscopis vestris, in regni illius convenienti loco, et tempore synodum condicatis, et placitum fiat, ubi princeps cum primoribus terræ intersit : ne, quod absit, ex utraque parte, cum parentum et amicorum auxilio, illustres isti viri convenientes, operante diabolo seditiosus valeat exoriri tumultus. Et hanc causam rex, cum viris nobilibus, inter viros nobiles pacificare procuret. Vos autem episcopali auctoritate, et canonica diffinitione eam dirimere, et ad debitum atque salubrem terminum studeatis perducere. Revocato autem Stephano, conditio ista illi proposita, et ab eo est gratissime accepta. Hujus autem rei modum, et ordinem diffinitionis, quoniam pusillitas intelligentiunculæ meæ, quid exinde senti-

ret, jussa synodo suggerere studuit, communi consensu sanctæ unanimi-
tati complacuit, ut ea litteris commendaret, et sapientiæ vestræ, sicut tunc fuerunt in concilio acceptata, transmitteret. Et idcirco non quasi nescientibus hæc quæ sequuntur vobis necessaria, nec ut arrogans auctoritatem specialis scientiæ, vel jactans diffinitionis audaciam, sed ut Ecclesiæ ac vester omnium videlicet servorum domini servus, et plebis dominicæ famulus, quanquam non ut debui, tamen ut potui, devotionis obedientia colligere, et collecta vobis transmittere procuravi. In quibus nihil de civili judicio, cujus cognitores non debemus esse episcopi, ponere, sed quæ ecclesiastica definitioni noscuntur competere, quantum occurrit memoriæ, breviter studui adnotare. Ordinem judicii de nondum sponte confessis, vel aperte convictis, quoniam aliter nemo, ut Leo papa decernit, potest regulariter judicari, sanctus Gregorius in commonitorio ad Joannem defensorem demonstrat dicens : Primum ut judicium ordinabiliter fiat, quantum sint alii accusatores, et alii testes : deinde ut causarum qualitas, si digna exsilio vel condemnatione sit, exploretur : et præsentem eo qui accusatur, sub jurejurando contra eum testimonium proferatur, et scriptis actum inseratur : et accusatus licentiam respondendi et defendendi se habeat. Sed et de personis accusantium et testificantium subtiliter est quærendum, cujus conditionis, cujusve opinionis, aut ne inopes sint, aut ne forte aliquas contra accusatum inimicitias habeant : et utrum testimonium ex auditu dixerit, aut certe specialiter se scire testati sint : et ut scriptis judicata partibus præsentibus sententiâ recitetur, et sic omnia solemniter roborentur. De manifesta autem, et nota plurimis causa, vel quæ ita confitetur, ut ista, si tamen ita et puella dixerit ut Stephanus profitetur, quia sæpe inter masculos audimus et feminas, quia quod alter dicit, alter sæpenumero denegat : non sunt quærendi testes, ut sanctus Ambrosius in epistolam ad Corinthios dicit, de fornicatore exponens sententiam apostoli : Judicis, inquit, non est, sine accusatore damnare, quia et Dominus Judam, cum fur esset, quia non est accusatus, minime abjecit, cognito opere isto pellendum illum fuisse de cœtu fraternitatis, omnes enim crimen ejus sciebant, et non arguebant. Publice enim novercam suam loco uxoris habebat ; in qua re neque testibus opus erat, neque tergiversatione aliqua poterat tegi crimen. Et paulo post : Absens facie, præsens autem auctoritate Spiritus, qui nusquam abest, jam judicavi ut præsens eum qui hoc admisit. Quapropter necesse est ut Stephanus puellam adducat ad synodum, et pater ipsius puellæ veniat, et interrogetur puella, si verum est quod Stephanus dicit, se illam hactenus servasse intactam. Et quoniam de altera femina audivimus, quia volens liberari a conjuge, persuasa super se aliqua quæ non erant, ut fertur, jam dixerit : debita ei libertas tribuatur, et periculum indicetur, ne persuasa pro veritate mendacium fateatur. Et si dixerit

A ita ut Stephanus, tunc si necesse fuerit, credulitas rationi et auctoritati conveniens sacramento exinde suscipiatur, vel per convenientem personam satisfactio, si ita necessitas exigit, judicio expetatur, quia non pro dolo, neque pro alia qualibet causa, Stephanus se a carnali copula puellæ hujus subtraxerit, nisi pro ea quam ipse synodo indicavit : videlicet quia cum puellæ sibi desponsatæ consanguinea, et carnis cognatione propinqua, carnaliter concubuerit.

Hoc enim sanctus Leo papa, et beatus Gregorius in re dubia a presbytero, vel a quolibet tam viro quam femina, nobili vel ignobili, per sacramentum fieri manifeste decernunt, sicut qui legere voluerit invenire valebit ; inter cætera dicente beato juniore Gregorio, in epistola per Denualdum presbyterum directa ad Bonifacium, Moguntinum episcopum : In causa, inquit, in qua certi non fuerint testes, qui criminis illati approbent veritatem, jusjurandum erit in medio, et illum testem proferat accusatus de innocentia suæ puritate, cui nuda et aperta sunt omnia, habeatque conscientia suæ testem, quem habebit et judicem. Quæ sacramenti purgatio, et in ecclesiasticis, et in exteris legibus usitatissima, et de fidei veritate etiam a primis sæculis esse constat exorta. Judicium autem, non nisi pro pacis charitatisque concordia, inter cœquales fieri solet ; fit autem a subjectis ad satisfactionem majorum, quod in hac causa nisi ex placito fiat, non potest ex auctoritate requiri. Hinc autem cognita veritate, quoniam dictum est nobis, requiri a Stephano, ut feminam designet ex nomine, et certam propinquitatis affinitatem demonstret, pro cujus concubitu huic puellæ se non valet salubriter carnali copula commiscere : quia contra rationem et auctoritatem ecclesiasticam, et Christianæ devotionis morem, ab eo queritur, si forte ab eo queritur, quæ ex hoc apostolica decrevit auctoritas, et catholica tenet Ecclesia, hic ponere dignum duximus : Leo universis episcopis per Campaniam, Samnium et Picenum, atque universas provincias salutem, Magna indignatione commoveor, et dolore multo contristor, quod quosdam ex vobis comperi, apostolicæ traditionis oblitos, et studio sui erroris intentos. Et post aliquanta : De pœnitentia scilicet, quæ a fidelibus postulatur, ne de singulorum peccatorum genere libello scripta professio publicetur, cum reatus conscientiarum sufficiat solis sacerdotibus indicari confessione secreta. Quamvis enim plenitudo fidei videntur esse laudabilis, quæ propter Dei timorem apud homines erubescere non veretur : tamen, quia non omnium hujusmodi sunt peccata, ut ea qui pœnitentiam poscunt non timeant publicare, removeatur improbabilis consuetudo, ne multi a pœnitentiæ remediis arceantur, dum aut erubescunt, aut metuunt inimicis suis sua facta reserari, quibus possint legum constitutione percelli. Sufficit enim illa confessio, quæ primum Deo offertur, tunc etiam sacerdoti, qui pro delictis pœnitentium peccator accedit. Tunc enim plures ad pœnitentiam potuerunt provo-

cari, si populi auribus non publicetur conscientia A pœnitentis. Et quoniam qualiter debeat iniri conjugium, et vetus et nova lex edocet, Domino per Moysen præcipiente, et Evangelio demonstrante: *Cum esset, inquit, desponsata mater Jesu Maria Joseph antequam convenirent* (Matth. 1), id est antequam nuptiali celebratione convenirent, sicut in nuptiis celebratis idem ostendit, quas sua præsentia sanctificare, et miraculo ibidem patrato illustrare dignatus est. Sed et sanctus Evaristus, quartus a beato Petro Romanæ sedis episcopus, et sanctus Siricius, et beatus Leo, atque cæteri quique doctores ostendunt, quæ omnia hic ponere propter pluralitatem et longitudinem devitamus.

Tantum dicere necessarium duximus, et inter æquales legitima fiunt conjugia, cum a parentibus, quorum interest, petita, et legaliter desponsata, et dotata, et publicis nuptiis honorata femina conjugii copulæ sociatur, et ex duobus unum corpus unaque caro efficitur, sicut scriptum est: *Erunt duo in carne una* (Gen. 11); jam non duo, sed una sunt caro. Et: *Quod Deus junxit, homo non separet* (Matth. 19). De qua conjunctione magnus Leo papa ad Narbonensem scribit episcopum: Non omnis, inquam, mulier viro juncta uxor est viri, quia ne omnis filius hæres est patris. Nuptiarum autem fœdera inter ingenuos sunt legitima, et inter æquales. Et paulo post: Unde cum societas nuptiarum ita ab initio constituta sit, ut præter sexuum conjunctionem; haberet in se Christi et Ecclesiæ sacramentum; dubium non est eam mulierem non pertinere ad matrimonium, in qua docetur nuptiale non fuisse mysterium. Et nos e regione hinc etiam ostendere possumus, quia non omnes nuptiæ conjugalem copulam faciunt, quas non sequitur commistio sexuum: sicut nec semper illius est filius omnis et hæres, cujus esse noscitur hæres. Nec habent nuptiæ in se Christi et Ecclesiæ sacramentum, sicut beatus Augustinus dicit, si se nuptialiter non utuntur, id est, si eas non subsequitur commistio sexuum. Nec pertinere poterit illa mulier ad matrimonium, cum qua docetur non fuisse commistio sexuum: sicut dubium non est eam mulierem non pertinere ad matrimonium, in qua docetur nuptiale non fuisse mysterium. Quod ita esse præfatus Leo demonstrat dicens: Unde cum societas nuptiarum ita ab initio constituta sit, ut præter sexuum conjunctionem haberet in se Christi et Ecclesiæ sacramentum. E item idem: Igitur, inquam, qui filiam suam viro habenti concubinam in matrimonio dederit, non ita accipiendum est, quasi eam conjugato dederit: nisi forte illa mulier et ingenua facta, et legitime dotata, et publicis nuptiis honestata videatur. Paterno arbitrio viris junctæ carent, culpa, si mulieres, quæ a viris habebantur, in matrimonio non fuerint. Quibus sententiis evidenter ostendit, quia tunc est vera legitimi conjugii copula, quando inter ingenuos, et inter quales fit, et paterno arbitrio viro mulier

juncta, legitime dotata, et publicis nuptiis honestata, sexuum commistione conjungitur. Et tunc habent nuptiæ in se Christi et Ecclesiæ sacramentum, et tunc pertinere noscitur mulier illa ad matrimonium, in qua et sexuum commistio, et nuptiale docetur fuisse mysterium. De quo mysterio Paulo apostolus ad Ephesios dicit: *Qui suam uxorem diligit, seipsum diligit. Nemo enim unquam carnem suam odio habuit, sed nutrit et fovet eam, sicut et Christus Ecclesiam; quia membra sumus corporis ejus, de carne ejus, et de ossibus ejus. Propter hoc relinquet homo patrem et matrem suam, et adhærebit uxori suæ, et erunt duo in carne una. Sacramentum hoc magnum est; ego autem dico in Christo et in Ecclesia* (Ephes. 5). Hinc sanctus Ambrosius mysterii sacramentum grande in unitate viri ac femine esse significat: nec hoc tantum prodit, sed aliam causam, quæ non discordet a memorato mysterio, flagitat, quam scit ad profectum humani generis pertinere, hoc est Ecclesiæ et Salvatoris, ut sicut relictis parentibus homo uxori suæ adhæret, ita et relicto omni errore Ecclesia adhæreat, et subjiciatur capiti suo quod est Christus. Quoniam una natura in viro et femina est: idcirco vir quasi seipsum et mulierem diligere commonetur. Naturali ratione mulier portio corporis viri est: ac per hoc vir in muliere seipsum diligit; quo modo si fornicetur in seipsum peccat, quia duo in carne una sunt. Non ergo personæ substantiam dividunt, ut per personas numerus fiat naturæ; sed sunt in unitate naturæ. Et sanctus Augustinus in libro de Nuptiis et Concupiscentia dicit: *Sane non tantum fecunditas, cujus fructus in prole est, nec tantum pudicitia, cujus vinculum fides est, verum etiam quoddam sacramentum nuptiarum commendatur fidelibus conjugatis, unde dicit Apostolus: Viri, diligite uxores vestras, sicut et Christus dilexit Ecclesiam* (Ephes. 5). Hujus procul dubio sacramenti res est, ut mas et femina connubio copulati, quando vivunt, inseparabiliter conjuncti perseverent; nec liceat, excepta causa fornicationis, conjugem a conjugate dirimi. Hoc enim custoditur in Christo et in Ecclesia, ut vivens cum vivente in æternum nullo divortio separetur in civitate Domini nostri, in monte sancto ejus, hoc est in Ecclesia catholica. Et sanctus Gregorius in epistola ad Theoctistam patriciam dicit: Per se enim Veritas dicit: *Quod Dominus junxit, homo non separet* (Matth. 19). Quæ etiam ait: *Non licet dimittere uxorem excepta causa fornicationis*. Scimus enim quia scriptum est: *Erunt duo in carne una* (Gen. 11). Si igitur vir et uxor una caro sunt, et religionis causa vir dimittit uxorem, vel mulier virum in hoc mundo remanentem, vel fortasse ad illicita migrantem, quæ est ista conversio, in qua una eademque caro ex parte transit ad continentiam, et ex parte manet in pollutione? Si vero utrisque conveniat continentem vitam ducere, hoc quis audeat accusare? quando certum est, quia omnipotens Dominus qui minora concessit, majora non prohibuit. Et post aliquanta: Si vero continentiam, quam vir appetit

uxor non sequitur; aut quam uxor appetit, vir recusat, dividi conjugium non licet: quia scriptum est: *Mulier sui corporis potestatem non habet, sed vir: similiter vir non habet potestatem corporis sui, sed mulier* (I Cor. vi). Et in epistola ad Adrianum Panormitanum: Nam, inquit, excepta fornicationis causa, virum uxorem relinquere, divina lex nulla ratione concedit: quia postquam copulatione conjugii viri atque mulieris unum corpus efficitur, non potest ex parte converti, et ex parte in sæculo remanere. Et sanctus Augustinus in libro de Bono conjugii: Ad hoc enim nuptiæ sunt, ut illa concupiscentia, redacta ad legitimum vinculum, non deformis et dissoluta fluitaret, habens de seipsa irrefrenabilem carnis infirmitatem, de nuptiis autem indissolubilem fidei societatem: de seipsa progressum immoderate coeundi, de nuptiis modum caste procreandi. Debent ergo sibi conjugati, non solum ipsius sexus sui commiscendi fidem, liberorum procreandorum causa, quæ prima est humani generis in ista mortalitate societas; verum etiam infirmitatis invicem excipiendæ, ad illicitos concubitus evitandos, mutuam quodammodo servitutem: ut et si alteri eorum perpetua continentia placeat, nisi ex alterius consensu, continere non possit. Ad hoc enim uxor non habet potestatem corporis sui, sed mulier: ut et quod non filiorum procreandorum, sed infirmitatis et incontinentiæ causa expetit, vel ille de matrimonio, vel illa de marito, non sibi alterutrum negent; ne per hoc incidant in damnabiles corruptelas, tentante Satana, propter incontinentiam vel amborum, vel cujusquam eorum.

Et item in eodem libro: Generationis itaque causa fieri nuptias Apostolus ita testis est: *Volo, inquit, juniores nubere*: et quasi ei diceretur: Ut quid? continuo subjecit: *Filios procreare, matres familias esse* (I Tim. v), ad fidem castitatis illud pertinere: *Uxor autem non habet potestatem corporis sui, sed vir: similiter et vir non habet potestatem corporis sui sed mulier* (I Cor. iv), ad sacramenti sanctitatem; et illud: *Uxorem a viro non discedere: quod si discesserit, manere innuptam, aut viro suo reconciliari* (I Cor. vii), et: *Vir uxorem ne dimittat*. Hæc omnia bona sunt, propter quæ nuptiæ bonæ sunt, proles, fides, sacramentum.

Et in libro de Nuptiis et de Concupiscentia: In nuptiis tamen bona nuptibilia diligantur, proles, fides, sacramentum: sed proles, non ut nascantur tantum, verum etiam ut renascantur. Nascitur namque ad poenam, nisi renascatur ad vitam. Fides autem, non qualem habent inter se etiam infideles zelantes carnem: quis enim vir, quamlibet impius, vult adulteram uxorem? aut quæ mulier, quamlibet impia, vult adulterum virum? Hoc enim in connubio bonum naturale est quidem, carnale tamen, sed membrum Christiani conjugis adultero conjugii debet timere, non sibi, et a Christo sperare fides præmium quodlibet conjugii. Sacramentum vero, quod nec separati et adulterati amittunt conjuges concordi-

ter casteque custodiant. Solum est enim, quod etiam sterile conjugium tenet jura pietatis, jam spe fecunditatis amissa, propter quam fuerat copulatum. Hæc bona nuptialia laudet in nuptiis: qui laudare vult nuptias. Et in Genesi ad litteram: Quod bonum habent nuptiæ, et quod bonæ sunt nuptiæ, peccatum esse nunquam potest. Hoc autem triperitum est, fides, proles, sacramentum. In fide attenditur, ne præter vinculum conjugale cum altera, vel altero concumbatur: in prole, ut amanter suscipiatur, benigne nutriatur religiose educetur: in sacramento, ut conjugium non reparetur, et dimissus, aut dimissa, nec causa prolis alteri jungatur. Hæc est tanquam regula nuptiarum, qua vel naturæ decoratur fecunditas, vel incontinentiæ regitur pravitas. Nunc cum his quæ sancti doctores dicunt de nuptiis, conferamus Stephani nuptias, non habentes amorem prolis, sed necessitatem vitandi exilii, sive mortis: non habentes servandæ conjugalis castitatis fidem, sed incurrendi incestus mortiferi non parvipendendum timorem: non habentes incorporationis unitate Christi et Ecclesiæ sacramentum, sed superducentes turpitudini velamentum: totumque quod in eis est actum, figmentum simulationis fuit, non veritas. Quæ nuptiæ, licet inter ingenuos et inter æquales, paterno arbitrio desponsationem atque dotationem præcedente, fuerunt celebratæ, etiamsi jam sexuum commistio eas subsequeretur, legitimam conjugii copulam obtinere non possent, nec ratum conjugium stabilire valerent, quin potius irrita omnia fierent: quoniam non sine separatione, propter incestus crimen, quod habere non potest Christi et Ecclesiæ sacramentum, vulnera quæ concumbentes inflicti susciperent, medicamento pœnitentiæ in eis sanari non valerent, sicut subsequentes orthodoxorum et Ecclesiæ magistrorum sententiæ demonstrabunt. Quapropter tales non mysticæ, neque legales in oculis Dei sunt nuptiæ.

Quia si per Stephani et puellæ, non ante Deum legaliter ductæ, sed magis abductæ, coitum carnalis commistionis ex his duobus unum corpus efficeretur, non secundum nuptiale bonum, sed secundum incestale malum, propter incestum Stephani unum corpus efficerent, sicut scriptum est: *Qui adhæret meretrici, unum corpus efficitur* (I Cor. vi). Et sit puella ab incestu sana, per coitum juncta Stephano, incestuosi caro fieret: et Stephanus illi junctus, sicut antea fornicator, ita et post conjunctionem illius, quoniam cum propinqua ejus concubuit, quod nondum erat, incestuosus existeret. Et propterea saniore consilio, et puellæ sanitati, quæ necdum infirmata erat, intactam eam servans providit, et se, ne gravius offenderet, cautius secundum Deum juxta quod res conjacuit custodivit. Quia sicut sacri canones dicunt, tale connubium, vel potius adulterium, sine separatione sanari non poterat, si carnaliter miscerentur. Unde ibidem scriptum est (*concil. Epæon. can. 30*): De incestis conjunctionibus nihil prorsus veniæ reservamus, nisi cum adulterium se-

paratione sanaverint. Incestuosos vero nullo conjugii nomine censemus deputandos, quos etiam designare funestum est. Et S. Gregorius in epistola ad Felicem Siciliensem episcopum, quem audierat perverse interpretari quod beatus Gregorius Augustino Anglorum episcopo consilium secundum indulgentiam de Paganis a quarto genu, et in reliquum, ne a fide refugerent, dederat, quodque ipsi venerando papæ suggererat, ad eundem Felicem rescribens dicit: Progeniem, inquit, suam unumquemque, de his qui fideliter edocti, et jam firma radice plantati stant inconvulsi, usque ad septimam observare decernimus generationem, et quandiu se agnoscent affinitate propinquos, ad hujusmodi copulæ non accedere societatem: nec eam, quam aliquis ex propria consanguinitate conjugem habuit, vel aliqua illicita pollutione maculavit, in conjugium ducere ulli profecto Christianorum licet, vel licebit: quia incestuosus est talis coitus, et abominabilis Domino, et cunctis fidelibus: incestuosos vero nullo conjugii nomine deputandos a sanctis patribus dudum legitimus constitutum.

Nec hoc quoque in hac sollicitudinis parte relinquimus, quod homines incestuosi a liminibus sanctæ Ecclesiæ sunt separandi, usquequo per satisfactionem precibus sacerdotum eidem sanctæ Ecclesiæ catholicæ reconcilientur. Et in edicto canonico ante corpus beati Petri prolato: Si quis de propria cognatione, vel quam cognatus habuit, duxerit uxorem anathema sit. Et responderunt omnes tertio, anathema sit. Et non dubium est huic anathematismo nuptias Stephani subjacere debuisse, si cum ista concumberet, qui se cum cognata ejus concubuisse fatetur. Et item in canonibus scriptum est (*conc. Ilerd. can. 4*): De his qui se incesti pollutione commaculant, placuit, ut quousque in ipso detestando et illicito carnis contubernio perseverant, usque ad missam tantum cathecumenorum in Ecclesia admittantur; cum quibus etiam, nec cibum sumere ullum Christianorum, sicut Apostolus jussit, oportet. Et hinc plura ex canonibus potuissemus congerere, si incestu intercedente quod Stephanus devitavit, se et uxorem suam propter hoc necesse fuisset disjungere. Nunc autem, ne nuptiali simulationi superaddatur incestus, quoniam oportet eos, et coram divinis et coram humanis oculis legaliter ac rationabiliter disjungi, qui non legaliter in divina justitia visi fuere conjuncti; talia sanctorum Patrum donemus testimonia, quæ ad agenda causam sint manifestissime pertinentia.

Sanctus Ambrosius in Epistolam ad Corinthios dicit: Non est enim frater, aut soror, servituti subiectus in ejusmodi, hoc est, non debet reverentiam conjugii, ei qui horruit auctorem conjugii. Non enim ratum est matrimonium quod sine Domini devotione est. Et sanctus Hieronymus in tertio libro commentii Epistolæ Pauli ad Ephesios: Quomodo itaque Christo subjecta est Ecclesia, sic subjecta sit uxor viro suo. Quem enim habet principatum et subjectionem

A Christus et Ecclesia, huic eidem ordini maritus et uxor astringitur. Sed videndum, ut quomodo in Christo et in Ecclesia sancta conjunctio est, ita et in muliere sancta sit copula. Sicut autem non omnis congregatio hæreticorum Christi Ecclesia dici potest, nec caput eorum Christus est; sic non omne matrimonium, quod non viro suo secundum Christi præcepta jungitur, rite conjugium appellari potest, sed magis adulterium. De quibus ita sacri definiunt canones: Sane quibus conjunctio illicita interdicitur, habebunt ineundi melioris conjugii libertatem. Et in synodo apud Liptinas (an. 743) habita, cui sub Carlomanno principe Georgius episcopus, et Joannes sacellarius, ac sanctus Bonifacius, ex præcepto Zachariæ papæ præ sederunt, legitur, ut si vir mulieri desponsatæ, dotatæ, ac publicis nuptiis ductæ secundum Apostolum debitum conjugale non potuerit reddere, et hoc aut amborum confessione, aut certa qualibet approbatione fuerit manifestum, ut separentur, et mulier, si se continere nequiverit, alteri viro legaliter nubat. Videlicet, quia secundum diffinitionem sancti Leonis papæ, et traditionem doctorum superius demonstratam, dubium non est, eam mulierem non pertinere ad matrimonium, in qua conjunctione sexuum non docetur Christi et Ecclesiæ sacramentum, hoc est nuptiale fuisse mysterium.

Multo magis autem hujusmodi, de quo agitur, separato conjugio, aliam legaliter adire licebit copulam, qui concubitus non contraxit impotentia carnis, sed reverentia mentis. In copula vero conjugali, in qua desponsatione, dotatione et nuptiarum sacramento, corporis scilicet, unitate, Christi et Ecclesiæ docetur fuisse mysterium, nisi morte corporis intercedente, conjugii non poterit solutio fieri, sicut evangelica et apostolica testatur auctoritas, et omnium catholicorum doctorum chorus. Et beatus Augustinus in libro de adulterii Conjugiis dicit: Quoniam si vel pro intolerabili ac diuturna infirmitate concubitus vir exercere, aut femina sustinere nequiverit, nec etiam pro sterilitate, seu religionis continentia, aut pro alia qualibet excepta fornicationis causa, vir et uxor, legaliter et carnali commitione conjuncti, separari non valebunt. Quapropter hanc legem a Domino audientes discipuli dixerunt: Si hæc causa ita cum uxore habetur, non expedit nubere (*Matth. xix*). Non tamen pro hoc Dominus suam mutavit sententiam. Unde et Leo ad Nicetam Aquileiensem episcopum scripsit, ut si per bellicam cladem, et gravissimos hostilitatis incursum, ira quædam fuerint divisa conjugia, ut abductis in captivitatem viris, feminae eorum remanserint destitutæ, quæ viros proprios, aut interemptos putaverint, aut nunquam a dominatione hostium crediderint liberandos, in aliorum conjugum amplexu solitudine cogente transierint, quia a Domino scriptum est: *Jungitur mulier viro; et: Quod Deus junxit, homo non separet (ibid.)*, si reversi, vel raptæ reversæ fuerint conjuges, legitima fœdera nuptiarum redintegranda perdocuit. Nec tamen tanquam pervasorem quem

quam judicari, qui personam ejus mariti vel uxoris, qui vel quæ jam non æstimabatur, assumpsit; sed inculpabile judicandum quod necessitas intulit, et restituendum quod fides poposeit. Mulieres autem, vel viros, posteriorum virorum vel uxorum delectatione captos, et ad priorum conjugum amorem redire nolentes, communione privari decrevit.

Et quia ecclesiasticæ regulæ de his etiam definitionis sententiam proferunt, qui sponsalitorum fidem infringunt, videtur nobis, non secundum auctoritatem promodo, sed consilium, si forte vobis ita visum fuerit, dando, ut quia Stephanus, si sponsalitorum fidem fregisset, secundum legem civilem multam eorundem sponsalitorum judicaretur componere: et ipsa puella, post desponsalia dotem acceptam, quam de seipsa, si carnaliter jungeretur, mercari debuerat, ut eandem dotem habere non debeat, non ipsa, sed Stephanus, ut videtur, commisit; habeat loco multæ sponsalitorum dotem a Stephano sibi datam, et cum eadem dote patri restituatur, et nubat parentum consilio cui vult, tantum in Domino, sitque pax inter parentes ejus et Stephanum. Et ne quis argute his quæ posuimus volens resistere dicat: Si dos manebit, et desponsalia atque celebratæ nuptiæ non negantur, quomodo esse poterit, ut et Stephanus maritus, et illa uxor non maneant? aut quomodo ille alteri feminae, et illa alteri viro se sine adulterio conjugere poterunt? præsertim cum idem sanctus Augustinus in præfato libro de Bono conjugii dicat: Si fiat ordinatio cleri ad plebem congregandam, etiamsi plebis congregatio non subsequatur, manet tamen in illis ordinatis sacramentum ordinationis: et si aliqua culpa quisquam ab officio suo removeatur, sacramento Domini semel imposito non carebit, quamvis ad iudicium permanente: sic et in istis desponsatione, dotatione, et nuptiis permanentibus, conjugale vinculum permanebit, et alteri nemo eorum, nisi cujuslibet ex eis morte intercedente, sine adulterio se poterit jungere. Audiat, si quis hæc fuerit conatus opponere, quia de dotalitio puellæ habendo, non nisi propter pacificationem parentum ejus et Stephani, loco multæ fractorum sponsalitorum diximus, quam multam si dissoluto dotalitio puellæ parentes exigere maluerint, aut utraque indulgere, vel utraque reposcere, ipsi viderint, et legibus civilibus eorundemque pacificationi exinde conveniat. Nos autem, quod ad nos pertinet, astute forte quærenti respondeamus, quoniam hanc comparisonem de ordinandis positam beatus Augustinus, non de imaginaria viri et uxoris conjunctione, sed de incorporata per sexuum commistionem copulatione posuit, sicut in proximæ præcedentibus inquit: Sequentur, inquit, agnum pueri cantantes canticum novum, sicut in Apocalypsi scriptum est, qui cum mulieribus se non contaminaverunt, nec ob aliud, nisi quia virgines permanserunt. Nec ideo se arbitrentur meliores esse primis patribus sanctis, qui nuptiis, ut ita dicam, nuptialiter usi sunt. Earum

A quippe usus se ita habet, ut si quid in eis per carnis commistionem fiat, quod excedit generandi necessitatem, quamvis venialiter factum contaminatio sit. Et post paululum: Bonum igitur nuptiarum, per omnes gentes atque homines in causa generandi est, et in fide castitatis; quod autem ad populum Dei pertinet, etiam in sanctitate sacramenti, per quam nefas est etiam repudio discedentem alteri nubere, dum conjux ejus vivit, nec saltem ipsa causa pariendi, quæ cum sola sit qua nuptiæ fiunt, nec ea re non subsequente, propter quam fiunt, solvitur vinculum nuptiale, nisi conjugis morte.

Et statim de ordinatione cleri ad plebem supposuit, sub quo sensu in libro de Nuptiis et Concupiscentia dicit: Ita manet etiam inter viventes quiddam conjugale, quod nec separatione, nec cum altero copulatione possit auferri. Manet autem ad noxam criminis, non ad vinculum fœderis; sicut apostatæ anima, quæ de conjugio Christi recedens, etiam fide perditam sacramentum fidei non amisit, quod lavacro regenerationis acceperat. Redderetur enim procul dubio redeunti, si amisisset abscedens.

Et in præcedentibus ipsius libri dicit de sacramento nuptiarum: Propterea, inquit, sacramentum nuptiarum temporis nostri, sic ad unum virum et uxorem redactum est, ut Ecclesiæ dispensatorem non liceat ordinare, nisi unius uxoris virum. Quod acutius intellexerunt, qui nec eum, qui catechumenus vel paganus habuerit alteram, ordinandum esse censuerunt. De sacramento enim agitur, non de peccato. Nam in baptismo peccata omnia dimittuntur. Sed qui dixit: *Si acceperis uxorem non peccasti, et si nupsit virgo non peccat, et quod vult faciat, non peccat si nubat* (I Cor. vii); satis declaravit nuptias nullum esse peccatum. Propter sacramenti autem sanctitatem, sicut femina, etiamsi catechumena fuerit vitata, post baptismum in Dei virginem consecrari, ita non absurde visum est, eum qui excessit uxorum numerum singularem, non peccatum aliquod commisisse, sed normam quamdam amisisse sacram, non ad vitæ bonæ meritum, sed ad ordinationis ecclesiasticæ signaculum necessariam. Et hinc dicat, si quis ad hæc quæ prædiximus opponere attentaverit, et nunc Stephanus morte præventus fuerit, et illa intacta, sicut hactenus manet, permanserit, et nubere non voluerit, quia catechumena vitata, post baptismum in Dei virginem consecrari non poterit, utrum hæc in sacram virginem ab episcopo consecrari valebit, qui non nisi virginem in virginitalis professione, vel in legitima conjugii copula, sacrare debet: sicut nec episcopus fieri, qui præter virginem et unam duxit uxorem. Dicat etiam, si post mortem Stephani virgo permaneat, et se continere non poterit, et nubere magis quam continere elegerit, utrum fratri ejusdem Stephani copulari valebit. Quibus cum contradicere non valebit, aut in quæstione sua deficiat, aut ei nostra solutio satisfaciat. Et hæc in vita Stephani, de consecratione si delegerit, vel de maritatione si maluerit puella, fieri

posse ratione et auctoritate monstrante cognoscat : A esse servandam, quoniam non solum mulier non habet potestatem corporis sui, sed vir, sed similiter et vir non habet potestatem corporis sui, sed mulier (I Cor. vii) : et propterea, nisi ex communi consensu non valent etiam propter continentiam separari; adeo ut si vir contra voluntatem mulieris conversus tondeatur, aut mulier sine voluntate viri conversa veletur, mulieri vir vel viro mulier, a sancto Gregorio in epistola ad Secundum Tauromitanum episcopum, et in epistola ad Adrianum Panormitanum, jubeatur restitui. Si autem ex communi consensu se mutare permiserint, et quilibet eorum se inde retraxerit, ad conversionem suam sequi parem præcipitur. Causa autem fornicationis vir aut mulier ab invicem discedentes, propter sacramentum nuptialis conjunctionis, aut inuupti quousque alter eorum moriatur manebunt, aut sibi reconciliari studebunt. Reconciliatio autem, post penitentiam et reconciliationem sacerdotalem ejus qui peccavit, fieri debet, ut prius restituarur Ecclesiæ sacramento, et postea nuptiali mysterio.

Unde S. Beda in homilia Evangelii dicit : Nam videtur, iniquus, qui baptizatur in fontem descendere, videtur aquis intingui, videtur de aquis descendere : B sola autem fidelium pietas novit, quia peccator in fontem descendit, sed purificatus ascendit. Cæterum oculis insipientium videtur talis exire de fonte qualis intravit, totumque ludus esse quod agit. Et in hac desponsatione, dotatione, atque in his nuptiis, totum simulatio fuit, non veritas. Propterea sicut sanctus Leo, de his qui formam tantum baptismi sine sanctificationis virtute susceperunt, decernit ut episcopali confirmatione firmentur : ita hæc non conjugii fides, sed copulationis imago, ecclesiastica functione solvatur, et in eo qui indiget ecclesiastica medicina sanetur.

Cæterum si hæc quæ posuimus studiosis vel curiosis nequaquam sufficiunt, apponere adhuc etiam alia procurabimus. Ait enim beatus Augustinus in libro de Nuptiis et Concupiscentia : *Relinquet homo, C iniquus, patrem et matrem, et adhærebit uxori suæ, et erunt duo in carne una (Gen. ii) : quod magnum sacramentum dicit Apostolus in Christo et in Ecclesia (Ephes. v).* Quod est in Christo et in Ecclesia magnum, hoc in singulis quibusque viris atque uxoris minimum, sed tamen conjunctionis inseparabilis sacramentum.

Quapropter legaliter et nuptialiter copulati excepta causa fornicationis, separari non possunt ; et causa fornicationis separati, aut permanere inuupti, aut mutuo debent reconciliari, sicut evangelica et apostolica docet auctoritas, et Africana synodus defini- vit : Placuit, iniquis, ut secundum evangelicam et apostolicam disciplinam, neque dimissis ab uxore, neque dimissa a marito, alteri conjugatur ; sed ita D maneant, aut sibimet reconcilientur. Quod si contempserint, ad penitentiam redigantur. Et quia uxor a marito, vel maritus ab uxore, nisi causa fornicationis, non valet neque debet discedere, ex hac evangelica et apostolica doctrina beatus Augustinus in libro primo de adulterinis Conjugiis ad Pollentium dicit : Quis est qui dicat, si discesserit mulier a viro non fornicante, ut inuupta permaneat, cum ei nisi a viro fornicante discedere omnino non liceat ? Et item : Hanc solam causam fornicationis Dominus magister excepit, cum de dimittenda loqueretur uxore : deditque intelligi talem formam etiam a viro

esse servandam, quoniam non solum mulier non habet potestatem corporis sui, sed vir, sed similiter et vir non habet potestatem corporis sui, sed mulier (I Cor. vii) : et propterea, nisi ex communi consensu non valent etiam propter continentiam separari; adeo ut si vir contra voluntatem mulieris conversus tondeatur, aut mulier sine voluntate viri conversa veletur, mulieri vir vel viro mulier, a sancto Gregorio in epistola ad Secundum Tauromitanum episcopum, et in epistola ad Adrianum Panormitanum, jubeatur restitui. Si autem ex communi consensu se mutare permiserint, et quilibet eorum se inde retraxerit, ad conversionem suam sequi parem præcipitur. Causa autem fornicationis vir aut mulier ab invicem discedentes, propter sacramentum nuptialis conjunctionis, aut inuupti quousque alter eorum moriatur manebunt, aut sibi reconciliari studebunt. Reconciliatio autem, post penitentiam et reconciliationem sacerdotalem ejus qui peccavit, fieri debet, ut prius restituarur Ecclesiæ sacramento, et postea nuptiali mysterio.

Et hinc sanctus Augustinus in secundo libro de adulterinis Conjugiis dicit : Licite itaque dimittitur conjux ob causam fornicationis, sed manet vinculum pudoris, propter quod fit reus adulterii qui dimissam duxerit etiam ob hanc causam fornicationis. Sicut enim in se manente sacramento regenerationis excommunicatus cujusquam criminis reus, nec illo sacramento caret, etiamsi nunquam reconcilietur Domino ; ita si manente in se vinculo fœderis conjugalis, uxor dimittitur ob causam fornicationis, nec carebit illa vinculo, etiamsi nunquam reconcilietur viro : carebit autem, si mortuus fuerit vir ejus ; reus vero excommunicatus ideo nunquam carebit regenerationis sacramento, etiam non reconciliatus quoniam nunquam moritur Deus. Remanet itaque ut, si sapere secundum Apostolum volumus, non dicamus virum adulterum pro mortuo deputandum, et ideo licere uxorem ejus alteri nubere. Quamvis enim sit mors adulterium, non corporis, sed quod pejus est, animæ ; non tamen de ipsa morte loquebatur Apostolus, cum dicebat : *Quod si mortuus fuerit vir ejus, cui vult nubat (I Cor. vii)* ; sed de illa sola qua de corpore exitur. Et item in eadem : Hæc namque alligatio quandoquidem non solvitur, etiamsi per repudium conjux a casta conjuge separatur ; multo minus solvitur, si non separata mœchetur. Ac per hoc non eam solvit nisi mors conjugis, non in adulterium corruentis, sed de corpore exeuntis. Quapropter si recesserit mulier ab adultero viro, et ei reconciliari non vult, maneat inuupta : et si dimiserit vir adulteram mulierem, et eam non vult recipere, nec post penitentiam, custodiat continentiam, etsi non voluntate eligendi potioris boni, certe ex necessitate vitandi perniciosi mali.

Et hinc latius in præfatis libris doctor facundissimus disputat, sicut qui intelligenter legerit, nescire non poterit. Sed et in primo libro de Nuptiis et Concupiscentia dicit, quia lavacro regenerationis,

et verbo sanctificationis, omnia prorsus mala hominum regenerantium mundantur, atque sanantur, non solum peccata, quæ omnia tunc remittuntur in baptismo, sed etiam quæ posterius humana ignorantia vel infirmitate contrahuntur: non ut baptismus, quoties peccatur, toties repetatur, sed quia ipso, quod semel datur, fit ut non solum antea, verum etiam postea, quorumlibet peccatorum venia fidelibus impetretur. Quid enim prodest vel ante baptismum pœnitentia, nisi baptismus sequeretur, vel postea, nisi præcederet? Et in epistola ad Bonifacium scribit: Non aliquid remanet in baptismo, quod non dimittatur, præteritorum omnium peccatorum, si tamen ipse baptismus non frustra foris habeatur sed aut intus detur, aut si foris datur, non foris cum illo remaneatur. Et quidquid ab eis, qui post acceptum baptismum hic vivunt, humana infirmitate contrahitur quarumcunque culparum, propter ipsum lavacrum dimittitur.

Hinc liquido demonstratur, quia sicut ut semel acceptum baptismi sacramentum, quo quisque fidelis in unitate catholicæ Ecclesiæ Christo incorporatur, postea nulla interveniente causa amittitur: sic et vinculum conjugale, legaliter et nuptialiter celebratum, indissolubiliter manet connexum licet fornicationis causa vel quacunque de causa videatur separatum. Causa vero fornicationis separatum si post pœnitentiam fuerit reunium, non tamen ideo erit reiteratum, quia permanet unum. Sed si in continentia pœnitentia, quod magis pœnitentibus convenit manere conjuges non valebunt, reconciliatione medicinali ex consensu mutuo, post ecclesiasticam reconciliationem, indulgentia computabitur esse sanatum: sicut nec baptismum, quoties peccatur, toties reiteratur; sed pœnitentiæ medicamento per reconciliationem ecclesiasticam, non iteratum creditur, sed divina gratia reparatur. Reparari autem de non amisso eo modo dicitur, sicut mens et corpus eucharistiæ perceptione reparari, et satisfactione congrua renovari mentis nostræ spiritus legitur. Et sicut quæ ante baptismum, vel post baptismum humana ignorantia vel infirmitate peccantur, baptismatis munere est ut dignis pœnitentiæ fructibus remittantur: ita nuptiarum bono defenditur, ne crimina habeantur, quæ ab Apostolo secundum indulgentiam conceduntur: illa videlicet, quæ concupiscentia impellente non nisi conjugibus conceduntur; tantum ut cum legaliter nuptis naturaliter concumbatur. Naturaliter autem dicitur, quia de Ona legitur (*Gen. xxxviii*), quod cum uxore naturaliter non concumbens interit percussus a Domino.

Unde beatus Augustinus in libro de bono conjugii, et de Nuptiis et Concupiscentia, et in aliis suis libris sufficientissime disputat. Sed et ibidem inter alia dicit: Quod ergo præcipiunt apostoli conjugibus, hoc est nuptiarum; scilicet, uxori vir debitum reddat, et uxor viro, et filios procreare, matres familias esse. Quod autem venialiter concedunt, aut quod impedit ad orandum, non cogunt nuptiæ, sed ferunt.

A Et sicut opera bona ad salutem æternam non proficiunt sine baptismatis sacramento: et non est baptismum verum, quia non est Secundum Scripturam unum, id est, in unitate catholicæ fidei unicum, si catholice non fuerit celebratum: sic et legitimum et verum non potest esse conjugium, in quo docetur nuptiale non esse mysterium, vel quod non docetur nuptialiter copulatum. Unde et Dominus de nuptiis Joannem volentem nubere, ut tradunt historiæ, non post celebratas nuptias, sed de nuptiis, et ante carnis copulationem, vocando retraxit, qui legem non solvere, sed adimplere venit. De cujus scilicet Joannis futura uxore, nisi eum Dominus, non solum ante carnis unionem, verum et ante nuptiarum percelebrationem, revocaret, sicut de beati Petri uxore, quæ continentissime perseveravit, non legitur utrum in continentia manserit, an secundum legem veterem, ut semen in Israel relinqueret, alii forte nubere delegerit: in cujus arbitrio hoc non maneret, si post legales nuptias fuissent nuptialiter copulati; nec Joanni esse licitum secundum Evangelii documentum, si desponsatam, dotatam, et publicis nuptiis honoratam duxisset, etiam ante unionem carnis relinquere, si non delegisset ex consensu in continentia permanere, sed aliam ducere. Sicut non licet Stephano istam, quam desponsavit, dotavit et publicis nuptiis honoravit, licet ei non sit misius, relinquere, et aliam cum pœnitentia, vel sine pœnitentia ducere, nisi in istius concubitu incestale malum potuisset intervenire: sed aut ex consensu cum ipsa in continentia Stephanus permaneret, aut si se continere non posset, cum ea nuptialiter copulatus maneret. Si autem sine incestu, cum hoc debito ordine commisti forent, nisi ex mutuo consensu propter continentiam separari non possent, aut propter fornicationem separati, vel in nuptiis permanere, vel sibimet reconciliari deberent: et si cum incestu fuissent conjuncti, separatione eorum ac pœnitentia adulterium secundum auctoritatem canonicam sanari deberet.

Et hæc sibimet ita concinere sacra demonstrat auctoritas, dicens de Maria et Joseph: *Antequam*, inquit, *convenirent* (*Matth. i*), id est, antequam nuptiarum solemnia rite celebrarent. Verbo enim conveniendi, non ipsum concubitum, sed nuptias, quæ præcedere solent concumbendi tempus, insinuat, quando ea quæ prius desponsata fuerat, esse conjux incepti. Et paulo post: *Voluit occulte dimittere eam* (*ibid.*). Vides Joseph sponsam concepisse suam, quam bene noverat a nullo viro fuisse attentam, cum esse justus et juste omnia vellet agere, optimum duxit, ut neque hoc aliis proderet, neque eam ipse acciperet uxorem, sed mutato occulte nuptiarum proposito, in conditione eam sponsæ manere pateretur ut erat. Sed si eam occulte dimitteret, neque acciperet conjugem, et illa sponsa pareret, nimirum perpauca essent, qui eam virginem, et non potius autumarent esse meretricem, et quasi adultera lapidaretur a Judæis.

Unde et sacri canones in capitulo, in quo de parentibus, qui fidem sponsaliorum frangunt, decernentes providentissime statuerunt adungere (*conc. Elib. c. 54*). Si tamen, inquit, sponsus vel sponsa in gravi crimine fuerint deprehensi, excusati erunt parentes : quia quod parentes fidei fractæ debuissent iudicium punitiois sustinere, ad eos jam qui meruerant pertinere. Et ut ad superioris exempli ordinem redeamus, propterea consilium Joseph repente consilio meliore mutatur, ut videlicet ad conservandam Mariæ famam, ipse eam celebrato nuptiarum conjugio conjugem acciperet, sed castus castam perpetuo custodiret, ut sequitur : *Hæc autem eo cogitante ecce angelus Domini in somnis apparuit ei dicens : Joseph, fili David, noli timere accipere Mariam conjugem tuam (Matth. 1)*.

De cujus conjugii genere Siricius ad Himerium Tarraconensem episcopum scripsit, dicens (*cap. 4*) : De conjugii violatione requisisti, si desponsatam alii puellam alter in matrimonium possit accipere. Hoc ne fiat modis omnibus inhibemus, quia illa benedictio, quam nupturæ sacerdos imponit, apud fideles cujusdam sacrilegii instar est, si ulla transgressione violetur. Et in concilio Ancyrano (*can. 10*) : Desponsatas puellas, et post ab aliis raptas, placuit erui, et eis reddi, quibus ante fuerant desponsatæ. Etiamsi eis a raptoribus vis illata constiterit. Quæ supra taxato ordine non modo sponsæ, verum etiam quasi conjuges factæ, etiam violenter corruptæ, ita sponsis reddendæ sunt, sicut etiam separati, sive fornicationis causa, et absque mutuo consensu disjuncti conjuges rejungendi sunt : fornicationis autem causa separati, aut innupti manebunt, aut ex consensu sibimet mutuo reconciliabuntur. De nuptiatis autem, sed innuptis, id est de nuptiarum celebratione, in quibus arrhæ sponsaliorum, et benedictio sacerdotalis, et dotationis confirmatio, et Christi atque Ecclesiæ mysterium ad completionis perfectionem dirigitur, sed non carnis unione completur, sed consilium bonum, ut de Joseph diximus, consilio meliore mutatur, ut in continentia perpetuo maneatur, ibidem iterum scriptum est : *Exurgens autem Joseph a somno, fecit sicut ei præceperat angelus Domini, et accepit conjugem suam, et non cognoscebat eam (Matth. 1)*. Accepit autem ad nomen conjugis, ob causas necessarias quæ tunc imminabant; et non cognoscebat eam ad opus conjugale, D sed uterque in continentia permanebant.

Quod et Paulus licenter fieri posse in Epistola prima ad Corinthios, et Augustinus in libro primo de Nuptiis et Concupiscentia demonstrat dicens : Quibus vero placuerit ex consensu ab usu carnalis concupiscentiæ in perpetuum continere, absit ut vinculum inter illos conjugale rumpatur : imo firmitus erit, quo magis ea pacta secum inierint, quæ charius concordiusque servanda sunt, non voluntaris corporum nexibus, sed voluntariis affectibus animorum. Neque enim fallaciter ab angelo dictum est ad Joseph : *Noli timere accipere Mariam conjugem*

A tuam, et reliqua, quæ latius ibidem prosequitur.

Qua de re his edocti testimoniis sacræ auctoritatis, quicumque desponsatas, dotatas, publicis nuptiis honoratas uxores ingenuas, vel ob hoc factas ingenuas duxerint, aut in perpetua continentia maneant, aut nisi hoc crimen incestuale, vel aliud quodlibet prohibuerit, quod in se vel secum non recipit Christi et Ecclesiæ sacramentum, nuptialiter nubant, si se ex consensu continere non poterunt, et non nisi fornicationis causa disjungantur : qui disjuncti, aut innupti permaneant, aut si continere non possunt, sibi post penitentiam reconcilientur. Ubi autem, ut in Stephani nuptiis, periculum cum periculo vitandum emergerit, minus periculum ad majus devitandum periculum, ut sanctus Gregorius in libris docet moralium, eligatur : sed et ipsum quod eligitur periculum non negligatur, verum dignis penitentiarum fructibus, videlicet piis operibus, et profusis lacrymis, ne æternaliter periculum maneant, sed salutari remedio temperetur, aut penitus evadatur, apud omnipotentis Domini misericordiam obtineri modis omnibus satagatur.

Nos autem hæc his idcirco interponere necessarium duximus, quia quosdam, etiam qui se doctores esse dicebant, audivimus pertinaci contentione intendere, quasi ex verbis beati Ambrosii, et sancti Augustini, quæ parum diligenter intenderant, virum non fornicantem, et a fornicatore muliere discedentem, aliam illa vivente ducere posse, et quæ causa fornicationis a viro recesserit, non posse reconciliari : illam autem quæ non causa fornicationis, sed alia qualibet recesserit, aut reconciliari, aut innuptam debere remanere ; non advertentes, quia sic adulterino sensu interpretabantur verba Apostoli, sicut et illi, contra quos olim beatus Augustinus istos libros descripserat, et Africana synodus, quæ præmissimus, definivit, quando et Coelestianos evisceravit, et ipsas etiam Pelagianorum medullas excussit. Nec mirum : sic enim pravo erant infecti dogmate, sicut et moderni Prædestinatiani, qui veterum Prædestinatianorum hæresim, quasi de sancti Augustini verbis compilatam instaurare laborant. Quorum capita confregit, et verticem capillorum perambulantium in delictis suis conquassavit, atque contrivit beatus Coelestinus papa in epistola decretali ad Venerium, et cæteros Gallicanos episcopos : et isdem beatus Augustinus in libro de Correctione et Gratia, et de Prædestinatione sanctorum, ac Bono perseverantiæ. Sed et sanctus Prosper, ex delegatione sedis apostolicæ, in absolutionibus objectionum Gallorum, Vincentianorum, atque Massiliensium, in libris etiam de Vocatione gentium, catholico sensu, et perfecta evidentissimæ rationis facundaque doctrina eorum argumenta dissolvit. Verba autem eorumdem auctorum, unde imperiti magistri talia insulsa captarunt, hic ponemus, si non pro solutione nodum componere vitaremus.

Addendum etiam necessarium duximus, ut his

sanctorum sententiis cognoscamus, nuptias, quas A concubitus pro quibusdam causis non sequitur, solvi posse, et propter incontinentiam feminas ad alias convolare valere. Sed subtilis investigatio, et rationabilis discretio in his prius est adhibenda, utrum quasi naturalis in viris sit hujusmodi commistionis impossibilitas (quia et sunt eunuchi, sicut scriptum est, qui de matris utero sic nati sunt,) an hoc impedimentum operatione diaboli, sicut fieri assolet, illis accidit. Quod si per sortiaras (33. q. 4), atque maleficas, occulto, sed nunquam vel nusquam injusto, Dominici iudicio permittente, et diabolo operante, accidit, hortandi sunt quibus ista eveniunt, ut corde contrito, et spiritu humiliato, Deo et sacerdoti de omnibus peccatis suis puram confessionem faciant, et profusis lacrymis, ac largioribus elemosynis, et orationibus, atque jejuniis, Domino satisfaciant, B cujus iudicio, pro suo merito, et ab illa benedictione privari inviti meruerunt, quam Dominus primis parentibus ante peccatum in paradiso donavit, qua etiam post peccatum genus humanum in totum privari non voluit: et per exorcismos, atque cætera medicinæ ecclesiasticæ munia, ministri Ecclesiæ tales, quantum annuerit Dominus, qui Abimelech ac domum ejus Abrahæ orationibus sanavit, sanare procurent (*Gen. xx*). Qui forte si sanari non poterunt, separari valebunt. Sed postquam alias nuptias expetierit, illis in carne viventibus, quibus junctæ fuerint, prioribus quos reliquerant, etiamsi possibilitas concubendi eis reddita fuerit, reconciliari nequibunt. Incestuosas autem nuptias, propter incestus crimen, quod habere non potest, ut prius diximus, et iterum dicimus, Christi et Ecclesiæ sacramentum, non debere manere, sed crimen separatione et pœnitentia debere sanari noscamus. Stephani vero nuptias, de quibus agitur, ne incestus admittatur, debere dissolvi modis omnibus cognoscamus: et nuptias quæ nuptiale habent mysterium, non quacunque alia, nisi sola fornicationis causa, posse dissolvi, docente Veritatis auctoritate teneamus. Quoniam etsi communi consensu continentiam voverint conjuges, tanto obnixius, quanto spiritualius in Domino juncti manebunt: quorum conjunctioni, ac indivisæ separationi, nulla simulatio in oculis ejus intervenire valebit, qui cordium ac renum scrutator esse dignoscitur.

Unde Stephanus pro fornicatione, de qua, nisi D coactus necessitate eam publicaret, secreta confessione pœnitentiam agere poterat, et quia sacro nuptiarum mysterio, licet necessitate compulsus, simulationis culpam superinduxit, sicut ille qui zizaniam tritico supereminare non metuit: et quoniam post tale connubium, antequam legaliter dissolveretur, quod quasi legaliter visum fuit initum, alios pravo exemplo destruens, concubina usus fuisse dicitur, juxta modum culpæ, cum pietatis modestia, quia reverentiam Deo exhibuit, ne incestum fornicationi adjungeret, a proprio episcopo secundum ejus arbitrium, qui canones sic decernunt, pœnitentiam regu-

larem suscipiat, et cum dignis pœnitentiæ fructibus peragat, ut qui suo neglectu Ecclesiam, et multos Ecclesiæ filios scandalizare præsumpsit, Ecclesiæ et ejus rectoribus atque filijs satisfaciat, et post satisfactionem, si se continere non poterit, juxta sententiam magni Leonis papæ ad Rusticum Narbonensem episcopum, et secundum decreta sancti Toletani concilii (*Decret. cap. 25, conc. Tolet. vi, can. 8*), copulam uxoris legitimæ expectat, ne iterum fornicationis crimen incurrat. In quo tamen, cum eodem Patre loquentes sanctissimo, non regulam constituimus, sed quid sit tolerabilis æstimamus. Nam secundum veram cognitionem nihil magis ei congruit qui pœnitentiam agit, quam castitas perseverans, et mentis, et corporis. Cui ne laqueum injiciamus, remediū manū porrigimus, non imperium actionis imponimus.

Quia etiam sanctus Siricius de benedictione sponsarum in decretis suis quædam ponere studuit. De quibus, quod notum est, sacri canones decernunt, et nos exinde aliqua diximus, et plura alia diceremus si his nuptiis, de quibus loquimur benedictionem sacerdotalem datam fuisse ex more ecclesiastico audiremus. Sed quibus debita fides deficit, locum benedictio sacerdotalis non habuit: præsertim cum scriptum sit: *In quacunque domum intraveritis, primum dicite: Pax huic domui; et si fuerit in ea filius pacis, requiescet super illum pax vestra: sin autem, pax vestra ad vos revertetur (Luc. x)*. Et Petrus Domino et fidelibus dicit: *Fide purificans corda eorum (Act. xv)*. Et item scriptum est: *Omnia opera ejus ex fide, et iterum, Quod non est ex fide, peccatum est (Rom. xiv)*. Et ubi peccatum manet, ante congruam satisfactionem benedictio locum non habet. Nihil enim, ut beatus dicit Gregorius, prodest oratio, ubi iniqua est actio.

Post hæc omnia, si Regimundus filiam suam recipere non voluerit, aut illa in sua libertate manere decreverit, indicandum est eis, quoniam si ipsa stuprum quodecunque consenserit, ad illum, vel ad illam, non autem ad Stephanum, quod perpetratum fuerit pertinebit. Debetis etiam vos, sancti antistites, et Regimundo et Stephano, atque illorum parentibus et amicis, ex divino mandato suggerere, intimare, atque præcipere, ut pacem inter se, quam Dominus præcepit, et sine qua cum nisi ad iudicium videre non poterunt, habeant; et terræ principes cum primoribus debent satagere, ne pro hac causa in Ecclesia, et in regno, scandala et seditioes fiant. Quod qui eorum obedire contempserit, juxta evangelicum præceptum, sicut ethnicus et publicanus efficiatur: et secundum Apostolum, qui non obedit verbo notetur, et nemo ei commisceatur; et qui hanc pacis doctrinam non receperit, nullus ei Ave dicat, ut non communicet peccatis ejus, et sicut canones decernunt, oblatio ejus nec in sacrario recipiatur. Et qui ad pacem redire noluerit, tandiu excommunicatus maneat, quandiu ad pacem redire

contempserit, et ad charitatem, quæ operit multitudinem peccatorum, quanto citius redire festinet.

Et item in canonibus scriptum est, ut de concilio bini vel terni iudices ad quæque definienda deligantur atque mittantur, quæ ecclesiastico debent examinari ac diffiniri iudicio, et alibi rationabilis atque convenientius quam in eodem concilio poterunt definiri; et quisquis probatus fuerit pro contumacia nolle obtemperare iudicibus, cum hoc primæ sedis episcopo fuerit probatum, det litteras ut nullus ei communicet donec obtemperet. Qua de re sancta synodus vos, qui primarum sedium regni Aquitanici estis, ad hanc causam definiendam, cum coepiscopis vestris, et principibus, ac terræ illius primoribus, eligere studuit quorum definitioni sine suo periculo et excommunicationis invectione, quisquis vobis obtemperare distulerit, evadere non valebit.

Hæc de evangelica veritate, et apostolica atque canonica auctoritate, seu catholicorum doctrina et traditione, sicut synodus sancta iussit, pro modestitate ingenioli mei colligere studui. De quibus, sicut audivi quoniam quidam faciunt, nemo contra me debet irasci: quia non meo sensu mea verba composui, neque quod meum non est mihi arrogare præsumpsi, neque statuendo vel imperando in hac causa, quod non est meum, quiddam scribere procuravi, nullius præiudicans sanæ sententiæ, nec deshonorans auctoritatem, aut ad obsequendi quemquam cogere volens necessitatem. Sed cum beato Leone scribente ad Rusticum Narbonensem episcopum, dilectissimam atque reverentissimam fraternitatem vestram commoneo, quia sicut quædam sunt, quæ nulla possunt ratione convelli ita multa sunt quæ aut pro consideratione ætatum, aut pro necessitate rerum oporteat temperari: illa semper conditione servata, ut in his quæ vel dubia fuerint, aut obscura id noverimus sequendum, quod nec præceptis evangelicis contrarium, nec decretis sanctorum inveniat adversum.

EPISTOLA XXIII.

AD CAROLUM IMPERATOREM.

De auctoritate Vitæ S. Dionysii ab Anastasio translata.

(Apud Mabill. Analect., page 212.)

Domno glorioso CAROLO imperatori Augusto, HINCMARUS, nomine, non merito, Rhemorum episcopus, ac plebis Dei famulus.

LECTA beati Dionysii Passione a Methodio Constantinopolim Roma directo Græcè dictata, et ab Anastasio utriusque linguæ perito et undecunque doctissimo, apostolicæ sedis bibliothecario. Latine conscripta, sicut in præfatione sua narrat, recognovi his quæ ibi scripta sunt ea quæ in adolescentia legeram consonare, videlicet per quos et qualiter gesta martyrii beati Dionysii sociorumque ejus ad Romanorum notitiam indeque ad Græcorum pervenerint. Nam quando Deo disponente in Francofurth palatio nati estis, Hucberto præcentori palatii episcopium Meldensis urbis commissum est,

A ubi propter Hilderici episcopi ætatis prolixitatem et diturnam ægritudinem, quædam ad scientiam et religionem pertinentia, necnon et ædificia et cætera quæque necessaria neglecta invenit. Quapropter a familiari suo Bodone clerico domni et nutritoris mei Hilduini abbatis sacri palatii clericorum summi quemdam clericum ipsius Bodonis propinquum, nomine Wandelmarum, qui cantilenam optime a Teugario magistro in sancti Dionysii monasterio didicit, ad crudiendos clericos suos obtinuit; cui abbatiolam sancti Sanctini in beneficium dedit. Idem autem Wandelmarus in loco sibi commisso quaternunculos valde contritos, et quæ in eis scripta fuerant pene delecta, de Vita et actibus beati Sanctini reperit, quos ob familiaritatis notitiam, et quia me sciolum putabat, ad exhaurienda ea quæ in eisdem quaternunculis contineri videbantur, et ad transcribendum aperte in nova pergamina mihi commisit. Quod est studioso peregrino, et mihi emendata emendanti restitui. Sed quia diu est quod idem Wandelmarus etiam ante obitum Hucberti defunctus fuit, et sicut audivi, idem locus neglectus exstitit, ac demum in eadem urbe Nortmanni fuerant, et quædam incendio concremaverant, quædam vero prædantes diriperant, nescio si ipsi quaternunculi vel eorum exemplaria in eadem urbe valeant reperiri. Propterea eorum exemplarium quod mihi retinui, vestro devoto et bono studio offerendum putavi: ut si quæ sunt illorum reliquiæ, qui negabant Dominum et Patrem nostrum, patrum nostrum Dionysium esse Areopagiten, et a beato Paulo apostolo baptizatum, ac Atheniensium ordinatum episcopum, et in Gallias a sancto Clemente directum, ex his quæ Græcæ testificatio et Romanæ sedis assertio et Gallicana intimat contestatio, ratum et in hac recognoscant, quod inde ante nos dictum est. Nam veritas sæpius agitata magis splendescit in lucem.

EPISTOLA XXIV.

AD CONVENTUM EPISCOPORUM.

Responsio ad interrogationem Guntharii archiepiscopi Coloniensis, de uxore Bosonis quæ virum suum relinquerat.

(Apud Sirmond., ex veteri codice Biblioth. Thunæ.)

HINCMARUS nomine, non merito, Rhemorum episcopus, ac plebis Dei famulus, sacro CONVENTUI.

QUIDDAM beato Ambrosio quædam proposuit, ad quorum solutionem in crastina illum ad ecclesiam invitavit, unde sermonem adoriens (*De Incarn. Domini*): Ad solvendum, inquit, debitum creditori meo adveni. Sed et ego de mihi proposita heri quæstione, cujus solutionem nunc assero, tunc domno Guntario pro tribus causis respondere non potui: videlicet, quia ad revertendum jam jamque commovebamur, et quoniam plures viri sapientes in conventu consistunt, quorum quidam certant proponere, quidam autem absolvere, interdum necessitate compulsus tanta velocitate cogor verba con-

fundere potius quam proferre, antequam alius mihi sententiam ab ipsis labiis rapiat, ut nec bucca efferre sufficiat quod vel convulsa memoria subministrat. Sed et sicut scriptum est : *Qui fortiter premit ubera, exprimit butyrum; et qui vehementer emulget, elicit sanguinem* (Prov. xxx), timui ne si inconsulte ac præpropere responderem, in carnalem intellectum deciderem, quia occupatum ad alia cor meum me dereliquerat, et lumen intelligentiunculæ serenum mihi vel mecum non erat. Quapropter distuli, donec si forte secundum prophetam (Ezech. iii) mitteretur manus, quæ me cibaret intellectus volumine : quæ videlicet toties mittitur quoties quæ ante nesciebamus divina nobis gratia revelantur. Qua de re propositionem domni Guntharii præferamus, et solutionem ex largitione divinæ gratiæ pro captu nostræ intelligentiæ referamus.

« Si, inquit, femina Bosonis ad nos venerit, et publice confessa fuerit, dicens : Mea culpa, virum meum adulteravi : quapropter timore mortis perterrita ad vos confugi, qui Dei estis vicarius, ut me et Deo salvetis, et a morte corporali, quæ mihi imminet ex parte mariti mei, me liberetis ; utrum debeam illi publicam pœnitentiam imponere, quam aut in parochia mea, in quam confugit, sejuncta a viro suo peragat, aut eam eidem viro suo sub tali conditione reddere debeam, ut nullo modo eam interficiat, sed post pœnitentiam illam in conjugio habeat. Quam si interfecerit, sciat se ecclesiastica damnatione plectendum, quoniam nefas est quemquam in publica pœnitentia positum a quocunque interfici. »

Respondemus : Feminam illam in tua vel alterius cuiusque parochia natam, baptizatam, nutritam, adultam, facultatum hæreditate ditatam, Boso ex alia non modo parochia, verum ex alia provincia natus, et per omnia incrementa in perfectum virum perductus, sub alterius episcopi cura degens secundum legem divinam et humanam, apud eos quorum intererat obtinuit, desponsavit, dotavit, publicis nuptiis honoravit, et sibi in conjugii copula sociavit, et unum corpus unamque carnem secum effecit, sicut scriptum est : *Erunt duo in carne una; jam non sunt duo, sed una caro* (Gen. ii ; Matth. xix) ; et : *Quod Deus junxit, homo non separat* (Matth. xix) ; nisi forte perpetuo, ex consensu, propter continentiam, unde tanto conjuncti sunt amplius quanto et spiritualius ; aut ad tempus, ut vacent orationi, et revertantur iterum in idipsum, ne tententur a Satana propter incontinentiam (I Cor. vii) ; aut causa fornicationis, qua separati, aut sic, id est inuupti et separati maneat, aut mutuo reconcilientur. Quomodo poteris inferiorem partem corporis hominis illius qui sub alterius providentia degit, separare, et tenere sub pœnitentia, quæ nec orationi continenter sine consensu partis superioris vacare potest ? Mulier enim non habet potestatem

corporis sui, sed vir ; et vir non habet potestatem corporis sui, sed mulier (*Ibid.*). Uxori vir debitum reddere debet, et uxor viro, ut non tententur a Satana propter incontinentiam. Quod qui eorum non fecerit, nisi ex consensu propter Deum dimiserit, parem suum, imo partem corporis sui mœchari ; facit. Si tu huic feminae pœnitentiam posueris, quæ pars est corporis viri diocesis alterius, sine consensu rectoris et viri, contra regulas ecclesiasticas facis, et, docente Leone papa, honoris communionem privaris. Et item : Si huic feminae lege pœnitentiæ manum imponis, et illa membrum caput suum (caput enim mulieris vir), in alteram provinciam secuta fuerit, sub providentia alterius præsulis quis curam de ejus accipiet pœnitentia ? Quis ut reconcilietur secundum canones, ad ejus attendet lacrymas et confessionem, quam non audivit ? Quis ei manum ad reconciliationem imponet, sacris regulis decernentibus, ut nemo episcoporum sub manu positum alterius sacerdotis ad reconciliationem suscipiat, neque reconciliatum sine litteris vel consensu reconciliatoris recipiat ? Et quomodo partem corporis, imo hominem alterius episcopi et parochiæ judicabis, quin pœnitentialem iudicio condemnabis ? cum scriptum sit, quod sanctus Gregorius hinc in suis decretis exposuit : « *Si transieris per messem amici tui, fricans confricabis spicas manibus tuis, et manducabis, falcem autem non mittas* (Deut. xxiii), sive falce non metas, id est homines parochiæ alterius verbo prædicationis et exemplo operis (ita tamen ut non conculces simpliciorum fratrem tuum, ne indicas in ruinam et laqueum, vanam scilicet gloriam diaboli) in corpus Christi, quæ est Ecclesia, festina trajicere, falcem autem iudicii non permitteris mittere, vel falce iudicii metere, id est incidere sive abscidere. » Et quoniam, sicut ipse Boso dicit, eidem mulieri, quæ caro sua est, nullum crimen impingit, sed non modicam negligentiam, quia ab ejus se subtraxit servitio, et quantum ex ipsa est, illum mœchari fecit, contra auctoritatem atque justitiam eum dimittens, et in aliis regnis circiter per triennium immorans, contumax mandatis illis adeo exstitit, ut nec compellata per tanta temporum spatia ad eum redierit, pro domni apostolici est jussione illi paratus indulgere ; restat ut rex, in cuius regno degit, secundum descriptionem chirographi regum nostrorum, eam ad viri sui præsentiam adduci faciat, et tu episcopus, in cuius parochia immoratur, quia hoc non est regis, sicut sanctus Gregorius de his qui ad Ecclesiam confugiunt præcipit, si exposcit necessitas, securitatem de æquitate sibi servanda apud virum ejus expectas et obtineas, et post hoc missus reipublicæ viro uxorem fuga lapsam restituat. Qui vir, si sacramentum fregerit, et apostolicis monitis inobediens exstiterit, episcopus ad ejus curam pertinet, canonicum iudicium in illum proinde exerat. Si autem confessa, vel legaliter de adulterio convicta, incolumis evaserit, lege ecclesiastica pœnitentiæ illam

isdem episcopus subigat, quia et mundanis legibus A
cautum atque usitatum esse dignoscitur, ut mala
quæ perpetrantur in illis locis emendantur, in quibus
perpetrata fuisse legaliter comprobantur. Præter hæc
nihil mihi videtur agendum, nisi aut domni apostoli-
lici monita exsequamur aut iudicium incurramus.

De sacramento autem, quoniam quasi ad pietatem
confugit ecclesiasticam, quia tuum, id est episcopale
poposcit auxilium, quod ex impunitate, in membro-
rum vel vitæ, si ita qualitas facti exegerit, legali
privatione requiris, super id quod sanctus decrevit
Gregorius pro eis etiam qui ad sacra sacra con-
fugerint requirendum, videlicet de æquitate ser-
vanda, subtiliter debes perpendere, ne videaris vel
dicaris non solum Ecclesiæ, verum et totius mundi
status et ordinem atque vigorem velle confundere B
atque destruere, et apostolicæ atque apostolicorum
virorum doctrinæ obsistere, qui non solum leges a
Christianis regibus promulgatas observaverunt, et
observantes tradiderunt, verum etiam promulgandas
expetierunt, sicut in Carthaginensis atque Africani
concilii cæterorumque conciliorum canonibus, et in
decretis apostolicæ sedis multoties reperitur. Unde
et sanctus Gregorius commonitoria ad Joannem de-
fensorem et ad alios etiam ex integro de legalibus
edictis considerat, et sanctus Gelasius ad imperato-
rem Anastasium scripsit (*epist.* 10, sub initium) :
« Si enim, inquit, quantum ad ordinem publicæ
pertinet disciplinæ, cognoscentes imperium tibi su-
perna dispositione collatum, legibus tuis ipsi quoque
parent religionis antistites, ne vel in rebus mundanis
exclusæ videantur obviare sententiæ, quo, oro, te
deceat affectu eis et convenit obedire, qui prærogan-
dis venerabilibus sunt attributi mysteriis. » Et san-
ctus Leo ad Turibium Asturicensem episcopum scri-
bens (*epist.* 4, sub initium) : « Merito, inquit, patres
nostri, sub quorum temporibus hæresis hæc nefanda
prorupit, per totum mundum instanter egerunt ut
impious furor ab universa Ecclesia pelleretur; quando
etiam mundi principes ita hanc sacrilegam amen-
tiam detestati sunt, ut auctorem ejus cum plerisque
discipulis legum publicarum ense prosternerent.
Videbant enim omnem curam honestatis auferræ,
omnem conjugiorum copulam dissociari, simulque
divinum jus humanumque subverti, si hujusmodi
hominibus usquam vivere cum tali professione li-
cuisset. Profuit diu ista districtio ecclesiasticæ leni-
tati, quæ etsi sacerdotali contenta iudicio cruentas
refugit ultiones, severis tamen Christianorum prin-
cipum constitutionibus adjuvatur, dum ad spiritale
nonnunquam recurrunt remedium qui timent corpo-
rale iudicium. Ex quo autem multas provincias
hostilis occupavit irruptio, et executionem legum
tempestates interclusere bellorum, ex quo inter sa-
cerdotes Dei difficiles commeatus, et rari cœperunt
esse conventus, invenit ob publicam perturbationem
secreta perfidia libertatem, et ad multarum mentium
subversionem his malis est incitata, quibus debuit
esse correctæ. »

Lege librum xvi legis Romanæ, lege decreta Da-
masi, percurre Leonis epistolas et cæterorum pon-
tificum de diversis conciliis ad imperatores trans-
missas; revolve Augustorum edicta de hæreticis ad
petitionem pontificum promulgata, scrutare Cæsa-
rum nostrorum capitula, et invenies quantum pro-
fuerit atque prosit legum severitas, non solum eccle-
siasticæ lenitati, verum totius Christianitatis optan-
dæ paci et colendæ tranquillitati. Sapientia nam-
que, videlicet Christus Dei virtus et Dei sapien-
tia dicit : *Per me reges regnant, et conditores legum
justa decernunt (Prov. viii)*; et Apostolus : *Lex
quidem est sancta, et mandatum sanctum, et justum
et bonum (Rom. vii, 12)*. Unde Ambrosius : « Man-
datum legem intelligi evangelicus sermo testatur. »
Ait enim : *Si vis ad vitam venire, serva mandata
(Matth. xix)*. Et item Apostolus : *Lex propter trans-
gressiones posita est (Gal. iii, 19)*. Et : *Lex non est
posita iustis, sed iniustis et non subditis, impiis et
peccatoribus, sceleratis, contaminatis, patricidis et
matricidis, homicidis, fornicariis, masculorum con-
cubitoribus, plagiariis, mendacibus, et si quid aliud
sanæ doctrinæ adversatur (I Tim. i, 9)*. Et item :
*Nam qui principantur non sunt timoribonis operibus,
sed malis (Rom. xiii, 3)*. Unde Ambrosius : « Prin-
cipes hos reges dicit, qui propter corrigendam vitam
et prohibenda adversa creantur. Dei habentes ima-
ginem, ut sub uno sint cæteri. » Et item Apostolus :
*Vis autem non timere potestatem? Bonum facito, et
habebis laudem ex illa (ibid.)* Hinc idem doctor :
« Laus ex potestate tunc surgit, cum quis innocens
C invenitur. Dei enim minister est tibi in bono. Ma-
nifestum est ideo rectores datos ne malum fiat. Si
autem malum feceris, time. Non enim sine causa
gladium portat : hoc est, ideo comminatur, ut, si
fuerit contemptus, vindicet. Dei enim minister est,
vindex in ira in eum qui male agit. Quoniam futu-
rum iudicium Deus statuit, et nullum perire vult,
huic sæculo rectores ordinavit, terrore interposito
hominibus, velut pedagogi sint, erudientes illos quid
servent, ne in pœnam incidant futuri iudicii. Ideo-
que subditi estote, non solum propter iram, id est
ultionem præsentem, sed etiam propter conscien-
tiam. Recte dicit subjectos debere esse, non solum
propter iram, id est ultionem præsentem, parit enim
vindictam, sed propter futurum iudicium, quia si
hic evaserint, illic eos pœna exspectat, ubi, accu-
sante ipsa conscientia, punientur. » Et sanctus Cy-
prius in nono abusionis gradu dicit : « Quia regem
non iniquum, sed correctorem iniquorum esse oportet. »
Et item ibi inter cætera : « Debet furta cohi-
bere, adulteria punire, impios de terra perdere,
parricidas et perjurantes non sinere vivere, filios
suos non sinere impie agere. » Et beatus Joannes
Chrysostomus in homilia decima sexta Matthæi
evangelistæ : « *Auditus, inquit Dominus, quia dictum
est antiquis : Oculum pro oculo, dentem pro dente
(Matth. v)*. Non enim ut nobis vicissim effoderemus
oculos sanxit hanc legem, sed ut metu quo ab alio

istud timemus pati, ipsi quoque tale quidpiam cave-
remus admittere, ut et qui ipso voluntatis bono
nollent a crudelitate desinere, saltem metu cogere-
rentur oculis parcere proximorum : si vero illud
crudeliter dicitur, et homicidam et adulterum coerceri
crudeliter dicatur. Sed insipientium omnino ista verba
sunt, et extremo furore dementium. Ego enim adeo
metuo dicere hæc esse crudelia, ut his contraria
etiam iniqua perdoceam, quod certe communis quo-
que ratio deprehendit. Tu enim dicis quia oculum
pro oculo jussit auferri, idcirco crudelis ; ego autem
refero, quia nisi præcepisset istud, tunc vere apud
plurimos talis fuisset, qualem tu eum falso esse
conquereris. Denique sermone fingamus omnem
legem esse dissolutam, nec quemquam pro hujusce-
modi factis formidare supplicium, sed cunctis prorsus
malignis licere uti moribus suis, et adulteris, et
homicidis, et furibus, et perjuris, et parricidis,
nonne sub hac licentia omnia pariter una confusio
iniquitatis involveret ? Nonne mille sceleribus et
cædibus urbes, fora, domus, maria, totusque
omnino mundus fuisset impletus ? Nam si legibus
certe dominantibus, et vigente comminatione atque
terrore, vix tamen voluntates cohibentur malignæ,
si etiam hoc præsidium defuisset, quam posset
malitia ratione frænari ? aut quæ non in vitam ho-
minum pestis irrueret ? Nec tamen solum istud cru-
dele est, permittere scilicet malis agere quæ velint :
sed aliud quoque isto certe nihil minus, id est læsum
et immerito afflictum negligere atque despiciere ?
Dic enim mihi, si quis feros homines ac semper
malignos in unum colligens, gladiis armaret, totam-
que circumire civitatem juberet, atque obvios
sibi quosque confodere, quid tandem hoc esset
immanius ? At si alius eos quidem, qui ab illo armati
essent, ligaret, violenterque constringeret, eos vero
qui interimendi erant ab iniquis illis manibus libe-
raret, quid e regione isto inveniretur humanius ?
Hæc igitur etiam ad legum transfer exempla. Quæ
enim oculum pro oculo effodere præcepit, timorem
quasi carnificum peccatoribus immitens, illius
similis invenitur, qui illos quos dixi cohibuit arma-
tos. Qui vero nullam omnino pœnam decrevit nocenti,
sed armasse tibi iniquitatem videtur, eumque
imitatum fuisse qui sceleratos illos gladios instruxit,
hinque totius civitatis immisit exitium, videsne
quemadmodum non solum nullius crudelitatis, verum
etiam maximæ pietatis sunt illa præcepta ?
Et in epistolis beati Gregorii idem competenti ul-
tione plectendis maleficis et iniquis sæpenumero
qui legere voluerit, invenire valebit.

Unde, frater charissime, collige, quia contra hæc
agere aut exigere, non nolum est pietatis jura con-
fundere, verum et sacerdotali innocentie ac puritati
detractionis molestias importare, et derogationis
blasphemias irrogare. Dicent enim maliloqui : Pau-
lus dicit : *Non solum qui faciunt, seu qui consentiunt
fatientibus, digni sunt morte* (Rom. 1, 32), iste iniquos
coerceri non sinit. Unde et Dominus per Psalmistam

tali sicut iste est sacerdoti : *Quare, inquit, tu enerras
justitias meas, et assumis testamentum meum per os
tuum ? Tu vero odisti disciplinam, currebas cum fero,
et cum adulteris portionem tuam ponebas* (Psal. XLIX,
16-18). Non enim foveret melos si bonum diligeret :
sed diligens Dominum, et odians vitium, quod suum
ageret, et quod a Deo per conditores legum justa
decernentes decretum est non oppugnaret. Et iniquæ
mulieres ac perversi homines iniquent : *Faciamus
quod volumus, et adeamus ecclesiam vel episcopum
et erimus impuniti*. Hinc namque vituperabitur
ministerium nostrum, et erimus contemptibiles,
ut videlicet legalem justitiam injustis a Domino
positam contemnent, quia unaquæque lex justa
crimen non habet, ne sit injusta, et tamen crimi-
nosum punit, ut vere sit justa. Et e regione quidam
jactabunt, Scriptura dicit : *Ne sis multum justus*.
Beati quoque misericordes (Eccli. VII ; Matth. V).
Et : *Judicium illi sine misericordia, qui non facit mi-
sericordiam* (Jac. II, 13) ; et : *Superexaltet judicium
misericordia* (ibid.) ; et Dominus adulteræ : *Nec
ego te condemnabo : vade, et amplius noli peccare*
(Joan. VIII, 11). Et tu sacerdos, cui misericordiam
nisi misero debes impendere, et illi claudis non mi-
serendo misericordiæ viscera, qui in eum liber es a
punitioe ? Quam utriusque partis derogationem erga
sacris mysteriis servientes provide atque discrete
cavens beatus Gregorius ad Leontium exconsulem
scribit : « Debet, inquit, gloria vestra meminisset
quia nunquam meas epistolas pro commendatione
alicujus accepit, nisi ut protectionem vestram
faciente justitia præstaretis, quia turpe est defendere
quod prius non constiterit justum esse. Ego quidem
homines propter justitiam diligo, non autem justitiam
propter homines postpono. » Et ad Romanum
defensorem (lib. VII, epist. 24, indict. 2) : « Patro-
cinia ecclesiastica, sive mea suscipiatis scripta,
sive etiam minime fuerint directa, sub tanto mode-
ramine debeatis impendere, quatenus hi qui in
furtis publicis implicati sunt, a nobis non videantur
injuste defendi, ne opinionem male agentium ex
indiscretæ defensionis ausu in nos ullo modo trans-
feramus : sed quantum decet Ecclesiam, admonendo
et verbum intercessionis adhibendo, quibus valetis
succurrere, ut et illis opem feratis, et opinionem
sanctæ Ecclesiæ non inquinatis. » Sed et de his qui
ad septa ecclesiæ, et etiam ad ipsa sacrarum confu-
gerint sanctuarium, ad Joannem episcopum Carali-
tanæ civitatis scribit : « Si, inquit, de quibus est
quæstio, ad ecclesiam fortasse refugerint, ita debet
causa disponi, ut nec ipsi violentiam patiantur, nec
hi qui dicuntur oppressi damna sustineant. Curæ
ergo vestræ sit, ut eis sacramento ab his quorum
interest, de servanda lege et justitia promittant, et
per omnia commoneantur exire, atque suorum ac-
tuum reddere rationem. »

Hæc, domini et fratres, rogatus, vobis audien-
tibus, a suprascripto venerabili consacerdote nostro,
sapientiæ vestræ deposui : quæ si illi ad interroga-

tionem suam non videntur sufficere, plura hinc poterit in sanctorum paginis legere, et a nostra mediocritate in solutionibus quæstionum, de quibus ab aliis interrogatus sum, vicesimæ secundæ, et vicesimæ octavæ latius invenire.

Quoniam quidem supra chirographi regum nostrorum memoriam feci, quæ de his ibidem constituta sunt hic subnectere procuravi (*Capitul. Caroli Calvi*, tit. 8, c. 4) : « Et quia per vagos et tyrannica consuetudine irreverentes homines pax et quies regni perturbari solet, volumus ut ad quemcunque nostrum talis venerit, ut de his quæ egit rationem et justitiam subterfugere non possit, nemo ex nobis illum ad aliud recipiat vel retineat, nisi ut ad rectam rationem et debitam emendationem perducat : et si rationem rectam subterfugerit, omnes in commune, in cujus regnum venerit, illum persequamur, donec aut ad rationem perducat, aut de regno deleatur. Similiter et de eo agendum est, qui pro aliquo capitali et publico crimine a quolibet episcopo corripitur, vel excommunicatur, aut ante excommunicationem crimen faciens, regnum et regis regimen mutat, ne debitam pœnitentiam suscipiat, aut susceptam legitime peragat : interdum etiam incestam propinquam suam, aut sanctimonialiam, vel raptam, sive adulteram, quam illic ei non licebat habere, fugiens secum ducit. Hic talis, cum episcopus, ad cujus curam pertinebit, nobis notum fecerit, diligenter perquiratur, ne morandi vel latendi locum in regno alicujus nostrum inveniat, et Dei ac nostros fideles suo morbo inficiat, sed a nobis, vel per ministros reipublicæ constringatur, et ut simul cum diabolica præda, quam secum duxit, ad episcopum suum redeat, et de quocunque crimine publico debitam pœnitentiam suscipiat, aut susceptam legitime peragere compellatur. »

EPISTOLA XXV.

AD HILDEGARIUM EPISCOPUM MELDENSEM.

De judicio aquæ frigidæ.

(Apud eundem, ex codice S. Remigii Rhemensis.)

HINCMARUS Rhemorum episcopus, ac plebis Dei famulus, dilecto fratri ac venerabili episcopo HILDEGARIO salutem.

Dum confabularemur, et inter nos de quibusdam quæreremus, sermo habitus est de judicio aquæ frigidæ, de quo Rabanum venerabilem archiepiscopum Moguntinæ civitatis quædam scripsisse dixisti, ex cujus scriptis quid mihi videretur seiscitari curasti. Unde inter alia et me scripsisse ad interrogationem fratrum ac coepiscoporum nostrorum de regno quondam junioris Lotharii tibi respondi, quæ ex scriptis nostris excipi et tibi transmitti magnopere postulasti. Et quia scriptum est : *Omni petenti te da, et volenti mutuari a te ne avertaris* (*Matth. v, 42*), quæ petisti de responsionibus exiguitatis nostræ ad interrogationes prædictorum fratrum nostrorum excerpta tuæ dilectioni transmittito,

A quæque utrum probabilia, aut per auctoritatem et rationem improbanda sint, catholici lectoris judicio derelinquo. Loquens Dominus de judicio quod in secundo adventu suo est futurum per ignem, commemoravit illud quod primum per aquam factum est : *Sicut, inquit, factum est in diebus Noe, ila erit et in die filiis hominis* (*Matth. xxiv, 37*). Et referens quod per ignem Sodomam judicaverit, similiter, inquit, *sicut factum est in diebus Lot* (*Luc. xvii, 28*). Solertia Christianitatis, inter acta et agenda judicia consistentis, ex antiquo sanxit et frequentavit judicium quod fit per aquam, quodque sub Noe factum fuerat in arca fidei, liberans innocentes et condemnans noxios. In ignita autem aqua, sicut factum est sub Lot in igne, et fiendum in adventu Filii hominis, Petro attestante, qui, dicit : *Quod cæli erant prius et terra, de aqua, et per aquam consistens Dei verbo, per quæ ille tunc mundus aqua inundatus perit. Cæli autem qui nunc sunt et terra, eodem verbo, repositi sunt, igni reservati in diem judicii et perditionis impiorum hominum* (*II Petr. iii, 5*); aperte docens quia non alii cæli sunt igne perituri, quam qui aqua periti, hoc est inania hæc et nubilosa ventosi aeris spatia. Neque enim aqua diluvii, quæ quindecim tantum cubitis montium cacumina transit, ultra aeris ætherisque confinia pervenisse credenda est. Quocunque autem pervenire potuit, eo nimirum, juxta præfatam beati Petri sententiam et ignis judicii perveniet. Sed quia scriptum est : *Cælum et terra transibunt* (*Matth. xxiv, 35*); et iterum : *Terra vero in æternum stat* (*Eccle. i, 4*), sciendum est quia cælum et terra per eam quam nunc habent iraginem transeunt, attamen per essentiam sine fine subsistunt. *Præteritenim figura hujus mundi* (*I Cor. vii, 31*), *et erunt, inquit, cælum novum et terra nova*; quæ quidem non alia condenda sunt, sed hæc ipsa renovabuntur. Transient et permanebunt, quoniam ab ea specie quam nunc habent tergentur, et in sua semper natura servabuntur. Unde scriptum est : *Mutabis ea, et mutantur* (*Psal. ci, 27*).

Quapropter fieri aquam ignitam, ad hæc duo copulata in unum indaganda judicia, illud videlicet quod jam per aquam factum est, et illud quod per ignem fiendum est, licet sint pro temporum varietate disparia, sed unum sunt operationis mysterio, in quibus sancti liberantur illæsi, et reprobi puniuntur addicti, Ecclesiæ, quam designavit arca diluvii, creditur tradidisse auctoritas, quæ etiam inde sanxit ut aquæ baptismatis halitu sacerdotali sanctus insuffletur Spiritus, qui inter ipsa mundi primordia ferebatur super aquas. Ut jam tunc virtutem sanctificationis aquarum natura conciperet, et quo rubigo omnium excoquitur peccatorum, cerei lumine sanctificato accensi a loco teneantur immissi, donec ejusdem fontis consecratio compleatur, per eum qui nocentis mundi crimina per aquas abluens, regenerationis speciem in ipsa diluvii effusione signavit, ut unius ejusdemque elementis mysterio, et finis

esset vitii, et origo virtutibus, quique venturus est judicare vivos et mortuos, et sæculum per ignem. Quia in eodem baptismate, in quo signanter Moyses propheta lignum velut in myrrhato fonte miserat, et dulcoratus est (*Exod. xv, 25*), prædicata per Domini sacerdotem sanguinis Christi cruce, tres unum sunt, non natura, sed operationis mysterio, id est, sanguis redemptionis, spiritus sanctificationis, et aqua lavacri: ubi exsufflatus et exorcizatus immundus spiritus exit ab homine, fitque mundi judicium, et princeps mundi foras eicitur, et qui in veritate non stetit, mendax et pater mendacii a veritate naturæ secernitur, quæ ad imaginem Dei condita, et ex aqua et Spiritu sancto renata, ad suum reformatur principium, ac fide interius exteriusque purgatur, et ab omni figmento mendacii totiusque malitiæ innocens comprobatur. Sed et si quis frigida tantum aqua, vel igniti cujuscunque elementi judicio, in auctorem et gubernatorem elementorum, quem omnia fideliter invocatum sentiunt elementa, sicut in Moysi virga et aquæ in sanguinem versæ, et iterum sanguis in aquas, et petra quæ dedit aquam (*Exod. vii, 20; xvii, 6*), et sub Eliseo sal vel lignum aquæ immisum (*IV Reg. i, 21*), indubitanti fide, quæ est argumentum non apparentium, credens fieri satis sibi decreverit, nihil differt. A qua enim frigida, sicut et in baptismate sacratur, in diluvio innoxii cum arca sunt ad cælum levati, et noxii perditii, igneque sunt Sodomitæ puniti. Et in libro Numeri aqua frigida, in quam Dominus imprecationes jussit elui, hausta a muliere adultera putrescendum femur ipsius legitur (*Num. v, 27*). Et Joannes Apostolus de olei ferventis dolio evasit illæsus. Et qui aquam ignitam delegerit, intelligat quoniam venientem ad futurum judicium terribilem Judicem tempestas ignisque comitabuntur, sicut scriptum est: *Ignis in conspectu ejus ardebit, et in circuitu ejus tempestas valida* (*Psal. XLIX, 3*), ut tempestas examinet quos ignis exuret. Et ignis ille futurus sanctis erit pervius, qui rapietur nubibus obviam in aera Domino, et inflammabit in circuitu inimicos ejus.

Quoniam quidem de purgationis judicio per aquam ferventem vel frigidam se ratio intulit, dicamus quod quidam sagacis ingenii vigilanter adjiciunt. Constat nimirum, ut inquit, quia in aqua ignita coquantur culpabiles, et innoxii liberantur incocti. Quia de igne Sodomitico Lot justus evasit inustus. Et futurus ignis, qui præbit terribilem Judicem, sanctis erit innocuus, et scelestos aduret: ut olim Babylonica fornax, quæ pueros omnino non contigit, neque contristavit, vel quidquam molestiæ intulit, sed vincula eorum comburens, incendit quos reperit de Chaldaeis ministros regis qui eam succendebant (*Dan. iii, 48, 50*). Sed in aquæ frigidiæ judicio quibusdam non constare videtur quod innoxii submerguntur, et aquam culpabiles supernatant, cum in cataclysmi judicio innocentes cum arca levantur, et noxii submersione perierint. Et Ægyptii insequentes

A Hebræos per mare Rubrum, respiciente Domino in vigilia matutina per columnam ignis et nubis, submersi sint quasi plumbum in aquis vehementibus, et ne unus quidem superfuit ex eis (*Exod. xiv, 24*). Et filii Israel super litus stantes viderunt Ægyptios mortuos. Et infideles ac peccatores terra sustinere non potuit, quando aperta est et deglutivit Dathan, et operuit super congregationem Abiron (*Num. xvi, 32*). Et Petrum fide fidentem aquæ instabilitas se calcantem sustinuit, in fide vero dubitantem jam pene dimersum obsorbuit, quando eum Christi dextera allevavit (*Matth. xiv, 29*); et ipsius Epistolæ sententiam (*I Petr. iii, 20*) de figura baptismatis in arca diluvii exponentes Patres catholici, dicunt quia non aliis, sed ipsis aquis hæretici et mali Christiani ad inferna merguntur, quibus orthodoxi et justii quique ad cœlestia regna sublevantur. Sed sciendum nobis est, ut beatus dicit Gregorius (*hom. 26 in Evang.*), « quod divina operatio si ratione comprehenditur, non est admirabilis: nec fides habet meritum, cui humana ratio præbet experimentum. Et cum Paulus apostolus dicat: *Est enim fides sperandarum substantia rerum, argumentum non apparentium* (*Hebr. xi, 1*), profecto liquet quia fides illarum rerum argumentum est quæ apparere non possunt. Quæ enim apparent, jam fidem non habent, sed agnitionem. » Sed hæc ipsa Redemptoris nostri opera, quæ ex semetipsis comprehendi nequaquam possunt, ex alia ejus operatione pensanda sunt, ut rebus mirabilibus fidem præbeant facta mirabiliora. Et idcirco Dominus quædam de Scripturis per semetipsum dignatus est exponere, ut sciamus rerum significationes quærere in his etiam quæ per semetipsum noluit explanare. Unde in responsum accipiant, qui in divinis judiciis atque miraculorum signis experimentum humanæ postulant rationis, quoniam et justos continens arca, qua fidelium est designata Ecclesia, fides sanctæ Trinitatis, quæ per incarnationem Jesu Christi edificata, et omnes de quibus dixit Dominus: *Finis venit universæ carnis coram me, repleta est terra iniquitate a facie eorum, et ego disperdam eos cum terra* (*Gen. vi, 13*), superfluenta aqua operti, et non omnes submersi sunt, sed innoxii liberati, et puniti sunt noxii, sicut scriptum est: *Ingressus est Noe, et filii ejus, uxor ejus, uxores filiorum ejus cum eo in arcam, propter aquam diluvii* (*Gen. vii, 17*); et post paululum: *Rupti sunt omnes fontes abyssi magnæ, et cataractæ cæli apertæ sunt, et facta est pluvia super terram quadraginta diebus et quadraginta noctibus* (*ibid., 11*); et item: *Et multiplicatæ sunt aquæ, et levaverunt arcam in sublime a terra* (*ibid., 17*); et post pauca: *Consumptaque est omnis caro quæ movebatur super terram. Remansit autem solus Noe et qui cum eo erant in arca* (*ibid., 21, 23*); et item post pauca: *Et clausi sunt fontes abyssi, et cataractæ cæli* (*Gen. viii, 2*). Et nubes una, tenebrosa facta est Ægyptiis, et luminosa Hebræis, ut iterum scriptum est: *Tollensque se angelus Dei, qui præcedebat*

castra Israel, abiit post eos, et cum eo pariter columnat nubis priora dimittens, post tergum stetit inter castra Ægyptiorum et castra Israel. Et erat nubes tenebrosa et illuminans noctem, ita ut ad se invicem toto noctis tempore accedere non valerent (Exod. xiv, 19). Et una eademque virga extenta super aquas, quæ erant quasi pro muro a dextris et a sinistris, filios Israel transduxit, sicut scriptum est, per aquam nimiam (Sap. x, 18), et involvit Ægyptios in mediis fluctibus, ut ne unus quidem superfuerit ex eis, quos viderunt Israelitæ mortuos super littus maris (Exod. xiv, 28), quos respexerat Dominus in vigilia matutina, ut diximus, in columna ignis et nubis, et expandit nubem in protectionem suorum, et ignem ut luceret eis per noctem (Psal. civ, 39), videlicet Christum, qui est columna lucis, tenebras intidelitatis depellens, et lucem veritatis ac gratiæ spiritualis affectibus humanis infundens, et per columnam nubis, qui est Spiritus sanctus. In quo baptismate typus baptismatis jam sicut et in diluvio monstrabatur. Adhuc addamus quia invocavit Elias nomen Domini Dei sui, et descendit de cælo ignis (IV Reg. i, 10); invocavit et Eliseus nomen Domini, et de aqua ferrum securis levatum est ad manubrium ligneum et supernavit aquis (IV Reg. vi, 7). Gravior enim est ferri species quam aquarum liquor. Advertimus igitur majoris esse gratiam quam naturam. De his omnibus beati Ambrosii sufficiat explanatio, ut colligi possit assimilatio cur in frigidæ aquæ judicio unius fiat mersio, alterius sublevatio. Ait enim in libro de Sacramentis sive mysteriis (lib. ii, cap. 6): « Verumtamen, ne in hoc sæculo diaboli fraus vel insidiæ prævalerent, inventum est baptisma. De quo baptismate audi quid dicat Scriptura, imo Filius Dei, quia Pharisæi, qui noluerunt baptizari baptismo Joannis, consilium Dei spreverunt (Luc. vii, 3). Ergo baptismum consilium Dei est. » Et post paululum: « Quod mergis, solvitur sententia illa: Terra es, et in terram ibis (Gen. iii, 19). Impleta sententia, locus est beneficio remedioque cælesti. Ergo aqua de terra, possibilitas autem vitæ nostræ non admittebat ut terra operiremur, et de terra resurgeremus. Deinde non terra lavat, sed aqua lavat. Ideo fons quasi sepultura est. » Cæterum, ut dicit Apostolus, omnis Scriptura divinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei ad omne opus bonum instructus (II Tim. iii, 16). Et sicut in Patrum catholicorum dictis legimus, margaritum est sermo divinus quod ex omni parte forari potest; et qui ad instructionem fidelium Scripturarum testimonia profert, etiamsi aliter illa exposuerit quam ea intellexerint per quos fuere prolata, non est fabricator mendacii, salvo majorum intellectu, hinc dicam quod ex eorum verbis pro exiguitate ingenioli mei exsculpere conjiciendo posset suspicor.

Sanctus Apostolus docet (I Cor. x) Rubrum mare, quod sub duce Moyse patres nostri transierunt, ba-

ptimum Christi sanguine rubricatum, et ipse Moyses ducem Christum, qui nos per baptismum eduxit de Ægyptia servitute ad terram repromissionis, videlicet de peccati servitute et mortis dominatione, in libertatem gloriæ filiorum Dei, et in regnum æternæ vitæ, præfiguravit, sicut et petra per desertum consequens populum, qui nos in eremo istius sæculi mysteriis suis consequitur. Unde item dicit de baptismate idem Apostolus: Quicunque baptizati sumus in Christo Jesu, in morte ipsius baptizati sumus. Consepulti enim sumus cum illo per baptismum in morte (Rom. vi, 3). « Quid est, inquit Joannes Chrysostomus (homil. 10 in Epist. ad Rom.), in morte ipsius baptizati sumus? ut et ipsi moriamur sicut et ille. Crux enim est baptisma. Quod ergo crux Christi et sepulcrum, hoc nobis baptisma factum est, tametsi non eisdem ipsis. Quapropter non dixit: Complantati morti, sed similitudini mortis (Rom. vi, 5). Ipse namque carne et mortuus et sepultus, nos autem peccato in utroque. » Quibus dictis colligi posse videtur, ut consepultus Christo per baptismum in morte, et liberatus per idem baptismum a morte, et per peccatum ad eandem servitute et mortem reversus. Anima, inquit, quæ peccaverit, ipsa morietur (Ezech. xviii, 4), complantetur similitudini mortis in aqua, ut aut noxius comprobatus, velit nolit, quia sæpe bona invitæ præstantur, confiteatur, et per emendationis ac correctionis confessionem liberetur iterum a morte commissi peccati: aut innoxius Dei judicio demonstratus, inter peccati reos non tenetur a nobis, complantatus similitudini mortis in aqua. Mare quippe, sicut supra ostensum est, baptisma designans, nihil in se mortuum retinet; quod, ut scriptum est, mortuos Ægyptios ejecit super littus (Exod. xiv, 31). Ergo Ægyptios mortuos, id est peccato obnoxius, quandiu negando in peccati sui morte manet, ab aqua invocatione veritatis, quæ Christus est, sanctificata non recipitur, non tenetur. Veniat autem ligatus institis iniquitatum suarum foras de latebris malæ conscientiæ confitendo, et per confessionem veritatis consepeliatur in aqua, quasi quodammodo complantatus similitudini mortis verissimæ veritatis, liberatus ab eadem veritate.

Colligatur autem fune qui examinandus in aquam dimittitur, quia, ut scriptum est, funibus peccatorum suorum unusquisque constringitur (Prov. v, 22). Qui ab duas causas colligari videtur: scilicet ne aut aliquam possit fraudem in judicio facere, aut si aqua illum velut innoxium receperit, ne in aqua periclitetur ad tempus valeat retrahi. Nam et Lazarus quatruiduanus mortuus, per quem designatur quisque criminum mole sepultus, ligatus institis sepultus, et eisdem colligatus institis a sepulcro Domino vocante legitur egressus, et ipsius jussu a discipulis disligatus (Joan. vi, 39). Et hoc examinandus judicio colligatus in aquam dimittitur, et colligatus retrahitur, et aut purgatus statim judicio arbitrorum absolvitur, aut usque ad purgationem colliga-

tus iudicio examinatur. Et item in sacra historia legimus quia venit Elias ad Jordanem cum discipulo Eliseo, et involuto pallio suo percussit aquas, quæ divisæ sunt, et transierunt ambo. Postea levavit Eliseus pallium Eliæ quod ceciderat ei, et veniens ad Jordanem percussit aquas, atque, invocato Deo Eliæ, divisit ac transiit (*IV Reg. II*). Recte enim per Jordanem fluxus nostræ mortalitatis exprimitur, quia et Jordanis Latine dicitur *descensus eorum*, scilicet Christianorum. Quia, inquit Gregorius (*Mor. lib. xxxiii, c. 6*), in Jordane flumine ipse auctor redemptionis nostræ baptizari dignatus est, recte Jordanis nomine eorum multitudo exprimitur, qui inter sacramentum baptismatis tenentur. Unde scriptum est in *Job* de antiquo hoste humani generis: *Et habet fiduciam quod influat Jordanis in ose ejus (Job xl, 18)*; quia postquam infideles quosque a mundi origine rapuit, adhuc se posse suscipere etiam fideles præsumit. Nam ore pestiferæ persuasionis eos quotidie devorat in quibus a confessione fidei reproba vita discordat. Unde ac si pallio Eliæ involuto aqua percutitur et divitur, et per eam transitus præparatur, quando tales, ut præmissimus ex verbis sancti Gregorii, colligantur et in aquam dimittuntur: et quasi aqua dividitur, cum aut quosdam aqua recipit, et innoxios ostendit, aut quosdam rejicit, et noxios esse demonstrat; et transitus præparatur, cum aut quidam a reputatis criminibus ad innoxios transferendi judicantur aut a negatione sua rei inter criminum noxios declarato iudicio deputantur. Nam et quando qui putatur et qui est noxius, in aquam examinandus dimittitur, a dimittentibus, secundum quemdam modum formæ baptismatis. Dominus invocatur, quatenus veritas unde requiritur demonstratur, et tenebras ignorantiae nostræ illuminare dignetur, ne aut innocens injuste a nobis damnatur, aut nocens sua negatione, aut diabolica fraude aliquo modo impunitus evadat. Sed et ipse qui examinandus in aquam dimittitur, invocationem invocantium sua responsione et denotatione confirmat, juxta formam quodammodo ante baptismum, quando aut ore patroni, qui alieno, id est originali peccato perditus, aliena fide salvatur: aut adultus peccata sive contracta, sive admissa confitetur, abrenuntians diabolo, et omnibus operibus ac pompis ejus, et ad interrogationem sacerdotis, ut in quo jam non est immunditia ejus per negationem abscondita, sed per confessionem publicata, illum recipiat atque, et consepeliatur Christo, et demergantur peccata ejus, juxta Scripturam in profundum maris, ad instar Ægyptios in mare Rubrum, de fidei suæ confessione respondet, sicut sanctus Ambrosius in libro de sacramentis dicit (*lib. II, c. 7*): « Interrogatus es: Credis in Deum Patrem omnipotentem? Dixisti: Credo, et mersisti, hoc est consepultus es. Iterum interrogatus es: Credis in Dominum nostrum Jesum Christum et in crucem ejus? Dixisti: Credo, et mersisti. Ideo et Christo es consepultus. Qui enim Christo consepultus, cum Christo resurgit. Tertio interrogatus es:

Credis et in Spiritum sanctum? Dixisti: Credo, tertio mersisti, ut multiplicem lapsum superioris ætatis absolveret trina confessio. Denique, ut vobis afferamus exemplum, sanctus apostolus Petrus, posteaquam in passione Domini lapsus videtur infirmitate conditionis humanæ, qui antea negaverat, postea, ut illum lapsum aboleret et solveret, tertio interrogatus a Christo si Christum amaret, tum ille dicit, *Tu nosti, Domine, quia amo te (Joan. xxi, 15)*. Tertio dixit, ut tertio absolveretur. » Sic et inventus in iudicio noxius, si fuerit forte super plura suspectus, iterato est iudicio examinandus, quousque inveniat emendationis confessione probatus. Et ad hoc assumamus sancti Ambrosii verba dicentis: « Denique ut vobis afferamus exemplum, sanctus apostolus Petrus posteaquam in passione Domini lapsus videtur infirmitate conditionis humanæ, qui antea negaverat, postea ut illum lapsum aboleret et solveret, tertio interrogatur a Christo si Christum amaret, tum ille dicit: *Tu nosti, Domine, quia amo te*. Tertio dixit, ut tertio absolveretur. » Et quoniam, sicut supra ostendimus divina auctoritate baptismum esse iudicium, unde et Jordanis baptismum designans interpretatur *rivus iudicii*, quo princeps mundi, mendax, et pater ejus foras eicitur, et baptismum consilium Dei est, consilium divini viri ad ignota investiganda invenerunt iudicium aquæ frigidæ. In quo aquæ frigidæ iudicio, ad invocationem veritatis, quæ Deus est, qui veritatem suo mendacio cupit obtegere, in aquis, super quas vox Domini majestatis intonuit, non potest mergi, quia pura natura aquæ naturam humanam, per aquam baptismatis ab omni mendacii figmento purgatam, iterum mendacio infectam non recognoscit puram, et ideo eam non recipit, sed rejicit ut alienam. Et ut in baptisate ab homine spiritus immundus, id est princeps hujus mundi eicitur, ita et qui a diabolo, principe videlicet mundi hujus, per peccatum reoccupatus, sicut scriptum est (*Matth. xii, 45*), quia cum exierit ab homine revertitur ad eum a bonis operibus vacantem, imo vacuum, cum aliis septem spiritibus nequioribus se ab aqua invocatione divini nominis sacra rejicitur. Quem hominem non naturalem, sicut ex aqua et Spiritu renatus est, purgatum, non carnis depositione sordium, sed interrogatione et confessione conscientie bonæ in Deum, verum potius talem de quo in Leviteo scriptum est sentit: *Omnis, inquit, homo, qui accesserit de stirpe vestra ad ea que consecrata sunt, et que obtulerunt filii Israel Domino, in quo est immunditia, peribit coram Domino (Levit. xxii, 3)*. Non dicit: In quo fuit immunditia. Immunditia quippe ejus in ipso est, qui mendacio contegit veritatem; et ideo de stirpe sacerdotali: *Vos, inquit, genus electum, regale sacerdotium (I Petr. II, 9)*; et in Apocalypsi: *Fecisti nos regnum Deo et sacerdotes (Apoc. v, 10)*, ad ea quæ consecrata sunt Domino accedens, quando immunditia ejus in ipso est, non poterit aquis invocatione Dei sanctitatis immergi, ut

innoxius pereat, sed pereundus monstrabitur. *Expurgate*, inquit Apostolus, *vetus fermentum, ut sitis nova conspersio, sicut estis azymi* (*I Cor. v, 7*). Ac si patenter dicat: Reputatum de crimine, atque negantem, quem idoneis testibus iudicario ordine comprobare nequit, aut sacramento, aut Dei iudicio expurgate, ne in medio vestri manens anathema, dicatur vobis: *Anathema in medio tui, Israel, non poteris stare coram inimicis tuis* (*Josue vii, 13*). Et item dicit Apostolus: *Nolite communicare operibus infructuosis tenebrarum* (*Ephes. v, 11*). Unde Augustinus (*de verbis Domini serm. 18*): «Nolite communicare, hoc est, nolite consentire. Et quia parum erat non consentire si sequeretur negligentia disciplinæ, magis, inquit, et redarguite. Duobus modis non te maculat malus, si non consentias, et si redarguas.» Igitur arguendus est peccator, et si negaverit et ordine iudicario comprobari non poterit, examineatur, ut probatus manifestus fiat, et reprobatus latere non possit. Deprehensus autem confiteatur et pœniteat, et non tenebitur fune peccatorum suorum, quo est illigatus, ut non mergatur et lavetur aqua salutarum lacrymis, et dimergatur ut Ægyptii, et qui corrupti erant carnali corruptione coram Domino, sicut plumbum in aquis vehementibus, et secundum prophetam: *Projiciantur iniquitates ejus in profundum maris* (*Mich. vii, 19*), quia antea cum mendacio suo mergi ut ablueretur non poterat, donec confessione a se illud in profundum projiceret, et ablutus emergeret, qui ante confessionem sicut ferrum Elisei premebatur aqua (*IV Reg. vi, 7*), usquedum ad confessionem divini nominis ad lignum rediit: ita nihilominus negans peccati pondere premitur anxia conscientia, usque dum pronuntians impietatem peccati sui Domino, in cujus ligno crucis omnium hominum, ut dicit Ambrosius, levatur infirmitas. Et hoc est diluivium, quod et baptisma, quo peccata omnia diluuntur, sola justus mens et gratia resuscitatur, pridem quippe mortui negatione peccati. Legat devotus librum Dialogorum beati Gregorii (*lib. II, cap. 23, 24, 3, 28, 7, 6*), et inveniet sanctimoniales non correctas, et pro incorrectione sua a sancto Benedicto excommunicatas, post mortem tempore communionis de sepulcris ab Ecclesia, quia non communicabant, exisse, post reconciliationem autem, se in suis sepulcris continuisse, et pueri monachi corpus a terra teneri non potuisse, quia Benedicti gratiam non habebat, et vas vitreum signo crucis per Benedictum edito disruptum: et iterum vas vitreum in ingens præcipitium, saxorum molibus aspersum, ejus jussione propter inobedientiam projectum, atque incolume reservatum, et discipulum ejus Maurum super undas lacu deambulasse: ferrum autem de profundo lacu, Elisei more, per ipsum in manubrium revocatum fuisse. Et sicut scriptum divinis paginis continetur (*II Mac. I, 20*), sacer ignis absconsus, post multa annorum curricula in crassam aquam versus reperitur, eadem aqua super oblatum sacrificium versa divina potentia est

A igne consumpta. Sed et Gedeonis sacrificium cum superfuso jure, cujus abundantia solet ignis extinguui, per angelicum ministerium, igne etiam lambente petram consumptum est (*Jud. vi, 19*); et in unius ejusdemque elementi mysterio et finis est vitii, et origo virtutibus, operante Spiritu sancto, in aqua sacri baptismatis. Hæc diligens lector legat, et non mirabitur in iudicio aquæ frigidæ innocentes ab aqua recipi, nocentes autem non recipi: sicut et in aqua calida coquantur noxii, innoxii vero reservantur incocti. Quia et Christus, cœlestis medicina Patris, verus humanæ medicus salutis, invocatus a suis fidelibus, ut et medicis carnis ipso inspirante solent, contraria contrariis, calida frigidis, frigida calidis curat. Et in veteri Ecclesia, quæ vocatur usitatus B Synagoga, de unius ejusdemque seditionis hominibus, quosdam terra absorptos operuit, quosdam vero super terram edax flamma consumpsit (*Num. xvi, 30 et 33*). Dumque caro innoxia Salvatoris aquis frigentibus tinguitur, opposita quondam noxiis romphæa ignea paradisi restinguitur. Sed et dispositione ipsius elementorum conditoris atque rectoris, uno eodemque sole lutum stringitur, cera liquatur. Hæc dicta sint, quia elementum instabile in mergendo, pro fide credentium, quosdam recipit, quosdam autem non recipit: sed et fervore elementi ejusdem quidam coquantur, et quidam evadunt incocti.

Nec prætereundum quia legimus in capitulis Augustorum (*addit. IV, cap. 80*) fuisse vetitum frigidæ aquæ iudicium: sed non in illis synodalibus, quæ de certis accepimus synodis. Quod, ut quidam insulse dicunt, propterea fuerat vetitum, quoniam quasi rebaptizatur, qui in nomine Domini aquis immergitur. Sed hoc ibidem scriptum nequaquam reperimus. Nec nos etiam ignoramus quia beatus Ambrosius plura dicit baptismata, id est plura baptismatis adnotat præconia. Et sacri canones rebaptizationes omnibus ut vitandæ sunt prohibent: nemo tamen est pene fidelium, qui se sine crucis signo, vel invocatione divini nominis aquis etiam ad lavandum immittat, jubente Apostolo: *Omnia agendum in nomine Domini* (*I Cor. x, 31*); et non se illo baptizati putat baptismate quo renatus est ex aqua et spiritu. Sermo enim, et opus Dei, cunctaque sacramenta divina, manna sunt, quod sicut scriptum est: *Habuit omne delectamentum, et omnis saporis suavitatem* (*Sap. xvi, 2*), quodque sicut pro desiderio suscipientium quondam factum est in saporem gustantium, ita et hæc pro devotione credentium fiunt causa ostensionum. Velut incarnatio Domini in ruinam et resurrectionem multorum est, et crux ejus, pereuntibus quidem stultitia est, credentibus vero in salutem virtus Dei est, et prædicatio ipsius aliis est odor mortis in mortem, aliis odor vitæ in vitam; et baptismatis sacramentum, quod verbis solemnibus consecratur, ut catholici doctores produunt, infidelibus est ludificatio, fidelibus autem redemptio. Si autem extra Domini institutionem et apostolicam fit

traditionem, lavaeum est corporalium sordium, A non ablutio peccatorum. Veluti et sanctus Augustinus de consecratione corporis et sanguinis Domini nostri Jesu Christi in libro contra Faustum dicit (lib. xx, cap. 13) : « Panis et calix non qualibet sed certa consecratione mistus fit nobis, non nascitur. Proinde quod non ita fit, quamvis sit panis et calix, alimentum est refectionis, non sacramentum religionis. »

Et ipsa sacramenta altaris devote ad se accedentibus vita, indevotis iudicium, sicut et panis vitam fortium roborat, parvulorum necat, et lenis sibilus equos mitigat, catulos instigat, et sol qui ceram liquat, lutum stringit, sanis oculis lumen est, et lippientibus tenebræ; utque venenum mors est homini, et vita serpenti, sic et istud iudicium firmiter et rite credentibus ostensio veritatis, hæsitantibus autem et dubiis error involvens esse dignoscitur. Quoniam sicut Paulus dicit : *Est enim fides sperandarum substantia rerum, argumentum non apparentium* (Hebr. xi, 1), profecto liquet quia, exponente beato Gregorio (hom. 26), fides illarum rerum argumentum est quæ apparere non possunt. Quæ etenim apparent, jam fidem non habent, sed agnitionem. Sic in hoc divino iudicio his, de quibus antea dubitabamus, divina ostensione monstratis, quæ corporalibus oculis videre non possumus, oculis fidei contemplantibus credulitate accommodare debemus. Sicut Thomas antea dubitans, dum Dominum palpavit, aliud vidit, et aliud credidit : a mortali quippe homine Divinitas videri non potuit. Hominem igitur vidit, et Deum confessusest, dicens : *Dominus meus, et Deus meus* (Joan. xx, 28). Videndo ergo credidit, quem considerando verum hominem, hunc Deum quem videre non poterat exclamavit. Ita et veritatem rei de qua dubitamus, quia corporalibus oculis videre nequibamus, divinæ ostensioni credentes, veritatem, quæ Deus est, exclamando laudare debemus, cum impleri viderimus quod dicit Apostolus : *Nolite iudicare ante tempus, quoadusque veniat Dominus, qui et illuminabit abscondita tenebrarum, et manifestabit consilia cordium* (I Cor. iv, 5). Venit quidem nunc Dominus ad illuminationem nostrarum tenebrarum, ut cognoscamus veritatem per manifestationem ipsius iudicii, qui venturus est ad manifestanda consilia cordium in futuro iudicio. Hæc autem dicimus, non quo quemquam reprehendamus, quia nec ibi scriptum est cur hoc iudicium non debeat fieri, sed tantummodo dictum ne fieret, aut nostra, quasi sapientius prolata, quam alii invenire ex sanctorum documentis prævaluerint, sive prævaleant, defendere stagemus. Unusquisque enim in suo sensu abundat. Tantum quilibet hoc caute provideat, ut a fide catholica et traditione apostolicæ sedis non discrepet. Sed quæ sentimus humiliter proferentes, parati sumus, si quis convenientius nobis ostenderit, sine contentione sano intellectui cedere, et libentissime non modo consentire, quin etiam discere.

EPISTOLA XXVI.

AD HILDEBOLDUM EPISCOPUM SUESSIONENSEM.

Illum, infirmitate detentum, juxta petitionem litterarum confessionis ejus, absentem reconciliando absolvit.

(Apud eundem, ex codice S. Remigii Rhemensis.)

HINC MARI, nomine, non merito, Rhemorum episcopus, ac plebis Dei famulus, charissimo filio et venerabili fratri nostro HILDEBOLDO mentis et corporis salutem tribui a Deo depono.

Quando confratres et coepiscopi nostri, Hodo et Rainelmus, Willebertus quoque, et Adalbernus, atque Geroldus, et noviter ordinatus Hadelbertus, mecum Rhemi fuerunt, humilis ac sinceræ mentis tuæ confessionem relegi, et pro tua animæ et corporis salute per omnem nostram parochiam Domini misericordiam implorari poposci. Et quoniam fratrem nostrum Hodonem ad te iturum cognoveram, non putavi necesse fore ut tibi litteras mitterem, quia ipse et unanimitate nostra, et ministerio episcopali, ea quæ agenda sunt erga infirmum fratrem per se agere poterat. Sed quoniam presbyterum tuum ad me mitens eundem breviculum confessionis tuæ mihi remisisti, petens ut absolutorias litteras tibi transmittam, quam devotionem tuam gratanter suscepi : scio enim quia non in me bona merita quæ nulla sunt, sed virtutem ministerii immerito mihi commissi attendis. Et ideo per verba sancti Leonis executionem ministerii indignitatis meæ, et fidem tuam, ad pontificem confessionis nostræ Jesum mitto. Ait enim idem sanctus Leo, quia aliter in Ecclesia Dei, quæ corpus Christi est, nec rata sunt sacerdotia, nec vera sacrificia, nisi in nostræ proprietate naturæ verus non Pontifex reconciliet, verus immaculati Agni sanguis emundet. Qui licet sit in Patris dextera constitutus, in eadem tamen carne quam sumpsit ex Virgine sacramentum propitiationis exsequitur, dicente Apostolo : *Christus Jesus, qui mortuus est pro nobis, imo qui et resurrexit, qui est in dextera Dei, qui etiam interpellat pro nobis* (Rom. viii, 34); cujus misericordiæ nec modum possumus ponere, nec tempora diffinire, apud quem nullas patitur veniæ moras vera confessio, dicente Dei Spiritu per prophetam : Cum conversus ingemueris salvus eris ; et alibi : Dic iniquitates tuas prior, ut justificeris ; et item : *Quia apud Dominum misericordia et copiosa apud eum redemptio* (Psal. cxxix, 7); et sanctus dicit Ambrosius : Beatus qui vel sub ictu mortis avertit a vitiis. *Beati enim quorum tecta sunt peccata* (Psal. xxxi, 1), quia scriptum est : *Desine a malo et fac bonum, et inhabita in sæculum sæculi* (Psal. xxxvi, 27). Quicumque ergo desierit a peccatis, et fuerit ad meliora conversus, habebit superiorum indulgentiam peccatorum, quæ fuerit vel pœnitendi confessus affectu, vel corrigendi aversus ingenio.

Quapropter sicut principali sententia constat, quia in multis offendimus omnes, unde ingemisci-

mus ; ita principali sententia consolamur, quia si A confiteamur peccata nostra, fidelis est et justus, quia Jesus Christus, conditor et redemptor ac salvator noster, quem habemus advocatum justum apud Patrem, et est propitiatio pro peccatis nostris, et interpellat pro nobis, fideliter confitentibus nobis dimittit nobis peccata nostra, et emundat nos ab omni iniquitate. Quibus animati divinis sententiis, frater et consacerdos noster Hildebolde, confitenti tibi peccata tua, per ecclesiasticam apostolicæ auctoritatis potestatem, quam Dominus noster Jesus Christus tradidit discipulis et apostolis suis, dicens : *Accipite Spiritum sanctum : quorum remiseritis peccata remittuntur eis* (Joan. xx, 22, 23) ; et per eosdem apostolos suos ipsorum successoribus, quorum vices licet indigni tenemus, etsi non merito, tamen nomine atque officii susceptione, eandem potestatem donavit, et in se credenti fideliter dixit : *Fiat tibi secundum fidem tuam* (Matth. viii, 13 ; ix, 22), gratia et omnipotentia sua, virtute sancti Spiritus, qui est remissio omnium peccatorum, dimittat tibi omnia peccata tua, liberet te ab omni malo, conservet in omni bono, et perducet te ad vitam æternam, et ad sanctorum sacerdotum consortium, Amen.

Et quia, dulcissime frater, tali infirmitate, sicut ipse nosti, detentus corpore ad te ire non possum, spiritu et devotione ad te vado, et quod ipse corporaliter erga te gererem spiritu ago, et per comministros ac presbyteros nostros in te agicorporaliter posco : mittens manu mea, secutus majorum exempla, in manu istius presbyteri oleum sanctificationis, ut etiam obsequio meo per ejus mentionem, Spiritus sancti gratia, qui est remissio omnium peccatorum, indulgentiam percipias omnium delictorum, et consortium sanctorum episcoporum. Velut ex superfluo denique, quoniam hæc te egissenon dubito, bonam devotionem tuam commoneo, ut præter istam generalem confessionem, quæque ab ineunte ætate, usque ad hanc in qua nunc degis, te commisisse cognoscis, specialiter ac singillatim Deo et sacerdoti satage confiteri ; et dum unumquodque erroris tui inquinamentum singillatim confiteris et desles, simul te de omnibus actorum lacrymis mundes. Unde dicitur per Prophetam : *Divisiones aquarum deduxit oculos meus* (Psal. cxviii, 136). Divisam quippe ex oculis aquam deducimus, quando peccatis singulis dispertitas lacrymas confitendo D exhibemus. Quæ singillatim de singulis semel sacerdoti sufficit confessio facta, si post hanc confessionem, et per sacerdotale consilium emendationem, non fuerit iterata peccata. Quotidie tamen de singulis singillatim cum gemitu vel lacrymis in oratione Deo est facienda confessio, ut ita confitens Domino cum Psalmista dicere possit : *Amplius lava me ab iniquitate mea, et a peccato meo munda me. Quoniam iniquitatem meam ego cognosco, et peccatum meum contra me est semper* (Psal. l, 3). Si autem quiddam subreptum fuerit de his quæ per dignos pœnitentiæ fructus deleta sunt, recurrendum est ad

divinum per beatum Joannem consilium : *Memor est unde cecideris, et age pœnitentiam, et prima opera fac* (Apoc. ii, 5). Sed sciendum est quia tunc bona opera nos a culpis mundant et liberant, cum perpetrata mala plangimus et abdicamus. Nam qui semper peccare vult, et quasi semper bona agere, scire debet quia commista pravis actibus opera bona animam non redimunt, quam a vitiis non compe-scunt. *Cor, inquit, contritum et humiliatum Deus non despicit* (Psal. l, 19). Quisquis enim peccata plangit, nec tamen deserit, cor quidem conterit, sed humiliare contemnit : quisquis vero peccata sua jam deserit, nec tamen plangit, jam quidem humiliat, sed conterere cor recusat. Quotidiana autem levique peccata, secundum Jacobi Apostoli (cap. v, 16) hortamentum, alterutrum coæqualibus quotidie confitenda sunt. Quæ quotidiana eorum oratione cum quotidianis piis actibus credenda sunt mundari, si cum benignitate mentis in oratione Dominica veraciter dicitur : *Dimitte nobis debita nostra, sicut et nos dimittimus debitoribus nostris* (Luc. xi, 4).

Frater charissime, de quotidiana communione corporis et sanguinis Domini nostri Jesu Christi noli te securare ut quotidie te illa non munias : quatenus per hanc communionem sacramentorum ejus unum effectus cum eo, in quo princeps mundi veniens nihil suum invenit, et fidelis in omnibus verbis suis, et sanctus in omnibus operibus suis dixit : *Qui manducat carnem meam et bibit sanguinem meum, in me manet et ego in eo* (Joan. vi, 57), ab omni hoste munitus, securus ad conditoris et redemptoris ac salvatoris tui præsentiam venias.

EPISTOLA XXVII.

AD ADRIANUM PAPAM.

Respondet ad quæ pontifex de regno Lotharii et de Hincmari nepotis causa mandarat.

(Apud eundem, ex editione Parisiensi.)

Domino sanctissimo et reverentissimo Patrum Patri ADRIANO, primariæ sedis apostolicæ universalis Ecclesiæ papæ, HINC MARUS, nomine, non merito, Rhemorum episcopus, ac plebis Dei famulus.

Excellentiæ vestræ auctoritas nuper xiv Kalend. Novembris, indict. iv, mihi per legatos suos multis et magnis increpationibus repletam, sicut sibi placuit, misit epistolam. De quibus, ut viri flagellis eruditi verbis utar, quantum ad humanum spectat judicium : *Non viro qui similis mei est respondebo, nec qui mecum in judicio possit audiri : nec est qui utrumque valeat arguere, et ponere manum suam in ambobus* (Job ix, 31, 32) ; et : *Si locutus fuero, non quiescet dolor meus ; et si tacuero, non recedet a me* (Job xvi, 7). Propterea non ex æquo ad omnia, sed ad quædam de his quæ scripsistis, de quibus tacere non audeo, brevi et humili sermone mihi est respondendum. Quia scripsistis me reminisci debere, si unquam epistolis non rescriptum sit, et convenientibus responsis de negotiis de quibus agebatur

apostolicæ sedi remissum, sicut me pro vestro contemptu fecisse penitus constat, quando nuper per viros missos in Galliarum partes epistolas tam mihi quam aliis destinastis, et nullum inde responsum recepistis. Humiliter suggero, quia nunquam per contemptum a sedis apostolicæ præceptionibus deviavi, et in vestra epistola per commemoratos missos vestros, Paulum scilicet et Leonem venerabiles episcopos, pusillitati meæ directam scripsistis quid inde agerem, sed non scripsistis ut inde vobis rescriberem. Verumtamen eisdem missis vestris verbis respondi, pro viribus me jussionem vestram exsecuturum. Egi autem exinde quantum valui, et quantum mihi agendum esse videre potui, et quod me agere non posse vidi, ad potestatis vestræ auctoritatem tractatione mea referre curavi, sicut et vobis innotescendum cujus rei exitum et effectus certitudinem scivi, quando præfatas increpatorias litteras mihi misistis, parabam scilicet, quomodo ipsa die, quando epistolas vestræ auctoritatis mihi Paulus et Leo venerabiles episcopi dederunt regi et episcopis, et regnorum primoribus, qui tam de regno quod antea dominus Carolus habuit, quam et de regno quod olim rex Lotharius habuit adfuerunt, relegi, et eis ut ita servarent denuntiari curavi.

His autem quidem episcopis regni quod antea dominus Carolus habuit, detulerunt epistolam, ad eos generaliter directam transmissi. Inde episcopis tam ex regno suo quondam Lotharii, qui in Atiniaco jussu ipsius domni Caroli regis convenerunt, eandem epistolam relegi, et præfato domno regi Carolo, sed et episcopis regni ipsius, et episcopis regni dudum Lotharii, et episcopis regni Ludovici, sed et ipsi Ludovico regi Germaniæ hanc schedulam quæ subsequitur, post juramenta inter reges sine me facta, dedi. In qua sic auctoritatis vestræ præceptionem indixi, ut periculis imminetibus commemoratis, quomodo eis obviare, et illa omnia penitus et insimul commovere non poteram, relatione ad auctoritatem vestram, et si non resistentibus, vel mihi consulere. Ipsa autem schedula, et regibus, et episcopis, ac regnorum primoribus a me recitata et data, ita se habet : « Dominus apostolicus Adrianus, sicut multis est cognitum, et litteris suis, quas præ manibus habeo, exiguitati meæ dignatus est intimare, regibus et præsulibus ac regnorum primoribus in his Galliarum partium regionibus, et inter cætera auctoritate ministerii sui mandavit, ut regnum quondam ac regis Lotharii, quod domno imperatori Ludovico spirituali filio ejus hæreditario jure debetur, et quod ad eum post mortem ipsius Lotharii rediet, vel homines in eo degentes, mortalium nullus invadat, nullus commoveat, nullus ad se conetur inflectere. Quod si quis præsumpseri, non solum per suæ auctoritatis ministerium infirmabitur, verum etiam vinculis anathematis obligatus, nomine Christianitatis privatus, cum diabolo omnino locabitur; et si quis nostrum de episcopis tam nefariæ temeritatis auctorem vel tacendo fugerit

A vel non resistendo consenserit, non jam pastoris sed mercenarii nomine se noverit censendum, et quia jam non pertinebit ad eum de ovibus, non pertinebit consequenter de pastoralibus dignitatibus. Quæ autem in epistolis ad episcopos et regnorum primores regni quondam Lotharii directis contineantur, melius ipsi scitis, qui eas legistis. Audivi etiam quod similes epistolæ, sicut domno nostro Carolo, et episcopis ac primoribus regni ipsius directæ sunt, domno nihilominus Ludovico regi glorioso, et episcopis ac regni ejus primoribus missæ sunt, quod vos qui de regno ejus estis certius scitis. Mihi quoque exiguo Rhemorum episcopo auctoritate sua dominus apostolicus specialiter commendavit, ut vice sua tam reges, quam cæteros Dei ac mundi ministros admonendo, suadendo, ac prohibendo a cupiditatis vel avaritiæ vitio, et ut aliena non suscipiant, atque regnum quondam Lotharii et homines in eo degentes non invadant, comprimant et pescant. Sed et per multos et a multis audio, divulgatum inter principes nostros, dominos scilicet ac reges gloriosos, mutuis sacramentis firmatum, ut inter eos qui se dicunt ipsius regni hæredes esse æqua divisio ipsius regni fiat : quæ firmitas si facta non fuisset, ut multi affirmant, jam seditio inter populos illis subjectos exorta fuisset. Et si ipsa firmitas exsecuta non fuerit, prælia et seditiones, sicut jam fuerint post obitum domni Ludovici imperatoris, inter eos exsurgent, et maxima strages populi ac perditio animarum inde proveniet, quod postea emendari non poterit. Quapropter inter tanta et talia pericula, scilicet domni apostolici præceptum negligere, et pactum juramentis in nomine Domini et sanctorum ejus inter reges nostros firmatum dissolvendum judicare, et seditiones populorum ac prælia parvipendere, et ut ecclesiarum rectores ac viri nobiles, de multis partibus a paganis impetiti, et sine rege ac principe, nisi quom ipsi post mortem Lotharii pro sua quisque convenientia elegerint, sicut fatentur, existentes, non debeant vel sicut habent necessitatem non habeant libertatem rectorem eligere, qui sanctam Ecclesiam, et eos atque Christianitatem in illo regno consistentem defendat et gubernet, dicere anxians sine generali unanimitate episcoporum regni domni Caroli, quibus dominus apostolicus de causa regni Lotharii, suam missit epistolam, quam eis, sicut mihi est præceptum, direxi, de his quæ præmissi, quantum ex me est, nulli definitioni audeo consentire, reservato per omnia privilegio sententiæ domni papæ, cujus auctoritas, si aliquid de actis corrigendum fuerit, admonitione paterna corriget, et quæ stabilienda sunt poterit roborare. »

De hoc vero quod mihi scripsistis dicentes : « Quis melius te novit, quod filii quondam Ludovici imperatoris, in unum convenientes, regnum inter se diviserunt, jureque jurando sibi invicem promiserunt, ut nullus eorum regnum alterius fratris sibi usurparet, aut omnino pervaderet, et tunc Carolus rex,

juramentis contemptis, illud regnum quod Lothario imperatore defuncto domino serenissimo imperatori filio ejus debetur invasit, et fidem debitam violavit? » Reverentiæ vestræ debita humilitate respondebo, quoniam etsi ita esse ut scribitis scirem, cum ipse rex Carolus ita esse non confiteatur, nec vel legali vel regulari judicio inde convictus appareat, et multis attestantibus fateatur hanc regni partem sibi a patre Ludovico Augusto, consensu tam episcoporum quam cæterorum procerum totius imperii traditam, et a fratre Lothario sacramento publice confirmatam, sequendum tamen mihi arbitrarer quod præmissio judicio dicit Africanum concilium (*can. 100*): « Ut magis caveat episcopus ne dicat in quemquam, quod aliis documentis convincere non potest. »

Unde sanctus Augustinus, qui eidem concilio interfuisse legitur, a sede apostolica, beato Cælestino docente, pro vita sua atque meritis ac magna scientia inter magistros optimos habitus, in libro de Pœnitentia dicit (*homil. 50, cap. 3*): « Ple-rique boni Christiani propterea tacent, et sufferunt aliena peccata quæ noverant, quia documentis sæpe deseruntur, et ea quæ ipsi sciunt indicibus ecclesiasticis probare non possunt. Quamvis enim vera sint quædam, non tamen judici facile credenda sunt, nisi certis indicibus demonstrentur. Nos vero a communione quemquam prohibere non possumus, quamvis hæc prohibitio nondum sit mortalis, sed medicinalis, nisi aut sponte confessum, aut aliquo sive sæculari, sive ecclesiastico judicio nominatum atque convictum. Quis enim sibi utrumque audet assumere, ut cuiquam ipse sit accusator et judex? Cujusmodi regulam etiam Paulus apostolus in Epistola ad Corinthios breviter insinuasse intelligitur, cum quibusdam talibus commemoratis criminibus, ecclesiastici judicii formam ad omnia similia ex quibusdam daret, ait: *Scrpsi vobis in Epistola, non commisceri fornicariis*, et reliqua (*I Cor. v, 9*); et aliquando post: *Si quis frater nominetur aut fornicator, aut rapax, cum ejusmodi nec cibum quidem simul sumite. Quid enim mihi de his qui foris sunt judicare? nonne de his quæ sunt inter vos judicatis? de his autem qui foris sunt Dominus judicabit. Auferte malum a vobis ipsis* (*ibid., 11, 12, 13*). Quibus verbis satis ostendit non temere aut quomodolibet, sed per judicium auferendos esse malos ab Ecclesiæ communione: et si per judicium auferri non possunt, tolerantur potius, ne perverse malos evitando quisque ab Ecclesia ipse discedens, eos quos fugere videtur vinciat ad gehennam. Et item: *Si quis frater nominatur fornicator, aut raptor*, et reliqua. Eam, inquit, nominationem intelligi Apostolus voluit, quæ fit in quemquam, cum sententia ordine judiciario atque integritate profertur. Nam si nominatio sufficit, multi damnandi sunt innocentes, quia sæpe falso in quemquam crimen nominatur. Noluit enim hominem ab homine judicari ex arbitrio suspicionis, vel etiam extraordinario usurpato judicio, sed potius ex lege Dei,

A secundum ordinem Ecclesiæ, sive ultro confessum, sive accusatum, atque convictum. »

Sunt enim leges, et canones, ac decreta sedis apostolicæ ex eisdem canonibus promulgata, quæ manifestant qualiter et a quibus, vel ubi quis debeat accusari vel judicari; de quibus sanctus Augustinus in libro de vera Religione (*cap. 31*) dicit: « In istis temporalibus legibus, quanquam de his homines judicent cum eas instituunt, tamen cum fuerint institutæ atque firmatæ, non licebit judici de ipsis judicare, sed secundum ipsas. » Et sanctus Gelasius in decretis suis ad Orientales episcopos: « Ideo, inquit, vocatur ad judicium certa quæcunque persona, ut aut fateatur objecta, aut vincatur objectis. » Et iterum (*II Reg. xii*): « Nathan propheta palam publiceque in facie regis David et commissum pronuntiavit errorem, et ipsum commissum non tacuit, et confessione correctum consequenter absolvit. » Et sanctus Bonifacius longe ante decrevit: « Et accusatus præsens, si confidit, ad objecta respondeat. » Non insurgendum ergo mihi est visum ad judicandum illum qui non confessus, aut in aliquo sive sæculari, sive ecclesiastico judicio nominatus est atque convictus: nec utrumque fui ausus assumere, ut ejus ipse forem et accusator et judex.

De eo quod sanctitas vestra exiguitati meæ scripsit, quia silui, et contra tale facinus saltem leviter non insurrexi, non solum consors, sed etiam, quod est deterius, hujus tyrannidis auctor ipse videor, cum venia et pace vestræ sublimitatis dico, quia ille qui forte hac opinione, sed non cognitione, ad injuriam et increpationem meam vobis suggestit, scire debuerat vestræ auctoritatis gravitatem sufficienter recelere quod scriptum est: *Causam quam nesciebam diligentissime investigabam* (*Job xxix, 16*). Et ut beatus dicit Gregorius (*Moral. xix, cap. 14*): « Cum omnia nuda et aperta sint oculis Domini, tamen mala Sodomæ noluit audita judicare, qui ait: *Descendam, et videbo utrum clamorem qui venit ad me opere compleverint, an non est ita, ut sciam* (*Gen. xviii, 21*). Omnipotens itaque Dominus et omnia sciens, cur ante probationem quasi dubitat, nisi ut gravitatis nobis exemplum proponat, ne mala hominum ante præsumamus credere quam probare? » Nam ut vestræ dignationi veraciter fatear, nec auctor, nec consors, nec consensor ullius tyrannidis unquam, vel usque ab ipsis cunabulis hactenus existiti. Hæc qui vobis talia nuntiavit, adjuvante Domino, de me probare non valebit. Et quia non silui, et in annuntiando vel exsequendo ea quæ mihi a vestra auctoritate præcepta sunt, pro scire et posse meo, deses vel segnis non existiti, sicut et ante scriptis ostendi, et coram missis vestris viva voce monstravi.

De hoc quod dicitis, quia honore et dignitate cæteris Caroli regis regni episcopis sum sublimior, suggero quia scientia et meritis inferior, et non dignitate ac honore loci priorem cæteris metropolitanis me esse cognosco. Quia sicut Innocentius et

Bonifacius, ac cæteri sacræ sedis Romanæ pontifices in decretis suis ex sacris canonibus promulgatis dicunt, unaquæque provincia suo metropolitano debet esse contenta. De hoc quod scripsistis, ut si ipse rex Carolus in obstinationis suæ perfidia post meam conventionem persistere maluerit, quam juxta vestra monita respiscere, ab illius me communione atque consortio sequestrem, et secundum apostolum : *Ne ave ei dicam* (Joan. 1, 10), si vestræ communionis volo esse particeps, præsentiam ejus modis omnibus devitem, cum magno cordis dolore ac gemitu dico, quoniam et ecclesiastici et sæcularis ordinis viri, qui diversis de regnis Rhemisi civitatem plurimi convenerint, quos mandatum vestrum ibidem mihi delatum, quia non debuit, latere non potuit, exiguitati meæ, qui quantum scivi et potui semper apostolicæ sedis privilegium extuli, impropere dixerunt et dicunt : Nunquam hujusmodi præceptionem ab illa sede ulli decessorum meorum missam fuisse, cum inter reges sacramentis etiam confederatos, sed inter patrem et filios, ac inter fratres prælia et seditiones eorum temporibus fuisse noscantur. Et aliis peccatis meis reputo, me hac intentionis vestræ comminatione singulariter ab auctoritate vestra impetum, cum cæteros episcopos regni sui, confratres scilicet et consacerdotes meos, tantum monueritis, increpaveritis, redargueritis et instruxeritis, non tamen sicut me illos de participatione communionis vestræ intentando comminari voluistis, nec etiam eos qui, ut quidam dicunt, regem nostrum in regnum quondam Lotharii pro sua necessitate invitaverunt, et honores ex eodem regno obtinuerunt, neque illos qui regibus et regnorum primoribus sicut ego vestram præceptionem et de ipso regno interdictionem non intimaverunt, et ex adverso ascendentes non restiterunt ut ego, qui secundum quod potui jussionem vestram perficere procuravi, et nihil emolumentum, et quantum passus est pedis in rebus cum plures ex Ecclesia mihi commissa diuturnis temporibus abstractæ in eodem regno habeantur, nec aliud quodcumque commodum, nisi impedimenta et dispendia sim adeptus.

Sed et domo nostro regi Carolo ad exaggerationem dicitur a quibusdam, quod nec pro Lothario, sicut multorum certa notitia, et infantes inde geniti protestati sunt, publico adulterio denotato, et apud sedem apostolicam accusato, in cujus parte regni non solum pars diocesis, verum et pars parochiæ meæ conjacuit, talem præceptionem et comminationem ab antecessore vestro nullus episcoporum in isto regno acceperit, nec etiam ab hæreticorum, vel schismaticorum, sive tyrannicorum imperatorum ac regum, quales fuerunt Constantius Arianus, ac apostata Julianus, et Maximus tyrannus, præsentia et salutatione sivi colloctione, sedis apostolicæ pontifices, vel alii magnæ auctoritatis atque sanctitatis episcopi, cum locus et ratio ac causa exigit, se subtraxisse leguntur. Et si, aliis episcopis regi nostro communicantibus, ego me ab illius commu-

nione vel præsentia subtraxero, dicunt secundum concilium Africanum (*can. 100*), quando illi non communicavero, ut mihi ab illis non communicetur episcopis. Præsertim cum ipse rex se perjurum esse denegat, se invasorem alterius et non ad se pertinentis regni diffiteatur, se tyrannum non esse confirmet, se hæreticum vel schismaticum, quibus apostolus nec ave a quoquam dici præcepit, non esse confiteatur : sed confessione rectæ fidei, et amplexione ecclesiasticæ pacis, se catholicum et in pace ecclesiastica manere et permanere velle demonstrat : et secundum leges ac canones, præsens in judicio, aut ad objecta respondere, aut objectis convinci, se non refugere dicat. Et ut de regia persona, inquirunt, reticeamus, nec sicut quemlibet plebeum vel liberi capitis virum, in istis regionibus, secundum ecclesiasticas regulas et secundum leges publicas, illum accusatum vel sponte confessum, aut legaliter ac regulariter aperte convictum audivimus. Sed in libris illa satis notissima ad legendum oculis ingerunt, qualiter proavus suus Pipinus a Stephano ipsius auxilium petente, et pro liberatione Romanæ Ecclesiæ in Galliam veniente, in regem sit unctus, cum adhuc degeret Romana Ecclesia sub nomine et non auxilio defensionis Græcorum imperatoris, et idem Pipinus non excommunicatione apostolica, sed virtute hostili, Haistulfum qualemcunque regem Christianum oppressit, et Italiam domuit, atque justitias sancti Petri obtinuit.

Similiter et quæ avus ejus Carolus temporibus Adriani et Desiderii regis Longobardorum egerit, et quomodo patricium Romanum susceptum, quomodo etiam temporibus Leonis papæ nomen imperatoris adeptus fuit, et quæ in Italia, et quanta erga Romanam Ecclesiam facerit ; et quomodo Stephanus in Belgicam veniens, et Rhemi patrem suum imperatorem coronans sacraverit ; et quomodo Gregorius subreptus cum Lothario patre suo repugnante in Franciam venit, et pax postea in Francia ut antea non fuit, et ipse papa cum tali honore sicut decuerat et sui antecessores fecerunt, Romam non rediit. Et computant quanta iste ab episcopis et populo qui regem non habebant, et a paganis et seditiosis impetebantur, in regnum quod Lotharius habuit invitatus exordinata ordinaverit : et dicunt sæcularem scripturam dicere, quia omne regnum sæculi hujus bellis quaeritur, victoriis propagatur, et non apostolici vel episcoporum excommunicationibus obtinetur, et Scripturam divinam proponunt dicere : *Quia Domini est regnum, per quem reges regnant, et cui voluerit dat illud* (Psal. XXI, 29) ; *Prov. VIII, 15* ; *Dan. IV, 29* ; ministerio angelorum et hominum. Quibus cum verba beati Jacobi apostoli opponimus, dicentis : *Unde bella et lites inter vos ? Nonne hinc ? id est ex concupiscentiis vestris, quæ militant in membris vestris ? Litigatis et belligeratis, et non habetis, propterea quod non postulatis* (Jac. IV, 1, 2).

Et ideo, quia Domini est regnum, et per eum reges

regnant, ab illo regnum postulare debetis, qui litigatis et belligeratis pro temporali gloria, cum, si Dominum pia intentione postularetis, ipse vobis necessaria ad usum temporalem et ad fruendum perpetuo superna bona tribueret. Et cum potestatem a Christo sancto Petro primo apostolorum, et in eo suis successoribus datam, sed et apostolis, et in eis episcopis, pontificium ligandi et solvendi collatum illis insinuare volumus, respondent: Et vos ergo solis orationibus vestris regnum contra Nortmannos et alios impetentes defendite, et nostram defensionem nolite quærere; et si vultis ad defensionem habere nostrum auxilium, sicut volumus de vestris orationibus habere adiutorium, nolite quærere nostrum dispendium, et petite domnum apostolicum, ut quia rex et episcopus simul esse non potest, et sui antecessores ecclesiasticum ordinem quod suum est, et non rempublicam, quod regum est, disposuerunt, non præcipiat nobis habere regem, qui nos in sic longinquis partibus adjuvare non possit contra subitaneos et frequentes paganorum impetus, et nos Francos non jubeat servire, quia istud jugum sui antecessores nostris antecessoribus non imposuerunt, et nos illud portare non possumus, qui scriptum esse in sanctis libris audimus, ut pro libertate et hæreditate nostra usque ad mortem certare debeamus. Et si aliquis episcopus aliquem Christianum contra legem excommunicat, sibi potestatem ligandi tollit, et nulli vitam æternam potest tollere, si sua peccata illi eam non tollunt. Et non convenit ut episcopo dicere, ut Christianum, qui non est incorrigibilis, non propter propria crimina, sed pro terreno regno alicui tollendo, vel acquirendo nomine Christianitatis debeat privare, et eum cum diabolo collocare, quem Christus sua morte et suo sanguine de potestate diaboli venit redimere, et Christianos pro fratribus suis animas suas docuit ponere. Propterea si domnus apostolicus vult pacem quærere, sic pacem quærat ut rixam non moveat, quia non nos concredemus ut aliter ad regnum Dei pervenire non possimus, si illum quem ipse commendat terrenum regem non habuerimus. Et alia de juramentis, et perjuriis, et de tyrannide, de quibus scripsistis, sed et de firmitatibus quæ inter reges nostros factæ fuerunt, et de sditionibus quæ pro illo regno exortæ fuerunt, et ad internecionem multorum pervenirent, nisi ipsæ firmitates executæ fuissent, nobis dicunt quæ vestræ auctoritati mandare nobis non convenit. Quapropter, quomodo ipsius regis, in cujus regno parochia et provincia mea consistit, et eorum qui cum eo degunt, sine animæ periculo, et mihi commissæ Ecclesiæ detrimento, consortium vel præsentiam valeam devitare non video, cum beatus Augustinus in præfato libro de Penitentia dicat: *Scripti vobis*, inquit Apostolus in Epistola, *non commiseri fornicariis, non utique fornicariis hujus mundi, aut avaris, aut raptoribus, aut idolis servientibus: alioquin debueratis de hoc mundo exire* (I Cor. v, 9). Non enim possunt homines in hoc mundo

A *viventes, nisi cum talibus vivere, nec eos lucri possunt facere Christo, si eorum colloquium conviviumque vitaverint. Unde et Dominus cum publicanis et peccatoribus comedens: Non est, inquit, opus sanis medicus, sed male habentibus. Non veni vocare justos, sed peccatores* (Marc. II, 17). Et paulo post: « Quibus satis ostendit, non temere et quomolibet, sed per judicium auferendos esse malos ab Ecclesiæ communione, et si per judicium auferri non possunt, tolerentur potius, ne perverse malos evitando, quisquam ab Ecclesia ipse discedens, eos quos fugere videtur vinciat ad gehennam. Quia et ad hoc nobis sunt in Scripturis exempla proposita, vel in messe (Matth. III), ut paleæ sufferantur usque ad ultimum ventilabrum, vel infra illa retia (Luc. v,) ubi pisces boni cum malis usque ad segregationem, quæ futura est in littore, hoc est in fine sæculi, æquo animo tolerentur. » Et item idem ex sententia Pauli: « Duobus modis non te maculat malus, si non consentias, et si redarguas: hoc est non communicare, non consentire. Communicatur quippe, quando facto ejus consortium voluntatis et approbationis adjungitur. Hoc ergo admonens non Apostolus ait: *Nolite communicare operibus infructuosis tenebrarum* (Ephes. v, 11). Et quia parum erat non consentire, si sequeretur negligentia disciplinæ, *magis autem*, inquit, *et redarguite* (ibid.). Videte quemadmodum utrumque complexus est. *Nolite communicare, magis autem et redarguite*. Quid est, *nolite communicare*? Nolite consentire, nolite laudare, nolite approbare. Quid est autem, *magis et redarguite*? Reprehendite, corripite, coercete. » Hoc enim secundum præceptionem vestram verbis et scriptis egi sæpissime. Et in epistola concilii ad Donatistas (epist. 152 Augustini), idem doctor solertissimus dicit: « Quisquis, inquit, in hac Ecclesia bene vixerit, nihil ei præjudicant aliena peccata: quia unusquisque in ea proprium onus portabit, sicut Apostolus dicit: Et quicumque in ea corpus Christi manducaverit *indigne, judicium sibi manducat et bibit* (I Cor. xi, 29). Cum autem dicit *judicium sibi manducat*, satis ostendit quia non alteri judicium manducat, sed sibi: quia communio malorum non maculat aliquem participatione sacramentorum, sed consensione factorum, Nam si in factis malis non eis quisquam consentiat, portat malus causam suam et personam suam, nec præjudicat alteri, quem in consensione mali operis socium non habet criminis. » Et in primo libro de Baptismo (cap. 17) dicit: « Spirituales sive ad hoc ipsum pio studio proficientes, non eunt foris, quia et cum aliqua vel perversitate, vel necessitate hominum videntur expelli, ibi magis probant quam intus permaneant, cum adversus Ecclesiam nullatenus eriguntur, sed in solida unitatis petra fortissimæ charitatis robore radicanter. Ad hoc enim pertinet quod in illo Abrahamæ sacrificio dicitur: *Aves autem non divisit.* »

Igitur qui me a solida unitatis catholicæ et apostolicæ Ecclesiæ petra non divido, et sicut nostis

scriptis, et etiam præsentiis vestris missis, adeo ex vestra jussione verbis restiti regi, ac regnorum primoribus, ut et coram eisdem missis comminaretur mihi, quoniam si in mea sententia permanerem, ad altare Ecclesiae meae cantare possem, de rebus vero et hominibus nullam potestatem haberem, a vestra communione non debeo separari aliorum factionibus quorum, quantum ex me est, non communico quaecumque sunt tenebrosis operibus. *Qui, inquit Dominus, peccaverit mihi, delebo eum de libro meo (Exech. xiv, 9); et: Anima quae peccaverit, ipsa morietur (Exech. xviii, 20).* Sed et in peccantibus, ut bene nostis, et beatus dicit Gregorius, causae pensandae sunt, et tunc ligandi atque solvendi potestas exercenda. Quae potestas, ut Leo dicit, in alios apostolos, et ad omnes Ecclesiae principes committitur: sed ideo singulariter Petro creditur, quia cunctis Ecclesiae rectoribus Petri forma proponitur. Manet ergo Petri privilegium, ubicumque ex ipsius fertur aequitate iudicium: nec nimia est vel severitas, vel remissio, ubi nihil est ligatum, nihil solutum, nisi quod beatus Petrus aut ligaverit, aut solverit. Qualiter etiam frater et sacerdos noster Odo, Belvacensis episcopus, mecum pro obtemperandis vestris jussionibus laboraverit, iidem legati vestri vobis innotescere possunt. Sed et aliae comminationes in nos sunt jaculatae, quas adhuc nolo proferre, quas scio, si Dominus illis permiserit, ut jam in deliberatione, ita sine retractione comminantes in opere monstrare curabunt. Et ut mihi experimento videtur, propter meam interdictionem, vel propter linguae humanae gladium, nisi alius eis obstiterit, rex vester vel regni ejus primores non dimittent, ut quod coperint quantum poterunt non exsequantur. Et nescio quomodo ipsius regis, vel inter quos habito, praesentiam et communionem vel consortium valeam devitare, cum rex et cohabitantes mecum una cum rege, non solum in parochiam, verum et in civitatem meam saepe conveniant, et ibi tandiu sicut regi complacet degant, et cum tanta multitudine, tam de regno quod antea habuit, quam et de regno quod Lotharius habuit, necnon de aliis regnis ad eum confluentibus, sicut missi vestri viderunt, et hoc quam saepe illi videtur, in civitate mea sustineo, qui ecclesiam et plebem mihi commissam deserere, et aliorum ut mercenarius non valeo fugere, nec quo extra regnum ejus fugiam habeo: sed regio cultu

eo recepto, de ecclesiasticis facultatibus, sicut praecipit et quandiu praecipit, illi et sibi obsequentibus servio, ut quiete, secundum quod instat tempus, cum mihi commissis degere possim. Dicit enim hanc potestatem suos decessores habuisse, quam ipse nullius interdictione dimittet.

Quae omnia supra et infra dicta, sicut non ad accusandum, sic nec ad excusandum in advocacione praefati regis depromo: aetatem enim habet, ipse de se loquatur, neque ad resistendum vestrae auctoritati, neque ad contradicendum vestrae praeeptioni, sed consulendum qualiter nos episcopi, et ego pra-

cipue, in quem tantam comminationem intentastis, erga regem nostrum gerere debeamus, cum beatus Augustinus Apostoli exponens sententiam dicat: « Apostolica, inquit, doctrina, ut omnis anima sublimioribus potestatibus subdita sit, et ut reddantur omnibus omnia, cui tributum tributum, cui vectigal vectigal, et caetera, salvo Domini nostri cultu, constitutionis humanae principibus reddamus, quando et ipse Dominus, ut nobis hujus sacrae doctrinae praerberet exemplum, pro capite hominis, quo erat indutus, tributum solvere non dedignatus est. Jubentur etiam servi Christiani et fideles boni dominis suis temporalibus aequanimiter fideliterque servire, quos judicaturi sunt, si usque in finem iniquos invenerint, aut cum quibus regnaturi sunt, si et illi ad verum Deum conversi fuerint. Omnibus tamen praecipitur servire humanae potestatibus atque terrenis, quo usque post tempus praefinitum, ab istius saeculi confusione, tanquam de captivitate Babyloniae, sicut Hierusalem liberetur Ecclesia. Ex cujus captivitatis occasione, si etiam terreni reges, desertis idolis pro quibus persequebantur Christianos, unum verum Deum et Christum Dominum cognoverint et colant, pro quibus Paulus apostolus jubet orare Ecclesiam, cum persequerentur Ecclesiam, *ut securam et tranquillam vitam agamus cum omni pietate et castitate (I Tim. ii, 2)*, sicut et ille populus in Babyloniam ductus per Jeremiam jubetur orare pro rege Babyloniae, et beatus Petrus dicit: *Subjecti estote omni humanae creaturae propter Dominum, sive regi, quasi praecellenti (I Petr. ii, 13)*; et item: *Dominum timete, regem honorificate (ibid., 17)*. Omni humanae creaturae, inquit doctor sagacissimus, omni dignitati hominum, omni personae, omni principatui, cui vos divina dispositio subdi voluerit. » Hoc est enim quod ait *propter Dominum, quia non est potestas, nisi a Deo, et qui potestati resistit, Dei ordinationi resistit (Rom. xiii, 1, 2)*. Et item sanctus Augustinus in sermone Evangelii Joannis (*serm. 6*): « Leguntur, inquit, leges manifestae, ubi praeeperunt imperatores, eos qui praeter catholicae Ecclesiae communionem usurpant sibi nomen Christianum, nec volunt in pace colere pacis auctorem, nihil nomine Ecclesiae audeant possidere. Sed quid, inquit, nobis et imperatori? Sed jam dixi de jure humano agitur: et tamen Apostolus voluit serviri regibus, voluit honorari reges, et dixit: *Regem reveremini*. Noli dicere: Quid mihi et regi? noli dicere possessiones tuas, qui et ipsa humana jura renuntiasti, quibus possidentur possessiones. » Et si per jura regum possidebunt possessiones, non possunt ut regi de ecclesiasticis possessionibus obsequium non exhibeant, sicut antecessores mei suis antecessoribus exhibuerunt.

Quapropter, domne pater reverentissime, consulti secundum privilegium sedis vestrae subjectioni nostrae, ne talia nobis cujuscunque suggestionis mandetis, unde inter episcopalem auctoritatem et regalem potestatem, inter Ecclesiam et rempublicam

tantum scandalum possit oriri, quod facile ac sine A dispendio religionis, vel detrimento ecclesiasticarum rerum, unde servi et ancillæ Dei debeant nutriri, et ecclesiastica negotia contineri, postea non possit sedari, quia sicut Abraham dixit ad Dominum : *Absit hoc a te, a Domine, non est hoc tuum, qui iudicas omnem terram* (Gen. xviii, 25). Et hanc meæ subjectionis humillimam suggestionem ea benignitate suscipite, qua primus apostolorum non solum minoris sui apostoli redargutionem pro simulatione suscepit, verum et minorum suorum quæstionem, cur ad præpatriatos intraverit, satisfacere ac lenire curavit. Epistolam autem generaliter episcopos regni domni nostri Caroli a vobis directam quantocius potui metropolitanis regni sui direxi, ut et ipsi per suos coepiscopos illam transmittant, quatenus scientes præceptionem vestram, quod jubeatis exsequi studeant. Vestra denique auctoritas misit mihi præterito anno epistolam, per missum coepiscopi nostri Hincmari, præcipientem ut oris mei officio Nortmannum, qui res Ecclesiæ Laudunensis invaserat, excommunicarem. Sed ipse Nortmannus, sicut manifestum est, multis in istis regionibus, in quibus leges et canones exortas causas agitari et definiri præcipiunt, res ipsius Ecclesiæ non invasit, ex quibus quasdam idem Hincmarus episcopus domno regi Carolo, sine meo et coepiscoporum ac comministrorum suorum consensu concessit, ut eas Nortmanno beneficiaret, sicut plurimi sciunt, et in scriptis suis domno regi, et mihi directis fatetur. Quas siquidem res nuper domnus rex Ecclesiæ Laudunensi restituit, quasdam etiam res prædictus episcopus filio Nortmanni sibi commendato in beneficium dedit, quas ab eo receptas tenet.

Præterea si vestræ complacet auctoritati, quando talia et hujusmodi ad vos veniunt, et inde præcipere postulamini, interponite si ita est ut vobis innotuit, quatenus sanius vestra jussio juste et rationabiliter ponderata valeat exsequi. Et metropolitanus qualiscunque, qui secundum sacros canones excommunicationes intentatas a provinciali episcopo, si inde ad me venerit proclamatio, debeo retractare, si vestro benigno sedet animo, in obsequium illius parochianum suum juberi non debeo excommunicare. Alteram siquidem mihi pro negotio ipsius Hincmari direxistis epistolam dicentes : « Miranda est plane vestra fraternitas, quare ministerio juris episcopalis in regionibus illis abutitur : et multorum charitas abundante nequitia refrigescere dicitur. Hincmarus namque nepos et æquivocus tuus venerabilis duntaxat episcopus, sicut audivimus, non minima in sua Ecclesia sustinet detrimenta, sed vobis, ut ita dixerim, tepescentibus, nullam consolationem potuit invenire. » Unde humiliter auctoritati vestræ rescribo quomodo, ut scriptum est, sicut audio judico, et vos sicut audistis scripsistis; sed qui vestræ sanctitati hæc verbis vel litteris intimavit, mendacium vobis dixit. Plurimum enim pro eo et apud regem et apud alios laboravi, sed et a præcedentibus annis,

sicut multis est notum, ab eo plurima suffero, et timeo ne in Scripturæ sententias incidat quibus dicitur : *Qui mentis est duræ corruet : abominatio enim Domino est omnis arrogans* (Prov. xxviii, 14 ; xvi, 5); et : *Qui se exaltat, humiliabitur* (Matth. xxiii, 22). Et sicut illa de quibus mihi pro eo scripsistis mendaciter dicta sunt, etiam aliquis vobis suggessit quod eum ire Romam prohibuerim, vel dissuaserim, mendacium vobis nihilominus dixit, sicut et plures in istis regionibus sciunt, et scriptis ad eum sæpe directis possum ostendere.

De eo quod pusillitati meæ vestra rescripsit sublimitas, ut eundem Hincmarum, et alios tres episcopos omnium episcoporum regni domni Caroli vicem ferentes ad synodum Romam mitterem, vestra sciatur auctoritas, quia nec prædictum Hincmarum, nec etiam quemlibet episcoporum dioceseos Rhemorum, minime autem aliarum provinciarum episcopos, nisi domnus rex illis præceperit, Romam, vel in aliquam partem, mea commendatione mittendi habeo potestatem, nec ipso ego ultra fines sui regni absque illius scientia progredi valeo, sicut missis vestræ sanctitatis coram Odone venerabili episcopo, et Ansegiso religioso presbytero et abbate, quibus nostræ causæ sunt cognitæ, dixi. Epistolam quoque, sicut mihi scripsistis, domno nostro regi Carolo a vobis directam, et a me dandam pro Hincmaro, quæ ut coram illo relegeretur, et quod in ea petebatis imple-ret me instare jussistis, frater Hincmarus mihi non dedit, nec etiam misit, sed sicut, audivi, a Remigio et Harduiro archiepiscopis aliarum provinciarum eam regi dari obtinuit. Deus omnipotens sanctitatem vestram, ad honorem sanctæ sedis, et correctionem sanctæ suæ Ecclesiæ, in suo apto servitio per annorum multa curricula conservare dignetur, domine sanctissime et reverentissime Patrum Pater in Domino.

EPISTOLA XXVIII.

AD ADRIANUM PAPAM.

Caroli Calvi regis nomine.

(Vide inter epistolas Caroli Calvi, Patrologiæ, tom. CXXIV, col. 881.)

EPISTOLA XXIX.

AD ADVENTIUM EPISCOPUM METENSEM.

Quo debeant ordine consecrari metropolitanus atque diæcesanus episcopus.

(Apud Sirmond., ex codice S. Laurentii Leodiensis.)

HINCMARUS, Rhemorum episcopus, domno ADVENTIO glorioso pontifici salutem.

Sicut jussistis, mitto vobis consecrationem episcopi, et exemplar decreti, quod in ampla pergamena debet scribi, ut confirmationes cleri et legatorum singulorum monasteriorum, et primorum presbyterorum parochiæ ac plebis, ibi valeant scribi : et si isdem electus in diaconii gradu adhuc est, canonico tempore debet presbyter ordinari. Sabbato autem

præcedente Dominicam, quando electus est ordinandus, convenire debent episcopi diocæseos ad principalem ecclesiam metropolis, et publice coram omnibus debet recitari decretum, et interrogare debent episcopi, si omnium vota, sicut ibi continentur, in eundem electum concordent. Et post responsionem illorum, debent interrogare episcopi, si has virtutes, quæ ibidem continentur, credunt vel sciunt esse in eodem electo. Et accepta inde responsione, debent interrogare episcopi, si aliquis ibi est, qui contra eundem electum aliquid dicere, vel ordinationi episcopali contrarium illi velit objicere, ut exeat et dicat memor communionis suæ. Quod si aliquis quiddam illi objecerit, habetis in canonibus quid inde sit faciendum. Sin autem omnes concordet fuerint in ejus electione, referendæ sunt ab omnibus Deo laudes, et examinandus est idem electus ab episcopis, secundum capitulum Carthaginensis concilii, quo manifestatur qualis debeat ordinari episcopus. Si ita credat, et simplicibus verbis catholicam fidem profiteatur, sicut ibidem scriptum habetur, et tunc monendus est idem electus, ut ipsa nocte, secundum traditionem apostolicam, se studeat Domino commendare.

Dominica autem die maturius episcopi diocæseos et clerus ac plebs convenire debent ad locum, ubi secundum consuetudinem solet metropolitanus episcopus ordinari. Et præparatis omnibus, et episcopis et ecclesiasticis ministris in vestibus sacris, et stantibus episcopus secus altare, idem electus indutus pontificalibus vestibus a primoribus clericis ejusdem metropolis de sacrario debet educi, et in ultimo loco post episcopos collocari. Is autem episcopus diocæsanus, qui consecrationem fusurus est super eum, incæpto *Introitu* ad missam secundum morem procedat. Et finito *Introitu* dicatur *Kyrie eleison*, prosequente ab ipso episcopo *Gloria in excelsis Deo*. Et post *Gloria in excelsis Deo*, dicat hanc orationem, quæ prima est in rotula consecrationis. Statim autem post completam ipsam orationem, antequam legatur Apostolus, commoneat clerum et plebem ut orent pro ordinando electo et pro ordinatoribus ejus, et accipiat electum manu sua dextera per manum illius, et incipiatur litania, et tam ipse cum electo, quam et cæteri qui adfuerint episcopi, incurventur ante altare, usque dum breviter pro tempore finiatur litania. Ut autem clerus incæperit dicere *Agnus Dei*, erigant se episcopi, et qui fundet consecrationem accipiat quatuor Evangelia, et aperiat per medium, et incurvato ipso electo ante altare, mittat ipse Evangelia super collum et cervicem ejus, et teneant ipsa Evangelia super eum duo episcopi, unus ex una parte, alter ex altera, et tam consecrator quam omnes episcopi, teneant manus dexteras suas super caput ordinandi, et dicat consecrator : *Oremus. Propitiare, Domine, supplicationibus nostris*, et reliqua. Et oratione completa, et respondentibus omnibus, *Amen*, dicat consecrator : *Dominus vobiscum, Sursum corda, Gratias agamus*

A Domino Deo nostro. Et respondente choro ad singula, incipiat consecrationem cantando : *Vere dignum et justam est, usque ad æterne Deus*; et tunc, sicut ipsa consecratio consequitur, et semper teneant manus dexteras episcopi super caput ordinandi. Ut autem ventum fuerit ad loca in quibus sunt cruce signatæ, accipiat consecrator vas chrismatis in sinistra manu, et cum dextro pollice, cantans quæ ibidem continentur, per singula loca faciat crucem de chrismate in verticem consecrandi, et perfecta consecratione, et respondentibus omnibus *Amen*, tollantur ab episcopis Evangelia de collo ejus, et mittat annulum in dexteræ manus digito qui præcedit minimum, dicens ad quid illi annulus datur. Signum est enim fidei, ut audientibus se ex divinis mysteriis signet quæ et quibus signanda sunt, et aperiat quæ et quibus aperienda sunt. Deinde donet illi baculum sancti regiminis, et det a se ordinato pacem, et sic per ordinem ordinatus osculetur episcopos et ponatur sella juxta eum qui illum ordinavit, et sedeat ibi metropolitanus episcopus : alioquin si non esset metropolitanus, in ordine consecrationis suæ sedere deberet. Et tunc legatur Apostolus ex Epistola ad Timotheum, qualis debeat esse episcopus; et expleta missa, ordinatus metropolitanus episcopus ducatur, vel deportetur, ad cathedram principalis ecclesiæ, cantantibus clericis ea quæ ad hoc opus conveniunt. Illuc autem perveniens resideat in principali cathedra, et commendat ministris ecclesiasticis ut unusquisque in suo ordine ministret sibi atque sibi commissæ Ecclesiæ. Inde pergat in sacrarium, et incæpto *Introitu* ad missam secundum morem procedat, et salutato altari ascendat ad sedem suam, et stet ibi donec in suo loco incipiat *Gloria in excelsis Deo* de gradibus sedis, et post datam orationem resideat in sede sua, considentibus secum episcopi et presbyteris. Et completa missa, habeat episcopus qui eum ordinavit litteras manibus suis subscriptas, quas sacri canones ordinato ab ordinatoribus suis jubent accipere, præferentes diem et consulem : et antequam ordinatus ab altari discedat, mittant eadem litteras super altare, unde eas accipiant et donent illas a se ordinato, et sic perfectis omnibus benedicatur Dominus. Cæterum quando provincialis ordinatur episcopus, ipsæ canonicæ litteræ a metropolitano et cæteris episcopis subscribendæ sunt, quando legitur Apostolus et cantatur responsorium et alleluia, et statim post missam finitum dantur ab episcopis ante altare ordinato provinciali episcopo, et archiepiscopo et alii episcopi vadunt ad sua. Ipse autem ordinatus cantat missam ubi locus est opportunus.

De his omnibus quæ mihi mandastis, et de his etiam quæ non mandastis, ut sit, veluti dicitur, quod supererogaveris, vobis rescripsi qualiter ordinationem agamus episcopi, et qualiter in me acta fuerunt. Decretum autem et consecrationem episcopalem, quæ ibi memoratur, ego non habui, quæ tamen vos habere posse cognosco.

EPISTOLA XXX.

AD EPISCOPOS.

De jure metropolitanorum, cum de Ansegisi primatu ageretur.

(Apud eundem, ex Mogunt. edit. Joan. Busæi.)

I. Domini et sanctissimi ac reverendissimi patris nostri apostolici papæ Joannis decreta ex sacris canonibus promulgata, sicut et sancti decessores ac prædecessores sui ex eisdem sacris canonibus spiritu Dei conditis, et totius mundi reverentia consecratis, promulgaverunt, quantum ex nobis est, non præjudicantes sententiis fratrum et coepiscoporum nostrorum, qui absentes sunt, ad quos hæc sua scripta mittuntur, reverenter suscipimus, singulis metropolitanis suo jure servato, velut mystica Nicæna synodus irrefragabiliter servari decrevit, dicens (*can. 6*): « Antiqua consuetudo servetur per Ægyptum, Libyam et Pentapolim, ita ut Alexandrinus episcopus horum omnium habeat potestatem, quia et urbis Romæ episcopo parilis mos est. Similiter autem et apud Antiochiam cæterasque provincias suis privilegia serventur Ecclesiis. Firmitas autem eorum, quæ geruntur per unamquamque provinciam metropolitanis tribuatur episcopo. »

II. Quæ sancti et magni concilii Nicæni decreta beatus Innocentius ad Alexandrum Antiochenum episcopum ita explanat, dicens (*epist. 20*): « Revolventes itaque auctoritatem Nicænae synodi, quæ una omnium per orbem terrarum mentem explicat sacerdotum, quæ censuit de Antiochena Ecclesia, cunctis fidelibus, ne dixerim sacerdotibus, esse necessarium custodire, qua super diocesim suam prædictam Ecclesiam, non super aliquam aliam provinciam recognoscimus constitutam. » Et Bonifacius papa scribens ad Hilarium Narbonensem episcopum (*epist. 3*): « Convenit, inquit, nos paternarum sanctionum diligentes esse custodes. Nulli etenim videtur incognita synodi constitutio Nicænae, quæ ita præcipit, ut eadem proprie verba ponamus, Per unamquamque provinciam jus metropolitanos singulos habere debere, nec cuiquam duas esse posse subjectas. Quod illi, quia aliter credendum non est, servandum sancto Spiritu suggerente sibi, consuerunt. » Et post aliquanta: « Quod idcirco dicimus, ut advertat charitas tua adeo nos canonum præcepta servare, ut ita constitutio quoque nostra diffiniat, quatenus metropolitanis sui unaquæque provincia in omnibus rebus ordinationem semper expectet. »

III. Et sancta synodus episcoporum Africae provinciae scribens ad S. Cælestinum papam (*in fine synodi Africanæ*): « Decreta, inquit, Nicæna, sive inferioris gradus clericos, sive episcopos ipsos, suis metropolitanis apertissime commiserunt. Prudentissime enim iustissimeque providenter quæcunque negotia in suis locis ubi orta sunt finienda, nec unicuique provinciae gratiam sancti Spiritus defuturam, qua æquitas a Christi sacerdotibus, et prudenter

A videatur, et constantissime teneatur, maxime quia unicuique concessum est, si iudicio offensus fuerit cognitorum, ad concilium suæ provinciae, vel etiam universale provocare. « Et hinc sanctus Cælestinus, ad rei firmitatem commemorans decreta præfati Bonifacii, decrevit ut unaquæque provincia suo metropolitanis debeat esse contenta, dicens (*ad episc. Galliae, c. 4*): « Primum, ut juxta decreta canonum unaquæque provincia suo metropolitanis contenta sit, ut decessoris nostri data ad Narbonensem episcopum continent constituta, nec usurpationi locus alicui sacerdoti in alterius concedatur injuriam. Sit concessis sibi contentus unusquisque limitibus, alter in alterius provincia nihil præsumat. » Et item idem (*Ad episc. Apuliæ, c. 1*): « Nulli sacerdoti suos liceat canones ignorare, nec quidquam facere, quod Patrum possit regulis obviare. Quæ enim a nobis res digna servabitur, si decretalium norma constitutorum pro aliquorum libitu, licentia populis permessa frangatur? » Et sanctus Leo ad Theodorum Forojuliensem episcopum (*epist. 92*): « Sollicitudinis quidem tuæ is ordo esse debuerat, ut cum metropolitanis tuo primitus de eo quod quærendum videbatur esse conferres, ac si id quod ignorabat dilectio tua, etiam ipse nesciret, instrui vos pariter posecretis, quia in causis, quæ ad generalem observantiam pertinent omnium Domini sacerdotum, sine primatibus nihil oportet inquiri. »

IV. Et quia sancta Romana Ecclesia, cui sollicitudo omnium Ecclesiarum in beato Petro principe apostolorum est commissa, plures metropolitanos in speciali sua diocesi habet, sicut sanctus Leo apud Anastasium Thessalonicensem episcopum monstrat (*epist. 88*), similiter et Alexandrina Ecclesia in sua diocesi; sed et Antiochena sedes nonnullos metropolitanos in sua diocesi habet, sicut sanctus Innocentius ad Alexandrum ejusdem sedis episcopum scribit (*epist. 20*), et in ecclesiasticis historiis ac synodalibus gestis invenimus, eisdem etiam metropolitanis, quos suis vicariis sancta Romana commisit Ecclesia, secundum Nicænos sacros canones sua jura decrevit servari, veluti ad eundem Anastasium idem beatus Leo scribens (*epist. 88*): « Igitur, inquit, secundum sanctorum Patrum canones, spiritu Dei conditos, et totius mundi reverentia consecratos, metropolitanos singularum provinciarum episcopos, quibus ex delegatione nostra fraternitatis tuæ cura prætenditur, jus traditæ sibi antiquitatis dignitatis intemeratum habere decrevimus, ita ut a regulis præstitutis nulla aut negligentia, aut præsumptione discedant. » Attendendum est igitur si apostolica sedes metropolitanis suæ specialis dioceseos, sicut in epistolis beati Gregorii ex Regesto legimus, quos propter longinquitatem suas vices agentibus delegavit, sua jura secundum sacros Nicænos canones servari præcepit, sicut et in epistola præfati Leonis ad prædictum Anastasium dicitur (*epist. eadem ante superiora*): « Si quid grave, inquit, intolerandumque gessisset metropolitanus,

nostra erat expectanda censura, ut nihil prius ipse decerneres, quam quid nobis placeret, agnosceres. Vices enim nostras ita tuæ credidimus charitati, ut in partem sis vocatus sollicitudinis, non in plenitudinem potestatis. »

V. Illis metropolitanis (qui et primates multoties in sacris canonibus appellantur, quique in loco defunctorum archiepiscoporum et metropolitanorum ab episcopis uniuscujusque provinciæ sine interrogatione alterius primatis prævalent ordinari, et ex antiquæ consuetudinis lege, a sede apostolica, cui sollicitudo et prælatio omnium Ecclesiarum in primatu est sancti Petri collata, pallii solent genio insigniri, et in loco decedentium episcoporum, sine consultu vel licentia primatis alterius, in sua provincia quique possunt episcopos ordinare), sua jura debent modis omnibus secundum eosdem sacros Nicænos canones conservari : qui inviolabiliter decreverunt, ut sicut Alexandrinæ Ecclesiæ, quia et urbis Romæ episcopo parilis mos est, similiter et apud Antiochiam, cæterasque provincias suis privilegia serventur Ecclesiis. De quibus sacris canonibus præfatus sanctus Leo ad Anatolium Constantinopolitanum episcopum ita passim dicit (*epist.* 56) : « Post consecrationem Antiocheni episcopi, quam tibimet contra canonicam regulam vindicasti, doleo etiam in hoc dilectionem tuam esse prolapsam, ut sacratissimas Nicænorum canonum constitutiones conareris infringere, tanquam opportune se tibi hoc tempus obtulerit, quo secundi honoris privilegium sedes Alexandrina perdidit, et Antiochena Ecclesia proprietatem tertie dignitatis amiserit, ut his locis juri tuo subditis, omnes Metropolitanis episcopi proprio honore priventur. Quibus inauditis et nunquam ante tentatis ita præveniris excessibus, ut sanctam synodum, ad extinguendam solum hæresim, et confirmationem fidei catholicæ, studio Christianissimi principis congregatam, in occasionem ambitus trahas, et ut conniventiam suam tibi dedat impellas, tanquam refutari nequeat quod illicite voluerit multitudo. »

VI. Consona his et in aliis decretis apostolicæ sedes habentur : « Quod si et omnes sacerdotes et mundus assentiat, damnatio consentientes involvit, non prævaricationem consensus absolvit. Non enim crimen minuitur, sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit. » Et item S. Leo ad præfatum Anatolium (*ibid.*, *post superiora*) : « Illa, inquit, Nicænorum canonum per sanctum vere Spiritum ordinata conditio in nulla unquam parte est solubilis. Nulla sibiimet de multiplicatione congregationis synodalia concilia blandiantur, neque trecentis illis decem, atque octo episcopis quantumlibet copiosior numerus sacerdotum comparare se audeat vel præferre, cum tanto divinitus privilegio Nicæna sit synodus consecrata, ut sive per pauciores, sive per plures ecclesiastica judicia celebrentur, omni penitus auctoritate sit va-

cum, quidquid ab illorum fuerit constitutione diversum. » Et paulo post : « Sancti illi et venerabiles Patres, qui in urbe Nicæna, sacrilego Ario cum sua impietate damnato, mansuras usque in finem mundi leges ecclesiasticorum canonum condiderunt, et apud nos in toto orbe terrarum in suis constitutionibus vivunt, et si quid usquam aliter quam illi statuere præsumitur, sine cunctatione cassatur, ut quæ ad perpetuam utilitatem generaliter instituta sunt, nulla communicatione varientur, nec ad privatum trahantur commodum, quæ ad bonum sunt commune præfixa : et manentibus terminis quos constituerunt Patres, nemo in jus tendat alienum, sed intra fines proprios atque legitimos, prout quis valuerit, in latitudine charitatis se exerceat. » Aliud enim sunt sedes, aliud præsidentes, et magaus unicuique honor est integritas sua.

VII. Et item idem ad synodum Chalcedonensem scribens (*epist.* 65) : « De custodiendis, inquit, sanctorum Patrum statutis, quæ in synodo Nicæna inviolabilibus sunt fixa decretis, observantiam vestræ sanctitatis admoneo, ut jura Ecclesiarum, sicut ab illis centum decem et octo Patribus divinitus inspiratis sunt ordinata permaneant. Nihil alienum improbus ambitus concupiscat, nec per alterius immunionem suum aliquis quærat augmentum. Quantumlibet enim extortis assentionibus sese instruat vanitatis elatio, et appetitus suos conciliorum æstimet nomine roborandos, infirmum atque irritum erit quidquid a prædictorum Patrum canonibus discreparit. Quorum regulis apostolica sedes quam reverenter utatur, scriptorum meorum, quibus Constantinopolitanis antistitis conatus repuli, poterit sanctitas vestra lectione cognoscere, et me, auxiliante Domino nostro, et catholicæ fidei et paternarum traditionum esse custodem. » Et ad Martianum Augustum (*epist.* 57) : « Privilegia Ecclesiarum sanctorum Patrum canonibus instituta, et venerabilis Nicænæ synodi fixa decretis, nulla possunt improbitate convelli, nulla novitate mutari. In quo opere, auxiliante Christo fideliter exsequendo, necesse est me perseverantem exhibere famulatum, quoniam dispensatio mihi credita est, et ad meum tendit reatum, si paternarum regulæ sanctionum, quæ in synodo Nicæna, ad totius Ecclesiæ regimen spiritu Dei instruente sunt conditæ, me, quod absit, connivente violentur, et major sit apud me unius fratris voluntas, quam universæ domus Domini communis utilitas. »

VIII. Et ad Pulcheriam Augustam (*epist.* 58) : « Contra statuta paternorum canonum, quæ ante longissimæ ætatis annos in urbe Nicæna spiritualibus sunt fundata decretis, nihil cuique audere conceditur : ita ut si quis diversum aliquid decernere velit, se potius minuat, quam illa corrumpat. Quæ si ut oportet a cunctis pontificibus intemerata servantur, per universas Ecclesias tranquilla erit pax et firma concordia, nullæ de mensuris harum dimensiones, nullæ de ordinationibus lites, nullæ de privilegiis ambiguitates, nulla erunt de alieni usur-

patione certamina, sed ea quæ jure charitatis rationabilis est et morum et officiorum servabitur unanimitas. Et ille vere erit magnus, qui fuerit totius ambitionis alienus, dicente Domino : *Quicumque voluerit inter vos major fieri, erit vester minister; et quicumque voluerit inter vos primus esse, erit vester servus. Sicut filius hominis non venit ministrari, sed ministrare* (Matth. xx; Marc. x). Et tamen hæc illis tunc insinuabantur, qui de pusillo volebant crescere, et de infimis ad summa transire. »

Et ad Maximum Antiochenum episcopum (*epist.* 66) : « Tanta apud me est Nicænorum canonum reverentia, ut ea quæ sunt a sanctis patribus constituta nec permiserim, nec patiar aliqua novitate violari. Etsi enim diversa nonnunquam sunt merita præsumul, tamen jura permanent sedium, quibus etsi possunt æmuli perturbationem aliquam fortassis inferre, non tamen possunt minuere dignitatem. Nunc autem ad omnia generaliter pronuntiare sufficiat, quod si quid a quoquam contra Nicænorum canonum statuta in quacunque synodo vel tentatum est, vel ad tempus videtur extortum, nihil præjudicii potest inviolabilibus inferre decretis. Et facilius erit quarumlibet consensionum pactum dissolvi, quam predictorum canonum regulas ex ulla parte corrumpi. » Quoniam universæ pacis tranquillitas non aliter poterit custodiri, nisi sua canonibus reverentia intemerata servetur. Quidquid enim præter speciales causas synodalium Conciliorum ad examen Episcopale defertur, potest aliquam dijudicandi habere rationem, si nihil de eo est a sanctis patribus apud Nicæam definitum. Nam quod ab illorum regulis et constitutione discordat, apostolicæ sedis nunquam poterit obtinere consensum.

IX. Et sanctus papa Hilarus ad Leontium, Veranum et Victorium episcopos, inter cætera ad locum (*epist.* 4) : Ita vestræ charitati cognitionem adnexæ querimonie delegamus, ut nihil adversum venerandos canones, nihil contra sanctæ memoriæ decessoris mei judicium valeat, quidquid obreptum nobis esse constiterit. Nolumus namque, fratres charissimi, Ecclesiarum privilegia, quæ semper suat servanda confundi, nec in alterius provincia sacerdotis alterum jus habere permittimus, quia per hoc non minus in sanctarum traditionum delinquitur sanctiones, quam in injuriam ipsius Domini prosilitur, cum expectatio fructus nostri ministerii, » non in regionum latitudine, sed in acquisitione ponitur animarum. » Et item idem ad episcopos diversarum provinciarum (*epist.* 10) : « Hæc ad universam charitatem vestram et jam per fratrem et coepiscopum nostrum Antonium scripta direximus. Quibus admoniti communis omnium sollicitudo procuret, ne quisquam frater in alterius prorupturus injuriam transcendat terminos venerandis Patribus constitutos. » De quibus terminis Antiochenum concilium, in magna synodo Chalcedonenſi collaudatum, capite decimo tertio dicit (*conc. Antioch., can.* 13) : « Nullus episcopus ex alia provincia audeat ad aliam

A transgredi, et ad promotionem ministerii aliquos in Ecclesiis ordinare, licet consensum videantur præbere nonnulli, nisi litteris tam metropolitani, quam cæterorum qui cum eo sunt episcoporum, rogatus adveniat, et sic ad actionem ordinatio accedat. Si vero nullo vocante inordinato more deproperet, super aliquibus ordinationibus, et ecclesiasticis ordinationibus ad eum non pertinentibus componendis, irrita quidem quæ ab eo geruntur existant, ipse vero incompositi motus sui, et irrationabilis audaciæ subeat ultionem, ex hoc jam damnatus a sancto concilio. » Et consona huic dicit in capite vicesimo secundo ejus conclusio talis est : « Si ordinare non potuerit, nullatenus judicabit. »

X. Et hinc sanctus Gelasius in decretis ad omnes B episcopos de Institutis ecclesiasticis (*epist.* 6) : « Cumque, inquit, nobis contra salutarium reverentiam regularum cupiamus temere nihil licere, et cum sedes apostolica superior his omnibus, favente Domino, quæ paternis canonibus sunt præfixa pio devotoque studeat tenere proposito, satis indignum est quemquam vel pontificum vel ordinum subsequendum, hanc observantiam refutare, quam beati Petri sedem et sequi videat et docere, satisque conveniens sit, ut totum corpus Ecclesiæ in hac sibi observatione concordet, quam illic vigere conspiciat, ubi Dominus totius Ecclesiæ posuit principatum. » Attendendæ summopere sunt omnibus nostratibus inter cæteros præcipue horum duorum heroum sententiæ, Leonis et Gelasii, ne præsumant discipuli quod licere sibi magistri non voluerunt, et si ad tanti tonitruum magnivocum sonitum tremunt cedri, quid faciendum sit tabulis. Ait enim Leo (*epist.* 56, ad Anatolium), « quod Nicænorum canonum per sanctum vere Spiritum ordinata conditio in nulla cuiquam sit parte solubilis. » In qua sententia nulla persona excipitur, quacumque prædita potestate vel dignitate. Et Gelasius (*epist.* 6) : « Cumque, inquit, nobis contra salutarium reverentiam regularum cupiamus temere nihil licere, satis indignum est quemquam hanc observantiam refutare, quam beati Petri sedem et sequi videat et docere, » Hinc sanctus Augustinus, tempore prior, loco posterior, ab omnibus sedis apostolicæ pontificibus in suo tempore, ac post suum obitum, imo et a cuncta catholica Ecclesia inter magistros optimos receptissimus. D in libro de Vera Religione (*cap.* 21) dicit : « Spiritualis homo judicat omnia, ipse autem a nemine judicatur, id est a nullo homine, sed a sola ipsa lege, secundum quam judicat omnia, quoniam et illud verissime dictum est : Oportet nos omnes exhiberi antetribunal Christi. Omnia ergo judicat, quia super omnia est quando cum Deo est; cum illo autem est, quando purissime intelligit, et tota charitate quod intelligit diligit. Ita etiam quantum potest, lex ipsa etiam fit, secundum quam judicat omnia, et de qua judicare nullus potest : sicut in istis temporalibus legibus, quanquam de his homines judicent cum eas instituunt, tamen cum fuerint

institute atque firmata, non licebit iudici de ipsis A iudicare, sed secundum ipsas. Conditor tamen legum temporalium, si vir bonus est et sapiens, illam ipsam consulit æternam, de qua nulli animæ iudicare datum est, ut secundum ejus incommutabiles regulas, quid sit pro tempore jubendum vetandumque discernat. Æternam igitur legem mundis animis fas est cognoscere, iudicare non fas est. »

XI. Cujus sententiam et beatus Gelasius confirmat in decretis ad episcopos per Dardaniam constitutos, dicens (*epist.* 2, sub initium) : « Confidimus, quod nullus jam veraciter Christianus ignoret, unius cujusque synodi constitutum, quod universalis Ecclesiæ probavit assensus, nullam magis exsequi sedem præ cæteris oportere quam primam, quæ unamquamque synodum et sua auctoritate confirmat, et continuata moderatione custodit, pro suo scilicet principatu, quem beatus Petrus apostolus Domini voce perceptum, Ecclesia nihilominus subsequente, et tenuit semper, et retinet. » Et Symmachus papa ad Cæsarium Arelatensem episcopum (*epist.* 11) : « Rationabile est ut sancta Arelatensis Ecclesia propriis privilegiis perfruatur, et quod vetustas præstitit, et Patrum auctoritas roboravit, nova non debet violare præsumptio : sic tamen, ut cæterarum Ecclesiarum privilegia temporibus acquisita non titubent, quia non potest ex parte firmum esse, quod generalitatis tangit injuriam. Manentibus siquidem his quæ Patrum constituta singulis Ecclesiis concesserunt, decernimus ut circa ea, quæ tam in Gallia quam in Hispania provinciis de causa religionis emergerint, solertia tuæ fraternitatis invigilet. » C Et post aliquanta : « Igitur quemadmodum supra diximus, per singulas Ecclesias beneficia, quæ sunt diu custodita, servantur. » Et hinc sanctus Hormisda in epistola ad beatum Remigium Rhemorum episcopum scripsit, dicens : « Dilectissimo fratri Remigio Hormisda. Suscipientes plena fraternitatis tuæ congratulatione colloquia, quibus nos germanæ salutis tuæ lætificavit indicio corporali cum spiritualibus officiis incolumitate subnixia, congruum esse perspeximus hanc ipsam quam mente gerimus verbis aperire lætitiâ. Agis enim summi documenta pontificis, dum et prædicanda facis, et ea insinuare non differs. Prærogativam igitur de nostri sumpsimus electione indicii, quando id operatum te esse didicimus, quod cæteris agendum obnixius imperamus, ut in provinciis tanta longinquitate disjunctis, et apostolicæ sedis vigorem, et Patrum regulis studeas adhibere custodiam. Vices itaque nostras per omne regnum dilecti et spiritualis filii nostri Clodovei, quem nuper adminiculante superna gratia plurimis, et apostolorum temporibus æquiparandis, signorum miraculis prædicationem saluiferam comitantibus, ad fidem cum gente integra convertistis, et sacri dono baptismatis consecrasti, salvis privilegiis, quæ metropolitanis decrevit antiquitas, præsentis auctoritate committimus : augentes studii hujus participatione ministerii dignitatem, relevan-

tes nostras ejusdem remedio dispensationis excubias. Et licet de singulis non indigeas edoceri, a quo jam probavimus acutius universa servari, gratius tamen esse solet, si ituris trames ostenditur, et laboraturis injuncti operis forma monstratur. Paternas igitur regulas, et decreta sanctissimis diffinita conciliis ab omnibus servanda mandamus. In his vigilantiam tuam, in his curam et fraternæ monita exhortationis ostendimus. His ea, quanta dignum est, reverentia custoditis, nullum relinquit culpæ locum sanctæ observationis obstaculum. Ibi fas nefasque præscriptum est, ibi prohibitum, ad quod nullus audeat aspirare, ibi concessum quid debeat mens Deo placitura præsumere. Quoties universæ poscit religionis causa concilium, te cuncti fratres evocante conveniant : et si quos eorum specialis negotii pulsata intentio, jurgia inter eos oborta compece, discussa sacra lege determinando certamina. Quidquid autem illic pro fide et veritate constitutum, vel provida dispensatione præceptum, vel personæ nostræ auctoritate fuerit confirmatum, totum, ad scientiam nostram instructa relationis attestatione perveniat. Eo fit ut et noster animus officii charitate dati, et tuus securitate perfruatur accepti. Deus te incolumem custodiat, frater charissime. »

XII. Et sanctus Gregorius in epistola ad Virgillum Arelatensem episcopum (*lib.* IV, *epist.* 32) : « Fraternitati tuæ, inquit, vices nostras in Ecclesiis quæ sub regno sunt præcellentissimi filii nostri Childeberti, juxta antiquum morem Deo auctore committimus. Singulis siquidem metropolitans secundum priscam consuetudinem proprio honore servato, pallium quoque transmissimus. » Ei in epistola ad Dominicum Carthaginensem archiepiscopum (*lib.* XI, *epist.* 39) : De ecclesiasticis, inquit, privilegiis quod vestra fraternitas scribit, hoc postposita dubitatione teneat, quia, sicut nostra defendimus, ita singulis quibusque Ecclesiis sua jura servamus. Nec cuilibet favente gratia ultra quam meretur impartior, nec ulli hoc quod sui juris est ambitu stimulante derogo : sed fratres meos per omnia honorare cupio, sicque studeo honore singulos subvehi, dummodo non sit quod alteri jure ab altero possit opponi. » Et ad Natalem Salonitanum episcopum (*lib.* eod., *epist.* 37) : « Quod, inquit, dicitis nostris temporibus debere servari, quæ a meis quoque prædecessoribus tradita atque custodita sunt, absit hoc a me, ut statuta majorum consacerdotibus meis in qualibet Ecclesia infringam, quia mihi injuriam facio, si fratrum meorum jura perturbo. »

XIII. Hæc ita, ut supra ostensum est, de antiquo jure singulis metropolitanis servando, et subsequentes sacram Nicenam synodum conciliorum canones statuerunt. Silicet Antiocheni, dicentes (*can.* 9) : « Per singulas regiones episcopos convenit nosse metropolitanum episcopum sollicitudinem totius provincie gerere. Propter quod ad metropolim omnes undique, qui negotia videntur habere concurrant, et reliqua. » Et Constantinopolitani

canones decreverunt (*can. 2*), ut illa quæ sunt per unamquamque provinciam ipsius provinciæ synodus dispenset, sicut Nicæno constat decretum esse concilio. Et universale Chalcedonense concilium dicit (*can. 1*): « Regulas, inquit, sanctorum Patrum per singula nunc usque concilia constitutas proprium robur obtinere decrevimus. » Et item idem (*can. 19*): « Decrevit itaque sancta synodus secundum Patrum canones bis in anno episcopos in id ipsum in unaquaque provincia convenire, quo metropolitanus antistes probaverit, et corrigere singula, si quæ fortassis emergerint. »

XIV. Sic et Africae provinciæ sancta concilia decreverunt, ut quæ in Nicæno concilio statuta sunt omni modo conserventur, et ut qui posterius ordinati sunt prioribus se non audeant anteferre. Unde inter cætera ad locum dicit Aurelius (*cap. 53*): « Non decuerat, inquit, ut hæc repeteremus, nisi forte existerent inconsiderata mentes quorundam, quæ ad hæc statuenda nostros acuerent sensus. Sed communis hæc causa est, quam insinuavit frater et consacerdos noster Valentinus, ut unusquisque nostrum ordinem sibi decretum a Deo cognoscat, et posteriores anterioribus deferant, nec eis inconsultis aliquid agere præsumant. Qua de re dico, prout captus animi mei retinet, eos qui putaverint spretis majoribus aliquid præsumendum, competenter esse ab omni concilio coercendos. Xantippus episcopus primæ sedis Numidiæ dixit: Audivit omnium fratrum præsentia prosecutionem fratris et consacerdotis nostri Aurelii, quid ad hæc respondent? Dativus episcopus dixit: Quæ majorum decrevit sententia nostro assensui mancipabuntur, ut quæ præteritorum conciliorum gentis tenentur Carthaginensis Ecclesiæ nostra assensione plene apud omnes firma teneantur. Universi episcopi dixerunt: Hic ordo et a Patribus et a majoribus servatus est, et a nobis Deo propitio servabitur, salvo etiam jure primatus Numidiæ et Mauritanie. »

XV. Et item iidem sacri canones (*conc. Milevit. c. 14*): « Placuit ut quicunque deinceps ordinantur per provincias Africanas, litteras accipiant ab ordinantibus suis, manu eorum conscriptas, continentes consulem et diem, ut nulla altercatio de posterioribus vel anterioribus oriatur. Unde Pelagius, antecessor sancti Gregorii, ad Childebertum regem Francorum scribit de Sapaudo Arelatensi archiepiscopo (*Pelag. I, epist. 11*), increpans eum, ut ipsius verbis utamur, quoniam ad petitionem episcopi ab eo ordinati in iudicium, sequentis civitatis episcopi, quod nulla ecclesiastica lege et ratione conceditur, iudicandum juberetis occurrere, ut ipso de conculcato loci sui præiudicio conquerente, illum qui usurpavit, necesse sit de illicita præsumptione culpari. » Et sanctus Gregorius vigilantissime servari decrevit ut posteriores se prioribus non præferant, et ut nullus metropolitanus in alterius metropolitani provincia, inconsulto eo quiddam juris præsumat, scribens ad Augustinum Anglorum episcopum (*interrogatione 9*):

A « In Galliarum, inquit, episcopis, nullam tibi auctoritatem tribuimus, quia ab antiquis prædecessorum meorum temporibus pallium Arelatensis episcopus accepit, quem nos privare auctoritate percepta minime debemus. » Et post aliquanta: « Ipse auctoritate propria episcopos Galliarum iudicare non poteris, sed suadendo, blandiendo, bona quoque opera tua eis imitanda monstrando, pravorum mentes ad sanctitatis studium reforma, quia scriptum est in lege: Per alienam messem transiens falcem mittere non debes, sed manu spicas conterere et manducare (*Deut. xxiii, 25*). Falcem enim iudicii mittere non potes in ea segete, quæ alteri videtur esse commissa, sed per effectum boni operis frumenta Domnica vitiorum suorum paleis exspolia, et in Ecclesiæ corpus monendo et persuadendo, quasi mandendo converte. Quod vero ex auctoritate agendum est, cum prædicto Arelatensi episcopo agatur, ne prætermitti possit hoc quod antiqua Patrum institutio invenit. »

XVI. Et quod de uno hoc primato Gallicano, qui a sede apostolica pallium acceperat, dixit, hoc et de reliquis Gallicanorum et Belgicorum atque Germanicorum primatibus est utique intelligendum. Inter quos, sicut et inter reliquos episcopos, hæc conditio regularis servatur, ut qui prius fuerit ordinatus, prior habeatur, velut idem S. Gregorius in alia epistola ad præfatum Augustinum patenter ostendit. De quibus primatibus iidem sacri canones dicunt, ut quisquis episcoporum accusatur, ad primatem provinciæ ipsius causam deferat accusator. Et qui provocandum putaverint, ad primates suarum provinciarum, sicut et de episcopis sæpe constitutum est, provocent. Et episcopus, qui ad synodum non occurrerit, ad primatem suum jubetur rationem impedimenti sui reddere. Et si episcopi inter quos causa versatur, diversarum sunt provinciarum, ille primas debet iudices dare, in cuius provincia est locus, de quo contenditur, et quæstio per episcopos iudices jubetur finire, sive quos primates dederint, sive quos inter se conquerentes vicinos ex consensu delegerint.

XVII. Ordo autem ac prærogativa prioratus non solum secundum sacros canones et decreta sedis Romanæ pontificum, inter episcopos est conservandus, verum et inter presbyteros, sicut sanctus Leo in decretali sua epistola ad Dorum Beneventanæ civitatis episcopum, ex eisdem sacris canonibus promulgata, inter cætera dicit ad locum (*epist. 6*): « Si ambientis intentio, aut imperita faventium studia, id quod nunquam habuit consuetudo, poscebant, ut incipiens imeritis, et novellus præferretur antiquis, tuæ fuerat industriæ atque doctrinæ, ut injuste peitentium desideria rationabili auctoritate cohiberes, ne quem in sacerdotali propere provehebas honore, ad injuriam eorum quibus sociabatur inciperet, minorque se fieret, dum in illo non humilitatis virtus, sed elationis vitium roboraretur. Neque enim ignorabas dixisse Dominum, quod qui se humiliat exal-

tabitur, qui vero se exaltat, humiliabitur. Eundemque dixisse: *Quicumque vult inter vos major fieri, sit vester minister, et quicumque voluerit inter vos primus esse, erit vester servus* (Marc. x, 43). Vos autem quæritis de pusillo crescere et de honore majores esse. Utrumque enim inordinatum, utrumque præposterum est, et omnis laborum fructus aufertur, omnis meritorum mensura vacuatur, si tantum quis assequitur dignitatis, quantum adulationis obtinuit, ut cupiditas eminendi non solum superbientem minuatur, sed etiam conniventem. Si vero, ut asseritur, primi secundique presbyteri circa Epicarpium sibi met præponendum, tam huic assentatio fuit, ut illum cum sui dedecore poscerent honorari, nec hoc quidem illis proprio se iudicio deicientibus tribui debuit quod volebant, cui tam miseræ voluntati te dignius fuerat obviare, quam cedere. Deformis autem et ignava subjectio bene sibi consciis, et non irritam facientibus gratiam Dei, præjudicare non potuit, ut primates suos quocumque commercio in alterutrum transferentes, subsequentium suorum minuerent dignitatem, et quem ultimum sibi anteposuerant, cæteris præmineret. Prædicti igitur presbyteri, qui indignos se honoris sui ordine sunt professi, licet privari etiam sacerdotio mererentur, tamen ut eis pro apostolicæ sedis pietate parcatur, ultimi inter omnes Ecclesiæ presbyteros habeantur. Et ut iudicii sui sententiam ferant, inferiores etiam illo erunt, quem propria sententia sibi met prætulere, cæteris omnibus presbyteris in eo ordine permanentibus, quem unicuique ordinationis suæ tempus ascripsit. Nec quisquam præter prædictos duos imminutæ dignitatis patiatur injuriam, sed in eorum statum tantummodo hoc recurrat opprobrium, qui novello et immature ordinato inferiores fieri elegere, ut illam evangelicam sententiam ad se sentiant pertinere, qua dicitur: Quo iudicio iudicaveritis, iudicabitur de vobis; et qua mensura mensi fueritis, eadem remetietur vobis (Matth. vii, 2). Paulus vero presbyter ordinem suum, de quo laudabili firmitate non cessat, obtineat, nec ulterius aliquid in cuiusquam præsumatur injuriam. »

XVIII. Hæc ita de jure singulis metropolitanis conservando, et ut posteriores se prioribus suis non præferant, sed ordinem sibi a Deo traditum quique conservare procurent, a Nicænis canonibus Spiritu Dei conditis, et totius mundi reverentia consecratis, cæterisque sacris canonibus irrefragabiliter decretis, ac providentia et auctoritate pontificum apostolicæ sedis ex eisdem canonibus promulgatis, ad eorum qui sciunt memoriam, vel nescientium forte notitiam commemorare debere putavimus, quoniam in Cisalpinis provinciis delegatio vicium apostolicæ sedis, propter Simoniacam hæresim extirpandam, et ad præsumptionem, quia laici potentes repente tonsurabantur, et ordinabantur episcopi, amputandam, sicut in apostolicæ sedis pontificum, maxime autem in beati Gregorii epistolis legimus, fuit exorta, privilegium singularum provinciarum metropolitanis

A inconcusse juxta sacras regulas conservatis. Quæ temporibus Theodosii et Honorii imperatorum, pontificatu papæ Zosimi, per septem provincias, scilicet Viennensem, Lugdunensem, Narbonensem primam et secundam, et Alpinam, et Novempopulanam, et secundam Aquitanicam emanavit, ut de his provinciis honorati vel possessores, iudices et episcopi præfatarum provinciarum, ab Idibus Augusti quibuscumque mediis diebus in Idus Septembris, in urbe Arelatensi, quæ et Constantina vocatur, ad concilium forense vel ecclesiasticum convenirent. Ita ut de Novempopulana et secunda Aquitanica, quæ provinciæ longius constitutæ sunt, si eorum iudices et metropolitanos occupatio certa retineret, legatos suos juxta consuetudinem mitterent, sicut in edicto præfatorum imperatorum, et in epistolis apostolicæ sedis pontificum invenitur. Deinde hic primatus per præfatas provincias Viennensi civitati commissus est, indeque hanc sollicitudinem episcopus Arelatensis recepit.

B XIX. Demum in regno Clodovei, nuper cum integra gente ad fidem conversi per sanctam prædicationem beati Remigii, Domino cooperante et sermone confirmante sequentibus signis, beatus Hormisdas vices suas eidem sancto Remigio Rhemorum Durocortorum antiquæ metropolis episcopo, quæ præcedentibus temporibus habuit sub se duodecim civitates, videlicet Suessionum, Catalaunorum, Veromandorum, Atrebatum, Camaracensium, Tornacensium, Silvanectum, Belgivagorum, Ambianensium, Morinum, id est, Ponticum, Bononiensium, et Laudunum Clavatum, in quo castro ex sua parochia idem sanctus Remigius Africanorum canonum et apostolica fultus auctoritate constituit episcopum, per Belgicas et quasdam provincias Gallicanas commisit, ut Dei ecclesias, quas Franci adhuc pagani devastaverant et incenderant universa prædantes, et quæcumque perperam gesta fuerant, ad debitum statum reduceret, manente privilegio Arelatensi Ecclesiæ in sibi antiquitus delegatis provinciis.

C XX. Postea vero, tempore beati Gregorii Virgilius Arelatensis episcopus, petente Childeberto rege, in regno ipsius, sicut decessores illius in præfatis provinciis habuerant, hanc delegationem eodem beato Gregorio committente suscepit (lib. iv, epist. 52). Denique tempore Caroli principis, quando propter discordiam et contentionem de principatu inter eum et Raganfredum, et frequentia ac civilia imo plus quam civilia, quia intestina et parricidalia bella, in Germanicis et Belgicis ac Gallicanis provinciis omnis religio Christianitatis pene fuit abolita, ita ut episcopis in paucis locis residuis, episcopia laicis donata et rubus divisa fuerint, adeo ut Milo quidam tonsura clericus, moribus, habitu, et actu irreligiosus laicus, episcopia Rhemorum ac Trevirorum usurpans insimul, per multos annos pessumdediderit: et multi jam, maxime in Orientalibus regionibus, idola adorarent, et sine baptismo manerent, Gregorius a primo secundus, sed et tertius Gregorius. Winfrid cogno-

mento Bonifacium legatum apostolicæ sedis ad reformandam Christianitatis religionem, primo presbyterum, postea vero episcopum ordinatum direxerunt. Cui per annos viginti quinque in eadem prædicatione sine cardinali sede laboranti, præfatorum successor Zacharias papa inter cætera in privilegio sibi directo scripsit atque firmavit ad locum ita dicens (*epist. 14*): « Ubi Deus prædicationem tuam auxit, obtinere voluisti, ut tibi episcopalem Ecclesiam, vel successoribus tuis confirmare debeamus, juxta eorumdem filiorum nostrorum Francorum petitionem. Et idcirco auctoritate B. Petri apostoli sancimus, ut supra dicta Ecclesia Moguntina perpetuis temporibus tibi et successoribus tuis in metropolim sit confirmata, habens sub se has quinque civitates, id est, Tungris, Coloniæ, Warmaciam, Spiratiam, et Trectis, et Germaniæ gentes, quas tua fraternitas per suam prædicationem Christi lumen cognoscere fecit. His a nobis diffinitis, per hujus nostræ confirmationis paginam in tua Ecclesia perpetuis temporibus pro sui confirmatione hæc conservari mandamus. » Sic enim et sacri Africæ provinciæ canones (*cap. 86*) decreverunt, ut quos adminiculante divina gratia episcopus potuerit lucrari ad catholicam unitatem, ad ipsum pertineant.

XXI. De primatu quoque in aliis provinciis item idem Zacharias papa ad eundem Bonifacium scripsit hoc modo (*epist. 8*): « Et quia si deberes in Bajoariæ provincia jus habere prædicationis sciscitasti, an non, quam a decessore nostro habuisti concessam, nos denique, auxiliante Deo, ea quæ tibi largitus est decessor noster, non minuimus, sed augemus, et non solum Bajoariam, sed etiam omnem Galliarum provinciam, donec te divina jusserit superesse majestas, nostra vice per prædicationem tibi injunctam, quæ repereris contra Christianam religionem, vel canonum instituta, spiritaliter stude ac ad normam rectitudinis reformare. »

XXII. Sed et cum Ebbo quondam Rhemorum episcopus se in synodo quadraginta quatuor episcoporum scripto et propria subscriptione ac viva voce pro criminibus suis damnavit, et a sacerdotali ministerio alienum reddidit, quem postea Sergius papa, sicut etiam in gestis ejus legitur, condemnavit, defuncto domno Ludovico imperatore, contentione de regno inter filios ejus exorta, primum ad Lotharium, deinde ad Ludovicum damnatus idem Ebbo se contulit. Qui reges, quoniam per merita sanctorum, adminiculante Domino et domno nostro Carolo, violentia non valebant, per insidias, tam apud apostolicam sedem quam et apud quoscunque valebant episcopos, et quaquaversum poterant, Rhemorum episcopo laqueorum tendicula injicere quæ præparaverant, et res ipsius Rhemensis Ecclesiæ, quæ in diversis regnis sitæ sunt, a pluribus usurpari coperunt, gratia et nomine Benedictus papa, in privilegio Rhemorum episcopo, qui nunc eidem servit Ecclesiæ, B. Petri et apostolicæ ipsius sedis auctoritate, secundum sacros canones, et decreta decesso-

rum ac prædecessorum suorum collato, ita dicit ad locum. Inter hæc quidem et hoc sancimus, ne quilibet tuæ dioceseos regulis subjectus Ecclesiæ, te contempto, impune audeat seu valeat aliena expetere aut expectare judicia, ut almorum traditionibus Patrum canonumque promulgationibus est constitutum, salvo in omnibus jure apostolicæ nostræ sedis, ut ab ipso veluti Christo sacris est cautum canonibus: sed cuncti, sive in prælatione, sive in subdicatione debita, ordinem ab ecclesiasticis regulis traditum observantes, obediant et studiosius obtemperare procurent.

XXIII. In quo decreto et beati Innocentii scribentis ad Victricium Rothomagensem episcopum est secutus decretum, quo dicit (*Innocent. I, epist. 1*): « Si quæ, inquit, causæ vel contentiones inter clericos, tam superioris ordinis quam etiam inferioris, fuerint exortæ, placuit ut secundum synodum Nicænam, congregatis ejusdem provinciæ episcopis, judicium terminetur. Nec alicui liceat, sine præjudicio tamen Romanæ Ecclesiæ, cui in omnibus causis debet reverentia custodiri, relictis his sacerdotibus, qui in eadem provincia Dei Ecclesias nutu divino gubernant, ad alias convolare provincias. Quod si quis forte præsumperit, et ab officio clerici summotus, et injuriarum reus ab omnibus judicetur. Si autem majores causæ in medium fuerint devolutæ, ad sedem apostolicam, sicut synodus statuit, et beata consuetudo exigit, post judicium episcopale referantur. » De qua hic specialiter reverentia dicat, apostolicæ sedi reservari debere, cui in omnibus rebus debet reverentia custodiri, sicut synodus statuit, et vetus consuetudo exigit, et quos canones, tertio et quarto ac septimo demonstrat capitulo.

XXIV. De quibus et S. Gelasius in commonitorio dato Fausto contra Orientales episcopos dicit ita (*epist. 3*): « Viderint ergo, si alios habent canones, quibus suas ineptias exsequantur. Cæterum isti, qui sacri, qui ecclesiastici, qui legitimi celebrantur, sedem apostolicam ad judicium vocare non possunt. » Et aliquanto superius: « Ipsi sunt canones, qui appellationes totius Ecclesiæ ad hujus sedis examen volvere deferri, ab ipsa vero nusquam prorsus appellari debere sanxerunt, » et reliqua. Qui vero præfatam epistolam sancti Innocentii ad Victricium Rothomagensem archiepiscopum, ex sacris canonibus promulgatam, de qua præmissi decreti ejus sententiam hic posuimus, diligenter a principio sui usque ad finem relegerit, inveniet eadem de privilegiis singulorum metropolitanorum, scilicet primatum provinciarum, quæ et sanctus Bonifacius ad episcopos Gallicanos et ad Hilarium Narbonensem episcopum constituit, videlicet, ut nullus metropolitanus duas metropolitanas civitates, duasque provincias debeat habere subjectas, sed unaquæque provincia metropolitani sui in omnibus rebus ordinationem semper expectet, et de majoribus causis ad sedem apostolicam singuli metropolitani ex suis

provinciis post episcopale iudicium referant, ut quidquid singuli metropolitani cum suis suffraganeis duxerint decernendum, cum relatum ad sedem apostolicam fuerit, ejus, ut concedet et necesse est, auctoritate firmetur, aut emendetur.

XXV. Sed et qui vigilanter eandem epistolam recensuerit, reperiet beatum Innocentium decrevisse, ea quæ in illa scripta sunt, et a cunctis provinciæ primatibus et ab omnibus episcopis debere servari. Et item in præfato beati Benedicti papæ privilegio est decretum: « Et hoc promulgamus atque statuimus, ut te, qui primas ipsius provinciæ esse dignosceris, nullius unquam infestatione contra canonica apostolicaque decreta, sive judicia ecclesiastica tibi commissa, aut virtute aut facultate nudari, vel ante audientiam Romani pontificis, a quocunque damnari statuimus, omnem iudicandi ordinem comprehendit, ut suis videlicet libere utens legaliter ac regulariter, si iudicandus est, ad electorum iudicium, vel ad ejus vicarii, cum fuerit specialiter ad hoc deputatus, iudicium intra suæ terminis provinciæ provocetur pro certis existentibus causis, quibus majores natu legaliter ac regulariter apud canonicos iudices accusari valent, dierum et dilationum, atque in discussione personarum accusantium et testificantium, utrum debeant vel non debeant ad accusationem vel testimonium admitti, canonica et legali forma servata, et sic demum legaliter vel regulariter convictus vel confensus apostolici papæ iudicio primas Rhemorum provinciæ reservetur, sicut S. Leo ad Anastasium cui vices suas commisit de metropolitano scripsit episcopo (*epist.* 88): Sed etiam, si quid grave intolerandumque gessisset, nostra erat expectanda censura, ut nihil prius ipse decerneres, quam quid nobis placeret agnosceres. » Unde et in præfato privilegio sequitur: « Sed si compellatus appellare ad hanc sanctam sedem volueris apostolici papæ iudicio reservari, nostra, imo beati Petri apostoli, auctoritate præcipimus, nec alicui cujuscunque juri vel iudicio te subijci, excepta potestate sedis Romanæ pontificum. »

XXVI. Et in hac sententia canonici privilegii domni Benedicti attendat, si quis forte supra mensuram suam ire voluerit, et non de his quibus dicit Dominus: *Ecce ego mitto vos (Matth. x)*, sed de his esse delegerit, de quibus Dominus dicit: *Ipsi ibant, et ego non mittebam eos (Joan. xxiii)*; quia primas Rhemorum provinciæ apostolici papæ iudicio reservari B. Petri apostoli auctoritate cum anathematis interdictione præcipitur, et nec alicui cujuscunque juri vel iudicio subijci permittitur, excepta potestate sedis Romanæ pontificum. Contra quæ si aliquis nostratium præsumere non voluerit, sed obaudiens Apostolum dicentem: *Nihil per contentionem, neque per inanem gloriam (Philip. ii)*, charitose, sicut frater a fratre, quæ pacis et dilectionis sunt expetierit, audiet cum Apostolo: *Cum liber essem ex omnibus, duntaxat vobis, omnium vestrum*

A me servum feci (I Cor. ix). Non enim nosmetipsos prædicamus, sed Jesum Christum Dominum nostrum, nos autem servos vestros per Jesum (II Cor. iv), salva memorata conditione privilegii gratia et nomine Benedicti. Si autem non desierit digitum extendere, et loqui quod non prodest, audiet cum Apostolo: *Tu quis es, qui iudicas alienum servum? Domino suo stat aut cadit. Stabit autem: potens est enim Deus statuere illum (Rom. xiv, 4)*; et: *Mihi pro minimo est, ut a vobis iudicer (I Cor. iv, 3)*; ne illa, quæ auctoritate canonica atque apostolica ædificata sunt in præfato privilegio, mea destruantur consensione, dicente magno papa Leone ad Leonem Augustum, cum peteret annuere quæ illi fas non erat consentire (*epist.* 84): « Si quæ, inquit, destruxi, hæc ædifico, prævaricatorem me constituo, et eis me ultionum conditionibus subdo, quas non solum auctoritas beatæ memoriæ principis Martiani, sed etiam ego mea consensione firmavi, quia, ut idem alibi dicit, sicut in mala suasionem delinquitur, ita et in mala consensione peccatur. » Sequitur in eodem privilegio.

XXVII. « Et hoc volumus, ne quilibet ex provincia et diocesi metropoli tuæ tibi que subjecta, jus secundum ecclesiasticas constitutiones primatui Ecclesiæ tuæ et tibi debitum quoquo modo per contemptum convellere, aut tibi vel Ecclesiæ tuæ quamcunque violentiam, contra eadem canonica constituta et decreta Romanorum pontificum, pertinaciter inferre præsumat, cum anathematis interpositione, nostra apostolica et beati Petri apostolorum principis auctoritate prohibemus. Optamus fraternitatem tuam in Christo nunc et semper bene valere. » Quæ constitutio quantum sacris canonibus Nicænæ, Antiochenæ, Chalcedonensis, Sardicensis, et Africae provinciæ synodis, sed et decretis apostolicæ sedis pontificum ac sacris legibus consonet, nemo est qui dubitat, si sacros canones et decreta sedis Romanæ pontificum ac venerandas leges cognitas habet. Quia enim scriptum est: *Post concupiscentias tuas non eas (Eccli. xviii)*; et: *Altiora te ne quæsieris (Eccli. iii)*; et beatus scribit Hormisda: Elevatio semper affert salutem periculum, per quam ipsius inventor diabolus angelica potestate privatus est, satis superque sufficit, ac sufficit, semperque sufficit præsignato Rhemorum Ecclesiæ servienti, que per sacros canones et decreta sedis Romanæ pontificum unicuique sunt metropolitano collata.

XXVIII. Hæc tantum propter vitandam prolixitatem, quia hinc sufficienter in canonibus sacris et in decretis prædecessorum suorum habetur, de privilegio domni Benedicti, quod in serinio sanctæ Romanæ Ecclesiæ noscitur contineri, et in synodo apud Suessiones ostensum est, et si necesse fuerit, adhuc valet ostendi, duximus commemoranda: non ut domni et Patris nostri apostolici papæ Joannis canonicis et apostolicis præceptionibus, quod absit, resultemus, qui etiam ante et post privilegia hæc collata, sedis apostolicæ jussione, et domni tunc

regis Caroli, nunc autem gratias Deo imperatoris Augusti, verum et invitatione confratrum ac coepiscoporum nostrorum, sequentes apostolicam regulam, quæ dicit : *Per charitatem servite invicem, subjecti invicem in timore Christi* (Gal. v), per diversa loca diversasque provincias, ad synodos convenire studuimus, et prout dederit Dominus posse studebimus, ut prædictum est, et sæpe dicendum est, qui non ab re est sæpius verbo repetere, quod semper necesse est animo retinere, servato jure privilegii domni Benedicti, si nos fraterna charitas invitaverit, potiusque jussio apostolicæ sedis, et præceptio domni nostri Caroli imperatoris Augusti nos ad synodum, sicut præcipiunt regulæ, vocare decreverit pro talibus, quæ forte provinciali nequiverint examine ditiniri, maxime in causa fidei vel generalis religionis, sicut in apostolicæ sedis pontificum, et in epistolis legimus Augustorum. Quoniam imperatorum auctoritate convocatas generales synodos, et in historiis ecclesiasticis et in epistolis apostolicæ sedis pontificum reperimus.

XXIX. Et sanctus Gregorius reges Francorum synodos in Gallicis et Belgicis provinciis convocare sæpe commonuit. Sed quoniam, ut Leo monuit (*epist. 56 ad Anatolium*), mens potentæ avida nec abstinere vetitis, nec gaudere concessis, et difficile est ut cupiditas improborum non aliquid supra mensuram moliat appetere : ne quis nostrum oblitus præceptionis Apostoli, imo per Apostolum Domini, qui dicit : *In omnibus exhibeamus nos ipsos sicut Dei ministros, nemini dantes ullam offensionem, ut non vituperetur ministerium nostrum* (II Cor. vi), aut improbitate, aut assentatione contra præfata privilegia pertinaciter moliat insurgere, et periculum intentatæ damnationis possit incurrere, de cernente Zosimo papa ad Aurelium, et universos episcopos per Africam constitutos, universosque episcopos per Gallias et septem provincias constitutos, et universis episcopis per Hispaniam constitutis, a pari (*epist. 6*). « Cum adversus, inquit, statuta Patrum venitur, non tantum illorum providentiæ atque sententiæ, qui in ævum victura sanxerunt, sed ipsi quodammodo fidei et catholicæ disciplinæ irrogatur injuria. » Et sanctus Hilarus papa, ut supra ostendimus, dicit (*epist. 14*) : « Non minus in sanctarum traditionem delinquitur sanctiones, quam in injuriam ipsius Domini prosilitur. » Et sanctus papa Symmachus ad Caesarium Arelatensem episcopum dicit (*epist. 1*) : « Cum ad Trinitatis instar, cujus una est atque individua potestas unum sit per diversos antistites sacerdotium, quemadmodum priorum statuta a sequentibus convenit violari? Huc accedit quod hæc si eveniat sententiarum varietas, ad ipsam sacrosanctam catholicam religionem credimus pertinere, cujus omnis potestas infringitur, nisi universa quæ a sacerdotibus Domini semel statuuntur perpetua sint. Quod alias contingere poterit, si successor decessoris actibus non tribuerit firmitatem, et roborando quæ gesta sunt, faciat rata

A esse quæ gesserit. Quanta enim vicariis beatissimi Petri apostoli judicabitur esse reverentia, si quæ in sacerdote præcipiunt, eisdem transentibus dissolvantur? » Et sanctus Leo papa in decretis suis præfixit (*epist. 1*) : « Hoc itaque admonitio nostra denuntiat quod si quis fratrum contra hæc constituta venerit, vel venire tentaverit, et prohibita fuerit ausus admittere, a suo se novurit officio submovendum, nec communionis nostræ futurum esse consortem, qui socius esse noluit disciplinæ. Ne quid vero sit, quod prætermissum a nobis forte credatur, omnia decretalia constituta, tam beatæ recordationis Innocenti, quam omnium decessorum nostrorum, quæ de ecclesiasticis ordinibus et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » Quia enim in Lege et in Evangelio duorum vel trium testium rata sententia comprobatur, quanto studio horum quatuor, de quibus dicit Dominus : *Si duo ex vobis consenserint super terram, de omni re fiet*, de præstitutis anteriorum privilegii conservandis uniformis sententia debeat conservari, cordatus quisque attendat, et unde quisque nostratum pro fidei reverentia ac conservatione meritum sibi beatæ remunerationis potest acquirere, ne prævaricando periculum incurrat, magnopere caveat.

XXX. Tandem brevites commemorare censuimus, quia sancto et venerando viro Bonifacio in Frisia verbum Domini prædicante, anno Incarnationis Dominicæ 754, martyrio coronato, et Simoniacæ hæresis pravitate, et neophytorum præsumptione, ac cæteris quibusque pro temporum opportunitate et qualitate compositis, hactenus provinciæ Cisalpinæ, temporibus Pippini regis, et Caroli ac Ludovici imperatorum, sine hoc primicerio vel primate a sede apostolica delegato annos circiter viginti tres (*imo annos nonaginta*) manserunt, et metropolitanis singulis suo jure servate, apostolicæ sedis favore, et principum suorum dispositione, secundum sacros canones, et decreta ejusdem sanctæ sedis pontificum, quæque fuerunt agenda, venerabiles episcopi per auctoritatem canonum sacrorum, et decreta sedis Romanæ pontificum peregerunt.

XXXI. Drogo interea Metensium episcopus, fastu regiæ prosapiæ subvectus, hanc prælationem in Cisalpinis regionibus, nacta quadam occasione, tempore Lotharii imperatoris apud Sergium papam obtinuit ; sed quod affectu ambiit, effectu non habuit ; et quod efficacæ usu, non consentientibus quibus intererat obtinere non potuit, patientissime ut eum decuit toleravit, ne scandalum fratribus et consacerdotibus generans, schisma in sanctam Ecclesiam introduceret. Quem tantæ generositatis ac dignitatis virum quisque nostrum imitari debuerat, ne indebite appeteret quod non habeat, qui sine contentione non exsequi pertulit quoc adeptus fuerat. Cum legamus, quia pravorum præsumptio, non solum ex sua tor-titudine, verum etiam ex comparatione rectorum,

quam sit damanda monstratur, dicente Scriptura : *Probata autem virtus corrumpit insipientes (Sap. II)*. Quantumque fratrum scandalum, ut ex altitudinis nostræ rapina, si forte aliquis nostrum hoc morbo laborat, fratibus scandalum non generemus, vitare debeamus, Domini sententia demonstrat dicentis ad Petrum, ut vitando scandalum exigentibus censum pro eo et pro se daret, quem non debebant.

XXXII. Et quoniam anni triginta secundum leges publicas, ut notum est, et juxta constitutionem ecclesiasticam, ut demonstrat Gelasius papa, humanas adimunt questiones, et Justiniana lege, ac decreto beati Gregorii ex eadem lege promulgato, negotia inter venerabiles Ecclesias, ac monasteria, locaque religiosa anni quadraginta determinant, si superstitiosus appetitus excellentiæ avidarum mentium nostrarum suffere valeret, non sedem apostolicam, vel aures imperiales, sine ulla nova necessitate, pro hoc indebito supercilio inquietaret, cum quies episcoporum Cisalpinarum provinciarum, sine hujus inquietudinis scandalo atque dispendio, post tanta tempora manere valeret. Si enim quique nostrum regulam pastorem beati Gregorii sequi per omnia ut debueramus maluissemus, metas nostræ mensuræ nequaquam transcenderemus, et quod cujuscunque nostratum civitas unquam non meruit, appetere deviteramus. Timere quippe ac cavere debemus, que passim beatus Gregorius in epistola ad Joannem Constantinopolitanum episcopum Roma scripsit, et unicuique nostrum altiora se quærenti de cælo dicit (*lib. II, epist. 38*) : « Perpende, inquit, rogo, quia in hac præsumptione temeraria pax totius turbatur Ecclesiæ, et gratiæ contradicitur communiter omnibus effusæ. In qua nimirum ipse tantum crescere poteris, quantum penestemetipsum decreveris : tantoque major efficeris, quanto te a superbi et stulti vocabuli usurpatione restringis, atque in tantum proficis in quantum tibi non studueris derogando fratribus arrogare. Quis, rogo, in hoc tam perverso vocabulo, nisi ille ad imitandum proponitur, qui despectis angelorum legionibus secum socialiter constitutis, ad culmen conatus est singularitatis erumpere, ut et nulli subesse, et solus omnibus præesse videretur? Qui etiam dixit : *In cælum conscendam, super astra cæli exaltabo solium meum : sedeo in monte testamenti, in lateribus Aquilonis. Ascendam super altitudinem nubium, similis ero Altissimo (Isa. xiii, 14)*. Quid enim fratres tui, omnes universalis Ecclesiæ episcopi, nisi astra cæli sunt? quorum vita simul et lingua, inter peccata erroresque hominum, quasi inter noctis tenebras lucent. Quibus dum cupis temetipsum vocabulo elationis præponere, eorumque nomen tui comparatione calcare, quid aliud dicis, nisi *in cælum conscendam, super astra cæli exaltabo solium meum*? An non universi episcopi nubes sunt, qui et verbis prædicationis pluunt, et bonorum operum luce coruscant? Quos dum vestra fraternitas despiciens sub se premere conatur, quid aliud dicit, nisi hoc quod ab antiquo hoste dicitur : *Ascendam*

A super altitudinem nubium? Pestilentia et gladius per mundum sævit, gentes insurgunt gentibus, terra concutitur, orbis cum habitatoribus suis terra dehiscens sorbetur, omnia enim quæ prædicta sunt fiunt. Rex superbiæ prope est, et quod dici nefas est, sacerdotum est præparatus exercitus, quia cervici militant elationis, qui ac hoc positi fuerant, ut ducatum præberent humilitatis. Sed hac in re, etiamsi nostra lingua minime contradicat, illus virtus contra elationem in ultionem erigitur, qui superbiæ vitio per semetipsum specialiter adversatur. Hinc enim scriptum est : *Deus superbis resistit, humilibus autem dat gratiam (Jac. IV, 6)*. Hinc rursus dicitur : Immundus est apud Deum qui exaltat cor; hinc contra superbientem hominem scriptum est : Quid superbis, terra et cinis (*Eccli. XI?*) Hinc per semetipsum Veritas dicit : *Omnis qui se exaltat humiliabitur (Luc. XIV, 11)*. Quæ ut nos ad viam vitæ per humilitatem reduceret, in semetipsa dignata est quod nos admonet demonstrare, dicens : *Discite a me quia mitis sum et humilis corde (Matth. XI, 29)*. Nunquidam mente excidit, quod Veritas dicit : *Qui scandalizaverit unum de pusillis istis qui in me credunt, expedit ei ut suspendatur mola asinaria in collo ejus, et demergatur in profundum maris (Matth. XVII, 6)?* Quod tamen si considerare negligimus, contra tantæ elationis tumorem judicia superna vigilabunt. »

XXXIII. His ita se habentibus, quia, ut sanctus Leo dicit (*epist. 56*), quoties ob occurrentes causas generalis congregatio facta fuerit sacerdotum, difficile est ut cupiditas improborum non aliquid supra mensuram molliatur appetere, sicut sæpe et etiam in universalibus synodis legimus accidisse, si quid in hoc humilitatis nostræ conventu, duorum vel trium favore, ac paucorum silentio, fastu imperialis potentia, contra superscripta sacrorum canonum et apostolicæ sedis pontificum decreta ex eisdem sacris canonibus promulgata, contraque singulis metropolitanis antiqua privilegia, etiam et per sacras leges, quibus una cum venerandis canonibus sancta moderatur Ecclesia, conservanda, immaturo atque inconsiderato jussu est superinductum, sive sancitum, prohibente Domino, ut non plantetur nemo secus templum suum, id est ne obumbretur, et decoloretur typo terreni principatus sinceritas et fulgor humilitatis ecclesiasticæ, juxta decreta mysticæ Nicænæ synodi, quo dicitur : « Si duo aut tres propter contentiones proprias contradicant, obtineat sententia plurimorum, spretisque, ut diximus, si duo vel tres propter assentationem forte non corde, sed verbo, vel silentio conspiraverunt, generalitas nostra Deo auctore non annuit, sed corde ac contradicente ore constantissime abnuet, et sententia plurimorum debitum robur atque vigorem obtinuit, obtinet, ac adjuvante Domino perpetim obtinebit. » Quia, ut memoratus sanctus Leo ad Maximum Antiochenum episcopum scripsit (*epist. 66*) : « Si quid a quoquam contra Nicænorum canonum statuta in quacunque synodo vel tentatum est, vel ad tempus videtur ex-

tortum, nihil præjudicii potest inviolabilibus inferre decretis. Et facilius erit quarumlibet consensionum pactum dissolvi quam prædictorum canonum regulas ex ulla parte corrumpi. »

XXXIV. De eo autem quod quidam frater imperiali edicto velut dato sibi collatum fuisse (quod non illi, sed nobis de illo, sicut lectionis auditu comperimus, a sede apostolica est directum, quibus non est donatum) visus est exultasse, idem sanctus Leo ad Anatolium Constantinopolitanum episcopum scripsit (*epist.* 54) : « Alia, inquit, ratio est rerum sæcularium, alia divinarum, nec præter illam petram quam Dominus in fundamento posuit stabilis erit ulla constructio. Propria perdit, qui indebita concupiscit. » Et ut Gelasius dicit, nunquam invenitur de pontificibus nisi Ecclesiam judicasse, et non esse humanarum legum, de talibus ferre sententiam absque Ecclesiæ principaliter constitutis pontificibus, obsequi solere principes Christianos decretis Ecclesiæ, non suam præponere potestatem, episcopis caput subdere principem solum non de eorum capitibus judicare.

XXXV. Et in lege Valentiniani, Theodosii et Arcadii decretum est de episcopis : « Habent inquit, illi iudices suos, nec quidquam his publicis commune cum legibus, quantum ad causas tamen ecclesiasticas pertinet, quas decet episcopali auctoritate decidi. » Quæ non dicimus, quod absit, potestati ac per hoc Dei ordinationi resistentes, sed potius obsequentes, quia sicut Dominus præcepit reddi quæ sunt Cæsaris Cæsari, et quæ sunt Dei Deo (*Matth.* xxii), ita quæ sunt imperatoris obsequia obedienter ipsius obsequiis exhibemus, et quæ sacerdotii sunt ordini sacerdotali dependimus, sicut memoratus sanctus papa Gelasius ad Anastasium imperatorem discrevit atque decrevit (*epist.* 10) : « Duo sunt, inquit, imperator Auguste, quibus principaliter mundus hic regitur, auctoritas sacra pontificum, et regalis potestas, in quibus tanto gravius est pondus sacerdotum, quanto etiam pro ipsis regibus nominum in divino reddituri sunt examine rationem. Nosti etenim, fili clementissime, quod licet præsideas humano generi dignitate, rerum tamen præsulibus divinarum devotus colla submitis, atque ab eis causas tuæ salutis exspectas, inque sumendis cælestibus sacramentis, eisque ut competit disponendis, subdi te debere cognoscis religionis ordine potius quam præesse. Nosti itaque inter hæc ex illorum te pendere iudicio, non illos ad tuam velle redigi voluntatem. Si enim, quantum ad ordinem pertinet publicæ disciplinæ, cognoscentes imperium tibi superna dispositione collatum, legibus tuis ipsi quoque parent religionis antistites, ne vel in rebus humanis exclusæ videantur obviare sententiæ, quo rogo te decet affectu eis obedire, qui prærogandis venerabilibus sunt attributi mysteriis ? Proinde sicut non leve discernem incumbit pontificibus, siluisse pro divinitatis cultu quod congruit : ita his, quod

A absit, non mediocre periculum est, qui cum parere debeant despiciunt. »

EPISTOLA XXXI.

AD QUEMDAM EPISCOPUM.

De translationibus episcoporum, contra Actardum Namnetensem.

(Apud eundem, ex codice Virdunensi.)

Servus Christi et servorum ejus dilecto fratri et venerabili episcopo salutem.

De quibus apud exiguitatem meam prudentia tua perquiri, et mox ac festinato breviterque sibi quid inde sentiam obnixè responderi deposcit, obediens postulanti respondeo cui negare nihil habeo, quia nec debeo, dicente Scriptura : *Qui abscondit frumenta* B *maledicetur in populis, benedictio autem super caput vendentium* (*Prov.* xi, 26) ; id est, qui scientiæ verbum abscondit, a Domino audiet : *Serve male et piger, quare non dedisti pecuniam meam ad mensas, et ego veniens recepissem utique quod meum est cum usura ?* (*Luc.* xix, 23). Benedictio autem super caput vendentium, quoniam qui dat conservis in tempore tritici mensuram, a Domino audiet : *Euge, serve bone et fidelis, quia super pauca fuisti fidelis, super multa te constituam* (*Matth.* xxv, 21). Et quidam catholicus doctor ait : Invidiæ siquidem maculam de sese non abluit, qui alteri conferre denegat hoc quod sentit. Igitur quæ non suffers tibi per tempus plenius ac latius responderi, breviter ac capitulatum, ab exordio rei hujus incipiens, ad interrogata rescribo.

C I. Ad quid Dei Filius formam servi accepit apostolus monstrat dicens : *Per unum hominem peccatum intravit in mundum, et per peccatum mors, et ita in omnes homines pertransiit, in quo omnes peccaverunt. Fidelis sermo et omni acceptione dignus, quoniam Jesus Christus venit in hunc mundum peccatores salvos facere. Omnes enim peccaverunt, et egent gloria Dei* (*Rom.* v, 12).

II. Ad quid apostoli ab eo sunt ordinati, ipse manifestat dicens : *Ecce ego mitto vos. Ite, docete omnes gentes, baptizantes eos in nomine Patris, et Filii, et Spiritus sancti, docentes eos servare omnia quæcumque mandavi vobis* (*Luc.* x, 3 ; *Matth.* xxviii, 19). *Sic luceat lux vestra coram hominibus, ut videant opera vestra bona, et glorificent Patrem vestrum qui in cælis est* (*Matth.* v, 16).

D III. Horum in Ecclesia locum tenent episcopi, de quibus quasi ore ad os alloquens Ecclesiam per apostolos fundatam, Spiritu sancto afflatus Psalmista præcinit dicens : *Pro patribus nati sunt tibi filii* (*Psal.* xlv, 17) ; qui ordinantur singuli, secundum apostolicam traditionem, per singulas civitates, et sicut ad Titum scribit Apostolus : *Hujus, inquit, rei gratia reliqui te Cretæ, ut ea quæ desunt corrigas et constituas per singulas civitates presbyteros* (*Tit.* i, 5), id est episcopos, sicut paulo post demonstrat : *Oportet, inquit, episcopum sine crimine esse* (*ibid.*, 7). Episcopus enim nomen est officii, sicut presbyter est

nomen ætatis, non corporeæ, sed sapientiæ et vitæ immaculatæ. Sicut per quemdam sapientem dicitur : *Senectus venerabilis est, non diuturna, neque numero annorum computata. Cani sunt autem sensus hominis, et ætas senectutis vita immaculata* (Sap. iv, 8). Hinc est ergo quod ad Moysen Dominus dicit : *Congrega mihi septuaginta viros de senioribus Israel, quos tu nosti quod senes populi sint* (Num. xi, 16) ; in quibus quid aliud quam senectus cordis requiratur, cum tales jubentur eligi qui senes sciuntur ? Si enim senectus in eis corporis quæreretur, a tantis sciri poterant, a quantis videri. Dum vero dicitur *quos tu nosti quod senes populi sint*, profecto liquet quia ut sanctus dicit Gregorius senectus mentis, non corporis, eligenda monstratur. Hinc et Paulus ad Timotheum scribit : *Nemo adolescentiam tuam contemnat, sed exemplum esto fidelium in verbo, in conversatione, in charitate, in fide, in castitate* (I Tim. iv, 12). Hanc autem traditionem, singulos per singulas civitates ordinandos episcopos, auctoritas apostolica constituit, sicut sanctus Clemens, successor beati Petri apostoli, ex traditione ipsius promulgavit, veluti sanctus Anacletus ab ipso beato Petro apostolo presbyter ordinatus, postea Romanæ sedis episcopus, in epistola sua demonstrat, decente sancto Spiritu per Prophetam : *Deus locutus est in sancto suo letabor et partibus Sichimam, et convallem tabernaculorum dimetiar* (Psal. lxx, 8). Hinc sanctus Basilius : « Nunc, inquit, quod hanc præcipuam et veluti privatam quamdam hæreditatem populi in divisionem vocabo, et communem cum cæteris omnibus faciam. Cum autem divisum fuerit testamentum in omnes, et cuncta ejus utilitas universis ceperit esse communis, Deo pro nobis omnibus melius aliquid providente, tunc etiam convalis tabernaculorum dimetietur, hoc est universus orbis terrarum, qui vallibus tabernaculorum pro habitaculis corporis dictus est hic, velut quadam sorte divisus atque dimensus per singula loca Ecclesiarum Dei parochiis et incolatibus distinguetur. Tunc etiam ea quæ divisa sunt in unitate fidei congregabit ille qui pacificat per sanguinem suum quæ in terra sunt, sive quæ in cælis et qui medium parietem sepi solvens facit utraque unum. »

IV. Ordinantur autem singuli episcopi in civitatibus singulis, non pro temporalium honorum potestatibus, non pro villis et possessionibus, non pro facultatibus propriis, quas tamen episcopi, suscepto ministerio, secundum regulas et leges sancto Spiritu promulgatas, conservare juste, ac rationabiliter ampliare et dispensare debent, ut re vera Deo dicata et consecrata sanctuariorum, vota fidelium, pretia peccatorum et patrimonia pauperum, sed pro lucrandis animabus et salvandis hominibus, sicut dicit Apostolus : *Omnis pontifex ex hominibus assumptus, pro hominibus constituitur in his quæ sunt ad Deum, ut offerat dona et sacrificia pro peccatis, qui condolere possit his qui ignorant et errant, quoniam et ipse circumdatus est infirmitate, et propterea debet, quomodo*

A modum et pro populo, ita etiam pro semetipso offerre pro peccatis (Hebr. v, 1). Et item idem : *Si quis episcopatum desiderat, bonum opus desiderat* (I Tim. iii, 1). « Ipse, inquit sanctus Gregorius (reg. past. i, cap. 8), sibi testis est, quia episcopatum non appetit, qui non per hunc boni operis ministerium, sed honoris gloriam quærit. Sacrum quippe officium non solum non diligit omnino, sed nescit, qui ad culmen regiminis anhelans, in occulta meditatione cognitionis cæterorum subjectione pascitur, laude propria lætatur, ad honorem cor elevat, rerum affluentium abundantia exultat. Mundi ergo lucrum quæritur sub ejus honoris specie, quo mundi destrui luera debuerunt, cumque mens humilitatis culmen arripere ad elationem cogitat, quod foris appetit, intus, immutat. » Et idem alibi de verbis Domini : *Sicut misit me Pater, et ego mitto vos* (Joan. xx, 21). Pater, inquit Filius misit, qui hunc pro redemptione generis humani incarnari constituit : quem videlicet in mundo venire ad passionem voluit, sed tamen amavit filium quem ad passionem misit. Electos vero apostolos Dominus non ad mundi gaudia, sed sicut ipse missus est ad passiones in mundum mittit. Itaque dicitur : *Sicut misit me Pater et ego mitto vos*, id est, ea vos charitate diligo, cum inter scandala persecutorum mitto qua me charitate Pater, diligit, quem venire ad tolerandas passiones fecit.

V. Ordinatis autem singulis episcopis in civitatibus singulis, non ad mundi gloriam, sed inter scandala persecutorum, non licet eis mutare civitates in quibus sunt regulariter ordinati, nec transferri de civitate ad civitatem pro terrena cupiditate vel gloriæ ambitione, sicut sanctus Gregorius in homilia Ezechielis prophete tractat dicens (homil. 3) : « *Thronus ejus, quin Dei, flamma ignis, rotæ ejus ignis accensus* (Dan. vii, 9). Hi enim qui animarum custodes sunt, et pascendi gregis onera susceperunt, mutare loca minime permittuntur. Sed quia uno in loco positi Divinitatis in se præsentiam portant et ardent, thronus Dei *flamma ignis* dicitur. Hi autem qui amore Domini in prædicatione discurrunt, rotæ ejus ignis ardens sunt, quia cum ex ejus desiderio per varia loca discurrunt, unde ipsi ardent, et alios accendunt. » Sicut. B. Paulus gentium ordinatus apostolus, totum ut ita dicamus mundum Evangelio Christi replevit, et rota Christi non uni civitati tantum præsedit, sed et multis civitatibus per suam præsentiam evangelizavit, ut sacra narrat historia, et per suas Epistolas confirmavit. Hinc et sacri canones Afrigani consilii deereverunt ut non liceat fieri rebaptizationem, reordinationem, vel translationem episcoporum ; et si quilibet episcopus de civitate in qua ordinatus fuit ad aliam transierit civitatem eamque invaserit, nisi ad propriam civitatem sponte vel commonitus redierit, liberum esse adversus eum rectorem adire provinciæ, ut secundum statuta gloriosissimorum principum auctoritate judiciaria protinus excludatur. Sed et colligendum est

quam grande scelus fit hujusmodi translatio, quæ rebaptizationi et reordinationi comparando conjungitur. De rebaptizatione autem, quam grande sit piaculum, in sacris canonibus, et in pontificum Romanorum decretis, specialiter autem in epistola Felicis papæ ad universos episcopos per diversas provincias constitutos, quisquis legere voluerit invenire valebit. De reordinatione vero S. Gregorius in epistola ad Joannem Ravennensem ita se it (*lib. II, ep. 33*): « Illud, inquit, quod dicitis, ut is qui ordinatus est iterum ordinetur, valde ridiculum est, et ab ingenii vestri consideratione extraneum: nisi forte quod exemplum ad medium deducitur, de quo et ille judicandus est, qui tale aliquid fecisse perhibetur. Absit enim a fraternitate vestra sic sapere. Sicut enim baptizatus semel iterum baptizari non debet, ita qui consecratus est semel, in eodem iterum ordine non valet consecrari. » De lapsis autem, qui ad ordinem cleri per ignorantiam vel ordinantium dissimulationem veniunt, et de presbyteris sine examine proventis, sacrum Nicænum concilium, et decreta Gelasii ex eodem promulgata concilio, quid agendum sit patenter ostendunt.

VI. Si autem causa certæ necessitatis vel utilitatis exegerit ut quilibet episcopus de civitate in qua ordinatus est ad aliam civitatem transferatur, synodali dispositione, vel apostolicæ sedis consensione, apertissima ratione manifestum fieri debet, quia transfertur de civitate, in qua ordinatus fuit, ad aliam civitatem causa fidei, non temporalis commodi, pro animarum lucro, non pro rerum temporarium quæstu, non suo vitio, sed aliorum repudio, necessitate persecutionis, non ardore ambitionis vel præsumptione propriæ voluntatis; neque, ut dicit Apostolus, *quisquamumat sibi honorem sed qui vocatur a Deo tanquam Aaron* (*Heb. v, 4*). Sicut et Christus non semetipsum clarificavit ut pontifex fieret, sed qui locutus est ad eum: *Tu es sacerdos in æternum secundum ordinem Melchisedechi* (*Psal. cix, 4*). Aliud est enim mutare et aliud mutari, sicut aliud est ministrare et aliud ministrari. Unde et Dominus in Evangelio loquitur dicens: *Non veni ministrari, sed ministrare* (*Matth. xx, 28*). Non ergo, ut in decretis apostolicæ sedis legitur, mutat sedem qui non mutat mentem, id est, qui non mutat qua suscipi episcopatus debet, intentionem, ut transeat de civitate ad civitatem per cupiditatem et ambitionem.

VII. Nam ut de multis exempli gratia quædam devocemus in medium, beatus Petrus causa fidei, ordinato pro se episcopo in Antiochia, insequens magum Simonem, Romam venit, in qua per viginti et quinque annos apostolatam et episcopatum gessit. Augustinus, a beato Gregorio papa causa fidei ad Anglos rota Christi directus, postquam ad prædicationem ejus gens illa fidem recepit, ab Arelatensi episcopo, jussione beati Gregorii episcopus est ordinatus, deinde ab eodem beato Gregorio in civitate regia ejusdem gentis accepto pallio archiepiscopus

A est incardinatus. Sed postea sedem non mutavit sicut in epistola beati Gregorii qui legit invenire valebit. Et ut antiquorum temporum exempla prætereamus, tempore Caroli principis, cum ordo ecclesiasticus et Christiana religio in istis Cisalpinis regionibus pene fuit abolita, Winfrid, cognomento Bonifacius a tertio papa Gregorio Romæ fuit ordinatus episcopus, et pro animarum lucro in istas regiones directus. In quibus ejus prædicatione et sanctæ conversationis exemplo cum ordo ecclesiasticus et religio cœpit reparari, aliquandiu in civitate Agrippinensi Colonia sedit, et emergente necessitate atque utilitate ad Moguntinam civitatem translatus, ibi est archiepiscopus regulariter incardinatus, sed sedem postea non mutavit, sicut in epistolis apostolicæ sedis pontificum studiosus lector cognoscere prævalet.

B VIII. De eo siquidem qui non suo vitio, sed alieno repudio, ad aliam in qua ordinatus non fuit civitatem transfertur, Antiocheni canones dicunt (*can. 18*). « Si quis episcopus ordinatus ad parochiam minime cui est electus accesserit, non suo vitio, sed quod eum aut populus vitet, aut propter aliam causam, non tamen ejus vitio perpetrata, hic et honoris sic et ministerii particeps, dummodo nihil molestus Ecclesiæ rebus existat, ubi ministrare cognoscitur. Quem etiam observare conveniet quidquid synodus perfecta provinciæ judicando decreverit. » Et hinc in Ancyrano concilio decretum est de his qui ad episcopatum proventi sunt, nec recepti (*can. 17*): « Si qui episcopi ordinati sunt, nec recepti ab illa parochia in qua fuerant denominati, voluerintque alias occupare parochias, et vim præsulibus earum inferre, seditiones adversus eos excitando, hos abjici placuit. Quod si voluerint in presbyterii ordine, ubi prius fuerant, ut presbyteri residere, non abjiciantur propria dignitate. Si autem seditiones commoverint ibidem constituti episcopis, presbyterii quoque honor talibus auferatur, fiantque damnatione notabiles. » Dicit enim Antiochenum capitulum, quia regulæ sacræ præcipiunt, ut nullis invitis detur episcopus, cleri et plebis et ordinis consensus et desiderium requiratur, et ille omnibus præponatur, quem cleri plebisque consensus concorditer postulerint, ne civitas episcopum non optatum aut contemnat, aut oderit, et fiat minus religiosa quam convenit, cui non licuerit habere quem voluit. »

C IX. De eo qui necessitate persecutionis de civitate in qua ordinatus fuit transit ad civitatem, Sardicenses canones dicunt (*can. 21*): « Ut si aliquis episcopus vim perpressus est, et inique expulsus pro disciplina et catholica confessione vel pro defensione veritatis, effugiens pericula, innocens et devotus ad aliam venerit civitatem, non prohibeatur immorari quandiu aut redire possit, aut injuria ejus remedium acceperit, quia durum est eum qui persecutionem patitur non recepi, etiam et larga benignitate humanitas ei est exhibenda. » Et hinc S. Gregorius ad universos episcopos per Illyricum (*lib. I, epist. 43*).

« Fratres coepiscoposque nostros, quos et captivitas A
diversarumque necessitatum angustiae comprimunt,
debetis consolandos convictosque vobiscum in
ecclesiasticis sustentationibus libenter suscipere :
non quidem ut per communionem episcopalis throni
dignitas dividatur, sed ut ab Ecclesia juxta possibi-
litate[m] sufficientia debeant alimenta percipere. Sic
et proximum in Deo et Deum in proximo diligere
comprobabamur. Nullam quippe eis nos in vestris
Ecclesiis auctoritatem tribuimus, sed tamen eos
vestris solatiis contineri summopere hortamur. »
Et hæc novissima verba epistolæ hujus concordant
præmisso concilii Sardicensis capitulo.

X. Sed et persecutio pro qua episcopus de civitate
ad civitatem transire possit vel debeat, attente
consideranda est, quam canones Sardicenses demon-
strant (*Can. 21*). « Si aliquis episcopus vim B
perpessus est, et inique expulsus pro disciplina et
catholica confessione, vel pro defensione veritatis,
effugiens periculum innocens et devotus ad aliam
venerit civitatem, quia solent a catholicis hæretici
vel schismatici seu criminosi persequi. » Et sanctus
Augustinus in epistola ad Honoratum episcopum
ostendit (*epist. 180*) : « Restat, inquit, ut nos,
quorum ministerium quantumcunque plebi Dei ubi
sumus manenti, ita necessarium est, ut sine hoc
eam non oporteat remanere, dicamus Domino : *Esto
nobis in Deum protectorem, et in locum munitum*
(*Psal. xxx, 3*). Sed hoc consilium tibi propterea
non sufficit, ut scribis, ne contra Domini præceptum
vel exemplum facere nitamur, ubi fugiendum esse
de civitate in civitatem monet. Recolimus enim
verba dicentis : *Cum autem persequerentur vos in civi-
tate ista, fugite in aliam* (*Matth. x, 23*). Quis autem
credat ita fieri hæc Dominum voluisse, ut necessario
ministerio, sine quo vivere nequeunt, deserantur
greges quos suo sanguine comparavit ? Nunquid hoc
fecit ipse, quando portantibus parentibus in Ægy-
ptum parvulus fugit, qui nondum Ecclesias congrega-
verat, quas ab eo desertas esse dicamus ? Nunquid
quando apostolus Paulus, ne illum comprehenderet
inimicus, per fenestram in sporta submissus est per
murum, et effugi manus ejus (*II Cor. xi, 33*), de-
serta est quæ ibi erat Ecclesia necessario ministerio,
et non aliis fratribus ibidem constitutis quod oportebat
impletum est ? Eis quippe volentibus hoc Apo-
stolus fecerat, ut seipsum servaret Ecclesiæ, quem
proprie persecutor ille quærebat. Faciant ergo servi
Christi, ministri verbi et sacramenti ejus, quod
præcepit sive permisit. Fugiant omnino de civitate
in civitatem, quando eorum quisquam specialiter a
persecutoribus quæritur, ut ab aliis qui non ita re-
quiruntur, non deseratur Ecclesia, sed præbeant
cibaria conservis suis, quos aliter vivere non posse
noverunt. Cum autem omnium, id est episcoporum
et clericorum, est commune periculum, ii qui aliis
indigent non deserantur ab his quibus indigent. Aut
igitur ad loca munita omnes transeant, aut qui habent
remanendi necessitatem, non relinquuntur ab

eis, per quos illorum est ecclesiastica supplenda ne-
cessitas, ut aut pariter vivant, aut pariter sufferant
quod eos paterfamilias volet perpeti. Quod si conti-
gerit ut sive alii minus, alii majus, sive omnes æqua-
liter patiantur, qui eorum sint qui pro aliis patian-
tur apparent, illi scilicet qui cum se possent talibus
malis eripere fugiendo, ne aliorum necessitatem
desererent manere maluerunt. Hinc maxime probatur
illa charitas quam Joannes apostolus commendat
dicens : *Sicut Christus pro nobis animam suam posuit,
sic et nos debemus pro fratribus animas ponere*
(*I Joan. iii, 16*). Nam qui fugiunt, vel suis devincti
necessitatibus fugere non possunt, si comprehensi
patiantur, ipsi non pro fratribus utique patiantur.
Qui vero propterea patiantur, quia fratres qui eis
ad Christianam salutem indigebant, nolunt deserere,
sine dubio suas animas pro fratribus ponunt. » Et
post aliquanta : « Cur enim sibi putant indifferenter
obtemperandum esse præcepto, ubi legunt de civi-
tate in civitatem esse fugiendum, et mercenarium
non exhorrent, qui videt lupum venientem, et fugit
quoniam non est ei cura de ovibus ? » Et paulo
post : « Fugit Apostolus, cum a persecutore ipse
proprie quæreretur, aliis utique necessitatem simili-
lem non habentibus, a quibus illic ministerium absit
ut desereretur Ecclesiæ. » Sicut fugit S. Athanasius
Alexandrinus episcopus, cum eum specialiter apprehendere
Constantius cuperet imperator. Et aliquanto
superius : « Non enim quisquam est qui dicat ministros
manere oportere, ubi jam non fuerit quibus
necesse sit ministrare. »

C Et hinc S. Gregorius in libro *Moralium* (*lib. xxxi, cap. 14*) : « Intuerit libet illum sessoris sui calcari-
bus excitatum contra armatos hostes, quantus Paulus
fervor accenderat, quando eum Ephesi ad ir-
rumpendas theatri turbas zeli flamma rapiebat.
Scriptum quippe est : *Repleti sunt ira, et exclama-
verunt dicentes : Magna Diana Ephesiorum. Et im-
pleta est civitas confusione, et impetum fecerunt uno
anima in theatrum* (*Act. xix, 28*), raptus Gaio et
Aristarcho Macedonibus comitibus, atque mox
subditur : *Paulo autem volente intrare populum, non
permiserunt discipuli. Quidam autem et de Asia
principibus, qui erant amici ejus, miserunt ad eum
rogantes ne se daret in theatrum* (*ibid., 30*). In
quibus profecto verbis agnoscimus quod impetu contra
cuneos adversantes irrueret, nisi eum per amicos
et discipulos charitatis frena tenuissent. Sed si
obviare hostibus, si ultro pugnam petere, si nosmet-
ipsos semper relinquere in cursu nostri fervoris
debemus, quid est quod isdem prædicator egregius
de semetipso fatetur dicens : *Damasci præpositus
gentis Aretæ regis custodiebat civitatem Damasceno-
rum ut me comprehenderet, et per fenestram in spor-
ta dimissus sum per murum, et sic effugi manus ejus*
(*II Cor. xi, 33*). Quid est quod equus iste modo
sponte armatorum cuneos impetit, et modo se ab
armatis hostibus quasi trepidus abscondit, nisi hoc
quod necesse est ut in ejus artificiosa virtute disca-

mus, adversariorum pugnam, et constanter aliquando appelere, et prudenter aliquando declinare. Necesse quippe est ut per omne quod agimus in mentis trutina positum hinc pondus, illinc fructum nostri laboris æstimemus. Et cum pondus fructum superat, laborem quisque innoxie declinat, dummodo se in aliis exercent, in quibus lucro fructuum pondus laboris vincat. Cum vero subsequenti quantitate fructuum mensura laboris aut æquatur aut vincitur, labor non sine gravi culpa declinatur. Unde prædicator sanctus, cum Damasci valde obstinatas mentes persequentium cerneret, eorum noluit adversitati configere, quia semetipsum, quem profuturum multis noverat, vidit posset deficere, et aut nullis se illic aut paucis prodesse. Secessum ergo a certamine petiit, et pugnatum felicius ad alia se bella servavit. Non enim loco virtus, sed locus virtuti deficit. Et ideo fortissimus miles ab obsidionis angustia certaminis campum quæsivit. Ubi autem subjuganda regi proprio multa adversariorum colla conspexit, subire bellum vel cum morte non timuit. Sicut ipse cum Hierosolymam pergeret, cumque discipuli passionem illius per prophetiam præscitam prohiberent, sibimet ipsi attestatur dicens: *Ego enim non solum alligari, sed et mori in Hierusalem paratus sum pro nomine Domini Jesu. Neque enim facio animam meam pretiosiorum quam me* (Act. XXI. 13). Quia prædicator egregius, despectis potestatibus sæculi, nullos minarum sonitus pertimescit. Videmus alium equum Dei quomodo terram sorbeat, quomodo nullus eum turbæ terror attingat. Scriptum est: *Supervenerunt autem quidam ab Antiochia et Iconio Judæi, et persuasis turbis, lapidantes Paulum traxerunt extra civitatem, æstimantes eum mortuum esse. Circumdantibus autem eum discipulis, surgens intravit civitatem, et postera die profectus est cum Barnaba in Derben. Cunque evangelizassent civitati illi, et docuissent multos reversi sunt Lystra, et Iconio, et Antiochia, confirmantes animos discipulorum* (Act. XIV. 17). Perpendamus ergo quæ hunc equum possentiniæ compescere, quando eum ab intentione sua non valet mors ipsa prohibere. Ecce lapidibus obruitur, nec tamen a veritatis sermone removetur. Occidi potest, superari non potest. Velut extinctus extra urbem projicitur, sed intra urbem die alio illæsus prædicator invenitur. O quam fortis huic viro inest firmitas! o quam victrix pœna! o quam dominatrix patientia! Ad agendum repulsione provocatur, ad prædicandam salutem plagis erigitur, ad propellendam laboris lassitudinem pœna refovetur. » Sed et isdem beatus Gregorius in epistola ad Agnellum episcopum scribit (*lib. XI, ind. 11, epist. 13*): « Quia igitur ob cladem hostilitatis, nec in civitate, nec in Ecclesia tua est cuiquam habitandi licentia, ideo te auctoritate nostra Terracinesi Ecclesiæ cardinalem constituimus sacerdotem. » Et in epistola ad Joannem episcopum (*lib. XI, ind. 10, epist. 25*): « Te Joannem ab hostibus captivæ Lisitanæ civitatis episcopum in Squillita-

na Ecclesia cardinalem necesse duximus constituere sacerdotem, ut et susceptam semel animarum curam intuitu futuræ retributionis impleas et licet a tua Ecclesia sis hoste imminente depulsus, aliam quæ pastore vacat debeas Ecclesiam gubernare. Ita tamen, ut civitatem illam hostibus liberam effici, et Domino protegente ad priorem statum contingerit revocari, ad aliam in qua et prius ordinatus es Ecclesiam revertaris. Sin autem prædicta civitas continua captivitatis calamitate premitur, in qua a nobis incardinatus es debeas Ecclesia permanere. »

XI. His auctoritatibus Actardus, Namnetensis episcopus, prius a Nominoio Brittonum duce de sua civitate expulsus, a domno rege Carolo, fugato eodem Brittonum duce, consilio episcoporum illum quem in sede Namnetensi isdem tyrannus fecerat exordinari, in monasterio sancti Martini jussit exulare, et Actardum in sede sua restitui. Postea autem a Salomone tyranno eundem Actardum a civitate sua expulsus, in vacante Morinensi ecclesia concilii consensu concessit aliquandiu immorari, donec penitentibus clero ac plebe provinciæ Turonensis, et conhibentibus episcopis, ad provinciam suam rediit. et a pontifice apostolicæ sedis in vacante metropoli fuit incardinatus. Qui Actardus non debuerat sedem suam mutare, si valerat ibi consistere, vel si alius aliquis esset, qui simili vel forte majori utilitate regulariter in Turonensi ecclesia posset ordinari, dicente Cœlestino (*epist. 1, ad episcopos per Vienne*, etc): « Tunc alter de altera eligatur ecclesia, si de civitatis ipsius clericis, cui est episcopus ordinandus, nullus dignus, quod evenire non credimus, poterit inveniri. Primum enim illi reprobandi sunt, ut aliqui de alienis ecclesiis merito præferantur. Habeat unusquisque suæ fructum militiæ in ecclesia, in qua suum per omnia officia transegit ætatem: in aliena stipendia minime alter obrepat, nec aliis debitam alter sibi audeat vindicare mercedem. »

XII. Quod autem isdem Actardus apposuit, ut utrasque sedes Turonensem scilicet et Namnetensem simul teneret, contra Chalcedonense concilium (*can. x*) egisse videtur, quo decretum est: « Non licere clericum in duarum civitatum conscribi simul ecclesiis, et in qua initio ordinatus est, et at quam confugit, quasi ad potiorem, ob inanis gloriæ cupiditatem. Hoc autem facientes revocari debere ad suam ecclesiam in qua primitus ordinati sunt, et ibi tantummodo ministrare. Si vero jam quis translatus est ex alia in aliam ecclesiam, prioris ecclesiæ, vel martyriorum quæ sub ea sunt, aut ptochiorum, aut xenodochiorum rebus in nullo communicent. Eos vero qui ausi fuerint, post diffinitionem magnæ et universalis hujus synodi quidquam ex his quæ sunt prohibita perpetrare, decrevit sancta synodus a proprio hujusmodi gradu recedere. »

XIII. Quod autem quidam contra hoc capitulum hujus magnæ et universalis synodi, quasi ex verbis beati Gregorii satagunt se munire, ut duas sedes simul tenere valeant, cum nulli Christiano sit

licitum, vel duas uxores simul, vel uxorem et concubinam insimul habere, diligenter verba ejusdem beati Gregorii in epistola ad Bacandum episcopum curent discernere, qua dicit, non de longius civitatulis a se invicem disparatis, sed de collimitaneis, et de tam cleri quam plebis imminutione destitutis, et rebus ac facultatibus desolatis. « Et temporis necessitas nos, inquit (*lib. 1, epist. 8*), perurget, et imminutio personarum exigit ut destitutis ecclesiis salubri ac provida debeamus dispositione succurrere. Et ideo quoniam ecclesiam Minturnensem funditus tam cleri quam plebis destitutam desolatione cognovimus, tuamque pro ea petitionem, quatenus Formianæ ecclesiæ, in qua corpus beati Erasmi martyris requiescit, cuique fraternitas tua præsidet, adjungi debeat, piam esse ac justissimam prævidentes, necessarium duximus, consulentes tam desolationi illius, quam tuæ ecclesiæ paupertati, redditus suprædictæ ecclesiæ Minturnensis, vel quidquid ei antiquo modernoque jure vel privilegio potuit potestve qualibet ratione competere, ad tuæ ecclesiæ jus potestatemque hac præcepti nostri auctoritate transmigrare. » In cujus verbis quisque debet attendere, quia dicit quod temporis necessitas perurget, et imminutio exigit personarum, ut destitutis ecclesiis debeat succurrere, et necessarium ducit tam desolationi loci, quam paupertati ecclesiæ consulere. Volunt etiam quidam, ex quorumdam novelli temporis adinventione, usurpare præsumptionem, quatenus liceat eis sedes suas mutare, non causa utilitatis, sed superducto quasi velamento necessitatis, revera quidem ambitione cupiditatis; in qua commemorantur quidam de civitatibus ad civitates, et etiam de minoribus ad potiores translati fuisse episcopi, antequam hinc certæ diffinitiones sacrorum canonum fuere præfixæ, quas transgredi perniciosum est. Manifestum, sicut sanctus Hilarius papa ad Leontium et ad cæteros episcopos scribit dicens (*epist. 11*): « Quia non minus in sanctarum traditionum delinquitur sanctiones, quam in injuriis ipsius Domini proslitur. » Et sanctus Cælestinus (*epist. 11*): « Nulli sacerdotum suos liceat canones ignorare, nec quidquam facere, quod patrum possit regulis obviare. Quæ enim a nobis res digna servabitur, si decretalium norma constitutorum pro aliquorum libitu licentia populis permissa frangatur? » Et sanctus Leo (*epist. 1*): « Hoc admonitio nostra denuntia, quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem, qui socius esse noluit discipline. » Et sanctus Gelasius (*epist. 6 ad universos episc.*): « Cumque nobis contra salutarium reverentiam regularum cupiamus temere nil licere et cum sedes apostolica super his omnibus favente Domino, quæ paternis canonibus sunt præfixa, pio devotoque studeat tenere proposito, satis indignum est quemquam, vel pontificum, vel ordinum subse-

quentium, hæc observantiam refutare, quam beati Petri sedem et sequi videat et docere, satisque conveniens sit, ut totum corpus Ecclesiæ in hac sibimet observatione concordet, quam illic vigere conspiciat ubi Dominus Ecclesiæ totius posuit principatum. » Et item idem: « Patres, inquit, nostri catholici videlicet doctique pontifices, quidquid pro fide, pro veritate, pro communionem catholicam atque apostolicam, secundum Scripturarum tramitem traditionemque majorum, facta semel congregatione sanxerunt, inconvulsum voluerunt deinceps firmumque constare, nec in hac eadem causa denuo quæ præfixa fuerant retractari qualibet recenti præsumptione permiserunt, sapientissime pervidentes, quoniam si decreta salubriter cuiquam liceat iterare, nullum contra singulos quosque prorsus errores stabile persisteret Ecclesiæ constitutum, ac semper isdem furoribus redivivis omnis integra diffinitio turbaretur. » Et Symmachus dicit (*epist. 1, Aonio*): « Ad ipsam sacrosanctam catholicam religionem pertinere, cujus omnis potestas infringitur, nisi universa quæ a Domini sacerdotibus semel regulariter statuuntur perpetua sint. Quod alias contingere poterit, si successor decessoris actibus non tribuerit firmitatem, et roborando quæ gesta sunt faciat rata esse quæ gesserit. » Et item idem (*epist. eadem*): « Quanta vicariis beatissimi Petri apostoli iudicabitur esse reverentia, si quæ in sacerdotio præcipiunt, eisdem transeuntibus dissolvantur? » Et item: « Non potest ex parte firmum esse quod generalitatis tangit injuriam, et quod quasit ad astruptionem, magis autem ad destructionem positum est in adinventione præmissa. » Unde sancti Patres Nicæni capite secundo dicunt (*can. 11*): « Quoniam plura aut per necessitatem, aut alias cogentibus hominibus adversus ecclesiasticam facta sunt regulam; et sanctus Leo papa capite quadragesimo quarto Decretalium suorum dicit, omittendum esse et inculpabile judicandum, quod necessitas intulit. Quam alienum a ratione et auctoritate astruptionis hujus perniciosæ permissionis sit, qui eadem capitula legit patenter agnoscit, quia illius secundi capituli Nicæni concilii processus, quod perperæ actum eatenus fuerat, ne deinceps quisque præsumat, cum magna interminatione prohibuit, et capitulum quadragesimum tertium Leonis, ab hac ratione penitus est alienum, sicut trigesimum octavum capitulum in decretis suis ad Anastasium Thessalonicensem episcopum, sed id ipsum capitulum evidenter ostendit. Sed et te his quæ per necessitatem fiunt, potiusque usurpari videntur, sanctus Innocentius in decretis suis ad Rufum et Eusebium ac cæteros episcopos dicit (*epist. 27*): « Pervideat ergo dilectio vestra haec tamen talia transisse, et advertite quod utique ut dicitis necessitas imperavit, in pace jam ecclesiæ constitutas non posse præsumere. » Et Paulo post: « Priora ergo dimittenda dico Dei iudicio, et de reliquo maxima sollicitudine præcavendum. » Videre igitur et mentis et corporis oculo qui hæc adinvene-

runt debuerant Pauli sententiam qua dicit : *Non enim sumus sicut plurimi adulterantes verbum Dei* (II Cor. II, 17). « Adulter, inquit beatus Gregorius (Moral. XVI, cap 25), in carnali coitu non prolem sed voluptatem quærit, et perversus quique ac vanæ gloriæ serviens recte adulterare verbum Dei dicitur, quia per sacrum eloquium non Deo filios gignere, sed suam scientiam desiderat ostentare. Quem enim libido gloriæ ad loquendum trahit, voluptati magis quam procreationi operam impendit. » Sic et qui pro opibus et facultatum copiis ac rebus terrenis Ecclesiam suam mutat, adulter merito vocatur, et inter adulteros deputabitur. Nam civitatem, in qua Comes inhabitat, et clerici ac laici nobiles, sed et ignobiles atque rustici laboratores, et etiam Judæi ut fertur inhabitant, et in parochia sub nomine Christiano degunt, episcopum causa cupiditatis, aut ardore ambitionis deserere, et alteram sedem vacantem invadere, et cum illa in qua ordinatus fuit, et in qua sine periculo mortis degere valet, tenere, non solum turpe sed et periculosum atque perniciosum est, cum sacri canones etiam de vacante episcopo in Ecclesiam vacantem prosilient decernant (conc. Antioch. can 14), « ut si quis episcopus vacans in ecclesiam vacantem prosiliat, sedemque pervadat absque integro perfectoque concilio, hic abiciatur necesse est, etsi cunctus populus quem diripuit eum habere delegerit. Perfectum vero concilium illud est, ubi interfuerit metropolitanus antistes. » Sed et de eo qui irrationabiliter et irregulariter civitatem suam in qua ordinatus fuit deserit, et ad aliam transit, Sardicense concilium dicit (can. 1) : « Non minus mala consuetudo, quam perniciose corruptela funditus eradicanda est, ne cui liceat episcopo de civitate sua ad aliam transire civitatem. Manifesta est enim causa qua hoc facere tentat, cum nullus in hac re inventus sit episcopus, qui de majore civitate ad minorem transiret : unde aparet avaritiæ ardore eos inflammari, et ambitioni servire, et ut dominationem agant. Si omnibus placet, hujusmodi perniciæ sævius et austerius vindicetur, ut nec laicam communionem habeat qui talis est. » In hoc capitulo major et minor civitas, non solum pensanda est nomine, sed et possessione, sicut et avaritia non solum pecuniæ est ac possessionis, sed etiam altitudinis. In nomine Metropolitano avaritia dicitur, cum supra modum sublimitas ambitur : in possessione, videlicet in rerum ac facultatum copiositate, est avaritia, quam Apostolus idolorum servitatem appellat. Et sanctus Leo papa hoc sequens capitulum decrevit (epist. 88 Anastasio Thessal.), « ut si quis episcopus civitatis suæ mediocritate despecta administrationem loci celebrioris ambierit, et ad majorem se plebem quacunque ratione transierit, a cathedra quidem pellatur aliena, sed et carebit et propria, ut nec illis præsideat, quos per avaritiam concupivit, nec illis quos per superbiam sprevit. Suis igitur terminis quisque contentus sit, nec supra mensuram juris sui affectet augeri. » Et item Sardicense con-

cilium dicit (can. 11) : « Ut etiamsi talis aliquis exstiterit temerarius, ut fortassis excusationem asserens asseveret quod populi litteras acceperit, cum manifestum sit potuisse paucos præmio et mercede corrumpi, eos qui sinceram fidem non habent, ut clamarent in Ecclesia, et ipsum petere viderentur episcopum, omnino has fraudes damnandas esse arbitrator, ita ut nec laicam in fine communionem talis accipiat. » Quia vero duabus metropolitans sedibus unus metropolitanus episcopus regulariter præsidere non poterit, sanctus Bonifacius papa auctoritate Nicæni concilii manifestat scribens ad Hilarium, Narbonensem episcopum (Epist. 8) : « Nulli, inquit, videtur incognita synodi constitutio Nicænae, [quæ ita præcipit ut eadem proprie verba ponamus ; per unamquamque provinciam ejus metropolitano singulos habere debere, nec cuiquam duas esse posse subjectas, quod illi, quia aliter credendum non est, servandum sancto Spiritu suggerente sibimet censuerunt. » Et post aliquanta : « Quod ideo dicimus, et advertat charitas tua, adeo nos canonum præcepta servare, ut ita constitutio quoque nostra offiniat, quatenus metropolitani sui unaqueque provincia in omnibus rebus ordinationem semper expectet. » Cogunt, inquit Augustinus, multis invenire medicinas multorum experimenta morborum. Et quia, ut Daniel dicit : *Pertransibunt plurimi, et multiplex erit scientia* (Dan. 12, 4), pro temporum diversitate, et morborum varietate, atque hominum sanitate, quædam conceduntur, sicut Noe et filiorum jus usibus alimenta nova permissione concessa deinde, per Moysen populo Judæorum prohibita rursusque nobis sunt ita concessa, ut quæ Judæis fuerunt vetita in pecoribus, nobis prohibeantur in moribus, sicut Dominus in Evangelio dicit : *Audistis quia dictum est antiquis : ego autem dico vobis* (Matth. V, 21). Quapropter quod licitum fuit, necessitate vel utilitate, de transmigrandis episcopis ab ecclesiis ad ecclesias ante sacram regularum præfixionem, postea intantum fuit, est, et erit illicitum contra easdem sacras regulas usurpare, ut sanctus Gregorius Nazianzenus, vir doctissimus, catholicissimus atque eloquentissimus, et vitæ merito ac sapientiæ doctrina venerandus, qui apud Græcos Theologus cognominatur, multorum decreto episcoporum, ut in historiis ecclesiasticis legimus : de parva civitate Nazianzo Constantinopolim causa fidei translatus, quam per annos duodecim insignissime gubernavit et ab hæresi Ariana gloriosissime liberavit, et dogma Nicæni concilii quasi jam mortuum in eadem regia civitate suis expositionibus resuscitavit, agnoscens episcopos murmurare eo quod esset et alia civitate contra canones translatus ad aliam, vitare imo auferre fratrum volens scandalum, ne schisma in Ecclesiam introducere videretur, monente Apostolo : *In omnibus exhibeamus nosmetipsos sicut Dei ministros, nemini dantes ullam offensionem, ut non vituperetur ministerium nostrum.* (II Cor. VI, 4), adveniente Constantinopolim Theodosio principe, pa-

citice impetrata licentia, habitare ulterius in eadem civitate declinavit, sequens Domini sententiam dicentis ad Petrum, ut qui censum non debebant, exigentibus censum darent, quatenus scandalum devitarent. *Qui scandalizaverit*, inquit Dominus, *unum de pusillis istis qui in me credunt, expedit ei ut suspendatur mola asinaria in collo ejus, et demergatur in profundum maris* (Matth. XVIII, 6). Per molam quippe asinariam, ut sanctus Gregorius in Pastoralis regula exponit (part. I, cap. 2), « secularis vitæ circuitus ac labor exprimitur, et per profundum maris extrema damnatio designatur. Qui ergo ad sanctitatis speciem deductus, vel verbo cæteros destruit, vel exemplo, melius profecto fuerat ut hunc ad mortem sub exteriori habitur terrena acta constringerent, quam sacra officia in culpa cæteris imitabilem demonstrarent: quia nimirum si solus caderet, utcumque hunc tolerabilior inferni pœna cruciaret. » Et item (part. III, cap. 5): « Scire etenim prælati debent, quia si perversa unquam perpetrant, tot mortibus digni sunt, quot ad subditos suos perditionis exempla transmittunt. Unde necesse est ut tanto se cautius a culpa custodiant, quanto per prava que faciunt non soli moriuntur. » At si aliquis dixerit, non ego invado Ecclesiam ad quam multorum consensu episcoporum et plebis transmigro, penset sollicite, sicut et sanctus pensavit Nazianzenus Gregorius, quæ, ut præmisimus, a sacris sunt præfixa canonibus, a quibus per, contemptum deviare in schisma est ruere, sicut sanctus papa. Hilarus patenter ostendit (epist. 11): « Non minus, inquiens, in sanctarum traditionum delinquitur sanctiones, quam in injuriam ipsius Domini prosilitur. » Qua sententia beatus Hilarus papa hæreticos et schismaticos pariter denotavit. Schismaticos quidem, in eo quod dixit, non minus in sanctarum traditionum sanctiones delinquitur, et hæreticos, in eo quod dixit, quam in injuriam ipsius Domini prosilitur. » Nam hæretici ut S. Gregorius ex sententia apostoli Pauli quia dicit *Si tradidero corpus meum ut ardeat, charitatem autem non habeam, nihil mihi prodest* (I. Cor. XIII, 3), demonstrat (Mor. XVIII, cap. 14), prava de Deo sentiunt schismatici recta de auctore tement, sed unitatem cum fratribus in sanctarum traditionum sanctione non tenent: illi errore fidei, isti vero schismatis perpetratione divisi sunt. Unde et in ipsa prima parte Decalogi utrarumque partium culpæ reprimuntur, cum divina voce dicitur: *Diliges Dominum Deum tuum ex toto corde tuo et ex tota anima tua, et ex tota virtute tua* (Deut. VI, 5), atque mox subditur: *Diliges proximum tuum sicut teipsum*. Qui enim de Deo perversa sentit, liquet profecto quia Deum non diligit: qui vero de Deo recta sentiens, a sanctæ Ecclesiæ unitate divisus est, constat quia proximum non amat, quem habere socium recusat. Quisquis ergo ab hac unitate matris Ecclesiæ, sive per hæresim de Deo perversa sentiendo, sive errore schismatis proximum non diligendo dividitur, charitatis hujus gratia privatur, de qua hoc quod præmisimus, Paulus

A dicit: *Si tradidero corpus meum ut ardeat, charitatem non habeam, nihil mihi prodest*; ac si aperte diceret: Extra locum suum conflationis mihi ignis adhibitus tormento me cruciat, mundatione non purgat. » Auro enim locus est in quo conflatur, id est unitas catholicæ Ecclesiæ, in qua baptismum, et opera bona, et etiam martyrium prodest, extra illam quippe, nec baptismum, nec opera bona, nec etiam martyrium proficit. Quia etiam cognati sunt hæretici et schismatici, et solemnibus orationibus sextæ feriæ ante Pascha monstratur. « Hinc ergo, ut sanctus Cælestinus scribit (epist. 8 in fine), legem credendi lex statuatur supplicandi. » Sed et quam grave peccatum schisma sit, sanctus Augustinus in libro secundo de Baptismo (cap. 6) demonstrat, dicens: « Atteramus divinam stateram de Scripturis sanctis, tanquam de thesauris Dominicis, et in illa quid sit gravius appendamus: imo non appendamus, sed a Domino appensa recognoscamus, tempore illo quo Dominus prio delicta recentibus pœnarum exemplis cavenda monstravit, et idolum fabricatum atque adoratum est, et propheticus liber ira regis contemptoris incensus et schisma tentatum idolatria gladio punita est, exustio libri bellica cæde et peregrina captivitate, schisma hiatu terræ sepultis auctoribus vivis, et cæteris cœlesti igne consumptis: quis jam dubitaverit hoc esse sceleratius commissum, quod est gravius vindicatum? »

Hinc et in decretis apostolicæ sedis est scriptum: Sicut enim justos ad æternam vitam Dominus prædixit ituros, sic impios æterno damnandos interitu: ut sicut non potest finire beatitudo justorum, sic ne impiorum tormenta finiatur. Hæc hæreticis schismaticisque sunt. Et quia quidquid nunc gerit Ecclesia, mystice typus est futurorum, si gustabunt de pane cœlesti, id est te suavitate divina, gehennæ participes, hæreticis schismaticisque damnatio est corporis et sanguinis Christi communio. Quisquis ergo assentit schismatico, schismatico esse negari non poterit. Quod etsi omnes sacerdotes et mundus assential, damnatio consentientes involvit, non prævaricationem consensus absolvit. Non enim crimen minuitur, sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit. D « Et sicut non potest, ut Gelasius scribit (epist. 10, ad Anastasium), perversitas communicatore suscepto, non pariter perversitas approbari: sic non potest refutari perversitas complice sectatore perversitatis admissio, cum dicat Apostolus non solum qui non faciendæ faciunt reos videri, sed etiam qui consentiunt facientibus (Rom. I, 32). Legibus enim publicis criminum conscios, susceproptoresque latrocinantium par judiciorum pœna constringit, nec expers facinoris aestimatur, qui licet ipse non fecerit facientes tamen in familiaritatem fœdusque receperit. Hinc ergo audianus quomodo et Dominus vocet eos, qui in ovile ovium contra sacros canones

Spiritu Dei conditos insiliunt, id est regimen Ecclesie rapiunt potius quam assequuntur, *Qui non intrat, inquit, per ostium in ovile ovium, ascendit aliunde, hic fur est et latro* (Joan. x, 1). De qualibus idem per prophetam dicit: *Ipsi regnaverunt et non ex me principes exstiterunt, et non cognovi* (Ose. viii, 4). » « A se, inquit Gregorius (*Pastor*. i, cap. 1), et non ex arbitrio summi rectoris regnant, qui sua cupiditate accensi, culmen regiminis rapiunt potius quam assequuntur: quos tamen internus iudex et pro-vehit, et non cognoscit, quia quos permettendo tolerat, profecto per iudicium reprobationis ignorat. » Timenda est igitur eis qui talibus favent a beato Gelasio ad sensum præmissa sententia Pauli, qua dicit: *Non solum qui faciunt, sed qui consentiunt facientibus, digni sunt morte* (Rom. i, 32), quia, ut Leo dicit, in talium prælatione non est populis consulere, sed nocere, nec præstare regimen, sed augere discrimen,

XIV. Quod scripsisti, episcopum de quo agitur dicere ad excusandas excusationes in peccatis, quoniam sunt in civitate metropoli, in qua ordinatus fuerat, ministri ecclesiastici, qui indigentium necessitatibus possunt consulere, sed ipse non habet sufficientiam rerum ac facultatum, quibus in ea honorabiliter possit subsistere, unde se conatur excusare, inde magis videtur accusare, et cupiditatis atque cauterio ambitionis incurere, qui plus possessiones terrenas quam animarum luera videtur acquirere. Debuerat enim in mente habere quod spiritus Paulo dixit, ut non exiret de civitate in qua ei multus populus erat, sed constanter prædicaret. Quid enim scit, utrum multi de paganis illis, qui in eadem civitate habitant, sint a Deo prædestinati ad vitam, qui per prædicationem ejus oris et operis converti poterant, et ubi Christiani sunt salvari valent, si in ea maneret, etiamsi necessitas eum ibidem taliter manere cogeret, sicut Paulus se mansisse apud Corinthios dixit: *Ego, inquit, in infirmitate et timore et tremore multo fui apud vos* (I Cor. ii, 3). Legat igitur decimam quartam beati Gregorii homiliam ex lectione sancti Evangelii, *Ego sum pastor bonus* (Joan. xi, 14), et inveniet qualiter ac quantum ab auctoritate et suo ordine deviaverit. Sed et scandalum in Ecclesia misit, sicut et quidam episcopi, etiam a longe præcedentibus temporibus, scandalum pro sua quiete et voluptatibus in Ecclesiam intromiserunt, ordinantes chorepiscopos, et eis quæ summis pontificibus conveniunt agere permittentes. Quos apostolica sedes sæpius reprobavit, et apostolico mucrone recidit, sicut in decretalibus eorum qui voluerit recensere inveniet. Inter quos Damasus papa de talibus dicit episcopis (*epist. 5 ad episc. Numidiæ*): « Illi, inquit, episcopi, qui talia sibi præsumunt, videntur mihi esse meretricibus similes, quæ statim ut pariunt, infantes suos aliis nutricibus tradunt educandos, ut suam citius libidinem explere valeant. Sic et isti infantes suos, id est populos sibi commissos, aliis educandos tradunt, ut suas libidines pleant, id est pro suo libitu sæ-

cularibus curis inhient, et quod unicuique visum fuerit liberius agant. » Et alia, quæ in suis locis lector invenire valebit. Sed et sicut in epistola beatæ memoriæ Nicolai papæ ad quosdam episcopos Belgicæ provinciæ directa continetur, Græci contra eum fremuerunt, quia ipse, sicut et predecessores sui, sacerdotes ab uxoribus abstinere præcepit, volentes per canones statuere ut liceat illis uxores habere. Nos autem moderni et Gallicani episcopi, novos canones facere conamur, ut liceat nobis quod gravius est quam carnali commercio, spiritali adulterio, aut duas uxores, id est duas sedes simul habere, aut uxorem simul et concubinam tenere, vel vivente licet infirma uxore, id est Ecclesia nostra persecutione qualibet rebus ac possessionibus imminuta, ad alterius copulam transmigrare. Cum sicut vir non habet potestatem corporis sui, sed mulier, quandiu uxor ejus licet infirmat vivit, ita et episcopus non habet potestatem ecclesiam, videlicet plebem suam deserere, et alteram invadere vel usurpare, quandiu, sicut sanctus Augustinus dicit (*epist. 180, Honorato*), in ea residui sunt conservi sui, quibus præbeat cibaria, quos aliter vivere non posse novit. Quod si fecerit, tanto majus committit adulterium, quanto spiritaliter adulterat, et plebem suam adulterare facit, si alteri eo vivente et in sacerdotii incolumitate manente se junxerit, quia mulier non habet potestatem corporis sui, sed vir, quandiu vir ejus vivit, et plebem quam invaserit secum adulterare facit, ut beatus Innocentius in decretis suis ostendit, loquens de repudio viri atque uxoris, quod merito intelligendum ac sequendum et de spiritali episcopi et Ecclesie, in qua primum ordinatus fuit, conjunctione.

« De his, inquit (*epist. 11, ad Exuperium*), requisivit dilectio tua, qui interveniente repudio alio se matrimonio copularunt, quos in utraque parte adulteros esse manifestum est. Qui viro vel uxore vivente, quamvis dissociatum videatur esse conjugium, ad aliam copulam festinarunt, neque possunt adulteri non videri, in tantum ut etiam hæc personæ quibus tales conjuncti sunt, etiam ipsi adulterium commisisse videantur, secundum illud quod legitimus in Evangelio: *Qui dimiserit uxorem suam et duxerit aliam, mæchatur: similiter et qui dimissam duxerit, mæchatur* (Matth. v, 21), et ideo omnes a communionem fidelium abstinendos. At sit uxor episcopi, ecclesia scilicet ac parochia ejus, fuerit qualibet oppressionem percutionis desolata, id est de solo elapsa, ut in ea non remaneant quibus necesse sit ministrare, licite valet episcopus ad vacantem aliam ecclesiam transmigrare, sicut supra verbis beatorum Augustini atque Gregorii est demonstratum. Et plebs episcopo suo viduata, id est vacans, carne vel regulariter defuncto sacerdotio episcopum viduatam, id est vacantem, regulariter potest suscipere, veluti Apostolus de muliere dicit: *Mortuo, inquit, viro, nubat cui vult, tantum in Domino* (I Cor. vii, 39). Sanctus quippe Leo, inter præcipuos sedis Romanæ,

ornatus præcipuus, de viro et muliere Apostoli sententiam exponens, quid per hanc conjunctionem intelligi voluerit patenter ostendit : *Sacramentum hoc, inquit, magnum est : ego autem dico in Christo et in Ecclesia* (*Ephes. v, 32*). Utique duo sunt, Deus et homo, Christus et Ecclesia, quæ de sponsi carne provibit, et de latere Crucifixi manante sanguine et aqua, sacramentum redemptionis et regenerationis accepit. »

Et idem alibi : Unde, inquit, cum societas nuptiarum ita ab initio constituta sit, ut præter sexuum conjunctionem haberet in se Christi et Ecclesiæ sacramentum, non ergo fornicetur quisquam, indebita voluntate abiens post uxorem legitimo et spiritali sibi sortitum conjugio, sed diligat et foveat eam, sicut Christus Ecclesiam : neque post pastorem suum, in fide et in nobis operibus manentem, quem ordinante Deo legitima sorte suscepit, Ecclesia abiens fornicetur sed in ea vocatione qua vocati sunt maneat, veluti sacræ Scripturæ et traditiones ecclesiasticæ præfixerunt. Si enim, quia concedente Apostolo unius uxoris vir assumi in sacerdotium jubetur, ut uxorem quam ante sacerdotium habuit castis foveat et tueatur auxiliis, et non eam destitutam, debet relinquere, multo minus sacerdos destitutam, aut pro superinducta, vel cum superinducta deserere vel negligere, minime autem cum alia una cum ipsa debet mœchari ecclesia : et sicut non adulterare verbum Dei, ita nec adulterare debet Ecclesiam suam. Nisi enim viri et uxoris legalis conjunctio ad episcopi et ecclesiæ sibi conjunctæ mysterium pertineret, magnum Chalcedonense concilium defuncto suo episcopo viduatam ecclesiam non vocaret, cujus reditus penes œconomum futuro reservari jubet episcopo, nec ab aliis quibusque, vel vivente vel defuncto cujuscunque civitatis episcopo usurpari, vel pessumdari : quod qui præsumpserint, verenda est illis sententia ejusdem sancti et universalis concilii, qua intentando decernit (*can. 10*) : « Eos, inquit, qui aussî fuerint, post diffinitionem magnæ et universalis hujus Synodi, quidquam ex his quæ prohibita sunt perpetrare, decrevit sancta Synodus a proprio hujusmodi gradu recedere. » Et de transgredientibus quæ constituta sunt, item conjuncte dicit (*can. 27*) : « Si quidem clerici sunt, decidant gradu proprio ; si vero laici, anathematizentur. » Sic etiam de rerum ac facultatum præsumptoribus, et aliorum conciliorum canones, et apostolicæ sedis pontifices multoties decreverunt, quæ non parvipendunt qui irrefragabili Domini sententiæ credunt, dicentis in Petro, et apostolis omnibus, et in eis illorum successoribus : *Quæcunque ligaveris super terram, ligata erunt et in cælis* (*Matth. xvi. 19*). Nam sicut Petrus respondit pro interrogatis a Christo apostolis omnibus, ita et Christus hæc in Petro dixit apostolis, et successoribus eorum omnibus, quibus manet hoc privilegium, a quibus fertur ex apostolorum æquitate judicium, sicut sanctus Leo et Gregorius evidenter ostendunt. Unde sanctus Gregorius item dicit :

A « Christiani non sunt, qui ligamenta sanctæ Ecclesiæ vanis se æstimant conatibus solvere : ac per hoc nec absolutionem sanctæ Ecclesiæ, quam præstat fidelibus, veram putant, si ligaturas ejus valere non æstimant. Contra quos diutius disputandum non est, quia per omnia despiciendi et anathematizandi sunt, et unde se fallere veritatem credunt, inde in peccatis suis veraciter implicantur, eosque et ego et omnes catholici episcopi, atque universa Ecclesia anathematizamus, quia veritati contraria sentiunt, et contraria loquuntur. »

Hæc idcirco de rebus et facultatibus Ecclesiæ viduatæ sub œconomio futuro reservandis Episcopo hic interposuimus, ut attendat de quo agitur episcopus, quia si nemini Christiano eas licet præsumere, multo minus item episcopus, sine sui status periculo ac animæ detrimento, ecclesiæ invasæ res et facultates prævalet usurpare. Sicut enim comes civitatis et minoris potestatis, habent unde in sua metropoli possint consistere, et comministri ejus ecclesiastici valent ibidem vivere ; sic et ipse, nisi eum cupiditas et ambitio unde ejiceret, ibidem vel de operibus manuum, vel de decimis fidelium ac collatione presbyterorum, et si aliter non posset, vel sub censu, sicut Hierosolymis patriarcha, et viri religiosi ac fideles in Corduba, et in aliis civitatibus per Hispaniam faciunt, ibi valerent manere, et conservis in tempore tritici mensuram donare, id est verbum prædicationis impertire, et ministeria quæ non nisi ab episcopis ministris ecclesiasticis et plebibus possunt dependi, sicut sunt ordinationes ecclesiasticorum ministrorum, sicut est confectio sacri chris-matis, et consecratio olei exorcizati et ad infirmorum unctionem consecrati, sicut est confirmatio et consignatio baptizatorum, sicut est manus impositio et reconciliatio publice pœnitentium, et velatio virginum, et alia quæ per singula non necesse est computare : quæ non nisi ab episcopis valent regulariter fieri, et in utrisque civitatibus, tanto spatio inter se distantibus, ab uno episcopo congruis temporibus non valent, imo nec debent, nec regulæ permittunt exsequi. Quæ et si per tempora possunt in sua metropoli ab eo fieri, convincitur in ea posse immorari, et quæ sibi a subditis competunt exsequi. Legat namque secundam epistolam Pauli apostoli ad Corinthios, cum quanta difficultate atque cum quanto labore prædicationis ministerium fuerit exsecutus, qui præter labores quos sustinuit in carceribus, in plagis supra modum, in mortibus frequenter, in flagellis, in lapidatione, in naufragiis, *in itineribus sæpe vexatus fuit, periculis fluminum, periculis latronum, periculis ex genere, periculis ex gentibus, periculis, in civitate, periculis in solitudine, periculis in mari, periculis in falsis fratribus, in labore et ærumna, in vigiliis multis, in fame et siti, in jejuniis multis, in frigore et nuditate, præter illa quæ extrinsecus sunt, instantia quotidiana, sollicitudo omnium Ecclesiarum* (*II Cor. xi. 23, 26, 27, 28*), et manibus suis la-

boravit, quæ necessaria sibi et suis fuerunt, ne quem libet gravaret, et inveniet se a successione illius extorem, cuius sequi detractat exemplum, et illorum constringi iudicio, qui jam in cœlis cum Deo regnant, sancto Spiritu inspirati sacros canones per eundem sanctum Spiritum protulerunt, quibus decernitur, ut huiusmodi nec in eo episcopos, ut supra scripsimus, habeatur, nec communionem laicam mereatur, sicut evidenter sanctus Leo apostolicæ sedis pontifex in decretis suis iterato decernit (*epist. 1, in fine*): « Hoe inquires, admonitio nostra denuntiat, quod si quis fratrum contra hæc constituta venerit vel venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem qui socius esse noluit disciplinæ. Ne quid vero sit quod prætermisum a nobis forte credatur, omnia decretalia constituta, tam beatæ recordationis Innocentii, quam omnium decessorum nostrorum, quæ de ecclesiasticis ordinibus et canonum promulgata sunt disciplinis, ita vestra dilectione custodiri debere mandamus, ut si quis in illa commiserit, veniam sibi deinceps noverit denegari. »

XV. Cur enim non posset religiosus homo et episcopus ac continens, sine uxore et filiis, ita in civitate sua vivere, sicut sæcularis homo comes, uxorem habens et liberos, etiam inter paganos vivit: præsertim cum alias possessiones et abbatias largitione domni regis habeat, unde sumptus habere valet, quibus ad Deo serviendum, et ministerium suum exsequendum in plebe sibi commissa sufficere posset? « Sed sunt, inquit Gregorius (*thom. 14, in Ev.*), nonnulli quidam plus terrenam substantiam quam oves diligunt, merito nomen pastoris perdunt. De quibus protinus subditur: *Mercenarius autem, et qui non est pastor, cuius non sunt oves propriæ, videt lupum venientem, et dimittit oves et fugit* (*Joan. x, 12*). Non pastor sed mercenarius vocatur, qui non pro amore intimo oves Dominicæ, sed ad temporales mercedes pascit. Mercenarius quippe, qui locum quidem pastoris tenet, sed lucra animarum non quærit, terrenis commodis inhiat, honore prælationis gaudet, temporalibus lucris pascitur, impensa sibi ab hominibus reverentia lætatur. Istæ sunt etenim mercedes mercenarii, ut pro eo ipso quod in regimine laborat, hic quod quærit inveniat, et ab hæreditate gregis in posterum alienus existat. » (*Ibid., post aliqua.*) « Et lupus rapit et dispergit oves. Lupus venit et mercenarius fugit, quia malignus spiritus mentes fidelium in tentatione dilaniat, et is qui locum pastoris tenet, curam sollicitudinis non habet: animæ pereunt, et ipse de terrenis commodis lætatur. » Unde quia sicut beatus dicit Gelasius (*epist. 10, ad Anastasium*): Duo sunt quibus principaliter mundus hic regitur, auctoritas sacras pontificum et regalis potestas, sequendum est episcopi ac principibus terræ consilium hortantis, imo præcipientis Apostoli: *Nolite, inquit, communicare operibus infructuosis tenebrarum, magis autem et redarguite*

(*Ephes. v, 11*). » Hinc sanctus Augustinus: « Duo- bus modis non te maculat malus, si non consentias et si redarguas: hoc est non communicare, non consentire. » Communicatur quippe, quando facto ejus consortium voluntatis vel approbationis adiungitur. Hoc ergo nos admones Apostolus ait: *Nolite communicare operibus infructuosis tenebrarum*; et quia parum erat non consentire, si sequeretur negligentia disciplinæ. *Magis autem, inquit, et redarguite*. Quid est nolite communicare? Nolite consentire, nolite laudare, nolite approbare. Quid est autem magis et redarguite? reprehendite, corripite, coercete. Nam et sanctum Africanum concilium eos qui negligunt loca ad suam cathedram pertinentia in catholicam unitatem lucrari, conveniri a diligentibus vicinis episcopis, ut id agere non morentur, signanter cum diffinitione certissima præcipit, sicuti suo loco diligens lector inveniet. Et constat esse certissimum, quia iste civitatem suam, in qua remanent plures qui episcopali ministerio indigent, pro alia quietiore ac locupletiore mutaverit, et alterum loco suo ordinari permiserit, quia, ut supra ostendimus, duabus metropolitans civitatibus præsidere non potest, non pro animarum lucro, sed pro temporali augmento cum spiritali suo detrimento hoc agat, quia, ut Leo dicit, non putabitur honor ille legitimus, qui fuerit contra divinæ legis præcepta collatus. Fautores autem ac ordinatores huiusmodi sancti papæ Simpliciæ percellit decretalis sententia qua dicit, Privilegium, inquires, meretur amittere qui permissa sibi abutitur potestate. Hæc quantum pro tempore et occupatione licuit, et Dominus ad mentem mihi venire concessit, de his quæ interrogaveras, Frater charissime tibi respondere curavi. Quæ si cuiquam displicuerint, non contra me sed contra se irascatur, quia contra verba divina nisi in malum suum irasci non poterit. Dum ergo est in via, id est in hac vita concorde cum adversario suo cito, ne forte tradat eum adversarius suus iudici, et iudex tradat eum ministro, et minister mittat illum in carcerem, Amen, non exiet inde donec reddeto novissimum quadrantem. Notum est vel parva de scripturis scientibus, quia in hoc loco adversarius noster dicitur sermo Dei, quoniam jubet contraria operibus nostris malis quæ agimus: Cui si non concordaverimus, justo Dei iudicio, per ministrum mittemur in carcerem, et non exiemus inde, donec reddamus novissimum quadrantem, id est, exolvamus et minimum peccatum.

EPISTOLA XXXII.

AD JOANNEM PAPAM.

Caroli II imperatoris nomine.

De iudiciis et appellationibus episcoporum et presbyterorum.

(Apud eundem, ex editione Moguntina Joan. Busæi.)

Sanctissimo ac reverentissimo Patri JOANNI summo pontifici et universali papæ, CAROLUS gratia Dei imperator Augustus ac spiritalis filius vester.

I. Antequam provinciae Transalpinæ, propter A religionis sumpsit initium, et quotidie gratias Deo, seditiones et bella frequentia, progenitorum nostrorum temporibus, sacrarum legum ac regularum notitiam et observationem plene caperent, sicut poster per incrementa studio illorum ab ac sancta sede gratia Dei ceperunt, gloriosæ memoriæ avus noster Carolus imperator Augustus, diu per egregios ac præcipuæ auctoritatis et sapientiæ viros, de presbyteris ex criminibus diffamatis, qualiter judicari vel purgare se debeant perquisivi, et reperit, sicut in suæ imperialis auctoritatis edictis, quæ in alia schedula habemus scripta, posteris servanda reliquit, quæque usque ad nostra tempora ex tunc in Transalpinis regionibus servata, et quando necessitas postulavit exsecuta fuerunt.

II. In diebus autem domini et genitoris nostris B piæ memoriæ Ludovici imperatoris, cum ipsa tepesci exsecutio aliquatenus cœpit; apud papam Eugenium inde ab eo commonitio facta est. Qua de re synodum iisdem universalis papa convocans, inter alia generalia decreta promulgare curavit, quæ Leo IV tempore fratris nostri Lotharii, et nepotis nostri Ludovici, observanda decrevit, sicut in gestis synodalibus, et in hujus sanctæ Romanæ Ecclesiæ archivo haberi credimus, et ab hac sancta sede nostris decessoribus directa venerabili sanctione habemus. Cum autem non longe ante hos annos nepos noster Ludovicus Italiæ imperator instinctu quorundam contra nos se commovit, missæ sunt nobis epistolæ quasi ex apostolicæ hujus sedis auctoritate ac nomine, quas tenoris inconvenientia hanc sanctam et discretissimam sedem non misisse ostendit.

III. Et quoniam pravis sæpius prava quam recta innotesci solent, nata hinc occasione, Transalpinarum regionum presbyteri, a suis episcopis de certis criminibus regulariter ab ordine sacerdotali dejecti, et pœnitentiæ subacti, sine licentia et conscientia primatum et episcoporum suorum, huc venire, et hinc epistolæ, quæ regulis non convenierunt, referre cœperunt. Quas non jussione apostolica, sed, ut assolet etiam in republica, propter multiplicia reclamatorum negotia, quorumcunque ministrorum quasi pia miseratione factas, et nos illius regionis putant episcopi. Quapropter quia, ut sanctus Augustinus dicit (*epist. 50, ad Bonifacium comitem*), cogunt multas invenire medicinas multorum experimenta morborum, inmissis propter proxilitatem sacrarum legum capitulis prædecessorum nostrorum imperatorum, quibus ecclesiasticæ regulæ consonant, necessarium duximus pandere sanctissimæ vestræ paternitati, ac summæ auctoritati, qualiter regulas de honore in suo statu episcoporum, et de apellatione, si necessitas et ratio in dejectione illorum poposcerit, sed et de apellatione presbyterorum intelligimus, et intelligi a rectoribus Transalpinarum Ecclesiarum didicimus: quatenus ab hujus sanctæ sedis auctoritate nostra sana, ut credimus, intelligentia confirmetur, a qua fidei ac C sunt ordine sacro sublimes, a nullo quolibet, sive ecclesiastica, sive sæculari potestate prædito, debent vilipendi, nec potentibus sæculi modo quocunque postponi, præcipiente omnibus apostolo Jacobo: *Nolite in personarum acceptione habere fidem Domini nostri Jesus Christi gloria (Jac. II, 1)*, quia non qui ditiores ad sæculum, hi in divino examine sunt meliores. *Nonne, inquit, Deus elegit pauperes in hoc mundo, divites in fide, et hæredes regni, quod promissit diligentibus se? (ibid., 5)*, et Paulus: *Ignorabilia et contemptibilia mundi elegit Deus, et reliqua. (I Cor. I, 28.)* Et sanctus Gregorius in epistola ad Mauricium imperatorem (*lib. IV, epist. 31*): « Sacerdotibus, inquit, non ex terrena potestate Dominus noster citius indignetur, sed excellenti consideratione, propter cum ejus servi sunt, eis ita dominetur, ut etiam debitam reverentiam impendat. Nam in divinis eloquiis aliquando sacerdotes dii, aliquando angeli vocantur. Nam et per Moysem, de eo qui ad juramentum deducendus est, dicitur: *Applica illum ad deos, id est ad sacerdotes. Et rursum scriptum est: Diis non detrahes (Exod. XXII, 8)*, scilicet sacerdotibus; et propheta ait: *Labia sacerdotis custodiunt scientiam, et legem requirunt ex ore ejus, quia angelus Domini exercituum est (Malach. II, 7)*. » Quid ergo mirum si illos vestra pietas dignetur honorare, quibus in suo eloquio honorem tribuens, eos aut angelos, aut deos, ipse etiam appellat Deus? Ecclesiastica quoque testatur

historia quia cum piæ memoriæ Constantino principi in scripto oblatae accusationes contra episcopos fuissent, libellos quos acceperat incendit, dicens : « Vos dii estis, a vero Deo constituti : ite, et inter vos causas vestras discutite, quia dignum non est ut nos iudicemus deos. In qua tamen sententia, pie domine, sibi magis ex humilitate, quam illis aliquid præstitit ex reverentia impensa. Ante eum quippe pagani in republica principes fuerunt, qui verum Deum nescientes, deos ligneos et lapides colebant, et tamen eorum sacerdotibus maximum honorem tribuebant. Quid ergo mirum, si Christianus imperator veri Dei sacerdotes dignetur honorare, dum pagani, ut prædiximus, principes honorem impendere sacerdotibus noverunt, qui diis ligneis et lapideis serviebant ? » Et idem sanctissimus atque facundissimus et discretissimus, veraciterque in oculis Dei humillimus, in epistola ad Joannem episcopum Syracusanum, scribens de episcopo Constantinopolitano, inter alia dicit (*lib. vii, epist. 64, ind. 11*) : « Quod sedi apostolicæ dicat se velle subijci, si qua culpa in episcopis invenitur, nescio quis ei episcopus subjectus non sit. Cum vero culpa non exigit, omnes secundum rationem humilitatis æquales sunt. »

VI. Post Constantinum autem, quique Christiani imperatores, decessores ac prædecessores nostri, leges de episcoporum honore ac privilegio condiderunt. Proinde, Pater sanctissime, quia, ut sanctus Gelasius dicit (*epist. 10, ad Anastasium*), duo sunt quibus principaliter mundus hic regitur, auctoritas sacra pontificum, et regalis potestas, ad quas appellari potest, et a quibus nemo permittitur appellare sub oculis districti et æquissimi iudicis Dei, qui sine personarum acceptione iudicat, nostra ponderemus iudicia : quia etsi plerumque existunt inter negligentes vel desides fratres, quæ oporteat majore auctoritate curari, « sic tamen est, ut sanctus Leo dicit (*ep. 88, ad Anastasium*), adhibenda correctio, ut semper sit salva dilectio, et plus erga corrigendos agat benevolentia quam severitas, plus cohortatio quam commotio, plus charitas quam potestas. » Episcopos sane in suo statu manentes debita veneratione colamus, et a nobis eis competentem honore impenso, cæteris exemplum reverentiæ erga sacerdotalem ordinem præbeamus : quia si nos sacrum ordinem in personis eorum vilipendimus, qui velut in speculo, ad sumendum exemplum, in omnium, qui subjecti nobis sunt, oculis positi sumus, pro tantorum culpæ a districto iudice, summo videlicet pontifice et rege regum dijudicabimur quot nostro facto delinquendi, quod absit, exempla præbuerimus. Sicut idem beatus Gregorius in Regula pastorali terribiliter insonat dicens (*part. i, cap. 5*) : « Scire etenim prælati debent, quia si perversa unquam perpetrant, tot mortibus digni sunt, quot ad subditos suos perditionis exempla transmittunt. Unde necesse est, ut tanto se cautius a culpa custodiant, quanto per prava quæ faciunt, non soli mo-

ariuntur, sed aliorum animarum, quas pravis exemplis destruxerunt, rei sunt. Et contra, quot suo vel verbo, vel exemplo, vel quibus potestas est data correptionis correptione, quia sæpe invitis bona præstantur, dicente summo patrefamilias ad servum, id est prælatorum chorum : *Exi cito in vias et sepes, et compelle intrare, ut impleatur domus mea* (*Luc. xiv, 23*), Domino lucrati fuerint, pro tantis gloriæ coronam accipient, attestante Apostolo : *Qui converti fecerit peccatorem ab errore viæ suæ, salvabit animam ejus a morte, et operiet multitudinem peccatorum* (*Jac. v, 20*). »

VII. Cæterum quia non est homo in terra qui faciat bonum et non peccet, et nec ipsi sine peccato fuerunt qui cælesti magisterio adhærebant, dicente Joanne : *Si dixerimus quia peccatum non habemus, nosipos seducimus, et veritas in nobis non est* (*I Joan. i, 8*) ; et Jacobus apostolus dicit : *In multis offendimus omnes* (*Jac. iii, 2*) ; et, ut Scriptura ostendit, in angelis reperta est nequitia (*Job iv, 18*) ; si necessitas cum multa ponderatione atque examinatione coegerit episcopos ab episcopis iudicari, vel presbyteros ab episcopis a gradu ecclesiastico dejici, sicut in honore atque administratione, sic et in dijudicatione atque appellatione, discretionem auctoritatis sacra distinxit, decernens, ut si necessitas et pondus legalis ac regularis accusationis exigit, episcopum iudicari debere a suis iudicibus episcopis, a quibus regulariter una cum primatè provinciæ potuit secundum Nicænos et Antiochenos canones et decreta sedis Romanæ pontificum ordinari, congregatis una cum primatè provinciæ ipsius regionis episcopis secundum Sardicenses canones, atque a constituto, juxta Carthaginenses canones, duodecim episcoporum numero, si plures nequiverint congregari, canonicè iudicetur.

VIII. « Et si isdem accusatus et iudicatus episcopus, congregatis ejusdem regionis episcopis, de gradu suo dejectus apostolicam sedem appellaverit, et confugerit ad episcopum Romanæ Ecclesiæ et ab eo si audiri voluerit post iudicium, juxta Sardicenses canones (*conc. Sard., can. 7*), et decreta Innocentii ad Victricium, et Bonifacii ad Gallicanos episcopos, et Leonis ad Anastasium, scribendum est ab his qui causam examinarunt Romano pontifici. Et si iudicaverit renovandum esse iudicium, renovetur, et det iudices ; si autem probaverit talem causam esse ut non refricentur ea quæ acta sunt, quæ decreverit confirmata erunt. Et si justum putaverit ut renovetur examen, scribere his dignetur episcopis, qui in finitima et propinqua provincia sunt, ut ipsi diligenter omnino requirant, et juxta fidem veritatis definiant. Quod si is qui rogat causam suam audiri iterum, deprecatione sua moverit episcopum Romanum, ut e latere suo presbyterum mittat, erit in potestate episcopi, et quid velit, et quid æstimet. Et si decreverit mittendos esse, qui præsentibus cum episcopis iudicent, habentes ejus auctoritatem a quo destinati sunt, erit in suo arbitrio. Si vero cre-

diderit episcopos sufficere, ut negotio terminum imponant, faciet quod sapientissimo consilio judicaverit. Interim tamen alter episcopus in cathedra depositi episcopi post appellationem ejus non ordinetur, antequam causa ejus fuerit in judicio episcopi Romani determinata. »

IX. Quæ constitutio appellationis ad apostolicam sedem non discordat a sacra et mystica Nicæna synodo, de qua magnus Leo papa ad Anatolium scripsit (*epist.* 56). « Illa, inquit, Nicænorum canonum per sanctum vere Spiritum ordinata conditio in nulla unquam parte est solubilis. Nulla sibilmet de multiplicatione congregationis synodalia concilia blandiantur, neque trecentis illis decem atque octo episcopis quantumlibet copiosior numerus sacerdotum comparare se audeat vel præferre, cum tanto divinitus privilegio Nicæna sit synodus consecrata ut sive per pauciores, sive per plures ecclesiastica judicia celebrentur, omni penitus auctoritate sit vacuum quidquid ab illorum fuerit constitutione diversum. » De cujus privilegio et B. Ambrosius dicit (*lib. I de Fide, c. 9*); « Non humana industria, non compositione aliqua, trecenti decem et octo episcopi ad concilium convenerunt; sed ut in numero eorum, per signum suæ passionis et nominis, Dominus Jesus suo se probaret adesse consilio, crux in trecentis, Jesus nomen in decem et octo est sacerdotibus. » « Et mihi, inquit Hilarius (*De synod.*, in fine), ille ipse numerus hic sanctus est, in quo Abraham victor regum impiorum, ab eo qui æterni sacerdotii est forma benedicitur. » Et hinc item beatus Leo papa ad Anatolium (*epist.* 56, post superiora); « Sancti illi et venerabiles Patres, qui in urbe Nicæna, sacrilego Ario cum sua impietate damnato, mansuras usque in finem mundi leges ecclesiasticorum canonum considerunt, et apud nos in toto orbe terrarum in suis constitutionibus vivunt, et si quid usquam aliter quam illi statuere præsumitur, sine cunctatione cassatur. »

X. Quod sanctum et mysticum concilium præcipit (*can. v*): « De his qui communione privantur, ut sive ex clero, sive ex laico ordine, ab episcopis per unamquamque provinciam sententia regularis obtineat, ut hi qui abiciuntur, ab aliis non recipiantur: requiratur autem, ne pusillanimitate, aut contentione, vel alio quolibet episcopi vitio, videatur a congregatione seclusus. Ut hoc ergo decentius inquiratur, bene placuit annis singulis per unamquamque provinciam his in anno concilia celebrari ut communiter, omnibus simul episcopis congregatis provinciæ, discutiantur, hujusmodi quæstiones et sic, qui suo peccaverunt evidenter episcopo, excommunicati rationabiliter ab omnibus æstimentur usquequo vel in communi, vel episcopo placeat humaniore pro talibus ferre sententiam. »

XI. Cujus sanctæ synodi constitutionem Sardicenses canones non convellunt (*cap. 7*), qui cum pontificis Romani vicario vel arbitrio causam episcopi in provinciali synodo judicati, etiam episcoporum

A arbitrio vel judicio qui eum judicaverunt, cum episcopis qui in finitima et propinqua provincia sunt præcipiunt terminari, quatenus sive in manenda, sive in immutanda sententia, juxta Nicænos canones commune sit placitum. De quibus sacris canonibus Nicænis Africanum concilium ad sanctum Cælestinum papam scribens (*cap. 105*), « Prudentissime, inquit, justissimeque providerunt, quæcunque negotia in suis locis ubi orta sunt finienda, nec unicuique provinciæ gratiam Spiritus sancti defuturam, quæ æquitas a Christi sacerdotibus et prudenter videatur, et constantissime teneatur. »

XII. Beatus quoque Innocentius ad Victricium Rothomagensem episcopum duo capitula magni concilii Nicæni: De his videlicet qui communione privantur ex clero; et aliud: Ut per singulas provincias suis privilegia serventur Ecclesiis; et capitulum Sardicensis concilii de episcoporum ad apostolicam sedem appellatione, uno capitulo sagaciter atque patenter explicat, dicens (*epist. Innocent.*): « Si quæ autem causæ vel contentiones inter clericos tam superioris gradus, quam etiam inferioris, fuerint exortæ, placuit ut secundum synodum Nicænam congregatis omnibus ejusdem provinciæ episcopis, judicium terminetur; nec alicui liceat, sine præjudicio tamen Romanæ Ecclesiæ, cui in omnibus causis debet reverentia custodiri, relictis his sacerdotibus qui in eadem provincia Dei Ecclesiam nutu divino gubernant, ad alias convolare provincias. Quod si quis forte præsumperit, et ab officio cleri submotus, et injuriarum reus ab omnibus judicetur. Si autem majores causæ in medio fuerint devolutæ, ad sedem apostolicam sicut synodus statuit, et beata consuetudo exigit post judicium episcopale referantur. » In eo enim quod dicit, ut secundum synodum Nicænam, congregatis ejusdem provinciæ episcopis de exortis causis judicium terminetur, capitulum Nicæni concilii de excommunicatis explanat: In eo quod ad alias quemcunque de ecclesiastico ordine prohibet convolare provincias, aliud capitulum Nicæni concilii explicat, quod jubet, ut per singulas provincias suis privilegia serventur Ecclesiis, sine præjudicio tamen Romanæ Ecclesiæ: ut si majores causæ, quarum una est de episcopi judicati appellatione, in medio fuerint devolutæ, ad sedem apostolicam, sicut synodus, quin Sardicensis, statuit, et vetus consuetudo exigit, post judicium episcopale referantur. Scilicet, ut aut juxta præmissum septimum Sardicensis concilii capitulum, appellantis episcopi causa in provincia, in qua fuit exorta, diffiniatur, aut judicium episcoporum provinciæ, secundum decreta Bonifacii, apostolicæ sedis auctoritate confirmetur, et sicut Leo scripsit, ejusdem sedis sententia roboretur. Quia vero sanctus Innocentius non Nicænam, sed Sardicensem synodum de appellatione episcopi ad sedem apostolicam in auctoritatem traxit, qui utrasque synodos legit, aperte intelligit.

XII. Sacræ leges ac regulæ, presbyteros et cæ-

teros inferioris gradus clericos, non alibi quam apud suos episcopos præcepiunt accusari: a quibus, sicut Africæ provinciæ canones decernunt, eorum causa debet audiri, et sicut sanctus Gregorius constituit, cum presbyteris vel clericis suæ parochiæ judicari. Qui forte si de iudiciis episcoporum suorum questi fuerint, ad quos eis sit provocandum, de appellatione presbyterorum ac diaconorum, ad vicinos et finitimos episcopos, papa Zosimus in comonitorio per Faustinum episcopum et Philippum ac Asellum presbyteros directo Carthaginensi concilio, in concilio Sardicensi capitulo decimo septimo continetur hoc modo, Osius episcopus dixit (*cap. 17*): « Quod me adhuc movet, reticere non debeo. Si episcopus quis forte iracundus, quod esse non debet, cito et aspere commovetur adversus presbyterum sive diaconum suum, et exterminare eum de Ecclesia voluerit, providendum est, ne innocens damnetur, aut perdat communionem, et ideo habeat potestatem is qui abjectus est, ut episcopus finitimos interpellat, et causa ejus audiatur, et diligentius tractetur: quia non oportet negari ei audientiam roganti. Et ille episcopus, qui juste aut injuste eum abjecit, patienter accipiat ut negotium discutiatur, ut vel probetur sententia ejus a plurimis, vel emendetur. Tamen priusquam omnia diligenter et fideliter examinentur, eum qui fuerat a communione separatus, ante cognitionem nullus debet præsumere ut eum communioni societ. Hi vero, qui conveniunt ad audiendum, si viderint clericorum esse factum et superbiam, quia non decet ut episcopus injuriam vel contumeliam patiatur, severioribus eos verbis castigent, ut obediant honesta præcipienti episcopo; quia sicut ille clericis sincerum exhibere debet amorem charitatis, ita quoque vicissim ministri infucata debent episcopo suo exhibere obsequia. »

XIV. Nec hoc capitulum Sardicensis concilii dissentire videtur a capitulo Nicæni concilii, quo expressius et apertius, quam Sardicense concilium, decrevit de his qui communionem privantur a proprio episcopo, sicut supra posuimus, et de privilegiis singulorum metropolitanorum dicens (*can. 6*): « Antiqua consuetudo servetur per Ægyptum, Libyam et Pentapolim: ita ut Alexandria episcopus horum omnium habeat potestatem, quia et urbis Romæ episcopo parilis mos est. Similiter autem et apud Antiochiam, cæterasque provincias, suis privilegiis serventur Ecclesiis. » Quod exponit Antiochena synodus dicens (*can. 9*): « Per singulas regiones convenit episcopos nosse, metropolitanum episcopum sollicitudinem totius provinciæ gerere. Propter quod ad metropolim omnes undique, qui negotia videntur habere, concurrant. » Et Constantinopolitanum concilium dicens (*can. 1*): « Ut illa quæ sunt per unamquamque provinciam, ipsius provinciæ synodus dispenset, sicut Nicæno constat decretum esse concilio. »

XV. Et hinc Innocentius ad Alexandrum Antio-

chenum episcopum (*epist. 30*): Revolventes, inquit, auctoritatem Nicæne synodi, quæ una omnium per orbem terrarum mentem explicat sacerdotum, quæ censuit de Antiochena Ecclesia cunctis fidelibus, ne dixerim sacerdotibus, esse necessarium custodire, qua super diocesim suam prædictam Ecclesiam, non super aliam aliquam provinciam, recognoscimus constitutam. » Et Bonifacius papa ad Hilarium Narbonensem (*epist. 111*): « Nulli, inquit, videtur incognita synodi Nicæne constitutio, quæ ita præcipit, ut eadem proprie verba ponamus, per unamquamque provinciam jus metropolitanis singulis habere debere, nec cuiquam duas esse subjectas. Quod illi, quia aliter credendum non est, servandum Spiritu sancto suggerente sibimet censuerunt. Quod idcirco dicimus, ut advertat charitas tua, adeo nos canonum præcepta servare, ut ita constitutio quoque nostra diffiniat, quatenus metropolitani sui unaqueque provincia in omnibus rebus ordinationem semper expectet. » Et his consonanter Cælestinus (*ep. 11, per Viennen. et Narbon.*): « Juxta decreta, inquit, canonum, unaqueque provincia suo metropolitanis contenta sit, ut decessoris nostri data ad Narbonensem episcopum continentur. Nec usurpationi locus alicui sacerdoti in alterius concedatur injuriam. Sit concessis sibi contentus unusquisque limitibus, alter in alterius provincia nihil præsumat. » Et Leo ad Maximum episcopum (*epist. 66*): « Etsi, inquit, diversa nonnunquam sunt merita præsulum, jura tamen permanent sedium. »

XVI. Et Antiochenum concilium, a magna synodo Chalcedonensi actione duodecima favorabiliter colaudatum, sequens decreta Nicæni concilii (*can. 6*): « Si quis, inquit, a proprio episcopo communionem privatus est, non ante suscipiatur ab aliis, quam suo reconcilietur episcopo aut certe ad synodum quæ congregatur occurrens pro se satisfaciatur, et persuadens concilio sententiam suscipiat alteram. Hæc autem diffinitio maneat circa laicos, et presbyteros et diaconos, omnesque qui sub regula esse monstrantur. » Et loquens de conciliis capitulo vigesimo dicit: « In ipsis conciliis adsint presbyteri, et diaconi, et omnes, qui se læsos existimant, et synodi experiantur examen. Nullis vero liceat apud se celebrare concilia, præter eos quibus metropolitana jura videntur esse commissa. » Et capitulo decimo sexto: « Perfectum vero concilium illud est, ubi interfuerit metropolitanus antistes. »

XVII. Appellantes autem presbyteri, vel diaconi, a quibus et qualiter sint iudicandi, sacri Carthaginenses canones capitulo vigesimo et capitulo vigesimo octavo evidenter ostendunt. Ubi autem inter accusatores et accusatos causa debeat agitari, Carthaginense concilium statuit, dicens (*can. 30*): « Ut accusatus, vel accusator, in eo loco, unde est ille qui accusatur, locum sibi eligat proximum, quo non sit difficile testes producere, ubi causa finiatur. » Et hinc leges dicunt: « Criminum discussio ibi agitanda est, ubi crimen admissum est. Nam alibi criminum

reus prohibetur audiri. » Et item : « Si quis adversarium, aut repetitione, aut criminis objectione pulsaverit, provincia, in qua consistit ille qui pulsatur, suas exerat actiones, nec aestimet adversarium suum alibi aut longius pertrahendum. » Illi vero qui pulsatus fuerit, si iudicem suspectum habuerit, liceat appellare, scilicet ecclesiasticis ad finitimos episcopos, ut Sardicenses et Carthaginenses canones, ut præmissimus, decreverunt, vel ad provincialia concilia, sicut sacri Nicæni et Antiocheni canones constituerunt, et sicut Africanum concilium in epistola ad Coelestinum papam ostendit (*cap. 103*) : « Ubi cuique, inquit, concessum est, si iudicio offensus fuerit cognitorum, ad concilium suæ provinciæ, vel etiam universale provocare. Nisi forte quisquam est, qui credat unicuique posse Deum nostrum

XVIII. A iudicibus autem, sive quos juxta Africanos canones primates dederint, sive quos ipsi vicinis ex concensu delegarint, causa finienda regulariter provocari non potest. Et sanctus Gregorius in epistola ad Gallicanos episcopos (*lib. xi, epist. 110*) : « Nec hoc, inquit, in hac sollicitudinis parte relinquitur, quod de habendis per parochias conciliis Patrum providentia utilitatis causa sancitum est. Unde ne qua inter fratres dissensio, ne qua inter præpositos et subjectos sint fomenta discordiæ, in unum sacerdotes convenire necesse est, ut de incidentibus causis disceptatio, et sit salubris de ecclesiastica observatione collatio; quatenus dum per hoc et præterita corriguntur, et regulam futuram suscipiunt, omnipotens ubique Dominus fratrum concordia collaudetur : cujus vobis adesse præsentiam, si hæc observabitis, scitote, quia scriptum est : *Ubi fuerint congregati duo vel tres in nomine meo, ibi sum in medio eorum* (*Matth. xviii*). Si ergo adesse dignatur ubi duo vel tres fuerint, quanto minus non deerit, ubi plures convenerint sacerdotes? Et quidem, quia de adhibendo bis in anno concilio Patrum sit regulis statutum, non latet; sed ne forte aliqua impleri hoc necessitas non permittat, semel tamen sine excusatione aliqua decernimus congregari, ut expectatione concilii nihil pravum, nihil præsumatur illicitum. Nam plerumque, etsi non amore justitiæ, metu tamen examinis, abstinetur ab hoc quod omnium notum est posse displicere iudicio. »

XIX. Hæc itaque Transalpinis Ecclesiis, earumque rectoribus, a sede apostolica, de appellatione episcoporum ad hanc sedem apostolicam, et de presbyterorum ac diaconorum appellatione, si de iudicii episcoporum suorum questi fuerint, ad comprovinciales synodos, et dijudicatione regulari eorum in

Alisdem synodis, ante longissimæ ætatis annos usque ad nostra tempora servata, et a decessoribus ac prædecessoribus eorum secuta et exsecuta fuerunt. Quæ si etiam illis servata, et ab eis secuta et exsecuta non fuerint, nihil prodest eos secundum sacros canones et decreta sedis Romanæ pontificum, pro accusatis presbyteris de manifestis criminibus comprovinciales episcoporum synodos frequentare, sed faciet licenter quisque presbyterorum quodlibet, unde si fuerit redargutus, veniat Romam.

XX. Et quia pro singulis presbyteris episcopi Transalpini regulariter iudicatis missos dirigere, et actionum documenta scribere non valent, nec testium necessarias personas, vel propter sexus, vel propter senectutis infirmitatem, vel pro multis aliis impedimentis, huc producere, fidecialiter poterit mentiens quique innocentiam suam asserere, cum non erit qui mendacia ejus possit refellere. Unde, sicut præmissimus, legum et canonum conditores, prudentissime justissimeque viderunt, quæcunque negotia in suis locis, ubi orta sunt, finienda, et per expressa regularum judicia discretissime iudicanda, et post iudicium conservanda. Maxime de subintroductione contra regulas mulierum : pro qua ab episcopis Transalpinis presbyteri regulariter iudicati ad hanc sanctam Romanam sedem insciis suis episcopis veniunt, et eis epistolas eorum refragantes judicia deferunt, eosque vel comministros illorum ad hanc sedem ad conquerendum contra eos venire præcipiunt, quod nullis antiquorum legibus vel patrum regulis decretum fuisse legimus.

XXI. Quas epistolas sacris regulis obvias, ut in præfatione hujus opusculi commemoravimus, nec auctoritate apostolica fuisse missas, sed compilatas quorumcunque vafricia credimus. Non enim sibi ipsi sedes apostolica potest esse contraria vel diversa. De qua Gelasius papa dicit (*epist. 11 ad Dardan.*) : « Confidimus, quod nullus jam veraciter Christianus ignoret, uniuscujusque synodi constitutum, quod universalis Ecclesiæ probavit assensus, nullam magis exsequi sedem præ cæteris oportere, quam primam, quæ et unamquamque synodum, et sua auctoritate confirmat, et continuata moderatione custodit, pro suo scilicet principatu, quem beatus Petrus apostolus Domini voce perceptum, Ecclesia nihilominus subsequente, et tenuit semper, et retinet. » Et item (*epist. 1*) : « Cuique nobis contra salutarium reverentiam regularum cupiamus temere nil licere, et cum sedes apostolica superior his omnibus, favente Domino, quæ paternis canonibus sunt præfixa pio devotoque studeat tenere proposito, satis indignum est, quemquam vel pontificum vel ordinum subsequentium hanc observantiam refutare, quam beati Petri sedem et sequi videat, et docere, satisque conveniens sit, ut totum corpus Ecclesiæ in hac sibimet observatione concordet, quam illic vigere conspiciat, ubi Dominus Ecclesiæ totius posuit principatum. » Potest enim fieri ut illi qui in vicinis parochiis sunt hujus sanctæ Romanæ Ecclesiæ, qui-

que juxta sacras regulas, ad manus impositionem, et ad synodos huc convenire solent, ipsi pro reclamacione contra presbyterorum suorum ad præfatam examinationem convenient, sicut sacri canones ac leges præcipiunt, ut ad primatem uniuscujusque provinciæ, qui negotia videntur habere concurrant, vel ad synodum, qui se læsos existimant, quo non sit difficile testes producere, invitentur. Transalpinis autem, et aliis, qui in similiter longinquis regionibus commorantur, apostolica sedes, et sacrorum canonum promulgatores, loquente in eis sancto Spiritu, quæ sunt unicuique provinciæ possibilis et auctoritati convenientia, atque paci Ecclesiæ congruentia, tenenda et exsequenda discretissime præfixerunt.

XXII. Legimus etiam, quamvis rarissime, præceptum a sede apostolica, quosdam de longinquiorebus parochiis specialis dioceseos Romani pontificis, ad cujus sollicitudinem universalis Ecclesia pertinet, propter contumaces contentiones aliquos invitatos fuisse : sed de Transalpinis regionibus, quibus decreta privilegia servari debent, tale quid pro presbyterorum et diaconorum appellatione a sede apostolica præceptum fuisse non legimus. De ecclesiasticis nihilominus privilegiis in epistolis beati Gregorii legimus ad Dominicum Carthaginensem episcopum (*lib. XI, epist. 39*) : « Vestra fraternitas, inquit, hoc postposita dubitatione retineat, quia sicut nostra defendimus, ita singulis quibusque Ecclesiis sua jura servamus. Nec cuiilibet, favente Christi gratia, ultra quam meretur impertior, nec ulli hoc quod sui juris est ambitu stimulante derogabo ; sed fratres meos honorare per omnia cupio, sicque studeo eos in honorem subvehi, dummodo non sit, quod alteri jure ab altero possit opponi. » Et alibi idem hinc dicit (*lib. XI, epist. 37*) : « Quod vero dicitis, vestris temporibus debere servari quæ a meis quoque decessoribus tradita atque custodita sunt, absit hoc a me, ut statuta majorum consacerdotibus meis in qualibet Ecclesia infringam, quia mihi injuriam facio, si fratrum meorum jura perturbo. »

XXIII. Tandem hinc, præter antiquas regularum ac legum constitutiones, in promptu habemus synodalia capitula apostolicorum, Eugenii, anno imperii decimo tertio domni et genitoris nostri Ludovici, et anno decimo imperii Lotharii fratris nostri, mense Novembrio, atque Leonis IV, anno Lotharii tricesimo septimo, et Ludovici nepotis nostri anno quinto, mense Decembrio decreta, quibus præcipiunt, « ut si quispiam sacerdotum, id est, episcopus, presbyter, diaconus, vel etiam subdiaconus, de quacunque femina crimine fornicationis suspectus, post primam, secundamque et tertiam commonitionem (metropolitani, vel alterius episcopi, aut ejus cui subjacere videtur) inveniatur, fabulari cum ea, vel aliquo modo conversari canonice judicetur. » Quapropter unusquisque episcopus in tali re studiosè ac diligenter curam habere debet, ne Ecclesia Christi a propriis possit sordidari ministris : quia cum propriam uxorem

habere non permittitur, maxime ab omni femina sit abstinendus. Et item : « Sacerdos etenim, aut quivis alius in ordinem ecclesiasticum proventus, si in eo scelere inveniat, quo abjiciendus existat, depositus providentia episcopi bene proviso loco constituatur, ubi peccata lugeat, et ulterius non committat. » Sic et magnus Leo papa, longe ante hanc constitutionem, auctoritate sacræ Scripturæ ad Hilarium Narbonensem decrevit (*epist. 95, ad Rusticum Narbon.*), « ut presbyteri vel diaconi lapsi ad promerendam misericordiam Dei, privatam expetant secessionem, ubi illis satisfactio, si fuerit digna, sit etiam fructuosa. »

XXIV. Cum hæc ita se habeant, non est perfunctorie attendendum vestræ pontificali auctoritati, et nostræ imperiali potestati, quid prædecessores nostri de servandis sacris legibus et sanctis regulis decernentes constituerunt, ex quorum pluralitate, pauca numero, non pauca pondere hic censuimus ponere. De legibus namque Valentinianus, Theodosius et Arcadius decreverunt dicentes (*I. II Cod. Theod., De Constitut. principum*) : « Perpensas serenitatis nostræ longa deliberatione constitutiones, nec ignorare quemquam, nec dissimulare permittimus. Interpretatio. Leges nescire nulli liceat, aut quæ sunt statuta contemnere. » Et sanctus Celestinus paria de sacris canonibus dicit (*epist. 3*) : « Nulli, inquit, sacerdoti suos liceat canones ignorare, nec quidquam facere, quod Patrum possit regulis obviare. Quæ enim a nobis res digna servabitur, si decretalium norma constitutorum pro aliquorum libitu licentia populis permessa frangatur ? » Quia, ut Hilarius papa dicit (*epist. 11, ad Leontium*), « Non minus in sanctarum traditionum delinquitur sanctiones, quam in injuriam ipsius Domini proslitit, cum expectatio fructus nostri ministerii, non in latitudine regionum, sed in acquisitione ponatur animarum. » Et item, de legibus præfati Augusti (*I. III Cod. Th., eod.*) : « Omnia constituta non præteritis calumniam faciunt, sed futuris regulam imponunt. Interpretatio. Omnes leges non ea quæ anteriori tempore facta sunt damnant, sed in futurum observanda constituunt. »

XXV. Et hinc Symmachus papa (*epist. 1, ad Æonium*) : « Dum ad Trinitatis instar, cujus una est atque individua potestas, unum sit per diversos antistites sacerdotium, quemadmodum priorum statuta a sequentibus convenit violari ? Huc accedit, quod hæc si eveniat sententiarum varietas, ad ipsam sacrosanctam catholicam religionem credimus pertinere, cujus omnis potestas infringitur, nisi universa, quæ a Domini sacerdotibus semel regulariter statuuntur, perpetua sint. Quod alias contingere poterit, si successor decessoris actibus non tribuerit firmitatem, et reborando quæ gesta sunt, faciat rata esse quæ gesserit. Quanta enim vicariis beatissimi Petri apostoli judicabitur esse reverentia, si quæ in sacerdotio præcipiunt, ea hisdem transeuntibus dissolvantur ? » Hæc igitur servemus nostris temporibus,

tanto gratius, quanto et Ecclesie et imperio erit A animas, quæ non moriuntur, et vivificabant animas quæ non vivunt (*Ezech. xiii*). Non morientem quippe gesta sunt, rata esse faciamus quæ legaliter, ac regulariter gesserimus.

XXVI. Suggestendum etiam vestræ summæ auctoritati necessarium credimus, ut de quorundam episcoporum coercenda inconsideratione, alios decreto, generali instrumentis, cautos efficiatis : ut quorum debent esse matura et perpensa judicia, non sint præcipites in proferendis sententiis, nec facile ac indiscrete, neque aliter nisi juxta sanctarum Scripturarum tramitem, traditionemque majorum, et pro evidentibus culpis, quemcunque a communione corporis et sanguinis Domini Dei nostri Jesu Christi, in quibus post unicum baptismum præcipue humanæ salutis reconciliatio et summa consistit, pro suis injuriis, vel animi sui motibus ac iracundia separant. Quoniam « ira sacerdotis, ut sanctus dicit Gregorius (*hom. 17, in Evang.*), nequaquam debet esse præceps et perturbata, sed magis ex consilii gravitate metuenda ; nec debent temere indiscussa judicare, nec passim dicta sine probatione credere, sed auctoris nostri facta pensare, cui cum omnia nuda et aperta sint, mala tamen Sodomæ noluit ante judicare, sicut sacra docet historia, quam probare, nos instruens me mala hominum ante præsumamus credere quam probare. »

XXVII. Sequantur autem in proferenda judiciali sententia sanctorum Romanæ sedis pontificum documenta, Leonis, atque Gregorii : « Beatissimo Petro, inquit Leo (*serm. 3, in Anniv. assumpt.*), a Christo dicitur : Tibi dabo claves regni cælorum, et quæcunque ligaveris super terram, erunt ligata et in cælis ; et quæcunque solveris super terram, erunt soluta et in cælis. Transivit quidem etiam in alios apostolos jus istius potestatis, et ad omnes Ecclesie principes decreti hujus constitutio commea vit : sed non frustra uni commendatur quod omnibus intimitur. Petro enim ideo hoc singulariter creditur, quia cunctis Ecclesie rectoribus Petri forma præponitur. Manet ergo Petri privilegium, ubicunque fertur ex ipsius æquitate judicium. Nec nimia est, vel serveritas, vel remissio, ubi nihil ligatum, nihil est solutum, nisi quod beatus Petrus, aut ligarit, aut solverit. » Hinc certa consideratione datur intelligi quia in judicando non est Petri privilegium, ubi non ex ipsius fertur æquitate judicium. Est igitur præjudicium, non judicium, quia non jure dictum, id est non justitiæ lege prolatum. Et S. Gregorius (*hom. 26 in Ezech.*) : « Sæpe agitur, ut qui nescit tenere moderamina vitæ suæ, judex vitæ fiat alienæ, ut vel damnet immeritos, vel alios ipse ligatus solvat, cum suæ voluntatis motus, non autem causarum merita sequitur. Unde fit ut ipse hac ligandi ac solvendi potestate se privet, qui hanc pro suis voluntatibus, et non pro subjectorum moribus exercet. Judicare enim digne de subditis nequeunt, qui in subjectorum causis sua vel odia vel gratiam sequuntur. Unde recte per prophetam dicitur : Mortificabant

animas, quæ non moriuntur, et vivificabant animas quæ non vivunt (*Ezech. xiii*). Non morientem quippe mortificat, qui justum damnat, et non victurum vivificare nititur, qui reum supplicio absolvere conatur. Causæ ergo pensandæ sunt, et tunc ligandi atque solvendi potestas exercenda. »

XXVIII. Qui beatissimus doctor Spiritu sancto repletus passim in dictis suis ostendit, quoniam episcopus, qui in ligando et solvendo interim arbitrium non sequitur judicis, ipse ligandi et solvendi potestate, quin et regno Dei se privat, si alligationis maledictum non judicio justitiæ, sed livore vindictæ depromit, Paulo attestante, qui dicit : *Neque maledici regnum Dei possidebunt* (*I Cor. vi*). Quia vero sacra Scriptura duobus modis maledictum memorat, aliud videlicet quod approbat, et aliud quod damnat, aliter enim maledictum profertur judicio justitiæ, aliter livore vindictæ, sancti viri, cum in excommunicationis alligatione maledictionis sententiam proferunt, non ad hanc ex voto lividæ ultionis, sed ex justitiæ examine erumpunt. Intus enim subtile Dei judicium aspiciunt, et mala foras exsurgunt, quia maledicto alligandæ excommunicationis ferire debeant, cognoscunt, et eo in alligationis ac excommunicationis maledicto non peccant, quod ab interno judicio non discordant. Contra excommunicationis maledictum, livore vindictæ depromptum, voce Pauli prædicantis admonemur, qui ait : *Benedicite, et nolite maledicere* (*hom. xii 14*), *quia neque maledici regnum Dei possidebunt* (*I Cor. vi, 10*). Nam si a quolibet non fortasse ex malitia, sed ex lingua incuria, maledictionis verbum jaculatur in proximum, apud districtum judicem, a quo de otioso verbo ratio in die judicii poscitur, damnabilis est ille sermo, qui malitia non caret, et pœnalis est ille, qui ab utilitatis bonitate vacat, pensandum est magnopere quanta animadversione plectenda est ab episcopo, cujus sermo semper sale, id est sapientia, conditus esse præcipitur (*Colos. iv, 6*), jaculata in proximum injustæ alligationis excommunicatio, quæ potius vocanda est maledictio.

XXIX. Sequamur itaque Ecclesie sanctæ rectores, quorum dorsa mentium incudes sunt hominum peccatorum, dicente Psalmista : *Supra dorsum meum fabricaverunt peccatores* (*Psal. cxxxviii, 3*), in separatione a communione, et reconciliatione sacramentorum Christi, sacrum Nicæanum concilium, et Africæ provinciæ canones, Siricii quoque, et Innocentii, atque Leonis decreta, et epistolam ipsius Leonis ad Theodorum Foro-Juliensem episcopum (*epist. 59*). Sed et quem de ecclesiastico ordine, clarescentibus gravioribus culpis, gradu privaverint, communione corporis et sanguinis Christi, ut canones præfixerint, non privent. Hæc est enim, Scriptura dicente, *directa via, ita ut recti ambulent in ea, et nec stulti errent per eam* (*Isa. xxxv, 8*). De injuste siquidem excommunicantibus, vel excommunicatis, quid etiam lex Justiniana decernat, vestram sapientiam latere non potest.

EPISTOLA XXXIII.

AD EPISCOPOS RHEMENSIS DIOECESIS ET OMNES ECCLESIE RECTORES ET FIDELIS.

Adversus Odacrum, cujus excommunicationem notificat.

(Ex Act. prov. Eccl. Rhem.)

HINC MARUS episcopus ac plebis Dei famulus, cum collegis nostris venerabilibus dioeceseos Rhemorum episcopis, omnibus Ecclesie sanctæ rectoribus atque fidelibus, ad quorum notitiam hæc sequentia poterunt pervenire: ut scientes a quibus, et qualiter, ac quotiens, et pro quibus excessibus Odacrus invasor Ecclesie Belvacensis, suffraganeæ nostræ metropolitæ, sit excommunicatus, ab ejus perniciose communionis se caveant, ne, ut scriptum est, picem tangentes inquinentur ab ea, et ovis morbida, nisi quantocius a sano grege fuerit separata, multos suo morbo inficiat.

I. Sicut longe ante prædictum est a Deo per Psalmistam: *Convallē tabernaculorum dimetiar* (Psal. CVII.) hoc est, ut catholici doctores produnt, universum orbem terrarum, qui vallis tabernaculorum pro habitaculis corporum dictus est, etiam priusquam Christus mundo per incarnationem illuxerit, dimensum fuisse legimus, quam dimensionem habemus. Et post, ut item ipse præcepit, *Distribuite*, inquit, *domos ejus* (Psal. XLVII), videlicet universalis Ecclesie toto terrarum orbe diffusæ, per custodiarum parochias distinctam cognoscimus, quam etiam distinctionem habemus. Unde sacri canones, spiritu Dei conditi, et totius mundi reverentia consecrati, decernunt dicentes (*conc. Antioch.*, an 344, *can. 9*): « Per singulas regiones episcopos convenit nosse metropolitanum episcopum sollicitudinem totius provincie gerere, » et reliqua quæ ibidem sequuntur. Et sanctus Bonifacius papa, explanans sextum capitulum mysticæ Nicæne synodi, per quam sanctus Spiritus est locutus ait: « Metropolitanus sui unaqueque provincia in omnibus rebus ordinationem semper expectet. »

II. Propter nos autem homines, et propter nostram salutem, mediator Dei et hominum homo Christus Jesus ad homines dixit: *Non sum missus nisi ad oves quæ perierunt domus Israel* (Matth., 15); et item dicit: *Et alias oves habeo, quæ non sunt ex hoc ovili et illas oportet me adducere, et vocem meam audivent, et fiet unum ovile, et unus pastor* (Joan., x). Sanctam designans Ecclesiam ex circumcisione ac præputio sub se pastore vero, qui posuit animam suam pro ovibus suis, ipso angulari lapide uniendam. De cujus sanctæ Ecclesie ovili idem dicit: *Qui non intrat per ostium in ovile ovium, sed ascendit aliunde, hic fur est et latro* (Joan., 10). Qualiter autem et quo ordine quisque ad hujus sancti ovilis custodiam, id est ad regimen sanctæ ecclesie accedere ac provehi debeat, sacri canones patentur ostendunt. Videlicet ut operam dante interventore constituto, episcopo pastore viduatæ ecclesie, et a clero et a plebe, secundum apostolicam et canonicam formam, eligatur

A futurus episcopus, qui sacris canonibus non valeat obviare, et cum decreto singulorum manibus roborato ad metropolitanum et cæteros provinciales episcopos, ipso interventore mediante, perducatur ad ordinationem, et sic communi cunctorum decreto rationabili, et secundum regulam ecclesiasticam comprobato, secundum quartum et sextum capitulum mysticæ synodi Nicæne, et juxta vicesimum quartum capitulum Antiocheni concilia ordinetur, sicut et sanctus Gregorius multoties in regesto suo decernit. Quos sacros canones Odacrus, invasor per exteras potestates viduatæ Belvacensis ecclesie, contemns atque conculcans pro nihilo duxit, et jam plus quam annum usurpans, sua tyrannica devastatione captivatam, contra magnum Chalcedonense concilium sexcentorum triginta et eo amplius episcoporum, quod præcipit intra tres menses ordinationes episcoporum celebrari (*conc. Chalced.*, *can. 25*). Non reverens divinum iudicium, nec pensans quantum periculum sit, quia in proxime præcedenti cænæ Dominicæ die, multi ab Odone episcopo pro publicis criminibus in publica pœnitentia constituti, quod nisi ab episcopo fieri licet, sine reconciliatione et communione sacramentes remanserunt, quanti sine canonico baptismo et episcopali consignatione relictæ fuerunt, quantis rusticanarum parochiarum in tanto tempore presbyteris defunctis, ipsarum parochiarum parvuli sine baptismo perire potuerunt, quanti viri, quantæ feminae, sine reconciliatione et sacri olei unctione atque sancta communione, et sine eorum animarum per orationes solemnes commendatione de isto sæculo exierunt. Contra cujus diutinam pervasionem, ultra terminum constitutum a præfato magno concilio, sancti Dei, per quos sanctus Spiritus ea quæ ibi sunt definita decrevit, et jam cum Christo in cælo regnant, terribiliter clamant, eos qui ausi fuerint post definitionem magnæ et universalis hujus synodi quidquam ex his quæ sunt prohibiti perpetrare, decrevit sancta synodus a proprio hujusmodi gradu recedere. Et sanctus Gregorius ad Gallicanos episcopos scribens de hujusmodi impostore (*lib. VII, epist. 110*): « Dum, inquit, non officium sed nomen attendit, sacerdos non esse, sed dici tantummodo inaniter concupiscit. Quod si sic licet, quid per hoc aliud agitur, nisi ut nulla de actu probatio, nulla sollicitudo de moribus, nulla sit devota discussio? Ex qua re, si recte libraminis examinatione pensetur, dum improbe ad inanem gloriam locum festinat utilitatis arripere, eo ipso magis quod honorem quærit indignus est. Sicut autem is qui invitatus renuit, quæsitus refugit, sacris est altaribus admovendus, sic qui ultro ambit, vel importune se ingerit, est procul repellendus. Nam qui sic nititur ad altiora conscendere, quid agit nisi ut crescendo decrescat, et ascendendo exterius interius in profundum descendat? »

II. Idem sanctum magnumque concilium decrevit (*conc. Chalced.*, *can. 25*): « Ut reditus viduatæ

ecclesiae penes oconomum ejusdem ecclesiae integre conserventur, » quos praedictus invasor Odacrus sine ulla divinae legis reverentia usurpare praesumpsit. Quapropter cum aliis hujusmodi praesumptoribus ab eodem sancto et magno concilio percullitur, ut qui ausi fuerint post diffinitionem magna et universalis hujus synodi quidquam ex his quae sunt prohibita perpetrare, decrevit sancta synodus a proprio hujusmodi gradu recedere.

IV. Odacrus, relicto ecclesiastico judicio et sacrorum canonum diffinitione, per saeculare potestatem invasor rerum et facultatum ecclesiasticarum Belvacensis Ecclesiae, quae secundum sacras regulas oblationes appellantur, quia Domino offeruntur, et vota sunt fidelium, ac pretia peccatorum, atque patrimonialia pauperum, ipse in se damnationis sententiam jaculavit, quia sicut sanctus Leo papa cum Romana synodo diffinivit (*epist.* 96): « Quicumque sub regula positi, relicto ecclesiastico judicio, ad patrocinia laicorum convolare, et judicia eorum experire, et praetermisso sacerdote suae ecclesiae, ad disceptationem saecularium venerint, sacriliminibus, id est ab ecclesiae aditu expelli, et a caelesti arceri altario, id est a corpore etsanguine Christi separari jubentur. » Et canones sacri diffiniunt (*conc. Antioch.*, can. 2): « Ut quilibet regulae subjectus Ecclesiae, praeter consilium et litteras episcoporum provinciae, et praecipue metropolitani, adierit imperatorem, hunc reprobari et abjici oportere, non solum a communione, verum et ab honore cujus particeps videtur existere. » Et sanctus Hilarus papa in decretis suis: « Non minus, inquit in sanctarum traditionum delinquitur sanctiones, quam in injuriam ipsius Domini prosilitur. » Schismaticus igitur, ab unitate Ecclesiae per sacrorum canonum contemptum, qui a sancto sunt Spiritu conditi et totius mundi reverentia censecrati, seipsam scindens, licet forte eodem cultu, eodem ritu credat ut catholici, in malo tamen suo per cupiditatem manet damnationis dissidium. Quantum autem sit malum dissidium schismatis, sanctus Augustinus in libro de Baptismo ex sacris demonstrat Scripturis hoc modo: « Non afferamus stateras dolosas, ubi appendamus quod volumus, et quomodo volumus, pro arbitrio nostro dicentes hoc grave, hoc leve est, sed afferamus divinam stateram de Scripturis sanctis tanquam de thesauris Dominicis, et in illa quid sit gravius appendamus, imo non appendamus, sed a Domino appensa recognoscamus. Tempore illo, quo Dominus priora delicta recentibus poenarum exemplis cavenda monstravit, et idolum fabricatum atque adoratum est, et propheticus liber ira regis auctoritatis incensus; et schisma tentatum, idololatria gladio punita est, exustio libri bellica caede et peregrina captivitate, schisma hiati terrae sepultis auctoribus vivis, et caeteris caelestibus igne consumptis, quis jam dubitaverit hoc esse sceleratius commissum, quod est gravius vindicatum? » Quae tria gravia commissa, et non levi punitione vindicanda, si diligenter sanctarum Scripturarum au-

toritate intendimus, in hac tyrannica Odacri pervasione vacantis ecclesiae invenimus. Apostolus namque dicit: *Avaritia, quae est idolorum servitus* (*Coloss.* III). Et beatus Gregorius loquens de tentatione Dominica in Evangelii homilia, et altera sententia praefata apostoli ostendit avaritiam esse non solum pecuniae, sed etiam altitudinis. Et Odacrus invasor vacantis ecclesiae, quia secundum sacrorum canonum tramitem, ad proventum episcopalis ordinis, ut res et facultates ipsius ecclesiae possideret, Deo iudice, pervenire non meruit, per saecularem potestatem prius res et facultatem ipsius ecclesiae vacantis obtinuit, ut saltu quoquo modo ad altitudinem episcopalis nominis perveniret, et sacerdos non esse, sed dici tantummodo inaniter concupivit. Non attendens, quia sic ab ipso Christo, summo pontifice, ac rege regum, sunt distincta potestatum officia, ut spiritalis actio a carnalibus distaret incurribus, et militantes Deo minime se negotiis saecularibus implicarent, ac vicissim non illi rebus divinis praesidere viderentur, qui essent negotiis saecularibus implicati. Et saeculares viri sacerdotum penderent iudicio, non sacerdotes ad suam deberent redigere voluntatem: et sacerdotes saecularium iudicia discuterent, non autem saeculares sacerdotum iudicia molestarent, sicut litterae divinitus inspiratae manifeste demonstrant, et Constantinus magnus imperator in Nicæno concilio se illorum iudiciis subdens ostendit. His igitur ita se habentibus, Odacrus per avaritiam et altitudinis, et possessionis, in pervasione vacantis ecclesiae idololatra esse ostenditur. Per Moysen de Domino dicitur: *In dextera ejus ignea lex* (*Deut.* xxxiii). « In sinistra, inquit Gregorius, reprobi qui et ad sinistram ponendi sunt, dextera autem Dei appellantur electi. In dextera ergo Dei lex ignea est, quia electi mandata caelestia nequaquam frigido corde audiunt, sed ad haec amoris intimi facibus inardescunt. » Et Apostolus dicit: *Deus noster ignis consumens est* (*Hebr.* xii); et Dominus: *Ignem veni mittere in terram, et quid volo nisi ut ardeat?* (*Luc.* xii). Ignem Dominus in terram mittit, cum afflata Spiritus sancti corda carnalium incendit. Spiritus igitur sanctus ignis est. Et sacri canones, sicut legitimus, sancto sunt Spiritu conditi, quos Odacrus facibus suae cupiditatis succensus, cum non per spiritalem ecclesiasticam traditionem, sed per carnalem saeculi potestatem pastorem vacantem ecclesiam usurpavit, Spiritum sanctum quo facti sunt conditi canones, reclamante Scriptura: *Spiritum nolite extinguere* (*I Thess.* v), quantum ex ipso est extinguere procuravit, et auctoritatem sacrorum canonum, ne vigeret in ecclesia sua molitione quasi incendere attentavit. Quia vero cum catholica unitate Ecclesiae, a quo propter suos excessus sicut ostendimus et in reliquum ostendemus, est excommunicatus, sacros canones totius mundi reverentia censecratos non sequitur, sicut ex superscriptis sacris sententiis manifestatur, schismaticus esse negari non potest, sicut sanctus Augusti-

nus in tractatu Evangelii secundum Joannem ostendit. « Habemus, inquit, sanctum Spiritum si amamus Ecclesiam, amamus autem, si in ejus compage et charitate consistimus. » Et in epistola concilii ad Donatistas : « Quisquis a catholica Ecclesia fuerit separatus, quantumlibet laudabiliter se vivere existimet, hoc solo scelere quod a Christi unitate disjunctus est, non habebit vitam, sed ira Dei manet super eum. Quisquis autem in hac Ecclesia bene vixerit, nihil ei præjudicant aliena peccata. Quia unusquisque in ea proprium onus portabit (Gal. v), sicut dicit Apostolus. Et quicumque in ea corpus Christi manducaverit indigne, judicium sibi manducat et bibit (I Cor. xi). Cum enim dicit judicium sibi manducat, satis ostendit quia non alteri judicium manducat, sed sibi, quia communio malorum non maculat aliquem participatione sacramentorum, sed consensu factorum. Nam si in factis malis non eis quisque consentiat, portat malus causam suam et personam suam, non præjudicat alteri, quem in consensione mali operis socium non habet criminis. » Qui vero ex quocunque statu, vel quocunque ordine schismati ejus favent, attendant et appendant diffinitionem apostolicæ sedis, quam decretis suis inseruit dicens, « Quisquis, inquit, assentit principi schismatici, schismaticus esse negari non poterit. Quod et si omnes sacerdotes et mundus assentiat, damnatio consentientes involvit, non prævaricationem consensus absolvit. Non enim crimen minuitur, sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit. » Isdem vero, ut jactant fautores sui, et applaudunt ei complices præsumptionis suæ, non proponens Deum ante conspectum suum, persuadet sibi tenere et usurpare res ac facultates a se invasæ ecclesiæ, etiamsi ad nomen episcopale pervenire nequiverit, assumentes in augmentum suæ damnationis exempla de quibusdam ecclesiis, quæ quorundam principum temporibus diu sine pastore vacarunt, sua opera quasi ex mortuis pellibus, ut beatus demonstrat Gregorius, credentes muniri, dum pravitatem suam ex alienis pravitatibus tuentur. Quia enim talia contigisse considerant, se hæc facere licenter putant, quod schisma esse contra traditionem ecclesiasticam et sacrorum canonum constitutionem patenter ostenditur. Quod sanctus Gregorius in Evangelii homilia redarguit dicens : « Sunt nonnulli, qui dum plus terrenam substantiam quam oves diligunt, merito nomen pastoris perdunt, quia non pro amore intimo oves Dominicas, sed ad temporales mercedes pascent. Mercenarius quippe est, qui locum pastoris tenet, sed lucra animarum non quærit, terrenis commodis inhiat, honore prælationis gaudet, temporalibus lucris pascitur, impensa sibi ab hominibus reverentia lætatur, et pro eo ipso quod in regimine laborat, hic quod quærit inveniat, et ab hæreditate gregis in posterum alienus existat. »

V. Cæterum quia cognata sunt schisma et hære-

sis, sicut etiam solemnes orationes universalis Ecclesiæ in die sancti parasceves aperte demonstrant, annuente veritate ostendere procurabimus, quia nec a damnatione simoniacæ hæreseos est immunis. Dominus dicit in Evangelio de largiendis sacris ordinibus : *Gratis accepistis, gratis date* (Matth. x). « Præsciebat, inquit beatus Gregorius, nonnullos hoc ipsum donum accepti Spiritus in usum negotiationis inflectere, et miraculorum signa ad avaritiæ obsequium declinare. Hinc est enim, quod Simon magus per impositionem manus edita miracula conspiciens, percipere donum Spiritus sancti pecunia voluit, scilicet ut deterius venderet quod male comparasset. Unde bene cum justum virum describeret propheta ait : *Qui excutit manus suas ab omni munere* (Is. xxxiii). Neque enim dicit, qui excutit manus suas a munere, sed adjunxit *ab omni*, quia aliud est munus ab obsequio, aliud munus a manu, aliud munus a lingua. Munus quippe ab obsequio est, subjectio indebita impensa, munus a manu pecunia, munus a lingua favor. Qui ergo sacros ordines tribuit, tunc ab omni munere manus excutit, quando in divinis rebus non solum nullam pecuniam, sed etiam humanam gratiam non requirit. » Unde Dominus vendentes et ementes ex templo eliminat, quia vel eos pro munere impositionem manuum tribuunt, vel eos qui donum Spiritus emere nituntur damnat. Vendentes quippe in templo sunt, qui hoc quod quibusdam jure competit ad pretium largiuntur. Ementes vero in templo sunt, qui dato patronis præmio emunt peccatum. Hinc est quod sacri canones simoniacam hæresim damnant, et eos sacerdotio privari præcipiunt, qui de largiendis ordinibus pretium quærunt. Et cum prima contra sanctam Ecclesiam simoniaca hæresis sit exorta, cur non videtur quia eum quem cum pretio ordinat provehendo agit ut hæreticus fiat? sacri namque canones et ordinantes et ordinatos pro munere, sed et interventores irrefragabiliter damnant, sicut lector in secundo capitulo magni Chalcedonensis concilii poterit invenire. Nos quidem non incerta relatione sæpe fatum Odacrum, non solum pecuniam, sed et res per non ignotas personas pro percipiendo episcopali ordine obtulisse comperimus. Et sanctus Augustinus in libro de utilitate credendi ait : « Hæreticus est qui alicujus temporalis commodi et maxime gloriæ principatusque gratia, falsas ac novas opiniones vel gignit vel sequitur. Ille autem qui hujusmodi homini credit, homo est imaginatione quadam pietatis illusus. »

VI. In privilegio Belvacensis Ecclesiæ, consensu domni Karoli nos episcopi quatuor provinciarum, Rhemorum scilicet, Rhotomagensium, Turonorum ac Senonum, majorum exempla secuti, canonica et episcopali auctoritate decernentes subscripsimus, « Ut nulla sæcularis potestas de rebus episcopii Belvacensis Ecclesiæ præsumat. Si quis vero regum, sacerdotum, et judicum, atque sæcularium personarum, hanc constitutionis paginam cognoscens

contra eam venire tentaverit, reum se divino iudicio existere de perpetrata iniquitate cognoscat. Et nisi vel ea quæ ab illo sunt male ablata restituerit, vel digna pœnitentia illicita acte deflexerit, a saceratissimo corpore ac sanguine Dei Domini Redemptoris nostri Jesu Christi alienus fiat atque in æterno examine districtæ ultioni subiaceat. » Et in hac constitutione nostra Domini nobis adfuisse præsentiam credimus, secundum promissionem suam qua dicit : *Ubi fuerunt congregati duo aut tres in nomine meo, ibi sum in medio eorum* (Matth. xviii). Si ergo adesse dignatur ubi fuerint duo vel tres congregati in nomine suo, quanto magis non deerit, ubi plures auctoritatem illius sequentes conveniunt vel consentiunt sacerdotes? Qui autem ex his qui jam ad Dominum perrexerunt in sedibus eorum successerunt, sicut sanctus Siricius in decretis suis demonstrat, in eorum labores curasque debent succedere, et quæ antecessores eorum statuerant regulariter, conamine summo defendere. Nam, inquit Symmachus papa, « Dum ad Trinitatis instar, cuius, una est atque individua potestas, unum sit per diversos antistites sacerdotium, quemadmodum priora statuta a sequentibus convenit violari? Huc accedit quod hæc si eveniat sententiarum varietas, ad ipsam sacrosanctam catholicam religionem credimus pertinere, cuius omnis potestas infringitur, nisi universa quæ a Domini sacerdotibus semel statuuntur perpetua sint, quod alias contingere poterit, si successor decessoris actibus non tribuerit firmitatem, et roborando quæ gesta sunt faciat rata esse quæ gesserit. Quanta enim vicarii beatissimi Petri apostoli iudicabitur esse reverentia, si quæ in sacerdotio præcipiunt, iisdem transeuntibus dissolvantur? »

VII. In privilegio domni papæ Nicolai, quod tempore Odonis episcopi ecclesiæ Belvacensi contulit, ad locum ita scriptum est : « Nullus itaque regum, nullus iudicum, nullus cuiuscunque sæcularis potentia dignitate fultus, in rebus vel villis vel agris vel mancipiis, vel quidquid ad monasteria ibidem descripta collatum fuerit, potestatem habeat vel dominandi vel accipiendi, vel auferendi, præter episcopum Belvacensis, qui per tempus fuerit eidem prælatus ecclesiæ : sed quidquid in auro vel in argento, vel in quacunquē suppellectili, vel in omni facultatis substantia ipsis est monasteriis hodie delegatum, vel futuris temporibus fuerit collatum, episcopi Belvacensis distributioni et ordinationi fiat subiectum, nec alterius potestatis jus vel dominatio super eis potestatem aliquam, nisi quantum divina auctoritas et lex et iustitia permittit, obtineat..... oculis ad ignem perpetuum vadat. Unde ipsi et suis complicitibus inculeanda est sententia beati Gregorii, quam in epistola Græcorum partibus contra quatuor male sententium capitula posuit, qui anathematizati cum aliis perniciosos persuadebant sibi anathematis vinculo non teneri. « Ipsi, inquit, sibi testes sunt quia Christiani non sunt, qui ligamenta sanctæ Ecclesiæ vanis se æstiment conatibus sol-

A vere, ac per hoc nec absolutionem sanctæ Ecclesiæ quam præstat fidelibus veram putant, si ligaturas ejus valere non æstiment. Contra quos diutius disputandum non est, quia per omnia despicendi et anathematizandi sunt, et unde se fallere veritatem credunt, inde in peccatis suis veraciter ligantur, eosque et ego, et omnes catholici episcopi, atque universa Ecclesia, anathematizamus, quia veritati contrariæ sentiunt et contraria loquuntur. »

VIII. Sacri denique Nicæni canones decernunt, de his qui communione privantur, seu ex clero seu ex laico ordine (*conc. Nic. an. 325, can. 5*) : « Ab episcopis per unamquamque provinciam sententia regularis obtineat, ut hi qui abijciuntur ab aliis non recipiantur. » De cujus magni concilii privilegio sanctus Hilarius et beatus Ambrosius mirabiliter scribunt ; sed et magnus Leo papa dicit (*epist. 106, ad Anatol., c. 2 et 4*) : « Tanto, inquit, divinitus privilegio Nicæna est synodus consecrata, ut sive per pauciores, sive per plures ecclesiastica iudicia celebrentur, omni penitus auctoritate sit vacuum, quidquid ab illorum fuerit constitutione diversum. » Et item (*epist. 53*) : « Sancti illi et venerabiles Patres, qui in urbe Nicæna, sacrilego Ario cum sua impietate damnato, mansuras usque in finem mundi leges ecclesiasticorum canonum condiderunt, et apud nos in toto orbe terrarum in suis constitutionibus vivunt, et si quid usquam aliter quam illi statuere præsumitur, sine cunctatione cassatur. » Et item idem in decretali sua epistola (*epist. 12, ad episc. Afric., c. 2*) : « Beati Pauli apostoli per Spiritum Dei emissa præceptio est, qua in persona Timothei omnium Christi sacerdotum numerus eruditur, et proinde unicuique nostrum dicitur : *Manus nemini cito imponeris, neque communices peccatis alienis* (1 Tim. v); » et paulo post : « Quid est communicare peccatis alienis, nisi talem effici ordinationem, qualis ille est qui non meruit ordinari? sicut enim boni operis sibi comparat fructum, qui rectum tenet in eligendo sacerdote iudicium, ita gravi semetipsum afficit damno, qui in suum collegium assumit indignum. Non ergo in cuiusquam persona prætermittendum est, quod institutis generalibus continetur, nec putandus est honor ille legitimus, qui fuerit contra divinæ legis præcepta collatus. » Et item idem : « Superflue extra Ecclesiam positus resistimus, si ab his qui intus sunt in eis quod decipiunt vulneramur. Oportet etenim nos evangelicæ meminisse præcepti, quod ab ipsa veritate præcipitur, ut si nos oculus, aut pes, aut dextera scandalizaverit manus, a compage corporis auferatur, quia melius sit his in ecclesia carere membrorum, quam cum ipsis in æterna ire supplicia. »

Abijcienda prorsus pestifera hæc a sacerdotali vigore patientia est, quæ sibi met peccatis aliorum parendo non parcat, sicut Heli quondam sacerdos, filiorum suorum delicta tolerando, cum ipsis divinæ justitiæ sententiam meruit expertiri, quia segni indulgentia dissimulavit plectere peccatores. Igitur

juxta præceptum Levitici, in quo leprosi domorum lapides a sacerdote inspici, et qui ex eis purificari nequiverit, jam inter immundos computari, ac de ordine mundorum lapidum præcipitur erui, et de cœlesti ædificio, videlicet sancta Ecclesia, velut indignus abjici, ac divino examine alius qui dignus est in loco illius substitui, quia sæpe fatus Odacrus non est clericus Rhemensis nostræ provinciæ, et contra sacras leges et regulas vacantem pastore suffraganeam metropolis nostræ ecclesiæ invadere præsumpsit, et reditus ecclesiæ viduatæ, quas magnum Chalcedonense concilium penes æconomum ejusdem ecclesiæ integre conservari præcipit, sacrilege usurpavit, cum diffinito judicio ipsius concilii, et excommunicatione episcoporum quatuor provinciarum, insuper et domni papæ Nicolai apostolicæ sedis pontificis, a nobis evangelica et apostolica atque canonica auctoritate sit excommunicatus, ut nunquam vel nusquam in provincia metropolis Rhemorum Ecclesiæ in gradu ecclesiastico ministret, et si in pertinacia suæ pervasionis de cætero manere præsumperit, nunquam vel nusquam in Rhemensi provincia cum aliquo Christiano communicet, neque corpus et sanguinem Christi, nisi forte, juxta mysticam Nicænam synodum (*can. 13*), in exitu positus viaticum munus sacræ communionis accipiat.

EPISTOLA XXXIV.

AD JOANNEM EPISCOPUM CAMERACENSEM.

De Hunoldo et malæ famæ presbyteri purgatione.

(Apud Sirmond., ex codice S. Laurentii Leodiensis.)

HINC MARUS Rhemorum episcopus ac plebis Dei famulus, dilecto fratri et venerabili coepiscopo JOANNI salutem.

Iste presbyter, nomine Hunoldus, dixit mihi quia presbyteros habens cum quibus famam suam sacramento purgare voluit de quadam femina, et quoniam examinationis judicium noluit facere, ut illi presbyteri cum eo securius jurare possent, sacerdotale ministerium interdictum est illi. Unde qualiter in nostra parochia ex auctoritate majorum tenemus, tuæ dilectioni mandamus. Sicut S. Gregorius de crevit, per idoneos testes sacramento inquiritur de malæ famæ presbytero, ut inde scientes nec mendacium dicant, nec veritatem reticeant; et exceptis accusatoribus, et sex testes jurent. Et post hoc juramentum, non interrogamus de concubitu presbyteri cum quacunque femina, quia nec hoc canones habent, sed de accessu et frequentatione, ac cohabitatione cum feminis contra interdictum sacrorum canonum, unde mala suspicio et inconveniens sacerdoti fama exivit. Et post illorum testimonium, septimus testis, si conditio vel qualitas personæ permittit, ad judicium exit, quod illi sex veritatem inde per sacramentum dixerunt: quia multi jam deprehensi apud nos habentur, quoniam pretio conducti se perjuraverunt. Et si hoc modo presbyter convictus fuerit de inconvenienti cohabitatione contra leges et canones cum femina, deponitur, sicut sacræ

præcipiunt regulæ. Accusatores autem ac testes ad accusandum vel ad testificandum tales suscipiuntur secundum Africanum concilium, quales publicæ leges in mallo vel audientia ad accusandum et ad testificandum admittunt. Si autem mala fama ex similitudine per parochiam de presbytero exierit, et accusatores et testes legales defuerint, ne contra Apostolum infirmorum corda de mala fama presbyteri percutiantur, et ne vituperetur ministerium nostrum, neque securiores presbyteri existentes licentius in peccatum labantur, secundum decreta majorum, cum denominatis sibi vicinis presbyteris, quos scimus se nolle perjurare sacramento, famam suam purget. Si autem denominatos a nobis sibi presbyteros ad famam suam purgandam habere nequit, et alios ad secum jurandum conduxerit, quoniam experti sumus quosdam ad invicem conspirasse, ut reputati mutuo in sua purgatione jurent, sicut et presbyteri, pleni iniqua cogitatione adversus Susannam conspiraverunt, coram misse nobis credibili, presbyteri, qui in purgatione infamati sacerdotis se una cum eo ad jusjurandum offerunt, examinationem judicis per advocatum infamati presbyteri recipiunt, ut in sacramento se Deo non perdant, sicut quosdam hinc jam revictos comperimus. Invocatio autem super eum qui ad judicium exit talis habetur, quod ipse presbyter talem accessum et frequentationem et cohabitationem contra sacros canones cum illa femina non habuerit, unde mala suspicio et inconveniens sacerdoti fama merito posset exire. Sicut enim vitiosi presbyteri, suadente diabolo, adveniunt, ut in mansis suis de alode, vel naturali, vel comparato, feminas habeant, quæ illorum pannos lavant, et vestimenta illis faciunt, et interdum etiam claves facultatum illorum prævideant, sicut cum eis inconvenienter cohabitent, ita, sicut sanctus Augustinus dicit, varia morborum genera nova quæ-rere cogunt medicamentorum experimenta, ut quia interdicto canonum et legum obaudire non curant, censuræ severitate ab eis discedere timeant. Data xv Kalend. Apriles, indictione vii.

EPISTOLA XXXV.

AD OMNES FIDELES.

Godaldi presbyteri de femina convicti depositio.

(Apud eundem, ex veteri codice sancti Laurentii Leodiensis.)

HINC MARUS episcopus ac plebis Dei famulus.

Notum sit omnibus sanctæ Dei Ecclesiæ rectoribus, ministris quoque ac filiis, ad quos hæc poterunt pervenire, quia Godbaldus quondam presbyter parochiæ nostræ, de quadam femina nómine Doda criminatus, et idoneis testibus comprobatus, et secundum sacros canones ad judicium provocatus, de ipso judicio conscientia sua redargutus fuga lapsus est. Propterea secundum sacros canones Spiritu Dei conditos, et totius mundi reverentia consecratos, omni sacerdotali officio est privatus, docente beato Bonifacio papa (*epist. 11*): « Quod si adesse ne-

glexerit, dilationem sententiæ de absentia non lucretur. Nam manifestum est confiteri eum de crimine, qui indulto et toties delegato iudicio purgandi se occasione non utitur. Nihil enim interest utrum in præsentis examine omnia quæ dicta sunt comprobentur, cum ipsa quoque per confessionem procurata toties constat absentia. » Data ex synodo in Rhemensi metropoli habita x Kalend. Maias, indict. xii

EPISTOLA XXXVI.

AD OMNES FIDELES.

Fulcheri et Haradoisæ ob incestas nuptias excommunicatio.

(Apud eundem, ex veteri codice sancti Laurentii Leodiensis.)

HINCARIUS episcopus ac plebis Dei famulus.

Notum sit omnibus sanctæ Dei Ecclesiæ rectoribus, ministris quoque ac filiis, ad quos hæc poterunt pervenire, quia Fulcherus et Haradoisa, carne propinqui, contra legis præcepta et prophetica dicta, contraque evangelicam et apostolicam atque canonicam regulam, sed et contra leges humanas, non conjugio sed incestu, carnali commistione conjuncti sunt, sicut idoneis et veracibus testibus, computata utriusque cognatione comprobatum est. Et quia obedire divinis et humanis legibus noluerunt, ut se ab ipso incestu disjungerent secundum sacros canones, a sacra communione corporis et sanguinis Christi, et ab omni Christianorum societate abjecti sunt, usque dum, Domino respiciente, a laqueis diaboli, a quo capti tenentur, per penitentiam separati, ab ipso incestu respiscant, decernente B. Gregorio (Gr. junior., *can. 8 et 9*): « Si quis, inquit, consobrinam suam duxerit in conjugio, anathema sit; et responderunt omnes tertio: Anathema sit. » Et item: « Si quis de propria cognatione, vel quam cognatus habuit, duxerit uxorem, anathema sit; et responderunt omnes tertio: Anathema sit. » Vos, fratres ac filii, qui litteras non didicistis, scitote quid sonat in nostra lingua anathema, id est *alienatio*, ut a Christo, a quo nominantur Christiani, et a Christianorum societate atque communione sint tales alieni, donec ab illa illicita conjunctione se separant, et per penitentiam et sacerdotale ministerium Christo et sanctæ Ecclesiæ, id est, Christianis reconcilientur. Progeniem vero suam divinæ leges nunquamque Christianum usque ad septimam generationem, et quandiu se cognoscunt affinitate propinquos, observare decernunt, ut nemo ex propria consanguinitate conjugem habeat, vel quam ex propria consanguinitate aliquis conjugem habuit vel aliqua illicita pollutione maculavit, quia incestuosus est talis coitus et abominabilis Deo et cunctis hominibus. Et incestuosos a liminibus sanctæ Ecclesiæ præcipiunt separari, usque dum per satisfactionem precibus sacerdotum, eidem, ut præmisimus, sanctæ Ecclesiæ canonicè reconcilientur. Si autem ab hoc incestu, in quo perditii jacent, separare se voluerint, quia sicut sacræ leges dicunt, incestus nullo con-

gii nomine deputatur, si se continere non potuerint, post penitentiam et reconciliationem, quibus conjunctio illicita interdicitur, habebunt ineundi melioris conjugii libertatem. Quandiu autem in ipsa illicita conjunctione permanserint, nullus Christianus quocunque modo eis communicet, quia cum talibus cuicumque Christiano nec communem cibum sumere licet. Propterea, fratres ac filii, omnes scilicet Christiani, separate vos ab omnimoda eorum communione, ne, quod absit, communicantes illis pariter pereatis. Nec mirum si inter homines hæc ratio custoditur, cum et inter jumenta hoc fieri sciatis, ut ea quæ scabiem habere videntur, separentur a sanis, ne illorum morbo cætera damnentur vel pereant. Et dicente Domino: *Nolo mortem peccatoris, sed ut convertatur et vivat (Ezech. xxxiii, 21)*, si antequam se ab hoc incestu separent, quisquam in infirmitatem deciderit, et vel sic jam in desperationem de vita temporalis devenierit, si vel tunc ex corde penituerit, et coram Deo et sacerdote ac fidelibus hominibus confessus fuerit, et fidejussores dederit, ut si de ipsa infirmitate convalesceret ulterius ad illam incestam conjunctionem non rediret, cum aliis peccatis suis de hoc incestu puram confessionem faciat, et a sacerdote reconcilietur, et sancto oleo ungetur, et communicatio corporis et sanguinis Christi ei largiatur. Si vero in hac pertinacia usque ad mortem permanserit, et sine reconciliatione et communione corporis et sanguinis Christi quisquam eorum mortuus fuerit, sine psalmis et hymnis atque orationibus, et non cum aliis Christianis sepeliatur: quia sicut sancto Spiritu inspirante scriptum legitur, quibus viventibus non communicavimus, mortuis communicare non possumus. Data ex synodo in Rhemensi metropoli habita, decimo Kalendas Maias, indictione duodecima.

EPISTOLA XXXVII.

AD ENGLIGARIUM VIRUM ILLUSTREM.

Illum arguit quod hominem suum inconvenienter jurare coegerat.

(Apud eundem, ex Flodoardi, lib. III, cap. 26.)

HINCARIUS episcopus ENGLIGARIO salutem.

Pervenit ad nos quia hominem tuum Ratramnum irrationabiliter et inconvenienter periculosum sacramentum jurare fecisses: qui licet tibi servitium debeat, tamen sub nostra cura et tu et ille de salute vestra esse debetis. Propterea mando tibi quia valde miror te non intellexisse gravius esse periculum cum hominem aut suadendo aut terrendo in perjurium mittas, quam si te solus perjurares, quoniam in te unum perjurium, imo pro perjurio homicidium perpetrare: cum autem alium perjurare facis, et te et illum perdis. Et ideo mandamus ut si ita causa habetur sicut ad nos pervenit, ab ecclesia et altario te abstineas donec ad nos venias, et de tali incautela aut dignam excusationem facias, aut dignam penitentiam accipias.

EPISTOLA XXXVIII.

AD ANASTASIUM ABBATEM.

Romam missa cum increpatorias papæ litteras accepisset.

(Apud eundem, ex codice ecclesiæ Laudinensis.)

HINCMARUS Rhemorum episcopus sanctissimo et fidissimo fratri ANASTASIO religioso abbati plurimam in Salvatore salutem.

Multis infirmitatibus et anxietatibus pressus pauca scribo cui multa debeo, et quem multum diligo ac de quo multum confido. Cæterum epistolæ domni apostolici, per Egilonem venerabilem archiepiscopum nobis directæ, ad nostra scripta respondentes, in quibusdam aliter sonuerunt, quam nos suæ sanctitati et auctoritati scripserimus. Sed certus sum quia non aliter ipse nobis rescripsit, nisi ut in scriptis ex nostra parte sibi porrectis invenit. Nos tamen, vera exemplaria eorundem scriptorum a nobis missorum habentes, de quibusdam causis non ita scripsimus, sicut habere scriptis ejus relegimus. Unde si et in his scriptis, de synodo apud Treas sub sigillis quinque episcoporum, consensu omnium qui interfuerunt directis, aliter, quod futurum non credimus, a quocunque fuerit missum, vel contra ea transmissum, hic venerabilis frater et coepiscopus noster Actardus vera exemplaria scriptorum ejusdem synodi ex authenticis accepit, quæ domno apostolico monstrare si fuerit necesse valebit. Quæ forte collata his, quæ Leoni papæ ab episcopis provinciarum Cisalpinarum, et a Lothario imperatore, sed et a rege Carolo directæ fuerunt, de quorum exemplariorum sensu hæc missa episcopi collegerunt, ut autumo, non discordare intellectu inveniuntur, quantum mitius quædam scripserint qui gestis non interfuerunt, quam illi qui ea quæ gesserunt, Sergio papæ mittenda et Leoni missa scripserunt. Et de restitutione Ebonis per edictum Lotharii imperatoris in scriptis suis ideo non miserunt, quoniam ipsi episcopi, quorum ibidem nomina sine illorum subscriptionibus sunt adnotata, eidem qualicunque restitutioni se non interfuisse dixerunt, sicut et Rothadus modo in synodo apud Treas dixit. Est etiam, quoniam et a Sergio post eandem restitutionem damnationis sententiam in eum prolatam legerunt, sicut codex episcopalis, et litteræ domni apostolici per Egilonem nobis missæ demonstrant. Sed et de charta transmirationis ad aliam parochiam, D a Gregorio papa præfato Eboni facta, nihil in prædictis eorum scriptis habetur, quoniam id istis nostris regionibus antea visa non fuit, nisi modo, cum dilectus frater noster Vulfadus apud Treas eam nobis ostendit: quæ utrum a Gregorio, cui successit Sergius, data fuerit an non, ex serinio sanctæ sedis Romanæ ut credimus sciri valebit. Ordinatos quoque mei Rhemensis provinciæ suffraganei episcopi, sæpe passim, sed et in synodo professi fuerunt eidem Eboni, non communicasse in his unde fuerat excommunicatus, nisi modo frater Rothadus, ut quidam putant, causa erga me zeli, qui eundem Ebonem damnavit,

A et me elegit, ac cum cæteris episcopis ordinavit, et qui dicitur dicere quod quidam episcopi a sæpedito Ebone annulos et baculos acceperint, cum quædam synodus Gallicana quæ Toletana vocatur dicat: Episcopus, presbyter, aut diaconus, si a gradu suo injuste dejectus in secunda synodo innocens reperiat, non potest esse quod fuerat, nisi gradus amissos recipiat, quoniam coram altario de manu episcoporum, si episcopus est, orarium, anulum et baculum, et sic demum de reliquis persequitur gradibus. Unde constat quia isdem Ebo dejectus, secundum hanc constitutionem, ab episcopis anulum et baculum accipere, et non episcopis dare debuerat. Et quia Scriptura dicit: *A filiis tuis cave, et a domesticis tuis attende* (Eccli. xxxii, 28), et unusquisque se a proximo suo custodiat, et in omni fratre suo non habeat fiduciam; et *inimici hominis domestici ejus* (Mich. vii, 6), ego per missum meum exemplaria scriptorum nuper in synodo apud Treas factorum mitterem, ne forte ab amicis meis, quorum infestationem patior, aliqua fortassis erga me in eis compilentur, si solide, propter quorundam principum erga me commotionem, quibus ad sua vota placere non audeo, sicut hic præfatus venerabilis et consacerdos noster vobis viva voce dicere potest, valerem. De quo charissimo et fidissimo fratre. et venerabili ac prudenti episcopo, vestram peto indubiam charitatem, ut domno apostolico, et patri nostro Arsenio, et cæteris familiaribus vestris eum commendetis, et ejus necessitatibus atque rationabilibus petitionibus pro viribus concurratis. Et quoniam, quando ad synodum apud Treas veni, non putavi eum cum legatione synodali ex ipsa synodo Romam iturum, talia vel ita condigna exenia mecum non attuli, ut domno apostolico, et carissimo Patri nostro Arsenio, ac vobis condigne mittere possem; et post synodum ad civitatem nostram infirmus remanens in quadam Ecclesiæ nostræ villula, redire ante profectionem illius non potui, ne in totum vos quantulacunque benedictiuncula visitare dimitterem, pro nostræ exiguitatis memoria mitto vobis per eum crusnam de pellibus variis, cum panno coloribus vario, qua... Cætera per pauca desunt.

EPISTOLA XXXIX.

AD CLERUM ET PLEBEM BELLAVACENSEM.

Pro episcopi elatione.

(Ex Act., prop. eccl. Rhem.)

HINCMARUS sanctæ metropolis Ecclesiæ Rhemorum episcopus, ac plebis Dei famulus, clero et plebi in parochia Belvacensi consistenti.

Quia defuncto dilecto, vel venerabili, confratre ac sacerdote nostro, patre videlicet ac pastore vestro Odone, electione canonica a domino nostro rege vobis solita benignitate concessa, necesse erit ut de eligendo atque constituendo vobis pastore, vel doctore atque rectore, secundum ecclesiasticas regulas, votis nostris in unum Domino mediante convenientibus, præmissis jejuniis et litaniarum obsecrationi-

bus, tractare quanto citius maturetis : et exorato eo a quo est omne datum optimum, et omne donum perfectum, quique facit unanimes habitare in domo, ita vos cum studiis hujus venerandi fratris ac coepiscopi nostri, cui secundum institutionem canonicam visitatoris officium in Ecclesia, cujus amore vel vigore fovemini, delegavimus, in electione regulari concorditer ; ut pastore vos diutius destitutos non doleatis. De ejus videlicet a nobis consecrandi episcopi electione, pro imposito nobis ministerio, et cura totius provinciae secundum mysticæ Nicænæ synodi canones delegata, fraternitati vestræ auctoritatem divinitus promulgatam intimare satagimus. Primo scilicet, ut decretum sine visitatoris præsentia nemo conficiat, cujus testimonio clericorum ac civium possit unanimitas declarari. Deinde, ut de ecclesia vestra, sive sit in civitate, sive in monasteriis, his disciplinis institutum, et ita apostolicæ formæ convenientem, de diaconibus vel presbyteris eligatis vobis, auctore et fautore Domino, consecrandum episcopum, sicut cum de eligendo atque constituendo episcopo ageret, Tito et Timotheo Paulus depingit apostolus. Et si, quod absit, de civitatis ac parœciæ vestræ clericis, ordinandus episcopus nullus dignus, vel idoneus summo sacerdotio, quod evenire non credimus, poterit inveniri : tunc alterum de altera diœceseos nostræ ecclesia, unde nobis secundum Africanum concilium (*can. 22*), sine cujusquam contradictione, ordinandi quemquam canonicè electum et petiitum est attributa licentia, eligere, procurate ; qui merito vitæ et scientiæ doctrina vobis præesse valeat, et prodesse : quique sacris canonibus præcipue capitulo Carthaginensis concilii (*conc. Carth. an 398, can. 1*) : Qualis debeat ordinari episcopus, non debeat obviare ; et a decretis Patrum, Siricii videlicet, Innocentii, Cœlestini, Leonis, Gelasii, atque Gregorii, quantum patitur humana fragilitas, et poteritis conspiciere, non valeat quoquomodo discrepare. Si etiam de alterius diœcesi archiepiscopi, vel parœciæ episcopi, quempiam vobis notum proficuum et utilem eligere maueritis : necesse vobis erit, cum beneplacito illius episcopi, cujus intererit, et litteris canonicis petiitum obtinere, et ad nos illum mediante visitatore vestro examinandum adducere ; quatenus, si congruus sacris canonibus inventus fuerit, vobis ordinetur episcopus. Ante omnia autem cavete in electione pontificis malum simoniacæ hæreseos, ne pro dato aliquo, vel promissione illicita, neque pro gratia cujuscumque vel familiaritate aut propinquitate alicujus, quempiam attentetis eligere. Non eum, cui nulla natalium, nulla morum dignitas suffragetur : vel qui originali, aut alicui conditioni obligatus detineatur. Neminem ex laicis neophytum, id est noviter attonsum, et sine disciplina, vel non per tempora constituta ad ecclesiasticos gradus provectum. Quod ideo specialiter designamus, quia cum canones dicant : « Nullus ex laicis ordinetur ; » demonstrant quod

non de omnibus sit laicis constitutum. Neque enim clerici nasci, et non fieri possunt ; sed designata sunt genera, de quibus ad clericatum pervenire non possunt : id est si quis fidelis militaverit ; si quis fidelis causas egerit, hoc est, postulaverit ; si quis fidelis administraverit ; si quis vir ante servivit ; si quis publicam pœnitentiam pro culpâ criminalibus egit ; si quis bigamus, vel maritus viduæ fuit, vel si concubinam, vel pellicem novit. Cavete nihilominus ne illiteratum, vel alicujus hæreseos peste corruptum, ac aliquorum membrorum damna perpessum ; non negociatoreum clericum, aut inhonestis et turpibus lucris incubantem, aut horrendis quibusdam criminibus implicatum vel diffamatum, vel dæmoniis similibusque passionibus irretitum, eligere attentetis : sed domui Dei dignum, fidelem atque prudentem ministrum dispensatorem eligite. Quatenus interius exteriusque decenter ornatus, formam vivendi vobis religiosa conversatione demonstrat, et sana doctrina, inter hujus mundi ac tribulationum tenebras, recto calle gradiendi sine offensione ad portum salutis æternæ lumen manifestare prævaleat ; et contra barbaricam infestationem, si quod absit, acciderit, vobis ferre auxilium prudentia sciat, virilitate valeat, temperantia consulat : et sic exteriora administret, ut interiora non deserat ; sic interioribus serviat, ut exteriora penitus non relinquat ; et ambidexter, contemplationi mente inserviat vitæ activæ servitiis intentus, ut fidelis servus et prudens, conservis in tempore tritici mensuram, id est modum verbi fidei, probate dispenset. Non solum in prædicationis sermone, ac conversationis exemplo, verum in cunctis saluti ac vitæ necessariis necessaria et opportuna prævideat.

Hujusmodi autem, quantum Dominus dederit, ipso cooperante electum cum visitatore vestro, præsentem scilicet confratre nostro, et cum decreto canonico, ad humilitatis nostræ sollicitudinem examinandum adducite : quia, ut longe ante nos dictum est, non est facile dimittendus, cui est proximus committendus. Prænoscere vos denique volo, quia si personam a sacris canonibus deviam scienter nobis adduxeritis, non solum ex ea pontificem non habebitis, verum etiam pro illicita electione, ut contemptores canonum, judicium incurretis. Sed et nostro ac coepiscoporum nostrorum iudicio refutate rationabiliter electione vestra incongrua, talem secundum Laodicenses canones studebimus eligere, qui vestris vitiosis voluntatibus non valeat consentire. Quia sicut bene petentibus dicit Dominus : *Petite, et accipietis* (*Matth. vii*), ita et per apostolum male petentes redarguit, dicens : *Petitis, et non accipitis, eo quod male petatis* (*Jac. iv*). Petite, fratres, a Deo, ut vobis pastorem secundum cor suum tribuat. In cujus electione si non plus temporalia quam spiritualia commoda studueritis attendere, gratiam suæ electionis electioni vestræ, bonorum operum et piorum studiorum auctor et cooperatores studebit ac-

commodare, qui non sicut homo tantum in facie, A
sed singulorum corda scrutatur, et reus. Cui est
honor et gloria, potestas et imperium, in sæcula
sæculorum, Amen,

EPISTOLA XL.

Fragmentum.

AD CAROLUM CALVUM REGEM.

*Quales iudices constituere debeat ad causas inter ec-
clesiasticos et sæculares dirimendas.*

(Apud Sirmond.)

Regia igitur sollicitudo, a Rege regum et æquis-
simo iudice Deo ut in directione cordis iudicium
iudicet constituta, provide solliciteque studere de-
bet, ut tales iudices cum episcopis ad causam inter
eclesiasticos et sæculares dirimendam eligat et B
constituat, qui religiosi sint et Deum timeant, et
non muneris præmio, non favoris vel propinquitatis
aut amicitiae gratia, non indebitæ subjectionis obse-
quio, non alterius partis odio, personam accipiant
in iudicio, sed absque contentione ac livore, sicut
ipsa Veritas dicit, non secundum faciem, sed iustum
iudicium iudicent : et hoc non in publico iudicii
loco, sed in privato, quia episcopi, non in consisto-
rio regum, non in prætorio iudicium, nec nisi ab
episcopis, aut in synodo, aut in privato loco, a pri-
matibus deputatorum aut a se electorum iudicium
iudicio debent aut possunt regulariter iudicari. Et
prætaxato modo supradictas leges, tam publicast
quam ecclesiasticas, in suis temporibus servari de-
crevisse didicimus antiquos imperatores et præde-
cessores ac progenitores vestros episcopis et viris C
ecclesiasticis, et nobis vestra dilectissima et beni-
gnissima dominatio servaturam se et verbo et
subscriptione promisit in Carisiaco, ubi hoc capitu-
lum consultu ac consilio fidelium vestrorum, tam
episcoporum quam et laicorum condidistis, et ei
subscripsistis dicentes : Quantum sciero et rationa-
biliter potuero, Domino adjuvante, unumquemque
vestrum, secundum suum ordinem et personam,
honorabo et salvabo, et honoratum ac salvatum
absque ullo dolo et damnatione vel deceptione con-
servabo. Et unicuique competentem legem et justi-
tiam conservabo. Et qui illam necesse habuerit,
et rationabiliter petierit, rationabilem misericor-
diam exhibebo, sicut fidelis rex suos fideles per
rectum honorare et salvare, et unicuique competen-
tem legem et iustitiam in unoquoque ordine con-
servare, et indigentibus et rationabiliter petentibus
rationabilem misericordiam debet impendere. Et pro
nullo homine ad hoc, quantum dimittit humana fra-
gilitas, per studium aut malvolentiam, vel alicujus
indebitum hortamentum deviabo, quantum mihi
Deus intellectum et possibilitatem donaverit. Et si
per fragilitatem contra hoc mihi subreptum fuerit,
cum hoc recognovero, voluntarie illud emendare
curabo. Nos autem fideles vestri, episcopi et cæteri
laicalis ordinis qui adfuerunt, hoc capitulum, et vo-
biscum condidimus, et ei subscripsimus unusquisque

proficundo : Quantum sciero et potuero, Domino
adjuvante, absque ulla doloitate, aut seductione,
et consilio et auxilio, secundum meum ministerium,
et secundum meam personam fidelis vobis adjutor
ero, ut illam potestatem, quam in regio nomine et
regno vobis Deus concessit ad ipsius voluntatem,
et ad vestram ac fidelium vestrorum salvationem,
cum debito honore et vigore tenere et gubernare
possitis.

EPISTOLA XLI.

Fragmentum.

AD LUDOVICUM REGEM GERMANIE.

Pro Bertulfo Trevirensi archiepiscopo.

(Apud eundem, ex Flodoardi, lib. III, cap. 25.)

Proinde sicut non leve discrimen incumbit ponti-
ficibus siluisse pro Divinitatis cultu quod congruit,
ita regie potestati, quod absit, non mediocre peri-
culum est, si cum debeat parere refugii quod ei ex
divina voce a sacerdotibus nuntiatur, Domino di-
cente in Evangelio : *Qui est ex Deo, verba Dei audit.*
Si autem vobis aliquis minus devotus suggestit,
quod in eadem metropoli, in contemptu vestro, vel
contra fidelitatem vestram, metropolitanum ponti-
ficem ordinari fecimus : quin potius consensu una-
nimitatis nostræ ipsi secundum sacros canones ordi-
navimus, quia, ut scriptum est, sicut Deus loci an-
gustia non continetur, ita verbum ejus non est
alligatum, collaudante Redemptore ac Salvatore
nostro, quod centurio in hoc sensu dixerat : *Dic
verbo, et sanabitur puer meus* (Matth. VIII, 8), vide-
licet quod hic dixeris, illic fiet. Qui in discipulis
suis hodieque nobis, licet indignis, loquitur : Spiritus
Patris vestri loquitur in vobis, qui replet orbem
terrarum. Nolite credere, quæsumus, prava sua-
denti, quia pro certo sciatis non in contemptu vestro,
neque contra fidelitatem vestram, in eadem metro-
poli sede pontificem ordinavimus ; sed perpendentes,
quod et vas melius sectis, quanta et per quanta
tempora ipsa Ecclesia desolata et destituta sit,
et quanta contra Dei voluntatem, non solum in
eadem parochia, sed et in tota provincia ad eam
pertinente, increverint, cum nihil canonice sine pri-
mate suffraganei episcopi agere valeant, nisi quod ad
propriam parochiam pertinet, ibidem commoditatem
regularem invenientes canonice pontificem ordina-
vimus : quod et secundum divinas leges agere pos-
sent atque deberent ipsius metropolis suffraganei, si
tanti numeri forent, ut per se regulariter possent
ordinare pontificem, qui non minus quam a tribus
prævalet regulariter ordinari. *Prosequitur etiam, de-
promens auctoritates sanctorum Patrum, quibus
fulti hoc egerant; et subinde : Et quia tot in eadem
provincia suffraganei non erant episcopi, ut metro-
litanum regulariter ordinare valerent, quoniam
Ecclesiæ Rhemensis et Trevirensis comprovinciales
atque sorores, et ex auctoritate et ex antiqua con-
suetudine habentur, ea conditione, ut qui prior eo-
rum fuerit episcopus ordinatus, prior etiam habeatur
in synodo, et sibi mutuo consilio et auxilio fovean-*

tur, atque fulciantur, Trevirensis provinciæ episcopi a primæ provinciæ Rhemorum solatium suæ ordinationis secundum sacras regulas quæsierunt, sicut sancti Sardicensis canones dicunt (*cap. 5*), scilicet « ut si contigerit in una provincia, in qua plurimi fuerunt episcopi, unum forte remanere episcopum, et populi convenerint, episcopos vicinæ provinciæ debere illum prius convenire episcopum, qui in ea provincia moratur, et ostendere quod populi petant sibi rectorem, et hoc justum esse, ut et ipsi veniant et cum ipso ordinent episcopum. Quod si conventus litteris tacerit et dissimulaverit, nihilque rescripserit, satisfaciendum esse populis, ut veniant ex vicina provincia episcopi, et ordinent episcopum. » Ex quibus rite colligitur quia si provincia Trevirensis non nisi unum vel nullum haberet episcopum, episcopi Rhemensis provinciæ petenti clero et populo Trevirensis. Ecclesiæ deberent ordinare episcopum. Cui Ecclesiæ omnes nos, quorum nomina præscripta in capite hujus epistolæ legit gloria vestra, unanimi voto atque consensu, fratrem et consacerdotem nostrum Bertulfum, ut præmisimus, regulariter pontificem ordinavimus, sicut ex sacris regulis et ordinationis ejus gestis ostendere possumus, et si necesse fuerit, ostendemus. Quapropter ipsius ordinationem, et dispositionem rerum ac facultatum ecclesiasticarum, sicut sacri præfigunt canones, ita defendimus, et perpetuo defendemus, sicut et ordinem nostrum, quia si ipse non est episcopus, nec nos debemus nominari episcopi. Et si quis voluerit contra ordinationem ejus sinistri quippiam dicere, exeat et dicat, verumtamen memor communionis suæ; quia aut ipse non communicabit ecclesiastico et episcopali ordini, aut nos non communicabimus ministerio episcopali.

Unde verbis beati Leonis Theodosium Augustum quondam alloquens: Vos, Christianissime et venerabilis nobisque charissime rex, cum consacerdotibus nostris alloquimur; impletes reverentiam clementiæ vestræ sinceri amoris officio, cupientesque vos placere per omnia Deo, cui pro vobis a nobis et ab Ecclesiis nobis commissis supplicatur, ne ante tribunal Domini rei de silentio judicemur, obsecramus coram unius deitatis inseparabili Trinitate, quæ tali facto læditur, cum ipsa vestri sit custos et auctor regni, et coram sanctis angelis Christi, ut in eo statu et immunitate seu privilegio cum suo pontifice Trevirensis Ecclesiam esse jubeatis, atque conservetis, quo vestri progenitores atque prædecessores, sed et in quo frater ac nepos vester Lotharius, pater scilicet ac filius, canonicè conservaverunt: quatenus et vos meritum inde apud Deum, et beatum apostolorum principem Petrum, in ejus honore ecclesia ipsa est consecrata, habeatis, et nos amplius debitores in orationibus et cæteris debitis obsequiis acquiratis; quia nisi pro vestra reverentia hoc differremus, jam in pervasorem ipsius Ecclesiæ judicium in terris exertum haberemus, quod sexcenti et triginta episcopi in magna Chalcedonensi synodo

A de hujusmodi decreverunt, et de cælo super eum intentant, et in judicio divino ad æternam damnationem exerent, nisi dignam pœnitentiam egerit. *Et cætera de auctoritatibus sacrarum canonum. Post quæ subjungitur*: Unde vestra religiosa et nobis charissima dominatio certissime sciat, qui quoad iste frater noster Bertulfus a nobis in Trevirensi Ecclesia ordinatus episcopus in hoc mortali corpore vixerit, alter in eadem Ecclesia ordinatus episcopus non erit: nisi forte ipse, quod absit, sacris regulis obvians, per easdem sacras regulas deponatur: et isdem præsumptor et apostata monachus Walto de monasterio Trevirensis parochiæ, nunquam, jam judicio Spiritus sancti super eum prolato, in Trevirensi Ecclesia, quam exitiabiliter usurpavit et læsit, poterit esse episcopus. Et si, ut diximus, pro vestra reverentia hoc non differremus, non solum per sacros canones decerneremus, ut nunquam et nusquam ad gradus ecclesiasticos præsumeret accedere, verum sub anathemate eum ponentes, retrudi in ergastulo secundum sacras regulas decerneremus: et si in contumacia sua perstiterit, sine ulla retractione modis omnibus decernemus. A præfactis autem intentionibus sacrarum canonum vos immunem atque exortem a Domino, per quem reges regnant, et ex quo et per quem exordium sacer cœpit episcopatus, fieri totis nisibus exoramus, illius clementiam deprecantes ut det vobis velle et perficere pro bona voluntate quæ præcepit, quatenus mereamini percipere æterna gaudia, quæ se diligentibus reppro-

EPISTOLA XLII.

Fragmentum.

WILIGISO ET CÆTERIS MONACHIS S. DIONYSII.

Quod pretium pro decima quæri non debeat.

(Apud eundem, ex Flodoardi, lib. III, cap. 25.)

Absit, fratres, ut alii ecclesiastici et religiosi viri hoc audiant, quia monachi de monasterio sancti Dionysii decimam vendere quærunt, ut de ipso pretio infernum comparent. Multo magis autem absit ut hoc laici audiant, quod nemo etiam peccatis publicis implicatus in mea parochia facere audeat. Si enim aliquis de alio monasterio quam de nostro hoc tentare, quanto magis facere præsumeret, ab omni communione illum de parochia mea excommunicarem, *et cætera.*

EPISTOLA XLIII.

Fragmentum.

AD TEUDULFUM COMITEM.

Ecclesiam pretio vendere non præsumat.

(Apud eundem, ex Flodoardi, lib. III, cap. 26.)

Propterea scias quia si vel unum denarium tibi aliquis clericus pro ipsa ecclesia, vel pro alia aliqua in mea parochia, per se aut per immissam personam dederit, per me ordinatus in ea non erit. Si autem vis ibi habere presbyterum, adhuc mihi talem clericum qui aptus sit sacro ministerio, et ego illum inquiram, et illi ecclesiam dabo, et tunc illum ordi-

nabo, si mihi satisfactionem fecerit quod nullum A pretium inde donaverit. Et si tu ita facere non volueris, ergo ordinado qualiter populus ibi officium habeat, usque dum ibi ordinem presbyterum. Cui si aliquod impedimentum contra divinas et humanas leges feceris, et manifestum fuerit, presbyter ibi permanebit, et tu et omnes qui tibi consenserint, ab omni Christianitate usque ad satisfactionem eritis separati. Hæc, chare fili, ideo mando tibi, et aliter commoneo, quia saluum et honoratum te cupio, et inter filios Ecclesiæ te in loco filii habere volo, et si me coegeris, ut sicut Dominus dicit in Evangelio, sis velut ethnicus et publicanus, non mihi sed tibi reputare debebis. Postquam istas litteras dictavi, dictum est mihi quod matricularios a ministro meo constitutos de illa matricula eiecisti, et ibi Bonarium B misisti, et pro illa matricula in pretio unum asinum accepisti. Quod si ita est, non solum criminaliter fecisti, quia contra omnes leges ecclesiasticum ministerium homo laicus usurpasti, et eleemosynam, id est misericordiam pauperum, ac per hoc Deum, qui misericordia miserorum est, sicut Judas proditor, vendidisti; sed etiam turpiter in hoc nimis fecisti, ut de mendacitate, de qua mendici vivere debent, comes et honoratus regi consiliarius in pretio asinum accepisti, et omnes qui hæc audiunt, pensare possunt qualiter de aliis causis pro amore et timore Dei, et reverentia tui ministerii, juste et recte facis, qui de tali miseria sine ulla verecundia turpe lucrum requiris.

EPISTOLA XLIV.

Fragmentum.

AD IRMINGARDEM AUGUSTAM CONJUGEM LOTHARII
IMPERATORIS.*De eo quod apud Lotharium falso accusatus fuerat infidelitatis.*

(Apud eundem, ex Flodoardi lib. III, cap. 27.)

Ego scio quia ei multa de me dicta fuerunt contraria, sed si vult poterit cognoscere non esse vera; tamen non eum audeo reprehendere, quia dominus est, nec in ejus persona dico, sicut legitur in Scripturis: *Qui libenter audit verba mendacii, ministros quoque habebit impios* (Prov. XXIX, 12); videlicet qui de erga eum piis voluntarie loquentur impia. Qui illi ea dixit ex mea parte quæ mihi mandastis, aliter quam verum sit dixit, male autem interpretatus est bene dicta. Si voluisset cognoscere verum, et aliquis missus mihi de sua parte veniret, ut vera ex me cognosceret, sicut venit et me qualemcumque Christi Domini sacerdotem suggillavit, libentissime suo animo satisfacerem. De meo autem misso, sicut dominatio benignissima vestra mandavit, ut ad eum dirigam qui ei hoc affirmet, quod de ejus infidelitate nihil velim tractare, scitis quanta mendacia nunc per istud vadunt sæculum, et quanta sinceritas debeat esse in sacerdote, et quantam merito domo meo velim servare fidelitatem. Et idcirco ne mali interpretes male nonum interpretentur, hoc adhuc facere non possum. Tamen, si vult credere domnus

meus Lotharius, potest veraciter cognoscere quia non tantum illi, sed nulli homini in mundo sum infidelis; et si vult credere, credat: sin autem, cum ille inter principes, et ego inter episcopos, ante Regem regum et Episcopum episcoporum venerimus, tunc quid inde verum sit, plenissime sine aliqujus judicatione cognocet, etc.

EPISTOLA XLV.

Fragmentum.

ROTRUDI ET CÆTERIS SORORIBUS MONASTERII S. CRUCIS
ET S. RADEGUNDIS.*Pro electione abbatissæ ipsius monasterii.*

(Apud eundem, ex Flodoardi lib. III, cap. 27.)

Propterea diligite sorores ante omnia, et in B privatis colloctionibus, et in publico vestro conventu, remittite et abjicite funditus a cordibus vestris omnes injurias, et scandalorum fomites, quæ hactenus inter vos ortæ fuerunt, ut nulla de sonore sua vindictam, aut pro sermone, aut pro facto, vel pro aliquo despectu quærat, aut a Deo, aut in sæculo. Quia sicut Dominus protestatur, sine concordia quidquid ei obtuleritis non illi placebit. Sive enim craveritis, sive sacrificium obtuleritis, sive vos afflixeritis, sine hac charitatis concordia nihil Deo placabile erit, quia sicut Apostolus dicit: *Etiamsi tradidero corpus meum ut ardeat, charitatem non habeam, nihil sum* (I Cor. XIII, 3). Et scitis quia regula quam professæ estis, propter scandalorum spinas quæ oriri in monasterio solent, orationem Dominicam in matutinis et vespertinis officiis, C ita ut omnes illam audiant, a priori orari præcepit, ut timentes convenientiam qua dicimus: *Dimittite nobis debita nostra, sicut et nos dimittimus debitoribus nostris*, omnem rancorem de corde nostro pellamus. Quæ dum prius egeritis, ne per vestram discordiam, quod absit, regularis electio de vestro monasterio pereat, adunate vos ad Dei voluntatem, et regularis devotionis unanimitatem, vestramque ipsam salutem, præsentem scilicet atque æternam, cum charitatis concordia, quæ est omnium virtutum mater, et cum humilitate, quæ est custos ipsarum virtutum, atque cum vera obedientia, quæ scala est qua ad cælum pertingitur, et in vobis salubri electione concordate, et vosmetipsas ad regularem normam reducite, et constringite ac conservate: quia D aliter, sicut melius ipsæ scitis, salvæ esse nequaquam valetis. Et sicut animos ab inquietis motibus, ita et linguas a provocativis iracundiæ vobisque nocivis sermonibus custodite, contestante Apostolo: *Omnis clamor et indignatio a vobis auferatur, cum omni malitia, et omnis sermo malus ex ore vestro non procedat* (Ephes, IV, 30, 31); ne sicut solent homines, prius dolore commoti, et postea aliquo gaudio, quasi victoriosi obtinentes quæ desideraverant, exhilarati, de quocumque homine quæ non conveniunt aliqua vestrum dicat: ne et patientiæ meritum inutilibus sermonibus coram Deo perdatis; et si aliquis fuerit qui aliqua provocatione quancumque vestrum ad

hoc instigare voluerit, ut quæcunque indebita de A
quocunque proferat, qualiter illam comprehendere
possit, ut rationabiliter damnare prævaleat, locum
nec diabolus nec astutus homo exinde aliquo modo
habeat. Sed tales vos exhibete ut, interius exterius-
que decenter ornata, dignas atque exaudibiles ora-
tiones et pro vobis et pro seniore ac domina vestra,
proque non solum amicis vestris, verum etiam et
pro inimicis ad aures Domini mittere valeatis.

EPISTOLA XLVI.

AD AENEAM PARISEMENSEM EPISCOPUM.

De ordinatione Bernonis, Parisiensis acolythi.

(Ex Actis prov. eccl. Rhem.)

Nostri fratres de monasterio sancti Dionysii, per
licentiam domini abbatis Ludovici, ad educandum
atque erudiendum commiserunt mihi quemdam ad-
lescentem nomine Bernonem quem vestra fraterni-
tas acolythum ordinavit. Propterea, quoniam sine
vestra licentia eum nolumus in nostra Ecclesia diu-
tino tempore immorari, petimus dilectionem vestram
ut de illo nobis litteras canonicas faciatis, quatenus
eum in Ecclesia nostra possimus regulariter ordi-
nare.

EPISTOLA XLVII.

AD CAROLUM REGEM.

*Ut clero et plebi Silvanectensi novi episcopi elec-
tionem permittat, et visitatorem designet qui
præsint electioni.*

(Apud Labb. Conc., VIII, pag. 1866.)

Domini CAROLO regi glorioso sit semper salus et
vita.

Septimo Idus Junii, circa horam secundam, vene-
runt tres clerici et duo laici Silvanectensis Ecclesie
ad exiguitatem meam, innotescentes eandem Eccle-
siam, fratre et consacerdote nostro Erpoino defun-
cto, viduatam esse pastore; ferentes etiam ipsius
Ecclesie tam cleri quam plebis petitionem ut eis
pastor secundum sacras regulas tribuatur. Quos in-
terrogavi si verbum haberent de pace [f., de parte]
cleri ac plebis Ecclesie ipsius ex aliqua designata
persona: qui responderunt se non aliam petitionem
ex parte sociorum suorum afferre, nisi ut apud soli-
tam misericordiam vestram, liberam illis ac regula-
rem electionem obtinere satagerem, quatenus secun-
dum sacras regulas ille, canonico visitatore directo,
ab omnibus Ecclesie ipsius alumnis valeat eligi, cui
debeat ab omnibus obediri. Ego autem, licet, ut
præfatum est, sacerdotem vestrum Erpoinum per
fratrem Hildeboldum compresbyterum nostrum octa-
vo Idus Junii defunctum audierim, non tamen sta-
tui antea dominationi vestræ quidquam inde sugge-
rere, aut pro eadem Ecclesia postulare priusquam
secundum regularem morem ab ea legatos accipe-
rem. Quia, ut Leo in decretis suis dicit (cap. 49):
« Si in quibuslibet Ecclesie gradibus providente
scienterque curandum est ut in domo Domini nihil
sit inordinatum nihilque præposterum, quanto magis
claborandum est ut in electione ejus, qui supra om-

nes constituitur, non erretur? Nam totius familie
Domini status et ordo nutabit, si quod requiritur in
corpore, non sit in capite. Ubi est illa beati Pauli
apostoli per Spiritum Dei emissa præceptio, qua in
persona Timothei omnium Christi sacerdotum nu-
merus eruditur, et proinde unicuique nostrum dicitur:
*Manus nemini cito imposueris, neque commu-
nices peccatis alienis (I Tim. v).* Unde religiosa
sapientia vestra inter alia hæc duo decreta beati
Leonis sagacissime ponderabit, quibus dicit ut in
domo Domini nihil sit inordinatum nihilque præpos-
terum. Quæ si idem sanctus et sapiens ita aperte non
poneret, subtilitas intellectus vestri sufficienter enu-
clearet. Propterea, domine reverentissime ac clem-
entissime, dignetur mihi dominatio vestra litteris
suis significare quem vultis de coepiscopis nostris,
ut ei ex more litteras canonicas dirigam, et visita-
toris officio fungens in eadem Ecclesia electionem
canonicam faciat; et aut per se, aut per litteras suas,
vicario suo deferente, eandem electionem, cum de-
creto canonico singulorum manibus roborato, ad me
referat, ut per me ipsa electio ad dominationis vest-
ræ discretionem perveniat. Et quia in domo Dei,
ut ex verbis Leonis præmisimus, nihil auctoritas
patitur mordinatum esse nihilque præposterum, cum
vota concordia cleri ac plebis in electione regulari,
vel vestræ dominationis consensum cognoverimus,
litteras metropolitane auctoritatis super electionem
certæ personæ ad coepiscopos Rhemorum dioceseos
dirigemus, certum diem et locum eis designantes,
quando et quo ad ordinationem ipsius electi aut ipsi
convenient, aut litteras sui consensus per presbyte-
rum aut diaconum vice sua transmittant.

EPISTOLA XLVIII.

AD HEDENULPHUM LAUDUNENSEM EPISCOPUM.

*Ut visitatoris officio fungatur in electione episcopi
Cameracensis.*

(Apud Labb. ibid.)

HINCARIUS sanctæ metropolis Ecclesie Rhemorum
episcopus, ac plebis Dei famulus, dilecto fratri ac
venerabili coepiscopo nostro HEDENULPHO salutem.

Dilecto fratre ac venerabili consacerdote nostro
Joanne Ecclesie Cameracensis defuncto, hortor ac
moneo dilectionem tuam, frater charissime, ut ejus-
dem Ecclesie officio visitatoris nostræ humilitatis
metropolitana delegatione suscepto, ad eandem Ec-
clesiam quantocius studeas properare, ac assiduis
hortationibus clerum plebemque Ecclesie publice
admonere festines, ut remoto privato studio, uno
eodemque consensu talem sibi præficiendum expe-
tant ac eligant sacerdotem, qui et tanto ministerio
dignus valeat reperiri, et a venerandis canonibus
nullatenus respuatur. Formam autem electionis,
qualiter et qualem eligere debeant, tuæ dilectioni
transmitto, quam publice coram omnibus tua solertia
relegi faciat, ne de ignorantia se quilibet excusare
prævaleat. Quæ electio non tantum a civitatis cleri-
cis erit agenda, verum et de omnibus monasteriis

ipsius parochiæ, et de rusticianarum parochiarum A presbyteris, occurrant vicarii, commorantium secum concordia vota ferentes, sed et laici nobiles ac cives adesse debebunt, quoniam ab omnibus debet eligi, cui debet ab omnibus obediri. Et si post lectionem formæ electionis a nobis per tuam dilectionem eis transmissæ, concordēs omnes in quacunque regularem personam inveneris, moneas eos decretum canonicum ab eis fieri, ac sigillatim omnium manibus roborari; et cum decreto canonico, atque cum tantis qui sufficienter omnium vice testimonium electo ferre possint, cum eis mandavero, eumdem electum ad nos adducere curent.

EPISTOLA XLIX.

AD HADEBERTUM SILVANECTENSEM EPISCOPUM.

Ut visitatoris officio fungatur in electione episcopi Bellovacensis.

(Apud Labb. *ibid.*)

Eadem est ac præcedens, hoc tantum discrimine quod sub initium adjecta est mentio consensus regii hoc modo: Officio visitatoris, consensu domini nostri Ludovici regis, nostræ humilitatis, etc. *Sub finem vero, verbis illis omissis, cum eis mandavero, paulo longius excurrit in hunc modum:* Eumdem electum ad nos adducere tecum examinandum procura. Tua autem dilectio, frater charissime, solerti cura in hac electione invigilet: præsertim cum nobiscum tibi necesse erit ei qui ordinandus est manus imponere; qui bene nostri præceptionem beati Pauli apostoli per Spiritum Dei emissam, qua in persona Timothei C omnium Christi sacerdotum numerus eruditur: proinde unicuique nostrum dicitur: *Manus nemini cito imposueris, neque communices peccatis alienis (I Tim. v, 22), etc.*

EPISTOLA L.

AD CLERUM ET PLEBEM CAMERACENSEM.

Ut canonicam electionem faciant cum visitatore sibi designato.

(Apud Labb. *ibid.*)

HINC MARUS sanctæ metropolis Ecclesiæ Rhemorum episcopus, ac plebis Dei famulus, clero et plebi in parochia Cameracensi consistenti.

Quia defuncto dilecto et venerabili confratre ac consacerdote nostro, Patre videlicet ac pastore vestro D Joanne, necesse est ut de eligendo atque constituendo vobis pastore et doctore secundum ecclesiasticas regulas votis nostris in unum Domino mediante convenientibus, præmissis jejuniis ac litaniarum observationibus, tractare quantocius maturetis, et exorato eo a quo est *omne datum optimum, et omne donum perfectum*, quique facit unanimes habitare in domo; ita vos una cum studiis hujus venerandi fratris ac coepiscopi nostri, cui secundum institutionem canonicam visitatoris officium in Ecclesia ejus amorem ac vigore fovemini, delegavimus, in electione regulari concorditer uniat. Talem autem vobis futu-

rum pastorem eligite, qui merito vitæ et scientiæ doctrina vobis præesse valeat et prodesse, quique a canonibus sacris non discrepet. De cujus electione decretum canonicum unanimi voto agere, et sigillatim omnium vestrum manibus in præsentia hujus visitatoris vestri roborare satagite.

EPISTOLA LI.

CLERI ET PLEBIS LAUDUNENSIS AD HINC MARUM RHEMENSEM ARCHIEPISCOPUM.

Pro ordinatione Hedenuffi.

(EX Actis prov. Eccl. Rhem.)

Domino reverendissimo et sanctissimo HINC MARO archiepiscopo, cæterisque nostræ dioceseos sanctis B Patribus et episcopis, clerus Laudunensis, cum totius parœciæ plebibus, et sibi conjunctis præsulibus, æternam in Domino Jesu Christo salutem et pacem.

Canonicis regulis et apostolicis institutionibus statutum esse recolimus, ut quoties quælibet civitas ministerio pontificalis dignitatis caruerit, proprioque pastore vacaverit, cum decreto electionis, singulorum petentium manibus roborato, metropolitanum adire pontificem debeant, et de substituendo, in loco ejus qui decessit, pastore, petitione supplicis commone, quatenus et civitas sollicitudine pastoralis destituta proprio recuperetur pontifice; et qui ordinandus est, gratiosius possit accedere: quia cui debet ab omnibus obediri, utique debet et ab omnibus eligi; ne civitas non optatum episcopum aut contemnat, aut oderit; et fiat minus religiosa, quam convenit, cui non licuit habere quem voluit: hi vero qui ordinaturi sunt, in quem viderint omnium vota propensius concordare, promptius liberiusque illi manus imponere possent. Quapropter cum decreto nostræ electionis manibus singulorum nostrorum roborato ad paternitatem vestram accedentes, Hedenuffum Ecclesiæ nostræ filium, et in Ecclesia nostra, suffragantibus stipendorum meritis, ad onus usque sacerdotale promotum, vita et moribus ac sancta conversatione idoneum approbatum, quem per licentiam vestram, favente Christianissimo imperatore Carolo, pari consensu ac concordia devotione, atque unanima voluntate elegimus, per manus vestras, ac cæterorum vestræ dioceseos sanctorum episcoporum, consecrari, nobisque et Ecclesiæ nostræ doctorem atque pontificem institui imploramus, precamur ac petimus. Elegimus autem cum nobis fore pastorem quem apostolicæ formæ, qua episcopum ornatum beatus Paulus esse oportere demonstrat, congruere, et sacris non obviare canonibus Christi gratia cooperante confidimus. Oramus sanctam paternitatem vestram nunc et semper in Christo bene valere.

Datum quinto Kalendas Apriles, in basilica sanctæ Mariæ genitricis Dei et Domini nostri Jesu Christi, anno Incarnationis ejusdem Domini nostri Jesu Christi 876, regni domni Caroli imperatoris xxxvi, et imperii primo, indictione nona.

EPISTOLA LII.

AD CLERUM ET PLEBEM LAUDUNENSEM.

De ordinatione Henedulfi Laudunensis episcopi.

(Ex Actis prov. eccl. Rhem.)

HINC MARUS sanctæ metropolis Ecclesiæ Rhemorum episcopus, clero, ordini et plebi in sancta Laudunensi Ecclesia consistenti, in Domino pacem et salutem.

Sicut beatus papa Innocentius docet, oportet nos hoc sequi quod Ecclesia Romana custodit, a qua principium sacræ institutionis nos accepisse dubium non est. Propterea documento ac verbis beati Gregorii vos alloqui procuramus, insinuantes quia probabilibus desideriis vestris nihil attulimus tarditatis, fratrem jam et coepiscopum nostrum Henedulfum vobis ordinantes, præsentia vel consensu ac litteris coepiscoporum totius nobis commissæ provinciæ, secundum sacros canones, sacerdotem, pastorem quoque atque rectorem. Cui his litteris, quas sacri canones, ordinatos prius de conciliorum placitis, ne se aliquid contra eorum statuta egisse pœniteat, instructos, ab ordinatoribus suis, manibus eorum conscriptas jubent accipere, secundum traditionem ecclesiasticam dedimus in mandatis, ne unquam ordinationes præsumat illicitas, ne bigamum, aut qui virginem, si de conjugatis agendum est, non est sortitus uxorem, neque illiteratum, vel in qualibet corporis parte vitiatum, aut ex publice pœnitente aut curiæ vel cuilibet conditioni obnoxium, notatumque, ad sacros ordines permittat accedere. Sed et si quos hujusmodi forte repererit, respectu divino non audeat promovere. Alienum etiam clericum sine voluntate et consensu episcopi sui contra sacras regulas non sollicitet, non suscipiat, non in sibi commissâ Ecclesia ordinet: nec eos qui probatæ fidei non fuerint, sacris ordinibus præsumat quoquo modo applicare. In ordinatione autem presbyterorum ac diaconorum, ceterorumque ecclesiastici ordinis ministrorum, a totius muneris, id est a manu, a lingua, aut obsequio indebito, juxta quod Dominus per prophetam præcipit, quantum patitur humana fragilitas, mundas et cordis et corporis manus exhibeat: ne uno eodemque gladio et dantem et accipientem munus interimat, et illicito munere polluens manus, aliis se benedictionem credat tribuere, cum fuerit jam propriæ iniquitati substratus, et sua nihilominus ambitione captivus. Ab eis etiam quos ordinaverit indebitum et contra sacras regulas sibi sacramentum fieri non compellat. Sed sicut Dominus, præsciens nonnullos accepti sancti Spiritus donum in usum negotiationis inflexuros, præcepit dicens: *Gratis accepistis, gratis date* (*Matth. xx*). Quod *gratis*, id est sine ulla venalitate dati vel accepti, aut etiam promissi vel sperati muneris, quantum ex nobis est, (cæterum ipse viderit habens conscientiæ suæ testem, quem habebit et iudicem) per ministerium nostræ exiguitatis accepit, suis etiam comministris gratis conferat, sciens ex

A Evangelio quid Redemptor noster per seipsum fecerit: videlicet quia ingressus templum cathedras vendentium columbas evertit. Columbas enim vendere, est de Spiritu sancto, quem Deus omnipotens consubstantiali sibi per impositionem manuum hominibus tribuit, commodum temporale percipere. Quod qui agere præsumit, suam Deo iudice cathedram ipse evertit, et quos cum precio ordinat, provehendo agit ut secum et ipsi simoniaci hæretici fiant; et pro benedictione maledictionem a beato Petro apostolorum principe Simoni Mago, qui donum sancti Spiritus pretio emere voluit, juste illatam, una cum ipso, per ipsum, a quo non benedicuntur, sed maledicuntur, iudicio ejusdem Spiritus sancti suscipiant. Et quoniam, sicuti comperimus, quidam diversis ad inventionibus turpia lucra sectantes, quod ministris altaris minime convenit, defunctis presbyteris, juxta quod didicerant viduatas ecclesiæ facultates habere, exenia pro his obtinendis exegerunt; et gradus ecclesiasticos eis non tribuebant antequam illis eadem exenia persolverentur; et synodos temere frequentabant, ut factione ministrorum suorum diverso modo denarios quasi pro eulogiis acciperent; et, quod dictu nefas est, etiam pro sacri chrismatism dispensatione, vel de ecclesiarum consecratione, quæcunque emolumenta ingenio caperent; et necesse est ut contra pestifera morborum genera, salubria medicamentorum quæramus experimenta: sicuti et de manus impositione, ita et de hac simoniacæ hæreseos ingeniosa et male studiosa collatione, quiddam eum accipere interdiximus, monentes illum attendere comminationem Domini per prophetam dicentis: *Ne forte egrediat ut ignis indignatio mea et succendatur, et non sit qui extinguat propter malitiam studiorum vestrorum* (*Jerem. xxi, 12*). Unde iterum iratus dicit: *Visitabo super vos juxta fructum studiorum vestrorum* (*ibid., 14*).

Verbis quoque beati Gregorii eum monemus, illique interdiximus, ut sacerdotes per suam parochiam, quoties ad consignandos infantes egressus fuerit, ultra modum gravare minime debeat, nec summam collationis, qua sui prædecessores, qui hoc bene misericorditer ac rationabiliter, atque sacris constitutionibus exsecuti sunt convenienter, contenti fuerunt, excedat. Et de capellis antiquitus subjectis ecclesiis, non æqualem, sicut de principalibus ecclesiis, collationem exigat; sed principalis ecclesia, cum sibi subjectis capellis, debitam et antiquitus consuetam collationem conferat. Principales vero ecclesias aliis ecclesiis loco capellarum non subiciat: quia secundum sacros canones non licet episcopis parochiam antiquitus constitutam inconsulte confundere atque dividere. Ne mansionaticos suis amicis aut suis hominibus a presbyteris parari faciat. Ne etiam quasi ad receptionem regis, vel legationem, aut ad ornatus suæ ecclesiæ faciendos, adjutoria quasi petendo, potius autem exigendo, denarios vel caballos, aut verres, aut friskingas, aut ad iter aliquod paraveredos, aut alia quælibet accipiat, id est

ripiat. A quo verbo, *accipere*, aves, quæ alias aves capiunt, accipitres nominantur : cum episcopi suos subditos non ut accipitres capere, sed sicut gallina pullos suos fovere, et quosque infirmos ut peritus medicus convenienti medicamento ac tempore debeant curare; et quos curare non poterint, aut patienter tolerare, aut regulariter usque ad correctionem sustinentes a sano corpore submovere. Regulam siquidem, quæ de quarta parte reddituum ecclesiæ, juxta consuetudinem aliarum regionum, ita ut est scripta intelligat, et non prave illam interpretans, perinde in his regionibus quæ sunt presbyterorum contra regulas sacras diripiat. Unde si qua fuerunt gravamina illis imposita, temperet : quia et in præsentis et in futura vita sibi prospiciet, si eos, qui sibi commissi sunt, sine gravamine conservare studuerit. Ministros vero, id est archipresbyteros, et archidiaconos, secundum quod providere, Domino inspirante et cooperante, valuerit, tales constituat, qui oderint avaritiam, et non diligant munera, nec sequantur retributiones; neque pro ordinandis clericis, vel reconciliandis pœnitentibus, munus accipiant, et ipso munere eum corumpere satagent. Et presbyteros in paratis et xenis indebitis non affligant : et sicut supra de episcopo diximus, per diversas petitiones, ut illis adjutorium faciant, quæ sunt presbyterorum unde ipsi vivere, et hospites recipere, et suas ecclesias continere debent, colludio quocunque diripiant, et ut eisdem ab inquisitione sui ministerii parcant, et pro infamia eorum calcanda vel cooperienda quocunque emolumentum non accipiant. Et si agentes talia ministros repererit, in ministerio manere non sinat, et canonica invectione corripiat. Ipse quoque pro constituendis ministerialibus ecclesiasticis, videlicet œconomis, id est ecclesiæ facultatum dispensatore, archipresbyteris et archidiaconis, in quibus fidei sinceritatem, et orobos mores ac religiosam vitam debet eligere, præmia non constituat : quia ecclesiasticum obsequium, quod male comparaverint, accipientes munus a subditis, pejus venundare curabunt. Nec pro quocunque judicio contra sacras leges, neque super innocentem contra veritatem, pretium ullum accipiat. Nec etiam odio vel gratia, livore aut iracundia, quantum scierit et poterit, a judicio recto declinet, dicente Domino : *Non facies quod iniquum est, nec injuste judicabis. D* *Juste judica proximo tuo, et juste quod justum est exsequaris (Levit. xix).* Juste namque quod justum est exsequitur, qui in assertionem justitiæ eandem ipsam justitiam quærit.

Pro baptizandis denique infantibus, vel pro sepultura, obaudiens decreta beati Gregorii, pretium de terra concessa putredini quemquam non permittat in parochia sua quærere, et de alieno velle facere luctu compendium. Sed si quando aliquem quisque sepeliri in commisso sibi loco concesserit, siquidem parentes ipsius proximi, vel hæredes, pro luminaribus, vel in eleemosyna defuncti, sponte quid offer-

re voluerint, accipere non prohibeat : peti vero aut exigi aliquid omnimodo vetet : ne, quod valde irreligiosum est aut venalis, quod absit, dicatur ecclesia, aut de humanis sacerdotalis religio videatur mortibus gratulari, si ex eorum cadaveribus studuerit quærere quolibet modo compendium.

Ab omni quoque avaritia, et usura, ac turpi lucro, secundum sacros canones, et ipse abstineat, et ministros ecclesiæ abstinere faciat, et etiam laicos abstinere suadeat, se autem, et sibi commissos ministros ecclesiasticos, solerter, sollicitè custodiat, ne contra sacros canones conductores vel procuratores alienarum possessionum fiant. Nec turpi negotio, aut inhonesto lucro victum quærant. Neque secularia negotia sub cura sua suscipiant, B Deique ministerium parvipendentes, per secularium domos non discurrant, nec propter avaritiam, gratiæ, aut honoris, vel pecuniæ patrimoniorum sollicitudines, aut alienorum testamentorum defensiones assumant, nec fidejussionibus inserviant.

A familiaritate nihilominus ac conturbatio illicite et vetito feminarum se et comministros suos, sed et a tabernis, secundum sacras regulas, ecclesiasticos ministros faciat abstinere, attendat quoque quod beatus Job dicit : *Si adversum me terra mea clamat, et cum ea sulci ejus deflent, si fructus ejus comedi absque pecunia (Job. xxx, 38).* Unde beatus Gregorius (*Moral. in Job, lib. xxii, cap. 15*) : « Omnis, inquit, qui præest, si perversa in subditos exercet, contra hunc terra clamat, et sulci deflent quia contra ejus injustitiam rudes quidem populi in murmurationis vocibus erumpunt : sed perfecti quique pro pravo ejus opere sese in fletibus affligunt. Fructus enim terræ absque pecunia comedere est, ex ecclesia quidem sumptus accipere, sed eidem debitu prædicationis pretium non præbere. De qua scilicet prædicatione auctoritatis voce dicitur : *Oportuit te committere pecuniam meam nummulariis, et veniens ego recepissem utique quod meum erat cum usura (Matth. xxv, 28).* Terræ igitur fructus absque pecunia comedit, qui ecclesiastica commoda ad usum corporis percipit, sed exhortationis ministerium populo non impendit, Exigit quod suo debetur corpori, et non impendit quod subjectorum debetur cordi. » Non igitur redemptionem aut pretium de collatione presbyterorum episcopus debet exigere, et alimenta ecclesiastica mutus manducare. Et cum Dominus prædicatoribus præcipiat ut intrantes in domos eorum quibus pacem prædicant, illa edant et bibant quæ apud illos sunt, per parochiam prædicando ac confirmando pergens episcopus, non debet superfluas pensiones in pigmentis et aliis quibusque a presbyteris quæ non habent requirere, et talia, quæ forte in domo sua non accipit, voluptati potius serviens quam necessitati, exigere, et suis parcens opibus, de superflue acceptis et venditis ditescere. Nec ideo dedet prædicare, ut sumptus accipiat; sed ideo sumptus accipere, ut sufficiat prædicare.

Ecclesias quoque in proprietatibus liberorum

hominum ac coheredum consistentes, ut suæ tradantur ecclesiæ, non debet cogere : sed secundum synodalia et imperialia capitula, quæ regularia esse probat Ecclesia, satagat quatenus dotis immunitates, sicut cæteræ ecclesiæ, auctoritate regis habeant, et ipsæ ab eisdem liberis hominibus potiantur. Talemque se, cooperante Domino, in cunctis exhibeat, ut sacrum ministerium non vituperet : qui etiam ab his qui foris sunt testimonium bonum juxta apostolicam doctrinam habere debet. Nam cujus vita despicitur, restat ut et prædicatio contemnatur : et cum pastor per abrupta graditur, solet fieri ut ad præcipientium grex sequatur. Et ne quemquam ecclesiastici ordinis ministrum, occasione turpis lucri, ut aliquid ab eo absoluto capiat, contra sacras regulas excommunicet, inhibemus. Quia, ut sanctus Augustinus, exponens sententiam Pauli apostoli : *Auferite malum ex vobis (I Cor. v)*, demonstrat, non temere et quomodolibet, sed per judicium auferendi sunt mali ab ecclesiæ communione. Multo magis autem cavendum est, ne sine regulari judicio ministri ecclesiæ officio suo priventur. Quapropter, sicut beatus docet Gregorius, si quid de quocunque clerico ad aures suas pervenerit quod cum juste posset offendere, facile non credat, nec ad vindictam illum res accendat incognita, attendens quod scriptum est : *Causam quam nesciebam, diligentissime investigabam (Job xxix, 16)*. Et præsentibus senioribus Ecclesiæ suæ diligenter veritatem perscrutari modis omnibus studeat ; et tunc, si qualitas rei poposcerit, canonicæ districtio culpam feriat delinquentis, secundum ordinem a sacris regulis propositum. Et ut cuncta brevi cingulo perstringamus, nihil per contemptum contumaciter faciat, vel fieri in parochia sua permittat, quantum ex ipso fuerit, quod sit evangelicæ veritati, et apostolicæ traditioni, aut sacris regulis inimicum. Si autem factum contigerit, arguendo, obsecrando, increpando secundum quod cuique viderit expedire, juxta traditionem majorum, quantum potuerit, emendare procuret.

Pastoralem siquidem regulam beati Gregorii mente, ore, ac manu, quantum sibi Dominus scire ac posse contulerit, in cunctis sequi procuret. Ministerium itaque, ornatum, vel patrimonium, atque redditus vel facultates ecclesiæ, prout leges divinitus promulgatæ præfigunt, studeat conservare, ampliare, augere, vel dispensare, et monasteriis in parochia sua sitis canonicam providentiam gerat, et quantum ex ipso fuerit, debita privilegia, et antiquam ac regularem consuetudinem servet. Ordinationes vero presbyterorum, et sacrosancti baptismatis sacramentum secundum traditionem ecclesiasticam studeat agere.

Cui etiam licet, inspirante divina gratia, abundans absit doctrina, tamen pro nostri officii debito, ex serinio sanctæ metropolis Rhemorum documentum dare studebimus qualiter se, cooperante Domino, morum probitate et doctrinæ studio debeat gerere. Ipsum vero non nescium quod totius provinciæ cura

A per sacros canones sit metropolitano commissa, ad eandem metropolim suam, sicuti ad matrem, ut ex ejus catholicis uberibus salubrem sugat doctrinam, humiliter, ac sedulo, atque obedienter monemus recurrere. Et non amplius quam sibi per sacras regulas est concessum, indebite usurpare : cum tanto charitatis ac humilitatis glutino præceptis salutaribus ad invicem sinus connexi, ut dicente sibi mandato divino : *Interroga patrem tuum, et annuntiabit tibi ; majores tuos, et dicent tibi (Deut. xii, 7)* ; et nobis : *Rectorem te posuerunt, noli extolli, sed esto in illis quasi unus ex ipsis (Eccli. xxxii, 1)* ; et : *Qui major est vestrum, erit minister vester (Matth. xxiii, 11)* : obedientibus scilicet ministrando paternam doctrinam, et inobedientibus, quod majoris est, regularem charitatis correptionem : nos fratrum et consecratorum vestrorum salubribus debeamus uti consiliis, et ipsi obedire paternis ac regularibus monitis. Hinc ergo, et hæc et alia præcepta salubria observanti, devotis animis vos obsequendo obedire oportet, ut irreprehensibile placidumque fiat corpus Ecclesiæ, per Christum Dominum nostrum, qui vivit et regnat cum Deo Patre omnipotente, in unitate Spiritus sancti Deus, per omnia sæcula sæculorum. Amen.

B Hinmarus sanctæ metropolis Ecclesiæ Rhemorum episcopus, et plebis Dei famulus, et venerabilis fratris Hedenulfi in sancta Laudunensi Ecclesia, favente Dei gratia, ordinator, his litteris canonicis, et ordinato et electoribus ipsius publice datis, anno Incarnationis Dominicæ 877, anno autem regni domni Caroli imperatoris xxxvii, et anno imperii ejus ii, subscripsi.

C Odo Belgivacorum episcopus, subscripsi.
Raginelmus Noviomagensis episcopus, subscripsi.
Joannes Cameracensis Ecclesiæ episcopus, subscripsi.

Willebertus Catalaunorum humilis episcopus, subscripsi.

Hildeboldus Suessionensis Ecclesiæ episcopus, subscripsi.

Geroldus Ambianensis Ecclesiæ episcopus, subscripsi.

Hadebertus Silvanectensis Ecclesiæ episcopus, subscripsi.

EPISTOLA LIII.

D AD FRANCONEM TUNGRENSEM EPISCOPUM.

Fratrem quemdam commendat.

(Ibid.)

Reverentissimo et sanctissimo fratri FRANCONI Ecclesiæ Tungrensis episcopo, HINCMARUS, sanctæ metropolis Rhemorum Ecclesiæ episcopus, optat præsentem et perpetuam salutem.

Noverit dilecta charitas vestra quia hic frater nomine Flodulfus ideo nostram accessit ad humilitatem, quia in nostro fuit loco nutritus atque educatus. Quamobrem dirigimus ad vos has litteras, ut libentius cum charitas vestra recipiat. Et quia sub regimine

vestro abhinc in ante gradus accipere et Deo militare desiderat, ut sciatis eum bonis moribus præditum, litteris sciolum atque ingenio capacem, et vestro cupientem regimini esse subditum, in vestraque parochia degere et monitis atque ordinationibus vestris diebus vitæ suæ libenter obtemperare. Et ut hæc parva epistola a vestra dilectione libentius reciperetur atque firmum crederetur, sigilli nostri ex imagine B. Remigii pontificis impressione signavimus. Omnipotens Deus vos per multa curricula annorum conservare dignetur. Amen.

Data IV Kal. Maii, anno XIII nostri episcopatus.

EPISTOLA LIV.

AD EUMDEM.

Illi Gisebrindum presbyterum, data epistola formata commendat.

(Ibid.)

Notum sit vestræ almitati et omnibus hominibus, licentiam dedisse nobis parochia vestra, et ubicunque voluerit presbyterum, quem ordinavi in Rhemis civitate, nomine Gisebrindum, ministerium sacerdotale fungere, si vestra adfuerit sacra voluntas, et aliorum ubi illi congruum perspexerit bonorum hominum. Qua de remissi ad vos hos apice, secundum petitionem supradicti presbyteri, ut et vos consensum ei et licentiam detis ministerium presbyteratus fungi, et ut certius cognoscatis, secundum auctoritatem canonicam formatam fecimus epistolam, et ei dedimus, Græcaque elementa sibi annotavimus H. X. Y. Nomen meum H litteram primam, et nomen vestrum secundum annotamus litteram O, et civitatis meæ litteram tertiam M, et vestræ quartam F. Valeat vigeatque vestra proprietas in ævum optamus venerande.

H. T. P. X. H. O. M. F. Y. II. CCCC. XL. DC. XC. III. LX. DCC. VIII.

EPISTOLA LV.

AD EPISCOPOS PROVINCE LUGDUNENSIS.

De Carlomanno ejusque complicibus excommunicandis.

(Apuđ Sirmond.)

HINCMARUS, Rhemorum episcopus ac plebis Dei famulus, cum Rhemorum dioceseos venerabilibus consacerdotibus nostris, REMIGIO, reverentissimo Lugduensium archiepiscopo, et ipsius dioceseos venerandis episcopis salutem.

Carlomannus, domni nostri Caroli regis gloriosi D carne filius, in diocesi Rhemorum Spiritu sancto regeneratus, et a patre sacro altari oblatum, religiosi divini servitii obsequiis mancipandus ac in clericum tonsus, in diocesi vero Senonensi, et in parochia Meldensi ab Hildegario ejusdem civitatis religioso episcopo per singulos gradus usque ad ordinem diaconatus proventus, nuper a patre, post plurima benignitatis ac beneficentiæ dona sibi collata, fuga lapsus congregavit secum plurimos filios Belial, qui inaudita nostris temporibus mala in parochiis dioceseos Rhemorum exercuerunt, in rapinis et deprædationibus, et homicidiis atque adulte-

Artis, et ecclesiarum violationibus, aliisque quam plurimis flagitiis ac facinoribus, quæ diabolica instigatione et humana crudelitate possunt patrari. Quem pie domnus noster rex Carolus, sed et complices ejus benigne ac misericorditer, sicut in mandato quod eis direxerat potestis relegere, quater studuit revocare. Verum et ego Hincmarus Rhemorum episcopus, illum ac suos satellites per meipsum ore ad os ter alloquens, et postea quarta vice per comministrum nostrum, una cum quibusdam collegis et coepiscopis nostris, eum et suos complices publice commoneri faciens, quantum mihi Dominus dedit, et suavitatem regni cœlestis, et æternorum tormentorum terrorem illis proposui, et quam gravissime Deum ipse offenderit in patris sui ac sanctæ Ecclesiæ totiusque Christianitatis læsione, atque raptorum a se congregatorum consensione atque favore ostendi, et si mala cœpta desereret, et ad patrem suum rediret, quam benigne illum et ecclesiastica pietas et paternus affectus debuisset recipere demonstravi, et quæ clementia illis qui cum eo erant offerebatur innotui, et si hæc negligeret, vel despiceret, atque in apostasiæ suæ cœpta obstinatione perseverare ipse et complices sui deligerent, inculcavi eis qualiter post hanc quartam conventionem, secundum præceptum Domini sicut ethnicus et publicanus forent nobis habendi, et gladio spiritu quod est verbum Dei episcopali auctoritate secundum sacros canones, spiritu Dei conditos, et totius mundi reverentia consecratos, juxtaque apostolicæ sedis decreta pontificum, ut revera apostatæ, a corpore et sanguine Domini, atque unanita corporis Ecclesiæ omnium videlicet fidelium Christi societate, essent modis omnibus ascidendi. Quem, sed et quosdam suos, nec intentatæ pœnæ terruerunt, nec promissæ dulcedines invitaverunt. Et ideo, quod flentes dicimus, gementes denuntiamus, complices illius, qui sunt de Rhemensi diocesi, et nostræ sunt curæ commissi, ac in nostris parochiis tanta et talia, ut præmissimus, crimina commiserunt, et toties commoniti respiscere a cœptis malis, et ad sinum piæ matris Ecclesiæ redire ut satisfacerent noluerunt, sed in pejus, quod dictu nefas est excreverunt, quia sicut dicit Apostolus, hujusmodi regnum Dei non possidebunt, et cum talibus vetat vel cibum sumere, judicio sancti Spiritus a corpore et sanguine Domini, et Christianorum societate atque consortio segregamus, et episcopali auctoritate, post v Idus Mart. præsentis quartæ indictionis, si se antea non correxerint, secernimus, donec si forte, juxta eumdem Apostolum, vos respiciens dei illis Deus pœnitentiam, ut ad ejus voluntatem respiscant a laquies diaboli, a quibus capti tenentur, et per dignos pœnitentiæ fructus satisfaciant Ecclesiæ quam læserunt, ea videlicet conditione ut secundum formam mystici Nicæni concilii et Africæ provinciæ canonum, juxtaque apostolicæ sedis decreta pontificum, Siricii, Innocentii, Cælestini, Leonis, ubicunque fuerint, ultima pœnitentia, et necessarij viatici

communio petentibus non negetur. Eos autem qui de Rhemorum diocesi non sunt, nec spectaliter sunt nostræ curæ commissi, et memorata mala in nostris parochiis commiserunt, ab eisdem nostris parochiis, post v Idus Martias præsentis quartæ indictionis, si se antea non correxerint, excommunicatos esse decrevimus, eo tenore ut nullam participationem in eis, vel in communione ecclesiastica, vel in societate Christi fidelium nobis commissorum habeant, quia nulla participatio est Christi cum Be-

Alia, nec pars esse debet fidei cum infidei, donec consilio et iudicio eorum quorum interest, Deo et sanctæ Ecclesiæ satisfaciant. Et quia essentialiter ac summe bonus pastor, qui animam suam posuit pro ovibus suis, neminem vult perire, et venit querere et salvum facere quod perierat, ostendit nobis viam quam sequamur, et formam cui imprimamur, decernimus, ut si forte in præscriptis parochiis nostris cuiquam illorum imminens urgentis mortis....

HINCMARI

ARCHIEPISCOPI RHEMENSIS

OPUSCULA ET EPISTOLÆ

QUE SPECTANT

AD CAUSAM HINCMARI LAUDUNENSIS.

EPISTOLA HINCMARI RHEMENSIS

AD HINCMARUM LAUDUNENSEM.

De Nivino ejusque fratre Bertrico, quos ut sceleribus infames e parochia Rhemensi ejecerat.

(Apud Sirmond., ex codice Laudunensi.)

HINCMARUS Rhemorum episcopus HINCMARO coepiscopo nostro salutem.

Nivinus in parochia mea sacrilega infamia est difamatus de quadam sanctimoniali, ab infantia in monasterio Deo dicata, et a sacerdote velata, quod clanculo eam prius corruperit, et postea ab ipsius monasterii claustris furtim educi fecerit, et in parochia mea aliquandiu multis scientibus habuerit, ac demum latenter in alteram provinciam abduxerit. Unde recogitandi, sive ad noxam confitendam, sive ad infamiam suam purgandam, ei legales ac regulares consilio et consensu clericorum ac nobilium laicorum nostrorum inducias dedi: sed ipse nec confiteri peccatum, nec ab infamia se purgare legaliter acquievit. Quapropter, quia non est de mea provincia, illum a mea parochia excommunicavi, donec aut confiteretur, aut se ab objectis purgaret. Nunc vero dici a multis audio quoniam in altera provincia res proprietatis suæ in pretium ab eo accipias, et illi res ac facultates ecclesiasticas, quas in ordinatione episcopali ad regendum et regulariter dispensandum sine pretio suscepisti, ad turpis lucri præmium in beneficium dones. Quod satis superque sanctarum Scripturarum auctoritatis contrarium, et canonum est sacrorum decretis adversum: et si ita est, ut passim a multis et etiam publice in publicis placitis divulgatur, quantum periculum ac detrimentum inde incurras, quantumque vituperationem sacerdotali ministerio ingeras, si sanum sapis

B intelligis. Bertricum etiam, ipsius Nivini fratrem, frequentissime de adulteriis et aliis incestis pollutionibus regulariter correptum, et non correptum, et diutius toleratum, atque ut a pravitatibus suis se cohiberet expectatum, quoniam a suis iniquitatibus eum coercere non potui, quia non est de mea provincia, a mea parochia regulariter exire cum suis præcepi. Quæ tibi, sicut sacri præcipiunt canones, nota facere procuravi. Data Idibus Februarii præsentis tertie indictionis.

EPISTOLA HINCMARI LAUDUNENSIS

AD HINCMARUM RHEMENSEM.

Purgat Nivinum sequæ ipsum in ejus negotio, et Hinomarum Rhemensem perstringit.

(Vide Patrologiæ tom. CXXIV, col. 979.)

EPISTOLA HINCMARI RHEMENSIS

AD HINCMARUM LAUDUNENSEM.

Intercedit pro Hadulfo presbytero.

(Ex Actis prov. ecel. Rhem.)

HINCMARUS, Rhemorum episcopus, HINCMARO dilecto fratri et venerabili coepiscopo nostro, salutem.

Frater Clarentius communis compresbyter noster ad me veniens ex tua parte mihi dixit, quia fratri Hadulfo compresbytero nostro missaticum tuum ad Witgarium episcopum de civitate Augustibure (*Augsbourg*) pro libro Paterii et aliis quæ tibi placuerunt commiseris, de quo missatico non se excondidit. Postea vero audisti quod in alias partes ire vellet, et misisti pro eo mandans illi per clericum tuum ex divina et episcopali auctoritate, ut ad te rediret, et direxisti homines tuos qui eum, si redire nollet, ad te reducerent. Veniens vero ad tuam presentiam, non sic humiliter tibi respondit sicut debue-

rat, et tibi placuit; et rogasti eum, ut iret Laudunum, et expectaret ibi usque dum tu illuc venires, et coram fratribus cum illo rationes haberes. Isdem autem Hadulfus perrexit in ecclesiam quæ est in Anisiaco (*Anisy*), ubi et tu morabaris, et projecit se ad orationem ante altare. Tu vero misisti post eum fratrem Clarentium, et diaconum tuum cum eo, et jussisti eis ut interdicerent Hadulfo ex divina et episcopali auctoritate ne in parochia tua communicaret; et Hadulfus missis digitis suis in auriculas ab eis in viam suam perrexit. Postea autem venit ad me præscriptus Hadulfus, et similiter ut Clarentius de missatice sibi injuncto et reversione sua ad te mihi dixit: de contumaci autem responsione non similiter, sed et excommunicationem ex parte tua, antequam ego illi dixerim, se non audisse professus est; et voluit ire Laudunum, quo una cum missis tuis præmisit hominem suum, et clausæ sunt obviam illi januæ ecclesiæ et porta claustris; et postea nihil de his quæ in mansione sua habuit obtinere prævaluit. Nunc autem petit me intervenire apud te, quatenus ei liceat communicare in tua parochia, et locum ac mansionem suam, et ea quæ apud te proserveriat pleniter habere, et cum pace canonice tibi servire. Et si hoc tibi grave fuerit, habeat tantum communionem in parochia tua, et liceat ei sub religione, ubicumque locum sibi aptum invenire potuerit, conversari, et sit tibi fidelis. Propterea, sicut tua prudentia novit quam sanctificati insistent dies, in quibus præcipue pax peti, et pax petentibus dari, etiam non petentibus pax et indulgentia debet concedi, et omnes colligationes impietatis dissolvi, et fasciculi deprimentes absolvi, sed et imperia dura curvari, remanda mihi præsentialiter litteris tuis, et per aliquem communioni ministrorum nostrorum, de Ecclesiæ Laudunensis canonica qualiter tibi de ipso fratre Hadulfo placet: utrum ei communionem tuæ parochiæ, et locum, et mansionem, ac ea quæ apud te proserveriat eum pace tua pleniter habere, et tecum canonice conversari valeat, an ei concessa communionem in parochia tua, ubicumque locum sibi aptum invenire potuerit, ut sub religione degat, hoc cum tua licentia facere valeat, et ei fidelitatem suam, quam erga te habet, ubicumque potuerit devote exhibeat. Data XIII Kalend. April., indicatione III.

EPISTOLA HINCMMARI LAUDUNENSIS

AD HINCMMARUM RHEMENSEM.

Hadulfo in Hincmmari gratiam pristinæ mansionis locum permittit; communionem suam nondum concedit.

(Vide Patrologiæ tom. CXXIV, col. 985.)

EPISTOLA EJUSDEM

AD EUMDEM.

De senati clerici ordinatione, deque carcerali sua detentione, et proclamatione ad sedem apostolicam.

(Vide ubi supra, col. ead.)

COLLECTIO EX EPISTOLIS ROMANORUM PONTIFICUM.

Ab Hincmmaro Laudunensi Hincmmaro Rhemensi apud Gundulfi villam missa per Wenilonem archiepiscopum.

(Vide Patrologiæ tom. CXXIV, col. 1001.)

OPUSCULUM LV CAPITULORUM

ADVERSUS

HINCMMARUM LAUDUNENSEM.

(Apud Sirmondum.)

INDEX CAPITUM.

In epistolæ capite ostenditur quæ mihi mandavit, et quæ illi remandavi, et quam insulsa illius mandato fuerit, dicens quod ego illi insinuavi, ut suam excommunicatam parochiam, et non attendit qualiter seipsum illaqueavit.

B CAP. I. Redditur ratio de capella, de qua mihi mandavit.

CAP. II. De administratione palatii et abbatia adeptis contra canones: et quoniam vocatus ad episcopi ordinationem non venit, et quid inde correptus respondit, et de irregulari excommunicatione Amalberti.

CAP. III. De irregulari excommunicatione in diversorum episcoporum parochianos intentata.

CAP. IV. De hoc quod mandavit, ut scripta pro dissolvenda illicita excommunicatione illius, sibi et parochiæ suæ directa, incenderem.

CAP. V. De eo quod gloriari dicitur quia mihi potest resistere, et me audeat contemnere: et quia duo mea iudicia a sede apostolica sunt cassata, mihi non debeat respondere.

CAP. VI. De eo quod dicitur solere dicere, quoniam degradari debeam, quia in sua parochia solvi quæ ipse ligavit.

CAP. VII. De eo quod non ecclesiastico sed sæculari consulto a sibi impetitis purgari quæsit.

CAP. VIII. De epistolis domno regi et mihi pro reclamatione sua a domno apostolice missis.

C CAP. IX. De monacho a se excommunicato.

CAP. X. De compilatione ex epistolis apostolicæ sedis mihi in quaternunculis missis, et verbo *promulgo*, et capitulo Leonis papæ.

CAP. XI. Quod latius de sacris ordinibus, et canonum disciplinis, ex orthodoxorum verbis et sensibus sit dicendum.

CAP. XII. Qui sint ordines in cælo, et in Ecclesia, et in terrena republica.

CAP. XIII. Quod si ordo generalis et omnibus episcopis, non tamen communis est dignitas omnibus.

CAP. XIV. Quod et in republica, ad instar cælestis militiæ, diversi sint ordines.

CAP. XV. De paternitatibus et incolatibus a Deo constitutis in cælo, ad quorum instar sunt paternitates, et incolatus divinitus distributa in Ecclesia et in republica.

CAP. XVI. De certa metropoli Rhemorum provincia, et castro Lauduno. Et quia licet tribus principalibus sedibus episcopi tres præsideant, una tamen sedes sunt Petri. Et de epistola Hørmisdæ sancto Remigio directa, et quod sanctus Remigius ordinans episcopum in castro Lauduno, in subsellio suæ metropolis consedere, et inter sedes computari fecit.

D CAP. XVII. De rebellionem minorum sacerdotum erga potiores et in Veteri et in Novo Testamento: et de metropolitanis, et archiepiscopis, et primatibus, ac patriarchis, et de apostolica sede, et de Constantinopolitana Ecclesia rebellante adversus apostolicam sedem, et usurpante sibi nomen universalitatis, et quid de eodem nomine sanctus Gregorius papa ad diversos scribens decreverit.

CAP. XVIII. Quod humilia videre non possit albuginem habens in oculo, id est arrogantiam in mente, et qualiter insanæ mentis homines per indiscretionem in Scripturis sanctis erraverint.

CAP. XIX. Quod similiter in sanctarum traditionum sanctiones homines vesani male intelligentes erraverint, et delerantes vocum novitates per diversas occasiones se ab Ecclesia separaverint.

CAP. XX. Qualiter caveat ne scandalum sibi sumat in intelligentia Scripturarum atque sacrorum canonum, et quomodo propagata sit processu temporum doctrina Eccle-

siaslica. Et de epistolis pontificum apostolicæ sedis ante sacra concilia ad diversos pro diversorum consolatione datus; et quod sicut in publicis legibus quedam sint abrogata, et quedam immutata, quedam etiam superaddita, ita et ex decretis catholicorum, pro tempore et ratione atque necessitate prolatis, postea quedam abrogata vel immutata fuerunt: et de quibusdam formis canonum; et de eo quod S. Augustinus ad Bonifacium de penitentia scripsit: et de diversitate constitutionum in prædictis epistolis, unde suam compilationem confecit. Et de sex generalibus synodis, et de nominibus universitatibus. Et quod de canonibus Gallicanis apostolica sedes senserit; et de privilegio ac clavibus regni cælorum beato Petro traditis, et in eo omni electorum Ecclesie. Et de epistolis Iulii, et Felicii, et Sardiensis Concilio: et inde omnino sit exorta plura quam viginti fuisse capitula in Nicæno concilio facta.

CAP. XXI. Qua ratione quedam ex his quæ in epistolis antiquorum apostolicæ sedis pontificum scripta inveniuntur, a successoribus eorum sua non fuerint, et quedam in decretis eorum posita, et conciliis inter canones sacros inveniuntur assumpta. Et quod non nisi viginti capitula, quæ habemus, in Nicæno concilio fuerint constituta.

CAP. XXII. De quatuor capitulis a beato Gregorio in epistola ad Theophilum patriam memoratis, de quibus quedam imposturans hic frater noster prave interpretatus est, sicut quondam et alii fecisse leguntur, unde in generali synodo revicti et degradati fuerunt.

CAP. XXIII. Quod apostolica sedes partem noni capituli, cum recapitulatione ipsius in cap. 17, non recipiat, sicut beatus Leo papa demonstrat.

CAP. XXIV. Quod ea quæ inde apostolica sedes refutavit, quidam relevare ac restituere conati sint, allegantes quoniam synodus Chalcedonensis, aut rata in totum tenebitur, aut in totum annullanda ducetur: et quod apostolica sedes fidem Constantinopolitanæ concilii temporibus Damasi papæ et Gratiani principis celebrati recipiat, canones autem ipsius concilii non recipiat. Et quod canones Chalcedonensis concilii, præter illud unum capitulum in 17 recapitulatum, recipiat. Et de canonibus qui dicuntur Apostolorum; et de sententiis, quæ dicuntur ex Græcis et Latinis canonibus, et synodis Romanis, atque decretis præsumuntur ac dum Romanorum, collectæ ab Adriano papa, et Angelramno Metensium episcopo datæ; et de præfatione Isidori in libro epistolarum. Et de eo quod dicit hic frater noster quia non ego solum sapio canones, et quia me reprehendit, quoniam dico ante me cognovisse canones quam ipse natus fuisset: et quia necessaria posset quærere quam talia quæ sibi ad suam intentionem non sunt profutura. Et de schedula quam illi in Gundulfi villa per domnum Wenionem direxi; et de eo quod dicit: Si quis contra Romanorum pontificum decreta obloqui præsumperit, et quod, sicut ipse dixit, ordine præpostero suam compilationem exerceat, et ego coartus sum anfractus ejus vestigando mille viis, ut dicitur, explicare.

CAP. XXV. Damelis explicatur sententia dicentis: *Pertransibunt plurimi, et multiplex erit scientia* (Dan. XII). Et de eo quod beatus Gelasius dicit in Catalogo, in quo descripsit qui libri ab Ecclesia catholica recipiantur, et quam differentiam faciat inter sacra concilia, et memoratas epistolas pontificum apostolicæ sedis ad diversos pro diversorum consolatione datas; et quod Apostolus de lege veteri dicit, et de cæremoniis ipsius legis veteris. Et quid sanctus Augustinus ex verbis Cypriani de consuetudine dicat, et quam differentiam in libris de Baptismo demonstret inter epistolæ colloquium, quo istæ epistolæ apostolorum, et quibus agitur, condite sunt, et regionale ac plenarium concilium: et inter priora et posteriora concilia; et inter sacram Scripturam et episcoporum concilia; et de mystica Nicæna synodo, et quid de conciliis in aliis libris suis beatus Augustinus dicat.

CAP. XXVI. Adjectio ex supererogatione ponitur, quid de conciliis beatus Augustinus ad Januarium dicat, et quid inde in edicto Justiniani super quendam synodum dicatur. Et quid de Antiochena synodo beatus dicat Hilarius. Et quod de Nicæno concilio nihil a catholicis sit abrogatum vel immutatum. Et quid apostolicæ sedis pontifices de metropolitanis et suffraganeis episcopis decreverunt. Et quid beatus Ambrosius et Hilarius de privilegio Nicæni concilii dicant. Et quid inde passim Leo scriperit.

CAP. XXVII. De eo quod hic frater noster dicit in metrica titulatione compilationis suæ:

Responsum a vinclo rite nec exigier.

Sed et de eo quod mihi per comministros meos ad se directos mandavit, quia respondere de sibi mandatis non deberit. Et quid de obedientia suffraganei erga metropolitanum sacri canones et apostolicæ sedis decreverint.

CAP. XXVIII. De irregulari excommunicatione ab hoc fratre nostro intentata in ministris ecclesiasticis suæ parochiæ. Et qui aequaliter ab episcopo excommunicari debeant. Et quia sicut duo sunt peccata, et duo genera peccatorum, et duo sunt adventus Domini, unus occultus, alter manifestus, ita et duo sunt iudicia unum occultum, alterum manifestum, et duo iudicarii ordines, et qualiter ipsi duo ordines sint exsequendi.

CAP. XXIX. Quid sacri canones dicant de his qui a singulis episcopis provincialibus, pro incognitis causis primati provinciæ et cæteris episcopis, excommunicantur: quos ante cognitionem nullus debet præsumere, ut eos communioni societ. Et qualiter agendum sit erga eos, quorum causæ manifeste sunt et plurimis cognitæ, et irregulariter excommunicantur.

CAP. XXX. Qua ratione et auctoritate per sacras regulas solvit quæ irregulariter in parochia sua hic frater noster ligavit: et quia suæ excommunicationes, non Ecclesiasticæ alligationes, sed commoti animi sui, contra Evangelicam veritatem, et apostolicam atque sacrarum regularum constitutionem, maledictiones fuerunt. Et quos sacri canones excommunicatos ab aliis recipi non prohibent, vel quos recipi vetent. Et quid beatus Gregorius de episcopali alligatione decreverit, et quid inde sacri canones dicant, et quid leges, quas Ecclesia recipit, de eo, qui injuste excommunicatus decernat, et quid ex eisdem legibus sedes apostolica promulgaverit.

CAP. XXXI. De eo quod parvulos qui sæpe discrimine mortis periclitantur, baptizari prohibuit.

CAP. XXXII. De eo quod penitentiam denegari et viatico munere non subveniri morientibus contra Nicænos et Africanos canones, et decreta Siricii, et Innocentii, atque Cælestini, nec non et Leonis, præcepit. Et de capitulo Cælestini, in quo quiddam prætermisit. Et quid sanctus Gregorius de anathemate dixit in quocunque, qui contra sacrum Nicænum concilium et cætera veneranda concilia, eas personas ligant quas ipsa solvunt, et eas solvunt quas ipsa ligant; et sacrum Nicænum concilium dicit (*can. 13*): «*Ut generaliter omni cuilibet in exitu posito, et posenti sibi communionis gratia non denegetur.*» Et beatus dicit Gregorius (*lib. 1, epist. 24*): «*Quisquis aliud sapit anathema sit.*»

CAP. XXXIII. De eo quod sepulturam mortuis, sicut in petitione a Laudunensi Ecclesia mihi porrecta continetur denegari præcepit.

CAP. XXXIV. Quia de certis et manifestis causis, quæ in nullo nobis sunt dubiæ vel obscuræ, de quibus definitivas sententias, quæ nulla possunt ratione convelli, a sanctis Patribus promulgatas habemus, synodalem consultum, vel coepiscoporum provinciæ nostræ consilium vel consensum non debet expectare, nec a regulis præstitutis ulla aut negligentia aut præsumptione discedere, nec tiam sedem apostolicam inde requirendo inquietare, sed secundum ipsas definitivas sententias quæ sunt præstituta decernere, et ligare, vel solvere.

CAP. XXXV. Quod quicunque primates provinciarum a Domino constituti, et apostolica auctoritate confirmati sumus, sed et quippe catholici episcopi, de certis et manifestis rebus, de quibus expressa iudicia, et irrefragabilia atque inconvulse conservandas definitivas habemus sententias, secundum sacros canones, et decreta sedis Romanæ pontificum, quæque decernimus et iudicamus, apostolica sedes, et catholica Ecclesia apostolorum fundamentum fundata, ut in ordinandis coordinat, ita et in deernendis canonice concederit, et in iudicandis conjudicat. Et quod firmatis legibus, non de eis, sed secundum ipsas sit iudicandum. Et quod sua irregulari subscriptione hic frater noster ligare non valeat quod secundum sacros canones, et decreta sedis Romanæ pontificum, regulariter solvi. Et de his quæ ex Lucio, et diversis decessoribus ac prædecessoribus ejus, qui ante sacrum Nicænum concilium exstiterunt, in suis compilationibus misit. Et quod non bene intelligit, ut nullus metropolitanus absque cæterorum omnium provincialium episcoporum instantia aliorum audiat causas. Et de differentia inter auditionem, et auditionem vel audentiam, et de differentia inter nominationem, et nominationem atque cognitionem: et item de differentia inter cognitionem et agnitionem. Et quid sit columbas vendere, et quam grave periculum sit de impositione manus, quæ Spiritus sanctus accipitur, munus quocunque accipere.

CAP. XXXVI. De eo quod me replicare cogit necessitas, quia si quod male admisit corrigere detrectassem, a præstitutis regulis negligentia discederem, a quibus præsumptione ipse discessit. Et de capitulis papæ Leonis. Et qualiter se habeat ipsius irregularis subscriptio, de qua per singula quod sententium sit, ex sacris Scripturis et traditione majorum ponere me cogit necessitas. Et quia con-

tra institutionem beati Hilarii illic litteram postulavit, ubi sensus conscientiae non periclitabatur, et fecit subscribi quod salutare non est confiteri, si tamen sacro Nicæno concilio, et Romanæ sedis pontificum decretis post Nicænum concilium habitis, et ex sacris canonibus promulgatis, in aliquo est contrarium quod ab eo et suis complicitibus constat esse subscriptum.

CAP. XXXVII. Monetur ut contra Prophetam et Apostolum non sit prudens apud semetipsum; et de discretione in pace tenenda.

CAP. XXXVIII. Monetur, ut sacræ Scripturæ verba, sed et sacras regulas, sicut a sancto Spiritu, quo et sacræ Scripturæ sunt conditæ, intelligat.

CAP. XXXIX. Admonetur et observatur ut removeat a me dolorem, a se periculum, et ab utrisque nostrum a plurimis illatum improperium.

CAP. XL. De eo quod dicit quoniam quiddam illi de suis hominibus et de hominibus a rege ad Laudunum directis, contrarii actum est, et quod cum rex commendavit, hoc meo instinctu et consilio atque consensu patrum extiterit.

CAP. XLI. Quod si inde me recognoscerem, quia prima salutis spes est confessio, deinde dilectio, non dimitterem quin inde salubrem indulgentiæ medicinam expeterem, non pro humano, sed pro divino timore et fraterno amore.

CAP. XLII. De auferendo a nobis ambobus opprobrio a multis illato.

CAP. XLIII. De eo quod audio, illum me apud multos infamare, quoniam sacras Scripturas solem deturcare, et ad meum sensum inflectere, quod illam egisse jam quater possum ostendere. Et de epistola a me illi directæ, de duobus a mea parochia, quoniam de aliena erant provincia, excommunicatis, quia satisfactionem de quibus reputabantur in mea parochia agere contempserunt. Et de eo quod commemoratis dictis Anacleto, Victoris, Callisti, et Eleutheri, qui ante Nicænum concilium pro quorundam consolationibus, sicut dicit Gelasius, ad diversos suas epistolas direxerunt, subjunxit: « Ecce, Pater, qui canones recipiendi, venerandi, ac observandi habeantur, et quid de canonibus apostolicæ sedis pontifices senserint. » Et de eo quod posuit de proscriptione secundum leges accusatoris adversus accusatum: et de differentia inter admonitionem et de accusatione iudicationem, et inter hoc quod dixi, si ita est ut passim a multis et etiam publice in publicis placitis divulgatur: et quid de petitione porrecta senserit apostolica sedes: sed et de additione sine petitione vel accusatione, verum et de accusatione episcopi aut cujuscumque ordinis clericus: et quod per mandatum nullus accuset, et ad quod episcopus accusandus debeat accusari. Et quod sæpe dictæ epistolæ venerabiliter suscipiendæ sunt, a sede apostolica pro diversorum consolatione datæ, quas ipse canones vocat, et concilia a sanctis Patribus instituta, ad auctoritatem sunt custodienda et recipienda. Et quod verba obstrusa, et undecunque per glossulas collecta, ad ostensionem dictis suis immisit. Et de instructione quam ironice ex Bertrico mandavit. Et de hoc quod mihi objicit, se scisse atque sensisse, sæpius me adfuisse, ac falsa audita pro veris recepisse atque tenuisse; et quia voluntarie audio verba mendacis, et detractoribus suis aurem libenter accommodo. Et quia sæpe illum verbis et scriptis secreto admonui, sicut et in hoc capitulo documentis sanctorum facio.

CAP. XLIV. Qualiter redire valeat ad paternæ charitatis dulcedinem, a me quondam sibi impensam. Et qui ordines et distinctiones episcoporum, ac sacros canones, et decreta sedis Romanæ pontificum, nec non et leges, quas Ecclesia probat ut servat, præsumit convellere, seipsam ab universali Ecclesia studet præcidere.

CAP. XLV. Admonetur ut reducat ad memoriam cum quanta benignitate in primis diebus, quando ad episcopatum venit, a domno rege suscipiebatur, et quanta dulcedine mea fruebatur, quanta unanimitate cum fratribus et coepiscopis nostris utebatur, cum quanto amore a palatinis et ab aliis hujus terræ hominibus celebratur, cum quanta amoris reverentia a sibi commissis, sed et a nostris, a quibus, et cum quibus, et inter quos nutritus fuerat, venerabatur, qui nunc est omnibus in cantico tota die. Et quia dicit, se mihi nolle consentire, ut sedes apostolica suam potestatem non habeat.

CAP. XLVI. De eo quod dicitur per vanitatem jactitare, quoniam quæcumque incipit, aut contra regem, aut contra me, aut contra quoscunque suorum, sive clericos, sive laicos, qui contra suam voluntatem fecerunt, vel contra vicinos suos, qui se contra eum exerxerunt, totum ex parte maxima semper vicit, et quod restat evincet.

CAP. XLVII. Et quia victum se dicere non dignabitur, et quæ ad instructionem suam et correptionem sibi scripta sunt, non ad edificationem suscipit, sed ad contentio-

nem, ex verbis beati Gregorii tria illi proposui, peccatum scilicet, et causam peccati, ac penam peccati, qui etiam negare velit admisisse convincitur. Sed et alia tria ex verbis beati Augustini illi proponuntur, ut, sicut scriptum est, videat, et sciat, et recogitet, et intelligat pariter: et de differentia, quam beatus Augustinus in libris de Baptismo ostendit, inter idolum fabricatum atque adoratum, et incensionem prophetici libri ira regis contemptoris, et schisma attentatum: et de eo quod in sua perversa subscriptione misit: « Si aliqui secus nolentes fieri socii hujus disciplinae, nec habeantur participes communionis nostræ. » Et quia in sola catholica unitate, per hæreses vel schismata non divisa, vera sunt ligamenta, ut vera sunt sacramenta. Et quia spiritalia etiam ab aliis injuste non dividuntur ab Ecclesia, nisi se ipsi dividant: et quid sacri canones de seipso dividitibus ab Ecclesia presbyteris, diaconibus, et episcopis dicant. Et quod, sicut in latrone in cruce converso monstratur, aliquando baptismi vicem passio implet: et de Cornelio eum suis ante baptismum Spiritum accipiente, et de baptismate Joannis, et quia in latrone perfecta salus est, quoniam per pietatem spiritaliter ei adfuit quod per necessitatem corporaliter defuit, sicut et parvulus, cum pro eis ab aliis responderet, et non tantundem valeat si quis pro se valeat respondere. Et quod parvuli participatione corporis et sanguinis Christi ac beneficio non privantur, etiam antequam panem illum comedant, et calicem bibant, de hoc sæculo in unitate corporis Christi constituti abscedant. Et quid beatus Ambrosius de Valentiniano sine corporali baptismate obeunte dicat.

CAP. XLVIII. Monetur ut ex his diligenter attendat, quid illi sentiendum sit de parvulis sua jussione sine baptismate mortuis, et de his qui ejus præceptione sine viatico munere obierunt, et quid inde regulæ sacræ dicant: et quid sanctus Augustinus dicat de his qui nimis amant sententiam suam, vel invidendo meliorem, usque ad præcedendæ communionis, et condendi schismatis vel hæresis sacrilegium perveniunt: et beati Cypriani pulchra laudatio, qui licet aliter de baptismate senserit quam debuerit, tamen ab unitate Ecclesiæ se per contumaciam non divisit. Et quod primatus non sit, nisi in sancta conversatione et vita bona. Et quod in hæresi vel schismate, nec ligari aliquid possit, nec solvi. Et quod Spiritus sanctus, qui in sola catholica per manus impositionem dari dicitur, majores nostri charitatem intelligi voluerunt, quam charitatem non habet, qui ab Ecclesiæ catholicæ unitate se segregat. Et quod communicio corporis et sanguinis Christi signum sit unitatis. Et quod quis hismate assenserit, schismaticus esse negari non poterit, et si de pane cælesti gestat, iudicium sibi manducat; et quod post revelationem factam, qui in eo quod erraverat perseverat, prudens et sciens sine venia ignorantia peccat. Et sequitur consilium orthodoxorum, qualiter ipse quod perperè egit, sed et ab illo tractati vel illicti se corrigant.

CAP. XLIX. Admonetur ut talentum intellectus, quod Dominus sibi gratuito dedit, non negligat.

CAP. L. De eo quod dicitur a quibusdam, quia portare patienter non potest, ut ei a quoquam dicatur, quod quisquam sibi bonum aliquid sine suo merito exhibuerit.

CAP. LI. De eo quod a multis dicitur, quia clericos et laicos sibi commissos in multis exeniis per diversas occasiones gravet, unde ex sanctorum verbis monetur, ut si verum est a talibus respiscat, et de cætero caveat.

CAP. LII. De eo quod a multis denotet regia superbia efferatur, et vana gloria jacitetur, atque arrogantia superetur. Unde admonetur, ut se corrigat, et qui ab humilitatis exemplum positus est, locum detractationis non præbeat. Admonetur etiam de eo quod dicitur apud plurimos gloriosi de fortitudine et agilitate sui corporis: et quia de præliis, atque, ut nostratum lingua dicitur, de *vassancis* frequenter ac libenter sermonem solet habere, et qualiter ageret, si laicus fuisset, irre erenter referre. Sed et alia quæ sibi non conveniunt dicere et agere, nec mihi enun iare.

CAP. LIII. Et quoniam a multis reprehenditur de moribus corporis mordinatis, ex verbis sanctorum monetur qualiter illa caveat.

CAP. LIV. Monetur ut non se permittat decipi a flore juventutis et sanitate corporis, et mundi illecebris, habens semper ante mentis oculos quod hinc sanctus Spiritus dicit.

CAP. LV. In conclusione horum omnium illi dicitur pood beatus Elias, Spiritu sancto repletus, ad Elisæum eodem Spiritu sancto replendum dixit: *Quod meum fuit feci tibi*. Quæ conclusio epistolæ in obatione terminatur, « Ut quod nostris meritis non valemus, divina gratia, » scilicet gratis data, « obtineamus. »

TITULATIO METRICA.

COMPILATIONIS

*Hincari Laudunensis episcopi ad domnum
Carolum regem ficta.*

Iste pitatiolus plane depromit et apte,
Sedem appellandam libere apostolicam,
Quin appellandam haud vinclis artarier ullis,
Responsum a victo rite nec exigier.
Archique pontifici distinguit jusque modumque
Cum compræsulibus ceu teneat sobrius.
Sitque pio regi Carolo pax, vita, potestas,
Qui probus hæc cernens præ probitate probet
Cui si surripitur humanis nisibus ullis,
Cassando reicit, res ubi certa redit.
Sic sua mens adeo veri defervet amore
Recte frustrandum ne sinat esse ratum.
Namque animum servat mitis sapientia fortem,
Præ cunctis proprie quem redimit pietas.
O quam rex felix, virtutum fortis amator,
Tam bene quem superat sola boni pietas!
At te, Christe, Deum noscens dum diligit ultro,
Quæ spernis spernit, quæ statuis statuit,
Se tibi committens in te tua verba veretur,
Nunc et in æternum tuque tuere tuum

RESPONSIO.

Hoc tibi de titulo, juvenis Hincmare sacerdos,
Respondere mihi convenit arte pari.
Ne tibi sis sapiens multum, quod cæcat hominem,
Collige de veris hæc tua ficta fore,
Sicut et ipsa tui primordia carminis esse
Clare demonstrant degeneri genere.
Namque pitatiolum neutro dixere priores,
Et caput hoc languens cætera fluxa docet.
Quæ compilasti vario pro tempore et actu
Conditæ de verbis sedis apostolicæ,
Conciliis certis præponens talia sensu,
Cui bonus interpres Spiritus almus abest
Cor fugiens fictum, quod disciplina salubris
Non regit, atque simul quæ tua vota vomunt.
Congruit unde tibi sapiens quod dixerat olim,
Non tenuem sensum venter obesus habet.
Et mens inflato sensu distenta videre
Noxia gesta nequit, quæ tamen ipsa gerit.
Hinc alios gestit semper clamare nocentes,
Seque putat mundam, si nitidos maculat.
At cor contritum, Domino placabile munus,
Dat mala cuncta sibi, dat bona cuncta Deo.
Tu, fugiens culpam, culpam nihilominus addis,
Innocuos carpens conscius unde tibi.
Moribus et factis turgens, ut corpore, corde,
Motibus atque nimis diceris ore levis.
Viscera qui matris, dum te gestaret in alvo,
Rumpere non quisti, nunc laniare cupis.
Parte pie suboles, donorum oblita parentis,
Quæ te nutritam fecit honore sacram.
Non rex, ut dicis, surreptus nisibus ullis,
De te rejecit quæ bene nota tenet.

A Sæpius expertus quam sit laudatio fixa
Hæc tua, quæ variat tempore et ore simul.
Sed prudens animo pariter non omnia profert,
Qui discretæ tenet tempora mente sua.
Et pardi pellem noscens te linquere nolle,
Sustinet ut propriis casibus ipse ruas.
Congeris et quædam tibi metus quæ valde resistunt,
Teque magis pungunt, quæ tibi grata putas.
Multa quidem ex studiis a te dimissa videntur,
Quæ quia contemnis, fraude doloque taces.
Impurus quædam falsasti, imittere mendas
Non veritus, quoniam non tibi pura placent.
Nam sacra depromunt canonum decreta patenter,
Juraque confirmant sedis apostolicæ,
Metropolitanum curam regionis habere,
B Ut præsit sollers ore manuque sagax,
Ad quem concurrant quæcunque negotia juris
Cuncti poscentes, præminet ipse quidem.
Regimine sub cujus constat provincia tota,
Ut sanctis semper legibus aptet eam.
Rebus in obscuris, dubiis quoque, certa requirat,
Consilio fratrum sicque tenenda legat.
Quæ scriptura tamen, sanctorum et dicta, perennes
Leges duxerunt nulla molesta ferant.
Cui quia subjecit regionis episcopus omnis,
Sit humilis humili, sit rigidus rigidis.
Corde manens mitis, zelo sit fervidus, atque
Sollicitus servet quæ canones statuunt;
Ætates, causas, personas, tempus, et actus,
Et loca dicernens, penset agenda simul:
C Illius in cunctis semper moderamina fratres
Expectent, sicut regula sancta docet.
Ut pater et fratres charitatis nexibus unum
In Christo facti, schismata nulla fient,
Angelicæ sortes cælo nam culmine præstant,
Suppositis aliis ordine composito,
Unde sacerdotum constat distinctio certa,
Et mundi populos ordo regit varius.
Plurima membra tuo gestas in corpore toto,
Quæ servire vides officiis propriis.
Quapropter sensus pompa fallente superbos
Deprime sub Domini jussibus almificis,
Cujus non metuis postponere dicta tremenda,
Insuper ipsa tumens evacuaere cupis,
Idque procul dubio nequam tibi spiritus omne
Suggestit, et semper quæ sua sunt adhibet.
D Qui rex est horum, quos cæca superbia vincit,
Cujus sunt facti sponte sua geniti.
Denique quod dicis depromptum rite vel apte,
Sedem appellandam libere apostolicam:
Quis hæc ignorat quæ tu te nosse fateris?
Aut tibi sunt soli cognita quæque Dei?
Nempe sacri canones, nec non et Romula dicta,
Ac leges clamant, omnibus atque liquet,
Qualiter, et quando, atque ubi, quis quoque, de quibus
[ipsam
Appellet sedem non levitate vaga,
Et quis, proque quibus sedem appellaverit illam,
Vinciri nullo debeat ab homine.

Et quis, proque quibus, propriis nudatus ad ulla
 Non det responsum, cum fuerit monitus,
 Indicat ipsa tibi manifeste regula sancta,
 Qualiter his fieri debitus ordo queat.

Si leges scires, canonum quas trames honorat,
 Perspicue nosces quæ bene cuncta patent,

Et tu conspiceres, nisi magna albugine plenus
 Mulceret visus, hæc tibi nota fore.

Quæ tibi dum tribuis, jactas et scire superbe,
 Cordis inest oculo nox tenebrosa tuo.

Hinc etenim Domino panes offerre veteris,
 Tangere quin etiam jura ministerii.

Hanc auctore geris lapsus de luce superbo,
 Qui sublime quidem letifer omne videt.

Hic te mirari monitat quod perficis ipse,

Quod non est mirum, sed potius miserum,
 Ac detestandum veri ratione tenoris,

Non attestandum prorsus ut illicitum.

Propter hoc autem tantum clamare videris
 Securos aditus sedis apostolicæ,

Ut quod valde libet valeas patrare licenter :

Non tamen omne licet, quod tibi forte libet.

At magis id certas, quia non vis ipse subesse
 Ulli, ceu poscit regula justitiæ.

Hinc imitans illum, qui nulli sponte subesse

Gestivit, labens per mala quæque miser,

Qui vitio proprio talis jam factus habetur,

Ut nullum timeat, nec mala post metuat.

Hunc et in hoc sequeris, dum non respiscere quid-
 [quam

A prave cœptis vel tibi sero placet,

Sicut et ipse nequit, postquam super omnia sese

Extulit, et misere primus ad imaruit.

Sed si forte animos vincas ad cuncta protervos,

A quibus ex studio valde tenere tuo,

Confestim poteris secure vera tenere,

A quibus et nolens vincaris ipse modo.

Utque duplex animo, inconstans per cuncta viando,

Lingua assentantis regia corda linis.

Quem contemnendo nosti te lædere crebro,

Non parens dicto legis apostolicæ,

Quod demum sancti canones, seu publica jura,

Et quod hinc sedes sancti apostolica.

Scilicet ut subsit quævis provincia sedi

Metropolitane semper ubique suæ.

Si vis, si non vis, firmum constabit in ævum,

Sic vere sanctus Spiritus instituit,

Ut tibi conscripta in parvo diplomate misi

Rhemorum præsul metropolita tuus :

Quæ mundus totus sequitur, veneratur, honorat

Et reprobare nequis, si male forte velis

Versibus inversis, juvenis Hincmare sacerdos,

Reddita sume tuis fontibus hausta sacris.

In sinibus propriis capiens hinc septupla, vates

Ut poscit justus de manibus Domini.

A

HINCMARUS

S. METROPOLIS ECCLESIE RHEMORUM EPISCOPUS

Hincmaro Laudunensi coepiscopo nostro

SALUTEM.

PREFATIO.

Nuper, quando transacto tempore, sicut tibi et aliis multis est cognitum, apud Gundulfi villam in obsequio domni nostri regis cum plurimis archiepiscopis et episcopis, ac cæteris fidelibus suis fuimus, quia me, sicut alii tui priores ordine, et potiores ordinis dignitate, ac seniores ætate, consecratos nostri et venerabiles archiepiscopi atque episcopi fecerunt, et te specialius oportuerat facere, exiguitatem meam adire mihi que pacis osculum dare noluisti, nec etiam ullum verbum mecum loqui dignatus fuisti, non dicam magnum, sed miserum multis spectaculum præbuiti. Quare de re, sicut mihi dixit, venerabilis archiepiscopus Wenilo tecum locutus, interrogavit te cur mecum debitam pacem non haberes, et debitam obsequii venerationem impendere detrectares. Unde a te responsum accepit, quoniam si scripta quæ tibi et Ecclesiæ tibi commissæ de a te intentata excommunicatione tuæ parochiæ transmiseram, quæ ibidem tecum habebas, coram aliis incenderem, et annullanda dicerem, meque contra rationem fecisse profiterer, tunc mecum pacem habere velles. Dixit etiam te mihi mandasse, quia quod de illa excommunicatione fecisti, ego tibi insinuavi. Habes enim quamdam villam in mea parochia, et quia homines ejusdem villæ rogasti ad illam ecclesiam dare illorum decimam, ad quam eam dare debebant, excommunicaverim illos, et habebas imbreviatos quot infantes sine baptisate, et quot homines sine comunione inde obierint, quæ mihi in publicum objicere nolles, ne postea tibi impropere, quod si alia mala de me scires, illa etiam diceres. Unde tibi statim per eum remandavi, quia et inde, et de quibuscunque velles, quæ tibi viderentur objiceres, sed de hac causa verum non diceres. Habeo enim scriptum perverse a te collectum, et perversius quæ collegisti interpretata, quod per manus Hadulfi archipresbyteri tui accepi : sed et gesta, quæ de ipsa ecclesia tu egisti, et qualiter et quæ inde ego egi, vera narratione conscripta, et quandocunque velles, aut cum quibusdam fratribus D et consacerdotibus nostris, aut si velles in synodo tibi ostenderem. Tacite autem in hac confessione tua, qua dixisti, quia quod de illa excommunicatione fecisti ego tibi insinuavi, tria consideravi.

Primum quidem, quoniam si ratio inter te et clericos Laudunensis Ecclesiæ agitata foret, de petitione ex causis in ea continentibus ab eisdem mihi porrecta, utrum esset an non veritate subnixâ, nullam quæstionem deberet recipere, postquam tuæ confessionis attestatione firmatur. Aliud vero, quia silentio suppressis bonis, quæ tibi insinuavi atque insinuari feci, imputando mihi quod male tibi de hac excommunicatione quam perpetrasti insinuaverim,

reum te confessus es, quia scienter male fecisti, ac per hoc, secundum decreta Hilari papæ, tuum contra regulas factum deberes ipse dissolvere, quod si nolles, auctoritas metropolitana illud deberet annihilare. Tertium, quia ut tecum me posses illaqueare, si forte, ut assolet improvisæ menti accidere, tibi statim hæc falsa de me rejciendo imparatus et ira commotus non responderem, et te jactitare valeres me in aliquo inde concedidisse, voluntarie tibi de tali confessione laqueum studuisti injicere, et pro bonis mala retribuens, non ut quondam proditorum primicerius, simulando pacem osculo quam non habebas in pectore, sed exerto linguæ gladio me aperte ac impudenter decrevistis impetere, et quasi me qualicunque patrono ac benefactore atque ordinatore tuo tradito, talis confessionis de tantis impietatibus laqueo te suspendere. Sed benedictus Dominus, qui secundum promissionem suam, qua dixit : *A flagello linguæ absconderis (Job v, 21)*, liberando animam meam a labiis iniquis et a lingua dolosa, adjuvit me, et consolatus est me, mox telum falsitatis scuto veritatis respondendo rejeci. Quæ animi dolore compunctus, non amaritudinis livore stimulatus dico, sciens capiti ac salvatori nostro mendaciter multa fuisse objecta, sed et productos adversus eum falsos testes fuisse. Nam et Romanæ sedis pontificibus Damaso, Sixto, et Leoni tertio, verum et aliarum insignium ecclesiarum præsulibus, Athanasio scilicet Alexandrino, Joanni Constantino-politano, Cæciliano Carthaginensi, sanctitate fidei et operationis atque scientiæ doctrina præclaris, necnon et quamplurimis aliis venerandis episcopis, ab hominibus invidis, et eorum locum ac bonæ opinionis famam obtinere volentibus, sed non habere meritum illorum studentibus, mortalia et nefaria crimina falso impacta, et usque ad ecclesiastica judicia et cognitionem publicam fuisse perducta legimus. Sunt enim hujusmodi vipereæ nequitæ homines, qui licet prius eorum mentes propria rodant invidia, in hoc tamen suas tegere posse iniquitates putant, si alios infamia modo quolibet maculare curaverint; quorum criminationes iidem viri sancti patientissime toleraverunt, et constantissime adjuvante Domino revicerunt. Et horum, sicut scriptum est (*Hebr. xiii, 7*), intuens exitum conversationis fidem mihi necesse est imitari; et usu compertus, et de te in me prorsus expertus, quia phreneticus sæpe nulli majorem alapam dare solet, quam ipsi medico qui eum curare volet.

Sed et multum miratus sum, ubi sensum tuum habuisti, quando de tantæ auctoritatis et sapientiæ atque religionis viro, sicut dominus est Wenilo, dixisti, et ad plurimorum episcoporum notitiam pervenire fecisti, quod si in judicio regulari dixeris probare non poteris, præsertim te reum de hoc ipso confessus, et confitendo te talia egisse, quæ etsi non confitereris, perpetrasse negare non posses, te ipsum illaqueasse videre non potuisti : cum leges quas probat Ecclesia dicant (*Cod. th., de Accusat. lib. xix*) :

A « Sane hi qui crimina sua in quæstione confessi sunt, de aliis si dicere voluerint, a iudice non credantur : quia jure et legibus constitutum est, ut spontanea professione reus reum non faciat, neque illi de altero credatur, qui se criminis esse confessus est. » Et item (*ibid., lib. xii*) : « Non credendum est contra alios eorum confessioni, qui in criminibus accusantur, nisi se prius probaverint innocentes : quia periculosa est, et admitti non debet, rei adversum quemcunque professio. » Et canones dicunt (*conc. Afr. can. 96, 97*) : « Ut ad accusationem non admittantur, quos ad accusanda publica crimina leges publicæ non admittunt. Et quotiescunque clericis ab accusatoribus multa crimina obijciuntur, et unum ex ipsis, de quo prius egerit, probare non valuerit, ad cætera jam non admittatur. » Et item canones dicunt (*conc. Carthag. can. 18*) : « Ut ordinandis episcopis, vel clericis, prius ob ordinatoribus suis placita conciliorum auribus eorum inculcentur, ne se aliquid contra statuta concilii fecisse pœniteant. » Quæ a me tibi ordinando inculcata sunt : inter quæ habentur et illa quibus et in hac illicita excommunicatione, et in contemptu obediendi, non solum semel secundo, sed et tertio, ex Scripturis et regulis sacris conscriptis admonitus ut eam corrigeres, obviasti, cum scriptum sit : *Melior est obedientia quam victimæ, et auscultare magis quam offerre adipem arietum, quoniam quasi peccatum ariolandi est repugnare, et quasi scelus idolatriæ nolle acquiescere (I Reg. xv, 22)*. Sed et tu, coram Rhemensi Ecclesia, in qua nutritus fuisti, et coram Ecclesia Laudunensi tibi committenda, sed et coram episcopis qui adfuerunt, et coram legatis eorum episcoporum qui corporali præsentia defuerunt, post fidei confessionem, ea quæ tibi inculcata erant, et specialiter de obedientia tuæ metropoli atque tuo metropolitano regulariter exhibenda, te observatum manu propria confirmasti : et quando tibi librum sacrorum canonum, et regulam pastorem beati Gregorii, coram altare sanctæ Mariæ, in præsentia omnium qui adfuerunt, in manum misi, obtestans ut ita, quantum tibi Deus scire et posse daret, servares in vivendo, docendo, et iudicando, sicut ibidem descriptum erat, et ipsos libros, sub testimonio divino et prædictæ fidelium Ecclesiæ susceptos, te ita observatum consensione tua confirmasti. Unde sacri canones dicunt (*conc. Carth. II, cap. 13*) : « Si quis contra suam professionem, vel subscriptionem venerit in aliquo, ipse se honore privabit. » Et sanctus Leo papa ad Leonem Augustum scribit (*epist. 84 per Philoxenum*) de sua erga leges consensione si contra illam fecerit, « Eis, inquit, me ultionum conditionibus subdo, quas non solum auctoritas beatæ memoriæ principis Martiani, sed etiam ego mea consensione firmavi. » Et canones Carthaginenses dicunt (*conc. i Carthag., c. 14*) : « Quæ vel facta vel dicta superius comprehensa sunt, vel ab aliis conciliis conscripta, quæ secundum legem inveniuntur, custodire nos oportet. Si quia

vero statuta supergressus corruerit, vel pro nihilo habenda putaverit, si laicus est, communionem; si clericus, honore privetur. Universi dixerunt, placet, placet. »

CAPUT PRIMUM.

De capella in Attolæ curte sita.

Cæterum causa de ipsa capella, de qua mihi mandasti, hoc modo se habet. Nam et cum a longo tempore ipsa capella in Attolæ curte sita, subjecta fuerit Ecclesiæ in Juviniaca villa, sicut infra ostendam, Bertharius præpositus tuus, ut dicebatur a pluribus, et etiam rei effectu claruit, tua jussione ad eandem capellam venit, et decimam dari presbytero parochiæ nostræ, cui commissa erat, et qui in ea ordinatus jam ante trigintam annos fuerat, prohibuit, et sicut sibi visum fuit, eandem decimam dispertiri præcepit. Insuper et scuriam ipsius presbyteri intereludit, et annonam de terris dominicatis collectam, sine licentia ipsius presbyteri in ea misit, omnemque potestatem inde Presbytero abstulit, antequam aliqua quæstio inde ad me, aut ad comministram meam veniret, cum etiam si aliquid inde rationis haberes, Canones Africani dicant (*can.* 87) : « Ut episcopi quascunque ecclesias vel plebes, quas ad suam cathedram existimant pertinere, non ita repetierint, ut causas suas episcopis judicantibus agant, sed alio renitente irruerint, sive volentibus, sive nolentibus plebibus, causæ suæ detrimentum patiantur, et cætera quæ ibidem sequuntur. »

Audiens autem quæ hinc gesta fuerant frater et compresbyter noster Ausoldus, cui delegata est pars parochiæ nostræ in qua ipsa capella consistit, sæpe inde ad Bertharium misit, sed nullam rationem regulis congruentem obtinere prævaluit. Unde quia tunc in parochia Rhemensi non eram, præcepit ut in ipsa capella missa non celebraretur, antequam homines villæ ipsius suam decimam presbytero suo secundum antiquam consuetudinem darent : si autem missam vellent audire, ad ecclesiam quæ est in Juviniaca villa pergerent. Nulli autem baptismus vel communicatio est donegata, et quantum rescire veraciter potui, quod mihi mandasti quosdam infantes sine baptisate, et quosdam sine viatico munere exisse de sæculo, non est verum. Nam et si inde aliquid verum esset, quia sæpe per inde transitum habui, et iidem homines frequenter ad confirmationem ac prædicationem ad me venerunt, sine dubio inde aliqua reclamatio ad me veniret. Postea etiam quam mihi ea quæ præmissi per præfatam venerabilem archiepiscopum mandasti, diligenter inquirere si inde aliquid verum esset curavi, et per omnia quod mihi mandasti mendacium esse inveni. Ipsa quidem capella in villa quæ nominatur Attolæ curtis, quam sicut fertur, Attola episcopus Laudunensis ecclesiæ partem inde, quæ suæ proprietatis fuit, ad ipsam ecclesiam in qua fuerat ordinatus donavit, excepto atrio ad sepulturam, et excepta cellula manselli ipsius capellæ, cum hortulo, ex potestate sanctæ Mariæ Laudunensis ecclesiæ non habet, nisi

A de terra arabili bunnuarua duo semis, et de alia terra, quam Franci homines in eadem villa in suis proprietatibus commanentes dederunt pro loco sepulturæ ad ipsam capellam, bunnuarua quatuor semis quæ in summa sunt de terra arabili bunnuarua septem. Nihil autem de vinea, nihilque de prato, vel quiddam de pascuali, sed et mancipium nullum habet. Et sunt in eadem villula de potestate sanctæ Mariæ Laudunensis ecclesiæ mansi ingenuiles novem, serviles undecim. Et ipsa capella a longo tempore unita fuit ecclesiæ sitæ in Juviniaca villa, et parochiæ illi subjecta, quia sine silva, vel aqua, aut palude, aut spatii longinquitate, vel alicujus alterius interpositione impediti, sunt contiguæ, tempore seniorum istorum, quorum subscripta sunt nomina, præter illos quos commemorare non possumus, qui ambas illas villas per regium beneficium tenuerunt, videlicet tempore Remegaudi comitis, Bertmundi comitis, Bernardi, Odonis, Gibuini, Rothardi, Godefridi, Angelboldi, Frederici, in quorum temporibus, præter eos quos commemorare non possumus, isti presbyteri easdem ecclesias insimul habuerunt, Tetgrimmus presbyter, Ermenricus presbyter, item Ermenricus presbyter. In qua ecclesia, sita in villa Juviniaca, simul cum præfata capella, istum presbyterum, qui adhuc eas tenet, nomine Ermenricum, Ebo, quando Bertmundus comes easdem villas insimul per beneficium imperatoris Ludovici tenebat, quarto anno ante depositionem suam ordinavit, qui Ebo depositus fuit anno incarnationis Dominicæ 835 et tempore præfatorum seniorum, qui Bertmundo in eadem villa successerunt, eandem capellam simul cum ecclesia tenuit, usque dum Pardulus episcopus apud istum domnum Carolum ipsa mansa impetravit ecclesiæ Laudunensi restitui, et iste ipse Ermenricus, quandiu Pardulus vixit, ipsam capellam Ecclesiæ suæ subjectam sine ulla inquietudine tenuit, et hoc regulariter per presbyteros, quorum habemus nomina, approbatum fuit, inter quos quidam Rattramus presbyter jam nonagenarius testatus est, quia ex quo sensum habuit quod hoc cognoscere potuisset, semper vidit presbyterum de Juviniaca villa habere cum illa etiam ecclesia capellam de Attolæ curte, nec non et legaliter per Francos in eadem villa commanentes, sed et per vicinos circummanentes, etiam et per colonos, quorum habemus nomina, hoc in tuorum missorum præsentia comprobatum fuit. Quod autem a quibusdam tuorum dicitur, quod ipsa capella antiquior sit quam ecclesia in Juviniaca villa, etiamsi verum foret, tunc illi antiquitas sua suffragium afferret, si in antiquitate sua usque ad tempora moderna persisteret. Nam Atrebatibus, Viromandis, et Bononia, ex cujus territorio es natus, antiquiores sedes cum episcopis propriis in Rhemorum provincia exstiterunt, quam castrum Montis Lauduni inter sedes computaretur, in quo es ordinatus episcopus. Sed quoniam a longo tempore, certis eventuum ac necessitatum causis accidentibus, sicut et de pluribus civitatibus in quibusdam provinciis

legimus, illæ aliis subjectæ civitatibus sum privilegium perdiderunt, quod non recuperant, et castrum montis Lauduni convaluit, quia secundum leges, ac sacros canones, atque decreta sedis Romanæ pontificum, pro id appellare, idque refragari non licet, quod legum tempus excludit.

CAPUT II.

De administratione palatii et abbatia contra canones adeptis, et quod vocatus ad synodum non venerit, et de irregulari excommunicatione Almalberti.

Sed et tempore tuo nullam inde inquietudinem habuit, quo usque te commovisti contra me, quia redarguere te præsumpsi, quoniam contra sacras Antiochenas regulas (*conc. Antioch. c. 9*), præcipientes « ut præter me agere non debeas, secundum antiquam a patribus nostris regulam constitutam, nisi ea tantum quæ ad tuam parochiam pertinent, possessionesque subjectas, sine mea vel coepiscoporum nostrorum conscientia, administrationem in palatio domni regis obtinuisti : sed et his quæ inde de sacris regulis tibi legeram contemptis, postea contra interdictum meum canonicum, eamdem administrationem palatii readeptus fuisti, contra Sardienses canones (*conc. Sard. can. 8*), redarguentes passim episcopos, qui archiepiscopi sui salutaria consilia spernunt atque contemnunt, ut non solum ad comitatum multas et diversas Ecclesiæ non profuturas perferant causas, sed et dignitates sæculares et administrationes quaerant, sed et scandala excitent. » (*Ibid., can. 2.*) « Quicumque ergo preces habuerint vel acceperint, per diaconum suum mittant, quia persona ministri invidiosa non est, et quæ impetraverit (scilicet de pauperum, et viduarum, ac pupillorum causis, et Ecclesiæ suæ necessariis vel futuris), celerius poterit ferre. Et hoc consequens esse videtur, ut de qualibet provincia episcopi ad eum fratrem et coepiscopum preces mittant, qui in metropoli consistit, et ille ei diaconum ejus, et supplicationes destinet, tribuens commendatitias epistolas pari ratione ad fratres et coepiscopos, qui illo tempore in his regionibus et urbibus morantur, in quibus felix et beatus Augustus rempublicam gubernat. Si vero episcopus habet amicos in palatio, qui cupit aliquid quod tamen honestum est impetrare, non prohibetur per diaconum suum rogare, ac significare his quos scit benigna intercessione sibi absentibus præstare. » (*ibid., can. 11.*) « Scimus enim et ipsi, sæpissime propter paucorum impudentiam, religiosum sacerdotale nomen fuisse reprehensum. Si igitur aliquis contra omnium sententiam nisus voluerit ambitioni magis placere, quam Deo, is debet scire, causis redditus honorem dignitatemque se amissurum ; et paulo post ; Si vero, ut superius memoravit sanctitas vestra, propter desideria et ambitiones ad comitatum pergit, neque in litteris ejus subscribatur, neque in communionem accipiatur : si vobis placet, omnium sententia confirmari debet. Et universi dixerunt honestum esse, et placere sibi hanc constitutionem. » Sed et cum eadem administratione pa-

lati, prælationem monasterii in tertia provincia sine meo consensu, vel ipsius episcopi, in cujus parochia idem monasterium erat, obtinuisti contra sacros Antiochenos canones, qui dicunt etiam metropolitano non licere, quod tu provincialis episcopus præsumpsisti. « Nullus, inquiunt (*conc. Antioch., c. 13*), episcopus ex alia provincia audeat ad aliam transgredi, ad promotionem ministerii aliquos in ecclesiis ordinare licet consensum videantur præbere nonnulli, nisi litteris tam metropolitani quam cæterorum qui cum eo sunt episcoporum, rogatus adveniat, et sic ad actionem ordinationis accedat. Sivero, nullo vocante, inordinato more deproperet super aliquibus ordinationibus, et ecclesiasticis negotiis ad eum non pertinentibus componendis, irrita quidem quæ ab eo geruntur existant, ipse vero incompositi motus sui et irrationabilis audaciæ subeat ultionem, ex hoc jam damnatus a sancto Concilio. » Attende intelligenter, quia sicut non tibi licuit in eodem monasterio quemquam irregulariter ordinare, ita et non licuit ecclesiastica quæcunque negotia ad te non pertinentia inconsulte componere. De quibus negotiis a te ibidem irregulariter actis, per eos quorum intererat gesta mihi quæ habeo facere oblata, sicut tibi paterna dilectione innotescere studui. Sed quia principalis potestas, te exaggerante, contra te admodum erat commota, ne super vulnere dolore tuorum adderem, inde agere satis omisi, spe ac studio cautelæ ac correctionis tuæ in reliquum : excusationem rationabilem ne inde satagerem, proferens, quia gesta illa non constitutis pariter partibus, sed ex una parte confecta fuerunt, et ideo secundum leges ac regulas exinde questionem agere, et judicium synodale proferre non possem. Ad quod monasterium irregulariter adeptum in tertia provincia, sine mea licentia, quoties tibi placuit, etiam irregulariter perrexisti, contra Hilari papæ decreta dicentis : « Illud non potuimus præterire, quod sollicitudine diligentiore curandum est, ne præter metropolitano- rum suorum litteras, aliqui ad quamlibet provinciam audeant proficisci, quod etiam in omni genere officii clericalis per singulas debet ecclesias custodiri. » Et sanctus Gregorius ad Vicentium et cæteros episcopos (*lib. VII, ind. 11, epist. 8*), « Hortamur, inquit, fraternitatem vestram, ut si quemquam vestrum pro causis propriis ubicunque longius compulerit ambulare necessitas, a metropolitano vestro secundum inditam a sanctis Patribus regulam petere licentiam debeatis, nec eum postponere in aliquo præsumatis, excepto si, quod non optamus, contra eundem metropolitanum vestrum vos habere aliquid causæ contingat, ut ob hoc sedis apostolicæ iudicium requiratis. Nam iis qui petere festinant licentiam, quod scitis, per canones etiam antiquorum patrum institutione habere permissum est. »

In eodem denique monasterio in tertia provincia sito, ad quod irregulariter, ut dixi, sine mea licentia quoties tibi placuit perrexisti, diutius contra cano-

nes Sardicensis immorans (*can. 14, 15*). Et semel ac secundo litteris canonicis evocatus ad ordinationem episcopi in Ecclesia Cameracensi provinciae nostrae pastore destituta, unde apostolica sedes me suggerente non modice laboravit, nec ipse venisti, nec pro te vicariam personam, ut regulæ sacræ præcipiunt, ad me direxisti: unde Symmachus papa ad Æonium ex sacris canonibus promulgavit, ut si quilibet episcopus metropolitano pontifici iusta canonum diffinitionem vocatus, obtemperare noluerit, noverit succidendum se, quod non obtamas, ecclesiastica disciplina. De persona autem pro te, cum tractoria et rationabili excusatione, si venire non potuisti dirigenda, sacri Nicæni canones dicunt (*conc. Nic., c. 4*): « Quia episcopum convenit maxime quidem ab omnibus qui sunt in provincia episcopos ordinari. Si autem hoc difficile fuerit, aut propter instantam necessitatem, aut propter itineris longitudinem, tribus tamen omnimodis in idipsum convenientibus, et absentibus quoque pari modo decernentibus, et per scripta consentientibus, tunc ordinatio celebretur: firmitas autem eorum quæ geruntur per unamquamque provinciam metropolitano tribuatur episcopo. » Et Antiocheni canones (*conc. Antioch., c. 19*), explanantes sententiam Nicæni concilii, dicunt: « Episcopus præter synodum et præsentiam metropolitani nullatenus ordinetur. Hoc autem modis omnibus coram posito, melius quidem est ut omnes simul adsint ejusdem provinciae sacerdotes quo metropolitano episcopus advocare debet et, reliqua, quæ sicut et præcedentia Nicænis concordant, canonibus. » Et quoniam hunc conventum episcoporum Antiocheni canones, explanantes, ut diximus, sententiam Nicæni concilii, synodum vocant, et perfectum esse concilium dicunt, ubi interfuerit metropolitano antistes, quo regulariter evocatus venire aut pro personam consensum tuum deferentem mittere neglexisti, non te pertransiere debet quia provinciae Africæ canones decreverunt (*conc. Afr., cap. 43*): « Ut episcopus a primatibus suo vocatus ad synodum competenter occurrat: quod si non potuerit occurrere, nisi rationem impedimenti sui apud suum primatum reddiderit, ecclesiae suæ communionem debere esse contentum. » (*Ibid., can. 20.*) « Et qui non fuerit concors circa metropolitanam ecclesiam, et circa sacerdotale concilium, sed inflatus et ab hoc consortio separatus putat propriae plebi incumbendum, et nonnunquam conventus ad concilium venire detrectat, circa hunc non tantum diocesim non esse servandam, verum et de propria Ecclesia, quæ illi male faverit, omnimodo adnitendum ut etiam auctoritate publica rejiciatur, atque ab ipsa principali cathedra removeatur. » Quia vero semel ac secundo, cæteris coepiscopis nostris ad ordinationem secundum sacras regulas convenientibus, et absentibus per scripta consentientibus, tu semel ac secundo regulariter convocatus, venire, vel regularem consensum tuum mittere detrectasti, secundum præfactos sacros canones, prædictum Ecclesiae Camera-

acensis regulariter electum, cum his qui convenerant, vel per scripta consenserant, ordinavimus. « Si iniquiunt (*conc. Nic., c. 6*), communi cunctorum decreto rationabili, et secundum regulam ecclesiasticam comprobato, duo aut, tres propter contentiones proprias contradicunt, obtineat sententia plurimorum; » præsertim cum nec tuam contentionem audierimus, sicut nec consensionem habere meruimus. Unde, quia fratres nostros non modice scandalizati, adhibito mecum fratre Hodone venerabili ecclesiae Belvacensis episcopo, te corripens dixi tibi quantum inde incurreris. Sed aliam recognitionem vel satisfactionem a te recipere non potui, ostendens qui hinc te regulæ non modice succenseant, nisi quod indignatione plenus respondisti: Non sumus adhuc iniqui ad hoc: et post hanc et alias correptiones, a me tibi litteris ac verbis adhibitas, in eadem contumacia permansisti, et hactenus permanens, qua et ante parochianum meum Amalbertum contra regulas pro causa tibi illicita excommunicasti: scilicet quia uxor illius, quam in tua parochia legaliter obtinuit, et in meam parochiam adduxit, post plures annos quam illam habuit, per mandatum eum apud te accusavit, quod cum illa non posset concumbere, cum leges diffiniant: « Ut neque accusator per alium accusare, neque reus per alium defendi potest, nisi ingratum libertum patronus accuset, aut rei absentia defendatur. » Et item: « Observare iudices specialiter debent, ut in omnibus causis sententia quæ deliberata fuerit constitutis pariter partibus recitetur, ut ab his a quibus causa dicta est ad integrum quæ dicta fuerit sententia cognoscatur. » Et regulæ sicut (*conc. Afr., can. 96*): « Ut ad accusationem non admittantur quos leges publicæ non admittunt. » Et hanc quoque irrationabilem excommunicationem a te factam, etiam scriptum, contra rationem et auctoritatem, et non veritate subnixum, sed a te fabulose conscriptum, ostendit, quod mihi inde dedisti. Unde etiam tertio tibi suasi, ut sententiam tuam contra regulas prolatam immutares, decernente Antiocheno concilio (*conc. Antioch., can. 13*): « Ut si episcopus, nullo vocante, inordinato more deproperet super aliquibus ordinationibus, et ecclesiasticis negotiis ad eum non pertinentibus componendis, irrita quidem quæ ab eo geruntur existant: ipse vero incompositi motus sui, et irrationabilis audaciæ subeat ultionem, ex hoc jam damnatus a sancto concilio. » Non enim metropolitanus eras, ut sollicitudo totius provinciae ad te pertineret. Sed quod tibi honestum fuerat, et præcipiunt regulæ, obtinere non potui, donec placitum, te propter pacis charitatisque custodiam cohibente, in confinio parochiarum nostrarum condixi, quo quidam ex coepiscopis nostris, et multi ecclesiastici, et laicalis ordinis, ac nobiles, et mediocri conditionis viri convenerunt: ubi causa irrationabiliter et inhoneste a te acta, regulariter atque legaliter diffinita, non solum mihi, et aliis coepiscopis ac confratribus nostris, verum etiam permultis laicis morigeratis maximam verecundiam de tuis verbis vere-

cundosis, ac moribus incompotis, et clamoribus inconditis, contra bonum nomen quod Apostolus (*I Tim. III*) jubet habere episcopum incussisti. Quam turpis rei episcopo indecentem historiam, proh dolor! multis nimium cognitam, pude me scribere.

CAPUT III.

De excommunicatione in aliorum episcoporum parachianos intentata.

Verum nec isti excessus tibi suffecerunt admittere, nisi etiam his alios superadderet. Quæ non ad tuam, quod absit, damnationem, si non tu ipse in contumacia perseverando exegeris, sed ad correctionem sicut et sequentia dico, Cum enim princeps apostolorum beatus Petrus dicat : *Quæ est enim gratia, si peccantes et colaphizati suffertis? sed si beneficientes patienter sustinetis, hæc est gratia apud Deum (I Petr. II, 20).* Causam injuriarum tuarum, meos et aliorum primatum atque episcoporum diversarum provinciarum parachianos, non confessos, neque convictos de aliquo crimine in parochia tua vel alicubi admissi, sine meo vel eorum ad quorum curam pertinebant consensu, contra divinas et humanas leges anathematizare, et ab omni omnium Christianorum societate alienare præsumpsisti. Unde multos scandalizasti, et maximum scandalum non solum Ecclesiæ, sed et regi ac regno intulisti, cum lex prohibeat, Ut per alienam messem transiens falcem non mittas, sed manu spicas conteras et manduces (*Deut. XXIII, 25*). « Falcem, inquit beatus Gregorius (*lib. XII, epist. 32, ad interrog. 9 August.*), judicii mittere non potes in ea segete, quæ alteri videtur esse commissa : sed per effectum boni operis frumenta Dominica vitiorum suorum paleis spolia, et in Ecclesiæ corpus monendo et persuadendo, quasi mandendo converte. » Leges etiam sæculi, quas probat Ecclesia, et sacri canones, atque decreta sanctæ sedis Romanæ pontificum, certa et fixa depromunt judicia de his qui adversus ea per contumaciam pertinaciter agunt, sicut egisti.

CAPUT IV.

De eo quod scripta contra se prolata incendi postulat.

De aliis etiam, quæ mihi per supradictum venerabilem archiepiscopum Wanilonem mandasti, scilicet quoniam si scripta, quæ tibi et ecclesiæ tibi commissæ, de a te intentata excommunicatione tuæ parochiæ transmisi, quæ ibidem tecum habebas, coram aliis incenderem, et annullanda dicerem, meque contra rationem et auctoritatem fecisse profiterer, mecum pacem habere velles, meditatus cum corde meo, satis apud me mirari non potui unde et quomodo hæc tibi in sensum venerint, ut talia mihi mandare posses. Non diabolus loquens ad primos parentes nostros, sed et ad Redemptorem ac Salvatorem nostrum, non ex dejectione, sed ex provectus et sublimitatis avaritia eos tentavit. Tu supergressus, si dici fas est, diaboli malignitatem, oblitus scriptum esse : *Qui malignantur exterminabuntur (Psal. XXXVI, 9)*, me stultissime nimis ex dejectione tentasti, sciens quia quæ tibi et Ecclesiæ tibi com-

missæ in eisdem scriptis direxi, de Evangelica veritate, et apostolica atque prophetica, necnon et canonica auctoritate, sed et de apostolicæ sedis constitutione, sicut acceperat eadem sancta sedes beatorum apostolorum traditione, constant esse conscripta. Et sanctus Hieronymus, ex sanctarum Scripturarum auctoritate, comprobatur quia ignoratio Scripturarum ignoratio Christi est. Et Apostolus, Si quis ignorat, ignorabitur. Profecto, inquit Gregorius, hi qui ea quæ sunt Domini nesciunt, a Domino nesciuntur, et sanctorum Scripturarum traditores et incensores inter sacrilegos computari debere legimus. Si ergo illa, quæ de Evangelio, et apostolis, atque prophetis, nec non et sacris regulis Spiritu Dei conditis, sine admistione alicujus hæreseos vel schismatis conscripsi, videlicet mensuram tritici, a comburendis paleis et zizania puri, revera de horreo Dominico in tempore tibi, ac ecclesiæ tibi commissæ, et sollicitudini meæ subjectæ, prolata incenderem, et vera negarem, sine dubio Christum, qui in eis prænuntiatus et ostentus est, et per quæ Christum cognovimus, quique illa locutus est, me nosse et in eum credere, ac per hoc me Christianum negarem : et si sacros canones et decreta catholicæ Ecclesiæ incenderem et abdicarem, me procul dubio non solum ab episcopatu ipse dejicerem, verum et ab ecclesia catholica divisum et alienum, id est schismaticum et anathematizatum publicis et ecclesiasticis legibus efficerem, sicut sanctus Leo papa, scribens ad Leonem Augustum, etiam de se dicit (*epist. 84*) : « Si secundum Apostolum (*Gal. II, 18*), inquit, quæ destruxi hæc ædificio, prævaricatorem me constituo, et eis me conditionibus ultionum subdo, quas non solum auctoritas beatæ memoriæ principis Martiani, sed etiam ergo mea consensione firmavi. » Quapropter, etsi me infirmum, ac fragilem atque imbecilem, ut revera sum, adeo aestimasti, ut minis vel promissionum blanditiis ad hæc agenda trahi vel invitari valerem, non tamen episcopus dubitare debueras, verum esse quod ab eo qui perficit in infirmitate virtutem, ore veridico promittitur : *Dominus inquit, dabit verbum evangelizantibus virtutem multam (Psal. LXVII, 42)*. Verumtamen quia sicut legimus : *In discendo mora nulla est, ubi Spiritus sanctus doctor adest, ipso inspirante qui dicit : Dabo vobis os et sapientiam, cui non poterunt resistere et contradicere omnes adversarii vestri (Luc. XXI, 15)*, non meo merito, sed gratia sua, dedit mihi Dominus subito recogitare, quia scriptum est : *Tempus tacendi, et tempus loquendi (Eccle. III, 7)*. Et quod prænoscentis æquanimitate te portare non posse ab aliquo reprehendi vel argui, et non audens authenticæ Scripturæ verba mutare, ne me ipsius notes falsarium, ratione coactus, cum venia sacerdotalis reverentiæ dicam : *Ne respondeas stulto juxta stultitiam suam, ne efficiaris ei similis : et responde stulto juxta stultitiam suam, ne sibi sapiens videatur (Prov. XXVI, 4, 5)*, distuli tibi quæ tunc poteram respondere. Et de his quæ mihi mandasti, tibi mox remandavi, ut

quoniam a confratribus nostris, quibus ea ostendisti, audieram te contra me, et contra eadem scripta quædam collegisse, et etiam cuidam scripto te subscripsisse, et a canonicis Ecclesiæ Laudunensis, et postea a presbyteris tuæ parochiæ, contra me et contra eadem scripta subscribi fecisse. Sed et te dicere, quia ipsa scripta, quæ ego tibi, et ecclesiæ Laudunensi, de præfata excommunicatione a te facta direxeram, membratim dissolvisses, et secundum sanctorum tramitem Scripturarum, traditionemque majorum, nullius esse auctoritatis vel rationis monstrasse: coram tantis et talibus de confratribus et coepiscopis nostris qui ibi aderant, quos et quantos tu eligeres, eadem scripta, quæ ego tibi et Laudunensi ecclesiæ pro ratione prædicta transmiseram, ostenderent. Sed et tu ea quæ collegeras, verum et illa quibus subscriperas, et subscribi feceras, nec non et illa per quæ scripta a me directa te dissolvisses dicebas, in medium nostri deportares, et legerentur per ordinem, et quidquid tunc ibi a præfatis fratribus et coepiscopis nostris juste et rationabiliter secundum sacram auctoritatem, et catholicæ fidei convenientiam, inventum et decretum, et inter nos conventum foret, voluntarie sequerer, et pacem, quam tecum in corde habebam, et exterius si velles eam tibi non denegarem, et a te mihi oblatam susciperem, et tibi dilectionem sinceram ut fratri et filio exhiberem. Ad quam meam responsionem tibi referendam, isdem venerabilis archiepiscopus Wenilo domnum Adventium gloriosum pontificem, qui una cum eo meam responsionem audierat, ire poposcit. Quod et isdem venerabilis episcopus libentissime egit, et post communem colloquutionem vestram, detulit mihi ex tua parte venerabilis archiepiscopus Wenilo quosdam quaterniunculos, sibi a te in præsentia mea datos, et versibus ad domnum nostrum regem Carolum titulos, et dixit mihi, te sibi respondisse, quoniam illa alia scripta quæ requirebam, te ibi non habere, et propterea illa mihi non mitteres. Ego autem ipsos quaterniunculos, ad mansionem nostram jam vesperi veniens, lectione citissima perlustravi: de quibus tibi in crastina, in scheda brevi respondi, quam tibi per præfatum venerabilem archiepiscopum Wenilonem transmisi, per quem mihi eosdem quaterniunculos miseras. Quos secundum auctoritatem ac morem, ut provincialis episcopus suo archiepiscopo facere debet et solet, offerre non voluisti, et velut quibusdam visum fuit dedignatus fuisti. Ego autem præfatum schedulam ideo per meipsum tibi non dandam, sed per eum, per quem mihi sæpe fatos quaterniunculos miseras, dirigendam necessario duxi, ne si de mea manu ipsam schedulam recipere refutares, malivolis, si forte aliqui aderant, plausus excitaretur, et benivolis qui plurimi aderant, dolor incuteretur. Expectavi autem postea usque modo, ut mihi illa scripta, quæ tunc apud te non habere mandaveras, mitteres. Sed quoniam illa hæcenus non misisti, dignum censui, ut a te mihi ea mitti reposcerem: et ideo has litteras

A exiguitatis meæ tuæ fraternitati dono, petens ut ipsa scripta mihi per teipsum tribuas, et ne diutius differas: quatenus illis inspectis, salva fide et auctoritate, inde simul sequamur quod catholicæ et fraternæ paci atque dilectioni convenire dignoscitur, sequentes Apostolum dicentem: *Pacem sequimini, et sanctimoniam, sine qua nemo videbit Deum (Joan. III, 20)*. Ipse enim frater nosti dicere veritatem, quia *omnis qui male agit odit lucem, et non venit ad lucem, ut non arguantur opera ejus: qui autem facit veritatem venit ad lucem, ut manifestentur opera ejus, quia in Deo sunt facta (Hebr. XII, 14)*. Propterea sicut, licet non regulariter, ostendisti mihi quæ collegisti ex apostolicæ sedis pontificum epistolis, unde tibi succincte respondi, si necesse foret latius responsurus, ostende etiam scriptum cui subscripsisti, et subscribi fecisti, sed et illa per quæ te dissolvisses dicis scripta a me tibi et ecclesiæ tuæ directa, ut manifestum sit, cum ad lucem venerint, si in Deo sint facta. Ego autem quæ tibi et ecclesiæ tibi commissæ scripsi de præfata excommunicatione a te facta, primum quidem ad te illa direxi, quæ non ex me illa scripsi, sciens dictum a Domino: *Tu autem audiens nuntiabis eis ex me (Ezech. XXXIII, 7)*. Eapropter *justitiam ejus non abscondi in corde meo, veritatem ejus et salutare suum dixi (Psal. XXXIX, 11)*. Non abscondi misericordiam ejus, et veritatem ejus a concilio multo, ut non elonget a me miserationes suas, sed misericordia et veritas ejus suscipiant me. Sed quia ut homo, et in multis divini sensus ignarus, errare possum, quod in hac causa me adhuc fecisse non concredo, si mihi rationem et auctoritatem ostenderis secundum sanctorum Scripturarum tramitem, traditionemque catholicorum Patrum, quam hinc debeam sequi, debitum assensum præbere non abnuo, qui etiam a minoribus meis corrigi, et eorum bene dicta sequi non renuo: quia sæpe juniori Dominus revelat quod melius est, et Apostolus dicit: *Si alii revelatum fuerit sedenti, prior taceat (I Cor. XIV, 30)*. Venerandum quippe, ac cum omni devotione imitandum teneo, quod beatus Gregorius dixisse lego (*lib. VII, ind. 11, epist. 2*): « Ego, inquit, et minores meos, quos ab illicitis prohibeo, in bono imitari paratus sum. Stultus est enim, qui in eo se primum existimat, ut bona quæ viderit discere contemnat. »

CAPUT V.

De duobus Hincari judiciis, quæ a sede apostolica rescissa dicebat.

Denique dictum est mihi, quoniam apud plurimos gloriaris, quia mihi potes resistere, et me audes contemnere, sicut de juvene jactantiæ vento repleto

legitur, qui Ephesi domum Dianæ incendit, et interrogatus cur hoc egerit, respondit, ut quia bonis non poterat, vel malis innosceret. Et ad hanc gloriationem tuam respondeo tibi ex verbis Apostoli: *frater, non bona gloriatio tua* (I Cor. v, 6). Quid enim, quantum sibi a potentia superna permittitur, non potest homo temporali potestate suffultus, qui Deum non timet, et hominem non reveretur? Nam et nos aliquid possumus, sed utinam semper in Deo possimus qui nos confortat. Et quoniam non est potestas nisi a Deo, discernendum est in potestate, quid nobis Deus concedat propitius, et quid permittat iratus, ut concessa cum timore et tremore humiliter exsequamur, et permissa in nostri perniciem non abutamur, et qui gloriatur in potestate, in Domino sicut et in aliis gloriatur, atque juxta dictum sapientis (Boet., de Cons. phil., lib. III, met. 5):

Qui se vult esse potentem,
Animos do met ille feroces;

quia beati mites quoniam ipsi possidebunt terram æternæ scilicet hæreditatis. Si enim gloriaris quia mihi potes resistere, time quia in quo mihi contra regulas sacras resistis, Dei ordinationi resistis, qui per sacros canones Spiritu Dei conditos, et totius mundi reverentia consecratos, me tibi præposuit, et te mihi supposuit. Et si gloriaris quia me audes contemnere, time, quoniam illum, qui suo vitio factus est ut nullum timeret, et specialiter in illo filio perditionis qui antichristus dicitur operabitur imitatis, et nunc, inquit Joannes apostolus, *antichristi multi sunt* (I Joan. II, 18); et ut item scriptum est: *Imitantur illum qui sunt ex parte ipsius* (Sap. II, 25). Unde si gloriaris quia contra me tumes, meque tumendo contemnis, ac per hoc Dei ordinationi resistis, quoniam humilibus, quibus Deus dat gratiam, et pro veritate loquentibus, et his qui contra veritatem se erigunt resistentibus, aperitur cælum, vel occulta nobis vel manifesta divina operatione, sicut de beato Stephano legimus (Act. 7): *Superbis autem, quibus Deus resistit, et Dei ordinationi resistentibus, contraque majores suos tumentibus, vel occulta nobis vel manifesta divina operatione infernus aperitur, sicut de Chore, Dathan et Abiron legimus* (Num. 16), quos dehiscente sub pedibus eorum terra infernus absorbit. Dementia quoque tua, sic enim vocatur a plurimis, per ora multorum volitat, dicentium te quasi mente captum disseminare, quoniam si de aliqua causa te in synodo compellavero, si visum tibi non fuerit, mihi non respondebis, pro eo quod jam duo mea judicia a sede apostolica sint cassata. Unde tibi breviter, potius significando, quam plenam rationem reddendo, censui respondere, donec aut ipse mihi hoc dicas in synodo, aut quod nudo sermone diceris susurrare, alligatum scripto deliberes, quod non æstimo, intimare (nam, ut Scriptura dicit: *Paratas sunt derisoribus judicia, et mallei percutientes stultorum corporibus* [Prov. XIX, 29], habeo hinc paratas judiciales sententias, malleorum vice cordiæ tuæ stultitiam percutientes, si ratio

A postulaverit in medium proferendas; velut item scriptum est: *Sicut spina in manu temulentis, ita in re stulti parabola* (Prov. XXVI, 9): quia temulentus spinam in manu gestans prius seipsum vulnerat, ita et tu, si hæc dicis, non me tantum, sed et plurimos plurimarum provinciarum episcopos, imo et te ipsum, quod non denegas, quia et denegare non potes, participem in omnibus judicio nostro mendaciter impetis, non videns quo te laqueo strangules, quoniam judicium nostrum a majoris auctoritatis iudice immutari, non autem aliter cassari canonice poterat, si contra regulas inimico animo, vel aliqua cupiditate aut gratia, depravatum nobiscum te judicasse confiteris, decernente Africano concilio (can. 91) de episcopo, qui se dixerit mentiendo eos communicasse, quos, eo sciente, non communicasse constiterit, etiam episcopatum amittat.

B Quia vero apud se humilis et discretus, sciens scriptum: *Tempus tacendi, et tempus loquendi* (Eccle. III, 7), gloriatur in Domino, dicens: Dedit mihi Dominus linguam eruditam, ut sciam in tempore proferre sermonem, succincte tibi respondeo, quia nostrum judicium, per regulas executum, sedes postolica non cassavit: sed Rothado, qui ad eam fecit confugium, humiliter poscenti (quoniam legati nostri, qui causam ejus examinavimus, cum litteris, sicut præcipiunt canonibus, prius non venerunt clusas transire prohibiti, quam ab eo, sed et ab aliis plurimis, suggestionem inde susciperet), sicut suo sapientissimo consilio judicavit, solatii benignitatem impendit. C *Quoniam universæ, inquit Leo papa, via Domini misericordia et veritas, cogimur secundum sedis apostolicæ pietatem, ita nostram temperare sententiam, ut trutinato pondere delictorum, quæ constant non unius esse mensuræ, quædam diffiniamus utcunque toleranda, quædam vero penitus amputanda: et remissio peccati non dat licentiam delinquendi, nec quod potuit aliqua ratione concedi, amplius patiemur impune committi. Et nostra unanimitas, ut par est et regulæ præcipiunt, venerabiliter ac humiliter præcellentis auctoritatis decretum apostolicæ sedis (cui, ut Innocentius scribit, in omnibus causis debet reverentia custodiri, et ad quam de majoribus causis, si fuerint in medium devolutæ, sicut synodus statuit, et vetus consuetudo exigit, post judicium episcopale debet referri, sicut D et scribentes, Bonifacius ad Gallicanos, et Leo ad Anastasium, et ad Mauros episcopos, decreverunt) sine ulla contentione vel resultatione suscepit, quoniam sic et synodus statuit, et vetus consuetudo exigit. Quoniam quidem sacra et mystica Nicæna synodus, cui cessit in decretis synodalibus omnis antiquitas, et quam in fidei diffinitione, vel legum latatione, convellere non præsumpsit catholica ulla posteritas, suggerente sibi sancto Spiritu censuit (can. 6). Ut secundum antiquam consuetudinem, Alexandrinus episcopus suorum omnium habeat potestatem, quia et episcopo Romano parilis mos est. Similiter et apud Antiochiam cæterasque provincias suis privi-*

legia servantur Ecclesiis. » Et inde sequentes sancti canones, et in decretis suis Romanæ sedis pontifices promulgaverunt (Cœlest., ep. 2, c. 4; Bonif., ep. 3; conc. Carthag., c. 16; Bonif., ep. 2; Innoc., ep. decret., c. 10): « Ut unaquæque provincia suo metropolitano contentia sit, nec usurpationi locus alicui sacerdoti in alterius concedatur injuria. Sit concessis sibi contentus unusquisque limitibus, alter in alterius provincia nihil præsumat, sed metropolitani sui unaquæque provincia in omnibus rebus ordinationem semper expectet. Et quisquis episcoporum accusatur, ad primatem provincie ipsius accusationem deferat accusator, et accusatus die statuta litteris regulariter evocatus, præsens si confidit ad objecta respondeat. Sed et si quæ causæ vel contentiones inter clericos tam superioris ordinis quam etiam inferioris fuerint exortæ, congregatis ejusdem provincie episcopis, jurgium terminetur: nec alicui liceat, relictis his sacerdotibus, qui in eadem provincia Dei Ecclesiam nutu divino gubernant, ad alias convolare provincias. »

Eodem sancto Spiritu inspirante, quo et præmissa diversis oribus diversisque temporibus decreta sunt, venerandum Sardicense concilium statuit (conc. Sardinic., cap. 3): « Ut si in aliqua provincia aliquis episcopus contra fratrem suum episcopum litem habuerit, ne unus e duobus ex alia provincia advocet episcopum cognitorem. Quod si aliquis episcopus judicatus fuerit in aliqua causa, et putat se bonam causam habere ut iterum concilium renovetur, sancti Petri apostoli (cui ob robur solidissimæ fidei Christus petra a se nomen Petri indidit, dicens: *Tu es Petrus, et super hanc petram, scilicet rectæ fidei, quam Patre tibi revelante confessus es, ædificabo Ecclesiam meam, et tibi dabo claves regni cælorum* [Matth. xvi, 18, 19]; et: *Tu aliquando conversus confirma fratres tuos* [Luc. xxii, 32], videlicet *Pasce oves meas* [Joan. xxi, 26], memoriam honorari constituit. Ut scribatur (conc. Sardinic., can. 3, 4) ab his qui causam examinarunt Romano episcopo, et si judicaverit renovandum esse judicium, renovetur et det iudices; si autem probaverit talem esse causam, ut non refricentur quæ acta sunt, quæ decreverit confirmata erunt. Et cum aliquis episcopus depositus fuerit eorum episcoporum judicio, qui in vicinis locis commorantur, et proclamaverit agendum sibi negotium in urbe Roma, alter episcopus in ejusdem cathedra, post appellationem ejus qui videtur esse depositus, omnino non ordinetur, nisi causa fuerit in judicio episcopi Romani determinata. » Justum namque ac ratione plenissimum Sardicense vidit concilium, ut quia secundum sacros Nicænos canones, unaquæque provincia suo metropolitano debet esse contentia, nec usurpationi locus alicui sacerdoti in alterius conceditur injuria, neque ut alter in alterius provincia quiddam præsumat, sed unaquæque provincia metropolitani sui in omnibus rebus ordinationem semper expectet, ne judicatus in provinciali judicio quilibet innocens damnetur episcopus,

A si necesse illi fuerit, apostolicam beati Petri sedem appellet, et cum appellatione sua ad successorem illius confugiat, ut ipse, de provincialium metropolitanarum sedium atque episcoporum judiciis, misericors et justum decernat judicium, quia in illius primatu ipse beatus Petrus cunctorum onera portat, cujus principatus auctoritate mediator Dei et hominum homo Christus Jesus sedem Romanam super omnes sedes sublimavit, Alexandrinam decoravit, Antiochenam confirmavit, et per cæteras provincias privilegia suis Ecclesiis conservari ac corroborari decrevit. Ordinem autem exsequendi judicii de appellante episcopo idem concilium explanat dicens: « Placuit ut si episcopus accusatus fuerit, et judicaverint congregati episcopi regionis ipsius, et de gradu suo eum dejecerint, si appellaverit qui dejectus est, et confugerit ad episcopum Romanæ Ecclesie, et voluerit se audiri, si justum putaverit ut renovetur examen, scribere his episcopis dignetur qui in finitima et propinqua provincia sunt, ut ipsi diligenter omnino requirant, et juxta fidem veritatis diffiniant. Quod si is qui rogat causam suam audiri iterum, deprecatione sua moverit episcopum Romanum, ut e latere suo presbyterum mittat, erit in potestate episcopi quid velit, et quid æstimet; et si decreverit mittendos esse qui præsentem cum episcopis judicent, habentes ejus auctoritatem a quo destinati sunt, erit in suo arbitrio. Si vero crediderit episcopos sufficere, ut negotio terminum imponant, faciet quod sapientissimo consilio judicaverit. »

C Lege epistolam ipsius Sardicensis concilii ad omnes usquam episcopos, et invenes hoc modo Athanasium Alexandrinum, et Paulum Constantinopolitanum, sed et alios apostolicæ sedis auctoritate in eadem synodo absolutos ac restitutos. Lege decretalem epistolam Leonis ad episcopos per Cæsariensem Mauritianiam constitutos (epist. 91), et invenes Lupicinum, secundum hujus synodi tenorem, in provincia jussu audiri, cum ratione reddita quare communionem ante suditionem meruerat. Et non præjudicatis apostolicæ sedis statutis, nec prædecessorum suorum suisque decretis, Donatum Salsinensem conversum directo fidei libello gregi Dominico præsedisse. Maximum etiam, ex laico reprehensibiliter ordinatum, similiter dato libello, ab episcopali, quam quoquomodo adeptus fuerat, dignitate non repelli. Aggari denique et Tiberiani causam, qui per tumultus et seditiones dicebantur ordinati, provincialium episcoporum judicio commissam fuisse et ad apostolicam sedem statuta referenda præceptum fuisse invenes, et si quæ causæ emergerint, quæ ad statum Ecclesiarum, et ad concordiam pertineant sacerdotum, in provincia sub timore Domini ventilari, et de compositis ac componendis omnibus ad sedem apostolicam plenissimam relationem mitti, ut ea quæ juxta ecclesiasticum morem juste et rationabiliter fuerint diffinita, ipsius sententia roborentur. Sed et de altero Maximo a sancto Bonifacio

decretum invenies (Bonifac. I, *epist.* 2), « intra provinciam esse debere iudicium, et congregari synodum, ut si adesse voluerit præsens, si confidit, ad objecta respondeat : si adesse negligeret, dilationem sententiæ de absentia non lucraretur. Et quicquid de eo provinciales episcopi ducerent decernendum, ad apostolicam sedem referrent, ut ejus auctoritate firmaretur. »

In decretis quoque Innocentii (Innocent. I, *ep.* 27, in fine) Photinum, de quo sedi apostolicæ per falsum rumorem subreptum et elicitum per insidias dicebatur, quia causa ad salutem redierat, invenies restitutum. Sed et a Felice papa (Felix III, *epist.* 4), non per subreptionem, sed per rationem damnatum Misenum, suscepto ab eo libello pœnitentiæ, legimus a beato Gelasio absolutum (*in synodo Rom.*). In regesto nihilominus beati Gregorii, in epistola ad Maximum, manifesta lectione reperies dicere, nullomodo posse ordinationem, quæ ab excommunicatis in excommunicato est acta. Et in epistola ad Columbum (*lib. 1, epist.* 33), oblata sibi petitione a diaconibus Ecclesiæ Pudentianæ, jussit in Numidia provincia cum misso suo universale concilium congregari, et Maximianum episcopum regulariter convictum deponi : et si accusatores pro sua culpa ferendi forent, pro eo quod se Romam fatigaverunt non eis esse parcendum. Et in epistola ad Joannem Syracusanum (*lib. VII, ind. 11, epist.* 62), Lucillum Melicitanæ civitatis episcopum, adhibitis secum tribus vel quatuor coepiscopis, ut ipsis præsentibus satisfacta veritate, debere deponi : et alter in ejus loco pæcipitur eligi, quia, ut ipse beatus Gregorius ad Neapolitanos scribit (*lib. XI, ep.* 3), « canonicis est regulis constitutum, ut defuncto vel sublato pastore, Ecclesia diu sacerdote privari non debeat. » Et in epistola ad Natalem Salonitanum archiepiscopum, sed et in epistola ad Antoninum subdiaconum (*lib. XI, ind. 11, ep.* 8, 9), habes, ut Florentium episcopum a quibusdam in criminalibus causis accusatum, et nullis canonicis probationibus exquisitis, nec sacerdotalis concilii proveniente iudicio, a sui eum honoris officio, non jure sed potestate depositum, quia non potest quisquam episcopatus gradu, nisi justis ex causis concors sacerdotum submovere sententia, eundem Florentium episcopum ab exsilio quo erat retrusus debere ejici, et causam ejus episcopali disceptatione perquiri ; et si in his, in quibus accusatus fuerat, canonica foret probatione convictus, canonica procul dubio ultione plectendum, et præfati archiepiscopi in eum proprium robur obtinere debere sententiam; sin autem generali iudicio fuisset absolutus, nullius deinceps præiudicio subjaceret, et suæ res sibi restituerentur. Et in epistola ad Joannem primæ Justinianæ archiepiscopum (*lib. X, ep.* 33), de Paulo Diadinæ civitatis episcopo invenies, ut qui post depositionem suam, inverecunde ac mente perversa de episcopatu loqui est ausus, et rursus ad hoc aspirare præsumpsit, ut Dominici corporis et sanguinis communionem privatus, in monasterio usque ad diem sui obitus deberet retrudi, viatico tantum munere redonatus.

Lege quoque decreta Gelasii, et invenies eum commemorare quæ longe ante sua tempora constiterunt, de Athanasio, de Joanne Constantinopolitano, atque Flaviano, eandem primam sedem egisse, sicut et de multis aliis in documentis certissimis reperimus. Lege etiam qualiter Athanasius in synodo Hierosolymitana, sed et in Alexandrina, suæ absolutio- nis ac restitutionis auctoritatem a sede apostolica sumptam, et in Sardicensi synodo executam relegit, et unanimitatem fraternitatis quæsit, sicut et in nostra synodo de fratre et consecratorum nostro de quo agitur factum fuit. Quia sicut et de redemptore nostro in Ezechiele propheta legimus (*Ezech. XLVII*), apostolica sedes funiculum in manu tenens, divinæ dispositionis intuitu, alterum intra mensuram electorum misericordia asciscit, et alterum iudicio foras relinquit : ut et Redemptor noster, dum alios a suis iniquitatibus abstrahit, et alios in sua iniquitate derelinquit, alibi funiculum trahit, et aliunde retrahit, et huc ducit quem aliunde subducit, quoniam in eadem sede Dominus, velut in throno suo præsidens, aliorum facta examinat, et cuncta mirabiliter, ut videlicet de sede sua, dispensat. Verum sicut nos ipsius apostolicæ sedis præstantiam fuimus amplexi, ita et ipsa sedes apostolica scripto sacrorum canonum auctoritatem nobis rependit, et benignitatem paternitatis exhibuit, velut concilium Carthaginense decrevit (*conc. Carthag., c. 15*): Placuit, inquit, ut a quibuscumque iudicibus ecclesiasticis ad alios iudices ecclesiasticos, ubi est major auctoritas, fuerit provocatum, non eis obsit quorum fuerit soluta sententia, si convinci non potuerint vel inimico animo iudicasse, vel aliqua cupiditate aut gratia depravati. Sane si ex consensu partium electi fuerint iudices, etiam a pauciore numero quam constitutum est, scilicet in superiori capitulo, non liceat provocari. Quapropter, quoniam benignitas apostolicæ sedis nos inimico animo, vel aliqua cupiditate aut gratia depravatos iudicasse non invenit, neque succensere decrevit : et sicut sanctæ memoriæ domino papæ Nicolao litteris nostris communiter intinnavimus, causa hujus sententiæ, in loco fratris nostri ordinatus decessit, ad se confugiens suæ auctoritatis manum porrexit, et quod sapientissimo suo consilio iudicavit, exsequi procuravit, et nobis executam servare mandavit : cujus præceptionem nostra humilitas, ut dignum fuit, obedienter suscepit. Quis enim cum Christo, qui est pax nostra, et soluto medio pariete fecit utraque unum (*Ephes. II*), pacem habere desiderans, non amplectatur quod dicit Apostolus : *Solliciti servare unitatem spiritus in vinculo pacis ?* (*Ephes. IV, 3.*) Quod ab Apostolo recte dictum, tu in quadam præsumptiosa subscriptione tua incongrue posuisti. Quis Ecclesiæ catholicæ filius non potissime desiderat fratris correctionem, atque erectionem, et non doleat dejectionem ? Quis non totis præcordiis congaudeat in omni Christiano,

maxime autem in ministerii collega, benignissimis A
 evangelicis sententiis piissimi Domini ore prolatis :
*Oportet et te, inquit, fili, gaudere, quia frater tuus
 mortuus fuerat et revixit, perierat et inventus est
 (Luc. xv, 32). Et quod sanato dicit : Ecce sanus factus
 es, jam amplius noli peccare, ne deterius tibi aliquid
 contingat (Joan v, 14) ; et : Vade in domum tuam, et
 annuntia quanta tibi fecerit Dominus ? (Marc. v. 19.)*

De altero autem quasi meo iudicio, quod dicere
 diceris ex Wulfado et ejus collegis, cassato a sede
 apostolica, sentiri potest quod Salomon dicit : *Qui,
 inquit, quod novit loquitur, index justitiæ est ; qui
 autem mentitur, testis est fraudulentus (Prov. xii, 17)*
 Et item : *Jaculum, et gladius, et sagitta acuta, homo
 qui loquitur contra proximum suum falsum testimonia-
 nium (Prov. xxv, 18).* Et ut ostendit apostolus : *His*
qui charitatis veritatem non recipiunt, immittit illis B
*Deus, scilicet ex retributione justitiæ, operationem
 erroris, ut credant mendacio, ut judicentur omnes qui
 non crediderunt veritati sed consenserunt iniquitati
 (II Thess. ii, 10).* Non debueras namque fallere, aut
 falli posse, quod auribus audisti, manibus contrec-
 tasti, oculis legendo vidisti, sed non illis auribus,
 neque illis oculis, de quibus Dominus prophetæ dicit :
Auribus tuis audi, et oculis tuis vide (Ezech. xliv, 5).
 Quia unde agitur iudex non fui, inter iudices con-
 numeratus non exstiti, in loco iudicis non sedi, iudici-
 um inde non terminavi, cum iudicibus vel aliis
 consentientibus non subscripsi. Sed quoniam sedi
 apostolicæ non placuit inde cum his qui iudicave-
 runt, et iudicio illi subscripserunt, rationem habere,
 et quibusdam suadentibus, me voluit, quod sibi bon-
 um videbatur, et episcopi regionum nostrarum, et
 princeps terræ volebat, unanimiter consentire, se-
 cundum auctoritatem sacri Nicæni concilii, et Afri-
 canæ provinciæ canonum, quæ de quibusdam juxta
 instantiam temporis decreverunt, consensi, obte-
 stante Apostolo, *ut idipsum dicamus omnes, et non
 sint in nobis schismata (I Cor. i, 10).* Qui ostendit
 quod jussit, iterum dicens etiam suis minoribus : *Si
 cui aliquid donastis, et ego ; et ego quod donavi, pro-
 pter vos in persona Christi, ut non circumveniamur a
 Satana : non enim ignoramus astutias ejus (I Cor.
 ii 20),* qui sæpe suadet ut unde alter miseretur,
 alter irascatur. Contra quas diaboli astutias pacem
 sequi debemus et sanctimoniam, sine qua nemo vi-
 debit Deum.

Quod pro modulo meo sequi etiam in hoc negotio
 studui, sicut advertere poteras, si de alia sagina,
 quam sanctus postulat dicens : *Sicut adipe et pingue-
 dine repleatur anima mea (Psal. lxxii),* cor impingua-
 tum non haberes, quia synodalis epistola hinc a
 nobis communiter missa, ita per omnia sincerâ, ad
 sedis apostolicæ lectionem, meæ infirmationis et al-
 terius confirmationis causa non venit, veluti ex epi-
 stolis nobis a sede apostolica de ea re scriptis evi-
 denter ostenditur, sicut coram rege et nobis in synodo
 releca fuit. Et tamen inde nullam quæstionem mo-
 vere, vel contentionem consensere volui, nec de his,

quæ a nobis unanimiter in synodo consensa, et a
 sede apostolica diffinita sunt, in perpetuum volo,
 quia bonæ memoriæ Nicolai papæ litteræ, postquam
 inde veritatem rescivit, per meum missum directæ,
 mihi abundantissime suffecerunt. Sed et alias litte-
 ras synodicas, quas audisti, per eundem missum
 mihi direxit, quibus de collectionibus ab eo præcep-
 tis, non mihi, ut jusserat, sed regi, ut tibi ad osten-
 tationem tuam placuit, correctis, quamquam eis non
 indiguerim, sicut solitus es obedisti. Quin et de his
 quæ in synodo Tricassina, in qua quæ non rapui, de
 his rationem reddendo, quæ ad me non pertinebant,
 relictis eis quorum inde intererat, exsolvi. Sed et
 de his quæ post eam synodum esse adversum me
 acitatum, domni Adriani papæ per Actardum vene-
 rabilem episcopum epistolæ missæ, adeo omnem
 angoris nebulam a mente mea sudario suæ magnæ
 benignitatis absterserunt, ut placidissima voluntate.
 sequi me libeat quod monet Apostolus : *Nihil per
 contentionem neque per inanem gloriam. (Philip.
 ii, 3,) ; et : Non efficiamur inanis gloriæ cupidi, in-
 vicem provocantes, invicem invidentes (Gal. v, 26) ;*
 et quod item scriptum est : *Non quæras ultionem, nec
 memor eris injuriæ civium tuorum (Levit. xix, 18),*
 atque totius medullis cordis Domino dicere : *Exulta-
 verunt filiæ Judæ in omnibus iudiciis tuis, Domine,
 et fiat pax in virtute Hierusalem, quæ virtus, ut Au-
 gustinus exponit (in psal. cxxi),* charitas est, cui sanc-
 tæ civitati, videlicet sanctæ Ecclesiæ, dictum est :
*Fiat pax in virtute tua, et abundantia in turribus
 tuis (Psal. cxxi, 7).* Intento mentis oculo, sollicitu-
 dine pia suspiciens quod de actione hujusmodi Leo
 dicit (epist. 91, episcopis per Cæsar. Mauritan.) : « *Superest
 ut concordi obedientia salubres suscipiatis hor-
 tatus, et nihil per contentionem agentes, sed ad
 omne studium devotionis unanimes, divinis et apo-
 stolicis constitutionibus serviatis, et in nullo patiamini
 pia canonum decreta violari. Quæ enim nunc
 certarum remisimus consideratione causarum, anti-
 quis deinceps custodienda sunt regulis, ne quod ad
 tempus pia lenitate concessimus, justa posthac ul-
 tionem plectamur,* » et reliqua.

CAPUT VI.

De eo quod dicebat Hincmarum degradari debere.

Dictum est etiam mihi te plurimis solere dicere ut
 D quoniam quæ in tua parochia ligasti, sine tuo con-
 sensu dissolvi, quin potius quæ contra regulas exor-
 dinasti, secundum regulas ordinavi, hoc agere et ob-
 tinere poteris, et ages et obtinebis, ut ego missam
 non cantem, et si ego illam cantavero, tu illam non
 cantabis. Ad quod tibi mitius responderem, nisi ira-
 tum fuisse Dominum contra Heli, qui filios suos le-
 nius quam debuerit corripuerat (I Reg. 3), legissem :
 et proinde hinc tibi, si tamen hoc dicis, respondeo
 quod de Moab scriptum est : *Audivimus superbiam
 Moab : superbus est valde, superbia ejus et arrogantia
 ejus plus quam fortitudo ejus (Isa. xvi, 6).* Et si tu
 me degradare posse te minaris arrogas tibi plus

quam possis ; ac per hoc in hac causa superbia tua et arrogantia tua plus est quam fortitudo tua. Citius enim facere potes ut tu missam non cantes, quam facere ut ego degradatus fiam ; imo hoc facere potes ut tu missam non cantes, sed hoc facere non potes ut ego degrader: Non es enim mihi prælatus, sed velis nolis in ordinis dignitate subjectus, et de illorum societate in ordinis qualitate, quibus sacri canones non permittunt apud se celebrare concilia, et de quibus magna synodus Chalcedonensis dicit (*can. 19*): « Decrevit sancta synodus secundum canones Patrum, bis in anno episcopus in idipsum in unaquaque provincia convenire, quo metropolitanus antistes probaverit, et corrigere singula, si quæ fortassis emergerint, » et reliqua. Ego te ad synodum deo convocare, tu me non potes ad synodum regulariter provocare, et si ad synodum a me vocatus non veneris, aut dignam excusationem cum tractoria per comministrum tuum mihi directa, in qua impossibilitatis vel necessitatis tuæ causas ostendas, cur ad synodum non venisti, non miseris, ego te valeo et deo judicare: tu pro hujusmodi vel pro alia causa, tua auctoritate me non prævalet judicare. Et si accusandus fueris, accusator tuus ad me primatem provincie de te accusationem debet deferre; nemo autem me apud te regulariter ad judicandum prævalet accusare. Non enim tuum est de me judicare, nec mihi iudices dare, quia sicut scriptum est, *minor a majore benedicitur* (*Hebr. vii, 7*), ita et judicatur. Unde sacri canones et decreta apostolicæ sedis me ad sequentis civitatis episcopi iudicium iræ invitum non patiuntur. Et si de meo quis iudicio queritur, evidenter regulæ monstrant qualiter et a quibus debeat retractari. Ego vero tibi iudices, aut consentire electos, aut a me etiam deputatos dare deo, si causa poposcerit. Ego locum deo et possum eligere, ubicunque mihi visum fuerit, in tota mea provincia ad synodum convocandam, vel ad ordinationem celebrandam, quo si te vocavero debes concurrere. Tuum non est locum ad synodum convocandam, vel ad ordinationem celebrandam, eligere, nec ne quo tu decreveris evocare. Si in Rhemensi provincia præter meam sententiam quis fuerit a quibuscunque et quantiscunque provincie hujus episcopi factus episcopus, sicut mystica Nicæna synodus diffinivit (*cap. 6*), *non oportet eum esse episcopum*. Si autem, communi cæterorum decreto episcoporum rationabili et secundum regulam ecclesiasticam comprobato, tu aut alii duo tui complices tecum propter constitutiones proprias contradixeritis, mea cum pluribus ad ordinandum episcopum obtinebit sententia, et mihi non tibi firmitas eorum quæ geruntur, de ordinationibus vel aliis rebus ecclesiasticis in Rhemensi provincia tribuetur. In qua si fuerit defunctus episcopus, ego et non ut visitatorem ipsi viduatæ designabo Ecclesie, electionem cum decreto canonico præcipiam fieri, et si in partes se eligentium vota dividerint, meum et non tuum erit eligere, qui majoribus ad ordinandum studiis juretur et me-

aritis, et meum est ordinandum examinare, non tuum. Tuum est autem cum aliis mecum ordinare episcopum, et litteris canonicis, quas ordinatus ab ordinatoribus suis jubetur accipere, post me in tuo loco subscribere: qui non debet ulli novæ rei, quæ ad generalem observantiam Domini sacerdotum pertinet, sine conscientia vel sententia mea subscribere. Tu juberis a sacris regulis, decreto vel relationi meæ, si præcepero tibi, salva fide subscribere, et non ego tuo decreto vel relationi subscribere deo: quia tu decreto, vel relationi cuicunque, vel cujuscunque, de his quæ ad parochiam tuam non pertinent, præter me non debes subscribere. Sed et nec de tua parochia, nisi de rebus et possessionibus quas cum notitia presbyterorum et diaconorum Ecclesie tuæ regere debes et dispensare, vel commutationibus earum cum cohibentia clericorum subscribere. De tuo iudicio judicati vel judicandi ad me possunt, et si necessitas eis fuerit ad me provocare debent, non autem de meo iudicio ad tuum iudicium quis provocabit. Tu de rebus Ecclesie tuæ vendendis vel distrahendis me juberis consulere, ego de hujusmodi causa ad tuum consultum ire non jubeor. Si tu presbyterum, vel diaconem, vel alium quemcunque excommunicaveris, et patienter accipere nolueris ut per finitimos episcopos negotium discutatur, et vel probetur sententia tua a plurimis vel emendetur, et tibi ante synodum non placuerit humaniorem pro eo ferre sententiam, congregatis provincie episcopis, una cum eis, si rationabile nobis visum fuerit, possumus et debemus, etiam si nolueris, tuam immutare et alteram proferre sententiam.

Sed et illa non bene intelligis ut in tuis collectionibus potiusque compilationibus inveni, ut ego ad tuam parochiam nisi a te invitatus non veniam, et quæ corrigenda ibi sunt corrigam; et hunc pravæ intelligentiæ tuæ sensum, et plura sacrorum concilia canonum, et apostolicæ sedis decreta redarguunt, revincunt atque repellunt. Si causa in provincia mea orta fuerit, aut in concilio perfecto debet finire (« perfectum, inquit canon [*conc. Antioch. can. 16*], concilium illud est ubi interfuerit metropolitanus antistes »), aut per episcopos iudices, sive quos ego conquirentibus dederò, sive quos ipsi vicinis ex consensu delegerint. Mihi sollicitudo totius provincie est commissa; propter quod ad me omnes undique ex tota provincia, qui negotia ecclesiastica videntur habere, debent concurrere, et ego illorum causas sicut et de tua parochia, deo regulariter diffinire. Tu autem contentus esse debes ut regas tuam parochiam juxta reverentiam singulis competentem, et providentiam geras omnis possessionis quæ sub tua est potestate, ita ut presbyteros et diaconos ordines, et non exordines, et singula, non autem provincie generalia, tuo iudicio comprehendas. Nec tibi licet, si contra fratrem tuum aliquem episcopum litem habueris, ex alia provincia advocare episcopum cognitorem, nec etiam tibi licet pro terminando jurgio præter me ad alias convolare provincias. Sed si ne-

cesse fuerit, pro meâ provincie ambiguitatis absolute, ego a vicina provincia iudices, si decrevero, convocare praevalero. Et si cum episcopo alterius provincie de causa contenderis, et in mea provincia causa conjacet finienda, ego debeo dare iudices, qui eadem causam regulariter finiant, nihil autem horum tui est pontificii. Ego de dubiis et obscuris rebus, de quibus certam diffinitionem non habemus, si forte emeruerint, et de his quæ sine plurimorum iudicio episcoporum finiri non possunt, cum coepiscopis provincie, inter quos annumeraris, debeo consilium quærere, qualiter ita finiantur, ut nec præceptis evangelicis contrarium nec decretis sanctorum inveniatur adversum (Leo, *ep.* 92). Tibi autem in causis quæ ad generalem observantiam pertinent, Domini sacerdotum, nihil præter me agere licet, qui nec vales implere. Si in causis dubiis vel obscuris aliquid dubitas, me debes interrogare; et si ego nesciero, ego apud alios, vel si necesse fuerit apud sedem apostolicam debeo requirere et tibi absolvere. Tu autem sine me de causis generalibus, nec etiam ad sedem apostolicam debes requirere antequam studeas me inde consulere; et si pro causis propriis ubicunque longius cogente necessitate tibi fuerit ambulandum, a me secundum indictam a sanctis Patribus regulam petere licentiam debes, et ad quamlibet provinciam sine meis litteris regulariter proficisci vel mittere longius ad comitatum ministrum tuum non potes, nec me in aliquo postponere debes præsumere, excepto si contra me aliquid causæ non habueris, ut ob hoc apostolicæ sedis iudicium regulariter expetatis, sicut Sardicenses canones monstrant, et Innocentius ad Victricium, et Gregorius et cæteri Romani pontifices in decretis suis commemorant, atque leges imperatorie, quas ecclesiasticæ regulæ approbant, evidenter ostendunt. Ego pro huiusmodi negotio, nec tua licentia, nec litteris tuæ singularitatis indigeo. De his denique ex quibus certas et manifestas, atque inviolabiliter et irrefragabiliter sine ulla immutatione tenendas, secundum tramitem Scripturarum, sanctorum conciliorum et postolicæ sedis habemus sententias, si contra eas feceris, non debeo expectare provinciale vel generale concilium, vel coepiscoporum nostrorum consultum sive consilium, sed statim secundum majorum et orthodoxorum Patrum sententia, ea corrigere debeo quæ contra eorum diffinitionem admiseris, quia, ut beatus monstrat Gelasius, in his non novæ constitutionis auctor, sed veteris constituti exsecutor existam.

CAPUT VII.

De eo quod sæculari consultus purgari quæsierit.

Tu autem contra veteres constitutiones, non solum toties, ut præmisi, a provincia Rhemorum, sine licentia regulari, inordinato more, pro quibusdam negotiis sicut tibi visum fuerat deproperasti, sed et postea inde sine meo ac coepiscoporum nostrorum consultu sive consensu, non ecclesiastico sed sæcu-

lari comitatu ascitus in aliam provinciam perrexisti; et si vim ab aliquo fuisti perpressus, ut ab ea irregulariter vel coactus exires, nihil apud me, sicut præcipiunt regulæ, inde questus fuisti, sed antequam scires quid ex eodem negotio acturus essem, vel quid obtinere valerem, sine mea conscientia, sicut et jam altera vice fecisti, reclamationem ad apostolicam sedem misisti, cum præcipiant regulæ (Greg., *lib.* VII, *ind.* 2, *ep.* 8): Ut nullus episcopus metropolitanum suum in aliquo præsumat postponere, excepto si contra eum aliquid causæ non habuerit, ut ob hoc sedis apostolicæ petat iudicium, quod per canones antiquorum Patrum est institutione permissum. Verum et priusquam inde responsum acciperes, relicto ecclesiastico, publico iudicio, videlicet principalis potestatis reipublicæ præsentis, de his quæ tibi illata fuerant purgari, ut quorundam etiam sæcularium interventu ac rei proventu claruit expetisti: quia cum bis ad te missos et litteras miserim, et quidam tuorum tecum loquendi habuerint fœultatem, et tecum locuti fuerint, nec meum vel coepiscoporum nostrorum expetisti auxilium, nec nostro voluisti uti consilio, sicut jam aliis vicibus egisti, quando pro te et verbis et scriptis apud domnum regem satagemus, et commotionem illius a te sine causa et irrationabiliter excitatam placavimus. Hinc autem ecclesiasticum expetere contempsisti iudicium, et episcopali, sicut præcipiunt regulæ, uti noluisti consilio, neque ullam inde postea satisfactionem Ecclesiæ vel ecclesiasticis regulis exhibuisti: sed ut scriptum est de ea quæ tergit os suum, et dicit: Non sum operata malum (*Prov.* xxx, 20), ita aut non intelligens, aut intelligere pervicacia tua dissimulans, hactenus in indomabili contumacia tua persistis; me quoque postposito, ac relictis provincie meæ communibus coepiscopis, scilicet meis ac tuis, in alia provincia, et aliarum provinciarum episcoporum inde uti consilio magis quam nostro contra regulas delegisti, cum ego in vicinitate loci ubi dominus rex immobilis tunc fuero, et quidam coepiscoporum nostrorum cum illo deguerint. Sicque sine mea ac coepiscoporum provincie meæ sententia ac conscientia, transiens secus locum in quo eram, adeo tibi proximum ut me videre posses si velles, quia te vidi, quando sine ulla necessitate, velocius quam episcopali gravitati conveniat, per inde transiens, irregulariter ad sedem tuam rediisti, antequam episcopali examini redderes rationem, qua de re a parochia tua, et Rhemensi provincia irregulariter aut voluntate abscesseris, aut de quacunque causa a quocunque reputatus vi abductus existiteris. « Ideo, inquit sanctus Gelasius (*cap.* 20), vocatur ad iudicium certe quæcunque persona, ut aut fateatur objecta, aut convincatur objectis. » Et Antiocheni canones: « In conciliis, inquit, adsint omnes qui se læsos existimant, et synodi experiantur examen. » Debueras igitur de nova noviter causa, vel a te acta, vel tibi illata, expetere synodum, ut aut de

quacunq̄ue objectione aut de læsione synodi expereris examen; sed tu econtra, inconsulte rediens ad sedem tuam, Decreto contra sacros canones et constituta sedis Romanæ pontificum subscripsisti, et ecclesiæ tuæ clericos subscribere fecisti.

CAPUT VIII.

De epistolis papæ pro ejus reclamatione scriptis.

Epistolas quoque, domno regi et mihi pro reclamatione tua a domno apostolico per missos tuos directas, non secundum domni papæ jussionem mihi, ut jussa illius exsequerer, dari fecisti, sed per aliarum et etiam longin quarum regionum archiepiscopos domno regi et mihi in parochia mea, in qua degebamus, dari obtinuisti, et cum dominus rex de his ex quibus eum ad sedem apostolicam accusasti, sicut in domni apostolici epistola sibi directa invenit, apud me primatem Rhemorum provinciæ querelam deposuerit, quia contra rationem et veritatem, inconsulte atque irregulariter illum accusaveris, etiam post sibi a te præstitum sacramentum, cui accusatio tua dicitur obviare, sine meo vel coepiscoporum nostrorum consilio ac judicio, et in alia provincia, eidem principali potestati satisfactionis modum, sicut tunc vobis visum fuit, exhibere maluisti, cum notum sit quid sacræ regulæ de cujuslibet ordinis clerico dicant, qui sive de criminali, sive de civili causa, relicto ecclesiastico, publico se judicio purgari voluerit, vel qui pro terminando jurgio, relictis his sacerdotibus qui in eadem provincia Dei Ecclesiam nutu divino gubernant, ad alias præsumunt convolare provincias. Quæ ignorare non poteris, quoniam quando te ad me reclamasti, quædam a domno rege, sed et ab aliis quibusque, tibi illata, quid de eisdem tibi illatis, et ecclesiasticæ regulæ et jura publica dicant, sufficienter in scripto domno regi a me una cum venerabilibus coepiscopis nostris apud Pistas porrecto legisti, unde obtinuimus quod nobis visum fuit tibi tunc suffecisse. Nam et quando eadem principâlis potestas, nec non et omnis præfectura totius regni sui, insolentia tua exigente, contra te fuere commotæ in Vermeria palatio, iterum inde scriptum quod legisti porrexisti.

CAPUT IX.

De monacho a Laudunensi excommunicato.

Sed et cum dominus rex monachum ac presbyterum quemdam inter suos religiosum ex venerabili monasterio S. Dionysii, ad monasterium in Laudunensium, ad doctrinæ atque religionis institutionem, non autem ad irregularem prælationem accersit, et inconsulte illum, pro animositate, quam contra regem habebas, excommunicasti, jussus a domno rege, adhibito mecum fratre et coepiscopo nostro Odone, te monui quatenus irrationabilem tuam mutares sententiam: sed nihil apud te inde obtinere prævalui. Quapropter dominus rex misit alios episcopos, aliarum etiam regionum, ad te pro hac eadem causa, quorum monitis obedisti, ostendens quod metropoli tuæ obedire in me non digneris, qui secundum

A morem Ecclesiæ nostræ, cum fidei professione ac subscriptione professus fuisti, ac subscripsisti, te obediturum regulariter privilegio metropolis sedis Rhemorum. Et si jurgium aliquod inter te et alium aliquem tam superioris quam inferioris ordinis foret, meo ac coepiscoporum nostrorum consilio ac judicio terminari debuerat, et de a te excommunicato in tua vel a tua parochia, si antea tibi non placeret, tua sponte vel finitimorum episcoporum consilio tuam immutare sententiam, meo ac coepiscoporum nostrorum consilio vel judicio confirmari vel immutari secundum regulas sacras debeat. Quæ vero judicia de hujusmodi excessibus regulæ sacræ sententiis diffinitivis decernant, hic intendendo ponere differo, quia sicut papa Simplicius dicit (*epist. 16*): « Nolumus exaggerare quæ gesta sunt, ne cogamur judicare quæ justa sunt. »

CAPUT X.

De compilatione ex epistolis apostolicæ sedis in quaterniunculis missis, et de verbo promulgo, et capitulo Leonis papæ.

Hæc autem quæ nuper contra regulas sacras egisti, in subscriptione detestandi decreti, et in compilatione quarundam sententiarum ex epistolis apostolicæ sedis pontificum, quam mihi, ut supra commemoravi, misisti, contra privilegium metropolis tuæ, volens illa adversum sancti Spiritus scita defendere, quæ tibi non licuit agere, silentio præterire non valeo. Attende igitur diligenter atque intelligenter, quid beatus Leo ad omnes episcopos per universas provincias constitutos dicat de omnium decessorum suorum epistolis (*epist. 1*, in fine): « Omnia, inquit, decretalia constituta, tam beatæ recordationis Innocentii quam omnium decessorum nostrorum, quæ de ecclesiasticis ordinibus et canonum promulgata sunt disciplinis, ita a vestra dilectione custodiri debere mandamus, ut si quis illa contempserit, veniam sibi deinceps noverit denegari. » Adverte quoniam illa dicit observanda quæ a decessoribus suis de ecclesiasticis ordinibus et canonum promulgata sunt disciplinis. Quapropter, quoniam de novo utre tuo adhuc grammaticæ artis mustum et ponderationes verborum ebulliunt, primo videamus de verbo *promulgo*, unde fit per conjugationis deductione *promulgatum*, ex cujus plurali numero hic Leo posuit *promulgata*, quia etiam panni veteres quasiti sunt quibus Jeremias suffultus, sanius ac suavius educeretur de lacu in quo missus fuerat (*Jer. xxxviii*), quia locus fuit in nomine Domini, quærenda nobis est priscorum auctoritas et doctrina, quibus valeamus tutius expediri a circumposita nobis omnibus metropolitanis a te muscipula. Et ut certius credas quæ de hoc etiam verbo dicemus, revolve libros veterum, et illum nihilominus codicem quodam meum, a sobrino tuo Anselmo receptum, et tibi a me prestitum, sed postea sicut nec quosdam alios tibi a me commodatos obtentum, et invenies dixisse veteres *promulgo*, *promo vulgo*, sive *primum in vulgus edo*, et esse hoc verbum *promulgo*, secundum

regulam grammaticæ artis compositum, ut quibusdam placuit, ex duobus corruptis *promo* et *vulgo*, et ut quibusdam placuit, ex duobus integris, scilicet *pro* præpositione et *vulgo*, sicut et *produco* : a quo simplici verbo *vulgo* componitur et *divulgo*. Unde Cicero, explanans verborum sensum, dicit : Proditum, memoriæ traditum, provulgatum, provulgavit, exposuit, prodidit, elocutus est, effatus est, retulit, narravit, nuntiavit, indicavit, locutus est, verbum fecit, disseruit, disputavit, tractavit, sermonem habuit, orationem habuit, orsus est. Et hujus verbi simplicis præteritum Nonius Marcellus in libro quem inscripsit de Proprietate sermonum, ponens dixit : *vulgavit, honeste positum, vile habuit, et quasi in vulgus dedit*. De composito autem hoc verbo, quod est *promulgo*, Paulus in Glossis suis dicit hoc modo : *Promulgari leges dicuntur, cum in vulgus eduntur*. Habet igitur sensum compositio, *prômulgare, in vulgus promere, dare, manifestare et edere*. Glossa autem, *promulgavit, ac si primum in vulgus dedit, protulit, ac prorogavit*. Et hujus verbi simplicis sensum, id est *vulgo, vulgas*, sanctus Hieronymus pro *manifesto* posuit, et inde vulgatam editionem, id est omnibus notam et manifestam dici ostendit. Compositi autem verbi hujus sensum et Evangelium Lucæ demonstrat, dicens : *Et super omnia montana Judææ divulgabantur omnia verba hæc (Luc. I, 65)*. Cujus verbi divulgabantur sensum Beda sequens beatum Ambrosium ita exposuit : *Quia nota facta fama innotuit*. Isidorus quoque, ut ipse dicit auctore Tullio, exposuit dicens : *Promulgatum est, foras prolatum, ut lex dicitur promulgata, et promulgatum proprie, ad omnium notitiam et totius vulgi intimatum*. Et Placides unum superadjiciens verbum, cætera dicit similiter : *Promulgatum, inquit, est foras prolatum, vel constitutum, ut lex dicitur promulgata, promulgatum autem, ad omnium notitiam et totius vulgi intimatum*. Præterea Glossæ antiquorum taliter hoc verbum explanaverunt, *promulgans, porrigens ; promulgare, edere ; promulgat, profert ; promulgat, crescit, incrementat, promit, prædicat, pronuntiat ; promulgata, prolata, deprompta, propagata, patefacta*. Et hoc, ut Priscianus præpositis de verborum explanatione auctoribus dicit, ipse omnibus validior usus ostendit. Differentiam vero sensus inter *divulgata* et *provulgata* sive *promulgata*, enucleatores verborum hanc voluerunt esse, ut *divulgata* simpliciter tantum dicantur ad notitiam omnium propalata, *provulgata* vero vel *promulgata*, ad conservandum decreta, et in omnium notitiam, ut illa sine refragatione conservent, deprompta intelligantur. Unde beatus Gregorius, exponens sententiam Domini ad Job dicentis : *Nunquid alligabis rhinocerotam ad arandum loro tuo? (Job xxxix, 10.)* « Sæpe, inquit (*Moral.*, lib. xxxi, c. 3), vidisse me memini quod cum se ad feriendum graviter hic rhinoceros accenderet, et quasi elevato cornu bestiolis minimis mortis exsilia damnationemque subjectis immensis terroribus intentaret, repente fronti signo crucis impresso omne in se

incendium furoris exstinxit, conversus minas deposuit, et quia ad deliberata progredi non posset, ligatus agnovit. Et non solum in se iras edomat, sed subjectorum etiam sensibus omne quod rectum est inserere festinat, utque omnes sanctam Ecclesiam ex intima cogitatione venerentur, exemplo ipsæ suæ humilitatis demonstrat. » Et post aliquanta : « Ad horum duritiam dissolvendam nonnunquam sancta Ecclesia, quia propria virtute non sufficit, rhinocerotis hujus, id est terreni principis, opitulationem quærit, ut ipse super jacentes glebas conterat, quas Ecclesiarum humilitas, quasi planities vallium portat. Has itaque glebas rhinoceros pede perimit ac comminuit, quia pravorum potentumque duritiam, cui ecclesiastica humilitas resistere non valet, principalis religio ex potestate dissolvit : quod quia sola divina virtute agitur, ut terreni regni culmina ad provectum regni celestis inclinentur, recte nunc dicitur, *aut confringet glebas vallium post te.* » Et paulo post (*ibid.*, c. 4) : « Quis ergo in initio nascentis Ecclesiæ crederet, dum contra eam ille indomitus principatus terræ tot minis et cruciatibus sæviret, quia rhinoceros iste Deo sementem redderet, id est acceptum prædicationis verbum operibus repensaret? quis posset tunc infirmorum credere quod ejus aream congregaret? Ecce enim modo pro Ecclesia leges promulgat qui dudum contra eam per varia tormenta sæviebat. Ecce quaslibet gentes capere potuerit, ad fidei illas gratiam suadendo perducit, eisque æternam vitam indicat, quibus captis præsentem servat. »

Ecce de origine sermonis et proprietate sensus ejus quid sensere majores. Nunc videamus de proprietate dictorum beati Leonis, qui mandavit omnia decretalia constituta, tam beatæ recordationis Innocentii quam omnium decessorum suorum, quæ de ecclesiasticis ordinibus et canonum promulgata sunt disciplinis, custodiri. Unde primum nobis sciendum est aliud esse promulgare sacros ordines et canonum disciplinas, aliud promulgare de sacris ordinibus et canonum disciplinis, sicut aliud est promulgare leges, et aliud promulgare de legibus. Promulgare autem leges, est leges condere ; promulgare vero de legibus, est de illis judicicia sumere, et secundum illas judicare, earumque observationem et judicicia omnibus intimare, sicut sanctus Augustinus in libro de vera Religione (*cap. 31*) ostendit, dicens : « Æternam legem mundis animis fas est cognoscere, judicare non fas est. Lex ipsa etiam ipse fit, secundum quam judicat omnia, et de qua judicare nullus potest : sicut in istis temporalibus legibus, quanquam de his homines judicent cum eas ipstituunt, tamen cum fuerint institutæ atque firmatæ, non licebit iudici de ipsis judicare, sed secundum ipsas. Conditor tamen legum temporalium, si vir bonus est et sapiens, illam ipsam consulit æternam, de qua nulli animæ judicare datum est, ut secundum ejus immutabiles regulas, quid sit pro tempore jubendum vetandumque discernat. » Et in libro Confessionum : « Spiritales ergo,

sive qui præsunt, sive qui obtemperant, spiritualiter judicant. » Sacros vero ordines promulgare est a Domino constituere. *Ipsi, inquit, invocant me, et ego benedicam* (Num. vi, 17), scilicet episcopos. Per episcopos, sicut per apostolos a Domino ordinatos, Matthias est ordinatus apostolus (*Act. i, 26*), et per prophetas ac doctores, qui et episcopi ac apostoli erant, apud Antiochiam, jubente Spiritu sancto atque dicente : *Separate mihi Barnabam et Saulum ad opus ministerii ad quod elegi eos* (*Act. xiii, 2*), ipsi Barnabas et Saulus sunt ordinati. Et per Moysen a Domino ordinatum Aaron et filius ejus Eleazar, et per eos reliqui minores sacerdotes ordinati sunt. *Et congregans, inquit sacra historia, Moyses septuaginta viros de senioribus Israel, quos stare fecit circa tabernaculum, descenditque Dominus per nubem, et locutus est ad eum, auferens de spiritu qui erat in Moysse, scilicet non tollendo, sed in alios propagando, vel promulgando, et dans septuaginta viris* (Num. xi, 24). Qui spiritus et Moysi dicitur, sicut et spiritus Eliæ vocatur, eo locutionis genere, quo et Dominum in oratione petimus : *Panem nostrum quotidianum da nobis hodie* (Luc. xi, 3). Dei enim idem panis est et spiritus, a quo illum ex munere dantis accipimus, et noster fit veraciter per acceptionem, qui illum ab eo accipimus. *Cumque, inquit historia, requievissent in eis spiritus, prophetaverunt, nec ultra cessaverunt* (Num. xi, 25). Quod sicut Moyses Domino, in quem non cadit oblitio, qui tamen dicit : *Recordabor pacti fœderis mei* (Gen. ix, 15), ad obtinenda quæ petebat patres obtulit, dicens : *Memento Abraham, Isaac et Jacob servorum tuorum, quibus jurasti* (Exod. xxxii, 3), id est firma pollicitatione dixisti. Et episcopi commemorant in ordinatione presbyterorum, ut ipse quod suum est in eorum, videlicet episcoporum, ministerio exsequatur, dicentes : « Sic in eremo per septuaginta virorum prudentium mentes Moysi spiritum propagasti, quibus ille adjutoribus usus in populo, innumeras multitudines facile gubernavit. Sic et in Eleazaro et Ithamar filiis Aaron paternæ plenitudinis abundantiam transfudisti, ut ad hostias salutare et frequentioris officii sacramenta sufficeret ministerium sacerdotum. Hac providentia, Domine, apostolis filii tui doctoribus fidei comites addidisti, quibus illi orbem totum secundis prædicatoribus impleverunt. » Qui scilicet episcopi et presbyteri, in primordio nascentis Ecclesiæ, et usque non ad parvum temporis progressum, uno nomine in singulis officiis vocabantur, sicut in epistola Petri, et in epistolis Joannis, et in epistolis Pauli manifestatur, et sicut Hieronymus ad Evagrium presbyterum (*epist. 85*) ex auctoritate Scripturarum ostendit. Sed et reliqui per eos qui a Domino ad hoc constituti sunt ecclesiastici ordines promulgantur, eorum scilicet ministerio, Domino quod suum est exsequente. De sacris autem ordinibus promulgare est qui et quot sint, et quales ac qualiter, et a quibus vel quando sunt ordinandi, et quomodo ac quantum in singulis gradibus debeant

A ministrare, qualiter etiam ab ostiario usque ad summum sacerdotium quique valeant provehi. Et quæ sint ex eis a sedis Romanæ pontificibus promulgata, omnibus in ecclesiasticis dogmatibus exercitatis constat esse notissimum ; et quia inde quæstionem non moventes, superfluum duco ea disserere.

Quia vero, ut superius dixi de legibus et sacris ordinibus, quoniam aliud est leges et sacros ordines promulgare, et aliud, sicut ostendi, de legibus et sacris ordinibus promulgare, ostendendum est quia similiter aliud est sacros canones promulgare, et aliud est de sacrorum canonum disciplinis constituta decretalia promulgare. Qui namque sint canones, de quorum disciplinis promulgata adeo conservari a sancto Leone papa jubentur, ut si quis in illa commiserit, veniam sibi deinceps noverit denegari. B memoratus ab eo beatus Innocentius, in disciplina ex eisdem sacris canonibus decreta, ad Victricium Rothomagensem episcopum patenter ostendit (*epist. 4*). « Si quæ, inquit, causæ vel contentiones inter clericos, tam superioris ordinis quam etiam inferioris fuerint extortæ, ut secundum synodum Nicænam, congregatis ejusdem provinciæ episcopis, jurgium terminetur, » et reliqua. Et ibi post aliquanta : « Si quæ autem majores causæ in medio fuerint devolutæ, ad sedem apostolicam, sicut synodus statuit, scilicet Sardicensis, et vetus consuetudo exigit, post judicium episcopale referatur. » Et ad Alexandrum Antiochenum episcopum (*epist. 20*) : « Revolentes, inquit, auctoritatem Nicæne synodi, quæ una omnium per orbem terrarum mentem explicat sacerdotum, quæ censuit de Antiochena Ecclesia, cunctis fidelibus, ne dixerim sacerdotibus, esse necessarium custodire, quæ super diocesim suam prædictam Ecclesiam, non super aliquam aliam provinciam, recognoscimus constitutam. » Et inde promulgavit de ordinatione metropolitanorum, quorum plures ipsa Ecclesia subjectos sibi habet, sicut et Alexandrinus episcopus ex antiqua consuetudine, et Thessalonicensis episcopus ex delegatione sedis apostolicæ. Et ad Macedones episcopos (*epist. 27*, sub medium), ex eisdem sacris canonibus apud Nicæam constitutis, promulgavit Novatianos ad Ecclesiam venientes per manus impositionem in suis ordinibus recipi ; et opinionem eorum qui, ne in Ecclesia scandalum fieret, Anisim [aiebant] sequendum in D recipiendis Bonosiaris ab eodem Bonoso post damnationem suam ordinatis, manifeste refellit. Sed et ex præfatis Nicænis canonibus promulgavit Paulianistas ad Ecclesiam venientes baptizari, alios autem ab hæreticis in nomine sanctæ Trinitatis baptizatos non baptizari debere. Et Zosimus ad universos episcopos per Gallias et septem provincias constitutos, decretas inde disciplinas promulgatas direxit. Bonifacius quoque ad Rusticum Narbonensem episcopum hinc ita dicit (*epist. 3, ad Hilarium*) : « Nulli, inquit, videtur incognita synodi constitutio Nicæne, quæ ita præcipit, ut eadem proprie verba ponamus : Per unamquamque provinciam jus metropolitanos

singulos habere debere, nec cuiquam duas esse subiectas. Quod illi, quia aliter credendum non est, servandum sancto Spiritu suggerente sibimet censuerunt. » Et paulo post : « Quod idcirco dicimus ut adverteat charitas tua adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem exspectet. » Et Cœlestinus ad universos episcopos per Viennensem et Narbonensem provinciam constitutos scribit (*epist.* 1), similiter et ad universos episcopos per Apuliam et Calabriam constitutos (*epist.* 2) : « Nulli, inquit, sacerdoti suos liceat canones ignorare, nec quidquam facere quod Patrum possit regulis obviare. Quæ enim a nobis res digna servabitur, si decretalium norma constitutorum pro aliorum libitu licentia populis permissa frangatur? »

Et non solum isti sui decessores sacrorum canonum, de quorum disciplinis decretalia constituta promulgaverunt, hoc modo ut præmissi, eosdem sacros canones ad auctoritatem duxerunt; sed et Damasus ad Paulinum (*epist.* 4), ita in observatione sacrorum Nicænorum canonum, sicut et in fide, ad Ecclesiam redeuntibus subscribere iussit, verum et successores ejusdem beati Leonis, ut de multis quosdam designem ex nomine, Hilarus scilicet, Simplicius, Felix, Gelasius, Symmachus, Hormisdas, et beatus Gregorius, eosdem sacros canones, sed et alia concilia quæ catholica Ecclesia recipit, servat ac veneratur, et apostolica sedes docuit esse servanda, in suis decretis, quæ ex eorum disciplinis promulgaverunt, ad auctoritatem deducunt, præcipientes ut in singulis sacris ordinibus, atque in singulis sacrorum ordinum dignitatibus, canonicam normam tenere, servare atque sequi procurent, et nulli ab eorum constitutione deviare præsumant, nullique eisdem sacris canonibus impune obviare prævaleant, nulli etiam suum arbitrium ad quoslibet judicandos sequantur, sed per rectum eorum tramitem non declinantes ad dexteram neque ad sinistram incedant, et singuli, sicut iidem venerandi canones decreverunt, obedientiam, quam a suis minoribus exigunt, suis majoribus reverenter dependant, et sicut non volunt gravis oneris sarcinam ferre, ita non audeant aliis importabile pondus imponere, nec de obscuris vel dubiis constituere, quod præceptis evangelicis contrarium et decretis sanctorum inveniat adversum, et singuli mensuram et ordinem a Deo sibi decretum per eosdem sacros canones servant. Sed et isdem beatus Leo, scribens ad Anatolium Constantinopolitanum episcopum (*epist.* 58), sacros canones, de quorum disciplinis sua decretalia constituta promulgavit, ita commemorat : « Sancti, inquiens, illi et venerabiles Patres, qui in urbe Nicæna, sacrilego Ario cum sua impietate damnato, mansuras usque in finem mundi leges ecclesiasticorum canonum condiderunt, et apud nos in toto orbe terrarum in suis constitutionibus vivunt, et si quid usquam aliter quam illi sta-

tuerunt præsumitur, sine cunctatione cassatur. » Et item idem ad eundem (*ibid.*, paulo superius : « Illa Nicænorum canonum per sanctum vere Spiritum ordinata conditio nulla unquam est parte solubilis. Nulla sibimet de multiplicatione congregationis synodalia concilia blandiantur, neque trecentis illis decem atque octo episcopis, quantumlibet copiosior numerus sacerdotum, vel comparare se audeat, vel præferre : cum tanto divinitus privilegio Nicæna sit synodus consecrata, ut sive per pauciores, sive per plures Ecclesiastica judicia celebrentur, omni penitus auctoritate sit vacuum, quidquid ab illorum fuerit constitutione diversum. » Et item idem ad Maximum Antiochenum (*epist.* 66) : « Quidquid, inquit, præter speciales causas synodalium conciliorum ad examen episcopale defertur, potest aliquam dijudicandi habere rationem, si nihil de eo est a sanctis Patribus apud Nicænam diffinitum. Nam quod ab illorum regulis et constitutione discordat, apostolicæ sedis nunquam poterit obtinere consensum. » Et Chalcedonense concilium dicit (*can.* 1) : « Regulas sanctorum Patrum, per singula nunc usque concilia constitutas, proprium robur obtinere decrevimus. » Et item Leo ad Anastasium dicit (*epist.* 88) : « Secundum sanctorum Patrum canones Spiritu Dei conditos et totius mundi reverentia consecratos, metropolitanos singularum provinciarum episcopos, quibus ex delegatione nostra fraternitatis tuæ cura prætenditur, jus traditæ sibi antiquitus dignitatis intermeraturo habere decernimus, ita ut a regulis præstitutis nulla aut negligentia aut præsumptione discedant. »

Et quia non necesse est tibi exponi ab aliquo quid intelligere debeas in eo quod dicit a *regulis præstitutis*, inspicere canonum libros, et videbis omnia illa concilia, quæ a majoribus servanda suscepimus, celebrata ante Chalcedonensem synodum, quæ decrevit regulas sanctorum Patrum per singula eatenus concilia constitutas proprium robur obtinere, a quibus omnibus Leo præcipit metropolitanos singularum provinciarum episcopos nulla aut negligentia aut præsumptione discedere. Et hinc Gelasius in generali decreto ad omnes episcopos de institutis ecclesiasticis dicit (*epist.* 6) : « Cum nobis contra salutarium reverentiam regularum cupiamus temere nil licere, et cum sedes apostolica super his omnibus, favente Domino, quæ paternis canonibus sunt præfixa, pio devotoque studeat tenere proposito, satis indignum est quemdam vel pontificum, vel ordinum subsequentium, hanc observantiam refutare, quam beati Petri sedem et sequi videat et docere : satisque conveniens sit ut totum corpus Ecclesiæ in hac sibimet observatione concordet, quam illic vigere conspiciet, ubi Dominus Ecclesiæ totius posuit principatum. » Et sanctus Gregorius ad Gallicanos scribens episcopos, inter alia et cum aliis dicit : « Omnia, inquiens, quæ sanctis canonibus sicut prædiximus sunt adversa, districte sub anathematis interpositione damnentur. » Qui beatus Gregorius

sæpenumero in suis decretalibus epistolis præstituta conciliorum regulas observari, et ab eis in nullo declinari decernit. Et beatus Hormisda sancto Remigio, vices apostolicæ sedis ei committens, inter alia ita scripsit : « Paternas scilicet regulas, et decreta sanctissimis diffinita conciliis, ab omnibus servanda mandamus. In his vigilantiam tuam, in his curam et fraternæ monita exhortationis ostendimus. His ea quanta dignum est reverentia custoditis, nullum relinquit culpæ locum sanctæ observationis obstaculum. Ibi fas, nefasque perscriptum est; ibi prohibitum ad quod nullus audeat aspirare, ibi concessum quod debeat mens Deo placitura præsumere. »

His, frater, appone sensum tuum, his suppose mentem tuam, his accomoda animum tuum, his subde intelligentiam tuam, et non errabis, neque diffuses per vanas autumationes tuas, quibus es quasi vento pastus, potiusque inflatione distentus, dum tuis compilationibus, nihil tibi ad ea quæ intendis profuturis, quinimo plurimum obfuturis, incumbis. Quid, inquit beatus Leo, iniquius quam impia sapere, et sapientioribus doctioribusque non credere? Sed in hanc insipientiam cadunt, qui cum ad cognoscendam veritatem aliquo impediuntur obscuro, non ad propheticas voces, non ad apostolicas litteras, nec ad evangelicas auctoritates, sed ad semetipsos recurrunt, et ideo magistri erroris existunt, quia veritatis discipuli non fuerunt. Audis quia venerabiles Patres leges usque in finem sæculi mansuras condiderunt? Audis quia quidquid ab eorum regulis fuerit diversum, erit penitus irritum? Audis sacros canones Spiritu Dei conditos, et totius mundi reverentia consecratos, a quibus nulla negligentia aut præsumptione a quolibet deviari conceditur? Audis quia contra eosdem canones nec etiam apostolica sedes sibi licere aliquid temere cupiat? Audis ut omnia quæ sanctis canonibus sunt adversa districtè sub anathematis interpositione damnentur? Audis quoniam ibi fas nefasque perscriptum est, ibi prohibitum ad quod nullus audeat aspirare, ibi concessum quid debeat mens Deo placitura præsumere, et studes tergiversationes exquirere ut nulli possis subesse, qui non potes cunctis præesse? Audi etiam quid de his sacrorum conciliorum canonibus cum aliis orthodoxis etiam B. Augustinus, vir in omni catholica scientia et doctrina opinatissimus, ad Januarium scribens sentiat (*epist.* 118) : « Illa, inquit, quæ non scripta, sed tradita custodimus, quæ quidem in toto terrarum orbe servantur, datur intelligi vel ab ipsis apostolis, vel plenariis conciliis, quorum est in Ecclesia saluberrima auctoritas, commendata atque statuta retineri. Omnia itaque talia, quæ neque sanctarum Scripturarum auctoritatibus continentur, nec conciliis episcoporum statuta inveniuntur, nec consuetudine universæ Ecclesiæ roborata sunt, sed diversorum locorum diversis moribus innumerabiliter variantur, ita ut vix aut omnino nunquam inveniri possint causæ,

A quas in eis constituendis homines secuti sint, ubi facultas tribuitur, sine ulla dubitatione resecanda existimo. » Et Damasus papa, ex cujus epistola quædam tuis commentis inseruisti, non intelligens vel intelligere nolens quæ ipse dixit, et quæ tu loqueris, vel de quibus affirmas, scribens, ut præmissimus, per Vitalem ad Paulinum Antiochenum episcopum, ita de observatione canonum, sicut et de integritate fidei, jubet resipiscentes et ad Ecclesiam catholicam revertentes profiteri, atque propria subscriptione firmare, post alia (*epist.* 4) : « Quicumque, inquit, huic epistolæ subscribere voluerit, ita tamen ut in ecclesiasticis canonibus, quos optime nosti, et in Nicæna fide ante subscripserit, hunc debebis absque aliqua ambiguitate suscipere : non quo hæc ipsa quæ nos scripsimus, non potueris convertentium susceptioni proponere, sed quo tibi consensus noster liberum in suscipiendo tribuat exemplum. » Et sanctus Leo ad Ravennium Arelatensem episcopum (*epist.* 94) : « Ecclesiasticarum, inquit, legum non ignara est dilectio tua, ut intra earum regulas atque mensuras omnia potestatis tuæ jura contineas. Justo quippe ideo dicitur lex non esse posita (*I Tim.* 1, 9), quia normam præceptionis implet judicio voluntatis, cum verus recti amor in semetipso habet, et apostolicas auctoritates, et canonicas sanctiones : quarum devotus sectator et diligens executor in eorum procul dubio consortio gloriaberis qui creditorum sibi profectibus talentorum audire meruerunt : *Euge, serve bone et fidelis*, et reliqua. » Et S. Gregorius Quiriaco et cæteris episcopis catholicis in Hibernia ita scripsit dicens (*lib.* ix, *ind.* 4, *epist.* 61) : « Quicumque a perverso errore Nestorii revertuntur, coram sancta fraternitatis vestræ congregatione eumdem Nestorium cum omnibus suis sequacibus, ac reliquas hæreses anathematizantes, venerandas quoque synodos, quas universalis Ecclesia recipit, recipere et venerari promittant, et absque ulla dubitatione sanctitas eos vestra, servatis eis propriis ordinibus, in suo cœtu recipiat. » Et hinc sanctus Gelasius in epistola ad episcopos per Dardaniam constitutos (*epist.* 11, sub initium) : « Confidimus, inquit, quod nullus jam veraciter Christianus ignoret, uniuscujusque synodi constitutum, quod universalis Ecclesiæ probavit assensus, nullam magis exsequi sedem præ cæteris oportere quam primam, quæ unamquamque synodum, et sua auctoritate confirmat, et continua moderatione custodit, pro suo scilicet principatu, quem beatus Petrus apostolus Domini voce perceptum, Ecclesia nihilominus subsequente, et tenuit semper et retinet. »

CAPUT XI.

Quod latius de sacris ordinibus et canonum disciplinis ex orthodoxorum verbis et sensibus sit dicendum.

Hæc quidem sufficere posse credo non alta sapienti, sed humilibus consentienti. Verum quia ista tibi non credo debere sufficere, non dicam perfectius sive plenius, quia, ut jam longe ante nos dictum

est, perfectio incrementum, et adjectionem plenitudo non recipit, latius de præfatis sacris ordinibus et canonum disciplinis hic quædam ex orthodoxorum verbis ac sensibus ad reprimendum sensus tui tumorem, et ad repellendam compilationum tuarum caliginem, ponere dignum duxi. Sancta quippe Ecclesia, quam B. Paulus apostolus supernam Hierusalem, ac matrem nostram, et manentem civitatem, et ædificationem ex Deo, domum non manufactam appellat, ex angelis et hominibus constat. Quæ partim ex hominibus societate angelica in ordinibus distinctis perfruens, jam cum Deo in cælo regnat, partim vero in ordinibus distinctis adhuc peregrinatur in terra, et ad supernam societatem suspirat, ubi est secundum Apostolum tabernaculum non manufactum, neque hujus creationis (*Hebr. ix, 11*). Ad cujus instar per Moysem factum est tabernaculum, de quo dixit ad eum Dominus: *Omnia fac juxta quod tibi in monte ostensum est*. In que superno et vero tabernaculo, quod fixit Deus, et non homo, in interiora velaminis, id est in ipsum cælum, *confessionis nostræ antistes summus, et sempiternus pontifex, sempiternum habens sacerdotium, sacerdosque magnus secundum ordinem Melchisedech, per proprium sanguinem introivit semel in sancta, æterna redemptione inventa: sedensque ad dexteram Patris*, id est in gloria paternæ majestatis, *interpellat, non voce sed miseratione, pro nobis* (*Hebr. iii, vii, ix; Rom. viii*). Idemque *Rex regum, et Dominus dominantium* (*Apoc. ix*), per quem reges regnant et conditores legum justa decernunt (*Prov. viii*), cælestem ac terrenum principatum, cunctam videlicet rempublicam regens, et universam militiam, tam cælestem et spiritalem quam terrenam et temporalem, distinctis in ordinibus disponens ac moderans, et supernæ atque mundanæ curiæ præsidens, miro ordine, angelorum hominumque ministerio, pro temporum varietate et opportunitate dispensat, et quæ singulis quibusque temporibus vel personis congruit, sua vel occulta inspiratione, vel evidēntiori illustratione, vel patefacta præceptione decernit.

CAPUT XII.

Quis sint ordines in cælo, et in Ecclesia, et in terrena republica.

Et quia legimus sacros ordines in cælo et in terra, et in Testamento Veteri et in Novo, dispositos a Deo, ex quo juxta Apostolum omnis paternitas in cælo et in terra nominatur, qui sint ordines, id est paternitates in cælo, et in Ecclesia, et in terrena republica, sancti doctores nostri, *haurientes aquas de fontibus Salvatoris* (*Ephes. iii, 15*), id est bibentes scientiæ doctrinam de sanctis Scripturis, patienter ostendunt. Unde beatus Dionysius Areopagites, antiquus scilicet et venerabilis Pater, sicut didicit a Paulo apostolo, qui raptus usque ad tertium cælum vidit secreta cælestia, duos libros de angelico et ecclesiastico principatu scripsit. Et beatus Gregorius in libris *Moralium*, et latius in homilia

A *Evangelii (homo. 34): Erant appropinquantes ad Jesum publicani et peccatores* (*Luc. xv, 11*), quæ in suis locis lector inveniet, succinctius autem in epistola ad episcopos Galliarum scribens ostendit, in qua dicit: « Ad hoc divinæ dispositionis provisio gradus diversos et ordines constituit esse distinctos, ut dum reverentiam minores potioribus exhiberent, et potiores minoribus dilectionem impenderent, una concordia fieret ex diversitate contextio, et recte officium gereret administratio singulorum: neque universitas alia poterat ratione subsistere, nisi hujusmodi magnus eam differentiæ ordo servaret. Quia vero creatura in una eademque æqualitate gubernari vel vivere non potest, cælestium militiarum exemplar nos instruit; quia dum sint angeli, sint archangeli, liquet quia natura æquales sunt, sed in potestate et ordine, sicut nostis, differt alter ab altero. Si ergo inter hos qui sine peccato sunt ista constat esse distinctio, quis hominum abnuat huic se libenter dispositioni submittere? Hinc etenim pax et charitas mutuo se invicem complectuntur, et manet firma concordia in æterna et Deo placita dilectione sinceritas, quia unumquodque tunc salubriter completur officium, cum fuerit unus ad quem possit recurri præpositus. »

CAPUT XIII.

Quod si ordo generalis est omnibus episcopis, non tamen communis est dignitas omnibus.

Ordines quoque ministrantium in Ecclesia veteris populi, quæ usitatore nomine Synagoga vocatur, fuisse legimus per Moysem a Deo dispositos: qui quales, et qualiter, ac quando ordinari deberent, et quando ac qualiter et quantum in singulis officiis ministrare deberent, historia sacra demonstrat. Sed et nunc in Ecclesia, quæ regnum cælorum appellatur, ad instar cælestium ordinum, ministros Domini institutione et apostolica traditione legimus et cognoscimus distincte esse dispositos: qui quales, et qualiter, et a quibus debeant ordinari, et qualiter quique in suis officiis debeant ministrare, ut superius memoravimus, apertissima nobis lectione monstratur, de quibus modo non est dicendum per singula. Tantum de eo unde agitur ordine, et unde ad rem de qua agitur pertinet, beatus Leo, sicut tibi nuper in suprafata scheda inter alia scriptum dedi, veluti traditione apostolica decretum didicit, ad Anastasium Thessalonicensem episcopum scripsit (*epist. 84*): « Et si ordo, inquit, generalis est omnibus sacerdotibus, non tamen communis est dignitas omnibus, quia et inter beatissimos apostolos in similitudine honoris fuit quædam discretio potestatis, et cum omnium par esset electio, uni tamen datum est ut cæteris præmineret. De qua forma episcoporum quoque est orta distinctio, et magna ordinatione provisum est, ne omnes sibi omnia vindicarent, sed essent in singulis provinciis singuli, quorum inter fratres haberetur prima sententia, et rursus quidam in majoribus urbibus con-

stituti sollicitudinem suscipere ampliore, per quos ad unam Petri sedem universalis Ecclesie cura conflueret, et nihil usquam a suo capite dissideret. Qui ergo scit se quibusdam præpositum, non moleste ferat sibi aliquid esse prælatum, sed obedientiam quam exigit etiam ipse dependat. Nam si, ut legimus, angelus angelo dicit: *Curre et loquere* (Zach. II, 4), et angelus obedit angelo, non debet homo dedignari homini obedire, præsertim cum inobedientia parentis primi perditionis causa sit generis humani, et obedientia Salvatoris nostri, qui factus est obediens Patri usque ad mortem crucis, reparatio sit humanæ salutis. Diabolus quippe superbus hominem superbientem perduxit in mortem; Christus humilis hominem obedientem reduxit ad vitam. Quia sicut ille elatus cecidit et dejecit consentientem, sic iste humiliatus surrexit et erexit credentem.

CAPUT XIV.

Quod et in republica ad instar cælestis militiæ diversi sint ordines.

Quia etiam sint angeli gentibus prælati, doctores catholici ex verbis angeli per Danielelem prophetam ostendunt, dicentis: *Ego veni propter sermones tuos. Princeps autem regni Persarum restitit mihi viginti et uno diebus, et ecce Michael unus de principibus primis venit in adiutorium mihi* (Dan. x); et paulo post: *Nunc revertar ut prælior adversus principem Persarum. Cum enim egrederer, apparuit princeps Græcorum adveniens* (ibid.). « Quos, inquit beatus Gregorius (lib. xvii Moral., c. 8), alios principes gentium nisi angelos appellat? quia certa angelorum ministeria dispensandis singulis quibusque gentibus sunt prælata, cum subjectorum mores adversus se vicissim præpositorum spirituum opem merentur, ipsi qui præsent spiritus contra se venire referuntur. Is namque angelus, qui Danieli loquebatur, captivus Israelitici populi in Perside constitutus prælatus agnoscitur: Michael autem eorum qui ex eadem plebe in judæa terra remanserant, præpositus invenitur. Unde et ab hoc eodem angelo paulo post Danieli dicitur: *Nemo est adiutor meus in omnibus his, nisi Michael princeps vester, de quo dicit: Et ecce Michael unus de principibus primis venit in adiutorium mihi.* Quid dum nequaquam simul esse, sed venire in adiutorium dicitur, aperte ei populo prælatus agnoscitur qui captivus in alia parte tenebatur. Quid est ergo angelum dicere: *Ego veni propter sermones tuos: princeps autem regni Persarum restitit mihi, nisi sua subditis opera nuntiare? Et his beatus Hieronymus consona dicit, quæ plenius qui voluerit in suis locis legere potest. Ad quod instar sunt ordines in sæculo Dei ordinatione distincti, sicut monstrat Apostolus, dicens: *Subjecti estote omni humanæ creaturæ propter Deum, sive regi tanquam præcellenti, sive ducibus tanquam ab eo missis* (I Petr. II, 13). « Liqueat, inquit beatus Gregorius (lib. XXI Mor., c. 10), quod omnes homines*

A natura æquales genuit, sed variante meritorum ordine, alios aliis culpa postponit. Ipsa autem diversitas, quæ accessit ex vitio, divino iudicio dispensatur, ut quia omnis homo æque stare non valet, alter regatur ab altero. »

CAPUT XV.

De paternitatibus et incolatibus in cælo, et in Ecclesia et republica.

Et quia per distinctos ordines sunt paternitates et incolatus a Deo constituti in cælo, de quibus per Danielelem dicitur: *Millia millium ministrabant ei, et decies millies centena millia assistebant ei* (Dan. VII), quibus electorum quoque hominum numerus jungitur, et aliud est ministrare, aliud assistere, ad instar hujus cælestis dispositionis, et in mundo, non solum dimensiones ecclesiasticorum incolatuum, sed et terrenorum, dispositæ a Deo existunt, sicut et in veteri populo exstiterunt, veluti libro Pentateucho demonstratur in dimensione terræ promissionis per duodecim tribus filiorum Israel. Unde et Paulus in Synagoga apud Antiochiam faciens sermonem, dicit: *Deus plebis Israel elegit patres nostros* (Act. XIII, 17); et paulo post: *Destruens gentes septem in terra Chanaan, sorte distribuit eis terram eorum* (ibid., 19). *Ejecit, inquit psalmus, a facie eorum gentes, et sorte divisit eis terram in funiculo distributionis* (Psal. LXXVII). Et beatus Joannes in Apocalypsi dicit, audisse se numerum de unaquaque tribu duodecim millia signatorum (Apoc. VII). Hoc enim numero diffinito, ut catholici doctores exponunt, innumera- bilis significatur totius Ecclesie multitudo, quæ de patriarchis, vel prosapia carnis, vel fidei est imitatione progenita. *Si enim, inquit, vos Christi, ergo Abraham semen estis* (Gal. III, 29). Ad augmentum autem perfectionis pertinet et ipsa duodecim duodecies multiplicari, et ad summam millenarium perfici, qui est denarius numerus quadratus solidus, significans stabilem Ecclesie vitam. Propterea quippe duodenario numero sæpius Ecclesia figuratur, quia per orbem quadratum in fide consistit sanctæ Trinitatis. Ter enim quaterni decus diphondius faciunt. Denique et apostoli, eandem mundo fidem prædicaturi, duodecim sunt electi, numero scilicet mysterium operis sui figurantes. Missi sunt enim per quadratum mundum prædicare fidem sanctæ Trinitatis, et incarnatum de Spiritu sancto ex Maria virgine Domini- um Jesum Christum, et hunc crucifixum, sicut in Symbolo continetur: quo signo crucis, et per Ezechielem in figura (Ezech. IX), et per Joannem in speciei veritate (Apoc. VII), fideles signati monstrantur. Nam et ipsa crucis figura dilatatum ubique Domini significat regnum, et monarchiam fidei ipsius signi, sicut vetus distichon probat:

Respice distinctis quadratum partibus orbem,
Ut signum fidei cuncta tenere probos.

Neque enim frustra in fronte pontificis nomen Domini tetragrammaton scribebatur, nisi quia hoc est signum in fronte fidelium, de quo in psalmo pro tor-

ularibus canitur : *Domine Dominus noster, quam admirabile est nomen tuum in universa terra!* etc., usque dum ait, *ut destruas inimicum et defensorem* (Psal. VIII). Ipsosque incolatus parochiarum ac regionum, olim sancto spiritu ante incarnationem Christi per prophetam prædictos, et post ascensionem in cœlum eodem sancto spiritu per sanctos Dei homines dimetiendos fore demonstrat sanctus Basilius (*homil. in psal. LIX*) tranctans versum quo dicitur *Convallem tabernaculorum dimetiar.* « Hanc, inquit, præcipuam et velut privatam quondam plebem, scilicet Israeliticam hæreditatem populi, in divisionem vocabo, et communem, cum cæteris omnibus faciam. Cum autem divisus fuerit testamentum in omnes, et cum ejus utilitas universis cœperit esse communis, Deo pro nobis aliquid melius providente, tunc etiam convallis tabernaculorum dimetietur, hoc est, universus orbis terrarum, qui vallis tabernaculorum pro habitaculis corporum dictus est, hic velut quædam sorte divisus atque dimensus, per singula loca Ecclesiarum Dei parochiis et incolatibus dividetur. Tunc etiam ea quæ divisa sunt, in unitatem fidei congregabit ille qui pacificat per sanguinem crucis suæ, sive quæ in terra sunt, sive quæ in cœlis, et qui medium parietem solvens, fecit utraque unum. » Hinc iterum scriptum est : *Distribuite domos ejus* videlicet universalis Ecclesiæ, per custodiarum parochias prædicando, *ut enarretis in progenie altera, quoniam hic est Deus noster, et ipse reget nos in sæcula* (Psal. XLVII). Ad quod instar, secundum constitutionem Anacleti, Dionysius papa rusticanis parochiis terminos certos posuit, ac ponendos disposuit, de quibus etiam Chalcedonense concilium quæ sunt nota decrevit.

De provinciarum autem dimensione, et civitatum privilegiis, quæ ad instar duodecim tribum Israelitici populi ethnici statuerunt, et apostolica sunt postea constitutione firmata, sanctus Clemens in prima epistola ad Jacobum Hierosolymitanum episcopum, qui et frater Domini appellatur, scripsit, quod tu in compilatione tua sicut et nec præcedentia verba Leonis ponere voluisti, ne inveniretur in eis quod tu alicui, præter apostolicæ sedis pontifici, deberes aliquo modo subdi, inaniter putans quod si tu hæc in tuo pitaciolo non poneris, alii non habent libros ubi ea legere potuissent. Sed quis ea quæ nosti ignorat? Prius enim quam formareris in utero illa novimus, et antequam exires de vulva sæpissime legimus, et discretius, quam tu Scripturas sacras et canones sacros intelligas intelleximus. Ait enim beatus Clemens inter alia in præfata epistola (*epist. 2, sub medium*), « jussisse beatum Petrum, in illis, inquit, civitatibus, in quibus olim apud ethnicos primi flamines eorum, atque primi legis doctores erant, episcoporum primates poni vel patriarchas, qui reliquorum episcoporum judicia et majora quoties necesse foret negotia in fide agerent, et secundum Domini voluntatem, sicut constituerunt sancti apostoli, ita ut ne quis injuste periclitaretur, difini-

rent. In illis autem civitatibus, in quibus dudum apud prædictos erant ethnicos eorum archiflamines, quos tamen minores tenebant quam memoratos primates, archiepiscopos institui præcepit, qui non tamen primatum, sed archiepiscoporum fruenterur nomine. Episcoporum quoque judicia, ut superius memoratum est, et majora ecclesiarum negotia, si ipsi reclamaverint, aut aliquem timorem, aut istos vel alios suspectos habuerint, ad jam dictos primates vel patriarchas, ne aliquis innocenter periret, transferri perdocuit. In singulis vero reliquis civitatibus, singulos, et non binos vel ternos aut plures, episcopos constitui præcepit, qui non primatum, aut archiepiscoporum, aut metropolitanorum, nomine, quia matrês civitatum non tenent, sed episcoporum tantum vocabulo potirentur, quoniam nec inter ipsos apostolos par institutio fuit, sed unus omnibus præfuit. Hoc tamen prævidendum instituit, ne in villis aut castellis, vel modicis civitatibus instituerentur episcopi, ne vile eorum nomen fieret. Episcopus ergo vicem apostolorum gerere Dominum docuisse dicebat, et reliquorum discipulorum vicem tenere presbyteros insinuabat debere. »

Et sanctus Anacletus, successor Clementis, a beato Petro apostolo presbyter ordinatus, in prima epistola ad omnes episcopos et cæteros fideles (*epist. 1, sub finem*) : « Privilegia, inquit, Ecclesiarum et sacerdotum sancti apostoli, jussu Salvatoris, intemerata et inviolata ævis decreverunt manere temporibus. Leges Ecclesiæ apostolica firmamus auctoritate, et peregrina judicia submovemus. Unde et Dominus mentionem faciens Lot, per Moysen loquiter dicens : Ingressus es quidem, inquit, ut advēna, nunquid ut judices? (*Gen. XIX.*) Unaquæque enim provincia tam juxta ecclesiasticas quam juxta sæculi leges, suos debet justos et non iniquos habere judices, et non externos, nisi apostolicæ hujus sedis decreverit auctoritas : quatenus quicunque causam habuerit, apud suos judices judicetur, et non ad alienos causa vagandi, stimulante protervia, suam despiciens patriam transeat, sed ad duodecim ejusdem provinciæ judices, ad quorum judicium omnes causæ civitatum referuntur, deferatur negotium. Si autem fuerit ecclesiasticum, apud episcopos, interveniente primate, si major causa fuerit ; si vero minor, metropolitano. Si vero fuerit sæculare, apud ejusdem ordinis viros, judicio tamen episcoporum, cum Apostolus privatorum Christianorum causas magis ad Ecclesias deferri, et ibidem sacerdotali judicio terminari voluit. » Et in secunda epistola ad episcopos in Italia constitutos dicit : Provinciæ autem multo ante Christi adventum tempore divisæ sunt maxima ex parte, et postea ab apostolis, et beato Clemente prædecessore nostro, ipsa divisio est renovata. Et in capite provinciarum, ubi dudum primates legis erant sæculi, ac prima judiciaria potestas, ad quos qui per reliquas civitates commorabantur, quando eis necesse erat, qui ad aulam imperatorum vel regum confugere non poterant, vel

quibus permissum non erat confungere, pro oppressionibus vel injustitiis suis [confugiebant], ipsosque appellabant quoties opus erat, sicut in lege eorum præceptum erat, ipsis quoque in civitatibus vel locis nostri patriarchas vel primates, qui unam formam tenent, licet diversa sint nomina, leges divinæ et ecclesiasticæ poni et esse jusserunt, ad quos episcopi, si necesse fuerit, confrugerent eosque appellarent, et ipsi nomine primatum fruerentur, et non alii : reliquæ vero metropolitanæ civitates, quæ minores iudices habebant, lices majores comitibus essent, habent metropolitanos suos, qui prædictis juste obedirent primatibus, sicut et in legibus sæculi olim ordinatum erat, qui non primatum, sed aut metropolitanorum, aut archiepiscoporum nomine fruerentur. Et licet singulæ metropoles civitates suas provincias habeant, et suos metropolitanos habere debeant episcopos, sicut prius metropolitanos iudices habebant sæculares, primates tamen, ut præfixum est, et tunc et nunc habere jussæ sunt, ad quos post sedem apostolicam summa negotia conveniant, ut ibidem quibus necesse fuerit releventur et juste restituantur, et hi qui injuste opprimuntur juste reformentur atque fulciantur, episcoporumque causæ et surmorum negotiorum iudicia, salva apostolicæ sedis auctoritate, justissime terminentur. » Et in tertia epistola : « De primatibus, inquit, charissimi, super quibus me quidam vestrum consuluerunt, aut si esse deberent, an non, quantum hactenus de his a beato Petro apostolo, et a reliquis apostolis, et a beato Clemente nostro sancto prædecessore et martyre novimus statutum, denegare vobis minime possumus. Et quis est, qui quærentibus fratribus denegare possit dubitationem vel necessitates eorum ? Sacerdotum, fratres, ordo bipartitus est, et sicut Dominus illum constituit, a nullo debet perturbari. Scitis autem a Domino apostolos esse electos et constitutos, et postea per diversas provincias ad prædicandum dispersos. Cum vero messis cœperat crescere, videns paucos esse operarios, ad eorum adjumentum septuaginta eligi præcepit discipulos. Episcopi vero Domini apostolorum, presbyteri quoque septuaginta discipulorum locum tenent. Episcopi autem non in castellis aut modicis civitatibus debent constitui, sed presbyteri per castella et modicas civitates atque vilias debent ab episcopis ordinari et poni, singuli tamen per singulos titulos suos : et episcopus non ab uno, sed a pluribus debet episcopis ordinari, et ut dictum est, non ad modicam civitatem, ne vilescat nomen episcopi, aut alicubi, sed ad honorabilem urbem titulandus, et denominandus est : presbyter vero ad qualemcunque locum vel ecclesiam in eo constitutam est præficiendus, atque in ea diebus vitæ suæ durandus. Amplius quam isti duo ordines sacerdotum, nec nobis a Deo collati sunt, nec apostoli docuerunt. Episcoporum vero ordo unus est, licet sint primates illi qui primas civitates tenent, qui et in quibusdam

locis patriarchæ a nonnullis vocantur. Illi autem, qui in metropoli a beato Petro, ordinante Domino et prædecessore nostro prædicto sancto Clemente, seu a nobis constituti sunt, non omnes primates vel patriarchæ esse possunt. Sed illæ urbes quæ præfatis et priscis temporibus primatum tenuere, archiepiscoporum, Patriarcharum, aut primatum nomine fruuntur : reliquæ vero metropoles archiepiscoporum, aut metropolitanorum, et non patriarcharum aut primatum utantur nominibus, quia hæc eadem et leges sæculi in suis continent principibus. Aliæ autem primæ civitates, quas vobis conscriptas in quodam tomo mittimus, a sanctis apostolis et a beato Clemente, sive a nobis primates prædicatores acceperunt. Hæc vero sacrosancta Romana et apostolica Ecclesia, non ab aliis, sed ab ipso Domino Salvatore nostro primatum obtinuit, sicut ipse beato Petro apostolo dixit : *Tu es Petrus, et super hanc petram ædificabo Ecclesiam meam.* » Et paulo post : « Prima ergo sedes est cœlesti beneficio Romanæ Ecclesiæ, quam, ut memoratum est, beatissimi Petrus et Paulus suo martyrio consecrarunt. Secunda autem sedes apud Alexandriam beati Petri nomine a Marco ejus discipulo atque evangelista consecrata est, quia ipse et in Ægypto primum verbum veritatis directus a Petro prædicavit, et gloriosum suscepit martyrium, cui venerabilis successit Habilius. Tertia vero sedes apud Antiochiam, id est, beati Petri apostolis habetur honorabilis, quia illic priusquam Romam veniret habitavit, et Ignatium episcopum constituit, et illic primum nomen Christianorum novellæ gentis exortum est. Reliquas vero, ut prædiximus, in quodam tomo, prolixitatem vitantes epistolæ, vobis conscriptas direximus. Inde namque et beati Apostoli inter se statuerunt ut episcopi singularum scirent gentium quis inter eos primus esset, quatenus ad eum potior eorum sollicitudo pertineret. Nam et inter beatos apostolos quædam fuit discretio, et licet omnes essent apostoli, Petro tamen a Domino est concessum, et ipsi inter se idipsum voluerunt, ut reliquis omnibus præseset apostolis, et Cephas, id est caput et principium teneret apostolatus quia et eandem formam suis successoribus, et reliquis apostolis tenendam traderunt. Et non solum hoc in Novo Testamento est constitutum, sed etiam in Veteri fuit. Unde scriptum est : Moyses et Aaron in sacerdotibus ejus (*Psal. xvii*) id est, primi inter eos fuerunt. » Inde sacrum Nicænum concilium paucioribus quidem verbis, sed non minori auctoritate decrevit (*can. 6*), quatenus « antiqua consuetudo, scilicet quæ apud ethnicos statuta fuerat, et apostolica est postea constitutione firmata, servetur, ut Alexandrinus episcopus suorum omnium habeat potestatem, quia et urbis Romæ episcopo parilis mos est. Similiter et apud Antiochiam cæterasque provincias suis privilegia serventur Ecclesiis.

His autem prætermisissis, sed et quæ Zephyrimus decrevit (*epist. 1*), ut quilibet episcopus accusatus a

moderim iudicetur episcopis, ad Callistum, et ad A
 uerit te contulisti, et quæ Stephanus statuit, qui
 ost eos fuit, contingere noluisti, qui dicit (*epist. 2*):
 Nullus præfati ordinis, videlicet episcopalis, vir
 cusari potest, aut respondere suis accusatoribus
 debet, priusquam regulariter a suo primate vocatus
 sit, locumque defendendi et inquirendi accipiat ad
 bluenda crimina. Nulli enim metropolitani, aut alii
 piscopi appellentur primates, nisi hi qui primas
 sedes tenent, et quorum civitates antiqui primates
 esse consuerunt. Reliqui vero, qui civitates metro-
 politanas adepti sunt, non primates aut archiepiscopi,
 sed metropolitani vocentur. Urbes enim et loca,
 quibus primates præsidere debent, non modernis,
 sed etiam multis ante adventum Christi sunt statuta
 temporibus, quarum primates etiam gentiles pro
 majoribus negotiis appellabant. In ipsis vero urbibus
 post Christi adventum apostoli et successores eorum
 patriarchas vel primates posuerunt, ad quos episco-
 porum negotia, salva in omnibus apostolica aucto-
 ritate, et majores causæ post apostolicam sunt sedem
 referendæ. Et licet, Apostolo prohibente, inter Chri-
 stianos non debeant accusationes exerceri, si prohiberi
 non poterunt accusationes, Episcoporum ad memoratos
 primates debent ad accusatoribus deferri. Studendum
 est tamen episcopis ut dissidentes fratres magis ad pa-
 cem quam ad iudicium cohortentur. Episcopus autem
 aliter non debet audiri vel iudicari, nisi in præsentia
 omnium comprouincialium, et ab omnibus comprou-
 incialibus episcopis, qui ipsis absentibus iudicarii
 nec debet, nec potest. »

Deinde plurima ex plurimis exponens, quæ tibi C
 visa fuerunt tecum facere, sed revera probantur re-
 larguere, Pelagium decessorem S. Gregorii transi-
 isti, et verba successoris ejus B. Gregorii ad Theo-
 distam patriciam a suo sensu, quantum ex te fuit,
 alienans, alienis a beato Gregorio verbis impostu-
 rasti. Ait enim idem Pelagius ad episcopos, qui
 injusta vocatione Joannis ad synodum Constantino-
 polim ut decernerent eum universalem vocari consti-
 tuerunt (*Pelag. II, epist. 1, sub finem*): « De cætero,
 inquiens, fratres, super provinciæ causa, unde se-
 dem apostolicam dudum consulere voluistis, videtur
 vobis sufficienter tractatum a sanctis prædecessoris
 nostris. Sed quia denuo nostram mediocritatem
 e eadem re interrogare dignum duxistis, scitote
 etiam provinciam esse quæ habet decem vel undecim D
 civitates, et unum regem, et totidem minores
 potestates sub se, et unum episcopum, aliosque suf-
 fragatores decem vel undecim episcopos iudices, ad
 quorum iudicium omnes causæ episcoporum, et re-
 quorum sacerdotum, ac civitatum causæ referantur,
 et ab his omnibus juste consona voce decernantur,
 nisi ad majorem auctoritatem fuerit ab his qui iudi-
 candi sunt appellatum. Unde non oportet ut degra-
 detur vel dehonoretur unaquæque provincia, sed
 apud semetipsam habeat iudices sacerdotes, et epi-
 scopos singulos, videlicet juxta ordines suos, et qui-
 usque causam habuerit, a suis iudicibus iudicetur,

et non ab alienis, id est a suæ justis iudicibus pro-
 vincię, et non ab externis, nisi, ut jam prælibatum
 est, a iudicandis fuerit appellatus. Si vero in qualibet
 provincia ortæ fuerint quæstiones, et inter ipsius
 provinciæ episcopos discrepare cœperit ratio, atque
 inter ipsos dissidentes non conveniat, ad majorem
 tunc sedem referantur, et si illic facile et juste non
 discernuntur, ubi fuerit synodus regulariter congre-
 gata canonice et juste discernantur. Majores vero et
 difficiles quæstiones, ut sancta synodus statuit, et
 beata consuetudo exigit, ad sedem apostolicam sem-
 per referantur. »

CAPUT XVI.

*De metropoli Rhemorum, et castro Lauduno; et
 quod tres primariæ sedes una fuit sedes Petri.
 Hormisdæ ad sanctum Remigium epistola.*

Vide, frater, utrum certa sit provincia metropoli
 Rhemorum ex antiquo subjecta : quæ metropolis
 undecim civitates sub se habuit etiam antequam
 beatus Remigius auctoritate Africani concilii ordi-
 naret episcopum in castello in quo et tu metropolis
 tuæ suffragator es ordinatus episcopus, et refragator
 ipsius dignitatis atque auctoritatis, asse, ut dicitur,
 exerevisti de pusillo magnus apud te oppidanus epi-
 scopus. Quod, sicut Eutropius antiquus historiogra-
 phus dicit, auctore Marcobrio prætoꝛe conditum, ab
 exordio sui in paganismo inter civitates vel provin-
 ciales sedes nomen et locum non habuit. Et post-
 quam B. Sixtus a Sixto sedis Romanæ pontifice pri-
 mus ad Rhemensem metropolim fuit directus episco-
 pus, in Christianismo per quindecim archiepisco-
 porum tempora, plurimis annorum evolutis curriculis,
 in Rhemensi parochia, sicut et alia municipia quæ
 hodieque ibidem consistunt, municipalem locum
 tenuit, sicut et tomus quem Anacletus episcopis de
 sedium privilegiis se interrogantibus se misisse dicit
 patenter ostendit, veluti ipse legere potes in eodem
 breviario, in quo descriptis civitatibus metropoli
 Rhemorum subjectis, nomen castelli in quo es ordi-
 natus episcopus, nequaquam invenies. Sed et per
 plures annos tempore ejusdem B. Remigii, qui, ut
 veraces nostratum historiæ monstrant, septuaginta
 quatuor et eo amplius annos in episcopatu degens,
 et multis insignibus virtutibus clarus, jam in senecta
 sua ibidem ordinavit episcopum, et rebus eccle-
 siasticis (quoniam secundum sacras regulas quid-
 quid rerum et municipiorum in ordine episcopatus ac-
 quirat episcopus, sicut et illæ quæ ante fuerunt Eccle-
 siæ, habentur Ecclesiasticæ), idem episcopium suffi-
 cienter ditavit. Quamobrem sicut sedes Ecclesiarum,
 scilicet Romanæ, Alexandrinæ, atque Antiochenæ,
 idecirco specialiter legimus sedes dici, cum plurimæ
 sedes et apostolorum, sicut Jacobi Hierosolymæ, et
 Joannis apud Ephesum, in qua sedit et Thimotheus
 beati Pauli discipulus, et multæ aliæ principalium civi-
 tatum quoniam sedes sunt, quin potius, licet dispa-
 rantur longinquitate terrarum, una sedes sunt magni
 Petri apostolorum principis : ita pro modo suo Rhe-
 morum metropolis, et Laudunensis parochia, spe-

cialiter inter cæteras sedes provinciales Rhemorum A provincie una est sedes, quia beatus Remigius eandem sedem Laudunensem in subsellio Rhemensis metropolis consedere fecit, quam a sua parochia, non autem a diœcesis provincia, scidit. Quia vero Alexandrina et Antiochena sedes, sicut et Romana, beati Petri sint sedes, Leo ad Dioscorum Alexandrinum episcopum monstrat, dicens (*epist.* 7): « Cum enim beatissimus Petrus apostolicum a Domino acceperit principatum, et Romana Ecclesia in ejus permaneant institutis, nefas est credere quod sanctus discipulus ejus Marcus, qui Alexandrinam primus Ecclesiam gubernavit, aliis regulis traditionum suarum decreta formaverit, cum sine dubio de eodem fonte gratiæ unus spiritus et discipuli fuerit et magistri, nec aliud ordinatus tradere potuerit quam quod ab ordinatore suscepit. Non ergo patimur ut cum unius nos corporis et fidei fateamur, in aliquo discrepemus, et alia doctoris, alia discipuli instituta videantur. » Et sanctus Gregorius ad Eulogium Alexandrinum episcopum (*lib.* viii, *epist.* 42): « Veritatis, inquit, minister, Petri sequax et sanctæ Ecclesiæ prædicator, scit quia illa loqui potuisti, quæ de sede Petri apostoli per os doctoris sonare debuerunt. » Et item eundem ad eumdem: Sit ergo illi laus, sit in excelsis gloria, ejus dono adhuc in sede Petri clamat vox Marci. » De Antiochena autem Ecclesia sanctus Innocentius ad Alexandrum Antiochenum episcopum dicit (*epist.* 20): « Revolventes itaque auctoritatem Nicænæ synodi, quæ una omnium per orbem terrarum mentem explicat sacerdotum, quæ censuit de Antiochena Ecclesia cunctis fidelibus, ne dixerit sacerdotibus, esse necessarium custodire, qua super diœcesim suam prædictam Ecclesiam, non super aliam aliquam provinciam recognoscimus constitutam. Unde advertimus non tam provincialis magnificentia hoc eidem attributum, quam quod prima primi apostoli sedes esse monstratur, ubi et nomen accepit religio Christiana, et quæ conventum apostolorum apud se fieri celeberrimum meruit, quæque urbis Romæ sedi non cederet, nisi quod illa in transitu meruit, ista susceptum apud se consummatumque gaudet. » Et Leo ad Maximum Antiochenum episcopum (*epist.* 66): « Oportet, inquit, dilectionem tuam toto corde conspiciere cujus Ecclesiæ gubernaculis te Dominus voluit præsidere, et ejus meminisse doctrinæ quam præcipuus apostolorum omnium beatissimus Petrus, per totum quidem mundum uniformi prædicatione, sed speciali magisterio in Antiochena et Romana urbe fundavit, ut illum in suæ glorificationis domicilio præminentem ea intelligas reposcere instituta quæ tradidit, sicut ab ipsa quam confessus est veritate suscepit. Neque ullo modo sinas in Orientalibus Ecclesiis, maximeque his quas Antiochenæ sedi sacratissimorum patrum Nicæni canones deputarunt, ab improbis hæreticis Evangelio resultari. » Et post aliquanta: « Dignum est enim te apostolicæ sedi in hac sollicitudine esse consortem, et ad agendi fiduciam privi-

legia tertiæ sedis agnoscere, quæ in nullo cujusquam ambitione minuitur: quia tanta apud me est Nicænorum canonum reverentia, ut ea quæ sunt a sanctis Patribus constituta, nec permiserim, nec patiar aliqua novitate violari. Et si enim diversa nonnulla sunt merita præsulum, tamen jura permanentium sedium, quibus possunt æmuli perturbationem aliquam fortassis inferre, non tamen possunt minuere dignitatem. »

Et sanctus Gregorius ad Anastasium Antiochenum episcopum (*lib.* vii, *epist.* 3): « Ecce in sancta senectute beatitudo vestra multis tribulationibus laborat, sed perpendat, cujus sedem teneat, nunquid non illius, cui voce veritatis dictum est: *Cum senueris, alius te cingat, et ducet quo non vis?* (Joan. xxi.) » Et item ad eundem (*lib.* iv, *epist.* 37): « Amen, gratia. Quæ videlicet verba, de scriptis vestris accepta, idcirco in meis epistolis pono, ut de sancto Ignatio vestra beatitudo cognoscat quia non solum vester est, sed etiam noster. Sicut enim magistrum ejus apostolorum principem habemus communem, ita quoque ejusdem principis discipulum nullus nostrum habet privatum. » Hunc enim Ignatium beatus Petrus, quando Romam petiit, Antiochiæ pro se ordinavit episcopum. Et licet beatus Petrus antea in Antiochia sederit, quam Romam venerit, unde Marcum Alexandrinum misit: non tamen ideo Antiochia secunda, sed tertia sedes, et Alexandrina Ecclesia secunda sedes dicitur, propter privilegium Evangelii, quod sanctus Marcus evangelista ore Petri excepit atque conscripsit, quod et in Alexandria prædicavit, et Alexandrinum populum, cum subjectis eidem magnæ civitati urbibus, veræ fidei fundamento fundavit, sicut et sanctus Gregorius ad Eulogium Alexandrinum episcopum inter cætera scribit dicens (*lib.* v, *epist.* 60): « Est aliquid quod nos erga Alexandrinam Ecclesiam quadam peculiaritate constringit, et in ejus amore promiores existere speciali quodammodo lege compellit. Nam sicut omnibus liquet quod beatus evangelista Marcus a S. Petro apostolo magistro suo Alexandriam sit transmissus, sic hujus nos magistri et discipuli unitate constringimur, ut et ego sedi discipuli præsidere videar propter magistrum, et vos sedi magistri propter discipulum. Ad hanc autem unitatem cordium etiam vestra sanctitatis meritis ligamur, quos auctoris suisalubriter sequi instituta cognoscimus, et semper ad magistri sui gremium, unde illic prædicatio salutis exorta est, tota se conferre devotione sentimus. » Et item, quod tres illæ sedes, scilicet Romana, Alexandrina, et Antiochena, una si Petri sedes, ad eundem Eulogium Alexandrinum episcopum scribit (*lib.* vi, *epist.* 37): « Suavissima, inquit, mihi sanctitas vestra multa in epistolis suis de sancti apostolorum principis Petri cathedra locuta est, dicens quod ipse in ea nunc usque in suis successoribus sedeat. Et quidem ego indignum me esse non solum in honore præsentium, sed etiam in numero stantium agnosco; sed cuncta quæ dicti

sunt in eo libenter accepi, quod ille mihi de Petri A cathedra locutus est, qui Petri cathedram tenet, et cum me specialis honor nullo modo delectet, valde tamen lætatus sum, quia vos sanctissimi quod mihi impendistis, vobismetipsis dedistis. Quis enim nesciat sanctam Ecclesiam in apostolorum principis soliditate confirmatam, qui firmitatem mentis traxit in nomine, ut Petrus a petra vocaretur, cui Veritatis voce dicitur : *Tibi dabo claves regni cælorum (Matth. xvi) ; et tu aliquando conversus confirma fratres tuos (Luc. xxii) ;* et iterum : *Simon Joannis, amas me ? Pasce oves meas (Joan. xxi)*. Ita et cum multi sint apostoli, pro ipso tamen principatu, sola apostolorum principis sedes in auctoritate convaluit, quæ in tribus locis unius est. Ipse enim sublimavit sedem, in qua etiam quiescere et præsidendo vitam finire dignatus est. Ipse decoravit sedem, in qua evangelistam discipulum misit. Ipse firmavit sedem, in qua septem annis quamvis discessurus sedit. Cum ergo unius atque una sit sedes, cui ex auctoritate divina tres nunc episcopi præsentent, quidquid ego de vobis boni audio, hoc mihi imputo ; si quid de me boni creditis, hoc vestris meritis imputate, quia in illo unum sumus qui ait : *Ut omnes unum sint, sicut et tu, Pater, in me et ego in te, ut et ipsi in nobis unum sint (Joan. xvii)*.

Si ergo, frater, immemor beneficiorum a me tibi inceptorum oblitus, adversum me rebellare non times, time tamen rebellare adversum beatum Remigium, qui sicut modo audisti, nunc usque in suis successoribus qualibuscunque sedet ; et quia sedes illius est, in qua resides ex auctoritate divina, et ipsius beati Remigii benignitate, inter sedes, quod antea non fuerat, computata : quidquid de me, qui sedeo in sede illius, boni audis, tibi imputare debes, quia quidquid de te boni audio, mihi imputo, et quidquid de te sinistrum audio, non tantum tuis, sed et meis peccatis imputo per cuius manus impositionem Dei iudicio te in illa sede residere cognosco. Desine ergo ab ea quam cepisti mentis improbitate, et assume mentis humilitatem cum virtute sanctæ obedientiæ, ut in illo unum simus, qui ait : *Ut omnes unum sint, sicut et tu, Pater, in me et ego in te : ut et ipsi in nobis unum sint*. Quoniam sicut et ex verbis apostolicæ sedis audisti, licet harum Ecclesiarum, Alexandrinæ scilicet et Antiochenæ, præsules beati Petri sedes tenere se cognoscant, quod D et Romani pontifices attestantur, non tamen subditas easdem sedes Romanæ sedi denegant, nec ipsi Romano pontifici subdi modo quolibet dedignantur ; nec tui decessores ac prædecessores subdi dedignati sunt Rhemorum episcopis, et de rebus Ecclesiæ Rhemorum metropolis de quibus ditatum est episcopium Laudunense, quando in ipsam venerunt parochiam, humiliter ac benigne Rhemensi Ecclesiæ famulari, ex quo beatus Remigius sanctum Genebadium in Laudunensi castello episcopum non solum constituit, sed etiam, ut ostendit antiqua traditio, et monumentum reclusionis, qua eum propter

excessum notissimum secundum regulas recluserat, post dignam satisfactionem restituit : sicut et mihi decessores tui Simeon et Pardulus, cui successisti, exhibuerunt usque ad tuam prælationem, quem Rhemensis Ecclesia ab ipsis, ut ita dicam, cunabulis dulci benignitate nutrit, et pannis infantiae eluit atque exuit, et ad virum perduxit, atque ad episcopatum provexit. De quo nunc per ora sibi servientium cum suspiriis ac gemitibus dicit : *Ex nobis exiit, sed non erat ex nobis ; si enim fuisset ex nobis, permansisset utique nobiscum*. Et attendens qualiter episcopi civitatum suæ provinciæ, quos non nutrit, sed regulariter ordinavit, ei benignitatis et humilitatis atque obedientiæ impendant obsequia, dicit : *Populus quem non cognovi servit mihi, in auditu auris obedit mihi : filius autem alienus mentitus est mihi, filius alienus inveteravit (Psal. xvii)*, videlicet quia quod agit ad hominem vetustum pertinet, et claudicat a semitis suis, quas in mandatis Domini per humilitatem et obedientiam debuerat currere, et sumens lamentum Domini de Isaia : *Filium, inquit, nutrivit et exaltavi, ipse autem spernit me (Isa. i)*. Et licet tu hoc forte non recogites neque timeas, certus tamen esse potes quia sanctus Remigius a te reposecet in conspectu Domini obedientiam dependendam suis successoribus, et tuis præpositis, quam instituit quando in eodem castello, in quo ordinatus es, consecravit episcopum, sicut de verbis beati Leonis ad Maximum Antiochenum episcopum : Præposui beatum Petrum, in suæ glorificationis domicilio præminentem, ea reposecere instituta, quæ in Antiochia tradidit. Attamen, velis, nolis, sanctus Hormisda papa tibi ostendet primatem esse hujus provinciæ illum qui in sede beati Remigii apud Rhemorum metropolim est ordinatus episcopus. Ait enim in epistola ad eum directa : « Dilectissimo fratri Remigio Hormisda. Suscepiens plena fraternitatis tuæ congratulatione colloquia, quibus nos germanæ salutis tuæ lætificavit indicio, corporali cum spiritalibus officiis incolumitate subnixo, congruum esse perspeximus, hanc ipsam, quam mente gerimus, verbis aperire lætitiæ. Agis enim summi documenta pontificis, dum et prædicanda facis, et ea insinuare non differs. Prærogativa igitur de nostri sumpsimus electione iudicii, quando id operatum te esse didicimus, quod cæteris agendum obnixius imperamus, ut in provinciis tanta longinquitate disjunctis, et apostolicæ sedis vigorem, et patrum regulis studeas adhibere custodiam. Vices itaque nostras per omne regnum dilecti et spiritalis filii nostri Clodovei, quem nuper, adminiculante superna gratia, plurimis et apostolorum temporibus æquiparandis signorum miraculis prædicationem saluferam concomitantibus, ad fidem cum gente integra convertisti, et sacri dono baptismatis consecrasti, salvis privilegiis quæ metropolitani decrevit antiquitas, præsentis auctoritate committimus, augentes studii hujus participatione ministerii, dignitatem, relevantes nostras ejusdem remedio dispensationis excu-

hias. Et licet de singulis non indigeas edoceri, a quo jam probavimus acutius universa servari, gratius tamen esse solet, si ituris trames ostenditur, et laboraturus injuncti operis forma monstratur. Paternas igitur regulas, et decreta sanctissimis diffinita conciliis ab omnibus servanda mandamus. In his vigilantiam tuam, in his curam et fraternæ monita exhortationis ostendimus. His ea quanta dignum est reverentia custoditis, nullum relinquit culpæ locum sanctæ observationis obstaculum. Ibi fas nefasque perscriptum est, ibi prohibitum, ad quod nullus audeat aspirare, ibi concessum quod debeat mens Deo placitura præsumere. Quoties universale poscit religionis causa concilium, te cuncti fratres evocante conveniant, et si quos eorum specialis negotii pulsat intentio, jurgia inter eos oborta compece, discussa sacra lege determinando certamina. Quidquid autem illic pro fide et veritate constitutum, vel provida dispensatione præceptum, vel personæ notræ auctoritate fuerit confirmatum, totum ad scientiam nostram instructa relationis attestazione perveniat. Eo fiet ut et noster animus officii charitate dati, et tuus securitate perfruat accepti. Deus te incolumem custodiat, frater charissime. »

Sed et Adrianus papa Tilpino prædecessori nostro talia suæ auctoritatis privilegia, et sibi commissæ Ecclesiæ dedit, sicut scripta quæ habemus demonstrant. Quæ exiguitas mea nec meruit, nec ambit, nec appetit, nec requirit, quanquam et quarti Leonis, ei nomine ac gratia Benedicti auctoritas mihi privilegia non a me quæsitæ contulerint, quia sufficienti mihi quæ per sacros canones unicuique sunt metropolitano collata. Unde sicut omnibus generaliter episcopis convenit pro Romano pontifice, et speciali Petri vicario Dominum exorare, veluti et traditio demonstrat ecclesiastica (de qua Cælestinus dicit [*post epist. 8*]: « Obsecrationum sacerdotium sacramenta respiciamus, quæ ab apostolis tradita in toto mundo atque in omni catholica Ecclesia uniformiter celebrantur, ut legem credendi lex statuat supplicandi »), eidemque ab omnibus obediri oportet, sicut ex evangelica et apostolica auctoritate, majorum traditione, atque antiqua consuetudine noscitur esse decretum: sic ab omnibus provinciæ coepiscopis, qui a primatu suæ metropolis ordinantur, convenit secundum sacras regulas obediri, et pro eo Dominum supplicari, quoniam incolumitas præsentis salutis est subditorum. Sed et te in his vigilantiorum curam exhibere convenerat, quem taliter, et præmissi, a se nutritum Rhemorum metropolis in subsellio sedis suæ ordinavit episcopum. Quæ non meo, sed ex Scripturarum sensu beati Leonis institutione profero (*serm. 3, in anniversario die ejusdem assumptionis*): « Instante, inquit, passione sua Dominus, quæ discipulorum erat turbatura constantiam, ait: *Simon, ecce Satanas expostulavit, ut vos cerneret veluti triticum; ego autem rogavi pro te ne deficiat fides tua; et tu aliquando conversus confirma fratres tuos* (*Luc. xxii. 31, 32*). Et omnibus apostolis: *Vigilate,*

et orate, ne intretis in tentationem (*Matth. xxvi. 41*). Commune erat omnibus apostolis periculum de tentatione formidinis, et divinæ protectionis auxilio pariter indigebant, quoniam diabolus omnes exagitare, omnes cupiebat elidere; et tamen specialis a Domino Petri cura suscipitur, ut pro fide Petri proprie supplicetur, tanquam aliorum status certior sit futurus, si mens principis victa non fuerit. In Petro ergo omnium fortitudo munitur, et divina gratia ita ordinatur auxilium, ut firmitas quæ per Christum Petro tribuitur, per Petrum apostolis conferatur. » Cum itaque et vobis provinciæ coepiscopis, per primatem ejus, orationibus et manus impositione in ordinatione gratia sancti Spiritus et episcopalis ordo tribuitur, justum esse perpenditur ut, papa Romano prælato, ei a vobis orationis devotio et obeditionis dilectio rependatur; quod et in illis temporibus actum legimus, in quibus non adeo abundavit iniquitas, et refriguit charitas sicut modo in nostris agitur. Lege nimirum epistolam Leonis ad Anastasium, et invenies cum Attico metropolitano episcopos provinciæ suæ Romam venisse sine datis induciis, non retardatos metu sublimissimæ inter mundanos apices potestatis, per sævitiam hiemis, per iter asperum et periculis plenum, per invias nives, cum tanto labore atque discrimine, ut ex his qui episcopum comitati sunt, quidam defece- rint, ut cum eo de indignissima afflictione quam pertulit, lacrymabili actione conquererentur. Quod tu quomodo ageres, si metropolitano tuum hoc indigere videres, qui quantiscunque potes molitionibus certas, ut tuæ metropoli auctoritatem ex antiquo per sacras regulas attributam deroges, ac per hoc omnibus metropolitans debita jura tollas? Sicut enim Apostolus Corinthiis dicit: *Et si aliis non sum apostolus, sed tamen vobis sum; nam signaculum apostolatus mei vos estis in Domino* (*I Cor. ix*); et si aliis primas forte non essem, tibi tamen apud te primas esse debueram; nam signaculum primatus mei tu es, quem signe interrogatione primatus alterius, cum consensu coepiscoporum Rhemensis provinciæ, potui ordinare episcopum: qui me tunc vehementer ac inhianter cupiebas esse primatem totius provinciæ, tantum ut vel in uno opidulo posses esse episcopus, et etiam, si vellem et auctoritas ac ratio foret, honoris ac potestatis cupidus, vicarius fieri consentiret episcopus, qui Græcè vocatur chorepiscopus, sicut nunc paret, qui humilitatis ministerio ac potestate abuteris in cupiditatis ac superbiæ vanitate.

CAPUT XVII.

De rebellionē minorum sacerdotum erga potiores, et de Constantinopolitana sede reluctante adversus apostolicam.

Et cum hæc ita se habeant, non miror si te ad hoc potui provocare, ut adversum me tumeres, et nolles secundum divinam dispositionem esse subiectus, qui Canditori suo nolens subijci, de cælo cum

suis complicibus in hunc caliginosum aerem miserabiliter est dejectus, æternis suppliciiis cruciandus. Nam et in Veteri Testamento minoris dignitatis sacerdotes contra potiores suos se elevaverunt, Core scilicet cum suis complicibus; unde vindictam debitam a Domino susceperunt, sicut veneranda narrat historia (*Num. xvi*). In Novo nihilominus Testamento inter sacros ordines legimus seditiones exortas: et primum quidem diaconibus se adversus presbyteros, itemque presbyteris et chorepiscopis adversus episcopos efferentibus, unde nunc necesse non habemus sermonem in longum protrahere, quæ novimus a sacris canonibus esse composita. Tantum de episcopali ordine dicamus, quem etiam ignis cupiditatis, et rapina altitudinis adeo potuit inflammare, sicut scriptum est: *Aperi, Libano, portas tuas, et consumat ignis cedros tuas* (*Zach. xi*), ut quique Dei ordinationi resistere non metuerunt, et cum obtinere non potuerunt ut sibi præpositis non subessent, etiam hæreses et schismata condidderunt, sequè ipsos ab unitate Ecclesiæ projecerunt, sicut multis documentis ostendere possumus. Rebellantes quoque episcopi adversus metropolitanos sive archiepiscopos suos (his enim duobus nominibus hujus excellentiæ dignitas designatur), itemque metropolitani vel archiepiscopi adversus primates vel patriarchas, qui in his duobus nominibus uno prioratu funguntur, sed et quidem archiepiscopi vel metropolitani primates provinciarum, multoties in sacris canonibus inveniuntur: illi videlicet, qui in loco defunctorum archiepiscoporum vel metropolitanorum, ab episcopis uniuscujusque provinciæ, sine interrogatione alterius primatis prævalent ordinari, et ex antiquæ consuetudinis lege, a sede apostolica pallii solent genio insigniri, et in loco decedentium episcoporum, sine consulto vel licentia primatis alterius, in sua provincia quique possunt episcopos ordinare, sicut sanctus Gregorius scribens ad Augustinum Anglorum episcopum, evidenter ostendit (*lib. xii, epist. 31, interrog. 9*): « In Galliarum, inquit, episcopos nullam tibi auctoritatem tribuimus, quia ab antiquis prædecessorum meorum temporibus pallium Arelatensis episcopus accepit, quem nos privare auctoritate percepta minime debemus. » Et post aliquanta: « Ipse auctoritate propria episcopos Galliarum judicare non poteris, sed suadendo, blandiendo, bona quoque tua opera eis imitanda monstrando, pravorum mentes ad sanctitatis studium reforma, quia scriptum est in lege: *Per alienam messem transiens, falcem mittere non debes, sed manu spicas contere et manducare*. Falcem enim iudicii mittere non potes in ea segete quæ alteri videtur esse commissa, sed per effectum boni operis frumenta Dominica vitiorum suorum paleis exspolia, et in Ecclesiæ corpus monendo et persuadendo quasi mandando converti. Quando vero ex auctoritate agendum est, cum prædicto Arelatensi episcopo agatur, ne prætermitti possit hoc quod antiqua Patrum institutio invenit. »

A Et quod de hoc uno primate Gallicano, qui a sede apostolica pallium acceperat, dixit, hoc et de reliquis Galliarum, et Belgicorum, atque Germanicorum primatibus est utique intelligendum. Inter quos, sicut et inter reliquos episcopos, hæc conditio regularis servatur, ut qui prius fuerit ordinatus, prior habeatur, velut idem sanctus Gregorius in epistola ad præfatum Augustinum patenter ostendit. De quibus primatibus et Africæ provinciæ concilia dicunt (*conc. Carthag., c. 19*): « Quisquis, inquit, episcoporum accusatur, ad primatem provinciæ ipsius causam deferat accusator. » Et item: « Qui provocandum putaverint, ad primates suarum provinciarum, sicut et de episcopis sæpe constitutum est, provocent. » Et item (*African., can. 92*): « Quod si et ab eis, scilicet vicinis episcopis, provocandum putaverint, non provocent nisi ad Africana concilia, vel ad primates provinciarum suarum. » Et item (*conc. Carth., can. 17*): « Ut unaquæque provincia propter longinquitatem primatem habeat proprium. Placuit ut Mauritania Sitifensis, et postulavit primatem provinciæ Numidiæ, ex cujus cœtu separatur, suum habeat primatem, quem consentientibus omnibus primatibus provinciarum Africanarum, vel omnibus episcopis, propter longinquitatem habere permissa est. » Et episcopus qui ad synodum non occurrerit, ad primatem suum jubetur rationem impedimenti sui reddere; et ille primas debet dare iudices, in cujus provincia locus est constitutus, et causæ finiendæ sunt per iudices episcopos, sive quos primates dederint, sive quos inter se conquirentes vicinos ex consensu delegerint. « Et episcopi (*conc. Carth., can. 23*) trans mare proficisci non debent, nisi consulto primæ sedis episcopo suæ cujusque provinciæ. » Sanctus quoque Zosimus universis episcopis per Gallias et septem provincias constitutis scripsit (*epist. 5*): « Quia quisquis, prætermissa metropolitani sui formata, sive episcopus, seu presbyter, sive diaconus, aut deinceps inferioris gradus sit, ad eum pervenerit, sciat se suscipi omnino non posse. » Et Hilarius papa in decretis ad quinque provincias (*epist. 8*): « Illud etiam non potuimus præterire, quod sollicitudine diligentiore curandum est, ne præter metropolitanorum suorum litteras aliqui episcopi ad quamlibet provinciam audeant proficisci, quod etiam in omni genere officii clericalis per singulas debet D Ecclesias custodiri. » Et sanctus Gregorius ad Vincentium et cæteros episcopos scribit (*lib. vii, epist. 8, indict. 11*): « Hortamus, inquit, fraternitatem vestram ut si quemquam vestrum pro causis propriis ubicunque longius compulerit ambulare necessitas, a metropolitano vestro secundum inditam a sanctis Patribus regulam, petere licentiam debeatis, nec eum postponere in aliquo præsumatis, excepto si, quod non optamus, contra eundem metropolitanum vestrum vos habere aliquid causæ contigerit, ut ob hoc sedis apostolicæ iudicium hi qui petere festinant licentiam habeant, quod scitis per canones, etiam antiquorum Patrum institutione permissum. »

In promptu est enim illum de Sardicensibus canonicis dicere, de quibus et Innocentius ad Victricium memorat, et hinc multoties idem beatus Gregorius in epistolis suis ad Gallicanos et ad alios episcopos scripsit. Sed et leges Romanæ a Justiniano imperatore promulgatæ, quas probat Ecclesia, decernunt de episcoporum sine metropolitani sui auctoritate profectio. Cujus partem constitutionis hic, quantum convenire putavi, subjunxi hoc modo : « Non liceat episcopis suas quidem Ecclesias relinquere, in alienas autem provincias pervenire; sin autem ex causa fecerint necessaria, ostendant vel litteras patriarchæ aut metropolitani sui, » et reliqua. Et secundum canones Sardicenses (cap. 9) : « De qualibet provincia episcopi ac eum fratrem coepiscopum preces mittere debent, qui in metropoli consistit, si longius ire voluerint. » De quibus primatibus ac metropolitans Nicænum dicit concilium (cap. 4) : « Episcopum, inquit, convenit maxime quidem ab omnibus qui sunt in provincia episcopis ordinari. Si autem hoc difficile fuerit, aut propter instantem necessitatem, aut propter itineris longitudinem, tribus tamen omnimodis in idipsum convenientibus, et omnibus quoque pari modo decernentibus, et per scripta consentientibus, tunc ordinatio celebretur; firmitas autem eorum quægerunt, per unamquamque provinciam, metropolitano tribuatur episcopo (cap. 6). Illud autem generaliter clarum est, quod si quis præter sententiam metropolitani fuerit factus episcopus, hunc magna synodus diffinivit episcopum esse non oportere. » Et hinc Innocentius ad Victricium scribit (epist. 1) : « Primum, inquit, ut extra conscientiam metropolitani, episcopum nullus audeat ordinare. » Et Leo ad Theodorum episcopum (epist. 59) : « Sollicitudinis quidem tuæ is ordo esse debuerat, ut cum metropolitano tuo de eo quod eo querendum esse videbatur conferres. Quia in causis quæ ad generalem observantiam pertinent omnium Domini sacerdotum, nihil sine optimatibus oportet impleri. » In quo metropolitanorum et archiepiscoporum atque primatum ordine, invenitur in sacris canonibus quædam honoris consequentia, de qua mystica Nicæna synodus statuit (can. 5), ut Æliæ, id est Hierosolymorum, honoretur episcopus. Videlicet, ut quæ gratia mysteriorum Domini Dei regis et sacerdotis nostri Jesu Christi, civitas sancta meruit appellari, etiam ejus episcopus consequentiam honoris haberet. Quia, inquit Nicænum concilium, consuetudo obtinuit et antiqua traditio, ut Æliæ episcopus honoretur, habeat honoris consequentiam, salva metropolis propria dignitate. Et hac constitutione ipsius civitatis episcopus inter patriarchas et primates meruit computari, salva metropolis propria dignitate : sicut et Constantinopolis civitas, quæ ante Lychos vel Byzantium dicebatur, Heraclæotis suffraganea, sanctione imperiali, et consensu apostolicæ sedis ac generalis synodi, salva metropoli propria dignitate æque inter patriarchas vel primates decreta est computari. Quam honoris consequentiam,

A salva metropolis dignitate, et beatus Gregorius servari ostendit, quando Syagrio Augustodunensi episcopo petenti pallium, pro genio et honore Ecclesiæ suæ tribuit dicens (lib. VII, *epist.* 112, *indict.* 11) : « Ne indumenti hujus munificentiam tibi nudam videamur quoquo modo contulisse, hoc etiam pariter perspeximus concedendum, ut metropoli suo per omnia loco et honore servato Ecclesiæ, civitas Augustodunum, cui omnipotens Deus præesse te voluit, post Lugdunensem Ecclesiam esse debeat, et hunc sibi locum ac ordinem ex nostræ auctoritatis indulgentia vindicare. Cæteros vero episcopos secundum ordinationis suæ tempus sibi ad consedendum in concilio, seu ad subscribendum, vel in qualibet alia re, sua tenere loca decernimus, et suorum sibi prærogativam ordinum vindicare, quia omnino rationis ordo nos admonet ut cum usu pallii aliqua simul largiri privilegia debeamus. »

B Hos namque qui hujusmodi privilegia sive per imperialem pragmaticam formam, sive per pallii ab apostolica sede largitionem, adepti sunt, Græci secundos metropolitanos appellant, de quibus et in gestis Chalcedonensis concilii, et in ejusdem synodi canonibus, et decretis Innocentii invenimus. Quibus et aliis sacrorum canonum, et decretis sedis Romanæ claret sententiis, eosdem metropolitanos primates esse singulos singularum provinciarum, qui ex antiqua ut præmisimus consuetudine, et apostolica traditione, secundum sacros Nicænos canones, et convocare synodos, et ordinare episcopos, et ordinari a provincialibus coepiscopis sine cujusquam alterius primatis interrogatione possunt, et dispo-
C nere regulariter quæque per suas provincias queunt. Quorum etiam privilegium Antiocheni canones manifestant (cap. 9), dicentes ad metropolitanum episcopum sollicitudinem totius provinciæ pertinere, qui ad tollendam controversiam inter episcopos suæ provinciæ exortam, a vicina provincia debet judices alios convocare. Illi autem archiepiscopi, vel metropolitani, qui hæc sine consultu primatis non possunt exsequi, archiepiscopi tantum vel metropolitani habentur, sicut et in Gestis Chalcedonensis concilii, et in ejusdem synodi canonibus, et decretis Innocentii, et in epistola Leonis ad Anastasium Thessalonicensem episcopum invenimus. Ait enim Innocentius ad Alexandrum Antiochenum episcopum (epist. 20) : « Revolventes, inquit, auctoritatem Nicænae synodi, quæ una omnium per orbem terrarum mentem explicat sacerdotum, quæ censuit de Antiochena Ecclesia cunctis fidelibus, ne dixerim sacerdotibus, esse necessarium custodire, quia super diocesim suam prædictam Ecclesiam, non super aliquam aliam provinciam recognoscimus constitutam. » Et post aliquanta : « Itaque arbitramur, frater charissime, ut sicut metropolitanos auctoritate ordinas singulari, sic et cæteros non sine permisso conscientiaque tua sinas episcopos procreari. In quibus hunc modum recte servabis, ut longe positos litteris datis ordinari censeas ab his qui nunc eos suo tantum

ordinant arbitrato; vicinos autem, si aestimas, ad manus impositionem tuæ gratiæ statuas pervenire, quorum enim te maxime, spectat cura, præcipue tuum debent mereri iudicium. » Et Leo scribens ad Anastasium Thessalonicensem episcopum (*epist.* 88), evidenter ostendit quam prælationem primas metropolitanorum ex delegatione apostolica sedis habere debeat, dicens : « De persona consecrandi episcopi, et de clerici plebisque consensu, metropolitanus episcopus ad fraternitatem tuam referat, quodque in provincia bene placuit scire te faciat, ut ordinationem rite celebrandam tua quoque firmet auctoritas. Metropolitanus vero defuncto, cum in loco ejus alius fuerit metabrogandus, provinciales episcopi ad civitatem metropolitanam convenire debent, ut omnium clericorum atque omnium civium voluntate discussa, ex presbyteris ejusdem Ecclesiæ, vel ex diaconibus, optimis eligatur, de cujus nomine ad tuam notitiam provinciales referant sacerdotes, impleturi vota poscentium, cum quod ipsis placuit tibi quoque placuisse cognoverint. » Et item : « In evocandis a te episcopis moderatissimum esse te volumus, ne per majoris diligentiam speciem fraternis gloriari videaris injuriis. Unde si causa aliqua major erit, ob quam rationabile ac necessarium sit fraternum advocare conventum, binos de singulis provinciis episcopos, quos metropolitani crediderint esse mittendos, ad fraternitatem tuam venire sufficiat, ut non amplius ab statuto concilii tempore quam dies quindecim remorentur episcopi. » Quos metropolitanos contra suos primates se elevasse in Gestis Chalcedonensis synodi reperimus, quosque eadem synodus juste redarguit et auctoritate repressit.

Patriarchas quoque vel primates, qui duobus his nominibus in unius prioratus funguntur officio, non solum adversus tertiam et secundam sedem, verum et contra primam et apostolicam sedem legimus extulisse, adeo ut episcopus Constantinopolitanæ civitatis, olim Heracleotis suffraganæ, contra regulas tertiæ sedis episcopum ordinare præsumperit et secundæ sedi se a synodo et ab imperiali potestate præferri contra regulas obtinuerit. Et quia mens potentiam avida non potest concessis sibi limitibus esse contenta, ad hoc usque prorupit ut contra primam et apostolicam sedem universalem vocari se fecerit, sicut in epistolis magni Leonis papæ ac beati Gregorii, et nuper Nicolai relegimus. Cujus profani vocabuli præsumptio, rapina scilicet altitudinis, qualiter repulsa sit a beato Leone, una cum arrogantia appellationis indebitæ a Constantinopolitano episcopo usurpatæ, quia tuæ compilationis perplexitas ejus dicta alibi exigit ponere, suo loco invenies. Et quid de eodem vocabulo beatus Gregorius senserit et decreverit, hic pro loci opportunitate duxi ponendum, cujus verba latius ac plenius in eisdem epistolis, de quibus hic quædam defloravi, lector poterit invenire. Ait enim in epistola ad ipsum Joannem Constantinopolitanum episcopum, qui se universalem episcopum satagebat vocari (*lib. iv, ind. 13,*

epist. 38) : « Rogo, inquam, deprecor, et quanta possum dulcedine exposco, ut fraternitas vestra cunctis sibi adulantibus atque erroris nomen deferentibus contradicat, nec stulto ac superbo vocabulo appellari consentiat. » Et item : « Perpende, rogo, quia in hac præsumptione temeraria pax totius turbatur Ecclesiæ, et gratiæ contradicitur communiter omnibus effusæ. » Et item : « Quis rogo in hoc tam perverso vocabulo nisi ille ad imitandum proponitur qui, despectis angelorum legionibus, secum socialiter constitutis, ad culmen conatus est singularitatis erumpere, ut et nulli subesse, et solus omnibus præesse videretur? » Et item : « Certe Petrus apostolorum princeps membrum sanctæ et universalis Ecclesiæ, Paulus, Andreas, Joannes, quid aliud quam singulorum sunt plebium capita, et tamen sub uno capite omnes membra, atque ut cuncta brevi cingulo locutionis astringam, sancti ante legem, sancti sub lege, sancti sub gratia, omnes hi perficientes corpus Domini, in membris sunt Ecclesiæ constituti, et nemo se unquam universalem vocari voluit. Vestra ergo sanctitas agnoscat quantum apud se tumeat, quæ illo nomine vocari appetit, quo vocari nullus præsumpsit, qui veraciter sanctus fuit. Nunquid non, sicut vestra fraternitas novit, per sanctum et venerandum Chalcedonense concilium hujus apostolicæ sedis antistites, cui, Deo disponente, deservio, universales oblato honore vocati sunt? Sed tamen nullus unquam tali vocabulo appellari voluit, nullus sibi hoc temerarium nomen arripuit, ne si sibi in pontificatus gradu gloriam singularitatis arriperet, hanc omnibus fratribus denegasse videretur. » Et item : « Quid ergo, frater charissime, in illo terribili examine venienti judici es dicturus, qui non solum Pater, sed etiam generalis Pater in mundo vocari appetis? Ecce ex hoc nefando elationis vocabulo Ecclesia scinditur, fratrum omnium corda ad scandalum provocantur. » Et in epistola ab Sabiniano diacono in Constantinopoli responsalis fungentem officio (*lib. iv, ind. 13, epist.* 39) : « Ad hoc, inquit, usque pervenit (quin Joannes Constantinopolitanus episcopus) ut sub occasione presbyteri Joannis gesta huc transmitteret, in quibus se pene per omnem versum oecumenicum patriarcham nominaret. » Et post aliquanta : « In isto enim scelesto vocabulo consentire nihil est aliud quam fidem perdere; unde sicut tibi jam transactis epistolis scripsi, nunquam cum eo procedere præsumas. » Et ad Constantinum Augustam (*lib. iv, ind. 13, epist.* 34) : « Cum se nova præsumptione atque superbia idem frater meus universalem episcopum appellet, ita ut sanctæ memoriæ decessoris mei tempore ascribi se in synodo tali hoc superbo vocabulo faceret, quamvis cuncta acta illius synodi sede apostolica contradicente soluta sint: triste mihi aliquid serenissimus Dominus innuit, quod non eum corripuit qui superbit, sed me magis ab intentione mea declinare studuit, qui in hac causa Evangeliorum et canonum statuta humilitatis atque rectitudinis virtute defendo. Qua in re a prædicto fratre

et consacerdote meo, contra evangelicam sententiam, contra beatum quoque Petrum apostolum, et contra omnes Ecclesias, contraque canonum statuta agit. » Et paulo post : « Triste tamen valde est, ut patienter feratur, quatenus despectis omnibus prædictus frater et coepiscopus meus solus conetur appellari episcopus. Sed in hac ejus superbia quid aliud nisi propinqua jam Antichristi esse tempora designantur ? » Et in epistola ad Eulogium Alexandrinum et ad Anastasium Antiochenum episcopos, a pari (*lib. II, ind. 13, epist. 36*) : « Sicut, inquit, veneranda mihi vestra sanctitas novit, per sanctam Chalcedonensem synodum pontifici sedis apostolicæ, cui Deo disponente deservio, hoc universitatis nomen oblatum est. Sed nullus unquam decessorum meorum hoc tam profano vocabulo uti consensus : quia videlicet, si unus patriarcha universalis dicitur, patriarcharum nomen cæteris derogatur. Sed absit hoc, absit a Christiani mente id sibi velle quempiam arripere, unde honorem fratrum suorum imminuere ex quantulacunque parte videatur. Cum ergo nos hunc honorem nolimus oblatum suscipere, pensate quam ignominiosus sit hunc sibi quempiam violenter usurpare voluisse. Propterea sanctitas vestram in suis epistolis neminem unquam universalem nominet, ne sibi debitum detrahat, cum alteri honorem offert indebitum. » Et item : « Si enim hoc dici licenter permittitur, honor patriarcharum omnium negatur : et cum fortasse is in errore perit qui universalis dicitur, nullus jam episcopus remansisse in statu veritatis invenitur. Obtestor ergo ut constanter ac sine præjudicio servetis sicut accepistis Ecclesias, et nihil sibi in vobis hæc tentatio diabolicæ usurpationis ascribat. State fortes, state securi, scriptaque cum universalis nominis falsitate, nec dare unquam, nec suscipere præsumatis. Omnes episcopos curæ vestræ subjectos ab hujus adulationis iniquatione prohibete. Universa vos Ecclesia patriarchas, non solum in bonis operibus, sed etiam in veritatis auctoritate cognoscat. Si qua autem forsitan adversa subsequantur, unanimiter persistentes, etiam moriendo debemus ostendere, quia in generalitatis damno nostrum specialiter aliquid non amamus. Dicamus cum Paulo : *Mihi vivere Christus est, et mori lucrum* (*Philip. 1*). Audiamus quod primus omnium pastorum dicit : *Si quid patimini propter justitiam, beati eritis* (*Petr. III*). Mihi enim credite quia honorem quem pro prædicanda veritate suscepimus, si necessitatis causa exigat, securius pro eadem veritate relinquimus quam tenemus. Pro me autem sicut vestram charissimam beatitudinem decet, orate ut hoc quod vobis loqui audeo, operibus ostendam. »

Et item in epistola ad Eulogium Alexandrinum episcopum (*lib. VII, ind. 1, epist. 4*) : « Indicare quoque vestra beatitudo studuit, jam se quibusdam non scribere superba vocabula, quæ ex vanitatis radice prodierunt, et mihi loquitur dicens : *Sicut jussistis*. Quod verbum jussionis peto a meo auditu remove-

A quia scio qui sum, qui estis. Loco enim mihi fratres estis, moribus patres. Non ergo jussi, sed quæ utilia visa sunt, indicare curavi. Non tamen invenio vestram beatitudinem hoc ipsum, quod memoriæ vestræ intuli, perfecte tenere voluisse. Nam dixi, nec mihi vos, nec quicumque alteri tale aliquid scribere debere, et ecce in præfatione epistolæ, quam ad me ipsum qui prohibui direxistis, superbiæ appellationis verbum, universalem me papam dicentes, imprimere curastis. Quod peto dulcissima mihi sanctitas vestra ultra non faciat, quia vobis subtrahitur quod alteri plusquam ratio exigat præbetur. Ego enim non verbis quæro prosperari, sed moribus : nec honorem esse deputo, in quo fratres meos honorem suum perdere cognosco. Meus namque honor est, honor universalis Ecclesiæ, meus honor est, fratrum meorum solidus vigor. Tunc ego vere honoratus sum, cum singulis quibusque honor debitum non negatur. Si enim universalem me papam vestra sanctitas dicit, negat se hoc esse quod me fatetur universum. Sed absit hoc. Recedant verba quæ vanitatem inflant et charitatem vulnerant. Et quidem in sancta Chalcedonensi synodo, atque post a subsequentibus Patribus, hoc est decessoribus meis, oblatum vestra sanctitas novit. Sed tamen nullus eorum uti hoc unquam vocabulo voluit : ut dum in hoc mundo honorem sacerdotum diligerent omnium, apud omnipotentem Deum custodirent suum. » Et in epistola ad diversos archiepiscopos a pari (*lib. VII, indict. 2, epist. 69*) : « Cognoscat fraternitas vestra, Joannem quondam Constantinopolitanæ civitatis antistitem, contra Deum, contra pacem Ecclesiæ in omnium despectu et injuria sacerdotum modestiæ ac mensuræ suæ terminos excessisse, et illicite in synodo superbum ac pestiferum œcumenicum, hoc est universalis, sibi vocabulum usurpasse. Quod beatæ recordationis Pelagius decessor noster agnoscens, omnia gesta ejusdem synodi, præter illa quæ illic de causa venerandæ memoriæ Gregorii episcopi Antiocheni sunt habita, valida omnino destructione cassavit, districtissima illum increpatione corripiens, ut se a novo et temerario supersitionis nomine cohiberet, adeo ut suum cum eo diaconum nisi tantum nefas emendaret, procedere prohiberet. Cujus nos rectitudinis zelo per omnia inhærentes, statuta ipsius sine refragatione, Deo protegente, servamus : quia dignum est ut rectam decessoris viam gressibus inoffensis incedat, qui de eodem loco ad reddendam rationem æterni judicis tribunal expectat. » Et paulo post : « Hortor atque suadeo ut nullus vestrum hoc nomen alivando recipiat, nullus consentiat, nullus subscribat, nullus ubi fuerit scriptum admittat, vel subscriptionem suam adjiciat, sed sicut omnipotentis Dei ministros decet, integrum se ab hujusmodi venenata infectione custodiat, et calido insidiatori in se locum non præbeat, quoniam hoc et in totius Ecclesiæ injuria ac discissione, et sicut diximus, in omnium vestrum despectu fit. Nam si, unus, ut putat, universalis est, restat ut vos episcopi non sitis. » Et post aliquanta : « Nam si quis,

quod non credimus, scripta præsentia aliqua in parte neglexerit, a beati Petri apostolorum principis pace se noverit segregatum. Ita ergo vestra fraternitas agat, ut cum pastor pastorum in iudicio venerit, de loco regiminis quem accepit, reatum habere non possit. »

Et in epistola ad Cyriacum Constantinopolitanum episcopum, Joannis episcopi successorem (*lib. vi, ind. 15, epist. 4*): « In hoc, inquit, vos medullitus amplectimur, in hoc sacerdotem esse recognoscimus, si repulsa vanitate verborum, sanctitatis locum cum sancta humilitate teneatis. Ecce enim in nefandi appellatione nominis scandalizati sumus, et non minimas querelas servamus in mente, promimus in voce. Vestra autem fraternitas novit quia Veritas dicit: *Si offers munus tuum ad altare, et reliqua (Matth. v)*. Qua in re pensandum quia cum omnis culpa oblato sacrificio deletur, tantum est malum scandalii alieno corde generati, ut ab eo qui peccaverit, nec ipsum sacrificium Dominus accipiat, quod delere peccatum solet. Curate ergo cordis nostri scandalum festine detergere, ut possit omnipotens Deus oblationis vestræ sacrificium acceptabile habere. » Et item in alia epistola ad eumdem (*lib. vi, ind. 15, epist. 28*): « Oportet, inquit, ut mihi atque omnibus fratribus in vestris, ejus charitatis pulchritudinem in hoc primum opere monstretis, ut verbum superbiæ, per quod grave scandalum in Ecclesiis generatur, auferre festinetis, hoc modis omnibus implentes quod scriptum est: *Solliciti servare unitatem spiritus in vinculo pacis (Ephes. iv)*. Et rursum: *Nullam occasionem dare adversario maledicti gratia (I Tim. v)*. Tunc enim ostensa charitas vera est, si per typhum superbiæ inter nos scissura non fuerit. Ego enim Jesum testem invoco in anima mea, quia a summo usque ad ultimum nulli hominum dare scandalii occasionem volo: omnes esse magnos et honorabiles cupio, quorum tamen honor honori non detrahit omnipotentis Dei. Nam quisquis se contra Deum honorari appetit, mihi honorabilis non est. » Et paulo post: « Quia hostis omnipotentis Domini Antichristus juxta est, studiose cupio ne proprium quid inveniat, non solum in moribus, sed neque in vocabulo sacerdotum. Ea ergo quæ novo modo introducta sunt, ipso ordine quo illata sunt auferantur, et pax nobis in Domino illibata permanebit. Nam quæ erit inter nos dulcedo, quæ charitas, si nosmetipsos voce refoverimus, et rebus pungimus? » Et in epistola ad Mauritianum Augustum (*lib. vi, ind. 15, epist. 30*): « Eumdem, inquit, fratrem et consacerdotem meum (quin Cyriacum Constantinopolitanum episcopum) studiose admonere curavi, ut si habere pacem omnium concordiamque desiderat, ab stulti vocabuli se appellatione compescat. De qua re mihi in suis jussionibus dominorum pietas præcepit dicens, ut pro appellatione frivoli nominis inter nos scandalum generari non debeat. Sed rogo ut imperialis pietas penset, quia alia sunt frivola valde innoxia, atque alia vehementer nociva. Nunquid non, cum se Antichristus

veniens Deum dixerit, frivolum valde erit? sed tamen minis perniciosum. Si quantitatem sermonis attendimus, duæ sunt syllabæ; si vero pondus iniquitatis, universa pernicies. Ego autem fidenter dice quia quisquis se universalem sacerdotem vocat, vel vocari desiderat, in elatione sua Antichristum præcurrit, quia superbiendo se cæteris præponit, nec dispari superbia ad errorem ducitur; quia sicut per-versus ille Deus videri vult super homines, ita quisquis iste est, qui solus sacerdos appellari appetit super reliquos sacerdotes. Sed quoniam Veritas dicit: *Omnis qui se exaltat humiliabitur (Luc. xiv)*, scio quia quælibet elatio tanto citius rumpitur, quanto amplius inflatur. Illis ergo pietas vestra præcipiat, ne quod per appellationem frivoli nominis scandalum gignant, qui in superbia et typho ceciderunt. Nam peccator ego, qui auctore Deo humilitatem teneo, admonendus ad humilitatem non sum. » Et in epistola ad Anastasium Antiochenum episcopum (*lib. vi, epist. 24*): « In suscipienda fratris et consacerdotis nostri Cyriaci synodica epistola dignum non fuit ut pro causa profani vocabuli moras facerem, ne unitatem sanctæ Ecclesiæ perturbarem. Sed tamen de eodem superstitioso et superbo vocabulo eum admonere studui, dicens quia pacem nobiscum habere non posset, nisi elationem prædicti verbi corrigeret, quam primus apostata invenit. Vos tamen eandem causam nullam esse dicere non debetis, quia si hanc æquanimiter portamus, universæ Ecclesiæ fidem corrumpimus. Scitis enim quanti, non solum hæretici, sed etiam hæresiarchæ de Constantinopolitana Ecclesia sunt egressi; et ut de honoris vestri injuria taceam, si unus episcopus vocatur universalis, universa Ecclesia corrui, si unus universus, cadit. Sed absit hæc stultitia, absit hæc levitas ab auribus meis. In omnipotentem autem Domino confido, quia quod promisit citius impleturus est: *Omnis qui se exaltat, humiliabitur.* »

CAPUT XVIII.

Quod insanæ mentis homines per indiscretionem in Scripturis sanctis erraverunt.

Hanc evangelicam sententiam, frater, intelligenter attende et tenaciter mente reconde; sed et illam beati Gregorii, quam ut paulo ante legisti, huic evangelicæ sententiæ subjunxit dicens: « Scio quia quælibet elatio tanto citius rumpitur, quanto amplius inflatur. » Recognosce igitur modum et mensuram tuam, tibi a Deo per canones sacros decretam, et esto humilis in oculis tuis, attendens quod Dominus dixit Sauli: *Nonne cum esses parvulus in oculis tuis, caput in Israel feci tæ? (I Reg. xii.)* Nunc quia magnus es apud te, *abjeci te ne sis rex*. Et istos veteres et emortuos cineres, a sacris canonibus dudum sepultos, eorum qui contra prælatos suos rebellaverunt, moliri desiste resuscitare. Sed timeo quoniam ea quæ vera et humilia sunt videre non poteris, albuginem habens in oculo, id est arrogantiam in mente. Unde Dominus ad Moysen dicit: *Qui habue-*

rit albuginem in oculo, non offerat panes Deo suo, nec accedat ad ministerium eius (Levit. xxi). Quæ de re inculcat tibi sententiam beati Augustini ad Julianum episcopum juvenem, et per superbiam male sentientem, ab Ecclesia catholica segregatum, in alio scripto jam a te lectam, sed utinam non neglectam. « Quando, inquit, animositatem qua teneris viceris, tunc veritatem poteris tenere qua vinceris. Quam scilicet veritatem si relicta animositate non tenueris, discretionem in sanctis Scripturis et in sacris regulis habere non poteris, sicut nec illi qui eas discrete intelligere noluerunt, et ideo erraverunt quidam eorum, voces earumdem Scripturarum non discernendo. Sicut hoc quod Dominus dicit: *Ego et Pater unum sumus (Joan. x)*, Arius dictum de unitate substantiæ unum intelligere noluit, Sabellius ad personarum proprietatem *sumus* non retulit, et uterque idcirco erravit. In unitate quoque unius ejusdemque personæ ex duobus et in duabus substantiis, id est naturis, divinitatis scilicet et humanitatis, subsistens Dominus noster Jesus Christus, hoc quod item dixit: *Pater major me est (Joan. xiv)*. Arius non humanitati, sed divinitati ascripsit, et ideo indignam vitam digna morte finivit. Quidam vero eorum easdem Scripturas male interpretando, sicut beatus Petrus de sancti Pauli Epistolis dixit: *In quibus, inquit, sunt quædam difficilia ad intelligendum, quæ indocti et instabiles depravant, sicut et cæteras scripturas ad suam ipsorum perditionem (II Petr. iii)*. Difficilia autem intellectu in Epistolis Pauli, quæ ab indoctis et instabilibus dicit depravata, illa sunt maxime in quibus de gratia Dei loquitur quæ justificat impios, hoc est ex impiis facit justos. Dicit enim ipse Paulus: *Ubi autem abundavit peccatum, superabundavit gratia (Rom. v)*; quod indocti et instabiles non intelligentes, putabant eum dicere, Faciamus mala ut veniant bona. Absit autem ut Paulus suos auditores promerenda bona doceat facere mala, cujus omnis intentio est a malis coercere, et ad bona agenda quoscunque potest advocare. Sed cum dicit: *Ubi autem abundavit peccatum, superabundavit gratia, donum gratiæ per hoc vehementius commendat, quæ et magna solet conversis et minora dimittere peccata; et quanto quis majora ante conversionem peccata commisit, tanto majorem gratiæ donantis indulgentiam conversus accipit.* » Quidam autem ex eisdem scripturis quædam eraserunt, de quibus revinci timebant, sicut constat Arianos de Evangelio erasisse quod Salvator ait: *Quia Deus spiritus est (Joan. iv)*, quoniam credere volebant quod Spiritus sanctus Deus esset omnipotens. Quidam etiam de Epistola Joannis eraserunt: *Et omnis spiritus qui solvit Jesum, ex Deo non est (I Joan. iv)*; ne scilicet per auctoritatem beati Joannis revincerentur. Unde Nestorius nescire se prodidit hanc authenticis exemplaribus inditam fuisse sententiam, atque ideo solvere non timuit Jesum, dicens beatam virginem Mariam non Dei, sed hominis tantum genitricem, ut aliam personam hominis, aliam faceret deitatis:

A neque unum Christum in Verbo Dei et carne atque anima credens, sed separatim alterum Filium Dei, alterum hominis prædicans. Quidam nimirum ipsas Scripturas verbis illicitis imposturaverunt, sicut Macedonius Constantinopolitanus episcopus, qui ab Anastasio imperatore ideo a civitate expulsus legitur, quoniam falsavit Evangelia, et illum Apostoli locum ubi dicit: *Quod apparuit in carne, justificatum est in spiritu (I Tim. iii)*, per cognitionem Græcarum litterarum \omicron et θ hoc modo mutando falsavit. Ubi enim habuit qui, hoc est, \omicron Σ , monosyllabum Græcum, littera mutata \omicron in θ vertit et fecit θ Σ , id est, ut esset Deus apparuit per carnem: quapropter tanquam Nestorianus fuit expulsus.

B Et multa alia sunt in Scripturis, de quibus male intelligentes scandalum sibi sumpserunt, et quia noluerunt fieri discipuli veritatis, magistri sunt facti erroris. Sicut de hoc quod dicit Apostolus: *Mediator Dei atque hominum homo Christus Jesus (I Tim. ii)*, quo testimonio ad auctoritatem hæresis suæ Photinus est usus; et de Epistola ad Philippenses, *habitu reperiens ut homo (cap. ii)*, Marcion phantasiam corporis confessus est esse in Christo, non corpus. Sed et Agnoitæ hæretici hoc ad suum confirmandum errorem protulerunt quod dictum est: *De die autem et hora nemo scit, neque angeli in cælis, nec Filius, nisi Pater solus (Matth. xxiv)*; et de hoc quod in Genesi scriptum est, *post noctem diem captum (Gen. i)*, tenebras coævās Deo, qui inaccessibilem lucem habitat, dixerunt hæretici. Et ex eo quod ibi dictum est: *Faciamus hominem ad imaginem et similitudinem nostram (ibid.)*, diabolus primum hominem idololatriam docuit dicens: *Eritis sicut dii (Gen. iii)*. Et quia Mathusalæ anni ætatem diluvii excedunt, non tantum octo animæ reservatæ sunt dictæ. Et clamores Sodomorum repletis jam peccatis Deus audiens, tanquam ignorans clamorem, descendit ut videret an plena essent. Et quod Moysi sepulcrum nemo scierit, nec etiam sepelientes sepultum; et lex diversa sibi ipsi sit hostis, et Dominus non mittere poterit Spiritum sanctum, de quo ipse natus legatur, nec mortem gladio usuris denuntiaverit, qui gladium passurus emi præcepit; nec ad inferos descendit, qui in paradiso eum latrone intravit; et apostoli reperiuntur in crimine, qui baptizare in nomine Patris, et Filii, et Spiritus sancti jussi, tantum D in Jesu nomine baptizaverunt: et de hoc quod dictum est: *Ego Deus creans mala (Isa. xlv)*; et: *Fecit omnia, et ecce bona valde (Gen. i)*. Et multa sunt alia quæ longum et non necessarium est nobis modo adnumerare, de quibus sapientissime atque sanctissime dictis insulsi et scelerati tenebrosissime perditionem suam adinvenerunt.

CAPUT XIX.

Quod in sanctarum traditionum sanctiones male intelligentes erraverint.

Et quia, ut Hilarus papa dicit. Non minus in sanctarum traditionum sanctiones delinquitur, quam

in ipsius Domini injuriam prosilitur, de ecclesiasticis regulis quidam sumpserunt scandala, et hæreses ac schismata condiderunt; sicut Meletius a synodo Ægypti episcoporum depositus, a quo Meletiani sunt dicti, qui ab eo post depositionem suam fuerunt ordinati, quos Nicæna synodus sub conditione in gradibus suis recepit, ea necessitate, ne cum Arianis cum quibus juncti fuerant remanentes, acrius Ecclesiam catholicam impugnarent. Sed et Novatianos æque sub conditione synodus prædicta recepit. Hæc enim hæresis a Novato presbytero Romanæ tunc Ecclesiæ, postea autem contra regulas a consortibus suis facto episcopo, sumpsit exordium. Qui Novatus se ab Ecclesiæ Romanæ communione suspendit, quoniam Cornelius episcopus fideles, qui sacrificaverant tempore factæ persecutionis a Decio, immutata concilii episcopalis acerbissima sententia, quam Innocentius in decretis suis commemorat, in communione receperat. Quorum scilicet Novatianorum episcopo nomine Acesio, Constantinus imperator vocato ad Nicænum concilium, et in dogmate fidei et Paschalis festivitatis consentienti, sed pœnitentes ad pœnitentiam recipere renuenti, imperator mirabilis dixit: « O Acesi, pone scalam, et si potes ascende solus in cœlum (lib. II, *Hist. trip.*, c. 13). » Ex qua condescensione circa Novatianos et Meletianos causa necessitatis proveniente, cum illi, quos ante damnationem suam Bonosus ordinaverat, in gradibus recepti fuerint, etiam eos qui a catholica ad hæresim transierunt, et a Bonoso damnato ordinati fuerunt, Anisius quidam cum suis collegis recipi in ordinibus suis debere decrevit, ne cum eodem Bonoso remanerent, ac non mediocre scandalum Ecclesiæ catholice fieret, quod sanctus Innocentius dissolvit et repulit. Et quia idem concilium Paulianistas hæreticos ad Ecclesiam venientes baptizari præcepit, quidam etiam alios hæreticos baptizandos esse dixerunt, quod apostolica sedes, et plenaria concilia (sicut decreta Romanorum pontificum monstrant, et sanctus Augustinus verbis et sensibus copiosis libris ostendit), penitus abdicarunt. Sed et alia hinc devocare in medium poteram, nisi prolixitatem vitarem.

CAPUT XX.

Quod in antiquis epistolis sedis apostolicæ, sicut in legibus, quædam post abrogata vel immutata fuerint. De sex synodis generalibus, et de septima apud Græcos, deque synodo Francica, et epistolis Julii papæ ac Felicis.

Ne igitur causa indiscretæ intelligentiæ, de his quæ collegisti ad tuam intentionem firmendam, scandalum sumas, animadvertere debes, quia sicut de sacramentis humanæ salutis, quæ ab exordio mundi usque ad adventum Domini Salvatoris pro temporum varietate diversa, ad unitatem tamen unius fidei recurrentia exstiterunt, quædam spiritualiter intelligenda sunt tradita, quædam vero immutata, et quædam penitus abolita, quædam etiam permanent ut fuere decreta: ita nullum fuit tempus sæculi a san-

ctis alienum doctoribus, qui sive verbis, sive exemplis, sive etiam scriptis, viam vitæ mortalibus pro temporum varietate demonstraverunt. Unde sunt plura non solum in canonibus atque in Romanorum pontificum decretis, sed et in Veteris ac Novi Testamenti sanctis Scripturis, eodem Spiritu inspiratis quo et sacri promulgati sunt canones, quæ quidem inter se contraria esse videntur, et non sibimet sunt contraria, sed pro temporum et rerum ac qualitate causarum disposita vel disponenda; ut Salomon conjunctim dicit: *Ne respondeas stulto juxta stultitiam suam (Prov. xxvi); et: Responde stulto juxta stultitiam suam (ibid.); et Dominus per prophetam: Nolo mortem peccatoris (Ezech. xxxiii); et de Heli filiis legitur, quia non poterant patrem audire, quoniam voluit eos Deus occidere (I Reg. ii).* Et in Evangelio: *Bonus homo de bono thesauro cordis sui profert bona (Matth. xii); et: Nemo bonus, nisi solus Deus (Luc. xviii). Et Venit filius hominis quærere et salvare quod perierat (Luc. xix), qui dicit: Non sum missus nisi ad oves quæ perierunt domus Israel (Matth. xv). Et item discipulis dicit: In viam gentium ne abieritis (Matth. x); itemque: Ite, docete omnes gentes (Matth. xxviii). Et: Deus neminem tentat (Jacob. i); et: Tentat vos Dominus Deus vester (Deut. i). Et Paulus: Si hominibus placerem. Christi servus non essem (Gal. i); itemque: Sicut ego per omnia omnibus placeo (I Cor. x). Et item: Optabam anathema esse a Christo pro fratribus meis secundum carnem (Rom. ix); et item: Quis nos separabit a charitate Christi, et reliqua (Rom. viii). Quia spiritus unicus et multiplex, stabilis et mobilis, ut in libro Sapientiæ scriptum est (cap. vii), per organum hominis sibi aretissimum non simul et in semel omnia profert: et etiam ipsis sanctis discipulis, quia nemo hominum purus repente fit summus, qui incessanter divino adhærebant magisterio, pro incrementa temporum fides et scientia est adauca; qui et dixerunt: Domine, adauge nobis fidem (Luc. xvii); et Dominus ipsis: Adhuc, inquit, multa habeo vobis dicere, quæ non potestis portare modo; cum autem venerit ille Spiritus veritatis, docebit vos omnem veritatem (Joan. xvi).*

Sed et post legem naturæ data est lex litteræ populi congruens duritiæ, quæ propter transgressiones posita est; quam lex Evangelii, tempore posterior sed gratia prior, est subsecuta, quæ pro incrementa temporum ab apostolis eorumque successoribus est propagata. Nam sicut in Actibus apostolorum legitur (cap. xv), primum credentes de circumcissione, sic Evangelii sacramenta suscipiebant, ut a legalibus cæremoniis non discederant; et quæstione facta de gestilibus, si credentes legis cæremônias observare deberent, tria tantum capitula ab apostolis suscipere servanda. Deinde apostolicæ sedis pontifices, ante constitutionem sacrorum conciliorum, etsi non fide sibi adversa, tamen stylo diverso, in suis epistolis ad diversos pro diversis causis emergentibus datis, de episcopis statuere judicia, considerantes

qualitatem personarum, necessitatem rerum, et A opportunitatem temporum. Unde et Anacletus in epistola ad universos episcopos in Italia constitutos dicit (*epist.* 2) : Ejectionem, inquit, summorum sacerdotum sibi Dominus reservavit, licet electionem eorum bonis sacerdotibus et spiritualibus populis concessisset; » ex quo aliter in præcedenti epistola scripserat. Et Constantinum imperatorem in Nicæna synodo tale quid dixisse Tripertita narrat Historia : Non ob id tamen dimisit decernere Nicæna synodus (*can.* 2) : « Si quis, inquit, præter hæc fecerit, quasi contra magnum concilium se efferens, ipse de clericatus honore periclitabitur. » In quo decretum cum dicit, *Si quis*, neminem tam de superiori quam inferiori ordine excipit, quod et in aliis evidenter ostendit. Sed et idem Constantinus, et post eum alii ortho- B doxy imperatores, leges de episcopis promulgare non fuere cunctati. Sed et post Anacletum, quidam ante Nicænum concilium, Julius autem et alii quidam post Nicænum concilium, judicia episcoporum ante diffinitionem ad sedem apostolicam referri jusserunt. Innocentius vero, et successores ipsius, postquam a sacris conciliis, et Romanæ sedis pontificibus, de certis capitulis expressius fuerunt decreta judicia, de dubiis vel obscuris ante iudicium, de certis autem atque decretis (quoniam et ecclesiasticæ et publicæ leges confessum vel convictum sine dilatione vel retractatione iudicari præcipiunt), post episcopale iudicium, secundum Sardicenses canones, sub gestorum testificatione ad sedem apostolicam referri jusserunt : quorum decreta in usu ecclesiastico etiam a tempore majorum nostrorum prævaluisse comperimus. Verum et ut de legibus publicis quædam sunt abrogata, quædam vero immutata, quædam etiam superadjecta, ita nihilominus quædam decreta catholicorum pro tempore et ratione atque necessitate prolata, sed postea abrogata vel immutata fuerunt : quod et Innocentius demonstrat dicens : « De his, inquit, observatio prior durior, posterior, interveniente misericordia, inclinatio est, » et reliqua. Et Africæ provinciæ canones de velatione virginum, et baptizatis parvulis a Donatistis, et de diocesibus, aliter quam primum decretum fuerit diffinierunt. Et sanctus Gelasius : « Priscis, inquit, pro sui reverentia manentibus constitutis, quæ ubi nulla vel rerum vel temporum perurget angustia, regulariter convenit custodiri, » et reliqua. Et Innocentius longe ante ad episcopos Macedones excusantes de temporibus necessitate quod egerant, dixit (*epist.* 27) : « Ergo quod necessitas pro remedio reperit, necessitate cessante debet utique cessare pariter quod urgebat : quia alius est ordo legitimus, alia usurpatio quam ad præsens fieri tempus impellit ; et advertite quod utique, ut dicitis, necessitas imperavit, in pace jam Ecclesias constitutas non posse præsumere. » Et Leo ad Rusticum Narbonensem episcopum (*epist.* 95, in præfat.) : « Sicut quædam, inquit, sunt quæ nulla possunt ratione convelli, ita nonnulla sunt quæ aut pro considera-

tionem ætatum, aut pro necessitate rerum oporteat temperari, illa semper conditione servata, ut in his quæ vel dubia fuerint vel obscura, id noverimus sequendum, quod nec præceptis evangelicis contrarium, nec decretis sanctorum Patrum inveniatur adversum. » Quas singillatim singulas formas et sanctus Paulus demonstrat ad Corinthios dicens : *Hoc autem dico secundum indulgentiam, non secundum imperium* (I Cor. vii), et reliqua. *His autem qui matrimonio juncti sunt, præcipio non ego, sed Dominus, uxorem a viro non discedere, et sequentia* (*ibid.*). Et concilium Africanum in uno capitulo de Donatistis ad locum (*can.* 35) : « Propter Ecclesiæ pacem et utilitatem, ut ex ipsis Donatistis, quicumque clerici correcto consilio ad catholicam unitatem transire vulerint, secundum uniuscujusque episcopi catholici voluntatem atque consilium qui in eodem loco gubernat Ecclesiam, si hoc paci Christianæ prodesse visum fuerit, in suis honoribus suscipiantur, sicut et prioribus ejusdem divisionis temporibus factum esse manifestum est : non ut concilium, quod in transmarinis partibus de hac re factum est, dissolvatur, sed ut illud maneat circa eos, qui sic transire ad catholicam volunt, ut nulla per eos unitatis compensatio procuretur, » et reliqua quæ ibi prosequitur. Sed et Leo utrasque has formas de una eademque re in uno capitulo ostendit ad Rusticum Narbonensem episcopum dicens (*epis.* 95, cap. 1) : « Nulla, inquit, ratio sinit ut inter episcopos habeantur, qui nec a clericis sunt electi, nec a plebibus expetiti, nec a comprovincialibus episcopis cum metropolitani iudicio consecrati. Unde cum sæpe quæstio de male accepto honore nascatur, quis ambigat nequaquam istis esse tribuendum, quod non doceret fuisse collatum? Si qui autem clerici ab istis pseudoepiscopis in eis Ecclesiis ordinati sunt, quæ ad proprios episcopos pertinebant, et ordinatio eorum consensu et iudicio præsentium facta est, potest rata haberi, ita ut in ipsis Ecclesiis perseverent ; aliter autem vana habenda est consecratio, quæ nec loco fundata est, nec auctoritate munita. » Et item ad eundem in eadem epistola (*cap.* 10) : « In adolescentia constitutus, si urgente aut metu mortis, aut captivitatis periculo, pœnitentiam egit, et postea timens lapsum incontinentiæ juvenilis copulam uxoris elegit, ne crimen fornicationis incurreret, rem videtur fecisse venialem, si præter conjugem nullam omnino cognoverit ; in quo tamen non regulam constituimus, se quid sit tolerabilius æstimamus. Nam secundum veram cognitionem, nihil magis ei congruit qui pœnitentiam gessit, quam castitas perseverans et mentis et corporis. » Et in epistola ad Theodorum Foro-Juliensem episcopum (*epis.* 59) : « Ut in tempore necessitatis et in periculi urgentis instantia, nullis præsidium pœnitentiæ et mox reconciliationis implorantibus denegetur, etiam si amisso vocis officio ea per indicia integri sensus expostulent ; vel si sub præsentia sacerdotis significare non valent, testimonia fidelium

circumstantium eis prodesse debebunt, ut simul et A poenitentiae et reconciliationis beneficia consequantur, servata tamen regula canonum paternorum circa eorum personas, qui in Deum a fide discedendo peccaverunt. »

Sed et quidam de his ex quorum epistolis quaedam sunt a te collecta, lapsos et poenitentes in gradibus suis manere debere dixerunt. Postea autem aliter ex sacris canonibus a sequentibus est constitutum. Unde beatus Augustinus ad Bonifacium scripsit dicens (*epist.* 50) : « Ut enim constitueretur in Ecclesia, ne quisquam post alicujus criminis poenitentiam clericatum accipiat, vel ad clericatum redeat, vel in clericatu maneat, non desperatione indulgentiae, sed rigore factum est disciplinae. Alioquin contra claves datas Ecclesiae disputabitur, de quibus dictum est : Quae solveritis in terra, soluta erunt et in caelis. Sed ne forsitan etiam detectis criminibus spe honoris ecclesiastici animus intumescens superbe ageret poenitentiam, severissime placuit, ut post actam de crimine damnabili poenitentiam nemo sit clericus, ut desperatione temporalis altitudinis, medicina major et verior esset humilitatis. Nam et sanctus David de criminibus mortiferis egit poenitentiam, et tamen in honore suo perstitit (*II Reg.* XII). Et beatum Petrum, quando amarissime lacrymas fudit, utique Dominum negasse poenituit, et tamen apostolus mansit (*Matth.* XXVI). Sed non ideo supervacua putanda est posteriorum diligentia, quia ubi saluti nihil detrahebatur, humilitati aliquid addiderunt, quo salus tutius muniretur, experti credo aliquorum fictas poenitentias per affectatas honorum potentias. Cogunt enim multas invenire medicinas multorum experimenta morborum. Verum in hujusmodi causis, ubi per graves dissensionum scissuras, non hujus aut illius hominis est periculum, sed populorum strages jacent, detrahendum est aliquid severitati, ut majoribus malis sanandis charitas sincera subveniat. » Sic multitudinibus per schismata et haereses pereuntibus Ecclesia catholica subvenire consuevit. Et de hac discretione Gelasius in quadam sua epistola, et beatus Gregorius in suis epistolis, et in aliis suis dictis mirabiliter disseverunt.

Verum et de translationibus episcoporum aliter antiqui suserunt pontifices, aliter autem concilia episcopalia, et ex his sequentes Romanae sedis pontifices quae tenenda sunt decreverunt. Scriptum est etiam in praefatis epistolis, ut accusationes episcoporum non recipiantur, et in eisdem habetur qualiter recipiantur, et ut a suis ovibus episcopi accusari non valeant. Et in constitutionibus sancti Silvestri : « Ut nullus laicus crimen clerico audeat inferre, et ut presbyter non adversus episcopum, non diaconus adversus presbyterum ; » et iterum, a quantis accusari valeant ab eo constitutum. Et Africae provinciae, canones cum legatis apostolicae sedis, eos tantum accusatores vel vestes a clericorum accusatione, vel contra clericos testificatione, removeri praecipunt,

quos ad accusanda vel attestanda publica crimina leges publicae non admittunt. Et Nicenum concilium neophytum episcopum a duobus vel tribus testibus redargutum abstinere a clero praecipit, si aliquod delictum animae circa personam reperitur hujusmodi. Et Apostolus adversus presbyterum accusationem non recipi, nisi sub duobus aut tribus testibus praecipit. Sed et per praedictos Africae provinciae canones, omnibus quibus accusatio denegatur, in causis propriis accusandi licentia non negatur (*can.* 96). Et de purgatione acesuatorum, sed non convictorum, vel confitentium, decreta sedis apostolicae quae tenemus constituerunt. Quidam etiam, quod de accusatis et de testibus Silvester constituit, velut in libro Episcopali legitur, ex hoc tenendum in auctoritate dicunt, quia Gelasius in Catalogo de libris recipiendis, Actus illius legendos dicit. Sed alia est scriptura Actuum illius, in quibus, et Scripturarum auctoritate, et miraculorum virtute, Judaeos Christum Jesum Deum verum negantes revocavit, qui legendi scribuntur : alia de constitutionibus illius in libro Episcopali, quas sicut et alias quasdam constitutiones aliorum pontificum quae in eodem libro leguntur, a praecedentibus temporibus universalis non servat Ecclesia : quaedam vero ex eisdem constitutionibus, sicut et ex dictis epistolarum de quibus agitur, recipit et custodit. Sed et in eisdem epistolis scriptum est, non debere vel posse convocari, synodum sine jussione vel consensu Romani pontificis ; et sacri Niceni canones dicunt (*can.* 5) : « Bene placuit annis singulis per unamquamque provinciam bis in anno concilia celebrari, ut communiter omnibus simul episcopis congregatis provinciae, discutiantur hujusmodi quaestiones. » Et Chalcedonense concilium (*can.* 19) : « Decrevit, inquit, sancta synodus secundum canones Patrum, bis in anno episcopos in idipsum in unaquaque provincia convenire, quo metropolitanus antistes probaverit, et corrigere singula, si quae fortassis emergerint. » Sed et Antiocheni et Africae provinciae canones his concinunt constitutis (*conc. Antioch.*, *can.* 20 ; *conc. Afric.*, *can.* 62). Et Innocentius ad Victricium : « Si quae causae vel contentiones inter clericos tam superioris ordinis quam etiam inferioris fuerint exorte, ut secundum synodum Nicenam, congregatis ejusdem provinciae episcopis, jurgium terminetur, patenter ostendit. » Et Leo ad Anastasium scripsit : « De conciliis, inquit, episcopalibus non aliud indicimus, quam sancti Patres salubriter ordinarunt, qui scilicet bini conventus per annos singulos habeantur, in quibus de omnibus querelis quae inter diversos Ecclesiae ordines nasci assolent judicetur. » Et sanctus Gregorius ad Gallicanos episcopos scribit (*lib.* VII, *ind.* 2, *ep.* 412, in fine) : « Nec nos, inquit, in hac sollicitudinis parte relinquimus, quod de habendis per parochias conciliis Patrum providentia utilitatis causa sancitum est. Unde ne qua inter fratres dissensio, ne qua inter praepositos et subjectos sint fomenta discordiae, in unum sacerdotes convenire necesse est, ut de inciden-

tibus causis disceptatio, et sit salubris de ecclesiastica observatione collatio. »

Non igitur absque sedis apostolicæ auctoritate metropolitani episcopi et primates provinciarum synodos convocamus, « quatenus, ut beatus dicit Gregorius, dum per hoc, et præterita corriguntur, et regulam futura suscipiunt, omnipotens ubique Dominus fratrum concordia collaudetur, cujus nobis adesse præsentiam si hæc observamus scimus, quia scriptum est : *Ubi duo vel tres congregati fuerint in nomine meo, ibi sum in medio eorum* (Matth. XVIII). Si ergo adesse dignabitur ubi duo vel tres fuerint, quanto magis non deerit ubi plurimi convenierint sacerdotes? » Constat ergo de generali fidei causa hoc dixisse apostolicam sedem. Unde cum plura catholica habeantur concilia, sex synodi tantum generales specialiter appellantur, quia pro generali ad omnes Christianos causa pertinente sunt convocata, quæ sine speciali jussione sedis apostolicæ regulariter congregari non poterant, neque possunt. Quarum synodorum universalium, a catholica Ecclesia receptissimarum, prima est quæ in Nicæna congregata exstitit contra Arium trecentorum decem et octo Patrum, temporibus Silvestri papæ, sub Constantino principe; secunda in Constantinopoli centum unius Patrum, contra Macedonium et Eudoxium, temporibus Damasi papæ, et Gratiani principis, quando Nectarius eidem urbi est ordinatus episcopus; tertia in Epheso ducentorum Patrum, contra Nestorium Augustæ urbis episcopum, sub Theodosio magno principe, et papa Coelestino; quarta Chalcedone, Patrum sexcentorum triginta, sub Leone papa, temporibus Marciani principis, contra Eutychem nefandissimum præsulem monachorum; quinta item in Constantinopoli temporibus Vigilii papæ, sub Justiniano principe, contra Theodorum et omnes hæreticos; sexta item in Constantinopoli sub Agathone papa, qui ex rogatu Constantini, Heraclii et Tiberii principum piissimorum, misit in regiam urbem legatos suos, in quibus erat Joannes Romanæ Ecclesiæ tunc diaconus, non longe post episcopus, pro adunatione facienda sanctarum Dei Ecclesiarum: qui benignissime suscepti a reverentissimo fidei catholicæ defensore Constantino, jussi sunt, remissis disputationibus, pacifico colloquio de vide vera perquirere, datis eis de bibliotheca Constantinopolitana cunctis antiquorum Patrum quos petabant libellis. Adfuerunt autem et episcopi centum quinquaginta, præsidebat Georgio patriarcha regis urbis, et Antiochiæ Macario, et convicti sunt qui unam voluntatem et operationem astruebant in Christo, falsasse Patrum catholicorum dicta per plurima. Finito autem conflictu, Georgius correctus, Macarius vero cum suis sequacibus, simul et præcessoribus Cyro, Sergio, Honorio, Pyrrho, Paulo, et Petro anathematizati, et in locum ejus Theophanius abba de Cilicia Antiochiæ episcopus factus. Tantaque gratia legatos catholicæ pacis comitata est, ut Joanes Portuensis episcopus, qui erat unus ex ipsis, Dominica octavarum Paschæ missas

A publicas in ecclesia sanctæ Sophiæ coram principe et patriarcha Latine celebraret. Septima autem apud Græcos vocata universalis pseudosynodus de imaginibus, quas quidam confringendas, quidam autem adorandas dicebant, neutra vero pars intellectu sano diffiniens, sine auctoritate apostolicæ sedis, non longe ante nostra tempora, Constantinopoli est a quampluribus episcopis habita, et Romam missa, quam etiam papa Romanus in Franciam direxit. Unde tempore Caroli magni imperatoris, jussione apostolicæ sedis, generalis est synodus in Francia, convocante præfato imperatore, celebrata, et secundum Scripturarum tramitem traditionemque majorum, ipsa Græcorum pseudosynodus destructa et penitus abdicata. De cujus destructione non modicum volumen, quod in palatio adolescentulus legi, ab eodem imperatore Romam est per quosdam episcopos missum. In cujus voluminis quarto libro (*cap. 28*) hæc de universali nomine scripta sunt: « Universitas ab uno cognominatur, quod uno multoties verso propagatur. Nam multitudo unitatum vertente in unum collecta, universitas efficitur. Sicut enim Ecclesia universalis est, quæ Græco eloquio catholica dicitur, ita nimirum omne quidquid ab ejus unitate non discessit, catholicum nuncupari potest. Omnis enim doctrina Christiana, vel quælibet constitutio sive traditio talis esse debet, ut universali conveniat Ecclesiæ: quod nequaquam hæretici observaverunt, qui per diversas mundi partes, aliquibus regionum partibus coactati, conventicula quædam statuerunt, quibus et se et quamplures ab ecclesiasticæ unitatis consortio segregaverunt. Cum ergo duarum et trium provinciarum præsules in unum conveniunt, si antiquorum canonum institutione muniti aliquid prædicationis aut dogmatis instituunt, quod tamen ab antiquorum Patrum dogmatibus non discrepat, catholicum est quod faciunt, et fortasse dici potest universale: quoniam quamvis non sit ab universi orbis præsulibus actum, tamen ab universorum fide et traditione non discrepat, quod crebro factum in plebisque mundi partibus quibusdam necessitatibus incumbentibus scimus. Multa enim concilia gesta sunt, quorum institutionibus sancta munitur et corroboratur Ecclesia. Si vero duarum aut trium provinciarum præsules in unum convenientes, nova quædam statuere cupientes, conventicula quædam faciunt, quæ non cum universi orbis Ecclesia sentiunt, sed ab ea quadam ex parte dissentiant, non est catholicum quod faciunt, et ideo universale nuncupari non potest. Omne quod ecclesiasticum est, catholicum est, et omne quod catholicum est, universale est: omne autem quod universale est, profanis vocum novitatibus caret, omne igitur quod ecclesiasticum est, profanis vocum novitatibus caret. Et si hæc synodus vocum novitatibus careret, antiquorum Patrum dogmatibus contenta, universalis dici poterat: non autem antiquorum Patrum dogmatibus contenta est, non igitur universalis dici potest. Universalem plane eandem synodum non cunctaremur profiteri

nisi eam universalis Ecclesiæ dogmatibus sentiremus A
refragari. »

Claret etiam hac de causa, ut prædixit, universales ac generales synodos nominari, cum plures episcopi, quam in quibusdam præfatis synodis fuerint congregati, apostolicæ sedis jussione, et imperiali convocatione : sicut Sardicensis synodus, in qua ab Hesperiiis partibus plusquam trecenti convenerunt episcopi. Et in Africanis synodis, cum legatis apostolicæ sedis celebratis, interdum amplius quam ducenti fuerint congregati episcopi ; non tamen inter illa universalia concilia computantur, cum constet esse catholica et a sede apostolica atque universali Ecclesia receptissima. Unde sanctus Gregorius in synodica epistola ad Cyriacum Constantinopolitanum episcopum de Eudoxio (*lib. vi, ind. 15, ep. 4, in fine*) : « Si quis eum veraciter de catholicis Patribus damnat, ejus procul dubio sententiam sequimur ; vos tamen si in synodica vestra epistola eos quoque nominatim damnare voluistis, qui extra sanctas synodos per Patrum scripta damnantur, multos scriptis vestris vestra fraternitas minus posuit ; si autem eos quos generales synodi respuunt, hunc unum amplius. » Et in Africano concilio legimus (*can. 62*) : « Concilium universale non nisi necessitate faciendum. Placuit ut non sit ultra fatigandis fratribus anniversaria necessitas ; et quoties exegerit causa communis, id est totius Africæ, undecunque ad hanc sedem de hac re datæ litteræ fuerint, congregandam esse synodum in eas provincias ubi opportunitas persuaserit. Causæ autem quæ communes non sunt in suis provinciis judicentur. » Et Leo papa ad Maximum Antiochenum scripsit : « Quidquid, inquit, propter speciales causas synodalium conciliorum ad examen episcopales defertur, potest aliquam dijudicandi habere rationem, si nil de eo est a sanctis Patribus apud Nicæam diffinitum. Nam quod ab illorum regulis et constitutione discordat, apostolicæ sedis nunquam poterit obtinere consensum. » Et Antiochena synodus dicit (*can. 16*) « perfectum illud esse concilium, ubi interfuerit metropolitanus antistes. » Et Zosimus papa Aurelio et universis episcopis per Africam constitutis, sed et universis episcopis per Gallias et septem provincias constitutis, et universis episcopis per Hispaniam constitutis, a pari ter cætera scribens, provinciale Gallicanorum episcoporum synodum approbat ita dicens : « Lazarus, inquit, dudum in Taurinensi concilio gravissimorum episcoporum sententiis pro calumniam damnatus, cum Briccii innocenti episcopi vitam illis objectionibus appetisset, post vero indebita proculo, qui inter cæteros in synodo damnationi assenserat, sacerdotium consecutus est, a quo ipse, vitæ suæ conscius, datis litteris in abdicationem sui sponte submovit. » Sed et Sardicensis concilii in capitulo decimo quarto, quanquam non designato nomine, sed posita constitutione Eliberitani concilii (*can. 21*), quod eodem tempore, sub Constantino imperatore, Paulino et Juliano consuli-

bus, quo et Nicænum concilium factum est, memorante Osio, ad auctoritatem devocaverunt. Et Carthaginensis synodi decretam constitutionem quasi propriam, apostolica sedes per Innocentium et Cælestinum amplectitur.

Sic igitur universales synodi specialiter apostolicæ sedis auctoritate convocantur, et æque provinciales canonicæ synodi, decreto sedis apostolicæ, a metropolitanis et provinciarum primatibus convocantur. Sicut de collatis clavibus regni cælorum, id est ligandi et solvendi, pontificio, specialiter sancto Petro dato et simul omnibus apostolis, et in eis catholicis episcopis collato, sancta et universalis tenet Ecclesia. Unde beatus Leo in sermone sui natalis inter cætera dicit : « Quod dicitur beatissimo Petro : *Tibi dabo claves regni cælorum, et quæcunque ligaveris super terram, erunt ligata et in cælis ; et quæcunque solveris super terram, erunt soluta et in cælis* (*Matth. xvi*), transivit quidem etiam in alios apostolos ejus istius potestatis, et ad omnes Ecclesiæ principes decreti hujus constitutio commevit, sed non frustra uni commendatur quod omnibus intimetur. Petro enim ideo hoc singulariter creditur, quia cunctis Ecclesiæ rectoribus Petri forma proponitur. Manet ergo Petri privilegium, ubicunque ex ipsius fertur æquitate judicium ; nec nimia est vel severitas vel remissio, ubi nihil est ligatum, nihil solutum, nisi quod beatus Petrus aut ligarit, aut solverit. » Qui regem cælorum, ut Augustinus et cæteri doctores exponunt, majori præ cæteris devotione confusus est, merito præ cæteris ipse collatis clavibus regni cælestis munere donatus est, ut constaret omnibus quia absque ea confessione ac fide regnum cælorum nullus possit intrare. Clavēs autem regni cælorum ipsam discernendi scientiam potentiamque nominat, qua dignos recipere in regnum, indignos secludere deberet a regno ; unde manifeste subjungit : *Et quodcunque ligaveris super terram, erit ligatum et in cælis ; et quodcunque solveris super terram erit solutum et in cælis*. Quæ solvendi ac ligandi potestas, quamvis soli Petro data videatur a Domino, absque ulla tamen dubietate noscendum est quia et cæteris apostolis datur, ipso teste qui post passionis resurrectionisque suæ triumphum apparens eis insufflavit, et dixit omnibus : *Accipite Spiritum sanctum ; quorum remiseritis peccata, remittentur eis, et quorum retinueritis, retenta sunt* (*Joan. xx*). Nec non etiam nunc in episcopis ac presbyteris omni Ecclesiæ officium idem committitur ; ut videlicet agnitis peccantium causis, quoscunque humiles ac vere penitentes aspexerit, hos jam a timore perpetuæ mortis miserans absolvat ; quos vero in peccatis quæ egerunt persistere cognoverit, illos perennibus supplicii obligandos insinuet. Unde alias Dominus de correpto semel et iterum ac tertio, sed non penitente fratre præcipit dicens : *Si autem Ecclesiam non audierit, sit tibi sicut ethnicus et publicanus* (*Matth. xviii*). Et ne leve quisque putaret Ecclesiæ se judicio condemnari, mox terribiliter adjunxit :

Amen dico vobis : quæcunque alligaveritis super terram, erunt ligata et in cælo ; et quæcunque solveritis super terram, erunt soluta et in cælo. Omni igitur electorum Ecclesiæ, juxta modum culpæ vel pœnitentiæ, ligandi ac solvendi datur auctoritas. Sed ideo beatus Petrus, qui Christum vera fide confessus vero est amore secutus, specialiter claves regni cælorum et principatum judiciariæ potestatis accepit, ut omnes per orbem credentes intelligant quia quicunque ab unitate fidei vel societatis illius quolibet modo semetipsos segregant, tales nec vinculis peccatorum absolvi, nec januam possint regni cœlestis ingredi.

Et quia devitans prolixitatem epistolæ, per singula sicut poteram, si tempus fuisset et otium, et non vererem legentium tædium, tibi ostendere de his quæ collegisti, illa ipsa te redarguere, quæ putas plurimum tecum facere, de quibusdam tibi tantum ex his quæ collegisti, specialiter respondebo, scilicet de epistolis Julii et Felicis, quasi de capitulis synodi Nicænæ confectis, ante Sardicense quidem concilium, cui Athanasius anno decimo octavo, ordinationis suæ cum litteris Constantis ab Occidentalibus partibus, in quibus exsulaverat, Alexandriam rediens legitur interfuisse, quodque juxta chronicorum et litterarum ecclesiasticarum fidem, undecimo mortis Constantini, patris Augustorum Constantii et Constantis, Rufo et Eusebio consulibus, anno decimo sexto Julii papæ, qui successit Marco successori Silvestri, cujus tempore celebrata est sacra Nicæna synodus, cuique ad vicem Silvestri præ sederunt Osius Cordubensis episcopus, Victor et Vincentius presbyteri urbis Romæ. Anno vero circiter vicesimo tertio post Nicænam synodum Antiochena synodus habita est, et eadem epistola Julii per idem tempus facta esse dignoscitur, in qua plura capitula modo diverso collecta tenentur, quæ si de una synodo fuissent assumpta, non taliter dissonarent. Et si de appellatione, sicut in Sardicensi concilio constitutum est, in Nicæno concilio fuisset antea statutum, nulla foret necessitas ut iterum in hoc concilio inde constitueretur, sed sicut in aliis conciliis legitur scriberetur videlicet, ut ea quæ sunt in Nicæno concilio constituta, ab omnibus conserventur. Epistola vero Felicis ex epistola Julii pendet. Hic enim est mos apostolicæ sedis pontificibus ut verba decessorum suorum quasi propria in suis ponant epistolis, sicut qui legit intelligit. Cæterum quod in epistola ex nomine Athanasii et episcoporum Ægyptiorum, ad Marcum successorem Silvestri habetur octoginta fuisse capitula : quadraginta scilicet a Græcis Græca edita lingua, et similiter quadraginta a Latinis Latina edita lingua ; et ab episcopis trecentis octodecim in septuaginta redacta fuisse capitula, si numerantur illa quæ in epistola Julii designata præmittuntur ; sed et quæ in epistola Felicis leguntur, plura quam septuaginta et inter se diversa inveniuntur ; et in eisdem epistolis non inveniuntur memorari, minime autem connumerari, illa capitula

quæ ex Nicæno concilio sumpta servavit antiquitas et hactenus tenet ac veneratur Ecclesia. De hoc autem quod reverentissimus Julius in epistola sua dicit : « Plura de his, scilicet capitulis Nicænæ synodi, ideo hic non inserimus, ne vacuare vilemve facere prædictam synodum videremur, aut fastidium legentibus audientibusque prolixa facere epistola : si quis autem de his ampliora atque abundantiora scire voluerit, in sacro nostræ sedis Ecclesiæ scrinio et ea quæ prædiximus invenire poterit, verum me dicere testis est ipsa Divinitas, a nullo est contradicendum : quia nisi ipsa quæ misit haberet, mittere nullo modo poterat, et quia plura habebat, esse utique verum constat : quia et illa quæ sacrum concilium Nicænum constituit, certum est in Romano scrinio conservari, de quibus et ipsius sanctæ sedis pontifices sua decreta promulgaverunt, et suis posteris tenenda et servanda reliquerunt. Fuit autem opinio apud majores nostros etiam non incerta, quia Osius quædam de capitulis a se synodi Nicænæ delatis, aliter prius renuntiaverit, quam postea inventum exstiterit ; qui et apud Sirmium, contra fidem Nicæni concilii cui subscripserat, sacrilegam professionem atque subscriptionem proferre et exhibere præsumpsit, sicut de eo historiæ ecclesiasticæ perhibent, et sanctus Hilarius in libro de Synodis dicit : Apud Sirmium, inquit, per immemorem gestorum suorum dictorumque Osium, novæ et tamen suppuratæ jamdiu impietatis doctrina proruperat : sed de eo nil loquor, qui idcirco est reservatus, ne judicio humano ignoraretur qualis ante vixisset. » Cujus scilicet beati Hilarii testimonio de Synodis, sed et de Osio, fidem accomodare debemus, qui in præfato libro de Synodis dicit : « Regeneratus pridem, et in episcopatu aliquantisper manens, fidem Nicænam nunquam nisi exsulaturus audivi. Sed mihi *homousii* et *homæousii* intelligentiam Evangelia et apostoli intimaverunt. Et per illa tempora, quando concilia, scilicet Nicænum, Antiochenum, Sardicense, et alia quædam posteriora celebrata fuerunt, idem sanctus et doctor catholicus in carne deguit, et verus de eis relator exstitit, et credenda nobis in suis scriptis reliquit. Refutanda est igitur falsa opinio de quorundam scriptis exorta, quod Nicænum concilium tempore Julii fuerit celebratum. cum constet eandem sacram synodum fuisse habitam anno post Alexandrum sexcentesimo tricesimo sexto, sub Constantino imperatore, die mensis secundum Græcos Desii xviii, quod est x Kalendarum Juliarum, consulatu Paulini et Juliani, tempore Silvestri papæ, sicut veridicæ chronicæ et ecclesiasticæ historiæ produnt. Verum Julius successor Marci, qui Silvestro successit. Romæ synodum celebravit sub Constantio et Constante Augustis, anno quarto sub die octava Kalendarum Octobris, indiet, sexta, consulatu Feliciani et Maximiani, et eandem Nicænam synodum apostolicæ sedis auctoritate per se, sicut prædecessor illius, Silvester per legatos suos firmavit. Capitula quoque in eodem concilio consti-

tuta ipse omnibus validior antiquitatis usus, et antiqua majorum traditio, reverentissimo vigore tenenda corroboravit.

CAPUT XXI.

Quod non nisi viginti capitula in concilio Nicæno fuerint constituta.

Et qua ratione quædam ex his que in epistolis antiquorum sedis Romanæ pontificum scripta inveniuntur, a successoribus eorum usa non fuerint, licet ad instructionem valeant plurimum, quædam vero in decretis eorum posita, et a conciliis inter canones sacros inveniuntur assumpta, et unde opio exorta exstiterit, plura quam in canone inveniuntur in Nicæna synodo decreta fuisse capitula, quod ex litteris antiquitatum seriem deferentibus recepimus, tibi ex parte scribo, non veritus ne mihi calumnias struas, sicut jam fecisti de his que scripsi de Stephano, sensum dictorum meorum pervertens, et scripta mea decurtans in scripto quod mihi de Amalberto dedisti, volens me ex verbis meis revincere, et me ad tortitudinem tui iudicii contorqueere, et si easdem calumnias sciero, necesse mihi sit inde rescribere, et tempus inutilitati expendere; mihi autem eas nesciero, ad derogationem mei tibi prederentes aliquo modo possis adducere. Dicam autem ex verbis veterum que didicimus de capitulis Nicænae synodi, ut si te delectat bellare, cum eis possis bellum conserere, et ego valeam repausare. Historia mihi quidem tripertita (*lib. II, c. 7*) Athanasium dixisse scribit ita: « In Nicænum concilium venientes episcopi viginti conscripserunt de conversatione ecclesiastica sanctiones. » Et item: « Meminit vestra patientia factum in Nicæa civitate concilium, cui et ego ipse conscientiam meam cultum decenter exhibui. » Et item in eadem Historia scriptum est: « Synodus corrigere volens hominum vitam et in Ecclesia commorantium, posuit leges quas canones appellamus. » Et decimus historiae ecclesiasticæ liber Rufini, qui in catalogo apostolicæ sedis inter recipiendos libros describitur, aperte ostendit, post confessionem fidei, viginti duo tantum capitula canonum in eodem concilio, et de Paschali solemnitate fuisse decreta. Quo autem, quæ super viginti sunt illic constituta, et viginti aliis capitulis apud nos habentur conclusa. Unde et in eodem libro ita scriptum habetur: « De singulis quibusque ecclesiasticis observationibus certa statuta figentibus, concilium diremptum est; » et post capitula ex ordine et numero constituta: « dicitur cum de his, inquit, prout divinarum legum reverentia poposcerat decrevisset, sed et de observatione Paschæ antiquum canonem, per quem nulla e reliquo varietas oriretur, ecclesiis tradidissent, omnibus rite dispositis, ecclesiarum pax et fides in orientis atque Occidentis partibus una atque eadem servabatur. Cujus historiographi dictis (salva auctoritate apostolicæ sedis, quæ suo principatu Domini precepto, et Ecclesiæ profutura constituit, et constituta conservando confirmat) et Carthaginense stipulatur concilium, quod dicit: « Exemplaria

A fidei et statuta Nicænae synodi, quæ ad nostrum concilium per beatæ recordationis Cæcilianum Carthaginensem episcopum, qui interfuit, allata sunt, sed et quæ patres exemplaria sequentes hic constituerunt, vel nunc communi tractu statuimus, his gestis ecclesiasticis inserta manebunt. » Nam quia Cæcilianus Nicænae synodo interfuerit, et subscriptio illius testatur, et historiae ac chronicae ecclesiasticæ astruunt, in quibus scriptum est: « Quia tertio anno post Nicænam synodum, Junio et Justo consulibus, Donatus agnoscitur, a quo per Africam Donatistæ, qui primum propter ordinatum contra voluntatem suam Cæcilianum ecclesiæ Carthaginensis episcopum, schisma fecerunt, objicientes ei crimina non probata, et maxime quod a traditoribus divinarum Scripturarum fuerit ordinatus: sed post causam confictam atque finitam, pertinaci discordia in hæresim transierunt. » Sed et epistola Cyrilli Alexandrini episcopi, cujus prædecessor Alexander, cum legatis apostolicæ sedis, Osio videlicet Cordubense episcopo, et Vincentio ac Victore Romanis presbyteris, mediante Constantino imperatore præsedisset, cum integritate ipsius concilii, per Innocentium presbyterum missa. Itemque epistola Attici Constantinopolitani episcopi, cum integritate nihilominus ipsius concilii per Marcellum subdiaconum Carthaginensi synodo directa, et verba Faustini episcopi ac legati sedis apostolicæ prolata in synodo Carthaginensi Epistola quoque ipsius concilii ad Cælestinum papam honorabiliter, ut par est, destinata. Sed et actio duodecima Chalcedonensis concilii, in qua scriptum habetur regula nonagesima quinta, de vacante episcopo; et paulo post Leontius ex eodem codice legit regulam nonagesimam sextam. De his qui ad episcopatum vocati evitant. Quas regulas, connumeratis a capite viginti capitulis Nicæni concilii, si quis per singula consequentia concilia ex ordine numeraverit, in Antiocheno concilio loca præfatorum numerorum tenere inveniet. Unde manifestum est, non nisi tantum viginti quæ habemus capitula fuisse in Nicæno concilio constituta. Verum et longissimarum ætatum ex antiqua consuetudine prolata tempora, per quæ ipsius concilii hæc tantum viginti capitula fuere suscepta, verbis præfati historiographi indubitabilem faciunt fidem.

CAPUT XXII.

De quatuor capitulis a beato Gregorio in epistola ad Theoctistam Patriciam memoratis.

Sed et quod de anathemate, ex verbis sancti Gregorii ad Theoctistam Patriciam, in suprascripta compilatione tua improprie posuisti, bene et rationaliter dicta male intelligi tradidisti, et non secundum illum sensum, quem beatus Gregorius illud in eadem epistola posuit, interpretari studuisti. Apud Græcos siquidem novitate vocum delectantes, quator hæretica capitula invenerunt, de quibus sanctus Gregorius ad Theoctistam Patriciam scripsit. Quorum primum est, quia sub obtentu religionis etiam non

ex amborum consensu conjugia dissocianda dicebant, A
 contradicente Domino : *Quod Deus conjunxit homo
 non separet* (Matth. xix). Aliud vero, quod baptisma
 peccata penitus non auferret, cum Dominus dicat :
*Qui lotus est, non indiget nisi ut pedes lavet, sed est
 mundus totus* (Joan. xiii). Tertium vero, quia si de in-
 quitatibus suis quis pœnitentiam in triennium ageret,
 postmodum perverse vivere ei liceret, cum scriptum
 sit : *Qui baptizatur a mortuo, et iterum tangit eum,
 quid proficit lavatio ejus ?* (Eccli. xxxiv). Baptizatur
 ergo a mortuo, et iterum tangit eum qui prava opera
 quæ se egisse meminit deplorat, sed eisdem se iterum
 post lacrymas implicat. Quartum vero est, quod non
 suo sensu posuisti, quia si compulsi aliqui, de quibus
 reprehendebantur contra catholicam sensisse Eccle-
 siam, anathematizare se dicerent, anathematis vin-
 culo nullo modo teneri. De quibus sanctus dicit
 Gregorius : « Quia ipsi sibi testes sunt quia Chri-
 stiani non sunt : quoniam ligamenta sanctæ Ecclesie
 vanis se æstimant conatibus solvere ac per hoc nec
 absolutionem sanctæ Ecclesie quam præstat fidelibus
 veram putant, si ligaturam ejus valere non æstimant. »
 Unde in orthodoxorum scriptis legimus, ex ipsis qui
 in Nicæna sancta synodo convenerunt, et expositæ
 ab ea fidei diffinitioni vel symbolo subscriperunt,
 et ab eadem subscriptione apostataverunt, et iterum
 per catholicam subscriptionem ad universalem
 Ecclesiam redierunt, quosdam fuisse susceptos,
 sicut et in aliis synodis, et, in epistolis Leonis, at-
 que Gregorii legimus. Constat igitur, quia non sunt
 tigmata vel solutiones sanctæ Ecclesie, quæ contra
 sanctam Ecclesiam fiunt, vel quæ ab his fiunt, C
 qui contra dogmata catholicæ Ecclesie sentientes.
 contraria ipsi sanctæ Ecclesie ligant vel solvunt.
 Sancta quippe Ecclesia dicit : « Non sedi cum con-
 cilio vanitatis, et cum iniqua gerentibus non introibo.
 Odivi ecclesiam malignantium, et cum impiis non
 sededo. *Lavabo inter innocentes manus meas* (Psal.
 xxv, 6). » Denique eisdem verbis beati Gregorii :
 quibus dicit : « Si qui vero sunt qui dicunt, quia
 compulsus quispiam necessitate se anathematizave-
 rit, anathematis vinculo non tenetur, » verbis tuis
 imposuisti, immitens et superadjiciens, et contra
 ea quæ sub anathemate prohibita sunt præsumpse-
 rit. In eo autem loco ubi dixit : « Si qui sunt igitur,
 qui sub nomine Christiano, hæc quæ prædiximus
 errorum capitula, aut prædicare audent, aut taciti D
 apud semetipsos tenere, » detruncasti et pervertisti
 dicens : « Si qui sunt igitur, qui sub nomine Chri-
 stiano hæc aut prædicare audent, non timens sen-
 tentiam sanctæ sextæ synodi in duodecima actione
 prolatam hoc modo : Inveteratum Macarium in im-
 pietatis dogmatibus, et non solum universam Chri-
 sto amabilem plebem, quæ hanc a Deo conservandam
 regiam urbem inhabitat, eversione turbulenta
 potantem, testimoniaque sanctorum et probabilium
 patrum falsantem, et quædam quidem abscedentem,
 quædam vero addentem, et secundum quod ei videba-
 tur in devia mittentem piissimum et a Deo corona-

tum principem per oblata ab eo codicia : sed et a
 solis ortu usque ad occasum, per litteras suas, et
 per homines quos mittebat, universos perturbantem,
 et a fide vera segregantem, et juste atque rationabi-
 liter a pontificali habitu denudatum, nullatenus di-
 vina regula de cætero suscipit in doctoris sede
 residere, ne ex hoc propriæ suæ hæreseos multo
 jam recrudescere faciat intelligentiam, et fiant, juxta
 quod scriptum est, novissima illius hominis deteriora
 prioribus. » Et Macedonius Constantinopolitanus
 episcopus, ut supra dixi, ab imperatore Anastasio
 legitur expulsus, quoniam Evangelia falsasset, et
 maxime illud Apostoli dictum : *Quod apparuit in
 carne, justificatum est in spiritu* (I Tim. iii); et per-
 vertisse, ut legeretur, *ut esset Deus, apparuit per
 carnem*. Quales redarguit Paulus apostolus, de se et
 suis sociis dicens : *Non enim sumus, inquit, sicut
 plurimi adulterantes verbum Dei* (II Cor. ii). « Adul-
 terare est, inquit beatus Gregorius, verbum Dei, aut
 aliter sentire quam de illo est, aut ex eo non spiri-
 tales fructus, sed adulterinos fetus quærere laudis
 humanæ. » Unde Gelasius ad episcopos per Darda-
 niam constitutos, in decretis suis scripsit (epist. 11,
 in principio) : « Quia majores nostri necessario præ-
 caverunt, ut contra unamquamque hæresim, quod
 acta semel synodus pro fide, communionem, et veri-
 tate catholica atque apostolica promulgasset, non
 sinerent novis post hæc retractationibus mutari, ne
 pravis occasio præberetur quæ medicinaliter fue-
 rant statuta pulsandi : sed auctore cujuslibet insa-
 niæ, ac pariter errore damnato, sufficere judicarunt,
 ut quisquis aliquando hujus erroris communicator
 existeret, principali sententia damnationis ejus esset
 obstrictus, quoniam manifeste quilibet vel profes-
 sione sua vel communionem posset agnoscere. » Et post
 aliquanta : « Quoniam idem ipse error, qui semel
 est cum suo auctore damnatus, in particeps quolibet
 prævæ communionis effecto execrationem sui gestat
 et pœnam. » Hæc igitur, qui beati Gregorii verba
 imposturasti, attendens quæ beatus dicit Gelasius,
 et ante oculos mentis ponens, quia Macarius et Ma-
 cedonius idcirco a sacerdotio, etiam ante humanos
 oculos, judicio synodali et potestate principali fue-
 runt dejecti accelera satisfacere terribili in consi-
 liis super filios hominum.

CAPUT XXIII.

Quod apostolica sedes partem noni capituli Chalcedonensis non recipiat, sicut beatus Leo papa demonstrat.

Sententiam denique Chalcedonensis concilii, quam
 tuæ compilationi apposuisti, a quocunque expositam
 qui advenit de ea quid diceret : Ut si clericus habet
 causam adversus episcopum proprium, vel adversus
 alterum, apud synodum provincie judicetur :
 quod si adversus ejusdem provincie metropolitanum
 episcopus vel clericus habet querelam, petat primatem
 dioceseos, aut sedem regie urbis Constantino-

politanae, et apud ipsum iudicetur, quod et in capitulo decimo septimo recapitulavit. Lege gesta synodi Chalcedonensis, et Breviarium de duabus haeresibus Nestorianorum et Eutychianorum, collectum a sancto Liberato archidiacono Ecclesiae Carthaginis regionis sextae, sed et epistolas sancti Leonis papae, et invenies hoc ipsius concilii nonum capitulum, in cuius fine dicitur: Petat primatem dioeceseos, aut sedem regiae urbis Constantinopolitanae, et apud ipsum iudicetur, et quod de divisione dioecesis inter Antiochenum et Hierosolymitanum episcopos convenit, ab apostolica sede non fuisse recepta. Sed nec illud capitulum Constantinopolitani concilii, in quo synodus ipsa constituit preferendam Constantinopolim secundae et tertiae sedi, et post Romanum pontificem habere primatum, quod et per pragmaticam formam imperialis potestatis obtinuit, et Chalcedonensis synodus, in absentia legatorum sedis apostolicae, confirmando quibusdam non consentientibus renovavit, et post, reclamantibus de sacrorum canonum, et privilegii apostolicae ac primae sedis injuria et praedictio eidem legatis ipsius apostolicae sedis, synodus in sententia sua patrocinante imperatore permansit. Egit enim Anatholius tunc Constantinopolitanus episcopus apud synodum (Leo, ep. 53 ad Anatol.), et apud imperatorem, nacta occasione de damnatione Diocori secundae sedis Alexandrinae episcopi, hac validitate, quoniam mens potentiae avida nec abstinere vetitis, nec gaudet concessis, ut quia in Constantinopolitana cl. episcoporum synodo Nectarius obtulerat quatenus Constantinopolis praelata secundae et tertiae sedis, post Romanum pontificem primatum haberet, istud capitulum aliis necessariis interpositum de appellatione episcoporum et clericorum ad eadem regiae urbis Constantinopolitanae foret: quatenus constitutionem Sardicensis concilii de appellatione clericorum apud finitimos episcopos, et appellationem episcoporum de regionali concilio ad sedem apostolicam, eidem apostolicae sedi abriperet, et sibi scribi faceret: quo, sicut mox claruit, primatum sedis apostolicae liberius contra sacros canones et aliquam consuetudinem usurparet, et universalis appellaretur et esset. Unde sanctus Leo, de his apud synodalem conventum obtentis ad Maximum Antiochenum episcopum scribens dicit (epist. 65): « Nunc utem ad omnia generaliter pronuntiare sufficiat, quod si quid a quoquam contra statuta Nicænorum canonum in quacunque synodo vel tentatum est, vel id tempus videtur extortum, nihil praedicti potest violabilibus inferre decretis, et facilius erit quamlibet consensionum pacta dissolvi, quam praedictorum canonum regulas ex ulla parte corrumpi. Ubripiendi enim occasiones non praetermittit ambicio, et quoties ob intercurrentes causas generalis congregatio facta fuerit sacerdotum, difficile est ut cupiditas improborum non aliquid supra mensuram soliat appetere. Sicut etiam de Ephesina synodo, quae impium Nestorium cum dogmate suo perculit

A Juvenalis episcopus ad obtinendum Palaestinae provinciae principatum credidit se posse sufficere, et insolentes ausus per commentitia scripta firmare, Quod sanctae memoriae Cyrillus Alexandrinus episcopus merito perhorrescens, scriptis suis mihi quid praedicti cupiditas ausa esset indicavit, et sollicita prece multum poposcit, ut nulla illicitis conatibus praeretur assensio. Nam cujus epistolae ad nos exemplaria direxisti sanctae memoriae Cyrilli, eam in nostro scrinio requisitam nos authenticam noveris reperisse. Hoc tamen proprium diffinitionis meae est, ut quantumlibet amplior numerus sacerdotum aliquid per quorundam subreptionem decernat, quod illis trecentorum decem et octo constitutionibus inveniatur adversum, id iustitiae consideratione cassetur: quoniam universae pacis tranquillitas non aliter poterit custodiri, nisi sua canonibus reverentia intemerata servetur. Si quid sane ab his fratribus, quos ad sanctam synodum vice mea misi, praeter id quod ad causam fidei pertinebat, gestum esse perhibetur, nullius erit penitus firmitatis: quia ad hoc tantum ab apostolica sunt sede directi, ut excisis haeresibus catholicae essent fidei defensores. Quidquid enim praeter speciales causas synodalium conciliorum ad examen episcopale defertur, potest aliquam dijudicandi habere rationem, si nihil de eo est a sanctis Patribus apud Nicæam diffinitum. Nam quod ab illorum regulis et constitutione discordat, apostolicae sedis nunquam poterit obtinere consensum. » Et ad Pulcheriam Augustam: « Frater, inquit (epist. 58), et coepiscopus meus Anatholius, parum considerans quantum, pietatis vestrae beneficio, et mei favoris assensu, Constantinopolitanae Ecclesiae sacerdotium fuerit consecutus, non tam de adeptis gravisus, quam de immodicis appetendis supra mensuram sui honoris accensus est, credens huic tam intemperanti cupiditati posse prodesse, quod ei quorundam consensum suum praebuisse dicitur extorta subscriptio; cum tamen destruendis mox conatibus contradictio fratrum coepiscoporumque meorum, vicem meam agentium, fideliter et laudabiliter obviaret; quoniam contra statuta canonum patrum, quae ante longissimae aetatis annos in urbe Nicæna spiritualibus sunt fundata decretis, nihil cuiquam audere conceditur: ita ut si quis diversum aliquid decernere velit, se potius minuatur, quam illa corrumpatur. Quae si ut oportet a cunctis pontificibus intemerata serventur, per universas Ecclesias tranquilla erit pax et firma concordia, nullae de mensura honorum dissensiones, nullae de ordinationibus lites, nullae de privilegiis ambiguitates, nulla erunt de alieni usurpatione certamina: sed aequo jure charitatis rationalis et morum officiorumque ordo servabitur, et ille vere erit magnus, qui fuerit totius ambitionis alienus, dicente Domino: Quicumque voluerit inter vos major fieri, sit vester minister. Et quicumque voluerit inter vos primus esse, erit vester servus, sicut filius hominis non venit ministrari, sed ministrare (Matth. xx). Et tamen haec illis tunc insinuabantur, qui de pusillo

volebant crescere, et de intimis ad summa transire. A Constantinopolitanæ vero præsul Ecclesiæ, quid amplius quam assecutus est concupiscit? aut quid illi satisfaciet, si tantæ urbis magnificentia et claritudo non sufficit? Superbum nimis est et immoderatum, ultra proprios terminos tendere, et antiquitate calcata, alienum jus velle præripere, atque ut unius crescat dignitas, tot metropolitanorum impugnare primatus, quietisque provinciis, et olim sanctæ synodi Nicænæ moderatione dispositis, bellum novæ perturbationis inferre, atque ut venerabilium Patrum decreta solvantur, quorundam episcoporum proferre consensum, cui tot annorum series negavit effectum. Nam sexagesimus fere annus hujus conhibentiæ esse jactatur, qua se prædictus episcopus æstimat adjuvari, frustra cupiens id sibi prodesse, quod etiam si quisquam ausus est velle, nullus tamen potuit obtinere. » De hoc siquidem, quia appellationem clericorum ex Sardicensi concilio ad finitimos episcopos, et appellationem episcoporum ad sedem apostolicam sibi voluit arrogare, et universalis et appellari et esse, et legati sedis apostolicæ in synodo reclamaverunt, isdem beatus Leo ad Martianum Augustum scribit dicens (*epist.* 57): « Apud Christianum, et vere religiosum, vereque orthodoxum principem loquor, multum Anatolius episcopus proprio detrahit merito, si illicito crescere optat augmento. Habeat sicut optamus Constantinopolitana civitas gloriam suam, et protegente Dei dextera, diuturno clementiæ vestræ fruatur imperio: alia tamen ratio est rerum sæcularium, alia divinarum: nec præter illam petram, quam Dominus in fundamento mire posuit, stabilis erit ulla constructio; propria perdit, qui indebita concupiscit. Satis sit prædicto, quod vestræ pietatis auxilio, et mei favoris assensu, episcopatum tantæ urbis obtinuit. Non dedignetur regiam civitatem, quam apostolicam facere non potest sedem, nec ullo modo speret, quod per aliorum offensiones possit augeri. Privilegia enim ecclesiarum, sanctorum Patrum canonibus instituta, et venerabilis Nicænæ synodi fixa decretis, nulla possunt improbitate convelli, nulla novitate violari. In quo opere auxiliante Christo fideliter exsequendo, necesse est me perseverantem exhibere famulatum: quoniam dispensatio mihi credita est, et ad meum tendet reatum, si paternarum regulæ sanctionum, quæ in synodo Nicæna ad totius Ecclesiæ regimen Spiritu Dei instruite, sunt conditæ, me, quod absit, conhibente violentur; et major sit apud me unius fratris voluntas, quam universæ domus Domini communis utilitas. Et ideo sciens gloriosam clementiam vestram ecclesiasticæ studere concordie, et his quæ pacificæ congruunt unitati piissimum præstare consensum, precor et sedula suggestionem vos obsecro, ut ausus improbos, unitati Christianæ paciue contrarios, ab omni pietatis vestræ abdicetis assensu, et fratris mei Anatolii nocituram ipsi, si perstiterit, cupiditatem salubriter comprimatis: ne ea quæ vestræ gloriæ atque temporibus inimica sunt cupiens,

major suis velit esse prioribus, liberumque illi sit, quantis potuerit splendere virtutibus, quarum non aliter particeps erit, nisi charitate magis voluerit ornari, quam ambitione distendi. Hanc autem improbi desiderii conceptionem nunquam quidem debuit intra cordis sui recipere secretum: sed cum illi fratres et coepiscopi mei qui vice mea aderant obviant, ab illicito appetitu ex eorum saltem contradictione cessasset. Nam et vestræ pietatis apices, et ipsius scripta declarant, legatos sedis apostolicæ, sicut oportuit, contradictione justissima restitisse, ut inexcusabilior esset præsumptio, quæ se nec increpata cohibuit. Unde quia convenit fidei vestræ vel gloriæ, ut sicut hæresis Deo per vos agente destructa est, ita etiam omnis ambitus retundatur, agite quod et Christianæ est prohibitatis et regiæ, ut prædictus episcopus parcat patribus, consulat paci neque sibi æstimet licuisse, quod Antiochenæ Ecclesiæ, sine ullo exemplo, contra statuta canonum, episcopum ordinare præsumpsit: quod nos amore reparandæ fidei, et pacis studio, retractare cessavimus. Abstineat ergo ab ecclesiasticarum injuria regularum, et illicitos declinet excessus, ne se ab universali Ecclesia, dum inimica paci tentat abscondat: quem opto magis irreprehensibiliter agentem diligere, quam in hac præsumptione, quæ illum ab omnibus separare poterit, perdurare. » Et quia videns Anatolius nullo modo se posse vel per se, vel per imperatorem, obtinere quod voluit, se inde recediderit, isdem sanctus Leo demonstrat, scribens ad eundem Anatolium (*epist.* LXXVII): « Si firmo, inquit, incommutabilique proposito dilectio tua curam gratiæ communis habuisset, nihil profecto quod ullam anxietatem tibi ingereret exstitisset. Non enim sinebat ratio, ut ejus charitatem spernerem, quem amore pacis, et studio reparandæ catholicæ fidei, inter ipsa episcopatus rudimenta juvissem, optans in ecclesiasticis curis talem habere consortem, ut mihi de sanctis præcursoribus tuis, nec Joannis spiritalem copiosamque doctrinam, nec auctoritatem Attici, nec industriam Procli, nec fidem beati Flaviani deesse sentirem, et ita studiis tuis uterer, si nullus auderet vel fidei catholicæ resultare, vel Nicænis venerabilium Patrum regulis contraire. Sed cum in injuriam canonum, ut agnosceis, illa tentata sint, quæ omnibus Ecclesiis scandalum maximum generarent, quid aptius ac modestius facerem, quam ut te primum, ut ab hac intentione discederes, fraterno animo missis litteris admonerem? ad quas cum non rescriberes, ipse te a colloqui mei consortio separasti. Denique inde jam tacui, sed elementissimo principi custodi fidei frequenti litterarum petitione suggesti, ut pro pace ecclesiarum, quam tibi maxime prodesse cognosceis, hæc quæ nunc a tua dilectione facta sunt implerentur. Cui ineffabiles gratias ago, quod secundum eruditionem Spiritus sancti, cujus est virtute plenissimus, sacerdotali dignatur studere concordie, sciens sibi orationes supplicantium copiosius profuturas, si famuli unius Domini in nullo sint a vere

pacis unitate divisi. » Et post aliquanta : Illam, inquit, culpam, quam de augenda potestate aliena ut asseris adhortatione contraxeras, efficacius atque sincerius tua charitas diluisset, si quod tentari sine tua voluntate non potuit, non ad sola clericorum consilia transtulisses : quia sicut in mala suasionem delinquitur, ita et in mala consensione peccatur. Sed gratum mihi, frater charissime, est, quod dilectio tua proficitur sibi displicere, quod tunc etiam placere non debuit. Sufficit in gratiæ communis regressum profectio dilectionis tuæ, et attestatio principis Christiani : nec videtur tarda correctio, cui tam venerabilis assertor accessit. Abjiciatur penitus inconcessi juris qui dissensionem fecerat appetitus. Sufficiant limites, quos sanctorum Patrum providentissima decreta posuerunt, ut quieta sit suis meritis et antiquis privilegiis dignitas omnium sacerdotum. Renovetur et maneat in te Dominicæ charitatis affectio, ad quam dilectionem tuam sæpius cohortatus sum, cum fratre et cœpiscopo nostro Juliano, qui communem gratiam semper optavit, cujus industria et sollicitudines tuæ relevabuntur, et fides catholica munieretur. Super omnia autem fraternam charitatem hortor et moneo, ut ea quæ ad gloriam vel ad munimen pertinent sacerdotalis officii, Nicænorum canonum universalis Ecclesiæ pacem servantia decreta custodias, Sic enim inter Domini sacerdotes inviolata charitas permanebit, si paribus studiis quæ sunt a sanctis Patribus constituta serventur. »

CAPUT XXIV.

De eodem canone Chalcedonensi, et de canonibus apostolorum, deque sententiis Angilramno datis, et de epistolis pontificum collectis ab Isidoro.

Quia vero iterum quidam hæc relevare ac restituere conati sint, allegantes quoniam synodus Chalcedonensis aut rata in totum tenebitur, aut in totum annullanda ducetur, beatus Gelasius explanat, et vanas opiniones atque objectiones destruit, et quæ sunt tenenda in decretis suis ostendit, dicens (*lib. de Anath. vinc.*) : « Ne forte, quod solent, dicant quin Græci, quod si synodus Chalcedonensis admittitur, omnia constare debeant quæ illic videntur esse de prompta. Aut enim ex toto eam admitti oportere, aut si ex parte repudianda est, firmam ex toto constare non posse. Cognoscant igitur, quoniam illud secundum Scripturas sanctas traditionemque maiorum, secundum canones regulasque Ecclesiæ, pro fide communi et veritate catholica et apostolica, pro qua hanc fieri sedes apostolica delegavit factamque firmavit, a tota Ecclesia indubitanter admitti. Alia autem, quæ per incompetentem præsumptionem illic prolata sunt, vel potius ventilata, quæ sedes apostolica gerenda nullatenus delegavit, quæ mox a vicariis sedis apostolicæ contradicta manifestum est, quæ sedes apostolica, etiam petente Martiano prin-

cipe, nullatenus approbavit, quæ præsul Ecclesiæ Constantinopolitanæ tunc Anatolius, nec se præsumpsisse professus, in apostolicæ sedis antistitis non negavit posita potestate, quæ ideo, sicut dictum est, sedes apostolica non recepit, quia quæ privilegiis universalis Ecclesiæ contraria probantur, nulla ratione subsistunt. Quid enim quia in libris sanctis, quos utique veneramus et sequimur, quoniam quorundam illic et profanitates esse feruntur et scelera gesta narrantur, ideo nobis pariter aut veneranda sunt aut sequenda, quia in illis sanctis libris et venerabilibus continentur ? Sanctus Petrus primus apostolorum, sic æstimans Novi Testamenti gratiam prædicandam, ut a legis veteris non recederet institutis, quædam per simulationem legitur inter Judæos gentilesque gessisse; nunquid ideo aut illa ejus sequenda sunt, quæ merito et coapostolus ejus facta redarguit, et postea consequenter ipse vitavit, pariter assumenda sunt cum his quæ utpote primus apostolus salubria prædicavit ? Nunquidnam aut ejus recta doctrina cum his quæ humanitas accesserant repudianda est, aut illa adhuc imbecillis inscitia cum perfecta ejus doctrina suscipienda est ? Nunquidnam in ipsorum hæreticorum libris non multa quæ ad veritatem pertineant posita releguntur ? Nunquidnam ideo veritas refutanda est, quia illorum libri, ubi pravitas inest, refutantur : aut ideo pravi libri suscipiendi sunt eorum, quia veritas quæ illic inserta est non negatur ? Ait apostolus (*I Thess. v*) : Omnia probate, quæ bona sunt tenete. Scimus Apostolum etiam de paganorum libris aliqua posuisse : nunquid ideo etiam cuncta recipienda sunt, quæ cum his pariter sunt prolata ? Ipse apostolus ait multos prædicatores aliter atque aliter Christum prædicare, ubi licet, quocunque modo, Christum prædicatum oportet admitti. Tamen non ideo illum morem, quo non recte prædicatum est, non admonet evitare. Malos operarios ipse conqueritur, quorum alia refutanda, alia docet esse sectanda. Hæc et hujusmodi exempla nos edocent, et testimonia divina confirmant, non omnia passim a quocunque dicta, vel ubicunque scripta, indifferenter accipere, sed retentis bonis quæ noceant refutare. » Et item : « Quod firmavit in synodo sedes apostolica, hoc robur obtinuit ; quod refutavit, habere non potuit firmitatem, et sola rescidit quod præter ordinem congregatio synodi putaverat usurpandum. » Et item : « Nobis, inquit, opponunt canones, quin Orientales episcopi, dum nesciunt quid loquantur, contra quos ipsi se venire produnt, quod primæ sedi sana rectaque suadenti parere refugiunt. Ipsi sunt canones, qui appellationem totius Ecclesiæ ad hujus sedis examen voluere deferri. » Et item idem : « Viderint ergo si alios habent canones, quibus suas ineptias exsequantur. Cæterum isti, qui sacri, qui ecclesiastici, qui legitimi celebrantur, non solum sedem apostolicam ad iudicium vocare non possunt, » et reliqua. Itemque idem : « Sed velint nolint, ipsius iudicio, scilicet apostolicæ sedis, antiquæ canonum constitutiones

firmantur. Sed religiosi viri atque perfecti secundum canones concessam sedi apostolicæ potestatem nimirum conantur eripere, et sibi libet eam contra canones usurpare contendunt. O canonum magistros atque custodes! » Et post aliquanta : « Quantum ad religionem pertinet, non nisi apostolicæ sedi juxta canones debetur totius summa judicii. » Et item : « Apostolicæ sedis auctoritas quod cunctis sæculis Christianis Ecclesiæ prælata sit universæ, et canonum serie paternorum, et multiplici traditione firmatur. » Et item : « Siquidem ad illam de qualibet mundi parte canones appellari voluerunt, ab illa autem nemo sit appellare permissus. » Beatus quoque Gregorius eadem passus a Joanne, et post eum a Cyriaco, Constantinopolitanis episcopis, quæ et Leo ab Anatolio de præfatis Constantinopolitanis canonibus, pari modo scribens ad Eulogium Alexandrinum episcopum, et ad Anastasium Antiochenum episcopum, in suis epistolis inter cætera dicit hoc modo (*lib. vi, epist. 31*) : « Canones quidem Constantinopolitanæ concilii Eudoxianus damnant, sed quis fuerit eorum auctor Eudoxius, nequaquam dicunt. Romana autem Ecclesia eosdem canones, vel gesta synodi illius, hactenus non habet, nec accipit : in hoc autem eandem synodum suscepit, quod est per eam contra Macedonium diffinitum. Reliquas vero hæreses, quæ illic memoratæ sunt, ab aliis jam patribus damnatas reprobat. De Eudoxianis vero nihil hactenus agnovit. » Et cum idem beatus Gregorius sæpe in suis epistolis dicat ita se quatuor synodos recipere sicut quatuor Evangelia, aperte demonstrat eodem modo, sicut præmisit, synodum Constantinopolitanam recipere, scilicet, ut quod de fide contra hæreticos in ea est diffinitum apostolica sedes recipiat, canones autem vel gesta synodi illius contra Nicænos canones, ut supra ostensum est, nequaquam recipiat. Quia vero sedes apostolica canones Chalcedonensis concilii, præter illud unum capitulum in xvii recapitulatum, quod contra Nicænos canones est constitutum, recipiat, idem beatus Gregorius in epistola ad Secundinum, et in homilia Evangelii decima septima evidenter ostendit : « Quinam sunt, inquit, in templo Dei hodie qui columbas vendunt, nisi qui in Ecclesia pretium de impositione manus accipiunt, per quam videlicet impositionem Spiritus sanctus cœlitus datur? Columba igitur venditur, quia manus impositio, per quam Spiritus sanctus accipitur, ad pretium præbetur. Sed Redemptor noster cathedras vendentium columbas evertit, quia talium negotiatorum sacerdotium destruit. Hinc est quod sacri canones Simoniacam hæresim damnant, et eos sacerdotio privari præcipiunt, qui de largiendis ordinibus pretium quærunt. Cathedra ergo vendentium columbas evertitur, quando hi qui spiritalem gratiam vendunt, vel ante humanos vel ante Dei oculos sacerdotio privantur. » Nulla quippe synodus ex hac re decrevit iudicium nisi Chalcedonense, concilium, licet inde habeatur decretum et in canonibus qui vocantur apostolorum, quia non episcopalium concilio-

rum auctoritate sunt constituti, sed a primis temporibus traditione viritum apostolicorum virorum fuerunt mentibus commendati, et partim verbis, partim sensu, ac sparsim diversis quorundam epistolis pro qualitate causarum et personarum ac temporum inditi, atque exinde, antequam episcopi concilia libere inciperent celebrare, a devotis quibusque collecti. In quibus quædam receptibilia, quædam vero sunt non servanda. De quibus interdum quædam assumpta sunt in conciliis, quædam etiam a maximis et præcipuæ auctoritatis viris in suis opusculis, sicut et de apocryphis, assumpta fuisse legimus, quoniam in quibusdam ad instructionem valent. Et ideo, sicut majorum traditione didicimus, seorsum ante concilia in canonum libris ad instructionem et propter vulgatam eorum famam ponuntur : in quibusque codicibus sacrum Nicænum et universale concilium regionalibus conciliis, quæ ante illud acta fuerunt, propter auctoritatem suæ magnitudinis præponitur. Cæterum iidem canones qui vocantur apostolorum, non ab apostolis conscripti esse creduntur. Quoniam, sicut in sacra historia legimus, et inde scriptum ab Ecclesiæ magistris accepimus, prima synodus apostolorum habita est Hierosolymis, de electione duodecimi apostoli pro Juda ; secunda, de electione septem diaconorum ; tertia, de circumcissione, ne credentibus ex gentibus imponeretur ; quarta facta est de credentibus ex Judæis illo tempore, ne prohiberentur, ubi necessitas exigeret, etiam legalibus cæremoniis initiari, ob devitandum videlicet eorum scandalum, qui putabant eos ita Mosaica decreta tanquam idololatriæ dogmata damnasse, quod etiam ante facere consuesse Timothei maxime circumcissione probatum est. Quinam vero synodum apostolorum Patres nostri fuisse tradunt, quando secundum quod prædictum est tempus adimpletionis advenit, ut in omnem terram exiret sonus eorum, et in fines orbis terræ verba eorum, et secundum Domini dictum, Evangelium prædicaretur in toto mundo per apostolos, quibus dixit : *Ite, docete omnes gentes (Matth. xxii)*. Et tunc Symbolum, sicut universalis tenet Ecclesia, condiderunt, singuli singulas sententias proferentes, sicut et Leo ad Pulcheriam Augustam demonstrat (*epist. 15, in fine*) : « Siquidem ipsa, inquit, catholici Symboli brevis et perfecta confessio, quæ duodecim apostolorum totidem est signata sententia, tam instructa sit munitione cœlesti, ut omnes hæreticorum opiniones solo ipsius possint gladio detruncari. Cujus Symboli plenitudinem si Eutyches puro et simplici voluisset corde concipere, in nullo a decretis sacratissimi Nicæni concilii deviare, et hoc a sanctis Patribus intelligeret constitutum, ut contra apostolicam fidem, quæ non nisi una est, nullum se ingenium, nullum elevaret eloquium. » Denique post hæc nulla synodus ab apostolis legitur celebrata, qui fuerunt per omnem terram ad verbum fidei seminandum progrediendo dispersi. Sed et beatus Gelasius in catalogo qui libri ab Ecclesia catholica recipiantur descripto, authenticis scripturis, et

Nicænae, Constantinopolitanæ, ac Ephesinæ, Chalcedonenſis quoque ſynodi, et aliis conciliis a ſanctis Patribus inſtitutis, et orthodoxorum opusculis, atque decretalibus epistoſis apoſtolicæ ſedis pontificum, aliſque ſcripturis diſcrete commemoratis, de his apoſtolorum canonibus penitus tacuit, ſed nec inter apocrypha eos miſit. Quapropter in lectione illorum ſequenda eſt cautela ab eodem ſancto Gelasio præmonita : « Cum hæc, inquit, ad catholicorum manus advenerint, beati Pauli apoſtoli præcedat ſententia, qua dicit : *Omnia probate, quod bonum eſt tenete* (I Theſſ. v). » Sicut et in illis capitulis, quæ dicuntur ex legibus Romanis Latina et Græca lingua conſcriptis, et ex præfatis epistoſis diſverſe collecta, et ſatagente Oſio ad ſynodum Nicænam delata, ſed non niſi ea quæ ibidem conſtituta teneamus, ad ſervandum fuiſſe decreta. Unde identidem iſdem Oſius quædam in ſynodo Sardiceniſi recitavit, quæ cum legatis apoſtolicæ ſedis ab eadem ſynodo corroborata Eccleſia catholica recipit. In qua ſynodo, cui præſederunt legati apoſtolicæ ſedis, idem Oſius Cordubeniſis epiſcopus, et Vincentius Capuanus, atque Calepodius Neapolitanus, fuerunt de heſperiiſi partibus epiſcopi quaſi trecenti, ex orientaliſibus ſex et ſexaginta, ſub Conſtantio imperatore, Rufo et Eusebio conſulibus : et orientaliſibus Arianiſis a ſynodo fuga recedentibus, heſperiiſi catholici remanentes quæ tunc agenda fuerant exſequi ſtudeverunt. Recordare quando hæc et plura hinc tibi dixi ex traditione hiſtoriæ veteris, cum mihi eras dulciſſimus filius, et ubi etiam iſta de apoſtolorum canonibus, et de in præfatis ſynodis, Oſio ſatagente, recitatſis capitulis legere potuiſti, ſi non neglexiſti, et contra auctoritatem veterum, qui veraci attestatione confirmant non plura fuiſſe caditula ſacri Nicæni concilii, quam illa quæ ex antiqua conſuetudine catholica tenet et veneratur Eccleſia, hiſis acquieſcere nolens contende, ſi dicentem Apoſtolum nolueris obaudire : *Si quis, inquit, vult contentioſus eſſe, nos talem conſuetudinem non habemus, neque Eccleſia Dei* (I Cor. x). Ego autem ex hac cauſa ceſtus jam depositos non reſumam, cum ſufficiant mihi quæ ſedes apoſtolica et catholica docet Eccleſia. Et quod addidiſti tuis commentis, non eſſe primatem dioceſeos præter apoſtoli primi vicarium, ſufficienter ſupra legiſti quæ ſacri canones et decreta ſedis Romanæ pontificum de provinciariſum primatibus intellexerunt ac decreverunt.

De ſententiis vero, quæ dicuntur ex Græcis et Latinis canonibus et ſynodis Romanis atque decretis præſulium ac ducum Romanorum collectæ ab Adriano papa, et Engelramno Metenſium epiſcopo datæ, quando pro ſui negotii cauſa agebatur, ex quibus quædam tuis commentis, interpoſuiſti, quam diſſonæ inter ſe habeantur, qui legit ſatis intelligit, et quam diſverſæ a ſacris canonibus, et quam diſcrepantes in quibusdam ab eccleſiaſticis judiciis habeantur, ut hic quædam de plurimiſum ponam, evidenter manifeſtatur. Delatori, inquit (cap. 57, 73), aut lingua capule-

tur, aut convicto caput amputetur. Judex criminolum diſcutiens, non ante ſententiam proferat capitalem, quam aut reus ipſe confiteatur, aut per innocentes teſtes convincatur. Teſtes autem ſine aliqua ſint infamia, uxores et filios habentes, et omnino Chriſtum prædicantes. Teſtimonium clerici adverſus laicum nemo ſuſcipiat. » Quæ quantum aliena ſint a ſacris canonibus, et quantum inimica ſint eccleſiaſticis judiciis, nemo eſt qui ignoret, et quam tibi tuiſque nuperrimiſis factis, de quibus reprehenderis, ſint in quibusdam adverſæ, ex quibusdam de plurimiſum hic oſtenſis patenter quilibet poteſt agnoſcere. « Placuit, inquit (cap. 22), ut nullus epiſcoporum quemquam clericorum judicare aut damnare præſumat, niſi accuſatus legitimos accuſatores præſentes habeat, locumque defendendi accipiat ad abluenda crimina. » Et poſt aliquanta : « Nec prius litigantibus ſua velit, quin judex, ſententia obviare, niſi quando ipſi, peractis omnibus, jam nihil amplius habuerint in quæſtione quod proponant, et tandiu actio ventiletur, quoſque ad rei veritatem perveniat, » et reliqua. « Caveant iudices Eccleſiæ (cap. 53), ne abſente eo cujus cauſa ventilatur ſententiam proferant, quia irrita erit, imo et cauſam in ſynodo pro facto dabunt. » Contra quas ſententias feciſti, quando excommunicationes Deo et præceptis ejus contrarias, de quibus te ſcriptis redargui, exerere præſumpſiſti. Et item in eiſdem ſententiis ſcriptum eſt (cap. 27) : « Sunt nonnulli, qui indiſcuſſos poteſtate tyrannica non canonica auctoritate damnant, et ſicut nonnullos gratia favoris ſublimant, ita quosdam odio invidiaque permoti humiliant, et levi opinionis aura condemnant, quorum crimina non approbant. Ideoque communi decreto cenſemus, ut quandocumque aliquis epiſcoporum criminaur, congregatiſum omnibus ejusdem provinciæ epiſcopis cauſa ejus audiatur, ut non occulte judicetur vel damnetur ; quia ab aliis prius judicari non poteſt, niſi ab hiſis a quibus ordinari poteſt : quod ſi aliter factum fuerit, nullas vires habebit. Bona hora, tantum laboraſti ut nulli ſubditus eſſes niſi apoſtolicæ ſedis pontifici, et nullus te judicare poſſet niſi apoſtolica ſedes ; cum ex ipſis ſententiis, quas ad defenſionem tui muniminiſum protuliſti, hoc contra te proferatur, quia ipſiſum eſſe ſubditus, et ab hiſis poteſt judicari, a quibus poteſtiſum ordinari. Miranda, vel potius miſeranda tua mirabilis imo miſerabilis ſapientia, quia hæc in ipſis ſententiis videre non poteſtiſum, vel videre non voluiſti, cum legas epiſcopus ſancta animalia Ezechieli oſtenſa plena eſſe oculis ante et retro, et arroganter Phariſæum ibi oculum non habuiſſe, ubi jactando enumerans bona ſua publicano ſe prætulit. Hinc etiam de te intelligi poteſt quod Salomon dicit : *Doctrina ſua noſcitur vir : qui autem vanus et excors eſt, patebit contemptui* (Prov. xii). Et Seneca pene Chriſtianus, et apoſtolo Paulo familiaris : *Videndum, inquit, ne per quæ admiratio paratur, ridicula et odioſa ſint.* » Et item Salomon : *Quomodo ſi argento ſordido ornare velis*

vas fictile, sic labia tumentia cum pessimo corde sociata (Prov. xxvi). Et Cato :

Audit quod non vult, qui pergit dicere quod vult.
 Uleus proserpit, quod stulta sabbatia celant.
 Tolle mali testes, levius mala nostra feremus.

Unde item Salomon : *Ejice derisorem, et exibit cum cogitum, cessabuntque cause et contumelia* (Prov. xxii). Si vero ideo talia quæ tibi visa sunt, de præfatis sentiis, ac sæpe memoratis epistolis, detruncando, et præposterando, atque disordinando collegisti, quia forte putasti neminem alium easdem sententias, vel ipsas epistolas, præter te habere, ideoque talia libere te existimasti posse colligere, res mira est, cum de ipsis sentiis plena sit ista terra, sicut et de libro collectarum epistolarum ab Isidoro, quem de Hispania allatum Riculfus Moguntinus episcopus in hujusmodi, sicut et in capitulis regis, studiosus obtinuit, et istas regiones ex illo repleri fecit. In cujus præfatione idem Isidorus dicit de apostolorum canonibus, quod a quibusdam dicantur apocryphi, et plures eos recipiant, et sancti Patres eorum sententias synodali auctoritate roboraverunt, et inter canonicas constitutiones posuerunt : quod de quibusdam sentiis verum est, sicut alibi in hoc opusculo potes legere. Differentiam quoque inter epistolas quas collegit et sacros canones, ex verbis beati Gelasii, quibus et sua verba interposuit, fecit. De Nicæno autem concilio non est ita ut scripsit, sicuti multis auctoritatum testimoniis approbatur : et quod de pascha ex epistola Theophili protulit, qui ecclesiasticas historias legit, in eodem concilio de pascha cum capitulis ibidem constitutis epistolam conditam reperit. De cujus scilicet Isidori dictis, sed et de epistola Damasi, quam suæ præfationi supposuit, et collectioni præposuit, quædam possem prolixius ostendere. Sed cum ad ea quæ hinc sunt opus, apostolicæ sedis Leonis, et Gelasii, ac cæterorum pontificum Romanorum post Damasum, sufficientissime auctoritas et explanatio suppetat, superfluum duxi non necessaria in medium devocare, ne illud poeticum mihi objiceres,

Tu ne forte foras in sylvam ligna, viator.

Tu dicis, ut audiui, quia non ego solus sapio canones et verum dicis. Accepto prorsus hoc dictum, non quia tuum est, sed quia verum est. Et ego dico, quia non tu solus bene intelligis canones, et verum dico. Recipe igitur hoc dictum, non quia meum est, sed quia verum est. Et si tu te putas scire quæ non didicisti, ego illum hominem solum dico esse, qui scivit quæ non ab homine didicit, de quo admirantes dicebant Judæi : *Quomodo hic litteras scit, cum non didicerit?* (Joan. vii.) Et ideo potuit per idiotas et piscatores docere oratores, et subjugare sibi imperatores. Et quia ego dico illum solum hominem esse, qui scivit quæ ab homine non didicit, tu videbis de Paulo, qui dicit se non didicisse ab homine, sed per revelationem Jesu Christi, quem idem Paulus hominem esse non denegavit, quando dixit *se nihil scire, nisi Jesum Christum, et hunc crucifixum* (1 Cor. ii) : quia Jesus Deus et homo, quoniam di-

vinitas crucifigi non potuit, homo est qui crucifixus fuit. Tu me reprehendis quia dico, quoniam antequam tu fuisses natus, ego canones scivi, jactans te cur non tibi liceat scire, qui post me didicisti, quod ego scio qui ante te didici. Sed Paulus non est de tuo corde locutus, qui legens dictum a Moysæ : *Interroga patrem tuum et annuntiabit tibi, majores tuos et dicent tibi* (Deut. xxxii), gloriatur se didicisse legem ad pedes Gamalielis (Act. xxii) : et sciens quia quando superbus erat, de cælo est prostratus a Domino, et qui prædicator futurus erat, non tamen mox ut prædicaret quod viderat audivit, sed ei jacenti dicitur : *Ingredere in civitatem, et dicetur tibi quid te oporteat facere* (Act. ix). Et hoc Dominus eum ab Anania discere voluit, unde ipse eum statim et in momento per revelationem potuit docere.

Deinde venit Hierosolymam videre Petrum (Galat. i). Deinde post annos quatuordecim ascendit Hierosolymam (Galat. ii) secundum revelationem, et contulit cum antecessoribus suis apostolis Evangelium quod prædicabat in gentibus (*ibid.*) : seorsum autem cum his qui videbantur præstantiores, ne forte in vacuum curreret aut ecurrisset. Et hæc dico non ignorans de quibusdam dictum fuisse : *In antiquis est sapientia* (Job. xii), et de quibusdam, *Cani hominis, sapientia ejus*. Similiter de quibusdam : *Quanto juniores, tanto perspicaciores*, et de quibusdam intelligendum, *Quanto juniores, tanto pervicaciores*, de quibus Paulus dicit : *Erit tempus cum sanam doctrinam non substinebunt, sed ad sua desideria conservabunt sibi magistros* (II Tim. iv), et reliqua. Et quoniam scimus ubi, et quanto tempore, et a quibus, et quæ ac quanta didicisti, qui non es doctus in schola Danielis, de quo dicitur, *Nunquid tu Daniele sapientior?* (Ezech. xxviii.) quandiu talia tibi ad intentionem tuam non profutura, quæ in commentis tuis continentur, vadis fodiendo, utilius, imo quia hæc inutilia sunt utile tibi foret illa quærere, quæ ad tuam et commissorum tibi salvationem debueras bajulare. Scilicet quomodo in regulis sacris debeas intelligere, quia quidam jubentur usque ad missam catechumenorum manere in ecclesia, quidam autem sola intra ecclesiam fidelium oratione jungi sacræ mysteriorum celebritati, a Dominicæ autem mensæ convivio segregari. Et Leo dicit (*epist. 91, c. 4*) : « His qui in tempore necessitatis, et periculi urgentis instantia, præsidium pœnitentiæ et mox reconciliationis implorant, nec satisfactio interdicenda est, nec reconciliatio deneganda. » Et Innocentius dicit (*epist. 1, c. 19*) : Ut quæ Christo spiritualiter nubunt et a sacerdote velantur, si postea vel publice nupserint, vel se clanculo corruperint, non eas admittendas esse ad agendam pœnitentiam, nisi is cui se junxerant de mundo recesserit. » Et Cælestinus dicit (*epist. 1, c. 2*) : Ut nulli sit ultima pœnitentia deneganda. » Cum enim nullus dicitur, nemo excipitur. Et Leo sicut præmisimus (*epist. 91, c. 4*) : « Implorantibus nec satisfactio, inquit, interdicenda est, nec reconciliatio deneganda. » Et hæc

reticos ac schismaticos legimus ad ecclesiasticæ fidei et pacis unitatem redeuntes per manus episcopalis impositionem in ordinibus suis debere recipere, et presbyteros vel diaconos in aliqua graviore culpa convictos, quia eos a ministerio necesse sit removeri, non eis manus tanquam pœnitentibus debere imponi. Sciendum ergo nobis est, cur hæreticis et schismaticis redeuntibus manus imponitur, et lapsis diaconibus vel presbyteris ad reconciliationem nequaquam manus imponitur, de quibus Leo dicit : « Hujusmodi lapsis ad promerendam misericordiam Dei privatam esse expetendam secessionem, ubi illis satisfactio, sit fuerit digna, sit etiam fructuosa. » Et idem Leo dicit : « Ut si quis in regulas sacras commiserit, veniam sibi deinceps noverit denegari. » Et S. Gregorius, ac cæteri Romani pontifices, sed et sacri canones dicunt lapsos in ordine non debere restitui, sicut nec publice pœnitentes ad ecclesiasticum ordinem promoveri. Quomodo ergo pœnitentia, si fuerit digna, esse poterit fructuosa, si in gradibus suis hujusmodi pœnitentes non valebunt restitui? Quid enim prodest triticum seminare, et fructum illius non colligere? aut domum construere, et non illic habitare? Nunquid qui cadit non adjiciet ut resurgat? (Amos v.) Et quorundam hæreticorum, quorum baptisma probatur, clericos in ordinibus suis recipi, quosdam autem legimus recipi non debere, et a quibusdam quosdam hæreticos vel schismaticos cum chrismatis unctione, a quibusdam quosdam per manus impositionem sine chrismatis unctione, a quibusdam quosdam sine manus impositione, cum professione simul et subscriptione, a quibusdam quosdam tantum professione recipi debere legimus. Et item in sacris canonibus legimus (*conc. Arelat. II, can. 25*) : « Ut hi qui post sanctam religionis professionem apostant, et ad sæculum redeunt, et postmodum pœnitentiæ remedia non requirunt, sine pœnitentia communionem penitus non accipiant. » Et : « Pœnitentes qui in infirmitate viaticum eucharisticæ acceperint, non se credant absolutos sine manus impositione, si supervixerint. » Et legimus, quia sicut unum est baptisma, ita et una debet esse pœnitentia, quæ tamen publice agitur. Et sunt in nostris parochiis plurimi, qui post pœnitentiam et reconciliationem per manus impositionem, et post communionem, iterum labuntur, non solum semel, sed et secundo ac tertio : quomodo nobis de his faciendum sit, cum, sicut præmisimus, sine pœnitentia communionem non accipiant, vel quomodo qui accipiunt eucharistiam, et sic moriuntur, absoluti erunt, qui non essent absoluti sine manus impositione, si superviverent. Et in sacris canonibus legimus (*conc. Vascen., can. 2*) : « Eorum, qui pœnitentia accepta in bono vitæ cursu satisfactoria compunctione viventes, sine communionem inopinatio nonnunquam transitu in agris aut in itineribus præveniunt, oblationem recipendam, et eorum funera ac deinceps memoriam ecclesiastico affectu prosequendam. » Et Leo dicit (*epist. 92, ad*

Rust. Narb., cap. 8) : « Horum causa Dei judicio reservanda est, in eujus manu fuit, ut talium obitus usque ad communionis remedium differretur. Nos autem quibus viventibus non communicavimus, mortuis communicare non possumus. » Sed et quomodo distinctos gradus pœnitentium, de quibus in canonibus legimus, pœniteant pœnitentes secundum præfixos gradus, intelligere quot sint, et qui sint, et observare erga pœnitentes in ecclesia debeamus, ne contra sacras regulas faciamus, nosse ex canonibus sacris debemus : de quibus quædam, si in opusculo isto diligenter attenderis, et ea reducere ad memoriam volueris, quæ jam tibi dixisse me recolo, quando videbaris dignationem discendi habere, et velle docenda discere, poteris intelligere. Sunt et alia plurima, quæ hinc tibi poteram computare, sed mihi, præsertim inter spinas seminanti, esse longum et tibi infructuosum fore existimo, qui voluntatem tuam ac desiderium ad ea tendere inhiante audio et video, quæ tanquam fenum velociter crescent, et sicut olera herbarum cito decident (*Psal. XXXIX.*) De quibus iterum scriptum est : *Dormierunt somnum suum, et nihil invenerunt omnes viri divitiarum in manibus suis. Ab increpatione tua, Deus Jacob, dormitaverunt qui ascenderunt equos (Psal. LXXV).* « In morte animæ, inquit Gregorius, mentis oculos a veritatis lucet clausurunt, qui in præsentis vitæ honore confisi sunt : qui temporalis amor et honor, tum sicut fumus deficient, nisi ad tempus fueris inde conversus, quando transibit actus, manebit tibi reatus. » Ideo oportuerat te illa, quæ hic tibi prodesse inciperent, et in semper existenti sæculo amplius prodesse, quando, sicut dicit Apostolus, *veniet quod perfectum est, et evacuabitur quod ex parte est (I Cor. XIII),* tota mentis devotione amplecti, de quibus si hodie aut cras interrogatus fueris, vera et salubria respondere valeres. Sed quia usus pessimo preceptore teipso, dedignaris scire quod nescis, cum inde interrogatus fueris, aut hæsitando dissimularis respondere, aut incerta studebis perverse docere. Tandem ab eo quod in fine pitacioli tui misisti : « Decretalia, inquit, quæ a sanctis pontificibus primæ sedis Romanæ Ecclesiæ sunt instituta, cujus auctoritate atque sanctione omnes synodi et sancta concilia roborantur et stabilitatem sumunt, cur vos non habere vel observari dicitis, nisi quia vestræ ordinationi contradicunt? Miror quare non vidisti te manifeste redargui et increpari, cum illa, quæ tibi in parva schedula apud Gundulfi villam dedi, et in hoc opusculo supra posui, quæ certum est te habere, penitus prætermiseris, nisi, ut tu ipse ex alterius verbis in tuo pitaciolo scripsisti, qui tuæ ordinationi, id est tuæ voluntati, et tuæ intentioni contradicunt. Unde inferri tibi recte potest quod scriptum est : *Ex verbis tuis te judico (Luc. XIX),* sicut ipse scripsisti dicens : « Ecce hic evidentissime ostenditur, si quis contra Romanorum pontificum decreta obloqui præsumperit, jure temeritatis arguetur. » Igitur lege illam præfatam schedulam, et supra scripta pontificum Romano-

rum decreta ex sacris canonibus promulgata, et invenies te obloqui pontificum Romanorum decretis : et quando altera vice sic accurate dictabis, studiosus polle linguam tuam curabis, ne vitiose contra tuam grammaticam dictes, sicut hic fecisti dicens : Si quis contra Romanorum pontificum decreta obloqui præsumpserit. Nos enim simplices ac idiotæ, si hinc loqui contingeret, diceremus, aut contra Romanorum pontificum decreta loqui, aut Romanorum pontificum decretis obloqui. Idem enim est, aut contra Romanorum pontificum decreta loqui, aut Romanorum pontificum decretis obloqui, ut non contemnendæ auctoritatis falsator dicit :

Obloquitur numeris septem discrimina vocum.

Unde tuus Servius, *obloquitur numeris*, dicendo *obloquitur*, chordarum expressit laudem, quas dicit verbis locutas : obloqui enim non est nisi contra loquentem loqui. Qua de re, si talionem mihi reddere voveris, et in dictis meis reprehensiones quærens inveneris, ego jam spretis jactantibus puerorum plausibus, qui manente integro sensu, in verbis me magis intelligi quæro, quam admirari, cum Paulo dicans : *Et si imperitus sermone, non tamen scientia (II Cor. XI, 6)*. Tibi autem novo grammatico, qui, ut frondosa et condensa arbor, foliis ornatus verborum phaleris debes incedere, et tua figmenta grandisonis pompare modis, et in omnem ventum inflatis buccis grammaticas spumas expuere, hoc dicere non licebit. In clausula vero tui pitacioli posuisti : « Hæc, inquit, succinete quidem excerpsti, ac passim pro qualitate negotii contexendo promiscueque conserendo, ordine cum præpostero, tum composito, sed et sensim connexo, ascivi. » Unde parcat mihi tua prudentia, et cujuscunque alterius lectoris patientia, si tumultuario et sæpius repetito, non autem recti tramitis vel ordinato sermone, necessitate compulsus hoc opusculum designare potius quam perficere studui : quoniam tuis compilationibus confuso, et sicut ipse dixisti, præpostero ordine positus, et nunquam in eodem statu manentibus, aliter respondere non potui, nisi, ut venatores feræ lustra sequentes agere auditu et lectione puer scholarius in libro qui inscribitur *Cynegeticon* Carthaginensis Aurelii didici, hæc illacque discurrendo, retrograda etiam vestigia repetendo, anfractus tuos vestigando, explicare studerem : quod adhuc mihi erit necessarium facere, et in explicanda de inceptis ratione, et in ostendenda causali actione de his quæ admisisti, et pro quibus tibi et Ecclesiæ tibi commissæ scripsi, contra quæ irregulariter subscripsisti, ac subscribi fecisti, et etiam cum tuam novam subscriptionem, quin potius tuam novam præsumptionem adiens,

.... mille vias, tristesque labores
Discursusque citos, securi prælia ruris,

et sincero corde lites domesticas subire compellar.

CAPUT XXV.

De auctoritate et differentia conciliorum et epistolarum sedis apostolicæ pontificum.

De cætero quod Daniel dicit : *Pertransibunt pluri, et multiplex erit scientia (Dan. XII)*, Dominus demonstrat ad Moysem dicens : *Ego sum Deus Abraham, et Deus Isaac, et Deus Jacob, et nomen meum Adonainon indicavi eis (Exod. VI)*; et longe post Moysem David dicit : *Super seniores meos intellexi et, super omnes docentes me intellexi (Psal. CXVIII)*, et apostoli viderunt et audierunt quod multi antiqui justi desiderantes non viderunt vel audierunt. Quod beatus Gelasius, sapientiæ et scientiæ spiritu repletus, in catalogo, qui libri ab Ecclesia catholica recipiantur, post descriptionem authenticarum Scripturarum, et Nicæna, Constantinopolitana, ac Ephesina, Chalcedonensi quoque synodis commemoratis, subjungit : « Et si qua sunt concilia a sanctis Patribus instituta, post horum quatuor auctoritatem et custodienda et recipienda decrevimus. » Commemoratis etiam opusculis orthodoxorum ex nomine designatorum, adjungit dicens : « Item opuscula atque tractatus omnium Patrum orthodoxorum, qui in nullo a sanctæ Ecclesiæ Romanæ consortio deviarunt, nec ab ejus fide vel prædicatione sejuncti sunt, sed ipsius communioni per gratiam Dei usque ad ultimum diem vitæ suæ fuere participes, legenda decernimus. » Deinde dicit : « Item decretales epistolæ, quas beatissimi papæ diversis temporibus ab urbe Roma pro diversorum Patrum consolatione dederunt, venerabiliter suscipiendas. » Et sic de martyrum passionibus conjunctim loquens, et de vitis sanctorum, et de actibus beati Silvestri, et ex Scriptura de inventione Dominicæ Crucis, et de inventione capituli beati Joannis Baptistæ, solertissime ac discretissime addidit dicens : « Sed cum hæc ad catholicorum manus advenerint, beati Pauli apostoli præcedat sententia : *Omnia probate, quod bonum est tenete (I Thess. V)*. » Sed et in ipsis apocryphis discretionem teneri debere subinnuit : « De quibus quædam in totum sunt rejicienda, quædam autem propter hæreticorum calumnias inter apocrypha sunt computanda, sed non penitus abominanda, de quibus viros catholicos in suis opusculis testimonia legitimus assumpsisse, sicut et beatus Judas apostolus in epistola sua egit. » Animadvertenda igitur est discretio ex verbis beati Gelasii inter synodalia concilia, et apostolicorum virorum epistolæ, quas ante concilia celebrata diversis temporibus, pro diversorum Patrum consolatione dederunt, quasque venerabiliter suscipiendas dicit : si qua sunt autem concilia a sanctis Patribus instituta post quatuor conciliorum auctoritatem, custodienda et observanda decrevit. Unde item idem in decretis suis dicit (Gelas. *epist. 3, ad Dardanos*) : « Patres, inquit, nostri catholici doctique pontifices, in unaquaque hæresi quolibet tempore suscitata, quidquid pro fide, pro veritate, pro communione catholica atque apostolica, secundum Scripturarum tramitem, prædicationem-

que majorum, facta semel congregatione sanxerunt, inconvolsum voluerunt deinceps firmumque constare, nec in eadem causa denuo quæ præfixa fuerant retractari qualibet recenti præsumptione permiserunt. » Quantum enim distet inter illa scilicet concilia, quæ custodienda et recipienda decrevit, et inconvolva firmaque deinceps Patres catholici manere voluerunt, et ilas epistolas, quæ diversis temporibus pro diversorum consolatione datæ fuerunt quas venerabiliter suscipiendas dicit, nemo in dogmatibus ecclesiasticis exercitatus ignorat. Si enim quædam ex his, quæ in quibusdam illis epistolis continentur, tenere et custodire velle inceperimus, contra alia plurima illarum epistolarum facere incipiemus. Et rursus, si alia contra quæ feceramus, tenere et custodire inceperimus, adversus ea quæ antea servare voluimus faciemus, et a concilii sacris, quæ perpetuo nobis recipienda, tenenda, ac custodienda, atque sequenda sunt deviabimus : sed et a consuetudine quam catholica Ecclesia habuit, ex quo in sacrum Nicænum concilium Patres nostri conuenerunt, qui adhuc, sicut Leo dicit (*epist. 51, vel 53, ad Anatol.*), nobiscum in suis constitutionibus vivunt, perniciosissime discedemus, et nihil certi tenentes in sectam Genethliacianorum, id est Mathematicorum offendemus, qui diffiniuerunt omnia in incertum. Nam et beatus Gelasius easdem epistolas, non solum sacris canonibus in quibusdam adversas, sed etiam sibi ipsis diversas ostendit, cum dicit, illas diversis temporibus pro diversorum consolatione datas. Et hinc forte adversum me dices: Ergo calumniaris apostolicam sedem in sanctis ejus pontificibus, eo quod male senserint, et non tenenda decreverint. Unde tibi respondeo, quod de lege non Judaice servanda, contradicentibus sibi et dicentibus: *Lex ergo adversus promissa Dei?* (*Gal. III, 21*). Respondit apostolus: *Absit. Lex quidem sancta, et mandatum sanctum, et justum, et bonum Rom.* (VII, 12), sed personis et temporibus suis congrua: *Quæ propter transgressionem posita est, donec veniret semen cui repromiserat Deus, ordinata per angelos in manu mediatoris* (*Galat. III, 19*). Et illas epistolas sanctorum et apostolicorum virorum, diversis temporibus pro diversorum consolatione, sicut et beatus Gelasius dicit, a sede apostolica datas, et per eosdem Domini sacerdotes qui et angeli secundum Scripturam appellantur ordinatas, cum beato Gelasio apostolico viro venerabiliter suscipiendas dico. Quæ suis temporibus congruentes fuerunt, donec per sacra concilia Patres nostri in unum convenientes, sicut ejusdem apostolicæ sedis pontifices protestantur, euggerente sibi libet sancto Spiritu, quoniam aliter credendum non est, mansuras usque in finem sæculi leges condiderunt. Et sicut de lege dicit: Apostolus: *Si enim esset lex que posset vivificare, vere ex lege esset justitia* (*Galat. III, 21*), ita salva reverentia sedis apostolicæ dico, quia si illa, quæ in eisdem epistolis continentur, et sui temporibus congrua fuerunt, subsequen-

A tibus temporibus, ita ut in eis continentur, omnia et insimul custodiri valerent, et servari ac teneri congruerent, Patres nostri, catholici videlicet doctique pontifices, in conciliis sacris leges mansuras usque in sæculi finem non conderent. Suscipiendas ergo illas epistolas venerabiliter cum beato Gelasio dico, et cum leguntur, sicut ipse præcipit Gelasio apostolica illa præcedat sententia, qua dicit: *Omnia probate, quod bonum est tenete* (*I Thess. V*). Et hæc dico, non quo quædam in eis dicam esse non bona, sed non per omnia sacris canonibus, Patrumque conciliis consona, sicut et Apostolus dicit: *Lex quidem bona et sancta, et mandatum sanctum, et justum, et bonum* (*Rom. VII, 12*), sed in temporibus suis. Et Dominus de Judæis, quibus ipsa ex data fuerat, dicit: *Dedis eis præcepta non bona* (*Ezech. XX*), id est, quædam tempore revelatæ gratiæ immutanda, quia lex dicitur in allegoria, ut Apostolus de duobus Abrahamæ filiis interpretatur. *Et patres, inquit, nostri omnes sub nube fuerunt, et omnes mare transierunt, et omnes in Moysse baptizati sunt in nube et in mari, et omnes eandem spiritalem escam manducaverunt, et omnes eundem potum spiritalem biberunt: bibebant autem de spiritali consequente eos petra, petra autem erat Christus* (*Gal. IV, 24; I Cor. X, 4*). Et lex in Decalogo quod non est immutatum accipitur, et lex in cæremoniis et legalibus sacrificiis dicitur, quæ futurorum umbras appellat Apostolus (*Col. II*), et ut longe superius prælibavi, immutata nunc spiritaliter in Ecclesia conservantur. Quid enim agebatur in illo populo Judæi nescierunt, sed nec modo sciunt. De illis quippe dictum est: *Quandiu legitur Moyses, velamen super cor eorum positum est* (*II Cor. III*); ibi velamen figura est, sed ablata est figura, et apparet veritas. Audi Apostolum quando ablatum est velamen. *Cum transieris, inquit, ad Dominum, auferetur velamen* (*ibid*). Propitius ergo peccatis nostris et impietatibus per illud sacrificium vespertinum, quando Christus extendit manus in cruce, ut diceretur: *Dirigatur oratio mea sicut incensum in conspectu tuo, elevatio manuum mearum sacrificium vespertinum* (*Psal. CXL*), sicut novimus quia Dominus circa vesperam pendit in cruce, ipse sacerdos, ipse victima, ipse oblator, ipse oblatio. Ipse sacerdos, est, qui nunc ingressus est in interiora veli, solus ibi ex his qui carnem gestaverunt interpellat pro nobis. In cuius rei figura, in illo primo populo, et in illo primo templo, unus sacerdos intrabat in Sancta sanctorum. Populus omnis foris stabat, et ille, qui solus ingrediebatur in interiora veli, offerebat sacrificium pro populo foris stante. Propitius ergo peccatis nostris et impietatibus per illud sacrificium vespertinum, transimus ad Dominum et aufertur velamen. Propterea et Domino cruxifixo velum templi scissum est. Itaque nec carnem præputii circumcidimus juxta ritum Mosaicæ legis, nec abstinemus carnibus quas eadem lex dicit immundas, nec sabbata, et neomenias, et dies festos eorum carnaliter observamus, nec victimas peco-

rum sacrificamus Deo, nec Pascha in ovis et azymis similiter celebramus, et si qua alia fuerunt vetera sacramenta, quæ omnia, ut dixi, *umbras futurorum* (Col. II), appellat Apostolus, quia ea significabant suo tempore revelanda, quæ nos revelata percipimus, ut remota umbra, nuda eorum luce fruamur. Nam et exuendo veterem hominem circumcidimur in exspoliatione corporis carnis, et quos cibos illi vitam in pecoribus, nos vitam in moribus, et *exhibemus corpora nostra hostiam vivam sanctam Deo placentem* (Rom. XII), cui et animas nostras in desiderii sanctis pro sanguine intelligenter effundimus, et Christi velut agni immaculati sanguine ab omni iniquitate mundamur: qui propter similitudinem carnis peccati, etiam caprino pecore in veteribus sacrificiis figuratur, nec cum negat in crucis cornibus taurum, qui in illo cognoscit maximam victimam. In illo requiem cum invenimus, vere sabbatizamus, et lunæ novæ observatio, vitæ novæ est sanctificatio, et Pascha nostrum est Christus, et azymum nostrum sinceritas veritatis fermentum non habens vetustatis. Et propter hanc vitæ novitatem, primus mensis in anni mensibus celebrationi huic attributus est nam ipse dicitur et mensis novorum. Quia vero in toto tempore sæculi nunc tertium tempus apparuit, ideo resurrectio Domini triduana est. Primum enim tempus est ante legem, secundum sub lege, tertium sub gratia, ubi jam manifestatio est sacramenti prius occulti in prophetico ænigmate: hoc ergo et in lunari numero significatur. Quia enim septenarius numerus solet in Scripturis ad quamdam perfectionem mysticæ apparere, tertia hebdomada lunæ Pascha celebratur, id est qui dies occurrit a quarta decima in vicesimam primam. Et quæcunque alia illis veteribus adumbrata sunt signis, in isto habent finem, *cujus regni non erit finis* (Matth. V). In illo quippe omnia oportebat impleri, qui venit legem et prophetas non solvere, sed implere. Proinde illa vetera signa rerum non evacuavit arguendo, sed mutavit implendo, ut alia essent quæ nuntiarent venisse jam Christum, quam fuerant illa quæ prænuuntiabant esse venturum. Similiter et in illis apostolicorum virorum epistolis, quædam demonstrantur etiam apud gentes fuisse ante adventum Domini significativa, sicuti de provinciis et privilegiis civitatum, et primatibus flaminum et archiflaminum, quæ ad instar legis Mosaicæ, longe ante gentilium dispositionem, et in legislatione, et in eis quibusque distinctionibus existentis, ut supra ostendi, et in divisione tribuum ac incolatum, et privilegiorum, ac primatum ordinum singulorum gentes disposuerunt, et, ut Clemens atque Anacletus ostendunt, apostolica traditione in Ecclesia hodieque servantur in divisione regionum, et parochiarum, et privilegiis sedium, et episcoporum, ac metropolitanorum, atque primatum. Quæ apostolica vera traditio etiam ratione et prisca consuetudine sufficientissime est confirmata. Plane, inquit Augustinus (lib. IV de bapt. contra Donatist, cap. 5.)

verum est, quia ratio et veritas consuetudini præponenda est: sed cum consuetudini veritas suffragatur, nihil oportet firmius retineri. Quædam denique, sicut in eisdem epistolis ab apostolis tradita leguntur, vel ex legibus Romanis assumpta inveniuntur, ita pleniorum conciliorum auctoritate firmata servantur: et quædam ex his in conciliis immutata fuerunt. Sed et quædam de his, quæ in regionalibus fuere statuta conciliis, pleniorum conciliorum auctoritate immutata, vel in postmodum irrefragabiliter conservanda tenentur, sicut catholici doctores et Ecclesiæ magistri demonstrant, et partim ex errorum dictis supra ostendi: et præter ea quæ de verbis beati Augustini in hoc opusculo posui, in libris de Baptismo dicit: primum quidem ostendens differentiam esse inter epistolare colloquium, quo istæ epistolæ apostolicorum, de quibus agitur, conditæ sunt, et regionale ac plenarium concilium. « Video, inquit (lib. III de Bapt., cap. 2), quid adhuc a me possit inquit, videlicet, ut respondeam verisimilibus illis rationibus, quibus vel ante Agrippinus, vel ipse Cyprianus, vel illi qui eis in Africa consenserunt, vel si forte aliqui ex transmarinis terris longe discretis, nullo quidem sive plenario sive saltem regio mali concilio, sed epistolari colloquio, commoti sunt, ut hoc esse faciendum putarent, quod et consuetudo Ecclesiæ pristina non habebat, et postea catholicus orbis terrarum robustissima firmitate consensionis exclusit, ut quod per disputationes ejusmodi aliquorum mentes irreperere cœperat, de salute veniens unitatis potentior veritas et universalis medicina sanaret. » Item differentiam inter regionalia et plenaria concilia ostendit hoc modo: « Nobis, inquit, tutum est in ea non protrahi aliqua temeritate sententiæ, quæ nullo in catholico regionali concilio cœpta, nullo plenario terminata sunt. Id autem securum est sententiæ vocis asserere, quod in gubernatione Domini Dei nostri et Salvatoris Jesu Christi universalis Ecclesiæ consensione roboratum est. » Item differentiam ostendit inter authenticas scripturas, et regionalia et plenaria concilia. « Quis, inquit (lib. II de Bapt., cap. 3), nesciat sanctam Scripturam catholicam, tam Veteris quam Novi Testamenti, certis suis terminis contineri, eamque omnibus posterioribus episcoporum litteris ita præponi, ut de illa omnino dubitari et disceptari non possit utrum verum vel utrum rectum sit, quidquid in ea scriptum esse constiterit? Episcoporum autem litteras, quæ post confirmatum canonem vel scriptæ sunt, vel scribuntur, et per sermonem forte sapientiorum cujuslibet in ea re peritioris, et per aliorum episcoporum graviorem auctoritatem, doctorumque prudentiam, et per concilia licere reprehendi, si quid in eis forte a veritate deviatum est: et ipsa concilia, quæ per singulas regiones vel provincias fiunt, pleniorum conciliorum auctoritati, quæ fiunt ex universo orbe Christiano, sine ullis ambagibus cedere: ipsaque plenaria sæpe priora posterioribus emendari, cum aliquo experimento rerum aperitur

quod clausum erat, et cognoscitur quod latebat, sine A ullo typho sacrilegæ superbiae, sine ulla inflata cervice arrogantiae, sine ulla contentione lividae invidiae, cum sancta humilitate, cum pace catholica, cum charitate Christiana. » Et item (*ibid.*, cap. 9) : « Quapropter illud unum isti considerent, quod omnibus patet. Si auctoritas Cypriani sequenda est, magis eam sequendam esse in unitate servanda, quam in Ecclesiae consuetudine commutanda. Si autem concilium ejus attendimus, huic esse universae Ecclesiae posterius concilium praeponeandum, cujus se membrum esse gaudebat, et ut se in totius corporis compage retinenda caeteri imitarentur, saepius admonebat. Nam et concilia posteriora prioribus apud posteros praepouuntur, et universum partibus semper optimo jure praepouitur. Cyprianus enim sanctae Ecclesiae catholicae universitas non fuit, sed in ejus universitate permansit : cujus radicem nunquam deseruit, sed in cujus radice fecundus, ut esset fecundior, ab agricola caelesti purgatus est. » Haec de aliis conciliis a beato Augustino sunt dicta. Caeterum de sacra et mystica Nicæna synodo, sicut supra ex verbis Leonis et aliorum ostendi, nihil unquam a quoquam, vel apostolicae sedis pontifice, vel a plenario concilio, minime autem a regionali, est immutatum, quod non sit penitus irritum. Sicut et sanctus Gelasius in decretis suis dicit : « Non, inquit (*epist. 11 ad Dardanos*), nos latet, in tempestate persecutionis Arianæ, plurimos pontifices de exsiliis pace reddita respirantes, per certas provincias, congregatis secum fratribus, ecclesias composuisse turbatas : non tamen ut illius synodi Nicæna quidquid de fide et communione catholica diffiniverat immutarent, nec nova quemquam pro lapsu damnatione percellerent : sed illius tenore decreti, nisi resipisset, judicare damnatum, essetque consequens, ut nisi corrigeret, damnationi procul dubio subjaceret. » Suscipe igitur illas epistolas, de quibus tua commenta compilasti, venerabiliter, ut dicit Gelasius, et serva inviolabiliter sacra concilia, ut decrevit Gelasius, et caeteri catholici videlicet doctique decreverunt pontifices. Sicut et de sanctorum imaginibus decreverunt, reprehendentes eos, veluti et beatus Gregorius in epistolis ad Secundinum et ad Serenum Massiliensem demonstrat episcopum, qui sub hac quasi occasione ne adorari debuissent, confringenda easdem imagines dixerunt, et laudantes eos, qui illas non adorandas, sicut neque confringendas, sed ad instruendas solummodo mentes fuisse nescientium collocandas constituerunt : quoniam in adoratione solius omnipotentis sanctae Trinitatis humiliter prosterni debet, et si quis imagines Dei et sanctorum ad instructionem facere voluerit et habere non debet ullo modo prohiberi. Et quia, ut scriptum est : *Quomodo in aquis resplendent vultus perspicientium, sic corda hominum manifesta sunt prudentibus* (*Prov. xxvii*) ; et : *Aqua profunda verba ex ore viri* (*Prov. xviii*) ; et : *Diriventur fontes tui foras* (*Prov. v*) ; ex verbis

sanctorum, quasi ex eorum imaginibus, ipsos, videlicet corda et promulgationes eorum, cognoscere possumus, quæ sint quæ singuli quique pro consolatione vel instructione quorundam, juxta temporum et actuum qualitatem, et quæ communiter atque unanimiter in conciliis sacris ad auctoritatem generaliter custodienda et recipienda perpetuo decreverunt : tu hac discretionem, ut praemisi ex verbis beati Gelasii, suscipe ad instructionem illas epistolas, quas beatissimi papæ diversis temporibus ab urbe Roma pro diversorum Patrum consolatione dederunt, legendas venerabiliter, et serva sacra concilia, quæ sedes apostolica et omnis sequitur Ecclesia, inviolabiliter. Et ut Dominus ex lege confirmat in Evangelio : *In ore duorum vel trium testium stabit omne verbum* (*Matth. xviii*), quia mihi non pigrum, tibi autem est necessarium, repetam tibi quod de sacris conciliis ad Januarium dicit beatus Augustinus : « Omnia itaque talia, quæ neque sacrarum Scripturarum auctoritatibus continentur, nec in conciliis episcoporum statuta inveniuntur, nec consuetudine universalis Ecclesiae roborata sunt, sed diversorum locorum diversis motibus innumerabiliter variantur, ita ut vix aut omnino nunquam inveniri causæ possint, quas in eis constituendis homines secuti sint, ubi facultas tribuitur, sine ulla dubitatione resecauda existimo. » Quæ verba beati Augustini quomodo placeant tibi, tu videris, exiguitati autem meæ tutius et salubrius videtur cum illo sacra sequi concilia, et omnibus qui me audire voluerint inculcare, non sequi relictis sacris conciliis illa quæ ipse existimat resecauda, quam illa quæ tu resecauda et dissecata proponis sectanda, quoniam sibi ipsis diversa, ostendunt se esse non posse omnibus et in omnibus servanda atque sequenda. « Oportet igitur, inquit Innocentius ad Decentium Eugubinum episcopum, eos, quin Domini sacerdotes, hoc sequi quod Ecclesia Romana custodit, a qua eos principium accepisse non dubium est, ne dum peregrinis assertionibus student, caput institutionum videantur omittere. » Quid sit autem quod Ecclesia Romana custodit, et Domini sacerdotes oporteat sequi, demonstrat Gelasius (*epist. 11 ad Dardanos*) : « Confidimus, inquit, quod nullus jam veraciter Christianus ignoret, niuscujusque synodi constitutum, quod universalis Ecclesiae probavit assensus, nullam magis exsequi sedem per caeteris oportere quam primam, quæ unamquamque synodum et sua auctoritate confirmat, et continuata moderatione custodit, pro suo scilicet principatu, quem beatus Petrus apostolus Domini voce perceptum, Ecclesia nihilominus subsequente, et tenuit semper et retinet. » Ecce habes secundum legem et Evangelium, plenitudinem testium testificantium de sequendis inconvulso conciliis, et de non studendis peregrinis assertionibus, Apostolo etiam præcipiente, *Doctrinis variis et peregrinis nolite abduci* (*Hebr. xiii*). Peregrinas autem eas assertiones ideo cum Innocentio dico, quia ex quo sacra concilia in Ecclesia catholica cele-

brari ceperunt, illa quæ suo tempore partim vigerunt, nisi quantum ex eis sacra concilia assumenda viderunt, ab usu ecclesiastico effluerunt, usquequæ nuper a te, quantum ex te est, recrudescere inceperunt, ut ab ea, quæ aspiras libenter, transire possis in affectum cordis licenter, et a nullo coerceri vel judicari valeas regulariter: sed non cœntiant tecum, neque tibi consentiunt doctores et magistris Ecclesiæ.

CAPUT XXVI.

De eadem differentia iterum, et de conciliis plenariis, synodique Nicæna prærogativa.

Unde quasi ex supererogatione superadjicio tibi quod item beatus Augustinus ad Januarium dicit (*epist.* 118): « Primo, inquires, tenere te volo quod est hujus disputationis caput, Dominum nostrum Jesum Christum, sicut ipse in Evangelio loquitur, leni jugo suo nos subdidisse et sarcinæ levi. Unde sacramentis numero paucissimis, observatione facilimis, significatione præstantissimis, societatem novi populi colligavit, sicut est baptismus Trinitatis nomine consecratus, communicatio corporis et sanguinis ipsius, et si quid aliud in scripturis canonicis commendatur, exceptis his quæ servitatem populi veteris pro congruentia cordis illorum et prophetici temporis onerabant, quæ et in quinque libris Moysis leguntur. Illa autem quæ non scripta sed tradita custodimus, quæ quidem toto terrarum orbe servantur, datur intelligi, vel ab ipsis apostolis, vel plenariis conciliis, quorum est in Ecclesia saluberrima auctoritas, commendata atque statuta retineri, sicuti quod Domini passio, et resurrectio, et ascensio in cælum, et adventus de cælo Spiritus sancti, anniversaria solemnitate celebratur, et si quid aliud tale occurrit, quod servatur ab universis quæcunque se diffundit Ecclesia. » Et in edicto Justiniani imperatoris, de rectæ fidei confessione, et refutatione hæresium quæ adversantur catholicæ Dei Ecclesiæ, a synodo quinta dictato, et ab eodem imperatore confirmato, scriptum est: « Oportet, inquit, etiam illud attendere eos qui veritatem perserutantur, quod forsitan in conciliis quædam a certis ibi convenientibus dicuntur, aut per favorem, aut per contrarietatem, aut per ignorantiam: nemo autem attendit ea quæ per partem a quibusdam dicuntur, sed sola illa quæ ab omnibus communi sensu diffiniuntur. Si enim aliquis secundum illos voluerit attendere hujusmodi contrarietates, unaquæque synodus invenietur semetipsam destruens. » Qua discretionem prudentius te intelligens Antiochena synodus, quam sanctus Hilarius, illo in carne vivens tempore quando celebrata fuit, in epistola ad imperatorem Constantium, et in libro de Synodis monstrat fuisse catholicam, quamque Chalcedonensis comprobat: et sciens, post tempora quorundam eorum, de quorum epistolis quædam collegisti et quædam dolo omisisti, habitum Nicænum concilium (*can.* 6), cui a sequentibus sanctis conciliis, sicut nihil contrarium est additum, ita ab eo nihil est abrogatum, nihil mutilatum vel immutatum,

licet a quibusdam non prævalentibus fuerit attentatum, constituisse ut per singulas provincias suis privilegia serventur metropolitanis ecclesiis, ita ut horum omnium, videlicet sibi commissorum, metropolitanus habeat potestatem, decrevit dicens (*conc. Antioch.*, *can.* 6): « Per singulas regiones episcopus convenit nosse, metropolitanum episcopum sollicitudinem totius provinciæ gerere, propter quod ad metropolim omnes undique, qui negotia videntur habere concurrant. » Et item (*can.* 13): « Nullus episcopus ex alia provincia audeat ad aliam transgredi, et ad promotionem ministerii aliquos in ecclesiis ordinare, licet consensum videantur præbere nonnulli, nisi litteris tam metropolitani, quam cæterorum qui cum eo sunt episcoporum, rogatus deveniat, et ad actionem ordinationis accedat. » Quod manifestum est de quolibet metropolitano, ne in provincia metropolitana alterius quod non est suum non petitus vel vocatus præsumat, et non de tuo metropolitano in tua parochia illi subjecta dicere. Unde et Innocentius ad Alexandrum Antiochenum episcopum (*epist.* 20): « Revolventes, inquit, auctoritatem Nicænae synodi, quæ una omnium per orbem terrarum mentem explicat sacerdotum, quæ censuit de Antiochena ecclesia, cunctis fidelibus, ne dixerim sacerdotibus, esse necessarium custodire, quia super diocesium suam prædictam ecclesias, non super aliquam provinciam, recognoscimus constitutum. » Et Bonifacius papa ad Hilarium Narbonensem episcopum (*epist.* 3): « Nulli, inquit, videtur incognita synodi constitutio Nicænae, quæ ita præcipit, ut eadem proprie verba ponamus: Per unamquamque provinciam jus metropolitanos singulos habere debere, nec cuiquam duas esse posse subjectas: quod illi, quia aliter credendum non est, servandum sancto Spiritu suggerente sibi met censuerunt. » Et paulo post: « Quod idcirco dicimus, ut advertat charitas tua, adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem semper expectet. » Et his consona Cælestinus: « Juxta decreta, inquit (*epist.* 1), canonum unaquæque provincia suo metropolitano contenta sit, ut decessoris nostri data ad Narbonensem episcopum continent constituta: nec usurpationi locus alicui sacerdoti in alterius concedatur injuriam. Sit concessis sibi contentus unusquisque limitibus, alter in alterius provincia nihil præsumat. » Unde et Africanum concilium ad Cælestinum papam scribit dicens (*post. conc. African.*): « Decreta Nicæna, sive inferioris gradus clericos, sive ipsos episcopos, suis metropolitanis aperitissime commiserunt. Prudentissime enim justissimeque viderunt, quæcunque negotia in suis locis ubi orta sunt finienda: nec unicuique provinciæ gratiam sancti Spiritus defuturam, qua æquitas a Christi sacerdotibus et prudenter videatur, et constantissime teneatur. » Et Leo ad Anatolium (*epist.* 56): « Illa Nicænorum canonum per sanctum vere Spiritum ordinata conditio nulla unquam est parte solubilis.

Nulla sibimet de multiplicatione congregationis synodalia concilia blandiantur, neque trecentis illis decem atque octo episcopis quantumlibet copiosior numerus sacerdotum, vel comparare se audeat, vel præferre : cum tanto divinitus privilegio Nicæna sit synodus consecrata, ut sive per pauciores, sive per plures ecclesiastica judicia celebrentur, omni penitus auctoritate sit vacuum, quidquid ab illorum fuerit constitutione diversum. » De cujus privilegio et beatus Ambrosius dicit (lib. 1 de Fide, cap. 9) : « Non humana industria, non compositione aliqua, trecenti decem et octo episcopi ad concilium convenerunt, sed et in numero eorum, per signum suæ passionis et nominis, Dominus Jesus suo probaret se adesse concilio, crux in trecentis, Jesu nomen in decem et octo est sacerdotibus. » — « Et mihi, inquit Hilarius, ipse ille numerus hic sanctus est, in quo Abraham victor regnum impiorum ab eo qui æterni sacerdotii est forma benedicitur. » Et item beatus Leo papa (epist. 36 Anatolio) : « Sancti illi et venerabiles patres, qui in urbe Nicæna sacrilego Ario cum sua impietate damnato, mansuras usque in finem mundi leges ecclesiasticorum canonum condiderunt, et apud nos in toto orbe terrarum in suis constitutionibus vivunt, et si quid usquam aliter quam illi statuere præsumitur, sine cunctatione cassatur. » Et hinc sanctus Leo ad Pulcheriam Augustam : « Contra statuta, inquit (epist. 58), canonum paternorum, quæ ante longissimæ ætatis annos in urbe Nicæna spiritalibus sunt fundata decretis, nihil cuiquam audere conceditur : ita ut si quis diversum aliquid decernere velit, se potius minuat, quam illa corrumpat. Quæ sit ut oportet a cunctis pontificibus intemerata serventur, per universas ecclesias tranquilla erit pax et firma concordia, nullæ de mensura honorum dissensiones, nullæ de ordinationibus lites, nullæ de privilegiis ambiguitates, nulla erunt de alieni usurpatione certamina ; sed æquo jure charitatis, rationabilis et morum officiorumque ordo servabitur, et ille vere erit magnus, qui fuerit totius ambitionis alienus. »

CAPUT XXVII.

De canonibus et sententiis ab eo prave intellectis et usurpatis.

Quod ergo de tua parochia, quasi ego ad aliquid in ea diffiniendum illam adire non possim, ex verbis Callisti et aliis, tuis compilationibus tecum non facientibus, affirmare conaris, prave intelligis. Sed his et aliis regularum constitutionibus invenies hoc observare debere unumquemque metropolitanum in provincia alterius metropolitani, quod tu tibi perverse arrogas de tua parochia metropolitana sedi Rhemorum subjecta. Unde ea quæ supra posui non meæ personæ arrogo, sed metropolitanae sedis dignitati ascribo : quia sicut beatus Leo dicit : « Etsi nunquam diversa sunt merita præsulum, jura amen permanent sedium, quibus possunt æmuli perturbationem aliquam fortassis inferre, non ta-

men possunt minuere dignitatem. » Sed nec sensu sacris canonibus concordante in metrica titulatione compilationis tuæ domno regi porrigendæ scripsisti :

Responsum a victo rite nec exigier ;

et mihi per comministros meos ad te directos remandasti, ne cogere te respondere, quandiu in custodia et absentia clericorum tuorum eras. Unde tibi tunc scripto respondi, et nunc ostendo tu, ut dixi, non recto sensu ponere ex sacris regulis, quod de non respondendo in tua excusatione dixisti, asserente sancto papa Hilario (in concil. Rom., c. 4) : « Nos, inquit, in nullo volumus severitatem ultionis exercere : sed qui in causis Dei contumacia vel contemptu deliquerit, aut ipse quod perperam fecit abolere noluerit, in se quidquid in alium non reseccarit inveniet. » Non enim hæc quæ egisti interdubia vel obscura secundum Leonis decreta poterant vel possunt ullo modo computari, ut inde locum defendendi te haberes, et tuis redonatus, regulariter vocatus ad synodum respondere deberes, sicut et in præcedentibus et in subsequentibus istius opusculi ex sacris regulis, et tu et quilibet alius qui legerit potest cognoscere : et ideo tibi scribere studui, ut quæ in causis Dei contumacia vel contemptu deliquisti, et quæ perpere commisisti, abolere curares, et factum tuum, quo male exordinasti, sicut idem Hilarius jubet de eo qui male ordinavit, ipse dissolveres : quatenus severitatem ultionis in te exerceri ab eis quorum interest non exigeres, et ego in me non invenirem quod in te non reseccare curaverim : quia, ut isdem dicit (in eodem conc., c. 1) : « Nulli fas est sine status sui periculo, vel divinas constitutiones, vel apostolicæ sedis decreta temerare : quia nos, qui potissimi sacerdotis administramus officia, talium transgressionum culpa respiciet, si in causis Dei desideres fuerimus inventi : quia meminimus, quod timere debemus, qualiter comminetur Dominus negligentiae sacerdotum : siquidem reatu majore delinquit, qui potiore honore perfruit, et graviora facit vitia peccatorum sublimitas dignitatum. » Scripsi ergo tibi secundum decreta Leonis, ut salubres suscipere curares hortatus, et nihil per contentionem agentes, sed ad omne studium devotionis unanimes, divinis et apostolicis constitutionibus pareremus, et in nullo pateremur providentissima canonum decreta violari. Tu autem cogitans consilia quæ non poteris stabilire, inobedientiam tuam, ne corrigas quæ perpere admisisti, et effrenationem desideratæ libertatis, indebite, ut non sis metropolitano subjectus, de appellatione, et non reddenda compellatus de injustis judiciis tuis responsione, secundum sensum tuum, sed non rectum, interpretata vis palliare : cum sicut Africæ provinciæ canones manifeste demonstrent a quibus non licet provocari, ita Sardinenses canones patenter ostendant, appellatio episcopi ad sedem apostolicam quando, ubi, et pro

quibus fieri et qualiter exsequi debeat, sed et Innocentius, ac Bonifacius, atque Leo id ipsum decernant : qui etiam et pro quibus appellans constringi non debeat, leges concordantes regulis eloquuntur. Attende igitur convenienter quod item idem beatus Leo Anatolio Constantinopolitano episcopo extolenti se supra mensuram suam scripsit dicens (*epist.* 56) : « Virum catholicum, et præcipue Domini sacerdotem, sicut nullo errore implicari, ita nulla oportet cupiditate corrumpi. Dicente quippe sancta Scriptura : *Post concupiscentias tuas non eas, et a voluntate tua vetare (Eccli. xviii)*, multis mundi hujus illecebris, multis vanitatibus resistendum est, ut veræ continentiae obtineatur integritas, cujus prima est labe superbia, initium transgressionis et origo peccati. Quoniam mens potentia avida, nec abstinere vetitis, nec gaudet concessis, dum in ordinato pravoque progressu excrescunt culpæ, quæ toleratæ sunt studio reparandæ fidei et amore concordia. » Quapropter revoca oculos mentis tuæ a pravis progressionibus, et rectos gressus fac pedibus intentionis tuæ et actionum tuarum, ut qui nunc de te gemimus, de te in Domino gaudeamus. Et attende quod beatus Gregorius ad Felicem episcopum in Serdica scripsit (*lib.* iv, *epist.* 10) : « Qualiter, inquit, obedientia vel sit reverentia præpositis exhidenda, ex tuis quoque subjectis ipse non ambigis. In qua re valde est utile, si id quod disciplinæ vigor imponit, nullo cogente humilitas laudanda servaverit. Pervenit ad nos itaque quod fraternitas tua Joanni fratri nostro, primæ Justinianæ episcopo, secundum morem constitutum parere despiciat, et nec decreto ejus, nec relationi juxta consuetudinem voluisset subscribere. Quod si ita est, contristamur, quia superbiæ de te manifestæ præbes indicium, quod quam sit præcipue in sacerdote culpabile, divinæ clementia admonitionis eloquitur. Propterea hortamur, ut mentis tumore deposito, antedicto fratri et coepiscopo nostro humilem te exhibere et parere non desinas, quatenus et Deus gaudeat in fraternitatis vestræ concordia, et alii de te sumant bonitatis exemplum. Nam si, quod non credimus, te in superbia permanere contigerit, districtam canonicamque disciplinæ correctionem contumaciæ tuæ scito sacros canones ulciscenter imponere. Bene ergo facis, talem te sponte salubri consideratione præbere, qualis esse canonica coercionem exigente compelleris. Nam nec tibi denuo post hanc nostram admonitionem licebit ad tuæ voluntatis arbitrium contra morem majoribus tuis inobedientem existere, nec nos tantæ indisciplinae ecclesiasticæ cognoscas dissimulare vel differre vindictam. » Et item idem S. Gregorius ad Vincentium, et cæteros episcopos (*lib.* vii, *ind.* 11, *epist.* 8) : « Hortamur, inquit, fraternitatem vestram, ut si quemquam vestrum pro causis propriis ubicunque longius compulerit ambulare necessitas, a metropolitanano vestro, secundum indictam a sanctis Patribus regulam, petere licentiam debeatis. nec

eum postponere in aliquo præsumatis, excepto si, quod non optamus, contra eundem metropolitanum vestrum vos habere aliquid causæ contingat, ut ob hoc sedis apostolicæ judicium requiratis. Nam iis qui petere festinant licentiam, quod scitis, per canones etiam antiquorum Patrum institutione permissum. » Manifestum est enim, qui canones hanc licentiam a metropolitanis petendam ab episcopis decreverunt. Quin Antiochenum concilium, a synodo Chalcedonensi favorabiliter comprobatum. Sed et Sardicensis canones dicunt (*can.* 9) : « Ut de quolibet provincia episcopi ad eum fratrem et coepiscopum nostrum preces mittant, qui in metropoli consistit, ut ille et diaconum ejus, et supplicationes destinet, tribuens commendatitias epistolas, et reliqua. De judicio etiam apostolicæ sedis expectando adversus metropolitanum, si episcopo necesse fuerit, iidem Sardicensis canones decreverunt, sicut et Innocentius ad Vitricium Rothomagensem episcopum patenter ostendit, et Hilarus papa dicit (*epist.* 8 ad *Metropol. Gallia*) : « Illud etiam non potuimus præterire quod sollicitudine diligentiore curandum est, ne præter metropolitanorum suorum litteras aliqui episcopi ad quamlibet provinciam audeant proficisci, quod etiam in omni genere officii clericalis per singulas debet ecclesias custodiri. » Et sanctus Leo ad Theodorum Forojuensem episcopum dicit (*epist.* 59) : « Sollicitudinis tuæ is ordo esse debuerat, ut cum metropolitanano tuo de eo quod quaerendum videbatur esse conferres, ac si id quod ignorabat dilectio tua etiam ipse nesciret instrui vos pariter posceretis : quia in causis, quæ ad generalem observantiam pertinent omnium Domini sacerdotum, nihil sine primatibus oportet inquiri » Et Symmachus ad Cæsarium Arelatensem episcopum (*epist.* 5) : « Si quilibet, inquit, episcopus metropolitanano pontifici, juxta canonum diffinitionem vocatus, obtemperare noluerit, noverit succidendum se, quod non optamus, ecclesiasticæ disciplinæ. » Et Africae provinciæ canones dicunt (*can.* 43) : « Ut episcopus a primatu suo vocatus ad synodum competenter occurrat. Quod si non potuerit occurrere, nisi rationem impedimenti suam apud suum primatem reddiderit, Ecclesiæ suæ communionem debere esse contentum. » Et (*can.* 20) : « Qui non fuerit concors circa metropolitanam ecclesiam, et circa sacerdotale consortium, sed inflatus, et ab hoc consortio separatus, putat propriæ plebi incubandum, et nonnuquam conventum ad concilium venire detrectat, circa hunc non tantum diocesim non esse servandam, verum et de propria ecclesia, quæ illi male favorit, omnimodo adnitendum ut etiam auctoritate publica rejiciatur atque ab ipsa principali cathedra removeatur. » Et (*can.* 190 *Carthag.*) : « Si accusatus ad rationem reddendam venire refugerit, et excommunicatus a primatu suo exstiterit, tempore quo non communicat, nec in sua Ecclesia vel parochia communicet. » Et sanctus Hilarus papa ad Leonem

tium, et cæteros episcopos scribit (*epist.* 2) : « Quia non minus in sanctorum traditionum delinquitur sanctiones, quam in injuriam ipsius Domini prosilitur. » Et Dioscorus in synodo Chalcedonensi, sicut in gestis ejusdem concilii, sed et in edicto Justiniani super quintam synodum demonstratur, non quia in fidem peccaverit, sed propter solum ecclesiasticum ordinem, et quia contra summ archiepiscopum sacris canonibus obvians rebellaverat, est damnatus. Et Acacius Constantinopolitanus episcopus propter prævaricationem Nicæni concilii a Felice papa est condemnatus, sicut idem Felix ad eum scripsit dicens (*epist.* 4) : « Multarum transgressionum reperiris obnoxius, et in venerabilis Nicæni concilii contumelia es sæpe versatus. » Hæc mentis oculo perspice, et ne illa, quod absit, incurras solertissime cave.

CAPUT XXVIII.

De male ab eo excommunicatis : qui et qualiter excommunicari debeant, et qui ordo in judiciis ecclesiasticis observandus.

Nam cum dicat beatus Petrus apostolus : *Si bene facientes patienter sustinetis, hæc est gratia apud Deum (1 Petr. II),* causa injuriarum tuarum, sicut in petitione mihi ab ecclesia Laudunensi data continetur, presbytero et diacono, ac reliquis clericis non accusatos, nec confessos, neque convictos, ab omni ecclesiastico officio excommunicasti, et ut nemo sacra missarum officia in tua parochia celebraret, interdixisti : cum sacri canones neminem ab officio removeri permittant, nisi aut sponte confessum, aut regulariter convictum, aut eum qui regulariter vocatus ad reddendæ rationis judicium venire noluerit, sicut scriptum est in capitulo 19 Carthaginensis concilii de episcopis, et in 20 de presbyteris et diaconibus, ac reliquis clericis. « Si, inquit (*can.* 29), presbyteri vel diaconi fuerint accusati, adjuncto sibi ex vicinis locis proprius episcopus legitimo numero collegarum, quos ab eodem accusati petierint, id est una secum in presbyteri nomine sex, in diaconi tres, ipsorum causas discutiant, eadem dierum et dilationum, et a communione remotionum, et discussione personarum inter accusatores et eos qui accusantur forma servata. » Scilicet sicut de episcopis in præcedenti capitulo est diffinitum : reliquorum autem clericorum causas etiam solus episcopus loci agnoscat et finiat. Et item (*can.* 28) : « Presbyteri, diaconi, vel cæteri inferiores clerici, in causis quas habuerint, si de judiciis episcoporum suorum questi fuerint, vicini episcopi eos cum consensu sui episcopi audiant, et inter eos diffiniant : vel ad primates suarum provinciarum provocent, sicut et de episcopis sæpe constitutum est. » Et secundum Antiochenos canones (*can.* 9) : « Ad metropolim omnes undique qui negotia videntur habere concurrant. » Et (*can.* 20) : « In canonicis conciliis adsint presbyteri, et diaconi, et omnes qui se læsos existimant, et synodi experiantur examen. Nullis vero liceat apud se celebrare concilia, præter eos quibus metropolitana jura videntur esse commissa. » Et hinc sanctus

Augustinus, doctor famosissimus, atque ab apostolica sede receptissimus, qui Carthaginensi concilio, in quo hæc quæ eo præmisimus, apostolica auctoritate firmato interfuit, et plenissime sensum novit, quo eadem synodus capitulum illud constituit de quo in epistola ad clerum et plebem Hipponiensium inter alia dicit (*epist.* 137) : « Nuper in concilio episcoporum constitutum est, nullum clericum, qui nondum convictus est, suspendi a communione debere, nisi ad causam suam examinandam se non præsentaverit. » Ipsam autem præsentationem idem demonstrat concilium (*conc. Carthag., can.* 19), videlicet, « ut aut ipse accusatus, ad causam suam dicendam electorum judicium die statuta litteris evocatus occurrat, aut aliquas veras necessitatis causas probet, quibus occurrere non potuisse manifestum sit. » Et attendendum, quia dicit *non potuisse*, et non dicit *non voluisse*. Sic et de accusatore dicit : « Ut nec ipsi adimatur facultas causæ suæ peragendæ, si se ad diem occurrere non valuisse probaverit. » Sic et iterum de accusato, si ad concilium universale anniversarium occurrere noluerit, dicit : « Quod si accusatus vel accusator occurrere voluit et non valuit, excusabilem quemlibet eorum synodus esse voluit. » Hoc quippe Africana synodus patenter ostendit, dicens (*can.* 46) : « Ut si intra annum excommunicationis causam suam purgare contempserit. » Unde et Carthaginense concilium dicit (*can.* 19) : « Quisquis episcoporum accusatur, ad primatem provincie ipsius causam deferat accusator, nec a communione suspendatur cui crimen intenditur, nisi ad causam suam dicendam electorum judicium die statuta litteris evocatus minime occurrerit. » Quæ sententia evidenter ostenditur, quia accusator accusare non potest, nisi in accusatione præsens fuerit; potest autem accusare absentem : et qui non potest accusari nisi per præsentiam accusatoris, potest absens judicari, imo etiam ab his qui hoc decreverunt jam judicatus est, si ad judicium litteris evocatus secundum quod decretum est non occurrerit, vel aliquas veras necessitatis causas, quibus eum occurrere non potuisse manifestum sit, non probaverit. Similiter ut de episcopo, ita et de presbytero, vel diacono subsequenti capitulo demonstratur. Hinc Bonifacius ad septem provincias scripsit, dicens de Maximo (*epist.* 2) : « Si adesse voluerit, præsens si confidit ad objecta respondeat : si adesse neglexerit, dilationem sententiæ de absentia non lucretur. Nam manifestum est confiteri eum de crimine, qui indulto et toties delegato judicio, purgandi se occasione non utitur. »

Qui autem ad accusationem admitti non debeant, leges dicunt : « Sane hi qui crimina sua in questione confessi sunt, de aliis si dicere voluerint, a iudice non credantur : quia jure et legibus constitutum est, ut spontanea professione reus reum non faciat, neque illi de altero credatur, qui se criminis esse confessus est. » Et item : « Non credendum est contra alios eorum confessioni, qui in criminibus accusantur, nisi se prius probaverint innocentes, quia

periculosa est, et admitti non debet rei adversum quemcunque professio. » Et concilium Africanum demonstrat : « Qui postea, inquit (can. 96, 97), quam excommunicatus fuerit, in ipsa adhuc excommunicatione constitutus, sive sit clericus, sive sit laicus, accusare voluerit; omnesque servi, vel proprii liberti, ad accusationem non admittantur, vel omnes quos ad accusanda publica crimina leges publicæ non admittunt; omnes etiam infamiæ maculis aspersi, id est histriones, aut turpitudinibus subjectæ personæ; hæretici etiam, sive pagani, seu Judæi : sed tamen omnibus, quibus accusatio denegatur, in causis propriis accusandi licentia non est neganda. » (Can. 98.) « Et quotiescunque clericis ab accusatoribus multa crimina obijciuntur, et unum ex ipsis, de quo prius egerit accusator, probare non valuerit, ad cætera jam non admittatur. Testes autem ad testimonium non admittendos, qui nec ad accusationem admitti præcepti sunt, vel etiam quos ipse accusator de sua domo produxerit : ad testimonium autem intra annos quatuordecim ætatis suæ non admittantur. » Et sanctus Augustinus dicit : « Quamvis, inquit, vera sint quædam, non tamen judici facile credenda sunt, nisi certis indicis demonstrentur. » Qui fecit quod docuit, cum in reddita ratione ad primatem suæ provinciæ Xantippum scribens, quemdam presbyterum suum Abundantium a se judicatum esse demonstrat, de eo dicens (epist. 236) : « Insinuo prudentiæ tuæ, Abundantium quemdam in fundo Strabonianensi pertinente ad curam nostram ordinatum fuisse presbyterum. Qui cum non ambulare vias servorum Dei, non bonam famam habere cœperat, qua ego conterritus, non tamen temere aliquid credere voleas, sed plane sollicitior factus, operam dedi, si quomodo possem ad aliqua malæ conversationis ejus certa indicia pervenire. Ac primo comperi, eum pecuniam cujusdam rusticani de vino apud se commendato intervertisse, ita ut nullam inde posset probabilem reddere rationem. Deinde convictus atque confessus est, die jejunii natalis Domini, quo etiam Gippitana ecclesia sicut et cæteræ jejunabat, cum tanquam perreكتورus ad ecclesiam suam valefecisset collegæ suo presbytero Gippitano hora fere quinta, et cum secum nullum clericum haberet, in eodem fundo restitisse, et apud quamdam malæ famæ mulierem, et prandisse et cœnasse, et in una domo mansisse, et hoc negare non potuit. Nam quæ negavit Deo dimisi, quæ occultare permissus non est, judicavi. Timui ei committere ecclesiam, præsertim inter hæreticorum circumlatrantium rabiem constitutam. Hæc autem me prudentiæ tuæ præcipue intimare oportebat, ne aliqua tibi fallacia subreperet. » Sciebat enim iste vir Domini canones, et non contemnebat secundum eosdem sacros canones, primati suo, minori scientia et forte merito, sed potiori loco subdi, obaudiens dicentem Apostolum : *Obedite præpositis vestris in Domino* (Hebr. XIII). Ubi autem inter accusatores et

A accusatos causa debeat agitari, Carthaginense concilium statuit dicens (can. 30) : « Ut accusatus vel accusator in eo loco unde est qui accusatur, locum sibi eligat proximum, quo non sit difficile testes producere ubi causa finiatur; » et hinc leges dicunt : « Criminum discussio ibi agitanda est, ubi crimen admissum est : nam alibi criminum reus prohibetur audiri. » Et item : « Si quis adversarium aut repetitione, aut criminis objectione pulsaverit, in provincia in qua consistit ille qui pulsatur, suas exerat actiones, nec æstimet adversarium suum alibi aut longius ad iudicium pertrahendum. Ille vero qui pulsatus fuerit si iudicem suspectum habuerit, liceat appellare. » Et Carthaginense dicit concilium (can. 15) : « Ut a quibuscunque iudicibus ecclesiasticis ad alios iudices ecclesiasticos, ubi est major auctoritas, fuerit provocatum, non eis obsit quorum fuerit soluta sententia, si convinci non potuerint, vel inimico animo iudicasse, vel aliqua cupiditate aut gratia depravari. Sane si ex consensu partium electi fuerint iudices, etiam a pauciori numero quam constitutum est, non liceat provocari. » Qualiter autem sententia fini debeat, leges et sacri canones monstrant, dicentes ut vel in synodo, vel per iudices, sive quos conquiritantes primates dederint, sive quos ipsi vicinos ex consensu delegerint. » Deputati autem iudices episcopi, ut Africanum dicit concilium (can. 88), ab illo primato sunt dandi, in cujus provincia causa versatur : si autem ex communi placito conquiritantes vicinos iudices elegerint, aut unus eligatur, aut tres, et si tres elegerint, aut

C omnium sententiam sequantur, aut duorum. » Et Chalcedonense concilium dicit (can. 9) : « Si quis clericus adversus clericum habet negotium, non deserat episcopum proprium, et ad sæcularia percurrat iudicia; sed prius actio ventiletur apud episcopum proprium, vel certe consilio ejusdem episcopi, apud quos utræque partes voluerint, iudicium continebunt. Si quis autem præter hæc fecerit, canonicis correptionibus subiacebit. » Et sanctus Innocentius ad Victricium episcopum : « Si quæ, inquit (epist. 1), causæ, vel contentiones inter clericos tam superioris ordinis quam etiam inferioris fuerint exortæ, ut secundum synodum Nicænam congregatis ejusdem provinciæ episcopis iurgium terminetur : nec alicui liceat (sine præiudicio tamen Romanæ Ecclesie, cui in omnibus causis debet reverentia custodiri), relictis his sacerdotibus, qui in eadem provincia Dei Ecclesiam nutu divino gubernant, ad alias convolare provincias. Quod si quis forte præsumperit, et ab officio cleri submotus, et injuriarum reus ab omnibus iudicetur. Si autem majores causæ in medio fuerint devolutæ, ad sedem apostolicam, sicut synodus statuit, et vetus consuetudo exigit, post iudicium episcopale referantur. »

Et quia sicut duo sunt peccata, et duo genera peccatorum (aut enim in Deum peccat homo, aut in hominem), et duo sunt adventus Domini, qui venit peccatores salvos facere. *Omnes enim pecca-*

verunt, et egent gloria Dei (Rom. III). unus occultus, et alter manifestus : unus, de quo scriptum est : *Descendit sicut pluvia in vellus (Psal. LXXI)*, et alter de quo scriptum est : *Deus manifeste veniet (Psal. XLIX)*; unus de quo dicitur : *Venit filius hominis, non ut judicet mundum, sed ut salvetur mundus per ipsum (Joan. III)*, alter quando venit *judicare vivos et mortuos et sæculum per ignem*; ita duo sunt judicia, unum occultum, et alterum manifestum; et duo judiciarii ordines, unus de quo dicit Apostolus : *Si quis frater nominatur fornicator (I Cor. v)*, etc., eam nominationem intelligi volens, ut dicit Augustinus in libro de Penitentia (cap. 3), quæ fit in quemquam, cum sententia ordine judiciario et cum integritate profertur. Noluit enim hominem ab homine judicari ex arbitrio suspitionis, vel etiam extraordinario usurpato judicio : sed potius ex lege Dei secundum ordinem Ecclesiæ, sive ultro confessum, sive accusatum atque convictum. Nam si nominatio sufficit, multi damnandi sunt innocentes, quia sæpe falso in quemquam crimen nominatur. Qui ordo judiciarius qualiter exsequi debeat, beatus Gregorius in commonitorio ad Joannem defensorem euntem in Hispanias dicit (*lib. XI, ind. 6, epist. 52*) : « Videlicet, ut alii sint accusatores, et alii testes : deinde causarum qualitas est examinanda, et ut præsentem accusato sub jurejurando dicatur testimonium scriptis allegatum, et accusatus respondendi et defendendi se locum habeat, et examinatio personarum accusantium ac testificantium regulariter fiat. » Quem judiciarii ordinis modum etiam Dominus inquit, cum in resuscitatione puellæ in domo jacentis mortuæ, ac si in revelatione non omnibus causæ notæ, quosdam discipulorum suorum testes, sed et patrem et matrem puellæ secum adhibuit (*Luc. VII*). Alter vero judiciarii ordinis modus est eorum, quæ non sub paucorum notitia, quasi adhuc in cubiculo contexta, ut patrata credantur testibus indigent, sed quasi jam extra portam civitatis multa turba comitante elatus (*Luc. VI*), ad multorum cognitionem delata esse noscuntur. De quo judiciarii ordinis modo, dicit Apostolus : *Ego quidem absens corpore, præsens autem spiritu, jam judicavi ut præsens eum qui sic operatus est, in nomine Domini nostri Jesu Christi, congregatus vobis et meo spiritu, cum virtute Domini Jesu, tradere hujusmodi hominem Satanæ in interitum carnis (I Cor. V)*; et paulo superius : *Ut tollatur de medio vestrum qui hoc opus fecit (ibid.)*. Unde Ambrosius « cognito opere pellendum peccantem fuisse de coetu fraternitatis » dicit. Omnes enim crimen ejus sciebant, in qua re neque testibus opus erat, neque tergiversatione aliqua poterat tegi crimen. De patratore autem manifestorum, et si ad judicium adduci non potest, Bonifacius papa ad septem provincias decernens dicit de Maximo, qui conventus etiam devitabat, et adesse minime volebat : « Nullus, inquit (*epist. 2*), dubitat, quod ita judicium nocens subterfugit, quemadmodum ut absolvatur qui est innocens querit. Sed astuta cavil-

latio eorum, qui versutias agendi credunt esse consilia, nunquam innocentiae nomen accipiet. Confiteatur enim de omnibus quisquis se subterfugere iudicium dilationibus putat. Nihil enim interest utrum in præsentem examine omnia quæ dicta sunt comprobentur, cum ipsa quoque pro confessione procurata toties constet absentia. Quod si adesse neglexerit, dilationem sententiæ de absentia non lucretur. » Sic Cœlestinus (*epist. 1*) de Daniele Galliarum quondam episcopo judicavit. « Et quia nemo præpropere, vel præpostere, scilicet non commonitus, neque conventus est judicandus, de conventionem hujusmodi patratore manifestorum criminum lex dicit : Quicumque tribus auctoritatibus iudicis conventus, vel tribus edictis ad iudicem fuerit provocatus, aut uno pro omnibus peremptorio, id est, quod causam extinguit, fuerit evocatus, et præsentiam suam apud eum iudicem a quo ei denuntiatum est exhibere noluerit, adversus eum quasi in contumacem judicari potest, quinimo nec retractari per appellationem negotia possunt, quoties in contumacem fuerit iudicatum. »

Et hanc sententiam de tribus auctoritatibus conventis ex evangelica veritate, Cœlestinus ad Nestorium scribens, et Ephesina synodus de eodem decernens, et beatus Gregorius ad Joannem scribens comprobant. De peremptorio autem scripto, Africanum concilium monstrat de Cresconio (*can. 15*) : « Ut si conventus respiscere detrectaverit suo contemptu et contumacia faciente, auctoritate judiciaria protinus excludatur. » Et item beatus Gregorius de sententia in contumacem scribens ad Maximum præsumptorem Salonitanum episcopum dicit (*lib. V, epist. 3*) : « Hortamur ut ad nos venire omni postposita excusatione festines, quatenus servata justitia, hæc de quibus accusaris et cognoscere et finire secundum canonica instituta Christo revelante possimus. Ita autem fac, ut ad veniendum amplius jam moras non ingeras, ne ipsa te magis absentia obnoxium his quæ dicuntur assignet, et nos in te hæc res, non solum propter dicta crimina quæ purgare subterfugis, sed etiam propter inobediendiæ culpam, durius scilicet ut in contumacem cogat ex concilio ferre iudicium. » Et Africanum concilium (*can. 67*), ad suggestionem vel postulatum Laurentii episcopi, post recitatam schedulam quam obtulit Placentinus : « Debuisset quidem ex sancto concilio adversus contumaces episcopos, qui præcepti fuerant a primate suo ut occurrerent ad concilium, et non venerunt, secundum mensuram sacerdotalem ferri sententiam; sed servata ecclesiastica mansuetudine, dati sunt de concilio electi iudices, et missæ sunt litteræ ad eorundem episcoporum primatem. » Qualiter autem examinatis omnibus et ad liquidum cognitis, sententia regulariter ac legaliter proferri debeat, et ecclesiasticæ et publicæ leges demonstrant dicentes : « Observare iudices specialiter debent, ut in omnibus causis sententia, quæ deliberata fuerit, constitutis pariter partibus recitetur, ut ab his a quibus causa dicta est ad integrum quæ dicta fuerit senten-

tia cognoscatur. Et item: « Quidquid presentibus partibus in causis fuerit ordinatum, habebit plenissimam firmitatem, nec poterit immutari. » Et item: « Ea quæ, altera parte absente decernuntur, vim rerum judicaliarum non obtinent. » Et item, quod et sanctus Gregorius in commonitorio ad Joannem defensorem euntem in Hispanias ex fegibus novellæ constitutionis capitulo decimo sexto de testibus posuit, et canonicum esse decrevit: « Hoc quoque, inquit, sapius agnovimus, quoniam quidam, aut apud locorum defensores, aut apud clarissimos provinciarum iudices, aut etiam ut assolet hic apud clarissimum magistrum census ingrediuntur et queruntur, tanquam ab alio passi aliquid contra leges, aut aliter injustitiam sustinentes, aut damnificati testes volunt producere. At ne postea objiciatur eis quia per unam partem gesta confecta sunt, oportet et illum qui impetitur, in ipsa civitate constitutum ubi testimonia dantur, admonitum a iudice sive a defensore, advenire aut audire testes. Si vero noluerit advenire, sed contempserit ut ex hoc ab una parte testimonia adversis aliam inutilia sint, sancimus hujusmodi testimonia ita valere, tanquam si non ex una parte consistenter, sed etiam ipso præsentem fuissent facta. Si enim repudiaverit, et venire noluerit et audire quæ deponuntur, cum utique in publico sit et non ex inevitabili quadam necessitate venire non possit, æqualiter erunt tanquam si advenisset, et nulla utilitas ex contemptu suo ei adhibebitur, sed videbuntur quidem in utriusque præsentia facta. » « Ecce, inquit sanctus Gregorius, admonendus est semper adversarius, ut ad audiendos testes adveniat, alioquin necesse est ut quod contra leges actum est firmitatem non habeat. » Quales autem testes, vel cujus opinionis, ad testimonium admittendi sunt, plurimæ leges ostendunt, quæ pene nulli habentur incognitæ, quæ etiam et illud sanciant: *Ut vilissimis testibus etiam sine corporali discussione credi non debeat*; et item in libro sexto, titulo decimo nono, inter alia præcipitur: *Ut sententia, si sine scripto dicta fuerit, nec nomen sententiæ habere mereatur*. Quod legale decretum et in passione Domini, super cujus caput posuerunt causam ipsius scriptam, et in martyrum passionibus, quando iudicati sunt, observatum multoties legimus, et legatos apostolicæ sedis, auctoritate Leonis papæ, Dioscorum in Chalcedonensi concilio, et Felicem Acacium, et Silverium papam Vigilium, et cæteros Romanæ sedis pontifices per scripturam plures qui respicere noluerunt legimus condemnasse.

CAPUT XXIX.

Quid canones statuunt de irregulariter excommunicatis.

Vide, frater, si has sacras leges fuisti secutus, quando presbyteros et diaconos parochiæ tuæ ab officio ecclesiastico generaliter excommunicasti, cum certissimum atque notissimum et nobis et omnibus in hac Rhemensi provincia habeatur, quod nec accusati, nec confessi, neque convicti de aliquo crimi-

ne fuerint. Quia vero certum est te non secundum has regulas iudicasse, nec ex consensu partium electus in hac iudicatione iudex fuisti, a te iudice ecclesiastico ad me majoris auctoritatis iudicem ecclesiasticum iudicati, sicut et fecerunt, debuerant provocare, et tua injusta sententia a me est competenter soluta *Placuit*, inquit Carthaginense concilium, *ut a quibuscumque iudicibus ecclesiasticis ad alios iudices ecclesiasticos, ubi est major auctoritas, fuerit provocatum, non eis obsit quorum fuerit soluta sententia, si convinci non potuerint, vel inimico animo iudicasse, vel aliqua cupiditate, aut gratia depravati, et reliqua*. Quæ sententia utrum te an non tangat, ratio ipsa demonstrat. Nunc videamus quid sacri canones dicant de his, qui a singulis episcopis provincialibus, pro incognitis causis primati provinciæ et cæteris episcopis excommunicantur. « De his, inquit Nicæni canones (*can. 5*), qui communione privantur, seu ex clero seu ex laico ordine, ab episcopis per unamquamque provinciam, sententia regularis obtineat, ut hi qui abiciuntur ab aliis non recipiantur; requiratur autem, ne pusillanimitate, aut contentione, vel alio quolibet episcopi vitio videatur a congregatione seclusus. Ut hoc ergo decentius inquiratur, bene placuit annis singulis per unamquamque provinciam bis in anno concilia celebrari, ut communiter omnibus simul episcopis congregatis provinciæ, discutiantur hujusmodi quæstiones, et sic qui suo peccaverunt evidenter episcopo, excommunicati rationabiliter ab omnibus astimentur, usquequo vel in communi, vel episcopo placeat humaniorem pro talibus ferre sententiam. » Et Antiochenum concilium (*can. 6*): « Si quis a proprio episcopo communione privatus est, non ante suscipiatur ab aliis, quam suo reconcilietur episcopo, aut certe ad synodum quæ congregatur occurrens pro se satisfaciatur, et persuadens concilio sententiam suscipiat alteram. Hæc autem definitio maneat circa laicos, et presbyteros, et diaconos, omnesque qui sub regula esse monstrantur. » Et Carthaginense concilium, quod in capitulo vigesimo dixerat, ut statuto numero uniti episcopi cum proprio episcopo presbyterorum et diaconorum causas terminarent, reliquorum clericorum querelas solus episcopus cognosceret et finiret, capitulo vigesimo octavo dicit: « Ut presbyteri, diaconi, vel cæteri inferiores clerici, in causis quas habuerint, si de iudiciis episcoporum suorum questi fuerint, vicini episcopi eos cum consensu sui episcopi audiant, et inter eos definiant adhibiti ab eis episcopi. Quod si et ab eis provocandum putaverint, non provocent ad transmarina iudicia, sed ad primates suarum provinciarum, sicut et de episcopis sæpe constitutum est. Ad transmarina autem qui putaverint appellandum, a nullo intra Africam in communionem suscipiantur. » Et Africanum concilium capitulo nonagesimo secundo hæc eadem diffinivit. Qui canones propter longinquitatem primatum, ad finitimos episcopos, presbyteros, vel diaconos, ac reliquos clericos præcipiunt

provocare, sicut iidem canones aperte demonstrant in capitulo de visitandis tempore concilii provincialis, et in eo ubi Carthaginense concilium dicit (*can. 7*): « Ut unaquæque provincia propter longinquitatem primatem habeat proprium. » Unde et Mauritania Sifensis postulavit primatem provinciae Numidiæ, ex ius cœtu separatur, ut suum habeat primatem, nempe, consentientibus omnibus primatibus provincialium Africanarum, vel omnibus episcopis propter longinquitatem habere permissa est. Quapropter in unaquæque provincia quæ primatem habet, omnes qui negotia videntur habere, secundum Antiochenos canones, ad metropolim debent concurrere: quia, ut Africanum concilium ad Cælestinum papam scribit (*can. 9*): « Decreta Nicæna, sive inferioris gradus clericos, sive episcopos ipsos, suis metropolitanis pertissime commiserunt. Prudentissime enim iustissimeque viderunt quæcunque negotia in suis locis ubi orta sunt finienda, nec unicuique provincie rationem sancti Spiritus defuturam, quæ æquitas a Christi sacerdotibus et prudenter videatur, et constantissime teneatur: maxime quia unicuique concessum est, si iudicio offensus fuerit cognitorum, ad concilium suæ provincie vel etiam universale provocare. »

Quod et Innocentius ad Victorium ex Nicænis decrevit canonibus, et ex eis Bonifacius ad Hilarium Narbonensem episcopum dicit (*epist. 1*): « Advertat, quærens, charitas tua adeo nos canonum præcepta errare, ut ita constitutio quoque nostra diffiniat, utatenus metropolitani sui unaquæque provincie in omnibus rebus ordinationem semper expectet »; et similiter Cælestinus, et alii sedis Romanæ pontifices decreverunt. Sardicensis quoque canones, propter præfatam longinquitatem primatum, ad finitimos episcopos, veluti et Africæ provincie canones, provocare permiserunt, sicut et in eisdem Sardicensibus canonibus demonstratur, memorante Osio importunitates Africanorum episcoporum, quos dicit se agnovisse sanctissimi fratris et coepiscopi sui Grati alutaria consilia spernere atque contemnere. Unde in præfatio Sardicensi concilio scriptum est (*can. 17*):

Osius episcopus dixit: Quod me adhuc movet retinere non debeo, si episcopus quis forte iracundus, quod esse non debet, cito et aspere commovetur adversus presbyterum, sive diaconum suum, et excommunicare eum de Ecclesia voluerit, providendum est et innocens damnetur, aut perdat communionem; et ideo habeat potestatem is qui abjectus est, ut episcopos finitimos interpellat, et causa ejus audiat, ac diligentius tractetur, quia non oportet ei negare audientiam roganti. Et ille episcopus, qui iuste aut injuste eum abiecit, patienter accipiat ut negotium discutatur, ut vel probetur sententia ejus plurimis, vel emendetur. Tamen priusquam omnia diligenter et fideliter examinentur, eum qui fuerat a communionem separatus, ante cognitionem nullus debet presumere ut eum communioni societ. » Attendum quippe nobis est quod discretissime sacri

A canones dicunt, ut eum qui fuerat a communionem separatus, ante cognitionem nullus debet presumere ut eum communioni societ. Quia sicut sanctus Leo ad Rusticum Narbonensem episcopum scribit (*epist. 95*, in præfat.): « In his quæ vel dubia fuerint aut obscura, id noverimus sequendum, quod nec præceptis evangelicis contrarium, nec decretis sanctorum invenitur adversum. » Et item: « Quia sacerdotum Domini matura volumus esse iudicia, nihil possumus in rebus incognitis in cujusquam partis præjudicium diffinire, priusquam universa quæ gesta sunt veraciter audiamus. » Et item alibi egregie dicitur: « Non esse justum mediatorem, qui in incertis sic unam partem audit, ut alteri parti nihil reservet. » Et sanctus Gregorius: « Ira, inquit, sacerdotis nequaquam debet esse præceptis et perturbata, sed magis ex consilii gravitate mitiganda. » Et item: « Ad proferendam, inquit (*Moralium l. xix, c. 14*), sententiam nunquam præcipites esse debemus, nec temere indiscussa iudicemus, ne quælibet mala audita nos moveant, ne passim dicta sine probatione credamus. Quod profecto perpetrare pertimescimus, si auctoris nostri subtilius facta pensemus. Ipse quippe, ut nos a præcipiti sententiæ prolotione compereret, cum omnia nuda et aperta sint oculis ejus, mala tamen Sodomæ noluit audita iudicare, qui ait: *Descendam, et videbo utrum clamorem, qui venit ad me, opere compleverint, an non est ita, ut sciam* (*Gen. xviii, 21*). Omnipotens itaque Dominus, et omnia sciens, cur ante probationem quasi dubitat, nisi ut gravitatis nobis exemplum proponat, ne mala hominum ante presumamus credere quam probare? » De manifestis autem et plurimis cognitis mox ibidem subsequitur:

C « Ecce per angelos ad cognoscenda mala descendit, moxque facinorosos percudit; atque ille patiens, ille mitis, ille de quo scriptum est: *Tu autem, Domine, cum tranquillitate iudicas* (*Sap. xii, 18*), ille de quo rursus scriptum est: *Dominus patiens est redditor* (*Eccli. v, 4*), in tanto crimine involutos inveniens, quasi patientiam prætermisit, et diem extremi iudicii expectare ad vindictam noluit, sed eos igne iudicii ante iudicii diem prævenit. Ecce malum quasi cum difficultate credidit cum audivit, et tamen sine tarditate percussit cum verum agnoscendo reperit: ut nobis videlicet daret exemplum, quod majora crimina et tarde credenda sunt cum audiuntur, et citius punienda cum veraciter agnoscuntur. » Et qui a Patre accepit omne iudicium, et in spiritali et in seculari sua republica, pro se ad iudicandum ministros suos constituit, sicut Scriptura dicit, eisque sibi in iudicio etiam ministrare præcepit, dicens: *Si quis mihi ministrat, me sequatur* (*Joan. xii, 26*), id est me imitetur. In qua ministracione idem qui est via, veritas, et vita, viam iudicandi hoc modo iudicibus sacra lectione, qui fuerint Sodomorum accusatores ostendit, *Clamor, inquit, Sodomorum venit ad me* (*Gen. xviii, 20*), id est non solum magna, sed et manifesta perseverantia peccata eorum ad iudicandum provocant me. Qui fuerint testes ac-

cusationis eorum subsequitur dicens : *Descendam et videbo utrum clamorem, qui venit ad me, opere compleverit, an non, ut sciam (Gen. XXI)*. Dominus itaque omnia sciens, ut ex verbis sancti Gregorii præmisimus, et alii catholici doctores exponunt, iudicandi nobis modum proponit, ut quæ non sunt manifesta non iudicemus, et quæ manifesta sunt sine tarditate et hæsitatione aliqua iudicemus, sicut supra ex verbis beati Ambrosii apostoli sententiam exponentis ostensum est : « Cognito, inquit, opere pellendum peccantem fuisse de cœtu fraternitatis dicit Apostolus. Omnes enim crimen ejus sciebant, in qua re neque testibus opus erat, neque tergiversatione aliqua poterat tegi crimen. »

CAPUT XXX.

Qua ratione solvi queant excommunicationes non legitime, et de iis qui injuste excommunicant.

Quibus sententiis sanctarum Scripturarum, et sacrorum canonum, atque decretorum sedis Romanæ pontificum, fultus atque suffultus, et sicut adhuc in processu ostendam, metropolitana auctoritate, execrabilem atque exitiabilem, non excommunicationem, sed maledictionem tuam, in eos jaculatam, qui non accusati, nec confessi, nec convicti, nec etiam a te fuere secundum Domini jussionem communiti, ac de his pro quibus eos excommunicaveras, sicut non solum mihi, sed et pene omnibus in Rhemensis provincia erat notum, innoxii, et tanti simul a sacro officio et sacra communione, atque a societate Ecclesiæ catholicæ, solo tuo furore et causa tuæ injuriæ, ad multorum exitium fuere depulsi, irritam et nullius momenti esse decrevi : præsertim cum sacre regulæ nulli in mortis urgente periculo constituto baptisma denegari, nulli poscenti ultimam pœnitentiam et viatici muneris communionem interdicti præcipiant, nulli etiam sepulturæ humanitatem abrogari permittant, et in tua parochia nemo in necessitate mortis ab eis quorum interest baptizari, nemo communionis gratia reconciliari, nemo sepeliri cum debita commendatione poterat, si ministri Ecclesiæ suis forent privati ministeriorum officii. Et tua ligamenta non fuerunt sanctæ Ecclesiæ alligationes, sed tuæ maledictiones. Unde beatus Gregorius respondens Petro interroganti : « Nunquidnam valde esse grave credimus, si fortasse cuilibet exagitati in acundia maledicamus ? » In libro Dialogorum dicit (lib. III *Dialog.*, cap. 15) : « Pensa, inquit, quam gravis est culpa quæ separat a regno vitæ, cum Paulus dicat : *Neque maledici regnum Dei possidebunt (I Cor. VI, 10)*. » Et interroganti eidem Petro : Quid si homo non fortasse ex malitia, sed ex linguæ incuria, maledictionis in proximum jaculatur verbum ? respondit : « Si apud districtum, inquit, iudicem, Petre, otiosus sermo reprehenditur, quanto magis noxius ? Pensa ergo quantum sit damnabilis qui a malitia non vacat, si et ille sermo pœnalis est qui a bonitate utilitatis vacat. » Et in libro *Moralium (lib. IV, cap. 6)* : « Sciendum est, inquit, quod

A Scriptura sacra duobus modis maledictum memorat, aliud videlicet quod approbat, aliud quod damnat. Aliter enim maledictum profertur iudicio justitiæ, aliter livore vindictæ. Contra maledictum quippe livore justitiæ depromptum, voce Pauli prædicantis admonemur, qui ait : *Benedicite, et nolite maledicere (Rom. XII, 14)*; et rursum dicit : *Neque maledici regnum Dei possidebunt (I Cor. VI, 10)*. Nam et sancti viri, cum maledictionis sententiam proferunt, non ad hanc ex voto ultionis, sed ex justitiæ examine erumpunt. Intus enim subtile Dei iudicium aspiciunt, et mala foras exurgentia quia maledicto debeant ferire cognoscunt, et eo in maledicto non peccant, quo ab interno iudicio non discordant. » Tu vero a iudicio justitiæ in tuis maledictionibus discordasti, qui non iudicio justitiæ, sed livore vindictæ, et causa injuriarum tuarum eas protulisti, non videns quoniam a te irregulariter maledictos sacri canones non vetant ab aliquo episcopo regulariter recipi, multo magis autem ab eo qui tibi præest innuunt eos debere absolvi. Scriptum est enim in Carthaginiensi concilio. Augustinus episcopus legatus provinciæ Numidiæ dixit (*can. 9*) : « Hoc statuere dignamini, ut si qui forte merito facinorum suorum ab Ecclesia pulsi sunt, et sive ab aliquo episcopo vel presbytero fuerint in communionem suscepti, etiam ipse pari cum eis crimine teneatur obnoxius, refugientes sui episcopi regulare iudicium. » Et item (*can. 29*) : « Qui excommunicatus fuerit pro suo neglectu, sive episcopus, sive quilibet clericus, et tempore excommunicationis suæ ante audientiam communionem præsumperit, ipse in se damnationis iudicetur protulisse sententiam. » Sentisne quid audis ? intelligisne quæ legis ? Hi enim sacri canones eos ab aliis recipi prohibent, qui merito facinorum suorum ab Ecclesia pulsi sunt, et qui refugiant sui episcopi regulare iudicium, et qui pro suo neglectu excommunicati sunt, et ante audientiam tempore excommunicationis communionem præsumunt. Laudunenses autem clerici, nec pro suo neglectu excommunicati a te fuerunt, nec regulare iudicium refugerunt, nec ante audientiam et cognitionem communionem contra regulas præsumperunt. Regula quippe, unde et qualiter quique excommunicari debeant, nobis est manifeste deprompta, dicente Domino : *Si peccaverit in te frater tuus, et reliqua usque dum dicitur, sit tibi sicut ethnicus et publicanus. Amen dico vobis, quæcunque alligaveritis super terram, erunt ligata et in cælo (Matth. XVIII)*. Et hac regula, atque hoc regulari iudicio, canonicoque ordine, ab Ecclesiæ communione medicinaliter, usque dum convertantur et ad pœnitentiam redeant, separatos constat rata a Deo prolata sententia : *Quæcunque alligaveritis super terram, erunt ligata et in cælo (ibid.)*. Et sacri canones taliter a propriis episcopis abjectos vel excommunicatos, vel si dubium fuerit utrum taliter necne abjecti vel excommunicati fuerint, interim non recipi ab aliis præcipiunt, si ante per finitimos episcopos, vel per electos aut deputatos iudices,

causæ eorum finiri nequiverint, donec in provinciali synodo, quo metropolitanus antistes probaverit, discutiantur, et regulariter sententiam communiter inventam abjecti suscipiant, sicut Nicæni canones aperte demonstrant dicentes (*can. 5*): « Hi qui abjiciuntur, ab aliis non recipiantur. Requiritur autem, ne pusillanimitate, aut contentione, aut alio quolibet episcopi vitio, videantur a congregatione seclusi. » Manifestum est enim, quoniam dubia vel obscura jubentur requiri, non certa vel manifesta. Et Antiochenum concilium (*can. 6*): « Communione, inquit, privatus a proprio episcopo, non ante recipiatur ab aliis, donec proprio reconcilietur episcopo, aut occurrens ad synodum quæ congregatur, pro se satisfaciatur, et persuadens concilio sententiam suscipiat alteram. » Et Sardicenses canones (*can. 17*): « Ille, inquit, episcopus, qui juste aut injuste cum abjecto, patienter accipiat ut negotium discutatur, ut vel probetur sententia ejus a plurimis, vel emendetur. » Scilicet ut discussione facta de ante dubiis et obscuris, sententia rationabiliter dicta probetur, vel irrationabiliter prolata emendetur. Et hoc de uno, vel duobus, aut tribus, decem quoque, vel viginti, aut triginta, et de dubiis vel obscuris servari patienter aliquo modo poterat. At ubi manifestissime, sicut omnibus constat esse notissimum, sine aliqua ratione, vel culpa abjectorum, contra omnem auctoritatem, trecenti, vel quadringenti, sive quingenti, solo tuo furore, et causa injuriarum tuarum abjecti erant, in quorum abjectione, ut beatus Augustinus dicit (*epist. 50*), non hujus aut illius hominis erat periculum, sed populorum strages jacebat in perditione, etiam qui in tuis injuriis non peccaverunt, sed potius doluerunt, pro quibus illi abjecti erant, cui Christiano servari usque ad examinationem, sicut de dubiis et obscuris et nihil periculi habentibus, videri debuisset? Maxime erga non peccantes in tuis injuriis, sed dolentes: cum Deus hanc retributionem modis omnibus detestetur, *cum retribuuntur mala pro bonis (Psal. xxxiv)*. Non ergo ante cognitionem, sicut Sardicenses canones jubent (*epist. 50*), sed post manifestam cognitionem, præfatos clericos a te maledictos communioni regulariter sociavi. Et si forte aliquid rationis vel auctoritatis haberet quod fecisti, ubi tantorum populorum strages et pericula imminebant, detrahendum foret, ut idem beatus Augustinus demonstrat, aliquid severitati, ut majoribus malis sanandis subveniret charitas quæ cooperit multitudinem peccatorum. Et si tantum in eos, qui auctores vel patratore injuriarum tuarum erant, maledictiones tuas jaculando exereres, forte portari ab aliis poterant, usque dum synodali conventu tibi demonstraretur te contra rationem egisse, docente beato Petro apostolo: *Hæc est enim gratia, si propter conscientiam Dei sustinet quis tristitias patiens injuste. Quæ enim gratia si peccantes et colaphizati suffertis? Sed si bene facientes patienter sustinetis, hæc est gratia apud Deum. In hoc enim vocati estis, quia et Christus passus est pro nobis, relinquens*

*A vobis exemplum, ut sequamini vestigia ejus, qui peccatum non fecit, nec inventus est dolus in ore ejus, qui cum malediceretur, non maledicebat, cum pateretur non comminabatur, tradebat autem judicanti se injuste (I Petr. II). Et Paulus: Benedicite, et nolite maledicere, non reddentes malum pro malo, nec maledictum pro maledicto (Rom. XII). Et hinc per semetipsam Veritas dicit: Diligite inimicos vestros, benefacite his qui oderunt vos. Orate pro persequentibus et calumniantibus vos (Matth. v). « Virtus, inquit Gregorius (*hom. 33 in Evang.*), est coram hominibus adversa tolerare, sed virtus coram Deo diligere: quia hoc solum Deus sacrificium accipit, quod ante ejus oculos in altari bonæ operationis flamma charitatis incendit. » Et Dominus illos dicit beatos, qui persecutionem patiuntur propter justitiam (*Matth. v*); non propter nequitiam, nisi forte per ipsam persecutionem convertantur ad correctionem, et consequantur purgationis beatitudinem. Tu autem, si contra leges divinas et humanas in te quiddam a quocunque exstitit perpetratum, mihi hoc notum facere, et per aliquod temporis spatium patienter debueras expectare, usque dum inde cum fratribus et coepiscopis nostris satagerem, sicut etiam egeram, et non tuas molestias aliorum perditionibus vindicare. Et si forte, quærens resistendi suffugia, et potius perniciosum factum tuum elegeris defendere, quam recognoscere atque corrigere, objicere mihi volueris quod Innocentius ad Macedones scripsit episcopos dicens (*epist. 29, sub finem*): « Sed ut sæpe accidit, quoties a populis aut a turba peccatur, quia in omnes propter multitudinem non potest vindicari, inultum solet transire, priora ergo dimittenda dico Dei judicio, et de reliquo maxima sollicitudine præcavendum; » rejicio tibi, ut vel in populos, aut in turbam peccantem, et non in populos et in turbam innoxiam, has maledictiones tuas exereris, qui nulli maledicere, etiam in te peccanti, minime autem non peccanti, præciperis. De alligatione autem episcopali, quod nobis satis tremendum, et cavendum, atque observandum est, sanctus Gregorius in homilia Evangelii vigesima sexta dicit: « Sæpe in ligandis ac solvendis subditis pastor suæ voluntatis motus, non autem causarum merita sequitur. Unde fit ut ipsa hac ligandi et solvendi potestate se privet, qui hanc pro suis voluntatibus, et non pro subjectorum moribus exercet. Unde recte per prophetam dicitur: *Mortificabant animas quæ non moriuntur, et vivificabant animas quæ non vivunt (Ezech. XIII)*. Non morientem quippe mortificat, qui justum damnat: et non victurum vivificare nititur, qui reum supplicio absolvere conatur; » ac sæpe agitur, ut vel damnet immeritos, vel alios ipse ligatus solvat. Non igitur novum, sed veterum regularum constitutum est, quod egi in absolute a te maledictorum: quia ut Gelasius de suo decessore dicit: « Non novæ constitutionis auctor, sed veteris sum executor. » Sicut Carthaginenses canones manifeste demonstrant dicentes (*can. 5*): « Novellæ suggestiones, quæ vel obscuræ sunt,*

vel sub genere latent, inspectæ a nobis formam accipiunt: cæterum de quibus apertissime divina Scriptura sanxit, non est differenda sententia, sed potius exsequenda. Proinde quod in laicis reprehenditur, id multo magis in clericis oportet prædamnari. Universi dixerunt, Nemo contra prophetas, nemo contra Evangelium facit sine periculo. » Et post pauca: « Reliqua vero, quæ vel facta vel dicta superius comprehensa sunt, vel aliis conciliis conscripta, quæ secundum legem inveniuntur, custodire nos oportet. Si quis vero statuta supergressus corruperit, vel pro nihilo habenda putaverit, si laicus est, communionem, si clericus est, honorem privetur. Universi dixerunt, Placet, placet. » Et post istam synodum, Chalcedonense celebratum concilium dicit (*can. 1*): « Regulæ sanctorum Patrum per singula nunc usque concilia constitutas proprium roborem obtinere decrevimus. » Et item post aliquanta (*can. 10*): « Eos vero qui ausi fuerint post definitionem magnæ et universalis hujus synodi, quidquam ex his quæ sunt prohibita perpetrare, decrevit sancta synodus a proprio hujusmodi gradu recedere. » « Et hic si obicere mihi volueris quod supra dixi de capitulo hujus synodi a sede apostolica non recepto, refero tibi ut legas superius, et videas quantum dixi, quod de eodem capitulo sedes apostolica non recipiat, scilicet, Si adversus ejusdem provinciæ metropolitanum episcopus vel clericus habet querelam, petat sedem regiæ urbis Constantinopolitanæ, et apud ipsam judicetur. » Et adhuc tibi refero, quia idem concilium hoc quod de Constantinopolitana sede petenda dixit, non prohibuit, sed concessit: in hoc autem supposito capitulo dixit, Qui ausi fuerint ex his quæ sunt prohibita perpetrare. Quia igitur constat in his te inimico animo judicasse, et cupiditate vincendi depravatum fuisse, secundum Carthaginenses canones, obest tibi tua soluta sententia. Et quoniam in rotulis tuis, domno regi et mihi per quoniam Ecclesiæ tuæ directis, multoties ac multipliciter ad confirmandas tuas sententias, cum sacris canonibus, et decretis apostolicæ sedis pontificum, etiam legales sententias catholicorum imperatorum posuisti, proponam tibi legalem sententiam Justiniani catholici imperatoris, quam probat et servat Ecclesia catholica, qua constitutione *cxviii*, capitulo *ccccxli*, decrevit: Ut nemo episcopus, nemo presbyter excommunicet aliquem antequam causa probetur, propter quam ecclesiastici canones hoc fieri jubent. Si quis autem adversus ea excommunicaverit aliquem, ille quidem qui excommunicatus est, majoris sacerdotis auctoritate ad gratiam sanctæ communionis redeat, is autem, qui non legitime excommunicavit, intantum absteineat a sacra communionem tempus, quantum majori sacerdoti visum fuerit, ut id quod injuste fecit, ipse juste patiat. Et hinc sanctus Gregorius ad Joannem episcopum injuste excommunicantem inter cætera scripsit dicens: « Cassatis prius atque ad nihilum redactis prædictæ sententiæ tuæ decretis, ex beati Petri aposto-

lorum principis auctoritate decernimus, triginta dierum spatium sacra te communionem privatum, ab omnipotenti Deo nostro tanti excessus veniam cum summa poenitentia ac lacrymis exorare. Quod si hanc sententiam nostram te cognoverimus implemisse remissus, non jam tantum injustitiam, sed et contumaciam fraternitatis tuæ cognoscas juvante Domino severius puniendam. » Et item alibi (*lib. ii, ind. 11, epist. 7*): « Quod si contra hæc quæ statuimus quolibet tempore, qualibet occasione, vel subreptione venire tentaveris, sacra scias te communionem privatum, nec eam te, excepto ultimo vitæ tuæ tempore, nisi cum concessa Romani pontificis decernimus jussione percipere. Hæc enim consona sanctis Patribus definitione sancimus, ut qui sacris necit obedire canonibus, nec sacris administrare, nec communionem capere sit dignus altaribus. »

CAPUT XXXI.

De eo quod parvulos, qui sæpe discrimine mortis periclitantur, baptizari prohibuit.

Denique sicut in petitione mihi ab ecclesia Laudunensi data continetur, causa injuriarum tuarum parvulos baptizari, qui sæpe discrimine mortis periclitantur, prohibuisti. In quo capitulo Pelagius et tu facti estis, ut ex majori parte egregius poeta dicit:

Ambo errore pares, quamvis diversa sequentes.

Pelagius docuit parvulos recentes ab uteris matrum non baptizandos in remissionem peccatorum, quia nihil trahebant ex Adam, quod lavacro regenerationis expiaretur, certos ostendere nos vacue a Christo redemptos, contradicente sibi Apostolo: *Per unum hominem peccatum in mundum intravit, et per peccatum mors, et ita in omnes homines mors pertransiit, in quo omnes peccaverunt* (*Rom. v*). Et tu sciens verum esse quod Dominus dicit: *Nisi quis renatus fuerit ex aqua et Spiritu sancto, non intrabit in regnum celorum* (*Joan. iii*), præcepisti non baptizari in tua parochia parvulos, etiam in mortis periculo constitutos, ne salvari valerent, cum scriptum sit: *Non venit filius hominis animas perdere, sed salvare* (*Luc. ix*), obvians etiam decretis Siricii, Leonis, Gelasii, et Africani concilii, sicut jam tibi scriptis non solum semel sed et secundo mandavi. Unde quia ex integro jam tibi illa decreta scripto direxi, breviter tibi quædam exinde commemoro. Nam de infantibus baptizandis, qui necdum baptizati noscuntur, quoties necessitas exegerit, regula ecclesiastica per beatum Siricium et prolata, cujus regulæ conclusio constat hoc modo (*epist. 1, Himerio*): « Nunc præfatam regulam omnes teneant sacerdotes, qui nolunt ab apostolicæ petrae, super quam Christus universalem construxit Ecclesiam, soliditate divelli. » Et sanctus Leo: « In mortis periculo, in obsidionis discrimine, in persecutionis angustiis, in timore naufragii, nullo tempore hoc veræ salutis singulare præsidium cuiquam denegari decrevit. » Et Africanum

concilium, sed et idem sanctus Leo (*epist.* 92. *Rustico*): « Etiam eis infantibus, de quibus non inveniuntur certissimi testes, qui eos baptizatos esse sine dubitatione testentur, neque ipsi sunt per ætatem de traditis sibi sacramentis idonei respondere, absque ullo scrupulo eos baptizandos esse jusserunt. » Et sanctus Gelasius (*Ivo*, p. 1, cap. 252): « Etiamsi necessitas extrema compulerit, a laicis Christianis hujusmodi baptizari debere ostendit. »

CAPUT XXXII.

De eo quod pœnitentiam et viaticum morientibus dari vetuit.

In eo vero capitulo, quo ultimam pœnitentiam denegari, et viatico munere subvenire morientibus contra Nicænos et Africanos canones, et decreta Siricii, et Innocentii, atque Cœlestini, necnon et Leonis, vetuisti, sicut Innocentius, et cæteri doctores catholici ostendunt, Novati hæretici, licet diverso itinere, sed non diverso discrimine, sequipes exististi. Novatiani enim dogmatizant recipi non debere lapsos ad pœnitentiam atque communionem: et tu sciens, juxta Nicænos canones, quovis tempore non esse denegandam pœnitentiam et communionem gratiam postulanti, causa injuriarum tuarum præcepisti, sicut in petitione a Laudunensi Ecclesia mihi porrecta continetur, etiam in exitu mortis positus pœnitentiam et communionis gratiam denegari, ne permittente Salvatore nostro a perpetuo exitio vindicari valerent, cum per se de se Veritas dicat: *Venit filius hominis querere et salvare quod perierat, qui non venit justos sed peccatores vocare in pœnitentiam* (*Luc.* XIX), multis voce Domini reclamantibus sanctis et Ecclesiæ catholice doctoribus ut præsidium regenerationis, ac pœnitentiæ, sacræque communionis, in mortis periculo positus et petentibus a quoquam nullatenus denegeretur. Unde tibi ex integro quid sacri Nicæni canones, quid sanctus Siricius, quid sanctus Innocentius, quid sanctus Cœlestinus, quid sanctus Leo decreverint, tibi scribere studui, sed et iudicium, quod de hæc contemnentibus sanctus Leo protulerit, præfatis subjunxi, tibi que mandavi. Ait enim (*epist.* 4): « Ne quid vero sit quod prætermissum a nobis forte credatur, omnia decretalia constituta, tam beatæ recordationis Innocentii, quam omnium decessorum nostrorum, quæ de ecclesiasticis ordinibus et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » Unde quia ignorare non potes quid sanctus Cœlestinus prædecessor beati Leonis decreverit, cujus decretorum partem tuæ collectioni interposuisti, quibus dicit: « Nulli sacerdoti suos liceat canones ignorare, nec quidquam facere quod Patrum possit regulis obviare: quæ enim a nobis res digna servabitur, si decretalium norma constitutorum pro aliquorum libitu, licentia populis permissa fran-

gatur? » satis mirari non valeo, quomodo te ipsum nescire, et tam grandem causam, sicut contra decreta Cœlestini egisti, oblivisci valens, inter cætera in tuo pitaciolo verba ejusdem Cœlestini papæ ponere ausus fuisti. Quæ, etsi in professionis tuæ decreto a te subscripto hanc beati Cœlestini sententiam decretalem præscripsisti, non solum suo, sed et tuo iudicio, te secundum sacros Carthaginenses canones, honore privasti, qui dicunt (*can.* 13): « Si quis contra suam professionem vel subscriptionem venerit in aliquo, ipse se honore privabit. » Fecisti enim quod Patrum regulis obviat, cum pœnitentiam, contra decreta Cœlestini, et cæterorum pontificum Romanorum, atque contra sacros canones, ad pœnitentiam suscipi, et morientibus viatico munere subveniri prohibuisti, et pro tuo libitu usurpata a te sententia, decretalium normam constitutorum fregisti. Sed forte noluisti intelligere illa constituta tuos esse canones, et ob id in tuo pitaciolo misisti: Nulli sacerdoti liceat canones ignorare, omittens quod ibi habetur *suos*. Non igitur radendum, vel omittendum est pronomen *suos*, de verbis Cœlestini: quoniam canones et Patrum regulæ canones et regulæ sunt sacerdotum, eo modo sicut lex Moysi dicitur et lex Judæorum, de qua Dominus ad Judæos: *In lege*, inquit, *vestra scriptum est* (*Joan.* VIII), et de eis iterum: *In lege eorum scriptum est* (*Joan.* XV). Aut ergo quilibet non est sacerdos, et sui non sunt canones: aut qui sacerdos est, sui sunt canones. Non ut sicut Judæi legem, eosdem canones pro suo libitu ad suum sensum inflectant, sed ut sensum eorum præceptis obediendo accommodent: quatenus eorum præcepta sequendo, gressus rectos faciant pedibus suis, et de Scripturarum lumine promulgatos lucernam eos ponant actionibus suis, ut possint dicere cum Psalmista: *Lucerna pedibus meis verbum tuum, Domine, et lumen semitis meis* (*Psal.* CXVIII). Si aliqua etiam tortitudo sensibus, vel præceptionibus, atque actionibus suis inesse videtur, eorum regulis corrigatur, et ad ea quæ sentienda, tenenda, et sequenda sunt dirigatur. Lege igitur decreta Siricii, et ejusdem Cœlestini, et sacros canones, et invenies te contra illorum decreta, imo contra evangelicam veritatem, et apostolicam auctoritatem, ausu nefario talia prohibuisse, sicut semel, et secundo jam tibi scripsi. Sed forte hæc, et ea quæ dicimus esse canones, tenere non vis pro canonibus, sed illa de quibus tua commenta finxisti. Ideo peregrino sensu Cœlestini verba interposuisti. Reduc tamen ad memoriam quæ in eodem tuo pitaciolo ex verbis Cœlestini posuisti: « Quæ, inquit, solæ admonitionis auctoritate non corrigimus, necesse est per severitatem congruentem regulis vindicemus. Per totas hoc ergo, quæ propriis rectoribus carent, ecclesias volumus innotescat, ut nullus sibi spe aliqua forsitan blanditus illudat. » Quapropter observandum tibi est de cætero, ne per ipsas regulas judicaris, quas de verbis sancti Cœlestini tuis collectionibus immisisti, sicut et ego servare studui

quod præcepit, scilicet notum faciens quæ servare debeat ecclesiæ Laudunensi. Et quoniam, ut supra ostendi, verba beati Gregorii a proprio eorum sensu, quantum ex te fuit, alienasti, et imposturasti, atque detruncasti, ut anathema, quod in eodem capitulo convenienti sensu miserat, ad eos quibus non convenerat retorqueres, tibi scribere dignum duxi, quod de anathemate in synodica epistola, quam secundum morem, in ordinationis suæ exordio patriarchis, Alexandrino scilicet, Antiocheno, Hierosolymitano, et Constantinopolitano direxerat, scripsit (*lib. 1, ep. 24*): « Præterea, inquiring, quia corde creditur ad justitiam, ore autem confessio fit ad salutem, sicut sancti Evangelii quatuor libros, sic quatuor concilia suscipere et venerari me profiteor: Nicænum scilicet, in quo perversum Arii dogma destruitur, Constantinopolitanum quoque, in quo Eunomii et Macedonii error convincitur, Ephesinum etiam primum in quo Nestorii impietas judicatur, Chalcedonense vero, in quo Eutycheis, Dioscorique pravitas reprobatur, tota devotione complector, integerrima probatione custodio, quia in his, velut in quadrato lapide, sanctæ fidei structura consurgit. Et ejuslibet vitæ atque actionis existat, quisquis eorum soliditatem non tenet, etiamsi lapis esse cernitur, tamen extra ædificium jacet. Quintum quoque concilium pariter venero, in quo epistola quæ Ibæ dicitur erroris plena reprobatur, Theodorus personam mediatoris Dei et hominum in duabus subsistentiis separans, ad impietatis perfidiam cecidisse convincitur, scripta quoque Theodoriti, per quæ beati Cyrilli fides reprehenditur, ausu dementiæ prolata refutantur. Cunctas vero quas præfata veneranda concilia personas respuunt respuo, quas venerantur amplector: quia dum universali sunt consensu constituta, se et non illa destruit, quisquis præsumit aut solvere quos religant, aut ligare quos solvunt. Quisquis ergo aliud sapit, anathema sit. Quisquis vero præfatarum synodorum fidem tenet, pax ei sit a Deo Patre per Jesum Christum Filium ejus, qui cum eo vivit et regnat consubstantialiter Deus in unitate Spiritus sancti, per omnia sæcula sæculorum. Amen. » Et sacrum Nicænum concilium dicit (*can. 13*): « De his, qui ad exitum veniunt, etiam nunc lex antiqua regularisque servabitur, ita ut si quis egreditur e corpore, ultimo et necessario viatico minime privetur. Quod si desperatus et consecutus communionem, oblationisque particeps factus, iterum convalescit, sit inter eos qui communionem orationis tantummodo consequuntur. Generaliter autem omni cuilibet in exitu posito, et poscenti sibi communionis gratiam tribui, episcopus probabiliter ex oblatione dare debet. » Ecce audisti, frater, quod sacri Nicæni canones generaliter omni cuilibet in exitu posito, et poscenti communionem gratiam, non denegari, sed per eandem communionem obeuntem absolvi præcipiunt. » Et ecce audisti decernentem beatum Gregorium: « Quisquis præsumit, aut solvere quos præfata concilia, quorum

A primum est Nicænum, religant, aut ligare quos solvunt: quisquis ergo aliud sapit, anathema sit. » Imitare igitur sanctum David, qui audiens a Nathan propheta de peccato quod fecerat, ex cordis intimo dixit: *Peccavi Domino (II Reg. XII)*; et item: *Quia percussit cor suum, eo quod fœdasset vestem Christi Domini (I Reg. XXIV)*. Et vestis Domini est Ecclesia, de qua scriptum est: *Vivo ego, dicit Dominus, quia omnibus his velut ornamento vestieris (Isa. XLIX, 18)*. Et Apostolus: *Quotquot in Christo baptizati estis, Christum induistis (Gal. III, 27)*. Percute pectus tuam, quia percussio pectoris ostendit contritionem cordis, et die cum profusis lacrymis: *Peccavi Domino, ut merearis audire, Dominus transtulit peccatum tuum, non morieris (II Reg. XII)*.

B

CAPUT XXXIII.

De eo quod sepulturam mortuis in parochia sua denegari præcepit.

In eo vero capitulo, quo sepulturam mortuis, sicut in petitione a Laudunensi ecclesia mihi porrecta continetur, denegari jussisti, nimia inhumanitate contra sacras historias sacrosque canones agere non erubuit, cum sicut in historia veneranda libri Regum legimus etiam eorum corpora, qui ad consultum Domini propter peccatum Saul, ob quod facta est fames in diebus David tribus annis jugiter, crucifixi fuerant, laudabiliter custodita legamus a concubina Saul, ne lacerarentur ab avibus per diem, neque a bestiis per noctem, *Donec stillaret aqua super eos de cælo (II Reg. XXI)*. Sicque sepulta sunt cum ossibus Saul et Jonathæ. Et in Evangelio legimus, quia petente Joseph, *Pilatus jussit reddi corpus Domini (Matth. XXVII, 58)*, quem quasi nefarium petentibus Judæis crucifigi adjudicavit; unde *et cum iniquis, secundum Scripturam, deputatus est (Isa. LIII, 12)*. Et Judæi, ne remaneret etiam sceleratorum corpora in cruce die sabbati inhumata, obtulerunt a Pilato ut frangerentur eorum crura, et tollerentur (*Luc. XXI, 38*). Et antiquorum patrum regulæ, etiam eorum corpora, qui sibi quolibet modo mortem intulerint, vel qui pro suis sceleribus puniuntur, ad sepulturam, licet sine hymnis et psalmis, deferri præcipiunt, et non sepultura in ventre matris omnium, id est terræ, carere etiam talium cadavera præceperunt. Si vere utique justitiam loqueris, juste judica, fili hominis, et vide si secundum præfatas regulas ac leges, metropolitana auctoritate pontificium habuerim hæc corrigere, quæ contra sacras regulas præsumpsisti.

D

CAPUT XXXIV.

Quod in rebus certis et definitis, nec synodus convocanda, nec sedes apostolica inquietanda sit, sed quæ statuta sunt observanda.

At si tu in contumacia tua, et in contemptu meo permanere delegeris, et quæ hinc vera sunt profiteri nolueris, quia de certis et manifestis causis, quæ in nullo nobis sunt dubia vel obscura, de quibus diffinitivas sententias, quæ nulla possunt ratione convelli

a sanctis Patribus promulgatas habemus, synodale A
 consultum, vel coepiscoporum provinciae nostrae consilium vel consensum, non debeo expectare, nec a regulis praestitutis ulla aut negligentia aut praesumptione discedere, nec etiam sedem apostolicam inde requirendo inquietare, dicat sanctus Innocentius scribens ad Macedones archiepiscopos atque episcopos inde quid sentiat (*epist. 27*): « Cum tradidisset epistolas, quin Vitalis archidiaconus, vestrarum portitor litterarum eas praecipio illi reco recenseri: in quibus multa posita esse pervidi, quae stuporem mentibus nostris inducerent, facerentque nos non modicum dubitare, utrum aliter putaremus, an ita illa essent posita quemadmodum personabant. Quae cum saepius repeti fecissem, adverti sedi apostolicae, ad quam relatio quasi ad caput ecclesiarum missa currebat, B
 fieri injuriam, cujus adhuc in ambiguum sententia duceretur. Unde de quibus jam dudum scripsisse me memini, nunc iterare formam argumentis evidentiore relationis vestrae percunctatio geminata compellit. » Et ad Felicem episcopum Nucernianum (*epist. 3*): « Stupimus prudentem virum de his voluisse consulere, quae omnibus sunt certa ratione comperta. » Et sanctus Zozimus (*epist. Hesychio*): « Sciet quisquis hoc postposita Patrum et apostolicae sedis auctoritate neglexerit, a nobis districtius vindicandum, ut loci sui minime dubitet sibi non constare rationem, si hoc putat post tot prohibitiones impune posse tentari. Contumeliae enim studio fit quidquid interdictum toties usurpatur. » Et sanctus Caelestinus quod et tu in tuis collectionibus, ut praemisimus, posuisti (*epist. 11, episcopis Apul. et Calab.*): « Nulli sacerdotum suos liceat canones ignorare, nec quidquam facere quod Patrum possit regulis obviare. Quae enim a nobis res digna servabitur, si decretalium norma constitutorum, pro aliquorum libitu, licentia populis permissa frangatur? » Et post aliquanta: « Quae enim sola admonitionis auctoritate non corrigimus, necesse est per severitatem congruentem regulis vindicemus. » Et Leo (*epist. 1, episcopis*), quod iterare non piget: « Omnia decretalia constituta, tam beatae recordationis Innocentii, quam omnium decessorum nostrorum, quae de ecclesiasticis ordinibus et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » Et item idem Leo ad Leonem Augustum: « Quae patefacta sunt quaerere, et quae perfecta sunt retractare, et quae sunt diffinita convellere, quid aliud est, quam de adeptis gratiam non referre, et ad interdictae arboris cibum improbos appetitus mortiferam cupiditatis extendere? » Et item idem sanctus Leo ad eundem Leonem Augustum dicit (*epist. 84*): « Quia de rebus et apud Nicæam, et apud Chalcedonem sicut Deo placuit diffinitis, nullum audemus inire tractatum, tanquam dubia vel infirma sint, quae tanta per sanctum Spiritum fixit auctoritas. » Et Hilarus papa dicit (*epist. 11, Verano*): « Quia non minus in san-

ctarum traditionum delinquitur sanctiones, quam in injuriam ipsius Domini prosilitur. » Et Gelasius: « Satis indignum est quemquam vel pontificum, vel ordinum subsequentium, hanc observantiam refutare, quam beati Petri sedem et sequi videat et docere, satisque conveniens sit, ut totum corpus Ecclesiae in hac sibimet observatione concordet, quam illic vigere prospiciat, ubi Dominus Ecclesiae totius posuit principatum. » Et item ad universos episcopos per Dardaniam constitutos: « Patres, inquit (*epist. 11, in princip.*), nostri, catholici videlicet doctique pontifices, in unaquaque haeresi quolibet tempore suscitata, quidquid pro fide, pro veritate, pro communione catholica atque apostolica, secundum Scripturarum tramitem, praedicationemque majorum, facta semel congregatione sanxerunt, incon- vulsum voluerunt deinceps firmumque constare, nec in eadem causa denuo quae praefixa fuerant retractari qualibet recenti praesumptione permiserunt: sapientissime pervidentes, quoniam si decreta salubriter cuiquam liceret iterare, nullum contra singulos quosque prorsus errores stabile persisteret Ecclesiae constitutum, ac semper eisdem furoribus redivivis omnis integra diffinitio turbaretur. Nam si limitibus etiam praefixis positarum semel synodali- um regularum, non cessant elisae pestes resumptis certaminibus contra fundamentum sese veritatis attollere, et simplicia quaeque corda percutere, quid fieret si subinde fas esset perfidis inire concilium, cum quamlibet illa manifesta sit veritas, numquam desit quod perniciose depromat falsitas, et si ratione vel auctoritate deficiens, sola tamen contentione non cedens? Quae majores nostri divina inspiratione cerentes, necessarie praecaverunt, ut contra unamquamque haeresim quod acta semel synodus pro fide, communione, et veritate catholica atque apostolica promulgasset, non sinerent novis post haec retractationibus mutilari, ne pravis occasio praeretur quae medicinaliter fuerint statuta pulsandi: sed auctore cujuslibet insaniae ac pariter errore damnato, sufficere judicarunt, ut quisque aliquando hujus erroris communicator existeret, principali sententia damnationis ejus esset obstrictus, quoniam manifeste quilibet, vel professione sua, communione posset agnosci. » Et si volueris hoc tantum de suscitatis haeresibus intelligere, pariter quoque quod dicit intellige: « Auctore, inquit, cujuslibet insaniae ac pariter errore damnato, sufficere judicarunt, ut quisque aliquando hujus erroris communicator existeret, principali sententia damnationis ejus esset obstrictus. » Quae enim major potest esse vesania, vel quis deterior error, aut gravior contra catholicam Ecclesiam schisma, quam sanctorum conciliorum et apostolicae sedis decreta contemnere, et leges quas probat Ecclesia conculcare, et Christianam pietatem abdicare, et innoxios contra omnes leges divinas et humanas gradu ac communione privare, atque ex proprio crimine innocentes in mortis urgentis periculo per baptismi gratiam non subveniri, obeuntibus

et petentibus communionis gratiam denegari, mortuis sepultaræ humanitatem non tribui? « Quidquid ergo, inquit Gelasius, pro fide, communionem, et veritate catholica atque apostolica majores nostri promulgaverunt, non siverunt novis posthæc retractationibus mutilari, ne pravis occasio præberetur quæ medicinaliter statuta fuerunt pulsandi: sed generaliter auctore cujuslibet insanie ac pariter errore damnato, sufficere judicarunt, ut quisque aliquando hujus erroris communicator existeret, principali sententia damnationis ejus esset obstrictus, quoniam manifeste quilibet vel professione sua, vel communionem posset agnoscere. » Et item idem Gelasius dicit (*in communitorio*): « Decessorem, inquit, meum executorem fuisse veteris constituti, non novæ constitutionis auctorem: quod non solum præsuli apostolico facere licet, sed cuicumque pontifici. » Quia vero non vetera constituta retractari vel refragari liceat, sed de novis emergentibus rebus novæ constitutiones requiri debeant, quæ tamen evangelicæ veritati non habeantur contraria, nec decretis sanctorum adversa; idem sanctus Gelasius in decretis suis, his enumeratis qui diffinitione constituta viritum et per diversa tempora fuere damnati, hoc modo demonstrat (*epist. 11, sub initium*): « Synodus, inquit, semel gesta condemnans, quin præfatos, ulterius ad nova concilia venire non sivit, sed universos quocumque modo in has blasphemias recedentes tradito sibi limite synodali refutavit Ecclesia: nec unquam recte cecisisse manifestum est, qualibet necessitate cogente, noviter quæ fuerant salubriter constituta temerasse. » Et post aliquanta: « Quoniam idem ipse error, qui semel est cum suo auctore damnatus, in particeps quolibet prævæ communionis effecto, execrationem sui gestat et pœnam. » Et iter: « Quia et nova in utroque pontifice causa esset exorta, et novam discussionem consequenter inquireret, ut sicut semper effectum, sacerdotali concilio de sacerdotibus judicia provenirent. » Et item: « Cum novæ essent causæ, nova debuit ecclesiastica provenire discussio. » Et item: « Novæ certe erant causæ, et his consequenter nova synodus debebatur. » Et item: « An hæc licuit sæculari potestati, et actis talibus Acacio consentientem, absque ulla synodo, quam ipsa rerum novitas exigebat, absque sedis apostolicæ consultatione perficere, et sedi apostolicæ non licuit, secundum tenorem synodi Chalcedonensis, in veteri utique causa, et veteri constituto, justa diffinitione damnata, inimicis synodi Chalcedonensis Acacium communicantem a sua communionem depellere? » Et item: « Nec opus fuit nova synodo, cum veteris constituti sufficienter hoc forma præscriberet. » Et item: « Quæ congregatio facta pontificum, non contra Chalcedonensem, non tanquam nova synodus secundum tenorem veteris constituti particeps apostolicæ executionis effecta est. » Et item: « Nec dubium quod sicut in unaquaque hæresi, quod incensabiliter repetendum est, quia firmum esse nul-

lus ambigit Christianus, omnes complices, sectatores, communicatores damnata semel pravitate pari sorte censentur. » Et item: « Inauditos, indiscussos, inconvictos non debere percelli, maxime cum novæ causæ et nova rerum facies appareret, ut rectores isti plebium repentinis incursionibus, pro mundanæ potentie voluntate, sacris dignitatibus privarentur, ex nulla veteri causa, ex nullo collegio reatus, nec participatione cujuslibet erroris jam ante damnati, teneri eos convincique consortes, ut tanquam ex præterita diffinitione judicarentur obstricti. » Sed et beati Gregorii condigna invectio ad Vitalianum episcopum Sipontinum memoriam meam non transit, quando tuam alligationem, quinimo execrabilem maledictionem dissolvit, qua idem beatus homo dicit (*lib. VIII, epist. 9*): « Si custos religiosi habitus, aut esse nosse episcopum, filie gloriose memorie Tulliani magistri militie, te illic posito, nec projectis religiosis vestibus ad sæcularem reverti habitum, nec ad nos licuisset perversam epistolam destinare. Nam si, ut præfati sumus, sollicitus existisses, prius ad nos ultio mulieris pravissime quam culpa debuit pervenire. » Et hinc ad Sergium defensorem (*lib. eodem, epist. 10*): « Si homo esses, aut discretionem aliquam habuisses, ita regularis discipline debuisti custos existere, ut ea quæ illic illicita committuntur, ante vindicta corrigeret, quam ad nos eorum nuntius perveniret. » Et post pauca: « Nam si quolibet modo in hac re negligens vel lentus existeris, ita in te noveris districtissime vindicandum, ut quod ex te nescis, pœna possis reserante cognoscere: quia sicut diximus, si intellectum hominis habuisses, hæc quæ modo facere præciperis, a te debuimus etiam cum ultione ante facta cognoscere. » Quid etiam hinc sacri canones per singula concilia decernant, devitans prolixitatem, et quia notissima sunt, hic ponere prætermitto. Tantum de Carthaginensi concilio testimonium, quod et supra posui, unum pono, Gratus episcopus dixit (*conc. 1, can. 13*): « Novellæ suggestiones, quæ vel obscuræ sunt, vel sub genere latent, inspecta a nobis formam accipient. Cæterum de quibus apertissime divina Scriptura sanxit, non differenda sententia est, sed potius exsequenda. » Lege Breviarium Africae provincie canonum, sedi apostolicæ missum, et ab eadem sede corroboratum, et hæc in fronte canonum ipsorum invenies.

CAPUT XXXV.

Quod apostolica sedes cum episcopis conjudicet, qui secundum canones judicant, et quod non bene intelligat, ut metropolitanus absque provincialium instantia causas non audiat.

Quicumque igitur primates provinciarum a Domino constituti, et apostolica auctoritate confirmati, sed et quique catholici episcopi, de certis et manifestis rebus, de quibus expressa judicia, et irrefragabiliter atque inconulse conservandas diffinitivas habemus sententias, secundum sacros canones, et decreta sedis Ro-

manæ pontificum, quæque decernimus et judicamus, apostolica sedes, et catholica Ecclesia, apostolorum fundamento fundata super angulari lapide Christo Jesu, in quo omnis ædificatio constructa crescit in templum sanctum in Domino, in nobis pro patribus natis filiis, id est pro apostolis creatis episcopis, ut in ordinandis coordinat, ita et in decernendis canonicè condecernit, et in judicandis conjudicat. Nos autem, qui sacros canones, et decreta sedis Romanæ pontificum sub ipsius apostolicæ petrae iudicio exsequimur, nihil aliud quam juste judicantium fautores, et iustorum iudiciorum executores, obedientiam sancto Spiritui, qui per eos locutus est, et sedi apostolicæ, a qua rivus religionis, et ecclesiasticæ ordinationis, atque canonicæ iudicationis profluxit, dependentes existimus. Quoniam quicumque baptismo catholico baptizent, sicut ad Joannem Baptistam dictum est, ipse est Christus videlicet Jesus qui baptizat, et quicumque sacrificent, ipse est sacerdos secundum ordinem Melchisedech, sempiternum habens sacerdotium, qui sanctificat (*Joan. 1*): quia ut sanctus Leo dicit (*epist. 91*): « Si quid per servitum nostram bono ordine et gratulando impletur effectu, non ambigimus per Spiritum sanctum nobis fuisse donatum, et operi nostro ipse Salvator intervenit, nec unquam ab his abest, quæ ministris suis exsequenda commisit dicens: *Ecce ego vobiscum sum omnibus diebus usque ad consummationem sæculi* (*Matth. xxviii*). » Et item Leo: « De his qui in Nicæno concilio, suggerente sibi met sancto Spiritu, quia aliter credendum non est, mansuras usque in finem mundi leges ecclesiasticorum canonum condiderunt, et apud nos in toto orbe terrarum in suis constitutionibus vivunt, et si quid usquam aliter quam illi statuerè præsumitur, sine cunctatione cassatur. » Et sanctus Augustinus dicit (*De vera Relig. c. 31*): « Æternam legem mundis animis fas est cognoscere, non est fas judicare. In istis autem temporalibus legibus, quanquam de his homines judicent, cum eas instituunt, tamen cum fuerint institutæ atque firmatæ, non licebit iudici de ipsis judicare, sed secundum ipsas. » Non ergo ea, quæ per me qualemcunque metropolitanum, et primatem Rhemorum provinciæ, ad cuius curam, secundum sacros canones et decreta sedis Romanæ pontificum, sollicitudo pertinet totius provinciæ, sedes apostolica, et sancti patres nostri, qui cum Deo in cælo, regnant, et in terris miraculis coruscant, quin ipse ut præmiseram Salvator noster dissolvit, ex his quæ provincialis episcopus contra diffinitivas sanctarum regularum sententias alligasti, quantacunque et qualicunque tua et complicum tuorum subscriptione potes ligare, nec ea, quæ secundum præfixas regulas a sanctis Patribus ligo, potes absolvere: quia ut Gelasius in decretis suis dicit, veluti potes in libro, quem tibi ante altare sanctæ Mariæ in die ordinationis tuæ commisi, relegere: Inferior potiorè absolovere non potest, potior autem inferiorem consequenter absolvit. Proinde inferioris loci pontifices,

qui nullatenus se noverant potiorè sibi sine prima sede posse resolvère, præcipue quem ejus sententia noverant obligatum, prævaricatoria absolute non illum penitus exuerunt, sed se prævaricatorè potius nexuerunt. Sed et quia Dominus ad quemdam dicit: *Ex verbis tuis te judico* (*Luc. xxiv*), licet in tuis compilationibus non mittere, sed potius omittere delegeris ex eorum verbis de quibus testimonia collegisti, quæ te mordere non ignorasti, unum pro omnibus quasi præemptorium edictum tibi proponam. Cum enim quædam posuisti de diverse collectis a Lucio papa ex diversis decessorum ac prædecessorum suorum dictis, interscripsisti: « Similiter, inquit, auctoritate fulti apostolica præcipimus, ut nullus metropolitanus, absque cæterorum omnium B provincialium episcoporum instantia, aliquorum audiat causas, quia irritæ erunt, et ipse causam pro facto dabit: putans te alligare onus grave et importabile, et imponere in humeros metropolitanorum, quod tibi conjunctim idem Lucius scripsit, digito tuo movere noluisti. Ait enim consequenter sine ulla interpositione: Episcopi vero per singulas provincias observent, ne posteriores se prioribus suis præferant, nec eis inconsultis, nisi quantum ad propriam pertinet parochiam, aliquid agant: sed omnes de communibus eorum causis consonam sententiam proferant et determinent, quoniam aliter actæ nullas vires habebunt, nec ecclesiasticæ reputabuntur. » Quia igitur partim Lucius, et post eum plenius Antiocheni canones decreverunt (*can. 9*): « Ut episcopus præter metropolitanum nihil agat, nisi ea tantum C quæ ad suam parochiam pertinent, possessionesque subjectas, ut regat juxta reverentiam singulis competentem, et providentiam gerat omnis possessionis, quæ sub ejus est potestate, ita ut presbyteros et diacones ordinet, et singula suo iudicio comprehendat, debes limatè attendere quod dicitur: Presbyteros, inquit, et diacones ordinet, et non exordinet: quia quos solus episcopus ordinare potes, solus, nisi ut venerandi præfigunt canones, a sacris officiis submovere vel suspendere nequaquam potes. Et singula, inquit, non autem generalia, tuo iudicio comprehendas, quem convenit nosse metropolitanum episcopum sollicitudinem totius provinciæ gerere, propter quod ad metropolim omnes undique qui negotia videntur habere concurrant. » Et Leo tibi dicit (*ibid.*): D « Quoniam in causis, quæ ad generale observantiam pertinent omnium Domini sacerdotum, nihil sine primatibus oportet impleri. » Et Lucius tibi ante Leonem prædixit, quod et canones Africae provinciæ dicunt: « Ne tuis prioribus inconsultis, nisi quantum ad propriam pertinet parochiam, aliquid agas, quoniam aliter actæ nullas vires habebunt, nec ecclesiasticæ reputabuntur. » Quia ergo illa quæ male contra evangelicam veritatem, et apostolicam auctoritatem, contraque sacrorum canonum et apostolicæ sedis constitutiones, sine concilio metropolitani, in quo tibi consensu non debuit, sicut nec fecit, ligasti, secundum

Lucili verba nullas vires habent, nec ecclesiasticæ reputantur, libere potui solvere quod non licuit tibi ligare. Sed et hoc bene, ut patet, non intellexisti, et certum est quia non recto sensu posuisti quod Lucius dixit : « Ut nullus metropolitanus absque cæterorum omnium comprovincialium episcoporum instantia aliquorum audiat causas. » Quia pro omnibus reprehensibilibus, quæ de te per omnium, ut ita dixerim, ora volitant, et ad me non pervenire non possunt, semper quando easdem reprehensiones tuas audio, omnes episcopos provinciales, ut eas mecum audiant, congregare non possum. Si enim bene intellexisses Carthaginenses canones quibus dicitur (*conc. Carthag. iv, can. 23*) : « Ut episcopus nullius causam audiat sine præsentia clericorum suorum, » in hac de auditione sentitia non errares : cum alio sensu accipiendum sit quod Jacobus dixit ad Paulum : *Audient, quin Judæi, te supervenisse (Act. xxi)*; et Paulus de se : *Audiant omnes gentes, et liberatus sum de ore leonis (II Tim. iv)*; et alio sensu quod dicit ad Corinthios : *Audio inter vos scissuras esse, id est schismata, et ex parte credo (I Cor. i)*. Et alio quod item ad eos dicit : *Auditor inter vos fornicatio (I Cor. v)*; et Elii filiis suis : *Non bona est fama, quam ego audio de vobis (I Reg. ii)*. Unde intelligere debes, inter auditionem et audientiam vel audientiam esse differentiam, sicut et Scripturæ demonstrant. De audientia quippe Felix ad Paulum : *Audiam te, inquit, cum accusatores tui venerint (Act. xxiii)*; et canones : Non oportet negare audientiam roganti : et aliter intelligenda est auditio in eo loco ubi dicitur : *Domine, audivi auditionem tuam et timui (Habac. iii)*; et aliter ubi dicitur : *Justus ab auditione mala non timebit (Psal. iii)*. Similiter differentiam intelligere debes inter nominationem, et nominationem atque cognitionem, ut item Paulus dicit : *Si quis frater nominatur fornicator (I Cor. v)*; et : *Ecce ego Paulus dico vobis. Et veniam cito ad vos, si Dominus voluerit, et cognoscam non sermonem eorum qui inflati sunt, sed virtutem (I Cor. iv)*. Hinc sicut in legibus atque in canonibus invenitur, inter cognitionem quoque et agnitionem esse differentiam intelligere debes, sicut ostenditur in Africæ provinciæ canonibus, in quibus scriptum est (*can. 71*) : « Quicumque ab imperatore cognitionem judiciorum publicorum expetiverit, honore proprio privetur. » Sed et alibi iidem ac Sardicenses canones glossam cognitionis exprimunt. Et sanctus Gregorius in homilia Evangelii differentiam agnitionis, quæ significationibus vel relatu percipitur, ut Paulus : *Significatum est mihi de vobis ab his qui sunt Chloes (I Cor. i)*, et reliqua, a cognitione, quæ legali ac regulari iudicio comperitur, demonstrat loquens ad episcopos de Simoniaca hæresi, quam si per cognitionem in personis certis compertus fuisset, sine iudicio ecclesiastico non dimisisset. « Vobis, inquit (*Greg. hom. 17 in Evang.*), sacerdotes, lugens loquor, quia nonnullos vestrum cum præmiis facere ordinationes agnovimus, spiritalem gratiam vendere, et de alienis iniquitatibus cum peccati damno tem-

poralia lucra cumulare. Cur ergo ad memoriam vestram non redit quod vox divina præcipiens dicit : *Gratis accepistis, gratis date ? (Matth. x)*. Cur non ante mentis oculos revocatis, quod templum Redemptor noster ingressus, cathedras vendentium columbas everlit, et nummulariorum effudit æs ? Quinam sunt in templo Dei hodie, qui columbas vendunt, nisi qui in Ecclesia pretium de impositione manus accipiunt, per quam videlicet manus impositionem Spiritus sanctus cœlitus datur ? Columba igitur venditur, quia manus impositio, per quam Spiritus sanctus accipitur, ad pretium præbetur : sed Redemptor noster cathedras vendentium columbas everlit, quia talium negotiatorum sacerdotium destruit. Hinc est quod sacri canones simoniacam hæresim damnant, et eos sacerdotio privari præcipiunt, qui de largiendis ordinibus pretium quaerunt. Cathedra ergo vendentium columbas everlitur, quando hi, qui spiritalem gratiam venundant, vel ante humanos, vel ante Dei oculos sacerdotio privantur. » De hac agnitione et beatus Augustinus in libro de Pœnitentia dicit (*cap. 3*) : « Plerique, inquirens, boni Christiani tacent, et sufferunt aliorum peccata quæ noverunt, quia documentis sæpe deseruntur, ut ea quæ ipsi sciunt iudiciis ecclesiasticis probare non possint. Quamvis enim vera sint quædam, non tamen iudici facile credenda sunt, nisi certis indicis demonstrentur. Nos vero a communiorem quemquam prohibere non possumus, quamvis hæc prohibitio nondum sit mortalis, sed medicinalis, nisi aut sponte confessum, aut aliquo, sive sæculari, sive ecclesiastico iudicio accusatum atque convictum. Quis enim sibi utrumque audeat assumere, ut cuiquam ipse sit et accusator et iudex ? Non enim temere et quomodolibet, sed per iudicium ab Ecclesiæ communione separandi sunt mali, ut si per iudicium auferri non possunt, tolerentur potius velut palea cum tritico, usque ad ultimum ventilabrum, vel pisces mali cum bonis usque ad segregationem, quæ futura est in litore, hoc est in fine sæculi. » De qua agnitione ad me perventa, bene reminisci potes me jam te commonuisse, quoniam per multos audivi, sed et usque ad aures domini regis pervenit, quia et de impositione manus in ordinatione ecclesiasticorum graduum, etiam a manu muneris accipiebas, et de ecclesiarum datione, quæ etiam non amplius quam dotem suam, id est manum, quem sub immunitate, sicut in capitulis ecclesiasticis continetur, habent cum decima fidelium præmia requirebas, et a diffamatis presbyteris, ne discuterentur, redemptionem accipiebas. Unde et ab ecclesiæ tuæ filiis isdem domnus rex veritatem audire quæsivit, et requisitionem, interveniente tali causa quæ nota est, prosequi desitit, tibi que quam terribilius potui, interdixi, ut his facinoribus nullo modo communicares. Sed et ante altare sanctæ Mariæ, ante quod episcopus es ordinatus, a me dictum audisti, et accepisti, si forte obaudisti, et mente condidisti, ut quod gratis accepisti, gratis etiam aliis secundum præceptum Domini dares (*Matth. x*) : quia dextera

ad pretium ordinantium, dextera est iniquitatis. Sed et quando hæc de te audivi, et a domno rege hæc requisisse cognovi, tibi et præscripta verba beati Gregorii dixi, et hæc quæ subsequuntur inculcare curavi, quibus in homilia Evangelii trigesima nona dicit: « Ingressus, inquit, Dominus Jesus templum, cepit ejicere vendentes et ementes de illo (*Luc. XIX*). Sicut templum Dei in civitate est, ita et in plebe fidelium vita religiosorum. Et sæpe nonnulli regionis habitum sumunt, et dum sacrorum ordinum locum percipiunt, sanctæ religionis officium in commercium terrenæ negotiationis trahunt. Vendentes quippe in templo sunt, qui hoc quod quibusdam jure competit, ad præmium largiuntur. Justitiam enim vendere est, hanc pro præmii acceptione servare. Ementes vero in templo sunt, qui dum hoc persolvere proximo quod justum est nolunt, dumque rem jure debitam facere contemnunt, dato patronis præmio emunt peccatum. Quibus bene dicitur: *Domus mea domus orationis est, vos autem fecistis illam speluncam latronum* (*Isa. LVI*): quia dum nonnunquam perversi homines locum religionis tenent, ibi maliciæ suæ gradibus occidunt, ubi vivificare proximos orationis suæ intercessione debuerunt. » Et item in homilia quarta: « *Gratis, inquit, Dominus, accepistis, gratis date* (*Matth. X*). Præsciebat namque nonnullos hoc ipsum donum accepti Spiritus in usum negotiationis inflectere, et miraculorum signa ad avaritiæ obsequium declinare. Hinc est enim quod Simon per impositionem manus edita miracula concupiscens, percipere donum Spiritus sancti pecunia voluit, scilicet ut deterius venderet quod male comparasset. Hinc de templo Redemptor noster flagello de reticulis facto turbas ejecit, cathedras vendentium columbas evertit. Columbas quippe vendere est, impositionem manus, qua Spiritus sanctus accipitur, non ad vitæ meritum, sed ad præmium dare. Sed sunt nonnulli, qui quidem nummorum præmia ex ordinatione non accipiunt, et tamen sacros ordines pro humana gratia largiuntur, atque de largitate eadem laudis solummodo retributionem quærunt. Hi nimirum, quod gratis acceptum est, gratis non tribuunt, quia de impenso officio sanctitatis nummum favoris expectant. Unde bene cum justum virum describeret Propheta ait: *Qui excutit manus suas ab omni munere* (*Isa. XXXIII*). Neque enim dicit, qui excutit manus suas a munere, sed adjunxit, ab omni: quia aliud est munus ab obsequio, aliud munus a manu, aliud munus a lingua. Munus quippe ab obsequio est, subjectis indebite impensa, munus a manu, pecunia, munus a lingua, favor. Qui ergo sacros ordines tribuit, tunc ab omni munere manus excutit, quando in divinis rebus non solum nullam pecuniam, sed etiam humanam gratiam non requirit. « Et in epistola ad Joannem Corinthiorum episcopum: « Pervenit, inquit (*lib. IV, ep. 55*), ad nos, quod in illis partibus nullus ad sacrum ordinem sine commodi datione perveniat. Quod si ita est, flens dico, gemens denuntio, quia cum sacerdotalis ordo intus cecidit,

A foris quoque diu stare non poterit. Scimus quippe ex Evangelio, quid Redemptor noster per semetipsum fecerit, quia ingressus templum cathedras vendentium columbas evertit. Columbas enim vendere est, de Spiritu sancto, quem Deus omnipotens consubstantiali sibi per impositionem manuum hominibus tribuit, commodum temporale percipere. Ex quo, ut prædixi, malo jam innuitur quid sequatur, quia qui in templo Dei columbas vendere præsumpserunt, eorum Deo giudice cathedræ corruerunt. Qui videlicet error in subditis cum augmento propagatur. Nam ipse quoque, qui præmio ad sacrum honorem perducitur, jam in ipsa proventus sui radice vitiatus, paratior est aliis vendundare quod emit; et ubi est quod scriptum est: *Gratis accepistis, gratis date?* (*Matth. X*.) Et cum primo contra sanctam Ecclesiam simoniaca hæresis sit exorta, cur non perpenditur, cur non videtur, quia eum, quem quis cum pretio ordinat, provehendo agit ut hæreticus fiat? Quia igitur hanc nefandissimam pravitatem universalis damnat Ecclesia, hortamur fraternitatem vestram, ut tam detestabile et immane peccatum de locis omnibus, quæ sub se sunt, sollicitudinis suæ compescat omnibus modis instantia. Nam si quid tale deinceps fieri senserimus, jam non verbis, sed canonica ultione corrigemus, et de vobis, quod non oportet, aliud incipiemus habere iudicium. » Et hinc in multis epistolis suis ad multos episcopos terribilia et grandia scripsit, quæ per te in suis locis legere potes, et cavere debes. Dixi etiam tibi, quia verba Dei, quæ sanctus Petrus apostolorum princeps, qui hanc hæresim in Simone mago damnavit, in omnes ex tunc et nunc, et usque in finem sæculi, veridica et valentia permanent. Et sicuti cum illo pecunia sua exstitit, in perditionem, ita et omnes qui hinc munera dant vel accipiunt, nisi dignam inde pœnitentiam egerint, in perditione et manent et sine fine manebunt. Et cum uterque sint hæretici, scilicet, et qui pro impositione manus pretium donant, et qui munus accipiunt, reatu tamen majore delinquit, qui potiore honore perfuitur, quia graviora facit vitia peccatorum sublimitas dignitatum. Et det Dominus ut non sint vera, quæ per multos ex hoc de te audio, et obstestor te per sanctam et inseparabilem Trinitatem, et per crucem et sanguinem Jesu Christi, Filii Dei vivi, ex quo, et a quo, et per quem omnis episcopatus ecclesiasticus cepit exordium, et per ipsum sanctum Spiritum, qui maxime in ordinationibus operatur, et per omnem sanctorum angelorum militiam, ac per sanctam omnium electorum Ecclesiam conscriptam in cælis, et per futurum iudicium, quo Christus veniet judicare vivos et mortuos, et sæculum per ignem, et reddere unicuique secundum opera sua, ut nec ipse, contra divinas et canonicas constitutiones, te huic Deo contrariæ negotiationi quolibet modo vel quacunque excogitata adinventione immisceas, nec alicui, quantum ex te est, et quantum ad te pertinet, immisceri consentias: imo tuis, quanta potes obstestatione, interdicere studeas.

Quam obstationem non nova præsumptione exero, sed pro modulo meo beati Pauli sequor exemplum, scribentis ad Timotheum, quem juvenem ordinavit Episcopum, licet non de hac causa, sed de aliis, de quibus necessarium duxit, hujusmodi obstationem exeruit. Cujus verba, per quem locutus est Christus, etiam tibi inculco. *Testificor, inquit, coram Deo, et Christo Jesu, et electis angelis, ut hæc custodias sine præjudicia, nihil faciens in aliam partem declinando (I Tim. v); et: Præcipio tibi coram Deo, qui vivificat omnia, et Christo Jesu, qui testimonium reddidit sub Pontio Pilato bonam confessionem, ut serves mandatum sine macula irreprehensibile usque in adventum Domini nostri Jesu Christi (I Tim. vi).* De Lucii autem epistola, quæ ante Nicænum concilium facta fuit non ideo tibi scripsi, quasi non sufficiant ad auctoritatem, quæ sacrorum conciliorum canones, et ex his promulgata decreta alia sedis apostolicæ dicunt, sed ut scientiam tuam quæ inflat, sine charitate quæ ædificat, vento distentam esse demonstrarem. Hæc, frater, patienter atque benigne suscipe, et apud peritos medicos disce sapientiam, quia illis inponentibus sæpe funem portat phreneticus unde ligetur. Et illa, de quibus me comprehendi a te posse existimas, discrete intellige: quoniam alia sunt quæ metropolitanus sine consilio atque consensu omnium coepiscoporum provinciæ agere non debet, sicut causas accusantis episcopum, ad discutiendum, vel ipsum canonice judicandum, sive noxium vel purgatum decernere, vel in loco decedentis episcopi ordinare, et de quibuscunque noviter emergentibus causis, vel dubiis aut obscuris: et alia sunt, de quibus certa et expressa in sacris regulis habemus judicia, quæ refragari vel convelli non licet, sed sine retractione exsequi auctoritas et ratio ipsa compellit.

CAPUT XXXVI.

De irregulari subscriptione, quam collectioni suæ apposuit.

His igitur documentis certissimis constat quod me replicare cogit ipsa necessitas, quia si in parochia tua, quæ mihi cum sollicitudine totius Rhemorum provinciæ commissa est, secundum privilegium mihi datum, quod male admisisti corrigere detrectassem, a præstitutis regulis negligentia discederem, a quibus præsumptione tua discessisti. Egi ergo secundum jus metropolitana auctoritatis, in quo jure metropolitana dignitatis, me a te, subjectæ civitatis episcopo, mihi velis nolis subjecto, capitulum beati Leonis discrevit, quo jussit metropolitanis singularum provinciarum jus traditæ sibi antiquitus dignitatis intemeratum servare, ita ut a præstitutis regulis nulla, aut negligentia, aut præsumptione discedant. Aliud autem capitulum ejusdem beati Leonis me tibi ordinis societate conjunxit, in epistola ad omnes episcopo per diversas provincias constitutos, de sacris ordinibus et canonum promulgata disciplinis, dum dicit (*epist. 1*): « Hoc admonitio nostra denuntiat, quod si quis fratrum con-

Atra hæc constituta venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem, qui socius esse noluit disciplinæ. » Pensemus igitur non dolosa, sed recta statera, quem nostrum pressius istud contingat capitulum, utrum me, qui ea, qui ea irrefragabiliter observanda sunt constituta, auctoritate metropolitana in parochia provinciæ mihi commissæ conservare decrevi, ante, qui in illa, quæ inviolabiliter conservanda sunt constituta, et temerasti et convelli fecisti, et præter me, primatem tuum, contra statuta ecclesiastica subscripsisti et subscribi fecisti, cum sicut statuta ecclesiastica docent, sine me nihil decernere valeas, quæ ad generalem observantiam pertinent omnium Domini sacerdotum, sicut Africanum decrevit concilium dicens (*conc. Afric., can. 53*): « Ut posteriores anterioribus deferant, nec eis inconsultis aliquid agere præsumant. Qua de re, inquit Aurelius, dico, prout captus animi mei retinet, eos qui putaverint spretis majoribus aliquid præsumendum, competenter esse ab omni concilio coercendos. » Et hinc Leo ad Theodorum Foro-Juliensem episcopum dicit (*Leo, epist. 59*): « Quia in causis, quæ ad generalem observantiam pertinent omnium Domini sacerdotum, nihil sine primaticus oportet impleri. » Contra constituta ergo venisti, cum ea, quæ ipsa præcipiunt nulli poscenti negari, omnibus in tua parochia denegari jussisti. Prohibita quidem fuisti ausus admittere, cum adversus ea me postposito subscripsisti et subscribi fecisti, quod etiam nec in rectis agere debuisti; subscriptio namque tua, sicut a multis dicitur, habetur hujusmodi: « Hincmarus Deo miserante Ecclesiæ Landunensis episcopus, his sanctorum apostolicæ sedis Patrum decretis obtemperandum subscripsi. Qui quoque mihi eodem Deo auctore commissi sunt, et in his similiter sentiunt, solliciti servare unitatem spiritus in vinculo pacis, hæc mecum pace potiantur. Si vero aliqui secus nolentes fieri socii hujus disciplinæ, nec habeantur participes communionis nostræ. Actum Lauduno VIII Idus Julias. »

Qua subscriptione tua manifestissime claret, quia si Nicæno concilio, et aliis generalibus catholicis synodis, eorumque fixis et immobilibus decretis contraria sentis in aliquo, te tibi que complices a catholica communione segregasti, dicens: His decretis obtemperandum subscripsi. Unde verbis beati Gregorii alloquentis Serenum Massiliensem episcopum te alloquor, dicens (*lib. ix, ep. 9*): « Dic frater, a quo factum sacerdote aliquando auditum est quod fecisti? Si non aliud, vel illud te debuit revocare, ut despectis aliis fratribus solum te sanctum et esse crederes sapientem. Præcipue cum sacrorum canonum prohibitio te ab hac præsumptione modis omnibus revocet. Hoc verum quod dicis, Deo miserante Ecclesiæ Laudunensis te esse episcopum, oramus ut verum sit. Legimus tamen de quibusdam dicere Dominum: *Ipsi regnaverunt*

runt, et non ex me: principes exstiterunt, et non cognovi (Ose. viii). Et: Dedi eis regem in ira mea, et principem in furore meo (Ose. xiii). Qui facit hypocritam regnare propter peccata populi (Job xxxiv). In eo quod subscripsisti, Actum Lauduno viii Idus Julias, intelligimus secundum leges quas probat Ecclesia, atque secundum sacros canones, hanc tuam sine consule prolatam non valere sententiam. Alia namque sunt, quæ subscribuntur ad notitiam rei vel temporis, alia quæ, scripto prolata sententia, subscriptione alligantur ad observationem constitutionis, aut professionis, seu accusationis, vel petitionis. « Sententia, inquit leges (Cod. Th. leg. 1, de const. princ., can. 56), si sine scripto dicta fuerit, nec nomen habere sententiæ mereatur; » et: « Si qua post hæc edicta sive constitutiones sine die et consule fuerit deprehensa, auctoritate careant. Et hinc Africæ provinciæ canones episcopis litteras ab ordinatoribus suis manu eorum conscriptas jubent accipere, continentes consulem et diem. » De eo quod subnexuisti: Qui quoque mihi commissi sunt, et in his similiter sentiunt, hac mecum pace potiantur, videris non simplici intelligentia posuisse, hac mecum pace potiantur: quia non est pax vera, nisi in unanimitate catholica, alioquin dicentes, ut scriptum est: Pax, pax, cum non esset pax (Jer. viii). Non est pax impiis, dicit Dominus (Isa. xlviii). Impii namque dicuntur, qui aut per fidem rectam Ecclesiæ catholicæ non incorporantur, aut ab ea fide vel opere per hæreses aut schismata recedunt. Et in unanimitate catholica non subscripsisti, neque tibi commissos subscribere fecisti, si, ut dixi, contra Nicænos canones, et alia generalia concilia, fixaque decreta sentis vel sensisti, ac per hoc sollicitus servare unitatem spiritus in vinculo pacis, nequaquam in ista subscriptione fuisti. Sicut enim in edicto quintæ synodi scriptum est: « Solent prave sentientes, ut simpliciores decipiant, vocibus quidem uti quæ ab orthodoxis pie dicuntur, rectum autem earum intellectum et expositionem ad suam impietatem transferre: quoniam est quando eadem voces, cum bene exponuntur et intelliguntur, cum pietate sunt: quando autem male a prave sentientibus interpretantur et proferuntur, impietatem habent. » Et sanctus Gregorius in homilia 10 Ezechielis dicit: « Quia quisquis expositor in explanatione sacri eloquii, ut fortasse auditoribus placeat, aliquid mentiendi componit, sua et non Dei verba loquitur, si tamen placendi vel seducendi studio mentiat. » Et tu, si hanc sententiam Apostoli tuis dictis interposuisti, ut ad subscribendum, quod non licet, comministros tuos facilius posses seducere, de auro et argento Dei, id est de sensu et eloquio divino, sicut per prophetam Dominus ad idololatram populum dicit, tuo sensu tibi et illis idolum fabricasti. Manifestum est enim, quia sententia apostolica, quam in eadem tua subscriptione ad tuam confirmandam sententiam perverse misisti, non eo sensu dicta est a beato Paulo apostolo, sicut eam ibi po-

suisti. Non enim, quando illam subscriptionem firmasti, quin potius te et subscribentes tecum infirmasti, sollicitus fuisti servare unitatem spiritus in vinculo pacis, sed sollicitus fuisti dissolvere unitatem spiritus contra vinculum pacis. Unde providendum est tibi, ne inter adulteratores verbi Dei computeris, quos, ut supra posui, redarguit Paulus apostolus. Sed et de hac sententia idem dicit. Solliciti servare unitatem spiritus in vinculo pacis, unum corpus, unus spiritus, sicut vocati estis in una spe vocationis vestræ (Ephes. iv). Unde beatus Gregorius: Ad unam igitur vocationis spem nequaquam pertingitur, si non ad eam unita cum proximis mente curatur. Est, inquit Dominus ad Moysen, locus penes me, et stabis super petram (Exod. xxxiii). Locus quidem apud Dominum est sanctæ Ecclesiæ unitas, qua supra petram statur, dum confessionis ejus soliditas utiliter tenetur. Hi enim in loco qui penes Dominum est, et supra petram stant, qui per hæreses vel per schismata ab unitate se Ecclesiæ non dividunt. Quia, ut sanctus Hilarus papa dicit (epist. 2), sicut et supra posui: « Non minus in sanctarum traditionum sanctiones delinquitur, quam in ipsius Domini injuriam prosilitur. » Credimus namque, ac cum Ecclesia catholica confitemur, sacros canones Spiritu Dei conditos: unde qui per contemptum pertinaciter a sacris canonibus deviant, in Spiritum sanctum quo sunt conditi peccant. Pertinaciter autem addidi, quoniam Dominus dicit (Matth. xii), quod in Spiritum sanctum peccantibus nec hic esse, nec in futuro sæculo remittendum. Et multos hæreticos legimus et credimus ad fidem catholicam revertentes, et hic remissionem suæ percepisse blasphemiæ, et in futuro spem indulgentiæ consequendæ sumpsisse. Nec tamen ejus refragatur sententia, qui alibi dixit: Verte impios, et non erunt (Prov. xii). Non quidem ut non sint per essentiam, sed non erunt quod fuerant per impietatis culpam: sicut et Paulus dicit de se: Vivo autem, jam non ego, vivit vero in me Christus (Gal. ii). Exstinctus quippe fuerat sævus ille persecutor, et vivere cœperat pius prædicator. Hinc etiam adhuc dico, quod cum catholica credo Ecclesia, et confiteor, quia Spiritu Dei, ut Leo cum aliis orthodoxis affirmat, canones sacri sunt conditi. Qui si quidem Spiritus est Patris, Spiritus est Filii, et Pater, et Filius, et Spiritus sanctus, quorum est una substantia, una voluntas et operatio, unus est Dominus, ac per hoc a Patre et Filio et Spiritu sancto, tota scilicet Trinitate uno Deo et Domino, canones sacri sunt conditi, a quibus qui per contemptum pertinaciter deviant, in Patrem et Filium et Spiritum sanctum, scilicet in Deum ac Dominum peccant. Constat igitur quia, ut Hilarus papa scribit, non minus in sanctarum traditionum sanctiones delinquitur, quam in ipsius Domini, Patris scilicet et Filii et Spiritus sancti, injuriam prosilitur. Et consequenter iterum pertinaciter, id est perseveranter addidi, quia beatus Joannes apostolus dicit: Est peccatum ad mortem, non dico ut cretus pro eo: et

est peccatum non ad mortem (I Joan. v, 16), dico ut oretur pro eo. Est quidem peccatum ad mortem, in eodem peccato manentibus : est peccatum non ad mortem, ab eodem peccato recedentibus. Nullum est quippe peccatum, pro quo aut non oret Ecclesia remittendum, aut quod data sibi divinitus potestate descendendum ab eo non possit absolvere, vel pœnitentibus relaxare, cui dicitur : *Quæcunque dimiseritis super terram, dimissa erunt et in cælis, et quæcunque solveritis super terram, erunt soluta et in cælis* (Matth. XVIII, 18). Cum enim dicitur : *Quæcunque solveritis*, omnia quæcunque sint, et quantacunque sint, et qualiacunque sint, ex quocunque statu, vel ex quocunque lapsu comprehenduntur : veraci nihilominus eorum manente sententia, quæ nunquam solvenda esse denuntiantur, in eodem tenore consistentibus, non etiam ab hoc eodem peccato postea recedentibus. Ex his igitur manifestissime claret de eadem tua subscriptione, in qua dicitis : *His*, quin a te specialiter excerptis, *sanctorum apostolicæ sedis Patrum decretis obtemperandum subscripsi*. Quia si, ut supra dixi, et nunc iterum dico, Nicæno concilio, et aliis generalibus ac catholicis synodis, eorumque fixis et irrefragabilibus decretis, quæ apostolica sedes et cuncta Ecclesia catholica recipit, veneratur, et servat, contraria in aliquo sentis, vel teneri ac servari decernis, te tibi que complices a catholica communione segregasti, et quando catholicæ observantiæ contrariis subscripsisti, sollicitus servare unitatem spiritus in vinculo pacis nequaquam in ista subscriptione fuisti. Et beati Leonis decernentis (epist. 59) : Quia in causis, quæ ad generalem observantiam pertinent omnium Domini sacerdotum, nihil sine primatibus oportet impleri, non fuisti socius disciplinæ. Unde timendum est ut non sis etiam consors communionis suæ, a cuius communione si quod absit fueris alienus, cum his, quorum decreta convelli fecisti, sicut ex sacris canonibus et decretis Romanæ sedis pontificum tibi scripto direxi, ac per hoc cum Ecclesia catholica communionem habere non poteris. Et non leve tibi ullo modo videatur quod supra ex verbis ejusdem beati Leonis posui, quibus dicit (epist. 84, ad Leonem Augustum) : « Quæ patrefacta sunt quærere, et quæ perfecta sunt retractare, et quæ sunt diffinita convellere, quid aliud est quam de adeptis gratiam non referre, et ad interdictæ arboris cibum improbus appetitus mortiferæ cupiditatis extendere ? » Sed cum magna cordis intentione considera, cui peccato peccatum quod admisisti diffinita convellens comparet, scilicet quod non nisi sanguine Filii Dei prævalet expiari, videlicet quod a primo parente commissum in omnes posteros pertransivit, sicut dicit Apostolus : *Per unum hominem peccatum intravit in mundum, et per peccatum mors, et ita in omnes homines pertransivit, in quo omnes peccaverunt* (Rom. v. 12) : sicut et per te in omnes tecum subscribentes contra diffinita a sanctis Patribus peccatum pertransiit, qui te agente in hoc peccaverunt, quia in illa subscriptione non te penitus

A exuisti, sed eos prævaricatione potius nexuisti, volens me ostendere canonum prævaricatorem, qui quasi contra canones in tua parochia solvi quæ ligasti, et certans me nota damnationis inurere, quam conscientia tua nequibat eflugere, et ideo plus veritus humanam verecundiam, ne vilis fieres ex his quæ perpere gessisti tuis subditis, quam reatum ante divinos oculos, quod humili resipiscentia corrigere poteras, ad illud argumentum te convertisti, ut hanc irregularem, imo tragædialem subscriptionem excogitares, et hac adinventione Dominum ad iracundiam amplius provocares, et tecum alios necceteres. Lege igitur in decretis Gelasii sententiam de Acasio, et de episcopis qui eum regulariter contendebant posse absolutum dicere, et eam tibi et his quos tecum fecisti subscribere applica, et quid egeris recognosce. Et quod ibi de sede apostolica leges, de tua metropoli, quæ jussa sedis apcstolicæ executata est, dictum puta. Ait enim (Gelasius, *epist. 11, in fine*) : « Ideo cum sede apostolica minime congruebant, quia in sortem reciderant prævaricatoris Acacii, et illius se sine dubio pervidebant sententia consequenter adstringi, ob hoc eum videri nolebant esse damnatum, quia se cognoscebant in eadem prævaricatione esse damnatos, in qua hodieque manere persistunt. Sed sicut hi simili conditione constricti, complicem suum non possunt judicare non jure damnatum, neque rei reum possunt competenter absolvere : sic illo jure prævaricatore damnato, ipsi quoque pari jacent damnatione prostrati, neque nisi resipiscentes inde poterunt prorsus absolvi ; quia sicut per unum scribentem eorum omnium vulgata transgressio est, qui in eandem perfidiæ reciderant actionem, sic in uno eodemque, qui pro omnibus scripserat, vel scribendo omnium prodiderat voluntates, transgressioe punita, pariter quoque cum eodem, vel in eodem est complicium transgressio punita cunctorum. » Et sanctus Hilarius in epistola de synodis, quam de exsilio ad Gallicanos misit episcopos, dicit : « Nihil, inquit, mirum videri vobis debet, fratres charissimi, quod tam frequenter exponi fides cœptæ sunt : necessitatem hanc furor hæreticus imposuit, et necessitas consuetudinem intulit exponi fides, et expositis subscribi. Ubi enim sensus conscientie periclitatur, illic littera postulat, nec sane subscribi impedit, quod salutare est confiteri. » Converte igitur oculos mentis tuæ ad actum tuum, quod irrationabiliter, et contra auctoritatem atque sine ulla necessitate in hac præsumptiva subscriptione tua perpetrare non timuisti, et tibi subditos agere compulisti, ne furor tuus, etsi diverso modo, non diverso dolo, in hoc facto furori hæreticorum æquetur, qui illic litteram postulasti, ubi sensus conscientie non periclitabatur, et fecisti subscribi quod salutare non est confiteri, si tamen sacro Nicæno concilio, et Romanæ sedis pontificum decretis post Nicænum concilium habitis, et ex sacris canonibus promulgatis, in aliquo est contrarium, quod a te et tuis complicibus

constat esse subscriptum. In quo pernicioso facto a te non leviter est erratum, in quem a beato Gelasio ostenditur transgressio punienda cunctorum, qui omnibus præscripsisti, et ab omnibus ministris tuis subscribi fecisti. Unde idem Gelasius dicit : « Quoniam idem ipse error, qui semel est cum suo auctore damnatus, in particeps quolibet pravæ communionis effecto, execrationem sui gestat et pœnam. » Et in epistola ad Anastasium (*epist. 10, sub medium*) : « Cum dicat Apostolus (*Rom. i*), non solum qui non facienda faciunt reos videri, sed etiam qui consentiunt facientibus? Proinde sicut non potest, perversitatis communicatore suscepto, non pariter perversitas approbari : sic non potest refutari perversitas complice sectatore perversitatis admissio. Legibus certe vestris criminum conscios, susceptoresque latrocinantium par judiciorum pœna constringit : nec expers facinoris æstimatur, qui licet ipse non fecerit, facientes tamen in familiaritatem fœdusque receperit. » Et in edicto quinti concilii scriptum est : « Miramur eorum dementiam, qui divinæ Scripturæ contraria agunt, evidenter dicenti (*Sap. xiv*), quia æqualiter horribilia sunt apud Deum impius et impietas ejus. Actio enim cum actore puniatur. » Si autem similiter impietas horribilis est Deo, et ille qui impie agit, certe separatus est talis a Deo, et anathemati juste subicitur. Anathema enim nihil aliud significat nisi a Deo separationem, sicut in Veteri et in Novo Testamento iudicium de anathemate significat. In mente igitur habe scriptum a beato Paulo : *Sic autem peccates in fratres, et percutientes eorum infirmam conscientiam, in Christum peccatis* (*I Cor. viii*). Graviter autem illi in Christum peccant, qui periculosissimo, et maxime detestando mendacio in religione mentientes, infirmorum conscientias percutiunt, de quibus specialiter scriptum est : *Perdes omnes qui loquuntur mendacium* (*Psal. v*). Et in decretis apostolicæ sedis scriptum est : *Quoniam quisquis schismatico assenserit, schismaticus esse negari non poterit*. Schisma enim a scissura est animorum, ut catholici doctores dicunt, vocatum. Eodem enim cultu, eodem ritu credit ut cæteri, solo congregationis delectatur discidio, et schismaticus est, licet sic credat ut catholica credit Ecclesia, si in dogmatibus ecclesiasticis ab Ecclesia se scindit catholica, cui quisquis assenserit, schismaticus esse negari non poterit : quod et si omnes sacerdotes et mundus assentiat, damnatio consentientes involvit, non prævaricationem consensus absolvit. Non enim crimen minuitur, sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit. Quorum perditionem evidenter catholica demonstrat Ecclesia, quæ ut pro hæreticis, ita conjunctim et pro schismaticis, orat, ut ad fidei et pacis redeant unitatem, sciens hæreticos et schismaticos in hæresi ac schismate permanentes regnum Dei non intraturos : quia nisi ad iudicium, in scissura

A mentium Deus non est, ut beatus dicit Gregorius. Deus quippe in unitate est, et illi ejus habere gratiam merentur, qui se ab invicem per sectarum scandala non dividunt. Unde per se Veritas admonet dicens : *Habete sal in vobis, et pacem habete inter vos* (*Marc. ix*). Ut quisquis habere sal sapientiæ studet, curet necesse est quatenus a pace concordia nunquam recedat. Sed sunt nonnulli, qui dum plus sapere quam necesse est student ; a proximorum pace resiliunt, dum eos velut hebetes stultosque contemnunt, sicut tu egisti, qui cum tuis complicitibus, et tecum subscriptentibus, a vinculo et unitate pacis ecclesiasticæ divisisti, contemnens auctoritatem tuæ metropolis, et contradicens atque resistens his quæ de Evangelica veritate et apostolica atque ecclesiastica auctoritate tibi et ecclesiæ. Laudunensi metropolitana sollicitudine scripsi, et eadem catholica Ecclesiæ auctoritate, considerans periculum imminens, quod male ligasti pro officio loci mei dissolvi.

CAPUT XXXVII.

Ut non sit prudens apud semetipsum, et de discretionem in pace tenenda.

Unde frater, et me et te moneo, ut attendamus quod Dominus per prophetam dicit : *Væ qui sapientes estis in oculis vestris, et coram vobismetipsis prudentes* (*Isa. v*) ; et per Apostolum : *Nolite prudentes esse apud vosmetipsos* (*Rom. xii*) ; et : *Si quis se existimat aliquid scire, nondum cognovit quomodo oporteat eum scire* (*I Cor. viii*) ; et : *Si quis vult inter vos sapiens esse, stultus fiat ut si sapiens, quia sapientia hujus mundi inimica est Deo* (*I Cor. iii*) ; et per Jacobum apostolum monstrat ; *Quia superba et contentiosa sapientia terrena, animalis est et diabolica : sapientia autem quæ desursum est, primum quidem pudica est, deinde pacifica, modesta, suavis, bonis consentiens* (*Jac. iii*). Scientia et enim virtus est, humilitas custos virtutis, et miranda actio cum elatione non elevat, sed gravat. Qui enim sine humilitate virtutes congregat, in ventum pulverem portat, et unde aliquid ferre cernitur, inde deterius cæcatur. Hinc etiam scriptum est : *Qui emittit fontes in convallibus* (*Psal. ciii*) ; et : *Convalles abundabunt frumento* (*Psal. lxiix*). A montibus namque aqua dilabitur, quia superba mens veritas doctrinæ deserit : sed fontes in convallibus surgunt, quia corda humilium verbum prædicationis accipiunt. Unde per se Veritas admonet dicens : *Habete sal in vobis, et pacem habete inter vos* (*Marc. ix*). Ut quisquis habet sal sapientiæ, studiose curet necesse est, quatenus a pace concordia nunquam recedat. Et ne in pace tenenda quis erret, per semetipsam veritas, cum terrenam pacem a superna distingueret, atque ad venturam discipulos ex præsentem provocaret, ait : *Pacem meam relinquo vobis, pacem meam do vobis* (*Joan. xiv*) ; relinquo scilicet transitoriam, do mansuram. Si ergo in ea cor quæ relicta est figitur, nunquam ad illam quæ danda est pervenit. Pax igitur præsens ita tenenda est, ut

et diligi debeat et contemni : quæ si immoderate A diligitur, diligentis animus in culpa capitur : et dum nimis humanam pacem desiderat, bravos hominum mores nequaquam redarguit, et consentiendo per-versis ab auctoris sui se pace disjungit, et dum humano foras jurgia metuit, interni fœderis discussione feritur. Hinc David, dum totum se ad fœdera pacis internæ constringeret, testatur quod cum malis concordiam non teneret, dicens : *Nonne qui te oderant oderam illos, et super inimicos tuos tabescebam? Perfecto odio oderam illos, inimici facti sunt mihi (Psal. cxxxviii)*, Inimicos etiam Dei perfecto odio odisse est, ad quod facti sunt diligere, et quod faciunt increpare, mores pravorum premere, vitæ prodesse. Pensandum est igitur, quando ab increpatione quiescitur, qua culpa eum pessimis pax tenetur, si Propheta etiam velut in hostiam Deo obtulit, quod contra se pro Domino pravorum inimicitias excitavit.

CAPUT XXXVIII.

Ut sacræ Scripturæ verba, et sacras regulas recte intelligat.

Admoneo etiam tuam dilectionem, ut cum sacræ Scripturæ verbis etiam sacras regulas, sicut a sancto Spiritu quo et sacræ Scripturæ sunt conditæ, intelligas : quoniam qui sacræ legis verba non recte intelligunt, saluberrimum vini potum in veneni sibi poculum vertunt, ac per medicinale ferrum vulnere se mortali feriunt, dum per hoc in se sana perimunt, per quod salubriter abscondere sauciata debuissent : quos videlicet ad intellectum pravum intentio perversa non raperet, nisi prius superbia inflaret : dum enim se præ cæteris sapientes arbitrantur, sequi alios ad melius intellecta despiciunt : atque ut apud imperitum vulgus scientiæ sibi nomen extorqueant, student summopere et ab aliis recte intellecta destruere et sua perversa roborare ; quorum sapientia sicut novacula acuta facit dolum (Psal. li) ; quia sicut novacula acuta sæpe assimilat se agere vultus nitorem, et genas vulnere suo sauciat, ita dolosa versutia dolo pravæ intelligentiæ vulnerat quos sano sensu sanare se simulat. Unde bene per prophetam dicitur : *Secuerunt pregnantes Galaad ad dilatandum terminum suum (Amos i)*. Quia nimirum bene dicta prave intelligentes, fidelium mentes, quæ jam aliquid de veritatis intellectu conceperant, perversa doctrina perimunt : et dum scientiæ sibi nomen extendunt, parvulorum corda jam de verbi conceptione gravida erroris gladio scindunt, et quasi doctrinæ sibi opinionem faciunt. Quibus primum necesse est ne inanem gloriam querant : quia si radix elationis absconditur, consequenter rami pravæ assertionis arefiunt. Nam catholici doctores, et Ecclesiæ sanctæ rectores, qui de hæresibus scripserunt, eos qui verba divini eloquii non recte intelligunt, vel non recte interpretantur, sed ad suos sensus illa allegorizant, in catalogo prave sentientium hæreticis connumerantes ascribunt.

CAPUT XXXIX.

Ut ab eo removeat dolorem, a se ipso periculum, et ab utroque improperium.

Admoneo te paterna et fraterna dilectione, ut removeas a me dolorem, a te periculum, et ab utrisque nostrum a plurimis illatum improperium. A me quidem dolorem, quia ut sanctus Gregorius dicit : « Minorem dolorem mala ingerunt, quæ ab extraneis inferuntur, plus vero in nobis ea tormenta sæviunt, quæ ab illis patimur, de quorum mentibus præsumebamus, quia cum damno corporis mala nos cruciant amissæ charitatis. » Hinc est enim quod de Juda traditore suo per Psalmistam Dominus dicit : *Et quidem si inimicus meus maledixisset mihi, supportassem ulique : et si is qui oderat me super me magna locutus fuisset, absconderem me utique ab eo Tu vero homo unanimes dux meus et notus meus, qui simul mecum dulces capiebas cibos, in domo Domini ambulavimus cum consensu (Psal. liv)*. Etrursum : *Homo pacis meæ, in quo sperabam, et qui edebat panes meos ampliavit adversum me supplantationem (Psal. xl)*. Ac si de traditore suo apertis vocibus dicat : Transgressionem ejus tanto gravius pertuliquanto hanc ab eo qui meus esse videbatur sensi. Omnes ergo electi, quia summi capitis membra sunt, caput quoque sum in passionibus sequuntur, ut ipsos adversarios in sua morte sentiant, de quorum vita præsumebant, et tanto eis crescat merces operis, quanto eis virtutis lucrum proficit et ex aliena damno charitatis. Et quoniam minus jacula feriunt quæ prævidentur, et nos tolerabilius mundi mala suscipimus, si contra hæc per præscientiæ clypeum munimur, eo ista de te tolerabilius porto, quo longe ante per prophetam a Domino dictum lego : *Unusquisque, inquit, a proximo suo se custodiat, et in omni fratre suo non habeat fiduciam, quia omnis frater supplantans supplantabit, et omnis amicus fraudulenter incedet, et vir fratrem suum deridebit, et veritatem non loquetur (Jer. ix)*. Et paulo post : *In ore pacem cum amico suo loquetur, et occulte ponet ei insidias, nunquid super his non visitabo, dicit Dominus? (Matth. x)* Et per semetipsam Veritas dicit : *Inimici hominis domestici ejus (Malac. ii)*. Et cum scriptum sit : *Labiæ sacerdotis custodient scientiam, et legem, quæ inter alia dicit : Honora patrem tuum et matrem tuam, requirent ex ore ejus, quia angelus Domini exercituum est (Exod. xx)*. Tu e contra, ne magnitudo miserationum Domini, quas de manu illius gratuita gratia sine merito ullo suscepti, extollat me, datus es mihi stimulus recognoscendæ infirmitatis meæ, angelus Satiæ, ut me et matrem tuam Rhemorum metropolim, quæ te nutrit, elatis moribus et inobedientis colaphizes. Sed sciens quia virtus in infirmitate perficitur, libenter gloriabor in his, quæ infirmitatibus meis, aut a Deo per corporales molestias, aut a diabolo per tentationes, aut ab homine per quaslibet immissiones inferuntur, ut inhabitet in me infirmo virtus Christi, qui

perficet in infirmitate virtutem. Periculum quoque discordiæ, quam contra auctoritatem et rationem, contraque salutem tuam erga me videris habere, a te quantocius amove : certissime sciens, quoniam quantislibet virtutibus polleas, spiritalis nullatenus fieri potes, si uniri per concordiam mihi et cæteris fratribus tuis neglexeris. Scriptum quippe est : *Fructus Spiritus est charitas, gaudium, pax (Galat. v)* : qui autem servare pacem non curat, ferre fructum Spiritus recusat. Certus enim es, si sanum sapi, quoniam tandiu nullum boni operis Deo sacrificium immolas, quandiu a proximorum charitate discordas : multo minus autem, si a dilectione mea discordas, qui te benigne nutriendum suscepi, orphanum dulci dilectione nutrivi, in clericum tottondi, litteris per me et per quoscumque potui erudivi, per singulos gradus ad ordinem episcopatus proxi, familiaritatem et dulcedinem dilectionis domni nostri regis tibi obtinui. Pensare enim cum magno timore debes quod scriptum est : *Si offers munus tuum ad altare, et ibi recordatus fueris quoniam frater tuus habet aliquid adversum te relinque ibi munus tuum ante altare, et vade prius reconciliari fratri tuo, et tunc veniens offer munus tuum (Matth. v, 23)*. Ex qua scilicet præceptione considerare debes, quam intolerabilis ejus culpa monstratur, cujus hostia repellitur. Nam cum mala cuncta bonis sequentibus diluantur, pensandum nobis est quanta sint mala discordiæ, quæ nisi extincta funditus fuerint, bonum sequi non permittunt : quia quælibet in nobis bona opera fuerint, si charitas disit, per malum discordiæ locus aperitur in acie, ut ad feriendum nos valeat hostis intrare. Ego, crede mihi, non tecum, sed cum tuis improbabilibus moribus et actuum motibus, de quibus te sæpe et verbis et litteris reprehendi et castigavi, et ut doleo, dolui, discordiam habeo. Fac quod salubriter tibi cupio, et tuo convenit ministerio, et me placabilem ac præstabilem in cunctis habebis. Alioquin expectabo, si per Dei gratiam verbum Domini, quod inter me et te adhuc laborat, tandem requiescere valeat. *Si peccaverit, inquit, in te frater tuus, increpa illum : si pœnitentiam egerit, dimitte illi (Matth. xviii)*. Interim autem, donec hoc verbum Domini inter me et te laborabit, utar continue salubris antidoti medicina contra mortiferum discordiæ poculum mihi a te propinatum, quam Dominus et Salvator noster conscius infirmitatis nostræ largiri dignatus est, dicens : *Cum stabilis ad orandum remittite si quid habetis adversus aliquem in cordibus vestris, ut et Pater vester cælestis dimittat vobis peccata vestra (Marc. xi)*. Et scilicet Conditor noster, dum tale placitum nostræ mentis aspexerit, a peccato nos solvet, quia munus pro culpa sumet. Quod munus etiam holocaustum gratia Dei misericordis fiet, si fuerit similia oleo conspersa, et in zeli sartagine frixa : scilicet cum misericorditer eum diligimus, et inter sacra pro eo oramus, quem zeli salutaris fervore insequi videmur, vel a quo invi-

diæ livore insequimur, imitantes illum qui mori etiam pro inimicis venerat, et tamen positurum se animam pro amicis dicebat, ut profecto nobis ostenderet, quia cum diligendo lucrum facere de inimicis possumus, etiam ipsi amici sunt qui persequuntur. Quæ non ideo dico, ut persecutionem tuam in damnis temporalibus vel in contumeliis timeam, aut magnopere sentiam, quibus etiam etsi voles me nocere non potes : sed de illa persecutione dico, licet sim injustus, qui me veraciter et ex corde peccatore profiteor, de qua beatus Petrus dicit : *Quoniam inter quos Loth habitabat, iniquis operibus de die in diem ejus animam cruciabant (II Petr. ii)*, et de qua Apostolus recolens historiæ veteris : *Quomodo, inquit, tunc is, qui secundum carnem erat, persequabatur eum qui secundum spiritum, ita et nunc (Gal. iv)*. Quia, ut ita dicamus, ferum nostræ animæ nequaquam perducitur ad subtilitatem acuminis, si hoc non eraserit aliena lima pravitatis.

CAPUT XL.

Verum non esse quod dicere solebat, Hincari consilio regem ipsi adversatum esse.

Et quia dictum est mihi, te plurimis solere dicere, quoniam quidquid tibi, de tuis hominibus, et de hominibus suis ad Laudunum directis, et de eo quod te commendavit Conrado, contrarium domnus noster rex egerit, hoc meo instinctu et consilio atque consensu egisse, tibi refero non esse verum, sicut et scriptis ad eundem domnum nostrum regent, sed et ad alios inde in eodem tempore directis possum ostendere, et coram plurimis episcopis apud Pistas domno nostro regi dixi me audisse quod sic deceres, et idem domnus noster rex coram eisdem episcopis respondit, sicut et pro certo verum dixit, quod nec meo instinctu, nec meo consilio, neque meo consensu hoc egerit, licet quædam fuerint et sint, de quibus metropolitana auctoritate, vel synodali conventionem, ac regia potestate corripere debueris atque debeas. Quæ non ideo dico, ut me apud te excusare operæ pretium ducam, cum stultum esse majores nostri demonstrent, si eis placere quærimus, vel displicere timeamus, quos honorum judicis non placere cognoscimus : sed ut in quibus ex veritate possum, quantum ex me est, quantumque sufficio, idoneum reddam bonum nomen, quod Apostolus etiam ab his qui foris sunt habere jubet episcopum. Quia vero auctoritate divina regi obedire jubemur, ipsius jussione respondisse me ex Scripturis et sacris legibus atque sanctorum verbis tuis litteris ad eum directis non nego. In qua responsione si quid perperere dixisse vel egisse me invenisti ostende, et aut rationabiliter sine contentione defendam, aut humiliter sine disceptatione recognoscam.

CAPUT XLI.

Quod si culpam agnosceret, pro divino timore indulgentiam expeteret.

Cæterum, si me contra auctoritatem et debitam

fraternæ dilectionis unanimitatem, quæ, ut supra dixi, te mihi reputasse audivi, egisse recognoscere, quia dicente beato Joanne apostolo : *Si confiteamur peccata nostra, fidelis et justus est Dominus, ut remittat nobis peccata nostra* (I Joan. I), et prima salutis spes est confessio, deinde dilectio, *Quia charitas operit multitudinem peccatorum* (I Petr. IV), non dimitterem quin inde salubrem indulgentiæ medicinam expetere, non pro humano, sed pro divino timore, et fraterno amore, ac propria salvatione. Non enim perfunctorie nobis sacerdotibus legendum et tenendum est, quod etiam laicis et feminis Spiritus sanctus per beatum dicit Gregorium (homil. 32 in Evang.) : « Est ubi se quisque interroget, et in confessione Christi se veraciter probeat. Veretur sæpe a proximis despici, dedignamur injurias verbi tolerare. Si contingat jurgium fortasse cum proximo, erubescimus priores satisfacere. Cor quippe carnale, dum hujus vitæ gloriam quærit, humilitatem respuit : et plerumque ipse homo qui irascitur, discordantem sibi reconciliari appetit, sed ire ad satisfaciendum prior erubescit. Pensemus facta veritatis, ut videamus quæ jaceant nostræ pravitatis actiones. Si enim membra summi capitis sumus, imitari eum cui connectimur debemus. Quid namque ad nostræ eruditionis exemplum Paulus egregius prædicator dicit ? *Pro Christo legatione fungimur, tanquam Deo exhortante per nos obsecramus pro Christo, reconciliamini Deo* (II Cor. V). Ecce inter nos et Deum discordiam peccando fecimus, et tamen ad nos Deus suos legatos prior misit, ut nos ipsi qui peccavimus, ad pacem Dei rogati veniamus. Erubescat ergo humana superbia, confundatur quisque si non satisfaciatur prior proximo, quando post culpam nostram, ut ei reconciliari debeamus, et ipse quoque qui offensus est legatis intervenientibus obsecrat Deus. »

CAPUT XLII.

De auferendo a nobis ambobus opprobrio a multis illato.

Aufer ergo, faciendo quæ debes, et quæ opto ac oro, et utinam dignus exaudiri fuisset, a me et a te opprobrium quod mihi a multis reputatur, quia talem, sicut et contra divinæ ordinationis dispositionem, et contra regem, et erga me, et erga Ecclesiam tibi commissam, et erga plurimos alios effectus es, episcopum ordinaverim. Sed qui mihi hæc reputant, non attendunt, quia non ut Judam electum præsentem justitia, et ut per eum divina dispositio impleretur, Apostolum, sicut et Saul regem postea reprobatum, de quo scriptum est : *Erat vir electus et bonus, et non erat vir de filiis Israel melior illo* (I Reg. IX). Deus omnia sciens per providentiam ordinavit, et nil culpæ contraxit, qui peccare non potuit ; sed ut homo nesciens quod futurum erat, te per improvidentiam ordinavi et divini judicii non injusti minister exstiti, quia sicut timeo aliis peccatis meis hoc esse promerui. Quanquam et sancti apostoli cum beato Stephano et aliis diaconibus

Nicolaum ordinaverint, nec tamen dictis et factis illius, improbabilibus postea comprobatis, per manuum suarum impositionem communicaverunt, quem ordinantes bonum crediderunt, et mansurum perpetuo in bonitate optaverunt : sicut nec Samuel culpam contraxit in ordinatione Saul, quem divina jussione a se ordinatum, et a Domino postea rejectum, sicut de te doleo, diutissime flevit, velut sacra narrat historia. Reputatur etiam mihi, quod te nepotem meum gratia propinquitatis episcopum ordinaverim. Quasi non et alii per me sint ordinati episcopi, qui non sunt mihi carne propinqui, et nolunt attendere mihi hoc reputantes, quia non impedit ad quemquam ordinandum carnis propinquitatis, si ordinandus fuerit electus et petitus secundum ecclesiasticas regulas. Non et Dominum, a quo et per quem cœpit episcopatus, carne sibi propinquos legimus ordinasse apostolos. Sed licet in te nepote meo egerim unde gemo, quia nescio qualiter de hoc et de aliis meis factis, terribilis in consiliis super filios hominum in oculo suo judicio, qui posuit tenebras latibulum tuum disponat : scio tamen omnipotentem advocatum, et misericordem judicem meum, ante quem est omne desiderium meum, et cui gemitus meus non est absconditus. Si enim obaudieris monita beati Pauli Timotheo a se juvene ordinato episcopo directa, et a me et a te opprobrium tuæ ordinationis tolles, in quibus inter cætera dicit : *Nemo adolescentiam tuam contemnat* (II Tim. IV) ; id est, talem te exhibe, ut propter ætatis adolescentiam nemo te contemptibilem habeat, quia cujus vita despicitur, restat ut et prædicatio contemnat. Si hæc, frater, tibi in aliquo dura sunt, quæ non sunt dicta ea intentione, ut velim quod absit in aliquo tuam damnationem, vel dehonorationem, sed potius salutem et correctionem, attende quia, ut beatus dicit Gregorius, per amarum poculum confectionis pervenitur ad effectum optatæ salutis. Et Salomon dicit : *Meliora sunt vulnera amici, quam odientis inimici oscula* (Prov. XXVII). Et Dominus dicit : *Ego quos amo, arguo et castigo* (Apoc. III) ; et : *Quem diligit Dominus, corripit : flagellat autem omnem filium quem recipit* (Heb. XII).

CAPUT XLIII.

De sacrarum Scripturarum falsatione, et responso ejus ad litteras de Nevino. Qui canones sint recipiendi, et de imperitia et jactantia ejusdem. De Bertrico item, et de eo quod sæpe illum admonuit.

Per plures denique audio te apud multos me infamare, quoniam sacras Scripturas soleam detruncare, et ad meum sensum inflectere. Quod ut pro certo adhuc credo nec in uno loco me egisse, si lamen hoc quod dicis poteris approbare, et si hoc ad approbationem volueris ducere, ostende coram quantis et quibus tibi libuerit, et aut patenter ostendam te mea verba bene non intelligero, aut ab aliquo illa falsata fuisse : et si forte me, quod dicis, si tamen dicis, egisse cognovero, quantocius corri-

gere procurabo. Quod enim de me dicere diceris, A
 Gothescalcus hoc de Scripturis facere consuevit, illas
 scilicet detruncare, et ad suum sensum violenter
 inflectere : sed et ea quæ in canonicis libris non
 continentur auditoribus suis proferre, sicut et supra
 priscos hæreticos facere consuevisse ostendi, quia
 sicut B. dicit Gregorius : « Sæpe hæretici, dum sua
 student perversa astruere, ea proferunt quæ pro-
 fecto in sacrorum librorum paginis non tenentur. »
 Unde et discipulum suum prædicator egregius admo-
 net dicens : *O Timothee, depositum custodi, devitans
 profanas vocum novitates (I Tim. vi)*. Quia dum lau-
 dari hæretici tanquam de excellenti ingenio cupiunt,
 quasi nova quædam proferunt, quæ in antiquorum
 Patrum libris veteribus non tenentur : sicque fit ut
 dum videri sapientes desiderant, miseris suis audi-
 toribus stultitiæ semina spargant. Et quoniam hæc
 egisse Gothescalcus in conventu episcopali revictus
 fuit, idem concilium, sicut scriptum est : *Qui impo-
 nit stulto silentium, iras mitigat (Prov. xxvi)*, silen-
 tium ei imposuit, mihiq; illum ad custodiendum
 commisit, sicque complicum ejus, qui jam s'ent
 vermes in putredine scatentes ebulliebant, iræ par-
 tim sunt mitigatæ, et congregatæ sunt a Domino
 quasi in utrum aquæ maris, cum amaritudo perversarum
 mentium nondum apud nos, de his quæ Gothescalcus
 eos docuerat, erumpit exterius in vocem pravæ
 libertatis. Et quod de sanctis Scripturis Gothescalcus
 agebat, et tu me agere notaris dicere, ut
 cum pace tua dicam, tu de sacris canonibus, et ec-
 clesiasticis regulis, atque de legibus soles agere,
 sicut jam quater egisse te possum ostendere. Scilicet
 in rotula per Hadulphum archipresbyterum tuum
 mihi transmissa, in qua de canonibus et legibus
 quædam detruncando, quædam de suo sensu expulsa
 prava interpretando, de capella parochiæ meæ in
 Attolæ villa sita nonnulla adversum me concinnasti.
 Similiter in rotula a te mihi data, in qua fabulam de
 Amalberto et uxore ejus contensex plurima in eum
 captasti. In rotulis nihilominus domno regi et mihi
 per comministros tuos directis, in quibus historias
 altercationum inter te et eundem domnum regem, et
 item inter te et Normannum descripsisti, et vo-
 cum ac factorum tuorum novitates explicuisti, senti-
 entias Scripturarum et canonum atque legum te
 ferientes tuo sensu in alios detorsisti, veluti ex ore
 et opere tuo, et ex eisdem sentienciis, majorum asti-
 pulante doctrina, singillatim ac viritum possum os-
 tendere. In quaterniunculis quoque, a te mihi per
 Wenilonem venerabilem archiepiscopum missis,
 plurima inter se diversa collegisti, quæ tecum facere
 aestimasti, non videns, quin potius videre non va-
 lens, aut non volens, quia inter se dissonabant, et
 de illis ipsis epistolis, ex quibus eandem tuam col-
 lectionem compilasti, conjunctim sequentia dolo pe-
 nitus omisisti ; sed et illa quæ cuncta catholica Ec-
 clesia recipit, tenet, sequitur, venerat, honorat,
 amplectitur, quæque tibi in diplomate, parvo cor-
 pore, sed maximo merito, per præfatum venerabilem

archiepiscopum Wenilonem remisi, nec ad memo-
 riam reducere voluisti. Nimia sunt quæ dico, si hæc
 ita esse illa ipsa tua scripta quæ habeo non attestan-
 tur, et lex, quam catholica Ecclesia recipit, mani-
 feste decernit dicens : « Confiteri quis in judicio non
 tantum sua voce, sed et litteris, et quocunque modo
 potest, convinci autem non nisi Scriptura aut
 testibus potest. » Et tu his scriptis hæc quæ dico
 denegans, si necesse fuerit, in judicio revinci vale-
 bis. Et Gelasius in decretis suis ad episcopos per
 Dardaniam constitutos dicit : « Quoniam manifeste
 quilibet vel professione sua vel communiione possit
 agnosci. » Præterea per Heddonem, clericorum tuo-
 rum præpositum, conscriptam nuperrime more tuo
 solito mihi rotulam direxisti, contra litteras de in
 mea parochia delinquentibus a me tibi directas, quæ
 ita se habent.

Hincmarus Rhemorum episcopus Hincmaro coepi-
 scope nostro salutem.

Nivinus, etc. *Reliqua hujus epistolæ, vide supra,*
 col. 224.

Et has litteras non ita, ut duberas, recepisti, sed
 ex eis nacta occasione, amaritudinem, quam erga
 me in animo geris, verbis evaporando exhalasti, vo-
 lens ostentare tuam sapientiam et meam insipientiam,
 et demonstrare me Nivino injuste et contra
 auctoritatem egisse ; et os mihi obstruere, ut de his
 quæ ex te audieram, non te auderem corripere, ut
 si forte vera forent te corrigeres, sin autem, ne illa
 incurreres præcaveres : cum sicut derogantium lin-
 guas nostro vitio non debemus, quantum ex nobis
 est, ad derogandum acuere, ita debemus derogan-
 tium detractiones, prout rationabiliter potuerimus
 compescere. Sed non talis est tuus animus, ut ea
 quæ benigne tibi dicuntur vel scribuntur, nisi talia
 fuerint qualia versantur in corde tuo, benigne et
 patienter possis audire ; unde Salomon ait : *Acetum
 in nitro ei qui cantat carmina cordi pessimo (Prov.
 xxv)*. « Acetum, inquit Gregorius, si mittatur in ni-
 trum, fervescit nitrum protinus et ebullit : et per-
 versa mens, quando per increpationem corripitur,
 aut per prædicationis dulcedinem ad bona suadetur,
 de correptione fit deterior, et inde in murmurationis
 iniquitate succenditur, unde debuit ab iniquitate
 compesci. » Litteris autem meis, quas per singulas
 periodos dissolvere voluisti, non eis convenientibus
 auctoritatibus respondisti, nec recto sensu eum in
 hoc es imitatus, qui tuis scriptis istiusmodi tenore,
 veritate subnixis auctoritatibus solitus est respon-
 dere : quia non in hoc jure rationem stude attendere,
 sed tuam intentionem modo quolibet confir-
 mare. Non enim ille, qui taliter tuis solet scriptis
 respondere, talis responsionis modum ab his didicit
 a quibus hæc studuit discere. De Nivino autem, ut
 me oportuit, ea quæ gesta sunt tibi nota facere pro-
 curavi. Cujus advocacionem non videtur mihi ut
 oporteat te suscipere. Quod et si adversum me illam
 volueris suscipere, et ratio atque auctoritas consen-
 tit, quantum ex me est, inde tibi non refugio re-

spondere. Cæterum isdem ætatem habet, ipse de se loquitur. Et si legaliter ac regulariter me accusare voluerit, aut de excommunicationis, aut de collaborationis, aut de alterius cuiusque rei præjudicio, rationem inde ei reddere non recuso. Nemo tamen potest me apud te regulariter accusare, nec de meo iudicio ad tuum iudicium provocare, nec sollicitudo totius Rhemensis provinciæ cum mea parochia est tibi commissa, ut inde amplius tibi reddere debeam rationem, nisi ut tibi scribere studui. Scrutare epistolam beati Augustini ad Xantippum primate suum, quam suprapositam legere præuales, et invenies te debere mihi de tuis iudiciis reddere rationem : et si de tuo iudicio quisquam ad meum iudicium provocaverit, ego deo debere veritatem investigare, et singula quæque canonicè terminare. Tu autem, quando hæc audisti quæ mihi post litteras meas tibi inde directas rescripsisti, debueras mihi aut humiliter suggerere quæ inde audisti, ut si perire inde actum haberem, corrigere procurarem : sin autem, fraternæ ac paternæ benignitate veritatem inde tuæ filiali dilectioni rescriberem, quod et faceres si apud te humilis esses, et erga me charitatem haberes. Verumtamen pro modulo meo secutus beati apostoli Petri exemplum, qui etiam minoribus suis quærentibus cur ad Gentiles intrasset, rationem per ordinem reddidit, et testes suæ rationi adhibuit, bonum duco, quocumque modo tu mihi ea quæ scripsisti mandaveris, ut iterato quæ inde sunt vera tibi rescribam. Videlicet quia, ut scripsisti, nullius prava vel mendosa suggestione illi ea de quibus diffamatus est imputavi, nec ad probationem sui sceleris testibus causa indignuit, quia sicut ipse scripsisti, negotii qualitas unumquemque aut excusat, aut accusat. Unde et Dominus de eo quod quidam paterfamilias ei, qui apud eum diffamatus est quasi dissipasset bona illius, dixit : *Quid hoc audio de te? redde rationem villicationis tuæ* (Luc. XVI). Et supra sufficienter habes in quibus negotiis testes legaliter atque regulariter examinati requirendi sunt, et in quibus negotiis ratio non indigeat testibus. Manifestum est enim et presbyteris, et aliis clericis, et laicis, ac feminis, et nobilibus, et villanis in nostra civitate, quia sanctimoniam, de qua tibi scripsi, ab infantia in monasterio Deo dicatam, et a sacerdote velatam, clanculo prius de ipso monasterio furatam, in mansione in qua manebat apud hortos per plurimas noctes habuit, consentiente portario, cuius factione ipse egrediebatur de monasterio, et a Novini hominibus abducebatur : in quo monasterio ipsa sanctimonialis regulariter inde est disciplinata. Quapropter cum fama excrescere cœpit, et ego ad civitatem reverti incepti, misit suos homines, Walchanonem scilicet et Lupum, qui eam scalis pretio locatis de ipso monasterio noctu eduxerunt, et ad beneficium, quod ei dederam in nostra parochia, deduxerunt, et ibi per plures dies eandem sanctimoniam Nivinus habuit, sicut et presbyteri, et circumstantes homines ac villani manifestissime sciunt.

A Et cum ministeriales nostri ipsam sanctimoniam cœperunt requirere, per eosdem suos homines illam in Calmontensem deduci fecit. De placitis autem sibi a me datis quot et quanti spatii fuerint, canonici et monachi, et fideles ac nobiles laici, ac presbyteri parochiani cognoscunt, in quorum præsentia et quorum consilio inde egi, quæ secundum regulas sacras inveni. De eo vero quod dicis, me ab illo quæsisse qualiter famam suam purgaret, non ideo ab eo quæsi, ut non scirem quia hoc agere non poterat, sed ut vel ita eum ad confessionem et pœnitentiam, atque post ad indulgentiam possem compellere, quem voluntarium ad ea non poteram provocare : et eo usque illum perduxit, ut si præfati sui homines, quia non liberæ conditionis sunt, aut cum aqua calida, aut cum aqua frigida, inde ad iudicium Dei exirent, quid inde Deus ostenderet mihi sufficeret.

B Et cum se ratione convictum atque constrictum vidit, in contumaciam et contumelias prosilivit : cui dixi, quod nisi aut confiteretur, aut satisfaceret parochiæ meæ unde infamabatur, ipse et illi sui homines, qui eandem sanctimoniam cum eo furati fuerant, in mea parochia habitare non possent, et progrediente illo ad contumelias atque calumnias, quia de mea parochia, vel de mea provincia non erat, et res et mancipia in regno senioris nostri non habebat, per quæ illum constringere ad reddendam rationem valerem, et per beneficium vel per peculiario noluit sustinere distringi, excommunicavi illum a mea parochia. Quod dicis, oportet episcopum omnibus bene facere, omnes recipere fideles, verum est, et utinam ita facias. Sed aliter vicini et parochiani tui de te dicunt, et tibi specialiter commissi aliter sentiunt.

C Cæterum de his quæ tibi mandavi ex te me audisse, si alteri sic mandarem, scio quia gratias mihi inde referret, et tu sic faceres quantum intelligo, si amaritudo animi tui tibi permetteret, et occasione invenire non velles, ut mihi de his quæ in quaterniunctis per venerabilem archiepiscopum Wenilonem a te missis compilasti, iterum licet non ad rem pertinentem inculcando conscriberes, et me dicere provocares, unde in sermone capere posses. Quod evidenter ipse in præfato tuo scripto demonstras : quia commemoratis dictis Anacleti, Victoris, Callisti, et Dietheri, qui ante Nicænum concilium pro quorundam consolationibus, sicut dicit Gelasius, ad diversos suas epistolas direxerunt, subjungis : Ecce, pater, qui canones recipiendi, venerandi, ac observandi habeantur. Et quia patrem me, ut paret, irrisione potius quam veneratione vocasti, dico tibi. *Et si pater ego sum, ubi est honor meus ?* (Mat. 1.) Dicam tamen tibi : Fili pro arbitrio tuo vel proprie vel aliene, si isti sunt canones recipiendi, venerandi, ac observandi, quos commemorasti, qui sunt illi, quos et apostolica sedes, et omnes episcopi per universum orbem, a primæ sedis apostolicæ pontifice usque ad illum qui modo novissime etiam post te est ordinatus episcopus, imo et omnis catholica Ecclesia, canones appellant? quique Nicæno con-

cilio, quod primum in nostris codicibus, quos ab apostolica sede majores nostri acceperunt sequendos per ordinem usque ad Africanum concilium pro canonibus recipiendis venerandis, et observandis retinent, et Innocentius, Zosimus, Bonifacius, Cœlestinus, Leo, Hilarus, Symmachus, Gelasius Hormisda, Gregorius, et cæteri quique observandos canones nominant? Inter quos et istas epistolas apostolicæ sedis pontificum, quas canones appellas, Gelasius, ut supra posui, differentiam facit, et illa concilia canonum observanda decrevit, has autem epistolas pro consolatione quorundam directas, venerabiliter suscipiendas dicit, et item in decretis suis inter alia dicit (*Gelasius in communitario ad Faustum*): Nobis, inquit, opponunt canones, qui orientales episcopi, dum nesciunt quid loquantur, contra quos ipsi se venire produnt, qui primæ sedi sana rectaque suadenti parere fugiunt. Ipsi sunt canones, qui appellationes totius Ecclesiæ ad hujus sedis examen volvere deferri. » Quod manifestum est de Sardicenis canonibus illum dicere, de quibus et Innocentius ad Victricium, et Gregorius ad Vincentium his consona dicunt, quæ in hoc etiam legis opusculo. Et ibidem post aliquanta : « Viderint ergo si alios habent canones, quibus suas ineptias exsequantur. Cæterum isti, qui sacri, qui ecclesiastici, qui legitimi celebrantur, non solum sedem apostolicam ad iudicium vocare non possunt, et Constantinopolitanæ episcopus civitatis, quæ utique per canones inter sedes nullum nomen accepit, in communionem recidens perfidorum non debuit submoveri? Nam, ut ipse demonstrat, Heracleotes suffraganea fuit. Hoc autem Gelasium dicere patet de sacris Nicænis canonibus, qui privilegia sedium constituerunt, sicut in sexto ipsorum capitulo aperte monstratur. Unde Bonifacius (*epist. 3, Hilario Narbon.*) : « Nulli, inquit, videtur incognita synodi constitutio Nicæna, quæ ita præcipit; ut eadem proprie verba ponamus: Per unamquamque provinciam jus metropolitano singulos habere debere, nec cuiquam duas esse posse subjectas. Quod illi, quia aliter credendum non est, servandum, sancto Spiritu suggerente, sibimet censuerunt; » et paulo post : « Quod ideo dicimus, ut advertat charitas tua, adeo nos canonum præcepta servare, ut ita constitutio quoque nostra definit, quatenus metropolitani sui unaqueque provincia in omnibus rebus ordinationem semper exspectet. » Et Leo ad Anastasium (*epist. 88, cap. 4*) : » Secundum sanctorum Patrum canones, Spiritu Dei conditos, et totius mundi reverentia consecratos, metropolitanos singularum provinciarum episcopos jus traditæ sibi antiquitus dignitatis intemeratum habere decernimus. » Et item Gelasius, ut supra ostendi, post descriptionem authenticarum Scripturarum, et Nicæna Constantinopolitanæ, ac Ephesinæ, Chalcedonensis quoque synodi, addidit : « Et si qua sunt concilia a sanctis Patribus instituta, post horum quatuor auctoritatem, et custodienda et recipienda decrevimus. » Ipsas autem epistolas, ut

A prædixi, et sæpe dicere necessitas ipsa compellit, pro diversorum Patrum consolatione diversis temporibus datas, a sede apostolica venerabiliter suscipiendas, sicut et facimus, dicit. Addam etiam : Si illa quæ de præfatorum pontificum apostolicæ sedis epistolis dicis recipiendos venerandos canones esse, qui quod vis sanctum dicis et licitum, et quod non vis non sanctum et illicitum, ac si voluntate tua cuncta sint posita, et non sit qui tuæ possit resistere voluntati, pande nobis, quæsumus, quid censeas de eorum decretis, qui post Nicænum concilium, et alia catholica concilia, observanda decretalia constituta de eisdem sacris canonibus promulgata sanxerunt, sicut Siricius, Innocentius, Zosimus, Bonifacius, Cœlestinus, Leo, Hilarus, Symmachus, B Gelasius, Hormisda, Gregorius, et quique alii, quorum decreta Ecclesia catholica, et Patres ac prædecessores nostri servanda tenuerunt, et venerati sunt. Et quoniam in quibusdam a præfatis, quos appellas canones, dissonant, magistrali censura decerne, quæ ex his sequi et quæ refutare debeamus : quoniam nisi tu ferula singularis auctoritatis de nostra consuetudine ista rejeceris, quæ sicut et Patres nostri, mentibus nostris tenenda et servanda imbibimus, non videtur mihi ut facile ab ecclesiastico usu illa quæ tenemus generaliter valeas remove, de quibus satis superque superior potes relegere, quæ si tibi non suffecerint, nec plura sufficient. Tantum de una re superadjiciam, videlicet quoniam qui dicis : « Ecce qui canones recipiendi, venerandi, ac observandi habeantur, » non satis eosdem canones C perscrutatus es, in quibus, sicut scripsisti, habetur ut qui accusare alium elegerit, præsens per se et non per alium accuset, inscriptione videlicet præmissa. Quod quia ad munimem tui convertere studuisti, legere debueras, quia ipsa sententia de antiquis legibus Romanis fuit assumpta, in quibus legibus. In capituli interpretatione edicti Valentiniani de episcopali iudicio, posteriore videlicet constitutione, ita scriptum habetur (*Interp. Novellæ Valent.*) : « Lex ista de diversis rebus multa constituit, sed in primis de clericis quod dictum est, ut nisi per compromissi vinculum iudicium episcopale non adeant, posteriore lege Majoriani abrogatum est. » Quam constitutionem, sicut petiit et obtinuit, ita ex tunc hactenus Ecclesia conservavit. Sed et sicut in litteris D meis legisti differentiam intelligere debueras inter admonitionem et de accusatione iudicationem, et inter hoc quod dixi, si ita est ut passim a multis et etiam publice in publicis placitis divulgatur, et hoc quod non dixi, quia ita est. Unde a multis et etiam publice quod non licet, in publicis vel a publicis, placitis accusaris. Et quod confuse dixisti, te mirari si aliqui ex his placitis fecissent a vobis pro hoc petitionem negotio, ex verbis Callisti adjungens, nullus doctor per scripta accusetur, non bene distinxisti quia nec bene intellexisti ex legibus et canonibus differentiam inter petitionem et accusationem. Revolve hinc leges, et decreta sedis apostolicæ, et

disce quæ nescis. Unde iterum quasi vestigans. sequar te per angulosos anfractus, et dicam tibi ad notitiam pauca de pluribus, sed quibus te consequi valeam. Innocentius ad Maximum et Severum episcopos scripsit (*epist. iv*): « Nuper Maximilianus filius noster agens in rebus ejusmodi querelam detulerit, libelli ejus series annexa declarat. » Et Gregorius Sabino subdiacono (*lib. vii, ind. 11, epist. 46*): « Clerus ecclesiæ Regitanæ multa contra reverentissimum fratrem nostrum Bonifacium episcopum suum, data nobis petitione, conquestus est, petens ut ad nos debuisset habere veniendi licentiam, quatenus causæ ipse hic subtiliter probarentur. Sed quia nos interim prædictum fratrem nostrum hoc modo non prævidimus deducendum, visum nobis est illic personam deputare ad causam eandem cognoscendam. Et ideo mediis sacrosanctis Evangelii, experientia tua, una cum Paulino, Proculo, Palumbo, Venerio, atque Martiano reverentissimis fratribus coepiscopisque nostris, sine cujusquam personæ respectu, tam clericorum querelam, quam adversus suum, sicut diximus, habent episcopum, vel si quam forte contra eos habuerit, cum omni æquitate ac sollicitudine perscrutetur: et quidquid in veritate cognoverit, nobis una cum prædictis nostris fratribus subtiliter diligenterque significet, ut renuntiatione vestra redditi certiores, quid fieri debeat decernamus. » Et ad prædictos episcopos, clerus ecclesiæ Regitanæ contra reverentissimum fratrum nostrum Bonifacium episcopum suum data nobis petitione conquestus est, et reliqua. Sed et de auditione, sine petitione vel accusatione, ad Sabinum idem beatus Gregorius scripsit (*lib. xi, epist. 28*): « Pervenit ad nos, inquit, reverentissimum Palumbum, fratrem et cœpiscopum nostrum, quod dici grave est, Ecclesiæ suæ, vel parochiarum causas utilitatesque negligere. » Et post aliquanta: « Ideoque experientia tua prædictum fratrem nostrum studeat commovere, ut res Ecclesiæ, vel parochiarum suarum, sive ministeria, rationabiliter vindicet atque defendat, » et reliqua. De accusatione autem episcopi, aut cujuslibet ordinis clerici, ex sacris canonibus sufficienter supra potes relegere. Verumtamen oportet te discrete intelligere quod de accusatione leges dicunt: « In criminalibus, inquit, causis, vel objectionibus, per mandatum nullus accuset, nec si per rescriptum principis hoc potuerit impetrare: sed ipse qui erimen intendit, præsens per se accuset, ut scias quo sensu de accusatione hos dicant. » Et canones dicunt (*conc. Carthag., c. 19*): « Quisquis episcoporum accusatur ac primatem provincie ipsius causam deferat accusator, nec a communione suspendatur cui crimen intenditur, nisi ad causam suam dicendam electorum judicum die statuta litteris evocatus minime occurrerit. » Manifestum est autem, quia episcopus accusatus apud primatem non esse præsens ostenditur, qui litteris evocari præcipitur. Et Bonifacius de Maximo dicit (*epist. 2*): « Si adesce voluerit, præ-

sens si confidit ad objecta respondeat, scilicet præsentii accusatori: si adesce neglexerit, dilationem sententiæ de absentia non lucretur. » Accommoda ergo sensum tuum bene dictis, et non prave intelligi tradas bene dicta, ad tuum sensum illa inflectens. Velis enim vel nolis, illi erunt canones, quos catholica Ecclesia canones vocat, et non erunt illi canones, quos tua socordia ad effrenationis tuæ libertatem canones advocas. Erunt autem epistolæ venerabiliter suscipiendæ, a sede apostolica pro diversorum Patrum consolatione datæ, quas canones vocas; et concilia a sanctis Patribus instituta, ad auctoritatem erunt custodienda et recipienda, sicut decrevit Gelasius, et cæteri sedis Romanæ pontifices, atque illi qui in eisdem conciliis, suggerente sibilmet sancto Spiritu, sacros canones condiderunt, et quos sedes apostolica, et Ecclesia catholica canones vocat. Verba quæ obstrusa, et undecunque per glossulas collecta, et sine ratione posita, quæ in hoc scripto tuo posuisti, sicut et in aliis domno regi et mihi olim directis concessisti, redarguant te typo jactantiæ, cum dicat Apostolus: *Vocum novitates devita* (I Tim. vi.); et: *Malo quinque verba loqui in Ecclesia ad ædificationem, quam decem millia verborum in lingua* (Cor. xiv). Qui enim linguam, in qua natus es, non solum non loqui, verum nec intelligere nisi per interpretem potes, cum suppetere sufficienter verba Latina, quæ in his locis ponere poteras, ubi Græca, et obstrusa, et interdum Scottica et alia barbara, ut tibi visum fuit, nothata atque corrupta posuisti, paret quia non ex humilitate, vel ad manifestationem, ea quæ dicere voluisti Græca verba, quæ ipse non intelligis, inconvenientissime posuisti, sed ad ostentationem illa insipientissime inseruisti, ut omnes qui illa legerint intelligere possint, te illa velle vomere quæ non glutuisti. Hunc namque morem etiam a pueritia habuisti in his quæ te dictare rogabam, maxime autem in versibus, et præcipue in figuris porphyriacis, in quibus verba linguæ alienæ, atque obstrusa, impropria et utilitate sensus carentia, quæ nec ipse intelligebas, studiose ponebas. Quod mente percipiebam, et mihi admodum displicebat: sed cum viderem te per jactantiam amore laudis flagrare, et me non posse sentirem in ætatis adolescentia te ad tantum robur mentis accendere, ut ad discendi ac verificandi studium te provocarem, et jactantiæ a te pravitatem eraderem, ne acriori correptione fractus revocareris ab studio, permisi te interim tantum, ut studio litterali incumberes, de scientia jactitare, donec in maturiori ætate ab illo etiam vitio possem compescere, secutus pro modulo meo Apostolum, qui cum infirmum auditorem suum perpenderet, aut prava adhuc velle agere, aut de actione recta humanæ laudis retributione gaudere, ait: *Vis non timere potestatem? bonum fac, et habebis laudem ex illa* (Rom. xii). Interea, quia illud, quo hæc agere cogitabam, tempus ante tempus excessit, cum præceptione Apostoli, jubentis vocum novitates vitare, ab hac jactantia et

ostentatione te doctorem et episcopum cohibere debueras : quoniam sancti et sapientes ac magnæ auctoritatis viri, et etiam utriusque linguæ, Græcæ videlicet et Latinæ periti, suis scriptis verba Græca, nisi ea quæ in Scripturis, vel canonibus, sive legibus, sine interpretatione sunt posita, et veluti Latina in usu habita, verum et obstrusa suis dictis immittere ad ostentationem noluerunt. De Hebræa vero lingua Alleluia, et Osanna, atque Amen, propter auctoritatem primæ linguæ, et reverentiam sensus sine interpretatione usi fuerunt. Nos etiam moderni glossarios Græcos, quos suatim Lexicos vocari audivimus, sed et sapientum scripta de nominibus obstrusis habemus, et adeo sensatuli sumus, ut nostras dictatiunculas eo usque circumducere et producere possimus, quatenus verba Græca vel obstrusa de glossariis assumpta in admirationem vel stuporem nescientibus seu scalpentis aures habentibus proferre possimus, cui vanitati obviat Scriptura dicens : *Vanitas vanitatum, et omnia vanitas (Eccl. i)*. Et timeo, quia sicut agis de verbis, et canonum ac legum sensibus, novitates vocum in eis delectando requirens, ad hoc usque te perducat elatio cordis, et jactantia inflata ac inanis scientiæ, ut ita in Scripturarum sensibus facias et aberres, quia ut Scriptura dicit : *Qui modica spernit, paulatim decedit (Eccli. xix)*. Quoniam qui minora corrigere ac devitare negligit, ad majora proruens, ab statu justitiæ, non quidem repente, sed partibus totus cadit. Attende igitur quod dicit Apostolus : *Si quis existimat se aliquid scire, nondum scit quemadmodum oporteat eum scire (I Cor. viii)*; et : *Si quis vult inter vos sapiens esse, stultus fiat, ut sit sapiens (I Cor. iii)*; et : *Nolite prudentes esse apud vosmetipsos (Rom. xii)*; et : *Non alta-sapientes, sed humilibus consentientes (ibid.)*. Beatus quoque Gregorius in epistola sua dicit, quoniam domnæ Domini-cæ salutes mandans ideo non rescripsit, quia cum esset Latina ei Græce scribere voluit, parvipendens illi rescribere, quoniam a corde pensavit quæ per sermonem in scripto suscepit. De eo quod petis a me te instrui, si Bertricus de mea esset provincia, non autem ex propria parochia, qualiter ex eo acturus essem, illo inspirante, qui cognita nequitia sibi dicentium : *Magister, scimus quia verax es, et viam Dei in veritate doces, et non est tibi cura de aliquo, non enim respicis personam hominum, dic nobis, si licet censum dare Cæsari, an non (Matth. xxii)*, respondeo tibi : Interrogabo te et ego unum sermonem. Rescribe mihi per ordinem et ex integro, qualiter ego feci et dixi, et qualiter tu fecisti et dixisti in placito confinium parochiarum nostrarum, te conhibente condico de Amalberto parochiano meo, qui in tua parochia et mea provincia legaliter uxorem accepit, et in parochiam meam duxit, quem tu irregulariter excommunicasti, et uxorem suam legaliter acceptam, quæ per mandatum tibi suggestit quoniam idem vir ejus cum ea non posset concumbere, de parochia mea apud Laudunum ad tuam

Audicium reduci rogasti; et ego dicam tibi qualiter facerem de Bertrico, si de mea esset provincia, et non esset ex propria mea parochia. De hoc quod dicis : Sciendus est modus correptionis, quia præfati Bertrici, utrum secretus, an publicus, utrum a Christianorum consortio, aut a corpore et sanguine Domini fuerit segregatus, quem publicæ deditum pœnitentiæ non audisti, et modum istius ejectionis de parochia mea nosse convenit : Tibi respondeo, quia si tanto studio sacros canones perscrutaberis, ut moderata discretionem te in subjectorum tibi actibus gereres, ne in sanctarum Scripturarum auctoritatem prædicationemque majorum offenderes, et in ipsis tibi subjectis servares quod scriptum est : *Diligenter agnosce vultum pecoris tui, et omnes greges tuos considera (Prov. xxvi)*; et : *Perfode parietem, et vide abominationes, quas isti faciunt hic (Ezech. viii)*, quanta intentione illa legis, unde tua commenta compilare procuras, quatenus effrenis, et sine ullius coercionem, viam voluntatum tuarum currere, et in affectum cordis transire prævaleas, bene intelligere posses et modum, quo toleratus et correptus et diu expectatus fuit, quem audire potuisti, sicut eum in pœnitentiæ publica positum dicis te non audisse, et scire cur hac conditione idem Bertricus, qui non est de mea parochia, neque de mea provincia, regulariter cum suis exire præcipitur. Et quoniam quæ mente hoc interrogas me latere non potest, *paratus, juxta Petri vocem, ad satisfactionem omni poscenti, quantum Deus dederit, respondere de ea quæ in me est spe (I Petr. iii)*, qui ex hac quæstione respondeo, quia Pilatus veritatem, quam ante oculos corporis, non autem ante oculos mentis habebat, *quid est veritas? (Joan. xviii)* interrogavit, et audire non meruit, quia, ut dicit S. Gregorius, *quam non invenit humilem, veritas fugit mentem*; et : *Qui fecte quaerunt, invenire Dominum nunquam merentur (I Cor. i)*; et isdem : *Dei virtus, et Dei sapientia, a cujus facie est sapientia et intellectus (Psal. xciii)*; et : *Qui docet hominem scientiam, contra quem non est sapientia, non est prudentia, non est consilium. (Prov. xxi); quique est via, veritas, et vita (Joan. xiv)*, via scilicet conversationis sanctæ, veritas doctrinæ divinæ, vita beatitudinis sempiternæ, confitetur, id est, laudat patrem, *quia abscondit ea a sapientibus et prudentibus (Isa. v)*, de quibus scriptum est : *Væ qui sapientes estis in oculis vestris, et coram vobismetipsis prudentes, quæ revelavit parvulis (Luc. x)*, id est humilibus, quoniam, *Qui resistit superbis, humilibus dat gratiam (Jac. iv)*; et : *Valles, id est humiles, abundabunt frumento (Psal. lxiiv)*, id est eloquii divini pabulo. His ita de his qui non sunt de mea parochia, sed neque de mea provincia. Cum autem me interrogaveris de tuis parochianis, confido in clementissima gratia Dei dicentis : *Aperi os tuum, et ego adimplebo illud (Psal. lxxx)*, quoniam qui mihi dedit regimen disciplinæ, dabit et spiritum sapientiæ, quo salutaria tibi valeam respondere. Denique de hoc quod mihi objicis, te scisse atque

sensisse, sæpius de te similia me audisse, ac falso audita pro veris recepisse, atque tenuisse, et quia voluntarie audio verba mendacii, et detractoribus tuis aurem libenter accommo, non me ad iram commoveo, quia et capiti nostro plura et majora mendaciter objecta fuere, scilicet, quia dæmonium haberet, et publicanorum atque peccatorum esset amicus (*Matth. xi*); et multa alia. Unde et in his titulum mei Domini recognosco, et tanta ac talia mihi et facta, et dicta, et mandata habes, ut de his commoveri non possim: sed quod ad remedium tibi adinvenisti, remediabiliter dictum accipio: quia sicut Heliu prævius arrogantium, qui non meruit per beatum Job, sicut cæteri amici ejus, a sua stultitia hostiis expiari, de se dicit: *Venter tuus quasi mustum absque spiraculo, quod lagunculus novas dirumpit* (*Job. xxxii*), nisi se verbis evaporet inflata adversum me tua stomachatio, aut follem inflati ventris tui dirumperet, aut alias secundum antiquum poetam,

Ut displosa sonat quantum vessica sonaret.

Factus sum insipiens, tu me coegisti. Sed nec te cogente tibi taliter responderem, nisi beatum Augustinum Juliano, elato ac duræ mentis juveni et exepiscopo, respondisse hujusmodi sensu et partim etiam verbis legissem, docente Paulo, et explanante Gregorio, qualiter sit respondendum Galatarum mentes habentibus. Verumtamen quia sapientibus et insipientibus debitor sum, præcipue omnibus consistentibus in provincia Rhemensi, cujus sollicitudo meæ indignitati est a Deo commissa, et unicuique secundum ordinem et personam ac qualitatem suam, inter quos et tu annumeraris, vae mihi est, si non docendo, custodiendo, suadendo, increpando, mulcendo, terrendo, aliquando leniter, aliquando vero severius agendo, pro viribus et captu meo evangelizavero tibi cum aliis, quæ ad fidem rectam, et bonos mores, atque ad bonas actiones pertinent, in sanctis Scripturis atque sacris canonibus rectam habere intelligentiam, et continuam observantiam, et humilitatem, atque obedientiam tibi prælatis, secundum sanctas Scripturas, et eosdem sacros canones dependentiam, et tibi subditis necessariam sollicitudinem, et benignitatem, atque modestiam impendendam, et in his contiauum laborem atque perseverantiam. Quia cum dicitur nobis qualibuscunque speculatoribus: *Quia sanguis nobis subditorum, si non annuntiaverimus eis, de manibus nostris requiretur* (*Ezech. iii*), augetur metus. Quia si in subjectis suis, is qui prælatus ad speculandum est, etiam de morte corporis quandoque morituri tam graviter reus tenetur, quo reatu de morte animæ subjectorum constringitur, quæ potuisset semper vivere, si verba correptionis audisset? Sanguis ergo morientis de manibus speculatoris requiritur, quia peccatum subditi culpæ præpositi si tacuerit reputatur. Et quia frequenter, juxta præceptionem Domini, verbis et litteris, secreto per me et cum aliis, te corripui, sed

A correptionem meam, ut optaveram, prodesse tibi non vidi, de quibus reprehendi te audio, tacere tibi non audeo, et quæ adversum me, rationi et auctoritati atque salutis tuæ contraria, contraque alios tibi male non meritos, quibus potes molitionibus satagis, unde apud homines inconveniens nomen episcopo, et periculum habes coram Domino, quæ nullo rancore sed pio animi dolore commemoro, tibi tacere non debeo, cum Dominus dicat: *Ne oderis fratrem tuum in corde tuo, sed publice argue eum, non habeas super illo peccatum* (*Levit. xix*); et item: *Si peccaverit in te frater tuus, increpa illum; si penitentiam egerit, dimitte illi* (*Luc. xvii*). Non igitur nobis tacendum est ea quæ ad dicendum sunt necessaria, vel his a quibus honoramur, vel his a quibus contemnimur, cum Dominus unicuique nostrum dicat: *Ecce dedi faciem tuam valentiorum faciebus eorum, et frontem tuam duriorum frontibus eorum: ut adamantem et silicem dedi faciem tuam* (*Ezech. iii*), ut nec subditorum humilitatem debeamus erubescere, nec superbiam humilidare. Sed nec honorantes, nec contemntes nos admonere debemus erubescere, cum Veritas dicat: *Qui me erubuerit et meos sermones, hunc filius hominis erubescet, cum venerit in majestate sua* (*Luc. ix*). Sed et quem in suis actibus infirmari, vel in contumacia permanere conspicimus, remissiores et clementiores nos illis, usque dum firmentur ac corrigantur, ostendere non debemus. Unde scriptum est: *Filiæ tibi sunt, serva corpus illarum, et non ostendas hilarem faciem tuam ad illas* (*Eccli. vii*). Infirmæ quippe animæ, atque ad appetitum mundi deditæ, aliquando melius ex severitate servantur, ut obfirmata facie, id est per severitatis custodiam, ab omni spe frivole remissionis obducta, inconstantem animam terreat, atque a delectatione vitiorum districtioris vigore constringat. Quod cum a doctore agitur, semper necesse est ut dulcedo et humilitas in corde teneatur, quatenus et multum amet, et nunquam contra eum quem corrigit, per elationem superbiat, cui tamen amorem suum, et humilitatem pro utilitate ejus proderet recusat. Mihi ergo, fili et contemptor, et tibi parces, si a contumacia cordis, et ab inconditis moribus, atque inconvenientibus actibus resipueris. Tibi et mihi parcam, quando ea, quæ de te displicenda audiero, aut corrigenda in te videro vel cognovero, non tacebo. Ut igitur ego non taceam, et tu libenter audias, atque obaudias, consideremus pariter quam liber a commissorum sibi sanguine fuerat prædicator egregius, qui dicebat: *Mundus sum a sanguine omnium vestrum, non enim subterfugi quo minus annuntiarem omne consilium Dei vobis* (*Act. xx*). Si enim non annuntiasset, mundus a sanguine eorum non esset: sed quibus omne consilium Dei annuntiare studuit, ab eorum sanguine mundus fuit. In qua voce nos convenimur, nos constringimur, nos rei esse ostendimur, qui sacerdotes et prælati vocamur, qui super ea mala quæ propria habemus alienas quoque mortes addimus, quia tot occidimus, quot ad mortem ire

quotidie tepidi et tacentes videmus, et solertissime attendamus, quia non sufficit tantum si verbo sine bono exemplo prædicemus, quia cuius vita despicitur, restat ut et prædicatione contemnatur; et: *Qui mandatum solverit et docuerit, hic minimus vocabitur in regno cælorum; qui autem fecerit et docuerit, hic magnus vocabitur in regno cælorum* (Matth. v), id est in Ecclesia justorum. Igitur corrige hæc quæ egisti, et de cætero sollicitè stude, ne huiusmodi probras incurras, aut scripturas authenticas, aut ea quæ Dominus per sanctos suos locutus est corrumpendo, quia scriptum est: *Non addas quidquam verbis illius, et aguaris, inveniariisque mendax* (Prov. xxx). Quod ita catholici doctores exponunt: ne corrumpas eloquia sanctarum Scripturarum, quod quidam hæretici, ne his convincerentur, fecisse noscuntur.

CAPUT XLIV.

Qualiter redire valeat ad paternæ charitatis dulcedinem.

Unde, frater et quondam dulcissime fili, qui exigentibus peccatis de nido paterno, velut implunis, citius quam necesse fuerat evolasti, et antequam soliditate plumarum, id est humilitatis veste fieres protectus, quasi nudus his animositatum et sæcularium cupiditatum spinis ac vepribus, quibus laceraris, insedisti, sed si volueris sacris regulis et religioni concordari, gratia Dei sine difficultate ad cubile paternæ dulcedinis redire valebis, te ante teipsum reponere, et memento unde excideris, et age pœnitentiam. Quod si volueris, necesse est ut intelligas per qualia et quanta delinquas, qui apud te tumens, nulli subesse voles, et cunctis præesse non potes: et ideo sacras regulas, perverse interpretando, et quas prave interpretari non potes, quasi non sint, in tuis collectionibus ex studio prætermittendo, convellere satagis, quibusdam etiam de tuo quædam contra veritatem immittis, et dum invidiosus esse desideras, exterius quæ non debes defendis, et interius veram dilectionem amittis, et te a compage fraternæ unanimatis præcidis: quod sine ulla dubitatione de illius magisterio tibi descendit, qui, ut scriptum est: *Omne sublime videt, et est rex super universos filios superbiæ, factusque est ut nullum timeret* (Job xli); quique dixit: *Ascendam super altitudinem nubium, similis ero Altissimo* (Isa. xiv). Et quia divinæ ordinationis dispositionem servare, et socialem vitam in cælo tenere non voluit, Lucifer qui mane oriebatur de cælo cecidit, et veram beatitudinem perdens, miseriam sempiternam incurrit, sibi consentientes et obsequentes atque complices de beatis miseros fecit, et adeo in miseriam suam exerevit, ut se recognoscere et humiliare non possit. Quod vitium primis parentibus nostris immisit, ut suam culpam delinquentes non dicerent sed in alium, videlicet in auctorem suæ conditionis, non autem iniquitatis, retorquere studerent. Quo vitio adhuc non minime laborat genus humanum, et timeo ac doleo quia ego et tu ab hoc vitio in totum alieni non sumus. Attende igitur tota mentis intentione verba beati Leonis, qui-

bus dicit (*epist. 15, ad Pulcheriam*): « Sedis, inquam, apostolicæ moderatio hanc temperantiam observat, ut severius agat cum obduratis, et veniam cupiat præstare correctis. » Quam temperantiam ex divino magisterio sedes apostolica suscepit, et hanc omnibus sedibus imitandam proposuit: quoniam error confessus et correctus jam culpa caret, quia veniam habet: error vero convictus nec sic correctus, et culpam habet et veniam caret. « Et, ut Augustinus dicit, melius est in factis malis humilis confessio, quam in bonis superba gloriatio. » Et beatus Joannes in Apocalypsi voce divina angelo, id est episcopo Ephesi dicit: *Memor esto unde excideris, et age pœnitentiam, et prima opera fac: sin autem, venio tibi et movebo candelabrum tuum de loco suo, nisi pœnitentiam egeris* (Apoc. ii). Et angelo, id est episcopo Laodicæ ecclesiæ dicit: *Collyrio inunge oculos tuos ut videas* (Apoc. iii). Collyrio quippe oculos ut videamus inungimus, cum ad conspiciendam veri luminis charitatem intellectus nostri aciem medicamine operationis adjuvamus. Sicque in mutuam gratiam redire valebimus, si hæc et alia tibi salubria, et ministerio nostro competentia, agere et sequi volueris: quia, ut item beatus Leo dicit: « Dulcius munera gratiæ divinæ proveniunt, quoties non sine magnis sudoribus acquiruntur, et minus videri bonum solet pax continuata per otium quam reddita per labores: ipsa quoque veritas et clarius renitescit, et fortius retinetur, dum quæ prius fides docuerit, hæc postea examinatio confirmat. » Noli ergo diutius, tanquam civili bello, nostris contra nos erectis signis armisque pugnare, et seditiones a multis et per multos super multos compressas, redivivo contumaciæ furore in perniciem tuam, et Ecclesiæ catholicæ commotionem reexcitare. Redi ad paternam charitatem humiliter, quam contempsisti contumaciter. Fiat pax, ut dicit beatus Augustinus de Donatistis contra Ecclesiam se erigentibus, in virtute Jerusalem, quæ virtus charitas est, cui sanctæ civitate dictum est: *Fiat pax in virtute tua, et abundantia in turribus tuis* (Psal. cxxi). Et noli te extollere contra maternam metropolis tuæ generalem totius provinciæ sollicitudinem, et contra paternam nutritoris et ordinatoris tui benignitatem, quam tibi cum cæteris, sine aliquo detrimento, tantum ut te recognoscas, et metropolis privilegium, et metropolitanam dilectio, sine difficultate cupiunt exhibere. Sciunt enim et auctoritas metropolis et metropolitanus, illum vere esse magnum, qui totius ambitionis fuerit alienus, dicente Domino: *Quicumque voluerit inter vos major fieri, sit vester minister: et quicumque voluerit inter vos primus esse erit vester servus, sicut filius hominis non venit ministrari, sed ministrare* (Matth. xx). « Et tamen, inquit Leo, hæc illis tunc insinabantur, qui de pusillo volebant crescere, et de infinis ad summa transire. » Tu autem, ut scriptum est, jam magister infantium, et doctor insipientium factus, debes modum tum cognoscere, et tibi subditis, a quibus obedientiam exigit,

humilitatem obedientiæ tibi prælatis dependendo insinuare : præsertim cum ordines et distinctiones episcoporum sacri canones et decreta sedis Romanæ pontificum, necnon et leges quas Ecclesia probat et servat, sufficientissime ostendant, et irrefragabiliter conservari decernant : quæ si quis præsumit convellere, quid est aliud nisi seipsum ab universali Ecclesia, quæ partim jam in cælo cum Deo regnat, partim autem adhuc in terris peregrinatur, et ad patriam cælestem suspirat, præcidere ? Unde, frater, maximo cordis dolore percussus, cogor tibi dicere quad Moyses et Aaron rebelles et sibi populo resistenti dixerunt : *Nec contra nos est murmur vestrum, sed contra Dominum. Nos enim quid sumus ?* (Exod. xvi.) Et licet me nihil esse cognoscam, scio tamen quia servanda est mihi in corde humilitas, et quando causa exigit, in regimine disciplinæ miscenda est lenitas cum severitate. Faciendum quoddam ex utroque temperamentum, ut neque multa asperitate exulcerentur subditi, neque nimia benignitate solvantur jura regiminis. Quod juxta Pauli vocem (Hebr. ix), bene illa tabernaculi arca significat, in qua cum tabulis virga simul et manna est : quia cum sacræ Scripturæ scientia in rectoris pectore sic esse debet virga districtio, ut sit etiam manna dulcedinis : et rursus non sit tanta dulcebo, ne hac dissolutione sui loci oblitus quis pereat. Nam falsa pietate superatus, quia ferire Heli delinquentes filios noluit, apud districtum judicem semetipsum cum filiis crudeli damnatione percussit. Si autem mihi locus et possibilitas, quocumque obstaculo intercludente, ad id exsequendum quod debeo defuerit, ponam sartagine inter me et obsistentem mihi, murum ferreum, ut zeli munitione defendar, ne destitutus pro dissolutione condemner.

CAPUT XLV.

Ut recordetur quanta in dulcedine fuerit initio episcopatus, et deponat animositatem.

Tandem, frater et filii, moneo te, reduc in memoriam, qui nunc es omnibus in proverbio, et motione capitis, atque in fabula et cantico tota die, cum quanta quiete a tumultu cogitationum, quibus nunc in diversas distenderis, degebas, in primis diebus quando ac episcopatum venisti, cum quanta benignitate a domno rege suscipiebaris, quanta dulcedine mea fruebaris, quanta unanimitate cum fratribus et coepiscopis nostris utebaris, cum quanto amore a Palatinis, et ab aliis hujus terræ hominibus colebaris, cum quanta amoris reverentia a tibi commissis, sed et a nostris, a quibus et cum quibus et inter quos nutritus fuisti, venerabaris, antequam immoderatus amor sæculi tibi irreperet, et per quosdam subriperet, et ad se te raperet ; et cum te raptum habuit, fecit mundus sicut solet facere mundus immundus, cunctos quos accepit decepit, cunctos quibus arrisit irrisit, et sicut a plurimis dicitur, ad ea te sponte offerre (tantum ut hoc ego nescirem, nullo nisi forte cupiditate aut indebito timore cogente, quem non haberes si episcopaliter viveres) exsequenda perduxit, quæ in tantum detestabaris, ut antea

tibi collum abscederet, quam ab illa perducereris agenda, quæ multi dicunt a te etiam iterata. Et sicut illa non servasti vera, quæ toties atque tantisper alligare curasti, qui solebas dicere et scribere, quia verba sacerdotis aut vera sunt aut sacrilega, ita sunt nihilominus falsa quæ diceris per plures disseminare, scilicet quia nihil aliud adversum te habeo, nisi quoniam non vis consentire ut sedes apostolica suam potestatem non habeat. A temetipso enim hæc dicis, et non alii tibi dixerunt de me, nec didicisti a me, nec etiam didisti in me, vel audisti ex me : sed tu auxiliator humanus illam summam sedem non petitus inde adjuvas unde a te se adjuvari non sentit. Jam per annorum millia etiam in paganismo orbis caput existens, nec ex quo Petrum apostolorum Cepham, quin caput principem, cui Dominus dixit : *Tues Petrus et super hanc petram*, id est, super hanc firmam et solidam fidei confessionem, quam tu es confessus, *ædificabo Ecclesiam meam* (Matth. xvi) ; et : *Ac tu aliquando conversus confirma fratres tuos* (Luc. xxii) ; et *Si diligis me, pasce oves meas* (Joan. xx), videlicet quæ sunt in universo mundo, quaquaversum se catholica diffundit Ecclesia, licet per terrarum plagas dispersa, sud uno tamen pastore ac pastorum principe Christo unitate fidei in ovili uno conclusa, suscipere meruit prima sedes, et omnium ecclesiarum in toto orbe terrarum mater atque magistra, antequam heri sero vel nudius tertius terra te germinaret, et uterus maternus in hanc lucem produceret, mansit et permanet. Nam non ego, sed tu illius potestati ac privilegio derogare videris, qui Dei ordinationi, quam per eam disposuit, ut nulli subesse valeas, resistere prout potes laboras. Quanquam non unde, nec sicut canones sacri, quos psa venerat et servat, præcipiunt, sed pro motibus incompositi animi tui, undecumque et per andronas de hora in horam appellas, et aliam semel etiam et secundo ab ea litteris evocatus adire detrectas : cum ea quæ voles, et pro quibus te illam fingis appellando adire, quolibet modo apud domnum regem obtines, pro certo sciens adhuc de causis regulari ordine non te compellari, pro quibus appellans in synodo, cum appellatione tua illam, sicut ipsa per canones præcipit, cures adire. Licet absque rationabili necessitate, quantum ex te constat, litteras evocationis tuæ obtinueris, ut ipsam primam et sanctam sedem adires. Cæterum ipsa unde et sicut audit rescribit. Crede mihi, frater ac filii, si qui sunt qui te hortantur in hac pertinacia, quam indebite et sine ulla necessitate assumpsisti, et in qua permanes pertinere, non pro tua salute, neque pro tuo honore hoc faciunt. Et non episcopum, non quemcumque sanum sapientem invenies, cum ad certam rationem veneris, qui tibi consentiat ita intelligere debere sacras regulas, sicut eas interpretaris, et ab aliis vis intelligi, ut nulli debeas suddi : quod tibi pressius demonstrabo, si necessitate, quod absit, cogente me ad hoc sine mea voluntate compuleris. Accipe ergo salubre et honestum tibi oblatum

consilium. Depone noxiam tibi animositatem, et illas nœnias, quin potius tragœdias, quæ vadis per tuas collectiones et subscriptiones interpretando, mihi ostende, et tempore congruo, cum quibus et cum quantis volueris de fratribus et coepiscopis nostris, sed et de communibus nostris fidelibus, familiariter illas legamus, et inveniamus inde consilium, qualiter et sine tuo periculo, et sine opprobrio sopiantur, quia illa tua subscriptio, divinæ auctoritatis, quæ per beatum Leonem dicit, quia in causis, quæ ad generalem observantiam pertinent omnium Domini sacerdotum, nihil sine primatibus oportet impleri, est contradictio. Et si in plurimorum sapientum notitiam perlata fuerit tua derisio, *incipient*, inquit Dominus, *omnes illudere ei, dicentes: Quia hic homo cepit edificare, et non potuit consummare* (Luc. XIV). Quia enim nihil fit, nisi quod aut Dominus voluntate facit, aut fieri contra voluntatem suam interdum juste permittit, et miro modo fit, quia ejus consilio militant etiam quæ ejus consilio repugnant, si quædam aliquando perverse a perversis obtinentur, vel evindicantur, aut ad eorum damnationem, aut ad electorum purgationem, aut ad utrumque fieri Dominus juste permittit, et in suo tempore eos irridebit, quia sicut item scriptum est: *Illusionibus ipse deludet* (Prov. III). Propter quod Psalmista Spiritu sancto repletus, unumquemque fidelem admonet dicens: *Noli emulari in eo qui prosperatur in via sua, in homine faciente injustitias, quoniam qui malignantur exterminabuntur. Et: Vidi impium superexaltatum, et elevatum super cedros Libani. Transivi, et ecce non erat, quæsi eum, et non est inventus locus ejus. Custodi innocentiam et vide æquitatem, quoniam sunt reliquæ homini pacifico* (Ps. XXXVI).

CAPUT XLVI.

De eo quod gloriatur se in omnibus, quæ contra quoslibet suscepit, fuisse ac semper fore victorem.

Quæ idcirco dico, quia sicut a pluribus audio, per vanitatem te jactitas, quoniam quæcunque incepisti, aut contra regem, aut contra me, aut contra quoscunque tuorum, sive clericos, sive laicos, qui contra tuam voluntatem fecerunt, vel contra vicinos tuos, qui se contra te erexerunt, totum ex parte maxima semper evicisti, et quod adhuc restat evinces. Unde tunc potes in Domino te gloriari victorem, si per rectitudinem vincis errorem; si autem de errore errorem, aut vincis rectitudinem per errorem, non te potes gloriari victorem, sed debes flere miserabiliter te victum errore, et si ita non sapis, insipide desipis, quia unde tristari et flere debueras, inde jactaris. Graviores enim sunt vindicta plectendi, qui gaudent etiam in delictis, et lætantur cum male fecerint, et exsultant in rebus pessimis. Et quidam sapiens dicit: *Qui semper vincit non semper bene vincit*. Quando enim nobis diabolus vincendi libidinem suggerit, debemus recordari sententiæ beati Gregorii in capitulo decimo hujus opusculi supra positæ, quæ dicit sæpe se vidisse, quod cum se ad feriendum graviter rhinoceros, id est temporali potestate fultus accenderet, et quasi elevato cornu

A subjectis intentaret damnationem, repente fronti signo crucis impresso omne in se incendium furoris extinxisset, et minas deposuisset. Et si homini sæculari potestate prædito sic utique est agendum, quid nos miseri sacerdotes in judicio Dei dicemus, qui loco sacerdotali devincti, non nostras ullo modo, sed divinas injurias cum misericordia et discretione in alios, et cum severitate in nosmetipsos, vindicare debemus, si ad evindicationem parati semper existimus, quibus dicitur: *Benefacite his qui oderunt vos, non reddentes malum pro malo* (Matth. V). Scriptum est enim: *Mihi vindictam, et ego retribuam, dicit Dominus: sed si esurierit inimicus tuus, ciba illum; si sitit, potum da illi* (I Petr. III; Rom. XII). Et Salomon dicit: *Melior est patiens viro forte, et qui dominatur animo suo expugnatore urbium* (Prov. XVI). Minor est ergo victoria urbes expugnare, quia extra sunt quæ vincuntur: majus autem est quod per patientiam vincitur, quia ipse a se animus superatur, et semetipsum sibimetipsi subjicit, quando eum patientia in humilitate tolerantia substernit. *Qui*, inquit Apostolus, *sunt Christi, carnem suam crucifixerunt cum vitis et concupiscentiis* (Gal. V), ut non solum a pravo opere, sed etiam a concupiscentia pravi operis crucifixi, non sequamur deliberatione, minime autem opere, quod prave a nobis concupiscitur, vel in mente suggeritur, Domini incessanter petentes clementiam, ut qui nos jussit vigilare et orare, ut non intremus in tentationem, sua nos gratia protegat, ne inducamur in tentationem: et si ut homines labimur, citius ad pœnitentiam redeamus ut non regnet peccatum in nostro mortali corpore ad obediendum desideriis ejus; cui videlicet peccato, si tollere non possumus, ut non sit in nobis tollamus tamen per Dei adjutorium illi regnum, ne dominetur nostri. Maxima quippe infelicitas est hominis, in malo suo prosperari feliciter. Scriptum est enim: *Tria sunt quæ bene gradiuntur, et quartum quod incedit feliciter* (Prov. XXXVIII). Non enim omne quod feliciter, bene: nec omne quod bene, feliciter. Feliciter enim semper incidere, filio perditionis est proprium. « Grandis namque offensa est, ut Hieronymus dicit, postquam peccaveris, iram Dei non mereri. » Et sanctus Gregorius: « Necesse est ut peccantes quosque tunc consideremus amplius miseros esse, quando eos conspiciamus in culpa sua sine flagello derelictos. » Hinc etenim per Salomonem dicitur: *Aversio parvulorum interficiet eos, et prosperitas stultorum perdet illos* (Prov. I). Qui enim a Deo avertitur et prosperatur, tanto perditioni fit proximus, quanto zelo disciplinae invenitur alienus: quo contra Psalmista de Moyse, et Aaron, et Samuele dicit: *Quia invocabant Dominum, et ipse exaudiebat illos, in columna nubis loquebatur ad eos. Custodiebant testimonia ejus, et præceptum quod dedit illis* (Psal. XCVIII); et more prophetico conversus mox ad Dominum dicit: *Domine Deus noster, tu exaudiebas eos: Deus, tu propitius fuisti eis, et ulciscens in omnes adventiones eorum. Propitiatio quippe Dei,*

est delinquentem corripere. *Cum judicamur*, inquit, *a Domino corripimur, ut non cum hoc mundo damnemur* (I Cor. xi); et : *Qui in bonis ducunt dies suos, ut scriptum est, in puncto ad inferna descendunt* (Job XXI). Hinc enim Psalmista de Domino dicit : *Immisiones per angelos malos, viam fecit semitæ iræ suæ* (Psal. LXXVII). Cor quippe Dominus prioribus meritis aggravatum juste permittit etiam subsequentibus malignorum spiritu persuasionibus falli : quod cum digne in culpam trahitur, reatus ejus in pœna cumulatur. Unde et iræ suæ Domino viam facere est, in eos, qui punire in se causas recte noluerunt, districte judicando dilatare : ut qui illuminati agere recta noluerunt, juste cæcati adhuc faciant unde amplius puniri mereantur, de quibus dicit Apostolus : *Ut impleant peccata sua semper* (I Thess. II). Et hinc voce angeli ad Joannem dicitur : *Qui nocet, noceat adhuc, et qui in sordibus est, sordescat adhuc* (Apoc. XXII). Et hinc David dicit : *Appone iniquitatem super iniquitatem eorum, et non intrent in justitiam tuam* (Psal. LXXVIII). Et hinc per Moysen dicitur : *Nondum completa sunt peccata Amorrhæorum* (Gen. xv). Hinc per eundem Dominus dicit : *Nonne hæc condita sunt apud me, et signata in thesauris meis ? In die ultionis reddam eis* (Deut. XXXII). Et quia eorum mala narravit, illico adjunxit : *In tempore quo lapsus fuerit pes eorum*. Ecce atrocissima peccata illorum describuntur, et tamen ad ultionis diem adhuc subsequens lapsus aspiciunt, quo eorum culpæ cumulentur. Habent jam quidem unde feriri mereantur, sed sustinetur tamen adhuc peccatum crescere, ut peccantes possit acrior culpa cruciari. Jam meretur supplicium peccatum et causa peccati, sed expectatur adhuc, ut augmentum supplicii subroget peccatum et pœna peccati. « Peccatum, inquit Gregorius (homil. 11 in Ezech.), quod per pœnitentiam citius non deletur, aut peccatum est et causa peccati, aut peccatum est et pœna peccati, aut peccatum simul causa et pœna peccati. Omne enim quod prius committimus, peccatum est : sed si citius pœnitendo non tergitur, Justo judicio omnipotens Deus obligatam peccatis mentem etiam in culpam alteram permittit cadere, ut quæ flendo et corrigendo noluit mundare quod fecit, peccatum incipiat peccato cumulare. Peccatum ergo, quod pœnitentiæ lamento non diluitur, peccatum simul est et causa peccati, quia ex illo oritur unde adhuc peccatoris animus altius obligetur. Peccatum vero quod ex peccato sequitur, peccatum simul est et pœna peccati, quia ex crescente cæcitate ex retributione prioris culpæ generatur, ut quasi jam quædam sint in peccatore supplicia ipsa incrementa vitiorum. » Peccatum quippe tibi fuit insolentiæ contumaciæ, cum sine causa, si tamen sine causa, contra domnum regem te irrationabiliter erexisti : a quo peccato quia per humilitatis debitam et rationabilem satisfactionem noluisti respicere, exegisti ut ageret et agi præciperet in te, unde amplius furore exagitatus te contra illum commoveres : qua commotione devictus, in peccatum subsequens inci-

disti, ut perniciosas excommunicationum maledictiones in eos etiam qui erga te non inde peccaverunt exereres : quasi non in te, sed in illum ipsa pericula, quæ de eisdem maledictionibus imminabant, redundarent. Qui te ad hoc prevocavit ut taliter innoxii malediceres, cum de his qui non iudicio justitiæ, sed livore vindictæ maledicunt, dicat Apostolus : *Neque maledici regnum Dei possidebunt* (I Cor. iv). Et hoc peccatum existit pœna præcedentis contumaciæ insolentis peccati, et causa adhuc subsequentis peccati : quia cum voluisti ostentare nihil te contra rationem in ipsa excommunicatione parochiæ tuæ fecisse, et verecundiam irrationabilis facti a te depellere, et non esse ita te subditum Metropolitanæ prælacioni, ut non licere quidquid velles in parochia tua sine meo consultu agere posses, meque prævaricatorem canonum esse, quia quod ligasti in parochia tua præsumpsi absolvere, et non esse soluta quæ solvi, quin potius sedes apostolica, et omnes illi per quos Deus sacros canones suo Spiritu condidit, ac per hoc ipse Deus, si recte intellexisses, absolvit, nisi contra ea quæ tibi et parochiæ tuæ scripsi, tecum sentirent, atque in præfato sensu subscriberent. In hanc vesaniam ex retributione justitiæ corruisti, ut sicut de aversore principe scriptum est : *Qui peccavit, et peccare fecit Israel* (III Reg. XIV), contra evangelicam veritatem, et apostolicam auctoritatem, et sacrorum canonum constitutionem, de quibus promulgata sunt illa scripta, quæ per me in unum collecta, et tibi ac parochiæ tuæ constant esse directa, et ipse subscriberes, et alios subscribere faceres, reclamantibus adversum te sacris regulis, ut inconsulto priore tuo nihil novi facere præsumas, quoniam quæ ad generale observantiam omnium Domini pertinent sacerdotum, nihil sine primatibus oportet impleri. Sed quia nervi testicularum Behemoth perplexi sunt, cum his te explicare finxisti, te durius et multiplicius nexuisti, et super dolorem vulnere tuorum ipse superaddens, alios solutos tecum connexioni, insuper et contra canones, et decreta sedis Romanæ pontificum commenta ad hoc collegisti, quatenus te ut onagram liberum a sede metropolitana monstrares, et me ut prævaricatorem canonum, eisdem commentationum tuarum vinculis astrictum in insolubiliter demonstrares, et adhuc etiam sicut de malo in pejus, ita de pejore in pessimum profecisti, ut non solum tibi commissis clericis, sed et episcopis illa figmenta compilata, et regi danda ostenderes, et mihi dari faceres, ut per illa me concredere, et adeo me tibi subjugarem, ut, sicut mandasti, verba evangelica et apostolica atque canonica, quæ tibi et Ecclesiæ tibi commissæ direxeram, igne cremarem, et me non solum a gradu, verum et a Christianitate exuerem, et potum mortis mihi a te propinatum bibens, etiam homicida mei velut Judas pœnitendo existerem, et in hoc etiam gravius a Juda differrem, ut de bono facto me pœniteret. Hoc namque poculum, quod

consecisti ex nominibus sanctorum apostolicæ sedis pontificum, quasi ad ora melle oblitum, et indiscrete commixtum, de quo tibi commissos clericos potio-nasti, et quod quibusdam episcopis obtulisti, et Satanæ primis parentibus nostris in paradiso obtulit, quando pomum bonum ad vescendum, et pulchrum oculis, aspectuque delectabile ostendit, eisque dixit: *Quacunque die comederitis ex eo, aperientur oculi vestri, et eritis sicut dii scientes bonum et malum (Gen. III)*; et quibus promisit divinitatem, tulit immortalitatem, et pollicens liberam et nulli subjectam deitatis æqualitatem, captivitatibus eis in-tulit miseram servitutem, quos sibi complices fecerat ad iniquitatem. « Et tu clericis tuis, qui, inquis, mihi eodem Deo auctore commissi sunt, et in his similiter sentiunt, solliciti servare unitatem spiritus in vinculo pacis, hac mecum pace potiantur, » ac si patenter addendo diceres, et in transgressionem sanctorum regularum per sanctum vere Spiritum prolatarum gradiantur; et mox subsequendo: « Si, inquis, aliqui secus nolentes fieri socii hujus disciplinæ, nec habeantur participes communionis nostræ. » Quod non est aliud dicere, nisi permaneant in catholicæ Ecclesiæ communione, et si forte non verbis, rebus tamen quibusdam episcopis persuadendo: « Hanc, inquis, tenete et mecum evindicate compilationem, et nulli nisi Romano pontifici debetis subjectionem, et dissipabitis mecum Dei ordinationem in communis episcopalis ordinis discretam sedibus dignitatem. » Sed concedamus hæc dicere et agere posse aliquem arrogantem atque jactantem, illa vero divinare non valeo, quomodo in mentem tuam venire potuit, ut regi illam compilationem versibus inversis, scilicet adulatoriis sensibus prælitam velles ostendere, quem latere non posse sciebas ad quid illam voluisti colligere. Sed et mihi quomodo potuisti mandare, ut non solum ea quæ ædificavi destruerem, verum sic metropolitanæ sedis privilegium et meisum tibi subicerem, et Evangelia, atque apostolos, et prophetas, et canones incendendo negarem, ut sicut ethnicus et publicanus omnibus fierem, cum licet infirmus et fragilis una cum sancta Ecclesia frequentissime cantem, esse virum sanctum, qui pro lege Dei sui certavit usque ad mortem. Et hinc anxie mihi hæsitanti occurrit Paulus de hujusmodi dicens: *Cum cognovissent Deum, non sicut Deum glorificaverunt, aut gratias egerunt, sed evanuerunt in cogitationibus suis, et obscuratum est insipientis cor eorum: dicentes enim se esse sapientes, stulti facti sunt (Rom. I)*. De quibus et Dominus ad Ezechielem prophetam dicit: *Patres, inquis, eorum prævaricati sunt pactum meum usque ad diem hanc, et filii dura cervice et indomabili corde sunt, ad quos ego mitto te (Ezech. II)*. Sed prius nobis ex verbis beati Gregorii dicendum est quid sit pactum: « In pacto, inquit (*hom. 9 in Ezech.*), discordantium partium voluntas impletur, ut ad votum suum quæque perveniat, et jurgia desiderato fine concludat. Quod pactum inter

A Deum et homines prævaricatum Deus queritur. Et ecce est una culpa superbiæ, quia prævaricati sunt pactum. Ecce altera obstinationis, quia usque ad diem hanc. Ecce culpa gravis impudentiæ, quia dura facie, quoniam mala quæ faciunt jam nec erubescunt, et nunquam vel post culpas ad poenitentiam redeunt, quia indomabili corde sunt. Cum vero tantæ pravitatis, tantæque obstinationis sint hi, ad quos propheta mittitur, quis jam non videat quia persona prophetæ a tam perversis hominibus despici valeat? Sed ecce auctoritas personæ tribuitur, cum subditur: Et dices ad eos: Hæc dicit Dominus, si forte vel ipsi audiant, et si forte quiescant, *quia domus exasperans est (Ezech. XII)*. Et tu, fili hominis, ne timeas eos, neque sermones eorum metuas, *quia domus exasperans est. (Ibid.)* Stultum enim valde est, si illis placere quærimus, quos non placere Domino scimus. Debe-mus autem habere in metu et reverentia judicia justorum, quia membra omnipotentis Dei sunt, et hoc ipsi in terra reprehendunt, quod Dominus redarguit e cælo. Nam perversorum derogatio, vitæ nostræ approbatio est quia jam ostenditur nos aliquid justitiæ habere, si illis displicere incipimus qui non placent Deo. Ideo boni timendi sunt ne offendantur, ne fortasse per eos ille provocetur ad iracundiam, qui eorum corda semper inhabitat. Propter quod etiam subditur: Tu autem, fili hominis, audi quæcunque loquor ad te, et noli esse exasperans, sicut domus exasperatrix est. Nisi enim ad loquendum verba cum mittebatur obediret, omnipotentem Dominum, sicut auditores de perverso opere, sic propheta, id est prædicator de suo silentio Deum exasperasset. »

CAPUT XLVII.

Quod victum se nunquam agnoscat. De ejus in metropolitanum rebellionem: et quod sacra eloquia exuri petierit, et schisma subscriptione sua fecerit. Et de injustis ejus obligamentis.

Unde mihi, ad cujus sollicitudinem pertinere dignosceris, non est tibi tacendum. Et quia ego monendo et tu resistendo luctari cepimus, et puto in hac præsentia luctatione non ante sextam, aut septimam, vel usque ad decimam volutionem patieris succumbere: nempe, ut timeo, etiam cum ratione, veritate, atque auctoritate, ac nube testium, acriori duello Daretis et Entelli justissime victus, et judicium justorum clamoribus percitus, jam subter jacens, victum te dicere non dignaberis, et quæ ad tuam instructionem et correptionem tibi scripta sunt, non ad ædificationem suscipies, sed ad contentionem exaggerare studebis, et more tuo sueto ut invictus sis, secutus Helium præcursorem arrogantium, et in arrogantia sua invictissimum, qui dixit: *Plenus sum sermonibus, et coarctat me spiritus uteri mei: loquar et respirabo paululum, aperiam labia mea et respondebo (Job XXXII)*, te intra te colibere non poteris, quin scientiam tuam sine ratione et auctoritate in auras incondite ut soles non proferas, et ut me ad rescribendum compellere possis, quatenus horas utilitat

et necessitati impendendas inutilitati et superfluitati expendam, frivola et inutilia atque ratione carentia rescribere decertabis, et illa quæ jam a me tibi scripta sunt, sed et tuas ineptias ad episcoporum et sapientum examen me producere ad meum pro te dolorem et ad tuam perniciem exiges, et veniet super te, sicut vereor, illa sententia quæ scripta est : *Necesse est ut veniant scandala, vœ autem homini illi per quem scandalum venit (Matth. xviii)*. Et sicut me et eos qui mecum te nutrierunt, deinde alios atque alios, sed et plures de his qui tibi commissi fuerunt, verum et de his qui a te in fœdus familiaritatemque suscepti fuerunt, viritum dereliquisti, et vicissim alios atque alios tibi in amicitiam et familiaritatem recepisti, cum delegeris potius eorum, qui se per diversa jactantes ab unitate catholicæ fraternitatis præciderunt, vel propter irrevocabilem suam pertinaciam præcidi exegerunt, ut nostris temporibus Gothescalculus atque Guntarius, exitiabilem pertinaciam sequi, quam ecclesiasticam mansuetudinem et piam paternitatem. Contingat tibi, quod absit, cum eis habere partem, quorum studueris imitari perversam intentionem : et idcirco si, quod non opto sed timeo, in hac dementia sicut cœpisti volueris perseverare, ne amplius contra verbosum studeam contendere verbis, sed ista aut ad correctionem, aut per aliorum judicium ad tuam revictionem sufficere valeant, et mihi de avulsione dextri oculi vel dextræ manus abscissione dolor continuus et perpetuus mœror accidat, sicut ex verbis beati Gregorii tria tibi proposui : peccatum scilicet, et causam peccati, ac pœnam peccati : quæ etiam si negare velis admisisse convinceris, tibi alia tria ex verbis beati Augustini proponam, ut sicut scriptum est, *Videas, et scias, et recogites, et intelligas pariter (Isa. xli)*. Primum quidem propectum avaritiæ, unde Apostolus, *et avaritia quæ est idolorum servitus (Coloss. iii)*. Avaritia enim, ut demonstrat Gregorius, non solum pecuniæ est, sed etiam altitudinis. Recte quippe avaritia dicitur, cum super modum sublimitas ambitur. Quod incidisse videris, qui contra decretum a Deo ordinatum, ne subditus secundum regulas tuo metropolitano fias, ut supra ostendi, rebellare conaris. In quo si perseverare delegeris, quantum delinquas, cum tantis auctoritatibus revincaris, ex ejusdem beati Augustini verbis, quæ de sancti Cypriani dictis deprompsit, tibi ostendere necessarium duxi. Ait enim sanctus Cyprianus (*epist. 65, ad Antonianum*) : « Post inspirationem, inquit, et revelationem factam, qui in eo quod erraverat perseverat prudens et sciens, sine venia ignorantia peccat : præsumptione enim atque obstinatione quadam nititur, cum ratione superetur. » Hinc Augustinus (*lib. iv de Bapt. contra Donatistas, cap. 5*) : « Hoc verissimum est, longe gravius esse peccatum ejus qui sciens, quam ejus qui nesciens peccaverit. » Et ideo vir sanctus Cyprianus, non solum doctus, sed etiam docilis, quod in laude episcopi pœnem designat Apostolus, sic ipse intellexit, ut diceret etiam hoc in episcopo esse diligen-

A dum, non solum ut scienter doceat, sed etiam patienter discat. Non dubito quod si istam quæstionem in Ecclesia diu multumque versantem cum viris sanctissimis doctissimisque tractaret, per quos postea factum est, ut antiqua illa consuetudo etiam plenario concilio firmaretur, sine dubitatione demonstraret, non solum quam devotus esset in his quæ firmissima veritate perceperat, verum etiam quam docibilis in his quæ minus advertebat. Et tamen cum manifestissimum sit multo gravius peccare scientem quam nescientem, vellem mihi aliquis diceret : Si quis in hæresim incurrat, nesciens quantum malum sit, et alius ab avaritia non recedat, sciens quantum malum sit, quis eorum sit pejor ? Possum etiam ita proponere, si alius nesciens in hæresim incurrat, et sciens alius ad idololatria non recedat, quia et Apostolus dicit : *Avaritia quæ est idolorum servitus (Coloss. iii)*, et ipse Cyprianus eandem sententiam non aliter intellexit, sicut ad Antonianum scribens ait (*epist. 52*) : « Nec sibi in hoc novi hæretici blandiantur, quod se dicant idololatriæ non communicare, quando sint et apud illos adulteri et fraudatores qui teneantur idololatriæ crimine, secundum Apostolum dicentem (*Ephes. v*) : Hoc enim scitote intelligentes, quia omnis fornicator, aut immundus, aut fraudator, quod est idololatria, non habet hæreditatem in regno Christi et Dei ; et iterum : *Mortificate itaque membra vestra quæ sunt super terram, exponentes fornicationem, immunditiam, et concupiscentiam malam, et avaritiam quæ est idolorum servitus (Coloss. iii)*. Quæro ergo quis peccet gravius, qui nesciens in hæresim incurrit, an qui sciens ab avaritia, id est ab idololatria non recesserit ? Secundum quidem illam regulam, qua peccata scientium peccatis ignorantia præponuntur, avarus cum scientia vincit in scelere hæreticum nescientem. Sed ne forte hoc fiat, facit in hæresi sceleris ipsius magnitudo, quod facit in avaritia scientis admissio, ut hæreticus nesciens avaro scienti coæquetur. » Exustionem quoque divinatorum eloquiorum, quam mihi persuadere, si posses, obtentu apud te obtinendam pacis conatus fuisti, sicut clericos parochiæ tuæ eodem obtentu per irregularem subscriptionem tecum connexuisti. Legimus quippe esse os cordis, sicut et os corporis. De ore enim cordis scriptum est : *Labia dolosa in corde, et corde locuti sunt (Psal. xi)* ; et juxta evangelicam veritatem : *De corde exeunt cogitationes malæ, homicidia, perjuria, falsa testimonia (Matth. xi)*, et reliqua quæ ex ore cordis ad aliorum procedunt notitiam per os corporis. Et legimus deliberationem voluntatis esse perfectionem operis, dicente Domino : *Qui viderit mulierem ad concupiscendum eam, jam mæchatus est eam in corde suo (Matth. v)*, et ad discipulos suos : *Posui, inquit vos, ut eatis et fructum afferatis (Joan. xv)*. « Eat, inquit Gregorius, volendo, fructum afferatis operando. Eat enim volendo dixi, quia velle aliquid facere jam mente ire est. Et tu adeo ex deliberatione voluntatis pervenisti ad operationem sermonis,

ut mortiferum ad bibendum mihi propinares, scilicet ut eloquia sacra gratia tui incenderem, nisi mihi ille adesset qui in se credentibus repromisit dicens : *Si mortiferum quid biberint, non eos nocebit* (Marc. xvi). Dum pestiferas, inquit beatus Gregorius, suasiones audiunt, sed tamen ad operationem pravam minime pertrahuntur, mortiferum quidem est quod bibunt, sed non eis nocebit. » Et licet me Deus hinc gratia sua servaverit, tu tamen, nisi pœnitueris, studii tui lues iudicium. « Tardius, inquit beatus Gregorius (*Pastor. III, admon. 33*), peccatum solvitur, quod et per consilium solidatur : nisi enim mens omnimodo aeterna despiceret, in culpa ex iudicio non periret. Hinc est quod per prophetam Dominus non tam præcipationum prava, quam delictorum studia reprehendit dicens : *Ne forte egrediatur ut ignis indignatio mea, et succendatur, et non sit qui exstinguat propter malitiam studiorum vestrorum* (Jer. iv). Hinc iterum iratus dicit : *Visitabo super vos juxta fructum studiorum vestrorum* (Jer. xxi). Quoniam igitur a peccatis aliis differunt peccata quæ per consilium perpetrantur, non tam prava facta Dominus, quam studia pravitatis insequitur. In factis enim sæpe infirmitate, sæpe negligentia, in studiis vero malitiosa semper intentione peccatur. » Hinc ergo colligant qui in culpa se etiam per consilium ligant, qua quandoque ultione feriendi sunt, qui nunc pravorum non socii, sed principes fiunt. Schisma nihilominus, quo te a tibi commissis separaturum monstrasti, nisi tectum subscriberent, quæ tecum subscriberentes a nobis, qui ea quæ tibi et ecclesiæ tibi commissæ, de evangelica veritate, et apostolica auctoritate, atque canonica institutione direxi, servamus, imo ab Ecclesia catholica, quæ illa servat et irrefragabiliter omnes servare docet. Ut quoniam me ex merito meo despicias, ex beati Augustini verbis de Scripturæ sacræ auctoritate docentis agnoscas quam grave peccatum sit idololatria, quod ex ambitu altitudinis admisisse videris, et quia gravius est incensio divinatorum eloquiorum, ad quod me quantum ex te fuit traduxisti, et quoniam gravissimum sit peccatum schisma, quo te a fraterna nostra unanimitate per tuam perniciosam subscriptionem separasti, si in eo, quod absit, permanere delegeris : et si forte his subscripsisti, quæ evangelicæ veritati et apostolicæ auctoritati contraria, et decretis sanctorum conciliorum, quæ universalis Ecclesiæ probavit assensus, et apostolicæ sedis confirmavit auctoritas, inveniuntur adversa. Ait enim idem Beatus Augustinus loquens ad Donatistas, imo contra Donatistas schismaticos per carnis præsentiam, sicut tibi nunc loqui creditur per litterarum suarum doctrinam, et quæ mori nunquam potuit charitatem : velut ipse de Cypriano dicit (*lib. v de Bapt., c. 17*) : « Præsens est, inquit, non solum per litteras suas, sed etiam per ipsam, quæ in illo maxime viguit et mori nunquam potuit, charitatem. » Quique te cum præfatis alloquens (*lib. II de Bapt., c. 6*) : « Quare, inquit, vos, non dico ab innocentibus,

A quod probatur, sed ab ipsis, quod non probatur, traditoribus separastis? An, ut dicere cœperam, graviora sunt crimina traditorum, quam schismaticorum? Non afferamus stateras dolosas ubi appendamus quod volumus, et quomodo volumus, pro arbitrio nostro dicentes, hoc grave, hoc leve est : sed afferamus divinam stateram de Scripturis sanctis, tanquam de thesauris Dominicis, et in illa quid sit gravius appendamus, imo non appendamus, sed a Domino appensa recognoscamus. Tempore illo, quo Dominus (*Exod. xxxii*) priora delicta recentibus pœnarum exemplis cavenda monstravit, et idolum fabricatum atque adoratum est, et propheticus liber ira regis contemptoris incensus (*Jer. xxxvi*), et schisma attentatum, idololatria gladio punita est, exustio libri bellica cæde et peregrina captivitate, schisma hiatu terræ sepultis auctoribus vivis, et cæteris celesti igne consumptis. Quis jam dubitaverit hoc esse sceleratius commissum, quod est gravius vindicatum? » De eo quod in tua subscriptione misisti, ut tecum subscriberentes : *Solliciti servare unitatem spiritus in vinculo pacis, hac tecum pace potiantur* (*Num. xvi*), in eodem libro dicit ad Donatistas (*lib. II de Bapt., cap. 6*) : « Quare non communicatis ecclesiis, quibus epistolas apostolicas missas tenetis et legistis, et secundum ipsas vos vivere dicitis? » Et post pauca, quæ studio brevitate prætereo, et lector ibidem ex ordine poterit invenire : Hos, inquit, omnes catholica unitas materno sinu complectitur, invicem onera sua portantes, et studentes servare unitatem spiritus in vinculo pacis, donec alteris eorum, si quid aliter sapiebant, Dominus revelaret. De hoc autem, quod quasi ex verbis Leonis subjunxisti (*Ephes. iv*) : « Si aliqui secus nolentes fieri socii hujus disciplinæ, nec habeantur participes communionis nostræ, » conferantur verba tua cum verbis Leonis in capitulo ubi hæc dicit, et junctim legantur, sicut ibi habentur (*epist. 1, c, 5*) : « Hoc itaque admonitio nostra denuntiat quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem, qui socius esse noluit disciplinæ. Ne quid vero sit quod prætermisimus a nobis forte credatur : Omnia decretalia constituta, tam beatæ recordationis Innocentii, quam omnium decessorum nostrorum, quæ de ecclesiasticis ordinibus, et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » Hæc est integritas capituli beati Leonis. Intueamur ergo, si disciplina discenda tuis a te proposita, disciplinæ, quam sequendam Leo docuit, æqua sorte conveniat, aut si tua doctrina ab illius doctrina discordet, et judicet cælum ac terra quæ potius sit sequenda, tua disciplina, an Leonis doctrina. Et cum idem Leo dicat : « Nec communionis nostræ esse consortem, qui socius esse noluit disciplinæ, » discernendum est, cujus commu-

nionem, illius cum universali Ecclesia, an tuam op-
 pidani episcopi cum tuis complicitus debeat catho-
 licus quisque eligere, præsertim cum idem Leo
 dicat : « Si quis in decretalia constituta tam beatæ
 recordationis Innocentii, quam omnium decessorum
 suorum, quæ de ecclesiasticis ordinibus, et canonum
 promulgata sunt disciplinis commiserit, veniam sibi
 deinceps noverit denegari. » In quæ decretalia con-
 stituta te manifestum est commisisse, sicut et in
 scriptis semel et secundo a me tibi directis ostendi-
 tur, et ecce jam tertio in hoc scripto supra monstra-
 tur : a quorum disciplina, imo a catholica Ecclesia,
 cujus exsistere rectores, hac subscriptione tua te
 separasti, si, ut prædictum est, et semper dicendum
 est, a te subscripta eisdem constitutis esse inve-
 niuntur adversa. Quapropter adhuc etiam tria tibi
 ex verbis beati Augustini catholicæ Ecclesiæ doctoris
 eximii proponenda proposui, præponens his tribus
 beati Cypriani sententiam, a beato Augustino favo-
 rabiliter collaudatam (*epist. 73, ad Jubajanum* in
 fine), et ab omnibus catholicis ac pie viventibus
 acceptandam. « Servatur, inquit beatus Cyprianus
 (*lib. IV de Bapt., cap. 7*), a nobis patienter et leniter
 charitas animi, honor collegii, vinculum fidei, con-
 cordia sacerdotii. » Hæc, inquit Augustinus, verba
 Cypriani sunt. An forte invidia et malevola dissensio
 parvum malum est? Quomodo ergo isti erant in uni-
 tate, qui non erant in pace? Vox enim non mea, aut
 alicujus hominis, sed ipsius Domini, nec per homi-
 nes, sed per angelos sonuit Christo nato : *Gloria in
 excelsis Deo, et in terra pax hominibus bonæ volun-
 tatis* (*Luc. II*). Quod utique nato in terris Christo
 non sonaret ore angelico, nisi Deus hoc vellet intel-
 ligi, eos esse in unitate corporis Christi, qui sunt
 in pace Christi, eos autem esse in pace Christi,
 qui sunt bonæ voluntatis. Porro sicut in bene-
 volentia bona voluntas, sic in malevolentia mala
 voluntas est. Jam vero ipsa invidia, quæ non
 potest esse nisi malevola, quantum malum est?
 Non quæramus alios testes, sufficit nobis ipse
 Cyprianus, per quem tam multa de zelo et livore
 Dominus veracissima intonuit, et salubria præcepit
 Legamus ergo Epistolam Cypriani de zelo et livore,
 et videamus quantum malum sit invidere melioribus,
 cujus mali originem ab ipso diabolo exstitisse me-
 morabiliter docet. « Zelare, inquit, quod bonum
 videas, et invidere melioribus, leve apud quosdam
 et modicum crimen videtur, fratres dilectissimi. »
 Deinde paulo post, cum ejus mali caput atque origi-
 nem quæreret : « Hinc diabolus, inquit, inter initia
 statim mundi, et periit primus et perdidit. » Et paulo
 post : « Quale malum est, inquit, fratres, quo ange-
 lus cecidit, quo circumveniri et subverti, alta illa et
 præclara sublimitas potuit, quo deceptus est ipse
 qui decepit? Exinde invidia grassatur in terris, dum
 livore periturus magistro perditionis obsequitur, dum
 diabolus qui zelat imitatur, sicut scriptum est :
*Invidia autem diaboli mors intravit in orbem terra-
 rum* (*Sap. II*). Imitantur ergo illum qui sunt ex parte

A ejus. » Hæc idcirco tribus promissis de verbis beati
 Augustini a me tibi proponendis præposui, quoni-
 am zelo et furore illa pernicioosa ligamenta, de qui-
 bus agitur, te egisse, et hanc contra sacras regulas sub-
 scriptionem adinvenisse veraciter credimus. Quapro-
 pter necessarium duxi primum quidem tibi ostendere,
 quia insola catholica, unitate per hæreses vel schismata
 non divisa, vera sunt ligamenta, ut vera sunt sacra-
 menta. « Puto me, inquit beatus Augustinus (*lib. VII
 de Bapt., c. 51*), non temere dicere, alios ita esse in
 domo Dei, ut ipsi etiam sint eadem domus Dei, quæ
 dicitur ædificari super petram, quæ unica columba
 appellatur, quæ sponsa pulchra sine macula et ruga,
 et hortus conclusus, fons signatus, puteus aquæ vivæ,
 paradisus cum fructu pomorum : quæ domus etiam
 claves accepit, ac potestatem solvendi et ligandi.
 Hanc domum si quis corripientem corrigentemque
 contempserit, sit tibi, inquit, tanquam ethnicus et
 publicanus. » Et sciendum nobis est, quia præposita
 regula corripiendi data huic domui Dei, videlicet
 catholicæ Ecclesiæ, hæc sententia si contempta fue-
 rit, subditur : *Sit tibi, inquit, tanquam ethnicus et
 publicanus* (*Matth. XVIII*). Secundum autem capitu-
 lum, contra injustam obligationem innoxiorum a te
 patratam, quasi specialiter de hoc facto loquentis, et
 te una cum eis quos alloquebatur computantis, ex
 verbis ejusdem doctoris magnifici tibi propono, di-
 centis (*D. Aug. I. II de Bapt., c. 6*) : « Si tunc in
 illos quos arguebatis vera diceretis, causam vestram
 unitati orbis terrarum persuasissetis, ut vobis reten-
 tis illi excluderentur. Quod si conati estis facere, et
 non obtinuistis, innocens orbis terrarum qui judici-
 bus ecclesiasticis potius quam vietis litigatoribus cre-
 didit. Si autem nolulistis agere causam vestram, in-
 nocens est orbis terrarum qui damnare non potuit
 inauditos. Quare ergo vos ab innocentibus separa-
 stis? Sacrilegium schismatis vestri defendere non
 valetis. » Spirituales autem, sive ad hoc ipsum pio
 studio proficientes, non eunt foras, quia et cum ali-
 qua vel perversitate vel necessitate hominum viden-
 tur expelli, ibi magis probant quam intus permane-
 ant, cum adversus Ecclesiam nullatenus eriguntur,
 sed in solida unitatis petra fortissimo charitatis ro-
 bore radican- tur. Ad hoc enim pertinet quod in illo
 Abrahamæ sacrificio dicitur : *Aves autem non divisit*
 (*Gen. xv*), videlicet quia se ab unitate spirituales non
 præcidiunt. Quo contra Antiochenum concilium de
 his, qui se a ministerio ecclesiastico subtrahunt, et
 seorsum colligunt, sequæ ab unitate dividunt, dicit
 (*conc. Antioch., can. 5*) : « Si quis presbyter aut dia-
 conus, episcopum proprium contemnens, se ab Ec-
 clesia sequestraverit, et seorsum colligens altare
 constituerit, et commentonem episcopo non acquie-
 rit, nec consentire vel obedire voluerit semel et ite-
 rum convocanti, hic damnatus omnimodo nec ultra
 remedium consequatur : quia suam recipere non
 poterit dignitatem. Quod si Ecclesiam conturbare et
 sollicitare persisterit, tanquam seditiosus per pote-
 states exteras opprimatur. » Et Carthaginense con-

cilium (*can. 11*) : « Si quis presbyter a præposito suo correptus fuerit, debet utique apud vicinos episcopos conqueri, ut ab ipsis ejus causa possit audiri, ac per ipsos suo episcopo reconcilari : quod nisi fecerit, sed superbia, quod absit, inflatus secernendum se ab episcopi sui communione duxerit, aut separatim cum aliquibus schisma faciens sacrificium Deo obtulerit, anathema habeat, et locum amittat : si querimoniam justam adversus episcopum non habuerit, inquirendum erit. » Secundum hoc capitulum, simul cum nono capitulo Antiocheni concilii, comministri Ecclesiæ Laudunensis absque schismate et rebellionem, juxta temporis augustiam et imminens periculum, innocenter injuriam passi episcopum metropolitanum adierunt, et ideo, sicut supra ostendi, in communione ecclesiastica restitui et permanere debuerunt. Unde Carthaginense concilium de irregulariter judicantibus, et injuste judicatis, et de majoris auctoritatis iudicibus : « Placuit, inquit (*can. 15*), ut a quibuscunque iudicibus ecclesiasticis ad alios iudices ecclesiasticos ubi est major auctoritas fuerit provocatum, non eis obsit quorum fuerit soluta sententia, si convinci non potuerint, vel inimico animo judicasse, vel aliqua cupiditate aut gratia depravati. » De episcopo autem, si forte schisma a sacris canonibus in Ecclesia fecerit, Africanum concilium dicit (*can. 20*) : « Circa eos sane, inquiens, qui fuerint concordēs, non solum circa Ecclesiam Carthaginensem, scilicet metropolim, sed et circa omne sacerdotale consortium. » Et post pauca : « Oportet ut quis universis fratribus ac toto concilio inhaerit, non solum sua jure integro, sed et dioceses possideat. At vero qui sibimet putant plebes suas sufficere fraterna dilectione contempta, non tantum dioceses amittant, sed ut dixi etiam propriis publica careant auctoritate, ut rebelles. » De a te autem separatim a communione catholica, sicut in petitione mihi a Laudunensi Ecclesia data continetur, scilicet parvulis in tua parochia causa injuriarum tuarum non baptizandis, et obeuntibus viatici muneris communione non reconciliandis, audi quid exinde ad remedium pertinens idem doctor catholicissimus et subtilissimarum rerum investigator, et gratia Dei inventor sagacissimus dicat (*Aug., lib. iv de Bapt., cap. 22*) : « Baptismi, inquiens, sane vicem aliquando implere passionem, de latrone illo, cui non baptizato dictum est : *Hodie mecum eris in paradiso* (*Luc. xxii*), non leve documentum idem beatus Cyprianus assumit. Quod etiam atque etiam considerans, invenio non tantum passionem pro nomine Christi id quod ex baptismo deerat posse supplere, sed etiam fidem conversionemque cordis, si forte ad celebrandum mysterium baptismi in augustiis temporum succurri non potest. Neque enim latro ille pro nomine Christi crucifixus est, sed pro meritis facinororum suorum : nec quia credidit passus est, sed dum pateretur credidit. Quantum itaque valeat etiam sine visibili baptismi sacramento quod ait Apostolus : *Corde creditur ad justitiam, ore confessio fit ad*

A salutem (*Rom. x*), in illo latrone declaratum est. Sed tunc impletur invisibiliter, cum ministerium baptismi non contemptus religionis, sed articulus necessitatis excludit. Nam multo magis in Cornelio et in amicis ejus (*Act. x*), quam in illo latrone posset videri superfluum, ut aqua etiam tingerentur, in quibus jam donum Spiritus sancti, quod nisi baptizatos alios accepisse sancta Scriptura testatur, certo quoque indicio, quod illis temporibus congruebat, cum linguis loquentibus eminueraat : baptizati sunt tamen, et in hoc facto apostolica exstat auctoritas. Usque adeo nemo debet, in quolibet projectu interioris hominis, si forte ante baptismum usque ad spiritalem intellectum pio corde profecerit, contemnere sacramentum, quod ministrorum opere corporaliter adhibetur, sed per hoc Deus hominis consecrationem spiritaliter operatur. Nec ob aliud existimo baptizandi munus Joanni fuisse attributum, ita ut Joannis baptismus diceretur, nisi ut Dominus ipse qui dederat, cum servi baptismum non sprevisset accipere, dedicaret humilitatis viam, et quanti pendendum esset suum baptismum, quo ipse baptizaturus erat, tali facto apertissime declararet. Videbat enim, tanquam potentissimus medicus salutis æternæ, quorumdam non defuturum tumorem, qui cum intellectu veritatis et probabilibus moribus ita profecissent, ut multis baptizatis vita atque doctrina se præponere minime dubitarent, supervacaneum sibi esse crederent baptizari quando ad illum mentis habitum se pervenisse sentirent ad quem multi baptizati adhuc ascendere conarentur. (*Ibid., c. 23*)

Quid autem valeat et quid agat in homine corporaliter adhibita sanctificatio sacramenti, sine qua tamen latro ille non fuit, quia non ejus accipiendæ voluntas defuit, sed non accipiendæ necessitas affuit, difficile est dicere: nisi tamen plurimum valeret, non servi baptismum Dominus accepisset. Verum quia per se ipsa consideranda est, excepta salute hominis cui perficiendæ adhibetur, satis indicat, quod et in malis, et in eis qui sæculo verbis non factis renuntiant, ipsa integra est, cum illi nisi corrigantur salutem habere non possint. Sicut autem in latrone, quia per necessitatem corporaliter defuit, perfecta salus est, quia per pietatem spiritaliter affuit, sic et cum ipsa præsto est, si per necessitatem desit quod latroni affuit, perficitur salus. Quod traditum tenet universitas Ecclesiæ, cum parvuli infantes baptizantur, qui certe nondum possunt corde credere ad justitiam, et ore confiteri ad salutem, quod latro potuit, quin etiam flendo et vagiendo, cum in eis mysterium celebratur, ipsis mysticis vocibus obstrepunt, et tamen nullus Christianorum dixerit eos inaniter baptizari. (*Ibid., c. 24*.) Et si quisquam quærat in hac re auctoritatem divinam, quamquam quod universa tenet Ecclesia, nec conciliis institutum, sed semper retentum est, non nisi apostolica auctoritate traditum rectissime creditur, tamen veraciter conjicere possumus quid valeat in parvulis baptismi sacramentum ex circumcissione carnis, quam prior populus

accepit, quam priusquam acciperet justificatus est Abraham (*Gen. xix*), sicut Cornelius etiam dono Spiritus sancti priusquam baptizaretur ditatus est (*Act. x*). Dicit tamen Apostolus de ipso (*Rom. iv*), Abraham signum accepit circumcisionis signaculum justitiæ fidei, qui jam corde crediderat, et deputatum illi erat ad justitiam. Cur ergo ei præceptum est, ut omnem deinceps infantem masculum octavo die circumcideret (*Gen. xvii*), qui nondum poterat corde credere ut ei deputaretur ad justitiam, nisi quia et ipsum per se ipsum sacramentum multum valebat? Quod in filio Moysi per angelum manifestatum est (*Exod. xiv*), qui cum adhuc incircumcisis a matre ferretur, præsentis et evidenti periculo ut circumcideretur exactum est, et cum factum esset, depulsa est perniciēs. Sicut ergo in Abraham (*Exod. iv*) præcessit justitia fidei, et accessit circumcisio signaculum justitiæ fidei, ita in Cornelio præcessit sanctificatio spiritalis in dono Spiritus sancti, et accessit sacramentum regenerationis in lavacro baptismi. Et sicut in Isaac (*Gen. xxi*), qui octavo suæ nativitatis die circumcisis est, præcessit signaculum justitiæ fidei et quoniam patris fidem imitatus est, secuta est in crescente ipsa justitia, cujus signaculum in infante præcesserat, ita in baptizatis infantibus præcedit regenerationis sacramentum, et si Christianam tenuerint pietatem, sequitur etiam in corde conversio, cujus mysterium præcessit in corpore. Et sicut in illo latrone quod ex baptismi sacramento defuerat, complevit Omnipotentis benignitas, quia non superbia vel contemptu, sed necessitate defuerat: sic in infantibus qui baptizati moriuntur eadem gratia Omnipotentis implere credenda est, quod non ex impia voluntate, sed ex ætatis indigentia, nec corde credere ad justitiam possunt, nec ore confiteri ad salutem. Ideo cum pro eis alii respondent, ut impleatur erga eos celebratio sacramenti, valet utique ad eorum consecrationem, quia ipsi respondere non possunt: at si pro eo qui respondere potest alius respondeat, non itidem valet. Ex qua regula illud in Evangelio dictum est, quod omnes cum legitur naturaliter movet: *Ætatem habet, ipse pro se loquatur* (*Joan. ix*). (*Cap. 25*.) Quibus omnibus rebus ostenditur, aliud esse sacramentum baptismi, aliud conversionem cordis, sed salutem hominis ex utroque compleri: nec si unum horum defuerit, ideo putare debemus consequens esse ut et alteram desit: quia et illud sine isto potest esse in infante, et hoc sine illo potuit esse in latrone, complente Deo sive in illo, sive in isto, quod non ex voluntate defuisset. Cum vero ex voluntate alterum horum defuerit, reatu hominem involvi. Et baptismus quidem potest inesse ubi conversio cordis defuerit: conversio autem cordis potest quidem inesse non percepto baptismo, sed contempto baptismo non potest. Neque enim ullo modo dicenda est conversio cordis ad Deum, cum Dei sacramentum contemnitur. » Et quia sicut veridica est sententia Salvatoris nostri: *Nisi quis renatus fuerit ex aqua et Spiritu*

A sancto non intrabit in regnum cælorum (*Joan. iii*), scilicet aut invisibili gratia cum visibili sacramento, aut invisibili gratia sine visibili sacramento renatus, ita veridica est ejusdem Salvatoris nostri sententia, qua dicit: *Nisi manducaveritis carnem Filii hominis et biberitis ejus sanguinem, non habebitis vitam in vobis* (*Joan. vi*). Unde idem beatus Augustinus in sermone ad infantes ad altare accedentes de Sacramento: « Dominus, inquit, Jesus Christus nos significavit, nos ad se pertinere voluit, mysterium pacis et unitatis nostræ in sua mensa consecravit: qui accipit mysterium unitatis, et non tenet vinculum pacis, non mysterium accipit pro se, sed testimonium contra se. Nulli est aliquatenus ambigendum tunc unumquemque fidelium corporis sanguinisque Dominici participem fieri, quando in baptismo membrum corporis Christi efficitur, nec alienari ab illius panis calicisque consortio, etiam si antequam panem illum comedit, et calicem bibat, de hoc sæculo in unitate corporis Christi constitutus abscedat. Sacramenti quippe illius participatione ac beneficio non privatur, quando ipse hoc quod illud sacramentum significat invenitur. » His autem, qui forte obeuntes viatici muneris communionem reconciliari petierunt, sed impetrare non potuerunt, convenire posse videtur remedialis sententia ejusdem beati Augustini, quam laudans sensum beati Cypriani de his qui in unitate Ecclesiæ dormierunt, et ideo ab Ecclesiæ muneribus non separati credebantur, dicit: « Bene quidem præsumpsit quod charitas unitatis cooperire posset multitudinem peccatorum. » Et his concinens beatus Ambrosius in libro de morte Valentiniani inter alia dicit (*post medium, versus finem*): « Non habet ergo gratiam quam poposcit? Et quia poposcit, accepit: et ubi illud est, Justus quacunque morte præventus fuerit, anima ejus in requie erit? Solve igitur, pater sancte, munus servo tuo, quod Moyses dum in spiritu vidit, accepit, quod David quia ex revelatione cognovit, emeruit (*Sap. iv*). Solve, inquam, servo tuo Valentiniano munus quod concupivit, munus quod poposcit sanus, robustus, incolumis. Si affectus ægritudine distulisset, tamen non penitus a tua misericordia esset alienus, qui celeritate temporis esset non voluntate fraudatus. Solve ergo servo tuo munus tuæ gratiæ, quam ille nunquam negavit, qui ante diem mortis templorum privilegia negavit insurgentibus quos revereri posset. Astabat virorum caterva gentilium, supplicabat senatus: non metuebat hominibus displicere, ut tibi soli placeret in Christo. Qui habuit spiritum tuum, quomodo non accepit gratiam tuam? Aut quia solemniter non sunt celebrata mysteria hoc movet? Ergo nec martyres si catechumeni fuerint coronentur? Non enim coronantur, si non iniantur. Quod si suo abluuntur sanguine, et hunc sua pietas abluit et voluntas. » Et item idem in eodem libro (*non longe a principio*): « Beatus plane qui ve, in senectute correxerit errorem: beatus qui vel sub ictu mortis animum avertit a vitiis. *Beati enim quorum tecta sunt peccata* (*Psal. xxxi*), quia scriptum

est : Desine a malo, et fac bonum, et inhabita in sæculum sæculi (Psal. xxxvi). Quicumque ergo desierit a peccatis, et fuerit ad meliora in quacunque conversus ætate, habebit superiorum indulgentiam peccatorum, quæ fuerit vel pœnitendi confessus affectu, vel corrigendi aversatus ingenio. »

CUPUT XLVIII.

De iis qui nimis amant sententiam suam usque ad schisma vel hæresim.

Ex his, frater, diligenter attende et perspicaciter collige, quia licet sicut in illo latrone (Luc. xxiii), quod ex baptismi sacramento et communicatione corporis et sanguinis Christi (quæ sacramenta antequam Dominus in crucem ascenderet suis discipulis celebranda et sumenda cunctis fidelibus tradidit), defuerat, complevit omnipotentis benignitas, quia non superbia vel contemptu, sed necessitate defuerat, et sicut parvulis naturali, id est alieno peccato obnoxiiis, aliorum, id est patronorum fides pro eis respondentium in baptisate fit ad salutem, ita parvulis, quibus baptismum denegari jussisti, parentum vel patronorum corde credentium, et pro parvulis suis fideli verbo baptisma expetentium, sed non impetrantium, fides et fidelis postulatio prodesse potuerit, dono ejus, cujus Spiritus quo regeneratio fit ubi vult spirat, quia ipse habet in potestate cujus cor gratia suæ visitationis illustret, sicut et in illis duobus, qui inter Septuaginta conscripti fuerunt a Moysæ (Num. xi), ut ad tabernaculum Domini irent, et propagato ejus spiritu inter seniores computarentur, et remanentes in castris prophetaverunt, et sicut ante baptismum in Cornelium et amicos ejus supervenit, et sicut secundum Africanum concilium et decreta Leonis, etiam signa petentium, et testes communionem postulantium, proficere ad salutem debere legitur, ita eisdem petentibus, licet non impetrantibus, communionem, quibus eam denegari jussisti, per viscera misericordiæ Dei nostri, qui posuit tenebras latibulum suum, et cujus misericordiæ nec modum possumus ponere, nec tempora diffinire, dicente Dei Spiritu per prophetam : *Cum ingemueris, tunc salvus eris* (Isa. iii), quia apud Dominum misericordiæ et copiosa apud eum redemptio, ipsa ex desiderio fidelis postulatio, si non præscientia Dei ex retributione justitiæ fuerint in massa perditionis umani generis relictæ ad pœnam, sed gratiam Dei ex eadem masse prædestinati ad gloriam, prodesse valuerit. Tamen tu sucurus esse non potes, si aliqui sine eisdem sacramentis per tuam jussionem obierunt, ut non districte inde judicetur tua malignitas, quod in eis complere valuit Omnipotentis benignitas, si per dignos pœnitentiæ fructus ac profusas lacrymas veniam non obtinuerit tibi apud Deum vera humilitas ; dicente Leone (epist. 59, ad Theodorum), et per eum catholica et apostolica Ecclesia : « His, inquit, qui in tempore necessitatis, et in periculo urgentis instantia, præsidium pœnitentiæ et mox reconciliationis implorant, nec satisfactio interdicens est, nec reconciliatio deneganda, quia mi-

A sericordiæ Dei nec mensuras possumus ponere, nec tempora deffinire, apud quem nullas patitur veniæ moras vera confessio, dicente Dei Spiritu per prophetam (Isa. xxx) : Cum ingemueris, tunc salvus eris ; et alibi : Dic tu iniquitates tuas prior, ut justificeris (Isa. xlvi) ; et iterum : *Quia apud Dominum misericordiæ est, et copiosa apud Deum redemptio* (Psal. cxxxix), In dispensandis itaque Dei donis non debemus esse difficiles, nec accusantum se gemitus lacrymasque negligere, cum ipsam pœnitentiæ affectionem ex Dei credamus inspiratione conceptam, dicente Apostolo (II Tim. i) : Ne forte det illis Deus pœnitentiam, ut resipiscant a diaboli laqueis, a quo capti tenentur ad ipsius voluntatem. » Et paulo post : « Verum, ut dixi, etiam talium necessitati ita auxiliandum est, ut actio illis pœnitentiæ, nec communionis gratia, si eam etiam amisso vocis officio per indicia integri sensus postulant, negetur. At si aliqua vi ægritudinis ita fuerint aggravati, ut quod paulo ante posecebant, sub præsentia sacerdotis significare non valeant, testimonia eis fidelium circumstantium prodesse debebunt, ut simul et pœnitentiæ et reconciliationis beneficium consequantur. » Et Gregorius : « Pastores Ecclesiæ ei pœnam debent amovere quam meruit, qui non erubuit confiteri quod fecit. » Et sacri Nicæni canones generaliter omni cuilibet in exitu posito, et poscenti sibi communionis gratiam tribui manifeste præcipiunt (can. 13). Tertium capitulum est de his qui nimis amando sententiam suam, vel invidendo melioribus, usque ad præcedendæ communionis, et condendi schismatis vel hæresis sacrilegium perveniunt. Unde idem doctor catholicus ac solertissimus dicit (August., lib II de Bapt. cap. 4, 5) : « Hoc, inquit, facit sanitas pacis, ut cum diutius aliqua obscuriora quæruntur, et propter inveniendi difficultatem, diversas pariunt in fraterna disceptatione sententias, donec ad verum liquidum perveniatur, vinculum permaneat unitatis, ne in parte præcisæ remaneat insanabile vulnus erroris. Et ideo plerumque doctioribus minus aliquid revelatur, ut eorum patiens et humilis charitas, in qua fructus major est, comprobetur, vel quomodo teneant unitatem, cum in rebus obscurioribus diversa sentiunt, vel quomodo accipiant veritatem, cum contra id quod sentiebant declaratum esse cognoscunt. Quorum duorum manifestatum tenemus unum in beato Cypriano, id est, quomodo tenuerit unitatem cum eis a quibus diversum sentiebat. Ait enim : Neminem judicantes, aut a jure communio- nis aliquem si diversum senserit amoves. Alterum autem, id est, quomodo accipere potuerit veritatem contra id quod sentiebat inventam, et si litteræ tacent, merita clamant ; si epistola non invenitur, corona testatur ; si concilium non judicat episcoporum, consortium indicat angelorum. Non enim parvum documentum est pacatissimæ animæ, in ea unitate martyrium meruisse, unde se diversum sentiens noluit separare. Homines enim sumus. Unde aliquid aliter sapere quam se res habet, humana

tentatio est : nimis autem amando sententiam suam, vel invidendo mulieribus, usque ad præcedendæ communionis et condendi schismatis vel hæresis sacrilegium pervenire, diabolica præsumptio est : in nullo autem aliter sapere quam se res habet, angelica perfectio est. Quia itaque homines sumus, sed spe angeli sumus, quibus æquales in resurrectione futuri sumus (*Matth. xxii*), quandiu non habemus perfectionem angeli, non habeamus præsumptionem diaboli. Ideo dicit Apostolus : *Tentatio vos non apprehendat, nisi humana* (*I Cor. x*). Humanum est ergo aliquid aliter sapere. Propterea dicit alio loco : *Quodquod ergo perfecti hoc sapiamus. Et si quid aliter sapitis, hoc quoque vobis Deus revelabit* (*Philip. iii*). Quibus autem revelat cum voluerit, sive in hac vita, sive post hanc vitam, nisi ambulantibus in viam pacis, et in nullam præcisionem deviantibus ? Non quales isti sunt, qui viam pacis non agnoverunt, nec propter aliud unitatis vinculum diruperunt. Ideoque Apostolus cum dixisset (*Ephes. iv*). Et si quid aliter sapitis, hoc quoque vobis Deus revelavit, ne putarent præter viam pacis quod aliter sapiebant sibi posse revelari, continuo addidit (*I Cor. xiii*) : Verumtamen in quod pervenimus, in eo ambulemus. In quo ambulans Cyprianus perseverantissima tolerantia, ne fuso sanguine, sed in unitate non fuso, quia si traderet corpus suum ut arderet, et non haberet charitatem, nihil ei prodesset, per martyrii confessionem pervenit ad angelicam lucem : ut si non antea, ibi certe revelatum agnosceret, quod cum aliter saperet, sententiam diversæ opinionis vinculo non proposuit unitatis. » Quod autem adjungit Cyprianus et dicit (*lib. v de Bapt., c. 3*) : « Non tamen quia aliquando erratum est, ideo semper errandum est, cum magis sapientibus et Deum timentibus congruat, patefactæ et perspectæ veritati libenter atque incunctanter obsequi, quam pertinaciter atque obstinate contra fratres et consacerdotes pro hæreticis reluctari, verissime dicit, nec alteri potius quam sibi adversatur qui resistit apertissimæ veritati. Primatus autem non est nisi in sancta conversatione et vita bona, quo pertinent omnes, ex quibus tanquam membris constat illa sponsa non habens maculam neque rugam, et illa columba inter multorum corvorum improbitatem gemens. Nisi forte cum Esau propter lenticulæ concupiscentiam primum perdidit, tenere primatum arbitrando sunt fraudatores, raptores, feneratores, invidi, ebriosi, et cæteri hujusmodi, quales in Ecclesia sui temporis etiam per litteras Cyprianus ingemuit. Quapropter aut quod est tenere Ecclesiam, non hoc est in divinis tenere primatum, aut si omnis qui tenet Ecclesiam, etiam primatum tenet, omnes illi iniqui Ecclesiam non tenent, qui tamen intus videntur, et baptismum dare et habere a nullo nostrum negantur. Nam eos primatum in divinis habere quis dicat, nisi qui nihil divinum sapit ? » Et foris quidem, id est in heresi vel schismate nec ligari aliquid potest nec solvi, ubi non sit qui aut

ligare possit aut solvere. Sed solvitur qui cum columba fecerit pacem, et ligatur qui cum columba non habet pacem, sive aperte foris sit, sive intus esse videatur. Dathan vero et Abiron (*Num. xvi*), qui sibi sacrificandi licentiam usurpare conati sunt contra unitatem populi Dei, et filii Aaron, qui alienum ignem altari imposuerunt, novimus quod impune non fecerint : nec nos alia scelera dicimus impunita remanere, nisi se tales correxerint, si patientia Dei ad poenitentiam adducens tempus corrigendi largitur. (*Aug., lib. iii de Bapt., c. 16.*) « Spiritus autem sanctus, qui in sola catholica per manus impositionem dari dicitur, nimirum hoc in telligi majores nostri voluerunt quod Apostolus ait : *Quoniam charitas Dei diffusa est in cordibus nostris per Spiritum sanctum qui datus est nobis* (*Rom. v*). Ipse est enim charitas, quam non habent qui ab Ecclesiæ catholicæ communionem præcisi sunt, ac per hoc etiam si linguis hominum et angelorum loquantur, si sciant omnia sacramenta, et omnem scientiam, et si habeant omnem prophetiam et omnem fidem, ita ut montes transferant, et distribuunt omnia sua pauperibus, et tradant corpus suum ut ardeant nihil eis prodest. Non autem habet Dei charitatem qui Ecclesiæ non diligit unitatem : ac per hoc recte intelligitur dici, non accipi nisi in catholica Spiritus sanctus. Neque enim temporalibus et sensibilibus miraculis attestantibus per manus impositionem modo datur Spiritus sanctus (*Act. viii*), sicut antea debatur ad commendationem rudis fidei, et Ecclesiæ primordia dilatanda. Quis enim nunc hoc exspectat, ut in quibus manus ad accipiendum Spiritum sanctum imponitur, repente incipiant linguis loqui ? Sed invisibiliter et latenter intelligitur pro vinculo pacis eorum cordibus divina charitas inspirari, ut possint dicere : *Quoniam charitas Dei diffusa est in cordibus nostris per Spiritum sanctum qui datus est nobis* (*Rom. v*). Multæ autem sunt operationes Spiritus sancti, quas idem Apostolus, cum quodam loco quantum sufficere arbitratus est commemorasset, ita conclusit : *Omnia autem hæc operatur unus atque, idem Spiritus dividens unicuique prout vult* (*I Cor. xii*). Cum ergo aliud sit sacramentum, quod habere etiam Simon Magus potuit (*Act viii*), aliud operatio Spiritus, quæ in malis etiam hominibus fieri solet, sicut Saul habuit prophetiam (*I Reg. xii*) : aliud operatio ejusdem Spiritus, quam non nisi boni habere possunt, sicut est finis præcepti charitas de corde puro, et conscientia bona, et fide non ficta (*I Tim. i*), quodlibet hæretici et schismatici accipiant, charitas quæ coeperit multitudinem peccatorum (*I Petr. iv*), proprium donum est catholicæ unitatis et pacis, nec est in omnibus, quia nec ejus sunt omnes, sicut suo loco videbimus. Præter ipsum tamen esse illa charitas non potest, sine qua cætera, etiam si agnosci et approbari possunt, prodesse tamen et liberare non possunt. » Et sanctus Gregorius in libro *Moralium* (*lib. xviii, c. 14*) : « Conflationis ignis, qui extra catholicam toleratur Ecclesiam, quam nullius

omnino virtutis sit, Paulus apostolus insinuat dicens: *A manu subscribitur. Et sicut tu absolvi non potes si contraria ore prædices, contraria uno eodemque tempore manu subscribas: sic ipsa omnium vestrum collectio absolvi non potest si contraria dicat et contraria faciat; id est, si communicet sacerdoti, a cujus prædicatione et subscriptione dissentit. Sicut enim os tuum et manus tua unius ejusdemque corporis membra sunt, ita unius ejusdemque Ecclesiæ membra sunt sacerdotes et populus, sive cum catholicis catholicis, sive cum non fidelibus infidelis. Inde est enim quod a Domino in finem sæculi colligi jubentur zizania et alligari fasciculos ad comburendum (Matth. XIII). Hinc est quod sancto propheta Ezechiele testante: Si sacerdos non distinxerit populo, ipse quidem populus in suo peccato morietur, animam tamen ejus de manu sacerdotis inquirat (Ezech. III), non ait, quia extra peccatum populus est non morietur, sed quia in suo peccato morietur, sed populus quidem pro seipso tantum, sacerdos vero etiam pro populo. Hinc est: Si cæcus cæcus ducatum præbeat, non ipse qui ducatum præbet solus, sed ambo in foveam cadunt (Matth. XV). Et item in eisdem decretis, Schismaticus enim et hæreticus populus schismatico et hæretico sacerdoti communicans, sicut universa Dei semper tenuit et tenet Ecclesia, schismaticus et hæreticus in regnum Dei intrare non possunt, sed pars ejus est in gehenna. Cessa igitur talia prædicare, quæ scelus sit cogitare: cessa vastare gregem Christi, ne sicut et ipse negare non potes, super tuum caput sit illius populi universi perditio. Quod quidem tibi perfectæ damnationis est causa, illos vero absolvere omnino non poterit. Et item ibi, quod et in alio loco istius opusculi posui: Quisquis assentit principi schismatici, schismaticus esse negare non poterit. Quod si et omnes sacerdotes et mundus assentiat, damnatio consentientes involvit, non prævaricationem consensus absolvit. Non enim crimen minuitur sed accrescit, cum generale fit ex privato. Hoc enim Deus omnium indicavit, qui mundum peccantem generali diluvio interemit. Sed quid miseri facietis, quia qui illum et prædixit et fecit, ipse ignis diluvium nunc minatur, ipse gehennæ sine fine tormenta? Sicut enim justos in æternam vitam prædixit ituros, sic impios æterno damnandos interitu, ut sicut non potest finire beatitudo justorum, sic nec impiorum tormenta finiuntur. Hæc hæreticis schismaticisque sunt: et quia quidquid nunc gerit Ecclesia, mystice typus est futurorum, si gustabunt de pane cœlesti, id est de suavitate divina gehennæ participes, damnatio est schismaticis et hæreticis corporis Christi communio. Et sanctus Augustinus in epistola concilii Africani ad Donatistas: « Quisquis, inquit (August., epist. 152), a catholica Ecclesia fuerit separatus, quantumlibet laudabiliter se vivere existimet, hoc solo scelere quod a Christi unitate disjunctus est non habebit vitam, sed ira Dei manet super eum. Quisquis autem in hac Ecclesia bene vixerit, nihil*

omnino virtutis sit, Paulus apostolus insinuat dicens: *Si tradidero corpus meum ut ardeat, charitatem autem non habeam, nihil mihi prodest (I Cor. XIII). Alii quippe prava de Deo sentiunt, alii recta de auctore tenent, sed unitatem cum fratribus non tenent: illi errore fidei, isti vero schismatis perpetracione divisi sunt. Unde et in ipsa prima parte Decalogi utrarumque partium culpæ reprimuntur, cum divina voce dicitur: Diliges Dominum Deum tuum ex toto corde tuo, et ex tota anima tua, et ex tota virtute tua (Deut. VI), atque mox subditur, Diliges proximum tuum sicut teipsum. Qui enim de Deo perversa sentit, liquet profecto quia Deum non diligit. Qui vero de Deo recta sentiens a sanctæ Ecclesiæ unitate divisus est, constat quia proximum non amat, quem habere socium recusat. Quisquis ergo ab hac unitate matris Ecclesiæ, sive per hæresim de Deo perversa sentiendo, seu errore schismatis proximum non diligendo, dividitur, charitatis hujus gratia privatur, de qua hoc quod præmisimus Paulus dicit: Si tradidero corpus meum ut ardeat, charitatem autem non habeam, nihil mihi prodest (I Cor. XIII); ac si aperta voce diceret, extra locum suum conflationis mihi ignis adhibitus tormento me cruciat, mundatione non purgat. Hunc omnes sanctæ pacis amatores summo studio locum quærunt, hunc quærentes inveniunt, hunc invenientes tenent, scientes peccatorum remissio, vel ubi, vel quando, vel qualibus detur. Ubi quippe, nisi in catholicæ matris sinu? Quando, nisi ante venturi exitus diem? quia ecce nunc tempus acceptabile, ecce nunc dies salutis. Et: Quærite Dominum dum inveniri potest, invocate eum dum prope est. Qualibus, nisi conversis, qui ad parvulorum imitationem magistra humilitate formantur, quibus dicitur: Sinite parvulos venire ad me: talium est enim regnum cælorum (II Cor. VI); et: Nisi conversi fueritis, et efficiamini sicut parvuli, non intrabitis in regnum cælorum (Isa. LV). » Et in decretis apostolicæ sedis, quando Vigilius ex apostolico, post multa et terribilia præstita sacramenta in hæresim lapsus Constantinopoli detinebatur, ab Ecclesiæ Romanæ catholicis clericis Joanni schismatico presbytero directis, quæ ipsa sancta Romana Ecclesia inter catholicas regulas retinet, inter alia scriptum est: Sic semper habuit omnis Ecclesia, quia qui in una communione consentiunt, una dogmate, una charitate, uno tenentur assensu. Sicut enim communio et ex omnibus offerentibus una fit, et una redit in omnibus, non parte corporea, sed virtute divina: sic unanimitas per omnes illic communicantes excurrit. Nam si non est unius consensionis signum una communio, quid erit quod ad confitentiam per omnem Ecclesiæ consonantiam mystice celebretur? Nec nobis jam dicas (Matth. XIX): Ergo si criminosus sit sacerdos, crimen redundat in populos. Aliud est enim quod committitur, aliud quod etiam prædicatur. Privatum est quod ab unoquoque committitur: commune vero fit Ecclesiæ quod publice prædicatur, tantorumque sacerdotum*

ei præjudicant aliena peccata, quia unusquisque in A
 ea proprium portabit, sicut Apostolus dicit : Et
 quicumque in ea corpus Christi manducaverit in-
 digne, *judicium sibi manducat et bibit* (I Cor. xi) :
 cum enim dicit *judicium sibi manducat*, satis ostendit
 quia non alteri *judicium manducat*, sed sibi :
 quia communio malorum non maculat aliquem
 participatione sacramentorum, sed consensione fac-
 torum. Nam si in factis malis non eis quisque
 consentiat, portat malus causam suam et personam
 suam, nec præjudicat alteri, quem in consensione
 mali operis socium non habet criminis. » Et Pro-
 sper in libro *Sententiarum* : « Escam vitæ accipit,
 æternitatis poculum bibit, qui in Christo manet, et
 cujus Christus habitator est. Nam qui discordat a
 Christo, nec carnem Christi manducat, nec sangui- B
 nem bibit, etiamsi tantæ rei sacramentum ad judi-
 cium suæ præsumptionis quotidie indifferenter ac-
 cipiat. » Audis, frater, quia nimis amando quis
 sententiam suam, vel invidendo melioribus, ad sa-
 crilegium schismatis pervenit ; audis, quia non in
 schismate, nec nisi in unitate Ecclesiæ est prima-
 tus ; audis, quia non in schismate, et non nisi in
 Ecclesiæ unitate vera sunt ligamenta, in qua vera
 et ad salutem pertinentia sunt sacramenta ; audis
 quia non in schismate, et non nisi in unitate Ec-
 clesiæ datur vel accipitur Spiritus sanctus, per
 quem diffunditur charitas in cordibus nostris ; au-
 dis quia illis, qui non sunt in unitate pacis eccle-
 siasticæ, si gustant de pane cœlesti, est perfecta
 damnatio corporis Christi communicatio. Depone
 ergo tumorem cordis tui, et pertinaciam contuma- C
 cis animi tui : et nimium amando sententiam tuam,
 noli te præcedere ab illa charitatis compage, in qua
 omnia sacramenta ecclesiastica catholice percepisti,
 et in qua idcirco es ordinatus episcopus, ut in
 ea permaneres, et alios in ea permanere fide et
 operibus, exemplis et verbis doceres. Denique unde
 oriuntur schismata, idem catholicus doctor dicit
 (August., *de Bapt.*, lib. I, cap. 11 et cap. 15) :
 « Origo et pertinacia schismatis nulla est alia, nisi
 odium fratris, et Ecclesia non prius carnales, vel
 animales, et postea spirituales habuit, sed in ipsa
 sorte mortalitatis nostræ, ex quo de Adam nasci-
 mur, non est prius quod spiritale, sed quod animale,
 postea spiritale. Ex ipso autem animali sensu, quia
 homo animatis non percipit quæ sunt Spiritus Dei,
 omnes dissensiones et schismata generantur. In
 quo sensu perseverantes Apostolus dicit ad Vetus
 Testamentum pertinere, id est ad terrenorum pro-
 missorum cupiditatem, in quibus quidem spiritualia
 figurantur, sed animalis homo non percipit quæ
 sunt Spiritus Dei. Quocumque ergo tempore tales
 homines esse cœperint in hac vita, jam divinis pro
 sæculorum distributione sacramentis imbuti, adhuc
 tamen carnaliter sapiunt, et carnalia de Deo sive
 in hac vita, sive post hanc vitam sperent atque
 desiderant, animales sunt. » Et item ex verbis
 beati Cypriani, ut partim et supra scripsi, quod

tibi necessarium esse replicari, dicit (Cyprian., *epist.*
 65, *ad Antonianum*) : « Ignosci enim potest simpli-
 citer erranti, sicut de seipso dicit apostolus Pau-
 lus : *Qui primum fui blasphemus, et persecutor, et*
injuriosus, sed misericordiam merui quia ignorans
feci (I Tim. I). Post inspirationem vero et revelati-
 onem factam qui in eo quod erraverat perseverat,
 prudens et sciens sine venia ignorantia peccat.
 Præsumptione enim atque obstinatione quadam ni-
 titur, cum ratione superetur. » Hinc Augustinus
 (August., *de Bapt.*, lib. IV, cap. 5) : « Hoc verissimum
 est, longe gravius esse peccatum ejus qui sciens
 quam ejus qui nesciens peccaverit. Et ideo vir sanctus
 Cyprianus, non solum doctus, sed etiam docibilis,
 quod in laude episcopi tamen designat Apo-
 stolus, sic ipse intellexit ut diceret, etiam hoc in
 episcopo esse diligendum, non solum ut scienter doceat,
 sed etiam patienter discat. Docibilis autem
 ille est qui est ad discendi patientiam lenis et mitis.
 Oportet enim episcopos non tantum docere, sed et
 discere : quia et ille melius docet, qui quotidie crescit
 et proficit discendo meliora. His utique verbis
 satis indicat vir sanctus, et pia charitate præditus,
 non esse metuendum sic ejus epistolas legere, ut si
 quid postea pluribus et diuturnioribus inquisitionibus
 compertum Ecclesia confirmavit, non ambigamus,
 quia sicut multa erant quæ doctus Cyprianus
 doceret, sic erat et aliquid quod Cyprianus docibilis
 disceret. » Hæc, frater, auribus percipe, et mente
 intellige, et non dedigneris cum Cypriano et Augu-
 stino, Apostolo præcipiente, docibilis esse episcopus,
 et quia si perseverare in obstinatione et præsumptione
 tua delegeris cum ratione supereris, prudens et sciens
 sine venia ignorantia peccabis. Hinc enim psalmus
 dicit : *Descendant in infernum viventes* (Psal. LIV),
 id est labantur in peccatum scientes. Unde Leo
 ad Constantinopolitanos scribit dicens (*epist.* 25) :
 « Nam si vix in laicis tolerabilis videtur inscitia,
 tanto magis in eis qui præsumunt nec excusatio est
 digna nec venia : maxime cum etiam defendere per-
 versarum opinionum commenta præsumunt, et in
 consensum suum, aut terrore, aut gratia insanabiles
 quosque traducunt. Separentur hujusmodi a sanis
 membris corporis Christi, neque sibi catholica liber-
 tas infidelium jugum patiatur imponi. » Revoca ergo
 te a pertinacia tua, quoniam illi, quos in conventi-
 culis tuis ad tecum subscribendum pellexisti vel D
 coegisti, habent quidem excusationem, quoniam aut
 captivas manus sine cordis consensione timori dede-
 runt, aut ignorantes quid agerent, palliata suasionem
 tua de vinculo pacis et communionem pacis tuæ con-
 sensu etiam deliquerunt, aut forte scientes et illi et
 isti quiddam tibi exinde suggerere ausi non fuerunt.
 Unde beatus Gregorius : « Nemo, inquit, amplius in
 Ecclesia nocet, quam qui perverse agens nomen vel
 ordinem sanctitatis habet. Delinquentem namque
 hunc redarguere nullus præsumit, et in exemplum
 culpa vehementer extenditur, quando pro reverentia
 ordinis peccator honoratur, quibus est facilior vē-

nia, quoniam inest eis et levior culpa. » Nam de his qui per ignorantiam peccaverunt traducti, sanctus Augustinus in supramemorato opere dicit (*lib. I de Bapt.*, c. 2) : « Si quem forte, iniquus, coegerit extrema necessitas, ubi catholicum per quem accipiat non invenerit, et in animo pace catholica custodita, per aliquem extra unitatem catholicam positum acceperit quod erat in ipsa catholica unitate accepturus, si statim etiam de hac vita emigraverit, non eum nisi catholicum deputamus. Si autem fuerit a corporali morte liberatus, cum catholice congregationi etiam presentia corporali reddiderit, unde nunquam corde discesserat, non solum non improbamus quod fecit, sed etiam securissime verissimeque laudamus, quia presentem Deum credidit cordi suo, ubi unitatem servabat. » De his autem qui scienter, sed causa timoris vel favoris, in hanc transgressionem ierunt, Leo ad Pulcheriam Augustam scribit (*epist.* 53) : « Sic utimur iustitia commotionis, ut non amittamus remedia charitatis : quod sicut pietas vestra cognoscit non verbis solis promittitur, sed etiam factis docetur. Siquidem pene omnes, qui in consensum presentium, in illo Ephesino, non iudicio sed latrocinio, aut traducti fuerant, aut coacti, rescindendo quod statuerant, et condemnando quod scripserant, perpetuam culpæ abolitionem et apostolicæ pacis gratiam sint adepti. » Et in epistola ad Anatolium (*epist.* 42) : « Neque enim potest in aliquo benignitas nostra reprehendi, cum satisfaciens recipimus, quos dolumus esse deceptos. Nec aspere igitur communionis nostræ gratia deneganda est, nec temere largienda : quia sicut plenum pietatis est oppressis charitatem Dominicam reddere, ita iustum est omnia perturbationis auctoribus imputari. » Audite igitur et tu et illi, quos traduxisti, vel ad tecum subscribendum coegisti, admonitionem beati Augustini, qua eos de illis alloquens qui se ab unanimitate fraterna disciderunt, admonuit dicens (*lib. II de Bapt.*, c. 10, 11) : « Videant, inquit, nihil sibi remansisse quod dicant, sed tamen remansisse quod faciant, ut pro factis eorum præteritis sacrificium dilectionis offeratur placabili Deo, cujus unitatem nefario scelere diruperunt, cujus sacramentis tam diuturnas injurias irrogarunt. Misericors est enim et miserator Dominus, longanimis, et multum misericors, et verax. Amplectantur in presenti vita misericordem et longanimum, et timeant in futura veracem. Non vult enim mortem impij, quantum ut revertatur et vivat, quia sententiam inflectit adversus injurias irrogatas. Hæc est nostra exhortatio. Propter hoc eos habemus inimicos, quia vera dicimus, quia tacere metuimus, quia cessare ab instantia quanta possumus formidamus, quia obtemperamus Apostolo dicenti : *Prædica verbum, insta opportune, importune, argue, hortare increpa* (*II Tim.* iv), sed sicut Evangelium loquitur : *Diligunt gloriam hominum magis quam Dei* (*Joan.* xii), et reprehendi ad tempus timent, damnari in sempiternum non timent. Vident etiam ipsi

A quid mali faciant, vident non esse quid omnino respondeant, sed nebulas imperitis ostendunt, cum ipsi vivi sorbeantur, id est scientes et agnoscentes intereant. Vident horrere homines et graviter detestari, quod etiam se ipsi in multa schismata diviserunt, et maxime in capite Africæ et notissima civitate Carthagine, conati sunt resarcire dedecus panorum suorum, putantes quod possent maximianistas auferre. » Et post aliqua (*ibid.*, c. 12 et 13) : « Urget eos undique veritas, vident se non habere quid respondeant, et putant se non habere quid faciant : quid loquantur non inveniunt, tacere non permittunt, malunt perversis vocibus veritati reluctari, quam confessis erroribus paci restitui. Quis autem non intelligat quid in corde suo possint dicere? »

B Quid ergo facimus, inquit, de his quos jam rebaptizavimus? Et vos : Quid ergo faciemus de his quos jam traduximus, vel quid faciemus qui traducti sumus? Respondetur : Redite cum eis ad Ecclesiam, videlicet ad unanimitatem fraternam : medicamento pacis offerte curandos quos vulnerastis, vitæ charitatis offerte suscitandos quos occidistis. Multum valet ad propitiandum Deum fraterna concordia. *Si duobus ex vobis, ait Dominus, convenerit super terram, quidquid petieritis fiet vobis* (*Math.* xviii). Si duobus hominibus, quanto magis duobus populis? Simul nos Domino prosternamus, participamini nobiscum unanimitatem, participemus vobiscum dolorem, et charitas cooperiet multitudinem peccatorum. Et beatus Gregorius in homilia Ezechielis dicit (*hom.* 7, *infine*) :

C « Perfectorum semper et virtutes et lacrymas ante mentis nostræ oculos ponamus, imitemur quæ in illis aspicimus, ut dum cœperimus per incrementa crescere, possimus ab illo distincto examine mala quæ fecimus velare. In assiduis enim fletibus, in quotidiana nostra pœnitentia, habemus sacerdotem in cœlis qui interpellat pro nobis, de quo etiam per Joannem dicitur : *Si quis peccaverit, advocatum habemus apud Patrem Jesum Christum justum, et ipse est propitiatio pro peccatis nostris* (*I Joan.* ii). Ecce exsultat animus, cum advocati nostri potentiam audimus : sed exultationem nostram iterum remordet timor, quia ipse qui nobis advocatus est dicitur justus. Nos enim causas injustitiæ habemus. Justus vero advocatus injustas causas nullo modo suscipit, nec verba dare pro injustitia consentit. Quid ergo

D agimus, charissimi fratres mei? Sed ecce occurrit animo quid agamus. Mala quæ fecimus, et deservimus et accusemus. Scriptum est : *Justus in principio accusator est sui* (*Prov.* xviii). Quilibet enim peccator conversus in fletibus jam justus esse inchoat cum cœperit accusare quod fecit. Cur enim justus non sit qui contra suam injustitiam jam per lacrymas sævit? Justus igitur advocatus noster justos nos defendit in iudicio, quia et nosmetipsos et cognoscimus et accusamus injustos. Non ergo in fletibus, non in actibus nostris, sed in advocati nostri allegatione confidamus. » Timeamus quod scriptum est : *Filius manus ipse se justum dicit, exitum autem suum non*

abluit, hoc est, ut Augustinus dicit, non excusat, non diluit, non defendit, Noli ergo, frater, te convertere, post auditas tot sacras auctoritates, et admonitiones, ac salubria tibi porrecta consilia, ad excusandas excusationes in peccatis, atque ad contumacem defensionem, cum nemo quærat tuam damnationem, sed tuam correctionem, et coram Deo et hominibus salvationem. Et hæc legens, quæ tibi paterna devotione scribo, cum his etiam beati Gregorii non prolixam verborum numero, sed maximam ac pretiosam intelligentiam, in mentis arcano reconde sententiam qua dicit: « In verbis, inquiriens, sacri eloquii iste debet studii nostri ordo servari, ut hæc ideo cognoscamus, quatenus de iniquitate nostra compuncti, cognoscentes mala quæ fecimus, vitemus ne alia faciamus, et cum jam ex magno usu lacrymarum, de peccatorum remissione cœperit esse fiducia, per verba Dei quæ intelligimus, ad vitam quoque et alios trahamus. Ad hoc enim intelligenda sunt, ut et nobis prosint, et intentione spirituali aliis conferantur. »

CAPUT XLIX.

Admonetur ut talentum intellectus, quod Dominus sibi gratuito dedit, non negligat.

Audiamus et obaudiamus beatum Apostolum secum nos admonentem: *Non efficiamur inanis gloriæ cupidi, invicem invidentes, invicem provocantes* (Gal. v); et iterum nobis dicit: *Videte quomodo caute ambuletis, non ut insipientes, sed ut sapientes: redimentes tempus, quoniam dies mali sunt* (Ephes. v); et: *Subjecti estote invicem in timore Christi* (ibid.); et: *Alter alterius onera portate, et sic adimplebitis legem Christi* (Gal. vi); et: *Honore invicem prevenientes* (Rom. xii). Dic frater ac fili, quid aliud a te exegi, postquam episcopus factus es, et divitias terrenas adeptus es, nisi ut Deum haberes placabilem, et episcopaliter vivens, et episcopalem habitudinem gerens, te hominibus faceres venerabilem? et pro quibus me contra te commovi, nisi quia talem coram Deo ad salutem, et coram sæculo ad honorem episcopali gravitati et ordini debitum esse cupiebam, et esse commonebam? et tibi hoc esse grave videbam: et hoc quidem tibi grave hactenus esse potuit, et propter ætatem, et quia sæculi hujus instabilitatem, ac quam mutabile et fragile sit, eatenus non cognovisti. Nunc autem hora est jam nos de somno surgere (Rom. xiii). Et non debemus esse semper juvenes, sicut bos malus semper est vitulus. Debemus ante oculos mentis neglecta reducere, et de pristinis erubescere, sicut egregius prædicator nos admonens dicit: *Quem fructum habuistis tunc in quibus nunc erubescitis* (Rom. vi). Et debemus certare, ut fructum nostrum habeamus in sanctificatione, finem vero vitam æternam. Et si, frater et fili, me non vis aut dedignaris audire, audi et obaudi ipsum beatum Paulum apostolum Timotheum spiritalem filium suum, quem juvenem episcopum ordinaverat, admonentem: *Exerce, inquit, teipsum ad pietatem: nam corporalis exercitatio ad modicum utilis est, pietas autem ad omnia utilis est, promissionem habens*

A vitæ quæ nunc est, et futuræ (I Tim. iv, 7). Nemo adolescentiam tuam contemnat, sed exemplum esto fidelium in verbo, in conversatione, in charitate, in fide, in castitate. Noli negligere gratiam quæ in te est, quæ data est tibi per prophetiam, et impositionem manuum presbyterii: hoc enim faciens, teipsum salvum facies, et eos qui te audiunt. » Sin autem time, frater ac fili, quod terribiliter Dominus dicit ei qui unum talentum acceperat, et abiens fodit in terram, et abscondit pecuniam domini sui: *Serve male et piger, sciebas quia meto ubi non semino, et congrego ubi non spargo* (Matth. xxv), et reliqua. Talentum quippe in terra abscondere, est acceptum ingenium in terrenis actibus implicare, lucrum spiritale non quærere, cor a terrenis desideriis nunquam levare. « Sunt namque, ut beatus dicit Gregorius (Greg., hom. in Evang.), nonnulli, qui donum intelligentiæ perceperunt, sed tamen sola quæ carnis sunt sapienter, de quibus per prophetam dicitur (Jer. iv): Sapientes sunt ut faciant mala, bene autem nesciunt facere: sed Dominus qui talenta contulit, rationem positurus redit, quia is qui nunc spiritualia dona distribuit, districte in judicio merita exquirat, quid quisquis accepit considerat, et quod lucrum de acceptis reportet, pensat. » Considera ergo quæ sine tuo merito in talento intelligentiæ accepisti, et vide ne in terra illud abscondas, et quod Deus longe faciat a te, inde ab illo damneris.

CAPUT L.

De eo quod dicitur ferre non posse, ut quisquam dicatur ei bonum aliquid sine ipsius merito exhibuisse.

Denique dicitur a quibusdam, quod portare patienter non possis, ut tibi a quoquam dicatur, quod quisquam tibi bonum aliquid sine tuo merito exhibuerit. Hæc namque qualitas animi non de humilitate, sed de superbia manifeste descendit. Ait enim Apostolus: *Quid enim habes quod non accepisti? si autem accepisti, quid gloriaris quasi non acceperis?* (I Cor. iv). Hæc enim et Domini consuetudo, et sanctorum ejus in Scripturis legitur esse, ut cum non recognoscimus a quo bona accepimus, et aut bonis factis malis operibus respondemus, aut ingrati existimus, ostendantur bona quæ nobis impensa sunt, quatenus illa recognoscentes, de malis nostris et de bonorum ingratitudine erubescamus, et ad bona reparanda, et ad gratias referendas convertamur. Sic enim Dominus agere in Scripturis sæpissime legitur, ut de pluribus pauca numero sed non merito ad medium devocemus. Ait enim ad peculiarem populum suum: *Popule meus, quid molestus fui tibi? Ostende mihi. Adduxi vos per desertum quadraginta annis, non sunt attrita vestimenta vestra, manna de celo pluvi vobis, et obliti estis me?* (Mich. vi). Et ad David dilectum servum suum, de quo dicit: *Inveni David servum meum, qui facit omnes voluntates meas. Ego, inquit, te tuli de domo patris tui, et posui te pascere gregem populi mei, et fui tecum in omnibus ubicunque ambulasti, firmans regnum tuum in æter-*

num (II Reg. vii). Et alia plurima quæ illi improperat, quoniam post multiplicia dona graviter in eum sine respectu peccaverat. Lege epistolas Pauli ad Corinthios et ad Galatas, et hinc sufficienter invenies. Nam quatuor legimus species arrogantium, cum aut bonum se putant a se habere quod habent, aut pro meritis suis se habere quod habent, aut singulariter se habere quod habent, aut præ cæteris se habere quod habent. Ab his omnibus cor tuum custodi, juxta quod scriptum est : *Omni custodia serva cor tuum, quoniam ex ipso vita procedit* (Prov. iv).

CAPUT LI.

De exeniis, quæ a clericis et laicis exigere dicebatur.

Dicitur et a multis, quod et clericos et laicos tibi commissos in multis exeniis per diversas occasiones graves, quod sanctus Leo papa non christianæ devotioni, minime autem episcopali religioni convenire ostendens, dicit : « Sicut, inquit (*epist. 84, ad Anastas.*), prælatus non vult gravis oneris sarcinam ferre, ita non audeat aliis importabile pondus imponere. Discipuli enim sumus humilis et mitis magistri dicentis : *Discite a me quia mitis sum et humilis corde, et invenietis requiem animabus vestris* (Matth. xi). Qui humilis et mitis magister iterum de gravi et importabili prælato dicit : *Si dixerit, inquit, malus ille servus in corde suo, moram facit Dominus meus venire, et cæperit percutere conservos suos, manducet autem et bibat cum ebriis, veniet Dominus servi illius in die qua non sperat, et hora qua ignorat, et dividet eum, partemque ejus ponet cum hypocritis* (Matth. xxiv). « Hinc beatus dicit Gregorius (*Pastor. II, cap. 6*) : « Inter hypocritas enim jure deputatur, qui ex simulatione disciplinæ, ministerium regiminis vertit in usum dominationis. » Et beatus apostolus Paulus vetat, *non percussorem esse episcopum* (I Tim. III; Tit. i). Non quidem qui non percutiat pugnis subditos, sed qui non percutiat actis et dictis suis conscientiam subjectorum, quos per prophetam Dominus redarguit : *Qui percutiunt pugno impie* (Isa. lvm). Audiendum ergo nobis est prælati quod per quemdam sapientem dicitur : *Ducem te constituerunt, noli extolli, sed esto in illis quasi unus ex illis* (Eccli. xxxii); et : *Divitiæ si affluant, nolite cor apponere* (Psal. lxi). Timere etiam debemus, ne prælatio et honores, quos in isto sæculo habemus, si aliquid boni sumus, retributio nobis fiat, et a retributione justorum alienos efficiat. Unde Abrahamæ voce ardenti diviti dicitur : *Memento, fili, quia recepisti bona in vita tua* (Luc. xvi). Idecirco enim bona hic recipit et malus, ut illic plenius mala reciperet, quoniam hic fuerat nec per bona conversus : quia cum largientem Deum humana mens boni operis response non sequitur, unde nutrita pie creditur, justius inde damnatur. Hinc enim per Psalmistam dicitur : *Dejecisti eos dum alleverentur* (Psal. lxxii). Quoniam videlicet reprobi, cum recta opera divinis muneribus non rependunt, cum totos se hic deserunt, et affluentibus prosperitatibus dimittunt, unde

A exterius proficiunt, inde ab intimis cadunt. A multis enim dicitur, quod vix pauci, aut potius nulli apud te quiddam beneficii, nisi præmii datione prævalent obtinere : quod satis superque sanctarum Scripturarum auctoritati contrarium, et canonum est sacrorum decretis adversum, ut res et facultates ecclesiasticas, quas in ordinatione episcopali ad regendum et regulariter dispensandum sine pretio suscepisti, ad turpis lucri præmium in beneficium dones, cum Paulus apostolus Tito describens qualis debeat esse episcopus, inter alia dicat : *Oportet, inquit, episcopum sine crimine esse sicut Dei dispensatorem, non superbum, non iracundum, non vinolentum, non percussorem, non turpis lucri cupidum* (Tit. i). Et item idem dicit : *Avaritia quæ est idolorum servitus* (Ephes. v, 5); Et : *Radix omnium malorum cupiditas* (I Tim. vi, 10). Et sacri Carthaginenses canones (*can. 5*) : « Omnino, inquit, cuiquam clericorum non liceat de qualibet re fenus accipere ; » et paulo post : « Proinde quod in laicis reprehenditur, id multo magis debet in clericis prædamnari. Universum concilium dixit : Nemo contra prophetas, nemo contra Evangelia facit sine periculo. » Et Nicænum concilium, quod sæpe et in aliis invenitur canonibus, more suo plures causas uno comprehendens capitulo, hinc cum aliis conclusive dicit (*can. 17*) : « Quoniam multi sub regula constituti avaritiam et turpia lucra sectantur, juste censuit sancta et magna synodus, ut si quisque inventus fuerit ex adinventione aliqua vel quolibet modo negotium transigens, vel aliquid tale prorsus excogitans turpis lucri gratia, dejiciatur a clero, et alienus existat a regula. » Et Leo in epistola ad universos episcopos per universas provincias constitutos : « Illud, inquit (*epist. 4*), duximus præmonendum, ut sicut non suo, ita non alieno nomine, aliquis clericorum exercere fenus attentet. Indecens enim est crimen suum commodis alienis impendere. Fenus autem hoc solum aspicere et exercere debemus, ut quod hic misericorditer tribuimus, ab eo Domino, qui multipliciter, et in perpetuum mansura retribuet, recipere valeamus. Hoc itaque admonitio nostra denuntiat, quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum, nec eum communionis nostræ futurum esse consortem, qui socius noluit esse disciplinæ. » Et Dominus in Evangelio : *Esurivi, inquit, et non dedistis mihi manducare ; sitiivi, et non dedistis mihi bibere ; hospes eram et non collegistis me, nudus et non cooperuistis me, infirmus et in carcere, et non visitastis me* (Matth. xxv, 42). Quibus etiam præmittit dicens : *Discedite a me, maledicti, in ignem æternum, qui præparatus est diabolo et angelis ejus* (ibid., 44). Ecce nequaquam audium quia rapinas vel quælibet alia violentia commiserunt, et tamen æternis gehennæ ignibus mancipantur. Hinc ergo colligendum est, quanta damnatione plectendi sunt qui aliena rapiunt, si tanta animadver-

sione feriuntur, qui sua indiscrete tenuerunt. Perpendant quo eos obliget reatu res raptæ, si tali subicit pœnæ non tradita. Perpendant quod meretur iniustitia illata, si tanta percussione digna est pietas non impensa. Cum aliena rapere intendunt, audiant quod scriptum est : *Væ ei qui multiplicat non sua usquequo et aggravat contra se densus lutum* (*Habac. II, 6*)? Avaro quippe densus lutum contra se aggravare, est terrena luca cum pondere peccati cumulare. Cum multiplicare largæ habitationis spatia cupiunt, audiant quod scriptum est : *Væ qui conjungitis domum ad domum, et agrum agro copulatis usque ad terminum loci: nunquid habitabilis soli vos in medio terræ* (*Isa. v, 8*)? Ac si aperte diceret : Quousque vos extenditis, qui non habere in communi mundo consortes minime potestis? Coniunctos quidem premitis, sed contra quos vos valeatis extendere semper invenitis. Cum angendis pecuniis inhiant, audiant quod scriptum est : *Avarus non impletur pecunia, et qui amat divitiarum fructus non capiet ea eis* (*Eclæ. v*). Fructus quippe ex illis caperet, si eas bene spargere non amando voluisset : quia vero eas diligendo retinet, hic utique sine fructu derelinquet. Cum repleti cunctis simul opibus inardescunt, audiant quod scriptum est : *Qui festinat ditari, non erit innocens* (*Prov. xxviii*). Profecto enim quoniam augere apes ambit, vitare peccatum negligit, et more avium captus, cum escam terrænarum rerum avidus conspicit, quo stranguletur peccati laqueo non agnoscit. Cum quælibet præsentis mundi luca desiderant, eaque quæ de futuro damna patiuntur ignorant, audiant quod scriptum est : *Hæreditas ad quam festinatur in principio, in novissimo benedictione carebit* (*Prov. xx*). Ex hac quippe vita initium ducimus, ut ad benedictionis sortem in novissimo veniamus. Qui itaque in principio hæreditari festinant, sortem sibi in novissimo benedictionis amputant : quoniam dum per avaritiæ nequitiam hic multiplicari appetunt, illic ab æterno patrimonio ex hæredes fiunt. Cum vel plura ambiunt, vel obtinere cuncta quæ ambiunt possunt, audiant quod scriptum est : *Quid prodest homini si totum mundum lucretur, animæ vero suæ detrimentum fiat* ? (*Luc. viii*). Ac si aperte Veritas dicat : *Quid prodest homini si totum, quod extra se est congregat, si hoc solum quod ipse est damnat* ? Hinc quoque te frequentissime monui, et adeo corripui, ut etiam contra me et mihi fideles inde scandalum sumpseris, et quas vel quantas potuisti insidias moliri studueris. Sed et domus rex in suis litteris tibi datis ex hac causa monuit hoc modo : « Verum, « inquit, prius te dignum duco monere, ut clerum « et plebem tibi commissam, qui te, nullo cogente, « sed spe ducti, quia pro amore tui avunculi, qui « et nobis, et regno, ac Ecclesiæ regni nostri in « multis profuit, me videbant te diligere, et quia « putabant te illius vestigia secuturum, et consiliis « obediturum, et quoniam Laudunense municipium « Rhemensi Ecclesiæ, in qua nutritus fuisti, unitum

A « antiquitus fuerat, devote elegerunt, et obnixè sibi « pastorem ordinari petierunt, debitam eis vicem « rependens, episcopalem ac pastorem benignitatem impendas, et non eos tam duriter tractes « atque affligas, neque illis alios quos ante non « nosti præponas vel superponas, et de gremio Ecclesiæ tibi commissæ, in qua nutriti et educati « fuerant, illos, sicut quosdam jam expulisti, vel « abscedere compulisti, non proicias, vel cum gemitu ibidem consistere cogas. » Lege intelligenter, et retine tenaciter hanc epistolam beati Gregorii ad Constantium Mediolanensem episcopum : « Scripta inquit (*lib. III, epist. 1*), fraternitatis vestræ suscipiens, magnas omnipotentis Deo gratias retuli, quia ordinationis vestræ merui celebratione relevari. Quod B vero ex superno munere in electionem vestram concorditer omnium convenit assensus, hoc fraternitas tua cum summa debet consideratione pensare, quia post Deum valde est debitoris eis qui sibi vos præferri tam subdita mente voluerunt. Decet igitur vos sacerdotali benignitate eorum moribus in omnibus respondere, eorumque necessitatibus pia compassione concurrere. Si quorum fortasse sunt vitia, hæc maturis objurgationibus increpare, ut ipsa quoque sacerdotalis indignatio, virtute sit admista dulcedinis, quatenus et tunc a subjectis amari debeat, etiam cum graviter timetur. Quæres personam vestram apud eorum iudicium in magnam quoque reverentiam adducit : quia, sicut præceps, furor usitatusque despicitur, ita contra culpas discreta indignatio plerumque quo tarda fuerit, eo amplius sit C timenda. » Diligenter etiam debes attendere, quod non in mea, sed in Dei laude cuius est donum, pro tua utilitate dico, quia et ego nutritor tuus, apud quem a pueritia usque ad juventutem tuam exegisti ætatem, sicut vidisti et audisti, non pro largitione beneficiorum, non pro commendatione ministeriorum, non pro receptione eorumdem ministeriorum, non pro redhibenda gratia mea his qui in me offenderant, non per quæcumque petitionem ejuscunque adjutorii, non per quæcumque adinventias occasiones, aut a clericis, aut a laicis, aut a parochianis presbyteris, quæcumque pretia, vel exenia, seu emolumenta exegi, vel quolibet modo quæsi, sed in omnibus eorum profectum, et loci mihi commissi utilitatem attendi. Unde et reminisci debes, quia D sæpius te commouui, ut tibi commissis, qui te libenter elegerunt, non onerosus, sed gratiosus existeres. Et si meæ admonitiones non tibi placent, lege cum aliis hominibus beati Gregorii in Evangelio, *Ego sum pastor bonus* (*Joan. x*) ; et eam mente reconde, in qua inter alia dicit de summe et essentialiter pastore bono, cuius formæ debemus inniti : « Cognosco, inquit (*homil. 14 in Evang.*), oves meas, id est diligo, et cognoscunt me meæ, id est diligentes obsequuntur : quia oportet ut nobis commissi magis dilectione in Christo obediunt, quam servili timore coacti gementesque deserviant. » Nam de hujusmodi prælationibus, vel præmissis negotiis,

quibuscunque adinventionibus præmia vel exenia quæcunque accipere, simoniacum et contra sanctas Scripturas, atque, ut supra ostendi, contra sacros est canones. Unde etiam leges, quibus debitæ observationis reverentiam sancta Ecclesia exhibet, in constitutione 117, capitulo 352 constitutionis Justiniani, dicunt : « Ut locorum venerabilium administratores sine pecunia fiant. Nullus neque ex xenodochiis, neque ptochotrophiis, neque nosocomiis, neque alicujus religiosæ domus administrator, vel cujuscunque curæ ecclesiasticæ gestor, præstet aliquid ei a quo præponitur, vel cuicunque personæ, pro commissa sibi administratione. Qui autem præter hæc quæ disposuimus dederit aliquid, vel acceperit, vel mediator factus fuerit, sacerdotio vel clero, vel commissa sibi administratione nudabitur, his quæ data sunt vindicandis religioso loco, cujus talis persona consecrationem, vel curam, vel administrationem accepit : sin autem laicus sit qui acceperit, vel mediator factus est, duplum ab eo exigatur, et religioso loco, in quo talis persona, vel administrationem, vel consecrationem, vel curam accepit, præstetur. » Juste igitur et rationabiliter leges sanctis Scripturis et canonibus concordantes talia decreverunt, quia ut sanctus Leo dicit (*serm. 9 de Passione Domini*) : « Avaritiam merito Apostolus radicem esse malorum omnium diffinivit. Nullum enim peccatum sine cupiditate committitur, et omnis illicitus appetitus istius aviditatis est morbus. Amori pecuniæ vilis est omnis affectio, et anima lucri cupida etiam pro exiguo perire non metuit, nullumque est justitiæ in illo corde vestigium, in quo sibi avaritia fecit habitaculum. Hoc perfidus Judas inebriatus veneno, dum sitit lucrum, pervenit ad laqueum. »

CAPUT LIH.

De superbia ejus et arrogantia, jactantiaque inepta et indecenti.

A multis etiam denotaris, quod superbia efferaris, et vana gloria jactiteris, atque arrogantia supereris. Unde ego et tu, quasi in speculo, in verbis beati Gregorii nos nostrasque mentes conspiciamus, et nos coram divinis oculis componamus. Ait enim (*lib. xxxiv Moral., c. 18*) : « Superbia, inquiens, quam vitiorum radicem diximus, nequaquam unius virtutis extinctione contenta, contra cuncta animæ membra se erigit, quasi generalis ac pestifer morbus corpus omne corrumpit, ut quidquid illa invadente agitur, etiam si esse virtus ostenditur, non per hoc Deo, sed soli vanæ gloriæ servitur. Quasi enim tyrannus quidam obsessam civitatem intercipit, cum mentem superbia irrumpit, et quo ditio rem quemque ceperit, eo in dominio durior exurgit, quia quo amplius res virtutis sine humilitate agitur, eo latius ista dominatur. Quisquis vero ejus in se tyrannidem captiva mente susceperit, hoc primum damnum patitur, quod clauso cordis oculo judicii æquitatem perdit. Nam cuncta quæ ab aliis vel bene geruntur displicent, et sola ei quæ ipse vel prave egerit pla-

cent : semper aliena opera despicit, semper miratur quod facit, quia et quidquid egerit, egisse se singulariter credit, atque in eo quod exhibet per gloriæ cupiditatem, sibimetipsi per cogitationem favet, nec considerat quid alter boni amplius quam ipse, sed quid boni ipse amplius quam alter habeat. Neque enim pensat quæ bona spiritus alter acceperit, et ipsi desint, sed quæ bona ipsi, et quæ mala sint alteri : et cum se in cunctis transcendere, cæteros æstimat, per lata cogitationum spatia secum deambulans, laudes suas tacitus clamat. Nonnunquam vero ad tantam elationem mens ducitur, ut in eo quod tumet, etiam per ostentationem locutionis effretur et tanto facilis ruina sequitur, quanto apud se quisque impudentius exaltatur. Hinc enim scriptum est : *Ante ruinam exaltabitur cor (Prov. xvi)*, et hæc elatio alios ex rebus sæcularibus, alios vero ex spiritalibus possidet. Alter namque tumescit auro, alter eloquio, alter infimis et terrenis rebus, alter summis cœlestibusque virtutibus, una tamen eademque superbia ante Dei oculos agitur, quamvis ad humana corda veniens in eorum obtutibus diverso amictu palliatur. Aliter autem præpositos atque aliter subditos tentat. Præ lato namque in cogitationibus suggerit, quia solo vitæ merito super cæteros exerevit, et si qua ab eo aliquando bene gesta sunt, hæc importune ejus animo objicit, et cum hunc Deo singulariter placuisse insinuat, quo facile suggesta persuadeat, ipsam ad testimonium potestatis traditæ retributionem vocat, dicens : Quia nisi omnipotens Deus te his omnibus meliorem cerneret, omnes hos sub tuo regimine non dedisset : ejusque mox mentem erigit, et viles atque inutiles eos ostendit qui subjecti sunt, ita ut nullum jam quasi dignum respiciat, cui æquanimiter loquatur. Unde et mox mentis tranquillitas in iram vertitur, quia dum cunctos despicit, dum sensum vitamque omnium sine moderatione reprehendit, tanto irrefrenatius se in iracundiam dilatat, quanto eos, qui sibi commissi sunt, esse sibimet indignos putat. Et si ipsi subjecti sunt aliis, eorum cor superbia instigat, ut sua acta considerare funditus negligant, et semper tacitis cogitationibus rectoris sui judices fiant : qui dum in illo quod reprehendere debeant importune respiciunt, in semetipsis quod corrigant nunquam vident ; unde et tanto atrocius pereunt, quanto a se oculos avertunt. Aliquando autem tales subditi proterva quæ sentiunt nequaquam produunt, et hi, quorum loquacitas vix compescitur, nonnunquam ex sola amaritudine intimi rancoris obmutescunt : qui per dolorem mentis procacitatis suæ verba subtrahentes, cum male loqui soleant, pejus tacent, quia cum peccantes aliquid de correctione audiunt, indignantes etiam responsionis verba suspendunt. Cum his quando aspere agitur, sæpe ad querelæ voces de hac ipsa asperitate prosiliunt ; cum vero eos magistri sui blande præveniunt, de ipsa humilitate, quæ præventi sunt, gravius indignantur, et tanto eorum mens vastius accenditur, quanto consideratius infirma

judicatur. Cunctis namque superba apud se cogitatione tumentibus inest clamor in locutione, amaritudo in silentio, dissolutio in hilaritate, furor in tristitia, inhonestas in actione, honestas in imagine, erectio in incessu, rancor in responsione. Horum mens semper est ad irrogandas contumelias valida, ad tolerandas infirma, ad obediendum pigra, ad lacessendos vero alios importuna, ad ea quæ facere et debet et prævalet ignava, ad ea quæ facere nec debet nec prævalet parata. Hæc in eo quod sponte non appetit nullis exhortationibus flectitur, ad hoc autem quod latenter desiderat, quærit ut cogatur, quia dum metu it ex desiderio suo vilescere, optat vim in ipsa voluntate tolerare. Quapropter hoc vitio, laborantibus Dominus dicit: *Deus superbis resistit, humilibus autem dat gratiam* (Jac. iv); et item: *Immundus est apud Deum omnis qui exaltat cor* (Eccli. xvii); et item: *Quid superbit terra et cinis?* (Eccli. x.) Quia igitur Redemptor noster corda regit humilium, et Leviathan rex dicitur *superborum*, aperte cognoscimus quod evidentissimum reproborum signum superbia est, ad contra humilitas electorum. Cum ergo quam quisque habeat cognoscitur, sub quo rege militet invenitur. Unusquisque enim quasi quemdam titulum portat operis, quo facile ostendat sub cuius serviat potestate rectoris. » De hoc quippe vitio superbiæ descendit, quod multi te apud plurimos dicunt de fortitudine et agilitate tui corporis gloriari, et de præliis, atque ut nostratum lingua dicitur, de *vassaticis* frequenter ac libenter sermonem habere, et qualiter ageres si laicus fuisses irreverenter referre, et alia multa quæ tibi non conveniunt dicere et agere, nec mihi enuntiare. Debes enim attendere quod scriptum est: *Non in fortitudine sua roborabitur vir* (I Reg. ii); et: *Non salvatur rex per multam virtutem, et gigas non salvabitur in multitudine fortitudinis suæ* (Psal. xxxii). Unde apud se David manu fortis, humiliter infirmus, et ideo veraciter fortis, qui gigantem multæ fortitudinis occidit, et regem ac virtutem exercitus ejus ab opprobrio liberavit, Domino dicit: *Fortitudinem meam ad te custodiam* (Psal. lviii). Et Paulus, qui audivit a Domino: *Virtus in infirmitate perficitur* (II Cor. xii), gloriatur in infirmitatibus suis, dicens: *Quando infirmor, tunc fortior sum et potens* (II Cor. xii); et: *Castigo corpus meum, et servituti subjicio, ne aliis prædicans ipse reprobus efficiar* (I Cor. ix). Sed et cum in his, in quibus infatigabiliter pugnando, non quasi aerem verberantes, sed contra aëris potestates, et carnis illecebras, ac mundi concupiscentias agonizantes decertaverimus, quod nobis a Domino præcipitur ex intimo cordis affectu dicere debemus: *Servi inutiles sumus, quæ debuimus facere, fecimus* (Luc. xvii). *Quia non sumus sufficientes a nobis quasi ex nobis, sed sufficientia nostra ex Deo est, qui dedit velle et perficere pro bona voluntate* (II Cor. iii); quique suis dixit: *Sine me nihil potestis facere* (Philip. ii). De vanitate autem qua te jactas, qualiter faceres si laicus esses, breviter tibi

A valeo respondere, faceres utique sicut patriotæ et propinqui tui laici faciunt, scilicet voluntarie vires inter tuos conterraneos atque vicinos pacifice, quoniam si aliter præsumeres, fortiores et superiores qui tibi resisterent, teque reprimerent, invenires.

CAPUT LIII.

De motibus corporis inordinatis, qualiter cavere debeat.

Et quoniam reprehenderis de motibus corporis inordinatis, attendendum mihi et tibi est quod beatus Gregorius dicit, quoniam interius est custodia, quæ ordinata servat exterius membra. Et sanctus Gregorius Nazianzenus habitum Juliani Apostatæ describit dicens (*orat. 1. in Julianum*): « Faciebat me cautum adeo inconstantia morum ejus, et excessus uberior. Vates enim egregius est, qui bene considerat. Nullum enim signum mihi in eo utile videbatur, cervix inflexibilis, humeri jactabiles, oculi currentes, huc illucque directi et furiose respicientes, pedes impatientes, nares spirantes injurias atque contemptum, schemata risibilia, et hoc ipsum semper habentia, risus incontines et quasi subulliens, consensus et negatio simul, ratio nulla ratione consistens, interrogatio inordinata, atque responsio nulla convenientia sibi conveniens. » Et sanctus papa Gregorius quemdam describens potiusque depingens juvenem, de eo dicit: « Quia erat superbus et lubricus, verbis levis, nutibus instabilis, mente timidus, veste compositus, actione dissipatus. » Unde attendendum est nobis, quia si hæc reprehensiones in laicis quibuscunque potestatibus præditis ita denotantur, quam damnabiles in nobis episcopis habeantur, qui lux mundi, et lucerna super candelabrum posita, ut luceamus omnibus qui in domo Dei, id est Ecclesia sunt positi, esse videmur? Hæc tibi, frater ac fili, scribo multo dolore ac confusione compunctus, hortans ut in lutere, quem Moyses (*Exod. xxxviii*) de speculis mulierum ante tabernaculum Domini excubantium fecerat, in quo sacerdotes ministraturi in eadem domo Domini manus et pedes lavarent, mecum te conspicias, et interius atque exterius ibidem, id est in sacræ Scripturæ præceptis per sanctos Dei nobis explanaris, et in eorumdem sanctorum exemplis, nostra reprehensibilia abluamus, et dignos nos fletibus et sanctis operationibus, ut digne illi ministrare possimus, exhibeamus. Hinc enim omnipotenti Domino per Psalmistam dicitur: *In æternum non obliviscar justificationes tuas, quia in ipsis vivificasti me* (Psal. cxviii). Justificationes enim præcepta Dei dicuntur, in quibus nos corrigendo justificat, de quibus idem Psalmista apertius dicit: *In tuis justificationibus meditabor, non obliviscar sermones tuos* (Psal. cxviii). In eis itaque nos vivificat, quia per hæc nobis spiritalem vitam demonstrat, eamque per afflationem spiritus nostris mentibus infundit.

CAPUT LIV.

Ut non se permittat decipi a flore juventutis et sanitate corporis, et mundi illecebris.

Tandem hortor te, frater ac fili, et moneo ut non te permittas decipi a flore juventutis, et sanitate corporis, et mundi illecebris, habens semper ante mentis oculos quod hinc sanctus Spiritus per beatum Job dicit: *Homo natus de muliere, brevi vivens tempore, repletur multis miseris: quasi flos egreditur, et coneritur, et fugit velut umbra, et nunquam in eodem statu permanet. Breves dies hominis sunt, numerus mensium ejus apud te est, constituisti terminos ejus, qui præteriri non poterunt (Job. xiv).* Et per Psalmistam: *Verumtamen in imagine pertransit homo, sed et frustra conturbatur. Thesaurizat et ignorat cui congregavit ea (Psal. xxxviii).* Habe semper ante mentis oculos, quam terribilis judex noster sit in consiliis super filios hominum, et quam districtus ad judicandum veniet, cœlis et terris ardentibus, et universis cœlorum virtutibus, atque omnibus creaturis in obsequium sui terroris comotis. Quando ignis ante ipsum præcedet, et inflammabit in circuitu inimicos ejus: advocans cœlum desursum, et terram discernere populum suum, quando veniet nos judicaturus de cogitationibus, verbis, et actibus nostris: quem præveniendum nobis est in confessione, et plorandum ante eum qui fecit nos (Psal. xciv). Attendendum est etiam, quæ nobis verecundia tunc erit in conspectu totius humani generis, omniumque virtutum cœlestium confundi, et post confusionem quæ nos pœna sequetur, cum animam immortaliter morientem reatus involvet, et indeficientem deficientem carnem gehenna consumet, si radices cordis huic sæculo perseveranter infixas habuerimus: quia nemo potest, ut scriptum est, *hic gaudere cum sæculo, et illic regnare cum Domino.* Simus igitur, ut docet Apostolus, *quasi morientes, et ecce vivimus: ut castigati, et non mortificati: quasi tristes, semper autem gaudentes: sicut egentes, multos autem locupletantes: tanquam nihil habentes, et omnia possidentes (II Cor. vi).* Momentis suis horæ fugiunt, et tempora dilabuntur. Satagamus ergo ut in bonis et continuis operibus teneantur: quia scriptum est: *Beati qui custodiunt judicium, et faciunt justitiam in omni tempore (Psal. cv).* Et descriptis viri sancti continuis bonis operibus, scriptum est: *Sic faciebat Job cunctis diebus (Job i).* Sicut ergo quotidianas et necessarias pensiones corpori reddimus, ita quotidianas atque continuas bonorum operum, scilicet continentiæ, lectionum, vigiliarum, et orationum, atque lacrymarum, et eleemosynarum, atque sacræ hostiæ oblationum, gemituum quoque ex præteritorum pœnitentia, et sancto futurorum desiderio, pensiones animabus nostris effundentes eas in conspectu Domini reddere studeamus, et in his cum fide recta, spe firma, et charitate perfecta, perseverantissime vigilemus, scientes quia Joseph solus inter fratres talari tunica indutus legitur (Gen.

A xxxvii), et cauda pecoris in sacrificio Domino offerri præcipitur, quia *qui perseveraverit usque in finem, hic salvus erit (Matth. x).* Et obaudiamus quod Sapientia per Salomonem nos singulos exhortans dicit: *Quodcumque potest manus tua facere instanter operare: quia nec opus, nec ratio, nec scientia, nec sapientia erunt apud inferos quo tu properas (Eccle. ix).*

CAPUT LV.

Conclusio epistolæ verbis Eliæ, Quod meum fuit feci tibi.

In conclusione autem horum omnium tibi scribo quod beatus Elias Spiritu sancto repletus ad Eli-seum eodem Spiritu sancto replendum dixit: *Quod meum fuit feci tibi (III Reg. xix).* Credo enim quia etiamsi quod absit me non obaudieris, labor meus non erit in te apud Deum inanis et vacuus. Etsi enim Æthiops niger in balneum intrat, et niger de balneo exit: non tamen balneator denarium, id est pretium sui balnei perdit. Nos autem et sermones nostri in manu Dei sumus, qui dicit: *Pluam super unam civitatem, et super alteram non pluam (Amos, iv);* et quibusdam loquitur per vocem, et exigente culpa, occulto atque justo judicio, non loquitur per unctionem: quibusdam vero gratiæ loquitur unctione, id est sancti Spiritus inspiratione cum voce. Det Dominus me, et velle, et scire, et dicere, et agere quæ jussit: et te audire, et exaudire quod expedit, et nobis ambobus ea velle et operari, et in his perseverare quæ præcipit, ut mereamur dona C percipere quæ promittit.

EPISTOLA HINC MARI RHEMENSIS

AD HINC MARUM LAUDUNENSEM.

Accepto ejus missatico per Heddonem præpositum ecclesiæ Laudunensis.

(Apud Sirmond., ex veteri codice bibliothecæ Thuanæ.)

HINC MARUS, Rhemorum episcopus, dilecto fratri Hincmaro, Ecclesiæ Laudunensis episcopo, salutem.

Decimo quinto Kalendas Augusti præsentis tertiæ indictionis, jam vesperi venit ad me communis frater et comminister noster Heddo, præpositus commissæ tibi ecclesiæ, dicens mihi ex tua parte missaticum, sicut hic habetur subnexum.

D « I. Meus senior vobis mandat salutes et fideles orationes.

« II. Mandat vobis, quia vos sapitis quod illi nunc factum fuit in Attiniaco, propter quod inde ambulavit, sicut vobis per Teutlandum mandavit, et vos sapitis quo modo illi jam altera vice factum fuit, quando rex illum detinuit.

« III. Mandat vobis, quia res de sua ecclesia illi tollutæ sunt, et Flotharius regis missus eas consignavit Nortmanni homini, et hoc meus senior jam sciebat, quando de Attiniaco ambulavit, quia sic deveniret, quia homo Nortmanni Herimundus hoc seniori meo dixit, quando rex de Silvanectis revenit.

« IV. Et mandat vobis, quia et alias res de sua ecclesia tenent sui homines per potestatem et per verbum regis, et mandavit suos homines ad se venire præterita die sabbati, et voluit considerare de servitio regis, et de illa opera ad suam ecclesiam, et illi non venerunt, et rex illi per Bertharium nunc mandavit, ut Eligio suum beneficium redderet, et Eligius inde regis indiculum apportavit, ut suum beneficium illi redderet, et meus senior illi respondit, ut reveniret die Lunis, et inde consideraret cum suis fidelibus, et tunc illi responderet : ipse autem dixit, quod hoc expectare non debuisset, quia rex illi eum beneficium reddidit, et intravit ibi, et tenet illum.

« V. Et quia vos estis suus avunculus et suus archiepiscopus, si vos illi potestis impetrare ad regem, ut ille possit res de sua ecclesia ordinare, et illi eas liceat sicut et simulaverit disponere et gubernare : quia quod ille facit, alter disfacit ; et quod ille disponit, alter pervertit. Tunc vult ille vobis obedire, et ad vos venire, et per vestrum consilium facere : quia quidquid de rebus suæ ecclesiæ fecit et ordinavit, non per scaz, vel per aliquam propinquitatem aut amicitiam inde fecit, sed sicut melius ille intellexit, si inde fecit. Et si hoc vos non potestis ad regem facere, tunc non potest ille regi obedire, nec illi servire, nec aliquod temporale obsequium facere, nec ad illum venire, et non potest dimittere, ut sic longe inde se non reclamet si plus alte potest, id est ad sedem apostolicam. Et non dimittet, ut inde suum ministerium non faciat, id est excommunicabit illos sicut hic habet quod illi episcopi diffinierunt, quia non potest dimittere ut illos non excommunicet, quoniam altera vice, quando domno apostolico mandavit de Nortmanno, hoc ei remandavit domnus apostolicus, ut prius inde fecisset suum ministerium, et tunc se reclamasset. Et hoc ideo usque modo dimisit, donec vobis mandaret ut hoc vos sciretis quia nunc inde suum ministerium faciet. »

Unde frater una cum venerabilibus episcopis et dilectis fratribus nostris qui adfuerunt, Remigio scilicet, et Harduico, et Francone, ac Hodone, atque Willeberto, ad domnum Carolum regem gloriosum petitorum suggestionem referre curavi. Qui nobis respondit, se putasse tibi posse sufficere quod hinc jam : coram episcopis benigno animo et allocutione placida tibi in Attinico dixit, videlicet quoniam ad illum pervenit, te amplius præsumpsisse de rebus, de quibus nunc mandas quia Flotharius missus ejus Nortmanno consignaverit, quam ecclesiæ tibi commissæ debeantur, et amplius quam in præcepto habeatur, per quod tibi res a longo tempore ab ecclesia Laudunensi subtractas restituit, vel gratis tuæ petitioni annuens dedit, sicut et manifestissime clarruit de his, quas contra rationem et justitiam illegaliter atque irregulariter usurpasti, quæ in præcepto non continentur, et juste atque rationabiliter secundum legem homo suus reconquisivit. Propterea illas res, videlicet villam Pauliacum, quæ a longo tem-

pore ab ecclesia Laudunensi subtractæ fuerant, præsentaliter reciperes, et illas alias de quibus ad eum reclamatio venit, interim non reciperes, sed tantum inde expectares, donec illud præceptum apportares, et suus ac meus missus in ipsum pagum irent, et ex his rei veritatem investigarent : et quidquid inventum fuerit, quod ex eisdem rebus juste et rationabiliter ad Laudunensem ecclesiam pertineret, non solum non discuperet, verum et libenter eas ipsi ecclesiæ concedere vellet, et tu ex his nihil tunc contradixisti. De beneficiis autem hominum tuorum, de quibus mandasti, respondeo quia tui homines se ad eum reclamaverunt, quod ab eis sua beneficia, quæ apud antecessores tuos, et apud te proservierunt, injuste et irrationabiliter abstulisses. Unde secundum sacros canones, et decreta sanctæ sedis Romanæ pontificum ex eisdem sacris canonibus promulgata, electos iudices episcopos apud me expetisti, et eorum atque aliorum Deum timentium iudicio de quibusdam decretum fuit, ut beneficia sua, quæ irrationabiliter perdidérant, recuperare deberent : quorumdam autem eorum causa usque ad alium tractatum certis causis intervenientibus non diffinita, sed implacitata remansit, et tu ante diffinitionem, contra sacros canones, sine ulla necessitate vel ratione fuga lapsus, regularem diffinitionem expectare contempsisti, unde quid sacri decernant canones sufficientissime nosti. Nunc vero quia ipse jam in motu est, pergens obviam fratri suo propter pacis charitatisque concordiam, et sanctæ Ecclesiæ ac Christiani populi obtinendam quietem ; cum favente Domino inde reversus fuerit, veni ad illum, et apporta illud præceptum, per quod præfatas res ecclesiæ Laudunensi restituit, sive contulit, et sicut justum de illis rebus quas requiris inventum fuerit, agere procurabit. Homines autem tui, quorum causa, te irregulariter ac illegaliter abscedente, adhuc non diffinita sed implacitata remansit, juste et rationabiliter ventilentur, et secundum sacras leges diffiniatur. Cæterum, charissime frater, de scedula quasi episcoporum diffinitionem continente, in synodo quæ apud Tusiacum fuerat habita, valde miratus sum ubi et quomodo hanc adinvenisti, quam antequam per Heddonem clericum tuum acceperim nunquam vidi, et nunquam vel nusquam audivi, sed nec qui modo adfuerunt episcopi eam se vidisse vel audisse dixerunt. Illam quippe authenticam diffinitionem, quæ secundum sacras leges in eadem synodo decreta est, cui et mecum interfuisti, ego habeo, et divinare non valeo, unde adinventio ista emergerit, quæ, sicut ex his evidenter potes cognoscere, quæ tibi contra præsumptiones tuas studii scribere, in quibusdam sacris regulis obviat, et mendacem illam esse facillime posses advertere, si illos oculos habuisses in capite, de quibus Scriptura dicit : *Oculi sapientis in capite ejus (Eccle. 11, 14)*. Et miranda est tua prudentia, cur sibi placuit plus hanc mendacem, et in quibusdam, ut dixi, sacris regulis obviantem compilationem habere, et mihi transmit-

tere, quam veram synodi diffinitionem, et sacris regulis congruentem habere, et a me qualicumque primate tuo juxta regulas sacras tenendam et sequendam accipere, cujus, secundum decreta sanctæ sedis Romanæ pontificum ex sacris canonibus promulgata, ordinationem semper debes in rebus expectare. Nam etsi scedula a te mihi directa quiddam rationis vel auctoritatis habere videtur, hoc tamen debes discernere, quia sicuti ubi reclamatio certa suscipitur, causa ventilatur, ratio postulatur, præsumptio vel usurpationis temeritas non invenitur, sed justitia sequitur, et æquitas conservatur, censura districtiōnis canonice vacat, ita se ad ulciscendum contra devios a ratione et auctoritate ac æquitate, et in contemptus pertinacia obduratos exaggerat. Sedis, inquit beatus Leo, apostolicæ moderatio hanc temperantiam servat, ut severius agat cum obduratis, et veniam cupiat præstare correctis. Igitur quoniam, ut item Leo dicit, matura volumus sacerdotum esse consilia, et sacra Scriptura dicit : *Qui festinus est, pedibus offendit (Prov. XIX)*, hortor et moneo te, frater charissime, paterna et metropolitana secundum sacras regulas auctoritate, ut non per hæc commenta, quæ mihi misisti, præceps sicut mihi mandasti sis ad profereendam sententiam, præsertim cum sufficientissime jam te hinc commonuerim, redarguerim, et etiam ex auctoritatibus divinis instruxerim. Sed patienter interim tolera quæ videntur tuæ potestati contraria, qui dicere cum Psalmista debes : *Supra dorsum meum fabricaverunt peccatores, prolongaverunt iniquitatem suam (Psal. CXXXVIII)*. In patientia, inquit Dominus, *possidebitis animas vestras (Luc. XXI)*; et item scriptum est : *Doctrina viri per patientiam noscitur (Prov. XIX)*. Quanto enim quis minus est patiens, tanto convincitur minus doctus. Et melior est patiens viro forte, et qui dominatur animo suo expugnatore urbium. Quoniam qui urbes subigit, extra se est quod vincit, qui autem patiens est, semetipsum sibimetipsi subjicit. Tolera igitur æquanimitate quos contrarios tibi deputas, et dilige ipsos quos toleras, et plus erga corrigendos agat tua benevolentia quam severitas, plus cohortatio quam commotio, plus charitas quam potestas : a qua regula non exorbitabis, si non quæ tua sunt quæseris, sed quæ Jesu Christi. Porro si dominari magis quam consulere subditis volueris, honor inflabit superbiam, et quod provisum est in ordinatione tua ad concordiam, tendet ad noxam. Ergo age, frater charissime, quod episcopalem concedet gravitatem, expectans donec ad provincialem synodum, cujus jam tempus in proximo est, conveniamus, in qua favente ac cooperante Domino, secundum decreta beati Gregorii, et de incidentibus causis disceptatio, et sit salubris de ecclesiastica observatione collatio : quatenus dum per hoc et præterita corrigentur, et regulam futura suscipient, omnipotens ubique Dominus fratrum concordia collaudetur, cujus nobis adesse præsentiam, si hæc observabimus, credere

A pro certo debemus, quia scriptum est : *Ubi fuerint duo vel tres congregati in nomine meo, ibi sum in medio eorum (Matth. XVIII)*. Si ergo adesse dignabitur ubi duo vel tres fuerint, multo magis non deerit ubi plures convenerint sacerdotes. Quod autem mihi mandasti : Quia non potes dimittere ut illos homines, qui res ecclesiæ tuæ contra voluntatem tuam tenent, non excommunices, quoniam altera vice, quando domino apostolico mandasti de Northmanno, hoc tibi remandavit, ut prius inde fecisses tuum ministerium, et tunc te reclamasses, non hoc in suis litteris invenimus, vel audivimus. Propterea, frater, vide ne cujusquam verbo, forte per adulatorem ad gratiam tuam tibi suaso, et non ex domni apostolici auctoritate prolato plectus, præpropere et tibi inconsulte ac præcipitanter sententiam excommunicationis sacris regulis obvia proferas : sed expecta, ut prædixi, donec ad provincialem synodum episcopi Rhemorum provincie conveniamus, et si quid nobis obstiterit, ut secundum sacras regulas juste et rationabiliter ea quæ agenda sunt exsequi quod absit nequiverimus, quod nullo modo futurum fore putamus, tunc si necesse fuerit secundum sacras regulas, tua reclamatio, si justa inventa fuerit, ad sedem apostolicam nostris litteris prosecuta perveniat.

HINCARI RHEMENSIS AD EUMDEM.

C *Ad mentis ejus oculos revocat qualiter illum orphanum dulcisdilectione sub religione nutriverit, litteris erudierit, per singulos gradus ecclesiasticos usque ad episcopatus apicem provexerit.*

Nunc, inquit, retribuendum mihi mala pro bonis, et odio me habentem gratis, quoniam non faveo tuis infructuosis operibus, quandiu te patiar, multis a te afflictus injuriis? Etenim ab ipsa die tuæ ordinationis, tam verbis quam scriptis, et inordinatis actibus ac motibus tuis, frequentibus adeo sum gravatus lacerationibus atque contusionibus, ut tædeat me vitæ meæ : quia sic pro loci mei officio tuæ insolentiae sum connexus, ut non solum post primam et secundam correptionem, juxta Apostolum, verum nec post plurimas, privatim et coram communibus familiaribus nostris, sed et coram rege, et episcopis, ac plurimis aliis, verbis et scriptis commonitiones te valeam devitare. Et licet exoptem, ut darentur mihi pennæ sicut columbæ, et avolarem ac requiescerem a te elongatus in aliquam solitudinem, non possum quoquam effugere, ut aut tua pertinacia contumacis præsentiae, aut missorum tuorum duriloquiis, aut scripturarum tuarum derogationibus et inutilibus næniis, quin potius tragœdiis, aut talibus quæ non conveniunt episcopo, de te auditionibus non affligar. Et jam tandem putavi te pigere talia exsequi, cum ecce nunc idibus Novembris quartæ indictionis prolixissimam rotulam, mendacis et irrationabilitatibus ac improprieis contra veritatem et auctoritatem repletam, mihi misisti. Et miror cur sic exfrons

factus, ut de Judæa Dominus queritur (*Jer.* vi, 13 ; viii, 12), nescis erubescere, et tibi non est nauseata talia et tanta scribere, nisi quoniam jam utilibus non es intentus, neque in necessariis occupatus. Et ut de aliis taceam, quæ si ex ordine voluero replicare, antea deficiet lux diurna, quam legenda exinde deficiat pagina, replicabo tibi aliqua, quæ non valeo nec deo silentio præterire. Videlicet quia statim ut a paternæ nido educationis factus episcopus evolasti, et me et eos qui nutrierunt deseruisti, et sæculares amicitias atque familiaritates quæstisti, et acquisisti, et sic subinde alios et alios deserens et acquirens, non solum de comparibus, sed etiam et de tibi commissis, ad hoc emersisti, ut contra sacras Antiochenas regulas, præcipientes ut præter me agere nihil debeas, secundum antiquam Patribus nostris regulam constitutam, nisi ea tantum quæ ad tuam parochiam pertinent, possessionesque subjectas, sine mea vel coepiscoporum nostrorum conscientia administrationem in palatio domni regis obtinueris : quam administrationem tibi coram eodem domno rege, et aliis qui adfuerunt ex sacris regulis interdixi, et aliquandiu ab administratione cessasti. Postea autem per exteras, id est sæculares potestates, contra Sardicenses canones, eandem administrationem cum abbatis in tertia provincia, ultra Rhemensem provinciam, sine mea conscientia obtinueris. Ad quam abbatiam, sine mea licentia, quoties tibi placuit perrexisti, et quandiu tibi placuit ibidem fuisti immoratus, contra Hilari papæ decreta dicentis (*epist.* 8 ad *episc.* Galliæ) : « Illud non potuimus præterire, quod sollicitudine diligentiore curandum est, ne præter metropolitanorum suorum litteras aliqui episcopi ad quamlibet provinciam audeant proficisci : quod etiam in omni genere officii clericalis per singulas debet ecclesias custodiri ; » et sic antea Zosimus, et postea sanctus Gregorius decreverunt. Præterea quoque, semel ac secundo litteris canonicis evocatus ad ordinationem episcopi in ecclesia Cameracensi Rhemensis provinciæ pastore destituta, unde apostolica sedes me suggerente non modice laboravit, nec ipse venisti, nec pro te vicariam personam, vel litteras tui consensus, ut regulæ sacræ præcipiunt, ad me direxisti. Unde Symmachus papa ad Æonium ex sacris regulis promulgavit (*epist.* 11 ad *Cæsarium*), « ut si quilibet episcopus metropolitanis pontifici juxta canonicam diffinitionem vocatus obtemperare noluerit, noverit succidendum se, quod non optamus, ecclesiastica disciplina. » Sed et hinc a me conventus, nullam satisfactionem, nec etiam humile responsum mihi ac coepiscopis nostris exhibuisti. Post hæc, more tuæ instabilitatis ac inconstantiae, contra domnum regem in tantum te sine ratione contumaciter erexisti, ut et administrationem palatinam, et ipsam abbatiam tibi auferret, et a te exaggeratus duriora ingerenda tibi proponeret : unde et scriptis et verbis pro te satagens illum tibi reconciliavi. Indeque, sicut sciunt plurimi, contra illum te iterum erexisti, et mandata sua ut ad eum ve-

nires contemnens, adeo illum ad iracundiam provocasti, sicut omnes in istis regionibus sciunt, ut coactus te per fideles suos sicut infidelem appeteret. Tu autem ante inauditam excommunicationem in meos et multorum archiepiscoporum et episcoporum parochianos, sed et in ipsum regem, sine mea conscientia contra sacras regulas jaculasti. Unde multos scandalizasti, et maximum scandalum non solum Ecclesiæ, sed et regi ac regno intulisti, cum lex prohibeat ut per alienam messem transiens falcem non mittas, sed manu spicas conteras et manduces (*Deut.* xxii, 25). « Falcem, inquit beatus Gregorius, judicii mittere non potes in ea segete, quæ alteri videtur esse commissa, sed per effectum boni operis frumenta Dominica vitiorum suorum paleis excoria, et in Ecclesiæ corpus monendo et persuadendo quasi mandando converte. » Post quam præsumptionem, adhibitis mecum confratribus nostris, te et cum eo pacificavi, et episcopis, quorum parochianos excommunicasti, ut te in synodali sententia non inveherent persuasi : sed et eosdem a te excommunicatos, licet non sine labore, adminiculante domno rege, adversum et conquiescere feci. Sed tu, addens pejora prioribus, sic domnum regem, sicut mihi longum est enarrare et multi sciunt, iterum exaggerasti, ut causa tuæ castigationis te sine mea voluntate, sineque meo consensu, aliquantulum destineri juberet. Tu vero causa tuæ injuriæ, me inconsulto, et sine consensu coepiscoporum Rhemensis provinciæ, sicut petitio a clericis Laudunensis ecclesiæ mihi porrecta demonstrat, presbyteros et comministros ecclesiæ ac parochiæ tibi commissæ excommunicasti, ut nemo in eadem parochia missarum officia celebraret, neminem parvulorum etiam in mortis urgentis periculo constitutum baptizaret, nullum ad pœnitentiam quisquam susciperet, nec etiam obeuntis communionem viatica muneris subveniret, nulli defuncto in sepeliendo humanitatis obsequium exhiberet, donec aut tu ipse ad eos venires, aut a sede apostolica inde relationem reciperent. Quod audiens, fateor, vehementer exhorruui, et proinde ad te metropolitana sollicitudine litteras misi, monens et hortans te, ut tam exitabilem excommunicationem et impietatis colligationem, in tuum et multorum periculum intentatam, quanto citius solveres. Sed et ad ministros Laudunensis ecclesiæ, timens immane multorum exitium, certissimas et irrefragabiles diffinitiones evangelicæ veritatis, et apostolicæ auctoritatis, atque sacrorum canonum et apostolicæ sedis direxi, quatenus secundum easdem diffinitiones, quæ in nullo divelli possunt, ex eadem periculosa et irregulari excommunicatione agerent et ipsi satis. Sed quia meæ admonitioni obedire non voluisti, misi ad te iterum exinde litteras, sed et clericos Laudunensis parochiæ, et nec sic te ad obediendum invitare prævalui. Post hæc, quærens adinventiones ut te a metropolitana subjectione posses exuere, libellum de Patrum antiquorum scriptis, ante sacros Nicænæ

synodi et anorum sanctorum canones editis, collegisti. In quibus sententias inter se dissonas, et contra evangelicam et apostolicam atque canonicam et apostolicæ sedis auctoritatem immiscuisti, et eadem libello, sine metropolitani et coepiscoporum Rhemensis provinciæ conscientia ac consensu, subscripsisti, et a clericis Ecclesiæ tuæ et a parochianis presbyteris subscribi fecisti, volens te a subjectione tuæ metropolis exutum ostentare, et privilegium metropolitane sedis annullare. Quasi non possem impietatis tuæ colligationes canonica auctoritate, sine tuo consensu ac sine synodali conventu in parochia tuo dissolvere, cum de certis et manifestis causis, quæ in nullo nobis sunt dubia vel obscura, et de quibus finitivas sententias, quæ in nulla posunt ratione convelli, a sanctis Patribus promulgatas habemus, synodale consultum vel coepiscoporum nostræ provinciæ consilium vel consensum non debeam expectare, et a regulis præstitutis, ut sanctus Leo dicit: « nulla aut negligentia aut præsumptione discedere, nec etiam sedem apostolicam inde inquietare, sicut ipsius sanctæ sedis beati pontifices, Innocentius, Zosimus, Cælestinus, Leo, Hilarus, Gelasius, Gregorius, et alii plures ejusdem sanctæ sedis rectores in decretis suis ostendunt, » et reliqua. Item datis auctoritatibus Gelasii papæ. » Post præfati denique, inquit, monstruosi libelli, a te monstruose collecti, tuam tuorumque subscriptionem, litteris quarum exemplar habeo denuo te commonui ut ea quæ in parochia tua contra rationem et auctoritatem egeras, studeras corrigere: sed admonitioni meæ non paruisti. Deinde ex præfatis epistolis Romanæ sedis pontificum, ante Nicænam synodum scriptis, libellum a te collectum, et versiculis in nomine domni regis Caroli titulum, per venerabilem quondam archiepiscopum Wanilonem in Gundulfi villa coram episcopis qui adfuerunt mihi direxisti. De quo tibi scripto respondi, cujus exemplar habeo, monens te ut sacris canonibus promulgatis fidem accommodares, et debitam obedientiam illis dependeres. Inde in Attiniaco Rhemensis parochiæ, tibi coram episcopis debi libellum in quinquaginta quinque capitulis, auctoritates ecclesiasticas continentem, contra illa quæ in præfatis tuis duobus collegeras, monens ut a talibus et hujusmodi reprehensionibus te cohiberes, et te sacris regulis subdens, pacem et sanctimoniam secundum Apostolum sequi studeres. Tu autem nullam inde meæ admonitioni satisfactionem exhibuisti: quin potius rotulam prolixissimam, contra veritatem et auctoritatem ac rationem contextam, in eadem synodo obtulisti, et præfatum tuum monstruosum libellum a te et a tuis subscriptum in eadem synodo protulisti, quem ibidem accipiens hactenus servo. Et cum me vidi post tot admonitiones nihil apud te posse proficere, schedulam porrexi in synodo episcoporum decem provincialium, ab eisdem venerandis episcopis quærens consilium, quid contra tuam pertinacem contumaciam

A agere possem, et illa, quæ tibi ac parochiæ tuæ contra colligationes tuæ impietatis direxeram, coram illis relegi feci. Unde et ab eisdem episcopis prædictis sacri conventus auctoritatibus, quoniam injuste ac irregulariter tantas et tales excommunicationes agere præsumpsisti, et a domno rege impetratus, quoniam juramenta illi a te super sacra præstita non observasti, sed et quia res suæ proprietatis contra leges divinas et humanas invasisti, et a Normanno in synodo accusatus, quoniam eum de rebus tua concessione atque consensione a domno Carolo sibi beneficiatis, sine auctoritate regia, armata militari manu, et turba vulgi collecta cum gladiis et fustibus, primum quidem uxorem suam quæ tibi sine ullo erat, et postea illum ipsum contra leges et regulas repulisti, et omnia sua quæ ibi habuit abstulisti, sed et a tuis hominibus accusatus, quia contra leges divinas et mundanas eis sua beneficia abstulisti, ut synodalem censuram evaderes, dedisti regi et mihi in eadem synodo professionis tuæ libellum de regulari obedientia tua, quem habeo, et tu negare non potest, quoniam ipsius exemplar de manu mea in eadem synodo accepisti, sicut in processu monstrabo. Sed ut vir duplex animo et inconstans in omnibus viis tuis, statim in crastina misisti mihi per Arduicum, venerabilem Vesontionensem episcopum, ad profitendum et subscribendum tibi, breviculum ita se habentem: « Et ego « Hincmarus Rhemorum archiepiscopus tibi Hincmaro Laudunensi episcopo tuum debitum sacris « canonibus privilegio conservabo, et in quibus- « cunque ecclesiasticis negotiis indigeris, secun- « dum sacras regulas debitum tibi jure adjutorium « archiepiscopali auctoritate adhibebo. » Quæ causa non solum non de humili, verum nec de sano sensu processit. Injustum quippe ac irrationabile videtur, ut archiepiscopus, a sacris canonibus non exorbitans, excedenti episcopo suffraganeo a se ordinato professionis ac subscriptionis libello, sicut postulaveras, satisfaceret. Sicut enim secundum Scripturam minor a majore benedicitur, ita prorsus minor a majore et non a major a minore judicatur, ligatur, vel solvitur, sicut et in decretis Gelasii demonstratur. Juste igitur et rationabiliter tibi hinc deditur ex Jacobo (*cap. iv*), Petisti et non accepisti, eo quod male petisti. Sed et in eo quod tibi a me subscribi poposcisti, ut tuum debitum sacris præcipientibus canonibus privilegium conservarem, petisti quod voluisti, sed nescisti quod dixisti: « quoniam, ut sanctus Hieronymus dicit, privilegia singulorum communem legem facere non possunt. Et sacri canones provincialibus episcopis, et eorum ecclesiis vel sedibus, privilegia, scilicet privatas leges vel jura privata generaliter non dederunt, quia quod omnes generaliter habent, jus speciale et dignitatis lex privata esse non valet. Sed metropolitani episcopis ac metropolitani sedibus privilegia tribuerunt, » et cætera de sacris canonibus et decretis Leonis papæ subnexa. Post quæ subinfert: « Qua-

propter quando talia mihi ad profitendum et subscribendum misisti, scire debueras quod in istis regionibus nemo pene ignorat, quia municipium Lauduni, in quo es ordinatus episcopus, ab exordio sui, postquam a Marcobrio prætore, ut produnt historiæ, conditum fuit, nunquam inter sedes provinciales Rhemorum provinciæ, in paganismo vel in Christianismo, nomen vel locum habuit, donec sanctus Rhemigius decimus quintus Rhemorum archiepiscopus, certis quibusdam accidentibus causis, primus ibidem ordinavit episcopum, et idem municipio, de rebus Rhemensis metropolis satis superque ditato, ipsum comitatum, in quo consistit, partem scilicet ex Rhemensi parochia delegavit; sed semper fuit Rhemensis provinciæ municipium, sicut hodieque alia municipia in Rhemensi parochia, quæ in subjectionis loco ac nomine permanent. Non igitur privilegium, sed municipatum tibi debere servari convenerat petere, quia sicut patres nostri ac magistri Ecclesiæ tradunt, Paulus apostolus non se civem, sed municipem appellat dicens: *Ego homo sum quidem Judæus a Tarso Ciliciæ, non ignotæ civitatis municeps* (Act. xxii, 3). Natus quidem apostolus in oppido Galiliæ Giscali fuit, quo a Romanis capto, cum parentibus suis Tarsum Ciliciæ commigravit. A quibus ob studium legis missus Hierosolyam, a Gamaliele viro doctissimo, sicut in subsequentibus ipse memorat, eruditus est: et ideo non se civem, sed municipem a municipio, id est territorio ejusdem civitatis, in quo est nutritus, appellat. Dictum autem municipium, quod tantum munia, id est tributa debita vel munera reddat. Nam liberales et famosissimæ causæ, et quæ ex principe proficiscuntur, ad dignitatem civitatum pertinent. Nec mirum, si se Tarsensem et non Giscalitem dicat, cum Dominus ipse in Bethleem natus, non Bethleemites, sed Nazarenus a loco ubi nutritus erat cognominatus est. Et tu ergo in diocesi Rhemensi natus, et in metropoli Rhemorum nutritus, et in municipio Lauduni ordinatus, non te civilem vel civicum, sed municipem, videlicet tributarium, seu munerarium, utinam spiritualium donorum, episcopum, et excepto quod a pluribus episcopis es ordinatus, pene vicarium episcopum, quem Græci chor-episcopum vocant, debueras recognoscere, ac per hoc non privilegium tibi ascribi, sed municipatum: nec contra privilegium tuæ metropolis te oportuerat rebellare, quod non ageres, si animo Paulus scilicet pusillus et humilis esses. Unde timendum est, ne et in hoc perditionis filium imiteris, qui adversatur et extollitur supra omne quod dicitur Deus, aut quod colitur: qui quantum ex te fuit tradidisti eos, quos irregulariter ut præmissi excommunicasti, non ut secundum Apostolum spiritus eorum salvi, sed quantum furor et indignatio tua prævalere potuit, perditii essent in die Domini. Quas colligationes impietatis, ut sæpe dictum est, et semper dicendum est, quoniam regulariter contra votum tuum dissolvi, te adversum me erexisti. » Item post auctoritates super illicita ex-

A communicatione. « De sacramentis autem a te regi præstitis non est mihi necesse aliquid scribere, quoniam pene omnes sciunt, quid de perjurio, si forte illud admisisti, Dominus in lege et prophetis, et in Evangelio, et per apostolos ac Ecclesiæ doctores atque magistros dicat. Et quia, ut in decretis apostolicæ sedis dicitur, nolimus exaggerare quod gestum est, ne cogamur judicare quod est justum, quoniam quod inde tibi in synodo reputatum est, judiciario ordine comprobati non est, sed regia benignitate intermissum est, omisi hinc regulare iudicium ponere, ut te ad sciendum tuam remitterem. Pervasio autem rerum proprietatis regiæ a te perpetrata manifestissime clariuit, quia nunquam res ipsæ juris ecclesiæ Laudunensis fuisse legaliter probatæ sunt, nec sua vel cujuscunque alicujus alterius donatione vel concessione ab eadem ecclesia possessas fuisse monstratum est. Unde super hominem tuum Teduinum, cui easdem pervasas beneficiasti, legaliter conquisitum est. Sed et proclamatio adversum te Nortmanni vera fuisse clariuit, nec testibus indiguit, quoniam tam manifestissime hoc quod inde contra leges et regulas egisti, adeo omnibus in istis regionibus patuit, ut nulla tergiversatione factum tibi aut excusari valeret. Nam constat multis esse notissimum, et tu in scriptis tuis domno regi et mihi directis hoc confiteris, quoniam ad deprecationem Rodulphi et Conradi easdem res, postquam domnus rex illas a longo tempore de ecclesia Laudunensi abstractas eidem ecclesiæ sua pietate restituit, ipsi domno regi illas, sine meo ac coepiscoporum nostrorum et ministrorum tuorum conscientia atque consensu beneficiasti, quatenus eidem Nortmanno illas beneficiaret. » Item et post aliquas datas auctoritates. « Et hoc a te ita irrationabiliter factum irrationabilius dissolvisti: qui armata militare manu, et permista vulgi multitudine cum armis et fustibus et tumultu maximo, sicut dicunt qui factum illud viderunt et audierunt, eundem Nortmannum, qui ipsas res a te regi concessas per regis beneficium retinebat, violenter et sine regis auctoritate ac verbo vel litteris expulisti, expulso illo illas invasisti, et in eas intrasti, ac possedisti, cum sint leges et regulæ, sit etiam rex portans gladium ad vindictam malefactorum, sint episcopi et canones ad iudicanda crimina sacrilegorum, ut si ipse Nortmannus pervasor rerum ecclesiasticarum foret, gladio, id est vindicta regia puniretur, si sacrilegus comprobatus esset, episcopali et canonico iudicio iudicaretur. Sunt etiam iudices, et sunt leges, quorum et quarum iudicio, si quid forte tibi et ecclesiæ tibi commissæ injuste factum erat, legaliter et regulariter emendaretur. » Item post quædam, præcipue beati Gregorii præceptionum decreta. » Denique ex eo quod tui homines se ad regem reclamaverunt, quoniam ab eis sua beneficia, quæ apud antecessores tuos præservierunt, injuste et irrationabiliter abstulisses, post datum regi et mihi libellum in synodo de regulari obedientia tua secundum sacros canones et de

creta sancta sedis Romanæ pontificum, ex eisdem sacris canonibus promulgata, electos iudices episcopos apud me expetisti, et tres secundum Africanum concilium, scilicet Actardum, Ragenelmum, atque Joannem, a me tibi designatos suscepisti, et eorum atque aliorum Deum timentium iudicio, in domni regis, sicut postulasti, præsentia de quibusdam decretum fuit, ut beneficia sua, quæ irrationabiliter perdiderant, recuperare deberent: quorundam autem eorum causa usque ad alium tractatum certis causis intervenientibus non diffinita, sed die alia diffinienda remansit, et tu ante diffinitionem contra sacros canones, et sine ulla necessitate vel ratione, fuga lapsus regularem diffinitionem expectare contempsisti. » Item, post aliqua de canonibus. « Et ab electorum iudicio, ut prædixi, incaute ac inhoneste fuga lapsus, abscedens pitaciolum irrationabiliter confectum, et manu tua subscriptum, ac præfata professioni tuæ usquequaque contrarium, per Ermenoldum diaconum tuum vi Nonas Julias III Indictionis mihi misisti, quod ita se habet. *Reverentissimo Rhemorum archiepiscopo Hincmaro, sanctæ Laudunensis ecclesiæ Hincmarus Deo miserante episcopus debitam in Christo devotionem.* Vos scitis, quia ab universali sanctæ Romanæ Ecclesiæ papa, patre quoque nostro et magistro Hadriano bis vocatus existo, et vos ipsi in quaternionibus, mihi a vobis in Attiniaco palatio coram archiepiscopis et episcopis qui adfuerunt datis, quod ad eandem sedem venire totidem vocatus detrectem, me reprehendistis, si vitio scriptoris pro detrectem, quod est dissimulem vel differam, detractem, quod valde tractem non ab re accipi potest, intercharaxatum non fuit. Unde vos nunc pro amore Dei omnipotentis et reverentia sancti Petri exposco, sicut in eadem synodo in eodem Attiniaco a vobis convocata, quod et impetrare non valui, expostulavi, ac jam etiam per integrum efflagitavi annum, et præcipue in synodo apud Vermeriam palatium olim ab orno habita obsecrando declamavi, nunc quoque et obsecro, et item declamo, ut et hactenus egi, quo vestra archiepiscopali auctoritate apud domni gloriosissimi regis Caroli clementiam obtineatis, quatenus domni et universalis papæ Adriani præceptis ac institutionibus ecclesiasticis mihi, ut omnibus expediat, velut ei qui de omni Ecclesia fas habet iudicandi, liceat obedire, videlicet ut limina sanctorum apostolorum Petri scilicet et Pauli merear, ut devovi, et ab eodem insuper vocatus sum, penetrare. Alioquin me vobis abhinc, ut archiepiscopo coepiscopus obtemperare debet, canonice sciatis obsequi non posse, quia ut decernit beatus papa Gelasius, nesciunt quid loquantur, qui decretis sanctæ Romanæ Ecclesiæ sedis præsulum quasi canones opponunt, quibus contraire contra canones est ipsos se erigere. » Iste Gelasius papa venerabilis et sanctus omnes decretales epistolas venerabiliter sanxit suscipiendas, nec eas venerabiliter suscipit, licet ad tomum caput inclinet, qui eis non obedit sed potius porro obvias manus inferens, quod sine periculo agi non potest, respuit, utpote

A qui de se iudicari non prospicit. Nam velimus nolumus, aut eis purebimus, aut eorum iudicio percelleremur, quorum neminem aliqui quique reprobare valemus. De archiepiscopis autem Remigio ac Arduico, quod mihi per Teutlandum diaconum mandastis, privilegio sanctæ Romanæ Ecclesiæ non præiudicat, sed quod eis eadem sancta sedes de me voluit ac disposuit committere commisit. Vos vero quod vestrum est agite. In Domino Jesu Christo bene valete. « Ego Hincmarus sanctæ Laudunensis ecclesiæ episcopus sponte subscripsi. » De quo pittacio tibi distuli respondere, putans te retractare, et a tua contumacia respiscere: tu autem non quievisti, sicut causa brevitas omitto. Et post hæc per clericum tuum Bertharium domno regi litteras tuas direxisti, excusans te, quoniam ad illum sicut tibi mandaverat venire non posses, quia febricitans ut te sol tangeret sufferre nequibas: sed tibi Romam eundi licentiam daret secundum votum tuum quod vovisti, quando altera vice febrem habuisti, ut ad sanctorum apostolorum limina sicut voveras veniens, ibidem ab eadem febre liberareris. Is autem domnus rex, coram episcopis et aliis suis fidelibus qui adfuerunt, tibi per eundem clericum tuum remandavit, mirum et non verum esse quod diceres, quoniam ad illum venire non posses, et Romam adire valeres. Venires autem ad illum, et si ipse pro causa rationabili te illuc ire velle cognoscere posset, tibi licentiam non denegaret. Tu vero ad eum venire noluisti, donec circa Kalendas Septembris tertie indictionis ad Silvacum de colloctione fratris sui Ludovici rediit. Quo obviam illi veniens, nihil cum eo, sed nec mecum, per te velmissos tuos de licentia tua Romam eundi dixisti. Sed et quando missi domni apostolici Rhemis fuerunt, quotidie per septem dies cum rege et mecum locutus fuisti, et inde nihil dixisti. Quod dicis te in synodo apud Vermeriam, indeque apud Attiniacum licentiam eundi Romam petisse, et impetrare non potuisse, omnes episcopi, qui in eisdem synodis fuerunt, liquido sciunt, quoniam cum de tuis insolentibus increpabaris, timens regulare iudicium, vel regis castigationem, licentiam eundi Romam petebas. Cum vero videbas, quia et rex et episcopi erant tibi placabiles, de ipsa licentia nihil dicebas, sicut nec modo facis, donec aliquam novitatem, ut soles, quam semper timendo exspecto, iterum facias, de qua compellatus solitam cantionem de licentia tua recantes. Petitio autem tua apud domnum regem talis fuit, quando ad eum venisti, quia sicut plures et pene omnes in istis provinciis scire dicuntur, et patet, addens gravibus graviora, velut ipsa sacrorum canonum demonstrant iudicia, nescio quibus machinationibus exquisitis a te jussio est principalis elicita, ut de his de quibus electos iudices secundum sacros canones expetisti, non solum eorum querela, quorum causa usque ad alium tractatum diffinienda remansit, verum et quæ, ut dixi, in domni regis præsentia electorum iudicum sententia

diffinita fuerunt, sine metropolitani conscientia, sineque canonico et episcopali iudicio, per iudices sæculares, Helmigarium scilicet mercati palatii telonearium, et Flotharium ac Ursionem villarum regiarum majores, refricarentur contra canones, qui ab ecclesiasticis ad majoris auctoritatis ecclesiasticos iudices, et non a majoribus ad minores, nec ab ecclesiasticis ad sæculares, neque a consensu partium electis provocari permittunt. A quibus iudicibus sæcularibus a te peritis, quædam ex diffinitis refricata et immutata, quædam vero ex diffiniendis sunt diffinita, adinventitia reputatione, sicut ab ipsis qui in eodem placito fuerunt dicitur, de non necessariis et inconvenientibus juramentis reperta, et a te coram prædictis iudicibus, ipsis tuis accusatoribus, quos contra electos iudices sicut expetieras suscepisti, proposita : quatenus et is, de quo legaliter et regulariter diffinitum fuerat, ut beneficium suum haberet, quod contra rationem et æquitatem perdidit, eadem adinventione dimitteret : et illi, quibus iudicatum fuerat, ut quoniam tu post expetitur electorum iudicium idem iudicium subterfugisti, beneficia sua usque ad legale diffinitionem tenerent, beneficia ipsa desererent, et tu quod incepisti evindicares, cum sicut tibi non licet de accusatione, sive criminalis causæ, sive civilis, relicto ecclesiastico, publico purgari iudicio, ita etiam non licet tibi, postposito vel contempto ecclesiastico iudicio, ad sæcularia iudicia convolare, vel quemcumque, nec etiam laicam personam pertrahere, neque ad forum suum sequi, si ipsa laica persona consenserit ecclesiasticum subire iudicium, sicut lex Valentiniani, quam probat Ecclesia, demonstrat. Item post ostensas auctoritates. « Et non pertranseat etiam tuam considerationem, cur domnus rex tuæ petitioni annuerit, ut unde in præsentia illius electos iudices episcopos secundum sacros canones accepisti, sine conscientia metropolitani, sineque ecclesiastico iudicio, consenserit ut sæculares iudices ad retractanda ea quæ diffinita fuerunt, vel ad diffinienda, de quibus iudices acceperas, demum acciperes. Scio enim et certus sum hinc illum canonicum scire iudicium, et miror ac doleo cur tu hoc videre non voluisti, aut Deo iudice arrogantia cæcatus non potuisti. Inunge igitur secundum consilium Apocalypsis Joannis (*cap. III, 18*) collyrio oculos tuos, ut videas et albuginem arrogantia de oculo mentis, id est intellectu tuo abicere valeas : et pensa, ne forte domnus rex, quem toties exacerbasti, sciens divina iudicia atque eloquia, hinc in annuendo votis tuis cogitaverit contra se sententias divinas, de his qui duræ cervicis et indomabiles corde sunt. *Qui nocet noceat adhuc, et qui in sordibus est sordescat adhuc (Apoc. XXII, 11) ; et : Ut impleant peccata sua semper (I Thes. II, 16) ; et : Dimisi eos secundum desideria cordis eorum, ibunt in adinventionibus suis (Psal. LXXX, 13) ; et : Nonne hæc condita sunt apud me, et signata in thesauris meis ? mea est ultio et ego re-*

A tribuam eis in tempore, ut tabatur pes eorum : juxta est dies perditionis, et adesse festinant tempora (Deut. XXXII, 34). Et cum tantarum transgressionum inveniariis obnoxius, non cessas me provocare, ut de promisso pittacio tuæ professionis atque tuæ subscriptionis, de quotibi, ut prædixi, respondere hactenus distuli, sed et de aliis tuis professionibus atque subscriptionibus vel lacessitus rescribam, quatenus professionum et subscriptionum tuarum historias plures legentes, si forte sunt qui adhuc eas ignorent, earum diligentiam, cautelam quoque et utilitatem cognoscant. Et primum quidem respondebo tibi de præfata a te subscripto pittacio, in quo scribis in adminiculo tuo te a me reprehensum, et esse me ostendis reprehensibilem, sed ego sprete reprehensione tua, qua me, quasi sub quodam excusationis velamine, de scriptoris vitio more tuo evidenter reprehendere satagis, qui aut differentiam verbi detractem, quod in meis scriptis tibi datis posui, nesciam, aut scriptoris vitium in eis corrigere non sapuerim, vel emendare neglexerim, et ex mea reprehensione tuam ostentare scientiam Cham Noe filius voluisti, non solum in verbi illius differentia, sed et in alio verbo, quod ad ostentationem tui in tuis adinventionibus iteratum inveni, et cum hinc meam insipientiam voluisti ostendere, tuam studuisti apud scholasticos stultitiam propalare. Pro me nil curo dicere : mihi enim pro minimo est ut a te judicer, aut sine dilectione a tua scientia reprehendar. Sed ne apud illos, qui tecum rumusculos captant, gloriaris quasi me mutum effeceris et elinguem, qui solus nostris temporibus thesauros sapientia et scientia penetrans introisti, hic causa compendii prætermittens, cum mihi vacaverit ostendam quid regularum grammaticæ artis auctores, quid orthographiæ doctores, quid sanctæ Scripturæ tractatores indentiant atque dicant. » Item post nonnulla. « Sed alia sunt hinc ex sacris canonibus et apostolicæ sedis decretis, quæ mihi hic ponere longum fuit, et in opusculo quinquaginta quinque capitulorum, quod ad tuam commonitionem et correctionem atque instructionem tibi dedi, potes relegere, præter epistolas præmissas quas tibi direxi ad redarguendam tuam temeritatem, contra evangelicam veritatem, et apostolicam atque canonicam auctoritatem, contraque sedis apostolicæ decreta, in tuam et perniciem multorum præsumptam, sicut in synodo plurimum episcoporum est comprobatum : sed et præter alias epistolas ac alia scripta quæ tibi direxi, vel dedi ad comprimendam tuam insolentiam, et commonendam ac instruendam tuam dilectionem, ut ageres juxta Domini dictum (*Deut. XXVI, 27*) : Quid quærit Dominus Deus tuus a te, nisi ut timeas Dominum Deum tuum, et facias voluntatem ejus, obediaturque ipsius imperio ? Quæ, frater, sollicita cordis intentione revolve, et recogita quid sit quod dixisti : Quia ex tunc quando mihi litteras illas misisti, ut archiepiscopo coepiscopo obtemperare debet canonicæ, scirem obsequi mihi te non posse, et revoca ante

oculos quod coram episcopis decem provinciarum professus es, et manu propria subscripsisti, scilicet quia privilegio metropolitani provinciæ Rhemorum ecclesiæ, secundum sacros canones, et decreta sedis apostolicæ sacris canonibus promulgata, pro scire et posse te obediturum profiteris, et subscripsisti. Dic, frater, quando, et ubi, vel in quibus a te requisiti vel extorquere volui, ut mihi contra hæc in aliquo obedires? qui nunquam tua, sed juxta Apostolum te quæsi, et qui meas injurias, scilicet meæ personæ, facile Deo gratias possum dimittere, sicut et pro te quotidie omnipotentiam Domini devote exorans facio, injurias ordinationis divinæ, quæ a tua insolentia exquiruntur, ut metropolitano privilegio canonicè non subdaris, in eum redundantes, qui Spiritu sancto suo, a que promulgati leguntur et creduntur canones, instituit, patienter ferre non possum, nec debeo, quin tantum inde non satagam quantum potero. Nam sicut sollicitudo et primatus totius Ecclesiæ catholicæ sanctæ sedis Romanæ pontifici divinitus est collata, ita et uniusque metropolitano ac primati provinciæ sollicitudo sibi delegatæ provinciæ per sacros canones spiritu Dei conditos, et totius mundi reverentiæ consecratos noscitur esse commissa, » et cætera. Sequuntur denique plura de professionibus et subscriptionibus ejusdem Hincari, et correptionibus ejus, usque ad finem operis.

EPISTOLA HINCARI LAUDUNENSIS

AD HINCARUM RHEMENSEM.

Respondet ad opusculum quinquaginta quinque capitulum et ad alia quæ contra ipsum scripta vel acta.

(Vide Patrologiæ, tom. CXXIV, col. 1027.)

HINCARI LAUDUNENSIS

AD EUMDEM

De consensu in excommunicationem ab eo factum quem exigebat.

(Vide ubi supra, col. 1069.)

EPISTOLA HINCARI RHEMENSIS

AD HINCARUM LAUDUNENSEM.

(Apud Sirmond., ex Flodoardi, lib. III, cap. 22.)

HINCARUS Rhemorum episcopus HINCARO Laudunensis episcopo.

Vir diversis flagellis a diversis attritus dicit: Qui me comedunt non dormiunt; ac si diceret, non quiescunt. Et tu, frater, me tuæ linguæ flagellis atterere, et venenosis scriptis tuis ad iracundiam provocando inficere non quiescis. Sed ille qui servum suum custodivit a murmurationibus, me peccatorem et fragilem in se confidentem potest custodire a rancore et malitia contra tuas falsas criminationes. Post alia multa super dolorem vulnorum meorum addens dicit: Sicut in scriptis tuis perversis invenio, quia apostolicæ sedis potestati derogo. Unde nemo sanum sapiens tibi unquam credidit vel credit: quoniam et ipsa scripta quæ ad apostolicam sedem sæpissime misi, et illa quæ tibi resultanti sæpe transmisi, te revincunt, et in isto sæculo et in futuro ju-

Adicio. Non enim de me verum esse valebis unquam vel usquam probare quod dicis, ab his, inquit, a quibus pro apostolicæ sedis privilegiis, quæ Christi sunt, usque ad mortem fas erat decretari, prædicatur et docetur, in his quæ eadem sedes statuit, vel ut respuendum probari. Sed tu probaris ejus privilegio resultare, qui secundum sacrosanctorum conciliorum canones supra positos, ab ipsa prima sede, atque ab omni Ecclesia catholica comprobatos, ut re vera spiritu Dei conditos, et totius mundi reverentiæ consecratos, et juxta decreta ipsius sanctæ sedis ex eisdem sacris canonibus promulgata, metropolitano privilegio semel et secundo ac tertio communitus obedire detrectasti, ut colligationes impietatis, quas contra evangelicam veritatem, et apostolicam atque propheticam auctoritatem, contraque sanctorum canonum, et decreta ipsius venerandæ sedis, exitiabiliter in tuum et multorum periculum colligasti, dissolveres. Insuper contra sacras regulas adversus metropolitano privilegium libello perniciose subscripsisti, et subscribi fecisti. Unde in synodo conventus ab episcopis decem provinciarum, libellum professionis de futura tua obedientia, subscriptum manu propria, quod habeo, porrexisti: contra quem iterum resubscripsisti. Nam ego decretales epistola sedis apostolicæ, divertis temporibus pro diversorum patrum consolatione vel consultatione ab ejusdem sedis pontificibus datas, et venerabiliter suscipio, et venerabiliter suscipiendas dico, et scribo, et sacrosanctorum conciliorum canones, cum decretis apostolicæ sedis ex eisdem sacris canonibus promulgatis et recipiendos et custodiendos et servandos, sicut supra ostendi, profiteor. Et quod te dicis audire obloqui de judicio domni papæ Nicolai, si de me dicis, mendacium dicis. Nam quod ille de Rothodo, sive de Vulfado judicavit, non contradixi, sed sicut ipse præcepit obedire curavi. De eo quod dicit de Rothodo, quia in ejus depositione non consensisti, subscriptiones tuæ manus propriæ te revincunt. Nihil enim inde egi quod tecum non egeris, nihil subscripsi quod non subscriperis. Habeo enim illas ipsas manus tuæ subscriptiones.

Et circa hujus operis finem. De aliis vero, quæ in scripto apud Attinacium dato mihi impropere mendaciter dicis, tibi respondere non curo. Sed scias quia non sum oblitus quod scriptum est in Isaia propheta, quoniam sanctus Ezechias arctatus angustia, blasphemias epistolas sibi directas in templo coram Domino expandit, et ad eum clamavit, et exauditus est. Expandam autem manus meas ad Dominum cum blasphemis et superbissimis scriptis tuis mihi a te directis, orans ut quando scit, et quando vult, et sicut scit, et sicut vult, te convertat ad veræ pacis et dilectionis atque debitæ obedientiæ dilectionem, et me liberet a labiis iniquis, et a lingua dolosa. Et Domine meæ beatæ et gloriosæ Dei genitricis Mariæ meritis, ac precibus sancti Remigii, cujus privilegio derogas, exaudiet me adjutor in opportunitatibus in tribulatione. Et quia beatus Hieronymus de his, quo-

rum adversum me gratis suscepisti officium, dicit : « Audiant canes mei, tu qui de filio in fratrem, indeque crevisti in coepiscopum, et post adeo profecisti ut in canem meum excreveris, accipe hanc perversi contumaciæ tuæ pittacioli exigente causa prolixam responsionem. Cum autem mihi vacaverit, succinetus de aliis perversis et incompositis scriptis tuis, in quibus quædam mendaciter, quædam reprehensibiliter me reprehendendo, quædam fecte humiliter et vere superbe scripsisti, rescribam, et in illo scripto, quia lego dixisse Dominum : Jam non irascar tibi amplius, quantum mihi adhuc paret, de hujusmodi altercationibus tibi scribendi finem imponam. De hoc quod dicis, quia dicunt de me homines : Qualis est ille avunculus, qui talia suo nepoti scribit, dicant et de te ipsi homines : Qualis est ille nepos, ab avunculo suo talis ut tunc erat assumptus, et talis sicut nunc est in spiritali ac temporali honore effectus, qui talia sibi exigit ab invito avunculo, ne talis ab aliis, sicut a nepote suo depingitur, æstimatus, per eum blasphemetur nomen Domini, et vituperetur ministerium ejus ; secutus Apostolum scribentem ad Corinthios contra se blasphemantes, et vilipendi ab aliis laborantes. Egit quippe doctor egregius, ut dum ipse qualis esset agnosceretur, et vita et lingua male prædicantium ejus prædicatione vilesceret. Illos videlicet commendaret, si se absconderet. Cumque se non ostenderet, errori locum dedisset. Dicunt etiam ipsi homines de te : Qualis est ille nepos, qui talia contra suum avunculum et nutritorem atque ordinatorem machinatur, et quantum potest mali agit, et plusquam potest agere cupit? Sicut tu in die magni judicii manifeste videbis, si te antea inde non recognoveris, et dignis pœnitentiæ fructibus non emendaveris. Multum me fatigas, et merito, non imputetur tibi. Sed fatigationem meam consolatur, quod sicut tibi scripsi dicit Gregorius : « Et si Æthiops niger balnearum intrat, et niger de balneo exit, tamen balnearum denarium balnei sui non perdit. » Timeo de te meo Alexandro, quod de suo dicebat Paulus : Alexander ærarius multa mala mihi ostendit, reddet illi Dominus. »

HINCARI RHEMENSIS

AD EUMDEM.

(Ex Conciliis Labbei, ut et sequentes epistolæ.)

HINCARIUS Rhemorum episcopus, ac plebis Dei famulus, presbyteris, diaconibus, ac reliquo ecclesiastico ordini, et cunctis in Laudunensi parochia consistentibus salutem.

Confratres ac consacerdotes nostri Hetto, Ermino, Hadulfus, et Clarentius presbyteri ecclesiæ vestræ prid. Kal. Junias præsentis secundæ indictionis data mihi ad vicem omnium vestrum petitione, cujus hinc partim textus, quantum sufficere vidi, sequitur, de quibusdam capitulis vestræ communis necessitatis consuluerunt, hoc modo : Dum XIII Kal.

Maia pastor noster in monte Lauduno in sua synodo de per plurimis utilitatibus suæ sanctæ ecclesiæ, ordinando et emeliorando quædam in eis disputaret ; occurrit pro successu temporum quædam pars ejusdem disputationis, pro qua quia ordinandi rerum ecclesiasticarum potestas ab eo, cum jus et lex canonum jubendo præcipit, ut episcopus res ecclesiæ suæ quibus voluerit, et quomodo voluerit disponendo dispenset, auferretur ; per plurimæ auctoritates sancti Petri successorumque ejus, quibus qualiter et quomodo data sit potestas ligandi et solvendi, ab eodem pastore nostro in præsentia totius synodi eas relegendo recitatae sunt. Quibus recitatis, memor injuriarum suarum, quæ ei moderno acciderant tempore addidit, quod immineret tempus comprovincialis synodi, quæ in Vermeria palatio regio a vobis vestrisque suffraganeis VIII Kal. Maia habita est. Ad quam vestris litteris evocatus libenti animo coram omnibus professus est, se sine ulla intercedente progressurum. Sed quia credebatur in ipsa synodo, quod mos haud exposcit canonicus, aliquam violentiam sibi illegaliter et contra leges canonum a quocunque fieri, sermone contestatorio et auctoritate sancti Petri, quod si ei licentia eundi Romam prohiberetur, aut ipse captus obtineretur, omnes sacerdotes totius parochiæ suæ colligavit, ut nemo eorum in ea sacerdotali ministerio tandiu uteretur, usque dum ille ipse nobiscum iterum viva voce loqueretur ; aut litteræ ex ipsa sancta sede beati Petri apostoli nobis mitterentur. Quo facto quod tunc non accidit, nunc in Silvaco palatio v Kal. Junias peractum est. Qua tamen die priusquam ad ipsum Silvacum perveniret, præsciis venturæ violentiæ suæ, prædixit sacerdoti nostro Clarentio, simulque diacono Teutlando, ut nobis denuntiarent per omnia nos servaturos, quæ causa suarum injuriarum, et ut satius dicamus, pro statu sanctarum ecclesiarum, in præscripta synodo XIII Kal. Maia omnibus sacerdotibus suæ parochiæ observare auctoritate sancti Petri ipse præceperat.

Et post aliquanta : Quapropter quia eundem dominum nostrum regia potestate retentum et reclusum viva voce adire non poteramus, et sacerdotali ministerio prohibiti ab eo frui non audebamus, III Kal. Junias ad capitulum nostrum convenimus, et ibidem communi colloquio retractantes ratum fore duximus, ut exinde consilium nostræ salutis a sacra paternitate almitatis vestræ humiliter deposceremus, utrum sacerdotalis ministerii officio missas celebrando, et domino pro receptione pastoris nostri ac communi utilitate totius sanctæ Ecclesiæ sacrificia offerendo, baptizando pueros, visitando infirmos reconciliando cum viatico munere pœnitentiam petentes, sepeliendo mortuos, cum penitus ab his omnibus prohibiti simus. Et paulo post : in parochia nostra uti debeat, an non, et reliqua. Quam relegens satis superque dolui fateor, quia dilectus frater et coepiscopus noster Hincarius contra episcopalem gravitatem, et contra evangelicam ve-

ritatem, atque apostolicam et canonicam auctoritatem talia inconsulte causa suarum injuriarum agere præsumpsit; qualia nullus ante ipsum episcopus egit: quæ non modo sacrarum Scripturarum tramiti contraria, et decretis sunt sanctorum adversa, verum et salutis humanæ ac universæ Christianitati sunt animica. Quia, sicut Hilarus papa dicit, non minus in sacrarum traditionum delinquitur sanctiones, quam in injuriam ipsius domni prosillitur. Vestram autem solertiam laudo, filii ac fratres charissimi, quos præcepta sanctorum canonum non perfunctorie legisse cognosco. Ait enim sacra et mystica Nicæna synodus: « Antiqua consuetudo servetur per Ægyptum, Libyam et Pentapolim, ita ut Alexandrinus episcopus horum omnium habeat potestatem; quia ut urbis Romæ episcopo parilis mos est. Similiter autem et apud Antiochiam cæterasque provincias suis privilegia servantur ecclesiis. » Quod capitulum sanctus Bonifacius papa scribens ad Hilarium Narbonensem episcopum exponit hoc modo: « Convenit nos paternarum sanctionum diligentes esse custodes. Nulli etenim videtur incognita synodi constitutio Nicæna, quæ ita præcipit, ut eadem proprie verba ponamus; per unamquamque provinciam jus metropolitanos singulos habere debere, nec cuiquam duas esse subjectas: quod illi, quia aliter credendum non est, servandum, Spiritu sancto suggerente, sibimet censuerunt. » Et post aliquanta: « Quod ideo dicimus, ut advertat charitas tua, adeo nos canonum præcepta servare, ut ita constitutio quoque nostra diffiniat; quatenus metropolitani sui unamquamque provincia in omnibus rebus ordinationem semper expectet. » Et secundum Africanum concilium scribens ad Cælestinum papam: « Decreta, inquit, Nicæna sive inferioris gradus clericos, sive episcopos ipsos suis metropolitanis apertissime commiserunt. »

Et venerandum Antiochenum concilium: « Per singulas, inquit, regiones episcopos convenit nosse metropolitanum episcopum sollicitudinem totius provinciae gerere. Propter quod ad metropolim omnes undique qui negotia videntur habere concurrant. Unde placuit eum de honore præcellere, et nihil amplius præter eum cæteros episcopos agere, secundum antiquam a patribus nostris regulam constitutam, nisi ea tantum quæ ad suam dioccesim pertinent possessionesque subjectas. Unusquisque enim episcopus habeat suæ parochiæ potestatem ut regat juxta reverentiam singulis competentem; et, providentiam gerat omnis possessionis quæ sub ejus est potestate: ita ut presbyteros et diaconos ordinet, et singula suo judicio comprehendat. Amplius autem nihil agere tentet præter antistitem metropolitanum. » Presbyteros, inquit, et diaconos parochiæ suæ episcopus ordinet, et non exordinet. Quia quos solus episcopus ordinare potest, solus nisi ut venerandi præfigunt canones a sacris officiis submovere vel suspendere nequaquam potest. Et singula, inquit, non autem generalia suo judicio comprehendat, quem convenit

nosse metropolitanum episcopum sollicitudinem totius provinciae gerere. Propter quod ad metropolim undique qui negotia videntur habere concurrant.

Unde, fratres charissimi, docente nos beato Gregorio ac dicente, « qui non corrigat resecanda, committit, » ad præfatum fratrem et coepiscopum nostrum Hincmarum has quæ sequuntur litteras auctoritate metropolitana dirigere necessarium duxi; monens illum paterna ac fraterna dilectione, ut juxta beati papæ Hilari decreta ipse quantocius iniquum factum suum dissolvat. Quod si agere noluerit, et contumaciter, quod absit, magis differre quam obedire maluerit, sciat generalitas fraternitatis vestræ virtute Domini nostri Jesu Christi, qui, ut ipse dicit, venit animas salvare, non perdere, et venit quærere et salvare quod perierat: qui est, ut ipse insinuat, *via, veritas et vita* (Joan. iv): via scilicet conversationis sanctæ, veritas doctrinæ divinæ, vita beatitudinis sempiternæ. A quo, et per quem in ædificationem, et non in destructionem sacer ordo episcopalis accepit exordium. Judicio etiam sancti Spiritus, quo sacri promulgati sunt canones; et sancti prophetæ atque apostoli, eorumque successores, et apostolicæ beati Petri sedis pontifices nobis documenta salutis et regulas ac decreta salubria ediderunt, et servanda inviolabiliter tradiderunt, sicut in subsequentibus relegetis cuncta quæ de capitulis in vestra petitione conscriptis contraria divinæ auctoritati, quæ tenetur in subditis, aut verbo præcepit, aut scripto decrevit, irrita et vacua et nullius virtutis vel auctoritatis esse pronuntio atque decerno; vobisque ministris ecclesiæ Laudunensis parochiæ præfata auctoritate præcipio, ut et in missarum celebrationibus, et in cæteris officiis, tam diurnis, quam nocturnis, et in distributione secundum traditionem Domini sacramentorum cœlestium fratribus et populis consulendis, sed et in baptizandis parvulis, et in suscipiendis ad poenitentiam indigentibus, et in subveniendis viatico munere secundum sacros canones obeuntibus, et in sepeliendis mortuis, sine ulla retractatione aut negligentia, quantum patitur humana fragilitas, secundum tramitem sacrarum Scripturarum traditionemque majorum divina munia exsequendo fratribus et populis consulere studeatis: scientes vos ordinum vestrorum sustinere jacturam, si confessi aut regulariter convicti fueritis de proximorum per vestram negligentiam, quod absit, periculo. Si autem, quod non est credendum, frater et coepiscopus noster Hincmarus quocunque tempore cuicumque vel quibuscumque vestrum pro hoc quia ejus illicitam præceptionem non observastis, contra regulas in antiquo fecerit, secundum sacros canones ad metropolim vestram, vel ad provinciale concilium qui læsos se existimaverint festinent recurrere; ut quod perperam illis, quod Deus longe faciat, fuerit irrogatum, synodi experti examen debitam et necessariam emendationem suscipiant.

HINC MARI RHEMENSIS

AD EUMDEM.

HINC MARUS Rhemorum episcopus dilecto fratri HINC MARO Laudunensi coepiscopo nostro salutem.

Pridie Kal. Junias præsentis secundæ indictionis misit ad me grex Laudunensis ecclesiæ per legatos suos, quorum nomina scripta habemus, oblatam petitionem, in qua inter cætera continetur : Dum XIII Kal. Maiasidem pastor noster in monte Lauduno in sua synodo de per plurimis utilitatibus suæ sanctæ Ecclesiæ ordinando et emeliorando quædam in eis disputaret, occurrit pro successu temporum quædam pars ejusdem disputationis, pro qua quia ordinandi rerum ecclesiasticarum potestas ab eo, cum jus et lex canonum jubendo præcipit, ut episcopus res suæ ecclesiæ, quibus voluerit et quomodo voluerit, disponendo dispenset, auferretur, per plurimæ auctoritates sancti Petri successorumque ejus, quibus qualiter et quomodo data si potestas ligandi et solvendi, ab eodem pastore nostro in præsentia totius synodi eas relegendo recitatae sunt. Quibus recitatis, memor injuriarum suarum, quæ ei moderno acciderant tempore, addit quod immineret tempus comprovincialis synodi, quæ in Vermeria palatio regio a vobis vestrisque suffraganeis VIII Kal. Maias habita est, ad quam vestris litteris evocatus libenti animo coram omnibus professus est se sine ulla intercapedine progressurum. Sed quia credebat in ipsa synodo, quod mos haud exposcit canonicus aliquam violentiam sibi illegaliter et contra leges canonum a quocunque fieri, sermone contestatorio et auctoritate sancti Petri, quod si ei licentia eundi Romam prohiberetur, aut ipse captus obtineretur, omnes sacerdotes totius parochiæ suæ colligavit, ut nemo eorum in ea sacerdotali ministerio tandiu uteretur, usque dum ille ipse nobiscum iterum viva voce loqueretur, aut litteræ ex ipsa sancta sede beati Petri apostoli nobis mitterentur. Quo facto, quod tunc non accidit, nunc in Silvaco palatio regio v. Kal. Junias præactum est. Qua tamen die priusquam ad ipsum Silvacum perveniret, præscius venturæ violentiæ suæ prædixit sacerdoti nostro Clarentio simulque diacono Teutlando, ut nobis denuntiarent per omnia nos servaturos, quæ causa suarum injuriarum, et ut satius dicamus, pro statu sanctarum ecclesiarum in præscripta synodo XIII Kal. Maias omnibus sacerdotibus suæ parochiæ observare auctoritate sancti Petri ipse præceperat.

Et post aliquanta : « Quapropter quia eumdem dominum nostrum regia potestate retentum et reclusum viva voce adire non poteramus, et sacerdotali ministerio prohibiti ab eo frui non audebamus III Kal. Junias ad capitulum nostrum convenimus, et ibidem communi colloquio retractantes ratum fore duximus, ut exinde consilium nostræ salutis a sacra paternitate almitatis vestræ humiliter deposceremus, utrum sacerdotalis ministerii officio missas celebrando, et domino pro receptione pastoris nostri ac communi utilitate totius sanctæ Ecclesiæ sacrificia offerendo, baptizando pueros, visitando infirmos,

A reconciliando cum viatico munere pœnitentiam petentes, sepeliendo mortuos ; cum penitus ab his omnibus prohibiti simus. » Et paulo post : « In parochia nostra uti debeat, an non, et reliqua. Quam novitatem a sæculo hactenus inauditam, frater charissime, satis contremiscens exhorruï, satis superque dolui. Unde augentur mihi lacrymæ : gemitus se in meo corde non capiunt, atque ex intimo viscerum dolore peccatis meis reputo, quod tu talia filius meus in tempore isto novitatis præsumptione, quæ de superbia descendere noscitur, agis, qualia nunquam ullus episcoporum legitur præsumpsisse. » Nam sicut in sacra Historia legitur : *Petrus quidem servabatur in carcere, oratio fiebat sine intermissione ab ecclesia ad Deum pro eo (Act. XII)*. Liberius papa, Vigilius papa, Joannes papa, et pontifices sanctæ Romanæ Ecclesiæ in exilium missi, et quidam eorum carcere conclusi fuerunt : Athanasius Alexandrinæ secundæ sedis episcopus, et sanctus Meletius Antiochenæ tertiæ sedis episcopus, et Cyrillus Hierosolymitanus episcopus, Joannes Constantinopolitanus episcopus, Paulinus Treverensis episcopus, sanctus Hilarius Pictaviensis episcopus, Eusebius Vercellensis episcopus de parochiis suis abducti et in exilium missi fuerunt, et tale quid agere, sicut egisti, non præsumperunt. Beatus Ambrosius in ecclesia Mediolanensi Justina hæretica imperatrice præcipiente, conclusus, et armatis circa ecclesiam excubantibus obsessus, et carpento posito ante ostium, quo in exilium traheretur, animam suam tenens in manibus suis, quid tale non egit. Rigobertus Rhemorum episcopus crudeli violentia a sede sua expulsus, et in proprietate sua non longe ab eadem urbe cum magna indigentia pluribus annis residens deguit, sed quid tale cum coepiscopis suis non egit. Fuerunt etiam alii nostra ætate ac tempore a sedibus suis pro diversis causis ad tempus expulsi, quidam etiam irrecuperabiliter abjecti, et tale quid non egerunt ; attendentes sibi dixisse Apostolum, et ex prophætico testimonio confirmasse : *Non vos defendentes, charissimi, sed date locum iræ. Scriptum est enim. Mihi vindicta, ego retribuam, dicit Dominus (Rom. XII ; Hebr. x ; Deuter. xxxii)*. Et si enim aliud vel hoc te ab hac præsumptione cohibere debuerat, ne solus talia faceres, quæ nemo alius fecit : Cum beatus Petrus apostolus dicat : *Nemo vestrum patietur D tanquam homicida, aut fur, aut maledicus (I Petr. iv)*. Tanquam maledicus, inquit catholici doctores, patitur, qui persecutionis suæ tempore in sui saltem injuria persecutoris effrenatur. Et item idem apostolorum princeps dicit : *Christus passus est pro nobis, vobis relinquens exemplum, ut sequamini vestigia ejus : qui peccatum non fecit nec inventus est dolus in ore ejus, qui cum malediceretur non maledicebat, cum pateretur non comminabatur ; tradebat autem judicanti se injuste (I Petr. ii)*. Tradebat autem, et non excommunicabat neque maledicebat. Et Paulus apostolus dicit : *Nemini dantes ullam offensionem, ut non vituperetur ministerium nostrum ; sed in omnibus*

exhibeamus nosmetipsos sicut Dei ministros, in multa patientia. Et patientes estote ad omnes (II Cor. vi) Et sanctus Gregorius scribens ad Januarium dicit : « Inter querelas multiplices, inquit, Isidorus vir clarissimus a fraternitate tua frustra se excommunicatum anathematizatumque conquestus est. Quod quam ob rem factum fuerit dum a clerico tuo, qui præsens erat, voluissemus addiscere, pro nulla alia causa nisi pro eo quod te injuriaverat factum innotuit. Quæ res nos vehementer afflixit. Quia si ita est, nil te ostendis de celestibus cogitare, sed terrenam te habere conversationem significas; dum pro vindicta propriæ injuriæ, quod sacris regulis prohibetur, maledictionem anathematis inexisti.

« Unde de cætero omnino esto circumspectus atque sollicitus, et talia cuiquam pro defensione injuriæ tuæ inferre denuo non præsumas. Nam si tale aliquid egeris, in te scias postea vindicandum. Et oblata mihi petitio Laudunensis ecclesiæ hanc inauditam antea excommunicationem causa injuriæ tuæ a te priusquam ipsa injuria tibi irrogaretur depromptam fuisse demonstrat. Quæ etiam præterita proxima Dominica die iv videlicet Kal. Junias præsentis secundæ indictionis missarum celebratione prætermissa in Laudunensi parochia, proh dolor! exstitit executâ. » Et item sanctus Gregorius in homilia 26 : « Judicare, inquit, digne de subditis nequeunt, qui in subditorum causis sua vel odia vel gratiam sequuntur. Unde fit ut ipsa hac ligandi ac solvendi potestate se privet, qui hanc pro suis voluntatibus, et non pro subditorum moribus exercet. Unde recte per prophetam dicitur : *Magnificabant animas quæ non moriuntur, et vivificabant animas quæ non vivunt (Ezech. xiii)*. Non morientem quippe mortificat, qui justum damnat; et non victurum vivificare nititur, qui reum supplicio absolvere conatur. Causæ ergo pensandæ sunt, et tunc ligandi atque solvendi potestas exercenda. » Cui concordat tempore prior, sed loco posterior sanctus Augustinus in libro de Pœnitentiâ: « Noluit, inquit, hominem ab homine judicari ex arbitrio suspicionis, vel etiam extraordinario usurpato judicio, sed potius ex lege Dei secundum ordinem Ecclesiæ, sive ultro confessum, sive accusatum atque convictum. Unde pro tuis injuriis non debueras presbyteros excommunicare ab officio celebrandi sanctum sacrificium; cum juxta sacros canones solus possis episcopus presbyteros ordinare, sed non confessos neque convictos de crimine solus non potest, nisi ut venerandi præfigunt canones, ab officio removere. Minime autem pro tua injuria quemquam presbyterorum, quantum minus omnes parochiæ tuæ sacerdotes non debueras officio presbyterali privare? » cum sanctus Gregorius ad Euphemium scribens dicat: « Servorum Dei humilitas in afflictionis tempore debet apparere; qui vero se contra præpositos suos erigunt, profecto ostenditur, quod esse servi Dei contemnuat. Non enim grande est, his nos esse humiles a quibus honoramur; quod et hoc sæculares quilibet faciunt :

A sed illis maxime esse debemus humiles a quibus aliqua patimur. » Psalmista dicit : *Vide humilitatem meam de inimicis meis (Psal. ix)*. Et ad Maximianum episcopum scribit: « Frequenter, inquit, me admonuisse vos recolo, ut in proferenda sententia esse præcipites nullatenus deberetis. » Et ad Marcianum dicit, quia nullus sine cognitione damnandus est.

Continetur etiam in præfata petitione ab ecclesia Laudunensi exiguitati meæ oblata, te prohibuisse nulli communionem, nec etiam obeunti ultimam pœnitentiam, vel viaticum munus in parochia tua tribui, nullum infantem in eadem parochia baptizari, nullum mortuum sepeliri, si tibi licentia eundi Romam prohiberetur, aut captus tenereris; usque dum tu ipse viva voce cum eis loquereris, aut litteræ a sede apostolica ecclesiæ Laudunensi mitterentur. Et unde nosti, frater, si vel usque in crastinum vives? semper obligati erunt quos decrevisti ligari? Quo contra beatus Gregorius dicit : Durum quippe est, ut qui nescit tenere moderamina vitæ suæ, iudex vitæ fiat alienæ. Et plerumque contingit ut hunc judicii locum teneat, cui ad locum vita minime concordat: ac sæpe agitur ut vel damnet immeritos, vel alios ipse ligatus solvat. Igitur, quantum ex te est, hæc crudelitas tua omnem crudelitatem omnium paganorum, et omnes persecutiones omnium persecutorum, quæ Christianis illatæ fuerunt, excedunt, dicente Domino : *Nolite timere eos qui occiderunt corpus, animam autem non possunt occidere (Matth. x)*. Tu autem, frater, quantum ex te est, animam et corpus mittis in gehennam; et non solum illos omnes occidis, quos sine baptismate, aut sine pœnitentia et communionem de hoc sæculo exire præcipiendo facis; verum et omnes presbyteros reos mortis illorum efficis, atque illorum judicio qui jam in cœlis cum Deo regnant, et in terris miraculis coruscant, gradu privatos efficis; et pro tantis non solum in synodo, verum et in divino judicio rationem de illorum mortibus reddes. Quia sicut Paulum legimus tantorum manibus sanctum Stephanum lapidasse, quantos ad lapidandum exertos reddidit; ita et tu tantos occidis, quantos tua crudelitate, et injusta atque iniqua commendatione sine baptismate atque communionem de corpore exire facis. Quomodo tibi, frater, a mente excessit, quod Dominus per prophetam unicuique nostrum dicit : *Speculatorem te dedi domui Israel. Si non annuntiaveris iniquam iniquitatem suam, et non conversus fuerit impius ab impietate sua, ipse quidem in peccato suo morietur, sanguinem autem ejus de manu tua requiram (Ezech. xxxiii)*. Et si illorum sanguinem de manu tua Deus requiret, quibus non annuntiasti suam iniquitatem, ut ab impietate sua converterentur; quid dices, frater, illi in judicio suo, qui sicut ipse dicit, non venit animas perdere, sed salvare? Cum venient illæ animæ ante Deum, qui natos suos ad baptismi gratiam, ut de potestate diaboli liberarentur, fideliter portaverunt et obtulerunt, vel per patronos [f. paternos] miserunt? Sed et illæ non minores grandium animulæ parvulorum, qui

non suo sed alieno peccato obnoxia liberari poterunt, nisi tua crudelitate et furore ac indignatione animi forent perditæ, et clamabunt adversum te ? pro quibus omnibus, additis etiam tuis peccatis, tot martibus dignus, quot occidisti crudeliori gladio tuæ sententiæ, quam materiali machæra.

Unde dignas ultionum pœnas sine dubio lues. Cur non te terruit, et ab hac perversa sententia proferenda Domini promissio revocaverit, qua universali Ecclesiæ suæ per Isaiam prophetam pollicitus est dicens : *Ab oriente adducam semen tuum et ab occidente congregabo te. Dicam Aquiloni, Da; et Austro, Noli prohibere (Isa. xxxiii).* Et tu prohibes Ecclesiæ ab immaculato divini fontis utero Domino filios generare, qui non venit animas perdere, sed salvare. Quomodo te præterit quod in Evangelio legis : *Offerebant, inquit, illi parvulos ut tangeret illos. Discipuli autem comminabantur afferre. Quos cum videret Jesus indigne tulit, et ait illis: Sinite parvulos venire. ad me, et ne prohibueritis eos (Matth. xix; Marc. x).* Et tu prohibes offerri Domino parvulos? Et si tremendum Dei iudicium te non terruit, et a furore animi tui ut talia præciperes revocare non potuit, quia nunquam et nusquam postquam sacrum Nicænum concilium est celebratum, tale quid factum fuisse audisti, sicut fieri præcepisti : timere debueras ne solus hoc ageres quod nullus Christianorum unquam facere ausus fuit. Nam de infantibus baptizandis qui necdum baptizare noscuntur, quoties necessitas exegerit, regula ecclesiastica per beatum Siricium prolata demonstrat, dicens ita : Infantibus qui necdum loqui potuerunt per ætatem, ut his quibus in qualibet necessitate opus fuerit sacri unda baptismatis, omni volumus celeritate succurri, ne ad nostrarum perniciem tendat animarum, si negato desiderantibus fonte salutaris, exiens unusquisque de sæculo et regnum perdat et vitam. Quicumque etiam discrimen naufragii, hostilitatis incursum, obsidionis ambiguum, vel cujuslibet corporalis ægritudinem desperationis inciderint, et sibi unico credulitatis auxilio poposcerint subveniri, eodem quo poscunt momento temporis expetitæ regenerationis præmia consequantur. Hactenus erratum in hac parte sufficiat : nunc præfatam regulam omnes teneant sacerdotes qui nolunt ab apostolicæ petræ super quam Christus universalem construxit Ecclesiam, soliditate divelli. Et beatus Leo dicit : « Principalis et

A sine dubitatione testentur, neque ipsi sunt per ætatem de traditis sibi sacramentis idonei respondere, absque ullo scrupulo eos esse baptizandos præcepit, ne ista trepidatio eos faciat sacramentorum purgatione privari. Et sanctus Leo hinc dicit : « Si nulla exstant indicia inter propinquos aut familiares, nulla inter clericos, aut vicinos, quibus hi de quibus queritur baptizati fuisse doceantur, agendum est ut renascantur, ne manifeste pereant. In quibus quod non ostenditur gestum, ratio non sint ut videatur iteratum : qui autem possunt meminisse quod ad ecclesiam veniebant cum parentibus suis possunt recordari an quod eorum parentibus dabatur acceperint. Sed si hoc etiam ab ipsa memoria alienum est, conferendum eis videtur, quod collatum esse nescitur; quia non temeritas intervenit præsumptionis, ubi est diligentia pietatis. » Et sanctus Gelasius : « Baptizandi sibi quispiam passim quoque tempore nullam credant inesse fiduciam præter paschale festum et pentecostes venerabile sacramentum, excepto duntaxat gravi languoris incursum, in quo verendum est ne, morbi crescente periculo, sine remedio salutari fortassis ægrotans exitio præventus abscedat. Et diaconi absque episcopo et presbytero baptizare non audeant, ni prædictis fortassis officiis longius constitutis necessitas extrema compellat; quod et laicis Christianis facere plerumque conceditur. » Et sanctus Gregorius scribens ad Joannem Larissæum episcopum, dicit : « Secundum, inquit, de criminalibus capitulum adversus Adrianum episcopum videtur esse propositum de infantibus ejus jussu a sacri baptismatis susceptione prohibitis; atque in inablutos sorde peccati defunctos in tenebris. » Vide, frater, quia esse hoc criminale capitulum sanctus demonstrat Gregorius. Sed et de ultima pœnitentia, et viatico munere nulli negare debere illius sententia sufficere tibi debuerat qui dicit : *Venit filius hominis querere et salvare quod perierat (Luc. xix)* : et licet misericordia Domini qua plena est terra illis qui ultimam pœnitentiam, et viaticum munus sibi dari deposcunt, si eis fuerit denegatum, subvenire possit qui corde credunt ad justitiam, ore autem confitentur ad salutem, transfixi dolore cordis, et baptizata conscientia suis lacrymis gratiam Dei incomprehensibiliter percipiant, quod eis denegare jussisti, sicut in illo latrone quod, ut beatus Augustinus dicit, ex baptismi sacramento defuerat, complevit omnipotens benignitas; quia non superbia, vel contemptu, sed ex necessitate illi defuerat : tamen manifestissime tu reus eris illarum omnium animarum, si tua præceptione sine pœnitentia et viatico munere rebus humanis excedant.

De viatico munere sanctæ communionis sacrum Nicænum concilium dicit : « Quia generaliter omnium cuilibet in exitu posito, et poscenti sibi communionis gratiam tribui, episcopus probabiliter ex oblatione dare debet. » De qua sancta et mystica synodo beatus Leo papa ad Anatolium episcopum Constantinopolitanum scribit dicens : « Quod illa Nicænorum

canonum per sanctum vere Spiritum ordinata conditio in nulla sit parte solubilis. Nulla sibi metipsum de multiplicatione congregationis synodalia concilia blandiantur, neque trecentis illis decem et octo episcopis quantumlibet copiosior numerus sacerdotum vel comparare se audeat vel præferre, cum tanto divinitus privilegio sit consecrata, ut sive per pauciores, sive per plures ecclesiastica judicia celebrentur, omni penitus auctoritate sit vacuum quidquid ab illorum fuerit constitutione diversum. » Et sanctus Siricius etiam de apostatis, et idolorum cultu, ac sacrificiorum contaminatione profanatis decrevit, ut in ultimo fine suo reconciliationis gratia eis non denegetur: quia, dicente Domino, nolumus mortem peccatoris, tantum ut convertatur et vivat. Et sanctus Innocentius dicit, quia communionem dari obtinentibus placuit, et propter Domini misericordiam quasi viaticum profecturis, et ne Novatiani hæretici negantis veniam asperitatem et duritiam subsequi videamur. Tribuitur ergo cum poenitentia extrema communio, ut homines hujusmodi vel in supremis suis permittente Salvatore nostro a perpetuo exitio vindicentur. Et sanctus Cælestinus dicit: « Agnovimus, inquiens, poenitentiam morientibus denegari, nec illorum desideriis annui qui obitus sui tempore hoc animæ suæ cupiunt remedio subveniri. Horremus, fateor, tantæ impietatis aliquem reperiri, ut de Dei pietati desperet, quasi non possit ad se quovis tempore concurrenti succurrere, et periclitantem sub onere peccatorum hominem pondere quo se ille expediri desiderat liberare. Quid hoc rogo aliud est quam morienti mortem addere, ejusque animam sua crudelitate ne absoluta esse possit occidere? cum Deus ad subveniendum paratissimus sit, et invitans ad poenitentiam sic promittat: *Peccator in quacunque die conversus fuerit peccata ejus non reputabuntur ei* (Ezech. xxxiii). Et iterum: *Nolo mortem peccatoris, sed tantum ut convertatur et vivat* (ibid.). Salutem ergo homini adimit quisquis ei mortis tempore poenitentiam denegavit: et desperavit de clementia Dei, qui eum ad subveniendum morienti sufficere vel momento posse non credit. Perdidisset latro in cruce præmium ad Christi dexteram pendens, si illum unius horæ poenitentia non juvisset; cum esset in pœna poenituit, et per unius sermonis promissionem habitaculum paradisi Domino promittente promeruit. Vera ergo ad Dominum conversio in ultimis positum mente potius est æstimanda quam tempore, propheta hoc taliter asserente: *Cum conversus ingemueris, tunc salvus eris* (ibid.). Cum ergo Dominus sit cordis inspector, quovis tempore non est deneganda poenitentia postulanti; cum illi se obliget iudici, cui occulta omnia noverit revelari. » Et sanctus Leo: « Poenitentia, inquit, quæ dilata est cum studiosius petita fuerit non negetur, ut quoquomodo ad indulgentiæ medicinam anima vulnerata perveniat. Et item: His autem qui in tempore necessitatis, et in periculi urgentis instantia præsidium poenitentiae, et mox reconciliationis implorant, nec satisfactio

interdicenda est, nec reconciliatio deneganda; quia misericordiae Dei nec mensuras possumus ponere, nec tempora diffinire, apud quem nullas patitur veniæ moras vera confessio, dicente Dei Spiritu per prophetam: *Cum conversus ingemueris tunc salvus eris* (ibid.). » Et alibi: *Dic tu iniquitates tuas prior, ut justificeris* (Prov. xviii). Item: *Quia apud Dominum misericordia est, et copiosa apud eum redemptio* (Psal. xxix). In dispensandis itaque Dei donis non debemus esse difficiles, nec accusantium se gemitus lacrymasque negligere, cum ipsam poenitendi affectionem ex Dei credamus inspiratione conceptam, dicente Apostolo: *Ne forte det illis Deus poenitentiam, ut respiscant ad diaboli laqueis, a quo captivi tenentur ad ipsius voluntatem* (II Tim. ii). Verum etiam, ut diximus, talium necessitati ita auxiliandum est, ut actio illius poenitentiae, nec communionis gratia, si eam etiam amisso vocis officio per indicia integri sensus postulant negetur. At si aliqua vi ægritudinis ita fuerint aggravati, ut quod paulo ante posebant sub præsentia sacerdotis significare non valeant, testimonia eis fidelium circumstantium prodesse debebant, ut simul et poenitentiae et reconciliationis beneficium consequantur.

Et item idem sanctus Leo dicit: « Hoc itaque admonitio nostra denuntiat, quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem, qui socius esse noluit disciplinæ. Ne quid vero sit quod prætermisum a nobis forte credatur, omnia decretalia tam beatæ recordationis Innocentii, quam omnium decessorum nostrorum, quæ de ecclesiasticis ordinibus et canonum promulgata sunt, disciplinis ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. Item idem de damnatione violatoris sacrorum ex hujusmodi re constitutorum. Et quia hæc, frater, ignorare non vales, et hoc iudicium jure depromptum non nescis, præsertim cum non catholici episcopi, sed Novatiani hæretici, ut beatus Innocentius, et sanctus Ambrosius et cæteri quique orthodoxi doctores demonstrant, sit ista perniciosissima et exitiabilis atque execrabilis secta: cavere debueras ne talia sicut oblata mihi ecclesiæ tibi commissæ petitio monstrat, inconsulte præciperes: puto enim te legisse epistolam sancti Augustini ad Honoratum episcopum, in qua invenire potuisti potius te mori debere cum plebe tibi commissa, quam ut illis desint sine quibus vivere et salvari non possunt sacramenta celestia. Qua de re, frater, vide ne tu sis homicida, et etiam homicidarum homicida, quia sacramenta cœlestia plebi subtrahi facis, sine quibus vivere non potest, cum adsint qui eadem sacramenta licite plebi valeant ministrare.

« Pertimesce nihilominus quod de sententia sancti Evangelii qua Dominus dicit: *Si quis vobis aliquid*

dixerit, dicite quia Dominus his opus habet, et confestim dimittet eos (Matth. XXI), loquente in eis Spiritu sancto nostri dixere majores: Doctoribus, inquit, præcipitur, ut si quid eis obstiterit adversi, si quis verbo contradixerit veritatis, si quis prohibuerit peccatores solvi a laqueis diaboli, et per confessionem fidei Domino adduci, non tamen a prædicando desistant, sed constanter insinuent, quia Dominus ad ædificandam Ecclesiam suam talibus opus habet. Et proh dolor! cum nemo his contradicat, tu econtra implorantibus contradicis; alligans eos ne divina munia populis exsequantur, quorum interest sacra missarum officia celebrare, mysticam distributionem spiritualis alimoniam corporis scilicet et sanguinis Domini nostri Jesu Christi in remissionem peccatorum fidelibus distribuere, per lavaerum regenerationis de potestate diaboli in regnum Christi non baptizatos transferre; per januam reconciliationis et viatici muneris sanctificationem animas ab æterno interitu liberare, Domino de cælestibus tibi clamante: quia *pastor bonus animam suam ponit pro ovibus suis* (Joan. X). Qui fecit quod docuit, ostendit quod jussit, cum præduce Juda cohors et ministri Judæorum venerunt, ut eum et suos cape-re dicit: *Si me quæritis, sinite hos abire* (Joan. XVIII), sicque comprehendi se pertulit, et qui populos ad fidem converterent, et conversis sacra mysteria celebrarent, solutos abire permisit. Nam si te provocante aliquid tibi adversi accidit, patienter ferre debueras, usque dum ego qualiscunque metropolitanus tuus cum coepiscopis et confratribus nostris Domini nostri regis clementiam pro te adirem; et sicut jam fecimus, quod juste et rationabiliter ab eo postularem, utique obtineremus. Unde nihil dubitamus quin Domino cooperante obtinebimus quod juste et rationabiliter postulabimus, tantum ut tua insolentia nostris petitionibus non obstet: quia etiam in hac tuæ præsumptionis præceptione contra Scripturarum tramitem contraque sacras regulas egeris, tibi ex loci nostri officio necessarium duxi ostendere: Scriptum est enim: *Interroga Patrem tuum et annuntiabit tibi; majores tuos, et dicent tibi* (Deut. XXXII); et: *Palpebræ tuæ præcedant gressus tuos* (Prov. IV); et: *Omnia fac per consilium, et post factum non pœniterebis* (Eccli. XXXII). » Et sacrum Nicænum concilium dicit: Antiqua consuetudo servetur per Ægyptum, Libyam, et Pentapolim, ita ut Alexandrinus episcopus horum omnium habeat potestatem, quia et urbis Romæ episcopo parilis mos est. Similiter autem et apud Antiochiam, cæterasque provincias suis privilegia servantur ecclesiis. Quod capitulum sanctus Bonifacius papa ad Hilarium Narbonensem episcopum scribens exponit ita. Convenit nos paternarum sanctionum diligentes esse custodes; nulli etenim videtur incognita synodi constitutio Nicæna, quæ ita præcepit ut eadem proprie verba ponamus, per unamquamque provinciam jus metropolitanos singulos habere debere, nec cuiquam duas esse subjectas. Quod illi, quia aliter cre-

A dendum non est, servandum sancto Spiritu suggerente sibimet censuerunt.

Et post aliquanta: « Quod idcirco dicimus, ut advertat charitas tua adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem semper exspectet. » Et Africanum concilium scribens ad Cælestinum papam: « Decreta, inquit, Nicæna sive inferioris gradus clericos, sive episcopos ipsos suis metropolitanis commiserunt. » Et sanctus Leo ad Anastasium Thesalonicensem episcopum: secundum sanctorum Patrum, inquit, « Canones Spiritu Dei conditos, et totius mundi reverentia consecratos, metropolitanos singularum provinciarum episcopos, quibus ex delegatione nostra fraternitatis tuæ cura prætenditur, jus traditæ sibi antiquitus dignitatis intemeratum habere decernimus: ita ut a regulis præstitutis nulla aut negligentia aut præsumptione discedat. » Et item ad Theodorum Forojuliensem episcopum: « Sollicitudinis, inquit, tuæ is ordo esse debuerat, ut cum metropolitano tuo de eo quod quærendum esse videbatur conferre; quia in causis quæ ad generalem observantiam pertinent omnium Domini sacerdotum nihil sine primatibus oportet impleri. Certum est enim quoniam illa quæ baptizandis parvulis, et de ultima pœnitentia, et viatico munere nulli denegando ex sacris regulis præmissi, ad generalem observantiam Domini sacerdotum pertinent, contra quæ inconsulte præcipere non debueras. » Et Antiochenum concilium dicit: « Per singulas regiones episcopos convenit nosse metropolitanum episcopum sollicitudinem totius provinciam gerere; propter quod ad metropolim omnes undique qui negotia videntur habere concurrant: Unde placuit eum et honore præcellere, et nihil amplius præter eum cæteros episcopos agere, secundum antiquam a patribus nostris regulam constitutam, nisi ea tantum quæ ad suam diocesim pertinent, possessionesque subjectas. Unusquisque enim episcopus habeat suæ parochiæ potestatem, ut regat juxta reverentiam singulis competentem, et providentiam gerat omnis possessionis, quæ sub ejusdem potestate; ita ut presbyteros et diaconos ordinet, et singula suo judicio comprehendat; amplius autem nihil agere tentent præter antistitem metropolitanum. » Diligenter attende quod dicitur presbyteros et diaconos parochiæ suæ ordinet episcopus; ordinet autem et non exordinet, nec contra regulas ab officio submoveat vel suspendat: et ibidem subsequitur, singula suo judicio comprehendat: singula autem dicit ut suo judicio comprehendat, et non quæ ad generalem observantiam omnium Domini pertinent sacerdotum, quæ, ut Leo dicit, sine primatibus non oportet impleri. Et noli claudere aures cordis ad id quod ibidem diligentissime dicitur: Unusquisque, inquit, episcopus habeat suæ parochiæ potestatem, ut regat juxta reverentiam singulis competentem. Proinde cavere debueras ne concessa tibi tuæ parochiæ potestate

contra hos sacros canones abutereris, qui dicunt ut regat episcopus suam parochiam juxta reverentiam singulis competentem, et non subrigat [f. subruat], sicut tu fecisti, quantum ex te fuit, exitio juxta irreverentiam cunctis incompetentem. Omnibus enim irreverentiam quam exhibuisti in tua parochia noscitur esse incompetentem, quæ ad omnium probatur pertinere exitum; cum singulis de singulis, quanto magis de pluribus timendum Dominus dicat: *Qui scandalizaverit unum de pusillis istis qui in me credunt, expedit ei ut suspendatur mola asinaria collo ejus, et demergatur in profundum maris* (Matth. xviii Marc. ix; Luc. xvii): quia, ut beatus monstrat Gregorius, ad sanctitatis speciem deducto, et verbo vel exemplo cæteros destruenti, melius profecto fuerit ut hunc ad mortem sub exteriori habitu terrena acta constringerent, quam in sacro officio positus cæteris mortem verbo et opere propinaret. Quia nimirum si solum ederet, utcumque hunc tolerabilior inferni pœna cruciaret.

Propterea, frater charissime, rogo, hortor, deprecor, et quanta possum dulcedine ac humilitate expono, et metropolitana auctoritate commoneo, ut sicut Dominus præcipit per prophetam, quantocius has *dissolvas colligationes impietatis, solvas hos fasciculos deprimentes* (Isa. lviii), dimitte eos qui a te constricti sunt liberos, et hoc omne onus disrumpe: attendens quod papa Hilarius in decretis suis dicit: « Qui, inquit, in causis Dei contumacia, vel contemptu deliquerit, aut ipse quod perperam fecit abolere noluerit, in se quidquid mali non resecurit inveniet, Quapropter qui te scis quibusdam præpositum, sicut sanctus Leo in decretis suis ad Anastasium Thessalonicensem episcopum dicit: non moleste feras aliquem tibi esse prælatum, sed obedientiam quam exigis etiam ipse dependas, et sicut non vis gravis oneris a me impositam tibi sarcinam ferre, ita non audeas alii importabile pondus imponere: discipuli enim sumus humiliter et mitis magistri dicentis: *Discite a me quia mitis sum et humilis corde, et invenietis requiem animabus vestris: jugum enim meum suave est, et onus meum leve* (Matth. xv). Et sit quod absit, his sacris ac regularibus monitis obedire renueris, scito metropolitana auctoritate, fulta apostolicæ sedis, et canonum sacrorum judicio, sicut præmissimus, hanc pestiferam atque mortiferam excommunicationem tuam solvendam. Nam si quælibet persona tuæ parochiæ a te excommunicata foret, unde dubitari posset utrum sicut sacri Nicæni canones dicunt, pusillanimitate, aut contentione, vel alio quolibet vitio tuo videretur a congregatione seclusa, expectarem utique usquequo omnibus communiter simul episcopis congregatis provinciæ discuteretur hujusmodi quæstio, et vel tibi, vel in communi placeret humaniorem pro tali ferre sententiam. Nunc autem quia tam manifeste causa patet execrabilis atque exitiabilis esse a te præcepta, ut præceptis evangelicis contraria, et decretis sanctorum inveniatur adversa, quod, ut sanctus

A Leo scribit, etiam in dubiis et obscuris cavere debueras, et nullas sustinet moras habere, supra dicta auctoritate denuntiabo esse omni penitus virtute vacuum quidquid a te ex prædictis capitulis præceptum est ab illorum constitutione diversum. In cujus tuæ præsumptionis evacuatione, ut partim sensu, partim verbis utar beati Gelasii, non novæ constitutionis auctor, sed veteris constituti executor existo, quod non solum præsuli metropolitano, sed et cuicumque est pontifici licitum, quoniam error qui semel est cum suo auctore damnatus, in participem quolibet modo pravæ communionis effectum execrationem sui gestat et pœnam. »

HINGMARI RHEMENSIS

AD EUMDEM.

B HINGMARIUS Rhemorum episcopus dilecto fratri HINGMARI Laudunensi coepiscopo nostro salutem.

Ante non longum tempus inconvenientes atque illicitas excommunicationes in eos etiam qui ad te non pertinebant ira præcipiti et perturbata contra sacras regulas jaculasti, unde maximum scandalum in hoc regno, et in ista ecclesia commovisti: de quibus excommunicationibus nuper in Vermeria te una cum fratribus, et coepiscopis nostris conveni, easque licet non sine tui calumniosa invidia his quibus ipsas maledictiones irrogaveras quomodo dissolvisti, a nobis commonitus ut in proferenda sententia de cætero nullatenus præceps existeres: sed tu addens pejora prioribus, sicut data mihi petito a Laudunensi Ecclesia monstrat, in vindictam C injuriarum tuarum præcepisti, ut in commissa tibi parochia nemo missam cantaret, nemo communionem sacram perciperet, cum Dominus tradens sacrosancta mysteria corporis, et sanguinis sui celebranda suis discipulis, et per eos omnibus sacerdotibus dixerit: *Hæc quotiescunque feceritis in mei memoriam facietis* (Luc. xxii); et de corpore et sanguine suo: *Nisi manducaveritis, inquit, carnem filii hominis, et biberitis ejus sanguinem, non habebitis vitam in vobis* (Joan. vi). Præcepisti quoque ut nemo parvulos, etiam mortis urgente periculo in tua parochia baptizaret, cum Dominus dicat: *Docete omnes gentes, baptizantes eos in nomine Patris, et Filii, et Spiritus sancti* (Marc. xvi); et: *Nisi quis renatus fuerit ex aqua et Spiritu sancto non intrabit in regnum cælorum* (Joan. iii). Vetuisti nihilominus ut nemo quemquam ultimam pœnitentiam vel reconciliationem reciperet, vel poscenti ultimo sacræ communionis viatico subveniret, cum Dominus omnibus prædicet. *Pœnitentiam agite, appropinquabit enim regnum cælorum* (Matth. iii.) Et Jacobus apostolus: *Infirmatur, inquit, aliquis in vobis, inducat presbyteros Ecclesiæ, et orent super eum, ungentes eum oleo in nomine Domini, et oratio fidei salvabit infirmum, et allevabit eum Dominus; et si in peccatis sit, dimittentur ei. Confitemini ergo alterutrum peccata vestra, et orate pro invicem ut salvemini* (Jac. v), Et sanctus Gregorius de resuscitatione quatruiduani

mortui loquens dicit, quia illos nos debemus per pastoralem auctoritatem solvere, quos auctorem nostrum cognoscimus per suscitantem gratiam vivificare. Quæ nimirum vivificatio ante operationem rectitudinis in ipsam cognoscitur confessione peccati. Veniat itaque foras mortuus, id est culpam confiteatur peccator, venientem vero foras solvant discipuli, ut pastores Ecclesiæ ei pœnam debeant amovere quam meruit, qui non erubuit confiteri quod fecit. Et de corpore, ac sanguine suo, in quibus salus animarum et corporum nostrorum consistit, Dominus dicit : *Qui manducat meam carnem, et bibit meum sanguinem habet vitam æternam, et ego resuscitabo eum in novissimo die* (Joan. vi). Quæ resuscitatio discreta erit ab eorum resuscitatione qui non manducant carnem filii hominis, et non bibunt ejus sanguinem, ac per hoc non habebunt vitam. Jussisti etiam maximam inhumanitatem ut nemo mortuum in tua parochia sepeliret, cum Dominus per prophetam egenos et vagos quemque in domum suam inducere jubeat, et Dominus in judicio dicet, *Hospes fui, et suscepistis me* (Matth. xxv) et tu hospitium in ventre omnium matris scilicet terræ mortuis denegari jussisti, de quibus præcepta evangelica atque apostolica, et sanctorum decreta tibi direxi, quæ sicut mihi non incerta relatione renunciatum est suscepisti quidem illa, sed legere noluisti, cum dicat Apostolus : *Quæcunque scripta sunt ad nostram doctrinam scripta sunt, ut per consolationem Scripturarum spem habeamus* (Rom. xv) : qui enim doctrinam et consolationem Scripturarum abnuit, spem salutis se non habere ostendit : nam beatus Joannes apostolus a Domitiano principe in Pathmo insula relegatus, et humana consolatione destitutus, consolationem revelationis quam divinitus acceperat in eodem exsilio ac relegatione manu propria scripsit, et ad Ecclesias quibus missus fuerat prædicare, direxit. Et sanctus Paulus apostolus ad Timotheum scribens dicit : *Memor esto Jesum Christum resurrexisse a mortuis ex semine David secundum Evangelium meum, in quo laboro usque ad vincula quasi mala operans, sed verbum Dei non est alligatum : ideo omnia sustineo propter electos, ut et ipsi salutem consequantur quæ est in Christo Jesu cum gloria cælesti* (II Tim. ii).

Et tu, frater charissime, non solum ea legere quæ tibi misi, et mihi respondere cum posses debueras ; verum et ministros Ecclesiæ tibi commissæ quibus modis posses debueras non excommunicatione ligare, sed consolari et adhortari ut in divino servitio, et assidua oratione, et salvatione populi tibi commissi laborare studerent. Et si me digne propter indignitatem meam despicias, tamen professionis, ac subscriptionis tuæ memor non debueras in qualicumque metropolitano tuo debitam obedientiam denegare, quam a tuis subditis etiam in his perniciosis tuis jussionibus exigis. Quapropter iterata commonitione, pro loci mei officio te convenire congruum duxi, suadens ut quod male ligasti dissolvas ; Dominus et Creator, ac Redemptor, atque Salvator noster dicit : *Si quis*

A mihi ministrat me sequatur (Joan. xii), id est me imitetur ; de quo scriptum est : *Quæ cepit Jesus facere, et docere* (Act. i), qui fecit et docuit, quæ tibi in tuarum injuriarum tribulatione agendum et jubendum fuerat : nam imminente suæ passionis articulo pro se et pro suis, sed et pro his qui credituri erant per verbum eorum in eum, Patrem oravit secundum humanitatem qui omnia donorum munera largitur cum Patre divinitatis æqualitate. Et qui præcepit discipulis suis dicens : *Orate pro persequentibus et calumniantibus vos, ut sitis filii Patris vestri qui in cælis est* (Matth. v ; Luc. vi), in cruce non solum pro suis persecutoribus, verum et pro suis interfectoriis exoravit, et nunc sedens ad dexteram Patris interpellat pro nobis. Jussit etiam discipulis suis antequam pateretur, cum tæderet et mæstus esset usque ad mortem, ut orarent ne in tentationem intrarent. Et sicut legimus, *Oratio fiebat ab ecclesia* (Act. xii) pro Petro recluso in carcere et victo catenis duabus ; sed et Petrus oravit, sicut legimus, pro Ecclesia. Paulus quoque in persecutionibus, in carceribus, in vinculis atque catenis positus, sicut legimus, sæpe ab Ecclesia orari poposcit ut liberaretur ab infidelibus et importunis ac malis hominibus, sed et ipse oravit pro Ecclesia. Jacobus apostolus præcipitatus de pinnaculo templi, flexis genibus oravit pro suis occisoribus. Et beatus Stephanus positus genibus oravit pro se lapidantibus. Et apostolus de hujusmodi loquens dicit nobis : *Quorum intuentes exitum conversationis, imitamini fidem* (Heb. xiii). Et item Jacobus apostolus dicit : *Tristatur aliquis vestrum, oret animo æquo, et psallat ; et : Orate pro invicem ut salvemini* (Jac. v) : genus est enim non contemnendum exauditionis cum cordis contritione ad Dominum clamare in tribulatione, sicut scriptum est : *Ad Dominum cum tribularer clamavi et exaudivit me* (Psal. cxix).

Tu autem contra hæc novus doctor, imo novus præsumptor injuriarum, missam, ut auidi, non vis cantare, nec etiam audire, et quasi aliorum oratione non indigens vetuisti pro te, et pro se orare tibi commissam Ecclesiam, et causa tuæ injuriæ jussisti Christo in membris suis, qui sedens ad dexteram Patris dixit Paulo : *Quid me persequeris ?* (Act. ix et xxvi) injurias importare et mortem inferre. Paulus quoque et Silas quorum locum tenere debes, in ecclesia cæsi virgis, et missi in interiorum carcerem, pedes habentes strictos in ligno, media nocte adorantes laudabant Deum, et audiebant eos qui in custodia erant. Subito vero terræ motus factus est magnus, ita ut moverentur fundamenta carceris, et statim aperta sunt omnia ostia, et universorum vincula soluta sunt. Expergefactus autem custos et videns apertas januas carceris, evaginato gladio volebat se interficere, æstimans fugisse victos : clamavit autem Paulus voce magna dicens, *Nihil feceris tibi mali universi enim hic sumus* (Act. xvi). Et tu tantam benignitatem Ecclesiæ tuæ filiis tibi commissis non es passus impendere, quantam idem Paulus suo ad

mortem custodi impendit. Unde, frater, moneo te iterum paterna et fraterna dilectione atque auctoritate metropolitana, respisce ab hac prava intentione, et concordans præceptis evangelicis atque apostolicis, et sanctorum decretis, quæ tibi in altera rotula pridem misi, non dedigneris eis, et cum eis patrono tuo sancto Remigio, in cujus sede, licet indignus sedeo, dicere quod sanctus apostolus Paulus dixit etiam suis minoribus : *Sicui aliquid donastis, et ego (II Cor. II)*. Obaudi, obsecro, illorum decreta salubria per quos locutus est Christus, ne, quod absit, tibi dicat : *Qui est ex Deo, verba Dei audit, propterea vos non auditis, quia ex Deo non estis (Joan. VIII)*. Pertimesce, Rogo, quia sanctus Innocentius, beatus Ambrosius, et cæteri catholici doctores hæc quæ jussisti de non suscipiendis pœnitentibus ad pœnitentiam hæresim dicunt esse Novati hæretici. Et non baptizare parvulos in mortis periculo constitutos schisma est maximum ab universali Ecclesia. Et in decretis apostolicæ sedis legitimus quia sicut universalis Dei semper tenet, et tenet Ecclesia, schismaticus et hæreticus nisi conversi fuerint ad sanctam matrem catholicam et apostolicam Ecclesiam, in regnum Dei intrare non possunt, sed pars eorum est in gehenna : et si de pane cœlesti, id est de suavitate divina gustant gehennæ participes, iudicium sibi sumunt. Propterea, frater, ab hac secta, et ab hoc schismate revoca sensum tuum, et sequere quod sanctus Cœlestinus in decretis suis ad Galliarum episcopos scripsit dicens : Obsecrationum, inquit, sacerdotalium sacramenta respiciamus, quæ ab apostolis tradita in toto mundo, atque in omni catholica Ecclesia uniformiter celebrantur, et legem credendi lex statuat supplicandi : cum enim sanctarum plebium præsules mandata sibi legatione funguntur apud divinam clementiam, humani generis agunt causam, et tota secum Ecclesia congemiscente postulant et precantur, ut infidelibus donetur fides; ut idololatræ ab impietatis suæ liberentur erroribus; ut Judæis, ablato cordis velamine, lux veritatis appareat; ut hæretici ad catholicæ fidei perfectionem respiscant; ut schismatici spiritum reditivæ charitatis accipiant; ut lapsis pœnitentiæ remedia conferantur; ut denique catechumenis ad regenerationis sacramenta perductis cœlestis misericordiæ aula reseretur. Et hæc conferens in corde tuo noli pietatis viscera petentibus salutem claudere, sed pete Deum omnipotentem, ut et in te impleat quod per prophetam olim pollicitus est dicens : *Auferam a vobis cor lapideum, et dabo vobis cor carneum, et faciam ut in præceptis meis ambulatis, et operemini (Ezech. xxxvi)*.

Cæterum fratres nostri quos ad te misi mihi renuntiaverunt te illis præcepisse, ut me precarentur propter Dei reverentiam, et sanctorum ejus et sedis apostolicæ auctoritatem ne cogerem te respondere quandiu in tali detineris custodia et absentia clericorum tuorum, nec iudicium, nec præiudicium inferrem tibi, vel tuæ parochiæ. Quæ petitio partim non est justa, neque rationabilis : quod enim petisti

ut præiudicium tibi vel parochiæ tuæ non inferam, obaudio. Quod petisti ut iudicium tibi vel parochiæ tuæ non inferam, non obaudio : dicit enim Dominus per prophetam : *Si feceritis iudicium inter virum et proximum ejus (Jerem. VII)*, et reliqua. Et Sapientia per Salomonem : *Erue eos qui ducuntur ad mortem, et qui trahuntur ad interitum liberare ne cesses (Pr. xxiv)*. Quod mihi a Domino, quem suo iudicio in metropolitana sede Rhemorum provinciæ constituere voluit, præcepi audio de his qui tua præceptione ducuntur ad mortem, et trahuntur ad interitum. Et decreta Nicæna, sicut Africana synodus scribens ad Cœlestinum papam demonstrat, sive inferioris gradus clericos, sive episcopos ipsos suis metropolitanis apertissime commiserunt. Et sanctus Bonifacius capitulum Nicæni concilii exponens, post alia diffinivit quatenus metropolitani sui unaquæque provincia in omnibus rebus ordinationem semper expectet. Et Antiochenum concilium : Per singulas, inquit, regiones episcopos convenit nosse metropolitanum episcopum sollicitudinem totius provinciæ gerere, propter quod ad metropolim omnes undique qui negotia videntur habere concurrant. Et cautum est sacris canonibus ut nullis liceat apud se celebrare concilia præter eos quibus metropolitana jura videntur esse commissa : in ipsis autem conciliis absint presbyteri et diaconi, et omnes qui se læsos existimant, et synodi experiantur examen. Propterea quod petisti ut iudicium tuæ parochiæ non inferam, contra regulas sacras petisti, et dicendum est tibi ab Apostolo cum hujusmodi petitoribus : *Petitis, et non accipitis eo quod male petatis (Jac. IV)* : unusquisque enim episcopus, inquit Antiochenum concilium, habeat suæ parochiæ potestatem, ut regat juxta reverentiam singulis competentem, et providentiam gerat omnis possessionis quæ sub ejus est potestate; ita ut presbyteros et diaconos ordinet, et singula suo in iudicio comprehendat, amplius autem nihil agere tetet præter antistitem metropolitanum. Ex hoc capitulo quædam sunt quæ tibi in præmissa rotula scribenda dictavi, sed notarius angustia temporis coarctatus celeriter scribens intermisit; sed ea quæ tibi scripseram ad meum opus diligentius scribere jubens de tabulis relevavi feci, videlicet diligenter attende quod dicitur, presbyteros et diaconos parochiæ suæ ordinet episcopus; ordinet autem, et non exordinet, nec contra regulas ab officio submoveat, vel suspendat, et ibidem subsequitur; singula suo iudicio comprehendat : singula autem dicit ut suo iudicio comprehendat, et non quæ ad generalem observantiam omnium Domini pertinent sacerdotum, quæ, ut Leo dicit, sine primatibus non oportet impleri. Et noli claudere aures cordis ad id quod ibidem diligentissime dicitur : Unusquisque, inquit, episcopus habeat suæ parochiæ potestatem, ut regat juxta reverentiam singulis competentem.

Proinde cavere debueras ne concessa tibi tuæ parochiæ potestate contra hos sacros canones abutereris, qui dicunt ut regat quis episcopus suam paro-

chiam juxta reverentiam singulis competentem, et non subrigat, sicut tu fecisti quantum ex te fuit exitio juxta irreverentiam cunctis incompetentem: omnibus enim irreverentia quam exhibuisti in tua parochia noscitur esse incompetens, quæ ad omnium probatur pertinere exitum, cum de singulis, quanto magis de pluribus timendum Dominus dicat: *Qui scandalizaverit unum de pusillis istis qui in me credunt, expedit ei ut suspendatur mola asinaria collo ejus, ut demergatur in profundum maris* (Matth. XVII; Marc. IX); quia, ut beatus monstrat Gregorius, ad sanctitatis speciem deducto, et verbo, vel exemplo cæteros destruendi melius profecto fuerat, ut hunc ad mortem sub exteriori habitu terrena acta constringerent, quam in sacro officio positus cæteris mortem verbo vel opere propinaret: quia nimirum si solus caderet, utunque hunc tolerabilior inferni pœna cruciaret. Quod mandasti ut non te cogere responderi in absentia clericorum tuorum, demonstrasti te non recte intelligere sententiam canonum Carthaginensis concilii qua dicitur episcopus nullius causam audiat absque præsentia clericorum suorum, licet jam tibi dixerim qualiter sit intelligenda, et qua de re fuerit constituta. Quod autem mandasti ut, sicut mihi dominus apostolicus scriptis mandaverat, tibi licentiam Romam eundi impetrem, non mihi hoc dominus apostolicus mandavit: habeo enim illius epistolam salvam et incorruptam, in qua hoc quod mandasti non continetur. Quod mandasti quoniam in synodo nuper in Vermeria habita sedem apostolicam appellasti, manifestissime omnes illi episcopi amplius quam viginti qui adfuere in synodo regulariter te sedem apostolicam non appellasse cognoscunt. Quod mandasti quia sedem appellas apostolicam cum in judicio nostro idem in episcopali judicio secundum sacros canones sedem apostolicam appellaveris, habemus ordinem rei qualiter inde agere debeamus. Cæterum nec tibi, nec cuiquam alii Romam ire quantum ex me est contradico. Data VIII Kal. Jun. præsentis secundæ indictionis.

HINCARI RHEMENSIS

AD PRESBYTEROS ET DIACONOS ECCLESIE LAUDUNENSIS.

HINCARIUS Rhemorum episcopus ac plebis Dei famulus, presbyteris, diaconibus ac reliquis ecclesiasticis ordinibus in Laudunensi Ecclesia consistentibus, salutem.

Sicut petitio mihi a vobis per quosdam comministros vestros vice omnium vestrum data continet, frater et coepiscopus noster Hincarius causa injuriarum suarum vos ab officio ecclesiastico, et omnem parochiam sibi commissam a perceptione et communione vivificorum mysteriorum nostræ redemptionis excommunicavit. Qua de re, sicut a quibusdam dicitur, plurimi sine sacri baptismatis regeneratione, et sine ultima penitentia petita et non impetrata, atque sine viatico munere obierunt. Cum Daniel propheta de dictis Domini testimonium contra inique judicantes perhibeat dicens: *Innocentem*

et justum non interficies (Daniel. VIII), id est quibus ligandi atque solvendi est a Deo collata potestas, non de supercilio Pharisæorum assumant ut vel damnent innocentes, vel solvere se noxios arbitrentur, cum apud Deum non sententia sacerdotum, sed eorum vita quærat. Legimus in Levitico (cap. XIV) de leprosis ubi jubentur ut ostendant se sacerdotibus, et si lepram habuerint tunc a sacerdote immundi fiant, non quod sacerdotes leprosos faciant et immundos, sed quod habeant notitiam leprosi et non leprosi, et possunt discernere qui mundus quive immundus sit. Quomodo ergo ibi leprosum sacerdos immundum facit, sic et hic cui Dominus ligandi et solvendi potestatem dedit, alligat et solvit, videlicet episcopus et presbyter, id est, non eos qui insontes sunt alliget, vel qui noxii solvat, sed pro officio suo cum peccatorum ex veritate cognoverit varietates, sciat qui secundum auctoritatem ligandus sit, quive solvendus. Et sanctus Gregorius episcopo Nichoteranæ civitatis pro quibusdam culpis in penitentiam deputato de ejus ecclesia dicat valde esse durum, ut quousque causa ipsius episcopi subtiliter requiratur, non habeat Ecclesia illa presbyterum qui sacrum illic opus valeat celebrare.

Et ad Maximinianum archiepiscopum Syracusanum scribit, ut Venantii patritii, cujus homines in episcopium ejus irruerant, et diversa hostili more mala commiserant, et ob id ipse et sua domus ab eo excommunicati erant, ejusdem Venantii oblationes reciperet, et ipsi ac domui ejus missarum peragi mysteria permetteret, dicens: *Quia ita terrena agi debet utilitas, ut nullum nos jurgium a charitatis valeat connexione disjungere; et ita filiis nos sacerdotes oportet sacerdotalem affectum impendere, ut in causis, prout ratio suffragatur, jurisdictionem Ecclesiæ nostræ debeamus minime præterire. Sed et communicantes Maximo episcopo a se excommunicato isdem beatus Gregorius etiam non petentes absolvit hoc modo. Quosdam, inquiens, ad communicandum eidem prævaricatori violenter esse compressos: quosdam autem vestrum audivi ignorantia lapsos. Omnipotentem Dominum deprecor, ut eos qui huic pravitati minime consenserunt perpetua gratiæ suæ protectione custodiat, et optata eis largitate respondeat: et illos quos aut studium, aut ignorantia, aut quælibet alia causa traxit in culpam, ab omni reatu peccatorum, atque ab omnibus vinculis alienæ obligationis absolvat, omnibusque et in præsentī vita protectionis suæ gratiam tribuat et nos de vobis in æterna patria gaudere concedat. Quia vero isdem frater ac coepiscopus noster his quæ ipse commoverat benignitate principali, et meo ac fratrum et coepiscoporum nostrorum, quorumdam etiam aliorum Dei fidelium interventu prout rationalius paci atque concordiæ convenire perspeximus, non sine magno labore sopitis pro quibusdam causis et redivivis contentionibus episcopali modestiæ inconvenientibus, sua contumacia exigente, ut auditu comperi, jussione domini nostri regis interim a sua est*

ecclesia separatus, usque dum episcoporum consilio tractet qualiter ejus provincia corrigatur, metropolitana sollicitudine vestram commoneo dilectionem, ut quoniam illud nefandum vinculum præceptis evangelicis atque apostolicis contrarium, et decretis sanctorum adversum, quod visus fuerat alligasse, sicut jam vobis aliis litteris intimavi, secundum tramitem Scripturarum, traditionemque majorum auctoritate sedis metropolitanæ noscitur dissolutum devotis sanctæ religionis excubiis mancipati orationum et sacræ oblationis ac cæteris divinæ placationis studiis invigilare curetis.

Præpositus quoque ac decanus fratrum custodiæ tam in spirituali sollicitudine, quam in temporalis administratione solerter curam adhibeant; Thesaurarius de luminaribus et de aliis omnibus, quæ ad ecclesiæ honestatem, utilitatem, atque salvationem, et ad suum ministerium pertinent, providentiam gerat. Archipresbyteri autem totius parochiæ, ac presbyterorum sibi commissorum diligentiam summopere habeant, et rectores ac rectrices monasteriorum ipsius parochiæ sedulo moneant, quatenus et in spiritualibus et in temporalibus subministracionibus necessaria sibi commissis exhibeant. Presbyteros vero assidue decertare hortentur et faciant, ut vigilare super greges sibi commissos non negligant, ne ab eis flagitia perpetrentur, vel perpetrata sine correctione ecclesiastica non remaneant. Ne parvuli sine regenerationis sacramento moriantur. Ne sani homines absque prædicatione et ecclesiastico ministerio fiant. Ne infirmi sine poenitentia et reconciliatione, ac sancti olei unctione et viatico munere de hoc sæculo exeant. Ne mortui sepeliendi officio, et pia commendatione secundum traditionem ecclesiasticam aliquomodo careant. Et omnes tam subditi quam prælati humilitatem invicem insinuantes, et per charitatem invicem servientes prælati subditos diligant, et verbo atque exemplo salubriter instruant, et ad viam salutis erudiendo et corrigendo dirigant: subditi prælati sinceræ dilectionis et humilitatis affectu in Domino obedire procurent, donec aut præfatus frater noster, pastor scilicet vester respectu divino, et intelligentia principis vobis restituatur, aut fratrum et episcoporum nostrorum consilio ac consensu, atque salubri tractatu inveniam, et vestræ in Domino unanimitati renuntiem qualiter et vobis decreto secundum sacras regulas sit agendum. »

EJUSDEM HINCARI

AD HINCARUM LAUDUNENSEM.

HINCARUS Rhemorum episcopus HINCARO dilecto fratri et venerabili coepiscopo nostro salutem.

Sicut oblata mihi a clericis tuis petitione suscepta jam non solum semel, sed et secundo litteris per ministros nostros tibi directis mandavi, causa tuæ injuriæ contra Scripturarum tramitem, traditionemque majorum in tua parochia excessisti et admonitus ut ea corigeres, mihi responsum inde

congruum non remandasti: verum nec quando te coram domino nostro rege, et quibusdam confratribus, et coepiscopis nostris verbis Apostoli monui (*II Tim. i*) ut non negligeres gratiam Dei quæ data est tibi per manuum mearum impositionem, mihi ad rem pertinentia respondisti. Cogitans autem maturiori consilio inde mihi respondere te velle qualiter ea de quibus te monueram correxisti, cum secus tuam parochiam, et in vicinitate tibi commissæ ecclesiæ amplius quam per decem dies immoratus fueram, nullum mihi reddidisti responsum. Nunc vero quia sicut mihi dominus rex litteris suis mandavit, et te audisse jam credo pro utilitate sanctæ Ecclesiæ, et pace populi Christiani una cum eo in longiores partes a parochiis nostris pergemus, pro loci mei sollicitudine commoneo te dignum duxi, ut et ea de quibus tibi scripseram, et si qua sunt alia in parochia tua pergere gesta, regulis sacris concordans debitam satisfactionem exhibere, atque ad tramitem Deo placitum stude reducere. Quatenus inordinata quæque in ea non remaneant, et ne quid contra disciplinam ecclesiasticam de cætero ibidem fiat, quibus valueris modis satagere cura: attendens quod nos omnes monet Apostolus; *Tentatio*, inquires, *vos non apprehendat nisi humana* (*II Cor. x*): humanum quippe est tentari, sed dæmonicum est a tentatione superari, et ad correctionis satisfactionem pedem operis non revocare. Igitur juxta ejusdem beati Apostoli monita, *sollicite cura teipsum probabilem exhibere Deo operarium inconfusibilem, recte tractantem verbum veritatis; vigila, in omnibus labora, opus fac evangelistæ, ministerium tuum imple, sectare justitiam, pietatem, fidem, charitatem, patientiam, mansuetudinem: certa bonum certamen fidei: apprehende vitam æternam in qua vocatus es, et confessus bonam confessionem coram multis testibus* (*II Tim. ii*). Data Kal. x Septemb. præsentis secundæ indictionis.

EJUSDEM HINCARI AD EUNDEM.

HINCARUS Rhemorum episcopus HINCARO Laudunensi episcopo.

Ea quæ mihi pridie per manus Wanilonis venerabilis archiepiscopi ex epistolis apostolicæ sedis pontificum aliis prætermissis de sacris regulis quibus sancta moderatur Ecclesia priusquam formareris in utero novi, et antequam exires de vulva in earundem quas habeo epistolarum integritate, non, ut dicitur, usus pessimo præceptore me ipso, sed eorum traditione qui gratia sancti Spiritus illuminati resplenduerunt, percepi, qualiter sicut et in authenticis scripturis plura inveniuntur, quæ a quibusdam dissona esse videntur, contraria sibi invicem non habeantur, veluti per singula si tempus esset ac otium, et audire dignareris, ex eisdem et aliis sacris regulis possem ostendere, de quibus pauca numero, sed magna merito, et auctoritatis pondere ommissa penitus a te qui vidisti, et auctoritatis non perspicue illa quæ voluisti, et non vidisti quæ noluisti, vel neque vidisti, quæque

videre debuisti. Sed quoniam cum intentione tua non faciunt, nec digito movere sustinuisti. Ingeram ergo illa tibi, ut scias per ea quæ congesisti, intentionis tuæ affectum te non posse perducere ad effectum: decernit enim contra tuam intentionem mystica et sancta Nicæna synodus, quoniam sollicitudo omnium ecclesiarum pertinet ad primæ et sanctæ Romanæ sedis pontificem, ut Alexandrinus episcopus omnium sibi commissorum habeat potestatem; similiter et apud Antiochiam, cæterasque provincias suis privilegia illis servantur ecclesiis: de quibus autem ecclesiis dicat, et quæ, ac qualiter privilegia illis servari debeant, Antiochenum demonstrat concilium. Per singulas, inquit, regiones episcopos convenit nosse metropolitanum episcopum sollicitudinem totius provinciæ gerere; propter quod ad metropolim omnes undique qui negotia videntur habere, concurrant. Et notis quibusdam interpositis: **A**mplius autem nihil agere tentet quin provincialis episcopus præter antistitem metropolitanum, nec metropolitanus cæterorum sine gerat consilio sacerdotum.

Et Africanum concilium: « Decreta, inquit, Nicæna sive inferioris gradus clericos, sive episcopos ipsos suis metropolitanis apertissime commiserunt, » et reliqua. Et sanctus Innocentius dicit: « Si quæ causæ vel contentiones inter clericos, tam superioris ordinis, quam etiam inferioris fuerint exortæ, ut secundum synodum Nicænam congregatis ejusdem provinciæ episcopis jurgium terminetur, » et reliqua. Et sanctus Bonifacius scribit: « Convenit nos patrum sanctionum diligentes esse custodes: nulli etenim videtur incognita synodi constitutio Nicænæ quæ ita præcipit, ut eadem proprie verba ponamus; per unamquamque provinciam jus metropolitanos singulos habere debere, nec cuiquam duas esse subjectas. Quod illi quia aliter credendum non est, servandum sancto Spiritu suggerente sibi met censuerunt. » Et paulo post: « Quod ideo dicimus ut advertat charitas tua adeo nos canonum præcepta servare, ut ita constitutio quoque nostra diffiniat quatenus metropolitani sui unaquæque provincia in omnibus rebus ordinationem semper expectet. » Et sanctus Cælestinus: « Juxta decreta canonum unaquæque provincia metropolitanis suis contenta sit, ut decessoris nostri data ad Narbonensem episcopum continent constituta. Nec usurpationi locus alicui sacerdoti in alterius concedatur injuria: sit concessis sibi contentus unusquisque limitibus, alter in alterius provincia nihil præsumat. » Et Leo: « Secundum sanctorum Patrum canones Spiritu Dei conditos, et totius mundi reverentia consecratos, metropolitanos singularum provinciarum episcopos jus traditæ sibi antiquitus dignitatis intemperatum habere decernimus. » De quibus canonibus idem sanctus Leo apostolicæ sedis pontifex non ignorans quæ sui decessores ac prædecessores scripserunt, ad Anatolium dicit: « Illa, inquit, Nicænorum canonum per sanctum verum Spiritum ordinata conditio in nulla est parte solu-

lubilis, nulla sibi met de multiplicatione congregationis synodalia concilia blandiantur. Neque trecentis illis decem atque octo episcopis quantumlibet copiosior numerus sacerdotum vel comparare se audeat vel præferre, cum tanto divinitus privilegio Nicæna sit synodus constituta, ut sive per pauciores, sive per plures ecclesiastica judicia celebrentur, omni penitus auctoritate sit vacuum quidquid ab illorum fuerit constitutione diversum. » Et ad Maximum Antiochenum episcopum: « Etsi diversa nonnunquam sunt merita præsulum, tamen jura permanent sedium, quibus præsumunt. Emuli perturbationem aliquam fortassis inferre, non tamen possunt minuere dignitatem: quantumlibet enim amplior numerus sacerdotum aliquid per quorundam subreptionem decernat, quod illis trecentorum decem et octo episcoporum constitutionibus inventum adversum, justitiæ consideratione cassatur. » Et ad Theodorum Foro-Juliensem episcopum dicit: « Sollicitudinis quidem tuæ is ordo esse debuerat, ut cum metropolitanis tuo de eo quod quærendum videbatur esse conferres, ac si id quod ignorabat dilectio tua etiam ipse nesciret, instrui vos pariter posceretis, quia in causis quæ ad generalem observationem pertinent omnium Domini sacerdotum, nihil sine primatibus oportet impleri. »

Et Hilarus papa: « Illud etiam non potuimus præterire, quod sollicitudine diligentiore curandum est, ne præter metropolitanorum suorum litteras aliqui episcopi ad quamlibet provinciam audeant proficisci, quod etiam in omni genere officii clericalis per singulas debet ecclesias custodiri. » Et sanctus Gregorius ad Innocentium et cæteros episcopos: « Hortamur, inquit, fraternitatem vestram, ut si quemquam vestrum pro causis propriis ubicunque longius compulerit ambulare necessitas, a metropolitanis vestris, secundum inclytam a sanctis patribus regulam petere licentiam debeatis, nec eum postponere in aliquo præsumatis, excepto si, quod non optamus, contra eundem metropolitanum vestrum vos habere aliquid causæ contingat, ut hoc sedis apostolicæ judicium hi qui petere festinant, licentiam habeant. Quod scitis per canones etiam antiquorum patrum institutione permissum, manifestum est enim de quibus canonibus, id est Sardicensis concilii: sicut et Innocentius ad Victorium Rothomagensis episcopum dicit. Et Gelasius præfatis concordans exponendo psalmi versum dicit: *Deus in gradibus ejus cognoscetur* (Psal. XLVII). Et item: *Distribuite domus ejus* (ibid.) quin Ecclesiæ hic ordo procul dubio qui ecclesiasticarum narratur in altitudine dignitatum, gradibus utique distributis nobis cognoscibilem Deum fieri, et tribuit esse rectorem. Quod Leo ad Anastasium evidenter exponit: « Etsi ordo, inquit, generalis est omnibus sacerdotibus, non tamen communis est dignitas omnibus. Quia et inter beatissimos apostolos in similitudine honoris fuit quædam discretio potestatis, et cum omnium par esset electio,

uni tamen datum est ut cæteris præemineret. De qua forma episcoporum quoque est orta distinctio, et magna ordinatione provisum est ne omnes sibi omnia vindicarent, sed essent in singulis provinciis singuli quorum inter fratres haberetur prima sententia. » Et paulo post : « Qui ergo scit se quibusdam præpositum non moleste ferat aliquem sibi esse prælatum, sed obedientiam quam exigit etiam ipse dependat. »

Et Africanum concilium decrevit ut episcopus a primatu suo vocatus ad synodum competenter occurrat : quod si non potuerit occurrere nisi rationem impedimenti sui apud suum primatem reddiderit, ecclesiæ suæ communionem debere esse contentum ; et qui non fuerit concors circa metropolitanam ecclesiam, et circa sacerdotale consortium, sed inflatus et ab hoc consortio separatus putat propriæ plebi incubandum, et nonnunquam conventus ad concilium venire detractat, circa hunc non tantum diocesim non esse servandam, verum et de propria ecclesia, quæ illi male faverit, omnimodo adnitendum ut etiam auctoritate publica rejiciatur, atque ab ipsa principali cathedra removeatur. Et si accusatus, juxta Carthaginense concilium ad rationem reddendam venire refugerit, et excommunicatus a primatu suo exstiterit, tempore quo non communicat, nec in sua ecclesia, vel parochia communicet. Percurre, frater, sacra concilia canonum, et decreta Romanorum pontificum, et a Siricio et in reliquum, ita ut præmissum est, invenies fuisse decretum ac conservatum, et corrige illorum sensibus sensum tuum, et dirige ad eorum doctrinam et præceptionem intentionem tuam. Et sic intellige sacras regulas sicut illi eas intellexerunt ; quia potest fieri ut ego et tu in multis erremus : non debet autem credi, vel etiam suspicari, ut ipsi erraverint. Quapropter velis nolis hæc statuta convulsa manebunt, a quibus si, quod absit, aliquis pertinaciter deviaverit non inter catholicos computabitur, sed cum schismaticis condemnabitur, quia, ut Hilarus papa dicit, non minus in sanctarum traditionum delinquitur sanctiones, quam in ipsius Domini injuria prosilitur. Et sicut in decretis apostolicæ sedis scriptum est, quisquis schismatico assenserit, schismaticus esse negari non poterit. Quod etsi omnes sacerdotes et mundus assensiat, damnatio consentientes involvit, non prævaricationem consensus absolvit : non enim crimen minuitur, sed accessit, cum generale fit ex privato : hoc enim Deus omnium indicavit qui peccantem mundum generali diluvio interemit.

HINCMARI RHEMENSIS

AD EUMDEM.

HINCMARUS Rhemorum episcopus dilecto fratri et coepiscopo nostro HINCMARO salutem.

Homines de villa quæ vocatur Follanæbrayus, metropolis Ecclesiæ Rhemorum indignitati meæ commissæ, in tua parochia consistente ad me reclamaverunt quia in ecclesia ad quam a longo tempore

ameorum et tuorum prædecessorum sua vota et decimas ipsi et sui prædecessores contulerunt, et tibi obsequium sacerdotalis officii habuerunt usque ad præsentis anni 860 tertiæ indictionis prid. Non. Febr. nempe nec missar. audire, nec in tempore necessitatis, sicut sacre regulæ præfigunt eorum infantes baptismum accipere, nec etiam obeuntes confessiones et viatici muneris reconciliatione salvari possint : dicunt enim quia ex quo memorari ab his qui in carne sunt potest, quoniam ipsa ecclesia per se fuit semper, et nulli alteri ecclesiæ fuit subjecta. Nam tempore Tilpini Rhemorum archiepiscopi quando Rodulfus avus Parduli Laudunensis episcopi ipsam villam in beneficio habuit, fuit in præfata ecclesia Ferterus presbyter. Post obitum Ferteri fuit in ipsa ecclesia Dodo presbyter, quando Odelherus filius Rodulfi, pater Parduli episcopi ipsam villam in beneficio habuit. Post obitum Dodonis presbyteri fuit in ipsa ecclesia Agmeradus presbyter quando Odelgus frater Parduli episcopi habuit ipsam villam in beneficio. Et isti tres presbyteri fuerunt in ipsa ecclesia per successiones tempore episcoporum Laudunensis Ecclesiæ, Genebaudi junioris, Berniconis et Gaufredi. Post obitum Agmeradi fuit in ea ordinatus Ottericus presbyter a Wenilone Laudunensi episcopo. Ipse Ottericus dum ipsam ecclesiam tenebat cantavit in Noviante, et in Landrica curte et in Broeris : titulus autem ipsius in quo et residuus erat, fuit in Follanæbrayo. In ipso tempore fuit Nodalbertus presbyter in Codiciaco per annos viginti : obiit autem Wenilo, et successit Ostroldus episcopus in Ecclesia Laudunensi. Obiit Nodalbertus presbyter de Codiciaco, et successit ei Gozmarus presbyter qui de canonica Rhemensi missus est ad Ecclesiam in Codiciaco, et fuit ibi per annos circiter triginta. Obiit Ostroldus et aliquandiu vacavit episcopatus in Follanæbrayo cum Odelharius beneficium illud habebat usque ad meum tempus quo fui ordinatus episcopus post plures annos ordinationis Simeonis episcopi. Et quia jam Gozmarus officium presbyterale agere non poterat, consentit ut alter presbyter illi in eadem ecclesia succederet, sicque consentiente Simeone episcopo missus est Haimeradus clericus Simeoni episcopo ad ordinandum in Codiciaco. Post obitum Simeonis episcopi in Laudunensi Ecclesia successit Pardulus episcopus, cujus tempore obiit Ottericus presbyter de Follanæbrayo, qui per annos circiter sexaginta in eadem ecclesia presbyter deguit. Post obitum Otterici venerunt homines de ipsa villa ante Pardulum episcopum reclamantes, quia non haberent presbyterum in sua ecclesia : Pardulus autem episcopus cum meo consensu suggerente mihi Osvero cui beneficium Odelharii filii Odelgisi nepotis de fratre Parduli episcopi commiseram Wlfegerum clericum in ipsa ecclesia ordinandum suscepit : ante vero quam ipse Wlfegerus fuisset ordinatus obiit Pardulus episcopus. Interea ante ordinationem tuam cantavit ibidem Haimeradus presbyter in Codiciaco ordinatus a Si-

meone episcopo, et reclamante ipso Haimerado apud me et ante te quia ipsa Ecclesia subjecta esse deberet Ecclesiæ de Codiciaco, cum meo consensu misisti vicarios tuos Ivonem, Luidonem archidiaconum, Hedenulfum, Angelrannum decanum presbyterum, qui inquisierunt inde rei veritatem, quique tibi renuntiaverunt quod tibi bene est notum, et sicut in nostris gestis habemus veracibus testibus, et evidentibus documentis invenerunt quod ipsa Ecclesia de Follanæbrayo nunquam Ecclesiæ in Codiciaco fuerit subjecta, sed presbyterum semper habuerit. Inde sicut ipsi homines dicunt per tuum consensum Bertfridus presbyter in eadem ecclesia, et in ecclesia tua apud Broeras per quinque per annos cantavit, qui Bertfridus apud te se reclamavit quod Haimeradus ipsam capellam destructam haberet; et inde pallium unum, et casulam unam, et schillam unam, et librum unum abstulerit, et, sicut homines ipsi dicunt, misisti missos tuos ad hanc causam inquirendam Hadulfum scilicet archidiaconem, Fainulfum et Angelrannum presbyteros, et sicut ipse Bertfridus dixerat invenerunt.

Quapropter et ea quæ repetita fuerant Haimeradus ipsi ecclesiæ coram missis tuis restituit. In ipsa ecclesia, ut prædixi, idem Bertfridus per annos quinque per tuam licentiam ministravit; donec fama de eo vulgata abscessit. Deinde Sigebertus cui illud beneficium de drame [f., dedi a me] secundum antiquam consuetudinem clericum petiit, qui in ipsa ecclesia a te ordinaretur, cui secundum consuetudinem antecessorum meorum, et secundum regulas ecclesiasticas ac synodalia capitula clericum de potestate ecclesiæ nostræ ea conditione concessi, ut si tu illum probabilem iudicares, ego illi libertatem ecclesiasticam darem; et sic demum tu illum regulariter ordinares. Qui clericus nomine Seminatus per quatuor annos te sciente ipsam ecclesiam tenuit, et secundum paupertatem suam, sicut simul sæpe vidimus, et adhuc paret, bene in ea laboravit, et ad illius vicem usque dum ad ordinationem venire per annum et dimidium commendatione ministrorum tuorum, scilicet Hadulfi archidiaconi et Angelranni decani presbyteri, Grimo presbyter tuæ parochiæ in ipsa ecclesia cantavit: deinde ipsorum consensione Heimericus presbyter tuæ parochiæ per duos et dimidium annos ibidem officium sacerdotale exhibuit, usque, ut supra dixi, pridie Nonas proxime præcedentis Februar, quando præfato clerico interdicta est ipsa ecclesia; et, nunc inde quæstio removetur, quasi non debeat sufficere ad sopiendam omnem remotionem antiquitas, et tanta longitudo temporum et numerositas episcoporum, ac presbyterorum sub quibus ipsa ecclesia per se nulli alteri ecclesiæ subjecta constitit, cum et leges publicæ tam apud Romanos, quam et apud nostrates, sed et canones, atque sedis Romanæ pontificum decreta præfigunt, ut ultra triginta annos nulli liceat pro eo appellare quod legum tempus excludit; quasi etiam non debeant sufficere tuæ per ministros tuos requi-

sitiones et diffinitiones, cum leges publicæ atque ecclesiasticæ decernant, ut quæ legaliter ac regulariter distincta sunt non evellantur neque removeantur: sed et leges publicæ atque ecclesiasticæ decretæ sunt de his qui diffinita causa removeere præsumunt. Postea vero quam ipsa ecclesia eidem clerico, sicut quidam dixerunt, sine tua commendatione interdicta est, missa ibidem celebrata non fuit, nec aliquis de ipsa villa in confessione, vel in communione, vel in baptismatione sacerdotale obsequium habuit, et hac occasione duo ibidem homines sicut ad me parvenit sine confessione et communionis reconciliatione fuerunt mortui, quorum unus Erleherus, et alter Gislehardus vocabantur; nam ipsa ecclesia habet unde bene per se potest consistere; et hoc inter cætera habetur indicium, quoniam a longo tempore per se constitit, quia etiam terras habet, quas Ottericus presbyter in ea ordinatus comparavit, et secundum regulas ecclesiasticas moriens ibidem reliquit, et presbyteri qui per tanta tempora in ea fuerunt bene inde se conduxerunt.

Propterea, frater, moneo dilectionem tuam, ut deposita omni contra regulas irrationabili animositate, nobis contra salutem et ministerium tuum de eadem ecclesia agere, pro eo quod ex mihi commissis ecclesia et beneficio Sigeberti mihi fidelis, viri sororis tuæ, probatur existere, contra quos indebite es commotus. Præsertim cum neminem pastoris fungentem officio latere debeat, quia in exsequendo divino mysterio sicut nullius gratia ad indebita provocari, ita et debita nullius odio, vel privati studii zelo debeat retardare sive pervertere: scimus enim quia regulæ Aurelianensis concilii dicunt, quæ tempore Ludovici regis quem sanctus Remigius cum Francorum millibus baptizavit decretæ fuerunt, ut omnes basilicæ quæ per diversa constructæ sunt, vel quotidie construuntur secundum priorum canonum regulam in ejus episcopi in cujus territorio positæ sunt, potestate consistent. Et Toletanum concilium dicit, ut dotes ecclesiarum, et omnia secundum constitutionem antiquam ad episcopi ordinationem et potestatem pertineant, scilicet, ut Antiochenum concilium dicit, regat juxta reverentiam singulis competentem, et prudentiam gerat omnis possessionis quæ sub ejus est potestate: ita ut presbyteros et diaconos ordinet, et singula suo judicio comprehendat. Sed antequam ipsæ regulæ tempore Ludovici regis in synodo Aurelianensi fuerint constitutæ, antiquiores non refragatæ Arausici concilii regulæ statuerunt, ut si quis episcoporum in alienæ civitatis territorio ecclesiam ædificare disponit, vel pro fundi sui, aut ecclesiastici, vel pro quacunque suorum opportunitate, permissa licentia ædificandi, quia prohiberi hoc voto nefas est, non præsumat dedicationem, quæ illi omnimodis reservatur in cujus territorio ecclesia assurgit, et reservata ædificatori suo hæc gratia, ut quos desiderat clericos in re sua videre, ipsos ordinet in cujus territorio est, vel si ordinati jam sunt, ipsos habere

acquiescat, et omnis ecclesiæ ipsius gubernatio ad A eum in cujus civitatis territorio ecclesia surrexerit pertinebit. Et hac auctoritate a temporibus sancti Remigii semper prædecessores mei in temporibus prædecessorum tuorum in ecclesiis ad Codiciacam villam Laudunensis parochiæ, sed et ad Juliacam villam in parochia Suessonica cum consensu ipsarum civitatum episcoporum ordinatos miserunt presbyteros. Unde et ego in Codiciaco, et in Juliaco inveni.

Sed quia mihi pro honore coepiscoporum nostrorum ipsarum sedium complacuit, ut illis decedentibus clericos ordinandos in eisdem ecclesiis episcopis propriarum parochiarum dirigerem cum libertate ecclesiastica et litteris meis ordinandos presbyteros in præfatis ecclesiis misi : et Simeon, ut prædixi B missum a me sibi Haimeradam ordinavit presbyterum, et domnus Rothadus meæ missioni non resultans, jam in Juliaco duos a me sibi missos clericos ordinavit presbyteros, et ego ipsi, sed et aliis coepiscopis nostris in parochia nostra ecclesias habentibus, eundem honorem sicut et prædecessores mei illorum prædecessoribus fecerunt, conservo. Et rectum est ut tu antiquæ auctoritati et consuetudini tuæ metropoli a tuis prædecessoribus conservatæ non deroges : præsertim cum sit constitutum in primo libro capitulorum synodali tempore Augustorum nostrorum a nostris majoribus conservatorum, ut sine auctoritate, vel consensu episcoporum presbyteri in quibuslibet ecclesiis constituantur, nec expellantur; et si laici clericos probabilis vitæ, et doctrinæ episcopis consecrandos, suisque in ecclesiis constituendos obtulerint, nulla qualibet occasione eos rejiciant; et exinde nuper in placito domni nostri regis Caroli apud Pistas constitutum est quod et tua consensione firmasti capitulum, quo dicitur ut si abbates, vel abbatissæ, aut comites, seu vassi nostri, aut cæteri laici clericos probabilis vitæ et doctrinæ episcopis canonicè consecrandos, suisque in ecclesiis constituendos obtulerint, nulla qualibet occasione eos episcopi vel ministri eorum rejiciant.

Propterea si ipse clericus criminosus non est, et docibilis est, quod etiam in episcopo canones sacri requirunt, quoniam a nobis tibi ordinandus offertur, non debes illum ab ordinatione in ecclesia ipsa rejicere, cui per tanta tempora eandem ecclesiam consensisti : cum sanctus Innocentius in decretis suis ad Martianum Naisitanum episcopum de quibusdam presbyteris qui in parochia illius aliquandiu tenuerunt ecclesias, sed quadam occasione communionem illius meri non poterant dicat : Frater, inquit, charissime, si eorum assertio fidem recipit veri, suscipiendos esse ambigere non debes, quod tandiu ecclesias sibi creditas passus es retinere. Et si eundem clericum in eadem ecclesia vis ordinare, scribe mihi secundum morem, et ego illi libertatem ecclesiasticam dabo. Si autem ipse clericus cui per tanta tempora ipsam ecclesiam in Follanæbrayo habere,

et in ea laborare consensisti, non placet, et per rationem, aut pro crimine, aut pro indocibilitate illum rejeceris, quem contra regulas sine mea licentia, et sine libertate canonica ordinasti, ostende, et alterum inveniemus; tantum ut præfata auctoritas regularum, et antiqua consuetudo de ipsa ecclesia nobis a te conservetur, sicut temporibus prædecessorum et decessorum tuorum Genebaudi, Berniconis, Gairfredi, Wenilonis, Ostroldi; et quando episcopatus vacavit in Ailemaro, et tempore Simeonis, ac Parduli, sed et tuo tempore usque modo meis prædecessoribus ac decessoribus Tilpino, et quando post eum vacavit episcopatus, sed et Wlfario, Eboni, et quandiu ipsum episcopatum tenuit Fulco, et post eum Noto, sed et mihi jam per viginti quinque annos in Rhemorum sede ministranti hactenus est conservata amplius quam per centum annos, velut per veridicas chronicas computavi, et tibi possum ostendere, cum constet legibus, et sacris regulis cautum, quia sicut nobis pro nostro libitu non licet parochias rusticanas antiquitus constitutas sine ratione dividere : ita etiam non licet confundere. Quia vero ipsum clericum contra regulas ordinasti, regulæ sacræ demonstrant dicentes : Admittuntur, inquit Leo in epistola ad universos episcopos per universas provincias constitutos, passim ad ordinem sacrum, quibus nulla natalium, nulla morum dignitas suffragatur; et quia dominis suis libertatem consequi minime potuerunt, ad fastigium sacerdotii, tanquam servilis vilitas hunc honorem capiat, provehuntur, et probari Deo posse creditur, qui domino suo necdum probare se potuit. Duplex itaque in hac parte reatus est, quod et sacrum ministerium talis consortii vilitate polluitur, et dominorum, quantum ad illicitæ usurpationis temeritatem pertinet jura solvuntur. Ab his itaque, fratres charissimi, omnes vestræ provinciæ abstineant sacerdotes, et non tantum ab his, sed et ab aliis etiam, qui originali, aut alicui conditioni obligati sunt, volumus temperari, nisi forte eorum petitio aut voluntas accesserit qui aliquid sibi in eos vindicant potestatis : debet enim esse immunis ab aliis qui divinæ militiæ fuerit aggregandus, ut a castris dominicis quibus nomen ejus ascribitur nullis necessitatis vinculis abstrahatur. Et post decretam natalium honestatem moresque ordinandorum describens, hanc conclusionem sub D jungit. Hoc itaque admonitio nostra denuntiat, quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum, nec communionis nostræ futurum esse consortem, qui socius esse noluit disciplinæ. Sciendum vero est hic non vacare a discretionem, ex rationis specialitate hæc pronomen pluralis numeri, cum dicit; si quis fratrum contra hæc constituta venire tentaverit, et reliqua, sicut secundum Domini dictum : *Iota unum aut apex unus a lege non præterit (Matth. v).*

Repetamus superiora hujus epistolæ in qua dicit : Admittuntur passim ad ordinem sacrum quibus nulla

natalium dignitas suffragatur. Si inter sacros ordines ordo acolythi non deputatur, de hoc nostro clerico nomine Senato a te acolytho sine nostra licentia, vel sine ecclesiastica libertate ordinato nil repeto. Et quia, ut dicit Innocentius, observatio prior durior, posterior interveniente misericordia inclinatio est, posteriores canones dicunt, ut nullus servilibus, colonariisque conditionibus obligatus juxta statuta sedis apostolicæ ad honores ecclesiasticos admittatur, nisi, prius aut testamento, aut per tabulas eum legitime constiterit absolutum. Quæ si quis episcoporum ejus qui ordinatur conditionem sciens transgredi per ordinationem inhibitam fortasse voluerit, anni spatio missas facere non præsumat. Hos autem Gallicanos canones, quibus sæpe in tuis scriptis uteris, et per quos te reclamationas, scio quia non abjicies, cum Antiochenum concilium quod apostolica sedes, et universalis Ecclesia recipit dicat: Perfectum concilium est ubi interfuerit metropolitani antistes. Et Leo ad Maximum Antiochenum episcopum: « Quidquid, inquit, propter speciales causas synodali conciliorum ad examen episcopale defertur, potest aliquam dijudicandi habere rationem, si nihil de eo est a sanctis Patribus apud Nicæam diffinitum. Sacri denique canones manumissiones in Ecclesia fieri posse ab imperatoribus petierunt, quæ et ab eis concessa est, et a tempore ipsius concessionis regulæ, et mox ecclesiasticus hactenus eas servavit, et servat. » Unde scriptum est in libro capitulorum synodali primo, quæ tempore Augustorum nostrorum Caroli et Ludovici fuerunt condita capitula quinquaginta quinque. Nullus, inquit, episcopus servum alterius ad clericatus officium sine domini sui voluntate promovere præsumat. Et hoc Gangrense concilium prohibet et capitulo 82 ad locum; de ecclesiarum vero servis communi sententia decretum est ut archiepiscopi per singulas provincias constituti nostram auctoritatem, suffraganei vero illorum exemplar illius penes se habeant. Et quandocunque de familia ecclesiæ utilis inventus aliquis ordinandus est, in ambone ipsa auctoritas eorum populo legatur, et coram sacerdotibus, vel coram fidelibus laicis ante cornu altaris, sicut in nostra auctoritate continetur, remota qualibet calliditate libertatem consequatur: et tunc demum ad gradus ecclesiasticos provehatur. Similiter quoque de his agendum est quos laici de familia ecclesiarum ad sacros ordines promoveri voluerunt. Sed et de his quos præpositi canonicorum atque monachorum ordinandos expetierint, eadem forma servanda est. Ostende igitur nobis istam manumissionem ecclesiasticam de præfato clerico a te acolytho ordinato, et nihil repeto. Dictum est etiam mihi quod ter per tres presbyteros ipsum clericum ad tuam synodum vocari jussisti ut reddat rationem in tua synodo, cujus auctoritate ecclesiam in parochia tua accepit: unde tibi puto supra rationem reddidi, cujus auctoritate, et qua ratione prædictam ecclesiam in parochia tua suscepit, quam ei per tanta tempora

A habere consensisti, sicut plurimis est manifestum. Ipse autem nullam rationem spoliatus contra rationem, et auctoritatem tibi inde in synodo regulariter reddere debet: si autem ideo illum vis in synodum tuam venire, quoniam Chalcedonenses canones dicunt nullam absolute ordinare debere presbyterum aut diaconum, nec quemlibet in gradu ecclesiastico, et reliqua, ut forte oblitus per illum discas cujus suasionem illum contra regulas ordinaveris; quatenus si forte in synodo episcoporum inde compellatus fueris, habeas quid respondeas. Manda mihi, et ego illum quoniam nostræ ecclesiæ est mancipium nulla libertate donatum, per meos missos tibi in synodum tuam transmittam, ut dicas quod beatus Leo ad Anatolium Constantinopolitanum episcopum scribit; quia sicut in mala suasionem delinquitur, ita et in mala consensione peccatur. Retractes etiam quoniam ut supra ostendi, illa quæ tempore antecessorum tuorum consiterant, et post mortem Otterici de ecclesia in Follanæbrayo præsumpta fuerunt per ministros tuos Ivonem, Luidonem, Angelrannum; itemque per Hadulfum, per Famulfum, per eundem Angelrannum destruxisti, et quæ statuta fuerunt tempore antecessorum tuorum reædificasti, quæque nunc iterum de ipsa ecclesia destructa sunt, sed et quæ prænotavi de regulis ecclesiasticis et synodalibus capitulis transtulisti. Sententiam beati Leonis ad Leonem Augustum depromptam parvipendere nullo modo debes, quam in synodo apud Sussionis audisti; et in illo libro quem tibi dedi ipse legere potes. Si, inquit, quæ destruxisti hæc ædifico, prævaricatorem me constituo, et eis me ultionum conditionibus subdo, quas non solum auctoritas beatæ memoriæ principis Martiani, sed etiam ego mea consensione firmavi; et sicut presbytero nostro parochiæ ad te misso respondisti, quia sicut tibi fecimus in nostra parochia de tua ecclesia, ita et tu nobis facies de nostra ecclesia in tua parochia non solum non consentio, verum et hortor ut facias, scilicet ut inquiras diligenter sub veritatis testificatione in suo sacerdotio per Angelrannum, per Grimonem, per Fraumarum presbyteros, sed et per ipsum Haimradum quod de ipsa ecclesia testificatus est Pardulus decessor tuus coram ipsis ante obitum suum. Sed et per alios presbyteros, et vicinos ac idoneos laicos in ipsa villa commanentes, et circummanentes legaliter require, quod inde ex veritate cognoscunt de his quæ præscripsi, et sicut episcopus cum veritatem inveneris inde justum iudicium judica, velut et ego coram missis tuis de capella episcopii tui in parochia nostra legaliter et regulariter inquisivi, et secundum leges et sacros canones ac decreta sedis Romanæ pontificum diffinivi, sicut tibi scripto veritate et auctoritate subnixo ostendam loco et tempore opportuno si necessitas fuerit. Nam plures ecclesiæ sunt in mea parochia de episcopio Laudunensi de quibus non tibi nec alicui tuorum ullum præiudicium intuli, neque inferre volo, quia non debeo; et quia ex capella de qua mandasti tuæ intentioni non annui, ra-

tio mihi et auctoritas contradixit. Quod autem a quibusdam tuorum quod ipsa capella antiquior sit quam ecclesia in Viviniaca villa, etiamsi verum foret, tunc illi antiquitas sua suffragium afferret, si in antiquitate sua usque ad tempora moderna sicut ecclesia in Follanabravo mansit, persisteret : nam Atrabatis, Viromandis, et Bononia ex cujus territorio es natus, antiquiores sedes cum episcopis propriis in Rhemorum provincia exstiterunt quam castrum montis Lauduni inter sedes computaretur in quo es ordinatus episcopus.

Sed quoniam a longo tempore certis eventuum ac necessitatum causis accidentibus illæ aliis subjectæ civitatibus suum privilegium perdidit quod non recuperant, et castrum montis Lauduni convaluit, quia secundum leges, ac sacros canones atque decreta sedis Romanæ pontificum pro id appellare, idque refragari non licet quod legum tempus excludit. De dicimis siquidem ecclesiæ episcopii Laudunensis, parochiæ vero meæ in Antenaco ex domini regis in dominicatu ordinationi meæ commissæ, non solum mihi et presbytero cui eam ad dispensandum commendavi, verum et domno regi contra leges et canones tuo tempore, quod ante actum non fuerat magnum præjudicium est a ministris tuis illatum, quod propter pacis charitatisque custodiam hæcenus patienter sustinui : unde potes advertere quia tibi de illa capella justitiam non negarem, si ipsa justitia tuis votis concurreret. Propterea, frater, pro loci mei officio de præfata ecclesia juxta antiquam consuetudinem, ratione, veritate atque auctoritate subnixam, ut præmisi, exsequi te regulariter moneo, quo benigno animo te suscipere et implere exopto. Quid facies si beati Leonis præceptionem cordis aure obaudire curaveris ; qui scit, inquit, se quibusdam præpositum, non moleste ferat aliquem sibi esse prælatum, sed obedientiam quam exigit etiam ipse dependat. Et quia non impune quis a sacris regulis deviare, et debitæ obedientiæ valeat obviare, scientiæ tuæ appone verba beati Gregorii, quibus ad Petrum Romanæ ecclesiæ subdiaconem et patrimonii magni Petri in Sicilia servantem dicit. De his, inquit, quæ tibi pro servanda justitia scribo, ego absolvor. Et tu si negligis, obligaris : terribilem judicem venientem considera, et de adventu illius nunc tua consideratio contremiscat, ne tunc sine causa jam timeat, cum coram illo cælum et terra tremuerit. Audisti quod volo. Vide quid agas. Datum v Kal. Maii præsentis tertie indictionis.

HINCARI RHEMENSIS

AD EUMDEM.

HINCARIUS Rhemorum episcopus HINCARO Laudunensi episcopo salutem, quæ est in Christo Jesu Domino nostro.

Quod erga me volens dissolvere illa quæ tibi scribo per jactantiam rescribendo agis singulatim, sed non singulis, causa mihi non incerta quibusdam prætermisissis, respondere me pro loci mei officio, ne tibi sapiens esse videaris, ad singula contumaci inobe-

diæ, et inobedienti perviviæ tuæ exigis, qui laboras ut superior in cunctis appereas et victor existas, metropolitano privilegio nomine tantum ironice per antiphrasim inhonorando insalutes, et cum inhonoratione contumeliosa inobediendo resultes, mihi que os adeo obtures, ut de his pro quibus ad me, cui per sacros canones divino judicio commissa est provinciæ totius in qua es ordinatus episcopus, sollicitudo, qui negotia videntur habere concurrant, te non audeam commonere, neque præsumam de his quæ ex te reprehensibiles ad me parvienti redarguere, quin etiam nec tuis scriptis, vel verbis in aliquo respondere, et ut totum brevi perstringam cingulo, timeam quod displiceat tibi mutire. Sed ejusmodi non es sapientiæ et scientiæ atque religionis, seu loci episcopus, ut hæc valeas obtinere. Qui si veraciter sapiens et religiosus fores, talia obtinere non attentares : et quoniam veritate, ratione, et auctoritate non potes, anxiaris, æstuas, et anhelas, ut quoquomodo et per verisimilia, et quasi auctoritati, et rationi convenientia mihi possis resistere, meque possis comprimere atque revincere. Unde et recte dicta studes prave ad sensum tuum inflectere, et ea a suo sensu quantum ex te est cogis peregrinari. Et hoc perniciosum certamen sine ulla necessitate contra me assumpsisti, et sine ulla utilitate in eo satagis laborare, cum nihil aliud a te requiram, nisi ut scriptum est (*Deut. xxvi*) : *Timeas Dominum Deum tuum ex toto corde tuo, et obedias ejus imperio* : et sicut episcopus, quod omni convenit Christiano : *Pacem sequaris et sanctimoniam sine qua nemo videbit Deum* (*Hebr. xii*), et loci tui contentus modestia te altiora ne quæras, et ut frater ac filius charissimus agas, quatenus nos invicem recognoscamus, ne antiquus hostis per scandalum duos movens, per nequissimam victoriam multos quæ non convenerant loqui faciat : ego enim ut aperte indicem qui per elationem a te nihil requiro quæ mihi de canonibus suppetunt, de quibus tibi ad recognoscentiam, et resipiscentiam tuam jam sæpius scripsi, tacere potiussem, si ea quæ familiari sermone monerem cum charitate et humilitate susciperes. Cæterum, ut beatus Gregorius ad Joannem Constantinopolitanum episcopum dicit, rixam inferre non volo, sed tamen a te venientem non devito, quia non valeo, nec etiam audeo pro loci mei officio : cum quasi me pulsando, egregius prædicator dicat : *Argue, obsecra, increpa in omni patientia et doctrina* (*II Tim. iii*). Si enim, ut veraciter fatear, utinam non ad condemnationem meam, metropolitanus tuus judicio Dei non forem, et tu provincialis episcopus metropoli, cui disponente Deo deservio, subjectus et a me ordinatus non esses, sed in alia provincia alterius ordinatus existeres, et talia de te audirem, sicus audire cœpi, ex quo post concupiscentias sæculi, et elationem cordis tu ire cœpisti, et verbis, et scriptis te charitatis affectu monerem, et si non obaudirer, apostolicam sequens jussionem, qui de eo præcipit qui semel et secundo commonitus non convertitur, nec obaudit,

te devitarem : nunc autem quia non solum sapientibus et insipientibus, sed etiam provinciæ Rhemorum episcopis meis, scilicet melioribus et sapientioribus atque religiosioribus, debitor sum, locum effugiendi invenire non valeo, ut te opportune importune non moneam, cum prædicator fortissimus dicat : *Mundus sum a sanguine omnium : non enim subterfugi quominus adnuntiarem omne consilium Dei vobis (Act. xx)*, si enim non annuntiasset, mundus a sanguine non esset ; sed quibus omne consilium Dei annuntiare studuit, ab eorum sanguine mundus fuit. In qua voce et ego peccator convenior, ego insipiens ut te moneam et arguam. Et quando necessitas exigit, increpem, valde constringor, ego reus esse ostendor, qui metropolitanus episcopus vocor, qui super ea mala quæ propria habeo, alienas quoque mortis addo, qui tot occido, ut timeo, quot ad mortem ire quotidie tepidus et tacens video, dicente Domino per prophetam de uno pereunte ; *Sanguinem ejus de manu tua requiram (Ezech. xxxiii)*, quanto magis de multis ? Et etiam de his per quos multi debent salvari, mihi hæc terribilis invectio incutitur, qui ad speculandum, et etiam episcopis, peccatis meis exigentibus Dei judicio prælatus. Qua de re et archiepiscopus, unde non lætor, sed revereor, sum vocatus, qui reatu de morte animarum subjectorum constringor, quæ forte potuissent semper vivere si verba meæ correptionis audirent. Sanguis ergo morientis de manu speculatoris requiritur, quia peccatum subditi culpæ præpositi si tacuerit reputatur. Est ergo, ut beatus Gregorius dicit, quod mihi est faciendum, ut etiam moriente subdito me liberum reddam, surgam, invigilem, malis actibus contradicam, sicut scriptum est : *Discurre, festina, suscita amicum tuum, ne dederis somnum oculis tuis, nec dormitent palpebræ tuæ (Prov. xxviii)*. Et si adhuc, ut cœpisti in resistendo persistis, audiam quid loquatur in me, et ad me de resistentibus Dominus Deus. *Ecce, inquiens, dedi faciem tuam valentiorum faciebis eorum, et frontem tuam duriorum frontibus eorum, ut adamantem, et ut silicem dedi faciem tuam (Ezech. iii)*, scilicet ut sive ab auditoribus conculcer atque despiciar, nec per delatum honorem refrenetur lingua ex verecundia, nec per despectum taceat ex infirmitate. Unde iterum mihi dici exaudio : *Ne timeas eos, neque metuas a facie eorum, quia domus, exasperans est (Ezech. ii)*. Itaque increpandus est frater et nunquam timidus qui est exasperans domus.

Propterea de eo quod jam tertio in præfatione tuarum litterarum mihi scribens mandasti debitam in Domino devotionem, quam non subsequeris prosequendo debitam, et in Domino devotinam tibi rescribo, quia quantum spectat ad humanos carnis oculos, debitam devotionem mihi non monstras : quantum vero spectat ad mentis humanos oculos, in Domino devotionem non exhibes. Quantum autem in divinis oculis superno consilio timeo trutinari, debitam devotionem mihi rependis, qui me tuis ope-

ribus, non adeo ut desideraveram laudabilibus, et tuis contradictionibus, et durissimis ac contra charitatem, quæ Deus est, responsionibus et impactionibus indebitis indesinenter excrucias. Sed utinam mihi contingat quod in Evangelio (*Luc. xvi*) voce Abraham de Lazaro per flagella expurgato a malis suis diviti ardentis responsum audimus. Recepit Lazarus similiter mala pro malis in vita sua ; sicut et dives bona pro bonis in vita sua. Et sic opto mihi per te fieri, ut si per improvidentiam Deum in aliquo ex te offendi, qui in multis eum me offendisse et offendere humiliter et contrito corde confiteor, recipiam ex te per te purgationem in vita mea, ne inde crucier in vita futura, qui, ut dixi per improvidentiam, non autem per malevolentiam conscientiam, tantorum gemitus qui sub manu tua, ut a multis dicitur, sicut revera sub falce gravissimo gemunt, in provectione tua excitavi, quotidie emitti ad Dominum, et proinde quotidiano, imo continuo timore et dolore constrictus non solum gemo, sed et eis congemiscens Deo cujus permissionis judicio a te scandalizatus, et mente excruciatu verbis viri flagellis attriti corde contribulato dico, *qui cepit ipse me conterat, solvat manum suam et succedat me, et hæc sit mihi consolatio ut affligens me dolore non parcat, nec contradicam sermonibus sancti (Job vi)* : vellem enim si illi placeret, ut flagellis dignum me per alium quam per te flagellaret, sed quia ita sibi placet cui bona cuncta placent, verbis suis eum conveniam qui ex affectu nostræ humanitatis Patri dignatus est dicere : *Pater, si fieri potest, transeat a me calix iste ; verumtamen non sicut ego volo, sed sicut tu vis (Matth. xxvi)*. Et item : spiritu suo de eo qui ejus esse videbatur, prædixit : *Si inimicus meus maledixisset mihi, supportassem utique : tu vero homo unanims dux meus, et notus meus, qui simul meum dulces capiebas cibos in domo Dei ambulavimus cum consensu (Psal. liv)*. Homo scilicet pacis meæ in quo sperabam, qui edebat panes meos, levavit contra me calcaneum suum (*Joan. xiii*) : ac si aperte diceret, quod tanto gravius pertuli, quanto hæc ab eo qui meus esse videbatur sensi : sed licet hinc erga me pietas cor tuum non tangat, timor tamen illud debet compungere, quia contumacia et inobedientia tua qualicunque successoris beati Remigii in metropolitana sede ipsius a te mihi illata in eum redundat, qui in me peccatore vicario suo totius Rhemorum provinciæ onera portat, quinimo, Christe Deus noster : orante apud eum pro nobis eodem sanctissimo prædecessore nostro, meas contumeliosas calumnias, et persecutiones derogationum tuarum in se dignatus suscipere, qui confidens Patri super omnes cælos et super omnium angelorum verticem Saulo, ut legimus, et credimus dixit : *Saule, Saule, quid me persequeris ? (Act. ix)*. Non enim est discreditandum in tanta turba credentium quos Saulus persequeretur aliquem fuisse, licet non ita ut ego sum imperfectum, in quo sicut et in reliquis, qui videlicet corpus

jus erant, si Dominus persequi dixit. Et ideo in me imperfecto, modo quolibet persecuto illum persequi credo, quia et voce sanctæ Ecclesiæ in qua ejus sum ultimum membrum per Psalmitam dicitur : *Imperfectum meum viderunt oculi tui, et in libro tuo omnes scribentur* (Psal. cxxxviii). Et iterum Psalmista dicit : *Benedixit omnes timentes se Dominus pusillos cum majoribus* (Psal. cxiii) ; et qui in iudicio dicit de benefactoribus : *Quandiu fecistis uni de his inimicis meis mihi fecistis* (Matth. xxv).

Veraciter credo quia quidquid mihi sive benignitatis, sive malignitatis pro ejus nomine exhibetur, sine dubio illi impenditur. Et quia beatus Joannes Baptista pro veritate, videlicet pro Christo sine dubitatione occubuit, sicut ipse ostendens dicit : *Ego sum veritas* (Joan. xiv). Et ego, ut Apostoli utar verbis, inimicus factus sum tibi vera tibi dicens et suavis, sed persuadere non valens, ut, sicut ipsa Veritas per beatum Leonem dicit : *Obedientiam quam tuis subditis exigit, prælatis tuis ipse dependas, et in ea vocatione qua vocatus es, in ea permanes, quæ quia non suffers, non solum mihi, sed et multis scandalum ingeris, et Veritas dicit : Qui scandalizaverit unum de pusillis istis qui in me credunt, expedit ut ei suspendatur mola asinaria in collo ejus, et demergatur in profundum maris* (Matth. xviii). Et tamen idem Christus Dei virtus, et Dei sapientia dicit : *Viro qui corripientem dura cervice contemnit repentinus superveniet interitus, et eum sanitas non sequetur* (Prov. xxix). Et Moyses et Aaron dura cervice resistenti sibi populo dicunt : *Nec contra nos est murmur vestrum, sed contra Deum* (Exod. xvi). Unde nec tuas inimicitias vereor, nec te monere in necessariis, quæ sine peccato non possum dimittere, desinam, sciens pacem dilectione integra intrinsecus me tenere debere, quam per vectio-nem vocis mihi extrinsecus non timeo perturbare. Quod utrumque provide David se perhibet servare, cum dicit : *Cum his qui oderunt pacem eram pacificus ; cum loquerbar illis impugnabatur me gratis* (Psal. cxix). Ecce et loquens impugnabatur, et tamen impugnatus erat pacificus, quoniam nec insanientes cessabat reprehendere, nec reprehensos negligebat amare. Hinc etiam Paulus ait : *Si fieri potest quod ex vobis est cum omnibus hominibus pacem habentes* (Rom. xii) ; hortatus enim Apostolus ut pacem cum omnibus haberent, præmisit dicens : *Si fieri potest, et*

atque subjunxit ; quod ex vobis est : difficile quippe erat ut si mala acta corripere, habere pacem cum omnibus possent : sed cum temporalis pax in pravorum cordibus ex nostra increpatione confunditur, inviolata necesse est ut in nostro corde servetur. Hinc iterum David cum se totum ad fœdera pacis internæ constringeret, testatur quod cum malis concordiam non teneret dicens : *Nonne qui te oderunt, Deus, oderam illos, et super inimicos tuos tabescebam ? Perfecto odio oderam illos, inimici facti sunt mihi* (Psal. cxxxviii). Inimicos enim perfecto odio odisse est, ad quod facti sunt diligere et quod fa-

ciunt increpare, mores pravorum premere, vitæ prodesse. Pensandum est igitur quando ab increpatione quiescitur, quanta culpa sit, si cum his qui increpandi sunt sine increpatione pax tenetur. Si propheta tantus hoc velut historiam Domino obtulit, quod contra se pravorum inimicitias excitavit. Unde Paulus discipulos admonet dicens : *Si quis non obedit verbo nostro per epistolam, hunc notate, et non commisceamini cum illo ut confundatur* (II Thes. iii). Atque illico subjunxit : *Et nolite ut inimicum existimare illum, sed corripite ut fratrem* (ibid.) ; ac si diceret : *Pacem cum eo exteriorem solvite, sed interiorem contra illum medullitus custodite*. Et qui amore tuo te credo refugere ad per-fugia solita, scilicet ad excusanda excusationes in peccatis, ut dicas quia etiam de cogitatione te iudico, cum dicat Apostolus : *Quis scit hominum quæ sunt hominis, nisi spiritus hominis qui in ipso est ?* (I Cor. ii) prævenio huic tuæ objectioni dicens, quia tunc spiritus hominis ignoratur ab altero, cum verbis, vel operibus non demonstratur : nam cum scriptum sit, *Ex fructibus eorum cognoscetis eos* (Matth. vii), per hoc quod foris agitur quidquid intus latet aperitur. Unde recte quoque per Salomonem dicitur : *Quomodo in aquis resplendet vultus perspicientium, sic corda hominum manifesta sunt prudentibus* (Prov. xxvii). Cum dicis te scripsisse ad auferendam amphibologiam traditionis tuæ ex primitivo genitivi inter tradentem et traditum, grammaticam quam tibi insinuari feci ego et ipse satis, mihi in faciem expuis : quod gratias illi patienter portare possum, qui quod de se prædixit, pro me peccatore sustinuit : *Faciem, inquit, meam non averti ab increpantibus, et conspuentibus in me* (Isa. l). Sed quia te traditum, et non tradentem designas ex nomine, de hoc tuo dicto non curo, testimonium inde perhibente mihi conscientia mea nihil me hinc tibi esse debitorem. Unde et pro minimo est, ut ex hoc a te iudicetur vel ab humano die : *sed neque me ipsum inde dijudico* (I Cor. iv). Verum tamen si te ita mori gratum scirem, ut hoc ad utilitatem tuam, et ad mentis tuæ sanitatem posset proficere, vel mihi inde cognoscerem aliquam necessitatem incumbere, et scriptis meis ad regem, et ad episcopos, et ipsorum testimonio, ac per alios idoneos tester possem tibi ostendere me, sicut dixi, debitorem hinc tibi non esse : *Uniuscujusque enim opus quale sit dies Domini declarabit*. (I Cor. iii). Quia vero de traditione tua quereris, et nihil fit in terra sine causa, nihilque quod aut non faciat Deus propitius, aut fieri non permittat iratus, et pluraliter fieri traditiones atque diversis modis diversos et pro diversis causis traditos legimus, necesse est tibi subtiliter mentem tuam discutere, ut meditatus cum corde tuo, et non dolosa, sed recta statera appendens mores, cogitationes, verba, et actus tuos, apud te invenias hæc traditio tua unde, et a quo processerit, et quem processum habeat, vel ad quem finem spectat : legimus enim quosdam a se traditos, ut Paulus ad Ephesios de

quibusdam dicit: *Qui desperantes semetipsos tradiderunt se impudicitiae in operationem immunditiae omnis in avaritia (Ephes. iv)*: Tanto enim hinc, beatus inquit Gregorius, se quisque in malis presentibus latius relaxat, quanto post hanc vitam se assequi bona aeterna desperat, et Jacobus apostolus dicit: *Unusquisque tentatur a concupiscentia sua abstractus et illectus (Jac. i)*, scilicet a recto itinere, et illectus in malum. Et item Paulus ad Romanos de quibusdam scribit: *Qui cum cognovissent Deum non sicut Deum glorificaverunt, aut gratias egerunt in cogitationibus suis, et obscuratum est insipiens cor eorum; dicentes enim se esse sapientes stulti facti sunt (Rom. i)*. Et paulo post: *Propter quod tradidit illos*. Tradidit, dixit, id est gratia non liberavit sicut cor Pharaonis induravit, quod gratia non emollivit. Et psalmus dicit: *Tradidit in captivitatem virtutem eorum, et pulchritudinem eorum in manus inimici (Psal. lxxvii)*: in captivitatem enim virtus et pulchritudo quorumdam in manus inimici traditur, cum deceptae menti antiquus hostis ex boni operis elatione dominatur. Et apostolos *expetivit Satanas ut cribraret eos sicut triticum (Luc. xxii)*, qui jussi sunt orare ut non intrarent in tentationem. Et Paulus quemdam tradidit Satanae, *ut spiritus ejus salvus ferit in die Domini (I Cor. v)*. Et item: Quosdam tradidit Satanae, ut discerent non blasphemare, et filiam Abraham incurvatam legimus a Satana, et plures propter peccata puniendae quae cruciari meruerunt quasi quibusdam quaestionariis atque tortoribus traditos legimus refugis spiritibus, quia non solum homines ministri et ultores sunt irae Dei in his qui malum operantur, quique non sine causa portant gladium, sed etiam contrariae fortitudines, quae appellantur furor et irae Dei (Rom. xiii). Quapropter si moribus et factis tuis exigentibus justo Dei iudicio permittente, aut a te ipso, vel per spiritum refugam in peccatum, quia legimus *immissiones per angelos malos (Psal. lxxvii)*, vel hominem Dei ministrum ad poenam peccati es traditus, si te non recognoscis, et non corrigendo respiscis, non habes unde queraris, sed unde tribuleris; quia non dicit Dominus: *Beati qui persecutionem patiuntur propter injustitiam, sed propter justitiam (Matth. v)*. Et Apostolus dicit: *Beatus qui suffert tentationem, quoniam cum probatus fuerit accipiet coronam vitae (Jac. i)*, quia, sicut beatus Cyprianus ait, martyrem non facit poena, sed causa: nam cum Christo crucem etiam periturus latro suscepit, sed quem reatus proprius tenuit, par crucifixio non absolvit. Et persecutio, vel traditio dum non rationaliter sustinetur, ut beatus monstrat Gregorius, nequaquam proficit ad salutem. Nam nulli fas est retributionem praemiorum expectare per culpam, quod et beatus Petrus apostolus demonstrat dicens: *Quae est enim gratia si peccantes et colaphizati suffertis? (I Petr. ii)*. Contra hos propheta Domino queritur dicens: *Attrivisti eos et renuerunt accipere disciplinam (Jerem. iii)*. Hinc est quod Dominus dicit: *Interfeci et perdidit populum istum, et tamen a viis suis non sunt*

A reversi (Jerem. xv). Hinc rursus ait: *Populus non est reversus ad percutientem se (Isa. ix)*. Hinc voce flagellantium propheta conqueritur dicens: *Curavimus Babylonem, et non est sanata (Jerem. li)*: Babylon quippe curatur, nec tamen ad sanitatem reducitur quando mens in prava actione confusa verba correctionis audit, flagella correctionis percipit, et tamen ad recta salutis itinera redire contemnit. Hinc captivo Israelitico populo, nec tamen ab iniquitate converso Dominus exprobrat dicens: *Versa est mihi domus Israel in scoriam: omnes isti aes, et stannum, et ferrum, et plumbum in medio fornacis (Ezech. xii)*; ac si aperte dicat: Purgare eos per ignem tribulationis volui, et argentum illos, vel aurum fieri quaevisi; sed in fornace mihi in aes, stannum, ferrum et plumbum versi sunt, quia non ad virtutem, sed ad vitia etiam in tribulatione proruperunt; quoniam aut ad sonitum murmurationis eruperunt, aut simulationis vitio non carere decreverunt, aut in nocendi malitia proximis perseveraverunt, aut a desideriis terrenis pressi in tribulatione purgari non potuerunt.

Hinc rursus scriptum est: *Multo labore sudatum est, et non exivit de anima rubigo ejus, neque per ignem (Ezech. xxiv)*, ignem quippe nobis tribulationis admovet, ut in nobis rubiginem vitiorum Dominus purget, sed nec per ignem amittimus quando et rubiginis inter flagella, vel per flagella vitio non caremus. Hinc propheta iterum dicit: *Frusta conflavit consolator, malitiae eorum non sunt consumptae (Jerem. vi)*. Poena inquit, Gregorius, praesens si afflicti animum convertit, finis est culpae praecedentis: si autem ad timorem Domini minime convertit, initium est poenae sequentis. Cavendum ergo nobis est et summopere in fletibus tota mentis conversione vigilandum, ne de tormento ad tormenta transeamus. Qui ergo justus patitur, si patienter ea quae patitur sustinet, Christum imitatur. Qui in flagellis corrigitur, latronem qui in cruce Christum cognovit, et post crucem paradisum cum Christo intravit: qui nec inter flagella desistit a culpis, sinistrum imitatur latronem, qui propter peccata ascendit in crucem, et post crucem ruit in tartarum. Si ergo propter peccatum modo quolibet vel a quoocunque traditus es, et per traditionis persecutionem correctus, ut audire merearis a Domino, et si non auribus corporis, vel auribus illis de quibus Psalmista dicit: *Audiam quid loquatur in me Dominus Deus (Psal. lxxxiv)*, quod audivit qui propter peccatum flagellatus, et per flagellum purgatus est, dicente Domino: *Ecce sanus factus es, jam noli peccare, ne deterius tibi aliquid contingat (Joan. v)*. Habes unde gaudeas, et quod cavendo custodias. Si autem ideo traditus, et traditione flagellatus es, non quia peccasti, sed ne peccares, sicut Paulus qui dixit: *Ne magnitudo revelationem extollat me datus est mihi stimulus carnis meae, ut me colaphizet (II Cor. xii)*. Libenter gloriare in infirmitatibus tuis, ut inhabitet in te virtus Christi. Si denique a quoocunque, vel modo quoocunque traditus es, vel non propter praecedens peccatum, vel ideo ut non

incurreres quod poterat accidere tibi peccatum, sed ut justus justificareris adhuc, sicut Tobias, et Job de quo Dominus dixit ad Satan : *Ecce in manu tua est, tantum animam illius serva* (Job 1), custodire te oportet ut ne de flagello murmures, et animam tuam quam Dominus servare in Job jusserat, murmurando in potestatem illius tradas. *Neque murmuraveritis*, inquit Apostolus, *sicut quidam eorum murmuraverunt, et a serpentibus perierunt* (I Cor. x). Cavere etiam summopere debes ut aucta per flagellum merita de cætero peccando non inquines, sed juxta vocem Domini corde bono et optimo verbum, et purgationem ejus retinens fructum afferas in patientia (Luc. viii), quoniam qui humiliter etiam pro peccatis suis flagella suscipiunt, post flagella ad requiem sublimiter suscipiuntur. Sic uva calcibus tunditur, et in vini saporem liquatur; sic oliva contritionibus expressa amurcam suam deserit, et in olei liquorem pinguescit, sic per triturationem a paleis grana separantur, et ad horreum purgata perveniunt. Quisquis ergo appetit plene vitia vincere, studeat humiliter purgationis suæ flagella tolerare, ut tanto post ad judicem mundior veniat, quanto nunc ejus rubiginem ignis tribulationis purgat. Quod dicis meis apicibus te solito more morderi, sed non te nosse lædi, si ita quod dicis ita ut est intelligendum intelligis, non improbo, quia et erat unde morderi, sed ad sanitatem; et idcirco te non lædi sentire debebas: sit enim ut in Evangelio legimus plaga sanatus, scilicet per acrem vini morsum, et per olei fomentum: cum enim tibi ostendi quod actum sit, rite ad morsum intellexisti, et cum ostendi quid agendum sit, si recte facis, pertinere ad olei fomentum intelligis. Si autem adeo intentionem tuam rebus transitoriis immoderatus implicas, ut quibus negligentiarum jaculis transfigaris, vel quibus monitionum medicamentis debeas curari ignores, quia nec læsum, nec sanabilem te sentis probabiliter improbo. Unde per Salomonem vox percussus et dormientis exprimitur qui ait : *Verberaverunt me, sed non dolui; traxerunt me, et ego non sensi* (Prov. xxiii): mens quippe a cura suæ sollicitudinis dormiens verberatur, et non dolet; quia sicut imminetia mala non prospicit, sic nec perpetrata permissit: trahitur et nequaquam sentit quoniam per illecebras vitiorum ducitur nec tamen a sui custodia suscitatur. Quod dicis a me jaculis te impetatum, nævoque notatum, noli agere ut hoc mihi necesse sit facere, et me ab his senties conquiescere. Quod dicis te integro fugatum anno, et non dicis a quo fugatus existas, nescio quid inde tibi respondeam, nisi quod dicit Scriptura, quod in te Dominus cadere non permittat : *Fugit impius nemine persequente* (Prov. xxviii). Quod dicis te ad instar Abner fugatum (II Reg. iv), et serris tritum, et ideo non tacere permissum, non convenienter sententiam beati Gregorii in persecutione Abner ab Asahel posuisti, quia non me furem tuum persecutorem, sed ad corrigendum excessus tuos pro

A loci mei officio intelligere debueras monitorum: et tu non me aversa hasta, ut Abner Asahel persequentem feris, et tranquille ex quibusdam tangis, et quasi parcendo superas, sed invehendo, et resistendo in faciem quantum potes per contumacem contemptum si potes ad furorem provocando exaggerare non cessas; et ideo responsum ratione in intimis sub tranquillitate tactus ab eo quod me pro necessitate loci mei exerere non cado, neque succumbo, sed validius semper clamo, elamavi, clamabo per ævum, et sicut tuba exaltabo vocem meam (Isa. lviii), et annuntiabo tibi excessus tuos, et satagam te revocare pro viribus a contumaci elatione tua. Quod dicis te serris tritum; improprie quantum audeo dicere hoc tua grammatica protulit: nemo enim serris teritur, sed secatur, quod bene Paulus intellexit scribens ad Hebræos cum passiones sanctorum descripsit dicens: *Sancti ludibria et verbera experti, insuper et vincula et carceres, lapidati sunt, secti sunt* (Hebr. vii): non enim dixit triti sunt: serra enim dentata fieri legitur, et ego quantum possum dentatis serris te ab accidentibus quæ episcopo non sunt propria secare laboro, et spiritalibus dentibus, mordere ac stimulis verborum momentum, et clavis increpationum configere non omitam; quoniam, ut Scriptura dicit, *verba sapientum quasi stimuli, et quasi clavi in altum defixi* (Eccli. xii), quia videlicet, ut exponit beatus Gregorius, verba sapientum culpas delinquentium nesciunt palpare, sed pungere. Quia vero in composita præteritum verbi *tereor* serris composuisti, multis locis non solum in tua grammatica, sed etiam in Scripturis prævales invenire, sed et in illo loco ubi Dominus Moysi qualiter thymiana quod nostra lingua incensum dicitur facere jussit dicens: *Cumque in tenuissimum pulverem universa contuderis* (Exod. xxx). Unde sanctus Gregorius: in tenuissimum pulverem aromata universa conterimus. Et item, aromata in pulverem redigere, est virtutes recogitando terere. Hujus activi passivum est, sicut melius nosti, *tereor*, cujus est præteritum *tritum*, quod non rite serris, sed pilæ ac pilo potius applicari debet, sicut Salomon demonstrat dicens: *Si contuderis stultum in pila, quasi ptisanas feriente desuper pilo, non auferetur ab eo stultitia ejus* (Prov. xxvii). Quodque thymiana per Moysen a Domino jussum fieri quotidie nos sacri altaris ministerio addicti debemus componere, ut recte possimus Domino dicere: *Dirigatur oratio mea sicut incensum in conspectu tuo* (Psal. cxi).

De eo quod dicis te mirari cur Hadulfum tandiu remorantem non remittam, præsertim cum super eo meæ, ut justum erat, anquisti interventioni, ideo pleniter non respondeo, quia sincera non est soliditate veritatis, et charitatis atque pacis tua mandatio, tantum hoc rescribo, quia quotiescunque ad me illum misisti, semper tibi illum remisisti, et non sicut aliis litteris de eo mihi directis quantum ex me est, contumacem illum a me recepisti quasi contumax tibi existerit: non mea persuasio, sed, ut æstimo, tua

factic hoc ab illo exegit, quia ut puto calice Babylo-
nico quo vicissim ac singillatim gentes propinatas
usque ad Sesag [*f.*, *Sesach*] novissimum legimus, a
te ille etiam est propinatus, sicut et plures alii ex-
stiterunt. Nam, ut scriptum est (*Jerem. xxv*), a san-
ctuatio meo incipite, a me nutritore tuo, et ab his
qui te mecum nutrierunt, vel inter quos nutritus
fuisti, prius incœpisti derelinquens nos, et odio ha-
bere inchoans, atque aliorum familiaritates expe-
tens, deinde per alios, et alios tam amicos quam et
subditos, tam clericos quam et laicos hactenus dis-
currrens, et viritim præcedentes relinquens usque
ad hunc tibi familiarissimum cursus tuus pervenit,
et cum tali gratia de scala vitrea tuæ familiaritatis
decidit, sicut et nos priores, et illius de tuis sub-
ditis antecessores cecidimus, si tamen talis casus
non potius ascensus quam casus dicit debeat. Cum
tibi Salomon dicat: *Amicum tuum, et amicum patris
tui ne dimiseris* (*Prov. xxvii*). Et sanctus Hieronymus
dicit: Proverbium, inquit, est quod serviri ne-
queat qui nulli servivit, sicut tibi serviri non potest
qui nulli servisti, quique non laborando, sed deli-
ciando, et dormiendo alterius labore quod habes
adeptus fuisti. Et quod Simonides cum interrogaretur
quod inter homines celerrime consenesceret,
beneficium, inquit, manifeste ostendis. Et Salomon
dicit: *Qui reddit mala pronobis, non recedet malum
de domo ejus, et qui mentis est duræ, corruet in
malum* (*Prov. xxviii*).

De hoc quod dicit te nescire unde sciam te con-
sensisse ecclesiam Sanato clerico nostro in Folla-
næbrayo, quoniam nec res nota est, nec per casus
aut formas saltem verisimiles inflectitur, et ideo
nec te consensisse scio, nec illud probare possum,
tibi rescribo, quia indignum tibi esse debuerat,
quoniam est utique indecorum ut pro illusione
mea episcopus ad cunas infantilis grammaticæ
redires: hoc enim quod mihi scribis respondere
solebas in schola, quando nomina, vel pronomi-
na, seu verba declinare, me jubente, insinuabaris:
cum enim te conscholarius puerulus interroga-
bat hoc vel illud quæ pars est? Respondere sole-
bas sicut tibi videbatur quæ pars erat; et inferen-
te illo, unde hoc scires, dicebas, si rite remetior,
quod mihi multis jam annis transactis non venit
in mêmoria, quia res nota est, et per casus, vel
modos, seu formas inflectitur. Et talia frater et fi-
lius meus ad derisionem quasi pituita, scilicet fleg-
ma coagulatum et vetustum ac mucidum mihi in
vultu excreas, et non attendis quantum Deum,
qualiscunque ego sim in contemptu ministerii sacri
sine reverentia ulla offendas. Jam ut antiquo pro-
verbio dicitur, *bos lassus fortius figit pedem*; quia
intelligere in præcedentibus litteris noluisti, vel
potius dedignatus fuisti, aut si intellexisti dicere
refugis, mihi non pigrum, licet non tibi necessarium,
et iterare unde hoc scio, quia et res nota est, et a
longo tempore per humaniter accidentes casus in-
flexa, et per formas non dicam verisimiles, sed et

A per veras ostenditur, videlicet quia sicut tibi ex
ordine scripsi, tempore Tilpini, et quando post
eum per annos circiter novem metropolis Rhemo-
rum vacavit episcopo, et tempore Wolfarii, et tem-
pore Ebonis, et quando Folco, et post eum Notho.
ipsum episcopium tenuerunt, sed et tempore meo.
Per tempora episcoporum Laudunensis ecclesiæ
Genebaudi videlicet junioris, Berneconis, Gairfredi,
Wanilonis, Ostroldi, et quando episcopatus vacavit
in Ailemaro, et tempore Simeonis, ac Parduli, sed
et tuo tempore per tempora quando Rodulfus tem-
pore Tilpini habuit villam Follanæbrayum in benefi-
cio, et post eum Odelharius, deinde Odalgisus, deinde
Odelharius: deinde quando post eum idem benefi-
cium comissum fuit Osvero, habuit ipsa ecclesia
in Follanæbrayo semper presbyteros, ex quo memora-
ri potest, Ferherum scilicet, et post eum Dodo-
nem, deinde Haimbradum, deinde Ottericum, et post
eum per quinque annos Bertridum; et nunquam fuit
ecclesiæ in Codiciaco subjecta. Et quando Ottericus
presbyter ordinatus a Wanilone Laudunensi episcopo
in ecclesia Follanæbrayo degebat, fuit presbyter in
Codiciaco Nodalbertus per annos circiter viginti, et
post Nodalbertum fuit ibi presbyter Gozmarus per
annos circiter triginta. Et post Gozmarum, sicut ibi
præscripsi, misi istum Haimeradum qui in Codiciaco
nunc degit Simeoni ad ordinandum, quem in eccle-
sia, quæ est in Codiciaco, ordinavit. Et tempore Si-
meonis semper in Follanæbrayo Ottericus presbyter
sicut in ea ordinatus mansit.

Sed et tempore Parduli usque circa finem ipsius,
et tunc Wlfegerus clericus ipsam ecclesiam consen-
tiente Pardulo tenuit usque ad obitum Parduli: post
obitum autem Parduli, et post ordinationem tuam
Bertridus presbyter in tua ecclesia secus, Cadomum,
et in ecclesia nostra in Follanæbrayo per quinque
circiter annos officium sacerdotale exhibuit: utrum
tu hoc consenseris, ut tuam ecclesiam, juxta quam
ibas et redibas quando ad palatium ibas, vel de eo
redibas, cum ecclesia in Follanæbrayo tenuerit, tu
videris. Abscedente autem de parochia tua Bertfri-
do, pro fama de eo vulgata, concessi more præde-
cesuorum meorum Sigeberto, cui illud beneficium
dedit, ut clericum nostrum Sanatum in eadem eccle-
sia ordinandum tibi offerret; et si tu illum probabi-
lem judicares, ego illi libertatem ecclesiasticam da-
rem. Et sic demum tu illum regulariter ordinares.
Qui clericus per quatuor annos ipsam ecclesiam te-
nuit, et secundum paupertatem suam, sicut simul
sæpe vidimus, et adhuc paret, bene in ea laboravit;
et quando simul equitabamus juxta ipsam ecclesiam
in qua idem clericus laborabat, euntes ad regem te
audiente se reclamaverunt ad me ipsi homines pro
ordinatione dilata ejusdem clerici, quia non habebant
presbyterum; et tu me audiente, sed et multis
aliis et meis et tuis audientibus respondisti quod ve-
rum non dicerent, quia nullam indigentiam de mi-
nisterio sacerdotali habebant: et ad tua verba te
audiente, ego eisdem hominibus dixi quod tu habe-

bas dispositum ut nullam indigentiam de ministerio sacerdotali haberent, donec ipse clericus ordinaretur. Et nihil contradixisti. Et per annum et dimidium ipso clerico eandem ecclesiam tenente, Grimmo parochiæ tuæ presbyter ibi cantavit. Et per duos annos et dimidium ibidem Haimericus presbyter officium sacerdotale exhibuit usque pridie nonas proxime præcedentis Februarii.

Et quia quæris unde hoc scio, sic mihi quantum ex antiquitate per veraces homines didici, et per os Parduli audivi, et post eum per os tuum, sicut dixi, audivi, et oculis vidi, res mihi nota est; et per has veras formas nota mihi ostenditur. Si autem illa negas quæ per te ipsum cum auditu multorum scio, minus tibi credere poterò, si te excusaveris ex his qui de te per alios audio: tamen me et te latere non potest quod nec tibi, sicut nec mihi, reputari posse ex veritate cupio quod scriptum est: *Os quod mentitur occidit animam* (Sap. i). Et: *Quod de ore procedit, scilicet veritati contrarium, hoc coinquinat hominem* (Matth. xv). Et Salomon dicit: *Testis falsus non erit impunitus* (Prov. xix). Duobus iniquis modis auctores fit falsus testis, scilicet aut falsa dicendo, aut vera reticendo. Nihil est, inquit beatus Gregorius, ad defendendum puritate tutius, nil ad dicendum veritate facilius: nam dum fallaciam suam tueri quis cogit, duro cor labore fatigatur. Hinc namque scriptum est: Labor laborum ipsorum operiet eos: qui enim nunc implet, tunc operit, quia cujus animum per blandam inquietudinem exerit, tunc per asperam retributionem premit. Hinc per Jeremiam dicitur: *Docuerunt linguam suam loqui mendacium, ut inique agerent laboraverunt* (Jerem. ix); ac si aperte diceretur: Qui amici esse veritatis sine labore poterant, ut peccent laborant: cumque vivere simpliciter renuunt, laboribus exigunt ut moriantur: nam plerumque in culpa deprehensi, dum quales sint cognosci refugiunt, sese sub fallaci velamine abscondunt: et hoc quod peccant, quodque jam aperte cernitur excusare moliantur; ita ut sæpe is qui eorum culpas corripere studet, aspersæ falsitatis nebulis seductus pene amisisse videat, quod de eis jam certum tenebat. Unde recte sub Judææ specie per prophetam contra peccantem animam, excusantemque se dicitur: *Ibi habuit foveam ericius* (Isa. xxxiv): ericii quippe nomine impuræ mentis seseque callide defendentis duplicitas designatur: quia videlicet ericius cum apprehenditur, ejus et caput cernitur, et pedes videntur, et corpus omne conspicitur: sed mox cum apprehensus fuerit semetipsum in spheram colligit, pedes introrsus subtrahit, caput abscondit, et intra tenentis manus totum simul amittitur, quod totum simul antea videbatur. Sic nimirum sic impuræ mentes sunt cum in suis excessibus comprehenduntur: caput enim ericii cernitur, quia quo initio ad culpam peccator accesserit, videtur. Pedes ericii conspiciuntur, quia quibus vestigiis nequitia sit perpetrata cognoscitur; et tamen adductis repente excusationibus impura mens

A introrsus pedes colligit, quia cuncta iniquitatis suæ vestigia abscondit. Caput subtrahit, quia miris defensionibus nec inchoasse se malum aliquod ostendit, et quasi sphaera in manu tenentis remanet; quia is qui corripit cuncta quæ jam cognoverat subito amittens, involutum intra conscientiam peccatorem tenet. Et qui totum jam deprehendendo viderat, tergiversatione pravæ defensionis inclusus totum pariter ignorat. Foveam ergo ericius habet in reprobis, quia malitosæ mentis duplicitas sese inter se colligens abscondit in tenebris defensionis. Audiant impuri quod scriptum est: *Qui ambulat simpliciter, ambulat confidenter* (Rom. x et xxiii): fiducia quippe magnæ securitatis est simplicitas actionis. Audiant quod sapientis ore dicitur: *Spiritus sanctus disciplinæ effugiet fictum* (Sap. i). Audiant quod Scriptura rursus teste perhibetur: *Cum simplicibus sermocinatio ejus* (Prov. ii). Deo enim sermocinari est per illustrationem suæ præsentis humanis mentibus arcana revelare. Cum simplicibus igitur sermocinari dicitur, quia de supernis mysteriis illorum mentes radio suæ visitationis illuminat, quos nulla umbra duplicitatis obscurat.

Est autem speciale duplicium malum; quia dum perversa et duplici actione cæteros fallunt, quasi præstantius cæteris prudentes se esse gloriantur. Et quia distictione retributionis non considerant de damnis suis miseri exsultant, et cætera quæ in regula pastorali beati Gregorii ex ordine potes relegere, quam tibi una cum libro sacrorum canonum in manu ante altare sanctæ Mariæ in die ordinationis tuæ misi, obstans quæ ignorare non potes et oblivisci non debes. Verumtamen hanc negationem tuam, quam sine ulla necessitate assumpsisti ad injuriam meam pertinere non ducam, nec pro crimine reputabo, neque pro hac sola negatione tua me a communione tua separabo, sequens capitulum Africani concilii, quod tu detruncatum, et a suo sensu expositum mihi scripsisti, ultimam ejus particulam ad tuum sensum inflectendo, scripto tuo mihi directo imponere, quia nec pro crimine ducendum puto, si clerico ordinando usque ad ordinationem consensisti in ecclesia in qua ordinandus erat laborare, donec ad ordinandum perveniret, et si dignus atque idoneus inventus foret ordinaretur, quia nec sanctus Innocentius, sicut tibi præscripti, pro crimine reputavit episcopo qui presbyteris quibusdam consensit in sua parochia ecclesias diutius retinere, qui communionem illius eatenus non poterant promereri, sed statuit ut quibus eadem ecclesias retinere diu in parochia sua consenserat, suam eis communionem nullatenus denegaret. Integritas autem ipsius capituli Africani concilii, cujus partem ultimam tuo scripto inseruisti, ista est: *Item placuit ut si quando episcopus dicit aliquem sibi soli proprium crimen fuisse confessum, atque ille neget, non putet ad injuriam suam episcopus pertinere quod illi soli non creditur. Et si scrupulo propria conscientia se dicit neganti nolle com-*

municare quandiu excommunicato non comunicaverit suus episcopus, eidem episcopo ab aliis non communicetur episcopis, ut magis caveat episcopus ne dicat in quemquam quod aliis documentis convincere non potest.

Hæc documenta quæ tibi et prius, et nunc scribo qualiter didici et præcedenti, et hæc subsequenti lectione potes cognoscere, ad quæ confirmanda, et ad te convincendum nullos testes producam, quia non debeo, nec de hac re secretam confessionem tuam, quam non accepit, promere volo, cum Scriptura dicat ei : *Qui revelat arcana, et ambulat fraudulenter, et dilatat labia sua, ne commiscearis* (Prov. xx). Quod ita exponunt doctores catholici : Ne commiscearis ejus amicitiiis qui prioris amici secreta denudat, sed hunc velut perfidum cave. Ostendere autem et monere te debeo, ut secundum leges et regulas inde quod justum est exsequaris. De eo vero quod negas per multas ambages non verisimiles, quibus mihi et longum et inutile respondere videtur, te non consensisse, ut ipse clericus eandem teneret ecclesiam si in contumacia et negatione tua perseverare decreveris, habeas illum conscientiam et negationis tuæ judicem, quem habebis et testem. Et quoniam mihi scripsisti quod inde causam quam nescis investigare et mihi remandare debeas, timeo pro te ne sicut jam fecisti ut victor in contentione videreris quando contra sacram auctoritatem cuiusdam decreto pernicioso, ut dicitur, subscripsisti, et clericos ac presbyteros parochiæ tuæ subscribere fecisti, te de causa hujus ecclesiæ in aliquo naufragio, et alios tecum irregulariter colligans ut evincas, in naufragium ducas. Unde obtestor et moneo te per sanctam et inseparabilem unius divinitatis Trinitatem, et per Christum Jesum Redemptorem nostrum, et per gratiam Spiritus sancti, qui maxime in ordinationibus operatur, quem per impositionem manuum mearum accepisti ; et per gloriam sanctæ Dei genitricis et semper virginis Mariæ, ac per electos Dei angelos, et per beati Remigii merita, et metropolitanam auctoritatem eidem prædecessori meo, et in ejus successione divinitus mihi collatam, ut contra leges quas catholica et apostolica Ecclesia ex antiquo servandas suscepit, contraque sacros sanctorum conciliorum canones et decreta sedis Romanæ pontificum de sacris ordinibus, et canonum promulgata disciplinis de causa Ecclesiæ ipsius non facias, sed sine ullo præjudicio, quantum Deus tibi scire et posse dederit, quod juste et rationabiliter videris exsequaris, et non negligas vel parvipendas rogo hanc obtestationem justitia et ratione atque auctoritate plenam, quia si potui propter ministerium mihi collatum exorare Deum per humilitatem ut tu per impositionem manuum mearum fieres ordinatus episcopus, possum et debeo eodem ministerio te obtestari per auctoritatem ut facias quod facere debet episcopus, sicut et Paulus obtestatus est Timothæum a se ordinatum episcopum, ut non declinans in aliam partem, sine

A præjudicio servaret mandatum (I Tim. v). Et scias, certissime quoniam si secus egeris, Deo annuente et vita comite, opportuno tempore hoc non sine regulari discussione dimittam, non mei, quod absit, causa, sed sacrarum regularum contemptu. De eo quod in eodem tuo insulso scripto apposuisti : Item canon dicit : *Qui unum crimen probare non poterit ad alia admitti non debet*, tibi rescribo, Nescis quid dicis ; plenus indignatione et contumacia non potes oculis mentis videre quod verbis debeas promere, vel quod debeas reticere ; si sequereris beatum David, Dominum deprecaberis ut *poneret custodiam ori tuo, et ostium circumstantiæ labiis tuis* (Psal. xxxviii). Canon dicit : Quotiescunque clericis multa crimina ab accusatoribus objiciuntur, et unum ex ipsis de quo prius egerit probare non valuerit, ad cætera jam non admittatur ; dic quis est ille accusator ; dic apud quem te accusator accusat ; dic in quo regulari judicio te accusat ; dic de quibus criminibus te accusator accusat ; dic de quo crimine accusator egit, quod probare non valuit, ut ad cætera jam non admittatur : quotiescunque enim te metropolitana auctoritate monuero, cui per sacros canones commissa est sollicitudo totius provinciæ de his pro quibus ad me de tua parochia qui negotia videntur habere concurrunt, semper accusator tuus existam. Et cum longius a te separatus corpore fuero, et verbis vel litteris te monuero, pro accusatore tuo de criminibus in judicio regulari tenebor. Regulæ namque dicunt apud quem et qualiter accusandus episcopus debeat accusari, et ubi, et qualiter, vel a quibus debeat judicari ; et quoties tibi ostendero per sanctarum Scripturarum tramitem, et sacram regularum auctoritatem in quibus excedis, semper te a me irregulariter, scilicet absque regulari videlicet synodali judicio, judicatum causaberis : Dominus enim dicit in Evangelio : *Audistis quia dictum est antiquis : Non occides ; qui autem occiderit reus erit judicio : ego autem dico vobis quia omnis qui irascitur fratri suo sine causa, reus erit judicio* (Matth. v), etc.

Et sacri canones sæpenumero dicunt : Si quis præter hæc fecerit, quasi contra magnum concilium se efferens, ipse de clericatus honore periclitabitur. Et decreta sanctæ sedis Romanæ pontificum hoc sensu dicunt : Si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum. Et ut tibi ostendatur in quibus contra hæc agis, sustinere non potes, sed semper te irregulariter judicatum quereris, et laboras quærendo nodum in scirpo, et unde tuam sapientiam jactitas, inde magis stultitiam monstras, cum dicat Apostolus : *Si quis vult inter vos sapiens fieri, stultus fiat ut sit sapiens* (I Cor. iii). Et Salomon dicit : *Qui impatiens est exaltat stultitiam suam, et qui increpationes odit morietur* (Prov. xiv) ; et : *Non amat pestilens eum qui se corripit, nec cum sapientibus graditur* (Prov. xv) ; et : *Filius sapiens doctrina patris ; qui autem illusor est, non audit cum arguitur* (Prov. xiii) ; et : *Auris quæ audit increpationes vitæ, in medio sapien-*

tum commorabitur. Qui abjecit disciplinam, despici animam suam; qui autem acquiescit increpationibus, possessor est cordis (Prov. xv); et: Qui meditatatur discordias, diligit rixas, et qui provocat iras, producit discordias (Prov. xxx); et: Qui exaltat os suum, quaerit ruinam (Prov. xvii); et: Non recipit stultus verba prudentiae, nisi ea dixeris quae versantur in corde ejus (Prov. xviii); et: Vidisti hominem sapientem sibi videri, magis illo spem habebit stultus (Prov. xxvi); et: Expediit magis ursae occurrere raptis fetibus, quam fatuo sibi confidenti in stultitia sua (Prov. xvii); et: Stultus irridet disciplinam patris sui: qui autem custodit increpationes astutior fiet (Prov. xv). Deinde post plurimum, non solum inutilia, sed et fatua adhuc pervenisti ut diceris; quia capitulum quod contra te scripsi de primo libro capitulorum synodali pro te faceret, ut sine auctoritate, vel consensu episcoporum presbyteri in quibuslibet ecclesiis non constituantur, nec expellantur. Et quod conjunctim in eodem habetur capitulo, et tibi scripsi, propter quod et praecedentia, ut integrum illud monstrarent capitulum memorari noluit; scilicet si laici clericos probabilis vitae et doctrinae episcopis consecrandos, suisque in ecclesiis constituendos obtulerint, nulla qualibet ratione eos rejiciant. Dic quis sine auctoritate, vel tuo consensu in Follanæbrayo constituit? Ego, ut praedixi, Sigeberto clericum nostrum concessi, ut tibi illum ad ordinandum offerret, et si illum ordinare velles, ego illi libertatem ecclesiasticam facerem. Quomodo ergo sine tua auctoritate Sigebertus ibi presbyterum constituit? et ubi est ille presbyter? Et Deo gratias quia sicut in subsequenti capitulo regio tuo scripto inserto dixisti, non adhuc habes illam potestatem de Sigeberto, ut bannum regium illum rewadiare cogas, ut per fidejussores ad palatium regium venire facias; quia nec tuus est parochianus, nec de tuo missatico divino, vel humano, nec in ipsa ecclesia presbyterum contra auctoritatem episcopalem constituit; sed forte impletur in te quod scriptum est: *Abominatio Domini est omnis arrogans, etiamsi manu ad manum fuerit, non erit innocens* (Prov. xvi), quia si cessat a perversitate quam explere non potest in operatione, non vacat a malitiosa voluntate quam desiderat si posset explere in opere.

Deinde ad me redis rodendum, dicens: « Perquiri cur a tanto tempore de sua, quin mei clerici irregulari ordinatione non requisistis. » Huc, respondeo tibi, certe quia antea illum a te ordinatum non audivi, nisi postquam ipsi homines de praefata villa se ad me reclamaverunt: nec in voluntate unquam habui ut de illicita ordinatione a te facta te unquam vel usquam impeterem. Denique dicis: « Prius erat modus ordinationis cognoscendus; et sic aut ordinator aut ordinatus jure judicandus, aut utriusque canonico percellendi cauterio. » Dic, frater: Quis te judicavit? et in quo regulari judicio inde es judicatus, vel compellatus: sed non mirum est quod agis, facis enim ut soles quod diligis. Dicit Scriptura:

A *Ephraim vitula docta diligere trituram* (Osc. x). Et item: *Ephraim panis subcinericius qui nunquam reversatur* (Ose. vii). Deinde dicis: « Ergo capitulum quod ex Augustorum nostrorum libro quasi contra me quod agit pro me detruncatum posuistis, integrum resumite, » non est verum; detruncatum illud capitulum regium tibi non misi: non enim ille clericus meus, aut tuus, vel alicujus est liberi hominis servus; et ideo quod capitulum illud de servis quorumlibet dicit, non posui, quia ad istum clericum non pertinebat. Quia vero mihi et non tibi commissae ecclesiae servus est, quod de ecclesiasticis servis illud capitulum dicit, hoc tibi scripsi, quia et hoc ad causam istius clerici pertinere cognovi. Et post ista persequeris: « Hujus autem capituli tenore perspecto, responsum de ordinatione clerici vestri meum, si a me facta est tempore et loco cum congruo tunc canonico exspectate, et interea de mea irregulari ordinatione judicare desistite, quoniam accusator simul et iudex non eritis. Et post capitulum canonum de scientia hujus clerici conditionis, et de transgressione per ordinationem inhibitam patet quid decerneretur, quae prius si placet opponenda est, et aut confesso, aut convicto inculcandum erit iudicium. Quod jam licet de me non convicto, nec confesso absque ulla synodo, sine ulla hujusmodi interrogatione, aut requisitione, aut praesenti interpellatione officium accusatoris simul et iudicis, tam de absente, quam absenti scripto vobis judicantes exerceueritis, ita pronuntiando. Quia vero ipsum clericum contra regulas ordinasti, sacrae regulae demonstrant dicentes. » Et tunc ponis capitulum beati Leonis quod tibi scripsi; in cujus fine solito more tuam ostentas scientiam, de qua ostentata scientia tua, quia non est utilis vel necessaria loqui nil curo; quia sicut de chamæleonte legimus, qui quemcunque colorem viderit, in eum convertitur, ita tu saliendo semper tuis ipsis dictis contraria vadis. Quandoquidem vero quia accusator simul et iudex esse non possum, quandoquidem quia te absentem iudico, interdum ut personam accusatoris induam, et tunc te accusem. Aliquando quod sine synodo te iudicio, et aliquando quod sine synodo te judicare non possum; et quia nec intelligis nec intellexisti admit-tendos ad ordines sacros servituti obnoxios. Et D multis modis hac illac vadis fluctuando sicut arundo a vento agitata, videlicet animo fluctuante, quia nullius gravitatis pondere es stabilitus.

Dicis etiam me exponere capitulum Leonis sicut volo, sed non sicut tu, hoc promis, sed sicut se res habet verum dicis: sic enim illum expono ut volo, quia sic illum expono ut debeo, quia sic illum intelligo sicut illi eum intellexerunt qui in capitulis synodalibus de ecclesiarum servis, ut tibi scripsi, et mihi rescripsisti, decreverunt; et sicut in ipsa manumissione servi ecclesiastici demonstratur; non enim sacri canones manumissionem fieri in ecclesia de natura liberis ab imperatoribus petierunt,

nec quilibet natura liberi per manumissionem fiunt cives Romani, sed servi vel ecclesiastici, vel regii, vel quorumlibet liberorum hominum. Et ideo sanctus Leo in capitulo sui decreti ex canonibus promulgato constituit, ut alicui conditioni obligatus non ordinetur, nisi forte eorum petito ad voluntas accesserit, qui aliquid sibi in eos vindicant potestatis. Quandiu enim fuero Rhemorum episcopus, in servis hujus ecclesiæ mihi potestatem debitam vindicabo, et sine libertate ecclesiastica per me sibi data quisquam eorum ordinari non debet. Unde breviter tibi dico quod Dominus ad Judæos dixit : *Non ego accuso vos, sed Moyses, in quem speratis, ipse vos accusat* (Joan. v), scilicet lex contra quam agitis. Et item Dominus dicit : *Ego non iudicio quemquam, est qui quarat et iudicet* (Joan. viii). Videlicet quia si ordinasti contra decreta Leonis ipsum clericum, non ego peccator in terra, sed ille sanctus de cælo te inde per suum decretum iudicat ; et si confiteri vis a te illum irregulariter ordinatum, sicut nec de aliis, ita nec de isto tuam quæro, vel desidero damnationem, vel quemcunque ante oculos humanos ruborem. Si autem negas illum te ordinasse sicut jam præmisi, habeas illum conscientia ac negationis tuæ iudicem, quem habebis et testem. Cæterum sacri canones dicunt ut episcopus sine concilio clericorum suorum clericos non ordinet, ita ut civium conhibitionem, et testimonium quærat : et secundum sacros canones et decreta sedis Romanæ pontificum mea interest, ut si ratio postulaverit me compellente ad delectorum de ordinatione ipsius clerici quam denegas, accedas iudicium, et quidquid veritate cognita, mediantibus sacrosanctis Evangeliiis per eos tam clericos quam cives, quorum consensu et in quorum præsentia ordinationes iuberis facere, inventum fuerit, hoc statuatur. Sed si æquissimum iudicem Deum, cui de omnibus factis et iudiciis nostris sumus reddituri rationem timueris hoc agere, nulla erit necessitas. Neque ego hanc, vel aliam quamcunque causam volo exaggerare, quia de quibuscunque scandalum sine peccato propria conscientia vitare potero, nemini scandalum inferre volo. Si autem ipse clericus, quod non opto nec quæro, se in comprovinciali synodo reclamaverit, aut de ordinatione a te in eum exhibita, aut de quocunque præiudicio, quia sacri canones dicunt, præmissa sententia de presbyteris et diaconibus, ut reliquorum clericorum causas etiam solus episcopus loci agnoscat et finiat. Et si presbyteri, diaconi, vel cæteri inferioris gradus clerici in causis quas habuerint, de iudiciis episcoporum suorum questi fuerint, vicini episcopi eos, cum consensu sui episcopi audiant, et inter eos diffiniant adhibiti ab eis episcopi. Quod etsi ab eis provocandum putaverint ad primates suarum provinciarum, sicut et de episcopis sæpe constitutum est provocent : et omnes qui se læsos existimant adsint conciliis, et synodi experiantur examen ; et plura quæ hinc canones dicunt, et mihi longum est scribere. Quidquid confratrum et coepiscoporum nostrorum

A consensu atque iudicio invenerimus salva pace, et charitate inde secundum sacram auctoritatem exsequi procurabimus. De eo quod dicis, cum per singula de cæteris omnibus ; tunc de receptione Gallicanorum canonum pleniter respondebis, tibi rescribo, quia Dominus qui in se credentibus promisit : *Aperi os tuum, et ego adimplebo illud* ; et : *Ego dabo vobis sapientiam, cui non poterunt resistere et contradicere omnes adversarii vestri*, et etiam brutos asina ruditus in humanas formavit loquelas, et siccam rupem fundere iussit aquas : et mihi dare poterit quæ tibi respondeam. Plurimis vero a te præmissis, et a me ut inutilibus prætermisissis, in quibus quandoquidem est negatio, quandoquidem quod negaveras demonstratio continetur, ad hoc pervenisti ut diceres me obligare volens de sententiis apostolicæ sedis tibi a me litteris præcedentibus scriptis. *Ecce in mala suasionem delictum, et in mala consensione peccatum depromitur ; et sicut vos sententiis quod mihi male suasum est, et a me male est sensum pariter vos consentire dignemini, dicentes quæ jam præmisi, ut scribam vobis si eum ordinare volo secundum morem, et vos illi libertatem ecclesiasticam dabatis, quem taliter ad gradus ecclesiasticos pervenisse divulgatis*. Unde tibi quod Salomon dicit scribo : *Qui erudit derisorem, ipse sibi facit injuriam* (Prov. ix). Non bene intelligis, quia non bene vis quod tibi bene et recte scripsi, scilicet ut si cujuscunque suasionem, vel quacunque subreptionem in hoc excessisti, et alias ipsum clericum utilem in ecclesiastico ministerio comprobaveris, quod defuit et tibi, et illi in ordinatione sua, et ad me pertinebat, ego supplerem. Lege decreta sedis Romanæ pontificum a beato Siricio, et deinceps, et invenies quomodo plures irregulariter ordinati per medicinam ecclesiasticam fuere sanati, supplente auctoritate in processu quod defuerat in ordinationis initio. Cogunt, inquit beatus Augustinus, multas invenire medicinas multorum experimenta morborum. Deinde, volens ostendere quod tui odio, et Sigeberti gratia, hæc de præfato clerico scripserim, nugas tibi noxias, et nœnias bene volenti et scienti non ridendas, sed dolendas componis. Cum Sigeberto, quantum ex ipso et pro ipso est, cura non est ut nunquam in illa ecclesia sit presbyter ordinatus ; quia nullam inde necessitatem habet : et si fuerit ibi presbyter ordinatus, nullum lucrum inde terrenum habebit. Et si in ipsa D ecclesia presbyter non fuerit ordinatus, nullum detrimentum vel incommodum spirituale aut temporale inde habebit. Sed et mihi nulla alia inde est cura, nisi ut leges ecclesiasticæ pro tua insolentia inde suum vigorem non perdant ; et homines exinde commoditatem, quam ipsi et sui antecessores a longo tempore habuerunt, amittant, et tu in hoc Deum offendas. Deinde minas præfato intentas clerico, cui si præiudicium intuleris, est justus iudex qui inter te et illum iudicabit : et si ad synodum venerit, quod nostrum erit, ut prædixi, exsequi procurabimus. Quod autem de missis meis ad synodum tuam mittendis subjungis, non missorum meorum ad synodum

tuam describis officium. Ego enim per me, vel per vicarios meos debeo retractare secundum sacros canones acta suæ synodi, si secus inde ad me quoddam pervenerit, et non ideo ad tuam synodum meos missos dirigere ut servum ecclesiæ nostræ in nulla rebellione stantem servituti obnoxium comprobent. Licet enim satis insipientis, scio qualiter, et ubi servus ecclesiasticus rebellans debet conquiri, et alibi oportet me de professione suæ servitutis requirere quam in tua provincialis episcopi synodo. Tandem quod scripsisti, ut, o utinam tibi servarem episcopo, carcerali sicut scio custodiæ tradito, ne inferrem tibi et parochiæ tuæ, contra apostolicorum omnium decreta, etiam ab apostolica sede vocato, et eam appellanti, præjudicium, et non exigerem a te responsum usque ad synodalem saltem conventum; et de sententiis apostolicæ sedis pontificum in eodem tuo scripto congestis, alterius temporis, et prolixiorum quam hæc sustineat epistola poscit responsionem. In clausula vero istius epistolæ verba beati Gregorii ad quemdam subjectum episcopum directa ponere dignum duxi; quia in tuis scriptis ad me directis contraria his suis monitionibus sæpe inveni, ut de cætero monitus per meam exiguitatem a beato Gregorio talia in tuis scriptis ad me, vel ad alios scientiam et auctoritatem habentes dirigendis ponere caveas. Primum, inquit, hoc me contristat, quia mihi fraternitas tua duplici corde scribit, et alia blandimenta in epistolis suis exhibet, alia in lingua sua sæculariter ostentat. Deinde grave mihi est, quod irrationes illas, quas habere notarii adhuc pueri solent, usque hodie frater meus in lingua sua retinet, mordenter loquitur, et quasi de tali studio lætatur, amicis præsentibus blanditur, de absentibus obloquitur. Et vitium describens superbiæ dicit: Quisquis, inquiens ejus, in se tyrannidem captiva mente susceperit, hoc primum damnum patitur, quod clauso cordis oculo iudicii æquitatem perdit. Nam cuncta quæ ab aliis vel bene geruntur displicent, et sola ei quæ ipse vel pravo egerit, placeant, semper aliena opera despiciunt, semper miratur quod facit, quia et quicquid egerit, egisse se singulariter credit, atque in eo quod exhibet per gloriæ cupiditatem, sibimet ipsi per cogitationem favet; nec considerat quod alter boni amplius quam ipse, sed quod boni ipse amplius quam alter habeat: nequo enim pensat quæ bona spiritus alter acceperit, ut ipsi desint, sed quæ bona ipsi, et quæ mala sint alteri. Et cum se in cunctis transcendere cæteros æstimat, per lata cogitationum spatia secum deambulans, laudes suas tacitus clamat; nonnunquam vero ad tantam elationem mens ducitur, ut in eo quod tumet etiam per ostentationem locutionis effrenetur: et tanto facilius ruina sequitur, quanto apud se quisque impudentius exaltatur: hinc enim scriptum est: *Ante ruinam exultabit cor (Prov. xviii)*. Et sanctus Gregorius Nazianzenus Iuliani morem, quem in tuis litteris invenio, describens dicit: Consensus et negatio simul, ratio nulla ratione subsistens; inter-

rogatio inordinata, atque responsio nulla convenientia sibi conveniens erat. Post hæc autem omnia et me, et te in mente continue habere moneo quod Dominus dicit: *Super quem requiescit Spiritus meus, nisi super humilem, et quietum, et trementem sermones meos? (Isa. lxxvi)*. Quia sicut scriptum est: *Spiritus sanctus disciplinæ effugiet fictum, et auferet se a cogitationibus sine intellectu, et non habitabit in corpore subdito peccatis (Sap. i)*; et: *Juxta est Dominus his qui tribulato, sunt corde, et humiles spiritu salvabit; vultus autem Domini super facientes perseveranter mala, ut perdat de terra memoriam eorum*. Data v Idus Maii præsentis III indictionis.

SCHEDULA

sive

LIBELLUS EXPOSTULATIONIS HINCMMAR

METROPOLITANI RHEMENSIS

Adversus HINCMMARUM Laudunensem episcopum

In synodo Duziacensi recitatus.

(EX consiliorum Labbei tomo VIII.)

PREFATIO.

Sanctus Cælestinus synodo apud Ephesum scripsit: « Spiritus sancti præsentiam testificat congregatio sacerdotum. Certum est enim quod legimus, quia non potest Veritas nostra mentiri, cujus in Evangelio sententia ista est: *Ubi duo vel tres congregati fuerint in nomine meo, ibi et ego sum in medio eorum (Matth. xviii)*. » Quod certissimum retinens, vestræ sanctæ congregationi consilium, et auxilium, sicut et jam feci apud eos qui conventibus inter fuerunt, scilicet in Vermeria, deinde in Gundulfi villa, et postea in Attiniaco, porrecta in synodo schedula de fratre et coepiscopo nostro Hincmmo exposita: quem multis epistolis, quarum habeo exemplaria, ut a pertinaci contumacia sua erga metropolem, suæ privilegium respisceret, corripui; sed corrigere non prævalui. Nam post multas commotiones, quibus ad eum nihil profeci, nuper iv Idus Junias præsentis iv indictionis, de his quæ in hac schedula breviter collecta sequuntur: sed et de petitione Bertharii diaconi Laudunensis, mihi adversus eum directa, cujus exemplar hic habeo: pro loci mei officio, illum ad proxime futuram synodum invitans, scripto commonui, volens illum statuere contra faciem suam: ut illa quæ coram Deo tecta, et coram hominibus oblita penitus cupiebam, alligata litteris, et ad memoriam ejus reducta legeret, ac se intelligeret, ne quando eum regularis iudicium raperet, quod effugere non valeret. Et in indiculo quo ad hanc synodum cum vocavi, sicut et cæteros provinciarum Rhemorum episcopos, illi superaddidi: « Sciat etiam tua fraternitas, eos qui adversum te anno præterito apud me querelas suas deposuerunt, et de quibus in synodo fuisti apud Attiniacum impetitus,

quoniam quæ conventa ibi fuerant, non es regulariter prosecutus, nunc iterum suas querelas deponere. Unde moneo fraternitatem tuam, ut ita inde præcogitatus et præparatus ad denuntiata synodum venias, quatenus querimoniam indecentes episcopo sopiantur: ne nomen bonum quod apostolica regula jubet habere episcopum, in tua opinione notetur; et, sicut idem dicit Apostolus, non vituperetur ministerium nostrum. Dat. prid. Id. Maii præsentis iv indictionis. »

Unde exardescens sicut ignis in spinis, mihi more suo prolixissimam rotulam xvi Kat. Julias præsentis iv indict. per hominem suum nomine Chunibertum, exprobrationibus repletam, et calumniis respersam direxit. Cui hoc modo per compresbyterum nostrum rescriptum direxi: « Domus apostolicus Adrianus misit mihi epistolas de causis nostræ diœceseos, quas oportet in synodo legi. Propterea auctoritate ipsius domni apostolici, te ad proximam futuram synodum in Duziaco Rhemensis parochiæ, Non. Augusti præsentis iv indict. venire commoneo. Data iii Non. Julias præsentis quartæ indict. » Igitur quoniam per me corrigere nequeo, vestram consultationem ac consolationem inde similiter adeo, si forte Spiritus sanctus, qui ubi vult spirat, et cujus præsentiam sancta congregatio vestra testificatur, vestris salubribus monitis, et Deo dignis orationibus, eum tandem aliquando corrigat, aut regulari medicamento insolentiam ejus compescat: quoniam diutius eum sine correctione, et propter Deum, et propter metropolitanam sollicitudinem indigno mihi commissam, sustinere non audeo. Præsertim cum et domnus papa Adrianus me nuper apostolicis suis litteris hinc commonuerit. Quæ ita se habent.

« Adrianus episcopus, servus servorum Dei, reverentissimo confratri nostro Hincmaro archiepiscopo, Fidelium relatione comperimus, etc. *Reliqua vide inter epistolas Adriani II, tomo CXII, col. 70. Patrologiæ.* Ex hæc quidem, sed et alia quæ sequuntur, non de propriis et specialibus meis injuriis vice accusatoris, sed sollicitudine privilegium metropolis Rhemorum provinciæ, per sacros canones Spiritu Dei conditos, et totius mundi reverentia consecratos decretum, et auctoritate apostolicæ sedis confirmatum, contra convellentem illud, evindicantis et contra professionem et subscriptionem suam erga sanctos sanctorum conciliorum canones, et decreta sedis apostolicæ, ex eisdem canonibus promulgata, ergaque sacras leges, quibus una cum canonibus moderatur Ecclesia, ejus contemptum monstrantis, et ei per scripturam falso illatas mihi calumnias refellentis, inculco. Quia ut beatus Cælestinus dicit (*epist. 1 et 3*), « merito nos causa respicit, si silentio faveamus errori. Quæ enim a nobis res digna servabitur, si decretorum norma constitutorum pro aliquorum libitu licentia populis permessa frangatur. Non est agentium causa solum: universalis Ecclesia quacunque novitate pulsatur. » Novum est enim quod provincialis episcopus qui non in civitate quæ

ex antiquo inter provinciales sedes fuerit computata, sed in municipio Lauduni a Marco brio prætore condito, ut produnt historiæ; quod ab exordio sui nunquam inter sedes provinciales Rhemorum provinciæ in paganismo, vel in Christianismo nomen vel locum habuit, donec S. Remigius quintus decimus Rhemorum archiepiscopus, certis quibusdam accidentibus causis, primus ibidem ordinavit episcopum, et eidem municipio de rebus Rhemensis metropolis satis superque dilato, ipsum comitatum in quo consistit, partem scilicet ex Rhemensi parochia delegavit, sed semper fuit Rhemensis parochiæ municipium; sicut hodieque et alia municipia in Rhemensi parochia, quæ in subjectionis loco ac nomine permanent, privilegium sibi arrogat, et contra privilegium metropolis suæ rebellat. Cum S. Leo diffiniat scribens ad Maximum Antiochenum episcopum (*epist. 66*): « Etsi enim diversa nonnunquam sunt merita præsulum, jura tamen permanent sedium; quibus possunt æmuli perturbationem aliquam fortassis inferre, non tamen possunt minuere dignitatem. » Quapropter non queror adversus hunc fratrem speciali causa mearum injuriarum, sed contempti privilegii Rhemorum metropolis, quod sacri canones mystici Nicæni concilii sedibus singularum provinciarum servari irrefragabiliter decreverunt. De quibus item Leo ad Anatolium diffinivit (*idem ep. 53, ad Anatol. Vid. et ep. 55 ad Pulcher Aug.*), « ut omni penitus auctoritate sit vacuum, quidquid ab illorum fuerit constitutione diversum. »

CAPUT PRIMUM.

Quod palatii regii et abbatiæ administrationem contra canones obtinuit.

(*Hincm., lib. LV Cap., c. 2; conc. Antioch. c. 9.*) Cum sacri Antiocheni canones præcipiant, ut præter metropolitanum nihil agere debeat, secundum antiquam a Patribus nostris regulam constitutam, nisi ea tantum quæ ad suam parochiam pertinent, possessionesque subjectas: sine mea vel coepiscoporum conscientia administrationem in palatio domni regis obtinuit. Quam administrationem illi coram eodem domno rege, et aliis qui adfuerunt, ex sacris regulis interdixi. Postea iterum per exterarum potestates, id est sæcularium interventione, contra Sardicenses canones, eandem administrationem in palatio cum abbatiâ in tertia provincia, ultra Rhemensem provinciam, sine mea conscientia impetravit, et per aliquot annos tenuit: donec contra domnum regem in tantum se, sine ratione, contumaciter erexit, ut et administrationem palatinam, et ipsam abbatiâ illi auferret. Contra quæ Sardicenses canones dicunt:

« Scimus enim et ipsi sæpissime propter paucorum impudentiam religiosum sacerdotale nomen fuisse reprehensum. »

Et post aliquanta in hujusmodi litteris subscribi et talem in communione recipi vetant.

CAPUT II.

Quod ad eandem abbatiam sine licentia metropolitani contra canones perrexit.

(*Lib. LV Cap., c. 2.*) Ad quam abbatiam quoties sibi placuit, sine licentia mea perrexit : et quandiu illi placuit, ibidem commoratus fuit ; contra Hilari papæ decreta dicentis (*epist. 8, ad diversos episcopos Galliæ*) : « Illud non potuimus præterire, quod sollicitudine diligentiore curandum est, ne præter metropolitano suorum litteras aliqui episcopi ad quamlibet provinciam audeant proficisci. Quod etiam in omni genere officii clericalis per singulas debet ecclesias custodiri. » Et sic antea Zosimus (*epist. 5, 6, 11*), et postea S. Gregorius (*lib. VII, ind. 2, ep. 8*) decrevit, scribens ad Vincentium [*al., Innocentium*] et cæteros episcopos : « Hortamur, inquit, fraternitatem vestram, ut si quemquam vestrum pro causis propriis ubicunque longius compulerit ambulare necessitas, a metropolitano vestro, secundum inditam a sanctis Patribus regulam, petere licentiam debeatis, nec eum postponere in aliquo debeatis. » Et reliqua.

CAPUT III.

Quod ad ordinationem episcopi Cameracensis vocatus venire, aut vicarium mittere, contempsit.

(*Lib. LV Cap., c. 2.*) Præterea quoque litteris canonicis certum diem et locum designantibus, et ad ecclesiam suam ex more directis, quarum exemplar habeo, evocatus ad ordinationem episcopi in ecclesia Cameracensis provinciæ nostræ, pastore destituta, unde apostolica sedes, me suggerente non modice laboravit, nec ipse venit, nec pro se vicariam personam, vel litteras sui consensus ad me, sicut præcipiunt regulæ sacræ, direxit. Qua de re, ordinatio electi fuit dilata. Unde iterum istiusmodi litteras ad ecclesiam suam ex more direxi : « Hincmarus Rhemorum episcopus dilecto fratri Hincmaro et venerabili coepiscopo nostro, salutem. Sicut jam altera vice litteris dilectioni tuæ mandavi, clerus ac plebs Cameracensis ecclesiæ cum decreto canonico petierunt sibi ordinari episcopum Joannem presbyterum, virum boni testimonii : ad ejus ordinationem nonis Julii convenimus secus Belvacum. Sed quia tua fraternitas illuc non convenit, nec pro se personam aut litteras sui consensus direxit, ordinationem illius distulimus. Propterea, quoniam sicut ipse scis, eadem sedes, diu in multorum periculum vacat pastore, XII Kalendas Augusti conveni cum cæteris fratribus in monasterium quod dicitur Isla, in parochia Belvacensi ad eundem fratrem nostrum ex more ordinandum episcopum. Data III. Id. Julii. » Et convenientibus nobis ad prædictum locum prædictis Kalendis, nec ipse venit, nec pro se vicariam personam, vel litteras sui consensus, ad me, sicut præcipiunt sacræ regulæ, direxit. Nos autem qui convenimus, auctoritate Nicæni concilii, decernentis (*can. 6*) ut in ordinando episcopo, si communi cunctorum decreto rationabili, et secundum regulam ecclesiasticam comprobato, duo aut tres propter con-

A tentiones proprias contradicant, obtineat sententia plurimorum, eundem venerabilem fratrem Joannem episcopum ordinavimus. De contemptu autem fratris Hincmari, ut ad ordinandum coepiscopum nostrum conveniret, et secundo litteris commonitus venire contempsit, Symmachus papa ad Æonium ita ex sacris regulis promulgavit (*epist. 10, ad Cæsarium, non ad Æonium*) : « Ut si quilibet episcopus metropolitano pontifici juxta canonicam diffinitionem vocatus obtemperare noluerit, noverit succidendum se, quod non optamus, ecclesiastica disciplina. » Sed dehinc a me conventus, nullam satisfactionem, nec etiam humile responsum, mihi ac coepiscopis nostris reddidit.

CAPUT IV.

B *Quod regem sine ratione vel necessitate offendit, et aliorum episcoporum parochianos excommunicavit.*

Postea intervenit diutinum scandalum inter domnum regem et illius pertinacem contumaciam : eo quod homines sui ad domnum regem se reclamaverunt, quia beneficia eorum ab eis injuste abstulerit. Unde domnus rex semel ac secundo me, una cum coepiscopis nostris, et aliis missis suis, inter eos habere audientiam jussit ; sed illum ad rationem et obedientiam debitam flectere non potuimus. Quapropter jussit domnus rex, ut ad Pontigonem palatium suum in Rhemensi provincia, quo plures episcopi, et alii fideles ejus conventuri erant, aut ipse veniret, aut ita personas pro se instructas dirigeret, ut ipsæ quærimoniæ finem acciperent. Ipse autem illuc non venit, nec ita instructas pro se personas direxit, qui legalem finem eisdem querimoniis imponerent. Qua de re domnus rex ei mandavit, ut ipsis hominibus sua beneficia tenere permitteret, usque dum juste et rationabiliter causæ de quibus apud eum reclamabatur diffinirentur.

Idem autem sine misso regis, vel metropolitani, absentibus illis qui contra eum querebantur, contra leges publicas et ecclesiasticas, septem homines quod sibi fuerat visum, interrogavit, et quod domnus rex ei mandaverat, non obaudivit. Et veniens demum ad domnum regem adeo illum commovit, ut et suprafatam, abbatiam, et administrationem palatinam ab eo auferret. Et post hæc, quia sicut ei præcepit ad domnum regem venire, non voluit, nec advocatum suum qui de rebus pecuniariis, contra conquirentes adversus eum rationem redderet, misit, nec electorum iudicium juxta leges et regulas expetere voluit, nec mihi suo metropolitano, ut ecclesiasticos iudices, quorum iudicio causæ finiuntur, sicut leges et regulæ jubent, illi delegarent, quiddam mandavit, domni regis erga se animum non mediocriter exaggeravit (*lib. LV Cap., c. 21*). Cujus benignitatem ad eum veniens, adjunctis mecum nostris coepiscopis, sicut antea, et postea sæpius egi, placabilem ei feci. Sed frater Hincmarus more sueto iterum atque iterum domni regis animum sine ulla ratione vel necessitate contumaciter recommovit ;

et sine ipsius licentia ab eo recedens, Laudunum per noctem aufugit. Quem dominus rex litteris et missis tam ecclesiasticis quam et sæcularibus ut ad eum venire sæpe vocavit : qui ad eum venire contempsit. Et quoniam pervenit ad domnum regem, quia cum Lothario illi conveniret, ut ecclesiam et plebem sibi creditam desereret, et in regno ipsius honores acciperet. Qui et in litteris domno regi directis scripsit dicens : « Deo teste vobis loquor : potius eligo extra vestrum degere regnum, quam in vestro talis apparere, quosdam nosco susurrare. » Tunc dominus rex necessitate compulsus mandavit, ut quia ipse venire volebat, liberi homines de episcopio Lauduni ad eum compendio palatio venirent. Quo aliqui ex eis venerunt : quibusdam vero, ut ad regem perventum est, Hinemarus venire non permisit. Et ideo dominus rex duos episcopos Rhemorum provincie, Odonem scilicet et Willebertum, ad eum misit, mandans ut jam tandem ad eum veniret. Et misit reipublice ministros, ut liberos homines, qui ad eum, sicut mandaverat, non venerunt, et cum Hinemaro debebant, aut voluntarios aut invitos ad eum venire facerent.

(*Ibid.*, c. 3.) Hinemarus audiens eorum adventum, sicut etiam ipse in scripto suo dimonstrat, antequam reip. ministri ad eum directi Laudunum pervenirent, inauditam antea nostris temporibus excommunicationem in meos, et multorum archiepiscoporum et episcoporum parochianos, non de criminibus quibuscunque accusatos, vel confessos, sive convictos, sed nec evangelice vel regulariter commonitos, in parochia sua perpetratis, sine mea conscientia, contra sacras regulas jaculavit. Unde maximum scandalum et regi et regno, et istis Cisalpinis ecclesiis intulit. Excommunicatio vero, quin potius maledictio, quam furia exagitata intorsit, hoc modo se habet : « Apostolica, imo divina auctoritate per virtutem hujus ligni (videlicet sancte crucis), cooperantibus meritis sancte hujus genitricis Mariæ, cum auctoritate beatissimi principis apostolorum Petri, tam omnes hujus loci invasores, quam parochie meæ, omnesque hujusmodi contaminatores cunctosque eis consentientes, anathemate damnamus, et a liminibus sancte Dei Ecclesie extorres virtute Spiritus sancti decernimus, atque ab omni Christianorum consortio alienos adjudicamus. » Et mox subsequitur in suo scripto. « Responditque omnis clerus : Anathema sint : tenentibus presbyteris in manibus sancta Evangelia, lignumque sancte crucis. »

Prafati vero episcopi ad eum venientes, nihil de obedientia erga regem, quam illi super sacrosancta juravit, obtinuerunt. Reip. autem ministri a rege directi, nullam ei aut cuiquam violentiam inferentes, homines liberos episcopii Laudunensis ad regis fidelitatem sacramento confirmaverunt, et sic ad regem redierunt. Ipse vero me postposito, in tali excommunicatione suis est libitibus usus : cum sacri Africae provincie canones præcipiant (*can.* 86) ut posteriores episcopi anterioribus deferant, nec eis

A inconsultis aliquid agere præsumant. Et lex prohibeat, ut per alienam messem transiens falcem non mittat, sed manu spicas conterat et manducet (*Deut.* xxiii). « Falcem, » inquit beatus Gregorius ad Augustinum (*lib.* xii, *epist.* 31, *ad Augustin.*) « iudicii mittere in ea segete non potest, quæ alteri videtur esse commissa : sed per effectum boni operis frumenta Dominica vitiorum suorum paleis exspolia, et in ecclesie corpus monendo et persuadendo, quasi mandando, converte. » Et item S. Gregorius ad Januarium episcopum, qui Isidorum V. Cl. causa suæ injuriæ excommunicaverat, scripsit, dicens (*lib.* ii, *ind.* 10, *ep.* 34) : « Quia, si ita est, nihil te ostendis de cœlestibus cogitare, sed terrenam te habere conversationem significas, dum pro vindicta propriæ injuriæ, quod sacris regulis prohibetur, maledictionem anathematis invexisti. Unde de cætero omnino esto circumspectus, atque sollicitus, ne tale cuiquam pro defensione injuriæ tuæ inferre denuo præsumas. Nam si tale aliquid feceris, in te scias postea vindicandum. » Et sanctus Augustinus in libro de Pœnitentia : « Auferte malum a vobis ipsis. Quibus verbis satis ostendit, non temere, et quomodolibet ; sed per iudicium auferentes malos ab Ecclesie communione. Noluit enim Apostolus hominem ab homine judicari ex arbitrio suspicionis, vel etiam extraordinario usurpato iudicio : sed potius ex lege Dei secundum ordinem Ecclesie, sive ultro confessum, sive accusatum atque convictum. Alioquin illud cur dixit : Si quis frater nominatur aut fornicator, aut idolis serviens, etc., nisi quia eam nominationem intelligi voluit quæ fit in quemquam, cum sententia ordine judiciario, atque integritate proferatur. Nam si nominatio sufficit, multi damnandi sunt innocentes ; quia falso sæpe in quoquam crimen nominatur. »

CAPUT V.

Quod ecclesie suæ presbyteros et ministros illicite excommunicavit.

(*Lib.* lv *Cap.*, c. 28.) De qua præsumptione coram coepiscopis nostris, quia publice illam admiserat, cum corripui : sed non acquievit ullo modo corrigi. Unde iterum causa suæ injuriæ, me inconsulto, et sine consensu coepiscoporum Rhemensis provincie, sicut petitio a clericis Laudunensis ecclesie mihi porrecta demonstrat, et in synodo apud Attiniacum habita demonstravi, presbyteros, et ministros ecclesie excommunicavit, ut nemo in eadem parochia missarum officia celebraret. Unde S. Augustinus doctor famosissimus, et ab apostolica sede receptissimus, qui Carthaginensi concilio interfuit (*concil. Carthag.*, c. 19, 20), et constitutiones ipsius plenissime novit, in epistola ad clerum et plebem Hipponensium, inter alia dicit (*Aug.*, *epist.* 137) : « Nuper in concilio episcoporum constitutum est, nullum clericum qui nondum convictus est, suspendi a communione debere, nisi ad causam suam examinandam non se præsentarit. » Et S. Gregorius Augustino tempore posterior, et

loco prior, ex sacris legibus ad Martinum, et ad Sici-
lienses episcopos, promulgavit (*lib. vii, ind. 2, ep. 64*),
« ut nemo sine cognitione damnetur. » Et de illicita
excommunicandi ratione lex Justiniani catholici imperatoris,
quam probat et servat Ecclesia catholica, constitutione 118,
capitulo 441, decrevit ut nemo episcopus, nemo presbyter
excommunicet aliquem, antequam causa probetur, propter
quam ecclesiastici canones hoc fieri jubent. Si quis autem
adversus ea excommunicaverit aliquem, ille quidem qui
excommunicatus est majoris sacerdotis auctoritate ad gratiam
sanctæ communionis redeat; is autem qui non legitime
excommunicavit, in tantum absteineat a sacra communione
tempus, quantum majori sacerdoti visum fuerit, ut id quod
injuste fecit, ipse juste patiatur. Et hinc S. Gregorius ad
Joannem episcopum injuste excommunicantem, inter cætera scripsit,
dicens, (*lib. ii, ind. 11, ep. 6*): « Cassatis prius, atque ad
nihilum redactis prædictæ sententiæ tuæ decretis, ex beati
Petri apostolorum principis auctoritate, decernimus triginta
dierum spatio sacra te communionem privatum, ab omnipotente
Deo nostro tanti excessus veniam cum summa poenitentia et
lacrymis exorare. Quod si hanc sententiam nostram cognoverimus
implet remissius: non jam tantum injustitiam, sed et contumaciam
fraternitatis tuæ cognosces, juvante Domino, severius
puniendam. » Et item idem quosdam episcopos excedentes,
post inquisitionem, utrum excessus exsilio, vel depositione
cujusque sit dignis? in sex mensibus Dominici corporis et
sanguinis communionem privatos agere poenitentiam in
monasterio decrevit; ea conditione ut, si communionem
privatis mortis contigerit imminere periculum, benedictio
eis viatici non negetur. « De qua causa, ut idem alibi,
et aliunde dicit, estensa est nobis ira quam sequamur,
apposita forma cui imprimamur. »

CAPUT VI.

Quod infantes in sua parochia baptizari prohibuit.

(*Lib. lv Cap., c. 31, 47*). Prohibuit quoque ut nemo
parvulos in sua parochia, etiam in mortisurgentis
periculo constitutos, baptizaret; sicut in petitione
præfata continetur: cum Veritas dicat: *Nisi quis renatus
fuerit ex aqua et Spiritu sancto, non intrabit in regnum
celorum* (*Joan. v*); et *Non venit filius hominis animas
perdere, sed salvare* (*Luc. ix*); et item: *Sinite parvulos
venire ad me, et nolite prohibere eos* (*Matth. xix*).
Obviam etiam decretis Siricii, Leonis, Gelasii, et
Africanorum concilii. Nam de infantibus baptizandis,
qui nondum baptizati noscuntur, quoties necessitas
exegerit, regula ecclesiastica per beatum Siricium est
prolata; cujus regulæ conclusio constat hoc modo
(*Siric., epist. 1, ad Himerium*): « Nunc præfata
regulam omnes teneant sacerdotes, qui nolunt ab
apostolicæ petra, super quam Christus universalem
construxit Ecclesiam, soliditate divelli. » Et S. Leo
hujus salutis singulare præsidium nullo tempore
unquam denegari decrevit (*S. Leo, epist. 92, ad Rustic.*),

CAPUT VII.

Quod poenitentiam et viaticum morientibus dari vetuit.

(*Lib. lv Cap., c. 32*.) Nullum siquidem etiam ad
ultimam poenitentiam suscipi, et nulli viatico munere
subveniri, contra Nicænos et Africanos canones et
decreta Siricii, et Innocentii atque Cælestini, nec
non et Leonis, vetuit, sicut in sæpefata petitione
habetur. Cum per se Veritas dicat: *Venit Filius
hominis quærere et salvare quod perierat* (*Luc. xix*);
qui non venit justos, sed peccatores vocare in poenitentiam
(*Matth. ix*). Multis voce Domini reclamantibus,
et Ecclesiæ catholicæ doctoribus, ut præsidium
regenerationis et poenitentiae, sacræque communionis
in mortis periculo positis et petentibus, a quoquam
nullatenus denegeretur. Et sacrum Nicænum concilium
decrevit (*can. 13*): « Generaliter, inquit, omni
cuilibet in exitu posito, et poscenti sibi communionis
gratiam tribui, episcopus probabiliter ex oblatione
dare debet. » Et præfatis apostolicorum pontificum
ex hac causa decretis sanctus Leo papa judicium
protulit (*ep. 1, ad episc.*), « ut si quis in illa
commiserit, veniam sibi deinceps noverit denegari. »

CAPUT VIII.

Quod sepulturam mortuis in parochia sua denegari præcipit.

(*Lib. lv Cap., c. 33*.) Sepulturam etiam mortuis,
sicut in memorata petitione continetur, nimia
inhumanitate contra sacras Scripturas, sacrosque
canones denegari præcepit, cum sicut in historia
veneranda libri Regum legimus (*II Reg. xxi*), etiam
eorum corpora qui ad consultum Domini propter
peccatum Saul, ob quod facta est fames in diebus
David tribus annis jugiter, crucifixi fuerant, laudabiliter
sunt custodita a concubina Saul, ne lacerarentur
ab avibus per diem, neque a bestiis per noctem,
donec stillaret aqua super eos de cælo: sicque
sepulta sunt cum ossibus Saul et Jonathæ. Et in
Evangelio legimus quia, petente Joseph, Pilatus
jussit reddi corpus Domini Jesu, quem quasi nefarium
petentibus Judæis crucifigi adjudicavit (*Matth. xxvii*):
unde et *cum iniquis*, secundum Scripturam, *deputatus
est* (*Isa. liii*). Et Judæi, ne remaneret etiam
sceleratorum corpora in cruce die sabbati inhumata,
obtulerunt a Pilato (*Luc. xxi*) ut frangerentur
eorum crura, et tollerentur. Et antiquorum Patrum
regulæ, etiam eorum corpora qui sibi quolibet modo
mortem intulerunt, vel qui pro suis sceleribus
puniuntur, ad sepulturam, licet sine hymnis et
psalmis, deferri præcipiunt, et non sepultura in
vente matris omnium, id est terræ, carere etiam
talium cadavera præceperunt.

CAPUT IX.

Quod de his excessibus monenti metropolitano suo obedire neglexit.

(*Hinc., ep. 35*.) Quæ audiens vehementer exhorruï,
et proinde ad eum metropolitana sollicitudine semel
et secundo litteras misi, monens et hortans illum ut

tam exitabilem excommunicationem, et impietatis colligationem in suum et multorum periculum intentatam, quantocius solveret. Sed ad obediendum eum invitare non valui. Cum sanctus Bonifacius explanans capitulum Nicæni concilii (*can. 13*) ad Hilarium Narbonensem episcopum dicat (*epist. 3*): « Advertat charitas, adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem semper expetat. » Et Leo ad Theodorum Forojuliensem episcopum: « Sollicitudinis, inquit, tuæ is ordo esse debuerat, ut cum metropolitano tuo de eo quod quærendum esse videbatur, conferres: quia in causis quæ ad generalem observantiam pertinent, omnium Domini sacerdotum, nihil sine primatibus oportet impleri. » Certum est enim quoniam illa quæ de baptizandis parvulis, et de ultima pœnitentia, et viatico munere ac mortuorum sepultura nulli deneganda, ex sacris regulis ad eum scripseram, ad generalem observantiam Domini sacerdotum pertinent. Contra quæ præsumere non debuerat, et inconsulto præsumens etiam ad primam commotionem ex evangelica veritate, et apostolica atque canonica auctoritate, et ex decretis apostolicæ sedis pontificum promulgatam mihi qualicumque metropolitano suo suadenti, ut easdem colligationes impietatis dissolveret, obaudire debuerat, sancto Leone decernente: « Qui, inquit, scit se quibusdam præpositum, non moleste ferat aliquem sibi esse prælatum, sed obedientiam quam exigit, etiam ipse dependat. Et sicut non vult gravis oneris sarcinam ferre, ita non audeat alii importabile pondus imponere. » Et non debuerat oblivisci professionis et subscriptionis suæ, ante ordinationem episcopalem: qui coram altari sanctæ Mariæ, et cunctis qui adferunt, non solum de Rhemensi ecclesia, et de Laudunensi parochia, verum et de Rhemorum provincia episcopis, et aliis diversi ordinis viris, secundum morem Rhemensis ecclesiæ, sicut soliti erant episcopi ordinandi subscribere, post catholicæ fidei professionem, de obedientia sua secundum sacras regulas erga Rhemorum metropolitum propria manu subscripsit; unde sacri canones dicunt: « Si quis contra suam professionem ac subscriptionem venerit in aliquo, ipse se honore privabit. »

CAPUT X.

Quod professioni cuidam subscripsit cum consensu episcoporum aliarum provinciarum, postposito metropolitano.

Deinde sine mea, et coepiscoporum Rhemensis provinciæ conscientia, in altera provincia consensu episcoporum aliarum provinciarum professioni subscripsit, et regi dedit: quæ ita se habet: « Ego Hincmarus Laudunensis episcopus de hora ista in antea fidelis ero seniori meo Karolo, sicut homo per rectum seniori suo debet esse, et episcopus regi suo: et sic obediens quomodo homo per rectum seniori suo debet esse, et episcopus Christi secundum

meum sapere et posse ad Dei voluntatem, et ad regis salutem, et ad statum.... ad meam ipsius salutem H. » Cum Africæ provinciæ canones dicant (*can. 86*): « Posterioris episcopi anterioribus deferant, nec eis inconsultis aliquid agere præsumant. » Et canones Antiocheni decerni metropolitanum et honore præcellere, et nihil amplius præter eum cæteros episcopos agere, secundum antiquam a Patribus nostris regulam constitutam, nisi ea tantum quæ ad suam dioccesim pertinent, possessionesque subjectas. Et si pro aliqua erga se causa, vel contentione sedanda huic professioni subscripsit, sine metropolitani tamen et coepiscoporum Rhemensis provinciæ conscientia id agere non debuerat. Unde sanctus Innocentius ad Victricium episcopum decrevit dicens (*epist. 1*): « Si quæ causæ vel contentiones inter clericos tam superioris ordinis quam etiam inferioris fuerint exorte, ut secundum synodum Nicænam congregatis ejusdem provinciæ episcopis jurgium terminetur; nec alicui liceat (sine præjudicio tamen Romanæ Ecclesiæ, cui in omnibus causis debetur [*al.*, cujus in omnibus causis debet] reverentia custodiri, relictis his sacerdotibus, qui in eadem provincia Dei Ecclesiam nutu divino gubernant, ad alias convolare provincias. Quod si quis forte præsumpserit, et ab ordine cleri submotus, et injurarium reus ab omnibus judicetur. »

Quid sit autem reum injuriarum judicari in lib. v Sententiarum Pauli ostenditur: « Qui per calumniam, inquit, injuriæ actionem instituit, extra ordinem puniatur. Omnes enim calumniatores, exsilii, vel insulæ relegatione, aut ordinis amissione puniri placuit. » Et in lib. i Sententiarum ejusdem Pauli: « Calumniator est, qui sciens prudensque per fraudem negotium alicui comparat; et in præfatis [*f. privati*] et in publicis judiciis omnes calumniosi pro qualitate admissi plectantur. » *Interpretatio*: « Qui aut apud cinctos [*f. civicos*], aut apud privatos iudices fuerit calumniæ objectione convictus, non expectate ordinis sententia, prout causa fuerit, supplicio subdatur. » Et in suprascripto capitulo beatus Innocentius dicit: « Si autem majores causæ in medio fuerint devolutæ: ad sedem apostolicam, sicut synodus statuit, et vetus consuetudo exigit, post judicium episcopale deferantur. » Et sanctus Gregorius ad Vincentium [*al.*, Innocentium] et cæteros episcopos, ait (*lib. vii, ind. 2, epist. 8*): « Ut nemo coepiscoporum metropolitanum suum postponere in aliquo præsumat: excepto si contra eundem metropolitanum eos habere aliquid causæ non contigerit: ut ob hoc sedis apostolicæ judicium, si qui petere festinant, licentiam habeant, quod per canones etiam antiquorum Patrum est institutione permissum. » Nam de quibus canonibus et Innocentius et Gregorius hoc dicant, manifestissime claret; scilicet de Sardicensibus, de quibus et Gelasius (*Commonit. ad Faust*). « Ipsi sunt canones qui appellationem totius Ecclesiæ ad hujus sedis examen voluere deferri: ac ipsa vero nusquam prorsus appellari debere sensurunt. » Claret igitur

ex his sanctorum pontificum sententiis, quia, A Ne quid vero sit quod prætermisum a nobis forte videatur, omnia decretalia constituta tam beatæ recordationis Innocentii, quam omnium decessorum nostrorum, quæ de ecclesiasticis ordinibus, et canonum promulgata sunt disciplinis, ita a vestra dilectione custodiri debere mandamus, ut si quis in illa commiserit, veniam sibi deinceps noverit denegari. » Et ita subscripsit: « Hincmarus, Deo miserante, ecclesiæ Laudunensis episcopus, his sanctorum apostolicæ sedis Patrum decretis obtemperandum subscripsi. Qui quoque mihi eodem Deo auctore commissi sunt, et in his similiter sentiunt, solliciti servare unitatem spiritus in vinculo pacis, hac mecum pace potiantur. Si vero aliqui secus, nolentes fieri socii hujusmodi disciplinæ, nec habeantur participes communionis nostræ. » Quæ præmissæ definitiones ab eo subscriptæ, quam sint contrariæ inter se, atque adversæ evangelicæ veritati, et apostolicæ auctoritati, nemo qui dubitet: cum sint de episcopis certa et manifesta in regulis sanctis iudicia. Et delatori aut lingua capuletur, aut convicto caput amputari, sicut hic potestis videre subscripsit, et qui ex suis secus, nolentes fieri socii hujus disciplinæ, non haberentur participes communionis suæ. Cum Cyprianus in abusivorum gradibus, et Innocentius in decretis suis ex apostolica sententia judiciariæ potestati gladius legaliter vindicem doceant esse permissum, quem ecclesiasticis ministris vel in bello, vel in seditione corripere, vel etiam portare, a majoribus nostris legimus non esse concessum (Vide Anton. Augustin. Jur. canon., p. III, tit. 20). Et Dominus dicit: *Benedicite maledicentibus vobis, et orate pro persequentibus et calumniantibus vos* (Luc. VI); et Petrus, *non reddentes malum pro malo, vel maledictum pro maledicto, sed e contrario benedicentes* (I Petr. III); et Paulus: *Non vos defendentes, charissimi, sed date locum iræ* (Rom. XII). Et sanctus Gregorius in epistola ad Sabinianum diaconum Constantinopolitanum (lib. VII, epist. 1): « Breviter suggeras serenissimis dominis nostris, quia si ego in mortem Longobardorum me miscere voluissem, hodie Longobardorum gens nec regem, nec duces, nec comites haberet, atque in summa confusione esset. Sed quia Deum timeo, in morte cujuslibet hominis miscere formido. » Et sanctus Augustinus ad Bonifacium Africæ proconsulem: « Fas, inquit, ut reus episcopi suggestionibus occidatur, qui veniæ, si pœnituerit, reservatur. » Si non est fas ut reus episcopi suggestionibus occidatur, qui veniæ, si pœnituerit, reservatur; nefas est ut reus, qui veniæ, si pœnituerit, reservatur, ab episcopo ad mortem adjudicetur, et in mortis ejus iudicio subscribatur: et episcopus, qui contra ecclesiasticum ordinem, et regularem disciplinam subscripsit, ut sacri altaris ministri huic mortis disciplinæ nolentes fieri socii, non habeantur participes communionis suæ: videtur se hujus iudicii subscriptione a communione ecclesiastica separasse, a cujus communione si se ministri altaris, subscriberentes mortis iudicio, separassent, solidius

CAPUT XI.

Quod ineptam decretorum collectionem composuit, eidemque indebitè subscripsit.

Post hæc quærens adinventiones ut se a metropo- B litana subjectione posset exuere, libellum de antiquorum Patrum scriptis ante sacros Nicænæ synodi, et aliorum sanctorum canones editis collegit: in quibus sententiis inter se dissonas, et contra evangelicam, et apostolicam atque catholicam, et apostolicæ sedis auctoritatem immiscuit; et eidem libello sine metropolitani, et coepiscoporum Rhemensis provinciæ conscientia et consensu subscripsit, et a clericis ecclesiæ suæ, nec non et a parochianis presbyteris subscribi fecit; cum Africæ provinciæ canones dicant (*conc. Afr.*, c. 53; *Milevit.*, cap. 13. *Cod. can. eccl. Afric. can.* 86): « Postiores episcopi anterioribus deferant, nec eis inconsultis aliquid agere præsumant: et qui putaverit, spretis majoribus, aliquid præsumendum, competenter esse ab omni concilio coercendum. » Et Antiochenum concilium decernit (*can.* 9): « Metropolitanum et honore præcellere, et nihil amplius præter eum cæteros episcopos agere, secundum antiquam regulam a Patribus constitutam, nisi ea tantum quæ ad suam diocesim pertinent, possessionesque subjectas. » Et S. Leo ad Theodorum Foro-Juliensem episcopum decrevit (*epist.* 91): « Quia in causis quæ ad generalem observantiam pertinent omnium Domini sacerdotum, nihil sine primatibus oportet impleri. »

In quo libello cum aliis diversis, et sibi adversis sententiis subscripsit, et a clericis parochiæ subscribi fecit, quia non possunt episcopi humano condemnari examine, quos Deus suo reservavit iudicio. Et item, ut « vocata episcopo canonice in loco omnibus congruo, tempore synodali, ab omnibus comprovincialibus episcopis in sua provincia audiatur. Qui, concordem super eo proferre debent sententiam. » Quod et Antiocheni canones apertissime decreverunt (*can.* 14). Et item subscripsit et subscribi a clericis suis fecit, ut « delatori aut lingua capuletur, aut convicto caput amputetur. » Et subjungens Leonis sententiam qua dicit (*ep.* 1 ad episc.): « Hæc itaque admonitio nostra denuntiat, quod si quis fratrum contra hæc constituta venire tentaverit, et prohibita fuerit ausus admittere, a suo se noverit officio submovendum: nec communionis nostræ futurum esse consortem, qui socius noluit esse disciplinæ.

in communione disciplinæ ecclesiasticæ perstitissent.

Unde beatus Ambrosius in epistola ad Valentinianum imperatorem, qui petebatur contra religionem Christianam legi subscribere : « Convenio iterum fidem tuam, convenio mentem tuam, ne vel respondendum secundum hujusmodi petitionem gentilium censeas, vel in ejusmodi responsa sacrilegium subscriptionis adjungas : vox enim tua, manus tua, et subscriptio tua opus est tuum. » Et antiquorum Patrum canones decreverunt dicentes : Sæpe principes contra quoslibet majestatis obnoxios sacerdotibus negotia sua committunt : et quia sacerdotes Christi ad ministerium salutis electi sunt, ibi consentiant regibus iudices, ubi jurejurando supplicii indulgentia committitur, non ubi discriminis sententia præparatur. Si quis etiam sacerdotum contra commune consultum discussor in alienis periculis exstiterit, ut reus effusi sanguinis apud Christum, et apud Ecclesiam perdat proprium gradum. » Hic autem nullo comminante neque jubente, gratis subscripsit, ut delatori aut lingua capuletur, aut caput amputetur, et qui noluerit fieri socius hujus disciplinæ, nec habeatur particeps communionis suæ. Et non sufficit illi ut subscriberet, quatenus convicto delatori caput amputetur ; verum et ministros ecclesiasticos suæ parochiæ, huic perversæ sententiæ fecit subscribere. Reclamante Gelasio in epistola ad Anastasium imperatorem (*epist.* 10) : « Dicit Apostolus, qui non solum non facienda faciunt, reos videri, etiam qui consentiunt facientibus. Legibus certe vestris criminum conscios, susceptoresque latrocinantium par judiciorum pœna constringit : nec expers facinoris aestimatur, qui licet ipse non fecerit, facientes tamen in familiaritatem fœdusque receperit. » Hic autem et fecit, et facientes ad agendum contra regulas quosdam impulit, quibusdam persuasit. Hinc Apostolus : *Sic enim peccantes in fratres, et percutientes conscientiam eorum infirmam, in Christum peccatis : et peribit infirmus in tua scientia frater, pro quo Christus mortuus est (I Cor. VIII).* Et beatus Gregorius in Regula pastorali : « Scire, inquit, prælatus debet, quia si perversa unquam perpetrant, tot mortibus digni sunt, quot ad subditos suos perditionis exempla transmittunt. Unde necesse est ut tanto se cautius a culpa custodiant, quanto per prava quæ faciunt, non soli moriuntur. » Et item Gelasius in decretis ad episcopos per Dardaniam constitutos, ac si de his loquatur quos secum fecit subscribere (*Gelas., epist.* 11, sub fin.) : « Sicut, inquit, in simili conditione constricti, non possunt complicem suum judicare non jure damnatum, neque rei [*al. om. rei*] reum possunt competenter absolvere : sic illo jure prævaricatore damnato, isti quoque pari jacent damnatione prostrati : neque inde nisi resipiscentes poterunt prorsus absolvi ; quia sicut per unum scribentem eorum omnium vulgata transgressio est, qui in eandem perfidiæ ceciderant actionem ; sic in uno eodemque qui pro omnibus scripserat, vel scribendo

omnium prodiderat voluntates, transgressio est puniuntur. »

Et quia sacrum Nicænum concilium metropolitanos singularum provinciarum episcopos privilegium habere decrevit. Unde Leo ad Anatolium dicit (*epist.* 55) : « Illa, inquiens, Nicænorum canonum per sanctum vere Spiritum ordinata conditio in nulla est parte solubilis. » Sed et alia catholica concilia ita ab omnibus teneri diffinierunt : quia eorum immobilibus decretis contraria subscripsit, se, sibi que complices a catholica communione segregasse videtur. Sicut item Leo in epistola ad Pulcheriam Augustam (*epist.* 55) manifeste demonstrat dicens : « Contra statuta canonum Paternorum, quæ ante longissimæ ætatis annos in urbe Nicæna spiritualibus sunt fundata decretis, nihil cuiquam audere conceditur : ita ut si quis diversum aliquid decernere velit, se potius minuat quam illa corrumpat. » Et quia, ut ipse beatus Leo, et ante illum Damasus, et Bonifacius, et post eum alii apostolicæ sedis pontifices scripserunt, iidem sacri canones, mansuræ scilicet usque in finem sæculi leges, Spiritu Dei sunt conditi. Qui scilicet Spiritus, juxta evangelicam et apostolicam veritatem Spiritus est Patris, Spiritus est Filii, quia æqualiter a Patre procedit et Filio, et totus est Patris, ac totus est Filii Spiritus ; et Pater, et Filius, et idem Spiritus sanctus, quorum est una substantia, una voluntas, et operatio ; scilicet ipsa sancta Trinitas unus est Deus, ac Dominus. Constat quia a Patre, et Filio, et Spiritu sancto, tota videlicet Trinitate, uno Deo et Domino ipsi canones sunt conditi : a quibus qui per contemptum pertinaciter deviat, in Patrem, et Filium, et Spiritum sanctum, unum Deum ac Dominum peccat. Et in hac subscriptione Apostoli est sententia Hincmarus, in qua sollicitus non fuit servare unitatem Spiritus in vinculo pacis : sed sollicitus fuit dissolvere unitatem Spiritus, contra vinculum pacis. Dicit enim Apostolus, cujus sententiam subscriptioni suæ perversæ inseruit : *Solliciti servare unitatem spiritus in vinculo pacis ; unum corpus, unus spiritus, sicut vocati estis in una spe vocationis vestræ (Ephes. IV).* Unde beatus Gregorius : « Ad unam igitur vocationis spem nequaquam pertingitur, si non ad eam unita cum proximis mente curratur. Est, inquit, Dominus ad Moysem, locus penes me, et stabis supra petram. » Locus quidem apud Dominum est sanctæ Ecclesiæ unitas, in qua super petram statur, dum confessionis ejus soliditas utiliter tenetur. Hi enim in loco qui penes Dominum est, et super petram stant, qui per hæreses, et per schismata ab unitate se Ecclesiæ non dividunt. Quia ut sanctus Hilarius papa dicit (*epist.* 4) : « Non minus in sanctorum traditionum sanctiones committitur, quam in injuriam ipsius Domini prosilitur. » Et beati Leonis decernentis (S. Leo, *loc. cit.*), quia in causis quæ ad generalem observantiam pertinent omnium Domini sacerdotum, nihil sine primatibus oportet impleri, non fuit socius disciplinæ : unde timendum est ut non sit etiam consors communionis

sux: a cujus communione si fuerit alienus, cum his A qui præfatis synodis interfuerunt, et quorum decreta convelli fecit, ac per hoc, cum Ecclesia catholica communionem habere non poterit. Et in edicto quinti concilii scriptum est: « Miramur eorum demeritiam qui divinæ Scripturæ contraria agunt, evidenter dicenti, quia æqualiter horribilia sunt apud Deum impius et impietas ejus, Actio enim cum actore punietur. » Si autem similiter impietas horribilis est Deo, et ille qui impie agit, certe separatus est talis a Deo, et anathemati juste subjicitur. Anathema enim nihil aliud significat, nisi a Deo separationem: sicut in Veteri et in Novo Testamento judicium de anathemate significat.

CAPUT XII.

Quod in ea collectione sanctorum Patrum dicta B sensusque corruptit.

Et in eo, de quo agitur, libello, sed et in illo, quem per Wenilonem quondam archiepiscopum mihi misit, quem paulo infra commemorabo (eum enim præ manibus habeo) verbis beati Gregorii, de quatuor errorum capitulis, de quibus ad Theocistam patriam scripsit (*lib. ix, epist. 39, in fin.*), quibus dicit: « Si qui vero sunt qui dicunt, quia compulsus quisquam necessitate se anathematizaverit, anathematis vinculo non tenetur; » verbis suis imposuit, immittens, superadjiciens, « aut contra ea quæ sub anathemate prohibita sunt, præsumperit. » In eodem loco, ubi dixit: « Si qui sunt igitur qui, sub nomine Christiano, hæc quæ prædiximus errorum capitula, aut prædicare audent, aut taciti apud semetipsos tenere, » detruncavit, et pervertit ad suum sensum dicens: « Si qui sunt igitur qui sub nomine Christiano hæc prædicare audent. » Non tamen sententiam sanctæ sextæ synodi in duodecima actione prolata hoc modo: « Inveteratum Macarium in impietatis dogmatibus, et non solum universam Christo amabilem plebem, quæ hanc a Deo conservandam regiam urbem inhabitat eversione turbulenta polantem; testimoniaque sanctorum et probabilium Patrum falsantem, et quædam quidem abscedentem, quædam vero addentem, et secundum quod ei videbatur, in devio mittentem, piissimum et a Deo coronatum principem per oblata ab eo codicia, sed et a solis ortu usque ad occasum per litteras suas, et per homines quos mittebat, universos perturbantem, et a fide vera segregantem, et justè atque rationabiliter D pontificali habitu denudatum, nullatenus divina regula de cætero suscipit in doctoris sede residere: ne ex hoc propriæ suæ hæreseos musto jam recrudesceret faciat intelligentiam, et fiant, juxta quod scriptum est, novissima illius hominis deteriora prioribus. » Et Macedonius Constantinopolitanus episcopus ab imperatore Anastasio legitur expulsus, quoniam Evangelia falsasset, et maxime illud Apostoli dictum: *Quod apparuit in carne, justificatum est in spiritu (I Tim. iii)*; et pervertisse ut legeretur, *ut esset Deus, apparuit per carnem*. Quales redarguit Paulus apostolus de se et suis sociis dicens: *Non*

enim sumus, inquit, sicut plurimi, adulterantes verbum Dei (Cor. ii). « Adulterare est, inquit beatus Gregorius, verbum Dei, aut aliter sentire quam de illo est, aut ex eo non spiritales fructus, sed adulterino foetus quærere laudis humanæ. » Unde Gelasius ad episcopos per Dardanium constitutos, de hujusmodi præve sententibus scripsit (*epist. 13*): « Quia majores nostri [*al.*, Quæ majores nostri divina inspiratione cernentes] necessario præcaverunt, ut contra unamquamque hæresim quod acta semel synodus [*coacta synodus*] pro fidei communione et veritate catholica atque apostolica promulgasset, non sinerent novis post hæc retractationibus nubilari [*mutilari*]: ne pravis occasio præberetur, quæ medicinaliter fuerant statuta, pulsandi: sed auctore cujuslibet insanie ac pariter errore damnato, sufficere judicarunt, ut quisquis [*quisque*] aliquando hujus erroris communicator existeret, principali sententia damnationis ejus esset obstrictus, quoniam manifeste quilibet vel professione sua, vel communione posset agnosci. » Et post aliquanta: « Quoniam idem ipse error, qui semel est cum suo auctore damnatus, in particeps quolibet præve communionis effecto, execrationem sui gestat et penam. »

Post præfati denique monstruosi libelli a se monstruose collecti suam suorumque subscriptionem, litteris quarum exemplar habeo, denuo illum commonui, ut ea quæ in parochia sua contra rationem, et auctoritatem egerat studeret, corrigere. Sed admonitioni meæ non paruit: cum dicat Apostolus: *Obedite præpositis vestris in Domino (Hebr. xiii)*. Et sanctus Leo decernat, ut « qui scit se quibusdam præpositum, non moleste ferat aliquem sibi esse prælatum. »

CAPUT XIII.

Quod frequenter admonitus excusare culpas maluit quam corrigere, et accusatus in synodo, non expectato fine judicii, fugam arripuit.

(*Lib. lv Cap. præf.*) Deinde ex epistolis Romanæ sedis pontificum ante Nicenam synodum scriptis libellum a se collectum, et 20 versiculis in nomine domni regis Caroli titulum, per venerabilem quondam archiepiscopum Wenilonem, in Gundulfi villa coram archiepiscopis qui adfuerunt, mihi direxit. De quo, illi, scripto respondi, cujus exemplar hic habeo: monens illum, ut sacris canonibus et apostolicæ sedis decretis ex eisdem sacris canonibus promulgatis fidem accommodaret, et debitam obedientiam illis dependeret. Inde in Attiniaco Rhemensis parochiæ, illi coram episcopis, qui adfuerunt, dedi libellum in 53 capitulis, 44 versibus titulum, auctoritates ecclesiasticas continentem, contra illa quæ in præfatis suis duobus libellis collegerat: monens ut a talibus hujusmodi reprehensionibus se cohiberet; et se sacris regulis subdens, pacem et sanctimoniam, secundum Apostolum, sequi studeret. Is autem nullam inde meæ admonitionis satisfactionem exhibuit. Quin potius rotulam prolixissimam de quadam capella, unde eum sæpe litteris, pro recla-

matione ad me hominum ex sua parochia, monui : A sed nihil profeci : et fabulis de Fimo presbyteri parochiæ suæ, et villæ Ecclesiæ nostræ ; sed et de aliis mendaciter compositis, de quibus se ipse presbyter ad me non reclamavit, nec in aliqua synodo provinciali ullam rationem inde commovit contextam, in eodem concilio mihi porrexit (*Non exstat*). De qua rotula loqui, in aliud tempus dignum duxi differe, ne vobis tædium deliramenta sua inferant, et ad necessaria vos deliberanda impediant. Sed et præfatum suum monstruosum libellum, a se et ea suis subscriptum, in eadem synodo protulit, quem ibidem accipiens, hactenus servo.

Et cum me vidi post tot admonitiones nihil apud eum posse proficere, schedulam porrexi in synodo decem provinciarum (*Non exstat hæc schedula*), ab eisdem venerandis episcopis quærens consilium quid contra suam pertinacem contumaciam agere possem : et quæ illi . . . suæ contra colligationes suæ impietatis direxeram, contra illis nota feci. Unde et ab eadem synodo conventus, quoniam injuste ac irregulariter tantas et tales excommunicationes facere præsumpsit, dedit mihi in eadem synodo professionis suæ libellum de regulari obedientia sua, quem habeo, qui ita se habet : *Privilegio Hincari metropolitani provinciæ Rhemorum ecclesiæ secundum sacros canones et decreta sedis apostolicæ ex sacris canonibus promulgata, pro scire et posse me obditurum profiteor, subscribo*. Et ex eo quod sui homines se ad regem reclamaverunt, quoniam ab eis sua, beneficia, quæ apud antecessores suos, et apud eum proservierunt, injuste et irrationabiliter abstulisset, post datum mihi libellum in synodo de regulari obedientia sua, electos iudices episcopos apud me expetivit : et tres, secundum Africanum concilium, scilicet Actardum, Ragenelmum, atque Joannem a me sibi designatos suscepit ; et eorum, atque aliorum Deum timentium, iudicio, in domni regis, sicut postulavit, præsentia, de quibusdam decretum fuit, ut beneficia sua quæ irrationabiliter perdiderunt, recuperare deberent. Tota autem eorum causa, usque ac alium tractatum, certis interventibus causis non diffinita, sed die alia diffinienda, remansit. Et ante diffinitionem contra sacros canones, sine ulla necessitate vel ratione, noctu fuga lapsus, regularem diffinitionem expectare contempsit. Unde sacri canones Africani concilii de Quodvultdeo, qui antequam aut iudices electos expeteret, aut etiam in rationem contra conquerentem adversum se introisset, rationem subterfugiens discessit, decreverunt dicentes (*conc. Afric. , c. 54 ; cod. can. Eccl. Afric. , can. 87*) : « De Quodvultdeo, inquam, episcopo Centuriensi, quoniam [*al. , quomodo*] adversarius ipsius cum se petisset, introduci ad concilium nostrum, interrogatus vellet cum eo apud episcopos experiri, primo promiserat ; et alia die respondit, hoc sibi non placere, atque discessit. Placuit omnibus episcopis, ut nullus eidem Quodvultdeo communicet, donec causa ejus qualem potuerit terminum sumat.

Nam adimi ei episcopatum, antequam causæ ejus exitus appareret, nulli Christiano videri jure potuit [*al. , potuisset*]. » Et item dicit (*conc. Milev. , c. 21 ; conc. Afric. , c. 87 ; Cod. can. Eccl. Afric. , can. 121 et 22*) : « Ut per episcopos iudices causa finiatur, sive quos eis [quin inter se conquirentibus] primates dederint, sive quos ipsi vicinos ex consensu delegerint. Si autem ex communi placito vicinos iudices elegerint, aut unus eligatur, aut tres : aut si tres elegerint, aut omnium sententiam sequantur, aut duorum. A iudicibus autem, quos communis consensus elegerit, non liceat provocare : et quisquis probatus fuerit pro controversio nolle obtemperare iudicibus, cum hoc primæ sedis episcopo fuerit probatum, det litteras ut nullus ei communicet episcoporum, donec obtemperet. » Et Carthaginense dicit concilium (*conc. Carthag. III, c. 7 ; Cod. can. Eccl. Afr. , can. 19*) : « Ut quisquis episcoporum accusatur, ad primates provinciæ ipsius causam deferat accusator. » Et post aliquanta : « Verum tandiu post mensem secundum non communicet, donec purgetur. Si autem ad concilium universale anniversarium occurrere noluerit, ut vel ibi causa ejus terminetur, ipse in se damnationis sententiam dixisse iudicetur. Tempore sane quo non communicat, nec in sua ecclesia, vel parochia communicet. » Et jam transactus est annus ex quo a me, suo metropolitano, præfatos iudices electos expetiit, et accepit ; et causam suæ accusationis regulariter executus non fuit. Et dilata est hactenus ex eo sententia Africani concilii, de Maximino episcopo promulgata (*conc. Afric. , c. 55 ; Cod. can. Eccl. Afric. , can. 88*) : « De Maximino, inquit, Bagagensi [*al. , Maximiano Bagaiensi*], et ad eum, et ad ipsam plebem placuit de concilio litteras dari, ut et ipse ab episcopatu discedat, et illi sibi alium requirant. »

CAPUT XIV.

Quod fugam illam infirmis rationibus excusare conatur.

Et cum hæc ita se habeant, idem frater mihi rescribens, multis allegationibus se necessitate compulsus, et persecutionem declinantem fugisse asseverat, sicut sua scriptura, quam hic habeo, prodit. Videlicet, quia omnes homines sui banniti fuerunt ad causas, ita ut nec unus, dum rediret ad mansionem, illum sequi permissus sit : Nortmanno hoc agente pro villa Pauliaco, eo quod illam concessione regia, et apostolica etiam, ut scirem, auctoritate recipiens, illum iidem sui homines in eandem villam secuti sunt. Et in eisdem suis allegationibus ponit testimonia ex epistola Julii papæ in Athanasii pro fuga defensione (*epist. 2, ad Orientales*) : « Quia Dominus quando Pharisæi consilium fecerunt adversus eum ut eum occiderent. Sciens autem Jesus discessit inde. Et discipuli propter metum Judæorum recesserunt, celantes seipsum. » Et Paulus in Damasco a principe gentis quæsitus, do muro in sporta depositus est, et manus quærentis effugit (*II Cor. XI*). Sed utrum pro eo si Franci homines ad iudicia suis legi-

bus vocabantur, ut quod contra legem fecisse quærebantur, aut legibus emendarent, aut legaliter defenderent, tueri illum oportuit, an non, causa in promptu est. Et utrum præmissa testimonia, suæ quam dicit persecutioni, suæque causæ ac personæ, vel persecutoris sui personæ, quam specialiter signant sed et aliis personis se persequentibus a se designatis conveniant, an non, ratio manifeste demonstrat. De fuga vero Athanasii, et quando, ac qualiter, vel pro quibus, episcopis vel ministris Ecclesiasticis fugiendum sit, beatus Augustinus in epistola ad Honoratum episcopum inter alia dicit: « Fortasse quis dicat ideo debere fugere Dei ministros talibus imminenti-bus malis, ut se pro utilitate Ecclesiæ temporibus tranquillioribus servent. Recte hoc fiet a quibusdam, quando non desunt alii, per quos suppleatur ecclesiasticum ministerium, ne ab omnibus deseratur, Quod fecisse Athanasium supra diximus. Nam quantum necessarius fuerit Ecclesiæ, quantumque profuerit quod vir ille mansit in carne, catholica fides novit, quæ adversus Arianos hæreticos oro illius et amore defensa est. Sed quando est commune periculum, magis timendum est ne quisquam id facere credatur non consulendi voluntate, sed timore moriendi: magisque fugiendi obstat exemplo, quam vivendi prosit officio: nulla ratione fugiendum est. » Et item post aliquanta: « Quicumque igitur isto modo fugit, ut Ecclesiæ necessarium ministerium non desit, facit quod Dominus præcepit, sive permissit (Matth. x). Qui autem sic fugit, ut gregi Christi ea quibus spiritualiter vivit alimenta subtrahantur, mercenarius ille est, qui videt lupum venientem et fugit, quoniam non est ei cura de ovibus (Joan. x). »

CAPUT XV.

Quod res Ecclesiæ quæ controvertuntur, regi concessit Nortmanno tradendas

De eo quod scripsit, me scire eandem villam ille concessionem regia, et apostolica etiam auctoritate sibi redditam, quod in ejus litteris legi, hoc me scire non denego. Dicit enim ibi, ad petitionem virorum venerabilis memoriæ Conradi, et Rodolfi, se eandem villam concessisse regi, ut eam Nortmanno, qui antea illam tenuerat, beneficiaret. Superadjiciens in responsione sua, quia si ipsam villam in alodem haberet, quidquid regis esset voluntatis ex ea facere gauderet; quia illud voto regis non obviabat, nec inde ei periculum animæ imminabat. Cæterum quando illam concessionem de rebus Ecclesiæ suæ fecit, nec mea conscientia, vel coepiscoporum Rhemensis provinciæ; sed nec cum consensu presbyterorum ac diaconorum Laudunensis Ecclesiæ, sicut præcipiunt canones, fecit. Sed et hoc inde, scio, quod in domni apostolici epistola exinde legi. Et quia quando Nortmanno ipsam epistolam ostendam, dicens illi, quia nisi ab ipsis rebus Laudunensis Ecclesiæ quas invaserat, se mox exueret, illum secundum jussionem domni apostolici excommunicarem: coram plurimus episcopis mihi respondit, ut pro amore, et honore Dei, et sancti Petri, ac domni apostolici

A illum non excommunicarem, quia nec meus parochianus erat, et ipsas res non invaserat; et habebat inde auctorem, qui illi eas beneficiavit: et si ipse suus auctor eas illi contradiceret, nihil postea se inde præsumeret.

CAPUT XVI.

Quod falso dicit se detentum fuisse ne Romam, quo appellabat, adiret.

Dicit etiam in eodem scripto suo Hincmarus, ideo se ab Attiniaco fugisse, quia « Silvaci memor fuerat, ubi et ego adfui, quod illi nihil profuit, sed obfuit: quia pro eo solummodo retentus fuit, ne Romam domni apostolici præceptis obediens iret: quod a sæculo non est de episcopo ab episcopis auditum. » Unde respondi, quia nec tunc sicut pro certo B scio, et illi mecum sciunt qui adfuerunt, nec unquam, prout reminisci valeo illum Romam appellasse pro quacunque causa audivi. Tunc autem ad synodum, quæ in proximo futura erat, invitatum audivi. Sed et multorum divulgabatur, oribus, quia cum Lothario agebat, quatenus Ecclesiam sibi commissam, et oves sibi creditas desereret, ut ad Lotharium iret, et in regno illius honores obtineret. Verumtamen, ex hac causa nullam rationem tunc cum domno rege habui; sed et domnus rex nihil inde tunc mihi dixit.

CAPUT XVII.

Quod post fugam Hincmaro Rhemensi per litteras significavit se Romam evocare a pontifice, quibus ab eodem Rhemensis responsum est. Et quod contra suam professionem venit.

C Is autem frater Hincmarus postquam electos judices, a me regulariter, ut scripsi, datos sibi suscepit, et incaute ac inhoneste noctu fuga lapsus abscessit, pitaciolum irrationabiliter confectum, et manu sua subscriptum, ac præfatæ professioni suæ usquequaque contrarium, per Ermenoldum diaconum suum vi Non. Jul. iii indict. mihi transmissit, quod ita se habet: « Reverendissimo Rhemorum archiepiscopo Hincmaro, sanctæ Laudunensis Ecclesiæ Hincmarus Deo miserante episcopus, debitam in Christo devotionem. Vos scitis quia ab universali sanctæ Romanæ Ecclesiæ papa, patre quoque nostro et magistro Adriano bis vocatus existo. Et vos ipsi in quaternionibus mihi a vobis in Attiniaco palatio coram archiepiscopis, et episcopis qui affuerunt datis, quod ad eandem sedem venire totidem vocatus D detractem, me reprehendistis: si vitio scriptoris pro detractem, quod est dissimilem, vel differam, detractem, quod valde tractem non ab re accipi potest, intercharaxatum non fuit. Unde vos nunc pro amore Dei omnipotentis, et reverentia sancti Petri exposco, sicut et in eadem synodo in Attiniaco a vobis convocata, quod impetrare non valui, expostulavi; ac jam etiam per integrum efflagitavi annum: et præcipue in synodo apud Vermeriam palatium olim ab harno habita obsecrando declamavi. » Et quæ sequuntur. « Ego Hincmarus sancti Laudunensis Ecclesiæ episcopus sponte subscripsi. »

De quo pitacio latius in quaterniunculis, ut supra dixi, ei datis respondi : et quia nunquam vel nusquam apostolicam sedem cum adire prohibui. Insuper etiam illum, sicut et ipse scripsit, curjussione invitationis domni apostolici prosecutus non fuerit, reprehendi. Qui undique sibi visum fuit, cum de suis insolentis increpatus est, licentiam eundi Romam petit, vel sedem apostolicam appellat. Quando vero rex, et episcopi sunt sibi placabiles, de ipsa licentia nihil dicit, nec sedem apostolicam appellat : cum sacri præfignant canones qualiter, et unde, et ubi appellare debeat episcopus apostolicam sedem. Et anno præterito, postquam in Attiniaco libellum de sua regulari obedientia mihi porrexerat in synodo, sedem apostolicam non appellavit, nec de licentia illuc eundi aliquid dixit. Sed cum commotus inhoneste inde discessit, præmissum pitaciolum de licentia Romam eundi, circa Kalend. Julias mihi direxit. Postea vero nihil mihi inde mandavit, nec quando mecum locutus fuit, inde aliquid dixit. Sed et cum domno rege in subsequenti mense Septembrio in Silvaco, et in mense Octobrio Rhemi, ubi et ego fui, et domni apostolici missi ibi fuerunt, et inde nihil dixit. Deinde mense Februario in Compendio cum domno rege per aliquot dies fuit, et ego etiam illic fui. Postea vero mense Aprili apud Silvanectis cum domno rege fuit. Et demum in Silvaco per aliquot dies cum domno rege fuit, et ego etiam ibi fui, et nihil inde dixit. Et jam plures Kalendæ mensis Augusti pertransierunt ultra placitum quod et domnus apostolicus misit, mandans ut ultra illas Kalendas non remoraretur quin Romam pergeret. Scripsi etiam illi, quia insolite scripserit, quoniam si licentiam ei eundi Romam apud regem non impetrarem : *Abhinc ut archiepiscopo coepiscopus obtemperare debet, canonicè mihi obsequi non posset.* Et quia contra rationem hoc dixit, ei ex epistolis beati Leonis ostendi ; et ut decretales epistolas quas beatissimi papæ diversis temporibus ab urbe Roma pro diversorum patrum consolatione dederunt, de quibus (ut a metropolitano privilegio contra canones et decreta sedis apostolicæ ex eisdem sacris canonibus promulgata se possit exuere, contumacia pertinaci contendit) illum commonui, ut secundum dictum beati Gelasii venerabiliter susciperet, et sacra concilia, ut Gelasius, et cæteri catholici videlicet, doctique pontifices decreverunt, inviolabiliter conservaret, illi suasi.

Et de eo quod scripsit, quia « quod apostolica sedes de eo voluit, ac disposuit, Remigio et Arduico archiepiscopis committere, commisit : » scilicet ut per eos domni apostolici epistola, unde illi mandavi, ad domnum regem perveniret, et ipsi ejus causam agerent : illi non credo, quoniam epistola domni apostolici mihi directa aperte demonstrat, illam de qua oblique satagit, mihi misisse, ut ego illius, videlicet suffraganei mei, causam agerem apud regem : quatenus et apostolica sedes vigorem proprium retineret, et a se concessa aliis jura sua non demeret.

Et his, ut præmissi, subscribens, illi professioni et subscriptioni quam coram episcopis decem provincialium in synodo apud Attiniacum professus fuerat, et manu propria subscripserat ; scilicet, quia privilegio metropolitano provinciæ Rhemorum Ecclesiæ secundum sacros canones, et decreta sedis apostolicæ ex sacris canonibus promulgata pro scire et posse se obediturum, contraria profitendo subscripsit. De qua professione atque subscriptione in eadem synodo mihi data, sanctus Leo in epistola ad Septimum episcopum dicit (*epist. 85*) : « Saluberrimum est, inquit, et spiritualis medicinæ utilitate plenissimum, ut sive presbyteri, sive diaconi, vel cujuslibet [*al.*, sive alii] ordinis clerici, qui se correctos videri volunt, errorem suum, et ipsos erroris auctores damnari a se sine ambiguitate fateantur ; ut sensibus pravis, et dudum peremptis nulla aspirante [*al.*, nulla sperandi] supersit occasio, nec ullum membrum Ecclesiæ talium possit societate violari, cum per omnia illis professio propria cœperit obviare. » In qua professione et subscriptione sua confratres et venerabiles coepiscopi nostri, consulentes duritiæ animi sui, et supportantes eum in charitate, noluerunt eum exaggerare de præteritis ; sed tantum futuram correctionem profitendo et subscribendo promitteret. Attendentes quod B. Gregorius in pastoralia Regula dicit : « Quia plerumque quos fortis pigmentorum potio curare non valuit, ad salutem pristinam atque tepens reduxit : et nonnulla vulnera quæ curari incisione ferri nequeunt, fomentis olei sanantur : et durus adamas incisionem ferri minime recipit, sed leni hircorum sanguine mollescit. »

Et hac professione quam subscripsit, quia si ei licentiam eundi Romam, quo illum vel quenquam nunquam vel nusquam volentem ire prohibui, apud domnum regem Carolum non impetrarem, mihi extunc, ut archiepiscopo coepiscopus obtemperare debet, canonicè scire illum obsequi non posse : subjungens : « Ego Hincmarus S. Laudunensis Ecclesiæ episcopus sponte subscripsi : » illam quam in synodo decem provincialium apud Attiniacum habitam mihi dedit, quantum in ipso fuit, destruxit. Sicut B. Leo in epistola ad Leonem Augustum (*epist. 78*), etiam tantus pontifex de se dicens, ostendit : « Secundum apostolum (*Galat. 2*) si quæ destruxi, hac ædificio, prævaricatore me constituo, et eis me ultionum conditionibus subdo, quas non solum auctoritas beatæ memoriæ principis Martiani, sed etiam ego mea consensione firmavi. » Destruxit enim in præfata synodo inobedientiæ præteritate insolentiam, ædificans profitendo et subscribendo futuram secundum sacros canones erga suæ metropolis privilegium obedientiam. Quam iterum hac prævaricationis suæ professione atque subscriptione destruere, et annullare satagit, et pristinam suam insolentiam, redivivo furore resuscitavit, ac per hoc se prævaricatorum constituit.

Quas omnes professiones et subscriptiones suas

sapientia vestra insimul conferat, et quod de subscriptione vel professione subscribentis ac profitentis, et negligentis atque refragantis sanctus Spiritus, per eos in quibus locutus est, et qui cum Deo in cœlo regnant, et in terris miraculis coruscant, decreverit, sollicita mente recogitet atque dijudicet. Ait enim sacrum Carthaginense concilium (*conc. Carthag. II, can. 13*) : « Si quis contra suam professionem vel subscriptionem venerit in aliquo, ipse se honore privabit. » Quid enim in hac novissima subscriptione sua sacris canonibus et superscriptis professionibus et subscriptionibus suis contraria, congruentius referri potest, qua dixit : Ego Hincmarus contra meam professionem, vel subscriptionem veniens, sponte me honore privavi ?

Sed forte dicet, alias subscriptiones se invitum, atque coactum fecisse. Et quid dicet de illa subscriptione, qua libello compilationum suarum, nullo petente, vel sperante, subscripsit, et ab aliis quibusdam invitit subscribi fecit ? Illi nempe qui de verborum differentiis loquuntur, sicut Nonius Marcellus Peripateticus, in libello de compendiosa doctrina (*cap. 5*), dicit : « Hoc distare inter confiteri et profiteri autumat, quod confiteri voluntatis est, profiteri necessitatis, et coacti. » Sed non illi hoc ad voluntatem suam succurrit, qui contra suam professionem et subscriptionem venit. Cum sanctus Leo, sicut multoties in illius invenitur epistolis, ab unanimitate catholicae pacis exorbitantes, professionem cum absolutissima subscriptione coram omnino, et universa plebe, dare præcipiat. Et sanctus Gregorius in epistola ad Theoctistam patriciam (*lib. IX, epist. 39*), de his qui dicebant, quia si compulsi aliqui de quibus juste reprehendebantur, anathematizare se, dicerent, anathematis vinculo nullo modo teneri, manifestissime dicat : « Et si sunt, iniqui, qui certissime talia sentiunt vel tenent, quia Christiani non sunt, dubium non est : eosque et ego, et omnes catholici episcopi, atque universa Ecclesia anathematizamus, quia veritati contraria sentiunt, et contraria loquuntur. »

CAPUT XVIII.

Quod schedulam fictam quasi ab episcopis concilii Tullensis conscriptam obtulit, cui rescripsit Rhemensis adhortans ad patientiam, et maturam rerum cognitionem.

Denique ad hæc xv Kalend. August., indictio- nis 3, misit ad me apud Pontigonem, Heddonem Ecclesiae suæ præpositum, et per eum schedulam quamdam mihi direxit, quam habeo sub chirographo : cujus partem coram episcopis qui adfuerunt, Remigio scilicet, Harduico, Francone, Odone atque Willeberto, et aliis ecclesiasticis viris referendam illi donavi ; ne postea mihi eandem schedulam, si vellet, misisse negare valeret. Quæ confecta est quasi ex nomine synodi apud Tusiacum : quam antequam per Heddonem clericum suum acceperim, nunquam vidi, et nunquam vel nusquam audivi ; sed nec qui adfuerunt episcopi, eam se vidisse et audisse

A dixerunt. Cui schedulæ ab episcopis qui præfatæ synodo interfuerunt, multifarie multisque modis : sed et a se assertit esse subscriptum ; quæ in quibusdam, sacris regulis contraria, et suæ excommunicationi quam fecerat in parochia sua, est consona. Dicitur enim ibi de damnato, ut « dum vivit, ita a cœtu et societate fidelium remotus, a corpore et sanguine Domini separatus, ut nec in finem communionem accipiat, neque corpus ipsius more fidelium cum oblationibus et psalmis atque hymnis ad sepulturam deducatur. » Et aliquanto inferius : « Habeantque principes et iudices hanc in populo Dei diligentiam, ut ubicunque tales in potestate eorum ab episcopis requisiti fuerint, absque mora eis exhibeant, ne forte si dissimulaverint, aut mandatum episcopi contempserint, ab Ecclesia Dei projecti, nec sepulturam cum fidelibus recipiant. » Et aliquanto supra istam sententiam : « Si clericus tanti cupiditate sacrilegii corruptus, aut laicus quicumque hac iniquitate deceptus fuerit, et cognoscens damnationem suam pœnitentiæ remediis secundum ordinem et dispositionem sui episcopi se submiserit, volumus ut pervasa, et præsumpta secundum qualitatem in simplum, aut in duplum, aut in triplum, aut in quadruplum ecclesiae cui damnum illatum est, primum restituat. Inde pro sacrilegio ab episcopo suo consilium salutis, et pœnitentiæ modum suscipiat. » Quæ constitutio restitutionis, salvo legum jure contraria esse dignoscitur decretis beati Gregorii ad Augustinum Anglorum episcopum interrogantem (*epist. ult. l. XII, ad August., interrog. 4*) : « Obsecro quid pati debeat, si quis aliquid de ecclesia furto abstulerit ? » Responsio beati Gregorii hinc post aliquanta : « Addis etiam quomodo ea quæ furto de ecclesiis abstulerint, reddere debeant ? Sed absit ut ecclesia cum augmento recipiat, quod de rebus terrenis videtur amittere, et lucra de vanis quærat. »

Quæ schedula, ut ostendi, ecclesiasticis ordinationibus contraria, etiam et ex hoc mendax esse patenter ostenditur, quia eorum episcoporum nomina ibi habentur subscripta, qui nondum erant episcopi : et etiam duorum episcoporum nomina ex una civitate, et uno tempore ibi sunt posita : et eorundem episcoporum nomina qui successerunt ante nomina suorum decessorum ibi ponuntur. Habetur enim ibi nomen Christiani Autissiodorensium, et longe post Abbonis item Autissiodorensium, cui Christianus successit. Et inscribitur ibi nomen Rainelmi Noviomagensium, qui nondum erat episcopus : deinde longe post, nomen Immonis Noviomagorum inscribitur, cui Rainelmus successit. Et aliorum episcoporum ibi habentur nomina, qui eidem synodo non interfuerunt. Et nos qui interfuimus, sed et se nobiscum his subscripsisse mendaciter dicit, quibus non subscripsimus. Unde videndum est si illi conveniat, quod Africanum decrevit concilium de episcopo qui Donatistis se communicasse mentitus fuerit (*cod. can. eccl. Afric., can. 124*) : ut « si probatum fuerit eum de communionem illorum fuisse menti-

tum, dicendo eos communicasse, quos, eo sciente, non communicasse constiterit, etiam episcopatum amittat. »

Et postquam idem præpositus Heddo mihi præfatam schedulam dedit, dixit inter cætera, seniore suum mihi mandasse, quia non posset dimittere, ut homines suos qui res de sua ecclesia tenebant per potestatem et verbum regis, non excommunicaret. Quoniam altera vice quando domno apostolico mandavit de Nortmanno, hoc ei remandavit dominus apostolicus, ut prius inde fecisset suum ministerium, et tunc se reclamasset. Et hoc ideo hæcenus dimiserat, donec hoc mihi mandaret, ut scirem quia nunc inde suum ministerium faceret unde inter cætera ei scripsi : « Age, frater charissime, quod episcopalem concedet gravitatem, exspectans donec provincialem synodum, cujus jam tempus in proximo est, conveniamus ; in qua favente ac cooperante Domino, secundum decreta beati Gregorii, et de indecentibus [*al.*, incidentibus] causis disceptatio, et sit salubris de ecclesiastica observatione collatio, quatenus dum per hoc et præterita corrigentur. » Et quæ sequuntur in epistola Hincari ad Heddonem usque ad finem.

CAPUT XIX.

Quod post fugam ab Attiniaco, relicto Ecclesie judicio sæculares iudices a rege expetiit, et iudicata retractari fecit.

Et evoluto duorum circiter mensium spatio, postquam noctu aufugit ab Attiniaco, ante diffinitionem causarum, de quibus apud metropolitanam auctoritatem electos iudices expetivit : quibusdam machinationibus exquisitis ab eo jussio est principalis elicta, ut de quibus electos iudices, secundum sacros canones accepit, non solum eorum querela, quorum causa usque ad alium tractatum diffinienda remansit, verum, et quæ, ut dixi, in domni regis præsentia electorum iudicium sententia decisa fuerunt, sine metropolitana conscientia, sineque canonico et episcopali iudicio, per iudices sæculares, Helmigarium scilicet mercati palatii te lonearium, et Flotarium, ac Ursionem villarum regiarum majores refricarentur, contra canones, qui ab ecclesiasticis ad majoris auctoritatis ecclesiasticos iudices, et non a majoribus ad minores, nec ab ecclesiasticis ad sæculares ; neque a consensu partium electis provocari permittunt. A quibus sæcularibus iudicibus a se petitis, quædam ex diffinitis refricata et immutata, quædam vero ex diffiniendis sunt diffinita, adinventitia reputatione, sicut ab ipsis qui in eodem placito fuerunt, dicitur de non necessariis et inconvenientibus juramentis reperta : et ab eo, coram prædictis iudicibus ipsis, sive accusatoribus, quos contra electos iudices, sicut expetierat, suscepit, proposita : quatenus et is, de quo legaliter ac regulariter diffinitum fuerat, ut beneficium suum haberet, quod contra rationem et æquitatem perdiderat, eadem adinventione dimitteret : et illi quibus iudicatum fuerat, ut quoniam is post expetitum electorum iudicium, idem iudicium subterfugit,

A beneficia sua usque ad legalem diffinitionem tenerent, beneficia ipsa desererent, et ipse quod inceptorat, evindicaret. Cum sicut ei non licet, de accusatione sive criminalis, sive civilis causæ, relicto ecclesiastico, publico purgari iudicio ; ita etiam non licet illi postposito, vel contempto ecclesiastico iudicio, ad sæcularia iudicia convolare : vel quemcunque, vel etiam laicam personam pertrahere ; neque ad forum suum sequi, si ipsa persona laica consenserit ecclesiastico subire iudicio. Sicut lex Valentiniani, quam probat, Ecclesia, demonstrat dicens : « Clericus si aliquem lite pulsaverit, in foro illius quem ad iudicium provocat, audiatur. Si tamen pulsatus non acquieverit ad presbyteri et episcopi venire iudicium. » Et sanctus Leo [*imo Leo Bitur. A.*] ac Romana synodus in epistola Sarmationi, Caratoni, Desiderio, episcopis et presbyteris omnium ecclesiarum intra provinciam Tertiam [*al.*, Thraciam] constitutis directa, dicit : « Si clerus laicum pulsat, prius se audiri ab episcopis poscat : tum si petitioni suæ laicum viderit obviare, ex permissio episcopi sui in sæculi moderatoris [moderatores] disceptatione confligat. » Videlicet, non per se, sed per advocatum, sicut leges et regulæ sacræ decernunt. Et quod non licet cuiquam clerico, minime autem licet episcopo. Quoniam ut sanctus Hilarus papa in suis decretis dicit (*in synodo Rom. cit.*) : « Reatu majore delinquit qui potiore honore perfruitur : et graviora facit vitia peccatorum sublimitas dignitatum. » Et Africanum concilium decrevit (*conc. Afric. c. 71 ; cod. can. Eccl. Afr., can. 104*) : « Placuit, inquit, ut quicumque, » scilicet clericorum, cum quibus et episcopalis ordo connumeratur, « ab imperatore cognitionem iudicium publicorum petierit, honore proprio privetur. Si autem episcopale iudicium ab imperatore postulaverit, nihil ei obsit. » Et Carthaginenses canones in tertio concilio (*can. 9*) : « Cui, inquit, ad eligendos iudices undique Ecclesie patet auctoritas, ipse se indignum Ecclesie consortio iudicat, qui de universa Ecclesia male sentiendo, de iudicio sæculari poscit auxilium : cum privatorum Christianorum causas Apostolus etiam ad Ecclesiam deferri, atque ibidem terminari præcipiat. » Et item Carthaginenses canones præcipiunt, « ut quisquis episcoporum, presbyterorum, et diaconorum seu clericorum, cum in Ecclesia ei fuerit crimen institutum [*al.*, intentatum], vel civilis causa fuerit commota, si relicto ecclesiastico iudicio, publicis iudicibus purgari voluerit, etiamsi proprio fuerit prolata sententia, locum suum amittat ; et hoc in criminali [*al.*, criminali iudicio] : in civili vero, perdat quod evicit, si locum suum obtinere maluerit. »

Unde sanctus Leo cum synodo Romæ habita prædictis episcopis Sarmationi, Caratoni, Desiderio, et presbyteris omnium ecclesiarum intra provinciarum Tertiam [Thraciam] constitutis, suis subscriptionibus hæc quæ sequuntur misit : « Tantam sæculi potestates circa sacerdotalem ordinem reverentiam

prævalere voluerunt, etiam hi [al., tanta reverentia prævalere, etiam hi] quos sub imperiali nomine terris divina potentia præesse præcepit, ut jus distringendorum [al., distinguendorum] negotiorum episcopis sanctis juxta Divalia constituta permiserint. Quod cum et juris antiqui edictis, et illatis [al., illibatis] frequentius sit legibus confirmatum, præsentî tempore a plerisque invenimus fuisse calcatum. Nam prætermissis sacerdotali judicio, passim ad examen sæcularium [al., sæculare] transierunt. Quocirca nobis visum est, ut hanc et sacram legem [al., sacræ legis], et nostri ordinis contumeliam, et ad præsens ulcisceretur plena districtio, et observandam formulam constitueret in futurum. Censemus itaque, ut quicumque prætermissis sacerdote ecclesiæ suæ, ad disceptationem venerit sæcularium, sacris liminibus expulsus, a cœlesti arceatur altario; neque nullus post hanc diffinitionem, quæ communi sedit arbitrio, quidquam sibi ultra præscriptum vindicare nitatur. Ita fieri [al., et ita fiet], ut et hi qui ante erraverunt, congrua emendatione isе corrigant, et qui sub observatione clericali, cœlesti probatur servire officio, ex clerico habendum [al., ex clero abjiciendum], si prætermissis sacerdotum judicio, sæcularium adierit potestatem. Quod ideo singulos universosque volumus agnoscere, ut quod pleno justitiæ et juris ordine constitutum est, effectum totius firmitatis ex omnibus [al., in omnibus] clericorum negotiis sortiatur. » Et paulo post : « Leo episcopus subscripsi. Victorius episcopus subscripsi. Eustachius episcopus subscripsi [al., Leo episc. scribit. Victorius episc. scribit. Eustach. episc. scribit.]. » Sic et cæteri qui adfuerunt episcopi subscripserunt.

De his autem quæ, ut præmissi, diffinita fuerunt, et irregulariter sunt retractata, sanctus Leo in epistola ad Leonem Augustum per Philoxenum agentem in rebus directâ dicit (*epist.* 78) : « Quæ patefacta sunt, quærere; et quæ perfecta sunt, retractare; et quæ diffinita sunt, convellere, quid aliud est, quam de adeptis gratiam non referre, et ad interdiciæ arboris cibum improbos appetitus mortiferæ cupiditatis extendere? » Unde attendendum est de tanta exaggeratione, quam sit grave quod admisit, in obtentis, quæ patefacta sunt, quærere, et quæ perfecta sunt, retractare, et quæ diffinita sunt, convellere. Quod tantæ sapientiæ, et sanctitatis atque auctoritatis vir apostolicæ sedis pontifex reatui comparavit, qui, ut docet Apostolus, *in omnes homines pertransivit* (*Rom. v*), et non nisi morte Filii Dei potuit expiari. Et videndum si tale commissum sine ultione delata, absque periculo eorum quorum interest, valeat pertransire.

CAPUT XX.

Quod excommunicationi complicum Carlomanni post quartam admonitionem non subscripsit.

(Aimoinus, l. v *Hist.*, c. 24 et seq.) Denique postquam Carlomannus a domino nostro Carolo rege

A glorioso inconvenienter ac perniciose discessit, et multis filiis Belial sibi consociatis, regnum ejusdem domni nostri est deprædatus : unde quantum potuimus, fideles illius qui in hoc regno commorabamur, sategimus. Sed et dominus noster rex postquam huc rediit, promissionibus paternis ac blanditiis, atque indulgentiarum largitione non modice laboravit, quatenus eundem filium suum Deo et sibi restitui, et complices ejus salvare valeret. Sed cum ipse et nos episcopi regni ejus qui adfuimus, nec terrores divini judicii, nec promissiones regni æterni ac temporalium honorum, apud eum et complices ejus proficere vidimus : episcopale ministerium, quia ipse de Rhemorum diœcesi non erat, sed diaconus provinciæ Senonum existeret, in complices ejus qui de nostris parochiis erant (Flodoard., *lib. III, c. 26*) ; sed et in eos qui in iisdem parochiis nostris multa scelera perpetrarunt, sententiam excommunicationis ecclesiasticæ, usquedum resipiscerent, jaculavimus. Quam sententiam ad archiepiscopos diversarum provinciarum dirigendam decrevimus, quæ ita se habet :

« Hincmarus Rhemorum episcopus, etc. Carlomanus domni nostri Caroli regis gloriosi carne filius in diœcesi Rhemorum ex aqua et Spiritu sancto regeneratus, etc. » *Vide supra inter epistolâs Hincmari Rhemensis.*

Et quia frater Hincmarus Compendio fuerat, quando adhuc de Carlomanni et complicum ejus conversione tractabatur : et sine conscientia mea inde recessit : consilio et consensu coepiscoporum nostrorum, qui ibidem mecum fuerunt, istiusmodi litteras ei, sed et aliis episcopis Rhemorum provinciæ, qui corpore tunc nobiscum non erant, direxi. « Hincmarus, etc. Te latere non potest quanta mala Carlomanni complices in Rhemorum, » etc. *Vide epistolâs Hincmari.* Et direxi ei præfatam huic subjunctam epistolam (Flodoard., *l. III, c. 21*). Deinde v Non. Februarius, venit ad me Heddo præpositus suus, et quia sicut ei mandaveram, litteras sui consensus in hac excommunicatione canonica non direxit, per eum illi easdem litteras mihi dirigendas verbo mandavi. Et evoluit plusquam triginta diebus, ex quo inde litteras accepit, remisi ad eum iterum litteras, mandans, ut veluti anteriores, et ordinatione posteriores sui, et etiam de longinquiribus partibus litteras sui consensus obedienter miserunt, diutius et ipse mittere non differret : aut certam et regularem rationem mihi rescriberet, cur jam tertio commoneat eas mihi mittere detrectaret. Ad quas mihi rescripsit hoc modo :

« Venerabili Rhemorum archiepiscopo Hincmaro, etc. Quia adeo litteras mei consensus in excommunicatione a vobis facta requiritis, » etc. *Reliqua habes inter epistolâs Hincmari Laudunensis, tom. CXXIV.*

Unde inter cætera illi rescripsi hoc modo : « Frater Heddo, » etc. *Vide epistolâs Hincmari Rhemensis.*

CAPUT XXI.

Quod deinde semel ac iteram eadem de re monitus obedire contempsit, et concilii Antiocheni canonem indiscrete exponit.

Postea III Nonas Maii venit ad me clericus suus, nomine Teutlandus, quædam mihi de parte illius referens, quæ hic causa brevitatis omitto. Et dixi ei, ut episcopo suo diceret, quatenus sicut et litteris et verbis jam illi mandaveram, litteras sui consensus in excommunicatione complicum Carlomanni mihi mittere diutius non differret : unde tunc quinta vice eum commonebam. Postea sexta vice litteris, quarum exemplar habeo (*non exstant*), illum commonui, quatenus consensus sui litteras in excommunicatione canonica complicum Carlomanni mihi mittere diutius non differret, qui obedire mihi more suo deditus fuit. Insuper in memorata rotula sua inter alia hinc mihi rescripsit : « Cujus couti dedignamini concilio, petere non operæ pretium habetis consensus. Et miror cur in hoc meum requiritis consensus, cujus non quæstistis ; imo sprevistis consilium. Dum Antiochenum decernat concilium : nec archiepiscopus sine cæterorum agat consilio sacerdotum : quod nullum excludit coepiscopum. »

Non attendens quam indiscrete sententiam ipsius exponat concilii ; quam discrete idem decrevit concilium, dicens (*can. 9*) : « Placuit præter metropolitanum cæteros episcopos nihil amplius agere secundum antiquam a patribus nostris regulam constitutam, » et reliqua. Quæ sit autem antiqua regula a nostris patribus constituta, sancta Nicæna synodus patenter ostendit (*can. 6, al. 8*), decernens, ut quoniam primatus et sollicitudo omnium Ecclesiarum in principatu beati Petri domini ore percepto, pertinet ad primæ et sanctæ Romanæ sedis pontificem, ut Alexandrinus episcopus omnium sibi commissorum habeat potestatem (*vide lib. LV, cap. 4*). Similiter et apud Antiochiam, cæterasque provincias sua privilegia serventur Ecclesiis. De quibus autem Ecclesiis dicat, et quæ, et qualiter privilegia illis servari debeant, præfatum Antiochenum demonstrat concilium (*can. 6 cit.*) : « Per singulas, inquit, regiones episcopos convenit nosse, metropolitanum episcopum sollicitudinem totius provinciæ gerere : propter quod ad metropolim omnes undique qui negotia videntur habere, concurrant. » Et Africanum concilium (*concil. Afric., c. 105, et cod. can. Eccl. Afr., can. 138*) :

« Decreta, inquit, Nicæna sive inferioris gradus clericos, sive episcopos ipsos suis metropolitanis apertissime commiserunt, » et reliqua. Et sanctus Bonifacius scribit (*epist. 3*) : « Convenit nos paternarum sanctionum diligentes esse custodes. Nulli etenim videtur incognita synodi constitutio Nicæna, quæ ita incipit [*al.*, præcipit], (ut eadem proprie verba ponamus). Per unamquamque provinciam jus metropolitanos singulos habere debere ; nec cuiquam duas esse subjectas. Quod illi (quia aliter credendum non est) servandum sancto Spiritu suggerente, sibi met censuerunt. » Et paulo post : « Quod ideo

A dicimus, ut advertat charitas tua, adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem semper expectet. » Distincte igitur Antiochenum decrevit concilium, ut « præter metropolitanum cæteri episcopi nihil amplius agant, nisi ea tantum quæ ad suam diœcesim pertinent, possessionesque subjectas. » Hic diœcesis pro parochia, sicut et alibi, ponitur. Et post aliquanta : « Nec metropolitanus sine cæterorum gerat consilio sacerdotum. » Et non addidit in hac sententia, quod in præcedenti præposuit : nihil amplius sine cæterorum gerat consilio sacerdotum : quoniam sacrum Nicænum concilium (*can. 6*) noverat decrevisse, ut si duo aut tres provinciales episcopi propter contentiones proprias contradicunt, obtineat sententia plurimorum.

Claret igitur fratrem Hincmarum aliter quam debuerat, ad suum sensum inflexisse sententiam Antiocheni concilii, quam idem concilium, sed et sanctus Bonifacius papa intellexerunt, sententiam sacri Nicæni concilii : cum idem sanctus Bonifacius in eodem concilio promulgaverit, « quatenus metropolitani sui unaquæque provincia in omnibus rebus ordinationem semper expectet. » Et non decrevit, quia non debuit, contra Nicænum et Antiochenum concilium, ut in omnibus rebus metropolitanus omnium coepiscoporum provinciæ consilium semper expectet : quoniam de omnium negotiis, qui de provincia ad metropolitanum undique concurrunt, semper omnium coepiscoporum consilium expetere vel exspectare metropolitanus non potest, verum nec debet. Sed sicut sanctus Leo ad Anastasium Thessalonicensem scribens (*epis. 85*) : « Secundum sanctorum Patrum canones Spiritu Dei conditos, et totius mundi reverentia consecratos, metropolitanis singularum provinciarum episcopos jus traditæ sibi antiquitus dignitatis intemeratum habere decrevit, ita ut a regulis præstitutis nulla aut negligentia aut præsumptione discedant. » Privilegium suæ sedis metropolitanus eo modo debet exercere, ut ea singulis servari præcipiat ; sicut item Leo ad Hilarium Narbonensem episcopum scribit (*ep. 92, ad Rusticum Narbon.*) : « Quæ [Quod] nec præceptis evangelicis contrarium, nec decretis sanctorum invenitur adversum. » Et hoc est a præstitutis regulis nulla aut negligentia, aut præsumptione discedere : videlicet ut præstituta pro viribus exsequi metropolitani non negligent, neque præsumptione convellant. Quæ autem secundum præstitutas regulas singulis pro negotiis convenientibus præcipiens, quorumcunque rebellionem vel præsumptionem non potuerit corrigere, sua præceptione debet aut per iudices a se datos, aut ex consensu partium electos, corrigere : aut in comprovinciali synodo, secundum sacras regulas, quæ neglecta vel præsumpta sunt, cum consilio episcoporum provinciæ emendare.

Quas sententias sacrorum canonum ab omnibus omnium provinciarum episcopis, præter cum, in istis

regionibus observatas, ante mentis oculos habens, non sæpe memoratam excommunicationem eanonica in Carlomanni complices, sine cæterorum qui adfuerunt, et adesse voluerunt, vel adesse potuerunt consilio vel consensu exerui; et aliorum qui tunc adesse non potuerunt, consensum et consilium requisivi, et obedienter ab illis datum, et missum recepi. Ab eo autem qui adesse potuit, et adesse non voluit, quique de tractatu ex causa Carlomanni et complicum ejus sine conscientia mea discessit, consensum requisivi: et sicut ab antecessoribus et successoribus ejus in ordinatione obtinui, apud illius contumaciam hactenus obtinere non potui.

CAPUT XXII.

Quod in quibusdam Rhemensem ipsum male reprehendit, et de pœna inobedienti irroganda.

Scriptis etiam mihi se miratum valde fuisse, si eum per suum clericum commonere potuissem. Non attendens quia si ipsius metropolitanus est qui sedet in Rhemorum metropoli, et clerici sui est metropolitanus, ad quem secundum sacros canones, totius provinciæ debent convenire omnes qui videntur habere negotia: et ipse præcipere singulis, et in commune omnibus quæ nec præceptis evangelicis contraria, nec decretis sanctorum inveniuntur adversa; et corrigere in singulis singula si quæ fortassis emergerint. Quibus constat etiam per clericum suum metropolitanus eum prævalet commonere, et apud quem, juxta Carthaginenses canones, si est utile, debet et prævalet provincialis episcopus accusari. Et presbyteri, et diaconi, et cæteri inferiores clerici in causis quas habuerint, si de judiciis episcoporum suorum questi fuerint, et ab eis atque a vicinis episcopis ad primatem provinciæ appellaverint, ejus auctoritate suos episcopos regulariter commonere valebunt. Nam et coepiscopi Rhemensis provinciæ in longinquo partibus constituti, ex antiquo, metropolitanis litteris per vicinorum episcoporum missos ad synodum vel ordinationem regulariter et jure, sed et de aliis quibusque monentur.

Et subsequitur (*non exstat hæc epistola Laudun.*): « Quod tamen synodali agendum erat tempore, et judicio, si esset digna ratio unde commoneret. Nam istæ tales vestræ præceptiones non illiusmodi commonitiones sunt: neque mihi aut alicui episcopo per loca diversa, quæ pro vestra commoditate aditis, si impetiar respondendum est, sed in synodo. » Non videns, vel potius arrogantia cæcus videre non valens, quia aliud est, si a quoquam impetitur vel accusatur; et aliud est, si pro reclamatione alicujus ex sua parochia a metropolitano commonetur, ut ea quæ prope *[legendum videtur]* perperè egit, provincialis episcopus emendare monetur, aut pro causis necessariis consensus illius requiritur. Nam pro omnibus omnium negotiis, qui undique juxta canones ad metropolim suam conveniunt, ad eum commonendum non debet, nec valet metropolitanus synodum convocare.

Reprehendit etiam me, quia Carlomanno, et suis,

A quibus excommunicationem intentaverat, sed adhuc eam, sicut et ipse scribit, in illos non protulerat, et qui se profitebantur velle corrigere, in sua parochia publice sine suo consensu, benedictionem petentibus dedi. Dicit de quibusdam Scriptura: *Docuerunt linguam suam loqui mendacium: ut inique agerent, laboraverunt (Jer., ix, 5); sed labor labiorum illorum operiet eos (Ps. cxxxix, 10).* Quando fideles senioris nostri qui convenimus tam episcopi quam abbates, et comites, et cæteri ejus fideles ad collocationem Carlomanni, atque suorum, et persuasimus eis, ut datis et acceptis utrinque obsidibus, a malis quæ perpetrabant in regno senioris nostri, quiescerent, et pacifice ibi degerent, quousque ad senioris nostri indulgentiam pervenirent: cum solvenda erat collocutio, et quique nostrum ad sua redire pararent, tam senioris nostri fideles, quam et Carlomannus et sui, profitentes de correctione sua, benedictionem sibi dari a me, sed et ab aliis qui adfuerunt episcopis, petierunt. Et præmissa sententia Domini, qua præcepit discipulis suis, dicens: *In quamcunque domum intraveritis, dicit: Pax huic domui; et si ibi fuerit filius pacis, requiescet super eum pax vestra: sin autem, pax vestra ad vos revertetur (Luc. x);* orando, ut confirmaret hoc Deus, quod operatus erat in nobis, et per nos in illis: benedictionem, ut fidelibus, et voluntatem ac devotionem fidelitatis habere profitentibus, dedimus. Docente sancto Gregorio ex legali sententia (*lib. xii, ep. ult. interrog. 9*) ut « per alienam messem transiens, manu spicas conterat et manducet; ut de segete quæ alteri videtur esse subjecta, per effectum boni operis, frumenta Dominica vitiorum suorum paleis exspoliet *[exspoliet]* (*Deut. xxiii*), et in ecclesia corpus monendo, et persuadendo, quasi mandendo convertat. « Et canones sacri dicunt (*concil. Antioch., can. 22; vide Anton. August., lib. iv Jur. pontif., tit. 50*), ut episcopus alienam civitatem quæ non est illi subjecta, non adeat, nec ad possessionem accedat, quæ ad eum non pertinet super ordinatione cujusquam; quod nec me fecisse intelligo; cum iidem sacri canones dicant: Per singulas regiones episcopos convenit nosse, metropolitanum episcopum sollicitudinem totius provinciæ gerere. Unde in quacunque parochia totius provinciæ visum mihi fuerit, sicut et in Laudunensi parochia sæpe jam egi, secundum Chalcedonenses canones et decreta sedis Romanæ pontificum, libere possum synodum convocare, et corrigere singula, si quæ fortassis emergerint. Non ergo alienam civitatem, quæ non est mihi subdita, adii; nec ad possessionem quæ ad me non pertinet super ordinatione cujusquam accessi. Quæ etsi Laudunensis parochia mihi in privilegio metropolitana sedis non esset subjecta; de segete quæ alteri videbatur esse commissa, per effectum boni operis frumenta dominica vitiorum suorum paleis exspoliare, et in Ecclesiæ corpus monendo et persuadendo, quasi mandendo, libere possem convertere.

Sed et quod scripsimus in epistola de excommu-

nicatione complicum Carlomanni, per diversos archiepiscopos dirigenda, dicentes : « Ea videlicet conditione, ut secundum formam mystici Nicæni concilii, et Africæ provinciæ canonum, juxtaque apostolicæ sedis decreta pontificum Siricii, Innocentii, Cælestini, Leonis, ubicunque fuerint, ultima pœnitentia, et necessarii viatici communio petentibus non negetur. » Secundum suam singularem sapientiam corrigit, scribens in sua rotula : « De viatico autem illis concedendo, non nisi per professionem, etiamsi in ultimo sint positi, videlicet ut si postea convaluerit, quisquis eorum vitaticum in infirmitate positus petierit, profiteatur non ulterius se talia acturum, neque talia agentibus se participaturum. Quoniam in suis ita sanctus papa Gelasius instituit constitutis ; sententia præfigitur, vel præfixa est semper errori. Quæ sententia huic errori præfixa, nunquam omnino resolvetur. » Qua de re quid est nobis agendum, nisi intremus apud illum in scholam, et nos magistrali ferula doceat, quod Patres qui in Nicænum concilium convenerunt, et canones spiritu Dei conditos, mansurasque usque in finem sæculi leges præfixerunt ? Sed et episcopi Africæ provinciæ, inter quos et famosissimus Augustinus, non parva Christi portio, et Ecclesiæ catholicæ institutio, atque defensio, exstitit, nescierunt, vel oblitifuerunt ? Sed et Siricius, Innocentius, Cælestinus, et Leo percipere non potuerunt ? Verumtamen quia nobis de hac causa sufficit tantorum, quorum formam præmisimus, catholica et salutaris doctrina ; cui ex superfluo, vel potius ex angustia quiddam, quasi dissimulando, superaddere voluit ac præsumpsit ; quoniam eum repercutit, contra quam in sua perniciose excommunicatione agere non pertimuit : et ideo sui consensus litteras in præscriptis canonum et decretorum apostolicæ sedis pontificum diffinitionibus mittere mihi ausus non fuit. Et accidit illud quod scriptum est : Qui fugerit arma ferrea, irruet in arcum æreum. Dum enim vitare voluit, ne contra suæ perniciosæ excommunicationis præsumptionem in consensu sibi mandato a me, scriberet, et de ipsa præsumptione illicitæ excommunicationis, et de contempto privilegio suæ metropolis, et de inobedientia contra suam professionem et subscriptionem, in iudicium sacrarum legum, et canonum et decretorum apostolicæ sedis pontificum irruit. Et ut statueret suam sententiam, posuit in eodem suo scripto testimonium contra se beati Augustini ex libro de fide et operibus, de discretionem correctionis et excommunicationis ; et quasi fugiens a facie leonis, irruit ursum ; et in domo innisus parieti, momordit eum coluber. Id est, testimonium contra se a se ipso in scripto suo positum ex scripturis illius, qui exaltatus et in cruce, sicut Moyses exaltavit serpentem in deserto. « Non est, inquit Augustinus in testimonio ab Hincmaro posito (*lib. de Fide et operibus*), contrarius apostolus Domino, quia dixit : Peccantes coram omnibus argue, ut et cæteri timorem habeant : cum ille dicat, corripe eum in-

ter et ipsum solum. Utrumque enim faciendum est, sicut infirmitatis diversitas admonet eorum, quos utique non perdendos, sed corrigendos curandosque suscepimus. » Quæ verba testimonii a se in scripto suo positi si attenderet, illam perniciosam excommunicationem ad perditionem multorum, quos non perdendos, sed corrigendos curandosque suscepit, intentare nequaquam præsumeret. Quo contra Salomon dicit : *Sicut spina in manu temulenti : sic et in ore stulti parabola (Prov. ix)*. Ut enim temulentus spinam in manu gerens seipsum vulnerat ; ita qui incautus est ad loquendum, sententia sua se percutit. Et item in eodem testimonio beatus Augustinus dicit : « Ita etiam est ratio dissimulandi, et tolerandi malos in Ecclesia : et est rursus ratio castigandi, corrigendi, non admittendi, vel a communione removendi. Errant autem homines non servantes modum ; et cum in unam partem proclives ire cœperint, non respiciunt divinæ auctoritatis alia testimonia, quibus possunt ab illa intentione revocari, et in ea quæ ex utrisque temperata est, veritate et moderatione consistere. » Et si hanc discretionem corripendi et excommunicandi, aut dissimulandi et tolerandi malos in Ecclesia, quam beatus Augustinus dixit, et ex verbis sacri eloquii ratissimam demonstravit, frater Hincmarus attendens a metropolitano suo semel et secundo ex evangelica veritate, et apostolica atque canonica auctoritate, et decretis apostolicæ sedis communitus, ut eandem perniciosam excommunicationem resolveret, in pertinaci contumacia sua in suum periculum non persisteret.

C Contra cujus inobedientiam, qui mihi, suo metropolitano, litteras sui ex hac causa consensus contumaciter mittere recusavit, quid sacræ leges et regulæ dicant, subjungam : Honorius et Theodosius Aug. in legali edito suo, directo Aurelio Carthaginensi archiepiscopo, decreverunt, dicentes : « Religio itaque tua competentibus scriptos universos episcopos faciat admoneri, scituros diffinitionem sanctimonii tui hanc sibi diffinitionem esse procriptam, ut quicunque damnationi supra memoratorum, quo pateat mens pura, subscribere impia obstinatione neglexerint, episcopatus amissione multati, interdicta in perpetuum, expulsi civitatibus, communione priventur. » Et paulo post : « Una enim eademque culpa est eorum qui aut dissimulando cohibentiam, aut non damnamo favorem noxium præstiterunt. » Et hinc S. Gregorius ad Felicem episcopum in Sardicia (*lib. iv, epist. 7*) : « Qualiter, inquit, obedientia, vel sit reverentia præpositis exhibenda, ex tuis quoque subjectis ipse non ambigis. In qua re valde est utile, si id quod disciplinæ vigor imponit, nullo cogente humilitas laudanda servaverit. Pervenit ad nos itaque quod fraternitas tua Joanni fratri nostro, prima Justinianæ episcopo secundum morem constitutum [*al. abest* constitutum] parere despiciat, et nec decreto ejus, nec relatione [*al.*, relationi quam ad no direxit] juxta consuetudinem, voluisset subscribere. Quod si ita est, contristamur, quia superbiæ de t

manifeste præbes indicium : quod quam sit, præsertim in sacerdote, culpabile, divinæ clementia monitionis eloquitur [al., divinæ admonitionis clamant eloquia]. Propterea hortamur, ut mentis tumore deposito, antedicto fratri et coepiscopo nostro humilem te exhibeas, et parere non desinas : quatenus et Deus gaudeat in fraternitatis vestræ concordia, et alii de te sumant bonitatis exemplum. Nam si, quod non credimus, te in superbia permanere contigerit, districtam canonicamque disciplinæ correctionem contumaciæ tuæ scito sacros canones ulciscerent imponere [al., nos scito ulciscerent imponere]. Bene ergo facis talem te sponte salubri consideratione præbere, qualis esse canonica coercionem [al., coercionem exigentem] compelleris. Nam nec tibi denuo post hanc nostram admonitionem licebit ad tuæ voluntatis arbitrium, contra morem, majoribus tuis inobedientem existere : nec nos tantæ indiscipline ecclesiasticam cognoscas dissimulare vel differre vindictam. » Unde attendentes iudicii comminationem beati Gregorii, contra inobedientiam archiepiscopo suo, qua dicit : « Denuo post hanc nostram admonitionem nec tibi licebit ad tuæ voluntatis arbitrium, contra morem, majoribus tuis inobedientem existere : nec nos tantæ indiscipline ecclesiasticam cognoscas dissimulare, vel differre vindictam. » Discernite utrum quod in terris consistens, et conversatione in cœlis habitans intentavit ; et adhuc nobiscum in suis constitutionibus vivens, de cœlo in huiusmodi creditur intentare, post tot commones, vindictam tantæ indiscipline istius regularum contemptoris dissimulare, vel differre diutius debeamus, nos qui per Dei gratiam ad cœlestia suspiramus.

CAPUT XXIII.

Quod Hincmaro eidem Rhemensi traditionis crimen per calumniam imponit.

Post tantas denique, et alias plures, quas vitando prolixitatem prætereo, commonitiones et sacras auctoritates a me illi prolatas ; sicut Dominus de rebellante adversum se populo queritur : *Curavimus Babylonem, et non est sanata.* Et : *Versa est mihi domus Israel in scorium (Jerem. LI)* ; accidit mihi ab illo, quod Salomon dicit : *Acetum in nitro ei qui cantat carmina corde pessimo (Prov. v)*. « Acetum, inquit Gregorius, si mittatur in nitrum, fervescit nitrum protinus, et ebullit : et perversa mens quando per increpationem corripitur, nec per prædicationis dulcedinem ad bona suadetur, et correptione fit deterior, et inde in murmurationis iniquitatem succenditur, unde debuit ab iniquitate compesci. » Unde subsequitur in rotula nuper iv Kal. Julias præsentis indictionis 4 mihi directa.

« Nulla, inquiens, consanguinitatis pietate restricti, sed neque aliqua archiepiscopalis præstabilitate aut prohibite, ab orgis (f. ὀργῶν) justitiam non operante retenti, suadentes, ac imo compellentes me tradendo, ut a regia potestate manciparer custodiae, scribentes litteris vestris ad eum ita : Et cum Silva-

A nectis venerit, habe tales homines strenuos ac peritos, sicut opus est ad talem bestiam capiendam. Et ad Odonem complicem vestrum, sic, ut quando ad synodum venerimus, Deus poterit dare nobis quid loquamur : usquedum de isto indomabili unicornio et inquieto animali nos liberabit. Hæc autem perficere laborare non cessastis, a tempore quo synodum in Suessionica civitate pro depositione Rothaldi habuistis : eo quod renitebar substitui contra sacras regulas in ejus loco episcopum, antequam universalis papa pro tanto consuleretur, ut auctoritas se habet, negotio. Quod dum ante efficere non valuistis, quia nondum venerat hora mea, in Silvaco compote estis potiti voto. Et hoc vos egisse Rhemi mihi negastis ; quod tamen tunc vobis aperte dicere nolui. »

B De quibus scribo. Lex Justiniani dicit, ut « metropolitanus vel primas provinciæ, de ecclesiastico jure, vel de aliis negotiis inter conquirentes audiat : et quod ecclesiasticis canonibus et legibus nostris consentaneum sit, hoc diffiniat, et nulla pars valeat calculo ejus contradicere. » Et hinc beatus Gregorius sæpe numero in suis ex Regesto decretis præcipit, ut « secundum leges et canones ecclesiastica judicia terminentur. » Et sacra leges, quas Ecclesia catholica recipit, dicunt : « Quoniam confiteri quisque in iudicio, non tantum sua voce, sed et litteris, et quocumque modo potest : convinci autem non nisi Scriptura aut testibus potest. » Et de clericis, in posteriori lege Majoriani abrogatum demonstrant, ut *clerici per compromissi vinculum non adeant episcopale iudicium.* Et item leges sacræ dicunt, ut in criminalibus causis nec accusator, nec accusatus per procuratorem, aut aliam personam defensare se permittantur, nisi ingratum libertum patronus accuset. Et in causa capitali nemo damnatur, neque absens per alium accusare aut accusari potest ; nisi forte accusatus legaliter ac regulariter evocatus (quia, ut scribit Gelasius : « Ita vocatur ad iudicium certa quæcunque persona, ut aut fateatur objecta, aut convinctur objectis ») ad purgandum se, contra evocationis regulam venire distulerit, ut secundum leges, et decreta Gregorii, in eum, quasi in contumacem proferatur sententia. Et secundum leges et canones, ut dicit Felix, « respondere diffidens, objecta confirmat : » quatenus ut Bonifacius papa decrevit, « dilationem sententiæ de absentia non lucretur. » Cujusmodi iudicio et accusator secundum leges et canones subiacebit, si accusationem suam legalem, ac regularem prosecutus non fuerit ; ut aut quæ obicit, legaliter ac regulariter comprobet, aut falsitatis reus iudicio legali ac regulari subiaceat. Sicut in legis Theodosianæ lib. ix, c. 26 et 27, in Carthaginiensis concilii c. 19, et Africani concilii c. 27, evidenter ostenditur. Sed et conspirans cum propria plebe, et nonnunquam vocatus ad concilium venire detractans, putans sibimet plebem suam posse sufficere, fraterna dilectione contempta ; non tantum diœcesim amittere, verum et auctoritate publica ab

ipsa principali cathedra removeri, et propriis carere, ut rebellis, præcipitur : sicut in vigesimo capitulo Africani concilii continetur.

Cæterum, quia gravissima ex hoc crimine judicia et in legibus sacris, et in ecclesiasticis regulis demonstrantur, tam in accusatum, quam in per calumniam accusantem, et non probantem; sive præsens in judicio Hincmarus a se objecta prosequatur; vel objectis sibi respondeat; sive sæpius regulariter evocatus adesse neglexerit : necesse erit ex utrisque partibus veritatem inquiri, et quæ inventa fuerint, juste et rationabiliter diffiniri. Dicit namque suum me traditorem, id est proditorem, videlicet episcopum episcopi delatorem. Et historiæ, ac chronicæ ecclesiasticæ adstruunt, præcipue chronica Prosperi, Cæciliano Ecclesiæ Carthaginensis episcopo objecta crimina non probata fuisse; maxime quod a traditoribus divinarum Scripturarum fuerit ordinatus. Et non leve crimen est, si ego qualescunque archiepiscopus per me Domino consecratum episcopum tradidi. Unde et signa litterarum mearum, quibus recognoscerem me suum traditorem mihi isdem frater noster ad comprobationem producere [deest debet]. Sicut et de traditore domini nostri scriptum est : quia traditor eis, quibus eum tradebat, dedit signum, ut quemcunque osculatus fuisset, ipsum tenerent (Matth. xxvi). De quo idem Dominus ad Pilatum dicit : *Qui tradidit me tibi, majus peccatum habet* (Joan. xix). Duarum quoque epistolarum mearum verba mendose, ac si duos testes adversum me in testimonium protulit : ut et in accusatione summi capitis nostri factum fuisse legimus. « Omnes, inquit Gregorius, electi, quia summi capitis membra sunt, caput quoque suum in passione sequuntur, ut ipsos adversarios in sua morte sentiant, de quorum vita præsumebant; et tanto eis crescat merces operis, quanto eis virtutis lucrum proficit et ex alienæ damno charitatis. »

Sanctus autem Zosimus papa ad Aurelium, et ad universos episcopos per diversas provincias constitutos scribens (epist. 6), ostendit quantum scelus sit traditionis, dicens : « Lazarus dudum in Taurinensi concilio præmissorum [al., gravissimorum] episcoporum sententiis pro calumniatore damnatus, cum Briceii [al., Brissi] innocentis episcopi vitam falsis objectionibus appetisset. Post vero indebite [al., indebitum] ab eodem Proculo, qui inter cæteros in synodo damnationi ejus assenserat [al., synodo damnationis ejus accesserat], sacerdotium consecutus est, a quo se ipse vitæ suæ conscientia datis litteris in abdicatione [al., abdicationem] sui sua sponte submovit. » Et in lib. viii Theodosianæ legis, c. 29, de calumniatoribus scriptum est : « Gratianus, Valentinianus, Theodosius AAA. Hællibico comiti, et ministro utriusque militiæ. Non est ratio qua manifesti calumniatoris supplicium differatur. Non enim patimur frequenter iterari, quæ consistere prima accusatione non quiverint; atque alienam innocentiam securitatemque sine crimine, damnabili

A appetitione terreri. Data iii Kal. Jun. Merobaude et Saturnino Cons. » Iidem Augusti Menandro Vicario Asiæ : « Nostris et parentum nostrorum constitutionibus comprehensum est, eos qui accusationem alienis nominibus præsumpsissent, delatorum numero esse ducendos. Atque ideo calumniosissimum caput et personam judico irritæ delationis infamem deportatio sequatur : quo posthac singuli universique cognoscant, non licere in eo principum animos commoveri, quod non possit ostendi. Data Idus Maias, Arcadio et Bautone Cons. » Et item Arcadius et Honorius AA. Victuro proconsuli Africæ : « Innocentes sub specie falsæ criminationis non patimur callidorum impugnatione subverti : qui si tentaverint, intelligant sibi met severitatem legum pro commissis facinoribus incumbere. Data iv Id. Mart. Mediolano. Honorio August. iii et Eutychno Cons. » Et item ibi post alia : « Calumniatores etiam sunt, qui falsa deferentes contra cujusque innocentis personam, principum animos ad iracundiam commovere præsumunt; qui omnes infames effecti, in exilio detruentur. » Et in lib. x, c. 5, de delatoribus lex promitur, quam idem frater in suis compilatis quaterniunculis synodo apud Atiniciacum præsentatis subscripsit, et subscribi a suis clericis fecit. Quæ quia ecclesiasticis judiciis de ministris ecclesiasticis non convenit, hic eam mittere supersedi.

CAPUT XXIV.

Ille calumnia tabulis testibusque productis a Rhemensi dissipatur.

C (Lib. lv, cap. 40.) Et quia dixit, « suadente, ac imo compellente me tradendo, ut a regia potestate manciparetur custodiæ, » domnus rex præsens, si dignatus fuerit, veritatem coram vobis hinc dicere potest, quia nullus eo melius scit, si ipsum fratrem nostrum tradidi, et ei suasi, vel consilium illi dedi, sive consensum præbui, ut eum regia potestas manciparet custodiæ. Nam quando suis jussionibus resultabat, et adversus eum rebellabat, domno regi misit litteras suas, quas mihi dominatio sua direxit, mandans ut apud Silvacum ad eum venirem; et antequam illuc venirem, litterariam responsonem de litteris Hincmari remandarem. Et quoniam mihi contra fidem, et bonos mores nihil mandavit, et apostolica regula nobis præcipit, ut « subjecti simus illi, tanquam præcellenti, » feci de jussione illius ut potui, et istiusmodi litteras exinde illi direxi.

« Domino glorioso, etc. Charissima et reverentissima dominatio vestra, » etc. *Hanc item habes inter epistolas Hincmari nostri.*

Ego ita sicut hęc posui, me scripsisse non denego. Quo contra ipse scribit, me scripsisse domno regi cum Silvanectis venerit, habere tales homines strenuos et peritos, sicut opus est ad talem bestiam capiendam. Et quomodo ad tradendum eum Scriptura mea conveniat, quæ salutem illius, et non traditionem quæsit? vos judicate. Et alteram domno regi

ex eo direxi prolixam epistolam, cujus exemplar hic habeo; in qua continetur ad locum:

« Ego autem sic hæc quæ acta sunt, progredi timeo, et sic doleo; licet isdem Hincmarus sicut ad me pro certo per eos qui ab ipso audierunt, et ejus frendentes motus cum de me loquitur, vident, perventum est, mihi hoc totum reputat, quod vos a me provocati, quidquid contra eum egistis et agitis, dicens quod hæc omnia meo consilio et instinctu agatis. Quod non esse verum, melius ipsi scitis. » Et item ad locum in eadem epistola: Quod autem jussistis ut consilium qualiter contra contumaciam Hincmari vobis agendum sit remandare procurem, cum venia vestræ dominationis respondeo, hoc mihi non modo difficile, verum etiam mihi videtur impossibile. » Et paulo post: « Sicut vobis sufficienter est cognitum, sacros præcipere canones de causa episcopi, maxime unde regia vestra potestas læsam se queritur: et apostolicæ sedis auctoritas contentiose, sicut mihi relatum est, in medium devocatur, sine coepiscoporum tractatu atque consensu sententiæ consilium dare, vel quiddam diffinire non valeo. »

Odoni autem epistolam pro eo, misi, interroganti quid vellem, ut Hincmaro daret consilium: unde illi prolixas litteras misi (*non exstant*), quarum exemplar hic habeo alteram autem eidem fratri Odoni pro Hincmaro misi epistolam, cujus exemplar et hic habeo, in qua continetur: « Quantum potes animum domni regis modifica, » etc. *Reliqua habes inter easdem epistolas.*

Tertiam quoque eidem fratri pro eo misi epistolam, cujus exemplar hic habeo, in qua continetur: « Multum timeo ac doleo, » etc. *Vide ubi supra.*

Ego sic scripsi. Et Hincmarus dicit me ad complicem meum Odonem scripsisse, ut « quando ad synodum venerimus, Deus poterit nobis dare quid loquamur, usque dum de isto indomabili unicornio, et inquieto animali nos liberabit. » Quæ Scripturæ quantum inter se discordant, ratio manifesta demonstrat. Nam etsi ita, ut dicit Hincmarus, ad Odonem scripsissem: non tamen ibi colligere poterat illius traditorem me fore: cum etiam in litteris suis me dicat dixisse: « Quando ad synodum venerimus, Deus poterit nobis dare quid loquamur. » Quæsi enim inter exemplaria litterarum exemplar epistolæ in qua hæc verba quæ dicit, contineantur, sed invenire non potui. Et licet eum unicornem, scilicet indomabilem bestiam in meis litteris appellarem, non criminaliter peccatum committerem. Cum B. Gregorius exponens sententiam Domini ad Job dicentis: *Nunquid alligabis rhinocerotem ad arandum loro tuo? (Job xxxix.)* de suo imperatore dicat: « Sæpe, inquit, vidisse me memini quod cum se ad feriendum graviter hic rhinoceros accenderet, quasi elevato cornu bestiolis minimis mortis exsilia, damnationemque subjectis immensis terroribus intentaret, repente fronti signo crucis impresso, omne in se

incendium furoris exstinxit. » Et utinam hic rhinoceros noster signum crucis fronti et cordi imprimeret, et e suæ contumaciæ ferocitate semetipsum exstingueret, et se alterum faceret: ut cum Apostolo dicere possit: *Vivo ego, jam non ego; vivit autem in me Christus (Galat. ii).* Unde Gregorius: « Exstinctus quippe fuerat sævus ille persecutor, et vivere cœperat pius prædicator. » Afferat autem litteras meas de quibus hic scripsit, et proferat eum qui eas illi dedit, et cognoscatur inde veritas. Nam quod dicit, mihi restitisse de Rothado: subscriptiones manus suæ, quas habeo, inde mendaciæ eum redarguunt, ostendentes, quia nihil de Rothado decrevi, val de ordinando alium in locum ejus feci, quod mecum ipse non fecerit: sicut et synodalia gesta apostolicæ sedi directa, quibus ipse subscripsit, patenter ostendunt.

Cæterum veni ad domnum regem ad Solarium in Cippido (*Suyppe*), et ei litterarum responsonem de suis et Hincmari litteris detuli. Quam responsonem coram me, et Odone episcopo, et Ottulfo, atque Hildeboldo tunc presbyteris, sed et coram Eirico comite, et non recordor aliorum nomina qui ibidem adfuerunt, Hincmaro dedit, et locum super noctem [*f. noctem super locum*] ad legendum concessit. Et in crastina ad regem reversus, quia in solita contumacia pertinaciter perstitit, ut nec ego, nec frater Odo, nec etiam qui adfuerunt alii quiddam rationis, vel humilitatis, aut episcopalis gravitatis obtinere apud eum potuimus: licentiam apud domnum regem petii: et quia satis infirmus eram, ad mansionem secessi. Si autem quiddam de traditione illius, vel de custodiæ mancipatione cum domno rege aliquid locutus fui, non solum domnus rex hoc melius sapit: verum et isti religiosi episcopi Odo, et Ottulfus, et Hildeboldus, veritatem nobis pro amore ipsius veritatis possunt edicere, et me aut noxium, aut innoxium de hac calumnia pronuntiare. Scriptum est enim: *In ore duorum aut trium testium stabit omne verbum (Matth. xvi; I Tim. 5).* Et Apostolus accusationem sub duobus, vel tribus testibus adversus presbyteros, recipi posse ostendit. Et Nicænum concilium (*can. 2*), Neophytum episcopum a duobus vel tribus testibus redargutum, abstinere a clero præcipit, si aliquid delictum animæ circa personam reperiat hujusmodi. Sed et quia, ut supra posui, sacræ leges dicunt, quia convinci nemo potest, nisi scriptura vel testibus: audistis scripturas et suas, et meas, de quarum certitudine cum domni regis, et istorum episcoporum attestazione legaliter ac regulariter potestis discernere, atque decernere, si præfata judicia legum, et Zosimi, in eum qui me falso est calumniatus, recidere debeant; quæ in me procederent, si me per calumniæ delatorem suum probare valeret.

Quæ, et alia, de aliis mihi ab eo illatis, non causa mearum injuriarum dico: sed zelo Dei et ecclesiasticarum regularum, atque divinæ ordinationis, secundum paternas constitutiones: ne pro loci mei

officio damnari ex negligentia debeam; sed, sicut A
B. Gregorius in regula pastoralis demonstrat, eum-
dem zelum postmodum, inter me et illum, fortem
munitionem habeam, ne tunc ad vindictam sim de-
stitutus, si nunc in correctiones fuero dissolutus.
Nec non ut et de me veritas, et litterarum illius fal-
sitas, cunctis ejus accusationes et meas excusationes
legentibus liqueat. Et si fortassis idem frater Hinc-
marus ideo subscripsit, et subscribi ab ecclesiasticis
Ecclesiæ suæ ministris fecit, ut delatori, juxta foren-
ses leges, aut lingua capuletur, aut caput amputetur,
quatenus in me, quem suum delatorem postea scrip-
sit, hæc vindicta procederet: egit præpropere, et
contra ecclesiasticam disciplinam, ut antequam me
confessum, vel ordine regulari convictum videret:
judiciali me sententia, et illa maxime, quam non B
recepti censura ecclesiastica, condemnaret.

CAPUT XXV.

*Aliam nepotis calumniam de contemptu pontificiæ
excommunicationis dissipat avunculus.*

Aliam quoque rotulam nimis prolixam præterito
anno, Idibus Novembris, 4 indictionis, per Claren-
tium presbyterum suum direxit, in qua contra me
scriptum habetur. « Non mihi, inquit Hincmarus,
videtur dignum excellenti vestra fuisse, ut dicere-
tis Berthario quod mihi renuntiavit vos dixisse: Si eos
præsignatos meos excommunicassem homines, qui
talia agerent, et adhuc agunt, non eos excommuni-
catione teneri, videlicet anathematis vinculo non
ligari. Sed non est mirum, si parvitatibus mea excom-
municationem parvipenditis, ac forte irrationabilem
judicatis, quando apostolicæ sedis excommunicationem
et pro nihilo ducitis, et pro nihilo ducendam,
ut pote absurdam, judicatis. »

De qua calumnia mihi illata, quia S. Gregorius
in libro ex Regesto frequentissime dicit, secundum
leges et canones, causas investigari debere, et judi-
cia terminari, legantur leges et canones. Dicunt
enim antiquorum Patrum nostrorum regulæ (*concil.
Tolet. III, c. 9, q. Dignum est*): « Dignum est, ut
vita innocentis nulla maculetur pernicie accusatoris.
Ideo quisquis a quolibet criminetur, non ante accu-
satus supplicio detur, quam accusator præsentetur,
atque legum et canonum sententiæ exquirantur.
Quod si indigna ad accusandum persona invenitur,
ad ejus accusationem non admittatur. Et, quod si
episcopus aliquem de crimine putat esse damnandum,
accusatoris vice discutiendum se sciat. Fas est enim
ut, quæ uni probantur, probentur et omnibus. » Quos
canones si, ut solet ea quæ contra illum faciunt, re-
futare voluerit, audiat, quid hinc Leo papa ad Maxi-
mum Antiochenum episcopum dicat (*epist. 62*):
« Quidquid, inquit, propter [al., præter] specia-
les causas sydonalium conciliorum ad examen
episcopale defertur, potest aliquam dijudicandi
habere rationem, si nihil de eo est a sanctis Patribus
apud Nicæam diffinitum. Nam quod ab illorum regulis
et constitutionibus [al. constitutionisque] discordat,
apostolicæ sedis nunquam poterit obtinere [obtinere]

consensum. » Et Antiochena synodus (*can. 20*), per-
fectum illud esse concilium, ubi interfuerit metropo-
litanus antistes. Et Zosimus papa in epistola ad
universos episcopos per diversas provincias consti-
tutos, provincialem Gallicanorum episcoporum syn-
nodum approbat, dicens: « Lazarus, inquit, dudum
in Taurinensi concilio gravissimorum episcoporum
sententiis pro calumniatore damnatus, cum Briccii
innocentis episcopi vitam falsis objectionibus appe-
tisset. » Et Africæ provinciæ canones (*conc. Afr. c.
97, Cod. can. Eccl. Afric.*, can. 130): « Causæ, in-
quirit, quæ communes non sunt, in suis provinciis
judicentur. » Et Africanum concilium decrevit, ut
« quotiescunque clericis, cum quibus et episcopi
numerantur, ab accusatoribus multa crimina obji-
ciuntur, et unum ex ipsis, de quo prius egerit,
probare non valuerint, ad cætera non admittantur. »
Et sacræ leges dicunt, quia nemo convinci nisi
scriptura aut testibus potest. Et Gelasius in Com-
munitorio Fausto legatione fungenti dato, de epi-
scopis prævaricatoribus: « Quid tamen dicerent, si
non chartis suis in omnibus vincerentur? » Et Afri-
canum dicit concilium (*can. 131*): « Testes ad tes-
timonium non admittendos, qui nec ad accusationem
admitti præcepti sunt: vel etiam quos ipse accusator
de domo sua produxerit. » Et item sacræ leges di-
cunt: Unius testimonium, quamlibet splendida e-
idonea videatur esse persona, nullatenus audien-
dum.

Unde quia scriptura quam frater Hincmarus ca-
lumniatus est impræsentiarum habetur: aut produ-
cantur ab accusatore adversum me legales et regula-
res testes, vel scriptura, qua me de hac calumnia
qua dicit excommunicationem apostolicæ sedis e-
pro nihilo me ducere, et pro nihilo ducendam, ut
pote absurdam, prædicare. Quod si agi ab eo, vel
quoquam nequiverit: leges et regulæ de calumniatorum
sententiam proferent. Et venit frater Bertharius
diaconus, in præsentiam vestram, quem sibi Hinc-
marus renuntiasse dixit, me illi dixisse, quod
præsignatos suos homines excommunicasset, quæ
talia scilicet contra leges ecclesiasticas egerunt,
adhuc agunt, non eos excommunicatione teneri, vi-
delicet anathematis vinculo ligari. Et quia discretus
est ista Hincmari in scriptura sua sententia, quia
sua excommunicatione a me annullata ad Bertharium
D se reclamât (*lib. LV cap.*, c. 29), liceat mihi legaliter
ac regulariter in præsentia vestra configere eum
eodem Berthario.

CAPUT XXVI.

*Sensum suum catholicum de summa sedis apostolice
licet in solvendo ligandoque potestate publi-
profiteatur Hincmarus.*

De eo autem quod dicit idem Hincmarus: « S
non est mirum, si parvitatibus meæ excommunicationem
parvipenditis, ac forte irrationabilem judicatis
quando apostolicæ sedis excommunicationem et pro
nihilo ducendam, utpote absurdam, prædicatis
cum eo legaliter, ac regulariter est mihi, concilio

auxilio vestro agendum. Qualiter autem de apostoli-
cæ sedis, quæ est omnium Ecclesiarum in toto orbe
terrarum mater et magistra, et cujus pontifex, patri-
archa est patriarcharum, et primas primatum
cunctarum provinciarum, ligatione atque solutione
sentiam atque teneam, ut sciatis mandaciter hinc me
ab Hincario calumniatum; ut quamquam decernat
Africanum concilium, « ut quotiescunque clericis
ab accusatoribus multa crimina obijciuntur, et unum
ex ipsis, de quo prius egerit, probare non valuerint,
ad cætera jam non admittantur: » coram vobis expo-
no, sicut corde credo ad justitiam, et ore confiteor
ad salutem.

Et sicut ex doctrina beati Leonis, ejusdem sanctæ
et primæ sedis pontificis didici, qui in sermone sui
natalis (*serm.* 3), inter cætera dicit: « Quod dicitur
beatissimo Petro: Tibi dabo claves regni cælorum,
et quæcunque ligaveris super terram, erunt ligata
et in cælis, et quæcunque solveris super terram,
erunt soluta et in cælis; transivit quidem etiam in
alios apostolos jus istius potestatis, et in omnes Ec-
clesiæ principes decreti hujus constitutio com-
meavit: sed non frustra uni commendatur, quod omnibus
intimetur. Petro enim ideo hoc singulariter creditur,
quia cunctis Ecclesiæ rectoribus Petri forma propo-
nitur. » Manet ergo Petri privilegium, ubicunque
ex ipsius fertur æquitate iudicium: nec nimia est
vel severitas vel remissio, ubi nihil est ligatum,
nihil solutum, nisi quod B. Petrus aut ligarit, aut
solverit: qui regem cælorum ut Augustinus et cæteri
doctores exponunt, majore præ cæteris devotione
confessus est; merito præ cæteris ipse collatis cla-
vibus regni cælestis munere donatus est: ut constaret
omnibus, quia absque ea confessione ac fide
regnum cælorum nullus possit intrare. Claves au-
tem regni cælorum, ipsam discernendi scientiam,
potentiamque judicariæ potestatis nominat, qua dignos
recipere in regnum, indignos secludere debet a
regno. Unde Dominus manifeste subjunxit: *Et quod-*
cunque ligaveris super terram, erit ligatum et in
cælis (*Matth.* xvi).

Quæ solvendi ac ligandi potestas, quamvis soli
Petro data videatur a Domino; absque ulla tamen
dubietate noscendum est, quia et cæteris apostolis
datur, ipso teste, qui post passionis resurrectionisque
suæ triumphum apparens eis *insufflavit et dixit* om-
nibus: *Accipite Spiritum sanctum: quorum remise-*
ritis peccata, remittuntur eis; et quorum retinueritis
retenta sunt (*Joan.* xx). Nam sicut interrogatis ge-
neraliter omnibus, Petrus respondit unus pro omni-
bus; ita et quod Petro Dominus respondit, in Petro
omnibus respondit: Necnon etiam nunc in episcopis ac
presbyteris omni Ecclesiæ officium idem committitur,
ut videlicet agnitis peccantium causis, quoscunque
humiles ac vere penitentes respexerit, hos jam a
timore perpetuæ mortis miserans absolvat: quos
vero in peccatis quæ egerit persistere cognoverit,
illos per [*deest eam*] omnibus supplicii obligandos
insinuet. Unde alias Dominus, de correpto semel et

iterum, ac tertio, sed non penitente fratre, præce-
pit dicens: *Si autem Ecclesiam non audierit, sit tibi*
sicut ethnicus, et publicanus (*Matth.* xviii). Et ne
leve quisque putaret Ecclesiæ se judicio condemnari,
mox terribiliter adjunxit: « Amen dico vobis: Quæ-
cunque alligaveritis super terram, erunt ligata et in
cælo: et quæcunque solveritis super terram, erunt
soluta et in cælo (*Matth.* xviii). » Omni igitur ele-
ctorum Ecclesiæ, juxta modum culparum, vel peni-
tentia, ligandi ac solvendi datur auctoritas. Sed
idem beatus Petrus, qui Christum vera fide confes-
sus, vero est amore secutus, specialiter claves
regni cælorum, et primatum judicariæ potestatis,
et curam pascendarum ovium Domini ovilis accep-
pit; et in primatu illius successores ipsius in sede
ejus acceperunt: ut omnes per orbem credentes in-
telligant, quia quicumque ab unitate fidei, vel soci-
tatis illius quolibet modo semetipsos segregant, tales
nec vinculis peccatorum absolvi, nec januam pos-
sunt regni cælestis ingredi.

De qua obligatione vel solutione episcopali, quod
nobis apostolicæ sedis filiis ac discipulis, satis tre-
mendum, et cavendum, atque observandum est, S.
Gregorius in homilia Evangelii dicit: « Sæpe in
ligandis ac solvendis subditis pastor suæ voluntatis
motus, non autem causarum merita sequitur. Unde
fit, ut ipsa hac ligandi et solvendi potestate se pri-
vet, qui hanc pro suis voluntatibus, et non pro sub-
jectorum moribus exercet. Unde recte per prophetam
dicitur: *Mortificabant animas, quæ non moriuntur:*
et vivificabant animas, quæ non vivunt (*Ezech.* xiii). »
C Non morientem quippe mortificat, qui justum dam-
nat; et non victurum vivificare nititur, qui reum
supplicio absolvere conatur: ac sæpe agitur, ut vel
damnet immeritos, vel alios ipse ligatos solvat.
Causæ ergo pensandæ sunt, et tunc ligandi atque
solvendi potestas exercenda.

Cæterum sicut B. Augustinus, et cæteri catholici
doctores dicunt, non sunt ligamenta vel solutiones
sanctæ Ecclesiæ, quæ contra sanctam Ecclesiam
fiunt; vel ab his fiunt, qui contra dogmata catholicæ
Ecclesiæ sentientes, contraria ipsi Ecclesiæ ligant,
vel solvunt. Sancta quippe Ecclesia dicit: *Non sedi*
cum concilio vanitatis, et cum iniqua gerentibus non
introibo. Ovidi Ecclesiam malignantium, et cum im-
piis non sededo. Lavabo inter innocentes manus meas
D (*Psal.* xxv). In cujus solius catholicæ Ecclesiæ uni-
tate, quæ per hæreses et schismata non est divisa, ut
vera sunt sacramenta, ita vera sunt ligamenta atque
solutiones; quæ ædificata est super petram: quæ
unica columba appellatur: quæ sponsa pulchra sine
macula et ruga: et hortus conclusus, fons signatus,
puteus aquæ vivæ, paradus cum fructu pomorum,
locus penes Deum in quo solide statur, et locus auro in
quo confletur; et domus Dei quæ claves regni cælo-
rum accepit, ac potestatem ligandi et solvendi. Hanc
domum si quis corripientem corripientemque contem-
pserit, præcipitur a Domino *ut sit sicut ethnicus et*
publicanus (*Matth.* xviii).

Ita de ligatione et solutione sanctæ catholicæ A Ecclesiæ, et apostolicæ sedis pontificis, sed et subjectorum sibi episcoporum ex ejusdem apostolicæ sedis doctrina credendum, et tenendum, atque sequendum accepi : et ita credo, teneo, et sequor. Et qui aliter de me dixit atque dixerit, ostendet se esse malivolum, et me probare non poterit non esse catholicum : se autem comprobabit mendacem criminatorem, et non criminis esse me reum. Quæ autem mihi discenda sunt, et libenter et obedienter ab illius summæ sedis catholica doctrina paratus sum discere, tenere, et loqui ; quæ in primatu B. Petri, cui Dominus trina repetitione pascendas suas oves commisit (Joan. XXI), et ut confirmaret fratres suos præcepit (Luc. XXII), privilegium primatus omnium Ecclesiarum in toto orbe terrarum accepit.

CAPUT XXVII.

Quod plura falso narrat de litteris apostolicis secum non communicatis.

Isdem etiam frater noster Hincmarus, mihi litteris suis impexit noxam non levem : si verum diceret, me commisisse contra eandem sanctam et apostolicam sedem, dicens : « Vocastis me litteris vestræ auctoritatis Attiniacum ad synodum, intimantes quia litteræ domni apostolici domno regi Carolo, et regni ipsius episcopis directæ fuerunt, de quibus sine synodali consulto responderi non poterat. Quamvis has litteras in Gundulfi villa (Houdilcourt) suscepissetis, ubi et præsens adfui : quas mihi ibidem nullatenus ostendistis. Cum autem Attiniacum veni, dedistis mihi quasi exemplar earumdem, legere me rogantes, et sic statim inde me respondere, et ut perlegens idipsum exemplar vobis protinus redderem, præcepistis. Sicut autem postea per aliud dedici exemplar, plura indiculo vestro mihi ostenso defuerunt. »

Quæ dicta illius non sunt vera. Nam ipsa die quando missi domni apostolici, in Gundulfi villa ejus epistolas in præsentia regis et episcoporum, et cæterorum fidelium qui ibi aderant, mihi dederunt : sicut et domnus rex scit, et episcopi, ac cæteri in quorum præsentia epistolas illas accepi, antequam de ipsa domo exirem, audiente rege, et audientibus episcopis, et cæteris qui ibidem fuerunt, eas relegi. Et si Hincmarus ibi fuit, et audire eas voluit, sicut et cæteri eas audierunt, audire modis omnibus potuit. Quod dicit, quoniam quasi exemplar earumdem, quando Attiniacum venit, illi dedi, et legere rogavi, et sic statim respondere, non dicit verum. Exemplar secundum tenorem authenticum epistolæ illi ad legendum dedi, sicut et Erardo [Turonensi], et Waniloni [Rothomagensi], et Vulfado [Bituricensi], et cæteris archiepiscopis domni Caroli ex integro misi, et eandem epistolam in synodo apud Attiniacum relegi. Quod dicit, me jussisse illum ut statim responderet : non sic dixi : sed ut legeret illud exemplar, et videret quid inde responderet. Quod dicit, quia per aliud exemplar didicit plura in indiculo meo sibi ostensa defuisse : integrum exemplar

epistolæ illi legendum dedi. In indiculo autem a me collecto, et regibus, et episcopis relecto et dato, quantum de ipsa epistola, sed et de illa quam dominus apostolicus misit (*nihil istorum exstat*), necessarium admittendum vidi, misi, et exemplar ipsius indiculi domno apostolico ex epistola mea direxi. Et ipsam epistolam domni apostolici, sed et memoratum indiculum, sed et scripta ipsius fratris Hincmari, hic habeo : quibus probari potest me verum dicere, et illum a vero deviare.

CAPUT XXVIII.

Quod vane gloriatur, excommunicationem a se factam a sede apostolica probatum iri.

Scribit etiam in rotula quam per Clarentium presbyterum suum mihi transmisit hoc modo : « Tam B tentative in Attiniaco de excommunicatione a me in parochia mea facta interrogatus sum. Tantummodo hoc interea pando, eo quod vos inauditam illam, ac contra apostolicam doctrinam, et contra ecclesiasticam veritatem fuisse asseratis factam. Non aliam illam feci, quam a vestra vivæ vocis doctrina faciendam didici, et vos ea quæ jure destruxistis, ab re ædificare non debetis. Imo et quam in Romana sede apostolica auctoritate cognovi præinditam, et de qua eandem mihi sedem declamo fore auctricem : ejus interest et de illa a me facta excommunicatione judicare, et de vestra resolutione decernere. »

Ad quæ rescribo. Majores ad doctores nostri dixerunt, quædam esse nomina, quæ in femininum flecti non possunt, ut auctor, cursor. Et iste novus doctor, qui noviter adinvenit quod diceret de ipsa excommunicatione, apostolicam sedem se reclamat fore auctricem. Sed me auctorem non habebit, se eo quod super me dicit, « quia non aliam illam excommunicationem parochia sua fecit, quam a mea vivæ vocis doctrina faciendam didicit. » Et quod mox subsequitur : « Quoniam ea quæ jure destruxi, ab re ædificare non debeo, » verum esse confirmo. Nam per evangelicam veritatem, et apostolicam atque canonicam auctoritatem ; necnon et per apostolicæ sedis doctrinam atque decreta, suam perniciosam excommunicationem destruxi : quam ab re ædificare non debeo, nec volo, nec valeo.

In eo vero quod dicit, quia non aliam illam excommunicationem fecit, « quam in Romana sede apostolica auctoritate cognovit præinditam, » id est ante insertam, ante impositam, ante immisam : nimis audacter posuit in cælum os suum. Et ideo non est mirum si lingua ejus transivit in terram, ut de me peccatore diceret : « Non aliam illam feci, quam a vestra vivæ vocis doctrina faciendam didici. » Sed sicut apostolica sedes a nobis accusari non debet, nec valet : ita excusatione nostræ humilitatis non indiget. Verumtamen quod non ab incertis relictis inde audivimus, cum venia ipsius sedis libere dicere possumus. Audivimus namque, quia sanctæ memoriæ Nicolaus papa, sancta Romana Ecclesia in afflictione posita, auctoritate Veteris et Novi Testa-

menti, in jejunio, et fletu, ac planctu, in cinere et A
 cilicio litanias indixerit. Sed a nullo audivimus,
 quia causa suarum injuriarum et ipsius sedis apo-
 stolicae, parvulos in discrimine mortis positos bapti-
 zari, et obeuntibus atque petentibus ultimam poen-
 itentiam, et viatici muneris communionem, et mor-
 nis sepulturam negari praeceperit. Et quod illa
 excommunicatione perniciosa quam fecit, eandem
 sibi sedem fore, sermone vitioso, atque calumnioso
 dicit auctricem, non credimus. Absit enim ut, sicut
 hic frater Hincmarus in pernicioso scripto suo im-
 proprie dicens declamat, suae colligationibus impie-
 tatis apostolica sedes consentiat; minime autem au-
 ctrix existat. Quae per B. Coelestinum universo mun-
 do apostolice intonat: « Obsecrationum, inquit,
 sacerdotalium sacramenta respiciamus, quae ab apo-
 stolis tradita, et in toto mundo, atque in omni ca-
 tholica Ecclesia uniformiter celebrantur: ut legem
 credendi, lex statuatur supplicandi. Cum enim sancta-
 rum plebium praesules mandata sibimet legatione
 funguntur, apud divinam clementiam humani gene-
 ris agunt causam; et tota secum Ecclesia congemis-
 cente postulant et precantur, ut infidelibus donetur
 fides. « Et sic pro omnibus exorare Dominum catho-
 licam Ecclesiam debere demonstrat, ut erutos de
 potestate tenebrarum transferat in regnum filii cha-
 ritatis suae (Col. 1): et ex vasis irae, faciat vasa mi-
 sericordiae (Rom. 9): qui non vult mortem peccatoris,
 sed ut convertatur et vivat (Ezech. xxxiii): et
 qui vult omnes homines salvos fieri, et in agnitionem
 veritatis venire; et neminem vult perire (II Tim. 2).
 Absit, inquam, ut auctor sit sancta sedes apostolica
 istius pertinacis crudelitatis tantorum hominum,
 qui per baptismum, vel per sacerdotalis ministerii
 reconciliationem salvari, et per viatici muneris
 communionem ab aeterno poterant liberari interitu
 mortibus reo (aliquid deest); quia non poterat fieri
 ut in tam ampla parochia, sicut illa est, quae specia-
 liter subjacet Lauduni municipio, per quinque cir-
 citer dies, quibus eo modo, sicut praemisi, fuerat
 colligata, quia eam antea metropolitana sollicitudine,
 evangelica, et apostolica, atque canonica, et aposto-
 licae sedis auctoritate absolvere non cucurri, plures
 sine baptismo, et absque communionis gratia, non
 obierint: de quibus quicumque salvati sunt, salvantis
 est donum; qui autem perierunt, perditoris et
 perevniitum fuit meritum.

Attamen licet, velut sanctus Ambrosius in fidei
 devotione Valentini (lib. de obitu Valentini.), et
 beatus Augustinus disputando demonstrat, ut sicut
 in illo latrone cum Domino crucifixo et credente, et
 confitente, quod ei ex baptismi sacramento defuerat,
 complevit omnipotentis benignitas: ita forte parvulis
 quibus baptismum denegari jussit, parentum vel
 patronorum corde credentium, et etiam parvulis
 fidei confessionis verbo baptismum expetentium, sed
 non impetrantium fides, et fidelis postulatio prodesse
 potuerit: donante eo, cujus spiritus, quo regeneratio
 fit, ubi vult spirat; et etiam ante baptismum se

baptizandis infudit, sicut in sacra historia legitur.
 Similiter et de his qui ultimam poenitentiam, et viatici
 muneris communionem petierunt, et impetrare
 pro sua interdictione non potuerunt, gratia ejus,
 cui ab omni fidei dicitur: *Gemitus meus a te non est
 absconditus* (Psal. xxxvii): et quibus singulis Domi-
 nus dicit: Mox ut ingemueris, salvus eris, ad salu-
 tem prodesse valuerit. Ipse tamen de eorum perdi-
 tione securus esse non potest, si aliqui sine eisdem
 sacramentis per suam jussionem abierunt, ut non
 districte inde judicetur.

Et si vult dicere de excommunicatione Nortman-
 ni, quam mendaciter per subreptionem a sede apo-
 stolica elicit, suggerens Nortmannum res suae ec-
 clesiae invasisse, quas ipse aut regi, aut Nortmanno
 beneficiandas concessit, aut filio Nortmanni benefi-
 ciavit, sicut scripta sua demonstrant: responden-
 dum ab eadem sancta et discretissima sede credi-
 mus: *Fiat tibi secundum fidem tuam* (Matth. ix).
 Et: *Ex verbis tuis condemnaberis* (Matth. xii). Et
 quod B. Augustinus in serm. 7 Evangelii Joannis
 dicit: « Juris, inquit, forensis est, ut qui in pre-
 cibus mentitus fuerit, non illi prosit quod impetra-
 vit. Dixisti enim quod voluisti: et cui dixisti, nesci-
 vit an verum sit. Dimisit te adversario tuo convin-
 cendum, ut si ante judicem convictus fueris de
 mendacio, quia non potuit ille nisi praestare, nesciens
 an fueris mentitus, ibi careas beneficio rescripti,
 quo perduxisti rescriptum. » Et hoc jus in corpore
 libri Theodosianae legis haberi legimus. Caeterum,
 sicut de Deo omnipotente, cum omnia possit, scilicet
 quae omnipotentiae illius conveniunt, recte dicit Apo-
 stolus: *Seipsum negare non potest* (II Tim. ii): ita
 et nos de illa sancta sede dicimus, quia sibi ipsi,
 praesertim in tam manifestissimis et maximis causis,
 et humanae redemptionis atque salutis singularibus
 praesidiis, contraria nullo modo esse potest: et quae
 secundum evangelicam veritatem, et apostolicam
 traditionem, atque canonicam auctoritatem, per Si-
 ricium, Innocentium, Coelestinum, Leonem irrefra-
 gabiliter constituit, refragari a quoquam impune
 nulla ratione dimittet. Cujus interest, sicut isdem
 frater Hincmarus scribit, « de illa a se facta excom-
 municatione judicare, et de mea resolutione decer-
 nere. »

Verumtamen, sicut ex concilii Sardicensis ca-
 nonibus SS. Innocentius, Bonifacius, et Leo promul-
 gaverunt, prius majores causas, quae ad statu-
 tum Ecclesiarum, et ad concordiam pertinent sacer-
 dotum, apud nos, sub timore Domini, convenit ven-
 tilari; et de componendis, quae forte nostro nequiver-
 rint sopiri iudicio; et de iudicio nostro compositis
 post iudicium oportet ad sedem apostolicam plenam
 rationem transmitti: ut ea quae juxta ecclesiasticum
 morem juste et rationabiliter apud nos fuerint diffi-
 nita, ipsius apostolicae sedis sententia roborentur.
 Sic enim et sanctus Ambrosius scribens ad Theophi-
 lum Alexandrinum episcopum, sacras leges, et ca-
 nones, ut post iudicium ad sedem apostolicam relatio

referatur, et qui legaliter evocatus, iudicio adesse negligenter, dilationem sententiæ proferendæ, sicut in contumaciam, de absentia non lucretur, se intellexisse demonstrat, dicens : « Cum sancta synodus cognitionis jus unanimitati tuæ, cæterisque ex Ægypto consacerdotibus nostris commiserit, iterum oportet fratrem nostrum Flavianum convenias, ut si in eo perseveraverit, quo veniendum non putet, salvus concilii Nicæni, etiam synodi Capuensis status, illibata pace universorum ita consulas, ut non videamur destruere quod ædificatum est. Si enim quod ædificavi destruo, prævaricatorem me ipse constituo; ac si quæ destruxi, iterum ædificem. Servetur ergo impertitæ pacis gratia inter universos, et nihilominus declinatio partis alterius frustrandi effectum habere non possit. Sane referendum arbitramur ad sanctum fratrem nostrum Romanæ sacerdotem Ecclesiæ; quoniam præsumimus ea te iudicatum, quæ etiam illi displicere non queant. Ita enim utile erit consultum sententiæ, ita pacis et quietis securitas, si id vestro statuatur consilio, quod communioni nostræ dissensionem non afferat; ut nos quoque accepta vestrorum serie statutorum, cum id gestum esse cognoverimus, quod Ecclesia Romana haud dubie comprobaverit, læti fructum huiusmodi examinis adipiscamur. »

CAPUT XXIX.

Quod similem excommunicationem ab ipso Rhemensi factam esse falso criminatur.

De hac etiam excommunicatione mihi in Gundulfi villa per venerabilem quondam archiepiscopum Wenilonem mihi mandavit sicut domnus Adventius, et cæteri qui adfuerunt episcopi, sciunt, quia quod de illa excommunicatione fecit, ego illi insinuavi, dicens se habere quamdam villam in mea parochia, et quia homines ejusdem villæ rogavit, ad illam ecclesiam dare illorum decimam, ad quam eam dare debebant, excommunicaverim illos: et habebat imbreviatos, quot infantes sine baptismo, et quot homines sine communione inde obierint: quæ mihi in publicum objicere nollet, et postea illi improperarem. Quod si alia mala de me sciret, illa etiam diceret. Unde illi statim per eundem Wenilonem remandavi, quia et inde, et de quibuscunque vellet, quæ illi viderentur, objiceret. Sed de hac causa verum non diceret, et contra canones se confitebatur egisse, qui me postposito ordinationem decimæ in mea parochia usurpavit.

Et postea inde illi scripto respondi, cujus exemplar hic habeo: in quo continetur, tria me considerasse in hoc quod dixit, me illi insinuasse quod de illa excommunicatione fecit. Primum quidem, quoniam si ratio inter illum et clericos Laudunensis Ecclesiæ agitanda foret, de petitione ex causis in eo continentibus ab eisdem mihi porrecta, utrum esset an non veritate subnixâ, nullam quæstionem deberet recipere, postquam suæ confessionis attestazione firmatur. Aliud vero, quia silentio suppressis bonis quæ illi insinuavi, atque insinuari feci, imputando

mihi quod male illi de hac excommunicatione quam perpetravit, insinuaverim, reum se confessus est, quia scienter male fecit. Ac per hoc, secundum decreta Hilari papæ, suum contra regulas factum deberet ipse dissolvere. Quod si nollet, per sententias canonum, et apostolicæ sedis decreta, quæ nulla possunt ratione convelli, auctoritas metropolitana illud deberet annihilare. Tertium, quia ut secum me posset illaqueare, si forte, ut assolet improvisæ menti accidere, illi statim hæc falsa de me rejiciendo imparatus et iracommotus non responderem, et se jactare valeret, me in aliquo inde concredidisse; voluntarie sibi de tali confessione laqueum studuit injicere. Et pro bonis mala retribuens, non ut quondam proditorum primicerius simulando pacem osculo, quam non habebat in pectore, sed exerto linguæ gladio me aperte, ac impudenter decrevit impetere: et quasi me qualicumque patrono, ac benefactore, atque ordinatore suo tradito, talis confessionis de tantis impietatibus laqueo se suspendere. Sed benedictus Dominus, qui secundum promissionem suam, qua dixit: *A flagello linguæ absconderis (Job v)*, liberando animam meam a labiis iniquis, et a lingua dolosa, adjuvit me, et consolatus est me: mox telum falsitatis, scuto veritatis, respondendo rejeci.

Quæ animi dolore compunctus, non animi livore stimulatus, dixi, sciens capiti ac Salvatore nostro mendaciter multa fuisse objecta: sed et productos adversus eum falsos testes fuisse. Nam et Romanæ sedis pontificibus Damaso, Sixto et Leoni III, verum et aliarum insignium Ecclesiarum pontificibus, Athanasio scilicet Alexandrino, Joanni Constantinopolitano, Cæciliano Carthaginensi, sanctitate fidei et operationis atque scientiæ doctrinæ præclaris: necnon et quamplurimis aliis venerandis episcopis, ab hominibus invidis, et eorum locum, ac bonæ opinionis famam obtinere volentibus; sed non habere meritum illorum studentibus, mortalia et nefaria crimina falso impacta, et usque ad ecclesiastica iudicia, et cognitionem publicam fuisse perducta legitimus. Sunt enim huiusmodi vipereæ nequitie homines, qui licet prius eorum mentes propria rodât invidia, in hoc tamen suas tegere posse iniquitates putant, si alios infamia modo quolibet maculare curaverint: quorum eriminationes iidem viri sancti patientissime toleraverunt, et constantissime, adjuvante Domino, revicerunt. Et horum, sicut scriptum est, intuens exitum, conversationis fidem mihi necesse est imitari: et ita compertus, et de illo in me prorsus alaxpertus, quia phreneticus sæpe nulli majorem alaxam dare solet, quam ipsi medico, qui eum curare volet. Sed et multum me miratum scripsi illi, ubi sensum suum habuit, quando de me, tantæ auctoritatis, et sapientiæ, atque religionis viro, sicut domnus erat Wenilo, dixit, et ad plurimorum episcoporum notitiam pervenire fecit, quod si in iudicio regulari dixisset, probare non posset: præsertim se reum de hoc ipso confessus, et confitendo se talia

egisse, quæ etsi non confiteretur perpetrasse, negare non posset, se ipsum illaqueasse videre non potuit. Et quia mendacium erat quod dixit, me excommunicasse homines villæ de ipsa rusticana parochia, et infantes sine baptismate, et homines sine communione in ea excommunicatione inde obiisse; mox illi remandavi, quoniam nulli unquam in mea parochia, postquam fui ordinatus episcopus, baptismum, vel viatici muneris communicio, a me, vel a quoquam comministro meo denegata fuere: sicut omnes in parochia mea tam ecclesiastici quam et sæculares, tam viri quam et feminae sciunt.

CAPUT XXX.

Quod postulavit ut avunculus sua adversus ipsum scripta igni absumeret. Iterum de superiore calumnia, propter quam non debet ad accusationem admitti.

(Lib. LV cap., c. 4.) Mandavit etiam mihi per præfatum venerabilem quondam archiepiscopum Wenilonem, ut si scripta quæ illi et ecclesiæ sibi commissæ, de excommunicatione qua agitur ab eo intentata suæ parochiæ, transmisi, quæque ibi secum habebat, coram aliis incenderem, et annullanda dicerem, meque contra rationem et auctoritatem fecisse profiterer, mecum pacem habere vellet. Unde illi pro tempore, cum aliis quæ mihi occurrerunt, per eundem archiepiscopum, et Adventium gloriosum episcopum remandavi. Et postea illa ipsa, et alia, scriptis, quorum hic habeo exemplaria, inculcavi, quoniam in quocunque conventu me adire, mihi que pacis osculum, sicut et dominus rex, et episcopi ac cæteri illustres, ac mediocres qui conveniebant, dare volebat, nec etiam ullo verbo me alloqui dignabatur, de quibus hic quædam studui replicare. Scripsi nempe inter cætera illi, quomodo ei in sensum suum venire potuerit, ut talia mihi mandaret? (*Epistola hæc non exstat.*) Nam diabolus loquens ad primos parentes nostros, sed et ad Redemptorem ac Salvatorem nostrum, non ex dejectione, sed ex propectu, et ex sublimitatis avaritia eos tentavit. Isdem autem supergressus, sic dici fas est, diaboli malignitatem, oblitus scriptum esse, quod *Malignitates exterminabuntur (Psal. xxxvi)*, me stultissime ex dejectione tentavit: sciens quia quæ illi, et ecclesiæ sibi commissæ in eisdem scriptis direxi, de evangelica veritate, et apostolica atque prophetica, necnon et canonica auctoritate, sed et de apostolicæ sedis constitutione, sicut acceperat eadem sancta sedes, beatissimorum apostolorum traditione constaret esse conscripta. Et sanctorum Scripturarum traditores et incensores inter sacrilegos legitimus computatos. Si ergo illa quæ de Evangelio, et apostolis, atque prophetis, necnon et de sacris regulis spiritu Dei conditis, sine admistione alicujus hæreseos, vel schismatis, conscripsi, videlicet mensuram tritici a comburendis paleis et zizania puri, revera de horreo Dominico in tempore illi ac ecclesiæ sibi commissæ, et sollicitudine meæ subjectæ prolata incenderem, et vera negarem: sine dubio Christum

A qui in eis prænuntiatus et ostensus est, et per quæ Christum cognovimus, quique illa locutus est, me nosse, et in eum credere, ac per hoc me Christianum negarem. Et si sacros canones, et decreta catholicæ Ecclesiæ incenderem et abdicarem: me procul dubio ab episcopatu non solum ipse dejicerem, verum et ab Ecclesia catholica divisum, et alienum, id est schismaticum et anathematizatum, publicis et ecclesiasticis legibus efficerem. Sicut sanctus Leo papa scribens ad Leonem Augustum etiam de se dicit (*epist. 78*): « Si secundum Apostolum, inquit, quæ destruxi, hæc ædifico, prævaricatorem me constituo, et eis me conditionum ultionibus subdo, quas non solum auctoritas beatæ memoriæ principis Marciani, sed etiam ego mea consensione firmavi. »

B Quapropter etsi me infirmum ac fragilem, atque imbecille, ut revera sum, adeo æstimavit, ut minis vel promissionum blanditiis ad hæc agenda trahi, vel invitari valerem non tamen episcopus dubitare debuerat verum esse, quod ab eo qui perficit in infirmitate virtutem, ore veridico promittitur: *Dominus, inquit, dabit virtutem multam evangelizantibus verbum (Psal. lxxvii)*: et episcopus mihi qualicumque episcopo mortiferum ad bibendum non debuerat propinare; scilicet, ut eloquia sacra, gratia sui incenderem. Et licet hinc me Deus gratia sua servaverit, qui in se credentibus repromisit, dicens: *Et si mortiferum quid biberint, non eis nocet ut (Marc xvi)*. » Dum pestiferas, inquit B. Gregorius (*homil. 29 in Evang.*), suasiones audiunt, et tamen ad operationem pravam minime pertrahuntur, mortiferum quidem est quod bibunt; sed non eis nocet. » Ipse tamen nisi pœniterit ex hac perniciosissima suasione studii sui luet iudicium. « Tardius, inquit B. Gregorius (*Pastor. I. III, admon. 33*), peccatum solvitur, quod et per consilium solidatur. Nisi enim mens omnimodo æterna despiceret, in culpa ex iudicio non periret. »

C Et quia dicit Apostolus: *Avaritia, quæ est idolorum servitus (Col. III)*: et B. Gregorius, ex propectu avaritiæ primos parentes nostros tentatos et superatos demonstrat, ostendens avaritiam, non solum pecuniæ, sed etiam altitudinis esse; et quia recte avaritia dicitur, cum super modum sublimitas ambitur: scripsi ei ex verbis beati Augustini de Scripturæ sacræ auctoritate dicentis, contra Donatistas schismaticos, qui se sine causa a compage unitatis catholicæ separaverunt, dicentes quod probare non potuerunt, Cæcilianum a traditoribus sacrarum Scripturarum fuisse ordinatum; ut cognosceret quam grave peccatum sit idololatria, quod ex ambitu altitudinis admisisse videtur, dum nulli subjectus esse velit, qui cunctis præesse non valet. Et quia gravior est peccatum incensio divinarum eloquiorum, ad quod me traducere voluit: et quoniam gravissimum sit peccatum schisma, quo se a fraterna nostra unanimitate per suam perniciosam subscriptionem separavit: sicut scripto ostendi in libello suo monstruoso a se, et a clericis parochiæ suæ subscripto:

ubi quibusdam subscriptis quæ evangelicæ veritati, et apostolicæ auctoritati, et decretis sanctorum conciliorum, quæ universalis Ecclesiæ probavit assensus, et apostolicæ sedis confirmavit auctoritas, inveniuntur adversa. Ait enim beatus Augustinus loquens ad Donatistas de his tribus capitulis (August., I. II de Bapt., c. 6) : Non afferamus, inquit, stateram dolosam, ubi appendamus quod volumus, et quomodo volumus, pro arbitrio nostro dicentes, hoc grave, hoc leve est; sed afferamus divinam stateram de Scripturis sanctis, tanquam de thesauris divinis, et in illa quid sit gravius, appendamus: imo non appendamus, sed a Domino appendente recognoscamus. Tempore illo, quo Dominus priora delicta recentibus pœnarum exemplis cavenda monstravit, et idolum fabricatum, atque adoratum est, et propheticus liber ira regis contemptoris incensus (Jer. xxxvi), et schisma attentatum, idololatria gladio punita est; exustio libri, bellica cæde et peregrina captivitate; schisma, hiatu terræ sepultis auctoribus vivis, et cæteris cœlesti igne consumptis: quis jam dubitaverit hoc esse sceleratius commissum, quod est gravius vindicatum?

Sed quia illi non sufficit me calumniari, quod tam nefariam et exitabilem excommunicationem illi agendam exemplo docuerim, nisi etiam nunc me scripto calumniaretur, non aliam illam excommunicationem se fecisse, quam a mea vivæ vocis doctrina faciendam didicerit: respondendum mihi contra mendacem illius calumniationem ex sacris auctoritatibus necessarium video; ne quasi tacendo consentiens, reus pariter cum illo dijudicer. Sicut in petitione, quam clerici Laudunensis Ecclesiæ mihi dederunt, continetur, et sicut in synodo eorum illi apud Attiniacum habita demonstravi, omnes sacerdotes totius parochiæ suæ colligavit, ut nemo eorum in ea sacerdotali ministerio tandiu uteretur, usquedum ille ipse iterum cum eis viva voce loqueretur, aut litteræ a sede B. Petri apostoli eis mitterentur: et ne baptizarent pueros, ne visitarent infirmos, ne reconciliarent cum viatico munere pœnitentiam petentes, ne sepelirent mortuos, penitus ab his omnes eos prohibuit. Et in sua rotula mihi scripsit, non aliam illam fecisse, quam a mea vivæ vocis doctrina faciendam didicit. Quod mendacium esse profiteor. Et quia manifestum est, eum illas colligationes impietatis admisisse: quæ si crimina esse possunt, sicut S. Gregorius esse ostendit, criminaliter illas admisit: ostendendum et ex sacris auctoritatibus si criminosus alium criminari, et reum criminis facere possit. Sacræ quippe leges, quas Ecclesia catholica recipit, dicunt, quia jure et legibus constitutum est (Jul. *epist.* II, c. 28), ut « spontanea professione reus, reum non faciat, neque illi de altero credatur, qui se criminosum esse confessus est. » Et item: « Non credendum est contra alios eorum confessioni (3, q. 5, c. *Accusatores*), qui in criminibus accusantur, nisi se prius probaverint innocentes: quia periculosa est, et

admitti non debet rei adversus quemcunque professio. » Et sacri canones dicunt (*conc. Afric.* cap. 130), ut « ad accusationem non admittantur, quos ad accusanda publica crimina leges publicæ non admittunt. » Et quotiescunque clericis ab accusatoribus multa crimina objiciuntur, et unum ex ipsis de quo prius egerint, probare non valuerint, ad cætera non admittantur. Et item sacræ leges Theodosianæ dicunt (2, q. 7, c. *Si quis episcopus*): « Si episcopus, vel presbyter, diaconus, et quicumque inferioris loci Christianæ legis ministri, apud episcopos, siquidem alibi non oportet, a qualibet persona fuerint accusati, sive ille sublimis vir honoris, sive ullius alterius dignitatis qui hoc genus illaudabilis intentionis arripuerit, noverit docenda documentis se debere inferre. Si quis ergo contra hujusmodi personas non probanda detulerit, auctoritate hujus sanctionis intelligat se jacturæ famæ propriæ subjacere: ut damno pudoris, existimationisque dispendio discat sibi alienæ verecundiæ impune insidiari, saltem dicere non licere. » Et Africanum dicit concilium (*conc. Afr.*, cap. 129): « Omnes infamiæ maculis aspersos ad accusationem non admitti, nisi in causis propriis. » Et de episcopo qui Donatistis se communicasse mentitus fuerat, idem decrevit concilium (*ibid.*, c. 124): ut « si probatum fuerit eum de communione illorum fuisse mentitum, dicendo eis se communicasse, quos eo sciente non communicasse constiterit, etiam episcopatum amittat. »

Unde vestra fraternitas inter me et illum discernat, atque decernat, ut si ego, licet mendaciter me talia illum docuisse vel hortatum fuisse, sicut ipse dicit, confiterer, reus criminis episcopatum deberem amittere: quid ille mereatur qui mendaciter me calumniatur, non solum participem, verum et auctorem in his suis impiis excommunicationibus esse. Unde etiam antiquorum Patrum canones sanxerunt, scribentes ad episcopos per Gallias et quascunque provincias constitutos, hoc modo: « Nec illud, fratres, scribere alienum ab Ecclesiæ utilitate censuimus, ut sciretis, quicumque sub ordinatione vel diaconatus, vel presbyterii, vel episcopatus mortali crimine dixerint se esse pollutos, a supradictis ordinationibus submovendos: reos scilicet vel veri confessione, vel mendacio falsitatis. Neque enim obsolvi potest, qui in seipso dixerit mortis causam, quæ dicta in alium puniretur; cum omnis qui sibi fuerit mortis causa, major homicida sit. » Quod enim in hac sententia canonum dicitur: « Quicumque sub ordinatione vel diaconatus, vel presbyterii, vel episcopatus, mortali crimine dixerint se esse pollutos a supradictis ordinationibus submovendos, » nemo sanum sapiens hæc de sola luxuria, et immunditia, vel pollutione carnis dictum intelligit, cum scriptum sit: *Dispersit superbos mente cordis sui* (Luc. 1). *Deus qui superbis resistit* (I Petr. v). Et in Evangelio dicit: *Quæ de corde exeunt, hæc coinquant hominem* (Matth. xv). Et S. Gregorius dicit,

quia « per humilitatis custodiam servanda semper est munditia castitatis, » Et item dicit, quia « aliquando minus est in corporis corruptionem cadere quam in cogitatione tacita ex deliberata elatione peccare. Neque enim rex Babylonæ tum reus de elatione exstitit, cum ad elationis verba pervenit. Quippe qui ore prophetico et ante, cum ab elatione tacuit, sententiam exprobatōnis audivit. Nam districtus iudex prius invisibiliter vidit, quod post publice feriendo, reprehendit. Unde et in irrationabile hunc animal vertit, ab humana societate separavit, agri bestiis mutata mente conjunxit (Dan. iv), ut districto videlicet, justoque iudicio homo quoque esse perderet, qui magnum se ultra homines æstimasset. » Et item Scriptura dicit : *Initium omnis peccati superbia (Eccli. x)*; quæ mater est inobedientiæ, et regina omnium vitiōrum, qua de cælo cecidit archangelus, et factus est diabolus, *qui est rex super universos filios superbiæ (Job xli)*. Mortale igitur peccatum esse superbiā, nemo qui nesciat. Sed et inobedientiā, propter quam homo est eiectus de paradiso, et de qua hic frater arguitur, omnes mortale peccatum novimus. De qua etiam Scriptura dicit : *Quasi peccatum hariolandi est repugnare; et quasi scelus idololatriæ, nolle acquiescere (Reg. xv)*. Unde S. Gregorius : « Sola est, inquit, qua fidei meritum possidet obedientia, sine qua quisque infidelis convincitur, etsi fidelis esse videatur. »

CAPUT XXXI.

Quod excommunicationem a se factam frustra excusare conatur.

Et frater Hinemarus, excommunicationem, de qua agit, se egisse in suis rotulis confitetur. Quam mortalem fuisse, et in plurimorum perditionem, in nullius autem salvationem a se absque ulla discretione intentatam denegare non potest. De qua satis egit, ut se valeret contegere tam de apostolicæ sedis calumnia, dicendo ab eadem sancta sede illam excommunicationem præinditam, et sibi fore auctricem : quam et dicendo super me falsa : quasi ego illi et exemplo faciendam ostenderim, et verbo agendam docuerim; quatenus exitiabiliter egisse a me non posset redargui. Sed quo fructu, ac cujus mercedis intuitu illam fecerit, in rotula per Clarentium mihi directe manifeste denudat, dicens, ad excusandas excusationes in peccatis, ut impleat peccata sua semper. « Docet quidem papa Alexander in fine suæ epistolæ, quod non tantum attendenda sunt quæ fiunt, quantum quo animo fiunt. Nempe cum hoc examissim tam in vobis, quam in me fuerit perscrutatum, patebit illico inde æquitatis emolumentum. » Et quæ sequuntur usque ad hanc sententiam : « Quod non me, pro me dicere reamini, quasi propria instigatum injuria. Quia, Deo teste, pro cavendo potius ecclesiastici ordinis, detrimento, vobis scribo, uti scriptum est : *Nolite locum dare diabolo (Ephes. iv)*. »

Quibus verbis aperte ostendit, se sustinere non

velle, ut auctoritas metropolitana, secundum regulas, excessus illius corrigendi ullam habeat potestatem : et quem violatorem apostolicæ sedis decreta, et delinquentem contra omnes leges tam divinas quam humanas significet, qui legit, vel audit, intelligat : et cui væ propheticum imminere ea docenti, per quæ hæc fieri quoquomodo a quibuscunque præsumantur : et quem in ipso sacrosanctam religionem prævaricatum fuisse convictum dicat, aperte in superiori capite demonstravit, in quo me suum traditorem vocavit. Verba quoque S. Alexandri corrupte interpretatus est. Ubi enim idem sanctus dicit. « Non tantum attendenda sunt quæ fiunt, quantum quo animo fiunt. » Paulo post subsequitur, inquit : « Unde et illud est, quod Dominus ad munera Abel respexit, et non ad Cain; quia magis intendit ad offerentis animum, quam ad ea quæ offeruntur. » Hinc B. Gregorius : « Ab omnipotente Deo munus non accipitur, quod corde obligato in malitia offertur : quia omne quod Deo datur, ex dantis mente pensatur, quia in his quoquo animo gerantur, ignoratur a proximis. Apud Deum igitur bona vera commendat intentio pura : quoniam non est arbor mala faciens fructum bonum. Arbor namque homo, fructus autem opera sunt ipsius. » In apertis autem malis non est necesse intentionem requirere cordis : quia non est arbor bona, quæ facit fructus malos. Dicit enim Apostolus : *Manifesta autem sunt opera carnis (Gal. v)*; post quorum enumerationem subdit spiritus fructus. Inconvenientem ergo interpretationem præcepti Domini ad primos parentes nostros, non humilitatem quacunque simulatione collectam; sed nudam superbiā frater Hinemarus se excusando de sua perniciose excommunicatione ostendit : quia, ut beatus dicit Gregorius (*in psal. pænit.*, ps. iii) : « Veræ humilitatis testimonia sunt, et iniquitatem suam quemque cognoscere, et cognitam voce confessionis aperire [*al.*, et nunciatam satisfactione pœnitentiæ delere]. At contra, usitatum humani generis vitium est, et labendo peccatum committere, et commissum negando defendere, et convictum defendendo multiplicare [*al.* et vulgatum defend. multiplic.] »

Similiter et Apostoli sententiam ad suum sensum violenter inflectens, dicit : *Lex propter transgressores posita est*. Quæ juxta ipsius sensum ad quem illam retorsit, ita exponi potest, ac si diceret : Transgressus sine timore legem contra legem, excommunicationis posui legem, quam rex timeret, et me contingere non auferet : et prædicans non furandum, furari non timui; et abominans idola, sacrilegium feci. Deinde ponens Gregorii verba dicentis (*lib. vii, epist. 6*) : « Qui non corrigit resecanda, in multos excommunicando commisi, ut hoc facto nemo in me resecanda auferet corrigere. Demum subsequitur : Deo teste, pro cavendo potius ecclesiastici ordinis detrimento vobis scribo. » Quibus verbis evidenter ostendit, qua intentione

illam excommunicationem fecerit : videlicet suæ irrationabilitatis castigationem, vocans ecclesiastici ordinis detrimentum, ut rex illam excommunicationem pertimesceret, et illum rebellantem contra se contingere non auderet : et ipse, qui pro Dei timore se non cohibebat, nec stringi a quoquam hominum revereretur, et propriæ voluntatis motus ut libenter, ita etiam exsequi posset licenter. Tandem addidit : « Pro cavendo ecclesiastici ordinis detrimento vobis scribo, ut scriptum est : *Nolite locum dare diabolo.* » Quod Apostoli testimonium, dum non apostolico, sed apostatico sensu in alium jaculare voluit, in seipsum retorsit. Sicut ipse Apostolus ad Ephesios aperte demonstrat, dicens : *Irascimini et nolite peccare (Psal. iv). Sol non occidat super iracundiam vestram. Nolite locum dare diabolo (Ephes. iv).* » Per iram, inquit Gregorius, lux veritatis amittitur, quia cum menti iracundia confusionis tenebras incutit, huic Deus radium suæ cognitionis abscondit. » Ipse ergo in se locum diabolo principi tenebrarum, scilicet iniquitatum, donavit, qui radium cognitionis Dei, qui lux est, per iracundiam menti suæ confusionis tenebras incussit, ut videre non posset, quam magnum malum in sua perniciosa excommunicatione, de qua se excusando accusat, perpetrare non metuit : ille ecclesiasticas, imo divinas leges transgressus est, et locum diabolo dedit, ut sine baptismo et communione mortuos homines raperet ; ne locum contingendi eum contra suam voluntatem quis habere auderet. Verumtamen secundum suam intelligentiam, eamdem Apostoli sententiam adulterino sensu hic posuit : qua de causa in synodis plures fuisse damnati leguntur.

CAPUT XXXII.

Refertur magna pars epistolæ Hincari Laudunensis de subscriptione quam fecit in synodo apud Attiniacum.

Et in rotula quam mihi XVI Kalend. Julius misit, ita scribit : « Quia me sæpe de subscriptione redarguitis, » et cætera quæ habes inter epistolas Hincari Laudunensis, tomo CXXIV, usque ad « Deo propitiante nunquam acturus ero » Pergit Hincarus Rhemensis :

Contra quæ scriptum est : « Filius stultus dicit se esse justum, sed exitum suum abluit. » Et aliis interpositis ad hanc suam subscriptionem resiliivit, dicens :

« Ac si etiam in subscriptione illa aliquid haberetur quod forte intolerabile foret. » . . . *Reliqua item lector habet ubi supra*

CAPUT XXXIII.

Hincarus archiepiscopus superiores objectiones vera rerum gestarum narratione dissolvit.

Cujus verba singillatim recenseamus. Dicit in eadem synodo, primo violenter per regiam potestatem, et postea fraudulenter a me fuisse ab illo ipsam, subscriptionem extortam. Dominus rex, Deo gratias, et ætatem, et sapientiam, et virtutem, et locum pro se respondendi habet : et de hoc facto plures habet

et archiepiscopos, et episcopos veridicos testes.

Quod dicit postea, illam a me fuisse ab eo fraudulenter extortam, non est verum. Nam soluta synodo illa die, in crastinum convenienda, postquam dominus rex ab ea domo abcesserat, et quidam episcopi in eadem domo, sicut cuique convenit, cum suo fratre loquebatur : et ego juxta quamdam fenestram stans cum fratre Odone loquebar, venit ad me Frotarius archiepiscopus, et Æneas episcopus, et dixerunt mihi coram Odone, quia frater Hincarus vellet professionis libello subscribere, et de domni regis obedientia : et essemus inter nos pacifici sicut pater et filius, ac archiepiscopus et episcopus esse debent. Quod ego gratanter recepi ; et ab alia fenestra, juxta quam stabat Hincarus cum aliis episcopis, adduxerunt eum ad me : et ipse Hincarus petiit, ut liceret illi loqui solo mecum solo. Et secessi cum ex juxta parietem domus ; et dixit mihi, quod pro me nihil dubitaret in illa subscriptione, sed pro eo qui post me erit in illa sede metropoli. Et ego ei respondi, ut ille ipse libellum dictaret sicut vellet ; et petiit ut ego illum dictarem. Et reversi sumus simul ad fenestram juxta quam Æneas et Odo stabant : et dixi Odoni ut acciperet suas tabulas, et exciperet in illis libellum cui Hincarus deberet subscribere. Et excepit Odo, sicut tunc simul dictavimus. Et dixi illi, ut quidquid ibi vellet aut mutare, aut subtrahere, aut addere, faceret : sicut et factum est. Et dixi ego Odoni, ut in crastino illum apportaret scriptum, et in synodo ei Hincarus subscriberet. Hincarus autem respondit, quia febris illum tangebatur, et statim se inde vellet deliberare, ut sanguinem posset minuere. Ego autem jussi Odonem ire ad Cancellarium regis, et accipere ab illo pergamenum, et atramentarium, et scriberet illum cito. Interea dixi Æneæ, cui tunc auscultabat Hincarus, quod melius esset ut in crastina exspectaret ; et persuadente Ænea acquievit ita Hincarus. Et in crastina veniens in synodo professus est secundum quod in illo libello continetur. Et porrigente sibi Odone pennam, coram omnibus, sicut tunc paruit, eidem libello sponte subscripsit ; et regi, et mihi manu sua porrexit. Et tunc dominus rex pacem illi dedit : et ego post illum. In crastino autem antequam in domum intrarem, in quam episcopi convenire debebant, Harduicus episcopus in alia domo mecum loquens, secretissime dixit mihi, quod Hincarus mihi mittebat unum parvulum scriptum, petens ut ei subscriberem. Et occulte illum mihi dedit ; ego autem illum suscepi, et in sinum meum misi. Quem postea non legi, antequam in via essem, qua ad mansionem meam redibam. Et coram Odulfo episcopo qui mecum ibat, primum idem scriptum relegi ; postea nec Hincarus, nec aliquis alius inde mecum rationem habuit. Verum et Fredericus presbyter Harduici, unquam de illo libello mecum ullam rationem non habuit. Et per talem fraudem, sicut auditis, eandem subscriptionem ab eo extorsi.

Quod dicit illam professionem, antequam ei A
 subscriberet, suam domum portasse, non est verum.
 Quia postquam Odo episcopus eam in tabulis suis
 excepit, scriptam Hincmarus illam non vidit; us-
 quequo xvi Kal. Jul. 3 indictionis eidem professioni
 in synodo coram omnibus qui adfuerunt episcopis,
 et coram domno rege subscripsit: et domno regi,
 ac mihi porrexit, et ei in synodo exemplar illius
 donavi. In crastino autem, id est xv Kal. Julias,
 domnus Harduicus archiepiscopus, tali modo sicut
 præmissi, libellum ab eo mihi directum dedit. Et ni-
 hil postea, quandiu in Attiniaco fuimus, inde Hinc-
 marus vel verbo, vel scripto quiddam mihi dixit.
 Qui etiamsi mihi aliquid inde dixisset, responderem
 illi ex Jacobo: *Petis, et non accipis, eo quod male*
petis (Jac. iv). Quia injustum atque irrationabile
 est, ut archiepiscopus a sacris canonibus exorbi-
 tans excedenti episcopo suffraganeo, et a se ordi-
 nato, professionis ac subscriptionis suæ libello sa-
 tisfaciat. Sicut enim secundum Scripturam, minor a
 majore benedicitur: ita prorsus minor a majore,
 et non major a minore judicatur, ligatur, et solvitur:
 sicut et in decretis B. Gelasii demonstratur.

De eo quod subsequitur: « Nam sicut jam vobis
 rescripsi, ad illam synodum pro responsione ad
 litteras domni apostolici me vocasti: ad quam
 veniens, non illam me intrare permisistis; sed extra
 fores, ut privilegio vestræ sedis subscriberem man-
 dastis. » Dicit, per quem hoc illi extra fores man-
 davi; et ostendat, quomodo verum esse possit, quon-
 iam ad synodum veniens, non illum eam ego intrare
 permiserim. Nam postquam ad Attiniacum venit,
 quodcumque in synodo fuimus, et ipse interfuit:
 et coram illo in synodo ea quæ semel et secundo pro
 dissolvendis ipsius impiis colligationibus ad eum ex
 evangelica veritate, et ex decretis apostolicæ sedis
 decreveram, relecta fuerunt. Et in synodo coram
 illo, omnibus audientibus, Oulfus episcopus dixit,
 eum sæpe dicere, sicut et alii cum eo audiebant
 episcopi, quod plenam buccam de aqua non valerent
 illa quæ legebantur.

Quod dicit se respondisse, quia nunquam contra
 privilegium meum, quod in metropoli civitatis
 dignitate accepi, fecisset: vos judicate, si contra
 privilegium metropolitani in his quæ audistis
 quoquomodo fecerit.

Quod dicit se sedem apostolicam appellasse: di-
 cat quis ei contradixit, ut suam appellationem non
 prosequeretur.

Quod dicit, qua domnus rex mea factione insti-
 gatus, qui priori die dixerat, se nihil illi ex sua
 parte discredere; et postea illum minatus est:
 domni regis responsio valebit sufficere.

Quod dicit, quia sui homines cogenter rewa-
 diare, quod illum in villam Pauliacum secuti fue-
 rant: si rewadiabant, quia irrationabiliter eum in
 Pauliacum secuti erant, negare non potest se esse
 auctorem ipsius irrationabilitatis.

Quod dicit, si etiam in subscriptione illa habe-

retur aliquid, quod forte intolerabile foret, B. papa
 Alexander illi manum porrigeret. Videamus quo-
 modo illi conveniat, et manum illi porrigat quod
 S. Alexander decrevit. Ait enim in epistola omnibus
 orthodoxis per diversas provincias Domino famu-
 lantibus (*epist. 1*): « Est etiam et hoc ad hanc san-
 ctam perlatum sedem quod pudet dicere; et non
 solum sacerdotali, sed etiam omni Christiano no-
 mini est inimicum. Id est, quod nonnullos episcopos
 aut sacerdotes aut metu compellunt, aut vi extor-
 quent, aut fraude decipiunt, aliquos confessionis
 suæ in alteram partem quam debeant, aut pro sua-
 rum non requisitione rerum; aut, quod deterius
 est, alieni erroris sectas [*al.*, pro alieni erroris
 secta], scripturas facere, et propriis manibus robo-
 rare, et coram populis recitare atque confiteri.
 Aliquos dicunt carceribus et ergastulis recludi, ut
 saltem his territi insidiis deviant Domini sacerdo-
 tes, et suis faveant voluntatibus. » Et plurimis ca-
 pitulis interpositis iterum hinc dicit ad locum, quæ
 Hincmarus adulterantium modo in rotula sua po-
 suit: « Similiter si hujusmodi personis quædam
 scripturæ quoquomodo per metum, aut fraudem,
 aut per vim extortæ, fuerint, vel ut se liberare pos-
 sent, quocumque ab eis conscriptæ vel roboratæ
 fuerint ingenio, ad nullum eis prajudicium aut
 nocumentum provenire censemus: neque ullam eos
 infamiam, aut calumniam, aut a suis sequestratio-
 nem bonis, unquam auctore domno, et sanctis apo-
 stolis eorumque successoribus, sustinere permitte-
 mus. Confessio vero in talibus non compulsæ sed
 spontanea fieri debet: ipso attestante qui ait: *Ex*
corde enim procedunt homicidia, adulteria, fornicationes,
blasphemix (Matth. xv), et cætera, quæ sunt
 ad hæc pertinentia. Nec tantum attendenda sunt quæ
 fiunt, quantum quo animo fiant. » Et paulo post:
 « Unde et illud est, quod Dominus ad munera Abel
 respexit, et non ad Cain; quia magis attendit ad
 offerentis animum, quam ad ea quæ offeruntur. »

Conferamus verba B. Alexandri cum professione,
 ac subscriptione Hincmari. Alexander dicit nonnul-
 los episcopos vel sacerdotes, aut metu compelli, aut
 vi extorqueri, aut fraude decipi, aliquas confessio-
 nis suæ in alteram partem quam debeant, aut pro
 suarum non requisitione rerum, aut, quod deterius
 est, alieni erroris sectas, scripturas facere, et pro-
 priis manibus roborare, et coram populis recitare
 atque confiteri. Et Hincmarus professus est, atque
 subscripsit hoc modo: « Ego Hincmarus Laudun-
 nensis Ecclesiæ episcopus amodo et deinceps domno
 seniori meo Carolo regi sic fidelis et obediens se-
 cundum ministerium meum ero, sicut homo suo
 seniori, et episcopus per rectum suo regi esse de-
 bet. Ac privilegio Hincmari metropolitani provinciæ
 Rhemorum Ecclesiæ, secundum sacros canones et
 decreta sedis apostolicæ ex sacris canonibus pro-
 mulgata, pro scire et posse me obediturum profiteor,
 et subscribo. » In qua professione et subscrip-
 tione nihil continetur de his quæ servari non

debent: nec aliquid ibi sonat de confessione in alteram partem quam debeat, neque pro suarum non requisitione rerum, neque de sectis alieni erroris: nec eum quisquam, ut subscriberet; aut in carcere, aut in ergastulo reclusit, ut his territus insidiis, Domini deviaret sacerdos, et voluntatibus alienis faveret.

CAPUT XXXIV.

Ejusdem refutationis continuatio.

De eo quod ibidem subsequitur: « Si non sunt tantum attendenda quæ fiunt, quantum quo animo fiant; quo animo ego illud fecerim, neque parum sciens poterit ignorare: qui etiam multa plura tunc essem facturus, ut meos qui innoxii erant, et causa mei opprimebantur, possem liberare. » Paulus apostolus dicit: *Lex non est posita justis, sed injustis* (I Tim. 1). Et hinc S. Leo dicit scribens ad Ravennium (*epist.* 90): « Justo quippe ideo dicitur lex non esse posita, quia normam præceptionis implet iudicio voluntatis. » Si sui qui eum ad Pauliacum secuti fuerunt, rewadiaverunt per legem, quod contra legem commiserunt, innoxii non erant; et dominus rex ut noxios distringere jussit: quantum audemus dicere, contra regium ministerium fecit. Si iudices regii contra legem innoxios, velut noxios, distinxerunt, prævaricatores legis fuerunt: si arbitros [arbitri] innoxios, velut noxios iudicaverunt, auctoritatem et locum iudicii amittere meruerunt. Quia vero nec ipse, nec aliquis suorum, se tunc in iudicio pati præiudicium reclamavit: et S. Gregorius sæpe iuxta leges et canones terminari decrevit iudicia: et ex interpretatione legis Honorii et Theodosii dicitur, quoniam « quicumque quod in iudicio adversario præsentante non repetiit, postea de eadem re litem aliam non poterit inchoare. Legem conculcat, qui contra legem, legaliter iudicata, etiam scripto, rediviva lite condemnat. » Et quia personas privatas suos homines contra legem distinxisse, vel iudicasse Hincarius probare non potest: constat, si sui homines legaliter rewadiarunt, quod contra legem commiserunt, innoxii non fuerunt. Et qui [supple dicit] se conduxisse illos, ut eum ad commissum illud quod rewadiaverunt, sequerentur, qui noxii fuere probati: innoxii rite dici non potest, et noxius innoxios facere suo testimonio nequit.

De hoc quod dicit, S. Gregorium scripsisse a Pompeio episcopo « cruciatio, crematioque fame extorta confessione [extortam confessionem]: » nos in illa synodo satis superque illum vidimus corpulentum, atque confessum; et non cruciatum neque necatum fame ut profiteretur ac subscriberet, vidimus vel audivimus.

De hoc quod dicit: « Certe si non nocet extorta confessio, non obest extorta subscriptio. » Puto clamare nunc contra illum de celo, et clamatorios in divino iudicio ducentos quatuordecim sanctos episcopos, qui in Carthaginensi concilio decreverunt, ut « si quis contra suam professionem, vel subscriptionem venerit in aliquo, ipse se honore privabit. » Et

A dicentem ex sua persona: « Certe si non nocet extorta confessio, non obest extorta subscriptio: » nisi poenitentiam egerit, credo illum inter alia de hoc mendacio ab eisdem sanctis episcopis iudicandum. Sed et a beato Gregorio condemnandum, qui scripsit ad Theocistam patriciam (*l. III, ep.* 39): « Si qui sunt qui dicunt, quia compulsus quispiam necessitate se anathematizaverit, anathematis vinculo non teneri, ipsi sibi testes sunt, quia Christiani non sunt: quia ligamenta sanctæ Ecclesiæ vanis se æstimant conatibus solvere: ac per hoc nec absolutionem sanctæ Ecclesiæ, quam præstat fidelibus, veram putant, si ligaturas ejus valere non æstimant. Contra quos diutius disputandum non est, quia per omnia despicendi et anathematizandi sunt, et unde se fallere veritatem credunt, inde in peccatis suis veracius ligantur. » Et aliquanto superius: « Et quia si compulsi aliqui de quibus reprehendebantur, anathematizare se dicerent, anathematis vinculo nullo modo teneri. Et si sunt qui certissime talia sentiunt, vel tenent, quia Christiani non sunt, dubium non est: eosque et ego, et omnes catholici episcopi, atque universa Ecclesia anathematizamus, quia veritati contraria sentiunt, et contraria loquuntur. » Sed et mihi alia mendaciter impingit: sed et super scriptum quædam dicit, contra quæ longum est mihi scribere, et vobis audire.

CAPUT XXXV.

Quod tertio vocatus ad synodum non respondit, et ideo tractari debet ut contumax.

Ecce audivit vestra fraternitas, quomodo et in quantis scriptura fratris Hincarii sit mendax. Et sicut sacræ leges dicunt, quia hoc in omnibus causis statutum est, ut scripturam prolator affirmet: nam si is qui scripturam protulit, ejus non astruxerit veritatem, ut falsitatis reum esse retinendum. Et in concilio Ephesino, et Chalcedonensi, sed et in quinta, ac sexta synodo, propriis scripturis et subscriptionibus suis convictos, nullorumque aliorum accusationem vel testificationem requisitam, secundum sacras leges, dicentes quoscunque convinci scriptura vel testibus, legitimus damnatos fuisse.

Sed et tertio vocatos, et venire detractantes, (quanto magis post tot ac tantas ammonitiones?) omni sacerdotali officio etiam absentes invenimus fore privatos. Sed et Joannem Antiochiæ tertiæ sedis episcopum, quia blasphemias contra Cyrillum secundæ sedis archiepiscopum per libellos emisit, tertio vocatum, et non adeuntem Ephesinam synodum legitimus ibidem fuisse excommunicatum. Necnon et Dioscorum secundæ sedis Alexandrinæ episcopum inter cætera, quoniam adversus regularem ordinem et ecclesiasticam egerit disciplinam: insuper etiam quia multos libellos plenos iniquitatibus contra archiepiscopum suum primæ sedis magnæ Romæ sanctissimum et sapientissimum Leonem, sæpius ecclesiasticos conculcans canones in concilio obtulit; privatam omni sacerdotali ministerio, ab eodem beatissimo Leone per vicarios suos in eadem magna synodo Chalcedonensi; et tertio vocatum, quia sy-

modo se præsentare contempsit, absentem legimus fuisse damnatum. Verum de trina commonitione sacræ leges dicunt, quicumque tribus auctoritatibus iudicis conventus, vel tribus edictis ad iudicem fuerit provocatus, aut uno pro omnibus peremptorio, id est quod causam extinguit, fuerit evocatus, et præsentiam suam apud eum iudicem, a quo ei denuntiatus est, exhibere noluerit, adversus eum quasi in contumacem iudicari potest. Quinimo nec retractari per appellationem negotia possunt, quoties in contumacem fuerit iudicatum ab ea sententia quæ adversus contumaces data est; neque appellari, neque in duplum revocari potest. Et hinc S. Gregorius ad Maximum Salonitanum episcopum (*l. v, epist. 103*): « Ita, inquit, fac, ut ad veniendum amplius jam moras non ingeras: ne ipsa te magis absentia obnoxium his quæ dicuntur, assignet: et nos inter hæc reo [*al., in te hæc res*] non solum propter dicta crimina quæ purgare subterfugis, sed etiam propter inobedientiæ culpam, durius, scilicet ut in contumacem cogat ex concilio ferre iudicium. » Et S. Cœlestius de trina vocatione ad Nestorium ita scripsit (*epist. 5*): « Itaque quamvis jam frater Cyrillus secundis te epistolis [*al., epistolis suis*] asserat esse conventum, intelligas volo post primam et secundam illius, et hanc correptionem nostram, quam constat esse jam tertiam, ab universitate collegii et conventu Christianorum te prorsus esse se junctum; nisi mox ea quæ male dicta sunt corrigantur, nisi in eam viam redeas, quam Christus esse [*al., se Christus esse*] testatur. » Et item in eadem epistola: « Persequar plane Domini mei [*al., boni Domini*] fidelis servus inimicos: cum Propheta asserat, eos odio se odisse perfecto (*Psal. cxxxviii*). Moneor rursus altero loquente, ne parcam. Quem vis ergo respiciam [*al., quem hic ego respic.*], cui honoris aliquid servem, quando agitur ut mihi totius spei meæ causa tollatur? » Ipsius in Evangelio verba sunt Domini, quibus ait non sibi patrem, non matrem, non filios, non aliquam necessitudinem debere præponi (*Matth. x*). Est enim frequenter talis pietas ex qua nascatur impietas: cum vincente earum affectu carnis charitati illi quæ Deus est, charitas præponitur corporalis. Et S. Ambrosius in psalmo cxviii: « Est justa misericordia, et est etiam injusta misericordia. Denique in lege scriptum est de quodam. Non miserebitur illius. Et in libro Regnorum legis, quia Saul propterea contraxit offensam, quia miseratus est Agag hostium regem, quem prohibuerat sententia divina servari (*I Reg. xv*). Et si quis latronis filii deprecantibus motus, et lacrymis conjugis ejus flexus, absolvendum putet, cui adsit latrocinandi affectus, nonne innocentes tradit exitio, qui liberet multorum exitia cogitantem? Certe si gladium reprimat, vincla dissolvit; cur laxat exsilia, cur latrocinandi qua potest clementiore via non eripit facultatem, qui voluntatem extorquere non potuit? Deinde inter duos, hoc est, accusatorem et reum, pari periculo de capite decernentes, alterum

A si rem probasset, alterum si non esset ab accusatore convictus, non id quod justitiæ est iudex sequatur; sed dum miseretur rei, damnet probantem, aut dum accusatori favet qui probare non possit, addicat innoxium. Non potest igitur hæc dici justa misericordia: in ipsa Ecclesia ubi maxime misereri decet, teneri quam maxime debet forma justitiæ, ne quis a consortio communionis abstentus, brevi lacrymula, atque ad tempus parata, vel etiam uberius fletibus communionem, quam plurimis debet postulare temporibus, facilitati sacerdotis extorqueat. Nonne cum uni indulget indigno, plurimos facit ad prolapsionis contagium provocari? facilitas enim veniæ, incentivum tribuit delinquendi. Hoc eo dictum est, ut sciamus secundum verbum Dei, secundum rationem, dispensandam esse misericordiam debitoribus.

B Medicus ipse si serpentis interius vulneris inveniat cicatricem, cum debeat resecare ulceris vitium, ne latius serpat, tamen a secundi urendique proposito lacrymis inflexus ægroti medicamentis tegat, quod ferro aperiendum erat: nonne ista inutilis misericordia est, si propter brevem incisionis vel ustionis dolorem corpus omnino tabescat, vitæ usus intereat? Recte igitur et sacerdos vulnus, ne latius serpat, a toto corpore Ecclesiæ, quasi bonus medicus, debet abscidere, et prodere virus criminis quod lateat, non fovere: ne dum unum excludendum non putat, plures dignos faciat, quos excludat ab ecclesia. Jure ergo Apostolus divino nos hortatur exemplo, dicens: *Vide ergo bonitatem et severitatem Dei; in eos quidem qui ceciderunt, severitatem in te autem bonitatem, si permanseris in bonitate (Rom. xi).* » Et sanctus Gregorius in Regula pastorali (*parte III, cap. 1, admon. 23*): « Malorum, inquit, cum incaute amicitiiis eingimur, culpæ ligamur. Unde Josaphat qui tot de antea vita præconis attollitur, de Achab regis amicitiiis pene periturus increpatur: cui a Domino per prophetam dicitur: *Impio præbes auxilium, et his qui oderunt Dominum amicitia jungeris; et idcirco iram quidem Domini merebaris; sed bona opera inventa sunt in te, eo quod abstuleris lucos de terra Juda. (II Par. xix).* » Et in homilia Evangelii: « Multum, inquit, est, quod carnales affectus intentionem mentis diverberant, ejusque aciem obscurant; sed non declinant a recto itineris, qui arcam Dei portant in mente. »

D Et ne quis dicat, beatum Cœlestinum de tertia commonitione scripsisse ad Nestorium hæreticum: attendendum est quod Hilarus papa dicit (*epist. 2*): « Quia non minus in sanctarum traditionum delinquitur sanctiones, quam in injuriam ipsius Domini prosilitur. » Et hujusmodi præsumptor, qui in sanctarum traditionum pertinaciter sanctiones delinquit, non inter catholicos et computandus, sed cum schismatis est condemnandus: quia sicut in decretis apostolicæ sedis scriptum est, quisquis schismatico assenserit, schismaticus esse negari non poterit. Quod etsi omnes sacerdotes, et mundus assentiat, damnatio consentientes involvit, non prævaricationem con-

sensus absolvit. Non enim crimen minuitur, sed roborescit, cum generale fit ex privato. Hoc enim Deus omnium iudicavit, qui peccatorem mundum generali diluvio interemit. Et his beatus Gelasius concinit in decretis suis: sicut manifeste ex ejus verbis hic possem ostendere, si prolixitatem non devitarem.

Conclusio qua monstratur non obstante appellatione ferri posse sententiam.

Hæc omnia suprascripta, ut sæpe commemoravi, non causa mearum injuriarum, sed evindicatione dignitatis mihi commissæ metropolis, contra fratrem Hincmarum contextui: nec sacras leges et regulas collegi adversus eum in causis propriis intendendo iudicium, sed ostendendo qualitatem, ac quantitatem suorum excessuum, et mearum commotionum; et quibus ac quantis constitutionibus pertinacem objecit contemptum. Vestra vero Deo placita unanimitas, coram se recitata vigilantia discernat libramine: quia licet sacerdotibus canones ignorare non liceat; levior tamen fuerat error, si per ignorantiam deliquisset, quam nunc, quia sciens et prudens ex consilio et studio sacrarum regularum per contumaciam transgressor existit, quarum custodiam et observationem professione ac subscriptione sua firmavit. Duplici ergo reatu tenetur astrictus; qui non solum contra venerabilium Patrum, sed etiam contra sua venisse decreta temere comprobatur. Utrum igitur Deo medio prolata sententia, eum debeat percellere; an veraciter recognoscentem, et humiliter supplicantem absolvere, salvis sanctorum conciliorum statutis, et apostolicæ sedis pontificum ex eisdem sacris canonibus promulgatis, et reservato per omnia primæ et apostolicæ sedis privilegio, ac Rhemorum metropolis jure: quod ex me est, consilio, et iudicio vestræ unanimittatis committo: pro modulo meo sequens dicta B. Cœlestini ad Cyrillum episcopum de Nestorio (Cœlestin., ep. 10, apud Baron. an. 431): « Studeo, inquit, quieti catholicæ, studeo pereuntis salutis, si tamen voluerit ægritudinem confiteri. Quod ideo dicimus, ne volenti corrigere [al. se corrigere], forsitan deesse videamur. Nam si et nobis [al., etsi et nobis] sustinentibus uvam, spinas sibi addiderit, impleatur manentibus, statutis prioribus sui fructu iudicii, colligat quod sulco diabolico seminavit, non nostro consilio, sed se periturus auctore. Probat [al., probet] nos veloces pedes ad effundendum sanguinem non habere, quando sibi etiam remedium cognoscat oblatum. » Et hæc dico non præjudicans vestræ deliberationi, utrum juxta hæc B. Cœlestini verba veraciter recognoscens, et humiliter supplicans, absolvi; an pro tam diutina pertinaci in contemptu sanctorum regularum permansione debeat percelli. Quia sicut a regulis præstitutis de certis et manifestis causis quæ in nullo nobis sunt dubia vel obscura nulla aut negligentia aut præsumptione debemus discedere, sicut Leo ad Anastasium scribens (epist. 84) decrevit: ita de quibus diffinitivas sententias, quæ nulla possunt ratione convelli, a sanctis Pa-

atribus promulgatas habemus, non debemus novum inire tractatum, vel novum expectare consilium.

(Lib. LV cap., c. 34.) Nec etiam sedem apostolicam in requirendo inquietare, sicut S. Innocentius scribens ad Macedones episcopos dicit (epist. 27): « Cum sæpius, inquit, repeti fecissem (quin scripta vestra) adverti sedi apostolicæ, ad quam relatio, quasi ad caput Ecclesiarum, missa currebat, fieri injuriam, cujus adhuc in ambiguum sententia duceretur. » Et ad Felicem Nucernum episcopum (epist. 3): « Stupuius prudentem virum de his voluisse consulere, quæ omnibus sunt certa ratione comperta. » Et S. Zosimus (epist. 1): « Sciat quisquis hoc, postposita Patrum, et apostolicæ sedis auctoritate neglexerit, a nobis districtius iudicandum, et loci sui minime dubitet sibi non constare rationem, si hoc putat post tot prohibitiones impune posse tentari. Contumeliæ enim studio fit, quidquid interdictum toties usurpatum. » Et S. Cœlestinus (epist. 11): « Quæ enim a nobis res digna servabitur, si decretalium norma constitutorum, pro aliquorum libitu, licentia populis permessa frangatur? » Et item (ibid.): « Quæ enim sola admonitionis auctoritate non corrigimus, necesse est per severitatem congruentem regulis vindicemus. » Et (Leo, ep. 1): « Ideo omnia decretalia constituta tam beatæ recordationis Innocentii, quam omnium decessorum nostrorum quæ de ecclesiasticis ordinibus, et canonum promulgata sunt disciplinis, ita a vestra dilectione custodiri debere mandamus: ut, si quis in illa commiserit, veniam sibi deinceps noverit denegari. » Et Gelasius (ep. 11): « Satis indignum est, quemquam vel pontificem, vel ordinum subsequentium, hanc observantiam refutare, quam B. Petri sedem videat edocere: satisque conveniens sit, ut totum corpus Ecclesiæ in hac sibimet observatione concordet, quam illic vigere conspiciat, ubi Dominus Ecclesiæ totius posuit principatum. » Et item: « Non opus fuit nova synodo; cum veteris constituti sufficienter hæc forma præscriberet. » Et item: « Nunquam cessisse manifestum est, qualibet necessitate cogente, noviter, quæ fuerant salubriter constituta, temerasse. » Et S. Gregorius ad Sergium defensorem (epist. 10): « Si homo esses, aut aliquam distractionem [al., discretionem] habuisses, ita regularis disciplinæ debuisses custos existere, ut ea quæ illic illicita committuntur, ante vindicta corrigeret, quam ad nos eorum nuntius perveniret. » Et post pauca: « Nam si quolibet modo in hac re negligens, vel lentus extiteris, ita in te districtissime noveris vindicandum, ut quod ex te nescis, pœna possis secante [al., reserante] cognoscere. » Et domnus Adrianus papa in epistola, sicut audistis, nuperrime directa: « Fidelium, inquit, relatione comperimus, quod tua fraternitas debitum vigorem in provincia Rhemensi non agitans, multa reprehensione dignissima a tuis comprovincialibus convalescant. Cujus rei gratia negligentiam vestram his apostolicis affa-

tibus excitamus, ut secundum venerandorum cano-
num regulas, ita omnium omnino comprovincialium
tuorum synodice, salvo sanctæ Romanæ Ecclesiæ
privilegio, reseces vitia, ut privilegii tui coram Deo,
nostroque iudicio non merearis sustinere iacturam. »
Et quia frater Hincmarus sæpe non in canonico
iudicio, nec pro certis causis, sed pro animi sui
motibus irregulariter sedem apostolicam appellavit,
et prosequi appellationem suam, etiam irregularem
neglexit : si regulariter nunc appellare voluerit, sic
submissæ et temperate legum et canonum sunt ex-
sequendæ sententiæ, ut et ipse comedat fructus viæ
suæ, suisque consiliis saturetur, et sedes apostolica
secundum sacros canones, ut dignum est, honore-
tur ; et nos pro dissolutione regularis disciplinæ re-
dargui non mereamur. Nam de appellatione Con-
stantinus Aug. ad Catulinum decrevit hoc modo.
« Moratorias dilationes, frustratoriasque non tam
appellationes quam ludificationes admitti non con-
venit. Nam sicut bene appellantes negari auxilium
non oportet ; ita his contra quos merito iudicatum
est, inaniter provocantibus differri bene gesta non
debet. » Et ex interpretatione legis Valentiniani,
Valentis, et Gratiani Aug. ad Claudium : Lex ista
hoc dicit : Cronopium episcopum a multis episcopis
fuisse damnatum, et studuisse eum, ante iudicium,
sententiam quæ proferebatur, appellatione suspende-
re : a qua sententia, quia iuste prolata fuerat, ap-
pellare minime debuisset. In qua eum gravi mulcta, id
est quinquaginta libras argenti addictum fuisse di-
cit. Quæ tamen summa ipsius mulctæ, non fisco
prodesse iussa est, sed pauperibus erogari. Unde
apostolica sedes discernet, si appellans episcopus
bonam causam habebit, velut decrevit Sardicense
concilium (*can. 3*) : « Si, inquit, aliquis episcopus
iudicatus fuerit in aliqua causa, et putat se bonam
causam habere, ut iterum concilium renovetur, si
vobis placeat, sancti Petri apostoli memoriam
honoremus, ut scribatur ab his qui causam exami-
narunt, Julio Romano episcopo : et si iudicaverit
renovandum esse iudicium, renovetur, et det ju-
dices. Si autem probaverit talem esse causam, ut
non refricentur ea quæ acta sunt : quæ decre-
verit, confirmata erunt. » Et hinc in *can. 4* et *7*
ordo appellationis episcopi post episcopale iudi-
cium ad apostolicam sedem describitur. Quem eod-
em modo exsequendum Innocentius, Bonifacius,
et Leo in decretis suis ex eisdem sacris canonibus
apertissime promulgaverunt. Unde et Gelasius scribit
(*epist. 11*) : « Confidimus quod nullus jam vera-
citer Christianus ignoret uniuscujusque synodi con-
stitutum, quod universalis Ecclesiæ probavit as-
sensus nullam [*al.*, non aliquam] magis exsequi
sedem oportere [*al.*, præ cæteris oportere], quam
primam quæ et unamquamque synodum sua au-
thoritate confirmat, et continuata moderatione cu-
stodit, pro suo scilicet principatu, quem beatus
Petrus apostolus Domini voce perceptum, Ec-
clesia nihilominus subsequente, et tenuit semper,

A et retinet. » Quam synodum Sardicensem apo-
stolica sedes per Osium Cordubensem, et Gentium
Capuensem, et Calepodium Neapolitanum episco-
pos, suos vicarios confirmavit : et Ecclesia nihilo-
minus subsequente confirmatam tenuit semper, et
retinet.

SENTENTIA DEPOSITIONIS

HINCIMARI LAUDUNENSIS

*Ab Hincmaro metropolitano Rhemensi in concilio
Duziacensi pronuntiata.*

(Apud Labb., Concil. tom. VIII.)

Hincmarus Rhemorum episcopus dixit : Nunquam
vellem in eum me iudicare oporteret ; et utinam
nec ordinare contigisset, de quo semper timui, quod
nunc video, postquam eum sibi sæculum rapuit,
et ei frequenter scriptum prædixi : *Qui mentis est
duræ, corruet in malum (Pro. xxviii)*. Sed quia ipse
sibi iudicium ferri exegit : vestra unanimis dicat,
si ego pro præmissis causis eum iudicavero, utrum
vos illum mecum unanimiter iudicabitis, an non ?
Et singillatim episcopis respondentibus, se illum
una cum eo iudicatos. Hincmarus Rhemorum
episcopus dixit : Et postquam ego iudicio secun-
dum morem ecclesiasticum subscripsero, subscri-
betis mecum eidem iudicio ? Responderunt, quia
quod cum eo iudicaverint, se juxta morem eccle-
siasticum fore subscripturos. Et tunc lectæ sunt in
synodo ab Adalgario diacono sententiæ canonum, ita
eo dicente. Sardicenses canones decreverunt (*can.*
3) : « Ut si aliquis episcopus iudicatus fuerit in aliqua
causa, et putet se bonam causam habere, ut ite-
rum concilium renovetur, si vobis placet sancti
Petri memoriam honoremus, ut scribatur ab his
qui causam examinarunt, Julio Romano episcopo,
et si iudicaverit renovandum esse iudicium, reno-
vetur, et det iudices : si contra probaverit talem
esse causam, ut non refricentur ea quæ acta sunt ;
quæ decreverit, confirmata erunt. » Et Innocentius
papa decrevit (*epist. 1*), ut « Si majores causæ in
medio fuerint devolutæ ; ad sedem apostolicam, sicut
synodus statuit, et vetus consuetudo [*al.*, beata
consuet.] exigit, post iudicium episcopale referatur. »
Et Bonifacius papa dicit (*epist. 2*) : Nos per omnes
provincias litteras dirigemus, ne excusationem sibi
ignorationis jure Maximus obtendat, ut ad provin-
ciam venire cogatur, et illic se constituto præsen-
tare iudicio. Quidquid autem vestra charitas de hac
causa duxerit decernendum, cum ad nos relatum
fuerit, nostra, ut concedet, necesse est auctoritate
firmetur. » Et S. Leo papa decrevit (*epist. 87*) :
« Si quæ, inquit, aliæ emergerint causæ, quæ ad
statum Ecclesiarum, et ad concordiam pertineant
sacerdotum, illic sub timore Domini volumus ven-
tilentur ; et de componendis atque compositis om-
nibus ad nos relatio plena mittatur : ut ea quæ
juxta Ecclesiarum morem juste et rationabiliter fue-
rint diffinita, nostra [*al.*, mea] quoque sententia
roborentur. »

Tunc Hincmarus metropolitanus Rhemorum episcopus legens, dixit : Hincmarus Rhemorum episcopus Hincmarum haec tenet Ecclesiae Laudunensis episcopum evangelicæ veritati, atque apostolicæ auctoritati in pertinacia præsumptionis illicitæ excommunicationis repugnatorem ; et sanctorum canonum venerandorum conciliorum, et decretorum sedis apostolicæ, ex eisdem sacris canonibus promulgatorum, transgressorem ; et ecclesiastici ordinis ac regularis disciplinæ in contemptu privilegii suæ metropolis contra sacram Ninænam synodum, contraque cætera sancta concilia, et decreta sedis apostolicæ novum impugnatorum : veterosis fœcibus corruptum, seditionis scilicet Choræ, ac post Nicænæ synodi constitutionem, quorundam subjectorum rebellionis contra potiores suos resuscitatorum ; et contra ordinem ecclesiasticum ac regularem disciplinam professorem ac subscriptorem ; necnon et canonicæ professionis ac subscriptionis suæ prævaricatorum ; sacræque Scripturæ adulteratorum, et verborum catholicorum interversorem, et imposturatorum. Regiæ siquidem subjectioni, et honorificentiae contra regulam apostolicam resultatorem ; perjurum quoque, seditiosum, et rerum alienarum ac facultatum pervasorem, calumniatorem, ac injuriarum reum ; et post tertiam vocationem a metropolitano suo ad synodum evocatum ; itemque ab ipsa synodo per ter, ternis episcopis, ternisque presbyteris, ac ternis diaconibus iterum evocatum, in diutina contumacia sua pertinaciter persistentem, et non resipiscentem ; et ad objecta sibi regulariter respondere contemnentem. Per Dominum nostrum Jesum Christum, cujus evangelicæ veritati, pertinaci præsumptione perniciosæ excommunicationis repugnavit, iudicio sancti Spiritus, qui locutus est in beatissimis apostolis, et apostolicæ sedis pontificibus, quorum doctrinæ, atque decretis causa suæ injuriæ crudeliter et contumaciter obviavit, secundum sacros sanctorum conciliorum canones Spiritu Dei conditos, et totius mundi reverentia consecratos, quibus sæpe correptus, et non correctus, multoties resultavit : et ideo ipse contra se elicit canonicam damnationis proferri sententiam : episcopali honore ac dignitate privatum iudico, et omni sacerdotali officio spoliatum decerno : reservato per omnia juris privilegio domni et Patris nostri Adriani, apostolicæ ac primæ sedis papæ : sicut sacri Sardicenses canones decreverunt, et ejusdem apostolicæ sedis pontifices Innocentius, Bonifacius, Leo, ex eisdem sacris canonibus promulgaverunt.

EPISTOLA SYNODALIS

AD ADRIANUM PAPAM

*Suo nomine concilii Duziacensis ab Hincmaro
Rhemensi scripta.*

(Apud Labb., *ibid.*)

Domino sanctissimo ac reverentissimo Patri Adriano, sanctæ catholicæ et apostolicæ Romanæ primæ

A sedis papæ, Hincmarus, Harduicus, Remigius, Fro-
tarius, Walfadus, Bertulfus, Adalardus, Ansegisus,
Franco, Hildegarius, Adventius, Gislebertus, Hodo,
Rainelmus, Engenoldus, Joannes, Waltharius, Wil-
lebertus, Hildeboldus, Berardus, Ingilwinus, episcopi,
qui cum diversarum ecclesiarum legatis in synodum
apud Duziacum Rhemensis parochiæ in nomine
Christi convenimus.

Diutinis, ac multis, gravissimisque, atque fre-
quentibus ab insolentibus Hincmari Laudunensis, vexa-
tionibus fatigati, quem nec metropolitanus suus, qui
orphanum benigne illum nutrit, in clericum to-
tondit, litteris erudit, per singulos gradus, electione
cleri et plebis Laudunensis Ecclesiæ, cum favore
domni regis Caroli, ad apicem episcopatus provexit,
B multifarie multisque modis et verbis, et scriptis
comonitum, corrigere non potuit. Quem domni
nostri regis Caroli benignitas multorum beneficiorum
largitionibus, et castigationibus, ad episcopalem
mansuetudinem, et gravitatem atrahere non præ-
valuit : et nec ipse, neque metropolitanus suus ad
hoc eum compellere potuerunt, ut clericis ac laicis,
quibus injuste fecerat, quod lex, et justitia dictabat,
restitueret. Sed potius quicumque ad regem, vel ad
metropolitanum suum se contra eum reclamavit,
nequaquam cessavit, donec eos penitus exterminavit.
Cui etiam synodales invectiones, ut a contumacia
et levitate sua resipisceret, bonum nomen, quod
apostolica regula episcopum etiam ab his qui foris
sunt, habere jubet (*I Tim. III*), morum probitate, et
ordinis sui religione obtinere, et bonorum operum
exemplum demonstrare studeret, persuadere non
potuerunt. Quem etiam humana verecundia a suis
reprehensibilibus, et improbabilibus actibus, ut non
vituperaretur ministerium nostrum extrahere nequi-
verunt. Quem vestræ postremo apostolicæ epistolæ,
obtestationes, et commonitiones corrigere, et ad
obedientiam debitam flectere non potuerunt.

Tandem quod non sine gemitu et cordis dolore
dicimus, quoniam aliud medicamentum quo sana-
retur, reperire nequivimus, ab ordine sacerdotali
removimus : sicut in gestorum serie sanctitas vestra
inveniet, quam per hunc fratrem, et venerabilem
coepiscopum nostrum Actardum, qui nobiscum re-
sedit in synodo, auctoritati vestræ dirigimus. Quia
diutius nec sibi commissa Ecclesia, quæ sub eo ve-
luti sub gravissimo fœce gemebat, illum portare ;
D nec aliarum Ecclesiarum rectores, sine reprehensione
insolentias ejus ferre ; nec regiæ dignitatis potestas,
vel regni unanimitas, ejus inquietudinem ac deho-
norationem sustinere valebat. De quibus quadam,
et juxta pluralitatem aliorum excessum, in præfata
gestorum serie pauca invenietis : quia et pro tempo-
ris brevitate, quoniam isdem Hincmarus constituta
sibi die noluit venire ad synodum ; et domnus rex
cum quibusdam episcopis ad colloquium fratris sui,
pro reconciliatione filiorum ejus, ad patrem illorum
et fratrem suum festinare accelerabat ; ne commota
editione carne propinquos inter se compugnantes

Christianorum parricidalis sanguis effunderetur [leg., effunderet]; et hac de causa ecclesiarum Dei rescinderetur, et sacerdotum ac servorum Dei facultates diriperentur, et pauperes depopularentur. Verum et ipsum Hincmarum ad hoc perducere multum laborantes non potuimus, ut secundum rationem et auctoritatem ad objecta sibi redderet rationem. Sed obstrependo clamoribus, et inconditis vocibus, ea quæ verbis confitebatur, et in scriptis suis professus fuerat, iterum denegabat, et ea quæ negaverat, iterum fatebatur.

Propterea præmissis [prætermis] aliis, quæ in gestorum serie invenietis, et quæ in plurimis sui metropolitani epistolis, et quæ in ipsius Hincari scriptis habentur: intermissis etiam quamplurimis plurimorum querelis, qui datis petitionibus in synodo adversus eum querebantur, tam de clericis et laicis ecclesiæ suæ, quam et de parochianis presbyteris, et liberis hominibus, non solum suæ parochiæ, verum et aliarum parochiarum. Intermissa nihilominus ratione de auro, et gemmis quamplurimis et pretiosis; et multis ac variis ornamentis ex auro et gemmis compositis, quibus Pardulus episcopus decessor illius altare sanctæ Mariæ Laudunensis Ecclesiæ pulchre satis ornavit: quod iste defabricavit: et sicut ministeriales ipsius ecclesiæ dicunt, inde umgas ad spatias, et balteos, et calcarias, atque ligaturas hosarum, quas hosobindas dicunt, fieri jussit; et suo fratri, et quibus sibi placuit dedit. Sed et de auro purissimo ex calice, quod præfatus decessor suus eidem ecclesiæ contulit. Necnon et de alio auro, verum et de argento ipsius ecclesiæ; sed et de casulis pretiosis, quas dedit quibus sibi visum fuit. Necnon et de sacro panno optimo ex altare sanctæ Mariæ, quem ad sæculares usus dedit: et alia plurima, quæ ad rationem et judicationem mittere non concurrimus.

Sicut nec de seditionibus aliis, præter eam de qua rex eum accusavit per scripturam, præsens præsentem in synodo: in quarum una ipse fuit et veniens cum pluribus armatis hominibus, et permista vulgi multitudine, cum gladiis et fustibus ad mansum ubi mulier comitis regis, nomine Nortmanni, de partu [more femineo] jacebat, ejecit eam inde, et omnia quæ ibi habuit, aurum, argentum, vestimenta, pannos plurimos, annonam, vinum, et generis diversi ac sexus pecuniam, sine misso, vel litteris, aut verbo regis, in sua parochia, et missatico, illi per violentiam abstulit: sicut in petitione ipsius Nortmanni nobis porrecta in synodo continetur. In altera vero seditione quæ ipsius jussione fuit concitata, sicut illi dicunt qui in ea fuerunt, unus homo fuit occisus. Nam quia dominus rex cuidam vassallo de Laudunensi episcopo, nomine Amalberto, cui beneficium reddere jussit, quod ab eo injuste tulerat, præcepit hominibus suis et familiæ episcopi Laudunensis illum ire cum armis et fustibus, et inde illum ejicere: sicut et factum est; et fugato eo, unus homo ibi fuit occisus.

A Sed et plura sunt alia, quæ nobis longum est scribere: tantum de his quæ in petitione domni regis contra eum in synodo data continentur, judicia terminavimus: reservato per omnia juris privilegio apostolicæ sedis, ac vestro judicio: sicut sacri Sardicensis canones, et decreta sedis apostolicæ pontificum, Innocenti, Bonifacii, et Leonis, ex eisdem sacris canonibus promulgata decernunt. Ea vero quæ metropolitanus suus et jam in altera. (*Non exstat schedula oblata synodo apud Attiniacum*), et nuper in ista synodo ad correctionem illius, quem per se non valebat corrigere, legenda obtulit, idcirco auctoritati vestræ dirigimus, ut expressius et certius, seu plenius, fastum et animi ejus duritiam, et irrevocabilem ipsius Hincari pertinaciam cognoscatis; et non præpropere, vel immutare, ac inconsulte, sed satis coacte nos in eum, ipso compellente, damnationis sententiam protulisse.

Unde obnixè precamur vestram auctoritatem, ut a tanto hujus incorrigibilis pestis tædio, nos etiam suo judicio, quem longius supportare nequivimus, liberet: secundum decreta Bonifacii et Leonis, ea quæ juxta ecclesiasticum morem, prout intelleximus, non inimico animo, vel aliqua cupiditate, aut gratia depravati, juste et rationabiliter diffinivimus, vestra quoque sententia roborando. Et si forte, quod non putamus, visum vobis necessario fuerit, ut secundum Sardicensis canones renovetis judicium, et detis iudices, scribendo episcopis qui in finitimis et vicinis provinciis sunt, ut et ipsi diligenter omnino requirant, et juxta fidem veritatis diffiniant. Vel si decreveritis mittere a latere vestro habentes auctoritatem vestram, qui cum episcopis judicent, eo in gradu adhuc non restituto, sicut sacri Sardicensis canones præcipiunt, non abnuimus. Licet, quantum possumus, redire ad laborem quo diu vexati sumus, refugere cupiamus: et ea quæ propter verecundiam sacerdotalis reverentiæ tegi potius, quam publicari optamus, si valuerimus, ad plurimorum notitiam deferri modis omnibus resultemus. Verumtamen quanta possumus devotionis humilitate deposcimus, ut etiam in hac causa nobis canonicam diffinitionem servetis. Videlicet ut si, quod non credimus, ea quæ regulariter diffinivimus prout sacras regulas intelleximus, vobis præsentialiter non placuerit vestra sententia roborare, non antea communionem sacerdotali,

D a qua separatus est restituatur, antequam, secundum regulas et leges, in provincia, in qua causæ gestæ, et judicatæ sunt, requirantur. Quia usque ad nostra tempora nulla Patrum diffinitione hoc Ecclesiis Gallicanis et Belgicis est derogatum: præsertim quia decreta Nicæna, sive inferioris gradus clericos, sive episcopos ipsos, ut Africanum scribit concilium, suis metropolitanis aptissime commiserunt. Sicut et S. Bonifacius exponit, scribens ad Hilarium Narbonensem episcopum (*epist. 3*): « Convenit nos, inquit, paternarum sanctionum diligentes esse custodes. Nulli etenim videtur incognita synodi constitutio Nicæna, quæ

ita præcepit, ut eadem proprie verba ponamus. Per A unamquamque provinciam jus metropolitanos singulos habere debere; nec cuiquam duas esse [al., posse esse] subjectas. Quod illi, quia aliter credendum non est, sancto Spiritu suggerente sibimet, censuerunt. » Et paulo post : « Quod ideo dicimus, ut advertat charitas tua, adeo nos canonum præcepta servare, ut ita constitutio quoque nostra diffiniat, quatenus metropolitani sui unaquæque provincia in omnibus rebus ordinationem semper exspectet. Prudentissime enim sancti Patres nostri justissimeque viderunt, » ut Africanum concilium ad Cœlestinum papam scripsit [conc. Af. ep. ad Cœlest.] « Quicumque negotia in suis locis urbi orta sunt, finienda : nec unicuique provinciæ gratiam sancti Spiritus defuturam, quæ æquitas a Christi sacerdotibus et prudenter videatur, et constantissime teneatur. » Maxime autem cum diffinitione ac patrocínio sanctæ et apostolicæ sedis secundum leges et Africæ provinciæ canones, illud ratum haberi posse ostendatur iudicatum, « ubi testium necessariæ personæ absque sexus, vel senectutis, seu infirmitatis, vel multorum aliorum excusatione impeditiorum, possunt adduci. » Quoniam nemo nisi aut scriptura, aut testibus, legaliter ac regulariter potest convinci : sicut Hincmarus suis scriptis, ac subscriptionibus, et idoneis testibus est in synodo coram nobis convictus.

Quia ergo nos, quantum scimus et possumus privilegium sanctæ ac primæ sedis Romanæ, et conservare, et obaudire, et extollere cupimus, atque satagimus, « pro suo scilicet principatu, quem B. Petrus apostolus Domini voce perceptum, Ecclesia nihilominus subsequente et tenuit semper et retinet : » servet vestra paternitas, et a Deo in prima sede constituta auctoritas, nobis, filiis et subjectis sibi episcopis ecclesiastica privilegia, a sacris canonibus, et vestris decessoribus, ac prædecessoribus conservata. Quatenus et apostolica sedes proprium vigorem retineat, et a se concessa aliis sua jura non minuat. Sicut B. Gregorius scribens ad Dominicum Carthaginensem episcopum [epist. 39.] : « De ecclesiasticis, inquit, privilegiis quod vestra fraternitas scribit, hoc postposita dubitatione teneat, quia sicut nostra defendimus, ita singulis quibusque Ecclesiis sua jura servamus : nec cuilibet favente gratia, ultra quam meretur impertior; nec ulli hoc quod sui juris est, ambitu stimulante derogabo [al., derogo]; sed fratres meos honorare per omnia cupio, sicque studeo eos in honores subvehi [al., honore singulos subvehi], dummodo non sit, quod alteri jure ab altero possit apponi. » Et ad Natalem Salonitanum episcopum : [indict. 10. ep. 37.] « Quod vero dicitis vestris temporibus [al., nostris temporibus] debere servari, quæ a decessoribus quoque [al., a meis quoque decess.] tradita et custodita sunt : absit a me ne statuta majorum consacerdotibus meis in qualibet ecclesia infringam : quia mihi injuriam jacio, si fratrum meorum jura perturbo. »

Et si forte, quod absit, cujuscunque suggestione

xel postulatione, apostolicæ sedi subreptum fuerit, ut idem contemptor et conculeator sacrorum canonum in gradu restitutus, aut in nostras provincias ad audientiam remittatur, aut sine audientia in restitutione manere jubeatur, ut cum venia vestra dicamus, ulterius quod isdem ab ipsis ordinationis suæ primordiis semper quasivit, ut in nostris provinciis, nullius coercitionis respectu quidquid vellet, licenter agere posset, sciens nos de singulis Romam mittere non posse : usquequo iidem sancti Patres nostri, qui adhuc nobiscum in suis constitutionibus vivunt, et secundum tramitem sanctarum Scripturarum, traditionemque apostolorum, præventi, ac inspirati gratia sancti Spiritus, de hujusmodi factis, quæ insolens, et transgressor sacrarum legum, ac regularum Laudunensis Hincmarus noscitur perpetrasset, certa præfixere judicia, cum domino inde iudicaturi adveniant, de ipsius in episcopali cum ma... ordine perpetratis, ac perpetrandis excessibus, sicut hactenus actibus ejus conhibendo non communicavimus; ita in postmodum nulla de eo judicia decernemus, vel quamcunque proclamationem apud quemcunque faciemus. Vivat si sibi sicut vult, consolante nobis ac consulente Apostolo, qui dicit : *Nolite communicare operibus infructuosis tenebrarum, magis et redarguite* (Ephes. v.). Egimus enim de illo pro modulo nostro. Quia sicut B. Augustinus exponit, « duobus modis nos non maculat malus, scilicet, si non consentiamus ejus operibus malis; et si ea redarguamus. » Non consensimus quidem : imo et ejus opera redarguimus; et quem corrigere non potuimus, iudicatum a nobis Dei mediante sententia, diffinitionis vestræ iudicio reservavimus : et sub gestorum serie, quæ acta sunt per venerabilem episcopum nostrum Actardum, qui synodalibus diffinitionibus nostris interfuit, paternitati vestræ dirigimus [Locus corruptus]. Quod et de Rothado faceremus, si legatis nostris facultas transeundi Alpes in illis temporibus concederetur. Credite ergo fidei nostræ, quia non inimico animo, vel aliqua cupiditate, aut gratia depravati eum iudicavimus : sed ipso multis et maximis, atque diutinis excessibus nos compellente : ac per hoc credite, juxta Sardicenses canones, posse sufficere, sicut regulariter negotio terminum imposuimus, nostrum iudicium vestra roborante sententia.

D (Flodoard. II. III. c. 21.) Venerabilem denique fratrem, et coepiscopum nostrum Actardum, quem clerus et plebs metropolis Ecclesiæ Turonensis, in eadem ecclesia baptizatum, tonsuram, et nutritum, ac per singulos gradus ad ordinem episcopatus provectum, sibi incardinari deposcit : quemque vestra paternitas nobis incardinandum, etiam si locus eveniret in nostris regionibus in metropoli commendavit, auctoritati vestræ remittimus. Quatenus illum in præfata metropoli, eo, si vobis placet, tenore archiepiscopum incardinatis, ut post decessum illius præfate metropoli ecclesiæ cleri ac plebis electione, sicut regulæ sacræ præcipiant, et vetus consuetudo

exigit, a suffraganeis et provincialibus episcopis ibidem metropolitanis ordinetur episcopus (Adrian., *ep. 2 ad episc. synod. Suession.*) Quem licet, juxta Antiochenos canones perfecto concilio, atque secundum apostolicas vestras litteras vacanti Ecclesiae incardinare possemus : quia tamen Turonensis Ecclesia ex antiquo metropolis, et beati Martini meritis famosissima et honorabilis semper exstitit, et praefatus frater noster Actardus venerabilis episcopus genio pallii^a a benignitate vestra est honoratus : rationabilius vidimus, ut petitione cleri ac plebis ipsius ecclesiae, et consensu nostrae unanimitalis, ac favore domni nostri Caroli regis gloriosi (Adrian., *epist. 28, ad Carol.*), ac vestra auctoritate eidem incardinetur Ecclesiae. Deus noster sanctitatem vestram aëvo longiore orantem pro nobis custodiat, domine reverentissime Pater in Domino. Data VIII Idus Septembr. praesentis quartae indictionis.

EPISTOLA HINC MARI RHEMENSIS

AD ADRIANUM PAPAM.

(Apud Labbeum ubi supra.)

Domino sanctissimo et reverentissimo Patrum Patri Adriano, primae sedis apostolicae et universalis Ecclesiae papae, Hincmarus, nomine non merito Rhemorum episcopus, ac plebis Dei famulus.

Venerabilem fratrem, et coepiscopum nostrum Actardum, sicut vestra dignatio exiguitati meae litteris suis praecepit (Adrian. *epist. 4, ad Hincm.*), in gremio dilectionis suscepi, et a paganis Nortmannis, ne non et a pseudochristianis Brittonibus de sua sede expulsum, consensu coepiscoporum Rhemensis provinciae, ac favore domni nostri Caroli regis gloriosi, in vacante ecclesia [Morinensi] dioceseos nostrae locum sacrificandi, et episcopale ministerium peragendi concessi : et secundum Sardicenses canones (*can. 3, 12, 21*) immorandi licentiam dedi : et de rebus ac facultatibus ejusdem ecclesiae, larga benevolentia humanitatem exhiberi praecepi : usque dum aptus et conveniens sibi locus eveniret, ubi secundum praeceptionem vestram posset incardinari. In qua vacante ecclesia dioceseos nostrae secundum apostolicas litteras vestras, incardinari non potuit ; quia res Ecclesiae Namnetensis a paganis residuae, longe ab Ecclesia Morinensi Rhemorum provinciae distant, et in duabus provinciis regulariter conscribi non poterat. Nunc autem quia clerus et plebs metropolis Ecclesiae Turonensis, in eadem ecclesia baptizatum, tonsum, et nutritum, ac per singulos gradus ad ordinem episcopatus provectum, sibi eum incardinari deposcit, quem vestra paternitas nobis incardinandum, etiam si locus eveniret in nostris regionibus in metropoli, commendavit, auctoritati vestrae remittimus : quatenus illum in praefata me-

Atropoli, eo, si vobis placet, tenore archiepiscopum incardinatis, ut post decessum illius, praefata metropoli ecclesiae, cleri et plebis electione, sicut regulae sacrae praecipiant, et vetus consuetudo exigit, a suffraganeis et provincialibus episcopis, ibidem metropolitanus ordinetur episcopus. Quem licet juxta Antiochenos canones perfecto concilio, atque secundum apostolicas vestras litteras vacanti ecclesiae incardinare possemus : tamen quia Turonensis Ecclesia ex antiquo metropolis, et beati Martini meritis famosissima, et honorabilis semper exstitit ; et praefatus frater noster Actardus venerabilis episcopus, genio pallii, a benignitate vestra est honoratus : rationabilius vidimus, ut petitione cleri ac plebis ipsius ecclesiae, et consensu nostrae unanimitalis, ac favore domni nostri Caroli regis gloriosi, a vestra auctoritate eidem incardinetur ecclesiae.

De causa vero fratris Hincmari, sufficienter vobis gestorum series, quam per hunc venerabilem fratrem et coepiscopum nostrum Actardum, synodus in parochia Rhemensis nuper habita, vestrae auctoritati transmitti, plenam notitiam intimabit. Cui post omnia gesta, quae de illo gerenda fuere, cum aliis episcopis et confratribus nostris, apud domnum regem obtinuit [*leg. videtur obtinuit*], ut quicumque de clero, vel de familia Laudunensis Ecclesiae cum illo pergere vellet, licentiam haberet. Quem utinam non vidissem, minime autem illum me ordinare in episcopum contigisset, per quem tantum scandalum in nostrarum provinciarum ecclesiis, et in regno in quo degimus, sine ulla necessitate commotum, et diutino tempore hactenus est perduratum. Adeo ut non inconvenienter de eo dicere possem : Bonum erat ei, si natus non fuisset homo ille : qui pro eo ut ad episcopalem gradum provectus in religione proficeret, sub qua nutritus fuerat, pompas et illecebras saeculi coepit sequi, et familiaritates, ac contubernia saecularium delectari ; de negotiis saecularibus sermocinationes frequentare ; cupiditatem et avaritiam, non solum pecuniae, sed et altitudinis, ac turpis lucri emolumenta sectari ; meas, et quorumcunque correptiones aspernanter et indignanter accipere, et in sensu ac sapientia sua confidere ; sicut multi, proh dolor ! in nostris regionibus sciunt. Et ut alia plurima specialiter computare omittam, quae per plures annos in timore, et cordis dolore, de illius moribus et improbabilibus actibus, et etiam humana verecundia de insolentis ejus sustinui : saepissime illum et verbis, et scriptis, familiariter et per me, et per communes familiares nostros corripuens, et ad recognitionem, vel correctionem adducere non valens ; de his pauca commemorabo, quae ante quadriennium in pejus proficiens, et ex-crescens, cum virtute laborare coepit, ut caderet.

Coepit enim clericos et laicos, qui eum elegerant, per varias occasiones affligere ; et ab eis, quae habebant, vel acquirere poterant, per diversa ingenia

^a Genium pallii vocavit Gregorius (*lib. vi, epist. 131*) dotes ejus et significationes.

subripere, et, ut dicam apertius, rapere: indeque illos de loco, in quo nutriti fuerant, exterminare, et alios pravæ opinionis ex diversis provinciis recipere. Unde afflicti tam clerici, quam laici de sibi commissa ecclesia, cœperunt se reclamare ad domnum regem, et ad meam exiguitatem: pro quibus satis superque laboravi; sed aut parum, aut nihil profeci. Idem autem pro reclamatione suorum hominum contra domnum regem commotus, de rebus a Nortmanno invasivis, quas ipse regi sine meo ac coepiscoporum meorum consensu concesserat, ut eas Nortmanno beneficiaret, sicut et ipse in suis scriptis fatetur: misit illum apud vestram auctoritatem, me inscio, sine ulla necessitate accusare, per missum suum Celsanum. Et mandavit mihi, quod domnus rex eum, et omne episcopium Laudunensis Ecclesiæ, exceptis principali ecclesia, et episcopii domo, et claustro fratrum, proscripserit et confiscaverit, quia ipse sæculare iudicium adire noluerit. Ego autem illi ut episcopo credens, scripsi inde domno regi plura, et minus caute, reprehendens illum de injusto iudicio. Et quia non ita se res habebat, sicut idem Hincmarus mihi mandaverat, et postea ipse dixerat: assumpto eo mecum, veni ad domnum regem, et una cum coepiscopis nostris, sicut antea, et postea sæpius egi, domnum regem ei placabilem feci. Postea vero sine mea conscientia, vel consensu, misit iterum ad vestram auctoritatem, non solum regem, sed et me accusare, sicut in sanctitatis vestræ litteris inveni. In quibus inter cætera continetur: « Quare ministerio juris episcopalis in regionibus istis abutar, et Hincmarus nepos, et æquivocus meus, venerabilis duntaxat episcopus, sicut audistis, non minima in ecclesia sua sustinet detrimenta: si me tepescente nullam potuit consolationem invenire. » Unde jure vestræ auctoritati rescripsi (*non exstat hæc epist.*), quod non est modo necesse repetere.

Sed ipse Hincmarus unde cautior et humilior esse debuerat, scilicet de mea intercessione, et domni regis benignitate, inde elatus in superbiam, et amarus animo effectus, non solum se non correxerat, sed malis pejora semper adiecit. Et quia suis pravis actibus et improbabilibus moribus consentire non volui, et incaute suis mendaciis fidem accommodare vitavi; imo et illum redarguere cœpi: etiam contra me irremediabiliter se commovit; et plura et majora scandala et regi, et regno, et mihi, ac coepiscopis nostris, et ecclesiæ suæ tam clericis quam laicis semper accumulavit.

Et horum scandalorum, licet non apertis vocibus, scandalizati ab eo, ut audivi, me auctorem esse dicebant: quoniam eum scilicet nepotem meum episcopum ordinaveram. Non attendentes, quia non ut Judam electum præsentis justitia apostolum, et Saul regem postea reprobatum, de quo scriptum est: *Erat vir electus et bonus, et non erat vir de filiis Israel melior illo (I Reg. ix)*. Deus omnia sciens ordinavit, et nihil culpæ contraxit, quia peccare non

potuit: sed ut homo nesciens quod futurum erat, istum per improvidentiam ordinavi, et divini iudicii non injusti minister existi: quia, sicut timeo, aliis peccatis meis hoc esse promerui. Quanquam et sancti apostoli cum B. Stephano, et aliis diaconibus, Nicolaum ordinaverint, nec tamen dictis et factis illius improbabilibus postea manifestis, per manuum suarum impositionem communicaverunt (*Act. vi*). Sicut nec Samuel culpam contraxit in ordinatione Saul: quem divina jussione a se ordinatum, et a Domino postea abjectum diutissime flevit, veluti sacra narrat historia (*I Reg. xv*). Quia autem dicebant quod nepotem meum episcopum ordinaverim, non attendebat quia et alii per me sunt episcopi ordinati, qui non sunt mihi carne propinqui: et quia non impedit ad quemquam ordinandum carnis propinquitas, si ordinandus fuerit electus, et petitus secundum ecclesiasticas regulas. Nam et Dominum a quo, et per quem cœpit episcopatus, carne sibi propinquos legimus ordinasse episcopos.

Sed licet in isto nepote meo egerim unde gemo, quia nescio qualiter de hoc, et de aliis meis factis *terribilis in consiliis super filios hominum (Psal. lxxv)* in occulto suo iudicio, *qui posuit tenebras latibulum suum (Psal. xvii)* disponet: scio tamen omnipotentem advocatum, et misericordem iudicem, « ante quem est omne desiderium meum et gemitus meus non est absconditus (*Psal. xxxvii*). » Consolatur enim me, quia recepi pro illo et per illum duplicia. Quoniam sicut sanctus dicit Gregorius: « Quos plus cæteris diligimus, cum ab eis adversa patimur, majorem dolorem mala nobis ingerunt, quam quæ ab externis inferuntur: et plus in nobis ea tormenta sæviunt quæ ab illis patimur, de quorum mentibus præsumebamus; quia cum damno corporis mala nos cruciant amissæ charitatis. Hinc est enim quod de Juda traditore suo per psalmistam Dominus dicit: *Et quidem si inimicus meus maledixisset mihi, sustinuissem utique; et si is qui oderat me, super me magna locutus fuisset, abscondissem me forsitan ab eo. Tu vero homo unanimis, dux meus, qui et notus meus, simul mecum dulces capiebas cibos: in domo Domini ambulavimus cum consensu (Psal. lrv)*. Et rursus: *Homo pacis meæ in quo sperabam, et qui edebat panes meos, magnificavit adversum me supplantationem (Psal. xl)*. » Ac si de traditore suo D apertis vocibus dicat: transgressionem ejus tanto gravius pertuli, quanto hanc ab eo qui meus esse videbatur, sensi.

Cui multa et multipliciter ut se corrigeret, scripsi: quæ si in unum corpus fuerint congregata, non puto minoris fore voluminis, quam quinque sunt libri Moysi. Et ideo ad scribendum illi me contuli, quia sufferre non poterat, quæ illi a me dicebantur. Sed nec de ullo homine patienter aliquid potest audire, ut semper non ipse loquatur; nisi ea illi quis dixerit, quæ in suo corde versantur. Contra quæ etiam scripta ipse multa multipliciter, et irrationabiliter mihi rescripsit: nolens ea quæ illi scribebam sic intelligere, sicut scripta erant: sed me, et ipsa scripta

reprehendere, et calumniari, atque refellere laborabat.

Per quæ intelligens illum esse incorrigibilem, statui in corde meo, ulterius me apud illum non inaniter laboratum: videns in eo impleri, quod de Domino psalmista dicit: *Immissiones per angelos malos, viam fecit semitæ iræ suæ* (Psal. LXXVII). « Cor, inquit Gregorius, Dominus prioribus meritis aggravatum, juste permittit etiam subsequentibus malignorum spirituum persuasionibus falli: quod dum digne in culpa trahitur, reatus jam in pœna cumulat. Unde et iræ suæ Domino viam facere; est in eos qui punire in se causas recte noluerunt, districte judicando dilatare: ut qui illuminati agere recta noluerunt, juste cæcati adhuc faciant unde amplius puniri mereantur. De quibus dicit Apostolus: *Ut impleant peccata sua semper* (I Thess. II). Et hinc voce angeli ad Joannem dicitur: *Qui nocet, noceat adhuc; et qui in sordibus est, sordescat adhuc* (Apoc. XXII). Et hinc David ait: *Appone iniquitatem super iniquitatem eorum, et non intrent in justitia tua* (Psal. LXXVIII). Et hinc per Moysen dicitur: *Non dum completa sunt peccata Amorrhæorum* (Gen. XV). Hinc per eumdem Moysen Dominus dicit: *Ex vinea enim Sodomorum, vitis eorum; et propago eorum ex Gomorrha. Uva eorum uva fellis, et botrus amaritudinis ipsis. Furor draconum vinum eorum, et venenum aspidum insanabile. Nonne hæc condita sunt apud me, et signata in thesauris meis? In die ultionis reddam eis* (Deut. XXXII). Et quia multa eorum mala narravit, tamen illico adjunxit. *In tempore quo lapsus fuerit pes eorum* (ibid.). Et atrocissima peccatillorum describantur: et tamen ad ultionis diem adhuc subsequens lapsus adipiscitur, quo eorum culpæ cumulentur. Habent jam quidem, unde feriri mereantur: sed sustinetur tamen adhuc peccatum crescens, ut peccantes possit acrior culpa cumulare. Jam meretur supplicium peccatum, et causa peccati: sed exspectatur adhuc, ut augmentum supplicii subroget peccatum et pœna peccati. Quæ in illo compleri videns, pro modulo meo sequi decrevi quod Dominus dicit: *Non audivit populus meus vocem meam, et Israel non intendit mihi: et dimisi eos secundum desideria cordis eorum: ibunt in adventionibus suis* (Psal. LXXX). Et: *Vocavi et renuistis, et despexistis omne consilium meum, et increpationes meas neglexistis. Comedent igitur hujusmodi, fructus viæ suæ, suisque consiliis saturabuntur* (Prov. I). »

Et quia ipse Dominus dicit: *Si oculus tuus dexter, vel manus tua dextera scandalizat te, projice ea abs te* (Matth. V): et odire nos proximos nostros præcipit, adhuc autem et animam nostram (Luc. XIV). Unde beatus dicit Gregorius (homil. 57 in Evang.) quia amandus quilibet in hoc mundo nobis est adversarius: sed in via Dei contrarius non amandus est nobis, etiam proximus. Quia licet amandi sint proximi, et impendenda charitas omnibus, et pro-

pinquis et extraneis; non tamen pro eadem charitate in Dei est amore flectendum. Quia pro affectu carnali, sicut nec vaccæ quondam portantes arcam Bethsames, non declinant a recto itinere (I Reg. VI), qui arcam Dei portant in mente: cognoscentes quia compassio proximis, et rectitudo debetur vitii. Quæ idcirco vestræ sanctissimæ auctoritati scribens, dolore cordis constrictus, de illo per vocem luctus emitto: ut sciatis, quanta non solum ego, sed et ecclesiæ Cisalpinarum regionum, et rex, ac regnum nostrarum partium per illum hactenus sustinuerunt. Suggesto enim paternitati vestræ, quia quando in hac mortali carne vixero, sicut metropolitanus cum episcopo rationem habere debet, quantum ex me est, nec de parochia, nec de quacunque causa, metropolitana sollicitudine, cum illo ullam rationem habeo: quem diutius insolentem sufferre non valeo. Et tolerabilius mihi est, etiam corporaliter, oculum, aut manum, aut pedem abscissione amittere, quam cum illo, quem spe gaudens dilexi, et ea gemens diligo propter Deum, de suis insolentibus contentiones sine ulla utilitate conserere. Jam enim in multis, et per plures ab eo vexato, necesse est mihi, ut non rixas, sed quietem exquiram. Quatenus qui jam terminum meum exspecto, vel in eodem termino, per Dei misericordiam dicere possim: *Nunc dimittis servum tuum, Domine, secundum verbum tuum in pace* (Luc. I).

Cæterum vestræ paternitatis auctoritas nuper mihi litteras misit de presbytero parochiæ nostræ, nomine Trisingo, præcipiens ut plenariis scriptis remitterem vobis notitiam de causa ipsius. De quo sicut se rei veritas habet, vestræ auctoritati rescribo.

Quædam libera femina, soror hominis nomine Livulfi, de ipsa in qua præfatus Trisingus presbyter fuerat ordinatus, accepit maritum fratrem ipsius Trisingi presbyteri: et hac familiaritate idem Trisingus cœpit frequentare domum fratris sui. Et, sicut idem Livulfus, qui in ipsa villa manebat, et parochiani atque vicini ejusdem presbyteri dicebant, cum filia uxoris fratris sui, quam de altero marito susceperat, cœpit concumbere. Et quadam die ipse presbyter, atque præfatus Livulfus perrexerunt ad castellum, quod Mosomus dicitur, et inebriaverunt se in quadam taberna contra nostrum episcopale interdictum: qui presbyteris nostris in omnibus synodis interdicimus, ut sicut canones Africani diffiniunt (conc. Afric., c. 40): « Clerici edendi, vel bibendi causa tabernas non ingrediantur, nisi peregrinationis necessitate compulsi. » Et iste presbyter, gulæ non peregrinationis necessitate, ad inebriandum se tabernam intravit: quia idem castellum non amplius quam quatuor milliaria a mansionem ipsius presbyteri distat. Revertentes autem idem presbyter et Livulfus, ebrii, de præfato castello, cœperunt verbosare inter se, sicut ebrii

« Se prendre de paroles. Dixit Augustinus Juliano: *Inaniter verbosaris*, hoc est, multis nugaris, lib. III, contra Jul., n. 46.

solent facere, et illorum verbosatio eo usque processit, ut de ipsa sua nepte improperearet presbytero; et e contra ipse presbyter opprobria quæ invenire potuit, eidem Livulfo retulit. Idem autem Livulfus fuste, quem in manu portabat, bis percussit Trisingum presbyterum. Tunc ipse presbyter irruens super filium Livulfi, qui spatam ad collum portabat, extraxit eandem spatam; et volens percutere eum per medium caput, ut illum occideret, levavit idem Livulfus manum contra spatam, et suscepit spatæ ictum, et abscissi sunt illi duo digiti de eadem manu: et cadente illo de caballo, putavit pesbyter illum esse mortuum, et saliens in caballum illius perrexit domum suam.

Ego vero per multos hoc audiens, vocavi eum ad me, in præsentia clericorum ac comministrorum nostrorum, et interrogavi eum, ac veritatem. Qui de femina de qua reputabatur, negavit quod cum ea non concubuerit. De voluntate autem, quia eo ordine sicut præmisi, ipsum hominem occidere voluerit, confessus fuit: qui juxta vocem Joannis apostoli homicida convincitur. Ego autem, sicut beatus Augustinus de presbytero suæ parochiæ Xantippo primati suo scripsit, quæ negavit, Deo dimisi; quæ occultare permissus non est, judicavi; et eum ab officio sacerdotali removi, donec ad synodum provincialem veniret, et ibi cum certo episcoporum numero, sicut Carthaginenses præcipiunt canones (*canon. Afric. c. 95; conc. Carthag. III, can. 8*), causa ipsius certum finem acciperet. Isdem autem, cum plures synodos in provincia nostra babuerimus, ad synodum postea nullam venit. Quem per annum et sex menses expectavi, et pro se in synodo nihil sategit. Et decernentibus sacris canonibus (*conc. Carthag. v. can. 12*): ut quoties clerici convicti, et confessi in aliquo crimine, si forte causæ adesse voluerint, et innocentiam suam asserere intra annum excommunicationis hoc faciant. Si vero intra annum causam purgare contempserint,

A *nulla eorum vox postea penitus audiat. Post annum et sex menses reclamantibus parochianis ecclesiæ ipsius, in qua idem presbyter fuerat ordinatus, se non habere presbyterum (deest aliquid ad sensum): nam quia Romam perrexerit, ignoravi, donec post tres menses, quam in loco ejus fuit presbyter ordinatus, Roma veniens mihi litteras vestræ sanctitatis attulit.*

In canonibus autem Africæ provinciæ concilii quarti capitulo 67, de seditonariis et usurariis, ne clerici fiant scriptum est ita (*conc. Carth. VI, can. 66*): « *Seditonarios nunquam ordinandos [al., ordin. clericos], vel injuriarum suarum ultores.* » Et si tales ordinandi non sunt, colligendum est. quid mereantur qui post ordinationem, admittere talia non formidant. Et antiqui Patrum canones in synodo, cui plurimi metropolitani cum suis suffraganeis interfuerunt, decernente Antiocheno concilio perfectum illud esse concilium, ubi interfuerit metropolitanus antistes, manifesta sententia decreverunt (*conc. Tolet. IV, can. 45. Habetur 23, q. 8, Clerici qui*): « *ut clerici, qui in quacunque seditione arma volentes sumpserint reperti, amisso ordinis sui gradu in monasterio pœnitentiæ detrudantur.* » Et Zacharias papa Bonifacio episcopo Moguntino scripsit, ut episcopos, presbyteros, aut diaconos sanguinem Christianorum seu paganorum effudisse repertos, ab eisdem ecclesiasticis gradibus removeret. Et jam plusquam duo sunt anni, ex quo præfatus Trisingus suprascriptum Livulfum volens occidere, demembra- vit, quando hanc relationem, ut jussistis, vestræ auctoritati transmitto. Et quia populus sine presbytero tandiu manere sine periculo dimitti non potest, vestra sapientia sufficientissime novit. Deus omnipotens sanctitatem vestram ad doctrinam et correctionem sanctæ suæ Ecclesiæ in suo cœpto servitio per annorum multa curricula conservare dignetur, domine sanctissime, et reverendissime Patrum Pater in Domino.

ANNO DOMINI DCCCLXXXII.

JOANNES VIII

PONTIFEX ROMANUS.

NOTITIA HISTORICA IN JOANNEM VIII

Auctore, ut creditur, PANDULFO Pisana.

(Apud Muratori, Rer. Ital. Script., tom. III, ex codice ms. Vaticano.)

Joannes VIII, natione Romanus, ex patre Gundo, D sedit annos decem, menses duos. Hic beatissimus pro utilitate omnium Ecclesiarum Dei, et præcipue pro Gallicanæ Ecclesiæ, Arelatem maritimali itinere deductus est; ubi Leo abbas in præsentia ejus veniens, contra Gisbertum [Baluz., t. VII Miscell., Gilbertum, hic et infra] Nemausensem episcopum

conquestus est. Monasterium enim sancti Petri in quo quiescit corpus beati Egidii in finibus Gothiæ in Valle Flaviana, quam vallem Flavius quondam rex beato Egidio donaverat, et sanctus Egidius exinde donationem integritè Romanæ Ecclesiæ et domo papæ Benedicto lecerat, et ibi in veneratione apostolorum principum Petri et Pauli monasterium

ædificaverat, præfatus Gisbertus Nemausensis antistes prædictum monasterium quadam temeritate invadens, eidem Leoni abbati abstulerat. Deinde præceptum ex rege Francorum exceperat, in quo nec firmitatem credens, Romanum pontificem adiit, super hoc auctoritatem furtim quasi de suis apostolicam exquisivit. Sed sanctæ recordationis domus Nicolaus papa, licet hujus fraudis esset ignarus, divino tamen Spiritu plenus, omnes de hoc legem quærentes excusare satagit. Sed dominus Joannes papa cum munimentum chartarum ejusdem monasterii requireret, privilegium, quod Romæ [*id.*, quod Romanus] venerabilis papa Benedictus sancto Egidio corporaliter tradiderat, ei oblatum est. Tunc dominus papa Joannes per Deum dedit ducem Ravennatem, advocatum suum, contra Gisbertum Nemausensem episcopum, ipsum monasterium quæsit. Tunc ambarum partium advocatis per fidejussorem legatis, executionem [*id.*, exsecutore] duntaxat Gregorio scriniario, et Deusdedit agente, voluit idem Gisbertus episcopus per præceptum domni Nicolai piæ memoriæ ibi relectum, quod furtim quasi de suis ex apostolica sede fraudaverat, et per præceptum quod ex quodam rege Francorum falsum exceperat, in quo nec ulla firmitas subsistebat, defendere. Sed dominus papa omnes episcopos et judices Romæ, vel provinciales sub anathemate excommunicationis admonuit, de hoc rectam legem dicturos et facturos. Tunc Rostagnus Arelatensis archiepiscopus, et Aribertus (*a*) Ebredunensis archiepiscopus, Waldbertus Portuensis episcopus, Paschalis Amerinus episcopus, Radbertus Valentianus episcopus, Litiduinus [*Baluz.*, Lituinus] Massiliensis episcopus, Ictarius Vivariensis

A episcopus, et alii episcopi provinciæ et judices, Joannes dux, et Dativus [*id.*, Daturus] Ravennæ, Arduus, Adbertus, Guisalfredus, Arderardus, Codulfus [*id.*, Gondalfus], et alii nonnulli provinciales judices, ut præceptum lectum audierunt, mox cognoverunt apostolicam domni Nicolai censuram, excusare de hoc legem quærentes. Et dixerunt per illud præceptum hoc monasterium non posse defendi, judicantes statim ut præfatum monasterium Gisbertus episcopus domno papæ redderet, et penam invasionis sibi componeret. Tunc ipsum advocatum Deusdedit ducem Ravennatem dominus papa illuc transmisit, qui super hoc corporalem traditionem de omnibus rebus prædicti monasterii tam intus quam extra a præfato Gisberto episcopo recepit. Deinde in Galliam transitum faciens anno Incarnationis Dominicæ 879, xv Kalendas Septembris (*b*), indictione xi, anno pontificatus sui in sanctissima [*id.*, sacratissima] sede beati Petri apostoli sexto, apud Treacas civitatem [*id.*, sexto, mense Augusto, Treacas civitatem], in præsentia domni Ludovici serenissimi regis concilium permaximum celebravit (*c*). Hujus etiam temporibus floruit Anastasius Romanæ Ecclesiæ bibliothecarius, qui, tam Græco quam Latino eloquio pollens, septimam universalem synodum de Græco in Latinum transtulit. Transtulit etiam de Græco in Latinum Hierarchiam Dionysii Areopagitæ Athenarum episcopi, scriptam ad Timotheum episcopum Ephesi, et direxit Carolo imperatori filio Ludovico. Transtulit etiam de Græco in Latinum Passionem sancti Petri Alexandrini archiepiscopi, et Passionem sancti Acacii, sociorumque ejus, et Vitam sancti Joannis Eleemosynarii.

(*a*) Nomen Ariberti Ebredunensis episcopi deest apud Baluzium.

(*b*) Apud Baluz., *an.* 878, xv Kal. Sept. Hæc idem adnotat: « In veteri codice legitur ea acta esse anno

879, indict. ix, et concilium Trecense fuisse celebratum mense Aprili. Quod cum constare non possit cum veritate historiæ, notas illas correximus, ut in re certa. »

(*c*) Cætera quæ sequuntur desiderantur apud Baluzium.

ALTERA DE JOANNE VIII NOTITIA.

(Ex Conciliis Mansi.)

Joannes (*a*) sedit annos decem, dies duos. Hic decreto suo statuit ut nulli ducum liceat quemlibet episcopum in præsentiam Romani præsulis introdu-

cere, vel census ab eo ad sumptus publicos seu dona quælibet exigere, sed nec coram laicis episcopum concessit. Clericos et sanctimoniales, pupillos et

(*a*) Joannes. Anno Redemptoris 872, decimo nonæ Kalendas Januarii, teste Aimoino, Joannes, patria et natione Romanus, ex archidiacono factus est pontifex hujus nominis octavus, electione, unctione et coronatione Caroli Calvi, Ludovici Balbi et Caroli Crassi trium imperatorum, post obitum Ludovici II, ordine prædicto succedentium celeberrimus.

Hic, cum Saraceni totam fere Italiam depopulerentur, omni auxilio hominum, in quibus spem expellendorum Saracenorum collocaverat, plane destitutus, a barbaris et infidelibus pacem et quietem annuo censu ac tributo redimere coactus fuit: idque justo Dei permissu contigisse videtur, ut scilicet hoc exemplo suo instructus agnosceret se post obitum Ludovici imperatoris II, suas malesuadæ carnalis prudentiæ, Carolum, a quo contra Saracenos majora quam a Ludovico fratre subsidia expectabat, male elegisse, creasse et coronasse imperatorem (*errat hic in multis Binus*), quem propter alieni regni invasionem, exemplo prædecessoris sui Adriani II ecclesiasticis censuris merito exagitasse debebat. Photium, qui per fraudem et imposturam admirabilem, quam idem Nicees prolixius enarrat, cuique Ignatius adhuc vivens

D reditum ad Ecclesiam, prout octava synodo constitutum fuerat, juste denegaverat, Joannes papa, petentibus illud Basili imperatoris et Hierosolymitani patriarchæ legatis, post obitum Ignatii ad communionem Ecclesiæ recepit, ejusque reditum ad sedem patriarchalem non sine gravi existimationis suæ jactura notaque cathedræ pontificiæ turpissima approbavit. Ne Photius ante finem vitæ ad penitentiam reciperetur, in concilio œcumenico viii non tantum constitutum, verum etiam singulorum juramento firmatum erat. Non ignarus hujus constitutionis sacratissimæ, neque immemor fortasse sui ipsius juramenti pontifex, contumacem hæreticum nulla ratione ad penitentiam, multo minus ad dignitatem patriarchalem recepisse, sed potius anathematis sententia periculis debebat. Impetraverat ista Photius sine dubio per intercessionem Basili, per unionis, pacis et concordiæ ecclesiasticæ, auxilium contra Saracenos ferendi promissionem, perque falsorum plurium enarrationem, quasi omnes orthodoxi pro sui restitutione intercederent: verum ista ratione non tam Joannes excusatur, quam majore ignominia afficitur, ut qui ab eunucho et semiviro omni robore enervatus, se feminam potius quam virum esse declaravit. Si quis

viduas sub tutela episcoporum esse decrevit, et eos ad sæcularia iudicia trahi modis omnibus interdixit. Quemlibet autem ducem vel alium contra hæc agentem, excommunicandum esse decrevit; persequentem vero anathematis vinculo innodandum.

Idem inter cætera de decimis sacerdotibus dandis ita præcepit. Quas scilicet decimas unumquemque fidelem illi sacerdoti dare censuimus, in cujus parochia eum procul dubio constat sub episcopi proprii ditione (a), quia ad hoc recipiendum ab episcopo suo est constitutus, manere, et ideo nullo alterius dioceseos sacerdotem aut Levitam alteri jure ea novum (b) debita hujusmodi audire impudenter, vel temere quærere, aut accipere damnationem vel donationem (c). Eum vero qui aliter

cum Baronio crederet ex hoc facto fabulam de Joanne VIII, non papa, sed papissa, originem sumpsisse, non male fortasse sentiret. Hæc ex Niceta et Aimoino Baron. tom. X in Vite Joannis. Sev. Bix.

A dare vel accipere præsumperit, ecclesiastica communione tandiu judicamus manere privatum, donec secundum hoc nostræ apostolicæ auctoritatis capitulum studuerit agere.

Hujus temporibus Ludovicus imperator, ab Adal-giso Beneventano duce constrictus, timore vitæ, jurejurando firmavit, nunquam se Beneventi fines ultra intraturum, neque ex periculo injuriæ tunc sibi illatæ vindictam aliquando exacturum. Ab hoc autem juramento postmodum prædictus papa eum Romæ absolvit auctoritate Dei et sancti Petri, affirmans nihil sibi obesse, quod ob mortis periculum evadendum coactus fecerat, nec sacramentum esse dicendum quod contra salutem reipublicæ, quamvis cum multis execrationibus, fuerit prolatum.

(a) Locus mendosus.

(b) *Ea novum.* Forte *canonum.*

(c) Forte tantum *donationem.*

JOANNIS PAPÆ VIII EPISTOLÆ ET DECRETA

ORDINE CHRONOLOGICO DIGESTA.

(Epistolas seu decreta quibus fontem unde hausimus non inscribimus, Conciliis Mansi ascribas.)

PHILIPPI JAFFE MONITUM.

(Regesta Pontificum Romanorum.)

Quantuncumque merito habetur amplum et grande, quod superest, Registri Joannis VIII fragmentum, epistolas 308 comprehendens, dolendum tamen est, quod non meliore conditione ad nos pervenit. Incuria enim sive ipsius notarii, sive. ut probabilius est, eorum qui transcripserunt, non modo corruptæ magnopere et truncatæ haud pauca epistolæ sunt, sed ne temporis quidem in iis disponendis ubique habita ratio est; quin etiam eo usque chronologiæ quasi contemptio quædam haud raro processit, ut in per-multis iisque continuis litteris, quas plane manifesto ex interioribus indicibus apparet scriptas temporibus diversis fuisse, chronicis signis omnino abjectis eodem modo substitueretur: Data ut supra. Quæ verba ab inepto quodam ætatis posterioris librariolo pro: Data et Cætera, apposita putem, cum præsertim quo ex codice expressum Registrum est, eum undecimo demum sæculo confectum esse testetur Pertz in Archiv für altere deutsche Geschichtskunde, V, 32. Sed quoquomodo sese res habeat, de epistolarum diebus nihil debuit usquam ex prava illa formula extricari.

I.

AD ANNONEM FRISINGUENSIS ECCLESIE EPISCOPUM.

Fragm. (Anno 873.)

Ut Ecclesiæ Romanæ debitos redditus transmittat.

Efficaciam tuæ fidelitatis circa sedem apostolicam, quam nimirum litteris tuis extuleras, operibus te approbare velle satis devotissime promittentem et gratanter accepimus et pro commendatione rerum Romanæ Ecclesiæ provisioni tuæ, ut asseris, commissarum. Noveris itaque nuperrime nos litteras dilecto filio nostro Ludovico regi, sed et episcopis et comitibus Italici regni qui earum redditus nobis deferri salvos faciant, transmisisse, nihilque aliudsuperesse cognoscimus nisi ut aurum aliasque species quas te collegisse fateris simul cum præteritæ indictionis qui minus fuerunt redditibus sub omni plenitudine nobis per totum Septembrem futuræ vi-

B indictionis, aut per temetipsum deferas aut transmittas, sciens quia si hoc condicto tempore redditus nobis non venerint, nullius alterius nisi tuæ morosæ negligentiae specialiter imputandum. Precamur autem ut optimum organum cum artifice, qui hoc moderari et facere ad omnem modulationis efficaciam possit, ad instructionem musicæ disciplinæ, nobis aut deferas, aut cum eisdem redditibus mittas, quatenus dum vile metallum beato Petro conferre festinas, ab eo aurea regni cœlestis munera capessas.

II.

AD WILIBERTUM COLONIENSEM ARCHIEPISCOPUM.

Fragm. — (Anno 873.)

Pallium, nisi post consuetam fidei professionem, dari non debet.

C Optatum tibi pallium nunc conferre nequivimus, quia fidei tuæ paginam minus quam oporteat continere reperimus: cum videlicet in ea nullam sancta-

rum universalium synodorum, in quibus fidei nostræ A symbolum continetur, nec decretalium pontificum Romanorum constitutorum, secundum morem, feceris mentionem; sed nec illam propria subscriptione munieris, nec aliquem qui hanc jurejurando firmaret miseris.

III.

AD LUDOVICUM II IMPERATOREM.

Fragm. — (An. 874.)

Asseruntur quædam Ecclesiæ Ravennatensi prædia.

Nam monasterium sanctæ Mariæ in Comaelo, quod Pomposia dicitur, et monasterium sancti Salvatoris in monte Feretri, aliudque monasterium quod vocatur sancto Probo, atque colonas in territorio Ferrariensi et Adriensi et Gallicata et Fanventillam B Ravennati archiepiscopo non abstulimus, sed ea monasteria et loca ab antecessoribus nostris possessa reperientes possedimus hactenusque jure proprio retinemus. Alia quoque loca et villas et prædia de quibus aliquam functionem per D jam annos Ecclesiæ Ravennas recepit, volumus ut pristinam functionem et dationem eadem Ecclesia deinceps recipiat. Et quia eadem Ecclesiæ alia loca nec tulimus nec occupari fecimus, habeat quæ hactenus habuit absque prædictis locis, id est Gallicata et massa Faventilla, et absque præfatis monasteriis, quousque in præsentia nostra et ipsa loca quæ sua esse putat, nostræ potius Ecclesiæ lege et ratione pertinere omnimodis cognoscetis. Datum iv Kal. Febr., indictione VII.

IV.

AD ANSBERTUM ARCHIEPISCOPUM MEDIOLANENSEM.

Fragm. — (Anno 874.)

Vir spectabilis Rudolphus nomine, imperatorius homo, nos nuper adierat, queritans et asseverans se uxorem suam nomine Bavam zelo pudoris fervente, obscenæ suspicionis macula denotasse, ac sinistra crebrescente fama carnalis accusatione criminis impetisse. Qui cum hanc ad purgandum, secundum legis propriæ tenorem parentibus ejus et consanguineis tradidisset, ultra spatium anni fuerit sub criminalium reatu calumniarum retenta. Qua de re nos, æquitatis amore succensi, apostolica parentibus ejus auctoritate præcipimus quatenus mediante mense Augusto præteritæ septimæ indictionis sive D purgatam, sive aliter eandem feminam viro proprio reddidissent, haud dubium quin subituram si non sæcularis legis, saltem ecclesiasticæ pietatis medellam. Alioquin corporis et sanguinis Domini nostri Jesu Christi se noscent cum ea communione privandos, qui nec mundanarum vel divinarum legum censuram, nec apostolicæ sedis reverentes decretum. Horum nihil, ut prædictus vir ad nos iterato veniens retulit et ipsius rei exitus innuit, agere curaverunt. Quamobrem in sacro communionis munere secundum quod illis intendando comminati fuimus, eos merito privavimus nisi alteram partem audiendam fore

judicavimus. Unde quia non esse justos mediatores oportet, unius autem mediator non est, eosdem vexare longius proficiscendo nolumus, sanctitati tuæ super hujuscemodi controversiæ circumstantia, vice nostra delegata hortamur, ut statuto et indicto tempore venerabiles Lintfridum Ficinensem, Paulum Placentinum antistites ad certum accersias, et uxore jam memorati Radulphi missis vestris et litteris advocata, quæ legis sive mundanæ sive divinæ sunt, super utroque conjugis incunctanter exerceas, secundum præstitutam vobis sacerdotalis mensuram duntaxat officii. Quæ si post vocationem vestram, quam tertiam esse post secundam nostram procul dubio constat, ad virum proprium, collata sibi legali et indubitabili se libertate purgandi, minime redire delegerit, examenque sanctitatis vestræ subterfugiens declinaverit, a sacris et sanguinis Domini nostri Jesu Christi communione in idipsum una cum spiritu nostro convenientes, tam ipsam quam nequiter eam tuentes et defendentes consanguineos, quinimo fautores ejus et omnino communicatores, donec obediant, sequestrate.

V.

AD LUDOVICUM REGEM GERMANIÆ.

(Anno 874.)

Privilegia Romanæ Ecclesiæ non nisi centum annorum præscriptiones tolluntur.

(Apud Grat., *Decr.*, caus. 16, q. 3, c. 17.)

Nemo de annorum numero resultandi sumat C fomentum, quia sanctæ Romanæ, cui Deo auctore servimus, Ecclesiæ privilegia, quæ in firma Petri stabilitatis petra suscepit, nullis temporibus angustantur, nullis regnorum portionibus præjudicantur. Sed venerandæ Romanæ leges, divinitus per ora piorum principum promulgatæ, rerum ejus præscriptionem non nisi per centum annos admittunt.

VI.

AD PAULUM EPISCOPUM.

(Anno 874.)

Commonitorium Paulo episcopo fungenti legatione in Germaniam et Pannoniam.

Non enim solum inter Italiam ac cæteras Hesperia provinces, verum etiam intra totius Illyrici fines consecrationes, ordinationes et dispositiones apostolica sedes antiquitus patrare consuevit. Porro si de annorum numero forte causatur sciat quia inter Christianos et eos qui sunt unius fidei numerus certus affixus est. Cum tamen ubi paganorum et incredulorum furor est in causa, quantalibet pertranseat tempora juri [non] præjudicant Ecclesiarum, quæ corporalia nescientes arma, solum Dominum propugnatores suum, quomodo ei placuerit misereri patientem, expectant. Verum, si annorum prolixitas in talibus impedit, ergo Deus ipse reprehendendus, qui post quadringentos et triginta annos filios Israel de servitute Pharaonis e fornace ferrea liberavit, et qui hominum genus

post longa tempora de claustris inferni et dæmonum potentia eripuit.

VII.

AD LUDOVICUM IMPERATOREM.

Fragm. — (An. 875.)

Excommunicatur Rainaldus Castri Felicitatis episcopus.

Qualiter Rainaldus Castri Felicitatis episcopus super homicidio tam penes apostolicam quam penes imperatoriam sedem publico murmure fuerit denotatus, et Gregorio dilecto filio nomenclatore misso et apocrisario sanctæ sedis nostræ cum Gregorio illustri magistro militum ac vestiario sacri nostri patriarchii apud dilectissimam filiam nostram imperatricem Augustam consistente, a matre perempti juvenis aliisque parentibus fuerint impetitus, et ad purificandum se a nobis per frequentes excommunicatorias epistolas accesserit Romam coactus, serenitati vestræ credimus manifestum. Sed quia idem Romam veniens purgationis suæ tempus præripuit, et indicta pro se synodo deputatum sibi a nobis locum, fraudulentus excedens more furis per Urbis se muros dejecit, et vera fuisse crimina, quæ sibi illata sunt, indicium subterfugiens proplavavit, hinc auctoritate Dei omnipotentis sanctorumque apostolorum principum et nostræ mediocritatis ab omni ecclesiastica simul et Christiana communione penitus sequestramus.

VIII.

AD LUDOVICUM II IMPERATOREM.

(Fragm. — An. 875.)

Legis auctoritate dissolvitur quod contra eam fit.
(Apud Grat., Decr. 1, dist. 10, cap. 9.)

Vides, fili charissime, quia quod contra leges accipitur, per leges dissolvi meretur.

IX.

AD NEAPOLITANOS, SALERNITANOS ET AMALPHITANOS

Fragm. — (An. 875.)

Conscientia vestræ in Christo dilectionis juste judicet, quantum Christo aversi sunt hi qui cum ejus infidelibus contra prohibitionem Pauli tanti apostoli pollutum fœderis ineunt unitatem. Cum enim regis rebellionibus quocunque participio junguntur, pariter majestatis criminibus obnoxii judicantur parique sententia condemnantur: quantum a corpore Christi probantur extranei, qui ejus hostibus fœderati, membra ipsius tanto perniciosius lacerant, quanto vicinius Ecclesiæ Dei colliminant? *Item.*

Quantum autem Deo sit execrabile cum impio fœdera pangere, luculenter ex hoc deprehenditur, quod Josaphat rex Juda, qui tot de antea vita præconiis extollitur, de Achab amicitii increpatur, cum ei per Jehu prophetam dicitur: *Impio præbes auxilium, et his qui oderunt Dominum amicitia jungeris. Et idcirco iram quidem Domini merebaris, sed bona opera inventa sunt in te eo quod abstuleris*

Lucos de terra Juda (II Par. xix). Quantum præterea sit Deo delectabile ab inimicorum Dei pace desistere, noster Psalmographus manifestat cum dicit: *Nonne qui oderant te, Domine, oderam illos, et super inimicos tuos tabescebam? Perfecto odio oderam illos, inimici facti sunt mihi (Psal. cxxxvii).* Ex quo, dilectissimi filii, patenter ostenditur quanto crimine cum pessimis pax tenetur, si propheta tantus hoc velut in hostiam Deo obtulit quod contra pravos pro Deo inimicitias excitavit. Hinc Levi tribus, assumptis gladiis per castrorum media transiens quia feriendis noluit peccatoribus parcere, Deo manus suas dicta est consecrare: hinc Phinees peccantium civium gratiam spernens, coeuntes cum Madianitis perculit, et iram Dei iratus placavit.

Quia fidelibus et mysterium Christianitatis scientibus loqui nos credimus, per sacrarum Scripturarum testimonia longius tendere devitamus, dilectioni vestræ Donatum venerabilem episcopum, cujus laus est in sancta octava synodo, et Eugenium religiosum presbyterum, dilectos filios et consiliarios nostros, ecce dirigimus.

X.

AD CLERUM SALERNITANUM.

(Anno 875.)

JOANNES VIII clero et ordini Salernitano.

De illis presbyteris qui tempore sanctissimi decessoris nostri domini papæ Nicolai excommunicati sacrum ministerium contingere præsumpserint, ipsi in se damnationis sicuti sancti canones statuunt, sententiam incurrerunt. Tamen quia miserratio apostolica veniam solet præstare correctis, ob multitudinem misericordiæ illis hanc indulgentiam exhibemus, ut sancta communione saginati studeant tribus continuis annis per hebdomadam omni secunda et sexta feria, aut a vino, aut a cibo [cocto ut alibi legitur] penitus jejunare, et ultra lugenda nequaquam committere.

XI.

Excommunicantur qui de morte Romani clerici suspecti erant.

Fragm. — (An. 875.)

Qui de homicidio Romani religiosi clerici suspecti, a nobisque canonicæ suæ excommunicationis intentione, mediante Junio præsentis octavæ indicationis, vocati venire contempserunt, et ob hoc per nostras litteras secundo et tertio advocati, extremum vero per Joannem, Leonem episcopos omni-moda communione privati, quia apostolatus judicium hactenus subterfugisse et neque venisse neque misisse probantur: auctoritate sancti Spiritus anathematizatos esse decernimus quosque futuris Kalendis Octobribus, futuræ nonæ indicationis purificari canonicè mereantur. Si autem neque tunc plenissimam nobis satisfactionem ostenderint, perpetuo anathemate teneantur innexi, ita ut quicumque amodo eis in cibo, potu vel oratione communicaverint, pari cum eis anathematis sententia colligantur.

XII.

PRIVILEGIUM PRO MONASTERIO FULDENSI.

(Anno 875.)

Monasterium Fuldense cum universis cellis, ecclesiis, decimis, curtibus, aliisque rebus adidem pertinentibus exemptum ac liberum iterato declarat.

(Apuđ Schannat., Hist. diœcesis Fuldensis, pag. 238.)

JOANNES episcopus, servus servorum Dei, SIGAHARDO religioso abbati venerabilis monasterii Domini Salvatoris, et per te in eodem venerabili monasterio successoribus tuis abbatibus in perpetuum.

Quoniam semper sunt concedenda quæ rationabilibus congruunt desideriis, oportet ut devotioni conditoris piæ constructionis auctoritas in privilegiis præstandis minime denegetur : igitur quia postulasti a nobis quatenus monasterium Salvatoris a sancto Bonifacio archiepiscopo constructum in loco qui vocatur Boconia erga ripam fluminis Fuldaha privilegii sedis apostolicæ adminiculis decoretur ut sub jurisdictione sanctæ nostræ cui Deo auctore deservimus Ecclesiæ constitutum nullius alterius Ecclesiæ jurisdictionibus submittatur ; pro qua re piis desideriis faventes, hac nostra auctoritate id quod exposcitur effectui mancipamus, et ideo omnem cujuslibet Ecclesiæ sacerdotem in præfato monasterio ditionem quamlibet habere aut auctoritatem præter sedem apostolicam, prohibemus : insuper locum Fuldensem cum omnibus cellis, ecclesiis, decimis, curtibus, ac cunctis rebus suis, tam eis quas moderno tempore tenet vel possidet, quam quæ futuris temporibus in jure ipsius loci divina pietas augere voluerit privilegii nostri præceptione firmamus : hoc vero deliberantes decernimus, ut congruis temporibus nostræ sollicitudini ecclesiasticæ intimetur, qualiter religio monastica regulari habitu dirigatur, concordiaque convenienti ecclesiastico studio mancipetur, ne forte, quod absit, sub hujus privilegii obtentu, animus gressusque rectitudinis vestræ a norma justitiæ aliquo modo retorqueatur, constituimus quoque per hujus decreti nostri paginam ut quicumque cujuslibet Ecclesiæ præsul vel quacunque dignitate prædicta persona hanc nostri privilegii chartam, quam auctoritate principis apostolorum firmamus temerare tentaverit, anathema sit, et iram Dei incurrens, a cœtu omnium sanctorum extorris existat, et nihilominus præfati monasterii dignitas a nobis indulta perpetualiter inviolata permaneat, apostolica auctoritate subnixâ. Scriptum per manum Pauli notarii, scriniarii sanctæ Romanæ Ecclesiæ in mense Octobris, indictione vi. Bene valete. Datum v Non. Octobrias per manum Gregorii nomenclimissi et apocrisarii sanctæ sedis apostolicæ ; regnante imperatore Domino Jesu Christo, anno pontificatus domini Joannis summi pontificis et universalis papæ et episcopi primo, indiet. sexta.

A

XIII.

AD MONACHOS S. VEDASTI ATREBATENSIS.

(Anno 875.)

Confirmat omnia contenta in diplomate Caroli imperatoris.

JOANNES episcopus, servus servorum Dei, fratribus monasterii B. Vedasti, quod vocatur Nobiliacus, vel Atrebas, ubi ipse S. Vedastus confessor Christi corpore quiescit in perpetuum.

Si utilitatibus servorum Dei pie consulimus locaque Christo dicata apostolicis fulsimus sanctionibus, quo divini cultus servitores, inibi Deo vacantes, a turbinibus, et variis tempestatibus sæcularium muniantur excursibus, nihil hoc holocausto gratius Redemptori nostro credimus offerendum. Qua de re luce clarius patet omnibus Ecclesiæ filiis, quia charissimus filius noster Carolus rex, adiens limina beatissimorum apostolorum Petri et Pauli, honorifice a nobis exceptus, postquam solemniter vota regia persolvisset ad sepulcrum B. Petri, die nativitatis Domini, in ecclesia ipsius B. Petri apostolorum principis dignitatem imperialem per impositionem manuum nostrarum adeptus est. Dehinc non minus sincere quam devote a nobis expetiit ut B. Petri apostolorum principis, simulque apostolatus nostri auctoritate decerneremus privilegium Romanæ atque apostolicæ sedis astipulatione roboratum, fratribus jam dicti monasterii confessoris Christi Vedasti, per quod stabili jure ac sine perturbatione possiderent claustrum ac prædictum monasterium et omne quod eis per suum præceptum concesserat ac Gallicanorum episcoporum decreto muniri fecerat. Hujus rei gratia, quia eumdem Augustum divino contactum amore id fecisse perspeximus, gratanter ejus petitionibus assensum præbuimus, decernentes apostolica auctoritate ea quæ hic inserta habentur inconvulsa manere. Ad matriculam scilicet ecclesiæ Maisbodyvillum, Bais, Senous, Herbodecisternam, Pomerias, Herlincurtem, et in Bonnicurtem mansos, et cum Longobragium, Manium, Morsele, et Sceldogothem, Juventiacum, et in Dominica curte mansum i et in Farreolo mansum i. Ad necessaria vero fratrum, victus scilicet et potus, medietatem vicij qui vocatur Hovavilla, et tabernam unam, Filciacum dominicam curtem, Theuludum, Bigartium, Hecnam-curtem, Bernevillam, Mediolanas, Puteas aquas, Angeli-curtem, valiis cum camba una, et duobus molendinis, Stagras Saltiacum, Atiamentarius, Mast, Marcheim, Seringe-him, precariam Emmonis, et Tangigarii. Ad cameram vero villas sitas in pago Batua, quæ circumfluit Rhenus bicornis fluvius, his nominibus Rehnam, Wulfrum, una cum capella ibidem posita, Rotheim super fluvium Versiam sitam. Item in altera Rotheim mansos vi, præterea etiam ultra Rhenum prælibatum fluvium mansos numero xxxvi, pariter cum silvis appendentibus. Deinde in pago Atrebatensi

Athejas, Saltiacum, Liniacum, Campanias, et in Fontanido mansos III, et in Lambras mansum I, et alterum in Hadas, et tabernam I in vico monasterii. Ad portam Bernejam villam, et in Anzinio mansum I, cum molendino et in Enez mansos V, cum molendino et decimam omnis abbatiae. Ad hospitale pauperum in Daginvilla mansos VII, in Bonejam villam, et Lentsales mansos III et quintam partem omnis decimae. Ad domum vero infirmorum omne telonium ex mercato, et has villas quas pro remedio animae suae dedit vel reddidit S. Vedasto, Frontellicurte, Ciliacum, Lutosum montem, atque Tilgidum. Has ergo villas cum omnibus appenditiis, et redditibus et mancipiis, quemadmodum per praecipii paginam ordinata sunt atque tradita, per nostri apostolatus auctoritatem sancimus, ut nulli mortalium liceat aliter ordinare, mutare, vel aliud quid quoquomodo exinde, vel parum agere, praeter quod a saepedicto filio nostro piissimo Augusto constitutum est; sed omnis ordinatio in arbitrio abbatis pendeat. Qui ergo ea quae sancta atque apostolica sedes stabilivit pro nihilo duxerit, temerarioque ausu avaritiae diabolicaeque cupiditatis instinctu qualitercunque violare tentaverit, si ex toto aut ex parte transgressor apparuerit, B. Petri apostolorum principis nostrique apostolatus auctoritate anathematis nexibus, ut fur et sacrilegus astrictus, atque ab unitate matris Ecclesiae et participatione corporis et sanguinis Christi sequestratus, cum Juda traditore Domini nostri Jesu Christi, et diabolo ejusque atrocissimis pompis in tremendo die magni examinis sententiam damnationis accipiat. At qui his apostolicis constitutionibus sincero amore observator exstiterit, benedictionem et misericordiam a Domino Jesu Christo percipiat, et partem et societatem cum eis quorum nomina sunt scripta in libro vitae Agni a constitutione mundi. Amen.

Data per manus Anastasii primiserinii anno primo imperii Caroli serenissimi Augusti, et post consulatum ejus anno I, indictione VIII.

XIV.

AD CAROLOMANNUM [al., LUDOVICUM REGEM.]

(Anno 875.)

Quod Pannonica diocesis deputata est privilegiis apostolicae sedis.

(Apud Timonem, Imago ant. Hung., pag. 164.)

JOANNES episcopus dilecto filio CAROLOMANNO glorioso regi.

Multis ac variis manifestisque prudentia tua poterit iudiciis deprehendere, Pannonicam diocesim ab olim apostolicae sedis fuisse privilegiis deputatam

^a *Ansegisum fratrem.* Quem ex abbate S. Michaelis in episcopatu Bellovacensi ad Senonensem cathedram evertum didicimus anno 871. Romane ejus legationis cum adhuc abbas esset, meminit Aimoinus lib. v, c. 27. Perverse

si apud excellentiam tuam justitia Dei locum, sicut decet, invenerit: Hoc enim synodalia gesta indicant; historiae conscriptae demonstrant. Verum quia a quibusdam hostilium turbationum simultatibus impediuntibus, illuc ab apostolica sede non est diu directus antistes, hoc apud ignaros venit in dubium....

XV.

AD EPISCOPOS GALLIE ET GERMANIE.

(Anno 876.)

Vices suas in Gallia et Germania committit Ansegiso archiepiscopo Senonensi.

JOANNES episcopus, servus servorum Dei, omnibus sanctissimis episcopis per Gallias et Germanias constitutis.

Vestrae omnium innotescimus sanctitati quia pro alleviandis multiplicibus oneribus ecclesiasticis, quibus quotidie satis abundeque deprimimur quibus maxime super negotiis ex Galliarum et Germaniarum partibus nobis assidue destinatis arctamus, Ansegisum fratrem^a et coepiscopum nostrum Senonensis Ecclesiae praesulem, qui quoties utilitas ecclesiastica dictaverit, sive in vocanda synodo, sive in aliis negotiis exercendis per Gallias et Germanias vice nostra fruatur. Et volumus ut decreta sedis apostolicae per ipsum vobis manifesta efficiantur, et rursus quae gesta fuerint, ejus nobis relatione, si necesse fuerit, pandantur: ut majora negotia ac difficiliora quaeque suggestionem ipsius a nobis disponenda et enucleanda quaerantur. Quapropter vos huic pie sanctioni omnimodis intendentes, quae super hoc apostolica auctoritate decernimus unanimes admittite. Talem quippe illum agnovimus, talemque circa sedem apostolicam devotum et in commisso fidelem reperimus, ut merito ei talia committi posse ducamus: quin et his majora conferri debere illi sine cunctatione credamus, pro sua scilicet sanctitate, et fidei merito, atque divinitus sapientiae dono concesso. Optamus vos benere valere. Data IV Nonas Januariarum, indictione IX *Recitata in synodo Pontigonensi.*

XVI.

BULLA JOANNIS PAPER AD CONGREGATIONEM S. MEDARDI SUSSIONENSIS.

(Anno 876.)

Confirmatur partitio monachorum S. Medardi Suessionensis.

D JOANNES episcopus, servus servorum Dei, venerandae congregationi religiosorum monachorum venerabilis monasterii sancti et confessoris Christi Medardi, necnon et beati martyris Christi Sebastiani in perpetuum.

Quoties illa a nobis tribui pro desiderio postulantis quae omni rationi incunctanter conveniunt, animo nos decet libenti concedere et pie petentibus impartiri suffragium. Igitur omnium Christi fidelium co-

autem faciunt qui hunc cum altero antiquiore Ansegiso confundunt abbate Lobiensi, qui Caroli Magni et Ludovici III capitula in quatuor libros digessit anno 827. Smm.

gnoscat solertia quoniam dilectissimus filius noster A Carolus imperator Augustus, beatorum Petri et Pauli apostolorum principum adiens limina, nobis mente devota suggestit quatenus eidem prædicto venerabili monasterio ad utilitatem et usum tam nominatorum monachorum, ibidem Domino servientium, per apostolatus nostri privilegium confirmaremus, et immobilia loca, quæ idem Christianissimus Cæsar, tam pro veneratione eorumdem sanctorum quamque pro mercedis suæ augmento per regale præceptum contulisse dignoscitur, quorum nomina inferius scripta leguntur, Berneium scilicet, Croviacum, Domno regium, Sodoleum, Berziacum una cum molendino, Berziso, mariziacos duos, atque spicarium et præter has Murocinetum, Cerniacum-vadum, sicut Hilduinus anterior abbas ad suum tenuit dominicatum, superaddens in Murocincto mansum unum, Malcas B etiam et piscinas super mare et Cubonimaci cultæ terræ bonaria XXIV et Ruminiao mansos quinque, et partem prati de loco Geigio, et mansos duos in villa, quæ dicitur Lentegere vicinium; decernens, ut camera vestimentorum monachorum habeat tres villas, Capram, Abiacum, et Solmam; et hospitalis nobilium accipiat nonam ex villis ipsius abbatæ secundum priscam consuetudinem, et habeat Cauciacum simul cum lignariis de Pivone: et hospitalis peregrinorum accipiat decimam, et habeat Hatoniscurtem. Thesaurarius autem et portarius, atque hospitalarius, necnon et camerarius intra octo dierum Dominicæ nativitatis, et resurrectionis Dominicæ spatia, bis in anno plenariam refectioem habeant; insuper ex præfatis aliis villis terminum nativitatis dilecti filii sui Carolomanni plenariam refectioem habeant, et post ejus obitum diem nativitatis transferant in diem depositionis, similiter ex villa Bernoilo decrevit refectioem abundanter fieri eisdem monachis in anniversario Bertæ amitæ suæ, et luminaria exhibeat ecclesiæ sanctæ Sophiæ inferiori, et sanctæ Trinitatis superiori, sicut in privilegio ejusdem pii augusti de his omnibus facto continetur: ut quidquid ab eodem illustrissimo Cæsare tam de nobilibus, et immobilibus rebus, quam de thesauro collatum est et in futuro conferetur, pro animæ suæ remediis firmum et inviolabile in perpetuum omnino consistat. Hujus rei gratia, quia eundem sublimem imperatorem divino amore contactum pia egisse confidimus, congruis suggestionibus ejus favere volentes, decernimus, stabilimus, D et apostolica auctoritate omnimodis confirmamus cuncta superius dicta immobilia loca cum nobilibus, seu famulis utriusque sexus, una cum thesauro ad usum et utilitatem supradictorum monachorum, utpote idem præstantissimus imperator augustali præcepto eidem monasterio ob salutem animæ suæ concessit, vel concessurus erit. Statuimus autem sub divini iudicii obstatione, et anathematis in-

terdicto, ut nemini mortalium liceat quoquo modo aliquid dare de his omnibus a jure venerabilis nostri monasterii, vel utilitate monachorum auferre, alienare, subripere, aut per qualemcunque modum, vel argumentum subtrahere: sed omnia hæc, et quæ adhuc in thesauro ab ipso pio Cæsare vel ab aliis Deum timentibus in jus, dominium, vel utilitatem nostri venerabilis monasterii ac monachorum ibidem morantium conferentur, perennibus consistat omnino temporibus. Si quis autem, quod nunquam optamus, contra hoc nostræ confirmationis præceptum, aliter agere non formidans, aliquid inde alienare, minuere, subtrahere, vel temerario ausu mutare præsumperit, aut aliter ordinare, præter quod jam ordinatum est tantaverit, vel in toto, vel in parte transgressor apparuerit, Dei omnipotentis iudicio sciatur se esse anathematis vinculis innotatum, et cum Diabolo, et ejus atrocissimis pompis; atque cum Juda traditore Domini nostri Jesu Christi; et cum impiis omnibus portionem habeat, et a regno Dei alienus existat. Qui vero pio in omnibus intuitu verus observator, et curator exstiterit benedictionem, gratiam, et cælestem misericordiam, sive veniam delictorum suorum a justo iudice Domino Deo nostro consequi mereatur. Scriptum per manum Benedicti notarii regionarii, et sacrosantæ Romanæ ecclesiæ in mense Januarii, indictione nona. Bene valete, Quarto nonas Januarii, per manum Anastasii bibliothecarii sanctæ sedis apostolicæ anno Deo propitio pontificatus domini Joannis quarto, imperatore domino piissimo perpetuo Augusto Carolo a Deo coronato magno imperatore anno primo, et post consulatum ejus anno primo, indictione nona.

XVII.

AD HINC MARUM ARCHIEPISCOPUM RHEMENSEM.

(Anno 876.)

Ut in locum Hincmari ordinetur episcopus in Ecclesia Laudunensis.

JOANNES episcopus, servus servorum Dei, HINC MARO archiepiscopo Rhemensi.

Quamvis a de sanctitatis tuæ iudicio nihil dubitassetus, quia tamen charissimus filius noster Carolus invictissimus imperator, a nobis diligentissime percunctatus, circumstantiam iudicii a beatitudine tua coepiscopisque suis in Hincmarum dudum Laudunensem episcopum prolati apostolatui nostro retulit, agnovimus justum fuisse omnino iudicium. Neque enim tantus princeps nisi veritate fultum quidquam poterat affirmare. Unde nefas esse duximus ejus relationi non præbere incunctanter auditum. Noli ergo jam nunc Ecclesiam Laudunensem viduatam et sine regimine pastorali dimittere; sed indifferenter electum, et de Laudunensis Ecclesiæ clero, virum idoneum, et in quo omnium vota consentiant, eidem Ecclesiæ præfice prorsus episcopum. Cui electioni volumus etiam missum præfati piissimi impe-

improbarat. Itaque tertio post mense electus est Hedenulfus. SIRM.

* Quamvis, etc. Superstite Hincmaro Laudunensi alium in ejus locum subrogari jubet, Carolo imperatori de illius depositione assentiens, quam Adrianus

ratoris interesse, ut sine sæcularium strepitu omni A latere talis eligatur, qui aptus sacris canonibus esse modis omnibus approbetur. Optamus sanctitatem tuam in Christo bene valere. *Data est Romæ Theodorico, jussu papæ Joannis et domni Caroli novi imperatoris, per manus Anastasii bibliothecarii, in secretario ecclesiæ sancti Petri, anno incarnationis Dominicæ 876. Nonis Januarii, indictione IX. Et delata est ab eodem Theodorico in civitate Rhemis Hincmaro Rhemorum archiepiscopo, eodem anno et eadem indictione, v Idus Martii.*

XVIII.

AD ALDFONSUM REGEM.

(Anno 876.)

Ovetensis Ecclesia Gallaciæ metropolitana efficitur.

JOANNES episcopus, servus servorum Dei, ALDEFONSO regi Christianissimo, seu cunctis venerabilibus episcopis, abbatibus, vel orthodoxis Christianis.

Quia igitur in cura nos totius Christianitatis B. Petri apostolorum principis sempiterna providentia efficit successores, ea Domini nostri Jesu Christi constringimur adhortatione, qua beatum Petrum apostolum monuit, dicens quadam voce [vice privilegii] : *Tues Petrus, et super hanc petram ædificabo Ecclesiam meam, et tibi dabo claves regni cælorum, et reliqua (Matth. xvi).* Hinc rursus imminente Domini nostri articulo gloriosæ passionis, inquit : *Ego pro te rogavi, ut non deficiat fides tua, et tu aliquando conversus confirma fratres tuos (Luc xxii).* Ideoque quia vestræ notiæ fama per hos fratres limina apostolorum lustrantes, per Severum et Desiderium C presbyteros [al. presbyterum et Synderendum] nobis miro odore bonitatis est revelata, paterna vos adhortatione commoneo, in cæptis bonis operibus, gratia duce, perseverare, quatenus copiosa vos beati Petri protectoris vestri et nostra protegat benedictio. Et quotiescunque, filii charissimi, ad nos venire quilibet vestrum aut transmittere voluerit, tota cordis exultatione et animi gaudio de ultimis Gallaciæ finibus, cui vos præter me Dominus rectores constituit, tanquam jure filios nostros vos colligimus : et ecclesiæ Ovetensi, quam nestro consensu et assidua petitione metropolitanam constituimus, omnes vos subditos esse mandamus. Et concedimus etiam prædictæ sedi ut ea quæ reges seu fideles [al. quilibet fidelis] juste obtulerunt, vel in futurum, Domino opitulante, contulerint, rata firma et inconcussa manere in perpetuum præcipimus. Hos quoque lateros litterarum nostrarum omnes hortor ut habeatis commendatos. Bene valete.

XIX.

AD EUMDEM.

(Anno 876.)

Monet ecclesiam sancti Jacobi consecrari.

JOANNES episcopus, servus servorum Dei, dilecto filio ALDEFONSO glorioso regi Gallaciæ.

^a Hæc etsuperior epistola habentur in historia Sampiti.

Litteras devotionis vestræ suscipientes, quia devotum vos esse cognoscimus erga vestram sanctam Ecclesiam gratias vobis multiplices referimus, Dominum exorantes ut vigor regni vestri abundet [al., abunde], de inimicis vestris victoriam vobis concedat. Nam nos, filii charissime, sicut petistis, sedulas preces Domino fundimus, ut regnum vestrum gubernet, vos salvos faciat, custodiat et protegat, et super inimicos vestros erigat : ecclesiam autem B. Jacobi ab Hispanis episcopis consecrari facite, et cum eis concilium celebrate. Et nos quidem, gloriose rex, sicuti vos, a paganis jam constringimur, die ac nocte cum illis bella committimus ; sed omnipotens Deus dat [al., det.] nobis de illis triumphum. Hujus rei gratia rogamus dilectionem vestram, et animum [nimum] deprecamur, ut quia, ut diximus, valde a paganis opprimitur aliquantos utiles et optimos Mauriscos cum armis, quos Hispani cavallos Alpharaces vocant, ad nos dirigere non omittatis. Qualiter nos recipientes, Dominum collaudemus, vobis gratias referamus, et per eorum portatorem de benedictionibus S. Petri vos remuneremus. Bene vale, dilectissime filii et clarissime rex.

XX,

AD EPISCOPOS ET COMITES IN REGNO CAROLI CONSTITUTOS

(Anno 876.)

Laudat illos quod in fide constantes erga Carolum perstiterint ; et de legatis, quos ad componenda dissidia mittebat in Galliam.

Benedicimus Deus et Pater Domini nostri Jesu Christi, qui vestræ sinceritatis fideique constantiam C duriolem, ut ita dixerimus, adamante erga fidelitatem invictissimi principis domni Caroli spiritualis filii nostri semperque Augusti hactenus non indebite fecit persistere, et quanti calor in vobis charitas vigeat, dono gratiæ largitatis suæ clarius demonstravit, quatenus notam faceret genibus virtutem gloriæ suæ, et divitias bonitatis suæ ad profectum fidelium et ad correctionem infidelium omnibus revelaret. Ostendistis enim, charissimi quantum sit erga pacis et concordiæ cultum vestræ benevolentiæ benignus affectus, et implestis opere quod ipse a vobis exigit Christus, dicens in Evangelio : *Omnia quæcunque vultis ut faciant vobis homines, et vos facite illis (Matth. vii)* ; et Apostolus ait : *Fides sine operibus mortua est (Jac. ii).* Unde noster apostolatus, D immensæ lætitiæ repletus tripudio, primum quidem Deo omnipotenti sufficientes ac laudes debitas, quia nihil sine eo facere possumus, retulit, et vobis, qui studiose tanto imperatori fidem immaculatam servastis multimodas gratiarum actiones agere dignisque vos efferre laudibus non omittit. Siquidem, dilectissimi, satis vobis prudenter consulistis, quando aliis, quod flentes dicimus, vel sponte vel callide ac fraudulenter deceptis, vos, sicut diximus, fidei calore utentes, et Deum præ oculis habentes, nolulistis iniquorum vel tyrannorum fascibus onerari vel ma-

culari. Quin potius restitistis, pravitatibus eorum ^A sua prisco jam tempore præoptata Domino Deo numiliter exsolvente, Augustaleque diadema, sibi divinitus sine dubio collatum, per humilitatis nostræ ministerium accipiente, fratri ejus, Ludovico scilicet regi, si tamen rex jure dici debeat, qui mentis suæ motus in abruptum impietatis cadentes non rexit, in regnum ipsius, collecta populi nefandi multitudine, intranti, et paganorum more Ecclesiam Dei, populum videlicet pretiosum Christi cruore redemptum, in pace positum conturbanti, relictis vestris concivibus atque sodalibus, qui Deo et seniori suo fideles procul dubio esse videntur, hæere, atque cum eo adversus Dominum, gentem et populum vestrum, ad statu vestræ fidelitatis et promissione divinorum sacramentorum, contra sacri ministerii vestri officium, et contra sponsonis ac fidei vestræ jusjurandum, arma cum hostibus elevare, pariterque nefanda et impia committere præsumpistis. Heu, proh dolor! quare tantæ iniquitatis scelus sponte committere, quare tantæ infidelitatis malum mundo universo, sicut Judæ Iscariotæ, execrabile in exemplum ostendere non dubitastis? Quæ gens hoc audiens vos non odiat? Quod regnum vos exosos fore non judicet? Quando etiam gentibus, quæ Deum verum utique ignorant, tale committere nefas videtur incongruum. Quarum pro terrenis lucris vel minis eos, quos societate et unanimitate vestra defendere salvareque ut vosmet debuistis, appetere, et cum inimicis persequi non contempistis? Cum dicente Domino: *Majorem charitatem nemo habet, quam ut animam suam ponat pro amicis suis* (Joan. xv), in quo scilicet vos eam, quæ per dilectionem operatur, charitatem, sine qua impossibile est placere Deo, in qua totam legem et prophetas pendere scimus, nullatenus constet habuisse, quin potius Cain fratricidam diu mente gessisse. Nonne lux mundi, et sal terræ, Veritate attestante, vos estis, qui verbis pariter et exemplis, quasi luminaria mundo lucere omnibus, atque insulas hominum mentes sapientiæ cœlestis sale condire instantissime debetis? Nonne vos posuit Spiritus sanctus episcopos regere Ecclesiam Dei, quam acquisivit sanguine suo? Nonne magis vestrum erat docere populum, non autem in tam perversis rebus assensum præbere? Dolemus itaque de vobis, quasi de membris corporis Christi, dicentes cum Propheta: *Ventrem meum doleo, ventrem meum doleo, sensus cordis mei turbati sunt* (Jer. iv); et iterum: *Quis dubit capti meo aquam, et oculis meis fontem lacrymarum, et plangam populum istum die ac nocte?* (Jer. ix.) Quapropter monemus, hortamur, et saluti vestræ volentes pro affectu consulere, magnopere suademus ut resipiscentes, tantæ iniquitatis auctore scelesto relicto, ad Deo dilectum

XXI.

AD EPISCOPOS QUI, A CAROLO DESCISCENTES,
LUDOVICO REGI ADHÆSERANT.

·Anno 876.)

Increpat eorum infidelitatem, monetque ut resipiscant, ac legatos a sede apostolica missos bene suscipiant.

Relatione vera ^a didicimus quod dilecto ac spiritali filio nostro Carolo gloriosissimo imperatore Augusto, seniore vestro, ad limina sanctorum apostolorum Petri et Pauli principum veniente, ubique ut Christianissimum decet Ecclesiæ Christi patronum, vota

^a Relatione vera. Eorum qui tunc a Carolo descivere princeps fuit, Aimonio teste, Ingelramnus nuper camerarius regieque intimus, nunc Ludovico Germaniæ regi auctor fraterni regni invadendi. De his ergo Aimonius idem (imo ejus Continuator ex Annalibus Bertinianis ad an. 875), lib. v, cap. 32 :

« Ad obsistendum, inquit, Ludovico primores regni Caroli, jubente Richilde regina, sacramento se confirmaverunt, quod non servaverunt, sed ex sua parte regnum Caroli pessumdantes hostilium more devastavere. Similiter et Ludovicus cum suo exercitu idem regnum pessumdedit. »
SIRM.

imperatorem seniores vestrum Augustum toto animo fidelique voluntate reverti, ac deinceps ei fideiorem existere omnibus modis procuretis. Nam vestrum erat pacem annuntiare his qui prope et his qui longe sunt, dicente Domino : *Supra montem excelsum ascende tu qui Evangelizas Sion. Clama, ne cesses, quasi tuba exalta vocem tuam (Isa. xl)*; vestrumque erat annuntiare populo scelera et peccata sua, ne sanguis eorum de manu vestra a Domino requiratur, non, ut dictum est, sequi. Et ideo contaminati estis secundum Prophetam dicentem : *Væ quia tacui, quia vir pollutus labiis ego sum, et in medio populi polluta labia habentis ego habito (Isa. vi)*; et communicantes pravus eorum sceleribus infructuosisque operibus, vos reprehensibiles ostendistis. Tamen quia scimus procul dubio late patere viscera pietatis Dei, revertimini, et nolite de cætero jugum cum infidelibus ducere. Nolite amplius imitari eos, qui pacis sanctæ fœdera violant, unitatem dividunt, et in agro Dominicæ zizania superseminare ad propriam infelicitatem præsumunt. Revertimini et sectamini charismata meliora, nec iterum antiqui hostis versutiis pareatis; sed sicut Dei ministri, Domini præcepta sequentes, in omnibus cum jam dicto imperatore charissimo filio nostro perfecte stare satagite. Quia si cum præfato rege Ludovico vel aliqui filiorum ejus ad scandalum et regni perturbationem manere, aut eis aliquod adjutorium modo quolibet præbere tentaveritis, et non potius ad eundem dilectum filium nostrum Cæsarem Augustum certissime redieritis, atque cum eo adversus ejus inimicos viribus totis fideliter non steteritis, scitote vos per auctoritatis nostræ legatos anathemati submitte. Præsentibus autem missos nostros, Joannem videlicet et Joannem venerabiles episcopos, dilectosque familiares nostros, benigne admittite, injunctam sibi legationem intelligenter audite, et efficaciter obaudite: ut in hoc quam vere sitis filii pacis cunctis detur intelligi, et neminem possit latere mortalium. Pro Christo enim, qui est pax nostra, legatione frunguntur, cum procul dubio a sede apostolica pro pace mittuntur. Optamus vos in Christo nunc et semper bene valere. *Recitata in synodo Pontigonensi.*

XXII

AD EPISCOPOS IN REGNO LUDOVICI REGIS BAJOARIÆ
CONSTITUTOS.

(Anno 876.)

Arguit eos quod Ludovicum regem ab invadendo Caroli fratris absentis regno non cohibuerint, monetque ut legatis, quos ad examinanda inter utrosque negotia mittit, satisfacere studeant.

JOANNES episcopus, servus servorum Dei, omnibus reverentissimis et sanctissimis archiepiscopis et episcopis in regno Ludovici gloriosi regis Bajoariæ constitutis.

Apostolicæ moderationis ordinem sequimur, si, Ecclesiarum Dei sollicitudinem retinentes, pro domo

spiritualis Israelis murum correctionis opponimus, et concordantes animos, aut sub ecclesiasticæ pacis unione complectimur, aut discordes ad concordiam gratiam revocamus, aut certe inter nos et illos qui apostatæ angeli, zizanii scilicet seminarios, fraudibus irretiti, sanctæ sedi apostolicæ concordare despiciunt, sartagine ferream juxta Ezechielis prophetæ magisterium collocamus (*Ezech. iv*). Reversus enim ad Patrem Dominus pacis bonum discipulis attentius commendavit eamque quasi testamentum firmissimum futuris hæredibus dereliquit, dicens : *Pacem meam do vobis, pacem relinquo vobis (Joan. xiv)*; et beatus apostolus Paulus ait : *Solliciti servare unitatem spiritus in vinculo pacis, unum corpus, et unus spiritus, sicut vocati estis in una spe vocationis vestræ (Ephes. iv)*; quia videlicet ad unam vocationis spem nequaquam pertingunt, si non ad eam cum proximis unita mente curratur. Quapropter sicut filii Dei qui ex testamento ejus sibi per apostolos derelicto pacem custodiunt, ita nimirum diaboli sunt filii qui pacem confundunt. Ille quippe ab initio mendax fuit, et in veritate non stetit, ejusque invidia, sicut scriptum est (*Sap. ii*), mors introivit in orbem terrarum. Nam dum protoplastis invidens, deceptionis laqueum jam deceptus utique a semetipso composuit, mortis poculum mortalibus propinavit; et quos immortales obedientiæ merito tuturos noverat, inobedientiæ venenis infecit, sicque in omnes homines mortis sententiam vitæ hostis induxit. Denique eisdem laqueis, quibus protoplastos deceperat, adhuc Adæ filios jugulat, et odio suæ ambitionis fraterna corda dissociat: ita ut quos unum patris femur tenuerat, jam Galliæ omnes non capiant, fraternis propectibus frater invideat, et quem monitis apostolicis sæpius etiam in durissimis casibus obsequentem sequi despexerat, hunc a sede apostolica sibi prælatum doleat, imo ut Cain fratris hostia, scilicet obedientia, stimulatus, contra fratrem fredens occurrat: fideles ejus fraudibus diversis inficiat, ad pejerandum terribilis Dei nomen impellat, pacem regni diuturno fratris studio radictam corrumpere gestiat, et lactatus a peccatoribus suis duntaxat complicitibus acquiescens, pedes suos ad malum currere faciat, madentibus adhuc campis Fontanicis, quos in juventa sua humano sanguine tinxerat, in senectute decrepita, minarum et cædis spirans, ad fundendum Christianorum multorum sanguinem pro sua singulari ambitione discurrat. Et qui amore fratris a sede apostolica obedientiæ suæ merito benedictionem sperare suumque piis operibus propagare debuerat, alterius regnum pervicaciter sibi suis armis subjugare desiderat, scilicet ut quos armis acquirit, ditione possideat, et colla vetustæ libertatis ingenua nova servitute prosternat. Quis hoc dilectissimi nobis, nisi antiquus humani generis adversarius, inter tales ac tantos fratres, quos nos pari spiritus amore complectimur, per suos satellites operatur? qui dum bonorum propectibus invidet, in agro sanctæ Dei Ecclesiæ semper zizania

seminare contendit. Quis hoc, charissimi, nisi diabolus operatur? qui Caroli virtutibus ab ineuntis ætatis principiis invidens, ejusque religiosum propositum longius propagari pavescens, levibus primo jaculis, quamquam frequentibus, læcessivus: deinde adversitatibus multis, quasi durissimis arietibus stimulavit; fideles ejus frequentissime rebellare suasit, in procinctu contra Northmannos pro Ecclesiæ Dei liberatione pugnanti, et inimicos crucis Christi usque ad ultimam deditionem constringere satagenti, senioris vestri utrinque animum ad invasionem relicti imperii suscitavit: ipsos familiares, ipsum postremo filium, ad ejus extinctionem hostiliter provocavit. Et ne quandoque ad imperium, quod ei constat non humano collatum beneficio, licet per nostræ mediocritatis ministerium, sed divino, pertingere potuisset, tota fraudulentæ suæ virtute prohibuit, tota consilii sui versutia debellare contendit. Sed Deus omnipotens, cujus providentia per mutabilium rerum principes mundi latitudo gubernatur et regitur, hunc flagellis erudiri voluit, deprimi penitus, sicut vobis est cognitum, nunquam permisit. Et afflictiones sanctæ suæ Ecclesiæ per eum specialiter, sicut divinitus revelatum fuerat, et nunc veraciter credimus, tandem aliquando revelare contendens, hunc, a decessoribus nostris, reverendæ scilicet memoriæ Nicolao et Adriano pontificibus, diu quidem desiderari voluit: tandem usque ad hæc periculosissima tempora, quibus a Belial filius pene tota vallatur Italia, misericorditer reservavit, angelicis ductibus vias ejus per invia loca direxit, frustratis insidiis ei compositis liberavit, paludes lubricas equitabiles reddidit, vada profundorum fluminum multis sæculis incognita transmeabilia demonstravit: ei elementis contra naturam cedentibus diffidentium corda perterruit: non solum sine sanguine, verum etiam cum magnis honoribus, hinc inde gaudentibus populis, Italiam penetrare permisit, et per apostolicæ sedis privilegium, cunctorum favoribus approbatum sceptris imperialibus sublimavit: ut qui per tot annos, communibus peccatis merentibus, pro defectibus sanctæ Dei Ecclesiæ diversis modis affligimur, per ejus sollicitudinis expertam prudentiam consolemur, per quem Gallicanarum Ecclesiarum status, et totius religionis vigor illis in partibus plausibiliter refloruisse cognoscitur. Hæc itaque hostis humani generis futura prospera præcavens, dilecti filii nostri Ludovici gloriosi regis vestri, si tamen filius dici meretur, qui apostolicæ sedis monitis per antecessores nostros perque nos ipsos prolatis, semper inobedientissimus, exstitit, si gloriosus dici debet, cui contra Christicolæ bella geri placuit, nullos habitura triumphos, si rex dici potest, qui semetipsum regere noluit, quo minus contra fratris absentiam ingloriosus pugnavisset, animos incitavit, ut neque divinam timorem præ oculis retinens, neque imminens sibi judicium provectæ senectutis agnoscens, neque sanguinis affinitatem fraterna pacta per-

pendens; sed neque Christianæ religionis disciplinam custodiens: tam decessorum nostrorum scripta quam recentia nostra monita religiosorum principum, et quod est mirabilis, contra consuetudinem tyrannorum veterum, prævipendit, et indictum sibi a nobis tempus cum mediantibus nobis cum fratre jure pacisceretur, præripiens, quantum in se fuit per vestram negligentiam sive condensationis audaciam, fratris absentis regnum pervasit, ac per hoc totius ecclesiæ Dei pulchritudinem maculavit, pacem corruptit, religionem fugavit, et ut cum Terentio compeñdiose dicamus, dum in alieno bonorum extortor et legum contortor apparuit, cunctis criminibus licentiam relaxavit. Nos etenim, quamvis illum, quem interim filiilitatis amore complectimur, B oppido reprehensibilem non negemus, vos tamen multo reprehensibiliores agnoscimus, qui in illis partibus sacerdotali magisterio præditi, et apostolatus nostri recentibus monitis instituti, dum ex officio vestro restitisse libere nunquam videmini, procul dubio consensisse probamini, et vos qui pastores dicimini; gregem vobis creditum quia non retraxistis, utique ad præcipitum provocastis. Et ubi est, quæsumus, quod vicem Christi in Ecclesia fungimur, si pro Christo contra insolentiam principum non luctamur; præsertim cum secundum Apostolum non sit nobis colluctatio adversus carnem et sanguinem, sed adversus principes et potestates (Ephes. vi). Ubi est quod episcopi dicimur, si de sublimibus ecclesiasticæ discretionis speculis gladium venientem non cernimus, cernentes ut devitetur annuntiare diffugimus? Enimvero sacerdotes non ad gratiam, sed ad pompam immerito dici cognoscimur, si quos docere debuimus sequi contendimus, si quos corrigere debuimus, saltem verbis pastoralibus non terremus. Hinc Dominus per Isaiam prophetam sacerdotum taciturnitates increpat dicens: *Canes muti, non valentes latrare (Isa. lvi)*. Hinc per Ezechielem sacerdotum negligentias arguit dicens: *Non ascendistis ex adverso, neque opposuistis murum pro domo Israel, ut staretis in prælio in die Domini (Ezech. xiii)*. Ex adverso quippe ascendere est, pro defensione gregis libera voce hujus mundi potestatibus contraire; et in die Domini in prælio stare est pravis decertantibus ex justitiæ amore resistere. Quod rursus per eundem prophetam deterret in-quiens: *Si non annuntiaveris iniquo iniquitatem suam, sanguinem ejus de manu tua requiram (Ezech. xxxiii)*. Quid ad hæc dicemus, fratres? Forsitan ideo vos excusabiles creditis, quia regem non arguendum, dicitis, sed monendum. Ad hæc apostolica tuba respondet: *Obedire oportet Deo magis quam hominibus (Act. v)*; et Paulus Timotheo: *Argue, obseca, increpa in omni patientia et doctrina (II Tim. iv)*. Item Tito: *Divitibus hujus sæculi præcipe non superbe sapere, neque sperare in incerto divitiarum suarum (I Tim. vi)*. Aut persecutionem quamlibet præcavistis. Sed a Domino jussum est ita: *Cum vos persecuti fuerint in una civitate, fugite in aliam*

(*Matth. x*). Aut mortem, quæ cunctis ultima pœna A
est, timuistis. Sed idem Redemptor noster in Evan-
gelio nos hortatus est dicens : *Nolite timere eos qui*
occidunt corpus, animam autem non possunt occi-
dere (ibid.).

Verum quia nihil horum, quia nec inferen-
dum vobis ab aliquo fuerat, timuistis, restat procul
dubio quia non solum secundum prohibitionem sedis
apostolicæ compatriotas vestros ab invasione regni
alterius sacerdotaliter non vetuistis, imo cupiditati
eorum vestri favoris conniventiam sociantes, quasi
pulvillos sub cubito eorum manuum, consuistis, et
illud Væ vobis propheticum maturastis, quo dicitur :
Væ his qui consuumt pulvillos sub omni cubito manus,
et faciunt cervicalia sub capite universæ ætatis ad
capiendas animas (Ezech. xiii). Quasi enim pulvillo B
cubitus, vel cervicalibus caput jacentis excipitur, dum
correctionis duritia peccanti subtrahitur, eique mol-
lities favoris adhibetur, ut in errore molliter jaceat,
quem nulla contradictionis asperitas pulsat. Sed hæc
rectores qui semetipsos diligunt, his procul dubio,
juxta quod beatus prædecessor noster Gregorius me-
minit, exhibent, a quibus se minus posse studio glo-
riæ temporalis timent. Quid igitur, fratres, si tamen
adhuc fratres dici meremini, qui sedis apostolicæ
salubria monita contemnentes pro Christo legatione
functis non estis, vobis agendum est, nisi ut tandem
aliquando cum sancta sede apostolica sentientes,
tam dilectum filium nostrum Ludovicum regem ve-
strum, quam paternis affectibus adhuc complecten-
dum decernimus, quam cunctos illius regni subditos,
voce libera moneatis, et ab invasione sive oppres-
sione imperii dilecti filii nostri Caroli semper Au-
gusti penitus compescatis? nunquamque de reli-
quo, sive blandimentis, sive terroribus, consen-
sum quemlibet favoremve præstetis ad funestum
prælium conferendum, et Christianorum sangui-
nem profundendum, si non vultis, amissis sacerdo-
tibus infulis, ab apostolica communione præsentia-
liter sequestrari, et perpetuis anathematis vinculis,
quod nunquam cupimus, obligari? Nam cujuscunque
sit gradus, ordinis, sublimitatis, sive professionis,
qui cum præsentibus legatis nostris. Joanne Sicu-
lensi, itemque Joanne Tuscanensi, venerabilibus
episcopis, quos vice nostra [*forte deest* mittimus,
HARD.] illas in partes ad examinanda simulque dif-
finienda canonicè sive legaliter, quæ hoc anno inter D
utrosque emergere, negotia, convenire in loco ab eis
designato, eisque satisfacere humiliter detrectaverit,
auctoritate Dei omnipotentis sanctorumque apo-
stolorum Petri et Pauli, nostræque mediocritatis, veniam
sibi deinceps noverit denegari; nec amodo commu-
nionis nostræ, ut verbis sanctissimi nostri præde-
cessoris utamur, futurum esse consortium, quisquis
esse noluerit disciplinæ. Optamus sanctitatem vestram
sedis apostolicæ monitis obsequentem semper in
Christo bene valere. *Recitata in synodo Ponti-*
gonensi.

XXIII.

AD COMITES IN REGNO LUDOVICI REGIS BAJOARIE
CONSTITUTOS.

(Anno 876).

Arguit eos quod Caroli regnum pervadere tentarint ;
monetque ut Ludovicum regem ab ea mente revo-
cent, et ut legatis, quos mittit, satisfacere non
detrectent.

JOANNES episcopus, servus servorum Dei, omnibus
gloriosis comitibus in regno Ludovici regis Bajoariæ
constitutis.

Ministerii nostri est universalis Ecclesiæ Dei solli-
citudinem, secundum beati Pauli apostoli sententiam
circumferre, et quid in qualibet mundi parte con-
gruat, sive non congruat, censoria gravitate pro-
mere, quatenus oves Dominicæ, quæ vocem pastora-
lis nostræ sollicitudinis cognoscentes, pastorum prin-
cipem humiliter audiunt, in ovile Dominum recogni-
tæ collocentur, et oves morbidæ, quæ pervicaciter
negligunt, ab ovili Dominico, ne sanas vicini peco-
ris contagio lædant, quia nimirum multa corporibus
transitione nocent per apostolicæ auctoritatis minis-
terium repellantur. Scriptum quippe est : *Si sepa-*
raveris carum avili, quasi os meum eris (Jer. xv);
et iterum : *Auferte malum de medio vestri* ; et Domi-
nus Evangelio præcipit ut si oculus, pes, vel manus
scandalum nobis generat, abscindatur atque projecia-
tur (*Matth. ix*) ; et illud post alia : *Si Ecclesiam non*
audierit, sic sicut ethnicus et publicanus (Matth.
xviii). Item Apostolus : *Si quis non obedierit verbo*
nostro per epistolam, hunc notate, et non commis-
ceamini cum illo (II Thess. iii). Quibus testimoniis
evidentissime provocamur, ut vos, quos contemptis,
apostolicæ sedis epistolis, regnum dilecti filii nostri
Caroli Christianissimi imperatoris contra interdicitum
nostrum, imo contra Dei omnipotentis timorem,
pervadere, sicut audivimus, pacemque sanctæ Dei
Ecclesiæ corrumpere tentavistis, a corpore totius
ejusdem Ecclesiæ, quam per antecessores nostros
perque nosmetipsos, vos suis epistolis commonentem
audire hactenus noluistis, sequestrari præsentialiter
debeat. Sed quoniam sanctæ sedis apostolicæ mis-
eratio vos interim filiorum dilectione complectitur, et
dissimulare peccata vestra magis quam punire vellet
cognoscitur, has iterum charitati vestræ sanctæ Dei
Ecclesiæ litteras destinamus, hortantesque instamus
ut divini judicii memores, et fraterni fœderis recor-
dantes, imminetentemque vestræ vocationis diem ul-
timum præcavescentes, fraudem diabolicam, per quam
mors introivit in orbem terrarum, effugiatis ; discor-
diam, quæ nutrit est cunctorum criminum quasi
venenum pestiferum declinetis : ne similes ei effi-
ciamini, de quo Salomon ait : *Homo apostata, vir*
inutilis, graditur ore perverso, annuit oculis, terit
pede, digito loquitur, pravo corde machinatur malum
et in omni tempore jurgia seminat (Prov. v). Pacem
et sanctimoniam, sine qua nemo videbit Deum, dili-
gatis : quoniam sicut pacifici sunt a Domino non
solum beati, sed etiam filii Dei vocati, ita Satanæ

sunt filii, qui pacem confundunt. Nam discordes A tandiu nullum boni operis Deo sacrificium immolant, quandiu a proximorum charitate discordant. Unde per Matthæum præcipitur : *Si offers munus tuum ad altare, et ibi recordatus fueris quia frater tuus habet aliquid adversum te, relinque munus tuum ante altare, et vade prius reconciliari fratri tuo, et tunc veniens offer munus tuum* (Matth. v). In qua Dominica præceptione pensandum est, quorum hostia respuitur, quam intolerabilis culpa monstratur. Cum enim mala præterita bonis operibus diluuntur, pensare debetis, o prudentissimi comites, quanta sunt mala, discordiæ, quæ nisi exstincta fuerint, bonum sacrificii subsequi non permittunt. Quis itaque, dilectissimi, vos ad tantæ discordiæ crimina nisi antiquus humani generis adversarius, provocavit ? qui ex angelo factus apostata bonæ messi semper zizania superseminare laborat. De cujus aviditate per apostolum dicitur : *Aversarius vester diabolus tanquam leo rugiens circuit, quærens quem devoret : cui resistite fortes in fide* (I Petr. v). Et certe *fides sine operibus mortua est* (Jac. ii) ; et beatus Paulus, collatis multis virtutibus, charitatem, quæ multitudinem peccatorum operit, prætulit dicens : *Sive prophetiæ evacuabuntur, sive linguæ cessabunt, sive scientia destruetur* (I Cor. xiii) ; et infra : *Nunc autem manent fides, spes, charitas ; tria hæc, major autem his est charitas* (ibid.). Unde bene per Joannem dicitur : *Deus charitas est, et qui manet in charitate, in Deo manet et Deus in eo* (II Joan. iv). Constat ergo quia qui in Deo non manet, in diabolo manet, cujus membra sunt omnes qui jurgia seminant, et ecclesiasticam disciplinam recusant, quibus veraciter dicitur : *Vos ex patre diabolo estis* (Joan. viii). Qui videlicet Caroli virtutibus ab ineuntis ætatis principiis invidens. ejusque religiosum propositum longius propagari pavescens, multis adversitatibus lacessivit, fideles ejus frequentissime rebellare suasit ; in bello contra Northmannos pro Ecclesiæ Dei liberatione pugnanti, eosque usque ad ultimam editionem compellere satagenti, senioris vestri, parentum quoque, sive vestrum animum ad invasionem relicti ejus imperii, sicut et modo fecisse dignoscitur, suscitavit. Ipsos familiares, ipsum postremo filium, ad ejus exterminium hostiliter provocavit : et ne quando ad imperium, quod ei constat non humano collatum beneficio, licet per nostræ mediocritatis ministerium, sed divino, per-

vos fecisse probamin, compulisset, si pacem regni, sicut vos facitis, temerasset. Nunc vero, cum divinitus præscitus et prædestinatus, non a semetipso, sed ab Ecclesiæ Dei filiis invitatus advenerit, sine sanguine sola sua benevolentia hujus Italiæ fortissimos sibi duces devinxerit, angelico munere vias suas per invia loca directas inspexerit, frustatis insidiis ei compositis divinitus liberatum se senserit, paludes invias sibi pervias factas inveniret, vada profundorum fluminum, velut alter dux Israeliticus, exercitibus suis pene sicca repererit, miramur et obstupescimus, cur eum a Domino prælatum non intelligitis vos, qui sensibiles estis, quem elementa insensibilia sensisse videntur. Miramur et obstupescimus, cur parricidalia contra eum arma sustollitis, quem ab ipsa sua infantia multis adversitatibus fatigatum vidistis, superatum vero protegente Domino minime cognovistis. Miramur, inquam, et obstupescimus, cur eum, quem obedientiæ suo merito vobis divinitus prælatum cognoscitis, non sicut revera imitabilem sequimini, sed sicut detestabilem, quantum in vobis est, persequi laboratis. Cum si exemplo illius obedientiæ vos sancta sedes apostolica sibi aliquoties devotiores cognosceret, benedictionis suæ vos et in hoc sæculo gratia debriaret, et in futuro ad hæreditatem regni cœlestis admitti suis continuis precibus impetraret. Sed quando sanctæ sedis apostolicæ debitam vos obedientiam servaturos putabimus, quos contra Dei omnipotentis ordinationem tam manifestis indiciiis rebellare videmus ? neque enim contra Carolum est murmur vestrum, sed contra Dominum ? cujus est regnum, et cui voluerit ipse dat illud, qui etiam per Solomonem dicit : *Per me reges regnant* (Prov. viii) ; item per doctorem gentium testatur dicens : *Non est potestas, nisi a Deo* (Rom. ii) ; et iterum : *Qui potestati resistit, Dei ordinationi resistit* (ibid.). Redite igitur prævaricatores ad cor, et quia mors non tardat, nolite differre de die in diem. Nolite socialia libella committere, nolite parricidales gladios in perniciem vestri sustollere. Nolite Fontanicum detestabile prælium revocare : quia sicut qui pro Ecclesiæ Dei defensione moritur, suo sanguine coronatur, ita qui contra Dei Ecclesiam pugnans ut refuga Christianitatis perimitur, procul dubio condemnatur. Nolite, charissimi, pro brevibus vitæ commodis æternæ remunerationis vobis januam claudere. Nolite pro rebus transitorii æternorum bonorum commoda præterire. Quia juxta beati Marci sententiam : *Nihil prodest homini si lucretur totum mundum, animæ vero suæ detrimentum patiat* (Matth. viii). Hujus rei gratia generalitatem vestram quam paterno affectu complecti volumus, his apostolicæ auctoritatis litteris identidem hortamur ac obstantamur ut tandem aliquando nobiscum pariter sentientes, tam dilectum nostrum Ludovicum gloriosum regem vestrum (si tamen filius dici meretur, qui apostolicæ sedis monitis semper inobedientissimus exstitit, si gloriosus dici debet, qui adhuc in senectute decrepita Christiani sanguinis effusionem

desiderat, si rex dici debet, qui neque vos, neque semetipsum regere valuit, quominus absentis fratris regni pacem corrumpere), quam cunctos vestri regni homines, vocelibera moneatis, et ab invasione sive oppressione imperii dilecti filii nostri Caroli semper Augusti funditus retrahatis; nunquamque de reliquo, sive blandimentis, sive terroribus, assensum quemlibet, favoremve præstetis ad funestum prælium inferendum, et Christianorum sanguinem, quod Dominus averterit, effundendum. Nam cujuscunque sit sublimitatis dignitatisve persona, quæ præsentibus legatis nostris, Joanne Siculensi, itemque Joanne Tuscanensi, venerabilibus episcopis, quos vice nostra [*Fortè deest* misimus, HARD.] illas in partes ad examinanda simulque diffinienda canonice, sive legaliter, quæ hoc anno inter utrosque fratres emersere negotia, convenire in loco ab eis designato eisque satisfacere humiliter detrectaverit, auctoritate Dei omnipotentis, sanctorumque apostolorum principum Petri et Pauli, nostræque mediocritatis, veniam sibi deinceps noverit denegari, nec amodo communionis nostræ futurum fore consortem, qui socius esse noluerit disciplinæ. Optamus gloriam vestram apostolicis monitis obsequentem semper in Christo bene valere.

XXIV.

AD UNIVERSOS GALLOS ET GERMANOS.

(Anno 876.)

De damnatione Formosi Episcopi, Gregorii nomenclatoris, et aliorum qui Romæ in synodo fuerant excommunicati.

JOANNES, servus servorum Dei, reverentissimis et sanctissimis confratribus nostris, archiepiscopis, episcopis, abbatibus, sacerdotibus, cunctisque iudicibus, et universo populo, per omnes Gallias et Germanias constitutis.

Zelo Christianæ religionis Ecclesia Dei quæ penes, nos est, instinctuque dilecti filii nostri serenissimi imperatoris, imo spiramine Spiritus sancti communita, pro diversis Ecclesiæ Dei refendis incommodis contra Gregorium nomenclatorem, et Georgium generum ejus, duo scilicet iniquitatis vasa contra excelsi Dei religionem pugnantia, tam præterito mense Februario præsentis nonæ indictionis, per Petrum venerabilem Forosemproniatem episcopum penes præfatum spiritalium filium lacrymabilem suggestionem deposuit: quam nostram quoque pontificalem suggestionem pridie Kalendas Aprilis die contra eosdem per semetipsam offerre curavit. Quapropter nos per Zachariam et Gaidericum venerabiles episcopos, et Christophorum sedis apostolicæ primicerium, eis suggestionum contestationem emisimus, admonentes atque jubentes ut si aliquid de conscientia suæ puritate confiderent, ad conductum venire studerent examen. At illi mollibus sermonibus et expusitis adventionibus se quidem venturos, et ad voluntatem nostram cuncta se emendaturos dixerunt, se de die in diem sub obtentu ægritudinis tandiu iudicii diem distulerunt, donec aut nos cum fidelibus Ecclesiæ Dei potuissent perimere, aut

A Saracenos, quos jam per suos familiarissimos, æque Saracenos, invitaverant, in Romanam urbem ad perditionem omnium intromittere valuissent. Cumque nos contra utramque fraudem, juvante Domino, præparatos vidissent, et imminere sibi iudicii statutum diem cognoscerent, decepti se cum quibusdam suis complicitibus, videlicet Formoso episcopo, Stephano secundicerio, et Sergio magistro militum, et Constantino nomenclatoris filio, quos non nostræ conventionis iudicium, sed reatus propriæ conscientia stimulat, contra salutem reipublicæ et regni dilecti filii nostri Caroli serenissimi principis, cui semper infideles fuerunt, et cujus protectioni semper detraxerunt, conspirantes nescimus quo prefecturi, noctis silentio cum adulterinis clavibus portas Urbis, quæ vocatur sancti Pancratii, aperuerunt, et cum suis complicitibus, cumque omnibus thesauris sanctæ Dei Ecclesiæ, Saracenis undique populantibus, diffugerent: portasque patentes relinquentes, multis margaritis fugiendi, et Saracenis ingrediendi aditum, nisi nos divina custodia tueretur, procul cubio reliquerunt. Itaque obstupescens in talibus, Dominicum et Grimoldum venerabiles episcopos ad evocandum eos direximus. Qui revertentes nuntiaverunt sibi a satellitibus suis fuisse responsum, nescire se quonam profecti fuissent. Iudicio sane in diem alterum protelato, cum eos iterum synodice simulque et legaliter quæreremus, et habere minime valeremus, cum omni Dei Ecclesiæ in basilica sanctæ Dei genitricis, quæ ad Martyres vocatur, synodum vocavimus, et post regulares allocutiones, sententias in eos protulimus, quarum exempla secundum ecclesiasticum morem generalitati vestræ dixerimus, ne vobis communicandi cum eis occasionis aditus tribuatur.

Quæ scilicet sententia ita se habet: « Formosum Portuensem episcopum, quia beatæ memoriæ domno prædecessore nostro papa Nicolao in Bulgarorum patriam destinatus, noviter in Christo regenerati regis animos adeo suis calliditatibus vitiavit, ut terribilibus sacramentis eum sibi obstrinxisset testatus sit, ne se vivo quemlibet episcopum a sede apostolica suscepisset, seque eidem terribilibus nihilominus juramentis, ut ad eum quantocius reverti debuisset, obstrictum fuisse professus sit, quique a nobis proficiscendi illuc licentiam, litteras et necessaria adjutoria impetravit: quoniam jamdudum per ambitionem a minori Ecclesia in majorem, videlicet sanctam sedem apostolicam, prosilire conatus, plurimos sibi consolatores effecit, et nunc per repertam hypocrisim retrorsum rediens, sine licentiâ vel conscientia nostra, propriam parociam deseruit, urbe discessit, et contra salutem reipublicæ, dilectique filii nostri Caroli a nobis electi et ordinati principis, cum suis fautoribus conspiravit: nisi amodo intra diem decimum, id est III Kalendas Maii præsentis nonæ indictionis, præsentiam suam nobis satisfaciendo monstraverit, auctoritate Dei omnipotentis, sanctorumque apostolorum principum Petri et Pauli, omni ecclesiastica communione privatum esse de-

cernimus. Decernitis et vos ita? Responderunt omnes: Decernimus: et nisi post diem decimum quintum, id est *iv Nonas Maii* præsentis *ix* indictionis, respiscens satisfactorius nobis occurrerit, auctoritate et iudicio sancti Spiritus qui semper effugiet fictum, omni sacerdotali ministerio penitus denudatum fore iudicamus. Judicatis et vos ita? Responderunt omnes: Judicamus. Qui si nec hujus dilationis miseratione commotus, humiliter se post diem 20, id est *vii Idus* ejusdem *Maii* mensis, præsentiae nostræ reddiderit, vel si in Ecclesia Dei in aliquo conturbare præsumperit, si contra hanc communem omnium nostrum sententiam agere vel resultare tentaverit, anathema sit a Patre, et Filio, et Spiritu sancto, nunquamque in ulla synodo recuperationis spem aut satisfactionis aditum sibi noverit reservatum. Gregorium nomenclatorem, Theophylacti quondam nomenclatoris filium, qui jusjurandum fidei suæ diverso modo corrumpens, puritatem sanctæ Dei Ecclesiæ suis fraudulentis, avaritiis, rapinis, cupiditatibus, simulque calliditatibus, per octo ferme annorum curricula maculans, summum Romanæ urbis pontificum, conjurantibus sibi dudum suis complicitibus, factiose præcipere affectavit; et de multis palam recitatis capitulis, tam primo penes dilectum filium nostrum Carolum serenissimum imperatorem, quam postea penes nos ad generalitatem sanctæ Dei Ecclesiæ, per nonnulla suggestionum capitula noxius diffamatur, et pro eisdem criminibus a nobis per Zachariam et Gaudericum venerabiles episcopos, et Christophorum primicerium sanctæ sedis apostolicæ, cum fratre et genero suisque complicitibus, juridice contestatus, examini se præsentandum fore, et cuncta quæ ecclesiis vel piis locis aliisque hominibus abstulerat, sub jurisjurandi interpositione restitutum promisit: deinde conventum nostrum de die in diem fraudulenter (usquequo nos vel fideles hujus ecclesiæ interimere, vel hostes Christiani nominis, id est Saracenos, quos per suos familiarissimos Saracenos jam invitaverat, intra Romanam urbem introducere potuisset) elusit; et præfinitum diem, quo canonicè sive legaliter audiri debuisset, fraudulenter præripiens, eum Georgio et Sergio magistris militum, nec non et Stephano secundicerio, aliisque suis complicitibus nocturno silentio portas hujus sacræ urbis, Saracenis circumquaque imminentibus, cum clavibus adulterinis aperuit, seque contra salutem reipublicæ simulque quietem imperii præfati filii nostri serenissimi Augusti, contra leges conspirando, fraudulenter proripuit, et cum omnibus pene thesauris Ecclesiæ Romanæ, dubium quo profecturus, excessit. Simulque Stephanum secundicerium, qui diversas ecclesias spolians per avaritiam turpisque lucri compendia tributa vetera multiplicavit, et in omnibus perversitatibus superius nominatis fratri complex et consentaneus existit. Necnon et Georgium Gregorii primicerii filium, qui germani proprii concubinam subripiens, eum veneno necavit: deinde post exse-

A crabiles Christianis incestus, vivente nepte sanctissimæ recordationis Benedicti papæ, cujus opibus de paupertate surrexerat, præfati nomenclatoris Gregorii filiæ se fornicario more commiscuit: propter quam pene publice jam dictam legitimam uxorem peremit. De cujus homicidio, et principibus adulterinos missos eruens, adjudicante conscio socero nefandus gener impunitus exiit. Quique post diversa homicidia, deprædationis et malignitatis genera, tam patriarchium, quam vestiarium sedis apostolicæ sibi commissum, non tantum auro, argento, vel palliis, verum etiam æreis signis, vasisque privavit: et in omnibus impietatibus socerum loquens, imo præveniens, Saracenis undique sævientibus, portas urbis cum eo fraudulenter aperuit, et cum sibi conspirationibus contra salutem reipublicæ demigravit. Simulque Sergium magistrum militum, Theodori magistri militum filium, qui reverendæ memoriæ domno Nicolao, cujus neptem in conjugium suscipiens, ita ingratus ac inhumanus exstiterat, ut vivente eo, et in extremis posito, eidem thesauros suos ad elemosynas faciendum cum præfatis suis complicitibus abnegasset. Quique eadem sua conjuge, propter quam de maxima paupertate convalescerat, derelicta, cum Valusindula concubina, præstito jurejurando ut eam nuptialiter sumeret, nuper effugit, et in omnibus iniquitatibus cum nominatis suis complicitibus conspiravit. Sed et Constantinam, præfati Gregorii nomenclatoris filiam, quæ primo per consensum patris, sub conditione jurisjurandi, legaliter Cessario Pippini potentissimi vestararii filio copulata, dein consumptis omnibus soceri sui divitiis, viventem et valentem sponsum suum sine ulla legali disquisitione deseruit, et ad Gratiani Gregorii magistri militum filii nuptias publice convolvit: postremum cum alio fugere gestiens incestum commisit, ex quo prægnans inventa prædictum Gratianum Gregorii filium maritum suum relinquens, cum rapacibus, perjuris, sacrilegis, mæchis, fornicatoribus turpiter fornicatura discessit. Nisi intra diem decimum, id est *iii Kalendas Maii* præsentis nonæ indictionis, præsentiam suam nobis præfati, videlicet Gregorius, Stephanus, Georgius et Sergius, simulque Constantina, congrue satisfaciens exhibuerint, auctoritate Dei omnipotentis sanctorumque apostolorum principum Petri et Pauli omni Christiana communione D privatos, cum omnibus communicatoribus et fautoribus suis, permanere decernimus. Et nisi post diem quintum decimum, id est *iv Nonas Maii* jam dictæ præsentis indictionis, simpliciter et humiliter nobis, imo Ecclesiæ Dei, sæpediti scilicet Gregorius, Stephanus, Georgius, Sergius, et Constantina, purificaturi occurrerint, eos auctoritate et iudicio sancti Spiritus, cum cunctis sibi communicantibus, perpetuo anathemate condemnamus. Hi vero qui ab omni se societate removentes ad unitatem sanctæ apostolicæ sedis redierint, communionis et benedictionis nostræ gratiam sibi reddendam esse confidant. »

His itaque auctoritate sancti Spiritus promulgatis,

omnium vestrum generalitatem his apostolicis litteris exhortamur ut has litteras per omnes diœceses vestras publice relegentes, et ad vicinas parœcias dirigentes, præfatorum depositorum, excommunicatorum et anathematizatorum consortia quasi venenum pestiferum declinetis, neque cum eis communicantibus in cibo, potu sive colloquio communicetis, scientes eum qui eis sive communicantibus eis se in oratione, cibo, potu colloquioque miscuerit, eadem excommunicationis et anathematis censura juxta canonicum capitulum modis omnibus obligatum, nunquamque a nobis sine digna satisfactionis pœnitentia sibi fore communicandum. Optamus sanctitatem vestram in Christo nunc et semper bene valere. Data xi Kalendas Maii. *Recitata in synodo Pontigonensi.*

XXV.

AD BOSONEM COMITEM.

(Anno 876.)

Agit gratias quod ejus opera legati ad imperatorem pervenerint, et illis injuncta confecta sint; eumque rogat ut quamprimum auxilia sibi contra Saracenos mittenda curet.

JOANNES episcopus BOSONI^a illustrissimo comiti.

Charissimæ tuæ nobilitati laudes Christo Domino referentes, gratias agimus, et hanc præconiis effe-
rentes in eodem Domino gratulamur, cujus gratia nostro fultus amore, missis apostolicæ nostræ sedis, facilem aditum perveniendi ad serenissimi domini Caroli semper Augusti spiritualis filii nostri præsentiam, non indebita tribuisti; et ut ea quæ sibi a nobis dicenda injuncta fuerant, aure suæ pietatis adverteret, et ad congruentem effectum perduceret, suadere curasti. Quod cum Deus omnipotens imperatoriæ magnitudini, ut fieret, inspiraverit; te tamen, qui nostri studii cooperatorem effectus es, admodum collaudamus, et, ut diximus, gratias tuæ industriæ referentes, et pro his et pro aliis retribuere tibi vicissitudinem non omittemus. Necnon et quidquid honori tuo congruit, vel ad utilitatem tuam crescere cognoverimus, incunctanter exsequi procurabimus, et grato amore, adjuvante Domino, quousque perficiamus, elaborabimus. Tu vero, fili charissime, sicut cœpisti, ad infidelium nostrorum, vel sanctæ Dei Ecclesiæ adversantium tyrannidem funditus abolendam magis [*Edit. Rom.*, magis ac magis] insiste, ut qui sanctam Romanam Ecclesiam in multis lædere non formidarunt, tali sententia, imo judicio percellantur, ut deinceps, quemadmodum es pollicitus, recuperationis locum nunquam invenient. Cæterum quia pro maxima necessitate hujus nostræ regionis, quam Saraceni pene totam depopulati sunt, audivimus imperiale adjutorium usque ad nos esse mittendum, gloriam nobilitatis tuæ nimium deprecamur, ut idem adjutorium, vel virorum exercitum, qui utinam jam præsens adesset, nullo modo illis in partibus moram pati permittat... veniendo

A eos exhorteris, ut urgeas, viriliterque quousque veniant pro Dei nostroque amore insistas: quia nisi citissime venerint, et nobis opem contulerint, pejora prioribus fieri formidamus; ac per hoc domino imperatori peccatum et damnum oriri poterit, et quia Ecclesia Dei, vel oves pascuæ ejus fortiter discerpuntur, ipsum nomen Christus, quod absit, in gentibus blasphemari. Data Kalendis Septembris, indictione decima.

XXVI.

AD LUDOVICUM REGEM.

(Anno 876.)

Disseniones inter ipsum et imperatorem scribit se non posse sedare, nisi alteram prius audiat partem: interea monet ut pacem cum omnibus, et præcipue cum imperatore, servet, et subjectos compescat.

B

JOANNES episcopus dilecto filio LUDOVICO glorioso regi.

Epistolas tuæ dilectionis, non quidem diversas suscepimus; quas relegentes, ea in eis reperimus quæ nisi nos charissimi filii nostri serenissimi quoque imperatoris Domni Caroli semper Augusti prior querela pulsaret, non solum admitteremus, verum etiam priusquam putares investigaremus, atque disscuteremus, rectique lance libraminis, quod et facturos nos, Deo juvante, confidimus, pensaremus. Sed quia una pars sine altera facile audiri non debet, interim deliberative non scribimus: quin potius gloriam tuam monemus, et auctoritate apostolica obtestamur, ut pacem cum omnibus et præcipue cum eodem imperatore conservans, tibi subjectos compescas, et ab omnibus scandalis vel factiosis conspirationibus usque ad nostram discussionem, sicut per te speramus, removeas. Quia nos, qui sacerdotum Domini matura volumus esse judicia, nec illi, nec tibi contra justitiam favere studemus. Hujus rei gratia, mediante sancti Spiritus gratia, per nostræ mediocritatis studium, quidquid illud est, volumus diffiniri; et quod adhuc suspendendum duximus, jam digna deliberatione, juvante Domino, dispensationis nostræ judicio terminabimus. Data Kalendis Septembris, indictione decima.

XXVII.

AD CLERUM ORDINEM, ET PLEBEM SANCTÆ UVALVENSIS ECCLESIE.

(Anno 876.)

D *Invehitur in quemdam Ecclesiæ Valvensis invasorem, legitimo adhuc superstite episcopo: laudat eos quod illum minime recipiendum duxerunt, simul præcipiens, ne unquam cum admittant, alioquin excommunicationis sententiam minatur.*

JOANNES episcopus clero, ordini et plebi sanctæ Valvensis Ecclesiæ.

Quia sollicitudinis nos, quam pro omnibus Dei Ecclesiis circumspiciendis suscepimus, maxima cura constringit, ut vel provisa vitia reseceamus, vel rumore comperta, ne pullulent, vigilemus; latere vos

^a De Bosone regino l. II Chron.; Aimoin, l. V, c. 14, 27, 32 et aliis in locis.

nolumus pervenisse ad nos quod quidam, calcata reverentia canonicæ disciplinæ, contra omne fas, imo contra legem ecclesiasticam, superstitie vestro pastore velit ausu temerario vestram sinceritatem corrumpere, et (quod dictu nefas est) plebem ipsam invadere, gregemque Dominicum, videlicet vosmetipsos, discerpere, schismata generare, et Deum in hoc ad iracundiam provocare : habens quasi auctoritatem sæcularium id peragendi, et quæ ab eis, imo a nobis, vivente vestro episcopo, jure dari non potest, nequiter exercendi. Quod tantum fieri prohibemus, tantumque detestantes abominamur, quantum contra canonicæ auctoritatis censuram, et contra divinæ legis traditionem, vel veterum Patrum exempla, tale quid attentari cognoscimus, ut vivente uno episcopo, ac superstitie consistente, alter vel non B petitus, vel qui peti non potest nec etiam debet, sedem viventis invadat ; et hanc vel sine nostro consultu, ut ita dixerim, expetat ; vel quia, sicut diximus, superest, in cor ejus ascendat talia cogitandi. Verum nos primum vobis gratias agimus quia, sicut didicimus, vestro episcopo fidem debitam conservantes, eumdem invaserem non recipiendum esse proposuistis. Deinde nostri apostolatus monitis omnium vestrum devotionem hortamur, præcipimus ac suademus, ut eodem vestro episcopo vivente, nulli unquam mortalium vos conati forte decipere, præbeatis assensum, ut vel in modico a fidelitate ipsius vestri episcopi qui nunc est, scilicet venerabilis Arnulfi, quoquo modo discedatis ; quin potius omnem honorem ac reverentiam juxta sacros canones ei impendere studeatis, ut magis (*Edit Rom.*, magis ac magis), unde vobis gratias referamus, habere possimus : scientes nos nullo modo in tali nefando opere consensuros, sed potius et factores et eorum consentaneos punituros. Verumtamen si hanc nostram legitimam obstestationem vos in aliquo ab his deviare cognoverimus, et habentes hanc nostram auctoritatem vos omnium ambitiosorum factionibus contraire minime senserimus, vel si quomodocunque talia facere tentanti vos consensum præbere saltem clanculo, quod absit, didicerimus, sciatis quia et vos anathemati submittemus, et illum pari sententia condemnantes, omne sacerdotalis officii ministerium, ut unquam nullis præsideat, ei perpetuo adimemus. Data, etc., indictione decima.

XXVIII.

AD QUEMDAM ^a.

(Anno 876.)

De Neapolitanorum duce ejus fratre queritur, qui suis monitis non parebat. Quare hortatur ut ab eo se separet ; alioquin cum eo ac cæteris fautoribus anathemati subjicietur.

JOANNES episcopus...

Multa per nos per decessoresque nostros reverendos pontifices duci Neapolitanorum, imo duci cæco-

^a Forte *Athanasium episcopum Neapolitanum*, ad quem nonnullæ infra scribuntur epistolæ : cujus meminit Leo Ostiensis, lib. 1, Chron. Cass. cap. 42. Fuit autem hic ne-

rum, missis et epistolis discurrentibus dicta sunt, quæ locum in ejus corde nullum penitus invenerunt : quia profecto viscera ipsius verba vitæ æternæ recipere renauerunt : Judeis enim Dominus dicit : *Qui ex Deo est, verba Dei audit ; propterea vos non auditis, quia ex Deo non estis (Joan. viii)*. Si quis, inquit, diligit me, sermonem meum servabit (*Joan. xiv*) ; ergo probatio dilectionis exhibitio est operis. Probatum igitur germanus tuus non diligere Deum, qui mandata ejus participando cum perfidis non custodit. Nam Joannes apostolus ait : *Qui dicit quia diligit Deum, et mandata ejus non custodit, mendax est (I Joan. ii)*. Sed nos postremo, nec etiam sic contempti, quæ ad salutem ejus et cunctorum pertinebant, negleximus : unde non angelus, non legatus quilibet (ut de Redemptore nostro propheticè dictum est), sed ad salvandos eos ipse per semetipsum apostolatus noster adveniens, quid est quod debuit facere, et non fecit ? licet ipse, ut cum propheta dicamus, conversus est in amaritudinem vitis alienæ (*Isa. v*), et sicut aspidæ surdæ, et obturantes aures suas, non audierit vocem incantantium (*Psal lvi*), id est prædicantium, nec mutaverit versutiarum suarum colorem, aut varietatem, instar Æthiopsis et pardi, quibus perfidorum Israelitarum Jeremias duritiam comparavit, unde merito abscissi sunt, ut de talibus Apostolus optat : *Abscindantur, inquit, qui vos conturbant, a Christo (Gal. v)*, id est a capite et corpore, quod est Ecclesia Dei vivi, columna et firmamentum veritatis. Ergo cum ita sit, prudentia tua moveri non debet, si inter tales officium cesset doctorum, sive torpenti desidia faciente rectorum, sive impœniteni exigente crimine subjectorum. Divino enim judicio, quamvis occulto, talia fiunt, sicut in libro beati Job legitur, cum de Deo inter alia fertur : *Ducit sacerdotes inglorios, et optimates supplantat, commutans labium veracium, doctrinam senum auferens (Job xii)* ; cujus sensus medulla concepta, procul dubio, scito quia in optionem unum et duobus a nobis tibi tribuitur : aut enim, secundum quod scriptum est, *Exiens exibis de medio ipsorum, et pollutum non tanges (Isa. lvi)* ; aut certe, quando cum talibus conversatus fueris, non poteris videri non talis, sed eris profecto illis pœna, sicut consortio similis. Nam Lot chaos Sodomis fugiens, cunctis necatis civibus, salvus singulariter redditur (*Gen. xix*).

D Sic Petrus fugiens, Herodis cateni ereptus, ad salvandas gentes eruitur (*Act. xii*). Sic Paulus, observante Damasci præposito, teneri intra claustra perfidorum noluit, in sporta per murum submissus (*Act. ix*), ad certaminis properat campum. Verumtamen ne sanguis eorum de manibus tuis divinitus requiratur, tanquam segnis desidisque speculatoris, qui videas gladium lupumque venientem, et taceas (*Ezech. iii*) : *Insta interim (ut Apostolus monet) opportune, importune : obsecra, increpa : nemo adpos et successor sancti Athanasii, cujus mentio est in Martyrologio Romano die 25 Julii.*

lescentiam tuam contemnat (II Tim. iv ; I Tim. iv). A est, citissimum consilium, confortante nos Domino, præparemus.

Qui si te audierint, lucrifacies fratres tuos ; sin autem, saltem tu salvans salva quantocius animam tuam, sciens procul dubio totius Hesperix præsules a nobis in proximo congregandos. Quibus generaliter imminentibus, tam perfido fratri tuo quam omnibus sectatoribus et fautoribus ejus perpetuo dicemus modis omnibus anathema, nunquam deinceps penitus dissolvendum : quod si evadere satagis, in nostrique affectus finibus inveniri, in nullo prorsus ab hoc nostro recedere præcepto patere vel hortatu. Gratias præterea referimus super his, qui per industriam tuam redempti sunt a Domino, quos redemit de manibus inimici : et scito nil te nobis acceptius oblatorum quam eos nimirum, pro quibus sanguis oblatus est Christi. Data quinto Idus Septembris, indictione decima.

XXIX.

AD LEONEM ET PETRUM EPISCOPOS.

(Anno 876).

Miratur eos ad se non reverti incursionibus Saracenum lacessitum : obtestatur ut quantocius redeant. Quod si vim ab aliquo patiantur, præcipit ut fortiter se gerant, et id sibi significant.

LEONI et PETRO episcopis.

Cum vobis innumerabiles hujus Dei Ecclesiæ necessitates non minus quam nobis sint cognitæ, pro quibus compescendis vos ad piissimum Cæsarem destinatos sub magna velocitate sensistis ; miramur vos tanto tempore nobis in tanto periculo constitutis, et Saracenum incursionibus undique laceratis, ad nos remeare usque hactenus neglexisse. Neque enim vos alicujus violentia magis quam vestra negligentia credimus retardatos, qui nescimus sub quibus argumentosis ingeniis, consiliis tamen a nobis anathematizatorum, ac fraudulentis, more corvi tempore diluvii ad mittentem se minime revertentis (*Gen. viii*), ita legationis vestræ usque nunc oblitus fuistis, ut a Papia per tot dies Romam repetere minime studeatis. Cujus rei gratia vos, auctoritate Dei omnipotentis, sanctorumque apostolorum principum, obtestamur, præsentialiter ad sanctam sedem apostolicam quæ vos misit, episcopatumque vestrorum sedes quantocius redeatis. Verum si, quod absit, juxta quod a nobis anathematizatorum satellites gloriantur quorundam violentis retinemi, et ad mittentes vos reverti non permitimini, præcipimus vobis auctoritate Dei et Domini nostri Jesu Christi ut, memores antiquorum sanctæ Romanæ Ecclesiæ legatorum qui nullis minis, nullis terroribus nullisque mortibus a suis legationibus discesserunt, præsentialiter auctoritate hujus epistolæ initium ad nos revertendi facere studeatis, et si permissi fueritis, statim ad nos revertamini. Si vero aliquis vos impedierit, violentia quam patimini cunctis Christicolis valeat propalari nobisque continuo revelari, quatenus in eo quod contra morem gentium apostolicæ sedis legatio ecce secundo naufragium passa

B

C

D

XXX.

AD BOSONEM COMITEM.

(Anno 876.)

Dolet quod sibi deprecanti auxilium contra Saracenos non tulerit. Significat Urbem magno in discrimine versari, cum ad eam oppugnandam fama sit magnum exercitum venturum : quare eum rogat ut quantocius opem ferat. Legatos ab eo detineri miratur.

JOANNES episcopus JOANNI BOSONI comiti.

Sæpe gloriam tuam missis et litteris hortari ac deprecari studuimus, ut manum auxilii porrigens, contra nefandos Saracenos hostiliter occurrere tandem satageret ; sed, proh dolor ! nil hactenus præsidii adipisci meruimus, adeo ut nec responsum, sicut nec de aliis quibusque necessitatibus, a nobilitate tua recipere hucusque noscamur. Quapropter nimis dolentes gementesque, iterum iterumque dilectionem tuam monemus, hortamur et obsecramus, ne differas ultra, nec patiaris populum Domini ab illis divinitus fulminandis Agarenis discerpi, qui operuerunt universam superficiem terræ, sicut locustæ, ita ut pene cunctis habitatoribus inde sublatis, et in prædam et gladium traditis, redacta sit in solitudinem et in cubilia bestiarum, et, quod est adhuc amplius formidandum, atque cavendum, certa relatione didicerimus, stolum amplissimum in proximo ad expugnandam urbem venturum, id est centum naves, ex quibus cum equis sunt quindecim grandes. Quod quam ingens malum et incomparabile sit si intente consideraveritis, advertetis, perditio enim istius urbis totius est mundi dispendium, imo et ipsius Christianæ religionis jactura. Et ideo, secundum quod et spiritalis filius noster semper Augustus necessario tuæ commisit industriæ, omnium cæterarum rerum curis omissis, hoc vos convenit toto considerare mentis intuitu, et ad auxilium nostrum non modicum exercitum quantocius destinare. Si enim vestrum divinitus roboratum nobis non porrigitis validum et amplum confestim auxilium, scitote nihil amplius remanere, nisi ut nobis a vobis desperatis dimissis, vobis etiam ab hac sancta Ecclesia nulla spes ultra remaneat. Porro si in præsentem necessitate nobis aptum et sufficiens præbueritis auxilium, et nihil differentes, populo Dei, beato Petro speciali prærogativa commisso, subvenire studueritis, scitote in omni opportunitate vestra tanto nos fore promptiores, quanto fuerimus redditi ab hoste securiores. Cæterum dilectionem tuam miramur legatos retinuisse, Leonem episcopum charissimum nepotem nostrum apocrisarium et missum apostolicæ sedis, atque Petrum æque episcopum, qui cum festinantes per vos ad divinitus protectum Augustum mitterentur, a vobis et tunc detenti sunt, et modo nihilominus non merito retinentur. Quod quia contra decus apostolicæ sedis, quod nunquam factum est, profecto non dimittemus, cum hinc certi fuerimus, inultum. Cum enim nos illos pro multipli-

cibus Ecclesiæ nostræ necessitatibus sub nimia A festinatione miserimus, a vobis, quem hoc non laet, non impediri, sed ad id celerius agendum vestris, sicut credidimus, potius debuerit fulciri subsidiis. Data at supra.

XXXI.

AD LANDULFUM EPISCOPUM CAPUANUM.

(Anno 876.)

Nuntiat legatos ad imperatorem rediisse; quem in episcoporum et optimatum conventu Romanæ Ecclesiæ jura recognovisse, præcipue vero terræ Capuanæ pactum suo juri commisisse scribit: ideo in ejus partes se venturum promittit.

JOANNES episcopus LANDULFO episcopo Capuano.

Sancta Romana Ecclesiæ, cujus Deo auctore præsidemus regimini, cunctis ab exordio sibi fideliter servientibus dignam in præsentī et in futuro sæculo solita est bonæ retributionis mercedem rependere; tibi nihilominus reliquisque fidelibus suis utroque modo, ob vestræ fidelitatis devotionem, quam illic positi plene cognovimus, per omnia maternis visceribus favebit in proximo, Siquidem nosse volumus tuæ religionis intentionem quoniam, Domino cooperante, Leone venerabili episcopo nepote nostro, ac sanctæ Ecclesiæ Romanæ eximio apocrisiario, aliisque nostris legatis, quos nuper direxeramus, a charissimo filio nostro Carolo imperatore Augusto reversis, vobis, utpote a secreto consiliariis nostris, ratum ducimus animi ejus, Deo inspirante, circa Ecclesiarum, præsertim Romanæ, quæ caput est omnium, exaltationem, affectum patefacere, omne sane jus potestatis antiquitus attributum capitulariter renovamus in conventu episcoporum ac optimatum^a, inviolabiliter concessit habendum. Inter quæ de terræ vestræ pacta, prout Christo duce voluissimus, statuere, nostro juri potestatique commisit, quatenus id quod pontificali ore nudis verbis diximus, operum ostendamus patratiōne, et ut pro animæ vestræ exhilaratione patrum notarice stylus scribentis loquatur. Parate hospitium, quia cum novo hospitum agmine Dei gratia in vestras partes sumus venturi. Frenum coercionis infidelibus, quantum valetis, imponite, fidelibus quoque futuræ in proximum spei sublevationem promittite; Domini Dei nostri sine intermissione, hortor, misericordiam deprecamini, nostrumque adventum spectate veraciter.

XXXII.

AD GUAIFERIUM PRINCIPEM SALERNITANUM.

(Anno 876.)

Ostendit se paratum esse firmare pactum quod fecerat; rogatque sibi ad ipsum eunti hospitium parari.

JOANNES episcopus dilecto filio GUAIFERIO^c glorioso principi.

Quia te non solum legatorum nostrorum inter relata fidelium circum Ecclesiæ nostræ Romanæ regimen, cui Christo præsidemus auctore, devotum

^a Hujus concilii et legatorum meminit Aimoinus, l. v de Gestis Franc., c. 33.

^b Locus, ut videtur, mendosus. HARD.

cognovimus, tuumque strenuissimum generum Pulcari præfectum, verum etiam cum pro liberatione totius patriæ, ut nobis a Christo cura commissa est, in vestras partes venissemus, pro certo fidelem reperimus: ideoque pactum quod petisti, ut promissum pontificali vera assertione a dilecto filio nostro Carolo imperatore Augusto, jure vobis firmandum, potestate per revertentes venerabiles legatos Ecclesiæ nostræ accepta juste ac legaliter ad futurum statuere sumus parati; simulque mihi et novo agmini comitatum volo præparetis, ut dixerim ita hospitium, fidelesque nostros incepta corroborate fidelitate, ac infidelibus, prout potestis, frenum redargutionis imponite, nostrumque adventum, Deo duce, sperate.

XXXIII.

AD GEILONEM ABBATEM TORNUTIENSEM EJUSQUE MONACHOS.

(Anno 877.)

Illorum omnia, vel regia, vel episcopalia privilegia, pontificia auctoritate sancit, anno Christi 876 quibus addit exemptionem ab omni cujuslibet antistitis jurisdictione.

Ex autographo in philyra, litteris uncialibus Gothicis descripto, longo pedes circiter duodecim, lato duos.

JOANNES episcopus, servus servorum Dei, GEILONI inelyto abbati, dilectisque filiis nostris in Tornutio monasterio, a spirituali filio nostro glorioso Carolo imperatore Augusto, sanctæ et intermatæ semperque virgini Dei genitrici Mariæ, atque pretioso confessori Christo Philiberto largito sub regula sancti Benedicti religiosa conversatione degentibus, nunc et futuris temporibus,

Quando ad ea quæ catholicorum imperatorum corda pontificalibus sunt monitis provocanda, ita ardenti desiderio, divina præveniente gratia, tam succendantur, ut ab eis ultro poscantur, tanto alacri et læto sunt animo concedenda, quanto et ea ipsa quæ cupiunt, si nolent facere, peti debuerant. Proinde juxta scripta petitoria filii nostri, præcellentissimi imperatoris Caroli, hujusmodi privilegium præsentis auctoritatis nostræ decreto, eidem venerabili monasterio vestris futurisque temporibus indulgemus, concedimus atque confirmamus: ut sicut ipse gloriosissimus filius noster, divino ductus amore, de villis ac facultatibus, seu stipendiis specialiter monachorum et ecclesiæ ornamentorum, vel luminariorum, ac matriculariorum, seu hospitum, atque pauperum usibus servata, vel emeliorata seu aucta ordinatione præcepto sæ auctoritatis firmavit privilegium quod venerabilibus fratribus ac filiis nostris episcopis illarum regionum fieri et confirmari fecit; ita sicut eodem privilegio atque præceptis, in primis filii nostri Caroli exinde factis continentur, perpetuo inconvulsa permaneant. Quamvis enim fama fuerit hoc tenuisse ad episcopatum Ma-

^c De Guaiferio principe Salernitano Leo episcopus Ostiensis libro 1 chron. Cass. c. 42 et 44.

tisconensem, nullaque ibi auctoritate qua teneri possit adjunctum longo interveniente tempore fuerit, melius multoque sanctius apostolicæ discretionis nostræ visum fuit ut monasticis utilitatibus in prædicto monasterio confirmetur, quam laicalibus sine aliqua acquisitione sanctorum locorum depopulationibus indulgeatur. Constituimus alia auctoritate beati Petri ut nullus regum, nemo antistitem vel abbatum, seu quilibet quacunque præditus dignitate, de his qui in præfato privilegio seu in præceptis ipsius filii nostri Caroli ex his quæ præmisimus factis continentur, vel in futuro, ab eo vel a quibuslibet aliis de proprio fuerint his specialibus usibus jure collata, sub cujuslibet causæ occasione sive specie, quidquam minuere vel auferre, sive suis usibus applicare, vel aliis quasi piis causis pro suæ avaritiæ excusatione præsumat concedere : sed cuncta quæ præfatis usibus monachorum et ecclesiæ ornamentorum, vel luminariorum, matriculariorum, hospitem et pauperum oblata sunt, vel offerri contigerit, perenni tempore inlibata et inconvulsa, ac sine aliqua inquietudine, eorum usibus pro quorum sustentatione gubernationeque concessa sunt, modis omnibus profutura permaneant. Hæc igitur omnia, quæ hujus præcepti decretique nostri pagina continet, tam vobis quam cunctis qui in eo quo estis ordine locoque successerint, in perpetuum conservanda decernimus. Salva in omnibus quæ hujus decreti pagina continentur, auctoritate et honore sanctæ Romanæ Ecclesiæ, et sedis apostolicæ privilegio. Placet etiam ut per futura tempora ipsi monachi ex scriptis habeant licentiam eligere abbatem. Si quis autem temerario ausu, magna parvaque persona, contra hoc nostrum apostolicum decretum agere præsumperit, sciat se anathematis vinculo esse innodatum, et a regno Dei alienum, et cum omnibus impiis æterni incendii supplicio condemnatum. Qui autem verus custos et observator hujus confirmationis extiterit, benedictionem et gratiam et cælestem misericordiam a Domino consequi mereatur. Scriptum per manum Anastasii notarii regionarii et scriniarii sanctæ Romanæ Ecclesiæ, in mense Octobrio, indictione decima. Bene valete.

Subscriptum Idus Octobrias, per manum Christophori primicerii sanctæ summæ sedis apostolicæ, imperante domino piissimo principe Augusto Carolo, a Deo coronato, magno imperatore anno primo, et post coronationem ejus anno primo, indictione decima.

XXXIV.

AD ABBATEM ET MONACHOS HERENSES.

(Anno 876.)

Approbat donationem monasterii S. Porciani illi factam.

JOANNES episcopus, servus servorum Dei, GEILONI religioso abbati venerabilis monasterii sanctæ Dei genitricis, semperque virginis Mariæ dominæ nostræ, et S. Filiberti, ac per te eidem venerabili monasterio in perpetuum.

Convent apostolico moderamini pia religione pol-

lentibus benevola compassione succurrere, poscentium animis alacri devotione impertiri assensum. Ex hoc enim luci potissimum præmium a conditore omnium Domino promeremur, dum venerabilia loca opportune ordinata, ad meliorem fuerint sine dubio statum perducta.

Igitur omnibus sanctæ Dei Ecclesiæ fidelibus et nostris, præsentibus et futuris, notum fieri volumus qualiter reverentia tua per Adalgarium sanctissimum episcopum sanctæ Æduensis Ecclesiæ nostro suggestit apostolatui, observans quod abbatiam quæ vocatur S. Portianus, quamque piæ memoriæ Carolus imperator, spiritualis scilicet filius noster, ob sui perennem memoriam, per præcepti seriem in eodem venerabili monasterio conferens largitus est, nostri apostolici privilegii auctoritate confirmaremus.

Nos autem, considerantes hanc petitionem salubrem fore et eidem venerabili monasterio, cui præesse dignosceris, stabilimentum consistere, præcipue cum omnia pia loca proprium habere optemus, inclinati petitionibus tuis, a præsentis nona indictione præfatam abbatiam cum omnibus rebus suis mobilibus vel immobilibus, sibi juste et legaliter pertinentibus, quemadmodum ex prædicto eodem Augusto concessum est, per hoc apostolicum nostrum privilegium in sæpe dicto venerabili monasterio confirmamus, et perpetually stabilimus, et ad mercedem nostram roboramus; ita quoque apostolica auctoritate munientes decernimus ut nullus episcoporum ad negotia divina illuc, aut pro alia re peragenda, nisi a te successoribusque tuis abbatibus fuerit invitatus, ire pertentet; imo ne judiciaria potestas quamcunque vel molestiam aut destructionem quamlibet pergens facere audeat, quam secundum ipsius venerabilis monasterii ritum, et prædicti Augusti concessionem, nec non et hanc apostolicam concessionem et confirmationem ab omnibus Christi fidelibus observandam sancimus.

Si quis autem cujuslibet dignitatis homo contra hoc nostrum apostolicum privilegium, quod non credimus, in toto vel in parte ire præsumperit, ac quod a nobis salubriter sancitum est, in aliquo frangere ausus fuerit, auctoritate Dei omnipotentis, et beati Petri apostoli, atque nostra, sciat se propria communicatione privatum; et nisi cito resipuerit ac canonicæ sanctioni obediit, anathemate perpetuo condemnatum; qui vero custos et observator extiterit, benedictionem et gratiam a Domino Deo nostro consequi mereatur.

Scriptum per manus Anastasii notarii regionarii et scriniarii sanctæ Romanæ Ecclesiæ in mense Octobri, indictione nona. Bene valete.

Datum Idus Octobri per manum Christophori Primicerii sanctæ summæ sedis apostolicæ. Imperante Domino piissimo Augusto Carolo a Deo coronato magno imperatore, post consulatum ejus anno primo, indictione nona.

XXXV.

AD EPISCOPOS PROVINCIÆ BITURICENSIS.

(Anno 876.)

Ut Frotario tanquam metropolitano suo deinceps obediant.

JOANNES reverentissimis et sanctissimis fratribus nostris episcopis per Bituricensem provinciam constitutis.

Quia Burdigalensem urbem, sed et totam pene provinciam quorundam vestrum litteris, sed et Leonis apostolicæ sedis apocrisiarii [*Edit. Rom. addit, sanctissimorum nostrorum*] expressa relatione didicimus diversis cladibus, sed præcipue iucursibus Nortmannorum deletam, et in solitudinem partim gladiis partimque captivitate deductam, necessaria rerum, ut cum sancto papa Gelasio decessore nostro dolentes gementesque fateamur, dispositione constringimur, et apostolicæ sedis moderamine convenimur, sic canonum paternorum decreta librare, et retro præsulum decessorumque nostrorum præcepta metiri, ut quæ præsentium necessitas temporum pro instaurandis ecclesiis relaxanda deprecit, adhibita consideratione diligenti, quantum potest fieri, temperemus Ecce enim [*Edit. Rom. addit, ne*] de civitate ad civitatem episcopi trasmigrent, sancti canones provide sanciant. Sed si huiusmodi sanctiones sine ulla discretione vel dispensatione ducimus observandas, nullam compassionem fratribus exhibemus, quos gentilium gladios passos causa fidei Christianæ servandæ videmus egentes, angustiatis, affictos, hac illacque palantes incedere; præsertim cum nonnulli eorum ita sint Dei gratia illustrati, ut non solum scientia, sed et moribus; non solum verbo, sed et exemplo plurimos valeant erudire. De quorum numero quia Frotarius Burdigalensis dudum antistes, ut testatur vestra fraternitas, exstat, necessario duximus eundem virum alii Ecclesiæ præponendum et incardinandum, Bituricensi videlicet, quæ et vacans esse nobis denunciata est, et tanti viri digna regimine: ne per minus idoneum rectorem salubre salvandarum animarum deest ei præsidium, et nos et contra ingentis culpæ involvamus annexu, si tanto urgente discrimine, tantæ minus consulamus Ecclesiæ, propugnatori hanc probali minime committentes. Prioribus itaque manentibus regulis inconcussis, quæ ubi nec rerum, nec temporum urget necessitas jure convenit observari, vacante sede, Frotarium fratrem et coepiscopum nostrum in sede Bituricensi præficiendum ordinavimus sacerdotem: ita ut in ea incardinatus, et quodammodo auctoritatis apostolicæ privilegio radiceatus, cætera metropolitana Bituricensis Ecclesiæ ac dioceseos jura tanquam Deo contemplante obtineat, dispenset et ordinet, omni posthac querimonia invidorum prorsus ablata. Cui vos tanquam proprio metropolitano convenit obedire, et competentem exhibere, secundum pristinum morem, reverentiam et honorem. Sane latere vos nolumus, sic nos ista interveniente non modica barbarica necessitate nunc concedere,

A ut tali necessitate remota, consuetudinarie ulterius non requiratur, quod removeatur etiam illud quod necessitas impetraret. Optamus sanctam fraternitatem vestram in Christo nunc et semper valere. Data VII Kalendas Novembris, indictione decima.

XXXVI.

AD BITURICENSES.

Ut Frotario burdigalensi archiepiscopo, cui tandiu Bituricensem Ecclesiam committit, quandiu pagani Burdigalensem diocesim obtineant, omnes obediant.

JOANNES episcopus clero, et plebi, et ordini sanctæ Bituricensis Ecclesiæ.

Suggestionis vestræ relegendæ epistolam, quod ab apostolatus nostri auctoritate de confratre nostro Frotario reverendo archiepiscopo postulant, hoc nos Baliorum testificationibus, et præcipue serenissimi semper Augusti, spiritualis quoque filii nostri relatione comperimus; sed et legatis apostolicæ sedis, Leone videlicet venerabili episcopo, apocrisiario et missos sanctæ Romanæ Ecclesiæ, seu Petro æque venerabili episcopo, revertentibus, didicimus pene totam provinciam Burdigalensi metropoli pertinentem, sicut ab his qui causam illam noverunt, iidem nostri legati discere potuerunt, ita esse paganorum persecutionibus desolatam, ut non solum ipse confrater noster illic lucri aliquid subjectis conferre non possit, verum etiam habitatio fidelium inde subtracta consistat. Quapropter quia eundem virum Frotarium reverendum archiepiscopum probis moribus actibusque præclaris, et ad lucrum animabus hominum conferendum idoneum esse comperimus, ne talis tantusque vir otio, quo prodesse aliis valeat, minime vacet, ejusdem sanctæ Bituricensis Ecclesiæ, cui subestis, ei pastorem curam apostolica auctoritate committimus, et in ipsa eum incardinandum necessario esse censemus. Cui vos ita decentem obedientiam et canonicam subjectionem humiliter exhibete, utpote revera metropolitani jura tenenti, proprio rectori et vestro antistiti convenit, et ex nostra apostolica auctoritate diffinitum advertitis, et ecce mandatum habetis: quatenus de bono vestræ obedientiæ nobis Deo gratias referentibus, et vobis reverentia competenti ipsum præfatum archiepiscopum excolatis; et ille vobis, tanquam pro vobis rationem Domino redditurus, modeste præesse studens, ut dilectos filios amplectatur. Porro sciatis quia sic ista non modica interveniente necessitate barbaro modo concedimus, ut tali necessitate remota, removeatur etiam id quod necessitas imperat. Data v Kalendas Novembris, indictione decima.

XXXVII.

AD CAROLUM CALVUM IMPERATOREM.

(Anno 876.)

Imperatoris precibus, cum Burdigalensis provincia pagani esset devastata, Frotarium Burdigalensem archiepiscopum transfert in Ecclesiam Bituricensem.

JOANNES episcopus CAROLO imperatori.

Petitionem vestram, filiorum charissime, quam non obnegando sed dispensando dudum distulimus,

nunc nos ad votum nostrum ob id vel maxime, A Christo præduce, perduxisse gaudemus quod et vestram gloriam perseverantem testificatricem cognovimus, et provincialium præsulum consenteneas probationes probavimus, et legatorum nostrorum subtilissimas disquisitiones advertimus. Quocirca, licet nos multis canonicis testimoniis provocati petitionem vestræ devotionis implere magnopere molleremur, et solius majestatis vestræ testimonio super exterminio Burdigalensis provinciæ credere nimine cunctaremur, tamen quia pietatis vestræ testimonio comprovincialium quoque præsulum litteras convenire, sicuti rebamur, nuper cognovimus, secundum pietatis vestræ religiosissimum libitum, Burdigalensis diocessis episcopum, fratrem scilicet nostrum Fro- B tarium in Bituricensem Ecclesiam cardinalem fieri decernentes, metropolitanæ dignitatis privilegio iterato munire curavimus; etudiri vestri solertiam, quo semper idoneos Ecclesiæ viros quadam naturalis ingenii nobilitate deligitis, admirantes, congruas litteras, his quorum interest, ex auctoritate sedis nostræ direximus, atque magnanimitatem vestram, quam istius religiosi negotii circa nos incentricem cognovimus, eam nihilominus executricem fore nec immerito delegamus. Quatenus propter Deum, Cujus Filii pretioso sanguine tota per mundum redempta consistit Ecclesia, sic istius necessariæ dispensationis instituta custodiat, ut a paternis regulis constitutis antiquitus in parte altera nunquam omnino discedat. Præterea, quod filiolitatis vestræ petit industria, ut quorum suggestionibus dudum vestra sit dilata petitio detegamus, omnino sciatis, G quia nos licet indigni simus, tamen quoniam per consequentiam priorum nostrorum pontificum maturo cogimur esse judicio, causam tantæ deliberationis ideo non facile tunc deliberandam credidimus, ne diffinisse, quod Deus averterit, minus ordinabiliter videremur. At postquam Deus omnipotens petitionem serenitatis vestræ comprovincialium præsulum testimonio decoravit, imo testimonia præsulum pietatis vestræ suffragio confirmavit, nos religiosam petitionem vestram complevimus, et suggestionibus fratrum coepiscoporumque nostrorum manus porreximus, et Ecclesiæ Dei tantis necessitatibus consulentes, de thesauro pontificalis pectoris ita vobis protulimus, ut a doctrinis deviasse veteribus nullo modo videamur. Data ut supra

XXXVIII.

AD CAROLUM CALVUM IMPERATOREM.

(Anno 876.)

Laudat eum de judicio in Emmenum prolato, et hortatur ut cum illo clementer agat.

JOANNES episcopus CAROLO imperatori,

Super judicio vestro in Emmenum prolato, o rectissime imperator, cum cælo tota terra lætatur. Scriptum est enim: *Lætabitur justus cum viderit vindictam (Psal. LVII)*. Cur autem decimus lætatur,

^a Post verbum *delinquentibus* additur in edit. Rom. *Vassalum Vestrum qua accepta duntaxat exhibitio quam judicii, etc.* MANSI.

cum super judicio [*edit Rom., judicia*] Salomonis scriptum sit: *Quia audivit omnis Israel judicium quod judicasset rex et timuerunt regem, videntes sapientiam Dei esse in eo ad faciendum judicium (I Reg. III)*. Super quo videlicet judicio sentiendum merito ducimus quia lætati quidem benigni, tristati vero sunt omnino maligni. Ergo et hic ita datur intelligi, quia nimirum super judicio vestro lætantur justis, deterrentur injusti. Nam et omnipotens Deus, cujus et vos judicium æmulamini, terribilis peccatoribus et blandus et justis. Quia igitur super Emmeno jam exhibuistis severitatem judicii, quæsumus exhibere de cætero pietatis insigne. Imposuistis in humeros ejus onus austeritatis, adhibete jam nunc id removemtem digitum lenitatis. Memento quia hunc vobis cum Petro Paulus dilectis suis, sicut Philemoni quondam Onesimum remittit (*Phil. I*), implorans et obsecrans, quatenus eum ut sua viscera suscipiatis. Quia etsi fortassis ad horam aliquando quidem vobis inutilis, exemplum non bonum cæteris tribuens, visus, est: nunc autem et vobis, et nobis, et plurimis utilis est, longanimitatis formam et patientiæ cunctis ostendens. Rogamus ergo ut penes vos non sibi tam suus obsit excessus, quam fidei et amoris erga vos habiti prosit affectus. Et quia noxam propriam et pœnam indictam sibi confiteri non reuit, animadversione remota quam meruit, patronos vestros, et sanctos scilicet primos apostolos se proficue adisse et salutasse de reliquo sentiat, et de tanto sibi collato munere lætetur et gaudeat, ut ubi abundavit peccatum, superabundet, secundum Apostolum, gratia (*Rom. v*). Data pridie Kalendas Novembris, indict. decima.

XXXIX.

AD IMPERATOREM ET IMPERATRICEM.

(Anno 876.)

Pro Madelgero qui Odelricum occiderat.

JOANNES ipiscopus ad imperatorem et imperatricem.

Dum non minus pro misericordiæ intuitu delinquentibus ^a exhibendo, quam judicii severitate in improbos exercenda, omnipotens Deus gloriam serenitatis vestræ imperiali voluerit sublimare decore, dignum profecto esse rati sumus pastorali cura fungentes apud majestatis vestræ excellentiam pro multorum salute, vel vitæ indulgentia, præcipue illorum qui diabolico licet instinctu nefanda committentes, ad apostolorum principum Petri et Pauli fautorum vestrorum limina, divina tamen pietate commoti, venire festinant, et misericordiam humili prece implorant, toto mentis annisu intercedere, atque pro viribus consolationis opem in quantum fas est petentibus impartiri clementer. Unde pro hujus viri, Madelgeri videlicet nomine, qui adversario incitante quemdam hominem Odelricum vocabulo peremit, salute, membrorum omnium integritate, et rerum suarum restitutione, majestati vestræ suggestimus, filiorum charissime, et pro amore Dei et Domini nostri Jesu Christi, sanctorumque apostolorum, quorum limina

præfatus Madelgerus adiit, nostræque paternitatis, quam sincerissimam erga nos habetis, dilectione precamur, quatenus gratiam vestram plenariam ei reddere non dedignemini, eoque cum vestræ serenitatis respectu accepto, pro suis valeat excessibus poenitentiam fructuosam accipere, qua commissi possit piaculi noxias sordes abluere, ut spiritus salvus sit in die Domini, de omnibus ultricem dantis vindictam. Nam pro tanti itineris labore durissimo, quem veniendo perpessus est, sicut credimus, aliquantulum de peracto scelere indulgentiam meruit, ejus utique intercessionibus adjutus, cui dictum a Domino constat: *Tibi dabo claves regni cælorum. Et quodcunque ligaveris super terram, erit ligatum et in cælis; et quodcunque solveris super terram, erit solutum et in cælis* (Matth. xvi). Quod cum ita sit, precamur etiam, ut eum cum parentibus ejus qui defunctus est, paciscere jubeatis, ne majus deinceps malum quo, multorum animæ noceat, perpetretur. Data *ut supra*.

XL.

AD EPISCOPUM CARNOTENSEM.

(Anno 876.)

Pro Madelgero qui Odelricum occiderat.

JOANNES episcopus reverentissimo GISLIBERTO episcopo sanctæ Carnotensis Ecclesiæ.

Dilectionis vestræ reverentiam spiritualibus pollere virtutibus procul dubio arbitrantis, his apostolatus nostri litteris convenire, ac pro præsentè viro Madelgero, qui suadente adversarios quemdam hominem Odelricum nomine gladio peremit, unde divina inspiratione compunctus ad limina sanctorum apostolorum principum Petri ac Pauli, per longa itinera spatia pro ipsius delicti abolitione venire curavit, petere studemus, ut pro amore Dei, et eorum ad quorum sacratissimas ecclesias venit, et pro suis excessibus Deum deprecatus est, necnon et pro nostræ paternitatis dilectione, illi omnes res proprias atque beneficium cum propriis honoribus quos abstulistis, cum plenaria gratia reddere non dedignemini, sicuti dilectionis nostræ consortium et charitatem circa te cupis habere sinceriter illibatam. Data *ut supra* ^a:

XLI.

AD ADALARDUM EPISCOPUM VERONEMSEM.

(Anno 876.)

Commendat eum ob præclaras virtutes, et jubet ut Romam ad concilium veniat.

JOANNES episcopus ADALARDO episcopo Veronensi

Advertit plane prudentia tua quanto et quali circa se apostolatus noster flagret affectu, cum tuæ causæ profectionis non modicum sumpserimus laborem, idoneum te Christi sacerdotem merito arbitantes

^a In edit. Romana post hæc additur fragmentum, ut apparet, alterius epistolæ: « Gloria magnitudinis vestræ cognoscat quia Roffredus gloriosus comes monachus sancti Amantii B. Petro apostolorum principi (*hic aliquid deest*) tribuit. Cujus quoniam quasdam res Umfredus comes dicitur abstulisse, pietatis vestræ gloriam supplicamus ut pro

A futurum, et spiritualem potius quam sæculi gloriam sectaturum, cum et ipsa nimirum nobilitatis suæ insignia, et sapientiæ specula, talia de te speranda tribuerunt; quod quia vindicare sibi virtutum nisibus et probitate morum sanctitatem tuam comperimus, Deo innumeras gratias valde gratulanter retulimus, et in hoc, quia, secundum Apostolum, *spes non confundit* (Rom. iii), experimenta didicimus: et ideo in proximo, causa ecclesiasticæ simul et imperialis opportunitatis, certorum congregaturi episcoporum concilium, dilectionem tuam tanto conventui jubemus adesse. Accinge igitur sicut vir lumbos tuos, et assume tibi pennas sicut columba, et vola, et veni, et requiesce in sinu apostolicæ dilectionis, ita ut pridie Kalendas Decembris, præsentiam tuam liminibus apostolicis et nostris exhibeas prorsus obtutibus. Porro si hoc impossibile asseris, viii Kalendarum Januariarum quod hortamur et jubemus expleri, si duntaxat ab apostolicæ sedis communione renuis prorsus arceri: dignum enim non est ut tantæ sapientiæ vir tanto procul cœtui sit. Optamus sanctitatem tuam in Christo bene valere. Data iv Nonnas Nevembris, indictione decima.

XLII.

AD CAROLUM IMPERATOREM.

(Anno 876.)

Laudat quod sedis apostolicæ legatos benigne exceperit, rogatque ut Ecclesiæ Romanæ prædones, qui missorum ipsius judicium latentes effugerant, requiri et coerceri jubeat.

JOANNES episcopus CAROLO imperatori.

Innumeras omnipotentî Deo grates et laudes referimus, qui cor pietatis vestræ, quod in manu sua consistit, tanta Spiritus sancti gratia replere dignatus est, quanto sollicitius vos sacras aures ad perfectum Ecclesiæ nobis commissæ divinitus inclinantes, et apostolicæ sedis legatos, Leonem videlicet apocrisarium et missum sanctæ Romanæ Ecclesiæ, seu Petrum, venerabiles episcopos, nostrosque dilectos, ea benignitate qua soliti estis, et eo amplius suscepistis: et illa quæ vobis pro statu ac exaltatione sanctæ Dei Ecclesiæ suggesserunt, ad efficacem finem provenire jussistis. Vere enim, filiorum charissime, cor vestrum in manu Dei est, quia ejus consultu universa disponitis, et sapienter imperium vobis collatum moderari studetis: quia ex utero matris crevit vobiscum sapientia, et rectitudo fuit dilecta vestra amica. Et quia præconiorum vestrorum humana lingua fari non sufficit multitudinem, ad illa quæ de infidelibus nostris et vestris peracta sunt epistolariter adeamus. Vestris quidem, benignissime imperator, apprime eruditus viris et Deum

amore sanctorum apostolorum principum easdem res reddi præfato monasterio presentaliter faciatis quatenus fructus vestræ mercedis maneat in sæculum sæculi. Data ut supra. * MANSI.

timentibus, ^b Ansegiso videlicet reverendo archiepi- A
 scopo, et Adalgario venerabili episcopo, communi-
 bus quoque fidelibus nostris, juxta quod petieramus,
 pro honore atque utilitate sanctæ matris vestræ Ec-
 clesiæ Romanæ a vobis directis, Romam pervenien-
 tibus, et quantum vobis justitia placeat, luce clarius
 agnovimus, et de affectu filiorum, quem erga nos
 conservatis, in Domino gratulati sumus : sed de
 infidelibus sanctæque Romanæ Ecclesiæ hostibus,
 quos pro multis sceleribus ac pravitatibus suis ovile
 Christi non recipit, huc illucque latitantibus, et ne-
 fandissimos actus suos tegere molientibus, non ut
 oportuit, neque sicut vestri voluerunt legati, de illis
 potuit adimpleri. Nam ut ita fateamur, a sibi simi-
 libus infidelibus vestris et inimicis nostris, quibus-
 dam scilicet marchionibus, quos iidem vestri legati B
 narrabunt, occultati et effugati, nec ad se percus-
 tentes reversi sunt, nec alios suæ malitiæ inquina-
 mento contaminare desistunt. Proinde clementiam
 vestræ celsitudinis imploramus, et per futurum Dei
 judicium adjuramus, ut eosdem sanctæ Dei Ecclesiæ
 hostes atque prædones, sacrilegos quoque sive ty-
 rannos, ac per hoc a Christi collegio synodice se-
 questratos, studiosius requiri jubeatis, et ad lugenda
 mala quæ imprætermisæ hactenus operati sunt,
 sicut jam decrevistis, exsilio deputetis. Quia si ipsi
 qui tantum Dei Ecclesiam macularunt, impune jam
 vestram sanctionem diffugerint ; vel si, quod eve-
 nire non debet, in vestro imperio quibuscunque,
 quod turpe est dicere, contra vestram voluntatem
 eis favorem præstantibus, tam absolute discurrer-
 rint ; totum idem vestrum imperium coinquinabunt
 et omni Christianitati dispendium generabunt, quia
 cum sint ipsi oves morbidæ, totum gregem conta-
 minant, et erunt novissima illorum pejora prioribus.
 Ideoque major morbus majori medicina curandus
 est ; ne si non debita vel quali decet austeritate
 vulnera magnum foretorem dantia radicibus resecata
 fuerint, totum corpus Ecclesiæ tabescat, et nobis
 hæc sustentibus ministerium nostrum exercere
 non liceat. Non enim Stephanum et Sergium ad nos
 fraudulenter venientes recipere noluimus, sed eos
 ad vestram venire jussimus majestatem. Cæterum,
 fili charissime, thesaurus Ecclesiæ nostræ, ab eis-
 dem nefandissimis raptos ac fraudatos, ita sciatis ab
 ipsis etiam celatos, ut per eos qui hic de suis satel-
 litibus remanserunt, inveniri non possint ; illos vero D
 qui noverunt ubi eos recondiderint, ne detegi pos-
 sent, apud se callide retinent, et nisi ipsi capti fue-
 rint, ubi sunt occultati nos nostrosque penitus latet,
 Verumtamen quid vel quantum ab uno et quan-
 tum ab alio, quantumque etiam in domibus eo-
 rum repertum sit, vestri jam dieti legati et scripto
 et verbis vobis, sit placet, edicant. Data xviii Ka-
 lendas Decembris, indictione decima.

^b Ansegiso et Adalgario. Missi ambo Romam a Carolo fuerant cum legatis apostolicis post synodum Pontigonensem. Aimoinus lib. v, cap. 33 : *Soluta est synodus. Postea imperator legatos muneratos apostolicos, Leonem et*

XLIII.

AD CAROLUM IMPERATOREM.

(Anno 876.)

Narrat calamitates Ecclesiæ illatas a Saracenis, et imperatorem precatur ut auxilium adversus eos mittat.

JOANNES episcopus CAROLO imperatori.

Quanta et qualia per impiam gentem patiamur Saracenorum, quid dicam quia scribere quilibet stylus non sufficit, cum omnia ligna silvarum, si vertantur in linguas, enarrare non valeant ? Quorum quia ex his quædam vestra jam didicit excellentia, prædisposuit exercitum suum ad hæc removenda cum valida manu dirigere. Quo nos audito, mox elevatis manibus Dominum collaudavimus, ejusque clementiam pro imperio vestro lætantes protinus exoravimus. Sed quanto, fili charissime, lætati sumus in his quæ dicta sunt nobis, tanto, heu ! tristati et amaricati, quia quæ dicta sunt rerum non sunt effectibus consummata. Reversi quippe sunt, ut audivimus, et solis paganis gaudium, nobis autem non nisi tribulationem inenarrabilem reliquerunt. Et ecce, proh dolor ! inimicis crucis Christi gratulantibus, solus fidelium cœtus magna mœstitudine consumitur. Christianorum sanguis effunditur, devotus Deo populus continua strage vastatur. Nam qui evadit ignem vel gladium, præda efficitur, captivas trahitur, et exsul perpetuus constituitur. En civitates, castra, et villæ destitutæ habitatoribus perierunt, et episcopi hac illacque dispersi. Sola illis apostolorum principum limina derelicta sunt in refugium, cum episcopia eorum in ferarum sint redacta cubilia, et ipsi vagi et sine tectis inventi, non jam eis liceat prædicare, sed mendicare. Ecce, charissime, pervenit gladius usque ad animam ; ecce dies in qua clamamus : *Beatæ steriles quæ non genuerunt* (Luc. xxiii) ; ecce illa periculosa tempora Pauli voce prædicta (II Tim. iii). Libet ergo cum Jeremia clamare (cap. ix) : *Quis dabit capiti meo aquam, aut oculis meis fontem lacrymarum, ut plangam tantam ac talem miseriam, tale ac tantum excidium patriæ ?* Sed et in tristitia, quin potius in ruina domina gentium, regina urbium, mater Ecclesiarum, consolatio tristium, portus periclitantium. Ecce, inquam, re vera dies tribulationis et angustię, dies calamitatis et miserię. Præterito quippe anno seminavimus quidem, sed non recolligimus ; hoc vero anno, quia non seminavimus, nec est recolligendi fiducia. Quid de paganis dicimus, cum Christiani nihil melius operentur ? quidam videlicet ex confinibus et vicinis nostris, quos marchiones solito nuncupatis. Nam ut propheticè dicamus : *Residuum locustæ comedit bruchus* (Joel ii). Et quid Saracenis incredulis, qui sunt filii ancillæ, forte relinquitur ab illis qui per fidem liberæ deberent existere filii ? Usque ad ter-

Petrum, remisit Romam, et cum eis Ansegisum Senonensem episcopum, et Adalgarium Augustodunensem episcopum. SIMM.

ram depascimur. Quid enim illi faciunt, et isti pe-
jora non faciunt? Illi terram occupant, isti cum Pe-
tro nihil ex civitatibus vel ex rure dimittunt: illi
occidunt gladio, isti ablatis omnibus fame trucidant;
illi in captivitatem ducunt, isti sibi in servitute re-
digunt. Et cum quæritur quid adversus hostes dimi-
cet inveniuntur nulli, cum scilicet eorum oppres-
sione retenti, ad mandatum nostrum occurrere nulli
prorsus inveniantur. Sed cum indique angustiati
clamamus, non est qui audiat, non est qui adjuvet,
non est qui salvum faciat, nisi tu, fili charissime et
imperator clementissime, qui post Deum nobis fac-
tus es in refugium, et solatium, et auxilium. Quo-
circa totis præcordiis, totisque commoti visceribus,
cum episcopis et presbyteris ac proceribus, totisque
plebis nobis olim commissæ reliquiis deprecamur,
jube tandem aperire aures, audire gemitum et sin-
gultus omnium nostrum, porrigere manum, et præ-
stare opem patriæ periclitanti, civitati inter multas
miserias et ærumnas jacenti, et huic Ecclesiæ matri
vestræ, a qua non solum regnandi, sed et in Domi-
num unum et verum credendi exordium percepistis,
quæque in ultimo, spreto bono et magno fratre, vos
more Dei gratuita voluntate, tanquam alterum re-
gem David elegit et præelegit atque ad imperialia
sceptra provexit. Cogitate itaque, Dei cultor semper
Auguste, a propheta præmoniti, si hæc humiliatur,
ad cuius confugietis auxilium? vel ubi relinquitis
gloriam vestram? Perpendite quia si hæc humiliatur,
non solum gloriam imperii vestri periclitabitur, sed et
ipsa profecto Christianæ religionis cultura maxima
ex parte peribit. Et ideo talia scientes nolite, ob-
secro, jam differre, nolite de dei in diem induciis
non profuturis abuti. Cum proverbialiter clamo, et
cum Salomone vociferor: *Ne dicatis amico vestro,
Vade et revertere, cras enim dabo tibi (Eccli. ix)*; et
alias: *Quod potest, inquit, manus tua facere, instan-
ter operare (Prov. iii)*, etc. Nescitis namque, ut cum
venia vestra dicam quid superventura pariat dies.
Ita ergo, fili Christianissime, de hæc Ecclesia nec
non et patria velociter et prudenter excogitate et
ordinate, ut saltem ipsæ paucissimæ reliquæ salvæ
sint quæ remanserunt, quæque quotidie catervatim
gladio et præda dispereunt. Occurrite strenue, sub-
venite celeriter, et manu, consolationis vestræ ab
oculis nostris tandem abstergete lacrymas, quatenus
super illis et præsentialiter Deo propitio gaudeatis, D
et in futuro, frequenti ac laudabili relicta fama su-
perstite, cum Christo perpetes in cœlestibus impere-
tis. Data xvii Kalendas Decembris, indictione decima.

XLIV.

AD CAROLUM CALVUM IMPERATOREM.

(Anno 876.)

*Scribit intellecturum imperatorem ex Adalgario
episcopo (cui pallium concedit) cur Ecclesiæ cau-
sæ ex voto processerit. Taxat Ansegisum, et Adal-
garii fidem commendat.*

JOANNES episcopus CAROLO imperatori.

Laudabilem quidem intentionem et pium studium
vestrum pro causa Ecclesiæ nostræ, matris videlicet

A vestræ, fili charissime, viscerabiliter habitum et
bene dispositum agnoscentes, innumeras Deo gra-
tias, qui totius boni auctor et moderator est, qui-
que docet hominem justitiam, gessimus; sed impe-
divit nos Satanas, et spes nostra frustrata est, cum
non ad votum nostrum et commune propositum finis
rei processerit. Qualiter autem; vel quo faciente, ita
causa provenerit. Adalgarius sanctissimus episcopus,
quem nos, vestri amoris causa ipsiusque morum
probate non immerito moti, palliatum ad vos ecce
remisimus, a majestate vestra interrogatus, et per
fidem quam vobis se illasam servaturum pollicitus
est, adjuratus edicet. Illud tamen nos interim ad
memoriam vestram reducimus, quod nobis olim de
Ansegiso et Lantberto specialiter quodam præsa-
gio futurorum, tanquam providus revera prænu-
ntiastis. B
Est enim ita gestum ut prævidistis, et nil vos ante
latuit quod postmodum intellectus nostri oculus non
aspexerit. Non enim recto cum eo, sicut episcopum
decuit, ambulavit; sed per versipelles anfractus ince-
dens, multum a via rectitudinis deviavit. Quod cum
exhibitum ad lucem veritatis extiterit, penitus eva-
surum non credimus impunitum. Cujus scilicet cer-
tam rei poteritis circumstantiam procul dubio de-
prehendere, si, ut prætulimus, idem almificus vir
sub testificatione vobis promissæ fidei adjuratus,
vos latere noluerit. Sane nosse vos volumus, quia
cum sæpe memoratum antistitem adeo cognovisse-
mus vobis esse fidelem, ut crederemus nullis mune-
ribus nullisque terroribus a suæ fidei erga vos ha-
bitæ sinceritate posse divelli, adhæsit animæ nostræ
salutis filius, et ideo inter pontificium nostrum et
imperium vestrum mediatorem illum fore decrevimus,
ita ut quasi vocis utriusque sit organum, referat-
que vestra nobis, et quæ nostra sunt vobis an-
nuntiet, ut lapis angularis habitus in Christo
Jesu, qui ex pax nostra, et fecit utraque unum.
Data xvi Kalendas Decembris, indictione decima.

XLV.

AD RICHILDIM AUGUSTAM.

(Anno 876.)

Rogat ut Romanæ Ecclesiæ suffragetur.

JOANNES episcopus RICHILDI Augustæ.

Quanto amore spiritualis filius noster piissimus
imperator erga hanc sanctam matrem suam Eccle-
siam flagret ex hoc manifestissime claret quod cau-
sam illius apud se specialiter exsequendam et ordi-
nandam in vestris proprie manibus collocavit. Cui
enim congruentius et præstantius eam, quam præ
cæteris spiritualiter diligit, oro, committeret, quam
vobis quæ ab eo sic diligi jubemini, sicut diligi a
Christo jubetur Ecclesia? Unde magnopere gratula-
mur de vobis tot audientes præconia, et cofidimus
in Domino quia onera quæ portamus, tam a paganis
quam a pessimis Christianis, vestri studii humeris
alleviabit, et eritis pro Ecclesia Christi apud pium
conjugem more sanctæ illius Esther pro Israelitica
plebe apud maritum (*Esther. ix*). Quia vero sæpe ad

Christianissimum conjugem vestrum semper Augustum diversis pro necessitatibus sive missos sive apices mittimus, ex hoc jam obsecramus et petimus, vos estote pro nobis ostium, lingua et manus: imo totum pro nobis situs, advocatoris fungentes officii, et omnia pro nobis in omnibus facite. Ita ut amici quidem et fideles Ecclesiæ hujus per vos apud apicem vestrum locum, apud vos inveniant aditum et salubre in necessitatibus suis omnino remedium: e contra vero, inimici et infideles per vos confundantur et excludantur: quia et nos pro vobis apud omnes et in omnibus erimus, et præcipue apud beatissimos apostolorum principes Petrum et Paulum amatores et protectores vestros, ita ut paterno vos affectu semper fovere studentes, et tanquam spiritalem filiam dilectionis nostræ sinibus collocatam in Christo tractare ac tegere perpetuo satagentes, apud eos commendare assiduis precibus studeamus, et vestri memoriam ad sacrosancta corpora ipsorum semper deponere satagamus. Lætamus autem et jucundamur in Domino, quia beatam vos et felicem dicent omnes generationes; quia pio committente conjuge tam salutiferum ministerium assumpsistis, per quod scilicet et in præsentis sæculo nomen bonum, quod est super divitias multas, et cæleste acquiretis inter angelos et non finiendum imperium. Data XVI Kalendas Decembris indicatione. x.

XLVI.

AD CAROLUM CALVUM IMPERATOREM.

(Anno 876.)

Commendat Wigbodum Parmensem episcopum.

JOANNES episcopus CAROLO imperatori.

Quia desiderandam nobis, et totis viscerum brachiis amplectendam dilectionem vestram nihil patimur ignorare eorum quam maxime quæ ad cumulum gloriæ vestri noscuntur culminis pertinere, operæ pretium duximus innotescere Wigbodum venerabilem Ecclesiæ Parmensis antistitem apostolorum adisse limen et sedem, tam orationis voto quam inveniendæ per nos vestræ gloriæ desiderio; cujus mentis arcana subtilius investigantes, nos plane minime latuisse fatemur quod et nunc sincera fidei erga pium imperium vestrum habendæ teneatur affectu; et hoc jam olim procul dubio rerum effectibus demonstrasset, nisi sibi esset a piæ memoriæ priore principe causa talis injuncta, quam sine sui discremini floccipendere nequivisset. Unde rogamus, data venia, suscipite nunc illum ut mea viscera, quia et si forte quondam vobis erat inutilis, nunc autem vobis et nobis utilis: quamvis forte non sit dicendus inutilis, qui fidem ante promissam custodiens, simile circa vos servandæ fidei dedit indicium, præsertim cum sperans in Domino non perdiderit, si mutaverit, fortitudinem, dum scilicet nobis hunc informantibus, si quopiam contra vos usus est, pro vobis proponat jam totis viribus exercere. Unde non dubitamus illum se fortiorem erga fidei vestræ constantiam exhibendum, quam fuerit,

A quando contra imperium vestrum perhibebatur sentire. Ergo, clementissime imperator, quia ab infantia crevit vobiscum miseratio, recipite illum tanquam ab ipsa beati Petri apostoli patroni vestri confessione, et super eo mercedem habere contendite, non imputantes ei quod novissimus venerit: quia et bonus ille paterfamilias operarios undecimæ horæ pares fecisse describitur his qui tertia hora venere (*Matth. ix*). Sed et vos non minus diligitis militem qui promo quidem in bello terga dedit, postea rediens premit fortiter hostem, quam eum qui nunquam terga dedit, et nunquam aliquid fortiter gessit. Sed quid multa? cum ecce nos ei apud pium imperium vestrum, fili charissime, fidem dicimus. Ecce nos pro illo vadem offerimus: tantum sic agat erga eum clementissima et seremissima pietas vestra, ut alii sub tegmen miserationis vestræ, hoc comperto, alacrius confluant, et per interventionem nostram quasi per immobilem pontem ad vos certatim transitum faciant. Siquidem hic in signum est ad apostolica tecta quoddam positus; cunctos ad vos terrigenas aut bene dispositus invitabit, aut a vobis male tractatus terrebit. Nam difficile esse credimus apud pietatem vestram quemquam per alios obtinere, quod per Petrum et Paulum apostolorum eximos non poterit impetrare. Data *ut supra*.

XLVII.

AD ADALGARIUM EPISCOPUM AUGUSTODUNENSEM.

(Anno 876.)

C *Villam Tilionacum illi restituendam decernit, cæterasque possessiones Augustodunensis sedis confirmat.*

JOANNES episcopus, servus servorum Dei, reverentissimo et sanctissimo ADALGARIO sanctæ Augustodunensis Ecclesiæ episcopo ac per te in eadem Ecclesia in perpetuum.

D Divinæ præceptionis movent cunctos eloquia ut quoties res aliena contra rationis ordinem a quoquam detinetur, æquitate debeat imminente restitui. Constat siquidem villam quædam Tilionacum proprietatis jure sancti fuisse quondam Leodegarii Augustodunensis episcopi, et ab eo sancto collatam Nazario, cujus vocabulo ipse honoratur episcopatus. Post vero cum a pravis hominibus longo tempore fuisset retenta et quasi in proprietatem eorum redacta, dilectus filius noster Carolus clementissimus imperator, super hoc subtili examinatione habita, cum eam ad ejus Ecclesiæ Augustodunensis pertinuisse legitime cognovisset, et possessam primo ab ea, et postea pervasam a violentis hominibus liquido didicisset, hanc præcepto suæ auctoritatis ipsi episcopo reddidit et ab ipsius Ecclesiæ jus revocavit, cui scilicet hanc superius nominatus sanctus Leodegarius olim contulerat. Et ideo, quia postulavit a nobis sanctitas tua ut jam memoratam villam secundum imperiale præceptum apostolicæ auctoritatis liberalitate aut privilegio Augustodunensi Ecclesiæ confirmarem, inclinati precibus tuis, supernæ pietatis gratia suf-

fragante, prædictæ Ecclesiæ, cui fraternitas tua præesse dignoscitur, sæpe memoratam villam, sicut antiquitus fuit, denuo confirmamus, ut hoc quod suum fuerat, et redditum nunc possident, debeat sine cunctatione perpetuis temporibus possidere vel adhærere, hujus privilegii auctoritate confirmantes antedictam villam in præfato episcopo constituimus quod in ejusdem episcopii Ecclesia, de qua ablata fuerat, nunc reddita in ipsius domino sine ambiguitate permaneat. Non solum autem crebro dictam villam, sed et omnes quæ ejusdem Ecclesiæ vel modo sunt vel futuræ consistunt, in eodem episcopo confirmamus habendas, statuentes pontificali censura, sub interdictione anathematis futurique judicii, nulli licere hæc quæ a nobis tam super jam dicta villa quam super omnibus rebus ab eadem vel habitis vel habendis promulgata sunt, aliqua temeritate violare vel conturbare aut repetere; sed potius stabilitate perenni inconvulsa permanere in eodem pio loco decernimus. Quod si quis autem, magnus vel parvus, adversus hoc privilegium auctoritate apostolicæ sedis munitum agere tentaverit, sciat se perenni judicio condemnandum et igni qui non exstinguitur mancipandum. Qui vero custos et conservator ejus exstiterit, æternis gaudiis perfruatur, et præmiis cum angelis in cœlestibus potiatur. Scriptum per manus Gregorii notorii regionarii et scriniarii sanctæ Romanæ Ecclesiæ in mense Novembris, indictione decima. Bene valeate.

XL VIII.

AD URSUM DUCEM VENETIARUM.

(Anno 876.)

Gratias agit quod apostolicæ sedis monitis paruerit Episcopus ad synodum venire jubet.

JOANNES glorioso duci Venetiarum.

Gratias gloriæ tuæ pro benigna devotione tua referimus, quam non solum verbis, sed et operibus erga nos studiose declaras, et frequenter ostendis: et ideo nos paterno circa te detinemur affectu; et in his quæ ad tuam tuorumque pertinere ac prodesse utilitatem cognoscimus, prompti et benigni semper esse curabimus, ita ut divinis præceptis sacrisque canonibus impedire intentionem et sanctionem nostram nunquam consentias; sed cum tibi de rebus ecclesiasticis quidquam injungimus, sicut devotus filius nos obaudias, et adimplere quæ dirigimus alacrisse semper animo studeas, quoniam nos tanto in causis tuis, et ubi tibi opportunitas fortassis evenerit, promptiores tecum non esse ac benigniores invenies, quanto te nos nolle a mandatis Dei aliquo modo avertere manifestius viderimus. Nam tibi, charissime, tanquam familiari nostro familiariter scribimus, quia nullius mortalis amorem præponere Dei justitiæ possumus, qui nimirum Evangelium legimus, dicens: *Qui amat patrem aut matrem plus quam me, non est me dignus (Matth. x)*. Veniant igitur episcopi ad synodum nostram, ut, ipsis nobis rei veritatem significantibus, causam fratris et coepiscopi nostri Petri illis præsentibus facilius diffinire-

A valeamus. Is vero qui valida infirmitate vel senectute gravatur, si ullo modo venire non potest, vicarium pro se strenuum mittat. Ille vero qui Constantinopolim ire refertur, si nondum abiit, nec abire cis Februarium mensem speratur, ab hac communi utilitate nullo modo se subtrahat; sed veniens veniat, ut omni litigio terminato, in Ecclesia Dei non nisi pax et tranquillitas perseveret. Optamus gloriam tuam semper bene valere, Data viii Kalendas Decembris, indictione decima.

XLIX.

AD FELICEM ET PETRUM EPISCOPOS.

(Anno 876.)

Felici et Petro sacris interdicti ob non exhibitum Grandensi archiepiscopo obsequium; eosque sub excommunicationis pœna Romam ad concilium venire, et si impediti fuerint, vicarios mittere jubet.

JOANNES FELICI ET PETRO episcopis Mandanau-censi et Equilensi.

Quam ingrati et inhumani fueritis erga reverendum fratrem nostrum Petrum Ecclesiæ Gradensis antistitem, in hoc maxime datur intelligi, in quo ille pro legibus paternis incolatum arripiens, nullum vestrum comitem suæ peregrinationis habere promeruit; præsertim cum ad limina sit apostolorum profectus, sedemque adierit, ubi semper catholicis subvenitur, et ubi plurimi sanctorum injuriæ passi, petram, a qua Petrus nomen sortitus est, refugium invenerunt. Additum autem est huic rei, quoad majoris contumaciæ vestræ cumulum demonstrandum, quia scilicet non solum cum illo stantes secundum prophetam, *Minime ex adverso ascendistis, et opposuistis murum pro domo Domini (Ezech. xiii)*, sed quasi rebelles, rupto unanimatis fœdere transistis ad hostes; et cum non sitis cum illo, facti profecto estis adversus illum, sicut Dominus ait: *Qui non est mecum, contra me est (Matth. xii)*: in quo et ipsam bestiarum transcendistis sævitiam, parricidalibus adversus cum utentes consiliis; pro quibus omnibus apostolatus nostri vos Romam occurrere, et pro his et aliis quæ corrigenda duximus, satisfacere, non semel apicibus commonuimus, sed venire hactenus modis omnibus contempsistis. Quapropter vos a sanctis mysteriis interim celebrandis auctoritate summi pastoris arcemus, jubentes ut Idibus Februariis istius indictionis, si adestis, vel si duræ infirmitatis pondere non gravamini, synodo nostræ Romæ celebrandæ interesse inexcusabiliter maturetis; quatenus et ab objectis purgemini, te a capite, tam scilicet apostolica sede quam metropolitano vestro in nullo dividamini: *Ne, quod absit, circumveniamini a Satana*, qui videlicet semper dissensione gaudet: membra quippe quæ capiti non hærent, inter mortua deputantur; sicuti procul dubio vos, qui nec apostolicæ sedis, quæ est caput omnium Christi Ecclesiarum, decretis hæretis, nec affectui metropolitani proprii, et patroni atque magistri. Jam vero si Idibus saltem Februariis occurrere contumaciter parvipenditis, tandiu estote posthac omnis Ecclesiæ communione

una cum vobis faventibus alieni, quando venire ac satisfacere super quibus impelimini, non curatis. Ecce enim venerandos forte canones tenetis præ manibus, qui tales sanciant non communicaturos donec purgentur. Porro si quisquam vestrum nullo modo se posse venire prætenderit, vicarium suum mittat, qui et mittentem se jurejurando excuset, et in synodo vicem mittentis adimpleat. Data Kalendas Decembris, indictione decima.

L.

AD DOMINICUM ELECTUM EPISCOPUM TORCELLENSEM.

(Anno 876.)

Invehitur in Dominicum electum episcopum, quod bis vocatus Romam non accesserit; eumque, nisi venerit constituta die, excommunicat.

JOANNES DOMINICO vocato electo Torcellensis Ecclesiæ.

Quia fama crebrescente Torcellensem invasisse dicebaris Ecclesiam, et semel et bis decrevimus te Romam venturum, ut coramposito fratre nostro Petro sanctæ Gradensis metropolitano antistite, una cum episcopis qui degunt sub ipso, facta super te discussione, rumor longe lateque respersus, aut innoxius patefactus absolveretur, aut comprobatus noxius damnaretur, venire modis omnibus constituimus. Unde merito a nobis fores damnandus, nisi erga te, petende nobis dilecto nobis Urso glorioso duce, minus severitate quam patientia uteremur. Verum quia eatenus non venisti, excommunicatum te jure a nobis esse cognosceres, in promptu habentibus, secundum Apostolum (*II Cor. x*), ulcisci omnem inobedientiam: verum quia nec sic interim contempti salutem tuam contemnimus, unde tertia ecce te vice vocamus, et Idibus Februarii præsentis decimæ indictionis nostro concilio Romæ adesse mandamus, ita ut si tunc non occurreris, tandiu sis cum faventibus tibi deinceps a nobis et a toto Christi corpore alienus, quando minus respiciens, obedientiæ nequaquam jussis nostris colla submiseris. Porro, si in hac in disciplina non permanseris, noveris deinceps tibi veniam denegandam, et secundum sanctos canones nil de absentia penitus lucraturum, et non solum communionis, sed et honoris jacturam anathemate percusum sine fine passurum. Data Kalendis Decembris, indictione decima.

L.I.

AD URSUM DUCEM VENETIARUM.

(Anno 876.)

Rogat episcopos qui Romam ad synodum evocantur, suis sumptibus alat; quibus, nisi accesserint, excommunicationis sententiam minatur.

JOANNES URSO duci Venetiarum.

Cum pro causa venerabilis fratris nostri Petri sanctæ Gradensis Ecclesiæ antistitis finienda, Dominicum vocatum electum, cui esses filium tuum sociandus [*pro sociaturus, HARD.*] ad apostolicam sedem mittere promiseras, nec tamen verbum veritas subsequuta est, valde mirati sumus: et quod non omni spiritui, nec in omni negotio credere, docente

A Apostolo, debeamus, patenter advertimus. Exhibito enim rerum præteritarum certitudo et futurorum. Quia vere idem frater et coepiscopus noster more majorum sedem apostolicam appellavit, imo alacriter adiit, obsecrans ut controversiæ quæ in inter se vertitur et prædictum Dominicum, utraque coram posita parte, finem legitimum imponamus: secundum quod se ratio habet, et jus canonicum dictat, rursus præcipimus, ut jam dictus Dominicus Kalendis saltem Februariis Romam nobis satisfactorius et sese purgaturus occurrat; ambitionis enim crimine denotatur, ac per hoc juxta sacros canones manifestum est confiteri eum de crimine, qui purgandi se occasione non utitur. Jam vero si dixerit se non venientibus episcopis venire non posse, noverit et B episcopos nos illius regionis occurrere præcipere et eundem Petrum venerabilem Domini sacerdotem imitandum tribuere, qui cum metropolitanus esset, nullis comitantibus secum episcopis, memoriam apostolorum veniendo, sicut quondam sanctus Athanasius honoravit; verumtamen et ex episcopis duos venire decernimus, Felicem scilicet et Petrum, ut tantum negotium non sine præsentia regionis episcoporum hujus cognitionem habentium diffiniri quoquo modo videatur; ita ut si forte se Felix venire nullo modo posse prætenderit, vicarium suum mittat, qui et mittentem se jurejurando excuset, et in synodo vice mittentis adimpleat. Petrus autem, si adest, modis omnibus veniat, siquidem, ut pehibitis, Constantinopolim mittendi nec mos vester nos latet nec tempus. Matarius [*forte, Maturius et delendum prius, HARD.*] quippe prius huc venire ac redire ad propria poterit, quam mari mos et tempus accedat itineris. Præterea jubemus archidiacono ad nos venire Torcellensis Ecclesiæ; similiter et Alinensis abbatem monasterii; nihilominus et archipresbyterum et archidiaconum, atque hujus æquivocum et nepotem Laurentium diaconum Gradensis Ecclesiæ, quo impræsentiarum super his quibus impetuntur, idoneam rationem canonicamque, si nocentes sunt, subeant ultionem. Quæ omnia ideo gloriæ tuæ nota fieri volumus, ut illi ad apostolicam sedem sanctamque synodum occursuri, liberalitatis tuæ adminiculis sustententur, sumptibusque locupletati laborem itineris facilius ac levius ferant, secundum pios principes, qui in talibus munifice semper erant intenti. Hos autem quos hac auctoritate apostolicæ presentandos sedi decrevimus, quia tertio jam commoniti lucusque occurrere contempserunt, Romam diebus [*pro Idibus, HARD.*] Februariis fore venturos decrevimus, nisi forte instanter properare delegerint. Porro post Februarias [*forte, post Idus Februarias, HARD.*] tandiu sit unusquisque ipsorum cum fautoribus suis excommunicationis vinculis inodatus, quando ad sedem apostolicam non occurrens, nullam idoneam super se rationem regulariter exhibuerit; sciens se anathematis postmodum sententia feriendum. Data Kalendis Decemb., indictione x.

LII.

AD DOMINICUM ET LEONEM EPISCOPOS.

(Anno 876.)

Significat quosdam qui Romam ad concilium vocati venire neglexerant, se excommunicasse, nisi ad certam præstitutam diem venerint; hortatur ut quandiu illi abfuerint, eorum officia exsequantur.

JOANNES episcopus DOMINICO Olivolensi, et LEONI Caprensi, episcopis.

Sanctitatem vestram nolumus ignorare misisse nos Felici et Petro episcopis, et Dominico, qui vocatur electus Torcellensis Ecclesiæ, seu abbati Altinensis monasterii, atque archidiacono Torcellensis Ecclesiæ, nec non et archipresbytero et archidiacono, atque hujus æquivoco ac nepoti Laurentio diacono Gradensis Ecclesiæ, quia toties a nobis vocati ad concilium Romæ occurrere contempserunt, futuram excommunicationis sententiam et eum qui ex his tunc saltem venire distulerit, tandiu post Idus Februarias omni ecclesiastica communicatione privasse, quandiu in obstinatione propria perseverans, apostolicam adire sedem contempserit. Alios enim horum nostro concilio pro communibus Ecclesiæ utilitatibus volumus interesse. Quosdam autem, quia super quibusdam reprehenduntur excessibus, de his satisfacturos requirimus. Unde, fratres charissimi, vos in specula esse præcipimus, et si quidem prædicti episcopi, dextra Excelsi corda eorum immutante, ad concilium nostrum circa Idus occurrerint, ut prædictum est, Februarias, vos per ipsam regionem morati, quæ sunt veræ religionis peragite, ne quis sine perfectis Christianitatis sacramentis abscedat, neque pœnitens minus reconciliatus deficiat; et cætera illic interim definite quæ ad speciale pertinent episcoporum officium. At vero si pater inobedientiæ sic mentes eorum obsederit, ut obedire omnino despiciant, restat ut eo qui obaudierit benignius tractato, qui prænotato tempore ex his omnibus abfuerit, post excommunicationem noverit se anathematis gladio puniendum. Qua de re prævidimus hæc omnia nota facere vobis, ut ea scientes ad omnium notitiam perferatis, et hoc ad quod decrevimus exhortati magnopere studeatis. Quod si vos non audierint, *non enim*, ut Dei ad Ezechiel voce dicamus, *volunt audire vos, quia nolunt audire nos* (Ezech. III), habete illos, et habendos ubique modis omnibus prædicate, sicut Dominus præcepit haberi eum qui Ecclesiam non audierit (Matth. XVII); tantumdem est si dicatur, sicuti nos eos haberi [Edit. Rom. addit, supra] decrevisse significavimus. Videte autem, ne persona vobis quælibet silentium possit imponere, ne, quod absit, tanquam idololatræ judicemini. *Est enim*, Samuele edocente, *quasi scelus idololatriæ, nolle acquiescere* (III Reg. XV). Si præterea Felix vel Petrus impedimento inevitabili prohibitus, non venerit, idoneum virum ex diaconibus Ecclesiæ suæ mittat per omnia vices suas supplementem. Jam vero si quoquo modo potuerint et noluerint, quia idcirco excommunicationis una cum

A tanti mali auctoribus sunt nexibus irretiti, non solum ab eorum vos communionem prorsus arcete, sed et ab omnibus qui eis communicaverint (sunt enim pari omnes obligatione constricti). Optamus sanctitatem, etc. Data Kalend. Decembris, indictione decima.

LIII.

AD DELTUM EPISCOPUM.

(Anno 876.)

Ut vice apostolicæ sedis fungens Venetias pergat, et episcopus ejus regionis Romam ad concilium, sicut jusserat, venire faciat.

JOANNES reverentissimo DELTO episcopo.

Tuæ dilectionis sinceritati pastoralis officii nobis sollicitudine junctæ, quam in consortium nostri laboris asciscere decrevimus, cognitum facimus, quia Petrus reverendissimus Venetiarum metropoleos antistes, multis suffraganeorum suorum gravatus molestiis, et canonicæ constitutioni repugnantibus malis oppressus, delegit corde devoto sanctorum apostolorum Petri et Pauli ad limina properare, indeque salutis et optatæ consolationis opem percipere, ubi totius Ecclesiæ Christus Deus noster fundamentum locavit, et religionis atque justitiæ caput instituit. Et ideo querimoniis ejus aures clementiæ nostræ, litteris tam ipsi Urbs Venetiarum duci quam suffraganeis ejus episcopis, quorum sane inobediencia et temeritate canonicus vigor confusus, Ecclesiæ Dei potestas exinanita, et metropolitana dignitas corrupta existit, ut in conspectu nostro apostolicæque sedis præsentia, utriusque partis præsentia existente, liteque discussa, finem causæ debitum æquo imponeremus libramine, litteras nostras direximus; sed ipse dux excusationis verba potius quam quæstas a nobis personas statuto tempore maluit destinare. Unde nolentes præfatum fratrem et coepiscopum nostrum absque consolatione debita relinquere, rati sumus te vice nostra illuc dirigere, quatenus divino fretus auxilio ea quæ prædicto fratri sunt necessaria prudenter peragas et cum Domini timore cuncta perficias. Has igitur apostolatus nostri litteras accipiens, pro utilitate et salute Ecclesiæ Dei ceu idoneus Christi miles laborare satage; quoniam dicente Apostolo (I Thess. II), labor noster non erit inanis in Domino; et si socii sumus laboris, erimus profecto et consolationis. Christo igitur duce, Venetiam perge, Ursoque duci epistolam destinatam tribue, eamque ut auribus audiendi audiat, instanter admone, ne statutis apostolicæ sedis resistere, quin potius humili corde obedire procuret. Alteram vero epistolam Felici sanctæ Ecclesiæ Equilensis episcopo, quem ad nos venire jubemus. Tertiam quoque Dominico Olivolensis Ecclesiæ et Leoni Caprensis Ecclesiæ, episcopis quos ibi manere volumus, eisque ut in his quæ Dei sunt te fideliter adjuvent, præcepimus, tribue. Quartam vero Dominico electo Ecclesiæ Torcellensis dare procura; eosque terribiliter obtestando atque jubendo easdem epistolas in conspectu totius Ecclesiæ et populi, teque præsentem

legere facito : quibus nimirum perlectis tam eosdem episcopos supradictos, hoc est felicem ^a Matemautesensem, et Petrum Aquilensem, episcopos, nec non Laurentium archidiaconum Gradensis Ecclesiæ, abbatem cœnobii Altinensis, archidiaconum Roscellensem, et archipresbyterum Gradensem, cum nepote suo Laurentio Romam in præsentiam nostram, ex nostra apostolica auctoritate Idibus Februariis, omni mora vel occasione postposita, secundum tenorem epistolæ nostræ venire præcipe. Nam si in prædictis Idibus venire quolibet modo distulerint, sciant se omni ecclesiastica communione esse privatos, atque anathematis vinculis innodatos, quousque nostris se obtutibus præsentare curaverint. Cumque omnia juxta nostræ præceptionis affectum pia et fideli devotione compleveris, ad Ecclesiæ tuæ revertere gremium, nobisque sub certitudine cuncta renuntiare non differas. Ut si de cætero aliqua super his agenda sint arbitrio solerti, ut cura debita sollicitius Deo propitio peragamus.

LIV.

AD LAMBERTUM COMITEM.

(Anno 876.)

Ut compescat sibi subjectos a malis quæ perpetrabant; quos si emendare non potuerit, minatur illos se excommunicaturum : legatis multa ei viva voce referenda se injunxisse significat.

JOANNES episcopus LAMBERTO comiti.

Ab olim, si recordaris, salutem tuam atque profectum desiderantes, et anima te salvari, et corporeis honoribus cumulari quæsimus et optavimus. Et quia nunc multo amplius hoc quam prius, fili charissime, volumus, scias paterno affectu a nobis te diligere et ut spiritualem filium prorsus amplecti, quoniam honorem atque tuum profectum nostram gloriam esse putamus, et de tuæ prosperitatis augmento in Domino gratulamur : unde et tu non immemor nostri, rogamus, ut semper et ut his quæ volumus, et quæ nostrum de tuis hominibus pontificium pulsant, emendare nullatenus prætermittas; non enim speramus ut talia scias qualia ab eisdem tuis hominibus in nostris finibus perpetrantur. Quæ oportet gloriam tuam studiose inquirere, et, sicut concedet, pro Dei et nostro amore omni conamine emendare, quia tam hominibus S. Petri apostoli quam hominibus Guidonis tui homines, sicut fertur, innumera mala faciunt et rapinas multas exercent. Quæ rogamus statim emendare facias, et tibi subjectis ultra tale quid facere non consentias. Verum si id forte emendare te non posse fateris, ut cum pace tua dicamus, in pravos atque iniquos homines illos ob tui amoris dilectionem, tuo consensu adhibito, nostri apostolatus sententiam dabimus, et quousque resistant, a liminibus sanctæ Ecclesiæ sequestrabimus. Latroes vero præsentium missos apostolicæ

A sedis, Acimundum scilicet et Walpertum venerabiles episcopos dilectos nostros ad tuam nobilitatem direximus, ut hi quod pagina reticuit viva voce loquentes edicant, et revertentes de tua benevolentia nos lætiores efficiant. Data XIX Kalendas Januarii, indictione decima.

LV.

AD GUAIFERIUM PRINCIPEM SALERNITANUM.

(Anno 876.)

Laudat ejus fidei constantiam erga sedem apostolicam : Adelgisii et complicum fraudes detestatur, suumque et aliarum Ecclesiarum auxilium contra Saracenos ei pollicetur, et hortatur ut in fide persistat, utque episcopum Surrentinum ad se mittat.

B JOANNES episcopus GUAIFERIO principi Salernitano.

Gloriosæ nobilitati vestræ, quam spiritualibus ulnis amplectimur et dilectionis semper sinibus fovere non mediocriter anhelamus, condignas gratias agimus, quoniam in fidei petra statuens constantiæ pedes, nec fluminibus, nec ventis diversorum eventuum impetu potuit a stabilitate sua demergi, vel a nobis præstitis sponsonibus aliquatenus amoveri; fundata enim est supra petram. Quæ autem de Adelgisii et complicum ejus prioribus ac modernis fraudulentis actibus indicastis, et ipsi veraciter sensimus, et sagacitatem tuam, ut se res habet, sensisse manifeste cognovimus. Erit autem eis ut Saul et Achab (*I Reg. xx*), et anima eorum pro anima inimicorum Dei, quoniam virum dignum morte dimittere minime formidarunt, nosque Deo favente cantabimus et psallemus : *In operibus manuum suarum comprehensus est peccator (Psal. vii)* : et iterum : *Lacum aperuit, et fodit eum, et incidit in foveam quam fecit : convertetur dolor ejus in caput ejus, etc. (Psal. xvii)*. Interim autem, quantum nos superna virtus adjuvare dignata fuerit, et in consiliis et in auxiliis vobis ferre præsidium non omitteremus, sed piissimum filium nostrum semper Augustum ad adjuvandum vos tam per se quam per exercitum suum quantocius iacitabimus. Simili etiam modo et alios quosque fideles et Ecclesiæ Christi amicos ad hoc ipsum excitare atque hortati studiosius procurabimus, atque omnia, sive quæ nos cogitare, sive quæ vos salubriter adinventâ nobis intimare maturaveritis, gratulanter agere ingenti cum gaudio festinabimus. Interim autem *state in fide, viriliter omnes agite, et confortetur cor vestrum (Psal. xxvi)*, non Insultam [in Sultam], qui Satan congruentius dicitur, sed sperantes in Domino : ita ut omnes a paganorum consortio subducatis, et vos ad pacem in invicem et concordiam unitatis in Christo Jesu Domino nostro : quidquid sane consilii vobis vel accreverit, vel salutiferum visum fuerit, nobis innotescere ne pigritemini, ut a libramine nostro vel tanquam salubre approbetur, vel si aliter cœlitus

^a Supra epist. 80, Mandanaucensis est, et Equilensis. **HARD.**

LVII.

AD AJONEM EPISCOPUM BENEVENTANUM.

(Anno 877.)

Commendat eum de zelo erga sedem apostolicam, monet ut sibi adjumento sit in expellendis Saracenis, suumque fratrem ad idem faciendum impellat.

Reverentissimo et sanctissimo AJONI episcopo Beneventana,

Susceptis atque relectis litteris sanctitatis tuæ, gratias omnipotenti Deo retulimus, et pro tuæ devotionis affectu proque sollicitudine quam inquirendo de nostris eventibus habuisti, multum in Domino gratulati sumus. Decet enim, et omnino coram oculis divinæ majestatis exstat conveniens, ut hi

B quos fideiorem erga sanctam matrem cunctorum, scilicet Romanam. Ecclesiam esse conspicimus, nostris affectibus, et si non per corpus, per spiritum amplectantur, et fraterna dilectione juxta merita singulorum tractentur. De hoc autem quod asseris, te de nostra sanitate lætari, sicut et contrario de oppressione Saracenorum tristari, optime quidem, ut ita dixerim, quantum foris est, tangis; sed quantum intus est, juxta tribulationem quam patimur, non advertis. Præcipue cum pro populi nobis commissi vastatione solum nobis supersit sepulchrum, et pro his qui nobiscum certare debuerant, et non solum inimicis Christi faveant, sed etiam nostrum laborem impediunt, immensis angustiis æstuemus. Sed in his non solum nobis orationibus a vobis subveniri precamur, verum etiam quos a communi nostro certamine deviare cognoscis, et exemplo operis,

C et verbo prædicationis revoces, exhortamur. Cæterum licet nostro itiniri Neapolim, nobis pro maxima nostræ Ecclesiæ necessitate nuper advenientibus non adhæseris, tamen quod per præsentiam non egisti, per absentiam, si ille calor fidei in te viget quem credimus, agere prorsus valebis. Bene enim tuo ministerio cedis, si et laborem nostrum, quem valde debiles corpore pro liberatione Christiani populi tunc assumpsimus, opportune advertis, et tribulationis, quam modo patimur, memor semper existis. Nam nunquam consilium fratris tui per aliquos tantum subverti potuit, quantum per tuæ sanctitatis solertiam immutatione dexteræ Excelsi non possit convertit. Eia igitur, frater charissime, accinge epi-

D sceopaliter lumbos tuos, et medullitas fratrum nostrorum, pro quibus Christus suum sanguinem fudit, necesse atque dietu horrendam captivitatem perpende, et insta opportune, importune (II Tim. I), fratremque jam dictum monitis, imo verbis increpatoriis exhortare, ut nostros pios conatus sequatur, et pro Christianis nobis certantibus opem tribuat, voluntatem extendat, et opus te instante exhibeat, et misereatur Deus. Quid nobis proficit Christianum vocabulum, si opere Christiano caremus? Quid prodest nobis cognovisse viam justitiæ, quando post cognitionem retrorsum conversi, cum inimicis Christiani nominis tam libere fœdera copulamur? Ergo, sicut diximus,

revelatum fuerit, aliter et dispensetur. Etenim nos A vestra damna nostra credimus, sicut e contrario lucra vestra nostra procul dubio deputamus. Episcopum interea Surrentinum sive per terram, sive per mare profectum, quia jam minus recepimus, haud parum moleste tulimus; et nisi ocius mittatur, molestius non immerito sustinebimus: at vero, si ad nos indifferenter fuerit destinatus, tunc magna et solita devotionis tuæ recognoscemus indicia, et pure profecto circa pontificium nostrum dilectionis tuæ sole clarius patebunt insignia. Optamus gloriam, etc. Data xv Kalendas Januarii, indictione decima.

LVI.

AD LANDULPHUM EPISCOPUM CAPUANUM.

(Anno 876.)

Ejusdem argumenti.

LANDULPHO episcopo Capuano.

Sicut de sanctitatis tuæ devotione ab olim erga hanc sanctam Romanam Ecclesiam habita gratulamur, ita de infidelium et de inimicorum malevolentia constritamur, nullatenus de omnipotentis Dei misericordia diffidentis, quod et tibi condigna recompensatio et illis repentina confusio maturetur. Verum, et condecet, reverentiam tuæ fraternitatis laudabiliter amplectentes, et gratias agimus, et ut in bono perseverare proficereque decertes, apostolica mansuetudine deprecamur: quatenus qui in illis regionibus et sanctitate decoratus et devotione prælatus es, sis etiam contra tortitudinem regula, et sicut hactenus fecisse probaris, contra infelices felicitas, et contra iniquos æquitas, atque lux contra tenebras; sciens illius qui de tenebris dat lucem splendescere, solatium nobis et vobis citius adfuturum, et nimis diu afflictæ Christi Ecclesiæ omnipotentem Dominum consulturum. Præterea quod de adjutorio, sicuti et ingens necessitas omnimodis postulat, a nobis conferendo deposcis, hoc et nos meditamur, hoc volumus, et divina gratia protegente, cito nos collaturos confidimus: quia jam calamitatem nobis commissi populi sustinere non possumus; jam devastationem terræ istius aspicere non sufficimus; tantumque dolemus, ut dici non possit, si omnes artus nostri vertantur in linguam. Quapropter vellemus, adhibito sanctitatis tuæ consulti, necessaria ad communem securitatem negotia prævidere: tamen præter id quod ad præsens difficile posse fieri, ut ita dixerimus, cernitur; cum primum se nobis posse præbuerit, quanquam imperialem exercitum nos cito habituros speremus, hanc ipsam necessitatem spirituali filio nostro serenissimo semper Augusto rursus significabimus, et ut quantocius nobis potenti virtute subveniat, humillimis precibus exhortabimur. Verum tamen *prope est Dominus omnibus invocantibus eum in veritate. Voluntatem timentium se faciet, orationes, eorum exaudiet, et salvos faciet eos (Psal. CXLIV)*. Data XIV Kal. Januar., indict. x.

beneficiis sanctæ Romanæ Ecclesiæ tua sanctitas non ingrata nobiscum laboret, nobiscum pro salute populi Dei in illis partibus cooperatrix existat, et nostro certamini favens, sanctæ Romanæ Ecclesiæ se devotam nomine et opere semper exhibeat. Quia si tu, sicut potes, peregeris, nec fratris tui, nec alicujus hominis factum, nostrum opus piūque laborem, Christo juvante, apud vestrates per toto dissipare valebit; quin potius incrementum per Jesum Christum Dominum nostrum augebitur, et labor proficuus apparebit. Data Kalendas Februarii, indicatione x.

LVIII.

AD CAROLUM CALVUM IMPERATOREM.

(Anno 877.)

Propter imminentiā tum a Saracenis, tum a quibusdam Christianis, gravissima pericula, enixe petit ut promissa auxilia quamprimum mittat, et destinatos ea de causa legatos commendat.

JOANNES episcopus CAROLO imperatori

Cum nos in ecclesiasticis curis instantia quotidiana constringeret, et hinc inde populi commissi continuus dolor, qui cuncta nostra interiora perculit, pertubaret, illud, ut ita dixerim, inter alia flevimus, quod nunc usque tam per terram quam et navigio ad vos nostrum missum dirigere summo desideravimus studio, ut nobis vestram prosperitatem desiderantibus et anxie sitientibus renuntiarentur citissime sanitates, sed omnino nequivimus. Hinc fateor, fili charissime, tanta per utrumque iter impedimenta timuimus, quantum et per paganos et per iniquos Christianos, sine respectu divini timoris, generari mala, quæ ætas nostra non meminit, deploramus. Tanta enim sunt, ut intra mœnia Urbis reliquæ populi innumerata paupertate affectæ consistent, et omnihus forinsecus devastatis ac in solitudinem redactis, nihil jam restet nisi, quod Deus, avertat, ipsius Urbis excidium. Sed et quantum nos Leo venerabilis episcopus, apocrisiarius et missus sanctæ Romanæ Ecclesiæ, communis quoque fidelis, a vestro servitio rediens, de hoc quod a vobis retulit, post se vestrum exercitum contra Agarenos esse mittendum, lætificaverat, tantum hucusque eundem nobis exspectantibus, quod consecuti non sumus, validior mœror et ineffabilis angustia contristavit, quia tota Campania ab ipsis Deo odibilibus Saracenis funditus devastata, jam fluvium qui a Tiburtina urbe Romam decurrit, furtim transeunt, et tam Sabinos quam sibi adjacentia loca prædantur. Sanctorum quoque basilicas et altaria destruxerunt, sacerdotes et sanctimoniales, alios quidem captivos duxerunt, alios autem variis mortibus necaverunt, et omnem Christi sanguine redemptum populum in circuitu deleverunt. Et quid dicam? aut quid loquar? cum pervenerit gladius usque ad animam, et sanguis omnium de terra clamet ad Deum. Ergo præcellentissime Cæsarem, jamjam nostræ calamitati succurrite, jam populi nostri miserias relevate, jam vestræ potentie manum porrigite, et hanc ter-

ram, cujus vobis necessitates ab ipso vestræ vocationis initio notas fecimus, liberate, ne si perditā fuerit, vestrum vilescat imperium, et totæ Christianitati noscatur dispendium. Reminiscimini igitur propter Deum, reminiscimini, quia multa spe et fiducia freti, divinitus et humanitus ab imperii gubernacula promerenda pro vobis certamina sumpsimus, nullique labori pepercimus. Ideoque vicem nobis rependite, ut spes et labor noster non sit inanis in Domino; quia cum hæc fuerit semper apud vos summa nostræ petitionis, si amplius nobis auxilium vestrum subtraxeritis, in desperationem lapsi deficiemus, et forsitan in aliud consilium, resumptis aliquantulis viribus, necessario transcendemus. Non enim, sicut vos forsitan aestimatis, mediocre malum tota nostra Ecclesia patitur, minimis status reipublicæ damnis afficitur: sed alia Saracenorum incursibus, alia autem Christianorum ita sunt exterminata et devastata tyrannide, ut non nostra sint quæ nostra fuerunt: quin potius solo nomine omnibus illis utamur, et vel ad defensionem patriæ vel ad aliquam utilitatem nostræ Ecclesiæ, quorumlibet solatia nunquam inveniamus. Præcipue autem multi, quos vestra non ignorat majestas, non solum nulla nobis solatia conferunt, verum etiam quiddam residuum est a paganis, imprætermisse subtrahunt, et omnem nostram dispositionem in territorio Romano suis violentiis calcant; adeo ut nec victualia nec ulla quadrupedia in omnibus nostris remaneant, nec ullum qui nobis compatiatur, vel nostros singulos aut gemitus doleat, oculi nostri aspiciant. Sed quia tanto imperatori pauca sufficiunt, et ex istis jam, fili charissime, quæ nos præ gemitu et afflictione cordis loqui non possumus, universa alia cognoscetis, quasi humo prostrati vestram magnificentiam deprecamur, et per futurum judicium deprecantes, cum tota nostra Ecclesia vestro divinitus protecto imperio totis viribus suggerimus, votisque supplicibus preces multas effundimus, ut contritæ et omni humano solatio destitutæ sanctæ matri vestræ Romanæ Ecclesiæ defensionem, debitamque tuitionem, cunctis remotis occasionibus, cunctisque omissis dilationibus, omnimodis præbeat: quia cum jam juxta præcipitium consistamus, nisi manu vestræ defensionis, et necessariis nobis sicut præmisimus, imo sæpius exoravimus, quanto citius opibus subvenire studueritis, spe vivendi per Christianos sublata, aut ipsis paganis subjiciemur, aut, quod avertat divina potentia, ab eorum multitudine victi, ad omnem Christianitatis interitum crudeli nece peribimus, ac per hoc et Christi nomen in gentibus blasphemabitur, et vestræ opinionis ante acta studia oblivioni trademur. Hujus rei gratia, sicut supra meminimus, opportunum adjutorium coferentes nobis vestrum exercitum ad hostilem expeditionem promptissimum destinate, aliosque Deum per omnia diligentes missos, qui vitiorum flammam justitiæ tramite usi compescant, nimia celeritate dirigite: quatenus qui innumeris tribula-

tionibus quatimur ac æstuamus, et pro populi nobis commissi miseris cruciamur, vestris consolationibus refecti lætemur, et per vos tranquillitate percepta, optatam libertatem, sicut decet, per tam benignum imperatorem consequi mereamur. Postremo sublimitatem vestram deprecimus ut latores præsentium, Petrum scilicet atque Petrum venerabiles episcopos, missos apostolicæ sedis, nostrosque dilectos, juxta morem benigne ac pacifice suscipere non dedignemini, et ea quæ piis vestris auribus pro utilitate sanctæ Romanæ Ecclesiæ in conspectu vestro retulerint, ad congruum ac opportunum effectum pervenire, pro sanctis apostolis vestris intercessoribus apud Deum, celeriter studeatis. Data quarto Idus Februarias, indictione decima..

LIX.

AD RICHILDIM AUGUSTAM.

(Anno 877.)

Ut imperatorem conjugem suum ad opem Ecclesiæ quamprimum ferendam hortetur.

JOANNES episcopus RICHILDI Augustæ.

Multo peracto jam tempore, tam ad spiritualis filii nostri Augusti quam ad vestram invisendam clementiam missos apostolicæ sedis destinare desideravimus, quatenus et de utriusque sospitate lætiores efficeremur, et nobis commissæ, sanctæ scilicet matris vestræ, Romanæ Ecclesiæ calamitates atque oppressiones, quas a Christianis et ab iniquis paganis sine cessatione patimur, ad memoriam reducentes, ab eodem Augusto consolationem et optatam opem, sicut sperabamus tandem aliquando consequi mereremur. Sed omnium viarum aditibus a malis obsessis hominibus, plus nos compulsi dolor lacrymas fundere quam locus pateret ad vos nostros missos dirigere: quia ex uno, sicut diximus, Christiani, ex alio pagani ita nos crudeliter persequuntur, ut solis mœnibus Urbis relictis, omnia in circuitu longe lateque consumpta habeant, et in solitudinem prorsus redacta. A quibus per tantum imperatorem relevari jam credebamus et recuperationem aliquam vel medelam adipisci summopere præstolabamur; sed ecce pro peccatis nostris aliis negotiis implicatus, nobis haectenus distulit ferre præsidium. Et quia jam sustinere non possumus, gloriam vestram multipliciter deprecamur, ut vice nostra fretæ, sumatis in femineo sexu virile pectus, et pro amore sanctorum apostolorum Petri et Pauli, quorum ita est devastatum terminus, ut magis libeat flere, quam dicere, tandiu apud piissimum imperatorem nostrum insistatis, quousque et contra paganos opem præbeat, et Christianos compescere gaudeat. Quoniam ideo illum tanto diademate ab olim quidem a nobis expectatum ac præelectum decore curavimus, ut sanctæ Romanæ Ecclesiæ recuperatio et securitas, quam adeptam dolebamus, per pium studium ejus, quo semper fruebatur, rediret. Quapropter, charissima filia, per Deum vos adjuramus, opportune importune insistite, ut antequam in ipsa urbe Romulea aliud periculum, quod Deus

avertat, proveniat, manum suæ defensionis exhibeat, et hanc terram, quæ sui imperii caput est, ad libertatem reducat, ne quando dicant gentes, ubi est imperator illius? Quatenus et nobis spes evadendi, vendique remaneat, et priusquam hiems vel ver transseat, contra eosdem paganos Romæ sint illius exercitus præparata subsidia. Alioquin aut omnino peribunt, aut coacti ut solam vitam redimere valeamus, eis qui nobis dominantur, quomodocunque subjiciemur. Data iv Idus Febuarias, indictione decima.

LX.

AD CAROLUM CALVUM IMPERATOREM.

(Anno 877.)

Mittit imperatori palmam, et a malis, quibus a Saracenis pravisque Christianis urgebatur expositis, auxilia petit.

JOANNES episcopus CAROLO imperatori.

Inter cætera quæ, vera crescente religione, ab olim ecclesiastica facta vestræ pietati duximus intimanda, virentium vobis palmarum ecce bravium mittimus, quod Apostolus non omnes qui currunt, sed unum propter unitatem legitime certantium accipere protestatur (*I Cor. ix*). Quapropter, fili charissime, quasi præsentis, incurvatis genibus et submisso capite, deprecamur et obsecramus, ut ita legitime celsitudo vestra in hujus sæculi stadio pro Christi Ecclesia currere, ita decertare contendat, ut non solum bravo victrix vestra dextera adornetur, verum etiam sacratissimum caput diademate gloriæ decoretur, imo pro visibilibus his et corruptilibus, non tantum palmam, sed et coronam accipiat incorruptam. Sed, heu, clementissime imperator, ecce dum ad alia intenditis, mater vestra, sancta videlicet hæc Ecclesia, quæ vos spiritualiter, genuit, periclitatur et in novissimum devenit exitum: hinc inde non solum tabernaculis hanc Idumæorum et Ismaelitarum, et Agarenis quotidiano gladio et captivitate in interitum impellentibus, verum etiam falsis filiis Saræ, quos optime nostis, in prædam et direptionem miserabiliter immittentibus; ita ut et illi sæpe usque ad muros Urbis quamvis clandestinis horis pervenerint, sed et Tiberinum fluvium, qui olim Albula dicebatur, juxta Sabinorum confinia pertransierint; et isti qui nobis vicini sunt, ex altera parte ita sæviant et debacchentur, ut non hominem, non agrum, non jumentum, non pecus, non quidquam ex his quæ sancti Petri juris existunt, dimittere patiantur, sed omnia quæ oculo vident manu diripiant, et mala quæ cogitant sine mora perficiant. Hæc sunt, charissime, de innumerabilibus pauca, quæ mater vestra Romana, proh dolor! diebus vestris perfert Ecclesia; quasi non vos specialiter ex omnibus et præ omnibus amaverit, invitaverit et extulerit, vel quasi nos non vos, auctore Deo, in imperium coronaverimus, et vobiscum in omnibus, quasi cum sapientissimo Salomone, ut quondam ille fidelis Sadoch sacerdos (*I Reg, i*), adversus alterum ad omnia minime steterimus, nec cuncta quæ pro vobis debuerimus facere, feceri-

mus : ad extremum quasi non hodieque manus vestra speciali voto et prærogativa plenam benedictione palmam, sicut et cernitis, destinemus adversus visibiles hostes et invisibiles triumphantem. Optantes enim vos de cunctis adversariis triumphare, nihil aptius vobis quam ramos palmarum duximus offerendum, quos et pueri sternebant in via Domino Hierosolymam venienti (*Math. xxii*), antiquum hostem triumphaturo et mundum victuro. Sed dicuntur multæ vos impedire sollicitudines. Hoc plane nec nos ignoramus. Verum ut cum Domino fateamur (*Luc. xi*), et hæc oportuit facere, et illa non omittere. Nam vobis, qui in agone contenditis, ut ad bravium supernæ vocationis et ad capessendam coronam incorruptam perveniatis, ab omnibus aliis abstinendum est, et legitime, ut prædiximus, decertandum. Quid autem magis legitimum quam ut præ omnibus et ante omnia Romanæ curam habeatis Ecclesiæ quæ cæterarum magistra est et mater Ecclesiarum, quæ vestro in tempore tantis ac tam immmanibus succumbit sine cessatione periculis. Denique si hæc Ecclesia, quæ caput est, viget, cætera membra, quamvis languida, recuperandi fiduciam non amittunt quæ nimirum omni robore carent, si contingat solum caput forte languere, quanto potius, quod avertat omnipotens, si contingat exstingui? Unde iterum iterumque totis singultibus totisque imploramus præcordiis, et per Christum Dei Filium suppliciter adjuramus, qui vos ad tantum provexit fastigium et imperium, vel nunc citatum extendite clementiæ brachium, et periclitanti patriæ, quin potius mundo, auxilii jamjamque porrigite dexteram. Ecce Petrus in commissis ovibus mergitur. Erigite ergo eas vos a fructibus, clementissime. Sic vos ipse ab excessuum alluvionibus erigat, et vobis cælestis atria regni intercessionum suarum clavibus reseret, et vitæ æternæ pascua invenienda inter angelos sine termino tribuat, *quæ oculus non vidit, nec auris audivit, etc.* (*Cor. ii*). Data Idibus Februarii, indictione decima.

LXI.

AD ANSPERTUM ARCHIEPISCOPUM MEDIOLANENSEM.

(Anno 877.)

Respondet, abbatem qui, nullo comprobato crimine, a regii cœnobii præpositura depulsus fuerat, esse revocandum; homicidam autem, et facinorosum socium, ab omni præpositura pellendum.

JOANNES episcopus ANSPERTO archiepiscopo Mediolanensi.

Laudamus sanctimoniam tuam, frater charissime, justitiæ zelo ferventem; sed in promotionibus sive antistitis, sive abbatis, nil profecto aliud gerendum possumus exhortari, nisi quod sacri canones sanciant quos nulli sacerdotum licitum est ignorare, vel quidquam facere quod Patrum possit regulis obviari. Verum quia in utroque filii nostri semper Augusti interfuisse perhibetur assensus, ejus super hoc esse videtur expectandus adventus: ad cujus cum

* Aliquid deesse videtur.

tua sanctitas accesserit pietatem, credimus nil Ecclesiæ Dei præter paternas regulas illaturam. Moderatio quippe sedis apostolicæ, universalis Ecclesiæ dispositio, in hoc periculoso tempore pene cuncta dispensatorie moderanda compellit. Quamvis autem præsentī sit exsuli consulendum, nihil tamen est, non exstante ulla necessitate, contra canones Patrum agendum. Abbas autem qui, nullo comprobato crimine, a regii est cœnobii præpositura depulsus, ejusdem piissimi principis permissu, precibus nostris tuæ sociatis industriæ, revocandus est. Non autem solum homicidam, sed et socium homicidæ ab omni præpositura pellendum decernimus. Hæc perpauca fraternitati tuæ scripsimus, ne sibi omnino rescribere supersedissem videremur. Cæterum, ut cum sancto Leone papa dicamus. Nos qui sacerdotum Domini matura volumus esse judicia, nihil possumus incognitis rebus in cujusquam partis præjudicium diffinire, priusquam universa quæ gesta sunt veraciter audiamus. Si enim, ut ait Apostolus (*Gal. iii*), mediator unius non est, qui sic unam partem audit, ut alteri parti nihil reservet. Optamus, etc. Data iii Kalendas Martii, indictione decima.

LXII.

AD EPISCOPOS IN REGNO CAROLI IMPERATORIS
CONSTITUTOS.

(Anno 877.)

Monet ut imperatorem hortentur ad opem Ecclesiæ Romanæ celeriter ferendam.

JOANNES episcopus omnibus archiepiscopis et episcopis in regno imperatoris Caroli constitutis.

Pristinis attritiis miseris et oppressi calamitatibus, dilectissimi filii nostri magni imperatoris Caroli, quasi de profundis ad Deum clamantes, tanquam ipsius Domini et Salvatoris nostri anxii expectabamus adventum, et, ut ita dixerim ejus iteratum pro salute nostra credebamus imminere descensum. Sed, proh dolor! tot ac tantis circumdamur hinc inde periculis ut tædeat nos etiam vivere. Ecce enim Dominicarum ovium ab Agarenis, qui sunt filii fornicationis, necnon et ab his qui solo sunt nomine Christiani, aliæ gladio trucidantur, aliæ fame pereunt, aliæ vero in prædam et captivitatem ducuntur. Sed et pastores earum, reverendi episcopi profugiunt, et vagi huc illucque palantes omni penitus egestate tabescunt. Redacta est terra in solitudinem, et ablatis ab illa hominibus, ferarum saltus effecta est; civitates, castra et villæ subversæ, nec ubi earum fuerint ædificia, innuunt. Sed et venerabilia loca destruentes, altaria Domini suffoderunt, ministros et servos ejus occiderunt. Factis sumus, secundum Psalmistam, in derisum et contemptum his qui in circuitu nostro sunt (*Psal. xliii*), dum illi aut vicinorum auxilio potiuntur, aut saltem pacto, secundum Apostolum, tempus redimunt, quoniam dies mali sunt (*Ephes. iii*). Seminamus pedetentim, quamvis in lacrymis, nec recolligimus, imo jam nec seminandi facultas suppeditat. Sedet

in tristitia domina orbis, mater Ecclesiarum, magistra gentium, consolatio tristem, et non est qui adjuvet, non est qui consoletur eam, nisi tu solus, o bone Deus, et si non re propter iniquitates nostras, sed spe, quæ secundum Apostolum non confundit (Rom. v). Quæ, fratres charissimi, partim vobis significamus (nam si per singula scribere tentassemus, facilius nobis charta quam sermo deficeret) ut sicut unum corpus sumus in capite Christo, et alter alterius membra, ita nobiscum pariter condoleatis et compatiamini : quia *si quid unum patitur membrum*, ut doctor gentium ait, *compatiuntur omnia membra* (I Cor. xii) ; *et si compatiuntur, et conregnabimus* (II Tim. ii). Condolentes autem nobis et compatiētes, accedatis ad Christianissimum filium nostrum, et consilium Domini ab eo non abscondatis ; suggerentes et exhortantes ut perpendat quis et quam terribilis sit ille, qui hunc ante sæcula huic præfuturum regioni prædestinaverit, et quam districte ab eo exacturus sit quod commisit : qui scilicet tam pretiosi sanguinis fusione quod credidit emit. Meminerit etiam quia et nos illum præ cæteris propinquis et æmulis ejus amavimus, elegimus et prætulimus. Unde et eum adversus omnes hostes Ecclesiæ non solum defensorem, sed et patronum et advocatum nostrum existere proposuimus : ut quod ei nos apud Deum esse satagimus, ipse inter homines pro nobis fieri non detrectet præcipue ut accelerans nobis subveniat et sine mora contra perfidos Christianos et infideles succurrat. In quo sanctæ fraternitati vestræ præ omnibus laborandum est : pro commisso scilicet sibi sacerdotali officio, et quia, ut cum propheta viridico fateamur (Isa x), si hæc humiliatur, ad cujus confugietis auxilium, vel ubi relinquētis gloriam vestram ? Data III Kalendas Martii, indict. x.

LXIII,

AD LANDULPHUM EPISCOPUM CAPUANUM

(Anno 877.)

Mittit legatos, ut Docibilis hypatus petierat : hortatur ut det operam una cum legatis, ut pactum cum Saracenis initum dissolvatur ; se quidquid ab eo constitutum fuerit, approbaturum.

LANDULPHO episcopo Capuano.

Noverit industria tua nos tam Sergii magistri militum quam Docibilis hypati epistolas suscepisse : quibus cognovimus eos excusabiles se velle coram nobis reddere tentavisse super contracto infando fœdere quod cum Saracenis impie pepigerunt nec absolverunt, in tantum, ut gerulus earum referret jam fuisse diruptum, nisi dilectio tua pro reverentia nostri, nostrum in hoc expectandum arbitrium judicasset. Quamvis nec hæc ipsa ex toto crediderimus, eo quod de his nullam tuam susceperimus. Verum quia nos prædictus Docibilis hypatus, ut missos nostros pro tanto bono et omni Ecclesiæ profuturo perficiendo, Cajetam mitteremus, obnixè rogavit, ne negligentia nostra diffamaret tantam humani generis salutem postpositam, misimus illic

A Walbertum Portuensem, et Eugenium Ostiensem sanctissimos episcopos, dilectos et consiliarios nostros, ut sive cum magistro militum, sive cum missis ejus loquentes, pactum illud, quod perditionis est causa, dissolvi per omnia suaderent, in tuæ maximæ sapientiæ illos fiducia destinantes. Quapropter hortamur ut solertia tua tanto in hoc laboret quanto non solum a nobis codignam vicissitudinem, sed et ab ipso Deo et Domino nostro coronam se percepturam in cœlestibus non poterit dubitare. Admonemus itaque, *insta opportune, importune* (II Tim. iv), ut tam impio discisso fœdere, pax Dei, quæ exsuperat omnem sensum (Philip, iv), nobis tandem cœlitus restituatur. Si qua vero inter hæc se ingerit inimica Deo contentio, tuæ sapientiæ manibus detergatur : nulla simultas, nulla rerum vel gloriæ cupiditas a tanto lucro atque profectu vos subtrahat ; quia, quidquid illud est, pacifice poterit post modicum dirimi, et cum charitate, nobis quoque mediantibus, diffiniri. Certet ergo, laboret et satagat industria tua, et in his vice nostra utatur ; quidquid agendum, quidquid communi ex placito fuerit construendum, vice nostra faciat atque constituat. Alacriter enim quod tua dilectio constituerit, et immobili placito fixerit, adimplere atque perficere procurabimus, nihil ut in hoc hæsitet dilectio tua magnopere componentes. Prædictis autem missis nostris missos tuos indifferenter et absque mora Cajetam dirigere procurato, qui de his omnibus cum eis salubriter tractare valeant, et quæ sunt agenda perficere, Optamus, etc. Data Idus Martii, indictione x.

LXIV.

AD FROTARIUM ARCHIEPISOPUM

(Anno 877.)

Frotarium ab Ecclesia Burdigalensi a paganis devastata transfert ad Bituricensem.

Reverentissimo et sanctissimo confratri nostro FROTARIO, dudum quidem Burdigalensi, nunc autem Bituricensi archiepiscopo.

Ad hoc nos divina proviso supernaque moderatio Ecclesiis suis voluit præesse rectores, ut dispersa congregare et servare congregata summo studio procuremus, non solum [*forte*, et non solum. HARD.] earumdem Ecclesiarum sollicitudinem, sed ipsorum quoque rectorum habeamus industriam et exerceamus solertiam : quatenus sicut rectoribus destitutis Ecclesiis alios subrogantes consulimus, ita rectoribus vacantibus Ecclesias Domini committentes, providam curam nos earumdem Ecclesiarum gerere demonstremus : maxime his qui, cum robusti præliatores Domini sint, intra otiositatis angustiam arceri renuunt, et per hoc expeditus contra vitia certaminum exercitia quærunt. Quia igitur Burdigalensem Ecclesiam, totamque pene sub ejus habitam regimine dicecesim, ita paganorum frequentes gladii prædæque continuæ consumpsit irruptio. ut pene omne illic episcopale vacet officium, necessario prævidimus. Dei omnipotentis auctoritate,

beatorumque Petri ac Pauli apostolorum principum, A hæc severius secundum ministerium nostrum puniendi commoveas. Denique nisi post lectam hanc nostri apostolatus epistolam, intra sexaginta dierum spatium, thesaurum illum sine aliqua diminutione reddere proposueris, ita ut missus tuus Romam in præsentiam nostram veniens, sive reddideris, sive nec reddideris, quidve hic agendum delegeris, veram et idoneam exposuerit rationem, eousque sis extunc excommunicatus, quousque ab omni te rapinæ communionem reddideris alienum; durioribus deinceps te sciens verberibus erudiendum, si his interim levibus tactus respiscere forte contempseris. Amamus enim te more paterno, et ab hac secunda idolorum servitute volumus scire liberum et immunem. Etenim *avaritia*, secundum Apostolum, *est servitus idolorum* (Gal. v). Optamus, etc. Data vi Kalendas Aprilis, indictione decima.

LXV.

AD CAROLUM REGEM

(Anno 877.)

Monet ut bona ablata a monasterio sanctimonialium restituenda curet; quod nisi intra sexaginta dies fecerit, et per legatum id sibi nuntiaverit, vel causam cur non sint restituta, non reddiderit eum excommunicat.

JOANNES episcopus CAROLO ^a glorioso regi.

Cum generositatem tuam tanta claritas prosapiæ regalis extollat, miramur et obstupescimus quomodo hanc tam sinister longe lateque discurrens rumor obnubilaret, asserens et affirmans te Italiam ingressum ad monasterium accessisse ancillarum Dei apud Brixiam constitutum; indeque cum illic ipse morareris, tyrannice aurum ablatum, tam ipsius venerabilis monasterii, quam dilectæ filiæ nostræ Angelbertæ Dei cultricis, quod sibi ad ipsius præcipue cœnobii sustentationem procul dubio reservaverat. Unde mœrore vehementer afficimur, dolentes gloriam tuam ad tam immane sacrilegii genus dilapsam et instar cujusdam gentilis regis vasa domus Dei ad usus proprios inflexisse conatam (Dan. 1). Atque ideo dilectionem tuam in Christi visceribus esse cupientes, monemus et sacris convenimus eloquiis cum Psalmista fatentes: *Nolite sperare in iniquitate, et in rapinis nolite concupiscere* (Psal. LXI). Si qua ergo a prædicto pio loco, sive gloria tua sciente sive nesciente, ablata sunt, industria tua diligentissime requirantur, et inventa in eo sine mora sub omni integritate restituantur: ne, quod absit, si aliter egeris, et Deum contra te ad iracundiam provoces, et decus tuæ regiæ nobilitatis offulces, atque nos ad

^a Illic Carolus, qui Crassus nominatus est. postmodum imperator creatus, fuit filius Ludovici Germaniæ regis. Ludovici Pii nepos, Caroli Magni pronepos, ad quem nonnulla infra scribuntur epistolæ. De quo Ado Viennensis in fine Chronicorum; Regino, l. n. Chron.; Aimoinus

B hæc severius secundum ministerium nostrum puniendi commoveas. Denique nisi post lectam hanc nostri apostolatus epistolam, intra sexaginta dierum spatium, thesaurum illum sine aliqua diminutione reddere proposueris, ita ut missus tuus Romam in præsentiam nostram veniens, sive reddideris, sive nec reddideris, quidve hic agendum delegeris, veram et idoneam exposuerit rationem, eousque sis extunc excommunicatus, quousque ab omni te rapinæ communionem reddideris alienum; durioribus deinceps te sciens verberibus erudiendum, si his interim levibus tactus respiscere forte contempseris. Amamus enim te more paterno, et ab hac secunda idolorum servitute volumus scire liberum et immunem. Etenim *avaritia*, secundum Apostolum, *est servitus idolorum* (Gal. v). Optamus, etc. Data vi Kalendas Aprilis, indictione decima.

LXVI

AD ENGILBERGAM.

(Anno 877.)

Consolatur eam ob mortem mariti, atque monet ut Carolo imperatori fidem servet, seque ejus intercessorem apud eundem Augustum futurum pollicetur.

JOANNES episcopus dilectæ filiæ ENGILBERGÆ b Christo dicatæ.

EO nos, filia charissima, nec alio circa dilectionem vestram flagrare affectu noveris, quo fuimus, quo etiam olim persistere proposuimus: nescit enim dilectio vicissitudinum obumbrationem, nec defectum patitur, cum, secundum Apostolum, nunquam excidat (I Cor. XIII). Hujus rei gratia consolatoriis his et exhortatoriis prudentiam vestram litteris commonemus, ne deficiatis in tribulationibus, scientes, docente Apostolo, *quia tribulatio patientiam operatur, patientia autem probationem, probatio vero spem: spes autem non confundit* (Rom. v); *omnia enim quæ videntur, temporalia sunt; quæ vero non videntur, æterna* (II Cor. iv). In his ergo configi, in his debes totis radicibus inhærere, charissima: unde sapientia vestra sanctos, qui patientia in mundo claritate quasi luminaria refulserunt, præ oculis habeat, et ita inoffensis ad palmam supernæ vocationis gressibus tendat, quam videlicet habituri sunt illi qui, oraculo Dominico imbuti, in patientia sua ponunt animas suas (Luc. XXI). Nihil enim inimica mors vel manus abstulit, quod vita, quæ Christus est et ipsius provida dextera in melius non transtulit atque restituit. Abstulit mortalem illa maritum, sed ista se ipsam æternum contulit sponsum; unde quæ terreni vocabamini uxor, Patris cœlestis jam regis multo præstantius dicimini conjux. Ademptum est corruptibile diadema, sed præparatur incorrupta corona.

lib. v, cap. 40 et alii.

^b Engilberga uxor fuit Ludovici secundi imperatoris, ad quam aliquot infra scribuntur epistolæ. Ejusdem meminit Aimoinus, l. v, c. 28, et Leo Marsicamus, lib. 1, cap. 38.

Remota sunt decoramenta quæ veterascunt, sed reposita sunt vobis ornamenta quæ non marcescunt. Et quid plura? Pro ærumnoso et phantastico regno, percipietis felix et verum imperium: et revera hæc est immutatio dexteræ Excelsi (*Psal. LXXVI*). Verum cum sapienti vobis et quæ notis de paucis plura pensare pauca sufficiant; his ita prælibatis, dilectionem vestram merito commonemus ut spirituali filio nostro Carolo piissimo imperatori puræ fidei ac sinceræ devotionis exhibens semper integritatem, omnes ad ejus mansuetudinem attrahat, et salubribus monitis inviolabilem ei fidem servare demonstret. *Non enim est potestas*, ut Apostolus ait, *nisi a Deo (Rom. XIII)*. Et: *Qui resistit potestati, Dei ordinationi resistit (ibid.)*; nos autem, quia illum divinitus, ut credimus, acti semel elegimus, perpetuo tanquam filium charissimum omni conatu diligimus, ita ut ipsius amicos et inimicos, nostros amicos et inimicos existere teneamus: si qua vero sunt vobis ab ejus clementia impetranda, per nos credimus, cum vobis liberit, indifficulter obtinere valebitis. Quod et nos libentissime pro memoria priscae benignitatis vestræ geremus, et idem pius Augustus pro Dei sanctorumque apostolorum, sed et nostri dilectione animo grantanti concedet. Optamus dilectionem vestram bene in Christo valere, dilectissima filia. Data VI Kalendas Aprilis, indictione decima.

LXVII.

AD WIGBODUM EPISCOPUM PARMENSEM.

(Anno 877.)

Hortatur ut quoscunque potest ad sanctæ Romanæ Ecclesiæ defensionem excitet, et ad se cum suis veniat, ut communi consilio Saraceni ab Italia expellantur: mittit desideratas epistolas, quas afferendas curet iis quibus scribuntur.

JOANNES episcopus WIGBODO episcopo Parmensi. Devotionis tuæ affectus non inscii grates condignas referimus; quia vero sanctitatem dolere tuam cognoscimus pro eo quod a nobis nihil sibi laboris injungatur; nil esse noveris aliud nisi quia novimus te multis hujus temporis procellarum fluctibus irretitum. Verum quia nobis multa incumbit necessitas, et tua promptissima claret alacritas, hortamur ut quoscunque potes, et quomodocunque potes, ad defensionem hujus sanctæ principalis Ecclesiæ filiorum excites, incites, et prout necessitas urget, impellas: sed et ipse cum his qui tibi adhaerent ad colloquium nostrum accelerare ne pigriteris, quatenus communi consilio, auxiliante Deo, gens impia nostris eliminetur et finibus: hoc est quod exigimus, hoc est quod ante speciali voto deposcimus. Quæ vero de mittendis quibusque litteris nostris suggerere voluisti, votis tuis, prout temporis qualitas, et causarum dispensatio concessit, gratanter annuimus; et non solum hoc, sed et quæ possumus, tanto circa sanctimoniam tuam exhibere libentius volumus, quanto hanc præteritis illis in partibus constitutam alacrius et in-

stantius quæ nostra sunt exsequi contemplamur. Epistolæ autem ipsæ quibus missæ sint, superscriptio earum monstrabit, quas ipse procul dubio ad eos quibus directæ sunt facies asportari. Esto itaque fidus in nobis, et *viriliter age et confortetur cor tuum, et sustine Dominum, et, Accinge sicut vir lumbos tuos (Job. XL)*, et accelera, ut dilectionem tuam superius commonuimus. Optamus sanctitatem tuam, etc. Data VI Kalendas Aprilis, indictione x.

LXVIII.

AD DOCIBILEM ET JOANNEM.

(Anno 877.)

Hortatur ut det operam ne Christiani fœdus eum Saracenis faciant.

JOANNES episcopus DOCIBILI^a et JOANNI hypatis.

Devotioni tuæ pro labore fidei Christianæ quam excolis gratiarum actionibus persolutis, iterum et iterum exhortamur ut magis ac magis satagere et decertare, et cœptum laborem ad perfectam ducere actionem procures: ut Christiani nominis viri paganorum federa fugiant, et solum in Deum, qui eos creavit, et non in diaboli membra, quæ sunt filii fornicationis et vasa iræ, spem suam ponere discant. Quod cum egeris, salvabis animam tuam, et operies multitudinem peccatorum. Dicit enim beatus Jacob: *Qui converti fecerit peccatorem ab errore viæ suæ, salvabit animam suam a morte, et operiet multitudinem peccatorum (Jac. v)*. Data V Idus Aprilis, indict. x.

LXIX.

AD PULCHAREM PRÆFECTURIUM AMALFITANUM.

(Anno 877.)

Monet ut fœdus cum Saracenis initum dissolvendum curet.

JOANNES episcopus PULCHARI^b præfecturio Amalfitano.

Admonemus ut in omni virtute tua et sapientia tua labores atque decertes ut illi homines paganorum disrumpere pacta procurent. Quod si fecerint, nil vobis vel illis denegabimus eorum quæ rite facere possumus, et pro nulla causa vel homine nos a communi vestra et eorum salute seu auxilio separabimus, nec illos aliquando dimittemus. At vero si illi hoc facere recuserint, et conspicias eos nobis de die in diem tantummodo velle illudere, saltem tu fac secundum consilium tuum, quod scilicet, inspirante Deo, ex prudenti corde salutiferum protulisti. Quidquid autem de his factum, vel non factum fuerit, aut faciendum exstiterit, tuis nobis vel missis vel litteris citius indicabis, ut quæ deinceps nobis necessario sunt agenda, facilius et expeditius agamus, præparemus et ordinemus. Data V Idus Aprilis, indict. x.

^a De Docibile Leo, ep. Ostiensis, lib. II, c. 14.^b De Pulchare Leo, ubi supra.

LXX.

AD SERGIUM MAGISTRUM NEAPOLITANUM.

(Anno 877.)

Dolet ipsum sæpe monitum fœdus cum Saracenis solvere noluisse; præcipit ut tandem pareat; sin minus, minatur se iterum eum excommunicaturum; pollicetur, si fideles legatos miserit, benigne se suscepturum.

JOANNES episcopus SERGIO ^a magistro Neapolitano.

Dum verbi Dei semen in pectore tuo etiam per memetipsum post crebros missos et litteras seminasse, exspectabam non verborum folia, sed fructus operum promereri: sed quia super hac parte spes nostra frustrata est, cogor in vocem Domini per Isaiam prophetam adversus Israeliticam plebem prorumpere, clamans: *Quid est quod debui ultra facere vineæ meæ, et non feci? an quod exspectavi ut faceret uvas, fecit autem labruscas?* (Isa. v.) Verum quia, ut cum Apostolo dicam, *eadem vobis scribere mihi quidem non pigrum, vobis autem necessarium est* (Philip. III); semel te tuosque adhuc admonere non abnuo ut ab infidelium consortio declinetis, et a tam profano tandem aliquando fœdere recedatis. Quod si nos audieritis, non solum bona quæ cupitis affluentius ex nobis habebitis, sed et magna præmia cœlitus assequemini; sin autem, non solum nos spirituali vos iterato gladio parcellemus, sed et hi qui non sine causa materiales gladios portant, cum sint sanctæ Ecclesiæ validi defensores et fervidi zelatores, cunctis adversis et prosperis conculcatis, adversus vos protinus arma corripient, et vindices contra vos impugnatores ejus celerius properabunt. Quæ nos scientes, quia vos anima et corpore salvos reddere cupimus, hæc vobis denuntiamus et cavenda præcipimus. Cæterum miramur quomodo vos in litteris vestris, quas in ipsa paschali festivitate suscepimus, inculpabiles tentetis astruere, cum piaculum vestrum totus qui desertus est mundus, et sanguis de terra, qui effusus est, clamet: præveniente autem gratia Dei, cito credimus fore ut et vos resipiscentes a vinculo quo annexi tenemini, convenientius absolvamini, et de tua tuorumque salute ipsi cum cœlestibus choris pari gaudio perfruemur. Porro si missos destinatis fideles, quibus credere procul dubio valeamus, libenti eos et benigno suscipiemus affectu; et quidquid desiderio vel voto vestro cederit, gratanter administrabimus fidentes, quod nil impossibile, nil allegaturi sint inconveniens: e contra vero si finetenus pacti jugum cum infidelibus ducere proponitis, scitote profecto quia, ut cum Apostolo fatear, *in virga veniam ad vos* (I Cor. IV). Data v Idus Aprilis, indictione decima.

LXXI.

AD EPISCOPUM NEAPOLITANUM.

(Anno 877.)

Quæritur Neapolitanos cum infidelibus fœdus iniisse, nec ab ipso eorum antistite ad viam veritatis revocari. Quare hortatur ut ipse et illi resipiscant: præterea pollicetur se benigne suscepturum Neapoli-

^a De Sergio Leo, lib. I, cap. 42.

A *tani ducis legatos, si miserit, paratumque ad omnia se fore, quæ pro Ecclesiæ Dei utilitate perficienda retulerint.*

JOANNES episcopus ad episcopum Neapolitanum.

Relictis litteris tuis, quas cœpto jam paschalis festivitatis officio in die magno suscepimus, nihil quo lætificaremur, reperimus: unde ingens tristitia, et continuus dolor cordi nostro crevit, et multiplicatus nos vehementer affligit; quia populum civitatis vestræ, quæ olim Dei, nunc autem principis tenebrarum effecta est, derelicto penitus creatoris sui amore, videmus jugum cum infidelibus ducere: teque ideo fore obnoxium, quoniam in medio populi polluta labia habentis, pollutum et complicem habitare, nec toto annixu te velle murum pro domo Domini, sicut idoneum Christi athletam oportet, contemplamur opponere. Cum nos pro hujusmodi causa te ad tanti honoris culmen perducere procul dubio studeremus, quatenus te adjutorem et fidelem cooperatorem habentes, oves Domini de tam immani profundo quo ab humani generis inimico submersas et retentas jacere conspiciebamus, abstrahere atque ad superna relevare possemus, ut de illorum simul salute par apud retributorem omnium Deum pro communi certamine meritum haberemus. Sed ecce neglecta pastoralis officii cura, postposito divini timore judicii, cum illis quos aut corrigere et ad viam veritatis revocare, aut eos quasi gregem morbidum tot disciplinæ salubris verberibus castigatum, salutem propriam nolentem recipere, vitare, atque de medio eorum, sicut jam olim tibi ex divina auctoritate præcipimus, exire debueras, nec amplius cum prævaricatoribus et consortium infidelium habentibus habitare præsumeres, ut tuæ devotionis sinceritate manifestis apparente, reverentiam tuam, quam sacerdotii summi decoravimus infulus, in societate corporis Christi nobiscum haberemus conjunctam. Nos enim assidua quamvis corporis incommoditate tunc detenti essemus, volentes Neapolitanam civitatem, ceu populum Domini, et oves pascuæ ejus nobis in ipso apostolorum principe commissas cum omni devotione salvare, non recusavimus laborem, quin potius posuimus animas nostras in manibus nostris, Dominicaque voce admoniti venimus confirmare illos in beneplacito Dei, ceu fratres, et ut filios charissimos coram Domino adjuvare; sed obdurato ipsi corde, nostras D præces et monita recipere atque ut aspides surdæ audire despexerunt; teque secundum eorum votum et desiderium antistitem, quod non merebantur, ordinare non prætermisimus, multis super hoc aliis et etiam bonis promissis, si nostræ voluntatis desiderium devota mente complerent: nunc autem vel illis incorrectis existentibus, et ad percutientem se redire nolentibus, vel tibi cum ipsis habitanti, et idcirco a divinis omnibus cum eis pariter sequestrato; quo pacto antequam resipiscentes ad viam salutis et justitiæ revertamini, parcere, aut a nexu ecclesiastici vos judicii valemus absolvere? Absolvite ergo

vos prius colligationes impietatis et fœdus impium quod cum inimicis Christi habetis compositum, et nos illico misericordiam, quam Deus noster Ecclesiæ suæ in Spiritu sancto dedit facere posse, nullatenus vobis jam conversis tribuere omitemus. Nam sicut vere satisfactionis confessoribus parcendum est, dicente Domino : *Cum conversus ingemueris salvaberis, et adhuc te loquente, dicam : Ecce adsum* (Ezech. xxxii) ; ita vero in scelere impio manentibus miserendum non est, quoniam misericordiam aliquam vobiscum ante fructum dignum pœnitentiæ facere omnino nequimus, eo quod misericordia sine controversia quæri debet, ut salus sit disciplinæ. Nam dicente sancto Gregorio (lib. ii in Ezech. hom. 19) : Sæpe pietas per immoderatam misericordiam errare solet, si fortasse pepercit quæ parcenda non sunt. Peccata enim quæ ferri gehennæ ignibus possunt, disciplinæ sunt verbere corrigenda. Sed inordinata pietas cum temporaliter parcat, ad æternum supplicium pertrahit. Unde vobis resipiscitibus ne in futuro pereatis, parcere optamus. Præterea si frater tuus, Neapolitanorum videlicet dux, per suos idoneos legatos nobis optata et ea quæ oportet veraci relatu perficienda direxerit, eos gratissime recipientes, quidquid ratione sagaci retulerint, perficere pro Ecclesiæ Dei utilitate atque salute procul dubio parati erimus. Age igitur, et desudare pro communi prosperitate, imo pro salute tua et civium tuorum non desistas, arguens, obsecrans et increpans cum omni imperio, ut labor tuus fructum desiderabilem in domo Domini pro quo digne remunereris afferat. *Data ut supra.*

LXXII.

AD AJONEM EPISCOPUM BENEVENTANUM.
(Anno 877.)

Laudat ejus promptum ad Ecclesiæ defensionem studium : tum hortatur ut contra Saracenos opem ferat, et fœdus cum illis ictumdīs solvendum curet.

JOANNES EPISCOPUS AJONI episcopo Beneventano.

Perspectis apicibus sanctitatis tuæ, quantum in te divini amoris ardor efferveat luce clarius recognovimus, et quantum erga sanctam Romanam Ecclesiam devotus existas nihilominus advertentes, pro tanta tibi benignitate multiplices gratias agimus, et sanctimoniam tuam ad nostri profectum certaminis dignis pollere successibus ab Omnipotentis clementia postulamus. Vere etenim, frater charissime, laudibus es extollendus, qui tribulationes nostras, quas pro populo nobis commisso patimur, quasi præsentem intuens, nobiscum gemens et dolens, ad has auferendas providum commilitonem et cooperatorem nostrum non indebite te velle esse in omnibus asseveras. Nec aliud itaque de tua sanctitate credimus, nec aliud suspicamur, nisi ut quamvis corpore absens sis, spiritu a nostris singultibus nunquam desis ; et quam dolendum sit quod fideles cum infidelibus tam perniciose junguntur, liquidius et ipse perpendas ; hujus rei gratia, quia multis studere loquelis, ne magis multiplicare verba quam gemitus videamur,

non expedit ; præcipue quia tua fraternitas ipsos invisibiles mœrores nostros, sicut in litteris tuis conspicimus, non ignorat, per illum qui te sacerdotem suum constituit, tuam reverentiam adjuramus, suadentesque modis omnibus deprecamur, et auctoritate principum apostolorum, fraterno freti amore, præcipimus ut omnibus viribus tuis omnique posse tuo labores, tam scilicet cum germano fratre quam cum aliis Christicolis in hoc opem ferre valentibus, ut impia Agarenorum fœdera, quæ Neapolitani vel sui consocii cum inimicis Christi nominis inierant, Christo miserante quantocius destruantur ; et pax atque concordia fidelium per eundem Christum Dominum reformetur, quatenus corpus sanctæ Dei Ecclesiæ, pro qua sanguis fusus est Christi, in suis membris non laceretur, et quæ sit vera religio atque perfecta charitas agnoscat : quia licet vos, vel omnis forte mundus mala quæ imminent lugeat, nos tamen tantum præ omnibus affligimur ac dolemus, quantum præ omnibus sollicitudinem atque curam regendarum Christi ovium nos suscepisse perpendumus. Ideoque quia plus omnibus laboramus, ut per vos labor noster usque ad effectum proficiat, specialiter deprecamur. Inter hæc autem charissimum fratrem quæsumus exhortare, ut epistolam nostram ad primum Græcorum illuc venientium cito transmittat, et suis cum deprecationibus moneat ut, omni amota occasione vel decem dromones in adjutorium nostrum statim dirigere nunquam omittat : quia nos, cooperante gratia Christi, tam cum charissimo filio nostro Lamberto glorioso duce, qui nobis in omnibus hæret, quam ceteris aliis Dominum timentibus desudabimus, ut et impium fœdus cum Agarenis habitum dissolvatur, et libertas vel aliqua securitas Christiani populi renascatur. Postremo quia, sicut diximus, plus omnibus necessario laboramus, nullum laborem nullamque tolerabilem molestiam corporis recusabimus, quo minus adjuvante Domino pro tantis necessitatibus pro vobis cum præveniente Christo laborem nostrum viriliter insistamus : forsitan omnipotens Deus, adhibitis tuis laboribus, tantorum pereuntium miserebitur, et dolores nostros auferens, fœdera cum iniquis paganis a vestratibus facta dissolvat ; ubi rogamus cunctis conatibus sudes, qui tanto de profectu tui certaminis lætari speramus, quanto te in hoc opere cooperatorem nostrum habere confidimus. Interim magno opere postulamus ut quidquid sive de dromonibus dirigendis, sive de impiis peccatis solvendis per tuam solertiam, vel per fratris tui obedientiam effectui fuerit datum, citissime nobis sancta tua fraternitas scriptis significare procuret. *Data xv Kalendas Maii, indictione decima.*

LXXIII.

AD GREGORIUM IMPERIALEM P.EDAGOGUM.
(Anno 877.)

Gratulatur imperatorem contra Saracenos classem ad Ecclesiæ defensionem misisse ; eumque ducem

constituissse : tum monet ut decem achelandia^a a nam superna vos majestas sanctæ suæ Ecclesiæ nobis commissæ patronum invictum, defensorem potentem, et strenuum adiutorem concessit, ut in omnibus ecclesiasticis utilitatibus, unde perpetuam habere gloriam mereamini, quasi vindicem Dei habeamus ministrum. Igitur cum eundem Adelardum episcopum venerabile monasterium Nonantulæ situm, quod pro Dei tantique loci reverentia, nullus unquam episcoporum vel iudicum in beneficium quæsivit, timorem divinum parvipendendo, contra sacras præcessorum nostrorum nostrique privilegii institutiones, quibus de propria semper congregatione abbatem fieri jubetur, callide petiisse, ac per hoc illicita præsumpsisse, omnimodis reperissemus ; auctoritate apostolica eum excommunicare studuimus ;^b ut eaque ipse tenere canonicis eum correctionibus, prout nobis auctoritas apostolica suffragatur, procul dubio arguemus, ut digno verbere castigatus, et canonico nexu ligatus, obedientiam discat servare, qui absolutus ecclesiasticis atque canonicis noluit obedire præceptis. Data ut supra.

JOANNES episcopus GREGORIO imperiali pædagogo.

Gloriam tuam hac apostolatus nostri epistola missa primitus exhortamur ut divinitus datas sanitates desiderabilis filii nostri Basili tranquillisimi imperatoris nobis significes. Cupimus enim valde salutem ejus animæ simul et corporis semper audire, tanquam piissimi propugnatoris orthodoxæ fidei. Gratulati autem sumus audientes gloriam tuam directam cum Deo conservandis exercitibus a prædicto divinitus protegendo imperatore, in partes Beneventanorum venisse, tam quia, gratias Deo, ipsius divinitus provectum imperium in defensionem Christianitatis pio zelo succensum, classes et militarem validam manum contra inimicos crucis Christi mittere procuravit, quam quod te præ cæteris ad tantum opus cum Dei auxilio peragendum elegit, quem audivimus in omnibus strenuum et Dei cultorem industrium. De cætero credimus scire jam magnificentiam tuam qualiter quædam latrunculorum Agarenorum sagenæ occultis irruptionibus littora nostra devastent ; et quia palam ausum non habent, furtivis deprædationibus plurima huic sanctæ Dei Romanæ Ecclesiæ damna multipliciter inferant. Quapropter bene visum est nobis litteras nostras tibi transmittere, ut vel decem bona et expedita achelandia ad portum nostrum transmittas, ad littora nostra de illis furibus et piratis Arabibus expurganda : quod citius et sine aliquo impedimento agere poterunt, adjuvante dextera Excelsi, quæ principibus apostolorum intercedentibus concertabit et auxiliabitur illis ; in quo, mihi crede, gratum animum piissimo imperatori facies, si in hoc admonitiones nostras audieris, quia cum sit Christianissimus Dei amator et Ecclesiarum Domini fervidus propugnator, non poteris illum tibi gratiorem reddere quam si tantum hanc sanctam Ecclesiam per te studueris adjuvare, quæ prima Ecclesiarum magistra et caput est, maxime cum in hoc facto eidem a Deo protecto semper Augusto et in hoc sæculo gloriam et in futuro acquiras sine fine coronam. Deus omnipotens te et qui tecum sunt protegat, et contra inimicos Christi potenti dextera tueatur. Data xv Kalendas Maii, indictione decima.

LXXIV.

AD CAROLUM CALVUM IMPERATOREM.

(Anno 877.)

Nuntiat se Adelardum episcopum Veronensem excommunicasse, quod Nonantulanum monasterium invasisset.

JOANNES episcopus ad imperatorem.

Sacris vestræ imperialis clementiæ auribus, gloriosissime imperator Auguste, Adelardi Veronensis episcopi inobedientiam et temerariam præsumptionem, quam non solum in nostro contemptu, sed etiam in vestræ celsitudinis peregrit injuriam, præsentibus referre apicibus jure curavimus et merito :

^a Al. *chelandia*, quæ e navium militarium genere sunt.

nam superna vos majestas sanctæ suæ Ecclesiæ nobis commissæ patronum invictum, defensorem potentem, et strenuum adiutorem concessit, ut in omnibus ecclesiasticis utilitatibus, unde perpetuam habere gloriam mereamini, quasi vindicem Dei habeamus ministrum. Igitur cum eundem Adelardum episcopum venerabile monasterium Nonantulæ situm, quod pro Dei tantique loci reverentia, nullus unquam episcoporum vel iudicum in beneficium quæsivit, timorem divinum parvipendendo, contra sacras præcessorum nostrorum nostrique privilegii institutiones, quibus de propria semper congregatione abbatem fieri jubetur, callide petiisse, ac per hoc illicita præsumpsisse, omnimodis reperissemus ; auctoritate apostolica eum excommunicare studuimus ;^b ut eaque ipse tenere canonicis eum correctionibus, prout nobis auctoritas apostolica suffragatur, procul dubio arguemus, ut digno verbere castigatus, et canonico nexu ligatus, obedientiam discat servare, qui absolutus ecclesiasticis atque canonicis noluit obedire præceptis. Data ut supra.

LXXV.

AD JOANNEM ANSPERTUM ET WAIPERTUM
ARCHIEPISCOPOS.

(Anno 877.)

Ejusdem argumenti.

JOANNES episcopus JOANNI Ravennati, ANSPERTO Mediolanensi, et WAIPERTO [f. VALPERTO] Aquileiensi archiepiscopis.

Sancti magnique Nicæni concilii præcepta secuti, quæ jubent (*can. 12*) regularem epistolam per unamquamque provinciam obtineri, ne hi qui abjiciuntur ab aliis recipiantur, fraternitati vestræ notum esse volumus Adelardum Veronensem episcopum auctoritate sedis apostolicæ privilegii communionem privatum : quoniam cœnobium Nonantulæ, quod semper apostolicæ sedis, et nostræ ipsius auctoritatis privilegio munitum nullius invasionis usurpatione detinebatur, sed solius hucusque abbatis e gremio fratrum electi atque prælati moderamine regebatur, subripuit, suisque usibus, coarctatis extrema egestate monachis, applicavit ; et eatenus etiam post frequens interdictum nostrum opprimere, sæculariumque manibus dispartitum prodere non formidat, contra sanctorum Patrum regulas, nec non et adversus apostolicæ sedis et totius sanctæ synodi sententiam, quam missis per singulas provincias litteris notam vobis omnibus fecimus, in communionem post nostram quoque prohibitionem per missos nostros, et apices sæpissime destinatum, passim recipit, et in cunctis pravitatibus ejus conscius et fautor apparuit. Excommunicavimus igitur prædictum Adelardum Veronensem episcopum, donec in præsentiam sedis apostolicæ venias, de prædictorum excessuum qualitate idoneam satisfactionem coram positus exhibuerit ; quæ contempserit existens interim, existet per omnia communionem jure privatus, pari vinculo

Deest aliquid.

irretiens omnes qui sibi communicaverint, vel contra A interdicitum nostrum ausu temerario faverint : unde vos cautos reddere volumus, si non vultis ipsi eidem secundum regulas sacras subjacere judicio. Optamus fraternitatem, etc,

LXXVI.

AD CLERUM VERONENSEM.

(Anno 877.)

Ejusdem argumenti.

JOANNES episcopus universo clero Ecclesiæ Veronensis.

Experientiæ vestræ notum esse volumus, Adalardum episcopum vestrum auctoritate sedis apostolicæ communionem privatum, quoniam cœnobium Nonantulæ, quod semper apostolicæ sedis et nostræ ipsius auctoritatis privilegio munitum nullius invasionis usurpatione detinebatur, sed solius hucusque abbatis e gremio fratrum electi atque prælati moderamine regebatur, subripuit, suisque usibus, coarctatis extrema egestate monachis, applicavit, et eatenus etiam post frequens interdicitum nostrum opprimere, sæculariumque manibus dispersitum prodere non formidat, contra sanctorum Patrum regulas, nec non et adversus apostolicæ sedis et totius sanctæ synodi sententiam, in communionem post nostram quoque prohibitionem per missos nostros et apices sæpissime destinata passim recepit, et in cunctis pravitatibus ejus conscius et fautor apparuit. Excommunicatum igitur eum scitote, donec in præsentiam sedis apostolicæ veniens, de prædictorum excessuum qualitate idoneam satisfactionem coram positus exhibuerit. Quæ si contempserit existens interim, existet per omnia communionem jure privatus, pari vinculo irretiens omnes qui sibi communicaverint, vel contra interdicitum nostrum ausu temerario faverint ; unde vos cautos reddere volumus, si non vultis ipsi eidem secundum regulas subjacere judicio. Optamus vos, etc. Data iv Kalendas Maii, indictione x.

LXXVII.

AD LANDULFUM EPISCOPUM CAPUANUM.

(Anno 877.)

Monet ut sibi significet an Neapolitanorum dux fœdus cum Saracenis in initum frangere velit, et det operam ut idem dux Gauferius et Pulchar una secum Trajectum se conferant, quo ipse est iurus ; paratum se ad ea quæ promiserat, et majori concessurum, si ipse dux in sententia persistat.

JOANNES episcopus LANDULFO episcopo Capuano.

Studeat sanctitas tua certissime scire si Neapolitanorum dux præsentialiter vult pactum Saracenorum irrumperere, et fœdere Christi, quod in regenerationis unda pepigit, vel a nunc, sicut debitum est, veraciter inhærere : et si quidem talem nunc animum habere cognoveris, hoc nobis præsentialiter indicato. Age ut idem dux Neapolitanus, et Guaiferius gloriosus princeps, ac Pulchar præfecturius ad Trajectum una tecum accelerent ; ubi etiam nos accedentes, quæ Deo sunt placabilia, statuemus. Parati

enim sumus non solum quæ dicta sunt, sed et majora concedere, tantum ut ejusdem magistri militum sermo ita sit fidelis et stabilis, et omni certitudine præmunitus, ut securitas ex utraque parte firma maneat, et sine dubitatione certa persistat. Quod si quæ repromittunt aut adimplere nolle aut prolongare velle illos cognoveris, non tibi sit licentia hoc a nostra scientia occultandi, sed quidquid veraciter sine dolo per omnia indicandi. De his ergo stude præsentialiter nos pleniter ac citissime litteris tuis instruere, ut quod deinceps Deus dictaverit, cum ipsius auxilio sine mora incipere et perficere procuremus. De quibus ipse præ cæteris curam arripe, qui nimirum speciali prærogativa nostrorum viscerum præ cæteris foveris in antro. Data iv Kalendas Maii, indictione x.

LXXVIII.

AD PULCHARIM PRÆFECTURIUM.

(Anno 877.)

Ejusdem argumenti.

JOANNES episcopus PULCHARI præfecturio.

Si vere utique magister militum pactum Saracenorum proposuit rumpere, hortamur ut Trajectum cum inelyto socero tuo adeas, ubi quoque et nostra reperta præsentia, quidquid rationabiliter quæritur, quidquid necessarium seu possibile postulatur, grantissime confestim admittet : sed et ampliora facere nullo modo recusabimus, ut omnes, secundum Apostolum, lucrifacere velemus (II Cor. ix). In quo industria tua tanto sollicitius elaboret, quanto liquidius sibi per hoc celeste præmium a Domino Deo tribui non ignorat. Alioquin adversus eum, quæ digne possumus agere, indubitabiliter et indifferenter exercere, Christo propitio, nullatenus omitemus. Data iv Kal. Maii, indictione x.

LXXX.

AD CAROLUM CALVUM IMPERATOREM.

(Anno 877.)

Auxilium contra Saracenos implorat, qui devastata Campania, omnia Romæ suburbana depulabantur.

JOANNES episcopus ad imperatorem.

Divina ideo majestas excellentiam vestram præ cæteris elegit Romani imperii altitudine sublimare, augustalique voluit diademate coronare, ut Deo nostro elementer auxiliante potentiæ vestræ brachio triumphali Ecclesiam Christi voce supra petram veræ fidei fundatam tueremini semper, et ad immani crudelique paganorum infestatione, qui nos jam more latronum undique circumdantes omnia nostra igne gladioque devastant, pio mentis defenderetis intuitu. Sed quia nobis procul existentibus, tot dura et importabilia, pro quibus jam vestram augustalem imploravimus majestatem, supra modum quotidie patimur, quippe cum tota jam depopulata Campania nil habeamus, nilque nobis, aut venerabilibus monasteriis, cæterisque piis locis, neque senatui Romano, unde corporaliter sustentari possumus, remanserit : omnibus etiam Romæ subur-

banis adeo deprædatis, ut nullus in ipsis jam habitator vel cujuslibet ætatis incola videatur consistere. Pro quibus sane malis innumeris ingenti mœrore afflictis, doloreque turbati, nec somnum oculis, nec cibum opere capere possumus : sed pro requie laborem assiduum, et pro corporali dapium dulcedine mentis amaritudinem patimur. Ideo vestram imperialem majestatem, totius sapientiæ luce splendide irradiatam, sancta Romana Ecclesia, quæ religioso vos utero genuit, meo quidem sermone, sed suo venerabili suppliciter nimis precatur affectu, ut omni dilatione remota, omnique ejus cura assumpta, nunc ad suam defensionem et totius patriæ liberationem adjutor clemens, defensor potens et salvator invictus venire dignemini, quia nisi vestra desideratissima nobis adfuerit præsentia, nullum defensionis auxilium nullumque necessariæ salutis remedium poterimus habere. Nos enim, cum omnis sedis apostolicæ ordine sacro, cum religiosis et Deum timentibus viris, pro vestræ gloriæ prosperitate, continuæque mentis et corporis salute, omnipotentem dominum, ejus est salus omnis et vita, totis deprecabimur nisibus, ut nec temporis fervor, nec loci natura insolita, nec molestia quælibet vestro insigni corpori nocitura contingat. Quamobrem nihil horum quæ sine Dei procul dubio non evenient nutu dubitantes, quin potius in Domini miseratione totis viribus confidentes, non solum corpoream incolumitatem, verum etiam et perpetuam animæ vestræ merebimini adipisci salutem et gloriam. Dignetur igitur piissima serenitas vestra, clementissime imperator Auguste, pro tantæ sedis liberatione tantorumque hominum Christi cruore redemptorum salvatione, nostras et Ecclesiæ nostræ preces audire, singultus prospicere et tanti gemitus lacrymas incessanter effusas attendere : quatenus more solito, et solitæ pietatis viscere nobis compatientes, opem consolationis citissime petentibus tribuentes, prout opportunum est, nos adjuvare satagatis, quia post Deum unica spes salutis et liberationis nostræ fiducia vos procul dubio estis. Ideo per vosmetipsos properantes, congruum et opportunum nobis præbere auxilium non differatis : ut et Dominus, qui elegit vos caput orbis, et dominum fecit, auxilium suum vobis de sancto mittere semper dignetur, amantissime fili. Data VIII Kalendas Junii, indictione decima.

LXXX.

AD ARCHIEPISCOPUM RAVENNATEM.

(Anno 877).

Præcipit ut cum suis suffraganeis ad concilium accedat.

JOANNES archiepiscopo Ravennati.

Quia jam ad periculosa pervenimus ab Apostolo (*II Tim. III*), quin potius a Domino prædicta, proh dolor ! tempora : *Surgit enim gens contra gentem, et sunt inter alia inimici hominis domestici ejus* (*Luc. XXI* ; *Mich. VII*) ; creverunt inopinabiliter mala, et non solum extrinsecus rabie infidelium barbarorum atterimur, sed et intrinsecus perversitate nequam

A Christianorum afficimur. Verum quanto crebrescunt mala pravorum, tanto crescere debent bona rectorum. Quæ profecto fieri nequeunt, nisi per commune fratrum collegium in idipsum corpore simul et mente convenientium. Est enim Ecclesia Dei propter concordiam tuam visibilibus quam invisibilibus hostibus omnino terribilis, et velut *castrorum acies ordinata* (*Cant. VI*). Quapropter tam pro ecclesiasticis quibusdam necessitatibus, quam pro statu et pro correctione reipublicæ, auctoritate apostolica decrevimus reverendorum fratrum et coepiscoporum nostrorum. Italici regni universale, id est totius provinciæ, advocare concilium ; locum autem nusquam ad hoc gerendum aptiorem et faciliorem quam apud Ravennam undique confluentibus inveniri posse perspeximus. Occurrat igitur alacriter cum suffraganeis suis, quos ipsa convenire commoneat ad designatam urbem sanctitatis fraternitas, et tanto deesse conventui, quem scilicet ibidem VIII Kalendas Julias, celebraturi sumus, nullo modo perferat, quo pullulantia in agro Dominico zizania communi studio radicibus amputentur ; et salubrium virtutum germina socio pro his certamine penitus inserantur. Fratres præterea et coepiscopos nostros qui sub beatitudine vestra degunt ad eandem universalem synodum hortatu sanctitatis vestræ venire præcipimus. Quisquis autem occurrere sanctitati tuæ forte contempserit, canonicis se noverit increpationibus procul dubio submittendum, in promptu, secundum Apostolum (*II Cor. X*) ; nobis habentibus omnem ulcisci prorsus inobedientiam. Hanc vero apostolatus nostri epistolam vel exemplaria illius, beatitudo vestra in diœcesi sua omnibus indifferenter episcopis parare faciat, ne aliquid possit ab inobedientia excusationis, quod non expedit, velamen obtendi.

LXXXI.

AD ANSPERTUM ET ANTONIUM EPISCOPOS.

(Anno 877.)

Ut Ravennam ad synodum accedant ; quod nisi paruerint, minatur eos se excommunicaturum.

JOANNES episcopus ANSPERTUM Mediolanensi archiepiscopo, et ANTONIO episcopo Brixienti.

Quia diversis ac multiplicibus Ecclesias Dei nobis commissas incommodis perturbatas, rebusque propriis incunctanter privatas, et earum antistitum honorem diminutum fore videmus ; ipsarum, secundum Apostolum (*II Cor. XI*), sollicitudine quotidiana compulsi, necessario rati sumus pro illarum statu ac pristina redintegratione generalem, Deo favente synodum celebrare : quam secundum antiquam consuetudinem cum Romæ agere debuissimus, non recusantes tanti laborem itineris, pro suavitate tamen venerabilium confratrum nostrorum episcoporum, quos in consortium nostrum litteris missi ascivimus, octavam Kalendarum Juliarum, Ravennæ, auxiliante Domino, erimus procul dubio celebraturi. Ad quam videlicet fraternitatem vestram omni occasione postposita, omnique tarditate prætermissa, his præsentibus venire jubemus apicibus

quatenus communi multorum fratrum nostrorum A
 consensu atque decreto, Ecclesia Dei nobis commissa
 propriæ dignitatis jura, quæ a quibusdam inique
 agentibus sunt usurpata, sub integritate recipientes,
 malorum omnium tandem securi effecti, ministe-
 rium pontificale, quod nimirum pro gregis Domini
 nobis commissi salute, Deo largiente, suscepimus,
 ut dignum est glorificare possimus: quapropter ite-
 rato te sermone ad eandem, ut dictum est, syno-
 dum venire præcipimus. Nam si præfato die ad
 ipsum venerandum concilium quoquomodo properare
 forte contempseritis, et pro Ecclesiæ Christi Dei
 nostri utilitate, quæ instanti tempore plurimum est
 necessaria, debitum nobiscum laborem sumere spre-
 veritis, sciatis pro certo communionis nostræ in futu-
 rum nullo modo esse consortes, sed potius canonicæ
 auctoritatis censura, utpote transgressores impro-
 bos, feriendum atque damnandum. Optamus rever-
 tentiam vestram in Christo bene valere. Data viii
 Kal. Junii, indictione decima.

LXXXII

AD URSUM DUCEM VENETIARUM.

(Anno 877.)

*Inobedientiam accusat, et monetur episcopus Venetiæ
 ad synodum Ravennæ celebrandum accedere curet,
 et ipse quoque vel veniat, vel legatos mittat.*

JOANNES episcopus Urso duci Venetiæ.

Multis esses nimirum justæ correptionis a nobis
 increpationibus submitendus, nisi apostolica mo-
 deratio circa te minus severitate quam patientia
 uteretur. Exceptis enim excessibus illis quos per
 inobedientiam prius contraxeras, ad extremum
 etiam legationem beati Petri indignam tuis oculis
 judicasti, cum hoc nec gentilis quisquam facile fe-
 cisse clarescat: maxime cum ea quæ dilectioni tuæ
 mittebamus, paterna essent monita, non inimici
 odientis verbera. Sed ista dissimulantes, innotesci-
 mus dilectioni tuæ nos octavo Kalendas Julias Ra-
 vennæ synodum totius Italiæ sacerdotum celebra-
 turos; cui interesse volumus et marinæ Venetiæ
 antistites, qui adhuc superesse noscuntur, una cum
 personis ad episcopatum electis, et illis quas tibi
 jam per diversas epistolas significavimus. Quapro-
 pter bene profecto facies, si eos ad prædictam venire
 synodum non impedieris, sed modis omnibus inci-
 taveris. Non enim ruinam eorum cupimus, absit; sed
 illius statum reformare provinciæ, et quidquid inter
 eos et metropolitanum quæstionis et controversiæ
 vertitur, canonicè diffinire. Itaque indubitanter ve-
 niant, et tam sancto numeroque fratrum deesse
 nullo modo patiantur collegio. Non enim, mihi crede,
 in aliquo minorati, quod avertat Dominus, sed po-
 tius augmentati, Christo propitio, ad propria rever-
 tentur. Sin autem communi omnium decreto, cum
 Ecclesiam non audis claruerint, erunt procul dubio
 quemadmodum sacrosanctum de hujuscemodi præ-
 cipit Evangelium. Illud autem ipse pro certo scito
 quia nihil pro ullo mortalium imminui Ecclesiæ tuæ
 cupimus; sed decus et genium tuum veluti specta-

abilis, et Deum timentis viri, conservari volumus et
 optamus. Unde monemus ut et ipse ad nos Raven-
 nam proficisci ne pigriteris: sin autem, saltem
 virum quemquam industrium nobis gloriæ tuæ
 injuncta legatione fungentem dirigere non detrectes
 Data vi Kalendas Junii, indictione x.

LXXXIII.

AD PETRUM ET LEONEM EPISCOPOS VENETIÆ.

(Anno 877.)

*Ut Ravennam ad concilium proficiscantur, in quo
 componendæ sunt controversiæ quæ cum metro-
 politano nonnullis intercedunt.*

JOANNES episcopus PETRO et LEONI episcopis Venetiæ.

Universale tandem aliquando nos celebrare con-
 cilium multiplex et multifaria nos Ecclesiarum ne-
 cessitas cogit; et ideo pro hac moderanda vel dis-
 pensanda, octavo Kalendas Julias hujus indictionis,
 totius Italiæ apud urbem Ravennam convenire jus-
 simus sacerdotes, ad quorum videlicet sacratum
 collegium, pontificio nostro mediante, vestram quo-
 que sanctitatem occurre commonemus, una cum his
 qui loco sunt episcoporum decedentium subrogati.
 Et illis nihilominus quos, Urso glorioso duci et
 vobis scribentes, nostris sæpius et expressius signi-
 ficavimus syllabis, atque, ut absolute regulariterque
 fateamur, omnibus qui se læsos existimant: quos
 generaliter auctoritate apostolica sanctitas vestra
 secum properaturos advocare profecto debet. Ita-
 que, fratres, indubitanter accedite, ut præter commu-
 nem utilitatem quæ in synodo est procul dubio
 componenda, quidquid inter fratrem et cæpiscopum
 nostrum, Petrum videlicet metropolitanum vestrum
 et prædictos, controversiæ vertitur, canonicum
 finem accipiat, et pax et tranquillitas Ecclesiis ves-
 tris, sicut condecet, reformetur. Non ergo, charis-
 simi, tam sancto numeroque fratrum deesse colle-
 gio patimini, quia nos, mihi credite, nullius vestrum
 casum exquirimus; absit. Verumtamen nisi ad hanc
 saltem præsignatam universalem synodum accesser-
 itis, communi cunctorum sententia canonicis legi-
 bus subdemini, et pro tanta inobedientia merito
 puniemini. *Est enim, Samuele sancto docente, quasi
 peccatum ariolandi, repugnare; et quasi scelus ido-
 latriæ, nolle acquiescere (I Reg. xv).* Data vi Kal.
 Junii, indict. x.

LXXXIV.

AD AQUILEIENSIS.

(Anno 877.)

*Quæ de eo sinistre ferebantur, in generali concilio
 canonicè terminanda significat.*

Ad AQUILEIENSIS (f. Aquileiensem).

Novimus vestram beatitudinem a nonnullis de qui-
 busdam sinisterius diffamari, quod profecto in syno-
 dali est conventu [f. integrus] interius et perspi-
 caciùs ventilandum, et secundum sui qualitatem,
 regulari censura modis omnibus finiendum. Sed cre-
 dimus, divina favente gratia, vos coram positos ita
 insontes inveniendos, ut veritis exagitata non de

vobis cœni, quod absit, sed unguenti commoti jucundum reddat odorem; nisi forte absentia procurata vera quæ dicuntur de vobis comprobet, et poenam merito irroget: quæ si adesset, magistra justitia forsitam retulisset. Data XI Kalendas Junii, indictione decima.

LXXXV.

AD GUAIFERIUM PRINCIPEM SALERNITANUM.

(Anno 877.)

JOANNES episcopus GUAIFERIO principi Salernitano.

Quia Neapolitanorum ducis legatos secundum ipsius et vestra scripta præstolati, nec contemplati sumus, iterato excellentiæ tuæ scribere cogimur, ut illum a perfidis separatam, piis sanctæ matris Ecclesiæ gremiis restituamus. In quo quia jam plurimum laborasti, industriam tuam item itemque laborare fine tenus exhortamur. Quod si iniquam colligationem statim dirumpere præparatur, cum hoc certissime scierimus, per nosmetipsos ad Trajectum properabimus, et hoc quod quaerit et quodve jam promissum est etiam, amplius libentissime largiemur, clariori duntaxat certitudine ac fidei veritate inter utramque partem composita; ubi quoque tuam sanctissimique Landulfi antistitis, et prædicti ducis nec non et Pulcharis gloriosi præfecturii adesse præsentiam cupimus. Et ut agatur solertiam tuam satagere flagitamus. Quod si adeo idem dux secundum dñritiam suam et cor impœnitens thesaurizat sibi iram in die iræ (Rom. II), ut aut protelare aut penitus suæ ipsius et multorum salutis causam contemnere velit, et hoc ipsum statim cognoscere cupimus: quoniam nobis nec humanum, nec divinum deficiet prorsus consilium et auxilium; quod plane reddere ei secundum opus suum et secundum fructum adventionum suarum... toto corde desiderant, in adventu illius exsultent: quia et omnipotens Deus blandus justis et terribilis apparebit injustis. Vestra itaque dilectissima charitas devotissimam se super hoc nobis exhibeat, et quousque vires suppeditant, laborare non cesset, ut dum vestris hortatibus hæc nostra postulatio ad effectum pervenerit, dignas vobis gratias referamus, et apud sanctos apostolos in orationibus nostris memoriam habeamus. Data III Kalendas Junii, indictione decima.

LXXXVI.

AD CAROLUM IMPERATOREM GEILONEM ABBATEM TORTUTIENSEM EJUSQUE MONACHOS.

(Anno 877.)

Cellæ, Godith, a Desiderio principe fundatæ sua jura confirmat; quibus addit immunitatem ab omni episcopali jurisdictione anno Christi 877.

JOANNES episcopus, servus servorum Dei, spirituali filio nostro gloriosa CAROLO imperatori Augusto ac GEILONI inclyto abbati dilectisque filiis in Trenorchio monasterio sanctæ et intemeratæ semperque virginis Dei genitricis Mariæ, atque pretioso confessori Christi Filiberto largito, sub regula sancti

A Benedicti degentibus nunc et futuris temporibus.

Postquam enim auxiliante Christo, Ecclesiæ cœpit origo, semper impiorum flatibus agitur. Sed quia nostris temporibus alis imperialibus sustollitur, nos, in quantum valemus, apostolicis auctoritatibus confirmare debemus. Proinde juxta petitionem filii nostri præcellentissimi imperatoris Caroli, privilegium hujusmodi auctoritatis nostræ eidem monasterio vestris futurisque temporibus indulgemus, concedimus atque confirmamus, ut sicut ipse gloriosissimus filius noster, per deprecationem Desiderii principis, cellam quæ vocatur Godith in pago Vallavensi, in loco qui dicitur Valis Augusta, loco prædicto necne præscriptis sanctis, cum villis ac facultatibus seu stipendiis concessit, et præcepto suæ auctoritatis roboravit atque privilegio fratrum et filiorum nostrorum episcoporum illarum regionum confirmari fecit: ita sicut in eadem charta nobilitatis quam fecit Desiderius, et præcepto filii nostri Caroli continetur, inconvulsa permaneant: ut nullus regum, nemo antistitum vel abbatum, seu quilibet quacunque præditi dignitate, de his quæ in hoc privilegio vel in præceptis ipsius filii nostri Caroli continentur, quidquam exinde minuere vel auferre præsumat; sed cuncta quæ præfatæ ecclesiæ Godithi oblata sunt vel offerri pontigerit, inconvulsa et illibata permaneant. Constituitur alia auctoritate beati Petri, ut ecclesia in valle prædicta constructa, et in honore Salvatoris, ejusque Genitricis dicata, immunitatis habeatur ab omni dominatione terrena, quia injustum decernimus ut gloriosa mundi Regina, quæ cum Filio juncta, exaltata est super choros angelorum, humanis subdatur potestatibus. Anathematizamus, igitur, ut nemo antistitum locum sibi vindicare audeat, seu qualibet occasione absolutionis, atque excommunicationis, vel sacræ ordinationis adire præsumat, nisi ab abbate loci, vel a monachis ibi Deo servientibus fuerit invitatus. Cæterum ab omni sæculari persona decernimus esse liberum et quietum, ut in præceptis filii nostri Caroli continetur. Si quis autem temerario ausu, magna parvaque persona, contra hoc nostrum decretum agere præsumperit, sciat se anathematis vinculo esse innocasum, et a regno Dei alienum, et cum impiis æterno incendio condemnatum. Scriptum per manum Anastasii notarii regionarii et scriuarii sanctæ Romane Ecclesiæ, in mense Junio indictione quinta [decima]. Bene valete. In plumbo Joannis papæ.

LXXXVII.

AD ARCHIEPISCOPUM RAVENNATEM.

(Anno 877.)

Certum præscribit diem quo Ravennæ cum omnibus suis suffraganeis adfuturus sit; quod si quis parere contempserit, excommunicationem illi minatur.

JOANNES archiepiscopo Ravennati.

Iter quod pro dissolvendo fœdere olim a Neapolitanis cum Sacracenis inito Trajectum fecimus nos a præfinito die synodi retardavit, sed quia auctore

Deo, ipso discisso, quies aliqua reddita comprobatur, ecce de itinere scribimus nos certissime sexto decimo Kalendas Augustas Ravennæ futuros, ubi sanctitas tua per se cum omnibus suffraganeis suis episcopis, quos ipsa convocare debet, adesse duodecimo Kalendarum Augustarum, omni remota excusatione, procuret; ut communi tractatu communia Ecclesiarum exorta zizania generaliter evellantur. Si quis autem in hac parte collegium vestrum putaverit declinandum, communionis nostræ a se noverit consortium modis omnibus adimendum: nobis procul dubio, secundum Apostolum (*II Cor. x*), in promptu habentibus ulcisci omnem inobedientiam. Data *ut supra*, indictione *x*.

LXXXVIII.

AD EUMDEM.

(Anno 877.)

Scribit se jussisse ut omnes Italiae episcopi, et praeipue Venetiarum, ad synodum Ravennæ celebrandam accedant.

JOANNI ^a archiepiscopo Ravennati.

Scire volumus gloriam tuam pro multis necessitatibus sanctæ Dei Ecclesiæ, sicut jam te non latere credendum est, undecimo Kalendas Augustas istius decimæ indictionis, Ravennæ, gratia sancti Spiritus suffragante, synodum nos cum confratribus et coepiscopis nostris instituisse fore modis omnibus celebrandam. Ac quam sicut nos, multis utilitatibus omissis, nec laborem quidem itineris, nec intemperantiam aeris recusantes, occurremus [*edit. Rom.*, occurimus]; ita omnes hinc et inde volumus antistites advenire, ut quidquid in sancta Dei Ecclesia perperam per zizaniorum satores crevisse dignoscitur, hoc communi tractatu per nostrum commune studium radicitus extirpetur. Idecirco tuam nobilitatem ignorare non patimur quod episcopos Venetiarum et electos vocatosque episcopos vacantium sedium ad eandem synodum, sicut jam eos vocavimus, occurri et iterato decreverimus, ut inter reverendum quoque metropolitanum vestrum et vos omnis altercatio discutiatur examinetur, et coram sancta synodo canonice terminetur. Alioquin tam a nobis quam a sancta synodo, si inobedientis jam toties per epistolam vocati exstiterint, tanquam contemptores synodicam sententiam incurrere merebuntur: quia cum sit illinc Ravennam brevior via, de labore itineris excusationem habere non poterunt. Data *xiv* Kalendas Augusti, indictione decima.

LXXXIX.

PRIVILEGIUM MONASTERIO ET XENODOCHIO PLACENTINO CONCESSUM.

(Anno 877.)

[*Apud Campi, dell' Hist. eccl. di Piacenza, p. 463.*]

JOANNES episcopus, servus servorum Dei, ANGLBERGÆ dilectæ filiae imperatricis Augustæ, et per te tuo venerabili monasterio Placentiæ noviter constructo in perpetuum.

Omnibus quidem juxta petentibus apostolica sol-

licitudine, præcipiente Domino, favere debemus, præcipue tamen devotioni tuæ, dulcissima ac spiritualis filia nostra Angilberga, olim imperatrix Augusta, quam merito honor atque reverentia sancta mater nostra Romana Ecclesia, ut dilectissima et principalem prolem amplectitur semper et refovet. Quapropter monasterium, xenodochium quod ad honorem dominicæ resurrectionis, et BB. apostolorum, et martyrum Bartholomæi, Sixti, et Fabiani prudenti provisione a fundamenti nuper Placentiæ ædificare voluisti, laudabili complectimur desiderio, paternoque affectu. . . Apostolica illud auctoritate ratum ac stabilitum perenniter instituentes, et ut ab omni impulsione, atque inquietudine quorumlibet infestantium beatissimi Petri tuitione illæsum semper et inconcussum, Domino protegente, permaneat; hoc etiam omnimodo providemus et stabiliter decernimus ut universa quæ ibidem in rebus mobilibus et immobilibus, intus forisque in familiis utriusque sexus, cunctoque ornatu ecclesiastico, atque omni suppellectili semel Domino a vobis distributæ sunt, futuris temporibus inconversa in eodem sacro loco persistant omnium penitus diminutiones vel invasione sopita; in eis etiam familiis, quas ob redemptionem, animæ vestræ prudenti respectu libertate donastis, vel in reliquum donaveritis, simili modo nos vobis favemus, aspiramus, et apostolicum præbemus assensum, quatenus et illi secunda libertate potiti, et gratia Dei duce sempiternæ suscipiant gaudia vitæ. Consecrationem pono abbatissæ loci ipsius, ut filia devota petisti. Mediolanensium archiepiscopo concedimus, vel Aquileiensi qui secundum vocem Evangelii per ostium, et canonice ingressus fuerit, cuique etiam reformandæ pacis studium delegamus cum moderamine disciplinæ, si, quod, absit, humano more abortum fuerit ibidem discordiæ malum. Etsi aliqua pro tempore necessitate malignantium gravedo impulerit, licenter hoc ad sedem apostolicam referre mandamus, ut quod rectius, et præstantius fuerit iudicii sui libramine diffiniat, sopiatque opprimere suprafatum venerabilem locum. Inter hæc Paulo venerabili episcopo, qui ejusdem urbis placentinæ præsulatum gerit, præbente consensum, ut clerici cujuscunque ordinis ad numerum duodecim in eodem sancto loco jugiter deserviant, missarum solemniam celebrantes, servato duntaxat in eos episcopi proprii regulari respectu, vocatione scilicet synodica et ordinatione consecrationis, ita tamen, ut in dicto cœnobio et xenodochio rebusque ipsorum nullum se noverit a modo et deinceps jus potestatis habere; neque etiam ad missas celebrandas juxta Patrum instituta, nisi invitatus, adveniat. Decimus vero juris, vestri, quas propter Dei amorem vestrorumque honorum recordationem devote atque libenter jam dictus episcopus suprataxato venerabili loco largitus est volumus ut absque refragatione tam ipsius quam et successorum ejus, velut ipsa instituisti sacro xenodochio perpe-

^a Forte, *Joannes Urso Venetiarum duci*, ut significat vox illa *gloriam tuam*, quam et in epistola. HARD.

tualiter habeantur. Insuper statuimus vobis, et auctoritate apostolica stabilimus, ut juxta quod nostri præcessores suis tibi privilegiis concessisse et roborasse videntur, universa quæ olim divæ memoriæ Ludovicus serenissimus imperator et vir tuus per suam munificentiam augustalibus apicibus tibi dum adviveret, contulisse probatur, seu etiam ea quæ ipsa post modum imperialibus largitionibus, vel etiam quibuslibet justis acquisitionibus, emptionibus vel commutationibus in proprios, sive jam dièti monasterii tui usus acquisisti, seu in posterum acquisitura es; simulque et ea quæ ad supplementum ejusdem sacrati loci, et tam regum quam aliorum quorumlibet fidelium donatione vel liberalitate, nunc vel posthac addita fuisse comprobatur; eodem tenore et ordine quo tibi vel tuo prænominato cœnobio advenere, illibata et inviolata atque inconcussa permaneant et secundum tuæ ordinationis statuta persistant. Et si quis, quod non optamus, contra hæc statuta in Dei omnipotentis oblata vel concessa servitium agere tentaverit, vel quippiam horum infringere temerario ausu voluerit, excommunicationi submissus omni ecclesiastico consortio careat, et nisi se continuo a tali nequitia corrigat, et respiscat, sancti Petri nostrique apostolatus auctoritate anathematis vinculo innodatus reus in futuro judicio permaneat, et pro excessu suæ tantæ transgressionis cum Juda traditore infrunitus, atque rebellis sancti spiritus sententia, qui semper fictum et mendacem effugit, noverit se habiturum portionem ingehenna ignis æterni. Scriptum per manum Leonis notarii regionarii, et scriiniarii sanctæ Romanæ Ecclesiæ, in mense Augusto, indictione decima. Bene valete. Kalendis Augusti per manum Joannis episcopi, missi et apocrisarii sanctæ sedis apostolicæ, imperante domno nostro Carolo, a Deo coronato, magno imperatore secundo, et post consulatum ejus anno secundo, indictione x.

XC.

AD TICINENSEM EPISCOPUM.

(Anno 877.)

Archiepiscopalia insignia utenda concedit cum facultate vocandi ad suam synodum archiepiscopos Ravennatensem et Mediolanensem.

JOANNES episcopus, servus servorum Dei, reverendissimo JOANNI S. Ticinensis Ecclesiæ, etc., in perpetuum.

Supernæ miserationis ad hoc regiminis curam suscepimus, et apostolicæ miserationis sollicitudinem gerimus, ut juste precantium votis libenti animo habeamus, et libramine æquitatis cunctis in necessitatibus positus subvenire debeamus. Nam summæ sedis gerentes auctoritatem, de venerabilium locorum stabilitate, quantum ex divino adjutorio possibilitas datur, satagere debemus; hoc namque studio et divina placatur clementia, et laus atque utilitas Christi Ecclesiæ procuratur. Igitur postulante a nobis tua reverentia, quantum ea quæ ad stabilitatis integra-

tem et ad profectum honoris sanctæ tuæ pertinere noscuntur Ecclesiæ, cui ex divina largitate præesse dignosceris, enucleanter perficere studeamus, inclinati precibus tuis per hoc nostrum apostolicæ auctoritatis privilegium confirmamus tibi successoribusque tuis omnia privilegia tam sacrorum pontificum quam gloriosorum Augustorum præcepta, quæ pro honore sanctæ tuæ Ecclesiæ, et rerum omnium mobilium et immobilium stabilitate collata sunt; nec non et apostolica censura statuimus ut secundum sacros canones, Spiritu Dei conditas, clerici vel sanctimonialia, aut viduæ sub tua tuæque Ecclesiæ cura et sollicitudine stare debeant, nullusque tam sacri ordinis præditus honore quam etiam sæcularium minister dignitatum, quocumque modo easque ad publicum pertrahere judicium, aut ob hoc res illorum illarumque in hannum ponere præsumant; sed æquo judicio specialique præsentia tua successorumque tuorum de quibuscunque causis vel negotiis quæ secundum temporis qualitatem acciderint, justitiam judiciumque faciant. Sancimus etiam ut monasteria quæ intra tuæ diocesis fines consistunt, sub tuo et eorum qui tibi successerint jure canonico permaneant in perpetuum videlicet, et consecratione abbatum vel abbatissarum, et in eorum earumque criminum discussione; ita sane ut nulli in eisdem venerabilibus locis, quoties opportunum fuerit, sine tua tuorumque successorum providentia atque consensu fiat electio, sicut canonica jubet auctoritas, salvo scilicet in omnibus sedis apostolicæ privilegio speciali; harumque tenore præcipientes ut monasterium S. Donati, fundatum a Luitprando episcopo, decessore tuo, in loco qui dicitur Scogialo, cum omnibus rebus mobilibus et immobilibus secundum testamenti sui seriem collatis, et aliud monasterium S. Mariæ positum in Cariata, quæ juri Ecclesiæ tuæ procul dubio et pertinere videntur, te successoresque tuos perpetuis temporibus jurisdictionem tenere habereque decernimus, et quamvis in alienis parochiis consistant, apostolica jubemus auctoritate in omnibus quæ ibi agenda vel ordinanda erunt, liberam sine alicujus contradictione habeas potestatem; presbyteros vero et monachos prædictorum omnium cœnobiolorum ad tuum canonicum, prout ecclesiastica necessitas exegerit, sine alicujus contradictione statuimus venire concilium. Quod si aliqua in eisdem monasteriis præcepta, quæ canonicis in aliquo regulis obviare videntur, fuerint reperta, major hoc canonicè factum^a ab illis habere auctoritatem decernimus. Ita etiam de cœmeteriis quæ intra vel extra civitatem Ticinensem consistunt, præcipimus ut sub tuæ Ecclesiæ cura et potestate antistitis, absque alicujus controversia permaneant. Sancimus etiam apostolica auctoritate largiendo tibi tuisque successoribus crucem habere quocumque volueris ferre, pallium quoque similiter concedimus, nec non album equum coopertum equitare in ramis palmarum, et secunda feria post Pascha. Sancimus etiam ut secundum

enorem capituli decimi, quod synodali decreto Ravennæ statuimus per indictionem decimam, nullus unquam, cujusque dignitatis aut potentia, homo, quasi sub obtentu hospitalitatis, in tuo venerabili episcopio, aut in domibus sacerdotum tuorum, et omnium clericorum sine tua tuorumque successorum voluntate applicare præsumat. His ita prælibatis decernimus ut si humana contradictione tuæ sedis episcopus ex hoc mundo migraverit, de proprio clero quem idoneum præ cæteris clerus et populus repererit, potestatem habeat secundum statuta venerabilium Patrum, et Romanæ sedis antistitem, nulla seculari contradicente potentia, eligendi episcopum. Quod si fortasse in eadem plebe, quod minime credimus, tantæ sedis honore dignus repertus non fuerit, tunc si alter de altera Ecclesia canonice providendus est, consensu tamen et voluntate ipsius plebis non nisi antea electus ordinetur antistes. Atque in his partibus mala molestaque consuetudine a quibusdam sacras leges ignorantibus clericalis ordinis viros sub jugo servitutis post consecrationem teneri, famulosque velle vocari audivimus, quod dici nefas est. Volumus atque expresse jubemus ut sicut is qui nullius unquam conditionis fuit, ita et ille cui ad hoc officium suscipiendum morum dignitas suffragaverit, nullius viri vinculo postmodum teneatur astrictus. Quia humana lege non debet arctari, quem divina gratia ad tantam sacri ordinis dignitatem provehere dignitas est. Præcipimus etiam ut in omnibus mobilibus et immobilibus, rebusque sanctæ tuæ Ecclesiæ pertinentibus, hominibus quoque utriusque sexus, tam liberis quam servis, nullam a quoquam contrarietatem aut fortiam nullam violentiam aut invasionem absque legali calculo aliquibus fieri. Confirmamus etiam sanctæ Ecclesiæ tuæ xenodochium fundatum intra Ticinensem civitatem juxta ecclesiam S. Mariæ quæ dicitur Minor, quod filius noster dominus Carolus imperator Augustus eidem Ecclesiæ, a qua injuste subtractum fuerat, legaliter per præcepti sui paginam restituere curavit, ut sibi jure ac dictione tua tuorumque successorum sine aliqua refragatione perpetualiter maneat; immunitatem etiam ipsius ecclesiæ secundum imperialia præcepta statuimus, et hoc nostro apostolico privilegio inconcussam stabilemque manere jubemus. Si quis autem temerario ausu contra hujus nostræ apostolicæ præceptionis seriem pie a nobis et canonicè promulgatam venire agereque tentaverit, et omnia quæ superius statuta sunt, tuæ sanctæ ecclesiæ fine tenus non observaverit, sciat se domini nostri apostolorum principis Petri anathematis vinculo innodatum, et cum diabolo et ejus atrocissimis pompis, atque cum Juda traditore Domini Dei et Salvatoris nostri Jesu Christi, æterno incendio concremandum; et qui pro intuitu custos, obediens atque observator hujus nostræ salutiferæ præceptionis exstiterit, benedictionis gratiam et cælestis retributionis æterna gaudia a justo iudice Domino Deo nostro consequi mereatur. Scriptum per manum

A Leonis scriniarii S. R. E. in mense Septembris. Bene Valete. Datum est hoc nono Kal. Septembris, per manum Leonis episcopi missi et apocrisiarii S. sedis apostolicæ, imperante domino Carolo coronato magno imperatore. Et ut certius appareat hoc nostrum privilegium, et inconcussum permaneat, sigillo nostro jussimus insigniri. Anno II. Post consulatum ejus anno II, indiet. XI.

Zacharias humilis episcopus sanctæ Ecclesiæ Anagniniensis in hoc privilegio consensi et scripsi.

Petrus episcopus Forosempronienensis Ecclesiæ in hoc privilegio consensi et scripsi.

Laurentius humilis episcopus Campaniæ Ecclesiæ consensi et scripsi.

B Leo humilis scriniarius et notarius S. R. E. et cum jussione reverendissimi D. Joannis papæ scripsi, et aliis roborandam protuli, et est sigillatum sigillo plumbeo magno impresso, habente imaginem sanctissimi olim papæ Joannis, cum litteris infrascriptis similibus, videlicet : Joannes papa.

XCI.

AD LAMBERTUM GLoriosum COMITEM.

(Anno (877).)

Significat Romanorum procerum obsides dari non posse; monet ne ad Urbem veniat, quia ipse eum excipere non potest.

JOANNES episcopus LAMBERTO glorioso comiti.

C Remaneantibus nobis, Deo præduce, Romam, convocavimus totam Ecclesiam, et illud quod nobis de obsidibus Romanorum procerum dandis edixeras, in conventu fidelium sanctæ Dei Ecclesiæ necessario contulimus : sed, heu! quid dicam? cum tantum totam eandem Ecclesiam contra nos incitaverimus, ac si pro melle eam felle potasse videremus. Romanorum filios sub isto cælo non legitur fuisse obsides datos, quanto minus istorum qui fidelitatem augustalem et mente custodiunt et opere, Deo juvante, perficiunt? Præcipue cum nos miseremur [f. dubitemus] si hoc ex augustali jussu processerit, et ipsum imperatorem non credamus suum nos velle secretum latuisse. Tale quippe consilium non alius adinvenit, nisi ille qui hanc terram conturbare molitur, et ineffabile damnum populo Dei generare versutus fraudibus machinatur; qui pacem et quietem odio habet, et dissensionibus utique gaudet. Quamvis antea Romani ovilis senatus mortem eligant, quam D hanc inauditam et pessimam rem fieri quocunque modo consentiant. Quapropter, quia omnino est impossibile, et tale quid omnis inelytus audiens in maximam suspicionem prorupit, atque simpliciter non fuisse dictum modis omnibus æstimavit : mandamus dilectioni tuæ, quam absentem sicut præsentem amplectimur, ut huc nullo modo fatigeris, quia modo tunc nullatenus recipere possumus, nec tectum aliquid nunc agendum fore necesse putamus. Cum autem, Deo juvante, ad unam concordiam et unam quietem reipublicæ causa redierit, et litis figmenta, quæ tanquam telas araneorum putamus contra Augustalem majestatem oborta, sopita exstiterint, nos et nobili-

tatem tuam recipiemus, et ea quæ ad communem A utilitatem pertinere cognoverimus, tecum et tractare, et utpote cum tantæ prudentiæ viro peragere summa dilectione curabimus. Antea autem nullo modo te venire oportet, quia nullo modo te, sicut diximus, recipere, fili charissime, possumus. Data XII Kalendas Novembris, indictione XI.

XCII.

AD WIDONEM EPISCOPUM INIVENSEM.

(Anno 877.)

Causam Leontardi cujusdam, qui homicidium cum aliis commiserat, ei delegat; hortatur, ut quoniam gravissimam illi antea pœnitentiam constituerat, modo leviores constituat.

WIDONI episcopo Inivensi.

Leontardus quidam tuæ diœceseos homo, singu- B
litis et gemitu tritus sanctam sedem apostolicam et nostram humilitatem adiit, referens se primo quidem homicidii incidisse reatum, et a sanctitate tua pœnitentiam accepisse, quam et peregerit; et ea peracta, miserationem et reconciliationem ecclesiasticam tuo iudicio promeruerit. Post vero cum aliis suis concivibus quosdam prædones publica sanctione jussus sit insequi, ut si eos capere potuissent, modis omnibus interimere non admitterent. Contra quos iste cum aliis proficiscens, asserit quod uno ex illis capto, oculos comprehensores ejus eruerint, ac per hoc ipse prædo nefandus vitam finierit. Hoc itaque facto, præfatus Leontardus pœnitentiam suscepturus, ad tuam præsentiam veniens, hujuscemodi dixit se fuisse tuo iudicio judicatum: sanctam videlicet communionem nisi ad exitum vitæ non percepturum; carnes et vinum, exceptis diebus Dominicis et sanctorum festivitatibus, non sumpturum; comam non rasurum, uxorem non accepturum; cum hominibus non conversaturum; in cinere et cilicio gemiturum; servis rebusque suis non dominaturum; seniores beneficium non habiturum, et aliis his similibus forte fruentis non fruiturum. Quæ omnia audientes, et intimo corde pensantes, invenimus aliquid gravius te quam expedit, si ita est, judicasse. Hujus rei gratia omne hujus iudicium tibi dimittimus, et ut nostra super hoc vice ad mitiorem in eo proferendam sententiam perfruaris, modis omnibus exhortamur: quatenus pro amore apostolorum et nostro, et laborem itineris, et lacrymabilem prædicti latoris intentionem, vel pœnitentiæ amaritudinem omnino D
considerans, mitius cum eo agere non detrectes, et eo quod ad sanctos apostolos fecit confugium in his quæ oportuerit, ne forte, in desperationem labatur, misereri illius nunquam omittas; quia Dominus, sicut per prophetam loquitur, misericordiam vult, et non sacrificium (*Ose. vi*). Ideoque monemus, rogamus ut misericordiam ei impendas, quatenus de impensione misericordiæ audientes, sanctitatem tuam in Christo bene valere. Data III Kal. Novembris, indictione XI.

^a Carolomannus fuit Ludovici Germaniæ regis filius, ac Ludovici Pii imperatoris nepos, ad quem aliquot in-

XCIII.

AD CAROLOMANNUM REGEM ^a.

(Anno 877.)

Dolet de Caroli imperatoris obitu, hortatur ut promissa pro Romanæ Ecclesiæ dignitate impleat: legatos se missurum pollicetur: ejus precibus Theotmaro archiepiscopo pallium mittit; quem apostolicæ sedis reditus, quos apud Bajoariam habet, Romam annuatim transmittere jubet.

CAROLOMANNO.

Apicibus igitur, gloriose fili, vestræ dilectionis susceptis cum parte gratulationis, vestra incolumitate prosperitatisque successu; Caroli imperatoris morte audita, nimio tristitiæ fateor mœrore ex latere sumus attriti sed subito undam mentis nostræ cogitatione ad divinum iudicium aliquatenus sustol-
lentes, in illud Apostoli obstupefacti cogimur voce erumpere, dicentes: *O profundum divitiarum sapientiæ et scientiæ Dei! quam inscrutabilia sunt iudicia ejus, et investigabiles viæ ejus! Quis enim cognovit sensum Domini? aut quis consiliarius ejus fuit?* (*Rom. xi*). Quod idcirco dicimus quatenus sedula cordis meditatio humanæ fragilitatis in hoc mari magno cursum vitæ instabilis intueri non desinati atque ad ea gaudia quæ sunt fixa et immobilia, nostra actio, gratia Christi duce, anhelare contenta bonis operibus nunquam desistat. De causa sane vestri ad nos adventus, vestraque sublimissima promissione, Romanæ Ecclesiæ supra omnes qui fuerunt ante vos, ejusdem exaltatione, cum hoc opere comple eritis, aderit ille vestri retributor, qui per controversiam juramenti confirmans modulus humanæ locutionis, ait: *Vivo ego, dicit Dominus, quia glorificantes me glorificabo* (*I Reg. ii*). Dum a colloquio, ut dicitis, fratrum vestrorum fueritis reversi, legatos ex latere nostro ad vos solemniter dirigemus. cumque pagina capitulariter continente ea quæ vos matri vestræ Romanæ Ecclesiæ vestroque protector, beato Petro apostolo perpetualiter debetis concedere. Quibus peractis, demum rursus ordinabiliter et honorifice mittemus, qui vos cum tota decentia, utpote tantum regem ad limina apostolorum ductare studeant, unaque convenienter de statu reipublicæ totiusque Christiani populi salvatione salubriter tractare, Deo opitulante, ac ordinare valeamus. Inter quæ, quæso, fili charissime, quoque [*edit. Rom.*, quotquot] infideles nostros nostræque vitæ insidiantes, quoquomodo vel significatione poteritis cognoscere nullum apud vos vestrosque fideles valeant aliquatenus locum vel aditum invenire, ne immundæ eorum præsentia aliqua consortii macula regium culmen contagiæ. Pallium vero, vestra petitione inclinati, Theotmaro archiepiscopo consuetudinaliter dirigentes, optamus ut hoc decore interiu fulgeat in oculis interni iudicis, quo nitet exteriori humanis obtutibus, cuique, quæso, committite e quæ apud Bajoariam beatus Petrus apostolus habet uti nobis annualiter reditus ejus Romam transmit-
tat. Data mense Novembri, indictione xv.

fra scribuntur epistolæ, et de quo Ado in fine Chroni. lib. ii, Chron. eorum, Aimoinus, lib. v. c. 28, Regi-

XCIV.

AD THEOTMARUM ARCHIEPISCOPUM JUVANNENSEM.

(Anno 877.)

Pallium ei concedit: mandat ut reditus quos Romana Ecclesia apud Bajoarium habet, Romam mittat.

THEOTMARO archiepiscopo Juvanensi.

Idcirco tuam fraternitatem tanto pallii decore studuimus decorare, ut, Christo opitulante, et ante Dei oculos bonis et sanctis actibus polleas, et sanctæ Romanæ Ecclesiæ, a qua potus præclari poculi sumis, devotus semper fidelis existas, ejus in futurum effectus particeps, cujus locata perpetuallyter fundamentis consistit, et apud Carolomannum regem dilectum filium nostrum quotidianus interventor pro Romana Ecclesia hortamur existas. Inter hæc ea quæ beatus Petrus apostolus apud Bajoariorum terram jure proprietatis possidet, tuæ industriæ sagacitæque committimus, quatenus amodo et deinceps annuos eorum reditus Romam sine mora transmittas. Data mense Novembri, indictione XI.

XC.V.

AD EDEREDUM ARCHIEPISCOPUM ANGLORUM.

(Anno 877.)

Laudate ejus pium erga sedem apostolicam animum, dolet de adversis: monet ut pro Ecclesia fortiter se gerat; ostendit uxores non esse dimittendas; nuntiat se ad regem scripsisse, ut debito eum honore; prosequatur demum ejus Ecclesiæ privilegia confirmat.

Reverendissimo et sanctissimo confratri nostro EDEREDO archiepiscopo gentis Anglorum.

Vestris relectis apicibus quanta veræ dilectionis et sinceritatis fides, qua Christum Deum vestrum proximumque diligitis, in vobis consistat et pia devotione circa sedem apostolicam ferveat, evidenti duntaxat intellectu perspicimus; cum more antecessorum vestrorum, et causas vestræ Ecclesiæ necessarias nostro præsalutari, quasi suo doctori referre, et a sede apostolica super quibusdam suis quas patitur adversitatibus consultum, et auctoritatis munimen accipere quæsitistis; in qua Deus omnipotens totius Ecclesiæ posuit fundamentum. Et quia dura quædam in præsentis sæculi vita, quæ vere tentatio est super terram, positi quotidie sustinetis, non solum flemus nostra, quæ similiter patimur, sed condolemus et vobis, talia, prohi dolor! patientibus, quoniam omni jam mundo in maligno posito, multis ubique adversariis adversus Christi famulos existentibus, quanto majores, et supra modum crebriores tentationes quotidie imminuerint circa nos, tanto Christi fretisolatio valentiores esse debemus; nostra sacra narrante serie: *Beatus vir qui suffert tentationem, quoniam cum probatus fuerit, accipiet coronam vitæ, quam promisit Deus diligentibus se; ipseque Deus benedictus in sæcula, qui non patietur nos tentari supra id quod possumus* (Jac. I), dicente Apostolo: *sed faciet cum tentatione proventum, ut possimus sustinere* (I Cor. X). Nos tamen pro instantis temporis necessitate hortamur et monemus fraternitatem vestram ut, omni sæculi timore postposito,

A sicut idoneus Dei minister opponas te murum pro domo Domini et zelo illius accensus, non solum regi, sed omnibus in ea perverse aliquid agere volentibus, strenue resistere non prætermittas, honorificans ministerium tuum, quandiu divina sinceris voluntate summo sacerdotio fungi, populumque Domini tibi commissum sanctæ doctrinæ pabulo pascere, sacerdotes scilicet et ecclesiasticos viros ac feminas, nec non viduas et sanctimoniales, juxta ordinem suum pro viribus regere tuerique, ut pastor idoneus coram Domino appareas prompta mente procures: quoniam nos apostolicæ sedis apicibus admonere exhortarique curavimus regem vestrum, ut tibi pro Jesu Christi Domini nostri amore in omnibus quæ sanctæ Ecclesiæ tibi commissæ utilia sunt obediens et adjutor devotus, sicut antecessores suos piissimos reges Anglorum, narrante historia, fuisse recolimus, existere non prætermittat; si et regnum sibi temporaliter concessum voluerit retinere securum, et vitam postmodum regni percipere sempiterni. His autem quos asseris uxores proprias contra præceptum Domini relinquere, præcipimus neque virum ab uxore neque uxorem a viro, nisi causa fornicationis discedere: quod si ob hoc discesserit, manere inuptum vel inuptam, aut sibi mutuo reconciliari, quoniam dicente Domino: *quod Deus conjunxit, homo non separat* (Matth. XIX); et ideo cum priorem legitimo sibi matrimonio junctam quisquam deserere nequeat nulla ratione illi prorsus conceditur aliam, vivente priore, conducere; quod si fecerit, et non emendare sub satisfactione studuerit, ab Ecclesiæ consortio maneat separatus. Sed neque de propria cognatione secundum sancti præcessoris nostri Gregorii doctoris gentis vestræ decretale statutum (*lib. XXII, epist. 31*) cuiquam ducere permittas. Nos namque sedis tuæ privilegium, quam vice beati Augustini a sancto Gregorio pro multorum salute et conversione illuc directi regis, illibatum tibi volumus procul dubio conservare, et ut ab omnibus ordinibus, tam ecclesiasticis quam sæcularibus, custodiatur in perpetuum, secundum ipsius sancti præcessoris nostri Gregorii [*forte deest statutum, aut quid simile*] ejus sapientiæ radius Ecclesiam Christi per orbem diffusam irradiat, sancimus atque præcipimus. Et quidquid adversi a quocunque hominæ de parte tua nobis fuerit relatum, ante veram cognitionem nullatenus credimus; quin potius etiam regem vestrum admonuimus, ut dignum honorem tibi pro amore Jesu Christi Domini nostri impendat, et omnia privilegia tui jura perpetua stabilitate et conservare ac indimiunta custodire procuret, si gratiam et benedictionem sedis apostolicæ, sicut antecessores ejus bene faciendo habere meruerunt, pari modo voluerit iste habere. Data ut supra.

XC.VI.

AD ATHANASIIUM EPISCOPUM NEAPOLITANUM.

(Anno 877.)

Commendat solum fidei quem ostenderat adversus

Sergium Ecclesiæ Dei hostem : hortatur ut in diebus magis pro Ecclesiæ sibi commissæ defensione laboret, Petrum diaconum ei commendat.

Reverendissimo et sanctissimo ATHANASIO episcopo sanctæ Ecclesiæ Neapolitanæ dilecto confratri nostro.

Innumeras gratiarum actiones vestræ Deo dilectæ agimus almitati, dignisque apostolico vos ore laudibus præ cæteris merito collaudamus, quoniam secundum Domini vocem dicentis : *Si oculus tuus, vel manus tua scandalizat te, erue eam, et projice a te* (Matth. v), fratrem tuum erga Ecclesiam Dei impie agentem ^a, et circa Dominum non recto itinere gradientem, velut secundum Holofernem, sancta Christi Dei nostri ausu temerario impugnantem; et hæreditatem patriam more sacrilego persequentem, tanti honoris regimine indignum judicans, ultionis divinæ percutere jaculo studuisti: nec pepercisti carni tuæ propter Dominum dicentem : *Qui diligit patrem, aut matrem, aut fratrem plusquam me, non est dignus* (Matth. x); in quo nimirum vos Deo per omnia dignos fore cognoscimus, quia membrum corporis tui multo contagio fetens libenter abscidere proculque abjicere sanctitas tua fideli devotione curavit: et quia nuncusque viris sæcularibus secundum se, et non secundum Deum in urbe Neapolitana principantibus, multa scandala et perturbationes multas, homicidia et oculorum erutiones intra eam vel foris peragentibus, dignum Deo de his juste judicante, peractum est ut iniqua jam cesserat dominatio, finem haberet peccatum et consurgeret vir de domo Domini, qui timorem Dei præ oculis habens regat populum Christi in omni iustitia et sanctitate, in omni veritate et mansuetudine, ut pastor idoneus, et non velut mercenarius deserat et disperdat: et ideo ea quæ vestræ dignitati vel honori congrua ac necessaria sunt, perpetua nihilominus stabilitate confirmamus; tantum ampliori nunc studio curaque multiplici pro defensione sanctæ Dei Ecclesiæ tibi commissæ stare ac desudare, quatenus salva securaque consistat, ut procures, his nostris apostolicis prudentiam vestram exhortamur apicibus. Nos namque, aliis omnibus mancosis datis, mille quadringentos vobis dare debemus, quos vestræ dilectioni aut initio Quadragesimæ aut in die sanctæ Resurrectionis vobis procul dubio dirigemus. Porro hunc Petrum venerabilem diaconum vestrum, quia eum vestræ Ecclesiæ, et civitati Neapolitanæ in omnibus fidelem esse cognoscimus, vobis in omnibus commendamus, et pro nostro eum amore benigne semper retinere dignemini. Data *ut supra*.

XCVII.

AD NEAPOLITANOS.

(Anno 877.)

Laudat eos quod, zelo divino accensi, Sergium a se abjecerint, et Athanasium episcopum suæ reipublicæ rectorem elegerint: præcipit ut ei pareant, offerens se una cum ipso eorum commodis consulturum.

Omnibus eximiis iudicibus, et universo populo Neapolitanæ civitatis.

Quanta veræ fidei devotione circa Deum creatorem

et salvatorem mundi atque erga Ecclesiam Christi ferveat, luce clarius ecce cognoscimus, cum tantæ impietatis virum, perditionis scilicet filium, et totius iniquitatis vas vobis inique dominantem Sergium nempe magistrum militum, secundum videlicet Holofernem, zelo repleti divino, abjicere ac velut membrum fetidum a corpore Christi abscidere, proculque abjicere studuisti, secundum Domini præceptum dicentis : *Si oculus tuus, vel manus tua scandalizat te, erue eam, et projice a te* (Matth. v); et quia illo abjecto, pastorem et episcopum animarum vestrarum, Athanasium videlicet, dilectum contra-trem et unanimum filium nostrum habere iudicem elegistis, innumeras vestræ dilectæ prudentiæ et unanimitati gratias agimus quoniam, sicut Dei ministri, iram Domini exercituum, quæ jam meritis imminabat illius, in eo ulcisci procurastis, qui nimirum multa et inaudita mala plus quam] omnes patres suos in civitate Neapolitana et in finibus nostris nequiter facere non dubitavit, cum innumeram hominum multitudinem, infantum et mulierum catervam gladio, fame atque captivitate crudeliter peremisset. His igitur nostris apostolicis litteris nobilitatem vestram, filioli mei, monemus atque hortamur ut præfatum Athanasium confratrem nostrum venerabilem episcopum vestrum, sicut divina inspiratione docti loco rectoris habere elegistis, fideli mente ac devotione cum omni honore habere studeatis: quoniam nos cum illo in omni vestro adiutorio, in omni vestra utilitate prompti existimus, parique voto vos adjuvare desideramus; tantum state viriliter obediens illi in omnibus, velut filii charissimi. Porro quia jam, aliis omnibus datis mancosis, mille quadringentos vobis dare debemus, ne turbemini, quia eos vel in initio Quadragesimæ, vel in die sanctæ Resurrectionis vobis procul dubio dirigemus. Vos tantum ut filii charissimi adversus infideles et communes inimicos totis viribus pro defensione Ecclesiæ Dei desudare satagite, quatenus et Dei gratiam et nostram semper benedictionem habeatis. Bene vos optamus in Domino. Data *ut supra*.

XCVIII.

AD LAMBERTUM COMITEM.

(Anno 877.)

Scribit se in Galliam velle proficisci, ideo sub excommunicationis pœna præcipit ne se absente Romanæ Ecclesiæ territorio vel Romanæ aliquod damnatum inferat.

Nobili viro LAMBERTO glorioso comiti.

Sagacitati ac prudentiæ vestræ notum esse volumus quia non solum pro assiduis paganorum infestationibus, quas ecce jam biennium, nemine defensionis nobis præbente solatium, patimur, sed etiam pro innumeris et supra modum gravibus oppressionibus quæ nobis una cum Dominico grege divinitus commisso in pace, quam Christus Deus noster se diligentes habere jubet, consistentibus, ab adversariis illata sunt et quotidie inferuntur, in gremio sedis apostolicæ, quæ caput est orbis et om-

^a Loquitur de Sergio, ut constat ex epistola proxima, cujus Leo Ostiensis meminit lib. 1. c. 42.

nium mater fidelium, quiete ac securiter manere A nobis minime licet. Ideo Franciam per iter marinum proficisci, gloriosumque Carolomannum regem adire, atque optatam illius contemplari præsentiam cupimus, pro salute scilicet ac defensione terræ sancti Petri, et totius Christianitatis suppliciter deprecantes : quatenus Dei omnipotentis solatio, et regia virtute nobis, prout opportunum est, solati ante possimus salubri prosperoque successu regere atque tueri territorium, et populum Domini pretioso cruore redemptum, ne pro aliquo eorum per nostram desidiâ vel incuriam pereunte, districtam Domino cogamur reddere rationem. Ideo monemus et his nostri apostolatus litteris dilectionem vestram pio intuitu exhortamur ut nobis abeuntibus Franciam pro defensione sanctæ Dei Ecclesiæ et republicæ stabilitate nullam contrarietatem vel inimicitiam exerceatis in toto territorio principis apostolorum, neque urbis Romæ, quæ est civitas sacerdotalis et regia, per sacram beati Petri sedem, aliquas adversitates vel insidias præparetis, neque faciatis, facereque volentibus ullo modo consentiatis. Quia si per vos aut per vobis subjectos homines eadem urbs Roma perturbationem aliquam vel dehonestationem habuerit, vel adversa quælibet sustinuerit, pro certo scitote quia canonicis vos correptionibus cum victrici sancti Spiritus auctoritate omnimodis redarguemus, et ab apostolicæ sedis communionem merito separabimus. *Data ut supra.*

XCIX.

AD LANDULFUM EPISCOPUM CAPUANUM.

(Anno 877.)

Monet ut consentiat cum Athanasio Neapolitano ad Ecclesiæ Romanæ defensionem : et curet pactum cum Amalfitanis factum, ab ipsis observari.

Reverendissimo et sanctissimo LANDULFO episcopo Capuano.

Quanto studio tua dilectio tuaque benigna fraternitas erga defensionem ac liberationem obsequiumque sanctæ Romanæ ecclesiæ, cui, Deo auctore, culmine præsidemus, laboraverit, totisque nisibus cordis in parte nostri operis desudaverit, sedula reminiscimur procul dubio recordatione, tuaque ob hoc retributio tam apud Deum quam apud nos erit in promptu indubitanter parata. Quapropter, quia te valde idoneum in tantis habemus expertum, monemus atque hortamur esse unanimum cum Athanasio Neapolitano episcopo in causa præsentis Romanæ Ecclesiæ, quoniam liquidum [*edit Rom.*, liquidum et scriptum] in Salomone dicimus : *Funiculus triplex difficilis erit (Eccli. iv)*, eidemque nostro hortatu et admonitione in omnibus fraternus auxiliator existere nunquam desinas ; inter hæc tua benigna fraternitate, et dilecti filii nostri Guaiferii principis, mediante, pactum in decem millium mancorum [*al. mancosorum*] cum Amalfitanis eatenus fecimus, ut a Trajecto usque Centumcellas nobis navali labore indesinenter auxilium ferrent. Sed hactenus id in nullo demonstraverunt : insuper quædam studio callidi-

tatis astruunt, quia utriusque abbates, Joannes videlicet ac Anastasius, quos illuc ex nostra parte direximus, non in decem millium tantum mancorum, sed in duodecim millium plaitasse, quod iidem abbates coram nostra præsentia non se fecisse jurejurando refellunt. Ideoque vestra eos prudentia et ab hac injusta petitione compescat, et in servitio salubri commonitione confirmet, quatenus nostra benedictione politici, animo et corpore ex Christo Domino salvi existant. *Data ut supra.*

C.

AD GUAIFERIUM PRINCIPEM SALERNITANUM.

(Anno 877.)

Hortatur ut in sua integritate perseveret, et Amalfitanos corripit, quod auxilium navale non miserint, et nimia calliditate in se utuntur.

B Amantissimo filio GUAIFERIO principi.

Devotionem igitur animi tui ex die qua te cognovi paucis verbis explicare non possum? Hoc tamen veraciter scimus quia [*edit. Rom.*, apud Deum et apud, etc.] apud nos tibi omnia salva reservantur tempore opportuno. Idcirco monentes hortamur et rogando jubemus uti in semet tua percepta bonitate perseveres. Quoniam scriptum est : *Non tardat Dominus promissum suum, donec adimpleatur quod locutus est (II Petr. III)* ; et ideo nosse gloriam tuam cupimus quia ex parte Amalfitanorum nullum nobis juxta conductum placitum studuerunt præbere adjutorium navali certamine a Trajecto usque Centumcellas. Insuper quadam calliditate asserunt non in decem millium tantum mancorum, sed et in C duodecim millium fuisse nostram promissionem : quod verum nullo modo constat, cum et ipsi abbates quos illuc pro nostra parte direximus jurejurando non se dixisse fateantur. De his vero aliisque similibus, quantum in nobis est, per gloriam tuæ nobilitatis correptionem omnemque speramus studii emendationem ; quod, quæso, facere mature accelere. Optamus. *Data ut supra.*

CI.

AD ARCHIEPISCOPUM EBREDUNENSEM.

(Anno 877.)

Reprehendit quod alium episcopum, præter eum quem clerus et populus elegerat, in Venciensi Ecclesia consecravcrit : præcipit ut cum utroque Romam veniat.

D Reverendissimo et sanctissimo ARIBERTO archiepiscopo Ebredunensi.

Si canonica in consecrandis episcopis statuta servasses, nunquam, sicut auditu didicimus, et quodam diacono, nomine Waldeno, super tuam dilectionem reclamante, se canonice a plebe et populo Vinciate electo, et a tua sagacite abjecto, de consecrato controversia quælibet nasceretur, qua vestra merito reprehenderetur fraternitas. At nunc, quia mortuo Venciensi episcopo, non præfatum sacerdotem, quem, ut dictum est, clerus et populus civitatis elegerat, piæque memoriæ Carolus imperator suo consensu firmaverat, consecrasti, et eodem [*f. sed eodem, HARD.*] Augusto de præsentis vita

subtracto alterum non juxta normam canonicam electum ad adverso venientem, nec per ostium sed aliunde introentem, tuo tantum libitu ordinasse accusaris. In quo te non leviter incurrisse omnino videmus, quia dicente prædecessore nostro papa Cœlestino (*epist. 1, episcopis Viennensi et Narbonensi*): Nullus invitis detur episcopus; cleri, plebis, et ordinis consensum et desiderium requirere debuisti. Cujus etiam auctoritate clerici habent facultatem resistendi, si se viderint prægravari: ut quos sibi ingeri ex transverso cognoverint, non timeant refutare; quoniam etsi non debitum præmium, vel liberum de eo qui eos rectorus est debent habere judicium. Nam et sancto Leone dicente (*epist. 95, Rustico Narbonensi*): Nulla ratio sinit inter episcopos habeantur, qui nec a clericis sunt electi, nec a plebibus expetiti. Unde cum sæpe quæstio de male accepto honore nascatur, quis ambigat nequaquam istis esse tribuendum, quod non doceatur fuisse collatum? Eodem etiam capitulo 33 Canonum suorum jubente (*epist. 88, Anastasio Thessalonicensi*): Nullus, ut dictum est, non petentibus est ordinandus antistes, ne civitas episcopum non optatum aut contemnat aut odiat; ac per hoc fiat minus religiosa quam convenit, cui non licuit habere quem voluit. His ita statutis, ne in Ecclesia Dei tibi commissa scandalum maneat vel schisma existat, dilectioni tuæ jubemus ut cum eodem a te consecrato episcopo, et illo qui se canonicè asserit fuisse electum, de præsentî Romam venire procures, quatenus in præsentia nostra et sedis apostolicæ tanti causa negotii diligenter inquisita et examinata legitimum, Deo favente, finem percipiat. Obedire igitur te oportet huic nostræ præceptioni pro Ecclesiæ Dei pace directæ. Nam si aliter feceris, scito quia nos talem illicitam præsumptionem impunitam nullatenus relinquemus. Data ut supra.

CII.

AD CUNIPERTUM COMITEM.

(Anno 877.)

Præcipit ut bona Romanæ Ecclesiæ quæ occupaverat restituat.

Dilecto filio CUNIPERTO glorioso comiti.

Auditu didicimus, etiam et veraciter scimus, quod cortem sancti Petri, quæ est in Alviscutia, contra Deum et nostram voluntatem teneatis invasam, et unde census ac functionem annuam ecclesia principis apostolorum pro luminariis habere solita erat, nunc vestra fortia et avaritia faciente, nil recipere nilque potest habere. Unde ex auctoritate Dei, et sancti Petri, ac nostra, vobis præcipimus ut non habeatis licentiam ipsam cortem amplius retinere, nec in ejus rebus et pertinentiis vos intro-mittatis, si gratiam Dei et beatorum apostolorum Petri et Pauli nostramque benedictionem cupitis habere; sinatisque homines sancti Petri qui ibi sunt eandem cortem securiter retinere. Nam si ipsam cortem deinceps tenere contra nostram voluntatem præsumperitis, aliquamque ibi fortiam vel violentiam feceritis, scitote quod omni vos ecclesiastica communione atque a corpore et sanguine Domini nostri canonice separabimus, sicut invasorem rerum ecclesiasticarum. Data ut supra.

CIII.

AD LAMBERTUM COMITEM.

(Anno 878.)

Monet ne Romam eam ob causam veniat, ut apostolicæ sedis hostibus auxilium ferat; quod si alia de causa venerit, honorifice se eum excepturum promittit: plura legatis injungit, quibus fidem adhiberi jubet; Adelbertum Romanæ Ecclesiæ hostem se non posse ait in communionem recipere.

Dilecto filio LAMBERTO glorioso comiti.

Dilectionis et amicitie vestræ amorem ac sinceritatem quasi quoddam insolubilis charitatis pignus tenentes, tanto de inimicorum nostrorum callidis astutiis vel præparatis cum apostolica sede securi existimus insidiis, quanto nobilitatis, vestræ potentiam, una cum Christi auxilio nobis conjunctam in omnibus prosperis seu adversis esse procul dubio credimus: quoniam et nos vobiscum in cunctis quæ vestræ gloriæ sunt congrua vel necessaria existere prompti optamus. Et ideo eminentiam vestram quæ relatione quorundam didicimus latere nolentes, utpote spiritali filio nostro referre indubitanter curamus. Audivimus namque quod inimicis et infidelibus nostris per eujusdam exhortationem cupiatis ferre solatium, atque Romam venientes suis eos rebus et beneficiis contra nostram etiam voluntatem inconvenienter restituere debeatis: quod nullus imperatorum, vel regum, aut comes antecessoribus nostris fecisse recolitur. Unde valde miramur, si hoc verum est, quomodo tantæ amicitie inter nos toties habitæ atque promissæ oblitî estis, cum post Deum vos modo in omnibus necessitatibus et utilitatibus Ecclesiæ sancti Petri habeamus unicum adiutorem atque fidelissimum defensorem. Et ideo licet quidam vobis agere talia sedi apostolicæ nobis que contraria suadeant, nos tamen in vestræ fidei devotione, quam erga beatissimos principes apostolorum Petrum ac Paulum, et nostram paternitatem habetis, plurimum confidentes, quasi dilecto filio et unanimi amico mandamus ut pro Dei et nostro amore, pro causa inimicorum nostrorum aliquatenus restituenda, cum bis jam ac ter synodico sint ipsi iudicio condemnati, Romam nunc non veniatis; quia valde turbati ac tristes ob hoc existentes, vos, sicut decet et nos cupimus, honorifice recipere non possumus. Quamobrem vestra prudentia tantæ per-versitatis consilium destruat, atque contra ipsos inimicos nostros totis viribus insurgere, et pari nobiscum voluntate, sicut oportet, eos confundere procuretis; ut nos, sicut per vos credimus, securi et quieti, Dei et vestrum maneamus auxilium. Alia vero pro causa, si ad limina sancti Petri et nostram apostolicam nunc aut postea vultis venire præsentiam, vos prompto atque gratissimo animo, prout oportet, honorifice recipiemus, vobiscum pariter gaudentes et exsultantes in Domino. Plura quidem

vobis super his scriberemus, sed quia indoneos ac reverendos fideles nostros, vestrosque devotos amicos, Gaudericum videlicet et Zachariam episcopos, deliciosos et consiliarios nostros, vobis direximus, qui vestræ gloriæ ea quæ litteris desunt verbis poterunt enarrare, omisimus scribere; quibus sane, quæ verbotenus dixerint, quasi nobis credere non dubitetis. Agite igitur sicut vos in omnibus nostris credimus habere procul dubio adiutorem et unanimem in Christo amicum. Adelbertus autem marchio ad nos si venerit, pro certo scitote quia eum nullo modo recipiemus, quia multas nobis contrarietates fecit et manifestus in omnibus inimicus apparuit. Præterea, sicut nobis mandatis, ut pro instantis temporis causa extra urbem Romam exeuntes, vobiscum alienubi loqueremur, libenter quidem hoc facere voluissemus, si utile ac necessarium esse videretur: ut simul loquamur non vobis grave sit ad nos quasi filius dilectus venire, quatenus ea quæ congrua sunt visa pariter consideremus. Data *ut supra*.

CIV.

AD EUMDEN.
(ANNO 878.)

Graviter cum reprehendit quod in litteris quas scripsit honorem apostolicæ sedi non habuerit, et ne levari absque ejus consensu mitterentur postulaverit.

Nobili viro LAMBERTO glorioso comiti.

Sedem apostolicam, quam Deus omnipotens supra petram sui nominis fundare dignatus est, non solum reges et principes terræ, verum etiam imperatores Augusti, et totius orbis Domini suis apicibus, utpote caput omnium Ecclesiarum Dei, honoraverunt, dignisque præconiis ejus pontifices, vicarios scilicet beati Petri apostolorum principis, laudaverunt, votisque supplicibus deprecari studuerunt, et usque in finem sæculi, Petri manente nomine ac memoria, supplicare non desinent. Quapropter audientes litteras tuas quas mandastis, mirati valde fuimus super earum verbis inconvenientibus, quæ nec debitas sancto Petro laudes resonant, nec ecclesiasticis concordant regulis vel doctrinis; cum nobis illa verba mandastis quæ sæcularibus viris et comparibus tuis scribere solitus es, hoc est, cum dicis nobis, Tuæ nobilitatis, vel cum dicis nobis, Monemus nobilitatem vestram; in quo luce clarius mentem vestram cognoscimus erga nos minime devotam, sicut putabamus existere. Idecirco nostræ paternitati tam vilibus verbis et inconvenientibus sermonibus scribere audaci potius quam sincera mente volui tis, et mirum non est quia de amaro fonte dulcis aqua non hauritur. Porro quia dixistis quod sine consensu tuo nostras legationes nusquam mittere deberemus, usus pro hoc non fecit, nec litteris legitur, nec a quoquam superstite unquam fuisse reminiscitur factum; et ideo sedes apostolica libera semper existens liberam ubique suam mittit legationem, habens Domini auctoritatem dicentis: *Ego pro te rogavi, Petre, ut non deficiat fides tua et tu*

Aliquid deest.

aliquando conversus confirma fratres tuos (Luc. xxii). De his autem quæ olim dicta sunt inter nos, pro diversis ac multiplicibus contrariis et adversitatibus, nec non et corporis incommoditatibus, quas quotidie patimur, nobis aliquid considerare vel pertractare non licet. Nos tamen, si prudentiam vestram in nostris profectibus et utilitatibus Ecclesiæ Romanæ cognovissemus devotam existere, nostramque voluntatem prompte perficere, loco vos filii dilectique cuperemus retinere amici, et ea quæ vestræ saluti ac prosperitati essent utilia, grato sane animo perficeremus: sed quia vos, nobis relictis, in partem contrariam inclinatos videmus, non solum obstupescimus, sed etiam a vestræ amicitie nos similiter declinamus consortio, quod pro Dei amore valde retinere volumus charum. Hanc præterea epistolam nostram secundum morem per Longobardorum fidelem vestrum, et litterarum delatorem vestrarum, vobis mandare volumus; sed ille a nobis eas recipere vestræque noluit deferre sagacitati, sed sicut et antiquus usus exigit^a et ratio manifesta fieri declarat. Data *ut supra*.

CV.

AD ANGELBERGAM AUGUSTAM.
(ANNO 878.)

Dolet Angelbergam molestiis affici et queritur de injuriis quas Lambertus Ecclesiæ Romanæ inflixit: rogit ut conservet benevolentiam quam erga ipsam habere solebat.

Dilectæ ac spiritali filiæ ANGELBERGÆ ex imperatrice Deo dicatæ.

Quia multum devotione et mentis alacritate dominum et senioremem diuæ memoriæ Ludovicum quondam Christianissimum imperatorem, spiritalem filium nostrum, dileximus, nullatenus prætermittimus ejus memoriam in sacris orationibus nostris apud Dominum quotidie facere et quandiu vixerimus facturos esse scitote, vestrique memores, dilectissima filia, similiter sumus. Nam, Deo teste, vestram prosperitatem et salutem semper cupimus vigere incolumem et audire: et super tot ac tantis adversitatibus, quas a filiis hujus sæculi vos sustinuisse cognoscimus, ingenti vobis dolore compatimur et condolemus; quoniam quidem paterno vos diligentes affectu, mœrorem vestrum nostrum putamus, et tranquillitatem vitæ vestræ nostram esse gaudemus; quia et vos pro talibus nefandis et inauditis malis, quæ nulla veterum scriptura decantat, nulla historia narrat, beati Petri apostolorum principis vicarium a quolibet imperatore vel rege unquam sustinuisse, nos his diebus a Lamberto Spoletano comite pati audientes, simili esse mœrore afflictam incunctanter agnoscimus; unde vestram hortamur dilectionem ut circa nos pium mentis affectum conservantes, ea quæ utilitati nostræ congrua vel necessaria esse perspicitis, pro viribus agere non prætermittatis. Quia et nos, Deo propitio, secundum datam nobis divinitus potestatem vobis auxilium et optatam in omnibus consolationem conferre avidè cupimus, et sub beati Petri apostoli vos, si opus fue-

rit, tuitione protegere, et illæsam, ceu filiam charissimam, conservare studebimus, si ad ipsius apostolorum principis limina vobis venire contigerit. *Interim confortare in Domino, qui consolatur vos in omnibus, nec patietur vos tentari supra id quod potestis; sed faciet cum tentatione proventum, ut possitis sustinere (I Cor. x).* De cætero autem ea quæ mandastis, multis impedimentis occupati, quæ præfatus comes cum multiplicibus insidiis nobis præparat cupitque inferre quotidie, perficere nequivimus; at Deo tranquillitatem vitamque præbente, cuncta quæ vestræ voluntati utilia sunt, lubenti animo perficiemus, quibus vester honor et gloriæ vigor incunctanter appareat integer. Dextera Domini vos in omnibus illæsam conservare dignetur. *Data ut supra.*

CVI.

AD BERENGARIUM COMITEM.

(Anno 878.)

Rogat ut imperatori nuntiet quæ a Lamberto Romæ perpetrata sint detque operam ut eam compescat.

Dilecto filio BERENGARIO glorioso comiti regia prosapia orto.

Lectis nobilitatis vestræ litteris, quia sinceritatem ac devotionem, more scilicet parentum vestrorum, circa nos pro amore Jesu Christi Domini et beati Petri apostolorum principis reverentia, vos habere ingentem reperimus, multa vestræ mellifluæ locutionis dulcedine sumus omnino repleti, ita ut cum Psalmista dicere possimus: *Quam dulcia faucibus meis eloquia tua!* (Psal. cxviii.) Hujus namque bonitatis decus eximium ex moribus piæ memoriæ nobilissimi quondam genitoris vestri vos trahere indubitanter cognoscimus, qui dignum semper honorem et piam reverentiam antecessoribus nostris, sacris videlicet pontificibus, exhibere tota mentis alacritate studebat et ideo pulchræ juventutis vestræ florem de radice justa prodeuntem Dominus exercituum pietatis suæ gratia custodiet incolumem, facietque prospere vigere in omnibus et ad prosperum usque finem perducet. Quapropter, filii charissime, sæpe volumus vestræ scribere dilectioni, non solum nostram vobis salutem innotescendo, sed et de vestra prosperitate atque incolumitate audire cupiendo; sed non solum paganorum crebris ubique incursionibus, verum etiam Christianorum insidiis circumdati nequivimus. At nunc, quoniam Deo disponente tempus evenit opportunum, excellentiæ vestræ quæ et qualia sumus nos cum tota Ecclesia et civitate Romana perpessi a Lamberto comite, veluti filio charissimo et fideli amico referimus. Cum itaque prædicto Lamberto multa quotidie bona fecissemus, dignumque impendissemus honorem supra quam antecessores nostri parentibus illius fecissent, ipse pro bonis mala retribuens, collecta populi multitudine, omne territorium sancti Petri invasit, et quod defendere debet ab hostibus, tyrannice dominatur invasum: venitque Romam, et quasi inimicus portam civitatis Romanæ violenter capiens, et sa-

tellites suos per dies plurimos retinere fecit, ac sic tantam civitatem invasam retinuit; ita sane ut nobis apud beatum Petrum consistentibus, nullam urbis Romæ potestatem, a piis imperatoribus beato Petro principi apostolorum ejusque vicariis traditam, haberemus. Sacras autem litanias, episcopos et sacerdotes, atque servos Dei, ex more celebrantes, et ad ecclesiam sancti Petri venire volentes, fustibus cædere ac dispergere fecit, intulitque nobis contraria quanta nulli præcessorem nostrorum unquam facta fuerunt: existitque paratus nobis iterum majora inferre, cujus rei causa nescimus. Quamobrem, quia nostrum ministerium est pro totius Christianitatis salute Dominum assidue deprecari, ut oves quas Christus Deus noster nobis in beato Petro commendavit, jugibus votis et precibus ad æternæ vitæ pascua perducere valeamus, voluissemus debitam habere quietem: sed illo a pravis cogitationibus et actibus se non retrahente, quin potius nos, cum inimicis et infidelibus nostris, quos bis jam et ter excommunicatos et anathematizatos habemus, juncto, rursum turbare volente; rogamus nobilitatem vestram ut pro amore Dei, et sancti Petri, ac nostro, hæc omnia et Carolomanno glorioso regi et spirituali filio nostro cognita faciatis, quatenus missis apicibus suis, eum a tali præsumptione compescat, et quod tempore parentum illius sedes apostolica non sustinuit, ejus non patiat diebus, et vestris similiter litteris eundem admonete corripiteque Lambertum, ut nullam de cætero contrarietatem nobis ingerere præsumat, eo quod nec Deo nec alicui Deum timent, ejus temeritatis placeat effectus. Si vero idem Lambertus nos persequi non omiserit, nos jam dicto regi fideles amici esse quomodo possumus, ad quæ ejus se voluntate jactat talia agere? Et ideo nos adjuvare, sicut supra dictum est, procurate; nam nos ea quæ vestræ fuerint placita voluntati libentissime perficere studebimus, eo quod vos loco amantissimi filii, quandiu vixerimus, retinere, nostræque Ecclesiæ causas necessarias per vos perficere optamus. Præterea homines vestros, qui orationis causa pro suis delictis Dominum misericordem precaturi venire ad limina sancti Petri, pro vestro ingenti amore benigne recepimus, nostrisque apostolicis benedictionibus confirmavimus, ac per eos nostræ incolumitatis salutem, sicut petistis, cognitam fieri decrevimus; et petimus ut cito nos vestris litteris laudificari non prætermittatis. Deus omnipotens gloriam vestram longa per tempora illibatam custodiat, charissime filii.

CVII.

AD JOANNEM ARCHIEPISCOPUM RAVENNATEM.

(Anno 878.)

Exponit mala quæ a Lamberto comite Romæ sunt perpetrata; seque in Galliam ad implorandum auxilium adversus eum iturum ostendit.

Reverendissimo et sanctissimo JOANNI archiepiscopo Ravennati confratri nostro.

Unanimitatis vestræ fraternitatem ignorare non

patimur quæ et qualia his retro diebus a Lamberto A Spoletano comite mala et multiplices passi sumus injurias, quales nullus antecessorum nostrorum pontificum a quoquam Deum colente sustinuisse recolitur. Igitur omne pene territorium S. Petri suis tyrannice devastantibus hominibus, cum immensa populi multitudine Romanam venit; nos autem illum quasi dilectum amicum apud beatum Petrum apostolorum principem honorifice recepimus; sed ipse quasi ovili pelle indutus, solita repletus nequitia, munereque corruptus ingenti, contra nos insurgere non dubitavit (*Aimoinus*, lib. v, c. 37). Nam portas civitatis Romanæ violenter, imoque fraudulenter cepit, totamque urbem Romam; ac per dies plurimos homines suos ita arctius retinere fecit, ut ne proceres Romanorum, nec episcopi et sacerdotes, neque etiam familiares nostri ad nos nisi maxima supplicatione exeundi facultatem haberent. Cibaria etiam nostra nobis venire instantissime prohibebant. Venerabiles item episcopos, presbyteros atque diaconos religiosos monachos cum hymnis et canticis spiritualibus, sacrisque litanis ad ecclesiam principis apostolorum venientes, heu, proh dolor! more paganorum conturbaverunt, et festibus cædentes nequiter disperserunt, non sinentes illos exire debituque Deo sacrificium offerre. Inimicos quoque atque infideles sanctæ Romanæ Ecclesiæ et nostros, quos una cum vestro consensu et subscriptione bis ac tertio jam excommunicatos damnatosque habemus, super nos temere conduxit, eosque in urbe Roma sine nostra voluntate immisit. His itaque nos prejudiciis et injuriis multiplicibus gravati, cum tota sede apostolica tristes adeo per dies multos exstitimus, ut nequaquam nobis aliud agere nisi flere liceret: nam ipsis diebus nec vestis fuit super altare sancti Petri, nec aliquod ibi nocturnum vel diurnum officium ex more celebratum. Nunc etiam minatur nobis pejora inferre, nisi ejus obtemperemus humiliter voluntati. Unde sanctitatem vestram pio fraternæ dilectionis affectu conjunctam hortamur ut pro tantis afflictionibus et miseriis capiti nostro iltatis, ex totis præcordiis vestris nobiscum pariter condoleatis, et contra evidentissimum, et immanem inimicum nostrum consurgere toto annis studeatis. Nos namque illius non valentes sustinere tantas insidias, quia per terram ire nequivimus, per marinum iter. Deo propitio, in Franciam proficisci debemus, gloriosos scilicet reges deprecaturi ut ecclesiam sancti Petri et civitatem Romanam, totius mundi caput et dominam, a tantis oppressionibus et calamitatibus liberent, salvam et quietam sinant manere, potentique manu ab hostium quas patimur insidiis tueantur; nec nos ob aliud illuc ituros, nisi pro communi salute, procul dubio credite. Sed sicut veridico multorum relatu didicimus, cum nos de urbe Roma fuerimus egressi, cæptumque iter egerimus, audimus eundem Lambertum satellites suos velle colligere, Romamque rursus expugnaturum adire. Nos vero hoc scientes, anathematis senten-

tiam in eum et in omnes sequaces ejus, si contra urbem Romam et Ecclesiam Romanam aliquam rursus veniens contrarietatem, vel molestiam, aut perturbationem inferre quolibet modo præsumperit, in ecclesia beati Pauli doctoris gentium protulimus. Et ideo nullus vestrum ejus iniquis operibus fa- veat, quin potius libere arguat, si apostolicæ sedis vultis semper fulciri auxilio. Quapropter hæc omnia, ut vestris suffraganeis episcopis cognita faciatis, incunctanter hortamur sanctimoniam vestram, quatenus ipsi, qui membra corporis Christi existunt, vobiscum pariter pro apostolicæ sedis exaltatione studeant desudare.

CVIII.

AD MICHAËLEM REGEM BULGARORUM.

(ANNO 878.)

Missa per Eugenium et Paulum episcopos mense Aprili die xvi, indictione xi.

Dolet quod Græcos sequatur; hortatur ad Romanæ Ecclesiæ gremium redeundum: tum de donomisso gratias agit; postremo Sergium quemdam per subreptionem ad sacerdotium et episcopatum promotum, depositum fuisse significat.

MICHAËLI regi Bulgarum.

Spiritualibus te visceribus edito gaudebamus, et pro salvatione tua gratias agebamus; sed nunc astutia malignorum decepto, tristamur et ingemiscimus verentes et pertimescentes ne si forte Græcos secuti fueritis, cum illi in diversas hæreses et schismata solito more ceciderint, vos quoque cum ipsis in erroris profunda ruatis; et sicut serpens seduxit Evam astutia sua, ita sensus vestri corrumpantur et excidant a simplicitate et castitate quæ est in Christo Jesu. Nam te, fili, Mosaicis rogo verbis, *interroga patrem tuum, et annuntiabit tibi: seniores tuos, et dicent tibi (Deut. xxxii)*, si aliquando Græci sine hac vel illa hæresi fuerint: et cum non inveneritis eos ab aliqua hæresi aliquando liberos exstitisse, oportet vos eorum fraudes et consortia fugere, ne cum illi erraverint, vos erretis, et cum illi ad blasphemiam versi fuerint, et vos etiam fidei rectæ blasphematores inveniamini; nec erit qui vos postmodum corrigat vel ab errore reducat: et hoc est, mihi credite, filii charissime, quod dolemus; hoc est unde nocte et die pro vobis solliciti sumus; non gloriam ex vobis vel honorem aut census procul dubio expectantes, cum vos potius et non vestra quæramus: nam non patriæ regimen et reipublicæ moderamen adipisci cupimus, sed dioceseos ejusdem regionis curam et dispositionem more prisco resumere volumus, ut sollicitudinem, quam universis debemus Ecclesiis, tanto pro eadem diocesi solertius exerceamus, antiquitus pertinuisse non ignoramus, tantoque pro vestræ salutis custodia instantius vigilare valeamus, quanto ut confirmet hoc Deus quod operatus est in nobis enixius nobis optandum est, et districtius a nobis divinitus exigendum, clarius scimus, si circa instructionem et munitionem vestram desides, quod absit, fuerimus inventi. Revertimini ergo ad beatum

Petrum apostolorum primum, quem amastis, quem elegistis, quem quæstis, cuiusque in necessitatibus patrocinium percepistis, et fluentia doctrinæ salubriter et convenienter hausistis; ejusque vos protectioni cum subjectis omnibus commendastis et tradidistis. *Bene quidem currebatis*, cum Apostolo clamamus, *quæ vos fascinavit veritati non obedire?* (*Gal. III.*) Sed et ipse per se Dominus dicit: *Nemo mittens manum suam in aratrum et conversus retrorsum, aptus est in regno cælorum* (*Luc. IX.*); non autem dicimus quod non una sit fides, unum baptisma (*Ephes. IV.*), unus Deus noster pariter et illorum, sed quia in eis sæpe, præsule Constantinopolitano, vel imperatore, aut plerumque utroque, auctore facto hæreseos, plures qui sub ipsis sunt, adulatione aut certe timore, illis efficiuntur consimiles: et vix tunc eis est qui societatem sequuntur eorum. Dic itaque, rogo, charissime fili, quid faceres tu, vel populus tuus, si tempore Pneumatomachi Macedonii Constantinopolitani antistitis, quando et impius illic imperabat Constantius, essetis eorum societate fruentes; nonne dogma ejus contra Spiritum sanctum blasphemans cum illis sequeremini? *Quod peccatum, attestante Domino, non remittitur neque hic, neque in futuro* (*Matth. XII.*). Nonne si horum pollutam societatem haberetis, et pravam doctrinam nihilominus haberetis? ac per hoc et vos cum illis, quasi fasciculi colligati ad comburendum, æterno igni reservaremini in die judicii cruciandi? Credimus autem quod jam vos non lateat nunquam apostolicam beati Petri sedem ab aliis sensibus reprehensam, cum ipsa alias omnes, et præcipue Constantinopolitanam, sæpissime reprehendes, aut ab errore liberaverit, aut certe in his qui resipiscere noluerunt, sententiæ suæ judicio condemnaverit. Noli ergo sequi Græcos, fili charissime, quia argumentis semper fallacibus student, semper dolosis intendunt versutiis, ne forte vobis quod genti contigit Gothorum contingat: quæ cum a paganorum errore cuperet liberari, Christianis fidei sociari, in episcopum incidit formam pietatis habentem, virtutem autem ejus abnegantem, qui eos dum a paganismo liberat, Arii blasphemias implicat; sicque illi, dum incaute quærunt errorem fugere, in errorem incidunt; et cæcum ducem sequentes, cum illo cæci facti in Arianæ pravitate præcipitia delabuntur^a: et hoc est unde Græcorum cavenda esse prædicamus consortia. *Corrumpunt enim, ut Paulus* **D** *apostolus ait, mores bonos colloquia mala* (*I Cor. XV.*). Qui etsi aliquando loquuntur aliquid boni, noli mirari, quia et dæmones confitebantur Filium Dei (*Matth. XVIII.*); sed ipse illos potius tacere præcipiebat, ne quis eos audiret vera prædicantes, sequeretur errantes. Convertimini igitur ab beato Petrum apostolorum principem, qui primus cognovit et confessus est Filium Dei; qui oves Dominicæ regendas accepit, et ut has ad æterna pascua vitæ introducere posset, et hic ligandi solvendique potestatem, et illic reserandi eis claves cœlestis regni prome-

Aruit. Igitur scitote, charissime, si ex hoc ad Græcos, quod avertat Dominus, conversio vestra fuerit, partem vestram divinitus cum his ponendam qui primam fidem irritam faciunt, et cum his quorum libenter amplectimini portionem. Porro si nos audieritis, et ad sancti Petri gremium redieritis, ut filios vos amantissimos expansis sinibus recipiemus, et exertis brachiis amplectemur, et in visceribus Christi dilectionis semper habebimus; et si qua sunt sancta, si qua salubria, si qua congrua, vobis et pro vobis offerre atque impendere non cessabimus. Xenium nobis ex vobis transmissum; quondam religiosi habitus Urso deferente, suscepimus; de quo benignitati vestræ gratias agentes, Deum laudavimus, qui te nobis devote munus offerre docuit; **B** *et metipsum cito totum, ut confidimus, et perfectum daturus. Cæterum gloria vestra sciat Sergium eunu- chum, qui cum genere Sclavus esset, et multis pravitatibus irretitus, sacerdotium per subreptionem obtinuit; et post etiam super aliis detectus et convictus excessibus, ab episcopo tunc suo depositus fuisse dignoscitur, et post indigne satis a Georgio, qui falso sibi episcopi nomen usurpat, ad episcopatum Belogradensem proventus est, apostolorum principum, et sanctorum canonum auctoritate, etiam nostri esse sententiæ decreti depositum: quod tam vobis quam vestræ omnium generalitati canonice patefacimus, ut hi qui abjiciuntur ab aliis non recipiantur* (*Nicæn. c. 5.*): ne, quod non optamus, simili cum eis pœna judicii tenantur astricti. Data die XVI mensis Aprilis, indictione XI.

CIX.

AD PETRUM COMITEM.

(Anno 878.)

Missa per Paulum et Eugenium episcopos, mense Aprilis, die XVI, indictione XI.

Hortatur ut Michaellem regem ad Romanam Ecclesiam gremium revocet.

PETRO comiti.

Dilectissimo filio nostro Michaeli Christianissimo regi apostolatus nostri mittentes epistolam, dignum duximus ut et tuæ quoque gloriæ scriberemus, et gemitus nostri cordis aperiremus, quos assidue patimur, suspirantes et stupore nimio admirantes quomodo ipse sapientissimus rex et vos ipsi averti potueritis, et a recta semita declinare, atque a sede beati Petri apostolorum summi recedere: sui, sicut Evangelium refert (*Matth. XVI.*), non caro et sanguis, id est humana sapientia, sed ipse per se Pater Filium proprium revelavit, cum alii hunc Joannem alii Eliam, alii Jeremiam aut unum de prophetis existimarent. Scribimus ergo tibi tanquam familiari et charissimo nobis; tu enim in hac causa primus ipsi regi præcursor et dux auctore Deo fuisti: tu inter illum et nos medius discurristi, et Deo gratias, cuncta quæ ad salutem gentis illius acta sunt, non sine tuo certamine acta sunt, et quot et quantos labores pro instructione vestri nos assumpserimus ipse non

^a Socrates, lib. v, c. 27; Theodoret., I. VII, c. 52; Sozomenus, I. VII, c. 57.

nescis. Et bene quidem in nobis delectabimini, et spiritualibus gaudiis et profectibus fruebamini; sed nescimus quis vos de cætero deceperit; quis organum factus diaboli, qui olim per serpentem Evam seduxit, vos a recto itinere callida suasionem retraxerit, unde non parum dolemus nec leviter anxiamur; et ideo te, virorum optime, cohortamur, loquere ad aures ejusdem dilecti filii nostri regis; cui et Dominus ipse ad aures præcordiorum loquatur, ut primam fidem non faciat irritam, ut ante se gradiens, retro nequaquam respiciat, viam qua ambulabat non deserat, evangelicam legat historiam, et videat ibi præcipue soli Petro, aliis ista vel illa opinantibus, Christum Dei vivi Filium revelatum et singulariter dictum: *Ego pro te rogavi, Petre, ut non deficiat fides tua* (Luc. XXI). Ergo si, istis vel illis falsa putantibus, Petro veritas præcipue revelata est, et si pro fide Petri oratum singulariter est a Filio ne deficeret, consideret sapiens rex quam laudabiliter primum fecerit Urbem quærens ad quam iste talis et tantus apostolus venit et prædicavit, cui, Patre revelante, veritas Filii patefacta est, et cujus fides, quia Filius rogavit, non defecit. Ad hanc quippe Romanam urbem post Antiochiæ, quam in transitu visitavit, fundatam ecclesiam, tanquam ad mundi dominam properavit; et illic consequenter Filium Dei vivi, quem non carne vel sanguine, ut prædicimus, sed eo revelante, sicut veraciter cognovit, veraciter et prædicavit: super quam etiam solidam confessionis petram Dominus Ecclesiam fabricavit; et hæc est petra illa supra quam, ut Salomon ait, serpentis non invenitur vestigium. Pro hac itaque purissima fide beatus Petrus Romæ moratus, in hac stabilivit Ecclesiam, et sede apostolica diutius gubernata, pro hac fide decus mortis assumpsit; sicque sanctam Romanam Ecclesiam in hac fide fundatam proprio sanguine cum Paulo, qui ab Jerusalem usque ad Illyricam regionem, scilicet in qua nunc vos habitatis, Evangelio replevit, Domino Deo consecravit et dedicavit; qua fide tanto intra breve tempus Romani creverunt et floruerunt, ut prælatus egregius apostolus mox in principio epistolarum suarum pro ea Deo gratias agere et denuntiare præconia videatur (Rom. I). Hanc itaque fidem fugere semper et suade, charissime, pio regi sitire: hanc non alibi præcipue quærere nisi Romæ, ubi plantata est et radicata a beato Petro, qui hanc, ut supra ostendimus, sicut veraciter cognovit veraciter et prædicavit: quoniam sicut aqua nunquam potest alibi tam munda vel tam limpida quemadmodum in fonte unde originem protrahit, inveniri, ita et fides nunquam omnino poterit alibi tam pura vel tam nitida reperiri sicut in Ecclesiæ nostræ vivario, ubi eam non tecta perstillantia, quibus litigiosa mulier, id est hæretica pravitas, comparatur; sed ille polorum claviger ubertim et purissime congregavit, qui ex ipso fonte vivo hanc cœlitus hausit et limpidissimam conservandam mandavit. Hæc, charissime, pio regi

loquere, et exhortare in Christo Jesu, ut pro accepto et multiplicato familiaritatis talento in gaudium Domini nostri merearis intrare. Nos vero, si nos audieritis, quia vos tanquam fratres et filios summo amore diligimus, de lucro vestri gaudebimus et superexsultabimus; sin autem, dicemus omni Ecclesiæ, et sicut Dominus præcepit (*Matth. XVIII*), vos tanquam ethnicos et publicanos habebimus: et tunc vos videritis, cum in varias errorum tentationes incideritis. Missa per Paulum, et Eugenium reverendissimos et sanctos episcopos. Data mense Aprilis, die XVI, indictione undecima.

CX.

AD QUEMDAM EX NOBILIBUS BULGARIS^a.

(Anno 878.)

B *Ejusdem argumenti, suntque fere eadem verba que in superiore.*

Christianissimo regi apostolatus nostri mittentes epistolam, dignum duximus ut et tuæ quoque gloriæ scriberemus, et gemitus ac dolores nostri cordis aperiremus, quos assidue patimur suspirantes, et tristes penitus incedentes et stupore nimio admirantes, quomodo ipse sapientissimus rex et vos ipsi averti poteritis, et a recta semita declinare, et a sede beati Petri apostolorum principis omnino recedere; cui, sicut Evangelium refert (*Matth. XVI*), non caro et sanguis, id est humana sapientia, sed ipse per se Pater Filium proprium revelavit, cum alii hunc Joannem, alii Eliam, alii Jeremiam aut unum ex prophetis existimarent. Scribimus ergo tanquam fratri ejus et charissimo nostro. Nam cuncta quæ ad salutem gentis vestræ a nobis acta sunt, et quot et quantos labores pro instructione vestri nos assumpserimus, ipse profecto non nescis. Et bene quidem primum in nobis delectabimini et spiritualibus gaudiis et profectibus fruebamini; sed nescimus quis vos de cætero fascinaverit, quis deceperit, quis organum factus diaboli, qui olim per serpentem Evam seduxit, vos a recto itinere callida suasionem retraxerit. Unde non parum dolemus nec leviter anxiamur: et ideo te, virorum optime, cohortamur, loquere ad aures ejusdem dilecti filii nostri regis, cui et Dominus ipse potius ad aures præcordiorum loquetur, ut primam fidem non faciat irritam, ut ante se gradiens, retro nequaquam respiciat, viam qua ambulabat non deserat, evangelicam legat historiam, et videat ibi præcipue soli Petro Christum Dei vivi Filium revelatum. Ad hujus ergo beatissimi Petri sedem alacri pectore rex Christianissimus redeat; et sicut servus, cum quid sumpserit noxium, desiderat ad fontes aquarum (*Psal. XLII*), ita desideret et sitiât anima ipsius ad salutifera ejus doctrinæ fluentia. In quo pio tua labore opere præ cunctis solertia, ut non solum fratrem charissimum lucrifacias, sed et de salute omnium vestrum ipse mercedum præmia consequaris. Nihil enim placet Deo plus his qui ab errore converti faciunt homines, vel qui ad justitiam erudiunt

^a Hæc epistola apud Mansi perperam inscripta est: *Michaeli glorioso regi Bulgarum, ut ex contextu patet.*

plurimos. Et ideo pro tam sancto labore, beato Petro clavigero regni cœlestis intercedente, operies, sicut scriptum est (*Jac. II*), multitudinem peccatorum, et stabilieris quasi cœli firmamentum et dies æternitatis. Sed et nos interim te in devotorum numero filiorum habebimus, et confessionibus apostolorum principum memoriam tui jugiter commendare nullatenus omittemus. Data mense Aprili, indictione XI.

CXI.

AD IGNATIUM PATRIARCHAM CONSTANTINOPOLITANUM.
(Anno 878.)

Tertio jam commonet, ne Bulgarum regionem ad Ecclesiam Romanam jam antiquitus pertinentem usurpet, et eo, vel ab ejus suffraganeis in ea regione consecratos episcopos intra triginta dies illinc educat: et nisi post duas menses paruerit, Dominici corporis et sanguinis communione, et si perseveraverit in contumacia, patriarchali etiam dignitate privat.

Reverentissimo confratri nostro IGNATIO patriarchæ Constantinopolitano.

Secundo jam sedis apostolicæ litteris probaris admonitus, et per missos ejus contestatoriis conventus hortatibus, jure tibi Constantinopolitanæ diœceseos, quod per ejusdem primæ sedis auctoritatem et favorem, annuente Deo, receperas, rite contentus, ultra prafixos tibi ex canonibus limites præsumptionis pedem non tenderes, nec antiquos terminos quos posuerunt patres tui aliqua usurpatione transferres. Nullus autem ignorat regionem Bulgarum a sanctæ memoriæ Damaso papa, et deinceps usque ad paganorum irruptionem a sedis apostolicæ præsulibus, quantum ad ecclesiasticæ provisionis attinet privilegium, moderatam. Præsertim cum hoc nonnulla scripta, sed præcipue diversorum pontificum Romanorum res gestæ quæ in archivis antiquitus nostræ reservantur Ecclesiæ, clarius attestentur. De his autem quæ bellica clades et gravissimi hostilitatis incursum intulisse noscuntur, nil præstantius sentiendum est quam quod clarissima Ecclesiæ tuba, sanctus videlicet Leo nostræ sedis antistes, edocuit et decrevit, cum ait (*epist. 85*): Adhibenda, inquit, curatio est, ut vulnera quæ adversione hostilitatis illata sunt, religionis maxime ratione sanentur. Qui statu rerum, auxiliante Domino, in meliora converso iterum dicit: Remotis malis quæ hostilitas intulit, unicuique id quod legitime habuit, reformetur; omnique studio procurandum est ut recipiat unusquisque quod proprium est. Et rursus: Quod bellica necessitate turbatum est, pacis remedio reformetur. Sed hæc, reverentissime frater, omnia clausis oculis relegisti, sanctorumque Patrum decreta calcaneo temerario conculcasti, ac multiplicium tibi beneficiorum sedis apostolicæ præstitorum oblitus, contra eandem sanctam sedem, benefactricem videlicet tuam, et erectus es, priscam diœcesim in regione Bulgarica constitutam illicita pervasione subripiens, et in alienam messem contra divinas leges mittere falcem non renuens. Unde merito post primam et secundam commonitionem a nostræ te debueramus communi-

anis contubernio sequestrare, in promptu habentes, secundum Apostolum, *omnem ulcisci inobedientiam (I Cor. x)*; qui etiam dicit: *Si quis non obedit verbo nostro per epistolam, hunc notate, ut non commisceamini cum eo (II Tim. III)*; sed quia sedis apostolicæ moderatione utentes; spiritu lenitatis potius quam severitatis erga correptionis tuæ flagramus affectum, ecce tertio canonicè per missos et syllabas commonemus, et hortamur, et protestamur, ut nullam omnino moram perpessa, strenuos viros in regionem Bulgarum dirigat, qui per totam patriam peragrantes, quoscunque illic repererint qui a te vel a subjectis tibi consecrationis munus acceperis dicuntur, sine quavis dilatione reducant: ita ut intra triginta dierum spatium nullus episcopus, nullus omnino clericus, qui tuæ ordinationis, imo inordinationis sunt, inter omnes Bulgarum fines inveniat. Non enim patimur eos quos ibidem tu illicite constituisti, quos et ab apostolica esse jam sede hujus rei gratia constat excommunicatos, errore suæ prævaricationis corda novorum Domini famulorum inficere: quos videlicet in fide instructionis manu plantavimus, et aqua salutaris fontis doctrinarum rigavimus, atque horum auctori Deo ad incrementum spiritus dandum, ut sit ipse in omnibus primatum tenens, obtulimus. Porro si intra triginta intervalla dierum omnes quos vel tu, vel episcopi tui consecrasset in aliquo gradu putantur Ecclesiæ, a totius regionis Bulgaricæ terminis non eduxeris, et temetipsum ab omni ecclesiastico illius jure diœceseos non subduxeris, tandiu sancto corpore ac pretioso sanguine Domini nostri Jesu Christi post duos menses a die numerandos qua hujus epistolæ tomum acceperis, esto privatus, quandiu his obstinatus decretis nostris minime obedientiæ colla submiseris. Jam vero si pertinaciter in hac indisciplinatione atque pervasione permanseris, et episcopos et quotquot illic vel illi vel tu consecrasset videris, foras illinc minus expuleris, omnipotentis Dei judicio et beatorum apostolorum principum auctoritate nostræque mediocritatis sententia, omni patriarchatus esto dignitate, quam favore nostro receperas, alienus et exsors, nullo penitus summi sacerdotii privilegio præditus vel potitus. Data mense Aprili, indictione XI, missa per Paulum et Eugenium episcopos.

CXII.

AD EPISCOPOS ET CLERICOS GRECOS.

(Anno 878.)

Declarat eos excommunicatos quod Bulgarum regiones invadentes illicitas ibi ordinationes fecerint; dignitate etiam privandos, nisi intra triginta dies ex omni Bulgarica regione decesserint. Si quis autem paruerit, restituendum ei episcopatum decernit quem in Græcia habebat; et si nullum antea habebat, vacantem, si dignus est, eidem conferri jubet.

Omnibus episcopis et cæteris clericis Græciæ Bulgaricæ diœceseos in vasoribus, ac per hoc excommunicatis.

Miramur vos et vehementer obstupescimus sanctorum Patrum canones obturatis oculis relegisse,

et calcata conscientia, terminos æternos a Patribus positos transtulisse, et in alienam messem iudicii falcem misisse, in Illyrici provincias, quas nunc Bulgarum natio retinet, ingredientes, et ordinationes illicitas perpetrantes, cum et sacra concilia sub sede beati Petri apostolorum principis, has olim provincias deguisse patenter innuant, et rerum gestarum a sancto Damaso papa conscripta manifeste denuntient. Et statu causarum, Deo auxiliante, in melius jam pridem converso sedes apostolica sit ab eis qui hanc habitant regionem recognita, requisita et multis precibus invitata : nosque illuc episcopos et inferioris ordinis sacerdotes cum præceptis sedis apostolicæ miserimus, et multos labores pro instructione illius regionis arripuerimus. Nam et si quidam vestrum clandestina illuc sorte venerunt, apte de illis dicere possumus illud Domini dictum asseverantes : *Omnes qui ante me venerunt, fures fuerunt et latrones (Joan. x)*. Ipse quippe Dominus per prophetam dicit : *Veniebant et ego non mittebam eos*. Nam quidam autem ambitus et avaritiæ causa illic accessuri profecti sunt, non autem vocati, nec invocati, licet nec sic in vestram vos diœcesim ad aliquam dispositionem faciendam introire conveniret. Quia igitur contra sacras vos multipliciter egisse regula deprehendimus, excommunicavimus vos, et estis excommunicati. Quisquis autem ex vobis intra triginta dierum spatium cognitæ hujus apostolicæ sanctionis, omni Bulgaricæ regioni non cedens, in ea quamlibet ordinationem vel dispositionem patrare ultra prædictum spatium obstinate præsumperit, sanctorum Patrum auctoritate nostricæ iudicii sententia proprio caret officio, non nisi respiscens pœnam evasurus, aut veniam aliquo modo speraturus. Si quis autem vestrum humiliter ac obedienter his salubribus monitis nostris parens, Bulgaricæ locum dederit diœcesi, noverit nos decrevisse sibi episcopatum restitui quem eum in regione Græcorum prius habuisse constiterit : porro et si nunquam habuit, vacantem illi tribui ; si tamen talis persona sit cui nulla in hoc regula Patrum valeat obviare.

Missa per Paulum et Eugenium episcopos. Data die XVI mensis Aprilis, indictione XI.

CXIII.

AD BASILICUM IMPERATOREM.

(Anno 878.)

Dolet Constantinopolitam Ecclesiam schismate adhuc laborare ; qua de re legatos mittit.

Missa per Eugenium et Paulum reverendissimos episcopos.

Dilectissimo nobis et desiderabili filio BASILIO Christianissimo et tranquillissimo imperatori.

Benedictus Deus et Pater Domini nostri Jesu Christi, Pater misericordiarum et Deus totius consolationis, qui misertus et consolatus est nos in præsentis sæculo nequam (*III Cor. i*) ; visitans et redemptionem faciens tam pium tamque benignum imperii vestri cornu salutis erigendo in domo David (*Luc ii*), Christi videlicet pueri sui. Vos enim, fili charissime,

minus imperatoria dignitate, secundum Apostolum quia ait : *Æmulamini charismata meliora (I Cor. xii)*, contenti, etiam angelorum estis ministerium imitati, dum pacem in terra bonæ voluntatis hominibus exoptatis, et beatos per id ac cœlum vos visuros luce clarius demonstratis. Utraque siquidem epistola vestro pontificio nostro missa hujus vos flagrare desiderio patenter insinuat, et hanc vos ad statum Ecclesiæ, unde pravorum dissensione repulsa est, inhianter velle reducere, indicio evidenti demonstrat. A Deo quippe provectum imperium vestrum, quod eo auctore, justitia et triumphis ornatis, minus nimirum validum minusque gloriosum putatis, nisi etiam summa condecorare pace seu concordia satagatis. Nos autem, dilectissime, audientes in Constantinopolitanam Ecclesiam dissensionis adhuc scandala fluctuare, nonnullosque religiosi habitus viros hac illacque dispersos atque dejectos ignominiose tractari, merito ingemiscimus et multa mœstia fatigamur ; præcipue pacem sentimus illic continua contentione turbatam, quam per multos sedis apostolicæ labores jam credebamus ædificatam ; et sacros quosdam diversas injurias didicimus passos, quos ab omni oppressionis fasce sperabamus ereptos. Portamus quippe omnium onera qui gravantur, imo portat hæc in nobis amator vester beatus Petrus apostolus qui nos in omnibus sollicitudinis suæ protegit ac tuetur hæredes : sed quia et professionis nostræ officio cum Jeremia nihilominus dicitur : *Ecce constitui te hodie super gentes et super regna, ut evellas et destruas, et disperdas, et dissipes et plantes (Jer. i)*, et etiam vestra pietas ab apostolatu nostro pro hoc ipso personas postulat. Ecce strenuos e latere nostro viros dirigimus, qui si qua illic inter hæc diligenti studio deprehendant, et his radicibus, secundum Domini mandatum, evulsis, destructis, dispersis et dissipatis, pacem et unitatem et charitatem et congruenter ædificant simul et plantent. Nam quomodo habere poterunt charitatem, qui dividunt unitatem ? nos autem pro Christo legatione procul dubio fungimur, cum paci Ecclesiæ studium impendere procuramus. Quia vero Deo amabiles viros, quos nominatim litteris expetit, quibusdam incommodis impeditos destinare nequimus, misimus Paulum et Eugenium sanctissimos et reverendos episcopos, dilectosque consiliarios nostros, quorum nobis et fides probata et scientia manifesta est : quibus scripto dedimus in mandatis ut, omnibus simultatibus sopitis atque sedatis, quæ ad pacem sunt, sanctorum magistra regula Patrum, toto conamine construant, et omni contentione sublata, justitiæ tribuant, Deo, propitio, palmam, hoc duntaxat ad laudem Dei agentes, et ad præconiorum vestrorum cumulum, sicut vos agere de die in diem decet, addentes. Verumtamen ignorare pium imperium vestrum nolumus nos apostolicæ sedis præcepisse legatis, ut causa tantum visitationis gloriosum ejusdem provinciæ a principem adeant, et de optata

^a Forte loquitur de rege Bulgarorum.

memoria ei apostolorum, ut condecet, expletis officiis persalutationis edicant. Ideoque rogamus ut aditu eis annitentibus vobis concesso, talem illis industrium virum [*deest tradatis aut quid simile*] qui eos usque ad prædictum principem salvos ducat atque reducat, facta in scriptis de ea minime iterum usurpanda professione. Optamus vos per multos annos in Christo bene valere, et de barbaris jugiter hostibus triumphare, spiritualis et desiderabilis et Christianissime filii semper Auguste. Data indictione xi.

CXIV.

AD EUMDEM.

(Anno 878.)

Ut legatis a se missis fidem adhibeat, et opem Romanæ Ecclesiæ ferat.

Dilecto filio semper in Domino triumphanti BASILIO

Scimus, venerabilis imperator, scimus et omnimodo novimus vos prudentia polere, æquitatem diligere, pietatem extollere, directiones plantare et vitia evellere. Scimus et liquido credimus vos sanctæ Romanæ Ecclesiæ vigorem et decus velle augere, tribulationes gemere, angustias dolere, et necessitates pio intuitu, quantum ad vos pertinet, amovere. Hujus rei gratia, maximam de vobis fiduciam assumentes, quidquid eandem sanctam matrem vestram Romanam Ecclesiam oppido affligit et lacerat, vobis singulari quadam spe committimus audiendum et corrigendum. Tamen ne vos, quos secretorum nostrorum conscios esse cupimus, lateat quod his diebus contra Dei voluntatem contraque salutem totius Christianæ fidei, ac contra privilegium sanctæ Romanæ Ecclesiæ, seu contra morem reique publicæ statum Romæ peractum est, his missis nostris Paulo et Eugenio episcopis verbotenus vobis dicenda commisimus. Quæ vos ita credere deprecamur ac sinos vobiscum loquamur, et credentes, si nobis ferre opem, vel aliquam consolationem valeatis, et veluti dilectus filius reverendæ matri assolet, omnimodo conferatis deprecemur. Habebitis enim pro his sanctos apostolos adjuutores, et nos possidebitis devotiores vestros apud Dominum semper intercessores. Data iv Kalendas Martii [*f. Maii, ut constat ex superioribus*], indictione xi.

CXV.

AD LUDOVICUM ALBUM REGEM.

(Anno 878.)

Deplorat mortem Caroli imperatoris patris ejus; hortatur ut pacem habeat cum regibus consanguineis suis, et Ecclesiæ inimicos persequatur, præcipue Lambertum ducem, cujus diras infestationes commemorat; denique in Galliam se venturum, ibique synodum celebraturum significat.

Ludovico glorioso regi, filio divæ memoriæ Caroli II imperatoris Augusti.

Quanto deinde amore dilectionis pro tantorum bonorum virtutibus, et pro omnipotentis Dei quotidianis genitorem vestrum dilexerimus cultibus, horum, Christo conscientiam nostram teste, absque lacrymarum effusione factorum reminisci nullatenus possumus. Et

Aquanquam gaudendum sit quoniam eundem, post felicitis cursum operis inter angelorum cœtum paradisi susceperint præmia vitæ perennis, flendum nihilominus convenit quod tantum adjutorem Ecclesiarum Domini diffusarum in orbe præsentia corporali, heu, proh dolor! amiserimus. Præsertim cum hoc in tempore sancta Romana Ecclesia, mater omnium, quæ meæ mediocritati commissa est, Jesu æterni dispositione consili, in quo ut cum Apostolo pace quorumcumque dixerim, fines sæculorum devenerunt (*I Cor. x*), in tot persecutionibus atque adversitatibus diu lacessita, domesticorum debacchatione fatigetur, ut cogar cum Propheta erumpens exclamare: *Veni in altitudinem maris, et tempestas demersit me (Psal. lxxix)*; et rursus: *Domine, libera animam meam a labiis iniquis et a lingua dolosa (Psal. cx)*.

Sed vos, fili charissime, hortor ac moneo paterno amoris affectu, ejus imitari in Ecclesiarum exaltatione vestigia vitæ spiritalis, ejus floris decore natus regia dignitate existis. Primum ut pacis unitatem vinculumque charitatis cum fratribus vestris, nimirum Ludovici regis Bajoariorum filii, cumque fidelibus Christianis tenens, demum contra insanientis rabiem, atque tyrannos, paterno provocatus exemplo, virtutem roboris, Christi auctoritate, in defensionem matris vestræ, a qua et potum prædicationis in proavis, et infulam imperii accepistis, medullitus viriliterque effundere valeatis. Quia, quod dici sine lacrymarum imbre nullo modo potest, prodiit in hoc tempore apud nos ex massa peccati radix ac fomes nequissimæ perditionis Lambertus, Widonis quondam Spoletani dicis horrendus filius, fatemur membrum Antichristi, qui adversatur et extollitur derogando adversus ortum regalis progeniei, et se turpis lucri cupidum clandestina machinatione, rapacitatis ardore, nunc huc atque illic tergiversando, cum mœcha sorore Rotilde, cumque complice suo infido Adelgero marchione, imo patriæ prædone, ad facem, ut vera fama volitat, impudenter, quod Deus avertat, sustollere Romani imperii; et nunc, utpote abominatio desolationis atque perditionis filius, caput scorpionis et aspidis surdæ, destruit dilapidans, perque nequam suos disperdit prædones omnem terminum sancti Petri ac Pauli protectorum vestrorum, ubi et pro qua re omnes pene nostri fideles in paupertatem ac necessitatem redacti videntur, sacramentisque ut sibi conspirent, et ne ad nostram occurrant jussionem, omnis territorii sanctorum apostolorum homines constringere non omisit. Nunc etiam Tarentum legatione directa paganis, donaque transmittens, atque ab eis accipiens, suppliciter deprecatus est, ut sibi, cum significatum fuisset, phalangæ Agarenæ ad perniciem Christiani populi quatuordecim deferant auxilia. Qualiter denique fraude nequitiæ, et per perjurium, in sinu Ecclesiæ nostræ nos deceperit, urbemque sacram invaserit, hæc ea ideo prætereundo silemus, quia in alio opusculo ad omnium Christianorum notitiam, quo id circo anathematis vinculis innodavimus, nonnulla

conscripta teneamus. Pro qua re, domine fili charissime, contra nova et inaudita in Christianis mala, novum jam fessum et fatigatum certaminis laborem, navalis scilicet periculi, fluctusque maris, assumere desiderans, me tantis periculis [*edit. Rom. legit assumere iter de transmetantis periculis, etc.*] ad vos veniendo pro Ecclesiarum sanctarum omnium liberatione, juxta Apostolum, non faciens animam meam pretiosior quam me. Et ecce, quantum ad mei ministerii regimen spectat, non recuso pro Christi Domini ovium, ope ejus, liberatione mori, detrimentumque sufferre. Vos, quaeso obnixè, vos, fili charissime, lacrymas meas arduumque laborem aspiciate; et ad defensionem sanctæ matris vestræ vestrum animum fideliumque vestrorum adhortatione continua præparate, et mecum unanimiter lupis rapacibus baculos redargutionis studete tenere; quatenus, duce Unigeniti gratia, post longa temporum spatia, cooperatores effecti nostri certaminis, de purpura terreni, imperii ad coronam venire valeatis perpetuam. Et epistolas reliquas, quas confratribus vestris, Carolomanno videlicet, et Ludovico, atque Carolo juniore, dirigimus pro talium adhortatione, precamur, gloriæ vestræ decentiam, easdem illis sine mora destinare dignemini, omnibusque reverentissimis archiepiscopis, et clero totius ordinis regni vestri, paterna peto adhortatione significari præcipite, quoniam, Domino miserante, apud vos synodum celebraturi sumus cunctis populis Christianis perneccariam. Quæcunque nosse vos cupimus, sane deinceps sumus acturi de negotiis ecclesiasticis. Te quoque, charissime fili, auctoritate sancti Spiritus Dei nostri, ad vicem genitoris vestri domini Caroli perpetui imperatoris Augusti, a secretis constituo meum consiliarium, qui, ut dici assolet, pars animæ meæ fuit, et quæque agenda sunt, coge adunaque consilium: quia in fonte tui cordis primum intingendus calamus, deinde manus nostra formabit characteris apices.

CXVI.

AD LUDOVICUM BAJORIORUM REGIS FILIUM.
(ANNO 878.)

Hortatur ad servandam pacem cum patruelibus; invehitur in Lambertum Spoletanum duce: rogat episcopos significet ut ad synodum accedant.

Ludovico Bajoariorum regis filio.

Scriptum enim vero in Salomon legimus: *Filius sapiens lætificat patrem, et est gaudium matris quæ D genuit eum* (Prov. x); quapropter, quoniam te, Ludovico filio Caroli, Ludovico filio Ludovici regis, æternitatis prescientiæ suæ consilio omnipotens Deus ex regum imperatorumque est dignatus producere prosapia, et tunc illum plene lætificare contendis, si vestræ matri ejusque immaculatæ sponsæ adversus insidiantium ictus atque illius laceratores tota virtute concurritis, omne quoque nixu more parentum pravorumque vestrorum auxilii consolationem conferre, sprete personarum acceptione quarumlibet, quantocius festinatis, sancti Spiritus per Salomonem verbis testantibus: *Frater et amicus in angu-*

stis comprobatur (Prov. xvii); et bene nobis filiationis vestræ spiritualis favere valebit, si pacis et unanimatis cum fratribus vestris, Christo opifrice, concorditer tenere consulte satagitis vinculum; quia in vestra pace, fatemur totius Christiani populi salus consistit; qua demum necessitate, quæve fatigati angustia, relicta sede propria apostolici culminis, compulsi sumus Franciam petere, vosque paterno affectu deponere, quatenus una nobiscum positi de communi salvatione sanctæ Romanæ Ecclesiæ et reipublicæ statu tractaremus, in paucissimis nunc patefacimus, quia in alio opusculo qualiter nefarie sit peractum ad omnium Christianorum notitiam reservatur conscriptum; quod luce clarius advertitis. Lambertus Spoletanus perfidus B dux, Widonis quondam stirps, perditionis filius, in quantam superbiam pro cupiditate, ut fama vera se habet, Romani imperii eruperit, in nostris tribulationibus atque angustiis procul dubio cognoscetis ad liquidum. Romam siquidem clandestina fraude devotum venire se simulans, a nobis velut filius pacis benigne susceptus: quid virulenti consilii corde gestiens [*f. gereret*] in crastinum sequentis diei diluculum demonstravit: nam deputatis custodibus, verum etiam satellitibus, ad portam Urbis quæ ad beati Petri apostolorum principis euntibus pandit iter, nullum nostrorum fidelium ad nos egredi patiens, cibos deferentes coercens, asserit Carolomanum regem sibi talia horrenda facere præcepisse. Quod idcirco non possumus credere, quoniam ex vestra progenie nullus cervicem superbe contra hanc extulit sedem, sed propter Deum suppliciter colla submisit. Nos, fili charissime, pro Domini Ecclesia et ejus ovibus animam ponere cupientes, ecce marinos fluctus undasque salis ad vos veniendo per difficile iter assumpsimus, vobiscumque simul positi, Domino miserante, universale synodum celebrare disponimus totius sanctæ Ecclesiæ, vobis obsecundantibus, proventum et exaltationem loco percongruo satagemus peragere. Quod, quaeso, regi vestri omnibus archiepiscopis coepiscopisque nostris innotescere dignemini, eosdemque nobis adesse continua maturitate accelerare monete. Data *ut supra*.

CXVII.

AD CAROLOMANNUM REGEM.
(ANNO 878.)

Ejusdem pene argumenti.

Dilecto filio CAROLOMANNO glorioso regi.

Quanta denique exaltatione sponsionis vestræ sanctam Romanam Ecclesiam, videlicet matrem vestram omniumque Christianorum, quæ vos et lacte suæ prædicationis ab uberibus et ad imperialia a proavis scepra sanguine regum excellenter produxit, sublevare curetis, et epistolari textu, et interantibus nuper ad nos directis reminiscimur pleniter, fontemque ubertim cordis vestri solita pietate parentum vestrorum circa omnipotentis Dei famulatum miseratione abundare reperimus: vestrum quoque ad prædictam matrem vestram, uti gloria culminis vestri spon-

derit, tanto avidius enixiusque quotidiana præstolatione adventum expectavimus, quanto pro augmento mercedis vestræ nos nostramque Ecclesiam in tot adversantibus laborantem, super omnes imperatores atque reges qui ante vos fuerunt exaltare ac beatificare omnimodo promissistis. Sed, heu proh dolor ! fesso mihi paganorum persecutione ac gladio, atque exactionis [f. exactione, HARD.] census viginquaque millium in argento mancusorum annualiter, imo prædictæ vestræ matri additus civilis mucro angustia est, qui pene nos funditus peremisset, nisi subita miseratione illius solarem auxilio, qui fidelibus pollicens inquit : *Ecce ego vobiscum sum omnibus diebus usque ad consummationem sæculi* (Matth. XXVIII). Exierunt quidam ex nobis, sed non fuerunt ex nobis, confitemur neque ex nobis [forte melius, neque, ex vobis, HARD.], qui tanta Romanam Ecclesiam dehonestatione urbemque sacram, nos quoque fatigaverunt atque oppresserunt, ut simile nec in Christianis regibus factum reminisci ullo modo possit. Lambertum fateor, atque Adelbertum electos marchiones, qui hostili manu occultaque fraude qualiter nos affecere, culminis vestri gloriam latere nulla potuit ratione, quod ad omnium vestrum notitiam in suo scriptum tenetur opusculo. Nihil enim vero ad vos inter cætera mala iter claudere venire cupientibus ; qua necessitate compulsi, navale, animam præ manibus habentes, assumpsimus laboriose periculum, et commodum duximus Franciam ire, vestramque fraternam compagem in pacis et unanimitatis vinculum consolidare, vestræ matris sæpe dictæ liberationem sanctæ Romanæ Ecclesiæ necessario quærere. Vos siquidem illuc omnesque vestrorum regnorum episcopos ad synodum celebrandam venire hortamur. Data de civitate Genuensi, et directa gloriæ vestræ per Anspertum Mediolanensem confratrem et coepiscopum nostrum.

Præsentem [præsentium] latorem Petrum cardinis ecclesiæ nostræ presbyterum gloriæ vestræ plurimum commendamus, eumque ad nos quæsumus cum vestris missis atque opitulatione festinanter remittite.

CXVIII.

AD ANSPERTUM ARCHIEPISCOPUM MEDIOLANENSEM.

(Anno 878.)

Monet ut quantocius ad synodum in Galliam cum suffraganeis accedat : queritur de perfidia Lamberti Spoletani comitis.

ANSPERTO venerabili archiepiscopo Mediolanensi.

Pro innumeris igitur et multiplicibus oppressionum angustiis totius sanctæ Ecclesiæ in orbe terrarum diffusæ, synodum universalem, Christo opitulante, in Francia (quia in Italia, persecutione malorum grassante ^a) Petrum presbyterum cardinis nostri, quem ad Carolomannum regem dirigimus, fraternitati vestræ plurimum commendamus (minime potuimus) sumus celebraturi, ad quam frater-

^a Hæc verba non coherent sequentibus.

^b *Ut causam communis hestis una mecum iudicetis.* Hæc vel ad a huiusmodi verba hic deesse videntur. De Lamberto et Adelberto Aimois., l. v, c. 37.

nitatem vestram quantocius, omni mora postposita, occurrere admonemus, cum cunctis coepiscopis ac suffraganeis vestris, exceptis his quos sacri canones pro incommodis causis stare patiuntur. Quoniam in ea, Christo cooperante, omnium Ecclesiarum speramus erigi statum atque vigorem. Hoc iterum iterumque monemus, hortamur expresseque mandamus, ut nulla vobis mora nullumque tempus præpediat, donec nobis vestrum adventum in præsentia præbeatis ; ^b id est Lamberti perfidi Spoletanis ducis Widonis filii, ejusque complices Adelberti marchionis, vel, ut melius, patriæ proditoris, qui clandestina fraude pacifice venire se simulans, in dolo ad portam urbis custodes deputans, sacramque civitatem tyrannus invasit, nosque cum fidelibus nostris intra ecclesiam beati Petri apostolorum principis inaudito atque horrende coarctare inter cætera mala ^c. Data *ut supra* ^d.

CXIX.

AD ANGELBERGAM AUGUSTAM.

(Anno 878.)

Ut in Romanæ Ecclesiæ fide perseveret ; præsentium latorem commendat.

Dilectissimæ filiæ ANGELBERGÆ imperatrici Augustæ.

Reminiscens omnium honorum vestrorum, quotidie Deo nostro gratiarum actiones referimus, qui vestrum animum tanta sollicitudine circa devotionem ab exordio sanctæ Romanæ Ecclesiæ spirituali flammæ adustione perussit. Sed nunc, filia mea charissima et in Christo devota, quæso, vires sollicita ingenii acutissimi, et in hoc inopportuno tempore solita bonitate concurre, quatenus cœptum bonum usque ad consummationem operis perductum æterni retributoris præmia recipere valeatis. Latorem quoque præsentium Petrum cardinis nostri presbyterum, quæso in omnibus habeas commendatum, vestroque consilio prudentissimo iter illius solita pietate disponite, quatenus, Deo duce, ad nos possit redire incolumis. Data *ut supra*.

CXX.

PRIVILEGIUM PRO MONASTERIO TORNUTIENSI.

(Anno 878.)

Confirmantur bona eidem monasterio olim concessa.

Anno Dominicæ incarnationis 878, indictione undecima, regnante piissimo atque gloriosissimo rege Ludovico, Caroli filio serenissimi Augusti, auxiliante Domino nostro, in honorem ejusdem Dei et Domini nostri

Jesu Christi. Ego Joannes episcopus, servus servorum Dei, atque prædictus filius noster gloriosus rex Ludovicus, constituimus conventum venerabilium archiepiscoporum necnon et præsulum totius regni Trevas civitate, quo interfuit memoratus rex piissimus : eoque peracto, precatus est nos cum filiis et fratribus nostris episcopis jam dictus gloriosus imperator ut Tornutum monasterium, quod fundatum est in comitatu Cabilonensi super Sagonnam fluvium,

^c Videtur hic deesse, *conatus est*.

^d In editione Romana in principio hujus epistolæ sic legitur : *Ad archiepiscopum de Mediolano ; ad patriarcham de Foro-Julii ; ad Joannem de Papia.*

ubi martyr Christi Valerianus corpore quiescit, quod A in regum reperitur præceptis. Si quis autem temeraria præsumptione cæcæque cupiditate, quod Dei et nostra auctoritate firmamus, in aliquo infringere præsumperit, æterna se sciat damnatione mulctandum, et cum diabolo et angelis ejus perpetuo incendio cremandum : a liminibus quoque sanctæ Dei Ecclesiæ habeatur extorris, quousque ab illicita præsumptione respiscens, condigna penitentia et emendatione iram omnipotentis Dei quam incurere non timuit placare procuret, Harum itaque sanctionum evidentissimam confirmationem, manibus sacrorum præsentium pontificum subnotavi, absentium quoque consacerdotum nec minus idoneis stipulationibus, per Christum et in Christo fulciri postulamus.

Hincmarus Rhemorum episcopus in Christi nomine roboravi.

Ansegisus episcopus Senonensis.

Ottulfus episcopus. Gissibertus episcopus. Hildibaldus episcopus. Berno episcopus. Geraldus episcopus. Hincmarus episcopus Laudunensis. Edenuulfus episcopus. Joannes episcopus. Raganulfus episcopus. Adalardus archiepiscopus. Alericus episcopus. Abbo episcopus. Agilmarus episcopus. Ingilwinus episcopus. Acredus episcopus.

Datum III Kalendas Maii, per manum Christifori primicerii sanctæ summæ sedis apostolicæ, imperante piissimo Ludovico.

CXXI.

AD ANGELBERGAM AUGUSTAM.

(Anno 878.)

C *Arelatem se venisse significat, ibique omnia prospera reperisse; hortatur ut Romanæ Ecclesiæ commodis prospiciat.*

Dilectissimæ filiæ domnæ ANGELBERGÆ imperatrici, piæ memoriæ domni Ludovici invictissimi imperatoris conjugii serenissimæ Augustæ.

Cum erga Romanæ Ecclesiæ privilegia immenso velle, immenso et opere decus imperii vestri decerere, et ad perfectum ducere semper adhaurimus [f. amaverimus, aut anhelaverimus] et amemus. Christo favente, perpetuo magnitudinem tantæ vestræ devotionis scire cupimus : Ecce Arelatem regni deliciarum vestrarum sani intravimus, summo arbitro permittente, per intercessionem apostolorum principum ; illicque Bosonem principem generum vestrum communem et filiam domnam Hermengardam^a alloquentes, omnia prospera et jugiter desiderata invenimus, et pro amore vestro, vestri nuper et piissimi conjugis, illos tanquam filios amplectentes, pro eorum consulto, illorum cum honore cuncta faciemus : quoniam ceu per vos, haud secus per istos consolationem et defensionem sanctæ Romanæ Ecclesiæ quærimus, eosdemque permissu Dei ad majores excelsioresque gradus modis omnibus, salvo nostro honore, promovere nihilominus desideramus. Quapropter monentes hortamur ut tanto labori favetis, ejusque perfectionem, prisco vestro consilio perfruentes, certis litteris per singula nobis et illis

^a Hermengardæ, sive Hermengardis filiæ Ludovici II imper. meminit Regino, lib. II Chron. Aimonius, l. v. c. 32.

sine mora intimare minime differatis. Cæterum rogamus ut Joanni archiepiscopo Ravennati mittatis epistolas ex nostra parte consolatorias, incitantes ut pro nobis orationes faciat, et contra Dei inimicos se præparare nequaquam formidet, et nostris fidelibus Romæ legatos consolando transmittat : et vos, si fas est, aut nihi apud vos est impetrandi facultas, Leoni episcopo misso et apocrisiario nostro, et Petro, super ista cæterisque fidelibus litteras vestras mittite, confortantes ipsos ut scitis et vultis.

CXXII.

AD MIRONEM ET HUNCFRIDUM FRATRES.

(Anno 878.)

Mironem et Hunccfridum multorum scelerum reos ad synodum venire jubet.

MIRONI et HUNCFRIDO germano suo.

Quanta ad apostolatam nostram relatione quarundam transgressionum vestrarum, mala atque perversa fuerunt nuntiata, hæc, fateor, lacrymabiliter nominamus, apostolicaque auctoritate citissime corrigenda jubemus, si sancti Spiritus potestate non vis tu, Miro, merito nequitiae tuæ ab omni consortio Christianitatis separari, et inferni flammis in perpetuum condemnari. Septimaniæ terram universam redegeisti in solitudinem : ecclesias, ut asserunt, ministris expoliasti ; castella ipsius terræ callide ac fraudulenter invasisti. Quo compulsi necessitate, homines Bernardi gloriosi marchionis cum multitudine hominum tuæ rabiei occursando, aliqua in eadem terra perperam egerunt : ut velut Jero-boam filius Nabath, qui peccavit, et peccare fecit Israel, auctor omnium peccantium existas. Ideoque ad universalem synodum nostram quam Deo auctore, in proximo sumus celebraturi, Lugdunum venire te, occasione omni postposita, volumus, si funditus, ut dictum est, non vis gladio divino mulctari. Lindoinum quoque vicecomitem audimus potestate uti horrendo denuntio, uti sacerdotali in parochia Sigebodi Narbonensis archiepiscopi, presbyterosque tuos in ejus exteris subrogare ecclesiis : quod concite tuæ vitæ consulentes, corrigere et emendare mandamus. Te vero Hunccfridum ex diaconatus officio et venerabili monachico habitu apostatam audimus et doleamus affectum. Quapropter vel sera et penitentia per Domini misericordiam libera, et ad monasterium quanto citius confuge ; vel si de tua confidis conscientia, ad synodum nostram de illatis tibi atque objectis te purgandum occurre : ne si prætermiseris, anathematis vinculo, utpote apostola et rebellis, alligeris. Data ut supra.

CXXIII.

AD ROSTAGNUM ARCHIEPISCOPUM ARELATENSEM ^a.

(Anno 878.)

Suas illi vices in Gallia et pallii usum concedit.

Reverentissimo et sanctissimo fratri ROSTAGNO archiepiscopo Arelatensi.

^a In editione Romana, et ex ea in collectionem epistolarum Joannis VIII, hujus epistolæ portio incipiens ab itaque fraternitati, etc., ponitur tanquam nova epis-

(S. Greg., l. iv, epist. 50.) O quam bona est charitas, quæ absentia per imaginem præsentia sibi met ipsi exhibet per amorem ! Divisa unit, confusa ordinat, inæqualia sociat, imperfecta consummat. Quam recte prædicator egregius vinculum perfectionis vocat (*Coloss. III*) ; quia virtutes quidem cæteræ perfectionem generant, sed tamen eas charitas etiam ligat, ut ab amantis mente dissolvi jam nequeat. Hac itaque virtute, frater charissime, plenum te esse reperiens, cum pro sanctarum Dei ecclesiarum restauratione in Arelatensium civitate corporalem præsentiam exhibuisses, sicut mihi de te multorum testimoniorum fama vera longe lateque narraret. Quod vero juxta antiquum morem usum pallii ac vices sedis apostolicæ postulasti, absit ne aut transitoria potestatis culmen, aut exterioris cultus ornamentum, in vicibus rostris ac pallio quæsisse te suspicer. Sed quia cunctis liquet unde in Galliarum regionibus fides sancta prodierit, cum priscam consuetudinem sedis apostolicæ vestra fraternitas repetit, quid aliud quam bona soboles ad sinum matris recurrit ? Libenti ergo animo postulata concedimus, ne aut vestræ Ecclesiæ quidquam de debito honore subtrahere, aut condignam petitionem vestri contempsisse, videamur. Sed jam nunc studio majore res indiget, ut cum honor crescit, etiam sollicitudo proficiat, et erga cæterorum custodiam vigilantia exerescat : vitæ quoque merita subjectis in exemplum veniant, et nunquam sua per suscepti honoris gratiam, sed lucra cælestis patriæ vestra fraternitas exquirat. Nostis enim quid beatus Apostolus gemens dicat : *Omnes enim quæ sunt quærent, non quæ sunt Jesu Christi (Philipp. I)*. Quibusdam namque narrantibus, agnovi quod in Galliarum vel Germaniarum partibus nullus ad sacrum ordinem sine commodi datione perveniat. Quod si ita est, flens dico, gemens denuntio, quia cum sacerdotalis ordo intus cecidit, foris quoque diu stare non poterit. Scimus quippe ex Evangelio quid Redemptor noster semetipsum fecerit, quia ingressus templum *cathedras vendentium columbas evertit (Matth. XXI)*. Columbas enim vendere est de sancto Spiritu, quem Deus omnipotens consubstantialem sibi per impositionem manuum hominibus tribuit, commodum temporale percipere. Ex quo, ut prædixi, malo jam innuitur quid sequatur, quia in templo Dei columbas vendere præsumperunt, eorum Deo giudice cathedræ ceciderunt, qui videlicet error in subditis cum augmento propagatur. Nam ipse quoque qui pretio ad sacrum ordinem perducitur, jam in ipsa pro- vectus sui radice vitiatus, paratior est aliis venundare quod emit. Ubi est quod scriptum est : *Gratis accepistis, gratis date ? (Matth. x.)* Et cum prima contra sanctam Dei Ecclesiam Simoniaca hæresis sit exorta, cur non perpenditur, cur non videtur, quia eum quem quis cum pretio ordinat, provehendo

tola ad archiepiscopum Arelatensem missa. Illam nos in hac collectione omisimus tanquam supervacaneam. MANSI.

agit ut hæreticus fiat? Itaque fraternitati tuæ vices nostras in ecclesiis quæ sub regno Galliarum sunt juxta antiquum morem Deo auctore committimus, singulis quidem metropolitibus secundum priscam consuetudinem proprio honore servato. Pallium quoque concessimus quo fraternitas tua decoretur. Sicubi autem longius episcoporum quisquam pergere forte voluerit, sine tuæ sanctitatis auctoritate ei ad loca alia transire non liceat. Si qua vero inquisitio de fide vel fortasse aliarum rerum inter episcopos causa emerit quæ discerni difficilius possit, collectis duodecim episcopis, ventiletur atque decidatur; sin autem decidi nequiverit, discussa veritate ad nostrum iudicium referatur (*Huc usque S. Greg.*). Proh dolor! cum in Galliæ partibus essemus inter cætera unum valde prohibendum invenimus: metropolitæ, antequam pallium a sede apostolica suscipiant, consecrationem facere præsumunt, quod antecessores nostri et nos canonico decreto ne fieret interdiximus. Unde fraternitatem tuam sanctam per Galliam nostram vicem tenentem hortamur, quatenus super hoc sollicitudinem habeas, et ne istud adoleat, auctoritate prohibeas, et ut secundum antiquum morem quærere festinent moneas, incites atque præcipias; et si ipsi obediant, necne, nostro apostolatu super omnia renunties, si potest in nativitate apostolorum, aut per vos, aut per nostrum legatum aliquem certis litteris intimare, ne differas. Omnipotens autem Deus sua vos protectione custodiat, honoremque perceptum vos in moribus servare concedat. *Data ut supra.*

CXXIV.

AD UNIVERSOS EPISCOPOS GALLIÆ.

(Anno 878.)

Ut Rostagno Arelatensi episcopo, cui vices suas in Gallia commisit, omnes obediant.

Omnibus reverentissimis et sanctissimis episcopis et fratribus per Gallias constitutis.

(S. Greg., *lib. iv, ep. 52.*) Ad hoc divinæ dispensationis provisio gradus et diversos constituit ordines inter se distinctos, ut dum reverentiam minores potioribus exhiberent, et potiores minoribus diligentiam impenderent, una concordiæ fieret a diversitate contextio, et recte officiorum gereretur administratio singulorum. Neque enim universitas alia poterat ratione subsistere, nisi huiusmodi magnus eam differentie ordo servaret. Quia vero creatura in una eademque æqualitate gubernari vel vivere non potest, celestium militiarum exempla nos instruunt, quia dum sint angeli, sint archangeli, liquet quia non æquales sunt, sed in potestate et ordine, sicut nostis, differt alter ab altero. Si ergo inter hos, qui sine peccato sunt, ista constat esse distinctio, quis hominum abnuat huic se libenter dispositioni submittere, cui novit etiam angelos obedire? Hinc etenim pax et charitas mutua se vice complectitur, et manet firma concordia in alterna et Deo placita dilectione sinceritas. Quia igitur unumquodque tunc salubriter completur officium, cum fuerit unus ad quem possit

recurri præpositus, idcirco opportunum esse perspeximus in ecclesiis quæ sub regno Galliarum secundum antiquam consuetudinem sunt, fratri nostro Rostagno Arelatensis civitatis episcopo vices nostras tribuere, quatenus et catholicæ fidei integritas, id est sanctarum quatuor synodorum, Deo protegente, sollicita devotione servetur; et si inter fratres consacerdotesque nostros aliqua eveniret forte contentio, auctoritatis suæ vigore, vicibus nempe sedis apostolicæ functus, discreta moderatione compescat. Cui etiam injunximus ut si quarundam causarum tale fuerit certamen exortum, in quo aliorum præsentia opus sit, congregatis sibi numero competenti fratribus et coepiscopis nostris, salubriter servata hoc æquitate discutiat, et canonica auctoritate diffiniat. Si quam vero contentionem, quod longe faciat divina potentia, de fidei causa evenire contigerit, aut negotium emerit, ejus vehemens sit fortasse dubietas, et pro sui magnitudine iudicio sedis apostolicæ indigeat, examinata diligentius veritate, relatione sua ad nostram studeat perducere notionem, quatenus a nobis valeat congrua sine dubio sententia terminari. Cui etiam injunximus ut nullum archiepiscopum in his partibus sine pallio a Romano pontifice directo consecrationem facere permittat, et facientes nostra auctoritate arguat. Et quoniam necesse est ut ad eum cui nostras vices indulsimus, quoties oportere perspexerit, pro facienda collatione aptis debeant episcopi temporibus convenire, hortamur ut nullus mandatis ejus inobediens esse præsumat, nec communi congregationi interesse postponat, nisi aut corporis infirmitas quempiam fortasse vetuerit, aut cujusdam eum causæ justæ excusatio minime venire permiserit. Hi tamen qui, prohibente aliqua necessitate, ne quierint in synodum convenire, loco suo presbyterum aut diaconum dirigant, quatenus quæ a nostro vicario, Deo auxiliante, fuerint definita, ad eum qui absens est, per ipsum quem miserit, fida relatione perveniant, ut inconvulsa firmitate serventur, et nullius ea audeant occasionis excusatione violare. Hoc etiam vos pariter prævidimus admonendos, ut nullus vestrum ad longinquiora loca sine præfati fratris et coepiscopi nostri Rostagni auctoritate tentet aliquo modo proficisci, scientes quia et prædecessorum nostrorum, qui vices suas ejus prædecessoribus concesserunt, sic procul dubio mandata definiunt. Hortamur præterea ut de officio suo sit quisque vestrum sollicitus, et qui promissam cupit patriæ mercedem portionis accipere, commissum sibi gregem sollicitudine et oratione custodiat, ne lupus insidians oves creditas invadendo dilaniet, et sit in retributione pœna pro munere. Optamus igitur, fratres charissimi, et totis omnipotentem Dominum precibus exoramus, ut dilectionem vestram boni amoris sui constantia faciat magis magisque fervere, atque in pace Ecclesiæ et una vos concedat manere concordia. Nuntiatum vero nobis est quia per simoniacam hæresim ad sacros ordines quidam

adducuntur, et hoc sancto fratri et coepiscopo nostro Rostagno per omnia prohibendum mandavimus; quod ut fraternitas vestra cognoscat et custodiat, ipsa vobis est epistola relegenda. Data *ut supra*.

CXXV.

AD CAROLUM REGEM.

(Anno 878.)

Excusat se quod ad eum legatum non miserit, interclusa sibi via a Lamberto ejusque fautoribus qui urbem Romam tenebant obsessam.

CAROLO glorioso regi dilecto filio.

Igitur gloriae vestrae litterarum serie recepta et lecta, ut de more antecessorum regum videlicet et imperatorum, vestrorumque duntaxat parentum erga Romanam Ecclesiam, cujus lac vestram prolem hactenus educaverit, in cunctis omnia vos desiderare et assequi novimus, paterno affectu gratias agimus, et qualiter scripsistis imo tenemus. Caeterum pontificium nostrum vestra percunctari dilectio studuit cur vobis non misimus ob quid taliter venissemus. Et vobis et fratribus vestris gloriosis regibus, antequam ex Urbe exiremus, mittere volumus, sed officientibus Lamberto et Adelberto fautoribusque eorum anathematizatis, mittere nequivimus. Nec mirum si ipsi nobis viam sustulerint, cum et ipsius beati Petri apostolorum principis Ecclesiam, vestram denique matrem, et omnium Dei Ecclesiarum tutricem, armis triginta diebus circumdatam tenere non formidaverint; ita ut nec ibi aliquam alicui lucernam illuminare, nec laudes Deo conferre liceret, praeter postquam urbem exivimus; fratribus vestris gloriosis regibus mittere satagimus, ut vobis super talibus intimaremus: sed cum vos magis juxta audimus, ita mittere cogitavimus. Quo loco ab ipsis significatur pro pacis et unitatis tranquillitatisque omnium Dei Ecclesiarum negotio; primo venimus, quo vos quatuor reges unum legitimumque velle, annuente Deo, nihilominus faciamus, ut Psalmista cecinit: *Ecce quam bonum et quam jucundum est habitare fratres in unum*, et reliqua (*Psal. cxxxii*). Dehinc volumus ut ita conventi nostras oppressiones audire compatiamini. Quapropter, fili charissime, quoniam te valde illuxit (*deest aliquid*). Data *ut supra*.

CXXVI.

AD ISAAC EPISCOPUM LINGONENSEM.

(Anno 878.)

Ut Trecae ad synodum veniat, et Cabilonum aliquos mittat qui pontificem eo deducant.

Reverentissimo ISAAC venerabili episcopo Lingonensi.

Quod sanctitati tuae notum esse non ambigimus, pro sanctorum ecclesiarum statu ad Galliarum partes devenimus. Quapropter, Domino auxiliante, apud Trecae synodum sumus celebraturi, ad quam sanctitatem tuam volumus omnino adesse. Prius tamen venerabilitas tua nobis missos Cabilonum dirigere studeat, qui iter nostrum recto tramite ad praedictum dirigant locum; et per parochiam vestram

A nobis congruas mansionaticas praeparate, id est in villa Marmania, in pago Alhensi. Data *ut supra*.

CXXVII.

AD OMNES CHRISTIANOS.

(Anno 878.)

Excommunicat eos qui sibi equos et argenteum vas furati fuerant, nisi intra tres dies restituant.

Omnibus episcopis, comitibus, et cuncto populo Christiano.

Notum sit quia dum pro pace et unitate sanctorum Dei Ecclesiarum in Gallias venissemus, apud Cabilonum civitatem, ad injuriam sanctorum apostolorum Petri et Pauli et nostram, multam inhonorationem sustinimus. Inter quae equi nostri nocturno silentio, nostris hominibus secure quiescentibus, a concivibus praedictae civitatis latrocinanter furati sunt. Quapropter nos, qui secundum officium ministerii nostri pullulantia vitia gladio spiritali reseccare mature debemus, hoc malum caelesti mucrone percussimus; ita ut nisi praedicti equi, et alia furta, nostris hominibus intra tertium diem reddita fuerint, praedictos fures, cum omnibus consentaneis suis, eo quod latronibus latebras praebent, et excommunicabimus et anathemati submittemus. Inter haec Aduvardum presbyterum, qui nobis in monasterio Flaviniaco ministravit, cujus homines scutellam argenteam sancti Petri, nescio utrum consensu illius, an non, furati sunt, pro sacrilegio furti excommunicamus, et pari sententia ut supra, nisi eam reddiderint, constringimus. Data *ut supra*.

CXXVIII.

AD EPISCOPOS SUFFRAGANEOS ARCHIEPISCOPI ARELATENSIS.

(Anno 878.)

Jubet ut cum archiepiscopo suo, simul ac vocati fuerint, ad Trecentensem synodum veniant.

Omnibus venerabilibus episcopis suffraganeis coepiscopis et confratris nostri Rostagni Arelatensis.

Notum sit omnium sanctitati quia, Domino opitulante, pernecessariam universam synodum sumus celebraturi: ad quam, mox ut vos praedictus archiepiscopus vester apostolatus nostri litteris convocaverit, omni postposita occasione, obedientiae vicino gressu occurrere satagatis: quoniam sicut in communi conventu, gratia Christi duce, paternis parentibus jussis erit exaltatio, ita, quod non optamus, subtrahentibus se ab hoc magno collegio est subsecutura confusio. Apud urbem Lingonensem IV Non. Junias. Similiter Otteramno archiepiscopo Viennensi, Aureliano archiepiscopo Lugdunensi, Roberto archiepiscopo Aquensi, Teutranno archiepiscopo Tarantasiensi, Sigibodo archiepiscopo Narbonensi, Ariberto archiepiscopo Ebreduensi.

CXXIX.

AD DIVERSARUM SEDIUM ARCHIEPISCOPOS.

(Anno 878.)

HINC MARO archiepiscopo Rhemensi, ANSEGISO archiepiscopo Senonensi, FROTARIO archiepiscopo Bi-

turicensi, JOANNI archiepiscopo Rothomagensi, ADELARDO archiepiscopo Turonensi, a paribus.

Canonica instituta servant, oportet nos, quotiescunque Ecclesiæ ingerunt passiones, sacerdotum collegia aggregare, ut his simul convenientibus, salubre universæ Ecclesiæ consilium, et totius Christianitatis fidem eidem imponant, et æquitatem moderamina queant congrue dilaniari [al. moderamine q. c. dilimari, id est examinari]. Ideo vestram hortamur sanctitatem, dum de Ludovici gloriosi regis adventu audieritis, quando ad nos venire conaverit, in eo loco celebraturi concilium incerte tenemus, sed vos audientes comperietis, mox ut præsentibus susceperitis nostras apostolicas litteras, omni mora seposita, ad nos venire non differatis. Ita profecto de vestræ unanimiatis et pacis concordia mentis jucunditas uberius multiplicetur, ut conventus universorum, et vestræ devotionis conversus, nec solum ad favorem hominum, sed ecclesiis ad laudem potissimum proficiat Creatoris. Optamus fraternitatem vestram in Christo bene valere. Data iv Idus Junias, ind. xi.

CXXX.

AD HUGONEM ABBATEM.

(Anno 878.)

Hortatur suadeat Ludovico regi ut ad se veniat: monet etiam ut se a quorundam communione separet.

HUGONI strenuo, nobili, regali prosapie edito atque excellentissimo abbati.

Quanto vos, charissime fili, amore diligimus celebrerrima fama vestri boni operis circumquaque accensi, explicare verbis nullatenus possumus. Quapropter, ut nostro desiderio præsentiae vestræ capiamus effectum, mature volumus hortemini Ludovicum regem filium nostrum, vosque cum eo ad nos concite properare, quatenus, Christo cooperante, exaltationem totius Christianitatis communiter operemur. Sic agat vestra dilectio ut tristitiam quam animo de vestra absentia nuper Papia intulistis, lenire moderatissime valeatis. Inter hæc ab omni te consortio Formosi anathematizati optamus, fili charissime, separare, Joannis archiepiscopi Rodomensis [al. Rodonensis, id est Rothomagensis, nec quidquam mutandum], Adelardi Turonensis, Frotarii Bituricensis [edit. Rom. Beduriensis]. Data ut supra.

CXXXI.

AD TEUTRANNUM TARANTASIENSEM ARCHIEPISCOPUM.

(Anno 878.)

Monet ut sibi cum suffraganeis suis obviam veniat, et Adalbertum synodo adesse jubeat, at rationem reddat eorum de quibus Bernarius episcopus questus fuerat.

Venerabili archiepiscopo TEUTRANNO.

Miramur fraternitatem tuam cur, nostrum in has partes audiens adventum, nos ob reverentiam beati Petri apostolorum principis, et nostram, more cæterorum venerabilium archiepiscoporum, minime consolari et occurrere studuisti. Qua admiratione

A jam diu suspensi, monemus fraternitatem tuam ut nobis citius occurrere cum tuis suffraganeis, quos tecum adducere præsentialiter poteris, non differas, ut simul de utilitate Ecclesiæ tuæ tractare valeamus. Innotescimus denique quia venerabilis frater et coepiscopus noster Bernarius, nostram nuper audiens præsentiam, reclamavit se super fratre Adalberto suffraganeo tuo, de quo jam Romæ proclamaverat et libellum suæ reclamationis ostenderat. Unde tibi et Viennensi archiepiscopo epistolas direximus, ut amborum querimonias ventilantes, quæ canonum sunt instituta dijudicaretis: insuper Arelatensem archiepiscopum, Valentiniensem quoque et Vivariensem episcopum, huic assertioni testes adesse jussimus. Sed quia variis præpedientibus causis, hactenus eorum indiscussa manet causatio, jam præcipimus monendi auctoritate ut ubicunque a nobis fuerit synodus indicta, canonicè eum inibi adesse jubeas, paratum in omnibus ad rationem reddendam. Quod si defuerit, vide ne ejus in te retorqueatur sententia: ipse vero sciat, a se de absentia sua lucrum non percipiendum. Data ut supra.

CXXXII.

AD ROSTAGNUM ARCHIEPISCOPUM ARELATENSEM.

(Anno 878.)

Ut ad synodum cum suffraganeis suis quamprimum veniat.

ROSTAGNO venerabili archiepiscopo Arelatensi.

Quia omnipotentis Dei miseratione universalem synodum sumus celebraturi in proximo, te omnesque tuos coepiscopus suffraganeos volumus, auctoritate apostolica admonemus expresseque mandamus, ad hanc, omni postposita occasione, quantocius præsentare, exceptis eis obstaculis quibus remorandi licentiam sacri canones tribuunt. Alias, quod non optamus, quicunque se a tanto hac vice collegio subtraxerit, particeps de reliquo nostræ communionis esse nullatenus valebit. Data ut supra.

CXXXIII.

AD HINGMARUM RHEMORUM ARCHIEPISCOPUM.

(Anno 878.)

Ut ad synodum Trecensem absque mora cum suffraganeis suis episcopo.

HINGMARE venerabili Rhemorum episcopo.

Fama tuæ fraternitatis longo exacto jam tempore bona notitia nos quoque celeberrime lætificavit; quantoque te desiderio contemplari cupimus, explicare verbis nullatenus possumus, præsertim cum causa exigendæ utilitatis ecclesiasticæ petere has partes decreverimus. Quapropter præsentiam religiosæ sanctitatis vestræ diu desideratam miramur a te nobis hactenus dilatari. Unde apostolica atque paterna auctoritate monemus ad synodum præsentem, quam, Deo auctore, Trecis sumus celebraturi, absque mora cum cunctis suffraganeis diocæses vestræ studeatis occurrere. Ad locum prænominatum iterum iterumque hortamur, omni postposita tarditate, quantocius properate venire, quoniam an-

tequam ipse nobis charior atque utilior veneris. A dictus rex præpeditus fuerit, et. ut non optamus, sanctarum Dei Ecclesiarum causas tractare differimus. Tantum monemus, rumpe moras, et satage properare celerrime atque agiliter. Data *ut supra*.

CXXXIV.

AD FROTARIUM ARCHIEPISCOPUM.

(Anno 878.)

Ut ad synodum suis cum suffraganeis Treceas veniat.

FROTARIO venerabili archiepiscopo Biturigensi.

Auditis denique deploratione atque angustia literis tuæ fraternitatis, quæ vobis ab omnibus Bernardi comitis sunt illatæ, recens dolor priori est augmentatus, et quod tibi sedis tuæ aditus clausus, mihimet ipsi id reputo. Hortamur interim dilectionem tuam patienter sufferre, et ad Treceas cum fratrum coepiscoporumque nostrorum collegio diocesanos tuæ ad synodum. Domino cooperante, celebrandum quantocius properare. Ludovici regis amantissimi filii nostri adventum præstolamur quotidie in hianterque desideramus. Optamus sanctitatem tuam in Christo bene valere. Data *ut supra*.

CXXXV.

AE BERNARDUM MARCHIONEM.

(Anno 878.)

Monet ut Frotario aditum ad suam sedem patere faciat.

Dilectissimo filio BERNARDO nobilissimo marchionum.

Quia tempore nonnullos diligimus specialius, idcirco in his quæ nobilitatem vestram Deum offendere cognoscimus vos paterno increpamus affectu; præsertim de causa Frotarii venerabilis episcopi, cui, ut audimus, vestri homines iter civitatis suæ, ne ad sedem suam ingrederetur, temerarie clauerunt. Episcoporum iudicium, fili charissime, suo tantummodo Dominus servavit arbitrio, nec de episcopis vult laicos iudicare. Unde monemus dilectionem tuæ charitatis, ut quidquid in hac causa prædicti episcopi deliquistis, sub celeritate et legaliter emendatione, inultum remanere nullo modo patimur officio ac ministerio sacerdotali. Optamus nobilitatem vestram bene valere. Data *ut supra*.

CXXXVI.

AD ARCHIEPISCOPUM MOGUNTINUM.

(Anno 878.)

Ut Ludovicum Germaniæ regem, ejusque fratres adhortetur ut ad synodum veniant aut legatos mittant.

Venerabili archiepiscopo LIUTBERTO Moguntino.

Ecclesiastica exigente utilitate, quoniam Deo duce causæ ad Galliarum partes venire commodum duximus: quapropter fraternitatem vestram necessario commonere studemus, ut secundum cœlitus tibi sapientiam datam, frequenti adhortatione suggeras Ludovico regi, aliisque confratribus, ut ad nostræ mediocritatis colloquium atque generalem synodum, juxta Christi voluntatem, apud Treceas congregatam, venire non omittat, vel si aliqua necessitate præ-

dictus rex præpeditus fuerit, et. ut non optamus, properare distulerit ad locum prædictum, quo cum Ludovico rege locuturi sumus, nominatenus destinet: quatenus sub cuncta celeritate regum filiis congregatis, totius Christianitatis, Dei gratia duce, consulere communiter valeamus utilitati. *Similiter Williberto archiepiscopo Agrippinæ. Wittecherio venerabili episcopo, et Bertulfo archiepiscopo Trevirensi.* Data *ut supra*.

CXXXVII.

AD ANGELBERGAM AUGUSTAM.

(Anno 878.)

Scribit in anniversario die Ludovici ejus viri sacra pro eo se facturum rogat; ut in sui defensione perseveret; synodum Treceas se habiturum significat.

B Dilectæ filiæ ANGELBERGÆ imperatrici, divæ memoriæ quondam domni Ludovici piissimi imperatoris conjugii.

Quia intimasti pontificio nostro anniversalem magnæ recordationis domni Ludovici imperatoris fieri, et ut pro eo proprias orationes celebraremus rogasti gaudemus, et impigre suo pro merito modis omnibus faciemus. Cæterum rogamus ut, seu hactenus in nostris fuistis sollicita, haud secus et nunc et perpetuo esse, prout credimus, non differatis, quatenus vestro labore vestroque consulto cito ad propriam sedem ut congruit, cum gaudio pro merita apostolorum principum reverti mereamur. Porro vos scire cupimus quia apud Treceas in Kalendis Augusti una cum rege Ludovico imperatoris Caroli filio, et cum universis Galliæ episcopis synodum universalem celebrabimus; delinc Carolomannum regem suosque germanos alloquemur, ut pari omnium consilio consolationem nostræ Ecclesiæ reperiamus.

CXXXVIII.

AD SUPPONEM COMITEM.

(Anno 878.)

Agit gratias de fidelitate erga Romanam Ecclesiam: quædam apud Carolomannum faciendum injungit.

Dilecto filio SUPPONI glorioso comiti.

Primum quidem devotioni vestræ magnas gratias agimus quia priorem fidelitatem, quam circa sanctam Romanam Ecclesiam habueras, in sequentibus quotidiano labore opere admonstrare non desinis. Nos quoque præ omnibus vos diligentes, vestris potius consiliis præ cunctis acquiescimus. Tantum D vobis eum Anspertum et Wibbodum episcopus assumite, et apud Carolomannum regem omnia nostra ordinabiliter ponite. Hoc tamen summopere cavete ne aliqua fraudis astutia decipiamur; et quidquid ex hoc facietis, sub omni festinatione facere accelerare: mihi tempus et locum denuntiate quo occurrere debeatis ad nos recolligendum; et ne forte aliqua dubietas animo vestro insideat, duas mandamus epistolas prædicto regi; quarum unam vos legite ut cognoscatis quod continet, quam aut ipse deferas volumus, aut per idoneum hominem vestrum transmittas: quia nos in hac terra stare non possumus nisi usque in Kalendas Augustas, quia

postquam in terram hanc venimus, cum Ludovico A rege loqui debemus. Festina quantocius sicut solitus es, nostræ Ecclesiæ causam peragere, ut apud Dominum merces vestra copiose accrescat. Data *ut supra*.

CXXXIX.

AD CAROLOMANNUM REGEM.

(Anno 878.)

Miratur illum ad binas litteras non respondisse. Valetudinem ejus deplorat; addit de synodo Treceis celebranda.

^a Sabbatinum episcopum.

Sabbatinum episcopum primum et postea per Anspertum Mediolanensem, de qua multum miramur, cur non jam a vobis responsum vel missos accepimus: nos cum foret possibile primum, saltem per legatos vobiscum loqui cuperemus, deinde cum reliquis fratribus vestris: quod quia vestra infirmitate, quam nimium dolemus, est prætermissum, nunc apud Treceas, Christo opitulante, synodum sumus celebraturi, loquemurque cum Ludovico et reliquis vestris fratribus, et post Kalendas Augustas ad vos revertemur: tantum locum nobis dicendo ad tempus mandate quo nobis debeatis occurrere, et laborem pro vestra matre sancta Romana Ecclesia non recusate assumere, quia *si fueritis socii laboris, simul eritis et consolationis* (II Cor. I), et in hoc, quæso, perficiendo non sit ulla dilatio. Data *ut supra*.

CXL.

AD CAROLUM REGEM.

(Anno 878.)

Agit gratias de observantia erga Romanam Ecclesiam: miratur quod ad se legatos non miserit: C rogat ut ante colloquium quod cum Ludovico rege habiturus est, aut ipse veniat, aut legatos mittat.

Dilecto filio CAROLO glorioso regi.

Quod pro pace et unitate sanctorum Dei Ecclesiarum omniumque Christianorum in priore epistola, quam vestræ misimus dilectioni, significavimus, gloriæ nihilominus vestræ uberes gratiarum laudes rependimus; quia nos vestra epistola valde lætificastis in hoc quod dilectionem animi vestri circa Romanam Ecclesiam, sicut vestri parentes ac proavi habuerunt, habere ubertim significatis; valde tamen miramur cur ad nos legatos vestros non direxistis, sicut precati sumus. Quapropter quæso, fili charissime, ut (*edit. Rom. addit ad nos*) ad colloquium quod cum Ludovico rege Caroli imperatoris regis filio apud Treceas habituri sumus, si possibilitas non obsistit, venire acceleretis; vel si aliquo obstaculo præpedimini, ut non optamus, strenuos legatos nobis dirigite, per quos gloriæ vestræ omnia secreta, quæ animo nostro resident, fidenter mandare valeamus; locum nobis simul nominatenus designate quo frui vestro colloquio et Germani vestri Ludovici gloriosi regis valeamus, quoniam de hac terra nullo modo regrediemur, priusquam, Deo auxiliante, percongrua et mutua vobiscum miscemus colloquia. Optamus gloriam vestram piis florere successibus.

^a Desunt aliqua.

CCLI.

AD LUDOVICUM REGEM.

(Anno 878.)

Ejusdem ac præcedens argumenti.

Dilecto filio LUDOVICO glorioso regi.

Quod pro pace et unitate sanctorum Dei Ecclesiarum omniumque Christianorum a Romana sede in partes Galliæ venerimus, in epistola quam gloriæ vestræ misimus plenissime significare studuimus: nescimus tamen quo tempore ad vos pervenit, et de eo qua re nobis non dedit dilectio vestra responsum. Quapropter quæso, fili charissime, ad nos ut ad colloquium quod cum Ludovico rege Caroli imperatoris filio apud Treceas habituri sumus, si possibilitas non obsistat, venire acceleretis; vel si aliquo obstaculo præpedimini, ut non optamus, strenuos legatos nobis dirigite per quos gloriæ vestræ omnia secreta, quæ animo nostro resident, fidenter mandare valeamus; locum nobis simul nominatenus designate, quo frui vestro colloquio et germani vestri Caroli gloriosi regis valeamus. Quoniam de hac terra nullo modo regrediemur, priusquam, Deo auxiliante, percongrua et mutua vobiscum miscemus colloquia. Data *ut supra*.

CXLII.

AD CAROLUM REGEM.

(Anno 878.)

Arguit quod vocatus ad se non venerit, sicut Ludovicus rex fecerat, monet sub excommunicationis pœna, ut sui regni finibus contentus nullam Bosoni molestiam exhibeat.

Dilecto CAROLO glorioso regi.

Servans fidem Francorum regibus, secundum prædecessorum meorum pontificum, multos et duros labores in mari et in terra pertuli; ab urbe et Romana sede in Franciam veni: omnes vos legatorum tam viva voce quam epistolis studui convocare, ut pactum quod avi et patres vestri sanctæ Romanæ Ecclesiæ jurejurando promiserunt, adimplere contenderetis. Sed heu, proh dolor! cuncti venire per inobedientiam neglexistis, præter Ludovicum regem divæ memoriæ Caroli imperatoris filium, cujus consilio atque hortatu, Bosonem gloriosum principem per adoptionis gratiam filium meum feci; ut ille in mundanis discursibus, nos libere in his quæ ad Deum pertinent, vacare valeamus. Quapropter contenti termino regni vestri, pacem et quietem habere stude, quia modo et deinceps excommunicamus omnes qui contra prædictum filium nostrum insurgere tentaverint. Data *ut supra*.

CXLIII.

AD LIUTBERTUM ARCHIEPISCOPUM.

(Anno 878.)

Monet ut Bosonis filiabus hæreditatem restitui faciat.

Reverentissimo et sanctissimo confratri nostro LIUTBERTO archiepiscopo.

Fraternitatem tuam recordari volumus qualiter jam de proprietatibus Bosonis et Engeltrudis tibi scrip-

serimus, monentes ut ipsas, quas vos allodum dicitis, filiabus eorum sæpe reclamantibus reddere deberitis : quoniam omnium legum auctoritate legitimi filii sunt veri hæredes (In authent. *de Hæred. ab intes. ven.*, § 1), ut vestra bene noscit religiositas, iterumque hortantes monemus, apostolicaque auctoritate expresse jubemus; jam quia nostras litteras audire distuleras, et super his hactenus respondere neglexeras, volumnus ut ad cor rediens, ipsas sæpe reclamatrices, aut homines ipsarum investire de jam dictis proprietatibus satagas, vestrosque earum et alios invasores similiter facturos, nostra auctoritate excommunicando permoneas : quoniam justus Dominus justitiam dilexit, et æquitatem vidit vultus ejus. » ^a Et si forte spurius Godefredus, aut aliquibus ipsa mœchans Engeltrudis, sine viri consensu quoquo modo donaverit, contendere voluerit; nostra apostolica auctoritate, donec reddiderint, quia sancientibus Joanne papa Romano et Justiniano imperatore scriptum est (In authent. *Bona damnatorum*, codice *de don. prosc. seu damn.*), spurios satis injuriosos, satisque acerbos, et nostris temporibus semper indignos esse dijudicamus : quapropter convenit reverentiam vestram illum semper monere. Porro hortamur ut quoquo modo monuimus compleas, quoniam si aliter feceris, scias te canonica damnandum censura, ut debeas illos excommunicare. *Data ut supra.*

CXLIV.

AD MATFREDUM COMITEM.

(Anno 878.)

Monet ut Bosonis comitis filiabus hæreditatem restituat.

MATFREDO illustri comiti.

Suggestentibus videlicet filiabus Bosonis nuper comitis, et Engeltrudis conjugis, proximæ vestræ, dividimus ut allodes suos vos invadentes tenere non formidatis. Super quo miramur cur tantæ sapientiæ vir hoc facere non erubescas. Nonne scitis quoniam in hæreditate suscipienda omnibus cognatis præferendi sunt filii? Illa vero mœchans, alicui sine consensu viri ex his aliquid dare nequivit omnium legum auctoritate. Unde vos monemus, hortamur apostolicaque auctoritate jubemus, ut ipsas proprietates illis filiabus eorum reddere pro reverentia principum apostolorum, a quibus per me petiere auxilium, minime differas, quoniam si aliter feceris, scias te canonica feriendum censura. *Data ut supra.*

CXLV.

AD VALDERAMUM.

(Anno 878.)

Monet ut Valderami causam ad exitum perducat vel ad se remittat.

VALDERAMO venerabili.

Præsentium lator litterarum, nomine Valderamus, ad vestram fraternitatem coram nobis veniens lacrymabiliter questus est patrem suum a quodam injuste carceris custodia teneri detrusum intra parochiam

^a Erat adulterium delatum in judicium, ut ex epist. 143 apparet.

vestram. Quapropter tuæ fraternitati auctoritate nostri apostolatus jubemus, attentius prædicti genitorum causam sacerdotali succinctus vigore inquirere, eique finem legaliterque terminum dare, si negotii status inambiguus futuris prospicitur. Quod si anceps vestro fuerit visa libramini, utrasque partes suis allegationibus instructas venire in præsentiam nostram omnino mature mandamus. *Data ut supra.*

CXLVI.

AD THEODORICUM ARCHIEPISCOPUM BISUNTINENSEM.

(Anno 878.)

Jubet ut quamprimum veniat et episcopum in ecclesia Lausanensi, propter electorum divisiones, priusquam una colloquantur, ordinari vetat.

B Reverentissimo et sanctissimo THEODORICO archiepiscopo Bisuntinensi confratri nostro.

Ignitur quia fraternitas tua apostolicæ et universalis Dei Ecclesiæ persecutiones audiens, compati modis omnibus distulit, nosque, pro eo et cunctis aliis laborem sumentes, quoquo modo visitare neglexit, satis miramur et ex parte turbamur, cum in te taliter charitatem fringere cognoscimus. Nonne Veritas ait : *Si frater fratrem adjuvaret, ambo exaltabuntur?* (Prov. xviii) Et Sapientia loquitur : *Frater et amicus in laboribus comprobatur* (Prov. xvii). Et prædecessor noster Gelasius papa, terrendo in suis decretalibus, episcopis parvipendentibus fratrum vexationes scribit : Cur non compassi estis? et reliqua. Quapropter monemus ut hactenus te negligentem pernoscas, et ad respectam charitatem nihilominus, postpositisque omnibus curis, ad nos visitandos una cum hoc nostro misso præsentialiter venire satagas. Cæterum audivimus, et auditu dolemus, ut in Ecclesia Lausanensi, quæ sine Patre nunc cernitur, sit orta contentio, ejusque filiorum in electione antistitis sit nefanda divisio. Unde monemus per Deum Patrem, et Filium, et sanctum Spiritum obtestamur, apostolicaque auctoritate expresse jubemus, et interdicens, ut quoad ad commune eloquium nostrum pervenias, ibi episcopum neque jussu regis neque ex petitu plebis consecrare præsumas, quatenus cum una allocuti fuerimus, auxiliante Deo, cum communi consulto, quem utiliozem præviderimus, consecrare permittamus de more. Quæ hic scribere omisimus, huic legato nostro Deuseddit glorioso magistro militum, et duci, consiliarioque nostro, ut verbis dicat injunximus : quem benigne recipite, et quæ vobis ex nostra parte tulerit, indifferenter audite. *Data ut supra.*

CXLVII.

AD AMETIUM PRESBYTERUM.

(Anno 878.)

Privilegio pro monasterio Sancti Petri in pago Nemausensi.

[Apud D. Bouquet, *Recueil des Historiens*, tom. IV, pag. 165.]

JOANNES episcopus, servus servorum Dei, reve-

rentissimis sacerdotibus AMELTO presbytero et LEONI abbati.

Quod postulastis a nobis, concedimus religiositati vestræ monasterium Sancti Petri cum omnibus cellis et rebus sibi pertinentibus, in quo quiescit corpus beati Ægidii in Valle Flaviana, in pago Nemausensi, in finibus Gothiæ : quam Vallem Flavius quondam rex, præfato beato Ægidio donavit. Qui sanctus Ægidius exinde donationem integritè Romanæ Ecclesiæ fecit, et ibi in veneratione principum apostolorum Petri et Pauli monasterium ædificavit. Porro dum spatium terræ illud cœnobium a Romana separaret Ecclesia, quia pro aliis curis illuc legatum mittere nequiverat, Nemausensis antistes ipsum quadam temeritate invadens sustulerat : deinde præceptum ex rege Francorum exceperat ; in quo nec firmitatem credens, Romanum pontificem adiit ; super hoc etiam auctoritatem furtim, quasi de suis, apostolicam exquisivit. Sed sanctæ recordationis domnus Nicolaus, licet hujus fraudis esset ignarus, divino tamen Spiritu plenus, omnes de hoc legem quærentes excusare satigit. Sed nos cum in nostro archivo nonimonia chartarum requireremus, ibi illud præceptum beato Ægidio traditum reperimus. Dehinc cum Arelatem maritimali itinere pro universarum Ecclesiarum Dei negotio veniremus, hoc recordantes, ipsum monasterium per Deum ducem Ravennates, advocatum nostrum, contra Girbertum Nemausensem episcopum quæsivimus. Imo ambarum partium advocatis per fidejussorem legatis, exsecutore duntaxat Georgio scriniario, et Deum agente, voluit idem Girbertus episcopus per præceptum domni Nicolai piæ memoriæ ibi relictum se defendere. Sed Rostagnus Arelatensis archiepiscopus, et Sigebodus Narbonensis archiepiscopus, et Aribertus Ebredunensis archiepiscopus, Walbertus Portuensis episcopus, Paschalis Amerinus episcopus, Rabertus Valentiae episcopus, Litidumus Massiliensis episcopus, Alictarius Vivariensis episcopus, et alii episcopi provinciae ; et iudices, Joannes dux et princeps Ravennæ, Arduus, Adbertus, Giselfredus, Alderadus, Godulcius, et alii nonnulli provinciales iudices, ut præceptum lectum audierunt, mox cognoverunt apostolicam domni Nicolai censuram excusare de hoc legem quærentes, et dixerunt per illud præceptum hoc monasterium non posse defendi ; judicantes statim ut præfatum monasterium Amelio presbytero et Leoni abbati Girbertus episcopus redderet, et pœnam invasionis nobis componeret. Nos pœnam pro ejus paupertate illi, si amplius non peccaverit, reliquimus ; et monasterium sub omni integritate recepimus ; ipsum advocatum nostrum Deum ducem illuc transmittentes, qui super hoc corporalem traditionem de omnibus rebus prædicti monasterii a præfato Girberto accepit episcopo ; villam Agarnelliam cum ecclesia Sancti Jacobi, vel cum omnibus suis appenditiis ; similiter ecclesiam Sancti Andrææ cum suis pertinentiis ; et ecclesiam Sanctæ Cæciliæ, atque ecclesiam Sancti Saturnini cum omnibus suis appen-

ditiiis ; seu ecclesiam Sancti Stephani cum omnibus suis appenditiis ; vel ipsos alodes qui ad ipsum monasterium debent esse pertinentes ; Seuram villam cum appenditiis suis, vel servis ibidem pertinentibus ; Brascam cum appenditiis suis ; Bionum cum appenditiis suis ; in Bruciano hortos et campos ; Luvam cum appenditiis suis ; ripam Gothicam ; Aspiranum cum omnibus appenditiis suis ; in Generaco campos et vineas cum terminis suis ; in Costaballenis vineas cum terminis suis ; in Gurgis campos et vineas cum terminis suis ; in Tovana campos et vineas ; in Aqua viva campos et vineas ; in Alburno campos et vineas cum omnibus suis pertinentiis ; in loco qui dicitur Stationensis campos et vineas cum omnibus suis pertinentiis ; Coconem cum omnibus suis consuetudinariis.

Quapropter volumus et præcipimus ut cuncta hæc præfata, vel quæ offerri contigerit subsequenti tempore, illibata et sine inquietudine in usum cœnobii, et in salario beati Petri apostoli possideantur. Verumtamen ut sibi pro quorumlibet sustentatione ac gubernatione concessa sunt, fiant modis omnibus pro futura, ea conditione ut nullus successorum nostrorum in hac sancta sede, cui auctore Domino, deservimus, unquam vel usquam aliquid de iisdem rebus beneficiare, commutare, ac sub censu concedere per futura tempora patiatur, nisi Amelium presbyterum, qui noster omnino dignoscitur. Hujus rei gratia commendamus vobis hanc notitiam ad regendum et tuendum et bene ædificandum cœnobium, ita sane ut a vobis, singulis quibuscunque annis, pensionis nomine, in rationibus ecclesiasticis x argenti solidiana, denarios xii accipientes, piæ paternitatis suffragium eidem monasterio contra omnes infestantes impendere studeant. Itemque statuimus ut, obeunte abbate prædicti monasterii, non alius ibi quocunque obreptionis studio ordinetur, nisi quem consensus monachorum, secundum timorem Domini et institutionem regulæ sancti Benedicti, elegerit, et hujus apostolicæ sedis pontifex providerit ordinandum, aut suggestio monachorum consenserit ordinatum Romanam adduci. Hoc quoque capitulo præsentis adjungimus, ut locum avaritiæ recludamus, nullum de regibus, nullum de sacerdotibus, vel quemcunque fidelium, per suppositam vel per suffectam personam, de ordinatione ejusdem abbatis, vel clericorum, vel presbyterorum, vel de largitione chrisimatis, aut consecratione basilicæ, aut de quacunque commoditate spiritualis vel temporalis obsequii, sive de quibuscunque causis ad idem monasterium pertinentibus, in ære, in auro, vel alia qualibet specie, commodi vel exenii loco, quidquam accipere, neque eundem abbatem, ordinationis suæ causa, dare præsumere ; ne hac occasione ea, quæ a fidelibus pro loco offeruntur, aut jam oblata sunt, consumantur. Neque episcopus civitatis ipsius parochiæ, nisi ab abbate ipsius monasterii invitatus, ibidem publicas missas agat, neque stationes in cœnobio eodem inducat, ne servorum Dei quies quoquomodo populari conventu valeat perturbari ; neque paraticas aut mansonicas

exinde præsumat exigere subscriptionem autem fidelium et religiosorum ac beneficiorum, quam jubet Apostolus cunctis exhibendam, pro possibilitate loci et facultate, non modo ibidem gratis fieri denegamus, verum etiam ut fiat suademus; sed et modus in numero congregationis adeo conservetur, ut nec pluralitas ad penuriam, vel paucitas inhabitantium ad destitutionem loci accedere valeat. Hæc igitur omnia quæ hujus præcepti decretique nostri pagina continet, cunctis post nos succedentibus, qui monasterium a nobis acquisitum sub usufructuario retinetis, vel eis quorum interesse potuerit, in perpetuum servanda decernimus. Si quis vero sacerdotum, judicum atque secularium personarum hanc nostræ constitutionis paginam agnoscens, contra eam venire tentaverit, potestatis honorisque sui dignitate, percussus apostolico anathemate, careat, reumque se divino judicio existere de perpetrato agnoscat: et nisi vel quæ ab illo sunt male ablata restituerit, vel præsumpta correxerit, vel digna pœnitentia illicite acta desleverit, a sacratissimo corpore Domini nostri Jesu Christi alienus fiat, et cum diabolo et atrocissimis pompis ejus in extremo examine districtæ ultioni subiaceat.

Cunctis autem eidem loco hæc nostræ præceptionis jura servantibus sit pax Domini nostri Jesu Christi, quatenus illi factum bonæ actionis recipiant, et apud districtum judicem præmia æternæ pacis inveniant. Bene valete.

Scriptum per manus Georgii scriniarii sanctæ Romanæ Ecclesiæ, in mense Augusto.

Datum XII Kal. Augustas, per manus Walberti humillimi episcopi sanctæ Portuensis ecclesiæ, anno Domino propitio pontificatus domini nostri Joannis summi pontificis et universalis papæ in sacratissima sede beati Petri apostoli VI, indictione XI.

CXLVIII.

AD FROTARIUM ARCHIEPISCOPUM BURDIGALENSEM.

(Anno 878.)

Ut ad synodum veniat, et privilegium de sedium mutatione afferat.

FROTARIO venerabili archiepiscopo Burdigalensi.

Ad synodum igitur, quam, Deo auctore, apud Treceas celebramus, cum reliquis septem Galliarum provinciarum confratribus et coepiscopis, fraternitatem tuam cum tuis suffraganeis episcopis, tam viva voce quam litterali, admonere ut venires, omni postposita occasione cujuscunque occasionis studuimus, fate-mur, jam tertio, ut simul positi emergentium quaestiones causarum statutis canonicis demerentur, et sacerdotum Domini una concordia omnium fieret dilectionis. Sed cur venire distuleris, moleste cuncti ferimus et valde miramur. Quapropter, repulsa mora, præsentiam tuam cum prædictis suffraganeis nobis et sanctæ synodo citissime exhibe. Sic tamen instructus, ut cum de mutatione contra canones sedium, et de aliis excessibus, quibus, quod non optamus, Patrum regulis feriri possis, impetitus fueris, causa

A justitiæ intercedente, illæsus et innocens recedere valeas. Hoc reverentiæ tuæ consulentes damus consilium, ne absentiam tuam tibi aliquid putes prodesse, sed imo secundum Patrum statuta, magis obesse. Privilegium atque scripturas de sedium mutatione, si qua a nobis vel prædecessoribus nostris habere sic fatemini, vobiscum sine mora deferre studeas.

CXLIX.

PRIVILEGIUM PRO MONASTERO SANCTI ÆGIDII.

(Anno 878.)

[Apud D. Bouq. *Recueil des Historiens*, tom. IX, pag. 167.]

JOANNES episcopus, servus servorum Dei, omnibus episcopis per universas Galliæ provincias consistentibus, abbatibus, presbyteris, cunctisque simul ordinibus divino ministerio mancipatis, necnon comitibus, vicecomitibus, vicariis, centenariis, judicibus, et omnibus in potestatibus constitutis, et omni populo, et cunctæ simul generali Ecclesiæ.

Auctore omnipotente Deo, mediante, anno Incarnationis Domini nostri Jesu Christi 878, xv Kal. Septembris, indictione XI, Domino feliciter, in præsentia domni Ludovici serenissimi regis in præsentem concilio residentis, etc.

Notum sit omnibus præfatis quod retroactis temporibus, cum Arelatem maritimi itinere pro omnium Ecclesiarum negotio veniremus, recordantes monasterium S. Petri, in quo quiescit corpus beati Ægidii, in Valle Flaviana, in comitatu Nemausense, in finibus Septimaniæ, quam Vallem Flavium quondam Gothorum rex prælibato beato Ægidio dedit; et iterum sanctus Ægidius apostolicæ sedi Romanæ integritè donationem fecit. Dum autem longinquitas terræ illud cœnobium a nostra separaret Ecclesia, quia pro aliis curis legatum illuc mittere nequiveramus, Nemausensis antistes ipsum monasterium magna temeritate usurpare præsumperat. Sed nos cum in nostro archivo munimina chartarum inquireremus, ibi et illud præceptum a beato Ægidio traditum invenimus. Tunc illud per nostrum advocatum Deus de duce Ravennates contra Girbertum Nemausensem episcopum, qui in præsentem concilio residet, quæsivimus. Voluit idem Girbertus [per] præceptum domni Nicolai quod furtim quasi de suis ex apostolica sede fraudaverat, et per præceptum quod ex quodam rege Francorum, in quo nulla firmitas subsistebat, falsum exceperat vindicare. Sed ego omnes episcopos et judices Romæ vel provinciales, sub excommunicationis anathemate, admonui de hoc rectam legem dicturos et facturos. Tunc Rostagnus Arelatensis archiepiscopus, Walbertus Portuensis episcopus, Paschalis Amerinus episcopus, Radbertus Valenciæ episcopus, Litidumus Massiliensis episcopus, Ictarius Vivariensis episcopus, et alii episcopi Provincie, et judices, Joannes, dux et Bativus Ravennæ, Arduus, Adbertus, Gisalfredus, Arderadus, Godulfus, et alii nonnulli provinciales judices; ut præceptum lectum audierunt, mox cognoverunt apostolicam domni Nicolai censu-

ram excusare legem, querentes dixerunt per illud præceptum hoc monasterium non posse defendi, iudicantes statim ut præfatum monasterium Girbertus episcopus redderet nobis, et pœnam invasionis mihi componeret. Nos pœnam pro ejus paupertate illi, si amplius non peccaverit, reliquimus, et monasterium sub omni integritate recepimus; ipsumque advocatum Deum ducem illum transmittentes, qui super hoc corporalem traditionem de omnibus rebus prædicti monasterii a præfato Girberto accepit episcopo.

Ob id etiam divino fretus juvamine, ego et omnes episcopi hujus concilii, ex auctoritate Domini nostri Jesu Christi, per quem, et per ipsum, et in quo constant omnia, sub omni anathemate detestamus, et interdicimus, et excommunicamus, ut nullus successorum nostrorum in hac sancta apostolica sede, cui auctore Domino, deservimus, unquam vel usquam præsentibus vel futuris temporibus quidquam de iisdem rebus, nec imperator, nec rex, nec ulla mundanis potestas beneficiare, commutare, ac sub censu concedere per futura tempora possit; nec pontifex ejusdem diocesis, ad cujus parochiam pertinet locus ipse, nec omnes ejusdem potestatis quidquam ex monite accipere ipsius monasterii audeat. Et insuper nulli omnino liceat quoquo modo in his omnibus aliquam minorationem vel forciam ingerere. Potius autem a præsentis concilio omnia hæc ad jam dictum monasterium cum omnibus appenditiis, et cathedra, alia loca mobilia immobiliaque, quæ per Deum timentium largitatem inibi collata esse noscuntur, huic Amulio presbytero et archidiacono Uzeticensis ecclesiæ confirmamus. Hujus rei gratia commendamus vobis hanc notitiam ad regendum et tuendum et bene ædificandum cœnobium; ita sane ut a vobis, singulis quibuscunque annis, pensionis nomine, in rationibus ecclesiasticis x argenti solidiana, denarios XII accipientes, piæ paternitatis suffragium eidem monasterio contra omnes infestantes impendere studeant. Nulli vero dubium est, fratres, quod apostolica Ecclesia mater sit omnium ecclesiarum, a cujus nos regulis nullatenus convenit deviare: et sicut Filius Dei venit facere voluntatem Patris, sic et vos voluntatem vestræ impleatis matris, quæ est Ecclesia, ejus caput, ut prædictum est, Romana existit Ecclesia. Pater ergo noster sine dubio Deus, qui nos creavit, et mater nostra Ecclesia, quæ nos in baptismo spiritaliter regeneravit, et ideo qui Christi pecunias et Ecclesiæ aufert, fraudatur et rapit, homicida in conspectu judicis justus esse deputabitur. Unde scriptum est: qui rapit pecuniam proximi sui iniquitatem facit; qui autem pecunias aut res Ecclesiæ tulerit, sacrilegium facit; unde et Judas qui pecuniam fraudavit, quæ usibus Ecclesiæ, id est pauperibus, quos Ecclesia pascere debet, distribuebatur jussu Salvatoris, cujus vicem episcopi tenent, nec solum fur, sed et latro, et sacrilegus effectus est. De talibus enim, id est qui facultates Ecclesiæ rapiunt, fraudant vel auferunt. Dominus

A comminans, omnes per prophetam alloquitur, dicens: *Deus, ne taceas tibi, ne sileas, et nequiescas Deus*, etc. In epistola papæ Symmachi: « Nulli apostolicæ sedis præsulæ a præsentis die, donec, disponente Domino, doctrina catholicæ fidei manserit Salvatoris, prædium ecclesiasticum, quantæcunque sit magnitudinis vel exiguitatis, sub perpetua alienatione vel commutatione ad cujuslibet jura transferre liceat. » Et ex epistola papæ Simplicii. « Ut non liceat episcopum titulorum suorum prædia, seu quidquid juris eorum fuerit, quolibet modo alienare vel commutare: qui vero hoc agere tentaverit, ordinis sui detrimento plectatur. » Item in eodem: « Qui petierit prædium ecclesiæ, et acceperit in proprio jure; aut si quis presbyterorum aut diaconorum, nec non defensorum denti subscripserit, anathemate feriat. » Item in canonibus: « Si episcopus condito testamento aliquid de ecclesiastici juris proprietate legaverit, aliter non valebit, nisi tantum de juris proprii facultate suppleverit. »

Igitur tam ego quam omnes episcopi hujus concilii, insidiatores ex hoc monasterio apostolicæ sedis, et huic presbytero si aliquis adversatus fuerit, tale, scelus perpetrantes, omnes a communionem Christi corporis ac fraternitatis consortio, sive omnium christianorum collegio sequestramus, damnamus, et sub omni anathemate excommunicamus. Sint illi maledicti in civitate, maledicti in agro; maledictus fructus terræ eorum. Sint maledicta interiora eorum et exteriora. Cælum quod super illos est, sit æreum; et terra quam calcant, sit ferrea. Oratio eorum ante Deum veniant in peccatum: sicut Datan et Abiron eant viventes in infernum. Omnes qui cum illis participaverint, aut cum eis cibum sumpserint, aut cantica eorum maledicta audire decreverint, scientes hanc maledictionem, cum Juda Scarioth traditore, Christi participes fiant. Aqua eorum putrefiat; vinum eorum scaturiat; panem eorum rubigo consumat, vestimenta eorum tinea comedat. Et quid plura? Omnes maledictiones Novi ac Veteris Testamenti veniant super illos, usque dum ad dignam satisfactionem et condignam pœnitentiam matris Ecclesiæ veniant. Joannes apostolicæ sedis Petri apostoli, omnibus Christi ecclesiis bene valete dicit ista servantibus.

Hincmarus Rhemensis archiepiscopus firmat, Ansigisus Senonensis archiepiscopus firmat, Aurelianus Lugdunensis archiepiscopus firmat, Rostagnus Arelatensis archiepiscopus firmat, Sigebodus Narbonensis archiepiscopus firmat, Teudericus Besantionensis archiepiscopus firmat, Auterannus Viennensis archiepiscopus firmat, Frautharius Bituricensis archiepiscopus signal, Adanaldus Turonensis archiepiscopus firmat, Berno Catalaunensis episcopus firmat, Joannes Rodomacensis archiepiscopus firmat, Aldebertus Silvanectensis episcopus firmat, Isaac Lingonensis episcopus firmat, Ingelvinus Parisi episcopus firmat, Otulfus Treassinensis episcopus firmat, Ingomarus Laudunensis episcopus firmat,

Eldeboldus Suessionis episcopus firmat, Willelmus Lemovicensis episcopus firmat, Gislabertus Carnotensis episcopus firmat, Rotbertus Valentinensis episcopus firmat, Garbaldus Cavalonensis episcopus firmat, Rainelmus Noviomensis episcopus firmat, Abo Magalonensis episcopus firmat, Oddo Belvacensis episcopus firmat, Girbertus Nemausensis episcopus firmat, Walterius Aurelianensis episcopus firmat, Walafredus Uzeticensis episcopus firmat, Macharius Lutovensis episcopus firmat, Rotfredus Avinionensis episcopus firmat, Alarius Biterrensis episcopus firmat, Ictarius Vivariensis episcopus firmat, Teutarius Gerundensis episcopus firmat, Abo Nivernensis episcopus firmat, Frodoinus Barchinonensis episcopus firmat, Lambertus Mudascensis episcopus firmat, Joannes Cameracensis episcopus firmat, Adalgarius Austudunensis episcopus firmat, Barnarius Gratianopolis episcopus firmat, Ademarum Claromontis episcopus firmat, Arnulfus Taurinensis episcopus firmat, Rainelmus Meldensis episcopus firmat, Aigofredus Pictaviensis episcopus firmat, Ainulfus Gavaldonensis episcopus firmat, Georgius scriiniarius sanctæ Romanæ Ecclesiæ, qui super scripta hujus judicati, post testium subscriptionem et traditionem factam, complevit et absolvit, Raimundus, comes firmat, Berengarius vicecomes firmat, Aimaricus firmat, Olumbellus firmat, Teutranus firmat, Gaucelinus firmat, Emenus vicecomes firmat, Oddo vicecomes firmat, Ugo comes firmat.

CL.

AD OMNES EPISCOPOS, COMITES, VICECOMITES, CENTENARIOS, JUDICES CATHOLICOS, IN HISPANIA ET GOTHIA DEGENTES.

(Anno 878.)

Lex de sacrilegiis a Joanne papa Gothicis legibus addita in concilio Tricassimo

JOANNES episcopus, servus servorum Dei, omnibus episcopis, comitibus, vicecomitibus, centenariis, iudicibus catholicis, in Hispania et Gothia provinciis degentibus, omnique populo Occidentali catholico, salutem et apostolicam benedictionem.

Noveritis, dilectissimi filii, quia nos pro statu sanctæ Dei Ecclesiæ jussimus congregari synodale concilium apud urbem Treacas. Ubi, sedentibus nobis in corona, venit ante præsentiam nostram filius noster Sigebodus primæ sedis Narbonensis episcopus, cum suis suffraganeis episcopis, et detulit nobis librum Gothicæ legis, ubi nihil habebatur de sacrilegiis, et in eisdem legibus scriptum erat, ut causæ quas illæ leges non habent, non audirentur a iudicibus illius patriæ: atque ita jus sanctæ Ecclesiæ suffocabatur ab incolis Galliæ et Hispaniæ provinciis. Unde nostra serenitas, cum præscriptis episcopis, inspectis legibus Romanis, ubi habebatur de sacrilegiis, invenimus ibi a Justiniano imperatore legem compositionis sacrilegii constitutam in quinque libras auri optimi. Sed nos leniorem legem præcipimus esse tenendam, quæ a Carolo est consti-

tuta pio principe de compositione sacrilegii, videlicet in xxx libras examinati argenti, id est sexcentorum solidorum summam argenti purissimi. Ideoque quisquis inventus fuerit reus sacrilegii, istam levio-rem compositionem emendet episcopis ipsis, vel abbatibus, sive personis ad quas querimonia sacrilegii juste pertinuerit; et si ipse reus sacrilegii facere noluerit, tandiu excommunicationi subiaceat, usquequo prædictam compositionem sexcentorum solidorum persolvat. Et si in hac obstinatione mortuus fuerit, corpus ejus cum psalmis et hymnis non deferatur ad sepulturam. Et præcipimus ut in fine codicis legis mundanæ scribatur hæc lex.

CLI.

AD OMNES FIDELES.

(Anno 878.)

Privilegium Ecclesiæ Pictavensis, ne quis ejus bona invadat, et ut ablata restituantur.

Omnibus fidelibus sanctæ Dei Ecclesiæ, præsentibus scilicet atque futuris.

Divino quia Romanum pontificum largitu enitet universis, illud luce clarius constat, largita defendere cunctis: quoniam indubitati juris est, semel concessa perenni cultu fore tenenda. Cæterum omnium religiositas orthodoxorumque pernoscat fidelitas, quod, ut relatu quorundam didicimus, Pictavensis quidem Ecclesia, quam diutinus paganorum hostis persequitur, multa Christianorum iniquorum incommoda patitur, quibus pressuris nos convenit perdelere eandemque nihilominus tanto fasce levare. Quapropter præcipimus apostolicaque auctoritate expresse jubemus, quod nemo vestrum, tam sacerdotali ordine perfruens quamque militare officium tenens, ipsius Ecclesiæ Pictavensis aliquam ecclesiam aliquodve monasterium vel prædia ipsi quoquo modo pertinentia invadere præsumat, ullosve colonos servos ancillasse contra sui episcopi velle tollere audeat: sed liceat ipsius Ecclesiæ Heccrido videlicet episcopo, suisque successoribus, illa quæ sui antecessores legitimo tramite canonicæ auctoritatis habuerunt, sub nostra tuitione habere, et ut possederunt possidere, et ut ordinauerunt suo arbitrio ordinare, cum consulto consensuque suæ Ecclesiæ canonicorum, ut prisca consuetudo dignoscitur, sine vestro vestrorumque obstaculo et omnium hactenus talia præsumendum. Inter hæc volumus quasque causas prædicto Heccrido episcopo inde motas in nostra præsentia adducendas. Si quis vero sacerdotum, iudicum atque secularium personarum, hanc constitutionis nostræ paginam agnoscens, contra eam venire tentaverit, potestate honoris sui ac dignitate percussus apostolico anathemate careat, reuque se divino iudicio existere de perpetrata iniquitate cognoscat. Et nisi vel ea quæ ab illo sunt male ablata restituerit, vel præsumpta correxerit, vel digna penitentia illicita acta dellexerit, a sacratissimo corpore Dei Domini ac Redemptoris nostri Jesu Christi alienus fiat.

Cunctis autem eidem præfatæ Ecclesiæ jura servantibus sit pax Domini nostri Jesu Christi, quatenus et hic fructum bonæ operationis recipiant, et apud summum Arbitrum præmia æternæ pacis inveniant. Data III Kalendas Septembris indictione XI, Trevis.

CLII.

AD EPISCOPOS PER GALLIAM CONSTITUTOS.

(Anno 878.)

Privilegium monasterio Floriacensi conceditur synodo Tricassina.

JOANNES episcopus, servus servorum Dei, omnibus episcopis atque aliis Dei fidelibus per Galliam constitutis.

Quoniam apostolica successione [f. suggestione] sollicitudinem omnibus Ecclesiis debemus impendere, sic cupimus generali consulere necessitati, ut etiam quorumcunque singulares causas sine fastidio cognoscamus. Igitur cum propter multiplices Ecclesiæ Dei curas Gallicanam adeuntes regionem, Trevas civitatem devenissemus, anno incarnationis Domini cæ 878, et ad rescandam quælibet inutilia vel statuenda ecclesiastica jura, synodum generalem plurimorum celebraremus episcoporum, inter alia suggestit auctoritati nostræ venerabilis partium vestrarum abbas, nomine Theotbertus, ex cœnobio quod vocatur Floriacus in pago Aurelianensi, quod idem monasterium quidam religiosus abbas, Leodebodus nomine, monachus exstruxerit in honore Dei et sanctæ genitricis Mariæ, nec non beati principis apostolorum Petri: quod revelatione divina per monachos ejusdem loci a Beneventana provincia corpus illuc S. Benedicti pervenerit olim allatum, ibique reverenter humatum, sicut manifestissima constat veritate; et quod propter stabilitatem monasticæ religionis, piæ memoriæ gloriosus imperator Carolus præceptum suæ auctoritatis eidem loco res denominatas delegaverit, partim a religiosis hominibus, pro amore Dei illic contributas, ut victum atque vestitum monachi ibidem Domino militantes deberent habere: nec non et hoc quod beatæ recordationis pater ejus serenissimus Augustus in ipso loco hospitale nobilem, quod Porta appellatur, juxta regularem institutionem, itemque hospitale pauperum, in sui parentumque suorum elemosyna statuerit, et res ad hoc opportune agendum, nec non alias ad lumen Ecclesiæ administrandum, jusserit deputari. Quæ omnia per jam dietos monachos hactenus ibidem comperimus observari. Nunc tam seipsum quam unanimem congregationem sibi commissam humiliter postulare, quamvis privilegia multorum meruerint episcoporum, ad reprimendam quorumlibet illicitam cupiditatem, ut super abbate regulari ex eis eligendo etiam nostræ auctoritatis privilegia consequantur. Quocirca nos potestatem, quam gratis a Christo accepimus, secundum evangelicam auctoritatem gratis prodesse omnibus cupientes, vice beati Petri apostoli decernimus ut in sæpe memorato loco servi Dei absque inquietudine debitum suæ religionis persolvere possint servitium

A secundum regulam Patris Benedicti, a propriis abbatibus, monachis videlicet ex eodem cœnobio regulariter electis, in perpetuum gubernetur. Nec illarum rerum quæ velin prælibato præcepto nominatim continentur vel a prædicto abbate venerabili nunc ejusdem loci Theotberto præfati monasterii officiis deputatæ habentur, ullam ab aliquo unquam patiantur immunionem, et etiam rebus quæ deinceps a quibuslibet religiosis hominibus eodem loco pervenerint condonata. Quod si quis hoc nostrum beneficium irrumpere præsumperit, et stipendia servorum Dei in alios usus converterit, ab apostolica communione anathematis animadversione illum separamus, ut nisi admonitus e vestigio se correxerit, cum rapacibus a regno Dei exclusus, quæ meretur tormenta persolvat. Ut autem hoc privilegium certam obtineat fidem, et Dei famulis in jam dicto Floriacensi cœnobio securitatem conferat, quandiu Deus et Dominus noster Ecclesiam suam durare voluerit, nostra id subscriptione roboravimus. Scriptum per manus Georgii scriiniarii sanctæ sedis apostolicæ, in mense Augusto, indictione XI. Bene valete. Data Nonis Septembris per manum Walberti humillimi episcopi sanctæ Portuensis Ecclesiæ, anno Deo propitio pontificatus domini nostri Joannis summi pontificis et universalis papæ, in sacratissima sede beati Petri apostoli sexto, indictione XI.

CLIII.

AD WALAM SEU WALONEM METENSEM EPISCOPUM.

(An. 878.)

Concedit illi pallium certis diebus deferendum.

C JOANNES episcopus, servus servorum Dei, WALE venerabili episcopo Mediomatricorum Ecclesiæ, quæ et Mettis vocatur, in honore scilicet sancti Stephani primi martyris.

Si pastores ovium solem geluque pro gregis sui custodia die ac nocte ferre contenti sunt, ac ne qua ex eis aut errando pereat, aut ferinis laniata morsibus rapiatur, oculis semper vigilantibus circumspiciant, quanto sudore quantaque cura debemus esse pervigiles, nos qui pastores animarum dicimur? Attendamus ad susceptum officium exhibere erga custodiam Dominicarum ovium non cessemus, ne in die divini examinis pro desidiosa nostra ante summum pastorem negligentiam reatus exeruciet, unde modo honoris reverentia sublimiores inter cæteros judicamur. Pallium autem fraternitati tue ex more ad missarum solemniam celebranda concessimus, diebus vitæ tantummodo: quod tibi, non Ecclesiæ tuæ, aliter privilegiis in suo statu manentibus, ut concedimus. Quoniam indumenti honor modesta actuum vivacitate servandus est, hortamur ut ei morum tuorum ornamenta convenienti, quatenus, auctore Deo, utrisque possis esse conspicuus. Itaque vita tua filiis tuis sit regula. In ipsa se semper considerando proficiant, ut tuum post Dominum videatur esse bene quod vixerint. Corrigan, ne prospera, quæ temporaliter blandiuntur, extollant, neque adversa dejiciant; sed quidquid illud fuerit, virtute patientiæ

devincant. Nullum apud te locum odia, nullus favor aut tui et sui senioris infidelitatem, justitiam facere. indiscretus inveniat. Sub ea videlicet ratione concedimus fraternitati tuæ ut a secretario usque ad sacrum altare, et ab altari usque ad secretarium, sicuti prisca existit palleatis [*pro palliatis*, HARD.] consuetudo, indui debeas. Auctoritate autem beati Petri apostolorum principis licentiam diebus vitæ tuæ sub jure et ditone nostra, ut diximus, habeas. Nullum usum vel consuetudinem successoribus tuis per hoc nostrum tibi concessum apostolicum privilegium habere censuimus. Et neque episcopus archiepiscopusque adversus te pro hoc altercationis contentione commoveat. Ita, Domino regente et gubernante cor tuum, commissam exsequi gubernationem studeas, ut, adepto hujus honoris officio, dignitate et probitate morum amplius procures adornari. Scriptum per manum Georgii scriniarii S. R. E. in mense Septembrio indictione XII. Data VIII Idus Septembris per manum Walperti humillimi episcopi sanctæ Portuensis Ecclesiæ, anno, Domino propitio, pontificatus domini nostri Joannis summi pontificis et universalis papæ in sacratissima sede beati Petri apostoli sexio, indictione XII. *Hoc est anno 878. Verum aut September in Octobrem, aut indictio XII in XI mutanda; quod ex privilegiis Floriacensi, Cabilonensi aliisque discas, licet non diffiteamur in antiquis diplomatibus indictionem nunquam usque ad natalem Christi diem aut pridie Kalendas Januarii protendi ab incuriosis tabellionibus librariisve.*

CLIV.

(Anno 878.)

Excommunicatio Hugonis et Emmonis.

Hugonem Lotharii regis quondam filium, non legitimum, sed naturalem adulterina copula genitum, qui post præstitum sacramentum dilecto filio Ludovico regi Francorum mentitus esse videtur, et inquietare pacificum regnum prædicti regis; et Emmonem, Bernardi comitis germanum, complicem in excessibus, nisi intra dies triginta ad prædictum seniore suum redierint, et ab inquietudine regni resipuerint, omni Christiana communione privamus. Postmodum si perseveraverint, sciant se anathematis vineulis innodandos. Data. etc.

CLV.

AD BERNARDUM COMITEM.

(Anno 878.)

Jubet ut ipse cum aliis quibusdam ad synodum veniat, in qua Frotarius Bituricensis episcopus de objecto sibi infidelitatis crimine, purgare se volebat.

BERNARDO comiti.

Relatu videlicet hominis pontificio nostro nuntiatum est quod Frotarius venerabilis episcopus civitatem Biturigam inimicis vestri senioris domini Ludovici gloriosi regis tradere maluerit, ideo illuc ipse contendere studueras. Ecce enim idem jam dictus episcopus nobis, nostro et filio præfato regi gloriosissimo, super hoc reclamare studuit, dicens se velle in omnibus tibi et tuis de universis objectis contra

Quapropter hortantes mitimus, apostolicaque auctoritate jubemus, ut ad hoc placitum, ad huncque conventum præsentialiter venire satagas, adducens tecum Girardum vicecomitem, Umberto, Aguarum, Ingelbertum, super quos ipse reclamat, quatenus nunc coram nobis et coram sæpe dicto glorioso rege, tam canonica censura quamque humanæ legis sancitu, inter vos, quidquid contra fas et jus factum fuerit, nihilominus finiatur. Data *ut supra*.

CLVI.

(Anno 878.)

Bernardi comitis excommunicatio.

Bernardum sacrilegum, filium Bernardi et Belihildis, sacrarum rerum ecclesiasticarum pervasorem, regniæque a Deo ordinate potestati contradictorem, a proprio archiepiscopo Frotario, cui et civitatem et omnia quæ habuit sustulit, tertio vocatum, a nostra autem apostolica auctoritate bis, et a regia sublimitate semel revocatum, venire nolentem et in pertinacia sua permanentem: qui etiam ab hominibus suis sacramentum damnabile et damnandum, blanditiis et terroribus tyrannice contra divina et humana jura extorsit, a corpore et sanguine Domini nostri Jesu Christi alienum decernimus, et ab omni Christianorum societate separamus, usque dum ad condignam satisfactionem emendaturus accedat. Quod si nec hic emendaverit, et ea quæ reus adeo communi judicio suorum fidelium abstulit, violenter tenere et fidelibus suis in hoc refragari tentaverit, anathematis vinculo sancti Spiritus [*adde auctoritate*] innodamus. Quicunque autem ei contra hanc excommunicationem communicaverint aut consenserint, nos prohibere non possumus ut qui excommunicatis communicaverint, non pari excommunicationi subjaceant.

CLVII.

AD ADALARDUM ARCHIEPISCOPUM TURONENSEM.

(Anno 878.)

Confirmat privilegia Ecclesiæ Turonensi concessa.

Reverendissimo et sanctissimo ADALARDO venerabili archiepiscopo Turonensi, successoribusque tuis, nec non et omnibus fidelibus sanctæ Dei Ecclesiæ, præsentibus scilicet atque futuris.

Decet Romanam Ecclesiam, quæ mater est omnium Dei Ecclesiarum, ut quanta viget dignitate præclara, eo magis consistat in misericordia pia, quatenus quæ digna postulantur a fidelibus, sine mora cum pietate largiri mereantur a nobis. Omnium vestrum religiositatem volumus scire fideliter quoniam presbyteri diocesis Turonici pagi ad nostrum accesserunt pontificium, suggerentes ut firmaremus apostolica auctoritate illis et capitulare regum et coepiscoporum scriptum, ut debeat unaquæque ecclesiæ proprium mansum habere cum mancipiis quatuor vineas, aripennis tres, prata similiter, et cæmeterium cum mansionibus, sine personali et civili munere exigendo, nisi divino solummodo in ecclesiastici rebus obsequio, sicuti canonum prisca auctoritas e

moderna concedit : ubi vero res nominatæ antiquitus condonatæ et moderno tempore abstractæ esse videntur, pontificali auctoritate et regali potestate sine mora aliqua aut tarditate restituantur. Nos illorum precibus inclinati, volumus, apostolicaque auctoritate expresse jubemus, ut præfata scripta, a nostro pontificio delata, a coepiscopis firmata, a regibus jussa, sint rata et modis omnibus observanda. Si quis hujus apostolicæ censuræ temerario ausu violator exstiterit, si sacerdos fuerit, proprio honore privetur, et Christiana communione cassus anathematis vinculo innodetur; si laicus, similiter perpetua damnatione cum Juda traditore torqueatur: conservator vero perenni benedictione apostolorum principum Petri et Pauli modis omnibus perfruatur.

CLVIII.

AD DIVERSOS EPISCOPOS.

(Anno 878.)

Ut invasores bonorum Ecclesiæ Turonensis cogant reddere, et nonas ac decimas solvere.

Reverendissimis et sanctissimis FROTARIO archiepiscopo Biturigensi, et ANSELMO Lemoviensi; HEFRIDO Pictavensi, DODONI Andecavensi, ROTBERTO Cenomanensi, HILDEPRANDO Sagiensi episcopis, nec non et aliis omnibus episcopis et comitibus, aliisque personis illustribus, sanctæ Dei Ecclesiæ fidelibus, in quorum parochiis sancti Mauricii (*nunc S. Gatiani, HARD.*) Turonensis Ecclesiæ prædia esse videntur.

Quorum omnium religiositas seu universorum pernoscat fidelitas quoniam, narrante Adelardo venerabili archiepiscopo, pontificium nostrum didicit qualiter quidam, absque legum omnium auctoritate, tam comites quamque subditi eorum, sancti Mauricii Turonensis Ecclesiæ res invasas ausu temerario teneant. Unde mandamus nostraque apostolica auctoritate expresse jubemus ut eos invasores primitus moneatis, ut ipsas res, omni occasione remota, ipsi præfata Ecclesiæ reddere satagant; et si ipsi forte audire noluerint, vos unanimes omnes unoque conventu pro posse collecti, nostra censura illos excommunicare debeatis, usquequo ipsas res ab eis injuste retentas reddant. Et si, quod non credimus, his censuris inobedientes fuerint, et ad satisfactionem venire distulerint, et justitiam de perpetratis facere noluerint, ab omni Christiana communione illos nostra auctoritate judicate esse immunes. Inter hæc etiam illos monete ut nonas et decimas, secundum antiquam consuetudinem, quibus dare debent, postpositis illicitis occasionibus, dare minime differant. Demum indicimus ut omnes res præfata Ecclesiæ sancti Mauricii, quæ in vestris existunt parochiis, defendere ab omnibus inimicis debeatis; quoniam si aliter feceritis, et nostræ censuræ non obedieritis, canonico sancti feriemi.

CLIX.

AD EPISCOPOS BRITANNIÆ.

(Anno 878.)

Arguit eos quod a Turonensi archiepiscopi jurisdictione se substraxerint, ejusque bona invaserint:

præcipit ut ei deinceps pareant et delictorum ab illo veniam petant.

MAHEN Dolensi episcopo, nec non et omnibus episcopis Britannicis, seu universis sanctæ Dei Ecclesiæ fidelibus.

Sanctitatem seu fidelitatem omnium nosse volumus quia dum Trevis synodum celebrarem, suggestionem Adelardi archiepiscopi consacerdotis nostri, audivimus quod vos matrem vestram Turonensem Ecclesiam despicientes, secundum antiquam consuetudinem illi obedire differtis, et privilegium a beato Petro apostolo illi supra vos concessum frangere conamini, debitumque honorem ipsi archiepiscopo vestro observare negligitis, et malum supra malum addentes prædicto capiti vestro prædia auferre non formidatis. Inter hæc etiam, et præfato antistite narrante, et aliis coepiscopis similiter conferentibus, audivimus ut vos non antiquo more a vestro metropolitano consecrati fuissetis, sed expulsis legitimis episcopis de sedibus, sola potentia ducis vestri alter ab altero consecratus fuit. Quod mirati fuimus, et, si ita est, tantum nefas delebimus, et vindictam, nisi satisfeceritis, nihilominus dabimus: quia non pastores, sed invasores fuisse cernimini. Quapropter monemus, apostolicaque auctoritate expresse præcipimus, ut ad cor redeentes, ad matrem vestram sanctam Turonensem Ecclesiam revertamini, et secundum antiquam consuetudinem illi obedire satagatis, et de perpetrato haecenus ipsi vestro archiepiscopo Adelardo misericordiam quæeratis, quatenus super omnibus negligentis apud summum Arbitrum veniam habere possitis. Quoniam si aliter feceritis, canonica auctoritate eritis nihilominus feriendi, et a nostra communione modis omnibus alienandi, et omnis vestra ordinatio a summa sede apostolica scilicet respuenda. *Data ut supra.*

CLX.

AD ARELATENSEM ET NARBONENSEM ARCHIEPISCOPOS

(Anno 878.)

Ut causam inter Ucticensem et Avemonensem episcopos canonice definiant.

ROSTAGNO venerabili archiepiscopo Arelatensi, et SIGEBODO Narbonensi.

Sanctitati vestræ notum est qualiter Walefredo Ucticensis Ecclesiæ episcopus ad synodum quam. Deo auctore, apud Trevas celebravimus, reclamationis libellum obtulit super Ractefredo Avenionense episcopo, quod ei quamdam villam ad suam sedem, sive parochiam, pertinentem abstulisset. Sed quia Ractefredus, de quo querela erat, synodo defuit, idecirco fraternitati vestræ apostolica auctoritate mandamus ut, coadunato numero episcoporum, eorum causam canonico judicio finiatis, ita discutiendo et determinando tantæ præsumptionis invasionem, ut nemo episcoporum vestrorum contra canonica præcepta ulterius insurgere sine suo periculo tentet. Vos quoque præsentialiter cum vestris istud determinate judicium. Capitula quædam vobis Patrum auctoritate collecta mittimus, secundum quæ judicare

absque dilatione debeatis. ne querendo assumatis laborem pro tali negotio. Optamus fraternitatem vestram in Christo bene valere.

CLXI.

PRIVILEGIUM PRO MONASTERIO VIZELIACENSI.

(Anno 878.)

Confirmantur immunitates olim concessæ.

(Apud Acherium Spicileg.)

JOANNES episcopus servus servorum Dei EUDONI venerabili abbati Vizeliacensis cœnobii, omnique congregationi ejusdem monasterii in perpetuum.

Quoties illa tribui a nobis optantur, quæ rationi incunctanter conveniunt, animo nos debet libenti concedere, et petentium desiderii congruum impertiri suffragium. Atque ideo quia postulasti a nobis quatenus privilegium sedis apostolicæ monasterio Vizeliaco, cui præesse dignosceris, quod constat olim a Gerardo nobilissimo et Christianissimo viro, necnon et Berta uxore ejus in honore Domini et Salvatoris nostri Jesu Christi et veneratione beatissimæ semper virginis Mariæ genitricis ejusdem Domini nostri Jesu Christi constructum; in regno scilicet Burgundiæ, in pago Avalensi quodque a præfatis fundatoribus beato Petro apostolorum principi pia devotione et testamenti pagina collatum est, facere deberemus; et inclinati precibus tuis, libenter fieri decrevimus, per quod nimirum apostolicæ sedis privilegium confirmamus, atque statuimus, ut nulli regum, nulli antistitum, nulli comitum, nulli cuiquam alii liceat ipsum monasterium perturbare, vel ea quæ ibi a jam dictis fundatoribus, vel ab aliis fidelibus oblata sunt, vel in futurum offerri contigerit, sub cujuslibet causæ, occasionisve specie, minuere, vel auferre, sive suis usibus applicare, sed sine inquietudine in sustentatione ejusdem monasterii, et usibus abbatum et monachorum sub regula sancti Patris Benedicti ibi Deo militantium volumus ea et præcipuum possideri: ea videlicet conditione, ut nullus successorum nostrorum pontificum in hac sancta sede, cui auctore Deo, servimus, unquam vel usquam quiddam ex eisdem rebus cuiquam beneficiare, commutare, aut sub sensu quolibet concedere per futura tempora patiatur, sed census tantummodo in testamento traditionis a fundatoribus qui ex eodem monasterio hanc sanctam hæredem Romanam fecerunt Ecclesiam etiam delegatum, unam videlicet libram argenti annis singulis successores nostri accipientes, per paternitatis suffragium eidem monasterio sollicitudine pastorali vigilantè contra omnes infestantes impendere studeant. Item constituimus, ut obeunte abbate prædicti monasterii, non alius ibi quacunque obreptionis astutia ordinetur, nisi quem consensus monachorum secundum timorem Dei, et institutionem regulæ sancti Benedicti elegerit, et hujus apostolicæ sedis pontifex præviderit ordinandum, aut suggestionem monachorum consenserit ordinatum.

Hoc quoque capitulo præsentì subjungimus, ut locum avaritiæ secludamus, nullum de regibus, nul-

lum de episcopis vel sacerdotibus, vel de quibuscunque fidelibus, per se, suppositamve personam, de ordinatione ejusdem abbatis, vel clericorum, aut presbyterorum, vel de largitione chrismatis, aut consecratione basilicæ, vel de quibuscunque causis ad idem monasterium pertinentibus, audere in qualibet specie exenii loco quidquam accipere, neque eundem abbatem pro ordinatione sua aliquid dare præsumere, ne hac occasione, ea quæ a fidelibus pio loco offeruntur consumantur. Neque episcopus civitatis ipsius parochiæ, nisi ab abbate ipsius monasterii invitatus, ibidem publicas missas agat, neque stationes in eodem cœnobio indicat, ne servorum Dei quies quoquomodo populari conventu perturbari valeat, neque paratas, aut mansionaticos exinde præsumat exigere. Suseptionem autem fidelium et religiosorum virorum atque beneficentiam, quam jubet Apostolus cunctis exhibendam pro possibilitate loci et facultatum, non modo ibidem fieri [non] denegamus, verum etiam suademus: sed et modus in numero congregationis adeo conservetur, ut nec pluralitas penuriam, nec paucitas inhabitantium destitutionem loci inducere valeat. Privilegium quoque a prædecessore nostro piæ memoriæ papa Nicolao eidem monasterio collatum nostra auctoritate confirmamus, excepto duntaxat quod ipse sub nomine ancillarum Dei quæ ibidem pro crebris infestationibus sæculi nunc ordinabiliter manere nequeunt, illud delegavit: nos vero aptioris utilitatis gratia, sub habitu monachorum esse congruenter decernimus. Si quis vero regum, episcoporum, sacerdotum, abbatum, iudicum comitum, aut secularium personarum, contra hanc nostræ institutionis paginam venire tentaverit, percussus apostolico anathemate, potestatis honorisve sui dignitate careat, reumque se coram divino iudicio cognoscat, et nisi ea quæ a se male acta sunt desleverit, a sacratissimo corpore Domini nostri Jesu Christi alienus fiat, atque æterno examini districtæ ultionis subiaceat. Cunctis autem eidem loco justa servantibus sit pax Domini nostri Jesu Christi, quatenus et hic fructum bonæ actionis recipiant, et apud districtum iudicem præmia æternæ pacis inveniant.

Datum per manum Walperti humillimi episcopi sanctæ Portuensis Ecclesiæ III Kalend. Octobris, anno VI ejusdem Domini Joannis papæ VIII, indict. XII. Scriptum vero per manum Georgii notarii regionarii et scriniarii sanctæ Romanæ Ecclesiæ.

CLXII.

AD WIBBODUM EPISCOPUM.

(Anno 878.)

Commendat illius fidem, hortatur ut legatum mittat antequam cum Carolomanno in colloquium veniat, cui eum quoque interesse jubet.

Reverendissimo et sanctissimo WIBBODO venerabili episcopo.

In lectione litterarum vestrarum, et in relatu earum geruli hominis vestri, et vos devotissimos, et ut semper, novi fidissimos; pro quibus vobis gratias

agimus, et Deo auxiliante, retribuemus. Interea A
monentes hortamur ut ceptum perficias, et ante-
quam Carolannum alloquamur, vestrum legatum
cum litteris mittere satagas, et in colloquio ubi fue-
ris, tua præsentiâ esse studeat. Optamus sanctita-
tem tuam in Christo bene valere, maxime in hoc.
Data ut supra.

CLXIII. — CLXIV.

PRIVILEGIUM PRO MONASTERIO SANCTI MARCELLI.

(Anno 878.)

[Apud Perry, *Histoire de Chalon-sur-Saône*, inter
præb., pag. 32.]

JOANNES episcopus, servus servorum Dei, DEODATO
venerabili levitæ et præposito monasterii sancti
Marcelli sito in territorio Cabilonensi, loco Floriaco
et Vallis Magnimontensis, atque Gibriacensis, cum B
omnibus ad se subjacentibus et pertinentibus ad
prædictum locum Floriacum aspicientibus, et in Ca-
bilonensi similiter Boscrotentensis.

Quia suppliciter petiit cum cuncta congregatione
sancti Marcelli tua devotio, quatenus apostolica
auctoritate benigna compassione eidem loco privi-
legium de cunctis rebus ibi positis, cultis vel in-
cultis aquis, aquarumque decursibus, tam in Ca-
bilonensi quam Belnensi, atque Magnimontensi ut
supra dictum, et Divionensi et Lugdunensi confir-
maremus, propter Deum piis petitionibus vestris in-
clinati, concedimus pro vobis vestrisque successoribus
supra dicto loco novas quoque et decimas eo modo
quo antiqua consuetudo præcedentium constat
episcoporum aut expectatur ab his intra quorum
parochias sæpe dicti loci habitatores jure proprio
habere videntur quidpiam secundum præcepta reg-
um, singulorumque hominum donationes, quæ ab
aliis legaliter ante donationem, vel post juste con-
cessa videntur, supranominatorum : Sed ut securius
ac quietius in Dei servitio valeant permanere, ab
omni volumus eos fratres ac spirituales cohabitato-
res molestia persistere, nullusque de regibus
comitibusque aliisque regni primoribus cujuslibet
cingulo dignitatis præpollens, audeat vel præsumat
his nostris propter Deum concessis petitionibus
quocunque resultare modo atque ingenio ; quod nos
paternæ compassionis affectu innuimus, filiorum
nostrorum debet assensu firmari et non, quod absit,
superna rebellione in aliquo temerari, et resultari D
proterva transgressione. Concessum a Deodato in-
dictione duodecima et cunctæ congregationi supra-
dicti loci, residente in sede apostolica domno
Joanne, anno sexto. Si quis contra hoc nostrum pri-
vilegium, amodo, nisi intra certum tempus resipuerit,
ire tentaverit, anathematis se vinculis cano-
nice noverit colligandum. † Bene valere † Nonis
Octobris per manum Valperti humillimi episcopi
sanctæ Portuensis Ecclesiæ anno, propitio Deo,
pontificatus domini nostri Joannis summi pontificis et
universalis papæ in sacratissima sede beati Petri
apostoli vi, indictione duodecima.

CLXV.

AD SUPPONEM COMITEM.

(Anno 878.)

*Mandat ut ad montem Cinistem [Cinisium] obviam
sibi veniens, imperatricem Angelbergam, et præ-
sules Mediolanensem et Parmensem idem facere
moneat, ut simul quæ ad utilitatem Ecclesiæ
pertinent tractare valeant.*

Dilectissimo filio SUPPONI glorioso comiti.

Quia nos, in quibus, Deo dispensante, fines sæcu-
lorum devenerunt, pro sanctarum Dei Ecclesiarum
statu variis motibus ducimur, diversisque fluctuum
procellis impellimur, sed tamen non destituimur,
propter eum qui nos confortat Christum Jesum,
servata prædecessorum nostrorum fide proli Franco-
rum, ad Gallias properantes idcirco venimus, ut
B pacis atque unitatis vinculo regum corda connecte-
remus. Sed ceptum videmus quod in Evangelio
legimus : *Quoniam abundavit iniquitas, refrigescit
charitas multorum (Matth. xxiv)*. Quapropter vestræ
dilectioni fidentissime et probatæ fidei mandamus, ut
nobis cum officio decentiæ vestræ ad montem Cini-
sem obvii quantocius veniatis, ut pariter conve-
nientes, quæ ad utilitatem congruunt, Domino per-
mittente, tractare valeamus. Simulque hoc precamini
fideam filiam nostram Angelbergam imperatricem,
atque Anspertum archiepiscopum Mediolanensem,
Wibbodumque Parmensem episcopum, aliosque fide-
les atque amicos. Data ut supra.

CLXVI.

AD WIBBODUM, PAULUM, ET PAULUM AC LIUDOINUM
EPISCOPOS.

(Anno 878.)

Jubet ut Papiam ad synodum accedant.

Reverendissimis et sanctissimis WIBBODO venera-
bili episcopo Parmensi, et Paulo Placentino, et Paulo
Regiensi, et Liudoino Mutinensi episcopis.

Sanctitatem vestram scire cupimus quoniam octavo
Kalendas Decembris Taurinum venimus, inde, Deo
duce, Papiam venimus, et ibi synodum pro statu
Dei Ecclesiarum celebrabimus. Quapropter mittimus
apostolicaque auctoritate expresse jubemus ut quarto
Nonas Decembris ibi, omni occasione remota, ad
synodum esse debeatis. Et qui primo hanc epistolam
egerit, alio sub omni festinatione transmittat. Videte
ne aliter faciatis ; quoniam si aliter feceritis, cano-
nico feriemini vigore. Data ut supra.

CLXVII.

AD JOANNEM EPISCOPUM PAPIÆ.

(Anno 878.)

*Ut sibi Taurinum obviam veniat, et epistolas a se
scriptas quibusdam episcopis dirigat, ut ipsi ad
concilium accedant.*

Reverendissimo et sanctissimo JOANNI Papiæ epi-
scopo.

Sanctitati tuæ notum fieri volumus quod nunc
Taurinensi in civitate consistimus. Cæterum diri-
gimus ut, continuo omni occasione postposita, nobis
venire ne differas obviam. Vide ne ab alicujus deci-

piaris instinctu fortasse, quæ minime credimus, pro parte Mediolanensis archiepiscopi, quoniam specialiter noster es et manualis. Et quia de nullius nisi nostra ditione consistis [*deest* jubeo vel quid hujusmodi] ut epistolam quam suffraganeis episcopis Ravennatis Ecclesiæ, Paulo Placentinæ, et item Paulo Regiensi atque Liudoino Mutinensi, cum celeritate mittere procuretis, ut statuto die Papiam veniant quatenus de sanctorum item Dei Ecclesiarum et communi atque universali salute tractare valeamus. Data ut supra.

CLXVIII

AD ANSPERTUM ARCHIEPISCOPUM.

(Anno 878.)

Narrat labores pro Ecclesia susceptos: monet ut sibi cum omnibus episcopis suis Papiam occurrat.

Reverendissimo et sanctissimo confratri ANSPERTO venerabili archiepiscopo Mediolanensi.

Quantum pro totius sanctæ Dei Ecclesiæ statu, et pro cuncto grege Dominico, pro quo omnipotens Deus proprio Filio suo non peperit, sed pro nobis omnibus tradidit illum, et Joannes apostolus exhortans nos ait: *Quoniam ille pro nobis animam suam posuit, et nos debemus pro fratribus animam ponere* (I Joan. III), laborare ac vigilare semper debemus, omnium vestrum luce clarius novit pia fraternitas. Quapropter, quantum ex divina gratia in nobis fuit et est ex quo nos superna miseratione sue Ecclesiæ præfecit, animæ nostræ nunquam pepercimus, nunquam dura pericula declinavimus; sed die noctuque, æstu et gelu exusti, ne quid captum a bestia aut dilaceratum Domino ostenderemus, marinos fluctus pertulimus pro omnium vestrum liberatione atque salute: in Franciam quoque venientes, et regum filios partim viva voce, partim epistolis atque legatis allocuti sumus omnes, id est utrosque Ludovicos, Carolomannum, et Carolum, acceptoque communi consilio uti Boso gloriosus princeps comes esset itineris nostri, donec, Christo opem ferente, reverteremur ad Urbem. Et quia de statu sanctæ Ecclesiæ sunt quæ communiter tractare debemus, tuæ sanctitati apostolica auctoritate mandamus cum cunctis suffraganeis tuis et coepiscopis nobis Papiam secunda die post festum sancti Andree occurrere. Et quoniam probata fides omnium prædecessorum tuorum semper fuit erga Romanum pontificem, tua fraternitas omnimodis studeat eorum in omnibus assequi vestigia, quia, quod absit, si aliter fuerit, vigor canonicus super inobedientes remanere non poterit. Data ut supra.

CLXIX.

AD SUPPONEM COMITEM.

(Anno 878.)

Miratur eum sibi, ut decebat, non occurrisse; certiorum reddit de his que cum Ludovico rege egit: monet ut ad se veniat.

Dilecto filio SUPPONI illustri comiti.

Cur, fili charissime, nobis iter tua dilectio clause- rit, curque ut audistis nos in tuos honores venisse.

obviam non concurreris, miramur, cum eam in omnibus nostris negotiis curam gessisse semper novimus; et ubi nos prope fuisse audieras, tuis universis postpositis seriis, ad nos festinanter properaveras. Unde cernimus quoniam istud non ex corde, sed pro fidelitate tui senioris taliter feceris, quod ideo par- cimus; ecce enim, ut audistis, et nos etiam vobis jam litteris significavimus, pro quibus in Gallia partibus synodum celebravimus. Et Ludovicum glo- riosum regem affati fuimus, qui nobis hunc Bosonem principem virum consultissimum, sibi que ex omni parte conjunctum dedit, ut nos salvos sine impedi- mento maledicti Lamberti in Urbem mitteret, cum quo nos pacifice pro certo venimus. Cæterum monen- tes mittimus et rogantes hortamur quatenus vestro demore, relictis aliis omnibus curis, omnique occa- sione remota, ad nos præsentialiter venias, incitans etiam alios, quibus apostolicas litteras mittimus, ut et ipsi similiter faciant. Quoniam, scit Deus, non ob aliud vos alloqui cupimus nisi ut sanctarum Dei Ec- clesiarum statum et reipublicæ quietem una vobis- cum consideremus; tamen ante alios venire satage, ut quidquid cum aliis fecerimus, tecum familiariter antea terminare queamus. Data ut supra.

CLXX.

AD BERENGARIUM COMITEM.

(Anno 878.)

Berengarii charitatem erga Romanam Ecclesiam commendat; significat celebratam in Gallia syno- dum, sequæ incolumem reversum: monet ut ad se venire festinet.

Dilecto filio BERENGARIO illustri comiti.

Relatu nonnullorum audivimus, maxime hujus Widonis comitis nostri consilarii, ut vestra devotio charitatem quam erga nos nostramque Ecclesiam, vestram videlicet matrem, semper habueras, magis magisque adoleat: in quo gratias agimus et ut proficias hortamur. Ecce enim audistis pro quibus in Gallia partibus synodum celebravimus, et Ludovi- cum regem gloriosum affati fuimus, qui nobis hunc Bosonem principem virum consultissimum, sibi que ex omni parte conjunctum dedit, ut nos, auxiliante Deo, salvos sine impedimento Lamberti maledicti, et a sancta Dei Ecclesia anathematizati, in urbem Ro- mam mitteret, cum quo nos pacifice pro certo veni- mus. Cæterum monentes mittimus, et rogantes hor- tamur, relictis aliis omnibus curis, ad nos præsentia- liter venire satagas. Quoniam, scit Deus, non ob aliud vos alloqui cupimus, nisi ut sanctarum Dei Ecclesiarum statum et quietum reipublicæ cum honore una vobiscum tractemus. Data ut supra.

CLXXI.

AD ANSPERTUM ARCHIEPISCOPUM MEDIOLANENSEM.

(Anno 878.)

Increpat eum quod sibi auxilium non tulerit; et jam tertio monet ut sibi Papiam certa die cum suis suffraganeis occurrat.

Reverendissimo et sanctissimo confratri ANSPERTO venerabili archiepiscopo Mediolanensi.

Quantum benigna fraternitas vestra sanctæ sedi

apostolicæ concurrere ac concordare debeat. prædecessor noster beatus Gelasius papa ad episcopos parvipendentes vexationem fratrum his verbis comminando scribit, dicens : Cur non compassi estis tantis fratribus vestris? Cur non adistis imperatorem? Cur non posuistis animam pro confratribus, quam præceptum habetis ponere pro grege vobis commisso? Cur non posuistis vos pro domo Israel murum, ut staretis in præliis in diem Domini? Quapropter tandem discussa negligentia ad pristinum vos reformate certamen, fratribus auxilium concite afferendum. Hæc et horum similia vestram fraternitatem debuerant exempla provocare, et nobis pro totius sanctæ Dei Ecclesiæ statu laborantibus non tantum inviti jam, sed etiam sponte concurrere debetis ac debuistis. Sed jam nunc post tertiam admonitionem nobis cum confratribus vestris et coepiscopis studete Papiam hæc quinta feria proxima adveniente occurrere, zelum Dei, quem pro vobis omnibus patior, atque dolorem audientes, ut quod deinceps Deus omnipotens communi vestro consilio decreverit, facere valeamus. Nulla, frater charissime, animo vestro dubietas insideat, in mea fide et in meo sacerdotio credite; nil contra vestram decentiam atque honorem vobis aliquatenus opponetur quia, quod non optamus, si hæc parvipendere tentaveritis, post tantam patientiam canonica eritis a...

CLXXII.

AD BERENGARIUM COMITEM.

Narrat labores pro Ecclesia susceptos.

Dilecto filio BERENGARIO glorioso comiti, seu omnibus optimatibus Longobardorum regni sanctæ Dei Ecclesiæ fidelibus.

Quanta et qualia Romana Ecclesia, vestra videlicet mater, hæcenus ab impiissimis Christianis passa est, et nostris litteris significantibus, et rumore populi narrante jam audistis, et ut certius sciatis, iterum significamus. Ecce enim pro quibus et pro omnium vestrum salute animæ nostræ non parcentes, quia per terram pro prædictis persecutoribus ad vos viciniore, ut res expetierat, venire nequivimus, marinum iter accepimus; et in Franciam ibimus, quærentes tranquillitatem atque auxilium, ubi nostri antecessores quæsiere pontifices. Misimus enim omnibus regibus, id est Ludovico domni Caroli imperatoris filio, et Carolomanno et Ludovico, et Carolo Ludovici regis filiis, ut cum suis episcopis ad nos venirent, et una nobiscum super his tractarent. Ex quibus venit Ludovicus rex, et tantis malis perdolens, nisi infirmus esset, nobiscum veniret. Jam quia pro infirmitate non potuit, dedit nobis hunc Bosonem principem sibi ex omni parte conjunctum, qui me per inimicos sanctæ Dei Ecclesiæ salvum duceret. Ecce enim, auxiliante Deo, Papiam venimus. Quapropter monentes mittimus et apostolica

Forte deest *animadversione castigandi*, vel aliquid hujusmodi.

Agilmarum. Ex subscriptionibus synodi Tricassinæ.

PATROL. CXXVI.

Auctoritate hortantes jam tertio mandamus ut præsentialiter ad nos, charissimi, tanquam ad patrem venire debeatis, et ut alii veniant alter alterum incitet, et has litteras primo legens remittere aliis procuret: quatenus venientes una nobiscum de statu sanctarum Dei Ecclesiarum et quiete reipublicæ et nostra vestraque omnium salute synodum celebrantes, tractemus; in quibus, dilectissimi filii, ne vestra charitas tepeat, neve religiositas inobediat, sed compatiatur ut oportet ac doleat; quia scriptum est qualiter tepidus sit jure vomendus, et qualiter per inobedientiam culpa quæ non fuit, sit, et qualiter qui non compatiatur, decreto pontificali feritur. Data *ut supra*.

CLXXIII.

AD LUDOVICUM BALBUM REGEM.

(Anno 878).

Bosonis comitis, et Agilmari episcopi, a quibus in Italiam deductus fuerat, studium erga se operamque commendat.

Dilectissimo filio LUDOVICO gloriosissimo regi, divæ memoriæ Caroli imperatoris filio.

Quanto vos amore diligimus, quantumque charitatis affectum erga vos tenemus, paucis explicare verbis minime possumus: hoc tamen gloriam excellentiæ vestræ scire cupimus, quod devotionem ardoremque charitatis, sicut polliciti sumus, erga vos indeficientem perpetuo retinemus. Interea millenas serenitati vestræ de Bosone dilecto et communi filio ac fidele gratias referimus, qui tam prudenter communibus obtemperans jussis, parere in omnibus ita nobis studuit, ut etiam velut vere Christianæ religionis cultor, animæ et vitæ suæ non pepercerit, sed pro sanctæ Ecclesiæ et communi fidelitate ultro se morti tradere non dubitavit, et usque Ticinum, annuente Deo, securius nos perduxit. Quapropter, dilectissime filii, ac porphyretice rex, obsecramus excellentiæ vestræ culmen, si res exegerit, sicut nobis vestra dignata est repromittere sublimitas, ei adjutorium ad debellandos hostes nostros virorum bellatorum adminiculum præbeatis: quoniam dignum est ut soli omnes adjutorium præbeant qui solus pro cunctis desudare non cessat. Præsentem itaque hujus latorem epistolæ, Agilmarum, venerabilem episcopum, excellentiæ vestræ plurimum commendamus, quatenus idem suaque Ecclesia crescat augmento perfectionis, qui in omnibus opportunitatibus nostris nulli secundus exstitit, et vobis fidelissimum in cunctis quæ cognoverit verissime comprobavimus. Inter hæc episcopos quos serenitas vestra in nostrum jussit venire adjutorium, scias præter Agilmarum nullum venisse. Quapropter regalis censura culminis vestri sua auctoritate compellat eos quantocius hostiliter [*synodaliter*] Romam venire, ut de cætero discant apostolico culmini et regali excellentiæ congruenter præbere obedientiam.

atque ex præcepto Caroli Crassi, anno 883. Arvernorum episcopum fuisse intelligimus. *Siam.*

CLXXIV.

AD LUDOVICUM REGEM.
(Anno 878.)

Miratur quod filiabus Bosonis, pro quibus alius rogaverat, hæreditatem jure debitam non restituerit; iterumque monet ut ipsam hæreditatem integram eis restituat.

LUDOVICO regi glorioso gloriosi quoniam regis Ludovici filio.

Jam enim magnitudinem vestram, fili charissime, apostolicis monuimus litteris, hortantes pro filiabus Bosonis dudum comitis et Ingeltrudis conjugis, quibus jure hæreditas deferri omnium legum auctoritate conceditur, proprietates reddere studeritis. Sed, ut cernimus, inauditi remansimus, quod miramur, et mirantes dolemus, cum vestra proles apostolicis censuris semper obediat, et præ omnibus regibus judicium faciat. Ut rex David cecinit: *Honor regis judicium diligit (Psal. xcvi)*. Nonne legistis: *Quoniam justis Dominus justitiam diligit, et æquitatem videt vultus ejus? (Psal. x)*. Cæterum reclamationem filiarum jam dicti Bosonis audivimus, ut ipsas, ipsius matrisque earum proprietates, Ingeltrudis, alias vos teneatis, alias vero vestris quibus ipsa post judicium sibi illatum sine viri consensu dederit, tenere permittatis, quod nefas est, et contra omnium legum prorsus auctoritatem. Quid enim uxor sine viri consensu agere potest? quanto magis ex mœchans, quæ divino gladio, censente domno papa Nicolao prædecessore nostro, interitit (Nicolau in *epist.* 64. *Regino l. II Chronic.*) et humano pro parte facto stupro puniri debuerat? Nonne Joannes papa Romanus, et Justinianus inelytus imperator legem Romanam facientes, scripserunt ita: *Capitali crimine damnatorum bona non ad lucrum præsidis, sed cognatis cognatorum in hæreditate sumenda præferendi sunt filii*. Unde liquido patet, gloriosissime rex, ut nec vos, nec cognati eorum, nisi ipsæ filie quæ sunt legitimæ, illos allodes habere debent; qui vero nati sunt post crimen illarum, spurii sunt, nec hæreditare debent, ut præfatus papa et imperator scripserunt ita: *Spurios satis injuriosos, satisque acerbos, ac nostris temporibus semper indignos esse dijudicamus*. Quapropter, ut rogavimus, iterum iterumque rogavimus, et hortantes monemus ut harum reclamationes, harum et gemitus vestra regia dignitas hauriat. Et pro apostolorum principum reverentia, a quibus petiere auxilium, et pro nostro amore integritè ipsas proprietates, quas vos allodes dicitis, reddat, et vestros omni occasione remota reddere faciatis. *Data ut supra.*

CLXXV.

AD HUGONEM.
(Anno 878.)

Monet ut dissensionem inter Abbonem et alios ortam sedet.

Hic est abbas nobilis, spectabilis, prescriptus. Pro quibusdam rebus illis, cum aliis quibusdam, con-

Amante vestrae prospicimus, commovere curavimus. [f. dissensionem].... quoque, quæ inter Abbonis episcopi parentes, et Rotbertum, atque Roelinum exorta est [f. ut]... regali potius [f. add. clementia] quam vindicta corrigatur; quoniam malum semel necessitate patratum non debet secundum necessitudinem expiari ad delictum, sed misericordius remitti ad veniam, agat vestra gloriosa nobilitas, ut decet tantæ naturæ decemiam. *Data ut supra.*

CLXXVI.

AD ROMANUM ELECTUM ARCHIEPISCOPUM RAVENNATEM.
(Anno 878.)

Latur eum Ravennatem archiepiscopum electum: jubet ne quidquam electionis causa ulli promittat: et epistolam suam Leoni, et Romanis scriptam afferendam curet, eorumque responsum ad se dirigat: res Joannis et Deusdedit ducum restituat.

ROMANO Levitæ egregio a Ravennatibus fidelibus nostris electo.

Litterarum tuarum, fili charissime, serie recepta et lecta, ubi Joannem Ravennatem archiepiscopum obiisse audivimus, valde doluimus, et ut pro eo ortis cum vestris, hortamur. Vestra videlicet electione unanimiter facta gaudemus, et quia nos visitando misisti, significans sanitatem nostrorum fidelium, tuamque devotionem demonstrans, gratias agimus. Cæterum monentes indicimus ut jam qui, annuente pastore summo, ad tale opus electus es, quo pastor fias, vigiles in eadem ecclesia, labores, nullique majori minorique tam concivibus quamque aliis quibuscunque personis aliquod promissum facias, quoniam Simoniacum est, et hoc nobis nequaquam celabitur; quod si feceris, per apostolos obtestantes, te minime benedicemus. Inter hæc volumus ut istam epistolam Leoni venerabili misso episcopo et apocrisiario, cæteris Romanis transmissam, ipsis præsentialiter per vestrum legatum transmittatis; eundemque revertentem, si potes saltem, aut alium eum illorum epistolis ad nos, dilecte [f. directis], remitte, qui nostrum adventum certum jam vobis renuntiare poterit. Igitur etiam cupimus ut pro amore horum nostrorum fidelium nostrorumque consiliariorum, Deusdedit videlicet et Joannis gloriosorum ducum res pro posse et homines salvetis et defendatis, occupatas hactenus integritè reddatis, quatenus eujus utuntur servitio, ei convenit ut fruantur defensionis auxilio. *Data ut supra.*

CLXXVII.

AD RAVENNATES.
(Anno 878.)

Dolet eorum antistitis morte: monet, ut electum ab eis archiepiscopum congruo prosequantur honore; Ecclesiam Ravennatem, et Deusdedit et Joannis ducum bona defendant.

Sacerdotibus et senatui populoque Ravennati fidelibus nostris.

Ravennatis antistitis, vestri videlicet Patris, obitum a dolens, valde dolemus; pro quo ut orthodoxam vestram vero tantamque fidelitatem ve-

stram erga nos unitate vigere cernentes. imo gaudeamus, et ut omnipotens intercessione apostolorum principum vos Patre desiderato recuperet, vestro pro velle decertabimus. Cæterum monentes hortamur, et expresse jubemus, ut jam quem unanimiter, quomodo scripsistis, elegistis, unanimiter eum electum teneatis, diligatis et vestro de more honoretis: et usquequo, Deo annuente, præsentia pontificii nostri desiderio vestro illuxerit, Ravennatem ecclesiam ab omnibus hostibus defendite, deprædationibus pro posse levate, ne ipsa ecclesia aliquam deprædationem sustineat, quoniam nos hoc inultum nunquam dimittemus, et prædatores prædatorumque receptores legali vigore modis omnibus feriemus. Porro præcipimus ut res mobiles et immobiles seseque moventes Deusedit et Joannis, gloriosorum ducum nostrorum consiliariorum, salvare, et in illas, quas hactenus invasas habuerunt, nullam invasionem facientes, illorum hominibus defendite: jam quia nostro utuntur servitio, nostra modis omnibus debent perfrui defensione, servatori hujus jussus, gratia corruptoris pro jussu erit nihilominus compositori ^a.

CLXXVIII.

AD JUDICES ET DUCES RAVENNATES.

(Anno 878.)

Jubet ut civitatem contra Lambertum viriliter defendant.

Omnibus judicibus et ducibus seu populis Ravennæ commorantibus fidelibus nostris.

Industriam seu omnium fidelitatem nosse volumus, quoniam relatu quorundam audivimus, ut Joannes diaconus chartularius deviet, et francos Lamberti contra electionem nostram conducat: unde mittimus apostolicaque auctoritate jubemus ut omnes unanimes unaque fidelitatem stare debeatis et defendere ipsam civitatem, ita ut nullus qui vobiscum non stat, francos ibi conduci Lamberti [f. francos ibi cum duce Lamberto, etc.] intus permittat ingredi, nec ipse Lambertus ibi quoquomodo accessus habeat, nec suus homo ibi intrare possit: ita in his agite, sicut Dei et nostram gratiam habere cupitis, quoniam qui aliter fecerit, et nostram iram habebit, et mille byzanteos palatio nostro componet. *Data ut supra.*

CLXXIX.

AD THEODORICUM ET ISAAC EPISCOPOS.

(Anno 879.)

Præcipit ut excommunicent eos qui Wiperto comiti filium eripuerant, et regionem illam populabantur.

Reverendissimis et sanctissimis THEODORICO archiepiscopo, et ISAAC episcopo.

Noverit vestra religiositas quia Wipertus comes reclamans pontificio nostro retulit, quod quidam sui homines malefactores suum filium sustulerint et cum eo terram prædaverint. Quapropter dirigimus.

A ut nostra apostolica auctoritate illos excommunicetis, quo relictis talibus deprædationibus ad patrem et seniore redeant et pacifice vivant. *Data ut supra.*

CLXXX.

AD HUGONEM COMITEM.

(Anno 879.)

Monet ut quosdam facinorosos puniat.

HUGONI glorioso comiti.

Referente videlicet hoc viro nomine . . . audivimus quod vestri homines, maxime Conterius suos equos tollentes suas mansiones prædassent. Quapropter hortantes monemus ut pro apostolorum reverentia et nostro amore, quam petit justitiam, illi facere satagatis. Ita agat in hoc vestra nobilitas ut acturam credimus, ut et ipsi malefactores nostri excommunicentur, quia non tale nefas, ut non ulciscatur, demittere nequimus. *Data ut supra.*

CLXXXI.

AD HUGONEM THEODERICUM ET BERNARDUM COMITES.

(Anno 879.)

Ut amicitiae charitatisque fœdus cum Bosone ictum servent.

HUGONI, THEODERCIO et BERNADO, illustrissimis regni Francorum.

Fretus vestra ingenuissima nobilitate, atque obedientia, quam propter Deum nobis condigne debetis, dilectissimum filium nostram Bosonem, vestrum unanimum fratrem et amicissimum, ut insolubile vinculum charitatis, fœdusque amicitiae, quod coram Deo vicissim colligastis, monco, hortor, nulla hominum male loquentium lingua, nullo cujuslibet fraudis ingenio, vel in modico quoquomodo possit avelli: sed Domino auxiliante, dilecti filii nostri Ludovici regis animum erga eum immobilem et tranquillum semper servetis, et omnia sua salva atque pacifica conservate; quoniam pro his ab omnipotente Deo et beato Petro apostolo futuræ vitæ mercedem, et a nobis et ab illo fidelissimas amicitiarum recipietis sine dubio retributiones. *Data ut supra.*

CLXXXII.

AD VULGARIUM MONACHUM.

(Anno 879.)

Ut Wiperto episcopo obediat, qui eum per dimissoriam acquisivit.

D

VULGARIO monacho.

Denique Trevis positi per nosmetipsos cognovimus qualiter Wipertus episcopus, devotus filius noster, te a proprio episcopo atque abbate per dimissoriam acquisivit, tua potius interveniente petitione. Quapropter convenit tibi ex die illo, et deinceps, tanquam proprio obedire, eumque ut proprium pastorem sequi non prætermittas, quia, quod non optamus, si aliter feceris, vinculum excommunicationis super te rationabiliter extendemus. *Data ut supra.*

^a Locus corruptus.

CLXXXIII.

A

AD CLERUM MEDIOLANENSEM.

(Anno 879.)

Præcipit ut quoties episcopus Ticinensis eos ad synodum vocaverit, accedant.

Omnibus sanctissimis et reverendissimis confratribus et coepiscopis, tam Mediolanensi archiepiscopo cum suis suffraganeis, quam Ravennati nihilominus cum suffraganeis suis.

Scriptum etenim est : *Deus qui glorificatur in consilio sanctorum* (Psal. LXXXVIII); et in evangelio : *Ubi duo vel tres congregati fuerint in nomine meo, in medio eorum sum* (Matth. xi); et item : *Si frater fratrem adjuverit, ambo consolabuntur* (Prov. xviii). His auctoritatibus fulti, vestræ omnium sanctitati mandamus, et apostolica auctoritate jubemus, ut quoties vos confrater et coepiscopus noster Joannes Ticinensis, et post eum sui successores, vestrosque vocaverint, pro emergentibus questionibus eximendis, continuo beato Petro apostolo obedientiam exhibentes, simul convenire non differatis : quatenus, Redemptoris nostri gratia discussis animositatibus, vitis purgatis, in tranquillitate pacis Ecclesia constituta, glorificetur Deus per Jesum Christum Dominum nostrum. Sacerdotum Levitarumque judicia, quancumque necesse fuerit, cum prædicto episcopo, tanquam proprii episcopi discernite, ac diffinite, freti nostra omnimodis apostolica auctoritate, quia onera nostra vobiscum partiendo reliqua tolerabilius sufferre valebimus. Optamus sanctitatem vestram in Christo bene valere. *Data ut supra.*

CLXXXIV.

AD JOANNEM EPISCOPUM TICINENSEM.

(Anno 879.)

Raptores uxoris cujusdam Ragiberti excommunicari jubet.

Reverendissimo et sanctissimo confratri nostro JOANNI venerabili episcopo Ticinensi.

Denique Ragibertus quidam nomine, Judex cognomento, coram nobis veniens questus est super Gotfredum, filium Joannis comitis palatii, et Iserbertum subdiaconem, atque Heribaldum notarium, filium Garibaldi, eo quod legaliter sibi filii sui nuptiam Gausildam nomine contra canonum et legum auctoritatem, per vim et per forciam abstulerunt, calcato illo præcepto quo Dominus ait : *Quod Deus conjunxit, homo non separet* (Matth. xix). Quapropter apostolica adhortatione zelum tui sacerdotii ad hortamen charitas Dei accendat, et quasi tuba exalta vocem tuam, et iniquis iniquitatem suam annuntiare non cesses, ne sanguis eorum de manibus tuis requiratur. Prædictosque transgressores omni Christiana communione privare non differas, donec legaliter emendent quod nequiter perpetrare ausi sunt. Quod si te audire neglexerint, perpetuo eos anathema esse decernimus. *Data ut supra.*

CLXXXV.

AD OMNES FIDELES.

(Anno 879.)

Præcipit ne quispiam monasterio sancti Augustini quidquam detrimenti afferat.

Omnibus fidelibus Ecclesiæ.

Sollicitudinem omnium Ecclesiarum nos habere oportet, et singulorum causas æquitatis judicio allevare; quapropter, cum de omnibus agere hæc eadem convenit, præcipimus atque præsentis decreto sancimus ut de abbacia sancti Augustini, quam divæ memoriæ Carolus imperator fidei suo et filio Ecclesiæ nostræ ante jure beneficiario tribuit, nullus de ipsiis rebus aliquid injuste auferre præsumat; nec prædicto episcopo, et monachis ipsius loci aliquam in distrahendo illicite inferre molestiam. Quod si quis abhinc agere præsumperit, separetur a communione fidelium Ecclesiæ : quod si pertinaciter perstiterit, et emendare noluerit, judicio sancti Spiritus anathematis vinculo feriat. *Data ut supra.*

CLXXXVI.

AD EPISCOPOS IN REGNO LUDOVICI CONSTITUTOS.

(Anno 879.)

Rescribit de indulgentia eorum qui contra paganos pugnantes occubuerant.

Omnibus reverendissimis et sanctissimis venerabilibus coepiscopis per totum regnum charissimi filii mei Ludovici.

Quia veneranda fraternitas vestra modesta interrogatione sciscitans quæsit utrum hi qui pro defensione sanctæ Dei Ecclesiæ et pro statu Christianæ religionis ac republicæ in bello nuper ceciderunt, aut de reliquo pro ea re casuri sunt, indulgentiam possint consequi delictorum, audenter Christi Dei nostri pietate respondemus quoniam illi qui cum pietate catholicæ religionis in belli certamine cadunt, requies eos æternæ vitæ suscipiet, contra paganos atque infideles strenue dimicantes, eo quod Dominus per prophetam dignatus est dicere : *Peccator quancumque hora conversus fuerit, omnium iniquitatum illius non recordabor amplius* (Ezech. 18), et venerabilis ille latro in una confessionis voce de cruce meruit paradysum (Luc. xxvii). Manasses quoque, imperrissimus quondam rex, captus carcerique artissimo religatus, ibi pœnitentiam agens, cum perfectione indulgentiæ, etiam regni pristini, propter Domini misericordiam, quia immensa est circa genus humanum, adeptus est solium (II Par. xxxiii). Nostra præfatos mediocritate, intercessione beati Petri apostoli, cujus potestas ligandi atque solvendi est in cælo et in terra, quantum fas est, absolvimus precibusque illos Domino commendamus. Optamus fraternitatem vestram in Christo bene valere. *Data ut supra.*

CLXXXVII.

AD WIFREDUM EPISCOPUM VENCIENSEM,

(Anno 879.)

Episcopum qui cum excommunicatis communicat, missarum celebratione prohibet.

WIFREDO venerabili episcopo sanctæ Venciensis Ecclesiæ.

Auctoritate Domini nostri Jesu Christi, et sancti Petri apostolorum principis, nostrique apostolatus, quia cum excommunicatis communicasti, ut litteræ tuæ manifestant, omni te missarum celebratione privamus, donec in nostram cum eisdem hominibus occurras præsentiam : et si, quod non optamus, amplius præsumptor exstiteris, denuntiamus te omni sacerdotio fore nudandum. Data *ut supra*.

CLXXXVIII.

AD ODNEM EPISCOPUM BELLOVACENSEM.

(Anno 879.)

Decernit, impuberes, qui alium occiderant, post peractam pœnitentiam ordinari posse.

ODONI venerabili episcopo Bellovacensi.

Relatu didicimus quorundam monachorum sancti Dionysii cœnobii quod quibusdam pueris impuberi adhuc ætate inter se rixantibus, hominum illorum instigatione unus ex illis est interemptus. Quapropter mandamus ut si inculpabiles post peractam pœnitentiam legitimi vigoris secundum canones reperti fuerint, gradatim ad ecclesiasticos ordines eos provehere non differas, servatis in omnibus Patrum regulis et canonum institutis. Data *ut supra*

CLXXXIX.

AD AIMARUM ET WIDONEM EPISCOPOS.

(Anno 879.)

Ut Rostagni uxorem ad se venire jubeant, illiusque adjutores, nisi resipuerint, communionem privent.

AIMARO et WIDONI reverendissimis episcopis.

Hortamur sanctitatis vestræ fraternitatem, sacerdotalemque zelum vestri vigoris apostolica auctoritate incitamus Bertildi, Rostagni illustris viri conjugii, quæ, spreto Dei timore ac lege tori, fugabunda per vestras parochias incedens, multoties ab episcopis et synodo vocata, surda aure venire distulit, omnem necessitatem imponite veniendi eorum nostra præsentia, ut ejus causa legaliter finem accipiat. Illiusque in tam perverso opere adjutoribus aditum acque communionem totius sanctæ Ecclesiæ tandiu intercludite, donec ab omni sequestrent prædictæ Bertildis consortio ^a. Inter quos Achetium mœchum, eoque consortio private, vestroque zelo percutite. Quæso, moneo, hortor, fratres charissimi, citissime amplectendam exhibetepresentiam ; iterum iterumque jubemus, omni postposita vocatione [occasione] ad nos festinanter venite : quatenus, Christo Domino miserante, in hoc et aliis negotiis communi consilio terminum salubriter imponere valeamus, Data *ut supra*.

CXC.

AD WALAM EPISCOPUM METENSEM.

(Anno 879.)

Ne cogatur sponsus uxorem ducere ab alio corruptum.

Reverendissimo et sanctissimo WALENO venerabili episcopo Metensi.

^a Hæc verba, *Bertildis consortio*, non habet editio Romana, sed ponit nullo sensu, *juravit spiritali* : tum sequitur ut hic ; *inter quos*, etc. MANSI.

Præsentium portitor litterarum, Alpertus nomine, lacrymabiliter coram nobis veniens questus est de sponsatam suam, nomine Walatam, adhuc in parentum domo manentem adulterino concubitu a presbytero quodam prægnantem repertam. Quæ confessa de crimine, libenter ab eo se vult dissociare : sed tua fraternitas pro quadam parentelæ affinitate, coacte eum cogit eandem sumere in conjugium, contra regulas Patrum atque institutionem. Quapropter, si ita est, requisitis super his legum et canonum institutis, quid de talibus præcipiant promulgate absque personarum acceptione. Data *ut supra*.

CXCI.

AD JOANNEM EPISCOPUM TICINENSEM.

(Anno 879.)

Ut cum quodam, qui pœnitentiam quinquennio egerat, remissius agat.

JOANNI venerabili episcopo Ticinensi.

Lator præsentium coram nobis veniens dicit se a prædecessore vestro Liuttefredo venerabili episcopo, quinquennio exacto jam anno, pœnitentiæ fuisse submissum, pro quodam, eo quod interfuit, fure a femina interempto : qua de re vestra fraternitas solerter prospiciat. Et, si ita est ut hic asserit, propter Domini misericordiam, quoniam magna est, cum eodem consultius agat, et prout ordo causæ dictaverit, frenum canonici vigoris remittite. Vel si quidquam, quod non optamus, impossibile perpensum fuerit, id nostro judicio vestra fraternitas studeat lenitate spiritus reservare. Data *ut supra*

CXCII.

AD AGINULFUM EPISCOPUM GABALITANUM.

(Anno 879.)

Ut præsentium latoribus ablata restituenda curet.

JOANNES AGINULFO venerabili episcopo Gebaldanensi.

Præsentium latores questi sunt ab hac sede plebem suam eisdem sublatam. Quapropter apostolica auctoritate tuæ fraternitati præcipimus ut, inquisita rei veritate, quod justum est unicuique reddere sacerdotali sollicitudine pervestiget, et quæ ipse diffinire non poteris, [referre ad nos] modis omnibus non prætermittas.

CXCIII.

AD BISUNTINENSEM ARCHIEPISCOPUM.

(Anno 879.)

Significat se Fulcardum ejusque conjugem ab excommunicatione absolvisse.

THEODORIO venerabili episcopo Bisuntinensi.

Notum sit sanctitati vestræ, quia Fucardum et Berelindam, uxorem ejusdem, ab excommunicationis vinculo absolvimus, donec canonica regula exacte reperiamus judicium. Unde a vobis in communionem

eos recipi mandamus. Optamus fraternitatem vestram bene valere. Data *ut supra*.

CXCIV.

AD GAIDERIM PRINCIPEM BENEVENTANUM.

(Anno 879.)

Consolatur eum de damnis ab Agarenis illatis, auxilium pollicetur, sequē in ejus partes venturum.

Dilecto filio GAIDERI glorioso principi Beneventanorum.

Epistolas sane a vestra dilectione transmissas eum parte gratulationis, fateor, etiam et mœroris accepi; quantoque in eis gaudens exsultavi vestram devotionem intimo mentis affectu circa obsequium sanctorum apostolorum Petri, Pauli compertam, tanto nihilominus triste pastoralis sollicitudine tuli, pressuris atque Agarenorum deprædationibus terræ vestræ auditis. Quapropter eum vase electionis compellor dicere et lacrymabiliter exclamare: *Quis infirmatur, et ego non infirmor? quis scandalizatur, et ego non uror? (II Cor. XI.)* Sed inter hæc meminisse debemus illius qui ait: *In mundo pressuram habebitis, sed confidite, quoniam ego vici mundum (Joan. XVI);* et apostolus: *Major est qui in vobis est, quam qui contra nos est (I Joan. IV).* Quocirca, dilectissime fili, hortor, admoneo, apostolica auctoritate suadeo, interim patienter Domini misericordiam deprecando continuis obsecrationibus malorum sufferre gravamina. Quoniam nos, Christo opitulante, ad patriæ vestræ liberationem pro virum facultate tantum præ cæteris mortalibus habebitis adiutorem enixius, quantum attentius compatimur; quod rebus ipsis præsentialiter sub [f. abundat sub] redderemus, nisi in itinere penitus hoc tempore equorum pabula defecissent, quibus statim gressus movere in veniendo prohiberetur. Sed Redemptoris nostri gratia duce, peracta solemnitate paschali, venire ad vestra partes accelerabimus; et una vobiscum positi, quidquid consilii, quidquid solatii atque adjutorii pro Christiani populi liberatione adinvenire poterimus, libentissime procurabimus. Optamus gloriam culminis vestri in Christo semper bene valere. Data *ut supra*.

CXCIV.

AD AIONEM, EPISCOPUM.

(Anno 879.)

Commentat ejus erga se observantiam; certiores eum de sua incolumitate reddit, tum consolatur de obitu fratris.

Reverentissimo et sanctissimo confratri nostro AIONI venerabili episcopo.

Quod veneranda fraternitas tua pro sanctarum Dei Ecclesiarum sublevatione longe ab Urbe aliquandiu nostram absentiam benigna animi compassione condoluit, viscera mentis suæ repleta Christi charitate patenter ostendit, et debitam, imo mutam dilectionem sanctis Dei apostolis per nos condigne studuit conservare, a quibus procul dubio meritorum retributionem in finem recipiet. Sospitatem quam in

A nobis vestra sitibunde atque ardentem requirit fraternitas, Domino donante, eam parte corporis aliquatenus habere videmur; sed inter tot fluctus mundi tantasque undarum procellas, quæ salus istius vitæ potest esse saltem ad momentum tranquilla? præsertim morte vestri germani audita, vestris filiorumque charissimorum tam crebris tribulationum angustiis. Sed inter hæc nos convenit toto conamine mentis ad illam patriæ cœlestis vitam corda sustollere, in qua pax semper inest, et vera securitas: quoniam *quandiu sumus in corpore, juxta Apostolum, peregrinamur a Domino, vobis vestræque patriæ secundum officium a Deo nobis collati ministerii, pro virum impossibilitate inhianter cupimus impertiri solatium. Data ut supra.*

B

CXCVI.

AD DAFERIUM COMITEM.

(Anno 879.)

Consolatur Daserium, eique opem pollicetur.

Dilecto filio illustri nobili viro DAFERIO comiti.

Perfectionem cordis Gaideris principis, consanguinei vestri, vestramque in Deum valde gaudemus, obsecrantes ut qui cœpit in vobis, operetur atque perficiat opus bonum usque in finem. Tribulationibus atque angustiis vestris in tantum compatimur, ut vestros dolores manu cogitationis in nostro corde tangamus; sed confidimus in æterni conditoris misericordia, quia in proximo aderit ejus auxillium, qui per prophetam admonet dicens: *Invoca me in die tribulationis tuæ, eripiam te, et magnificabis me (Psal. XLIX):* nos etenim in tantum paratos habetis in vestrum adiutorium, ut cum opportunum tempus fuerit, pro fratribus animam ponere non recusemus. Equum quem nobilitas vestra petit, cum vestros fines attigero, dare me vobis libenter denuntio. Data *ut supra*

CXCVII.

AD ROMANUM ARCHIEPISCOPUM RAVENNATEM.

(Anno 879.)

Præcipit ut Romam ad synodum cum suffraganeis accedat.

D Reverentissimo et sanctissimo confratri nostro ROMANO archiepiscopo sanctæ Ravennatis Ecclesiæ.

Canonicis sanctorum Patrum jubentibus regulis bis per annum concilia episcoporum esse omnimodis celebranda (*Nicæni concilii cap. 5*), nos ob id pro multiplicibus Ecclesiarum Dei utilitatibus et necessitatibus synodum octavo Kalendas Maias, Domino annuente, celebrare cupimus. Ideo jubemus dilectioni vestræ ut, omni mora postposita, vos cum omnibus suffraganeis vestris episcopis prædicto tempore Romam venire studeatis, quatenus eandem synodum nobiscum æqualiter celebretis ac de communi salute consideretis. Data III Nonas Martias.

CXCVIII.

PRIVILEGIUM PRO MONASTERIO PLACENTINO.

(Anno 879.)

[Ex Campi, *dell' Hist. eccl. di Piacenza*, pag. 164.]

JOANNES episcopus, servus servorum Dei, dilectæ filiæ ANGILBERGÆ, imperatricis Augustæ.

Ex largitate nostri Redemptoris semper sunt annuenda ea quæ ad tuitionem rerum ecclesiasticarum et piorum locorum esse noscuntur. Quapropter monasterium Caput Trebiæ, quod Carolomannus rex per præcepti donationem, et perennem firmitatem monasterio tuo quod in honore sanctæ Resurrectionis Placentiæ construxisti, cum omnibus pertinentiis suis pro remedio animæ suæ suorumque prædecessorum condonavit; petis, filia dilectissima, ut super hoc apostolicæ auctoritatis sanctionem firmemus. Ideoque justis petitionibus tuis eotenus apostolica auctoritate effectum annuimus, ut a modo et deinceps supradicti loci, si quis regum vel cujuslibet potestatis homo ratam et stabilem donationem irrumpere, aut alienare, seu quamlibet violentiam temerario ausu præsumpserit inferre, sciat se a nostra communione divelli, et anathematis vinculo innodatum cum Anania, et Sapphira, et Juda traditore portionem nihilominus habiturum. Et si hæc nostra jussa obedienter observaverit, Dei omnipotentis benedictionem, et sanctorum apostolorum Petri et Pauli mereatur accipere plenissima largitate. Cæterum quod ad ecclesiasticæ ordinationis rationem pertinet ac ministerium, id est chrismatis, vel cujuslibet sacerdotalis officii, si episcopus ejus loci aliqua causa ductus, contra jus et rectitudinem quamlibet gravationem et superpositum ibidem inferre præsumpserit, cunctum inde penitus ordinationis jus et potestatem amittat, et liceat ei qui præfuerit monasterio, quemcunque voluerit, ad totius ecclesiæ officii ministerium invitare.

Scriptum per manum Gregorii scriniarii sanctæ Romanæ Ecclesiæ, in mense Martio, indictione duodecima, iv Kal. Aprilis, per manum Zachariæ episcopi sanctæ Ecclesiæ Anagninæ, et bibliothecarii sanctæ sedis apostolicæ, anno, Deo propitio, pontificatus domini nostri Joannis summi pontificis et universalis papæ VIII septimo in mense Martio, indictione duodecima.

CXCIX.

AD ROMANUM ARCHIEPISCOPUM.

(Anno 879.)

Ut Luponem presbyterum in Sarcennati Ecclesia episcopum ordinet.

Reverendissimo et sanctissimo confratri nostro ROMANO archiepiscopo sanctæ Ravennatis Ecclesiæ.

Relatione quorundam comperimus quod eum quem vobis ordinandum episcopum sanctæ Sarcennati Ecclesiæ. Luponem videlicet venerabilem presbyterium [*f. deest.* mandavimus], postposito nostræ voluntatis et jussionis mandato, consecrare postponatis, sed alium pro eo cupiatis nihilominus ordinare :

A quod sane, si verum est, valde miramur, vos a spon- sione quam nobis polliciti estis, quolibet modo vel occasione velle retrahere. Unde more paterno dilectionem vestram his nostris apostolicis monemus, hortamur atque jubemus, apicibus, ut vestræ promissionis memores, præfatum Luponem presbyterum, sicut vobis commissum continuo ac præsentialiter jam dictæ Ecclesiæ antistitem ordinatis [nam si aliter feceritis, et tam cito, ipso scilicet vestræ ordinationis ^a] initio vos a nostræ voluntatis decreto subtrahere cognoverimus, canonicis correctionibus, velut inobedientem corripere nullatenus prætermit- temus.

CC.

AD ANSPERTUM ARCHIEPISCOPUM MEDIOLANENSEM.

(Anno 879.)

Ut Romam ad synodum celebrandam eum suffraganeis accedat, ubi de imperatoris electione agatur; jubet ne quemquam regem excipiat, antequam ipse imperatorem elegerit: nisi paruerit, eum excommunicat.

Reverendissimo et sanctissimo ANSPERTO archiepiscopo sanctæ Mediolanensis Ecclesiæ.

Quantæ necessitatis assidue sustinuerimus incommoda, quantæque perturbationis nunc usque passi sumus et quotidie, patiamur adversa, fraternitatem vestram nosse luce clarius non ignoramus: pro quibus nimirum malis sedis apostolicæ ab inimicis nequiter illatis, per procellas et in periculosa maris itinera ire et defensionis auxilium nos quæsisse mecum pariter seitis. Sed quia humanum præsentialiter subsidium non reperimus, divinum ut potius quæramus communique voto ut a Domino flagitemus, frater mi, necesse est. Propter quod fraternum sanctitatis vestræ collegium his nostris apostolicis litteris more præcessorum nostrorum vocamus, et in consortium nostræ sollicitudinis apostolica duntaxat auctoritate asciscimus; et quasi membrum capiti suo adhærens ad Kalendas Maias hujus duodecimæ indictionis ad synodam, auxiliante Domino, nobiscum celebraturos cum omnibus; suffraganeis vestris episcopis Romam venire jubemus, ut superba gratia freti, ea quæ necessario sunt amputanda ecclesiastico reseceamus mucrone; et quæ utiliter sunt statuenda communi, Deo propitio, statuimus decreto; ne per vestram absentiam atque desidiam regnum hoc amplius in perturbatione persistat et fiat scandalum pejus priore. Et quia Carolomannus, corporis, sicut audivimus, incommoditate gravatus, regnum retinere jam nequit, ut de novi [*f. deest* electione] regis omnes pariter consideremus, vos prædicto adesse tempore valde oportet: et ideo antea nullum absque nostro consensu regem debetis recipere. Nam ipse qui a nobis est ordinandus in imperium, a nobis primum atque potissimum debet esse vocatus atque electus, quoniam et nos una cum vestra fraternitate cupimus pertractare et de hoc et quo tenere vel ordine communes causas et utilitates Ecclesiarum Dei nobis commissarum ordinemus et jure canonico statuamus: quate-

^a Unis inclusa supplevit ex edit. Rom.

nus tantorum malorum onera quæ sustinemus procul abjicere, et leve jugum Christi lætis, ut concedet, possimus cervicibus ferre. Quapropter nullam in veniendo excusationem habeatis, sed alacri mente occurrere et ad jam dictam synodum venire procuratis, quam sane et canonica sanctorum Patrum regula bis in anno fieri jubet, et instantis temporis necessitas magna compellit. Nos enim paterno vos affectu diligentes pro communi utilitate vocamus, quamvis jam tertio jampridem dilectio vestra vocata ad synodum venire contempserit. Pro quo dignam debueratis correctionis sustinere censuram, cum a sede apostolica vobis semper fuisset collatum præsidium, et vos nullum in quibus oportebat studeretis præbere solatium : nunc autem, si ad eandem synodum venire contempseritis, scilicet canonicam a nobis in vos velut inobedientes promulgari sententiam.

CCI.

AD ATHANASIAM EPISCOPUM NEAPOLITANUM.
(Anno 879.)

Commendat ejus erga se observantiam; de suo incolumi reditu certiorum ipsum facit; hortatur ad perseverantiam, donec simul conveniat.

Reverendissimo et sanctissimo ATHANASIO episcopo Neapolitano.

Quia non solum tuis præcipue actibus, quibus devotionem sanctitatis tuæ circa nos fidelissimam ostendisti existere, verum etiam nobis longe pro Ecclesiæ statu manentibus quomodo eam illibatam in omnibus conservaveris, fidelium nostrorum relatione didicimus. Quamobrem dignas tuæ dilectioni referimus grates, innotescentes sane nostri præsulatus reversionem juxta desiderium tuum esse, Deo favente, prosperam atque incolumem. Ideo more apostolicæ paternitatis almitatem tuam monemus, cum Apostolo dicentes : *Confortare in Domino, et in potentia virtutis ejus quoniam fidelis est Deus, qui non deseret sperantes in se tentari supra quam possunt, sed faciet cum tentatione proventum, ut possitis sustinere* (Ephes. vi; I Cor. x), Tua igitur reverentia in his instantis adversitatis casibus aliquatenus non frangatur; quin potius in Deo confidens roborata consistat, donec, Christo adjuvante, nos vobiscum speciali præsentia juncti simul loquamur. Quia tunc, Deo permittente, cuncta quæ necessario statuenda sunt communi eloquio atque consensu pertractata pro venire credimus in salutem. Tamen nostræ voluntatis affectum per Petrum venerabilem diaconum tuum communemque fidelem tuæ dilectioni innotescendum mandavimus, quoniam te quasi proprium filium diligentes in omnibus nostris volumus habere consortem. Data ut supra.

CCII.

AD EUMDEM.
(Anno 879.)

Ejusdem argumenti ac præcedens.

Reverendissimo et sanctissimo ATHANASIO episcopo sanctæ Neapolitanæ Ecclesiæ.

Multas gratiarum actiones atque salutes almitatis vestræ bis nostris apostolicis referimus litteris, quia

A nobis pro communi utilitate longe consistentibus, quasi præsentibus sinceritatem devotionis et fidei vestræ circa sanctam Romanam Ecclesiam matrem vestram, nostrumque pontificium, atque circa fideles nostros promptam in omnibus ostendere procuratis. Quamobrem nulla inimicorum versutia vel calliditas vos a bono mentis proposito in aliqua sinistra cogitationis aut voluntatis partem inclinet; sed sicut cœpistis, perficere omnimodo satagite, quia et meritum et condigna retributio vobis, Christo favente, provenit. Nam licet inimicorum nos præpediente fraudulenta nequitia, non omnia quæ volebamus ex toto potuissemus perficere, nunc tamen, annuente Domino, quod ad honorem sanctæ Dei Ecclesiæ et istius terræ salutem vestramque defensionem pertinent, jam cœptum habemus, credimus nos incunctanter acturos. Proinde hortamur nihilominus et monemus dilectionem vestram ut sicut hactenus, ita deinceps viriliter ac firmiter consistatis, donec speciali præsentia adjuncti simul loquamur, et pro communi salute pariter laborantes totis conatibus desudemus. Quoniam velut charissimum te filium retinere cupientes, benigne amplectimur, et tecum in omnibus congratulari feliciter cupimus, quia, ut dictum est, pro certo scias te dignam nobis compensationem esse procul dubio recepturam. Hunc vero diaconum tuum, qui pro tuo amore in nostro servitio tanto tempore fideliter mansit, sanctitati vestræ in omnibus commendamus, ut dignum a vobis recompensationis honorem percipiat. Data ut supra.

CCIII.

AD EUMDEM.
(Anno 879.)

Ut sibi indicet locum ubi simul possint de communis patriæ salute colloqui.

Reverentissimo et sanctissimo dilectoque confratri, et consiliario nostro ATHANASIO episcopo sanctæ Neapolitanæ Ecclesiæ.

Scientes vos procul dubio fideles in omnibus atque devotos esse sanctæ sedi apostolicæ nostræque paternitati, totis præcordiis nostris fraternitatem vestram oppido diligimus et amamus: quamobrem pro multiplicibus instantis temporis necessitatibus atque communibus utilitatibus vobis cum speciali præsentia loqui cupimus, quatenus vestro consilio communique tractatu ea quæ necessario sunt consideranda perspicaciterque tractanda salubriter, Domino annuente, ordinare statuereque possimus. Quoniam nostræ ac vestræ terræ salutem, totius videlicet populi pretioso Christi cruore redempti, pastorali duntaxat more desideramus perficere, et ideo, ut pertinax inimicorum comprimator audacia, vobiscum pariter cupimus convenire. Quapropter volumus ut locum etiam nostræ colloquutioni, quem aptum esse cognoscetis, nostro præsulatui vestris sub celeritate significetis apicibus. Quia nos, Deo propitio, illuc sine mora properare et una vobiscum alacriter loqui non prætermittimus. Data ut supra.

CCIV.

AD CAROLUM REGEM.

(Anno 879.)

Hortatur ut legatos mittat, et in auxilium Ecclesiæ Romanæ veniat.

CAROLO regi.

Regalis excellentiæ vestræ litteras recipientes atque relegentes, ut in eo quod antea nostro præsulatu direxistis, vestro videlicet amore dilectioneque maneremus, non solum, ut jam olim retulimus, verum etiam magis ac magis nostræ voluntatis affectum ad vestræ exultationis cumulū ampliāre magnopere cupimus, atque in omnibus ceu charissimum filium vos retinere procul dubio satagemus. Tantum ut quo celerius, sicut mandastis, vestros idoneos legatos ad nos dirigere potestis, aliquatenus non prætermittatis; cum quibus sane et exaltationem sanctæ sedis apostolicæ, et istius terræ salutem, vestrumque honorem profligare [*f. investigare*] considerareque firmissime valemus. Et ideo vestræ magnitudinis gloriam exhortamur ut præcingentes quasi vir lumbos tuos, et potentiæ Dei brachio adversus inimicos potentissime roborati, jam ipsi venire non dubitetis; quoniam si tantæ calamitatis pressuram, quam sancta Romana mater vestra Ecclesia et ipsius terra quotidie ab inimicis patitur, cognovissetis, nobiscum utique pariter doleretis. Quapropter, fili charissime, antequam inimicorum insidiæ plus accrescentes prævaleant, nostram devotionem atque consilium pio intuitu attendere nullo modo desinatis, sed more parentum vestrorum ea quæ necessaria sunt nobis, instantissime peragatis, quia nostri apostolatus ulnis extensis alacriter amplecti regalem præsentiam vestram desideramus. Tertio Nonas Aprilis, indiet. XII.

CCV.

AD WIBERTUM EPISCOPUM.

(Anno 879.)

Arguit eum quod bis vocatus ad se venire neglexerit; præcipit ut veniat objectis responsurus.

Reverendissimo et sanctissimo WIBERTO venerabili episcopo.

Jam enim sanctitati tuæ his misimus ut ad nos venires, sed ignoramus qua temeritate non obedias; iterumque mittimus ut, omnibus tuis posthabitis seriis, ad nos præsentialiter acceleres, quoniam multi supra te reclamant, maxime hic senex qui ob hoc jam Romam venit pro suo monasterio. Cæterum sapias, si venire distuleris, te excommunicandum, si perseveraris in tua [*f. deest*] obstinatione] etiam a communione alienandum. Data ut supra.

CCVI.

AD BERENGARIUM COMITEM.

(Anno 879.)

Declarat suam in eum benevolentiam, commendat ejus erga Romanam Ecclesiam observantiam; rogat ut Stephanum episcopum in tuendis Ecclesiæ suæ juribus adjuvet.

Dilecto filio BERENGARIO glorioso comiti.

A Quia præcessores nostros, sacros videlicet pontifices, imitantes, qui gloriosos progenitores vestros dignis semper honoribus glorificaverunt, vos quasi dilectum et spiritalē filium paterno cupimus affectu diligere et gloriosum in omnibus retinere. Nam sicut per Demeum eximium ducem et fidelem nostrum nobis intimando mandastis, quod erga sanctam sedem apostolicam et nostram paternitatem vos in omnibus devoti et obediētes esse deberetis, omnemque nostram voluntatem quasi filius charissimus adimpleretis, multum fuimus gavisi: sed quia iterum per Petrum venerabilem episcopum et Joannem insignem ducem vobis mandavimus, ut adjuutores fuissetis Stephano venerabili episcopo, quem nos in Comiaclo præordinavimus, quatenus vestro auxilio adjutus Ecclesiæ suæ jura et possessiones atque ipsius curam ducatus retineret securus, et vestro minime audivimus adjutum esse auxilio, valde miramur. Quapropter rogamus nobilitatem tuam ut tale jam dicto episcopo nostro adiutorium faciatis, per quod suam Ecclesiam et ministerium sibi commissum securiter retinere atque disponere valeat. Et si forte, quod non credimus, vestra est circa nos voluntas mutata, ut audire nos de hoc non cupiatis petimus ut pro amore Dei et nostro omnes vestros homines prohibeatis aliquam ibi nostris contrarietatem facere, ut absque illorum impedimento nobis illos liceat secundum nostram possibilitatem castigare, veluti rebelles et inobediētes nostræ apostolicæ jussioni ne censum, quem his annis transactis duobus exinde perdidimus, et istius anni perdamus. Data ut supra.

CCVII.

AD PANDENULFUM COMITEM.

(Anno 879.)

Rogat ut legatis imperatoris peregris regionem transiituri auxilium præstet; condolet de paganorum in eum incursione: excusat se, cur ad eum non eat: hortatur ut sil animo forti, promittitque subsidium.

Dilecto viro PANDENULFO glorioso comiti.

Multiplices nobilitati vestræ his nostris præsulatus apicibus gratias agimus, qui vestram devotionem atque dilectionem, quam nostræ voluntatis præceptis parendo alacriter ostendistis, in omnibus sinceram et obediētem fore incunctanter agnoscimus, cum præsentem hunc Græcum imperialis bajuli hominem nostris direxistis obtutibus præsentandum incolumem. Sed quia imperiales missi, ceu in ipsius bajuli reperimus litteris, per vos transituri sunt, quatenus ad nostram apostolicam præsentiam veniant, petimus nobilitatem vestram ut pro nostro amore et ipsos vestros auxilio munitos prospero, annuente Domino, nobis itinere dirigatis. Quod autem multiplice paganorum incursione vos gravatos asseritis condolemus, maxime quia vestri concives circunquaque positi cum eisdem perditionis filiis fœdus

^a Comiti Capuano, ut ex epistola 209 constat. Ejus meminit Leo in Chronico Cassinensi, lib. 1, cap. 43.

inire procurant : quamobrem nostram his vestris in partibus necessario præsentiam præstolamini adfuturam. Nos vero, sicut jam pridem mandavimus, pro communi duntaxat utilitate atque salute omni anxio venire magnopere cupimus, quamvis et de assidua corporis incommoditate et de peracto jam Franciæ itinere adhuc maneamus defessi. Nunc igitur ante prædictorum imperialium missorum adventum illuc properare ne possumus ; cum vero eorum legationem nobis delatam congruis, Deo propitio, responsionibus utentes audierimus, tunc quid utilius agendum sit pro viribus agere omnino curabimus. Vos tamen in Domino confidentes animo estote constanti, qui non deserit confidentes in se, ut inter cæteros vestros proximos atque vicinos efficaciores ac potiores in omnibus appareatis, quoniam nostro apostolico vos præsidio, prout opportunum fuerit, quasi charissimos filios adjuvabimus. *Data ut supra.*

CCVIII.

AD ARCHIEPISCOPOS, EORUMQUE SUFFRAGANEOS.

(Anno 879.)

Ne Biebertinum ante causæ discussionem excommunicent.

Reverendissimis et sanctissimis confratribus nostris, AURELIANO ET OTTERMANO, necnon et THEODORICO, et universis coepiscopis vestris.

Omnium vestrum sanctitati notum esse volumus venisse Biebertinum, deferentem imperatoris præceptum et commutationis chartulam de rebus quas charius cum Amulo archiepiscopo dudum celebraverunt. Insuper nostro apostolatu intimavit ut cum sine ratione discussa excommunicare vultis. Quapropter apostolica auctoritate jubemus ut nemo vestrum eum excommunicet, antequam ad legis examen proveniat. Scitote, quemadmodum in centesimo capitulo Africani concilii legitur, similiter in secundo novellarum Justiniani libro, ut nemo episcopus aut presbyter aliquem excommunicet antequam causa probetur. Qui excommunicatus majorem sacerdotem adeat, et illæ qui injuste excommunicavit, ab ipso juste patiatur. Et nemo vestrum, aut quilibet laicorum præfati, res ante legis sanctionem invadere audeat. Nam, quod non credimus, si quis contra hanc nostram apostolicam auctoritatem ire tentaverit, sciat se anathematis vinculo innodatum. *Data ut supra.*

CCIX.

AD BOSONEM COMITEM.

(Anno 879.)

De incoluni ejus prosperitate gratulatur: se tum cum, tum Angelbergam imperatricem charos habere ostendit: rogat ut Adelberto et illius conjugis Rotildæ bona quæ in provincia possederant, retinere permittat.

Dilecto filio Bosoni glorioso principi.

Quia litteris nobilitatis vestræ relectis, vos incolunes cum optata prosperitate vigere didicimus, plurimum sumus læti effecti ; nam vestræ dilectionis amore apostolica semper cupimus benignitate manere

A devoti, et ea quæ vobis utilia vel proficua esse videntur, alacri duntaxat mente perficere, nec pro aliquo homine vestram nobis dilectam amicitiam relinquamus, sed pio potius intuitu in omnibus conservare illasam. De parte autem spiritualis filiar nostræ Angelbergæ imperatricis, charissimæ matris vestræ, pro certo citote quoniam paterno eam affectu semper dileximus, et quandiu, auxiliante Domino, vixerimus, diligere nostroque apostolico subsidio adjuvare tuerique magnopere desideramus, necnon et quasi charissimam et spiritalem filiam gloriosius retinere. Porro de vestræ voluntatis actione, quam dicitis exhibere, nos sine dubio in vestra amicitia constantes habebitis. De parte quoque Adelberti gloriosi marchionis, seu Rutildæ comitissæ conjugis ejus, cognoscat nobilitas vestra quod vobis in omnibus fideles et devotos amicos eos esse cognoscimus ; ideo rogamus ut eorum comitata in provincia posita, sicut jam tempore longo tenuerunt, ita deinceps pro nostro amore securiter habeant. Optamus gloriam vestram nunc et semper in Christo manere perpetuam. *Data ut supra.*

CCX.

AD LIUDTEFRIDUM COMITEM, EJUSDEM CONJUGEM.

(Anno 879.)

Excommunicat eos, quia moniale monasterio rapuerant.

LIUDTEFRIDO comiti et conjugi suæ.

Quia contra divina et legum præcepta temerarie agere non erubuistis, ita ut, calcato Dei timore, Garelandam sacro velamine tectam, et in monasterio Angelbergæ dilectæ filiar nostræ imperatricis Augustæ sub professione regulari diutissime conversatam, quod Placentiæ situm est, abstrahere fraudulentissima suasione ausi fueritis ; tandiu te tuamque conjugem auctoritate sancti Spiritus Domini nostri a corpore et sanguine Domini nostri Jesu Christi separamus, et a consortio Christianitatis, donec prædictam feminam Garelandam, loco unde deganastis, restituatis. Quod si hoc neglexeritis, anathematis vos vinculis innodamus. *Data ut supra.*

CCXI.

AD GREGORIUM PRIMICERIUM.

(Anno 879.)

Commendat ejus studium erga Ecclesiam et imperatores; significat se ad Constantinopolitanæ Ecclesiæ perturbationes sedandas paratum esse: ostendit imperatoris legatos honorifice se excepturum, quos etiam a comite Capuano recipi et ad se mitti jam antea mandarat.

Dilecto viro GREGORIO glorioso primicerio, et imperiali bajulo.

Litteris tuis, quas nobis per Stephanum candidatum fidelem tuum direxisti, relectis, devotionis tuæ sinceritatem et fidem, quam circa Ecclesiam Dei et gloriosissimos imperatores habes Augustos, enucleatius agnoscentes, plurimum collaudamus. Et ideo sacris orationibus nostris, sicut supplici voto postulasti, Domino commendare ut et a visibilibus et invisibilibus securus, ac victor existas, omnino

studemus. Et quia magno imperatori tuo Ecclesiam Dei pacificari volenti, nos ut favere debeamus hortaris, id juxta nostri officii magisterium prompta duntaxat agere voluntate divinitus adjuti curamus; quoniam, dicente Apostolo, Ecclesiarum Dei omnium nobis sollicitudo incumbit. Quapropter more prædecessorum nostrorum pontificum, Constantinopolitanam Ecclesiam multiplicibus scandalis nunc perturbatam, prout justum est atque possibile, sedare volumus, et pacem perpetuam stabilire. Præterea legati imperiales, quos ad nostra apostolica fastigia dicis esse directos, si venerint, competentem a nobis recipientur honore, et Augustalem per eos nobis delatam legationem clementer recipiemus; atque ipsius legationis textum et ordinem cognoscentes, una cum sedis apostolicæ nobis commissæ assensu, quantum fas est, pro Ecclesiæ Dei pace imperiali voluntati favere omnino studebimus. Pro quibus etiam missis Pandenulfo Capuano comiti scripsimus ut eos venientes recipiat, et pro nostro amore prospero nobis itinere, Domino annuente, dirigere studeat. Nunc ergo iidem missi præsentialiter Romam venire procurent, quia nos aliis causis impediti, istas in partes modo, sicut dispositum habuimus, properare non possumus. Data *ut supra*.

CCXII.

(Anno 879.)

Excommunicatio Ansperti quia ad synodum vocatus venire contempserat.

Anspertum Mediolanensem archiepiscopum, quem Papiæ existentes et postmodum ad synodum Romæ pro multis Ecclesiarum Dei necessitatibus collectam vocavimus, nec per se occurrere nec excusationem suam secundum sacros canones in tractoria scripta nobis et sancto concilio, causa temeritatis et inobedientiæ, dirigere nolentem, virtute sancti Spiritus et principum apostolorum Petri ac Pauli, nostraque auctoritate, cum consensu sanctæ synodi, corpore et sanguine Domini nostri Jesu Christi privamus, quousque suam nobis præsentiam exhibere procuret. Data *ut supra*.

CCXIII.

AD THEODOSIUM PATRIARCHAM HIEROSOLYMITANUM.

(Anno 879.)

Excusat tardum legatorum ejus reditum, per quos quedam munera ad eum mittit, rogans ut pro se assidue Deum deprecetur.

Reverendissimo et sanctissimo confratri nostro THEODOSIO patriarchæ sanctæ Hierosolymitanæ Ecclesiæ.

Notum esse volumus sanctitati vestræ quia præsentem monachi vestri, Theodosius videlicet, David et Saba, venientes Romam ad limina sanctorum apostolorum Petri et Pauli, demorati sunt ibi eo quod nos pro nostræ Ecclesiæ causis et utilitatibus Franciam perrexeramus. At ubi, Deo volente, reversi sumus incolumes, eis ad vestram paternitatem revertendi licentiam dedimus, per quos nimirum, causa charitatis, aliquam licet modicam beati Petri

apostoli benedictionem fraternitati vestræ mandavimus. Quam petimus ut pro Dei et ipsius apostolorum principis amore nostraque dilectione benigne recipiatis, quoniam nimia paganorum oppressione gravati, plura, ut volebamus, dirigere non potuimus. Rogamus præterea sanctam vestram in Domino charitatem ut in sanctis orationibus vestris nostri semper memores existentes, pro nobis preces Jesu Christo Domino nostro quotidie fundere alacri animo dignemini, carissime frater. Data VI Nonas Maii.

CCXIV.

AD CAROLOMANNUM REGEM.

(Anno 879.)

Ut in Vercellensi Ecclesia Gospertus Diaconus constituitur episcopus.

Dilecto et spiritali filio CAROLOMANNO glorioso regi. Multorum relatione didicimus quod Ecclesia Vercellensis nunc valde turbata et quotidianis commota scandalis consistat, dum in duas partes populus pro episcopi electione divisus, alii unum, alii vero alterum eligere habereque contendant et cupiant, electumque enormiter defendere uterque procuret. Sed quia juxta nostri ministerii apostolicum officium et sollicitudinem omnium Ecclesiarum Dei, nobis in ipso apostolorum principe commissam, juxta canonicam etiam sanctorum Patrum regulam dicentem: Si divisio clericorum vel populi exstiterit, et de futuri electione pontificis contentio fuerit oborta, nullum ex his duobus in throno episcopali esse aliquatenus consecrandum, sed alterius electionem fieri debere sacerdotis Ecclesiæ proprio destitutæ rectore, et ob id perturbatæ, jura pacis ferentes subvenire debemus. Regiam excellentiam vestram rogamus ut pro amore Dei et S. Petri, ac nostræ paternitatis dilectione, ipsum Vercellensem episcopatum huic nobilissimo viro, Gosperto videlicet venerabili diacono, vobis bene cognito communique fideli nostro ac vestro, quem pro ecclesiasticis utilitatibus in servitium vestrum direximus, placido de præsentia modo tribuatis. Quoniam vere cognoscimus hunc in omnibus tam civilibus quam etiam ecclesiasticis causis strenuum atque utilissimum fore, nobisque non mediocriter fidelissimum. Quapropter ad vestræ præsentis et futuræ gloriæ augmentum hoc vos nobis concedere petimus, hanc primam nostri pontificii justam petitionem vestra regalis alacriter perficiat magnitudo; et nos vestram libenti possimus animo perficere voluntatem charissime fili, quoniam sic veræ dilectionis unanimitate pioque amoris affectu videbimur manere cuncti, si nos ea que cupitis apostolica duntaxat perfecerimus auctoritate, et vos item vestro regali jure nostri desiderii preces audire cum judicunditate procul dubio studueritis. Talem namque progenitores vestros, invictissimos imperatores Augustos, circa decessores nostros, sanctos videlicet Romanæ sedis antistites, habuisse dilectionem recolimus, ut quidquid ab alterutra parte petebatur, omni postposita occasione mox efficaciter completeretur. Ita vero et nostra nunc pontificalis a

Deo conservata majestas et vestra regia magnitudo sibimet debent placide favere vicissim. Data ut supra.

CCXV.

AD CAROLUM REGEM.

(Anno 879.)

Hortatur ut quamprimum contra infideles et Ecclesie oppressores auxilio veniat.

Dilecto ac spiritali filio CAROLO glorioso regi.

Miramur quia vos sæpius exhortantes ut ad exaltationem sanctæ Dei Ecclesiæ vestrumque honorem et totius terræ nostræ defensionem venire vocavimus, et hactenus distulisti. Credere namque nobis potestis quod nimia undique tam paganorum quam malorum Christianorum persecutione gravati, undique concussi, talia quæ jam a longo tempore patimur sufferre nequimus : et ideo iterum admonemus ut toto conamine, sicut vobis mandavimus, procul dubio attendatis. Nam pro certo scire debetis quoniam pro nullius hominis lucro, vel blandimento, sive terrore, a vestro nos consortio et vestræ amicitiae fœdere separabimus; idcirco tantum viriliter agere ea quæ nobis ac vobis proficua sunt, nullatenus dubitetis. Sed præstolando vestrum adventum, diuque tardanter putavimus, ne forte Carolomanni gloriosi regis, germani vestri prædicti, aliquo impedimento jam venire nequissetis : unde illi nostram apostolicam direximus epistolam, admonentes quia si hoc regnum amplius taliter occupatum ac inordinatum et sine defensione tenuerit, animæ suæ detrimentum omnimodis fiet; nullumque vobis pro Ecclesiæ Dei defensione venientibus impedimentum aliquot facere præsumat. Quapropter quod agendum est vestra regalis excellentia agere nullo modo desinat; nam si per vos sancta Romana Ecclesia fuerit exaltata atque defensa, vester honor et gloria hic, et in futuro sine dubio coram Domino multiplicata manebit. Data ut supra.

CCXVI.

AD WIBBODUM EPISCOPUM.

(Anno 879.)

Ut una cum legatis quos ad Carolomannum mittit, eat, vel aliquem vice sua mittat; arguit, quod bona Angelbergæ diripi non prohibuerit: hortatur ut ea recuperanda curet.

WIBBODO episcopo.

Quoniam præ omnibus qui in his videntur consistere partibus, Deo dilectis sacerdotibus, te utpote charissimum filium et fratrem unanimem specialius diligimus, et pro tanta tuæ sinceritatis devotione quam circa nos et sedem apostolicam habere dignosceris, toto mentis affectu amplectimur, et idcirco reverentiam tuam pie nobis amore conjunctam cupimus apostolica semper benignitate fovere, auctoritate falcire. Nunc igitur dilectioni tue notum esse volumus quia pro tot et tantis calamitatibus, quas, sicut ipse bene cognosces, assidue patimur, hos præsentis missos nostros direximus, per te quasi per quoddam ostium intraturos spiritali filio nostro

A Carolomanno glorioso regi, cum quibus sane, aut ipse in servitium sancti Petri alacri mente ire, omnemque nostræ voluntatis causam et necessitatem apud eundem regem perficere studeatis, aut fidelissimum et idoneum a latere tuo virum dirigas qui vicem tuam in omnibus sagaciter possit explere. Nam tuo consilio et adjutorio... eosdem legatos nostros munias hortamur, quatenus sedis apostolicæ legationem, prout dignum est, et instantis temporis necessitas exigit, Deo propicio, perficere possint. Et quia eos sine tarditate ire ac reverti præcipimus, ne ultra tres dies illos penes te retinere procures; sed habito mox consilio quatenus salvi et securi ad jam dictum regem proficiscantur, aut nullatenus demorentur. Quod si fortasse ad Carolomannum pro ejus corporea infirmitate ire non posse contigerit, ad Carolum regem ipsius germanum eos quocunque modo proficisci facito. Præterea, veridico multorum relatu longe lateque resonante didicimus quod res et possessiones dilectæ ac spiritualis filię nostræ et sancti Petri commendatæ Angelbergæ imperatricis sint a quibusdam malefactoribus omnimodis deprædatæ, non solum quæ foris exstiterent in agris et villis, sed etiam quæ intus per venerabilia et non violanda loca sanctorum monasteriorum repositæ fuerant: pro quo scilicet tam immani scelere nefandoque piaculo sanetimoniam tuam merito redarguimus. Quoniam sacerdotii tui officium est male agentes auctoritate divina corrigere, verbisque salubribus cohibere, ne tacendo tales, proh dolor! imitari potius quam prohibere videaris. Est enim ex hoc pessima fama universum discurrens per orbem, quod dominam quondam et imperatricem vestram, cui vestram fidem per jusjurandum dedistis, male tractatis, cui pristinum honorem dignamque reverentiam semper exhibere debuistis. Nunc itaque pro amore sancti Petri, sub cujus speciali defensione consistit, eam adjuvare non prætermittas, quousque sua omnia quæ injuste perdidit, [*f. deest* recuperare] possit. Data ut supra.

CCXVII.

AD MICHAELUM REGEM BULGARORUM.

(Anno 879.)

Hortatur ut ad obedientiam Romanæ Ecclesiæ, a quo seductus recesserat, cum sua gente revertatur.

Dilecto filio MICHAELI regi Bulgarorum.

D Quia vos omnipotens Deus dono gratuitæ misericordiæ suæ gentemque vestram ad cognitionem sui nominis vocare dignatus est, meminisse debetis hoc quod Dominus beato Petro apostolo dicit: *Tu es Petrus, et super hanc petram ædificabo Ecclesiam meam* (Matth. XVI): cui vos in primordio christianitatis vestræ ad regendum commisistis ejusque successoribus ad obediendum. Sed nescio qua ratione ab ejus magisterio calliditate quorundam estis abducti, ita ut cum Apostolo dicamus: *Quis vos fascinavit ei non obedire, cui dudum colla submisistis* (Gal. III)? aut illis credidistis, ut pace Græcorum loquamur, qui quotidie novis et variis disciplinis atque dogmatibus

confunduntur? Sed quæso, fili charissime, ad sanctæ A matris vestræ Romanæ Ecclesiæ sinum, quæ caput est, institute Deo, omnium Ecclesiarum in toto orbe diffusarum, relictis superfluitatibus et seductionum scandalis, vos gentemque vestram amore mentis sine mora reducite, Quia in tantum vos affectione paterna diligimus, ut in visceribus Christi Jesu esse cupiamus. Et ecce parati sumus, ut vos lucrifaciamus, et quidquid legatorum nostrorum ofuscatione nuper offensum est, ad purum corrigere et omnia maturissime redintegrando curare; et si contigerit, non solum compati et condolere vobiscum, sed etiam pro salute animarum vestrarum mori non recusabimus, dicente Joanne apostolo: *Quoniam Deus pro nobis animam suam posuit, et nos debemus pro fratribus animam ponere (I Joan. III)*. Vestræ tamen dilectioni convenit monitis paternis benigno amore semper præbere assensum, et admonitionibus nostris accommodare auditum, quia ille cui a Domino claves regni cælorum ligandi atque solvendi collatæ sunt, quotidie et indesinenter expandit brachia, et vos revertentes ad se gratulenter exspectat; quatenus vos æterno pastori reddat compotes æternæ beatitudinis, a quo accepit ministerio sui apostolatus animas vestras redimere. *Data ut supra.*

CCXVIII.

AD CONSILIARIOS MICHAELIS REGIS BULGARORUM.
(Anno 879.)

Ejusdem arguænti.

PETRO, CERBULÆ et SUNDICÆ, cæterisque optima- C tibus consiliariis dilecti filii nostri Michaelis regis Bulgarorum.

Denique moneo vestram omnium dilectionem ut continuis adhortationibus atque suggestionibus dilecto filio nostro Michaeli glorioso regi seniori vestro annuntietis, vosque cum eo ad sinum sanctæ Romanæ Ecclesiæ, quæ vos æternæ beatitudinis cupit esse participes, redeat ac redeatis; ne diutius quorundam perversi dogmatis suasionibus perniciem ac detrimentum, quod absit, animæ vestræ patiamini, quoniam nos in tantum amorem super vos ducimur, ut quidquid juste et secundum Deum petieritis, a nobis impetrare valeatis, vestrisque petitionibus irrefragabiliter velimus effectum annuere. Hoc iterum iterumque monemus, et in verbo Christo edicimus, ut redire ad nos omnino festinetis; quia, sicut nos peccare timemus, si vos ad sinum sanctæ matris vestræ non deducimus, ita vos in Deum peccabitis, si nostram vocem audire omittatis. *Data ut supra.*

CCXIX.

AD SEDESCLAVUM COMITEM.

(Anno 879.)

Præcipit ut legato quem ad regem Bulgarorum mittit iter tutum præbeat ac necessaria suppeditet.

Dilecto filio SEDESCLAVO glorioso comiti Slavorum ^a.

^a De Slavica Historia Miscellanæ lib. XVII in Mauricio, l. XIX et 25.

Quia fama tuæ dilectionis atque bonitatis et religionis in Deum ad nos usque pervenit, confidenter gloriæ tuæ præcipimus atque mandamus ut pro amore sanctorum apostolorum Petri ac Pauli protectorum vestrorum præsentem legatum, quem ad gentem Bulgarorum dirigimus ^b, salvum atque incolumem venire faciatis usque ad dilectum filium nostrum Michaelæm gloriosum regem eorum, et quæcunque ei sunt necessaria ad victum et vestimentum, illi pro Dei amore administrate, quia Dominus dicit in Evangelio: *Quandiu fecistis uni de minoribus istis, mihi fecistis (Matth. XXV)*: et apostolus: *Hospitales invicem sine murmuratione (I Pet. IV)*. *Quia per hanc latuerant quidam, angelis hospitio susceptis (Heb. XIII)*. Agat, fili charissime, de hoc tua dilectio, ut æternæ vitæ præmia percipere valeat. *Data ut supra.*

CCXX.

AD GREGORIUM PRIMICERIUM.

(Anno 879.)

Rogat ut legatos Constantinopolitanos ad se mittat; pollicetur, cum Francorum rex Romam venerit, se ad eum auxilio iturum.

Dilecto filio GREGORIO primicerio ac bajulo imperiali.

Religionem tuæ charitatis in Christo et in ejus Ecclesia collaudamus, et ut magis ac magis in bono opere proficias exhortamur. Legatos ab urbe Constantinopolitana ad nos directos per Beneventum, deinde per Capuam dirige, quoniam jam habemus præordinatum qualiter, Deo volente, ad nos salvi atque illæsi perveniant. De nostro ad vos adventu, quod tua, fili charissime, dilectio perscrutatur, pro certo deliberatum habuimus; sed rex Francorum ad nos properans suppliciter deposcit ut ab Urbe non discedamus quoquam donec ipse perveniat. Qui cum, Domino protegente, venerit cum valida manu, prout temporum dicta necessitas, illuc omni mora postposita, studebimus omnimodis preparare, pro totius sanctæ Dei Ecclesiæ et omnium Christianorum salvatione. *Data vi die Maii, indictione XII.*

CCXXI.

AD WIBODUM EPISCOPUM.

(Anno 879.)

Ut apud Carolomannum, vel Carolum ejus fratrem, de Ecclesia Dei a paganorum infestationibus defendenda agat; et si archiepiscellanus Caroli Romam venerit, ipse quoque veniat; sin minus, eorum regum voluntatem sibi litteris aperiat.

Reverendissimo WIBODO episcopo, et dilecto consiliario nostro.

Cum assidue vos quasi charissimum filium in nostro cupiamus habere obsequio, placeret nunc nobis pro instantis temporis multiplicibus causis vestro sagaci consilio frui; sed quia industriam vestram ea quæ ad honorem sanctæ Dei Ecclesiæ ac nostrum pertinent, semper ubique agere fideli devotione

^b Aimoinus lib. IV, c. 26 et 81. Cedrenus in *Mauricio*, Nicephorus, lib. XVIII, c. 28.

velle procul dubio credimus, nunc ad nostram apostolicam venire presentiam non gravamus. Quapropter vestre innotescimus dilectioni quoniam assidua et supra modum gravi paganorum infestatione gravati, cujuslibet regis jam cupissemus habere solatium. Unde si Carolomanum posse incunctanter agnoscitis, apud illum; sin autem, apud germanum et æquivoicum ejus, Carolum videlicet gloriosum regem, causas et utilitates sanctæ sedis apostolicæ prudenti duntaxat consilio agere et, Deo auxiliante, ad perfectum deducere satagatis, quatenus pristinum ejus honorem atque vigorem ipsius regia majestas, more videlicet parentum suorum, conservet in omnibus. Præterea si talis archicapellanus jam fati Caroli regis, sicut nobis mandastis, venerit, ad nostraque apostolica vestigia missus properare quaesierit volumus et cum eo ad nos pariter veniatis; ut communi tractatu quid pro Ecclesiæ Dei exaltatione agendum sit, pariter consideremus. Sin autem ipse Romam non venerit, eo diligenter inquisitocausas et voluntates atque devotiones vel Carolomani, vel ipsius germani jam dicti regis nobis litteris vsstris sub omni certitudine præsentialiter innotescatis, ut quid prospere agendum sit luce clarius agnoscamus. Hujus quoque textum epistolæ, ut nullus agnoscat, cum legeritis, statim igne comburite. *Data ut supra.*

CCXXII.

AD BOSONEM COMITEM.

(Anno 879.)

Scribit se tacitum tenere quod secreto ex ipso audierat, et auxilium, quod promiserat, ab eo omnino expectare; præterea se bene valere.

Secretum quod, Deo auxiliante, vobiscum Trevis existentes habuimus, immutilatum ac fixum nostro apostolico pectore, quasi quoddam thesaurum reconditum procul dubio retinemus, et totis, vita comite, nisibus illud, quantum in nobis est, alacriter optamus perficere. Quapropter si excellentiæ vestræ libet, jam hoc ipsum ad effectum debetis perducere. Quia juxta sanctum Apostolum admonentem: *Ecce nunc tempus acceptabile, ecce nunc dies salutis (II Cor. vii)*, quibus favente Domino, vestra potestis efficaciter desideria explere. Nos enim sponsonem vestram nimium præstantes, sed usque adhuc minime contemplantes, tristes existimus, eo quod assiduas et supra modum graves paganorum infestationes omnimodis patiamur; et idcirco pro instanti necessitate alio dirigere auxiliumque opportunum prætermisimus quærere. Unde, si placet agere, quod agendum est agite: sin autem, nobis remandare sine mora satagite. Quia vero de salute nostra solliciti gaudetis, vestræ innotescimus magnitudini, quia et prosperum, Christo, duce, revertendo iter habuimus, et nunc corpora auitate bene valeamus. *Data ut supra.*

CCXXIII.

AD ANSPERTUM ARCHIEPISCOPUM MEDIOLANENSEM.

(Anno 879.)

Arguit eum quod tertio vocatus ad concilium non venerit; præcipit ut ad synodum celebrandum cum suis episcopis accedat, et cum Francorum regibus qui in Italiam fuerant ingressi, placitum non faciat: aliter excommunicationem minatur.

Reverendissimo et sanctissimo ANSPERTO archiepiscopo Mediolanensi.

Multæ inobedientiæ atque perniciosæ temeritatis procul dubio reperiris obnoxius, cum nobis pro Ecclesiarum Dei omnium juxta Apostolum commissa sollicitudine populi que salute in hoc periculoso tempore, necessitate scilicet nimia cogente, strenue decertantibus, nullum, ut oportebat præbere assensum nullumque, veluti capiti tuo compatiendo, studuisti conferre solatium. Missis etiam apostolatus nostri secundo ac tertio per fratres et coepiscopos nostros litteris, in consortium sollicitudinis nostræ te more præcessorum nostrorum, utpote idoneum comministrum, primum quidem in Gallia et postmodum Papiæ consistentes canonicè vocavimus, sed minime occurrere voluisti. Regulari etiam et nostra apostolica vocatione jussimus ut Romam pro tam multiplicibus necessitatibus in commune pertratandis ac synodice deliberandis negotiis, venire absque quolibet obtentu satageres; sed neque secundum canonicam sanctionem excusationem tuam in tractoria scriptam nobis et sanctæ synodo peridoneum a latere tuo ministrum dirigere, neque ipse potius venire, improvida duntaxat mente curasti, ut una nobiscum, qui vestrum omnium onera portamus, juxta præceptum Apostoli, ea portare omni annixu studeret. Pro quibus videlicet tot evidentissimis culpis et temerariis præsumptionibus a te peractis, una cum veneranda synodo ante sacratissimum beati Petri apostolorum principis corpus habita, secundum immutilatam Africanæ concilii regulam (*Conc. Afric. cap. Carthaginense v, c. 10*), te ad concilium nostrum non occurrentem, neque excusationem tuam in tractoria subscribeatam, neque justam rationem impedimenti tui apud nos omnium vestrum primatem reddere curantem, omni prorsus ecclesiastica communione, sancti Spiritus auctoritate, privavimus, quousque tuam specialem presentiam nobis et sedi apostolicæ exhibere curaveris.

Nunc itaque, quoniam constanter tenentes justitiam, benigne debemus semper præbere clementiam, his iterum nostris apostolicis litteris dilectioni tuæ præcipimus, ut quia ad præfatam synodum non venisti, ad eam quam rursus, juxta canonis apostolici capitulum tricesimum quartum, erimus quarto Idus Octobris, auxiliante Domino, celebraturi, omni postposita occasione, cum suffraganeis episcopis tuis devotus occurras. Vel si aliqua evidenti necessitate te non posse venire claruerit, eximios a latere tuo dirigas viros, qui tunc nobis et sancto concilio idone faciendo, et causam tuæ impossibilitatis veraci-

ter intiment, et ea quæ pro Ecclesiarum Dei utilitate peragenda sunt, nobiscum sagaciter valeant deliberare. Nam si et hanc quartam nostræ apostolicæ auctoritatis vocationem parvipendens, ad jam denuntiata synodum ipse venire vel tuos mittere contempseris, scias pro certo quoniam majori te iudicii ecclesiastici vinculo velut inobedientem incunctanter ligabimus. Præterea hoc etiam tibi tuisque suffraganeis omnibus admonitione nostra denuntiamus atque præcipimus, ut cum eo qui de regibus Francorum, Deo favente, Italiam fuerit ingressus, nullum absque nostro consensu et unanimitate placitum facere præsumatis; apostolorum canone capituli tricesimi quinti ita jubente atque dicente: Episcopos gentium singularum scire convenit quis inter eos primus habeatur, et quem velut caput existiment, et nihil amplius præter ejus conscientiam gerant quam illa sola singuli quæ parochiæ propriæ et villis quæ sub ea sunt, competunt, sed nec ille præter omnium conscientiam faciat, aliquid; sic enim unanimitas erit et glorificabitur Deus per Christum in Spiritu sancto. Propter quod et nos vestro communi tractatu atque consensu, ea quæ ad communem et necessariam utilitatem Ecclesiarum Dei nobis commissarum agenda sunt, omnimodis agere cupimus. Non enim aliter, dicente sancto Leone, unus grex et unus pastor sumus, nisi quemadmodum Apostolus docet, id ipsum dicamus omnes: Simus autem perfecti in eodem sensu et in eadem scientia (I Cor. II). Data XIV Kalendas Junii, indictione XII.

CCXXXIV.

AD EUMDEM.

(Anno 879.)

Ejusdem pene argumenti.

ANSPERTO archiepiscopo.

Cum universi qui Christiano censentur vocabulo, ab ipso religionis exordio, fide et meritis Petri Romanam Ecclesiam sublimatam omni veneratione sequi omni que reverentia honorare studuerint; et contra eam, nisi qui de se voluit judicari, nullus obices manu habuerit; valde miramur cur adeo vestri ordinis ministerium excedatis, ut cujus auctoritatis, cujusque privilegii eadem sancta sit Romana Ecclesia, furo ignorantie non advertatis, et ei que vos genuit dolenti ac injurias patienti, nullo filiorum affectu compati studeatis. Quin potius in contemptum religionis non solum possibilia adjutoria nobis præbere contemnitis, sed etiam nuper a Galliis remeantibus, ut saltem clamorem et laborem nostrum, quem pro omnibus patiebamur, audiretis et doleretis, apud Ticinum nobis occurrere distulistis, ubi etiam diutius immorantes, ut ad synodum veniretis vos litteris nostris vocavimus. Sed inobedientiæ atque temeritatis audacia freti, nec tunc vestram nobis præsentiam exhibere curastis; postremo generali synodo Romæ præteritis Kalendis Maii celebratæ, a nobis rursus vocati, interesse penitus distulistis. Hujus rei gratia juxta Apostolum in

A promptu habeates ulcisci omnem inobedientiam, digna correptione canonicis vocibus vos perferimus, nisi misericordia apostolicæ sedis nostrum animum temperaret. Vos autem, charissimi, tanta nostra patientia non abusi, redite ad cor, et depouentes omnem temeritatem, pro communi salute et pace regni nobis hærete, adeo ut quæ recipimus recipiatis, et quæ respuimus respuatis, ut id ipsum dicamus omnes et eadem sapiamus, quia et ego sollicitos vos pro communi salute ac statu regni et pace libenter audio, sicut e contra aliud quam tenemus tenentes, non libenter admitto. Jam vero quia multoties ad synodum convocati, venire hæcenus contempseritis, sicut prætulimus, omni temeritate atque inevitabili occasione deposita, ad aliam synodum, quam, gratia divina opitulante, quarto Idus Octobris futuræ tertiæ decimæ indictionis celebraturi sumus, occurrere. Quatenus ea quæ ad utilitatem sanctæ Dei Ecclesiæ pertinent, communi tractatu, communi voto atque consensu, cum Domini adjutorio exsequamur. Quod si forte et tunc venire contempseritis, sciatis vos et de præteritis et de futuris negligentibus canonicè judicandos, ita ut ecclesiarumstrarum communione juxta sacros canones sitis contenti, qui non vultis ecclesiasticis acquiescere disciplinis (*Concilium Africanum*, c. 43; *Carthaginense* v, c. 10). Data XIII Kalendas Junii, indictione XII.

CCXXXV.

AD THEODOSIUM ELECTUM EPISCOPEM NONENSEM.

(Anno 879.)

C

Laudat ejus erga Romanam Ecclesiam observantiam et præclaras ejus virtutes; testatur suam in eum benevolentiam: monet ut a se consecrationem episcopalem accipiat.

THEODOSIO venerabili diacono et electo sanctæ Ecclesiæ Nonensis.

Dilectionis tuæ litteris receptis atque perlectis, devotionis et fidei tuæ sinceritatem, quam circa Ecclesiam B. Petri apostoli et circa nostrum pontificium habes, luce clarius agnovimus. Et quia nostram gratiam et benedictionem humilij prorsus affectu expectere studuisti, valde sumus gavisi; nam et Joannes venerabilis presbyter, de vestra parte veniens, multa nobis tuæ bonitatis et patientiæ viva voce præconia retulit, quæ in sacerdote Christi magnopere sunt habenda. Unde te quasi dilectum corporis Christi membrum et spiritalem filium nostri apostolatus ulnis extensis amplectimur, paternoque amore diligimus, atque apostolica semper volumus benignitate fovere. Ideo monemus sagacitatem tuam ne in quamlibet partem aliam declines, et contra sacra venerabilium Patrum instituta episcopatus gratiam recipere quæras, audiens illam desiderabilem summi iudicis vocem dicentis: *Euge, serve bone et fidelis, quia super pauca fuisti fidelis, supra multa te constituam: intri in gaudium Domini tui Matth. XXV.* Sed toto corde totaque voluntate ad gremium sedis apostolicæ, unde antecessores tui divina legis dog-

mata meliflua, cum sacrae institutionis forma, summi-
que sacerdotii honorem sumpserunt, redeas : quatenus
et ipse ab apostolica sede, quæ caput et magistra
est omnium Ecclesiarum Dei, episcopalem consecra-
tionem, per nostræ manus impositionem, Christo
annuente, percipias ; quatenus secundum pristinum
morem sancti Petri et nostra semper auctoritate
atque tuitione munitus, populum Domini tibi com-
missum strenue ac securiter regas, et in conspectu
Altissimi veniens venias cum exultatione, portans
manipulos tuos, dicereque Domino possis ovanter :
Ecce ego, et pueri, et quos mihi dedisti ; et ob hoc
cum Deo valeas sine fine gaudere. Data IV die mensis
Junii, indictione XII.

CCXXVI.

AD ANSELMUM EPISCOPUM LEMOVICENSSEM.

(Anno 879.)

*Non separandum virum ab uxore, qui filium suum
necessitate urgente baptizavit.*

ANSELMO episcopo Lemovicinæ Ecclesiæ.

(30 quæst. 1, *Ad limina.*) Ad limina beatorum Pe-
tri et Pauli apostolorum principum hic præsens
homo, nomine Stephanus, orationis causa veniens,
nostro præsulatui suggerendo innotui quod filium
suum in extremo vitæ positum, necdum baptismatis
unda lotum, absentia scilicet sacerdotum necessitate
cogente baptizasset, eumque ipse propriis manibus
retinendo suscepisset, atque pro hujus rei negotio
notitiæ tuæ patefacto, reverentia tua, quasi zelo
rectitudinis flagrans, præfatum hominem a sua judi-
caverit conjuge separandum. Quod fieri nullatenus
debet, dicente Scriptura a Deo junctam viro esse
uxorem, et : *Quod Deus conjunxit, homo non separet*
(*Matth. XIX.*) Unde et Dominus in Evangelio neminem
posse dimittere uxorem suam nisi causa fornicatio-
nis apertissime jubet. Quapropter et nos, tantæ
auctoritatis jussione præcipue freti, dicimus omit-
tendum esse et inculpabile judicandum quod neces-
sitas intulit. Nam baptizandi hoc opus etiam laicis
fidelibus, juxta canonicam sanctionem, si necesse
fuerit, facere libere conceditur. Unde si prædictus
genitor filium suum corpore morientem aspiciens,
ne animam morte perpetua pereuntem dimitteret,
sacri baptismatis unda lavit, ut eum de potestate
auctoris mortis et tenebrarum eriperet, et in regnum
Christi jam regeneratum indubitanter mitteret, bene
fecisse laudatur. Et ideo cum sua uxore sibi jam
olim legitime sociata impune, quandiu vixerint, ju-
dicamus manere conjunctum, nec ob hoc contra
præfatas auctoritates divinas aliquatenus separari
debere. Data VII die mensis Junii, ind. XII.

CCXXVII.

AD CAROLOMANNUM REGEM.

(Anno 879.)

*Hortatur ad Ecclesiam Romanam defensionem, quæ a
Saracenis nullis afficiebatur detrimentis: rogat
ut legatos benigne excipiant, et fidem illis
adhibeat.*

Dilectissimo ac spiritali filio CAROLOMANNO glorio-
sissimo regi.

A Quia more prædecessorum nostrorum pontificum
regiam excellentiam divinitus exaltatam pio mentis
affectu diligimus, ad honorem et exaltationem sanctæ
Dei ecclesiæ eam sitibundo pectore videre deside-
ramus, quatenus vestræ magnitudinis triumphali
certamine sedis apostolicæ vigor et honos, quem
progenitorum vestrorum, gloriosissimorum videlicet
imperatorum, tempore habuisse recolimus, vobis re-
gnantibus maneat illibatus et integer, ut et vestræ
regalis gloriæ decus vigeat indimmutum et æternæ
mercedis vobis munus superna gratia tribuatur. Nunc
igitur pro tot et tantis calamitatibus ac necessita-
tibus quas a paganis assidue atque a malis patimur
Christianis, licet pro multitudine scribere non valeamus,
et vestram excellentiam ignorare non credimus,

B pastorali sollicitudine moti, ponentes animas nostras
in manibus nostris, ingentes labores non solum mari-
ni sed itineris etiam terreni omnimodis sumpsimus.
Testamur namque Deum, cui occulta omnium ma-
nifesta existunt, quod vestro desiderabili honore,
nihilius hominis, nisi vestrum præpotens adjutorium
avida mente quærere volumus ; sed malorum homi-
num, quos ipsi scitis, præpediti insidiis, hoc agere
non valuimus. Quapropter, dilectissime filii, nostra
apostolica exhortatione monemus gloriam vestram
ut pro amore sanctæ Romanæ Ecclesiæ matris vest-
stræ defensionis laborem indubitanter assumere non
prætermittatis, unde vobis honor et salus hic et in
æternum accrescat. Et ideo petimus ut pro Dei et
sanctorum apostolorum Petri ac Pauli amore nostris
apostolicis monitis toto conamine attendatis qua-
tenus aut per vos aut per saluberrimum consilium
C vestrum citius nobis subvenire omnimodo satagatis.
Quoniam tanta istius terræ perditione undique ag-
gravati, undique concussi talia jam sufferre minime
valemus. Nam si, quod absit, per vos forte reman-
serit, ut Ecclesia Dei in præsentem defensionem non
habeat, et taliter turbata consistat, videte ne ante
tribunal Christi et coram apostolorum principem
præsentia vestræ animæ patiimini detrimentum, quia
nos paterna vos admonitione hortantes, secundum
ministerii nostri officium ea quæ Dei sunt et saluti
vestræ proficua agere incunctanter convenimus. Mi-
simus autem ad vos præsentem missos nostros Joan-
nem et Paschalem venerabiles episcopos dilectos
fideles nostros, quos petimus ut pro nostro amore
D benigne recipiatis, et eis locum familiaritatis tribua-
tis, atque ea quæ vobis de nostra parte dixerint,
libentissime attendatis. Data VII die mensis Junii,
indictione XII.

CCXXVIII.

AD EUMDEM.

(Anno 879.)

*Ut in Vercellensi Ecclesia Conspertus creetur
episcopus.*

Dilecto ac spiritali filio CAROLOMANNO glorioso
regi.

Misimus cum his præsentibus missis nostris hunc
venerabilem diaconum nomine Conspertum, vobis.

ut credimus, notum, in servitium magnitudinis vestræ : quem petimus ut pro nostro amore benigne recipiatis : et quia nobis ac vobis fidelis existit, rogamus excellentiam vestram ut episcopatum Verecellensis Ecclesiæ placido animo tribuatis, quatenus, Deo auxiliante, per nostram ac vestram munificentiam episcopali duntaxat honore potitus, nobis omnibus existere devotior atque fidelior possit. Data VII die mensis Junii, indictione XII.

CCXXIX.

AD BRANIMIRUM.

(Anno 879.)

Suscipit eum ad Romanæ Ecclesiæ gremium redeuntem; monet ut in Dei amore perseveret: impartitur benedictionem apostolicam, quam petiit: hortatur, ut permittat legatum suum epistolam Bulgarorum deferre.

Dilecto filio BRANIMIR.

Relegentes nobilitatis tuæ litteras, quas per Joannem venerabilem presbyterum communem fidelem nobis mandasti, quantum fidem et sinceram devotionem circa Ecclesiam sanctorum apostolorum Petri ac Pauli ac circa nos habeas luce clarius novimus. Et quia, Deo favente, quasi dilectus filius sancto Petro et nobis, qui per divinam gratiam vicem ejus tenemus, fidelis in omnibus et obediens esse cupias, humiliter proferis, tuæ nobilitati dignas valde gratias his nostri apostolatus litteris agimus paternoque amore, utpote charissimum filium, ad gremium sanctæ sedis apostolicæ matris tuæ, de cujus videlicet purissimo fonte patres tui melliflua sanctæ prædicationis potavere fluentia, redeuntem suscipimus, et spiritualibus amplectimur ulnis, atque apostolica volumus benignitate fovere; ut gratiam, benedictionem Dei sanctorumque Petri ac Pauli apostolorum principum, et nostram super te habens diffusam, a visibilibus et invisibilibus hostibus, qui salutem humanæ insidiari et impedire non cessant, salvus semper ac securus existas, optatamque de inimicis victoriam facilius possis habere. Nam quanto ipse te Deo humiliter subdere sanctisque ipsius obedire præceptis studueris, atque ipsius sacerdotibus et ministris honorem debitum pro amore Domini exhibueris, tanto super omnes inimicos tuos et rebelles adversarios eris procul dubio victor et potens. Et ideo monemus industriam tuam ut in omnibus tuis actibus Deum semper præ oculis habeas, timeas et toto diligas corde, quoniam, dicente Psalmista : *Beatus est vir qui timet Dominum, in mandatis ejus cupit animis: potens in terra erit semen ejus* (Psal. cxi). Et ipse in Evangelio : *Qui me, inquit, diligit, sermonem meum servabit, et Pater meus diligit eum, et ad eum veniemus, et mansionem apud eum faciemus* (Joan. xiv). Quod cum ita sit, si tuis bonis operibus in præsentem lucentibus Deum glorificaveris, gloria eris sempiterna in futuro sine dubio decoratus, quoniam ipse per Moysen hoc se facere testatur, dicens : *Glorificantes me glorificabo* (I Reg. ii). Sicut autem nostro præsulatui per jam fatum presbyterum

Atria suggestisti, quatenus nostro tibi ore apostolico benediceremus pro tuæ salutis augmento, id ipsum libenter fecimus. Nam in die Ascensionis Domini inter sacra missarum solemniam super sacrum altare S. Petri apostoli celebrantes, elevatis sursum manibus benediximus tibi, et omni populo tuo omnique terræ tuæ, ut hic et in æternum corpore simul et anima salvatus, et principatum terrenum quem habes, prospere ac securiter regere possis et in cælesti regione post mortem cum Deo feliciter gaudeas et in perpetuum regnes. Et quia hunc ipsum Joannem presbyterum tibi et nobis verum fidelem in omnibus esse cognoscimus, dedimus illi nostram apostolicam epistolam deferendam regi Bulgarorum. Ideo petimus ut pro amore sancti Petri et nostro cum tua ipse licentia legationem hanc nostram sine tarditate perficiat, ut et propter hoc tuæ dilectioni multiplices gratias habeamus. Data VII die mensis Junii, indictione XII.

CCXXX.

AD SACERDOTES ET POPULOS BRANIMIRO SUBJECTOS.

(Anno 879.)

Excipit eos ad Romanæ Ecclesiæ gremium redeuntes, monet ut perseverent.

Omnibus venerabilibus sacerdotibus, et universo populo.

Cum litteras principis vestri Branimir, quas nobis per Joannem venerabilem presbyterum ipse direxit, legeremus, non solum illius devotionem, sed etiam fidei vestræ sinceritatem et dilectionem, quam circa sanctum Petrum apostolorum principem et circa nos habeatis, cognovimus. Et quia velut charissimi filii ad sanctam Romanam ecclesiam, unde parentes vestros melliflua sanctæ prædicationis dogmata suscepisse agnoscitis, toto animo totaque voluntate redire cupiatis, nostram apostolicam gratiam et benedictionem habere magnopere desiderantes, magna sumus repleti lætitia. Et ideo brachiis extensis vos amplectimur, paternoque amore recipimus, et apostolica volumus semper benignitate fovere, si vos hanc voluntatem et sponsonem vestram usque ad finem sinceriter habueritis, et fideliter tenueritis; quia, dicente Domino : *Qui perseveraverit usque in finem, hic salvus erit* (Matth. x); et apostolo Paulo id ipsum dicente : *Participes enim Christi facti estis, si tamen initium fidei usque ad finem firmum retineatis* (Hebr. iii). Quapropter estote fideles Deo, et sancto Petro, sicut mandastis, usque ad mortem, et accipietis coronam vitæ, quam repromisit Deus diligentibus se. Non enim sacris orationibus nostris memoriam vestri coram Domino assidue facientes, manibus sursum ad Dominum elevatis, omnipotenti Deo vos una cum dilecto filio nostro principe vestro commendamus, et omni benedictione spiritali vobis benedicimus in Christo Jesu Domino nostro, ut hic et in æternum corpore simul et anima benedicti existatis, et in perpetuum Domino gaudeatis. Data VII die mensis Junii, indictione XII.

CCXXXI.

AD MICHAHELEM REGEM BULGARORUM.

(ANNO 879.)

Agit Deo gratias quod legatos ad se miserit, doctrinam ecclesiasticam et canonica instituta recepturus; hortatur ut ad Romanam Ecclesiam redeat; et si ei placuerit, se legatum missurum pollicetur.

Dilecto ac spiritali filio MICHAELI glorioso regi Bulgarorum.

Quante pietatis et miserationis suae largitate vos omnipotens Deus dilexerit, narrare quis sufficiat, charissime fili? Quando per infusionem sancti Spiritus sui in cor vestrum unigenitum Filium suum, per quem omnia visibilia et invisibilia condidit, vobis clementer revelare dignatus est, mentemque vestram claritatis suae lumine irradiare, et de tenebris ad veram voluit perducere lucem veræque fidei dogmate suo docere. Ipsius etiam gratia vobis revelante, ad sedem beati Petri apostolorum principis, quæ caput et magistra omnium Ecclesiarum Dei existit, et a qua omnes reges et principes verbum veritatis acceperunt, legatos vestros, Petrum scilicet cognatum vestrum, et Joannem atque Martinum, prædecessoris domni nostri Nicolai beatissimi præsulis tempore direxistis, ut et vos inde doctrinam ecclesiasticam atque canonica instituta reciperetis, ubi totius Ecclesiæ Christus posuit principatum, quod nimirum, secundum vestram voluntatem, ab eadem sancta Romana Ecclesia promeruistis. Nunc igitur vos, quasi propriam gregis Dominici ovem nobis in ipso apostolorum principe commissam, utpote charissimum filium nostrum his nostri apostolatus litteris visitamur et nostris apostolicis spiritualiter amplectimur ulnis; assidue vos cum omni populo vestro sacris orationibus nostris Domino commendantes, ut ipse, qui vobis gloriosum in terris tribuit principatum, tribuat et post mortem cæleste regnum et gloriam sempiternam. Quapropter monemus gloriam vestram, ut ad sanctam matrem vestram Romanam Ecclesiam devota mente libentique animo redeatis; ut apostolorum sanctorum precibus adjuti tam visibiles inimicos [*f. deest* quam invisibiles] facile superare possitis: et quia vos, ut prædictum est, multum diligimus, nostrum ad vos volumus cum sedis apostolicæ visitatione dirigere legatum, visitareque vos, sicut pastor visitat gregem domini sui sibi commissum: si tamen cognoverimus voluntatem vestram, quod nostram cupiatis recipere legationem et apostolicam visitationem. Quod si volueritis, per hunc Joannem venerabilem presbyterum fidelem nostrum, nobis sub certitudine litterarum vestrarum remanere curate, dilectissime atque amantissime fili. Omnipotens Deus, qui vobis viam veritatis ostendit, et lumine suæ claritatis cor vestrum illustrare dignatus est nunc et semper cum omni prosperitate et

.. In edit. Romana titulus depravatus est, et cum dubitaverim Labbeum sua conjectura hic correxisse, non ex fideicis codicis, ideo hic prout est in Romana repræsen-

Ad salute vos consuetudine dignetur incolument. Data VI Idus Junias, indictione XII.

CCXXXII.

AD AIRADUM ARCHIEPISCOPUM AUSENSIS ET USQUE SUFFRAGANEOS.

(ANNO 879.)

Hortatur ad depravatos populi mores corrigendos, præcipue incestu matrimonii: ne quis relicta uxore aliam ducat, aut simul cum uxore concubinam habeat, ut res immobiles ecclesie nemo sibi usurpet, et ut clerici sub episcopi sint potestate.

Reverendissimis et sanctissimis, AIRADO archiepiscopo, et INVOLATO Convenensi, WAINARDA Conserano, SARSTONO Bigorrensi episcopis.

Multas prævaricationes contra totius Christianitatis religionem atque sanctorum Patrum venerabiles sanctiones his vestris in partibus a pravis fieri Christianis veridica multorum relatione didicimus. Quos vero nec piæ admonitionis vestræ blandimento, nec debitæ excommunicationis vinculo, nec etiam apostolicæ constitutionis verbo aliquatenus a tantorum malorum operum infestatione ac perpetratione prohibere nec penitus valetis compescere. Et ideo dolemus pariter vobiscum, fratres mei, super temeritate populi talia præsumentis, et nullam ex his poenitentiam fructuosam in præsentem agere volentis vestramque salubrem correptionem pro nihilo ducentis. Igitur quia nostro apostolatu humiliter suggestistis ut, apostolica fulti auctoritate, populum gravem et plenum iniquitate libere possitis corrigere; quando ex divino eloquio docemur ut aliquando conversi fratres nostros aliqua sæculi fluctuation inefficaces confirmare debeamus (*Luc. 22*); vos cur doctore gentium convenimus, dicentes: Corripit inquietos, consolamini pusillanimes, arguite peccatores, obsecrate protervos, et increpate inique agentes cum omni imperio (*I Thess. v*). Vobis namque populus ipse sicut grex ovium Domini pastoribus commissus; et nisi eos ita nunc temporali increpatione correxeritis, ut spiritu salvi sint in die Domini nostri Jesu Christi, sanguis eorum de vestris procul dubio manibus requiretur. Sin autem vobis annuntiantibus non obedierint, ipsi in suis iniquitatibus deficient, vos vero animas vestras liberastis. Præterea unum valde illicitum et execrabile malum contra venerabilia sanctorum Patrum decreta eosdem vestros parochianos committere audimus, hoc est, nulla generis consanguinitate custodia, nulla propinquitatis parentela observata, unusquisque suam uxorem, atque incesto et nefario se conjugio copulens. Quod licitum facere Christianis non est, dum usque se generatio cognoverit. Unde sanctissimi prædecessores nostri, Stephanus videlicet, Eugenius atque Leo, synodali decreto tale nefandum con-

tandum duxi: *Reverendissimis et sanctissimis Airado archiepiscopo, et Involato Convenensi, una in Ardo Conserano Sarstono vobis Orensibus episcopis.*

gium fieri prohibuerant, dicentes : Ut consobrinam, neptem, novercam, fratris uxorem, vel etiam quamlibet de propria cognatione, nullus præsumat sibi in conjugio copulare, quia scriptum est in lege Domini : *Turpitudinem uxoris patris tui, sive uxoris fratris tui, atque sororis tuæ non revelabis : turpitudinem enim tua est (Levit. xviii)*. Et si Deus Hebraico populo ante incarnationem unigeniti Filii sui hæc servanda mandavit, quanto amplius nos, qui Christianæ religionis documenta tenemus, ab illicitis connubiis observare debemus, ne demersi in voraginem ignis æterni concrememur incendio? Si quis vero in hoc nefario conjugio inventus in eo permanere voluerit, aut nunc ab uxore solutus hoc agere tentaverit, sciat se auctoritate apostolica anathematis vinculo esse innodatum, et nullus sacerdos illi tribuat communionem : et si inclinatus ab illicita se copula dividerit, pœnitentiæ submittantur, ut sacerdos loci consideraverit. Hoc etiam cum illis pariter jubemus ut nullus propriam relinquat uxorem, et illa vivente alteram sibi sociare præsumat; nec liceat ei uno tempore duas habere uxores uxoremve et concubinam. Jubemus etiam ut nulli sacerdotum nullique laicorum liceat res immobiles sub qualibet occasione a piis et venerabilibus locis subtrahere et in proprio usu habere. Qui vero præsumpserit, canonicis subiaceat correctionibus. Statuimus etiam ut omnes presbyteri et clerici sub proprii potestate consistant episcopi, et nihil sine ipsius conscientia gerant, secundum regulam a Patribus constitutam. Si quis sane sacerdotum aut clericorum aliter agere præsumpserit, a suo canonicè redarguatur episcopo; laicus quoque, si de potestate episcopi clericum quemlibet subtrahere præsumpserit, excommunicatus existat. Hæc, fratres charissimi, pro vestra supplicatione et honorificentia in auctoritatem habenda descripsimus vobis quatenus his nostræ constitutionis muniti præceptis, digna Deo nostro possitis securiter deferre obsequia debitasque persolvere laudes. Optamus sanctitatem vestram in Christo bene valere. Data Idibus Juniis, indictione xii.

CCXXXIII.

AD ROSTAGNUM ET ALIOS.

Fragm. — (An. 879.)

ROSTAGNO archiepiscopo Arelatensi, SIGIBOLDO archiepiscopo Narbonensi, et ROBERTO archiepiscopo Aquisi, a paribus.

Veracium relatione comperimus Gilbertum Nemausensem venerabilem episcopum, quod quoddam monasterium nostrum quod super eundem episcopum acquisivimus, ipse Gilbertus temere invaserit, cunctasque res ipsius monasterii per suos homines distribuerit, et illius monachos inde contra sacras regulas omnino expulerit. Quod tantum nobis displicuit, quantum, sicut ipse nobiscum advertis, calcata reverentia venerandorum canonum contra privilegium apostolicæ sedis eum fecisse non ambigis. Quapropter fraternitati tuæ dirigimus ut vice nostra cum contrahitis et coepiscopis nostris jun-

ctis eundem Nemausensem episcopum ad commune colloquium convocetis, et ex auctoritate nostra conveniatis ut ab omni invasione ipsius monasterii tam se quam suos removeat, et ulterius nec res ejus, nec monachos illic Domino famulantes molestare præsumat. Quod si ipse surda aure, quod absit, per vos monita nostra audierit, tunc ex auctoritate beati Petri apostoli, cui idem monasterium pertinet, simul et nostra, illum a ministerio sacerdotali excommunicando suspende, quousque dum aut ab ipsa invasione se subtrahat, aut ad sedem apostolicam vel ad nostram præsentiam nobis satisfactorius occurrat. Agat in his sanctimonia tua sicut illam agere decet et nos Deo laudes et tibi gratias referamus. Data xviii Kal. Julii, indictione xii.

CCXXXIV.

AD SALONITANOS CLERICOS.

(Anno 879.)

Monet ut ad gremium Romanæ Ecclesiæ revertantur; et electus ab eis archiepiscopus consecrationem et pallium a se, et non ab alio accipiat: utque legato quædam verbis relaturò fidem adhibeant.

Reverendissimis et sanctissimis episcopis VITALI Adransi, DOMINICO Absarensi, cæterisque episcopis Dalmatinis, seu JOANNI archipresbytero sanctæ sedis Salonitanæ, omnibusque sacerdotibus et senioribus populi habitatoribus Spalatensis civitatis, atque Zadarensis, cæterarumque civitatum.

Pastorali sollicitudine moti, vos quasi oves Dominicas nobis in beato Petro apostolorum principe commissas, dicente Domino : *Si diligis me, Simon Petre, pasce oves meas (Joan. XXI)*, licet pro assidua gentium persecutione nunc usque impediti, his modo apostolatus nostri litteris visitare curavimus, admonentes fraternitatem vestram ut, more præcessorum vestrorum, ad sedem beati Petri apostoli, quæ caput et magistra est omnium Ecclesiarum Dei, et ad nos, qui ei divinitus præsidemus, toto animo libentique voluntate reverti studeatis, quatenus inde summi honorem sacerdotii, totius institutionis ecclesiasticæ formam sumatis, unde parentes ac præcessores vestros melliflua sanctæ prædicationis et doctrinæ apostolicæ potasse fluentia recolitis. Reminisci namque debetis quanta eosdem præcessores vestros prospera evidentissime comitabantur, quando ad limina Petri cœlestis regni clavigeri devoto pectore quasi proprii filii confluebant; et quanta postmodum nunc usque sustinueritis adversa, cum ab ea vos quasi alienos separare non dubitastis. Quapropter vos plurimum diligentes, non ea quæ vestra, sed vos quærentes, paterna benignitate monemus atque hortamur ut, sicut diximus, ad gremium sanctæ Romanæ Ecclesiæ matris vestræ redire ovanter attendatis, ut electus a vobis canonicè archiepiscopus una cum vestro omnium consensu, et voluntate ad nos veniens gratiam episcopalis consecrationis sacramque pallium a nobis more pristino incontinenter percipiat, ut gratiam et benedictionem

S. Petri ac nostram habentes, a pallio omnibus liberi, et bonis universis repleti, et hic in præsentis seculo gaudeatis, et in futuro cum Domino sine fine procul dubio exsuletis. Porro si aliquid de parte Græcorum vel Sclavorum super vestra ad nos reversione vel consecratione aut de pallii perceptione dubitatis, scitote pro certo quoniam nos secundum sanctorum Patrum decessorum nostrorum pontificum statuta vos adjuvare auctoritate curabimus. Quod si forte hanc nostram apostolicam admonitionem, imo canonicam præceptionem, pro nihilo ducentes, ad sedem apostolicam Romanæ Ecclesiæ redire, et inde secundum antiquam normam, consecrationem episcopalem sacrumque pallium recipere contempseritis, omni ecclesiastica vos communione scitote penitus excommunicandos. Interim tamen auctoritate Dei et sancti Petri vobis præcipimus ut non habeatis licentiam aliunde consecrationem palliumque recipere. Nam si feceritis, quasi transgressores et inobedientes vos sine dubio judicabimus. Hanc autem nostri apostolatus epistolam fraternitati vestræ per hunc præsentem Joannem venerabilem presbyterum, fidelem familiarem nostrum, direximus, cui scilicet aliqua injunximus vobis verbo tenus referenda, et ideo illi omnia quæ de parte nostra dixerit vobis, credere nullatenus dubitetis. Ipsamque epistolam, ut ad omnium vestrum notitiam ferant, bulla nostra jussimus in calce signari. Data x die mensis Junii, indictione xii.

CCXXXV.

AD TRES ARCHIEPISCOPOS.

(Anno 879.)

Ut Nemausensem episcopum a monasterii cujusdam iniqua invasione removeant, et si non paruerit excommunicent.

ROSTAGNO archiepiscopo Arelatensi, SIGIBODO archiepiscopo Narbonensi, ROTBERTO archiepiscopo Aquensi, a paribus.

Veracium relatione comperimus Gibertum Nemausensem venerabilem episcopum, quod quoddam monasterium nostrum, quod super eundem episcopum acquisivimus, ipse Gibertus temere invaserit, omnesque res ipsius monasterii per suos homines distribuerit, et illius monachos inde contra sacras regulas omnino expulerit. Quod tantum nobis displicuit, quantum sicut ipse nobiscum advertis, calcata reverentia venerandorum canonum, contra privilegium apostolicæ sedis eum fecisse non ambigis. Quapropter fraternitati tuæ dirigimus ut vice nostra cum confratribus et coepiscopis nostris junctus eundem Nemausensem episcopum ad commune colloquium convocetis, et ex auctoritate nostra conveniatis, ut ab omni invasione ipsius monasterii tam se quam suos removeat, et ulterius nec res ejus nec monachos illic Domino famulantes molestare præsumat. Quod si ipse surda aure, quod absit, per vos monita nostra audierit, tunc ex auctoritate B. Petri apostoli cui idem monasterium pertinet, simul et nostra, illum a ministerio sacerdotali excommuni-

cauto suscipi. prorsusque dum aut ab ipsa invasione se subtrahat, aut ad sedem apostolicam vel ad nostram præsentiam nobis satisfactorius occurrat. Agat in his sanctimonia tua sicut illam agere decet, ut et nos Deo laudes et tibi gratias referamus. Data xviii Kalend. Julias, indict. xii.

CCXXXVI.

AD MICHAËLEM REGEM BULGARORUM.

(Anno 879.)

De legatione ad maneris us missis gratias agit: de eum defecisse ab Ecclesia Romana, ad quam moxnet ut revertatur; ostendit Græcos Bulgarorum diæcesim, cum sit Romani pontificis, contra canones detinere.

Dilecto ac spiritali filio MICHAËLI glorioso regi Bulgarorum.

Multas regiæ excellentiæ vestræ gratias agimus quia sicut charissimus filius divino repletus amor paternitatem nostram per Functionem eximium fidelem vestrum visitare missisque donis honorare curasti, per quem tuæ salutis incolumitatem omniumque fidelium tuorum audientes prosperitatem, valde sumus gavisi. Nos autem et nostris assiduis precibus ante sacratissimum B. Petri apostolorum principis corpus astantes, et te et omnes principes tuos omnemque populum tuum Jesu Christo Domino semper commendare studemus, et benedicimus tibi, omni populo tuo, omnique regno tuo, ut et a visibilibus et invisibilibus hostibus liberatus, Dei auxilio adjutus, inimicorum tuorum semper victor existas, et ad palmam supernæ vocationis gloriosius pertingas. Ut ipse qui gratiæ suæ largitate et regnum tibi terrenum concessit, et illuminando oculum tuam viam veritatis ostendit, et de tenebris veram lucem perduxit, usque ad finem in eadem sancta fide et bonis operibus perseverantes salvos incolumes dignetur perducere, ut post finem præsentis vitæ, per intercessionem sanctorum apostolorum Petri et Pauli, regnum valeas cœlestis percipere; in quo illa omnia bona, quæ oculus non videt nec auris audivit, nec in cor hominis ascenderunt cum sanctis omnibus simul accipias, quæ diligenter se ab origine mundi præparavit omnipotens Dominus (I Cor. ii). Sed non modica nos tristitia fili charissime, replevisti, quia sedem beati Petri cœlestis regni clavigeri, qui tibi in manifesta visio apparuit et opportunum auxilium præbuit, reliquisti, cum ipsa sedes caput et magistra sit omnium Ecclesiarum Dei, ad cujus auctorem beatum Petrum a Domino dictum est: *Pasce oves meas* (Joan. xx) et cui traditæ sunt claves regni cœlorum, ut quicumque ligaverit super terram, ligata maneant et cœlis; et quæcunque solverit super terram, sint ligata et in cœlis (Matth. xvi). Revertere jam, amantissime, ad sanctam matrem tuam Romanam Ecclesiam, quæ te religioso utero genuit, et quam totius religionis et justitiæ formam, sancti prædecessore nostro Nicolao præsule mittente, suscepisti; et quæ omnium gentium retinet principatum, et ad quam totius mundi, quasi ad unam r-

trem et unum caput, conveniant nationes. Noli amplius deserere matrem tuam, quia illa tui non obliviscitur; quin potius quasi unicam diligit, et semper memoriam tui coram Domino facit. Non enim licitum fuit Græcis alterius parochiam usurpare, sanctis hoc Patribus apertissime prohibentibus. Et ideo ipsi contra canones Spiritu Dei conditos et totius mundi reverentia consecratos nostras retinent dioceses. Quos si pro tuo nobis non esset amore, iam per apostolicam sententiam inde compelleremus exire. *Data ut supra.*

CCXXXVII.

AD ANASTASIIUM ABBATEM.

(Anno 879.)

Præcipit ut cellulam Gauderico episcopo reddat.

ANASTASIO religioso abbati.

Monemus religionem tuam et expresse præcipimus ut, omni remota occasione et dilationis inventione, cellulam S. Valentini in Sabinis positam, quam a Gauderico venerabili episcopo abstulisti, ei continuo reddas, usque in nostram præsentiam, ut nec suum laborem perdat, nec pro eo quod ex hinc nos addit, sibi obesse, quin potius prodesse cognoscat: quod etiam tibi faciendum per præsentem cubicularium nostrum mandamus, ut aliter nullo modo facias; cum autem te nobis exhibueris, si merito sua negligentia fortasse ipsam cellulam amisit, nos eum contra justitiam defendere nolumus; sicut nec illum innocentem perpetui damna permittimus. *Data ut supra.*

CCXXXVIII.

AD TUVENTARUM DE MARAUNA.

(Anno 879.)

hortatur ut, omnem falsam doctrinam rejiciens, in Romanæ Ecclesiæ fide maneat: miratur Methodium aliter quam fuerat professus docere, et propterea a se vocatum fuisse significat.

TUVENTARO DE MARAUNA.

Scire volumus, quia nos qui per Dei gratiam B. Petri apostolorum principis vicem tenemus, pio amore vos quasi charissimos filios amplectimur et paternam dilectione amamus, nostrisque assiduis precibus vos omnes Jesu Christo Domino commendamus, orantes semper pro vobis, ut Deus omnipotens, qui corda vestra illuminavit et ad viam veritatis perduxit, in bonis operibus confirmet et usque ad finem in recta fide bonaque actione decoratos vos atque incolumis dignetur perducere. Quod autem, sicut Joanne presbytero vestro, quem nobis misistis, referente didicimus, in recta fide dubitetis, monemus dilectionem vestram ut sic teneatis, sic credatis, sicut sancta Romana Ecclesia ab ipso apostolorum principe didicit, tenuit et usque in finem sæculi tenebit, atque per totum mundum quotidie sanctæ fidei verba rectæque prædicationis semina mittit, et sicut antecessores nostros, sanctos videlicet sedis apostolicæ præsules, parentes vestros ab initio docuisse cognoscitis. Si autem aliquis vobis vel episcopus vester vel quilibet sacerdos aliter an-

nuntiare aut prædicare presumpserit, zelo Dei accensi omnes uno animo unaque voluntate doctrinam falsam abjicite, stantes et tenentes traditionem sedis apostolicæ. Quia vero audivimus quia Methodius vester archiepiscopus ab antecessore nostro, Adriano scilicet papa, ordinatus, vobisque directus, aliter doceat quam coram sede apostolica se credere verbis et litteris professus est, valde miramur; tamen propter hoc direximus illi ut absque omni occasione ad nos venire procuret, quatenus ex ore ejus audiamus utrum sic teneat et credat sicut promisit, aut non. *Data ut supra.*

CCXXXIX.

AR METHODIUM ARCHIEPISCOPUM PANNONIENSEM.

(Anno 879.)

B *Præcipit ut ad se veniat, ut de ejus doctrina cognoscere possit. Missas Sclavonica lingua celebrari prohibet.*

Reverendissimo **Методію** archiepiscopo Pannoniensis Ecclesiæ.

Prædicationis tuæ doctrinis populum Domini tibi, quasi spiritali pastori, commissum salvare instruereque cum debeas, audivimus quod non ea quæ sancta Romana Ecclesia ab ipso apostolorum principe didicit et quotidie prædicat, tu docendo doceas, et ipsum populum in errorem mittas. Unde his apostolatus nostri litteris tibi jubemus ut, omni occasione postposita, ad nos de præsentem venire procures, ut ex ore tuo audiamus et cognoscamus utrum sic teneas et sic prædices sicut verbis et litteris te sanctæ Romanæ Ecclesiæ credere promisisti, aut non, ut veraciter cognoscamus doctrinam tuam. Audimus etiam quod missas cantes in barbara, hoc est, in Sclavina lingua; unde jam litteris nostris per Paulum episcopum Anconitanum tibi directis prohibuimus ne in ea lingua sacra missarum solemnia celebrares, sed vel in Latina, vel in Græca lingua, sicut Ecclesia Dei toto terrarum orbe diffusa et in omnibus gentibus dilatata cantat. Prædicare vero aut sermonem in populo facere tibi licet, quoniam Psalmista omnes admonet Dominum gentes laudare (*Psal. cxvi*), et Apostolus: *Omnia, inquit, lingua confiteatur, quia Dominus Jesus in gloria est Dei Patris (Philip. ii)*. *Data ut supra.*

CCXL.

AD ANSPERTUM ARCHIEPISCOPUM MEDIOLANENSEM.

(Anno 879.)

D *Arguit quod sedi apostolicæ obediens non fuerit, ejusque legatos injuriose tractarit, et excommunicatus missas celebrarit. Ideo monet ut ad synodum se purgaturus quamprimum vel per se vel per legatos accedat.*

ANSPERTO archiepiscopo Mediolanensi.

Tantis, heu, proh dolor! transgressionibus inveniris obnoxius, quantis nullus de Ecclesia Mediolanensi aliquo modo est inventus: in primis quod nostri operis atque laboris noluit socius esse ac particeps, sed apostolicæ sedi proterve, inobedienter ac procaciter resultasti; deinde legatos nostros Joannem Ticinensem et Walpertum Portuensem episcopos

e latere nostro ad te directos non suscipiens, prætoribus portæ diu tibi nostræ commonitionis verba facientes, quatenus nobis, aut per te, aut per legatum tuum, tuam more prædecessorum tuorum condignam obedientiam exhibere debuisses, irreverenter stare fecisti, nullamque illis reverentiam vel auditum accommodare dignatus, sed sicut aspis surda contra charitatis affectum viscera cordis et aures valide obturasti. Pro quibus et his similibus tetandiu communione privavimus missarumque celebratione, donec nobis occurreres, et aut per te aut per vicarium tuum cuncta errata corrigeres, et sic te demum personaliter in nostrum consortium admitteremus. Sed in despectum et injuriam paternorum canonum excommunicatus a nobis, sacrum ministerium agere missamque celebrare præsumpsisti; de quo sollicitè volumus parcere tuæ senectuti perquirentes; sed adeo verum esseprehendimus ut præsentium^a videtur, videlicet presbyter lator non fuerit ausus coram collegio coepiscoporum pro vobis hoc satisfacere. Quapropter quia, Domino auxiliante, secundum statuta canonum circa autumnus tempus synodum sumus celebraturi, ad quam te volumus, omni occasione postposita, sine mora venire aut legatos dirigere, et dum, Christo opitulante, perpetrata transgressionis purgaveris, te in communionem omnimodis recipiemus. Data *ut supra*.

CCXLI.

AD ANGELBERGAM AUGUSTAM.

(Anno 879.)

Significat se modo absolvere nolle Anspertum archiepiscopum; sed si in synodo crimina quæ obiciebantur, diluerit, tunc eum excommunicatione absoluturum: ait se pro Ludovico imperatore in anniversario ejus die sacrafacturum.

Dilectæ ac spiritali filiæ ANGELBERGÆ imperatrici.

Pio affectu petitionis vestræ preces quibus nos super absolute excommunicationis Ausperti Mediolanensis archiepiscopi precata es exaudire, secundum collatam nobis ligandi solvendique divinitus potestatem, non præmitteremus, et maxime propter annum commemorationem divæ memoriæ domini Ludovici, quondam imperatoris Augusti, quæ in proximo celebranda est; sed quia synodali eum decreto pro suis negligentibus et præsumptionibus, sicut ipsa bene cognoscis, excommunicavimus, absque eorundem fratrum et coepiscoporum nostrorum, cum quibus in eum excommunicationis sententiam promulgavimus, consensu et voluntate nunc absolvere nolumus; ne ab his qui vel desiderio, vel negligentia ecclesiasticam disciplinam contemnunt, et multa non præsumenda præsumunt, canonicum parvipendatur judicium. Porro cum ad nominatam synodum, quam secundum sacros canones Spiritu Dei conditis quarto Idus Octobris, Domino annuente, celebraturi erimus, vel ipse venerit, vel e latere suo venerabiles confratres et coepiscopos suos direxerit, qui nobis et sim-

^a Legendum videtur, *præsentium videlicet presbyter lator*, subintellige *litterarum*, et verbo *videtur* expuncto.

Actæ synodo de his quæ illi objecta sunt, idonee satisfaciant, tunc post veram satisfactionem ab omni eum excommunicationis nexu procul dubio absolvemus, et quasi fratrem et comministrum in nostræ communionis consortio incunctanter habebimus. Et ideo pro prædicta annua commemoratione ipsius domini et senioris vestri ne turbemini quod modo vos pro absolute præfati archiepiscopi non audivimus, nam in eodem die quo ipse de sæculo migravit, pro animæ illius requie sempiterna sacrificium erimus Domino oblaturi; etiam et pro anima Supponis, fraterna moti compassione, omnipotentem Dominum deprecamur ut suorum absolute non valeat percipere delictorum.

CCXLII.

AD LUDOVICUM REGEM.

(Anno 879.)

Gratias agit de propensa voluntate erga Romanam Ecclesiam: hortatur ut ad eam a paganorum incursionibus defendendam veniat, eique tacite imperium pollicetur.

Dilecto ac spiritali filio LUDOVICO glorioso regi.

Vestræ regiæ serenitatis mellifluis relectis apicibus, quos per Astaldum insignem comitem vestrum nobis mandastis, quantam devotionem ac sincerissimam voluntatem exaltandi et defendendi Ecclesiam Dei, more videlicet parentum vestrorum gloriosissimorum imperatorum habeatis, luce clarius novimus. Unde valde gavisi existentes, maximas excellentiæ vestræ agimus gratias, quia nobis inter tot angustias et persecutiones, quas a paganis assidue supra modum patimur, vestræ invictæ potentiæ auxilium defensionisque solatium pia duntaxat animi devotione conferre omnimodis cupiatis. Ideo, fili charissime, nostræ apostolicæ admonitioni aurem clementiæ vestræ ut accommodetis obnixè precamur, ut citius nobis vestro potenti brachio subvenire studeatis, quatenus sanctam Dei Ecclesiam, in magna nunc fluctuatione positam, ad portum salutis et tranquillitatis efficaciter perducatis, et terram perditam per vos, Deo propitio, ad pristinam revocetis incolumitatem, ut ex hoc et apud omnipotentem Dominum dignam valeatis mercedem recipere, et in præsentis sæculo laudabile nomen omnimodo acquiratis. Quapropter scitote pro certo quia nullus parentum vestrorum tantam gloriam et exaltationem a præcessoribus nostris percepit, quantam nos vobis, si veneritis, totis multipliciter viribus desideramus impendere. Porro de hoc quod mandastis, ut pro eventu regni Ludovici piæ memoriæ nepotis vestri præpedi existatis, pro multo quod circa vos videndi desiderium habemus turbati manemus; sed vestra fisi benignitate petimus ut, omni cura remota, pro amore Dei et sanctorum apostolorum Petri et Pauli, nostræ petitionis sollicitudinem pio pectore vestro alacriter assumatis, ut sicut sedes apostolica, quæ caput est omnium Ecclesiarum Dei, vos magno desiderio quasi

quod natum est ex repetitione sequentis adverbii, *videlicet. Hard.*

unicum et charissimum filium præstolatur, vestra speciali visione celeriter perfruatur; quoniam si, Deo favente, Romanum sumpseritis imperium, omnia vobis regna subiecta existent. Nam si pleniter sciretis quanta nos undique mala, quæ pro multitudine scribere nequimus, opprimunt et affligunt, tantum in vestra cognoscimus sapientia quod per vestram magnitudinem jam maneremus defensi. Deus te incolumem custodiat, charissime fili. *Data ut supra.*

CCXLIII.

AD BASILIUM, CONSTANTINUM ET ALEXANDRUM IMPERATORES.

(Anno 879.)

Imperatorum precibus comotus, ut pax sit Ecclesie Constantinopolitane, dispensat cum Photio ut in Ignatii locum Constantinopolitanæ Ecclesie patriarcha subrogetur, statuens ne deinceps quisquam ad patriarchalem dignitatem, nisi per gradus ecclesiasticos ascendat: jubet patriarcham Constantinopolitanum Bulgarorum diocesim sub Ecclesie Romanæ jurisdictione relinquere, monet omnes ut patriarchæ debitum præstent obsequium: præcipit ut ad Ecclesie communionem eos qui a Methodio et Ignatio initiati fuerant, admittant; excommunicat illos qui cum Photio noluerint communicare.

Dilectissimis ac excellentissimis spiritualibus filiis nostris BASILIO, CONSTANTINO et ALEXANDRO, gloriosissimis imperatoribus semper Augustis.

Inter claras sapientiæ mansuetudinis vestrae laudes, o Christianissimi principes, aliquod cum puriore luce summæ devotionis lumen longe lateque resplendet, quod amore fidei, quod charitatis studio, disciplinis ecclesiasticis edocti, Romanæ sedi reverentiam more prædecessorum vestrorum piissimorum imperatorum conservatis, et ejus cuncta subjicitis^b auctoritati: ad ejus auctorem, hoc est apostolorum omnium principem, Domino loquente, præceptorum est: *Pasce oves meas* (Joan. XXI). Quam esse vere omnium Ecclesiarum Dei caput et beatorum Patrum præcipuæ regulæ, et orthodoxorum principum statuta declarant, et pietatis vestræ reverendissimi apices attestantur. Nihil est enim quod lumine clariore præfulgeat, quam pia devotio et recta fides in principe. Et quia pontificii nostri reverentiam hoc ardore mentis, hoc religionis studio luculenter vestris mellifluis litteris exoratis id nos ratione seu temporis necessitate inspecta, cum sedis apostolicæ nobis commissæ consensu et voluntate^d perficere jure apostolico decet.

Igitur petitis a nobis quatenus, sede apostolica sæpe pendente viscera pietatis, Photium reverendissimum in patriarchatus honore, in summi sacerdotii dignitate et in ecclesiastici collegii societate recipere, nostræque communionis participem faceremus, ne Ecclesiam Dei, tanto jam tempore perturbatam, pateremur amplius manere divisam scanda-

loque commotam. Nos itaque, serenitatis vestræ preces congrua ratione admittentes, quia^e Ignatium piæ memoriæ patriarcham de præsentī vita jam migrasse cognoscimus, temporis ratione perspecta, hoc modo decernimus ad veniam pertinere quod nuper de ipso Photio, licet ipse absque consulto sedis nostræ officium sibi interdictum usurpaverit^d, gestum constat fuisse.

Nos statutis apostolicis non præjudicantes, nec beatorum Patrum regulas resolventes, quin potius multiplicibus earum auctoritatibus freti, qui Nicæni concilii capitulo secundo apertissime dicunt: Quoniam plura aut per necessitatem, aut alias cogentibus hominibus, adversus ecclesiasticam facta sunt regulam. Hinc et Gelasius papa dicit, quod ubi nulla perurget necessitas, constituta Patrum inviolata^b serventur^c. Et sanctus Leo eodem spiritu præcipit omittendum esse et inculpabile judicandum quod necessitas intulit. Inde et Felix præsul, decessor noster, in sua decretali epistola voce consona dicit, aliter tractandam esse necessitatem rationem et aliter voluntatis. Inde etiam sanctum concilium apud Africam gestum capitulo tricesimo quinto jubet ut clerici Donatarum in Ecclesia, propter Ecclesie pacem et utilitatem, si correcto concilio ad catholicam unitatem transire voluerint, si hoc paci Christianæ prodesse visum fuerit, in suis honoribus suscipiantur, non ut concilium quod in transmarinis partibus de hac re factum est, dissolvatur, in quo videlicet concilio statutum est ut ordinati in parte Donati, si ad catholicam partem transire voluerint, non suscipiantur in honoribus suis. De hoc etiam^c beatus papa Innocentius dicit capitulo quinquagesimo quinto (*epist.* 27), quod ii qui a Bonoso hæretico ordinati sunt, propterea sint recepti, ne scandalum remaneret Ecclesie.

Nunc itaque aliis patriarchis, Alexandrino videlicet et Antiocheno et Jerosolymitano, atque omnibus archiepiscopis, metropolitans, episcopis et sacerdotibus, cunctoque clero Constantinopolitanæ sedis, qui de ordinatione beatæ memoriæ Methodii et Ignatii reverendissimorum patriarcharum existunt, una voluntate, parique voto consentientibus, eundem Photium satisfaciendo^f, misericordiam coram synodo secundum consuetudinem postulantem, in vera dilectione fratrem, in pontificali officio ministrum (atque coram synodo misericordiam quærendo) in pastoralī magisterio consacerdotem, pro Ecclesie Dei pace et utilitate, amodo, Christo favente, recipimus et habemus.

Quia et vos Christianissimi imperatores Augusti, qui sanctæ reipublicæ clementissimo affectu gubernatis imperium, pro Christo fungī legatione viderimini (*II Cor.* v), dum pro pace rogatis Ecclesie, et nos quibus, secundum Apostolum omnium Ecclesia-

^a Hæc epistola a Photio est corrupta, locis infra designatis. Vide notam Sev. Bie. ad eadem epistolam.

^b Ista de auctoritate Romanæ Ecclesie Photius in sua translatione non posuit.

^c Nomen Ignatii sustulit Photius, alia attexens.

^d Mutavit hæc in contrarium sensum Photius, ut

^e Gelasius, ep. 6: *Necessitatis tempore locum habet dispensatio.*

^f Omnia ista delevit Photius, de venia coram synodo petenda.

rum Dei sollicitudo incumbit *II Cor. XI*, contro-
versiam aliquam in Ecclesia Dei amplius remanere
nolentes, hunc ipsum patriarcham cum omnibus sive
episcopis, sive presbyteris, seu cæteris clericis et
omnibus laicis, in quos judicii fuerat censura pro-
lata, ab omni ecclesiasticæ sanctionis vinculo ab-
solvimus, sanctæque Constantinopolitanæ Ecclesiæ
judicamus recipere sedem, Dominicique gregis esse
pastorem, illa scilicet potestate fulti, quam Ecclesia
toto orbe diffusa credit nobis in ipso apostolorum
principi a Christo Deo nostro esse concessam, eod-
em Salvatore beatum Petrum apostolum præ cæ-
teris specialiter delegante : *Tibi dabo claves regni
cælorum, et quæcunque ligaveris super terram,
erunt ligata et in cælis; et quæcunque solveris super
terram, erunt soluta et in cælis* (*Matth. XVI*). Sicut
enim ex his verbis nihil constat exceptum, sic per
apostolicæ dispensationis officium et totum possumus
procul dubio generaliter alligare, et totum consequen-
ter absolvere, præcipue cum ex hoc magis præberi
cunctis oporteat apostolicæ miserationis exemplum.

Nam et legati sedis apostolicæ ab antecessore
nostro, Adriano videlicet almifico præsule, Constanti-
nopolim directi, synodo ibidem peractæ usque ad
voluntatem sui pontificis vigilantis studio subscri-
pserunt.....nec ab apostolico manere : quia se-
des beati Petri cælestis regni clavigeri potestatem
habet, ligata quælibet pontificum congrua æstima-
tione absolvere. Quippe cum constat multos jam
patriarchas, hoc est Athanasium et Cyrillum Alexan-
drinos, Flavianum et Joannem Constantinopolitanos,
et Polychronium Jerosolymitanum synodice damna-
tos per apostolicæ sedis postmodum absolutionem
restitutos incunctanter fuisse.

Eo tamen tenore ista statuentes, apostolica dun-
taxat auctoritate et sanctorum Patrum venerabili-
bus institutis decernimus ut post hujus patriarchæ
obitum, nullus de laicis vel curialibus in patriarcha-
tus eligatur vel consecratur honore, nisi de cardina-
libus presbyteris et diaconibus Constantinopolitanæ
sedis, secundum sacros canones Spiritu Dei conditos
et totius mundi reverentia consecratos ; quia nec
præpropere contra canones ecclesiasticos, decreta-
que majorum cito quilibet lector, cito acolythus,
cito diaconus, cito sacerdos vel episcopus fiat, qui
in minoribus officiis sic diu perdurent, et vita eorum
pariter et obsequium comprobetur, ut per tempora
a majoribus instituta, comprobatis prius moribus,
et bonæ vitæ meritis refulgentibus, ad summum sa-
cerdotium postmodum veniat. Quoniam non est su-
bito præripiendum vel usurpandum, quod vita diu
probata meretur accipere. Nam si in quibuslibet
Ecclesiæ gradibus providenter curandum est ut in
Domini domo nihil sit inordinatum, quanto magis
elaborandum est ut in electione ejus qui supra om-
nes gradus constituitur, non erretur ? Nam totius

familiæ Domini status et ordo notabit, si quod requi-
ratur in corpore, non sit in capite ; et inde fiet ut
omnis ecclesiastica disciplina resolvatur, omnis ordo
turbetur. Et ideo hoc quod nos modo pro ecclesia-
stica unitate et pace quam Christus Dominus noster
nobis dedit habendam utcumque patimur esse veniale,
inultum postmodum esse non poterit ^a.

Hoc etiam modo ista, excellentiæ vestræ precibus
moti, fieri jubemus, si ipse patriarcha Bulgarorum
diocesis, quam piæ memoriæ Nicolaus præcessor
noster, Michael e ipsorum rege petente, apostolicis
doctrinis docuit, et per venerabiles episcopos suos
lavit unda baptismatis, omnique ecclesiastica regula
et disciplina prout oportebat instruxit, amodo suo
juri vindicare vel remittere nullo modo præsumpserit,
nec aliquam ejus-cumque honoris ibidem ordina-
tionem fecerit.... ibidem sunt illicite ordinati epi-
scopi vel sacerdotes.... archiepiscopo, vel episcopis
qui ibidem videntur existere..... sacrum pallium
quo inter sacra missarum solemnias uti pontificibus
solutum est, ipse patriarcha mittere præsumpserit.

Porro pro tantis perturbationibus, quibus, Eccle-
sia vestra longo jam tempore manet turbata, vestræ
Augustali pietati, obnixè suggerimus ut Constanti-
nopolitanum patriarcham digno honore venerantes,
quasi patrem spiritalem, et utpote inter vos et Deum
mediatorem præcipuum, divina vobis, per quæ ad
regnum perveniatis æternum, sedule annuntiantem,
pio semper affectu colatis, et ut concedet, in omnibus
honoretis ; quia pro temporali, quem illi exhibetis,
honore, vos et hic temporalem honorificentiam ha-
bebitis, et in æternum multiplicem procul dubio
recipietis, ab illo nempe qui glorificantes se glorifi-
care testatur (*I Reg. II*). Nec eorum verba falso
prolata, qui scandalorum zizania super conspicuam
segetem Domini seminare non cessant, vestra imperia-
liter dignetur audire majestas, nec pro talium su-
surrectionibus hominum, qui semper student scindere
unitatem Dei, vestem Domini, Ecclesiam Christi,
quique linguis suis semper dolose agere non cessant,
venenum aspidum portantes sub labiis suis (*Psal.
XIII*), animum clementiæ vestræ adversus eum aliqua-
tenus commoveatis, et summum sacerdotem vestrum
Dei providentia in Ecclesiæ Christi regimine constitu-
tum sic facile exhonoretis, quod nimirum sancto vestro
imperio valde inhonestum et indecens esse videatur.

Præterea mandamus etiam, ut omnes episcopos et
sacerdotes, seu cujuscumque ordinis clericos, qui de
consecratione Ignatii bonæ memoriæ patriarchæ
consistunt, sive in ipsa regia urbe manentes, sive
alicubi extra, longe seu prope retrusos, clementi
animo ad gremium et unitatem sanctæ Ecclesiæ revo-
catis, et ulnis extensis paterno affectu recipiatis et
amplectamini, propriasque unicuique illorum jubea-
tis reddere sedes ; ut sicut una est fides, unus in
nobis baptismus, et omnes unum sumus in Christo,

^a Hic deest periodus, quam ex editione Romana
suppleo : Si quisquam id quod omnino interdiximus
usurparit ; quia remissio peccati non dat licentiam

illorum delinquendi ; nec quod potuit aliqua ratione
semel concedi, fas erit amplius impune committi. Hoc
etiam, etc.

ita et isti qui ad unitatem et societatem Ecclesiæ Dei et corporis Christi redierint, et id ipsum dicentes perfectique existentes in eodem sensu, in eadem scientia, unus grex efficiantur, et unus pastor, nec audeant amplius dicere : *Ego quidem sum Cephæ, ego Pauli, ego autem Appollo* (I Cor. I), sed unius Christi veri Dei nostri, qui est pax nostra et fecit utraque unum, veniensque cœlestia cum terrenis pacificare dignatus est. *Qui idcirco semel pro peccatis nostris mortuus est, ut filios Dei qui erant dispersi, congregaret in unum* (Joan. XI, 52). Nec enim poterit unitatis eorum firma esse compago, nisi eos ad inseparabilem soliditatem vinculum charitatis astrinxerit : quatenus, Deo favente, absque omni perturbatione, vobis regnantibus salvi et securi persistentes, pro salute vestra et pro statu publicæ jugibus semper votis Dominum valeant deprecari.

Quod si forte quidam exstiterint cum eodem patriarcha communicare nolentes, admoneantur secundo et tertio ut sanctæ Ecclesiæ se unire procurent. Quod si acquiescere noluerint, in sua pertinacia manere volentes, sacra eos communione, his præsentibus missis nostris una cum synodo iussimus privare, quousque ad suum redeant patriarcham et ad sanctæ Ecclesiæ unitatem, cum præcipue ipsi episcopi a nobis sint canonice excommunicati. Et ideo si eos in consortium suum receperit, aliquamve cum eis communionem habuerit, simili modo eundem patriarcham cum ipsis episcopis ecclesiastica communione judicamus esse privatum. Data mense Augusto die decima sexta^a, indictione duodecima.

Missæ per Petrum presbyterum.

ADNOTATIO SILVERII BISH.

De præcedentis epistolæ a Photio adulteratione.

Qua occasione hanc de Photii absolute et restitutione epistolam pontifex scripsit, diximus supra in notis ad Vitam Joannis papæ VIII. Hæc in codice Vaticano character Longobardo exarato, atque jam haud pridem, sed mendose nonnihil, cuso, scripta est.

Summa plane Dei providentia factum est ut ejusmodi Joannis VIII papæ litteræ in nostrum usque tempus in ejus regesto, sive ut dicunt vulgo, registro integræ servarentur, nec sicut aliorum plurium pontificum epistolæ perderentur : ut ex his etiam ex Nicolai et Adriani epistolis Photius millies possit redargui imposturæ et falsitatis convinci. Ad usitatum impostor artem rediit falsandi litteras Romanorum pontificum, et fingere nova scripta, nam præter ea quæ plus satis de ipso dicta sunt sub Nicolao et Adriano pontificibus, et in synodo universali sunt proclamata, novæ rursus ab impostore prodieri falsitates, ut plane acciderit de his Joannis papæ litteris quod de suis, ab eodem Photio falsatis, Nicolaus in epistola ad Michaelem imperatorem exclamavit, cum ait : *Ex his, inquit, quæ tibi in aëre lecta sunt, nonnulla addita, multa mutata, plura subtracta reperiuntur, et per omnia talia a vobis effecta est, ut aut nihil, aut parum aliquid nos per eam de crebro dicti comministri Ignatii disposuisse causa videamur.* Hæc tunc Nicolaus, quæ etiam nunc ab ipso Joanne repetenda essent, si vivens videre potuisset, ut Nicolaus, quomodo suas missas Constantinopolim litteras Photius addendo, minuendo atque mutando, male pessimeque habuisset.

^a Deest in editione Romana, die decima sexta.

^b Ferme totum principium a Photio immutatum ;

Sed quorsum hæc ipse ? dices. Voluit scelestus quasi ex Joannis papæ litteris non solum suam restitutionem firmam roboratamque monstrare, sed et falsatis illis probare etiam auctoritate ejusdem pontificis octavam synodum œcumenicam esse damnatam ; probatam vero recentem ab ipso adversus eam Constantinopoli celebratam ; octavamque pariter nominatam in abolitione legitima octavæ œcumenicæ sub Adriano pontifice celebratæ. Ex quo grande malum illud evenit ut pro germana octava, a Græcis maxime, accepta sit synodus Photiana ; ut factum inter alios a Zonara est videre, qui in sua canonum collectione et interpretatione posuit loco octavæ œcumenicæ synodum Photianam sacrilegam : quam ipsam et Theodorus Balsamo universalem appellat, cujus et tres canones recitat ; sic et reliqua Græcorum schismaticorum colluvies. Tu igitur, lector, hic, amabo te, sede, arbiter veritatis, atque ex litteris Joannis papæ in Græcum a Photio redditus et recitatis in secunda actione suæ pseudosynodi, revocatis vero ad Latinitatem a Friderico Metio, origine Græco, sed pietate catholico atque fide Latino, modo ob virtutum atque doctrinæ præstantiam creato Thermarum episcopo, veteraris malas artes intellige. Exstat ipsa integra Photiana pseudosynodus Græce in scripto codice bibliothecæ Columnensis, quæ fuit cardinalis Sireleti, nota numeri quadragessimæ, in quo sub actione secunda eadem epistola Joannis papæ recitatur ad imperatorem scripta adeo mutata, ut vix quis cognoscat eandem esse Joannis, quam nuper recitatum audisti ; sic enim se habet :

« Joannes, servus servorum Dei, serenissimis dilectis filiis nostris spiritualibus, et Deo charis BASSILIO, LEONI, et ALEXANDRO victricibus [pro victricibus, HARO.] imperatoribus et æternis Augustis. »
 « Puritas et splendor vestræ rectæ fidei, et morum probitas, et benignitas perfecta, o Christianissimi et maximi imperatores Romanorum, luminum instar in medio terræ micantes usque ad omnes fines, ad quos universus orbis, extenduntur et splendent. Non enim sola recta fide præstantes, in aliis rebus vos oscitanter habetis, sed potius super vestram irreprehensibilem fidem superedificatis non lignum aut herbam, aut arundinem, sed pretiosos lapides aurum et argentum, et ut brevier dicam omnia alacri studio perficitis, quibus cognoscitis Deo rem gratam fieri. Nihil vero Deo gratius esse dignoscitur quam ut universæ ejus Ecclesiæ quasunque sol respicit, recta fide et mutua inter se dilectione et charitate viventes, illi singulis diebus gratias agant. Quapropter hanc unionem etiam in vestra Dei Ecclesiæ conspici et vigere vos percipientes, Romanam sanctam Ecclesiam per vestros legatos et sacras litteras adjuvante assumpsistis, pro certo habentes eam vobis futuram præsto ad id quod optastis. Neque vos prius id agere coepistis, ut hanc rem excogitaretis, sed vestigiis prædecessorum vestrorum inhaerentes ; in quamvis scilicet, curare et etiam dignum : a principe videlicet apostolorum Petro, quem Dominus omnium Ecclesiarum caput constituit, inquit illi : *Pasce oves meas* (Joan. XX) ; nec non a sanctis et orthodoxis sanctorum Patrum decretis atque doctrinis, quemadmodum sacre et piæ vestræ litteræ testantur : id vero propterea fecistis, quo magis vestræ fidei firmitas celebrata eluceat, et erga Deum dilectio sincera et efficax pateat.

Nihil enim aliud aptius et dignius contingere potest illis qui maximis dignitatibus et principalibus sunt constituti, quam rectæ fidei splendore et Dei dilectione præstare contendere ; et curare ut omnes qui cum eadem fide Deum venerantur, dilectionis etiam vinculo uniantur et constringantur. Quapropter vestræ litteræ obsequantes nos, et in illius verbis dilecti, ignis instar accensi, cum universis quod enim visum sit oculis præconium imperatoris, voluit illud gloriosius predicari.

nostra sanctissima Romanorum Ecclesia unanimes et concordēs surreximus ad ea omnia quæ a vobis scripta sunt prompto et alacri animo peragenda. Scripsistis nobis, noster dilecte fili, ut nostra apostolica viscera misericorditer aperiremus, et omnes quot quot fuerint qui in vestra Ecclesia vel propriis chirographis vel alio quovis pacto prævaricati sunt, et canonicis censuris obnoxii sunt effecti, recipere et pacis et unionis curam haberemus. Quin etiam ante omnia Photium religiosissimum episcopum nostræ communionis hæredem et participem, et comministrum facientes, ad magnum episcopatus culmen et dignitatem, patriarchalem iterum constitueremus, ne Ecclesia Dei multo tempore schismatum Deo exosorum et malorum scandalorum fluctibus agitata permaneat.

« Nos vero vestræ serenitatis preces accipientes ut rationales et justas et Deo acceptas, et tempus jam præsto esse, quod antea quærebamus et invenire Deum precabamur, et rationi etiam congruum censentes Ecclesiam Dei tranquillam reddere missimus propterea legatos qui vestram perficerent voluntatem. Et licet pietas vestra Photio vim inferendo nos prævenit, in illo restituendo videlicet, antequam nostri legati isthuc venissent, hæc tamen nos supplemus non auctoritate nostra, licet hoc etiam facere possimus, sed apostolicis constitutionibus et sanctorum Patrum decretis horum demonstrationem afferentes, neque Ecclesiæ regulas jamdiu traditas solventes, sed eas in quibuscunque, dum harum nimis exacta et immutabilis observantia servatur, divellit et destruit totam compagem corporis Ecclesiæ, ad quod conducit trahentes, ab ipsamet Ecclesia edocti. Secundus enim canon Nicænae synodi hæc habet. Quoniam frequenter vel a necessitate vel alio quovis pacto coguntur homines ecclesiasticos canones transgredi, et quæ sequuntur. Nec non papa Gelasius de seipso inquit quod ubi vis non apponitur, sanctorum Patrum statuta inconcussa maneant. Similiter etiam sanctissimus papa Leo in eodem spiritu præcipit, dicens: Ubi vis non præcedit, immobilia permaneant sanctorum Patrum statuta; ubi vero necessitas et vis reperitur, ibi ad id quod convenit Ecclesiis Dei, ille qui potestatem habet, dispenset. Ex necessitate enim, juxta divinum apostolum, etiam legis lit mutatio. Felix præterea papa consono etiam dicit: De hoc enim oportet animadvertere ut ubi necessitas contingerit sæpenumero etiam constitutiones Patrum transgredi liceat. Sancta etiam synodus Carthaginensis ait trigesimo quinto capite: Mandamus ut Donatistarum clerici iterum ad ecclesias revertantur, licet etiam a synodo fuerint damnati. Synodus etiam synodum abrogasse reperitur propter unionem Ecclesiæ et concordiam. Et Innocentius papa ait: Isti a Bonoso ordinati hæretico recipiantur, ne iterum scandala in Ecclesia Dei oriantur.

Neque solum istis, licet tales essent ut ex illis fuissent ut hæretici damnati, apostolica tamen sedes Ecclesiæ pacis curam gerens manus adjutrices porrexit, verum etiam orthodoxis episcopis et patriarchis ad ipsam confugientibus, sicut nunc religiosissimus Photius, et auxilium implorantibus opem tulit. Nostis omnino magnum Athanasium episcopum Alexandrinum et Cyrillum et Polyehronium Hierosolymorum, Joannem, quem dilecto vestra Chrysostomum appellat, Flavianum etiam Constantinopolitanum: hos enim a synodis damnatos et reprobatos, cum ad sanctam Romanam Ecclesiam commiserunt, apostolica sedes hæc nostra

A confirmavit et ad priorem dignitatem restituit. Si igitur ex Donatistis et ex Bonoso ordinationem acceperunt, et ab Ecclesiæ catholicæ limitibus fuerunt ejecti a synodo numerosa, iterum ab alia synodo recipiuntur, et in sacerdotum numero collocantur, ut Ecclesia Dei indivulsa et a schismatibus integra et libera permaneat (nihil enim oculis Dei magis execrandum et abominabile conspiciatur quam is qui schismatum auctor in ecclesiis existerit, et nihil jucundius vel charius etiam bonitati quam Ecclesiam suam integritatem, perfectum erga Deum amorem, et erga proximum dilectionem conservare), multo magis veros orthodoxa fide illustres, et vitæ gravitate et rerum peritia celebres, non oportet illos contemne^b, obnoxios penitentiae jugo gravi, sed ad priorem dignitatem restituere.

« Cum enim semel apostolica hæc sedes claves accepisset regni cælorum a primo et magno pontifice Jesu Christo per principem apostolorum Petrum; cum illi dixisset: *Tibi dabo claves regni cælorum, et quæcunque solveris super terram, erunt soluta et in cælis; et quæcunque ligaveris super terram, erunt ligata et in cælis*. Matth. xvi: habet facultatem omnes ligandi atque solvendi, et juxta prophetam Jeremiam, evellendi et plantandi (Jer. i). Hac de causa nos, auctoritate usi principis apostolorum Petri, cum universa Ecclesia^d affirmamus vobis, et per vos etiam sanctissimis fratribus et comministris patriarchis, Alexandrino, Antiocheno et Hierosolymitano, et reliquis episcopis et sacerdotibus, et universæ Constantinopolitanæ, nos convenire et consentire vobis, vel potius Deo in omnibus quæ a nobis vos petistis. El primum quidem nos recipere Photium admirabilissimum et religiosissimum archiepiscopum et patriarcham fratrem nostrum, et communionis cum sancta Romanorum Ecclesia consortem et participem, et hæredem, non solum propter alias virtutes quibus ille præstat, verum etiam propter scandala e medio tollenda, et pacem Dei, et dilectionem ad invicem inter nos firmandam. Recipite etiam ipsum vos certo et firmo animo, et charitate et fide, omne iniquitatis et malitiæ venenum, et duplicitatem et ambiguitatem de cordibus vestris avellentes, sicut ipsum recepit Romana Ecclesia.

« Didicimus enim fere ab omnibus qui huc veniunt ex illis qui istic versantur, Photium omnibus prærogatiis præstare coram Deo non solum sapientia et prudentia circa res divinas et humanas, verum etiam circa omnes virtutes morales, et curam divinorum præceptorum; tanquam irreprehensibilem operarium celebrari. Neque justum duximus talem virum otiosum et inutilem permanere, sed in altum in vestra Ecclesia iterum elatum et lucentem consueta sibi et Deo dilecta opera exercere, tum erga sacerdotes, tum etiam erga episcopos. Quapropter eundem resumentes sermonem, vobis dicimus: Suscipite virum istum absque ulla dubitatione.

D « Nec aliquis pro sui excusatione adducat injustas synodos adversus ipsum habitas, neque, ut multi stupidiore opinantur, decreta prædecessorum nostrorum beatorum pontificum, Nicolai videlicet et Adriani adversus Photium lata acuset; non enim recepta fuerunt ab ipsis quæ contra sanctissimum Photium gesta fuerunt. Nullus per chirographa vestra occasione sumat ad schismata fovenda cum illo et adinvicem: omnia enim jam sedata sunt et abrogata, omnia que contra Photium gesta sunt, irrita et nulla per nos minimos in manibus principis apostolorum reposita sunt, et per eum in humeros

^a Addidit ist. Photius, et mutavit in contrarium sensum que de seipso habebantur.

^b Ex se hæc addidit Photius.

^c Nulla hæc a Photio prætermissa noscuntur, quibus sedis apostolicæ auctoritas prædicatur, et Adriani prædecessoris legatio memoratur.

^d Hæc omnia addita à Photio impostore.

^e Additamentum item est impostoris totum quod sequitur.

^f Sunt ista Photii additamenta contra synodos in ipsum celebratas.

Jesu Christi agni Dei qui tollit peccata mundi.

^a Recipite igitur ipsum apertis unis, fratrem videlicet nostrum comministrum, Recipite episcopum et Dei et irreprehensibilem. Recipite patriarcham vestræ Ecclesiæ. Confirmate erga illum dilectionem, fidem, et cum observantia obedientiam, et per hunc erga sanctam Romanam Ecclesiam eandem confirmate. Qui enim illum non recipit, nec ea quæ a nobis et sancta Romanorum Ecclesia de illo decreta sunt, recipit; nec is adversus nos bellum suscipit, sed adversus sanctum Petrum apostolum vel potius adversus Christum ipsum Filium Dei, qui ita honoravit et glorificavit apostolum suum ut ipse ab eo haberet facultatem ligandi atque solvendi.

^b « Hoc etiam rogamus pietatem vestram, ut in memoriam revocetis ex quo tempore scandala et schismata in vestram Ecclesiam ingressa sunt et eam integritatem corruerunt, horum malorum nullam aliam fuisse causam, nisi quod vos imperatores admisistis blasphemias et calumnias adversus pontifices et patriarchas vestros ac reliquos Dei sacerdotes, nec non quod vos parvipendistis dilectionem et fidem et honorem et observantiam erga illos. Rogamus itaque divinam potentiam vestram ut ex nunc aures obturetis imperii vestri a Deo electi calumniis et obtreccationibus adversus pontifices quas pravi illi homines et malis solum gaudentes vobis suggerere solent, et eos tanquam piacula et abominaciones, iniquas verborum illorum sagittas repellere velitis: patriarchas autem vestros in honore habere, et quasi proprios patres existimare, tanquam Dei et hominum mediatores venerari. Ipsi enim vigilat pro animabus vestris, et quæ pro salute vestra faciunt vobis a Deo semper deprecantur, nec non, ut par est, pro iis quibus vos Deum offendistis errantes, sacrificia ipsi offerunt, ut vobis Deum placeat, benevolum illum vobis reddentes. Neque id solum, verum etiam pro tranquillitate et duratione potentie vestræ, et pro victoria adversus hostes obtinenda Deum nostrum misericordem orant. Doctores, etiam et magistri, vobis existunt, dum vos admonent ut ea faciatis quibus regnum cœlorum acquiratis.

^c Præterea vos præ aliis diligere noscuntur: non enim adulatorum amicitiam sectari sciunt vobiscum, adulatorum instar vos diligere, sed potius charitatem, quam ipsos docuit Christus Jesus per sanctos apostolos suos. Non oportet igitur vestros patriarchas a vobis contemni, tum propter ea omnia quæ prædicimus tum etiam ut juxta Domini præceptum illos diligatis. Nec vos lateat quod si hoc feceritis, non solum honores illorum consequimini, quos vos honoratis et colitis, sed illum potius qui eorum manibus in altari ministratur, videlicet Christum, qui pro peccatis omnium Deo offertur: qui enim illos honorat, Deum honorat; et qui illos aversatur et respuit, Deum ipsum respuit. Falsas itaque detractiones et obtreccationes, per quas zizania et schismata et scandala in Ecclesia Dei oriuntur, et dividunt inconsutilem Christi vestem, tanquam venenum aspidum, vestrum imperium vitet, et potius sanctissimo Photio fratri et comministro nostro opem ferat in omnibus quæ ad Ecclesiæ bonum regimen faciunt.

^c « Eos etiam qui ipsum non quo par est honore habent, argue ut corrigantur; sæpe enim quos Dei timor et erga divina religio et pietas non correat,

^a Ejusdem falsarii sunt hæc verba si pposita.

^b Adjuvit et omnia ista quæ sub hoc capite continentur ad securitatem sui patriarchatus falsitatis architectus Photus.

^c Censuit et ista Photius sui causa.

^d Sunt ex Joannis epistola, licet habeat aliqua verba a Photio addita, ut illud: *Post obitum sanctissimi Photii*, etc.

A imperatorum et principum indignatio in eos irruens modestiores reddit. Idque si feceris, regnum tibi cœlorum comparare certo scito, et sempiternam imperii tui durationem et pacis confirmationem. Si vero id minus feceritis, pro certo habeatis quod nunquam schismata deerunt in Ecclesia Constantinopolitana.

^d « De hoc etiam legem condere, tuum imperium a Deo custoditum monemus, ut post obitum sanctisimi Photii comministri et fratris nostri nullus et sæculari ordine ad pontificalem dignitatem eligatur, et ordinetur sed potius ex presbyteris cardinalibus, ex iis videlicet qui catholicæ Ecclesiæ sunt ascripti, vel ex ejus diaconis, vel aliis sacerdotibus, qui existunt sub sede Constantinopolitana, juxta sacros canones, ut ne contra ecclesiasticam regulam et sanctorum Patrum canones res vestræ peragantur. Procedere autem hunc volumus per singulos gradus Ecclesiæ satis probatum, primum lectorem, deinde acolythum, postea diaconum, deinde presbyterum et tandem episcopum, si tamen bonum habuerit testimonium de se pietate et scientia; quoniam dum inferioribus gradibus aliquod temporis spatium immoratur, ejus virtus et probitas agnoscit, et hoc pacto oportet vestros patriarchas progredi, non ex tempore præoccupare singulos gradus, ut in domo Domini nihil inveniatur incompositum et inordinatum. Qui enim supra omnes gradus collocatur, irreprehensibilis in omnibus oportet reperitur.

^e « Nec quia nos vestræ Ecclesiæ paci et quieti consulentes, Photium religiosissimum fratrem nostrum recipimus, sicut et papa Adrianus Tarasium ejus avunculum, hoc jam vobis pro consuetudine et regula usurpetur; quæ enim raro bona sunt, non possunt lex fieri multis et pro lege sumi. A Domino enim nostro Jesu Christo edocti, etiam nos viscera misericordiæ recipientes, condonavimus vobis petitionem vestram tum de Photio, tum de aliis sacerdotibus ex altera ordinatione existentibus indultum concessimus. Quicumque vero in futurum ausus fuerit id iterum committere, pœnitentia ex canone a nobis absque ulla remissione et damnatio illi irrogabitur.

^g « Rogamus etiam hoc pietatem vestram ut neque frater et comminister noster Photius sanctissimus, nec alius quispiam successorum ejus in futurum in Bulgaria ordinationes habeat, neque per pallium illuc missum, neque per defensorem prædictam provinciam Bulgarorum ut propriam ministret. In alieno enim solo non decet alios ædificare. Prædecessor enim noster Nicolaus felix recordationis precibus principis Bulgariae Michaelis apostolicis doctrinis gentem illam educavit, et per religiosos suos episcopos omnes ecclesiasticas regulas et canones, et quæcumque ad Christianam religionem pertinent cum illis tradidisset, eos perfecti: licet nonnulli audacter subriperint nobis prædictam provinciam, quæ ad eos non attinebat; ordinationes etiam et consecrationes ecclesiarum et omnia quæcumque facere minus oportebat, peregerint. Quapropter præter prædicta, et hoc etiam vobis notum facimus, ut, si aliquando episcopos ibi degentes contra nos aliquid delinquere deprehendemus, et canonicis pœnis illos subjiciemus, non habeant vos ad quos confugiant, sed potius vos inveniant in hoc nobis concordantes nec dissentientes.

^h « Oramus præterea imperium vestrum Christo

^e Cum prætermisissis audis astruimus et exortam a Latinis omnibus inter primos quatuor ordines annumeratos, sciat a Græcis corruptum locum.

^f Sunt addita ista a Photio quæ hoc capite continentur.

^g Sunt Joannis: sed nonnulla miscuit Photius.

^h Delevit impostor vocem, *Vandamus*, et nomen Ignatii, et posuit *Oramus*, etc.

dilectam ut congregetis episcopos et presbyteros cujuscunque ordinis ecclesiastici et civilis qui a nobis dissentire videntur, ubicunque fuerint intra terminos vestros, eosque ad vos ducentes curetis, et moneatis ut ipsi uniantur Ecclesiæ Dei et Photio sanctissimo patriarchæ fratri et comministro nostro nobis unito. Proprias pontificales et sacras vestes, gradus etiam illis restituite, et viscera misericordiæ illis aperite, ut quemadmodum unus Deus, unum baptismum, una fides, ita et nos ipsi unum etiam in Christo, et per vestram piam doctrinam unum pariter nobiscum sint, et in Ecclesiæ Dei perfectione coordinati et conjuncti nobiscum in Christi sanctissimum corpus, ut in eadem mente et in eadem voluntate permanentes, Deum omnium glorificemus. Nec aliquis in posterum dicat : *Ego quidem sum Cephas, ego vero Pauli (I Cor. I)* : sed ut omnes hoc dicamus quod Christi sumus crucifixi et mortui pro nobis, qui per suam passionem quæ in terris sunt et quæ in cælis invicem conciliavit, et nos Deo conjunxit et Patri per se ipsum et mutua dilectione et communione. Si vero a vobis eos advocatos monentes et hortantes et orantes, ad unionem Ecclesiæ convenire vobiscum semel et iterum et sæpius obedire illi noluerint, neque nostris litteris obtemperare et suamet lucrari salutem, sed in priori sua pertinacia et temeritate permanserint istiusmodi homines, precipinus ab immaculati corporis et sanguinis Domini nostri Jesu Christi perceptione alienos fore, quousque uniantur sanctæ Dei Ecclesiæ, et Photio sanctissimo patriarchæ fratri et comministro nostro. Et postea : Hoc peracto quæ sequuntur justam damnationem, in his litteris non scripsimus, ne amplius prorogaretur oratio præter modum, sud in communitario conscripsimus religiosissimi Petri presbyteri et cardinalis nostri legati, una cum Eugenio et Paulo religiosissimis episcopis, ut cum ipsis præsidens in synodo una cum sanctissimo Photio fratre et comministro. Dei oculum qui omnia videt et semper vigilat ante suos oculos habentes, et inevitabilem divinam justitiam et suam conscientiam immaculatam et inculpata conservantes, omnes res Constantinopolitanæ Ecclesiæ et quæcunque indigent correctione, et quæ, ut par est, declinare debent, ut id quod melius est et conducibilis Dei Ecclesiæ, peragatur. Cælestis imperator piam potentiam tuam custodiat. »

Hucusque ex Photiana versione Joannis papæ epistola. Cur autem in titulo Joannis epistolæ non insit Constantini nomen, id accidit quod, sicut ex Nicæta dictum est, mortuus inter hæc fuerit Constantinus ipse Augustus primogenitus Basilii imperatoris.

Vidisti imposturas, lector, veritatis amator et cultor, execratus es procul dubio, quas in profano etiam homine, nedum sacerdote, et episcopo et patriarcha, sed et in ethnico, omnisque divinæ et humanæ legis experte barbaro improbare non possis; totque falsitate admixta litteris non privati alienius et ignoti hominis, sed ab apostolica sede ex episcoporum concilio datis; nec ad vilem aliquem terre filium, sed ad ipsum Orientis imperatorem, nec otiose vel leviter de rebus nullius momenti conscriptis, sed quæ maximi omnium ponderis essent; ut merito tanti auctorem sceleris improbare et execrari, ipsumque facinus abominari atque horrere tanquam funestum aliquid ab imis inferis proditum a principe tenebrarum per filium tenebrarum nominatens lucis angelum mententem Profium, omnino debens.

CCXLIV.

AD CONSULUM CONSTANTINENSEM.
(Anno 879.)

Jubei eos, schismate soluto, ad Ecclesiam unitatem redire, et Photio communicare.

EXIMIS VIRIS JOANNI, LEONTI ET PAULO PATRICIIS, AT-

que STILIANO, JOANNI ET METROPHANI reverendissimis metropolitibus, et cæteris sacerdotibus, seu cujuscunque ordinis clericis seu laicis.

Omnium Ecclesiarum Dei secundum Apostolum sollicitudinem habentes, et pastoris gregis Domini nobis in ipso apostolorum principe curam commissam gerentes, Domino dicente : *Si diligis me, Simon Petre, pasce oves meas (Joan. XXI)*, condolemus vobis; quoniam multis jam labentibus annis usque ad præsens in discordiæ divisione et in scandalorum perturbatione vos videmus promptos manere, nec per charitatis custodiam ad unitatem Ecclesiæ reverti. Quam videlicet unitatem qui non tenet, Dei legem non tenet, Patris et Filii fidem non tenet, vitam non tenet nec salutem. Hoc denique unitatis sacramentum, hoc concordie vinculum inseparabiliter cohærens ostenditur, quando in Evangelio tunica Domini nostri Jesu Christi non dividitur omnino, nec scinditur, sed sortientibus de veste Christi, quis potius Christum indueret, integra vestis accipitur, et incorrupta, atque indivisa tunica possidetur. Possidere enim non potest indumentum Christi, qui scindit et dividit Ecclesiam Christi. Quis ergo sic sceleratus et perfidus? quis sic discordiæ furore vesanus? Quis aut credat scindi posse aut audeat scindere unitatem Dei? vestem Domini? Ecclesiam Christi? Monet ipse in Evangelio suo dicens : *Et erit unus grex, et unus pastor (Joan. XVI)*. Apostolus autem Paulus hanc eandem nobis insinuans unitatem, hortatur dicens : *Obsecro vos per nomen Domini nostri Jesu Christi, ut id ipsum dicatis omnes, et non sint in vobis schismata : sitis autem perfecti in eodem sensu et in eadem sententia (I Cor. I)*. Et iterum dicit : *Sustinentes invicem in dilectione, satis agentes servare unitatem spiritus in conjunctione pacis (Ephes. IV)*; quoniam nec habere pacem cum Deo poterit, qui cum fratribus pacem per zeli discordiam non habuerit. Quam igitur sibi pacem promittunt inimici fratrum? Quæ sacrificia celebrare se erudunt sacerdotes, charitatis Dei qui non sunt veste induti? Pacem nobis Christus dedit : *Pacem, inquit, meam do vobis, pacem relinquo vobis (Joan. XIV)*; concordēs atque unanimes esse præcepit; dilectionis et charitatis federa incorrupta atque inviolata mandavit. Et ideo vestram salutem cupientes, monemus, et apostolicam benignitate jubemus, vos omnes sanctæ Ecclesiæ viri, vestroque patriarchæ, Photio videlicet, quem pro Ecclesiæ Dei pace et unitate recepimus, adherere communicareque studete. Nam si hæc nostra apostolica monita, tantis supradictis testimoniis divinis firmata, audire contempseritis, in vestra pertinaciâ manere volentes, scitote quia missis nostris præcipimus tandiu vos omni ecclesiastica communione privare, quandiu ad unitatem corporis Christi et ad vestrum contempseritis redire pontificem. Nec aliquis vestrum hanc habeat in redeundo excusationem, pro scripturis de hac causa compositis, quia divina potestate, quam accepit Ecclesia Christi, cuncta solvuntur vincula, quando per pasto-

ralem auctoritatem quæ fuerant ligata solvuntur; A quoniam, sicut dicit sanctus papa Gelasius, nullum est vinculum, insolubile nisi circa eos qui in errore persistent. Data mense Augusto, indict. XII, die XVI.

Missæ per Petrum presbyterum.

CCXLV.

AD CLERICOS CONSTANTINOPOLITANOS.

(Anno 879.)

Ejusdem ac precedens argumenti.

Reverendissimis et sanctissimis omnibus episcopis, confratribus Ecclesiæ Constantinopolitanæ sedem respicientibus, seu tribus aliis principalibus ecclesiis Hierosolymitanæ.

Quorumdam sane vestrum, fratres charissimi, scripta suscipientes, unanimitem atque consensum in parte Photii in eis plene reperimus, indeque ob- B nix optantes, ut quod particulariter hactenus, hoc canonicè semper et generaliter, atque secundum ea quæ sunt Christi Jesu, et non quæ vestra, pia animi devotione, id ipsum, ut non sit in vobis schisma, sapiatis quærere, pulsare et invenire; nos autem moderatione sedis apostolicæ, sicut divisa contentione atque dolemus scissa errore, ita gaudemus in vinculo pacis ac charitatis compagine soliditatis fraternitatem vestram sine intermissione inviolata persistere, juxta Apostolum (I Cor. XIII), idem sapite, et Deus pacis erit vobiscum. Quod vero sollicita intentione vestra petit dilectio, uti auctoritate beati apostoli principis apostolorum Petri, vobis Photium patriarcham in regia urbe Constantinopolitana fore consentiamus, illud animo luce clarius retinetis, quod in Evangelio primo pastori Dominus ait: *Ego pro te rogavi, Petre, ut non deficiat fides tua; et tu aliquando conversus confirma fratres tuos* (Luc. XII). His hortationibus succensi, imo potius corroborati, in quantum sine gravi offensione valemus auxilium ferre, tam cunctis Domini sacerdotibus quam universo in orbe terrarum Christiano populo, nunquam desinimus, sequentes prædecessorum exempla, de quibus sanctæ memoriæ Adriani papæ in Tarasii nuperime regiæ urbis patriarchæ confirmatione (in epistola ad Constantinum et Irenem imperatores), hæc interim ponimus verba; inter reliqua inquit: Ipse enim Tarasius regiæ urbis patriarcha misit nobis synodicam, priscam adimplens consuetudinem, quam suscipientes et liquidius indagantes, et tam de fassione recte fidei ejus quam dogmatum sanctarum sex synodorum et venerandarum imaginum orantes, nimis iterum conturbati ac contristati sumus, quia ex laicorum ordine, et imperialibus obsequiis, deputatus, repente in patriarchatus culmen electus est, et apocaligus [in epist. Adriani, a caliga militari] contra sanctorum canonum censuram factus est pa-

triarcha. Et quod dicere pudet, et grave tacere est, qui regendi adhuc et docendi sunt doctores nec erubescunt videri nec metuunt, ducatumque animarum impudenter assumunt, quibus via omnis ignota doctoris est, quo [forte, qui quo, Hæro] vel ipsi gradiantur ignari sunt. Quod quam pravum quamve sit temerarium, sæculari ordine et disciplina monstratur: nam dum dux exereitus non nisi labore et sollicitudine expertus eligitur, quales animarum duces esse possunt qui in episcopatus culmen immatura cupiunt festinatione conscendere? Hujus saltem rei comparatione considerent et aggredi repente inexpertos labores absteineant, quippe qui non didicerint quod doceant. Unde canonica instituit censura nequaquam ex laico ad sacerdotium repente transire.

Et nisi per ejus fidelem concursum pro sanctarum imaginum erectione ejus consecrationi assensum omnimodo tribuere nequimus. Porro et nos ac vos, fratres charissimi, lege constringimur ut si deinceps apud cunctam ecclesiam quæ in vobis est a paternis regulis per similem prævaricationem nunquam spondeatis delinquere, id est, ne neophytum repente ad honorem ascendere. Et si parochiam Bulgaræ gentis, quæ Deo auctore beati Petri apostoli intercessionem, atque decessorum nostrorum labore, ad Christum conversa est, subducta quam ibi fecistis illicitam ordinationem, reddideritis; et abjectos quosque fratres ac discordantes vestro labore [f. deest reconciliaveritis] studio cum prædicto Photio quem patriarcham in regia urbe desideratis habere, aliisque piis operibus offensione quam coram Deo et sanctis canonibus contraxistis, in hac parte, recompensaveritis. Venerabilem fratrem Photium coram synodo misericordiam quærando, et patriarchatus honore fungi volumus, et nostræ communionis, imo et beatorum apostolorum seu omnis Ecclesiæ fore, Domini miseratione, participem. Hoc exemplo roborati maxime quo egregius prædecessor noster Innocentius, sanctissimus papa, Photinum restaurare dignatur, dicens (epist. 12, n. 7): Veniam nunc ad maximum. quasi quoddam thema, Photinum; et inter alia: Quia res ad salutem rediit veniæ, hunc in tantum vobis annitentibus, post condemnationem more apostolico subrogamus, tantisque vestris assertionibus, vobisque tam bonis, tam charis non dare consensum, omnibus duris rebus durius abutramur. Pro vestra ergo approbatione, fratres charissimi, et sententia ac postulatione episcopum Photinum habetote. Licetum est ita constituere ut deprecamini; et nostram in melius conversam sententiam, labore vel testimonio vestro, compotes voti suscipite. Sollicitos enim vos pro salute libenter admitto; cui manum porrigitis, vobiscum porrigo; cui porrigo, mecum porrigite.

^a Hanc epistolam sicut cæteras recitatas passim esse perditissimi hominis Photii imposturam, patet ex verbis istis: *Venerabilem fratrem Photium coram synodo misericordiam quærando, et patriarchatus honore fungi.* Quæ professionem humilitatis insinuantia superbus et profanus homo plane abrasit, et loco istorum, ut in cæteris fecerat, ista posuit:

Photius, patriarcha sanctissimus et religiosissimus frater noster, non dedignetur in conspectu synodi gratiam et studium nostrum, quin potius viscera misericordie Romanorum Ecclesie prædicare, quod ab ea sit receptus. SEN. BIN.

^b Aliquid deest.

Hæc enim est ad Corinthios apostolica declarata benignitas, ut in uno spiritu ductam ac reductam sententiam boni semper indifferenter sequantur. Data mense Augusto, indictione duodecima.

Missa per Petrum presbyterum.

CCXLVI.

AD PAULUM ET EUGENIUM EPISCOPOS.

(Anno 879.)

Constituit eos unacum Petro presbytero legatos, ut, sicut illos monuerat, pacem in Ecclesia Constantinopolitana conficiant.

Reverendissimis PAULO Anconitano EUGENIOQUE Ostiensi episcopis.

Quamvis contra nostram egeritis voluntatem, et Constantinopolim venientes, inquisita causa Ecclesiæ pacis et unitatis, Romam reverti nobisque omnia sub certa relatione debebatis referre. Et quia primam legationem vobis comissam idonee non perregistis, secundam vobis ideo committere non debebamus; tamen apostolicæ miserationis benignitate utentes, et in hac secunda legatione fideliter perficienda vos huic Petro religioso presbytero cardinis nostri, familiarique nostro sociamus, quatenus ea quæ pro pace et unitate Ecclesiæ Dei agenda sunt, secundum apostolicos nostræ auctoritatis apices, et secundum a commonitorii nostri tenorem capitulum descriptum, sagaci valde intuitu simul agatis et ita definiatis ut gratiam nostram, quam prius inobedienter agendo exasperastis, nunc fideliori devotione operando, placibilem habere possitis. Data mense Augusto, indictione duodecima.

CCXLVII.

AD PAULUM ET EUGENIUM EPISCOPOS, SIMILITER AD PETRUM PRESBYTERUM.

(Anno 879.)

Mansi monitum in sequentem epistolam.

Romana synodus, auctoritate Joannis papæ congregate, Petrum aliosque adjunctos ei legatos ea facultate duntaxat instruxit atque communivit, ut Photium a censuris ecclesiasticis absolverent et sedi Constantinopolitanæ restituerent: non ad veram et germanam synodum octavam, sub Adriano pontifice habitam, reprobandam et particulam illam, *Filioque*, e symbolo penitus tollendam, multa auctoritate idem muniti fuerant. Hæc cum pateant ex epistola Joannis ad Basilium imperatorem scripta (*epist.* 243), qua se in Photio sedi suæ restituendo, non concilii dissipatione vel abrogatione, sed tantum dispensatione uti significat; secundo ex epistolis 250 (*nunc* 297) et 251 (*nunc* 296), quibus indicat se reprobare omnia quæ præter restitutionem Photii acta sunt. Tertio ex ipso commonitorio per Photium corrupto et falsato, in quo episcopi subseribentes profiterentur omnes se commonitorio pro Photii restitutione subscribere. Nos vero et germano commonitorio cujus 203. 250 (*nunc* 296, 297) aliisque pluribus Joannis papæ epistolis mentio fit, destitui, commonitorium illud quod Pothio corruptum, et in Photianæ pseudo octavæ synodi actione 3 lectum fuit, inserendum esse putavimus; tum ut inde acta hujus concilii confirmarentur; tum ut quæ auctoritate legatorum in

* *Commonitorii nostri.* Commonitorium ipsum, cujus hic fit mentio, reperitur recitatum, sed a Photio falsatum, in actione secunda synodi Photianæ, octavæ mendaciter dictæ. Quod etsi non inveniatur inter Latine scriptas epistolas ipsius Joannis, ut ex autographo possit argui falsitatis, tamen ex multis

A pseudo octava Photiana synodo Constantinopoli gesta dicuntur, falsitatis et imposturæ manifestæ redarguantur. Commonitorium autem Græce scriptum et a Metio Latine redditum, sic se habet:

JOANNES episcopus, servus servorum Dei; commonitorium fratribus PAULO et EUGENIO episcopis, similiter et PETRO presbytero cardinali, nostris Constantinopoli legatis.

Cum primum, divina favente gratia et intercessionibus sanctorum, apostolorum, Constantinopolim ingressi fueritis, illuc divertite quo præcipiet imperator; et antequam imperatorem visitaveritis, nulli alii apostolicas litteras tradere velitis. Cum coram imperatore fueritis, litteras illi tradetis hujusmodi verbis illum alloquentes: Salutat vestrum ex Deo regnum spiritualis vester pater dominus Joannes apostolicus papa, tuam ex Deo potentiam suis orationibus singulis diebus sancto Deo commendans, ut ille qui vobis dedit hoc desiderium propter ecclesiasticam pacem, tribuat vobis gratiam suam, et consoletur vos sua felici protectione, et perficiat in bonis desideria vestra. Si rogaverit imperator, antequam litteras legat sive capitula responsionis nostræ, hujusmodi verbis illis respondeat: Si jubet imperium vestrum, videat epistolas. Et si dixerit: Quid continent epistolæ? illi respondete: Salutationes continent et omnino recte perficiunt. Postridie salutaturi Photium sanctissimum accedite, et epistolam illi tradite, salutantes illum decenter talibus verbis: Salutat te, dominus noster Joannes apostolicus papa, et vult habere te fratrem et comministrum, sicut C scripsit imperator, ut propter pacem Ecclesiæ reciperemus sanctissimum patriarcham Photium fratrem et comministrum nostrum, exaudiremus preces vestras, et præciperemus ut coram nobis veniat ad synodum: et ut recipiat ipsum universa Ecclesia: juxta tenorem litterarum nostrarum, illum recipite ut comministrum nostrum, atque ut Ecclesiæ Romanæ gratiam habeat, surgentes, illi dicite: Mandat dominus noster sanctissimus papa ut omnes qui in diversis locis extra terminos exstiterunt, sive episcopi, sive presbyteri, sive quivis, alii fuerint, et noluerint hujusque vobis communicare, vestro opere et labore uniantur Ecclesiæ Dei, et fiant unum vobiscum. Qui si venerint, recipite illos, ut pater recipit filios, eosque monebit sæpius, ut propter pacem Dei Ecclesiæ idem sentiant cum apostolico, ut unius sint cum ipso voluntatis: recipientes videlicet Photium sanctissimum patriarcham et cum illo una communicantes. Si autem venerint quicumque antea fuerant ordinati, recipiant sedes suas; qui vero deinde fuerant ordinati, accipiant ab episcopis ipsis victum et vestitum necessarium.

b Præsidentibus vobis in synodo una cum prædicto sanctissimo patriarcha et legatis Orientalibus, una

alii idipsum consequi facile possumus, ut patet ex notis concilii Romani sub Joanne VIII. Sev. Bix.

b Hic dempta aliqua superius notata de petendo veniam coram synodo Photio imposita, addita vero alia; ex recitatis litteris intelligere potes.

cum reliquis archiepiscopis et metropolitâ, et omnibus sacerdotibus Constantinopolitanæ Ecclesiæ, primum legantur litteræ ad imperatorem missæ, et interrogetur synodus si illas recipit, et si observat testimonia quæ continent litteræ ipsæ. Quibus annuentibus, hæc dicite : Dominus noster sanctissimus papa, omnium Ecclesiarum curam gerens, salutem etiam vestram et unionem et pacem procurans, misit nos servos suos ut dispersos congregemus et dissidentes conciliemus, et Ecclesiæ misericordiam manum porrigamus, lapsos erigamus, ut omnes uno ore glorificemus Patrem cum Filio et Spiritu sancto.

Sequentes canones nostrorum Patrum dicimus, ut post obitum Photii sanctissimi patriarchæ nullus a civili dignitate Constantinopolitanam sedem ascendat, quemadmodum etiam litteræ nostræ testantur.

Volumus etiam ut coram synodo prædictum Photium sanctissimum patriarcham oreis ut neque pallium in Bulgariam mittat, neque ordinet quemquam in ipsa provincia. Si enim hæc fecerit, juxta sacros canones illum arguemus.

^a Volumus præterea ut coram universa synodo promulgetur, quod synodus habita adversus prædictum patriarcham Photium tempore Adriani sanctissimi papæ tum Romæ tum Constantinopoli, ex nunc habeatur nulla et irrita, et non annumeretur cum alia sancta synodo.

^b Advertite ut juxta mandatum nostrum ita ambuletis, neque muneribus vos corrumpi sinatis, neque adulationibus, neque minis et terroribus declinetis sive ad dexteram sive ad sinistram, sed regiam viam incedite, tanquam habentes locum et potestatem nostram, quam vobis propter Ecclesiæ pacem sumus impertiti, ut vestro labore et diligentia digne gratiam nostram, et apostolicæ sedis obtineatis, et nostram communionis sitis hæredes.

Subscriptiones episcoporum qui interfuerunt Romanæ synodo, ex qua prodiit commonitorium et litteræ Petro legato datæ.

Zacharias episcopus Ecclesiæ Anagninæ et bibliothecarius apostolicæ sedis in hæc commonitorio pro receptione Photii sanctissimi patriarchæ propria manu subscripsi.

Martinus episcopus Ecclesiæ Narniensis in hoc commonitorio apostolicæ sedis pro restitutione Photii sanctissimi patriarchæ propria manu subscripsi : sic et aliqui sequentes :

Dominicus episcopus Triventi.
Florius episcopus Maturensis.
Gaudericus episcopus Velitrensis.
Stephanus episcopus Ferentinas.
Leo episcopus Gabiensis [Sabiniensis].
Petrus episcopus Forosempronienis.
Leo episcopus Tarracinensis.
Walpertus episcopus Portuensis.

^a Non preces tantum sed excommunicationem continent Joannis litteræ de Bulgarorum causa.

Vides idem additamentum hic a falsario quod

A Simeon episcopus Fundensis.
Joannes episcopus Siminorum.
Benedictus episcopus....
Gregorius episcopus Silvæ Candidæ.
Bonifacius episcopus Blerancrum.
Theodorus episcopus Gallesiensis.
Stephanus episcopus Nepesinus.

Presbyteri cardinales.

Germanus presbyter tituli sanctorum Joannis et Pauli.

Petrus presbyter tituli sancti Chrysogoni.
Benedictus presbyter tituli sancti Balbinæ.
Adrianus presbyter tituli sancti Laurentii.
Joannes presbyter tituli sanctæ Cæciliæ.

Diaconi cardinales.

B Paulus diaconus subscripsi.
Leo diaconus subscripsi.

ADNOTATIO SEVERINI BINI.

Audisti, lector, additamentum Photii de abrogatione concilii œcumenici VIII sub Adriano pontifice celebrati, jam superius apertissime redargutum falsitatis, ex recitatis Joannis papæ VIII epistolis. Sed detegitur in eodem commonitorio eadem etiam impostura ex ipsa subscriptione episcoporum, qua (ut ex supra positis vidimus) profitentur omnes se commonitorio pro Photii restitutione subscribere. Quod si ex synodi sententia definita fuisset damnatio œcumenicæ synodi VIII eademque commissa legatis in dato illis commonitorio, credibile utique est magis eam suis subscriptionibus expressurus fuisse quam Photii restitutionem.

CCXLVIII.

AD PHOTIUM PATRIARCHAM CONSTANTINOPOLITANUM.

(ANNO 879.)

Photium patriarcham Constantinopolitanum constituit, dummodo in synodo veniam postulet; decernit ne deinceps ullus e laicis in eadem Ecclesia statim episcopus ordinetur : jubet Bulgaricam diocesim Ecclesiæ Romanæ restitui.

PHOTIO patriarchæ Constantinopolitano.

^c Experientia tuæ prudentiæ litteris pontificio nostro delatis satis ubertim comperta, altitonantem Dominum, piissimas ei grates agentes, laudavimus, qui postulatus dat omnibus sapientiam, et in domo faciens unanimes habitare, salvat omnes in se sperantes, et protegit se in veritate quærentes; qui neque probos, reos, neque facit pios, tyrannos : tamen juste judicans, beatis quibuslibet æterna præmia, et infelicibus, reservato interim pœnitentiis tempore, nisi resipuerint, æterna confert supplicia. Prædictis quoque litteris præconia nostra legentes, affectum tuum cognovimus, et quam sis nunc erga nos devotus, satis evidenter reperimus : verum in quo nobis nostra merita non suffragantur, Deo dimittimus ; et in quo nos humanis laudibus quicunque mortalium elevare conantur, fragilitatem naturæ nostræ cum summa formidine, eodem Deo præ oculis habito contemplanur. Scimus enim, ipso dicente, *quia qui se exaltat humiliabitur, et qui se humiliat exaltabitur* (Matth. xxiii).

supra de abolenda octava synodo fuit appositum.

^c Hanc epistolam Photius locis infra notatis corripit.

Quod dicitur autem, sanctam Constantinopolitanam Ecclesiam in te convenire, teque privatam sedem recipere, missos vero nostros tecum minime consecrare, de adunatione omnium Deo gratias agimus; sed missis nostris ideo de hoc mandatum non dedimus, quia nil certitudinis, qualiter ipsa sedes haberet, antea comprobavimus. Nunc vero, sicut de pace et adunatione ipsius Ecclesiae valde gaudemus, ita et de dissensione nolentium acquiescere contristamur, quia Salomone [*leg. Samuele*] testante, *quasi peccatum hariolandi est repugnare, et sicut genus idololatriæ nolle acquiescere* (I Reg. xv).

^a Verum super receptione privatae sedis nos debuimus ante consuli. Tamen quia, obeunte fratre et coepiscopo nostro Ignatio te Constantinopolitano throno presidere audivimus, tantum ut pax augeatur et jurgia cessent, multimodas Deo gratias agimus. Tu autem omnium mentes demulcens, omnes patulis ulnis amplectere, omnes dispersos congregare non desinas, omnes colligere sollicite stude. quia sicut sanctus papa Leo Magnus scribit, sedis apostolicæ, inquiens, moderatio hanc temperantiam servat, ut severius agat cum obduratis et veniam cupiat præstare correctis.

Et cum non sit reprehensibilis erga correctum quantacunque miseratio, satisfaciens coram synodo misericordiam ^b secundum consuetudinem postulaveris, ac si evidenti correctione utaris, et peritiæ non obliviscens, nullius damna molaris, quin potius exsilia eorum qui tibi non velle consentire dicuntur, studiose dissolveris, eosque suis ecclesiis et honoribus restituere: et si, quia spiritalis filius noster Basilius Christianissimus imperator apud nos pro te multis precibus intervenit, omnes uno voto, uno consensu et una concordia in tua restitutione convenerint, veniam pro pace sanctæ Constantinopolitanæ Ecclesiae tibi concedimus, communionem quoque et gradum, coram synodo misericordiam querendo ^c, nihilominus reddimus, et ut sanctæ Constantinopolitanæ Ecclesiae digne præesse debeas, consentimus, ita tamen ut deinceps de laicis in eadem Ecclesia episcopus contra sanctorum Patrum statuta nullatenus ordinetur, et omnis illa mala consuetudo abinde penitus amputetur, juxta capitulum quod super hac re in venerabili synodo, tempore scilicet decessoris nostri Adriani junioris papæ Constantinopoli habitæ, est congruentissime promulgatum.

Reliqua vero quæ litteræ tuæ a nobis fore censenda vel finienda expectant, dato commonitorio nostris legatis, Petro venerabili presbytero cardinali nostro, deliciosisque consiliariis nostris, quædam scriptis, quædam autem verbis injunximus, qui juxta censuram nostri apostolatus instructi de omnibus, cuncta, Deo præ oculis habito, contemplantes, et admittenda

^a Ista de consulenda sede apostolica Photius detruncavit in sua translatione.

^b Hæc de misericordia querenda coram synodo, abstulit Photius, hic et alias inferius.

^c Hæc quatuor verba itidem decurtavit Photius.

ubi fas est admittere studeant, et corrigenda sub æquitate libramine corrigant.

Præterea sicut vestra pars suum velle conatur vires accipere, ita et diocesim nostram Bulgariam ^d, quam apostolicæ recordationis sanctissimique domini papæ Nicolai certamine sedes apostolica recepit, ac Adriani æque beatissimi præsulis tempore possederat, summa nobis celeritate restitui volumus, et de cætero omnem ordinationem ecclesiasticam ab Ecclesia Constantinopolitanæ præsulibus in eadem diocesi Bulgarica auctoritate apostolica amputamus; ipsos autem ordinatos ibidem episcopos, et omnes alios inferioris ordinis clericos, ut inde se subtrahant et ab invasione Bulgaricæ nostræ diocesis se omnino compescant, decertare procures. Quibus si tu aut pallium dederis, aut quæcumque illic ordinationem feceris, vel donec nobis obediant, cum eis communicaveris, pari excommunicatione eum eis tenebris annexus.

ADNOTATIO SEV. BINI.

De adulteratione epistolæ præcedentis a Photio perpetrata.

Hæc est altera epistola quam a pontifice Joanne VIII acceptam Photius a se Græce translata, et ad perfidiam suam occultandam addendo, mutilando, subtrahendo et expungendo in pseudosynodo sua octava legi ac promulgari fecit.

Porro ille sciens quanta inesset in apostolicis litteris auctoritas, lecturus cum esset eas in synodo ad persuadenda quæ vellet, addidit et abstulit pro arbitrio quæ sibi sunt visa. Quænam autem ista fuerint, ex recitatione ipsius epistolæ ex secunda ejusdem actione depromptæ, Latinaque ab eodem Metio redditæ, satis intelliges sic enim se habet.

« JOANNES episcopus, servus servorum Dei, Photio sanctissimo fratri et comministro patriarchæ Constantinopolitanæ Ecclesiae.

« Sapientiam et prudentiam fraternitatis tuæ in litteris cum perspexerimus, instar tonitruum cœlitus missi ex Deo resonantem et omnes terminos terræ suo strepitu replentem ^e, pias Deo gratias et excelsas laudes retulimus, qui omnibus petentibus juxta eorum petitionem largitur sapientiam, et qui habitat in concordiae domo, et fovet et protegit omnes qui veritate spem suam in ipsum collocant: quia quique nec malos in finem rejicit, neque bonos ut in tyrannidem aliquam incidant, supra eorum vires permittit, sed potius justitiæ æqualitate ac judiciorum æquilibrium omnes res humanas dirigit et feliciter ducit. Et beatus ille qui alacri animo presentis tempore per penitentiam lapsos erigit, in cœlis enim iste thesauros sibi thesaurizat: hic etenim in hac felicitate permanens, fructus sempiternis futuris bonis, cum revelabitur futura gloria. Tuas itaque prædictas humanissimas litteras cum accepissemus, et laudes nimias quibus nos exornas et qua animi alacritate erga eos te habes, agnovimus quomodo pie et sane te geris, licet laudes quas nobis tribuis longe a nobis absint: cum enim mortalem et mutabilem naturam nacti simus, non sunt laudes satis tutæ, et magno timore afficimur illius videlicet qui omnia videt et

^d Hæc de Bulgarica diocesi detruncavit Photius omnino.

^e Photius versipellis fecit in laudem suam quod in Dei laudem Joannes dixerat de altitonante Deo.

omnia prospicit, tum occulta tum aperta, ne aliquo pacto aliter ab hominibus nos habiti, aliter in conspectu Dei reperiamur, et pro laudibus et optata gloria perpetuum dedecus lucremur. Sed hæc permittamus interea Deo, qui novit omnia, et quem nihil nostrum latet. Novimus enim ipsum dicere : *Qui se exaltat, humiliabitur* (Matth. XXIII).

« Scripsisti nobis quod sanctissima Dei Constantinopolitana Ecclesia in te recipiendo concors et unanimis facta est ^a, et quod sedem recepisti quæ tua erat et qua fueras orbatus; his de rebus, de Ecclesia videlicet et de tua restitutione, que es ad propriam sedem restitutus, Deo ex corde et pro virili gratias agimus. Habebant etiam litteræ pietatis tuæ quod nostri legati noluerunt quam primum tibi comministrare. Et hoc factum dicimus quia nondum illis permiseramus ut ea facerent quæ præceperamus. Si enim mandatum nostrum habuissent, nulla ipsis fuisset dubitatio, nec alicujus mœstitiæ causam pietati tuæ præbuisset. Nec nos satis certi eramus de fraternitate tua, quod ad tuam sedem te Deus restituisset, et jam ipsam obtinuisses: si enim hoc rescivissemus, misissemus procul dubio, ut par erat, gratulaturi tibi pro tuæ sedis receptione ^b. Ne igitur interea iniquo feras animo; quod enim antea defuit, jam ex superabundantia completum est.

« Didicimus præterea quod sunt inter vos nonnulli schismatici qui non quiescunt, sed in vanum laborant, et certantem diabolicam certant, juxta prophetam dicentem: Divisi sunt contriti, ut evellant ei evertant ad se nonnullos simpliciores. Et quemadmodum gravisi sumus pro tua restitutione, quam Deus operatus est, et unione facta Ecclesiæ, ita tristati sumus pro schismaticorum illorum interitu.

« Tu vero qui præstas sapientia et prudentia et gratia a Deo tibi largita (quid enim habes quod non accepisti? et si accepisti, novimus te non gloriari quasi non acceperis), omnes tibi devincere humanitate contendas eos qui a te procul sunt segregati et dispersi, misericordiæ viscera illis aperiendo, et benignitate illos complectendo, simul congregare ne graveris: ut, quemadmodum sanctissimus papa Leo Magnus scribit, eos qui quærunt humiliari in conspectu Dei et unionem vobiscum quærere, suscipiamus. Sicut econtra adversus eos qui duro sunt corde, fortitudine et constantia et patientia illos vincamus, duritiæ etiam cordis illorum obsistamus. Similiter illis qui pœnitentiam quærunt, quæ lapsos sublevat, manus adjutrices præbeamus. Non enim est desperatio pœnitentibus, et petentibus misericordiam non est confusio.

« Quapropter fraternitatem tuam rogamus ut Christi mores imitando, præcipue vero ejus humilitatem quam sustinuit pro salute generis nostris, non te pigeat in synodo prædicare Dei erga te misericordiam et auxilium ^d, nec non sanctissimæ Romanorum Ecclesiæ protectionem et tutelam, laborem, quem pro tua dilectione sustinuit, ut hoc pacto ædifices omnes pro communionem nostram et animorum nostrorum concordiam. Quandoquidem quæcunque ab illa petisti, obtinuisti etiam. Et sicut illi mos

^a Tacet hic Photius quod de privata sede, nempe quam in Magnaura exerceat vivente Ignatio.

^b Aliqua addit, et detruncat aliqua, quæ suprius notavimus de consulenda anostolica sede aliis.

^c Ista de laudibus suis Photius addidit.

^d Joannes non ista habet, sed ut ipse misericordiam coram synodo postulet; quæ Photius sustulit hic et inferius callide admodum.

^e Detruncavit hic iterum quæ Joannes habet in sua epistola de quærendo misericordiam coram synodo.

A est ut omnibus qui injuste patiuntur opem ferat ita ejus auxilio ut non caruisti, sed divina ope et hujus sanctæ sedis labore et studio ad sedem tuam es restitutus.

« Quapropter rationi congruum duco ut hujus consueti auxilii, necnon benignitatis, quam ipsis operibus singulis diebus experiris, de illa in omnem terram sonum emittere non obliviscaris, sed etiam ipsam sequere, et instar illius nulli damnun inferas, nec aliquem a visceribus misericordiæ tuæ repellas, Si qui usque adhuc unionem cum tua pietate amplecti noluerunt, neque tecum convenire, ne desistas, sed potius laborem et certamen sustine. cum docendo, tum etiam sermocinando, et longanimitate admonitione, nec non alacri et benevolenti ut juxta Apostolum, vel omnes vel plerosque lucrari studeas, et tibi conciliare, ac per te ipsi Deo accedentes, illos ad te, et per te ad Deum suscipere dignare. Sacerdotales etiam honores et eorum ecclesias, illis restitue.

B « Et quemadmodum spiritalis filius noster imperator Basilius pro te nos ejus petitioni rationabili et justæ et Deo gratæ obsequentes, fecimus cum tua pietate, quod imperator petierat, eodem pacto te rogamus ut tu etiam obliviscaris malorum quæ adversus te commiserunt, qui a te fuerant abalienati ^e. Qui si revertantur ex corde, tua pietas honore insigni apertis ulnis illos recipere dignetur, ut omnes feliciter consentientes ad conversionem et restitutionem tuæ sedis commune gaudium et diem festum et lætitiæ peragamus.

« Hoc etiam rogamus fraternitatem tuam ut nobiscum decernas ut in posterum nullus sæcularis ex tempore ad pontificalem sedem assumatur, sed secundum gradum et ordinem procedens, et proprium unusquisque in suo gradu progressum virtutis ostendens ita pontificalis sedis gradum obtineat. Qui enim aliter ascendit, ecclesiasticis nostris canonibus contraria facit. Et volumus morem hunc, qui non est probandus, ab initio in vestra ecclesia inventum, in posterum irritum abolere ^f. Hoc autem dicimus juxta canonem editum in synodo tempore Adriani sanctissimi papæ et Tarasii beatæ memoriæ patriarchæ Constantinopolitani.

C « Synodum vero contra pietatem tuam ibidem habitam irritavimus et annullavimus, imo et abjicimus, tum propter alia, tum etiam quod beatus papa Adrianus prædecessor noster illi non subscripsit. Reliqua vero omnia et ecclesiasticis rebus quæ tua epistola nobis insinuavit, scribere omittimus, quoniam de illis in commonitorio scripsimus, cui etiam subseripsimus omnes pro tua restitutione, et illud Petro religiosissimo presbytero cardinali et legato nostro dedimus quem misimus, [f. ut una, HARD.] et una cum Eugenio et Paulo religiosissimis episcopis legatis nostris Dei timorem præ oculis habentes, et suam conscientiam immaculatam conservantes omnino vobiscum faciant quæ vestræ Ecclesiæ conferre noverint, Deus te conservet usque ad finem, dilecte frater, reverendissime et comminister noster. »

Ecce tu jam vidisti, et confrens utraque exempla

^f Hic falsarius et impostor astutissime convertit ad Adrianum primum quod dixit Joannes de Adriano II satis expresse. At id ea de causa ab eo factum, quod per illa verba Joannes probare se significaret synodum octavam sub Adriano habitam juniore.

^g De abrogatione synodi contra Photium facta nihil penitus in litteris Joannis. Apposuit hæc impostor ut quasi apostolicæ sedis auctoritate damnaret, quod postea idem fecit octavam synodum sub Adriano habitam. Porro cum hæc impostor apposuit, decurravit quæ in conditione apposita Joannes habet de restituenda diœcesi Bulgarorum.

ria cognovisti, lector, quo tandem progressa impostoris audacia, et ausa sit falsarii animosa procacitas, ut tribus versibus istis ad epistolam Joannis ultimo loco additis, tantam molem illam œcumenicam, inquam, octavam synodum, quam Occidens et Oriens, pontifex et imperator una cum episcopis et magistratibus tanto labore sunt conati erigere et stabilire, quantum in ipso fuerit, Photius mendaci stylo sit demolitus. Ut plane iterum repetendæ, quin et aliæ innumeræ sint agendæ Deo gratiæ, quod ad tam immane periculum evitandum, et immensum scandalum antevitandum, voluerit divina providentia remanere integra exemplaria Jcannis epistolarum, unicum remedium ad falsatam hominis perditissimi arguendam et imposturam aperiendam. Quo nomine pariter, ut vidimus, et ipse de quo egimus, pontifex Nicolaus summam gratias Deo rependit, quod ad convencendas falsitates ejusdem Photii in suis litteris impudenter admistas, earum exemplaria Romæ servaverit, sic dicens in epistola ad Michaellem imperatorem: *Veruntamen nos quomodocunque falsitati vel depravationi eadem sit epistola submissa, grates innumeras agimus Deo, cujus inspiratione et fidelillius exemplaria penes nos retinimus, et cujus permissu qui hæc vel authenticam ipsam scripsere, sua peresse noscuntur; hæc ipse. Sed nos dupliciter Deo gratias rependere obligamus, et quod Joannes, sicut et Nicolaus, missarum a se litterarum excrisperit et retinuerit exemplaria, et quod eadem cum codice, quem regestum vocant, sint in hanc diem in Vaticana bibliotheca integra post tot naufragia Romanæ Ecclesie conservata; ut quod earum translatio facta per Photium fraudulentem posset argui falsitatis, cum in multis aliis, tum in iis quæ operatus est ad demolendam funditus œcumenicam octavam synodum, tam quod citationem ejusdem synodi octavæ sub Adriano habitæ quæ convincitur eam recipere et comprobare Joannem, omnino erasit atque penitus abolevit; quam etiam quod disertis verbis addiderit, ab eodem Joanne pontifice jam illam prosus damnatam, irratam, ut ait, ac nullam redditam esse.*

In hoc ipsum enim totus incubuit homo profanus, ut adversum se collectam œcumenicam synodum, in qua cubitalibus litteris, ut ita dixerim, ejus scelera multipliciter nota essent, abolendam extinguendamque penitus, ut nec nominaretur amplius, laboraret. Sed ex quod sciretur falsificatione historicorum Græcorum, tum Latinorum, octava synodus œcumenica celebrata esse Constantinopoli: ipse eodem in loco haberi, eodemque quoque nomine appellari voluit suam pseudosynodum, quam supponeret pro legitima octava œcumenica habita per Adrianum, usus ad decipiendos omnes recitatis superius ad ipsum scriptis, sed ab ipso falsatis litteris Joannis papæ, ex quibus pariter detegat alias ejusdem nebulonis versutissimi imposturas. Quamvis enim idem Joannes pontifex, tum in ipsa epistola ad Photium scripta, tum in recitata superius ad imperatorem citando dictam œcumenicam synodum, ut dictum est, eam visus est comprobasse; et nihilominus in additamentis Photii idem ipse ejus damnato asseritur: non ista ipsi fati sunt visa, sed et ab illo falsatum est commonitorium ab eodem pontifice datum Petro legato.

CCXLIX.

AD LANDULFUM ET LANDONEM.

(Anno 879.)

Scribit Trajectum se iturum, et quæ paci eorum conducant, curaturum; ibique cum de aliis, tum de Landulfo Capuanæ Ecclesie episcopo electo acturum.

Dilectis viris LANDONI filio Landonis, et fratribus

A ejus, seu LANDULFO filio Landenulfi, ejusque germanis.

Receptis atque perlectis litteris vestris, quas nostro pontificio direxistis, quanta pace et concordia vos post obitum Landulfi bonæ memoriæ Capuani episcopi, cum Pandenulfo conjunxissetis, et jusjurandum fraterno ac indivisibili fœdere inter vos habito firmassetis, luce clarius novimus: sed suadente humani generis inimico, et zizaniorum inter vos semina diffundente, omnem concordiam et unanimi-tatem quæ inter vos divino respectu exstiterat videmus corruptam atque confusam. Per quo videlicet tantæ inimicitie malo vobis jam litteris nostris per Dominicum venerabilem episcopum nostrum ad vos delatis, innotescentes, mandavimus quoniam Deo propitio pro vestrum omnium salute ac pace volumus Kalendis Octobribus Trajectum venire ibique vobiscum et cum Guaiferio glorioso principe, atque cum Capuanis cæterisque vestratibus loqui, et ordinare primum ea quæ nobis et vobis sunt necessaria vestræque paci et utilitati proficua, quatenus, totius discordiæ scandalo de medio vestri ablato, et recepta Dei pace, quæ superat omnem sensum (*Philip. iv*), in fraterna dilectione et in pristina devotione omnes concordet et unanimes manere valeatis; et tunc sive de Landulfo venerabili presbytero, quem omnium Dei sacerdotum et judicum, seu totius Capuanæ plebis voto parique consensu electum habetis, sive de aliis necessariis causis, vestram secundum sacros canones adimplebimus voluntatem; et idcirco grave non videatur nobilitati vestræ nostrum, ut dictum est specialem præstolari adventum.

CCL.

AD GUAIFERIUM PRINCIPEM SALERNITANUM.

(Anno 879.)

Eadem quæ in superiori: præterea arguit quod contra Capuanos armâ sumpserit: rogat ut mancosos sibi au Amalfitanis restitui curet.

Dilecto filio GUAIFERIO glorioso principi.

Sicut nobis litteris vestris mandastis, quod devotam circa nos amicitiam et sinceram conservetis dilectionem, hoc multis jam evidentibus documentis luce clarius agnoscimus et tenemus; unde et noster apostolicus animus circa nobilitatem vestram, utpote circa charissimum filium, benignus existit, cupiens honorem et gloriam vestram semper immutatam conspicere et audire. De electo autem Landulfo, videlicet venerabili presbytero Capuanæ Ecclesie, pro quo jam toties nostro pontificio suggestistis, non aliquo malæ voluntatis affectu vos nunc usque audire prætermisimus, sed sola pacis veræ causa et inter proximos augendæ dilectionis. Nam sicut vobis nunc litteris nostris, per Dominicum episcopum ad vos delatis, mandavimus, cupimus, Deo propitio, pro vestrum omnium salute, concordia et unanimi-tate Kalendis Octobribus Trajectum venire, ibique vobiscum et cum Capuanis cæterisque vestratibus loqui, et ordinare primum ea quæ nobis et vobis sunt necessaria et vestræ paci utilitatique proficua;

et tunc sive de præfato electo, sive de aliis necessariis causis, vestram adimplebimus voluntatem : quia vestro sagaci consilio communique consensu, quæ pro pace fraterna et pro terræ nostræ ac vestræ defensione, sive Saracenorum perditione, considerata et perficienda sunt, peragere cupimus. Quapropter, sicut nos vestrum volumus desiderium et honorem alacri mente implere, ita quoque et vos illa quæ nostro apostolico culmini sunt decencia, devota mente debetis peragere; quamvis in hoc reprehensione non modica digni videamini, quod sumptis armis contra Capuanos, inter assiduas paganorum persecutione consistentes, persequi et impugnare præsumpseritis, antequam eorum culpas nobis veraciter cognitatas fecissetis. Porro de mancosis quos pro defensione terræ S. Petri dedimus te præsentem Amalfitanis, volumus ut eosdem mancosos ipsi Amalfitani deferant secum navigio usque in portum urbis Romanæ, quoniam salvi et securi ibi manebunt; et tunc accepta a nobis prius securitatis sponsione, ipsos nobis mancosos reddere procurent, quatenus nostra recipientibus nobis, nullam pro his de cætero patiantur calumniam.

CCLI.

AD LEONEM EPISCOPUM.

(Anno 879.)

Dolet Capuæ discordias esse excitatas; significat se Trajectum iturum, ibique de Landulfo episcopo electo, cujus confirmationem petierat, acturum.

Reverendissimo et sanctissimo LEONI episcopo.

Sacerdotalem curam et sollicitudinem, quam pro Ecclesiæ Dei utilitate populique concordia et pace peragere procul dubio debent Domini sacerdotes, litteris tuis relectis, te luciflua habere cognoscimus; dum Dei proximique dilectione sollicitus, doles Capuanos, nobiles scilicet viros, fraterno fœdere per jusjurandum inter eos habito nequiter corrupto ad veram discordiam et inimicitiam pervenisse, et adhuc in ea improvida mente consistere, atque pro Landulfo venerabili presbytero, et electo a vobis et omni sacerdotali cœtu nobiliumque caterva, cunctoque populo Capuanæ civitatis, pontificio nostro supplicas, quatenus eum non differamus sacræ plebi Capuanæ antistitem ordinare. Nos autem, pastorali sollicitudine moti, vobiscum similiter condolemus fratres et propinquos pro sæculi cupiditate in tantam discordiæ et inimicitæ voraginem demersos, pro quibus sane, Deo propitio, pacificandis, volumus Kalendis Octobribus Trajectum venire, et ibi cum Guaiferio principe, atque vobiscum, et cum Capuanis cæterisque vestratibus loqui, et ordinare primum ea quæ nobis et vobis sunt necessaria; et tunc de ipso electo vestram secundum sacros canones adimplebimus voluntatem : et idcirco grave non videatur dilectioni vestræ nostrum, ut dictum est, specialem præstolari adventum. *Unam talem Adelchisi episcopo : et alteram Lupeno episcopo.*

CCLII.

AD LANDULFUM PRESBYTERUM.

(Anno 879.)

Laudat eum quod ad propinquorum suorum insidias evitandas Capuam fuerit egressus, et in discordiis sedandis elaboret; significat Trajectum se iturum ibique de ejus electione deliberaturum.

LANDULFO venerabili presbytero et electo.

Quia discordantium parentum tuorum insidias declinando, et ex urbe Capuana egrediendo, in anti-qua sanctæ ecclesiæ Capuanæ sede, nomine videlicet S. Stephani protomartyris refulgente, nunc habitare te asseris, atque cum vicinis episcopis assidue decertas, ut male divisos adunare atque discordantes pacificare, Deo favente, possis, gratum recepimus. Quia et ante susceptum officium ea quæ sunt boni pastoris peragis, in quo scilicet ut perseveres hortamur usque ad nostrum specialem adventum, quoniam, Deo propitio, pro vestrum omnium salute, concordia et pace, Kalendis Octobribus volumus Trajectum venire, ibique cum Guaiferio glorioso principe, et cum aliis eximis parentibus tuis loqui, et ordinare primum ea quæ nobis et vobis sunt necessaria vestræque paci et utilitati proficua, et tunc provectionem tuam secundum sacros canones, omnibus pacificatis, peragere.

CCLIII.

AD PULCAREM PRÆFECTUM.

(Anno 879.)

Arguit quod nec fœdus cum paganis ictum ruperit, nec ditionem sancti Petri, sicut promiserat, defenderit; præcipit ut pecuniam pro ea re datam ad se remittat.

Dilecto viro PULCARI præfecto.

Pro salute animæ tuæ ac pro defensione totius Christianitatis, quæ, te cum paganis pactum habente, quotidie deprædatur atque in diram ducitur captivitatem, multa tibi et populo tuo, quæ postulasti, fecimus bona. Insuper decem millia mancosorum argenti dedimus tibi ut terram sancti Petri rupto fœdere paganorum defenderes; quod tu cum tuis per jusjurandum facere promisisti, sed timore judicii Dei postposito, neque pactum iniquum dirumpere voluisti, neque propter jusjurandum littora nostra defendere, sed potius deprædari diabolico jam Juri subjectus, permittis, et in animæ tuæ perditionem consentis oves pretioso Christi cruore acquisitas duci captivas. Et ideo dignum est ut ipsos mancosos, quos tibi pro defensione terræ nostræ dedimus, recipiamus. Quapropter volumus ut eosdem mancosos per tuos fideles Amalfitanos usque in portum urbis Romanæ nobis navigio venientes remandes, quoniam ipsi Amalfitani salvi et securi ibi manebunt, et tunc accepta prius a nobis securitatis sponsione, præfatos mancosos nobis reddere procurent, quatenus nostra recipientes, nullam tibi vel populo tuo inferamus calumniam. Nam et dromonibus nostris præcepimus ut nullo modo aliquam populo tuo faciant contrarietatem, si tamen nobis ipsos mancosos salvos reddideris.

CCLIV.

AD MONACHOS PULTARIENSIS CŒNOBII.

(Anno 879.)

Dolet de eorum calamitatibus, et significat se ipsorum causa Bosoni principi atque Hugoni abbati scripsisse ut eos utentur; exemplar etiam testamenti Gerardi fundatoris Ansegiso archiepiscopo et Conrado comiti misisse.

Sanctæ congregationi summi apostolorum principis Petri cœnobii nostri Pultariensis.

Cognoscat pro certo fraternitas vestra nos, relectis literis vestris, pro tantis adversitatibus quas ab iniquis quotidie sustinetis hominibus, valde tristes existere, quoniam sicut de vestra prosperitate gaudemus, ita quoque et de vestra tribulatione tristamur. Unde volentes sanctam congregationem vestram, utpote Dominicum gregem in ipso apostolorum principe nobis commissum, salvam et quietam habere, direximus, secundum petitionem vestram, nostras apostolicas litteras Bosoni glorioso principi, et Hugoni nobilissimo abbati, petentes quatenus pro Dei sanctorumque apostolorum principum Petri ac Pauli amore, nostraque dilectione, suæ defensionis auxilium vobis impendant, et contra Dei atque omnes vestros adversarios manum suæ potentiae extendant, ut quiete ac securiter degentes, debitas Domino laudes persolvere ac pro nobis et omni populo Christiano valeatis omnipotentem Dominum deprecari, et res sancti nostri monasterii tranquilla mente disponere, regere ac secundum Dominum dispensare possitis. Porro exemplar ipsius testamenti, per quod Gerardus bonæ memoriæ comes, una cum Berta quondam conjuge sua ipsas res principibus apostolorum Petro et Paulo tradidit, bulla nominis nostri munitum, Ansegiso archiepiscopo et Conrado comiti, in cujus comitatu ipsæ res continentur, per præsentem nuntium vestrum direximus. Vos itaque videte si de his omnibus adjuti fueritis, an non, et nobis renuntiate, ut quasi concilio meliori potuerimus, vos libentissime adjuvare curemus. Fraternitatem vestram orantem pro nobis Dominus dignetur conservare incolumem.

CCLV.

AD HUGONEM ABBATEM.

(Anno 879.)

Ut monasterium Pultariense tueatur.

Dilecto filio HUGONI nobilissimo abbati.

Quanta vos dilectione quantoque nostræ paternitatis quasi unicum filium dilexerimus affectu, ex quo vestram sublimem cognovimus sagacitatem et gloriam, ipsi abundanter recolitis, quoniam et vestra nos excellentia veluti patrem spiritalem in omnibus colere et honorare animo tranquillo curavit. Quo videlicet mutæ dilectionis fœdere illibato confisi, monasterium sancti Petri, quod appellatur Pultariense et Gerardus quondam comes de rebus suis perfecit atque dotavit et sancto Petro tradidit, petimus ut vestra in omnibus tuitione adjuvetur, quia fratres qui nunc in eo consistunt, et sedulas Deo laude persolvunt, orantes pro salute omnium in

A Christo credentium, ab inimicis vicinis perturbantur, omnisque illorum, imo nostra familia crudeliter assidue vexatur et opprimitur; ita sane ut neque arare neque cætera quæ ad terræ culturam pertinent, possit exercere. Quapropter et vestrum auxilium eidem sancto loco impendatis, et contra Dei atque ejus adversarios manum vestræ potentiae, pro amore Dei et sanctorum apostolorum Petri ac Pauli nostraque dilectione extendatis, quatenus vestro potenti brachio freti, salvi in omnibus et securi consistent, ut et in præsentia dignas a nobis retributiones et in futuro multiplicem a Domino valeatis mercedem cum sanctis recipere.

CCLVI.

AD HUGONEM ET RADULFUM.

(Anno 879.)

B *Quod Vendoaram villam sancti Petri Pultariensis nulli concesserit, et Arembertum, qui a Bosone eam accepit, excommunicari jusserit, nisi ab ea abstineat.*

HUGONI et RADULFO dilectis fidelibus nostris.

Cognoscat pro certo fidelitas vestra quia nos ipsam villam nostram Vendoaram, quam dicitis esse invasam a Bosone comite, quasi nos eam cum illo commutassetus accipientes alteram ab eo, neque beneficii more, neque alicujus commutationis tenore, neque alio quocunque modo, cum eodem Bosone vel alio quocunque homine, dedimus neque commutavimus. Ideo in fidelitate et servitio sanctorum apostolorum Petri ac Pauli devota mente permanentes, ipsam villam sub nostro jure tenentes, defendite et cum Domini auxilio gubernate, nec aliqui homini credatis nos aliquando præfatam villam quolibet modo daturus. Direximus vero, pro nostro adjutorio ac defensionis auxilio, litteras nostras jam dicto Bosoni comiti, ut pro amore Dei, et S. Petri, ac nostro, et suos homines inde removeat, et ipsam villam nullatenus invadere nec invasam retinere præsumat: quin potius suo vos brachio tueatur, et ab omnibus erga vos male agentibus dignetur defendere, si gratiam Dei et principis apostolorum cupit habere. Arembertum autem, vassallum ejus, cui ipsam villam beneficio dederat, omni ecclesiastica communione per Isaac venerabilem episcopum justimus esse privatum, si in eadem villa ulterius temere intrare aut aliquam ibi contrarietatem facere præsumperit.

CCLVII.

AD BOSONEM COMITEM.

D *Ut Arembertum et quosvis alios a Vendoara villa removeat, eamque Pultariensibus restituat et monasterium ipsum tueatur.*

Dilectio filio BOSONI glorioso principi.

Quanta vos dilectione quantoque nostræ paternitatis dilexerimus affectu ex eo quo vestram sublimem cognoverimus gloriam, ipsi abundanter recolitis, quoniam et vestra nos excellentia veluti patrem spiritalem in omnibus colere et honorare animo tranquillo curavit. Quo videlicet mutæ dilectionis fœdere confisi, ea quæ sub jure sanctorum apostolorum

rum principum Petri ac Pauli per totius Galliæ provincias immobilia loca consistunt, cum hominibus omnibusque sibi pertinentibus, ut vestro potenti brachio defensa manerent rogavimus, vestroque auxilio secunda consistent, quod vos pro amore Dei et S. Petri nostroque honore nobis libentur facere promissistis. Nunc autem, sicut audivimus, villam nostram Vendoaram absque nostro consensu et voluntate occupatis, et uni vestro vassallo, nomine Aremberto, in beneficium dedistis, et, si verum est, non bene, sicut vos decebat, egistis. Ideo rogamus, fili charissime, celsitudinem tuam ut propter amorem Domini et S. Petri, cœlestis regni clarivergi, ipsam villam nostris, qui ibidem resident, hominibus sub nostro jure, sicut nos eam ordinavimus, liceat habere securiter, omnesque vestros vel alienos homines ab ejusdem villæ habitatione vel dominatu removeatis, nec vestris diebus aliquam a quocunque homine contrarietatem patiamur. Simili etiam modo petimus ut monasterium S. Petri, quod appellatur Pultariense, et Gerardus quondam comes de rebus suis perfecit atque dolavit, et sancto Petro tradidit, vestra in omnibus tuitione adjuvetur, quia fratres qui in eo consistunt, et sedulas Deo laudes persolvunt, orantes pro salute omnium in Christo credentium, ab inimicis vicinis perturbantur, omnisque illorum, imo nostra familia crudeliter assidue vexatur et opprimitur, ita sane ut neque arare, neque cætera quæ ad terræ culturam pertinent, possit exercere. Quapropter et vestrum auxilium eidem sancto loco impendatis et contra Dei atque ejus adversarios manum vestræ potentiæ, pro amore Dei, et sanctorum apostolorum Petri ac Pauli, nostraque dilectione extendatis, quatenus vestro potenti brachio freti, salvi in omnibus et securi consistent, ut et in præsentem dignas a nobis retributiones et in futuro multiplicem a Domino valeatis mercedem recipere.

CCLVIII.

AD GUAIFERICUM PRINCIPEM SALERNITANUM.

Monet ut a molestiis desistat quas Capuanis inferbat; significat se in ejus regiones iturum et discordias sedaturum.

Nobilissimo viro GUAIFERIO glorioso principi.

Relatu quorundam didicimus quod, suadente humani generis inimico, qui totius inimicitie et mortis est auctor, cupiatis multiplicia damna et adversa inferre Capuanis, et propter discordiæ malum quod sæculi quotidie livore generatur, et inter propinquos atque amicos accrescit, cogitatis generale discrimen præbere, unde scilicet non modica turbatio his vestris in partibus oriatur et longi temporis scandalum maneat. Et dum non desint extranei hostes, cum quibus assidue luctamen habeatis, vultis contrarietatis discrimina præbere propinquis, quos in auxilium vobis opportunum poteratis habere fautores. Nos ideo, more paterno, vos quasi dilectum filium admonemus, et ex Dei omnipotentis auctoritate beatorumque apostolorum Petri et Pauli potestate prohibemus, ut non habeatis licentiam super

A præfatos Capuanos ire neque aliquam illis contrarietatem inferre usque ad nostrum specialem adventum. Quoniam, Deo auxiliante, cum hujus æstivi temporis fervor transierit, pro omnium vestrum salute, concordia et unanimitate, has vestras in partes veniemus, quatenus, nobis præsentibus, omnis vis sopiatur omneque scandalum, quod ex vipereo semine inter vos et illos accrevit, de medio vestri auferatur. Nos namque salutem vestram, ne in æternum pereatis, cupimus, et ideo volumus ut ea quæ pacis sunt sectemini semper. Nam pro vestro cum venerimus amore, ipsum quem vultis Capuanæ plebi, Domino favente, antistitem ordinabimus, ut vester principalis honor indiminutus permaneat. Quod si forte aliter vos facere cognoverimus, scitote quia nostræ vos non habebimus communionis consortes.

CCLIX.

AD PANDENULFUM CASTALDUM.

(Anno 879.)

Significat se Guaiferio scripsisse ut ab inferendo Capuanis damno desisteret.

Nobili viro PANDENULFO glorioso castaldo.

Relectis industriæ tuæ litteris, quas per talem fidelem hominem tuum nobis mandasti, ea quæ nostro pontificio supplicare studuisti, apostolica duntaxat benignitate audivimus, ac, prout ratio exigebat, partim complevimus. Direximus namque nosti apostolatus litteras Guaiferio, et admonendo increpando atque excommunicando eum non habere licentiam ex Deo et sanctorum apostolorum Petri ac Pauli nostraque auctoritate permissum venire contra urbem Capuanam, neque aliquam in omnibus suburbanis et finibus ejus contrarietatem inferre, nullasve moliri insidias, usquequo istas in partes, auxiliante Domino, post hujus æstivi temporis fervorem veniremus.

CCLX.

AD CAROLUM REGEM.

(Anno 879.)

Scribit se litteris eum, ut ad imperium promoveret, ad Urbem advocasse, Ravennam usque ad eum processisse, sperasseque se auxilium ab eo adversus Romanæ Ecclesiæ hostes recepturum: quæ spes ita eum frustrata est, ut nunquam hostes magis sævierint: petit ut Ecclesiæ opem ferat, et dum iter parat, legatos ad se mittat; suosque legatos commendat.

Dilecto ac spiritali filio CAROLO glorioso regi.

Quod bene vestra regalis cognoscit sublimitas, a longo jam tempore vos pro utilitate et exaltatione sanctæ sedis apostolicæ matris vestræ ad culmen imperii, Deo propitio, volentes perducere, auctoritatis nostræ litteris missis vocavimus, ac postmodum præ magnitudine amoris vestri, relicta nostra Ecclesia inter sævas hostium non solum paganorum, sed etiam malorum Christianorum manus, ad vos Ravennam pervenimus, quod nullus antecessorum nostrorum gloriosissimis progenitoribus vestris aliquando fecisse recolitur, sperantes scilicet omnem honorem pristinumque vigorem sanctæ Romanæ Ecclesiæ per vos ad augmentum perfectum perducere.

atque inimicorum sanctæ Dei Ecclesiæ et nostrorum ferocem severitatem omni modo comprimere facileque superare putabamus. Sed quia de his omnibus nihil apud magnitudinem vestram, ut volebamus, peregrimus, revertentes prioribus peiora reperimus. Nam inimici nostri, majori audacia elevati, non solum ea quæ sancti Petri sunt diripere, sed etiam homines nostros in sua potestate recolligere et retinere non dubitant. Quapropter, fili charissime, pro certo scitote quia nos vestrum honorem et gloriam toto conamine desideramus perficere, et ideo vos ea quæ utilitati et exaltationi sanctæ sedis apostolicæ proficua sunt, pio intuitu menteque devota debetis peragere. Unde obnixè precamur ut nobis dirigatis Luithbardum venerabilem episcopum, Manigoldum filium Adelberti, et Adelbertum protopincernam vestrum, qui, antequam vos has in partes veniendi iter sumatis, nos et sanctam matrem vestram Romanam Ecclesiam certificent, et ad vestrum honorem et gloriam placabiles et lætos efficiant, quatenus Deo auxiliante, vobis venientibus Romam, unum de pactis, et privilegia sanctæ Romanæ Ecclesiæ, more parentum vestrorum, renovare et confirmare studeatis: et petimus ut de hoc quod pro honore Dei et sanctæ Ecclesiæ, seu vestro vos facere monemus, aliquid inimicis nostris non credatis, neque his qui magis ea quæ sua sunt quam vestram gloriam quærunt, eo quod honor et exaltatio sanctæ Romanæ Ecclesiæ vestra protectio est in omnibus vestraque contra omnes inimicos defensio. Hos autem missos nostros, Marinum videlicet venerabilem episcopum et arcarium sedis nostræ, atque Petrum æque episcopum Senogalliensem vobis direximus, quos ut benigne recipiatis rogamus, et ea quæ vobis verbotenus dixerint, quasi nobis credere non dubitetis. Data *ut supra*.

CCLXI.

AD EUNDEM.

(Anno 879.)

Dolet se non posse cum eo colloqui. Arnulfum legatum ad eum mittit, petens ne Romanam Ecclesiam ab hostibus lædi patiatur, ideoque ejus legatum cum Arnulfo ad se mitti jubet.

Dilecto ac spiritali filio CAROLO glorioso regi.

Audivimus quod debeatis nunc Alpes transire, atque cum charissimo fratre vestro communi eloquio frui; unde valde turbati existimus eo quod secundum commune placitum sperabamus nos vobiscum simul convenire, et magnum ac proficuum opus exaltationis sanctæ Romanæ Ecclesiæ matris vestræ vestrique honoris et totius terræ sancti Petri salutis peragere. Idcirco direximus vobis hunc charissimum nepotem nostrum Farulfum deliciosum consiliarium nostrum, per quem vestræ regali suggerimus magnificentiæ ut nullo modo prætermittatis ita ordinare atque disponere terram S. Petri; quatenus salva et defensa non solum a paganis, sed

etiam a malis Christianis, quod ipsi procul dubio scitis, permaneat, donec, Deo auxiliante, revertentes ad gremium sanctæ matris vestræ Romanæ Ecclesiæ veniatis; quia si hoc prætermiseritis, tanta undique adversa vix ferre valemus. Quapropter vestra regalis magnitudo prævideat ne vestris diebus eadem Ecclesia aliquam minuitatem patiatur, sed per vos magis augmentetur, quoniam ipsius augmentum vester est honor. Ideo petimus ut cum præsentem jam dicto nepote nostro idoneum e latere vestro nobis dirigatis legatum, qui ad salutem et justitiam terræ nobiscum interim pariter et promptissime in omnibus, prout opus fuerit, desudet; ut et nos omnem vestrum honorem libentissime valeamus perficere, cui ea quæ vobis dixerit, quasi nobismetipsis credere non dedignemini. Quamobrem rogamus, ut libenti animo hoc facere, et secundum promissum vestrum adimplere omnimodis satagatis, nam certos vos esse volumus quia vestrum honorem et gloriam tota mente desideramus perficere.

CCLXII.

AD ROMANUM ARCHIEPISCOPUM.

(Anno (879.)

Miratur quod injuriis lacessitus ad se non confugerit; nuntium Ravennam mittit, qui omnia contra eum gesta diligenter inquiret, et eos qui injuriam intulerant, Romam venire compellat; quibuscum ipse ad synodum proficiscatur, ubi ejus causa agetur: eumque arguit quod in sua Ecclesia non resideat.

C Reverendissimo et sanctissimo ROMANO archiepiscopo sanctæ Ecclesiæ Ravennatis.

Audientes tales vobis a quibusdam insidias et injurias accidisse, mirati sumus quomodo ad Romanæ Ecclesiæ gremium et ad nostram apostolicam non statim veneritis præsentiam; nam si venissetis, pro certo scire potestis quia nos, diligenter inquistis omnibus, omnem tuam causam ad optatum et prosperum finem, Deo favente, omnimodo perduceremus. Nunc autem pro hujus rei causa missum prudentem dirigimus Ravennam, cui ea quæ nobis mandastis contra te acta fuisse, diligenter inquirere jubemus, ut eos qui talia, ut asseritis, egerunt, sub fidejussore talique legato obliget, quatenus ipsi de præsentibus Romam compellantur venire. Quibus sane venientibus, volumus ut et vos pariter veniatis Kalendis Octobris, sicut tibi pro celebranda etiam synodo jam præceptum est, quia in præsentia nostra causam tuam volumus deliberare, quoniam nos, secundum datam nobis divinitus potestatem, more prædecessorum nostrorum vos adjuvare omnino curabimus; nam volumus ut honor sanctæ Ravennatis Ecclesiæ semper indiminutus permaneat. In hoc tamen redarguendus es, quia dimissa Ecclesia tua Ravennæ, per alias Ecclesias contra tuam sponcionem discurras et resides; nam pro his quæ tibi evenis e diebus. Data *ut supra*.

CCLXIII.

AD OMNES FIDELES.

(Anno 879.)

Præcipit ut Ticinensi episcopo, cui potestem excommunicandi tribuerat, obediant.

Omnibus reverendissimis et sanctissimis episcopis, seu eximiis marchionibus et comitibus, cunctisque sanctæ Dei Ecclesiæ fidelibus.

Habentes omnium Ecclesiarum Dei, secundum Apostolum (*II Cor. XXI*), sollicitudinem, dignum duximus vestram industriam his apostolatus nostri litteris admonere atque apostolica benignitate magnopere exhortari quatenus potentiæ munus, quod divina largitate habetis, utilitati Ecclesiæ et honori sacerdotali prodesse debeat semper. Quapropter reverentiam et honorem sanctæ Ticinensi Ecclesiæ, quæ specialiquodam modo sedi apostolicæ pertinere videtur, ejusque antistiti, Joanni videlicet confratri nostro, cui vice nostra transgressores excommunicandos commisimus, eo videlicet tenore at quos ipse excommunicaverit, ipsi excommunicati existant, ut ei auxilium alacriter impendatis monemus, nullam contrarietatem vel invasionem in rebus vel hominibus ipsius Ecclesiæ quamlibet facere permittatis; quin potius vestro eos solatio tueri pro Dei nostroque amore diligentissime studeatis; sed et clericos illius nemo vestrum in commendatione, aut sub alicujus defensionis obtentu, absque prædicti episcopi sui licentia recipere præsumat. Quod si contra hoc nostrum apostolicum statutum aliquid suorum clericorum agere tantaverit, ecclesiastica sit, tam acceptor quam acceptus, communionem privatus. Data *ut supra*.

CCLXIV.

AD ROMANUM ARCHIEPISCOPUM RAVENNATEM.

(Anno 879.)

Præcipit ut Romam ad synodum veniat.

Reverendissimo et sanctissimo archiepiscopo sanctæ Ecclesiæ Revennatis.

Sicut jam olim vestræ præcepimus reverentiæ, ut pro multis Ecclesiarum Dei necessitatibus quarto Idus Octobris Romam venientes, synodum pariter celebraremus, nunc iterato his apostolatus nostri litteris fraternitati vestræ jubemus ut, omni mora vel occasione postposita, ad denominatam synodum, quam, Deo auctore, in prædicto tempore celebraturi erimus in ecclesia beati Petri principis apostolorum, cum suffraganeis tuis episcopis occurrere nullatenus prætermittatis; quia nos omnium Ecclesiarum Dei utilitati et exaltationi, sicut oportet, pari consensu et decreto more prædecessorum nostrorum consulere volumus. Et ideo vestram, secundum sacros canones unanimitatem adesse volumus, quatenus Ecclesiæ Dei vigor, Christo favente, per synodalem censuram illibatus permaneat. Quapropter si in ve-

A niendo nunc aliquam moram vel negligentiam ad miseritis, scitote quoniam canonica vos redarguemus censura. Optamus sanctitatem tuam, etc. Data XI Kalendas Octobris, indictione XIII.

CCLXV.

AD CLERUM MEDIOLANENSEM.

(Anno 879.)

Præcipit ut in locum Ansperti archiepiscopi in Romana synodo privatum a se consecrandum sufficiant; mittit legatos qui una cum ipsis electioni intersint, quibus in omnibus obediri jubet.

Omnibus episcopis, presbyteris, diaconibus, subdiaconibus, et omni clerico sanctæ Ecclesiæ Mediolanensis.

B Deo dilectæ unanimitati vestræ fraternitatis, charissimi, notum esse volumus quia nos una cum sancta synodo Idibus Octobris in ecclesia beati Petri apostoli peracta. Anspertum dudum archiepiscopum vestrum pro suis negligentibus ac multiplicibus præsumptionibus jam in priori synodo, post secundam et tertiam vacationem, atque post canonicas sibi datas inducias pro se satisfaciendo nolentem occurrere, virtute sancti Spiritus, et auctoritate sanctorum Petri ac Pauli apostolorum principum, et canonica atque synodica sanctione, episcopali honore privavimus, quia ante audientiam communicare pertinaciter præsumpsit, et ante legitimum sue purgationis examen ministerium sacrum contra statuta majorum temere agere non dubitavit. Et ideo præsentibus vobis statuto jubemus ut omnes uno animo unoque voto convenientes atque convocantes pastores vel populum civitatis, de electione alterius, qui de cardinalibus presbyteris aut diaconibus dignior fuerit repertus, cum Christi solatio, ad archiepiscopalem honorem promoveatis: quo scilicet decreto solemniter facto, atque ad hanc urbem transmissis, ne antea quislibet episcoporum aliquem ibidem ordinare præsumat, antequam nobis omnia fuerint renuntiata, cum, Deo favente, nos ibi secundum morem pristinum, et secundum regiam concessionem, velimus archiepiscopum consecrare. Nam si aliter præsumpseritis, ecclesiastica vos communionem privabimus; et qui contra hoc nostrum statutum fecerint, apostolico iudicio erunt omnino correpti. Sane reverendissimos fratres et coepiscopos nostros Joannem Ticinensem, et Weltonem Ariminensem illum vice nostra dirigimus, qui vobiscum pariter eandem electionem feciant; quos nemo vestrum impedire in aliquo præsumat, si quidem iustum fore cernitis ut nobis in omnibus obedire procuret: cui quisquis hoc superbiendo resistens agere tentaverit, a Christianorum collegio separatus erit^a. Et quia nondum a vinculis excommunicationis absolutus in Vercellensi ecclesia episcopum enormiter ac pervicaciter ordinare, contra regiam etiam voluntatem præsumpsit. Data *ut supra*.

^a Hæc verba superius transferenda videntur.

CCLXVI.

AD CAROLUM REGEM.

(Anno 879.)

Significat Anspertum dudum archiepiscopum Mediolanensem in Romana synodo privatum, ac Josephum, quem ille in Vercellensi episcopum ordinaverat, depositum; rogat ut Conspertum in Vercellensi ecclesia episcopum a se consecratum tueatur.

Dilecto ac spiritali filio CAROLO glorioso regi.

Regiæ magnitudinis vestræ notum esse volumus, fili charissime, quia Anspertum Mediolanensem archiepiscopum, in prima quidem synodo in ecclesia beati Petri apostoli habita pro suis evidentissimis negligentis et præsumptionibus, una cum reverentissimo episcoporum cœtu regulariter excommunicavimus: sed mentem suam in superbiam erigens, non solum pro perpetratis veniam humiliter non quæsit, verum etiam ante audientiam et nostram apostolicam absolutionem, sacrum præsumpsit ministerium celebrare, atque contra sacros canones contraque regiam et nostram apostolicam voluntatem, episcopum in Vercellensi ecclesia enormiter consecrare præsumpsit. Pro quibus videlicet tantæ temeritatis præsumptionibus, et ipsum Anspertum dudum archiepiscopum in ea, quæ nuper acta est synodo, omni episcopali honore privavimus, et eum, quem illicite ordinavit episcopum, decrevimus synodali iudicio depositum esse ab ordine episcopatus: intuitu tamen misericordiæ in pristinum quo erat antea gradum reverti. Porro nos, secundum voluntatem et petitionem dilecti filii nostri Carolomanni gloriosi regis hunc Conspertum reverentissimum, de quo jam olim vobis per vestrum fidelem missum innotuimus, in eadem Vercellensi Ecclesia, consentientibus omnibus comprovincialibus episcopis, antistitem consecravimus, quem petimus obnixè ut pro amore Dei et sancti Petri, ac nostro, vestræ potentis brachio tueamini, et, prout ei opus fuerit, dignum semper in omnibus præbeatis solatium. Regalem excellentiam vestram Dominus conservet incolumentem, charissime fili. Data ut supra.

CCLXVII.

AD VERCELLENSES.

(Anno 879.)

Præcipit ut Conspertum a se illis episcopum constitutum recipiant, et congruo honore colant. Josephi invasoris acta nulla esse declarat.

Omnibus presbyteris, diaconibus, subdiaconibus et omni clero ac primatis, omnique populo Vercellensi.

His nostris apostolicis litteris vobis cognitum facimus quia Anspertum dudum archiepiscopum Mediolanensem pro suis multis præsumptionibus et negligentis jam olim una cum sancta synodo sacra communionem privavimus; sed ipse contra canonica statuta et contra nostrum apostolicum synodicumque iudicium agens, ante audientiam, et absolutionem ministerium sacrum agere atque adhuc excommunicatus in hac Vercellensi Ecclesia vestra, quemdam virum Joseph nomine, ut audimus, contra regiam et

A nostram apostolicam voluntatem, episcopum ordinare temere præsumpsit. Ideo et eundem archiepiscopum, et hunc ipsum Joseph invasorem ac præsumptorem, non intrantem per ostium, sed aliunde quasi furem ingredientem in ovile Domini, cum virtute sancti Spiritus, et auctoritate beatorum Petri ac Pauli apostolorum principum, nostroque apostolico iudicio una cum synodali cœtu reverentissimorum episcoporum, omni episcopali honore decrevimus esse privatos et alienos: tamen intuitu misericordiæ, decreto synodali statuimus, jam fatum Joseph, invasorem Ecclesiæ vestræ, de ordine episcopali dejectum, in gradum et ordinem quo prius exstitit omnimodo reverti. Nam cum prædictus Anspertus dudum Mediolanensis archiepiscopus esset regulariter excommunicatus, aliquam vel minimorum in Ecclesia Dei consecrationem graduum facere nullo modo potuit; quia quod non habuit, dare profecto nequivit. Quare omnium vestrum cognoscat sagacitas, et laudanda fidelitas, quoniam dilectus ac spiritalis filius noster Carolomannus, gloriosus rex istius Italici regni, ipsum Vercellensem episcopatum, more præcessorum suorum regum et imperatorum, concessit huic Consperito vero nobilissimo, præsentibus missis nostris, nostramque apostolicam clementiam suis et litteris deprecatus ut eum vobis episcopum consecrarem. Nos autem, ejus precibus inclinati, nolentes vos diu sine proprii ac legitimi esse cura pastoris, hunc ipsum sanctæ Vercellensi Ecclesiæ vestræ apostolica duntaxat auctoritate episcopum consecravimus, dedimusque vobis pro invasore illo istum pastorem, pro merceenario ignavo providum satis rectorem, qui scilicet nostris vos apostolicis doctrinis admonitus, quasi populum Domini sibi commissum more veri pastoris pabulo vitæ perpetuæque salutis pascere atque in virga æquitatis et mansuetudinis regere vigilantem semper cura et sollicitudine solerter procuret. Quem itaque vos omnes uno voto et pio affectu quasi patrem et rectorem animarum vestrarum, utpote charissimi filii, ut recipiatis præsentis statuto nostro jubemus; et abjecto ac reprobato supradicto invasore, hunc, quem ordinavimus vobis, habetote episcopum. Nam magna vos laude dignos fore videmini, quod de beati Petri apostoli consecratione meruistis habere antistitem: et hoc in augmentum honoris Ecclesiæ Vercellensis sine dubio proveniet, si vos devota mente nostris obtemperatis præceptis. Nos enim, vestram cupientes salutem, ideo monemus ut mente et corpore salvi esse possitis. Jubemus etiam omnes scripturas, vel dationes cujuscunque tenoris, quas fecit de plebibus, casalibus et villis ipsius Ecclesiæ Vercellensis, nullam habere firmitatem; sed omnia quæ fecit esse iudicamus vacua et inania, quia legitimus ipse non fuit episcopus, et ideo quippiam dare non potuit: eum vero qui ex his quæ fecit aliquid firmum esse dixerit, Ananiæ et Sapphiræ anathemate feriendum fore censemus. Nam si cujuslibet consilio vel hor-tatu aliter facere, non de præsentis ipsum invasorem

abjicere studueritis, atque hunc quem nos consecravimus vobis, alacri cum voluntate non receperitis, omni ecclesiastica vos communione privabimus dinonquoque anathemate feriemus. Data *ut supra*.

CCLXVIII.

AD NOTINGUM NOVARIENSEM EPISCOPUM.

(Anno 879.)

Monet ut res Angelbergæ restituat; sin minus, denuntiat illi excommunicationem, nisi intra duos menses ad reddendam de his rationem Romam veniat.

NOTINGO Novariensi episcopo.

Audivimus te res spiritualis filiæ nostræ Angelbergæ Augustæ injuste tenere, quas volumus, et apostolica auctoritate præcipimus, ut continuo reddere studeas : et quod tibi retinere debere nulla lege conceditur, sub omni celeritate dimittas, ut ei cui pertinere videtur, his perfrui modis omnibus liceat. Nam si continuo præfatas res non reddideris, monemus, et apostolica auctoritate præcipimus, ut intra spatium duorum mensium Romam ad reddendam pro his rationem occurras, et coram nobis congruam satisfactionem exhibeas : alioquin tandiu excommunicatus existas quandiu huic nostræ commonitioni obtemperans, hæc quæ statuimus adimplere procures. Data XIV Kalendas Novembris, indictione XIII.

CCLXIX.

AD AMALFITANOS.

(Anno 879.)

Significat se eos excommunicasse donec se a paganis separent; minatur illis alias penas, nisi quamprimum pareant.

Reverendissimo et sanctissimo PETRO episcopo, seu PULCARI præfectorio, atque universo populo Amalfitano.

Notum esse volumus dilectioni et unanimitati vestræ quia contra divina statuta, et nostra apostolica monita, quibus vos frequenter monuimus, et ex auctoritate Dei et sanctorum apostolorum Petri ac Pauli, præcepimus ut nullum cum impia Saracenorum gente pactum haberetis, habitumque omnimodorumumperetis, in tali scelere, et in consortio inimicorum Dei manere non formidatis : virtute sancti Spiritus, et auctoritate sancti Petri, cui ligandi et solvendi in cælo et in terra a Domino est concessa potestas (*Matth. xvi*), omni sacra communione, sancto videlicet corpore et sanguine Domini nostri Jesu Christi, vos una cum totius apostolicæ sedis consensu privavimus, et ab Ecclesiæ Dei societate separavimus, ut in eadem excommunicatione maneat, donec resipiscentes ab impia vos paganorum præda separetis ; et nisi puro corde et devota voluntate citius fueritis conversi ad gremium sanctæ matris vestræ Romanæ Ecclesiæ, majoris damnationis sententia vos procul dubio feriemus. Vestram denique nos salutem quærimus, vestras cupimus in conspectu Domini animas apostolica benignitate salvare, et quasi oves dominicas ad pascua salutis æternæ desi-

deramus perducere : si tamen bonis operibus dediti nostra solatia, voluntatem, jussionem et admonitionem studueritis perficere, et in tali placito nequitiae contempseritis manere. Optamus vos in Christo bene valere. Die 24 mensis Octobris, indictione XIII.

CCLXX.

AD HELMOINUM EPISCOPUM PENNENSEM.

(Anno 879.)

Arguit quod ad synodum non accesserit; jubet statuta die ad se venire, et interim quemdam absolvere, quem injuste excommunicaverat.

Reverendissimo et sanctissimo HELMOINO episcopo Pennensi.

Secundum sacros venerabilium Patrum canones Spiritu Dei conditos, et totius mundi reverentia consecratos, pro ecclesiasticis duntaxat necessitatibus atque utilitatibus ad eas, quas nuper statutis diebus celebravimus, synodos, missis ex more auctoritatis nostræ litteris, fraternitatem tuam debere occurrere modis omnibus decrevimus : sed quia, cæteris devote valde venientibus, te minime venisse, neque excusationem tuam in tractoria regulari tenore conscriptam nobis et sanctæ synodo, causa videlicet temeritatis et inobedientiæ, ut etiam evidenter apparet, non direxisse comperimus, ne dilectionem tuam de hoc indiscussam præterisse videamur, hoc nostro apostolatus statuto jubemus, eam infra octavum diem Decembris mensis, sine aliqua mora vel ambiguitate ad nos debere venire nostrisque se obtutibus præsentare. Nam et Oteramus filius qui [*f. quondam*] Corvini cum aliis suis concivibus, nostris apostolicis, coram venerabili episcoporum cœtu super te questus est, auribus, quod dum a te ipse impetitus ecclesiastice de contemptione, post præstito sacramento, se cum suis sacramentariis purgasset, tua eum fraternitas, sicut professus est, quasi perjurum excommunicaverit ; regula canonica præcipiente quod hanc episcopus sibi cognitionem nullo modo debeat vindicare, Dominoque dicente ad Moysen, ad unius testimonium neminem condemnari oportere. Quod si ita est, quia temere illum excommunicare non debuisti, præcipimus ut eum de præsentanti absolvas tuæque communioni restituas : nam si ausu improbo aliter feceris, non quidem eum auctoritate apostolica procul dubio absolutum esse jubemus. Et si hanc jussionem nostram parvipendens, temerario ausu præsentanti nostræ adesse contempseris, ecclesiastica te communione velut inobedientem esse noveris privandum, quousque pro tuis negligentis dignam veniens nobis satisfactionem humiliter feceris. Data XIII Kalendas Decembris.

CCLXXI.

AD PAULUM EPISCOPUM.

(Anno 879.)

Jubet ecclesiam in villa Carpana sitam restitui, ibique sacerdotem constitui, et sacrum chrisma annuatim in eadem mitti.

Reverendissimo et sanctissimo PAULO episcopo sanctæ Ecclesiæ Regiensi.

Dilectioni tuæ venerandis sanctorum Patrum re-
gulis edoctæ mandamus, atque his præsulatus nostri
litteris jubemus, ut ecclesiam Dei positam in villa
Carpana, jam nuper incendio crematam restaures,
atque in pristinum decorem et ordinem restituere
nullatenus prætermittas, atque sub proprii cura sa-
cerdotis eam constituas, qui sedulas ibi Domino
laudes quotidie persolvat, ac pro salute fidelium
omnipotentem Dominum valeat exorare, sacrumque
illic, Deo propitio, annue chrisma mittere indesinenter
procures, quod est totius Christianitatis salus
et perfectio vera. Nam si aliter feceris, nos ex
apostolica auctoritate alteri episcopo præfatam eccle-
siam ad restaurandum et canonice ordinandum
procul dubio commitemus. Data XIII Kalendas De-
cembris.

CCLXXII.

AD THEODORICUM, HEODICIUM, ETC.
(Anno 879.)

*Ostendit mulierem, que viminisque coacta religio-
sum habitum susceperat, ad vota servanda non
teneri; hujus tamen causam illis definiendam
committit. Quod si qua oriatur difficultas, eos
vel eorum legatos cum ipsa muliere ad se venire
jubet.*

THEODORICO Teatio, HEODICIO Firmano, JOANNI
Aprutiensi et HELMOINO Pinnensi episcopis.

Quædam vestrarum dioceseon femina, nomine
Theoderona de Vivelata, relicta quondam Tresigii.
sedem apostolicam nostrumque simul pontificium
adiens, quæta est nobis quod, viro suo defuncto,
velamen sibi sacri habitus ab ejusdem viri sui fratris
duntaxat gemani vi, non scilicet dilectione vitæ spiri-
tualis, sed ambitione prædiorum ducti, impositum
fuerit, et ipsa plurimum renitens contra propriam
sponsonem, pollicitationem, expetitionem, electio-
nem, propositum, votum atque spontaneum iudicium
sine benedictione sacerdotis idem velamen susceperit.
Cujus professionem coram coepiscopis et fratri-
bus nostris conferentes, inquisivimus etiam idoneos
viros Operarum, Scattoimum, Erfemarium, Ame-
deum et Cerisium, vicinos scilicet ipsius feminae,
qui casu præsentés aderant, utrum se ita res haberet
an non. Sed illi non solum ita fuisse testificati sunt,
verum etiam parati exstiterunt omnem super hanc
causam satisfactionem præmittere. Nos igitur ha-
bentes eundem quem et patres nostri spiritum fidei,
et per gratiam Christi, zelum justitiæ, eadem super
legitime velatis quæ et illi sentimus eademque omni-
no decernimus; et quod non propria voluntate, non
arbitrio, non voto, non expetitu vel spontaneo iudi-
cio, quin potius coacte admittitur, cassandum esse
sancimus: præcipue cum hæc eadem femina non
nisi minis perterrita, plus minus diebus quindecim
idem velamen gestasse se dixerit, et nullo sacerdote
benedictionem tribuente hoc violenter susceperit.
Quod licet ad hujus absolutionem sufficere posse
speremus, quia si ita est, totius violentiæ ac neces-
sitatibus vinculis absoluta, suum licenter et impune
sequi debet arbitrium, et quod non elegit, ut perfe-

rat, non est cogenda: tamen sanctitati vestræ com-
mittimus ut, in unum convenientes, ipsius feminae
causam secundum Deum discutatis, et omnem super
hac querimonia veritatem subtili indagatione repe-
rientes, ad liquidum finiatis. Verumtamen dignum
non esse sancimus ut jugum cui non suo pro-
posito mota, sed ambitione et violentia oppressa
subacta est, portare cogatur, quia et sanctus papa
Gregorius in epistola ad Athanasium [*al. Anastasium*]
presbyterum Isauriæ, inter cætera ita refert:
(*epist. lib. v, epist. 67*). Quanquam ea quæ vi im-
pulsioni sunt, canonum minime censura recipiat,
et jure habeantur infirma quia ipse ea dissolvit, qui
injustum fateri compellit, sed magis illa est susci-
pienda et amplectenda confessio, quæ ex spontanea
monstratur voluntate procedere. Et rursus scriptum
est: *Voluntarie sacrificabo tibi (Psal. LIII)*; et alias:
Voluntaria oris mei beneplacita fac, Domine (Psal. CXVIII). Porro jam fato Joanni reverendo Aprutiensi
antistiti etiam verbis injunximus ut, ascita vestra
fraternitate, omne de hac re negotium vobiscum pa-
riter ventilet, et canonice, sicut prædiximus, diffinire
procuret. Super quo si aliqua ambiguitas fortassis
emerserit, tunc jubemus ut aut vos, aut vestri legati
vices vestras agentes, cum eadem femina nostris
præsentialiter obtutibus præsententur, ut coram
nobis jam diligentius omnis rei veritas inquiratur
et æquitatis regula terminetur. Postremo si præfatæ
feminae aliquid invidiosè objectum crimen quoquo-
modo fuerit, vos, Deo præ oculis habito, hoc non
admittatis; et si accusator illius in sua obstinatione
permanserit, tam accusata quam accusator in no-
stram cum vestris pariter missis accelerent prope-
rare præsentiam. Verumtamen si accusator ejus
defuerit, jam illa crimine illo coram nobis veniens
non tenebitur, secundum Carthaginensis concilii
nonum decimum capitulum, ita inquires (*Conc.
Carth. III, cap. 7*): Accusator ejus si nunquam die-
bus causæ dicendæ defuerit, a communione non
removeatur; restituito in communione accusato,
ipse removeatur a communione accusator. Data XII
Kalendas Decembris, indictione XIII.

B

C

CCLXXIII.

AD ATHANASIVM, PULCAREM, ETC.
(Anno 879.)

*Præcipit ut sædus cum Saracenis ictum rumpant;
quod nisi Kalendis Decembris fecerint, eis excom-
municationem minatur. Pulcarem monet ne Pan-
denulfo Capuano judici molestiam inferat.*

ATHANASIO episcopo Neapolitano, PETRO episcopo,
seu PULCARI præfactorio Amalfitano, episcopo Ca-
jetano, seu Decibili, et JOANNI gloriosis hypatis, a
paribus.

Pudet, ut ita dixerim, pontificium nostrum vos
jam commonere super hoc quod tam multoties a
nobis commoniti respiscere nolulistis, et cum Deo
odibilibus Saracenis habitum pactum dissolvere
haecenus contempsistis. Verum quia quanta crude-
litate genera, ac desolationum terræ istius cala-

mitatum nimis ex hoc mala lugenda provenerint atque proveniant, exaggerare differimus, ne interim, quod dignum est, judicare cogamur. Adhuc obsecramus, adhuc sicut spiritales filios exhortamur, et paternis visceribus vos amplecti conantes, Dei ac principum apostolorum Petri ac Pauli auctoritate præcipimus, ut jam jamque disciplinam percipientes, ab eisdem iniquis et ancillæ filiis saracenis vos separetis, et pactum cum eis habitum modis omnibus dissolvatis, si vel nostræ communionis, vel ipsius Christianitatis vultis esse participes; in quos jam daremus ecclesiastici mucronis sententiam, nisi nos apostolica patientia retineret. Idcirco vobis inducias usque Kalendas Decembrias istius tertie decimæ indictionis ad idem pactum cum Saracenis frangendum largimur, et tam vos quam Cajetanos atque Amalfitanos lucrari volentes, si usque ad idem tempus omnem Saracenorum amicitiam, nec non et omne fœdus dissolvere solito contempseritis, utrosque sententiæ ecclesiasticæ jaculis feriemus, et perpetuo anathemati submittemus, ut qui socii disciplinæ esse non vultis, communionis quoque nostræ non sitis participes. *Hoc addendum est in epistola ad Pulcarem.*

Postremo nobilitatem tuam monemus ut Pandenulfo judici Capuano in nullo molestus existas; et quod nobis ipse devotus est, tu ei devotione et amicitia copulatus, in quo posse tibi fuerit, contra adversitates illius te murum opponas; quatenus patris illius qui proprio genitore salvando suffigiit, reminiscens, pro utriusque amore, si de nobis tibi cura est, ipsius Pandenulfi profectibus potius hæreas, quam obviare quoquomodo videaris.

CCLXXIV.

AD ARPALDUM EPISCOPUM ASCULANUM.

(Anno 879.)

Arquit quod ad synodum non venerit; jubet ad se venire, ut iis quæ a suis clericis objiciebantur, respondeat.

Reverendissimo et sanctissimo ARPALDO episcopo Asculano.

Secundum sacros venerabilium Patrum canones Spiritu Dei conditos, et totius mundi reverentia consecratos, pro ecclesiasticis duntaxat necessitatibus ad eas, quas nuper statutis diebus celebravimus, synodos, missis ex more auctoritatis nostræ litteris, fraternitatem tuam debere occurrere modis omnibus decrevimus. Sed quia, cæteris devote valde venientibus, te minime venisse, cum etiam et auditu didiceris nos synodum celebrare, neque excusationem tuam regulari tenore in tractoria conscriptam nobis et sanctæ synodo, causa temeritatis et inobedientiæ tuæ, ut evidenter apparet, non direxisse comperimus; ne dilectionem tuam de hoc indiscussam præteritis videamur, hoc nostræ auctoritatis statuto jubemus, eam de præsentis sine aliqua mora vel ambiguitate ad nos debere venire nostrisque se obtutibus præsentare. Nam et clerici tuæ nos Ecclesiæ adierunt, reclamantes multa se a tua perpes-

Asos fraternitate enormiter adversa, et contra regulam ecclesiasticam injuste fore oppressos; quorum videlicet objectionibus coram nostro præsulatu assistentem te oportet procul dubio respondere. Et ideo hac jussione nostra percepta occurrere studeas, antequam Ecclesia tua majus schisma vel scandalum patiat: quoniam si venire jam modo contempseris, dignam excommunicationis a sede apostolica prolatam sustinebis omnino censuram. Data VIII Kalendas Decembris.

CCLXXV.

AD CAROLUM REGEM.

(Anno 879.)

Miratur quod cum Papiam venerit, ubi simul convenire debebant, legatos ad se non miserit: petit illos, destinet, ut se ad eum conferre possit.

Dilecto ac spiritali filio CAROLO glorioso regi.

Sicut nostro præsulatu vestris jam olim regalibus direxistis apicibus, ut his Kalendis Novembribus jam transactis vobis Papiam obviam venire deberemus: quatenus communi simul tractatu ea quæ sanctæ Ecclesiæ Dei utilia sunt, et regni stabilitati proficua, pariter considerassemus, stabilitateque perpetua firmassemus; hoc quidem avida ex tunc perficere mente parati existimus: sed quia vos in Italiam introisse audimus, valde mirati sumus quamobrem vestrum nobis adventum, per excellentiæ vestræ mellifluos apices et idoneos legatos, cognitum minime feceritis; nam paterno vos affectu diligentes, speciali duntaxat intuitu magnitudinem vestram cernere desideramus, filiorum charissime. Nunc itaque, si omnino verum est jam Papiam venisse, volumus ut eximios ex latere vestro nobis dirigatis legatos, honorificas sedi apostolicæ litteras deferentes; quibus videlicet perspectis, ad vestram properare serenitatem communique colloquium indubitanter valeamus: quia cum, Deo propitio, vobiscum fuerimus conjuncti, omnia quæ ad exaltationem sanctæ sedis apostolicæ matris vestræ, et ad vestrum ac nostrum videntur pertinere honorem, Deo favente, facile poterimus perficere. Pro quibus vobis et in hoc sæculo gloria multipliciter augeatur a Domino, et in cœlesti postmodum regione merces perpetua procul dubio tribuetur. Data ut supra.

CCLXXVI.

AD EUMDEM.

(Anno 879.)

Gratias agit quod cum a se fuerit Conspectus Ecclesiæ Vercellensis episcopus ordinatus, ejus ordinationi libenter acquieverit; se excusat quod Anspertum archiepiscopum Mediolanensem ejus precibus non absolvat.

Dilecto ac spiritali filio CAROLO glorioso ac excellentissimo regi.

Multiplices gratias vestræ referimus magnitudini, quia pro Vercellensi episcopatu, in quo nos Conspectum una cum synodi decreto episcopum ordinavimus, nostram libenter perfecistis voluntatem. De cætero autem, hoc est Mediolanensi archiepisco-

patu, o fili charissime, sicut nobis nunc mandasti, ut Anspertum archiepiscopum, quem in synodo pro nonnullis suis negligentis et præsumptionibus iudicavimus, reconciliare deberemus. Quod quidem nos pro vestro amore alacri mente omnimodo perficeremus, si sententia damnationis, quam in eundem archiepiscopum protulimus, sub tenore aliquo non fuisset prolata. Dictum est enim tandiu eum fore ab honore et ministerio sacerdotali suspensum, donec, auctore Deo, suam specialem nobis ad satisfaciendum exhiberet præsentiam. Et quia Ecclesiæ Dei privilegium nos decet immutatum solemniter conservare, ne in aliquo patrum terminos præterire videamur, contra statuta majorum agere nequimus. Unde benignitatis vestræ excellentiam paterno affectu monemus ut ob hoc quod irreprensibiliter agere non possumus nullo modo turbemini, quoniam vestram in omnibus cupimus pro honore perficere voluntatem. *Data ut supra.*

CCLXXVII.

AD LUDOVICUM ET CAROLOMANNUM REGES.

(Anno 879.)

Gratias agit de ipsorum erga Romanam Ecclesiam affectu, et mutuum studium pollicetur.

Dilectissimis filiis LUDOVICO et CAROLOMANNO gloriosissimis regibus.

Audita per venerabilem episcopum devotione vestra, quam circa sanctam Romanam Ecclesiam habere totoque conamine exercere cupitis, maximas Deo et vobis gratias agimus. Unde a nostra parte vos certos existere volumus quia sicut dominus Carolus divæ memoriæ imperator avus vester, ac postmodum genitor vester Ludovicus rex, sub protectione Romanæ Ecclesiæ nostraque apostolica tuitione vos commendaverunt, ita nostrum apostolicum affectum circa vos in omnibus ostendere vosque adjuvare ac protegere paterna dilectione atque amore semper parati existimus. Præterea de his quæ per jam dictum cœpiscopum verbo tenus mandastis, ita vobis per eum dictis respondendo direximus. Nam ea quæ nostro consilio reperimus et vobis innotescendo mandavimus, ad vestrum honorem proficua esse omnimodo credite.

CCLXXVIII.

AD HUGONEM ET ALIOS COMITES.

(Anno 879.)

Gratias agit de fide quam Ludovico et Carolomanno regibus servabant.

HUGONI eximio abbati, seu BERNALDO, GUITONI, et aliis regi gloriosis comitibus.

Audientes bonam famam de vobis, quod protectores, defensores atque fideles Ludovico et Carolomanno excellentissimis regibus, qui nobis a progenitoribus suis commissi sunt, in omnibus existitis, gratias referimus maximas. Quapropter his apostolicis nostris litteris magnificentiam vestram exhortamur ut more fidelium parentum vestrorum, magis ac magis circa eos vestram sincerissimam devotio-

A nem ostendatis, quoniam et nos, Deo propitio, in eorum adiutorio vobiscum pariter in omnibus prompti existimus: ut dignam exinde vos non solum a Deo et a nobis, verum etiam et ab illis retributionem percipere mereamini.

CCLXXX.

AD JOANNEM EPISCOPUM TICINENSEM.

(Anno 879-880.)

Præcipit ut ecclesiam in Carpana villa sitam, quam Paulus Regiensis episcopus reficere neglexerat, restituat, ibique sacerdotem proprium constituat et sacrum chrisma annuatim mittat.

Reverendissimo et sanctissimo JOANNI episcopo Ticinensi, dilectoque confratri.

Quia Paulus Regiensis Ecclesiæ episcopus, et canonicis admonitus institutis, et nostris apostolicis præceptionibus exhortatus, ut ecclesiam Dei positam in villa quæ dicitur Carpana, igne crematam restaurare, ibique suum, secundum jus ecclesiasticum, omne officium vel ministerium rite peragere debuisset, temere contempsit, nostræque salubri præceptioni obedire contempsit, nec debitum in hoc nostro reddidisse videtur honorem. Præcipientes igitur ex apostolica auctoritate dilectionis tuæ jubeamus, ut de præsentis, et absque omni protelatione, ipsam ecclesiam restituas in pristinum decorem et ordinem, atque sub proprii cura sacerdotis eam constituas, qui sedulas ibi Domino laudes quotidie persolvat, ac pro salute fidelium omnipotentem Dominum valeat exorare, sacrumque illic, Deo propitio, annue chrisma mittere indesinenter procures, quod est totius Christianitatis salus et perfectio vera. *Data ut supra.*

CCLXXX.

AD TEUTMARUM ARCHIEPISCOPUM.

(Anno 879 vel 880.)

Miratur eum morari et ad se non venire; monet ut statim veniat.

Reverendissimo et sanctissimo TEUTMARO archiepiscopo dilecto confratri nostro.

Sicut nobis dilectus ac spiritalis filius noster Carolomannus gloriosus rex suis regiis direxit apicibus, ut vos ad nostram apostolicam venire debuissetis præsentiam, vestrum quotidie præstolantes adventum miramur cur tantum moremini: nos enim almitatis et prudentiæ vestræ favore repleti fraternitatem vestram pio cupimus jam contemplari intuitu. Unde his nostris apostolicis litteris vos monemus et exhortamur ut libenti ad nos animo proferare omnimodis studeatis, quatenus una vobiscum ea quæ sanctæ Dei Ecclesiæ utilia sunt, prout necesse fuerit, pariter ordinare valeamus. *Data ut supra.*

CCLXXXI.

AD ANTONIUM EPISCOPUM ET BERENGARIUM COMITEM.

(Anno 879-880.)

Liutfredum comitem, quia monialem quæ e monasterio effugerat, suscepit, et bona Angelbertæ imperatricis diripuit, excommunicat, nisi statuto tempore satisfecerit: monet ne quisquam eum eo communiect.

Reverendissimo ANTONIO episcopo Brixienti, et

nobilissimo viro dilectoquo filio BERENGARIO glorioso A
comiti.

Quia dilectus ac spiritalis filius noster Caroloman-
nus gloriosus rex suis regalibus litteris, et missorum
nostrorum verbo, nostro præsulatui pio mentis affe-
ctu commisit, ut nos curam hujus Italici regni habe-
remus, tam pro divinitus nobis commissa pastoralis
sollicitudine omnium Christi ovium, quam etiam pro
præfati regis vice cura concessa, illa quæ contra
Deum et jura legis alicubi cognoscimus præsump-
tione commissa, omni volumus conamine compe-
scere, et unam ovem morbidam gladio percutere
spiritali, ut ad salutem quoquomodo anima vulne-
rata perveniat, antequam totus grex unius contagione
maculetur. Audientes igitur veraciterque scientes
Liutfredum comitem suscepisse quamdam sanctimo-
nialem, nomine Gerlindam, de Placintino monasterio
fuga lapsam, et post nostram super hac causa admo-
nitionem salubremque prohibitionem, eam detinuisse,
atque cum propria uxore suisque illi pariter com-
municasse; nobilitati vestræ paterna duntaxat dile-
ctione mandamus ut et tam pro eadem sanctimo-
niali [*deest aliquid*], quam facultatibus dilectæ filiæ
nostræ Angelbergæ Augustæ, cui debitam omnino
debuisset fidem conservare, latenter recepit; et hactenus
contra nostrum ei reddere distulit interdictum;
quamque etiam, quia cortex ipsius sub nostra apo-
stolica tuitione ac defensione perenniter susceptas,
depradari temere præsumpsit, nos eum a commu-
nione fidelium sequestramus, ita scilicet ut si infra
Italicum regnum consistit, intra dies triginta habeat
omnia sub vera satisfactione reddita quæ violenter
abstulit, et si extra regnum Italicum esse videtur,
infra dies sexaginta; ac deinde si, hæc omnia parvi-
pens, in sua pertinacia manere nihilque studue-
rit emendare, anathematis vinculo sit innodatus,
donec ad nostram apostolicam præsentiam venerit et
pro illicitis his omnibus veram coram nobis satis-
factionem facere studuerit. Idcirco volumus ut nul-
latenus ei communicetis, si nostro apostolico vultis,
ut dilecti filii, consortio frui. Data ut supra.

CCLXXXII.

AD EGILBERTUM EPISCOPUM.

(Anno 879-889.)

*Arguit eum quod cum excommunicatis a sede apo-
stolica communicavit: jubet ne cum Liutfredo et
Odebrico excommunicatis comminiceat.*

Reverendissimo et sanctissimo EGILBERTO epi-
scopo.

Beatissimi Apostolici præcepto (*Ephes. iv*) jube-
mur deponere veterem hominem cum actibus suis
et induere novum, qui secundum Deum creatus est
in justitia et sanctitate veritatis: propter quod dile-
ctionem tuam audientes cum eis qui a sede apo-
stolica, in qua beatorum Petri ac Pauli semper auctoritas
vivit, pro suis manifestis sceleribus excommunicati
merito existunt, contra jus ecclesiasticum, ante au-
dientiam et veram in reddendo satisfactionem, com-
municare, non medioeri animi dolore turbati existi-

mus: cum idem de talibus cavendis doctor egregius
dicat: *Si quis non obedit verbo nostro per epistolam,
hunc notate, ut non commisceamini cum eo (II Thess.
iii)*. Hinc etiam et coapostolus ejus Joannes, hujus-
modi nec Ave dicendum concedit: *Si quis, inquit,
venit ad vos et hanc doctrinam non affert, nolite re-
cipere eum in Domino, nec Ave ei dicite. Qui enim
dixerit ei, Ave, communicat operibus illius malignis
(II Joan. i)*. Item beatus Clemens Jacobo fratri Do-
mini scribens, ita de se apostolum Petrum populum
admonuisse commemorat: *Si inimicus est alicui pro
actibus suis, vos nolite exspectare ut ipse vobis di-
cat, cum illo nolite amici esse; quibus videlicet
salubribus exemplis et canonicis etiam institutis
edocti, ne simul pariter cum eis excommunicatus
B* existas, ex apostolica tibi auctoritate jubeamus, ut
nullam deinceps cum Liutfredo et Odebrico, a nobis
regulariter excommunicatis, vel in communi eloquio
communione habere præsumas: si debitam in te
non vis provinere sententiam, sane (*f, cave*) ut infra
dies triginta post hujus nostræ apostolicæ epistolæ
denuntiationem, reddant ipsi omnia eidem dilectæ
filiæ nostræ Angelbergæ Augustæ quæ violenter ac
fraudulenter auferre præsumperunt.

CCLXXXIII.

AD EGIFRIDUM ET ALIOS.

(Anno 879 vel 880.)

*Requt ut bonorum Angelbergæ imperatricis curam
sustineant.*

Nobilissimis viris dilectis filiis EGIFREDO, SUPPONI,
ERIPALDO, BERARDO Bonifacii filio, et COTEPHREDO
gloriosis comitibus.

Scientes profecto ea quæ sagacitati vestræ com-
mittimus, vos pro amore Dei et sanctorum principum
reverentia, nostraque dilectione, pio mentis affectu
perficere; ideo pro parte dilectissimæ ac spiritalis
filiæ nostræ Angelbergæ Augustæ his apostolatus
nostri litteris gloriam vestram magnopere deprecamur
ut omnium rerum ejus ubicunque consistentium
curam et sollicitudinem maximam habeatis: quatenus
vestro prudenti consilio ingentique solatio ejus
omnia salva et indiminuta, secunda et defensa consi-
stant, ita sane ut nulli easdem res invadere ac de-
prædare sinatis. Quia et nos cum qui facere vel favere
facienti præsumperit, spiritali procul dubio gladio
feriemus, quatenus ex hoc et nos secundum collatum
nobis divinitus apostolicum magistrum dignas atque
multiplices nobilitati vestræ gratias habeamus, be-
nedicentes vobis omni benedictione spiritali in
Christo Jesu Domino nostro, et vestræ fidei laudabili
rumor per ora fidelium semper ubique resonet
ad augmentum vestræ perpetuæ remunerationis.
Data ut supra.

CCLXXXIV.

AD EUNIBERTUM COMITEM.

(Anno 879 vel 880.)

*Minatur illi excommunicationem, nisi res sancti
Petri et Angelbergæ imperatricis restituat.*

EUNIBERTO glorioso comiti.

Veraci relatione comperimus te res sancti Petri apostoli, quas spiritali filiæ nostræ Angelbergæ Augustæ concessas habemus, cum aliis ejusdem filiæ nostræ proprietatibus, contra legem invadere ac retinere : et ob hoc tu ipse admonitus ab invasione illa non te subtraxeris, quin potius hactenus in hac eadem pravitate persistere nequaquam omiseris. Idcirco tibi præcipimus ut, omni occasione postposita te compescens, easdem res omnino relinquant, et te sive tuos ab ipsis removeas, quatenus eidem filiæ nostræ liceat omnes illas suo dominio vindicare atque disponere, et ut ei libitum fuerit, sub nostro speciali mandeburdio retinere : alioquin noveris te apostolica nostra auctoritate sancta communione privati, et quousque sub congrua satisfactione quæ alterius sunt restituas, a Christianorum consortio separatum. *Data ut supra.*

CCLXXXV.

AD GISULFUM ABBATEM.

(Anno 879-880.)

Ejus curæ monasterium Angelbergæ imperatricis committit.

GISULFO venerabili abbati monasterii sanctæ Christianæ.

Auctoritate sanctæ sedis apostolicæ tuæ reverentiæ committimus ut curam perspicuam et sollicitudinem habeas monasterii dilectæ filiæ nostræ Angelbergæ Augustæ, siti in civitate Placentia, sicut idoneus Christi minister et gregis Domini provisor eximius, quatenus secundum regulam sancti Benedicti jure abbatis quæ ordinanda vel disponenda sunt disponas et ordines, et quæ corrigenda perspexeris subtili duntaxat indagatione, ut Domino placeas, ex nostra auctoritate corrigere procures. *Data ut supra.*

CCLXXXVI.

AD GREGORIUM, THEOPHYLACTUM ET DIOGENEM, ETC.

(Anno 879 vel 880.)

Gratulatur de victoria contra Saracenos parta; miratur cur Romam non venerint: mandat ut contra Saracenos sibi auxilio veniant.

Dilectis viris GREGORIO spathario, THEOPHYLACTO turmacho, atque DIOGENI comiti imperialibus.

Audientes vos per Dei auxilium, et secundum spiritali filii nostri imperatoris voluntatem Neapolim venisse ac multitudinem Saracenorum ibi consistendem potenti brachio superasse, læti sumus effecti et statim debitas omnipotenti Domino gratias egimus super victoria vestra et inimicorum contritione. Sed iterum mirati sumus quia Romam venire nostramque apostolicam neglexistis videre præsentiam, ut pro vestri laboris certamine multiplicem gratiam et benedictionem a nobis et a sede apostolica super vos reciperetis effusam, quatenus sanctorum apostolorum Petri et Pauli orationibus adjuti, omnique spiritali benedictione muniti, contra eosdem perdi-

tionis filios victrici semper dextera valeretis efficaciter dimicare : quod tamen ut salubriter facere possitis, ut terra marique de inimicis et infidelibus victores feliciter existatis, ideo mandamus vobis ut cum aliquantis dromonibus pro honore jam dieti spiritalis filii nostri Augusti has nostras in partes iterum venire omnimodis satagatis, quatenus contra eosdem nefandos Agarenos congruum nobis adjutorium præbere possitis, ut ex hoc laus et merces imperatori accrescat, et a nobis dignas retributiones sine dubio recipiatis. Quapropter monemus et hortamur vos ut nostris monitis libenti animo attendatis, et quidquid acturi estis, per vos velociter cognoscemus. *Data ut supra.*

CCLXXXVII.

AD ATHANASIO EPISCOPUM NEAPOLITANUM.

(Anno 879 vel 880.)

Commendat ejus erga sedem apostolicam observantiam; hortatur ut, sicut promiserat, pactam cum Saracenis ictum frangat. Amalfitanos per legatum suum ea de re admonitos, si parere neglexerint, excommunicandos significat.

Reverendissimo et sanctissimo ATHANASIO episcopo Neapolitanæ Ecclesiæ.

Sanctitatis vestræ devotionem semper in omnibus circa sedem apostolicam et nostram paternitatem sinceram atque præclaram esse cognovimus, quod etiam et præsentis legationis vestræ tenore inspecto nobis est luce clarius manifestum. Quamobrem his apostolatus nostri litteris multiplices almitati vestræ gratias agimus, paterno vos affectu monentes ut juxta indultum vobis officium in his quæ Dei sunt, et Ecclesiæ Christi utilia, toto conamine desudare non desinatis : ac sicut nobis per legatos vestros mandatis, quod sive ruperint Amalfitani pactum cum Saracenis, sive non, vos omnino frangetis, volumus ut indesinenter id agere studeatis. Nam et missum nostrum, Dominicum videlicet venerabilem episcopum, illuc direximus, eos admonentes ut patienter nostram in hoc perficiant voluntatem : quod si ipsi nostram in hoc fuerint voluntatem secuti, habeamus eos complices et amicos ; sin autem, velut externos inimicos non solum visibili sed etiam invisibili gladio pariter persequamur, ut et a nobis et ab omnibus Christianis perpetuo digni odio habeantur. Nam et per præfatum missum nostrum Dominicum episcopum, eos obaudire nolentes præsentialiter excommunicare præcipimus, ac postmodum nos ipsi digno anathemate feriemus. Vos igitur estote nobiscum, et pactum iniquum corrumpite : quia et nos vobiscum in omnibus erimus, et quod jam dare promissimus, auxiliante Domino, annis singulis vobis procul dubio tribuemus ; quia si vos fœdum cum Saracenis non habueritis, nil, Domino juvante, de Amalfitanorum perfidia curabimus, quos videlicet gladio poterimus spiritali persequi et facile humiliare. Optamus sanctitatem vestram in Christo bene valere.

CCLXXXVIII.

AD AMALFITANOS.

(Anno 879 vel 880.)

Monet ut rupto cum Saracenis fœdere ad Ecclesiæ gremium revertantur, et eam obrem singulis annis decem millia mancosorum et eo anno mille daturum se promittit; nisi paruerint, minatur excommunicationem.

Reverendissimo PETRO episcopo, seu PULCARI præfactorio, et omnibus sacerdotibus, ac clericis, atque universo populo Amalfitanæ civitatis.

Multa vobis bona facere alacrique mente tribuere sæpe promisimus, decertantes ut pactum quod cum impia Saracenorum gente habetis, omnimodis rumperetis, ne ex consortio gentis malignæ Ecclesia Dei per vos sic crudeliter affligeretur, et animabus vestris non solum temporale exinde discrimen, sed etiam æternum acquiretis supplicium. Nunc autem vos, quasi filios dilectos corpore et spiritu salvare volentes, his apostolatus nostri litteris monemus et hortamur unanimitatem vestram ut, relicta nunc penitus Saracenorum societate; corruptoque fœdere quod cum eis ad perditionem animarum vestrarum et terræ sancti Petri habetis, alacri mente pique devotione, jam modo ad gremium sanctæ catholicæ et apostolicæ Ecclesiæ matris vestræ revertamini, et ad societatem et communionem nostram redire studeatis. Et dabimus vobis nunc et per singulos annos, sicut inter nos statutum fuit, decem millia mancosorum argenti; et isto præsentis anno damus vobis pro benedictione supra mille mancosos, et teloneum quod in portu nostro dare debetis, vobis concedimus. Quod si in tali impio scelere, diabolo suadente, amplius permanere præsumperitis, et ipsum pactum de præsentis non corrueritis, præcipimus huic episcopo nostro Dominico ut vice nostra omni ecclesiastica vos communionem privare procuret; ipsoque revertente, synodice vos iterum perpetui anathematis vinculis alligabimus: et omnium terrarum aditus, in quibus negotiari soliti estis, vobis omnino claudemus, ut illic nulla possitis exercere negotia. Sane si de aliis civitatibus dubitatis quod pactum non rumpant, credimus quia nostram facient voluntatem: nam modo per vos habeant excusationem. Et si aliqua de illis fuerit quæ sicut vos facere voluerit, una vobiscum ejus perditionem ordinabimus. Porro scitote quia Leonem presbyterum vestrum penes nos retinimus. **Data ut supra.**

CCLXXXIX.

AD CAROLUM CRASSUM REGEM ITALIÆ.

(Anno 880.)

Rogat regem ut Hieronymum episcopatum Lausanensem pacifice retinere permitta, et Hubonem res Ecclesiæ Bisuntinæ ablatas reddere jubeat.

Dilecto ac spiritali filio CAROLO glorioso regi.

Magnitudinem vestram ingenti nobis amore dilectam nosse volumus, quia Hieronymus sanctæ Lausanensis Ecclesiæ episcopus, apud B. Petrum apo-

stolorum principem nostrumque pontificium veniens, humilitatis devotione petit quatenus Lausanensem Ecclesiam, quam jam olim regendam susceperat, ei deinceps vobis fœventibus habere liceret. Nos autem ejus precibus moti, juxta quod omnium Ecclesiarum Dei curam habemus commissam, et quia nostra exhortatione illum vobis fidelem in omnibus, propriumque, sicut cæteri regni vestri episcopi existunt, esse cupientes agnovimus, his apostolatus nostri litteris excellentiæ vestræ suggerimus ut eum pro amore Dei et sancti Petri et nostro, et benigne recipiatis, et jam dictum episcopatum Lausanensem, sibi divinitus concessum, nostraque apostolica etiam auctoritate commissum, sub omni integritate recipere habereque securiter permittatis, ne amplius eadem Ecclesia contra statuta Patrum sine proprio restore consistat. Nam regulariter illum electum, e proprio archiepiscopo causa infirmitatis præbente consensum, et episcopos consecratores illius litteris, quas nobis ostendit, rogante, consecratum fuisse jam dictæ Ecclesiæ episcopum, incunctanter agnoscimus. Et ideo volumus et rogamus ut absque temporis protelatione, vel aliqua contradiectione, suum, ut diximus, episcopatum habeat, teneat atque cum Dei reverentia disponat, quoniam nos in alterius nominis electione vel consecratione isto vivente consentire nullo modo patiemur eo quod præcipua sanctorum Patrum auctoritas jubeat, duos simul in una civitate non debere esse episcopos. Quamobrem, charissime fili, hortamur nihilominus et obsecramus regiam gloriam vestram, ut Deo auxiliante ipsa Ecclesia, proprio nunc recepto pastore, sub vestræ clementiæ tutamine pacifica jam et quieta consistat, ut ejus precibus adjuti, post hoc regnum terrenum vobis concessum, sempiternum percipere mereamini. Præterea et Theodoricus sanctæ Chrysopolitanæ sedis archiepiscopus multas nostris apostolicis auribus super Hubonem fidelem vestrum querelas direxit, eo quod res Ecclesiæ illius invaserit. Pre quo etiam precamur ut easdem res ecclesiasticas jam dicto archiepiscopo sub integritate reddere faciatis pro amore Dei et nostro, et nulla deinceps ei permittatis adversa vel contraria inferre. **Data die 20 mensis Junii, indictione XIII.**

CCXC.

AD LIUTWARDUM EPISCOPUM VERCELLENSEM.

(Anno 880.)

Ut Hieronymi episcopi Lausanensis causam apud Carolum regem procuret.

Reverendissimo et sanctissimo LIUTWARDO episcopo sanctæ Ecclesiæ Vercellensis.

Dilectioni vestræ familiari quodam modo pioque affectu, veluti fidelissimo nobis, mandantes committimus ut recipientes hanc nostri apostolatus epistolam, legatione nostra dilecto ac spiritali filio nostro Carolo excellentissimo regi, pro Hieronymo videlicet Lausanensi episcopo directa fungamini: vestroque ingenti certamine, prudentique consilio, ipsius

regis magnitudinem admonere atque exhortari ma-
gnopere studeatis, quatenus eundem Lausanensem
episcopatum, illi jam olim divinitus concessum, pro
amore Dei et nostro de præsentī reddere et secu-
riter quasi suo fideli habere permittat. Nam eo vi-
vente in alterius electione vel episcopali consecra-
tione assensum nullo modo præbebimus, quin potius
apostolica hoc fieri auctoritate modis omnibus inhi-
bebimus, ne contra statuta Patrum duo in una vi-
deantur civitate esse episcopi. Quapropter nobis
justa mandantibus omni annis et voluntate favere
nullo modo prætermittatis, quo minus nostræ vol-
untatis legatio apud serenissimum regem salutis
et pacis ecclesiasticæ per vestrum certamen effe-
ctum obtineat, quatenus eadem Ecclesia Dei, pro-
prio recepto pastore, salva in omnibus et quietā
consistat. Data die 20 mensis Junii, indictione XIII.

CCXCI.

AD THEODORICUM ARCHIEPISCOPUM BISUNTINENSEM.

(Anno 880.)

*Significat se de ipsius causa Carolo regi scripsisse ;
ac de Hieronymo episcopo Laudunensi hortatur,
ut adjuvare illum studeat.*

Reverendissimo et sanctissimo THEODORICO archi-
episcopo sanctæ Chrysopolitanæ Ecclesiæ.

Pro tot et tantis perturbationibus et calamitatibus
quas ab iniquis et Deum non timentibus viris Eccle-
siam tibi commissam quotidie pati vestris litteris
referentibus agnoscimus, plurimum condolemus et
congruum cupimus, Deo favente, vobis præbere
solatium, quatenus sedis vestræ vigorem pristi-
num indiminuto jure feliciter obtineatis. Nam
dilecto ac spiritali filio nostro Carolo glorioso
regi pro tuæ causa utilitatis proque vestræ
plebis salute suggestimus ; ut pro amore Dei et
nostro, suo vos auxilio ac defensione in omnibus
tueatur, et de his qui res Ecclesiæ vestræ invadere
præsumperunt, justitiam facere dignetur, resque
ipsas sub integritate vobis restitui jubeat. Vos ta-
men, more boni pastoris, sicut in prosperis humiles,
ita quoque in adversis fortes existite, ut populum
Domini tibi commissum pro malorum infestatione,
quam patimini, strenue regere non omittatis. Pro
ipso etiam Hieronymo episcopo eidem regi direxi-
mus ut Lausanensem episcopatum illi divinitus
concessum, et nostra apostolica auctoritate largi-
tum, securiter amodo retinere permittat. Et ideo
vestra fraternitas eum in hoc adjuvare pro viribus
non prætermittat. Data die 20 mensis Junii, indi-
ctione XIII.

CCXCII.

AD CAROLUM REGEM.

(Anno 880.)

*Commendat epus erga Romanam Ecclesiam obser-
vantiam ; rogat ut legatum sibi auxilio mittat.*

Dilecto ac spiritali filio CAROLO glorioso regi.

Multiplices regiæ magnitudini vestræ his nostris
apostolicis litteris gratias agimus pro vestra tam

ingenti cura et sollicitudine quam circa sanctam
Romanam Ecclesiam matrem vestram habetis, at-
que pro vestræ devotionis sinceritate qua nos puræ
mentis affectu more parentum vestrorum diligitis et
in omnibus adjuvare alacriter cupitis. Et quia pro
exaltatione atque utilitate sedis apostolicæ, totius-
que terræ sancti Petri defensione, vos prompta
mente desudare velle cognoscimus, in quo scilicet
vestri desiderii affectu piissimum et divinam circa
regiam gloriam vestram habebitis adjutricem et pla-
cabilem majestatem, et dignam non solum in hoc
sæculo, sed etiam in cœlesti postmodum regione
retributionem procul dubio recipietis. Quod vero
mandastis, ut marchiones vestri qui circa nos exis-
tunt, ad defensionem necessariam peragendam no-
biscum pariter decertare debuissent, hoc autem
sine vestræ majestatis præsentia, vel sine idonei
optimatis vestri, nullo modo sicut oportet proderit
nobis, eo quod ipsi marchiones homines de civitati-
bus et propriis finibus nostris, cum quibus terri-
torium sancti Petri poteramus satis defendere, in
suo assiduo servitio habent, et nonnullos eorum
potentia sua defendunt, et ita impediunt, ut nostrum
servitium secundum voluntatem nostram minime
perficere valeant. Unde precamur excellentiam vest-
ram ut pro amore Dei et principis apostolorum
honore, talem nobis de præsentī missum dirigatis,
cum quo per vestræ auctoritatis potentiam, ea quæ
sanctæ Dei Ecclesiæ et nobis pertinent, inunctanter
valeamus perficere, quatenus eosdem homines no-
stros, qui nobis sublatis sunt, omnimodis recipiamus,
ut omnis honor et vigor sanctæ Romanæ Ecclesiæ
vestris diebus in omnibus integer accrescat, et in-
dimitutus permaneat, quoniam ipsius honor et
exaltatio, vestra hic et in æternum est salus et
gloria. Nam et nos ea quæ vestræ gloriæ proficua
sunt, libentissime perficere cupimus, et nostris
assiduis precibus vos Domino commendare, aposto-
lorum suffragantibus meritis, semper satagimus.
Hæc itaque pro utilitate sanctæ Ecclesiæ modo fieri
petimus, ut cum vestrum gloriosum adventum, fa-
vente Domino, conspexerimus, optata et ingenii pa-
riter lætitia exultare valeamus. Data die 23 men-
sis Junii, indictione XIII.

CCXCIII.

AD SFENTOPULCRUM COMITEM.

(Anno 880.)

*Gratulatur de ejus et subditorum illius observantia
erga sedem apostolicam, recipit eos in fidem
suam : ostendit Methodium archiepiscopum ortho-
doxam fidem fuisse professum ; ejus jura et pri-
vilegia confirmat, eumque ad eos regendos mittit.
Nitrensium Ecclesiæ episcopum consecratum signi-
ficat, et alium ad se vult mitti, quem alii eccle-
siæ præficiat : jubet omnes ipsi archiepiscopo obe-
dire ; concedit ut divina officia Sclavonica lingua
recitari possint, dummodo Evangelium Latina
prius recitetur.*

Dilecto filio SFENTOPULCRUM glorioso comiti.

Industriæ tuæ notum esse volumus quoniam, con-
fratre nostro Methodio reverendissimo archiepiscopo

sanctæ Ecclesiæ Moravensis una cum Semisisno fidei A tuo ad limina sanctorum apostolorum Petri et Pauli nostramque pontificalem præsentiam veniente, atque sermone lucifluo referente, didicimus tuæ devotionis sinceritatem, et totius populi tui desiderium, quod circa sedem apostolicam et nostram paternitatem habetis. Nam, divina gratia inspirante, contemptis aliis sæculi hujus principibus, beatum Petrum apostolici ordinis principem vicariumque illius habere patronum et in omnibus adiutorem ac defensorem pariter cum nobilibus viris fidelibus tuis, et cum omni populo terræ tuæ amore fidelissimo elegisti, et usque ad finem sui ipsius et vicarii ejus defensione colla submitbens, pio affectu cupis, auxiliante Domino, utpote filius devotissimus, permanere. Pro qua scilicet tanta fide ac devotione tua et populi tui, apostolatus nostri ulnis extensis, te quasi unicum filium amore ingenti amplectimur; et cum omnibus fidelibus tuis paternitatis nostræ gremio, veluti oves Domini nobis commissas, recipimus, vitæque pabulo elemente nutrire optamus, atque nostris assiduis precibus omnipotenti te Domino commendare studemus: quatenus, sanctorum apostolorum suffragantibus meritis, et in hoc sæculo adversa omnia superare, et in cœlesti postmodum regione cum Christo Deo nostro valeas triumphare. Igitur hunc Methodium venerabilem archiepiscopum vestrum interrogavimus coram positis fratribus nostris episcopis, si orthodoxæ fidei symbolum ita crederet, et inter sacra missarum solemnia caneret, sicuti sanctam Romanam Ecclesiam tenere, et in sanctis sex universalibus synodis a sanctis Patribus, secundum evangelicam Christi Dei nostri auctoritatem, promulgatum atque traditum constat. Ille autem professus est se juxta evangelicam et apostolicam doctrinam, sicuti sancta Romana Ecclesia docet, et a patribus traditum est, tenere et psallere. Nos autem illum in omnibus ecclesiasticis doctrinis et utilitatibus orthodoxum et proficuum esse reperientes, vobis iterum ad regendam commissam sibi Ecclesiam Dei remisimus, quem veluti pastorem proprium ut digno honore et reverentia lætaque mente recipiatis jubemus, quia nostræ apostolicæ auctoritatis præcepto archiepiscopatus ei privilegium confirmavimus, et in perpetuum, Deo juvante, firmum manere statuimus, sicuti antecessorum nostrorum auctoritate omnium Ecclesiarum Dei jura et privilegia statuta et firmata consistunt: ita sane ut juxta canonicam traditionem omnium negotiorum ecclesiasticorum curam habeat ipse, et ea velut Deo contemplante dispenset. Nam populus Domini illi commissus est, et pro animabus eorum hic redditurus erit rationem: ipsum quoque presbyterum nomine Wichinum, quem nobis direxisti, electum episcopum consecravimus sanctæ Ecclesiæ Nitrensium, quem suo archiepiscopo in omnibus obedientem, sicuti sancti canones docent, esse jubemus, et volumus ut pariter cum ipsius archiepiscopi consensu et providentia, alterum nobis apud tempore utilem presbyterum vel diaconum dirigas, quem

FATROL. CXXVI.

similiter in alia Ecclesia, in qua episcopalem vestram (*f. sedem vel cathedram*) noveris esse necessariam, ordinemus episcopum, ut cum his duobus a nobis ordinatis episcopis præfatus archiepiscopus vester, juxta decretum apostolicum, per alia loca, in quibus episcopi honorifice debent et possunt existere, postmodum valeat ordinare. Presbyteros vero, diaconos, seu cujuscunque ordinis clericos, sive Slavos, sive cujuslibet gentis, qui intra provinciæ tuæ fines consistunt, præcipimus esse subjectos et obediens in omnibus jam dicto confratri nostro archiepiscopo vestro, ut nihil omnino præter ejus conscientiam agant. Quod si, contumaces et inobedientes existentes, scandalum aliquod, aut schisma facere præsumperint, et post primam et secundam admonitionem se minime correxerint, quasi zizaniorum seminatores ab ecclesiis et finibus vestris auctoritate nostra præcipimus esse procul abjiciendos, secundum auctoritatem capitulorum quæ illi dedimus et vobis direximus. Litteras denique Slavonicas, a Constantino quodam philosopho repertas, quibus Deo laudes debite resonent, jure laudamus; et in eadem lingua Christi Domini nostri præconia et opera ut enarrentur, jubemus. Neque enim tribus tantum, sed omnibus linguis Dominum laudare auctoritate sacra monemur, quæ præcipit dicens: *Laudate Dominum, omnes gentes, et collaudate eum omnes populi* (Psal. cxvi). Et apostoli repleti Spiritu sancto locuti sunt omnibus linguis magnalia Dei (Act. ii). Hinc et Paulus cœlestis quoque tuba insonat, monens: *Omnis lingua confiteatur quia Dominus noster Jesus Christus in gloria est Dei Patris* (Philip. ii) De quibus etiam linguis in prima ad Corinthios Epistola satis et manifeste nos admonet, quatenus linguis loquentes Ecclesiam Dei ædificemus (I Cor. xiv). Nec sane fidei vel doctrinæ aliquid obstat sive missas in eadem Slavonica lingua canere, sive sacrum Evangelium, vel lectiones divinas Novi et Veteris Testamenti bene translatas et interpretatas legere, aut alia horarum officia omnia psallere, quoniam qui fecit tres linguas principales, Hebræam scilicet, Græcam et Latinam, ipse creavit et alias omnes ad laudem et gloriam suam. Jubemus tamen ut in omnibus ecclesiis terræ vestræ propter majorem honorificentiam, Evangelium Latine legatur, et postmodum Slavonica lingua translatum in auribus populi Latina verba non intelligentis, annuntietur sicut in quibusdam ecclesiis fieri videtur. Et si tibi et iudicibus tuis placet missas Latina lingua magis audire, præcipimus ut Latine missarum tibi solemnia celebrentur. Data mense Junio, indictione decima tertia.

CCXCIV.

AD LANDULFUM EPISCOPUM SURICORUM.

(Anno 879.)

Objurgat quod violaverit quæ ipse inter eum et Landulfum Capuanum episcopum de frugibus illius ecclesiæ decreverat; minatur illi eacommunicacionis pœnam, nisi suis decretis pareat: præcipit

ut si se læsum sentiat, cum eodem episcopo causam dicturus ad se veniat.

Reverendissimo et sanctissimo LANDULFO episcopo Suricorum.

Nostra (f. Vera) relatione comperimus quod quidquid tempore consecrationis tuæ in nostro conspectu de frugibus illius ecclesie congrua deliberatione fuerat inter te et Landenulfum Capuanum episcopum diffinitum, tu ingenti usus temeritate violaveris; et quod nos juxta temporis qualitatem moderari decreveramus, tu adimplere neglexeris. Quo audito, valde noster animus est commotus quod tam audacter nostra præcepta parvipenderis et terminos paternos excesseris. Quapropter hujus nostri pontificii auctoritate ab hujuscemodi te factione compescere volentes, præcipimus, et modis omnibus tibi injungimus, ut, omni obstinatione deposita, quidquid nos illic positi inter te et eundem episcopum, vel illius fratrem Pandenulfum fidelem nostrum, de divisione vel frugibus illius ecclesie deliberavimus, sine mora adimplere procures, hoc sciens quia si aliter agere præsumpseris, sicut invasorem rerum sacrarum te canonicis jaculis feriemus. Quod si aliquam querimoniam aut justam excusationem te habere confidis, tunc cum eodem episcopo causam dicturus, jubemus ut nostram petas præsentiam. Nam et nos præsentī legato nostro Walperto reverendissimo episcopo dilecto consiliario nostro præcipimus, ut si nostra salubria monita adimplere contempseris, ex nostra auctoritate te excommunicare procuret quatenus, sicut prædiximus, Romam in nostra (f. add. præsentia venias). Data xv Kalendas Augusti, indictione decima tertia.

CCXCV.

AD CAROLUM REGEM.

(Anno 880.)

Gratulatur de ejus erga Romanam Ecclesiam observantia, cujus eum defensorem elegit; monet ne adversariis fidem habeat: laudat quod ditionem sancti Petri ab hostili incursu defendi jusserit. Bosoni tanquam tyranno auxilium se non daturum affirmat; optat ejus adventum, et rogat ut legatos mittat.

Dilecto ac spiritali filio CAROLO glorioso regi.

Regiæ magnitudinis vestræ receptis apicibus ac diligenter perlectis, quia more Christianissimorum principum parentum vestrorum admonitionis et exhortationis nostræ doctrina repleti vos velle cognoscimus, nostroque consultu ea quæ pro sanctæ matris vestræ Romanæ Ecclesie et totius Christianitatis defensione salubria ac utilia esse videntur, animo libenti cupiatis perficere, valde gratulamur et immensas Domino gratias referimus, et optamus ut cuncta circa vos semper prospera, divina favente gratia, existant. Ea etenim quæ de vestris causis et eventibus vestris nobis litteris non retulistis, fideli relatione communis fidelis et reverendissimi episcopi Wibbodi luculenter didicimus; eique omnem familiaritatis aditum pio affectu præbentes, vestræ voluntatis arcana cognovimus, per quem et nos

celsitudini vestræ aliqua verbotenus intimanda direximus. (Aimoinus, l. v, c. 39, 40; Regino, l. ii.) De oppressionibus autem Græcorum (sicut vobis a quibusdam æmulis nostris nuntiatum est) nos aliquid nullo modo scimus; si vero certissime sciremus, dilectioni vestræ cum omni devotione celeriter nuntiassemus, quoniam Dei omnipotentis procul dubio inspiratione et voluntate, vos præ omnibus eligere et inclytum in omnibus negotiis sanctæ sedis apostolicæ nostrisque profectibus patronum ac defensorem habere omnino curavimus, et ideo, vita comite, longa per tempora optamus possidere. Quapropter inimicis nostris, quos nobis adversarios et zizaniorum seminatores esse cognoscitis, aurem clementiæ vestræ nullatenus accomodetis. Nam inimicus semper contraria loquitur. Tamen bene vos fecisse laudamus, quod omnibus episcopis et comitibus, qui circa nos consistunt, auctoritate vestra mandastis atque jussistis ut terminum sancti Petri ab hostili nepe incursu, nostro pariter instructi mandato, defendere debeant. Valde necessarium est ut non solum a malis Christianis, verum etiam et a Saracenis ubique diffusis, ubique et undique nos sine intermissione deprædantibus, et more furum nostra diripientibus, tueri procurent. Pro qua videlicet necessitate, quam supra modum patimur, ipsius Wibbodi episcopi hortatu, in quamdam cortem nostram exivimus, et una cum Widone comite Lamberti filio loqui volumus hujus rei causa; sed ipse adesse prætermisit, sicut jam dictus fidelis noster ac vester vobis poterit enarrare. De Bosone quoque certos vos esse volumus quia neque aliquem familiaritatis locum, aut receptionis nostræ auxilium apud nos habebit neque poterit invenire, eo quod vos, ut prælibavimus, amicum et adiutorem quæsivimus, et loco charissimi filii retinere toto mentis conamine volumus. Nam nihil nobis de parte ipsius pertinere videtur, qui talem tyrannidem præsumpsit committere. De vestro quoque adventu, quem, Deo favente, adesse mandastis, valde sumus gavisi effecti, et pro tantis calamitatibus, quibus circumdati et oppressi existimus, optamus et vehementer rogamus vestram specialem citissime, Deo propitio, contemplari præsentiam. Joannem vero reverendissimum episcopum Tritiensem penes nos hac vice retinimus, ut si aliquid novi nobis evenerit, et necesse fuerit per eum vestris mandare fidelibus, ac per ordinem quæ opportuna fuerint, significare possimus. Pro justitiis autem faciendis sanctæ Romanæ Ecclesie, ut idoneos et fideles viros e latere vestro nobis de præsentī dirigatis obnixè deposcimus, qui nobis pariter cum missi nostris proficiscentibus, de omnibus justitiam plenissimam faciant, et vestra regali auctoritate male agentes corrigant et emendent: præterea, sicut vestro proprio nobis ore, fili charissime, promisistis, ut in hoc duntaxat opere vestram voluntatem vestræque mentis affectum circa nos purissimum fore luce clarius agnoscamus, ut et nos vestrum desiderium pio semper valeamus affectu perficere. Data ut supra.

CCXCVI.

AD IMPERATORES AUGUSTOS.

(Anno 880.)

Commendat eorum studium in Ecclesiæ concordia stabilienda; monet ut in eo persistent: agit gratias de dromonibus auxilio missis: de monasterio sancti Sergii, et de Bulgarorum diœcesi sedi apostolicæ restituta; rogat ut Dei Ecclesiam tueantur: demum ea quæ pro Photio in synodo Constantinopoli acta sunt, se approbare significat, si tamen legati contra sua jussa non egerint.

Imperatoribus Augustis.

Post innumeras sollicitudines quibus nimirum oneratur imperiale fastigium, laudabile clementiæ vestræ cognoscimus Christianissimi imperatoris esse propositum, per quod submotis omnibus discordiarum atque zizaniorum seminibus, quæ in agro Dominico humani generis inimicus asperserat, sanctæ catholicæ Ecclesiæ piissimo mentis affectu consulere voluistis. In quo scilicet animi voto ac desiderio, quantum rebus humanis favere providentia divina dignetur, sollicitudo clementiæ vestræ Spiritu Dei incitata demonstrat, quæ in catholica Ecclesia misericordem per auctoritatem et iudicium sedis apostolicæ, quæ Christo Domino delegante, totius Ecclesiæ retinet principatum, nihil impacatum, nihil voluit esse diversum: cum omnes schismatica pravitate divisos, vel zelo quolibet separatos atque dispersos, clementi affectione vel studio ad veræ pacis soliditatem, concordiaque sincerissimæ unanimitatem evocare, et in uno Christi ovili cum proprio pastore, Photio videlicet confratre et comministro nostro, aggregare curavit. Pro quibus videlicet nostri pastoralis magisterii officium est, apud serenitatis vestræ Augustalem clementiam assidua semper sollicitudine omnimodis intercedere; ut vestræ pietatis majestas, more Christianissimorum imperatorum, benigna circa omnes existat; et quasi Deo continente, populum Domini sibi commissum felici regat semper et gubernet intuitu, nec amplius patiatur eos aliquibus sæculi hujus procellis illidi, aut malignis perturbationibus concuti: quatenus post hoc vitæ præsentis, imperium cœlestis adipisci et in æternum cum Domino retinere valeatis. Nunc itaque pro tanta devotione animique vestri sinceritate, quam non solum verbis, sed lucifluis etiam operibus circa Ecclesiam sancti Petri et nostram paternitatem ostendistis, immensas post Deum serenitati vestræ gratias agimus. Primo quidem quod dromones vestros, qui pro defensione terræ sancti Petri in nostro manerent servitio, nobis misistis. Secundo autem quod monasterium sancti Sergii intra vestram regiam urbem constitutum, quod sancta Romana Ecclesia jure proprio quondam retinui, divina inspiratione repleti, pro honore principis apostolorum nostro præsulatui reddidistis. Tertio vero vobis grates multas referimus quia Bulgarorum diœcesin pro

A amore nostro gratanti animo sancto Petro, ut justum erat, permiseritis habere. Unde obnixè petimus ut vestro potenti solatio sanctam Romanam Ecclesiam in hoc periculoso tempore in omnibus adjuvare defendereque non dedignemini, quatenus ex hoc vestra imperialis gloria, apostolicis suffragantibus meritis, per cunctas mundi partes magis ac magis accrescat, et apud omnipotentem Dominum dignam retributionem percipiat. Et iterum humiliter petimus ut in hujus bonæ voluntatis ac pietatis affectu, quem pro amore Dei circa Ecclesiam Christi habetis, immobiles permaneat, quoniam nos Augustalem excellentiam vestram ulnis extensis amore paterno amplectimur, et honore debito veneramus, atque assiduis orationibus nostris, juxta sacrosancta beatorum apostolorum Petri ac Pauli corpora fuisis, omnipotenti Domino commendare studemus, ut pro tantis beneficiis quæ sancto Petro impenditis, ipse vobis et in hoc præsentis sæculo vestrum sanctum imperium cum omni prosperitate magis ac magis conservet incolume, clarisque semper dignetur ubique decorare triumphis; et in cœlestis postmodum regione sempiternam gloriam et beatitudinem cum sanctis et electis suis habere concedat. Nam et ea quæ pro causa restitutionis reverendissimi Photii patriarchæ synodali decreto Constantinopoli misericorditer acta sunt, recipimus: ^a Et si fortasse nostri legati in eadem synodo contra apostolicam præceptionem egerint, nos nec recipimus nec judicamus alicujus existere firmitatis. Data Idibus Augusti, indictione XIII.

CCXCVII.

AD PHOTIUM (ut videtur).

(Anno 880.)

Gratulatur de concordia Ecclesiæ Constantinopolitanæ: miratur multa, quæ statuerat, mutata esse; approbat quæ Constantinopoli in concilio pro causa Photii acta sunt, si tamen legati contra sua mandata non egerint.

Hoc nostri semper certaminis et laboris fuit, hoc nostri voti existit, ut pro orthodoxæ fidei integritate, seu pro statu et pace omnium Dei Ecclesiarum, quarum cura constringimur, adeo operam demus, quatenus dispersa congregentur, congregata conserventur, et ut quidquid inhonestum vel aliter quam se rectitudo habet per providentiam Dei, sanctorum apostolorum meritis suffragantibus, corrigatur, omnino conamine, juxta officium nobis commissum, speculando satagimus. Hujus rei gratia more apostolico sanctæ Constantinopolitanæ Ecclesiæ misereri volentes, decrevimus ut unius incrementum nullius fieret detrimentum, quin potius omnium manifestum existeret adjutorium. Convocata nostra Ecclesia, quantum ad præsens tempus coegit necessitas, auctoritate et potestate apostolica dictæ Constantinopolitanæ Ecclesiæ consulimus, et legatis nostris directis, ut inoffenso pede incederent, instituimus.

^a Et si fortasse nostri legati. Hanc synodum pseudooc-tavam a Joanne VIII cæterisque ejus successoribus ponti-

ficibus, et a concilio Florentino reprobata fuisse, præter alia, indicant ista verba. SEV. BIX.

De cujus scilicet unitate pacis sive concordia gratulamur, et cunctipotentem Domino laudes innumeras referentes, licet ei qui tanta bona servis suis largitur, condignas grates agere non possimus, hunc benedicimus et assiduus vocibus glorificare studemus. Gloria namque sit illi, et omnis laus ac virtus, ejus majestate et semper perlaudabili gratia certata [f. curvata] ad rectitudinem reducuntur, prava diriguntur; contumacia retunditur, humilitas exaltatur, zizania quandoque velluntur, scandala amputantur, et omnis bonitas augmentatur: unde non in nobis, sed in eodem Domino gloriemur, jucundemur et exsultemus in misericordia ejus qui dicit: *Confidite, quia ego vici mundum* (Joan. xvi); et in alio loco: *Sine me, inquit, nihil potestis facere* (Joan. xv); sed cum nos scriptis et verbis misericorditer tecum specialiter agendum esse deereverimus, mirandum valde est cur multa quæ nos statueramus, aut aliter habita aut mutata esse noscantur, et, nescimus ejus studio vel neglectu, variata monstrantur. Cæterum scribens subintulisti quod, te innuens, non nisi ab iniqua gerentibus misericordia sit quærenda; quod et nos de his qui Deum se scire non fantur, licet dispensatorie fatemur, tamen nos quod lectum est exaggerare nolumus, ne quod dignum est judicare cogamur; ideoque talis excusatio sileat, ne hoc dicentes illa sententia tangat qua dicitur: *Vcs estis qui justificatis vos coram hominibus; Deus autem novit corda vestra, quia quod hominibus altum est, abominabile est apud Deum* (Luc. xvi); igitur laudabilis tua prudentia, quæ dicitur humilitatem scire, non moleste ferat quod ab Ecclesia Dei miserationem jussa est postulare; quin potius se, ut exaltetur, humiliet, et fraternum discat erga sui miserentem servare affectum. Quia nos, si tu debitam devotionem et fidelitatis incrementa erga sanctam Romanam Ecclesiam et nostram parvitatem observare studueris, et ut fratrem amplectemur et ut charissimum proximum retinebimus. Nam et ea quæ pro causa tuæ restitutionis synodali decreto Constantinopoli misericorditer acta sunt, recipimus. Et si fortasse nostri legati in eadem synodo contra apostolicam præceptionem egerunt, nos nec recipimus nec judicamus alicujus existere firmitatis.

CCXCVIII.

AD CAROLUM REGEM.

(Anno 880.)

Gratias agit de ejus erga sedem apostolicam observantia; suam erga eum benevolentiam testatur: adventum ejus pro Ecclesiæ necessitatibus expectat, monetque ut aliquem legatum mittat. Queritur de Georgio quodam excommunicato, qui, ipsius imperatoris auctoritate fultus, bona Romanæ Ecclesiæ invaserat; rogat ut promissa auxilia mittat.

Excellentissimo et dilecto filio CAROLO glorioso regi.

Relegentes regalis excellentiæ vestræ litteras, devotionem vestram quam circa sanctam Ecclesiam matrem vestram et circa nostrum pontificium ha-

betis, luce clarius novimus, unde multiplices gloriæ vestræ gratias referimus. Nam et nos vos semper quasi dilectum et spiritalem filium retinemus, et pio mentis affectu desideramus amplecti, et pro augenda gloria vestra assidue solliciti incunctanter existimus. Quod autem nobis mandastis, ut vestrum optatum præstolaremur adventum, pro eorum adversitatibus emendandis qui nobis contraria inferre et qui a nostra ditione homines nostros subtrahere præsumunt, nos quidem vestrum adventum toto desiderio pro tantis Ecclesiæ Dei necessitatibus, quæ ad augmentum gloriæ vestræ sunt emendandæ, omnimodo optamus inspicere. Sed sicut vobis nostris jam pridem apostolicis litteris suggessimus, ut vestrum idoneum missum nobis direxissetis, cum quo aliquid ecclesiasticis utilitatibus potuissemus perficere, pro qua causa non eum miseritis, miramur. Quamobrem petimus ut eundem missum, antequam veniatis, nobis dirigere non omittatis, ut cum, Deo auxiliante, veneritis, nobis simul convenientibus, vera inter nos dilectio, utpote inter spiritalem Patrem et charissimum filium possit existere. Præterea postquam Georgius excommunicatus et anathematizatus cum homine Widonis est a vobis reversus, assiduo sumus mœrore turbati; eo quod audacter veniens, quasi vestra fultus auctoritate, in proprietates olim suas, quæ ad jus sanctæ Romanæ Ecclesiæ, (Carolo divæ memoriæ imperatore patruo vestro concedente), conlegaliter pervenerunt (et nunc usque juri nostro defendebamus et tenebamus), temere pariter cum aliis introivit; et nostros, qui in circuitu homines existunt, affligere, et deprædari non cessat. Unde obnixè rogamus vestram magnitudinem, ut sicut nobis ore proprio promisistis, et per epistolam vestram, atque legatos nostros, Liutwardo venerabili sanctæ Vercellensis Ecclesiæ episcopo mediatore existente, mandastis, præsentialiter nobis adimplere satagatis: quia nos ea, quæ vobis promisimus, omnimodis adimplebimus, aut eosdem infideles nostros procul a nobis expellatis, ut nulla nobis adversa, vel contraria valeant aliquatenus moliri, quousque, Deo propitio, vos veneritis. Quarto Idus Septembris, indict. decima quarta.

CCXCIX.

AD ROMANUM ARCHIEPISCOPUM RAVENNATEM.

(Anno 880.)

Jubet eum Romam ad synodum causa dissolvendi quasdam quæstiones advenire.

D ROMANO archiepiscopo Ravennati.

Quia bellica, imo Saracena impediende angustia, juxta sacros canones, quarto scilicet Idus Octobris, synodum sicut volueramus celebrare nequivimus, opportune valdeque necessario sane prævidimus ut hanc eandem vIdus Novembris istius quartæ decimæ indictionis, adjuvante Domino, convocemus. Quapropter sanctimoniam tuam hortamur ut ad idem tempus sine omni mora, imo omni occasione postposita, Romanam occurras, quatenus ea quæ ad honorem sive utilitatem sanctæ Dei Ecclesiæ pertinent, nobiscum ordines et diffinias, et sancti Spiritus gratia revelante,

voto communi decernas. Interea negotium viri illustris A Deusedit gloriosi ducis, qui nostrum pontificium adiit, dicens se a tua solertia pro conjugio suæ uxoris, quam illius consanguineam fateris existere, communionem privatum, est procul dubio ventilandum, ut quidquid rei veritas hinc demonstraverit, omnimodis exsequamur. Qui pro eo quod tam diu apud nos est immoratus, et de tua parte, qui rationem redderet, non est inventus, rationabiliter erat a nobis interim absolvendus : tamen quia in proximo, sicut diximus, synodum (qua hoc cum unanimitate aliorum consacerdotum fratrumque nostrorum et tua est inter alia pertractandum) celebrare debemus, dignius iudicavimus, quod et ipsæ res expetunt tuum præstolari adventum, ut hoc synodali discutiamus collegio, et alterna visione congratulantes, pari sententia decernamus : in qua etiam quidquid supra generum suum habueris, similiter diffiniri iubeamus. Præterea jam dicti viri cunjux, Maria nomine, libellum suæ reclamationis per Paulum legatum suum nostro præsulatui dirigere procuravit, asserens tuam sanctitatem in nuptiis per consensum patris de ea habitis, consciam exstitisse ; et tam virum suum quam se, postquam una caro effecti sunt, tam ad spiritalem, sive Dominicam, quam etiam ad communiorem mensam, sæpe non solum admisisse, sed etiam invitasse. Sed et hoc per eundem suum libellum reclamando innouit quod Majoranus, qui et Maginpertus diaconus dicitur, in necem sui patris consenserit, petens a nobis ex hoc convenientem justitiam, et obnixè postulans hoc indiscussum non derelinqui, quem videlicet sæpissime Bononiensis episcopus suæ Ecclesiæ famulum quæere studuit. Hujus rei gratia, præcipimus ipsum diaconum tecum nobis omnimodis exhiberi, ut quidquid rationis ordo poposcerit, adjuvante Domino, canonice ventilemus et synodice statuamus. Data III Kalendas Octobris, indictione decima quarta.

CCC.

AD UNIVERSOS EPISCOPOS.

(Anno 880.)

Ut Romam ad synodum adveniant.

Omnibus episcopis per ducatum Spoletanum et Cameriensem, et ad omnes episcopos per diversas provincias constitutos.

Nolumus ignorare vestram fraternitatem quia pro multiplicibus sanctæ Dei Ecclesiæ necessitatibus, VI Idus Novembris istius quartæ decimæ indictionis synodalem conventum, Domino adjuvante, celebraturi sumus ; et cum diversis, præcipue Saracenorum, impedimentis implicati essemus, nequivimus eum suo tempore congregare, dignum duximus ad augmentandas atque perficiendas ecclesiasticas utilitates, vel præfato tempore non prætermitti, quominus tanta necessitas sine consultu aliorum confratrum nostrorum indiscussa non remaneret, ut vestris salubribus consiliis fulti, quidquid ad honorem Dei et communem utilitatem pertinet, communiter per-

ficere satageremus. Quapropter hujus nostræ communionis sanctitatem vestram exhortamur apicibus, ut, solita desidia deposita, ad eandem synodum Romam venire non differatis, quatenus, sicut diximus, ea quæ agenda sunt, Christo juvante, communiter peragamus, et quæ juxta nostri ministerii officia statuenda sunt, salubriter statuamus. Videte itaque ne solito negligenter agatis, ne si per vos ea quæ honori et statui sanctæ Dei Ecclesiæ sunt proficua, inordinata remanserint, et, quod non oportet, venire contempseritis, canonicis icibus non immerito feriamini. Data pridie Kalendas Octobris, indictione XIV.

CCCI.

AD CAROLUM REGEM.

(Anno 880.)

Lætatur de ejus incolumitate, Deumque orat ut omnia ei prospere eveniant : nuntiat Saracenos a Græcis victos, sequè Saracenis, et aliis etiam valde premi : quare petit ut sibi quam citissime auxilio veniat.

CAROLO glorioso regi.

Susceptis gloriæ vestræ, spiritalis atque desiderabilis filii nobis directis apicibus, atque relictis, quia vos, Deo gratias, sanitate vigere cognovimus, ineffabilem ultra quam dici possit jucunditate reffecti, in Domino gratulati sumus : et ut magis ac magis vobis Dominus Deus noster prosperitatem tribuat, triumphum de adversantibus concedat, et felicia tempora ad regnum pacifice atque justissime disponendum multiplicet, continuis votis eundem Dominum deprecamur. Quia nihil est omnino, filii charissime, nobis dulcius nihilque amabilius, quam ut vos semper ad defensionem et exaltationem sanctæ matris vestræ Romanæ Ecclesiæ cognoscamus esse promptissimos, et et eis qui eam diversis modis impugnant, libera correctionis ac disciplinæ sententia contraire. Nos autem, licet in innumeris infirmitatibus atque augustiis constituti, Deo grâtiâ, utcunque valeamus ; sed tunc potius nostra sanitas erit, si vos omni prosperitate, ut diximus, pollere cognoverimus, et ad nobis conferendum solatium festinanter occurrere, ut alterna visione loquamur, non pati moras advertimus. Cæterum, quod dicitis ut Liutwardum venerabilem episcopum communem fidelem nostrum ad nos præmittatis, valde in Domino gratulamur ; et cum eum pro communi utilitate semper desudare cognoverimus, magnum nobis gaudium in adventu illius nascetur, eo quod in ipsius præsentia vestram intuebimur excellentiam. Postremo, filii charissime, quod sciscitamine de Græcis, atque Ismaelitis, et cæteris quibusque exteris nationibus, vel concivibus, qualiter res agatur, brevissime respondemus. Sed ut hæc omnia ex intimo corde atque dolenter advertatis, omni mentis conamine exhortamur : tamen Deo sint grates et laudes quia Græcorum navigia in mari Israelitarum victoriosissime straverunt phalanges, et eos, prout Dominus voluit, debellati sunt. Sed nos tamen tam ipsi jam dicti Ismaelitæ quam alii concives no-

stri impugnant ac persequuntur, ut extra muros Urbis nullatenus vel qui labore manuum suarum vivere valeant, vel qui, ut ita dixerim, Christianitatem suam, sicut decet, observent, egredi libere possint : ac per hoc, imo pro his omnibus, si citissime et, omnibus occasionibus omnibusque excusationibus postpositis et contemptis, ad omne nobis et huic regioni valde afflictæ conferendum solatium non veneritis, procul dubio scire potestis quia ad peccatum vestrum et damnum omnium hæc terra peribit. Unde pro Deo festinanter iter ad nos veniendi assumite, et ut bella Domini vice illius præliemini, ad beatorum apostolorum limina, Deo præduce, pro Christianorum omnium auxilio properate. Data III Kalendas Novembris, indictione XIV.

CCCII.

A D E U M D E M.

(Anno 880.)

Deusdedit Ravennatem injuste excommunicatum absolvit; confirmat illius cum Maria uxore conjugium: jubet eum defendi.

Reverendissimo et sanctissimo ROMANO archiepiscopo Ravennati pro causa Deusdedit Ravennatis, et Leoni venerabili episcopo misso et apocrisario summæ sedis nostræ apostolicæ, necnon quibusvis missis imperatoris et omnibus iudicibus, et populis Romani territorii constitutis, cunctisque fidelibus sanctæ Ecclesiæ, præsentibus scilicet atque futuris.

Omnium reverentiam omniumque industriam scire hortamur quod Ravennas Romanus archiepiscopus, et ore, cum Ravennæ fueramus, dixerit, et scriptis transmiserit, quod nonnulla incesta conjugia in sua parochia fuissent, et quotidie fierent. Deinde per suum legatum, Dominicum videlicet presbyterum, ut ipsi triginta et duo essent, dicendo significavit, suggerens ut nostra auctoritate ipsi eos liceret canonice omnes judicare. Qui omnibus dimissis, quos etiam nominatim dixerat, et sola inductus invidia, ut remur, et postea in sancta patuit synodo, Deusdedit fidelem nostrum (qui, dum Ravennæ fuimus, ipse penes nos quotidie fuit, et coram me, et ipso archiepiscopo causas, ut debuerat, judicavit), postquam sedem apostolicam appellavit, excommunicare non formidavit. Ipse Deusdedit vero dux pro nostra fidelitate his obedit, et ad apostolicam præsentiam venire modis omnibus festinavit. Nos suam causam audientes, et qui eum accusare non debuerant, ex parte archiepiscopi non inventientes, poteramus ipsum absolvere; sed nolimus, usquequo archiepiscopo misissemus, imo cui misimus, dicentes: ut ipse archiepiscopus pro statutis sanctorum Dei Ecclesiarum, VI Idus Novembris ad synodum celebrandam veniret, deferens secum accusatores et testes, quatenus his delatis negotium Deusdedit inter alia canonice finissemus. Qui pro se sui cardinis Dominicum presbyterum, et Joannem diaconum misit, transmittens cum illis scriptas accusationes: quibus scriptis coram sancta synodo lectis, ad ea Deusdedit respondit, et se incestum atque

A nefarium commisisse negavit; sed coram omnibus se innocentem ostendit, et divini mundanique juris auctoritate se conjugatum probavit. Quapropter una cum sancta synodo illum absolvimus, et eum communioni nostræ recepimus, et Mariam conjugem suam illi uxorem esse legitimam firmavimus cum benedictione Dei omnipotentis et nostra; et si præfatus archiepiscopus, aut ministri ejus, in rebus suis suorumque hominum invasionem et fortiam facere voluerit, vos Ravennates pro ipso illum in suis defendite. Data ut supra, indictione decima quarta.

CCCIII.

AD ANSPERTUM ARCHIEPISCOPIUM MEDIOLANENSEM.

(Anno 880.)

B Inobedientiæ eum arguit, præcipitque ut Rhodoaldum et Warlenum monachos, quos injuste in carcerem conjecerat, ad eorum monasterium honorifice remittat.

ANSPERTO archiepiscopo Mediolanensi.

Decuerat te, frater charissime, pura animi sinceritate eam reverentiam eumque honorem sanctæ sedi apostolicæ, cui Deo auctore præsidemus, quotidie impendere, quæ usque ad tua tempora omnes tui prædecessores laudabiliter viventes, huic Ecclesiæ obtulerunt prona mentis devotione. Pro qua re ejus gremio suscepti, quidam præ nonnullis amore dilecti sunt; sed ecce, quod sine dolore dici non potest, nescio qua antiqui hostis fraude, a die ordinationis tuæ, et tempore senectutis, contra sanctam Romanam Ecclesiam matrem tuam non destitisti

C nunc inobediens, nunc dolosus te patefacere: qua necessitate compulsi, te corripere apostolico flagello operæ pretium duximus; sed iterum paterna miseratione te ad nos reducere non prætermisimus, sperantes in te de reliquo nullum vestigium circa nos culpæ aliquo modo reperire, quia et professio tua hoc coram nobis jurejurando sponderat. En, bone vir, aliquid deterius committere non formidasti, cum quosdam monachos nostros nomine Rhodoaldum, et Warlenum, Roma ad sum monasterium Pultariense iter carpentes, comprehensos jussis diu sub custodiæ vinculis reservari. Quod quanti piaculi sit sano intellectu ipse perpende, quantumque dedecus sedis apostolicæ, quæ Christo auctore, etiam in barbaras nationes libera semper visa est

D fungi legatione: quod nefas malum sibi omni celebritate emendare hortamur, et prædictos Dei famulos cum omnibus suis illæsos abire patiaris ad locum, miserante Deo, suæ habitationis. Et sicut tuo consilio pro certo eos cognovimus esse innocenter custodiæ mancipatos, ita, te faciente, sciamus eosdem funditus et cum competenti honore dimissos. Data mense Novembris, indictione XIV.

CCCIV.

AD SALOMONEM PROCURATOREM PAPA.

(Anno 880.)

Ejusdem argumenti.

SALOMONI procuratori Papæ.

Apostolica tibi auctoritate præcipimus ut monachos nostros, id est Rhodoaldum et Warlenum, quos, spreto Dei timore, a liminibus sanctorum apostolorum ad suum monasterium revertentes, et simpliciter per viam gradientes, comprehendere ausus fuisti et in custodia retinere, sine omni mora et dilatione dimittas cum omnibus suis reverti ad suum monasterium sanos atque illæsos. Quia tantum scelus et injuriam pro hac re in sedem apostolicam commisisti, pro quibus juste carere debueras consortio omnis Christianitatis : et fatemur, si hoc continuo non emendaveris, a perceptione corporis et sanguinis Domini nostri Jesu Christi et introitu ecclesiæ te prohibebimus. Data mense Novembri, indictione decima quarta.

CCC.V.

AD ADELBERTUM MARCHIONEM.

(Anno 880.)

Ab excommunicatione eum absolvit, ejusque homines, si spatio quindecim dierum intra mensem Martium Ecclesiæ satisfecerint.

ADELBERTO marchioni.

Te vero quia conversum et fidelem circa sanctam Romanam Ecclesiam et nos cognovimus, absque tenore ab omni excommunicatione absolvimus; hominibus tuis sub eo tenore sacram reddimus communionem, ut omnem emendationem, sicut promissum est, facere ad quindecim dies intra mensem Martium omnino accelerent. Quod si hoc facere neglexerint, omnes sub eadem excommunicatione permaneant, donec iterum de perpetratis malis plenam faciant satisfactionem. Data ut supra, indictione XIV.

CCCVI.

AD OTERAMUM VIENNENSEM EPISCOPUM.

(Anno 880.)

Arguit quod faveat sociis Bosonis, idque a se imperari asserat; præcipit ut Romam accedat ut crimina quæ ipsi obijciuntur diluat.

OTERAMO^a Viennensi episcopo.

Inter eximios nunc usque Christi Dei nostri sacerdotes te habere tenereque omnino volumus; sed quia ecclesiasticæ paci et utilitati contraria agere audimus, valde miramur, nihilominus et turbati existimus, eo quod, sicut fidelium relatu comperimus, his qui cum Bosone præsumptore et regni perturbatore tyrannidem exercere non cessant, ausu temerario favere eorumque malis operibus communicare præsumas, et in superbiam eorum sequax existens, falsa opinione sanctam nostram Romanam Ecclesiam infamare non dubitas, quod ad talia peragendum ipsius auctoritatem habere te certifies; quod quam evidenter ostendere non poteris, pro qua scilicet Romana Ecclesia te murum opponere omnibus iniqua agentibus debueras. Pro quibus nimirum tot malis tantisque præsumptionibus, tibi ex auctoritate Dei, et sanctorum apostolorum ac nostra,

A præcipimus ut de præsentibus Romam ad limina sanctorum apostolorum nostramque præsentiam venire procures, ut de talibus te criminibus secundum auctoritatem sanctorum Patrum coram nobis et sede apostolica satisfaciendo purgare valeas, quatenus te inter fratres et consacerdotes retinere valeamus. Nam, quod non credimus, si aliter feceris, et venire distuleris, donec hanc nostram jussionem impleveris, scias te omni episcopali officio esse privandum.

CCCVII.

AD BARNIMERUM COMITEM, SACERDOTES, ETC.

(Anno 880.)

Ostendit sibi gratissimam fuisse eorum in sedem apostolicam observantiam; hortatur ad perseverantiam. Jubet legatos ad se mitti, quibus reverentibus legatum suum missurum pollicetur, cui ipsi fidelitatem juxta Ecclesiæ ritum promittant.

B Excellentissimo viro BARNIMERO glorioso comiti et dilecto filio nostro atque omnibus religiosis sacerdotibus, et honorabilibus judicibus, cunctoque populo pax et gratia a Domino Jesu Christo.

Audita per Theodosium venerabilem episcopum vestrum fide et devotione, quam circa sedem beati Petri apostoli et nostri pontificii vos habere cognoscimus, immensas Deo gratias referentes, in magno gaudio sumus repleti; qui vos nunc ad tantam gratiam perducere, et inter oves suas connumerare dignatus est, secundum quod Dominus ipsi principi apostolorum commisit, dicens : *Si diligis me, Simon Petre, pasce oves meas (Joan. XXI)*. Unde vestram fidelitatem, et Christianissimam devotionem, his nostris apostolicis litteris admonemus et exhortamur, ut sicut divina inspiratione agere cœpistis; usque ad finem perficere et observare non prætermittatis, quatenus qui sub ala et regimine atque defensione beati Petri apostoli et nostra toto conamine vos subdere, atque in ejus servitio perseverare, quasi dilecti filii procurastis, apertius hoc ostendatis atque impleatis, ut Dominus in Evangelio dicit : *Sic luceat lux vestra coram hominibus, ut videant bona opera vestra, et glorificent Patrem vestrum qui in cælis est (Matth. v)*. Et ut ita hoc per orbem terrarum vestræ sponsonis diffametur, ut auxiliante Domino, et sanctorum apostolorum suffragantibus meritis, ea quæ salutis et utilitati omnium vestrum proficua sunt, possimus ad honorem et exaltationem sanctæ sedis apostolicæ incunctanter perficere, sicut nomine vestro scripta nobis mandastis, ita in libro cœlesti scripta permaneant. Quapropter mandamus ut revertente ad vos dilecto episcopo vestro, idoneos legatos vestros præsentialiter ad nos dirigere non prætermittatis, qui pro parte omnium vestrum nos et sedem apostolicam consulant de his quæ mandastis, ut et nos cum illis missum nostrum dirigamus ad vos, quibus secundum morem et consuetudinem Ecclesiæ nostræ universus populus vester fidelitatem promittat. Interim monemus ut constantes perma-

^a Otranno, qui sæpe postea occurrit.

neatis, quoniam scriptum est : *Melius est votum non vovere, quam post votum promissa non implere* (Eccli. v). Spiritus Domini, qui orbem terræ replevit, repleat vestrum cor omni pace et gaudio in Christo Jesu Domino nostro.

CCCVIII.

AD MICHAELM REGEM BULGARORUM.

(Anno 880.)

Miratur quod legatos non miserit, quemadmodum jam diu promiserat; monet ut id quamplurimum faciat.

Dilecto ac spiritali filio MICHAELI glorioso regi Bulgarum; gratia vobis, et pax a Deo Patre et Domino Jesu Christo.

Miramur quod tanto jam tempore transacto, missos vestros ad sanctam Romanam Ecclesiam matrem vestram et ad nos non transmisistis. Modo vero, sicut nobis retulit Theodosius venerabilis episcopus, missos tuos cum eo dirigere promiseras, sed pro qua causa eos dirigere prætermiseris, ignoramus. Unde vos jam recognoscere oportebat, etiam ad pastorem et pontificem animarum vestrarum reverti tota devotione debueratis; unde his nostris apostolicis litteris vos quasi charissimos filios admonemus et exhortamur, ut de præsentī vestros idoneos missos nobis transmittere non dubitetis, quatenus ab uberibus matris vestræ sanctæ videlicet Romanæ Ecclesiæ satiēmini omnique bono repleamini. Quia nos more paterno ulnis extensis vos amplecti, et quasi oves Christi nobis commissas alere et salvare parati existimus, secundum quod Dominus dicit beato Petro : *Pasce oves meas*; quidquid enim vobis dirigimus, credere omnino potestis, quia pro salute vestra semper agere ac perficere incunctanter cupimus. Optamus vos in Christo nunc et semper bene valere.

CCCIX.

AD QUEMDAM (f. CAROLUM CRASSUM REGEM).

(Anno 881.)

Monet ut perficiat quæ per legatos mandavit.

Susceptis litteris gloriæ vestræ, quibus vos plena intentione monstratis ad limina apostolorum festine, imo potius præcipiti gressu et velle conflare; quapropter attoniti, vel magis stupefacti miramur decentiam vestram terminos Patrum transcendere, et lineam generis vestri superbo spiritu conculcare, et in deterius, non in melius prorsus convenire. Et ecce dolenter cum Apostolo compellor dicere : *In novissimis temporibus instabunt tempora periculosa, in quibus erunt homines semetipsos amantes, et quærentes quæ sua sunt, non quæ Jesu Christi* (1 Tim. III). Sed nos te, fili charissime, in viscere Christi plurimum diligentes, ad ea te provocare gestimus quæ animæ vestræ proficiant ad salutem. Legatos sane e latere nostro plene instructos direximus, quibus omnia ad purum credere non ambigatis in his quæ verbotenus et scriptis capitulariter dedimus in mandatis. Qua de re paterno affectu monemus ut omnia sicut vobis direximus per eosdem legatos, adimplere omnino curetis. Ideoque scitote quoniam si pleno jure cuncta quæ destinavimus non adimple-

veritis, nos enimvero quantum in nobis est, zelo Dei succensi ea quæ ad honorem sanctæ Romanæ Ecclesiæ pertinent exaggerare penitus satagemus : a quibus vos nulla ferocitas, nulla malorum hominum comminatio donec spiritus reget artus, poterit sequestrare. Quod jussionem nostri pontificii ingenti præsumptione absurdam posuisti, omnimodis temetipsum proprio jæculo reverberasti, et velut aspis surda salutī tuæ congruentibus aurem non accommodasti. Sed quid plura? Iterum atque iterum inhibendo apostolica auctoritate præcipimus, terminum S. Petri ad ingrediendum animum vestrum non incitetis, quousque prædicti legati nostri ad nos revertantur, omnia nobis renuntiaturi, itemque alios ad nos transmittere cures. Data octavo Kalendas Februarii, indictione XIV.

CCCX.

AD ANSPERTUM MEDIOLANENSEM ARCHIEPISCOPUM.

(Anno 881.)

Confirmat Josephi episcopi Astensis ordinationem, qui alias contra canones Vercellensis Ecclesiæ fuerat episcopus constitutus.

ANSPERTO Mediolanensi archiepiscopo.

Consultationis tuæ qua nos super Joseph, nuper in Vercellensi Ecclesia ordinati, nova nunc electione vel ordinatione in Ecclesia Astensi, consulere voluisti, perspectis suggestionibus, quibus super hoc nostræ auctoritatis consultum requiris, canonicum judicavimus, et nostris tibi decretis convenienter, propitia Divinitate, respondimus. Fuerat autem de illo primum, ut ipse mecum advertis, quoddam irregulariter institutum; sed nos apud B. Petrum apostolum cum sancta synodo residentes, salubri potiti consilio, et animositatem illius correximus et misericordiæ fomenta, gratia Sancti Spiritus revelante, protinus adhibuimus, scilicet ut, eo in pristinum ordinem reducto, si alium episcopatum ei concedere voluisses, et cleri vel populi vota hunc sibi concorditer in episcopum expeterent, et eligeretur, et sicut qui nihil ab ordinatore prius acceperit, in episcopum crearetur. Interea accidit ut, Astensis Ecclesiæ rectore proprio obeunte, permissu Caroli gloriosi regis idem Joseph, post electionem cleri et expetitionem populi in eadem ecclesia deberet ordinari episcopus, tua fraternitas, tam nostra absolute quam etiam ipsius regis exhortata monitionibus, hoc libenter admisit et canonice jussa complere conata est. Quod quia nunc sententiam nostram tu quoque secutus, et regalem permissionem devote, sicut condecet, es amplexatus, præfatum Joseph presbyterum sanctæ Ecclesiæ Astensi episcopum præfecisti, et ordinationem illius ratam haberi decernimus, et omnium ora contra hoc quoquo modo mussitantia apostolica auctoritate obstruimus : quia sicut de irregulariter quibuslibet habitis nos ad hæc corrigenda zelus justitiæ excitat, ita de bonorum virorum laudabilibus factis gratia divina lætificat. Nam et sedes apostolica, juxta quod S. Leo papa scribit, hanc temperantiam servat, ut et severius

agat cum obduratis et veniam cupiat præstare correctis : et ideo his omissis, de prælibati Joseph iterata creatione sanctitas tua in nullo penitus hæsitet, quia hanc et nos approbatam admittimus et ab omnibus admittendam esse mandamus : quia quod non ostenditur factum per impositionem manus illius, cui tempore suæ legationis, quod dare visus est, ut ita dixerim, non habuit, ratio non sinit ut videatur iteratum. Data xv Kalendas Martii, indicatione xiv.

CCCXI.

AD ATTONIUM.

(Anno 881.)

Excommunicat eum, nisi Ecclesiæ Mediolanensi bona quæ abstulerat restituat, et ad obedientiam sui archiepiscopi cum sociis redeat.

ATTONIO excommunicato.

Missæ præsulatui nostro ab Ansperto sanctæ Mediolanensis Ecclesiæ archiepiscopo relatione atque suggestione, didicimus te multa per horrendæ temeritatis impudentiam sive audaciam egisse illicita, et in contemptum beati Ambrosii atque ipsius antistitis contrarietatem, in locis et rebus ei pertinentibus mala et quæcunque poteras enormiter una cum filiis tuis commisisse adversa. A quorum scilicet perpetratione assidua te quasi ovem gregis Dominici, multis jam vicibus arguendo, obsecrando et increpando convenire atque remove curavit, ne antiqui hostis callida persuasione semel deceptum in profundum mortis barathrum lapsum jacere omitteret. Sed quia te sanctæ admonitionis verbis salubribus humili prorsus devotione non obedire, neque aurem cordis, velut aspidem surdam, inclinare vel acquiescere nolle aspiciens, post tot correptiones una cum venerabilium coepiscoporum cætu a sacrosancti corporis et sanguinis Domini, secundum institutionis paternæ censuram, communione separavit et ab Ecclesiæ Dei societate merito removit; et adhuc in eadem sorde iniquitatis fetidum et vulneratum te dolet jacere, cordeque impœnitenti nolle ad te percutientem reverti aspiciens, clamat ut per salutis medicamenta animi tui valeat vulnera male inflata sanare. Unde et nos pastoralis sollicitudine, atque confratris nostri archiepiscopi hoc præsentî dilectione commoti, auctoritatis nostræ statuto jubemus ut, tanta perversitate et cordis duritia jam procul abjecta, quoniam hactenus, Dei timore postposito, multos tuæ iniquitatis lepra coinquinasti, et tantorum malorum auctor esse non dubitasti, præcipimus te cum omni celeritate reverti ad veram præfati pontificis tui satisfactionem eum filiis et tuis omnibus complicitibus, quorum incentor adhuc malorum post tantas correptiones esse non timuisti, et ejus salubribus monitis subditus et subjectus existas, omnibus tamen Ecclesiæ deprædationibus in integrum restitutus, et secundum ipsius Ecclesiæ privilegium emendatis atque solutis. Quod si post hujus nostræ præceptionis relectam epistolam in tuainiqua obstinatione perdurans, ut dictum est, ad præfatum

A pontificem tuum redire satisfaciendo contempseris, ex auctoritate Dei Patris, et Filii, ac Spiritus sancti virtute, beatorumque apostolorum Petri ac Pauli, et omnium sanctorum Patrum, nostraque apostolica sanctione, secundum jam dicti dilecti confratris nostri archiepiscopi et episcoporum sententiam jam olim in te prolatam, jubemus te cum filiis et complicitibus tuis omni ecclesiastica esse communione privatum, et a cœtu atque societate omnium Christianissimorum, utpote tantorum malorum perpetratores inconvertibiles, seclusos et damnatos existere; quousque omnia, quæ perperam gessistis, emendando, canoniceque satisfaciendo, veniam condignam percipere mereamini. Data xv Kalendas Martii, indicatione xiv.

B

CCCXII.

AD ANSELMUM MEDIOLANENSEM ARCHIDIACONUM.

(Anno 881.)

Minatur illi excommunicationis pœnam, nisi ad sui archiepiscopi obedientiam redeat.

ANSELMO archidiacono Mediolanensi.

Missæ præsulatui nostro suggestione, Anspertus sanctæ Mediolanensis Ecclesiæ reverendissimus archiepiscopus, cujus minister esse videris, super te questus est quod inter cæteras perturbationis molestias a te sibi temere illatas, et post rerum suarum damna non modica, non propria derelicta Ecclesia, ab ejus te obsequio et consortio separare, et velut schismaticus per alienas parochias contra canonica statuta commorari præsumpseris, necnon et apud principalem potentiam properando, noxias illi præparare insidias callida persuasione decretas. Unde his nostris apostolicis litteris dilectionem tuam paterno affectu convenimus, nihilominus et cum omni jubemus imperio, ut de præsentî ad sinum et gremium sanctæ Mediolanensis Ecclesiæ matris tuæ, quam furibundo animo reliquisti, valde devotus redire festines, atque sub proprii pastoris regimine vel præsentia esse omni mentis alacritate decertes, et, utpote idoneus minister, humili prorsus devotione debitum, juxta ordinis tui locum, reverenter impendas obsequium et obedientiæ famulatum, quatenus, ejus gratia potius, omnipotenti Domino de officii tui assiduitate semper placere valeas. Quod si aliter contra præcipuas et non violandas sanctorum Patrum institutiones, atque contra hanc nostram saluberrimam jussionem agere præsumpseris, et ad tuam Ecclesiam tuumque pastorem, sicut regula ecclesiastica docet, redire contempseris, scias te Dei omnipotentis virtute et beati Petri apostolorum principis nostraque auctoritate, atque canonico Patrum judicio, fore omni ecclesiastica communione privatum, quousque, ut prædictum est, ad tuam Ecclesiam redire tuoque pastori humilitatis colla subdere omnino studueris, quoniam ferro necesse est ut abscondantur vulnera quæ ut illis manum adhibueris fomentorum non senserint medicinam.

C

D

CCCXIII.

AD JOANNEM, EGILULFUM, ETC.

(Anno 881.)

Causam inter Tridentanum et Veronensem episcopos versantem eis committit; monet ut eam jure definiant, et ad se sententiam mittant; ut eam confirmare possit.

JOANNI BONONIENSI, EGILULFO MANTUANO, ET EICARDO VICENTINO, ET VIATORI FERRARIENSI EPISCOPI.

Sanctitamen vestram nolumus ignorare quoddam olim inter sanctam Veronensem Ecclesiam et Tridentanam de quibusdam rebus Asianæ villæ exortum fuisse litigium, quas Veronensi Ecclesiæ pertinuisse probavimus, sicut a legatis nostris, qui tempore illo in Italiæ partibus legationis nostræ fungebantur officio, veraci relatione comperimus: quorum et judicii diffinitionem vidimus, et eorum subscriptiones manu lectione percurremus, quo manifestius declaratur easdem res ad sanctam Veronensem Ecclesiam juste pertinuisse, et eas in perpetuum possidendas diffinitum fuisse. Sed quia sæpe contentio solet generare discordiam, nunc, sicut dicitur, Adelchisius venerabilis Tridentanus episcopus, contra diffinitionem ipsam peragens, atque contra professionem, manusque suæ subscriptionem movere præsumpsit, reverentiæ vestræ super hoc negotio vicem nostram committimus, ut ad illas partes accedentes, cum Adelardo, et eodem Adelchisio, venerabilibus episcopis, hoc litigium (licet hoc, quia cum legatis nostris deliberatum est, superfluum judicemus) rursus audientes deliberetis, et ad legitimum finem perducere modis omnibus satagatis: quo rite et secundum seriem scripturarum suarum peracto, quidquid illud fuerit, nostro apostolatu scriptis vestris volumus intimari, ut nos et libenter accipiamus, et nostra auctoritate stabilire non omitamus. Quia et primum coram apostolicis missis aliisque reverendissimis episcopis in synodo Ticinensi, et post in Tridentina ecclesia, nihilominus coram nostris legatis et aliis imperialibus iudicibus de hoc iudicatum fuit et legaliter diffinitum. Data IV Nonas Martii, indictione XIV.

CCCXIV.

AD ADELCHISIUM EPISCOPUM TRIDENTANUM.

(Anno 881.)

Arguit eum quod bona Veronensis episcopi invaserit; ejus causam quibusdam episcopis se commisisse significat: monet ut eorum acquiescat sententiæ.

ADELCHISIO EPISCOPO TRIDENTANO.

Suggestente coepiscopo nostro Adelardo Veronensi episcopo, didicimus sanctitatem tuam aliter egisse quam se canonica, imo Christiana observantia habere videtur. Quia scilicet, contempto præcedentium Patrum iudicio, cui ipse interfuisse dignosceris, res quasdam ad sanctam Veronensem Ecclesiam pertinentes invasisse diceris, et contra manus tuæ subscriptionem te egisse quodammodo suspicaris; in quarum rerum diffinitione, si sedis apostolicæ legati non interessent, speraremus adhuc posse nos

A aliorum certificari super hoc attestationibus. Sed quia hoc non esse opportunum prævidimus, Joanni Bononiensi, Egilulfo Mantuano, Eicardo Vicentino, et Viatori Ferrariensi venerabilibus episcopis, ad hoc secundum Deum providendum, et quantum ad contemptum inobedientium pertinet, rursus diffiniendum, vicem nostram super hanc quæstionem commisimus, ut in id ipsum convenientes, hoc litigium cum sanctitate tua determinent, et irreprehensibiter, Deo præ oculis habito, diffinire procurent. Quapropter fraterno te amore monemus ut in hoc ita peragas quatenus a nobis merito reprehendi non possis et canonicam sententiam non excipias: verumtamen ad locum quem prædicti venerabiles episcopi tibi significaverint, occurrere non omittas. Et de eisdem rebus Asianæ villæ respondeas, ut ex hoc jam nulla quæstio prorsus ramaneat vel renascatur. Data ut supra.

CCCXV.

AD LUDOVICUM ET CARLOMANNUM REGES.

(Anno 881.)

Rogat ut cum Carolo imperatore consentiant de revocanda et Romam mittenda Angelberga, ubi eam ita se custoditurum pollicetur, ut contra ipsos moliri nihil possit.

LUDOVICO ET CARLOMANNO REGIBUS; ET HUGONI abbati.

Nosse volumus vestram dilectionem qui spiritalem filium nostrum Carolum serenissimum imperatorem Romæ nobiscum degentem rogavimus ut spiritalem filiam nostram Angelhergam Deo devotam, quæ se sancto Petro apostolo et nobis cum suis omnibus commendaverat, quam etiam conjux illius divæ memoriæ Ludovici Augustus adhuc vivens nostræ tuitioni specialiter submiserat, ab exsulatu reduceret, et apud nos eam Romam, ubi nulla jam de illa sinistra suspicio oriri posset, pro amore Dei et Christi, clavigeri ipsius beati Petri apostoli simulque nostro dirigeret. Quod ille libenter se facturum promittens, quantum comperimus, vestrum super hoc præstolatur assensum. Et quidem nos de communi dilectione et pace sive concordia vestra gaudemus, et Deo pro hoc innumeratas grates referimus. Sed tantum de ipsius spiritalis filię nostræ recuperatione et reditu vos deprecamur, quantum, si ipsa ad nos reducta fuerit, ut nihil penitus jam vel contra eundem imperatorem, vel contra vos agere possit, nostris vos attestationibus certissimos reddimus. Ideo juncta vestra devotio cum ejusdem Augusti obedientia, absque omni protelatione, jam dictam Deo devotam feminam, quam ad limina apostolorum, a quorum confessione altarium nostro semper tuendam præsidio suscepimus, pro amore Dei et nostro remittere, quantum in vobis est non omitatis. Quia si hic apud nos rediens habitaverit, tanta custodia circumspecta, nobis credite, erit, ut nec Bosoni, nec alio homini, ad perturbationem imperii sive regni, quodlibet adiutorium vel auxilium verbis aut scriptis præbere quouomodo valeat. Ve-

cumtamen unum est quod vobis veraciter et unde occasionem vos ad nos contemendum non possitis assumere, hoc ecce proponimus, scilicet, si eandem Angelbergam vel in modico contra imperialem aut nostram voluntatem adversi quippiam moliri aut velle manifestis cognoverimus indiciiis, præsentialiter illam reddere ac remittere imperialibus satagemus obtutibus, quatenus quæ disciplinam forte recipere, quod nec optamus, distulerit, non solum mundana vestra judicia non evadat, verum etiam nec nostram miserationem, quæ delinquentibus parcere consuevit, inveniat. Ideoque, charissimi filii, estote in hoc nostri cooperatores et adutores, et audiat nos continuo excellentia magnitudinis vestræ, ut et vos a Domino exaudiri mereamini, et per felicia tempora regni gubernacula moderantes, cum Christo regnum, quod finis nullus angustat, intercedentibus beatis apostolis, capescere valeatis. Data IV Idus Martias, indicatione XIV.

CCCXVI.

AD OMNES ARCHIEPISCOPOS, EPISCOPOS ET COMITES
ITALIÆ.
(Anno 881.)

Hortatur dent operam ut Carolus imperator Angelbergam Romam venire patiatur, quam se ita custoditurum promittit, ut nihil contra ipsum Carolum cum Bosone moliri possit; et si quid tentaverit, se eandem remissurum pollicetur.

Omnibus reverendissimis et sanctissimis archiepiscopis et episcopis hujus Italici regni, et omnibus gloriosis comitibus filii nostri imperatoris.

Si ea quæ saluti et utilitati proximorum necessaria sunt, secundum sollicitudinem et curam gregis Domini nobis ab bene regendum commissi, divinæ pietatis memores agere studemus, omnipotentem Deum in his quibus et ipsi ex humana infirmitate quotidie indigemus, habebimus omnino propitium, et in bonis omnibus procul dubio adiutorium. Igitur sanctitatem vestram nosse volumus quoniam missis et apostolatus nostri litteris, dilecti ac spiritualis filii nostri Caroli gloriosissimi imperatoris clementiam obnixè rogamus ut Angelbergam filiam nostram, quam divæ memoriæ Ludovicus rex pater imperatoris, et Ludovicus imperator vir ejus nobis Veronæ commendaverunt, ac postmodum ipsa se sancto Petro tradidit, et de ipsius altaris confessione tuendam recepimus, de loco in quo nunc esse constat, pro amore Jesu Christi Domini nostri, et pro sanctorum apostolorum Petri ac Pauli reverentia, nostraque paterna dilectione præsentialiter reduci, et ad nos eam dirigere jubeat. Unde vos fratres et comministros nostros pio mentis convenimus atque hortamur affectu, quatenus in hujus feminæ reversione vel salute nobiscum cooperari pariterque desudare studeatis, ut vestro consilio vestroque instanti hortatu, ipse Augustus nostræ petitionis affectum more parentum suorum libenti perficiat voluntate. Nam sicut illud regnum, in quo nunc illa sub custodia manet, ejus est, ita et istud; et sicut ibi custoditur,

ne aliquod solatium, vel consilium dare, facereque possit Bosoni, ita et nos eam in tali loco habitare faciemus, quo nihil adversi moliri, nihilque valeat machinari contrarium ad hujus regni, et imperii perturbationem. Et si contra ejus ac nostram voluntatem aliquatenus eam agere, aut velle cognoverimus, illico ad imperialem remitemus præsentiam, nec nostro erit amplius adjuta consilio. Quod nimirum, ut nobis sine omni dubitatione credatur, unum ex his legatis nostris venerabilibus episcopis, quos pro ea imperatori direximus satisfaciendo, repromittere jussimus ita nos esse incunctanter facturos. Neque enim, sicut cum coepiscopis, et primatibus ejus promissum est, nullum temporale adiutorium et consilium jam fato se fore præbiturum Bosoni; et quod, sicut prædiximus, diligentissime custodita, non poterit de his omnibus quidquam agere. Idcirco per Dominum vos adjuramus, ut toto conamine in hoc opere nobiscum pro amore Dei desudare, eique manum porrigere procuretis, ut et nos in vestris proficuis utilitatibus et necessitatibus esse prompti possimus; et cui manum porrigere vobiscum omnimodis porrigamus, dignasque vestro Deo dilectæ sanctitati pro vestro labore, atque devotione gratias habere valeamus.

CCCXVII.

AD CLERUM MEDIOLANENSEM.
(Anno 881.)

Recipit Hadericum sub tutela sedis apostolicæ, et excommunicat omnes qui illi vel ejus ecclesiis molestiam intulerint.

Omnibus reverendissimis episcopis et sacerdotibus seu clero, ac populo sanctæ Mediolanensis Ecclesiæ.

Boni patrisfamilias, quem bene et fideliter laborantes remunerasse cognoscimus, informati exemplo, et apostolicæ auctoritatis et miserationis magisterio, seu benivolentia, omnibus, quos pro Ecclesiæ Dei utilitatibus fideliter desudare conspiciamus, subvenire debentes, opportunum ac necessarium nos oportet præbere auxilium. Igitur quia te Hodericum venerabilem presbyterum et abbatem sacrorum monasteriorum beatorum, scilicet Gervasii et Protasii, atque Simpliciani, nec non ex xenodochii (*aliquid deest*) sanctorum Cosmæ et Damiani, quod Romanorum dicitur, et alia tua beneficia vel patrimonia intra vel extra civitatem Mediolanensem constituta fidei devotione, totoque mentis comanine pro pristino statu et vigore atque restitutione sanctæ Mediolanensis Ecclesiæ ter quaterque in obsequie Ansperti reverendissimi archiepiscopi tui atque confratris nostri devotum atque in omnibus fidelissimum permanere atque decertare omnino et evidenter comperimus, et legationem Ambrosianæ Ecclesiæ catholica fide te, et prout vires suppleverunt, ardentissimo ardore explorare, crebro cognovimus. Et ob hoc aliquos contumaciæ livore adversum tuam commotos esse dilectionem, vel ob alias causas invidiæ, qui et modo labiis dolosis zeli contra te con-

citati, et postmodum callidis argumentis nocivam tibi moliuntur, nostro statuto decernimus, atque Dei omnipotentis auctoritate beatique Petri apostolorum principis et nostra sanctione statuimus, nulli unquam archiepiscoporum, vel sacerdotum, aut cujuslibet ordinis clericorum ejusdem sanctæ Mediolanensis Ecclesiæ, nec aliarum Ecclesiarum, neque alicui magnæ parvæque personæ, cujuscunque honoris præditæ dignitate esse licitum, pro tuæ laudabilis devotionis affectu et pro tuæ fidei sinceritate atque charitatis certamine, quod pro ipsius Ecclesiæ utilitate nostris te diebus habuisse cognovimus, aliquam tibi quocunque modo vel sub ecclesiasticarum rerum obtentu, inferre calumniam aut his præfatis, quæ pro tui digni laboris merito retines beneficiis et patrimoniis, vel a quibus propriis rebus mobilibus privare: sed diebus vitæ tuæ, secundum auctoritatis nostræ decretum, pro amore Dei et mercede animæ nostræ tuaque fidelitate, quam tuæ te novimus habere Ecclesiæ, liceat tibi sub apostolicæ sedis successorumque nostrorum tutamine, cum propriis beneficiis, et cum omnibus tuis hominibus utriusque ordinis, manere quietum atque securum. Porro quicunque contra hoc nostrum statutum temerario ausu agere teque pro hujusmodi negotio calumniare præsumperit, omni eum ecclesiastica judicamus communionem carere, quousque per congruam satisfactionem in nostra successorumque nostrorum præsentia, quod perperam læserat, emendare curaverit. Et ideo nostra etiam apostolica auctoritate præcipimus te nusquam cujuslibet episcopi vel sacerdotis subiacere judicio, quousque in nostram vel successorum nostrorum, libere ac securiter, sine alicujus obstaculo vel impedimento præsentiam venias. *Data ut supra.*

CCCXVIII.

AD ATHANASIAM EPISCOPUM NEAPOLITANUM.
(Anno 881.)

Arguit eum quod non fregerit fœdus quod cum Saracenis fecerat, cum promiserit illud rumpere: ostendit multa mala ejus causa a Saracenis Christianis fuisse inflicta; minatur illi excommunicationem, nisi fœdus illud rumpat.

ATHANASIO episcopo Neapolitano.

Jam quia te lactantium et ab ipsis cunabulis educantium sanctæ matris tuæ Romanæ Ecclesiæ oblitus es uberum, vel nostræ benevolentæ non debueras oblivisci, quam tibi paternaliter exhibentes, et salutis tuæ consulta prævidimus, et in temporalibus commodis juxta qualitatem temporis, præsidia quæque contulimus; et quoniam cooperatorem nostrum in his quæ Dei sunt, te habere volumus, nimisque tuam sanctimoniam diligimus, monemus ut vel nunc ad eor. redeas, ut prava quæque juxta tuum ministerium diluas, et inimicorum Christianorum nominis fœdus exsecrando devites, quatenus et animæ tuæ lucrum acquiras, et nostris magis ac magis affectibus perfrui valeas, et blasphemis ac maledictionibus reliquiarum populi Christiani, Di-

A vinitate propitia, careas. Memento, quæso, quid es; memento quid, si non resipueris, eris; et judiciorum Domini memor esto, ne pro tantis Deo rationem reddere cogaris, quanti per tuam desidiam interempti sunt, et captivi ducti diversis mortibus perierunt. De quorum crudelitate quid dicere possumus? Cum tanta hinc flenda sint et lugenda, ut si scribere velimus, et lacrymarum rivuli crescant, et primum charta quam verba deficient. Denique apud Cajetam olim nobis necessario constitutis, legati tui promiserant ut intra spatium viginti dierum non solum cum Agarenis habitum pactum dissolveres, verum etiam Saracenos caperes, et nobis eos transmitteres; sed ecce, quod promissum est, fide hactenus caruit, et omnium sponsonum tuarum dicta cassata sunt, et, ut apparet, frustrata. Unde, sicut diximus, cesset jam, cesset hæc immanissima pestis, ut reliquæ Christianæ funditus non depereant, et tu animæ tuæ dispendia non incurras, quia si populo Dei compassus fueris, et Deum tibi propitium facies, et nostram paternitatem solito more percipies, et ministerium tuum custodies: alioquin non solum nostra tibi non dimittemus, sed etiam canonicam in te sententiam juxta nostrum ministerium jaciemus. Sed et hoc nostri apostolatus auctoritate monemus, et excommunicando modis omnibus interdiciamus, ut quia *ecce tempus acceptabile est, ecce nunc dies salutis (II Cor. VI)*, nullam seditionem, nullam commotionem, nulla discrimina vel læsionem cum his qui in Berolassi commorantur aut facias aut facientibus omnino consentias, quatenus pacem sectando, ab omni nequitia purgatus, munus Dei immaculatum offeras, et charitatem Dei in tuo vase diffusam cohabitare permittas: quia nos, quibus de omnibus cura est, Deo juvante, congruenter illuc properabimus, et inter vos, te potissimum cooperante, pacem et amicitiam reformabimus. *Data pridie Idus Martii, indictione XIV.*

CCCXIX.

AD METHODIUM ARCHIEPISCOPUM.
(Anno 881.)

Gratulatur de orthodoxæ fidei cultu, et de ejus erga religionem studio et cura; precatur tibi dies spiritualem profectum majorem, eunque consolatur.

METHODIO archiepiscopo, pro fide.

Pastoralis sollicitudinis tuæ curam, quam in lucrandis animabus fidelium Domino Deo nostro exhibes, approbantes, et orthodoxæ fidei tuæ cultorem strenuum existere contemplant, nimis in eodem Domino jucundamur, et ei immensas laudes, et gratias agere non cessamus, quia te magis ac magis in suis mandatis accendat, et ad sanctæ suæ Ecclesiæ profectum ab omnibus adversitatibus elementer eripiat. Verum auditis: per tuas litteras vanis casibus vel eventibus tuis, quanta compassione tibi condolerimus, ex hoc advertere poteris, in quo te coram nobis positum, sanctæ Romanæ Ecclesiæ doctrinam, juxta sanctorum Patrum probabilem traditionem, sequi debere monuimus, et tam symbolum quam

rectam fidem a te docendam et prædicandam subdidimus; nostrisque apostolicis litteris glorioso principi Scentopulco, quas eis asseris fuisse delatas, hoc ipsum significavimus, et neque aliæ litteræ nostræ ad eum directæ sunt, neque episcopo illi palam vel secreto aliud faciendum injunximus, et aliud a te peragendum decrevimus, quanto minus credendum est ut sacramentum ad eodem episcopo exegerimus, quem saltem levi sermone super hoc negotio allocuti non fuimus. Ideoque cesset ista dubietas, et, Deo cooperante, sicut evangelica et apostolica se habet doctrina, orthodoxæ fidei cultum fidelibus cunctis inculca, ut de labore tui certaminis Domino Jesu Christo fructum afferas abundantem, et gratia ejus remuneratus, mercedem recipias competentem. Cæterum de aliis tentationibus quas diverso modo perpressus es, noli tristari, quin potius hoc, secundum Apostolum, omne gaudium prorsus existima, quia si Deus pro te, nemo esse poterit contra te. Tamen cum Deo duce reversus fueris, quidquid enormiter adversum te est commissum, quidquid jam dictus episcopus contra suum ministerium in te exercuit, utramque audientiam eorum nobis discussam, adjuvante Domino, legitimo fini trademus, et illius pertinaciam judicii nostri sententia corripere non omitemus. Data decimo Kalendas Aprilis, in dictione decima quarta.

CCCXX.

AD CAROLUM IMPERATOREM.

(Anno 881.)

Nuntiat imperatori se iis malis a Saracenis affici, ut amplius suslinere non possit; rogat eundem ut sibi subsidio exercitum mature mittat, eique palmam cum benedictione mittit.

CAROLO ^a imperatori.

Multarum oppressionum nostrarum, fili charissime, vobis oblivisci non convenit, et calamitatum nostrarum, quas sancta mater vestra Romana Ecclesia patitur, oportet vos reminisci, et tunc demum ad aliquam consolationem nostram manum vestræ pietatis porrigere et auxilium nobis præbere quantocius debetis. Scitis namque quæ, quanta et qualia, præcipue a paganis, mala quantasque etiam miseria patimur; et in nobis commissis, quantum quotidie affligamur, et vos estis experti, et nos partim vestræ clementiæ paulo ante significavimus. Et cum quotidie hæc eadem mala non minui sed magis ac magis crescere ac dilatari cernamus, dolor et gemitus, ac sine fine tristitia imminet, ac per hoc libet magis mori, quam, pro dolor! jam talia tolerare. Proinde, spiritualis fili semperque Auguste, gloriam vestram summopere deprecamur ut pro amore Dei omnipotentis et reverentia principum apostolorum Petri ac Pauli hostilem [f. vestrum] exercitum, quem istas in partes venturum esse dixisti, moram perpeti non sinatis, sed cum omni velocitate ad auxilium nostrum, quæsumus, dirigatis, ut, Domino adjuvante, ad respirationem nostram Agarenos expugnet, et

A nobis quantulumcumque de ipsis paganis tranquillitatem valeat ferre. Sed et e latere vestro, qui eidem exercitui præesse possit, tam strenuum tamque idoneum missum modis omnibus tribuatis, qui et ductor exercitus vestri existat, et quam defensionem vel adjutorium nobis faciant, ipse prævideat, et quidquid vestra vice est peragendum potestateve perficiat. Alioquin non solum ex hoc maxima negligentia erit, et omnis vestra utilitas deperiet, sed etiam novissima nostra erunt pejora prioribus; et vos, quantum ex hoc habeatis peccatum, dici non potest. Ideoque propter Deum succurrite nobis, succurrite, ut non dicant in circuitu nationes: Ubi est imperator eorum? Præterea honorificentiam vestræ cum benedictione apostolica palmam, per quam signum datur victoriæ, ecce ex more direximus, exoptantes, omnipotentemque Deum deprecantes, ut hanc cum lætitia vos in die tantæ solemnitatis gestare faciat atque permittat. Et ad omnium nostrum utilitatem et profectum aures præcordiorum vestrorum divinitus inclinare dignetur. Data iv Kalendas Aprilis, indictione xiv.

CCCXXI.

AD DIVERSOS EPISCOPOS.

(Anno 881.)

Athanasium Neapolitanum episcopum, qui sæpe monitus, nunquam, sicut promiserat, fœdus cum Saracenis ictum rumpere voluit, a se cum omnibus ei consentientibus excommunicatum significat.

Omnibus episcopis Cajetam, Neapolim, Capuam Berolassim et Amalfim, Beneventum et Saternum incolentibus, a paribus.

Quæ et quanta ab Athanasio Neapolitano episcopo Christi Ecclesia patiat adversa, optaremus vobis non esse dicturos, nisi essent supra modum gravia. Ecce enim, ut ipsi jam ex maxima parte non ignoratis, ad perditionem totius Christianitatis, a multis retro temporibus cum filiis Ismael et Deo scilicet odibilibus Saracenis pactum faciens, omnem istam terram ita ad nihilum redegit, ut jam non sit quæ eam prorsus inhabitet. Super quo scelere eum sæpissime commonuimus, et corpori nostro omnimodo non parcentes, usque Neapolim properavimus, multumque argenti ei contulimus, et rogavimus ut ab eorum se societate divideret, ut tandem aliquando resipiscens, tantam pestem deleret. Qui, ut ita dixerim, importunitatem nostram, licet fictæ, non tolerans, promisit se ita esse facturum, et pactum cum Saracenis habitum soluturum, sub ea duntaxat conditione ut si deinceps hoc malo se quocumque modo misceret, et sacerdotio esset privatus et anathematis subjaceret. Sed, heu! pro turpis lucri commodo, quod ab ipsis Saracenis, de præda eorum partes recipiendo, hujus promissionis oblitus, noluit adimplere, quod multis eorum positus scriptis et verbis promisit. Rursum nobis, non modici argenti adactis ponderibus, et apud Cajetam pervenientibus,

^a Ejus nominis tertio, cognomine Crasso.

per suos legatos ei mandavimus ut si intra triginta dierum spatia cum Saracenis habitum fœdus non rumperet, aut ea quæ nobis tergiversando abstulerat, non retransmitteret, nostro iudicio iterum sententiam, quam ipse in se pertulit, prorsus exciperet; sed tam varia juramenta quam absolutas promissiones postponens, nos de die in diem delusit, et foris omnibus dissipatis, intus vero per suam calliditatem multis nostris ablatis, hactenus nec cum Saracenis habitum pactum dissolvit, nec reliquæ Dei populi voluit misereri. Quin potius cum ipsis conversans, de ipsis malis in pejus crevit, et Dei mandata contemnens, sacerdotii etiam sui oblitus, non solum similis illis effectus est, sed etiam in multis deterior. Hujus rei gratia apud beatum Petrum apostolum synodice in eum sententiam protulimus, et cum omnibus sibi consentientibus sive faventibus omni ecclesiastica communione sub anathematis interpositione privavimus. Modus autem excommunicationis hic est: Athanasium Neapolitanum episcopum sæpissime admonitionibus, et multis argenti ponderibus datis, ut pactum cum Saracenis habitum dirumperet, admonuimus. Ille autem idem pactum se omnimodo soluturum et ab eorum societate separaturum esse promittens sub ea conditione, ut si denuo cum illis quolibet modo fœdus habuisset, omni esset sacerdotali honore privatus et anathematizatus; sed hæc omnia parvipendentem, et ad perditionem Christianorum cum eis pactum habentem, et nos sæpissime deludentem, et de præda eorum partem recipientem, iudicio et auctoritate Dei omnipotentis, et beatorum apostolorum Petri ac Pauli simul et nostra, cum omnibus sequacibus suis, et omni ecclesiastica communione privamus, et quousque se ab ipsis Saracenis penitus separaverit, velut totius Christianitatis inimicum anathematizamus. Data mense Aprili, indictione XIV.

CCCXXII.

AD ROMANUM ARCHIEPISCOPUM RAVENNATEM.

(Anno 881.)

Arguit quod Albericum comitem Ravennam asciverit, et nobiles Ravennates contra jusjurandum sibi præstitum vexarit: cum Neapoli reversus fuerit, ait se ea omnia curaturum: jubet Dominicum archidiaconum Faventinæ Ecclesiæ episcopum consecrari.

ROMANO archiepiscopo Ravennati.

Ea quæ nostro præsulatui pro utilitate et necessaria sanctæ Ravennatis Ecclesiæ restitutione perficienda mandasti, lucifluis antecessorum nostrorum informati exemplis, congruum et opportunum eidem Ecclesiæ libenter volumus, Deo favente, præbere solatium et defensionis auxilium, præcipue cum ipsius nos tibi commissum habeamus regimen. Sed quia multi nobilium Ravennatum crebris duntaxat querimoniis apostolatus nostri aures pulsare non desinunt, circa te clementiæ nostræ benevolentia commota non immerito habetur. Nam, ut cætera omitamus, quia Albericum comitem quasi ex parte

A imperiali Ravennam asciscere, et nobiles cives ipsius, nobis inconsultis, ausu temerario distringere enormiter coegisti, miramur, eo quod te adversum tuam promissionem jurejurando coram nobis et sede apostolica prolatam, penitus egisse cognoscimus. Pro quo nimirum te valde cavere oportet, ne pro talibus tua sententia velut transgressorem ulciscatur. Nos enim te gregem Domini pascere, non perturbare; salvare, et non perdere statuimus. Tamen cum nos, Deo volente, Neapoli, quo nunc proficiscimur, fuerimus reversi; et aut tu, secundum nostram tibi jussionem directam, Romam veneris, aut nos vel missus noster istas in partes venerimus, plenariam de omnibus quæ tuæ Ecclesiæ cognoverimus esse necessaria justitiam omnimodo faciemus. B Defuncto præterea Ecclesiæ Faventinæ episcopo, prævidimus hunc Dominicum venerabilem archidiaconum, sedis ipsius honore episcopali dignum existere. Hoc auctoritatis nostræ statuto præsentis dilectioni tuæ præcipimus ut, absque omni mora vel protelatione, eundem archidiaconum studeas secundum morem episcopum consecrare. Nam si aliqua temeritate depravatus, hoc contra tuæ sponsionis juratoriam paginam præsentialiter facere contempseris, pro certo scias quia nos ipsius Ecclesiæ curam et sollicitudinem habentes, jam fatum archidiaconum ad nos ex nostra præceptione illico reverentem episcopum consecrabimus. Data ut supra.

CCCXXIII.

AD ROMANUM ARCHIEPISCOPUM RAVENNATEM.

(Anno 881.)

C *Arguit eum quod alterius legitimam uxorem raptori tradi consenserit, et Romanæ Ecclesiæ ausus fuerit adversari; has ob causas illum a conferendis sacris ordinibus suspendit, donec a synodo, ad quam eum jubet venire, ejus causa cognoscatur.*

ROMANO archiepiscopo Ravennati, missa per Deltonem venerabilem episcopum.

Inter cætera quæ de te audivimus, veniens Deusedit dux retulit nobis quod uxorem illius, de qua legaliter diffinitum est, ad te callide venire fecisses, et alteri viro raptori in stupro utique tradidisses: quod nimirum tanti flagitii scelus te, juxta tuum ministerium, omnimodis prohibere ac funditus rescare oportebat: tu autem consensum illicite præbuisti. Cognoscimus etiam multis indicis quod ausu D temerario contra sanctam et dominam tuam Romanam Ecclesiam recalcitrare, et contra tuæ juratorię sponsionis tenorem luculentissime agere nullatenus dubitasti. Unde auctoritate Dei et beati Petri nostraque tibi præcipimus, et præsentis statuto jubemus, ut nullam omnino sacerdotalem ordinationem pro talibus, quibus es irretitus, criminibus, facere quomodo præsumas, donec VIII Kalend. Octobris futuræ quintæ decimæ indictionis, ad synodum quam, Deo favente, pro ecclesiasticis videlicet utilitatibus, secundum sanctorum Patrum statuta celebraturi erimus, omni postposita occasione, venire procures; quatenus synodali decreto ea, quæ de te didi-

cinus, examinata, canonicum finem percipiant. *Data ut supra.*

CCCXXIV.

AD EUMDEM.

(Anno 881.)

Jubet Placentinos clericos, quos sine commendatitiis litteris ad eum confugientes receperat, ad eorum episcopum remitti; ejusdem etiam Ecclesiæ clericos absolvi, donec cum eis ad synodum veniat.

Reverendissimo et sanctissimo ROMANO archiepiscopo Ravennati.

Inter cæteras proprii affectus, rationes incongruas, quibus te ipsum quotidie mente improvida insertiri [f. irretiri] non dubitas, Paulo charissimæ Placentinæ Ecclesiæ antistite ad aures apostolatus nostri humiliter reclamante, didicimus quod clericos ipsius Ecclesiæ regulæ normam sectari nolentes, et idcirco sine commendatitiis utique litteris ad te confugientes, contra sacra beatorum Patrum statuta recepisses, receptosque tibimet famulari decernas. Quod nimirum propter multam perturbationem, et seditiones quæ sæpe fiunt, auctoritate apostolica et sanctorum Patrum præcipua institutione amputare volentes, reverentiæ tuæ jubemus prædictæ Ecclesiæ Faventinæ [Placentinæ *ut supra*] clericos, quos penes te enormiter habere videris, et præcipue Gausum diaconum, de præsentī suo reddere vel dirigere procures episcopo. Quia non licet quemlibet clericum in duarum civitatum conscribi simul Ecclesiis, et in qua ab initio exstitit, ad quam confugit quasi ad potiorem ob inanis gloriæ cupiditatem: et ideo eos ad suam Ecclesiam revocari decernimus, et de illis amplius agere cavere prorsus oportet, ne sanctorum Patrum judicio, quod contra hujus regulæ transgressores prolatum est, damnari omnino merearis. At si aliquid inter eos adversi exortum fuerit, canonicè inter eos diffinias, salvo sedis apostolicæ honore, atque vigore, salvoque tuæ Ecclesiæ privilegio. Et præterea sacerdotes et clericos Placentinæ Ecclesiæ, quos excommunicasti, ut ab eadem excommunicatione absolvas, quousque tempore congruo tu cum eis Romam ad synodum pariter veniatis. *Data mense Julio, indictione XIV.*

CCCXXV.

AD CONSTANTINUM SACERDOTEM.

(Anno 881.)

Excommunicat eum quod absque sua licentia ab archiepiscopo Ravennate ad Faventinæ Ecclesiæ episcopatum promotus fuerit: prohibetque eum illius Ecclesiæ administrationem attingere, donec ad synodum Romanam veniat.

CONSTANTINO sacerdoti Ecclesiæ Faventinæ de plebe sancti Petri Transilvani.

Audientes te esse quasi ad episcopalem honorem a Romano Ravennate archiepiscopo, sine nostri pontificii auctoritate, seu licentia, et absque canonicæ institutionis regulæ enormiter promotum, his apostolatus nostri litteris ex Dei omnipotentis sanctorumque Petri ac Pauli apostolorum principum

aucto ritate, nostroque apostolico jure, te excommunicamus, ut nullo modo habeas licentiam aliquid de episcopali officio peragere, aut ipsam Faventinam Ecclesiam quoquomodo invadere, neque in plebibus, vel rebus, seu hominibus ipsius Ecclesiæ, aliquod dominium agere præsumas, usquequo cum eodem Romano archiepiscopo tuo, (*aliquid deest*) octavo Kalendas Octobris quam, Deo favente, celebraturi Romæ erimus, tuam specialem rebus præsentiam exhibere procures. Nam si contra hanc nostram apostolicam jussionem, et post hujus nostræ excommunicationis sententiam, aliquid de ipso episcopali ministerio agere præsumperis, vel in omnibus quæ ad eumdem episcopatum pertinent, temerario te ausu intromittere tentaveris, atque ad denominatam synodum occurrere postposueris, scias pro certo quia non solum omni ecclesiastica te communionem privabimus, sed etiam synodali decreto a sacerdotali honore te sanciemus alienum existere. *Data XVI Kalendas Augusti, indictione decima quarta.*

CCCXXXVI.

AD JOANNEM EPISCOPUM FICOCLENSEM.

(Anno 881.)

Visitationem Faventinæ Ecclesiæ pastore destitutæ, ejusque curam ei committit, donec novus pastor eidem præficiatur.

JOANNI episcopo Ficocleni.

Obitum Romani Faventinæ civitatis antistitis directa dudum relatio patefacit: quapropter visitationis destitutæ Ecclesiæ fraternitati tuæ operam solemniter delegamus. Quam ita te convenit exhibere, ut nihil de provectionibus [f. proventibus] clericorum, reditu, ornatu ministeriisque, vel quidquid illud est in matrimonio eodem, a quoquam præsumatur Ecclesiæ; et ideo Ecclesia [fraternitas] tua ad prædictam Ecclesiam ire procuret, ut quidquid utilitati illius congruit, interim solerti cura prævideat, quousque, qualiter se habeat electio, vel ordinatio succedentis episcopi coram nobis synodali discutiatur examine, et apostolica terminetur, Deo juvante, censura. *Data XIII Kal. Augustas, indictione XIV.*

CCCXXXVII.

AD ROMANUM ARCHIEPISCOPUM.

(Anno 881.)

Ad synodum Romam sub pæna excommunicationis venire jubet, ut ad ea quæ objiciebantur respondeat.

D Reverendissimo et sanctissimo confratri nostro ROMANO archiepiscopo.

Quia jam pridem missis tibi per Joannem venerabilem episcopum Montis Feretrani apostolatus nostri litteris, ad synodale te collegium pro ecclesiasticis duntaxat utilitatibus nobiscum pariter celebraturum occurrere jussimus, et tuam nobis contempsisti præsentiam exhibere; nunc multis criminibus irretitum, multorumque hominum accusationibus horrendis impetitum, et præcipue manifesto perjurio esse pollutum, agnoscentes, hac secundæ vocationis nostræ auctoritate ad venerabilem synodum, quam, Deo favente, octavo Kalendas Octobris

future quintæ decimæ indictionis, crimus celebraturi, omni occasione vel mora postposita, una cum omnibus suffraganeis tuis episcopis venire jubemus, quatenus ibi coram fraterno et venerabili episcoporum cœtu, pro omnibus tibi objectis rite examinatis ore proprio valeas respondere et te innoxium demonstrare; nam si aliqua temeritate tumidus, vel inobedienciæ stimulis motus, hanc nostram apostolicam et canonicam vocationem, quam tibi primitus per Deltonem, seu et modo per Joannem Callensem venerabiles episcopos direximus, parvipendendo, ad præfatam synodum venire contempseris, scias pro certo quoniam omni te communione ecclesiastica privabimus, et fugiendo tuæ damnationis sententiam, utique honoris patieris jacturam. Data vi Kalendas Augusti, indictione xiv.

CCCXXVIII.

AD CAROLUM IMPERATOREM.

(Anno 881.)

Petrum et Zachariam legatos ad eum mittit; causa corrigendi mala, quæ se, eo regnante, perpessum queritur.

CAROLO imperatori.

Quia nunc eadem omnibus vobis, jam Deo favente, per humilitatis nostræ officium regnantibus, ubique patimur et sustinemus adversa, quæ ante vestræ imperialis gloriæ provectionem nos sustinuisse quotidie recordamur, his apostolatus nostri apicibus directis, dignum duximus Augustali serenitati vestræ pro utilitate ac multiplici necessitate Ecclesiæ universalis, cui per Dei gratiam præsidemus, suggerere, atque cognitum omnimodis facere, quoniam secundum commune placitum atque decretum direximus Petrum, insignem palatii nostri, super ista deliciosum consiliarium nostrum, communemque fidelem, cum Zacharia venerabili episcopo et bibliothecario sedis nostræ, pro recipiendis de omnibus, quæ hactenus perperam acta fuerant, justitiis et emendationibus, ac pro totius terræ S. Petri salute, pristinaque restitutione; quatenus in præsentia misorum vestrorum ea quæ necessario emendanda et corrigenda erant, jure legitimo corrigerentur, ut tam diuturnum malum finem acciperet.

CCCXXIX.

AD RAVENNATES.

(Anno 881.)

Præcipit ut se a Ravennatis archiepiscopi in synodo excommunicati communione separent: quousque eum absolutum cognoverint.

Omnibus venerabilibus sacerdotibus et clero atque universis judicibus populoque Ravennati.

Nosse volumus fidelitatem et unanimitatem vestram quia Romanum archiepiscopum vestrum pro perjuri reatu manifeste pollutum, aliisque nefandis criminibus impetum, et ideo ad synodum pro sui purgatione vocatum, occurrere contemnentem, omni ecclesiastica communione una cum sanctæ synodi decreto privavimus, quousque suam specialem studuerit nobis exhibere præsentiam. Quamobrem

A his apostolatus nostri litteris vobis jubemus, et ex auctoritate Dei et beati Petri apostolorum principis et nostra præcipimus, ut omnes vos ab illius consortio et communione modis omnibus separetis, donec per nostræ apostolicæ miserationis officium, ab hujus excommunicationis vinculo eum cognoveritis absolutum existere. Quicumque autem ei ante audientiam et absolutionem nostram aliquatenus communicare præsumperit, eodem excommunicationis laqueo, secundum sanctorum Patrum institutionem, maneat irretitus, usque dum a nobis fuerit misericorditer, absolutus. Data mensis Octobris die quarta, indictione duodecima [decima quinta].

CCCXXX.

AD CAROLUM IMPERATOREM.

(Anno 881.)

B

Gratulatur de ejus observantia erga Romanam Ecclesiam: lætatur ipsum Ravennam venire velle, ut de Ecclesiæ et imperii statu agat: rogat ut ante diem quem præstituerat accedat.

Ad imperatorem.

Receptis serenitatis vestræ litteris atque perlectis, ac sicut nobis per Joannem Venticinensem episcopum verbotenus mandastis, quia cognovimus vos honorem sanctæ Romanæ Ecclesiæ matris vestræ et salutem terræ ipsius toto conamine velle perficere, exsultantes sumus animo gavisi. Porro sicut mandastis ut die purificationis beatæ Mariæ semper virginis Ravennæ venientes simul conjuncti fuissetis pro ad considerandum, cum Dei auxilio, et peragendum profectum sanctæ Dei Ecclesiæ, et statum imperii vestri; nos autem et hoc libenti animo recipientes, volumus quarto die ante jam dictam festivitatem vos ibi adesse, quia et nos ita desideratissime cupimus vobiscum simul conjungi, et vestram petitionem libenter adimplere, si, Domino annuente, sanitas corporis divinitus concessa fuerit. Et quoniam, sicut audivimus, vos laborem atque certamen pro Ecclesiarum Dei statu et imperii vestri incolunitate, atque communi Christianorum salute, pio affectu cupitis perficere, his apostolatus nostri litteris admonemus et exhortamur ut magis ac magis in hoc vestra imperialis sollicitudo proficiat: hoc gloriam vestram obsecramus et magnitudinem vestram ut cum in has partes venire cœperitis, Supponem gloriosum comitem et communem fidelem vobiscum venire jubeatis.

D

CCCXXXI.

AD WILIBERTUM ARCHIEPISCOPUM AGRIPPINENSEM.

(Anno 881.)

Commendat ejus vigilantiam, et presbyterum quemdam excommunicatum, nunc ipsius testimonio longa pœnitentia purgatum, ejus precibus commotus absolvit, et sacerdotali ministerio restituit: causam Gedeonis adulteri ei committit, ut sententiam canonicè ferat.

Reverendissimo et sanctissimo WILIBERTO archiepiscopo Agrippinensi.

Almitatis tuæ prudentiam sacerdotali vigilantia pro gregis Domini sibi commissi salute, atque de

fauce hostis maligni, qui semper incauto ad æternæ A mortis profunda pertrahere avide certat, liberatione, juxta pastorale magisterium reverentiæ tuæ divinitus delegatum sollicitam fore, litteris vestris inspectis luculenter agnoscentes laudamus, cum apostolicæ sedis privilegium perspicaci mentis intuitu conservando hunc tuæ diœceseos presbyterum, nomine Tal (*aliqua desunt*), Ingeltrudæ Bosonis quondam comitis uxori torum conjugalem, contra divinæ legis præcepta relinquenti. Et idcirco ab antecessore nostro beatæ memoriæ papa Nicolao legitime excommunicatum improvide communicasse reperiens, sacra jam olim communione privasti. Quem scilicet, cum tuæ fidelis devotionis attestatione nostro præsulatui dirigens, professus es per annos undecim illatam sibi excommunicationis sententiam humiliter sustinuisse : et quod ex polluto consortio feminæ venenum attraxerat, longa penitentiæ satisfactione purgasse, a vinculo suæ obligationis ut absolveremus mandasti. Nos vero misericordiæ intuitu, precibus tuis inclinatis, interni arbitrium judicis sequentes, ab ipsius excommunicationis vinculo, si ita est, eum absolvimus, et omne officium vel ministerium sacerdotale, juxta præcedentem consuetudinem, jubemus solemniter ac libere cum Domini semper timore peragere. Præterea de Gedeone, cujus uxorem cum germano istius adulterium perpetrasse fateris, ex parte dubii existentes, utrum verum sit quod de hoc dicitur necne, dilectioni tuæ committimus ut omni ex parte diligentique cura, rei hujus veritate comperta, quid super hoc excellentissimus doctor beatus Augustinus in libris de adulterinis Conjugiis ad Pollentium dixerit, quidque beatus Innocentius papa vicesimo sexto capitulo statuerit (*epist. 2*) relegens, secundum horum sanctionem ita diffinire procuret ; quatenus animabus eorum per penitentiæ remedia subveniri possit, et corpora per tuæ sanctitatis providentiam secundum Deum in omnibus dirigantur.

CCCXXXII.

AD LEONEM, LANDULFUM ET LANDONEM.
(Anno 882.)

Ut Auxentii filium, ab Attinulfo captum, patri restituendum curent.

LEONI episcopo Thienensi, item LANDULFO episcopo, et LANDONI gastaldio patri ejus.

Auditu certiori comperimus quod filium Auxentii Capuani, nostrum duntaxat proprium hominem, Attinulfus caperet, et non bene tractans eum violenter teneret, quod admodum admiramur : et quod tale quid præsumperit agere, moleste quippe accipimus. Unde vobis nostri apostolatus litteris injungere dignum duximus, ut omnem operam detis, et ex nostra parte ipsi Attinulfo tandiu insistatis quousque eundem Auxentii filium, hominem scilicet nostrum, patri suo salvum restituat, et cum suis hominibus reddat illæsum. Alioquin sententiam nostram evadere non poterit, qui nostrum hominem tam simpliciter ambulantem affligere non contem-

psit. Vos tamen, rogamus, tam strenue agite, ut vobis gratias referamus, et majora vobis committere invitetur.

CCCXXXIII.

AD MICHAEM REGEM BULGARORUM.

Hortatur ut ad fidem et obedientiam Romanæ Ecclesiæ redeat et legatos mittat.

MICHAELI regi Bulgarorum.

Cum non tam initia sint in bonis laudanda quam finis, Deo omnipotenti factori omnium visibilium et invisibilium gratias agimus, qui vestrum bene velle hactenus in soliditate veræ fidei solidavit, et sui amatorem efficiens, tanquam vera ex tenebris olim lumen splendescere fecit, et ad salutem multorum benignissimum cor vestrum gratia suæ potentia illustravit. Sed et hinc devotioni vestræ dignum duximus congruas grates referre, quod partim finis ostendit, quam fidelitatem erga sanctam Romanam Ecclesiam omnium terrarum matrem et caput observare curetis. Cum hanc et initio vestræ conversionis quæsieritis, et ad præsens auxiliatricem habere ad perpetuam scilicet vestram salvationem monstrare non omiseritis, sanctos videlicet apostolos visitando, et eorum, ut diximus, suffragia postulando. Igitur absurdum valde est ac inconveniens quod pia vestra voluntas aliter se post habere voluit quam, sicut omnibus notum est, primum. Vos enim divinitus inspirati matrem omnis religionis, sanctam quippe Romanam Ecclesiam ductricem, et viam per quam ad æternitatis pascua duceremini, merito expetistis ; et illa, quia omnibus fidelibus viscera materna præbet ac præbuit, vos expansis ad Deum ulnis, Christo gratias agens, recepit : consequens fuit ut a recti gressu itineris, in partem non flecteremini, nec manum mittentes in aratrum, retroaspicere cujuscunque forte suasionibus niteremini. Nunquid non, fili charissime, sanctum Evangelium surda aure auditis, quo legitur : *Qui perseveraverit usque in finem, hic salvus erit ? (Matth. x.)* Aut si audistis et obaudistis : *Redite ad mentem vestram, redite ad cor ? (Isa. xlvi.)* Et vestræ sponsonis reminiscimini. Quia plus amor et timor Dei vos fecit esse credulum apostolici privilegii, quam, ut ita dixerim, exempla multorum. Si enim quod quicumque Deo novit, hoc debet et reddere, valde oportet ut vos quod sanctæ Romanæ Ecclesiæ sponte vovistis, sine tenus reddere studeatis, non ignorantes quod beatus Petrus apostolus regni cælestis claves a Domino Jesu Christo acceperit, et quibusque fidelibus aperiendi, aliis autem claudendi promeruerit potestatem. Hac igitur, sicut et nostri prædecessores, nos potestate, licet indigni, utentes, cogimur, si non emendaveritis quod gessistis, et ad præsens vos in hoc sæculo digne corripere, et ut in futuro, quantum in nobis est, maledictionibus repleamini, non præterire. Hujus rei gratia, fili charissime, festinate corrigere quod inique gessistis ; et omni occasione omnique mora postposita, nobis per vestrum legatum quidquid super hoc

emendare vultis, mandate : quia nos, Deo juvante, omnem voluntatem vestræ correctionis implebimus, et vos anima et corpore salvos existere cupientes causam secundum Deum ordinare studebimus.

CCCCXXXIV.

AD IMPERATOREM ET IMPERATRICEM.

Fragm. — (An. 882.)

Cum reversi fuisset, omnia littora nostra deprædata etiam in Fundis et in Terracina, velut in domo propria multos Saracenos invenimus residere, pro quibus non plus quam quinque diebus in Urbe manentes, quamvis corporis non modica detineretur molestia, exivimus cum fidelibus nostris, quorum, Domino adjuvante, cœpimus naves octodecim. Saraceni vero multi occisi sunt, captivos autem fere sexcentos liberavimus. Ideo vobis venientibus necesse valde est ut talis in littoribus marinis fortitudo virorum remaneat, quorum virtute nostra omnia salva consistent, et ea quæ necdum deprædata sunt loca non prædentur.

CCCCXXXV.

AD ANGELBERTAM IMPERATRICEM.

Fragm. — (An. inc.)

Ad hoc usque malum crevit et incrassatum est, ut factione Ravennatis archiepiscopi Maurinus cum suis complicitibus, qui excommunicati et anathematizati a nobis jam sunt, Ravennam ingrederetur, et fidelium nostrorum res cum eis funditus raperet ac devastaret, adeo ut claves civitatis Ravennæ a Vestarario nostro violenter subtraheret et pro libitu suo, nescimus cujus auctoritate, ipsi archiepiscopo, quod nunquam factum fuisse recolitur, potestative concederet.

CCCCXXXVI.

AD EAMDEM.

Fragm. — (An. inc.)

Siquidem cum virtute Dei, melius quam Naletam, quæ nostra sunt defendemus et illorum in nullo penitus indigemus, dromones videlicet cum cæteris navibus constructas, et cætera vasa bellica et apparatus, quin potius et ipsos animos hominum præparantes, et adversus hostiles incursus indesinenter armantes.

CCCCXXXVII.

AD EAMDEM.

Fragm. — (An. inc.)

Excusat Joannem episcopum removeri de militia.
[Apud Grad., Decr. II, c. 23, q. 8, c. 1.]

Nimium [al. nimirum] certe veretur, et jure formidat contra professionem sui ordinis sæcularem militiam exercere : terram defendere, de præliis tractare, de armis terrenæ potestatis est.

CCCCXXXVIII.

AD DOMASOLEM DUCEM GLORIOSUM.

Fragm. — (Inc. an.)

Præterea devotionis tuæ studium exhortamur, ut contra marinos latrunculos, qui sub prætextu tui

nominis in Christicolos debacchantur, tanto vehementius accendatur, quanto illorum pravitate famam tui nominis obfuscatam fuisse cognoscis, quoniam licet credi possit quod, te nolente, illi navigantibus insidentur, tamen quia a te comprimi posse dicuntur, nisi eos compresseris, innoxios non haberis. Scriptum quippe est : Qui crimina, cum potest emendare non corrigit, ipse committit.

CCCCXXXIX.

AD ROSTAGNUM ARCHIEPISCOPUM ARELATENSEM.

Fragm. — (An. inc.)

Communione privetur sponsa, nisi raptorem deserere et ad sponsum suum redire voluerit.

Atho præsentium lator, dum in nostro servitio fideliter excubaret, quemdam virum feminam sibi desponsatam queritur rapuisse. Et ideo fraternitas tua, auctoritate nostra suffulta, suffraganeos suos episcopos præsentialiter convocet ; sicque unanimi sententia, si sponsam huic raptor non reddiderit, tam idem quam rapta, si ad sponsum pristinum remeare noluerit, omni communionem privetur.

CCCCXL.

AD SIGIBODUM ARCHIEPISCOPUM NARBONENSEM.

Fragm. — (An. inc.)

De examinanda causa cujusdam presbyteri.

Præsentium litterarum gerulus, sedi apostolicæ præsentatus, se presbyterum esse querula et lamentabili voce perhibuit, et a sanctitatis tuæ subjectæ dioceseos episcopis ab officio presbyteratus suspensum, et aliis quibusdam epitimiis usque ad speciale iudicium nostrum submissum, pro eo quod, inquit, facto tumultu, quidam se apprehensum, et a terra brachiis sublevatum, in proprium fratrem forti jactaverit impetu, ut idem germanus suus tanti operis male [leg. ponderis malo] impulsus in terram ruerit, et prostratus atque oppressus vitæ flatum violenter amiserit. Denique illi reverendi antistites, cum sibi, ut iste retulit, res in dubium veniret, utrum commisso sibi dudum carere necue, penitus debuisset officio, non ipsi hanc deliberare, sed nostro decerni et diffiniri iudicio voluerunt. Sed tunc hoc solemniter agerent, si primum ipsi plenario, et ex canonibus in causa presbyteri delegato iudicio, quatuor deputatis ex venerandis decretis et legibus personis præsentibus, hanc ventilassent et subtili examine discussissent ; ut ita facta scripto relatione, si quid dubium sibi seu difficile ingessisse videretur, nostrum super hoc more prisco decretum exposcerent. At ubi nobis et persona relatoris incognita, et nullo episcoporum scripto commendatio approbata est, et rursus ubi nulla est accusatoris objectio, nec accusati reatus confessio, nec fidelium comprobatio testium, nos nec illius solius narrationi creduli esse possumus, nec rursus in eum definitivam damnationis sententiam proferre valemus. Ergo saltem nunc fraternitas tua, metropolitani jure potita, ex episcopis sub se degentium vel vicinorum sex, una cum episcopo, cujus est iste parocciæ, sibi socians, tantum negotio subtili

ventilet discussionis ventilabro et invento, quod justum est canonicè decernat et communi fratrum censura diffiniat.

CCCXLI.

AD CENNEMOCUM EPISCOPUM VENETENSEM.

Fragm. — (An. inc.)

Quod sacerdos homicida non potest in sacerdotio manere.

Miror minus doctam scientiam tuam sacerdotem putare post perpetratum homicidium posse in sacerdotio ministrare; imo, quod est pejus, nobis suadere velle, ut ipsi tali præsumptioni præberemus assensum. Quis enim tam demens tamque perversi sensus tale quid æstimaret, vel post quantumcunque pœnitentiam concedendum, cum omni sit canonicæ disciplinæ contrarium? Debet ergo sacerdotio privatus lacrymarum fonte flagitium tam immane diluere, ut talibus saltem remediis curatus, salutis possit invenire suffragium.

CCCXLII.

AD EPISCOPOSO BRITANNIÆ.

(An. inc.)

De ordinatis ab Heclocaro abbate monachis.

(Mart. Thes. Anecd., tom. III, p. 867.)

JOANNES ROMANUS sedis episcopus, dilecto atque præclaro filio MAINO^a archiepiscopo, necnon et cæteris episcopis per Britanniam commanentibus [al. commorantibus] salutem et apostolicam benedictionem.

Notum sit vobis quomodo Resgallon et Corvili [al. rex Gallon et Gorvili] cum aliis monachis corpora apostolorum visitarunt, nostraque in præsentia venerunt. Postea de illorum ordinatione et aliorum monachorum per ignorantiam ab Heclocaro abbate accepta judicavimus, ut si ipse indigne usurpavit, qui [f. quod] a nemine illius officii ordinatore minime acceperit; istis tamen sit perfecta ordinatio, quia mali possunt bona bene ministrare, cum sint nequam. Ille vero amplius neminem ordinet quousque sit sui contagii nodis solutus. Hos suademus de cætero suam procurantes regulam, ut fratres ac filiis [f. filios] alacriter, omni occasione postposita, in suo monasterio recipiat, ad deinceps bonum erga se studium suosque subjectos faciat, ne sator zizaniorum sui gregis sit sparsor, et ne nostris iterum auribus de illo proclametur, ut regula rite judicabit, ed eis peragat.

CCCXLIII.

AD PETRUM EPISCOPUM.

Fragm. — (An. inc.)

Si Deodatus et Gregorius statuto jam tempore ad nos venire et omnia juste atque canonicè emendare contempserint, gravioribus eos perpetui anathematis vinculis innodabimus, eorumque scelera et excommunicationes, et anathemata scribentes ante sanctissimam beati Petri apostoli imaginem suspendemus ut omnibus de toto mundo ad limina apostolica ve-

^a Merito Turonenses in responsis ad objecta Dolensium asserunt scriptoris incuria nomen archiepiscopi irrepsisse in titulo hujus epistolæ; idque arguit

A nientibus illorum sit nota iniquitas et consortio sacræ Ecclesiæ videantur extranei.

CCCXLIV.

AD MARINUM ET PULCHAREM.

Fragm. — (An. inc.)

Sed et provinciis vestræ fidelitatis vobis injungimus, ut cum aliquibus navibus vestros milites robustissimos præsentialiter destinetis, qui quadraginta Saracenos, qui dudum Græcorum nostrorum navibus in mare fugere, quique postea terrestrium nostrorum militum exspoliati armis omnibus virtute, in montis Circel latibulis evaserunt, una cum nostris pedestribus apprehendant, quia nos pro tantillis Saracenis dromones nostros fatigare nolumus, dum de vobis confidere (sicut et ipsi velle dicimini) provocamur modis omnibus confidentes. Quia si obedientiæ vestræ constantiam et fidei puritatem cum virtutis efficacia circa S. R. E. amodo consenserimus, non solum de his tribus quibus vos ultra consuetudinem prægravatos dicitis, in quantum ratio postulaverit, levigabimus, verum etiam ut propriam S. Petri familiam terra marique vos tueri, Domino confortante, studebimus.

CCCXLV.

AD COZILEM COMITEM.

(An. inc.)

De illis qui, uxoris suis dimissis, ad alias nuptias transierint.

Porro eos qui uxores suas dimiserunt, vel ad alias, illis viventibus, nuptias migraverunt, tandiu eos cum consentaneis eorum excommunicamus, quousque, posterioribus remotis, priores pœnitendo receperint. Sicut enim nuptiæ a Deo, ita divortium a diabolo est, teste sancto Augustino, repertum. *Quod enim Deus conjunxit, homo non separet (Matth. xv)*: præcipue cum hæc pessima consuetudo ex paganorum more remanserit, quorum in talibus non alias nisi ipse diabolus erat magister et auctor.

Prudentissime vir, stude et prævide ut duo viri il qui uxores suas, quas Deus illis præparavit et junxit, abjecerunt, eas repellere minime permittantur: quia impium est ut qui, auctore Deo, legali fœdere copulati sunt, pro humano libitu, imo fraude diabolica separentur. *Idem commonitorium Paulo episcopo.* Prævide ut de separatione conjugatorum maximam curam geras, ita ut qui a susceptione sedis apostolicæ litterarum separati sunt, inculpate reducant priores uxores, injuncta convenienti pœnitentiâ, dimissis quas postmodum sunt sortiti. Quod si noluerint, extra ecclesiam facite una cum his qui eos in communione recipiunt, donec emendent quæ admissæ sunt.

CCCXLVI.

CONSTITUTIO DE JURE CARDINALIUM.

(An. inc.)

Itemque ex nostra præsentî constitutione bis in mense vel eo amplius, vel apud illum vel illum titulus sequentis, ubi Dolensis episcopus solum nominatur.

tulum, sive apud illam vel illam diaconiam, sive apud alias quaslibet ecclesias vos convenire mandamus. Et ob vestram et inferiorum clericorum vitam, et mores, et qualitates, et habitus vestium perscrutandum, et qualiter quilibet præpositi se erga subditos habeant, vel quod subditi suis præpositis non obediant, et ad quæque illicita amputanda, clericorum quoque et laicorum querimonias, quæ ad nostrum iudicium pertinent, quantum fieri potest, definiendas. Quippe cum sicut nostram mansuetudinem Moysi, ita et vestram fraternitatem septuaginta seniorum, qui sub eodem causarum negotia dijudicabant, vicissitudinem gerere, certum habeamus. Idem monasteria abbatibus viduata et abbatum, nostra præcedente conscientia, substitutionem his qui sunt inter nos [vos], vel fuerint monasticæ professionis, disponenda committimus.

Propter sollicitudinem autem ecclesiarum et clericorum eorundem disciplinam, sive laicorum querimonias definiendas, bis in hebdomada ad sacrosanctum palatium, juxta decreta prædecessoris nostri Leonis quarti, vos convenire mandamus.

Item sancimus de parochiis nostris, quantumque pontifici competit, pontificali beneficio vos in perpetuum possidere, et in principalibus ecclesiis juxta primatum vestræ consecrationis vicissim officia divina peragere, et earum oblationibus, salva semper cardinalium diaconorum prisca consuetudine, æqualiter participare, tam propter usum vestrum quam in ecclesiarum vestrarum luminarium concinnationes,

CCCXLVII.

Fragm. — (An. inc.)

Contra violatores domus Dei.

Si quis domum Dei violaverit et aliqua sine licentia illius, cui commissa esse dignoscitur, inde abstulerit, vel in ecclesiasticis personis injuriam fecerit, donec in conventu admonitus legitime satisfaciatur, sciat se communionem fore privatam. Si vero post secundam et tertiam conventionem coram episcopo satisfacere detrectaverit, sacrilegii periculo ab omnibus obnoxius teneatur, ita ut secundum Apostolum nemini fidelium misceatur.

CCCXLVIII.

AD THEIBERGAM ET ALDERICUM.

(An. inc.)

Illos hortatur ut Radulfo suam uxorem reddant.
(Apud Ivonem, viii, c. 118.)

Iterum iterumque vos admonemus, et præsentibus apostolatus nostri litteris hortamur feminam suam

^a Photius inter alias etiam hanc Joanni papæ affingens calumniam, quasi eadem cum Græcis de Spiritu sancti processione senserit, finxit hanc epistolam sub nomine Joannis papæ VIII ad se Photium scriptam de processione Spiritu sancti: quam vel ab ipso Photio, vel alio quodam effictam esse oportet. His enim temporibus in Romana Ecclesia absque aliqua ambiguitate usu receptum fuisse ut Spiritus sanctus a Patre Filioque procedere diceretur, post alias ea imprimis ratione manifeste probatur, quod Joannes sanctæ Romanæ Ecclesiæ diaconus, scribens ad hanc ipsum Joannem pontificem

Anobili viro Radulfo, sicut jam ante diximus, maturius restituere, et viro suo adhærere, secundum legem Domini facere: non enim lex ulla permittit quominus aut injectum sibi crimen confiteatur, aut certe a crimine injecto, legitima præmissa purgatione, solvatur. Quod neutrum agere illa delegerit, sed sola obstinatione usa, nulli satisfactioni dare operam procuraverit, liquet aperte quia crimen quod non deluit, procul dubio confitetur. Solæ namque, ut sanctus papa scribit Hormisda, examen effugiunt conscientiæ, quæ recta sunt non tenentes. Ergo si is, vel illa, vel vos, apostolatus nostri decretis obedire postponentes, sæpe memoratam feminam aut a viri potestate, aut a legis examine, nulla rationabili causa exstante, subducere amplius conati fueritis, tam illa quam vos, Theiberga et Alderice, quousque sanctioni nostræ pareatis, Dei omnipotentis iudicio, et beatorum Petri et Pauli apostolorum sententia principum, excommunicati et a corpore et sanguine Domini nostri Jesu Christi sitiis alienati, una cum fautoribus, consentaneis, sequacibus et complicibus vestris, utpote divinarum et humanarum legum violatores, sedisque apostolicæ decretorum contemptores, et toties ac multipliciter infractores.

CCCXLIV.

AD BERRARIUM ABBATEM.

Fragm. — (An. inc.)

De reverentia erga summos pontifices.

(Apud Ivonem iv, c. 102)

Absit a piis mentibus quid de Romani culminis Pontifice sinistrum sentire, cum beato Ennodio confessore Ticinensis urbis antistite scribente doceamur quia Deus omnipotens aut claros ad tanta fastigia erigit, aut certe quos elegit, illustrat.

CCCL.

AD PHOTIUM PATRIARCHAM CONSTANTINOPOLITANUM ^a.
(Anno 879-882.)

De processione Spiritus sancti.

JOANNES episcopus, servus servorum Dei, PHOTIO reverendissimo et catholico fratri patriarchæ Constantinopolitano, gratiam desuper ad opera salutarem.

Non ignoramus quod nonnulli eorum qui apud vos sunt, pacis parum studiosi, de nostra Ecclesia et de nobis ipsis, veritate neglecta, male loquuntur. Resque eo progressa est, ut parum absit quin tua fraternitas de nobis et de iis qui nobis sunt subditi male sentiat. Et illi quidem nacti sunt occasionem,

quatuor a se elaboratos libros Vitæ sancti Gregorii papæ, ubi agit de Dialogis ab eo scriptis, et in Græcum a Zacharia papa translatis, juste queritur quod cum ipse sanctus Gregorius in eis asseruerit disertis verbis Spiritum sanctum a Patre Filioque procedere, illi textum corruerint, allaque verba *Filioque* abradendo inde abstulerint; illos magnopere redarguens, quod audacter nimis sicut et impudenter sancti Gregorii textum ita corruerint: plane significans Romanam Ecclesiam nihil diversum ab ipso sancto Gregorio sentire, nec Joannem, ad quem scribit, ab ea sententia discrepare.

sicut etiam ego ipse affirmarem hujusmodi proposito satis congruam, veritas tamen ipsa, uti se habet, nullo pacto est adulterata neque vitata, ut procedens sermo rem manifestam faciat, et Deus hoc ipsum nobis suo testimonio desuper confirmabit. Verum illi, instar eorum qui vinum aqua miscent et adulterantur, nonnulla a seipsis falsa fingentes et excoGITantes adhibent. Oportet enim ut dæmon, qui ab initio mali opifex fuit et inter nos et Deum inimicitias posuit, ac deinde nostrum primum parentem a Dei amore separavit, et creatori suo inimicum illum constituit, etiam nunc aliquos habeat sui ministros, et hos ipsos impellat ut inter Ecclesias scandalum aliquod concitent.

Ego vero ad Deum potius auctorem et largitorem oculos dirigens, qui inimicitias etiam in cruce sua morti tradidit, pro viribus illorum hominum qui malis delectantur, ora obstruere contendo. Et hac de causa etiam antequam tua fraternitas aliquid mihi significet, hæc tibi manifesta facere decevi, ut de rebus nostris satis edoctus, aures minus præbeas iis qui contendere et conviciari student; sed ipsos rejicias potius et respuas; efficias præterea, ut alii eorum verbis fidem non adhibeant.

Novit etiam tua fraternitas quod cum nuper ad nos accessit qui a te missus est, et de sancto symbolo nos consuluit, quomodo invenit nos illud inconcussum, sicut nobis ab initio traditum est, conservare, neque aliquid addidisse vel detraxisse, cum recte noverimus quod eos qui talia facere audent, gravis condemnatio exspectat. Reverentiæ itaque tuæ iterum significamus, ut de hac additione in Symbolo (ex Filio scilicet) tibi satisfacimus, quod non solum hoc non dicimus, sed etiam quod eos qui principio hoc dicere sua insania ausi sunt, quasi transgressores divini verbi condemnamus, sicut theologiæ Christi Domini eversores, et sanctorum Patrum qui synodice convenientes sanctum Symbolum nobis tradiderunt, et una cum Juda illos collocamus, quod eadem ipsa quæ ille patrare non sunt veriti; non quia Dominicum corpus morti tradiderunt, sed quia Dei fideles, qui sunt ejus membra, schismate segregarunt et invicem diviserunt, et ita æterno igni illos præcipites dantes, et multo magis seipso, ut fecit prædictus Judas indignus Christi discipulus, suffocarunt.

Arbitramur autem tuam reverentiam recte nosse, cum sis sapiens et doctrina præditus, quod dum, ut reliqui nostri episcopi nobiscum idem sentiant, totis viribus contendimus, non mediocre id nobis molestiam affert. Et revera rem adeo gravem cito commutare, nullus id facere posset, licet brevi tempore ortum habuerit, nec multorum annorum spatio fuerit confirmata. Et hac de causa rationi congruum nobis visum est, ne violenter aliquis cogatur a vobis additionem illam dimittere, quam ipse adjecisse Symbolo se noverit, sed potius mansuetudine aliqua hujusmodi homines admonere, et paulatim a blasphemia revocare: *Pascite*, inquit summus apostolo-

rum Petrus, qui in vobis est gregem Dei, providentes non coacte, sed spontanee neque ut dominantes in cleris, sed forma facti gregis (1 Petr. v). Qui igitur ita nos accusant ac si talia mala sentiamus, non jure nos accusant. Tuam itaque decet fraternitatem neque scandalum aliquod adversus nos pati, neque a reliquo Ecclesiæ corpore proscindi, sed potius nobiscum fidei agones sustinere cum prudentia et longanimitate; et alios qui a veritate declinaverunt, ad illam amplectendam revocare, ut pro his eandem nobiscum mercedem recipias. Vale in Domino, reverendissime et catholice frater.

CCCLI.

AD QUEMDAM [f. ROMANUM ARCHIEP. RAVEN.].

(Anno 880.)

B Laudat ejus studium erga sedem apostolicam, eumque monet ut perseveret; pollicetur eum a se in amicorum numero referri: præcipit ut Romanus veniat.

Sicut nobis per litteras tuas et verbotenus per Deusedit religiosum presbyterum tuum mandasti, ut fidem et devotionem, quam circa sedem apostolicam habere debes, te velle toto conamine conservare indiminutam asseras, gratanter suscepimus. Unde te omnimodis admonemus, et his apostolicis litteris exhortamur, ut nulla inimicorum calliditas vel seductio amplius a nostra fidelitate quoquomodo valeat te remove; sed secundum sponsonis tuæ tenorem in ea devotissime permanere procures. Quapropter scito quia sine omni dubietate inter dilectos nostros te retinere volentes, volumus etiam *C* et præcipimus ut et pro necessitate Ecclesiæ, et pro tuæ causa utilitatis, Romæ ad nostram apostolicam præsentiam præsentialiter venire indubitanter procures, quia et statum sanctæ Ravennatis Ecclesiæ incolumem conservare, tuumque profectum et honorem perficere, auxiliante Domino, cupimus.

CCCLII.

AD ATHANASIIUM EPISCOPUM NEAPOLITANUM.

(Anno 881-882.)

Ab excommunicatione eum absolvit, et ministerio sacerdotali restituit, dummodo pactum cum Saracenis initum, sicut promiserat, rumpat, et ex eis aliquos, cæteris jugulatis, captos mittat, nec deinceps cum eis fœdus feriat.

ATHANASIO episcopo Neapolitano.

D Boni pastoris eximio informati exemplo, qui venit quærere et salvare quod perierat, tanto tempore te per devia errantem, abjecto Christi levi jugo, cum infidelibus jugum obscena cupiditate ducere non dubitarem, quamvis sero ad te percutientem reverti velle mandasti, alacriter recipimus, et inter cæteros consacerdotes nostros præcipue honorabilem cupimus retinere, prout ipse nos jam olim fecisse procul dubio reminisceris. Sed quia, tua exigente sceleris tanti audacia, sancti Spiritus judicio te a consortio nostro divini mysterii jure submovimus, nunc secundum preces tuas et relationem Petri venerabilis diaconi tui, si modo pactum quod hactenus cum

impiis Agarenis habuisti, manifesta devotione fregeris, et ab eorum nequissima societate conamine te separaveris; atque si præsentibus his missis nostris, Marino videlicet reverendissimo episcopo et sanctæ sedis nostro arcario, et Siconi egregio viro, majores Saracenorum quantos melius potes, quos nominatim quærimus, cum aliis omnibus ceperis, et jugulatis aliis, eos nobis direxeris, a vinculo excommunicationis absolvimus, et juxta præcedentem consuetudinem episcopale officium reddimus. Eo scilicet modo, vel tenore, ut captis et traditis antea, ut dictum est, Saracenis, deinceps nullum cum eis ulterius foedus quoquo modo inire præsumas. Nam si cum illis iterum pactum aliquod facere tentaveris, in eadem te excommunicatione manere sancimus, et auctoritate Dei omnipotentis et beati Petri apostolorum principis et nostra, omni episcopali honore te privandum et perpetuo anathemate damnandum esse decernimus.

CCCLIII.

AD GENEVENSES.

(Anno 882.)

Præcipit ut Optando episcopo a se consecrato obediant.

Clero et populo Genevensi.

Dilectissimi filii nostri Caroli imperatoris, principumque ipsius relatu, vestram Ecclesiam viduatam cognoscentes pastore, et propter dissensionem Bosonis, cui sociatus ejusdem sedis videtur metropolitanus, ordinationem electi vestri Optandi differre, auctoritate et potestate apostolica, secundum deprecationem ejusdem serenissimi imperatoris, filii scilicet nostri spiritualis Caroli atque optimatum ejus præcognita vestra omnium in eodem Optando electione, et qualiter idem serenissimus imperator eidem Ecclesiæ electionem perenniter de proprio clero donaverat, diutius ipsa Ecclesia ne viduata maneret pastore, consecravimus cum sancti Spiritus gratia; et ad regendum vos pastoraliter instructum direximus; quem devote et unanimiter suscipientes, obedientes ei, utpote proprio patri spirituali sitis in omnibus; salvo deinceps ejusdem loci privilegio antiquo propriæ metropolis, sancimus, ut quicumque huic nostræ auctoritati et apostolicæ deliberationi contra stare, aut resistere, aut non obedire, vel quod absit, electionem ipsius Ecclesiæ aliquando pervertere, aut infringere, quam, Deo propitio, justa est assecuta, tentaverit, gladio utique canonicæ disciplinæ noverit se ferendum, atque omnipotentis Dei vindictam non evasurum, si digna celeriter non fuerit satisfactione sanatus. Confirmamus denique, nostri apostolatus auctoritate, omnes res ejusdem Ecclesiæ pacifice ac quiete perpetually possidere. Et quicumque easdem invadere ac dissipare ausus fuerit, postquam a proprio episcopo canonicè admonitus fuerit, si secundum divinas et humanas leges non emendaverit, sub anathemate sit damnatus.

CCCLIV.

AD CAROLUM IMPERATOREM.

(Anno 882.)

Queritur multa bona Ecclesiæ Romanæ a Widone quodam marchione erepta; rogat ut Ecclesiam defendat, et ipsemet adjutor veniat.

Ad imperatorem CAROLUM.

Cum et ante susceptum imperium, et post Augustale sceptrum, per humilitatis vestræ ministerium vobis divinitus attributum, nos quidem multoties pro innumeris necessitatibus et multiplicibus oppressionibus, quas sancta mater vestra Romana Ecclesia quotidie patitur, ingenti mœrore afflicti reclamasset, nullum usque adhuc optatæ consolationis valuimus promereri auxilium vel defensionis solatium, quia de omnibus immobilibus rebus territorii sancti Petri, quas nobis Ravennæ consistentibus, in præsentia serenitatis vestræ uterque Wido marchio pro reinvestitione reddidit, nec unum recepimus locum; sed ipsi et homines eorum contra jus et æquitatem omnia retinere præsumunt: nam nobis in Pentapoli, hoc est in urbe Fano consistentibus, Adelardus reverendissimus episcopus, et deliciosus vester communisque fidelis, secundum vestræ delegationis jussum advenit, et ibi præfati Widonis et satellitum ejus, qui nostra violenter tulerunt ac retinuerunt, præsentiam præstolati sumus: quatenus vel inde omnis emendationis et justitiæ cœpto initio, per cæteras urbes, de omnibus juxta clementiæ vestræ decretum, recipiendo coram legato vestro justitias, pariter proficisceremur; sed illo semper fugiente iudicium, et vestræ jussionis piissimam sanctionem callide declinando, non veniente, quia nobis sine profectu aliquo per ipsas civitates quæ illorum gravamine apprimuntur, proficisci evidenter exstitit manifestum, direximus cum eodem Adelardo venerabili episcopo misso vestro Valpertum reverendissimum episcopum et fidelem consiliarum nostrum, qui vice nostra recepisset consolationem justitiæ nobis in vestra præsentia reddita, et legitimam de aliis omnibus emendationem, qui videlicet profecti nullum justitiæ fructum recipientes, ad nos reversi sunt. Nos autem omnem excusationis eorum defensionem penitus auferre volentes, decrevimus eos iterum mittere ut saltem postmodum recipere justitiam. Qui cum ad prædictum Widonem rursum abiissent, nihil emendationis nihilque redditionis ab eo vel sequacibus ejus, sicut promissum fuerat, recipere potuerunt. Sed ut antea sine aliquo ad nos effectu reversus est, et vester ad vos absque justitiæ contemplatione omnimodo rediit, quamvis ingenti et fideli devotione ipse confrater noster Adelardus ad justitiam exigendam multimodis decrasset. Nunc igitur pro certo scientes nullam nos de tantis malis posse habere justitiam et emendationem per quemlibet celsitudinis vestræ legatum, nisi per vestram imperialem præsentiam, rogamus obnixè, atque per omnipotentem Dominum adjuramus, ut ad defendendam et liberandam de manibus malefacto-

rum, qui eam atrociter devorant, Ecclesiam beati Petri apostolorum principis vobis commissam, quæ vos divino nutu adjuutores ac defensores in omnibus elegit habere, ipsi, Deo auxiliante, venire libenter dignemini: quatenus Dei et vestro solatio freta, quæ sua sunt valeat securiter retinere cum pristinae dignitatis decore, ad laudem et perpetuam animæ vestræ mercedem.

CCCLV.

AD RICCARDEM AUGUSTAM.

(Anno 882.)

Queritur nullam sibi contra Saracenorum excursiones opem ferri; rogat ut ab imperatore celeriter postulet auxilium: legatum suum commendat; petit det operam ut Angelberga ab exilio revocetur et Romam mittatur.

RICCARDI Augustæ, seu LIUTWARDO Vercellensi B episcopo, a paribus.

Tanta cordis angustia tantusque dolor et gemitus hinc et inde cum irriguis lacrymarum rivulis nostram ætatem quatit et conquassant, tantusque etiam luctus pro desolatione terræ istius, quam jam funditus a Christiani nominis inimicis et Deo odibilibus Saracenis deprædatam cernimus, nos afficit et intima nostra dissolvit, ut et somnus ab oculis et a gustu cibis effugiat. Etiam cum Jeremia decantare compellor: *Quis dabit capiti meo aquam? aut oculis meis fontem lacrymarum?* (Jer. IX) Et reliqua. Siquidem exspectavimus lucem, et ecce tenebras; quæsivimus adiutorium, et muris Urbis egredi non audemus. Nam ante vestrum Romam adventum qualiscunque nobis erat tranquillitas; modo vero intolerabilis et importabilis persecutionis exstat tempestas, quia neque spiritalis filius noster Augustus, neque alicujus alterius gentis homo nobis confert auxilium; et nisi divinitas summa subveniat, aut in desperationem aliquam lapsi (quia non solum duplum, sicut Dominus dicit, sed etiam triplum et quadruplum exercitum contra nos venire conspiciamus), ea quæ pacis sunt postulabimus. Aut certe non solum jugo illorum coacti subdemur, sed etiam ab eis capti impie jugulabimur. Quia, sicut scitis, sæpissime reclamavimus, et neque ipse Augustus, ut prætulimus, qualemcunque defensionem nobis exhibuit, neque homines civitatum nostrarum, qui contra Deum et contra omne privilegium nostrum ab alienigenis, ac si nostri non fuerint, detinentur, ad servitium sanctæ Romanæ Ecclesiæ faciendum, sicut solitum erat, ab eorundem alienigenarum jugo subtraxit. His ergo, charissima filia, clamoribus ac ululatibus nostris auditis, quia sapientibus loquimur, continuo propter Deum et propter sanctos ejus apostolos, jam dicto spiritali filio nostro Augusto, flexo poplite, suggere ut, omnibus omnino necessitatibus aut omissis aut certe suspensis, sanctæ matris suæ calamitati subveniat, et conculcationem, imo perditionem illius advertens, antequam pereamus, citissimum conferat adiutorium, aut congruum sine mora donet consilium: quia vita nostra nobis non prodest, et in extremo positi, etiamsi non optaremus, jam mors se palam

A præbet videndam. Præsenti quoque Petro venerabili episcopo valde nobis credulo, et dilectissimo familiari nostro summam benevolentiam, quæsumus, exhibe, et ei utpote a tanta sede directo, familiaritatis locum apud domnum Augustum congruentissimum tribue, atque ut nobismetipsis illi credulitatem penitus adhibens, ea quæ verbis retulerit, studio tuo operibus impleantur. Sed et hoc deprecamur ut pro eo quod apud Ticinum eodem episcopo ea quæ nos illi commiseramus, ipsi Augusto necessaria exponente, animus illius contra hunc est turbatus, tua instantia quidquid illud fuerit omnino aboleatur. Et ad hunc eundem episcopum pie tractandum imperialis animus placabilis in cunctis reddatur, quoniam non hæc contumaciter aut contra Augustalem dignitatem protulerat, sed zelo Dei ductus ad nos inefficax redire nolebat. Postremo Christi cultrix et Deo amabilis filia, moleste accipimus, cur multoties deprecantes, spiritali filiæ nostræ Angelbergæ nullam per vos potuimus conferre medelam, ut dissoluto exsilio, ad sanctum Petrum apostolum eam reducere faceremus. Unde etiam nunc summopere deprecamur ut pro amore Dei et nostro sancta sedes apostolica de hoc honoretur. Et sicut jam dictus Augustus vobiscum pariter repromisit, a captivitate, qua frustra tenetur, salva et incolumis reducatur. Quia postquam nobis quibus fuerat commendata et defensioni sancti Petri apostoli protectoris sui commissa, reddita fuerit, nullam de ea sinistram quis habere poterit, crede nobis, suspicionem.

CCCLVI.

(Anno 882.)

Privilegium pro monasterio Montis Cassini.

[Apud Cocquillin., Bull. Dipl., etc., ampl. Collect., tom. I, p. 881.]

JOANNES episcopus, servus servorum Dei, BERTHARIO religioso abbati venerabili monasterio B. Benedicti confessoris Christi sito in Cassino et per eum in eodem venerabili monasterio, vel cunctæque congregationi in perpetuum.

Quoniam semper sunt concedenda quæ rationalibus congruunt desideriis, oportet ut devotio in me petitoris humiliter acquisita in privilegiis concedendis minime denegetur a nostra clementia. Igitur quia petisti a nobis quatenus monasterium B. Benedicti confessoris Christi, atque monasterium B. Scholasticæ, seu et ecclesiæ per singula loca constructæ, prædictis monasteriis pertinentes, privilegiis apostolicæ sedis infulis decorentur, ut sub jurisdictione sanctæ cui, Deo auctore, deservimus Ecclesiæ constitutæ, nullius ecclesiæ: cujuslibet episcoporum ditionibus promoveatur, vel submittatur. Pro qua re piis desideriis faventes, hac nostra auctoritate id quod exposcitur petitione, mancipamus: et ideo omnem cujuslibet ecclesiæ episcopum in præfata venerabilia loca quæcumque ditionem habere omnino prohibemus, præter ad sedem nostram apostolicam habeant respectum amodo et deinceps; amissa videlicet omni novitate, et violentia, ex

eisdem monasteriis prohibemus, ita ut nisi quis ab abbate monasterii fuerit invitatus, neque ad consecrandam ecclesiam, vel sacerdotem de præfatis monasteriis sive in omnibus cellis ibidem pertinentibus præsumat ingredi, nec missarum ibidem solemnitatem quispiam episcoporum præsumat omnimodo inibi celebrare. Ad consecrandam autem ecclesiam in suis monasteriis, vel cellis quemcunque episcoporum invitare voluerit ipse abbas, sine cujuslibet impedimento concedimus potestatem, ut profecto juxta id, quod subjecti apostolicis privilegiis consistunt, inconcusse donanda permaneant, sed ei constituentes una cum sacerdotali nostro collegio, per hoc nostrum apostolicum privilegium omnia loca, quæ aliquando possederunt ipsa venerabilia monasteria, vel quæ nunc eis, aut postea a fidelibus hominibus fuerint concessa per diversa territoria, nulli castaldio, aut episcopis, non magno, vel parvo homini per quodlibet ingenium, aut argumentum liceat quomodocunque easdem invadere possessiones, vel censum tollere, aut affligere monachos, vel servos, vel magis ad laudem Christi, et æternam memoriam largitoris perpetuo tempore maneat intacta ab omnibus, et deserviant solummodo S. matri Romanæ Ecclesiæ, et nullus præsul audeat amodo in his monachis subjectis S. nostræ Ecclesiæ quamcunque ingerere excommunicationem: sed liceat illis ita peragere deficos cursus, sicut a B. Benedicto per illius regulam habent in mandatis; atque constituimus, ut quispiam præsul non præsumat segregare ab ecclesiis ex dictis monasteriis pertinentibus populum ibidem percurrentem ad audiendum verbum Dei, et confitentem delicta sua tam in urbibus quam extra urbes, sed canonicè ingrediat ibidem, et egrediat devotus populus, et ecclesiæ vestris ditionibus subditæ omnibus pateant. Sed quoniam pastoralis propterea nobis a Deo cura commissa est, ut viriles in omnibus existere, mereamur, ne quod absit, Dominicæ oves luporum moribus lanientur; qua de re omnibus venerabilibus episcopis, presbyteris, abbatibus, diaconibus, ducibus, tribunis, comitibus, castaldiis, actoribus, vel cunctis Deum timentibus nostræ apostolicæ auctoritatis, sub contestatione beati Petri principis apostolorum, præcipimus, atque jubemus; qui ligandi, solvendique peccata hominum in cælo, ac terra a Domino Deo nostro potestatem perceperit, cujus nos gratia divina vices gerimus, statutum est, per hujus decreti nostri paginam interdiciamus omnibus omnino cujuslibet Ecclesiæ præsulibus, vel cujuscunque dignitatis præditis potestate sub anathematis interdictione, et æterni judicii obligatione, qui ei præsumperit præsentii constitutioni a nobis præfati monasterii indulti quolibet modo existere temerato. Scriptum per manum Anastasii notarii regionarii, et scriiniarii S. Romanæ Ecclesiæ in mense Maii, indictione quinta decima. Bene valete. Undecimo Kal. Junii per manus Walperti, episcopi S. Portuensis Ecclesiæ, anno, Deo propitio, pontifi-

acatus domini nostri Joannis summi pontificis, et universalis papæ, in sacratissima sede B. Petri apostoli, decimo, imperante domno piissimo Carolo Augusto a Deo coronato magno imperatore anno secundo.

CCCLVII.

AD ARCHIEPISCOPUM VIENNENSEM.

(Anno 882.)

Arguit quod, detruso in carcerem Optando episcopo, alium in Ecclesia Genevensi constituerit; præcipit ut illum sedi suæ restituit, atque ad synodum veniat ad diluenda ea quæ ipsi objiciebantur.

OTERAMO Viennensi archiepiscopo.

Relatu veraci didicimus sanctimoniam vestram in Genevensi Ecclesia episcopum consecrasset, cui nos, necessaria temporum qualitate perspecta, jam primum clericis ejusdem Ecclesiæ suggerentibus, auctoritate apostolica præfeceramus episcopum nomine Optandum. Quo audito, audaciam et temeritatem vestram nimium admirantes, ob id maxime turbati sumus, eo quod non solum super ordinationem nostram obices manus habuistis, sed etiam ad contemptum et injuriam sedis apostolicæ præfatum episcopum turpiter capientes, arcta custodia retrusistis, et, rebus omnibusque suppellectilibus ejus direptis, [f. add. contra vel per] ministerium vestrum, quod nulli Christiano licet, sacerdotem Domini tetro carcere maceratis: non habentes præ oculis scilicet, quod sacerdotes Domini sacra Scriptura aliquando deos, aliquando angelos nominet, et qui eos tangit, tangat pupillam oculi Domini (Zach. II). Quapropter auctoritate Dei omnipotentis et principum apostolorum Petri et Pauli, simulque nostra, vobis præcipimus ut accepta hac nostra epistola, aut quoquomodo tenore illius audito, si intra octo dierum spatia jam dictum episcopum propriæ sedi proprioque honori et dignitati reddere restituereque contempseritis, a corpore et sanguine Domini nostri Jesu Christi, cum omnibus vobis in hoc facto faventibus, sitis prorsus extorres, quousque juxta hanc nostram dispositionem perficere satageritis. Et quia alia multa vobis a quibusdam objiciuntur quæ synodali discussione sunt corrigenda, decernimus ut, omni excusatione remota, VIII Kalendas Octobris futuræ primæ indictionis Romam ad synodum occurrere non omittatis, ut tunc et de vobis objectis rationem reddatis, et si adversus eundem episcopum a nobis consecratum aliquam querimoniam habetis, canonico valeamus, quidquid illud fuerit, Deo juvante, libramine diffinire. Hoc etiam scientes quia si ad eandem synodum præfato tempore venire distuleritis, canonicæ in vos censuram sententiæ proferemus.

CCCLVIII.

AD OTERAMUM VIENNENSEM ARCHIEPISCOPI

(Anno 882.)

Agit de Optando episcopo, ejus litteris respondens, et de litteris quas scribit episcopo Mauriennensi ut Romam veniat.

OTERAMO Viennensi archiepiscopo.

Susceptis vestræ fraternitatis apicibus, quod essent alicujus, ut ita dixerim, rectitudinis zelo com-

positi, satis ubertim cognovimus: quia post plurima in Ecclesia Genevensi fatemini vos consecrasse episcopum, et ut quidam Optandus nomine clericus advenerit, qui in Ecclesia Genevensi nec baptizatus, clericatus, ordinatus, acclamatus, eruditus unquam exstiterat, Ecclesiam illam invaserit. Multipliciter admiramur cur illa nescire vos dicitis, quæ totus, ut remur, Occidens non ignorat. Præcedenti siquidem tempore nobis fuerat nuntiatum ut vos in eadem Ecclesia episcopum consecrare contempseritis; ideo nos, necessaria temporum qualitate perspecta, clericis ejusdem Ecclesiæ suggerentibus, auctoritate apostolica illic episcopum Optandum nomine consecravimus. Qua ex re non bene vos fecisse probamus, qui super ordinationem nostram obices manus habuistis, et alterum episcopum ibidem ordinastis. De hoc autem quod dicitis, quod ipse Optandus in Genevensi Ecclesia nec baptizatus, clericatus, ordinatus, acclamatus, eruditus unquam exstiterit, interim silentio est tegendum, eo quod, cum charitate vestra loquamur, nihil horum habens vestra sanctitas in Viennensi Ecclesia est consecrata. Verumtamen, his interim necessario prætermissis, sanctimoniam vestram jam dudum litteris nostris monuimus ut quia quædam vobis a quibusdam objiciuntur, quæ synodali discussione sunt corrigenda, omni excusatione remota, viii Kalendas Octobris futuræ indictionis primæ Romam ad synodum occurrere studeretis. Nihilominus autem iterato decernimus ut eodem tempore apostolicæ nostræ vos præsentetis præsentia, ut tunc et de vobis objectis rationem reddatis, et si adversus eundem episcopum a nobis consecratum aliquam querelam habetis, nos canonico valeamus, quidquid illud fuerit, Deo juvante, libramine diffinire. Cæterum Adalberto Mauriennensi Ecclesiæ episcopo auctoritatis nostræ litteras, quas ei a vobis dari mandamus, ecce transmisimus, ut cum Barnerio Gratianopolitanæ sedis episcopo eodem viii Kalendas Octobris Romam occurrat, quatenus de iis quæ irreverenter tam temerario ausu sui ordinis immemor intulit, coram nobis plenissimam satisfactionem exhibeat.

CCCLIX.

AD ADALBERTUM EPISCOPUM MAURIENNÆ.
(Anno 882.)

Jubet ut Romam veniat cum episcopo Gratianopolitano, quem ignominiose tractarat.

ADALBERTO Mauriennensi episcopo.

Tristis nos nuntius percudit quando audivimus quod tu, ordinis tui immemor, Barnerium Gratianopolitanæ sedis episcopum, hora matutinali in ecclesia sua publice agentem officium, cum multitudine populi, et armata manu, absque reverentia ecclesiam ingrediens, nulla ab eo tibi culpa illata, irreverenter tecum abstuleris, et ignominiose tractaveris; quod tantum nobis displicuit, quantum te temere egisse modis omnibus comprobamus. Ideoque nostri apostolatus litteris tibi mandamus ut, omni excusatione remota, viii Kalendas Octobris futuræ primæ in-

ditionis cum eodem Barnerio venerabili episcopo Romam ad synodum nostram occurras, ut quidquid inter vos litigii est exortum nos æquitatis regula potiti, Deo juvante, discutere et diffinire aliquo modo studeamus.

CCCLX.

AD ANSELMUM ARCHIEPISCOPUM MEDIOLANENSEM.
(Anno 882.)

Mediolanensis Ecclesiæ privilegia confirmat; hortatur ut in Romanam Ecclesiam sit fidelis: narrat Saracenorum et iniquorum Christianorum injurias; rogat ut pro Ecclesia ad Dominum preces effundat.

ANSELMO archiepiscopo sanctæ Mediolanensis Ecclesiæ.

Privilegii sane auctoritati Ecclesiæ vestræ, eo quo fraternitas tua poposcit modo, pernecessario apostolica fulti moderatione, libenti annuimus animi charitate, simulque optantes ut semper ea quæ ad animæ tuæ salvationem tuique gregis custodiam sunt congrua atque proficua, Spiritus sancti infusione postulare, quærere atque operari... ne desinas. Ut ante tribunal æterni iudicis dignam, gratia suæ misericordiæ cooperante, ratiocinationem positurus, meritum perennis vitæ cum sanctis accipias. Inter hæc dilectionem tuæ fraternitatis hortamur, sanctæ matris vestræ Romanæ Ecclesiæ, quæ pro vobis omnibus vestraque salute, utpote caput pro suis membris, laborare non cessat, toto adnixu mentis, omnique devotione fideles existere omnimodis satagatis; quoniam in ejus exaltatione, atque incolumitate, sicut ab initio, erit omnium vestrum apud Deum et præsens sæculum certa salvatio. Nos enim in hac terra tam paganorum quam malignantium Christianorum tantas persecutiones patimur ut has verbis explicare non valeamus. Inter innumeras rapinas, deprædationes et mala quamplurima, ad augmentum doloris nostri quidam sceleratus Longobardus nomine, homo Widonis marchionis, octoginta tres homines cepit: manibus singulis detruncatis, apud Narniensem civitatem, plures ex tali sunt incisione sine mora perempti. Unde communi ad Dominum prece supplicamus ut ille Ecclesiam suam sanctam de præsentibus malis eripiat, pro qua unigenito Filio suo non pepercit. Nosque pastorali sollicitudine baculum in manibus tenentes, lupis rapacibus, Domino protegente, resistere non omitemus. Data mense Augusto, indictione xii [f. xv].

CCCLXI.

(Anno 882.)

AD ROMANUM ARCHIEPISCOPUM RAVENNATEM.

Præcipit ut Joannem diaconum benigne excipiat, et res ei ablatas restituat.

Reverendissimo et sanctissimo ROMANO archiepiscopo Ravennati.

Quia non solum tempore ordinationis tuæ te scriptis et verbis secundum morem et canonicam sanctionem, sed postmodum sæpissime admonere curavimus, quatenus cum filiis, et membris sanctæ tuæ Ecclesiæ tranquilla semper mente et alacri affectione, ceu idoneus pastor existeres, valde mira-

mur dilectionem tuam, monita nostra contemnendo, eis præjudicium, sicut audivimus, et importabiles gravitates inferre minime recusasse. Unde iterum præsentati apostolatus nostri statuto jubemus fraternitati tuæ ut huic Joanni venerabili diacono commendato nostro, qui ad nostram apostolicam sedem confugiens, præjudicium a te sibi illatum ferre non valens, nostro se petiit apostolico præsidio adjuvari, et ideo nos solita misericordia moti, apostolica tibi benignitate mandamus, ut eum in gremio sanctæ tuæ Ecclesiæ benigne recipias, et monasteria seu res quas illi tui occupaverunt ministri, libenti animo pro amore nostro præsentialiter reddas. Et quæ de ipsis rebus a tuis ablata sunt, modis omnibus restituas. Ita sane ut ei deinceps ad nostras apostolicas aures non sit necessarium reclamare. Simili etiam modo tibi mandamus ut Joanni venerabili diacono et chartulario Ecclesiæ tuæ monasterium sancti Martini, quod a te dudum promeruit obtinere, de præsentati reddere studeas : nos enim hoc patienter ad te peragendum apostolica benignitate direximus. Verum, quod non credimus, si aliter fraternitas tua peregerit, hi nostri legati, nostra apostolica fulti auctoritate, hoc procul dubio explere studebunt, quoniam justum fore decernimus, eos post longa obsequia et diuturna servitia, quæ in sancta Ravennate Ecclesia peregerunt, non solum digna remuneratione non privari, sed potius acquisitis beneficiis alacriter gratulari ; et in hoc ita peragat fraternitas tua ut quæ a nobis pro Ecclesiæ tuæ utilitate petieris, assequi omnimodis valeas. Data quinto Kalendas Septembris, indictione decima quinta.

CCCLXII.

AD CLERUM RAVENNATFM.

(Anno 882.)

Ut Maimbertum quemdam, quem alias ab Ecclesia Ravennate expelli jusserat, comprehensum, legato suo et Joanni duci tradant, et ad se mittendum curent.

Omnibus venerabilibus sacerdotibus, seu subdiaconibus, et universo clero sanctæ Ravennatis Ecclesiæ.

Audita sæpe afflictione atque miseria vestra, quam per Maimbertum Bononiensem clericum incessanter patimini, jam pridem nostram apostolicam misimus vobis auctoritatem per Joannem diaconum et chartularium, præcipientes ut omnes uno animo constanctique devotione prædictum Maimbertum, manifestissimum zizaniorum seminatore, ab archiepiscopo et a vestra sancta Ecclesia, tanquam ovem morbidam, expelleretis ; sed miramur quare hactenus a vobis hoc prætermissum sit ; unde nunc vestra iterum petitione moti, et divino amore succensi, per hanc nostram apostolicam auctoritatem vobis omnibus præcipimus ut, relecta priori epistola, unanimiter juncti et cum præsentati misso nostro fideliter conglobati, eundem Maimbertum adversatorem vestrum, si sponte venire ad nos contempserit, vel in

A partem aliquam ire voluerit, audacter comprehendere studeatis ; et huic misso nostro seu et Joanni duci fideli nostro ad exigendum ab eo, secundum nostram jussionem, nobis ad deducendum contradite, sicut gratiam Dei omnipotentis sanctorumque apostolorum et nostram vultis habere. Nam si quis vestrum in hoc se quoquo modo subtrahens pro cujuslibet rei gratia hanc nostram jussionem pro statu et pace sanctæ Ravennatis Ecclesiæ directam gratanter ad effectum perducere contempserit, et ex Dei omnipotentis, sanctorumque apostolorum Petri et Pauli, et ex nostra apostolica auctoritate a vino et cocto, etiam et a proprio ministerio suspensus maneat usque ad nostram præsentiam. Data v Kal. Septembris, indictione xv.

CCCLXIII.

AD JOANNEM MARTINUM, ETC.

(Anno 882.)

Ejusdem argumenti.

JOANNES episcopus, servus servorum Dei, MARTINO, JOANNI, seu DEMETRIO, atque ROMANO gloriosis ducibus, necnon et aliis fidelibus nostris.

Omnium vestrum noscat fidelitas quia sæpissime Romanum archiepiscopum tam per venerabiles episcopos quamque etiam nostris apostolicis litteris admonuimus, ut Maimbertum Bononiensem clericum a sua superstitiosissima familiaritate separasset, et ad propriam Ecclesiam, ut canonicum est, remisisset, et ipse Maimbertus multoties, ut recederet, a nobis est protestatus : sed minime acquiescere nostræ voluerunt apostolicæ jussioni. Idcirco præcipientes præcipimus, et jubentes expresse jubemus, ut unanimes juncti simul cum isto fideli misso nostro, omni occasione postposita et dilatione remota, prædictum Maimbertum comprehendatis, et vi coactum ab archiepiscopo separetis, et huic nostro misso simul et Joanni duci ad exigendum secundum nostram apostolicam auctoritatem validissime contradatis. Quod si in hoc negligentes vos, quorum nomina suprascripta sunt, fueritis, et ipse quoquomodo effugerit a vobis, scitote per unumquemque vestrum centum aureos dabitur nostræ parti. Insuper ex Dei omnipotentis sanctorumque apostolorum Petri et Pauli, et nostra apostolica auctoritate a vino et cocto suspensi manete usque ad nostram præsentiam : cæteri vero, si hoc quod jubemus assequi noluerint, aut subtrahendo quoquo modo se huc illuc diverterint, et usque ad effectum rei non perseveraverint, superiori excommunicationi subiaceant. Data v Kalendas Septembris, indictione xv.

CCCLXIV.

AD JOANNEM DUCEM.

(Anno 882.)

Ut Maimbertum captum ad se ducat, et mulieres quæ apud ipsum sunt detineat, et Romano archiepiscopo epistolam deferendam curet.

JOANNI duci delicioso fideli seu et misso nostro.

Gratulos nos non modice credas eo quod fidelitas tua erga sanctam Romanam Ecclesiam nostrum

que apostolatum constanter reperimus [reperitur] A vigilare; et ideo per hos nostros apostolicos apices tuæ fidelitati jubemus ut de Maimberto modis omnibus sicut misisti, pariter cum isto misso nostro ex- plere decertes, ut nullo modo effugere possit, sed separatum ab archiepiscopo vi coactum, postquam ab eo omnia sua constanter exegeritis, ad nostram præsentiam districtum deducere studetote: etiam et illas mulieres, quas nunc in sua mansione collectas detinet, in nostro rectorio retinere jubemus usque ad nostram notitiam. Epistolam vero quam Romano archiepiscopo mittimus, ut res aut monasteria quæ ab isto, Joanne diacono fidele commendato nostro quoquo modo occupavit, restituere, et investire eum in omnibus studeat, et quæ de rebus ejus sui famuli abstulerunt, reddere huic per omnia faciat, ipsi archiepiscopo deportate, et coram sacerdotibus et judicibus ipsam legere facite; similiter autem et monasterium sancti Martini secundum nostram jussionem, Joanni diacono et chartulario pro nostro reddat amore. Nam et mansionem quam Maimbertus ab ipso diacono suam per fraudulentiam abstulit, simili modo eum cum Petro nepote suo investire studete. Data ut supra, indictione xv.

CCCLXV.

AD CAROLUM IMPERATOREM.

(Anno 882.)

Gratulatur de ejus incolunitate; gaudet ipsum ad- venturum esse statim in Italiam: hortatur ut mature Romanæ Ecclesiæ auxilio veniat, et Guidonem prædatorem ab Ecclesiæ finibus ejici jubeat.

CAROLO imperatori.

Cognoscentes de vestra incolunitate, quod oppido videbamus, Deo gratias egimus, et ut magis ac magis prosperitatibus et innumeris gaudiis fulciamini, majestatem divinam supplicibus votis omnimodo flagitavimus, scientes et multis experimentis discentes quod vos eadem vultis, eadem quippe desideratis: quoniam si nostra mediocritas vigerit, et valuerit illa, vos facturos hortabitur, unde et sanctæ Romanæ Ecclesiæ matris vestræ defensio augmentabitur, et vobis copiosa merces in cælo in perpetuum reponetur. Quod autem dicitis, ut, postpositis cæteris curis, iter vestrum in Italiam recto itinere ordinatum habeatis, grato animo suscepimus, et ut utinam non solum Papiæ, verum etiam propius essetis, necessitas maxima deposcit. Ideoque quod cœpistis, cum Dei adjutorio, velociter vestra sublimitas perficere studeat, et ad defensionem, imo securitatem sanctæ matris vestræ Romanæ Ecclesiæ, sicut dixistis, cæteris curis postpositis, mente et brachio potenter occurrat, quia quantis affligatur et conculcetur angustiis, jam dicere non valemus. Cæterum de Widone Rabia, invasore scilicet et rapaci, vestra gloria subveniat, et eum de finibus nostris, ut aliquantulum populus noster relevari valeat, ejicere modis omnibus jubeatis. Data III Idus Novembris.

CCCLXVI.

AD LIUTWARDUM EPISCOPUM:

(Anno 882.)

Gratias agit quod dederit operam ut imperator in Italiam ad Ecclesiæ defensionem veniret.

LIUTWARDO episcopo.

Studio tuo (quod cum spiritali filia nostra imperatrice, sicut asseris, ut dominus imperator pro defensione sanctæ Romanæ Ecclesiæ ingrederetur Italiam, habuisti) gratias agimus, et ut quod deest stet, quod te minimè latet, tua instantia perficiat, multum hortamur: quia tantum nobis necesse est, quantum docere non valemus. Unde ita age ut tibi magis ac magis gratias referamus et in temporalibus commodis vicissitudinem reddere invitemur.

CCCLXVII.

AD OMNES EPISCOPOS:

(Anno 879-882.)

Monet ut sua instituta observent, justeque judicent.

Allocutio pontificis et exhortatio ad omnes episcopos.

Ecce, sanctissimi sacerdotes, præmissis precibus fraternitatem vestram cum pia exhortatione convenio, et per divinum nomen obtestor, ut ea quæ a nobis de Deo et de sacris ordinibus vel sanctis moribus fuerint dicta, cum omni pietate suscipiatis, et cum summa reverentia perficere intendatis. Quod si forsitan aliquis vestrum aliter quam dicta fuerint, senserit, sine aliquo scrupulo contentiones in nostrorum omnium copulatione, ea ipsa de quibus dubitaverit conferenda reducat, qualiter, Deo auxiliante, aut doceri possit aut doceat. Deinde simul vos obtestatione conjuro vel obsecro ut nullus vestrum in judicando aut personam accipiat, aut quolibet favore, vel munere pulsatus, a justo judicio scienter avertatur aut discedat; sed tota pietate eum qui cœtui nostro se judicandum intulerit, retractate. Ut nec discordans contentio ad subversionem justitiæ inter nos locum inveniat, nec in perquirenda æquitate vigor vestri ordinis vel sollicitudo tepescat. Data ut supra.

CCCLXVIII.

AD CAROLUM REGEM.

(Anno incerto.)

Embolum ut Carlomannum regem in Ecclesiæ Romanæ dilectione confirmet.

Jam quod te, charissime fili, tantæ devotionis D tantæque fidelitatis erga vestræ matris Romanæ Ecclesiæ pontificium esse videmus, tanquam utero natum monentes rogamus, flagitantes hortamur, ut pro amore apostolorum principum, quasi vestro proprio consulto, nec repræsentaliter, Carolomanno glorioso regi mittatis, consilium dantes ut antiquos honorans amicos, fruens charitate, ad parentum consilium redeat, et de epistolis quas illi ex maritimo itinere remisimus, respondeat, et Romanam Ecclesiam, quæ vobis utrisque omnibus decus regale et imperiale intulit, venerando diligat, mittens præsentialiter ipsis anathematizatis Lamberto et Adalberto. Data ut supra.

CCCLXIX.

AD MICHAELM REGEM BULGARORUM.

JOANNES VIII MICHAELI regi Bulgarorum.

Si ab his quos excommunicatos habebamus sacramenta quæcunque suscipitis, constat quia idololatricam, non ut catholici essetis, sed ut schismatici efficeremini, deliquisse [*pro dereliquisse*, HARD.] videmini.

CCCLXX.

AD LUITBERTUM ARCHIEPISCOPUM MAGONTINUM.

Fragm. — (An. inc.)

Engeltrudem uxorem Bosonis noveris non solum excommunicatione quæ a fraterna societate separat, sed et anathemate, quod ab ipso corpore Christi, quod est Ecclesia, recidit, crebro percussam.

CCCLXXI.

AD LUDOVICUM IMPERATOREM.

Fragm. — (An. inc.)

Vides, fili charissime, quia quod contra leges accipitur, per leges dissolvi meretur. Item, facientis procul dubio culpam habet, qui quod potest corrigere, negligit emendare. Scriptum quippe est: Non solum qui faciunt, sed etiam qui consentiunt, participes judicantur. Et libat Domino prospera, qui ab afflictis pellit adversa. Et negligere, cum possis deturbare perversos, nihil aliud est quam fovere; nec caret scrupulo consentionis occultæ, qui manifesto facinori desinit obviare. Et probat odisse se vitia, qui condemnat errantes; nec relinquit sibi locum deviandi, qui non pepererit excedenti. Et primus innocentiae gradus est odisse nefanda. Et latum pandit delinquentibus aditum, qui jungit cum pravitate consensum; et nihil prodest alicui non puniri proprio, qui puniendus est alieno peccato.

CCCLXXII.

AD EPISCOPOS BRITANNIÆ.

(Anno incerto.)

Quid agendum de monachis ab abbate suo ordinatis.

JOANNES servus servorum Dei, episcopus Romanæ urbis, in Christo fratribus universis episcopis ceterioris Britanniae salutem in Christo et visitationem.

Quia vicæ B. Petri apostolorum principis, Domino Deo dignante, omnium Ecclesiarum curam suscepimus, sollicitudinem, quæ uniuscujusque fides integra in eodem Domino reservetur, sine qua nullus ei placere valebit, ubique severe observare debemus; ideoque notum sit vobis quoniam charissimus frater noster Arduinus, sanctæ Turonensis Ecclesiæ archiepiscopus, veniens ad apostolorum limina Romam oratum, interpellavit nos quod jura sui archiepiscopatus, quæ ab antiquis temporibus per decreta sanctorum pontificum sanctæ Romanæ matris Ecclesiæ suis prædecessoribus concessa et confirmata fuerunt, a vestro archiepiscopo et suis decessoribus per violentiam et paganorum Nortmannorum contrarietatem sublata videntur; unde apostolica auctoritate vobis sciatis interdictum ne illius ullo modo juri resistatis

A deinceps, de omnibus quæ prædictus archiepiscopus confirmat archiepiscopatu sui pertinere debere, quousque ille vester archiepiscopus, aut aliquis ex vobis cum Arduino archiepiscopo, sive cum suo suffraganeo, vel alio fideli misso ad nostram sanctam matrem Ecclesiam veniat, ut ibi præcognitis causis inter vos et illum, quod æquum comprobabimus diffiniatur ad laudem Dei et Domini nostri Jesu Christi. Quod si aliter quam jubemus contra voluntatem ejus feceritis, cognoscatis vosmetipsos Dei et B. Petri principis apostolorum, per nostræ humilitatis mandatum, auctoritate excommunicatos ab omni ecclesiastico officio.

Quod si vere debitam reverentiam circa prædictum fratrem nostrum observare vobis placuerit, secundum justitiæ decretum a sancta Romana Ecclesia statutum, permaneatis cum Dei benedictione in unitate nostræ catholicæ communionis. Interea sciant regni vestri homines, maxime nobiliores, nominatim Berengarius, et filius suus Conanus, et Hoel cum fratre suo Guerech, cum cæteris majoribus, ut si contra justitiam inobedientes fuerint huic nostræ jussioni, et contrarii seu rebelles extiterint prædicto fratri nostro Turonensi episcopo, sint et ipsi excommunicati et nostra benedictione apostolica privati.

CCCLXXIII.

AD QUEM DAM.

Administratores secularium dignitatum, qui ad ecclesiarum, ac viduarum tuitionem rapaciumque refrænationem sunt constituti, quotiens ab ecclesiasticis viris conventi fuerint, eorum querimonias attentius audiant; et quod necesse illis fuerit diligenter et cito perficiant; quod si neglexerint vindicare vel corrigere post tertiam admonitionem priventur a communione.

CCCLXXIV.

AD ALIUM INCERTUM.

Præsides, cum ad præsidium promoti fuerint, litteras accipiant ecclesiasticas, communicatorias; ita tamen ut in quibuscunque locis præsidium gesserint, ab episcopis ejusdem loci cura de illis agatur, ut si cœperint contra publicam agere disciplinam, a communione secludant divina.

CCCLXXV.

Allocutio pontificis ad episcopos sub finem synodi Tricassinæ.

Vos confratres et coepiscopos meos volo unanimiter mecum in defensione sanctæ Romanæ Ecclesiæ, quam constat esse caput omnium Ecclesiarum, convenire, donec, Deo auxiliante, in sedem beati Petri apostolorum principis revertamur, cum omnium hominum vestrorum armata bellico apparatu manu: et de hoc, non differendo, sed sub omni celeritate et certitudine sponsionis, hic mihi, quæso, absque ulla dilatione continuo date responsum.

CCCLXXVI.

Item allocutio pontificis ad regem.

Vos, charissime fili Ludovice gloriose rex, precor, in defensionem, liberationem, atque exaltationem sanctæ Romanæ Ecclesiæ, sicut predecessores vestri fecerunt, et vobis sub attestatione facere mandaverunt, sine procrastinatione et ulla dilatione succurrite; quia ministri Dei estis, vindices in ira in his qui male agunt, et non sine causa gladium portatis: ne forte, quod absit, illa vos aut regnum vestrum culpa contegat, quod quosdam veteres reges inimicis et infidelibus Dei quondam parentes damnabiliter strinxit. Vel si aliud placet, præsentialiter in isto loco date, per Deum et per beatum Petrum, vos conjuro, sine mea responsione.

CCCLXXVII.

Allocutio Joannis papæ ad Patres synodi Tricassini II, de Lambertii et Adalberti aliorumque sequacium excommunicatione.

Charissimi, condolete mihi et sedi apostolicæ quæ caput et magistra est omnium Ecclesiarum Dei, quæ et vos religioso utero genuit, reges terræ et omnes populi, principes et omnes iudices terræ, sacrique confratres et consacerdotes Dei, venerabiles Ecclesiarum Christi antistites, et totius sacrati ordinis viri, et mecum tantas injurias Ecclesiæ sancti Petri apostolorum principis, celestique regni clavigeri, cui ligandi et solvendi data est a Deo potestas, simul flentes requirite, tantasque invasiones atque contumelias civitati Romanæ illatas cum ingenti dolore lugete, et mecum, qui curam et sollicitudinem omnium vestrum habeo, et secundum Domini vocem, quoties causa exegerit, conversus vos in omnibus bonis deo confirmare: ac necessariæ consolationis opem conferre, viriliter state quærentes simul et judicantes tantæ patratores iniquitatis, tantæque temeritatis præsumptores, ut digna ultione temporaliter puniti, spiritu salvi sint in die Domini nostri Jesu Christi, quoniam eos prædictos Lambertum et Adalbertum sequacesque eorum, pro quibus tantis sceleribus tantisque perjuriis patefactis, in ecclesia B. Petri apostoli, una cum coepiscopis et confratribus nostris Italicis, excommunicavimus; et quia in his perseveraverunt, Christianæ communionis immunes esse decrevimus. Quodque decretum in prædicta beati Petri ecclesia scriptum, ut ingredienti et exeuntes legant et doleant, eosque anathematizatos teneant, posuimus. Et vos fratres charissimi, ut decrevimus, nostræ communionis alienos tenete, et anathematizatos fautores eorum mecum facientes consternite.

CCCLXXVIII.

Responsio episcoporum.

Domine sanctissime et reverendissime Pater Patrum, Joannes, catholicæ atque apostolicæ Ecclesiæ videlicet Romanæ primæ sedis papa, nos famuli ac discipuli vestræ auctoritatis, Galliarum et Belgicarum episcopi, his quæ super vulnera dolorum vestrorum maligni homines ac ministri diaboli addentes,

A in sanctam matrem nostram ac magistram omnium Ecclesiarum commiserunt, compatimur, et dolori vestro couflentes condolemus, atque iudicium vestræ auctoritatis, quod privilegio beati Petri et sedis apostolicæ in eos et complices eorum, juxta sacros canones Spiritu Dei conditos, et totius mundi reverentia consecratos, et secundum ejusdem Romanæ sedis pontificum decessorum vestrorum decreta pretulisti, voto, voce et unanimitate nostra, atque auctoritate sancti Spiritus, cujus gratia in episcopali ordine sumus consecrati, gladio spiritus, quod est verbum Dei, eos interimentes persequimur. Scilicet quod excommunicastis excommunicatos tenemus, quos ab Ecclesia abjecistis abjicimus, quos anathematizastis anathematizatos esse judicamus, et quos regulariter satisfaciens vestra auctoritas et apostolica sedes receperit, recipimus. Sed ut in sacra historia de plaga Ægyptiaca digne a Deo illata legimus (*Exod. XII*), quia non erat domus in qua non jaceret mortuus, et non erat qui alium consolaretur, quoniam in domo sua unusquisque quod lugeret habebat, nos quoque in nostris Ecclesiis lugenda lugemus. Et ideo vestra auctoritate nobis subveniri cum omni mentis humilitate deprecamur, petentes ut promulgetis capitulum vestræ auctoritatis, qualiter nos erga Ecclesiarum nostrarum pervasores agere debeamus, ut, censura apostolicæ sedis muniti, robustiores et promptiores deinceps, Domino opem ferente, contra perversos ecclesiasticarum rerum ac facultatum raptores ac vastatores sacrique ministerii episcopalis contemptores nos successoresque nostri persistere concordia sententia valeamus: ut juxta egregii prædicatoris vocem, et vestræ auctoritatis promulgationem, traditi Satanæ spiritu salvi fiant in die Domini nostri Jesu Christi.

CCCLXXIX.

Excommunicatio adversus pervasores rerum ecclesiasticarum in eadem synodo lata.

De pervasoribus quippe rerum ecclesiasticarum, quos sacri canones, Spiritu Dei conditi, et totius mundi reverentia consecrati, et decreta pontificum sedis apostolicæ, sub anathemate usque ad regularem satisfactionem esse debere constituerunt, sed et de raptoribus, quos Apostolus, Christo in se loquente, regnum Dei non possidere testatur (*I Cor. VI*), et cum hujusmodi omni veraciter Christiano nec cibum sumere præcipit, quandiu in ipso crimine permanent (*I Cor. V*), per virtutem Christi et iudicio Spiritus sancti decernimus ut si ante proximas Kalendas Novembris easdem res quas quique usurpatores injuste pervaserunt, ecclesiis suis regulariter satisfaciens non restituerint, a communione corporis et sanguinis Christi usque ad restitutionem rerum ecclesiasticarum et satisfactionem, alieni habeantur, et sacris episcopalis ministerii excommunicationis ecclesiasticæ contemptores, secundum evangelicam et apostolicam auctoritatem (*Matth. XVIII*), ab episcopis quorum interest

commoniti, si regulariter satisficientes non resipuerint, anathematis vinculo innodati usque ad satisfactionem permaneant. Et si in ipsa pertinacia permanentes obierint, nemo corpora illorum cum hymnis et psalmis sepeliat, nec memoria illorum ad sacrum altare inter fideles mortuos habeatur, docente apostolo et evangelista Joanne: *Est peccatum ad mortem: pro illo non dico ut quis roget* (1 Joan. v). Peccatum enim ad mortem est perseverantia in peccato usque ad mortem. Et sacri antiquorum Patrum canones de his qui sibi mortem voluntarie inferunt, et qui pro suis sceleribus puniuntur, sancto inspirante Spiritu, decreverunt, ut cum hymnis et psalmis eorum corpora non deferantur ad sepulturam. Quorum decreta sequentes, ea quæ præmisimus de pervasoribus et raptoribus rerum et facultatem ecclesiasticarum, si non resipuerint, iudicio Spiritus sancti decernimus, sicut beatus decrevit Gregorius, dicens quia tales Christiani non sunt, quosque et ego, et omnes catholici episcopi, imo et universalis Ecclesia anathematizat.

CCCLXXX.

Joannis papæ iterata excommunicatio adversus Formosum episcopum, Gregorium nomenclatorem, et Georgium magistrum militum.

Auctoritate apostolica parem sententiam iterodamus in Formosum, nuperime Portuensem episcopum, et Gregorium magistrum militum, anathematis et perpetuæ obligationis. Et quia non desinunt inquietare aures regum ac principum, et malis prioribus, juncti cum prædonibus et subversoribus ecclesiarum, nova et recentia mala addere quotidie student, insolubiliter vinculo perpetuo et irrecupandæ spei, sancti Spiritus Dei nostri virtute damnamus, omnemque illis suspicionem obtinendæ indulgentiæ irriterabiliter excludimus, et omnes qui illis communicaverint adiutoriumve præbuerint, de quocunque ordine, sive episcopali aut laicali, potentes, mediocres ac pauperes, in eorum prolatis maledictionibus involvantur, quorum consortio uti non metuant, et nisi resipuerint, sint anathema maranatha.

CCCXXXI.

Statutum Joannis papæ adversus laicos qui, viventibus uxoribus, alias ducunt, et contra episcopos qui de minore ad majorem Ecclesiam ambitus causa demigrant.

Inter nonnulla necessitatum a sancta synodo reclamatum est quod laicorum quidam, sortitis primo legaliter conjugii, postposito Dei timore, secundi vel tertii, adhuc uxore vivente, conjugii copulam contrahant. De quibus Otilo quidam intra parochiam Rostagni Arelatensis episcopi, et Eoolus intra Otramni Viennensis archiepiscopi, talia fecisse multorum fama refertur. Ad augmentum quoque earum transgressionem, quod flebiliter dicimus, additum est quod episcoporum quidam intra septem provincias Galliarum, calcato ter-

Amino Patrum, spretoque sancti canonicæ auctoritatis, de minori ad majorem ambitus causa demigrant episcopalem cathedram. Quibus canones Spiritus sancti gratia concorditer contradicunt. Nos quoque eorum, quos veneranter imitatur atque complectimur, quorumque statutis consentimus, Ecclesiarumque gubernationem tenemus, fulti virtute interdiciamus, et in hærendo prohibimus, ne quisquam catholicorum taliter audeat amodo et deinceps agere, et si, ut non optamus, hætenus quidquam taliter actum est, digna pœnitidine ecclesiastica corrigatur. Denique hac auctoritate apostolica virtute Dei nostri intercedimus ut episcopi ad pristinam sedem sine mora redeant, quia si tardaverint, continuo omni sacerdotali honore spoliabuntur; et laici redeant ad primum conjugium: sin autem, vinculo anathematis innodentur.

CCCLXXXII.

AD CLERUM ET POPULUM AUGUSTODUNENSEM.

(An. inc.)

Privilegium concedit unum ex suis, quem clerus et populus proclamaverit, sibi præponendi, non obstante contrario regum vel principum delectu.

JOANNES episcopus, servus servorum Dei, omnibus filiis sanctæ Eduensis Ecclesiæ et per vos successoribus vestris in perpetuum.

Auditum est nostris apostolicis auribus et crebro intimatum frequenter Ecclesiis Galliarum contra decreta canonum in electione suorum episcoporum violentiam inferre. Quod nos, cui Ecclesiarum omnium cura commissa est quamvis indignis, visceraliter condolentes, ab universis Ecclesiis hanc insertam violentiam auctoritate Dei et beati Petri recidere cupientes, præcipue vobis, sanctæ videlicet Eduensi Ecclesiæ, hujus nostri decreti privilegium scribere sancivimus, reges Francorum primum observatores orantes; in quo decernimus et regulariter ordinamus ut deinceps nemo regum vel principum vel aliqua persona vobis superponere vel ordinare aut successoribus vestris præsumat nisi ex filiis ipsius Ecclesiæ secundum scripta canonum, quem clerus elegerit et populus proclamaverit, si in ea dignus reperiri potuerit. Quod si in ea, quod forte accidere non credimus, inventus non fuerit, unanimi eorum consilio tam cleri quam populi de aliis dignissimis expectatur. Vestrumque denique honorem, quem de seniore adepti fueritis, de vestris domibus et de vestris canoniis et de communi causa fratrum et de omni proprietate vestra in hæredibus legitimis statuendis et eligendis ex ipsa domo nostra apostolica auctoritate licentiam vobis concedimus ordinandi absque alicujus controversia impedimenti. Si quis vero, magnus vel parvus, contra hoc nostrum decretum et concessivam largitionem in aliquo surgere nostramque apostolicam auctoritatem violare vel infirmare præsumperit, sciat se anathematis vinculo sanctæ Trinitatis invocatione et beati Petri apostoli potestate ac nostra auctoritate æternaliter

cum inimicis Dei et ejus contradictoribus usque ad A rum Deo consequantur et vitam æternam habere satisfactionem profligatum ac in perpetuum damnatum. Conservatores autem hujus nostri decreti pax et gaudium et benedictio a largitore omnium bono- mereantur. Scriptum per manus Theodori scriniarii sanctæ Romanæ Ecclesiæ in mense Martii et indictione sexta. Datum. . . . Bene valete.

ANNO DOMINI DCCLXXXIV.

MARINUS PAPA I

NOTITIA HISTORICA.

(Apud Mansi, Sacrorum Concil. ampl. Coll.)

Marinus Gallesio oppido oriundus, post triduum B ab obitu Joannis VIII Kalen. Februarii unanimi consensu totius cleri, non ex diacono sed episcopo electus est pontifex, anno Domini 882, tempore Caroli III et Basilius imperatoris. Sedit annum unum et dies viginti. Hic dum sanctæ Romanæ Ecclesiæ diaconus cardinalis esset, missus est cum Donato atque Leone Constantinopolim ad insinuandam Photio anathematis sententiam, qua a Nicolao papa percussus erat. Cum Donato et Stephano tempore Adriani II iterato munere legationis apostolicæ sanctus, Constantinopoli Photium deposuit, Ignatium restituit, atque sacrosanctæ œcumenicæ synodo octavæ præsedit. Bulgari eum sibi episcopum dari apud Adrianum II institerunt; sed non impetrarunt. Creatus a Joanne pontifice episcopus, tertiam legationem obiturus, tertio missus est Constantinopolim, ad ruinam illam reparandam, quæ per Potrum, Paulum et Eugenium tres sedis apostolicæ isthuc pro Photio restituendo ad synodum ablegatus facta erat. Cumque ibidem summa animi constantia coram Basilio imperatore, cuncta quæ prædicti tres legati perperam gesserant, irrita reddidisset, triginta diebus, inquit Stephanus in epistola ad Basilium imperatorem, carcere detentus fuit. Hac confessionis gloriosa corona redimitus, ab eodem Joanne VIII ablegatus est ad Athanasium Neapolitanæ urbis episcopum et principem, ut si fœdus, quod ille cum Saracenis initu habebat, dissolveret, eum lem Athanasium a sententia excommunicationis, quæ synodali judicio in eum lata erat, absolveret. Fuisse eundem sedis apostolicæ arcarium indicat Joannes papa epistola 294. Initio pontificatus sui Photium, omniaque ejus acta ad munus episcopale spectantia damnavit, atque acta conciliabuli pseudoctavi plane reprobavit. Qua de causa Basilius imperator graviter offensus, furore gravi incensus, Romam scribens dicebat, Marinum non esse pontificem, eo quod alterius Ecclesiæ episcopus jam ante ordinatus fuisset, aliaque multa adversus eundem papam sanctissimum effutus, solio pontificio eum dejicere satagebat. Quid autem pro eodem defendendo Stephanus papa successor Marini ad Basilium rescripserit, ex epistola ejusdem Stephani infra patebit. Ea, quæ Joannes papa perperam egerat, rescissurus, inter alia Formosum episcopum Por- tuensem munere apostolatus apud Bulgaros præclare functum, ac aliarum legationum meritis exornatum, quem Joannes episcopatu deposuerat, et juramento obstrinxerat, se nunquam ad sedem episcopalem rediturum; sed laica communione contentum deinceps quieturum, in urbem et episcopatum revocavit, atque eundem in pristinum statum restituit. Qua de causa a Joanne depositus, quove modo a Marino restitutus fuerit, non constat: potuit sine dubio eum a juramento injuste exacto absolvisse, et sententiam Joannis papæ velut iniquam, privatoque affectu fortasse prolatam, retractasse. Utrum horum factum fuerit, incertum est; ideoque mirum, quod rerum gestarum ignari, ob reassumptum pontificatum Formoso obloquantur. *Hæc ex diversis epistolis pontificum Baronius.* Fulconi Rhemensi archiepiscopo, qui Hinemaro subrogatus erat, post emissam orthodoxæ fidei professionem, pallium concessit. *Flodoardus in vita Fulconis.* Scholam C Anglorum Romæ existentem rogatu Aelfredi regis a tributo liberam fecit *Matthæus Westmonasteriensis.* Cumque locis omnibus supra allegatis Marinus nominetur, recte Platinam erroris redarguit Onuphrius, quod aliter quam Martinum appellantes similitudine nominis deceptos esse scribat. Hujus temporibus Northmanni Trevirorum, Tungrorum, Ubiorum, aliorumque circumjacentium populorum urbes et oppida incendiis et rapinis devastarunt. *Ex actis sanctæ Gudilæ et annalibus Francorum Baronius.* Photius schismaticus hoc tempore Aquileiensi archiepiscopo imperito et schismatico de processione Spiritus sancti respondens, causam dedit; quod sicut jamdiu ante hæc tempora Hispaniarum et Galliarum Ecclesiæ, ita etiam ad retundendam Photii ejusque sectariorum de processione Spiritus sancti hæresim, Romana Ecclesia additamentum illud, *Filioque*, ad symbolum Constantinopolitanum posterioribus hisce sæculis adjecerit, et in ecclesia publice decantaverit. Quo tempore et fine, quove auctore et modo id factum fuerit, ex *Etheriano*, et concilio Florentino refert Baronius anno 833, numero 34 et sequentibus. Marinus apostolico munere laudabiliter perfunctus migravit ex hac vita xv Kalendas Februarii anno Redemptoris 884, cum in pontificatu annum unum et dies viginti sedisset. Post obitum ejus sedes biduo vacavit.

PRIVILEGIA MARINI PAPÆ

I.

PRO MONASTERIO SOLEMNACIACENSIS.

(Anno 883.)

[Apud Mansi, Conc. Collect.]

MARINUS episcopus, servus servorum Dei, dilecto abbati DANIELI ex cœnobio sancti Petri Solemniacensis, quod olim a beato viro Eligio constructum, successoribusque tuis ac monachis inibi nobiliter degentibus in perpetuum.

Convenit enim nostro pontificio, ut quantum præ omnibus eminet dignitate, tanto supra universo eniteat serenissima pietate. Postulastis itaque a nobis, ut præfatum cœnobium sub defensione ac tuitione beatorum apostolorum Petri et Pauli ac nostra statueremus, sicut factum legimus ab antecessore nostro beato viro papa, postulante nobilissimo Francorum rege Dagoberto, et constructore ipsius loci sanctissimo viro Eligio episcopo Novioma-gensi, quatenus quieti ac tuti esse per futura tempora valeatis. Nos vero, vestram sanctitatem agnoscentes, vestraeque religioni assensum præbentes, tanta alacritate læto animo concedimus, quanto vos Deo propinquiores in sacra conversatione cognoscimus fore. Igitur juxta petitionem vestram, hujusmodi privilegium præsentis auctoritatis nostræ decreto eidem venerabili monasterio vestris futurisque temporibus indulgemus, concedimus, atque confirmamus. Et sicut nobilissimus Francorum rex Dagobertus, et gloriosissimi Augusti, Carolus et filius ejus Ludovicus, et filii et nepotes eorum, Carolus imperator, et ejusdem Caroli filius Ludovicus, nee non et Carlomannus Ludovici filius, qui nunc regnum Francorum feliciter gubernare videtur, ducti divino amore, de villis ac facultatibus seu stipendiis propriis, vel quolibet modo ibi a fidelibus viris condonata res, a vobis quoquomodo acquisitæ sunt, sicut in præceptis prædictorum regum continentur, vel in charta ejusdem monasterii fundatoris insertum est, scilicet Eligii episcopi, omnia illibata et incon-vulsa nostræ auctoritatis privilegio confirmamus. Damus etiam licentiam, propter persecutionem infidelium Christianitatem devastantium, munitionem ibi fieri. Constituimus alia auctoritate beati Petri, ut nullus regum, nemo antistitum, vel abbatum, seu quilibet sua præditus dignitate, de iis quæ in prælibatis præceptis continentur, vel in futuro ab eis, vel a quibuslibet de proprio fuerint his specialibus usibus jure collata, sub cujuslibet causæ occasione sive specie, quidquam minuere vel auferre, vel aliis quasi piis causis pro suæ avaritiæ excusatione præsumat concedere. Sed cuncta, quæ usibus monachorum,

A vel ecclesiæ oblata sunt, vel offerri contigerit, perenni tempore absque ulla inquietudine ipsis, quibus concessa sunt, profutura permaneant. Statutum etiam, ut nullus episcoporum, seu comitum, mansionaticum ibi, vel paratas, vel stationes require-re seu exigere præsumat, sed liceat servis Dei sine aliqua inquietudine Deo servire, et hospitalita-tis benevolentiam, prout eis libuerit, cunctis fide-libus impendere. Placuit huic paginæ inseri, ut obeunte abbate prædicti cœnobii, nullus ibi, quacun-que subreptionis ambitione, abbatem statuere præ-sumat, nisi quem ejusdem loci monachi secundum authenticam et regularem institutionem ex seipsis elegerint ordinandum. Si quis autem hanc paginam constitutionis agnoscens contra eam venire tentaverit, sit alienus a sacratissimo corpore Domini Jesu Christi, et nisi præsumpta correxerit, vel male ablata non restituerit, ultionem cum Juda proditore excipiat, et beatum Petrum sentiat hostem. Cunctis autem eidem loco justa servantibus sit pax Domini nostri Jesu Christi, quatenus et hic fructum bonæ actionis inveniant. Scriptum per manum Zachariæ scriniarii sanctæ Romanæ Ecclesiæ mense Maio, in-dictione prima. Bene valete. Pridie Idus Junias, per manum Valentini Ecclesiæ Portuensis episcopi, re-gnante in perpetuum Domino Deo nostro. Anno pontificatus domni Marini universalis papæ primo, in-dictione prima.

II.

PRO MONASTERIO SAVINIENSI.

(Anno 883.)

[Ex Ughelli, Italia sacra t. IV, pag. 657.]

MARINUS episcopus, servus servorum Dei, dilecto, reverendissimo, et sanctissimo GERARDO sanctæ Lau-densis Ecclesiæ episcopo et præsent in eadem Ec-clesia et monasterio Savinionis in perpetuum.

Te narrante cognovimus munificentia imperato-rum, et regum, qui nostris fuerunt temporibus, qui-que erga eos industria obsequii cœnobium Savinio-nis Ecclesiæ tuæ concessum, atque præceptis suis firmatum esse eo videlicet ordine seu tenore quod semper in eodem cœnobio regularis institutio disci-plinabiliter observaretur, salvo jure concessarum sibi rerum in usus proprios. Tu vero præcavens ne post discessum tuum quilibet successorum tuorum, aut alia sæcularis potestas a proprio statu et ordine idem cœnobium subvertere possit, res aut familias ibidem subvertendo, vel invadendo, petisti fideliter auctoritate sedis apostolicæ, et privilegio ea, quæ ad usus monachorum, ac totius ejusdem cœnobii utilitatem cunctis possessionibus, ac recordandæ memoriæ piissimo Ludovico quondam Augusto per

præceptum suum dudum delegata, atque concessa et postea diligenter provisâ æquanimittate sibimetque, firmari, et quæ deinceps a quibusdam timentibus Deum ibidem collata fuerint, videlicet ab urbe Derthona quiddid de ipsa est abbatiola usque ad ipsum monasterium in eodem comitatu Derthonensi, Januensi, maris littore et Tuscia, necnon vicum Arderatum, et Pasqualini, et casam de Papia cum massario in aurello. Reliquum vero ipsius abbatiolæ Laudunensis episcopus ad utilitatem suæ ecclesiæ pro defensione, et excusatione eorumdem monachorum retineret, ac possideret, implorasti scilicet pro omni excubia et expeditione tam palatina quam et hostili. Nos igitur per gratiam, et potestatem, quæ nobis a Deo apostolorum meritis collata sicut superius continetur ambabus partibus juxta commune votum, et moderationem æquam, apostolicaque confirmantes auctoritate statuimus auctore Domino Jesu Christo inviolabile amodo sic permanere. Sancimus quoque ut cum præsens ejusdem loci abbas Adalbertus, vel ejus successores ab hac luce divina vocatione subtracti fuerint, non aliunde, sed de ipsa congregatione concorditer substituantur alter, si vero pro ipsa electione, aut fratrum dissensione, vel etiam alia qualibet ipsius loci necessitate Laudensis episcopus utique non alius, vel ejus missi idem monasterium aut cellas, aut curtes ejus vocati in adiutorium venerint non plusquam triginta homines, et caballos quadraginta conducant, quibus ex ipsis monasterii rebus dentur stipendia, et ultra triduum

non ibi morentur, nisi cogente charitate, aut necessitate abbas cum fratribus postulaverint, ter siquidem per annum aut abbas, aut ejus inde monachi Laudensem episcopum in sua ecclesia honorifice et visitent, et recipiantur. Præterea decernimus ut si ejusdem monasterii abbas se aliquando prægravari injuste cognoverit ab eodem episcopo, vel aliis, libere ad nostram sedem apostolicam appellet, atque ad eam confugium faciat, ut sua mereatur obtinere irrefragabiliter jura apostolica sibi clementia roborata. Quæ si quis præcognita corrumpere, ipsamque sanctam congregationem perturbare, vel inquietare prætermissis apostolico, seu regulari judicio tentaverit, et hoc nostrum privilegium quoquo modo corrumpere, in virtute sancti Spiritus, se beatorum apostolorum a communione omnium sit separatus justorum quoadusque digna satisfactione humiliatus emendare studuerit, quæque contra ipsum reverendum locum ad periculum sui deliquit. Qui vero custos et observator hujus apostolici nostri privilegii fuerit, benedictionem et gratiam a Domino consequatur. Scriptum per manum Georgii scriptarii sanctæ Romanæ Ecclesiæ, mense Junio, indictione i. Bene valete.

Datum x Kal. Juli per manum Zacchariæ episcopi et bibliothecarii, atque missi S. sedis apostolicæ, imperante domino nostro piissimo perpetuo Augusto Carolo a Deo coronato magno imperatore anno III, et post consulatum ejus anno III, indict. i.

MARINI PAPÆ I

EPISTOLA AD MONACHOS J. ÆGIDIÏ.

(Anno 883.)

Præficit Amelium presbyterum.

(In probat. novæ hist. Nemaus, pag. 15, apud D. Bouq. Script. rerum Franc., t. IX.)

MARINUS episcopus, servus servorum Dei, omnibus fidelibus nostris monachis de monasterio quod vacatur Vallis-Flaviana, salutem et apostolicam benedictionem.

Cognitum facimus omnibus vobis quia præsens Amelius religiosus presbyter noster commendatus factus est. Unde et nos pro sua fidelitate concedi-

mus et ipsum vestrum monasterium, cum omnibus suis pertinentiis, ad tenendum, et vos regendum atque gubernandum, salva pensione nobis annua persolvenda. Unde vobis præcipimus ut eum honorifice suscipiatis, et eum ut prælatum cum omni religione habeatis, qui eum ad salvandum et regendum super vos ordinavimus. Bene valete.

sublevationem et defensionem loci ipsius operam viriliter usque ad effectum dare, donec omnes ejus sopiantur controversiæ, studeant.

Inter hæc Ravennate archiepiscopo cum Ticinense, et Placentino, et Regiense, et Mutinense cum Mantuano, et Veronense cum Laudense, et Vercellense, aliisque coepiscopis nobisque sanctam synodum celebrantibus, et tuæ voluntati assensum præbentibus, volumus atque instituimus, ut cujuscunque ordinis clericos, qui in eodem sacrato loco missarum solemniam celebrantes deservunt, et eos qui in ejusdem monasterii capellis ubicunque divina jugiter officia faciunt, liceat præcipue Mediolanensi archiepiscopo, aut patriarchæ supradicto promovere, et consecrare, vel alii etiam cuilibet episcopo, quem abbatissa loci illius voluerit rogare. Hæc et alia ecclesiastici officii ministeria sint in abbatisæ voluntate, ut possit videlicet chrisma, et ecclesiarum suarum consecrationem, a quocunque ei libitum fuerit, omni tempore impetrare: ita tamen, ut si aliquando ad hæc forte rogabitur Placentinus episcopus, in prædicto cœnobio, et xenodochio rebusque ipsorum nullum se noverit amodo et deinceps jus potestatis habere, neque etiam ad missas celebrandas juxta Patrum instituta, nisi invitatus, adveniat.

Decimas vero universi fundi pertinentis ad ipsum monasterium, quas episcopi qui..... esio sunt, et in quorum quidem adjacent parochiis, pro Dei amore, vestrorumque honorum recordatione, devote atque libenter supradicto venerabili loco largiti sunt: volumus, et apostolica corrobamus auctoritate, et absque refragatione, tam ipsorum, quam et successorum eorum, velut ipsa instituisti, sacra xenodochio, et capellis perpetualiter habeantur. Insuper statuimus, et apostolica auctoritate stabilimus, ut juxta quod nostri prædecessores tam Adrianus, quam

Joannes et Marinus præsules suis tibi privilegiis concessisse, et roborasse noscuntur, universa, quæ olim divæ memoriæ Ludovicus serenissimus imperator, dominus et vir tuus, per suam magnificentiam augustalibus apicibus tibi dum adviveret contulisse probatur, seu etiam et ea quæ ipsa postmodum imperialibus largitionibus, vel etiam quibuslibet justis acquisitionibus, emptionibus, vel commutationibus in proprios, sive jam dicti monasterii tui usus acquisisti, seu in posterum acquisitura es; simulque et ea, quæ ad supplementum ejusdem sacrați loci, et tam regum, quam aliorum quorumlibet fidelium donatione, vel liberalitate nunc, vel postmodum addita fuisse comprobantur: eodem tenore et ordine, quo tibi, vel tuo prænominato cœnobio advenerunt, illibata et inviolata, atque inconeussa permaneant, et secundum tuæ ordinationis statuta persistant. Et si quis, quod non optamus, contra hæc statuta in Dei omnipotentis oblata, vel concessa servitium agere tentaverit, vel quippiam horum infringere temerario ausu voluerit, excommunicationi submissus omni ecclesiastico consortio careat, et nisi se continuo a tali nequitia corrigat et respiscat, S. Petri nostrique apostolatus auctoritate anathematis vinculo innodatus, reus in futuro judicio permaneat, et pro excessu suæ tantæ transgressionis cum Juda traditore infrunitus, atque rebellis sancti Spiritus sententia, qui semper fictum et mendacem effugit, noverit se habiturum portionem in gehenna ignis æterni. Scriptum per manum Leonis scrinarii S. R. E. in mense Aprili, indictione tertia. Bene valete. Dat. xv Kal. Maii per manum Gregorii nomenclatoris, missi, et apocrisiarii sanctæ sedis apostolicæ, impetrante domno piissimo Augusto Carolo a Deo coronato magno imperatore, anno ejus quinto, indictione tertia.

ADRIANI PAPÆ III

EPISTOLA AD SIGIBODUM NARBONENSEM ARCHIEPISCOPUM.

(Apud D. Bouquet, ibid.)

Moneat Girbertum Nemausensem episcopum ut nullam inferat molestiam monasterio sancti Ægidii.

ADRIANUS episcopus, servus servorum Dei, reverentissimo et sanctissimo Sigibodo Narbonensi archiepiscopo.

Sanctitati tuæ notum esse volumus quia monasterium sancti Ægidii, cum omnibus suis pertinentiis, sub nostra apostolica potestate consistit, una cum Leone religioso abbate et monachis ipsius monasterii: ideo monemus fraternitatem vestram ut Girbertum episcopum Nemausensem moneatis ut nullam forciam, nullamque contrarietatem et nullam oppressionem facere præsumat in ipso monasterio, aut in monachis, vel in familiis ejus, neque suis sequa-

bis oppressionis eorum materiam relinquere: quia certissime ipsum monasterium, cum omnibus suis rebus, sub ditione et potestate B. Petri apostoli et nostra consistit. Et volumus ut eidem episcopo dicas ut omnia reddere studeat quæ ab ipso monasterio per vim abstulit. Et sciatis quia ipsum monasterium in potestate Amelii presbyteri jam concessimus ad protegendum et ad defendendum. Et si ipse Girbertus episcopus acquiescere noluerit nostris et vestris monitis, sciatis illum esse excommunicatum et damnatum inrecoverabiliter. Vos ita agite sicuti nos per vos bene confidimus. Bene valete.

ANNO DOMINI DCCCLXXXIV.

S. BERTARIUS

ABBAS CASSINENSIS

NOTITIA HISTORICA IN BERTARIUM.

(Fabric. Bibl. med. et inf. Lat.)

BERTARIUS sive *Bertarius* ex regum Francorum stirpe, abbas Cassinensis et a Saracenis obruncatus martyr anno 883, 22 Octobris; scripsit ex Veteris Codicis fide et teste Leone Ostiensi lib. 1, cap. 32, et Petro diacono cap. 12, *libros duos abbas in Sententiarum Veteris et Novi Testamenti, editos suo nomine auctoris*; Basileæ, 1530, in-fol.; Parisiis, 1530, in-8°; Coloniae, 1533, in-8°; et Parisiis, 1536, in-12, cum libris Junilii Africani: et in Bibliothecis Patrum in quibus ex Felicis Toletani fide Juliano Toletano tribuuntur; cujus non magis sunt quam Salviani

A Massill. cum quibus eos anno 1530 edidit Johannes Alexander Brassicanus; vel Ricardi Cluniacensis, ad quem referuntur a Sixto Senensi, lib. iv Bibliothecæ sacrae, pag. 371. De cæteris Bertharii scriptis nolo repetere quæ jam notata a Petro diacono et in Johannis Baptistæ Mari ad eum notis, et apud Caveum; nisi quod *versus de vita, obitu ac miraculis S. Benedicti*, etiam editos monere juvat in Actis SS. Benedict. tom. I, pag. 29; Trithemius, cap. 326; et illustr. Benedictin. II, 72, tantummodo sermones ejus elegantes commemorat.

SANCTI BERTARII

CARMEN DE SANCTO BENEDICTO.

(Apud Mabill. tom. I, Act. SS. ord. S. Bened., ex Prospero Martinengii tom. III.)

O Benedicte pater, cunctis celeberrime terris,
 Qui confessorum culmen honoris habes :
 Te Deus a puero delegit cœlitus, atque
 Instituit sancti Germinis esse patrem.
 Tu via, tu ductor, tu pastor, doctor eorum,
 Qui, spretis terris, cœlica regna petunt.
 Tu, studiis spretis, orbis dominam fugis urbem,
 Et Domini subdis mitia colla jugo.
 Tu precibus vasis solidas fragmenta dirempti,
 Obsequiis vestris quod pedagoga tulit.
 Æs lapidis jactu confregit lividus hostis,
 Signa dabat mensæ quod, Benedicte, tuæ.
 Sed minime solitam tibi tradere desinit escam,
 Romanus furtum subripiendo pium.
 Aptarat Paschæ sibi prandia magna sacerdos,
 Sed tibi cum dapibus destinat hunc Dominus.
 Tetra nimis volucris se vultibus ingerit almis,
 Et visa quondam concremat in specie.
 Sed spinis recubans, stimulis et punctus earum,
 Exsuperas vulnus illico vulneribus.
 Frangitur arte crucis vas, virus quo latitabat,
 Cum signat tanti dextera sancta Patris.
 Quem puer a sanctis precibus niger eliciebat,
 Virga Patris sistit, ac puer ater abit.
 Suscipe, sancte Pater, pueros, quos gloria Romæ
 Ad tua transmisit limina mente pia.
 Fratribus ipse tibi commissis mons dedit amnem,
 Rupe latex exit cum rogatas Dominum.
 Ferrum dum vepres resecat Gothus, insilit undis,
 Sed repetit manicam mox, ubi tinguis aqua.

Assiduum Placibus dum ferret gurgitis undam,
 Obsequiis sanctis hunc tulit unda fluens.
 Pergito, Maure celer, Pater illico providus, inquit,
 Jam trahit unda laei præcipitem puerum.
 Jussa ferens properat super undas, atque recurrit
 B Erepto puero, ceu per humum gradiens.
 Promptus ad omne malum dira cum mente sacerdos,
 Toxicæ quæ misit, sustulit ipse prius.
 Corruit ecce miser collapsi culmine tecti,
 Corpore contractus tartara seva petit.
 Talia discipulus dum perfert nuncia cursim,
 Concussit sancti intima corda Patris.
 Cui pater indixit ob talis gaudia mortis,
 Ut lacrymis culpam defleat ipse suam.
 Panem tollit avis, quo virus texerat ille,
 Abdit ubi nullus cernere possit homo.
 Tu meritis almis falsorum templa deorum,
 Vertisti in laudem, sancte, decusque Dei.
 Perfidus ille draco cœlo demersus ab alto,
 In famulum Christi talia dicta dabat.
 Quid, maledicte, tibi mecum est? Quid non, Benedicte,
 Quid me persequeris? quid mea jura rapis?
 Stat lapis immotus nimio præ pondere fixus,
 Quem residens hostis impius ille premit.
 Tollitur at subito Benedicti voce beati,
 Hicque procul sessor, postmodo flamma vorax.
 Fratribus est falso comburere visa culinam,
 At Pater ut venit, visio falsa fugit.
 Attritus puer est murali mole peremptus,
 Suscitatur hunc, et opus jussit adire Pater.

Non leitibus domibus sumpserunt prandia fratres,
 Absens ipse videt arguit et nimium.
 Hospes adest simplex, quem cepit calle viator,
 Mollibus in pratis prandia quo facerent.
 Arguit hunc pastor tali pro crimine sanctus,
 Mox veniam culpæ expetit ille suæ.
 Veste venit splendens fraudantis Riggo tyranni,
 Non tua sunt, inquit, quæ tua dorsa gerunt
 Totila rex veniens prostrato corpore supplex,
 Præscivit vitæ commoda cuncta suæ.
 Bis quinque annis retinebis culmina regni,
 Mors his succedet, moribus esto pius.
 Desinit in factis extunc existere sævus,
 Blandior et vixit tempora dicta sibi.
 Excole, Roma, tuo vatem de dogmate doctum,
 Qui tua per sæculum mœnia salva canit.
 Turbinibus multis quassaberis, atque coruscis,
 Hostis nullus erit, qui tua septa ruat.
 Non escam carnis, sed nec sacris ordinis unquam,
 Excipias quæstum, clerice, salvus eris.
 Hæc ubi contempsit, repetit quem liquerat olim,
 Ut vates sanctus dixerat, ille malus.
 Omnia quæ monachis congressi munere Christi,
 Gentibus arbitrio tradita sunt Domini.
 Vix potui precibus Dominum exorare supernum,
 Ut mihi vel fratrum cederet ipse animas.
 Post Langobardi venientes tempore noctis,
 Cætera vastantes cuncta tulere simul.
 Æterni regis salvati munere fratres,
 Illo nec lædi de grege quis potuit.
 Vas retinet serpens absconsum tramite, fili,
 Admoneo ut solers vergere mox studeas.
 Mappula testis adest, retines quam pectore, frater,
 Cur ingressa tuum nequitia est gremium?
 Non clam Patre manent, quæ voluit mente superba,
 Præbens cœnantis luminis officium.
 Fratres en hodie nullus est panis in areis,
 Cras pietate Dei copia panis erit.
 Iis sacra cœnobii satagunt qui ponere septa,
 Astans per somnum condere monstrat opus.
 Redduntur tumulis per eum, quæ more sorores
 In famulum Christi noxia verba dabant.
 Patria namque puer dum tecta requirit anhele,
 Injussus pergens mortuus est inibi.
 Hujus non potuit corpus retinere sepulcrum,
 Sed Domini famulus id sociavit humo.
 Ore patens anguis medio stat calle malignus,
 Quem cernens frater ad pia septa redit.
 Rusticus adveniens variato corpore lepra,
 Abcessit sospes glorificando Deum.
 Aurea dona Patri funduntur cœlitus almo,
 Ut poscens habeat, debita quo redigat.
 Vas vitreum montis per saxa patentia mersum,
 Illæsum perstat omne tenens oleum.
 Post Dominum rogitanis dolium complevit oliivo,
 Ante quod hoc penitus exstiterat vacuum.
 Quo properas, Satana, medicorum more paratus?

A Vado tuis potum fratribus ut tribuam.
 Dextera sancta senem mox illo dæmone captum
 Salvavit Patris, depulit et Satanam.
 Rusticus adveniens constrictus brachia loris,
 Ad primum sancti solvitur intuitum.
 Postulat orbatus reddi sibi pignus ademptum,
 Cum rogitat sanctus, vita redit puero.
 Sacra soror precibus diffundens cœlitus inbrem,
 Invitum secum nocte Patrem retinet.
 Post triduum frater gaudens de morte sororis,
 Hanc tumulat proprio protinus in tumulo.
 Unica sanctorum retinct nunc arca duorum
 Pignera, ^a quos æthræ junxit, humoque Deus.
 Sanctorum hic animas ad cœli gaudia cernit
 Angelicis ulnis hoc per inane vehi.
 B Totus adest orbis collectus solis ab instar,
 Tempore sub noctis visibus, alme, tuis.
 Testis adest meriti, Servandus nomine, magni,
 Lucis enim partem cernit et ipse simul.
 Regula, sancte Pater, multos tua mittit ad æthram,
 Consocians sanctis hoc super astra choris.
 Flans Domini famulus animam cum laudibus almis
 Mirifica scala scandit ad astra poli.
 Pallia sternuntur divino lumine mixta,
 Qua sacer ascendit ad sacra regna Pater.
 Perdita mente manens mulier per devia scandens,
 Hujus salva fuit cum specus introiit.
 Plurima signa tibi concessit gratia Christi,
 O Pater insignis, quæ modo nemo sciat.
 Sed quæ noscuntur per mundi climata, quisnam
 Ut tua facta decet, pangere rite queat?
 C Quæve micant hodie signorum facta priorum,
 Temporibus nostris gesta tuis meritis?
 Andreas etenim Germano germine cretus,
 Rectis non unquam gressibus ire valens;
 Mox ut promeruit tua limina tangere templi,
 Extemplo sospes dante fuit domino.
 Alter serpentem gestans in ventre latentem,
 Obstaclum nullum cui medicina dabat;
 Concitus huc scandens pietatis munera poscens,
 Ad tua parvenit lumina sancta, Pater.
 Evomito colubro postquam tua limina scandit,
 Perstitit incolumis hic pietate Dei.
 Corpore contractus genuit quem Cimbrica tellus
 Erigitur templi, David, in æde tui.
 D Eia, beate Pater, tanto qui lumine præstas,
 Sedibus in superis tanta pietate coruscus,
 Esto tuis famulis custos, doctorque per ævum:
 Ne lupus insidians, hostis ne pestifer unquam
 De grege tollat ovem, proprio quem jure retentas.
 Berthariumque tuum famulum me protege, serva,
 Ductus amore tuo qui carmina vilia prompsi.
 Hoc Deus omnipotens, salvos qui vis fore cunctos.
 Qui cœlum terramque regis per sæcula, Christe
 Des petimus, nec non paradisi gaudia nobis,
 Omnibus et veras tribuas sine fine coronas.

^a Al., quos terris junxit et æthre Deus.

APPENDIX AD SCRIPTA S. BERTARII

VITA S. SCHOLASTICÆ VIRGINIS

S. BENEDICTI SORORIS.

Ex homilia in ejus natali habita, quæ Bedæ Venerabili vulgo, sed immerito, tribuitur.

1. Quia beatæ Scholasticæ natalitia colimus, fratres charissimi, libet de ejus vitæ meritis aliquid de vita beatissimi Benedicti huic opusculo introducere, ut quantæ excellentiæ sanctitatis fuerit, silentio non tegatur. Sed primitus omnipotenti Deo preces mitamus, qui omnia in sapientia fecit, ut ipse donare dignetur, quia dignatus est dicere: *Qui sitit veniat, et bibat, et de ventre ejus fluent aquæ vivæ* (Joan. vii, 37), ut cœpta sic digne prosequamur, ut tantæ festivitatis pertineat ad honorem, et vestræ charitati præbeat incrementum.

2. Soror namque ejus Scholastica (ex Greg. M., lib. II *Dialog.*, c. 23) omnipotenti Domino ab ipso infantia tempore dicata, ad eum semel per annum venire consueverat. Primitus quidem virtutem tanti nominis inquiramus, ut suo decore oratio decurrat. Scholastica enim a Schola derivatur, quæ est sapientiæ nutritrix: ab ipsa virtutum omnium norma concrevit, et tota virtus animæ procax fit ad discendum bona et mala, ut recto limite currere possit viam salutis, qualiter peritura mundi despiciat, ne oberans bonum ducat pro malo, malum pro bono, tenebras pro luce, et lucem pro tenebris, amarum pro dulci, et dulce pro amoro, et discernere possit quæ virtus sit spiritus, quæ carnis, ne indiscrete cuncta peragens, ibi bonum eligere speret, ubi tota est malitiæ norma ut est illud: Qui non fuerit discipulus veritatis, erit magister erroris.

3. Sed videamus quis hujus tantæ sororis possit esse germanus per omnia Benedictus non solum nomine, sed opere, non solum in terris, sed etiam in cælis. C. Ista non in philosophorum schola Scholastica facta, sed Christi, mundi Judibria ab infantia fugiens, cœlestem sibi sponsum aptavit: iste vero a pueritiæ suæ tempore abrupta vitiorum et litterarum mundanarum Romæ studia cernens, senili corde eum quem in ingressu mundi posuerat, retraxit pedem. Quam felix Nursiæ tellus, tales quæ mittit alumnos! Nam Canopica regna aurea mittunt tyrannos: tu Christo proles super æthera dignos. O felicia tantæ viscera matris, quæ tali germine soboles mundo dedere, id est benedictionis et sapientiæ. Vere ista est illa fertilis gleba, quæ sumpto semine aliud centesimum, aliud sexagesimum fructum produxit.

4. Sed cur semel in anno sancta soror veniebas? forsitan longitudine itineris a tua tenera planta for-

midabas? an munus parabas quod ferres? an forsitan tantum et semel in anno fecundabat bonus frater rore verbi cœlestis, ut madefacta mentium prata sufficeret ad incrementum salutis? an in mente habebas illud Salomonis, *Prohibe pedem tuum de domo proximi tui, ne forte satiatus oderit te?* (Prov. xxvii, 6.) Et illud: *Mel invenisti, fili mi, comede quod sufficit tibi ne forte satiatus evomas illud?* (Prov. xxv, 16.) Sic sic agant omnes sorores, non densis gressibus fratrum limina frequentent, non carnalia basia requirant, non ineptas resonent fabulas, non munus deferant tantum, quod tela depingit, vel magistra manus adornat: non olfactoriola, non variorum placentas saporum, sed cum Scholastica sacra Benedicti fratris requirite scholam, ut magis cibo cœlesti, quam dono terreno satiati, reverti ad propria queatis. Sequitur:

5. Ad quam vir Dei non longe extra januam in possessione monasterii descendebat. Quam sanctus, quam pudicus, quam discretus accessus! ut fragilis sexus non lascesseret, obvius frater occurrit, ne forte labor itineris frangeret mentis devotionem. An illicitum cernebat, ut in tanti limen Cœnobii calcari femineo pede debuisset? an forsitan sæcularium latratus vitabat, qui bonos monachorum mores canino more devastant, et hoc credant in illis quod suis malis actibus agere non recusant: et si hoc de tanto Patre sperare illicitum esset, de tenerioribus discipulis inflato gutture crispant cachinnos? Idecirco non in secularium, sed in propriis possessionibus descendebat Pater almificus. Sequitur:

6. Quadam vero die venit ex more, atque ad eam cum discipulis venerabilis ejus frater descendit. Ex more enim venit, quia ex bona consuetudine mentis appropinquabat, et fide non ficta. Quam sanctus accessus, quam sanctus adventus, quam pius cursus, qui magis amore mentis currebat ad Christum, quam devotione pedum ad fratrem, imo et ad Christum fratrem! Nam et ipse dicit: *Si quis fecerit voluntatem Patris mei, qui in cælis est, ipse meus frater, soror et mater est* (Matth. xii, 50). Sed quali devotione ista currat, Psalmista dicit: *Sicut cervus desiderat ad fontes aquarum ita desiderat anima mea ad te, Deus* (Psal. xl, 2). Sed quare Psalmista metapti orice cervi proposuerit mentionem, ut ita currat anima ad Deum, ut cervus ad fontem, non vacua mysteriis

manent, Nunquid solus cervus et non columba, tur-
tur et passer fontem requirunt? Sed aliter cervus,
aliter columba, ad fontis amnem recurrunt. Iste
cursu pedum, ista aërio volatu descendi: iste inse-
cutus frequenter arte venatorum lassabundus currit
ad aquam, hæc vero infatigata solita accedit. Quod si
mystice pensare volumus, invisibilis anima visibilis
animalis habet formam, qua uno cursu fatigationis, hic
pergit ad fontem terrenum, hæc ad fontem cœlestem:
iste fatigatus vocibus canum, ista consecuta spiribus
malignis, pro quo ad fontem illum currendum est,
qui est fons vivus, putens domus Jacob, ex quo aquæ
vena salientis ebullit in vitam æternam. Certe tanta
soror tali fide venit ad fratrem. Nam aliter æger,
aliter sospes ad medicum vadit: iste ut sanus sanum
visitet, iste ut languentem sanus procuret. Nam et ad
fontem aliter sitiens festinat, aliter crapulatus a
vino. Iste ut hausto refocillet mentem, ille ut recto
itinere insitiens pergat. Soror vero ista in tanto fra-
tre ambas gratias cernens, sapiente pede infatigata
venit: prius, ut sana sanum visilet; sequenter, ut
ægram non corpore, sed mente curet documento sal-
lutis, quia nec ipsa astra munda sunt in conspectu
Dei, et secundum Apostolum, nec infans unius diei.
Sequitur:

7. Qui totum diem in Dei laudibus sacrisque collo-
quiis, ducentes, incumbentibus jam noctis tenebris,
simul acceperere cibum. Beata talis visio parentum,
præ oculis habentes Domini præceptum: *Primum
querite regnum Dei, et justitiam ejus, et hæc omnia
adjicientur vobis* (Matth. vi, 33). Beata talia fercula,
ubi prius ponitur panis angelorum quam hominum:
et ubi prius refocillatur mens quam venter. Nam
hic reponitur cibus, qui placere possit mensæ cœles-
ti: ibi vero esca manet, quam indigeries corporis
mittit. Et beatus sermo qui toto diei spatio protela-
tur laude divina, et qui a primo lucis ortu usque ad
occasum, alternatim reciprocantur prædicamina sa-
cro-sancta. Sequitur:

8. Cumque adhuc ad mensam considerent et inter
sacra colloquia tardior se hora protraheret, eadem
sanctimonialis femina soror ejus eum rogabat, di-
cens: Quæso te ne ista nocte me deseras, ut usque
mane aliquid de cœlestis vitæ gaudiis loquamur. Ad
mensam sedent, cibum sumunt, uno dente charitatis
ruminant panem et colloquia sacra, ut unum esset
os, quo terrenum panem frangerent, et cœlestem.
Nam venter plenus cibo, mens erat adhuc jejuna
verbo salutis: idcirco quasi famelica rogat, ut di-
vinis cibariis mentem satiaret per jucundus cœlestis
usque in lucem, ut qui fuerat luce diei magister, fie-
ret etiam inter tenebras doctor herilis. Sequitur:

9. Cui ille respondit: Quid est quod loqueris, soror?
manere extra cellam nullatenus possum. Ecce per-
contatur frater sororem, magister discipulam, san-
ctus sanctam, quasi non sciens quid dixerit soror.
Sed ista inquisitio magis irascentis est, quam inter-
rogantis, dum bene Pater audisset quod soror ro-
gaverit. Tanquam si diceret: Non bene est hoc quod

A rogas, ut insolitus extra cellam maneam, quod im-
plere minime possum. O sanctitatis amator, quare
germanæ denegas quod etiam extraneis præbes?
sed hoc religio facit, non causa doloris. Scis Domini
præceptum: *Qui diligit patrem aut matrem aut fra-
trem, vel sororem plus quam me, non est me dignus*
(Matth. x, 37). Ideoque ad assuetum recurris ora-
tionis locum, ubi magis Deo quam sorori solitus es
adhaerere. Sed præsumenti voce dicimus: Nunquid
non Deus hic est ubi bona soror sacramenta Dei
perquirat, cum ipse dicat: *Ubi duo vel tres congre-
gati fuerint in nomine meo, in medio eorum sum?*
(Matth. xviii, 20.) Ecce non rogat, ut longo te tem-
pore cernat more parentum, sed unius noctis spa-
tium poscit, quo præbeas colloquia sacra. Quam
dure attendis, sancte frater, preces sororis, ob tuæ
causam sacræ religionis. Illa bene quærit, ut a te
habeat, tu similiter ut redeas: illa fide tu fide: illa
amore Dei, tu pariter ut illa: illa ut cum sorore in
prædicatione tempus noctis exsolvas, tu ut cum fra-
tribus solitas Domino referas laudes. Sed quis e
duobus melius, sequens sententia monstrat. Tanta
vero erat cœli serenitas, ut nulla in aere nubes ap-
pareret. Vere nulla nubes esse potuit, ubi erat lux
vera quæ illuminat omnem hominem venientem in
hunc mundum. Sequitur:

10. Sanctimonialis autem femina cum verba fra-
tris negantis audisset, insertas digitis manus super
mensam posuit, et caput in manibus omnipotentem
Dominum rogatura declinavit. Dic, virgo beata, cu-
jus te schola docuit, quæ contra magistrum senten-
tiam proponis? Nunquid non dicit: *Perfectus omnis
discipulus erit, si sit sicut magister ejus?* (Luc. vi, 40.)
Et in Evangelio inquit: *Nesciat sinistra tua quid fa-
ciat dextera tua* (Matth. vi, 3): et tu ambas manus
innectis? et illud: *Mittite in dexteram navigii rete*
(Joan. xxi, 6), et tu utroque latere recte immergis?
ille a dextris oves collocat, tu etiam in sinistra?
Psalmistæ hinc a dextris ponit dicens: *Dixit Domi-
nus Domino meo, Sede a dextris meis* (Psal. cix, 1):
nec non *dextera Domini fecit virtutem, dextera Do-
mini exaltavit me* (Psal. cxvii, 16); et in Cantico:
Dextera tua, Domine, glorificata est in virtute
(Exod. xv, 6), etc.; et tu ista derogans, non solum
manus implectis, sed etiam digitos inseris? Dominus
dicit in Evangelio: *Tu autem cum oraveris, intra
D in cubiculum tuum, et clauso ostio ora Patrem tuum*
(Matth. vi, 6): et tu ad cœnam sedens, ante humanos
oculos preces lacrymasque fundis? Sed quam lau-
danda sunt tua facta, o sanctissima feminarum! Quid
tu in conclavi facis, quando talia patenti cœlo peragis?
Nam ideo tibi una est dextra lævæque pars, quia fabri-
cam attendis illius, qui nullam habet sinistram, ut di-
cit: *Vidit Deus cuncta quæ fecerat, et erant valde
bona* (Gen. 1): Et in Cantico canticorum *Læva ejus
sub capite meo et dextera illius amplexabitur me*
(Cant. 1). Et in Psalmo: *Manus tuæ, Domine, fece-
runt me, plasmaverunt me* (Psal. cviii). Et illud in Can-
tico: *Manus meæ stillavere myrrham* (Cant. v, 5).

Hæc quippe auctoritate quam pulchræ tuæ manus complexæ consistunt, super quas caput reclinans, imbrem cœlitus lacrymans effudisti. Sed quod caput, Apostolus dicat: *Caput mulieris vir, caput viri Deus* (*Zach. vi, 12*). Nam cuius viri nisi illius, unde Propheta dicit: *Vir Oriens nomen ejus? (I Cor. xi, 3.)* Ecce ille qui pro salute omnium in cruce inclinato capite tradidit spiritum, suo capite nunc tuas declinavit in palmas, ut sui mysterii quod mente quærebas arcanum, tibi manaret ab astris. Quæ tantum insertis digitis egisti miraculum, quid faceres si palmas extendisses ad preces? Cumque levaret de mensa caput, tantæ coruscationis et tonitruï virtus, tantaque inundatio pluvix erupit, ut neque venerabilis Benedictus, neque fratres qui cum eo aderant, extra locilimen quo considerent, pedem movere potuissent. Quam nova miracula mundo, quam cunctis laudanda præconia sæclis! ubi nulla erat umbra nubis, aer intonat clamoribus omnes: et densa tonitrua sonant, ubi nullius erat concussio venti. Nam unus fons oculorum, et mensam rigabat lacrymis, et æther imbribus arva. Stet nunc sancta charitas fixa, stent immobiles pedes fratrum: quod soror poscit, non denegat dilectio fratris: da, volens nolens, pernox sacra colloquia, Pater. Ecce ista præceptum Domini complet, petit ut accipiat, quærit ut inveniat, pulsat ut aperiatur ei. Quid petit, ipsa dicat. Ut usque mane aliquid de cœlestis vitæ gaudiis loquamur. Nam ideo descendisti obvis, ut ista dona proferres: perfice quod cœpisti. Nam non initio præmium exstat, sed in fine operum bonorum. Idcirco e superis fudit Dominus imbrem, ut tu non deneges prædicaminum amnem. Vere non poscit munus caducum, sed regni cœlestis expetit lucrum. Sequitur:

11. Sanctimonialis autem femina, caput in manibus declinans, lacrymarum fluvius in mensa fuderat, per quos serenitatem aeris et pluviam traxit: nec paulo tardius post orationem inundatio illa secuta est: sed tanta fuit convenientia orationis et inundationis, ut de mensa caput jam cum tonitru levaret, quatenus unum idemque esset momentum, et levare caput et pluviam deponere. Quam bonus Deus Israel rectis corde, quam piæ animæ quærenti illum? Ecce qui scrutator est mentium et corda omnium cernit, qui per Psalmistam dicit: *Invocabit me et ego exaudiam eum, cum ipso sum in tribulatione (Psal. xc, 12)*: ecce non distulit, non multas expedivit preces, sed in ictu oculi et puncto cordis petenti tribuit donum. Nam levato de manibus capite, una fuit convenientia orationis et inundationis. Gaude et lætare, virorum sanctissime, quia ecce tenes quod voluisti, ecce habes quod semper quæstisti: ecce miracula cernis insignia, cœlo terraque probata. Vere si non negasses quod expetebas, non fuerant signa humanis oculis nata, quæ toto semper mundo

* Erant ergo gemelli Benedictus et Scholastica, uno scilicet partu editi: non enim una iis alicui mansio est, qui sibi in eundem locum post intervalla succedunt. Trithemius in lib. 1, de Viris illust. Ord. S. B., c. 1., de

A lectio sacra sonat. Ecce jam Scholasticæ nomen virtutum laude coruscet: ecce illius miraculo plebs sancta congaudet: ecce quam cultasti sarculo cœlesti, fructus fert signorum. Sequitur:

12. Tunc vir Dei inter coruscus tonitrus atque ingentis pluvix inundationem, videns se ad monasterium non posse remeare, cœpit conqueri contristatus, dicens: Parcat tibi omnipotens Deus, soror, quid est quod fecisti? Quare quæris, vir Dei, quid soror fecerit? Nunquid non cernis quid ipsa fecerit? Nunquid non vides pluvix guttas? Nunquid non audis concrepantes mugitus ætheris? Nunquid non sentis miracula coruscare, signa fluere, fundamenta domus contremiscere, et dicis quid fecisti? Nunquid ipsa hoc fecit, quod magis tua sancta negatio fecit: quia si non negasses, miraculum non eveniret. Hoc Christus gessit pietatis amator. Nam petenti Chananeæ mulieri preces audire distulit, ut ejus fidem faceret acutiorem, ut quærenti catello micas, filii daretur panis. Sed illa ut extranea a finibus tunc venit, jam non extranea a consortio Christi: ista vero a cunabulis Christo dicata, cum Maria gloriosa Virgine audire meruit: *Optimam partem elegit (Luc. x, 42)*. Et quare Pater contristatus dicitis: Parcat tibi omnipotens Deus, soror, quid est quod fecisti? O vir Dei, tibi hominum mentes patescunt, tibi aer numismata fundit, tibi arida dolia oleum manant, tibi alta profundi lacu ferrum reducunt ab imo, ipsi inferi animam reddunt, et nunc quasi contristatus nesciens dicitis, quid fecisti? O Pater beate, si fas est dicere, quantum fuerat justius dicere, Parcat mihi omnipotens Deus, qui tuas bonas non audio preces: quam diceres. Parcat tibi omnipotens Deus, quid est quod fecisti? Hoc est illud Salomonis, *Argue sapientem et diliget te (Prov. ix, 8)*. Sequitur:

13. Cui illa respondit: Ecce te rogavi, et audire me noluisti, rogavi Dominum meum, et audivit me. Subaudiatur: Te quidem rogavi ut fratrem, sed tu ut germanam noluisti audire. Sperabam ut mente haberes viscera matris, partus dolorem, lacteas mammas, cunas nutricis, lavaera obstetricis, fascias temporales, quibus infantia olim nutritiv. Sed tu me noluisti audire, et magis festinabas ad fratres, quos tibi sola charitas Christi facit germanos, quos etiam nescis a quo limitè ad tua cunabula hos mundus transmittat. Idcirco rogavi Dominum meum, et audivit me. Tu non attendebas quod unus pater amborum contulit membra, tu non cernebas unam nobis mansionem^a esse [al. fuisse] inter uteri septa: idcirco ad illum patrem cueurri, qui nobis animam dedit, qui terrena tribuit, et cœlestia non denegavit. Modo ergo si potes, egredere, et me dimissa, ad monasterium redi. Modo enim præsentis est temporis: modo enim, quando tibi omnipotens Deus itinera

Abundantia eorum matre agens: hæc, inquit, periclitata in partu geminos edidit, filium scilicet Benedictum, et filiam nomine Scholasticam.

clausit : modo, quando aditum eundi denegavit : A modo, si potes, me dimissa, ad monasterium redi. Et cur, Pater, fatigaris ? Nunquid non hic est monasterium ubi tu es, qui caput es omnium monasteriorum, et doctor omnium monachorum, dum non locus hominem, sed homo sanctificet locum ? Sta nunc, Pater sanctissime, invitus, ut alterius diei sol tibi præbeat gressus. Sequitur :

Ipse autem exire extra tectum non valens, qui manere sponte noluit in loco, mansit invitus. Quam multis sanctis viris factus es vir Dei compar, qui inviti fecerunt honorum facta. Nam Jacob invitus fratrem fugit, qui postea rediit cum multis. Sic Joseph invitus pergit ad sedem, ut doctor fieret populo Dei. Sic Daniel vadit Babylonam ad arcem, ut primus fieret sapientibus cunctis. Sic Saulus invitus B factus est Paulus, ut fieret gentium prædicator. Ideoque tua non requiescat charitas, sancte vir, stare invitus, ut Christi tribuas documenta salutis. Sequitur :

14. Sicque factum est, ut noctem totam pervigilem duceret, atque per sacra spiritalis vitæ colloquia sese vicaria relatione satiarent. Ecce nunc nova spiritalia gaudia surgunt, quia negans prius, factus est nunc attributor cœlestis : et colloquiis sacris vicaria relatione se satiant, qui prius erant a concordia discordes. Quanta sunt omnipotens tua mirabilia, Deus ! Nam omnia proba voluisti, fecisti, et non est qui resistat tuæ majestatis potestati. Ideoque laudant te cœli, aer, terra, mare, et cuncta quæ in eis sunt : quia semper innovas signa et mirabilia tua, ut te totus orbis agnoscat summæ Redemptorem. Da jam plus pio Patri Benedicto iter redeundi ad cellam, stringe aerium amnem, tolle pluviam guttas, da serenitatis solem, ut qui lætus accessit, gaudens recedat : ut simul ejus soror valedicens fratri, ad propria revertatur, ut simul gaudentes et exultantes, tuo de munere ad sua tecta vehantur. Sequitur : Qua de re dixi eum voluisse aliquid, sed minime potuisse : qua si venerabilis viri mentem aspiciamus, dubium non est, quod eandem serenitatem voluerit, in qua descenderat, permanere : sed contra hoc quod voluit, in virtutes omnipotentis Dei ex femineo pectore miraculum invenit. Nec mirum quod plus illo femina, quæ diu fratrem videre cupiebat, in eodem tempore valuit : quia enim juxta Joannis vocem, *Deus charitas est* (1 Joan. iv. 16) : justo valde judicio illa plus potuit, quæ plus amavit. Brevi sermone de his disserendum non est. Nam secundum grammaticos, charitas media species est, dum inter bonos et malos charitas esse possit, et inter latrones et pios : ut est illud : *Perfecta charitas foras mittit timorem* (ibid., 17). Certe si perfecta est ista, quæ inter bonos foras mittit timorem : imperfecta nihilominus fore creditur, quæ inter malos ac superbos nequitiae concordiam præstat. Sic in passione Domini Pilatus Jesum mittens Herodi, a quo Jesus ad Pilatum iterum remissus, amici facti sunt Herodes et Pilatus in ipsa die : nam antea inimici

erant ad invicem. Sed hæc est perfecta charitas quæ Deus est, qua hic plus una potuit quam alter : de qua dicit Apostolus : *Charitas Dei diffusa est in cordibus nostris per Spiritum sanctum, qui datus est nobis* (Rom. v. 5). Sequitur :

15. Cumque die altero eadem venerabilis femina ad cellam propriam recessisset, vir Dei ad monasterium rediit : et ecce cum post triduum in cella consistens, elevatis in aera oculis, vidit ejusdem sororis suæ animam de ejus corpore egressam, in columbæ specie cœli secreta penetrare. Quam felices sunt oculi qui animas possunt contemplari beatas, qui carnali intuitu spiritalia cernere queunt ? Ista luminaria non adjacent in fundamine frontis, sed intus renitescunt ad cordis fenestras de quibus dicit : *Qui sunt isti qui ut nubes volant, et sicut columbæ ad fenestras suas ?* (Isa. lx. 8.) Ecce jam, Benedicte Pater, ista columba ad tuas jam, cordis volat fenestras, ut tuæ sororis anima per eas transiens, ad cœlestem illam deferat portam : ut illa fieret ductrix animæ tantæ, quæ fuit avis quondam portatrix ad arcem reddita pacis. Quam felix ales talibus mysteriis compta, quæ meruit etiam super Dominum Christum Spiritum sanctum ferre ! Ista frequens obsequiis instat Regis æterni, ista assuetis pennis deargentatis auro dorsa refulgens, paradiso nuntia defer. De hac in Cantico Canticorum dicit : *Surge, amica mea sponsa, et veni : columba mea in foraminibus petræ, in caverna maceris* (Cant. ii, 14). Sequitur :

16. Qui tantæ ejus gloriæ congaudens, omnipotenti Deo in hymnis et laudibus gratias egit, ejusque obitum fratribus denuntiavit. Denuntiavit enim sanctus Pater fratribus, quod meruit sacro intuitu cernere secretum : et talibus congaudens votis, omnipotenti Deo gratias egit, quia quam ante triduum rore verbi cœlestis perfuderat, ad ætherea regna in columbæ specie scandere cernit. Sequitur :

17. Quos etiam protinus misit, ut ejus corpus ad monasterium deferrent, atque in sepulcro quod sibi ipse paraverat, ponerent. Quo facto contigit, ut quorum mens una semper in Domino fuerat, eorum quoque corpora nec sepultura separaret. Ecce, fratres, margarita cœlestis a negotiatore dudum empta, aptatur cœlestibus ornamentis, jam inter lilia candidia pascens, sequitur Agnum quocunque ierit. D Ecce in paradiso Domini ab angelis collocatur, ecce in terris monachorum manibus aptatur in tumulo fratris, ut munus quod una mater contulit, nec cœli janua, nec terræ sepultura separaret : et quibus una fuit semper meus in Christo, una esset corporum arca. Ecce reparata sunt tua damna, paradise. Ecce virgo Dei manu formata, quam de tuo pestifer hostis, abstulit loco, jam redit ad culmina cœli, jam recognoscit sui palmam structoris ; jam quia victa fuit, victrix calcat hostis colla maligni. Dic, dic, inferni minister, dic, tartaree miles, dic, origenum genus omnium venenorum fraude repletum, quid tibi fecit plasma sanctissimum Dei, quid tibi nocuit femina

bene formate? Quare causa ultro te consiliarius A injecisti, ut manducaret quod tuum non fuit? Dic, pestifer fur, quia non potuisti rapere partem regni Dei, ideo voluisti rapere per serpentem creaturam Dei imo qualis Dominus, talem famulam mittit. Tu serpens lubricus, ille serpens tortuosus; tu omni dolore plenus, ille omni veneno; tu mortis consilia dans, ille suis organis sibilans, mortis consilia propinat. Nunquid non potuisti in paradiso Dei aliud animal invenire, quod tuis votis concordaret, nisi serpentem? Vere non. Tu callidior angelis sanctis, ille callidior animantibus cunctis; tu bonus in cœlo formatus es, sponte malus effectus es; ille bonus in paradiso creatus est, per te reus, effectus est. Virgo Dei, plasma Dei, femina Dei bona creata est, per te et serpentem illicita gustando effecta est peccatrix. Qui demens de his tibi profuit? Tu tibi perpetuos ignes cumulasti, ille terram comedit cunctis diebus: tu catenis igneis illigatus; ille omnium ira premitur, calcaneis tunditur, verberibus flagellatur. Væ, væ per omnia vobis. Ecce femina reparata est sanguine Christi, ecce pro amissione terreni paradisi, illa nunc culmina cœli retinet, unde præceps ruisti. Versum est fel tuum in dulcedinem mellis, fraus maligna tua in reparationem omnium et salutem. Perforata est maxilla gutturis tui, neminem mordens, neminem vorans sine Deo volente. Et si quem voraveris, pietate Dei præfocatus cum sanguine rejicies illum, et de visceribus tuis abstrahet illum Deus.

18. Gaude jam, virgo Dei, tantis sublimata trium-

phis; exsulta, Benedicte Pater sanctissime Patrum, doctor dulcissime doctorum: quia, consummatis operibus sanctis, pariter congaudetis super regna cœlorum. Intercedite pro vobis commissis, postulate pro nobis afflictis, rogate pro nostris delictis, poscite Christum non solum pro monachis commissis, sed etiam pro vestris ancillis, ut omnis ætas, omnis sexus, omnis Ordo, qui vestris præceptis colla submitunt, peritura mundi despiciant, gaudia æterna concupiscant, regna beata appetant, prospera animarum et corporum percipiant. Nulla diabolica fraude molestantur, nullis incursionibus malignorum affligantur, nullisque calamitatibus annihilentur. Euge, Pater beate, fave precantibus, appone aures precibus famulorum tuorum, da veniam poscentibus, da dona quærentibus, parce peccantibus: quia tu pastor es, nos vero oves, audi tu balatus ovium tuarum, trahe nos post te, ut veniamus ad te, ut illic vera pascua inveniamus, ubi sunt vera gaudia sempiterna. Redde Deo talenta cumulata de nobis, reporta cum usuris credita dona doctrinarum, meque indignum hujus operis præsumptorem, tuis conjunge servulis sacris, ut cum omni grege commisso vitæ præmia assequamur, ut tibi dicatur a Deo: Euge, serve bone et fidelis, quia super pauca fuidisti fidelis, supra multa te constituam; intra cum his omnibus tibi creditis in gaudium Domini tui, præstante ipso qui digna promittere gaudia dignatus est suis famulis, qui vivit et regnat per cuncta sæcula sæculorum. Amen.

QUOMODO PER ANNUM JEJUNANDUM SIT.

cript. cod. Cassinensi, apud Mabill., tom. I Annal. ord. S. Bened., pag. 784.)

Quatuor tempora, quatuor sunt legitima jejunia in anno, scilicet mensis primi hebdomada prima, feria quarta et sexta et sabbato in duodecim lectiones jejunandum usque ad vesperum. Mensis quarti, id est Junii, hebdomada secunda, feria quarta et sexta et sabbato in duodecim lectiones jejunandum usque ad nonam. Mense Septembrio, id est mensis septimi hebdomada tertia, feria quarta et sexta et sabbato in duodecim lectiones jejunandum usque ad nonam. Mense decimo hebdomada quarta, feria quarta et sexta et sabbato in duodecim lectiones jejunandum est usque ad vesperum. Ista duodecim legitima jejunia per annum exusant pro peccatis centum solidos in auro cocto. Cumque studiose hæc duo no pellit ... liberabit... animam. Extra ea jejunia, quæ Prior indixerit pro quacunque tribulatione.

De reliquis jejuniis.

In vigilia sancti Matthæi et Natalis Domini et Epiphania jejunandum usque ad vesperum. In vigi-

lia Ascensionis Domini, Pentecostes, et sancti Joannis Baptistæ, et sancti Petri, et sancti Laurentii, et sanctæ Mariæ; in vigiliis harum festivitatum semper jejunandum est usque ad nonam, et expleta missa reficiant. Si nominatæ vigiliarum reliquiæ die Dominico occurrerint, non licet jejunare. Octava Natalis Domini, octava Epiphaniæ, Purificationis sanctæ Mariæ, sed et sanctæ Scholasticæ, sanctorum Faustini et Jovitæ, sancti Germani, dedicatio sancti Benedicti sursum, et dedicatio Domini Salvatoris et sanctæ Mariæ deorsum. In istis omnibus festivitibus non jejunatur usque ad vesperum, nisi si evenerit sanctæ Scholasticæ, aut sanctorum, Faustini et Jovitæ, vel sancti Matthæi apostoli in quinquagesima, aut in quadragesima. Quod si evenerit, sic agatur sicut in aliis sacris jejunii diebus. Nam officia ut reliqua omnia de supra scriptis festivitibus ita agantur, quomodo diximus, sicut et in Dominico die. In sancti vero Gregorii et sancti Benedicti, et Annuntiatione sanctæ Mariæ duodecim lectiones fiunt, et genua in oratione fratres non

flectunt, sed jejunium usque ad vesperum observant ; tamen post vespervas refectionem faciunt de cotto et vino. In sancti Stephani et sancti Joannis evangelistæ, et in feria secunda, et in feria tertia post Pascha, novem quidem lectiones faciunt ; nam missa ita agitur, sicut in die Dominico. In istis omnibus supra scriptis festivitatis semper ad matutinum *Dominus regnavit* canitur, et genua non flectuntur, et capitulum et lectio ad seram non leguntur. Nam in aliis omnibus sanctorum novem quidem lectiones faciunt, matutinum et missa ita agitur, sicut in quotidianis diebus, genua flectent, jejunium observent usque ad horam statutam ; *Miserere mei, Deus*, ad vespervas et matutinum et ad primam non cantent : nam cæteris horis cantatur, præter si in Dominico die venerit, si contigerit, celebratur sicut Dominica. De divisione matutini et nocturni ita agitur. A Kalendis novembris usque in vigiliam Cœnæ Domini, sicut sanctus Benedictus prædestinavit. Præterea in vigilia Natalis Domini, et in omnibus sanctorum et Dominicis diebus, quod minime

licet dividere. A Natali Domini usque Epiphaniam genua non flectuntur : *Miserere mei, Deus*, in oratione publica ad nullum officium cantant usque in octavam Natalis Domini. Similiter a Pascha usque octavam Pentecosten ; postea vero cantent. De rectorio autem omnia adimpleri debent, sicut sanctus Benedictus dicit, sive æstatis, sive hiemis, sive quadragesimæ, omnia secundum tempus suum. Præter quod consuetudo est, sive sursum, sive deorsum, ut non reficiant ad nonam, usque dum vindemiaverint. Cum autem liberi a vindemia fuerint, statim ad nonam horam reficiunt, et post vespervas gustum manducant, et bibunt iterum, quod in regula non est scriptum. Similiter et quinquagesima post refectionem secundum consuetudinem, antequam lectio legatur, tota hebdomada bibunt, quod nec istud in regula dicitur. Quando autem mandatura faciunt, si Dominus abundantiam vini dederit, semper bibunt ; si autem exiguum fuerit, abstinebunt.

ANNO DOMINI DCCCLXXXIV.

HARMOTUS

SANGALLENSIS ABBAS

INSCRIPTIONES IN TEMPLO SANCTI OTHMARI

(Apud Canisium lect. antiq.)

Templum sancti Othmari pingi fecit Harmotus abbas, atque in pariete uno pingebatur Sapientia, cum hoc Patrum elogio.

O generosa parens, cunctis gratissima doctis.
O decus imperii, rectrix dignissima mundi,
Soleque splendidior, fulvo pretiosior auro
Quam præclara nites toto, Sapientia, mundo.
Aspice quam pulchro decorata est ordine mater
Natarum, clare dives Sapientia fulgens.

In pariete altero septem Sapientes.

Continet hic paries veterum monumenta sophorum,
Claro qui totum docuerunt tramite mundum.

In alia parte turba beatorum Deo assistentium.

Agmina sanctorum laudantia voce serena
Ante thronum Domini sistunt per sæcula cuncta.

In pariete super ostium.

Hic Deus est præsens puro poscentibus ore,
Dans miseris veniam, contritis corde medelam.

EPITAPHIUM GRIMALDI

AUCTORE HARMOTO

(*Hist. litt. de France*, tom. V, p. 404.)

Hic manet interius divinæ legis amator
Grimaldus humilis templum hoc qui condere jussit.

ANNO DOMINI DCCCLXXXVIII.

SANCTUS REMBERTUS

HAMBURGENSIS EPISCOPUS.

VITA SANCTI REMBERTI

AUCTORE ANONYMO, EJUS ÆQUALI.

(*Apud Mabill. Acta SS. ordinis S. Bened.*)

PROLOGUS.

Scripturi Vitam cum omni semper veneratione memorandi Remberti pontificis, et quæ officii ejus primitus occasio fuerit, aut quem ad hoc institutorem vel conversationis profectum habuerit, seu qualiter ad hoc electus deinceps vixerit, in quantum hæc comperimus, fideliter enarramus.

CAPUT PRIMUM.

Cum imperator Ludovicus Regni Francorum monarchiam teneret, auctori sublimationis suæ Deo talem devote vicem reddere curavit, ut ecclesiæ Dei in regno ejus constitutæ decenti vigori proficerent, servorum quoque et ancillarum Dei status cum honoris incremento latius exeresceret. His ejus assiduis meditationibus ex divina inspiratione subintravit etiam memoriam, qualiter serenissimus pater suus Carolus cognomento Magnus, gentem Saxonum cœtenus, infidelem ad fidem Christi converterit, usque ad huc ordinatis per ipsam provinciam sufficienti numero episcopis, et sedibus eorum provide distributis, extremum ad plagam aequilonarem ejusdem provinciæ partem ad hoc reservaverit, ut ibidem archiepiscopalis constitueretur sedes, unde prædicatio verbi Dei finitimis fieret populis, Sueonum, Danorum (a Norveorum, Farriæ, Gronlandan, Islandan, Scridwndan), Slavorum, necnon omnium septentrionalium et orientalium nationum quocunque modo nominatarum, qui paganis adhuc erroribus involvuntur.

CAPUT II.

Sed ad hoc opus constructa est tantum et dedicata Hammaburgensis ecclesia in confinio Danorum et Slavorum, in extremis videlicet partibus Saxonum inter eos qui dicuntur Nordalbingi: et una cum incolis locorum eadem ecclesia jussu ejusdem

Agloriosi imperatoris Caroli ad gubernandum est presbyteris commissa, donec opportuno tempore, deputatis prius ad locum episcopalibus sufficientiis, archiepiscopum faceret ibidem consecrari. Ipso autem ante hujus effectum voti ex hac vita sublato, piissimus filius ejus jam dictus Ludovicus cum fidelibus suis hanc ejus intentionem retractans, Ansgarium summæ sanctitatis virum, ut pater decreverat, privilegii archiepiscopalis et ordine et nomine sublimari, et jam dictæ novellæ ecclesiæ rudibusque adhuc in fide populis rectorem, ac gentibus, ut dictum est, necdum fidelibus erogatorem verbi divini fecerat ordinari. Cujus a pueritia in Dei timore conversationem, vel cum ætatis processu virtutum incrementa, aut quantis indicis divinitus præmonstratum sit pontificatus et prædicationis ejus officium, et quomodo per sedis apostolicæ privilegia ejus sit omnia causa munita, studiumque ejus et profectum in lucrandis Deo animabus, quas vel in fide roborare, vel de paganismo ad Christianitatem producere quotidie satagebat, quisquis scire cupit, legat libellum vitæ ejus, et quantæ sanctitatis vir ipse fuerit perpendet. Nos nunc de ejus sanctitatis imitatore simul et dignitatis successore Remberto scripturi, qualiter primo ei cognitus sit et consequenter ascitus, hinc jam sequi incipiamus.

CAPUT III.

Cum jam dictæ noviter institutæ Hammaburgensis ecclesiæ termini essent angusti, et ad tantum officium quod episcopo ejus injunctum diximus, sumptus ex illius pertinentiis collecti non sufficerent, ipsosque etiam qui provenire possent redditus, frequens hostilis irruptio diriperet; ne per hoc vir Dei impediretur a prædicationis officio, quod in gestis ejus legatio ad gentes vocari solet, memoratus imperator Ludo-

* Includa parenthesi inserta videntur a posterioribus, ut notatum est in Vita sancti Ansharii.

vicius quamdam in Gallia cellam, *Turholt*^a vocatam, eidem legationi tradidit perpetuo servituram. Quodam autem tempore dominus pontifex ibidem degens, aspexit quosdam pueros ad ecclesiam cum joco et inanibus festinare discursibus : quorum quidam inter cæteros pene minimus graviter incedens, et pueriles levitates sollicitè devitans, orationem cum reverentia et timore peregit, surgensque signo crucis frontem munivit, et quasi maturioris esset ætatis, suam per omnia continentiam exhibuit. Animadvertit ergo vir Dei sacram religiosi pueri infantiam divinæ jam servitutis amore flagrasse ; acitisque ad se parentibus ejus, et nomen pueri quod Rembertus vocaretur, edidicit, et consensu eorum accepto, tonsuram ei et ecclesiasticum habitum imposuit. Sicque eum ibidem paterna sollicitudine commendans, studiose erudire præcepit : paucisque diebus ibi transactis inde discessit, et suscepti pastoralis officii, suæque ad gentes legationis instanter operam egit.

CAPUT IV.

Post hæc puer jam Deo dilectus magis magisque in gravitate proficiens, et discendis liberalibus disciplinis ardentè instabat, et inter hæc orationibus cæterisque bonarum rerum occupationibus assuetus, in paucis annis omni maturitate et scientiæ et virtutum perfectus enituit. Et jam tunc juxta Psalmistam concaluit cor ejus intra ipsum, et in meditatione ejus exarsit ignis (*Psal. xxxviii, 4*), invenire cupiens quid ei in hac vita consistenti exsqui maxime prodesset. Cui talia meditantem occurrit, juxta quemdam sapientem, primam philosophiæ definitionem meditationem esse mortis, idque toto pectore hausit, ut omni vitæ suæ tempore hanc summam sapientiæ consequi mereretur : quatenus tempore mortis suæ de neglecto præmeditationis ejus non constrictari, sed potius per observationem Scripturæ monentis ac dicentis : *In omnibus operibus tuis memorare novissima tua, et in æternum non peccabis (Eccli. vii, 40)*, quantum humanæ conditioni possibile esset, de peccatorum vel cautela vel remissione securus lætificari mereretur.

CAPUT V.

Venerandus igitur præsul, qui eum divino mancipavit servitio, sicut in gesti vitæ ejus legitur, quæ illi ventura vel ab ipso gerenda erat, pene omnia, vel per somnium, vel per intimam revelationem in mente prænoscere et præordinare solebat : quæ autem ipsa fuerit intima in mente revelatio, scriptores vitæ ejus tale quid esse arbitrantur, quale in Actibus apostolorum sæpius replicatur (*Act. viii, 10 et 11*) : Dixit autem Spiritus illi, vel illi discipulo. Unde non est diffidendum, quod vir Dei, non ex eventu, sed divinæ admonitionis attractu, quem occultiori sensu, utpote vir spiritualis, in anima percipere solebat ; hunc felicem de quo loquimur puerum cum tantæ paternitatis affectu divinis asciverit ministeriis : quin potius in tenore conversationis et modo, quo

A semper deinceps apud illum tractatus et habitus est verisimile videtur, quod evidenter a Deo illi sit revelatum, quia successor illi in episcopatu futurus fuisset. Nam cum primo in discendis artibus et disciplinis scholaribus districtio magistrorum ei remitteretur, quod usitata locutionis egressum de schola dicimus, mox eum dominus episcopus indivisibilem suæ legationis comitem esse constituit : venientemque de præfato in quo eum nutriendum commendavit monasteriolo cum gaudio suscepit, consciumque suorum in omnibus permiserat esse gestorum, quibus ipse Deo cum omni pietate, sive occulte, sive manifeste famulabatur.

CAPUT VI.

B Denique cum quadam die juxta morem simul assisterent ad orationem, jamque supplicatione finita egredi de ecclesia parent, quasi secretioris gratiæ munus in discipulo pontifex agnoscens, eum his verbis alloquitur : « Oportet te, inquit, o fili Remberte, semper illi gratias agere, qui de turbidis sæculi fluctibus ad portum quietis te vocavit : ad quem quia video te indubitanter animum applicasse, fautor amoris tui me affectu flagrare, eamdemque dilectionem finetenus ex mea parte circa te durare non dubites. Cui ille respondens : Indignus sum, inquit, domine, tanta gratia tua : quia tamen hanc in me ostendis clementiam, meritis tuis apud Deum mihi obtineri deosco, ut in futura vita præmiorum tuorum consortium adipiscar. » Tunc sanctus episcopus, cujus mentem gratia Dei sæpius illustrari diximus, ad prænoscentia quæ illi futura essent, his verbis dignissimi Remberti nullum quidem ad præsens dedit responsum : tertia vero die transacta, ipso jam sollicitudine cogitationum fatigato, quare scilicet ad hanc petitionem suam reticuerit episcopus, talem ei reddidit consolationem : « Jam, inquit, obtinui a Domino, ut in futuro sæculo, sicut petisti, ab invicem non separemur : ubi ita beatitudinis æternæ participes erimus, ne nostra nos virtute ad hanc pertingere posse præsumamus, quod est reatus superbiæ, per quam ceciderunt qui operantur iniquitatem : nec rursus desidia torpentes obliviscamur quod dicitur : *In Deo faciemus virtutem (Psal. lix, 14)* : sed quotidie studeamus, ut bonum opus, sicut admonet beatus Gregorius, habeatur nobis in voluntate ; ac sic consequenter confidamus, quia juxta eundem doctorem ex adjutorio divino erit in perfectione. » Si quem autem movet hanc trium dierum dilationem ad hoc responsum fecisse episcopum ; meminerit nos prædixisse, mentem ejus a gratia Dei ad prænoscentia futura sæpius illuminari, de quo tamen his ipsis quæ subjecta sunt verbis in Vita ejus ita scriptum habetur. « Ad omnia ergo quæ forte præcipua definire debebat, spatium cogitandi habere voluit, nec quidquam temere disponebat, antequam gratia Dei illustratus, ipse in mente sua sentiret quid melius esset : sicque superna vi-

^a Turholtum in Flandria prope Brugas, Remberti natalis sedes, ut constat ex hoc loco. Falluntur proinde qui eum ex Frisia natum esse dicunt.

sitatione certificatus in mente, sine cunctatione quæ agenda erant, disponebat. » Hæc de Vita ejus idoneus inseruisse lector intelligat, ut ex hoc testimonio comprobaretur, nihil eum ad petitionem hujus sanctissimi discipuli sui Remberti respondisse, nisi quod in hoc tridui spatio menti ejus Spiritus sanctus infudit, juxta sententiam, quam etiam superius de Actibus apostolorum protulimus.

CAPUT VII.

Accedit etiam ad præsagium virtutum beati viri visio quædam de ipso revelato procuratori antistitis prima mox nocte adventus ejus Hammaburgum, cum ipse adhuc in prima ætate adolescentiæ fuisset. Videbatur enim eidem procuratori conpexisse se, ipsum Rembertum sedisse in fastigio oratorii, signumque ecclesiæ unum, quod nos cloccam vocamus, in cælo apparuisse, a quo ligamen lineum, ut assolet, in modum funis demissum usque ad ipsum dependeret Rimburtum, per quod ipse idem signum hilariter traxisse, et sono ejus dulciter delectatus esse videbatur. Cui somnio congruam ex divinis Scripturis interpretationem reperimus (*Exod. xxviii.* Præcipitur Mosi a Domino, ut inter alia vestis sacerdotalis mystica indumenta hæc etiam fiant : *Deorsum*, inquit, *ad pedes ejusdem tunicæ per circuitum quasi mala Punica facies ex hyacintho et purpura et cocco bis tincto, et*, ut in sequentibus invenitur, *ex bysso retorta, mixtis in medio tintinnabulis.* Quare autem hic tintinnabula adjungi præcepta sint, inferius ostenditur : *ut audiatur*, inquit, *sonitus quando ingreditur pontifex sanctuarium in conspectu Domini, et non moriatur.* Sacerdos namque ingrediens vel egrediens moritur, si de eo sonitus non audiatur : quia iram contra se occulti Judicis exigit, si sine prædicationis sonitu incedit. Quia igitur futurum erat, ut summo ecclesiæ gradu conscenso, vir Domini ornamentis spiritualibus eniteret ; ut etiam prædicationis officium insigniter egisse probaretur, recte in fastigio templi, quod significat apicem pontificalem, cum doctrinæ suavissimo et cælitus attracto sonitu ad convocandam servitio divino sacram Christi plebem sedisset videbatur. Hoc enim in hujus ostensione visionis personans attractu ejus signum cælestis significare potest, quod in veste pontificis tintinnabula monstrare probantur. Qualiter etiam cætera, quæ de Scriptura sacra proposuimus, sacerdotalis habitus ornamenta spiritualiter in sese semper exhibuerit, ad profectum simul et imitationem legentibus exponere judicavimus. Malis utique Punicis utebatur, in quibus multa interius grana uno foris cortice teguntur : quia ipse semper multifariam virtutum operationem uno charitatis munimine undiqueversum tectam gestabat. Hæc autem mala Punica ex purpura et hyacintho et cocco bis tincto et bysso retorta erant, quæ cuncta illi aptissime conveniunt. Omni enim desiderio semper

A quærebat cælestia, quæ per hyacinthum significantur ; pro Christi nomine usque ad martyrium paratus, quod intelligitur in purpura ; amore Dei et proximi flagrans, quod per coccum bis tinctum exprimitur. Et sicut byssus de terra eruta longo exercitio, siccandi, tundendi, purgandi, coquendi, et nendi, gramineum solet perdere, et candidum in se recipere colorem : ita ipse cum magno continentie labore quasi nativum exsudans humorem, ad decorem dignæ Deo puratis solerti jejuniorum et vigiliarum et orationum et lectionis ; patientiæ et humilitatis instantia pervenit. Quibus omnibus tintinnabula habuit permista : quia raro aliud ab illo quam prædictarum virtutum suavissimus sonitus audiebatur, qui rursus operum ejus sublimitate audientium mentibus commendabatur, sicut et sequens de illo hujus opusculi textus manifestius ostendit.

CAPUT VIII.

Cum adhuc esset in obsequio decessoris sui domni Ansgarii, apparuit ei presbyter Arnulfus jam diu defunctus, et percontanti de ejus causa in alterius sæculi vita dolenter respondit : Ego, inquit, dum adhuc in carne essem, negligentem de animæ meæ agebam salute, gravitatem personæ meæ competentem non servans, otio sæpius vacans, et aliquando etiam in indieto jejunio carnem manducans, aliaque similiter interdicta in esca et potu frequenter usurpans. Pro talibus commissis indignus fui hætenus ad præsentiam Dei venire : sed si tua, ait, fraternitas pane et sale et aqua contenta, a cæteris victualibus abstinentiam quadraginta diebus pro me facere vellet, crederem me per Dei misericordiam ab hujus repulsionis meæ sententia seu pœna liberari. Cui cum ipse, ut ei videbatur, ita se facturum esse polliceretur, expergefactus de somno, mox ut episcopum alloqui potuit, visionem ei omnem exposuit : acceptoque ab eo consilio, toto quadraginta dierum spatio nullæ alio cibo vel potu est usus, nisi pane tantum et aqua. Eodem tempore tanto dentium dolore vexabatur, ut ipsis sibi panem ad reficiendum commotis sustinere non posset. Quamobrem ipsum panem comminutim terendo, seu manibus confricando in ipsam aquam commiscebat, et ad levamen dentium quodammodo instar pultis emollebat. In quo etiam ad augmentum abstinentiæ, ea quæ in simplici decoctione panis esse possent, plurimum defecerunt, et vis scilicet alimenti, et suavitas ac delectatio saporis. Expletis autem diebus istius abstinentiæ, ipse presbyter pro quo hæc agebantur, per visum apparuit euidam fœminæ, quæ multis diebus paralytica jacebat, nomine Helahvih, cui longa quidem infirmitas membra gravavit ; sed tamen, ut de quodam beatus Gregorius^a dicit, ipsa infirmitas eadem membra a bono opere non ligavit. Quotidie enim se ad ecclesiam deportari faciens, verbum

^a Scilicet de Servulo, in homilia 13 in Evangelia, et lib. iv Dial. cap. 44.

vitæ ibidem delectabatur audire, hymnisque et laudibus, prout potuit, die noctuque vacare. Huic, ut dictum est, per visum apparens presbyter memoratus, famulo Dei Remberto gratias referri petivit de parcimonia pro ejus salvatione exacta, quam et in tantum sibi profecisse mandavit, ut abnegatum sibi prius ad conspectum Dei accessum et aulæ cœlestis introitum per hanc condonatum constaret. Ipse vero Rembertus inter eos, inquit, ascribetur, de quibus dicitur : *Fulgebunt justi, et tanquam scintillæ in arundineto discurrunt* (Sap. III, 7) et de quibus Psalmista ait : *Ibunt de virtute in virtutem* (Psal. LXXXIII, 8). Istiusmodi visionibus vir Dei nisi unquam anima extolli solebat : sed per humilitatis tutissimam semper viam incedens, ita quodammodo quotidie virtutum gradus ascendit, ut saepe dictum semper attendere videretur beatum Gregorium, disentem : « Unusquisque vestrum, fratres, magnus esse studeat, sed tamen magnum se esse quodammodo nesciat : ne dum sibi magnitudinem arroganter attribuit, amittat. »

CAPUT IX.

Quandiu ergo fuit in corpore vir Domini Ansgarius, iste servus Dei Rembertus præ cunctis familiaribus illi in omnibus adesse solebat, de quo aliquoties nobis in hoc opusculo mentio incidit, et libellus gestorum præfati pontificis ab ipso Remberto alioque condiscipulo ejus editus testatur. In quo videlicet libro ubicunque commemoratio fit cujusdam fidissimi discipuli ejus, quod frequenter ibi lector inveniet, ipsum sciat fuisse Rembertum. Sed quia, ut diximus, ipse cum alio quodam editor eorumdem exstitit gestorum, idcirco veritatem rei, suppresso nomine suo, exprimere voluit, ne de se familiariorem gratiam jactanter proferre videretur. Sic enim et beatus evangelista Joannes in Evangelio suo fecit, ubi suam semper personam maluit iudiciis rerum accidentium, quam proprio designare vocabulo. Quatenus autem in hoc devotionis loco cum episcopo familiariter sanctus vir Rembertus perseverarit, ex verbis præfati libelli cognoscitur, quibus de transitu domni episcopi ita commemoratur : « Percepta, inquit, Domini corporis et sanguinis communionem, sanctus pontifex Dominum deprecabatur, ut quicumque in eum quoquomodo peccasset, divina hoc ei pietas remitteret. Deinde versiculos istos cœpit frequentius repetere : *Secundum misericordiam tuam memento mei, tu propter bonitatem tuam, Domine* (Psal. XXIV, 7); et : *Deus, propitius esto mihi peccatori* (Luc. XVIII, 13); et : *In manus tuas, Domine, commendo spiritum meum* (Psal. XXX, Luc. 23). Cumque hæc sæpius repeteret, et frequenti anhelitu jam ea frequentare non posset, cuidam fratri præcepit, ut hæc vice illius frequentando caneret : sicque oculis in cælum intentis Domini gratiæ commendatum spiritum exhalavit. » Hic ergo quem vice sua verba orationis pro se frequentare præcepit, Rembertus fuit : cui in loquelæ

A suæ defectu voti sui verba commendans episcopus, per eum se compensare credidit, quidquid ipse minus orationum jam moriens peragere posset : quoniam et propter vitæ ejus meritum pro se illum exaudiri non dubitavit ; et quod ille fecit, non discrevit ab eo quod a se ipso factum fuisset : quia cor unum et anima una, unus spiritus et una fides erat semper in eis.

CAPUT X.

Denique cum infirmitate ipsa, qua de hac vita migravit, consilium quæreretur ab eodem domno Ansgario de successore ejus eligendo, et quidam etiam de Remberto quid ei videretur, inquirerent ; respondisse fertur, quod hoc sui non fuerit ministerii decernere, quia forsitan ipse in episcopatu multorum animos offensus haberet, quod emendare magis debuisset, quam per hoc motum ipsum animorum augere, quod ipse talem ad successionem personam denominaret, quæ fortassis incommoditate sua gravaret subjectos, et amaræ fierent propter hoc contra ipsum querimonie. « De meritis tamen, inquit, Remberti sciatur, quia dignior ipse archiepiscopali, quam ego subdiaconatus officio. » Hæc de se magnæ humilitatis intentione sanctus persecutus est episcopus, tanquam verus observator ejus, quam et ipse olim in professione habuit monachorum regulæ (cap. 7), dicentis : « Septimus, inquit, humilitatis gradus est, si non solum omnibus se inferiorem sua lingua pronuntiet monachus, verum etiam intimo cordis credat affectu, humilitans se et dicens cum Propheta : *Ego autem sum vermis et non homo* (Psal. XXI, 7). Solent enim sancti viri cum fortia agunt, de semetipsis vilia sentire, juxta quod de semetipso David coram arca Domini saltando regni sui potentiam despiciens dixit : *Ludam et vilior fiam plus quam factus sum, et ero humilis in oculis meis* (II Reg. VI, 22); de quo et Apostolus admonet, dicens : *Implete gaudium meum, ut idem sapiatis, eandem charitatem habentes, unanimes id ipsum sentientes, nihil per contentionem neque per inanem gloriam, sed in humilitate superiores sibi invicem arbitrantes* (Philip. II, 2). Quorum prius, hoc est Prophetae testimonium, beatus vir Ansgarius ita in se custodire solebat, ut de semetipso intus humilia sentiens, honorem exterius non requireret, quasi dicens : *Ludam et vilior fiam*; nec rursus per hoc quod vilem se exterius præbuit, interius intumesceret, implendo potius quod sequitur : *Et ero humilis in oculis meis, id est qualem me exterius despiciens exhibeo, talem me interius attendo. Qua despectus sui intentione implevit etiam quod de Apostolo proposuimus ; ut omni contentione et inani gloria carens, per humilitatem sibi alios superiores arbitraretur : unde et superius est scriptum, quod potioris quam ipse esset meriti, beato viro Remberto tantopere dedit testimonium. Sed quoquam ipse humilitatis causa de sese talia dixerit, nostrum tamen non est quemlibet eorum alteri præponere,*

sed æquales fuisse meritis credere, quos et unius A gloriosus rex direxit ad Liudbertum Mongontiensem archiepiscopum, a quo jussu ejus ita est consecratus, ut provide actum sit, quatenus in adiutorium consecrationis, non unius metropolis, sed quarum convenirent suffraganei, Liudhardus videlicet Paderbournensis episcopus, pertinens ad Maguntiam; et præfatus Thiadricus suffraganeus archiepiscopi Colonien- sis: quos ita permistim adesse idcirco placuit, ut tam hujus consecrationis actio, quam etiam domni Ansgarii primitus ad sedem ipsam simili modo facta ordinatione, in signum essent futuris temporibus, quod ad nullam nominatim condicessitatem quorumcunque episcoporum pertineat ad hanc sedem consecrare episcopum, sed tantum, ut diximus, palatinæ hoc commissum sit prudentiæ, donec consecrantium B numerus ex gentibus suppleatur.

CAPUT XI.

Quantum igitur, sicut nunc diximus, sanctus pontifex non libenter aliis, pro offensa eorum vitanda, de successuro sibi aliquid referre voluisset; ne suam tamen pœne in omnibus conscium hæc gratia in fine defraudaret, triduo ante obitus sui diem aperuit secretum suum viro Dei Remberto, quod post se deberet ad pontificatus apicem promoveri. Tum ille reniti cœpit ad tantum ministerium, nec viribus nec meritis se idoneum esse proclamans. Cui sanctus episcopus Dei dispositionem esse commemorans quod ipsi prædixit, competentes admonitiones adjunxit, quod suam voluntatem ad divinæ dispositionis iudicium inflectere deberet, juxta illud beati Thomæ Domino dicentis: Dominus meus es tu, et ego servus tuus, fiat voluntas tua. Ad hæc gloriosus Remberto reniti vel contraire constantia defecit, quando episcopum divinitus hæc accepisse sciebat. Nec ulla ambiguitas fuit clero vel populo inter plures de electione: sed ipso mox die depositionis domni Ansgarii Rembertum omnes concorditer elegerunt. Cum ejus concordie pacto, ad gloriosum tunc temporis regem Ludovicum adduxerunt eum viri venerabiles, Thiadricus Mindensis Ecclesiæ episcopus, et Adalgarius abbas monasterii novæ Corbeie: susceptusque ab eo honorifice, cum pontificalis baculi juxta morem a commendatione episcopatus est sortitus dominium. In chartis autem apostolicorum Romanæ sedis pontificum, a quibus privilegium archiepiscopale sancitur sedi quam tunc ipse suscepit, etiam hoc continetur ^b, ut quia propter novellam ejusdem sedis institutionem, et necdum conversos ad fidem populos suffraganei non habentur episcopi, a quibus decedente uno alter archiepiscopus consecraretur; palatinæ interim providentiæ succedentium per tempora pontificum consecratio sit commissa, donec numerus suffraganeorum episcoporum canonice eum consecrare debentium ex gentibus suppleatur. Cum hujus ergo ad ordinandum eum tenoris insinuatione venerabilem Rembertum

^a Hæc verba in gratiam imperialis investiture intrusa fuisse tempore Henrici quarti censet Henschedius, hæc maxime rati ne ductus, quod in primariis ecclesiæ Hamburgensis et Bremensis privilegiis nullum hujus rei vestigium apparet. Et tamen Adamus, Henrici æqualis, hæc privilegia pro investitura imperiali laudat his verbis capitis 28: *Pallium Rembertus pontificale suscepit a papa Nicolao, ferulam pastoralem a Cesare (scribendum rege) Luthewico, sicut in privilegiis dignosci potest.*

^b Nempe in privilegio Gregorii papæ IV, in quo habentur ea quæ sequuntur in hunc modum: *Consecrationem vero succedentium sacerdotum, donec consecrantium numerus augeatur ex gentibus, sacre palatinæ providentiæ interim committimus.*

^c Sic libri editi apud Philippum Casarem et Bollandum. Erit forsitan qui legendum putet, *ut stabilitatem, et conversionem morum suorum*, etc., convenienter ad regulæ

Habuit autem hic sanctissimus vir olim hoc votum de se factum, ut post discessum domni Ansgarii monachicum mox et propositum acciperet et habitum. Unde cum consilio consecrantium se pontificum, mox post ordinationem ad monasterium novæ Corbeie properans, vestem quidem illius promissionis ex integro suscepit, conversationis autem illius promissionem ita fecit, ut conversationem ^c suam, et stabilitatem morum suorum, et obedientiam secundum regulam sancti Benedicti exhiberet, in quantum labor et occupatio suscepti pontificatus permetterent. Et ut in hujus promissionis effectu ^c veracius assuesceret, aliquem de fratribus ejusdem monasterii sibi præstari rogabat, cum quo, quia ipsi in monasterio esse non liceat, solatium haberet assidue inde meditationis et usum continendi se juxta moderamen regulare quod promisit. Ad quod ei deputari placuit insignem conversatione virum, gradu diaconum, nomine Adalgarium ^d, germanum videlicet et æquivocum abbatis ejusdem monasterii, de quo supra diximus. Hic vir venerabilis in conversationis ejus imitatione simul et successionis dignitate adhuc hodie superest, cum multis aliis attestans, quia sanctus pontifex, ejus vitam scribimus, nihil ex occasione curæ pastoralis de monachica perfectione perdidit, adeo ut nullus etiam intra

CAPUT XII.

nostræ caput 58, ubi hæc verba: *Suscipiendus autem in oratorio coram omnibus promittat de stabilitate sua, et conversione morum suorum, et obedientia coram Deo et sanctis ejus.* Et hanc quidem professionis formam hactenus sequimur Benedictini omnes. Verum alio modo editam a Remberto fuisse professionem puto. Quia enim ejus dignitas non sinebat ipsum in monasterio persistere; tantum stabilitatem morum secundum regulam sancti Benedicti, non stabilitatem in monasterio, Deo vovit. Quo fit, ut rectam hujus loci lectionem existimem. Porro in hoc facto illud observari dignum est, Rembertum nulla probatione facta ad professionem vitæ monasticæ admissum fuisse. Legæ superioris tunc præfationem.

^d Hinc patet Adalgarium, qui Remberto successit, non fuisse Corbeie abbatem, ut recte contra Letznerum nolavit Henschenius.

ipsa monasteria viventium, instrumenta bonorum operum, quæ eorum regula commemorat (*cap. 4*), æque ut ipse observaverit. Cujus facta quidem vix a nobis explicari possunt: sed quotidianam ejus cum Deo conversationem, et animum cælo semper intentum, nostræ tenuitæ scientiæ nequaquam edicere vel saltem perpendere valet. Grave ducebat ullum tempus vacuum absque opere Dei transigere: sed orationi lectio, lectioni semper apud illum successit oratio: et si aliquid accessisset, quod eum ab oratione impedire videretur, semper tamen quæ justa sunt agens, sine intermissione sentiendus est orasse, ut beatus docet Augustinus: Illi, inquit, qui in divino versatur officio, omnia gesta ejus dictaque pro oratione reputantur.

CAPUT XIII.

Vigiliarum usum moderanter agebat: abstinentiæ modum ita exercuit, ut semper illi essent quotidiana jejunia, et refectio satietatem fugiens. In quo videlicet hoc attendebat, ut juxta beatum Hieronymum ita corporis frangeret appetitum, ut tamen ad lectiones et psalmodiam atque ad altaris ac pontificatus sui officium vires ei non deficerent. « Nihil enim prodest, ut ait idem Hieronymus (*epist. 22 ad Eustoch.*), biduo triduoque vacuum portare ventrem, si pariter obruatur, si compensetur saturitate jejunium. Illico enim mens repleta torpescit, et irrigata humus spinas libidinum generat. » Quod vir Dei, ut diximus, in se cavere volens, moderamen jejunii ita custodivit, ut Dominus in Evangelio Judæos arguens, quod nec Joannem jejunantem, nec ipsum manducantem et bibentem suscipere, subjecit dicens: *Et justificata est sapientia a filiis suis (Matth. xi, 19)*; ostendens per hoc filios sapientiæ intelligere, nec in abstinendo, nec in manducando esse justitiam, sed in æquanimitate tolerandi inopiam, et temperantiam per abundantiam non se corrumpendi, atque opportune sumendi vel non sumendi ea, quorum non usus, sed concupiscentia reprehendenda est,

CAPUT XIV.

Quidquid vero etiam ad usus et sustentationes pauperum beatæ memoriæ decessor suus institutum habebat, in nullo hoc ipse disjecit: sed omnem curam et diligentiam adhibebat, ut omnia ad id statuta nullum suis temporibus caperent detrimentum, sed potius suo quotidie studio his aliquid adderetur. Erat enim pro indigentium levamine hospitale constitutum in episcopatu ejus, ad quod tanta subsidiolorum sufficientia deputata est, ut nusquam copiosius vel sapientius hoc ipsum procuratum esse sciamus. Sed et extra episcopatum, ubicunque fuisset, semper constitutos habebat, qui pecuniam in sacellis ad dandum pauperibus gestarent: ipse-

^a Modo Nova Herisia, vulgo *Nienherse*, collegium canonicarum, trium horarum itinere ab urbe Paterbrunna, ex Henschenio.

^b Abhinc capitulum 16 orditur Philippus Cæsar; at se-

que ad hoc ipsum in zona sua marsupio cum nummis semper utebatur, ut si quando dispensator eleemosynæ suæ in adventu egentis deesset, ipse sine mora haberet quod daret. Inerat enim ei sollicitudo, ne quis talium a se sine levamine abcederet; suisque similia jugiter adhortationem faciens, dicere solebat: « Non tardandum est ut cunctis pauperibus succurramus, quia quis sit Christus, vel quando ad nos venit, ignoramus. »

CAPUT XV.

Interea juxta adinonitionem beati Gregorii, etiam eleemosynam verbi incessanter agens, doctrinæ salutaris studio jugiter instabat, recolens quod idem ait doctor (*hom. 6*): Plus esse ut verbi pabulo victura in perpetuum mens reficiatur, quam venter morituræ carnis pane terreno satiatur. Hujus rei gratia excerptum legentibus utile de nibris sancti Gregorii fecit, et propria manu conscripsit, epistolasque non nullas ædificationis plenas ad diversos composuit, quarum una est ad quamdam Dei ancillam in monasterio quod dicitur Herisi^a constitutum, cæterasque sorores ibidem in Dei famulatu consistentes. Hæc autem famula Dei, de qua loquimur, neptis erat venerabilis episcopi Liuthardi, cujus supra mentionem fecimus, qui se sancto viro cum omni devotionem affectu ita devinxerat, ut non solum ipse sanctitatis ejus amator existere, verum etiam omnes ad se quoquo modo pertinentes illi commendare studuerit, præcipue istam de qua loquimur ab infantia Deo oblatam, et in virginitate permanentem neptem suam, quæ et propria devotione promeruit, ut unicam dilectionis suæ filiam vir sanctus eam nominare solitus sit. Quæ licet nomen suum vitandæ jactantiæ causa palam nolit edici, ipsam tamen ad ædificationem sacris virginibus, quamvis tacito nomine ejus ad quam specialiter scripta est, hic ponere decrevimus epistolam ita se habentem^b.

« Charissimæ filiæ cæterisque virginibus et sponsis Christi REMBERTUS, gregis Dei vilis servulus, in Domino salutem.

» Frater Adalgarius nuper a vobis rediens, dixit mihi graviter vos ferre, quod parvitatæ meæ litteras raro suscipiatis. Quod modo mihi emendare cupienti, quid scribere debeam, nihil convenientius occurrit, quam ut vos de vestræ sanctitatis commoveam proposito. Si igitur ad sublissimam gloriam vultis pervenire, omni virtute incorruptionem corporis ac spiritus excolere debetis. Interioris enim fotu ac pabulo puritatis, subministrari necesse est etiam exterioris hominis castitatem, eamque jugiter ad perseverantiam perpetuæ incorruptionis animari. Illæ namque sunt veræ atque incorruptæ virgines Christi, non quæ metuunt, sed quibus non libet fornicari. Quod donum, si per Dei gratiam adeptas vos quens epistola pertinet ad capitulum 15, ut patet ex Adamo, cui capitulum 16 est id quod post epistolam sequitur, integrum ab ipso relatum in cap. 29.

senseritis, quanto magnæ estis, ut sacra monet Scriptura, humiliare vos in omnibus, et coram Deo invenietis gratiam (*Eccli. iii, 20*). Ea enim via pervenire debetis ad Christum Dominum et sponsum vestrum, quia ipse dixit: *Discite a me quia mitis sum et humilis corde* (*Matth. xi, 20*). Curandum itaque est, ut omni custodia mens servetur a superbiæ tumore. Non enim ante oculos Dei vacuæ transvolant cogitationes vestræ. Intus ergo videt Deus quod mentem elevat: et idcirco foris permittit inolescere quod deponat. Hinc quippe per Osee contra Israelitas dicitur: *Spiritus fornicationis in medio eorum, et Dominum non cognoverunt* (*Osee v, 4*). Qui ut ostenderet, sicut dicit beatus Gregorius, quod causa libidinis ex culpa prorumpat elationis, mox subdidit dicens: *Et respondebit arrogantia Israel in faciem ejus*; ac si diceret: Culpa quæ per elationem mentis in occulto latuit, per carnis luxuriam in aperto respondebit. Proinde per humilitatis custodiam servanda est munditia castiatis. Si enim spiritus sub Deo premitur, caro illicite super spiritum non lavatur. Habet quippe spiritus commissum sibi dominium carnis, si tamen sub Domino recognoscit jura legitimæ servitutis. Nam si auctorem suum superbiendo contemnit, jure et a subjecta carne prælium suscipit. Hinc est enim quod longa continentia repente solvitur, hinc quod plerumque et usque ad senium virginitas servata vitiatur. Quia enim negligitur humilitas cordis, rectus iudex respicit etiam integritatem corporis. Et quandoque per apertum malum reprobos annuntiat, quos dudum reprobos in occulto tolerabat. Nam qui diu servatum bonum subito perdidit, apud semetipsum intus aliud malum tenuit, ex quo aliud subito erupit: ac per hoc omnipotenti Deo etiam tunc alienus existit, quando se ei per munditiam corporis inhaerere monstravit. Hæc ergo, filiæ, non ideo scribo, quod in vobis quidquam de qualitate superbiæ vel vanæ gloriæ cognoverim: sed quia vos opto in illarum consortio esse, de quibus legitur, quoniam sequuntur Agnum quocumque ierit (*Apoc. xiv, 4*). Ubi multos cecidisse doleo, vos caute ambulare desidero, optoque ut dicat vobis Dominus et sponsus vester: *Tota pulchra es, amica mea, et macula non est in te* (*Cant. iv, 7*). Itaque sequimini hic Agnum in præceptis suis, ut ipso auxiliante illum sequi valeatis in æterna vita, cantando canticum, quod nemo potest dicere nisi chorus virgineus. Hæc pulchre beatus Augustinus virgines admonendo exposuit (*Aug., de sancta Virg. cap. 27*). Pergite, inquit, sancti Dei pueri et puellæ, mares ac feminæ, cælibes et innuptæ, pergite perseveranter in finem. Laudate Dominum dulcius, quem cogitastis uberius: sperate felicius, cui servitis instantius: amate ar-

^a Omittit hoc loco auctor factum quoddam insigne sancti Remberti, in Observationibus prævis relatum, de victoria Frisonum in Nortmannos reportata meritis sancti Remberti.

^b Hæc verba ex hac Vita refert Adamus in cap. 32, capite vigesimo mendose citato: et post hæc verba addit,

dentius, cui placetis attentius. Lumbis accinctis et lucernis ardentibus exspectate Dominum, quando veniat a nuptiis. Vos afferetis ad Agni nuptias canticum novum, quod cantabitis in citharis vestris, utique tale, quale nemo poterit dicere nisi vos. Sic enim vos vidit in Apocalypsi quidam præ cæteris dilectus Agno, qui discumbere super pectus ejus solitus erat. Ipse vos vidit duodecies duodena millia sanctorum citharædorum illibatæ virginitatis in corpore, inviolatæ veritatis in corde. Sequimini Agnum, quia et Agni caro utique virgo. Sequimini eum virginitate cordis et carnis, quocumque ierit. Quid est eum sequi, nisi imitari? de quo beatus Petrus: *Christus, inquit, Jesus passus est pro nobis, vobis relinquens exemplum, ut sequamini vestigia ejus* (*I Petr. ii, 22*). »

Hanc epistolam ideo hic posuimus, ut legentibus appareat, quantum, sicut admonet Apostolus, studium habuerit ejus quæ secundum pietatem est doctrinæ, et quam potens fuerit in ipsa doctrina etiam alios exhortari.

CAPUT XVI.

Præterea legationis suæ officium, quod ad prædicandum gentibus verbum Dei primitus a decessore suo susceptum est, et postmodum sibi successionis jure quasi hæreditarium provenit, impigre executus est, ipse quidem per se quoties occupationes aliæ sinerent, eidem legationi insistens; semper autem constitutos habens presbyteros, per quos et verbum Dei gentiles audirent, et solatium captivi Christiani haberent, ad ecclesias inter ipsos paganos constitutas longe ab ecclesia sedis suæ, quodque gravissimum erat, marinis discriminibus adeundas. Quæ discrimina ipse frequentius et abundantius sustinens, sæpe tanquam de se testabatur Apostolus, naufragium pertulit, sæpe in proximo erat ut cum eodem dicere posset: *Nocte et die in profundo maris fui* (*II Cor. xi, 25*). Sed profecto aderat ei Spiritus sanctus, qui in exterioris hominis corruptione interiorem renovaret de die in diem, et spe futuræ beatitudinis omnia præsentis vitæ aspera deliniret, et gravia relevaret. Consolabatur enim continua meditatione sermonis apostolici: *Quia non sunt condignæ passionibus hujus temporis ad futuram gloriam quæ revelabitur in vobis* (*Rom. viii, 18*): ac sic quæcumque fierent dura laboranti, mitescere solebant eadem propter Christum sustinenti ^a.

CAPUT XVII.

Ad redemptionem captivorum cunctis pene quæ habebat expensis, cum multorum adhuc apud paganos detentorum miseriam cernere cogeretur, etiam altaris vasa ad redemptionem eorum impendere non dubitavit ^b. In quo dum quibusdam minus sublimiter

Rembertum dixisse cum beato Ambrosio: *Melius est animas Domino, quam aurum servare. Pretiosa sunt ergo illa vasa, quæ animas de morte redimunt*. Lege librum i de Vita sancti Cesarii episcopi Arelatensis, num. 17 et sequentibus.

intelligentibus non recte videretur fecisse, quasi ad alios usus redigeret quæ sacris erant deputata mysteriis, et a quodam interrogatus fuisset, quare ita faceret, justa ratione seiscitanti satisfaciens : « Non ignoro, inquit, res ecclesiastici officii digne esse tractandas, et sub magna fore obligatione ad hoc opus depositas. Verumtamen plus est apud Deum per hæc subveniri captivis Christianis in angustia constitutis, quam esse possit depositum ista custodiendi. Et si necessitas incubuerit duorum bonorum unum eligere et alio carere, oportet assumere quod est melius, et relinquere quod habetur inferius. Unde et ego, ait, cum nullum aliud habeo consilium, non impie ago, si Christianum, qui filius Dei est, cum thesauris ecclesie redimo : cum et semper invenire possimus, quod ad usum sacri sufficiat ministerii : irrecuperabile autem sit, si Christianus in captivitate afflictione deficiat. »

CAPUT XVIII.

Exempli autem causa unum de hujuscemodi factis commemoramus, in quo non minus in potentia miraculi, quam in opere misericordie refulsit. Cum venisset quadam vice ad partes Danorum, ubi ecclesiam novellæ Christianitati constructam habebat, in loco qui dicitur Sliasvich, vidit multitudinem Christianorum catenatam trahi captivam : inter quas una sanctimonialis, ut eminus illum conspexit, cum genuflexione et crebra capitis inclinatione tam illum venerari, quam ejus misericordiam pro sua redemptione precari videbatur. Et ut eam intelligeret fuisse Christianam, elevata altius voce cœpit cantare psalmos. Episcopus autem miseratione commotus, divinitus eam adjuvari cum lacrymis orabat. Ad cujus preces mox disrupta est catena de collo ejus, quæ vincta tenebatur. Ne tamen ipsa aufugeret, eam inter manus habentes pagani facile obtinebant. Tum sanctus episcopus anxio de illa motus affectu, tenentibus eam paganis plura diversi generis pretia pro ipsa cœpit offerre. Sed illi nullam conditionem suscipere volebant, nisi suum eis daret equum, quo ad propriam sellam uti solebat. Quod ille facere non detrectans, repente disilivit [*al.*, desiluit] de equo, et cum omni quam ipse ad eum habuit paratura pro eadem dedit captiva, redemptamque libertate donavit, et quo vellet abire permisit. Duplex, ut diximus, per hoc factum de se memoriale laudis relinquens, quod et virtute orationis suæ catenam fregerit, et simul hoc insigne opus misericordie demonstraverit.

CAPUT XIX.

Proinde juxta præceptum Apostoli, quo servum Domini jubet mansuetum esse ad omnes (*II Tim. 2, 24*), ita vixit, ut suis temporibus nullus, sicut ipse, Mosaicum illud assimilaverit, quo vir mitissimus

^a Adamus in cap. 34 : *Hunc regis Luthewici filium Carolum esse arbitramur, qui novissimis archiepiscopi temporibus a regno depositus. Arnulfum germani sui filium accepit successorem. Sane in Annalibus Fuldensibus et*

super omnes homines fuisse describitur (*Num. XII, 3*). Aliquoties tamen sine ullo ejusdem mansuetudinis detrimento ita inquirendis vel discutiendis causis constans ac fixus in sua sententia mansit, ut a nemine posset in aliud deflecti. Quod autem diximus absque mansuetudinis detrimento hoc fieri, tam veraciter in illo adimpletum est, ut nil unquam iracundiæ vel commotionis contradicentibus ostenderit, vel verbis asperis contra eos egerit : sed familiaribus colloquiis et delectabili continentie gestu, cunctis sit amabiliter exsecutus quidquid intendebat : de ea tamen quæ illi inerat inflexibilitate animi, a quodam familiariter interrogatus, quæ infra habentur exposuit. « Quæcunque, inquit, agere debeo vel omittere, seu de omnibus futuris mihi eventibus, præsagium semper capio ex visionibus Domini ac decessoris mei Ansgarii. Solet enim mihi ipse apprensus in qualitate vultus sui ostendere, qualiter me immiscere debeam rebus agendis ; et quidquid de illo sentio, nullam ad hoc exsequendum dissimulationem facere possum. »

CAPUT XX.

Fertur etiam antiquorum more sanctorum quædam fecisse miracula, frequenter videlicet dum iret ad Sueoniam, tempestatem maris orationibus suis sedasse, cæci cujusdam oculos illuminasse per confirmationem, quam episcopali more cum chrismate sacro in eodem faciebat. Sed et filium quemdam regis dicitur a dæmonio liberasse : cui etiam affirmationi hoc astipulari videtur, quod multis astantibus episcopis clamor ab ore vexati sæpius sonabat, Rembertum solum inter eos digne commissum egisse officium, ipsumque sibi esse cruciatui auctor vocis testabatur ^a. Sed quia nostris temporibus, ut dicit Psalmista, *defecit sanctus, et diminutæ sunt veritates a filiis hominum* (*Psal. XI, 2*), nec facile accipitur quemque ex modernis viris talia fecisse, sufficiat nos hactenus comprobasse, quod hic vir Domini sanctitatis apicem conscendit per eas virtutum species, quas in Evangelio Dominus ad beatitudinem propeandam proponit : *Beati, inquit, pauperes spiritu* (*Matth. v, 3*), etc., de octonario virtutum catalogo, quo significatur per resurrectionis gratiam spei nostræ implenda perfectio. Nec miracula illi defuerunt spiritualia, quæ etiam nunc in Ecclesia a fidelibus fieri testatur beatus Gregorius exponens verba Domini dicentis (*hom. 29 in Evang.*) : *Signa autem eos qui crediderint, hæc sequentur : in nomine meo dæmonia ejicient, linguis loquentur novis, serpentes tollent ; et si mortiferum quid biberint, non eis nocebit ; super ægros manus imponent, et bene habebunt* (*Marc. XVI, 17, 18*). Sed de his singulis expositionem præfati doctoris percurrere longum est et non necessarium, cum homilia hæc continens in promptu

Bertinianus anno 875 malignus spiritus Carolum invasisset et graviter vexasse ferunt, ob id scilicet quod contra patrem Ludovicum conspirasset.

habeatur, ad quam nos lectorem mittentes ceptum **A** recedens disceret, arctius imprimeretur, hoc quod etiam ab eis amari noverat, admonitiones eis salutare fecit, non mediocriter verbis ejus in gratiam ædificationis profluentibus. Post hæc valedicens illis discessit ab eis, nec ulterius, ut ipse prædixit, eum viderunt. Qualiter autem somnium hoc, quod modo protulimus, evidenti effectu in obitu ac dispositione ejus, ut ipse intellexerat, completum sit, congrue eo loco enarrabimus, quo commemorandum erit, qualiter anima ejus ad cælos sublevata sit, et quomodo corpus ejus sepulturæ traditum habeatur.

CAPUT XXI.

Cui, cum jam senio gravari cœpisset, etiam continuus pedum dolor ad molestiam ei accessit : unde apud gloriosum primo regem Ludovicum, quo commendante episcopatum accepit, et postea apud filios ejus Ludovicum et Karolum hoc obtinuit, ut insignis vir Adalgarius, monachus videlicet de monasterio novæ Corbeia, ut supra retulimus, illi præstitus, ita in ædutorium illi confirmaretur, quatenus dum sese quælibet infirmitas præpediret, in ipso haberet solatium circandi episcopatum, placita adeundi, et quando exigeretur, in expeditionem, vel ad palatium cum comitatu suo proficiscendi. Nec **A** multo post, electionem succedendi sibi in ipso confirmari, et per manus acceptionem hominem regis illum fieri, et inter consiliarios ejus collocari obtinuit, assentientibus abbate et fratribus monasterii ejus, ac sancta synodo hæc omnia roborante. Post hæc etiam, velut expeditior a negotiis sæcularibus, omni instantia quotidie ampliari satagebat quidquid boni prius exercuit. Nec diu postea in hac vita duravit, cujus transitus ad Dominum subjuncto ordine factus esse perhibetur.

CAPUT XXII.

Anno pene integro ante obitus sui diem, quibusdam fidelibus suis secretius intimavit, multa sibi ostensa fuisse signa, quibus præsciret se in hac vita non diu mansurum, et quod eos quibus hæc loquebatur, in hac vita ultra non esset visurus. « Quædam, inquit, hujus rei præsentia mihi venerunt, quæ mihi non licet aliis indicare : visionem tamen hac nocte mihi ostensam vobis refero, qua evidentissime discessum meum præfiguratum esse intelligo. Videbatur enim mihi, quod in ecclesia quadam, muro firmissimo per medium intersepta, ego ex una parte muri fuissem, ex altera vero teneretur dominus et decessor meus Ansgarius : conspexique innumerabilem turbam utriusque sexus, more quærentium aliquid, hac illacque converti, nec quidquam ex eo quod quærebant potuisse inveniri. Quibus dominus Ansgarius : Quid, inquit, quæritis? At illi se anulum meum quæsisse respondentes, audierunt rursus ab episcopo, ut cessarent eum quærere, quando ipse secum esset illum habiturus. » Hæc dum quibusdam, ut **D** diximus, narraret dominus Rembertus, ex hoc multisque aliis indiciis asseruit se esse certificatum, quod eodem anno de hac vita foret exiturus. Et ut memoria ejus audientium animis per verba quæ

^a Aliter legit Adamus in cap. 58 : *Impetravit etiam, ut ipse illi in electione successor confirmaretur, et inter consiliarios regis locaretur, assentientibus fratribus et abbate monasterii ejus, etc.*

^b Nempe mos in Ecclesia olim vigeat, ut unctio infirmorum, quæ viatico præmittebatur, per plures dies a pluribus presbyteris repeteretur. Lege notas Menardi in librum Sacramentorum.

^c Adamus in cap. 57 : *Obiit autem anno Domini 888, indictione 76 cujus depositio in Idus Junii celebratur :*

CAPUT XXIII.

Duodecim igitur diebus ante transitum suum perveniens ad ecclesiam Bremensem, ipso mox die infirmitate correptus est. Cumque per omnes horas infirmitas graviter cresceret, ipse semper psalmodiis et lectionibus sacris intentus, sese ad futurum de hac vita transitum sollicitè præparabat. Et quamquam languoris immanitas corporeis viribus defectum ingereret, animo tamen semper invictus apostolicam prætendebat fortitudinem, de qua dicit : *Quando enim infirmor, tunc potens sum (II Cor. XII, 10)*. Septimo ante obitum die ministerium sacræ unctionis cum oleo sancto ei fieri cœpit, et una cum communione corporis et sanguinis Domini usque in diem animæ exeuntis de corpore hoc salutare remedium omni die **B** percepit. Et cum jam migraturus esset de mundo, convocatis presbyteris et universis fratribus, veniam petivit de omnibus quæcunque fortassis in aliquem illorum peccasset. Et cum ipse vicissim reconciliationem fecisset omnibus Christianis, a quocunque in eum aliquid commissum fuisset, veniamque eis **C** Domino poposcisset; percepto corpore et sanguine Domini sacram animam ^e emisit. Tunc vero incredibile gemitus omnium subsecutus est, maxime pauperum has inter fletus voces emittentium : *Væ nobis, Pater sancte, quomodo jam post te vivemus, tuis eleemosynis in victu et vestitu hactenus sustentati? a quo deinceps hæc merebimur? Sed tibi, inquit, Christe supplicamus, ut anima servi tui sentiat te nunc memorem dictorum tuorum, quibus promittere dignatus es a te esse remunerandum, quicunque uni ex minimis tuis aliquid solatii in nomine tuo fecisset.*

CAPUT XXIV.

D Ipse autem vir Dei, cum adhuc viveret, humilitatis intuitu, præcepit ne in ecclesia sepeliretur : quod præceptum transgredi non audentes fratres ecclesiæ illius, sepelierunt eum foris basilicam prope tumbam ^d sancti Villehadi, extra murum ecclesiæ orienta-

qui annus et dies certi esse videntur. Fallitur proinde Trithemius, qui Remberto annos duntaxat novem regiminis tribuit, cui annos tres et viginti cum mensibus quinque tribuere debuisset.

^d Interjecto tamen muro seu pariete ecclesiæ. Nam sanctus Willehadus Bremensis episcopus primus, intra Bremensem basilicam sepultus, et in aliam a Willerico successore suo translatus est, ut patet ex Vita relata in sæculi III, parte 2.

lem : ipsumque sepulcrum postea super exstructo, A et in honorem sancti Michaelis sanctorumque martyrum Stephani atque Viti dedicato oratoriolo, adornavit vir Adalgarius, de quo supra diximus, qui et sancto viro successit in pontificatum. Sicque completa est visio supra memorata, de sua et domni Ansgarii in una ecclesia detentione, sed muri medii interpositione ipsis ad invicem sejunctis. Est enim præfatum oratoriolum contiguum antiquæ ecclesiæ, muro tantum ejus orientali ex uno in aliud aditum intercludente ; et in ipso, ut diximus, novo oratoriolo domnus Rembertus sepultus est : in antiqua vero ecclesia domnus Ansgarius requiescit. Et hoc est quod ipse in visione ipsa dixisse videbatur, quod annulum domni Remberti secum habiturus esset, ipso videlicet domno Remberto per fidem et operationem B bonam perfecto, non longe post cum ipso conjungi debente, tam in vicinitate sepulcri, quam beatæ requiei perceptione, sicut olim ipse divino Spiritu revelante prædixit. Per annulum quippe fides significatur, qua nobis imago Dei exprimitur : et quia ipso manus ornari solent, quibus operatio designatur ; recte per hoc ostenditur, ornamento fidei bonum opus semper inesse debere. Quod quia domnus Rembertus in sua conversatione commisit sibi semper exhibuit, recte in præsgio mortis ejus

multitudo plebis annulum ejus quæsisse ostensa est : per quod significatum est, tempore mortis ejus eos qui illi fuere commisi, anxie desiderare, ut adhuc exemplis in illo perspectis perfrui mererentur. Sed hoc jam fieri non posse tempus expetebat requiei ejus, quam episcopus Ansgarius plebem a quærendo annulo compescens significavit, dum eum diceret secum esse habendum.

CAPUT XXV.

Suspensa est etiam super sepulcrum ejus lampas lignea, ut lumen continuum in ea ibidem haberetur : subtus ipsam vero in superficie sepulcri velamen jacebat expansum, in quo fertur præclarum contigisse miraculum ; quod in quantum ex relatione narrantium, vel memoria vel intellectu retinemus, ita gestum esse constat. Contigit quadam nocte conflagrasse eandem lampadem, ac primo crebros carbones decidisse ex illa super velum memoratum, atque illico subsequi etiam casum totius lampadis, ipsamque supra idem velum totam comburi, absque ulla læsione ipsius veli. Quod nulli dubium esse debet ad declaranda merita servi sui Christum fecisse, qui cum Patre et Spiritu sancto vivit et regnat in æternum.

VITA SANCTI ANSCHARII

ARCHIEPISCOPI HAMBURGENSIS

AUCTORE SANCTO REMBERTO

(Vide *Patrologiæ*, tom. CXVIII, col. 959.)

ANNO DOMINI DCCLXXXVIII.

AIMOINUS

MONACHUS SANGERMANENSIS.

NOTITIA HISTORICA IN AIMOINUM

(Fabric., *Biblioth. med. et inf. Lat.*)

AIMOINUS, sive AIMOINUS, notarius et monachus S. Germani de Pratis in suburbio Parisiensi, qui subscripsit diplomati dato an. C. 872, regni Caroli (Calvi) 32. Ejus libri II ad Bernonem abbatem, de *Inventione et Translatione corporis B. Vincentii*, Levitæ et martyris, ex Valentia Hispaniæ an. 864 ad monasterium Castrum diocesis Albingensis in Gallia, versibus scripti hexametris, una cum *Epistola ad Theotgerum monachum et carmine* versum 60 heroicorum de eadem translatione exstant, cum Breullii Aimoino Historiæ Francicæ scriptore. Parisiis 1603, in-fol. in Boscii Bibliotheca Floriacensi, Lugduni 1605, in-8° ; et in Actis Sanctorum Januarii,

C tom. II, pag. 405 ; necnon in Mabillonii Actis Sanctorum Ord. S. Benedicti, sec. IV, part. 1, p. 652. Liber de *S. Germani, episcopi Parisiensis, Miraculis* ab an. 846 ad an. 874, scriptus an. 892 ; in Jacobi Mosandri Appendice ad Surium 25 Julii ; in Actis Sanctorum 6 Maii, pag. 801, et in Mabillonii Actis Sanctorum Ord. Benedicti, sec. III, part. II, p. 104. De *Translatione S. S. Martyrum Georgii, Monachi, Aurelii et Nataliæ*, liber, et libri II de *eorum Miraculis*, apud eundem Mabillonium, sec. IV, tom. II, pag. 45. Sunt etiam qui huic Aimoino tribuunt libro *Miraculorum B. Mauri et Historiam inventionis corporum Placidi abbatis et sociorum ejus.*

HISTORIA TRANSLATIONIS SANCTI VINCENTII

LEVITÆ ET MARTYRIS,

EX HISPANIA IN CASTRENSE GALLIÆ MONASTERIUM.

Duobus libris prosaicis scripta ab AIMOINO monacho S. Germani à Pratis, duobus item metricis.

(Apud Mabill. Act. SS. ord. S. Bened.)

MABILLONII OBSERVATIONES PRÆVIÆ.

1. Libellos Aimoini duos de Miraculis S. Germani Parisiorum antistitis exhibui in sæculi tertii tomo II (*Vid. infra, col. 1027*): nunc totidem libros de Translatione S. Vincentii ab eodem soluta oratione scriptos cum aliis duobus metricis exhibere juvat. Fuit is monachus cœnobii S. Germani a Pratis apud Parisios sub Gozolino abbate, qui ab anno circiter 850 eidem loco præesse cepit, atque Aimoino ut miracula S. Germani perscriberet, mandavit. Hos vero libros Aimoinus scripsit ex relatione Audaldi monachi, istius translationis adjutoris, *cujus ab ore quæ dicuntur, accepit*, ex lib. I, cap. 2. Editi sunt quatuor isti libri a Jacobo Brolio Prateni monacho in Supplemento Antiquitatum Parisiensium. Porro Aimoinus auditorem habuit Abbonem ejusdem loci monachum, qui de obsidione Parisiaca libros duos versibus cecinit, præmisso carmine dactylico ad Aimoinum præceptorem. Ex quo intelligitur, Aimoinum anno 888, quo Abbo scribebat, superstitem fuisse. Ejus obitus signatur in pervetusto Necrologio Prateni his verbis: « v Id. Junii depositio domini Heimonis sacerdotis. » Diversus est is ab Aimoino Franciæ historiae scriptore, qui fuit monachus Floriacensis sub Abone abbate.

2. Primus duos priores libros de Translatione S. Vincentii Bernoni Castrensi abbati (*abbé de Castres*) ejusque fratribus nuncupavit. Istud monasterium « anno Domini 647 Robertus, Anselinus et Daniel, tres viri pii et nobiles construxerunt in pago Albigensi, juxta fluvium Agouti sub regula S. Benedicti, » adjuvante Faustino strenuo ac prædivite milite, « qui monachus factus ecclesiam S. Benedicti a fundamentis magno sumptu ædificavit, et post mortem Roberti secundus monasterii abbas » evasit, ut legitur in ejusdem monasterii Chronico, quod typis vulgatum est in Spicilegii tomo VII. Eidem loco præfuit anno 870 Berno abbas undecimus, cui sequentes libros inscribit Aimoinus. Monasterium in eccle-

siam cathedralem erectum est ab Joanne XXII, modo a sæcularibus canonicis occupatum.

3. Obiter observo, Guarnerium Resbacensem abbatem, qui in vulgatis indicibus omissus est, scripsisse opusculum metricum de S. Vincentio martyre hactenus ineditum, quod legi in ms. codice Gemblacensi sub hoc exordio :

Quis tua, Christe, salutifera,
Quæ facis omnipotens opera
Tradere non cupiat titulus, etc.

Deinde in consequentibus agit de cella seu monasterio S. Vincentii prope Hispalim his versibus :

Cella procul bidui spatio
Ab populi manet hospitio.
Sancta monastica religio
Degit in hoc velut exsilio,
Nullius indiget auxilio.
Sola Deo vacat hæc eremus,
Fert scopulos aridumque nemus
Mons supereminet aeris,
Oceanum videt inferius,
Nil monachis libet exterius.
Mons etiam capit ecclesiam.
Inter utrumque decus mediam,
Claustra decoris habent faciem.
Cuncta boni retinent speciem,
Et specie tenus almitiem.
Hic Vincentius arripotens.
Cui Dominus Deus omnipotens
Vincere carnifices tribuit,
Lipsana dum sua distribuit,
Nobilius caput exposuit.

Et in loco Eugenius secundus Toletanæ sedis episcopus vitam monasticam egisse mihi videtur, quippe qui sagaci fuga urbem Cæsaraugustanam petens, illic martyrum sepulcri inhaesit, ibique studia sapientiæ et propositum monachi decenter incoluit, ut scribit Hildephonsus in lib. de Scriptoribus ecclesiasticis, cap. 13.

EPISTOLA AIMOINI

Ad domnum BERNONEM abbatem cæterosque sub eo fratres.

Dignis memoria sanctis Patribus, domno abbati Bernoni, cæterisque sub eo fratribus, in pago Albiensi et monasterio beati Benedicti, quod Castrum cognominatur, sub ejus regimine, regulari studio Deo commilitantibus, Aimoinus peccator, almi Germani Parisiorum præsulis monachorum novissimus, præsentem prosperitatem, æternamque in Christo coronam.

Vestra, o amantissimi Patres, prudenti, necnon et imitabili simplicitate comperta, non miror quod

libuit sanctitati vestræ mihi modico tantum injungere negotium : quatenus adventum beati levitæ et martyris Christi Vincentii ad vos, ejusdemque adventus supernæ admonitionis causam, litteris mandando posteris futurisque sæculis sciendum præberem. In quo etiam illud competenter exigitur : ut grandia paucis elucidem, seu pro vitando fastidio spatiosa brevi sermone contraham : quo omnibus legentibus hoc opus, Christo favente, probetur acceptius. Id quoque quemadmodum de miraculis

ejusdem sancti in itinere vel penes vos multiplica A
 numerositate exhibitis, tantum ut ejus inventio,
 ejusque ad vos translatio certa dignoscatur, contin-
 gam. Sed quoniam me super hoc, quanvis indig-
 num, dignanter tamen aggressi estis, fiat Domini
 pia semper voluntas, ipsiusque sancti et egregii tes-
 tis consequens pro me ac frequens apud eum oratio.

Neque fas sit me tottantisque præceptoribus digna,
 licet ab immerito, postulantibus inobedientem repe-
 riri : vestra quoque pro me sanctitate divinam sup-
 plicante clementiam, ut quod meritis non præsumo,
 sanctarum precum sublevatus auxilio, non ego qui-
 dem, sed gratia Dei mecum perficere possim.

INCIPIIT LIBER PRIMUS

INVENTIONIS SIVE TRANSLATIONIS B. VINCENTII

LEVITÆ ET MARTYRIS,

Quæ celebratur vi Kal. Novembris.

CAPUT PRIMUM.

Anno octingentesimo quinquagesimo quinto In-
 carnationis Domini nostri Jesu Christi, regnante
 orthodoxo Francorum principe Carolo Hludowici
 Imperatoris filio, in parte quandam regnorum ipsius,
 in Aquitania scilicet et Monasterio, quod vulgari
 appellatione Conkittas vocitatur, Hildeberto cuidam
 monacho visio ostensa est, quam cœlitus monstra-
 tam sequentia declarabunt. Erat igitur idem vir
 simplex, ultra juvenilem ætatem tempus agens : se-
 nex moribus, ac sanctæ patientiæ studiis eruditus.
 Habitum etiam monasticum (quem præsertim a tem-
 pore sui sacerdotii inhianter desideraverat) adeptus,
 talem se totius religionis præbuerat actibus, ut etiam
 præcedentium hujus vitæ patrum sequens vestigia,
 multis et ipse foret in exemplum. Hic cum se ali-
 quando post exsolutum vigiliarum debitum sopori
 dedisset, vox ei divina sic insonuit dicens : « Frater,
 vigilas ? Cui respondentem : Domine, quid me vis face-
 re ? Surgens, inquit, vade, et aggredere Valentiam
 Hispaniarum : ac perquire extra muros ejusdem ci-
 vilitatis locum sepulturæ Vincentii levitæ et martyris.
 Cujus corpus ecclesia quæ desuper fuit, a paganis
 ob malignorum civium et circum habitantium pra-
 vam conversationem destructa, ibi absque ullo reli-
 gionis honore, nullo obstante tegmine, imbre mada-
 scit a thereo. Nam dignum est, scito, Dominique
 voluntas, ut idem gloriosus Dei amicus inde diligen-
 ter effossus, ad locum transferatur pacis cultusque
 legitimi. » Quibus dictis, mox a conspectu videntis
 illa cœlestis species hujusmodi visionem narrantis
 una cum voce subdicatur. Qui sopore depulso, et
 quod viderat vigilantem animo replicans, ad Dei ro-
 gandam pronus consurgit clementiam, quatenus per
 eum cunctorum opifex quod ostenderat, dignaretur
 explere.

CAPUT II.

Erat sane alius in eodem monasterio monachus

B religiosus æque sacerdos et conversus ^a Audaldus
 nomine, speciali ei familiaritate connexus, ætate ac
 vitæ moribus pene consimilis, cujus ab ore quæ
 dicuntur, et multo etiam ampliora nos in fide acce-
 pisse confidimus. Ad hunc primus memoratus com-
 presbyter Hildebertus accessit : et quod sibi revela-
 tum fuerat secreta allocutione detegens, eum in hoc
 multis modis animando socium postulavit. Hortatur
 amicum, precatur dilectum : Dei sanctique martyris
 adfuturum repromittit solatium, necnon et pro la-
 boris sudore æternæ recompensationis pollicetur
 præmium. Quibus vir devotus attentè pectoris ar-
 cano receptis, confestim verbis favens sodalis, as-
 sensum libentissime præbuit : præsertim cum idem
 a quodam nobili Hispaniensi viro, Berta nomine,
 frequenter audierit, quod ejusdem sancti levitæ et
 martyris corpus ab eodem loco cultoribus desolato
 facile in quameunque partem a quolibet asportari
 posset. Convenique utriusque animus ad tot terra-
 rum intervalla perecurrere promptissimus, atque
 ad perferenda, si qua etiam adforent, impedimenta
 paratissimus. Itaque Blandino ejusdem loci abbati,
 reliquisque fratribus suæ voluntatis rem patefaciant :
 a quibus hoc agendi seu perficiendi eos oportebat
 expetere consilium. Processit sane omnium qui
 convenerant communis in hoc validusque animi
 ardor : quorum scilicet mentes virtus illustraverat
 superna, et æqualis spei perflaverat lætitia.

CAPUT III.

Hoc igitur accepto ardentibus duntaxat animis
 divino, quod est magis fatendum, consulto, paratis
 omnibus exeunt cum duobus tantum famulis, hila-
 res procedentes ad locum et opus sibi cœlitus inti-
 matum. Gradientibus autem eis, ac viam festino
 tramite accelerantibus, Hildebertus carnis incom-
 modo pressus assumptum iter quanquam invitus
 reliquit. Audaldus vero mœstus ac deinde uno solo
 comite contentus, post multas, quas prolixum esset

^a Conversi dicebantur olim apud monachos, qui ex sæculari vita ad monasticam convertiebantur in adulta ætate.

expedire, paganorum insidias, pariterque tribulationum variarum pressuras, ducente se Christo audacter percurrens, tandem aliquando Valentiam superius nominatam civitatem aggreditur. Ubi diebus quatuor in ejus suburbio, a Christianis jam penitus derelicto, anxius dubisque quid ageret immoratus, quinto die Zachariam quemdam Maurum, apud quem hospitabatur, conveniens, sciscitabatur ab eo privatim de re propter quam venerat, et utrum se in hoc adjuvare possit, denudatis secretis interrogat. Quo respondente se optime posse, atque locum ubi pretiosus Domini martyr jacebat, ipsiusque monumenti tumbam adhuc integram bene nosse: Eamus, inquit Audaldus, et videamus utrumne ita sit, quemadmodum testaris. Quo aiente: Quid mihi dabis pecuniæ, si quod quæris ostendero? Monachus ait: Parum quidem habeo: sed illud totum, vel certe exinde quantum petieris incunctanter appendam. Unde prædictus Zacharias superno instinctu, sanctique martyris, ut credimus, obtentu moderatus, non amplius quam quadraginta argenteos, solidos videlicet quinque postulavit. Quibus libenter tributis simul ierunt ad locum, ubi maceriarum ecclesiæ tantum patebant ruinæ, atque ipsius sepulcri situm, ut fuerat incontaminatum tituloque signatum, reperiunt: in quo erat super inscriptum, quod illic requiesceret sanctus levita et martyr Vincentius. Præclarorum quoque parentum nomina, patris Euticii, matris vero Enolæ, a quibus orbi agonista talis processerat, eidem epitaphio inter cætera refulgebant inserta. Ergo comperto se denotato sarcophagi loco, die adhuc multo domum reversi sunt, glorificante Audaldo Deum ac benedicente, qui itineris sui incursum ita prospere direxisset.

CAPUT IV.

Proinde dum quies noctus membris præsertim humanis blanditur, accepto lumine consurgentes soli secreto revertuntur ad tumulum: inventumque miræ pulchritudinis vas marmoreum indique, ut decebat, studiose munitum, inopina facilitate, ultra quam dici posset, simul ambo viribus insistentes aperiant. Quid præterea admirationis pro incredibili ejus integritate, quidve compunctionis seu lacrymarum, propter videlicet gaudium ac inexpertam aromaticæ suavitatis illic diffusam fragrantiam, memoratus ille monachus, tanti boni repertor, inibi tunc persenserit, ineffabile ipso jurejurando attestante habetur. Hoc tamen luce clarius fulget, quod hujusmodi signis veluti quibusdam vocibus promulgatum fuerit, quod is qui quærebatur Dei Martyr et Levita Vincentius esset inventus. Qui extra multiplices et admirandas suppliciorum ejus injurias ita, ut prælibavimus, integer liberque a putredinis labe repertus est, ut nullo modo in preparato sibi ad efferendum sacculo, nervis adhuc rigidis componi potuerit: nisi per artus, hoc ipsa cogente necessitate, complicatus dissolveretur. Quibus cum reverentia et timore perfunctis, ad hospitium deportatur,

tempusque ac opportunitas exeundi patriamque revertendi præstolatur in dies.

CAPUT V.

Emptis denique palmarum ramis, et circa ipsum corpus ligatis, veluti hujusce rei gratia thesaurus occultaretur acquisitus, tantum tamque venerabile præmium levans, hoc onustus munere, hacque locupletatus margarita negotiator ille pauper ditissimus effectus, optatum iter dum tempus videt, resumit. Cui Dominus rursus ostendere volens, quod quæsi Vincentii levitæ et martyris corpus invenerit, sub nocte quadam dum super universos eumdemque Audaldum sopor solito vehementer irruisset: Subito fulgor (haud dubium quin celo delapsus) omne replevit quo Sanctus inerat habitaculum: adeo ut hospes seorsum recubans nil aliud quam domum suam, volvente ignis edacitate, ardere putaret. Dumque clamores pavitans, quis ignem succendisset, emitteret, Audaldus veluti de itinere fessus, vix somni decussa quiete assurgit, vocesque clamantis hospitis accipens, rem cœlitus administratam, ipso perfusus splendore tacitus timidusque attendit. At ubi in se recollectus virtutem agnovit Altissimi, hospitem, utpote gentilitatis ritu ferocem, blando ne paveat demulcet affatu, ignem procul dubio a se accensum fuisse pronuntians. Hoc autem audit, ille se intra cubiculi sui claustra continuit: nec est permissus dignusque inventus, qui facti miraculi mereretur nosse mysterium.

CAPUT VI.

Monachus vero orto mane festine consurgens, quod residebat itineris conficere satagit. Unde post aliquot dies Cæsaraugustam civitatem properanter aggressus, a quadam Deo devota muliercula prope ipsius urbis mœnia domum habente, misericordia hospitandi, utputa peregrinus, illa nocte suscipitur. Quæ sollicita, dum in occultiore parte suæ domus vigilans et tacens quiesceret, adnadvertit memoratum monachum ante sancti corpus lucentibus cereis psallenter adstare. Itaque pulsato nocturnali tempore signo, ad ecclesiam concita pergit: atque quod viderat per internuntium episcopo civitatis intimavit. Qui festinans sarcinam sibi unum cum palmis pudore sublato deportari jussit, monachum autem comprehendere mandavit. Ille vero paulo ante de necessariis viæ sumptibus meditans, propter emendos panes, ministro, quia erat mutus, domi relicto, ad forum processerat. Episcopus namque diviso fasce, et quæcunque inerant universis coram expositis, reperit sanctum intrinsecus latens pignus, sacco diligenter insutum. Quod stupens nimiumque admirans, et æstimans omnino quod erat plane alicujus sancti martyris corpus, jussit illud auferri, atque in ecclesia beatæ Mariæ semper virginis (quæ est mater ecclesiarum ejusdem urbis) veneranter recondi: in qua olim sub Valerio pontifice idem martyr strenuusque athleta archidiaconi arcem insignis tenuerat.

CAPUT VII.

His ita dolo peractis, Audaldus horum nescius cum panis edulio domum regressus: agnitoque (proh dolor!) hoc tristis factus, percussus animi dolore ad eundem episcopum, nomine Seniore^a, lacrymis plenus accessit, conquerens cum eo de injuste sibi subducto corpuseulo. Et meus, ait, meus fuerat ille propinquus, in partibus Hispaniarum nuper mortuus ac sepultus. Cujus cadaver inter reliquorum parentum meorum exanimis artus componere satagens, hæc terrarum spatia multis vexatus calamitatibus Christo propitio peragrans evici: atque illud non parvo xenio dato, ex paganorum placata feritate redemi. Sed proh nefas! inquit, offendi episcopum crudeliorem ethnicis. Quod enim eorum austeritas humanitas emollita pie quærenti concessit, hoc tua violentia improbe omnimodis exagitata rapit, impudenterque præsumit, et veluti insanus sanctum dicis corpus hominis peccatoris. Tunc episcopus inter hæc et alia nimis rapida permotus iracundia, monachum teneri præcepit: inexacta tormentorum genera virgarumque ei livores repromittens, nisi de qua civitate vel loco eum furatus esset, seu quo nomine idem sanctus censeretur, exponeret. Quod cum cœpisset, ac crudelius carnifice turpiter exercere perstitisset, Audaldus volens nolens et valde diu cæsus, ac per testiculos tandem suspensus, quasi visus est confiteri quod ab Hispaniæ partibus illum deferret, quodque sanctus Marinus martyr (hoc invento vocabulo) nomen haberet. Sicque, ut reliqua transeamus, episcopo sacræ prædæ nefario invasore partim deluso, cum magno cordis ploratu fletuque plurimo pulsus, ad proprium locum monachus tristis verberibusque attritus revertitur. Quod monasterii sui fratres audientes, nec credentes, Audaldum mendacii redarguerunt; nomenque illi gyrovagi imponentes, a se sequestrando, jamque ipso etiam sponte exeunte, repellunt: et ubicunque libeat licentiam ei, imo necessitatem tribuunt commorandi. Qui ad cœnobium beati Benedicti, Castrum superius cognominatum, usque perveniens, ejusdem congregationis abbati, viro religioso, domno Gisleberto, cæterisque fratribus ibidem degentibus omnem sui itineris sive actus continentiam, qualiterque sibi sancti levitæ et martyris corpus sublatum fuerit, per ordinem explicavit. Qui nimirum attoniti, et pro his quæ dicebantur valde gavisus, Audaldum regulari more prius suscipiunt: ac deinde illi secundum, quamdiu viveret, habitandi locum concedunt. Simulque deliberant, tempus ad hoc congruum opperientes, quatenus tantum ad se decus quandoque superna opitulante gratia transferre satagerunt.

CAPUT VIII.

Exacto denique tempore, annis scilicet octo et semis evolutis, ad Cæsaraugustam, Salomone sibi familiarissimo Cerdaniensi comite mandate, ex se

^a Seniore Cæsaraugustanum pontificem, *rectis vitæ moribus* prædictum S. Eulogius presbyter Cor-

A fratres mittunt, qui sancti levitæ et martyris corpus, procurante hoc ipso Salomone, reciperent, secumque Christo miserante deferrent. Salomoni namque hoc jamdudum compertum fuerat: (ut erat prudens atque boni cupidus) ad regem Majorem Cordubensem opportunitate accepta perrexerat, fingens inter reliqua, quod apud Cæsaraugustam civitatem parens ipsius, vocabulo Sugnarius, dum ab Hispaniæ partibus deferretur, a Seniore ejusdem civitatis episcopo violenter sublatus detineretur. Ille vero exceptis aliis donariis sponte oblatis, ut corpus reddi juberet solidis centum expostulatis, ad regulum sæpe dictæ civitatis, nomine Abdilam, chartam facere mandat: imperans ut ipse totidem quoque solidis sumptis Salomoni comiti propinqui sui Sugnarii corpus restitui præciperet. Quibus sic expeditis, ac principum animis, taxata pecuniarum summa, lucratis, episcopus advocatur: et cur tantam in mortuum, imperatoria posthabita reverentia, exercuerit iniquitatem, velut reus majestatis, quique etiam nec sibi reveritus fuerit, districte inquiritur. Quo omnia negante, et quod id non fecerit, cum multis Dei sanctorumque juramentis affirmante, Audaldus accedens constanti animo episcopum fortiter convincere parat. Sed illis diu absque effectu, et, ut dicitur, muliebriter altercantibus postquam episcopus blandis sermonibus invitatus veritatem fateri noluit proponuntur ei tormenta: ut scilicet ligato pedibus ejus vel collo fune per circuitum civitatis traheretur, et sic illusus membratim demum dissiparetur. Et quanquam virtutes S. Vincentii, licet sub nomine sancti Marini, transacto præscripti temporis spatio illic frequenter ostensæ, animum illius in ejus amorem miro modo pertraxissent, minarum tamen horrore exterritus, quod gestum fuerat confitetur, et locum quo illud sacrum corpus erat humatum, non sine dolore ac gemitu aperit. Quo perveniens monachi qui advenerant, tam pretiosum cœlestis doni talentum reperiunt, elevantque. Cumque unus illorum, Radbertus nomine, hæsitans dubitaret an is vel alius esset, atque loculum aperiendo certis signis Audaldo notis, hoc prius caute perspicere debere contenderet, statim pede quem ad hoc promoverat, infirmatur, plurimum sibi formicante genu cum tibia. Quo signo reliqui satis certi de reddito corpore, illud ad deportandum apte componunt. Tantoque potius desiderio, ac post paululum monacho pedis vigore plener recuperato cum hymnis et gratiarum laudibus (prout ratio et loci qualitas dictabat) exeuntes, ad propria redire Domino ducente disponunt: cui est honor et potestas, virtus et imperium in sæcula sæculorum. Amen.

Huc usque de sancti corporis inventione, seu repetitione: nunc autem quæ restant translationis et gestorum in ca miraculorum, sequens libellus cum subjecto excipiat prologo.

Ergo quia hactenus quæ circa hujus sancti levitæ et martyris inventionem seu corporis repetitionem gesta

dubensis prædicat in epistola ad Wilesindum Pampilonensem episcopum.

sunt, fidei stylo Christo duce digessimus : jam nunc A etiam dividere volumus corpora, licet quantitate quæ restant ipsius translationis et gestorum [in ea exigua. Nobisque donari petimus, quidquid præterea miraculorum, brevi quemadmodum cœpimus tractatu eunter in his excessimus : qui de multis pauca legentes, illa prorsus quæ fide ac relatione digna inventa habuimus, eis presentibus qui viderant attestantibus, pii laboris studio ipso in loco scribere curavimus.

INCIPIT LIBER SECUNDUS.

CAPUT PRIMUM.

Siquidem illis ad Balagivum oppidum, juxta novium Segarim, cursim pervenientibus, in quadam insula solo contigua resederunt. Statimque divulgatum est nobilis levitæ et martyris corpus adesse. Tunc conveniunt nonnulli munera et obsequia pro posse offerentes. Inter quos mulier dudum cæca adducta est, quæ humi ante ipsas reliquas prostrata, lumen sibi donari poposcit. Et aliquandiu flens ac in oratione persistens, visum cunctis qui aderant cernentibus recepit et semetipsam qualis venerat qualisque effecta esset admirans, aiebat : Gratias tibi Deus, tibi que sancte martyr, qui me tuæ virtutis ubertate dignam duxisti.

CAPUT II.

Profecti autem inde ad Bergam castellum celeri C cursu iter dirigunt. Ubi Dominus itidem præstito miraculo, quid meriti quidve gratiæ apud eum sanctus levita et martyr haberet, clementer ostendit. Nam inter reliquos gratissima ejus munera requirentes, adfuit quidam delatus claudus, totoque corpore ægrotus. Qui coram reliquiis (ut in talibus contingere solet) cœpit primum dolore valido affligi, et in pavimento volutari. Quod astantibus mirum videbatur : sed paulo post miserante Deo intercessionem beati Vincentii consolidatæ sunt bases pedum ejus, et directi gressus : ita ut lætitia sospitatis amica comitatus, per se ad suos sanus rediret.

CAPUT III.

Quia vero lucerna non debet abscondi, sed ut luceat super candelabrum poni, jam illud sanctum D corpus tanto virtutum fulgore coruscum feretro aptantes, Salomone comite, prævio pacificoque ductore Cerdaniam usque venerunt. Ibi enim propter occurrentes, et necessariam itineris quietem, salubri consideratione aliquantis per stare decreverant. Intransesque quamdam ejusdem provinciæ villam, quæ a priscis cultoribus nomen Albis accepit, imposuerunt illud super altare ecclesiæ beatæ Mariæ Virginis. Quo innumera multitudine utriusque sexus per biduum confluyente, reperti sunt inter eos, contracti genibus duo, et una debilis mulier, cæcus unus, ac febricitantes seu energumeni, ejus sanctis meritis ab omni infirmitatum gravitudine liberati. Nec audivimus, quod ullus quocunque debilitatis morbo invasus (si

B fideliter accessit), se vel advenisse, vel certe sine remedii medicina recessisse doluerit.

CAPUT IV.

Pene igitur per singula mansionum loca patris miraculis, ut verbi gratia in Livia duobus claudis erectis, et in Carasona extra urbem in ecclesia sub ipsius Levitæ et Martyris veneratione Christo sacrata, dæmoniacis infirmisque aliis non paucis curatis, jam læti Castrum quo tendebatur, præcipui Patris Benedicti monasterium appropinquant. Sed qualis fuerit tanta exceptione dignus, cum crucibus ac cereis, omnibusque congruis ornatibus ille monachorum splendidus apparatus, necnon et devotissimus populi concursus, reor superfluum, si exponi contendatur, Martyris itaque corpus servandum venerandumque in ecclesia almæ genetricis Dei Mariæ ante ipsius cœnobii portam collocaverunt, ob devotam maxime feminarum frequentiam, quibus monasterii ipsius aditus ex antiqua Patrum ejusdem loci consuetudine denegatur. Decreverunt tamen novam basilicam in ejus honorem monasterio vicinam extruere : ad quam utriusque sexus personis devotis liber sit accessus.

CAPUT V.

Sed quoniam forte poterat dubitari de tali ejus inventione et optata delatione, hoc omnipotens Deus ad cumulum suæ bonitatis tali miraculo roborari voluit. In villa Vidcellas, a monasterio tribus duntaxat milibus distante, femina quædam ibidem adhuc degens, nomine Aitrudis, a vicino suo admonita est, ut deposito lanificii opere, in occursum susceptionis beati Vincentii martyris cum aliis properaret. Quod illa facere recusans, cum cachinno dixit esse potius corpus cujusdam Mauri ethnici vel Hispani, quam martyris. Et extemplo omnium privata membrorum officiis contrahitur ; ac veluti cadaver miserabiliter in terram consternata, se mox expiraturam terribili voce proclamat : rogatque suos, ut ad sancti templum deferatur. Ubi curru delata, per dies novem, aspicientibus multis, eandem percussiois debilitatem sustinens mansit : atque post alios novem salutem reformata, valens, ut nunc quoque valet, exivit.

CAPUT VI.

Enimvero frequentantibus locum plebibus, sive infirmis variis languoribus oppressis sanitatum me-

delam exquirentibus, a Cerdaniæ partibus quidam venientes, haud longe a monasterio propriis rebus exspoliati, nudi ad sanctum gemebundi flentesque perveniunt. Sed mirum in modum gratia supernæ accidit æquitatis, ut prædatores aliorum fugere tentantes, adversa sibi protectione mirabiliter coacti, cum universis quæ abstulerant, ad eundem locum festinanter accederent. Et sese mutuo intuentes spoliatores ac spoliati, isti timere, hi vero multo amplius mirari cœperunt: volentibusque populis in reos consurgere, supplices rogarunt, ne quid sibi mali ob Christi sanctique martyris amorem inferrent. Quo impetrato omnia restituerunt: et Deum sanctumque laudantes Vicentium, ad propria singuli repedant: isti de inventis, illi autem de venia gratis acquisita jocundi.

CAPUT VII.

Nec silentio prætereundum, quod pari admiratione dignum est. Quidam enim ex Camerensi pago, causa orationis, inclinato jam die adveniens, lanceam suam uni arborum, quæ sunt ante memoratæ basilicæ ingressum (servato religionis honore), innixam reliquit. Cumque ecclesiam sic exarmatus intrasset, et orationi devote insisteret, fur quidam lancea ejus raptâ aufugit, domum suam non longe positam petens. Sed mente perturbatus, ad ejusdem viri tugurium, cujus erat hasta, infra triginta ferme leugas, jejunio, ac itinere per totam noctem fatigatus devenit. Cumque sitiens paululum aquæ peteret, mulier agnitam mariti hastam recepit, et furi reatum suum confitenti pepereit, non sine admiratione virtutis sancti Vincentii qui peregrini sui injuriam eo modo reparari curavit.

CAPUT VIII.

Quandoquidem de nova sancti Vincentii levitæ et martyris fabricanda ecclesia mentionem fecimus, congruum est huic loco novum referre miraculum. Ad hanc enim constructionem confluentibus pariter plus quam ducentis viris cum muneribus, præter mulieres, parvulos, et infirmos, inter quos fuit quidam cæcus rebusque pauper: qui ne in sancti servitio vacuus appareret, lapidem non parvum sibi ex itinere a ductore dari poposcit, atque illum subito levatum collo supposuit. Cumque a plebe stultitiæ argueretur, ut qui rem impossibilem propter pondus attentaret, asseruit se nunquam ab incepto quieturum, donec munus assumpti lapidis ad novi templi S. Vincentii structuram detulisset. Nec mora, inter hæc verba, depulsa cæcitate visum recepit.

CAPUT IX.

Vir venerabilis Helisagar Tolosæ civitatis episcopus, his auditis virtutum signis, jure pastoralis clerum populumque hortatus est, ut qui vellent ad sancti martyris orationem secum ire pararent. Qui dum decreto tempore pastor bonus ovium turmis circumseptus, a nono etiam milliario disalceatus, forma factus gregi, reverenter advenisset, quidam eorum digitos utriusque manus ab ipsa nativitate ita contra-

actos et volæ hærentes habens, ut nunquam explicari seu extendi valerent, post orationes et lacrymas coram sancto martyre fusas, sensit eos solutos, manente tamen vivo cruore e locis, quibus prius inhæserant. Quo viso episcopus et universi qui cum eo erant, in laudes divinas prorumpunt, litanias, hymnos, et *Te Deum laudamus*, lacrymosa voce psallentes: ipsasque manus sanguine litas jam gaudio magno deosculantes.

CAPUT X.

Quidam argentum sibi ad aliquod opus necessarium in sinu absconderat. Quod inverecunde mulier in latrocinandi arte perita extraxit. Sed manus ejus ipsum argentum continens statim obriguit, ita ut eam nec aperire, nec ad se (cunctis videntibus) reducere valeret. Ipsa vero ad sancti Vincentii sacras reliquias confugiens, et ibidem cum fratribus aliisque fidelibus devote orans, curata est, manumque relaxata furatum argentum restituit.

CAPUT XI.

Alius cæcam habens filiam a nativitate, eam mendendi fretus fiducia, ad sancti Vincentii divulgata passim patrocinia adducere statuit, et ad monasterium usque veniens, ubi comperit ipsum sacrum corpus, propter timorem paganorum Nortmannorum, ad remotiorem et tutiorem locum transportatum fuisse, crebrius ingemiscens dicebat: Miserere Christe, miserere, o beatissime Vincenti: miserere mihi misero, miserere huic filiæ meæ. His lacrymarum vocibus, superna (quæ non dormitat) ad miserandum excitata clementia, continuo obtinentibus magni agonistæ precibus et fide parentis, lumen restituit puellæ.

CAPUT XII.

Nortmannis autem (qui ad obsidendam Tolosam venerant) accedentibus, monachi sanctum revehant corpus: dignisque, eo in loco ubi prius fuerat, officiis venerandum reponunt.

CAPUT XIII.

Rursus puella quædam a nativitate cæca, indubitanter credens interventu tanti martyris se posse lumen recipere, sororem rogavit, ut ad eum quantocius perduceretur. Quæ dum simul incederent, audierunt in terram procul remotam delatum fuisse. Ad quam propter rigorem hiemis et aspera juga montium non valentes pervenire, cæca sororem suam hortata est, ut ex cera quam secum tulerant, candelas conficeret, easque saltem ad locum quo sanctum corpus in itinere ad modicum pausarat, deferret. Audierat enim locum miraculis celebrem: ita ut etiam animalia ratione carentia illum contigentes debilia redderentur. Quod cum fecissent, atque se illic ambæ gementes prostravissent, fusa prece, quæ lucis nescia venerat mulier cœpit dicere se clare quæque aderant cuncta videre.

CAPUT XIV.

In eodem Albiensi pago fuit quidam piscator nomine Ubidandus, qui cum videret socios suos pesca-

tum purgentes, in præfato loco causa venerationis morari, eos increpabat dicens : Vellem arbores hujus silvæ universas adoraretis : qui omnium plateas viarum indiscreta consideratione, oratorii religione sacratis. Quibus dictis, illico petulans os ejus in aurem sursum convertitur, atque ultra quam dici potest monstruosum efficitur. Tuncque pœnitens ad prædictum locum occurrit totoque extensus corpore se contumeliosum et blasphemum fuisse fatetur. Deinde ad ecclesiam, in qua sancti levitæ et martyris corpus excolebatur, velociter perrexit : eamque singulis horis diei vel noctis frequentavit, donec sanaretur.

CAPUT XV.

Hac itaque luce longe lateque diffusa, etiam a nativitate adducti cæci illuminabantur, surdis ac mutis sensus officia reddebantur, claudi curabantur, energumeni fugatis dæmonibus mundabantur, et aliarum infirmitatum quacunque molestia aggravati præsentibus absentesque sani efficiebantur. Unde paupercula quædam a multo tempore luminibus privata, cum ad sanctum martyrem duceretur, in medio itinere a ductoribus tædio et labore fessis derelicta, rogavit quemdam astantium, ut saltem candelas (suar orbitatis munuscula) ante sancti martyris altare accensas offerret. Qui dum manu extensa eas accipere vult, ab ipsa muliere videntur : recollectoque brachio jam non ductorem, nec earum latorem quærit : sed hilaris et de die in diem clarius videns, iter cœptum etiam plerosque antevertens, perficit : et tandem ad sepulcrum beati Vincentii pervenit. Ubi candelis ardentibus, non per alium, sed per se oblati, plenam oculorum aciem recepit.

CAPUT XVI.

Huic simile est miraculum in Rotenensi pago, qui vulgo Rodinigus appellatur, patratum. Quidam contractus genibus cum ad sanctum Vincentium adduceretur, a suis ductoribus ignavis, pigris et inhumanis in medio itinere solus et plorans derelictus est. Sed quia Dominus de quacunque necessitatis angustia ad se clamantem preces misericorditer exaudire non cessat, extemplo miseratur miserum, ac celesti perfusum medicamine, jacentem debilem facit erectum : adeo ut magnis passibus gradiens, suos desertores mox assequeretur. Illi autem tanto miraculo attoniti, seipsos accusare vehementerque redarguere cœperunt, quod cœlestis remedii beneficio dignum, ita pigri inclementesque deseruissent.

CAPUT XVII.

Consuetudo (ut meminimus) præfatæ congregationis fuit, ut femine omnes ab ingressu monasterii arcerentur. Ideo ejusdem cœnobii fratres prudenter providerant, ut corpus beati Vincentii levitæ et martyris in basilica Dei genitricis Mariæ poneretur, ad quam liber erat mulierum accessus. At vero successu temporis, conventu hujusmodi per dies cessante, intulerunt illum in senioremonasterii

ecclesiam, atque retro altaro beati Benedicti (donec ejus templum consummaretur) posuerunt. Post hæc mulier ab annis plurimis cæca conata est usque ad locum quo sanctus jacebat ingredi : sed quidam obvians, hanc repulit, atque retrorsum mœstam abire coegit. Quæ suspirans, ac ad cœlum oculos mentis erigens, sancti martyris sibi provenire supplex orabat solatium. Sicque inter lacrymarum flumina cæcitatem expulit.

CAPUT XVIII.

In quodam loco eidem cœnobio adjacenti, qui Waldarii cella nuncupatur, hoc memorandum enituit virtutis præconium. Secus etenim ipsum locum diffusis militum copiis, Monachi Hermengaudum Albiæ comitem adierunt : orantes ut ab hostium invasione equorumque depastione sata condiminæ suæ protegeret. Nam in illis partibus pepauca exstant prata. Qui quatuor pallas ecclesiæ sancti Vincentii a pauperibus mulierculis oblatas præcepit assumi, et totidem baculis perticis alligari, atque in circuito florentis agri affigi, quatenus eo signo a messis direptione hostes temperarent. Sed unus eorum tale signum despiciens, pallam unam cum baculo in terram excussit, et ab equo (quem in ipsa sata inducere nitebatur) versis calcibus in fronte percussus, spiritum exhalavit. Quo audito et per hostes diffamato, timor universos invadit, evidensque Dei judicium ac sancti martyris meritum ubique valens prædicatur a cunctis.

CAPUT XIX.

Huic facto propemodum simile est quod sequitur. Nam domno Alberico monacho cum fratre Helia in pagum Impuriensem profecto, atque in villa suæ obedientiæ, quæ Garriculas nuncupatur, commorante, supervenerunt hostes, qui pagum villamque, nemini parcentes, depopulati sunt. Quinetiam equos ipsius Alberici abduxerunt, nec impetrare potuit ut saltem unus (quem robustiorem noverat) redderetur. Sed ipsemet equus qui postulabatur, quasi vindex duplicis injuriæ (raptus inquam, et justæ repetitionis), raptorem calcibus in nudo capite percussus, morti tradidit. Quo facto iniquitatis socii perterriti, non solum equos, verum etiam quicquid in eadem villa rapuerant, relinquentes aufugerunt.

CAPUT XX.

Sequens exemplum de muto et surdo curato finem imponet. Georgius quidam vir illuster servum mutum et surdum habuit : qui cum ad sepulcrum sancti Vincentii levitæ et martyris duceretur, nec amplius a monasterio quam duodecim ferme millibus distaret, cœpit loqui, loquentesque absque impedimento audire. Tunc comites rogavit, ut eum cito ad locum, ob referendas sancto martyri grates perducerent. Quod et fecerunt ad gloriam et laudem Dei et Domini nostri Jesu Christi, qui sanctos suos mirabili potentia ubique triumphare facit : cujus honor et imperium sine fine permanet in sæcula sæculorum. Amen.

EPISTOLA EJUSDEM AIMOINI

AD DOMNUM THEOTGERUM,

Ejusdem congregationis monachum.

Levitarum præcipuo domno THEOTGERO, juxta A
consonam sui nominis etymologiam Deum gerenti,
Aimoinus comminister salutem dicit.

Laudabili charitati vestræ, mi dulcissime Theot-
gere, frequenti studio circa mei curam satagenti,
in omnibus parere devotus existens, inclino me
tuus camelus sponte, ad injunctum mihi abs te onus
ferendum. Rem siquidem novam et pro sui brevitate

mirandam, prosaico opere expleto, me vestra dile-
ctio de adventu beati levitæ et martyris Christi
Vincentii facere cogit geminos rursus libellos : quos
singulos tricenis modo versibus claudam, per denos
etiam positus in unoquoque capitulis. Unde consul-
tus eligo veluti recens scriptor videri, quam me
vestro amori, mihi melle dulciori, quavis occasione
ullo modo absentari.

Explicit Epistola.

INCIPIT LIBER PRIMUS,

Habens versus xxx.

CAP. I. *Quod Audaldus Hispaniam aggrediens, Va-
lentiam usque pervenerit.*

Bis quadringentis, decies quinisque volutis,
Quattuor inque super ciclis a præsule Christo
Virgineo semperque sacro de germine nato,
Audaldus fuerat tali de nomine notus
In Castro monachus communi lege probatus :
Atque sacer sancti gestans Aaronis honorem.
Hic uno comite assumpto perpessus amara
Plura; sed in dulces convertens cuncta sapes,
Institit audacter quandoque Valentia civem
Quo se susciperet peregrino functus agone.

CAP. II. *Quod Zachariæ Mauro suum detexit secre-
tum; et quomodo Sancti reperit sepulcrum.*

Quod faceret Mauri Zachariæ culminis hospes,
Denudat secreta sui jam pectoris olli :
Esset quodque Dei levitæ martyris atque
Vincentii Hispanias solo delapsus amore :

Hinc precibus blandis animum mentemque relam-
Mercator Maurum cupidi nummis argenti. [bens,
Denique surgentes monumenti septa requirunt,
B Quæ manifesta nitent titulo hoc : Vincentius istic
Martyrii levita jacet fundatus honore.
Nomina namque genus signabant scripta parentum.

CAP. III. *Quomodo sub nocte ad monumentum pari-
ter regressi, sanctum levaverint corpus.*

His igitur causis signorum nocte revisis,
Viribus admissis fodiunt, tumbamque recludunt.
Educuntque sacrum corpus famulante lucerna,
Indice cœlesti facti dulcedine veri.
Quæ super excrescens aromata cuncta subibat.
Cumque ligaturis expletis his opus esset,
Utitur Audaldus suta sindone cuculla.
Inde domum læti redeunt lucentibus astris,
Audaldo expectante diem patriam repetendi,
Quod hilaris fecit nactus post tempus amicum.

Explicit liber primus.

INCIPIT LIBER SECUNDUS,

Totidem continens versus.

CAP. I. *Quod sanctum corpus ad Castrum per-
veniens, honorifice sit susceptum.*

Cæsar in Augusta Senioris fraude relicta,
Omissis necnon aliis, ob dicere longum,
Ad Castrum, bellam patris cellam Benedicti,
Perveniat Christi martyr levitaque sanctus.
Cujus in adventu fuerint quæ gaudia, nullus
Ora gerens centum poterit depromere verbis.
A monachis pulchra serie susceptio qualis
Exstiterit, solus qui testis novit Iesus :
Aptis aurifluis ornatibus undique fuis,
Gemmivomo ad cœlos usque irradiante virore.

CAP. II. *Quod mulier de eo primum dubitans con-
tracta fuerit, ac deinde credens sanari meruerit.*

Tunc risisse fuit mulier, cui talia fastus,
Et sanctis corpus levitæ credere nolens :
Esse magis Maurum contendens forte putentem.
Protinus in terram membris prostrata caducis
Contrahitur, vitæ sublata spe fugientis.
Sed sancto deducta, fide nascente, medetur :
Et pedibus, plaustro veniens, curata recessit.
Primitus hoc signo tanta virtute patrato,
Post quoque quæ numero nescit, sunt plurasecuta,
Prosaico necnon partim sermone notata.

CAP. III. *Ubi sanctum corpus exceptum positum A fuerit : et qualiter deinde retro altare sancti Benedicti locatum sit.* Masculus atque simul veniens quod femina adiret, Interea placuit defluxa temporis urna

Namque monasterii ante fores genitricis in aula, Inde levare sacrum corpus, digneque locari
Ista sub immenso gerebantur munere Christi : Post altare pii Patris sancti Benedicti :
Dum fieret sanctum templum proprio sub honore ; Quo meriti pleno cultu veneratur honoris,
Quo placidus demum migraret jure sepultum, Assiduis signis virtutum rite coruscans.

Præstante Rege regum, et Domino dominantium Jesu Christo, bono et benigno Salvatore mundi : qui eum Deo Patre, et Spiritu sancto vivit et regnat Deus per infinita sæcula sæculorum. Amen.

DE TRANSLATIONE SS. MARTYRUM GEORGII, MONACHI, AURELII ET NATHALIÆ

Ex urbe Corduba Parisios,

Vide inter Opera S. Eulogii, Patrologiæ tom. CXV, col. 939.

DE MIRACULIS SANCTI GERMANI

LIBRI DUO,

Auctore eodem AIMOINO monacho.

(Apud Mabill. *ibid.*)

INCIPIT EPISTOLA AIMOINI MONACHI.

Studiosis in Christo piisque lectoribus salus et pax B perennis ab Jesu omnium dominatore dominantium. nostræ congregationis fratribus, maturitate pariter ac scientia provecctis : qui pro sui quisque sensus

Quoniam non saturatur oculus visu, nec auris auditu, siquidem pertransibunt plurimi, et multiplex erit scientia ; hunc libellum miraculorum domni nostri Germani, eluculentibus promicantem insignibus, per aliquorum manus minime dubito revolvendum. Hæc priscorum temporibus Danorum, Ragenarii scilicet ejusque sociorum, meritis ipsius sancti pontificis superno favore mundo concessa, ad aures usque serenissimi regis Caroli digna passim relatione pervulgata fluxerunt. Quibus ille gavisus, veluti eorum pretiositate se regnante munificentior redderetur orbis, mandavit ea solerti diligentia notari, atque ecclesiastico jure catholicis paginis aggregari. Tunc namque memorati sancti Præsulis Cœnobio præerat domnus et abbas vir venerabilis Ebroinus ^a, Pictavensis ecclesiæ sedis episcopus. Hic regali censura inunctum sibi negotium quomodo perficeretur incumbens, duobus hoc delegavit agendum ejusdem

antistite Ebroino aliisque recitantibus approbati placuit [*f. non placuit*], sed alterum alteri utcumque præferri. Idcirco mansit amborum inusitatus labor usque ad tempus domni Gozlini ^b ejusdem loci præcipui Patris. Quod cum sibi jam aliquorum quidem post tempus annorum ita compertum fuisset, præcipit mihi non ut sapientiori, sed ut manuali potius fratri, quatenus unum et duobus coadunarem corpusculum. Tantum ut si qua prosus invenirem superflua, reciderem : quæve minus compta, florentioris styli venustate, nihil extra veritatem faciens, polirem. Quod ego fateor non viribus, nisi cœlitus datis, aut ingenio tumens arripui ; sed magis obedientia tanto primati debita fidens suscepi : merebarque mihi noxam criminis, si jubentis domini jussa prosequi negligerem.

INCIPIT PROLOGUS AIMOINI MONACHI.

Sicut laude dignos credimus eos, qui gesta vel miracula sanctorum, quæ divina virtus per eos operari dignatur, ad ædificationem fidelium scribere sagittant : ita absque dubio scimus culpam illos, qui præ desidia ac torpore mentis ea litteris tradere ad profectum negligunt futurorum. Jam veluti à summo quotidie ad amorem Dei studiumque bene vivendi excitantur plurimi, legentes in libris facta sanctorum Patrum, eorumque ac si præsentia sacra cernentes

miracula. Proinde unusquisque talenti donum habens timeat, ne forte audiat quod ille malus servus, qui acceptam pecuniam ac male humo defossam, ad Dominum sine usuræ lucris reportare non formidavit. Hoc non solum sponte agendum, verum etiam et cum injungitur, summopere injungentis est imperio parendum. Plura quidem ac stupenda dignaque relatu omnipotens Deus per eundem beatum Antistitem præteritis nostrisque dignatus est patrare tempori

^a Erat is summus capellanus Caroli regis, ut notavit Sirmondus ad capitulare tertium Caroli Calvi in Verno palatio habitum presidente Ebroino.

^b Et is Caroli Calvi cancellarius fuit post Ludovicum abbatem, dein mortuo Carolo episcopus Parisiensis, de quo rursus infra.

bus, quæ ob inertiam silentio sunt pressa, atque per A incuriam scriptorum omissa. Tunc vero ea quæ noviter cunctarum rerum Conditori gratia ejusdem sanctissimi viri placuit operari, auxiliante Domino et ipsius sancti juvantibus meritis, jubente domno rege Ebroino antistiti ejusque monasterii rectori,

licet incompto atque inerudito, veraci tamen ac fideliter sermone læti conamur perstringere, et ut veraciter sunt gesta, atque etiam in populo Nortmannorum jam vulgata tam præsentibus quam futuris legenda relinquere.

INCIPIIT LIBER PRIMUS.

CAPUT PRIMUM.

Anno incarnationis Domini Jesu Christi octingentesimo quadragesimo sexto, regis autem præcellentissimi Caroli sexto, cum regnum Francorum post obitum domni Ludovici imperatoris varias divisum esset in partes, et peccata populi crescerent, sanguisque sanguinem tangeret; Deo permittente, flagitiis quidem exigentibus actum est nostris, ut exteræ nationes e propriis egrederentur sedibus, videlicet gens Danorum, qui vulgo Nortmanni, id est Septentrionales homines appellantur: et superbo tumentique corde cum valido navium apparatu Christianorum fines intrarunt, qui huc illucque furentes, atque cum magna superbia cuncta gyrantes, cœperunt vastando per diversas insulas maris, donec nemine sibi resistente fluvium Sequanæ ingressi, Rotomaco [*Rouen*] sorte incredibili applicarent. Cumque in eadem civitate aliquantisper demorantes, regionis principes (quod absque ingenti contritione cordis effari nequivimus) ad bellandum pigros timidosque adverterent; exeuntes, a navibus, longe lateque diffusi, cœperunt utriusque sexus multitudinem trucidare, captivare, villas, monasteria, ecclesiasque depopulando cremare, totamque suæ libidinis immensitatem cum omni crudelitate in populum Dei debachando exercere: quousque ad locum, qui vocatur Caroli venna^a, ventis velisque suæ malignitatis justo Dei judicio secundantibus, ultra spem securi navigando venirent. Tunc gloriosus princeps rex Carolus, quia propter subitaneum eorum ascensum ex toto non poterat, convocata aliqua sui exercitus parte, venit primum^b ad monasterium Macharii Dionysii, ut ejus orationibus fultus, securius contra Dei suosque pergeret inimicos. Deinde ut erat, uti adolescens, animo armisque strenuus, ad supra dictum locum pugnaturus accessit; paratus non solum dimicare, sed etiam pro fide, proque de-

^a Caroli-venna, id est Caroli piscatura. Carolus Calvus in diplomate pro monasterio S. Dionysii apud Sirmondum in Notis ad Capitula: *Et solitum census de venna, quæ est super fluvium Loch in pago Tellau*, etc. Caroli-venna locus erat prope *Rioilum*, a Carolo Martello piscatura instructus, ut constat ex litteris Ludovici Augusti, quas postea huic loco illustrando referemus; nec longe aberat Cella S. Germani, ex sequenti capite 6. Hinc colligimus fuisse locum illum, qui hactenus nomen hæsit vernacule *Chalevanne* ad Sequanam, paulum supra oppidum S. Germani in silva Ledia: a loco non longe distat vicus *Rotoialus*, seu *Rioilus*, vulgo *Rueil*; et Cella sancti Germani, *la Celle*. In quadam chartulario nostro Germanensi exstat *Arbitrium Roberti Abbatis S. Victoris datum anno 1255*

fensione sanctæ Dei Ecclesiæ laudabiliter mori. Cujus adversarii cognoscentes adventum, deverterunt ad alteram prædicti fluminis ripam, ubi quædam parva tantum pars populi erat: quibus confestim in fugam versis, in insula quadam ejusdem fluvii ad opprobrium Christianorum plus minus indecim captivos B subdibus suspenderunt, multosque alios per domos et arbores confixerunt, atque nonnullos per villas camposque miserabili insecutione trucidantes peremerunt: ipsoque sacratissimo Paschali festivitatis sabbato Parisiis pervenientes, vacuum penitus saburbem quondam populosam, et omnia in circuitu illius monasteria a suis habitatoribus deserta repererunt. Timor siquidem et metus universos invaserat, ut puta merito iniquitatis divino enudatos auxilio atque ideo mundanæ defensionis destitutos solatio. Quis, rogo, non doleat, antequam bellam committeretur, fugatum exercitum; antequam jaceretur sagitta, confossum; ante scuti-collisionem, ignominiose subactum? Universorum namque ordo penitus in Ecclesia confusus atque a bonitatis studio permutatus, hoc ipsa privatione bono usque ad existii fomitem digna satis ultione promeruerat. At pius Pater justus, deliquentium semper corrector, correctorumque clemens susceptor, non hoc intulit ut nos ob innumera delictorum nostrorum pondera crudelis damnaret, sed ut per immensam suæ largitatis benignitatem afflicto emendaret. Tunc, proh dolor! sacratissimum beati Germani corpus de suo effossum sepulcro, in possessionem quandam ejusdem Ecclesiæ, quæ Cumbis^c dicitur, delatum est. Sed quæ facundia quive sermo exponere potest, qualis dum hæc agerentur, quantusque in eadem Ecclesia existit luctus? Senes itaque ac juvenes, pueri flebant et infantes, utpote nemo sese a lacrymis temperare valens. Similiter et aliorum corpora sanctorum in eodem pago degentium extumulata, atque per diversa sunt loca deportata, exceptis duntaxat membris Macharii Dionysii sociorumque ejus martyrum: quæ licet a in gratiam Germanensium contra Dionysianos de molendino Caroli-vennæ ante annos duos ab illis erecto, et in Dionysiano item chartulario diploma Philippi tertii Francorum regis, quæ justitiam altam et bassam apud Caroli-vennam monachiis Dionysianis cedit.

^b Vides jam tum in more positum fuisse, ut rex Francorum bellum præliumve suscepturus S. Dionysio coram se suumque exercitum commendaret, quod posteri coram se observarunt. Lege caput 20 libri de miraculis S. Dionysii infra ad annum 784.

^c Cumbæ villa, *Combes la ville*, vicus in pago Briegio, sexto milliari a Lutecia Parisiorum, olim de jure monasterii S. Germani in codice Irminonis abbatis.

suis fuerint abstracta sepulcris, propter tamen regis A est, minime oportet silere : cujus exempla actusque præsentiam, non sunt tunc ad alia loca a transire compulsa. Statuerat quippe rex populo videlicet a se labente, ut vel jam dicti sancti martyris monasterium defenderet, eo quod divæ memoriæ genitor illius eum, cum esset parvulus, eidem sancto speciali traditione commendasset.

CAPUT II.

Hoc interea juxta narrationis ordinem inseratur, quod dum sanctum ejus moveretur corpus, cunctipotens Dominus dignatus est ostendere. Nam dum in effossione ipsius, et quomodo portari deberetur unanimes intenti essemus, cereis pro reverentia accensis, casu accidit ut unus, quem puer incaute tenebat, e manibus ipsius labens rueret, totoque privatus exstingeretur lumine : quem cum a soloidem B puer cum omni velocitate levasset, lumen amissum ab altero mutare cupiens, meritis tanti patroni actum est, ut statim in manibus ejus cereus illuminaretur extinctus. Quod quidem mirum, nec ab re tamen ducimus, si ibidem ignis divinus respanduit, ubi, quamvis lugubre, filius venerabatur lucis. Unde qui aderant universi gratias Deo referentes atque præclara pontificis merita collaudantes, cœperunt magis magisque in psalmodiis Deique laudibus esse devoti, quousque opus, licet triste, consummaretur honeste.

CAPUT III.

Num visio illa quæ aliquibus ipsius monasterii fratribus eadem nocte, qua beatissimum ejus corpus effossus est, antequam aurora subsequens appareret diei, ostensa est, ut non dicatur omitti debet? Cum ergo ad fluvium Sequanæ sua quæque ad naves ferentes, prima ipsius noctis vigilia quidam perrexissent fratres, indeque ad monasterium jam remearent, apparuit eis secumque etiam comitantibus famulis tam immensus claritatis splendor super eam ecclesiæ partem, qua ejusdem sanctissimi viri corpus positum erat, ut claritati æquaretur diei, eademque ecclesia veluti igne supposito videretur cremari. Qui cum intra se nimium mirarentur, et eorum corda hujuscemodi considerationes stupefacta hærent, visio paulatim deficiens disparuit. Pervenientesque ad monasterium sciscitanti sunt, si aliquis Fratrum ea hora cum lumine super ipsam fuisset ecclesiam. Nemine tamen qui fuerit reperto, cognoverunt visionem angelicam divina virtute meritis sancti patratam, qui sua migratura ossa piosque cineres talis sibi claritatis concessa gratia invisere curavisset.

CAPUT IV.

Illud quoque insigne miraculum, quod ante biennium quo hæc acciderunt, cuidam monacho ipsius monasterii ætate moribusque grandævo ostensum

^a Lege tamen translationem Reliquiarum S. Dionysii in libro III de Miraculis S. Dionysii infra ad annum 784.

^b Cella Equilina dicitur in codice Irminionis, quod

est, minime oportet silere : cujus exempla actusque eximii si sequantur, plurimum prodesse poterunt ad salutem. Vidit isdem quadam nocte positus in sopore, beatum Germanum quasi suo egredientem de sepulcro, expeditum atque ad iter agendum præparatum. Qui veluti sciens eumdem esse beatissimum Dei famulum, interrogavit humili voce, quo tali processu abire disposuerit. At ille migraturum se ex eodem loco respondit. Quem rursus animo quidem timenti interrogans ait : Domine, et si tunc abieris, nos tantilli tui servuli quid postea faciemus? Cui quasi tristi vultu et cum magno mœrore, ut eidem fratri videbatur, ait : Et vos ex isto migrabitis loco, attamen vere cognoscetis quoniam et ego revertar, vosque miseratione divina simul cum tempore disposito remeabitis. Quam visionem verissimam fuisse, ea quæ consequenti fine sunt completa declararunt.

CAPUT V.

Nec illud quod cuidam in eadem ecclesia revelante Christo patefactum est, et silentio præterire debemus : quoniam dum prædicamus talia, excitantur audientium corda ad melliflua sanctorum deposcenda suffragia. Quidam vero religiosus ejusdem monasterii frater, cum alii completorio peracto festinarent ad requiem, quo fessa post diem laborem corpora lectulis reclinaret, sesse ille ante sepulcrum beati Germani peculiaris orationis causa projecit. Cumque diu cœlorum ac totius mundi Dominum pro suis exorans delictis, opem beati Germani cœterorumque sanctorum intento corde fidelibus cunctis deposceret (jam enim frequens paganorum rumor ad nostras certissime pererebuerat aures), ante quindecim fere dies adventus illorum hæc mirabilis sibi ostensa est visio. Nam ab oratione qui jacuerat surgens, apertis vidit oculis, ut olim totum mundum Pater Benedictus, sepulcrum beatissimi Germani veluti patefactum, ipsumque sanctissimum corpus indisruptis vestibus indutum, atque ministerio ut fuerat divino in ipso sarcophago ordinate compositum, quemadmodum ipse post paululum omnesque qui simul adfuimus, dolendum inspeximus. Sic Dominus, suo dilecto sanctusque Germanus ostendere voluit, quod in brevi peccatis facientibus nostris erat implendum. Nec visio prius quam visionis sequentia omnibus panditur.

CAPUT VI.

In memorato denique Caroli-vennæ loco ipsi Nortmannorum populi se victores seque superiores esse conspicientes, dum adhuc morarentur, exeuntes a navibus Cellam nostram, quæ contra vel secus eundem locum posita est, cursu propro festinantes intraverunt. Unde miraculum quod illic tunc factum comperimus, optimum si narretur putamus. Namque in eadem Cella b ecclesiis apostoli Petri almique

non longe sit a silva Equilina. Hæc est Cella, quam Wandremarus Abbas S. Germano dedisse memoratur, hactenus de ure Cænobii nostri vulgo la Celle.

Germani ignem terque quaterque supponere nitentes cum defecissent, eas incendere amborum meritis non valentes, claustra ejusdem Cellæ tandem egressi, horreum quod ibi erat juxta positum cremaverunt: ex quo tantus flammæ globus aeris alta petens ascendit, qui quasdam arbores ultra etiam jam dictam Cellam virentes incenderet, ipsas vero ecclesias intactas integras ut erant relinqueret. Cum insuper ventus australis validissime flaret, totumque fere incendium eandem in partem projiceret, illico septentrionalis e regione spirans intumuit: atque in alterius partis latus australem mira conversione reflectens, omnem vim pariter retorsit. Ita mirabilis Deus, qui famulos suos secum fulgentes in cœlis semper mira communi pietatis gratia operatur in terris.

CAPUT VII.

Cum igitur sabbato paschali diffusa navium classis Parisius, ut supra relatum est, pervenisset, in crastinum cum suos jam sol lucifluos emitteret radios propria totum illustrans lampade mundum, e navibus prorumpentes, ipsam civitatem, ut præmisimus, vicinaque suburbana absque habitatoribus repererunt: ingressique monasterium beatissimi Germani, Dei fanum residuumque ecclesiæ, quod securitatis damno remanserat apparatus, contaminare, pollutisque manibus cœperunt destruere. Sed quia Domino miserante nec ibi virtus defuit ejusdem sanctissimi Patris, minime debent reticeri, quæ tunc illic totius mundi Creator ad laudem sui nominis gratia ipsius pontificis ostendere dignatus est miracula. Quæ quia nemo nostrum interfuit, penitus ignorabamus: postea tamen a fidelibus missis Ludovici Bejuvariorum regis, Kobbone videlicet aliisque quos ad principem Nortmannorum Horich nomine legationis causa direxerat, ea cognovimus: qui nobis illa fideliter narraverunt, quemadmodum ipsi (ut testati sunt) coram Horich præsentibus ex parte videntur, atque ex parte ab ipsis qui tunc in ipsa ecclesia, quando hæc gesta sunt, simul aderant Christianis audierunt. Nam cum trabes ecclesiæ miserrimus ille populus, quia erant abiognæ, et idcirco habiles navigio, incidere tentavissent; tres ex maligno eorum numero ante altaris crepidinem beati Stephani, invalidi totius virtutis robore ruentes ceciderunt, atque confracti incredulas Deoque odibiles animas aliis timore percussis exhalantes, perpetuas descenderunt ad umbras, ubi edax vermis eorum non morietur, et nimis eorum ignis non exstinguetur.

CAPUT VIII.

Cumque illud Dei templum a trabibus ita cessatum totumque simul depopularentur monasterium, accidit ut unus eorum etiam apud eos nefandissimus ad confessionem domni Germani strictum gladium polluta gestans manu (mira quidem dicentur) deveniret, columnamque marmoream, quæ ibidem

orantibus ad dexteram sita erat, tredecies totisque corporis adnisi veluti capulans hostem percuteret. Cui continuo ita manus dexteræ, qua columnam ipsam inciderat, virilitas evanuit, ut post illum diem (quemadmodum idem Kobbo vidit, qui et eas incisiones nobis ignorantibus præsens ostendit) usque ad infelicem ejus ex hac vita discessum semper immobilis aridaque et ut fuerat extensa permaneret: manubrium vero ferri ita manu compaginatum inhæserat, ut nunquam ab ea aliquo ingenio vel arte nisi cum cutis parte avelli potuerit. Qui tamdiu nimia vexatione compatientis corporis cruciatus est, donec miserrimam finiret vitam, plenus indignationis et iræ, manibus dæmoniorum devectus ad tartareas sedes cocyti fœtidumque lacum averni.

B

CAPUT IX.

Operæ prætium fore credimus, si et illud magnum narretur miraculum. Igitur dum ipsum sanctissimum oratorium a crudelissimi impie violaretur turba, tanta subito nebulæ est densitate repletum, ejusdemque obsceni violatores ita divini judicii cæcitate percussi, quatenus illud metu ac tremore nimio pavefacti linquere cupientes, vix ostia vel fores per quas intraverant invenire valerent. Sicque in oberrando diutius fatigati, tandem erumpentes quantocius effugerunt, tali ab illo die tantoque pervas terrore, quo non ausi ulterius essent quacunque fœditate ipsam contaminare ecclesiam. Insuper et ita dysenterici morbo exinde (ut est vulgatum) sunt afflicti, ut dum quotidie morerentur, nullus ex tanta C multitudine se putaret evadere.

CAPUT X.

Interea simulato languore, legationis causa dirigunt ad præcellentissimum regem Carolum, ut eos cum pace fideles suscipiens, ad propriam dato regni tributo redire permetteret patriam. His ita placitis, rege quidem nolente, principibus tamen quibusdam (ut fatebatur) muneribus læsis, Ragenarius dux eorum, cunctique principes ad regem, qui tunc in monasterio Macharii Dionysii residebat, adducuntur: per deos, perque ea quibus maxime se protegi ac salvari putabant testantes numima vel arma, quatenus nequaquam ulterius vel fines sui regni nisi fortasse auxiliores intrarent aut contingerent. Qui ita dimissi atque pro sui evasione quam minime D speraverant gavis, pariter que venerant accepta auri argentique imposita summa læti redierunt: sed revertentes, morbo quo in prædicta ecclesia percussi fuerant quotidie deficientes cruciabantur, cruciatique nequissimas miserabiliter animas expirabant, nemine quos secum habebant Christianorum hujusmodi plagam sentiente. In quibus omnibus Dei est consideranda potentia, ejusque pietas amplectenda, qui tam misericorditer salvat innocuos, tamque terribiliter sanctos suos mirificando punit profanos.

CAPUT XI.

Quid in eadem ecclesia, postquam major pars

fratrum ab exsulatu reversa fuit, gestum est silentio premere non debemus. Necdum enim sacratissima beati viri ossa ad proprium fuerant reportata sepulcrum. Una namque noctium, custodibus ejusdem ecclesiae dormientibus, antequam fratres ad referendas Deo laudes more solito exitarentur, auditur ab eisdem coram altari sancti Stephani strepitus daemioniorum ingens, veluti hominum multitudo ad aliquid putaretur discurrens. Qui confestim surgentes, et cum lumine totam ecclesiam circumeuntes cum neminem reperissent, intellexerunt fraudem fallaciamque daemionum fuisse; qui nimirum dolebant se expelli a sanctis sedibus templi, in quod, dum a perfidis permissum fuerat polliui, haud dubium quin aliquantum iuxta illud: *Et pilosi saltabant ibi* (Isa. xiii, 21), intrandi licitum habuerint. Postquam autem sacri ejus cineres relati atque suo loco Christo favente sunt restituti, nihil tale in eadem basilica ipsius sanctitate promerente auditum est.

CAPUT XII.

Siquidem Ragenarius dux auctorque totius memorati mali, ante profanum Horich Nortmannorum principem cum ingenti superbia veniens, ostendit ei quod secum hinc asportaverat aurum argentumque multum: dixitque quod opinatissima Parisius civitatem captam haberet; quodque mansionem Germani senis, quae in eadem terra decentissima haberetur, intrasset; insuper et quod omne Caroli regnum sibi ratione tributis subjugatum haberet. Horich autem dum talia non crederet, jussit jam dictus Ragenarius partem incisae trabis monasterii domni Germani, seramque portae Parisiacae urbis ante eum in testimonium adduci. Praeterea retulit ei quam bonam quamque fertilem uti omnibus repletam copiis invenisse terram: populum vero eam incolentem, ad dimicandum pavidum ac trementem: referebatque dicens quod majorem ibi mortui quam viventes haberent virtutem, nullumque invenerit sibi resistentem, praeter Germanum senem mortuum. Haec cum diceret, tremens illico ac pavens corruit in terram, atque terrificam coepit voce clamare, Germanum coram assistere, eumque se baculo quem manu gestabat graviter flagellare. Quod videntes Horich scilicet universique sibi assistentes, ipseque Kobbo Luduwici regis illuc directus legatus, ex hoc quod acciderat stupore nimio permoti admirati sunt. Isdem vero Ragenarius sic humiliatus ac repente contritus, aliorum manibus cito sublatus recessit. Qui maximis per triduum tormentis ignominiose afflictus, praecipit tandem unam auream suae similitudinis statuam fieri, atque per eundem Kobbonem Germano seni deferri, spondes se, si evaderet, Christianum deinceps futurum, Deumque Christianorum indubitanter crediturum; sed quia non erat ex ovibus Christi, idcirco quod petebat obtinere non meruit. Ita prorsus inflatus, quemadmodum nobis idem Kobbo manifestum fecit, ac totus turgidus exstitit, ut nec audibus, nec visus, nec odoratus, vel

A gustus in ejus corpore discerni potuerit. Sicque diffusus ad postremum visceribus mediis crepuit, vitamque miserimus mane finivit. Statua vero sacris oblationibus indigna, a quibus delegata fuerat re-tenta, veluti immundissima a mundissimo cordium inspectore refutata remansit.

CAPUT XIII.

Sed adhuc qualiter qui residui fuerant ex hac defecerint vita, prosequendo narremus. Ad eo sane die, quo monasterium almi praesulis Germani ingressi sunt, donec penaliter cuncti interirent, ita, ut diximus, turgenti sunt (Kobbone teste) viscerum inflatione perculti; quatenus omnis eorum coetus etiam in patria quotidie moriens periret, praeter quos Horich postea jussit occidit. Timens etenim ipse ejusque optimates et populus pariter universus hujusmodi morte pessima damnari, praecipit omnes qui residui erant, exceptis paucis fuga lapsis, quos nec mortis credimus evasisse exitum, decollari: eorumque capita veluti satisfaciens morbo, Christiano qui captivus illic erat populo tradi. Nam ita clades ingrassata Deo permittente saeviebat in plures, ut pene quicumque morbidum tangeret, exemplo eodem adtactus morbo et ipse deficeret. Insuper jussit cunctos captivos qui Christianitatis vocabulo censerentur, in regno suo perquiri, eosque cum libertate et honore absque alicujus contradictione in suam patriam reverti. Qui etiam haec et alia ultra quam sint inserta dicebant. Nos tamen ea quae a videntibus percepimus, solummodo ponere disposuimus; magnum satis habentes, quod victoriam quam populi multitudo, communi obstante crimine, ex inimicis habere non potuit, beatus Germanus inclytus meritis, gloriosus miraculis, apud Deum tali donatus triumpho obtinere promeruit.

CAPUT XIV.

Quia vero duce Christo hucusque signorum dulcedinem sequentes processimus, nunc ordinem quo ipsius beatissimi corpus relatum sit dicere aggrediamur, his praemissis quae in villa Cumbis accedentibus infirmis, ejus patrocinis donata cognovimus: quae quo magis narrantur, eo amplius juvat a pia narrationis tramite non discedere. Igitur cum quidam puer Dagenus nomine, ex familia ejusdem monasterii, surdus et mutus, omniumque membrorum officio destitutus, ad praefatam villam auxilio parentum deportatus fuisset, ita est subito meritis ipsius gloriosi pontificis pristinae redditus sanitati, ut et loqueretur pariter et audiret: et qui paralyticus manibus de-ductus venerat alienis, ovans ac letabundus tribus in se miris ostensis, propriis jam coepit ire vestigiis. Namque a terra post paululum incolumis surgens, eum magna cordis alacritate illis qui aderant aiebat: Ecce, ecce adest beatus Germanus, per quem me totum Deo gratias agnosco curatum.

CAPUT XV.

Nec illud omitti debet, quod Christus ad laudem et

gloriam famuli sui largiri dignatus est, quod etiam audientibus proficere credimus. Fuerunt itaque in eadem villa duæ puellæ, longo tempore sic febribus valde vexatæ, ut vix jam pedibus incedere valerent, quibus nec ulla medicinæ ars eatenus potuerit subvenire. Quæ cum fiducia magna ad eandem ecclesiam in qua sanctissima ejus membra posita erant pergentes, petierunt a custodibus ut saltem sub tanti pontificis venerabile corpus eis transitu præberetur. At illi fidem illarum plenam considerantes, promiserunt eas sicut humili petebant prece transire. Nec fides præmium distulit. Ita sane ipsius sancti corporis transitu feretro ab eadem infirmitate mox curatæ sunt, ut nullam exinde molestiam per idem tempus ulterius paterent. Ergo mirabilis Deus in sanctis suis, qui non solum eos in præsentem gratiarum donis mirificat, verum et post mortem tantis beneficiorum muneribus eorum meritis largientibus præstitis miraculorum glorificat signis.

CAPUT XVI.

Post hæc cum ejus sacratissimum corpus a supradicta villa Cumbis ad monasterium reportaretur; quod tunc in via actum est manifestare placet in populis. Tanti denique præsulis beatissima membra monachis cum laudibus et hymnis ad proprium referentibus locum, contigit ut cereus qui præferbatur ardens, validissimo flante vento, etiam in laterna in qua positus erat, exstingueretur. Dumque cum equo ad villam quis propter ignem qui rursus debuisset accendi ire voluisset, cœlitus effulsit, ut omnibus qui aderant, tanquam extinctus non fuisset, in eadem laterna rutilans appareret. Unde ad hujus rei testimonium in eodem loco a fidelibus crux lignea^a ponitur: ut quod ibi tunc gestum est, quodque priusquam ad monasterium perveniretur genuinatum miraculum, a transeuntibus futurisque non ignoretur generationibus.

CAPUT XVII.

Ventum est autem non paucis sanatis infirmis cum magnificentia et honoris obsequio ad Theodasium^b ejusdem sancti villam: unde sequenti die comitantibus rursus virtutum prodigiis gratanter egressi, venerunt psallentes rectoque itinere gradientes usque ad fluvium qui vulgo dicitur Biber^c. Quo transmissio venerabilis præsul et abbas ipsius monasterii domnus Ebroinus obviam venit, multique utriusque sexus, diversi gradus et ordinis cum crucibus et cereis, reliquoque sanctissimo apparatu cum eo: plebs quoque civitatis villarumque circumquaque non modica, cum omni alacritate ac devotione cordis universi currentes. Nam clerici magna cum voce Deum laudantes, singultu interdum quantiente psallebant: populi autem nunc præ immenso gaudio lacrymas fundentes, nunc vero præ cordis

^a Crux ista inter Quinciacum et Villam-Novam S. Gregorii collocata dicitur.

^b Theodasius, *Thiais*, vicus hactenus cænobio Præsentensi subjectus, altero milliari supra urbem, haud

A jubilo exsultantes, innumeras Deo gratias referebant. Nec uberior cœlestiæ fletus in transmigrante, quam lætitiæ exstitit in reversione. Præfatus itaque antistes, alique ad hoc delecti sacerdotes nobilesque viri, sacratissimum ejus corpus propriis humeris vicissim gestantes, reliquis omnibus ante et post feretrum cum laudibus et hymnis tripudiantibus bajulantiumque vestes attingere festinantibus, ad propriam deportaverunt ecclesiam. Cumque ad primam monasterii portam pervenisset, cœperunt hymnum *Te Deum laudamus, te Dominum confitemur*, cœlo resonante ante ipsum decantare, ponentes eum super altare sancti Stephani in eadem ecclesia principali. Ubi tandiu mansit, donec translationis ejus festus dies, quæ octavo Kalendas Augusta celebratur, adveniret. Tunc accedens memoratus abbas domnus Ebroinus episcopus, tulit illum, et collocavit in suo sarcophago cum metu et nimia diligentia benedictibus universis qui aderant ac laudantibus Deum.

CAPUT XVIII.

Denique postquam ejus sacratissimum corpus in suo est collocatum sepulcro, illam visionem silendo præterire non debemus, quæ cuidam fratri nostro in eodem cænobio quadam nocte revelata est. Videbantur enim illi in sopore posito omnes fratres ipsius monasterii stantes in choro vestibus induti solemnibus, loquentes ad invicem quasi de his quæ acciderant malis: respicientesque contra orientalem ejusdem ecclesiæ partem, viderunt beatissimum Germanum veluti in habitu militari ante altare sancti Stephani galeatum atque mirifice loricatedum stantem, et uti ex campo certaminis armigeratum fessumque venientem: aspiciensque cunctos, interrogavit usitato gentis nomine, ubi essent vel quo abiissent Nortmanni ipsius templi violatores, patriæ dissipatores, qui sua aliorumque sanctorum membra effodi compulissent. Cui humili satis (ut decebat) responso dixerunt, quia recessissent. Tunc venerabilis Pater, Bene, inquit, et Deo gratias respondit. Deinde in sedili quod ante memoratum altare paratum erat, ut eidem videtur fratri, residens, vocavit eos jussitque ut sese ad deponendum ea quæ portabat arma militaria juvarent. Interea quod aspiciebatur defecit. Nos vero tali habitu talique visione præfiguratum animadvertimus, quod jam veraciter factum esse cognoscimus, ultionem dumtaxat a sancto viro ex inimicis cœlitus reportatam: cujus interrogatio eorum perditionis declaratio fuit. In armorum quoque deponendorum adjuvante colligimus, quod eum, immo nosmetipsos bene juvando adjuvare debeamus, ne talia nobis aut illi pro nobis ultra proveniant.

CAPUT XIX.

Nunc igitur paulisper considerare libet, quam me-

procul a Sequana. *Theodasium* vocatur in codice Irminonis.

^c Biber annis, vulgo *la rivière de Bièvre*. Sequana miscetur ad urbem.

tuenda sint omnipotentis Dei judicia ; quanta sit longanimitas atque iustitia piissimi Creatoris nostri, vere terribilis in consiliis suis, patiens et æquissimus in universis operibus suis : qui si iratus servis suis negligentibus fuerit, cito illis pœnitentibus placatus reconciliabitur, atque visibilibus sive invisibilibus prostratis hostibus, pacem contritis corde cum victoria dabit. Sic de populo Israelitico sæpe legimus ; sic nostris temporibus frequenter audivimus ; sicque in nobis ipsis ejus pietatis gratia experti sumus. Ipse est enim Deus repellens et destruens, irascens et miserans, commotorumque contritiones sanans. Attendendum etiam beatissimus Germanus quantum sit glorificandus, quantumque venerandus, qui sic misericorditer juvat ad se cum fiducia confugientes, sicque terribiliter justis, quod est fatendum, meritis perecutit adversantes. Et quia longum ac difficile est per singula ejus virtutes retexere, maxime cum et antequam nasceretur ita dilectus gratusque Deo ut Joannes in utero matris exsultans inventus sit, cui virtus miraculi famulatrix exstiterit, placet in ejus laude hoc in loco paucis ludere versibus, sitque prioris libelli finis.

A Hic est Germanus, voluit quem mater in alvo
 Perdere, præsumptis haustibus atriferis.
 Sed quia vitali fuerat respersus olivo,
 Non potuit sanctum commaculare malum.
 Nam fuit egregia genitus de stirpe parentum,
 Qui quondam terris, nunc super astra nitet.
 Optat enim fragili si quis dum carne manebat
 Nosse fuit qualis, hic sua gesta legat.
 Et cœlos postquam conscendit, quanta per ipsum
 Gesserit Omnipotens, promere lingua nequit.
 Linquitur hoc illi bibulas qui solus arenas,
 Ac pelagi guttas dinumerare valet.
 Hortor enim cunctos, maculat quos actio vitæ,
 Hujus opem precibus poscere sæpe piis.
 Debilis ad cujus venit si turba sepulcrum,
 Inde means rediit sana favente Deo.

B Cui nunc et semper gratias agamus, qui nos meritis
 hujus fidelissimi sui præsulis de tot tantisque malis
 eripuit, quique nobis quotidie innumerabilium dono-
 rum beneficia ejus suffragiis præstat, faciens magna
 et mirabilia sine numero : cui sit honor et potestas,
 decus et imperium per infinita sæcula sæculorum,
 Amen.

INCIPIT PRÆFATIO LIBRI SECUNDI.

Quia prioris libelli metas, optatum propinquantes portum, Christo sermonis vela regente, attigimus ; acceptum ducimus ea modo miraculorum subnectere signa, quæ postea Dominus per ejusdem pontificis merita gloriosa dignatus est pandere. Illa quoque quæ rursus in ipsius sancti nostraque peregrinatione sunt facta, non incongrue addenda censerentur, nisi forte pudoris esse viderentur. Scilicet qui castigationis divinæ posthabitis eruditionibus, tempus emen-

C dationis necnon et fructum correctionis parvipendentes, ad hoc iterum prolapsi sumus, ut longiorem demum exsulationem dignissima expulsionem pateremur. Sed absit ut vel nostra tacendo inaccusata pallietur iniquitas ; aut cœlestis qua sanaremur, nobis clementer adhibita quo non præconetur, reticeatur benignitas ; vel etiam tanti pontificis humanæ salutis largita virtutum gratia immemorata transiliatur.

INCIPIT LIBER SECUNDUS.

CAPUT PRIMUM.

Sancti vero corpus dum revectum, atque ordine supra digesto suo est in loco restitutum, accessit ex pago Oximensi [d'Hyemes] quædam paupercola mulier, nomine Hirmintrudis. Hæc per novem annorum curricula contractionis calamitate oppressa, de loco ad locum, nisi aliorum manibus delata, nequam incedere valebat. Cumque eam Dominus per gloriosum antistitem Germanum curare voluisset, nocte quadam superveniente, vidit duas sanctimonialia virgines præclaris vultibus coram se assistere, deferentes sibi panem et lac, signum futuræ sanitatis, hortantesque ut comederet : molestia namque infirmitatis fatigata obdormierat. Cumque comedisset ex his quæ attulerant, dixerunt illi : Surge et quomodocunque potes, Parisius ad sepulcrum beati Germani ire festina : cujus munere noscas te ex propria corporis debilitate curandum Quæ longo

D ægritudinis vinculo de sua desperata salute, putavit se vano somni phantasmate deludi. Idipsum et parentes, quibus hæc retulerat, dicebant. Sed alia iterum nocte prædictæ virgines eidem apparentes, cum quadam indignatione, blando quidem sermone eam allocutæ dixerunt : Gaude, in proximo est enim ut cures. Et quare quo tibi præcepimus non isti? valde igitur saltem nunc, nec moram feceris. Porro expergefata mulier, auxilio tandem fratris asello levatur, sique ante tumulum tanti patroni delata exponitur. Permissa itaque est in atrio ejusdem ecclesiæ ipsa nocte requiescere. Sed priusquam mediæ noctis spatium transmitteretur, evigilans, quasi quodam medicamine delibuta, per seipsam aggreditur ecclesiam, fratribus jam ex more vigiliarum solemnia celebrantibus. Interea membra sibi male cohærentia cœperunt resolvi, atque in antiquum mox officium reverti : quæ pro anxietate cordis corporisque relaxatione

magnas institit voces emittere, ut omnes qui aderamur audivimus : factoque mane, illi Domino beati Germani precibus miserante propriis concessum est ambulare vestigiis : sicque per iter quo venerat rediens, omnibus bonum sibi largitum narrabat.

CAPUT II.

Nec illud præterire debemus quod simili modo factum contigit miraculum. Nam inter cæteros ex diverso properantes, venit quidam juvenis ex pago Bajocasino [*de Bayeux*] vocabulo Hildemodus, qui ita renibus contractus tribus continuo exstiterat annis, ut eo ipso dolore genuum ac tibiærum seu pedum privaretur officio : isque multa venerabilium sanctorum circummensens loca, quo pristinam illorum suffragiis recuperaret sospitatem, a nullo prorsus destinatus est sanari. Supra dicta autem sanctissimi pontificis imminente celebritate, a quodam venerabili viro per soporem est admonitus, ut monasterium ejusdem sanandus adiret. Qui nihil de visione dubitans, eo die qui eandem præcedit solemnitatem, nono Kal. Augustas, cum ascellaribus venit ante sancti Patris sepulcrum, jaciens se pronus in terram. Cumque diutius pro sui recuperatione Deum beatissimumque præsullem intentissime exoraret, subito cœpit coram oculis omnium illic adstantium membra proluxa ægritudine torpentia gemens extendere. Nec mora. Statim namque surrexit benedicens Deum, sanctumque glorificans Germanum : et non solum ipse, verum et qui præsentés eramus, omnisque frequentia populi qui convenerat, pariter benediximus Domino, qui talia meritis sui confessoris dignabatur concedere.

CAPUT III.

Illud quoque quod divina bonitas eodem vespere ad famam nominis tanti viri ostendere voluit, reticere non debet quin inter cætera narretur miraculorum insignia. Fuit quidam puer (ut putabatur) duodennis, de pago Aurelianensi et familia beati Patris Benedicti, qui de matris vulva in lucem renibus contractus ac genibus proruperat ; nec aliter se ullo modo movere poterat, nisi manibus nitens semivalidum promoveret corpusculum, insuper et ita ab ineunte ætate, officio loquendi privatus adoleverat, ut more ipsius lingua potius strepitum, quam verborum exprimeret sensum. Qui cum ad beati Caronis [*S. Chéron*] Martyris sepulcrum, qui juxta oppidum situm est Karnotinum [*Chartres*], a quolibet gratia pietatis deportatus fuisset, interventu ipsius sancti Caronis pedes ejus, contractione genuum perseverante, a posterioribus solummodo sunt disjuncti. Inde vero ad patrocinia almi patroni nostri quandoque perductus, obtentu misericordiæ permissus est ad sancti pontificis confessionem manere. Cumque jaceret fratribus jam in ecclesia vespere psal-

* Pinciaco, *Poissy*, locus sexto milliari infra civitatem Parisiorum, S. Ludovici regis natalibus illustris, a quo non longe distat Prunidas, *Prunay*. Pinciaccensis pagus longe extendebatur. Complete-

lentibus, cœperunt mox nervi atque nodi a natiuitate contracti corporis resolvi, necnon et ad usum ambulandi divina miseratione per beati viri suffragium aptari : qui cum fide venienti impetrare potuit quod natura vitata negaverat.

CAPUT IV.

Non enim debent esse (quod longe a fidelibus sit) oneri, quæ Christus suis sanctis amicis dignatur largiri. Nam qui gesta virtutesque eorum qui jam cum Domino in cœlesti regnant Hierusalem audire renuit, ipse procul dubio sibi testis existit, quia nondum ad illorum perfecte suspirat consortium. Contra vero qui recolit, legit vel audit ; ille utique, licet in terris adhuc positus, concivem illorum se evidenter esse demonstrat in excelsis. Igitur ex quadam possessione ipsius beati viri, quæ in pago Pinciaccensi a sita Prunidas dicitur, fuit quidam homo nomine Adoardus, ita oculorum privatus lumine, ut illi continua nox esset, nec quidquam lucis haurire posset. Hic ad sancti pontificis festivitatem manibus, utpote cæcus, aliorum deductus, ad sacra missarum solemniam inter reliquos qui convenerant devotus adstabat : et ecce subito antequam Evangelium legi inchoaretur, cœpit ab ejus oculis magnus quasi lacrymarum fluxus mirum in modum manare. Cumque diu hoc ageretur, et ipse rivulorum fontem de suis maxillis crebra manus adhibitione extergeret, superno mox respectus intuitu, incipit paululum splendoris inspicere. Deinde gratias agens toto devotionis affectu, solo prostratus obnixè precabatur, ut sibi jam partim reseratum lumen plenius redderetur. Nec ejus sunt preces apud Altissimum cordis inspectorem sanctumque frustratæ visum. Statim namque exauditus, pristinum recepit visum : missarumque peracta solemnitate, venit jam clare videns ante poliantrum [*id est sepulcrum*] beatissimi confessoris glorificans Deum, qui sibi ejus precibus, per tot annorum curricula luminis ademptam reddiderit dignitatem.

CAPUT V.

Ut igitur castigantis nos inæstimabilis divinæ bonitatis miseratio evidentius prædicetur, illa quæ rursus in ejusdem sancti ac nostra peregrinatione, ut meminimus, facta sunt miracula persequamur, etsi non sermone verborum copia phalerato, virtutum tamen speciositate colendo. Non post multos denique annos, iteratis sæpius malis, suscitavit nobis Deus sævissimam earumdem gentium persecutionem qua nos merito affligeret, afflictosque ut pietatis pater emendationem compelleret. Nam quemadmodum prospera a recto tramite per mentis elationem aliquando deviant, ita et adversa per contriti cordis humilitatem ad nostri nos custodiam revocant. Sola enim vexatio intellectum dabit auditui. Hujus itaque persecutionis orto flagello, sanctorum circumquaque

batur siquidem villam *Magedon*, recentioribus *Meudon*, paulo infra eandem civitatem, ex codice Irminonis ; *Surisnas*, vulgo *Suresnes*, ex diplomate Caroli cognomento Simplicis, etc.

jaecientium corpora non solum a sepulcris instaurato dolore effossa, verum etiam et ad proprias possessiones sunt hac illacque devecta. Cumque paratum fuisset quo sanctissimi corpus Germani ad superius dictam villam Cumbis iterum ferri deberet, illud nos quod tunc ibidem gestum est miraculum dicere juvat. Quidam autem nostrum, nomine Adalarius, monachus et sacerdos, sic per tempus continua renum fatigatione debilis factus exstiterat, quo nullo modo per se vel ad modicum, nisi uno et praesertim duobus sustentatus baculis, incedere valeret. Quibus adductus venit ad ecclesiam inter reliquos gemens: accedensque ad sancti praesulis corpus jam ad efferendum feretro aptatum, studuit unus nec tardior quidem esse portantium. Et hoc divino suffragante auxilio precibus sancti sublevatus, relicto, imo, ut ipse post aiebat, obliato baculorum officio, vicissim peregit, usquedum ad praefatam Cumbis villam vinculo infirmitatis solutus pertingeret. Quo in loco beati corporis gleba super altare venerandum exposita, ipse gratias agens ad omne quidquid voluit sanus evasit.

CAPUT VI.

Deinde contigit post aliquod evolutum temporis spatium, ut illuc quispiam daemone plenus adduceretur, quem quatuor ferme vii tenere vix possent. Maligna quippe vigebat virtute, eratque ex ipsius sancti familiae colonibus, atque de villa supra memorata Prunido. Advenit ergo manibus violentorum impulsus, tergiversatione reluctante hostis, Justipraesentiam nimium formidantis. Itaque multas illi adjurationes juxta consuetudinem exorcismi quidam nostri fecerunt, dantes insuper et haustum aquae benedictae. Sed ut in eo potius apostolici viri meritum praefulgens panderetur, universis ab eo tandem quiescentibus accessit ultima ejusdem exorabilis medicina. Qua depulsa callidi pervasoris morbida foeditate, omnis in eo incolumitas sensus vigore restituta informatur. Iniquissimo siquidem habitatore projecto, liber exivit captivus ab angue: remansitque non solum quatuor, sed uno minus homine valens.

CAPUT VII.

Adducitur et quaedam femina utramque manum gestans aridam. Haec olim pro qualibet sibi adhæsibili infirmitate ad sanctae Mariae [*Notre Dame de Moussy*] basilicam, quae ibi prope sita est, annuale votum juxta suae paupertatis modulum ex dimidii denarii quantitate constituerat. Sed adveniente Dominicae Resurrectionis die, emit inde, blanda diei subripiante occasione, edulium carnis, atque comedit, parvipendens melius non vovere, quam post votum vota non reddere: statimque ut sole clauso gratia soporis cubilis sui secreta petivit, ita manibus voti violatricibus ea in nocte contrahitur, quemadmodum emortuo in eis operandi officio, palmarum

^a Interpres Gallicus hunc locum interpretatur de vico *Ruyau* diocesis Senonicae, cujus tamen vici ecclesia S. Juliano vota est. Neque explicandus videtur hic locus de Rioilo vico pagi Pinciacensis ad

intima unguis producti penetrare viderentur. Quae mane facto veniens, dum ante altare in quo sanctum quiescebat corpus statuta fuisset, sic post modicum emendato delicto, ut fuerat prius, sana regreditur: nec gloriosa domina gloriosum dedignata est Germanum consortem seu reparatorem sui habere miraculi.

CAPUT VIII.

Ut autem taceamus de reliquis ea tempestate per eundem sanctum in eodem loco patris miraculis, dicatur nunc illud de quodam caeco mirabiliter curato, qui dum alieni gressus solatio fuisset attractus, suam illic per dies exorando praestolabatur salutem. Nam et solitus erat alia nescio quadam intercurrente infirmitate, multas crebrius quam subitas cum gemitu doloris effundere voces. Unde aliquando quasi importunus, et qui ecclesiae silentiis esset inquietus, a quibusdam correptus, nimis moerens aliorum ire disponens recessit; destinavitque animo, ut ad quamdam ecclesiam in villa Ruilo^a in ipsius sancti honore dicatam, quia prope erat, diverteret; ibique dum tempus sui veniret miserendi maneret. Quod cum praevio se ducente fecisset, antequam ejusdem basilicae januam intraret, lumen oculorum recepit: moxque tanta caelitus sibi data visitatione jocundus, ad eundem sanctum videns laudesque vociferans Cumbis revertitur. Fuit itaque gaudium fratribus universisque inibi conversantibus, atque per omnes circumquaque non modica admirationis laetitia. Hi ergo a quibus exasperatus recesserat, poenitentes aiebant, se et alios tali facto communitos, ad pauperum debiliisque importunitates patientes esse debere.

CAPUT IX.

Hinc Helagiam, generosi sanguinis feminam, inter reliquos illic venisse sanandam, simulque sanatam rediisse videamus. Haec ita suffocationis molestia per prolixi temporis cursum elanguerat, ut nec saltem divinis aliquando interesse cupiens officiis, dum solius tantum legeretur Evangelii lectio, durare pedibus stando valeret. Neque haec Dominus piis sancti carere voluit beneficiis. Quae diebus plurimis alieno portatu subvecta, eam in qua ipsius erat corpus frequentans ecclesiam, cum cereis neonem et aliis oblationibus piissimum ex animo venerabatur patronum. Cumque terminus quo ejus devotionis labor remunerari deberet, divinitus jam praefixus incumberet, statim caelesti perfusa medicamine, tanta corporis valentia ante ejusdem sancti praesentiam donatur, quatenus Deo ipsique beatissimo gratias agens reparata saluti exsultans rediret.

CAPUT X.

Dignum ducimus quod in sequentibus rythmo continet recolendum interserere miraculum. Nortmanni vero apud eundem locum qui dicitur Osecllus^b, in Sequanam, cujus vici fit mentio in diplomate Ludovici Augusti, infra: nam istius loci ecclesia S. Petro sacra dicitur.

^b Istius loci meminit Carolus Galvus in libello pro-

quadam Sequanæ insula residentes, Parisius sæpe-
 dum prorsus placebat, navali excursu veniebant. Re-
 dimebantur ergo omnia in circuitu vicina monasteria,
 ne illorum sævitia impositis ignibus cremarentur; stu-
 debantque præterea vicissim equis, quatenus aliquos
 nobilium gratia pecuniæ capere possent. Unde veluti ex
 mitissimi viri domni Luduwici^a abbatis redemptione,
 non modicum et incomparabile acquirebant lucri
 negotium. Et quotiescunque tale quid agere dis-
 posuissent, dissimulabant se multis diebus ante,
 nullatenus quoquam ire, ne cui illorum furtivus
 innotesceret adventus. Proinde decreverant mutua
 silentique consideratione Parisius sive ad nostrum
 aliquando percurre locum; omnesque ibidem sub
 malefida securitate commorantes insperate decipere.
 Restiterat siquidem in eodem monasterio qui ipsum
 custodirent fratres fere viginti. Quibus matutinale
 orto jam crepusculo Paschalis sacrosanctæ festivitatis
 officium celebrantibus, adsunt Nortmanni, qui
 Parasceve die equis ascensis iter arripuerant veniendi.
 Quos quidam nostrorum equites paulisper
 pervenientes, eorum eis quamvis sero malignum
 nuntiaverunt adventum. Illis autem non credentibus,
 sed magis laudibus divinis insistentibus, pagani sine
 mora insequentes venerunt, cunctosque ut erant in
 ecclesia circumcinxere psallentes. Tunc, quod magnum
 fuit declinandi subsidium, clausis in eorum oculis
 ecclesiæ portis, omnes sese in quæque latibula vel puteos
 immergentes absconderunt; quo non ex omnibus nisi
 unum equo fidentem, tanti præsulis suffragantibus
 meritis interficerent. Itaque fugientes, ante
 conspectum ipsorum ibant. Nec aliter inquam
 verissime, nisi ut quidam illorum ante enudatos
 etiam gladios, cum esset dies, illæst transierunt.
 Quibus ita angelica administratione salvatis, interfectis
 prænuntiis atque aliis in circuitu et in medio
 monasterii ex familia plurimis, omnia veluti spurcissimi
 invasores quæque in ecclesia vel extra invenierant
 diripientes; cum proventus exsultatione. cellario
 fratrum igne supposito, reversi sunt. Tunc universi
 de qualibuscunque quibus se abdiderant egressi
 latebris, concurrente etiam hinc inde populo civitatis,
 subverterunt tantum Spiritus sancti ignis ardorem,
 jam ad cuncta consumenda, spatia altiora petentem.
 Neque, quod postea nostris iterato contigit delictis,
 locus tunc penitus crematus dispersiit.

CAPUT XI.

Cæterum ut sit memoria Justi cum laudibus, ad
 ea quæ in Novigento^b villa nostra super Maternam
 fluvium sita dum ibi moraretur, dumque inde rever-

clamationis adversus Wenilonem Semonum archiepiscopum.
Deinde contra paganos, inquit, ad insulum loci qui Oscellus dicitur perrexi.

^a Quidam imperitus in codicibus mss. hoc loco reposuit
Hilduini, advertens nullum id nominis Ludovicum abbatem
 eo tempore Cœnobio S. Germani præfuisse. At retinendum
 nomen Luduwici seu Ludoviçi abbatis monasterii Diony-

teretur facta dedicimus, sed non ad cuncta vertamus
 sermonem. Nam si camus per singula, exuberans
 erit modus in pagina. Contingerat ergo terrore paganorum
 ultra Parisius jam et castelli Milidonis [*Melun*] terminos
 excurrerentium, sanctissimum, corpus ab Acmanto [*Esmant*]
 quo nuper delatum ablerat, illuc transferri. Homo igitur
 ex eadem villa illa infirmus per annos ut vix incedere
 posset, totoque corpore nulla sibi subveniente medicina
 debilitatibus adveniensi- candelam secum detulit, munus
 fidei, pretium sanitatis. Sed antequam illam accendere
 conatus quod cœperat peregisset, quæsitum, videntibus
 qui aderant universis, e cœlo respectus donum percepit.
 Ergo si regni cœlorum inæstimabilis magnitudo cujuslibet
 quantitate pretii emi potest, multo magis vera fide
 sanitas corporis. Tantum enim Christianus accipit,
 quantum credit. Confesum siquidem oblato munere
 sanatur, atque domus suæ limina gaudens revisit.

CAPUT XII.

Erat ibidem sane concursus infirmorum hinc inde
 confluentium plurimus: quorum causas ut sic breviter
 colligam, cæci gaudebant videntes, claudi ambulantes,
 curati diversi febricitantes, atque plurimi variis
 corporum contagiis liberati gratias agebant lætantes:
 singulisque largiebatur remedii gratia, prout digni
 inveniebantur medicantis clementia. Ita quoque
 dumtaxat ut qui vespere debilis adveniret, mane
 facto sæpissime incolumis exiret. Inter quos puerulus
 de pago Stampensi [*d'Etampes*] insanus defertur:
 habebat enim contractione nervorum membra
 damnata. Qui a matre deportatus, deprecatur ipsa
 obnixæ, ut se cum puero ea nocte in eadem basilica,
 in qua sancti præsulis corpus venerabatur, emanere
 liceret. Deinde hora ejusdem noctis adveniente,
 ut putabatur, jam mediæ, puer, matre nesciente,
 solus adsurgens, per eandem ecclesiam pedum
 cohæsiōne utcumque soluta ambulare tentabat.
 Evigilat mulier, gaudetque de nati visa salute:
 sicque ipsa atque sequenti nocte eodem in loco
 transacta, totus post biduum sospes affectus, genitricem
 jocunda recessit.

CAPUT XIII.

In eadem denique Novigento villa quæ et quanta
 D fuerint (ut paulo supra retulimus) sanitatum charismata
 ejus bonitatis munere advenientibus exhibita,
 sine crimine fatemur nos ignorare. Quam vero fuerint
 innumera, ille qui dedit cooperatore piissimus,
 solus novit Jesus. Ideo ad id quod ardet animus
 transeuntes, ejus reversionem mente hilari exponere
 festinemus. Fratres igitur qui illic aderant

siani, qui ab Nortmannis captus ac pretio dato liberatus
 est. Lege Vitam S. Faronis in sæculo II.

^b Novigentum Artaldi appellatur, vernacule *Nogent Par-taud*,
 in pago Briegio ad Maternam seu Matronam fluvium;
 habetur in codice Irminonis, nuper prædo vulgo dicto
Amblainvillers commutatum.

sanctissima ejus corporis membra custodientes, una cum ipso loci ruinas saltem invisere festinantes egressi; Nortmannis jam amico pacis fœdere regno eductis, iter reversionis læti suscipiunt: fuitque eis in revertendo navalis congruus apparatus. Unde Maternæ fluvium pariterque Sequanæ enavigantes, venerunt citra Biberis ac Sequanæ confluentia portum facientes: eductumque sacratissimum corpus navi, excepimus illud multi utriusque sexus et ordinis ibidem congregati, ut miraretur vix clericos ad eum tollendum accedere posse. Nam ex sui quondam episcopi domo, canonici primi uti pontifici adstantes exceptionis peregere ministerium, hujus antiphonæ congruam jubilantes melodiam: *O quam venerandus es, egregie Germane confessor, qui terrena contempsisti, et cæli januam exsultans petisti! Modo victor fulges in virtute cælesti, ideoque supplices te exoramus, ut intercedas pro nobis ad Dominum Deum nostrum.* Factaque geniculatione, ac ratione Dominica et missa pro universis solemniter dicta, ex monasterio sancti Petri necnon et beatæ Genovefæ virginis religiose accedentes clerici, eundem sequentes ordinem cœperunt sancto humeris suscepto corpore hanc psallere antiphonam dicentes: *Iste est Germanus pontifex maximus, qui per supernam gratiam divina dans miracula, promissa sumens munera, vivit perenni gloria.* Deinde nos uti decebat servulos corruentes, salutationis novum habentes hymnum, verenter adfuimus: surgentesque a solo dignissima ejus reverentia prostrati jacueramus, post orationem et collectam, jam cuidam, contractæ femine ac cæcis duobus collato sanitatis beneficio, quo unaquæque videlicet exceptio proprio decoraretur miraculo, ita concrepantes intulimus:

Ave, præsul benedicte, ave nunc piissime,
O Germane, venerande Pater et eximie,
Plebis temet cum fideli comitantis agmine,
Veni jam, veni benigne, redi pastor optime,
Oves proprias require, ac paci restitue,
Nec tristari ultra sine de sublato pignore.
Deplorabat te cæssisse dominum Lutecia,
Se plangebatur et lugebat caruisse gloria,
Quam adplaudet recepisse jam tua præsentia.
Heu quam flebant et gemebant servi tui monachi,
Et caterva populorum cuncta nimis propria,
Cum fuisses exsul loco a tuo, sanctissime!
Quis illorum sermo valet planctus fari cordium,
Atque simul expedire fletus amarissimos
Quod sacerdos pietatis pulsus esset impie.
Qui si cessit feritati paganorum rigidæ,
Necnon loco vel ultrici flammæ; tamen adfuit
Votis dignis famulorum præsens in periculis.
Unde juvat nos adire illud dictu nobile.
Quod stupendum et mirandum inferat miraculum,
Pro quo dignæ confessori referantur gratiæ.
Itaque dum illucessit Paschæ dies splendida,
Dumque laudes celebrarent matutinas Monachi,

A Circumdantes se paganos miro ludunt ordine.
Nam ut cunctos gloriantur se cepisse miseri,
Utque gyro mox vallarunt omnes fere proximo,
Te precante liberantur prope capti servuli.
Dumque nullus sese putat habere superstitem,
Gladiatam evasisset qui Danorum aciem;
Omnes se de locis mergunt additis incolumes.
Cerneret tunc lacrymantes non loquentes invicem,
Dum de necis quasi fauce se viderent surgere.
Vota solum cordis dabant tacita dignissime,
Unus tantum præpeditur cæcæ mortis obice,
Atque telo perforatur hostis velossime,
Ne tanto summus careret pontifex libamine.
Salve clemens, hinc precamur, salve præsul agie,
Omniem clerum te colentem cum devoto populo
B In præsentia ut mereamur uti prece commoda,
Hincque celsi paradisi regnum nobis obtine,
Quo simul tecum psallamus Patri laudes Domino,
Atque stoti Trinitati consonantes angelis,
Sanctus, Sanctus, Sanctus, Dominus Deus exer-

[cituum.

Cæli tuæ pleni manent atque terra gloria.
Osanna qui benedictus in excelsis venerat.
Gloria sit Deo Patri atque laus Altissimo,
Honor, virtus et potestas Jesu Christo Domino,
Dignitas et unus apex sit quoque Paraclito, Amen.
Quo ad finem usque ita completo, fuimus jam licet
ex adverso proximi partim adustæ, nec non et per-
multum dissipatæ civitati, cujus demolita facies nos
omnes in dolorem adducens, competentem exegit
psallare: *Aspice, Domine, quia facta est desolata*
C *civitas plena divitiis, sedet in tristitia domina gen-*
tium, non est qui consoletur eam, nisi tu Deus
noster. Multi namque canentes, plures vero cerne-
bantur plorantes: sicque processimus in pratam^a
usque, quod sub est monasterio. Eramus vero mœ-
rentes, quod postea quam propriam intraveramus
tellurem, nullas ut antea ostensas noveramus virtutes,
sed ecce subito ex tanta populi multitudine unus
procurrrens accessit. Habebat enim causa penitentiam
ferri circulum in brachio, ut solet fieri, aretissime
obvolutum. Jamque tempus increverat ex quo illi
casu propriam occidenti matrem, hujusmodi pœna
accesserat. Qui vociferans et tanti viri pietatem sibi
adjutricem expostulans, ut manum ad feretum, quo
sancti sacrum bajulabatur corpus, pallium saltem
D desuper contingere cupiens protendit, illico ferrum
de brachio exsiliens mirandum crepuit, ita ut in
aera sursum evolans videretur a multis. Quæ res
nos universos hilariores efficiens, nonnullos etiam
in lacrymas præ gaudio movit. Sed et caro armillæ
hujusmodi asperitate in profundum exesa, quod
gestum erat pretiosum pandebat miraculum.

CAPUT XIV.

Advenerat et quædam mulier adjunctis fidei comitata, quæ a cunabulis ita nuncupata, dicebatur

^a Hinc monasterium dictum *S. Germani de Prato*, non tamen ante sæculum xi, si bene adverti, recentius *de Pratis*.

Electa. Hæc prorsus, ut nobis quasi eadem adhuc infirmitate dolens aiebat, ita per decem annorum curricula manus dexteræ ariditate contabuerat, quo nullo modo vel ad os eam porrigendi posset habuerit. Accedens itaque cœpit magnæ humilitatis precibus supplicare, quemadmodum sibimet tantum sub ejusdem sancti corporis feretro, ut eramus in ambulando, transitus concederetur. At ubi vix intromissa (erat enim compressio populi multa) transisset, sic illius aridæ manus debilitas extemplo curatur, quatenus omni recepto vigore, solitum propriæ actionis exerceret officium. Hanc namque vidimus incolumem, et Meroldum qui venerat cæcus, necnon et Aldegundem videntes.

CAPUT XV.

Pervenimus ergo psallentes nimia lassitudine ac solis ardore fatigati hora quasi sexta ad monasterii januam. Annus autem circuli resurgentis Christi octingentesimus sexagesimus tertius; dies vero mensis quarto decimo Kalendâs computabur Augustas. Tunc hymno *Te Deum laudamus* incœpto, intravimus ecclesiam, deponentes idem sacro-sanctum corpus

^a Ergo id quod scribit auctor anonymus in libro Translationis superius edito, S. Germani corpus humanum fuisse primitus in porticu ecclesiæ S. Vincentii, explicandum est de sacello S. Symphoriani, quod hactenus exstat in atrio ecclesiæ.

In codice Irminonis abbatis exstant litteræ donationis paulo recentiori manu scriptæ, quibus Brunardus quidam ingenuus tradit duos mansos propriæ hereditatis suæ beatissimo Præsuli Germano, sitos in villa ipsius sancti Pon-

^A super ipsum in quo prius jacuerat sepulcrum. Deinde concinentes antiphonam: *Laudem dicite Deo nostro omnes sancti ejus, et qui timetis eum pusilli et magni, quoniam regnabit Dominus Deus noster omnipotens, gaudeamus et exsultemus et demus gloriam ei*, facta oratione ad pro omni qui convenerat cœtu peracta missarum celebritate, intulimus illud in sancti Symphoriani cryptam, ubi primum migrans ^a quieverat, atque post ejusdem sancti martyris altare in præparato sibi tumulo venerandum posuimus. Unde evolutis temporum spatiis, atque monasterio jam ex parte reædificato, adveniens gloriosus semperque pius rex Carolus ejusque regni consors Richildis regina, simulque pater et pastor noster domnus Gauzlinus ^b abbas et Ingelvinus episcopus, aliique præsules sive regni sui principes, retulerunt eadem sanctissima membra cum laudibus et hymnis ad propriis locum supulcri. Ubi auxiliante Deo et Domino nostro Jesu Christo, socia Spiritus sancti gratia, multi usque hodie venientes ejusdem sancti Pontificis meritis sanantur infirmi ad gloriam et laudem sanctæ et individvæ Trinitatis in sæcula sæculorum, Amen.

lificis nomine Celciaco in pago Stampinse, eo tenore, ut de reditu et censu quod exinde exierit, queat lumen haberi ante sanctum ejus sepulcrum. Actum Parisius anno regni x Karoli, Kal. Aprilis, Abbate Gozolino. Ex quibus apparet Gozlinum jam præfuisse monasterio anno 850. Hic subjiciendum est diploma Ludovici Augusti cognomento Pii, quo discimus situm Karoli-vennæ, cujus meminit Aimoinus superius initio libri i de miraculis S. Germani, ex ipsa originali membrana descriptum in hæc verba.

ACTA TRANSLATIONIS S. SAVINI MARTYRIS

AUCTORE AIMOINO

(Apud Marten., vet. Script. et Mon. ampl. Collect. tom. VI, p. 806, ex ms. illustrissimi domini Chauvelin, regiorum sigillorum custodis.)

OBSERVATIO PRÆVIA.

Acta translationis S. Savini martyris suppediavit nobis codex antiquis illustrissimis domini Chauvelin, regiorum sigillorum custodis, ab annis circiter 800 axaratus. Aimoinus, illorum auctor, alter nobis non videtur a celeberrimo illo Aimonio Parisiensis S. Germani a Pratis monasterii asceta, qui tempore Caroli Calvi librum de inventione et translatione sancti Vincentii aliaque conscripsit. Et certe id non obscure in fine præfationis, ubi S. Savini *dominique mei Germani*, inquit, sanctitate, adjuvari se postulat.

In hoc autem opusculo duo præsertim occurrunt observanda. Primum, illustrem virum Baidulum clericum palatinum Majoris monasterii Turonensis abbatem, apud eruditos hactenus ignotum, S. Savini corpus ex ecclesiâ a Wandalis olim diruta, quam plurimis retro annis omnino deserta, ac vepribus et spinis obsita proprium Ceresiacum prædium translulisse, ubi, ædificata in honorem genetricis Dei

^D Mariæ basilica, canonicos posuit et dotavit, variis beneficiis cumulavit. Secundo, locum illum, *posita ibi monachorum norma*, longe cultionem ac venerabiliorem evasisse, quippe *domus omnis cum ecclesia nobiliori atque ampliori schemate* consurrexit. Id auctoritate simul ac pietate Caroli Magni factum tradunt, qui monasterium regia magnificentia constructum restauratori ordinis monastici in Gallia Benedicto Anianensi abbati regendum commissit, ubi, congregata maxima monachorum caterva, Benedictina religio ita floruit, ut ad varias inde congregationis subsecutis temporibus diffusa fuerit. Ex S. Savini quippe monasterio ad restaurandam in Augustodunensi S. Martini cœnobio disciplinam cum sancto Hugone et sedecim aliis monachis assumptus est maximus ille Berno, qui postea Gignacensi, Balmensi ac demum Cluniacensi congregationi abbas præfuit: idque petente ac procurante Baidilone comite, Æduensis asceterii restauratione, cujus olim,

ut conjicimus, Baidulus propinquus, S. Savini bisilicam construxerat ac dotaverat.

Porro hæc Acta conscripsit Aimoinus ad petitionem Hucberti abbatis S. Savini, qui a vulgatis ha-

ctenus hujus cœnobii indicibus exsulavit, qui post Dodonem Benedicti Anianensis discipulum et successorem collocandus videtur.

AIMOINI PRÆFATIO.

1. Vere crediderim hoc tam parvum quam magnum hujus sequentis operis sacramentum mihi divina sanctique Savini præcipui testis Christi miseratione donatum : parvum dico quantitate voluminis, magnum vero reverentia martyris. Nam et talia ne legentium auditorumque sensibus fastidienda sint, paucis oportet innotesci. Et utinam, licet immeritus presbyter, is talis inveniar, qui et sancto defe-

ram, ipsiusque amplexandæ congregationi, memorando videlicet ejus cœnobii Hucberto abbati, et sub eo pie colendis Patribus, aliquid eum honore futurum relinquam, utque ad sancti martyris laudem vestramque jucunditatem fieri possit, illius, domnique mei Germani sanctitate, vestrarumque orationum solamine, Dei sanctique Savini amici me supplex imploro juvari.

INCIPIT TRANSLATIO.

2. Ea sane tempestate qua Wandalorum populatio, B ut usque nunc ex antiquitate refertur, in vicinas exterasque longe lateque sæviebat nationes, ecclesia quæ desuper corpus erat beatissimi martyris Christi Savini, diruta, ipseque locus ita desolationi habitatorum absentia traditus est, ut eremi vastitate ob-situs, per multum inhabitabilis desereretur annorum cursum. Quod et si aliqui, pauci duntaxat, restiterant vicini incolæ, et quorum manus ad hoc reparandum minime sufficerent. Tempus namque profusum transiit, sed non memoria oblita est loci : qui licet incultus, priscorum tamenolvebatur per ora sacratus, beatique Savini corpori scientissime dedicatus. Cumque longioris ævi defluxo jam spatio, Omnipotens et locum restaurari, et sanctum manifestius recoli disposuisset, quomodo acciderit gratum in brevi dicere fuit.

3. Cum igitur quoddam pecus cujusdam coloni hominis aliquando aberasset a grege, ille, animali in pascualibus non invento, remotiora silvarum, de pecore desperatus, agressus est loca, reperitque extra pecoris vestigio, cœpit sequi donec spinarum ruborumque asperitate longius arceretur ab incepto. Sed quod est pro perditis rusticorum pauperum, laborem quamvis gravem evincere persistens, ferro veprium omniumque stirpium sibi noentium dextera lævaque impedimenta succidens, ad locum tandem sic desudans prorupit, in quo quadrupede quod quærebat jacenti conspecto, accessit, eum commovens, sed pecus ullo modo se levare non potuit. Obruerat enim intrans ejusdem olim basilicæ septa, taliter debile jacens, quatenus omnibus contractum membris, nec assurgere, nec incedere penitus valeret. Brachiis tamen illud impositum portavit ad domum, vicinis gesta replicans universa.

4. Crescebat itaque hujusmodi narratio per dies atque dilatabatur proluxe. Manebat quidem de sancto, et ejus ecclesia vivens adhuc, ut præmisimus fama : sed catenus quo fuerit in loco, mortuis jam

qui noverant, ignorabatur. Non tamen deerant, qui a videntibus priorem ejusdem basilicæ statum, ea quæ tunc quasi nova dicebantur, se antea crebrius audisse certissime faterentur.

5. Interea quidam presbyter, nomine ac merito Bonitus, his diligentia attentis, institit divino sanctique martyris amore conductus, ecclesiam martyrii reconstruere, locumque ut est hodie habitationi restituere. Quod autem inter cætera unum ibidem miraculum a Bonimio sacerdote ipsius Boniti nepote comperimus, sufficiens ad id quod agitur interponere judicavimus. Aiebat enim inter hæc quæ ab eodem suo avunculo referri de sancto sæpius asserebat, quasi modo idem Bonitus equum sibi quondam fur-tim subtractum interpellatione domni Savini recuperare meruerit. Equo siquidem perditto, quid faceret, frenum necnon et sellam accepit, atque ante sancti tumulum sic increpitans, mœrensque projecit : Te, inquit, sancte martyr, cultui seu venerationi ecclesia tibi refecta, pro parvo possim et laborando restituere, tu, pro nefas, equum mihi tuis meritis, ut poteras, non custodisti. Equidem servio ecclesiam, num patior? Quod si rectum videtur, Deus discernat, tuque perpende, mihique equum restitue. Hæc et plura postquam sic veluti juste querelans intulit, reversus ad domum, nocte superincumbente, placido se sopori donavit, deinde galli voce somni torporem linquere monentis evigilans, officium nocturnale atque matutinale ante sancti sepulcrum reverenter solito complevit. Quo peracto, dum se ab ecclesia domui redderet, equus nuper furatus, nullo se regente, mox in facie præsto fuit, domini-que præsepium, utpote notum repetens, stabulum cursu ingreditur : quod presbyter cernens, Domino sanctoque ejus martyri Savino grates rependens, studiosiorem se deinceps circa Del martyris cultum exhibuit.

6. Erat denique vir prosapia clarus, rebus inclutus. Baidilus clericus palatinus abba Majoris mona-

sterii Turonensis, hæreditaria ibidem juxta in villa nuncupante Cerisio, jure propinquitatis possidens prædia : qui hujusmodi dum advenisset, agnitis negotiis, incipit prudenti animo audita meditari, atque si taliter esse vulgata possent sagaci perquisitione scrutari ; cumque ex præsentium et antiquorum relatione, insuper et miraculorum attestatione, idque etiam loco pandente, rem verissimam esse collegisset, conatibus piis sedulisque anhelare, quo et sibi ex sancti martyris parte cederet gratia, et sancto martyri ex suarum portione rerum amplificaretur dignitas. Quid inquam ? In eodem prædio, quod non antea molitus fuerat, in honore Virginis matris Christi, divinitus ardens condis, sacratque basilicam, habitationes facit, clericos imponit, necessaria cuncta exornat, demum vero ad sancti tumulum cum fiducia, omnisque obsequii diligentia supplex accedens, celebratis officiis missarumque solemnibus, Deum sanctumque postulans martyrem, ut illi quod nisus fuerat concedere perficere, tantum tamque copiosum pignus a loco in quo jacebat cum tremore psallens assumpsit. Ibat ergo feretro corporis supposito, gaudenter exsultans, nulla sibi in sancto opere impediende difficultate, quousque ad reverendam egregio martyri quam paraverat perveniret urnam ; in quo pretiosum, gratias agens divinas, corpus honeste recondens, dotem ecclesie ipsique martyri, totumque prædium familiamque donavit. Itaque Deum, quod suis annuerit votis, sanctumque Savinum magnifice laudans, gratulans exivit et ovans.

7. Cæterum dum vixit non cessavit conferre munera, augere beneficia, quibus locus ditaretur et cresceret. Plures quoque nobilium ejus actus eximios imitati, addiderunt thesauros, contulerunt alios, multisque domis locus effulsit, positaeque ibi monachorum norma, redditur quanto cultior, tanto prorsus venerabilior. Erat autem et est situ habilis, silvarum arborumque fructuosarum amenitate jucundus, cum pratis et vineis, aqua et molendinis.

8. Ergo monachis post divinum persolutum officium, operibus manuum, quod suum eorum est, sollicitè studentibus, domus omnis cum ecclesia nobiliori ampliorique schemate consurgit. Quorum bonitatis ordinisque religio, Deo sanctoque martyre suffragante, illic talis exstitit, quæ multorum et maxime magnatorum mentes ad recolegendum duntaxat muneradamque locum dulciter invitaret. Talis floruit, talis cum bonarum actionum fructibus hactenus vernat, talis quæso et opto in Jesu Christo permanet.

9. Nec illam aliis omissis silendam reor quæ post venerabilem ejus corporis translationem præcipua facta fuisse dignoscitur virtus, ad ipsius sanctam evidentissime declarandam sanctitatem, et quia locum unde transpositus fuerat, etsi corpore, non tamen tuitione reliquerat. Presbyter vero inde cum per eandem viam qua sancti martyris corpus translatum venerat, plaustrum musto onustum minaret,

A antequam domum pervenisset, ducilis a fundo karralis egressus in terram, nemine considerante, prosiliit : attamen mustus haud minus quam si obturatum esset foramen, nec una fluerat gutta, stetit, perventumque ad receptaculum plaustrum cum fuisset, presbyter accedens, et tonnam hanc inde si quiddam fecisset circumspiciens, animadvertit aperto foramine ducilem abesse, æstimans pavensque nihil in ea musti remansisse, famulos vehementi furore commotus arguere cœpit, et quare hoc minime providerint acriter ut tristis invehere : dumquo amaro nimis animo sic loquitur, unus retro recurrens ducilem a terra non longe jacentem recepit, atque ad patentem qui erat in tonna pertusum applicuit. Quo apposito, priusquam intro poneretur, impetus musti e regione prosiliens, ad barbam et pecius porrigentis ducilem usque volavit. Presbyter autem et qui astabant, pro hoc quod visu mirabile ostensum fuerat, attoniti stupuerunt, vocesque hymnidicas omnium Factori ejusque sancto martyri Savino in cœlum levatis manibus cum jubilatione dederunt. Sacerdos vero sub eadem summa qua illud in tonnam posuerat, vino recepto, ampliori voto et ore grates lætus exsolvit. Hoc et alia idem Bonimius a præfato Bonito avunculo suo frequenti relatu se accepisse fatebatur.

10. Sed quid plurima de sancto scribentes conferemus ? Nunquid illum majoris meriti ex hoc faciemus ? Ut si, verbi gratia, de Giboldi cursis inseramus perdibus sese introrsum ad invicem respicientibus, moxque sancti precatu superna miseratione directis ; ac de vinea illa juxta quam ejus corpus pausatam fuit, nec prius inde remotum, donec eadem ipsi daretur vinea ; vel de alio in somnis commoto a Franciæ partibus adveniente, manumque aridam diu habente, atque interventu martyris illic extemplo curato ; aut etiam de cæco ab annis triginta lumine oculorum privato, qui post trecentorum sexaginta mensium curricula ibidem illuminatus videns hilarisque recessit. Hæc et similia benignitate martyris ad ejus limina debilibus concessa, si modo, ut dixerim, superfluo exsequi incipiant, sanatorumque nomina, patrias villasque in quibus sunt nati vel ex quibus advenerunt, si disposuero recitare, me sobriis lectoribus avidisque auditoribus tædium inferre non abnego. Est autem mensura discretionis in divinis et hagiographis servanda scripturis, et si pauca de ipso referamus, nunquid ejus meriti virtutisque gratiam ex paucis mutilabimus dictis ? Hoc autem precamur sufficiat dictum, paucisque roboratum, quod beatus Savimus ita decenter translatus, pretiosus ac gloriosus habetur martyr Christi. Quod tam ipse quamque omnes Christum confitentes, rite confessores appellantur, cuidam ex eodem monasterio Deo subique devoto per revelationem spiritus ostendere voluit, se martyrem ob sanguinis pro Christo effusionem malle vocari.

11. Est enim meritis dives, præcibus potens,

ipsum rogemus, ipsumque humiles imploremus, A ejus sanctorumque omnium orationibus crimina no-
quatenus ad eum qui se martyrem fecit, atque in
cœlestibus martyrii præmio coronavit, pro nostra
animæ corporisque salute intercedere dignetur, ut
stra idem Dominus solvat peccata seu commissa re-
laxet universa, gloriam vitamque conferrat sempi-
ternam in sæcula sæculorum. Amen.

RATPERTUS

SANGALLENSIS MONACHUS.

NOTITIA HISTORICA IN RATPERTUM.

(Apud Pertizium, Monumenta Germ. Hist., tom. II.)

S. Galli celeberrimæ abbatia in Helvetia incuna- B
bula et casus describere, desinente sæculo nono,
Ratpertus aggressus est (a), quod inceptum dien
sæculo undecimo Ekkehardus IV, sæculo duodecimo
Burhardus, sæculo decimo tertio Conradus de Fa-
baria, sæculo decimo quarto Christianus Kuchi-
meister prosecuti sunt, opere pro addiscenda medi
ævi indole apprime accommodo.

Ratpertus Tiguro ortus, post medium sæculi noni
in S. Gallo monasticam vitam amplexus est, magi-
stros sortitus Marcellum et Isonem, ac discipulos
S. Notkerum balbulum, Tutilonem, Hartmannum,
Waltramum et Salomonem postea Constantiæ epis-
copum, viros illius ævi nominatissimos. Præfectus
posthac ipse scholis, tam indefesso studios litteris
incubuit, ut nec cura corporis, nec communi prece
ab eis averti se pateretur, quippe tam raro domo
egressus, ut integro anno duos calceos non attereret,
diurnas psalmodum preces non frequentans cum
dicto : *bonas missas facimus, si alios facere eas* C
docemus. Cum ei incumberet fratres ob commissa a
superiore ex regulæ S. Benedicti præscripto ad
fustigationem condemnatos, columnæ alligatos fla-
gellis cædere, id munus in hujusmodi otiosos et
inutiles acriter exercebat. Extremo decumbentem
quadraginta canonici, ejus quondam discipuli, qui
de multis Alamanniæ ecclesiis festum S. Galli cele-
braturi huc convenerant, invisere, quorum quilibet
se pro eo defuncto triginta missas Deo oblaturum
spondebat. Obiit die 25 Octobris, circa annum 900.
Ex iis quæ scripserat, supersunt præter hos Casus
aliquæ chartæ traditionum, plures hymni sacri abs
Jodoco Mezler Canisio traditi publicandi, et versio
latina Vitæ S. Galli ab ipso ad usum populi rhy-
thmo Teutonico concinnata. Stylus ejus, etsi tersior
sit ac ætas ejus in plerisque ferebat, nihilominus

teutonismos et modos loquendi ex bibliis, liturgia et
regula S. Benedicti mutatos refert, ac quasdam
rusticæ Latinitatis voces a scriptoribus sæculi VI et
VII libris invectas habet. Pro more auctorum medi
ævi vera narrans fallitur in dominibus propriis, aut
aliquibus circumstantiis, quos infidæ memoriæ lap-
sus relata referentibus, et librorum ope destitutus
accidisse nemo mirabitur. Primævus Casuum horum
textus auctori cœvus est; is reperitur in codice
n. 614. canonibus Remedii episcopi, et ordinibus
Romanis colligatus; est scriptus ornate et correcte
mendis scriptoris manu cœva emendatis. Huic codi-
dici tanta fidelitate studii inhærere, ut neque in
voce, nec syllaba, nec littera ab eo secederem, lit-
teris majusculis, et interpunctionibus exceptis, quæ,
utpote obsoletæ, non videntur esse in recensis reti-
nendæ, etsi illis quibus Romanos subinde usos
fuisse fragmenta nostra codicum sæculo VII vetu-
stiorum docent, satis conformes sint. In his enim
antiquissimis paginis pro commate punctum in me-
dio lineæ, pro puncto speciem quandam puncti in-
terrogationis positam, et numeros antecedens et
subsequens punctum habere videmus. Habentur
Ratperti Casus etiam in cod. n. 615, sed cum is de
cod. n. 614 descriptus reperitur, et sæculum VIII
non superet, seponendum eum esse esse judicabam.
Ratperti Casus primo edidit Melchior Goldastus
1606 Francofurti, secutus fidem sex codicum, sed
recentiorum. Quæ causa est, quod in ejus editio-
nem menda irrepserint, quæ, cum neque editores
subsequentes ad codicem primigenium recurrerent,
identidem recusa videmus.

In S. Gallo, 1824.

ILDEPRONSUS VON ARX,
Bibliothecarius.

(a) Notitias suas hausit ex Vitæ SS. Columbani, Galli,
et Otmari, ex antiquorum Patrum traditionibus, librisque

et chartis authenticis apud S. Gallum adservatis; sui de-
nique temporis historiae pars ipse non parva fuerat. PERTZ.

RATPERTI DE CASIBUS MONASTERII S. GALLI LIBER.

INCIPIT TEXTUS DE ORIGINE ET DIVERSIS CASIBUS MONASTERII SANCTI GALLI
EDITUS A RATPERTO .

1. Postquam beatissimi viri, sanctus videlicet abba A Columbanus cum beato Gallo reliquisque discipulis suis, divinæ charitatis fervore succensi, relicta Hibernia, parentibus spretis prediisque paternis, per maria diversa Hiberniam transmearunt, et Gallias advenerunt, Sigibertum illius provinciæ regem adierunt. Qui, cognito eorum desiderio, devotissimamente famulus Christi concessit, ut ubicunque vellent, Dei servitio congruum sibi locum eligerent, et, ut illis placeret, incolerent; se vero in cunctis necessitatibus factorem illis esse promisit. Quod et copiosissimi implevit. Ingressi igitur heremum quæ Vosegus nominatur, locum invenerunt antiquitus cultum, sed tunc vetustate conlapsum penitusque destructum, aquis tamen calidis speciosum, nomine Luxovium b. Protinus vero ibi cellulas construentes, felici vita B Christo et amabili conversatione usque ad tempora Sigiberti junioris filii c Hiltiberti, nepotis videlicet Sigiberti, perduraverunt.

Qui etiam benignissimam erga Sanctos habuit mentem. Sed Brunnehildis avia ipsius Sigiberti, uxor autem prioris Sigiberti, plena dæmonis, tenebrarum socia, lucis inimica, omnibus bonis contraria, non passa est Sanctos in illo consistere regno, nec requievit, donec eos inde perturbaret. Qui relicta terra illa spretaque diaboli filia, ad Lotharium regem pervenerunt. A quo benignissime suscepti, cum honore, ut cupiebant, ad Theodebertum regem Austrasiorum sunt perducti. A quo accepta potestate, per Alemanniam locum eligendi aptum divinæ servituti, Tuconiam d advenerunt, quæ est ad caput lacu Turicini; ubi cum consistere vellent, populumque ab errore dæmonum revocare — nam adhuc idolis immolabant — Gallo idola vana confringente e et in lacum vicinum demergente, populus in iram conver-

a Ratpertus (*Rathgeber*) constanter vocatur et non Ruhepertus (*Ruhebringer*) vel Rudpertus (*Lammacher*). Is Tiguro se natum prodit hęc codici Tiguri asservato de SS. Felice et Regula inscriptis versibus :

Obsecro, da veniam patriam repedare gradatim,
Quam cupiens Felicem visere curro propinquam,
Germanamque ejus, quæ Regula jure vocatur.

b *Luxœuil* in comitatu Burgundiæ.

c Sigibertus junior filius Theodorici II, Childeberti II nepos, Sigiberti I pronepos fuit.

d Hodie *Tuggen* ad ostia Lintomagi.

e Jonas in Vita S. Columbani Wodani idola fuisset scri-

sus, non sine multo et ignominioso damno sui generisque futuri, Sanctos exinde perpulerunt. Inde iter agentes, pervenerunt ad castrum quod Arbona f nuncupatur, juxta lacum Potamicum, ibique a Willimaro presbitero honorifice suscepti, septem dies continuos cum gaudio permanserunt. Qui a Sanctis interrogatus, si sciret locum in solitudine illorum proposito congruum, ostendit eis locum jucundissimum ad inhabitandum, nomine Brigantium g.

Ibique reperientes templum olim Christianæ religioni dedicatum, nunc autem dæmonum imaginibus pollutum, mundado et consecrando in pristinum restituerunt statum, atque pro statutis quas ejecerunt, sanctæ Aureliæ reliquias h ibidem collocaverunt. Cellulas vero ibidem construentes, ibique degendo Christo servire volentes, prohibiti sunt a populo, cujus pars major adhuc erroribus diabolicis illudebatur. Indeque expulsus auctore Cunzone duce, sanctus Columbanus cum suis ad Agilolfum regem Longobardorum perrexit, sancto videlicet Gallo infirmitate detento in illis partibus derelicto. Quem etiam ob laborem itineris putans sanctus Columbanus ægritudinem simulare, officium illi altaris interdixit, dum ipse Columbanus in hac vita mansisset. i Hęc autem omnia quisquis plenius scire cupit, et quædam in hoc opusculo sequentia, a nobis vero ex aliqua parte contacta, in libris actuum eorumdem sanctorum j plenissime digesta reperiet. Nos vero, ut cœpimus, ex notis quæ sunt necessaria pauca ex parte tangamus, et ad intacta citius, Deo donante, properemus. Igitur beatus Gallus post felicitatis discessum magistri studiose cœpit inquirere locum in heremo ex alia parte castrii k præfati Alpibus contiguo divinis famulatibus aptum, quem et inventum aquis planitieque jucundum, duce quodam Willimari prebit Ratpertus in S. Galli cantilena Iovis, Ekkehardus IV Iovis et Neptuni.

f Hodie *Arbon*, Romanis Arbor felix, a S. Gallo tribus horis distans oppidum.

g Hodie *Bregenz* in supremo lacus Potamici sinu.

h Diva hujus, quæ et Argentorati colebatur (*Gallia Christiana*), nulli scriptores sacri meminere; videtur his in terris Romanorum tempore martyrium passa.

i Hęc post vocem *ægritudinem* a scriptore omissa alia manus cœva adposuit, secutaque indolem Teutonicæ linguæ pro *maneret* scripsit *mansisset*.

j Iste liber d huedum adest in bibliotheca S. Galli, n. 553.

k Nempæ Arboris felicitis.

sybiteri diacono, cum gratulatione suscepit non minima, ipsumque locum jejuniis et orationibus consecrando, cellulam ibidem, in qua ipse et cum eo Domino servituri commanerent, celeriter ædificavit Interea prædicti ducis Cunzonis filiam, sponsam^a videlicet regis Sigiberti, spiritus malignus invasit, quem cum episcopi a rege directi, quorum etiam credebatur sanctitati, ab ea expellere non potuissent, sed etiam cum ignominia ab eo expulsi fuissent, beatus Gallus non prima, sed jam secunda legatione atque humillima supplicatione ab eodem duce suscepta, locum in quo puella vexabatur, presbytero comitante, devenit, hostemque malignum oratione præmissa a pervasa domo imperiosa voce potenter ejecit, patrique puellam reddidit sanam, statimque ad dilectæ solitudinis chariores rediit aulam. Præfatus igitur rex audiens puellam a passione tanta sanatam, suis eam presentari jubebat aspectibus. Quæ interrogata a principe memorata de causa salvationis suæ, sanctum virum cum actibus suis, et beneficiis circa se per illum exhibitis ordine pandit, adjiciens et rogans, ut ipse cum suæ gratia pietatis dignaretur fovere. Quod rex benigne suscipiens, cujus heremi hospes exstiterit, inquisivit, comperiensque narrante puella aliisque fidelibus viris, ex parte ad regiam potestatem, aliunde vero ad possessionem nobilium viliorum pertinere herenum in qua Sanctus commanebat cum suis, protinus partem regis potestati cedentem præfato Sancto sua auctoritate contradidit^c, et constituit, ut tam ipse quam posterius ejus ibidem, scilicet ejus exemplo Domino servituri locum præfatum cum circumjacentibus silvarum commodis per regium auctoritatem deinceps firmissime retinerent. Et ut a nullo hoc imposterum destrui valeret, propriæ auctoritatis firmissima conscriptione munire decrevit, quod, ut bene cogitavit, optime perfecit. Cunzoni quoque duci præcepit, ut cum omnibus eidem heremovicinis necessitatibus sancti Galli sedulus ac studiosus fautor existeret, et in ædificiis, et in qualibuscumque rebus illius indigeret solatio, quod et devote complevit. Qua auctoritate talique firmitatis conscriptione locus iste tutus ab adversariis usque ad tempora Pipini et Caroli permansit. Religiosos etiam viros, qui eundem sanctum in sua susceperunt, ejusdemque heremi jus hereditarium illi potestativa manu

^a Multum negotii hæc sponsa, quam auctor Vitæ S. Galli Fridenburgam nominat, eruditus Sigibertum sponsum adinvicem non scientibus facessebat.

^b His, nempe Taltionibus illa silvæ pars, quæ humilior et Thurgoviæ locis cultis proximior erat, adpertinebat, quæ cum rotundum quoque montem complectebatur, cellam S. Galli attingebat, quæ hinc, incertis quoque et indefinitis finibus, jam in illorum, jam in regis fundo sita esse dicitur.

^c Post devictos anno 497 Alamannos mahnam Helvetiæ partem fisco cessisse, liquet ex hac, et aliis donationibus, quas reges Francorum parthenoni Sekingensi in Glarona, Tigurino in Uri, monasterio Murbacensi Lucernæ, nobilibus Alsatis circa Windonissam, Lucernam, et Werbd contradidere.

^d Nemp Martelli.

concesserunt, subter notare curavimus; quorum nomina hæc sunt: Willibertus videlicet presbyter, et Talto vir illustris, Tagoberti scilicet regis camararius et postea comes ejusdem pagi a quibus idem sanctus, cum in corpore viveret, eum augmentatione hujus loci non parva, maxima veneratione habitus est.

2. At postquam de corpore spiritum transmisit ad astras, a successoribus istorum locus iste ob amorem Sancti similiter augmentatus est usque ad tempora Caroli^d. Taltonis vero filius fuit Thiotolt, cujus filius Pollo, Pollonis autem filius Waldpertus; qui genuit Waldrammum. Ipse vero Waldrammus^e locum istum in omnibus ob amorem sancti Galli augere desiderans regularemque inibi vitam instituire cupiens, Otmarum sanctum virum a Victore, Rhetici Curiensis comite, impetravit, eique cellam præfatum cum omnibus ad eam pertinentibus commendavit, abbatemque constituit, ut in Vita ipsius plenissime continetur. Postea vero tempore procedente atque statu monasterii in melius proficiente, præfatus Waldrammus eundem abbatem Otmarum Pippino regi præsentavit, ipsique regi monasterium, quod adhuc hæreditario jure in sua tenebat potestate, cum ipso pariter abbate contradidit. Ea videlicet causa, ut ipse abbas ejusque successores idem monasterium regia auctoritate retinentes, nullius deinde violentia premerentur, sed tantummodo regum jussionibus obedirent. Quod benivolus princeps benigne suscipiens, statim hujus causæ conscriptionem fieri præcepit; scilicet ut monachi ejusdem loci deinceps potestatem haberent abbatem eligere sibi, atque solis tantummodo regibus subjacerent. Quam conscriptionem suæ auctoritatis signaculo confirmavit^f, atque abbatem ipsum in sua remisit; qui idem monasterium per annos 40 feliciter rexit, Waldrammo prædicto 20 annis solatio illi præstante. Postea vero, ob quam causam, et quando, et qualiter idem abbas a Warino et Ruadhardo^g exsilio damnatus, ad perpetuam sit coronam perductus, in libris Vitæ ipsius, qui scire desiderat, pleniter degesta reperiet. Post hæc vero Sydonius Constantiensis præsul, qui et monasterium, quod Auva^h nominatur, in sua potestate habebat, instigantibus præfatis comitibus, cepit inquirere monasterium nostrum, et in potesta-

^e Waltrammus, ut charta anni 779 testatur, tribunus erat territorii vicini; is ex uxore Waltrada genuit Walbertum, qui præcipitæ anno cum matris ac fratrum assensu S. Gallo vineas, agros et ecclesiam in Rumanishorn (nunc Romishorn) contulit, et jus in sylva monasterio vicina lingua cædendi, porcos pascendi, et runcando novalia molendi.

^f Neque hoc, neque supra memoratum donationis diploma supersunt.

^g Warinus trium pagorum lacum Potamicum ambientium comes erat, Thurgoviæ, Linzoviæ, et Hegoviæ. *Codex Trad. S. Galli*. Et Ruadhart anno 769 legitur comes in Baar. *loc. cit.* Quis utrorum Welforum stirpi adnumerandus sit, incertum.

^h Augia dives in insula prope Constantiam sita.

tem episcopatus redigere. Quibus, ut illi solatio essent, beneficia promisit, atque donavit ^a, Warino videlicet Vina, et Turinga, et Engi, Ruadhardo vero Antolvinga et Uzinaha, Miloni autem advocato ipsius monasterii, ut illi solatium subtraxisset ^b, sextam villam, quæ Heimbach nuncupatur, contradidit. Quam ob rem præfatus Sydonius, quod nequiter cœpit, auxiliantibus iniquis principibus pessime ad sui, ut postea res docuit, damnationem perfecit, monasteriumque ipsum in jus episcopatus redegit. Igitur prædictus episcopus fratres in monasterio sancti Galli multis injuriis semper afficiens, quodam die etiam majoribus ibi, si aliqui essent sibi contrarii, afflicurus calumniis, monasterium turbulentus ingreditur, et cum ante confessionem ^c sancti Galli quasi oraturus constitisset, quid in mente habuerit, pœna corporis et illuvies ventris, ut in Vita sancti Galli scriptum est, manifestavit; quo redundante supplicio ad Auvam perlatas, de cloaca corporis vitam exalavit plenam miseris.

3. Post cujus obitum Johannes, monachus Augensis, Constantiæ episcopus ordinatus, amborum regimen suscepit cœnobiorum. Qui tres nepotes suos educavit, quibus honorem suum in tribus illis loci situm post suum discessum distribuere cogitavit. Quo agnito, fratres utriusque cœnobii episcopum pariter adierunt, rogantes ut privilegia eis apud principem acquireret, ac potestatem eligendi abbates, se vero, si hoc fieret, eosdem illius nepotes sibi abbates electuros polliciti sunt. Quod ille consensit, ac se facturum promisit. Tempore vero transacto, Carolus rex cum Hildigarda conjugæ sua Romam profecturus, Constantiam advenit: Tempore vero opportuno se invenisse existimantes, utriusque monasterii fratres pro prædicta necessitate principem adeunt, ejusque clementiam interpellant. Rex vero episcopum, quid de hoc illi placeret, interrogavit. Episcopus autem æternæ beatitudinis gaudia illum exinde percepturum respondit, si talem et tantam securitatem famulis Christi absque ulla perturbatione Domino serviendi concederet. Quod audiens rex gavisus est, et protinus utriusque cœnobii fratribus, sancti Galli scilicet et Augensis, firmissima auctoritate privilegium optatum contradidit, ac scripta emunitatis ad hæc eadem retinenda fieri præcepit, quæ signaculo suæ auctoritatis firmavit ^d, constituens atque præcipiens, ut post mortem episcopi monachi prædictorum monasteriorum potestatem haberent sibi eligendi abbates, et ut nulli absque regibus deinceps essent subjecti. Fratres igitur læti redierunt in

A sua. Episcopus autem cartas utrorumque, quas rex fieri præcepit, secum retinuit. Cum igitur idem præsul finem sibi præsentis vitæ cognosceret imminere, assumpta Augensium fratrum carta ad ipsum monasterium devenit, cartam autem fratrum de monasterio sancti Galli in scriniis Constantiensis Ecclesiæ dereliquit, eo quod nolissent nepotem illius sibi abbatem, sicut pridem promiserant, eligere. Sensebant enim cartam a rege datam multum esse depravatam, et multo aliter, quam rex juberet et res eorum indigeret, esse conscriptam. Idcirco nepotem illius sibi abbatem eligere neglexerant. Similiter autem et fratres alterius monasterii fecerunt. Postquam igitur præfatus episcopus vita excessit, Augenses quemdam senem presbyterum et monachum, nomine Petrum, sibi elegerunt abbatem cum consilio Hildigardæ reginæ, cujus etiam adminiculo res apud illos ita perstitit, quia a Geroldo comite, germano prædictæ reginæ, locus ipse maxime constitit et augebatur. Nostri vero ^e Waltonem concœnobitam, virum sapientem, sibi abbatem, rege permittente, constituerunt. Sed non in finem res ita permansit, ut in sequentibus manifeste declarabimus.

4. Post obitum vero Johannis episcopi Eginio episcopi Constantiensis jura suscepit, qui mox omnia insidiarum genera circa monasterium nostrum exercere non metuens, sicuti Sydonius sanctum Otmarum, ita et iste Waltonem persequi cœpit abbatem, quatenus iterum perverso more antecessorum suorum episcopatu subiceret monasterium. Hujus igitur rei gratia optimatibus regis prædia et pecunias contulit infinitas, illosque ad consensum suum provocans, muneribusque, ut scriptum est, etiam sapientum obtutus excæcans, quod nequiter cœpit, illorum adminiculo pessime complevit; iterumque monasterium non æqui observatione episcopo subjecit. Carolus vero serenus augustus, cum voluisset prædictum abbatem cum episcopo pacificare, eo videlicet pacto, ut episcopi præcepto obediens, abbatem locum in monasterio ageret; præfatus Waldo, non valens diutius præsens intueri tantam dejectionem suorum, tale fertur regi dedisse responsum: *Cum enim, inquit, semel manus vestræ dominationis ingressus, tantæ celsitudinis merui dominio sublimari, nequaquam posthæc dum horum trium digitorum vigorem integrum teneo, — nam scriptor erat eximius, — vilitioris personæ manibus me subdere decrevi.* Itaque cum consensu ipsius imperatoris ad vicinum monasterium, quod Auva nominatur, ibidem episcopo pactum hoc initum fuit.

^a Asservantur adhuc chartæ, quibus S. Galli cœnobium villas hæc acquisivit. Vinæ de anno 754, Duringæ prope Buchhorn de 752, Uzinahæ ad lacum Tigrinum de 745.

^b Teutonismus pro *subtraheret*.

^c Hodie presbyterium.

^d Ex hoc diplomate Vuramsiæ civitate, 8 Id. Mart. anno 12 regni dato erroris convincitur Ratpertus. Non enim cum Joanne, sed abs Joanne proabbate cum Sidonio

^e Hic in codicis nostri margine manu sæculi XIII hæc adduntur: *Rupertum sibi constituerunt abbatem, quo post unum annum defuncto Waltonem, etc.* Rupertum quoque Hermannus Contractus, et tres abbatum catalogi sæculis XI, XII, XIII conscripti abbatibus S. Galli annumerant, a quibus e contra Constantienses episcopos Joannem, Eginonem, et Wolfleozum excludunt.

commoraturus, devenit. Ubi postea abbas electus A atque ordinatus, ad ultimum monasterium sancti Dionysii a suscepit regendum.

5. Tunc prædictus episcopus assumens quendam presbyterum forensē b, nomine Werdonem, obtulit eum ad nostrum monasterium, ut abbatem illum constituisset; ne, si de monachis eisdem aliquem ordinasset, res ab eo aliquatenus cedere videretur. Quem tamen monachi in tali habitu commanentem minime susceperunt abbatem. Quod cum sensisset idem Werdo, cum conversatione habitum mutavit, et tunc demum monachicis indutus vestimentis susceptus, atque, ut decreverat episcopus, abbas est ordinatus. Tunc vero, quodam perversæ fidei pacto inter episcopum et abbatem contra monachorum necessitates effecto, res nostræ magis ac magis in desolationem vergere cæperunt, cum hi qui tutores esse debuerant, afflissent, et nullus esset ex nostris, qui eos prohibere potuisset. Habuerunt autem adhuc fratres monasterii nostri firmissimum emunitatis præceptum, quod beatæ memoriæ domnus Pippinus rex illis scribi jusserat, propriaque manu firmatum contradiderat, in quo etiam multum confisi sunt: quod etiam idem episcopus maximo studio sæpius investigabat, sed invenire non poterat. Ipsum quoque præceptum, quod superius a Carolo imperatore sub Johanne episcopo factum monstravimus, adhuc in Constantiæ seriniis detentum, a monachis non recipiebatur, eo quod, ut superius diximus, depravatum atque contra imperatoris præceptum illorumque necessitatem fuisset conscriptum. Contigit autem tempore quodam Wolfharii Remensem episcopum, legatione a domno Carolo sibi injuncta, justitias in Rhetia Curiense faciendas c, ad ipsum pagum venisse, indeque reversum ad nostrum monasterium devenisse, ibique, prout illis facultas erat, benigne susceptus, devoto servitio sustentatus est.

Quem cum non lateret calumnia et injustitia, quas passi sunt incolæ monasterii nostri, prædictum emunitatis præceptum sibi ostendere rogavit, quod cum vidisset ac perlegisset, hortatus est eos, ut per aliquem fidum hominem firmitatis cartam domno imperatori dirigerent, se vero res eorum notas imperatori facturum, atque auxilium illis præbiturum promisit. Cujus consilio consentientes, cuidam vasallo imperatoris, nomine Engilrammo, in ejus fide multum præsumebant, ipsam cartam immo totius D securitatis d spem commendaverunt. Qui etiam in altario sancti Galli juravit se ipsam cartam regi perlaturum, atque ipsis monachis cautissimè esse redditurum; quod, suadente diabolo, aliter quam promisisset e effecit. Denique discedente eo de mo-

nasterio atque secum cartam portante, episcopo res innotuit, qui protinus directis illi muneribus non parvis, præfatum cartam, sicut diu cupivit, accepit atque in suam potestatem redegit. Statim vero cupiens penitus omnem spem securitatis nostris auferre, ad ipsum monasterium venit, atque cautissima investigatione perquisivit si alicubi aliquid exemplar ipsius cartæ inveniri potuisset f. Quod cum nequam invenisset, quia omnino non erat, delatum est ei, quod Amalgarius g monachus et diaconus eam exemplari tradere voluisset. Cujus facti licet ille securus esset, tamen nequamque de hoc aliter apud episcopum se potuit excusare, nisi in altario sancti Galli cum juramento firmaret, nec se eam ullo modo habere scriptam, nec in aliquo loco scire esse conscriptam. Tunc demum episcopus, securus suæ voluntatis effectus, rediit in sua, atque monachis nostris, qui secum soliti erant commorari, quasi ob aliam causam a se foras transmissis, sepe memoratam cartam ignibus tradidit atque in favillam redegit, ut postea res nobis innotuit.

Temporibus vero transactis, Eginō episcopus finem vitæ presentis accepit anno ab incarnatione Domini 813, anno autem imparii h Caroli serenissimi augusti 46. Post ejus obitum episcopatum Constantiensis Ecclesiæ adeptus est Wolfleoz, monasterii sancti Galli cenobiota.

6. Werdone vero abbate postea vitam finiente, Cozbertus, ejusdem congregationis monachus, a fratribus est abba electus, et ordinatus, vir statura procerus, sapientia quoque morumque dignitate præcipuus, anno ab incarnatione Domini 816, anno autem imperii Hludovici imperatoris, filii præfati Caroli augusti, tertio i. Cum igitur Wolfleoz episcopus more antecessorum suorum etiam causas monasterii suæ subiceret ditioni, incolæ monasterii, quasi in proprio fratre et converso, consolationem in eo se habere posse confisi sunt; ille vero non solum mitior cæteris non existens, aliqua in parte illis de quibus venit pepercit, sed etiam, in quantum potuit, more Hieroboam digitorum suorum dorso antecessorum suorum erga sibi subjectos grossiorem exhibere tentavit, monachosque de quibus exivit, cessante priorum exemplo, affligere non destitit. Quæ omnia, quanta et qualia fuerint, non decet memoriæ tradere; tamen necessaria huic textui subnectimus, sed et paucissima. Idem namque episcopus, cum omnes monasterii causas sibi, ubicunque vellet, adferri jussisset, nihilominus ad libitus suos sæpius idem monasterium invisens, omnes ibidem ministeriorum consuetudines ad suas detorserat voluptates. Denique cellario cunctisque similibus monasterii

a Parisiis anno 796. *Mabillon. Annal.*

b Id est sacerdotem sæcularem.

c Hunc Wolfharium sub Carolo M. missum dominicum egisse testatur Marlot in Hist. Rhemensi.

d Id est, jus liberæ electionis abbatum.

e Per Teutonismum ponitur Plusquamperfectum pro Imperfecto.

f Idem Teutonismus.

g Amalgorum officia portarii, cellerarii, præpositi obisse chartæ traditionum testantur. Eum ante altare aureum sedulo orare consuevisse, scribit Ermenricus in Cod. n. 263.

h Melius regni Francici.

i Seu quarto.

officinis laicales præfecit personas, sibi forinsecus administrare solitas; nullusque eorum qui ad hæc eadem ministeria constituti fuerant monachorum, vel intrare aut de his aliquatenus habuit potestatem tractare vel habere^a. Quare contigit, non solum alia necessaria, sed etiam victum, supremum videlicet corporis sustentaculum, omnino fratribus defecisse. Tantæ igitur causa necessitatis Hludovicus piissimus imperatorem fratres de monasterio sancti Galli adierunt, ejusque clementiam suæ miseræ solamen esse posebant. Episcopus quoque eodem tempore præsens aderat, cœpiscoporum confusus solatio, aliorumque familiarium regis, quos omnes suæ partis sciebat esse adminiculatores monachorumque adversarios. Maximam tamen suæ pertinaciæ fiduciam habuit in quadam carta, quæ diabolicis machinationibus a quodam diaboli ministro conscripta, non solum idem monasterium, sed et alia loca non pauca falsissime canebat^b ad episcopi partes quasi hereditario jure pertinere. Monachi vero econtra nullam eo tempore suæ securitatis cartam habuerunt, una, ut prædiximus, concremata, alia vero, sicut etiam præfati sumus, quam suscipere ob aliquam causam monachi noluerunt, ab episcopo detenta. Cum vero altercatio inter episcopum et monachos oriretur coram principe, episcopum petiit: ut sua carta coram imperatore legeretur, et secundum eam res adjudicaretur. Ipsam autem, quam supra commemoravimus, mendis plenissimam præferre^c cogitavit. Sed divina pietas suis, quibus humana deerant solatia, superna dignata est, intercedente sancto Gallo, conferre subsidia. Denique episcopus, cum de manibus proprii ministri suæ voluntatis se putare accipere cartam, immo sancti Galli famulos destruendos invidiosam decipulam, non eam quam voluit, sed proficuo nobis errore aliam cartam imperatori cunctisque principibus, causæ penitus ignarus, coram designavit, quam ab imperatore Karolo sub Johanne episcopo nobis factam, sed a nostris antecessoribus ob alicujus infandæ additionis maculam non receptam supra memoravimus. Quam cum piissimus imperator suscepisset, sigillumque sui patris recognoscendo intuitus esset, venerando deosculatus est, circumque adstantibus similiter ho-

noris causa deosculandum contradidit. Deinde carta traditur legenda.

Cum vero audisset episcopus contra suum decretum cartæ procedere textum, protinus recusavit istam, asserens perversam, aliamque cupiens suæ perversitatis in præsentiam adferre scripturam. Quod benivulus imperator non consensit, sed tantæ auctoritatis firmitatem monachis restituendo contradidit, ut liberi ad sua redeuntes, potestatem deinceps eligendi abbates haberent, nullamque potestatem episcopi absque magisterii causa spiritalis super eos deinceps haberent; excepto quodam censu quem de monasterio ad episcopatum persolvi debere singulis annis, hoc est unum equum et unam unciam auri^d, supra memorata carta^e asserebat. Insuper etiam præfatus princeps ad augmentum securitatis eorum cartam emunitatis sua auctoritate illis contradidit^f. Quibus peractis, monachi cum suo abbate Gozperto ad monasterium redire letantes, episcopo nihilominus ad sua cum tristitia redeunte. Gozpertus vero abbas una cum suis ad monasterium rediens, omni studio satagebat circa communem fratrum utilitatem omnem sui laboris impendere solertiam, nostræ in omnibus rebus congregationis ubicunque potuit commoda cumulando; ad augmentum quoque nostri monasterii, veteri destructa, novam sancto Gallo cœpit ædificare basilicam, quæ hodie rationabili proceræque magnitudinis statura cernentibus apparet constructa^g, anno videlicet incarnationis Domini 830, Hludovici vero imperatoris 17. Quam utique spacio septem annorum ad plenum ædificando perduxit, annoque nono dedicationem ipsius basilicæ perpetravit, convenientibus ad idem monasterium Wolfleozo, ad cujus diocesis pertinebat, Constantiensi episcopo, unaque Oadalricho Basiliensi episcopo, Erlebaldo^h quoque Augensis monasterii abbateⁱ cum aliquantis suæ congregationis fratribus præsentem manente^j aliisque Alamannorum principibus non paucis. Dedicatione igitur ipsius basilicæ gloriose cœpta et non sine signorum claritate honorifice peracta, postea præfatus abba Gozpertus in omnibus monasterii nostri utilitatibus sine cessatione se studuit exercere. Librorum enim, quorum maxima penuria^k in nostro loco

^a Lege: *tractandi vel habendi*.

^b Lege: *cavebat*.

^c Lege: *proferre*.

^d Is idem census, quem monasteria libera regi persolvebant.

^e Voces *Adulterata a Joanne* adseripsit postea Ekkehardus IV.

^f Superest hoc diploma Aquisgrani 6 Kal. Febr., anno 2 imperii, indiet. 9 datum.

^g Ejus ichnographia haud dubie a regis architecto Gerungo delineata, et Gozberto diacono missa, et pedes 3 1/2, longa, et 2 1/2, pedes lata adhuc superest. Winiharius et Isenricus monachi operi præerant, columnæ lapideæ omnes immensis molibus advectæ fuere. *Epistola Ermenrici*.

^h Pro Erlebaldo anno 858 defuncto putant aliqui ejus successorem a Ratperto fuisse nominandum.

ⁱ Quæ sequuntur usque ad vocem *dedicatione* diversa manu, cœva tamen, scripta sunt.

^j Hujus translationis acta a S. Galli monacho e Scotia oriundo conscripta, Ratperto in bibliotheca evolvere proclive erat. *Vide catalogum librorum sæc. ix.*

^k Attamen aderant Romano caractere sæculis v, vi, vii exarati, ut tum ex residuis fragmentis, v. g., Virgilio, Evangelio, etc., tum ex novem codicibus rescriptis, tum et ex nota antiquum, antiquissimum, vetus, vetus valde, legi non potest multis codicibus in catalogo bibliothecæ sæculi ix adjecta manifestum fit. Sæculo quoque viii S. Galli ascetas libris scribendis jam insudasse, testantur multi ex hoc ævo superstitis codices, præcipue epistolæ S. Pauli n. 70 et liber prophetarum n. 44, ac ea quæ Ratpertus de scriptore Waltone habet.

usque ad illius tempus exstiterat, tantam copiam ille patravit, ut locus iste ex eorum multiplicatione non parum exeresceret. Qui, quales, et quot fuerint, qui diligentius quæsierit, invenire poterit.

7. Tempore vero procedente idem abbas, cum jam ætatis gravitatem corporisque infirmitatem non sufficere crederet ad instantium necessitatem negotiorum, a Hludowico clementissimo augusto impetravit ut Bernwicus monachus noster, successor illi existeret; quod statim, ut ille postulavit, effectum est. Ordinatus est vero Bernwicus abbas vivente Gozperto, anno incarnationis Domini 837, Hludowici autem imperatoris 24. Post hæc vero Hludowicus imperator 12. Kal. Jul. de hac luce migravit anno incarnationis Domini 840. Eodem etiam anno facta est solis eclypsis 3. Non. Maii in vigilia ascensionis Domini ^a. Post obitum vero Hludowici imperatoris maxima discordia orta est inter filios ejus, Hlotharium, qui primus fuit ætate, et Hludowicum et Carolum. Itaque Hlotharius cum esset ætate primus, potentia utique et multitudine populorum post se declinantium cæteros præcellebat. Cum igitur, ut diximus, maxima pars populorum Hlotharium sequeretur, contigit et Bernwicum nostrum abbatem illius partis fuisse adminiculatorem. Nec minus interea Hludowicus Alamanniam penetrans, singula loca suæ suorumque dicioni subiecit; indeque abbatem in nostro monasterio constituit Engelbertum, monachum nostrum. Qua re contigit, ut sicut regna, ita et monasteria diversis erroribus atque laboribus quaterentur. In tantum autem major pars populorum Hlotharium sequebatur, ut quidam principes Alamannorum cum exercitu magno Hludowico obviam pergerent, eumque, ne fines illorum intraret, prohibere vellent. Cum quibus protinus pugnam validam commisit, et maximam eorum partem prostravit, reliquos vero omnes in fugam convertit; et sic ad fratrem suum Carolum pervenit. In quibus terminis Hlotharius cum maximo exercitu aderat contra fratres suos, Hludowicum et Carolum, et ipsi contra illum. Die autem constituta, commissum est prælium validissimum, atque miseria plenum, et Domino disponente juniores exstiterant victores anno incarnationis Domini 841.

Ergo hac miserabili consummatione belli peracta, protinus Hludowicus abbatiam sancti Galli Grimaldo, destinavit atque contradidit. Qui statim eam, in quantum valuit, causa regie auctoritatis obtinuit.

8. Postquam vero divisio regni patrata est, et pax inter germanos reges firmata est, Grimaldus

^a Has temporum consignationes omnes veras esse indaganti patebit.

^b Grimaldus in regia aula educatus et bene doctus (*Epistola Ermenrici*) habuit fratres Wettinum monachum Augiensem, et Thietaudum archiepiscopum Trevirensis (*Mabilion*). Factus archicapellanus, et tribus abbatibus prælatum, Sangallensem omnibus prætulit. (*Epistola Ermenrici Aug.*)

^c Id est, antequam abbatiam S. Galli obtinuerat.

^d Id est donum.

Abba ad monasterium sancti Galli veniens, honorifice atque omni obsequela suavitate a fratribus ejusdem monasterii susceptus est, atque devota illorum servitute sustentatus. Causa autem extitit, quam nemini miram puto videri, fratres nostros tristitia non parva agitari, eo quod securitas electionis eorum, quæ tam multis, ut ante prædiximus, laboribus sepe difficillime fuerat, acquisita, tam facile de eorum potestate deficiebat excussa. Sed hujus tristitiæ, Domino juvante, jocunda venerat medicina. Nam prædictus Grimaldus prioribus ^e semper idem monasterium protegere atque erga illud clementer agere consueverat. Quam causam loco et potestate accepta non minuerat, sed augebat magis caritatem, quam suæ potestatis declarans magnitudinem. Qua confidentia monachi eum flagitare cœperunt, ut sicut in illo immunitatis privilegium amiserunt, ita cum illo pristinae securitatis recuperarent augmentum. Quam petitionem ille gratissime suscipiens, studioseque complens, a rege Hludowico permissione illis acquisita concessit, ut statim sibi eligerent, qui post ipsum illos illorumque omnia procuraret, et postea nullam suæ securitatis et propriæ electionis dubitationem haberent. Qui protinus gratanter hanc benedictionem ^d suscipientes, Hartmotum elegerunt, scientia et moribus nobilitateque præclarum, eumque Grimaldus secum ad regem perduxit. Qui cum manibus regis a Grimaldo fuisset contraditus, benigneque ab eo susceptus, protinus a regia potestate ipsum sancti Galli locum cum omnibus ad illum pertinentibus suscepit post Grimaldum secunda vice ^e regendum; eo videlicet pacto, ut post obitum Grimaldi hæc eadem electionis stabilitas a rege concessa et in Hartmoto cœpta, deinceps stabilissime præsentibus cæterisque ad eundem locum futuris signaretur, et firmaretur mansura. Quo peracto, Grimaldus abba cum Hartmoto lætus, lætantibus pariter fratribus, ad monasterium rediit.

Post hæc igitur Grimaldus regularem in nostro monasterio vitam omni sagacitate mentisque alacritate instituire cœpit. Cujus rei curam, quia ipse sepius regalibus fuerat occupatus officiis, Hartmoto injunxit, ut spiritalis structuræ ædificia in fratribus fundaret, et non minus etiam exteriora officinarum necessaria studiose construeret.

Quam indictionem Hartmotus benigna mente suscipiens studioseque perficiens, cum prius monachi colerent officinas suæ utilitati incommodas, non multo tempore succedente, omnia nostri claustrum habitacula ^f, quamvis prius cœpta, pulcherrime ad

^e Nempe secundo post abbatem commendatarium loco.

^f Monasterium non instar palatii longis tractibus ædificiorum, sed tanquam villa, separatis domibus, construxit Hartmotus; majori ex parte ichnographiam supra citatam secutus. Edita habetur hæc monasterii S. Galli delineatio in Mabilionii *Annal. Benedict.* tom. II, pag. 870. Versus autem Leonini illam exponentes habentur in Canisii *lect. antiq.*

perfectionem, ut modo cernimus, perducta venienti Grimaldo consignavit. Nec non etiam singulare eidem abbati domicilium cum omnibus necessariis ad illud pertinentibus utilissime pulcherrimeque ^a construxit. Quare Grimaldo apud nostros sepius demorante, contigit nostri proventus non parum excrescere suavitate. Sed sicut nox et dies sibi alternatim successerunt, ita adversa cum prosperis se sepius miscuerunt, talesque vices variaverunt. Venerabilis namque Constantiensis ecclesie præsul nomine Salomon, cum suæ sedis dignitatem non solum non minuere, sed etiam in omnibus vellet religiose accumulare, ad nostrum monasterium nuntios direxit, censum, ut sepius præfati sumus, nefanda conditione ex monasterio ad episcopi partes conductum sibi restitui inquirens. Quæ perturbatio fratres aliqua ex parte inquietavit; maxime cum ille census ob hoc a Hludowico imperatore ^b ita fuisset concessus, ut ipsum monasterium et ab episcopi et ab omnibus sæcularibus potestatibus, absque solis regibus, fuisset absolutum. Grimaldus autem abbas cupiens omnia utrobique cum pace et caritate finire, claustra ingrediens monasterii, principes fratrum ad se convocavit; a quibus inquirere cœpit cur census, sicut scriptura ipsorum continebat, ad episcopatum non persolverent? Tunc Hartmotus præ cæteris respondens: *Non merito, inquit, debemus hunc censum sicut hactenus fecimus persolvere.* Grimaldus dixit: *Unde debet cessare census istius ad episcopatum donatio?* Hartmotus respondit: *Quia illa securitas, et illa immunitas, quam nobis iste census liberam, regum donante clementia, usque huc fecit, a nobis penitus ablata est.* Grimaldus dixit: *Ob quam causam, et per quem eadem libertas vobis ablata est?* Hartmotus respondit: *Utique propter vos; quia enim vobis in beneficium traditi sumus, ideo episcopo censum persolvere non debemus. In vestræ enim dominationis servitute nobis sufficere credimus, et ideo in diversa partiri nequimus.* His auditis, Grimaldus ex illo tempore cœpit cogitare rogantibus Hartmodo et reliquis fratribus atque cum illis pertractare, qualiter ipsum monasterium et ab istius census, et ab omni inquietudinis liberaretur molestia. Quod ita peractum, in sequentibus Deo miserante monstrabimus. Exinde igitur utriusque loci rectores, episcopi videlicet et monasterii, cum sibi subjectos perquirere cœperunt, qualiter salubritas pacis inter utrumque locum ita statueretur et firmaretur, ut absque discordia quandoque liceret utriusque Christi servitio inherere. Cum

A vero hujus consilii prolixitas sepius utrinque pertractaretur, tandem salubri consilio reperto, rectores præfati consentientibus partis utriusque familiarum invenerunt, et decreverunt, ut quædam possessiones de monasterio ad episcopatum contraderentur; per quarum donationem monasterium ab episcopatu segregaretur, ab omni census molestia deinceps redderetur securum. Quod decretum ab episcopo et abbate inventum, placuit ambobus, episcopi videlicet filiis et monasterii incolis. Interea contigit Hludowicum, piissimum regem, publice placitum suum habere in villa quæ dicitur Ulma, præsentibus filiis suis aliisque regni sui principibus. Ad quod placitum istius conventionis causa perlata est. Et cœpit exinde rex solleter et caute cum suis cogitare atque pertractare. Cumque summates ^c qui aderant, in bonam partem causam declinare ^d studebant, tandem piissimus princeps ab episcopo et abbate monachisque qui aderant, inquisivit: Si utraque pars, monachorum videlicet et clericorum, in hac re consentiret? Responsum est ab abbate et monachis qui aderant, in hac voluntate se cunctamque illorum congregationem persistere. Similiter et episcopus interrogatus, pro se suisque similem reddidit istius consensus responsum. Rex vero cum ambarum partium conspiceret unitatem, sese huic pacto interposuit medium, atque in semet omne negotium assumens, cum manu sua potestative res predictas ad episcopatum contradidit, atque cum ipsa manu similiter potestative ab episcopo monasterium abstulit penitus diremit, ita ut deinceps nullam potestatem episcopi in rebus ejusdem monasterii haberent, neque in censu neque in ulla alia simili causa, præter spiritalem tantummodo episcopalis officii dignitatem; sed pura mente ex hoc et deinceps licentiam haberent monachi idem ^e Deo servire, nullique sæculari potestati, nisi solis regibus subjacerent. Hæc confirmatio cum regia auctoritate circa utramque partem fuerit ^f stabilita, oriebatur et alterius similis causæ necessitas in præsentia, quæ et protinus in eodem concilio penitus finiebatur. Nam cum ipsa loca ita unitate fuissent antea copulata, ut velut uni semper viderentur cedere potestati, hujus causa communionis quidam hereditatem suam ad Constantiam census debito cædentem monasterio contradiderunt, et econtra tributarii monasterii eandem tributariam hereditatem ad episcopatum contradiderunt. Et ut in hoc etiam penitus omnis dissensio auferretur idem rex

^a Palatium hoc, posthac Pfalz dictum, et marmoreis columnis et picturis deauratis ornatum erat, regis architectis et pictoribus Augiensibus operantibus, ut codex cœvus n. 597 hisce testatur:

*Splendida marmoreis ornata est aula columnis,
Quam Grimoldus ovans firmo fundamine struxit
Ornavit, coluit, Hludowici principis almi
Temporibus, multos lætus feliciter annos.
Aula palatinis perfecta est ista magistris.
Insula pictores transmiserat Augia clara.*

^b Istum censum post Carolum M. et Ludovicum piium Ludovicus ejus filius ratihabuit diplomate Francofurt anno 1 regni, 14 Kal. Nov. indict. 12, dato et adhuc superstite. Ludovici pii confirmatio conventionis hujus (superstes a huc) data est Aquisgrani 3 Non. Jun. anno Imp. 5, indict. 11.

^c Id est optimates.

^d Id est vertere.

^e Nempe *Ibidem*.

^f *Lege fuisset.*

de parte monasterii, consentientibus abbate et fratribus, quasdam res ad Constantiam condonavit; ea videlicet ratione, ut omnia quæ tunc in potestate monasterii erant, vel a præfatis tributariis illuc delegata, vel qualicumque modo ibidem confirmata, postea sine ullius contradictione personæ firmarentur ibidem in perpetuum permansura.

His vero ita a clementi rege omni cum consensu compositis, jussit idem rex suæ auctoritatis præceptum utriusque parti ad perpetuum confirmationem istius pacti statim in præsentem describi. Et ut cautius hæc eadem firmitatis scriptura communiretur, præceptum primitus tantummodo dictatam et in aliqua scæda conscriptam sibi præsentari. Et cum ille causam comprobaret, tunc demum cancellario præcepit, in legitimis cartis describere præfati pacti confirmationem^a. Et cum perscriptæ fuissent, propriæ manus auctoritate eas confirmans, unam episcopo cum suis, aliamque abbati monaschisque contradidit perpetue firmitatis sine aliqua eversione ita retinendas indicio. Quisquis autem vult scire quantæ fuerint causæ ob redemptionem prædicti census et monasterii securitatem, et præterea ob tributantium prædictorum reconciliationem ad episcopatum contradictæ, legat in cartis supra memoratis, et invenire poterit quod quærit. Præterea rex piissimus Hludovicus statim jussit monachis fieri aliam cartam firmissimæ immunitatis, ut post Grimaldum deinceps potestatem in perpetuum haberent eligendi sibi abbates, nullique hominum nisi solis regibus subjacerent; et in eadem carta describi jussit regia dona sibi metipsis secundum consuetudinem aliorum monasteriorum securitate præditorum quotannis ventura, id est, duos caballos et duo scuta cum lanceis. Et sic etiam istam cartam sua manu confirmatam proprioque anulo consignatam monachis tradens, lætos eos in sua redire permisit.

9. His ita Deo disponente peractis, Grimaldus abbas omnia monasterii negotia Hartmoto commendans, ipse securus regali se frequentabat exhibere præsentia. Hartmotus itaque cum fratribus tandem optatæ securitatis quiete percepta, operibus necessariis totis studebat insistere; atque in primis templum Dei in honore sancti Galli constructum, variis cœpit ornamentis decorare et sublimare. Principio vero tumbam sancti Galli^c rum reliquis altaribus et

^a Datum Hulmam palatio regio 11 Kal. Aug., anno 21, regni in orientali Francia, indict. 2.

^b Datum est hoc diploma Ulmæ eodem anno, et die ac præcedens, ast manifesto errore pro 2 Kal. in eo positum legitur 11 Kal.

^c Vox Tumba hic loculum argenteum in sacelli formam fabricatum denotat, in quo in processionibus S. Galli ossa circumferebantur. *Hymnus Ratperti de S. Gallo in Canisii lect. antiq.*

^d Erat pulpitum, de quo conciones habebantur, et evangelium missæ legebatur.

^e Id est orbis argenteus, de quo plures dependebant lampades, unde vox *Kronleuchter*.

^f Fornices hanc chori absidam constituentes, spiras convoluti erant. *Ichnographia sæc. ix.*

^g Indicem subsequentem Ratpertus ex cod. msto

A analogio^d atque confessione ita innovari, maximaque ex parte totum ex integro fecit ædificari, sicut hodie videtur et cernitur. Præterea coronis^e argenteis, aliisque diversis luminaribus pariter cum multimodis variorum ornamentorum splendoribus ipsam magnopere studuit insignire basilicam. Absidam^f quoque post altarium sancti Galli ita honorifice pictura deaurata, sicut in præsentem videmus, ipso composuit tempore. Librorum etiam non parvam copiam sub eodem abbate Hartmotus composuit; quorum nomina hæc esse scias^g:

* Quinque libros Moysi, Josue, judicumque in volumine 1. Regum libros 3 in volumine uno. * Tres libros Salomonis, et librum sapientiæ, vel Jesu, Job et Tobiam in volumine uno. * Paralipomenon, Judith, Hester et Hestram, Machabeorumque libros 2 in volumine 1. * Omnes prophetas in volumine 1. * Epistolas Pauli, Actus apostolorum, 7 Epistolas canonicas, et Apocalypsin Johannis in volumine 1. * Sancti Augustini super Johannem partem 2 et 3. * 22 libros de civitate Dei in duobus voluminibus. * Augustini de civitate Dei libros 15 in volumine 1. * Contra Faustum manicheum libros duos in volumine 1. * 82 quæstiones, et contra adversarium legis et prophetarum in volumine 1^h. * Augustini super psalms 6 volumina. * Item de eisdem libris in voluminibus duobus excerpta valde necessaria. * Libros 12 confessionum sancti Augustini. Ejusdem libros 7 de baptismo. * In Genesim ad litteram libros 12. Sancti Ambrosii contra Arrianos liber 1, et epistola ejus, et sancti Augustini contra eosdem in volumine 1 pusillo. * De doctrina Christiana libri 4 in volumine 1. Recapitulationes sancti Augustini. Lectionarium ad basilicamⁱ. * Duo volumina epistolarum sancti Hieronimi. * Omelias Johannis Crisostomi, et de compunctione cordis, ac reparatione lapsi in volumine 1. Sancti Hilarii super Matheum volumen 1. * Collectarios^j duos in singulis voluminibus de adventu Domini usque in pascha. * Sancti Ambrosii episcopi in evangelium secundum Lucam in volumine 1. * Ejusdem in epistolas Pauli volumina 2. Ejusdem de bono mortis, et Hieronimi in Apocalypsin Johannis in volumine 1. Victorini de sancta Trinitate. Librum sancti Clementis. Passionales^k duos in duobus voluminibus. * Cassiodori super omnes psalms in tribus voluminibus. Bedæ su-

D n. 267 mutuatus est, ubi hunc titulum præfert: *Hoc libros patravit Grimoldus abba in monasterio S. Galli in diebus Hludovici regis Germanie cum adjutorio Hartmoti præpositi sui per annos 50 et unum. Codices^l præfixum habentes in bibliotheca nostra adhuc exstant.*

^h Codex alfefatus n. 267 habet in voluminibus duobus.

ⁱ Codex Raperti n. 614 addit sine evangeliiis.

^j Id est collectiones sermonum SS. Patrum per anni circulum in choro, et durante prandio legendorum diebus Dominicis ut in cod. 103, p. 253 notatur.

^k Sic vocabant libros SS. martyrum cruciatus prosequentes.

per Cantica canticorum. Collationum patrum tertiam et quartam partem. * Regulam sancti Benedicti et reliquorum Patrum in volumine 1. Explanationem super lectiones in volumine 1. Libros æthiologiæ Isidori in volum. 1. Josephi de antiquitate Judaica libri 12 in volum. 1. * Item libros 4 in volum. 1. * Item ejusdem de bello Judaico libri 7 in volum. 1. Excerpta de Pompeio in volum. 1. Gesta Alexandri in volum. 1. Librum ymnorum optimum. * Grammaticam Prisciani in volum. 1. * Librum canonum. Passionalem apostolorum. Passionem sanctorum Sergii, et Bachi. Chronicam Eusebii, et Hieronimi. * Tractatum Origenis in epistolam Pauli ad Romanos. * Rhabani episcopi in posteriorem partem Hieremias prophetæ volumen 1. * Item epistolas Pauli apostoli, et 7 epistolas canonicas in volumine uno. Actus apostolorum, et apokalipsin in volum. 1. * Vitam sancti Columbæ in volum. 1. Item Job, Tobiam Judith et Hester in volum. 1. * Visiones Wettini et Baronti.

Præterea etiam idem Hartmotus sub Grimaldi temporibus ipsa fratrum necessaria, in quantum potuit, meliorare studuit et augere. Quod tunc constitutum, usque hodie similiter permanet firmum. Temporibus etiam illis, exigentibus meritorum ejus insigniis, corpus sancti Otmari de ecclesia sancti Petri festive sublatum, in basilicam sancti Galli cum debita laudum honorificentia est perlatum, presente Grimaldo, abbate et archicapellano regis Hludowici, et Salomone Constantiensis ecclesiæ episcopo, cum cætero innumerabili populo 4 feria sub octavo Kalendarum Novembrium die anno incarnationis Dominicæ 864. Collocatum est autem corpus sancti viri in ecclesia sancti Galli juxta altarium sancti Johannis Baptistæ, ubi magna miraculorum abundantia meritorum ejus claruere præconia, usque dum nova sibi ædificata basilica, quæ statim in brevi tempore est peracta, tumbaque argento et auro sibi parata, honorifice in eam sancti viri exuvias sunt perlatæ. Quæ basilica etiam post, tempora Grimaldi ab Hartmoto abbate, ita ut hodie videtur, aucta est atque constructa, tumba videlicet et altari plenius decoratis.

Post hæc igitur temporum transeunte curriculo, Grimaldus abbas cum jam ætatis plurimos dies haberet, cæpit sedulo in nostro monasterio commorari, cupiens reliquum vitæ suæ tempus cum quiete trans-

a In Ratperti codice 614 erasus est titulus libri, quem codex 267 his verbis recenset : *Vitas patrum, quas dicunt majores.*

b Iste liber in cod. 267 non legitur.

c Nempe victus et vestitus.

d Conveniunt optime annus, feria, et dies mensis.

e Sacella basilicæ nomine sæpe veniunt.

f Id est, sive ad regis aulam, sive in bellicas expeditiones.

g Eidem etiam reliquit libros suos, quorum 33 volumina recenset codex 267 sub hoc titulo : *Istos autem libros domnus Grimaldus de suo dedit ad S. Gallum.* De illorum uno hæc habet iste index : *Psalterium glossatum, quod ipse Grimaldus Notingo Brixienſi episcopo primum, post vero Engilberge regine dedit, et per Rihbertum magistrum*

Agere, et in Christi ducere servitute. Hartmotus vero, præcipiente Grimaldo, omnes labores et itinera, sive ad curtem, sive in expeditionem et ad omnes alias necessitates, vice illius strenue complevit, omniumque curam negotiorum in semet accepit.

Ipse autem Grimaldus, cum alia loca et monasteria suæ dicioni habuisset subjecta, in hoc monasterio præcipue cupiens finem dierum suorum expectare, cæpit studiosissime monachicis se exercere disciplinis, et licet habitu non esset, conversatione tamen, et voto monachus existebat. Orationibus sæpius insistebat, elemosinarum largitatem solus præ ceteris possidebat, in tantum, ut pater pauperum vocaretur et esset.

His itaque aliisque similibus bonarum virtutum profectibus cottidie crescens, senex et plenus dierum in confessione veræ fidei de hac luce, Domino vocante, altitudinem conscendit, ut credimus, lucis perpetuæ, atque in eodem monasterio cum omni honore et debita veneratione sepultus, requiescit in Domino. Contigit autem transitus ejus Idibus Junii 6, feria in primo ortu solis anno incarnationis Dominicæ 872. Rexit autem monasterium nostrum feliciter per annos 30 et unum.

Præmia tantorum cui dona, Christe, laborum
Huicque polum tribuas, qui sydera celsa crearas,
Mattheus, Marcus, Lucas, pariterque Johannes
Sint illi comites, quorum celebrabat honores i.

Post obitum vero Grimaldi fratres juxta promissam sibi licentiam protinus cum maximo unanimis consensu Hartmotum sibi elegerunt abbatem. Cum quo pariter quidam de senioribus fratrum ad piissimum regem Hludovicum devenerunt. Qui cum eorum consensum et desiderium comperisset, sicut prius disposuit, Hartmoto monasterium cum omni securitatis libertate contradidit, nulla addita vel interposita causa, per quam aliquomodo ulterius violari potuisset hujus securitatis integritas. Hartmotus vero cum fratribus ad monasterium rediens, optimi se pastoris et patris perfectione studuit ubique et undique exercere. Nam licet præteritorum maxima pars ille fuisset laborum atque bonorum, tamen nunc quasi incipiens, cumulum et augmentum solitorum desiderabat augere meritorum. Nam parietes basilicæ sancti Galli, et in choro et foris chorum, et posteriora templi, sicut modo cernuntur pictura deaurata, idem eodem in tempore fecit ornari et

aliud restituit. Engilberga uxor erat Ludovici II regis Italie a Carolo Crasso in Alamanniam (forte S. Gallum) in exsilium missa. *Annal. Bertiniani ad annum 882.* Videtur idem esse psalterium, quod in Italia sub nomine Engilberga celebratur.

h Sortitus hoc epitaphium :

*Hic manet interius divine legis amator,
Grimoldus humilis templum hoc qui condere jussit*

(nempe S. Otmari). *Cod. sæc. ix. n. 597, p. 52.*

i Versus hos alio tenore, et abs Ekkehardo IV correctos exhibent codex n. 615, sæc. xii, et editio Goldasti.

j Nempe moris erat, cum neolecto partem eligentium cum baculo abbatiali regem adire.

comi^a. In aliis præterea ædificiis, ut cerni poterit in præsentibus plurimum nostro monasterio decorem suis temporibus ipse patravit; et, ut plurima breviter comprehendam, ubicumque fuit, sive intus, sive foris, sive apud divites, sive apud mediocres, Domino donante sapientiaque a Deo sibi concessa nostra omnia cautissime providente, nos semper securi ex titeramus. Librorum quoque quos ille ad communem monasterii utilitatem suo tempore patravit, hæc sunt nomina^b.

Lectiones evangelii, quem librum auro et argento ac lapidibus pretiosis ornavit. Lectionarium elephanto^c et auro paratum. * 35 volumina beati Gregorii in Job in sex corpora divisa. Collectaria duo de pascha usque ad adventum Domini. * 7 libros sancti Augustini in heptateucum. Sancti Ambrosii de fide contra arrianos libros 3 in volum. 1. * Item ejusdem libri 3 proprie de spiritu sancto, et unum de incarnatione Domini, et alium de laude sanctorum in volum. 1. * Vitam sancti Martini in volumine uno. * Vitam sanctorum Galli et Otmari in volum. 1. * Vitam sancti Silvestri in volumine uno. * Instituta patrum, quas nuncupant vitas patrum minores, in volum. 1. * 20 duas omelias Gregorii super Ezechielem prophetam in volum. 1. * Ambrosii de officiis libri 3 in volumine uno. Sancti Augustini de magistro, et ejusdem epistolas. Item de gratia et libero arbitrio. * Collectanea Flori presbyteri de voluminibus sancti Augustini in epistolam Pauli ad Romanos in volum. 1. * Sancti Augustini de utilitate credendi, et bono naturæ, et scoliam Cyrilli de incarnatione Domini, et paucas quæstiones. * Polihystorem Solini in volum. 1. * Altercationes Attici et Cretoboli ad parvum tempus non poterat inveniri, pro qua, antequam inveniretur, scripta est alia, et additus est ei liber sancti Augustini de vita Christiana et altercatio Ecclesiæ et Synagogæ. Collectanea Flori in epistolam ad Corinthios secundam, et ad Hebræos^d. * Decreta pontificum Romanorum in volumine uno. Regulam sancti Basilii, et ceterorum. Alios quoque libros, proprii causa videlicet usus, jucunda patravit scriptura; quos similiter post finem dierum suorum sancti Galli servitio perpetualiter contradidit retinendos; imprecans etiam illi non parvæ dedecus confusionis, si quis præsumperit aliquam partem eorum de monasterio sancti Galli

^a Codex n. 615, sæc. 13 his addit: *Iste etiam Hartmotelum velum optimum, quod adhuc hodie in quadragesima ante crucem extra chorum appenditur, per manus sororis sue nomine Richlin textum donavit.*

^b Indicem subsequentem Ratpertus ex eod. m. codice n. 267 descripsit, omissis titulis, qui sic habet: *Hos vero libros idem Hartmotelus post Grimoldum abba constitutus sub Hludowico supradicto rege, et filio ejus Karolo imperatore in diebus regimnis sui fecit conscribi.*

^c Ebore addidit manus cœva. Insignes hi duo libri tempore reformationis subduci. (*Vadian de collegiis*) dein perire.

^d Adjungit syllabus librorum in n. 267: *Nunc sunt inter manus.* Ex quibus verbis liquet, syllabum hunc Ratperti casuum libro esse vetustiore.

abstractere, illiusque servitio eos auferre^e. Nomina vero eorundem librorum sunt hæc. * Quinque libri Moysi, Josue, judiciumque in volum. 1. * Regum libri 4 in volum. 1. * Psalterium de Hebraico translatum^f. Proverbia Salomonis, ecclesiastes, et cantica canticorum; item liber sapientiæ, et Jesu filii Sirach, et paralipomenon libri duo in volumine uno. * Job, Tobias, Judith, et Hester in volum. 1. Esdras, Neemias, et Machabeorum libri 2 in volum. 1. * Esaias, et Hieremias in volum. 1. * Ezechiel, et 14 prophetæ, et Danihel in volum. 1. * Evangeliorum volum. 1. Reliquorum librorum novi testamenti volum. 1. Bedæ libelli duo de natura rerum, et temporibus. * Item unus grandis, et alia argumenta computandi in volum. 1. Regula sancti Benedicti, et martyrologium Bedæ; et ymnarius, nec non et omeliæ Cesarii in volum. 1. * Ethimologiarum Isidori volum. 2. Medicinalis liber unus. Glossa in epistolas Pauli. Super lectiones volum. 2. Super evangelia volum. 2. * Volumen Orosii. Martiani de nuptiis Mercurii et philologiæ libri 2. Item de 7 liberalibus artibus libri 7, Boethii 5 libri philosophicæ consolationis in volum. 1. Item alii 5 in altero volumine. Inter hos etiam unam mapam mundi subtili opere patravit, quam inter hos quoque libros connumeravit^g.

Post obitum vero Hludowici piissimi regis in partem Caroli, filii ejus, nostro monasterio pertingente cum cetero regno, omnes immunitatis cartas a patre ejus Hludowico nobis condonatas, ab ipso clementissimo filio ejus Carolo Hartmotus abba nobis renovari fecit, atque illius auctoritate iterato conscribi^h.

Neque hoc silentio prætereundum est, quantum de regalibus donationibus ad nostrum monasterium fuisset illo tempore concessum. Deniqueⁱ præfatus piissimæ memoriæ rex Hludowicus, vivente abbate Grimaldo, locum qui dicitur Mecchinga, ad monasterium sancti Galli æternæ causa remunerationis regia auctoritate contradidit^j.

Post cujus obitum, Grimaldo quoque defuncto, Carolus clementissimus rex, filius ejus, Hartmoto intercedente quandam possessionem regie potestatis in pago Turgoiense, sitam in loco qui dicitur Roholvesriuti, sancto Gallo in perpetuam possessionem

^d Earum aliqua sic sonant: *Auferet si quis, damnetur mille flagellis, judicioque Dei succumbat corpore pesti.* Cod. n. 19. *Et si quis et hos aufert, gyppo scabique redundet.* Cod. 46.

^e Codex perrarus.

^f Libri hi etiam catalogo bibliothecæ inscripti leguntur, qui in duplo nono sæculo confectus exstat.

^g Datum est hoc diploma anno 877, 15 Kal. Sept., anno Karoli primo regni illius, indict. 10, sine loco.

^h Pro etenim.

ⁱ Datum Francoufurt regio palatio Non. Oct. anno 29 regni, indict. 10. Villæ Mecchingen et Guttingen palatio Potamo vicinæ sunt.

condonavit, quod et protinus suæ auctoritatis conscriptione firmavit ^a.

Quendam etiam montem situm in Hretia Curiense, in quo constructa est basilica sancti Victoris martyris, cujus et nomine vocatur idem locus Mons Victoris, ipso tempore ad monasterium sancti Galli contradidit, firmitatisque cartam regia auctoritate exinde fieri jussit ^b, rogante Eusebio Scottigena, qui ibidem per 30 annos spontaneæ clausus Domino serviebat; anno vero incarnationis Dominicæ 884, pridie Kalend. Februarii de hac luce ad lucem migravit perennem ^c.

Postquam vero idem Carolus Italiam ingressus pacifice eam suo subjugavit imperio, alium etiam locum in pago supra dicto similiter regie auctoritatis dominio cadentem, nomine Stamheim, cum omnibus ad illum pertinentibus sancto Otmaro imperatoria contradidit potestate, hujusque donationis firmitatem imperialis scripti præcepto firmissime corroboravit ^d. Sed et illius, quam supra memoravimus, donationis imperatoriam denuo jussit scribi commemorationem, quod factum est, ut imperavit ^e.

Postquam autem idem mitissimus imperator Carolus omnibus Italiæ Germaniæque populis suavissimo ordine imperavit, rogante Hartmoto et efficiente Liutwardo episcopo atque archicancellario imperatoris, quandam abbatiolam in Italia sitam, olearum et vinearum feracem, quam tunc idem Liutwardus in beneficio habebat, cui nomen est Massin, ad monasterium sancti Galli imperatoria auctoritate contradidit; eo quoque pacto, ut idem Liutwardus tempore vitæ suæ sub usufructuario ipsas res consideret, censumque de ipso loco, sicut ipse condixit, singulis annis ad monasterium prædictum persolveret, hoc est vel 6 lagenas de oleo, vel 60 solidos de argento; post obitum vero Liutwardi ipsæ res sine ullius contradictione perpetualiter ad jus pertinerent monasterii. Cujus rei carta protinus firmissime sua auctoritate est scripta atque firmata, atque ipso imperatore jubente, super altarium sancti Galli est posita, ubi hodie Deo volente cum pace tenetur ^f.

Igitur venerabilis abbas Hartmotus post tantorum, ut supra commemoravimus, perfectionem laborum cupiens etiam finem suæ clarissimæ administrationis aspicere propriis oculis, jam quoque ætate requiem poscente, cœpit sedulo ab imperatore deprecari, et cum fratribus quærere, quatenus ipse ab his laboribus liberaretur, et alius in ejus locum subrogaretur, cujus ætas et validudo apta existeret

^a Tradita fuit hæc villa prope Wilam Thurgoiæ sita (*Rosstrüti*) anno 878, 16 Kal. Aug. Indict. 11, regni Karoli 1.

^b Diploma, quo Carolus Crassus monasterium Scotorum in monte S. Victoris prope Feldkirih situm S. Gallo donavit, datum est anno 885, 9 Kal. Oct. anno Imp. in Italia 1, in Francia... Post annos duos idem Carolus in eodem S. Victoris monasterio hospitale pro 12 peregrinantibus Romam de bonis villæ Raitinis (*Rotis*) fundavit Potama 17 Kal. Maii anno 885, indict. 3 anno regni 8, imperii 5.

ad supportandos varios casus, qui nunc etiam prioribus ampliores variantur in mundo. Cujus rei consensum neque apud imperatorem, neque apud monachos facile potuit invenire. Sed cum ille diutissime et omnimodo in hac persisteret petitione, ætatis suæ sepius causando gravedinem, tandem difficilem adquisitam istius petitionis ab imperatore suscepit promissionem. Proinde lætus cœpit ad hæc ipsa negotia congruens inquirere tempus. Aliquanto vero temporum transeunte curriculo, contigit dominum imperatorem de Italia redeuntem nostrum intrare monasterium; ubi cum maxima laudem honorificentia cunctorumque non parva lætitia fuisset susceptus ^g, ipse etiam lætus triduo ibidem permansit. Tunc vero venerabilis abbas Hartmotus opportunum tempus suæ voluntati occurrere credens, imperatoris clementiam, ut suæ promissionis memor existeret, studiosissime cœpit flagitare. Piissimus vero princeps nullius preteritæ immemor vel dictionis vel promissionis, volens et abbatis petitioni annuere, et monachis in omnibus satisfacere, illorum concessit arbitrio, ut quem vellent, de suis abbatem sibi eligerent, Hartmoto videlicet successorem. Quæ res a fratribus audita maximæ tristitiæ et lacrimarum pariterque intermixtæ lætitiæ seminarium exiebat: tristitiæ, quia a tanti patris dominio, ipso vivente, se abstrahere cordetenus recusaverunt; lætitiæ vero, quia idem elementissimus imperator, cum rem finiri necessitas exegisset, non per suos nuntios absens, sed per seipsum nostras causas maluit confirmare atque statuere præsens.

Cum igitur hæc, ut diximus, necessitas, imo etiam dignissima utilitas, rem finiri exigerent, omnes pariter senes et juvenes a primo usque ad ultimum, Domino donante, communi consilio atque una voce Bernardum sibi elegerunt abbatem, virum nobilitate et juventute præclarum; cujus sapientia et moribus atque benignitate et regia servitia peragi, et se cum omnibus suis fidissime protegi confidebant. Cujus rei notitia cum ad imperatorem fuisset perlata, protinus ipse conventui eorum dignatus est interesse, ibique imprimis Hartmotum, ut sepiissime postulaverat, honorabiliter atque cum magna gratiarum actione a pondere tantorum liberum donavit esse laborum, sed non destituit a magisterio ibidem degentium. Postea vero omnibus Bernhardum sibi abbatem poscentibus, statim in præsentem benignissimus princeps eorum desiderium audiens, Bernharδο monasterium cum congregatione commendavit, ip-

^e Eundem diem Eusebii emortualem habet necrologium in cod. 915, sæc. 10.

^d Quod anno 880. 9 Kal. Dec. indict. 12, anno regni in Francia 5, in Italia 1, scriptum est.

^f Altera curtis Roholvesruti traditio conscripta est Papæ 5 Non. Oct. indict. 2, anno 883, imperii in Italia 5, in Francia 2.

^g Jam ab aliquot sæculis desideratur autographum hujus diplomatis.

^h Has suscepciones regum Jodocus Mezlerus collegit, et in lect. antiq. Canisii edidit.

sumque abbatem constituit. Qui inter alia plurima A
 consolatoria verba hoc etiam intulit promittendo ^a ciens, ipse quoque lætus de monasterio abcessit.
 se numquam hanc securitatem nobis ablaturum, Contigit autem ista ordinatio circa finem anni ab
 tantummodo si inter nostros valeat inveniri, qui incarnatione Domini 883, 6 feria, 8 Id. Decem-
 ad hoc officium idoneus possit existere. Om- bris, indictione prima, anno vero Caroli imperatoris
 nibus vero rationabiliter constitutis, domnus imper- tertio ^a, super omnia vero regnante Domino nostro
 ator omnes ibidem conversantes lætos effi- Jhesu Christo, cui est honor et gloria per indeficien-
 tia sæcula. Amen.

• Hanc temporis definitionem optime sibi convenire deprehendet curiosus lector.

RATPERTI POEMATA VARIA.

I.

VERSUS DE FESTIVITATE SANCTI GALLI.
(Vide tom. LXXXVII Patrol., col. 35.)

II.

VERSUS AD SOLEMNEM PER CAMPOS ET MONTES PROCES- B
 SIONEM DE RELIQUIIS SANCTI GALLI.
(Vide tom. LXXXVII Patrol., col. 46.)

III.

IN FESTIVITATE SANCTI OTHMARI.
(Vide ibid., col. 55.)

IV.

VERSUS DE SANCTO MAGNO.
(Vide Patrol. ibid., col. 44.)

V.

AD EUCHARISTIAM SUMENDAM.
(Vide ibid., col. 40.)

VI.

VERSUS AD REGEM SUSCIPIENDUM.
(Vide ibid., col. 40.)

VII.

LITANIA AD PROCESSIONEM DIEBUS DOMINICIS.
(Vide ibid., col. 39.)

VIII.

AD REGINAM SUSCIPIENDAM.
(Vide ibid., col. 41.)

IX.

AD DESCENSUM FONTIS.
(Vide ibid., col. 41.)

X.

HILDEGARDE EPITAPHIUM.

[Apud Gold. Alam. Rerum Script. pag. 85.]

Hoc jacet in tumulo Christi dignissima virgo
 Hildigarda nitens moribus egregiis.
 Hæc fuit eximii Ludovici filia regis,
 Mentem sponte suam voverat illa Deo.
 Bis denos octo vitæ compleverat annos
 Migrans ad Sponsum virgo beata suum.

XI.

DE CAPELLA QUADAM.

[Apud Gold., ibid.]

C
 Condidit hoc sanctum stabili fundamine templum
 Cum genitore pio Ludovico principe terræ
 Hildigarda potens Christi clarissima virgo,
 Cui Deus æternæ concedat gaudia vitæ.

ORDO RERUM

QUÆ IN HOC TOMO CONTINENTUR

HINCMARUS RHEMENSIS ARCHIEPISCOPUS.

(OPERUM CONTINJATIO.)

EPISTOLE.

EPISTOLA PRIMA. — Episcoporum dioceseon Rhemensis atque Rothomagensis ad Ludovicum Germaniæ regem.	9
EPIST. II. — Ad Nicolaum papam.	25
EPIST. III. — Ad episcopos synodi Suessionensis.	46
EPIST. IV. — Ad eandem synodum Suessionensem.	50
EPIST. V. — Ad episcopos synodi Suessionensis.	55
EPIST. VI. Ad eosdem.	59
EPIST. VII. — Ad Nicolaum papam.	61
EPIST. VIII. — Ad Egilonem archiepiscopum Senonensem.	64
EPIST. IX. — Ad Egilonem eundem episcopum.	68
EPIST. X. — Ad Egilonem eundem episcopum.	71
EPIST. XI. — Ad Nicolaum papam.	75
EPIST. XII. — Ad eundem.	90
EPIST. XIII. — Ad monachos Altovillarensis monasterii.	92
EPIST. XIV. — Ad Odonem episcopum Bellovacensem.	93
EPIST. XV. — Ad Carolum regem.	94
EPIST. XVI. — Ad clericos palatii.	99
EPIST. XVII. — Ad presbyteros diocesis Rhemensis.	101
EPIST. XVIII. — Ad presbyteros Rhemensis parochiæ.	104
EPIST. XIX. — Ad Ludovicum III regem, Balbi filium.	110
EPIST. XX. — Ad eundem Ludovicum III regem.	117
EPIST. XXI. — Concilii Tusiacensis ad rerum ecclesiasticarum pervasores et ad pauperum prædatores.	122
EPIST. XXII. — Ad Rodulfum Bituricensem et Frotarium Burdigalensem, metropolitano Aquitaniæ.	132
EPIST. XXIII. — Ad Carolum imperatorem.	153
EPIST. XXIV. — Ad conventum episcoporum.	154
EPIST. XXV. — Ad Hildegarium episcopum Meldensem.	161
EPIST. XXVI. — Ad Hildeboldum episcopum Suessionensem.	172
EPIST. XXVII. — Ad Adrianum papam.	174
EPIST. XXVIII. — Ad eundem.	186
EPIST. XXIX. — Ad Adventinum episcopum Metensem.	186
EPIST. XXX. — Ad episcopos.	189
EPIST. XXXI. — Ad quemdam episcopum.	210
EPIST. XXXII. — Ad Joannem papam.	230
EPIST. XXXIII. — Ad episcopos Rhemensis diocesis et omnes Ecclesiæ rectores et fideles.	245
EPIST. XXXIV. — Ad Joannem episcopum Cameracensem.	253
EPIST. XXXV. — Ad omnes fideles.	254
EPIST. XXXVI. — Ad omnes fideles.	255
EPIST. XXXVII. — Ad Engilgarium virum illustrem.	256
EPIST. XXXVIII. — Ad Anastasium abbatem.	257
EPIST. XXXIX. — Ad clerum et plebem Bellovacensem.	258
EPIST. XL. — Fragmentum. — Ad Carolum Calvum regem.	261
EPIST. XLI. — Fragmentum. — Ad Ludovicum regem Germaniæ.	262
EPIST. XLII. — Fragmentum. — Wiligiso et cæteris monachis S. Dionysii.	264
EPIST. XLIII. — Fragmentum. — Ad Teudulfum comitem.	264
EPIST. XLIV. Fragmentum. — Ad Irmingardem Augustam conjugem Lotharii imperatoris.	265
EPIST. XLV. — Fragmentum. — Rotrudi et cæteris sororibus monasterii S. Crucis et S. Radegondis.	266
EPIST. XLVI. — Ad Æneam Parisiensem episcopum.	267
EPIST. XLVII. — Ad Carolum regem.	267
EPIST. XLVIII. — Ad Hedenulphum Laudunensem episcopum.	268
EPIST. XLIX. — Ad Hadebertum Silvanectensem episcopum.	269

EPIST. L. — Ad clerum et plebem Cameracensem	269
EPIST. LI. — Cleri et plebis Laudunensis ad Hinmarum Rheinensem archiepiscopum	270
EPIST. LII. — Ad clerum et plebem Laudunensem.	271
EPIST. LIII. — Ad Franconem Tungrensem episcopum.	276
EPIST. LIV. — Ad eundem.	277
EPIST. LV. — Ad episcopos provinciæ Lugdunensis.	277

OPUSCULA ET EPISTOLE IN CAUSA HINCMARI LAUDUNENSIS.

Epistola Hincmari Rhemensis ad Hinmarum Laudunensem.	279
Epistola Hincmari Laudunensis ad Hinmarum Rhemensem.	280
Epistola Hincmari Rhemensis ad Hinmarum Laudunensem.	280
Epistola Hincmari Laudunensis ad Hinmarum Rhemensem.	281
Epistola ejusdem ad eundem.	281

OPUSCULUM LV CAPITULORUM adversus Hinmarum Laudunensem.

Index capitum.	283
Titulatio metrica.	287
Responsio.	287
Prefatio.	290
CAPUT PRIMUM. — De capella in Attolæ curte sita.	293
CAP. II. — De administratione palatii et abbacia contra canones adæptis, et quod vocatus ad synodum non venerit et de irregulari excommunicatione Amalberii.	295
CAP. III. — De excommunicatione aliorum episcoporum parochianos intentata.	299
CAP. IV. — De eo quod scripta contra se prolata incendi postulat.	299
CAP. V. — De duobus Hincmari iudiciis, quæ a sede apostolica rescissa dicebat.	302
CAP. VI. — De eo quod dicebat Hinmarum degradari debere.	310
CAP. VII. — De eo quod sæculari consulto purgari quæsierit.	313
CAP. VIII. — De epistolis papæ pro ejus reclamatione scriptis.	315
CAP. IX. — De monacho a Laudunensi excommunicato.	315
CAP. X. — De compilatione ex epistolis apostolicæ sedis in quaterniunculis missis, et de verbo <i>promulgo</i> , et capitulo Leonis papæ.	316
CAP. XI. — Quod latus de sacris ordinibus et canonum disciplinis ex orthodoxorum verbis et sensibus sit dictum.	324
CAP. XII. — Qui sint ordines in cælo, et in Ecclesia, et in terrena republica.	325
CAP. XIII. — Quod si ordo generalis est omnibus episcopis, non tamen communis est dignitas omnibus.	326
CAP. XIV. — Quod et in republica ad instar cælestis, militiæ diversi sint ordines.	327
CAP. XV. — De paternitatibus et incolatibus in cælo, et in Ecclesia et republica.	328
CAP. XVI. — De metropoli Rhemorum, et castro Lauduno; et quod tres primariæ sedes una fuit sedes Petri. Hormisdæ ad sanctum Remigium epistola.	334
CAP. XVII. — De rebellionem minorum sacerdotum erga potiores, et de Constantinopolitano sede reluctante adversus apostolicam.	340
CAP. XVIII. — Quod insanæ mentis homines per indiscretionem in Scripturis sanctis erraverunt.	350
CAP. XIX. — Quod in sanctorum traditionum sanctiones male intelligentes erraverint.	352
CAP. XX. — Quod in antiquis epistolis sedis apostolicæ, sicut in legibus, quædam post abrogata vel immutata fuerint. De sex synodis generalibus, et de septima apud Græcos, deque synodo Francica, et epistolis Julii papæ ac Felicis.	353
CAP. XXI. — Quod non nisi viginti capitula in concilio Nicæno fuerint constituta.	355

CAP. XXII. — De quatuor capitulis a beato Gregorio in epistola ad Theocistam Patriciam memoratis.	366
CAP. XXIII. — Quod apostolica sedes partem noni capituli Chalcedonensis non recipiat, sicut beatus Leo papa demonstrat.	368
CAP. XXIV. — De eodem canone Chalcedonensi, et de canonibus apostolorum, deque sententiis Angilramno datis, et de epistolis pontificum collectis ab Isidoro.	373
CAP. XXV. — De auctoritate et differentia conciliorum et epistolarum sedis apostolicæ pontificum.	384
CAP. XXVI. — De eadem differentia iterum, et de conciliis plenariis, synodique Nicænæ prærogativa.	391
CAP. XXVII. — De canonibus et sententiis ab eo prave intellectis et usurpatis.	393
CAP. XXVIII. — De male ab eo excommunicatis, qui equaliter excommunicari debeant, et qui ordo in iudiciis ecclesiasticis observandus.	397
CAP. XXIX. — Quid canones statuunt de irregulariter excommunicatis.	403
CAP. XXX. — Qua ratione solvi queant excommunicationes non legitimæ, et de iis qui injuste excommunicant.	407
CAP. XXXI. — De eo quod parvulos, qui sæpe discrimine mortis periclitantur, baptizari prohibuit.	412
CAP. XXXII. — De eo quod pœnitentiam et viaticum morientibus dari vetuit.	413
CAP. XXXIII. — De eo quod sepulturam mortuis in parochia sua denegari præcepit.	416
CAP. XXXIV. — Quod in rebus certis et definitis, nec synodus convocanda, nec sedes apostolica inquietanda sit sed quæ statuta sunt observanda.	416
CAP. XXXV. — Quod apostolica sedes cum episcopis conjudicet, qui secundum canones iudicant, et quod non bene intelligat, ut metropolitanus absque provincialium instantia causas non audiat.	430
CAP. XXXVI. — De irregulari subscriptione, quam collectioni suæ apposuit.	427
CAP. XXXVII. — Ut non sit prudens apud semetipsum, et de discretionem in pace tenenda.	434
CAP. — XXXVIII. — Ut sacræ Scripturæ verba, et sacræ regulas recte intelligat.	435
CAP. XXXIX. — Ut ab eo removeat dolorem, a se ipso periculum, et ab utroque improprium.	436
CAP. XL. — Verum non esse quod dicere solebat, Hincmari consilio regem ipsi adversatum esse.	438
CAP. XLI. — Quod si culpam agnosceret, pro divino timore indulgentiam expeteret.	438
CAP. XLII. — De auferendo a nobis ambobus opprobrio a multis illato.	439
CAP. XLIII. — De sacrarum Scripturarum falsatione, et responso ejus ad litteras de Nevino. Qui canones sint recipiendi, et de imperitia et jactantia ejusdem. De Bertrico item, et de eo quod sæpe illum admonuit.	440
CAP. XLIV. — Qualiter redire valeat ad paternæ charitatis dulcedinem.	453
CAP. XLV. — Ut recordetur quanta in dulcedine fuerit initio episcopatus, et deponat animositatem.	455
CAP. XLVI. — De eo quod gloriatur se in omnibus, quæ contra quoslibet suscepit, fuisse ac semper fore victorem.	457
CAP. XLVII. — Quod victum se nunquam agnoscat. De ejus in metropolitanum rebellionem: et quod sacra eloquia exuri petierit, et schisma subscriptione sua fecerit. Et de injustis ejus obligamentis.	461
CAP. XLVIII. — De iis qui nimis amant sententiam suam usque ad schisma vel hæresim.	473
CAP. XLIX. — Admonetur ut talentum intellectus, quod Dominus sibi gratuito dedit, non negligat.	483
CAP. L. — De eo quod dicitur ferre non posse, ut quisquam dicatur ei bonum aliquid sine ipsis merito exhibuisse.	484
CAP. LI. — De exeniis, quæ a clericis et laicis exigere dicebatur.	485
CAP. LII. — De superbia ejus et arrogantia, jactantiaque inepta et indecenti.	489
CAP. LIII. — De motibus corporis inordinatis, qualiter cavere debeat.	492
CAP. LIV. — Ut non se permittat decipi a flore juventutis et sanitate corporis, et mundi illecebris.	493
CAP. LV. — Conclusio epistolæ verbis Eliæ, <i>Quod meum fuit feci tibi.</i>	494
Epistola Hincmari Rhemensis ad Hincmarum Laudunensem.	491
Hincmari Rhemensis ad eundem.	498
Epistola Hincmari Laudunensis ad Hincmarum Rhemensem.	509
Hincmari Laudunensis ad eundem.	509
Epistola Hincmari Rhemensis ad Hincmarum Laudunensem.	509

Hincmari Rhemensis ad eundem.	511
Hincmari Rhemensis ad eundem.	51
Hincmari Rhemensis ad eundem.	526
Hincmari Rhemensis ad presbyteros et diaconos ecclesiæ Laudunensis.	531
Ejusdem Hincmari ad Hincmarum Laudunensem.	533
Ejusdem Hincmari ad eundem.	534
Hincmari Rhemensis ad eundem.	537
Ejusdem ad eundem.	545
Schedula, sive libellus expostulationis adversus Hincmarum Laudunensem episcopum.	566
Prefatio.	566
Incipiunt capitula.	568
Sententia depositionis Hincmari Laudunensis.	634
Epistola synodalis ad Adrianum papam.	635
Epistola Hincmari Rhemensis ad Adrianum papam.	641

JOANNES VIII, PONTIFEX ROMANUS.

Notitia historica.	647
Notitia altera.	649

EPISTOLÆ ET DECRETA.

I. — Ad Annonem Frisinguensis ecclesiæ episcopum.	651
II. — Ad Wilibertum Coloniensem archiepiscopum.	652
III. — Ad Ludovicum II imperatorem.	653
IV. — Ad Ansbertum archiepiscopum Medionalensem.	653
V. — Ad Ludovicum regem Germaniæ. — Privilegia Romanæ Ecclesiæ non nisi centum annorum prescriptione tolluntur.	654
VI. — Ad Paulum episcopum. — Commonitorium Paulo episcopo fungenti legatione in Germaniam et Pannoniam.	654
VII. — Ad Ludovicum imperatorem. — Excommunicatur Rainaldus Castri Felicitatis episcopus.	655
VIII. — Ad Ludovicum II imperatorem. — Legis auctoritate dissolvitur quod contra eam fit.	655
IX. — Ad Neapolitanos, Salernitanos et Amalphitanos.	655
X. — Ad clerum Salernitanum.	656
XI. — Excommunicatur qui de morte Romani clerici suspecti erant.	656
XII. — privilegium pro monasterio Fuldensi.	657
XIII. — Ad monachos S. Vedasti Atrabatenis. — Confirmat omnia contenta in diplomate Caroli imperatoris.	658
XIV. — Ad Carolomannum (<i>al.</i> Ludovicum regem). Quod Pannonica diocesis deputata est privilegiis apostolicæ sedis.	659
XV. — Ad episcopos Galliæ et Germaniæ. — Vices suas in Gallia et Germania committit Ansegiso archiepiscopo Senonensi.	660
XVI. — Bulla Joannis ad congregationem S. Medardi Suessionensis.	660
XVII. — Ad Hincmarum archiepiscopum Rhemensem. — Ut in locum Hincmari ordinetur episcopus in ecclesia Laudunensis.	663
XVIII. — Ad Aldefonsum regem. — Ovetensis Ecclesiæ Galliciæ metropolitana efficitur.	663
XIX. Ad eundem. — Monet ecclesiam sancti Jacobi consecrari.	663
XX. — Ad episcopos et comites in regno Caroli constitutos. — Laudat illos quod in fide constantes erga Carolum persisterint, et de legatis, quos ad componenda dissidia mittebat in Galliam.	664
XXI. — Ad episcopos qui, a Carolo desciscentes, Ludovico regi adhaeserant.	665
XXII — Ad episcopos in regno Ludovici regis Bajoariæ constitutos. Arguit eos quod Ludovicum regem ab invadendo Caroli fratris absentis regno non cohibuerint, monique ut legatis, quos ad examinanda inter utroque negotia mittit, satisfacere studeant.	667
XXIII. — Ad comites in regno Ludovici regis Bajoariæ constitutos. — Arguit eos quod Caroli regnum pervaderent; moneturque ut Ludovicum regem ab ea mente revocent, et ut legatis, quos mittit, satisfacere non detrectent.	672
XXIV. — Ad universos Gallos et Germanos. — De damnatione Formosi episcopi, Gregorii nomenclatoris, et aliorum qui Romæ in synodo fuerant excommunicati.	675
XXV. — Ad Bosonem comitem. — Agit gratias quod ejus opera legati ad imperatorem pervenerint, et illis injuncta confecta sunt; cumque rogat ut quam primum auxilia sibi contra Saracenos mittenda curet.	679
XXVI. — Ad Ludovicum regem. — Dissensiones inter ipsam et imperatorem scribit se non posse sedare, nisi alteram pius audiat partem: interea monet ut pacem cum	

omnibus, et præcipue cum imperatore, servet, et sub-
jectos compescat. 680

XXVII. — Ad clerum ordinem, et plebem sanctæ Uval-
vensis ecclesiæ. — Invehitur in quamdam Ecclesiæ Val-
vensis invasorem, legitimo adhuc supersite episcopo :
laudat eos quod illum minime recipiendum duxerunt,
simul præcipiens, ne unquam eum admittant, alioquin
excommunicationis sententiam minatur. 680

XXVIII. — Ad quemdam. — De Napolitanorum duce
ejus fratre queritur, qui suis monitis non parebat. Quare
hortatur ut ab eo se separet; alioquin cum eo ac cæteris
fautoribus anathemati subjicietur. 681

XXIX. — Ad Leonem et Petrum episcopum. — Miratur
eos ad se non reverti incursionibus Saracenorum lacessi-
tum : obtestatur ut quantocius redeant. Quod si vim ab
aliquo patiantur, præcipit ut fortiter se gerant, et id sibi
significet. 683

XXX. — Ad Bosonem comitem. — Dolet quod sibi de-
precanti auxilium contra Saracenos non tulerit. Significat
Urbum magno in discrimine versari, cum ad eam oppu-
gandam fama sit magnum exercitum venturum; quare
eum rogat ut quantocius opem ferat. Legatos ab eo de-
lineri miratur. 684

XXXI. — Ad Laudulfum episcopum Capuanum. — Nun-
tiat legatos ad imperatorem rediisse; quem in episcopo-
rum et optimatum conventu Romanæ Ecclesiæ jura re-
cognovisse, præcipue vero terræ Capuanæ pactum suo
juri commississe scribit : ideo in ejus partes se venturum
promittit. 685

XXXII. — Ad Guaiferum principem Salernitanum. —
Ostendit se paratum esse firmare pactum quod fecerat;
rogatque sibi ad ipsum eunti hospitium parari. 685

XXXIII. — Ad Geilonem abbatem Tornutiensem ejusque
monachos — Illorum omnia, vel regia, vel episcopalia
privilegia, pontifica auctoritate sancit, anno Christi 686,
quibus addit exemptionem ab omni cujuslibet antistitis
jurisdictione. 686

XXXIV. — Ad abbatem et monachos Xerenses. —
Approbat donationem monasterii S. Porciani illi fa-
ctam. 687

XXXV. — Ad episcopos provinciæ Bituricensis. — Ut
Frotario tanquam metropolitano suo deinceps obediant.
689

XXXVI. — Ad Bituricensis. — Ut Frotario Burdigalensi
archiepiscopo, cui tandiu Bituricensem Ecclesiam com-
mittit, quandiu pagani Burdigalensem diocesim obti-
neant, omnes obediant. 690

XXXVII. — Ad Carolum Calvum imperatorem. — Im-
peratoris precibus, cum Burdigalensis provincia paganis
esset devastata, Frotarium Burdigalensem archiepiscopum
transfert in Ecclesiam Bituricensem. 690

XXXVIII. — Ad Carolum Calvum imperatorem — Lau-
dat eum de judicio in Emamenum prolato, et hortatur ut
cum illo clementer agat. 691

XXXIX. — Ad imperatorem et imperatricem. — Pro
Madelgero qui Odelricum occiderat. 692

XL. — Ad episcopum Carnotensem. — Pro Madelgero
qui Odelricum occiderat. 693

XLI. — Ad Adalarum episcopum Veronensem. — Com-
mendat eum ob præclaras virtutes, et jubet ut Romam ad
concilium veniat. 693

XLII. — Ad Carolum imperatorem. — Laudat quod
sedis apostolicæ legatos benigne exceperit, rogatque
ut Ecclesiæ Romanæ prædones, qui missorum ipsius ju-
diciu latentes effugerant, requiri et coerceri jubeat. 694

XLIII. — Ad Carolum imperatorem. — Narrat calamitates
Ecclesiæ illatas a Saracenis, et imperatorem precatur ut
auxilium adversus eos mittat. 696

XLIV. — Ad Carolum Calvum imperatorem. — Scribit
intellecturum imperatorem ex Adalgario episcopo (cui
pallium concedit) cur Ecclesiæ causa ex voto non pro-
cesserit. Taxat Ansegisum, et Adalgarii fidem com-
mendat. 697

XLV. — Ad Richildim Augustam. — Rogat ut Romanæ
Ecclesiæ suffragetur. 698

XLVI. — Ad Carolum Calvum imperatorem. — Com-
mendat Wigbodum Parmensem episcopum. 699

XLVII. — Ad Adalgarum episcopum Augustodunen-
sem. — Villam Tilionacum illi restituendam decernit, cæ-
terasque possessiones Augustodunensis sedis confir-
mat. 700

XLVIII. — Ad Ursam ducem Venetiarum. — Gratias
agit quod apostolicæ sedis monitis paruerit. Episcopos ad
synodum venire jubet. 701

XLIX. — Ad Felicem et Petrum episcopos. — Felici et
Petro sacris interdicit ob non exhibitum Grandensi archi-
episcopo obsequium; eosque sub excommunicationis

pœna Romam ad concilium venire, et si impediti fuerint,
vicarios mittere jubet. 702

L. — Ad Dominicum electum episcopum Torcellensem.
— Invehitur in Dominicum electum episcopum, quod
bis vocatus Romam non accesserit; eumque, nisi venerit
constituta die, excommunicat. 703

LI. — Ad Ursam ducem Venetiarum. — Rogat episco-
pos qui Romam ad synodum evocantur, suis sumptibus
alati; quibus, nisi accesserint, excommunicationis senten-
tiam minatur. 703

LII. — Ad Dominicum et Leonem episcopos. — Signi-
ficat quosdam qui Romam ad concilium vocati venire ne-
glexerant, se excommunicasse, nisi ad certam præstitu-
tam diem venerint; hortatur ut quandiu illi abfuerint, eor-
um officia exsequantur. 705

LIII. — Ad Deltum episcopum. — Ut vice apostolicæ
sedis fungens Venetias pergat, et episcopos ejus regio-
nis Romam ad concilium, sicut jusserat, venire faci-
at. 706

LIV. — Ad Lambertum comitem. — Ut compescat sibi
subjectos a malis quæ perpetrabant; quos si emendare
non potuerit, minatur illos se excommunicaturum : le-
gatis multa ei viva voce referenda se injunxisse signifi-
cat. 707

LV. — Ad Guaiferum principem Salernitanum. —
Laudat ejus fidei constantiam erga sedem apostolicam :
Adelgisii et complicum fraudes detestatur, suumque et
aliorum Ecclesiarum auxilium contra Saracenos et polli-
cetur, et hortatur ut in fide persistat, utque episcopum
Surrentinum ad se mittat. 708

LVI. — Ad Landulphum episcopum Capuanum. — Eju-
dem argumenti. 709

LVII. — Ad Ajonem episcopum Beneventanum. —
Commendat eum de zelo erga sedem apostolicam, monet
ut sibi adjumento sit in expellendis Saracenis, suumque
fratrem ad idem faciendum impellat. 710

LVIII. — Ad Carolum Calvum imperatorem. — Propter
imminentia tum a Saracenis, tum a quibusdam Christianis,
gravissima pericula, enixe petit ut promissa auxilia quam-
primum mittat, et destinatos ea de causa legatos com-
mendat. 711

LIX. — Ad Richildim Augustam. — Ut imperatorem
conjugem suum ad opem Ecclesiæ quamprimum ferendam
hortetur. 713

LX. — Ad Carolum Calvum imperatorem. — Mittit impe-
ratori palmas, et a malis, quibus a Saracenis pravisque
Christianis urgebatur expositis, auxilia petit. 714

LXI. — Ad Anspertum archiepiscopum Mediolanensem.
— Respondet, abbatem qui, nullo comprobato crimine, a
regii cœnobii præpositura depulsus fuerat, esse revocan-
dum; homicidam autem, et facinoris socium, ab omni
præpositura pellendum. 715

LXII. — Ad episcopos in regno Caroli imperatoris con-
stitutos. — Monet ut imperatorem hortentur ad opem Ec-
clesiæ Romanæ celeriter ferendam. 716

LXIII. — Ad Landulphum episcopum Capuanum. —
Mittit legatos, ut Docibilem hypatus petierat : hortatur ut
det operam una cum legatis, ut pactum cum Saracenis
initum dissolvatur; se quicquid ab eo constitutum fuerit,
approbatum. 717

LXIV. — Ad Frotarium archiepiscopum. — Frotarium
ab Ecclesia Burdigalensi a paganis devastata transfert ad
Bituricensem. 718

LXV. — Ad Carolum regem. — Monet ut bona ablata a
monasterio sanctimonialium restituenda curet; quod nisi
infra sexaginta dies fecerit, et per legatum id sibi nun-
tiaverit, vel causam cur non sint restituta, non reddere-
rit, eum excommunicat. 719

LXVI. — Ad Engilbergam. — Consolatur eam ob mor-
tem mariti, atque monet ut Carolo imperatori fidem ser-
vet, seque ejus interessorem apud eundem Augustum
futurum pollicetur. 720

LXVII. — Ad Wigbodum episcopum Parmensem. —
Hortatur ut quoscunque potest ad sanctæ Romanæ Ec-
clesiæ defensionem excitet, et ad se cum suis veniat, ut com-
muni consilio Saraceni ab Italia expellantur : mittit desi-
deratas epistolas, quas afferendas curet iis quibus scribun-
tur. 721

LXVIII. — Ad Docibilem et Joannem. — Hortatur ut det
operam ne Christiani fœdus cum Saracenis faciant. 722

LXIX. — Ad Pulchram prefecturam Amalfitanum. —
Monet ut fœdus cum Saracenis initum dissolvendum curet.
722

LXX. — Ad Sergium magistrum Neapolitanum. — Do-
let ipsum sæpe monitum fœdus cum Saracenis solvere no-
uisse; præcipit ut tandem pareat; sin minus, minatur se

iterum esse excommunicatum; pollicetur, si fideles legatos miserit, benigne se suscepturum. 723

LXXI. — Ad episcopum Neapolitanum. — Queritur Neapolitanos cum infidelibus foedus iniisse, nec ab ipso eorum antistite ad viam veritatis revocari. Quare hortatur ut ipse et illi resipiscant: præterea pollicetur se benigne suscepturum Neapolitani ducis legatos, si miserit, paratumque ad omnia se fore, quæ pro Ecclesiæ Dei utilitate perficienda referuntur. 724

LXXII. — Ad Ajonem episcopum Beneventanum. — Laudat ejus promptum ad Ecclesiæ defensionem studium: tum hortatur ut contra Saracenos opem ferat, et foedus cum illis ictum dissolvendum curet. 725

LXXIII. — Ad Gregorium imperialem pædagogum. — Gratulatur imperatorem contra Saracenos classem ad Ecclesiæ defensionem misisse; eumque ducem constituisse: tum monet ut decem achelandia a littora a Saracenis piratis expurganda mittat. 726

LXXIV. — Ad Carolum Calvum imperatorem. — Nuntiat se Adelardum episcopum Veronensem excommunicasse, quod Nonantulum monasterium invasisset. 727

LXXV. — Ad Joannem Anspertum et Waipertum archiepiscopos. — Ejusdem argumenti. 728

LXXVI. — Ad clerum Veronensem. — Ejusdem argumenti. 729.

LXXVII. — Ad Landulfum episcopum Capuanum. — Monet ut sibi significet an Neapolitanorum d. x foedus eum Saracenis initum frangere velit, et del operam ut idem dux Gauferius et Pulchar una secum Trajectum se conferant, quo ipse est iturus; paratum se ad ea quæ promiserat, et majora concessurum; si ipse dux in sententia persistat. 729

LXXVIII. — Ad Pulcharum præfecturium. — Ejusdem argumenti. 730

LXXIX. — Ad Carolum Calvum imperatorem. — Auxilium contra Saracenos implorat, qui devastata Campania, omnia Romæ suburbana depopulabantur. 730

LXXX. — Ad archiepiscopum Ravennatem. — Præcipit ut cum suis suffraganeis ad concilium accedat. 731

LXXXI. — Ad Anspertum et Antonium episcopos. — Ut Ravennam ad synodum accedant; quod nisi paruerint, minatur eos se excommunicatum. 732

LXXXII. — Ad Ursum ducem Venetiarum. — Inobedientiam accusat, et monet ut episcopos Venetiæ ad synodum Ravennæ celebrandam accedere curet, et ipse quoque veniat, vel legatos mittat. 733

LXXXIII. — Ad Petrum et Leonem episcopos Venetiæ. — Ut Ravennam ad concilium proficiscantur, in quo componendæ sunt controversiæ quæ cum metropolitano nonnullis intercedunt. 734

LXXXIV. — Ad Aquileium. — Quæ de eo sinistre ferebantur, in generali concilio canonicè terminanda significat. 734

LXXXV. — Ad Guaiferium principem Salernitanum. 735

LXXXVI. — Ad Carolum imperatorem Geilonem abbatem Tortuensiensem ejusque monachos. — Cellæ Godith, a Desiderio principe fundatæ sua jura confirmat; quibus addit immunitatem ab omni episcopali jurisdictione anno Christi 877. 735

LXXXVII. — Ad archiepiscopum Ravennatem. — Certum præscribit diem quo Ravennæ cum omnibus suis suffraganeis adfuturus sit; quod si quis parere contempserit, excommunicationem illi minatur. 736

LXXXVIII. — Ad eundem. — Scribit se Jussisse ut omnes Italiæ episcopi, et præcipue Venetiarum, ad synodum Ravennæ celebrandam accedant. 737

LXXXIX. — Privilegium monasterio et xenodochio Placentino concessum. 637

XC. — Ad Ticinensem episcopum. — Archiepiscopalia insignia utenda concedit cum facultate vocandi ad suam synodum archiepiscopos Ravennatensem et Mediolanensem. 739

XCI. — Ad Lambertum gloriosum comitem. — Significat Romanorum procerum obsides dari non posse; monet ne ad Urbem veniat, quia ipse eum excipere non potest. 742

XCII. — Ad Wilonem episcopum Invinensem. — Causam Leontardi ejusdam, qui homicidium cum aliis commiserat, ei delegat; hortatur ut quoniam gravissimam illi antea penitentiam constituerat, modo leviorè constituat. 743

XCI. — Ad Carolomannum regem. — Dolet de Caroli imperatoris obitu; hortatur ut promissa pro Romanæ Ecclesiæ dignitate impleat: legatos se missurum pollicetur ejus precibus Theotmaro archiepiscopo pallium mittit; quem apostolicæ sedis redivit, quos apud Bajoariam habet, Romam annuatim transmittere jubet. 744

XCIV. — Ad Theotmarum archiepiscopum Juvannen- sem. — Pallium ei concedit, mandat ut redditus quos Romana Ecclesia apud Bagoatiam habet, Romam mittat. 745

XCIV. — Ad Ederedum archiepiscopum Anglorum. — Laudat ejus pium erga sedem apostolicam animum, dolet de adversis: monet ut pro Ecclesia fortiter se gerat; ostendit uxores non esse dimitendas; nuntiat se ad regem scripsisse, ut debito eum honore prosequatur; demum ejus Ecclesiæ privilegia confirmat. 745

XCVI. — Ad Athanasium episcopum. — Commendat zelum fidei quem ostenderit adversus Sergium Ecclesiæ Dei hostem; hortatur ut in dies magis pro Ecclesiæ sibi commissæ defensione laboret; Petrum diaconum ei commendat. 747

XCVII. — Ad Neapolitanos. — Laudat eos quod, zelo divino accensi, Sergium a se abjecerint, et Athanasium episcopum suæ republicæ rectorem elegerint, præcipit ut ei parent, offensus se una cum ipso eorum commodis consulurum. 748

XCVIII. — Ad Lambertum comitem. — Scribit se in Galliam velle proficisci, ideo sub excommunicationis pœna præcipit ne se absente Romanæ Ecclesiæ territorio vel Romæ aliquod damnum inferat. 749

XCIX. — Ad Landulfum episcopum Capuanum. — Monet ut consentiat cum Athanasio episcopo Neapolitano ad Ecclesiæ Romanæ defensionem; et curet pactum cum Amalfitanis factum, ab ipsis observari. 749

C. — Ad Guaiferium principem Salernitanum. Hortatur ut in sua integritate perseveret, et Amalfitanos corripit, quod auxilium navale non miserint, et nimia calliditate in se utuntur. 750

CI. — Ad archiepiscopum Ebrudunensem. — Reprehendit quod alium episcopum, præter eum quem clerus et populus egerat, in Vinciensi Ecclesia consecraverit: præcipit ut cum utroque Romam veniat. 751

CII. — Ad Cunipertum comitem. — Præcipit ut bona Romanæ Ecclesiæ quæ occupaverat, restituat. 752

CIII. — Ad Lambertum comitem. — Monet ne Romam eam ob causam veniat, ut apostolicæ sedis hostibus auxilium ferat; quod si alia de causa venerit, honorificè se eum exceptorum promittit: plura legatis injungit, quibus fidem abhiberi jubet; Adelbertum Romanæ Ecclesiæ hostem se non posse ait in communionem recipere. 753

CIV. — Ad eundem. — Graviter eum reprehendit quod in litteris quas scripsit honorem debitum apostolicæ sedi non habuerit, et ne legati absque ejus consensu mitterentur postulaverit. 753

CV. — Ad Angelbergam Augustam. — Dolet quod Angelbergam molestiis afflicti et queritur de injuriis quas Lambertus Ecclesiæ Romanæ inlinoxit: rogat ut conservet benevolentiam quam erga ipsam habere solebat. 754

CVI. — Ad Berengarium comitem. — Rogat ut imperatori nuntiet quæ a Lamberto Romæ perpetratæ sint detque operam ut eam compescat. 755

CVII. — Ad Joannem archiepiscopum Ravennatem. — Exponit mala quæ a Lamberto comite Romæ sunt perpetrata; sequè in Gallia ad implorandum auxilium adversus eum iturum ostendit. 756

CVIII. — Ad Michaelè regem Bulgarorum. — Dolet quod Græcos sequatur; hortatur ad Romanæ Ecclesiæ gremium redeundum: tum de dono misso gratias agit: postremo Sergium quemdam per subreptionem ad sacerdotium et episcopatum promotum, depositum fuisse significat. 757

CIX. — Ad Petrum comitem. — Hortatur ut Michaelè regem ad Romanæ Ecclesiæ gremium revocet. 760

CX. — Ad quemdam ex nobilibus Bulgaris. — Ejusdem argumenti, suntque fere eadem verba quæ in superiore. 761

CXI. — Ad Ignatium patriarcham Constantinopolitanorum. — Tertio jam commonet, ne Bulgarum regionem ad Ecclesiam Romanam jam antiquitus pertinentem usurpet, et eo, vel ad ejus suffraganeos in ea regione consecratos episcopos intra triginta dies illinc educat; et nisi post duos menses paruerit, Dominici corporis et sanguinis communionem, et si perseveraverint in contumacia, patriarchali etiam dignitate privat. 769

CXII. — Ad episcopos et clericos Græcos. — Declarat eos excommunicatos quos Bulgarum regiones invadentes illicitas ibi ordinationes fecerint: dignitate etiam privandos, nisi intra triginta dies ex omni Bulgarica regione decesserint. Si quis autem paruerit, restituendum ei episcopatum decerni quem in Grecia habebat; et si nullum antea habebat, vacantem, si dignus est, eidem conferri jubet. 764

CXIII. — Ad Basilium imperatorem. — Dolet Constan-

tinopolitanam Ecclesiam schismate adhuc laborare; qua de re legatos mittit. 765

CXIV. — Ad eundem. — Ut legatis a se missis fidem adhibeat, et opem Romanæ Ecclesiæ ferat. 766

CXV. — Ad Ludovicum Balbum regem. — Deplorat mortem Caroli imperatoris patris ejus: hortatur ut pacem habeat cum regibus consanguineis suis, et Ecclesiæ inimicos persequatur, præcipue Lambertum ducem, cujus diras infestationes commemorat; denique in Galliam se venturum, ibique synodum celebraturum significat. 767

CXVI. — Ad Ludovicum Bajoariorum regis filium. — Hortatur ad servandam pacem cum patruelis; invehitur in Lambertum Spoletanum ducem; rogat episcopos, significat ut ad synodum accedant. 769

CXVII. — Ad Carolomannum regem. — Ejusdem pene argumenti. 770

CXVIII. — Ad Anspertum archiepiscopum Medionalensem. — Monet ut quantocius ad synodum in Galliam cum suffraganeis accedat; queritur de perfidia Lamberti Spoletani comitis. 770

CXIX. — Ad Angelbergam Augustam. — Ut in Romanæ Ecclesiæ fide perseveret; præsentium latorem commendat. 771

CXX. — Privilegium pro monasterio Tornutiensi. — Confirmantur bona eidem monasterio olim concessa. 771

CXXI. — Ad Angelbergam Augustam. — Arelatem se venire significat, ibique omnia prospera reperisse; hortatur ut Romanæ ecclesiæ commodis prospiciat. 773

CXXII. — Ad Mironem et Hunefridum fratres. — Mironem et Hunefridum multorum scelerum reos ad synodum venire jubet. 774

CXXIII. — Ad Rostagnum archiepiscopum Arelatensem. — Suas illi vires in Gallia et pallii usum concedit. 775

CXXIV. — Ad diversos episcopos Galliæ. — Ut Rostagno Arelatensi episcopo, cui vires suas in Gallia commisit, omnes obediunt. 777

CXXV. — Ad Carolum regem. — Excusat se quod ad eum legatum non miserit, interclusa sibi via a Lamberto ejusque fautoribus, qui urbem Romam tenebant obsessam. 779

CXXVI. — Ad Isaac episcopum Lingonensem. — Ut Treas ad synodum veniat, et Cabilonum aliquos mittat qui pontificem eo deducant. 779

CXXVII. — Ad omnes christianos. — Excommunicat eos qui sibi equum et argenteum vas furati fuerant, nisi intra tres dies restituant. 780

CXXVIII. — Ad episcopos suffraganeos archiepiscopi Arelatensis. — Jubet ut cum archiepiscopo suo, simul ac vocati fuerint, ad Trecensem synodum veniant. 780

CXXIX. — Ad diversarum sedium archiepiscopos. 780

CXXX. — Ad Hugonem abbatem. — Hortatur suadet Ludovico regi ut ad se veniat: monet etiam ut se a quorundam communione separet. 781

CXXXI. — Ad Teutranum Tarentasensem archiepiscopum. — Monet ut sibi cum suffraganeis suis obviam veniat, et Adalbertum synodo adesse jubeat, ut rationem reddat eorum de quibus Bernarius episcopus questus fuerat. 781

CXXXII. — Ad Rostagnum archiepiscopum Arelatensem. — Ut ad synodum cum suffraganeis suis quamprimum veniat. 782

CXXXIII. — Ad Hincmarum Rhemorum archiepiscopum. — Ut ad synodum Trecensem absque mora cum suffraganeis suis episcopis veniat. 782

CXXXIV. — Ad Frotarium archiepiscopum. — Ut ad synodum cum suis suffraganeis Treas veniat. 783

CXXXV. — Ad Bernardum marchionem. — Monet ut Frotario aditum ad suam sedem patere faciat. 783

CXXXVI. — Ad archiepiscopum Moguntinum. — Ut Ludovicum Germaniæ regem, ejusque fratres adhortetur ut ad synodum veniant aut legatos mittant. 783

CXXXVII. — Ad Angelbergam Augustam. — Scribit in anniversario die Ludovici ejus viri sacra pro eo se facturum; rogat ut in sui defensione perseveret; synodum Treas se habiturum significat. 784

CXXXVIII. — Ad Supponem comitem. — Agit gratias de fidelitate erga Romanam Ecclesiam: quædam apud Carolomannum facienda injungit. 784

CXXXIX. — Ad Carolomannum regem. — Miratur illum ad binas litteras non respondisse. Valetudinem ejus deplorat; addit se synodo Treas celebranda. 785

CXL. — Ad Carolum regem. — Agit gratias de observantia erga Romanam Ecclesiam; miratur quod ad se legatos non miserit: rogat ut ante colloquium quod cum Ludovico rege habiturus est, aut ipse veniat, aut legatos mittat. 785

CXLI. — Ad Ludovicum regem. — Ejusdem ac præcedens argumenti. 786

CXLII. — Ad Carolum regem. — Arguit quod vocatus ad se non venerit, sicut Ludovicus rex fecerat; monet sub excommunicationis pœna, ut sui regni finibus contentus nullam Bosoni molestiam exhibeat. 786

CXLIII. — Ad Linbertum archiepiscopum. — Monet ut Bosonis filiabus hæreditatem restitui faciat. 786

CXLIV. — Ad Matfredum comitem. — Monet ut Bosonis comitis filiabus hæreditatem restituat. 787

CXLV. — Ad Valderam regem. — Monet ut Valderami causam ad exitum perducatur vel ad se remittat. 787

CXLVI. — Ad Theodoricum archiepiscopum Bisuntinensem. — Jubet ut quamprimum veniat et episcopum in ecclesia Lausanensi, propter electorum divisionem, priusquam una colloquantur, ordinari vetat. 788

CXLVII. — Ad Ametium presbyterum. — Privilegium pro monasterio Sancti Petri in pago Nemausensi. 788

CXLVIII. — Ad Frotarium archiepiscopum Burdigalensem. — Ut ad synodum veniat, et privilegium de mutatione sedium afferat. 789

CXLIX. — Privilegium pro monasterio sancti Egidii. 790

CL. — Ad omnes episcopos, comites, vicecomites, centenarios, judices, catholicos, in Hispania et Gothia degentes. — Lex de sacrilegis a Joanne papa Gothicis legibus addita in concilio Tricassino. 795

CLI. — Ad omnes fideles. — Privilegium Ecclesiæ Pictavensis, ne quis ejus bona invadat, et ut ablata restituantur. 796

CLII. — Ad episcopos pro Galliam constitutos. — Privilegium monasterio Floriacensi conceditur synodo Tricassina. 797

CLIII. — Ad Walam seu Walonem Metensem episcopum. — Concedit illi pallium certis diebus deferendum. 798

CLIV. — Excommunicatio Hugonis et Emmonis. 799

CLV. — Ad Bernardum comitem. — Jubet ut ipse cum aliis quibusdam ad synodum veniat, in qua Frotarius Bituricensis episcopus de objecto sibi infidelitatis crimine, purgare se volebat. 799

CLVI. — Bernardi comitis excommunicatio. 800

CLVII. — Ad Adalardum archiepiscopum Turonensem. — Confirmat privilegia Ecclesiæ Turonensis concessa. 800

CLVIII. — Ad diversos episcopos. — Ut invasores bonorum Ecclesiæ Turonensis cogant reddere, et nonas ac decimas solvere. 801

CLIX. — Ad episcopos Britanniæ. — Arguit eos quod a Turonensis archiepiscopi jurisdictione se subtraxerint, ejusque bona invaserint, præcipit ut ei deinceps pareant et delictorum ab illo veniam petant. 802

CLX. — Ad Arelatensem et Narbonensem archiepiscopos. — Ut causam inter Utecicensem et Avenionensem episcopos canonice definiant. 802

CLXI. — Privilegium pro monasterio Vizeliacensi. — Confirmantur immunitates olim concessæ. 803

CLXII. — Ad Wibbodem episcopum. — Commendat illius fidem, hortatur ut legatum mittat antequam cum Carolomanno in colloquium veniat, cui eum quoque interesse jubet. 804

CLXIII, CXLIV. — Privilegium pro monasterio Sancti Marcelli. 805

CLXV. — Ad Supponem comitem. — Mandat ut ad montem Cinisen (Cinisi) obviam sibi veniens, imperatricem Angelbergam, et præsules Medionalensem et Parmensem idem facere moneat, ut simul quæ ad utilitatem Ecclesiæ pertinent tractare valeant. 806

CLXVI. — Ad Wibbodem, Paulum, et Paulum ac Luidoinum episcopos. — Jubet ut Papiam ad synodum accedant. 806

CLXVII. — Ad Joannem episcopum Papiæ. — Ut sibi Taurinum obviam veniat, et epistolæ a se scriptas quibusdam episcopis dirigat, ut ipsi ad concilium accedant. 806

CLXVIII. — Ad Anspertum archiepiscopum. — Narrat labores pro Ecclesia susceptos; monet ut sibi cum omnibus episcopis suis Papiam occurrat. 807

CLXIX. — Ad Supponem comitem. — Miratur eum sibi ut decebat, non occurrisse; certiorum reddit de his quæ cum Ludovico rege egit: monet ut ad se veniat. 807

CLXX. — Ad Berengarium comitem. — Berengarii charitatem erga Romanam Ecclesiam commendat; significat celebratum in Gallia synodum, sequæ incolumem reversum: monet ut ad se venire festinet. 808

CLXXI. — Ad Anspertum archiepiscopum Medionalensem. — Increpat eum quod sibi auxilium non tulerit; et jam tertio monet ut sibi Papiam certa die cum suis suffraganeis occurrat. 808

CLXXII. — Ad Berengarium comitem. — Narrat labores pro Ecclesia susceptos. 809

CLXXIII. — Ad Ludovicum Balbum regem. — Bosonis

- comitis, et Agilmari episcopi, a quibus in Italiam deductus fuerat, studium erga se operamque commendat. 810
- CLXXIV. — Ad Ludovicum regem. — Miratur quod filiabus Bosonis, pro quibus alias rogaverat, hereditatem jure debitam non restituerit; iterumque monet ut ipsam hereditatem integram eis restituat. 811
- CLXXV. — Ad Hugonem. — Monet ut dissensionem inter Abbonem et alios ortam sedet. 811
- CLXXVI. — Ad Romanum electum archiepiscopum Ravennatem. — Lætatur eum Ravennatem archiepiscopum electum; jubet ne quidquam electionis causa ulli promittat; et epistolam suam Leoni, et Romanis scriptam afferendam curet, eorumque responsum ad se dirigat: res Joannis et Deusediti ducum restituat. 812
- CLXXVII. — Ad Ravennates. — Dolet eorum antistitis morte: monet, ut electum ab eis archiepiscopum congruo prosequantur honore; Ecclesiam Ravennatem, et Deusedit et Joannis ducum bona defendant. 812
- CLXXVIII. — Ad iudices et duces Ravennates. — Jubet ut civitatem contra Lambertum virilitate defendant. 813
- CLXXIX. — Ad Theodoricum et Isaac episcopos. — Præcipit ut excommunicent eos qui Wiperto comiti filium eriperant, et regionem populabantur. 813
- CLXXX. — Ad Hugonem comitem. — Monet ut quosdam facinosos puniat. 814
- CLXXXI. — Ad Hugonem, Theodoricum et Bernardum comites. — Ut amicitia charitatisque fœdus cum Bosone iectum servent. 814
- CLXXXII. — Ad Vulgarium monachum. — Ut Wiperto episcopo obediat, qui eum per dimissionis acquisivit. 814
- CLXXXIII. — Ad clerum Mediolanensem. — Præcipit ut quoties episcopus Ticiniensis eos ad synodum vocaverit, accedat. 815
- CLXXXIV. — Ad Joannem episcopum Ticiniensem. — Raptores uxores cujusdam Ragiberti excommunicari jubet. 815
- CLXXXV. — Ad omnes fideles. Præcipit ne quisquam monasterio Sancti Augustini quidquam detrimenti afferat. 815
- CLXXXVI. — Ad episcopos in regno Ludovici constitutos. Rescribit de indulgentia eorum qui contra paganos pugnantes occubuerant. 816
- CLXXXVII. — Ad Wifredum episcopum Venciensem. — Episcopum qui cum excommunicatis communicarat, missarum celebratione prohibet. 816
- CLXXXVIII. — Ad Odonem episcopum Bellovacensem. — Decernit, impuberes qui alium occiderant, post peractam penitentiam ordinari posse. 817
- CLXXXIX. — Ad Aimarum et Widonem episcopos. — Ut Rostagni uxorem ad se venire jubeant, illiusque adjutores, nisi resipuerint, communione privent. 817
- CXC. — Ad Walam episcopum Metensem. — Ne cogatur sponsus uxorem ducere ab alio corruptam. 817
- CXCI. — Ad Joannem episcopum Ticiniensem. — Ut cum quodam, qui penitentiam quinquennio egerat, remissus agat. 818
- CXCII. — Ad Aginulfum episcopum Gabalitanum. — Ut præsentium laboribus ablata restitunda curet. 818
- CXCIII. — Ad Bisuntinensem archiepiscopum. — Significat se Fulcardum ejusque conjugem ab excommunicatione absolvisse. 818
- CXCIV. — Ad Gaiderim principem Beneventanum. — Consolatur eum de damnis ab Agareis illatis, auxilium pollicetur, sequi in ejus partes venturum. 819
- CXCV. — Ad Ajonem episcopum. — Commendat ejus erga se observantiam; certiorum eum de sua incolumitate reddit, tum consolatur de obitu fratris. 819
- CXCVI. — Ad Daferium comitem. — Consolatur Daferium, eique opem pollicetur. 820
- CXCVII. — Ad Romanum archiepiscopum Ravennatem. — Præcipit ut Romam ad synodum cum suffraganeis accedat. 820
- CXCVIII. — Privilegium pro monasterio Placentino. 821
- CXCIX. — Ad Romanum archiepiscopum. — Ut Luponem presbyterum in Sarcennati Ecclesia episcopum ordinet. 821
- CC. — Ad Anspertum archiepiscopum Mediolanensem. — Ut Romam ad synodum celebrandam cum suffraganeis accedat, ubi de imperatoris electione agetur; jubet ne quemquam regem excipiat, antequam ipse imperatorem elegerit: nisi paruerit, eum excommunicat. 822
- CCI. — Ad Athanasium episcopum Neapolitanum. — Commendat ejus erga se observantiam; de suo incolum redditu certiorum ipsum facit; hortatur ad perseverantiam, donec simul conveniat. 823
- CCII. — Ad eundem. — Ejusdem argumenti ac præcedens. 824
- CCIII. — Ad eundem. — Ut sibi indicet locum ubi simul possint de communis patriæ salute colloqui. 824
- CCIV. — Ad Carolum regem. — Hortatur ut legatos mittat, et in auxilium Ecclesie Romanæ veniat. 825
- CCV. — Ad Wibertum episcopum. — Arguit eum quod bis vocatus ad se venire neglexerit; præcipit ut veniat objectis responsurus. 825
- CCVI. — Ad Berengarium comitem. — Declarat suam in eum benevolentiam, commendat ejus erga Romanam Ecclesiam observantiam; rogat ut Stephanum episcopum in tuendis Ecclesiæ suæ juribus adjuvet. 825
- CCVII. — Ad Pandenulfum comitem. — Rogat ut legatis imperatoris per ejus regionem transituris auxilium præstet; condolet de paganorum in eum incursione: excusat se, cur ad eum non eat: hortatur ut sit animo forti, promittitque subsidium. 826
- CCVIII. — Ad archiepiscopos, eorumque suffraganeos. — Ne Biebertinum ante causæ discussionem excommunicent. 827
- CCIX. — Ad Bosonem comitem. — De incolum ejus prosperitate gratulatur: se tum eum tum Angelbergam imperatricem charos habere ostendit; rogat ut Adelberto et illius conjugi Rotildæ bona quæ in provincia possederant, retinere permittat. 827
- CCX. — Ad Liudetrudum comitem, ejusque conjugem. — Excommunicat eos quia monialem, monasterio rapuerant. 828
- CCXI. — Ad Gregorium primicerium. — Commendat ejus studium erga Ecclesiam et imperatores; significat se ad Constantinopolitanæ Ecclesie perturbationes sedandas paratum esse: ostendit imperatoris legatos honorifice se excepturum, quos etiam a comite Capuano recipi et ad se mitti jam antea mandarant. 828
- CCXII. — Excommunicatio Ansperti quia ad synodum vocatus venire contempserat. 829
- CCXIII. — Ad Theodosium patriarcham Hierosolymitanum. — Excusat tardum legatorum ejus reditum, per quos quædam munera ad eum mittit, rogans ut pro se assidue Deum precetur. 829
- CCXIV. — Ad Carolomanum regem. — Ut in Verceilensi Ecclesia Gospertus diaconus constituatur episcopus. 830
- CCXV. — Ad Carolum regem. — Hortatur ut quamprimum contra fideles et Ecclesie oppressores auxilio veniat. 831
- CCXVI. — Ad Wibodum episcopum. — Ut una cum legatis quos ad Carolomanum mittit, eat, vel aliquem vice sua mittat; arguit, quod bona Angelbergæ diripi non prohibuerit: hortatur ut ea recuperanda curet. 831
- CCXVII. — Ad Michaelem regem Bulgarorum. — Hortatur ut ad obedientiam Romanæ Ecclesie, a quo seductus recesserat, cum sua gente revertatur. 832
- CCXVIII. — Ad consiliarios Michaelis regis Bulgarorum. — Ejusdem argumenti. 833
- CCXIX. — Ad Sedesclavum comitem. — Præcipit ut legato quem ad regem Bulgarorum mittit, iter tutum præbeat ac necessaria suppediet. 833
- CCXX. — Ad Gregorium primicerium. — Rogat ut legatos Constantinopolitanos ad se mittat; pollicetur, cum Francorum rex Romam venerit, se ad eum auxilio iturum. 834
- CCXXI. — Ad Wibodum episcopum. — Ut apud Carolomanum, vel Carolum ejus fratrem, de Ecclesia Dei a paganorum infestationibus defendenda agat, et si archiepiscopus Caroli Romam venerit, ipse quoque veniat; sin minus, eorum regum voluntatem sibi litteris aperiat. 834
- CCXXII. — Ad Bosonem comitem. — Scribit se tacitum tenere quod secreto ex ipso audierat, et auxilium, quod promiserat, ab eo omnino expectare; præterea se bene valere. 835
- CCXXIII. — Ad Anspertum archiepiscopum Mediolanensem. — Arguit eum quod tertio vocatus ad concilium non venerit; præcipit ut ad synodum celebrandam cum suis episcopis accedat, et cum Francorum regibus, qui in Italiam fuerant ingressi, placitum non faciat; non aliter excommunicationem minatur. 836
- CCXXIV. — Ad eundem. — Ejusdem pene argumenti. 837
- CCXXV. — Ad Theodosium electum episcopum Nonensem. — Laudat ejus erga Romanam Ecclesiam observantiam et præclaras ejus virtutes; testatur suam in eum benevolentiam: monet ut a se consecrationem episcopalem accipiat. 838
- CCXXVI. — Ad Anselmum episcopum Lemovicensem. — Non separandum virum ab uxore, qui filium suum necessitate urgente baptizaverit. 839
- CCXXVII. — Ad Carolomanum regem. — Hortatur ad Ecclesie Romanæ defensionem, quæ a Saracenis multis

- afficiebatur detrimentis ; rogat ut legatos benigne excipiat, et fidem illis adhibeat. 839
- CCXXVIII. — Ad eundem. — Ut in Verceilensis Ecclesie Consensus creetur episcopus. 840
- CCXXIX. — Ad Branimirum. — Suscipit eum ad Romanæ Ecclesie gremium redeuntem ; monet ut in Dei amore perseveret ; impartitur benedictionem apostolicam, qua non petierat ; hortatur, ut permittat legatum suum epistolam Bulgarorum deferre. 841
- CCXXX. — Ad sacerdotes et populos Branimiro subiectos. — Excipit eos ad Romanæ Ecclesie gremium redeuntibus ; monet ut perseverent. 842
- CCXXXI. — Ad Michaëlem regem Bulgarorum. — Agit Deo gratias quod legatos ad se miserit, doctrinam ecclesiasticam et canonica instituta recepturus ; hortatur ut ad Romanam Ecclesiam redeat ; et si ei placuerit, se legatum missurum pollicetur. 843
- CCXXXII. — Ad Airardum archiepiscopum Ausensem ejusque suffraganeos. — Hortatur ad depravatos populi mores corrigendos, præcipit incesta matrimonia ; ne quis relicta uxore aliam ducat, aut simul eum uxore concubinam habeat, ut res immobiles ecclesie nemo sibi usurpet, et ut clerici sub episcopi sint potestate. 844
- CCXXXIII. — Ad Rostagnum et alios. 845
- CCXXXIV. — Ad Salonitanos clericos. — Monet ut ad gremium Romanæ Ecclesie revertantur ; et electus ab eis archiepiscopus consecrationem et pallium a se, et non ab alio accipiat ; utque legato quædam verbis relato fidei adhibeat. 846
- CCXXXV. — Ad tres archiepiscopos. — Ut Nemausensem episcopum a monasterii ejusdam iniqua invasione removeat, et si non paruerit, excommunicat. 847
- CCXXXVI. — Ad Michaëlem regem Bulgarorum. — De legatione ac muneribus missis gratias agit ; dolet eum defecisse ab Ecclesia Romana, ad quam monet ut revertatur ; ostendit Græcos Bulgarorum diocesim, cum sit Romani pontificis, contra canones delinere. 848
- CCXXXVII. — Ad Arastasium abbatem. — Præcipit ut cellulam Gauderico episcopo reddat. 849
- CCXXXVIII. — Ad Tuventuram de Marauna. — Hortatur ut, omnem falsam doctrinam rejiciens, in Romanæ Ecclesie fide maneat ; miratur Methodium aliter quam fuerat professus docere, et propterea a se vocatum fuisse significat. 849
- CCXXXIX. — Ad Methodium archiepiscopum pannoniensem. — Præcipit ut ad se veniat, ut de ejus doctrina cognoscere possit. Missas Sclavonica lingua celebrari prohibet. 850
- CCXL. — Ad Anspertum archiepiscopum Mediolanensem. — Arguit quod sedi apostolicæ obediens non fuerit, ejusque legatos injuriose tractarit et excommunicatis missas celebrari, ideo monet ut ad synodum se purgaturus quamprimum vel per se vel per legatos accedat. 850
- CCXLI. — Ad Angelbergam Augustam. — Significat se modo absolvere nolle Anspertum archiepiscopum ; sed si in synodo crimina quæ obijciuntur diluerit, tunc eum excommunicatione absoluturum ; ait se pro Ludovico imperatore in anniversario ejus die sacrificaturum. 851
- CCXLII. — Ad Ludovicum regem. — Gratias agit de propensa voluntate erga Romanam Ecclesiam ; hortatur ut ad eam a paganorum incursionibus defendendam veniat, eique tacite imperium pollicetur. 852
- CCXLIII. — Ad Basilium, Constantiam et Alexandrum imperatores. — Imperatorum precibus commotus, ut pax sit ecclesie Constantinopolitanæ, dispensat cum Photio ut in Ignatii locum Constantinopolitanæ Ecclesie patriarcha subijogetur, statuens ne deinceps quisquam ad patriarchatam dignitatem, nisi per gradus ecclesiasticos ascendat ; jubet patriarcham Constantinopolitanum Bulgarorum diocesim sub Ecclesie Romanæ jurisdictione relinquere, monet omnes ut patriarchæ debitum præsent obsequium ; præcipit ut ad Ecclesie communionem eos qui a Methodio et Ignatio initiati fuerant, admittant ; excommunicat illos qui eum Photio noluerint communicare. 853
- CCXLIV. — Ad Constantinopolitanos. — Jubet eos, schismate sedato, ad Ecclesie unitatem redire, et Photio communicare. 863
- CCXLV. — Ad clericos Constantinopolitanos. — Ejusdem ac præcedens argumenti. 865
- CCXLVI. — Ad Paulum et Eugenium episcopos. — Constituit eos una cum Petro presbytero legatos, ut sicut illos monerat, pacem in Ecclesia Constantinopolitana conficiant. 867
- CCXLVII. — Ad Paulum et Eugenium episcopos, similiter ad Petrum presbyterum. — Mansi monitum in sequentem epistolam. 867
- Adnotatio Severini Bini. 870
- CCXLVIII. — Ad Photium patriarcham Constantinopoli-
- tanum. — Photium patriarcham Constantinopolitanum constituit, dummodo in synodo veniam postulet ; discernit ne deinceps ullus e laicis in eandem Ecclesia statim episcopum ordinetur ; jubet Bulgaricam diocesim Ecclesie Romanæ restitui. 870
- Adnotatio Severini Bini. 872
- CCXLIX. — Ad Landulfum et Landonem. — Scribit Trajectum se iturum, et quæ paci eorum conducant, curaturum ; ibique cum de aliis, tum de Landulfo Capuanæ Ecclesie episcopo electo acturum. 875
- CCL. — Ad Guariferum principem Salernitanum. — Eadem quæ in superioribus ; præterea arguit quod contra Capuanos arma supererit ; rogat ut mancosos sibi ab Amalitanis restitui curet. 876
- CCLI. — Ad Leonem episcopum. — Dolet Capuæ discordias esse excitatas ; significat se Trajectum iturum, ibique de Landulfo episcopo electos cujus confirmationem petierat, acturum. 877
- CCLII. — Ad Landulfum presbyterum. — Laudat eum quod ad propinquorum suorum inimidas evitandas Capua fuerit egressus, et in discordiis sedandis elaboret ; significat Trajectum se iturum ibique de ejus electione deliberatum. 878
- CCLIII. — Ad Pulcarem præfectum. — Arguit quod nec fœdus cum paganis ictum ruperit, nec ditionem sancti Petri, sicut promiserat, defenderit ; præcipit ut pecuniam pro ea re datam ad se remittat. 878
- CCLIV. — Ad monachos Pultariensis cœnobii. — Dolet de eorum calamitatibus, et significat se ipsorum causa Bosoni principi atque Huzoni abbati scripsisse ut eos adjuvarent ; exemplar etiam testamenti Gerardi fundatoris Ansegio archiepiscopo et Conrado comiti misisse. 879
- CCLV. — Ad Hugonem abbatem. — Ut monasterium Pultariense tueatur. 879
- CCLVI. — Ad Hugonem et Radulfum. — Quod Vendoram villam sancti Petri Pultariensis nulli concesserit, et Arembertum, qui a Bosone eam accepit, excommunicari jusserit, nisi ab ea abstineat. 880
- CCLVII. — Ad Bosonem comitem. — Ut Arembertum et quosvis alios a Vendora villa removeat, eamque Pultariensibus restituat et monasterium ipsum tueatur. 880
- CCLVIII. — Ad Guariferum principem Salernitanum. — Monet ut a molestiis desistat quas Capuanis inferebat ; significat se in ejus regiones iturum et discordias sedaturum. 881
- CCLIX. — Ad Pandulfum, castaldum. — Significat se Guarifero scripsisse ut ab inferendo Capuanis damno desisteret. 882
- CCLX. — Ad Carolum regem. — Scribit se litteris eum, ut ad imperium promoveret, ad Urbem advocasse, Ravennam usque ad eum processisse, sperasseque se auxilium ab eo adversus Romanæ Ecclesie hostes recepturum ; quæ spera ita eum frustrata est, ut nunquam hostes magis scire sperit ; petit ut Ecclesie opem ferat, et dum iter parat, legatos ad se mittat ; suosque legatos commendat. 882
- CCLXI. — Ad eundem. — Dolet se non posse eum eo colloqui. Arnulfo legatum ad eum mittit, petens ne Romanam Ecclesiam ab hostibus lædi patiatur, ideoque ejus legatum cum Arnulfo ad se mitti jubet. 883
- CCLXII. — Ad Romanum archiepiscopum. — Miratur quod injuriis læcessitus ad se non confugerit ; nuntium Ravennam mittit, qui omnia contra eum gesta diligenter inquiret, et eos qui injuriam intulerant, Romam venire compellat ; quibuscum ipse ad synodum proficiscatur, ubi ejus causa agatur : eumque arguit quod in sua Ecclesia non resideat. 884
- CCLXIII. — Ad omnes fideles. — Præcipit ut Ticinensi episcopo, cui potestatem excommunicandi tribuerat, obediant. 885
- CCLXIV. — Ad Romanum archiepiscopum Ravennatem. — Præcipit ut Romam ad synodum veniat. 886
- CCLXV. — Ad clerum Mediolanensem. — Præcipit ut in locum Ansperti archiepiscopi in Romana synodo privati alium a se consecrandum sufficient : mittit legatos qui una cum ipsis electioni intersint, quibus in omnibus obediendi jubet. 886
- CCLXVI. — Ad Carolum regem. — Significat Anspertum dudum archiepiscopum Mediolanensem in Romana synodo privatum, ac Josephum, quem ille in Verceilensi episcopum ordinaverat, depositum ; rogat ut Consperitum in Verceilensi ecclesia episcopum a se consecratum tueatur. 887
- CCLXVII. — Ad Verceilenses. — Præcipit ut Consperitum a se illis episcopum constitutum recipiant et congruo honore colant. Josephi invasoris acta nulla esse declarat. 888
- CCLXVIII. — Ad Notingum Novariensem episcopum. — Monet ut res Angelbergæ restituat ; sin minus, denunat

- illi excommunicationem, nisi intra duos menses ad red-
dendam de his rationem Romam veniat. 889
- CCLXIX. — Ad Amalfitanos. — Significat se eos excom-
municasse donec se a paganis separent; minatur illis
alias penas, nisi quamprimum parvant. 889
- CCLXX. — Ad Helmoium episcopum Pennensem. —
Arguit quod ad synodum non accesserit; jubet statuta die
ad se venire, et interim quemdam absolvere, quem in-
juste excommunicaverat. 880
- CCLXXI. — Ad Paulum episcopum. — Jubet ecclesiam
in villa Carpana sitam restitui, ibique sacerdotem consti-
tuit, et sacrum chrisma annuatim in eadem mitti. 890
- CCLXXII. — Ad Theodoricum, Heodicum, etc. —
Ostendit mulierem, quæ vi minisque coacta religiosum habi-
tum susceperat, ad vota servanda non teneri; hujus tamen
causam illis definiendam committit. Quod si qua oriatur
difficultas, eos vel eorum legatos cum ipsa muliere ad se
venire jubet. 891
- CCLXXIII. — Ad Athanasium, Pulcreum, etc. — Præci-
pit ut fœdus cum Saracenis ictum rumpant; quod nisi Ka-
lendis Decembris fecerint, eis excommunicationem mina-
tur. Pulcreum monet ne Pandenulfo Capuano judici mo-
lestiam inferat. 892
- CCLXXIV. — Ad Arpaldum episcopum Asculanum. —
Arguit quod ad synodum non venerit; jubet a se venire,
ut iis quæ a suis clericis objiciebantur, respondeat. 893
- CCLXXV. — Ad Carolum regem. — Miratur quod cum
Papam venerit, ubi simul convenire debebant, legatos
ad se non miserit: petit illos, destinet, ut se ad eum
conferre possit. 894
- CCLXXVI. — Ad eundem. — Gratias agit quod cum a
se fuerit Consperitus Ecclesiæ Verocellensis episcopus ordi-
natus, ejus ordinationi libenter acquieverit; se excusat
quod Anspertum archiepiscopum Mediolanensem ejus pre-
cibus non absolvat. 894
- CCLXXVII. — Ad Ludovicum et Carolomannum reges.
— Gratias agit de ipsorum erga Romanam Ecclesiam af-
fectu, et mutuum studium pollicetur. 895
- CCLXXVIII. — Ad Hugonem et alios comites. — Gra-
tias agit de fide quam Ludovico et Carolomanno regibus
servabant. 895
- CCLXXIX. — Ad Joannem episcopum Ticinensem. —
Præcipit ut ecclesiam in Carpana villa sitam, quam Paulus
Regiensis episcopus reficere neglexerat, restituat, ibique
sacerdotem proprium constituat et sacrum chrisma an-
nuatim mittat. 896
- CCLXXX. — Ad Theutmarum archiepiscopum. — Mira-
tur eum morari et ad se non venire; monet ut statim ve-
niat. 896
- CCLXXXI. — Ad Antonium episcopum et Berengarium
comitem. — Liutfredum comitem, quia moniale quæ de
monasterio effugerat, suscepit, et bona Angelbergæ impe-
ratrix deripuit, excommunicat, nisi statuto tempore
satisfecerit: monet ne quisquam cum eo communicet. 896
- CCLXXXII. — Ad Egilbertum episcopum. — Arguit
eum quod cum excommunicationis a sede apostolica com-
municarit: jubet ne cum Liutredo et Odebrico excommuni-
catis communicet. 897
- CCLXXXIII. — Ad Egifridum et alios. — Rogat ut ho-
norem Angelbergæ imperatricis curam sustineant. 898
- CCLXXXIV. — Ad Eubertum comitem. — Minatur
illi excommunicationem, nisi res sancti Petri et Angel-
bergæ imperatricis restituat. 898
- CCLXXXV. — Ad Gisulfum abbatem. — Ejus curæ mo-
nasterium Angelbergæ imperatricis committit. 899
- CCLXXXVI. — Ad Gregorium, Theophylactum et Dio-
genem, etc. — Gratulatur de victoria contra Saracenos
parla; miratur eorum Romam non venerint: mandat ut contra
Saracenos sibi auxilio veniant. 899
- CCLXXXVII. — Ad Athanasium episcopum Neapolita-
num. — Commendat ejus erga sedem apostolicam obser-
vantiam; hortatur ut, sicut promiserat, pactum cum Sara-
cenis ictum frangat Amalfitanos per legatum suum ea de
re admonitos, si parere neglexerint, excommunicandos
significat. 900
- CCLXXXVIII. — Ad Amalfitanos. — Monet ut rupto
cum Saracenis fœdere ad Ecclesiæ gremium revertantur,
et eam ob rem singulis annis decem millia manesorum et
eo anno mille daturum se promittit; nisi paruerint, mina-
tur excommunicationem. 901
- CCLXXXIX. — Ad Carolum Crassum regem Italiae. —
Rogat ut Hieronymum episcopatum Lausanensem pacifice
reficere permittat, et Hubonem res Ecclesiæ Bisuntinæ
ablatas reddere jubeat. 901
- CCXC. — Ut Hieronymi episcopi Lausanensis causam
apud Carolum regem procuret. 902
- CCXCI. — Ad Theodoricum archiepiscopum Bisuntinen-
sem. — Significat se de ipsius causa Carolo regi scripsisse;
- ac de Hieronymo episcopo Laudunensi hortatur, ut adju-
vare illum studeat. 903
- CCXCII. — Ad Carolum regem. — Commendat ejus erga
Romanam Ecclesiam observantiam; rogat ut legatum sibi
auxilio mittat. 903
- CCXCIII. — Ad Sftenopulcrum comitem. — Gratulatur
de ejus et subditorum illius observantia erga sedem apo-
stolicam, recipit eos in fidem suam: ostendit Methodium
archiepiscopum orthodoxam fidem fuisse professum;
cujus jura et privilegia confirmat, eumque ad eos re-
gendos mittit. Nitrensis Ecclesiæ episcopum consecratum
significat, et alium ad se vult mitti, quem alii ecclesiæ
præficiat: jubet omnes ipsi archiepiscopo obedire; con-
cedit ut divina officia Slavonica lingua recitari possint,
dummodo Evangelium Latina prius recitetur. 904
- CCXCIV. — Ad Landulfum episcopum Suricorum. —
Objurgat quod violaverit quæ ipse inter eum et Landenu-
lum Capuanum episcopum de frugibus illius ecclesiæ de-
creverat; minatur illi excommunicationis penam, nisi
suis decretis pareat: præcipit ut si se læsum sentiat, cum
eodem episcopo causam dicturus ad se veniat. 906
- CCXCV. — Ad Carolum regem. — Gratulatur de ejus
erga Romanam Ecclesiam observantia, cuius eum de-
fensorem elegit; monet ne adversariis fidem habeat: laudat
quod ditionem sancti Petri ab hostili incurso defendi jus-
serit. Bosoni tanquam tyranno auxilium se non daturum
affirmat; optat ejus adventum, et rogat ut legatos mittat.
907
- CCXCVI. — Ad imperatores augustos. — Commendat
eorum studium in Ecclesiæ concordia stabilienda; monet
ut in eo persistent: agit gratias de dromonibus auxilio
missis: de monasterio Sancti Sergii, et de Bulgarorum
diocesi sedi apostolicæ restituta; rogat ut Dei Ecclesiam
tueantur: demum ea quæ pro Photio in synodo Constanti-
nopolitana acta sunt, se approbare significat, si tamen le-
gati contra sua non egerint. 909
- CCXCVII. — Ad Photium. — Gratulatur de concordia
Ecclesiæ Constantinopolitanæ: miratur multa, quæ statue-
rat, mutata esse: approbat quæ Constantinopoli in con-
cilio pro causa Photii acta sunt, si tamen legati contra sua
mandata non egerint. 910
- CCXCVIII. — Ad Carolum regem. — Gratias agit de ejus
erga sedem apostolicam observantia; suam erga eum
benevolentiam testatur: adventum ejus pro Ecclesiæ ne-
cessitatibus exspectat, monetque ut aliquem legatum
mittat. Queritur de Georgio quodam excommunicato, qui,
ipsius imperatoris auctoritate fultus, bona Romanæ Ec-
clesiæ invaserat; rogat ut promissa auxilia mittat. 911
- CCXCIX. — Ad Romanum archiepiscopum Ravennatem.
— Jubet eum Romam ad synodum causâ dissolvendi quas-
dam quæstiones advenire. 912
- CCC. — Ad universos episcopos. — Ut Romam ad syno-
dum adveniat. 913
- CCCI. — Ad Carolum regem. — Lætatur de ejus inco-
lunitate, Deumque orat ut omnia ei prospere eveniant:
nuntiat Saracenos a Græcis victos, sequæ a Saracenis, et
aliis etiam valde premi, quare petit ut sibi quam citissime
auxilio veniat. 914
- CCCII. — Ad eundem. — Deus dedit Ravennatem injuste
excommunicatum absolvi; confirmat illius cum Maria
uxore conjugum: jubet eum defendi. 915
- CCCIII. — Ad Anspertum archiepiscopum Medionalen-
sem. — Inobedientiam eum arguit, præcipitque ut Rho-
dodum et Waricum monachos, quos injuste in carcerem
conjecerat, ad eorum monasterium honorifice remittat. 916
- CCCIV. — Ad Salomonem procuratorem Papiæ. — Ejus-
dem argumenta. 916
- CCCV. — Ad Adelbertum marchionem. — Ab excom-
municatione eum absolvi, ejusque homines, si spatio quin-
decim dierum intra mensem Martium Ecclesiæ satisfacere-
runt. 917
- CCCVI. — Ad Oteramum Viennensem episcopum. —
Arguit quod faveat sociis Bosonis, idque a se imperari as-
seret; præcipit ut Romam accedat ut crimina quæ ipsi
objeuntur diluat. 917
- CCCVII. — Ad Barnimerum comitem, sacerdotes, etc. —
Ostendit sibi gratissimum fuisse eorum in sedem apostoli-
cam observantiam; hortatur ad perseverantiam. Jubet le-
gatos ad se mitti, quibus reverentibus legatum suum mis-
surum pollicetur, cui ipsi fidelitatem juxta Ecclesiæ ritum
promittant. 918
- CCCVIII. Ad Michaëlem regem Bulgarorum. — Miratur
quod legatos non miserit, quemadmodum jam diu promise-
rat; monet id ut quamprimum faciat. 919
- CCCIX. — Ad quemdam (Carolus Crassus regem). —
Monet ut perliciat quæ per legatos mandavit. 919
- CCCX. — Ad Anspertum Mediolanensem archiepisco-
pum. — Confirmat Josephi episcopi Astensis ordinatio-

- nem, qui alias contra canones Vercellensis Ecclesiæ fuerat episcopus constitutus. 920
- CCCXI. — Ad Altonium. — Excommunicat eum, nisi Ecclesiæ Mediolanensi bona quæ abstulerat restituat, et ad obedientiam sui archiepiscopi cum sociis redeat. 921
- CCCXII. — Ad Anselmum Mediolanensem archidiaconum. — Minatur illi excommunicationis pœnam, nisi ad sui archiepiscopi obedientiam redeat. 923
- CCCXIII. — Ad Joannem, Egilulfum, etc. — Causam inter Tridentanum et Veronensem episcopos versantem eis committit; monet ut eam jure definiant, et ad se sententiam mittant, ut eam confirmare possit. 923
- CCCXIV. — Ad Adelchisium episcopum Tridentanum. — Arguit eum quod bona Veronensis episcopi invaserit; ejus causam quibusdam episcopis se commisisse significat; monet ut eorum acquiescat sententiæ. 923
- CCCXV. — Ad Ludovicum et Carlomanum reges. — Rogat ut cum Carolo imperatore consentiant de revocanda et Romam mittenda Angelberga, ubi eam ita se custoditurum pollicetur, ut contra ipsos moliri nihil possit. 924
- CCCXVI. — Ad omnes archiepiscopos, episcopos et comites Italiæ. — Hortatur dent operam ut Carolus imperator Angelbergam Romam venire patiatur, quam se ita custoditurum promittit, ut nihil contra ipsum Carolum cum Bosone moliri possit; et si quid tentaverit, se eandem remissurum pollicetur. 925
- CCCXVII. — Ad clerum Mediolanensem. — Recipit Hadericum sub tutela sedis apostolicæ, et excommunicat omnes qui illi vel ejus ecclesiæ molestiam intulerint. 926
- CCCXVIII. — Ad Athanasium episcopum Neapolitanum. — Arguit eum quod non frugerit fœdus quod cum Saracenis facerat, cum promiserit illud rumpere; ostendit multa mala ejus causa a Saracenis Christianis fuisse inflata; minatur illi excommunicationem, nisi fœdus illud rumpat. 927
- CCCXIX. — Ad Methodium archiepiscopum. — Gratulatur de orthodoxæ fidei cultu, et de ejus erga religionem studio et cura; precatur in dies spirituale profectum majorem, eumque consolatur. 928
- CCCXX. — Ad Carolum imperatorem. — Nuntiat imperatori se his malis a Saracenis affici, ut amplius sustinere non possit; rogat eundem ut sibi subsidio exercitum mature mittat, eique palmam cum benedictione mittit. 929
- CCCXXI. — Ad diversos episcopos. — Athanasium Neapolitanum episcopum, qui sæpe monitus, nunquam, sicut promiserat, fœdus cum Saracenis ictum rumpere voluit, a se cum omnibus ei consentientibus excommunicatum significat. 930
- CCCXXII. — Ad Romanum archiepiscopum Ravennatem. — Arguit quod Albericum comitem Ravennam asciverit, et nobiles Ravennates contra jusjurandum sibi præstitum vexarit; cum Neapoli reversus fuerit, ait se ea omnia curaturum; jubet Dominicum archidiaconum Faventinæ Ecclesiæ episcopum consecrari. 931
- CCCXXIII. — Ad eundem. — Arguit eum quod alterius legitimam uxorem raptori tradi consenserit, et Romanæ Ecclesiæ ausus fuerit adversari; has ob causas illum a conferendis sacris ordinibus suspendit, donec a synodo, ad quam eum jubet venire, ejus causa cognoscatur. 932
- CCCXXIV. — Ad eundem. — Jubet Placentinos clericos, quos sine commendatitiis litteris ad eum confugientes receperat, ad eorum episcopum remitti; ejusdem etiam Ecclesiæ clericos absolvi, donec cum eis ad synodum veniat. 933
- CCCXXV. — Ad Constantinum sacerdotem. — Excommunicat eum quod absque sua licentia ab archiepiscopo Ravennate ad Faventinæ Ecclesiæ episcopatum promotus fuerit; prohibetque eum illius Ecclesiæ administrationem attingere, donec ad synodum Romanam veniat. 933
- CCCXXVI. — Ad Joannem episcopum Ficclensem. — Visitationem Faventinæ Ecclesiæ pastore destituta, ejusque curam ei committit, donec novus pastor eidem præficiatur. 934
- CCCXXVII. — Ad Romanum archiepiscopum. — Ad synodum Romam sub pœna excommunicationis venire jubet, ut ad ea quæ objiciebantur respondeat. 934
- CCCXXVIII. — Ad Carolum imperatorem. — Petrum et Zachariam legatos ad eum mittit; causa corrigendi mala, quæ se, eo regnante, perpessum queritur. 935
- CCCXXIX. — Ad Ravennates. — Præcipit ut se a Ravennatis archiepiscopi in synodo excommunicati communione separent, quousque eum absolutum cognoverint. 935
- CCCXXX. — Ad Carolum imperatorem. — Gratulatur de ejus observantia erga Romanam Ecclesiam; lætatur ipsam Ravennam venire velle, ut de Ecclesiæ et imperii statu
- agat; rogat ut ante diem quem præstituerat accedat. 936
- CCCXXXI. — Ad Willibertum archiepiscopum Agrippinensem. — Commendat ejus vigilantiam, et presbyterum quemdam excommunicatum, nunc ipsius testimonio longa pœnitentia purgatum, ejus precibus commotus absolvit, et sacerdotali ministerio restituit; causam Gedeonis adulteri ei committit, ut sententiam canonicè ferat. 936
- CCCXXXII. — Ad Leonem, Landulfum et Landonem. — Ut Auxentii filium, ab Attinulfo captum, patri restitutum eurent. 937
- CCCXXXIII. — Ad Michaellem regem Bulgarorum. — Hortatur ut ad finem et obedientiam Romanæ Ecclesiæ redeat et legatos mittat. 938
- CCCXXXIV. — Ad imperatorem et imperatricem. 939
- CCCXXXV. — Ad Angelbertam imperatricem. 939
- CCCXXXVI. — Ad eandem. 939
- CCCXXXVII. — Ad eandem. 339
- CCCXXXVIII. — Ad Domasolem ducem gloriosum. 939
- CCCXXXIX. — Ad Rostangum archiepiscopum Arelatensem. — Communionem privetur sponsa, nisi raptorem deserere et ad sponsum suum redire voluerit. 940
- CCCL. — Ad Sigibodum archiepiscopum Narbonensem. — De examinanda causa cujusdam presbyteri. 940
- CCCLII. — Ad Cennemocum episcopum Venetensem. — Quod sacerdos homicida non potest in sacerdotio manere. 941
- CCCLIII. — Ad episcopos Britannicæ. — De ordinatis ab Heolocaro abbate monachis. 941
- CCCLIII. — Ad Petrum episcopum. 941
- CCCLIV. — Ad Marinum et Pulcharem. 942
- CCCLV. — Ad Cozilem comitem. — De illis, qui, uxori- bus dimissis, ad alias nuptias transierint. 942
- CCCLVI. — Constitutio de jure cardinalium. 942
- CCCLVII. — Contra violatores Domus Dei. 943
- CCCLVIII. — Ad Theibergam et Aldericum. — Illos hortatur ut Radulfo suam uxorem reddant. 943
- CCCLIX. — Ad Berrarium abbatem. — De reverentia erga summos pontifices. 944
- CCCL. — Ad Photium patriarcham Constantinopolitanum. — De processione Spiritus sancti. 944
- CCCLI. — Ad quemdam (f. Romanum archiep. Raven.). — Laudat ejus studium erga sedem apostolicam, eumque monet ut perseveret; pollicetur eum a se in amicorum numero referri; præcipit ut Romam veniat. 946
- CCCLII. — Ad Athanasium episcopum Neapolitanum. — Ab excommunicatione eum absolvit, et ministerio sacerdotali restituit, dummodo pactum cum Saracenis mitum, sicut promiserat, rumpat, et ex eis aliquos cæteris jugulatis, captos mittat, nec deinceps cum eis fœdus feriat. 946
- CCCLIII. — Ad Genevenses. — Præcipit ut Optando episcopo a se consecrato obediant. 947
- CCCLIV. — Ad Carolum imperatorem. — Queritur multa bona Ecclesiæ Romanæ a Widone quodam marchione crepta; rogat ut Ecclesiam defendat, et ipsemet adjuvator veniat. 948
- CCCLV. — Ad Riccardem Augustam. — Queritur nullam sibi contra Saracenorum excursionem opem ferri; rogat ut ab imperatore celeriter postulet auxilium; legatum suum commendat; petit det operam ut Angelberga ab exilio revocetur et Romam mittatur. 949
- CCCLVI. — Privilegium pro monasterio Montis Casini. 950
- CCCLVII. — Ad archiepiscopum Viennensem. — Arguit quod, detruso in carcerem Optando episcopo, alium in Ecclesia Genevensi constituerit; præcipit ut illum sedi suæ restituat, atque ad synodum veniat ad diluenda ea quæ ipsi objiciebantur. 952
- CCCLVIII. — Ad Oteramum Viennensem archiepiscopum. — Agit de Optando episcopo, ejus litteris respondens, et de litteris quas scribit episcopo Mauriennensi ut Romam veniat. 952
- CCCLIX. — Ad Adalbertum episcopum Mauriennæ. — Jubet ut Romam veniat cum episcopo Gratianopolitano, quem ignominiose tractarat. 952
- CCCLX. — Ad Anselmum archiepiscopum Mediolanensem. — Mediolanensis Ecclesiæ privilegia confirmat; hortatur ut in Romanam Ecclesiam sit fidelis; narrat Saracenorum et iniquorum Christianorum injurias; rogat ut pro Ecclesia ad Dominum preces effundat. 954
- CCCLXI. — Ad Romanum archiepiscopum Ravennatem. — Præcipit ut Joannem diaconum benigne excipiat, et res ei ablatas restituat. 954
- CCCLXII. — Ad clerum Ravennatem. — Ut Maimbertum quemdam, quem alias ab Ecclesia Ravennate expelli jusserat, comprehensum, legato suo et Joanni duci tradant, et ad se mittendum eurent. 955
- CCCLXIII. — Ad Joannem Martinum. — Ejusdem argumenti. 956

CCCLXIV. — Ad Joannem ducem. — Ut Maimbertum captum ad se ducat, et mulieres quæ apud ipsum sunt detineat, et Romano archiepiscopo epistolam deferendam curet. 956

CCCLXV. — Ad Carolum imperatorem. — Gratulatur de ejus incolumitate; gaudet ipsum adventurum esse statim in Italiam: hortatur ut mature Romanæ Ecclesiæ auxilio veniat, et Guidonem prædatorem ab Ecclesiæ finibus ejici jubeat. 957

CCCLXVI. — Ad Liutwardum episcopum. — Gratias agit quod dederit operam ut imperator in Italiam ad Ecclesiæ defensionem veniret. 958

CCCLXVII. — Ad omnes episcopos. — Monet ut sua instituta observent, justeque judicent. 958

CCCLXVIII. — Ad Carolum regem. — Embolum ut Carolmannum regem in Ecclesiæ Romanæ dilectione confirmet. 958

CCCLXIX. — Ad Michaelem regem Bulgarorum. 959

CCCLXX. — Ad Luitbertum archiepiscopum Magontinum. 959

CCCLXXI. — Ad Ludovicum imperatorem. 959

CCCLXXII. — Ad episcopos Britanniae. — Quid agendum de monachis ab abbate suo ordinatis. 959

CCCLXXIII. — Ad quemdam. 960

CCCLXXIV. — Ad alium incertum. 960

CCCLXXV. — Allocutio pontificis ad episcopos sub finem synodi Tricassinæ. 960

CCCLXXVI. — Item allocutio pontificis ad regem. 961

CCCLXXVII. — Allocutio Joannis papæ ad Patres synodi Tricassini II, de Lamberti et Adalberti aliorumque sequacium excommunicatione. 961

CCCLXXVIII. — Responsio episcoporum. 961

CCCLXXIX. — Excommunicatio adversus perrasores rerum ecclesiasticarum in eadem synodo lata. 962

CCCLXXX. — Joannis papæ iterata excommunicatio adversus Formosum episcopum, Gregorium nomenclatorem, et Georgium magistrum militum. 963

CCCLXXXI. — Statutum Joannis papæ adversus laicos qui, viventibus uxoribus, alias ducunt et contra episcopos qui de minore ad majoram Ecclesiam ambitus causa demigrant. 963

CCCLXXXII. — Privilegium concedit unum ex suis, quem clerus et populus proclamaverit, sibi præponendi, non obstante contrario regum vel principum delecta. 961

MARINUS PONTIFEX ROMANUS.

Notitia historica. 965

PRIVILEGIA.

I. Pro monasterio Solemniaciensi. 667

II. Pro monasterio Saviniensi. 968

Epistola ad monachos S. Ægidii. 969

ADRIANUS III, PONTIFEX ROMANUS.

Vita Adriani papæ III. 971

Privilegium pro monasterio Placentino. 971

Epistola ad Sigibodum Narbonensem archiepiscopum. 973

S. BERTARIUS, ABBAS CASSINENSIS.

Notitia historica. 975

CARMEN DE SANCTO BENEDICTO. 975

Appendix ad scripta S. Bertarii. 979

Vita S. Scholasticæ virginis. 979

Quomodo per annum jejunandum sit. 987

HARMOTUS SANGALLENSIS ABBAS.

Inscriptiones in templo sancti Othmari. 989

Epitaphium Grimaldi. 991

SANCTUS REMBERTUS, HAMBURGENSIS EPISCOPUS.

Vita sancti Remberti. 991

Prologus. 991

Incipiunt capita. 991

VITA SANCTI ANSCHARII. 1009

AIMOINUS, MONACHUS SANGERMANENSIS.

Notitia historica. 1009

HISTORIA TRANSLATIONIS SANCTI VINCENTII.

Epistola ad domnum Bernonem. 1011

INCIPIT LIBER PRIMUS inventionis sive translationis B. Vincentii. 1013

INCIPIT LIBER SECUNDUS. 1019

Epistola ad domnum Theotgerum. 1025

INCIPIT LIBER PRIMUS CARMINUM DE TRANSLATIONE B. VINCENTII. 1025

Cap. I. — Quod Audaldus Hispaniam aggrediens, Valentiam usque pervenerit. 1025

Cap. II. — Quod Zachariæ Mauro suum detexit secretum: et quomodo sancti reperit sepulcrum. 1025

INCIPIT LIBER SECUNDUS. 1025

Cap. I. — Quod sanctum corpus ad Castrum perveniens, honorifice sit susceptum. 1025

Cap. II. — Quod mulier de eo primum dubitans contracta fuerit, ac deinde credens sanari meruerit. 1026

DE TRANSLATIONE SS. MARTYRUM GEORGII, MONACHI, etc. 1027

DE MIRACULIS SANCTI GERMANI.

Epistola. 1027

Prologus. 1027

LIBER PRIMUS. 1029

Præfatio libri secundi. 1039

LIBER SECUNDUS. 1039

ACTA TRANSLATIONIS S. SAVINI MARTYRIS.

Observatio prævia. 1049

Præfatio. 1051

Incipit Translatio. 1051

RATPERTUS SANGALLENSIS MONACHUS.

Notitia historica. 1057

DE CASIBUS MONASTERII S. GALLI. 1057

POEMATA VARIA. 1079

FINIS TOMI CENTESIMI VIGESIMI SEXTI.

a vol. 126
2126

71973

THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA.

2126.

